

BIBLE

Pathian Lekhabu Irthiang

Hrangkhol Language

Hrangkhol - All Bible

Old Testament		New Testament	
		Nahuma	1.900
Irphutna	3	Habakuka	1.905
Fesuakna	128	Zefania	1.911
Levi Dân	230	Hagaia	1.917
Nambar	295	Zakaria	1.921
Dân Inhnina	395	Malakia	1.943
Josua	476		
Roirêltuhai	531	Mathaia	1.949
Ruthi	586	Marka	2.037
1 Samuela	594	Luka	2.093
2 Samuela	674	Johana	2.184
1 Rêng hai	741	Tîrtôn hai Sintho	2.252
2 Rêng hai	811	Rom	2.334
1 Thurchi Suina	876	1 Korinth	2.369
2 Thurchi Suina	944	2 Korinth	2.405
Ezra	1.017	Galatia	2.429
Nehemia	1.040	Efesi	2.441
Estheri	1.074	Filipi	2.454
Joba	1.088	Kolosa	2.463
Inpâkna Hlahai	1.159	1 Thesalonika	2.471
Thuvâr hai	1.340	2 Thesalonika	2.479
Thuhriltu	1.402	1 Timothea	2.483
Hlahai Hla	1.422	2 Timothea	2.493
Isaia	1.433	Tita	2.500
Jeremia	1.545	Filemona	2.504
Chap Hla	1.675	Hebrai	2.507
Ezekiela	1.686	Jakoba	2.533
Daniela	1.808	1 Petera	2.542
Hosea	1.842	2 Petera	2.552
Joela	1.860	1 Johana	2.558
Amosa	1.867	2 Johana	2.568
Obadia	1.881	3 Johana	2.570
Jona	1.884	Juda	2.572
Mika	1.889	Thuphuang	2.575



Hranghol - All Bible

Irphutna

Irphutna 1

Thilsiam thurchi

- ¹Pathianin a phut taka irnêng le irvân a siama,
- ²rammual hi mumalboi le a korong ringot a nia; tui inthûk tak chung khom an thim khaka; Pathian irtha khan tui chunghai chu a op maia.
- ³ Khan Pathianin, “Vâr hong om ri se” a tia; khanchu vâr a hong om ta.
- ⁴Khan Pathianin vâr chu a ena, a sa a ti oka; khanchu Pathianin vâr le inthim chu a’rsentir ta.
- ⁵Pathianin vâr chu “Sûn” a tia, inthim chu “Zân” a tia. Khanchu a sîn khatna zîng le khohloi a om tâka.
- ⁶ Khan Pathianin, “Tui le tui kêra khan boiruak liantak om sianlân, kha khan tui le tuihai chu irsen ri se,” a tia.
- ⁷Khanchu, Pathianin, boiruak lian tak chu a siama, boiruak lian tak hnuaia tui omhai le boiruak lian tak chung a tui omhai chu a’rsentir tâka. Khaang tak khan a hong ni ta.
- ⁸Khan Pathianin boiruak lian tak chu “Irvân” a tia, khanchu khohloi a oma, zîng tiang a oma, kha kha sîn hnina.
- ⁹Khan Pathianin, “Irvân hnuaia tui omhai chu hmunkhata luang khôm sianlân, mual le tâng chu inlang ri se,” a tia. Khanchu khaang tak khan a hong ni tâka.
- ¹⁰Pathianin mual le tâng chu “Irnêng” a tia, tui om khômhai chu “Tuipuihai” a ti tâka, khan Pathianin kha kha a ena, a sa a ti zapa.



¹¹Khan Pathianin, “Irnêngin hloisûl, chîmu, thei kunghai, irnênga an chi om dân hrang anga ra, a ra sînga a chi omhai chu hong ra suak ri se,” a tia. Khanchu, khang tak khan a hong ni ta.

¹²Khanchu irnêngin hloisûlhai, chîmu hai an mâni chi om dân hrang anga chi neihai, thing an mâni chi om dân hranga ra, a ra sînga a chi omhai chu an suak ta. Khan Pathianin a ena, a sa a ti zapa.

¹³Khanchu khohloi a oma, zîng a oma, kha kha sîn thumna.

¹⁴Khan Pathianin, “Sîn le zân irsentir hrangin irvân boiruak lian taka khan vârhai om sianlân; khahai kha irsinsiana hai, zoro hai, sîn hai le kumhai inhriatna hrang ni ri se,

¹⁵irnêng invâr hrangin irvân boiruak lian taka khan vârhai om ri se,” a tia. Khanchu khang tak khan a hong ni tâka.

¹⁶Khan Pathianin vâ roinputak inhni khi a siama, vâ roinputui ual kha sîn roirêltu hrangin a tia, vâ roinputui loi ual kha zân roirêltu hrangin; ârsihai khom khi a siam sa.

¹⁷Khan Pathianin an nihai kha irnêng invârtir hrangin irvân boiruak liantak chung a khin a sîa;

¹⁸sîn le zân chung a roirêl hrang le vâ le inthim chu irsentir hrangin, Pathianin kha kha a ena, a sa a tia.

¹⁹Khanchu khohloi a oma, zîng a oma, kha kha sîn minlina.

²⁰Khan Pathianin, “Tuihaiin thilsiam hringna nei tamtak insua mai sianlân, vatehai khom irnêng chung a irvân boiruak liantak inhonga hin vuang sup sup ri sehai,” a tia.

²¹Khanchu Pathianin tui puia sa liantak takhai a siama, thilsiam hringna neia châng thei tinrêng, tuia insua tâkhai kha, an mâni chi om dân hrang ang takin a siama, va mitha nei tinrêng khom an mâni chi omdân hrang ang sengin a siam. Pathianin kha kha a ena, a sa a tia.



²²Khan Pathianin, “Irchi tamtak nin irchi ata hong pung unglân, tuipeihaia hong sip roi, vâhai khom irnênga pung ri sehai,” tiin sat a vura.

²³Khanchu khohloi a oma, zîng a oma, kha kha sîn ringana.

²⁴Khan Pathianin, “Irnênga thilhringhai chu an mâni chi omdân lam angin sa murdi an omdân ang chitin om ri se,” a tia. Khanchu an hong om tâka.

²⁵Khanchu Pathianin ram sa, insûng sa an chi omdân hrang siamin le irnênga bokvâka thilhring murdi a isiamhai kha a ena, khan Pathianin a sa a ti tâka.

²⁶ Khanchu Pathianin, “Ama irangpuiin mihriama siam inlân, tuipei sînga nga le chunglêng vahai, le sa murdihai chung a irnênga bokvâka thilhring murdihai chung a ircham inneitir ki ti,” a tia.

²⁷ Khanchu Pathianin ama irangpuiin mihriam a siama, ama ang zekin pasal le nupang a siama.

²⁸ Khanchu Pathianin sat a vurhaia, Pathian ngêtin an kuang khan, “Irchi tamtak sema pung hrangin, irnêng chung hi lua sipin, nin ircham takin inomtir roi, tuipei sînga ngahai chung a, chunglêng vahai chung a khom, thilhring irnêng chung a bokvâka fe murdihai chung a ircham nei roi,” a tia.

²⁹Khanchu Pathian ngêtin, “Irngai roi, irnêng chung a chîmu tinrêng le thing tinrêng thing ra nei murdi nangni ki ipêk a ni, nin bu hrangin.

³⁰Khan irnênga sa murdihai kôla khom, chunglêng va murdihai laia, thil irnênga bokvâka fehâi laia khom, hringna nei murdihai kuanga khom, an bu hrangin sîlhringhai ki ipêk a ni,” a tia.

³¹Khanchu Pathianin a thilsiam murdi a ena, irngai ro, a sîn a sa a ti oka. Khanchu khohloi a oma, zîng khom a hong om tâk a ni, a sîn rukna chu.

Irphutna 2

¹Kha zoiin chu irnêng irvân le a sînga om hrang murdi siam zoi a ni tâka.

² Khanchu Pathianin sîn sari nî tena chu a thilsiam hranghai siam zoiin, a sîn sari nî chu a thilsiam mâkin a’rngam tâka.



³Khanchu Pathianin sîn sari nî sîn chu sat a vurin a ser ir-up tâka. Kha nî sîn chu Pathianin a thilsiamhai thu ringot le a kuta a isiamhai mâkin a'rngamsanhai tâk sikin.

Eden irhuan

⁴Irnêng le irvân siam dân chu hiang hin a ni, Rengpa Pathianin irnêng le irvân a siam lai khan.

⁵Irnênga sûl hringhai hi ite la om maka, irnênga anhringhai khom ite la mông thei maka. Rengpa Pathianin irnêng chung a rua a la'nthotir no sikin, irnêng tuk hrang mihriam khom an la om no sikin;

⁶khannisianlân irnêng ata sôm a hong suaka irnêng pumpui a bit zoi tâka.

⁷ Khan Rengpa Pathianin irnêng pilin mihriam a siama, a hnâra hringna phûk a mût inlûta, khanchu mihriam kha mihriam hring a hong ni tâka.

⁸Khan Rengpa Pathianin nisua tiang Eden irhuan a siama; a mihriam siam kha an omtira.

⁹ Khan irnêng ata Rengpa Pathianin thing satak tak le fâk thei zât tinrêng a inmôngtira, hringna thingkung a laitaka a inmôngtira, a sa le a sia inhriatna thing.

¹⁰Khan Eden irhuan ata tuidung, irhuan irziltir hrangin a inluangtira, khatak ata irsem darin, iva minliin a'rsem suak ta.

¹¹Inkhat irhming chu Pison a ni; Havila ram pumpui hual suaktu a ni, kha khan rângachak a oma;

¹²kha rama rângachak kha a satak a ni, kha khan Bedolak le berul lung khom a om.

¹³Vadung inhnina irhming chu Gihon a ni, hi hi Kus ram pumpui hualtu a ni.

¹⁴Vadung inthumna irhming chu Hiddekal a nia; Assuria ram nisua tianga luang a ni. Khan vadung minlina chu Eufates a ni.

¹⁵Khan Rengpa Pathianin mihriam kha a hruaia, Eden irhuan enkola hrung hrangin a siaa.



¹⁶Khan Rengpa Pathianin mihriam kuang khan, “Irhuana thing murdi ra ni fâk thei ving ni inuam murdi,

¹⁷khan a sia le sa inhriatna thing ra hi chu ni ifâk hrang ni ma: ni fâkin chu, ni fâk nî sîn le zoro taka ni ithi ngêt hrang a ni,” tiin thu a pêka.

¹⁸Khan Rengpa Pathianin, “Mihriam a bing doka om chu a sa ti maka, ama chanpui hrangin, a’rhloppui thei hrang irhoi mi siam pe ki ti,” a tia.

¹⁹Khan Rengpa Pathianin, irrêng pilin ramsa tinrêng le chunglêng vahai tinrêng a siama; khan an irhmingin imo a iti hrang ti inhriatna hrangin Adama kuang a hruaihaia; thilhring murdi Adama kuanga hong murdi chu, a iti ang takin irhming an nei ving ta.

²⁰Khan Adama’n ramsa murdi, chunglêng vahai tinrêng irhming an neitirhai vinga; khannisianlân Adama chu a changpui hrang le a’rkoppui hrang ite a’rhloppui hrang om maka.

²¹Khanchu Rengpa Pathianin Adama kha inmu irhnik taka inzâlin an intira, a in kârin a kângru inkhat a lâk pea, kha irthûla khan taksa’n an bittir tâka;

²²Khan Rengpa Pathianin Adama ata a ilâk kângru kha nupangin a siama, Adama kuang a hruai tâka.

²³Khan Adama’n, “Hi ngêt hi keima ru ang ru neia, ki taksa anga taksa nei ngei chu a ni: Pasal ata lâksuak a ni sikin. ‘Nupang’ ti hrang ni a ti,” a tia.

²⁴ Khasikin pasalin a nu le a pa masan a ta, a dôngma chel a ti: khanchu taksa pumkhat hong ni ta an ti.

²⁵Khan Adama le a dôngma kha korongboiin an oma, inzak ual mahai.

Irphutna 3

Mihriam thu zômloina

¹ Khan Rengpa Pathianin ramsa a isiam murdi laia mirûl hi a vâr irlet tak a nia. Khanchu mirûlin nupangnu kuang khan, “Pathianin irhuana thing rahai hi nin ifâk hrang ni mah a iti ma ni?” a tia.



²Khan nupangnu khan mirûl kuang, “Ti ma, irhuana thing rahai hi kin fâk thei,

³irhuan lâitaka thing ra hi chu Pathianin, ‘Nin ifâk hrang ni ma, an them khom nin inthem hrang ni ma, nin inthema nin fâkin chu nin ithi hrang kêng;’ a iti a ni,” a tia.

⁴Khan mirûlin nupangnu kuang khan, “Thi viat no chin ni;

⁵nin fâk nî renga khan nin mit hong vâa a ta, a sia le a sa inhriatin Pathian hong ang nin ta, ti Pathianin nangni a inhriat chian a ni khate,” a tia.

⁶Khanchu nupangnu khan thing ra kha fâk thei zât a nih ti le mit lâktak a nih ti le, mihai invâtir theitu thing ra irzukom tak a nih ti an hriatin chu, a ra senkhat irhmalin a fâk tâka; khan, a pasal khom a pêka a fâk sa tâka.

⁷Khanchu an ruaiin an mit a hong vâa, korongboi an nih ti an irhriat suak tâka; khanchu theipui hnâ insui irkopin puanbom hrangin an siam tâka.

⁸Khan, Rengpa Pathian chu irhuan enin chohnung misa dâia a zuang irhâi an inhriata; khanchu Adama le a dôngma chu irhuana thing kêra Rengpa Pathian kha an le’rbîksan pe tâka.

⁹Khan, Rengpa Pathian khan Adama kha a koia, a kuang, “Adama khôn mo ni iom tâk? a tia.

¹⁰Khan ama khan, “Irhuana ni’rhâi kin hriata, korongboia om ki nih sikin, ki chi tâka; khasika khan ki irbîk tâk a ni,” a tia.

¹¹Khan, ama khan, “Korongboi ni nih ti tu’n mo nang a inhril? Thei ra faloi hrang tia nang ki inhril kha ni ifâk tâk ma ni?” a tia.

¹²Khan Adama’n, “Keima ni ompui hranga nupang ni ni ipêk khan thei ra a ni pêka, ki ifâk tâk a ni,” a tia.

¹³ Khan, Rengpa Pathianin nupang kuang khan, “Ni sintho hi itinlama mani tâk?” a tia. Khan, nupangnu’n, “Mirûlin a ni huanga, ki ifâk tâk a ni,” a tia.

Pathian hremna



¹⁴Khan, Rengpa Pathianin mirûl kuang khan, “Hi thil hi ni tho tâk sikin ramsa le sa murdi laia le ramsa tinrêng laia chu khosâl tongin om bîk ni ta, ni boka irvâkin fe hen ni ta, ni hring sêngin vâiphin ni ifâk hrang a ni.

¹⁵Khan, nang le nupang hi nangni irdoitir ki ta, ni’rchi hai le a’rchi hai khom la’rdoitir ki ti: kha khan ni lu zêmirnôitir a ta, nangin a ke ârtui lei inchuk pe ni ti,” a tia.

¹⁶Nupangnu kuang khan, “Ni dengtheina le ni nâi vongna kha a saterengin nang inpungtir pe ki ta; intak takin nâi nei ngai ni ta; khannisianlân ni nuamlam chu ni pasal tiang ni a ta, ama khan ni chung a ircham nei ngai a ti,” a tia.

¹⁷ Khan, Adama kuang khan, “Ni dôngma thu ni zôm ta, thing inkhat, ‘A ra ni ifâk hrang ni mah’ tia thu nang ki ipêk kha, a ra ni fâk sikin irnêng hi nangma sikin khosâl tongin a iom tâk a ni; ni dam sêngin intak taka sinin a ra kha fa ta ni ti.

¹⁸Ilhling le hloisûlhai khom nang inpung pe ki ta; khan, irnênga ansûl hloihna fâkin om ta ni ti.

¹⁹Khan, irnênga ni kîr nôk mâka chu ni hmâia irthântui luang zon zonin bu ne ta ni ti; irnêng pil ata lâksuak ni ni sikin: Pil ni nia, pila dên ni ikîr nôk hrang a ni,” a tia.

²⁰Khan, Adama khan a dôngma kha mihring murdi hai nu a ni sikin a’rhminga Evi a tia.

²¹Khan, Rengpa Pathianin Adama-hai sangram hrangin savun songkol irfualhai a siam pehaia, a inngâktirhai a ni.

Irhuan ata Adama le Evi innot suak an ni

²² Khan, Rengpa Pathianin, “Irgai roi, mihriam chu a siat le sa inhriatin einihai ang an hong ni ta; atûn chu a kuta inbanin, hringna thing ra irhmala fâkin, kumkhua’n hring rôl a ti,” a tia.

²³Khasikin Rengpa Pathianin ama a ilâk suakna irnêng pil tuk hrangin Eden irhuan ata a tîrsuak tâk a ni.



²⁴Khanchu, mihriam kha an hnotsuak tâka; khan, hringna thing lampui kha enkol hrangin Eden irhuan nisua tiang pang cherubhai le mei khandai irvêl lop lop kha an omtir tâka.

Irphutna 4

Kaina le Abela

¹Khanchu Adama'n a dôngma Evi kha a'rpôlpuia an rai tâka, "Rengpachangpuina zârin nâipasal ki nei ta," a tia. A'rhming khom Kaina a phuaa.

²Kha zoiin Abela a hong suak nôka. Abela chu belra enkolpu sin a thoa, Kaina chu loi sin thopua a om ta.

³Khanchu inhnunga chu hiang hin a hong ni tâka, Kaina'n a loimâna thil, Rengpa makunga darh hrangin a hong chôia.

⁴ Abela khomin a belra pâl laia a martak le a suak masatak a hong chôia. Khan, Rengpa'n Abela leh a thilinhlan kha a lôma.

⁵Kaina le a thilinhlan kha chu lôm maka. Khanchu Kaina chu a sate'n a ning an mur pe tâka, a hmêl kha an khukhak tâka.

⁶Khanchu Rengpakhan Kaina kuanga khan, "Ithoa mo ni ning a inmur? Ithoa mo ni hmêl a inkhu tâk?"

⁷Thil ni tho insa'n chu lôm ni ihlo hrang mo ni ma? Ni tho'n sa no'n chu sual chu mikot kôla a iom chian a ni: a nuam lam chu nangma nang inhnê hi a nia, a chungu thu niinei hrang a ni," a tia.

⁸ Kaina'n a sangpa Abela kuang, "Loia fe ei ti" a tia. Khanchu hiang hin a nia, loia an om laiin a sangpa Abela kha a'rsualpuia, a thatpai tâka.

⁹Kha zoiin chuRengpa'n Kaina kuang, "Ni sangpa Abela kha khôn mo a om tâk?" a tia. Khan ama khan "Inhre ma ung, ki sangpa enkolpu mo ni ni sôn," a tia.

¹⁰ Khanchu Rengpa'n, "Itho mo hiang sin hi teh ni tho tâka? Ni sangpa thisen irhâi khan irnêng ata a ni hong insam kêng.



¹¹Khasikin, irnêng, ni kut ata ni sangpa thisen dong hrang a bâi lei ângtu ata hi khosâl tong ni ta;

¹²irnêng ni tuk khomin a satna kha nang pe phal ta no nia; irnênga chaninvâi le inlêng hong ni ta ni ti,” a tia.

¹³Khan, Kaina’n Rengpa kuang, “Ni ni ihremna hi a sate’n a natinsatin, tuang zoi no ning.

¹⁴A vuan hin irnêng chung ata ni nin hnotsuak tâka, ni mithmu phâk loina ithuprûkin om ta ki ti, irnênga hin inlêng le chaninvâi ki hong ini hrang a ni ta; khanchu hiang hin ni a ta, mi tukhomin an ni hmupu dôrin ni that an ti,” a tia.

¹⁵Khanchu Rengpa’n, “Khaang kha ni nih tâkin chu tukhom Kaina thatpu tak chu a bâk sari’n a chung a phuba la an ti,” a tia. Khanchu mi’n an hmu khoma an that loina hrangin Rengpa’n Kaina kha a’rsinsia tâka.

¹⁶Khanchu Kaina kha Rengpakuang ata a suaka. Eden nisua tiang Nod rama khan a om tâka.

Kaina irchihai

¹⁷Khan, Kaina’n a dôngma a pôla, khanchu an inrâia, Enoka an neia. Khan, khua a chuana, a khua irhming khom a nâipa irhming chôiin Enoka a tia.

¹⁸Khan Enoka’n nâipasal Irada a neia, Irada’n nâipasal Mehujaela a neia, Mehujaela’n nâipasal Methusaela a neia, Methusaela khan nâipasal Lameka a neia.

¹⁹Khanchu, Lameka’n dôngma inhni a neia, inkhat irhming chu Adaii a nia, inkhat nôk chu Zillaii, a ni.

²⁰Khan Adaii leh khan Jabala an neia, ama chu puan ina om ngaihai sa vâi ngaihai irchibul a ni.

²¹A sangpa irhming chu Jubala a nia, ama hi chu perkhuang le theihle tum theihai irchibul a ni.



²²Zillaii khomin Tubal-kaina, dâr le thîr hriamhrei tinrêng incher ngaitu a neia; khan Tubal-kaina farnu chu Naamaïi a ni.

²³Khanchu Lameka'n a dôngmahai kuang khan, “Adaii le Zillaii haio, ki'rhâi inhre unglân: Lameka dôngmahaio, ki thu'nsîr hi irngai roi, A nin phop sikin mi ki thata, A ni vîk irdul sikin ruatharte ki ithat a ni.

²⁴Kaina phuba kha a bâk sariin an lâkin chu, Lameka phuba chu a bâk sômsari le sariin an ilâk ngêt hrang kêng,” a tia.

Setha le Enoka

²⁵Khan, Adama'n a dôngma a'rpôlpui nôka, nâipasal an nei nôka, a'rhming chu Setha a iphua a ni: “Pathianin Abela irthûla a ni ipêk a ni, Kaina'n a lei thatpai tâk sikin,” a tia.

²⁶Khan, Setha khomin nâipasal a neia, a'rhming khom Enosa a phuaa. Kha rengata chu mihaiin Rengpa irhming an lei isâm phut a ni ta.

Irphutna 5

Adama irchihai

(1 Tsn 1.1-4)

¹ Hi hi Adama irchihai chuangna bu chu a ni. Pathianin thu ringota mihriam a siam nî khan, Pathianin ama ir-angpuiin ama kha a siama;

² Thu ringotin pasal le nupang kha a isiamhai a ni. Thu ringota siam an ni lai khan sat a vurhaia, an irhming khom “Mihriam” a tihai ta.

³Khanchu Adama kha kum 130 a ni kumin, ama irangpuiin nâipasal a neia; a'rhming khom Setha a phuaa.

⁴Setha a nei zoiin Adama chu kum 800 a la dama nâi nupang le pasal dang a la neihaia.

⁵Khanchu Adama dam sîng kum chu 930 a ni zoiin a thi tâka.

⁶Khan Setha khom kum 105 a ni'n nâipasal Enosa a neia,

⁷Enosa a nei zoiin Setha chu 807 a la dama nâinu le nâipa a la neihaia,

⁸kha zoiin Setha dam sîng kum chu 912 a niin a ithi a ni.



- ⁹Khan Enosa chu kum 90 a ni kumin nâipasal Kenana a neia,
- ¹⁰khan, Kenana a nei zoiin Enosa chu kum 815 a la dama, nâinu le nâipa a la neihaia;
- ¹¹khanchu Enosa dam sâng kum chu 905 niin a ithi a ni.
- ¹²Khan, Kenana khan kum 70 a niin nâipasal Mahalalela a neia.
- ¹³khan, Mahalalela a nei zoiin Kenana chu kum 540 a la dama, nâinu le nâipa a la neihaia.
- ¹⁴Khanchu Kenana dam sâng kum 910 a niin a ithi a ni.
- ¹⁵Khan, Mahalalela'n kum 65 a niin nâipasal Jareda a neia,
- ¹⁶khan Jareda a nei zoiin Mahalalela chu kum 830 a la dama, nâinu le nâipa a la neihaia,
- ¹⁷khanchu Mahalalela dam sâng kum chu 895 niin a ithi a ni.
- ¹⁸Khan Jareda khan kum 162 a niin nâipasal Enoka a neia;
- ¹⁹khan, Enoka a nei zoiin Jareda chu kum 800 a la dama, nâinu le nâipa a la neihaia,
- ²⁰khanchu Jareda dam sâng kum chu 962 niin a ithi a ni.
- ²¹Khan Enoka khom kum 65 a niin nâipasal Methusela a neia,
- ²²Methusela a nei zoiin Enoka chu kum 300 chu Pathian le omsuamin, nâinu le nâipa a la neihaia,
- ²³khanchu Enoka dam sâng kum chu 365 a nia.
- ²⁴ Khan Enoka chu Pathian leh omsuamin om ta maka, Pathianin a hruaipai tâk sikin.
- ²⁵Khan Methusela khom kum 187 a niin nâipasal Lameka a neia,
- ²⁶khan Lameka a nei zoiin Methusela chu kum 782 a la dama, nâinu le nâipa a la neihaia,
- ²⁷khanchu Methusela dam sâng kum chu 969 niin a ithi a ni.



²⁸Khan Lameka khan kum 182 niin nâipasal a neia,

²⁹khan, “Hi mi ngêt hinRengpa khosâl tongna irnêng chungâ sintho intaka fâk nêk zong hi, ni sanin irzângtir ngêt a ti,” tiin a’rhming khom Nova a phuaa.

³⁰Khan Nova a nei zoiin Lameka chu kum 595 a la dama, nâinu le nâipa a la neihâia;

³¹khan Lameka dam sâng kum chu 777 niin a ithi a ni.

³²Khan Nova chu kum 500 mi a nia, Nova khom nâipasal Sema, Hama le Jafeta a neihai a ni.

Irphutna 6

Mihriam laia sualna pung

¹Khanchu irnêng chungâ mihriam an hong pungâ, nâilete an hong tamin chu,

²Pathian nâihai khan, mihriam nâihai kha an hmêl a sa ti’n an hmuhâia, khanchu an indit murdihai chu dôngma’n an luahâia.

³Khanchu Rengpa’n “Ki’rthain chu mihriamhai hi kumtuangin chu doihai no ning, anni khom taksa nei an ni sikin, khannisianlân kum irzakhat sômhni chu la dam an ti,” a tia.

⁴ Kha zoro khom khan rammuala hin mi lian an oma, kha zoi khomin Pathian nâihai khan mihriam nâihai irpôlpuiin nâi an neipuihai lai khom khan an oma, hihai hi chu tianlaia mi hrât, mi irhming inthanghai kha an ni.

⁵ Khan Rengpa’n irnênga a mihriam siamhai sual dân chu a’rkhêl hrai a nih ti le, an lungrîl ngaituana murdi hi sual ringot a nih ti a’rhriat suaka.

⁶Kha tena chu irnênga om hrang mihriam a lei isiam tâk hi a sate’n a’rsîra, lungrîl natna’n a neipui tâka.

⁷Khanchu Rengpa’n, “Ki mihriam siam, hi irnênga omhai hi inboi ving inlân, mihriamhai, sahai, thilhring hai, chunglêng vahai leh hin; ki siam tâk sikin a sân ki’rsîr,” a tia.

⁸Nikhomsianlân, Nova kha chu Rengpa mit a tung maia.

Nova thurchi



- ⁹ Hiang hin Nova thurchi chu a ni. Nova chu mi feltak a nia, kha laia mihriam sũaga chu Nova chu Pathian le hmunkhata lêngsuam ngai a ni.
- ¹⁰ Khan Nova chu nâipasal inthum a neia, Sema, Hama le Jafeta hai an ni.
- ¹¹ Khan, irnêng chung hi Pathian mithmuin a porinche zoi tâka, hnarsana'n a sip tâk sikin.
- ¹² Khanchu Pathianin irnêng chung hi a ena, irngai roi a isiat zoi tâk kêng, taksa om murdihai hin an omdân a isiat zoi tâk a ni hi teh a tia.
- ¹³ Khanchu Pathianin Nova kuang khan, “Taksa murdi hek hrang nikhua chu ki kuang a om ta, annihai sikin irnêng chung hi hnarsana'n a sipa, khasikin irnêng chung hi ki insiatpai hrang tâk kêng, a tia.
- ¹⁴ Ni ta hrangin meisâr thingin irkuang siam ro; irkuanga khan banglâi siamin lân; a sũang tiang le a pên tiang meisâr hnâi ni ipol hrang a ni.
- ¹⁵ Hiang hin ni isiam hrang a ni, irkuang a dung mûk irzathuma sei ni sianlân, a khang lian chu mûk sômringa ni ri se, a'rsâng lam chu mûk sômthum ni ri se.
- ¹⁶ Irkuanga khan tukver khom ni isiam hrang a ni. A chung tiang mûk khat kêra a dâp ni itho hrang a ni. Irkuang inkhat chu a sâr tiang ni inhong hrang a ni. Irkuang chu irchuan inthumin ni isiam hrang a ni.
- ¹⁷ Khanchu irngai ro, keima'n taksa nei murdi hringna pai hrangin irnêng chung hi tui ki indîl zit hrang a ni. Irnênga hringna nei murdi that vingna hrangin,
- ¹⁸ khannisianlân ki thuthung chu nangma hrangin indet ual ki ta, irkuanga ni ilût hrang a ni, nangma lût ni ta; ni nâihai le ni dôngma le ni moinuhai ni kuang an ilût sa hrang a ni.
- ¹⁹ Khan taksa nei murdi, le thilhring laia mi chi tin bop khatin ni kuang an hring theina hrangin irkuanga ni ihruai inlûthai hrang a ni; nupang le pasal an ini hrang a ni.



²⁰Vâhai khom chi tin an irkip hrang a ni. Sa khom chi tin an omdân angin an irkip sa zit hrang a ni. Thilhring murdi a bop irkipin an pung thei nôkna hrang le an hring theina hrangin ni kuang an ihong hrang a ni.

²¹Khan bu nin inêk le fâk thei zât lâk khômin buk zit ro; nang le annihai fâk hrangin,” a tia.

²² Khaang khan Nova’n a thoa, Pathianin a kuanga thu a ipêk murdi zômin a itho tâk a ni.

Irphutna 7

Tuisâng lian

¹Khan Rengpa’n Nova kuang khan, “Nang le ni in mi murdi chu irkuanga khan lût roi, nang vai kêng atûn lai thoithar laia chu ki mithmua mi fela nang ki ihmu a ini.

²Sa irthiang murdi laia mi, a chal le pui bop sariin,

³sa irthiang loi laia mi a chal le pui bop khatin, chunglêng vâhai laia mi khom a pui le chal bop sariin, irnêng chung a irchi nei hrangin ni ihruai inhringhai hrang a ni.

⁴Sûn sari a la’rsam, hi zoi hin chu irnêng chung a hin sûn sôminli zân sôminli rua inthotir ki ta; ki thilhring siam murdi irnêng chung a an hek theina hrangin,” a tia.

⁵Khanchu Nova khan Rengpa’n a iti pe ang takin a tho tâka.

⁶Hi tui a lêt lai hin Nova chu kum 600 mi a ni.

⁷ Khan tui a lêt hrang sikin Nova chu irkuanga a lûta, a dôngma, a nâihai le a moi hai an rêngin an lûta.

⁸Pathianin a kuanga thu a ipêk angin sa irthiang laia mi le, sa irthiang loi laia mi khom chunglêng vâhai khom irnênga bokvâka om murdi le,

⁹Nova kuanga irkuanga khan an lût ving tâka.

¹⁰Khan sûn sari zoia chu irnênga hin tui a hong lêt tâka.



- ¹¹ Nova chu kum 600 a ni kum, tha hni le sôn sôm hleisari nê chu, tuipui inthûk tak sipin a sinthônaa omin, irvân tukver a'rhong pe tâka.
- ¹² Khan sôn sômminli zân sômminli sùng chu ropuivânsâng a tho tâka.
- ¹³ Hi laia hin Nova nâihai Sema, Hama le Jafeta, Nova dôngma irkuanga an lûta, an moinuhai inthum an lût saa.
- ¹⁴ Annihai le sa tinrêng le ramsa murdi an lût vinga, thilhring le chunglêng vâ mitha neia vuang murdihai an lûta.
- ¹⁵ Khanchu taksa nei murdi a chal a pui an rêngin Nova irkuang sûnga an lûta.
- ¹⁶ Khanchu a lûthai chu Pathianin thu a ipêk angin an lût zoiin chu irkuang a khâra.
- ¹⁷ Khan, tui kha irnêng chung a hin sôn sômminli a lêt tâka, tui chu a sip zut tâka, irkuang chu a'rhlan maia.
- ¹⁸ Sôn tin tui a lian intam maia, irkuang inhlânin a om maia,
- ¹⁹ tui chu a sate'n a bit zoi tâka khomual irsâng ite inlang thei ta maka.
- ²⁰ Tâng irsânghai chung a mûk sôm hleiringaa irsângin a om tâka,
- ²¹ khanchu taksa neihai, ram sahai, vâhai, sahai, thilhring irnênga bokvâka irlôihai le mihriam om murdi an thi zoi ving tâk a ni.
- ²² An hnâra hringna phûksân lâk murdi an thi zoi tâk a ni.
- ²³ Pathianin a thilsiam hai, mihriam, ramsa, sahai, vahai le irnênga bokvâk murdihai an thi zoia. Nova le irkuanga lût ti no chu zôkin hmu hrang om ta mahaia.
- ²⁴ Khan tui chu sôn sôm irzakhat sôn sômringa chu irkai loiin a lêt tâka.

Irphutna 8

Tuilian irkai



- ¹Khanchu Pathianin Nova le irkuanga thilhringhai ramsa le sahai, bokvâka irvâk murdihai kha irnghilhai maka, Pathianin irnêng chung a phâivua an zâptira, tui lianpa kha a'rkai thiai tâka,
- ²tui inthûk tak hnârhai le vên tukver khom a'rkhâra om kha, rotho irvân ata a chan tâk sikin, tuilian khom a'rkaia.
- ³Khanchu sîn sôm irzakhat le sîn sôm ringa a kâi zoiin chu tui a tôm ok tâka,
- ⁴khanchu irkuang kha a tha sarina sîn sôm hleisari nî tena chu, Ararat tânga irkuang a'rngam thei tâk a ni.
- ⁵Khan tui chu a tha sômna tena chu a hong tôm tâk sikin, a tha sômna sîn khat nî tena chu tâng sîp irzumhai an lang thei ta.
- ⁶Khan sîn sômminli a hek tena chu hiang hi a hong nia, Nova'n irkuang inkhâr a isiam kha an hong,
- ⁷vaâk inkhat an suaktira, irnênga tui a kang zoi mâka chu a vuang irvêl maia,
- ⁸khan tui a tôm le tômloi inhriatna hrangin vasu an suaktir nôka,
- ⁹khannisianlân vasute khan chuangna hrang ite a la hmu no sikin, irkuang tiang ngêt a hong kîr nôka, tui a la om pe sikin. Khanchu Nova'n a kut leh a hon pûra a chela irkuang sûnga a hruai lût nôka.
- ¹⁰Khan sîn sari dang a nghâk nôka, vasu kha irkuang ata an vuangtir nôka,
- ¹¹vasu chu a vuangin khohloi tiang chu a hong kîr nôka; khan irngai ro, a hmûra khan Oliv hna tharte a hong sê khap pea, khanchu Nova'n tui a tôm tah ti an hriat thei ta.
- ¹²Khan sîn sari dang a nghâk zoiin chu vasu an vuangtir nôka, a kuang hong kîr nôk pe ta maka.
- ¹³Khan Nova kha kum 601 a ni kum, tha khat sîn khat nî tena chu irnênga tui a kang tâk sikin, Nova'n irkuang irkhûna puan a paia, a thîr vêla tui chu kangin rammual a'rlang ving ta.



¹⁴Khan tha hnina le sôn sôminhni sôn sari ni tena chu ite tui hmu hrang om viat ta maka.

¹⁵Khanchu Pathianin Nova kha,

¹⁶“Irkuang ata suak ta ro, nang le ni dôngma, ni nâihai le an dôngmahai khom hmunkhatin suak roi.

¹⁷Taksa nei murdi le thilhring ni iompuihai khom, sahai, ramsahai irnênga bokvâka fehais le vâhai khom hmunkhatin hruai suakhai vingin lân, irnênga hin nâilete nei intamin, irchi tamtak neia an hong pung theina hrangin,” tiin a hrila.

¹⁸Khanchu Nova kha a dôngma le a nâihai le a moinuhai an rêngin an suaka,

¹⁹sa tinrêng le thilhring murdi vahai irkuang ata an mâni irchi om dân ang takin an suak ta.

Nova'n Pathian kuang irbôlna an hlan

²⁰Khan Nova'n Rengpa ta hrangin irbôlna maichâm a siama; khan sa irthiang murdi le vâ irthiang murdi laia mi a lâka; maichâma khan hâlvôm irbôlna thil an hlana.

²¹Khan Rengpa'n, kha rimhoi kha an hriata, Rengpa'n a lungrîlin, “Irnêng chung hi chu mihriam sikin khuasâl ta no ninga, mihriam lungrîl ngaituana hi an chînte ata an sual sikin, atûna ki isoisak ang hin chu thilhring murdihai khom hi soisakhai ta no ning.

²²Irnêng om sùng chu bu'nrît le bu âtin, kholum le khodâi, phalbi le kholum, sôn le zânhai, khom boi no ni,” a tia.

Irphutna 9

Nova kuanga Pathian thuthung

¹ Khan Pathianin, Nova le a nâihai kha bor a pêkhaia, an kuang khan, “Irchi tamtak thâka hong pungin irnêng chung lua insip roi.



²Nangnihai hi irnêng ramsahai le vâhai khomin chitna nangni nei an ti; annihai le bokvâka fâk zong murdi le tuipui sînga ngahai khom, nin kuta pêk an ni zit ta.

³Thilhring châng thei murdi khom nin hrangin fâk thei ni an ta, anhring nangni ki ipêk ang khan itinrêng nangni ki pêk zit ta.

⁴Khannisianlân sahai hi a thisen om pumin nin ifâk hrang ni ma.

⁵Khan nin thisen, nin hringnahai chu keiin phuba ki ilâk ngêt hrang a ni, sa murdihai laia khom mihriam laia khom, mi tin an urêng laia khom phuba chu ki ilâk ving hrang a ni.

⁶Mi tukhom mihriam thisen insuaktu chu, mihriam ngêtin ama thisen an insuaktir hrang a ni. Pathian irangpuia siam an ni sikin.

⁷Khan, nangni chu irchi suanpâr tam takin hong pung unglân; irnênga hin nâi tamtak nei unglân; irnêng hong sip roi,” a tia.

⁸Khan Pathianin Nova le a nâihai kuanga khan,

⁹“Irngai roi, keima ngêtin nangni le nin irchi la hong om hranghai kuanga ki thuthung chu ki indet a ni,

¹⁰nin kuanga vahai, sahai le ram sahai, irkuang ata suak murdihai laia.

¹¹Nin kuang ki thuthung chu indet ki ta, taksa nei murdihai khom tuilêtin indîlin irhmang ta no nihaia, irnêng insiat hrangin tui khom lêt ta no ni,” tiin a hrila.

¹²Khan Pathian ngêtin, “Hi hi kei le nangni le nin laia thilhring om murdihai laia khom mongni nei loia om mai hranghai laia thuthung irsinsiana a ni.

¹³Sûmphâi kâra sumrisâng inkûi a ta, kha kha kêng kei le nangni kâra thuthung irsinsiana a ini hrang.

¹⁴Khan, hiang hin ni a ta, irnêng chungâ sûmphâi ki’rzâmtirin chu, sumrisâng chu sûm laia inlang a ta,



¹⁵kei le nangni le taksa nei murdihai thilhring tinrêng kêra ki thuthung om hi inhre mai ki ta, khanchu tuihai chu taksa nei murdi insiat ta loi hrangin hong lêt ta no ni.

¹⁶Khan sumrisâng chu sumpêi laia inlang ta a ta. Khanchu Pathian le irnêng chung a taksa om murdi thilhring tinrêng kêra kumtuanga ki thuthung om chu kin hriat maina hrangin en hen ki ti,” a tia.

¹⁷Khan Pathian ngêtin Nova kuanga khan, “Hi hi kêng kei le irnêng chung a taksa nei murdi laia ki thuthung det irsinsiana a ni,” a ti nôka.

Nova le a nâihai

¹⁸Nova nâihai irkuang ata zôkhai chu Sema, Hama le Jafeta an ni. Hama chu Kanaana pa a ni.

¹⁹Hi mi inthumhai hi Nova nâihai chu an ni. Anni inthumhai irchi hi irnêng chung an isip tâk a ni.

²⁰Khan, Nova chu loi sinthopu a nia, grep irhuan siam masatakpu a ni.

²¹Uain kha a ina, an ruia, a puan ina khan korongboiin a zâla,

²²khan Hama, Kanaana pa khan a pa korongboia om chu a va hmua, pên tianga a urêng hai ruai kha a hrilhaia.

²³Khanchu Sema le Jafeta'n puan an lâka, an tuama an hnung tiang an irzôna, hnung tianga irheiin an pa korongboi kha, an irkhû en loiin,

²⁴khan Nova uain inrui a hong harin chu, a nâi mitumtakpa thiltho chu a hon hriat suaka.


²⁵Khanchu, “Kanaana chu khosâl tongin om ri se; a urêng hai siahlohai siahlo ni ri se,” a tia.

²⁶Rengpa, Sema Pathian chu inpâkin om ri se, Kanaana chu siahlo'n om ri se.

²⁷Pathianin Jafeta chu mi lian inchangtir sianlân, Sema puan ina om ri se; khan Kanaana chu siahlo'n om ri se. a ti nôka.

²⁸Khan Nova chu tuisâng a lian zoiin kum 350 a dama,

²⁹khanchu Nova dam sâng kum chu 950 a ni, khanchu a thi ta.



Irphutna 10

Nova nâihai irchi

(1 Tsn 1.5-23)

- ¹Khan, Nova nâihai Sema, Hama le Jafeta hai irchi chu hiang hin a ni. Tuilian zoia chu nâilete an hong neihaia.
- ²Jafeta nâihai chu Gomera, Magoga, Madaia, Javana, Tubala, Meseka, le Tirasa hai an ni.
- ³Khan Gomera nâipasalhai chu Askenaza, Rifata le Togarma hai an ni.
- ⁴Khan Javana nâipasalhai chu Elisa, Tarsisa, Kitima, le Dodanima-hai an ni.
- ⁵Annihai ata irthoka hin kêng, Jentail ramchârna hmuna an ram omna hrang hmun chita an indara; an chong hmang ang hrang le an nam om hrang ang chitin an om tâk.
- ⁶Khan Hama nâihai chu Kusa, Mizraima, Puta le Kanaana hai an ni,
- ⁷khan Kusa nâihai chu Seba, Havila, Sabta, Raama le Sabteka hai an ni, khan Raama nâihai chu Seba le Dedana an ni.
- ⁸Khan Kusa khan chu nâipasal Nimroda kha a neia, ama hi irnênga hin mi hrâttak a hong ni tâka.
- ⁹Rengpa makunga sa kâp hrâttak a nia; khasikin, “Rengpa makunga sa kâp hrâttak Nimroda ang a ni,” an iti ngai kha a ni.
- ¹⁰Khan, a rêng chang phutna ram chu Sinar ram Babel khua, Erek khua, Akad khua le Kalne khuahai a nia;
- ¹¹kha ram ata a suak zoiin, Assuria rama a lûta, Ninevi khua, Rehobot-ir khua, Kala khua,
- ¹²Ninevi le Kala khua kâra Resen khua a chuana. (Resen khua hi khua inthang tak a ni.)
- ¹³Khan Mizraima khan Lud hai, Anam hai, Lebab hai, Nafta hai,
- ¹⁴Pathros mihai, Kaslu mihai. Hi mihai hi Filistia le Kaftor mihai irchihai an ni.



- ¹⁵Khan, Kanaana khan nâilutîr Sidona a neia, Hetha khom a nei nôka;
- ¹⁶Jebus hai, Amor hai, Girgas hai le
- ¹⁷Hiv mihai, Arka hai, Sin mihai, le
- ¹⁸Arvad hai, Zemar hai, Hamath mihai an hong irzira: kha zoiin chu Kanaana namhai chu an irtheek indarh zoi tâka.
- ¹⁹Khan, Kanaana hai ramri chu Sidon khua ata Gerar sim tiang pang Kaza khua dênin; Sodom le Gomora le Adma le Zeboim sim tiang Lasa khua dênin a ni.
- ²⁰Hihai hi kêng Hama irchihai an ini, an nam omdân hrang angin, an chong hmang hrang angin an nam le an irchi om hrang angin an om ta.
- ²¹Khan Sema, Ebera nâihai irchibul, Jafeta upa khomin nâi a neia,
- ²²Sema nâihai chu Elama, Asura, Arpaksada, Luda, le Arama hai an ni.
- ²³Khan Arama nâihai chu Uza, Hula, Gethera, le Masa hai an ni.
- ²⁴Khan Arpaksada'n chu nâipasal Sela a neia; khan Sela'n nâi Ebera a neia.
- ²⁵Khan Ebera'n nâipasal hni a neia: inkhat irhming chu Pelega a nia, a dam laiin a ram kha senin a oma; a sangpa irhming chu Juktana a ni.
- ²⁶Khan Juktana'n nâi Almodada, Selefa, Hazarmavetha, Jera le
- ²⁷Hadorama, Uzala, Dikla le
- ²⁸Obala, Abimaela, Seba le
- ²⁹Ofira, Havila le Jababa hai a neia: hihai murdi hi Juktana nâihai chu an ni.
- ³⁰Khan an omna chu Mesa ata nisua tiang Sefar lam panna lam a nia.
- ³¹Hihai hi kêng Sema irchihai an ini, an nam om hrang dân angin, an chong hmang hrang lam angin, an irchi om hrang le ram om hrang angin an oma.
- ³²Hihai hi Nova irchihai le nam omhai an ni, an irchihai angin, an irchihai laia, tuilêt zoi ata irnêng chung a chi tin nam tin a hong indarh a ni ta.

Irphutna 11



Babel in irsâng

¹Khanchu irnêng chung a mi murdi hi chong hmunkhat, thuhiril lam hmunkhat an ni vinga.

²Khan hiang hi a nia, nisua tiang an irthon laiin Sinar rama phâizôl an hmua; kha hmun khan om hmun an khuara,

³khan “Tho pilrôngar siam ei ta, a sate’n hâl inhmin ei ti,” an irtia. Khanchu lung irthûlin pilrôngar hmangin âlkatara leh inluanin.

⁴Khanchu, “Tho khopui siam ei ti, in irsâng a sîp irzumin irvân sun rakin siam ei ta, ei irhming an thang theina hrangin, khano’nchu irnêng chung a hin irthek indarh zoiin om ei ti,” an tia.

⁵Khan, Rengpa’n chu mihriam nâihaiin khopui le in irsâng an isin en hrangin a zuanga;

⁶khan, Rengpa’n “Irngai roi, hi mihai hi pumkhat an nia; hi sin hi iphut a ni; atûn chu hi thil an itho hi khap thei zât khom ni ta no ni.

⁷Tho zu fe ei ta, chong an irhlet thei lina hrangin an chong zu’ndanglam pehai ei ti,” a tia.

⁸Khatak ata Rengpa’n annihai kha irnêng chung a a’rthek indartirhaia: khanchu an khua siam kha an mâksana;

⁹khasikin a’rhming khom Babel an phuaa; Rengpa’nkha ni rengata kha irnêng chung a mihai hi chong dangin an chongtirhaia, a irthek indartirhai a ni ta.

Sema irchihai

(1 Tsn 1.24-27)

¹⁰Hi hi Sema irchihai chu an ni. Sema chu kum 100 mi a nia, tuilêt zoi kum hni tena chu nâipasal Arpaksada a neia:

¹¹khan Arpaksada a nei zoiin Sema chu kum 500 a la dama nâipasal le nâinupang a la neihai sa.

¹²Khan Arpaksada’n kum sômthum ringa a ni le nâipasal Sela a neia;

¹³khan Sela a nei zoiin Arpaksada chu kum 403 a la dama, nâinupang le nâipasal a la neihai sa.



- ¹⁴Khan, Sela kha kum 30 a ni le nâipasal Ebera a neia;
- ¹⁵khan Ebera a nei zoiin Sela chu kum 403 a la dama, nâinupang le nâipasal a la neihai sa.
- ¹⁶Khan, Ebera'n kum 34 a ni le nâipasal Pelega a neia;
- ¹⁷khan, Pelega a nei zoiin Ebera chu kum 430 a la dama, nâinupang le nâipasal a neihai sa.
- ¹⁸Khan, Pelega khan kum 30 a ni le nâipasal Reua a neia;
- ¹⁹khan Reua a nei zoiin Pelega chu kum 209 a la dama, nâinupang le nâipasal a neihai sa.
- ²⁰Khan Reua khan kum 32 a ni le nâipasal Seruga a neia:
- ²¹khan Seruga a nei zoiin Reua chu kum 207 a la dama, nâinupang le nâipasal a neihai sa.
- ²²Khan Seruga khan kum 30 a ni le nâipasal Nahora a neia:
- ²³khan Nahora a nei zoiin Saruga chu kum 200 a la dama, nâinupang le nâipasal a neihai sa.
- ²⁴Khan Nahora kha kum 29 a ni le nâipasal Tera a neia;
- ²⁵khan Tera a nei zoiin Nahora chu kum 119 a la dama, nâinupang le nâipasal a neihai sa.
- ²⁶Khan Tera kha kum 70 a ni le nâipasal Abrama, Nahora, le Harana a neihai sa.
- ²⁷Khan, hihai hi Tera irchihai chu an ni, Tera khan nâipasal Abrama, Nahora le Harana hai a neihai: khan Harana khan nâipasal Lota a neia.
- ²⁸Khan Harana chu a'rzirna rama, Kaldai hai khua Ur, a pa Tera kôla a thia.
- ²⁹Khan Abrama le Nahora hai chu dôngma an neia: Abrama dôngma irhming chu Saraii a ni; Nahora dôngma irhming chu Harana nâinu Milkaii a ni, Harana chu Milkaii pa le Iskaii pa chu a ni.
- ³⁰Khan Saraii chu nâi boiin a chinga.



³¹Khan Tera'n a nâipa Abrama chu a tupa Lota, Harana nâipahai kuanga a moinu Saraii chu a hruaihaia; khan Kanaan fe hrangin Kaldai hai khua, Ur-ah irthokin an suaka; Haran khua an tunga, kha hmun khan om hmun an khuara.

³²Khan Tera dam sâng chu kum 205 a nia; khanchu, Tera chu Haran khuaa khan a thi ta.

Irphutna 12

Pathianin Abrama a koi

¹ Khan Rengpa'n Abrama kuanga khan, “Ni khua ata ni urêng sângsuakhai le ni pa in ata suakin lân, ram nang ki irhmûna hranga fe ro:

²khanchu irchi tamtakin nang siam ki ta, sat tinrêng nang vur ki ti, ni'rhming inthangtir ki ti; khan, nang satvurna ni ro.

³ Khan sat nang vurtu murdihai satvurhai ki ti. Khua nang sâltu chu khuasâlhai ki ti, nangmaa khan irnênga nam tin satvurin la om an ti,” a tia.

⁴Khan Abrama khomin Rengpa iti pe lam angin a fe tâka; Lota khom a fe saa, khan Abrama chu Haran khua ata a suaksan laiin kum 75 mi a ni.

⁵Khan Abrama dôngma Saraii le a sangpa nâi Lota le an sum nei murdi le Haran khuaa an mi nei takhai a hruaia: Kanaan rama fe hrangin an suaka; Kanaan ram chu an tung tâka.

⁶Khan Abrama chu, kha rama Sekem hmun dênin, More tâng seso thing hmun dênin a fe zêla; kha zoro khan Kanaan mihai chu kha rama khan an lei oma.

⁷Khan Rengpa kha Abrama kuang an lâra, “Hi ram hi ni'rchihai la pehai ki ti,” a tia. khanchu a kuanga inlârtu Rengpa ta hrangin maichâm a siama.

⁸Khan khatak ata Bethel nisua tiang tânga a'rsona, kha khan puan in a sunga, nisua tiang Bethel a oma. Nitâk tiang Ai khua a oma: kha hmuna khan Rengpa ta hrang maichâm a siam nôka; Rengpa irhming koiin a oma.

⁹Khan Abrama chu sim tiang ram panin a'rson nôk thiaia.

Aigupta rama Abrama a fe



¹⁰Khan kha rama khan châm a hong tâka: kha rama châm kha a nahrai sikin, Abrama chu Aigupta rama zu om viat hrangin a suak tâka.

¹¹Khan hiang hin a nia, Aigupta rama an lût hrangin a dôngma Saraii kuanga khan, “Irngai ro, nupang hmêl satak ni nih ti kin hriat.

¹²Khanchu hiang hin ni a ti, Aigupta mihaiin an ni hmuin chu, hi hi a dôngma a ni, ti an ta; keima chu an ni ithat hrang a ni, nang chu nang hruaipai an ti.

¹³ Nangma sikin a dama ki om theina hrangin, a farnu ki ni, lungkham takin ni irti mai hrang a ni,” a tia.

Abrama'n Hebron tiang a pan

¹⁴Khan hiang hi a hong nia, Abrama khan Aigupta ram a lûtin chu, Aigupta-haiin nupangnu kha an hmua, a hmêl a sa pehai hraia an indita.

¹⁵Faroa milianhai khomin an hmua, Faroa ina an hruai inlûta.

¹⁶Khan, ama'n chu Saraii sikin Abrama chu satakin a dona, belra, sehrât, sakuartunghai, suaknu suakpa le saringseihai a neipui tâka.

¹⁷Khan Rengpa'n Abrama dôngma Saraii sikin Faroa le a in mihai chu a sate'n dengtheiin a soisakhai sabaka.

¹⁸Khanchu Faroa'n Abrama kha a koia, “Ki chung a hin i sin tak mo ni itho tâk? Ni dôngma a nih ti itho mo ni ni inhril loi?

¹⁹ki farnu kêng, itho mo ni iti? Ni ti no sika kêng dôngma'n ki inei a ni hi te: a dik atûn chu ni dôngma hi hruaiin lân, fe pat roi,” a tia.

²⁰Khanchu hi thu sikin Faroa'n a mihai kuang thu a pêkhaia, hi mihai hi hong thakhai ta roi, a dôngma le an neinun nei murdihai leh a tia.

Irphutna 13

Abrama le Lota an irsen

¹Khan Abrama chu Aigupta ram ata a suaka, Kanaan ram sim tiang a oma, a dôngma le an neinun murdi le Lota hai khom an rêngin an om suama.



²Khan Abrama chu sahai, sum le puan, rângachakhai a nei intamin a sân a'rchonga.

³Khan sim tiang ata irthonin Bethel hmun dênin a fea. Bethel le Ai khua kêra a phuta a puan in sungna hmun khan:

⁴a phuta a maichâm siamna hmuna khanRengpa irhming sâmin a om nôka.

⁵Khan Lota, Abrama zuitu khom khan belra pâl, sehrât pâl le puan in a nei saa.

⁶Khan hmunkhata omsuam hrangin chu a ram a chîn tâk sikin; an neinunhai lak an pung pehai sikin, om suam thei ta mahaia.

⁷Khanchu Abrama sa enkoltuhai le Lota sa enkoltuhai kêra irsêlna a suak tâka; kha lai khan Kanaan mihai le Periz-hai khom, kha rama om an nia.

⁸Khanchu Abrama'n Lota kuanga khan, "Lungkham takin, nang le keima kêra ei sa enkoltuhai laia khom irsêlna ite om no ri se, ulenâi ei ni sikin.

⁹Ram irzât tak lak hin a iom mo ni ma? Lungkham takin keima kuang ata a bingin om ta ro: nangma vei tiang ni omin chu, keima chang tiang, nang chang tiang ni fe le keima vei tiang," a tia.

¹⁰ Khanchu Lota chu ram a en vêla, Zoar khua tiang pan balamin, Jordan phâizôl murdi chu Rengpa irhuan ang le Aigupta ram anga tui tamna hmun a nih ti an hriata; Sodom le Gomora khom kha Rengpa'n a la insiat mân kha a nia.

¹¹Khanchu Lota khan Jordan phâizôl kha an thang tâka; khan nisua tiang depin a oma; an irsen tâka.

¹²Abrama chu Kanaan rama khan a oma, Lota chu phâizôl khuaa a oma, a puan in chu Sodom khua dênin a son zêla.

¹³Khan, Sodom khua mihai chu Rengpa mithmua a satêrenga sual sin tho an nia.

¹⁴Khan Lota a bingin a om zoi ata chu Rengpa'n Abrama kuanga, "Thîrin lân, ni omna rengata sim, hmâr, nisua, nitâk envêl ro:



¹⁵ ni ram hmu murdi hi nang le ni'rchihai a vuan ata kumkhuain nang pe ki ti.

¹⁶ Khan ni'rchihai khom irnêng chung a la tam an ta, tûte itep zoi loiin om an ti.

¹⁷ Thoiin lân ram hi a dung a khang irfang suak ro: nang ki ipêk hrang a ni," a tia.

¹⁸ Khanchu Abrama'n a puan in a sona, Hebron-a om, Mamre saso thing kôla khan omhmun a khuara; khataka khan Rengpa hrangin maichâm a siam ta.

Irphutna 14

Abrama'n Lota a sansuak

¹ Khan Sinar khuua rêng Amrafela hai, Elasar khuua rêng Arioka hai, Elam khuua rêng Kedorlaomera hai, Goiim khuua rêng Tidala hai dam lai khan hiang hi a nia,

² anni'n chu Sodom khuua rêng Bera kha an doia, Gomora khuua rêng Birsa hai, Adma khuua rêng Sinaba hai, Zeboim khuua rêng Semebera hai, Bela khuua rêng hai kha an doia. (Bela khuua chu Zoar khuua a ni ta.)

³ Khahai murdi kha Sidim hual sînga khan an irsan irhlôma (hi hual sîng hi Tuipui Al a ni.)

⁴ Kum sômhleihni sîng chu Kedorlaomera hnuai an oma, a kum sômhleithum changna'n chu an hong tehel an zong tâka.

⁵ Khanchu kum sômhle minlina'n chu Kedorlaomera le a kôla rêng omhai an hong, Asterot-Karnaim rama Refa-hai, Ham rama Zuzim-hai, Seva-kiriathaim rama Enim-hai leh

⁶ ramchâr kôla om El-paran dung, Seir tângrama om Hor-hai dênin an hong inhnêhaia.

⁷ Khanchu an kîr nôka En-mispat an tunga, (hi hi chu Kades a ni ta) Amalek rama mi murdi le Amor-hai Zazon-tamar khuua omhai khom kha an thathai nôka.



⁸Khanchu Sodom khuaa rêng hai Gomora khuaa rêng hai, Adma khuaa rêng hai, Zeboim khuaa rêng hai, Bela khuaa rêng hai an suaka, (Bela chu Zoar khua a ni ta.) Khan Sidim hualsûnga khan annihai doi hrangin irnak an lâk irruala,

⁹Elam khuaa rêng Kedorlaomera hai, Goiim khuaa rêng Tidala hai, Sinar khuaa rêng Amrafela hai, Ellasar khuaa rêng Arioka-hai doi hrangin; rêng minli'n, rêng ringa an doihaia.

¹⁰Khan Sidim hual chu âlkatara khuri'n a sipa, khan Sodom le Gomora khuaa rêng hai chu an intâna, âlkatara khura khan an tâka, a tâk banhai kha tâng tiang an rota.

¹¹Khanchu Sodom le Gomora khua mi le an sumpuan le fâk nêk omhai an lâka, an fea.

¹²Lota Abrama sangpa nâi, Sodom khuaa om chu, a sumhai le ama khom lâkin an fe nôk ta.

¹³Khan mi inkhat hong intân chu a hong lûta, Hebrai mi Abrama kha a hrila: Abrama chu Amor mi Mamre thing irkhang kôla om ngai kha a ni. Mamre chu Eskola sang le Anera sanghai an ni; annihai hi chu Abrama hai leh irkop an ni.

¹⁴Abrama'n a nâi kha suak hrangin an hruai ti an hriatin chu, a ina irzira mihriamhai, irchu sai tâk 318 a hruaihaia, Dan khua dênin a'rzûlhai ta.

¹⁵Khan zâna chu anni doi hrangin ama le a mihai kha a'rsempuihaia; an thathai ta. Hoba khua dênin an irzûlhaia. (Hoba chu Damaska khua hmâr tianga om a ni.)

¹⁶Khan sumpuan murdi chu a hong chôl nôk vinga, a nâi Lota le a sumhai khom, nupanghai khom a hong hruaihai nôka, mi dang om murdihai le.

Melkisedeka'n Abrama sat a vur

¹⁷Khan Kedorlaomera le a kôla rêng omhai a thathai zoiin chu Sodom rêng chu Save hualsûnga khan Abrama don hrangin a fea, (Save hual chu rêng hualsûng a ni ta.)



¹⁸ Khan Salem khuua Rêng Melkisedeka'n bai le uain a lâka, Abrama a pêka. Ama chu Pathian inchungtak a ni.

¹⁹Melkisedeka'n Abrama chu sat a vura, "Irnêng le irvân siamtu, Pathian inchungtakin, Abrama chu satvur ri se!

²⁰ni râlhai ni kuta nang pêktu, Pathian inchungtak chu inpâkin om ri se," a tia. Khan Abrama'n ama kha itinrênga sôma inkhat a pêka.

²¹Khan Sodom khuua rêngin Abrama kuang, "Mihriamhai hi ni pe'n lân, sumhai hi chu nangin la ro," a tia.

²²⁻²³Khan, Abrama'n Sodom khuua rêng kuang khan, "Pat malkhat khom, kekok insuina hruite khom, ni inei ite la no ning, itinrêng irvân neitu Pathian inchungtak makunga ki kut ki iphar a ni ta, anino'nchu, 'Abrama chu keima irchongtir kêng ni itih hrang mo ni ma'

²⁴ruathartehai fâk inhek hrang le a ni zuihai mantum ti no chu ite la no ning; Anera hai, Eskola hai, Mamre haiin an mantumhai chu la ri sehai," a tia.

Irphutna 15

Abrama kuanga Pathian thuthung

¹Kha zoiin chu Abrama kuang Pathianin, "Abram chi no ro, kei hi ni pho le lômman hlutak ki ni," tiin Rengpa thu chu irmang angin an hriata.

²Khan Abrama'n, "O Rengpa Pathian, imo ni ni ipêk hrang, nâi nei loiin ki oma, ki'rchonhai khom hi Damaska khua mi Eliezera'n mo a ilua hrang ni ma?" a tia.

³Khan Abrama'n, "Irngai roh irchi ni pe mak chea: en roh ki ina suak hi kêng ki'rchon lua hrang a ini ta," a tia.

⁴"Khan irngai ro, kha mi khan ni'rchon lua thei no ni; nangma rîla ra ngêtin kêng nir chon chu a ilua hrang," tiin Rengpa thu an hriata.

⁵ Khan pên tiang a hruaia, "Irvân khi en ro, ârsihai khi ni tep theiin chu tep ro, a tia. Khanchu Rengpa'n ni'rchihai chu khihai ang khin an la itam hrang a ni," a tia.



⁶ Khan Rengpa kha a iam zela; khanchu Rengpa'n a felna sikin mi iamomin a bêa.

⁷Khan a kuang, “Hi ram lua hranga Kaldaihai khua, Ur ata hruai suaktu Rengpakha ki ni,” a tia.

⁸Khan Abrama'n, “O Rengpa itin mo ki ilua hrang ti ki inhriat thei hrang?” a tia.

⁹Khan ama khan, “Sehrât irla kum thuma le kêlpui kum thum mi le belrachal kum thum mi le vasu le phervalite ni hong chôï pe ta,” a tia.

¹⁰Khanchu a hong chôï pea, a laitaka a tuk tanhaia, phalkhatin a'rboptirhai vinga, vatehai chu tuk loiin.

¹¹Irmuhai saruak fâk hrangin an chuma khan, Abrama'n a le'nhnotpaihai ngai.

¹² Khan khohloi misa tâk tôn chu Abrama chu a inmusu tâka; khan irngai ro, zîng irkhêltak hin a hong zîng dela.

¹³ Khan Abrama kuang Pathianin, “Ni'rchihai chu an ram ni lolina hmuna chu mikhualin la om an ta, an sin an la itho pehai hrang a ni kha; kum 400 dengthei tuang an ta;

¹⁴ khan an sintho pehai chungthu khom ngaitua ki ti: khanchu sumpuan tamtak neiin suak an ti.

¹⁵Nangma chu ni'rchibulhai kuang irtharngam takin fe ni ti, ni sam chuak vinga tarin nang phûm an ti.

¹⁶Khan irlo minlinahai khom hin hong an ta; Amor-hai sualna hi a la'rkip no sikin,” a tia.

¹⁷Khan, hiang hi a nia, misa a tâka rammual a hon thimin chu, irngai ro, meikhu senduk irzâmin kôlirtêk angin meichok luai luai inlôi a oma;

¹⁸ kha nî tena chuRengpa'n, “Hi ram hi, Aigupta Tui ata Tuipuilian (Eufrates) tui dênin ni'rchihai ki pêk ta,

¹⁹Ken-hai, Keniz-hai, Kadmonhai,



²⁰Hit-hai, Periz-hai, Refaim-hai,

²¹Amor-hai, Kanaan-hai, Girgas-hai le Jebus-hai khom ki pêk sa,” tiin Abrama kuanga thu a thung tâka.

Irphutna 16

Hagari le Ismaela

¹Khan Abrama dôngma Saraii khan chu nâi a neipui no sikin: Saraii khan Aigupta mi suaknu inkhat an idôn a oma, a’rhming chu Hagari a ni.

²Khan, Saraii khan Abrama kuang, “Irngai ro duah, Rengpa’n nâi a ni pêk no sikin, irngaihoi takin ki suaknu irpôlpui ro; ama ata nâi ki nei khomin a sa,” a tia. Khanchu Abrama’n Saraii thu chu a zôma.

³Khanchu Abrama dôngma Saraii khan Abrama chu Kanaan rama kum 10 a om hnungin a suaknu Hagari chu a hruaia; a pasal Abrama kuanga a dôngma hrangin a pêka.

⁴Khan, Hagari kha a’rpôlpuia; an râia, khan an râi ti a’rhriatin chu a pi kha a theimâk tâka.

⁵Khanchu Saraii khan Abrama kuang, “Ki thil tuang hi nangin a mô pêl ro: ki suaknu chu nangma ompui hrang ki tia, an râi ti a’rhriatin chu a ni theimâka;Rengpa’n nang le keima kâr hi ngaitua ta ri se,” a tia.

⁶Abrama’n Saraii kuanga khan, “Irngai ro, ni suaknu chu ni kuta om kêng a ini, a sa ni iti lam takin lo ta ro,” a tia. Khanchu Saraii khan deng an theitira, a rotsan tâka.

⁷Khan Rengpavântîrtônin tâng chârna tuikuang kôla Sur khua panna lama a lei hmua;

⁸“Hagari, Saraii suaknu, khô rengata ni ihong mo, khôna fe hrang mo ni ni?” a tia. Khan, ama’n, “Ka pi Saraii kuang ata ki hong irot a ni,” a tia.

⁹Khan Rengpa vântîrtônin a kuang, “Ni pi kuang fe nôkin lân, a thu thuin om ro,” a tia.



¹⁰Vântîrtôn ngêtin a kuang, “Ni’rchi chu tep zoiloi rakin nang la’ntam pe ki ti,” a ti pe nôka.

¹¹Vântîrtônin a kuang, “Irngai ro, nâi ni vong ta, nâipasal nei ni ta; Pathianin ni dengthei lam an hriat tâk sikin, a’rhming khom Ismaela ni iphua hrang a ni.

¹²Ama chu mihriam laia om loiin ram sakuartung angin; mi murdi doi a ta, mi tinin ama khom doi an ti; a urêng hai leh khom omsuam no nihai,” a ti pe nôka.

¹³Khan Hagari chu a chongpuitu Rengpa irhming chu, “Nang hi hmutheitu Pathian ni ni,” tiin a bêa, “Hi zel hin a ni hmutu ki ien zuiloi hrang mo?” a’rtia.

¹⁴Khasikin kêng tuisunsuak chu Beer-lahai-roi, iti a ni. “Tuisunsuak hring hmutu a ni,” Kades le Bered kua kâra om a ni.

¹⁵ Khan Hagari’n Abrama kha nâipasal a neipuia; khan Abrama’n Hagari leh an nâi chu a’rhming Ismaela a phuaa.

¹⁶Khan Hagari’n Abrama nâi a nei lai hin Abrama chu kum 86 mi a ni.

Irphutna 17

Thuthung irsinsiana hranga sertan

¹Khan Abrama kha kum 99 mi a niin Rengpa chu a kuang an lâp pea, a iti chu, “Kei Pathian itinrêng thothei ki ni, ki kôla omin lân, satirkipin om mai roh.

²Khanchu nangma le ei kâra thu thung ki ta, ni’rchi inpungtir ki ti,” a tia.

³Khan, Abrama chu khûksadelin a oma, Pathianin a chongpuia;

⁴“Irngai ro, keima’n ki thuthung chu nangma kuang ki intung a ni hi, atûn ata nam tin chi tin inpungpu ni ta ni ti.

⁵ Ni’rhming khom Abram ni ta no nia; Abrahama ni ta ni ti; nam dang dang inpungpu’n nang ki isiam a ni ta.



⁶Nam tin chi tin nangma ata suak an ta, senkhat chu rêng ni an ta, rammual bitin pung ta ni ti.

⁷Khan kei le nangma le ni'rchi hong pung hranghai Pathian ni hrangin kumtuanga hek ta loi hranga thuthung ki indet a ni ta.

⁸Khan ni kôl le ni hnunga ni'rchi la hong om hranghaiin chu ni mikhualna ram, Kanaan ram murdi hi kumkhua irchon hrangin nangni ki pêk; khan keima hi an Pathian ni ki ti," a tia.

⁹Khanchu Pathian ngêtin Abrahama kuanga khan, "Nangma'n chu ki thuthung hi ni izôm hrang a ni; nangin ni izôm ngêt hrang a ni. Ni hnunga ni'rchi hai dênin an izôm ving hrang a ni.

¹⁰Hi hi nang le keima le ni'rchi hai kêra thuthung chu a ni, nin laia pasal murdi chu ser nin itan hrang a ni.

¹¹Khanchu, nin servun taksa kha tanin nin iom hrang a ni; hi hi kêng nangma le keima kêra thuthung irsinsiana a inih hrang a ni.

¹²Khanchu a suak ata sîn riat ni sînga chu nangma nâi mo, mi nâi ni iompui mo, mikhual mo, suma ni irchôk a ni khomin, pasal murdi chu a ser ni itan hrang a ni.

¹³Ni ina suak khom, suma ni irchôk khom a ser ni itan hrang a ni: khan kêng ki thuthung kha kumtuang thuthung a nih ti nin taksa khan a iom hrang.

¹⁴Khan, pasal ser tanloi, a vun tan loa om chu, a'rchi hai lai ata thatpai a ini hrang a ni; ama'n chu ki thuthung a insiat a ni," a ti nôka.

¹⁵Khan Pathian ngêtin Abrahama kuanga khan, "Ni dôngma Saraii khom a'rhming Saraii ti ta no chi nia; a'rhming chu Sari ni ta a ti.

¹⁶Khan ama khom satvur ki ta, ama rengata nâipa nang ki ipêk hrang a ni, ama chu satvur ki ta, nam chi tin irchinu ni ta a ti; ama ata nam chi tin le rêng khom la suak an ti," a ti nôka.



¹⁷Khanchu Abrahama chu an boka, a lungrîla, a minui an za pea, “Kum irzakhat mi hin mo, nâi a la inei hrang? Sari kum sômkuak mi hin mo nâi a la inei hrang?” a tia.

¹⁸Khan Abrahama'n Pathian kuang, “Ismaela hi ni makunga om thei ni sianlân!” a tia.

¹⁹Khan Pathianin, “Ni thei no ni, ni dôngma Sari'n nâipasal nang neipui a ti; a'rhming khom Isaka phua ni ti: iti'n ki thuthung chu hi zoia irchihai hrang khomin kumkhua thuthung ni hrangin ki indet a ni.

²⁰Ismaela chungthu khom irngaitua ki ti: irngai ro, ama chu sat ki vur ta, irchi tamtak inpung a ta; ama'n chu rêng sômkhath inhni nei a ta, ama khom chi inpungtu lian takin siam ki ti.

²¹Ki thuthung hi chu Isaka, nakuma Sari'n atûn lai zoroa a inei hrangpa kuanga vai kêng ki indet ual hrang a ni,” a tia.

²²Khanchu a kuanga thuhiril chu a monga, khan Pathianin Abrahama kha a suaksan ta.

²³Khan, Abrahama chu a nâipa Ismaela le a ina suakhai le sum le puana a irchôkhai murdi, Abrahama urênghai laia pasal murdi a hruaihaia, Pathianin a ihril pe ang takin, kha ni sîn zel khan an servun a tan pehaia.

²⁴Khan, Abrahama khom a servun taksa an tan lai hin kum 99 mi a ni.

²⁵Khan, a nâipa Ismaela servun taksa an tan lai hin kum 13 mi a ni.

²⁶Hi ni sîn ata hi Abrahama le a nâipa Ismaela khom sertan an ni ta.

²⁷A urênghai le a ina suakhai le sum le puana a irchôkhai khom an rêngin sertan an hong ni ving ta.

Irphutna 18

Abrahama kuanga nâipasal pe hranga chonginkung

¹Abrahama chu sîn lum laitaka puan in mikot kôla a toi lai takin, Rengpa chu Mamre seso thing kôla a hong inlâr pea;



² Khan a hong tanga, a ena, khan irngai ro, a kôla khan mi inthum ngîr a hmua; a hmu infelhain chu, anni lômhain hrangin a van tâna, khûksadelin chubai a va mûkhaia;

³“Ka pu lung nin khamin lân, ni siahlo hi ni lôi no hrâm roh.

⁴Tui tômte hong la ki ta, nin kehai irsu unglân, thing dâihlîm hnuaia hin sôl irngam roi.

⁵Bai fâk zât chînte va la ki ta, nin fena lama nin hrât theina hrangin, ki in nin ni lômpuina le keima’n nin sin ki thônâ nin chang pe roi,” a tia. Khan anni khomin, “Ni iti angin va tho ta ro,” an tia.

⁶Khanchu Abrahama chu Sari omna puan in sûnga a lût lata, “Bai indiap sai, danh thum siamin lân, hmet inzôiin changpêr angin siam ro,” a tia.

⁷Khanchu Abrahama chu sehrât omna tiang a fea, sehrâtchal satak hi a hong kaia, a sin thotuhai kuanga a pêka, an siam pe lata.

⁸Sehrât dût le sehrâtchal suang sai a lâka, a va darhaia; khan thing kôla a ngîr chiana, anni’n an nêk pe tâka.

⁹Khan anni’n a kuanga khan, “Ni dôngma Sari teh khôn mo a om?” an tia. Khan ama’n, “So puan in sûnga son,” a tia.

¹⁰ Khan anni laia inkhatin, “Zoro hi a hong tung nôk tika chu ni kuanga hong nôk ki ti, khan irngai ro, ni dôngma Sari’n nâipasal nei a ti,” a tia. Khan a hnung tiang puan in mikot ata Sari’n an hriat chiana.

¹¹Abrahama le Sari chu ulian tak tartak anni tâka; nupang ihmu ngai khom ite hmu ta maka;

¹² khanchu Sari’n, “Tar ki ni zoi hin lômna mo la nei ning, ki rêngpa lak a ulian ok tâka?” iti insâpin a minui an za pea.

¹³Khan, Rengpa’n Abrahama kuang khan, “Itho sikin mo Sari’n kei tarnu hin nâi ki la inei thei hrang mo? tia a innui?”

¹⁴ Rengpa hrangin thiltho hi a intak hrang mo a isôn? zoro’nkunga, a zoro a hong tung tika chu, ni kuang zuang nôk ki ta, Sari’n nâipasal nei a ti,” a tia.



¹⁵Khanchu Sari'n, "Innui lua ma ung duah" tiin chit le rumrâiin a tia. khan ama'n chu a ni lo loi kha ti no ro, "Nin nui kha te," a tia.

Abrahama'n Sodom khua hrang a ngên

¹⁶Khan, mi murdi an thoia, Sodom khua tiang an ena: Abrahama'n annihai thak hrangin a om saa.

¹⁷Khan Rengpa'n, "Ki itho hrang hi Abrahama teh hril loiin mo om ning?"

¹⁸Abrahama lak hi irchi tamtak le sinthothei a la ini hrang a nia; ama rengata hi rammual mi tin sat la vur ki ti.

¹⁹Rengpa hnung an zui theina hrangin a hnunga a nâihai le a in mihai, thil fel le roirêl indik hrangin kin kung tâk sikin, khanchu ama chungchânga hrila Rengpa'n Abrahama chung a tung theina hrangin," a tia.

²⁰Khanchu Rengpa'n, "Sodom le Gomora khua irhû a siatin a sate'n an sual tâk sikin;

²¹atûn zu fe ki tah an irhû a isiat ang hin an sual le sualloi zu'nfel ki ta, inhre thei ni a ti,"

²²khan mi inhni an suaka Sodom mâksanin, khan Rengpachu Abrahama kuang a la oma.

²³Khan Abrahama'n a va pana, "Mi felhai khom hi mi dik loi hai laia hin ni ithathai sa hrang ma ni?"

²⁴kho sînga hin chu mi fel sômringa vêl chu an om khom a ni thei: a sînga mi fel sômringa omhai khom hôihai loiin an khua hi ni insiat hrang ma ni?

²⁵nangma'n chu khaanga mi felhai mi suala an lût thei lona hrangin, mi felhai hi a sualhai le thathai hrangin chu tak nang sôn ma unga; irnêng chung roirêltu'n fel takin a irêl ngai mo ni ma?" a tia.

²⁶Khanchu Rengpa'n, "Sodom kho sînga hin mi fel sômringa ki hmu khomin, anni sikin a khua pumpui la hôi ki ti," a tia.

²⁷Khan Abrahama'n, "Rengpa keima pilpoka siam hin nang ki chongpui thei tâkin te,



²⁸mi fel chu ringa irsamin sômringa an kêi no khomin ni ithathai hrang mo?” a ti nôka. Khan Rengpa’n “Sôm minli ringa ki hmu’n chu thathai no ning,” a tia.

²⁹Kha hnung chu a’rdon nôka, “Sômminli vai mi fel ni hmu’n te,” a tia. Ama’n, “Sômminli vai an om khomin thathai no ning,” a tia.

³⁰Khan Abrahama’n, “O Rengpa ni ning chu inmur no ro, nang la’rdon nôk rong: sômthum vai an omin te,” a tia. Khan ama’n, “Sômthum vai an om khomin thathai no ning,” a tia.

³¹Khan ama’n irngai ro, nang ki ichongpui thei a ni sikin: “Sômhni vai an omin te,” a tia. Khan, ama’n, “Sômhni vai an om khomin irhmangtir no ning,” a tia.

³²Khan ama’n, “O Rengpa ni ning chu inmur no ro, voikhat vai nang irdon nôk ki ti, sômkhat vai an niin te,” a tia. Khan, ama’n chu, “Sômkhat vai anni khomin thathai no ning,” a tia.

³³Khanchu Rengpa chu Abrahama leh an chong zoiin chu a fe tâka; khan Abrahama khom a omna tiang a kêi nôk tâka.

Irphutna 19

Sodom khua sualzia

¹Khan, vântîrtôn inhni khohloi tiang Sodom khua an tunga; Lota chu Sodom khua dâimitzînga a lei toia: Lota’n a hmuhaia, lômhài hrangin a ngîra; khûksadelin chubai a mûkhaia;

²“khan lungkham takin puhaio, nin sinhotu ina hin irngam unglân, nin ke nin kut irsûkin zân riak unglân, zîng nôka nin thoi le nin fena hranga la fe ta roi,” a tia. Khannisianlân anni’n chu, “Ni no ni, keini chu kholaidunga riak kin ti,” an tia.

³Khannisianlân a ngênhai hrai sikin, an zuia, a ina an lûta, bu anh a suanga, bu anh tuitak fâkin an oma.

⁴Khannisianlân, an zâl mân Sodom khuaa mi, bunglu bungdop, a lian a chînin an irhuala;



⁵ Khan Lota kuanga khan, “A vuana ni ina mi hong lûthai kha khôn mo an om? anni kin irpôlpuihai theina hrangin kin kuang zuang tuanghai ro,” an tia.

⁶Khan, Lota chu mikot a van hong a enhaia, in a khâr nôka.

⁷Khan, “Urênghaio lungkham takin hi angpa hrai hin chu sual no roi ba!

⁸irngai roi, pasal la irpôlpui ngai loi nâi dôngmate inhni ki nei: lung nin kham unglân, anni hi nangni kuta nin izo zôt lôhai roi, a sa nin iti angin ompuihai roi; hi mihai chung a vai hin ite dengintheihai no roi, khasikin kêng ki ina an hong irngam,” a tia.

⁹Khan anni'n chu, “Irkhâi zel ro,” an tia. Khanchu, “Hi mi hi mo, hitaka om hranga hong lût, roirêltu chang nuam a la ni sa rêk: atûn chu annihai nêkin, nangma chung a kêng nang kin isoisak ual hrang,” an tia. Khan, Lota kha inkhâr insiatin an irbuanpuia.

¹⁰Khannisian, mihai khan an selhaia, Lota chu in sûnga an kai lûta in an khârkhuma;

¹¹ khan inkhâr kôla omhai, a chîn a lianhai mit an incho pehaia: khanchu inkhâr hmu thei loiin an siahai ta.

Lota'n Sodom khua a suaksan

¹²Khan, mi inhnihai khan Lota kuang, “Hi mihai ti no hi ni irnâipui mo an la om? Nâipasal, nupang, ni moi ni mâk murdi hruai suakhaiin lân, hi khua hi suaksan ta roi,

¹³Rengpa inhriatin an sualzia an thang tâk sikin, hi khua hi insiat hrang kin ni ta: insiatpai hrangin Rengpa'n a ni zuang itîr a ni,” an tia.

¹⁴Khanchu, Lota chu a suaka, a mâkpahai a va hrilhaia; “Thoi unglân, hi khua hi suaksan ta roi, Rengpa'nhi khua hi a ihâl hrang a ni ta,” a tia. Khannisianlân a mâkhaiin chu taksôn loiin fiamthu angin an lâka.

¹⁵Khan zîng kôl a hong irsalin chu, “Thoiin lân, ni dôngma le ni nâi dôngmate inhnihai hi hruaihai ro; khano'nchu, hi khua siatna hin thina nin ti,” tiin Lota chu an tuar tâka.



¹⁶Khannisianlân irhnot loiin, ar ial maia; khanchu Rengpa'n lung an khamhai sikin, a kut leh a dôngma, a nâihai kuta chelin kho pên tiang an hnûk dokhaia, an siahai ta.

¹⁷Khan hiang hi a nia, kho pên tiang an om zoiin, “Ni hring theina hrangin intân ta ro; ni hnung khom irhei no ro, phâizôla khom hin irngam viat no'n lân, tâng tiang intân ro; khano'nchu ni ithi sa hrang kêng,” an tia.

¹⁸Khannisian Lota'n “Ka pu hiang bâk hin chu ni no ri se ba.

¹⁹Irngai ro, ni sintho hin chu ni mit ki itung mo ni ma. Nangma khonzâna chu a liana, kha khonzâna kha ki chung a hin ni saninzôkin nin lang pe'n lân, so tânga son chu intân thei no ning; thil saloi tongin ki ithi hrang kêng.

²⁰ Irngai ro, so khua chînte so kêng intâna tung lat theina anaitak a ini; kho chînte ni khomsian ki zôk theina hrangin so son nin tântir ro,” a tia.

²¹Khan anni khan, “Irngai ro, hi thil ni iti khom hi nang ki pom pe, khua ni iti khom so nang hâl pe no ning.

²²Irhnotin lân, so son van tân ro, ni tung mâka chu ite la ti thei ual no ning,” a tia. Khasikin kha kho'rhming khom kha Zoar an ti ta.

Sodom le Gomora kângsiat thu

²³Lota'n Zoar khua a tung tena chu, irnêng chung chu misa a hong ir-al suak tâka,

²⁴ khan Rengpa'n Sodom le Gomora khua chung a khan irvâna Rengpa kuang ata meiri-al ropuivânsâng angin an thotira;

²⁵khanchu kha khua le phâizôl lian dôr le a mi omhai le thil ite mông thei loiin a hâl irhmang zit tâka.

²⁶ A dôngma chu Lota hnung a omin a hnung tiang a'rheia, lungmichi a chang zel tâka.

²⁷Khan Abrahama chu zînga a thoiin Rengpa kôla a ngîrna hmuna a fea;

²⁸khan Sodom le Gomora phâizôl murdihai chu a thîra, a ena; kha rama meikhû kha hâlirhmang chit angin a khû irzâm hlut hlutin a oma.



²⁹Khan hiang hi a nia, Pathianin phâizôl a hâl irhmang laia, Lota omna hmun kha Pathianin Abrahamama kha an hriat maia, Lota chu irhmangna hmun ata a sansuak a ni.

Moab le Amon-hai suakna bul

³⁰Khan Lota kha Zoar khua ata a suaka, tânga a oma; a nâi dôngmatehai inhni leh Zoar khuaa om ngam mahaia: an parêngin rôla an oma.

³¹Khan a unu'n a sangnu kuang khan, "Ei pa laka hi a tar tâka, irnêng chungang hin dân ang taka ni'rpôlpui hrang lak pasal inkhat lua om ta mahaia;

³²tho ei pa hi uain in intir ei ta, irchi ei pung theina hrangin zâlpui ei ti," an tia.

³³Khanchu kha ni zân chu uain an in intira: a unu kha a pa kôla lûtin a va zâlpuia, an pa'n a zâlpui khom inhre loiin a thoi nôka.

³⁴Khanchu zîng nôka chu a unu'n, a sangnu kuang khan, "Irngai ro, mizân zân khan ei pa ki zâlpuia, a vuan zân khom uain in intir ei ta; nangma lûtin lân, ei pa irchi pung hrangin va zâlpui ro," a tia.

³⁵Khan hi nê zân khom hin an pa chu uain an in intira: a sangnu kha a va lûta a pa leh an zâlsuama, a zâlpui le a thoi nôk khom inhre loiin.

³⁶Khang khan Lota nâinuhaiin an pa irpôlpuiin nâi an vonga;

³⁷a unu'n nâipasal a neia, a'rhming chu Moab a tia: hi mi hi atûna Moab-hai irchibul chu a ni.

³⁸Khan, a sangnu khomin nâipasal a neia, a'rhming chu Ben-amona a tia, hi mi hi atûn laia Amon-hai irchibul hi a ni.

Irphutna 20

Abrahama le Abimeleka

¹Khan, Abrahamama chu kha ram ata kha sim tiang a'rsona, Kades le Sur khua kâra omhmun a khuara, Gerar khuaa om pumin.

² Khan a dôngma Sari kha Abrahamama'n, ki farnu a ni a tia: khanchu Gerar khuaa rêng Abimeleka'n mi a tîra, Sari a van hruaitira.



³Khannisianlân, Pathianin zâna a'rmangin Abimeleka kuang khan hiang hin a hrila, "Irngai ro, ni nupang hruai sikin mithi ni ni ta, mi dôngma kêng a ini," a tia.

⁴Abimeleka'n chu la'rpôlpui maka: "Khanchu Rengpa mi felhai khom hih ni ithathai hrang ma ni?"

⁵ama rengin ki nuchapa a ni a tia. Lungrîl fel le porinche loiin hi thu hi nang ki ihril a ni," a tia.

⁶Khan Pathianin a'rmang tiang, "A lungrîl porinche loia hi thu hi ni iti a ni, nang kin hriat, keima khomin ki chung a sin saloi tho loi hrangin nang ki ikhap a ni; khasikin, hi nu hi inthem hrang khomin nang phal ma ung.

⁷Khasikin atûn zel mi dôngma kha pepai nôk ta ro; ama chu deipu kêng a ni, khan kêng nang chongchai pe a ta, ni hong idam hrang: ni pêk kêr nôk no'n chu ni ithi ngêt hrang a nih ti inhre ro, nang le ni inei murdihai le," a tia.

⁸Khanchu Abimeleka chu zînga a thoia, a sin thotuhai a bukhai zita, anni inhriatin thil tung murdi a hrilhaia; khan mihaiin an chi tak taka.

⁹Khanchu Abimeleka'n Abrahama kha a koia, a kuang khan, "Kin chung a hin itho mo hiang sin hi ni itho? i ang sin mo ni chung a kin inchâina om, kei le kin khua kin tuihai chung a thil saloi tak ni hong intungtir hi? Thil tho loi hrangtak ni itho tâk hi," a tia.

¹⁰Khan Abimeleka'n Abrahama kuang, "Imo ni ihmu, hi thil ni itho ngam hi?" a ti nôka.

¹¹Khan, Abrahama'n, "Hi kho sînga hin Pathian chitna nei mi nin om viat no sikin, ki dôngma ki ti'n teh kei nin ni ithat ngam hrang a nih ti kin hriat sika a ni.

¹²Khakhêla, ka pa tianga ki farnu khom a ni. Ka pa farnu nâi a nia, dôngma'n ki inei a ni ta:



¹³khan hiang hi a nia, Pathianin ka pa in ata kin vâi lai khan, hiang hin ni lungthungna chu ki chungna ni inlangtir hrang a ni, ei tungna in hmun tina; ki nuchapa a ni, ni iti mai hrang a ni, ki iti pe tâk kêng,” a tia.

¹⁴Khan Abimeleka'n belrahai, sehrâthai le suaknu le suakpahai a hruaihaia, Abrahama kha a pêka, a dôngma Sari khom a pêk kêr nôka.

¹⁵Khan Abimeleka'n, “En ro, ram lian tak ki nei, ni iom nuamna taka om ro,” a tia.

¹⁶Khan Sari kuang khan, “En ro, ni nuchapa hi sum sângkhat ki pêk ta: a ni hmutuhai murdi mithmua, mi dikloi ni loiin, mi dik ni nih ti inhriatna hrangin, nangma chungna ite dik lina om ma,” a tia.

¹⁷Khanchu Abrahama kha Pathian kuang a chongchaia; khan Pathianin Abimeleka le a dôngma le a suakhai khan damna an chang zela; nâi an hong nei tâka.

¹⁸Abrahama dôngma Sari sikin Abimeleka in sâng mihai chu nâi boiin an iching tâk a ni.

Irphutna 21

Isaka suakna thu

¹Khan, Rengpa'n a lei iti tâk angin, Sari kha a pana, Rengpa satna a donga.

²Khanchu Sari chu an râia, Pathianin hunbi a lei inkung nî taka chu, Abrahama tar hnungin nâipasal a neipui ta.

³Khan Abrahama, Sari ineipui irhming khom Isaka a phua ta.

⁴Khan Abrahama'n Pathian thupêk ang takin a nâipa Isaka chu sîn riat a chukin a ser a tan pea.

⁵Khan Abrahama'n, Isaka a nei lai hin kum 100 mi a nia.

⁶Khan Sari khan, “Pathianin a nin nuitir ta; mi tin a nin hriat murdihai khom an raifân ta a ti,” a tia.

⁷Khan ama ngêtin, “Sari'n nâite la pom a tah ti tu'n mo Abrahama kuang lei hril ngam om hrang? a tar hnunga nâi ki ineipui tâk hi,” a tia.



⁸Khan nâite chu a hong liana, irhnu pe ta maka: khan Isaka irhnu nêk ta loi hrang nî taka chu Abrahamana'n hruai an thêa.

Hagari le Ismaela inhnotsuak thu

⁹Khan Aigupta mi, Hagari nâipa, Abrahamana hranga a ineipui khan an nuisan lai tak Sari'n a hmua.

¹⁰Khanchu Abrahamana kuanga khan, "Hi suaknu le a nâipa hi irzûlpaihai ro: hi suaknu nâipa hin, ki nâipa Isaka irchon luapui thei no ni," a tia.

¹¹Khan, hi chongbâi sik hin Abrahamana hrangin chu a nâi a'rkôk pe sikin a irngai hoi pe thei maka;

¹² khannisianlân Pathianin Abrahamana kuang khan, "Nâipang chungchâng thu le ni suaknu thu hi nangma irngai khomin thil saloiin bê no ro; Sari'n ni kuanga thu a insîrhai kha zôm ro; Isaka ata kêng ni'rchi hai an la iti hrang.

¹³Khan ni suaknu nâipa khom hi ni'rchi a ni sikin, irchi suanpâr chu inpung ki ti," a tia.

¹⁴Khanchu Abrahamana chu zînga a thoia, bai le tui bêla tui bitin a chôia; Hagari a pêka, a dârsuama toiin, nâipang khom an fetira; khanchu Beerseba tâng châra a'rvâk hena.

¹⁵Khanchu tui bêla tui chu om ta maka, nâite chu chînribuk hnuaia a sia raka.

¹⁶Khan "Nâipang thi hrang kha en ngam ma ung," a tia. A chi sikin hla rak loi, thal kâp tung thei hrang tena ang khan a mân tiang a va toi ngota; inring takin a chap tâka.

¹⁷Khan Pathianin nâipang irhâi kha an hriata, khan Pathian vântirtônin irvân ata Hagari chu a zuang koia, a kuang, "Hagari imo ni ingaitua? chi no ro, nâipang irhâi chu Pathianin a omna ata an hriat,

¹⁸thoiin lân, nâipang kha a kuta kaithoi ro, ama chu irchi tam takin ki isiam hrang a ni," a tia.

¹⁹Khan Pathianin a mit an vâp pea; tuisunsuak kha a hmu tâka; khanchu a va fea, tui bêla khan tui a thun insipa, nâipang kha an intira.



²⁰Khan, Pathian chu nâipang kôla khan, a ompui ngaia, a hong lian dênin, tângchâra a om ngaia. thal kâp thei mi a hong ni tâka.

²¹Paran ramchâra omin, a nu'n Aigupta ram mi a dôngma hrangin an neitir ta.

Abrahama le Abimeleka irngeina thu

²²Kha laia khan Abimeleka le sipai hruaitu Fikola haiin Abrahama kuang khan, “Ni sinthônahai hin Pathianin nang a sâm mai ngaia.

²³Khasikin atûn hi hmuna hin Pathian irhming sâmin, kei le ki nâipa le ki tupa, hnuaisia loia lung ki lei inkham tâk ang khan keima le ni omna ram lungkhamna indong hrangin ki kuang hin chong nin kung pe ro ba!” tiin a hrila.

²⁴Khan Abrahama'n, “O chonginkung ki ti,” a tia.

²⁵Khan Abimeleka siahlohaiin tuisunsua an suthai sikin Abrahama'n Abimeleka kha a'rchua.

²⁶Khan Abimeleka'n, “Kha thil lei thotu kha tu mo a ini, ite inhre ma ung,” a tia.

²⁷Khanchu Abrahama'n belra le sehrâtchal a hruaihaia, Abimeleka a pêka; khanchu an ruaiin chong an inkunga.

²⁸Khan Abrahama'n a belra pâl laia a sa, a'rthiang sari a khâia;

²⁹khanchu Abimeleka'n Abrahama kuang khan, “Belra irthiang sarikai hi itho mo a bingin ni ikhâihai?” a tia.

³⁰Khan ama'n chu, “Hi tuisunsuak hi keima kut ngeia ki ituk suak a nih ti ni nin hriatpui ti inhriatna'n hi belra irthiang sari hi ki kut ata ni ilâk hrang a ni,” a tia.

³¹Khatak sikin hi hmun khom hi Beerseba a tia: hi hmuna hin an ruaiin khomâk an irsâm sikin.

³²Khanchu, Abimeleka kha a thoia, a sipai hruaitu Fikola leh khan Filistia rama an kîr nôk ta.



³³Khan Abrahamama'n Beerseba khuuaa khan meisâr kung a phuna, kha hmuna khan Rengpa, kumtuang Pathian irhming a sâma.

³⁴Khanchu Abrahamama chu zoro sôtta Filistian rama a oma.

Irphutna 22

Pathianin Abrahamama a nâi Isaka inhlan hranga inphût

¹ Khan, hiang hin a nia, zoro sôtloite hnunga chu, Pathianin Abrahamama chu a fiaa, "Abrahamama," a tia; khanchu ama'n "Hin ki om," a tia.

² Khan ama'n, "Ni nâi, ni nâikhât neisun, ni inrentak Isaka kha hruaiin lân, Moria rama khan fe ro, kha hmuna nang ki ihril hrang tâng inkhata khan hâlvôm thilinhlan ro," a tia.

³ Khan Abrahamama chu zînga a thoia, thing a tuka, a neinun pênna sakuartung le a siahlo ompuihai inhni leh a nâi Isaka a hruaihaia; Pathianin a ihril pena tiang khan a fe tâka.

⁴ Khan, sîn thum ni tena chu Abrahamama kha a hong tanga, a fena hrang hmun chu hlavitin a la hmua.

⁵ Khanchu Abrahamama'n a siahlohai ruai kuang khan, "Hi hmuna hin sakuartung leh hin lei om roi, kei le nâipang hi so hmuna son va fe kin ta, Pathian chubai va mûk kin ta, kha zoiin nin kuang hong kîr nôk kin ti," a tia.

⁶ Khan Abrahamama'n hâlvôm thilinhlanna thing kha a lâka; a nâipa Isaka a'rputtira; ama'n mei le chemte chôiin a nâipa leh an fea.

⁷ Khan Isaka'n a pa Abrahamama kha hiang hin a ti pea, "Ka pa," a tia; khan ama'n, "Ki nâipa hin ki om," a tia. Khanchu Isaka'n, "En ro, mei le thing chu a oma; khannisian hâlvôm thil inhlan hrang belra tuai teh khôn mo a om?" a tia.

⁸ Khan Abrahamama'n, "Ki nâipa, Pathianin ama ta hranga thilinhlan hrang chu a zoro taka ni pe a ti," a tia. Khaang khan an irzui maia.



⁹ Khan, Pathianin a inhrilna hmun chu an va tunga; Abrahama'n maichâm a siam irfûka, thing a tana a buka, a nâipa Isaka kha a khita maichâm chung a an zâltira.

¹⁰ Khan, Abrahama'n chem an bana a nâipa thatna hrangin.

¹¹ Khan, Rengpavântirtônin irvân ata a zuan sama, "Abraham, Abraham," a zuang tia: khan ama'n, "Hin ki om," a tia.

¹² Khan Pathianin, "Nâipang chung a khan ni kut insum no'n lân, ite tôn viat no ro: ni nâi neisun khom pêk hrangin nin hroi ta no sikin, Pathian ni chi ti kin hriat ta," a tia.

¹³ Khan Abrahama khan a hnung a'rheia, a en vêla, a hnung tiang belrachal a'rki thinga inôk hi a ngîr pea; khanchu Abrahama'n belra kha a chela, a nâipa irthûlin hâlvôm thilinhanna hrangin a hmang tâka.

¹⁴ Khasikin Abrahama'n kha hmun irhming kha Jehova Jire a phua tâka; a vuan sîn tena, Rengpa tânga ngaitua ni a ti, an iti ngai ang hin.

¹⁵ Khan Rengpa vântirtônin voihnina irvân ata a zuan sam nôka,

¹⁶ "Hi thil hi ni tho tâk sikin, ni nâi neisun nin hroi ta no sikin, sat nang vur ngêt ki ti.

¹⁷ Irvâna ârsi zât le tuia chiai tam nêkin ni'rchi hai la'npung ngêt ki ti, nir chihaiin an irdoipuihai kul mikot khom la nei an tih ti le.

¹⁸ Ki hê ni lâk tâk sikin, ni'rchi lai ata rammuala chi tin vânsatna la dong an ti; mâni le mâni irtiin thu ki inkung a ni ta, Rengpa'n a ti," a zuang tia.

¹⁹ Kha zoiin chu Abrahama chu a siahlo pasal hnihai omna khan a kîr nôka, khanchu Beerseba khan Abrahama chu a om ngai tâka.

Nahora irchihai

²⁰ Khan hiang hi a hong nia, Abrahama kuang khan, "Irongai ro, Milkaii khomin ni sangpa Nahora kha nâi a neipui ta," iti an hrila.

²¹ A nâilutîr chu Uza a ni, a sangpa chu Buza a ni, Kemuela, Arama pa le;

²² Kheseda hai, Hazova hai, Pildasa hai, Jidlafa hai, Bethuela hai hi an nia.



²³Khan, Bethuela'n chu nâinupang Rebeki a neia, hi mi kiriathai hi Milkaii, Abrahama sangpa Nahora nâihai an ni.

²⁴Meithâinu irhming Reumi nu khomin Teba hai, Gahama hai, Tahasa hai, Maaka hai, a ineihai a ni.

Irphutna 23

Sari thi thu Abrahama'n a thân hmun hrang ram irchôk

¹Khan Sari dam sâng kum chu 127 a nia: hi hi Sari dam sâng kum chu a ni.

²Khan Sari chu Kanaan ram Kiriath-arba khuaa khan a thia, (hi hi Hebron khua a ni): khan Abrahama chu Sari chûlpuia châ hrangin a hong.

³Khan mithi ruak mâkin a thoia, Hit mihai kuanga khan,

⁴“Kei chu nin laia mikhual anga om ki nia, ki mithi ruak hi ki hmu lina rama nin phûmtir hrangin hmun ni pe roi,” tiin a hrila.

⁵Khan, Hit mihaiin Abrahama kha hiang hin an sâma,

⁶“Ka pu irngai ro, nangma chu kin laia hin hruaitu inthangtak ni nia: kin tâna hin ni inuamna taka ni mithi ruak chu phûm ro: ni mithi phûmna hrangin, mi tukhomin mithi ruak phûmna hrangin inhroi ma ung,” an tia.

⁷Khanchu Abrahama kha a thoia, kha mihai Hit mihai kha chubai a mûkhaia,

⁸khan, ki mithi chu hmu lina rama ki phûm hrang hi a dik nin ti'n chu, Makpela khura loi nhôm a om, kha kha ni pe hrangin Zohara nâipa Efrona kuang ni zong pe roi.

⁹Nin laia irphûmna hmun irchon a man nin iti ang lamin ni pe roi, tiin a nghihaia.

¹⁰Khan Efrona chu Hit mihai laia a om maia; khanchu Hit mi Efrona chu Hit mihai inhriatin, a khua dâimitzînga lût murdi inhriatin,

¹¹“Ni no ni, ka pu ni'rngai hi ro: loi khom nang ki pêk, loi nhôma khur khom nang ki pêk; ni mithi chu phûm ro,” tiin Abrahama an hrila.

¹²Khan Abrahama chu kha rama nâihai makunga khan chubai a mûkhaia,



¹³khan, kha rama omhai inhriatpuiin Efrona kuang, “A sa ni ni tipuiin chu; loi man chu nang pe ki ti; ki kut ata la tan lân, kha hmuna khan ki mithi phûm ki ti,” tiin a hrila.

¹⁴Khan Efrona’n Abrahama kha hiang hin a ti pea,

¹⁵“Ka pu ni’rngai pe hi ro: irnêng hmun tangka irzaminli irnôi, nang le keima kêra irpêk ngêt mo a inang? ni mithi chu phûm zel ro,” a tia.

¹⁶Khanchu Abrahama’n Efrona hê a lâk tâka; khan Abrahama’n Hit mihai inhriatin Efrona’n tangka sum a iti dôr chu sumru irzaminli, sum hlo mihai ihlo zât chu varin Efrona a pêk tâka.

¹⁷Kha zoiin chu Efrona loi, Mamre irdîna Makpela rama om chu, a loi le a sênga khur le, a loaia thing om murdi, a ram kôla thing om murdi chu,

¹⁸Hit mihai mithmua, a khuua lût murdihai mithmua khan, Abrahama irchon hrangin pêk indetin a om tâka.

¹⁹Kha zoiin chu Abrahama’n a dôngma Sari chu Kanaan ram Mamre kôla (Hebron khua a ni.) Makpela loi kôla khura khan a phûm ta.

²⁰Khanchu loi le a sênga khur om kha irphûmna irchon hrangin Abrahama pêk indetin a om ta.

Irphutna 24

Isaka hrang dôngma an zong

¹Khan, Abrahama chu a hong tar ok tâk sikin, Rengpa’n Abrahama kha bor tinrêng pêkin sat a vur tâka.

²Khan, Abrahama’n a siahlopahai laia, a in mihai laia a uliantak, a neinunhai chung a ircham neitu kuanga khan, “Lungkham takin ni kut kha ki teêl hnuaia hin thun ro;

³khanchu Rengpa irvân Pathian le irnêng Pathian irhming sâmin, ki omna rama Kanaan mi dôngmatehai hi ki nâipa Isaka dôngma inluatir hrangin ni iphal hrang ni mah:



⁴kin rama, ki sîngsuakhai kuanga fein ki nâipa Isaka dôngma ni izong pe hrang a ni,” a tia.

⁵Khan, a siahlopa khan a kuang, “Nupangnu hin hi rama om hrangin ni zui nuam ual ni moa? ni nâipa hi ni suakna ram tiang ki ihruai lût a inang kher mo?” a tia.

⁶Khan Abrahama’n a kuang, “Ki nâipa hi, kha rama khan chu hruai kîr nôk loi hrangin irdîn ro.

⁷Rengpa vân Pathian, ka pa kuang ata le ki suakna ram ni hruai suaktu le a ni donsuito le, hi ram hi nir chihai la pehai ki ti,” a tia. Ki kuanga chong le’nkungtu hin, “Ama ngêtin a vântirtôn chu ni kôla inlôitir a ta, kha ni rengata chu ki nâipa Isaka dôngma ni inneitir hrang a ni.

⁸Khan, nupangin nang a zui nuam no’n chu, ki kuanga ni chonginkung ata ni izôk a ni, i khom nisianlân ki nâipa chu kha rama khan ni ihruai kîr nôk viat hrang ni ma,” a tia.

⁹Khanchu a siahlopa khan a kut chu a pu Abrahama teêl hnuai a rola, hi thua hin chong an kung tâka.

¹⁰Khan a siahlopa khan a pu saringsei laia sômkhata tuanghaia, a pu neinun sahai chôin a fe ta: khanchu Mesopotamia ram Nahor-hai khuaa a fea.

¹¹Khan khohloi tiang dôngmatehai tui chôizoro laitaka khan tuisunsuakna hmun kho kôla khan a saringseihai chu an kualtirhaia;

¹²Khan “O Rengpa, ka pu Abrahama Pathian, lungkham takin a vuan hin hlo nin chuktir ro, ka pu Abrahama chungahin ni lungkhamna inlangtir roh.

¹³Ni en ro, tuikuang kôla omin, hi khuaa mi dôngmatehai tui chôihrangin an izuang a ni:

¹⁴khan hiang hin ni sianlân, dôngmate tu kuang khom ni ri se, ‘Ki in theina hrangin lungkham takin nin tuibêl kha ni’rhnuai pe ro,’ ki tia. Khan ama’n, ‘In ro, ni saringseihai khom in hrang pe ki ti,’ titu ka chu, kha mi kha ni nâi



Isaka hranga inkung ni ri se; khanchu kha nu kha ka pu chung a lungkhamna inlangtir ti kin inhriat thei hrang a ni,” a tia.

¹⁵Khan hiang hi a nia, a hril zoi mân reng, irngai ro, Abrahama nâi Nahora dôngma Milkaii nâipa Bethuela nâinu Rebeki chu a dârsuama tuibêl tiangin a hong suaka.

¹⁶Kha mi kha a hmêl khom a satak taka, dôngmate irthiang a nia, tu pasal khomin an la ichâipui dop loi a nia; tuikuanga a fea, a tuibêl inbitin a fe nôka.

¹⁷Khan, a siahlopa chu irtongpui hrangin an tâna, “Lungkham takin ni tuibêla tui kha nin intir ro ba,” a tia.

¹⁸Khan ama khomin, “In ro ba, ka pu,” a tia. Khan inrang takin tuibêla tui a kut leh luakin tui an intir tâka.

¹⁹Khan, tui a in zoiin chu, “Ni saringseihai khom tui an khop mâka chu tui chôi mai ki ti,” a tia.

²⁰Khan inrang takin a tuibêl kha an rong a, tui chôi hrangin tuisunsuak tiang a kîr nôka, saringseihai in hrangin tui a’rthak pehaia.

²¹Siahlopa khan a en maia, Rengpa’n a fe nasan hlo an chuk le chukloi inhriatna hrangin a dâihreka.

²²Khan, a saringseihai khom an khop ti an hriatin chu, siahlopa khan rângachak irthei a hnâra inkhâi zât le a kuta sum bânhril inhni a kêlsuaa.

²³Khan a kuang khan, “Tu nâinu mo ni ini, nin hril theiin mo?. Ni pa inah kin riakna hrang hmun mo om ni?” a tia.

²⁴Khan kha nu khan a kuang, “Bethuela Milkaii nâipa Nahora hranga a inei pe nâinu ki ni,” a tia.

²⁵Khan ama ngêtin a kuang khan, “Fapôl le sa bu fâk hrang chu kin nei ngai, riakna hmun khom kin nei,” a ti pea.

²⁶Khanchu siahlopa khan a lu a suka, Rengpa chubai mûkin



²⁷khan, “Ka pu chung a lungkhamna danglam ngailoi le a dikna khom irsamloi, Rengpa ka pu Abrahama Pathian chu inpâkin om ri se, kei khom hi Rengpa’n chu, ka pu urênghai in tiang a ni hruai a ni hi te,” a tia.

²⁸Khanchu dôngmatenu chu an tâna, kha thu kha a nu urênghai a hrilhaia.

²⁹Rebeki’n nucha a neia, a’rhming chu Labana a ni: khanchu Labana a suaka, tuikuang kôla mi ompa tiang a fea!

³⁰hiang hi a ni tâka, irthei le sum bânhril a farnu kuta a hmua, “Mihaiin an ni irkôk sup sup,” a tia, a farnu Rebeki thuhiril an hriatin chu, mihai kuang a fea, irngai roi, hi mi hi tuikuang kôla omin saringseihai leh khan.

³¹Labana’n, “Nang Rengpa satvur dongtu hongin lân, ki ina hong lût ro, itho mo pên tianga ni iom? in le saringseihai hrangin hmun ki sinsiam zoi ta kêng,” a tia.

³²Khanchu kha ina khan a lûta, Labana’n saringseihai neinun kha a sûta; khan saringseihai hrang fapon le bu anh a pêkhaia; an kehai irsûkna hrang tui a pêkhaia,

³³khan Abrahama siahlopa kuang khan, fâk hrang an dôn pea; khannisianlân, “Ki hongna bitak thu ki hril mâka ite fâk fa no ning,” a tia. Khan ama’n, “Hril ro,” a tia.

³⁴Khan ama’n, “Kei Abrahama siahlopa ki ni,

³⁵khan Rengpa’n ka pu chu a sate zelin sat a vura, mi irchongtak a nia: Rengpa’n a kuang belra rual, sehrât rual, sum tamtak, rângachak hai, siahlonu le siahlopahai, saringseihai tamtak a pêka.

³⁶Ka pu dôngma Sari’n a tar hnungin, ka pu nâipasal a neipuia! ama kuanga a inei a’rchon lua hrangtu a nia.

³⁷Khan, ka pu’n, ‘Ki omna ram Kanaan dôngmatehai hi ki nâipa dôngma’n ni inneitir hrang ni ma,’ a tia.

³⁸Ka pa in tiang, ki urêng le ki sîngsuakhai laia mi kêng a dôngma hrang ni inneitir hrang tiin chong a nin kungtira,



- ³⁹khan keima'n chu, 'Nupangin a ni zui nuam no duaiin te'? ki tia.
- ⁴⁰Khan ama'n ki kuang, 'Rengpa kuang ki omna hmun tina a vântirtôn chu ni kuang hong tîr a ta, ni ifena bi khom manchang nang insuatir ngêt a ti; khan kêng ka pa urênghai laia mi a dôngma hrang ni inneitir hrang a ni.
- ⁴¹Ki sîngsuakhai kuang ni tung tena kêng ki kuanga ni khomâk irsâm chong hi a irkât hrang, dôngmate nang an pêk no khomin ni khomâk irsâm chu irkât a ti,' a tia.
- ⁴²“Khaangin, a vuan hin tuikuang chu ki hong itung a ni ta, O Rengpa, ka pu Abrahama Pathian, ki kalchôina hi hlo ni nin chuk pe hrangin chu,
- ⁴³en ro, tuikuang kôla ki om chian, hiang hin ni sian chu, dôngmate tui chôi hranga zuang tukhom ni ri se, 'lungkham takin in hrangin nin tuibêla tui tômte ni pe ro,' ki tia.
- ⁴⁴Khan ama'n ki kuang, in ro, ni saringseihai hrang khomin tui irthak ki ti, titu takin chu, ka pu nâipa hranga Rengpa'n nupang a inkung ni ri se, ki tia.
- ⁴⁵Ki lungrîla ki sua zoi mân reng Rebeki hi tuibêl chôiin a hong, tui a zu thâl zoiin a hong: khan a kuang, 'Lungkham takin tui nin intir ro ba,' ki tia.
- ⁴⁶Khan inrangtakin a tuibêla tui chu a thâla, a nin intira, 'Ni saringseihai khom hi tui pehai ki ti,' a tia. Khanchu tui ki ina ki saringseihai khom an ina.
- ⁴⁷Khan keima'n, 'Tu nâinu mo ni ni?' tiin ki'r dona. khan ama'n, 'Bethuela Nahora nâipa Milkaii inei nâinu ki ni,' a tia: khan hnâra bet zât chu kinbettira, sum bânhril khom a kuta kin buntira.
- ⁴⁸Khan ki lu kûnin chubai ki mûka, Rengpa, ka pu Abrahama Pathian, ka pu sangpa nâinu hi a nâipa dôngma ni thei hranga lam dik ni'rhmutu kin pâka.
- ⁴⁹Khasikin atûn ka pu nin inrena, nin nuam pe hrangin chu nin hril roi; khan kêng ki vei tiang mo ki chang tiang mo ki ipan thei hrang,” a tia.
- ⁵⁰Khan Labana le Bethuela'n hiang hin an sâma, “Hi thil hi Rengpa bâia suak a ni hi te: a sia le a sa ite ni kuanga ti thei no ni ung.



⁵¹En roh Rebeki chu ni kôla om a ni, hruaiin lân, fepui ro, Rengpa'n a iti angin, ni pu nâipa dôngma chang ri se," an tia.

⁵²Khan hiang hin a nia, Abrahamama siahlopa khan an nuampui ti thu an hriatin chu, khûksadelin Rengpa chubai a mûk tâka.

⁵³Khan Abrahamama siahlopa chu sumru irvôna hai, rângachak irvôna hai, puandiar sahai kêlsuain, Rebeki a pêka; a nuchahai le a nu khom thil man tam takhai a pêka.

⁵⁴Khan ama le a rualhai khomin an fâkin an nêka, an riaka; zînga an thoia, "Ka pu kuanga nin fetir ta roi," a tia.

⁵⁵Khan a nuchapa le a nu'n, "Tôinu hi zoro sôtloite sîn sôm vêl chu la om ri se, kha zoi hong a ti," an tia.

⁵⁶Khan ama'n an kuang khan, "Ni khap inhnung ta no roi, Rengpa'n ki hongna hi hlo a nin chuktir ta; ka pu kuang ki kêr thei nôk latna hrangin nin fetir ta roi," a tia.

⁵⁷Khan anni khomin, "Tôinu chu koi ei ta ama la'rdon rei," an tia.

⁵⁸Khanchu Rebeki kha an koia, "Hi mipa kuanga hin ni fe nuam mo?" an tia. Khan ama khomin, "O ki fe nuam" a tia.

⁵⁹Khanchu an farnu Rebeki le an tîrtônnu le Abrahamama siahlopa le a rualhai chu an fe an phalhaia.

⁶⁰Khan, Rebeki chu bor a pêka, a kuang khan, "Kin farnu nang chu a sîng a sâng tamtak nu hong ni'n lân, nir chihai khom a doituhai ram khom lua zit ri sehai," an tia.

⁶¹Khanchu Rebeki chu a thoia, a siahlonu le saringsei chungu chuangin, kha mi kha an zuia. Khaang khan Abrahamama siahlopa'n Rebeki kha a hruaia, a fepui ta.

⁶²Khan Isaka chu Berla-hai-roi tiang ata a lei hongu, sim tianga om a ni sikin,

⁶³khan Isaka chu khohloi tiang chu kholâi a va chaia: rammual a hei thîr vêla, en ro, saringseihai hong a hmua,



⁶⁴khan Rebeki'n Isaka a hei hmu'n chu, a saringsei ata a chum tâka.

⁶⁵Khan Abrahamama siahlopa kuang khan, "So phâia a ni don hranga hong so tu ma ni?" a tia. Khan siahlopa khan, "Ka pu a ni so te," a tia: khanchu irkhûna puan a lâka a sil irkhum nôka.

⁶⁶Khan siahlopa khan a va itong murdi chu Isaka kha a hrila;

⁶⁷khan Isaka'n Rebeki chu a nu puan ina a hruaia, Rebeki chu a lua tâka; a dôngma a ni ta; khan a sate'n lung a thunga; khasikin Isaka chu a nu thia beidong khom kha a'rtha a'ngam pe ta.

Irphutna 25

Dôngma dang leh Abrahamama nâi neihai

(1 Tsn 1.32-33)

¹Khan, Abrahamama'n dôngma dang a neia, a'rhming chu Keturi a ni.

²Khan ama leh hin Zimrana, Joksana, Medana, Midian, Isbaka le Suaha a neipuia.

³Khan Joksana'n nâipasal Seba le Dedana a neia. Khan Dedana nâipasalhai chu Asur-hai, Letus-hai, Leum-hai an ni.

⁴Khan Midian nâipasalhai chu Efa, Efera, Hanoka, Abida le Elda-hai an ni. Hihai murdi hi Keturi nâihai chu an ni.

⁵Khan Abrahamama'n chu a inei murdi Isaka a pêk vinga,

⁶nu dang leh a nâihai chu a dam laiin lômmanin thil a semhai; Isaka mithmua nâi danghai chu sim tianga rama om hrangin a tîrhai ta.

Abrahamama thina thu

⁷Khan Abrahamama dam sâng kum chu 175 a nia.

⁸Khan Abrahamama chu tar lupôl bianga damin a thi ta, a'rchipuihai kuanga hruaiin a om ta.

⁹Khan, a nâi Isaka le Ismaela'n Hit mi Zohara nâipa Efrona loia Mamre irdîna Makpela khura an phûm ta;



10 hi loi hmun hi Abrahamama'n Hit mihai kuanga a irchôk a ni: hi hmuna hin Abrahamama le Sari chu phûmin an om ta.

11Khan hiang hi a nia, Abrahamama a thi zoiin chu Pathianin a nâipa Isaka chu sat a vura; khan Isaka chu Beer-lahai-roi kôla a oma.

Ismaela irchihai

(1 Tsn 1.28-31)

12Khan, hihai hi Abrahamama nâipa Ismaela, Sari suaknu, Aigupta mi Hagari'n Abrahamama irchi hranga nâihai chu an ni:

13an irhming le an irchi ang taka Ismaela nâipasalhai chu an ni: Ismaela nâilutîr tak chu Nebaiota a nia; a sanghai chu Kedara, Adbeela, Mibsama,

14Misma, Duma le Masa, an ni;

15Hadada le Tema, Jetura, Nafisa le Kedema-hai an ni:

16hihai hi Ismaela nâihai chu an ni, an khua le an omna hmun ang zêla irziak a ni, an irchi ang takin chu rêng sômkhath inhi an ni.

17Khan, Ismaela dam sêng kum chu, kum 137 a ni: khanchu a thi tâka, a'rchihai kuang hruaiin a om tâk a ni.

18Khan a nâihai chu Havila ram ata Assuria ram panin Aigupta ram irdîn Sur dênin an oma.

Esaua le Jakoba suak thu

19Khan, hi hi Abrahamama nâipa Isaka irchihai chu an ni.

20Isaka'n Padana-ram-ah mi Suria mi Bethuela nâinu Labana farnu Rebeki leh an irlua lai hin kum 40 mi a nia. (Padana ti chu Mesopotamia ram le hmunkhat a ni.)

21Khan, a dôngma kha nâi nei loiin a chinga, khasikin Isaka'n Rengpa kuanga nâi a zong pea. Khan,Rengpa'n a zongna chu sat a vura, a dôngma Rebeki chu an rai tâka.

22Khan a nâi vonghai chu a phîng sênga an irsuala; khan ama'n chu itho mo hianga om hrangin teh ki hringa? a tia, khanchu Rengpa irdon hrangin a fea.



²³ Khan Rengpa'n a kuang khan, "Ni sul sũaga khan mi nam hni an om, nangma sũaga ngêt mi nam hniin irsen an ti: nam khat hrât a ta, nam khat dok a ti: khan, a ulian ualpu khan a sangpa sin tho pe a ti," a tia.

²⁴ Khan, a nâi nei zoro a hong nâiin chu, a sũaga khan inphîr an nia.

²⁵ Khan a nâi ulian ual chu a senin, puan irmul anga irmul neiin a suaka; khanchu a'rhming khom Esaua an phuaa,

²⁶ kha zoiin chu a sangpa a hong suak nôka, a kut leh Esaua keârtui a chela; khanchu a'rhming khom Jakoba an tia; khan Rebeki'n annihai a nei zoro hin Isaka chu kum 60 mi a ni.

²⁷ Khan nâipanghai kha an hong lian tâka, Esaua chu sa kâp thei mi a nia; Jakoba rêk chu mi phûkdâi, puan ina om ngai a nia;

²⁸ khan Isaka chu sakhi hme fâk ngai a ni sikin, Esaua chu a'rngaiinat uala; Rebeki'n chu Jakoba a'rngainat uala.

Esaua'n a nâilutîr nitna a zuar

²⁹ Khan, Jakoba'n sũa khat chu bu anh a lei suanga, khan Esaua chu ram ata châmsôl irveiin a hong lûta:

³⁰ khan Esaua'n Jakoba kuang khan, "Lungkham takin ni bu anh suang kha nin netir ro ba; a sũa ki sũa tâk," a tia. Khasikin kêng a'rhming khom Edoma an iti a ni.

³¹ Khan Jakoba'n, "Ni nâilutîr nitna nir chotir bak ro," a tia.

³² Khan Esaua'n, "Irngai ro, ki ithi va vâng kêng a ni ta, ki nâilutîr nitna ringotin ite a'rfena om ma!" a tia.

³³ Jakoba'n, "Ki kôla khomâk irsâm bak ro," a tia. Khanchu khomâk a'rsâm tâka; a nâilutîr nitna chu Jakoba kuang a zuar tâka.

³⁴ Khan, Jakoba'n Esaua kha bai le a dâl suang kha a pêka; khanchu a fâkin a nêka, kha zoiin a thoia, a fe ta: hiang hin Esaua'n a nâilutîr nitna hi ite bea a ibe loi a ni.

Irphutna 26



Isaka Gerar rama a om

¹Khan kha rama khan Abrahamama dam laia châm tâk ti ang khan, châm a tâk nôka, khanchu Isaka chu Filistian-hai rêng Abime-leka kuang, Gerar khuua a zu fea.

²Khan Rengpa chu a kuang an lâr pea, “Aigupta rama chu zu fe no ro; ram nang ki irhmûna khan om roh:

³ hi rama hin omin lân, ni kuang om ki ta, sat nang vur ki ti; hi ram murdi hi nangma le nir chihai pêkin, ni pa Abrahamama kuanga ki chonginkung kha ki indet hrang a ni.

⁴Khan, irvâna ârsi tam nêkin nir chi la’npung ki ti, hi ram murdi khom hi nir chihai la pe ki ti; khan nangma irchi ata rammual mi chi tin vânsatna dong an ti.

⁵Abrahama’n chu ki hê a lâka, ki thuhiril, ki thupêk le ki dânhai khom a zôm ngai ang khan,” a tia.

⁶Khanchu Isaka chu Gerar khuua khan omhmun a khuar tâka:

⁷ khan, a khuua mihaiin a dôngma thurchi an irdona; khan ama’n chu, “Ki farnu a ni,” a tia; a hmêl a sa sikin, “Hi khua mihai hin Rebeki sikin an ni that itinin,” tihna sikin, ki dôngma a nih ti ngam maka.

⁸Khanchu hiang hi a nia, kha hmuna khan zoro sôtak a om hnungin, Filistian-hai rêng Abimeleka’n tukver ata a hong vênga, irngai ro, Isaka’n a dôngma Rebeki leh an irsâi lai a hmuhaia.

⁹Khanchu, Abimeleka’n Isaka kha a koia, “Irngai ro, ni dôngma kêng a ni hi te; itho mo ki farnu kêng ni iti hi?” a tia. Khan Isaka’n a kuang, “Ama sikin ki thi ngânin te ki ti sika a ni,” a tia.

¹⁰Khan Abimeleka’n, “Kin chung a hin itho mo hianga ni iti? mihai tu khôkin mani ni dôngma hi an lei siatpui thei hrang anga, khatena chu keini kêng theilo ni ni inchang hrang a ni hi te,” a tia.

¹¹Khan Abimeleka ngêtin, “Mi tukhomin ama mo, a dôngma moh an them puhai chu thatpaihai hrang a ni,” tiin mipuihai thu a pêkhaia.



¹²Khanchu Isaka'n kha rama khan omin loi a thoa, hi kuma hin bu khom tamtak a nei: Rengpa'n sat a vur pea.

¹³Khanchu a hong roiinpuuin, mi'rchongpa a hong kêi tâka:

¹⁴Belra le sehrât a hong neia; insûng mi khom tamtak an hong punga; khanchu Filistian-haiin an hong hnarsa tâka.

¹⁵Khan a pa dam laia a sinthotuhaiin tuisunsuak hmunhai kha Filistian-haiin an hong nel inbit pehaia,

¹⁶khan Abimeleka'n Isaka kuanga khan, "Kin kuang ata rot nôk ta ro, keini nêkin ni ihrât kêng a ni," a tia.

¹⁷Khanchu Isaka chu khatak ata a suaka, Gerar phâia a puan in a sung nôka, om hmun a khuar nôk ta.

¹⁸Khan, Isaka'n a pa Abrahamama dam laia tuisunsuak choi angin a choi nôka; Abrahamama thi hnungin Filistianhaiin an nel inbit pehai sikin: khan, a pa'n irhming a iphuahai angin irhming an neitirhai nôka.

¹⁹Khan, Isaka a sinthotuhaiin phâia khan an laih nôka, kha hmuna khan tuihnâr nei an choi doka.

²⁰Khanchu Gerar khuaa sa enkoltuhaiin, "Kha tui kha kin ta kêng," tiin Isaka sa entuhai leh an irsêla: khanchu kha hmun khan an irsêl sikin a'rhming khom "Esek" tiin a phua ta.

²¹Khan tuisunsuak dang an choi nôka, kha khom kha irchupuihai tumin an sêlhai nôka, khanchu a'rhming khom "Sitna" a tia.

²²Khan, khatak ata kha a'rsona, tuisunsuak dang a choi nôka; kha kha chu irsêlpui ta mahai: khanchu, "Atûn kêng RENGPA'N 'hmun liantak a ni la isiam pe, hi rama hin irchi tamtak inpungin om ta ei ti," tiin a' rhming khom "Rehobot," a iti a ni ta.

²³Khan, khatak ata Berseba a hong fea:



²⁴kha ni zân khan Rengpa'n a kuang an lâr pea, “Kei hi ni pa Abrahamama Pathian kha ki ni; chi no ro, ni kuang ki om, sat nang vur ki ta, ki sinthotu Abrahamama sikin, nir chi la pung an ti,” a tia.

²⁵Khanchu kha hmun khan maichâm a siam irfûka, Rengpa irhming a sâma, puan in khom sungin a oma; khan Isaka sinthotuhaiin tuisunsuak an choi nôka.

Isaka le Abimeleka irngeina

²⁶ Khan, Gerar khua ata Abimeleka chu a rualpa Ahuzatha le a sipai ulianpu Fikola leh a kuang an hongga.

²⁷Khan Isaka'n an kuang, “Ni en nuam loia, nin kuang ata nin ni inhnot tâk kha, itho mo ki kuang nin la ihong?,” a tia.

²⁸Khan anni khan, “Rengpa chu ni kuang a om ti fel takin kin inhriat, khanchu ite nang irkôk ta loi hrang le thil sa ti no chu ni chungga ite tho ta loi hrangin, nang kin irzûl tâk ang khan, keini khom kin siatna hrang ite ni tho pe loi hrangin;

²⁹keini le nangma kêra chonginkungna ni neipui ro, kin iti; atûn chu nang vai kêng Pathian satvur dongtu ni inih tâk hi,” an tia.

³⁰Khan ama'n chu an ta hrangin hruai an thê pehaia, an fâkin an ina:

³¹khan zîng nôka chu an thoia, khomâk an irsâma, khan Isaka'n a tîrhai ta. Khanchu fel takin an ichîn a ni ta.

³²Khan, hiang hi a nia, hi nî ngêt hin Isaka sinthotuhai an hongga, an tuisunsuak choi thu an hrila, a kuang, “Tui kin hmu ta,” an tia.

³³Khanchu kha tuisunsuak kha “Seba” a tia; khasikin kha kho'rhming kha atûn ten hin “Berseba” a la ni mai a ni.

Esau'n nam dang dôngma a nei

³⁴Khan Esaua chu kum 40 mi a niin, Hit mi Beria nâinu Judithi le Hit mi Elona nâinu Basemathi dôngma'n a neia;

³⁵hihai hin Isaka le Rebeki lungrîl insôltirtu an ni.



Irphutna 27

Isaka'n Jakoba sat a vur

- ¹Khan hiang hi a hong nia, Isaka a tar tâka, ite hmu thei loiin a om tena chu a nâi Esaua a koia, a kuang, “Ki nâipa,” a tia. Esaua khan, “Hin ki om,” a tia.
- ²Khan Isaka'n, “Irngai ro a sên ki tar ta, ki thi hrang ni lak inhre ma ung;
- ³khasikin atûn hin lungkham takin ni timmatuahai, chôiin lân ram va chai ro, sakhi ni va kâp pe roh.
- ⁴Ki thi mân ngêt sat nang ki vur theina hrangin, ki indu tak anh suangin lân nin fatir ro,” a tia.
- ⁵Khan Isaka'n a nâipa Esaua a chongpui lai chu Rebeki'n a lei inhriata, khan Esaua chu sakhi kâp hrangin ram chai a fe tâka.
- ⁶Khan, Rebeki'n a nâipa Jakoba kuang, “Irngai ro, ni pa'n chu ni upa Esaua kuang
- ⁷sakhi ni va kâp pe'n lân ki thi mân nin fatirin lân, Pathian kuang sat nang ki vur theina hrangin nin fatir ro, a iti kin hriat.
- ⁸Khasikin, ki nâipa atûn hin thu nang ki pêk ang takin ki hê la'nlân,
- ⁹ni kêlhai laia va fe'n lân, a sa, a mar inhni hong chôî ro, khanchu ni pa indu lam takin nang suang pe ki ta:
- ¹⁰khan a thi mân ngêta sat nang a vur theina hrangin, fâk hrang kha ni pa ni va ipêk hrang a ni,” tiin a hrila.
- ¹¹Khan, Jakoba'n a nu Rebeki kuang khan, “Irngai ro, ka upa Esaua chu mul tama irmul a nia, keima lak irmul ma ung.
- ¹²Ka pa'n ni le'nthem a ta a huang kêng ki ichang hrang, satvur dong nêkin khosâl tongin kêng omna ki ti,” a tia.
- ¹³Khan, a nu'n a kuang khan, “Ki nâi ni khosâl tong hrang chu keima'n la chang rong: ki hê lâkin lân ni va la pe ro,” a tia.
- ¹⁴Khanchu a fea, a va lâk pea; khanchu a nu'n a pa indu lam takin a suang pea.



- ¹⁵Khan Rebeki'n a upa silkai satak, in sũaga om kha a lâka, a nũapa Jakoba an nghâktira;
- ¹⁶khan kêl mulhai kha a kut leh a ring vêla an khop pea;
- ¹⁷khan a anh suang le bai kha Jakoba a pêka.
- ¹⁸Khan a pa kuang a fea, “Ka pa,” a tia. Khan ama'n, “Ki nũa hin ki om, ki nũa tu khôk mo nin ini?,” a tia.
- ¹⁹“Ni nũa ulianpa Esaua ki ni, ni ni itır ang khan ki tho zoi ta: lungkham takin thoiin lân, sat ni vur hrangin, ki sakhi hme hi fa ta ro,” a tia.
- ²⁰Khan Isaka'n a nũapa kuang khan, “Ki nũa itina mo ni va man inrang bâka?” a tia. Khan, ama'n, “Rengpa ni Pathianin hlo a nin chuka a ni,” a tia.
- ²¹Khan Isaka'n Jakoba kuang khan, “Ki nũa lungkham takin ni hong nũa ro, nang le'nthem rong, ki nũa Esaua chu ni inih ma ni,” a tia.
- ²²Khan Jakoba'n a pa Isaka a va nũaia; a le'nthema, “A'rhâi chu Jakoba a nia, a kut chu Esaua kut a nia,” a tia.
- ²³Khanchu a upa Esaua kut angin a'rmul pe sikin inhre thei maka; khanchu sat a vur tâka;
- ²⁴khan “Ki nũapa Esaua lele chu ni ni mo?” a tia. Khan ama'n, “O ki ni lele,” a tia.
- ²⁵“Ni hong nai ual ro, khan kêng sat nang ki vur theina hrangin ni sakhi hme kha fa ta ki ti,” a tia. Khan a pêka, a fâk tâka: Uain khom a pêka a in tâka.
- ²⁶Khan a pa Isaka'n a kuang khan, “Ki nũapa hong nũaiin lân ni tum ro,” a ti pea,
- ²⁷ khan a va nũaia a tuma; khan ama'n a silkai mirim inhriatin sat a vur tâka. “Irngai ro, ki nũapa mirim hi Rengpa satvurna ram mirim ang a ni:
- ²⁸Khanchu Pathianin irvân irdo leh irnêng satna le, bu tamtak le uain tamtak nang pe ri se:



²⁹ nam tinin ni sin thohai sianlân; chi dang danghaiin chubai nang mûk ri sehai. Ni urênghai laia rêng angin omin lân; ni nu nâihaiin chubai nang mûk ri sehai: Khua nang sâltu chu khosâlin om sianlân, sat nang vurtu chu satvurin om ri se,” a tia.

Esaua'n Isaka kuang satvurna a zong

³⁰Khan, hiang hi a nia, Isaka'n Jakoba sat a vur zoiin chu Jakoba chu a pa kuang ata a lei suak zoi chakin, a upa Esaua chu sakhi sa pêlin a hong tunga.

³¹Ama khomin irhnik takin a suang pea, a pa kuang a hong chôia; a pa kuang khan, “Ka pa thoiin lân, satvurna ni pe hrangin, ni nâipa sakhi anh suang hi fa ta ro,” a tia.

³²Khan a pa Isaka'n a kuang khan, “Tu mo ni ni?,” a tia.

³³Khanchu Isaka chu a satêrenga inthingin a oma, “Sakhi kâpa, ki kuanga a hme hong chôia, ni hong tung mân ki lei fâka sat ki lei ivur tâk kha tu mo nin ini tâk? a ni khate, ama lak satvurin a lei iom hrang kêng a ni ta,” a tia.

³⁴Esaua'n a pa thuhiril kha an hriatin chu a milung siat chita inhriatin a chap khup khup a, a pa makunga khan, “O ka pa, kei hi, keima khom hi sat ni ni ivur ngêt hrang kêng,” a tia.

³⁵Khan ama'n, “Ni sangpa'n a ni hong huanga, nangma dongtum satvurna chu nang a isutpai tâk kêng,” a tia.

³⁶ Khan Esaua'n chu, “A'rhming khom Jakoba an tia, nin phua indik chu a ni hi te? hi voihi a ni khêl ta; ki nâilutîr nitna khom a ni lâk pea, irngai ro, atûn hin, ki satvur dongtum a ni sutpai nôk a ni ta,” a tia. Khan ama ngêtin, “Satvurna chu ni hôi viat ta mak che mo?” a tia.

³⁷Khan Isaka'n hiang hin a tia, Esaua kuang khan, “Irngai ro, ama chu nangma rêng ni hrangin ki siama, a urêng murdihai khom a sinhotu hrangin ki pêk ta; bu le uain khom nei tah a ta; ki nâipa nangma hrangin imo nang ki ipêk ta hrang,?” a tia.



³⁸Khan Esau'a'n a pa kuang khan, "Ka pa satvurna chu inkhat vai mo a ini? O ka pa kei khom satvurna chu nin dong ngêt ro," a tia. Khan, inring takin Esaua chu a chapa.

³⁹ Khan a pa Isaka'n a kuang khan, "Iringai ro, ni omna hrang chu irnêng sa chu hlataka, le irvân irdo khom hlataka, a iom hrang a ni.

⁴⁰ Ni chemin a ni, ni ihring hrang a ni, ni sangpa sin ni hong itho pe hrang a ni, khan, hiang hin, ni zoro hnungkhôn tiang chu a ringkol chu ni ring ata ni ipai hrang a ni," a tia.

⁴¹Khan a pa satvurna sikin Esau'a'n chu Jakoba kha en nuam ta maka; Esaua lungrîlin, "Ka pa lak idôr dam sôt ta no nia, a thi zoiin chu ki sangpa Jakoba chu thatpai ki ti," a tia.

⁴²Khan Esaua thuhiril chu Rebeki an inhrila; khanchu mi a tîra, Jakoba an koitirhaia; a kuanga khan, "Iringai ro, ni upa Esau'a'n ni chungchânga hin, nang that hrang tumin a om mai a ni.

⁴³Khasikin, ki nâipa ki hê hi la'nlân, atûn thoiin lân, Haran khuaa ki nuchapa Labana kuang rot ta ro;

⁴⁴ni upa ningmur a chum mâka chu a kuang lei va om ro;

⁴⁵ni upa ningmur hi a chum tena, ni chung a ithotum a'rnhil tena. Mi hong tîrhai ki ta; nang hong hruai nôk an ti. Itho sikin mo nin ruaia sîn khat sîngin nangni ki itheisam hrang?" a tia.

Isaka'n Jakoba Labana kuang a tîr

⁴⁶Khan Rebeki'n Isaka kuang khan, "Hit nâinuhai nun hi ki hnônghai: Jakoba hin hiang rama dôngmate Hit nâihai ang hi dôngma'n a neihaiin chu keima hrangin ite a'rfêna om no ni" a tia.

Irphutna 28

¹Khanchu, Isaka'n Jakoba kha a koia, sat a vura, thu a pêka a kuanga khan, "Kanaan ram dôngmatehai hi dôngma hrangin ni ienhai hrang ni mah.



²Thoiin lân Padanaram-ah ni nu pa Bethuela ina fe'n lân, khataka ni nu nuchapa Labana nâinuhai laia inkhat va luahai roh.

³Khanchu Pathian Itinrêng thotheiin sat nang vur a ti; nam tamtak ni la hong chang theina hrangin, na'npungtir a ti;

⁴ ni mikhualna ram, Pathianin Abrahamama a ipêk hi, ni lua theina hrangin Abrahamama satvurna khom nang indong sa ri se; nang le nir chihai khom," a tia.

⁵Khanchu Isaka'n Jakoba kha an fetira; khan Padana-ram-ah Esaua le Jakoba nu Rebeki nuchapa mi, Bethuela nâipa Labana kuanga khan a fe tâka.

Esaua'n dôngma dang a nei

⁶Khan Esaua chu Jakoba kha a pa Isaka'n sat a vur tâk sikin, dôngma nei hrangin Padana-ram-ah a tîra; sat a vur lai khan, Kanaan rama dôngmatehai hi dôngma hrangin ni ienhai hrang ni ma, tiin thu a pêk, ti le

⁷Jakoba'n a nu le a pa thu lâkin Padana-ram-ah a fe tah ti an hriata;

⁸khanchu Esaua'n Kanaan dôngmatehaiin a pa, milung chuk mah ti inhriatin;

⁹khanchu Esaua chu Ismaela kuang a va fea; Abrahamama nâipa Ismaela nâinu Mahalathi, Nabaiiotha farnu chu a dôngma hrangin, a dôngmahai khêla a nei nôka.

Bethel hmuna Jakoba'n irmang a nei

¹⁰Khan Jakoba chu Berseba rengata a suaka, Haran khua a pana;

¹¹misa a tâk pe tâk sikin, lam chimripa hmun irthiangna hmuna a riaka; khataka khan lung inkhat a lâka, lukhamin a doa; a zâlin a in tâka.

¹² Khan irmang a phana, irngai ro, irnêng chung a hin leidâk a zuang irdoa, a sîp irzumin irvân a suna, Pathian vântirtônhai an luiin an chuma.

¹³ Irngai ro, a sîp taka Rengpa an dinga, "Kei hi Rengpa, ni pu Abrahamama Pathian le Isaka Pathian ki ni: ni zâlna hmun kha nang le nir chihai nangni pe ki ti;



¹⁴ Khan nir chi khom irnêng chung sip an ti, nitâk tiang, nisua tiang, sim tiang, hmâr tiang la bit zoi nin ti: nangma ata nam tin la hong harsuak an ti.

¹⁵ Irngai ro, kei ni kuang om ki ta, ni fena hmun tina nang hrung ki ti; hi rama hin nang hruai nôk ki ti; ni kuanga ki ihril hi a tak a tung mâka nang irnghil no ning,” a tia.

¹⁶ Khan Jakoba kha a hong harin chu, “Hi hmun hin Rengpa a om ngêt; keima’n le’nhre loiin,” a tia.

¹⁷ “Khanchu hi hmun hi ichi le inzak a om tâk a ni! hmun dang ni ma, Pathian in kêng a ini, hi kêng hi irvân fena lampui a lei ini,” a tia.

¹⁸ Khan zînga Jakoba chu a thoia, lukham a ido kha a lâka, lungin a phuna, a sîp tiang sahriak a buaka;

¹⁹ khanchu kha hmun irhminga khan Bethel a tia: a khua irhming masa chu Lus a ni.

²⁰ Khan Jakoba’n, “Ka pa ina irtharngamtaka ki kîr theina hrangin Pathian ki kuang a oma,

²¹ hi kin zin ram lama a ni hruaia, fâk hrang bu le silkai a ni pêk hrangin chu, Rengpa chu ki Pathian ni a ti.

²² Hi ki lungphun khom hi, Pathian in ni a ta; khan ni ni ipêk hrang murdihai khom hin sôma inkhat chu nang pe ngêt ki ti,” tiin chong an kunga.

Irphutna 29

Jakoba Labana ina a tung

¹ Kha zoiin chu Jakoba chu a fe zêla, nisua tianga mihai omna hmun a tunga.

² Khanchu a hei en vêla, hmun ôla khan tuisunsuak hi a oma, a kôla khan belra pâl thum hi an oma; kha tuisunsuak ata belrahai kha tui an pêkhai ngaia; tuisunsuak fena lama lung lianpa a oma.

³ Kha hmuna khan belrahai an irbukkhôm ngaia; khan tuisunsuak kôla lung chu an khâi pehaia, belrahai tui an pêkhaia. Lung leh khan an tuisunsuak kha an khâr pehai nôka.



⁴Khan Jakoba'n an kuanga khan, "Urênghaio, kho tianga mi mo nin ini," a tia. Anni khan, "Haran khuaa mi kin ni," an tia.

⁵Khan an kuang khan, "Nahora nâipa Labana kha nin inhriat mo?" a tia. Anni khan, "O kin inhriat," an tia.

⁶Khan ama'n an kuang khan, "A dam laitak chu ma ni?" a tia. Anni khomin, "O a dam laitak a ni, va en roh a nâinu Rakili khom belra pâl hruaiin a hong mai," an tia.

⁷Khanchu ama khan, "Irngai roi, misa lak a la'rsânga, an lûthai zoro la ni ma, belrahai hi tui in intirhai unglân, van suahai nôk roi," a tia.

⁸Khan anni khan, "Thei ta no ni ung, belrahaiin tuisunsuak kôla lung irkhârna hi kêlhaiin an bingîn an inhlumpai mâka chu, a'rhlum zoi le vai kêng tui kin in intir theihai hrang a ni," an tia.

⁹Annihai leh an chong lai takin, Rakili chu a pa belrahai hruaiin a hong tung tâka.

¹⁰Khan hiang hi a nia, Jakoba'n a nu nuchapa Labana nâinu Rakili le, a nu nuchapa Labana belrahai a hmu'n chu, Jakoba'n a va panhaia, tuisunsuak kôla lung inkhâr kha an hlum paia, a nu nuchapa belrahai tui an intirhaia.

¹¹Khan Jakoba'n Rakili kha a tuma, in ring takin a chap ta.

¹²Khan Jakoba'n a pa tupa a ni thu le Rebeki nâipa a nih ti Rakili kha a hrila; khan Rakili chu an tâna a pa a va hril tâka.

¹³Khanchu hiang hi a nia, Labana'n a farnu nâipa Jakoba thurchi an hriatin chu, a don hrangin a van tân zôia, pominkuain a tuma, a in tiang a hruai tâka. Khan Jakoba khan thil murdihai kha Labana kha a hril pe vinga.

¹⁴Labana'n a kuang khan, "Khano'nte ki thisen kêng ni ni hi te," a tia: khan tha khat a kuang khan a om tâka.

Rakili le Leaii hrangin Labana kuang Jakoba irhloin a om

¹⁵Khan, Labana'n Jakoba kuang khan, "Ki tupa ni nih sikin a man boi rengin mo sin ni itho hrang? idôr mo ni hlo nuam? nin hril roh," a tia.



- ¹⁶Khan Labana'n nâinupang inhni a neia: a uliannu irhming chu Leaii a nia, a nâipang ualnu chu, Rakili a ni.
- ¹⁷Khan Leaii chu a mit a pôla, Rakili chu mi intuai demnaboi hmêl satak a ni.
- ¹⁸Khan Jakoba'n Rakili hi an dit uala. Khanchu, "Ni nâi nâipangnu Rakili hi a lua ki nuam sikin kum sari ni sinthoin samâk chang ki ti," a tia.
- ¹⁹Khan Labana khomin, "Mi dang lua nêkin chu ama ki inluatir hi kêng sa ual a ti duah: khasikin ki kôla om mai ta ro," a tia.
- ²⁰Khanchu Jakoba chu Rakili neiin kum sari samâk a chang tâka; a indit tak a ni sikin zoro sôtnote angin a bê tâka.
- ²¹Khan Jakoba'n Labana kuang khan, "Ki'rpôlpui theina hrangin ki dôngma chu ni pe ta ro, a kum khom a chuk tâk sikin," a tia.
- ²²Khanchu Labana'n a khuaa mihai koi khômin hruai an thepui tâka.
- ²³Khan hiang hi a nia, a zîng a hong irphut le chu a nâinu Leaii kha a hruaia; Jakoba kuang a hruai lûta, a pêka, khan Jakoba'n a lei irpôlpui tâka.
- ²⁴Khan Labana'n a siahlonu Zilpaii chu a nâinu Leaii suak hrangin a pêka.
- ²⁵Khan, hiang hi a hong nia, zîng khua a vârin chu Leaii kha kêng a ni pe tâka; khanchu Jakoba chu Labana kuang khan, "Ki chung a ni thil tho hi imo a omzia a ini tâk? Rakili lua hrangin samâk ki ichang mo ni ma? Itho sika ni ni ihuang mo?" a tia.
- ²⁶Khanchu, Labana'n, "Kin rama hin hianga nâipang ualin an uhai khêl hi dân a ni no sikin.
- ²⁷A unu ata sîn sari hi ser zoi unglân, kha zoi ata chu mi dang khom ni lua nôk thei," a tia.
- ²⁸Khanchu Jakoba khomin kha dân zômin a oma, sîn sari a ser zoi hnungin; a nâinu Rakili chu a dôngma hrangin a pêk nôka; kum sari dang samâk chang nôk hrangin.
- ²⁹Khan Labana'n a siahlonu Bilhaii chu a nâinu Rakili suaknu chang hrangin a pêka.



³⁰Khan, Rakili khom a'rpôlpui tâka, Leaii nêk khomin an dit ual a nia, Labana sintho hrangin kum sari dang samâk a chang nôk ta.

Jakoba nâihai

³¹Khan, Rengpa'n Leaii chu hmumâk a om ti inhriatin, nâi nei tamna hrisêlna a pêka, Rakili chu nâi boiin chingin a oma.

³²Khan Leaii chu an râia, nâipasal a neia, a'rhming chu Reubena a tia: "RENGPA'N ki dengtheizia a ni hmu sika a ni; atûn ata chu ki pasalin lung ni thung ta a ti," a tia.

³³Khan an rai nôka, nâipasal a nei nôk tâka; "Rengpa'n hmumâkin ki om ti an hriat sikin hi nâi khom hi a ni ipêk a ni," a tia, a'rhming khom Simeona a tia.

³⁴Khan, an rai nôka, nâipasal a nei nôka; "Atûn chu nâipasal inthum ki neipui tâk sikin, ki pasalin ni donsui nuam ta a ti," a tia; khasikin a'rhming khom Levia a tia.

³⁵Khan, an rai nôka nâipasal a nei nôka, "Atûna nâi hi chu Rengpa inpâkna'n hmang ki ti," a tia. Khasikin a'rhming khom Juda a tia; kha zoiin chu nâisalu a bâng ta.

Irphutna 30

¹Khan Rakili'n chu Jakoba leh nâi nei thei loiin an om ti an hriat suakin chu, a unu a hnarsa tâka; Jakoba kuang khan, "Nâi ni pe ro, khano'nchu, ki ithi hrang kêng," a tia.

²Khanchu Jakoba chu voikhat zelin Rakili chung a ning an mur pea; "Ni rîla ra phal loitu Pathian mo ni ni sôn?" a tia.

³"En ro, ki siahlonu Bilhaili hi irpôlpuiin lân, khan kêng nâi nei a ta, ama ata nâi ki nei theina hrangin ki malchunga hin nâi a inei hrang a ni," a tia.

⁴Khanchu a siahlonu Bilhaili chu a dôngma hrangin a phala, khan Jakoba'n a'rpôlpuia.

⁵Khan Bilhaili khan Jakoba leh nâipasal an nei ta.



⁶Khan Rakili'n, "Pathianin a ni ngaituaa, ki'rhâi inhriatin nâipasal a ni ipêk a ni," a tia: khasikin a'rhming khom Dana a tia.

⁷Khan Rakili suaknu Bilhail chu an rai nôka, Jakoba kha nâipasal dang a neipui nôka,

⁸khan Rakili'n, "Pathian irbuanpui angin ka unu ki'rbuanpuia, kin hnê ta," a tia. Khanchu a'rhming khom Naftalia a ti ta.

⁹Khan Leail chu nai dang khom nei ual loiin a la om mai iti a'rhriat suaka, a siahlonu Zilpail chu a hruaia Jakoba dôngma hrangin a pêk nôka.

¹⁰Khanchu Leail siahlonu Zilpail leh nai an nei nôka.

¹¹Khan Leail chu "A sân ki dormu a sa!" a tia: a'rhming khom Gada a phua ta.

¹²Khan Leail suaknu Zilpail khan Jakoba leh nâipasal dang a neipui nôka,

¹³khan Leail chu "A sate'n ar iama, nupanghaiin a sân ar iam ta ni ti an ti," a tia; a'rhming khom Asera a phua ta.

¹⁴Khan bu ât laitakin Reubena'n an loia khan Zolaidi a hmua, a nu Leail a pêka; khanchu Rakili'n, Leail kuang khan, "Lungkham takin ni nâipa Zolaidi ni sem ro," a tia. (Zolaidi omzia chu hloi chi khat, irnêng insatirna le hur, nghalna'n, an hmang ngai a ni.)

¹⁵Khan a kuang khan, "Ki pasal ni ni irchupui lua hi a tøm mo ni insit? ki nâipa Zolaidi khom hi mo nir chupui ni la itum?" a tia. Khan Rakili khan, "khano'nchu, ni nâipa Zolaidi irthul hin a vuan zân nang zâlpui nôk a ti," a tia.

¹⁶Khan khohloi tiang chu Jakoba loi hong tung chu Leail'n a va dona, "A vuan zân ni ni irpõlpui hrang kêng ki nâipa Zolaidi leh nang ki'rchõk tâk," a tia. Khanchu zâna chu hmunkhatin an zâl suam tâka.

¹⁷Khan Pathianin Leail chongchaina chu a sâma, an rai nôka, Jakoba nai ringana a neipui nôk ta.

¹⁸Khan Leail'n chu "Ki siahlonu chu ki pasal kuang ki pêk sikin, Pathianin lômman a ni ipêk a ni ta," a tia: khanchu a'rhming khom Isakara a phua ta.



¹⁹Khan Leaii chu an rai nôka, Jakoba chu nâipasal kiruk a neipui nôka,

²⁰khan Leaii'n, "Pathianin irchonhlu a ni ipêk a nih a tia; atûn ata chu nâipasal kiruk ki neipui tâk sikin ki pasal khom ki kôla om nuam ta a ti," a tia. Khanchu a'rhming khom Zebulun a tia.

²¹Kha zoiin chu nâinupang a nei nôka, a'rhming chu Dinaii a phua ta.

²²Khan Pathianin Rakili chu an hriat maia, khanchu a chongchaina a sâm pea, a sul an hong pe tâka;

²³khanchu an rai, nâipasal a neia: khan, "Pathianin keima irhming sâm in a ni ipêk a ni ta," a tia.

²⁴Khan, "Rengpa'n, nâipasal dang ni pe nôk ri se," a tia. Khanchu a'rhming khom Josefa a phua ta.

Jakoba le Labana irdôrna

²⁵Khan, hiang hi a nia, Rakili khan Josefa a nei zoiin chu, Jakoba'n Labana kuang khan, "Ki omna hmun ngêta, kin ram tiang nin fetir ta ro, a tia:

²⁶ni sin ki thona man ki dôngma le ki nâihai ni pe'n lân, nin fetir ta ro, ni sin ki itho lam laka nin hriat tâka," a tia.

²⁷Khanchu, Labana'n a kuang khan, "Lung nin khamin lân ni la ompui ual ro ba: Rengpa'n nangma zâra sat a ni vur ti tasânin kin hriat kêng," a tia.

²⁸Khan ama ngêtin, "Ni hlo hrang bîk inkungin lân, ni hril ro, khanchu nang pe ki ti," a tia.

²⁹Khan ama'n a kuang khan, "Itin mo ni sin ki itho, itina mo ni'rchon sial, kêlhai ki kuang an om ti ni inhriat;

³⁰ki hong mân khan chu a tômte kêng ni inei, atûn chu a sate'n an hong punga, an tam tâk hi te: ki fena hmun tina Rengpa'nsatvurin a inpung mai a ni: khannisianlân itika mo keima in sêngkua ta hrangin ki la isin ta hrang?" a tia.



³¹Khan ama khomin, “Imo nang ki ipêk hrang?” a tia. Khan Jakoba’n, “Ni sial, kêlhai khom nang enkol pe mai ki ti, hi ki thil indit ni zôm nuamin chu, a tia.

³²A vuan chu ni kêl le belrahai va enhai ki ta, belrahai laia a duk murdi le a râng murdi, le kêl laia khom a duk le a râng murdi a bingin zêkhai ki ta; kha hnung, atûn ata chu hianga duk le a râng irzir murdi chu ki ta ni hrangin keima hlo hrang chu ni ri se, a tia.

³³Khasikin atûn ata ni mithmua ki ihlo le ki thu zômna chu ki hlo chukna ni ihmu hrang a ni. Belra mo kêl mo a duk loi mo a râng loi mo ni hmu’n chu, ni ta kin rûkin nin tum ro,” a tia.

³⁴Khan, Labana’n, “Irngai ro, ni iti ang takin ni ta ri se,” a tia.

³⁵Khanchu hi nî sîna hin chu kêl duk le a râng murdi, belra duk le a râng murdihai chu a bingin an hruai indanglamhaia, a nâipa kuta enkol hrangin a pêka;

³⁶khanchu, ama le Jakoba kâra sîn thum fena lam hlataka an omtirhaia. Khan Jakoba’n Labana kêlhai chu an thâhai tâka.

³⁷Khan, Jakoba’n theikung le thingkung irzar chi khianghrol hring a lâka, a hmor irzumin khianghrol chu irtêk langin a siama.

³⁸Khan khianghrol a isunna, kêlhai tui hong inna ngai khêng, tui luangna kôlhaia khan tui in hrangin an hongin chu an inrâi ngaia.

³⁹Khanchu kêlhai kha inrâiin an têhai chu chial rekrük le râng bekbukin an suaka.

⁴⁰Khan Jakoba’n kêltehai kha a bingin a siahaia, khan kêl têhai chu Labana kêl hranga irhoi murdi a duk le a rânghai irhmu theiin, a bingin ama ta hai a siahaia, Labana kêl leh irzêltir loiin.

⁴¹Khan hiang hi a hong nia, kêl a hrât ualhai pâl an fâk hrang rikipa, khianghrol omna hmun tiang a hôlhaia; Jakoba’n tui luangna hmun, kêlhai irhmu theina hrang hmuna a khianghrol a sia ngaia.



⁴²Khannisianlân kêl irchi sarak loihai kôla chu sia nuam ma: khasikin a sa ok loihai kha Labana ta an nia. A sa, a hrâthai chu Jakoba ta an ni.

⁴³Khanchu Jakoba kêl chu a sate zelin an pung pea, kêl rual, satak tak hai, suaknu, suakpa, saringsei le sakuartunghai a nei tâk a ni.

Irphutna 31

Labana in ata Jakoba rotna

¹Khanchu, Labana nâihaiin, “Jakoba’n kin pa neinun murdi a lâk pe ving ta, hiang dôra roiinpuina hi a idong a ni ta,” an iti thu Jakoba’n an hriata.

²Khanchu Jakoba’n Labana hmêl a ena, matona angin a hmâi tâi pe ta mah ti an hriata;

³khan Rengpa’n Jakoba kuanga khan, “Ni’rchibulhai omna rama ni sângsuakhai kuang fe nôk ta ro, ni kuang om mai ki ti,” a tia.

⁴Khanchu Jakoba’n mi a tîra, sûl hmuna kêlhai omna hmun tiang Rakili le Leaii a koihaia.

⁵Khan an kuang khan, “Nin pa hmêl ki enin, matona ang khan ni ta mah ti kin hriata, khannisianlân ka pa Pathian chu ki kuang a om mai a ni.

⁶Nangni khomin nin pa sin hi ki theidôr ki tho ti nin hmu,

⁷khannisianlân nin pa’n a ni huanga, ki hlo khom hi voisôm dênin a ni thûl indanglam pe tâka; khannisianlân Pathianin a ni ompui mai.

⁸A zia chial rek rukhai hi ni hlo ni a ti, a ti nôka; kêlhaiin a te chial rekruk an nei intama, khanchu a zia a râng irtong kai kêng ni hlo a ti nôka; kêl murdi’n a râng irtongin an inte intam nôka.

⁹Khaang khan Pathianin nin pa kêlhai chu a lâkpai pea; keima a ni ipêk tâk a ni hi.

¹⁰Khan hiang hi a nia, kêl an inrâi phutin ki’rmang tiang a pa kêl hrungtu kêl chu, a râng irtongin, a chial rekruk, debekbuk an ini hrang a ni tih ki hmua.

¹¹Khan ki’rmangin Pathian vântirtônhaiin, ‘Jakoba an ni lei tia,’ ‘Hin ki om’, ki tia.



¹²Khan, anni khan, hong thîrin lân, hong envêl ta, a pa kêl hrungtuhai kêltêhai so, a râng irtong, chial rekruk le debekbuk kêng an itam a ni so te: Labana'n ni chung a thilthohai hi kin inhriat ving;

¹³ kei hi, 'Lungphuna sahriak ni ipol, ki kuanga chong ni inkungna Bethel Pathian kha ki ni: atûn hin thoiin lân, hi ram hi suaksan ta ro, ni'rzirna rama fe nôk ta ro,' a tia.

¹⁴Khan Rakili le Leaii'n hiang hin an tia, "Kin pa ina son kin hrangin mantum le irchon kin lua thei hrang a la iom ma ni?"

¹⁵ama'n chu khohmal ena a ni ien mo ni ta ma? a ni zuara, kin man khom a fâk zoi ta.

¹⁶Pathianin kin pa sum a ilâkpai pe murdi chu keini le kin nâihai ta a ni hi te: khasikin Pathianin ni kuanga a iti murdi chu tho ta ro," an tia.

¹⁷Khanchu Jakoba chu a thoia, a nâihai le a dôngmahai chu saringsei chung a an chuangtirhaia;

¹⁸khan Kanaan rama a pa Isaka kuanga fe hrangin a kêl murdi le a sum irtik murdi Padana-ram-ah a neinun murdihai chôiin an fe tâka.

¹⁹Khan, Labana chu a belra mul ep hrangin a lei fe pata; khan Rakili'n a pa millim an rûk pea.

²⁰Khan, Jakoba khom Suria mi Labana inhriat loi kârin a rotsana, ite hril viat loiin.

²¹Khaangin a neinun tam dôr chôiin a rot tâka; khan a thoia, tuipei kha a'rkâna, Gilead tâng tiang panin a fea.

Labana'n Jakoba a'rzûl

²²Khan sîn thum zoia chu Jakoba a rot ti Labana kha an hrila.

²³Khanchu a hnungzuihai hruaihaiin, sîn sari fena lama a'rzûla; Gilead tânga a hong phâka.



²⁴Khan, Suria mi Labana kuanga khan zâna a'rmang tiang Pathian a zuang pea, a kuang khan, "Jakoba kuang ite a sia le a sa thu hril loi hrangin irdîn ro," a tia.

²⁵Khan Labana'n Jakoba a phâk tâka, Jakoba chu tânga khan a puan in a lei sin zoi tâka: Labana khom a hnungzuihai leh Gilead tânga puan in an sina.

²⁶Khan Labana'n Jakoba kuanga khan, "I zât thil mo ni itho tâk, keima inhre loia ni irot tâk hi te, ki nâinuhai hi nu le pa boi anga irdon loia ni ihruaihai tâk hi?"

²⁷Itho mo inrûka ni irotpuihai, raifân taka hla, khuang leh hoitaka nangni intha theina hrang thu ite hril loia ni iom,

²⁸ki tûhai le ki nâihai tumhai hrang ni ni iphal loi? ni thil tho hi invêt tho dân anga ni itho a ni.

²⁹Nang insiat thei ki nih ti ni isôn loi ma ni: khannisianlân ni pa Pathianin zânin khan, 'Jakoba kuanga ite a sia le a sa hril loi hrangin irdîn ro,' tiin a ni hrila.

³⁰Khan ni pa irngaiin a fe nuam zap khom unglân, itho sika mo ki pathiantehai nin ni inrûk pe?" a tia.

³¹Khan Jakoba'n Labana kuanga khan, "Nang ki chi sika a ni; ni nâinuhai hi ni sutpai nôk ni ti, tiin ki insâp sika a ni.

³²Tukhomin ni pathian millim lâka omna chu dam no nihai; ni urênghai mithmua ni ta kin kuang om chu eninfelin lân, la ro," a tia. Rakili'n a inrûk ti Jakoba lakin inhre maka.

³³Khan Labana chu Jakoba puan ina, Leaii puan ina, le a siahlonuhai ruai puan ina a lût chita, khannisian ite hmu maka; khan Leaii puan in ata a suaka Rakili puan ina a lûta.

³⁴Khan Rakili chu millimtehai kha a lei lâka, saringsei neinun siana kêra a lei thupa, a lei toiphaa, khan Labana'n puan in a en chita, hmu maka.



³⁵Khan a pa kuang khan, “Ni makunga nang ki thoi pe no sikin, ki rêngpa, ni ning chu inmurtir no ro, nupang hmu ngai ki’rvei lai tak a ni sikin,” a tia. A zong irvêl ngot lakin hmu zoi ta maka.

³⁶Khan, Jakoba ning an mur pea, Labana kha a hâla; Jakoba’n Labana kuang khan, “Imo ki insiatna, imo ki sualna, hi dôr ni ni hong irzûl?”

³⁷Ki neinun murdi ni phong chit khoma, ni neinun imo ni iman mo a om? eini ruai kêra tu mo a dik le dikloi ni urêng hai le ki urêng hai mithmua hin infel ei tih hong sia roh.

³⁸Hi kum sômhni ni kuanga ki om tâka, ni belrapuihai, ni kêlpuihai an intea, a dam suak ngai loi mo an om, ni belrachal khom ite la thatin fa ngai ma ung;

³⁹ramsa ithohai lua nang hril nuam loiin; keiin ki ta leh kêng ki irthûltir ngai, sîna mo zâna mo irhmang chu tuam hrang ni ni, ni ti ngai sikin.

⁴⁰Hiang hin sin ki tho ngai; sîna misa luma, zâna a dâi irsein deng ni nin theitir tak taka, a zâl khom zâl ngai ma ung.

⁴¹Kha kum sômhni sîng chu ni ina ki oma: ni nâinuhai ruai hlo hrangin kum sôm hleiminli samâk ki changa; ni kêlhai hlo hrangin kum ruk ni sin ki la tho nôka: ki hlo lak voisôm dên rakin nin danglamtira.

⁴²Ka pa Pathian, Abrahama Pathian, Isaka Pathian ki kuang om no sianlân chu, kut koronga ni ni infetir hrang kêng a inih mo ni mah. Pathianin ki dengthei le ki dûktonghai hi a le’nhriat sikin, mizân khan chu nang a irchu a ni ta,” a tia.

Jakoba le Labana chonginkungna

⁴³Khanchu Labana’n Jakoba kuang khan, “Hi nupanghai hi ki nâihai an nia, an nâihai khom hi ki ta an nia, kêlhai khom hi ki kêlhai ving an ni, ni ihmu murdi hi keima ta ving a ni: a vuan hin hi ki nâihai le an nâihai chung a hin imo ki’rcham la om?”

⁴⁴tho kei le nangma kêra hin chonginkung ei ti; nang le keima kêra inhriatna hrangin ni ri se,” a tia.



⁴⁵Khanchu Jakoba'n lung a lâka, lungin a phuna,

⁴⁶khan Jakoba'n a urênghai kuang khan, "Lung va bukhai roi," a tia; lung an hong buka, an phunna hmuna bu anh an fâka.

⁴⁷Khan Labana'n kha lung irchuan hmun kha chu Jegar-Sahadutha a phuaa; Jakoba'n chu Galeed a phuaa.

⁴⁸Khan, Labana'n, "Hi lung irchuan hi kei le nangma kêra inhriat maina a ni," a tia. Khasikin a'rhming khom Galeed ti'n iphua a ni ta.

⁴⁹Mizpa khom an ti sa. Labana'n, "Irsena ei om hnungin, Rengpa'n ni enkol ri se.

⁵⁰Ki nâinuhai hi, deng ni intheitirhaia, dôngma dang ni neiin chu, tûte om loina hmuna, en ro, Pathian chu nang le kei nin hriatpuitu a ni," a ti saa.

⁵¹Khan Labana ngêtin Jakoba kuanga khan, "Hi lung irchuan hi en ro, nang le keima kêra lung ki iphun khom hi en ro,

⁵²ite ei irti loina hrangin hi lung irchuan leh phun hi eini ruai kêra inhriat maina lung changin om ri se.

⁵³Abrahama Pathian, Nahora Pathian, an pa Pathianin ei kêra thu chu ngaitua ri se," a ti nôka. Khan Jakoba'n a pa Isaka Pathian irhmingin khomâk a'rsâma.

⁵⁴Khan Jakoba'n tânga khan irbôlna Pathian a thoa, a urênghai kha bai fâk hrangin a koihaia; khanchu bai an fâka, tânga khan an riak tâka.

⁵⁵Labana chu zînga a thoia, a tûhai le a nâinuhai a tumhaia; sat a vurhai zoiin, Labana chu ama omna tiang a kîr nôk ta.

Irphutna 32

Jakoba'n Esaua irtokpui hranga irsiam

¹Khan Jakoba chu a fe zêla, Pathian vântirtônhaiin an le'rtokpuaia.

²Jakoba'n a hmuhaiin chu, "Hi kêng hi Pathian ihruaihai pâl an ni hi te," a tia: khanchu kha hmun irhming kha Mahanaim a ti tâka.



³Khan Jakoba chu, Seir rama, Edom phâia a upa Esaua kuanga mi a lei tîrhai baka,

⁴an kuang khan, “Ki rêngpa Esaua kuang khan hiang hin nin iti hrang a ni, ni sinthotu Jakoba’n hiang hin a ti: Labana kuang ata chu ki hong zôk tâka, hi hmun hin ki bingîn ki om ta;

⁵ki sial, ki sakuartung le ki belrahai, ki suaknu le suakpahai khom neiin ki om ta; khanchu ni mit ki tung theina hrangin, nang ki rêngpa hril hrangin mi ki hong itîrhai an ni,” tiin.

⁶Khanchu a mi tîrhai chu Jakoba kuang an hong kîr nôka, “Ni upa Esaua kuang kin va tunga, ama khom mi irzaminli tuangin nang irtongpui hrangin a hong,” iti thu an hrila.

⁷Khanchu Jakoba chu a sate’n a lei chia, chardong a le’rlâka: khanchu a kôla mi a iompuihai kha pâl hniin a lei semhaia, a kêl, sakuartung le belrahai khom buk hniin a lei siahai tâka;

⁸Esaua’n buk khat a hmua a that khoma buk khat an zôk theina hrangin a tia.

⁹Khan Jakoba ngêtin, “Ka pu Abrahamâ Pathian, ka pa Isaka Pathian, o Rengpa ni omna rama le ni sîngsuakhai tianga fe hranga ni tîrtu le nin thâ loi hranga ni hriltu,

¹⁰kei ni sinthotu chungâ hin ni thudik murdi le lungkhamna inlangtir ngai, ki’rchonhai chungâ hin, a chînte khom hi hmu inruk ni ma ung; hi Jordan dung hi, ki khianghrol leh vai ki’rkâna; atûn chu pâl hnia sema inpungin ki om tâk.

¹¹Khasikin lungkham takin ka upa Esaua kut ata hi, ni saninzôk ro; nu le nâihai kin rênga ni that hrang chu ki chipuihai sikin.

¹²Nangin nang siam insa ngêt ki ta, nir chihai khom tuipua chiaî tam anga tep zoi loi nêka tamin nang siam ki ti, ni tia,” a tia.

¹³⁻¹⁵Khan, kha ni zân chu kha hmuna khan a riaka; a’rchonhai chu kêlpui irzahni le kêlchal sômhni, kêlbelrapui irzahni le belrachal sômhni, saringsei



dût sôm lai a tê le sômthum, sehrâtpui sômminli le sehrâtchal sômkhât, sakuartung pui sômhni le a tê sômkhât, a upa Esaua lômna hrangin a bingin a siahaia.

¹⁶Khan a papâlin a zêkhaia; a siahlohai kha an hôltirhaia; an kuanga khan, “Ki maton tiang fe unglân, a pa pâlin nin kêr irhla vi viatin,” a tia.

¹⁷Khan maton taka fe kuang khan, “Ka upa Esaua leh nin irtoka, tu mi mo ni ini? kho tianga fe hrang mo ni ni? ni kôla omhai hi tu ta mo an ini? tia nang a’rdonin chu,

¹⁸ni sangpa Jakoba ta an ni; ka pu Esaua, nangma nang lômna hranga nang a hong ithon an ni; ama khom kin hnunga son a om; ti ro,” tiin thu a pêka.

¹⁹A hnunga la omhai khom a sial, kêl hôltuhai kuanga khan, “Esaua nin hmu’n chu, khang khan nin iti hrang a ni.

²⁰Ni sinthotu Jakoba chu kin hnunga son a om ti ving roi” a tia. Lômman ki ipêk hin a lôm theina hrangin, kha zoi le a hmêl la hmu rong, khanchu a raifân thei ngêt a ti, iti an sâp a ni.

²¹Khang khan an fe tâka; kha ni zân chu kha hmuna khan a riaka.

Peniel hmuna Jakoba’n mi leh an irbuan

²²Khan, zâna chu a thoia, a dôngmahai ruai le a siahlonuhai ruai le a nâihai sômhleikhathai a hruaihaia, Jabok tui irkânpuihai hrangin.

²³Annihai a hruaihaia, a neinun murdi leh tui a’rkânpuihai tâka.

²⁴ Khan Jakoba chu a bingin a om lai takin, mi inkhat a hongga, a’rbuanpui a’rbuanpuia, khovâr mân chu.

²⁵kha mi khan inhnê ma ung ti an hriatin chu, Jakoba malru a sômkhoi pea, a’rbuanpui laiin Jakoba malpui ru chu a koi pe tâka, a’rloru a’rphêt tâka.

²⁶kha mi khan, “Nin tha ta ro; khua a vâp tâk,” a tia. “Nang intha viat no ning sat ni ni vur mâka chu,” a tia.

²⁷Khan, kha mipa khan Jakoba kuang, “Imo nir hming nin hril ro?” a tia. “Ki’rhming chu Jakoba a ni,” a tia.



²⁸Khan kha mi khan, “Ni’rhming khom Jakoba nang ti ta no nihaia; Israel nang ti ta an ti; Pathian le mihriam nir buanpuia, nin hnê tâk sikin,” a tia.

²⁹Khan Jakoba’n ama chu hiang hin a’rdona, “Lungkham takin nir hming nin hril ro,” a tia. “Khan kha mipa khan i lo hrang mo ki’rhming ni ni irdon?” a tia. Khanchu kha mi khan sat a vur tâka.

³⁰Khanchu Jakoba’n kha hmun irhming hrangin Peniel ni ri se, a tia: Pathian chu hmâi irsongin ki hmua, ki hringna a ni hoi pe sikin, a iti a ni.

³¹Khanchu Peniel hmun a khêlin chu misa a hong suaka, misa’n a hong êlin chu, a malpui koi sikin a ke an bâi tâka.

³² Khasikin atûn ten hin Israel irchihaiin chu malpui irlo ru inbâi hme fa ngai mahai. Jakoba malpui ru sa lai tak a siat pe sikin

Irphutna 33

Jakoba’n Esaua a’rtongpui

¹Khan Jakoba chu a hong tanga, Esaua chu mipui irzaminli leh hong a hmuhai tâka. Khanchu a nâihai kha Leaii, Rakili le a siahlonuhai ruai kuang khan a semhaia.

²Khan a siahlonuhai kha a maton tiang a siahaia; Leaii le a nâihaiin an zuia; Rakili le Josefa chu an hnungtaka an oma.

³Ama chu an matona a fea; a upa a va phâk mân voisari irnênga khûksadelin chubai a mûka.

⁴Khan Esaua chu ama lôm hrangin a van tâna, a pom inkuaa, an irtuma, an ruaiin an chapa.

⁵Khan Esaua’n a en vêla nupang le nâipanghai a hmuhai; “So ni hong ihruaihai so tuhai mo an ini?” a tia. Khan ama’n “Pathianin lungkham taka ni sinhotu nâi ni pêkhai an ni so te,” a tia.

⁶Khanchu a siahlonu le a nâihaiin an hong nâia, kûnin chubai an mûka.

⁷Khan Leaii le a nâihai khom an hong a chubai an mûka; kha zoiin chu Josefa le Rakili khom an hong nâia, kûnin chubai an hong mûk sa tâka.



⁸Khan Esaua'n, "Sa le neinun ki hong ihmuhai rêk kha te? tu ta mo an ini" a tia. Khan ama'n, "Ki rêngpa ni mit ki tung theina hranga ki ta ki hong itîrhai an ni," a tia.

⁹Khan Esaua'n, "Kei khomin ki nei intam ki sangpa, ni inei murdi chu ni ta ni ri se," a tia.

¹⁰Khan Jakoba'n, "Ni thei no ni, ni mit ki tungin chu lungkham takin ki thilpêkhai kha ni la pe ro: Pathian hmêl hmu angin ni hmêl ki hmua, ki chungga ni lôm ti an langa;

¹¹Pathianin a nin renna sika ki inei a ni sikin, lungkham takin ki thilpêk chu ni pom pe ro," a tia. Khaangin an thêma an thêma, a pom pe tâka.

¹²Khan Esaua'n, "Tho fe ta ei ti, keiin nangni hruai ki ti," a tia.

¹³Khan a kuang khan, "Nâipanghai lak an la chîna, belra le sahai khom an tê an tam ti lak nin hriata; sùn khat vêl irngam loiin ei fepuihaiin chu an ithi zoi hrang kêng.

¹⁴Ki rêngpa lungkham takin ni sinthotu hi ni masanin lân: kei chu Seir tâng tiang, ni kuang ki hong tung mâka, ki sahai fe thei lam takin zâmin hongpuihai ki ti," a tia.

¹⁵Khan Esaua'n, "Ki hong ituanghai hi senkhat hi nang ma pe ki ti," a tia. Khan ama'n, "Nang ual no ni duah, ni milung a chukin chu a ruk ta," a tia.

¹⁶Kha tena chu Esaua chu Seir tâng panin a kîr nôk tâka.

¹⁷Khan Jakoba chu Sukoth hmun panin a fea, an omna hrangin in a sina; a sahai omna hrang khom a sin pehaia: khasikin kha hmun kha Sukoth an iti a ni.

¹⁸Khan Jakoba chu Padan-aram, ram rengata irtharngam takin Sekem khua, Kanaan rama a omna chu a tunga, dâimitzîng kôla khan a puan in zarin a oma.

¹⁹Khan a puan in zârna hmun chu Sekema a pa Hamora nâihai kuanga, tangka irzakhat leh a'rchôka.



²⁰Kha hmuna khan maichâm a siama, a'rhming khom El-elohe (Israel Pathian) iti a ni ta.

Irphutna 34

Jakoba nâinu Dinaii Sekema'n a châipui

¹Khan, Leaii nâinu Dinaii, Jakoba ineipui chu, a ram mihai hmu nuamin a va lêng suaka.

²Khan Hiv mi Hamora kha, kha rama rêng nâipa Sekema'n a lei hmua, a chelthunga, a lei zâlpui tâka.

³Khanchu, a milung kha Jakoba nâinu Dinaii ringot an sâp tâka, kha dôngmatenu kha a sân an dita, chonghoi ta takin a chongpui.

⁴Khanchu, Sekema'n a pa Hamora chu a hrila, "So dôngmate so ki dôngma hrangin ni ti pe ro," a tia.

⁵Khan Jakoba'n a nâinu Dinaii chu Sekema'n a lei châipui ti an hriata, a nâihai lak ram tianga sahai enin an oma: a nâihai hong mâka chu a dâihreka.

⁶Khanchu, Sekem pa Hamora chu Jakoba chongpui hrangin a hong,

⁷Jakoba nâihaiin an inhriatin chu ram rengata an hong! khan Jakoba nâinu zâlpuiin Israelhai laia thil saloi tho loi hrang ti a ni sikin an char a donga, a sate'n an ning khom an mur pehaia.

⁸Hamora'n a chongpuihaia; "Ki nâipa Sekem lungrîl lak nin nâinu chung a om rak tâka: lungkham takin nin luatir pe roi.

⁹Khanchu irlua irhlôm ta ei ti, nin nâinu nin luatir unglân, kin nâinuhai khom luahai nin ti.

¹⁰Khanchu kin kuang om nin ta; ram lak a la lian zapa, hi rama hin omin sin tho nin ta irfûk takin om nin ti," a tia.

¹¹Khan Sekema'n dôngmatenu pa le nuchahai kuang khan, "Nin ren unglân, nin inuam tak hril roi, nangni pe zel ki ti.

¹²Man le tui thilpêk chu nin inuam dôr ti roi nangni pe zel ki ti, i khom nisianlân nin farnu vai dôngma'n nin luatir ngêt roi," a tia.



- 13**Khan Jakoba nâi pasalhain an farnu Dinai irhming a le'nsiat tâk sikin, Sekem le a pa Hamora chu vârtakin huang irtêlin an hrila,
- 14**an kuanga khan, “Hi thil ser tanloi mi hi kin farnu pe thei no ni ung, kin pêkin chu kin irhming siatnabul a ni hrang sikin:
- 15**hiang hin chong nin inkung vaiin kêng nin iti angin a ini thei hrang: nin laia pasal murdi'n ser tan unglân, keini angin om roi;
- 16**khan vai kêng kin nâinuhai nin iluagai thei hrang, keini khomin nin nâinuhai kin iluagai thei hrang. Khanchu nin kuang om kin ta, irchikhat ei ini thei hrang an tia.
- 17**Khannisianlân ser tan thua kin hê nin lâk no'n chu, kin farnu chu hruai kin ta, fepui kin ti,” an tia.
- 18**Khan an thu kha Hamora le a nâipa Sekem chu a sate'n an lôma.
- 19**Khanchu ruathartepa chu Jakoba nâinu an dit hrai sikin, kha thil kha zoro sôt loiin a tho zela: ama hi a pa in sêng mihai laia chu mi inza le ingîk tak a nia.
- 20**Khanchu, Hamora le a nâipa Sekem chu, an khua dâimitzîng an va tunga an khuagai an hrilhaia,
- 21**“So mihai son an nir fûkpui tâka, khasikin hi rama omin irvaihai sian, ram khom a la lian tôk sikin, an nâinu so dôngma'n nei ei ta, ei nâinuhai khom nei an ti.
- 22**Khannisianlân irchi hmunkhat ei ni theina hrangin, ei kôla omin, ei irfûk theina hrangin, hi thil hi ei tho'n kêng ei irfûk thei hrang, ser tan nam an ini angin eini khom pasal murdi'n ser tan ni thei inlân.
- 23**An sahai, an sumhai, an inei murdi ei ta a ichang ving hrang mo ni ma? khasikin an thu hi a sa ti puihai ei ti, khan kêng ei kuang an iom hrang,” an tia.
- 24**Khanchu Hamora le a nâipa thu chu an khuaa mi murdi'n an zôma; pasal murdi'n an ser an tantirhai ving ta.



²⁵Khanchu, hiang hi a hong nia, sîn thum tena, an irh pehai lai takin, Jakoba nâihai pasal hni, Dinaii nuchapa Simeona le Levia haiin an chemhai chôiin, dâihrekin an khua kha an rûna, pasal om murdi an thatpaihai vinga.

²⁶A hnung taka Hamora le a nâipa Sekem khom chem ngaih takin an thathaia: Sekem in rengata Dinaii chu an hruai suaka.

²⁷Jakoba nâihai mi that nasan chu an farnu irhming an insiat sikin, khua kha an irûn a ni.

²⁸An belra pâlhai, an sehrât le an sakuartunghai an khuaa thil om murdi, le an loimâna neinunhai an lâk pehaia.

²⁹An sum nei murdi, an nâitehai le dôngmahai chu an bukkhômhaia.

³⁰Khan, Jakoba'n Simeona le Levia kuang khan, "Nangni'n hi rama omhai laia, Kanaan le Periz-hai laia hin ni hmumâkna sin nin thoa, ei tôm sikin pungkôm an ta an ni idoi hrang a ni, ni that an ta ki'rchihai leh irhmang vingin kin iom hrang a ni," a tia.

³¹Khan anni'n, "Kin farnu hi notizuar angin mo an ibe hrang?," an tia

Irphutna 35

Bethel-a Pathianin Jakoba sat a vur

¹ Khanchu, Pathianin Jakoba kuang khan, "Thoiin lân, Bethel-a fe ro, kha hmuna khan omin lân; ni upa Esaua kuang rengata ni rotsan laia, ni kuanga inlâr Pathian ta hrangin maichâm siam ro," a tia.

²Khanchu, Jakoba'n a in mihai kôla omhai kuang khan, "Nin kôla mi dang pathian biakhai kha paihai unglân; irthiang takin nin tukfamhai thûl roi.

³Thoi ei ta, Bethel-a fe ei ti, ki chardong le lungzîng laia ki kuanga om ngai Pathian ta hrangin maichâm siam ki ti," a tia.

⁴Khanchu mi dang pathian an kut le mikuara kuarkâia an ibet ngaihai kha an sûta Jakoba an pêka; khanchu Jakoba'n Sekem kho kôla sesua thing bula a thupa.



⁵Khanchu an fea, an khua vêla mihaiin an lei chihai, ite Jakoba nâihai chu irzûl ngam ta mahaia.

⁶Khaang khan Jakoba leh a kuanga om murdihai chu Kanaan ram Luz khua chu an tung ta, Luz khua chu atûna Bethel hmun hi a ni.

⁷Khanchu maichâm a siama, a upa kuang ata a rot lai khan Pathian a inlâr pena hmun a ni sikin a hmun chu El-Bethel a ti tâk a ni.

⁸Khan Rebeki donsuitu Debori chu a thia, Bethel hmun sesua thing hnuaia an phûma; khasikin a'rhming khom Alon-bakut an iti a ni ta.

⁹Khanchu Jakoba chu Padanaram ram rengata a hongin Pathian an lâr pe nôka, sat a vura.

¹⁰ Pathianin a kuanga khan, “Ni'rhming chu Jakoba a nia; atûn chu Jakoba nang ti ta no nihaia; Israel nang ki iti a ni ta.”

¹¹ Pathian ngêtin a kuanga khan, “Kei Pathian Itinrêngthoheitu ki ni: irchi tam takin hong pung ro; irchi tep zoi loi rak, nam dang dang changin hon pungtir ni ta, nir chi ata rênghai khom la hong om an ti.

¹²Khan Abrahamama le Isaka, ram ki ipêkhai hi, nang pe ki ta, ni thi tena khom nir chihai pe nôkhai ki ti,” a tia.

¹³Khanchu, Pathianin Jakoba chu a mâksan nôk tâka.

¹⁴ Khanchu kha hmun khan Jakoba'n lung a phuna, a chung a khan thilinhlanin, sahriak a buaka.

¹⁵Khanchu Jakoba'n Pathian leh an chongna hmun irthiang hi “Bethel” a iti a ni.

Rakili thina thu

¹⁶Bethel ata an fe nôka, khan Efrat khua tungna hrangin chu a la hla tala; Rakili chu nâiha'n a sê tâka.

¹⁷A sân a na pe tâka, a kurmanu'n, “Chi no ro, nâi dang ni inei nôk hrang a ni ta,” a tia.



¹⁸Khanchu, hiang hin a nia; a'rtha suaksanin a thi tâka, a nâi irhming khom Benonia a tia; a pa khan chu Benamina a tia.

¹⁹Khaangin Rakili chu lampuia Efrat lama an phûma (Efrat chu Bethlehem khua a ni.)

²⁰Jakoba'n a thân chung a khan lung a phuna: atûn ten hin Rakili thân lungphun a ni ta.

²¹Khaangin Israel chu a fe maia, Mig-dal-eder khêla a puan in a zar nôk ta.

Jakoba nâihai

(1 Tsn 2.1-2)

²²Khanchu hiang hi a nia, Israel chu kha rama khan a om laiin; Reubena'n a pa dôngma meithâi Bilhaili kha a va zâlpuia; kha thu kha Israela'n a le'nhriat suaka. Khan, Jakoba nâihai chu sômkhât inhni an nia:

²³Leaili nâihai chu Reubena (Jakoba nâilutîr) Simona, Levia, Juda, Isakara, le Jebuluna hai an nia.

²⁴Rakili nâihai chu Josefa le Benamina an nia:

²⁵khan Rakili suaknu Bilhaili nâi chu Dana le Naptali an nia.

²⁶Khan Leaili suaknu Zilpaili nâi chu Gada le Asera an nia: hihai hi Jakoba nâihai Padanaram-ah a ineihai an ni.

Isaka thina thu

²⁷Khanchu Jakoba chu Kiriath-arba khua Abraham a le Isaka omna Mamre, a pa omna chu a tunga. (Kiriath-arba khua chu Hebron a ni.)

²⁸Khan Isaka dam sâng kum chu irzakhat sômriat a nia;

²⁹Isaka chu a'rtha'n mâksanin, upatak tar dêna damin a ithi a ni ta; a'rchipuihai laia hruaiin a om tâka; a nâihai Esau a le Jakoba'n an phum ta.

Irphutna 36

Esau irchihai

(1 Tsn 1.34-37)

¹Hiang hin Esau irchihai suina chu a ni: (Esau hi Edoma khom an ti sa)



- ²Esaua dôngmahai chu Kanaan rama mi an nia; Hit mi Elona nâinu Adaii le Hiv mi Zibeona tunu, Ana nâinu Oholibami-hai hi an ni;
- ³ Ismaela nâinu, Nebaiota nâinu Basemathi khom a ni sa.
- ⁴Khan Adaii khan Esaua chu Elifaza a pea; Basemathi'n Reuela a neia;
- ⁵Oholibami'n Jeusa le Jalama le Kora a neihaia; hihai hi Esaua nâihai Kanaan rama a ineihai an ni.
- ⁶Khan Esaua chu a dôngmahai le a nâihai le a nâinuhai, a ina mi om murdi, a sa, neinunhai le a sum nei murdi chu Kanaan rama a inei murdi chôiin a sangpa Jakoba chu ram danga a rotsana.
- ⁷A sate'n irchon an nei tâk sikin, hmun khatin omsuam thei ta mahai; a sa, lêngna hmun a om ta no sikin.
- ⁸Khanchu Esaua chu Seir tânga khan a om tâka:
- ⁹khan, hiang hin Seir tânga Edom-hai irchi Esaua nâi le tehai chu an ni:
- ¹⁰Esaua nâihai irhming chu Elifaza Esaua dôngma Adaii nâipa le Reuela, Esaua dôngma Basemathi nâi hi
- ¹¹Elifaza nâihai chu Temana, Omara, Zefoa, Gatama le Kenaza hai an ni.
- ¹²Khan Timnai chu Esaua nâipa Elifaza ithisan meithâi a ni: ama hin Elifaza chu Ameleka a neipua: hihai hi Esaua dôngma Adaii irchihai chu an ni.
- ¹³Khan Reuela nâihai chu; Nahata, Zera, Sama le Miza hai an ni: hihai hi Esaua dôngma Basemathi irchihai chu an ni.
- ¹⁴Zibeona tunu Ana nâinu Esaua dôngma Oholibami nâihai chu Jeusa, Jalama le Kora a neipui a ni.
- ¹⁵Esaua nâihai laia irchi nitna changhai chu; a nâilutîr Elifaza nâihai hi an ni; Temana hai, Omara hai, Zefoa hai, Kenaza hai;
- ¹⁶Kora hai, Gatama hai, Amalek hai hi an ni: hihai hi Edom rama Elifaza ata irzirsuak irchihai an ni; Adaii irchihai chu an ni.



¹⁷Khan, Esaua nâipa Reuela irchihai chu; Nahata, Zera, Sama, Miza hai hi Edom rama Reuela ata irzir irchihai chu an ni; Esaua dôngma Basemathi irchihai chu an ni.

¹⁸Esaua dôngma Oholibami irchihai chu; Jeusa, Jalam, Kora hai hi an ni: hi irchihai hi Ana nâinu Esaua dôngma Oholibami irchihai an ni.

¹⁹Hihai hi Esaua nâi irchi changhai an ni. Esaua ata suakhai chu an ni.

Seira irchihai

(1 Tsn 1.38-42)

²⁰Hihai hi Seira Hor mi, kha rama om nâihai chu an ni; Lotana, Sobala, Zibeona, Ana,

²¹Disona, Ezera le Disana hai an ni; hihai hi Edom rama suak Hor mihai laia Seira irchihai chu an ni.

²²Khan Lotana nâihai chu Hora le Hemama an ni; Lotana farnu chu Timnai a ni.

²³Khan, hihai hi Sobala nâihai an ni; Alvana, Manahata, Ebala, Zefoa le Onama hai hi an ni.

²⁴Zibeona nâihai chu; Aia le Ana hai hi an ni: hi Ana hi a ni, a pa Zibeona sakuartunghai a enkol laia ramchârna hmuna tuilum khur hmupu kha a ni.

²⁵Hihai hi Ana nâihai chu an ni; Disona le Ana nâinu Oholibami hi an ni.

²⁶Hihai hi Disona nâihai chu an ni; Hemdana, Esbana, Ithrana, Kherana hi an ni.

²⁷Hihai hi Ezera nâihai chu an ni; Bilhana, Zavana le Akana hai an ni.

²⁸Hihai hi Disana nâihai chu Uza le Arana an ni.

²⁹Hihai hi Hor mihai ata suak irchihai an ni: Lotana, Sobala, Zibeona, Ana,

³⁰Disona, Ezera le Disana hai hi Seir rama Hor mihai ata suakhai chu an ni.

Edom rama rêng

(1 Tsn 1.43-54)

³¹Hihai hi Israelhaiin rêng an nei mâna, Edom rama roirêltu rêng hai chu an ni.



³²Beora nâipa Bela khan Edom rama roi a rêla; a omna khopui irhming chu Dinhaba a ni.

³³Khan Bela a thi zoiin chu, Bozra khuaa mi Zera nâipa Jobaba khan a hmun luain roi a rêla.

³⁴Khan Jobaba chu a thia, Teman-hai rama mi Husama'n a hmun luain roi a rêla.

³⁵Khan Husama a thi'n chu Bedada nâipa Hadada, Moab phâia Midian-hai thattu khan a hmun luain roi a rêla. A omna khua irhming chu Avit a ni.

³⁶Khan Hadada a thi'n chu, Masreka mi Samla khan thûlin roi a rêla,

³⁷khan Samla a thi'n chu Tuipui kôla Rehobot khuaa mi Saula khan ama irthûlin roi a rêla.

³⁸Khan Saula a thi'n chu Akbora nâipa Baal-hanana khan thûlin roi a rêla.

³⁹Khan Akbora nâipa Baal-hanana a thi'n chu Hadara irthûlin roi a rêl nôka. A omna khopui irhming chu Pau khua a ni, a dôngma irhming chu Mehetabeli a nia, Mezahaba nâi Matredi nâinu a ni.

⁴⁰Khan, hiang hin an in sêngkua le an omhmun le, an irhming anga Esaua irchihai irhming chu a ni; hruaitu Timna, hruaitu Alva, le Jetheta:

⁴¹hruaitu Oholibami, hruaitu Ela, hruaitu Pinon,

⁴²Kenaza, Temana le Mibzar,

⁴³Magdiel, Iram hai hi an ram Edoma omna ang taka irchihai; Esaua Edom-hai irchi chu a ni.

Irphutna 37

Josefa le a urêng hai

¹Khan Jakoba chu a pa omna Kanaan rama khan a oma.

²Hiang hi Jakoba irchihai thurchi chu a ni, Josefa chu kum sômhleisari mi a nia, a uhai kêl hôl a zuihaia; nâipang a la ni sikin, a pa dôngmahai Bilhahi le



Zilpaili nâihai kôla a om ngai a ni. Khan Josefa'n an isêl lam a pa kuang an hrila.

³Khan a pa Israela'n Josefa chu a tar hnunga nâi a ni sikin a nâi danghai nêkin an ren uala: songkol khom satak takin an sui pea.

⁴Khan, an pa'n an ren ual bîk ti a uhaiin an inhriata; khanchu a sate'n an hnarsa tâka, chongbâi hoi zel irhmu ta mahaia.

⁵Khan Josefa'n irmang a neia; a uhai kuang a hrila: khatak ata kha an hnarsa ual nôk tâka.

⁶Ama'n chu "Iringaihoi takin ki'rmang hi ni'ringaipui roi, a tia:

⁷iringai roi, loia bu ei âta, keima bumût kha a thoia; nin bumûthaiin an irhuala; ki bumût kha chubai an hong mûka," a tia.

⁸A uhaiin a kuang khan, "Nangma tê hin mo kin chung a roi ni irêl hrang?" an tia. Khanchu a'rmang thu a hril pehai khan a sân an hmumâk nôk ual tâka.

⁹Khan, zân khat chu irmang dang a phan nôka, a uhai a hrilhai nôka, "Iringai roi, irmang ki phan nôka; misa, le thahai, ârsi sômkhath inkhathai khin chubai an ni mûka," a tia.

¹⁰Khan, a pa le a uhai a hrila, khanchu a pa'n hiang hin a'rchua a kuang khan, "Irmang ni iphan hi i zât irmang mo a ini? kei le ni nu le ni uhai hin mo khûksadelin chubai nang kin imûk hrang?" a tia.

¹¹ Khanchu a uhaiin an hnarsaa; a pa rêkin chu a thuhiril kha a lungrîla a vong chiana.

Josefa an zuara, Aigupta rama a om

¹²Khan, a uhai chu Sekem-ah an pa kêl hôlin an fea;

¹³khan a pa Israela'n Josefa kuanga khan, "Ni uhai chu Sekem-ah kêng kêl hôl an ife? hongin lân, nang khom nang tîr ki ti," a tia. Ama khomin, "Ni tîr ro," a tia.



¹⁴Khanchu, “Va fe’n lân, ni uhai chu an dam le damloi thu, kêlhai khom va eninfelin lân, an thurchi ni hon hril nôk ro,” a tia. Khanchu Hebron phâi ata a tîr suaka Sekem chu a va tung ta.

¹⁵Khan, mi tu’n mani, loia a uhai zongin a chai lai kha a hmua: khanchu kha mi khan, “Imo ni izong?” tiin a’rdona.

¹⁶Ama’n, “Ka uhai ki izonghai, irngaihoi takin kêl an ihôlna hmun nin hril ro,” a tia.

¹⁷Kha pa khan hitak ata chu an lei suak nôk ta, “Dothan-a fe ei tih an iti chu kin hriat,” a tia. Khanchu Josefa chu a uhai kha a’rzûlhaia Dothan-a a hmuhaia.

¹⁸Anni khomin hlatak ata an lei hmua, khanchu a va tung mânin ama that hrang lam an lei ngaituaa.

¹⁹Irngai roi, so irmang neipa a hong;

²⁰tho thatpai ei ta, khurpadop inkhata inthapai ei ti, khanchu ramsain a that ti ei ta. Khanchu a’rmang kha itin mo a om pe inhre ta a ti, an irtia.

²¹Khan Reubena’n a le’nhriata, “A that chu thatpai no ih,” tiin a lei sansuaka.

²²Reubena’n chu a pa kuanga a hruai theina hrang lam zongin an kuang khan, “Thisen chu insuaktir no roi, ramchâr khurpadop inkhata intha unglân, nin kut chu ban no roi,” a tia.

²³Khanchu hiang hin a hong nia, Josefa chu a uhai omna a va tungin chu; Josefa songkol rông satak kha an lei khekpai pea;

²⁴khanchu an hruaia, khurpadopa an inthâka, kha khur kha tui om ta loi, a rong a ni.

²⁵Khanchu bu nêkin an irbuka, an hong thîra, irngai roi, Ismaela khual fe mihai Gilead ram ata saringsei, mirimhoi, thinghnâi, hloi le Mura pêlin Aigupta ram fe hranghai an hong,

²⁶khan Juda khan a urênghai kuang, “Ei sangpa ei thata, a thisen suak thup hin imo a’rfêna om hrang?”



²⁷tho kha nêkin ama that loiin Ismaela hai kuang son zuar ei ti; ei sangpa chu rîlbong khata nâi eini sikin,” a tia.

²⁸Khanchu Midian irvai mihai an hong, Josefa kha khurpadop ata an kaisuaa, Ismaela hai kuang khan tangka sômhniin an zuara. Khanchu Josefa chu Aigupta rama an hruaipai ta.

²⁹Khan Reubena kha a hong khurpadop a va ena, Josefa kha lei om pe ta maka, khanchu ningmurin a puan le diarhai a ir-ek seta.

³⁰A urênghai kuang a va fea; “Tôite kha lei om ta ma! kei te kho tiang mo fe ta ning?” a tia.

³¹Khan Josefa songkol kha a lâka, kêlchal an thata, songkol kha kêl thisen an pola.

³²Khanchu songkol rông Josefa ta chu, an pa kuang an chôia, “Hi hi kin hmu, ni nâipa songkol a ini mo eninfel ro,” an tia.

³³Ama’n chu an hriat zôia, “Ki nâipa songkol teh ni a ti ro; ramsain a ithat kêng a ni ta hi te, Josefa chu a ifâk inhekchit ni ta a ti na,” a tia.

³⁴Khanchu Jakoba chu a puan le diarkaihai a ir-ek seta, bora puan silin zoro sôttak a chûlpuia.

³⁵Khan a nâi pasal le nupang murdi’n irtharngam an saka, khannisianlân a’rtha irngam pe thei maka, “Ki nâipa thâna chûl chûlin kei khom ki va ithi hrang kêng,” a tia. Khaangin an pa chu ama irngaiin a chap mai ngaia.

³⁶Khan Midian-haiin Josefa kha Aigupta rama a lupuitak Faroa hnuiaia hruaitu inkhat, enkoltu pôl hruaitu Potifara kuanga khan an zuara.

Irphutna 38

Juda le Tamari

¹Khanchu hiang hi a hong ni tâka, Juda chu a urênghai kuang ata a rota, Adulam khuua mi Hira irbelin a oma.

²Juda chu kha hmuna khan Kanaan mi Sua nâinu a hmua, dôngma’n a neia;

³khanchu an râia, nâipasal a neia; Juda’n a’rhming khom Era tiin a phua ta.



- ⁴Khan an rai nôka nâipasal an nei nôka, a nu khan a'rhming chu Onana a tia.
- ⁵Khan nâipasal an nei nôka; a'rhming khom Sela an tia. Hi nâi a suak lai hin Juda chu Khezib khuaa a om.
- ⁶Khan a nâilutîr Era chu đôngma an lâktira, a'rhming chu Tamari a ni.
- ⁷Khan Juda nâilutîr Era chu Rengpa mithmua mi sual a nia; khanchu Rengpa'n a thatpaia.
- ⁸Khan Juda khan Onana kuang, "Ni upa đôngma siatpuiin lân; a pasal leh an tho tumhai tho pe'n lân, ni upa irchi inpung pe ro," a tia.
- ⁹Onana khan ama irchi a ni loi hrang ti an hriata; khanchu hiang hin a nia, a upa đôngma a siatpui rikipa, a upa irchi a nei thei lina hrangin pên tiang a kêlsua ngaia.
- ¹⁰A sintho dân kha Rengpa mithmua chu sualtak a nia: khanchu ama khom a that nôka.
- ¹¹Khanchu Juda khan a moinu Tamari kuang khan, "Ki nâipa Sela hi ruatharte a chang mâka chu pasal nei loiin ni pa ina lei om mai ro," a tia. khano'nchu ama khom hi a uhai angin ni thi pe a ti, a iti a ni. Khanchu Tamari chu a pa ina a va om tâka.
- ¹²Khanchu Juda đôngma Sua nâinu kha a thia; khan zoro sôt viat tena Juda'n ite an sâp no tena chu, Timna khuaa a belra mul eptuhai kuang khan ama le a rualpa Adulam khuaa mi Hira leh an fea.
- ¹³Khan mihaiin Tamari kha, "Ni tarpu chu belra mul ep hrangin Timna khuaa hong hrang a ni," iti an hrila.
- ¹⁴Khanchu a pasal chûlpuina songkol kai kha a lei khekpaia, irkhumna puan leh a le'rtuama, Timna khua lam Enaim dâi kôla a lei toia; Sela khom ruatharte a ni tâka. A san chu Sela đôngma hrangin inbeipui mah ti a le'nhriat sikin.
- ¹⁵Khan Juda'n a hmua, tu notizuar moh ni a ti, a tia; a hmêl a hmu infel no sikin,



¹⁶a lei lâm mai nupang kha a va pana, “Tho lungkham takin zâlsuam ei ti,” a tia: a moinu kha a nih ti inhre loiin. Khanchu ama’n, “Ni ni zâlpuiin teh imo ni ni ipêk hrang?” a tia.

¹⁷Khanchu ama’n, “Ki kêlhai laia a chaltuai nang hong thon ki ti,” a tia. Khan ama’n, “Kha thil ni hong thon mâna ki lei dôn hrangin kongkhitna hrui ni pêkin mo?” a tia.

¹⁸Khan ama’n, “Imo nangma khith thei zât nang ki ipêk hrang?” a tia. Khan ama’n, “Ni’rhmingin ni kongkhitna hrui le ni khianghrol leh khan,” a tia. Khanchu a pêka, a zâlpui tâka, khanchu nâi a vongpui ta.

¹⁹Kha zoiin chu a thoia, a’rkhûna puan paiin a meithâi tukrivo a tho nôk ta.

²⁰Khan a kongkhit nupangnu a ipêk la nôk hrangin a kêlchal tuai kha a rualpa Adulam an chôitira, khannisianlân va hmu maka.

²¹Khanchu nupangnu omna hmuna mihai kuang khan, “Enaim khua tiang kôla notizuarnu kha kho tiang mo a om ta? tiin a’rdonhaia. Khanchu anni khan notizuar reng hi khuaa hin tûte om ngai mahai,” an tia.

²²Khanchu Juda kuang a kîr nôka, “Kha nu kha va hmu thei ma ung, an khuaa mihai khomin hi hin tûte notizuar om mahai an ti,” a tia.

²³Khanchu Juda khan, “khano’nchu a ta hrangin la ta ri seh a tia, khano’nchu mualphoi irsak ei ti, ni va hmu ta no sikin,” a tia.

²⁴Khanchu tha thum zoia chu mihaiin Juda kha, “Ni moinu Tamari khan pasal a zonga, khakhêla pa irdang loiin nâi a vong,” tiin an hrila; khanchu Juda’n, “Hruaisuak unglân hâl thatpai roi,” a tia.

²⁵Khanchu hruai suakin a oma, a iti chu “Hi thil neitupa leh hin kêng nâi ki ivong,” a tia. Khanchu a pu hril hrangin mi a tîra: khanchu ama khom a va zuia, a iti chu, “Hi thil kongkhitna hrui le khianghrol hi ni ta ma ni, eninfel sabak ro,” a tia.



²⁶Khanchu Juda khan a ta a nih ti an hriat zôia, “Keima nêkin a ifel ual a ni hi te, ki nâipa Sela lak inluatir loiin ki oma,” a tia. Khanchu Juda khan siatpui ngam ta mah.

²⁷Khan, nâiha’n a sê zoro tena chu hiang hi a nia, a nâi chu inphîr an lei ni chiana.

²⁸Khanchu a nâi inkhat chu kurmâhaiin a kuta an lei chela, a suak masa chu nâilutîr a nih ti irdangna’n, a kuta patsen an khit pea.

²⁹Khanchu a kut a thun nôk lai takin a sangpa inkhat a lei zuang suak masaa. Khanchu an kurmâhai chardongin itina mo lampui nin irchu? an tia. Khasikin a’rhming khom Pereza an tia.

³⁰Kha zoi kêng matona a kut zuang suak masa patsen leh irkhit kha a zuang suaka: a’rhming khom Zera an ti.

Irphutna 39

Josefa le Potifara dôngma

¹Khanchu Josefa chu Aigupta rama an hruaia: Faroa hnuaiia hruaitu inkhat, a enkolhai chung a hruaitu, Aigupta mi Potifara’n Ismaela hai kuang ata a le’rchôka.

² Khan Rengpa chu Josefa kuanga omin, Josefa chu vânei tak a nia. Aigupta mi ina omin,

³khan a pu khan, Rengpa’n a ompuia, a sinthônahai hi Rengpa’nhlochukna a pêk ti an hriat suaka.

⁴Khanchu Josefa chu a pu mit a tung tak taka; khanchu a in sîngkua tena hruaitu nitna khom iam zoiin a pêka, a inei murdi a kut chung a sia zita.

⁵Khanchu hiang hin Rengpa’n satvurna changin Josefa sikin Aigupta in sîng mihai chu an in le loi, neinun sampârhai chung a Rengpa’n sat a vur ual uala.

⁶Khanchu a inei murdi chu Josefa kuta a sia vinga, a kuanga irchon om murdi chu a pu’n inhrepui loiin a kuta a pêk hleta, a bu nêk hrang ti no kai chu. Khan, Josefa chu mi hmêl sa le nunhoi tak a nia.



- ⁷Kha zoi chu hiang hi a nia; a pu dôngma'n Josefa chu an dita; sùn khat chu, "Ni zâlpui ro," a tia.
- ⁸Ama'n chu, a pu dôngma zâlpui hrang khan nuam maka, "Irngai ro, ka pu'n hi ina hin, ki kuang neinin omhai chung a ircham neina ni pêka ama'n ite nin hrepui maka,
- ⁹hi ina hin keima nêka irchamnei tûte om mahaia; a dôngma ni ni sikin nangma ti no chu ki kuanga hin ite inhroi maka; khasikin itin mo hi sual liantak hi sinin Pathian chung a sin ki insiat thei hrang?" a tia.
- ¹⁰Khanchu sùn tin zân tin hmunkhat hmârkhata ompuiin, a chongpui khomin ama zâlpui hrang rêng rêng tum viat maka.
- ¹¹Khaanga sintho hrangin in sũaga a va lûta; kha ni khan in sũaga tûte mi dang om mahaia.
- ¹²Khanchu a pi khan, "Ni zâlpui ro," tiin a songkol a lei chel pea: khanchu a songkol mâksanin an tâna, a suaksana.
- ¹³Khanchu a pi kuta a songkol mâksanin an tân tah ti an hriatin chu,
- ¹⁴a ina omhai chu a koihaia; "En roi hi, mualphoi ni sak hrangin Hebrai mi inkhat a hong lûta, ni zâlpui hrang tiin, irhâi inringtakin ki ikhêk a ni hi.
- ¹⁵Irhâi ki phoi pea ki khêkkhum tena chu hi a songkol mâksanin an tân ta," a tia.
- ¹⁶Khan Josefa pu hong mâka chu a songkol a lei dôn chiana,
- ¹⁷khanchu hiang hin kêng a ni tah ti thu a hrila, "Hebrai mi ei kuanga sintho hranga ni hong ihruai khan, mualphoi ni sak hrangin ki omna a hong lûta.
- ¹⁸Khan hiang hin a nia, irhâi inringin ki khêk pe tena kêng a chi'n a ni intânsan; hi a songkol mâksanin a om rak ta," a tia.
- ¹⁹Khanchu hiang hin a nia, Josefa pu khan a dôngma'n "Ni sinthotuin," hiang hin a ni ilo lam a nih ti a hril an hriatin chu, a ning a sate'n an mur pea.
- ²⁰Khanchu Josefa pu khan a hruaia intângna ina a khuma, khanchu kha intângna ina khan a om tâka.



²¹ Khannisianlân Rengpa chu Josefa kuang khan a om maia, intângna in nghâktuhai khom an rentirhaia;

²² khan, intângna in nghâktu khan, intângna ina om tuhai chungu hruaitu'n an siaa; khanchu an itho murdi kha Josefa itho a hong ni tâka.

²³ Rengpa chu Josefa kuanga a oma, a sintho murdi Rengpa'n hlo an chuktir pe sikin; intângna in enkoltu khan Josefa kuta thil om kha ite a nangna om pe ta maka.

Irphutna 40

Josefa'n intângna ina omhai irmang a hrilfiana

¹ Khanchu zoro sôtnote hnunga chu Aigupta rêng uain le bai siamtuhai ruaiin an pu ning an inmurtir pea.

² Khanchu Faroa'n hi hruaituhai inhni chungu hin a sate'n a ning an mur pea,

³ khanchu intângna ina a khumhaia; Josefa a ikhumna ina khan hmunkhatin an oma.

⁴ Khanchu intângna in enkoltupa khan Josefa kha annihai enkol hrangin a tia, khanchu a sintho'n zoro sôttak an om suama.

⁵ Khan intângna ina khan, zân khat chu uain le bai siam sinthohai inhni khan irmang an phana, omzia da dangin.

⁶ Zînga chu an omna hmuna khan Josefa a va fea, an hmêl ngûi khakhakin a va hmuhaia.

⁷ Khanchu Josefa'n, "Itho mo a vuan hin te nin ngûi bâka?" a ti pehaia.

⁸ Anni khan, "Irmang kin neia, tûte'n a ni hrilfia pe thei om mahaia," an tia. Khanchu Josefa'n, "Irmang hrilfia theina chu Pathian ta mo ni ma? I irmang mo nin iphan ni hril roi ba," a tia.

⁹ Khanchu uain siamtupa khan a'rmang a hrila, "Ki'rmangin, ki maton tiang hin grep kung a oma;

¹⁰ grep kunga khan ôn inthum a oma; a pâr irmuamin a hong pâr suaka, a pâra khan a ra hmin a hong oma.



11Khan Faroa khilât chu ki kuta hin a lei oma, a ra ki’rhmalâ, Faroa khilâta khan ki sôm pea, Faroa kha ki lei pêka,” a tia.

12Khanchu Josefa’n, “Kha kha chu hiang hin ni a ti: a ôn inthum kha chu sîn thum a nia,

13a vuan ata sîn thum zoia chu Faroa sintho nôk ni ta: khanchu a uain pêktu ni ni laia ang khan Faroa khilât pêktu la ni nôk ni ti, a tia.

14Khannisianlân ni vân a sa nôk tena chu a’rnhil vai ni hong irnhil no’n lân, Faroa kuang ki thurchi hril pe ngêtin lân, hi in ata hi ni hruaisuak lam ngaitua roh.

15Kei hi Hebrai-hai ram ata mi’n an nin rûka, mi’rhmanng ki nia, hi rama lak hin hianga irkhumna ina khum inruk hrang lakin ite ki insiatna om maka,” a tia.

16Khanchu bai siamtupa khom khan hrilfiana thu kha an hriata, Josefa kuang khan, “Kei khom irmang ki phana, ki lu chungâ hin bai khamphulu thum ki lei tiang irchuana,

17a chungtaka khan Faroa hranga bu, bai chi tinrêng a oma; khanchu ki tiang pum khan vatêhaiin an hong inchuka,” a tia.

18Khanchu Josefa’n, “Hi hi a hrilfiana chu a ni: khamphulu thum chu sîn thum ni a ta;

19a vuan ata sîn thum tena chu Faroa’n ni taksa ata ni lu chôikâng a ta, thingrêla nan khâi a ta; khanchu vatêhaiin nang an inchukin nang an ifâk hrang a ni,” a tia.

20Khan sîn thum ni tena chu, Faroa suak ni sîn chu a nia; Faroa’n a suakhai hrangin hruai an thea, a siahlohai laia mi uain siamtu le bai siamtu lu a chôikânga.

21Josefa’n a ihrilfia pehai ang takin, uain pe ngaitu chu uain petu ni nôk hrangin an sintir nôka.

22Bai siamtupa rêk chu an khâi thatpaia.



²³Khannisianlân uain pêktu khan Josefa kha inhre loiin a'rngil rak tâk a ni.

Irphutna 41

Josefa'n Faroa irmang a hrilfiana

¹Khanchu kum hni zoia chu, Faroa'n irmang a phana; Nail vadung kôla hin a oma.

²Sehrâtpui sari satak le mar tak tak, tuidung ata an hong suaka, phâiruanghai fâkin an oma.

³Khanchu sehrâtpui dang sari, kông tak tak, le por derdurin an hong suak nôka, tui ata kha sehrât danghai leh khan phâiruanga bila hmun khatin an lêng suama,

⁴khan sehrât kông le por derdurhai khan a sa le a marhai kha an fâkpaihaia, khanchu a hong har tâka.

⁵A hong zâl nôka, irmang a phan nôka; bu kung khata hin a vûi sari lianpapa le ra satak takin a vûi om a hmua,

⁶kha irzoiin chu a vûi sari nei phâivua isêm inrîl thei pai anga chînte te an hong suak nôka,

⁷khan a vûi chîntehai khan, a vûi lian le sahai kha an involpaihai vinga. Khanchu Faroa a hong hara, e! ki'rmang kêng a ni hi teh a tia.

⁸Zîng khua a hong vâra, Faroa chu a char an dong oka, khanchu Aigupta ram sûnga mitphil, dôithei, mi vârhai zong hrangin mi a tîra; khan Faroa'n a hril pehaia, khannisianlân tûte'n a hrilfia pe thei om mahaia.

⁹Kha lai takin, uain pêktupa khan Faroa kuang khan, "A vuan hin ki sual kin hriatsuak ta.

¹⁰Faroa'n a suakhai chung a ning an mura, khasikin kei le bai siamtupa chu intângna in hruaitupa kuanga intângna ina ikhumin kin oma;

¹¹zân khat chu kin ruaiin irmang kin phana, a dadang a nia;

¹²khanchu kha kin omna hmuna khan hruaitu inkhat, Hebrai ruathartepa a oma, kin irmanghai kin hrila, ama'n kin irmang omlam angin a ni hrilfia pea.



¹³Khanchu atûn hin ama ni ihrilfia pe lam angin a hong idik a ni; kei chu ki sin ki tho nôka, bai siamtupa chu inkhâi thatin a om ta a ni,” a tia.

¹⁴Khanchu Faroa khan Josefa kha a van koitirhaia, irhnot takin irkhumna in ata an hong hruaia, tui mei tôn zoiin, a tukrivohai thûlin, Faroa makunga a hong lûta.

¹⁵Khanchu Faroa khan Josefa kuang, “Irmang ki neia tûte a hrilfia thei om mahai, nangin irmang thu nin hriata ni hrilfia pehai thei tih mi insîr kin hriata,” a tia.

¹⁶Josefa’n, “Kha thu kha chu keima inhriat ni maka, Pathianin Faroa chu lungngam takin nang sâm ri se,” a tia.

¹⁷Faroa’n Josefa kuang, “Irngai ro, ki’rmang tiang hin tui kôla ki lei oma.

¹⁸Sehrâtpui sari satak tak, le mar tak tak an hong suaka, phâiruang bila an hongga;

¹⁹khan sehrâtpui sari dang, kông tak tak, por derdur an hong suak nôka, hianga kông sehrât hi Aigupta rama zel hin la om ngai mahai a ni.

²⁰Sehrâtpui sari satak tak le marhai kha an fâkpaihai vinga.

²¹an fâk zoihai khomin khop loiin an fâk lua’n irbe loiin an la kông le an la por maia, khanchu ki hong hara.

²²Voihnina chu bukung khata hin a vûi sari satak tak a sate zela tak an hong vûi suaka,

²³kha zoiin chu, khang dênin buvûi sari chîn tete phâivua isêm insiatpai hlet dôr an hong suak nôka.

²⁴Khanchu buvûi sari chîntehai hin a vûi lian le sahai kha an involpaihaiin ki hmua; mi thiam mi vârhai ki hrilhaia, tûte’n a ni hrilfia pe thei om mahai,” tiin a hrila.

²⁵Khanchu Josefa’n Faroa kuanga khan, “Faroa ni’rmang hi hmunkhat kêng a ini. Pathianin a itho lat hrang tak hi kêng nang a inhriattir a ni ta.



²⁶Sehrâtpui satak tak le marhai chu kum sari a nia; a vûi sari satak takhai khom kha kum sari a nia; khasikin ni'rmang hi hmunkhat a ni.

²⁷Sehrâtpui kông tak tak, le por derdur mar thei loihai khom kha kum sari a nia, a vûi sarikai leh hmunkhat a ni. Kha kha chu châm tâk hrang kum sari a ni.

²⁸Hi kêng hi Faroa kuanga ki ihril Pathianin a itho lat hrang hi Faroa a inhriattirna a ni.

²⁹Irngai ro, Aigupta rama hin irchongnain kum sari sâng om a ta.

³⁰Kha zoiin chu châm tâk kum sari la hong om a ti, khanchu Aigupta rama irchongnahai hi irzugin châmin a ram hi a ifâk irhmang hrang a ni.

³¹Irchongna hi a zuitu châm tâk sikin, hi ram hin a sate'n a la intak hrang a ni," a tia.

³²Khanchu Faroa irmang voihni a iphan nasan chu, a tak takin zoro sôtloitea a hong hrang sika a ni.

³³Khasikin Faroa'n "Mi inkhat mi vâ le mi bengvâr tak Aigupta rama hin inthang sianlân; hruaitu inchangtir ro, a tia.

³⁴Faroa khan hiang hin tho sianlân, hruaitu inthang sianlân, hi irchongna kum, kum sari sâng hin bu hmun ringa semin hmunkhat chu bukkhôm sianlân,

³⁵khanchu hruaituhai khan kha buhai kha lâk khômin Faroa ina buk khômin enkolhai sian.

³⁶Khanchu châm kum sari a tâk tena mipuihai nêk hrangin le'rsiam ta ri se," a tia.

Josefa Aigupta rama hruaitu nina a chang

³⁷Khanchu, kha thu kha Faroa le a sinthotuhai khomin a dik tiin an poma,

³⁸khanchu Faroa'n a sinthotuhai kuang khan, "Hianga Pathian irtha iompui mi hi mo hmusuak thei ni ni?" a tia.



- ³⁹Faroa khan Josefa kuang, “Pathianin hihai murdi hi nang a inhriattir sikin, nangma anga mi bengvâr le thiam hi om mahai:
- ⁴⁰nangma ngêt kêng ki in sêngkuahai chungu hruaitu ni ni ta, ki khua le tui ni ienkol hrang; rêngtoihmuna vai hin kêng keima inlal ki ti,” a tia.
- ⁴¹Khanchu Faroa’n Josefa kuang, “Irngai ro, Aigupta ram sênga hin hruaituin nang siam nôk ki ta,” a tia.
- ⁴² Khanchu Faroa kuta kutsabi kha lâkin Josefa a’rbuntira, puanirphân tukrivo pêkin a’rbeltira, a ringa rângachak irthei a’rhlitir ta.
- ⁴³Khan a sakor inhnina khan an chuangtira; “A matona hin mi tinin chubai mûk roi,” tiin an khêka. Khanchu Aigupta rama hruaitu a ni tâka.
- ⁴⁴Khanchu Faroa khan Josefa kuang, “Keima Faroa’n ki ti, nangma thu ni loiin Aigupta rama hin tûte’n an ke an kut irlek thei viat no nihai,” a tia.
- ⁴⁵Khanchu Faroa khan Josefa irhming kha Zafenat-panea a tia: khan Heliopolis khuaa deipu Potifara nâinu Asenathi an luatira. Khanchu Josefa kha suakin Aigupta ram murdi a’rfang phut tâka.
- ⁴⁶Josefa chu kum sômthum mi a ni tena hin Aigupta rêng Faroa hnuaia sin a itho a ni ta; Faroa kuang ata suakin kho tina Aigupta ram chu a’rfang suaka,
- ⁴⁷khanchu kha rama khan kum sari sêng kha chu bu a vâng intama.
- ⁴⁸Kha sênga bu an ineihai chu a’rfuangtirhaia. Kho sênga le hmun inchumnahaia an hrêtirhaia.
- ⁴⁹Khanchu Josefa’n tep zoi loi rakin tui puia chiaî nêka tamin bu a bukkhôm tâka.
- ⁵⁰Khanchu châm tâk mânin Josefa’n nâi inhni a neihaia, Hekopolis deipu nâinu Asenathi ineipui an ni.
- ⁵¹Josefa nâilutîr irhming chu Manasea a tia: “Pathianin ki sinthôna ra le ka pa in sêng mi hai a ni’rngiltir zoi tâk sikin,” a tia.
- ⁵²Khan a nâi inhnina irhming chu Efraima a tia. “Pathianin dengthei ki tuangna rama irchi a ni pêk tâk sikin,” a tia.



⁵³Khan kum sari irchongna kum chu a hong hek tâka,

⁵⁴châm tâkna kum sari chu, Josefa ihril angin a hong tung irphuta: ram tina châm a tâk tâka; Aigupta rama vai hin fâk nêk hrang a la omsun a nia.

⁵⁵ Aigupta rama mihai khan fâk hrang an boiin chu Faroa kuang fâk hrang zongin an va khêk ngaia, khanchu Faroa'n a mihai chu "Josefa kuang fe unglân; tho roi a iti murdi chu tho ngai unglân," a tia.

⁵⁶Khanchu a sate'n châm a tâka Aigupta rama khan, a bu siana in chu an hongga, bu kha zuarin a semhaia.

⁵⁷Irnêng chungga hmun tina a sate'n an châm sikin Aigupta rama Josefa kuanga mi hongin bu an hong izong ngai a ni.

Irphutna 42

Bu irchôk hrangin Josefa urênghai Aigupta rama an fe

¹Khanchu Jakoba'n Aigupta rama bu a om ti an hriata, khanchu a nâihai kuanga khan, "Itho mo ite ngaitua loia nin iom? a tia.

² Irngai roi, Aigupta rama bu a om ti kin hriat, khasikin phîngchâma ei thi loina hrangin fe unglân, zu'rcho roi," a tia.

³Khanchu Josefa uhai pasal sôm chu Aigupta rama bu irchôk hrangin an fea.

⁴Josefa sangpa Benjamina chu a pa Jakoba'n a uhai kha inzuitir maka; "Ama khom thil saloi a zu tong rêkin te," ti'n an sâp sika a ni.

⁵Khaangin Israel nâihai chu mipui dang a fehais leh hmunkhatin an irzuia bu irchôk hrangin, Kanaan rama khom châm a tâk sikin.

⁶Khan Josefa chu kha rama khan hruaitu tak a lei nia; ama ti loiin tûte ram dang mihai bu pêk thei ni maka: khanchu a uhai an hongga irnênga khûksadelin ama chubai an mûka.

⁷Josefa'n a uhai kha a lei hmuhaia, a la'nhriathai maia, khannisianlân an inhriat thei loina irbelin a'rvoa, henhrum tak takin a chongpuihaia, an kuang khan, "Kho rengata hong mo nin ni?" a ti pehaia. Anni khan, "Bu irchôk hrangin Kanaan ram rengata zuang kin ni," an tia.



- ⁸Josefa'n chu a uhai kha a la'nhriathai maia, anni'n chu inhre ta mahaia.
- ⁹Khanchu Josefa'n anni thurchi irmanga a iphan kha an hriat suaka, "A ni zuar dîpa hong kêng nin ni dua, kin ram sa le siat thu inhriat nuama," a tia.
- ¹⁰Anni'n, "Ka pu ni ma ung ni siahlohai hi ni kuanga bu irchôk hranga zuang kêng kin ini.
- ¹¹Mi inkhat nâi, mi diktak nâi kin ni, khasikin ni siahlohai hi nang a'rdîpa zuang chu ni viat ma ung," an tia.
- ¹²Khanchu Josefa'n, "Nangni iam ma ung, ram en irdîpa hong kêng ni nin ti," a tia.
- ¹³"Keini urêng hi Kanaan rama om mi inkhat nâi sômhleihni kin ni; kin sangpa mitumtak chu atûn hin kin pa kuang a lei oma, inkhat chu om ta ma," an tia.
- ¹⁴Khan Josefa'n an kuanga khan, "Ni'rdîpa zuang nin ni ki iti hi a dik a ni hi te:
- ¹⁵khasikin hiang hin fiain om nin ti; nin mitumtakpa kha nin hong hruai mâka chu hi hmuna hin Faroa kôla ikhumin nin iom hrang a ni.
- ¹⁶Nangni hi mi dik le mi fel, minlak nin tho le tholoi inhrena hrangin, nin laia mi inkhat tîr unglân, nin sangpa chu zuang hruai bak roi; khano'nchu mi irdîpa zuang nangni ki iti tâk ang khan fe thei loiin ikhumin nin iom hrang a ni," a tia.
- ¹⁷Khanchu an rêngin sûn thum a khumhaia.
- ¹⁸Sûn thum ni sûn chu Josefa'n "Kei lak Pathian ki chia, hiang hin tho unglân, khan kêng nin izôk thei hrang a ni.
- ¹⁹Mi diktak lele nin niin chu nin urêng laia hin inkhat suak hrangin masan unglân, a danghai chu nin in mihai châm an lei zôk theina hrangin bu pêl unglân fe roi:
- ²⁰khan nin mitumtakpa chu ki kuang zuang hruai roi; khan kêng nin thurchi chu a ifel hrang, thi ual no chin ni," a tia. Khaang khan a hê lâkin an thoa.



²¹Khanchu an sangpa chung a an sinsiat tho kha an inhriat suaka, “Lungkham taka sansuak hrangin a ni ngên tih ei inhriat khoma ei idonsui loihai kha, khasikin kêng eini khom hianga thil ei itong a ni ta,” an irtia.

²²Reubena’n, “Kha nâipang chung a thil saloi tho no roi nangni ti loi mo ki ni? ite bêin ni bê pe mak chêia, atûn teh hi a thisen phuba a ni ilâk a ni ta,” a ti pehaia.

²³Josefa’n an thuhrihai kha inhre loi hrang angin chong irhlettu kuang an iti a nia,

²⁴Josefa chu an ihrilhai kha inhriatin a’rngai a siatin a’rheia, a chap tâka; khanchu hiang hin a ti pehaia, an laia Simeona chu a hruai suaka, an mithmua a khit pehaia.

Josefa urênghai Kanaan rama kîr nôkna

²⁵Khanchu Josefa’n an phurhai siam pehai unglân an sumhai khom an hmarsa sûnga siain, lampuia an nêk hrang bufûn khom siam pehai roi, tiin thu a pêkhaia:

²⁶khanchu an phurhai chu an sakuartunghai chung a bângin khatak ata kha an fe tâka.

²⁷Mi inkhatin riakbuk an tunga a sakuartung bu pe hrangin a hmarsa a phonga sum kha a hmarsa sûnga khan a hmua,

²⁸khanchu a urênghai kuang khan, “Ki sum kha an ni isiam pe nôk kêng a ni ta, ki hmarsa sûnga a om,” a tia. An phûk an thing pehai raka, “Itina mo Pathianin hianga a ni ilo tâk hi te?” tiin chipumin an ir-en rum tâka.

²⁹Khanchu an pa omna Kanaan ram chu an tunga, an thil tong murdi an hrila;

³⁰an ram hruaitupa’n henhrum takin a ni chongpuia, mi en irdîptu pôlin an ni bêa,

³¹keini’n chu, “Mi diktak kin ni; mi en irdîptu chu ni ma ung:

³²urêng sômkhath inhni kin nia, pa inkhat sûnga mi kin ni; inkhat chu om ta maka; kin mitumtak chu atûn hin Kanaan rama kin pa kuang a om,” kin tia.



³³Khanchu an ram hruaitupa khan kin kuang, “Hiang hin mi dik nin ni le ni loi thu chu nangni inhria ki ti, nin urêng laia mi inkhat masan unglân, nin in mihai bu hong thakhai roi.

³⁴Khan nin mitumtakpa kha ki kuang zuang hruai roi; khan kêng mi en irdîptu pôl ni mak chêi ti inhriatin, mi dik nin nih ti ki inhriat thei hrang; kha zoiin kêng nin urêngpa khom hi nin ihruai nôk hrang, hi rama hin om nin ta, nin ihring thei hrang a ni ti,” an tia.

³⁵Khanchu an hmarsahai an inronga ni’n chu an sumhai an rêngin hmarsa sûnga an hmu vinga, an rêngin an pa khomin a hmua a sate’n a chi nôk tâka.

³⁶Khanchu an pa Jakoba’n chu, “Nangni hin ki nâihai nin ni inchântir zoi hrang kêng; Josefa lak om ta maka, Simeona khom om nôk ta maka, Benjamina tena hruai nin tum nôk ta, beidongin nin ni isia a ni ta,” a tia.

³⁷Reubena’n a pa kuang khan, “Ni kuang ki hong tuanghai nôk no’n chu ki nâi pasal hnihai hi thathai zel ro, ama chu ki kuta bângin lân ni kuang hong tuang nôk ngêt ki ti,” a tia.

³⁸Khanchu ama’n, “Ki nâipa hi nangni intuangtir viat no ning; a upa a thia, nin fena lama buaina zu tong nin ta keima tar luchuak tâk hi beidongin thânkhur nin zongtir kêng nin itum a ni,” a tia.

Irphutna 43

Josefa urênghaiin Benjamina Aigupta rama an hruai

¹Kha rama khan châm chu a satêrengin a tâka;

²Aigupta rama an bu hong pêl laka an nêk zoi tâka; khanchu an pa khan, “Fe nôk ta unglân, a tam no khomin bu zu’rcho nôk ta roi,” a tia.

³Khanchu Juda khan a kuang, “An hruaitupa khan, nin sangpa nin zuang hruai no’n chu ki hmêl khom hmu thei no chin ni a ti, a tia.

⁴Kin sangpa hi ni nin tuangtirin chu bu zu’rcho kin ti;



⁵ni phal no'n chu a fe lua zu fe ngam ta ma ung, kha pa khan a iti chu, nin sangpa nin kuang a zuang no'n chu ki hmêl rêng hmu thei no chin nih a ti tâk sikin," an tia.

⁶An pa Israel khan, "Itho sika mo sangpa kin la nei nin la iti kher, keima hranga thil saloitak nin ihril?" a tia.

⁷Kha pa khan, "Nin pa mo a la dam? urêng dang mo nin la nei? tiin kin thurchi a nir don hlet tâk sikin kin iti a ni ta, kin hril zoiin chu nin sangpa zuang hruai roi, ti a tih, ti tu ualin mo a sôn?" an tia.

⁸Khan Juda khan an pa Israel kuanga khan, "Tôia chu ni zui ri se, khanchu zu fe kin ta, kin nâi chîntehai le ei rênga ei dam theina hrangin.

⁹A chungchâng thu chu keima'n a bul la tum ta rong, ni kuanga hong hruai nôk ngêt ki ti, ki hong hruai no'n chu keima'n kumkhontuanguin a mophur ki ti,

¹⁰hiang hin ni khap no'n lân chu voihni zu tung nôk ta kin ti," an tia.

¹¹An pa Israela'n an kuanga khan, "Khaang kha a ni tâkin chu, hiang hin tho ta roi, nin phurhaia khan hi rama neinun sa, thinghnâi, hloihai, khuaituihai, mirimhoi le Mura, theipui rahai ama lômna hrangin chôi unglân,

¹²sum le nin hmarsaa omhai kha pe nôk unglân, a irnghil khom a ni thei:

¹³nin sangpa khom hruai unglân, ama kuanga zu fe ta roi:

¹⁴khanchu nin urêngpa le Benjamina hi an sua theihaina hrangin Pathian itinrêng tho theiin a lungrîla lungkhamin nangni hmu ri se. Ki nâihai chu an chên a ni le khom inchânhai ta ki ti," a tia.

¹⁵Khanchu a lômna hrangin thilhai kha chôiin, sum lêthni chôiin, Benjamina khom an hruaia, Aigupta rama an fea, Josefa kuang an zu tung nôk tâka.

¹⁶Khanchu Josefa'n Benjamina kha an kôla an hruai ti a va hmuhaiin chu, a in enkoltupa kuanga khan, "So mihai so in sînga va hruai lûthaiin lân, sa thatin lân, bu anh suang pehaiin lân, annihai leh son sîna ki kuanga bu nepuihai hrang ki ni," a tia.



- ¹⁷Khanchu Josefa iti angin a thoa, Josefa'n a hruai lûthaia.
- ¹⁸Josefa ina a hruai lûthai sikin an chia, “Ei zuang masaa ei hmarsa sum a ni ipêk kîr sika a ina a ni ihruai ni a ti, zoro inchum zonga ei rêngin ei neinunhai le a suak chang hranga a ni ihruai lût a ni,” an tia.
- ¹⁹Khan Josefa in enkoltupa kuang an va nâiin chu an chongpuia,
- ²⁰“Ka pu kin zuang masa lai khan bu irchôk hrang piala zuang kin nia,
- ²¹riakbuk kin tunga, kin phurhai kin kêlsuain chu kin sumhai chu ite siat viat loiin kin phurhai khan a om vinga, khasikin kin zuang ichôi nôk a ni hi an tia.
- ²²khan bu irchôkna hranga sum kin zuang ichôi kha tu mo kin hmarsaa ni sia pe inhre ma ung,” an tia.
- ²³Khanchu kha pa khan, “Irtharngam takin om unglân: nin Pathian, nin pa Pathianin nin neinuna irchon nangni a ipêk a ni kha te, nangni kin hriatpui,” a tia. Khanchu Simeona kha a hong hruai suaka.
- ²⁴Khanchu Josefa'n in sûnga a hruaihaia, tui a pêkhaia, an ke irsûkin, an sakuartunghai khom bu a pêkhaia,
- ²⁵khanchu an lômman chôihai kha Josefa bunêk a hong mân an lei sinsiamhaia, kha hmuna khan Josefa bunêk a hong ti an inhriat sikin.
- ²⁶Khan Josefa ina a hong lûtin chu an lômman chôihai leh khan an va pana, irnênga khûksadelin chubai an mûka.
- ²⁷Khanchu an thurchihai a'rdonhaia, “Nin patar thurchi nin ni ihril kha teh hring damin mo a la om?” a tia.
- ²⁸“Kin pa ni siahlo chu a dam lai tak chu a ni, a dam a harin a la om mai,” an tia. Khanchu an luhai sukin chubai an mûk nôka.
- ²⁹Khan a enhaia, Benjamina a nu nâipa kha a hmua, “Kha pa kha mo nin mitumtak thurchi nin ni ihril kha a ini?” a tia. Khanchu “Ki nâipa, Pathianin lung nan kham ri se,” a tia.



³⁰Khan Josefa'n a sangpa a hmu nôk tâk sikin, a milung an dûk pe hraia, chapna hmun inrangtaka zongin a zâlna hmuna a lûta, kha hmun khan a chap tâka.

³¹Khan a hmâi a phî nôka, a va suaka, insum za zâmin bu thur ta roi, a tia.

³²Khanchu ama hrang a bingin annihai hrang a bingin, Aigupta mi a bunêk koppuituhai hrang a bingin an thur pehaia. (Aigupta-haiin Hebrai-hai le hmunkhatin bu nepui thei ni ma, khaanga tho'n chu Aigupta-hai hrangin chu irthiang loi tihna a ni.)

³³Khanchu a uliantak chu nâilutîr nina angin, nâipangtak chu mitumtak nina angin Josefa kôla an toia, an ir-enin chu a'rkhêl an ti oka.

³⁴Khan Josefa'n an dongtum hranghai chu semin, a bîkin Benjamina dongtum hrang chu mihai nêkin voirenga'n a tam ual bîka, khanchu uainhai inin a sân a hoi ti takin an om ta a ni.

Irphutna 44

Josefa khilât irhmang

¹Khan Josefa'n a in enkoltupa kuang khan, “Kha ki mihai puak kha an inhnê hrang ang dôr chitin bu siam pehai unglân, an sumhai khom an hmarsaa khan siam ro,

²khan ki tangkarua khilât satak kha an mitumtakpa puaka siamin lân, a sum leh khan,” tiin thu a pêka; khanchu Josefa iti angin a tho pea.

³Khua a hong vârin chu an sakuartunghaia chuangin a tîrhaia.

⁴Khanchu an fea, zoro sôtnote hnunga chu Josefa'n a in enkoltupa kuang khan, “Thoiin lân, kha mihai kha va'rzûlhaiin lân, ni va phâkhaiin chu, itho sika mo thil sa teh thil saloiin nin ithuan?

⁵kha thil kha chu ka pu uain inna le a tasâna ngai kêng? Hianga thil nin itho hi chu, nin inchâi ok a nih va ti ro,” a tia.

⁶Khanchu a va phâkhai tena chu kha thu kha a ti pehaia;



⁷“Ka pu i thu mani tâk, khang khan teh ni ni ti lik tâka? Ni siahlohai hin khang thil kha tho le mo ni nir hoitir.

⁸Irgai ro, kin phura sum kin ihmuhai lua khom Kanaan ram ata, ni kuang kin zuang chôi nôk kha te: itin mo ni pu in ata sum mo, rângachak mo kin inrûk ngam hrang?

⁹khasikin ni siahlohai laia hin enin lân, tu phura mo ni man, ni imantakpu chu thi dênin kin pu suak chang ri se,” an tia.

¹⁰“A ni nangni iti lam tak ni ri seh duah, ki imanpu tak chu keima suak chang ri se, a tia. a danghai chu ite nangni ti no ning,” a tia.

¹¹Khanchu an phurhai insumin an kêlsuahaia;

¹²khanchu a ulian dônin a zonga, khanchu kha tangkarua khilât kha Benjamina phura a hmua.

¹³Khanchu an songkolhai an ir-ekthêra, an sakuartunghai chungu chuanguin kho sêng tiang an kêr nôka.

¹⁴Khan Juda le a sanghaiin Josefa in an va tungin chu, a lei om maia, kûnin chubai an va mûka.

¹⁵Josefa’n an kuanga khan, “I zât thil mo nin itho tâk hi? keima anga mi hin tâ a sân thei nin ni isôn loi ma ni?” a tia.

¹⁶“Ka pu ni kuanga imo kin ihril ta hrang? I ang tak ngân mo kin ihril thei ta hrang? Pathianin ni siahlohai sualna chu a ihmu a ni ta. Ka pu kin rêngin ni suak kin ni ta,” an tia.

¹⁷“Khang khan chu nangni sia thei no ning; a kuta tangkarua khilât an ihmupu tak vai kêng ki suak ni a ta; nangni chu nin pa ina fe roi,” a tia.

Juda’n Benjamina sansuak tumna

¹⁸Juda khan Josefa a va nâia, “Ka pu lungkham takin nangma inhriata thu bân khat ki hril nuam a tia, khannisianlân ni ning an mur khomin a’rgai ni thei ngêt ni ti; nang chu Faroa anga mi lian ni nia.

¹⁹Ka pu, nangin pa le urêng dang mo nin nei? tiin ni nir dona.



²⁰Ka pu keini'n chu ni kuanga khan, o kin pa chu tar tak a ni tâka, a tar hnunga nâi, nâipangte kin neia, ama chungapu chu a thia, a nu inkhat le nâi chu ama vai kêng a ni ta, a pa khan ama chu an hlu dor dor a ni: kin tia.

²¹Khan nangma'n kin kuanga khan, 'Ama kha ki mithmua hin zuang hruai roi,' ni tia,

²²ka pu, keini'n chu tôia chu zuang hruai thei no ni ung kin tia; a pa a mâksanin chu a pa beidongin a ithipui hrang kêng kin tia.

²³Khan nangma'n kin kuang nin mitumtak nin zuang hruai no'n chu ki hmêl hmu thei no chin ni, ni tia.

²⁴"Khanchu ka pa kuang ki hong tungin chu, ni thurchi kha ka pa kin insîr pea;

²⁵Kin pa khan, 'Fe nôk unglân bu zu'rcho nôk ta roi,' a tia.

²⁶Keini'n chu zu fe thei ta no ni ung; kin mitumtakpa hi kin hruai vaiin kêng kin zu ife thei hrang, khano'nchu ni hmêl hmu thei no ni ung, kin tia.

²⁷Khan ni siahlo mi kin pa khan, ki dôngma'n nâi inhni vai a ni neipui ti khom nin inhriat.

²⁸Inkhat chu ki kuang ata a suaka, ramsa'n an isê that ni a tih tiin ki oma, khatak ata hmu ta loiin ki oma;

²⁹khaang khan hi mi khom hi nin hruaiin chu thil saloi zu tongin om a ta, keima tar luchuak tâk hi beidong pumin kêng thânmual nin ni inliamtir hrang a tia.

³⁰Khasikin tôia hi kin hruai no'n chu kin pa hringna le tôia hi a sate'n a'rzompui sikin,

³¹hiang hin kêng a ini hrang, tôia chu hong suak nôk ta mah ti an hriatin chu, a ithipui hrang kêng, kha tena chu keini ni siahlohai khom hin kin pa chu beidong pumin thânmual inliamtir kêng kin ichang hrang;



³²kei, ni siahlo hin kin pa kuang ata nuamloi puma ni kuanga zuang hruaitu hin kumtuangin a mô ki iphur hrang tiin, ka pa kin thêmin a bultumtu ki ni tâk sikin.

³³Khasikin keima hi tôia irthûlin, ni suaka nin omtirin lân, tôia chu ni tîr pe nôk roh.

³⁴Tôia ki hruai no'n chu ka pa hmêl itin mo ki ihmu thei ta hrang? ka pa chung a siatna hong tung hrang ki ihmu a ni," a tia.

Irphutna 45

A urênghai kuanga Josefa irphuangna

¹ Khanchu Josefa chu a kôla mipui omhai makunga khom khan milung na hraiin irthup thei ta loiin, "Mipuihai ki kôl ata suak ving roi," tiin a khêka. Khanchu Josefa'n a urênghai makunga irhriatsuak irhlômna thu a hrilpuihai sêng chu tûte om mahaia.

²Khanchu a chap ngûk ngûka, Aigupta mihai le Faroa in mihai khomin an inhriata.

³Khanchu Josefa'n a urênghai kuanga khan, "Josefa kha ki ni; ka pa chu a la dam mai na," a tia. Khannisianlân a urênghaiin ite sâm hrang inhre loiin an kamang zoi tâk a ni.

⁴"Irngaihoi takin ni hong nâi roi," a tia. Khanchu an va pana, nin sangpa Josefa Aigupta rama nin izuarpa kha ki ni.

⁵Khannisianlân hi rama om hranga nin ni lei izuar sika hin chi ual no roi, nangni khom a siat irti ual no unglân, mihai sansuak hrangin Pathianin nin matona a ni lei zuang itîr a ni.

⁶Hi kum hni sêng chu châm a tâk tâka, kum ringa a la'rsam, hi sênga hin chu loi tho thei ni no nia, bu ât hrang khom hmu ni no ni.

⁷Khasikin irnêng chung a nin irchi a'rzom theina hrang le saninhringna inthangtak a hring a dama nangni kin omtir theina hrangin Pathianin nin matona a ni lei zuang itîr a ni.



⁸Khasikin hitaka nin omtirtu hi nangni ni mak chêia, Pathian kêng a lei ini. Ama'n Faroa in sêng mihai pa le hruaitu, Aigupta ram sênga roirêltua a ni lei isiam a ni.

⁹ Khasikin inrangtakin ka pa kuang fe unglân, “Ni nâipa Josefa'n hiang hin a tih hong ti roi, Pathianin Aigupta ram pumpuia hruaituin a ni siam ta: ki kuang zuang ta ro, zuang sôt ta no ro:

¹⁰khanchu Gosen rama om ni ta, keima kôl ngêta om ni ta, nang le ni nâihai le ni tûhai le ni belra le ni sahai ni inei murdihai leh om ni ti.

¹¹Kha hmuna khan keima'n nan fâ ta ki ti. Châm laka kum ringa zel a la itâk hrang a ni sikin, khang khan ni om ngotin chu ni la intak hrang kêng, nang le ni in sêng mihai leh” hong ti pe roi.

¹²Khan nin rênga mithmu le Benjamina mithmu ngeia nin infel, “Kei Josefa diktak kha ki nih ti lak nin inhriata.

¹³Khanchu Aigupta rama hruaitu lian le inthang nin ihmu le inhriat murdi hong hril unglân: ka pa chu inrangtakin hi hmun hi nin zuang itungpui lat hrang a ni,” a tia.

¹⁴Khanchu a kut leh a sangpa Benjamina chu irkuapuiin a chapa, Benjamina khom khang dênin a chap nôk ta.

¹⁵Khanchu a urêng danghai kha an rêngin a tumhaia, a chapkhumhai ta. Khanchu a urênghaiin thu tamtak an insîrpui ngam tâk a ni.

¹⁶Kha tena chu Josefa urênghai an hong ti thu kha Faroa ina khan an le'nhriata, Faroa le a hnuaia sinhotuhai khom an rai a lei fânpuî tâka.

¹⁷Khanchu Faroa'n Josefa kuang khan, “Ni urênghai kha, an sahai chungu bu inpêltirhai sian Kanaan rama tîrhaiin lân;

¹⁸khanchu, nin pa le a in mi tam dôr zuang hruaihai unglân ki kôla zuang ri sehai; khanchu Aigupta rama irchon sahai hi nangni pe ki ta, nin rênga nin dam theina hrangin om nin ti, a tia.



¹⁹Thu nangni ki pêk nin nâi le tehai, nin dôngmahai chuang theina hrangin Aigupta ram ata tâli ke neihai chôi unglân nin pa hruaiin nin rêngin zuang roi.

²⁰Nin bêlbûr hmanghai khom ite inpâm no roi, Aigupta rama hin hi nêka thil sa murdi hi nin ta chang a ti,” ti roi a tia.

²¹Khanchu Israel nâihai khan kha ang tak khan an thoa, sakor chung chuang zât le fâk le nêk pêlin an fea.

²²An rêngin puandiar irsakna a pêkhaia, Benjamina len vâng chu tangka sum irzathum le puandiar khom a'rthuamin ringa a pêk saa.

²³A pa khom hi thilhai hi a thona; sakuartung sômkhât Aigupta rama thil sa pêlna hrangin le sakuartung pui sômkhât, lampuia a pa fâk le nêk hrang pêlin a tîrhai saa.

²⁴Khanchu a tîrhaia, lampuia “Irsual irkhal ite tho loi hrangin irdîn roi,” a tia.

²⁵Khaang khan Aigupta ram ata chu an fea, Kanaan ram an pa Jakoba omna chu an tung tâka.

²⁶Khanchu an pa kuang khan, “Josefa kha a la dama, Aigupta rama roirêltu liantak a ni,” an ti pea. An thu hril kha an hriata, ni khomsianlân a dam hrangin tûng thei ta maka.

²⁷Khanchu an kuanga Josefa'n a ihril murdi kha an insîr pea: a chuangna hrang Josefa sakor a hong itîrhai kha a hmu'n chu; Jakoba râi a hong fân pea:

²⁸khanchu Israel khan, “Ki nâipa Josefa chu a dama la om ngêt a nih ti kin hriat suak zoi ta, khasikin ki thi mân ama hmu hrangin zu fe ta ki ti,” a tia.

Irphutna 46

Jakoba-hai in sùng mi Aigupta an fena

¹Khanchu Jakoba chu a inei murdi chôiin a suaka; Beerseba a tunga a pa Isaka Pathian kuanga khan irbôlna thil a'rhlana;

²khan Pathianin zâna a'rmang tiang Israel chu a chongpuia, “Jakob, Jakob,” a tia. Ama'n, “Hin ki om,” a tia.



- ³Khanchu Pathianin, “Keima hi ni pa Pathian chu ki ni. Aigupta rama fe chu chi viat no’n lân fe ro; khu hmuna khun irchi tam takin nang siam ki ti:
- ⁴Aigupta rama khom ni kuang om mai ki ta, hi rama hin nir chihai hong hruaisuak nôk ngêt ki ti. Khanchu Josefa khom ni thi nê dênin ni kuang om a ti,” a tia.
- ⁵Khanchu Jakoba chu Beerseba ata a suaka, a nâihaiin Faroa sakor hong tîra khan an pa Jakoba a dôngmahai le a tû a têhai leh an inchuangtirhaia;
- ⁶Khan, Jakoba le a’rchihai chu Kanaan rama an irchon neihai chôiin, Aigupta rama an tung tâka.
- ⁷a nâihai, a tuhai a nâinuhai, a tunuhai, an irchi pumin Aigupta ram chu a lûtpuihai tâk a ni.
- ⁸Hihai hi Israel irchi Aigupta rama lût Jakoba le a nâihai irhming chu a ni: Reubena Jakoba nâilutîr.
- ⁹Reubena nâihai chu Hanoka, Palua, Hezrona le Karmia-hai an ni.
- ¹⁰Simeona nâihai chu Jemuela, Jamina, Ohada, Jakina le Zohara Kanaan nupangnu le nâi Saula-hai hi an ni.
- ¹¹Khan Levia nâihai chu Gersona, Kohatha, Meraria-hai an ni.
- ¹²Juda nâihai chu, Era, Onana, Sela, Pereza le Zera-hai an ni: Era le Onana chu Kanaan rama thi an ni ta. Pereza nâihai chu Hezrona le Hamula an ni.
- ¹³Isakara nâihai chu Tola, Pua, Jasuba le Simrona hai an ni.
- ¹⁴Zebulun nâihai chu Sereda, Elona le Jahleela hai an ni.
- ¹⁵Hihai murdi hi Leaii nâipa, a nâinu Dinaii le Padan-aram rama Jakoba a ineipuihai chu an ni: a nâi nupang le pasal, an rêngin sômthum inthum an ni.
- ¹⁶Khan Gada nâihai chu Zefona, Hagia, Sunia, Ezbona, Eria, Arodia le Arelia hai an ni.
- ¹⁷Asera nâihai chu Imna, Isva, Isvia le Beria le an farnu Seri. Khan Beria nâihai chu Hebera ke Malkiela-hai an ni.



¹⁸Hihai hi Zilpail Labana nâinu Leail kuanga a nâi pêkhai chu an ni, Jakoba a ineipui sômhleirukhai chu an ni.

¹⁹Khan Jakoba dôngma Rakili nâihai chu Josefa le Benjamina an ni.

²⁰Khanchu Josefa'n Aigupta rama Manasea le Efraima a neia. Khahai kha chu On khuaa deipu Potifara nâinu Asenathi ineipuihai chu an ni.

²¹Benjamina nâihai chu, Bela, Bekera, Asbela, Gera, Naamana, Ehia, Rosa, Mupima, Hupima le Arda-hai an ni.

²²Hihai hi Rakili'n Jakoba a ineipuihai chu an ni, an rêngin sômhle minli an ni.

²³Khan Dana nâi chu Husima a nia,

²⁴Naftalia nâihai chu Jazeela, Gunia, Jezera, le Silema hai an ni.

²⁵Hihai hi Bilhail Labana nâinu Rakili a ipêk nâihai chu an ni, Jakoba a ineipuihai chu an rêngin mi sari an ni.

²⁶Jakoba moihai tep loiin, Jakoba le Aigupta rama lût, ama irchia suak murdi chu an rêngin sômruk le kiruk an ni;

²⁷ Khan Josefa'n Aigupta rama a nâi nei chu inhni an ni. Jakoba in sâng mi Aigupta rama om chu sôm sari an ni ta.

Jakoba-hai in sâng mi Aigupta rama om

²⁸Jakoba'n Juda kha Gosen ram lei en hrangin Josefa kuang a lei tîr baka, khan Gosen rama an lûta,

²⁹khan Josefa'n a sakor chu a'rsiamtirhaia; Gosen rama a pa don hrangin a fea, khanchu hmêlirhriatna neiin, Josefa'n a pa ringa a kut leh inkuapumin zoro sôtta a chapa.

³⁰Khan Israela'n Josefa kuang khan, "A hring a dama ni la ioma, ni hmêl ki hmu nôk tâk sikin a thi khom ite irhroi ta ma ung, ki thi khomin a sa ta," a tia.

³¹Khan Josefa'n a pa le a urênghai kuanga khan, atûn chu, "Faroa kuang hong fe ki ta, ki urênghai le ka pa in mihai ki kuang an zuang tung ta.



³²Anni chu sa vâituhai an ni sikin, belra enkoltu an nia; an belra rualhai le an inei murdi an zuang chôi zit a ni,” tiin hong hril ki ti.

³³Khanchu hiang hin hong ni a ti, Faroa'n nangni a koia, ‘Imo nin isin ual ngai? a tiin chu,

³⁴nangni'n chu ni siahlohai hi kin irchibulhai ata irthokin atûn ten hin, sa vâi ngai kin ni' ti unglân: khan kêng Gosen rama nangni a inomtir hrang,” a tia. Belra hrungtuhai hi chu Aigupta mihai intir tak ngai a ni.

Irphutna 47

¹Khanchu Josefa'n a urênghai mi ringa a tuanghaia, Faroa kuang khan, “Ka pa le ki urênghai, an neinin le an belra rual le sehrât rualhai an inei murdi leh Kanaan ram ata an zuang ichum thâk tâk a ni: khan, irngai ta, Gosen rama an om,” a tia.

²Faroa kuanga hmêlihriattirna an neia;

³Faroa'n a urênghai kha, “Imo nin isin ual ngai?” a tia. Anni'n Faroa kuang khan, “Ni siahlohai hi kin irchibulhai ata atûn ten hin belra hrunga vâi ngai kin ni,” an tia.

⁴Anni ngêtin, “Hi rama om viat hranga zuang kin ni; kin rama lak kin belrahai fâk hrang a om ta no sikin; Kanaan rama châm tâk lak a na hrai tâk sikin; khasikin lungkham takin ni siahlohai hi Gosen rama nin omtir ro,” an tia.

⁵Khanchu Faroa'n Josefa kha, “Ni pa le ni urênghai hi ni kuang an zuang tung tâka;

⁶Aigupta ram chu a la lian hi te, khasikin ni pa le ni urênghai omna hrang chu hmun hoi le ram a sa ni itihna taka inomtirhai ro; Gosen rama omhai sian. Khan anni laia mi itinrênga ni iiamzoi ni nei le'nvângin chu, ei sahai chungu hruaitu ni hrang khomin sianghai ro,” a tia.

⁷Khanchu Josefa'n a pa Jakoba kha Faroa kuang a tuanga Jakoba'n Faroa kha sat a vura.



⁸Khan Faroa'n Jakoba kuang, "Kum iza mo ni ni ta?" a tia.

⁹Jakoba'n Faroa kuanga khan, "Ki khual inzinna kum chu irzakhat sômthum a nia; ki dam lai kum hi a tômin a intak a ni. A ni neituhai kum leh irkhiin chu, an dam lai kum chimrip khom ni ma," a tia.

¹⁰Khan Jakoba'n Faroa chu sat a vur nôka, Faroa kuang ata a suaka.

¹¹Khanchu Josefa'n a pa le a urênghai chu omhmun an khuartirhaia, Faroa thupêk angin Aigupta ram laia a satak Ramases ram chu an irchon hrangin a pêkhaia.

¹²Khanchu Josefa'n a pa leh a urênghai chu an fâk an nêk khop hrang dôr pêkin a donsuihai tâka.

Châm tâk

¹³Khanchu kha ram sênga khan a sate'n châmpui a tâka, fâk hrang nêk hrang boiin Aigupta le Kanaan ram chu a hong om tâka;

¹⁴Josefa'n an bu zuarna man sumhai chu Faroa kuang a hrêa,

¹⁵khan Aigupta le Kanaan rama sum a hek ving tena chu, Aigupta mi murdi chu Josefa kuang an hongga, "Fâk hrang ni pe ta ro, khano'nchu ni mithmua hin kin ithi zoi hrang tâk kêng? sum lak ite nei ta ma ung," an tia.

¹⁶Khan Josefa'n, "Nin sahai zuang chôl unglân, kha irthûlin bu nangni pe thei ki ti," a tia.

¹⁷Khanchu an neinunhai kaiin Josefa kuanga an pêka: khanchu Josefa'n, an kêl, belra, sâ, sakuartunghai man leh khan annihai chu fâk hrang a pêkhaiin kha kum kha chu a infâhai a ni ta.

¹⁸Khan kum a hong tharin chu, an va pan nôka, "Kin sum nei loi lam khom, ka pu kin neinunhai khom nangma ta an chang zoi lam khom nangma mithmua ite thup loiin, ka pu ni mithmua hin kin taksa le kin ram ti no chu ite nei ta ma ung.

¹⁹Khasikin ni kôla hin keini le kin ramhai leh hin kin ithisan hrang ma ni ta? khasikin kin taksa pum hi nir chôkin lân, kin ramhai hi Faroa'n ircho sianlân,



ama suak chang ta kin ta, thi loia a hring a dama kin om theina hrangin fachî vai ni sem ro,” an tia.

²⁰Khanchu Josefa'n Faroa hrangin ramhai chu a'rchôka, an châm hrai tâk sikin Aigupta-haiin an ram an izuar zoi a nia. Faroa ta a ichang zoi a ni ta.

²¹Khanchu Josefa'n Aigupta rama suak an ni sikin a itihna tiang anga semin a sin an thoa.

²²Ochahai ram ti no chu a'rchôk vinga: ochahaiin chu Faroa kuang ata mantum an nei sikin, an fâkin an la iom thei a ni.

²³Kha zoiin chu Josefa'n a mihai kha, “Irngai roi, a vuan hin ramhai leh nangni kin irchôk zoi a ni ta, hi fachîhai hi irsem unglân irnênga song nôk ta roi.

²⁴Khan bu ât zoro chu Faroa hrangin hmun ringa zêkin hmun khat chu nin ipêk hrang a nia, hmun minli chu nangni hrang ni a ti, khahai kha nin fachî le nin nâi le têhai fâk hrang ni a ti,” a tia.

²⁵Khan anni khan, “Nangin kin hringna ni ni sansuakpui ta. Khasikin ka pu hin lung nin kham sianlân, Faroa suak ni mai kin ti,” an tia.

²⁶Khasikin Josefa'n Faroa hrang hmun ringa zêka hmun khat a iman hrang thu hi, Aigupta rama chu atûn ten hin dânin a isiam a ni: Ochahai ram ti no chu Faroa ram ving a ni.

Jakoba thi hrang tâk a ngênna

²⁷Khan Israelhai chu Aigupta Gosen rama omhmun an khuara; irchongna tam tak neiin an pung tâk a ni.

²⁸Khan Jakoba chu Aigupta rama khan kum sômhleisari a oma: khanchu Jakoba dam sûng kum chu irzakhat sômminli sari a nia.

²⁹ Khan Israel thi zoro chu a hong nâi tâka; a nâipa Josefa chu a koia, “Ni mit ki tungin chu lungkham takin ni kut kha ki teêl sunga hong thunin lân, chong inkungna neiin lân, lungkham takin Aigupta rama hin ni phûm no roh.



³⁰Ka pahai irphûmna khin, ki thi tena chu ni hruaiin lân, ni ni iphûm hrang a ni,” a tia.

³¹Khan Jakoba’n, “Keima inhriata hin khomâk irsâm ro,” a tia: khanchu a’rsâma, khanchu Jakoba chu a lu kûnin lônthu a hril ta.

Irphutna 48

Jakoba’n Efraima le Manasea sat a vur

¹Khanchu hiang hin a hong nia, Josefa kuang khan, “Irngai roh ni pa dam ma,” an tia. Khanchu a nâihai Manasea le Efraima a hruaihaia.

²Jakoba kuang khan, “Irngai ro, ni nâipa Josefa chu ni kuang a hong,” an ti pea; khanchu Israel chu a hong hara, zâlmuna a toia.

³ Khan Jakoba’n Josefa kuang, “Pathian Itinrêngthothei chu Kanaan ram Luz khuaa ki kuang a zuan lâra, sat a ni vura,

⁴ki kuang, ‘Irchi tam takin nan pung ki ta, irchi tam takhai irngatna hmunin nang siam ki ti, hi ramhai hi nir chi suanpârhai khomin la hong lua an ti,’ a ni tia.

⁵“Khan ni nâihai inhni Aigupta rama ni kôla ki om mâna Aigupta rama nir chonhai hi ki ta a ni: Efraima le Manasea-hai ruai hi, Reubena le Simona ang dênin ki ta ni an ti.

⁶Khanchu hihai zoia ni nâi kêng ni ta an ini hrang.

⁷ Padan-aram ata ki hong lai khan, Kanaan rama Efrath khua tiang hlatak la omin ni nu Rakili chu lampuia a thia: kha hmun Efrath khua tianga ki phûma. (Kha khua kha chu Bethlehem a ni)” a tia.

⁸Khanchu Israela’n Josefa nâihai chu a ena, “Hihai hi tuhai mo an ini?,” a tia.

⁹Josefa’n a pa kuang, “Hihai ruai hi ki nâihai, Pathianin hitaka a ni ipêk an ni,” a tia. Khanchu, “Lungkham takin ki kôla ni hong nâi ri sehai, khan kêng sat ki ivurhai hrang,” a tia.

¹⁰Israel mit chu a tar tâk sikin infelhai ta maka, a hong hruai innâiin chu pominkuain a tumhaia.



- ¹¹Khan Israela'n Josefa kha, "Ni hmêl hmu hrangin nang tûng ta ma unga, nikhomsianlân, Pathianin ni nâihai hmêl tena a nir hmutir tâk a ni hi," a tia.
- ¹²Khan Josefa'n a pa inkuapumin a hruaihaia, hnuai enpumin a pa chu chubai a mûk ta.
- ¹³Khan Josefa'n a kut chang tiang a pa Jakoba kut vei tianga om Efraima a hruaia, Manasea chu a kut chang tiang Jakoba vei tianga om chu a hruaia,
- ¹⁴khan Jakoba'n a kut irkherin a kut chang tiang Efraima nâipang ual lu chung a irnghatin, a vei kut chu Manasea nâilutîrpa chung a a'rngkata.
- ¹⁵Khan Josefa chu sat a vura, "Ki'rchibul Abrahamama le Isaka maton ata a vuan sîn tena nin fâtu Pathian,
- ¹⁶siatna tinrênga nin zôktu vântirtônin nâipanghai hi satvur ri se, khan ki'rhming le kir chibul Abrahamama le Isaka irhming pêlin om ri sehai, rammual pumpui hi lua sipa pungin om ri sehai," a tia.
- ¹⁷Khan Josefa'n a pa chang kut Efraima lu chung a irnghat a hmua, a milung hoi pe maka; khanchu a pa kut an bana, Efraima lu chung ata Manasea lu chung a thûl pe hrangin a chela,
- ¹⁸"Ka pa hiang hrang hi ni ma: hi kêng hi nâilutîr chu a ini, khasikin ni chang kut hi ama lu chung a irnghat ro," a tia.
- ¹⁹Khannisianlân a pa khan nuam maka, "Kin hriat, ki nâi kin hriat: ama khom nam tiin koi ni a ta, khannisianlân a sangpa hi inlal ual a ti, ama irchi ata nam tamtak la hong suak an ti," a tia.
- ²⁰ Khanchu Jakoba'n Israelhai angin, Efraima le Manasea angin Pathianin nangni ompui ri se, tiin nin irhming sâmin satvur ni an ti. Khanchu Efraima chu Manasea matona an omtir ta.
- ²¹Jakoba'n Josefa kuang khan, "Irngai roh thi hrang ki ni ta, khannisianlân Pathian chu nin kuang om a ta, nin irchibulhai omna rama nangni la hruai a ti.



²²Hi khêla hin ni urêng danghai nêkin nang ki pêk intam, ki chemhring le ki thalngul, Amor-hai kuta ki ilâk pehai kha ni dongtum a ni sa,” a tia.

Irphutna 49

Jakoba chong hnungkhôn

¹Khan Jakoba'n a nâihai chu a koihaia, “Sûn hnungkhôn tianga nin chung a thil hong tung hrang nangni ki hril theina hrangin irkoibuk roi,” a tia.

²Nangni Jakoba nâihai irbuk unglân irngai roi; nin pa Israel thuhrih hi irngai roi.

³Reubena nang ki nâilutîr, ki sintho theina, ki hrât lai taka ra maton tak ni ni. A'rsângtak le thuneitak nina chu ni ta a ni.

⁴Khannisianlân tui anga det loi ni ni sikin, a'rsângtak nina chu chang no chi ni. Ni pa zâlmun ni kâi sikin, ni iporinchetir a ni kha.

⁵Simeona le Levi hi ulenâi an nia. An chemhai chu thisen suakna hriamhrei a ni.

⁶O, ki'rtha anni ngaitua angin om no ro, kin lalnahai hi, anni ruai irkopna hmuna om no'n lân. Ningmurin mi an thata, lungrîl saloiin sehrâtchal an thata.

⁷An ningmurna chu khosâl tongin om ri sehai; nun saloitak an ni sikin. Jakoba-hai leh khom irkop no ri sehai. Israelhai ata khom sem indarin om an ti.

⁸Juda ni urênghaiin nan pâk an ti. Ni kut chu ni idoihai chung a irngat ni ta; ni pa nâihaiin ni makunga chubai nang mûk an ti.

⁹Juda hi kâmkeibaknei nâi ang a ni. Ki nâipa ni sa sê chu ni mâksan ta. A kûna, kâmkeibaknei angin an boka; kâmkeibakneinu angin tu'n mo nang a kai thoi ngam hrang?

¹⁰Reng khianghrol chu Juda kuang ata irsam no nia; roirêltu khianghrol khom a ke kâr ata irsam no ni. Nam tinin ama thu la zôm an ti.



- ¹¹A sakor te chu grep hruia khít a ta, A sakuartung tê chu grep kung sataka thung a ti. A tukfam khom uain tui leh irsu a ta; a puan chu grep thisen leh irsu a ti, A mihai khom uain thisen angin om an ti.
- ¹²A hahai khom dût anga invârin om a ti.
- ¹³Zebulun hin tuipui kôla omhmun khuar a ta, Irkuang irngamna hmun ni a ti. A ramri khom Sidon ni a ti.
- ¹⁴Isakara hi sakuartung hrât tak, kêlbelra pâl kâra kual thei a ti.
- ¹⁵Irngam chu a sa ti an hriata, a ram hoi lam khom an hriata. Khanchu puak pêl hrang zongin a oma. Khanchu sintho hrangin mihaiin an hmang ta.
- ¹⁶Dana hin a mihai chu roirêl pehai a ti, Israel nam inkhat anga bêin,
- ¹⁷Dana hi chu lampui kôla mirûl ang a ni. Mirûl tûr hrât lampuia irkhang ngai ang a ni. Sakor ke inchuk invûngtirtu ang hi ni a ti.
- ¹⁸Khasikin Rengpa ni saninzôkna ki nghâk mai. Gada hi râlin doi an ta.
- ¹⁹Khannisianlân ama'n khom an ke ârtui tiang doihai a ti.
- ²⁰Asera hi a fâk chu satak ni a ta, Renghai ifâk nuam lam siamtheitu ni a ti.
- ²¹Naftalia hi sazuk a nuam taka lêng ang hi ni a ti. Thu satak takhai hrildoktu a ni.
- ²²Josefa hi a ôn ra nuam tak a ni. Tuikuang kôla thing ra nuamtak ang kha; a ôn irzâmnhai khan lung danghai irkhûhai a ti.
- ²³Thal kâp mihaiin a sate'n dengintheitir an ti, kâp an ta an nuamin an isoisak ang khan.
- ²⁴Khannisianlân a thalngul chu ite châng viat no ni. A kuthai khom irnak songin hrât tak ni a ti. Jakoba mi hrât kut sinthotheina khan (kha khan chu belra hrungtu, Israel lampui a lei oma).
- ²⁵Ni pa Pathian, nangma nang changpui hranga Itinrêngthoheiin, chung tianga vâñ satvurnahai, hnuai tianga satvurnahai, dûtui le rîla ra satvurnahai, Nangma satvur hranga inhrâtin a oma.



²⁶Ni pa satvurnahai hin, Ki'rchibul satvurnahai khom kumkhontuanguin sipin om a ta. Hihai murdi hi Josefa lu chung a om a ta, A urênghai nêka danglamin om a ti.

²⁷Benamina hi Inê inchar a ni. Zînga chu a sa that kha fa a ta, khohloia chu a ihlo dok chu sem suak a ti," a tia.

²⁸Hihai murdi hi Israel nam sômhleihnihai chu a ni. An sika satvurna an irphulam ang takin an pa khan a vurhai ving a ni.

Jakoba thina le phûma omna

²⁹Khanchu a nâihai thu a pêkin an thâhaia, "Kei chu ki'rchipuihai kuanga hruaiin om hrang ki ni ta: Hit mi Efrona loia khur, Kanaan rama Mamre irdîna.

³⁰ Makpela loia khur Abrahamama phûmna hmun irchon hranga a irchôk Efrona kôla khan ni phûm roi:

³¹ kha hmun khan Abrahamama le a dôngma Sari an phûma; kha hmuna khan Isaka le a dôngma Rebeki an phûma: kha hmun ngêta khan Leaii ki phûma;

³²loi le a sînga khur om leh khan Hit mihai ata irchôk sai a ni," a tia.

³³ Khanchu Jakoba'n a nâihai kuang kha thu a bêhai zoiin chu, a ke chu zâlmuna a bâng a, a'rtha khan a mâka, a'rchipuihai kuang hruaiin a om ta.

Irphutna 50

¹Khanchu Josefa chu a pa ruak chung a khupa chapin a tuma.

²Josefa'n a pa ruak thu thei lona hrangin hloi pol hrangin thu a pêkhaia: khanchu hloi sin theihaiin thu thei lona hloi polin an sinsiama.

³Khaanga thu thei lona hrangin sîn sômminli an innanga Aigupta-haiin sîn sôm sari sîng chu an châin an chap a ni.

⁴Khan an châ zoiin chu, Josefa'n Faroa in mihai kha a ngêna, "Ni mit ki tungin chu lungkham takin Faroa inhriatin,



⁵ Ka pa'n irngai ro, thi hrang ki ni ta; Kanaan rama ki thân Choi sai hmun ngêta ni phum ro, tiin chong a nin kungtira, khasikin lungkham takin ka pa hi ni hon phumtirin lân, zuan rang nôk lat ki ti, a tih tiin va hril roi," a tia.

⁶Khanchu Faroa khomin "Chong ni inkung angin fe'n lân hong phum ro," a tia.

⁷Khanchu Josefa chu a pa phum hrangin a'rsiama, Faroa sinthotuhai le Faroa in mi ulianhai le Aigupta rama ulianhai tuangin.

⁸Josefa le a urêng hai a pa irkaipui murdihai an fea; an nâi chintehai, an belra rual, an sehrât pâlhai chu Gosen rama an lei mâkhaia.

⁹Khan an kôla khan chuang theina thil an sakorhai lâkin an fea, mi tamtak an nia.

¹⁰Jordan râla Atad phâizôl an tunga, kha hmun khan Josefa'n sùn sari a pa châna hrangin zoro a hmanga,

¹¹kha hmuna Kanaan mihaiin a pa chûlpuina an nei zoro kha an hmuhaia, "Aigupta-hai mithi chûl dân chu irkhêltak a ni," an tia: khasikin a hmun irhming khom Abel-mizraim an tia, Jordan dung râla om a ni.

¹²A nâihaiin an pa thupêk ang takin an thoa:

¹³ Kanaan rama an irzôn lûta, Abrahama irphumna hmun irchon hranga, Hit mi Efron ata a irchôk Mamre irdîna Makpela loi sûnga khura an phum tâk a ni.

¹⁴Khan Josefa chu a pa a phum zoiin chu a urêng hai leh mi danghai an rêngin Aigupta rama an kîr nôk ta.

Josefa'n a urêng hai lungngam a sakhai

¹⁵Khan Josefa urêng hai chu an pa thi thu an ngaituaa, "Josefa'n atûn chu a chung a thil saloi ei ithohai kha ni thuan tumin, ei chung a thil saloi tho tumin ni en nuam ta no ni," an irtia.

¹⁶Khanchu kha thu kha Josefa hril hrangin an ngaituaa. "Ni pa'n a thi mân khan



¹⁷hiang hin Josefa kuang ti roi, lungkham takin ni urêng hai sin insiatna, le an sat loinahai chu ngaidamhai ro, nin iti hrang a ni, tiin thu a ni pêka: khasikin lungkham takin ni pa Pathian siahlohai thil soal tho chu ngaidamhai ro,” an tia. Khan Josefa makunga an hrilin chu Josefa chu milung nain a chapa.

¹⁸A urêng hai khom an rêngin a kôla khan khûksadelin an oma; “Nangma siahlohai kin ni,” an tia.

¹⁹Khanchu Josefa’n an kuanga khan, “Chi no roi, kei hi Pathian irthûla om mo nin ni sôn?”

²⁰Nangni’n chu ki chung a thil saloi tho hrangin nin irsiam; khannisianlân Pathian chu a vuan sîn tena mi tamtak hring dama sansuak an ni theina hrangin a irsiam a ni.

²¹Khasikin chi no roi, nangni le nin nâihai murdi nangni infâ mai ki ti,” a tia. Hianga chong lungngam sakin a ompuihaia.

Josefa thina thu

²²Khanchu Josefa chu a pa in mihai leh Aigupta rama an oma: Josefa chu kum irzakhat sôm khat a dama.

²³Josefa’n Efraima nâihai nâi, a tuhai dênin irlo thum a hmua; Manasea nâi Makira nâihai khom a malpuia donin an suaka.

²⁴Khanchu Josefa’n a urêng hai kha, “Ki ithi hrang tâk kêng, khannisianlân Pathianin nangni ompui mai a ta, hi ram ata hi Abrahama, Isaka, Jakoba chonginkungna ram a ipêk tâkna hmuna nangni la hruai a ti,” a tia.

²⁵Khanchu Josefa’n Israel nâihai kha chong an kungtirhaia; “Pathianin nangni ompui a ta, ki ruhai vai hi irzôn unglân nin ifepui sa hrang a ni,” a tia.

²⁶Khaangin Josefa chu kum irzakhat sôm khat mi a ni’n a thia: a ruak chu thu thei loiin an sinsiam, irkuanga inzâlin a om tâk a n



Fesuakna

Fesuakna 1

Aigupta-haiin Israelhai dengintheitirna

- ¹ Hihai hi Israel nâihai Aigupta rama omhai irhming chu a ni; mi tin mâni in sêngkuahai tuangin Jakoba kuang an fea.
- ² Reubena, Simeona, Levi le Juda,
- ³ Isakara, Jebuluna, le Benjamina;
- ⁴ Dan le Naftalia, Gada le Asera.
- ⁵ Jakoba sênga irzir murdi chu sômsari an ni. Josefa chu Aigupta rama lei om tâk a ni.
- ⁶ Khanchu, Josefa le a urênghai irlo khathai chu an thi zoi tâka.
- ⁷ Khan, Israel irchi chu an la hong pung nôk maia; an hong tam tîr tîra, an hong hrât sit sita, kha ram kha an hong bit zoi tâka.
- ⁸ Khanchu, Aigupta rama khan Josefa inhre loi rêng thar a hong om tâka.
- ⁹ Khanchu a mihai kuang khan, “Irngai roi, Israel irchihai hi eini nêkin an tama an ihrât kêng a ni ta.
- ¹⁰ Hiang hin lôhai ei ti: chôitum neia sinthoin dengintheitirhai ei ti: anino'nchu hong pung mai an ta, nakana irdoina a hong omin chu, ei ikhômâkhai tiang kop an ta, an ni doia, hi ram hi an suaksan ngânin te”, a tia.
- ¹¹ Khanchu Faroa ta hranga neinun hrêna in siam hrangin, Pithom le Ramases khuaa khan an siahaia, dengthei le sinrunat taka sin hrangin enkoltu an sia pehaia.
- ¹² Khannisianlân deng an intheihai lia an pung li liaa, an zaphai nôk maia; Israel irchihai pung dân enin a sân an char a dong pehai ta.
- ¹³ Aigupta mihaiin a satea sôlin sin an inzongtirhaia;



¹⁴sin intak takhai, lungtuk le pilrôngar an insiamtirhai le loi inmân tiang khom intak taka sin inthotirin an oma. Itinrêng sinna hmun tina lungkhamna boi pitin an insintirhai a ni.

¹⁵Khanchu Aigupta rêng khan Hebrai mi nâi suak enkol ngai, Sifraii le Puaii hai kha hiang hin a ti pehaia.

¹⁶“Hebrai mi nâi nei thar, nâipasal an ni photin chu thatpaihai unglân, nâinupang an niin chu thathai no roi”, a tia.

¹⁷Khannisianlân nâi kurmâhai khan Pathian an chi sikin rêng thupêk zôm loiin, nâipasalhai khom an inzôkhaia.

¹⁸Khanchu Aigupta rêng khan nâi enkoltuhai kha a koihai nôka, “Itina mo hianga nin itho? ki thupêk zôm loiin nâipasal nin inzôktirhai”? a tia.

¹⁹Khan, kurmâhai khan Faroa kuanga khan, “Hebrai nupang hi Aigupta nupang ang an nih no sikin a ni. Annihai hi chu an nâi nei a ola, kin tung mân an lei nei zoi ngai sika a ni”, an tia.

²⁰Pathian an china sikin, nâi le te an hong punga, an hong tamin, an hong ihrât mai a ni.

²¹Khanchu hiang hin kurmâhai chu Pathianin in sêngkua satakin a hong siamhai ta.

²² Khanchu Faroa’n a mihai chu hianga tho hrangin thu a pêkhaia, “Atûn ata nâipasal suak murdi chu Nail vadunga paihai unglân, khan nupang chu inzôkhai roi”, tiin.

Fesuakna 2

Mosia suakna thu

¹Khanchu mi inkhat Levi irchi laia miin Levi nâinu dôngma’n a neia,

² kha nupangnu kha an râia, nâipasal a neia, kha nâi kha a hmêl sa hrai sikin tha thum a thupa.



³Zoro sôttak thup a intak pe tâk sikin, irkuangte âlkataraa inluan a siama, kha sînga khan an zâla, khanchu tuipui muangpanga phâiruang bil kôla a va siaa.

⁴Nâite farnu khan nâite imo chang nih tiin hlatak ata a ena;

⁵khanchu Faroa nâinu tuiirsil hrangin a zu fea, a suaknuhai khom tui kôla khan an oma, Faroa nâinu'n phâiruang kôla irkuangte a va hmua, a suaknu a van lâktira.

⁶Irkuang kha an hongin chu nâite kha a hmua, a hong chap pea, a sân an ren ngôl ngôia, “Hi nâi hi chu Hebrai nâi a ni hi te,” a tia.

⁷Khanchu nâite farnu khan Faroa nâinu kuang khan, “Hi nâite don hrang hin Hebrai nâi enkol thei nang zong pe ki tih”, a tia.

⁸Khanchu, Faroa nâinu'n, “Fe'n lân, va zong ro”, a tia. Khanchu a va fea, kha nâite nu kha a va hruaia.

⁹Faroa nâinu khan, kha nupangnu kha, “Hi nâite hi hruaiin lân ni don pe'n lân, thahlo nang pe ki ti,” a tia. Khanchu, nupangnu khan nâite kha a hruaia a pomin a enkol ta.

¹⁰ Khanchu nâite chu a hong lian tâka, Faroa nâinu kuang a hruaia, khanchu a nâipa a chang tâka. “Tui ata ki ilâk suak a ni sikin”, a'rhming khom Mosia ti'n a phua ta.

Midian rama Mosia rotna

¹¹ Khanchu Mosia a hong ulian tena chu, a zât a ponhai a va panhaia, Aigupta mihaiin intak taka sin an inthotirhai a hmua; khan Aigupta mi inkhatin Hebrai mi a vîk lai tak a hmua.

¹²Mosia'n a kôl a kiang a thîra tûte mi om mahai ti an hriatin chu, Aigupta mi chu a vîk thata, a phûmpai tâka.

¹³Khanchu sîn danga a va fe nôka, Hebrai mi inhni an le'rsual pea, dik loi ualpa kuang khan, “Itho mo ni rualpa ni ivîk?” a tia.



¹⁴Anni khan “Nang hi tu’n moh kin chung a roirêl le ircham nei hranga nang siam? Aigupta mi ni ithat ang khan ni that ni itum rêk ma ni?” a tia. Khanchu Mosia chu a chi tâka, “An inhriat kêng a ni ta hi teh”? a tia.

¹⁵ Kha thu kha Faroa’n an hriatin chu, Mosia that hrangin a’rsiama, khannisianlân Mosia chu Faroa in ata a rota, Midian rama a om ta: sîn khat chu tuisunsuak tuikuang kôla a oma.

¹⁶Midian rama ochai khan nâinupang sari a neia; khahai kha tui chôi an fea, an pa kêlbelrahai in hrangin tui an irthaka.

¹⁷Khan, belra entuhaiin an irzûlhaia; khannisianlân Mosia kha a thoia, nupanghai kha a sanhaia kêlbelrahai tui a pêkpuihaia.

¹⁸Khanchu an pa Reuela kuang an va tungin chu, “A vuan sîn teh imo nin itong nin hon rang bâka”? a tia.

¹⁹Anni khan, “Aigupta mi inkhatin belra entuhai kuang ata a ni changpuia, kin belrahai tui a ni pêkpuia, tui a ni irthakpui a ni”, an tia.

²⁰Khanchu an pa khan, “Kha mi kha khôn mo a om? Itho mo nin hong imâksan? va koi unglân, bu anh khom hong fa ri se ba,” a tia.

²¹Khanchu Mosia chu kha pa kuanga om kha a nuam tâka: Khanchu a nâinu Zipori kha a dôngma hrangin a pêka.

²²Nâipasal a neia, a’rhming khom Gersoma a tia. Mi rama rot ki ni sikin, a iti a ni.

²³Zoro a hong sôt nôkin chu, Aigupta rêng kha a thia; Israel nâihai chu an sintho intakin an khêka, kha sin sôltaka an ikhêk kha Pathianin an hriata,

²⁴ Pathianin Abrahamama, Isaka le Jakoba-hai kuanga a thuthung kha an hriat maia.

²⁵Khanchu Pathianin Israel irchihai kha a thîrhai maia, a donsuihai mai a ni.

Fesuakna 3

Pathianin Mosia a koina



- ¹Khanchu Mosia chu a tarpu Jethroa kêlbelra rual enkolin a oma, sún khat chu ramchârna tâng tiang kêlbelra hôlin a fea. Khan, Pathian tâng an iti Horeb a va tungin chu;
- ² Rengpa vântirtôn kha a kuang, chînribuka meichokin a zuang inlâr pea, a hong enin chu chînribuk kha a choka, khannisian, kâng maka.
- ³Khan, Mosia'n "La va irthîn ual hi rong, itina mo chînribuk so a ikâng zoi thei loi, hi thilirkhêl hi la van fel hi rong," a tia.
- ⁴Khan, Rengpa Pathianin a var thîn kha a hmua, Pathianin chînribuk ata kha a hon sama, "Mosi, Mosi, a hong tia.
- ⁵Hong nâi no ro; ni kea kekok kha khek ro, ni ngîrna hmun kha hmun irthiang kêng a ni," a tia.
- ⁶Khan kei hi ni pa Pathian, Abrahama Pathian, Isaka Pathian le Jakoba Pathian kha ki ni, a ti pe nôka. Kha tena chu Mosia kha a hmâi a thupa; Pathian a en ngam loi sikin.
- ⁷Khanchu Rengpa khan, "Aigupta rama ki mi omhai dengthei taka an om kin hriata, annihai enkoltuhaiin deng an intheitirhaina irhâi ki le'nhriata; an beidongnahai khom kin hriat.
- ⁸Khasikin Aigupta mihai kuang ata hruaisuaka inzôkhai hrang le, kha ram mâksana, Kanaan hai, Hit hai, Amor hai, Periz hai, Hiv hai le Jebus hai omna ram sa le lian tak, khuaitui le dût tui luangna rama hruai suak hrangin ki zuang isuak a ni ta.
- ⁹Israel irchihai khêk irhâi, Aigupta-haiin an hnuaisiahai lam kha ki hmuhai maia.
- ¹⁰Khasikin nang ki târ, ki mi Israel irchihai Aigupta ram ata hruai suakin, Faroa kuanga fe ro," a tia.
- ¹¹Khan Mosia'n Pathian kuang khan, "Keima Faroa kuanga zu fea, Israelhai Aigupta ram ata zu hruai suakhai hrangin ite chukna nei mo ni ni isôn?" a tia.



¹²Khanchu, Pathianiin “Keima ni kuang om mai ki ti, nang ki ompui ti inhriatna’n hi hih irsinsia ro: Aigupta ram ata ni hruai suakhai zoiin chu, hi tânga ngêt hin Pathian sin nin la itho hrang a ni,” a tia.

¹³ Khanchu Pathianin Mosia kuang khan, “Irngai ro, Israel irchihai kuanga zu fe’n lân, nin irchibulhai Pathianin a ni zuang itîr a ni; zu ti’n lân. Anni’n tu mo a ini, imo a’rhming an ti’n te? itin mo ki iti pehai hrang nir hming an nir donin te,” a tia.

¹⁴ Khanchu, Pathianin Mosia kuang khan, “Kei chu ‘OMA KI NI’, a tia. Khanchu nangma’n Israel irchihai kuanga khan, OMA khan nangnihai hruai suak hrangin a ni zuang itîr a ni, ni iti hrang a ni,” a tia.

¹⁵Khanchu Pathianin Mosia kuang khan, “Nangin Israel irchihai kuanga khan,Rengpa nin irchibulhai Pathian Abrahamama Pathian, Isaka Pathian le Jakoba Pathianin nin laia hin a ni zuang itîr a ni, hi hi kumtuanga ki’rhming hrang chu a ni, nin irchihai tenin nin nin hriat mai hrang a ni ti roh.

¹⁶Fe’n lân Israel ulianhai buk khômhaiin lân, Rengpa nin irchibul Pathian, Abrahamama Pathian, Isaka Pathian le Jakoba Pathianin nangni ki zuang pan a ni hi, Aigupta mihaiin nin chungang nangni an ilo lam hi ki hmu ta.

¹⁷Aigupta rama dengthei taka nin iom hi, nangni hruai suak ki ta, Kanaan hai, Hit hai, Amor hai, Periz hai, Hiv hai le Jebus hai ram khuaitui le dût tui luangna rama nangni hruai lût ki ti, ki lei iti kha tiin ki kuang a zuan lâ a ni; zu ti’n lân.

¹⁸“Khanchu ni chong le’rngai an ta; khanchu Israel ulianhai le nangma Aigupta rêng kuanga fe unglân, a kuanga khan, Rengpa Hebraihai Pathianin a ni zuang irtongpuia; khasikin ramchârna hmuna, sîn thum fena lampuia son Rengpa kin Pathian kuanga kin va irbôl theina hrangin lungkham takin nin fetir ro; va ti unglân.

¹⁹Khanchu Aigupta rêngin nakhrât nin song no’n chu nangni phal no nih ti khom kin hriat.



²⁰Khanchu ki kut phar ki ta. Aigupta-hai laia thilirkhêl tak, ki thil thotheinai hai hmangin tuang an ta, kha tena kêng nangni a la insua hrang.

²¹Khanchu hi mihai hi Aigupta mihaiin inrenhai an ta, nin suak tena khom kut korongin suak no chin ni.

²²Nupang om murdi'n an kua le tui murdi'n sumtaka irvônahai, rângachaka irvônahai, sil le kai, nin nâi le tehai khom tamtak Aigupta rama irchon nin isuakpui hrang tâk a ni," a tia.

Fesuakna 4

Pathianin Mosia thilirkhêl tho theina a pêk

¹Khanchu Mosia khan, Rengpa kuanga, taksônloiin ki hê la no nihai, "Rengpakhom ni makunga nan lâp pe no ni, an ti ngânin te," a tia.

²Khanchu Rengpa'n, "Ni kuta ni intûk kha i mani?" a tia. "Khianghrol," a tia.

³Khanchu Rengpa'n "Hnuaia khan lei pai ngân ta," a tia. Khanchu a paia, voikhat zelin mirûl a hong chang pea, an tânsan ta.

⁴Khanchu Rengpa'n, "Ni kutin zu'nbanin lân, a'rmei khan zu chel ro," a tia. Khanchu a zu'nbana, a chelin chu khianghrol a chang pe nôk ta.

⁵Rengpa'nmin irchibulhai Abraham Pathian, Isaka Pathian le Jakoba Pathian chu nangma kuanga khom nang a ompui ti an inhriat theina hrangin, a tia.

⁶Khanchu Rengpa'ni kut leh khan, ni rôpa khan zu thun nôk ro, a tia, a zu thuna a hong kêlsua nôkin chu a kut chu ivur anga vâp ngoiin a phar suaka.

⁷Ni kut kha zu thun nôk roh a ti pe nôka, khanchu a zu thun nôkin chu a pum danga a taksahai ang dênin a om pe nôk ta.

⁸Khanchu Pathianin, thilirkhêl voikhatna kha ni thoa nang an iam no le khom, voihnina nir hmuhai tena chu nang iam ta an ti.

⁹Khanchu kha irsinsiana inhni kha an iam noa, ni ihril tak an sôn no'n chu, tui luang tui zu thâlin lân, irnêng chârna buakin lân: kha tui irnêng châra ni ibuak kha thisen hong chang a ti, a tia.



¹⁰Khanchu Mosia'n Rengpa kuanga, "O Rengpa ni tîr no ro, kei chu maton ata mi chong thei ni ma unga, mi chong ak mi ki lei ni sikin," a tia.

¹¹Khanchu Rengpa'n, "Mihriam hmûr hi tu isiam mo ni isôn, mikuar sêthai, mit vârhai, mitchôhai hi tu itho mo a ini?"

¹²Khasikin fe zelin lân, ni hmûr chu keima hmûr ni a ta, ni ihril hrang khom nang ti pe thiai ki ti," a tia.

¹³"Ni mah Rengpa mi dang tîrhai ro," a tia.

¹⁴Kha tena chu Rengpa kha Mosia chung a milung hoi pe maka, "Ni upa Arona Levi irchia mi a iom mo ni ma? Ama chu chong âng khom a theia, irngai roh nang a don hrangin a hong, nang a hmu'n chu a sân lômin a raifân a ta.

¹⁵Khasikin nangma'n chongpui masa'n lân, ki thuhrilhai kha hril pe vingin lân, ni hmûr le a hmûrhai chu keima'n nangni ompui ki ta, nin iti hranghai khom, nangni intitir ki ta.

¹⁶Khanchu Arona kha mipui laia ni thuhiril irhlettu chang a ta, nangma hrangin ni hmûr ni bâi nang chang pe a ta, nangma chu ama hrangin a Pathian angin om ni ta.

¹⁷Khanchu nangma'n, hi khianghrol hi chôi ni ta, kha leh khan irsinsiana thilirkhêlhai ni itho hrang a ni," a tia.

Aigupta rama Mosia kîr nôkna

¹⁸Khanchu Mosia chu a tarpu Jethroa kuang a kîr nôka, "Aigupta rama ki urêng omhai so a dam a harin mo an la om lungkham takin nin fetir ro," a tia. Khan a tarpu Jethroa khomin "Irtharngam takin va fe ro," a tia.

¹⁹Khan Rengpa'n Midian rama Mosia kuanga khan, "Fe'n lân, Aigupta rama va kîr nôk ro: nang a that hranga irsiamhai kha an thi zoi ta," a tia.

²⁰Khanchu Mosia chu a dôngma le a nâihai a hruaihaia, sakuartung chung a an chuangtirhaia, Aigupta rama an kîr nôk ta. Mosia khan Pathian khianghrol kha a chôi maia.



²¹Khanchu Rengpa'n Mosia kuanga khan, "Aigupta ram ni tung tena chu ni kuta thilirkhêl nang ki inchôitirhai hi Faroa mit hmua irlangtir ngêt ro, khannisianlân, a milung inliantir pe ki ta, khanchu mihai kha insuatirhai no ni.

²²Khan, nangin Faroa kuanga khan, 'Rengpa'n, Israel hi ki nâipa ki nâi lutîr a ni:

²³ khan ki nâipa'n ki sin a tho theina hrangin insua roh ki tia, nuam mak chea, ni nâipa, nâilutîr thatpai ki ti, a ti ti ro,' a tia.

²⁴Khanchu hiang hin a hong nia, lampui riakbuka khan Rengpa'n Mosia chu a'rtongpuia, that a tuma.

²⁵Khan Zipori'n lung bavo a lâka, a nâipa servun a tana, Mosia ke an tôn pea; khanchu Mosia'n, 'Ki ta hrangin pasal thisen insuak ngam mi ni nih,' a tia.

²⁶Khasikin, 'Sertan sikin pasal thisen insuak ngam ni nih,' a tia.

²⁷Khanchu Rengpa'n Arona kuang khan, "Mosia va don hrangin ramchârna hmuna son va fe ro," a tia. Khanchu a fea, Pathian tânga khan a va hmua, a tum ta.

²⁸Khan Mosia'n Rengpa'n a itîr nasan le thilirkhêl tho roh a iti murdi a hrila.

²⁹Khanchu Mosia le Arona'n Israel irchi ulianhai kai chu an koi bukhaia:

³⁰Khanchu Rengpa'n Mosia kuanga a ihril murdi kha Arona'n a hril pehai vinga, mipuihai mit hmua thilirkhêlhai kha a'rhmuhaia.

³¹Khanchu mipuihai khan tak an sôna: Rengpa'n Israel irchihai chu a ompuihaia, an dengthei lamhai Rengpa'n a ni hmu mai a nih iti an irhriat suakin chu an lu kûnin, chubai an mûk ta.

Fesuakna 5

Aigupta rêng makunga Mosia le Arona an ngîrna

¹Khanchu Mosia le Arona chu Aigupta rêng kuanga an fea, Faroa kuang khan, "Rengpa Israelhai Pathianin hiang hin a ti, ki mihai hi ramchârna hmuna infetirhai ro, kût an hmang theina hrangin a ti," an tia.



²Khan Faroa'n, "Tu mo a inih Rengpanin iti chu, a thu zôma, Israelhai infetirna hranga nin iti? Rengpa nin iti khom inhre ma ung, Israelhai khom infetirhai no ning," a tia.

³Khanchu anni khan, "Hebraihai Pathianin a ni zuar tongpui nôk ta, khasikin ramchâr sîn thum fena lam inzinna son, Rengpa kuang kin va irbôl theina hrangin nin fetir ro, an tia. Kin tho no'n chu kin chung a hin chem hrei a ni no le hripui inlêngin a ni ithat zoi hrang a ni," an tia.

⁴Khanchu Aigupta rêngin an kuang khan, "Itina mo Mosia le Arona hi mipuihai sintho nin inchâihai ngai? nin sin kha van sintirhai chian roi," a tia.

⁵Khanchu Faroa'n, "Hi rama hin nin pungin nin tam tâk sikin, nangni ruai hin an puak rik pêl hi nin irngamtirhai ngai", a tia.

⁶Hi nî sîn ngêta hin Faroa'n a enkoltu a hruaituhai kuanga khan,

⁷"Atûn ata chu pilrôngar (ita) siamna hrangin fapon khom zongin pehai ta no roi, an bingin irfuanghai sian buk khôm ta ri sehai.

⁸Khannisianlân, pilrôngar matona an isin dôr ngêt la sin hrangin ti pehai roi, intôm viat no ri sehai, an irtha a boi sika kêng, 'Kin Pathian kuang va'rbôl kin ti,' an iti.

⁹Khasikin hi nêka tama sin hrangin inphûthai unglân, irlêmin sin zong loi hrangin ti pehai roi.

¹⁰"Khanchu an hruaitu, enkoltu pâlhai chu an fea, mi sinthotuhai kuang khan, 'Faroa'n fapon nangni pe ta no ning' a ti.

¹¹Nin bingin fapon khom nin ihmu theina hrang taka va zong unglân, nin sintho hi a irkai ual hrang khom ni mah a ti," an tia.

¹²Kha tena chu sinthotuhai chu Aigupta ram pumpuia fapon zongin an chaia,

¹³khan a hruaitu enkoltu pâlhaiin, "Matona pilrôngar nin isin dôr ngêt, a sîn tin nin la isin mai hrang a ni," tiin an tuarhai maia.



¹⁴Khanchu, Faroa sin enkoltuhai khan Israelhai laia hruaituhai kha an vîkhaia, “Itina mo mizân le a vuan sînhai ten hin matona nin sîn khat sin lua nin iphâk ta loi,” tiin an halhaia.

¹⁵Khanchu Israel irchi laia an hruaituhai chu Faroa kuang an va fea, “Itina mo hiang dôr hi teh keini ni sinthotuhai hi, ni nin phût tâka?

¹⁶Ni sinthotuhai hi fapon ite ni pe ta loiin ni oma, pilrôngar siam roi, ni ni tia, neinun boiin, irngai roh ni sinthotuhai hi an ni vîka, ni mihai an pua no sikin iti,” an chardong thu an va hrila.

¹⁷Khannisianlân ama khomin, “Nin irtha a boi, nin irtha a boi, hi sika kêng hi irphialna zonga Rengpa kuang va’rbôl hrang nin iti ngai a ni,” a tia.

¹⁸Khasikin fe unglân sin va zong roi, fapon chu nangni pe ta no ning, khannisianlân pilrôngar sin hranga nangni an inphût zât chu nin isin ngêt hrang a ni, a tia.

¹⁹A nî tina pil nin ihâl ite a irkôm thei ual hrang ni ma, an ti an hriata, Israel hruaituhai chu an vânduai bîk iti an irhriat suaka.

²⁰Khanchu Faroa kuang ata an hong kîr nôk tiang chu Mosia le Arona lampui kôla ngîr an hmuhaia;

²¹khanchu anni kuang khan, “Rengpa’n nangni ompui sian, Pathianin roirêl theina nangni innei ri se, keinihai ni thatna hrangin an kuta chem hring chôiin Faroa mit hmua, an ni ilo a ni ta,” an tia.

Pathian kuanga Mosia a nuar

²²Khanchu Mosia chu Rengpa tiang thîrin, “Rengpa itho mo hi mihai hi ni isoisakhai? Itho hranga ni ni itîr mo?

²³Faroa kuanga nir hminga thuhiril hrangin ni ni tîr ata, Faroa’n hihai chungga hin nunsiat a hmanga, nang lakin ni mihai hi la sansuakhai mai mak chea,” a tia.

Fesuakna 6



¹Khanchu Rengpa'n Mosia kuang khan, "Atûn chu Faroa chungã ki itho hrang hi hmu ta ni ti: Ki kut hrâtna sinin ki mihai infetir a ta, ki mihai a ram ata insuakhai ta a ti.

Pathianin Mosia a koina

² Khanchu Pathianin Mosia a koia, "Kei Rengpa ki ni:

³Abrahama kuang, Isaka le Jakoba kuanga khom Pathian itinrêng thothei kin lâr pehaia, khannisianlân Jehova ki nih tiin chu la'nlâr pehai ma ung.

⁴Khan anni kuang khan chu, Kanaan ram, zoro sôtnotea an lei mikhualna ram pe hrang thu ki lei irthungpuihai tâka.

⁵Atûn chu Israelhai khêk irhâi, Aigupta haiin suak anga an ihmanghai lai hin, ki thu lei thung kin hriat suak ta.

⁶Khasikin Israel irchihai kuang khan 'Kei Rengpa'nAigupta rama nin suak puak rik pêlna ata nangni hruai suak ki ta, an suak chang ta no chin ni. Ki kut hrât tak hmangin dengitheitirhai ki ta, nangni chu nangni hruai suak ki ti.

⁷Khanchu ki mi ni ta nin ta, kei nin Pathian ni ki ti; khanchu keima hi nin Pathian Rengpa Aigupta hai suak nin changna ata hruai suakpu ki nih ti inhria ta nin ti.

⁸Abrahama, Isaka le Jakoba ki lei ipêkhaina ram hi nangni'n hong lua nin ta, nin irchon ni ta a ti: Kei Rengpa ki nih tiin hril ta nin tih a tia.

⁹Khanchu Mosia'n kha thu kha Israel irchihai kuanga a va hrila, khannisianlân an lungrîl sôl sikin le dengthei hrai tâk sikin Mosia thu irngai thei mahaia.

¹⁰Khanchu Rengpa'nMosia kuanga,

¹¹"Va fe'n lân, Aigupta rêng Faroa kuang, Israel irchihai hi a ram ata insuahai ta ri se, va ti pe'n lân," a tia.

¹²Khanchu Mosia'n Rengpa kuang khan, "Irngai ro, Israel irchihai lua'n ki thu hril irngai nuam mahaia, keima mi chong ak hi Faroa len vângin chu a'rngai lua le'rngai nuam no ni?" tiin a hrila.



¹³Khanchu Rengpa'n Mosia le Arona kuang khan, "Aigupta ram ata ki mi Israelhai hruaisuak hrangin thu nangni ki pêk tah ti hi Israelhai le Aigupta rêng va hril roi," a tia.

Mosia le Arona'n Israel mi hruaituhai irhming an irziakna

¹⁴Khanchu hihai hi Israel nâilutîr tak Reubena irchihai chu an ni. Hanoka, Palua, Hezrona, le Karmia hai hi an ni, hihai hi Reubena nam irtihai an ni.

¹⁵Khan Simeona irchihai chu Jemuela, Jamina, Ohada, Jakina le Zohara, Kanaan nupangnu le a nâi Saula hai hi an ni, anni hi Simeona nam irti an ni.

¹⁶ Khanchu hihai hi Levi irchihai chu an ni, Gersona, Kohatha le Meraria hai an ni; Levi dam sêng kum chu 137 a ni.

¹⁷Khanchu an nam ang takin Gersona nâihai chu Libni le Simeia hai an ni.

¹⁸Kohatha nâihai chu Amrama, Izhara, Hebron le Uziela hai an ni; Kohatha dam sêng kum chu 133 a ni.

¹⁹Meraria nâihai chu Mahlia le Musia an ni. Hihai hi an irchi fe dân anga Levi nam irtihai an ni.

²⁰Khan Amrama'n chu a pa farnu Jokebedi dôngma'n a neia; khanchu Arona le Mosia a neipua, Amrama dam sêng kum chu 137 a ni.

²¹Izhara nâihai chu Kora, Nefega le Zikri hai an ni.

²²Uziela nâihai chu Misaela, Elzafana le Sithria hai an ni.

²³Khan Arona'n Aminadaba nâinu, Nasona farnu Elisebi dôngma'n a neia; Nadaba, Abihua, Eliazara le Ithamara a neipua.

²⁴Kora nâihai chu, Asira, Elkana le Abiasafa hai an ni; hihai hi Kora nam irtihai chu an ni.

²⁵Khan Arona nâipa Eliazara chu Putiela nâinupang laia inkhat dôngma'n a neia, Finehasa a neipua. Hihai hi a nam fe dân anga Levi irchibulhai chu an ni.

²⁶Hihai hi kêng Arona le Mosia Rengpa'n ki mi Israelhai "Aigupta ram ata hruai suak roi, a iti pehai," an ni.



²⁷Hihai hin kêng Aigupta rêng Faroa va chongpuia, Israel irchihai chu Aigupta ram ata suak hranga va hriltu chu Mosia le Arona hai hi an ni.

Mosia le Arona kuanga Rengpa thupêk

²⁸Khanchu, hiang hin a hong nia, Aigupta rama Rengpa'n Mosia a koi ni khan,

²⁹Rengpa'n, "Kei Rengpa chu ki ni: Aigupta rama rêng Faroa kuang khan, ni kuanga ki ihril murdi hi va hril pe ro," tiin Mosia kha a hrila.

³⁰Khan Mosia'n Rengpa kuang khan, "Irngai roh kei chu chong ak ki nia, khasikin keima chong hi itin mo Faroa'n a lei irngai hrang?" a tia.

Fesuakna 7

Arona khianghrol

¹Rengpa'n Mosia kuang khan, "Irngai ro, Faroa ta hrangin, Pathiana nang ki siam tâk kêng, ni upa Arona hrangin deipu ni ta ni ti.

²Thu nang ki ipêk murdi hrilhai zitin lân; khanchu ni upa Arona'n Faroa kha a ram sêng ata Israelhai kha insuatir hrangin hrilhai a ta,

³khannisianlân Faroa lungrîl inngartir pe nôk ki ta, irsinsiana le sinirkhêl ki tho chu Aigupta rama hin hong inthang a ta.

⁴Khan, nikhomsianlân Faroa hin pom nuam no ni, khanchu Aigupta ram sênga hin ki kut irngat ki ta, annihai chung a sate'n dengtheina tuangin ki mi Israelhai chu Aigupta ram ata hruai suakhai ki ti.

⁵Khanchu, Aigupta mihaiin, an rama ki kut ki phara, Israelhai ki hruai suakhai nê tena kêng, Rengpa ki nih ti hi an la inhriat hrang," a tia.

⁶Khanchu Mosia le Arona khan a iti ang takin an hong thoa, Rengpa'n thu a ipêkhai ang takin.

⁷Hi zoro lai hin Mosia chu kum sômriat mi a nia, Arona chu kum sômriat inthum mi a ni.

⁸Rengpa'n Mosia le Arona kuang khan,



⁹“Faroa’n sinirkhêl tho roi nangni a lei ti’n chu, Arona kuanga ni khianghrol kha la’nlân hnuaia pai ro, khanchu mirûl hong chang a tih ti pe’n lân,” tiin a hrilhaia.

¹⁰Khanchu Mosia le Arona kha Faroa kuang an va lûta, Rengpa thupêk angin an thoa; Arona’n a khianghrol kha Faroa le a siahlohai mit hmua a paia, mirûl a hong chang pehai tâka.

¹¹Khanchu Faroa’n dôithei le mi vârhai a koihaia, Aigupta ram sûnga mitphil dôithei hai khomin an khianghrolhai an paia, mirûl an hong chang pehai tâka.

¹²Khannisianlân, Arona khianghrol khan a danghai kha an volpaihai vinga.

¹³Khannisianlân, Faroa lungrîl chu a ngar pe maia, an thuhiril kha zôm nuam ual maka, Rengpa’n a lei iti tâk ang khan.

Aigupta ram hremna thisen

¹⁴Khanchu Rengpa’n Mosia kuang khan, “Faroa lungrîl an ngartir sikin, a mi hai insuatir hrangin nuam maka.

¹⁵Khanchu Faroa kuang zînga va fe nôkin lân; tui chôi fe ngai a ni sikin, ama irhmupui hrangin tui kôla khan ngîrin lân; ni khianghrol mirûl chang thei kha chôi roh.

¹⁶Khanchu a kuang khan, ‘Rengpa, Hebraihai Pathianin, ki mi hai hin ramchâra ki sin an tho theina hrangin insuahai ro, tiin a ni hong itîr a ni; atûn ten ni la ngaipoimo no’n chu.

¹⁷ Rengpa’n a vuan ata ni la’rhriatsuak no’n chu Rengpa ki nih ti inhre lat ta ni ti. Irngai ro, ama ki mi hong tîrtu khianghrol leh hin ivadunga tui hi vîk a ta, khanchu thisen chang ving a ti.

¹⁸Kha tena chu tuia ngahai, khom thi ving an ta, tui khom a mirimhai hong siat ta a ti. Aigupta mi hai in kha tui khom kha in thei no nihai a ti, va ti ro,’ a tia.

¹⁹Khanchu Rengpa’n Mosia kuang khan, ‘Arona kuanga ni khianghrol chôiin lân, Aigupta ram tui chunghaia, ivadung haia, dîl le tui omna hmun tin



chunga ni khianghrol kha pharin lân, tui chu thisen a hong chang theina hrangin, kha tena chu Aigupta rama thing le lunghai tenin thisen hong om ving a ti, a tih va ti ro,' a tia.

²⁰Khanchu Mosia le Arona haiin Rengpa thu pêk angin an thoa. Khianghrol kha an irleka, Faroa le a siahlohai mit hmua ivadunga tui kha a hong vîka; khan ivadunga tuihai kha thisen a hong chang zit ta.

²¹Tuia nga om murdihai khom an hong thi zoi tâka; Aigupta mihaiin in thei ta mahaia; khanchu Aigupta ram lian dôra khan thisen a hong bit zoi tâka.

²²Khanchu Aigupta rama mitphil dô theihaiin an dô hmangin an ni khom an thoa; Faroa lungrîl chu inngartirin a oma, an thu ite irngai nuam loiin a oma; Rengpa'n a lei iti tâk ang khan.

²³Khanchu Faroa chu a in tiang a kîr nôk tâka, ite a lungrîl châng pe viat maka.

²⁴Aigupta mihai khan tui in hrang zongin muang kôlhai khan an tuka; ivadunga tui an in thei ta no sikin.

²⁵Rengpa'n tui a vîk nî ata irthokin sîn sari a hong ni ta.

Fesuakna 8

Uichok intâm

¹Khan Rengpa'n Mosia chu hiang hin a ti pea, "Faroa kuang va fe'n lân, Rengpa'nki mihai khan ki sin an tho theina hrangin insuahai roh.

²Nin suatir nuamhai zel no'n chu, nin ram sip khakin uichok insuahai ki ti.

³Nail vadung khom uichokin sip an ta, nangma in sînga khom lût an ta, ni zâlna hmun, ni puantahai le ni sinthotuhai in sîng khom sip zoi an ti, ni mihriam omna hmun tina sip an ta, ni buhmun le ni khalâia khom fuan sup supin om an ti.

⁴Khakhêla uichokhai chu nang le ni mihai le ni sinthotuhai laia sip zitin om a ti, a ti va ti ro," a tia.



⁵Khanchu Rengpa'n Mosia kuang, "Arona kuanga ni khianghrol kha tui chung a khan irlekin lân, Aigupta ram sînga hin uichok hong suak ni ta ri se, va ti ro," a tia.

⁶Khanchu Arona'n Aigupta ram vadunghai chung a khan a kut a phara, khanchu uichok an hong suak tâka, Aigupta ram murdi an hong bit zit tâk a ni.

⁷Khan tasân theihai khomin an dôihai hmangin khaang khan an thoa; Aigupta rama khan uichok an hong insuaktir pehaia.

⁸Khanchu Faroa'n Mosia le Arona a koihaia, "Rengpa kha koi unglân, ki mihai le ki kôl ata uichokhai hi lapai sianlân; khanchu Rengpa kuang an irbôl theina hrangin mipuihai hi infetirhai ki ti," a tia.

⁹Khanchu Mosia'n Faroa kuang, "Hi inzak irlâkna ata hi nangin ni nei pe'n lân, nangma le ni ina uichokhai hi nin boitir pe hrang le vadunga fea om mai hrangin ni mi le ni siahlohai le nangma ta hrangin itika mo nangni ki la izong pe hrang?" a tia.

¹⁰Khanchu Faroa'n, "Zînga duah," a tia. Mosia'n "Ni thu ang takin ni ri se:Rengpa kin Pathian ang hi mi tûte om mahai, ti nin hriat theina hrangin.

¹¹Khanchu uichokhai khan ni mihai le ni siahlohai, ni in le nangma irthokin fesuak an ta; ivadunga om ta an ti," a tia.

¹²Khanchu Mosia le Arona chu Faroa kuanga irthokin an fesuak tâka: Mosia'n, Faroa chung a uichok a ikêlsua chungchânga khanRengpa a koi tâka.

¹³Khanchu Rengpa'n Mosia thu angin a hong tho pea; khanchu uichokhai chu loi le kho sînghaia, in sînga an thi khup tâka.

¹⁴An bukkhômhaia, an thu lulin an mirim a siata.

¹⁵Khannisianlân Faroa'n an boi tah ti thu an hriatin, a milung an ngartira; Rengpa'n a lei ihril tâk angin an thu hril uksak nôk ta maka.

Phersedîp intâm



¹⁶Khanchu Rengpa'n Mosia kuanga, "Arona kuanga ni khianghrol kha inlekin lân, hnuai chung a vâiphin kha vîk ro, Aigupta rama phersedîp an hong tam theina hrangin, tho ro," a tia.

¹⁷Khanchu a hong thoa, Arona'n a kuta hmol kha an leka, hnuai vâiphin kha a vîka, sa le mihriamhai chung a khan phersedîp an hong om tâka.

¹⁸Khanchu tasân theihaiin an dôî hmangin phersedîp intâm tir hrangin an thoa, khannisianlân tho thei mahai; khanchu sa le mihriam chung a hrikhai an hong om tâka.

¹⁹Khanchu tasân theihaiin Faroa kuanga khan, "Hi hi Pathian kut chal a ni," an tia. Faroa lungrîl chu an ngartira; Rengpa'n a lei ihril tâk angin an thu hrilhai chu irngai ual loiin.

Thoivâi intâm

²⁰Khanchu Rengpa'n Mosia kuang khan, "Zînga thoiin lân, Faroa kuanga va ngîr ro: irngai roh tui chôi hrangin hong suak a ta, a kuang khan, 'Rengpa'n hiang hin a ti, ki sin an tho theina hrangin ki mihai infetirhai roh.

²¹Ki mihai nin fetirhai no'n chu, ni in sîng le ni mihai chung a, ni siahlohai chung a le nangma chung a thoivâihai hong tîr ki ta: Aigupta mihai omna le an inhaia thoivâi hong sip zoi an ti.

²²Khanchu kha ni tena chu, ki mihai omna Gosen ram chu zêkpai ki ta, thoivâi om viat no nihai; hnuai chung hai khom hin Rengpa ki ni, ti an hong inhriat theina hrangin.

²³Khanchu ni mihai le ki mihai kêra saninzôkna thua teina sia ki ti; kha inhriatna kha chu zînga hong tung a ti,' ti ro," a tia.

²⁴Khanchu Rengpa'n khang khan a hong tho tâka. Faroa in sîng le a siahlohai in sînga khan thoivâi irkhêl takin an hong tama; kha thoivâihai leh khan, Aigupta ram murdi insiatin a hong om tâka.

²⁵Khanchu Faroa'n Mosia le Arona a koihaia, "Fe unglân, ram kêra nin Pathian kuang irbôl roi," a tia.



²⁶Mosia'n, "Khaanga tho kha a sa ti maka; Aigupta mi intiromna kha chu kin Pathian Rengpa kuanga ki irbôl sa hrang a nia, irngai ro, Aigupta mi intiromna chu an mit hmua kin irbôl sa'n chu, lung leh an ni idêng loi hrang ma ni?"

²⁷Thu a ni ipêk angin, ramchârna hmun, sîn thum fena lam hlataka fe kin ta, Rengpa kin Pathian kuang irbôl kin ti," a tia.

²⁸Khanchu Faroa'n, "Rengpa nin Pathian kuang khan, ramchârna nin irbôl theina hrangin nangni infetir ki ti. Aniachu, ram hlataka fe thei no chin ni; kha kha ni zong pe roi," a tia.

²⁹Khanchu Mosia'n, "Ni kuang ata fesuak ki ta, Faroa le a siahlohai, a mihai rengata, thoivâihai hi zînga irthokin chu an rot theina hrangin Rengpa chu nghî ki ti; khannisian mipuihai chu Rengpa kuanga irbôlna hmuna infetirhai loiin, hmûsit takin Faroa'n enhai mai ta no ri se," a tia.

³⁰Khanchu Mosia chu Faroa kuang ata a fesuaka, Rengpa kha a ngêna.

³¹Khan, Rengpa'n Mosia iti angin a tho pea, a lâkpai pe vinga, inkhat khom hoi pe loiin.

³²Hi zoro khom hin Faroa lungrîl chu a ngar pea, mipuihai chu infetirhai ta mah.

Fesuakna 9

Sahai chungga hripui inlêng

¹Khanchu, Rengpa'n Mosia kuang, "Faroa kuang fe'n lân, 'Rengpa Hebraihai Pathianin hiang hin a ti: ki sin an tho theina hrangin ki mihai infetirhai ro:

²Anni nin fetirhai noa, ni khaphai maiin chu,

³irngai ro, loia ni sa omhai chungga, sakorhai chungga, saringseihai chungga, sehrât pâlhai laia, ni kêlbelrahai chungga,

⁴Rengpa'n a kut thâk a ta, hri irkhêl tak hong om a ti. Khanchu Rengpa'n, Aigupta mihai le Israel mi sahai zêkhai a ta, Israel irchihai ta chu ite thi viat no ni,' a tih ti'n hrilin lân," a tia.



⁵Khanchu Rengpa'n zoro an kung pehaia, "Hi thil hi, hi rama hin zînga Rengpa'n zuan changtir a ti," a tia.

⁶Khanchu zînga chu kha thilhai kha Rengpa'n an changtir tâka. Aigupta rama sa om murdihai chu an thi zoi tâka; khannisianlân Israel irchihai sahai chu inkhat khom thi viat mahai.

⁷Khan Faroa'n mi a tîra; irngai ro, Israel mihai sahai chu inkhat khom thi mahaia. Khannisianlân Faroa lungrîl chu a la ngar maia, mihai kha la'nfetir nuam mai maka.

Sakhuai

⁸Khan, Rengpa'n Mosia le Arona kuang, "Irtapa irvut nin kutkâng sipin chôl unglân, Faroa mit hmua Mosia'n irvân tiang hlôn ri se.

⁹Khanchu Aigupta ram pumpui chung a vâiphin khu a sipa, Aigupta ram pumpuia mihriam le sa om murdihai chung a sakhuai invûng chang a ti," a tia.

¹⁰ Khanchu irtapa irvut kha an lâka, Faroa kôla an ngîra; Mosia'n irvân tiang a hlôna, khanchu mihriam le sahai chung a sakhuai an irvei ving tâka.

¹¹Kha sakhuai irveina sika khan tasân theihai chu Mosia makunga ngîr ngam ta mahai, kha sakhuai kha Aigupta mi murdi le tasân theihai khomin an irvei vinga.

¹²Khan, Rengpa'n Faroa lungrîl chu a la'nngartir pea, Rengpa'n Mosia kuanga a lei ihril tâk angin, anni thuhiril chu irngai ual mah.

Irial

¹³Khan, Rengpa'n Mosia kuang, "Zînga thoiin lân, Faroa kôla ngîrin lân, a kuang, Hebraihai Pathian Rengpa'n hiang hin a ti, ki sin an tho theina hrangin ki mihai infetirhai roh.

¹⁴Hnuai chung a hin keima ang hi tûte om mahai ti nin hriat theina hrangin, atûn a zoro hin chu, ni mihai le ni siahlohai le nangma chung a khom, hi hri hi hong tîr ki ti.



- ¹⁵Atûn hin ki kut irlek ki ta, ni mihai le nangma khom hripuiin nangni hrem ki ta, hnuai irthokin sâtpai ni ta ni ti.
- ¹⁶Khannisianlân hi thil ki ithôna ang taka hin ki sinthotheina chu inentir a ni theina hrangin le, rammual pumpuia ki'rhming puang indarh a ni theina hrangin nang ki la indam mai a ni hi te.
- ¹⁷Ki mihai chung a hin nangma le nangma chôindômin, annihai chu ni la infetir nuamhai loi mo?
- ¹⁸Irngai ro, zînga hiang tika hin chu irial inrik takin zuan thotir ki ta; hiang dôra Aigupta ram a'rzir ata a vuan tena hin a la ihrât ngai loi chu hong om a ti.
- ¹⁹Khasikin, atûn hin mi tîrin lân, loia ni thil nei murdi le ni sahai chu hong hruai lat ri sehai; sa le mi loia om murdi chu, an chung a irial hong tho a ta, thi ving an ti, in sûng tianga hong thei hrang tûte om ta no nihai, a tih tiin hril ro," a tia.
- ²⁰Faroa siahlohai laia Rengpa thu chia omhai chu an siahlohai le an sahai in sûnga thun inlût an ta,
- ²¹khan Rengpa thu irngai loituhai siahlohai le sahai chu loia an inomtira.
- ²²Khanchu Rengpa'n Mosia kuang, "Aigupta ram pumpuia, loia chîmu tinrêng hai chung a le, sa chung a le mihriam chung a, Aigupta ram pumpuia irial tamtak a hong tho theina hrangin, irvân tiang ni kut phar ro," a tia.
- ²³Khanchu Mosia'n a khianghrol chang tiang an leka; khanchu Rengpa'n khonri le irial a zuang insua tâka, hnuai chung a mei angin a hong irtêktir tâka, Rengpa'n Aigupta ram sûnga irial an thotir tâka.
- ²⁴Khanchu, irial le michêk tâk chu a'rkoptira, irkhêl takin Aigupta ram pumpuia, nam inkhat ram a hong chang ata la hmu ngai loi chu a hong om tâka.



²⁵Aigupta ram pumpuia khan, loia thil om murdi chu sa le mihriam khom a dêng thathai vinga; irialin loia sũlhna om murdi a dêng that vinga, rama thingkung khom a dêng that zoi ta.

²⁶Israel irchihai omna, Gosen ram ti no chu irial tâk loina om mah.

²⁷Khanchu Faroa'n mi a tîra, Arona le Mosia an koitirhaia, an kuang, "Atûn hin chu ki lei insual ok a ni ta: ki mihai le kei chu kin tukul a liana, Rengpa chu a fel a ni.

²⁸Ruk ta ri se, irial le khonri irvân inrûm hi a boi theina hrangin, Rengpa kha nghi tan lân, khanchu infetirhai ki ta, om ta no chin ni," a tia.

²⁹Mosia'n a kuang, "Khopui ki suaksan zoiin chu, Rengpa tiang ki kut phar ki ta, hnuai hi Rengpa ta a nih ti nin hriat theina hrangin, irvân inrûmhai mong a ta; irial khom tho ta no ni.

³⁰Khannisian, nangma le ni siahlohai chu, Rengpa Pathian la chi ual no chin ni, ti kin hriat," a tia.

³¹Khan, patkung le fachaihai dêng thatin an oma, fachai vûi lai tak le pat khom a ra lai tak a nia.

³²Bupui le chîmu danghai chu dêng that ni mahaia, an la mông no sikin.

³³Mosia chu Faroa kuang ata khopui a suaksanin chu, Rengpa tiang a kut a phar tâka; khanchu irvân inrûm le irial chu a mong ta, rua khom inthotir ta maka.

³⁴Khan, Faroa'n rua le irial, irvân inrûm chu om ta mah ti an hriat khomin, a la tho'nchâi maia, a siahlohai le an lungrîl a la ngar maia.

³⁵Khan, Faroa lungrîl inngarin a la oma, Mosia bâia Rengpa'n a lei ihril tâk angin, Israelhai chu infetir nuam maka.

Fesuakna 10

Khâi intâm



¹Rengpa'n Mosia kuang, "Faroa kuang va lûtin lân, hi ki isinsiahai hi anni laia ngêt kin entir theihaina hrangin a siahlohai le ama lungrîl khom ki inngartir pehai tâk a ni,

²anni laia thil irkhêl ki ithohai le, Aigupta mihai chung a i angin mo an chung a sin ki itho iti hi a nâipa le a tupahai laia an inhriat theina hrangin le; Rengpa ki ni, ti nin hriat theina hrangin," a tia.

³Khanchu Mosia le Arona kha Faroa kuang an va lûta, a kuang khan, "Hebrai Pathian Rengpa'n hiang hin a ti, ki makunga nangma ni binga irhnuai nuam loiin i dôr mo ni iom hrang? ki sin an tho theina hrangin ki mihai infetirhai roh.

⁴Ki mihai nin fetirhai no'n chu, irngai ro, zînga ni ram sûnga hin khâi hong chôihai ki ta;

⁵hnuai chung hmun tin hi a dâpin hor dâp an ta, irnêng hmu thei loi rakin om a ti; irial la insiat zoi loi, ni la idonghai kha fapai ving an ta; ni ta hranga loia thing mông tharhai khom fapai ving an ti.

⁶Nangma le ni siahlohai omna inhai khom Aigupta mi in tinhai khom sip ving an ti, ni pahai le nir chi suanpâr khomin, hi hnuai chung a an oma irthokin a vuan sîn tena hin an la ihmû ngai loi ni a ti," a tia. Khanchu a'rheia, Faroa a mâksan ta.

⁷Faroa siahlohaiin, a kuang khan, "Hi mipa hi i dôr ten mo ei ta hranga chakal ni sak a ini tâk? An Pathian Rengpa sin an tho pe theina hrangin a mihai chu infetir pehai ta ro ba; Aigupta ram hi a insiat zoi hrang a ni, ti hi ni la inhriat mai loi ma ni?" an tia.

⁸Khanchu Mosia le Arona chu Faroa kuang an hong hruai nôka, ama'n an kuang khan, "Fe unglân nin Pathian Rengpa sin va tho ta roi, khannisian tu tuhai mo a fe hrang chu nin ini hrang?" a tia.

⁹Mosia'n "Rengpa makunga hruaiinthe hrang ki nia, kin nâipang le kin tarhai, kin nâipasal le nupanghai leh fe kin ta, kin sehrât le kin kêlbelra pâlhai leh fe kin ti," a tia.



¹⁰Khanchu an kuanga khan, “Nangni le nin nâihai, nangni infetir ki ta, Rengpachu nin kuanga om ri se; khan khom ni sian en roi ba, thil saloi nin matona a la om maia.

¹¹Khaang khan chu ni no ri se, mi ulian tâkhai kai fe unglân, Rengpa sin va tho roi, kha kha nin inuam tak a nia,” a tia. Khanchu Faroa kuang ata inhnotsuakin an om tâka.

¹²Khanchu Rengpa’n Mosia kuanga, “Khâihai tâk hrangin Aigupta ram chung a ni bân phar ro: Aigupta ram pumpuia an hong om theina hrangin le a rama hnâ hring tinrêng irial insiat zoi loi an fâk inhek theina hrangin,” a tia.

¹³Khanchu Mosia’n Aigupta ram chung a khan a khianghrol an lektira, khanchu Rengpa’n sîn khat le zân khovârin nisua tianga phâivua an hrângtira; zîng khua a hong vârin chu sak phâivua’n khâi a hong chôihai.

¹⁴ Khanchu khâi tamtak Aigupta ram sînga khan an oma; Aigupta ram an bit zoi ta, an tam lam chu irkhêl tak a ni. Matona khan hiang reng hin khâi lei tam ngai mahaia, anni zoia hin khom om khom om ta ngai no ni.

¹⁵Hnuai chung chu an dâp vinga, a ram an thimtir tâka; rama sîlhna hring murdi le, thing rahai, irial idêng that mihliahai an fâka; Aigupta ram pumpui chu loia chîmu hnâ le thilhring om viat thei ta maka.

¹⁶Faroa’n Mosia le Arona inrang takin a koihaia, “Nangni le nin Pathian Rengpachunga thil ki tho insual ok ta.

¹⁷Khasikin atûn hin nangni ki ngên; ki sualna hi voikhat vai ni ngaidam nôkin lân, hi thina hi keima ata a ni lâkpai pe theina hrangin Rengpa kuang ni zong pe roi,” a tia.

¹⁸Faroa kuang ata an fesuaka, Rengpakha an nghi tâka.

¹⁹Khanchu Rengpa khan, khâi murdihai kha Tuipei Sena hôl lûtpaihai hrangin nitâk tiang ata phâivopui hrât tak an thotira, Aigupta ram pumpuia khan khâi inkhat lua om ta mahaia.



²⁰Khannisian, Rengpa'n Faroa lungrîl an ngartira, Israel irchihai chu infetirhai ual mah.

Inthim

²¹Rengpa'n Mosia kuang khan, "Aigupta ram pumpuia inthimin, irmai raka oma inthimin a hong om theina hrangin ni bân phar ro," a tia.

²²Mosia'n irvân tiang a bân a phara; khanchu sîn thum sîng chu Aigupta ram pumpui chu inthim irsa khakin a om tâka.

²³Sîn thum sîng chu mi tukhom an om hmun ata suak thei loiin, a'rhmu khom irhmu thei loiin an oma, khan khom Israel irchihaiin chu an omna khan a vâp pehai maia.

²⁴Khanchu Faroa'n, Mosia a koia, "Fe unglân, Rengpa sin va tho roi; nin sehrât le kêlbelrahai chu omhai sianlân, nin nâihai khom fe no ri sehai," a tia.

²⁵Mosia'n, "Kin Pathian Rengpa kuang khan, kin irbôl theina hrangin, pum hâlirvôm thilinhlanhai le irbôlna hranghai kin kuta ni ni ipêk hrang a ni;

²⁶Kin sa rualhai khom kin ituanghai hrang a ni, sa inkhat lua khom masan ni thei no ni; kin Pathian Rengpa sin kin tho theina hrangin kin ihruaihai hrang a ni; a hmun kin tung mâka chu, i hmangin mo Rengpa sin kin itho hrang ti kin inhriat no sikin," a tia.

²⁷Khannisian Faroa lungrîl chu Rengpa'n an ngartira, infetirhai maka.

²⁸Faroa'n a kuanga khan, "Ki kuang ata rot ta roi, ki chung a irdîn ro; ki hmêl ni hong hmu kochok ta no ro, ki hmêl ni hmu nôk nî chu thi hrang ni ni ta," a tia.

²⁹Mosia'n, "Ni ti indik, ni hmêl hmu nuam ta ma ung," a tia.

Fesuakna 11

Nâilutîr thi hranga hrilna

¹Rengpa'n Mosia kuang khan, "Faroa le Aigupta ram chung a hri inkhat la hong intungtir nôk ki ti; kha zoiin chu hitak ata hi nangni infetir ta a ti; nangni an fetir tena chu, nam tôlin nangni nam tôlpai a ti.



²Mipuihai inhriat hrangin hrilin lân, pasal le nupang tinhaiin rângachak le sumru, irvônahai kha an tualbômhai ata pûk ri sehai,” a tia.

³Rengpa’n Aigupta mihai mit hmua, Israel mihai chu inhroina an neitirhaia, Faroa siahlohai mit hmua, Aigupta ram sûnga mi liantak a nia.

⁴Khan, Mosia’n “Hiang hin Rengpa’n a ti; zânrl̄ laia Aigupta mihai irfang suak ki ta;

⁵Aigupta rama nâilutîr murdi, Faroa nâilutîr a rêngtoihmuna toi lai rengata, bu sukna hmuna sintho, suaknu nâilutîr tak le a sa pâl laia a tê maton takhai leh khan thi ving an ta.

⁶Khanchu Aigupta ram pumpuia khan chap irhâi irkhêl tak om a ta, khang kha la om ngai maka, om khom om ta ngai no ni, a ti.

⁷Khannisian Israel le Aigupta mihai kêra hin Rengpa’n i ang dôra danglamna mo a isia ti an inhriat theina hrangin Israel irchihai chu sa le mihriam chung a ui inkhat lua khomin inmûk no ni.

⁸Khan, hi ni siahlohai murdihai hi ki kuang hong an ta, ki makunga khûksadelin, ‘Nang zuitu hranghai murdi leh khan, suak ta ro,’ ni ti an ta. Khanchu kha zoi le khan suakpuihai ta ki ti,” a tia. Khanchu ningmur takin Faroa kha a suaksan tâka.

⁹Khanchu Rengpa’n Mosia kuang khan, “Aigupta rama hin ki thilirkhêlhai a pung theina hrangin, Faroa’n nin thu a irngai nuam loi hrang a ni,” a tia.

¹⁰Khanchu Mosia le Arona’n Faroa makunga khan, thilirkhêlhai an tho tâka; khannisianRengpa khan Faroa lungrîl chu an ngartira, Israel irchihai chu kha rama irthokin infetirhai mah.

Fesuakna 12

Ferkân kût

¹ Aigupta rama khan Rengpa’n Mosia le Arona-hai kha a ti pehaia,

²“Hi tha hi nin ta hrangin tha maton tak, nin kum khat sûnga tha matontak ni a ti.



³Israel nam pumpui inhrilhai unglân, hi tha sùn sôm ni sùn tak hin mi tin an nam omdân dungzuiin kêlbelrate inkhat lahai sianlân, in sêngkua khatin kêlbelrate inkhat la chit ri sehai.

⁴Khannisian in sêng khat mi fâk a ruk pehai noa, a tôm hraiin chu, an tualbôma mi anaitak le a fâk hrang mihriam an tam le tôm enin irsem ri sehai.

⁵An indit inthangna khom kêlbelrate a ni no le kêl nei thei nin ta, khannisian a chal kum khata mi, demnaboi a ini hrang a ni.

⁶Kha tha sêng ngêtin sùn sôm hleiminli nî sùn dênin enkol nin ta, khanchu Israel nam pumpuiin misa kôl a tâk tena an ithat ngêt hrang a ni.

⁷A thisen kha la an ta, an hme fâkna hrangin mikot chunghaia an inâl sa hrang a ni.

⁸Kha zâna khan hme chu meia rôin, chol polloi bai le hloihna khâ leh an ifâk hrang a ni.

⁹A sel a hroia tuia suangin fa no unglân, a lu a ke le a sêngkuahai khom meia rô ni ri se.

¹⁰Zînga fâk hrangin ite hôi ni no ri se; nin ifâk ban la omhai chu nin ihâlirvôm ngêt hrang a ni.

¹¹Hiang hin nin fâk hrang lam khom a ni; nin puan nin kongka khit pumin, nin kekok khom nin kea bun pumin, le nin kuta khianghrol chôi pumin irhnot pasotin nin ifâk hrang a ni. Kha kha Ferkân kût keima Rengpa nin ni imahripna a ni.

¹²Kha zân ngêta khan Aigupta rama fe ki ta, sa le mihriam an rêngin nâilutîr kai chu that ving ki ta; khante Aigupta rama pathianhai chungga roirêlna intung ki ti.Rengpa'n ki iti a ni.

¹³Thisen chu nin ta hrangin nin omna ina irsinsiana ni a ta; khanchu thisen ki hmu'n chu nangni irkân ki ta, khanchu Aigupta mihai dûk ki thohai tena chu, nangni irhmangtir hrangin hripui ite lêng ta no ni.



14 Hi nê hiRengpa'n sintho nangni inhriattirtu sakhua kût nin ihmang ngêt hrang a ni.

Chol pol loi kût

15Rengpa'n, "Sûn sari sêng chu chol pol loi kût bai nin ifâk hrang a ni; matona nin in sênga chol kha chu nin ipai ving hrang a ni. Mi tukhom maton tak ni sîn ata sîn sari ni tena bai fâkhai chu, Israel mi iti thei ni no nihai.

16Sîn maton taka inkhômpui irthiang nei nin ta, sîn sari sîna khom nei nin ti. Mi tinin an innang fâk zât irfûktir ti no chu ite sin dang nin itho hrang ni ma; fâk zât irfûktir vai tho hrang ni a ti.

17Chol pol loi kût nin ihmang a ni, hi nê sîn khera hin nin mihai chu Aigupta ram ata ki hruai suakhaia; khasikin nin irchihaiin kumtuanga thudet a om mai theina hrangin hi sîn hi nin iser hrang a ni.

18A tha khatna, kha tha a sîn sôm hleiminli nê kha, tha sîn sôminhni sîn khat khohloi dênin

19sîn sari sêng chu nin in sênga chol a iom hrang ni ma, tukhom chol kop bai fâkhai kai chu, nin laia om mani, nin laia suak mani, Israel mipuihai laia tep ni thei no ni.

20Chol kop rêng rêng chu nin ifâk thei hrang ni ma, nin omna hmun tina chol kop loi bai nin ifâk hrang a ni," tiin.

Ferkân kût maton tak

21Mosia'n Israel hruaituhai a koi bûmhaia, an kuanga khan, "Nin in sêngkua nam dân dungzuiin belratehai mani, kêlte mani, zen unglân, ferkân kût sa hrangin that roi.

22Husop ôn la unglân, tâbora thisen leh inchie roi, mikot luah le inkhâr banga tâbora thisen om leh khan nâl roi; mi tukhom zîng khua a vâr mâka chu nin in omna pên tiang nin isuak hrang ni mah.

23 Rengpa kha Aigupta mihai that hrangin a hong itung ngêt hrang a nia; khanchu mikot chung le inkhâr sîr hnia thisen kop kha a hmu'n



chu Rengpa khan mikot kha irkân a ta, in sênga khan nangni that hrangin vântirtôn mi that ngai kha hong lût phal no ni.

²⁴Hiang hin nir chihai hrangin kumtuanga thu'nkung a om mai theina hrangin nin hong itho ngai hrang a ni.

²⁵Rengpa'n nangni pe hranga ram nin lûtin chu hi tho dânhai hi nin izôm hrang a ni.

²⁶Khante, nin nâihaiin, 'Hi sinthôna omzia hi i tihna mo a ini ta hrang?' an hong ti'n chu,

²⁷Nangni'n, 'Hi hi Rengpa Ferkân irbôlna a ni, ama'n Aigupta mihai a that lai khan keini inhai chu a hong irkânpaia, Aigupta rama Israel irchihai chu a hong irkânhai a ni,' la ti roi," a tia. Mipuihai chu an lu an kûna chubai an mûk tâka.

²⁸Israel irchihai chu an fea, Rengpa'n Mosia le Arona thu a ipêk ang khan an thoa.

Nâilutîr thina

²⁹Rengpa'n zân laia Aigupta rama nâilutîr murdi rêngtoihmuna toi Faroa nâilutîr taka irthokin intângna in sênga nâilutîr tak dênin a thathai vinga, sa a suak maton takhai khom.

³⁰Kha zân khan Faroa le a milianhai le Aigupta mi murdi chu an thoia; Aigupta rama khan chapa inrûm a oma; mithi om loina in reng om ta maka.

³¹Reng khan kha ni zân ngêta khan, Mosia le Arona a koihaia, an kuang khan, "Thoi unglân, ki mihai mahai unglân, Israelhai leh hin fe unglân, ni ingên lam angin Rengpa sin va tho ta roi.

³²Nin iti angin nin belrahai le nin kêl le sehrâthai khom fepuihai unglân, keima hrang khom ni chongchai pe sa roi," a tia.

³³Aigupta mihai khan kha ram ata suak lat hrangin Israel mihai kha a tuarpolhaia; "Nin suak lat no'n chu kin ithi zoi hrang kêng," an tia.



³⁴Khanchu mipuihai khan bai an inhmet kha chol kop loi kha an lâka, an inhmetna khêng kha puan leh an tuama, an dâra an bângga.

³⁵Israelhai khan Mosia iti angin an thoa; Aigupta mihai kha sumru irvôna rângachak irvônahai le puanhai an ngêna.

³⁶Rengpa khan mihai kha Aigupta mihai lungkham an ihlo a ni, khaang khan an inghi kai chu an pêka; khaang khan Aigupta mihai an hong irbuk a ni.

Israelhaiin Aigupta ram an mâk

³⁷Israelhai kha Ramases-ah irthokin kein an suaka, Sukoth hmun dênin an fea, nâipang le nupang tep loiin pasal ulian ringot khom nuai ruk an ni.

³⁸Anni le mi dang tamtak an irthoka, belrahai, kêlhai le sahai khom tamtak an hruaihai sa.

³⁹Aigupta ram ata bai inhmet sai chol koploi an hong ichôi kha an inzêia, Aigupta ram ata inhnotsuak an ni sika khan an fâk hrang irfûktir zoro nei mahaia, hi sika hin bai inhmet sai chol an ipol loi a ni.

⁴⁰Khaang khan Israelhaiin Aigupta rama an om sângin kum 430 a ni.

⁴¹Kum 430 a hekin chu, kha nî taka khan Rengpa mi murdihaiin Aigupta an imâk a ni.

⁴²Kha zâna khan Aigupta ram ata anni a hruaisuakhai sikin Rengpa ta hrangin zân an iser hrang a ni; Israelhaiin an irchi suanpâr dênin kha zân kha Rengpa ta hrangin an iser mai hrang a ni.

Ferkân kût hmang hrang dân

⁴³Rengpa'n Mosia le Arona kuang khan, "Hiang hin Ferkân kût hmang hrang dân chu a ni: nam danghaiin chu an ifâk hrang ni mah.

⁴⁴Khannisian siahlo sum le irchôk sai tâk chu dân anga a sertan zoiin chu fa thei ni a ti.

⁴⁵Nam dang le suaka nin ihmanghaiin chu an ifâk hrang ni mah.

⁴⁶In inkhata nin ifâk hrang a nia; hme khom pên tiang nin ichôi hrang ni mah. A ru khom nin inkhiak viat hrang ni mah.



⁴⁷Israelhai murdi'n an ihmang ngêt hrang a ni.

⁴⁸Nam dang nin kuanga om, khanRengpa'n Ferkân a hmang nuamin chu, a in sêngkua pasal om murdi'n sertanhai sianlân, khanchu a ram izir angin kop sa thei ni a ti; khannisianlân sertan loi mi'n chu a ifâk hrang ni mah.

⁴⁹Khakhêla suak le nam dang nin laia omhai hrangin hi dân hin a ihuaphai ving a ni," a tia.

⁵⁰Israel murdihaiin khang khan an thoa,Rengpa'n Mosia le Arona thu a ipêk ang lam takin an tho tâka.

⁵¹Hiang hin a nia, kha nî sîn taka khan Rengpa'n Israel irchihai kha Aigupta ram ata mipuihai chu a ihruaisuakhai tâk a ni.

Fesuakna 13

Nâilutîr Pathian hrangin inhlan hrang

¹Rengpa'n Mosia kuanga khan,

² "Israelhai laia nâilutîr pasal murdi sul sêng ata suak murdi mihriam mo, sa chal mo, ki kuang nin inhlan hrang a ni," ki ta a ni sikin.

Chol koploi bai

³Mosia'n mipuihai kuang khan, "A vuan sîn hin Aigupta ram suak ata nin zôk nî sîn a nih ti inhre mai roi; kut hrât takin Rengpa'n hi hmun ata nangni a ihruaisuak a ni hi; bai chol kop ite nin ifâk hrang ni mah.

⁴Tha maton tak Abib tha a vuan hin nin isuak a ni.

⁵Rengpa'n Kanaan mihai, Hit mihai, Amor mihai, Hiv mihai, Jebus mihai ram, dûttui le khuaitui luangna ram, nin irchibulhai pe hranga lei chonginkunga khan nangni a hruai intung tena chu, hi thaa hin a kum tin nin ihmang hrang a ni.

⁶Sîn sari sêngin bai chol koploi nin ifâk ngêt hrang a ni, sîn sari ni sîn chu Rengpa ta hranga nin kût hmang nî ni a ti.

⁷Sîn sari sêng chu bai chol koploi chu a om zel om no ri se, nin omna hmuna chol ite om no ri se.



⁸Kha ni khan chu nin nâihai kuang, Aigupta ram ata kin hong suak laia khan Rengpa'nsinirkhêl a ni tho pe sikin, hi hi kin itho a ni hi," tiin nin ihril hrang a ni.

⁹Rengpadân chu nin bâia a om mai theina hrangin nin kuta irsinsiana le nin mit kêra hin nin inhriat maina hrang ni a ti. Kut hrât tak Rengpa'n Aigupta ram ata nangni a hruai suak sikin.

¹⁰Khaang khan hi thu inkung hi a kum tin a zoro taka nin hong izôm mai ngai hrang a ni.

Nâilutîr

¹¹Hiang hin ni a ti, Rengpa'n nin kuanga le nin irchibulhai laia chonginkung dettak neia nangni pêk a inkung tâk ang khan, Kanaan mihai rama nangni a hruai intunga, nangni a pêk tena chu.

¹²Sul ata suak masatak pasal le nin sahai a chal maton takhai kha chu, Rengpa hrangin nin isia indanghai zêl hrang a ni: pasal murdi chu Rengpa ta hrang ni a ti.

¹³Sakuartung a suak maton tak chu kêlbelrate le nin inhlan hrang a ni; nin inhlan nuam no'n chu a ring nin inkhiak pe hrang a ni.

¹⁴Hiang hin la ni a ti, nakana chu nin nâihaiin, "Hi hi itina mo a ini?" tiin nangni an irdonin chu nangni'n an kuang, "Rengpa kut hrât takin Aigupta ram ata suaka kin om a ni insuaktir a ni.

¹⁵Hiang hin a nia, Faroa'n kin suak hrang a phal no lai khom khan, Rengpa'n Aigupta rama nâilutîr murdi le sa a suak masa takhai chu a thathai vinga, khasikin pasal, sul ata suak masatak murdi hin Rengpa kuang kin irbôlna a ni hi; khannisian kin nâihai laia nâilutîr pasal murdi kin inhlan a ni, ti roi.

¹⁶Nin kuta nin ta hranga irsinsiana ni a ta, nin michala irsinsianahai le kut hrât tak Rengpa'n Aigupta ram ata a ni hruaisuak tâka," a tia.

Sûm le mei inding



¹⁷Faroa'n mihai insuak hrang a phal zela khan, Pathianin Filistia ram tiang khan lampui nâi ual khomsian hruaihai maka; Pathianin irdoi a nang iti a'rhmua tena an lungrîl indang lamin Aigupta ram tiang ki mihai kîr nôk hrangin nuam ma ung, a tia.

¹⁸Khasikin Pathianin mihai kha Tuipui Sen tiang panin ramchârna tiang a hruai irvêlpuihai ta; Israelhai kha Aigupta ram ata kha râl doi hrang irtûng chakin an irthok ta.

¹⁹ Mosia khan Josefa ruhai kha a chôia; Josefa'n Israel irchihai kuanga khan, "Pathianin nangni la zuang hruai a ta, ki ruhai hi, hi hmun ata hi nin ichôi hrang a ni," tia chonginkung lei nei sai a ni.

²⁰Israelhai khan Sukoth hmun an mâksana, ramchâr depna tiang Etham hmuna an riaka;

²¹Rengpa khan sîn laia sûmin a hruaia, zâna chu anni invâr hrangin meichokin an mân a hruaia.

²²Sûna sûmin zâna meiin mipuihai kha a imâkhai viat loi a ni.

Fesuakna 14

Tuipui Sen irkân thu

¹Rengpa khan Mosia kha hiang hin a ti pea,

²"Israelhai laia kîr nôka Migdol le Tuipui Sen kâr, Pi-hahiroth kôla Baal-Zefon maton tianga riak hrangin hril roh.

³Khan kêng Faroa'n Israelhai chungchâng thua, ram kâra lungzîngin an invâia, ramchâra an in-ôk a ni ta hi te, ti a ti.

⁴Keima'n Faroa lungrîl inngartir pe ki ta, khanchu irzûlhai a ta; keima'n Faroa le a sipaihaiin ni chôirsâng an ti; khanchu Aigupta mihaiin keima hi Rengpa chu ki nih ti inhre ta an ti," tiin.

⁵Aigupta rêng kha Israel mipuihai rot thurchi hril hrang a ni'n chu, Faroa le a milianhai khan an lungrîl a'rthûl nôka, "Hianga Israel mihaiin ei sin an tho lai taka ei insuaihai hi te, itho sika hianga ei itho mo a ini tâk," an tia.



⁶Khanchu an sakor tâlihai an sinsiama, a mihai hruai sain;

⁷Sakor tâli irzaruk le Aigupta rama sakor tâli om murdi a rêngin hruaituhai hruai sain an oma.

⁸Rengpa khan Aigupta rama rêng Faroa lungrîl an ngartir pea, Israelhai ngam taka suakhai kha an irzûlhaia.

⁹Aigupta mihai khan sakor murdi le Faroa sakor tâlihai le sakor chungu chuang mihai le a sipaihai leh khan an irzûla. Khante, Pi-hahiroth hmun kôl Baal-Zefon kôl tuipei kôla an riak laiin an va phâkhaia.

¹⁰Faroa'n a va nâihaiin chu, Israelhai khan an lei thîra, Aigupta mihai khan, an ni tiang an pana; kha zel khan an chihai tâka. Israelhai khan Pathian an insam tâka.

¹¹Mosia kuang, "Aigupta rama khan thân a iom loi sika ma ni? hi ramchâra thi hranga ni ni hong ihruai suak hi?"

¹²Aigupta rama khom khan, Aigupta mihai sinthoin lei ompai hi ri ung, nang kin iti mo ni ma? Ramchâra thi nêkin chu Aigupta mihai sintho khom hi kin ta hrangin chu sa ual a ti," an tia.

¹³Mosia khan mipuihai kuang khan, "Chi no unglân, lungthiriamin om roi, Rengpa saninhingna a vuan hin nangni a itho pe hrang hi a thîr vai tho roi, a vuana Aigupta mi nin ihmuhai hi, kumtuangin hmuhai nôk ta no chin ni.

¹⁴Rengpa'n nangni doi pe a ta, nangni chu nin iom chian hrang a ni," a ti pehaia.

¹⁵Rengpa khan Mosia kuanga, "Itho sika ni ni insam mani? Israelhai hi fe zêl hrangin hrilhai roh.

¹⁶Ni khianghrol kha lêngin lân, ni kut Tuipui chungu phar ro, tui irsen a ta, Israelhai Tuipui laia irnêngchâra an fe theina hrangin.



¹⁷Keima'n Aigupta mihai lungrîl inngartir pehai ki ta, khanchu irzûlhai mai an ti. Faroa le a sipaihai, a sakor tâli le sakor chung chuang mihaiin ni chôiirsâng an ta,

¹⁸Faroa le a sakor tâlihai le sakor chung chuang mihaiin an ni chôiirsâng tena chu Aigupta mihaiin keima hi Rengpa ki ni, ti inhre thei ta an ti," a tia.

¹⁹Pathian vântirtôn Israelhai mân tianga fe ngai kha inhnung tiang a'rthon tâka, khang khan an maton tianga irthokin sôm inding khom a'rthona an hnung tiang a om tâka.

²⁰Aigupta sipaihai le Israelhai kêra a hong om tâka. Zân sôtin sôm kêra a vâr insuakin, a dang tiang a zîng inchangin, khang khan tûte irpan irnâi thei loiin an oma.

²¹Mosia'n Tuipui chung a kut a phara; Rengpa'n zân sôtin nisua tianga phâivua a hong inhrângtira, Tuipui kha a sêm inkîrtira, khanchu Tuipui kha irnêng châr a hon changtira, Tuihai kha irsen chitin a oma.

²² Israelhai khan Tuipui sîng kha irnêng châr angin an fe tâka. Tuihai kha an chang tiang le vei tianga hrângin bang angin a hong om pehai tâka.

²³Aigupta mihai khan an irzûlhaia, Faroa sakor murdi le sakor tâli le sakor chung chuang mihai khan Tuipui sînga khan an irzûl lûthai sa tâka.

²⁴Zîng kôl a hong irsal tôn chu sôm le meichok indinga irthokin Rengpa'n Aigupta sipaihai kha a zu ena, an char an dongtir pehai tâka.

²⁵An sakor tâli kehai a khek pehaia, fe thei ta loiin, khanchu Aigupta mihai khan, "Israel pâlhai kha masanghai ta ei ti, Rengpa'n a sanhaia, Aigupta mihai a idoipui a ni," an ti tâka.

²⁶Khanchu Rengpa khan Mosia kuanga, "Aigupta mihai an sakor tâli le an sakor chung chuang mihai hi tuiin a hong dîl nôkhai theina hrangin ni kut kha Tuipui chung a phar ta ro," a tia.

²⁷Mosia'n a kut kha Tuipui chung a phara kua a hong vârin chu, Tuipui kha a luang balamin a luang nôk tâka; Aigupta mihai kha an kîr nôka; Rengpa'n Aigupta mihai kha Tuipui sînga khan a pailûthai tâka.

²⁸Tui an luangtir nôk tâka. Khanchu, sakor tâli le sakor chung chuang mihai Tuipuia irzûl inlûttirtu Faroa sipai murdihai kha Tuipui khan a tân irhmang paihai ta.

²⁹Khannisianlân, Israelhai rêk chu Tuipui sînga irrêng châra khan an fesuak ving theia; tui kha an chang tiang le an vei tianga hrangin bang a hong chang pehai ta.

³⁰Kha nî khan Rengpa'n Israelhai kha Aigupta kut ata an zôka, Israelhai khan Tuipui kama Aigupta mithihai kha an hmua,

³¹Israelhai khan Rengpa'n Aigupta mihai chung a thil roiinpui tak a itho kha an hmua, mipuihai khan Rengpa an ngîka; khanchu Rengpa le a suak Mosia kha an iam zôi ta.

Fesuakna 15

Mosia hla

¹ Kha irzoiin chu Mosia le Israelhaiin Rengpa inpâkna hrangin hi hla hi an saka, "Rengpa inpâkna hrangin hi hla hih sak ki ti, Ama'n roiinpui takin an hnê tâk sikin, Sakor le a chung a chuanghai kha tuipuia a pai lûthaia.

²Rengpa chu ni changpuitu hrât tak a nia, Ki saninhringna a nia, ki Pathian a ni, ama inpâk ki ti, ki Pathian a ni, ama chôindôm ki ti. Kin pahai Pathian a nia, a roiinpuizia hril kin ti.

³Rengpa chu irdoi mi a nia, a'rhming khom Rengpa a ni.

⁴Faroa sakor tâli le a sipaihai kha tuipuia a pai lûthai tâka, A sipai lian a sa murdi Tuipui Sena a pai lût zoi ta.

⁵Tui inthûk takin a ngîmhai tâka, an thûkna taka khan lung angin an tâk zoi ta.



⁶Ni kut chang tiang kha, O Rengpa sinthotheina roiinpuiin ni kut chang tiang khan, O Rengpa râlhai irsem darin.

⁷Ni roiinpuina liantak khan, nangma nang a doituhai an irhmang zoi ta; Ni ningmurna ni zuan suma, fapôl angin an kâng zoi ta.

⁸Ni hnâra phûkin tui an irhloma, Tuihai kha bang angin an indingtira; Tuipui inthûknahai khom a kang zoi ta.

⁹Râl kha irpâkin, irzûl ki ta, pha ngêt ki ti, râlâk sum sem ki ta, annia khan ki'rzukna murdi khopna hmu ki ti. Ki khandai kêlsua ki ta, ki kut leh anni thathai ki ti," tiin.

¹⁰Ni phâivua kha nin sêmtira, tuipui khan a'rkhû zoi ta, tui inthûk taka khan sisâr tang angin an tâk zoi ta.

¹¹"O Rengpa nangma anga Pathianhai laia tu mo a om? Tu mo nangma anga irthiangna tianga roiinpui? Tu mo sinirkhêl le sin roiinpui ni isin anga sin thei?

¹²Ni kut chang tiang ni phara, khanchu irnêngin an volhai zoi ta.

¹³Nangma lungkhamna sika irtan sai tâk, ni mihai hruai ni ta; ni hrâtna'n ni omna hmun irthianga hruai intunghai ni ti.

¹⁴Nam tinin inhria an ta; ngîkin inthing an ti; Filistia omhai kha an milung kângpuihai a ti.

¹⁵Edom rama hruaituhai chitna'n sip an ta, Moab mi hrâthai insînain chelhai an ti, Kanaan rama mihai zâmirzal ving an ti.

¹⁶Chitna le ngîkna an chung a chum a ta, Ni bân irnakhrât khan lung angin omchian an ti; O Rengpa ni mihai an thang zoi mâka chu.

¹⁷Nangma'n hruai intunghai ni ta, ni tâng sîpa phun ni ti, O Rengpa nangma omna hranga hmun ni irfûktirna khan, O Rengpa, hmun irthiang ni kuta ni lei inding ta kha.

¹⁸Rengpa'n kumtuangin roirêl a ti," tiin.

Miriami hla



¹⁹Faroa sakorhai kha sakor tâlihai le a chung a chung mi hai leh khan tuipua an tâk ving tâka, Rengpa khan tuikhanglian tuihai leh a hong vurhai nôka; Israelhai rêk chu tuipui sâng irnêng châra khan an kâi zoi ta.

²⁰Khanchu deipu Miriami, Arona farnu khan khuangte a kut leh a lâka, nupang murdi'n khuangte chôia lâmpuiin an zuia.

²¹Miriami'n, anni hrang hla a sak pehaia: “Rengpa chu inpâkin hla sak roi, ama khan inhnêna roiinpu takin an hnê tâk sikin; sakor le a chung a chung murdi'n tuipua an pai lût tâka.

Tui khâ

²²Kha hnung chu Mosia khan Israelhai kha tuipui sena irthokin a hruaihaia, Sur ramchâr tiang panin an suak tâka; sîn thum sâng ramchâra khan tui hmu viat loiin an inzina.

²³Mara an itihna hmun an hong tungin chu tui kha a khâ pehai sikin in thei mahaia; khasikin a'rhming khom Mara ibe a ni.

²⁴Mipuihai khan Mosia kuang khan, “Imo kin i-in hrang tâk?” tiin an chiara.

²⁵Mosia'n Rengpa kha a sâma, Rengpa khan thing inkhat a'rhmu, kha kha tua khan an dêngzuanin chu, tui kha a hong tui pehai tâka. Kha hmuna khan Rengpa'n an izôm hrang dân a pêkhaia; a fiahai saa.

²⁶“Rengpa ni Pathian hnuk irhâi kha ngûk takin irngaiin lân, a mit hmua a sa a iti murdi ni sina, ni pomin chu Aigupta mi hai chung a hri ki inlêngtir ang khan ni chung a inlêngtir no ning. Keima hi Rengpa nang an damtirtu ki ni,” a tia.

²⁷Kha hnung chu Elim an itihna hmun an hong tunga, kha hmun khan tuihnâr sômhleihni le tûm kung sômsari a oma; tui kôla khan riakbuk irpuk an khôr ta.

Fesuakna 16

Mana le Mamîm



¹Israel nam pumpui Elim ata an suakin chu, Sin ramchâra an hong tunga; kha kha Elim le Sinai kêra om a nia; kha zoro kha Aigupta ram ata an suaka irthokin a tha hnina sôn sôm hleiringa nê sôn a ni.

²Kha ramchâra khan Israel nam pumpui Mosia le Arona chung a an ichiar a ni.

³Israelhai khan an kuang, “Aigupta rama hmê bêl kêla kin toi lai le bai khoptela kin fâk lai khan Rengpa kuta kin ithi ni sian chu o! atûn nangni lakin ramchâra hin phîngchâma thi hrangin mipui irbukkhôm murdi hi hin nin ni hong hruaia,” an tia.

⁴Rengpa khan Mosia kuang, “Irngai ro, nin ta hrangin bai irvân ata zuang inthatir ki ta, khanchu mipuiin a sôn tina an fâk hrang vai va hrût ngai ri sehai, ki dân an zôm le zôm loi ki fiahai theina hrangin.

⁵Sôn ruk nê sôn chu an va ihrût kha sinsiam an ta; a sôn tina hrang an zêkin inhni a ini hrang a ni,” a tia.

⁶Khaang khan Mosia le Arona’n Israel mihai laia, “Khohloi tiang chu Aigupta ram ata nangni hruai suaktu chu Rengpa ngêt a nih iti inhre ta an ti.

⁷Zînga khomRengpa roiinpuina hmu nin ti; a chung a nin nuarnahai kha a le’nhriat tâk sikin. Keinihai hi tu ual mo kin nia, kin chung a nin inuarna hrang a om,” an tia.

⁸Khante Mosia’n ama kha la’nhria nin ti, khohloi tiang sa fâk hrang nangni a pêka, zîng tiang bai nin fâk khop hrang dôr nangni a pêk tika chu; Rengpa Pathian khan a chung a nin nuarna kha a le’nhriat tâk sikin, keini hi i ual mo kin nia? kin chung a nin inuar ni maka, Rengpa chung a nin inuar a ni, a tia.

⁹Khanchu Mosia’n Arona kuang, “Israel irbukkhômhai laia hin, Rengpa kêla hong nêi roi, nin inuarnahai kha a le’nhriat tâk, ti pehai ro,” a tia.

¹⁰Arona’n Israel mipuihai laia thu an sêr lai takin ramchâr tiang an irnghata; Rengpa vâ irkhêl kha sôm laia a zuang inlanga.

¹¹Rengpa khan Mosia a chongpuia,



¹²“Israelhai nuarna kha ki le’nhriata; an kuang khan khohloi tiang hmê fa nin ta, nangtûk chu bai khop takin fa nin ti; kha tena kêng Rengpa nin Pathian ki nih ti inhre ta an ti,” ti pehai ro, tiin.

¹³Kha nî khohloi tiang chu mamîm an hong vuanga an riakbuk kha an sip zoi tâka, zînga chu an riakbuk vêl kha irdôin a sipa.

¹⁴Kha irdô tâk kha a hulin chu ramchârna pil chung a khan thil inperthe tehai ivur kêra khan a’rlang pehai phura.

¹⁵ Israelhai khan an hmu’n chu, “Imo a ini hrang tâk?” an irti irhlôma, i zât moh a inih ti an inhriat no sikin. Mosia khan an kuang, “Rengpa’n nin fâk hrang piala bai nangni a ipêk a ni.

¹⁶Hi hi a ni Rengpa’n, Mi tinin mâni khop hrang dôr hrût unglân, mi inkhat hrangin Omer khat nin in sînga mihriam om dôr angin nin ihrût hrang a ni, mi tinin nin puan in sînga omhai hrang nin ihrût hrang a ni, tia thu a ipêk kha a ni,” a tia.

¹⁷Israelhai khan a iti angin an thoa; a sen a zârhaiin an hrût intama, a senin an hrût intôma.

¹⁸ Khaang khan Omer leh an irtea, a hrût intam khomin a zôk om maka, a hrût intômhai khomin tôm pehai ual ma; mi tinin mâni khop dôr hrangin an hrût senga.

¹⁹Khanchu Mosia’n an kuang, “Mi tukhomin nangtûka hrang hôi no roi,” a tia.

²⁰Khannisianlân Mosia chong zôm nuam mahaia; a senin nangtûka hranga an hrêa; an ihrêhai kha a’rngê pehaia, a thu pehai ta, khasikin Mosia kha a ning an mur pe ok tâka.

²¹Khaang khan a zîng tin an khop hrang dôr ti no chu hrût ta mahaia, khanchu misa a hong lum tena chu irnênga an ihrût zoi loi la om chu a zôi ving ngai.



²²Sûn ruk nê chu bai kha mi inkhat hrangin bak hni Omer inhni chit an hrûta; khante mipuihai hruaitu khan Mosia an hong hrila.

²³Ama'n an kuang khan, "Rengpa thupêk chu hi hih a ni, nangtûk chu irngamnê sùn a ni, Rengpahraha irngamni irthiang. Khasikin nin isuang nuam dôr suang unglân, a but nin inuam kai but roi, a ban la om kha chu nangtûka hrangin se roi," a tia.

²⁴Mosia iti angin zînga hrang an khâia, kha kha chu a mirim khom se pehai maka, irngê pehai mah.

²⁵Khanchu Mosia'n, "A vuan chu hi hi fa roi; a vuan chu Rengpa hranga irngamnê sùn a ni sikin, riakbuk kôlvêla ite bu hmu thei ni no ni.

²⁶Sûn ruk sùng fâk hrang bûm nin ta, khan sùn sari nê chu, irngamnê sùn a ni, ite om no ni," a tia.

²⁷Kha tena khom khan sùn sari nê khan mipui a sen a zârhaiin hrût hrangin an la'rthoka, hrût hrang zel hmu ta mahaia.

²⁸Rengpa'n Mosia kuang khan, "Ki thupêkhai le ki dânhai hi idôr ten mo zôm loi nin la itum?

²⁹Rengpa'n irngam nê nangni a ipêk hi inhre roi ba, khasika khan kêng sùn ruk nê khan, sùn hnia nin khop hrang dôr nangni a ipêk a ni kha te; mi tin mâni hmun chita omchian roi, sùn sari nê chu tukhom mâni om hmun ata suak viat no ri sehai," a tia.

³⁰Khaang khan sùn sari nê chu an irngam tâka.

³¹Israel mihai khan bai irhming kha Mana an tia. Koriender (theiru) ru anga ngoi le bai khuaitui leh siam anga thum a ni.

³²Mosia'n, "Hi hi a ni, Rengpa'n nin irchihai dênin Omer inkhat se roi: Aigupta rama bai kha an la hong hmu theina hrangin, tia thu a ipêk kha," a tia.

³³Khaangin Mosia'n Arona kuanga, "Bêl va la'nlân, Omer inkhat Mana hi thun ro, nin irchihai dênin vong mai hrangin Rengpamakunga se ro," a tia.



³⁴Rengpa'n Mosia thu a ipêk angin Arona khan vong mai hrangin thuthung bôm kôla a sia tâka.

³⁵ Israelhai khan mihriam omna ram an tung mâka chu, kha kum 40 sâng kha chu Mana an fâka; Kanaan ramri dep an tung mâka chu an fâk ngai.

³⁶Omer khat hi epha hmun sôma zêkin inkhat a ni.

Fesuakna 17

Lungpui ata tui

(Nam 20.1-13)

¹ Israel irbukkhômhai murdi chu Sin ramchâr ata an suak nôka, Rengpa thupêk angin hmun khat ata a dang tianga irthonin Refidim-ah riakbuk an khuara, khannisian kha hmuna khan mipuihai in hrang tui om maka.

²Khasikin Mosia kha an irkhalpuia, "Tui in zât ni pe ro," an tia. Khante Mosia'n, "Itho sika nir khalpui moh nin ni? Itho sika Rengpa nin irkhalpui mo?" a ti pehaia.

³Khannisianlân mipuihai kha an tui an hrâl pehai hrai sikin Mosia chung a khan an la nuar pe maia, "Itho hrang sika mo nin nâihai le kin sahai leh hin tui inhrâla ni that hrangin Aigupta ram ata ni ni hong ihruai?" an tia.

⁴Khanchu, Mosia'n Rengpa an sama, "Hi mipuihai hi imo ki ilôhai ta hrang? lung leh ni dêng that hranga irsiam an ni tâka?" a tia.

⁵Rengpa'n Mosia kuang, "Mipuihai maton tiang fe'n lân, Israel ulianhai a sen a zâr hruaihaiin lân; ni khianghrol tiana tui ni vîkna kha ni kutin chôiin lân fe roh.

⁶Irngai ro, Horeb lungpui chung a son ni maton tiang lei ngîr ki ta; lungpui kha hong vîk ni ta, khanchu mipuihai in hrangin tui zuang luang zel a ti," a tia. Khaang takin Mosia khan Israel hruaituhai mit hmua khan a thoa.

⁷Kha hmun irhming hranga khan Masa le Meriba a tia. Israelhai khan an bei sik le Rengpa hi, "Ei laia a iom mo a iboi mo?" an ti sika khan.

Amalek-hai leh irdoi



⁸Refidim hmuna khan Amalekhain Israelhai kha an hong doihaia.

⁹Mosia'n Josua kuang khan, "Eini lai ata mi inthang suakin lân, Amalek-hai nangtûka va doi hai roh. Tâng sîpa Pathianin chôi mai hranga khianghrol intûkin lei ngîr ki ti.

¹⁰Josua khan Mosia iti ang takin a thoa, khanchu Amalek-hai doi hrangin a fesuak tâka, Mosia, Arona le Hura hai kha tâng sîpa an luia.

¹¹Mosia'n a bân a lâng insôt dôr kha Israelhai an hrâta, khannisian a bân an sumin chu, Amalek-hai an hrât ngai.

¹²Mosia a bân a kham pe tena chu, Arona le Hura khan a toi hmun hrang lung an hong chôi, kha khan a toi tâka; Arona le Hura khan a bân kha an indom pea, inkhatin kiangkhat tiang an indompui maia, misa tâk dênin a phar mai tâka.

¹³Khasikin Josua'n Amalek-hai a inhnêhai zoi thei a ni.

¹⁴ Kha hnung chu Rengpa'n Mosia kuanga, "Hi thu hi inhriatmaina hrangin lekhabua irziakin lân, irvân hnuaia hin Amalek-hai an om ti khom inhre ta loi hrangin that irhmanghai ki ti, iti hi Josua khom hril ro," a tia.

¹⁵Mosia khan maichâm a'rfûktira, a'rhming khom "Rengpa chu Jehova Nisi," a tia.

¹⁶Khan, Mosia'n, "Rengpa puanzâr kha chôi kâng roi! Rengpa'n Amalek-hai kha kumtuangin doi sunzom maihai a ti," a tia.

Fesuakna 18

Jethroa'n Mosia a hro

¹Jethroa Midian ochai, Mosia tarpu kha Pathianin Mosia le a mi hai thil a tho pehai zia murdi le, Rengpa'n Israelhai Aigupta ram ata a hruaisuak zia hai a le'nhriata.

²⁻³ Mosia tarpu Jethroa khan Mosia dôngma Zipori, Mosia'n a itîr pai kha, a nâi hai inhni a hruaihaia; inkhat irhming chu Gersoma a nia, "Mi rama om ki ni sikin," a tia.



⁴Inkhat irhming chu Eliazara a ni, “Ki Pathian chu ni changpuitu a nia, Faroa khandai ata a ni saninzôk tâk sikin,” a tia.

⁵Jethroa, Mosia tarpu kha Mosia nâipasal hnihai le a dôngma leh khan Mosia kuang ramchâra a riakna Pathian tânga khan an hong.

⁶Mosia kuang khan, “Keima hi ni tarpu Jethroa, ni dôngma le ni nâipasal hnihai le kin hong,” iti chong a len thuana.

⁷Khanchu Mosia khom a tarpu lei don hrangin a’rthoka, a makunga a kûna, a poma, damhar thu an irdon irhlôma; khanchu Mosia puan in sûnga an lût tâka.

⁸Rengpa’n Israelhai sansuak hranga Faroa le Aigupta-hai chung a sintho murdi le, lam laia intak tuang lamhai le Rengpa’n a saninzôkhai lam murdi chu Mosia’n a tarpu kha a hrila.

⁹Rengpa’n Israelhai, Aigupta ata a saninzôka, thil a lei itho pehai lam le an chung a satna tamtak sika khan Jethroa chu a lôm sabak tâka.

¹⁰Rengpa’n Aigupta-hai irthoka, Faroa irthoka, nangni saninzôktu chu inpâkin om ri se; ama khan Aigupta thuhnuaia om mipuihai chu a saninzôk ta hi,

¹¹atûn ata chu Rengpa chu pathian tinhai nêkin a roiinpui ual ti kin hriat ta, Israelhai hmusitin, khaang dôra dengintheiin, a saninzôk tâk sikin, a tia.

¹²Khanchu Jethroa khan thil inhlanin, a pum kai hâlivôm le irbôlna hrang danghai a hong chôia. Arona le Israel hruaituhai murdi kha Mosia tarpu kuanga khan Pathian makunga bai fa hrangin an fe.

Roirêltu hrang irbêna

¹³Zîng nôka chu Mosia kha mipuihai roirêl hrangin a toia; khante mipuihai khan zîng ata khohloi dênin Mosia kôla an om maia.

¹⁴Mosia tarpu khan khaanga mipuihai hranga a sintho kha a hmu’n chu, “Mipuihai hi i ual mo ni itho pehai tâk? Itho sika mo sùn khat vaiin roirêltu’n ni toina zîng ata khohloi dêna mipuihai hi ni kôla an ingîr chian?” a tia.



¹⁵Mosia'n, "Mipuihaiin Pathian nuam lam irchu hrangin ki kuang an hong sikin ki itho ngêt a nang a ni, tiin a sâma.

¹⁶Thubuai i ma ni, an neiin chu ki kuanga hin an hong ngai, khanchu keima'n an tualbômhai an thubuai kha ki lei rêl pehai ngai, khanchu Pathian inkung le a dânhai chu ki lei inhriat ngai a ni," a tia.

¹⁷Mosia tarpu khan, "Ni thil tho dân hi sa mah.

¹⁸Nangma leh hi mipuihai ni kuanga honghai hi sîn khat sûnga tho hrangin chu a intak hrai a ni.

¹⁹Atûn hin, ki chong hi irngai ta, thurôn nang pe ki ti; Pathian chu ni kuang om sianlân, Pathian makunga nang chu mipui irthûltu nin lân; nangin Pathian makunga thubuaihai kha intung thiaiin lân:

²⁰khan, dân irziakhai le dânhai chu anni irchutirhai ni ta, an sintho hranghai le, lam an ihrô hrang kha inkhîk irhmuhai ni ta.

²¹Kha no khomin, mipui laia irthok mi theithiam, Pathian chi mi, mi dikhai, fâkinrûk fel loi khôkmâk mihai inthangsuakin lân, anni chu sâng khat chungaroirêltu, irza chungaroirêltu, sôm ringa chungaroirêltu, sôm ruk chungaroirêltu hai ni hrang se roh.

²²khahai khan itiklai khomin mipui roirêl pe ri sehai, thu intak ual kai chu ki kuang hon tunghai sian, thu ol ualhai chu anni'n rêl infel ri sehai. Khaang khan nangma ta hrangin chu nang irzâng pe ok a ti; anni'n nang an isan hrang a ni.

²³Khaang khan ni thoa, Pathianin chong nang a pêkin chu tho thei ni ta, khaang khan mipuihai milung inchukin mâni in tiang an ichîn thei hrang a ni," a tia.

²⁴A tarpu Jethroa thuhiril chu Mosia'n a poma, a iti lam angin a thoa.

²⁵Mosia'n Israelhai laia mi kâmom u ual an thanghaia, mipuihai laia hruaitu'n a siamhaia, sâng chungarhruaitu le irza chungarhruaitu hai, sômringa chungarhruaitu hai, sôm khat a bêhaia.

²⁶Khahai khan itiklai khomin mihai roi an rêl pehaia, thu intak ual kai chu Mosia kuang an intung ngaia, thu intak ok loi chu an bingin an rêl ngai.

²⁷Khanchu Mosia khan a tarpu kha an fetir tâka. A omna ram tiang a kîr nôk ta.

Fesuakna 19

Israelhai Sinai tânga

¹Israelhai kha Aigupta ram ata an zôk nî ata tha thumna taka khan Sinai ramchâr an hong tunga.

²Refidim ata an suak zoiin Sinai ramchâr an lûta, kha ramchâra khan, Israelhai chu tâng kôla khan an riaka.

³Khanchu Mosia kha Pathian irtongpui hrangin tânga khan a hong luaia. Rengpa khan tâng ata kha a koia, a kuang, “Jakoba in sêngkuahai laia hiang hin ti ro, Israel mipuihai laia khom:

⁴Aigupta chung a ki sinthohai le irmupuiin a tê a mitha chung a ichôi ngai ang khan nangni ki chôi, ki kuanga nangni ki hruai intung lam nin hmua.

⁵Khasikin ki chong nin irngai ta taka, ki thuthung hi nin vong maiin chu, rammuala nam tin laia ki ta hrangin ki’rchon nei thei nin ti: rammual pumpuia chi, nam irthiang ni nin ti, iti hril roh. Hi hi Israelhai laia ni insîr hrang a ni,” a tia.

⁶Khanchu ki tah hrangin ochai chu, nam irthiang ni nin ti; iti hril roh. Hi hi Israelhai laia ni insîr hrang chu a ni, a tia.

⁷Khanchu Mosia chu a chum nôka, mipui hruaituhai a koibûma, Rengpa thupêk murdi kha a hril vinga.

⁸Mipuihai khomin, “Rengpa’n a iti murdi chu tho kin ti,” an rêngin an ti inruala. Khanchu Mosia’n mipuihai sâмна kha Rengpa kuang an tung nôka.

⁹Rengpa khan Mosia kuang, “Irngai ro, nang ki chongpui lai tak mipuihai inhriat sa theina hrangin le kumtuangin ki thu an zôm mai theina hrangin



sûm irsatakin ni kuang zuang ki ti,” a tia. Khanchu Mosia khan mipuihai iti kha Rengpa an hril nôka.

¹⁰Rengpa'n a kuanga, “Mipuihai kuang fe'n lân, a vuan le nangtûk khi târ roh. An puanhai irsutirhaiin lân,

¹¹sûn thumna nî tena chu irzoi ri sehai; kha nî khan chu mipuihai mit hmua Sinai tânga khan Rengpa a zuang ichum hrang a ni sikin.

¹² An kuanga khan, Irdîn unglân, tânga khan hong lui viat no roi, tâng hmor khom hong tôn viat no roi; tukhomin tâng a hong tônin chu lung leh dêng that hrang a ni,

¹³kut leh zel inthem phal ni maka, lunga dêng that hrang a ni, anino'nchu thala kâp that hrang a ni; sa mani mihriam mani a huam dôr that hrang a ni, khannisianlân bekul an ring tena chu mipuihai kha tânga an ilui hrang a ni,” a tia.

¹⁴Kha zoiin chu Mosia kha tâng ata a zuang chuma, mipuihai kha a târ irthianghaia; an puanhai irsûk infâiin,

¹⁵Mosia'n an kuang, “Sûn thum nîa hrangin irsiam ving unglân, pasal le nupang chung a irdîn roi,” a tia.

¹⁶ Sûn thum nî zînga khan chu khua a hong irzila kôl a irtêka, tâng sîp ata sûm a zuang irsâtira, bekul inring takin an tuma; riakbuka om an rêngin an phûk an thinga.

¹⁷Khanchu Mosia khan a hruai suakhaia; tâng kôla khan an ngîra.

¹⁸Sinai tânga khan Rengpa kha mei angin a zuang chum sikin an thim khap tâka; kha meikhu kha, hâl inzôina meikhu angin a tâk chûl chûla, tâng kha a saterengin an hnîngtira.

¹⁹Bekul irhâi an ringtir si sita, khanchu Mosia'n thu a hrila, Pathianin khonri angin a sâma.

²⁰Pathian kha tâng sîp taka a zuang chuma, Mosia chu tâng sîpa khan a koia, khanchu Mosia kha a hong luaia.



²¹Rengpa khan Mosia kuanga, “Zu chumin lân, mipuihai khu zu ngo ro, anino’nchu, Rengpa hmêl hmu tumin ramri an hong khêl duaiin chu, mi tamtak an irhmang hrang a ni.

²²Ochai nihai khom sianlân, a ni hong nâi nuamtuhai chu an irthâr ngêt hrang a ni. Anino’nchu, deng ki intheitirhai hrang kêng,” a tia.

²³Mosia’n, Rengpa kuanga, “Mipuihai hi chu Sinai tânga hong lui thei mahaia; nangma’n, tâng kôla hin ramri kang pehaiin lân, thâr irthiangna hrangin, nangma’n thu ni ni ipêk mo ni ma,” a tia.

²⁴Rengpa khan, “Zu chumin lân Arona hong hruai ro, khannisian ochaihai le mipuihai chu ki kuanga hong hrangin ramri an ikhêl viat hrang ni ma, khano’nchu deng ki intheitirhai hrang kêng,” a tia.

²⁵Khanchu Mosia chu mipuihai kuang a zu fea, Rengpa’n a iti murdi a hrilhaia.

Fesuakna 20

Thupêk sôm

(Dhn 5.1-21)

¹Pathianin thu a hrila, a thu hril chu hihai hi a ni:

²“Suaka nin omna Aigupta rama irthoka nangni hruai suaktu, Rengpa nin Pathian chu ki ni.

³Keima ti no chu Pathian dang reng nei no roi.

⁴ Nangma hrang millim khom siam no ro, chung tianga irvâna om mo, irnênga om mo, irnêng hnuaia om mo, ir-angpui ite ni isiam hrang ni mah.

⁵ Annihai kha chubai ni imûk hrang khom ni ma, an sin khom ni itho hrang ni mah. Keima Rengpa ni Pathian hi Pathian nunsetak ki nia, a ni hualtuhai chu an irchi khom irlo thum irlo minli dênin an pahai sualna sikin an nâihai deng kin theitir ngai.

⁶Khan lung ni thunga ki thupêk zômtuhai chu an irchi sâng tamtak tena khom lungkham insua mai ki ti.



7 “Rengpa ni Pathian irhming sâmin minlak tho no ro, minlaka a’rhming sâmtu chu Rengpa’n dengintheitir loiin om no ni.

8 Sabat nî chu ni iser hrang a nih ti inhre mai roh.

9 Nangma hrangin sîn ruk sîng sin thei ni ta;

10 Sîn sari nî chu Rengpa ni Pathian ta hranga irngam nî a nia; Kha nî sîn khan chu ite ni isin hrang ni ma, ni nâipasal le nupanghai, ni suakhai, ni sahai, nam dang nin rama om khomin sin an izong hrang ni ma;

11 Rengpa khomin sîn ruk sînga khan Tuikhanglian, irnêng le irvân le a sînga om murdi a siama, sîn sari nî chu a irngam chian a ni, satakin sat a vura a iser a ni.

12 “Ni nu le pa mahrip tho’n lân, khanchu Rengpa ni Pathianin ram nang a ipêka hin hring dam sôtin om ni ti.

13 Mi ni ithat hrang ni ma,

14 Ni iuirê hrang ni mah.

15 Inru ni itho hrang ni mah.

16 Ni tualbômhai chung a inhriattu mi laka ni irsiam hrang ni mah.

17 “Ni tualbômhai neinun ni irzuk hrang ni ma, ni bômhai dôngma ni irzuk hrang ni ma, a suakpa mani, a suaknu mani, sehrâtchal mani, sakuartung mani ni bômhai ta rêng rêng chu ni irzuk hrang ni ma,” tiin.

Mipui irtha’nvâi

(Dhn 5.22-33)

18 Mipuihai khan khonri tho’n kôlirtêk an hmua, bekul irhâi an inhriata, tâng sîpa meikhu hlet hlut an hmu’n chu, an phûk an thinga, hlatak ata an thîra.

19 Mosia kuang, “Kin kuang thu insîrin lân, irngai kin ti, Pathian ngêtin kin kuang thu an sîrin chu, kin thi duai ngânin te, iti hi kin ichi a ni,” an tia.

20 Mosia khan, “Chi viat no roi, ama chitna lungrîl nin nei maia, sual sin ta loa nin omna hrangin nangni en irsin hrang vaia Pathian chu a izuang a ni,” tiin a sâma.



²¹Khan khoma mipuihaiin hlatak ata an thîr maia; Mosia vaiin Pathian omna sôm duk kha a va nâia.

Maichâm hmang hrang dân

²²Rengpa'n Mosia kha Israelhai laia ti pe hrangin thu a pêka; "Atûn hin irvâna irthokin keima Rengpa'n nangni ki ichongpui a ni, ti nin inhriat ta.

²³Sumru mo, rângachakin mo, nangni hrang siam no roi, keima ti no chu chubai mûk hrang ite siam no roi.

²⁴Nin ni chongpuina hrang hmun ki indangna tina pil maichâm siam unglân, kha khan hâlrivôm thil inhlan le irbôlna thil inhlan kêlbelra le sehrât inhlan roi, zuang ki ta, sat nangni vur ki ti.

²⁵Ki ta hrangin lung maichâm nin siamin chu, incher no unglân, nin lung sukna hmang sika khan nin iporinchetir a ni ta.

²⁶Kalbi siam nang raka irsângin maichâm ni siam pe no roi, nin siamin chu nin lui tena nin ithuphai an lang duai itinin," a tia.

Fesuakna 21

Suak enkol hrang dân

(Dhn 15.12-18)

¹"Hiang hin Israelhai zôm hrang dân siam pehai ro:

²Hebrai mi siahloa an irchôkin chu, kum ruk sâng chu suakin om a ta, kum sari tena chu ite pe loiin insua nih a ti.

³Ni suak a chang phuta khan dôngma a ihruai hrang ni ma; khannisian innei saia irchôk a ni'n chu a dôngma khom a ihruai sa hrang a ni.

⁴A pu'n dôngma a inneitir a nia, nâi a neiin chu a dôngma le a nâi le tehai chu a pu ta an nia, ama chu a bing vaiin suak thei ni a ti.

⁵Khannisian suak khan a pu, a dôngma le nâihai lunginkhama zalên taka om a nuam loina thu an puang suakin chu,

⁶a pu khan Pathian ina hruai a ta, mikot kôla inngîrtir a ta, thîr irzum leh a mikuar inver pe a ta, a hring kêr chu a suak ni mai ta a ti.



⁷Mi'n a nâinu suakin a zuarin chu pasal suaka an insuahai angin chu phal ni mah.

⁸Ama chu dôngma nei nuamtuhai hranga zuar a nia, a nuam nôk noa ni'n chu, a pa kuang zuar nôk hrang a ni, a pu'n a huang sika khan mi dang kuang a izuar thei loi a ni.

⁹Mi'n a nâipasal dôngma hrangin suak nupang a'rchôkin chu a nâinu ang takin a ienkol hrang a ni.

¹⁰A nâipa'n dôngma dang a nei nôkin chu a dôngma miluinu kha fâk nêk silkai le thuneina a lei hong inei ngai khom kha a la inneitir mai hrang a ni.

¹¹Hi sintum inthumhai hi a tho pe thei no'n chu a man la loiin a insua hrang a ni.

Kuttum chungchâng

¹² “Mi tukhomin mi vîk sianlân, a ivîk kha a thi'n chu, ama khom kha that ngêt hrang a ni.

¹³ A tum sika a ithat a ni no'n chu, hmun nangni ki indang pena khan lût a ta, khatak khan zôk thei a ti.

¹⁴Zôk hrangin mi'n irtanhai khom sianlân, ningmur irlâka mi dang that chu kêlsuapaia, thatpai hrang a ni.

¹⁵“Mâni nu le pa chung kut insum chu that hrang a ni.

¹⁶Zuar hranga mo, a suak ni hranga mihriam inrûk khom thatpai hrang a ni.

¹⁷ “Ama mo, a pa mo, khomâk sântu chu thatpai hrang a ni.

¹⁸Mi irsualhai sianlân, inkhat khôkin lungtum leh suk sianlân, kut tum leh irchûm sianlân, a thi no'n chu ite dûk tho loi hrang a ni, kut tum tuangtu khan zâlmuna inbokpui a ti.

¹⁹Zâmin hong dam a ta, tuala khianghrol chôiin a'rvâk thei mâka chu a vîktu khan a ituam vîng hrang a ni.

²⁰“Mi'n a suaknu mo, a pa mo vîk thatpai sianlân, kha mi kha dûk tho hrang a ni.



²¹Thi zel loiin sîn khat sîn hni la dam sianlân a pu kha dûk tho loi hrang a ni. A inei a inchân kha a ta hrangin dûk thônâ a iruk pe a ni sikin.

²²“Mi an irsuala, nupang inrâi an innatir duaiin chu, ama’n pop liam tong no khom sianlân, a nâi vong kha a siat pein chu, nupang pasal irphu dôrin, roirêltuhaiin a sa an iti lam taka ircho hrang a ni.

²³Khan nupangin pop liam a tongin chu, hringna irthûlin hringna

²⁴ mit irthûlin mit, ha irthûlin ha, kut irthûlin kut, ke irthûlin ke,

²⁵meia kâng irthûlin vîkirdulin a ituang hrang a ni.

²⁶“Mi’n a suakpa mit mo, a suaknu mit moh vîk incho pe sianlân, a mit siatna man a ipêk hrang a ni.

²⁷A ha inkham pe sianlân an ha manin an ithuan hrang a ni.

A neituhai mophurna

²⁸“Sehrâtchalin mi tu mani sik that sianlân, sechal chu lung leh dêng that ni a ta, a hmê kha fa hrang ni ma; a chongpu khomin a kut a insum hrang ni mah.

²⁹Sehrâtchal khan mi a lei sik mai ta ngaiin chu, sechal chu lung leh dêng that ni a ta, a chongpu khom lung leh dêng that ni a ti.

³⁰Khannisian a chongpu kha a hringna inzôk hranga irchôk a ni’n chu a bituk zât chu a ipêk ngêt hrang a ni.

³¹Sehrâtchal khan nâipang pasalte mani nupang mani a that khomin ulian a isik that rêl anga rêl hrang a ni.

³²Sehrâtchal khan suakpa moh suaknu moh sik that sianlân a chongpu khan suak neitu kuanga khan tangka sômthum a ipêk hrang a ni, sechal chu lung leh dêng that hrang a ni.

³³“Mi’n khur sîng an hongin chu, khur thar choiin a sîng nôk noa sehrâtchal moh sakuartung moh a tâkin chu,

³⁴a hmun a ichoi ngêt hrang a ni. A chongpu kuang khan sum chu pe a ta, a hmê chu la thei a ti.



³⁵Mi sechalin mi dang sechal that sianlân, an ruaiin a la dam sechal kha zuar an ta, a man irsem an ta; a thi sai hmê khom kha an irsem hrang a ni.

³⁶Khan sehrâtchal khan mi sik a lei songa a chongpu khan khit indet loi ni ta ang sianlân, a isik that pepu kha sehrâtchal ngêtin a ituam hrang a ni, a hmê chu la thei a ti.

Fesuakna 22

Lei chôi hrang lam

¹“Mi’n sehrâtchal mani, kêlbelra mani inrûka that a ni no le, zuar sian, sehrâtchal inkhat irthûlin a bâk ringa tuam a ta, kêlbelra inkhat irthûlin minli a ipêk ngêt hrang a ni.

²⁻⁴A thil inrûk kha a ituam nôk ngêt hrang a nia, a tuamna hrang a nei no’n chu, a thil inrûk tuamna hrangin ama kha suaka a irzuar hrang a ni. A sa inrûk sehrâtpui mo, sakuartung mo, kêlbelra mo a thil nei laia a damin a la omin chu, inkhat irthûlin inhni a ipêk hrang a ni. Zâna inru in sûnga lût an chela, an thatin chu a thattu kha mi that ti thei ni no ni, khan sûn khovâra that a ni’n chu mi that ti thei ni a ti.

⁵Mi’n a sahai an suaka, loia mo grep bila mo a lênga mi dang loia chîmu a va fâkin chu, a ifâk insiat dôr kha a chongpu khan loia bu mo, a grep bila grep ra leh a ituam ngêt hrang a ni.

⁶“Mi’n loia mei sêm sianlân, mei irzôtin mi dang loia bukung danghai mani, bu ât zoia a butâng va kâng pe duai sianlân, mei insuatukhan a kâng insiat dôr kha a ituam ngêt hrang a ni.

⁷“Mi’n mi dang sum mo, a thil hlu dang nei hrê pe hrangin a’rphala, a kôlvêla khan irhmang sianlân, an rûktu kha an chelsuakin chu a bâk inhniin tuam a ti.

⁸An rûktu kha an chel thei no’n chu thil hluhai hrêtu chu roirêltu makunga hong hruai ni a ta, mi dang neinun kha inru viat mah ti infelna hrangin khomâk a irsâm hrang a ni.



⁹“Thil irchua buaina a omin chu, sehrât, sakuartung, kêlbelra sil le kai, thil dang irnêng hnuai mo, mi inhni a chongpu ni irtihai kha roirêltu makunga hruaiin om an ta, roirêltu’n thei loi a inchangpu khan a dikpu kha bâk hniin a ituam hrang a ni.

¹⁰“Mi’n mi dang sakuartung, sehrât, kêlbelra, sa danghai enkol pe hrangin a’rphala, a lei hruaia, popliam, irok le a hruaihai pata, an hriattu om no sianlân,

¹¹mi dang sa kha an rûk ti inlangna hrangin khomâk irsâm hrangin Pathian Biak ina a ife ngêt hrang a ni. Khan, sa kha a inrûk a ni no’n chu, a chongpu khan a inchân irti a ta, tuam ual ta no ni.

¹²A inrûk a ni’n chu, a chongpu kha a ituam ngêt hrang a ni.

¹³Ramsa isê that a ni’n chu an hriat theina hrangin sa ifâk ban kha in sûnga a hong ichôi hrang a ni; ramsahai sa that kha a man tuam nang no ni.

¹⁴“Mi’n mi dang laia irthokin sa hmangin a chongpu la hmu loiin a pop no le a thi ti sianlân, a lei hmangtu khom a ituam ngêt hrang a ni.

¹⁵A chongpu mit hmua a ni’n chu tuam nang no ni. Man neia a ihmang a ni’n chu, a ihmangna man khan a ihuam sa hrang a ni.

Sakhua tianga thil le nun dân pangaia omdân

¹⁶ “Mi’n dôngmate irthiang châipui sianlân, dôngma man pangai pe a ta, dôngma’n a inei hrang a ni.

¹⁷A pa khan an luatir nuam no’n chu, dôngmate irthiang moi chang thei dôr kha a pa kuang khan a ipêk ngêt hrang a ni.

¹⁸ Nupang dôithiam hmang kha nin ithat hrang a ni.

¹⁹ Sa irpôlpui chu that hrang a ni.

²⁰Rengpa kuang ni loa, pathian dang kuanga irbôlna hmangtu chu that irhmangpai hrang a ni.

²¹ Nin laia nam dang omhai soisakin nin isir phûmhai hrang ni ma; nangni khom Aigupta rama mikhualin nin iom kha inhre mai roi.



²²Meithâi mo, nâifara moh hnuaisiahai no roi.

²³Nin soisakhaiin chu, keima Rengpa hin nangni changpui hrangin an ni koi tika sâm ki ti.

²⁴Nin ninginmur a ta, khandai leh nangni that ki ti. Nin dôngmahai meithâi chang an ta, nin nâihai fara'n om an ti.

²⁵ “Ki mihai an inriang sika sum nin tângtirhaiin chu, sum ni intângtirtu danghai angin tho no ro, a pung ni isînghai hrang ni mah.

²⁶ Ni tualbômhai puan man pe loiin ni khapin chu, misa tâk mân ngêt ni ipêkhai hrang a ni.

²⁷A taksa tuam inlumna hranga a ineisun a ni sikin, nin khîr nôk no'n chu changpui hrangin a ni koi tika chu lungkhamna sip ki ni sikin, ki la isâm ngêt hrang a ni.

²⁸ “Pathian chungchâng chu saloiin hril no'n lân, ni mihai hruaitu chu khuasâl no roh.

²⁹Ni chîmu ni hrê zoi tika, Oliv hriak ni sôm zoi tena chu, bu uain le oliv hriak ni inhlan hrang dôr chu ni pe zêl roh. Ni nâilutîr pasal ni ni ipêk hrang a ni.

³⁰Ni sehrât le kêlbelra inte maton takhai khom, ni ni ipêk hrang a ni, a puinu irhnu sîn sari ne thei a ta, sîn riat a ni'n chu ni ni hong ipêk hrang a ni.

³¹ Ki mihai nin nia, nin irthiang hrang a ni; khasikin ramsahai isê, hmê ite nin ifâk hrang ni ma, uihai nin ipêkhai hrang a ni.

Fesuakna 23

Dikna le felna

¹ “Minlak chong ni inhriat hril indartir no'n lân, mi sual sanin thu dik loi hril no roh.

²Thil sual tho hrangin chu, tam ual khomhai sian zui no'n lân, milaka mi dang thiamno inchangtirnaa khom kop ual hliak no roh.

³Roirêlna hmuna inriang thiarthâk no roh.



- ⁴ Ni irdoipui ngai sehrât mo, sakuartung moh a rot ni hmu'n chu, a kuang ni ikai intung pe hrang a ni.
- ⁵ A sakuartung kha a puakin a del a ni'n chu, a sakuartung kai thoipui hrangin changpui ro, ni imâk rak hrang ni mah.
- ⁶ Mi inriang kha roirêlna hmuna a ngîrin chu, thudik takin ni irngaitua pe hrang a ni.
- ⁷ Minlakin mi dem no'n lân, mi tho inchâina nei loi kha ni ithat hrang ni mah. Tukhom thil saloi thohai kai chu theiloi ki inchangtirhai hrang a ni.
- ⁸ Inthâmna rêng rêng ni ilâk hrang ni ma; inthâmna hin thil dika irthokin mit an chotir ngai. Tho'nchâina nei mihai chu chanlamboiin a siam ngai.
- ⁹ “Ram dang mi dengintheiin ni inomtirhai hrang ni ma, nang khom ram danga Aigupta rama ni oma, a tuang intak lam nin hriat tâk sikin.

Kum sari le sîn sarina

- ¹⁰ “Kum ruk sîng chu ni loia chîmu songin a rahai chu irtik inlûthai roh.
- ¹¹ Kum sarina kuma chu ni irngam hrang a ni, khatak ata chu ite farhli khom ni irtik hrang ni mah. Mi'nrianghai dong hrang a nia, an irtik zoi loi la om chu ramsahaiin an ifâk hrang a ni. Khaang khan grep le oliv loihai khom ni itho hrang a ni.
- ¹² Sîn rûk sîng sin zongin lân, sîn sari nî sîn chu sintho no ro, khanchu ni suakhai le ni sintho ram dang mihai le ni ram khomin irngam zoro an inei hrang a ni.
- ¹³ KeimaRengpa nin kuang ki itih murdi hi lunghnâng tho roi, Pathian dang laia chu chongchai no unglân, an irhming lua sâm no roi.

Kût lian ual inthumhai

(Fes 34.18-26; Dhn 16.1-17)

- ¹⁴ “Ni chôirsângna hrangin a kum tin kût voithum hmang ngai roi.
- ¹⁵ Abib tha, ki zoro inkunga, chol koploi bai kût hmang unglân, sîn sari sîng chu hi kûta hin chol koploi bai ite nin ifâk hrang ni mah. Hi zoro hin a ni,



Aigupta ram ata nin hong isuak, khasikin chubai ni mûk hrangin kut korongin nin ihong hrang ni mah.

16 Chîmu invâng thar Pentikos kût hmang unglân, kum hek tiang nin thil song murdi nin bûm zoi tika kairêng kût hmang sa roi.

17A kum tin hi kût voithum zoro hin, nin laia pasal murdi Rengpa nin Pathian chubai ni mûk hrangin nin hong inlang ngêt hrang a ni.

18“Chol kop bai chu ki kuang thil inhlan sa thisen leh nin inhlan hrang ni mah. Irbôlna sa inhlan mar chu, zîng khovâr dêna sia hrang ni mah.

19 A kum tin ni chîmu ra maton tak a sa u ual chu Rengpa ni Pathian ina ni hong ichôi hrang a ni. Belra mo kêlte moh a nu dûttui leh ni ibut hrang ni mah.

Pathian chonginkung le a chongbê

20“Nin zin sûnga hmun ni irfûktir kha, nangni intungtira, ni hrungin mahruaitu ni hrangin vântirtôn ki itîr hrang a ni.

21Ama chu irngaiinhlu unglân, a thu zôm roi. A chungka khan tehel ngai no roi, khaanga tho'nchâina kha ngaidam ni no ni; ama kha ki itîr a ni sikin.

22A thu nin zôma, ki iti murdi hi nin zôma ni'n chu, nin râlhai nangni doitu ni ki ti.

23Ki vântirtôn khan nangni hruai a ta, Amor hai, Periz hai, Kanaan mihai, Hiv hai le Jebus hai rama nangni hruai inlût a ta, anni chu that irhmangpai hrang a ni.

24an pathianhai chubai nin mûk hrang ni ma; an sakhua khom nin ilâk hrang ni mah. An pathian chu nin insiat chit hrang a nia, an lung chopui khom nin ivîk siat pehai hrang a ni.

25Rengpa nin Pathian chu chubai nin mûka niin chu bu le rotuiin sat nangni vur ki ta, nin lai ata natna irkiangtir ki ti.

26Nin rama nu tukhomin nâi saloi vong no nihaia, irchi suanpâr boiin om no nihai. Hring dam sôtnahai nangni pe ki ti.



²⁷“Nin fena hrang mihai chu irtha’nvâiin inomtirhai ki ta, milung am invâiin om an ta, nin râlhai chu nin mân tiang laizâm len thotirhai ki ti.

²⁸An laia khuaipei insua ki ta; Hiv hai, Kanaan mihai le Hit mihai chu irzûl indarhai an ti.

²⁹Kum khat sâng rengin chu irzûlpaihai zit no ninga; irzûlhai khom inlân, ram rong vîng a ta, nangni inbuaï hrang ramsa an itam hrai hrang a ni.

³⁰Ram pumpui lua hrang mi nin om mâka chu, tôm pha phatin irzûlhai ki ti.

³¹Nin ram chu Tuipui Sena irthokin Mediteranean tuikhanglian kê le ramchâr ata Eufates vadung ten ni a ti. Kha rama omhai chungâ thuneina nangni pe ki ta, hong nâi maiin nin irzûl suakhai hrang a ni.

³²Anni le moh an pathianhai leh moh khom thuthung ite siam viat no roi.

³³Nin rama khan hi mihai hi nin inomtirhai hrang ni ma; nin inomtirhaiin chu, ki chungâ thil saloi nangni an inthotir hrang a ni. An pathian chubai nin mûk duaiin chu, nin ta hrangin thina châng nangni chang pe a ti,” a tia.

Fesuakna 24

Thuthung namindetna

¹Rengpa khan Mosia kuang, “Arona, Nadaba, Abihua hai leh Israelhai hruaitu sômsharihai ki kuang hong luipuihai ro; hlatak ata chubai nin ni imûk hrang a ni.

²Nangma vai ti no chu, mi dangin an ni hong inâi hrang ni mah. Mipuihai len vâng chu tâng lua an hong ilui hrang ni ma,” a tia.

³Mosia kha a zuang chuma, Rengpathupêkhai le an ivong hrang dân a irêl murdi an hril vinga, mi tinin, “Rengpa’n a iti murdi chu tho kin ti,” tiin an tia.

⁴Mosia khan Rengpa thupêkhai kha a’rziaka, zînga chu inrang takin a thoia, tâng kôla khan maichâm a siam irfûka, Israel nam om dôr lung chopui sômshleihni a phuna.



⁵Khan, Israel irchi ruathartehai chu a tîra, Rengpa kuang hâlrivôm thilinhlan an inhlana, irngeina thilinhlan hrangin sehrâtchalin an irbôl saa.

⁶Mosia'n sa thisen a chimrip a lâka, tâbora a siaa, a chimrip dang kha maichâma an theka.

⁷Khanchu thuthung irziakna bu chu a lâka, mipuihai inhriat hrangin inring takin a tepa, "Rengpa thu zôm kin ta, a thupêk angin tho kin ti," an tia.

⁸ Kha hnung chu Mosia khan thisen kha a lâka, mipuihai kha an thekhaia, "Thupêkhai nangni a pêk laia Rengpa'n Thuthung nangni le a isiam namindettu chu hi thisen hi a ni," a tia.

⁹Mosia, Arona, Nadaba le Abihua hai le Israel hruaitu sômsarihai chu tânga an hong luaia.

¹⁰Israelhai Pathian chu an hmua. A ke hnuaia khan safir lung siakhôm ang, a irtêkzia chu irvân ni ôm tak hi a oma.

¹¹Rengpa'n hi Israel hruaituhai hi na intuanghai maka, Pathian chu an hong hmua, khanchu hmunkhata fâkin an ina.

Mosia'n Sinai tâng chung

¹²Rengpa'n Mosia kuang, "Tâng sîpa ki kuang hong luiin lân, ni mi hong hruaihai irchuhai ro, ki dân le thupêk ki'rziakna lungphêk inhnihai nang lei pe ki ta," a tih pea.

¹³Mosia a thoia, ama santu Josua hruaiin Pathian omna tânga khan a hong lui tâka.

¹⁴Mosia'n Israel hruaituhai laia khan, "Kin zuang kîr nôk mâka chu hi riakbuka hin ni lei nghâk mai roi, Arona le Hura khom hin an om, i mani thubuai infel zât nin neiin chu an kuanga fe thei nin ti," a ti pehaia.

¹⁵Khanchu Mosia kha Sinai tânga a lui tâka, tâng sîp kha sûmin a tuam khapa.

¹⁶⁻¹⁷Rengpa ompuina vâ irkhêl chu tâng chung khan a zuang chuma. Israelhai hrangin chu vâ kha tâng chung meichok ang a ni. Sûm khan sîn



ruk sâng chu a tuam maia, sôn sari nî sôn chu sôm laia
irthokin Rengpa'n Mosia kha a koia.

¹⁸Mosia chu sôm kêra khan a lûta tâng chung a khan a lui tâka, kha khan sôn
sômminli le zân sômminli a hong oma.

Fesuakna 25

Pathian kairêng sinna hrang tholôm

(Fes 35.4-9)

¹Rengpa khan Mosia kha hiang hin a ti pea,

²“Israel mihai chu ki kuang thil hong pe hrangin hrihai roh. Mi'n thil an pêk
nuam dôr chu lei la pehai roh.

³Thilpêkhai chu, rângachak, sumru le sumpsen;

⁴Puanzâi irhmi, samul dum, a senduk le a sen; kêl mul leh isiam puan;

⁵kêlbelra vun chingsen leh irpol; savun sa zât; sitim thing;

⁶Meiser le inchokna hrang hriak; irthu zoroa hmang hrang sahriak le hâl
hrang mirimhoi;

⁷Ochai a rôpa a irbel hrang onik lung songkol irfîng le lung man tamhai a ini
hrang a ni.

⁸Mipuihaiin ki ta hrangin puan in irthiang an ni isin pe hrang a ni, an kuang
ki om theina hrangin,

⁹kairêng chu a sâng irvotir hrang dân chu a'rlim nang ki irhmutir lam takin
ni isin hrang a ni.

Thuthung Bôm

(Fes 37.1-9)

¹⁰“Sitim thing le bôm, a dung mûk hni a chimrip, a khang mûk khat a
chimrip, a'rsâng lam mûk khat a chimripin ni isin hrang a ni.

¹¹A pên tiang le a sâng tiang rângachak irthît infâi hmangin inluan ni a ti, a
hмор chu rângachak rôngin ni ituam irhlûm hrang a ni.

¹²Rângachak leh irki minliin siam unglân, a ke minlihai khan a ruaiin inhni
hniin inkhophai roi.



- 13**Sitim thing leh zônfunghai siam unglân, rângachaka tuamin
- 14**Bôm sîra khan irki omhaia khan nin irol hrang a ni.
- 15**Zônfunghai chu bôm irki sînga a iom mai hrang a nia, la suak viat hrang ni mah.
- 16**Lungphêk inhni, thupêkhai chuangna nangni ki ipêk hrang kha a sînga se roi.
- 17** “Bôm sîng hrang chu a dung mûk hni a chimrip, a khang mûk khat a chimrip, irthît infâi sai rângachak leh siam roi.
- 18**Rângachak suk inphêkin cherub inhni,
- 19**A sîng dung tianga omin siamin lân, a sîng leh khan phêk khata suain ni isiam hrang a ni.
- 20**Cherubhai chu hmâi irsongin ni isiahai hrang a ni, an mitha inphar leh khan bôm sîng hai kha a irkhu zoi ving hrang a ni.
- 21**Bôm sînga khan lungphêk inhni nang ki pêk hrang dân sia’n lân; a sîng leh irkhutir roh.
- 22**Bôm kôla khan irtok hen ei ta, cherub inhni Thuthung Bôm chung a om kâra irthokin nang chongpui ki ta, Israelhai laia thu ki ipêk hrang lam nang zuan hril ki ti.

Bai inchai sai siana dokâng

(Fes 37.10-16)

- 23**“Sitim thingphêk leh dokâng ni isiam hrang a ni; a dung mûk hni a khang mûk khat, a’rsâng lam mûk khat a chimrip ni ri se.
- 24**Rângachak rông leh inluanin lân, a sîrhai khom rângachak leh tuam roh.
- 25**Bêl minli a hmor irangsarin siamin lân, rângachak leh ni ithop hrang a ni.
- 26**Rângachak leh a’rzônna hrang irki minli siamin lân, a ke irki minli omnahai khan inkhop roh.
- 27**A’rzônna fung rolna hrang irki minli chu a hmor thopna kôla ni isia hrang a ni.



- ²⁸Sitim thing leh ngêt zônfung sinin lân, rângachak leh tuam roh.
- ²⁹Khênghai, khilât hai, bêlhai le khuri hai uain thilinhлана hmang hrang rângachak irthât infâiin ni isin hrang a ni.
- ³⁰Dokâng chu Thuthung Bôm kôla ni ido hrang a ni. A chung a khan ki kuanga inhlan bai ser kha a iom mai hrang a ni.

Meiser siana
(Fes 37.17-24)

- ³¹“Rângachak irthât infâi le meiser siana hmun sari ni isiam hrang a ni. A ngul le a ônhai chu ni incher hrang a ni; a’rvotirna pâr irmuamhai le an rêngin an irzom ving hrang a ni.
- ³²A kungpuia irthokin a ôn kiruk suak a ta, hi tiang inthum, hi tiang inthumin.
- ³³A ôn kirukna tina khan a’rvôtirna pâr illim inthum almond pum irmuam le a pâr a iom hrang a ni.
- ³⁴Meiser siana ngul a thungpuia khan almond pâr irmuam le a pâr ang a a’rvotirna pâr minli a inei hrang a ni.
- ³⁵Khan a ôn bop thum hnuaia khan pâr irmuam inkhat a iom hrang a ni.
- ³⁶Pâr irmuam le a ônhai le meiser siana hmun kha rângachak irthât infâi suk sai phêk khat a ini hrang a ni.
- ³⁷Meiser siana hmuna khan meiser sari inchokin lân maton tiang a êl theina hrangin a siana khan intoitir roh.
- ³⁸Meiser inchokna ni hmang hrang meichep le mei indomna rângachak irthât infâi saiin siamin lân.
- ³⁹Rângachak irthât infâi sai her 35 le meiser siana le ni hmangrua danghai le ni isiam hrang a ni.
- ⁴⁰Tâng chung a dâr nang ki irhmutir ang tak khan irdîn takin ni isin hrang a ni.

Fesuakna 26



Rengpa omna puan in

(Fes 36.8-38)

- ¹“Puan in irthiang, ki omna puan in chu patzâi irhmi thûr sai, samul rông dum, a senduk le a sen inpôl cherub dûr a ze enhoi taka zep, puan hlek sômkhata không sai hmangin sin ro.
- ²A hlek murdi kha irtiat natin, mûk sômhni le kiriata sei, a khang mûk minlia sei, siam roh.
- ³A phêk ringahai kha insui irkoptirin lân, a dang ringa khom kha khang dên khan tho roh.
- ⁴Ringa hmor insui irchunna hmor taka khan a mikuar, pat dum inhruai leh ni inkhop chit hrang a ni.
- ⁵Mikuar sômringa seng a’rkop inhnia khan inkhopai roh.
- ⁶A mikuar le irkoptirna hrang rângachak kuaikim sômringa siamin lân, kha khan puan insuiin irkop inhnihai chu inkhâihaiin lân, khanchu puan in chu puan phêk khata siam chang thei ta a ti.
- ⁷“Puan in chung chu kêl mul puan hlek sôm hleikhata không hrang a ni.
- ⁸A’rhlek tin kha a irtiat hrang, mûk sômthuma sei le mûk minlia khang lianin siam roh.
- ⁹Ringa kha buk khatin insui irkoptir sa roh. A’rhlek kirukna kha puan in maton tiang khan ni ithep hrang a ni.
- ¹⁰A rênga insui irkop maton tak le hnungkhôn tak hmora khan a mikuar irang natin sômringa inkhopin lân, a mikuar sômringa insui irkop dang hmora khan inkhop sa roh.
- ¹¹Dâr sen kuaikim sômringa siamin lân, in chung inkhata siam hrang puan in inhnihai irzom hrangin, a mikuarhai khan inkhop roh.
- ¹²A chimrip la om kha chu puan in hnung tiang khan kâi chian ri se.
- ¹³A sîr inhni tiang khan mûk khat a sei la om a ti; a’rkhûna hrangin a sîr tianghai khan nin insei hrang a ni.



- 14“A chung irthua inrâng inhni, kêlbelra vun, le savun a sazât hmangin siam sa roh.
- 15“Puan in banga intung hrang sitim thing irfangin lân;
- 16mûk sôma irsângin a khang lian mûk khat a chimripin siamin lân.
- 17Chontan tina khan a’rzomna hrangin a’rlût mat theia a ke inhni a iom hrang a ni. Puan in chopui danghai khom, khang khan thohai ving roh.
- 18Sim tianga banga khan chopui sômhni siamin lân,
- 19sumru invit ir-ông sômminli a hnuai tianga omin, chopui hnuaihaia khan a ke inhni irlût theina hrang sumru invit sai inhni a ikop chit hrang a ni.
- 20Puan in maton tianga khan intung hrang chopui sômhni siamin lân,
- 21sumrua siam an toina sômminli a chopui irkipa inhni kop saiin siam sa roh.
- 22Nitâk tianga puan in hnung tianga hrangin chopui kiruk siam sa’n lân,
- 23a kila om hrangin inhni chu se sa roh.
- 24A sîr taka chopuihai chu a bula irthokin a sîp dênin ni irkoptir chit hrang a ni, a kila bang hrang chu a kil irzom sai a ini hrang a ni.
- 25Khang khan chopui kariat, sumrua siam an toitirna sômhleirukhai le om a ta, inhni senin om sa a ti.
- 26“A bang tung indetna hrang chu sitim thing tuan sôm hleiringa siamin lân, a banga khan banglâi ringa in om sa sianlân,
- 27a hnung tiang ringa, a sîr tianghai khan ringa sengin om sa ri se.
- 28A laia banglâi khan puan in bang kha a irtongtir hrang a ni.
- 29Thing chopui intung kha rângachaka tuam hrang a ni, an sui irkoptirna hrang banglâi tung inkhopna hrang rângachak irki neia siam sa hrang a ni, rângachak ngêta siam ni ri se.
- 30Puan in chu tâng chung a an dâr nang ki irhmu ang zekin siam roh.
- 31“Chontana zâr hrang patzâi irhmi samul dum a senduk le a sen pôl không sai, a’rvôna cherub dârhai zepin siam roh.



³²Rângachaka tuam sitim chopui minliin siamin lân, a toina hrang sumru tumin siam sa roh. Chopui khan thil inkhâina hrang kuaikim siamin lân, kha khan puan kha zâr roh.

³³Puanzâr tentan sînga khan Thuthung Bôm a sînga lungphêk inhni om kha se'n lân, puanzâr chu hmun irthiang tak le Hmun Irthiang kâr indangna ni a ti.

³⁴Thuthung Bôm chu a sîngna leh sîngin lân, hmun irthiang taka khan se roh.

³⁵Hmun Irthiang tak pên tiang dokâng kha, hmâr tiang khan sia'n lân, meiser siana chu sim tiang pang khan om ri se.

³⁶Puan in mikota zâr hrang patzâi irhmi thûr sai samul dum, a senduk le a sen pôl a'rvotirna hrang puan không hrang a ni.

³⁷Kha zârna hranga khan sitim thing chopui ringa rângachaka tuam, a toina dâr sen ir-ông inthûk le an khâina hrang thil incher rângachakin siam roh.

Fesuakna 27

Maichâm (Fes 38.1-7)

¹Maichâm irki minli nei, mûk ringaa sei, sitim thing leh siamin lân, mûk thuma irsâng a ini hrang a ni.

²A'rki minlina hmun tina a'rki inseiin siamin lân, maichâm leh khan a tuana siam ni ri se, a pumpuiin dâr sen leh tuam ving hrang a ni.

³Pil bêlhai, irvut luakna hai, khuri le thîr kut nei le mei luakna hai dâr sen leh siam roh.

⁴Intuan phitin siamin lân, a sîr tiang khan dâr sen leh irzônna hmun irki minli inkhop roh.

⁵Dâr intuan chu maichâm hmor hnuai inkhopin lân, maichâm inlaina tena huap theina hrangin;

⁶zônfunghai sitim thingin siamin lân dâr sen leh tuam roh.

⁷Maichâm sîra irki neihaia khan a'rzôn zoro rikipa rolin lân.



⁸Thingphêk leh maichâm chu inver ir-ôngin lân, tâng chung a dūr nang ki irhmu lam tak khan ni isiam hrang a ni.

Rengpa omna puan in dâi

(Fes 38.9-20)

⁹“Ki omna puan in dâi hrangin patzâi irhmi thûr sai puan không ni ihmang hrang a ni. Sim tiang mûk irzakhata sei ni izarh hrang a ni.

¹⁰Dâr sen chopui sômhni le a toina dâr eng sômhni a iom sa hrang a ni, a chopuia khan puanzâr inkhâina hrang thil kôi le a zârna hrang thil intûn sumrua siam, ni isia hrang a ni.

¹¹Puan in hmâr tiang khom khan puan mûk irzakhata sei ni izâr sa hrang a ni, chopui sômhni le an toitirna dâr sen tum sômhni, inkhâina hrang thil kôi le a zârna hrang thil intûn, sumrua siam a iom sa hrang a ni.

¹²Nitâk tiang khom mûk sômringaa sei puan zâr hrang a nia, chopui sômkhat le a toina sômkhat om a ta,

¹³Nisua tianga mikot omna khom a dâi chu mûk sômringa lian a inang hrang a ni.

¹⁴⁻¹⁵Mikot sîr tiang sũa bang chu mûk sôm hleiringa sei ni a ti, chopui inthum le a toina inthum nei sa a ti.

¹⁶A lûtna mikota zâr hrang patzâi irhmi thûr sai, samul dum, a senduk le a seninpôl irzêl enhoi tak puan khônga mûk sômhnia sei a iom hrang a ni. A zârna hrangin chopui minli an toitirna neiin a iom sa hrang a ni.

¹⁷Dâi chopui murdi chu sumrua inluana irkoptir hrang a ni, an kuaikimhai chu sumrua siam le an toinai chu dârsena siam a ini hrang a ni.

¹⁸Dâi chu mûk irzakhata seiin, a khang mûk sômringa, a’rsâng lam mûk ringa ni a ta, a puan zâr chu patzâi irhmi thûr saia không, an toitirna chu dârsena siam a ini hrang a ni.

¹⁹Puan in sũa hmangrua murdi, puan in khârna hêmvuak le a dâi hmang hrang chu dârsena siam hrang a ni.

Meiser enkol hrang dân

(Lev 24.1-4)



²⁰“Meisera inchok hrang oliv hriak irthât infâi hong chôï hrangin Israel mihai chu hril ro, a khohloi tina inchok mai theina hrangin.

²¹Arona le a nâihaiin puan ina Thuthung Bôm omna puanzâr pên tiang khan meiser chu sehai sian, khohloia irthokin zîng dênin Rengpa makunga khan chok mai ri se. Hi thupêk hi Israel mihai le an irchi suanpâr dên khomin tho dân balam det taka nei hrang a ni.

Fesuakna 28

Ochahai tukfam

(Fes 39.1-7)

¹“Ni upa Arona le a nâihai Nadaba, Abihua, Eleazara le Ithamara hai kha koihaiin lân, Israelhai lai ata keima ochai ni hrangin khâihai roh.

²Ni upa Arona ta hrangin ochai tukfam songkol irfual mahripom tak siam pe roh.

³Kut sin theithiamna ki inneitirhai murdi koihaiin lân, ki sin tho hranga ochai irthiang an ni theina hrangin.

⁴Hi tukfamhai hi an inei hrang a ni, lungbom, Efod songkol irfual, songkol sînga inngâk zât lukôm, diar le kongkhit hai, ni upa Arona le a nâipasalhai inngâk hrang ochai songkolhai nei ri sehai, keima ochai an ni theina hrangin.

⁵Kut theithiam pâl khatin samul dum, a senduk le a sen le rângachak pat zâi irhmi thûr sai samul dum, an ihmang hrang a ni.

⁶Efod chu rângachak patzâi irhmi thûr sai samul dum, a senduk le a sen le irpol enhoi taka không hrang a ni.

⁷Dârsuama inhnia inkhâiin, a hnung tiang le a mân tianga inkhopin, a khilina siam ri se.

⁸Khaang dên khan kongkhit a sa chi a không inkhat a ni theina hrangin Efod puana khan an inkhop sa hrang a ni.

⁹Onik lung inhni la’nlân, Israel irchi nam sômhleihni irhming ni irziak hrang a ni.



- 10**A ulian dônin kiruk rugin ni irziak hrang a ni.
- 11**Lung man tam tianga inhriat thei mi inhrilin lân, Israel nâihai irhming lungphêk inhni sinin lân ni irziak hrang a nia, rângachak phûm hrang a ni.
- 12**Lung man tam inhnihai kha dârsuam chungka khan Israel nam sômhleihni inhriat maina hrangin belsa ni sianlân. Arona khan Rengpa makunga a'rhming chu a dârsuama irvâ a ta, Israel namhai chu ki inhriat mai hrang a ni.
- 13**Lung man tam inkhopna hrang rângachak inhni siamin lân,
- 14**rângachak irthît infâi hmangin zîngziri hruï siam sa'n lân, an khopna hranga khan inkhop roh.

Rôpbel

(Fes 39.8-21)

- 15**“Patzâi irhmi thûr sai, samul dum, a senduk, a sen le rângachak pat anga efod anga khôngin, Pathian an koi zoroa ochaihai dâra bâng hrang puan insui theihai enhoi takin ni insuitirhai hrang a ni.
- 16**Thep pumin kil minli nei, khâpkhat vêla chêng ni ri se.
- 17**Lung man tam rân minli inkhop ni sianlân, a rân inkhatna khan Odam lung, Pitda lung, Berekot lunghai om sianlân;
- 18**A rân inhnina khan, emeral, safir le endonuk (lunghlu),
- 19**A rân inthumna khan Lasen, Agate, Amethyst hai om sa sianlân;
- 20**A rân minlina khan Tarkois, Onik, Jasper, lunghai om sa sianlân, kha lung man tamhai kha rângachak phêka inkhop ving hrang a ni.
- 21**Lung man tam sômhleihnihai laia an rêngin Israel nam inkhat seng irziak hrang a ni. Israel nam sômhleihni entîrna a ni theina hrangin.
- 22**Rôpbel inkhâina hrang rângachak irthît infâi zîngziri hruïin siamin lân,
- 23**rângachak irkual inhni, rôpbel hmora inkhop hrang, siam sa roh.
- 24**Zîngziri hmor inhni chu rôpbel hmora irkuala khan inkhop hrang a ni.



²⁵A hmor inhni kha lung man tama inhni oma khan inkhopin lân, Efod puan irvâ leh khan irzom ri se.

²⁶Efod dep rôpbel sâng tiang hmora rângachak irkual inhni inkhop sa roh.

²⁷Efod puan irvâna irdîna kop sian, Efod khitna leh khan enhoi taka không sai hmora khan rângachak irkual dang inhni inkhop sa roh.

²⁸Rôpbel le efod rângachak irkual chu pat dum inhrua leh irzomin lân, rôpbel chu a kong irdîna det mat sianlân, a irthôl viat hrang ni mah.

²⁹“Hmun Irthianga khan Arona a hong lûtin rôpbela Israel namhai irhming chuangna chu a hong isong hrang a ni; ama kha keima Rengpa ki mihai nin hriat suaktirtu nih a ti.

³⁰ Efod songkola khan Urim le Thumim kha om sianlân, ni chongpui hrangin a hong rikipa Arona lung irdîn taka a iom hrang a ni. Khaangin Arona a hong rikipin Efod kha inngâk a ta, Israel mihai hranga ki inuam lam chu siam infel thei a ti.

Ochai tukfam dang

(Fes 39.22-31)

³¹“Efod hnuai inngâk hrang songkol irfual chu samul dum rônga không hrang a ni.

³²A laitaka lu thunna tiang a ir-ông hrang a ni, a chet thei lina hrangin a hmor kâm hrang a ni.

³³⁻³⁴A hnuai tianga hmor irfuala khan samul dum, a senduk le a sen dâr rângachak silniang kârirthâk a inkhop hrang a ni.

³⁵Kha kha ochai sin a tho zoroa Arona inngâk hrang a ni. Hmun Irthianga Rengpa kuang a lût tiang le a suak tiang silniang chu nok ngai a ta, that ni thei ngai no ni.

³⁶“Rângachak felriai phêka khan, namindetna, kutsabia irziakin, a chungka khan, “Rengpa HRANG TUM,” ti irziak inchuang roh.

³⁷Ochai lukôm maton tiang khan hrui dum leh khit roh.



³⁸Arona'n lukôm leh khan a michala inkhop a ta, khanchu keima Rengpa hin Israelhai irbôlna thil ki kuanga an hong inhlan kai chu lei pom ki ta, an thil inhlanhai khan tho'nchâina nei khomhai sian.

³⁹Arona inngghâk hrang songkol hnuai lukôm pat irhmia không ni sianlân, a kong khitna hrang khom enhoi taka irvôtir ni ri se.

⁴⁰“Songkol irfual kong khit le lukhumhai, Arona nâipasalhai hrang siam pehai ro; man neia irvôtir hrang a ni.

⁴¹Ni upa Arona le a nâihai chu inngghâkhai sian, ki sinthotu ochai ni hrangin Oliv sahriak irthûtirhaiin lân, inhlanin lân, ser indanghai roh.

⁴²Pat ze irhmia không, tuman kong hnuai ata a mal dênâ sei ni ri se, an inzakpui an lang lina hrangin.

⁴³Arona le a nâihai khan, puan ina an hong lût zoroa, Hmun Irthianga om maichâma ochai sintho hranga an hong zoro khoma, kha kha an ikai ngêt hrang a ni. an inzakpui ngai an lang duai khoma that an ni lina hrangin, hi hi Arona le a'rchihai hrangin kumkhuaa tho hrang dân chu a ni.

Fesuakna 29

Ochai namindet dân

(Lev 8.1-36)

¹“Keima sin tho hranga ochai sin tho hrang, Arona le a nâihai ni irserindang hrang dân chu, hiang hin ni a ti; sehrâtchal tuai inkhat le kêlbelra chal inhni demnaboi kaiin lân,

²chol kop loi bai oliv hriaka irpol leh, sahriak pol sai bai phêk satakin siamin lân,

³annihai kha kok sênga thunin lân, sehrâtchal inhni ni hong ichôi hrang a ni.

⁴“Arona le a nâihai chu ki omna puan in kot bâia hong hruaihaiin lân, dân anga irthârna tui irsil hrangin hrilhai roh.

⁵Arona chu ochai tukfam, songkol irfual, Efod songkol, Efod hnuai songkol irfual rôpbel le kong khit irkipin.

⁶A lua lukôm, “Rengpa HRANG TUM,” iti inkhumtir roh.



- ⁷Irthû a nang zoroa hmang zât oliv hriak kha la'nlân, a lua buakin irthûtir roh.
- ⁸A nâihai kha hong hruaihaiin lân, songkol inngâkhai sian,
- ⁹an konga kongkhithai khitin, an lu tiang khom lukhum inkhumtirhai roh. Khaang taka khan Arona le a nâihai chu ni inamindethai hrang a ni. Anni le an irchihai chu ochai hong ni thei mai ta an ti.
- ¹⁰Sehrâtchal tuai ki omna puan in kôla hong kaiin lân, Arona le a nâihai chu sehrât lu chung a kut irngat hrangin hrilhai roh.
- ¹¹Puan in kôla khan, ki kuang sehrâtchal chu that roh.
- ¹²Sechal thisen kha la'nlân, maichâm kila khan ni kut mitin leh polin lân, a ban la om chu maichâm kôla khan bun ving roh.
- ¹³A rîl tuamtu, a hlap murdi le a mithin a sa tak, a bê inhni a thâi kop kha la'nlân, sual irbôlna hrangin maichâma hâlivôm roh.
- ¹⁴Khanchu a hme, a vun, le a rîlhai chu dâi pên tiang hâlivômin lân, sual irbôlna thil inhlân a ni sikin hâlivôm ving hrang a ni.
- ¹⁵“Belrachal inkhat kaiin lân, Arona le a nâihai chu an lu chung a an kut irngat hrangin hrilhai roh.
- ¹⁶Thatin lân, maichâm irhîl kha thisen inthek ro,
- ¹⁷hme kha irchan indi'n lân, a sêngkua le a hnungzâng tianga a malhai chu irsûkinfâi ro, a lu le a ke danghai chu a chung a khan se roh.
- ¹⁸ A rêngin thilinhlan belra chu ni inhlân hrang a ni, hi thilinhlan mirimhoi hin ki milung a inchuktir ngai a ni.
- ¹⁹“Belrachal inkhat kai sa'n lân, serindangna hmang ngai kha, Arona le a nâihai chu an lu chung a kut irngat hrang ti pehai roh.
- ²⁰Thatin lân, a thisen chu Arona le a nâihai mikuar chang tianga silnianghaia, kut chang tiang kutpui hmora, kepui chang tiang hmora nâlin lân, a ban la om chu maichâm irhîl kha inthek roh.



²¹Maichâm thisen irthûna hmang ngai oliv hriak senkhat la'nlân, Arona le a puanhai chung a le a nâihai le an puanhai chung a khan inthek roh. Khanchu ama le a nâihai an puanhai murdi keima hranga serindang ni ta an ti.

²²Kêlbelra irmei satak, a sêngkua tuamtu a hlap, a mithin sanatak, a bê inhni a thâi kop le a chang tianga malpui kha âtin lân,

²³bai inhlan khamphulua sia chu a zât kipa bai tiam khat seng oliv hriak le inhmet bai tiam khat le chol kop loi bai tiam la'nlân,

²⁴kha fâk le nêk thil murdi kha Arona le a nâihai kuta fe'n lân, ki ta hrangin thilpêk bîk nghi hrangin, thâr hrangin ni ihrilhai hrang a ni.

²⁵An kuta irthokin la'nlân, maichâma hâlivôm thilinhlan chung a khan sia'n lân, ki ta hrangin thilinhlan na nei roh. Ni thilinhlan mirimhai hin a ni inlômtir ngai a ni.

²⁶Hi belrachal mier hi la'nlân, ki ta hrangin thilpêk bîk ni hrangin thâr roh. Khaangin hihai hi ni dongtum ni a ti.

²⁷Ochai namindet zoroa kêlbelrachal mier le a malpui thârin ki kuang thilpêk bîk ni inhlan hrang a nia, ochaihai ta hranga thâr hrang a ni.

²⁸Israel nâihai irhîlin thil an inhlan kha la'nlân, a mier le a malpui chu ochaihai dongtum kumtuanga hranga ki indet a nia, hi hi Rengpa'n thilpêk bîk mipui ata ki idong chu a ni.

²⁹“Arona ochai tukfamhai hi a thi tena chu a nâihai kuang ochai ni hranga an phunhai zoroa an inngâk hrang a nia, an kuta ni ipêkhai hrang a ni.

³⁰Arona nâi irthûla ochai namindet khan sintho hranga ki omna puan in hmun irthiang a fe zoroa sîn sari sêng chu hi puanhai hi a irbel hrang a ni.

³¹“Arona le a nâihai namindetna hrang, kêlbelrachal hme chu lâkin hmun irthianga but roh.

³²Anni khan ki omna puan in mikot bula khan khamphulu sênga bai la om le khan fa ri se.



33Anni namindetna soal irbôlna hme chu an ifâk hrang a ni; khalâi irthiang a nia, ochai vaiin an ifâk thei hrang a ni.

34I mani, hme mo bai mo zîng dênin fa loiin a la omin chu, hâlpai ving hrang a ni; hme ser a ni sikin, a dâi chu fa hrang ni ta mah.

35“Thu nang ki ipêk ang takin Arona le a nâihai chu sîn sari sîng chu ni iserindanghai hrang a ni.

36A sîn tin soal irbôlna hrangin, sehrâtchal inkhat inhlan ngêt ni ta, kha leh khan maichâm kha a ithâr hrang a ni. Khanchu oliv hriak pol ni ta, irthiang taka ni isiam hrang a ni.

37Khaang khan sîn sari sîng chu, a sîn tin tho ngaiin lân, khanchu maichâm kha hor thiang ving a ta; mihriam mo, a dang khomin a tôn murdi a'rthiangna irtha khan a ipol ving hrang a ni.

A sîn tina thilinhlan

(Nam 28.1-8)

38“Zoro la hong om mai hrangin a sîn tin maichâma kêlbelrate inhni ni inhlan ngai hrang a ni.

39Zîng tin belratehai laia inkhat inhlan ni ta, a dang kha khohloi tiang inhlan ngai roh.

40Belrate matona leh khan baidi a sa chi her khat le oliv hriak irthît sai litar khat ni inhlan hrang a ni.

41Belrate inhnina kha chu khohloi tiang inhlan nôkin lân, ama leh khan baidi oliv hriak le uain khom zîng tianga dôr kha inhlan nôk roh. Hi hi keima Rengpa kuanga fâk nêk thilinhlan chu a nia, a mirimhai hin a ni inlôm-tir ngai a ni.

42Zoro la hong thiaia hin, hâlrivôm thilinhlan hin ki omna puan in kotbâi kôla khan inhlanin a iom mai ngai hrang a ni, kha hmuna khan kêng ki mihai zuang irtongpuihai ngai ki ta, nangni ki ichongpui hen hrang a ni.

43Kha hmuna khan Israel mipuihai irtongpuihai ki ta, ki ompuina vâr irkhêl khan a hmun kha irthiangin siam ki ti;



⁴⁴puan in le maichâm chu ser irthiang ki ta, Arona le a nâipasalhai khom chu ochai sina ki sin tho hrangin serindanghai ki ti.

⁴⁵Israel mihai laia lêng ki ta, an Pathian ni ki ti.

⁴⁶An laia ki lêng theina hrangin Aigupta ram ata anni hruaisuaktu Rengpa an Pathian kha ki nih ti inhria an ti. Keima hi Rengpa an Pathian chu ki ni.

Fesuakna 30

Mirimhoi hâlna hrang maichâm

(Fes 37.25-28)

¹“Sitim thing le mirimhoi hâlna hrang maichâm siam roh.

²Irki minli nei mûk khat vêla sei, a’rsâng lam mûk hni ni sianlân, a’rki minlia khan a’rki inchor maichâm leh tuan khata siam om ri se.

³A chung tianga incham, irki minliai, a’rkihai chu rângachak rônga inluan hrang a nia, a hmor tiang chu rângachaka tuam hrang a ni.

⁴A irzônna hmol rolna hrang rângachak irkual inhni siamin lân, a sîr hitiang, hitiang a hmor hnuaia khan inkhop roh.

⁵A zônfung chu sitim thing ni sianlân, rângachak leh ni ituam hrang a ni.

⁶Hi mirimhoi hâlna maichâm hi Thuthung Bôm maton tianga puanzâr inkhâina maton tiang khan intoitir roh. Kha hmuna khan nang ki irhmupui hrang a ni.

⁷A zîng tin, Arona’n meiser infâi balamin, mirimhoi thil a inhlan hrang a ni.

⁸Khohloi tiang meiser an chok zoro khomin khaang khan a itho ngêt hrang a ni. Zoro la hong om thiai maia khom, hi mirimhoi thil inhlan hi irngam loiin a irzôm mai hrang a ni.

⁹Hi maichâm chung a hin hâl phal loi, thil mirimhoi, hme thil inhlan mo, bu thil inhlan mo, kha hnung uain khom thilin ni inhlan hrang ni mah.

¹⁰A kum tin voikhat, soal irbônna thil inhlan thisen chu, Arona khan maichâm thâr irthiangna hrangin a’rki minli khan a ipol hrang a ni. A kum tin zoro la



hong oma khan tho mai hrang a ni. Hi maichâm hi keima Rengpa kuanga inhlan a irthianghai hrang a ni,” tiin.

Rengpa omna puan in enkol dân

11Rengpa khan Mosia kha hiang hin a ti pea.

12“Irteppui zoroa a mi Israel mihai chungã vânduaina irkhêl a tung loina hrangin, mi tinin mâni hringna irtanna an ipêk ving hrang a ni.

13 Irteppuia om murdi an pêk hrang dôr sum an inkung chu an ipêk ngêt hrang a ni. Ki omna puan ina hrang, varna le diktaka varh sekel chimrip, Gera sômhni an pêk ngêt hrang a ni. Mi tinin sekel chimrip ki kuang thilinhlan an inei ving hrang a ni.

14Irteppuia tep kum sômhni chung tianga mihaiin Rengpa kuang hiang thil hi an inhlan ving hrang a ni.

15An hringna irtanna hrang Rengpa kuang an inhlan zoro khan sekel chimrip, mi tinin an inhlan ving hrang a ni. Mi irchong khomin hi nêka tam a inhlan hrang ni mah. Mi inriang khomin hi nêka tôm a inhlan hrang ni ual mah.

16Israel mihai laia irthokin hi hringna irtanna sum hi irfuangin lân, ki omna puan in enkolna hrangin hmang roh. Hi khâzana hi an hringna irtanna hranga chôi ni a ta, anni ki sênghual ti inhriatmaina hrang ni a ti,” tiin.

Dâr tâbor

17Rengpa khan Mosia kha a ti pea,

18 “Dâr tâbora toina hrang dâr thîrin siamin lân, puan in le maichâm kêra intoitirin lân, tui om mai ri se.

19Arona le a nâihai khan an kut le ke irsûkinfâina hrangin tui kha an ihmang hrang a ni.

20Uain inna mo, fâk nêk zongna mo thil inhlanna hranga maichâm an pan mân khan chu thatin om no nihai.

21An thi loina hrangin an kut le ke an irsûk ngêt hrang a ni. Anni le an irchihaiin kumtuanga an hmang hrang chu a ni,” tiin.

Irpol zât sahriak



- ²²Rengpa khan Mosia kha hiang hin a ti pea,
- ²³“Mura tui her ruk, thingzungthum mirimhoi her thum, thing rimhoi her thum,
- ²⁴kesepât thing her ruk, ki omna puan ina hmang lai her leh varh kha lakhômin lân, oliv hriak litar minli leh polin lân,
- ²⁵mirimhoi irpol anga irthiang takin siam sa roh.
- ²⁶Ki omna puan in thuthung bôm.
- ²⁷Dokâng le hmangrua danghai, meiser siana le hmangrua danghai, mirimhoi hâlna hrang maichâm,
- ²⁸Thil inhlan hâlna hrang maichâm le a hmangrua murdihai, tâbor irthûlna le an toitirnahai inlâpna hrangin kha kha hmang roh.
- ²⁹Hi thilhai hi fel takin serindangin lân, hong irthiang khak an ta, mihriam mo, i dang khom a hong tônpu dôr chu a’rthiangna irtha khan a innatirhai hrang a ni.
- ³⁰Arona le a mihai chu ki sintho hrangin sahriak hi polhaiin lân, ochai hrangin namindethai roh.
- ³¹Israel mihai chu hrihai roh. Hi hriak irthiang hi ki sinthotu ni hranga serindang zoroa irpol hrangin hmang mai ngai hrang a ni.
- ³²Mi pangaihai chu pol hrang ni maka; thil dang dang irpol ngai dân hmangin a dang nin isiamsuak hrang ni mah. Thil irthiang a nia, nin iser ok hrang a ni.
- ³³Hianga irpol hrang sahriak le thil danga ki siamhai mo, ochai rua ni loi lei pol mihai chu ki mihai laia inkhat khom tep ni no nihai,” a tia.

Mirimhoi hâl hrang

- ³⁴Khan, Rengpa’n Mosia kuang, “Hi mirimhoi Netep hai, Sekelet hai, Kalbana hai, Bero irfîmhai ir-angarin la’nlân,
- ³⁵mirimhoi sinpu sin dân angin mirimhoi takin siamin lân, fâi tak le irthiang taka a om theina hrangin michi pol roh.



³⁶Vikkham viatin lân, nôinditir ro, nang ki'rtongpuina hrang hmun, irtongna Biakbuka Thuthung Bôm maton tiang khan sia'n lân, nangma ta hrangin irthiang tak ni a ti.

³⁷Hi mirimhoi sin dân hranga hin, nangma ta hrangin mirimhoi zel siam ta no ro, Rengpa ta hranga hual a ni sikin, thil irthiang tak ni ibe ta hrang a ni.

³⁸Mi tukhomin khaanga mirimhoihai kha mâni hmang hrangin a siama ni'n chu a mihai lai ata ipai ni a ti," tiin.

Fesuakna 31

Rengpa omna hrang puan in sin theithiamhai

(Fes 35.30–36.1)

¹Rengpa khan Mosia chu hiang hin a ti pea.

²"Uria nâipa Bezalela, Hura tupa Juda nama mi chu kin thang tâka,

³kut sinthei le irfûktir theina, thil i ang khom siam hranga kutsintheina nei hrangin ama kha ki sin theina hrangin ki insiptir a ni ta.

⁴Thil enhoihai ngaitua suaka, rângachak, sumru le dân siam theina,

⁵lungmantam inkhop zât ât tan, thing a enhoi tak tak siam theina ki inneitir a ni ta.

⁶Ama changpui hrangin Dan nama mi Ahisamaka nâipa Oholiaba ki inthang sa a ni ta. Kut sinthei dang khom, sin hranga thu ki ipêk murdi siam theina ki ipêk sa a ni ta.

⁷Puan in sin an ta, Thuthung Bôm le a sîng, puan in timmatuahai,

⁸dokâng le hmangruahai, rângachak inzena siam meiser siana le a hmangruahai mirimhoi hâlna hranga maichâm,

⁹hâlvôm thilinhana maichâm, a tuibêl murdi leh, tâbor le an toina hai,

¹⁰Arona le a mihaiin ochai sin an tho zoroa an inngâk hrang ochai tukfam roiinpui,

¹¹Iropol zât sahriak, hmun irthianga hrang mirimhoi thil an isiam sa hrang a ni. Hi thilhai siam hranga hin thu nang ki ipêk ang takin an itho hrang a ni".



Irngam nî sùn sabat

¹²Rengpa'n Mosia kha,

¹³Israel mipuihai chu inhril hrangin thu a pêka, "Ki sabat nî hi an iser hrang a ni, nin irchi la hong om thiaihai hrang khomin keima Rengpahi, nangni an thangsuaaktu ki nih ti nin inhriatmaina hrang a ni sikin.

¹⁴Sabat nî hi nin ta hranga nikhua irthiang a nia, nin iser ngêt hrang a ni. Mi tukhom ser loia kha ni sîna sintho chu that hrang a ni.

¹⁵Mâni sinthôna hrangin sùn rukpa zel nin neia, a sùn sari ni chu irngam nikhua irthiang, keima hranga serindang hrang a ni. Mi tukhom hi nikhuaa sintho chu that ngêt hrang a ni.

¹⁶Israel mihaiin kin kêra thuthung an inhriatmaina hrangin kumtuanga ser mai hrang a ni.

¹⁷Keima le Israel mihai kin kêra thuthung irsinsiana det ni a ti; keima Rengpa hin sùn ruk sîngin irnêng le irvân ki siam zoia, a sùn sarina chu ki sin ki monga, ki irngam a ni ta," a tia.

¹⁸Pathianin Sinai tânga Mosia a chongpui zoiin chu, ama Pathian ngêt khan a irziak thupêkhai chuangna lungphêk inhni kha Mosia kuang khan a pêka.

Fesuakna 32

Rângachak sehrâtchalte irlim

(Dhn 9.6-29)

¹ Mosia chu tânga a hong om insôta, kha hmun ata zuang chum lat loiin a om ti an hmu'n chu mipuihaiin Arona tiang an hong fekhôma, a kuang khan, "Tho a ni hruai hrangin pathian ni siam pe ro; Aigupta ram ata ni hruaisuaaktu Mosia laka hi imo a ichang a ni ta, suak ta maka," an tia.

²Arona'n an kuang khan, "Nin dôngmahai, nin nâipasalhai le nâinupanghai mikuar bet kuarkâihai khek unglân, ki kuang ni hong pe roi," a ti pehaia.

³Khaang khan mi tinin an rângachak kuarkâihai kha an kheka, Arona kuang an hong chôl tâka.



⁴ Ama'n kuarkâihai kha a lei lâka, an zôia, a suangna hrang hmun a isiam khan a buna, rângachak sehrâtchhalte irlim an luan pehai tâka. Mihaiin, "O Israel mihai hi Aigupta ram ata ni hong hruaisuaktu ei Pathian kha a ni," an tia.

⁵Kha thu kha Arona'n an hriatin chu, rângachak sehrâtchhalte kôla khan maichâm a siama, "Nangtûk chu Rengpa chôirsângna hruaithe ni a ti," iti an puanga.

⁶Zînga chu irbôlnahai a hâl hrang le irngeina thilinhlan fa hrangin sahai an hong chôia. Mipuihai chu hruaithe fa hrangin an toi tâka, kha kha uain inrui inhnâi le taksa irzukna sinin an inchangtira.

⁷Rengpa khan Mosia kuang a ti pea, "Zu kîr nôk zel ta roh, mipui Aigupta ram ata ni hong ihruaisuakhai khan, sualin an ni ihnôl zoi tâk kêng.

⁸An lampui zui hranga ki iti kha an imâk tâk kêng; rângachak inzôia siamsuak sehrâtchal irlim chubai mûkin irbôlna thil an inhlan tâk kêng, 'Ama hi Aigupta ram ata hruaisuaktu an Pathian kha a ni,' an ti," tiin.

⁹Hi mihai tukullian lam hi kin hriat infel a ni ta.

¹⁰Khasikin, lei dâihrekin lân, an chung a ki ning an mur oka, annihai khu thathai ving ki ti, khanchu nang le ni irchihai nam roiinpui takin siam ki ti.

¹¹ Mosia'n Rengpa a Pathian chu intha loiin a kuang khan, "O Rengpa ni kut irnakhrât le ni sinthotheina hmangin Aigupta ram ata ni isansuak ni mihai chung a hiang dôra ni ning a inmur hi?

¹²"Tâng rama that irhmang hrang pialin ni mihai hi Aigupta ram ata ni ihruaisuak a ni,' tiin Aigupta mihai khan itin moh an iti thei? ni ningmurna insum zâmin lân, ni milung inchong thûlin hi vânduaina irkhêl hi ni mihai chung a insum no roh.

¹³ Ni mi Abraham a, Isaka le Jakoba hai kha inhre maiin lân; 'Irvâna ârsi tam dôr nêkin annihai kha irchi suanpâr pe hrang le ram ni inkung murdi an ta ni mai hranga kha,' an irchi suanpârhai kuanga ni inkung kha inhre mai ro," a tia.



- ¹⁴Khasika khan kêng Rengpa'n a lungrîl an danglamtira, a mihai chung a vânduaina irkhêl intungtir hranga a lei ihril kha a irlêktir a ni.
- ¹⁵Mosia chu tâng ata a chuma, lungphêk inhni hitiang hitiang thupêk sômhai chuangna kha a chôia.
- ¹⁶Lungphêk kha chu Pathian isiam a nia, thupêk sômhai chung a khan invera irziak a ni.
- ¹⁷Josua'n mipuihai khêk an hriatin chu, Mosia kuang khan, "Riakbuka irdoi irhâi kin hriat," a ti pea.
- ¹⁸Mosia khan, "Zoina khêk irhâi mo, an dinghmun siatna irhâi chu ni le irhoi ma; raifân hlasak irhâi a ni," a tia.
- ¹⁹Mosia khan sehrâtchal le mipui lâm sup sup hmu'nfel theina hranga riakbuk kha a zu nâiin chu, a ning an mur pe tak taka, tâng kôla khan lungphêk a ichôihai kha dêngzuanin an khoipai ta.
- ²⁰Sehrâtchal irlim an isin kha a lâka, an zôia a suk indi chita, tui leh a'rzêla, Israel mihai kha an intirhai ta.
- ²¹Arona kuang khan, "Itin takin mo hi mipuihai hin sin an itho, hiang dôra sual sin irkhêl an itho tâk hi?" a ti pea.
- ²²Arona'n hiang hin a ti, "Ki chung a ni ninginmurtir viat no ro; hi mihai hin thilsual tho hrang an irzuk dop dop ti chu ni inhriat mo ni ma,
- ²³anni hin ki kuang, "Tho a ni hruai hrangin pathian ni sin pe ro; Aigupta ram ata ni hruaisuaktu Mosia laka imo a thurchi a ini tâk inhre ta ma unga,' an ni tia.
- ²⁴An rângachak irvôna thilhai ki kuanga hong chôi hrangin ki hrilhaia, a neipuhaiin chu an kheka an ni ipêk a ni. Kha thilhai kha meia ki rôa, hi sehrâtchal hi a hong irsiamsuak zel a ni," a tia.
- ²⁵Mipuihai chu an nuam an ningin an oma, an râlhai en nuam loi rak hrangin Arona khan a len lêngtirhai tih Mosia khan a hmuin chu,



²⁶riakbuk mikota khan a ngîra a khêka, “Mi tukhom Rengpa tianga kop murdihai chu, ki kuang hin hong ri sehai,” a tia. Khanchu Levi irchi murdihai chu ama an hong bûma,

²⁷an kuang khan, “Israelhai Rengpa Pathianin nin rêngin mâni khandai lâkin, hi riakbuk kotbâi ata kotbâi dang dênin urêng danghai, a rual le chim an tualbômhai that hrangin thu a pêka,” a tia.

²⁸Levi hai khan thupêk kha an zôma, kha ni sîn khan mi sâng thum vêl an ithat irman a ni.

²⁹Mosia’n Levi hai kuang khan, “Mâni nâi le urêng hai that ten khom Rengpa hrangin nin irpêka, sat chu nangni vur ngêt a ti,” a ti pehaia.

³⁰Zînga chu Mosia’n mipuihai kuang khan, “Sual ichiom tak nin itho a ni ta; khan atûn hin Rengpa kuang tânga hong fe nôk ki ta, nin sual inboi hrangin ngaidamna ki hmu duaiin chu,” a tia.

³¹Mosia chu Rengpa kuang a kîr nôka, “Hi mi hai hin sual ichiom tak an lei tho tâka, rângachak tui leh millim an siama, Pathian angin chubai an lei imûk a ni ta.

³²Ngaihoi takin an sualna ngaidamin lân; khan ni ngaidam nuam zel no’n chu, ni mi hai irhming chuangna bu ata kha, ki’rhming khom kâtpai ro,” a tia.

³³Rengpa’n hiang hin a sâma, “Ki lekhabu ata ki ikâtpai hrang chu, ki chung a thilsual thotuhai irhming vai kêng a ini.

³⁴Atûn hin fe’n lân, nang ki ihrilna hmuna khan ni mi hai hi hruaihai roh. Ki vântirtônin nang a ihruai hrang a nih ti hi inhre mai ro, hi mi hai an sual sika dûk ki ithohaina hrang nikhua khom anâi teng ta,” a tia.

³⁵Khaingin sehrâtchal irlim hranga Arona an insintir sikin Rengpa’n mipuihai laia hri an lêngtir ta.

Fesuakna 33

Rengpa’n Sinai tâng masan hrangin Israelhai thu a pêk



¹Rengpa'n Mosia kuang khan, "Nangma le ni mipui Aigupta ram ata ni hong ihruaisuakhai khan hi hmun hi masan unglân, Abrahamama, Isaka le Jakoba le an irchihai pe hranga ram ki inkungna khan fe roi.

²Nin matona hruaitu hrangin vântîrtôn tîr ki ta, Kanaan mihai, Amor mihai, Periz mihai, Hiv mihai le Jebus mihai chu irzûlpaihai ki ti.

³Ram irchong irnêng sa hmuna nin ife hrang a ni, keima chu ni kuang hong ual no ning, tukullian mi an nia, lam laia nangni ki that irhmangtir duaiin chu," a tia.

⁴Mipuihaiin kha thu kha an inhriatin chu an irpei a tema, tûte an irchon sa leh irvo nuam ta mahai.

⁵Rengpa khan an kuanga hril pehai hrangin Mosia kha thu a pêka, "Mi tukullian tak nin ni. Zoro sôtnotea hrangin ni pôla fe sa hrang khomin, nangni ki'rh mangtir chit khom a ni thei. Atûn hin nin irvôna thil mantamhai kha khek unglân, imo nangni ki ilo hrang infel ki ti," tiin.

⁶Khaang khan Sinai tâng an mâksan hnungin chu an thilhlulai leh irvo ta mahai.

Rengpa omna puan in

⁷Israelhai riakbuk siamna hmun tina khan Mosia puan in irthiang kha hlavita khan a siam ngaia. A'rhming hrangin Rengpa omna puan in iti a nia, mi tukhom Rengpa chongpui nuam murdi'n kha khan an ife ngai a ni.

⁸Kha hmuna khan puan in kotbâihaia ngîrin Mosia kha an ithîr ngai a ni.

⁹Mosia kha a sînga a lût zoiin chu sîm ir-al zuang chumin puan in kotbâia khan a oma, sîmkâr ata khan Rengpa'n Mosia kha a chongpui ngai.

¹⁰Sîm ir-al kha puan in mikota khan an hmu le chu mipuihai an lu an kûn ngaia;

¹¹mi an rualhai leh an ichong ngai angin, Rengpa khan Mosia kha hmâi irenin a ichongpui ngai a ni. Kha hnung chu Mosia kha riakbuk tiang a kîr nôk ngai, a chongpuitu ngai ruatharte Nuna nâipa Josua chu puan ina khan a iom ngai a ni.



A mihai laia om hranga Rengpa chonginkung

¹²Mosia khan Rengpa kuang, “Hi mihai hi kha ram tianga hruai hrangin ni ni hril ngaia, kha kha tu mo a ni fepui hranga ni itîr hrang chu ni la hril pe mak che. Ni nin hriat infelna thu le ki chung a ni lungdo thu khom ni hril ta.

¹³Ni milung ki ichuk ta tak a ni’n chu, ni sin ki thoa, nang kin lômtir mai theina hrangin ni inthang ki nih ti kin hriat infel theina hrangin,” a ti pea.

¹⁴Rengpa’n Mosia kuanga, “Nin kuang hong sa ki ta, inhnêna nangni pe ki ti,” a tia.

¹⁵Mosia khan, “Kin kuang ni hong no’n chu, hi hmun hi nin masantir viat no roh.

¹⁶Kin kuang ni hong sa no’n chu, ni mihai le ki chung a hin ni milung a chuk a nih ti itin mo kin inhriat thei hrang? Ni ompuina khan irnêng chung a mi danghai laia danglamna tak a ni inneitir hrang a ni,” a tia.

¹⁷Rengpa’n Mosia chu hiang hin a ti pea, “Nang kin hriat infela ni chung a ki milung a chuk sikin ni iti ang lam takin tho ki ti,

¹⁸Mosia ingên angin ngaihoi takin ni hmêl nir hmutir ro,” a tia.

¹⁹Rengpa khan a sâma, “Ki roiinpuina vâr irkhêl ni matona intungtir ki ta, ki’rhming irthiang khom nangma inhriat hrangin inpuang ki ti, Rengpa ki ni hi, ni khonzana le satna ki inthanghai chung a ki inlangtir ngai a ni.

²⁰Ki hmâi chu nang irhmutir no ning, mi tukhomin an ni hmu’n chu an ihring ngai loi a ni.

²¹Khan lung chung a ni ngîrna hrang hmun chu ki kôla hin a om.

²²Ki ompuina vâr irkhêl a tung zoroa lungpui kika khan nang thun ki ta, ki fe zoi mâka chu nang ilhlî mai ki ti.

²³Khanchu ki kut khâipai ki ta, ki hmâi ni loiin ki ruang tiang kai hmu ni ti,” a tia.

Fesuakna 34

Thupêk sôm irziakna lungphêk dang (Dhn 10.1-5)



¹Rengpa khan Mosia kuang hiang hin a ti pea, “Matona ang dêna lungphêk inhni siamin lân, ni inkhoi lungphêk masahaia chuang thuhai kha irziak nôk ki ti.

²Nangtûk zînga irsiamin lân, tâng sîp taka ni hmu hrangin Sinai tânga hong lui roh.

³Mi dang tûte an hong ilui sa hrang ni ma, tâng kôla khan kêlbelra mo sehrâtin mo fâk an izong hrang ni ma,” a tia.

⁴Khaang khan Mosia khan lungphêk inhni a siama, Rengpa thupêk ang lam takin zîng nôka chu a luipui tâka.

⁵Rengpa chu sûmlaia a zuang chuma, a kôla a ngîra, a’rhming Rengpa iti kha a zuang tia.

⁶A maton tiang fe angin Rengpa khan, “Keima Rengpa hi khonza le satna sip Pathian chu ki nia, a ninginmur zel ngai loi lungkhamna lian le iamomna inlang ngaitu chu ki ni.

⁷Suanpâr dênin ki chonginkung tho ngaitu, pualoina le tehelna le سوال نگايدام نگاي; khan nu le pahai سوالنا sikin nâihai le tu le te irlo inthum le minli dên khomin dûk intongtirhai lêk no ning,” a tia.

⁸Mosia chu inrang takin khûksadelin a kûna, chubai a mûka.

⁹“Rengpa ni milung ki chuk tak takin chu kin kuanga fe sa hrangin nang ki ngên. Hi mihai hin an tukullian bâk khomsian, kin pualoina le سوالنا hai nin za’n lân, ni mi ni hrangin ni pom ro,” a tia.

Thuthung namindet thar a ni

(Fes 23.14-19; Dhn 7.1-5; 16.1-17)

¹⁰Rengpa’n Mosia kha hiang hin a ti pea, “Israel mihai le thuthung atûn hin kin isiam a ni. Rammual kho hmuna le tu nam chung a ki la itho ngai loi thil roiinpuihai an mit hmu ngeia tho ki ti. Thil irkhêl tak nin ta hrangin ki itho hrang a ni sikin, nin omna hmuna mi tinin keima Rengpa’n thil roiinpui tak ki itho thei lam hi hmu an ti.



11A vuana dân nangni ki ipêkhai hi zôm ngit unglân, malam nin pan thiai lai hin, Amor-hai, Kanaan mihai, Hit mihai, Periz mihai, Hiv mihai le Jebus mihai inhnotsuakhai ki ti.

12Nin fena hrang rama mihai leh khan thuthung nin isiam hrang ni ma, kha kha nin ta hrangin thina a ini thei hrang a ni sikin.

13An maichâmhai setpai unglân, an lungphunhai insiat unglân, pathiannu Aseri irsinsianahai insiat zit roi.

14“Pathian dang chubai nin imûk hrang ni ma, Rengpa, a’rhming khom “hnarsasia” chu Pathian hnarsasia tak a ni sikin.

15Kha rama mihai leh khan thuthung siam no roi, an pathianhai chubai mûka irbôlna an inhlan zoro khomin, kop sa hrangin nangni fial an ta, an pathianhai laia fâk an inhlan kha fa sa hrangin nin irzuk hrang ni mah.

16Nin nâipasalhaiin kha nam dang nupanghai kha dôngma’n lahai duai an ta, ki ta hrangin iamom lolina om hrang le an pathianhai chubai nin mûkpui theina lampuia nangni an ihruai thei hrang a ni.

17 Inluan millim pathianhai chubai nin imûk viat hrang ni mah.

18 Baidi kût chu hmang mai ngai roi. Abib tha, ki zoro khita thu nangni ki ipêk ang khan sîn sari sîng chu chol pol loi bai nin ifâk hrang a ni; kha tha kha Aigupta nin mâkna zoro a ni sikin.

19 “Nâilutîr pasal le sa a suak maton tak chu keima hrang a ni.

20 Sakuartung suak maton tak rêk chu a’rthûlin kêlbelrate inhlanin inhlan thei nin ti, nir hlan no’n chu a ring inher khiak pe roh. Nâilutîr murdi chu ni inhlan nôk ving hrang a ni. Tûte thilinhlan loiin ki kuang an hong inlang thei hrang ni mah.

21 “Mâni sinthôna hrangin sîn ruk sîngpa reng nin neia, a sîn sari ni chu sin nin izong hrang ni ma, âlkai zoro mo, bu ât zoro mo i ang khomin nin irngam hrang a ni.



²² “Bu a tung masatak ât a’rphutin chu, favâng kût hmang unglân, phalbi lût tianga ni thei ra nin bûm zoro’n chu, kairêng kût chu hmang roi.

²³RengpaIsraelhai Pathian kuanga pasal murdi chu a kum tin voithum an hong inlang ngêt hrang a ni.

²⁴Nin mâna nam danghai ki len hnothaia, nin ramrihai kin liantir tena chu, hi kût inthumhai laia hin, Rengpa nin Pathian kuang inhlan hranga nin fe zorohai hin tûte’n nin ram lei long no nihai.

²⁵ “Irbôlna hme nin hlan zoro’n chol kop loi ni inhlan hrang ni mah. Ferkân kût zoroa that sai hme hlek khat khom nangtûka hrang hôi no roi.

²⁶ “Ni loia chîmu a tung masatak chu Rengpa ni Pathian ina hong chôinlût ngai roh. Belrate mo kêlte mo a puinu irhnutui leh suang ngai no roh,” tiin.

²⁷Rengpa’n Mosia kuang khan, “Hi thuhai hi irziak suak ving roh, hi thuhai hi sirbia neiin nangma le Israel kuang thuthung ki isiam a ni,” a ti pea.

²⁸Mosia chu sîn sômminli le zân sômminli ite fâk le in loiin Rengpa leh an oma, lungphêk chungka khan thuthung chonghai thupêk sôm chu a’rziak tâka.

Sinai tâng ata Mosia a chum

²⁹ Thupêk sôm irziak lungphêk chôiin Mosia chu Sinai tânga irthokin a chuma, a hmêl chu Rengpa leh an chong sikin a ir-al puma, ama’n chu inhre thei maka.

³⁰Arona le Israel mipuihai khan Mosia kha an enzui maia, a hmêl chu ir-al phutin an hmu maia, a kôla va nâi hrang khom a sate’n an chia.

³¹Khan Mosia’n a koihaia, Arona le nam hruaituhai murdi chu a kuang an fea, Mosia khan a lei chongpuihaia.

³²Kha zoiin chu, Israel mi murdihai a’rhîlin an irbûma, Sinai tânga Rengpa’n a kuanga a ipêk dânhai chu Mosia’n a hrihaia.

³³Mosia’n thu an sîr pehai zoiin chu, puan hmâiirkhûna leh a’rkhuma.



³⁴Rengpa leh chong hrangin Rengpa omna puan ina a fea, a hmâi irkhûna a hlîkpai ngaia, a hong suakin chu Rengpa'n a kuang a iti hrang thu a ipêk murdi kha Israel mipuihai an hrilhai ngai.

³⁵A hmêl ir-al phut kha an ihmu ngai a ni. Khanchu Rengpa chongpui hrangin a fe nôk mâka chu a hmâi a'rkhu nôk ngai.

Fesuakna 35

Sabat hmang hrang dân

¹Mosia'n Israel nam pumpui a koi bûmhaia, an kuang, "Hi hi nangni sin hrangaRengpa thupêk a ni:

²Mâni sinthôna hrangin sîn ruk reng nininei a ni, sîn sarina ni chu irngam nî sîn irthiang, keima Rengpa hranga serir-up hrang a ni. Mi tukhomin ser loa kha nî sîna sin zong chu that hrang a ni.

³Sabat ni chu mei ten lua in sînga khom nin itho hrang ni ma," a tia.

Rengpa puan in sinna hranga tholôm

(Fes 25.1-9)

⁴Mosia'n Israel mipuihai laia, "Rengpa thupêk chu hi hi a ni;

⁵Rengpa kuanga thilinhlan nei roi, tukhom a'rhlan nuamhai chu thilinhlan rângachak, tangka dâarthîr,

⁶patzâirhmi thîr sai, a dum, senduk le sen samul puan, kêl mula siam puan;

⁷kêlbelra chal a vun sen, savun a sazât, sitim thing;

⁸meisera hmang hrang oliv hriak, irthu theina sahriak, hâl hrangin thil mirimhoi;

⁹ochai Efod le a kôlvêla onik lung le lungmantamhai hong chôi roi.

Rengpa omna puan ina sia hrang thilhai

(Fes 39.32-43)

¹⁰"Nin laia kut theithiamna nei murdi'n hong irsiamhai sian, Rengpa'n thu a ipêk murdi sin hrangin;

¹¹puan in a chung irkhûna le, hnuai inta ual inkhopna le thingtuai tângkhang, a chopuihai le a bangbul intoinahai;



- ¹²Thuthung Bôm zônfunghai, a sîng le a dâihlîm hrang puanzâr;
- ¹³dokâng zônfung le hmangrua dang a rêngin; Pathian kuanga inhlan bai,
- ¹⁴hâl invâr hrang meiser siana le hmangruahai; meiserhai le a tui,
- ¹⁵thil mirimhoi hâlna hrang maichâm le a zônfunghai, irpol zât sahriak, thil mirimhoi, puan in kotbâia sia hrang puanzâr;
- ¹⁶thilinhlanhai hâlna hrang maichâm a sîra dârthîr kopa zônfung le a hmangrua murdi irsûkinfâina tuibêl le a toihmun;
- ¹⁷dâia hmang hrang puanzârhai, a chopui le an toitirna dâi mikota hrang puanzâr;
- ¹⁸puan in le a dâi hêmvuakhai le a hruihai;
- ¹⁹Hmun Irthianga sintho hrangin an fe zoroa ochaihai inngâk hrang tukfam enhoi takhai; ochai Arona le a nâihai hrang songkol ser siam ri se,” a tia.

Mipui thilpêk hong inhlan

- ²⁰Israel mipui irbûmhai chu an chîn indara,
- ²¹a'rphaltuhaiin Rengpa omna puan in sinna hrangin thil an hong pêka, Pathian chubai mûk zoroa nang murdihai le ochai tukfamhai siamna hmangrua an hong chôia.
- ²²Mi irzukna neihaiin nupang le pasal irvôna irthei enhoihai, kuarkâihai, kutsabi hai, irthei rângachaka siam thil hlutak takhai an hong chôia Rengpa makunga mahrip takin an inhlana.
- ²³Mi tukhom patzâirhmi a dum, a senduk mo, a sen samul pat, kêl mula siam puan kêlbelra chal vun a sen; savun a sazât neihaiin an hong chôia.
- ²⁴Sumru le dârthîr neihaiin Rengpa kuang an hong pêka, i ang khoma hmang thei hrang sitim thing neihaiin an hong chôia.
- ²⁵Mi kut theithiamna neihaiin patzâirhmi an hong chôia.
- ²⁶Kêl mul khom satak thûr sai an hong chôi sa ngai.



²⁷An hruaituhaiin onik lung le lung mantam dang, Efod-a inkhop hrang le rôpphô târ hrang,

²⁸Thil mirimhoi le sahriak inchok thei hrang, irpol hrang le hâl hrang an hong tum ngaia.

²⁹Israel mi tukhom a nuam murdiin, Mosia kuang sin hrangin a thupêk anga hmang hrang thilpêkhai Rengpa kuanga an hong pêk ngai.

Rengpa omna hrang puan in sina kut theithiamhai

(Fes 31.1-11)

³⁰Mosia'n Israel nâihai laia khan, "Juda nam laia mi, Hura tupa Uria nâipa Bezalela chu Rengpa khan an thang tâka.

³¹Irfûktir theina thil i khom siam hranga kutsin theina le inhriat thiamna nei hrangin Pathianin a sinthotheina an siptira.

³²Thil enhoihai ngaituah suaka, rângachak sumru le dâr irfûktir theihai;

³³lungmantam inkhop hranga âttan, thing sin, thil enhoi chi tinrêng siam theina a ipêk a ni.

³⁴Dan irchia mi, Ahisamaka nâipa Oholiaba le an ruaiin mi dang kut theithiamhai irchutir theina Rengpa'n a ipêk a ni.

³⁵Thil siam theina, thil enhoi inhriat theina hai, puan zerhmi satak sin, a dum le a senduk le samul puan sen le puan dang không theihai, a ipêk a ni. I khom an sin theia, a hong irhoi hrang anga theina an inei tâk a ni.

Fesuakna 36

¹"Bezalela, Oholiaba le kut sintheihai pâl, Rengpa omna puan ina hrang thil nang murdi sinsiam theina le vârna Rengpa ipêkhai khan, a thupêk ang takin itinrêng an isiam hrang a ni," a tia.

Mihaiin thilpêk an pêk intam

²Mosia'n Bezalela, Oholiaba le Rengpa'n theina a ipêk le sinzong nuam kut sinthei pâlhai kha a koia, sin phut hrangin a hrilhaia.



³Puan in irthiang sinna hranga Israel mihai thilpêk hong chôi kha Mosia kuang ata an idong a ni. A zîng tin Israel mihai khan an thilpêkhai Mosia tah hrangin an la hong chôi irzôm maia.

⁴Mi kut sintheihai khan Mosia kuang an fea,

⁵“Rengpa’n hmun irthianga sinthôna thil siam hranga a itih dân kêng mihaiin an hong ipêk a ni,” an tia.

⁶Khanchu Mosia kha riakbuk hmun tina khan tukhomin puan in irthiang sinna hranga thilpêk inhlanna nei ta loi hrangin thupêk a sema; khanchu mihaiin thilpêk an hong ichôi ta loi a ni.

⁷Hong chôi saia om tâk lua kha a nang murdi sinna hranga nang nêkin a itam ual a ni ta.

Rengpa omna puan in sinna thu

(Fes 26.1-37)

⁸Sinthotuhai laia a kut irloi ualhai khan Rengpa omna puan in chu an sina, patzâi irhmi, samul rông dum, a senduk le a seninlâr cherub dūr ze enhoi taka zepa không hlek sôm hranga siam.

⁹Puanzâr chu a sei lam mûk sômhni kariat, puanzâr chu a khang tiang chu mûk minli seng a ni; puanzâr murdi chu a irtiat zit a ni.

¹⁰Khan, puanzâr ringa kha chu an suiirzom zita, puanzâr ringa danghai khom an suiirzoma.

¹¹Khan, puanzâr buk tina a hmor taka khan a rông duminpôlin a sina, khang dên khan a puanzâr hmor letianga irkopa khan a sin saa.

¹²Phêk tin hmora khan hlam sômringa nângval irkopin, a’rdîntaka phêk inhnina khom khan nângvalin sômringa dang inkhop sai.

¹³Phêk hni kha inkhata siam hrangin a’rkoptirna hrang rângachak kuaikim sômringa an siama.

¹⁴Puan in chung chu kêl mula siam puan hlek sômhleikhatin a siama.

¹⁵A rêngin irangnatin a dung mûk sômthum le a khang mûk minliin a isiam a ni.



- ¹⁶A phêkin ringa ngain an insui irkoptira, kiruk danghai khom phêk danga an inkhop sa.
- ¹⁷Phêk khatna sîr tiang khan irkual sômringa le phêk inhnina sîrtaka lekha khan nângval sômringa an inkhop sa a ni.
- ¹⁸In chung inkhata siam hrangin phêk hnihai insui irkoptir hrangin dâr kuaikim sômringa an siama.
- ¹⁹A chung thuaa hmang hrangin kêlbelra chal vun sen le savun a sazât chi an siama.
- ²⁰Khan, biakbuk bang intunghai chu sitim thingin a siama.
- ²¹Thingphêk tin a sei tiang chu mûk sôm, thingphêk tin a khang tiang chu mûk khat le a chimrip a ni.
- ²²Thingphêkhai kha hmunkhata irzom theina hrangin a'rlûtmat thei, a kîm inhni a oma, a rêngin a kîm an inneitirhai chit a ni.
- ²³Sim tianga intung hrangin sômhni,
- ²⁴an toina hrangin a sêng ir-ông sumrua inluan sômminlia kîm inhniachel indetna nei chitin, an toina hrang inhni an isia sa a ni.
- ²⁵Hmâr tianga puan ina intung hrang phêk sômhni,
- ²⁶an toitirna hrang sumrua siam sômminli, phêk khat hnuaia inhni hni toina siam sa a ni.
- ²⁷Nitâk tianga puan ina intung hrang phêk ruk,
- ²⁸a kil tianga hrang phêk hni an isiam a ni.
- ²⁹Hi a kila hai hi a bula irzomtîr a ni, a sîp dêna irzomtîr a ni.
- ³⁰Khaangin chopui kiriat, sumrua inluan an toitirna sômhleiruk, inkhat hnuaia toina hrang inhni hni a iom chit a ni.
- ³¹A bang tung tianga indettirna hrangin tângkhang hrang sitim thingtuai sômhleiringa,



³²hmâr tiang banga, sim tiang banga, a hnung tiang nitâk tianga banghaia khan ringa ngain an khanga.

³³a tângkhang inlaina taka khan a tung tianga a laitaka khang khan, puan in hmor inhni khan an irtongtir a ni.

³⁴Thingbuk intunghai chu rângachak tuiin an inluana, a tângkhang danghai indetna hrangin rângachak irkual an inkhopa, annihai khom khan rângachaka inluan a ni.

³⁵Patzâi irhmi samul rông dum a senduk le a sen irzêl cherubhai dâr zia enhoi taka zepa không chu chontan puanzârin an hmanga.

³⁶Sitim thing chopui minli puanzâr indettir hrang rângachak inluanin an phuna, rângachak kuaikim an inkhopa, chopuihai phûmna hrang sumrua inluan toina minli an siam sa.

³⁷Puan in mikota târ hrang patzâi irhmi thûr sai samul dum, a senduk le a sen irzêl, a'rvô enhoi tak puanzâr an khônga.

³⁸Hi puanzâr hranga hin sitim thing chopui ringa kuaikim inkhop, a sîphai le puan banga hrang khianghrol tuan rângachakin an inluana, a chopui intoina hrang dâr thîr ringa an siam sa.

Fesuakna 37

Thuthung Bôm siam

(Fes 25.10-22)

¹Bezalela khan Thuthung Bôm hrang sitim thingin a dung mûk hni le a chimrip, a khang mûk khat a chimrip, a'rsânglam mûk khat a chimripin a sina.

²A sùng le a pên tianghai khan rângachak rôngin an luanhaia, a kil thophai khom rângachak leh a thopa.

³A zônfung rolna hrang rângachak irkual minliin a siama, bôm sîra a ke minlihai khan hitiang hitianghai khan inhni hniin an khopa.

⁴A zônfung hrang sitim thing leh a siama, rângachak le a tuama,

⁵bôm sîr hitiang le hitianghai khan a'rkualna khan a rola.



⁶Bôm a sîng hrang, a dung mûk hni a chimrip, a kang mûk khat a chimrip, rângachak felfatin a siama.

⁷Rângachak suk inphêkin cherub inhni,

⁸a sîng a seina tiang a siama, a sîng leh khan irzoma phêk khat a ni theina hrangin a isiam a ni.

⁹Cherubhai chu bôm sîng chung a khan hmâi irsongin an ir-en a ni, an mitha zârhai khan Thuthung Bôm sîng kha an ingha a ni.

Bai irthiang siana dokâng

(Fes 25.23-30)

¹⁰Sitim thing dokâng a dung mûk hni, a kang mûk khat, mûk khat le a chimripa irsâng a siama.

¹¹Rângachak felfatin a tuama, a kôlhài khom kha rângachak leh a tuam vinga.

¹²A hmor kutzapha dôra lian a siama, rângachakin a thopa.

¹³A'rzônna hrang rângachak irkual minli a siama, a kehai omna a kil minlia khan an khopa.

¹⁴A'rzôn zoroa zônfung rolna hrang irkual chu a hmor kôla khan inkhop a ni.

¹⁵A zônfung sitim thing leh a siama, rângachakin a tuama,

¹⁶rângachak felfatin dokâng hmang hrang le khênghai a siama, khênghai, khilâthai, bêlhài le khurihài uain inna hmangrua hrangin a isiam a ni.

Meiser siana ôn sari nei

(Fes 25.31-40)

¹⁷Rângachak felfatin meiser siana ôn sari nei an chera. An toina hrang le a ngul kha rângachak suk inphêkin a siama; a'rvôtirna pârhai, a'rmuam le pâr illimhai leh khan a irzomtir ving a ni.

¹⁸A ôn kiruka kungpuia irthokin an zara, a sîr tiang, hitiang hitiang inthum thumin a iom a ni.

¹⁹A ôn kiruk omna hmun tina khan a'rvotirna pâr irlim inthum, almond pâr irvut angin, a'rmuam le pâr anga om an khop sa.



²⁰A ngulpuia khan a'rvôtirna pâr almond pâr irvut anga om, a'rmuam le a pâr ang a iom sa a ni.

²¹A ôn chung inta le hnuai inta kêra khan, a ngulpuia khan a'rmuam inkhat illim a chuang chita.

²²Hi a'rmuamhai a ônhai le a ngulpui hi rângachak felfat phêk khat suk inphêka siam a ni.

²³Meiser siana ôn sari hranga meiser bûr, a lu inchor sari, meichephai le mei chôina hmunhai rângachak felfatin a siama.

²⁴Meiser siana le hmangrua danghai siamna hrangin rângachak felfat her sômthum ringa a ihmang a ni.

Mirimhoi hâlna hrang maichâm

(Fes 30.1-5)

²⁵Sitim thing maichâm kil minli nei mûk khat vêla sei, a'rsânglam mûk hnia irsâng a siama, irki minlia inchor leh khan an tuanthal a ni.

²⁶Rângachak felfatin maichâm leh a'rkihai a thopa, a hmor indôr khom rângachak leh a ithop a ni.

²⁷A zônfung rolna hrang rângachak irkual inhni a siama, a hmor indôr hnuaiia khan an khophaia.

²⁸a zônfung hrang sitim thingtuanhai a siama, rângachakin a tuama.

Iropol zât sahriak le hâl hrang mirimhoi

(Fes 30.22-38)

²⁹ Hriak irthiang irpol zât, mirimhoi irpol zâthai a siam sa.

Fesuakna 38

Hâlirvôm thilinhlan maichâm

(Fes 27.1-8)

¹Thilinhlanhai hâlna hrang maichâm sitim thing le irki minli nei, mûk ringa sei, mûk thum irsâng a siama.

²A'rki minlia khan a'rki inhortirin a intuanthal a ni; dârin maichâm le a'rkihai kha a tuam vinga.



³Maichâma hmang hrang hmangruahai, irvut bêlhai; irvut luakna, khuri hai, thîr kuaikim le mei luakna dâarthîrin a siama.

⁴Dâr tuana om hmor hnuai tiang khan irkualin an inkhopa, maichâm chimrip a idel a ni.

⁵A'rzônna hrang a kalna minli siamin irki minli khan an khopa,

⁶a'rzônna hrang sitim thing tuan a siama, dâr leh a tuama.

⁷Maichâm kil tianga kalna khan a rola, maichâm chu thingphêk leh a siama, a sâng chu a ir-ôngtir a ni.

Dâr tâbor

(Fes 30.18)

⁸Rengpa omna puan in mikot kôla sintho ngai nupanghaiin hlîmena an ihmang ngai dâr irtêk ngaia irthokin dâr tâbor le a toihmun chu a siama.

Rengpa omna puan in dâi

(Fes 27.9-19)

⁹Patzâirhmia không puan in kha a'rkula. Sim tianga puan mûk irzakhata sei puan a hmanga,

¹⁰chopui sômhni le an toihmun dâr sômhni, thil bângna hrang kuaikim le a zarna hrang sumru tuanghai siamin.

¹¹Hmâr tianga dâi khom khang ngêt khan a nia.

¹²Nitâk tianga khan puan mûk sômringa sei a zara, chopui sômkhât le an toitirna hmun dâr sômkhât a siama, a chopuia khan thilinchor a oma, puan bângna hrang sumru tuan a om sa.

¹³Nisua tiang, mikot omna khom khan dâi mûk sômringa irzat a ni.

¹⁴⁻¹⁵Mikot irzat lam chu mûk sôm hleiringa a ni, a sîr hitiang hitianga zâr hrangin patzâirhmi thûr sai không zoi loi a ni.

¹⁶Mikot kôla puanzâr murdi chu patzâi irhmia siam ving a ni.

¹⁷Chopui intoitirna chu dâra siam a nia, a kuaikim ngul le a chopui sîp tuamnahai chu sumru rônga siam a ni. A'rkulna dâr chopui chu a rênga sumrua inluan ving a ni.



¹⁸A lûtna mikota puanzâr chu patzâirhmi thûr sai, samul dum, a senduk, a sen leh irzêl enhoi taka zepa không a ni. A sei lam chu mûk sômhni, a'rsâng lam chu mûk ringa; puan in irkulna puanzâr danghai anga khan;

¹⁹An toitirna dârthîr minli inver sai sûnga phun chopui minlia indet a ni.

²⁰Puan in le a irkulna dâi hêmvuak murdi kha dâra siam ving a ni.

Rengpa puan ina hmang hrang rângachak sumru le dârhai

²¹Thupêk sôm irziak chuangna lungphêk an isiana Rengpa omna puan ina sin hrang rângachak sumru le dârhai an ihmang tam lam chu hiang hi a ni. Mosia thupêkin ochai Arona nâipa Ithamara hruaina hnuaia Levi irchihai a tam lama insâp suak an ni.

²²Juda nama mi, Hura tupa Uria nâipa Bezalela'n Mosia kuanga Rengpa thupêk angin itinrêng a siama.

²³A sinthopui, Dan nama mi, Ahimasaka nâipa Oholiaba chu thil ker theia enhoi lam a siam thei, patzâirhmi le samul dum, a senduk le a sena irzêla không nuam mi a ni.

²⁴Puan in irthiang sinna hranga Rengpa kuanga hrang rângachak an hong inhlan chu her sângkhat a ni, kha zoroa khotâng tho lam le ngaidân dik taka varin.

²⁵Irteppui an neia, mi tin an chôitum hranghai bituk an siama, sumru an hong ichôi bûm chu her sâng thum irzaminli sômthum a ikâi a ni, khotâng varh dân diktaka varin.

²⁶Hi hi kum sômhni kâia irteppuia tep sa chu, mi nuai ruk sângthum irzaringa sômringa haiin sekel irzakhat an hong ipêk irangpui kha a ni.

²⁷Puan in irthiang le puanzâr intoitirna irzakhat siam hrang sumru her sâng thum irzaminli hmang a nia, an toitirna inkhat hrangin her sômthum minli hmang a ni.

²⁸A hmang zoi loi sumru her sômthûm la om chu, Bezalela puan zârna thiltuan chopui hranga kuaikim le a sîp tuamna hrangin a siama.



- ²⁹Rengpa hranga dâr an ipêk chu her sâng hni irzaminli sômhni ringa a ni.
- ³⁰Hihai ata hin Rengpa omna puan in mikot toihmun dâr maichâm le indettirtu dâr tuan ram, maichâma hrang hmangrua murdi;
- ³¹puan in irkulna dâi le a mikot irngatna hai, puan in le a'rkultu dâi indettu hrang hêmvuakhai a siamsuaka.

Fesuakna 39

Ochahai hranga tukfam

(Fes 28.1-14)

- ¹Samul pat dum, a senduk le a senhai hmangin hmun irthianga sin an tho zoroa ochahai inngâk hrang enhoi tak le Arona ta ochai songkol ser chu Rengpa'nMosia kuang thu a ipêk ang lam takin a siama.
- ²Efod chu rângachak patzâirhmi thûr sai; samul dum, a senduk le a sen hmangin a khônga.
- ³Rângachak irphân dapin a sukinpêra, patzâirhmi, samul dum, a senduk le a sen leh irpol hrangin a thêrhai zita,
- ⁴rôpbel inhni an sina, Efod kilhai khan an inkhopa, khahai khan Efod an intûk indetpui a ni.
- ⁵Konga Efod khit indetna hrang Efod ang zekin an siama, Mosia kuang khan Rengpa thupêk anga Efod leh khan an ikhông irkoptir a ni.
- ⁶Onik lungmantam chu rângachaka an inkhopa, enhoi takin Jakoba nâi sômhleihnihai irhming an irziaka.
- ⁷Rengpa thupêk ang takin Efod dâra irvôna khan an belsaa; kha kha Israel nam sômhleihni inlangna hrang a ni.

Ochai rôpbel siam thu

(Fes 28.15-30)

- ⁸Efod siamna hranga an thil hmang, patzâirhmi thûr sai, samul dum, a senduk le a sen le rângachakhai hmangin rôpbel khom enhoi takin an không sa.
- ⁹Ithep a nia, thep zoiin irki minli nei, khâp khata chêng a ni.



¹⁰Lungmantam rân minli an inkhopa; rân maton taka khan Odam, Pitda le Bereka lunghai an siaa;

¹¹a rân inhnina khan Nopek, Safir le Emerald lunghai;

¹²a rân inthumna khan Tarkois, Agate le Amethyst lunghai;

¹³A rân minlina khan berid, Onik le Jasper lunghai an siaa. Hi lungmantamhai hi rângachak inkhop indet a ni.

¹⁴Lung inkhata hin Jakoba nâihai inkhat irhming a chuang chita, Israel nam sômhleihni irthûla ngîr hranga iti a ni.

¹⁵Hi rôpbel hranga hin rângachak felfat zîngziri hruihrual irkin anga siam a ni.

¹⁶Lungmantam inkhopna hmun inhni rângachak le rângachak irkual inhni an siama, a'rkualhai kha rôpbel chung tianga a khilina hrangin an inkhopa.

¹⁷Rângachak zîngziri irkin kha a'rkualna khan an khita;

¹⁸hrui inhni inkhat tianga mongna hmora khan, a danghai chu a kopna hmun inhni khan a kop sa, khaangin, rôpbel intoina chu Efod dâr bângna maton tianga inkhâi a ni.

¹⁹Rângachak irkual inhni an siama rôpbel hnuai sîra khan an inkhopa, a sâng tiang chu Efod kôl zela khan,

²⁰rângachak irkual inhni an siam nôka, Efod dâr bângna inhnihai maton tiang hnuai enhoi takin kongkhít chung a an inkhopa;

²¹Mosia kuanga Rengpathupêk angin, rôpbel irkualhai chu Efod irkualhai leh khan hruihrual dum le an khít irkopa, rôpbel vêl chu kongkhít chung a i ang khomin a'rthôl lina hrangin.

Ochai tukfam dang siam

(Fes 28.31-43)

²²Efod hnuai inngâk hrang songkol irfual chu samul dum inzena không a nia.



²³Lu thunna hranga a ring ir-ông chu a chet loina hrangin, suisaruangmual neia iphiar a ni.

²⁴⁻²⁶A hnuai tianga a hmor irfual khan patzâirhmi samul dum, a senduk a sena siam dâlim dâr anga siam rângachak silniang kâirthâk inkhop a nia; Mosia kuanga Rengpa thupêk lam ang takin an siama.

²⁷Arona le a nâihai inngâk hrang songkol hnuai,

²⁸lukôm, le tuman an khônga,

²⁹patzâirhmi thûr sai le samul dum, a senduk le a sen hmangin kongkhit enhoi taka irvôtirin an ikhông a ni, Mosia kuanga Rengpa thupêk lam ang taka khan.

³⁰Rângachak felfata irvôna thil irthiang an siama, kha khan “Rengpa HRANG TUM” iti an inchuanga.

³¹Lukôm maton tiang khan hrui dumin an inkhopa, Rengpa’n Mosia thu a ipêk ang taka siam a ni.

Sin zoiin a om

(Fes 35.10-19)

³²Rengpa omna puan in sinhai chu a hnungkhôn taka chu zoiin a om tâka. Israel mihai khan Mosia kuanga Rengpa thupêk lam ang takin itinrêng an isiam ving a ni.

³³Mosia kuang khan puan in le a hmangruahai an hong chôia; a kuaikimhai, thingphêk irfûk saihai, tângkhang hai, chopuihai le a in intoitirna hai;

³⁴a chung irkhûtirna kêlbelra chal vun sen; a chung irkhûna savun a sazât a’rhlina hrang puanzâr;

³⁵thuthung bôm le a sênga lungphêk hai, zônfung hai, a sêng;

³⁶maichâm le a hmangrua, Pathian kuanga inhlan bai ser sai;

³⁷rângachak felfata siam meiser siana, meiserhai, a hmangrua murdi meisera inchok hrang meitui;



³⁸rângachak maichâm, irpol zât sahriak, thil mirimhoi hâl zât, puan in mikota hrang puanzâr;

³⁹dâr maichâm le an detna zônfung hai, hmangrua murdi, irsûk infâina tuibêl le a toihmun;

⁴⁰dâia puanzâr târ hrang, a chopuihai le a toihmun hai, dâi mikota hrang puanzâr le a toihmun hruihai; puan in hêmvuak hai, puan ina le hmang hrang hmangrua murdi;

⁴¹hmun irthianga ochaihai inngâk hrang tukfam le mitha enhoi takhai ochai Arona le a nâihai inngâk hrang songkol serhai.

⁴²Rengpa'n Mosia kuanga thu a ipêk ang takin sin tinrêng Israel mihaiin an thoa.

⁴³Israel nâihai khan itinrêng eninfelin Rengpa thupêk lamtak a ni iti a hmua, khanchu Mosia'n anni kha sat a vurhai tâka.

Fesuakna 40

Rengpa omna puan in sin le inhlan

¹Rengpa'n Mosia kuang hiang hin a ti pea,

²"Tha masa tak, sîn khatna nî chuRengpa omna puan in sin roh.

³Thuthung Bôm a sînga thupêk sômhai omna kha a sînga sen lân, a maton tiang puanzâr târ ro.

⁴Dokâng chu a sînga thunin lân; a chung tianga hmangruahai se roi. Meiser siana khom thuninlût sa unglân, a chung meiser intoi roi.

⁵Rângachak maichâm, mirimhoi hâlna hrang chu, Thuthung Bôm maton tiang se unglân, puan in mikota khan puanzâr târ roi.

⁶Hâlrivôm thilinhlan na hrang maichâm chu puan in maton tiang intoi unglân,

⁷irsûkinfâina tuibêl chu tui sung inbitin puan in le maichâm kêra se roi.

⁸A tual kha dâiin sung unglân, a kotbâia khan puanzâr târ roi.



- ⁹“Khante, puan in le a hmangrua murdi chu hriak irthiang polin thârin lân, a hong irthiang hrang a ni ta.
- ¹⁰Kha hnung chu maichâm le hmangruahai pol intharin lân, a hong irthiang hrang a ni ta.
- ¹¹Irsûkinfâina tuibêl le a toihmun khom khang dênin ni ithâr hrang a ni.
- ¹²“Arona le a nâihai puan in mikota hong hruaihaiin lân, dân anga irthâr hrangin tuiirsil hrangin ti pehai roh.
- ¹³Arona chu ochai tukfamhaiin irvo sian, sahriak irthu in hiang tak khan ni iserhai bîk hrang a ni, ochai nia ki sin a tho theina hrangin.
- ¹⁴A nâihai khom koi inlûthaiin lân, anni chu songkol irfual inngâktirhai roh.
- ¹⁵Khanchu an pa sahriak ni irthu ang tak khan, anni chu ochai sintho hrangin, sahriak irthutirhai roh. Hi hriak irthu hin anni chu zoro la hong hranghaia khom ochaiin a isiamhai mai hrang a ni ta,” a tia.
- ¹⁶Rengpa thupêk ang tak khan Mosia’n itinrêng a tho vinga.
- ¹⁷Khang takin Aigupta ram ata an suak zoia, kum hnina le tha masa tak sîn khat nî sîn khan,Rengpa omna puan in chu an indingtir ta.
- ¹⁸Mosia’n a bul intoinai an deta, a hmangruahai a’rfûktira, tângkhang an khopa, chopuihai a phuna;
- ¹⁹puan in chung a khan a irkhûna puanzâr a târa, a chung nôka khom khan a’rthuatira,Rengpa thupêk lam takin.
- ²⁰Khanchu lungphêk inhnihai kha a lâka, Thuthung Bôm sînga a siah tâka, a zônfunghai chu Bôm irzônna irkual sînghai khan a rola, a sînga leh a sînga.
- ²¹Bôm chu puan in sînga a chôi inlûta, a irhli hrang puanzâr chu a târa, Rengpa thupêk lam takin an sina.
- ²²Puan in sîng tentan sînginta ual hmâr tiang khan dokâng a doa,
- ²³Rengpathupêk ang takin a chung a khan bai ser a siaa.
- ²⁴Sim tiang khan puan in sînga meiser siana chu dokâng depna tiang an toia.



²⁵Kha hmuna khan Rengpamakunga, a thupêk ang takin meiserhai chu an choka.

²⁶Rângachak maichâm chu puan in sênga tentan puanzâr kôla a doa.

²⁷RENGPA thupêk ang takin thil mirimhoihai chu a hâla.

²⁸Puan in mikota puanzâr chu a târa;

²⁹kha puanzâr pêna khan hâlrivôm thilinhlan le bu le bâl thilinhlanhai a'rhlana, RENGPA thupêk lam takin.

³⁰Dâr irsûkinfâina tuibêl chu puan in le maichâm kêra khan a siaa, tui a sung inbita.

³¹Kha khan Mosia'n, Arona le a nâihai khom an kut le kehai an irsûkinfâia,

³²puan in sênga mo, maichâma moh an fe hrang richamin RENGPA thupêk lam ang takin an kut le kehai an irsûkinfâi ngai a ni.

³³Mosia khan puan in le maichâm irhualtu hrang dâi a sina, a dâi mikota khan puanzâr a târa. Hiang hin sin hrang murdi chu a izoi zit a ni ta.

RENGPA omna puan in chung a tuamtu sôm

(Nam 9.15-23)

³⁴Khanchu puan in kha sôm in a tuama, RENGPA ompuina vâ irkhêl khan a sipa.

³⁵Hi sika hin Mosia kha puan in sênga a ilût thei ta loi a ni.

³⁶Israel nâihai khan puan in chung ata kha a'rthon vaiin an riakbuk kha an irthon theia.

³⁷Sôm kha, kha hmuna khan a om kêr kai chu an riakbuk kha an irthon ngai loi a ni.

³⁸An chaninvâi laiin a zîng sêng kêr chu sôna RENGPA ompuina sôm in a tuama, zâna meichokin puan in chung a tuama khan an hmu ngai.



Levi Dân

Levi Dân 1

Hâlirvôm Thilinhlan

- ¹Irtongna puan in ata Mosia chu Rengpa'n a koia.
- ²Israel nâihai kuang hiang hin ti ro: Rengpa kuang thilinhlan nin hong chôiin nin sa vâi, sehrât laia mani belra le kêl laia mani nin hong ilâk ngai hrang a ni.
- ³Thilinhlan chu hâlirvôm thilinhlan hrang a ni'n chu sa laia a chal, hmêlveiloï ni a ta, Rengpa lei pom hrangin irtongna puan in mikota an hlantu khan a hong ichôi hrang a ni.
- ⁴Hâlirvôm hrang sa lu chung a kut irngat a ta, a sual irbôlna hrangin pom ni a ti.
- ⁵Sechalpa khaRengpa makunga tan a ta, Arona nâi, ochaihai khan a thisen kha inhlan an ta, irtongna puan in lûtna kôla maichâm kha an inthek irkual suak hrang a ni.
- ⁶A vun kha hlâi a ta, a hme kha irchanchit a ti.
- ⁷Arona nâi ochaihai khan maichâma thing an lei siaa, mei tho an ti.
- ⁸A sa chu a thâi le a lu leh ochai khan meia rô an ti.
- ⁹A phîng sùng le a kehai kha irsûkinfâi hrang a nia, an hlantu ochai khan maichâma a rêngin a ihâlirvôm hrang a ni. Hi hi hâlirvôm thilinhlan tho lam dân hrang a ni; kha kha Rengpa nuamlam tak a ni.
- ¹⁰Belra mani kêl mani hâlirvôma inhlan hrangin chu a chal, hmêlveiloï, a ini ngêt hrang a ni.
- ¹¹Rengpa makunga, maichâm hmâr tianga khan tan a ta, a thisen kha ochaiin maichâma inthekin irkualsua a ti.
- ¹²A hme kha irchan indarh a ta, maichâm chung a thing chok luai luaia khan ochaiin a lu leh a thâi le rô a ti.



¹³A phîng sùng le a kehai rêk chu a irsûkinfâi bak hrang a ni; a rêng khan ochaiin a ihâlirvôm zit hrang a ni, hâlirvôm thilinhlan a nia, Rengpa nuamlam a ni.

¹⁴Rengpa kuanga thilinhlan hrang chu phervali le vasu hâlirvôm thilinhlan a ni'n chu vasu mani, phervali mani hong chôi sianlân,

¹⁵ochai khan lei la a ta, maichâma a inhlan hrang a ni; a ringa inpotsat a ta, a ihâlirvôm hrang a ni; a thisen chu maichâm sîra a inzung zoi hrang a ni.

¹⁶A midil le a busêk chu maichâm kôl sak tiang irvut sianaa a ipai hrang a ni.

¹⁷Inset chit loiin a mitha dâra kaiphar hrang a ni, maichâma hâlirvôm zit ri se, hâlirvôm thilinhlan a nia, Rengpanuamlam tak a ni.

Levi Dân 2

Bu le bâl thilinhlan

¹Rengpa kuang bu le bâl thilinhlan pêktu'n chu baidi a sa zât, hong la sianlân, oliv hriak le bero pol ri se.

²Ochai khan baidi kha hap a ta, sahriak tômte le berohai leh khan maichâma a ihâlirvôm hrang a ni, kha kha a rênga hâlirvôm a nih ti entîrna hrang a ni; hâlirvôm thilinhlan a nia, Rengpa nuamlam tak a ni.

³Thilinhlan hâl ban kha chu ochai dongtum hrang a ni, Rengpa kuanga inhlan tâk thil irthiang tak a ni sikin.

⁴Bu le bâl thilinhlan lungthua rô inhmin a hong chôiin chu, chol kop loi bai a ini hrang a ni, sahriak le inhmet a ni no khomin irphân taka sinin sahriak pol ni ri se.

⁵Khan, ni thilinhlan chu khênga hâlirvut baidi thilinhlan a ni'n chu chol kop loi, sahriaka inhmet, bai indi tak a ini hrang a ni.

⁶Khoi ni ta, sahriaka phûm ni ta, kha kha baidi thilinhlan a ni.

⁷Thîrbêla inzêi, bu le bâl thilinhlan kha baidi a sa zât, sahriaka inzêi a ini hrang a ni.



⁸Khaang thil kha Rengpa kuang nin hlan hrangin, ochai kha pe'n lân, ama'n maichâma chôi a ta,

⁹senkhat nok thâk a ta, a inokthâk kha a ihâlirvôm hrang a ni; kha kha a rênga hâlirvôm entîrna ni a ti. Hi hi hâlirvôm thilinhlan a nia, Rengpanuamlam tak a ni.

¹⁰Inhlan ban, rô loi chu ochaihai dongtum hrang a ni, Rengpainhlan ser irthiang tak a ni.

¹¹Bu le bâl thilinhlan, Rengpa kuanga inhlan rêng rêng chu chol kop siam hrang ni maka; chol le khuaih lutui kop rêng rêng Rengpa kuanga hâlirvôm hrangin inhlan hrang ni ma.

¹²Nin bu le bâl invâng masa tak rêk chu Rengpa makunga kum tin nin hong inhlan hrang a ni, maichâma hâl zit hrang ni ma.

¹³Bu le bâl thilinhlan a hin michi a ikop seng hrang a ni, michi hi Pathian leh Thuthung entîrna a nia, nin thilinhlan a ikop seng hrang a ni.

¹⁴Nin bu le bâl thar masa nin hong inhlan tika changpêr inhlan sa hrang a ni.

¹⁵Oliv hriak le bero a ikop sa hrang a ni.

¹⁶Ochai khan changpêr le sahriak tômte, a rênga irthûlin la a ta, bero le khan bu le bâl thilinhlan Rengpa hrangin hâlirvôm hrang a ni.

Levi Dân 3

Irpôlkhôm thilinhlan

¹Irpôlkhôm thilinhlan hrang mi'n an sa vâi laia a hong inhlanin chu a chal mani, a pui mani hmêlveiloï, Rengpa makunga a hong inhlan hrang a ni.

²A sa inhlan lu chung a kut irngat a ta, irtongna puan in tual lûtna mikot kôla that a ta, ochaiin a thisen kha maichâm a inzung irkual suak hrang a ni.

³Irpôlkhôm thilinhlan ata kha Rengpa hrangin hihai hi inhlan hrang a ni: a rîl le a thâi murdi,

⁴a bêhai le a thâi, a mithin hlap sa lai tak



⁵kha ochaiin maichâma hâlirvôm thilinhlan dang a hâl laiin a ihâlirvôm hrang a ni; kha kha Rengpa nuamlam tak a ni.

⁶Irpôlkhôm thilinhlan hrang mi'n a belra mani, a kêl laia mani a hong inhlanin chu a pui khom, a chal khom, hmelveiloi a inhlan hrang a ni.

⁷Belra a hong inhlanin chu

⁸a lua a kut irnghat a ta, irtongna puan in mikota Rengpa makunga a ithat hrang a ni; ochaiin chu a thisen kha maichâma inthek irkual suakpui hrang a ni.

⁹Irpôlkhômhai thilinhlan ata kha Rengpa hrangin hihai hi a inhlan hrang a ni: a'rmei thâi, a bulrêta tan, a rîl thâi murdi,

¹⁰a bêhai leh a thâi, a mithin a sa lai tak,

¹¹kha kha ochaiin maichâma Rengpa kuang pêk hrang thilinhлана a ihâlirvôm hrang a ni.

¹²Rengpa kuanga a thilinhlan kha kêl a ni'n chu,

¹³a lua a kut irnghat a ta, irbiakna in mikota that a ta, a thisen kha ochaiin maichâma a inthek irkual suak hrang a ni.

¹⁴Hi hi fâk hrang thilinhlan hrangin Rengpa kuang a inhlan hrang a ni, a rîl thâi murdi

¹⁵a bêhai le a thâi hlap, a mithin hlap sa lai tak.

¹⁶Hi hi fâk hrang, thilinhlan hrangin ochaii khan maichâma Rengpa lei lôm hrangin a ihâlirvôm hrang a ni. A thâi murdi hi Rengpa ta hrang a ni.

¹⁷Israel mi tukhomin sa thâi le thisen an ifâk hrang ni ma. Israel mihai kha khoa khom omhai sian hi dân hi an izôm kumkhua hrang a ni.

Levi Dân 4

Sual irbôlna

¹Rengpa'n Mosia chu a chongpuia.



- ²Israel nâihai hril ro, mi tukhomin Rengpathupêk an tho'nchâiin chu hianga tho hrang a ni.
- ³Thil tho'nsualtu chu ochai inlaltak a nia, mipuiin a sual mô an pêl hrangin chu, a sual irbôlna'n sehrâtchal tuai, hmêlveiloï, Rengpa kuang a inhlân hrang a ni.
- ⁴Rengpa makunga, irbiakna puan in mikota, sehrâtchal tuai chu hong kai a ta, a lua a kut irngat a ta, a ithat hrang a ni.
- ⁵A thisen senkhat chu chôi a ta, irbiakna puan in sênga lût-pui a ta,
- ⁶a kut chalin hmun irthiang puan zâr kha thisen khan voisari inthek a ta,
- ⁷mirimhoï hâl-na maichâm kôla a ibuakpai zit hrang a ni.
- ⁸Sehrât mar, a rîl thâi murdihai,
- ⁹a bêhai le a thâi a mithin tuam râng thâi sa lai takhai.
- ¹⁰Ochai khan la a ta, a thâihai kha irpôlkhôm thilinhlan tho dân ang khan hâlirvôm inhlanna maichâma a ihâlirvôm hrang a ni.
- ¹¹A vunhai, a takhai, a luhai, a kehai, a sêngkua murdi le a rîlhai le
- ¹²riakhmun dâi pên tiang hmun ser, maichâm irvut pai khômnaa, meipua inche-pin a ihâlirvôm hrang a ni.
- ¹³Israel nam pumpuiin tho'nsual an tho tika, inhresuak zoi loiin Rengpa thupêk an porinchetirin chu,
- ¹⁴an tho'nsual tho kha an irhriat suak zoi le, nam punghai khan sual irbôlna hrangin sehrât-tuai kha irbiakna puan in mikota an hong ilâk hrang a ni;
- ¹⁵nam hruaituhaiin chu a lua kut irngat an ta, that hrang a ni.
- ¹⁶Ochai inlaltak khan sehrât thisen kha irbiakna puan ina chôi lût a ta,
- ¹⁷hmun irthiang tak puan zâr chu voisari a kut chalin thisen kha a inthek hrang a ni.



¹⁸Puan in sũaga mirimhoi hâlna maichâm kila a'rkia khan thisen pol sa a ta; puan in mikota thilinhlan hâlna maichâm kôla a zôk ban chu a ibunpai hrang a ni.

¹⁹A thâihai kha maichâma khan a ihâlirvôm hrang a ni.

²⁰Sual irbôlna sehrâttuai a isinsiam ang khan a itho zit hrang a ni, mipui sual irbôlna kha a inhlan hrang a ni; khanchu, an sual kha ngaidam ni ta a ti.

²¹Sehrâttuai kha riakhmun dâi pên tianga, ama sual irbôlna ang khan, a ihâlirvôm hrang a ni. Hi hi nam pumpui sual irbôlna thilinhlan hen hrang lam chu a ni.

²²Roirêltu'n thilsual a tho'nchâia, Rengpa thupêk a tho'nchâiin chu,

²³a thilsual tho kha an hrila, an hriatsuak zoi le, a sual irbôlna hrangin kêlchal, hmêlveiloï a inhlan hrang a ni.

²⁴Kêl lua a kut irnghat a ta, maichâm hmâr tiang, hâlirvôm thilinhlan an thatna hmuna khan a itan that hrang a ni.

²⁵Ochâiin a thisen kha lâk a ta, a intât ban chu maichâm kôla khan a ibunpai hrang a ni.

²⁶A thâi murdi chu irpôlkhôm thilinhlan, a itho angin maichâma khan a ihâl irvôm hrang a ni; khang kha roirêltu sual irbôlna ochâiin a inhlan hrang dân chu a ni; khanchu, a sual chu ngaidam ni a ti.

²⁷ Mi narânin thilsual a tho'nchâia, Rengpa thupêk a porinchetirin chu,

²⁸a thilsual tho a'rhriatsuak zoi le kêlpui hmêlveiloï, a sual irbôlna hrangin a hong inhlan hrang a ni.

²⁹Kêl lua kut irnghat a ta, hâlirvôm maichâm hmâr tiang, hâlirvôm thilinhlan an ithatna hmuna khan a ithat hrang a ni.

³⁰A thisen chu ochâiin maichâm kil irkihaia khan a kut chalin intât a ta, a intât ban chu maichâm kôla a ibunpai hrang a ni.



³¹A thâi murdi chu irpôlkhômhai thilinhлана itho ang taka khan maichâma a ihâlirvôm hrang a ni; kha kha Rengpa nuamlam tak a ni. Khaang khan thilsual thotu sual irbôlna chu inhlan a ta, ngaidam ni ta a ti.

³²Sual irbôlna hrangin belra a hong chôiin chu, a pui, hmêlveiirla loi a ini ngêt hrang a ni.

³³Belra lua khan a kut irnghat a ta, hâlirvôm thilinhлана an ithatna hmun, maichâm hmâr tianga khan a itan that hrang a ni.

³⁴A thisen kha hâlirvôm maichâm kil irkihaia khan a kut chalin ochai khan thisen kha nâl a ta, a inâl ban chu maichâm kôla a ibunpai hrang a ni.

³⁵Irpôlkhômhai thilinhлан belra ang khan a thâi murdi kha la a ta, Rengpa hranga bu le bâl thilinhлан leh khan a ihâlirvôm hrang a ni. Khaang khan sual irbôlna kha ochai khan inhlan pe a ta, a sual chu ngaidam ni tah a ti.

Levi Dân 5

Sual irbôlna inhlan ngêt hrang thilhai

¹Hiang thila hin sual irbôlna inhlan a nang. Roirêlna hmuna thu'nhriatnaa koi a ni'n chu a thil hmu mani, a thil inhriat mani inpuang hranga ti a nia, an puang nuam no'n chu thilsual a tho a ni, a moh a iphur hrang a ni.

²Mi'n thil irthiang loi, sâ a ruakhai, a lian mani a chîn mani ramsa irthiangloi ruakhai mani a tôn palin chu thilsual a itho a ni; an hriat suakin chu a mô chu a ipêl hrang a ni, porinche sa a ti.

³Mihriam ata suak, thil irthiangloi rêng rêng a tôn palin chu a thiltho chu dik mah ti an hriat zoi le a irthiang zôi zel a ni.

⁴Mi'n thil sa mani saloi mani tho hrangin irngaitua sabak loiin khuasâl sianlân, a thiltho chu a'rngaitua sabak zoi tika vai a tho'nsual mô kha pêl ta a ti.

⁵Mi'n thilsual a tho'n chu, a thilsual tho kha irphuang a ta,



⁶a thilsual tho hremna hrangin Rengpa kuang belra mani kêl mani, a pui, a hong inhlan hrang a ni. Ochai chu kha mi sual irbôlna kha a inhlan pe hrang a ni.

⁷Belra mani kêl mani a nei no'n chu a sual mana pêkin Rengpa kuang vasu inhni mani phervali inhni mani a hong inhlan hrang a ni. Inkhat chu sual irbôlna thilinhlan ni a ta, inkhat chu hâlrivôm thilinhlan hrangin ni a ti.

⁸Ochai kuang hong lâk a ta, sual irbôlna kha a inhlan masa hrang a ni. Tan nghet loiin a ringa khiak a ti,

⁹a thisen chimrip chu maichâm panga inthek a ta, maichâm kôla a thisen kha a inzung zoi hrang a ni. Hi hi sual irbôlna thilinhlan a ni. Inkhat chu dân angin hâlrivôm thilinhlan a inhlan hrang a ni.

¹⁰Khang ochai khan mi thilsual tho irbôlna kha inhlan a ta, ngaidam ni ta a ti.

¹¹Vasu inhni mani phervali inhni mani khom a nei no'n chu sual irbôlna thilinhlan baidi sa zât her khat a hong inhlan hrang a ni. Oliv hriak mani bero mani a hong ipol sa hrang ni ma; hâlrivôm thilinhlan ni maka, sual irbôlna thilinhlan a ni.

¹²Ochai kuang hong chôl a ta, fâk hrang thilinhlan angin Rengpakuang inhlan zit a ni entîrna hrangin senkhat lei hap a ta, maichâma fâk hrang thilinhlan angin hâlrivôm a ti. Sual irbôlna thilinhlan a ni.

¹³Khang khan thilsual thôtu hrangin ochai khan lei inhlan pe a ta ngaidam ni a ti. Bu le bâl thilinhlan ang dênin a ihâl ban baidi chu ochai dongtum hrang a ni.

Tho'nsual man thilinhlan

¹⁴Rengpa'n Mosia kuang:

¹⁵“Mi'n Rengpa dongtum thil ser chu pe no lik sianlân, thilsual a itho a ni. A thilsual tho man thilinhlan Rengpa makunga belra mani, kêl mani, a chal, hmêlveiloï a hong ichôi hrang a ni, sa man zât chu biak ina dân hmang lai anga sût hrang a ni.



¹⁶A ipêk loi zât irphu chu pe a ta, khabana hmun ringaa hmunkhat a ipêk bel hrang a ni. Ochai kuang pêk a ta, belrate kha ama'n tho'nsualna man thilinhlan lei inhlan pe a ta, ngaidam ni a ti.

¹⁷“Tho loi hrang thua Rengpa thupêk hi tho pal sian thilsual a itho a ni, a mô kha pêl a ti.

¹⁸Ochai kuang tho'nsual man thilinhlan hrangin belra mani kêl mani, a chal, hmelveiloi a hong ikai hrang a ni, sa man bi zât chu biak ina dân hmang lai anga sût hrang a ni. Ochai khan tho'nsual man thilinhlan kha a thil tho'nsual pal irbôlna hrangin lei inhlan pe a ta, sual kha ngaidam ni a ti.

¹⁹Rengpa ata a tho'nsual man thilinhlan a ni,” a tia.

Levi Dân 6

¹Rengpa'n Mosia kha a chongpuia.

²A'rchi Israelhaiin a kuanga thil a inkoltirhai, a ihlephai, pêk kêr nuam ta no sian, inrûkpai pên mani huang ta sianlân;

³khan, thil irhmang hrûta hrût loi angin khomâk a sâmin chu,

⁴⁻⁵hiang thilsual, a i ang khom hi tho sianlân, a inrûkhai a ihuanghai, a ihlep inkhîr nuam loihai, thil irhmang hrûthai, milak khomâk a isâmkhum thilhai chu, a rêngin a ithuan zit hrang a ni; khabana hmun ringa ata hmun khat a ipêk belsa hrang a ni; thilsual a tho ti hmusuak nia a neitu kuang a ipêk hrang a ni.

⁶Tho'nsual man Rengpa kuang inhlan hrangin ochai kuang belra mani kêl mani, a chal, hmelveiloi a hong ikai hrang a ni; ama'n chu hmun irthianga hmang lai sum insâpa sût hrang a ni.

⁷Ochai khan Rengpa kuang sual irbôlna chu inhlan pe a ta, a sualna chu ngaidam ni ta a ti, a tia.

Hâlrivôm thilinhlan

⁸Rengpa khan Mosia kha a chongpuia:



⁹Arona le a nâihai chu hâlrivôm thilinhlan chungchânga tho hrang dân hi hril roh. Hâlrivôm thilinhlan chu zânhovârin maichâma khan a isia hrang a ni, mei chu inchok mai hrang a ni.

¹⁰A tûka chu ochai khan a puanchek irphân songkol le tuman hnuai innghâkin lungthua thil rô irvâmhai kha hrût a ta, maichâm sîra khan a isia hrang a ni.

¹¹A puandiar chu thûl a ta, riakhmun dâi pên tiang hmun sera irvut kha a ipai hrang a ni.

¹²Maichâma mei kha som inhring mai hrang a ni, a ithi hrang ni mah. Ochai khan a ni tin thingtua bel mai a ta, hâlrivôm thilinhlan hranghai kha hâl a ta; irpôlkhôm thilinhlan thâihai khom kha hâlrivôm zôi zel a ti.

¹³Maichâma mei kha som inhring mai hrang a ni, a ithi lik hrang ni mah.

Bu le bâl thilinhlan

¹⁴“Hiang hi bu le bâl thilinhlan tho hrang dân chu a ni: Arona irchi ochaiin bu le bâl thilinhlan kha maichâma, Rengpa makunga an inhlan hrang a ni.

¹⁵Baidi le sahriak kha a chimrip thâr a ta, bero leh maichâma hâl a ti, kha kha a rênginRengpa kuang inhlan a nih ti entîrna a ni, Rengpa lôm lam tak a ni.

¹⁶Inhlan ban chu ochaihai fâk hrang a ni, irbiakna puan in tual hmun irthianga chol kop loia fa hrang a ni,

¹⁷chol le inhmet pola inzêi hrang ni mah. Bu le bâl thilinhlan ata an dongtum hrangin ki ipêk a ni. Sual irbôlna le tho’nsual man thilinhlan anga thil ser, a sân ser irthiang tâk a ni.

¹⁸Arona irchi pasalhai ka kaiin fa thei an ti. Rengpakuang fâk hrang inhlan kumkhuaa an dongtum hranga inkung a ni. Mi dang tukhomin fâk hrang thilinhlan chu an tônin chu an irthiang loi zôi zel a ni,” a tia.

Ochai sahriak pol

¹⁹Rengpa’n Mosia a chongpuia:



²⁰“Arona le a nâihai sahriak pol an niin chuRengpa kuang baidi sa zât her khat, a nitina bu le bâl thilinhlan inhlan sa dôr, zînga her kecher, khohloia herkecher hong inhlan seng ri sehai.

²¹Oliv hriak leh inhmet irzêla thîrtûla em inhmin hrang a nia, irsik indi'n bu le bâl thilinhlan anga inhlan hrang a ni.

²²Arona irchi, a âiôtu hranga sahriak pol, ochai inlaltak khan hi thilinhlan hi a inhlan hen hrang a ni; hi hi kumkhuaa tho hrang a ni, Rengpahrangin hâlrivôm zit hrang a ni.

²³Ochaiin bu le bâl thilinhlan a inhlan hi fa hrang ni ma, hâlrivôm zit hrang a ni,” a tia.

Sual irbôlna thilinhlan

²⁴Rengpa'n Mosia kuang,

²⁵Arona le a nâihai kha hril roh. Hiang hi sual irbôlna thilinhlan inhlan hrang dân chu a ni. Hâlrivôm thilinhlan hrang thatna hmuna sual irbôlna thilinhlan chu Rengpa makunga that hrang a ni, thil ser irthiang a ni.

²⁶An hlantu ochaiin, a hme hi puan in irbiakna tual hmun irthianga fa hrang a ni.

²⁷Hi hme hi a tôn murdi chu an innim zôi zel a ni. Sil le kai khom a thisenin an thekin chu hmun irthianga a irsûk hrang a ni.

²⁸A hme suangna bêl kha pilbêl a ni'n chu inkhoi hrang a ni; thîrbêl a ni'n chu inlap infâi vinga irsûk hrang a ni.

²⁹Ochai irchi pasal rêng rêng chu a hme fa thei an ti, thil ser a ni.

³⁰Irbiakna puan in hual sùng hmun irthianga thisen chu sual irbôlna hrangin lâk lût a niin chu a hme chu hâlrivôm zit hrang a ni.

Levi Dân 7

Tho'nsualna man thilinhlan

¹Hi hi tho'nsualna man thilinhlan tho lam hrang chu a ni.



²Hâlrivôm thilinhlan, sa thatna hmuna sa chu that hrang a ni, a thisen chu maichâma inthek hrang a ni.

³A'rmei takhai, a rîl thâihai,

⁴a kalhai le a taksahai a mithin hlap tuam sa lai takhai kha

⁵ochaiin maichâma a hâlrivôm hrang a ni, tho'nsual man thilinhlan a ni.

⁶Ochai irchi, pasal kakaiin a hme kha fa thei an ti, a sâna ser a ni sikin hmun irthianga fa hrang a ni.

⁷Sual irbôlna thilinhlan le tho'nsualna man thilinhlan hi an hlan dân a ir-ang mai hrang a ni; an hlantu ochai hin a hme hi an ifâk hrang a ni.

⁸Hâlrivôm thilinhlanana hmang savun kha an hlantu ochai idong hrang a ni.

⁹Bu le bâl thilinhlan lungthua rô innhminhai, thîrtûla rô inhminhai, thîrbêla inzêihai kha an hlantu ochai dongtum hrang a ni.

¹⁰Bu le bâl thilinhlan la'nhmin loi, sahriak kop le koploi khom Arona irchi ochaihai dongtum hrang a ni, an irsem thiai hrang a ni.

Irpôlkhôm thilinhlan

¹¹Rengpa kuang irpôlkhôm thilinhlan chu hianga inhlan hrang hi a ni.

¹²Irpôlkhôm thilinhlan chu Pathian kuang lônthu hrlina hrangin mi'n a hong inhlanin chu, sa an hlan laiin bai chol kop loi le oliv hriak leh inhmet mani, bai irphân oliv hriaka nâl mani, oliv hriaka inzêi mani a hong inhlan sa hrang a ni.

¹³Khabana chol kop baitang rô inhmin a ipêk sa hrang a ni.

¹⁴Bai chi dang dang a inhlan laia inkhat chu Rengpa hrangin a ipêk hrang a ni, maichâma sa thisen inthektu ochai dongtum hrang ni a ti.

¹⁵A hme chu an hlan nia fa zoi zit hrang a ni, a tûka hrangin sia hrang ni mah.

¹⁶Irpôlkhôm thilinhlan chu chonginkung hlochukna sika mani, mâni nuam thua thilinhlan rêng rêng mani chu, a hme kha an hlan nia fa zit ual hrang ni ma, a tûka khom la fa thei a ni.



- ¹⁷Fa zoi loi, sîn thum ni tena khom la om chu hâlvôm hrang a ni.
- ¹⁸A sîn thum nia la fâk chu Pathianin a thilinhlan kha pom no nia, an hlantu thil tho kha a saa pom nêkin porinchea bê ni a ta, a fâktu khom mophur a ti.
- ¹⁹A hme thil porinche a kopin chu fa hrang ni ma, hâlvôm hrang a ni. Mi porinche loiin chu a hme kha fa thei an ti.
- ²⁰Mi porinche laiin irpôlkhômhai thilinhlan hme hi a fâkin chu ensan hrang a ni.
- ²¹Mihriam mani sa ata mani thil porinche suak tôntu chu hi hme hi a fâkin chu ensan hrang a ni, a tia.
- ²²Rengpa'n Mosia kuang,
- ²³"Israel nâihai chu hril ro: belra mani, sehrât mani, kêl mani, a i anga mar khom nin ifâk hrang ni mah.
- ²⁴Sa thi mani, sa ise that hme chu nin ifâk hrang ni ma, thil danga chu hmang thei ni a ti.
- ²⁵Fâk hrang thilinhlanRengpa kuang sataka inhlan tâk fâk chu ensan hrang a ni.
- ²⁶Israel nâihai chu khoa khom omhai sian sa thisen mani va thisen mani an ifâk hrang ni mah.
- ²⁷Hi dân insiat murdi chu ensan hrang an ni," a tia.
- ²⁸Rengpa'n Mosia kuang:
- ²⁹"Israel mihai chu hril roh. Irpôlkhôm thilinhlanRengpa kuanga inhlantu chu senkhat Rengpa kuang thilpêka an ipêk hrang a ni.
- ³⁰Ama ngeiin fâk hrang thilinhlan chu a hong inhlan hrang a ni. Sa taksa le a mithin chu sen a ta, Rengpa kuang a hong inhlan hrang a ni.
- ³¹Ochaiin a taksa chu maichâma hâl a ta, a mithin chu ochai dongtum a ni.
- ³²Irpôlkhôm thilinhlan chu a chang tianga mal chu ochai dongtum a ni,



³³Irpôlkhôm thilinhlan taksa le thisen inhlantu ochaiin chu, a mal chang tianga chu dong a ti.

³⁴Israelhaiin Rengpa kuang irpôlkhôm thilinhlan an inhlanin a mithin senkhat le a mal hi itiklai khom ochai kuang an ipêk hen hrang a ni,” a tia.

³⁵Hi hi fâk hrang Rengpa kuang pêkna ata Arona le a nâihai, ochaia inkung indet hnunga an dongtum hranga pêk hrang chu a ni.

³⁶Kha nikhua khan Rengpa’n Israel mihai kuang, hi irthâr thilinhlan hi an kuang pe hen hranga thupêk a ni. Hi dân hi Israel mihaiin itiklai khom an izôm hen hrang a ni.

³⁷Khanchu, hâlirvôm thilinhlan hai, bu le bâl thilinhlan hai, sual irbôlna thilinhlan hai, tho’nsual man thilinhlan hai, ochai namindet thilinhlanhai le irpôlkhôm thilinhlanhai chu khaanga inhlan hen hrang chu a ni.

³⁸Ramchâra Sinai tânga Israelhai thilinhlan hrang dân a hril laia Mosia kuang Rengpa thupêkhai kha chu a ni.

Levi Dân 8

Arona le a nâihai ochaia namindetna

(Fes 29.1-37)

¹Rengpa khan Mosia kuang:

²“Arona le a nâihai kha irtongna puan in lûtnaa honghai sianlân, ochai tukfam pol hrang sahriak hai, sual irbôlna hrang sehrâtchal tuai hai, belrachel inhni le chol kop loi bai, kokin hong chôi ri se.

³Israel pungkômhai chu koi zit ro,” a tia.

⁴Rengpa thupêk angin Mosia’n a thoa, an hong irchunghôm zoiin chu an kuang,

⁵“Ei itho hrang hi Rengpa thupêk a ni,” a tia.

⁶Mosia’n Arona le a nâihai kha a hong hruaia, dân angin tui a’rsiltirhaia.

⁷Songkol hnuai, songkol irfualhai an nghâktira, kongkhit an khittira. Efod an nghâktir saa, a khitna sataka phan khan a konga a khitdela.



- ⁸Rôp irbel kha a'rbela, Urim le Thumim khom kha a siaa.
- ⁹Diar kha an kaitira, a michala rângachak phêk, Rengpa dongtum ti irziakna kha a'rbela. Khahai kha Rengpa thupêk angin a tho zita.
- ¹⁰Mosia'n sahriak pol zât kha a lâka, kairêng le a sũaga om murdi kha an mâia, a'rthiangtira.
- ¹¹Sahriak chimrip khan maichâm le a bêlbûr hai, thîr tâbor le dônahai kha irthiangtirna hrangin voisari an theka.
- ¹²Sahriak chimrip chu Arona lua a buaka, a ser irthiang tâka.
- ¹³Arona nâihai khom kha Mosia'n a hruaia, songkol chial an nghâktira, kongkhit an khittira, lukhum an khumtir saa, khahai kha Rengpa thupêk angin a itho a ni.
- ¹⁴Mosia'n sual irbôlna sehrât kha a kaia, Arona le a nâihai khan a lua an kut an irnghata.
- ¹⁵Mosia'n a thata, a thisen chimrip chu a kut chalin maichâm kil irkhai khan irthiangtirna hrangin a nâla, a inâl ban chu maichâm kôla a bunthuana, khang khan maichâm kha a sera, a irthiangtir a ni.
- ¹⁶Mosia'n a sũakua a rîl thâi murdi, a mithin le a milunghai, a bêhai le a thâihai kha maichâma khan a hâla.
- ¹⁷Rengpa thupêk angin a vun, a taksahai, a rîlhai kha riakhmun pên tiang a hâla.
- ¹⁸Hâlrivôm thilinhlan hrang belra khom kha Mosia'n a kaia, Arona le a nâihai khan a lua an kut an irnghata.
- ¹⁹Mosia'n a thata, maichâm kha thisen khan an thek kualala.
- ²⁰Rengpa thupêk angin belra kha a'rchanchita, a lu le a taksahai le a thâihai chu a hâla.
- ²¹A sũakua le a kehai kha a'rsûka, belrachal kha maichâma a hâl zit tâka. Hâlrivôm thilinhlan a ni, kha kha mirimhoi tak hranga hâlrivôm thilinhlan a



nia; Rengpa ta hranga meia thilinhlan chu a ni, Rengpa'n Mosia thu a ipêk ang khan.

²²Mosia'n belra inkhat ochai namindetna kha a kaia. Arona le a nâihai khan a lua an kut an irnghata.

²³Mosia'n a thata, a thisen chimrip kha Arona mikuar chang tiang hmora khan a pola, a kutpui chang tiang le a kepui chang tiang hmora khom a pola.

²⁴Arona nâihai khomin an hong pana, an mikuar chang tiang hmora, an kutpui le kepui chang tiang hmorhaia a lei pol pehai saa, a ipol ban chu Mosia'n maichâma inthekna hrangin a ihmang a ni.

²⁵Belra mar, a pin thâitak-hai, a rîl thâi tuamhai, a mithin tuamtu a rânghai, a bê inhni le a thâi kophai le a mal chang tianga kha a lâka.

²⁶Rengpa kuang bu le bâl thilinhlan, chol koploi bai tang khat le bai, sahriak le inhmethai, bai irphân sahriak nâihai kha chu sathâi le a mal chang tiang chung a kha a siaa.

²⁷Arona le a nâihai kuta an hlana, Rengpa makunga khan a voka, an hlana.

²⁸Mosia'n khahai kha a lâk nôka, hâlvôm thilinhlan chung a namindetna thilinhlan a hâl tâka. Hi hi fa hrang thilinhlan a ni; kha khaRengpa lôm lam tak a ni.

²⁹Mosia'n a mier kha a lâka, Rengpa makunga khan a thâra, an hlana: kha kha ochai namindetna belra ata Mosia dongtum chu a ni sa. Rengpa thupêk ang khan Mosia'n itinrêng a tho zita.

³⁰Mosia'n sahriak pol hrang senkhat chu maichâma inthek thisen chimrip leh khan a lâka, Arona le a nâihai kha an songkolhaia an theka. Khaang khan an songkolhai le Rengpa ta hranga ser irthiang tâk an ni.

³¹Mosia'n Arona le a nâihai kuang, "Irtongna puan in mikot kôla a hme hi la unglân, but unglân, koka namindetna thilinhlan bai leh khan Rengpa thupêk angin fa roi.

³²Nin ifâk ban kha, hme khom bai khom hâl zit hrang a ni.



³³Namindetnaa tho hrang tho zoi zit a ni hnungin, sùn sari sùng chu irtongna puan in ata pên tiang nin isuak hrang ni mah.

³⁴Rengpa thupêk angin khahai kha nin sual irbôlna hrangin ki itho a ni.

³⁵Rengpa thupêk ang khan sùn sari le zân sari irtongna puan in lûtna kôla nin iom hrang a ni. Nin om nuam no'n chu thi nin ti, kha kha Rengpathupêk a ni," a tia.

³⁶Khanchu, Arona le a nâihai khan Mosia kuanga Rengpathupêk murdi kha an tho zit tâka.

Levi Dân 9

Arona'n irbôlna a inhlan

¹Sùn riat niin chu Mosia'n Arona le a nâihai kha Israel ulianhai leh a koihaia.

²Arona kuang, "Belrachal tuai le belrachal hmêlveiloï kaiin lân, sehrât kha sual irbôlna thilinhlan Rengpa kuang inhlanin lân, belra chu hâlvôm thilinhlan inhlan roh.

³Israel mihai khan sual irbôlna thilinhlan kêlchal hong chôi hai sianlân; sehrâtte le belrate, kum khat vêl ang, hmêlveiloï hâlvôm hrangin hong chôi sa ri sehai.

⁴Sehrâtchal le belrachal, irpôlkhômhai hrangin hong chôi sianlân, bu le bâl thilinhlan sahriak leh irpol Rengpa kuang hong inhlan sa ri se. A vuan hin kei, Rengpa hi, nin makunga ki hong inlang hrang a ni," a tia.

⁵Mosia thupêk angin irtongna puan in mikota, khahai kha hong chôi in lân, nam pumpui chu Rengpa chubai mûk hrangin an pungkôma.

⁶Mosia khan an kuang, "Hi hi tho hrangin Rengpa khan thu nangni a ipêk a ni. Rengpa roiinpuina vâk kha a zuang inlang hrang a ni," a tia.

⁷Khan, Arona kuang khan, "Maichâma ni sual irbôlna hrang le hâlvôm thilinhlan chu inhlan ro, mipui sual irbôlna hrang khom inhlan sa roh. Rengpa thupêk angin mipui sual irbôlna kha inhlan pehai ro," a tia.

⁸Arona chu maichâma a fea, ama sual irbôlna sehrâtchal tuai kha a thata.



- ⁹A nâihai khan a thisen an hong lâk pea, a kutchal an chiea, maichâm kil irkia khan an pola, a ipol ban chu maichâm kôla a bunpaia.
- ¹⁰A thâihai, a bê inhni, a mithin tuam a râng sa laitakhai kha Mosia kuang Rengpa thupêk angin maichâma khan a hâla.
- ¹¹A vun le hme rêk chu riakna hmun pên tiang a hâlrivôma.
- ¹²Ama hranga hâlrivôm thilinhlan khom kha a thata, a thisen kha a nâihaiin an hong lâk pea, maichâma an thek irvêla.
- ¹³A lu le a hme dang khom an hong chôia, maichâma a lei hâla.
- ¹⁴A sêngkua le a kehai kha a'rsûk infâia, maichâma hâlrivôm thilinhlan chungka khan a hâl tâka.
- ¹⁵Kha zoi chu mipui thilinhlan kha an hlan tâka. Mipui sual irbôlna thilinhlan kha a thata, ama sual irbôlna a inhlan ang takin a thoa.
- ¹⁶Hâlrivôm thilinhлана inhlan hrang sa khom kha a tho hrang lam dân angin a thoa.
- ¹⁷Bu le bâl thilinhlan baidi kha a hapa, maichâma khan a hâl saa.
- ¹⁸Irpôlkhômhai thilinhlan sehrâtchal le kêlchal, mipuiin an hong ichôi kha a thata, sa thisen kha a nâihaiin an hong chôia, maichâm kha an thek irvêla.
- ¹⁹Arona khan sehrâtchal le belrachal mar, belrachal pin thâi tak le a hlap thâihai, a bêhai, a mithin tuamtu a rânghai kha an pêk saa,
- ²⁰a mier chungka khan a siaa, khan ama khan a thâi kha a hâla,
- ²¹Mosia ihril angin a mier le a mal chang tianga kha ochaihai hrangin Rengpa makunga ngaihoi thilpêkin a hong inhlana;
- ²² Arona'n hihai hi an hlan zoiin chu mipui chungka a kut a phara, satvurna a hrila, maichâm ata a zuang chum tâka.
- ²³Mosia le Arona kha irtongna puan ina khan an lûta, an hong suakin chu mipui hrangin satvurna kha an hrila. Rengparoiinpuina vâk kha mi murdi chungka a hong irlang ta.



²⁴Rengpa kuang ata mei a hong suaka, maichâma hâlirvôm le a hme thâihai kha a hong kâng irhmang tâka. Mipuiin kha kha an hmu'n an khêka, khûksadelin irnênga an inbok tâka.

Levi Dân 10

Nadaba le Abihua thil tho'nsual

¹Nadaba le Abihua, Arona nâihai khan, an mei lâkna khan meiri-al an lâka, mirimhoi hâl zât an phula, Rengpa makunga mei irthiang loi kha an hmanga. Khaanga hmang kha chu Rengpa'n a khap a ni.

²Rengpa kuang ata mei a zuang suak zoka, Rengpa makunga an inhni khan a kâng thathai ta.

³Mosia'n Arona kuang, "Rengpa'n hi chungchânga hin hiang hin a ti; 'Ki sinthotuhaiin chu ki irthiangna hi an iuksak hrang a ni. Ki mihai makunga ki roiinpuizia inlangtir ki ti,' a ti lele kha te," a tia. Arona chu a dâihreka.

⁴Mosia'n Misaela le Elzafan, Arona pa urêng Uziela nâihai kha, a koia, an kuang, "Hong unglân, nin urêng hai ruak hi in irthiang ata hi la suak hai unglân, riak hmun pên tiang sepaihai roi," a tia.

⁵Khanchu, an hong, Mosia iti angin an ruak hai kha an ochai songkol irfual khan riakna hmun pên tiang an irzôn suakpaihai ta.

⁶Mosia'n Arona le a nâipa Eleazara le Ithamara kuang, "Lu nin irsûkin nin sam intha no unglân, nin puan khom ir-ek thêr sa no roi; khang khan nin tho'n chu nin ithi ngêt hrang a ni, Rengpa chu nam pumpui chung a ninginmur a ti, Rengpameiin a ikâng thathai kha nin urêng Israel dang hai khan châ thei an ti.

⁷Nangni'n chu irtongna puan in hi suaksan no roi, thina nin ti, Rengpa sahriak pol nin ni tâk kêng," a tia. Mosia iti angin an tho tâka.

Ochai om hrang dân

⁸Rengpa'n Arona kuang,



⁹“Irtongna puan in nin hong lût hrangin nang le ni nâihai hin uain le zu nin i-in hrang ni ma, nin inin chu thi nin ti. Hi hi nin irchi murdi’n an izôm hrang a ni.

¹⁰Thil ser le serloi, irthiang le irthiang loi nin isen thiam hrang a ni.

¹¹Mosia kuang dân nangni ki ipêk murdi Israel mihai kha nin irchutir hrang a ni,” a tia.

¹² Mosia’n Arona le a nâipa inhni la dam, Eleazara le Ithamara hai kuang, “Bu le bâl thilinhlan ata Rengpa kuanga inhlan ban kha la unglân, maichâm kôla fa roi, ser irthiang a ni tâk sikin.

¹³Hmun irthianga khan fa unglân, Rengpa kuang fâk hrang inhlan ata nin nâihai leh nin dongtum a ni. Hi hi Rengpa thupêk a ni.

¹⁴ A mier le a mal, Rengpa makunga ngaihoi kha chu hmun irthianga khan nin nâipahai le nin nâinuhai leh fa nin ti. Hi thilinhlanhai hi nin nâihai le nin fâk hrang, irpôlkhômhai thilinhlan ata nin dongtum hrang chu a ni.

¹⁵A mal le a mier hi Rengpa makunga an ivôk kha fâk hrang thilinhlan Rengpa kuanga a thâi an hong inhlan laiin an hong ichôi hrang a ni. Rengpa thupêk angin hihai hi nin nâihai leh kumkhuaa nin dongtum hrang a ni,” a tia.

¹⁶Mosia’n sual irbôlna thilinhlan kêl chungchâng thu kha ngûk takin a’rdona, an lei hâlpai tah ti an hriata. Eleazara le Ithamara chung a khan a sân a ning an mur tâka.

¹⁷ “Ithoa mo hmun irthianga sual irbôlna thilinhlan, kêlchal hme kha nin ifâk loi, ser irthiang zit tâk a ni kha; mipui sual irbôlna ata nin dongtum hrang Rengpanangni ipêk kha,

¹⁸Irtongna puan ina thisen kha lâk lût ni maka, nangni ki ihril ang khan kha khan a hme chu nin ifâk hrang a ni kha te,” a tia.



¹⁹Arona khan a sâma, “A vuan khan irbôlna hme chu fa inlân, Rengpa’n a sa mo ti ni? mipuihai khan Rengpa kuang sual irbôlna kha an hong inhlana, kha tena khom khan hi thilirkhêl tak hi ki chung a itung a ni,” a tia.

²⁰Khahai kha Mosia’n a hong inhriatin chu, a milung a chuk tâka.

Levi Dân 11

Hme fâk theihai

(Dhn 14.3-21)

¹Rengpa’n Mosia le Arona kuang

²“Israel mihai kha hiang hin hrilhai roi.

³Tânga lêng, hiang sahai hi fa thei nin ti: a kemitin têra suak, a fâk insoi ngai sâ rêng rêng chu fa thei nin ti.

⁴Khannisianlân insoia inlem mani a mitin têt loa a suak laia om mani, hihai hi chu nin ifâk hrang ni ma; saringsei, insoiin invol khom sianlân, a mitin a têt no sikin, nin ta hrangin a iporinche a ni.

⁵Khan, mizupui, an soia an lem nâkin, a mitin a têt no sikin; nin ta hrangin a iporinche a ni.

⁶Khan, mizupui kha insoia an lema chu, khannisian a mitin a têt no sikin: nangni hrangin a porinche a ni.

⁷Vok hme fa no roi, sâ porinche a ni, a ke mitin a’rkaka chu, khannisian insoiin invol mah.

⁸Hiang sâ hmehai hi chu fa no roi, a thi tâk ruak khom tôn no roi, a porinche a ni.

⁹Nga chi tinrêng, tuia omhai, tuikhangliana om, dîla om, hlip le a phe neihai chu fa thei nin ti.

¹⁰Tuia lêng hlip le a phe nei loi chu fa loi hrang a ni.

¹¹Khahai kha intir a om, a tôn khom tôn no roi.

¹²Tuia lêng, hlip le a phe nei loi chu nin ifâk hrang ni ma.

¹³Hi vâhai hi vâ intirom an ni: irmu, simbu



- 14muhâte, vânlaiirmu chi rêng rêng
- 15vaâk chi rêng rêng,
- 16vâ ngalirsâng hai, meibâk, tuivaârngoi, tuikhanglian vahai, irmu chi rêng rêng
- 17rângkêk, vadung irmuhai, suitilil hai
- 18simbu misiaknei, raikoso hai,
- 19khânghlâi hai, dîl va chi rêng rêng, sualungvakâmkei hai le bâk hai.
- 20Thilhring mitha nei, ke minlia irvâk chi rêng rêng chu nangni hrangin a porinche a ni.
- 21Irkâr theina hrang ke mitin irphal nei zât rêk chu fa thei nin ti.
- 22Khâihmimse chi rêng rêng, khâiruang chi rêng rêng, ruanguiêk chi rêng rêng hai fa thei nin ti.
- 23Mitha nei, ke minlia irvâkhai chu nangni hrangin intirom a ni.
- 24A thi tôn murdi khohloi dênin porinche a ti.
- 25A hme khom puan diarin a tônin chu irsu hrang a ni, khohloi dênin a neitu chu a porinche a ni.
- 26Sa khom a mitin irkak khomsian insoi loi mani, a mitin irkak sualoi rêk chu a iporinche a ni, a ruak tôn chu porinche a ti.
- 27Ke minli nei, kepâr irtuam murdi chu, an iporinche a ni, an ruak tôn chu khohloi dênin porinche a ti.
- 28An ruak lâktu khan puandiar a irsûk hrang a ni, khohloi dênin porinche a ti; hi ruakhai ang hi nangni hrangin a porinche a ni.
- 29Irnênga a'rvâkhai ang zât hi nangni ta hrangin a porinche sa a ni; ibûi, mizu, châichek rêng rêng,
- 30tokke, inngâk, laikin, ûleng kinsanêlnek.
- 31Hiang a boka irvâka lôn chi hi nin ta hrangin a porinche a ni. A thi tôn khom khohloi dênin porinche an ti.



- ³²Khan, a thiin chu thing mani, puandiar mani, savun mani, hmarsa mani, thil sianaa hmang tâka khom a delin chu porinche a ti, irthiang nôk zôi zel a ti.
- ³³Pilbêl sînga a tâkin chu a sînga om tinrêng kha porinche a ta, a bêl kha zêmkhoichit hrang a ni.
- ³⁴Thil fâk thei chi rêng rêng, khaang bêla lei om chu irchôk a niin chu porinche sa a ti; khaang bêla inthei chi om rêng rêng khom porinche sa a ti.
- ³⁵Hihai thi ruak hi bai inzêina bêla mani, a tâkin chu porinche a ta, inkhoichit hrang a ni.
- ³⁶A thi ruak chu i ang khomin tôn sian a tôntu chu a porinchea, khannisian, tuikuanga, tui panga ta sian porinche ma.
- ³⁷Song hranga chîmu sia chung a tâk khom ni sian, chîmu chu porinche ma.
- ³⁸Chîmu chu tuia an inchie laiin, hi a thi ruak hi a tâkin chu porinche a ti.
- ³⁹Sa fâk zât thi sianlân, a ruak tôn murdi khohloi dênin porinche an ti.
- ⁴⁰A hme fâk chu a puandiar a irsûk hrang a ni, khohloi dênin porinche a ti. A hme pêltu khomin a puandiar a irsûk hrang a ni, khohloi dênin porinche a ti.
- ⁴¹Thilhring, irnênga boka irvâk zât hi nin ifâk hrang ni mah.
- ⁴²A'rtôla irtôlhài, ke minli mani kha nêka tam mani nei irnênga irvâk zât rêng rêng hi nin ifâk hrang ni ma, a porinche a ni.
- ⁴³Hihai hi nin fâkin chu intirom ni nin ta, porinche nin ti.
- ⁴⁴Kei Rengpa hi nin Pathian ki nia, ir-enkol insa unglân, kei hi ki'rthiang a ni, nangni khom nin irthiang sa hrang a ni. Irnênga lôn zât chi rêng rêng hin porinche no roi.
- ⁴⁵Nin Pathian ni hrangin Aigupta ram ata nangni hruai suaktu Rengpa ki ni. Nin irthiang hrang a ni, kei ki'rthiang sikin.
- ⁴⁶Hihai hi ramsa hai, vâ hai, tui sîng hai, irnêng chung a irvâk hai, chungchânga dân chu a ni.



⁴⁷A'rthiang le irthiang loi, fâk zât le fâk loi zât nin itheithâk hrang a ni.

Levi Dân 12

Nâi nei zoia irthâr hrang dân

¹Rengpa'n Mosia kuang:

²"Israelhai kha hril roh. Nupangin nâi a vonga, pasal a niin chu sîn sari sâng porinche a ti, thi a nei sâng a iporinche ang khan.

³ A sîn riat ni'n chu nâitesente ser hmor vun kha a itan hrang a ni.

⁴A thisen suak sikin nu chu sîn sôminthum sîn thum a hek mâka chu irthiang no ni, a'rthâr irthiang mâka chu thil irthiang ite a itôn hrang ni mah.

⁵"Nâinupang nei chu sîn sômhleiminli sâng, thi nei lai ang dênin, porinche a ti, a thisen suak sikin sîn sômruk kiruk dang a hek mâka chu irthiang no ni.

⁶Pasal mani nupang mani irthâr infâi zoro a chuk zoia irtongna puan in lûtnaa kum khat vêla belrate hâlvôm thilinhlan hrang hong chôi a ta, sual irbôlna hrangin phervali mani, vasu mani ochai kuang a hong ichôi sa hrang a ni.

⁷Ochai khan Rengpa kuang thilinhlan kha inhlan a ta, porinche irthârna kha lei tho pe a ti. Hi hi nupangin nâi a neia a itho hrang chu a ni.

⁸ "Nupang khan belrate a nei no'n chu vasu bop khat mani phervali bop khat mani a hong inhlan hrang a ni; inkhat chu hâlvôm thilinhlan ni a ta, inkhat chu sual irbôlna thilinhlan ni a ti. Ochai khan a porinche thârna kha inhlan pe a ta, hong irthiang ta a ti," a tia.

Levi Dân 13

Vun natna chi tinrêng tho hrang dân

¹Rengpa'n Mosia le Arona kuang:

²"Vun pân mani, sarthiat mani, invûng mani a oma, dam zôi theiloi hrang angin an langin chu ochai inentir hrang a ni.



³Ochaiin pân kha ngûk takin a hong ena, a pân laia mul kha a hong ngoia, a pân dân kha a vêl vun nêkin an thûk uala an langin chu pânسيا a ni, ochaiin mi porinche'n inpuang a ti.

⁴A pân kha a ngoia, a sân an langa, a mul khom a ngoi no'n chu ochaiin sîn sari sùng irkêmtir a ti.

⁵Sîn sari hnunga ochaiin en nôk a ta, a pân kha a pangai dên a nia, a zap no'n chu sîn sari dang irkêmtir nôk a ti.

⁶Sîn sari hek zoi tika en nôk a ta, a pân kha a châr thiaia, an darh no'n chu porinche mah ti ochaiin inpuang a ti, pân papai a nia, a silkaihai kha irsûk a ta, irthiang a ti.

⁷Ochaiin a ena, a'rthiang tia an puang hnungin pân kha indarh sianlân, a inentir nôk hrang a ni.

⁸Ochaiin en nôk a ta, a hong indarh irzatin chu, mi porinchea inpuang a ti, pân saloi zât a ni.

⁹Tukhomin pân saloi zât hi an irveiin chu ochai kuang hruai ngêt hrang a ni;

¹⁰ama khan ngûk takin lei en a ta, pân kha a ngoi hlunga, a mul a ngoia, a hnâi a omin chu,

¹¹pân dam intak zât a ni; ochai khan mi porinche a nih ti inpuang a ta, en nôk hranga irkêmtir nang no nia, a porinche ti a fel sai a ni.

¹²Kha natna kha an dara, ochai hmu phâk ten, a ke ata a lusîp dênin a'rsua tâkin chu,

¹³ochaiin ngûk takin en a ta, a taksa pumpui an darhsuak tâkin chu, kha mi kha a'rthiang tâk ti inpuang a ti, a vun kha a ngoi suak zitin chu a irthiang tâk a ni.

¹⁴Aniachu a taksa châr a hong irlangin chu a porinche a ni.

¹⁵Ochai khan en nôk a ta, an lông lai a hmu'n chu porinche a nih ti inpuang a ti. Takpuma inlông om hi pân saloi a nia, a porinche a ni.

¹⁶Inlông kha a boia, a hong ngoiin chu ochai a inentir hrang a ni.



- 17**Ama'n lei en a ta, inlông kha a lei ngoiin chu kha mi kha chu a'rthiang tâk a nih ti inpuang a ti.
- 18**Sarthiat dam tâk,
- 19**a hong irhlipin mani a sena a hong dukin mani, ochai inentir hrang a ni.
- 20**Ochai khan a porinche ti inpuang a ti; sarthiat ata pân saloi a irsiam a ni.
- 21**A mul chu a hong ngoi noa, a vêl vun ata inthûk ual loia ochaiin an hriatin chu kha mi kha sîn sari sêng a ikhum irkêmtir hrang a ni.
- 22**Kha thil kha a hong zapin chu ochai khan a porinche a nih ti inpuang a ti; hri saloi a ni.
- 23**A danglam noa a zap no'n chu, sarthiat ata hong irsiang nôk a ni, ochai khan a'rthiang ti inpuang a ti.
- 24**Mei ikâng inlông tuang chu a kâng laia sen mani, a senindông mani a niin chu
- 25**ochaiin lei en pe a ta, a mul kha a hong ngoia, a vun pên tiang ata an thûk okin an langin chu, a kângna sâbe lai kha pân saloia a irsiam tâk a ni. Ochaiin kha mi kha a porinche ti inpuang a ti.
- 26**A mul a hong ngoia, inthûkin inlang no sian khom, a dukin chu ochaiin sîn sari sêng a bingin a isiapai hrang a ni.
- 27**A sîn sari niin ochai khan en nôk a ta, a pân kha a hong zapin chu pân saloi a ni; ochai khan kha mi kha a porinche a nih ti inpuang a ti.
- 28**A ngaidân a nia, a hong zap noa, a duk no'n chu, pân saloi ni maka; kâng ser papai a nia, ochaiin kha mi kha a'rthiang ti inpuang a ti.
- 29**Pasal khom nupang khom, an lua mani an irkama mani, pân a omin chu
- 30**ochaiin en a ta, a kôlvêl vun kha an thûkin an langa, a mulhai kha a eng hruakin chu inthak saloi a ni; kha mi kha a porinche ti inpuang a ti.
- 31**Pân kha inthûk ual loiin inlang khomsian, a mulhai kha a hong vom insa ual no'n chu sîn sari sêng a ikhum irkêmtir hrang a ni.



³²a sùn sari nia ochai khan en nôk a ta, a zap noa, an thûk ualin an lang no'n chu,

³³a pân kôlvêla mul chu ziat inkol hrang a ni, ochai khan sùn sari sùng a ikhum irkêmtir nôk hrang a ni.

³⁴Sùn sari niin ochai khan a pân kha en nôk a ta, a zap noa, inthûk ualin an lang no'n chu, a'rthiang ti inpuang a ti; kha mi khan puandiar irsu a ta, irthiang ta a ti.

³⁵A'rthiang ti inpuang zoia, pân kha a zapin chu

³⁶ochaiin en nôk a ta, a pân kha a izap ngei a ni'n chu kha mi kha a iporinche a ni; a mul kha a eng le eng loi en nang ual no ni.

³⁷Pân kha a zap noa, a sam kha samvom sa nia ochaiin an hriatin chu pân kha a dam ta tihna a ni, ochaiin a'rthiang tah ti inpuang a ti.

³⁸Pasal khom, nupang khom, an vun taksa puar a ngoi a hong omin chu,

³⁹ochaiin en pe a ta, a ngoina kha an vârin chu a hnâi hong lâkpai a nia, ama kha chu a'rthiang a ni.

⁴⁰A tukburung tiang le a michal tianga sam chil sianlân, lukol papai a nia, a irthiang a ni.

⁴¹A michal le a tukburung sam chil sianlân, chalkol papai a ni, a'rthiang a ni.

⁴²A kol laia eng mani sendâng viat a omin chu pân saloi a ni.

⁴³Ochaiin hong en a ta, a sen indâng viat a omin chu,

⁴⁴kha mi kha a porinche ti inpuang a ta, a lua pân saloi a om sikin.

⁴⁵Pân saloi irvei chu songkol chet inngâk a ta, a sam inthâ a ta, a hmâi chimrip, a'rkam tiang chu tuam a ta, "Porinche, porinche," tiin a ninginmurin khêk hrang a ni.

⁴⁶Kha pân saloi inthak kha a nei sùng chu a porinchea, mi dang kôla om loiin dâi pên tiang a iom hrang a ni.

Phâr hri irkâi chungchâng



- ⁴⁷Samul puana mani, puan irnêma mani,
- ⁴⁸pat phiara mani, samul pat phiara mani, savuna mani, savuna siam thil danga mani, phâr hri a kâia,
- ⁴⁹a êm angin mani, a sen angin mani ni'n an langin chu, phâr hri an darh zât a nia, ochai inentir hrang a ni.
- ⁵⁰Ochaiin en a ta, sîn sari sîng a danga inomtir a ta,
- ⁵¹sîn sari sîng en nôk a ta; hri kha a hong izap a ni'n chu, thil porinche a ni.
- ⁵²Ochai khan a ihâlpai hrang a ni; hri, meia hâlpai zât a ni.
- ⁵³A hong ena, a hong zap no'n chu
- ⁵⁴irsûk infâtir a ta, sîn sari dang se nôk a ta,
- ⁵⁵en nôk a ta, hri chu zap no khomsian a pân hmun rông kha a danglam no'n chu a la porinche a ni, a pân hmun kha pên tiang vai mani, a sîng tiang vaia om mani, a ni khomin.
- ⁵⁶Hong en nôk a ta, a pân hmun kha a hong irnêpin chu a omna laitak kha puan ata mani, savun ata mani ât thapai hrang a ni.
- ⁵⁷A pân hmun kha a hong inlang nôka, a zap maia an langin chu puan neitu khan a ihâl chian hrang a ni.
- ⁵⁸A'rsûk infâi theiin chu irsu nôk a ta, hong irthiang ta a ti.
- ⁵⁹Puan irnêm mani, samul puan phiara mani, savun siam thil rêng rênga mani, a pân hmun, a'rthiang le irthiang loi sen hrang lam chu, khang khan a ni.

Levi Dân 14

Pân saloi irvei thâr hrang dân

- ¹Rengpa'n Mosia kuang,
- ²“Pân saloi irvei dam nôk, thâr infâi hrang dân chu hi ang hin a ni. A'rthiang tah ti inpuang a ni'n chu ochai kuang fe a ta,



³ochaiin dâi pên tiang hruai a ta, ngûk taka a en zoia a dam ngêt a nih ti an hriatin chu

⁴sa irthiang inhni, sidar thing le patzâi senduk le husop hriak le hong chôl hrangin hril a ti.

⁵Pil bêlin ivatui luang lai thâl sianlân, ama chungâ khan vâ inkhat a ithat hrang a ni,

⁶a thisen zungna tuia khan vâ inkhat kha sidar thing, patzâi senduk, husop hriak hai leh khan inchie a ti.

⁷Irthiangtir hrang kha thisen khan voisari inthek a ta, a'rthiang tah ti inpuang a ta, vâ chu ramhnuai insua a ti.

⁸Kha mi khan a sil le kaihai kha irsu a ta, a sam ep a ta, a'rsil tika hong irthiang a ta, riakna hmuna lût thei ta a ta, aniachu, sîn sari sîng ama puan in pên tiang a iriak hrang a ni.

⁹Sîn sari zoia a lu, a hnerkamul, a mitkhoi mul le a mul danghai khom voi a ta, a puandiar irsu a ta, tui a'rsil zoi tika hong irthiang ta a ti.

¹⁰Sîn riat ni'n chu belrate, a chal inhni le a nupang inkhat, kum khat vêla irchang, hmêlveilo le baidi her thum, sahriak koploi oliv hriak litar hmun thuma hmunkhat hong chôl a ta,

¹¹ochai khan irtongna puan in mikota, kha mi kha a thilinhlanhai leh khan a ihruai inlût hrang a ni.

¹²Belrate inkhat, a chal chu, oliv hriak litar hmun thuma hmunkhat leh khan tho'nsualna man thilinhlanâ inhlan pe a ta, Rengpa makunga thâr a ti.

¹³Belrate chu sual irbôlna le hâlirvôm thilinhlan hrang thatna hmun irthiangâ that a ta, hiang tho'nsualna man thilinhlan hi sual irbôlna thilinhlan angin ochai hrangin a iser hrang a ni.

¹⁴Ochai khan belrate thisen kha an hlantu mikuar chang tiang hmora, a kut le kepui hmorhaia a ipol pe hrang a ni.

¹⁵Ochai khan oliv hriak senkhat chu a kut zapha vei tiang bun a ta,



16a kut chang tianga kutpâr phûm a ta, Rengpa makunga hriak kha voisari a inthek hrang a ni.

17A kuta hriak le belrate thisen senkhat kha irzêl a ta, a mikuar chang tiang hmora, a kut le kepui hnâra pol pe a ti.

18A kuta hriak la om chu irthiangtir hrang, a lua khan pol a ta, khang khan irthârna kha tho pe a ti.

19Sual irbôlna thilinhlan kha inhlan pe a ta, kha mi kha thâr irthiang a ti. Kha zoia chu hâlrivôm thilinhlan kha that a ta,

20bu le bâl thilinhlan le maichâma inhlan a ta, khang khan thâr irthiang a ta, kha mi kha irthiang ta a ti.

21Khang dôr nei zoi zâkloi inriang chu irthârna belrate inkhat, tho'nsualna man thilinhlan hrangin hong chôl a ta, sual irbôlna hrangin a ithâr hrang a ni, kha leh khan baidi hriak le irpol herkecher le oliv hriak litar hmun thuma hmunkhat a inhlan sa hrang a ni.

22A inei la lamin, vasu bop khat mani, phervali bop khat mani, inkhat chu sual irbôlna thilinhlan hrangin, inkhat chu hâlrivôm thilinhlan hrangin a hong ichôi hrang a ni.

23A'rthâr sîn riat niin chu Rengpa makunga irtongna puan in mikota a hong ichôi hrang a ni.

24Ochaiin chu belra le oliv hriak kha la a ta, Rengpa makunga a ithâr hrang a ni.

25Belrate kha that a ta, a thisen senkhat kha a mikuar chang tiang hmora, a kut le a kepui chang tiang hmora pol pe a ti.

26Ochai khan oliv hriak senkhat kha a kut zapha vei tiang bun a ta,

27a kut chang tiang kutchala inchie a ta, Rengpa makunga voisari a inthek hrang a ni.

28Sahriak senkhat a mikuar chang tiang hmora, a kut le ke chang tiang kepui hnârhaia a ipol hrang a ni.



²⁹A kuta hriak la om khan khapa lua khan a ipol hrang a ni. Khaang khan irthârna kha a itho pe hrang a ni.

³⁰Kha zoia chu vasu mani, phervali mani inkhat chu,

³¹sual irbôlna hrangin, bu le bâl thilinhlan leh inhlan a ta, khaang khan thâr irthiang a ti.

³²Hiang hin pân saloi irvei, irthârna hrang bituk zât nei zoiloi hranga irthâr hrang dân chu a ni.

In sânghaia phâr hri om

³³Rengpa'n Mosia le Arona kuang:

³⁴“Nininei hranga nangni ki ipêk Kanaan ram nin tung tika chu, ram nin va idong nin in sâng phâr hri kin koptirin chu,

³⁵in neitu khan ochai koi a ta, ‘Ki in sâng phâr hri ni le irhoi a kopa’ ti a ta.

³⁶Ochai khan in sâng a lût mân a sâng thil om murdi inkêlsuatir a ta, a porinche ti an puangkhum lona hrangin, in sâng thil om murdi chu inkêlsuatir zit a ta, eninfel hrangin in sâng khan lût a ti.

³⁷A phâr hri kha ngûk takin en a ta, a êm mani, a sen u uai mani a oma, banga khan a lei kâia, bang kha a hmonin an lang tikin chu,

³⁸in kha suaksan a ta, sîn sari sâng inkaltir a ti.

³⁹Sîn sari ni'n chu in kha va en nôk a ta, banga khan a lei zapin chu,

⁴⁰lung hri kopna lung kha, kho pên tiang porinche painaa inpaitir a ti.

⁴¹Kha zoi tena chu in sâng tianga bang murdi kha ziat inkhoktir a ta, an ikhok kha dâi pên tiang an ipai hrang a ni.

⁴²Lung an ipai kha a thar thûl hrang a ni, a lung bang khom a thar vanga inmâi innâm hrang a ni.

⁴³Hi hi pai a nia, inmâi innâmna ziatkhok zit hnunga a thar thûl a ni zoia khom hri a kop nôkin chu,



⁴⁴Ochai khan va en nôk a ta, a hong zapin chu boi theiloi a ni, in kha a porinche a ni.

⁴⁵Insiat chit hrang a ni, lung, thing, inmâi innâmhai kha pai zit hrang a ni.

⁴⁶In kha khâr a ni sâng khan a lût an omin chu khohloi dênin porinche an ti.

⁴⁷Kha in sâng a zâl mani, thil fâk mani chu, a sil le kai kha a irsûk ngêt hrang a ni.

⁴⁸In sâng lung, inmâi thar hnung khan ochaiin va en nôk a ta, hri kop a om ta no'n chu a'rthiang ti inpuang a ti, hri kha a boi fel tâk sikin.

⁴⁹Kha in thâr irthiang hrangin chu, vâ inhni chel a ta, sidar thing, pat senduk hai le husop hriak hong chôi sa a ti.

⁵⁰Vâ inkhat chu pilbêl ivatui siana chung a that a ta,

⁵¹vâ inkhat kha sidar thing, patzâi sendukhai, husop hriak leh khan pil bêla tui thar, vâ inkhat thisen zungnaa khan inchie a ta, in sâng kha voisari inthek a ti.

⁵²Vâ thisen le tui luang lai, sidar thing, pat sendukhai le husop hriakhai hmang khan in kha thâr irthiang a ti.

⁵³Vâ la hring kha kho sâng ata ramhnuaiia insua a ta, khang khan irthâr infâina kha tho a ta, hong irthiang ta a ti.

⁵⁴Hiang hin takpuma pân saloi chungchânga tho hrang lam chu a ni.

⁵⁵Puandiar mani, in sâng hrihai,

⁵⁶takpuma invâng mani, irdul mani, a khir mani,

⁵⁷a'rthiang le irthiangloi theithâkna hrangin. Hihai hi inphâr chungchânga dân chu a ni.

Levi Dân 15

Takpum sâng ata thil porinche suak

¹Rengpa'n Mosia le Arona kuang,



- ²“Israel mihai chu hril roi; pasal tukhom, an ser ata thil suak a omin chu a porinche a ni.
- ³A suak irzôm mai mani, a mong nôk lat khom ni sian, a porinche tâka, hianga tho hrang a ni.
- ⁴Khaang mi zâlmun le a toina kâi kaiin chu a porinche a ni.
- ⁵⁻⁶A zâlmun tôntu khom, a toinaa toi khom khan an sil le kai irsu an ti, tui an irsil hrang a ni; khohloi dênin porinche an ti.
- ⁷An takpum tôntu khomin a puandiar irsu a ti, tui a irsil hrang a ni, khohloi dênin porinche a ti.
- ⁸Kha mi khan mi porinche ni loi inchil sianlân, a inchiltu kha porinche sa a ta, a sil le kai irsu a ta, tui a irsil hrang a ni; khohloi dênin porinche a ti.
- ⁹Kha mi chuangna sakor chungu chuang chu porinche a ta,
- ¹⁰a itoi phâna tôntu khom khohloi dênin porinche a ta; kha thil chôi sontu khom khan a silkai irsu a ta, tui a irsil hrang a ni, khohloi dênin porinche a ti.
- ¹¹Thil suak neitu khan kut irsu loiin mi dang a tônin chu, a itôntu khan a sil le kai irsu a ta, tui a irsil hrang a ni, khohloi dênin porinche a ti.
- ¹²Pilbêla itôn chu inkhoipai hrang a ni, thing khêng rêk chu sataka irsu hrang a ni.
- ¹³A thil suak irveitu kha a hong dama irthokin a’rthiang nôkna hrangin sîn sari nghâk a ta, a sil le kai irsu a ta, vadung luang laia a irsil hrang a ni; khanchu, hong irthiang thei a ti.
- ¹⁴A sîn riat ni’n chu vasu inhni mani, phervali te mani Rengpamakunga irtongna puan in mikota hong chôi a ta, ochai pe a ti.
- ¹⁵Inkhat chu sual irbôlna thilinhlan, inkhat chu hâlrivôm thilinhlan, inhlan pe a ta, khang khan a porinchen a kha lei irthiangtir a ti.
- ¹⁶Pasal chu a chi a tâk ringotin chu a irsil hrang a ni, khohloi dênin porinche a ti.



- 17**A chi tâkna puan mani, savun mani, thil siam tâk ka chu irsu ngêt hrang a ni, khohloi dênin porinche an ti.
- 18**Khan, nupang a zâlpui khomin an inhni'n an irsil hrang a ni, khohloi dênin porinche an ti.
- 19**Nupang, thinei chu, sîn sari sîng porinche a ti. Ama tôn ka kaiin khohloi dênin porinche an ti.
- 20**A thi nei laia a toinahai, a zâlnahai kha a porinche zit a ni.
- 21-22**A zâlna mani, a toina mani tôntu chu a silkai irsu a ta, a irsil hrang a ni, khohloi dênin porinche a ti.
- 23**A zâlna mani, a toina mani rêng rêng tôntu chu khohloi dênin a porinche a ni.
- 24**Nupang thinei laia zâlpuitu chu a porinchen a kha a kâi saa, sîn sari sîng porinche a ti, a zâlmun khom porinche a ti.
- 25**Nupang chu a thinei zoro ni loia, a thi suak mani, a thinei ngai sîng nêka sôt mani, thi a neiin chu, a thi a suak sîng chu a porinche a ni.
- 26**A thi suak sînga a zâlna le toina kha a porinche a ni, a thinei lai zoro anga khan.
- 27**Kha tôntu khan a sil le kai irsu a ta, a irsil hrang a ni, khohloi dênin porinche a ti.
- 28**A thi suak kha a mong tika chu sîn sari sîng nghâk a ta, hong irthiang ta a ti.
- 29**A sîn riat nia vasu inhni mani, phervali inhni mani chongkhômna puan in mikota ochai kuang hong chôi a ta,
- 30**ochai khan inkhat kha sual irbôlna thilinhlna, inkhat kha hâlirvôm thilinhlna inhlan pe a ta, Rengpa makunga irthâr irthiangna kha tho pe a ti.
- 31**Israel mipuihai porinche loiin an irkêm hrang a ni, irtongna puan in bul zela om an nia, hong porinche lik nihai, ti an ti.



³²Hi hi pasal, a sera thil suak nei mani, a chi thâkin mani,

³³nupang khom a tha tin thinei le a porinche laia pôltu chungchâng tho lam hrang chu a ni.

Levi Dân 16

Irtanna Nikhua

¹Arona nâihai inhni'n Rengpa makunga mei irthiang loi hmanga mirimhoi an hâl sikin an thi zoi hnungin Rengpa'n Mosia a chongpuia:

²“Ni upa Arona kha hril roh: Thuthung bôm sîng chung a sîma ki zuang ngai sikin hmun irthiang tak tentan zâr sînga a hong ilût papai hrang ni ma, kha kha a uksak no'n chu thi a ti.

³Hmun irthiang taka chu sehrâtchal tuai, sual irbôlna thilinhlan le belra hâlrivôm hong inhlan hrangin chu hong lût thei a ti.

⁴Tui irsil bak a ta, sil le kai irthiang a irbel hrang a ni; puan irnêm songkol hai, tumante kai a ta, puan irnêm kongkhitin khit a ta, puan irnêm diarin a ikai sa hrang a ni.

⁵Israel pungkôm khan sual irbôlna thilinhlan hrang kêlchal inhni le hâlrivôm thilinhlan hrang belrachal inkhat an ipêk hrang a ni.

⁶Arona'n sehrâtchal kha ama le a in sîng mihai hrangin sual irbôlna'n sual irbôlna thilinhlan inhlan a ti.

⁷Irtongna puan in lûtnaa kêl inhni kha kai a ta,

⁸a kho tak mo Rengpa hrangin ni ni, a kho tak mo Azazela hrangin a ini hrang ti inhriatna hrangin tâ an sâna,

⁹Rengpa inthang ual chu sual irbôlna thilinhlan inhlan a ti.

¹⁰Azazela hrangin inthang kêl kha Rengpa kuang a hring puma inhlan phot hrang a ni, sual irbôlna hrangin Azazela kuang ramkâra insua hrang a ni.

¹¹Arona'n sehrâtchal kha inhlan a ta, ama le a in sîng mihai sual irbôlna hrangin sual irbôlna thilinhlan inhlan hrang a ni.



¹²Mei lâkna'n maichâma meiri-al kha lâk a ta, mirimhoi hâl zât hap hni le hmun irthiang taka a hong ichôi hrang a ni.

¹³Rengpa makunga mirimhoi kha meia phul a ta, mirimhoi khu khan thuthung bôm sîng kha a inhli hrang a ni: khanchu, hmu thei no nia, a ithiloi hrang a ni.

¹⁴Sehrâtchal thisen kha a kut chalin thuthung bôm makunga khom voisari a inthek hrang a ni.

¹⁵Kha zoi tika chu kêl kha mipui sual irbôlna thilinhlan that a ta, a thisen kha hmun irthiang taka khan hong chôi a ta, sehrâtchal thisen a iti ang thuthung bôm maton tianga le a sîngnaa a inthek hrang a ni.

¹⁶Khaang khan hmun irthiang tak kha Israel mipuihai tho'nchâina le an sualna ata a thâr irthiang hrang a ni. Irtongna puan in riakhmun kôl zela om a nia, riakhmun porinche sikin khaanga irthiangtir kha a inang a ni.

¹⁷Hmun irthiang tak thâr irthiang hranga Arona a lût le a hong suak nôk kêra irtongna puan in sînga tukhom an iom hrang ni mah.

¹⁸Ama le a in sîng mihai sual le Israel pungkôm sual irbôlna a tho zoiin chu pên tiang hong suak a ta, maichâma hâlîrvôm thilinhlan inhlan a ta, thâr irthiang a ti. Sehrâtchal thisen le kêl thisen senkhat kha maichâm kila irkihaia khan a pol hrang a ni.

¹⁹A kutchalin thisen chimrip kha maichâma voisari inthek a ta, Israel mihai sualna sikin a thâr irthiang hrang a ni.

²⁰Hmun irthiang takhai, irtongna puan in sîng murdihai, maichâmhai a thâr irthiang zoiin chu Azazela hranga kêl kha Rengpa makunga inhlan a ti.

²¹Kêl lua khan a kut kianghni'n irngat a ta, Israel mihai thil saloi le sual an ithohai le an pualoina murdi kha phuang a ta, kêl lua khan irngat a ti; a itho hranga inkung khan ramchâra kêl kha fepui a ta,

²²Kêl khan an porinchen a murdi kha pêl a ta, ramchâra khan insua a ti.



²³ Kha zoi tena Arona kha irtongna sũaga lût a ti, hmun irthiang taka a lu doa ochai songkol inngkhai kha hlík a ta, masan a ti.

²⁴Hmun irthianga khan tui irsil a ta, ama puandiar irbel nôk a ta, hâlvôm thilinhlan, ama dongtum le mipui dongtum inhlan a ta, ama sual le mipui sual kha a irbôl hrang a ni.

²⁵Sual irbôlna thilinhlan, sa marhai kha maichâma hâl a ti.

²⁶Ramchâra Azazela hranga kêl va insuatu khan in tiang a hong kîr tika a puandiar irsu a ta, tui a irsil sa hrang a ni.

²⁷ Sehrâtchal le kêl, sual irbôlna thilinhlan hranga that, hmun irthiang taka sual lapaina hrang an thisen lâklût sai kha a vunhai, a sũakuahai le dâi pên tiang hâl zit hrang a ni.

²⁸Va hâlvôm tu'n chu a sil le kai irsu a ta, irtongna puan in tiang a hong kîr mân tui a irsil hrang a ni.

²⁹ Hi dân hi kumkhuaa zôm hrang a ni. Tha sarina tarik sũa sũa niin chu Israel mi murdi le an laia nam dang om sahai khan bu nghei an ta, sin an itho hrang ni mah.

³⁰Hi nikhua hin a ni, an hong irthiang theina hrangin an sual murdi irbôlna thilinhlan an inhlan a ni.

³¹Hi nikhua hi nikho ser, ser ir-up khak hrang a ni, bu ngheia sin khom tholoi hrang a ni. Hi dân hi kumkhua'n zôm hrang a ni.

³²“Ochai inlaltak hranga sahriak pol le a pa irthûl hranga namindetin hi thil hi a itho hrang a ni, ochai songkol irthiang a inngkhai hrang a ni.

³³Hmun irthiangtak, irtongna puan in sũaghai, maichâmhai, ochaihai le pungkômhai thâr irthiangna sin kha a itho hrang a ni.

³⁴Hi dânhai hi kumkhuaa zôm hrang a ni. Israel mihai kha kum khata voikhat, an sual an irthâr irthiangna sin hi tho pe ngêt hrang a ni,” a tia. Mosia'n Rengpa thupêk ang khan a tho tâka.

Levi Dân 17



Thisen irthiangzia

¹Rengpa'n Mosia kuang,

²Arona le a nâihai le Israel mihai kha hril ro, hi hiRengpa thupêk a ni.

³"Israel mi'n riak hmuna khom dâi pên tiang khom sehrâtchal mani, belra mani, kêl mani a thata,

⁴Rengpa kuang inhlan hrang tia irtongna puan in mikota a that no'n chu thisen a insua a ni, thisen insua anga bê hrang a ni, a'rchihaiin an iensan hrang a ni.

⁵Ram irhonga thilinhlan that an ivarh ngai hiRengpa kuang an hong inhlan tâkna hrangin ochai kuang irtongna puan in mikota an hong ichôi hrang a ni, Rengpa makunga irhîlhai thilinhлана an hong inhlan hrang a nih tihna a ni.

⁶Ochai khan a thisen kha irtongna puan in lûtna kôla maichâma inthek a ta, a thâihai kha a ihâlirvôm hrang a ni, kha kha Rengpanuamlam tak a ni.

⁷Kêl lu nei ramilhli an ibiak hrang ni ta ma; khang biak chuRengpa ata an iuire a ni. Hi dân hi Israel mihaiin kumkhua'n an izôm hrang a ni.

⁸"Israel mi mani, nam dang an laia om mani, tukhomin Rengpa kuang hâlirvôm thilinhlan khom, thilinhlan chi dang rêng rêng khom,

⁹irtongna puan in mikot kôla vai an inhlan hrang a ni; hmun danga inhlan chu Pathian mihaiin an iensan hrang a ni.

¹⁰ "Israel sêngkua laia mi mani, an laia nam dang om mani, a thisen le ileh sa fâk tâk ka chung, Rengpa ningthik chum a ti. Pathian mihai lai ata inhnotsuak hrang a ni.

¹¹ Thilhring rêng rêng, an hringna kha an thisena a oma, khasika khan kêngRengpa khan mihai sual lapai hrang a ti, thisen kha maichâma bunthuan hranga ti a ni; thisen kha hringna a nia, kha khan sual kha a lâkpai a ni.

¹²Khasikin kêng,Rengpa'n Israel mihai le an laia nam dang omhai khan sâ a taksa le thisen le ileh fa hrang ni mah a itihna a ni.



¹³“Israel mi’n mani, an laia nam dangin mani, sa irthiang khom, va irthiang khom ramchainaa man sianlân, a thisen kha irnênga inzung inkangtir a ta, vâiphinin a isirpol nôk hrang a ni.

¹⁴Thilhiring tinrêng hringna chu a thisena khan a iom a ni; khasikin Rengpa’n Israel mihai kha a thisen le ileh a hme ite faloi hranga ti a ni, tukhom, nakhrâta fâk chu Israel lai ata ensan hrang a ni.

¹⁵Israel mi mani, an laia om nam dang mi mani, tukhomin sa thi sai hme mani, sa isethat sai hme mani a fâkin chu an sil le kai irsu an ta, tui an irsil ngêt hrang a ni, khohloi dênin porinche an ta, kha tena kêng an hong irthiang hrang a ni.

¹⁶Irsûk nuam loi mani, tui irsil nuam loi mani chu tuang an ti,” a tia.

Levi Dân 18

Om dân saloi khapna

¹Rengpa’n Mosia kha a chongpuia,

²“Israel mihai kha nin Pathian Rengpa ki ini hi hril roh.

³Nin lêngna Aigupta mihai itho lam tho no unglân, nangni ki ihruai lûtna hrang Kanaan ram mihai om dân khom la ual no roi.

⁴Ki dânhai hi zôm nin ta, ki thupêk angin nin iom lem hrang a ni. Rengpa nin Pathian ki ni.

⁵ Ki dânhai hi zôm unglân, tho hrang ki itihai hi tho roi; kha kha mihriam ta hrangin hringna hrang a ni;” Rengpa ki ni.

⁶Tukhomin mâni urêng irnaipui a ipôl hrang ni ma, Rengpa ki ni,

⁷ni pa mualinphoitir hrangin ni nu ni ipôl hrang ni ma, ni nu a nia, ama khom ni imualinphoitir hrang ni ma.

⁸ Ni pa dôngma dang tukhom pôlin ni pa ni imualinphoitir hrang ni ma.

⁹ In inkhata nin omsuam mo tâk, om no mo tâk, ni farnu, nu dang khom pa dang nâi khom ni ipôl hrang ni mah.



- ¹⁰Ni nâipa nâinuhai, ni nâinuinei ni tunuhai pôl no ro, mâni irmualphoitir ni ni.
- ¹¹Ni pa dôngma nâinu infâ khom ni ipôl hrang ni ma, ni farnu dên kêng.
- ¹² Ni nî ni ipôl hrang ni mah.
- ¹³Ni nu zuarpui khom ni ipôl hrang ni ma, urêng irnai nin ni.
- ¹⁴Ni pa sangpahai dôngma khom pôl no ro, ama khom ni nu a ni sa.
- ¹⁵ Ni nâipa dôngma, ni moi khom pôl no ro,
- ¹⁶ Ni sangpa dôngma khom pôl no roh.
- ¹⁷ Ni nupang pôl tâk nâinu mani, tunu mani pôl no ro, thilsual a ni; ni urêng irnaipui an ni.
- ¹⁸Ni dôngma a hring laiin a zuarpuinu dôngma'n nei no roh.
- ¹⁹ Nupang thinei laiin pôl no ro, a porinche lai a ni.
- ²⁰ Mi dôngma pôl no ro, mâni irporinchetir a ni.
- ²¹Moleka biakna hrang hâlrivôm hrangin ni nâi ni ipêk viat viat hrang ni ma, ni Pathian irhming ni porinchetir ni ti, Rengpa ki ni.
- ²²Nupang angin pasal kha ni ipôl hrang ni ma, a porinche a ni.
- ²³ Pasal khomin nupang khomin, sâ a ipôl hrang ni ma; khaang tho ngai mi chu an suakinsual an nia, irporinchetir no roi.
- ²⁴Nin matona ki irzûlpai suak hrang namhai kha hi thil hin an irporinchetira, hi thil hin irporinchetir no roi.
- ²⁵An thil inzong sikin ram kha an porinchetira, an sual sika khan ram kha hrem ki ta, an nihai kha ki inhnotsuak hrang a ni.
- ²⁶Nangni chu ki dânhai le ki thupêkhai hi zôm unglân, nin laia tukhomin, nin laia om nam danghai ten khomin, hi thil porinche hi tho no roi.
- ²⁷Nin om mâna hi rama omhai hin thil porinche hi an tho ngaia, ram chu an porinchetir tâk a ni.



²⁸Rama khan nin mâna omhai an hnôl tâk angin nin porinche'n chu irhnôl sa ngêt nin ti.

²⁹Nin laia hiang thil tho chu ensan ngêt hrang a ni.

³⁰“Hi thil intirom nin mâna mihai iuar ngai hi tholoi hrangin nangni ki iti a ni, irporinchetir viat no roi, Rengpa nin Pathian ki ni,” a tia.

Levi Dân 19

A'rthiang le irthiangloi

¹Rengpa'n Mosia kuang,

² “Israel mipui pungkômhai kha hril roh: nin irthiang hrang a ni, kei Rengpa nin Pathian hi ki'rthiang sikin.

³ Mâni nu le pa mahrip nin itho seng hrang a ni, ki thupêk angin ki sabat nikhua nin iser hrang a ni, Rengpanin Pathian ki ni.

⁴ Millim tiang irhei no roi, biak hrangin millim pathianhai irsiam ual no roi: kei hi Rengpa nin Pathian ki ni.

⁵Irpôlkhômhai thilinhlan Rengpa kuang nin hlanin tho hrang lam ki iti ang khan tho'n lân, lei pom ki ti.

⁶A sâ kha nin thatin mani, a tûka mo fa zoi hrang a ni,

⁷a sùn thum ni'n nin fâkin chu a porinchea, thilinhlan kha pom no ning.

⁸Khaang fâk chu thil irthiang a porinchetira, a mô a ipêl hrang a ni, a mihai khan an iensan hrang a ni.

⁹ Bu nin âtin faôi tena ât no roi, nin ilâk irhmâi ât hrangin fe nôk no roi.

¹⁰Grep voikhat lâk zoi mani, a ra tâk mani, irvai ta no ro, mi'nrianghai le nam danghai hrangin masan ro, kei hi Rengpa nin Pathian ki ni.

¹¹ Inru no ro, mi huang no ro, milak hril no roh.

¹²Ki'rhming sâmin milak tho no ro, ni Pathian irhming insiat no ro, Rengpa ki ni hi.



- 13 Ni bômhai huang no'n lân, an thil nei irchûpuihai no ro, ni kuanga irhlo chu zân khat khom a hlo khap pe no roh.
- 14 Kuarsêt khuasâl no ro; mitcho matona tûkna thil se no roh. Ni Pathian chi ro, kei hi Rengpa ki ni.
- 15 Dik takin ni tualbômhai thu rêl pe ngaiin lân, mi'nriang ditsak bîk no'n lân, mi'rchong chi ual hliak no roh.
- 16 Mi chungchâng, milak chong inzaptu ni no ro: thi zôi thei ngîrhmunana ngîr kha san hrangin ni thu inhriat ang ang hril irdîn no ro; Rengpa ki ni hi.
- 17 Tukhom khôkmâk lungrîl irput no ro, irhong pharin thu insîr suakin nin kêr thu infeltir ro, khanchu thilsual ni itho loi hrang a ni.
- 18 Tu chungâ khom phuba la no ro, khôkmâk no ro; lung ni irthung angin ni bômhai kha lungthung roh. Kei hi Rengpa ki ni.
- 19 Ki thupêkhai hi zôm roh. Ni sâ vâi kha chi dang dang irzêltir no roh. Loi inkhata chîmu dang dang song no roh. Thil chi hni puankhông sil no roh.
- 20 Suak dôngmate kha, mi'n dôngma hrangin hual sianlân, a man la pe loi mani, la'nsualoi mani a ni'n chu mi dangin lei châipui khomsian, suak mamai a nia, that hrang chu ni ma, hrem hrang chu a ni.
- 21 Pasal khan tho'nchâi man thilinhlan, irtongna puan ina a hong inhlan hrang a ni.
- 22 Kha pa soal irbôlna hrang irthârna kha ochaiin lei inhlan pe a ta, Pathianin ngaidam a ti.
- 23 Kanaan ram nin hong tung tika, thei nin iling rêng rêng a ra phut ata kum thum sâng chu porinchea bê hrang a ni, fa no roi.
- 24 A kum minlinaa thei ra murdi chu Rengpa, nin Pathian kuang lômthu hrilna hrangin nin inhlan hrang a ni.
- 25 A kum ringanaa thei ra chu fa thei ta nin ti; khang khan nin tho'n chu nin thei kha a sân ra nuam a ti; Rengpa nin Pathian ki ni.
- 26 Sa rêng rêng a thisen le ileh fa no roi, mitvai dôihai, tasânhai, uar no roi.



²⁷Nin michal ata a vêlin nin sam voi inkol mani, hnerkamul voi hai mani nin itho hrang ni ma.

²⁸Mithi sîn sikin nin taksa rêng rêng khom nin irziak inchialhai, ir-âtkhok mani uar no roi. Kei hi Rengpa nin Pathian kha ki ni.

²⁹Ni nâinu chu tempil notizuara pêkin thanginse no ro; nam dang pathian tiang irheina lik ni ti, ram chu pualoina'n sipna ni.

³⁰Sabat nî serin lân, chubai ni ni mûkna hmun chu inza ro, Rengpa ki ni hi.

³¹Ramilhli ikop mani, mithi kaithoi thei mani irdon hrangin fe no ro; khaang kha ni tho'n chu porinche ni ti. Rengpanin Pathian ki ni hi.

³²Tar luchuak tâkhai makunga ngârna châng inhren lân, ulianhai chu inza roh. Nin Pathian chi roi, kei hi Rengpa ki ni.

³³Nin rama nam dang om saihai chu dengitheitir no roi.

³⁴Nin Israel chanpuihai angin bê unglân, mâni lung nin irthung angin lungthunghai roi. Nangni khom Aigupta rama mikhual nin ni ngai kha inhre mai roi. Kei hi Rengpa nin Pathian ki ni.

³⁵Irtêna dik loihai, varna lung dik loihai, phalla dik loihai hmangin mi huang no roi.

³⁶Irtêna diktak, varna lung diktak, phalla diktak hmang ngai roi. Aigupta ram ata nangni hruaisuaktu Rengpa nin Pathian ki ni.

³⁷Ki dân murdi le ki thupêkhai hi zôm roi, Rengpa ki ni.

Levi Dân 20

Thuzômloi hremna

¹Rengpa'n Mosia kuang,

²"Israel mihai hril ro; Israel mi'n mani, nin laia om, ram dang mi'n mani, Moleka kuang mani, nâi an hlanin chu that hrang a ni, pungkhômhaiin lungin an idênghat hrang a ni.



³Mâni nâi Moleka kuang inhlana ki hmun irthiang porinchetira, ki'rhming irthiang insiattu chu irheisan ki ta, ensan ki ti.

⁴Israel mipuihaiin kha thil kha a'rngil om tho'n, an that nuam no'n chu,

⁵keima ngeiin kha mi chung a le a in sâng mihai chung a insum ki ta, Moleka biaka keimaa iamom loihai murdi chu ki mihai laia inkhop ta no ning.

⁶Ramilhli ikop le dôi thei pantuhai chu irheisan ki ta, ki mihai laia inkhop ta no ning.

⁷Rengpa nin Pathian ki ni sikin irvong irthiang roi.

⁸Ki dânhai hi zôm unglân, tho ngai roi. Rengpa nin Pathian kha ki ni, nangni indangtu ki ni.

⁹ Mâni nu le pa khosâltu chu that hrang a ni; a thisen mô chu ama'n pêl a ti.

¹⁰ A Israel chanpui dôngma uirepuitu chu a nupang leh khan that hrang an ni.

¹¹Mi'n a pa dôngma laia inkhat khom a lei pôlin chu a pa a imualinphoitir a ni, a nupang leh khan that hrang an ni, sângsuak irnai irdit an nia, an thisen mô chu anni'n pêl an ti.

¹² Mi'n a moinu a zâlpuiin chu that ngêt hrang an ni; porinchena sual tho an nia, an thisen mô chu anni'n pêl an ti.

¹³ Pasalin pasal dang a pôlin chu thil inzakom tak an itho a ni, an inhni'n that hrang an ni, an thisen mô chu anni'n pêl an ti.

¹⁴Mi'n nulefa dôngma'n a neiin chu thil inzakom tak an itho a nia, an inthumin hâl that hrang an ni, hiang thil hi nin laia, a tho an iom hrang ni mah.

¹⁵ Mi'n sâ a pôlin chu a sâ leh khan that hrang an ni.

¹⁶Nupang khom sâ pôl tuma zâlpui chu a sâ leh khan that hrang an ni, an thisen mô chu anni'n pêl an ti.



¹⁷Mi'n a farnu, nu dang inei mani, pa dang inei mani dôngma'n a neiin chu vântâng laia mualinphoitir hrang a ni; khua ata inhnotsuak hrang a ni. Mâni farnu an dit sikin, a mô chu ama'n a ipêl hrang a ni.

¹⁸ Mi'n nupang thinei laia a pôlin chu an inhni'n ensan hrang an ni, porinche lai chungchânga dân an tho'nchâi a ni.

¹⁹ Mi'n, mâni nê mani, a nu nâipangnu zuarpuinu mani a pôlin chu an inhni'n an sual mô chu pêl an ti.

²⁰ Mi'n a pa urêng dôngma a pôlin chu a pa urêng chu a mualinphoitir a ni, a nupang leh khan an sual mô chu pêl an ti, nâi zel nei no nihai.

²¹ Mâni sangpa dôngma irchupuitu chu nâi zel nei no nihai, thil porinche tak a itho a ni, a sangpa a imualinphoitir a ni.

²² Ki dân le ki thupêk murdihai hi zôm unglân, tho ngai roi; khanchu, nin omna hrang ram nangni ki hruai intung tika chu kha ram ata kha hnôlin om no chin ni.

²³ Kha hmuna lei om, nangni ki inhnotsuak pe hranghai om dân la no roi; hiang tho hi an uar ngai, ki intir lam tak a ni.

²⁴ Hi ram, khuaihlutui le dût tui luangna ram hi, nin ilua hrangin nangni pêk hrang kin kung tâka, nangni pe ngêt ki ti; Rengpanin Pathian ki ni, nam dang lai ata nangni ki ilâk indang a ni.

²⁵ Khasikin, sâ le vahai chu a'rthiang le irthiang loi theithâk intam unglân, sâ irthiang loi mani, vâ irthiang loi mani fa no roi; irthiangloi ki iti nin fâkin chu irthiang loi ni nin ti.

²⁶ Ki ta bîk hrangin nin irthiang hrang a ni, ki ta nin nina hrangin nam dang lai ata nangni ki inthang suak a ni.

²⁷ "Pasal khom, nupang khom, ramilhli ikop le dôi uar chu lunga dêng that hrang an ni, an thisen mô chu anni'n pêl an ti," a tia.

Levi Dân 21

Ochahai irvong irthiangna



- ¹Rengpa'n Mosia kuang, "Arona nâi, ochaihai kha hril ro, an laia mihai chu tukhom an chipuihai ruak tônin an iporinche hrang ni mah.
- ²Ama nu mani, pa mani, nâipa mani, nâinu mani, sangpa mani,
- ³farnu mani pasal neiloï inkhata ompui ruak chu tôn thei a ti.
- ⁴A dôngma sêngkuahai ruak khom tônin a iporinche hrang ni ma.
- ⁵Ochai tukhomin lusûn entîrna hrangin a lu kiangkhat a ivoi inkol hrang ni ma, a hnerkamul a ivoi hrang ni ma, a ir-ât irphop hrang ni ma.
- ⁶A irthiang hrang a ni, ki'rhming a insiat hrang ni ma; hâlrivôm hâltu a nia, ki kuang fâk hrang inhlantu ni sa a ta, a irvong irthiang hrang a ni.
- ⁷Ochai chu a'rthianga, notizuar tâkhai, mi imâkhai, ruatharte irditpui tâkhai dôngma'n a inei hrang ni ma.
- ⁸Nin Pathian kuang fâk hrang inhlantu, ki mihai lai ata ki indang a ni.
- ⁹Ochai nâinu notizuar khan a pa a mualinphoitira, hâl that hrang a ni.
- ¹⁰Ochai inlaltak chu sahriak pol a nia, ochai puandiar irbel hranga ser bîk a ni; khasikin, lusûn entîrna hrangin a sam khûi loiin a intha hrang ni maka, a puan a inpotthêr hrang ni ma.
- ¹¹Mithi ruak omnaa a ife hrang ni ma; a nu le a pa ruak ngei khom tônin a iporinche hrang ni mah.
- ¹²Khaanga tho hrangin ki hmun irthiang a suaksanin a iporinche hrang ni ma, keima hranga ser indang tâk, sahriak pol tâk a ni, kei hi Rengpa ki ni.
- ¹³Dôngmate irthiang vai dôngma'n a inei hrang a ni.
- ¹⁴Pasal sûnhai, imâk tâkhai, ruatharte le irdit tâkhai, notizuarhai dôngma'n a inei hrang ni ma, ama chipui laia om dôngmate irthiang a inei hrang a ni.
- ¹⁵khano'nchu, a nâihai porinche an ti, anni khom an irthiang hrang a ni. Rengpa ki ni hi, kei hin ki ochai inlaltak kha ki ser indang tâk a ni.
- ¹⁶Rengpa'n Mosia a hrila:



¹⁷“Arona hril ro; nin irchi laia nâi suakinsual tukhomin fâk hrang thilinhlan hi, itiklai khomin an hong inhlan hrang ni mah.

¹⁸Suakinsualna nei chu thilinhlan a hong inhlan hrang ni ma; mitcho, ke’nbâi, hmêl insiat, ru’rbun danglam bîk irput hai,

¹⁹kut bûi, ke bûi,

²⁰ke’rval, phûkirsam, mit hêk, uithak irvei, hlip neihai le tilru koihai khan thilinhlan a’nhlan hrang ni mah.

²¹Ochai Arona irchi, takpuma suakinsualna nei chu hâlvôm thilinhlan hâl hrangin mani, fâk hrang thilinhlan hâl hrangin mani a ihong hrang ni ma.

²²Khaang mi chu Pathian hranga thilinhlan irthiang le ochai dongtum thil irthiang kha fa thei a ti.

²³Suakinsualna a nei sikin hmun irthiang tak puanzâr kôla a ihong hrang ni ma, maichâm a hong inâi hrang ni ma. Hi thil irthiang hi a iporinchetir hrang ni ma, kei hi Rengpa ki ni, ki’rthiangtak a ni,” a tia.

²⁴Hi thu hi Mosia’n Arona le a nâihai kha a hrila, Israel mihai khom a hril a ni.

Levi Dân 22

Thilinhlan irthiang

¹Rengpa’n Mosia kuang:

²Arona le a nâihai kha hril ro; “Israel mihai ki makunga thil ser an hong inhlanhai kha kuluk takin lei dong sianlân, ki’rhming mualinphoitir no ri se, kei hi Rengpa ki ni.

³Israel mihaiin keima hranga thil irthiang an hong inhlan kha nin irchi thiaihai an porinche laiin an tônin chu ochai ata inmatir hrang an ni; kei hi Rengpa ki ni.

⁴Arona irchi, vuna pân saloi irvei mani, a ser ata thil suak nei mani chu a porinchen a boi mâka chu thilinhlan irthiang hi a itôn hrang ni ma. Ochaiin mithi ruak tontu a tônin mani, ama chi a tâkin a porinche tâk a ni.



- ⁵A boka irvâk sâ porinche mani, mi porinche mani a tôn khomin a porinche a ni; tui a'rsil mâka chu thilinhlan irthiang fa thei no ni.
- ⁶Ochai porinche tâk ka chu khohloi dênin a porinchea, tui a'rsil mâka chu thilinhlan ser irthianghai kha fa thei no ni.
- ⁷Misa a tâk tena irthiang a ta, thilinhlan irthiang kha fa thei ta a ta, a dongtum hranga ti a ni sikin.
- ⁸Sa thi sai tâk mani, sâ isê mani chu a ifâk hrang ni ma, kei hi Rengpa ki ni.
- ⁹“Thil tho hrang dân ki itihai hi an izôm zit hrang a ni, an zôm nuam no'n chu a mô pêl an ta, thi an ti; anni indangtu Rengpa ki ni hi.
- ¹⁰Ochai in sâng mihai vaiin thilinhlan irthiang hi fa thei an ta; ochai iompui mani, mi sin hranga om mani, mi dang tukhomin an ifâk hrang ni mah.
- ¹¹Ochai suak, ama poisa le ngeia a irchôk mani, a in sâng suak ngei mani chu fa thei an ti.
- ¹²Ochai nâinu khom ni sian, ochai ni loi pasal a neiin chu thilinhlan irthiang hi fa thei no ni.
- ¹³Passal isûn mani, imâk tâk mani, nâi nei loa a pa ina lût nôk chu fa thei a ti; ochai irchi vaiin fâk irthiang a ni.
- ¹⁴Ochai irchi ni loiin ochai dongtum thil irthiang kha lei fa pal sianlân, a ithuan zit hrang a ni, hmun ringaa hmunkhat a ipêk bel hrang a ni.
- ¹⁵Ochahai khan thilinhlan irthiang hi an porinchetir hrang ni ma.
- ¹⁶Fâk loi hrang irchihai an infâktir hrang ni ma; an fâkin chu thiamno chang an ti, tuang an ti. Hi thilinhlan irthiangtu Rengpa kha ki ni,” a tia.
- ¹⁷Rengpa'n Mosia kuang:
- ¹⁸“Arona hai, a nâihai le Israel mihai chu hril ro: Israel mi'n mani, an laia om nam dangin mani, chonginkungna thilinhlan mani, mâni nuam thua thilinhlan mani, Rengpa kuang hâlvôm hrang an hong chôiin chu,



- ¹⁹a lei pom theina hrang chu sehrâtchal mani, belra mani, kêl mâni, a chal hmêlveiloï a ni.
- ²⁰ Hmêlveina nei chu inhlan khomsian Rengpa'n lei pom no ni.
- ²¹“Mi'n chonginkung suana hrangin thilinhlan, mâni nuam thilinhlan mani, irpôlkhômhai thilinhlan hrangin Rengpa kuang an hong inhlanin chu, an sâ inhlan chu hmêlveiloï a ini hrang a ni; khanchu, lei pom thei a ti.
- ²²Sa mitcho mani, ke'nbâi mani, sirirdul mani, pân hnâi lâk nei mani, a vun phâr mani, Rengpa kuang inhlan no ro, a maichâma inhlan sa no roh.
- ²³Nuam thilinhлана khan sehrât mani, belra mani, irningloiin khom, inhlan thei a ni; chonginkung suana hranga thilinhлана rêk chu pom ni no ni.
- ²⁴Sa tillâk tho mani, inolkhiak mani, pop iliam mani, zêm irdulhai ang mani chu Rengpa kuang inhlan hrang ni mah. Nin ram sûnga hiang hi khap a ni.
- ²⁵“Nam dang sâ chu fâk hrang thilinhlan inhlan hrang ni ma; khang inhlan chu hmêlveiloï nei anga tep sa hrang a ni, pom ni thei no ni.
- ²⁶Rengpa'n Mosia kuang,
- ²⁷Belra mani, sehrât mani, kêl mani, a chal chu a pui kôla sùn sari om a ta, a sùn riat nî ata chu hâlrivôm hrangin hmang thei ni ta a ti.
- ²⁸Sehrâtpui le a tê, belrapui le a tê, kêlpui le a tê sùn khata thilinhлана inhlan hrang ni mah.
- ²⁹Lômthu hrilna thilinhlan nin hlanin dân ang takin itinrêng tho ro, pom thei ni a ti,
- ³⁰fa zit unglân, a tûka hrangin hôi no roi.
- ³¹“Ki thupêkhai hi zôm unglân, zôm roi, kei hi Rengpa ki ni,
- ³²ki'rhming hi nin iporinchetir hrang ni ma, Israel mihaiin chu ki'rthiang ti hi an inhriat hrang a ni, nangni indangtu Rengpa kha ki ni.
- ³³Nin Pathian ni hrangin Aigupta ram ata nangni ki hruai suak a ni, kei hi Rengpa ki ni,” a tia.



Levi Dân 23

Sakhua kûthai

¹Rengpa'n Mosia kuang:

²“Israel mihai chu hril ro: Rengpa chôindômna kût hranga zoro inkunga omni khitin nin ihmang suam hen hrang a ni. Khahai kha hihai hi an ni.

³ Sûn ruk sêng sin tho nin ta, a sùn sari niin chu sabbat a nia, nin irngam hrang a ni. Sin tho loiin Pathian chubai mûkin nin inkhôm hrang a ni. Sabbat nê hi Rengpa dongtum a ni, nin omna kipa nin iser hrang a ni.

⁴Rengpahrang a kût inkunghai chu hihai hi a ni, a zoro inkunga nin ihmang hen hrang a ni.

Ferkân kût le bai chol kop loi kût

(Nam 28.16-25)

⁵ “Tha masa tak tarik sômhleï minli khohloi tiang, hi Rengpa ferkân kût a ni,

⁶kha tha dên tarik sômhleï ringa ni chu Rengpa hranga chol kop loi bai kût a ni: sùn sari sêng chu chol kop loi bai nin ifâk hrang a ni.

⁷A sùn khat nê chu irbukkhômna nei nin ta, sin ite nin itho hrang ni ma.

⁸Sùn sari sêng chu a nitin Rengpa kuang fâk hrang thilinhlan nin inhlan hrang a ni. Sùn sari ni'n chu irbukkhômna nei nôk nin ta, sin pangai ite nin itho hrang ni ma,” a tia.

⁹Rengpa'n Mosia kuang:

¹⁰“Israel mihai chu hril ro: ram nangni ki ipêk hrang nin tung tika chu ochai kuang nin bu thar masa a mût kha nin hong ichôi hrang a ni.

¹¹Ama khan Rengpa kuang thâr a ta, nangni lei pom a ti. Sabbat nê a ni'n chu a tûka ochai khan a ithâr hen hrang a ni.

¹²Bumût thâr ni khan belrate, a chal hmêlveïloi, kum khat vêla, hâlvôm thilinhlan nin hong inhlan hen hrang a ni.

¹³Kha le ileh khan bu le bâl thilinhlan baidi a sa zât her hni, oliv hriak pol nin inhlan sa hrang a ni; kha kha Rengpa nuamlam tak chu a ni; uain litar khat khom in hrang nin inhlan sa hrang a ni.



¹⁴Nin bu thar, ochaihai kuang nin hong inhlan mâka chu nin inêk hrang ni mah. Nin irchihai khomin hi dân hi kumkhua'n an izôm hrang a ni.

Pentikos kût
(Nam 28.26-31)

¹⁵Bumût, Rengpa makunga nin thâr ni, sabat zoi ata tepin hapta sari hek a ta,

¹⁶sabat voisari zoi tûk, sùn sômringa ni'n chu bu le bâl thilinhlan nin chîmu thar kha nin inhlan hrang a ni.

¹⁷Sûngkua tinin mâni hmun senga chol kop loi bai nin iur hrang a ni. Rengpa makunga thâr hrang tang hni nin hong ichôi hrang a ni, bai tang khat chu her hnia rik, baiphit thar sa zât nin isiam masa tak a ini hrang a ni.

¹⁸Kha leh khan belrate kum khat vêla sari, sehrâtchal inkhat, belrachal inhni, hmêlveiloï inzen vântângin Rengpa kuang hong chôi an ta, in hrang thilinhlan le hâlvôm thilinhlan an inhlan hrang a ni; kha kha Rengpa nuamlam tak a ni.

¹⁹Sual irbôlna thilinhlan kêt inkhat inhlan nin ta, thilinhlan belrate kum khat vêla irchang inhni, nin inhlan sa hrang a ni.

²⁰Ochaiin bai le belrate inhni khaRengpa makunga thâr a ta, ochai dongtum kha ser bîk ni a ti.

²¹Kha nê khan tukhomin sin pangai nin itho hrang ni ma, Pathian chubai mûk hrangin nin inkhôm hrang a ni. Hi dân hi nin irchihai khomin an omna kipa kumkhua'n an izôm hrang a ni.

²²Bu nin âtin nin irkhol dênin nin inlût zit hrang ni ma, ât irhmâi nin nei khomin ât zit no roi. Mi'nrianghai le nam danghai hrangin se roi, kei hi Rengpa nin Pathian ki ni.

Bôlzoï kût
(Nam 29.1-6)

²³Rengpa'n Mosia kuang:

²⁴“Israel mihai kha hril ro; tha sarina, tarik khat ni'n chu omni ten unglân, bekul tum unglân, irbukkhômna nei roi.



²⁵Rengpa kuang bu le bâl thilinhlan nin inhlan hrang a ni, nin sin pangai tukhomin nin isin hrang ni mah.

Sual irbôlna nikho roiinpui

(Nam 29.7-11)

²⁶Rengpa'n Mosia kuang,

²⁷“Tha sarina, tarik sôm hi kum tin nam pumpui sual irbôlna nikho roiinpui a nia, bu ngheiin nin inkhôm hrang a ni. Rengpa kuang hâlrivôm thilinhlan nin inhlan hrang a ni.

²⁸Hi nikhuua hin sin nin itho hrang ni ma, nin sual irbôlna inhlan a ni sikin.

²⁹Hi nia thil imo khat lei fâk chu a chipuihai lai ata inhnotsuak hrang a ni.

³⁰Hi nia sintho chu Rengpa ngeiin thatpai a ti.

³¹Hi dân hi nin omna kipa nin irchihai khomin kumkhua'n an izôm hrang a ni.

³²Tarik kuak khohloi, misa tâk ata tarik sôm khohloi misa tâk dênin irngam nia hmang hrang a ni,” a tia.

Kairêng kût

(Nam 29.12-40)

³³Rengpa'n Mosia kuang:

³⁴Tha sarina tarik sômhleis ringa ni ata sôn sari sêng kairêng kût nin ihmang hrang a ni.

³⁵A sôn masa tak nê chu irbukkhôm ir-up nei nin ta, nin sin pangai nin isin hrang ni mah.

³⁶Sôn sari sêng chu a nitin bu le bâl thilinhlan inhlan hen nin ta, a sôn sari ni chu irbukkhôm nei nôk nin ta, bu le bâl thilinhlan khom nin inhlan hrang a ni, Pathian chubai mûk nê a ni, sin nin itho hrang ni mah.

³⁷Hihai hi Rengpa chôindômna'n hruaithe nin hmang hranghai chu a ni, irbukkhôm nei nin ta, fâk hrang thilinhlanhai, hâlrivôm thilinhlanhai, bu le bâl thilinhlanhai le irbôlna chi danghai le in hrang thilinhlanhai, a hun bi taka nin inhlan hrang a ni.



³⁸Hi kût hi sabat ser bâka ser hrang a ni; khan, hi thilinhlanhai hi Rengpa makunga nin inhlan ngai chonginkung thilinhlanhai, nuam thilinhlanhai bâka tho hrang a ni.

³⁹Bu nin ât zoia, tha sarina tarik sômhleï ringa ni ata kût hi sîn sari sêng nin ihmang hrang a ni. A sîn masatak kha irngamna nikhua ni a ti.

⁴⁰Kha nikhuaa khan nin chîmu ra satakhai hong chôi unglân, tûm ônhai le thing incher sasôl sât unglân, Rengpa makunga raifân takin om roi.

⁴¹Khaang khan sîn sari hmang roi. Hi dân hi nin irchihai khomin kumkhua'n an izôm hrang a ni.

⁴²Israel mi murdi chu hi nikhua sari sêng hin dângdia an iom hrang a ni.

⁴³Israel mihai Aigupta ram ata Rengpa'n a hruai suak khan Kairêng chînte tea an omtir ngai ti nin nâi le tehai khomin an inhriat hrang a ni, kei hi Rengpa nin Pathian ki ni.

⁴⁴Khaang tak khan Mosia'n Israel mihai kha Rengpa chôiindômna kût hmang hrangin dân a siam pehai a ni.

Levi Dân 24

Meiser enkol hrang dân

(Fes 27.20-21)

¹Rengpa'n Mosia kuang:

²"Israel mihai khan oliv hriak irthît infâi meiser tui hrangin hong chôi hai sianlân, a zoro taka a ibel hen hrang a ni.

³Irtongna puan in sênga hmun irthiangtak, thuthung siana, puanzâr pên tiang, khohloi tin Arona'n bel a ta, a tûk khovâr dênin a ibel pat hrang a ni. Hi thil hi kumkhuaa tho hrang a ni.

⁴Rângachak inzena siam meiser sianaa meiserhai chu Arona'n irvo a ta, Rengpamakunga khan a zoro taka bel hen hrang a ni.

Bai ser

⁵Baiphit a sa zâtin bai tang sômhleihni, her khata rikin, siam ro,



- ⁶rângachak inzena inluan dokânga khan thâr hni, kirukin se roh.
- ⁷Bero'n zen, idôr ten mani bai sia irtângna khan sehai ro, kha khan bai kha Rengpa kuang fâk hrang thilinhlan ni entir a ti.
- ⁸Sabat ni kipa Rengpa makunga bai thar se hen hrang a ni. Hi hi Israelhai hrangin kumkhuaa tho hrang a ni.
- ⁹Bai kha Arona le a'rchihai dongtum a ni hrang a ni, hmun irthianga khan an ifâk hen hrang a ni, Rengpakuang thilinhlan, ochaihai hranga ser khak chu a ni.

Irhremna irphutôk le irhoitôk

- ¹⁰Aigupta mi ata Israel nu inkhat nâipa le Israel mi an irsuala.
- ¹¹Kha nupang kha Selomiti nâinu a ni, Dan nama Dibria tunu a ni. Israel nu nâipa khan Rengpairhming a hrilinsiata, khua a sâl saa. Mosia kuang an hong hruaia.
- ¹²I anga tho hrang mani ti Rengpa a'rdona, a zuang sâm mâka chu a hrung khak a ni.
- ¹³Rengpa'n Mosia kuang,
- ¹⁴“Kha mi kha dâi pên tiang hruaiin lân, Pathian khua a isâl lai inhretuhai khan a lu chung a an kut irnghathai sianlân, mipuiin lungin dêngthat ri sehai.
- ¹⁵Israel mihai kha hril ro: Pathian khuasâltu khan a ituang ngêt hrang a ni.
- ¹⁶Pathian hrilsiat chu thatpai hrang a ni; Israel pungkhôm murdi'n lungin an idêngthat hrang a ni; Israel mi khom, an laia nam dang omhai khom, Pathian hrilsiat chu thatpai hrang a ni.
- ¹⁷Mi that chu thatpai sa hrang a ni.
- ¹⁸Mi dang sa that petu chu a ithuan hrang a ni, hringna irthûla hringna.
- ¹⁹Mi dang hmêlirveitirtu chu a itho ang takin a chung a tho nôk hrang a ni.
- ²⁰Ru inkhat an khiaktirin chu a ru inkhat inkhiak nôk hrang a ni, mit irthûla mit, ha irthûla ha, hmêlirveitir irthûla hmêlirveitir nôk.



²¹Mi sa inrûka thattu chu thuan a ta, mihriam thattu chu that sa hrang a ni.

²²Hi dân hi Israel mi murdi hrang a ni, nin laia om nam danghai khom huam a ti, Rengpa nin Pathian ki ni,” a tia.

²³Hi thu hi mihai a hril zoiin chu Pathian khosâltu kha riakhmun ata an hruai suaka, an dêngthat tâka. Mosia kuang Rengpa thupêk ang khan Israel mihai khan an tho tâka.

Levi Dân 25

Kum sarina

(Dhn 15.1-11)

¹ Sinai tânga Rengpa khan Mosia kuang,

²“Israel mihai kha hril ro, nangni ki ipêk hrang ram nin tung tika chu Rengpa chôindômna hrangin a kum sarina kipa ram kha inôltir hen roi.

³Kum ruk sêng chîmu song nin ta, nin grephai sât nin ta, a ra irhmal nin ti.

⁴A kum sari kum rêk chu Rengpa chôindômna hrangin inôltir pat hrang a ni, nin loihaia chîmu song no roi, nin grephai sât irnoitir no roi.

⁵Ni bu faôi khom nin i-ât hrang ni ma, ni ienkol loi grep khom nin irhmal hrang ni ma: ram inôltir kum a ni.

⁶Ram chu inôltir khom unglân, nin suakhai hrang, irhlofâk nin ihmanghai hrangin, nam dang nin iompuihai le nin ta hranga fâk hrang chu om dên a ti.

⁷Nin sâ vâihai, nin ramsahai ta hrang khom fâk hrang om dên a ti.

Pêkkîr kum Jubili

⁸Kum sari a bâk sari, kum sômminli kum kuak a hek kum

⁹tha sari, tarik sôm ni, sual irbôlna nikhua roiinpuia khan mi tîr unglân, ram pumpuia bekul tum ri sehai.

¹⁰Kum sômringana chu lôm nin ta, ram sênga om murdihai hrangin zalênna thu nin inpuang hrang a ni, nin ta hrangin Jubili kum ni a ti. In le loi zuar tâk murdi chu a neitu kuang mani, a’rchihai kuang mani, pêk kîr nôk hrang a ni, suaka zuar tâk khom an isuak zit hrang a ni, mâni in le loia kîr nôk an ti.



¹¹Kha kuma khan ite nin isong hrang ni ma, faôï nin i-ât hrang ni ma, nin grep sat irnoi hong ra khom nin ilâk hrang ni mah.

¹²Kumtuangin kha kum kha nin ta hrangin kum ser ni a ta, nin loia hong suak kha nin ifâk hrang a ni.

¹³Hi Jubili kuma hin mâni ram seng nin inei kîr nôk hrang a ni.

¹⁴Khasikin, ram nin zuarin mani, nin lâkin mani, nir chi chanpui Israel mi chu irhoiloï takin ni ilo hrang ni mah.

¹⁵Jubili kum a tung mâna, rama chîmu hong suak thei hrang dôr insâpin, a ram man chu sût hrang a ni.

¹⁶kum a la tamin chu a man a ipung hrang a ni; ram kha zuar tak tak ni maka, chîmu thar thei vai kha zuar thei a ni.

¹⁷Nin Israel chanpuihai huang no roi, Pathian chi roi, kei hi Rengpa nin Pathian ki ni.

Kum sari kuma fâk hrang

¹⁸Rengpa dân hi zôm unglân, a thupêkhai hi zôm unglân, kha rama khan chardong loiin nin iom hrang a ni.

¹⁹Rama chîmu irzir intam a ta, nin inuam do dôr fâk hrang nei nin ta, irtharngam takin om thei nin ti.

²⁰A kum sari kum chu ite ei song noa, ei ât ual no'n chu imo ei ifâk hrang? nin iti a ni thei.

²¹A kum rukna ram chu satvur ki ta, kum hni fâk hrang suak a ti.

²²kum riatnaa chîmu song ra nin ât mâka chu kum ruknaa suak kha nin iruk hrang dôr om a ti.

²³Nin ram chu zuarpai thei no chin ni, ram chu ki ta a ni; nangni chu mikhual nin ni.

²⁴Ram chu nin izuar a ni khomin a neitu khan a irchôk kîr thei ngêt hrang a ni.



²⁵Israel mi chu a sân an rianga, a ram zuar nang rak a ni khomin a'rnâipui urêngin a irtan hrang a ni.

²⁶Lei irtan hrangtu urêng irnaipui neilo chu, ama a hong irfûk irhniang theia, ama ngêtin a'rchôk kîr nôk thei hrang a ni.

²⁷Khaang thila chu Jubili kum tung mâka chu chîmu thar thei zât man insâpin irchôk kîr thei hrang a ni, Jubili kum chu a inei kîr nôk dên hrang a ni.

²⁸Ram ircho kîrna hrang poisa a nei zoi no'n chu a'rchôktu khan Jubili kum dênin nei a ta, Jubili kum chu a neitu chongpu kha a ipêk khîr nôk hrang a ni.

²⁹Kul nei khopuia in neiin a in kha a zuarin chu a zuar ata kum khat sêng khan irtan nôk thei a ti.

³⁰Kum khat sênga a'rchôk kîr thei no'n chu irchôk kîr thei nôk ni ta no ni, a'rchôktu khan a'rchihai dênin a in kha nei thei ta a ti; Jubili kuma khom pêk khîr hrang ni mah.

³¹Khua kulnei loi, thingtâng khuaa in chu ram nin irchôk anga bê hrang a ni, a neitu kuang khan irchôk kîr thei a ta, Jubili kuma pêk kîr nôk dên hrang a ni.

³²Levia irchihai rêk chu an omna hrang inkung khuaa an thil nei chu itiklai khomin irchôk kîr nôk thei an ti.

³³Hi khuaa om Levi irchihaiin in an izuar chu ircho kîr thei no khomhai sian, Jubili kuma chu pêk kîr nôk hrang a ni; Levi chihai an omna hrang inkung khuaa an in nei chu Israelhai laia an kumkhua thil nei indet tak an ni sikin.

³⁴Levi irchihai khua kôla sâ lêngna hmuna chu itiklai khomin zuar hrang ni ma, thil an inei indet omsun a ni.

³⁵Nin urêng Israel, ni kôla om chu, a sân a lei hong inrianga, mâni khom a'rfâ thei no'n chu irhlofâk angin mani, mikhual angin mani ni ienkol hrang a ni; khanchu, ni kôla a iom sa mai hrang a ni.



³⁶A kuang ata a pung irzûl no ro, Pathian chin lân, ni urêngpa chu a bingín a hong iom thei hrang a ni.

³⁷Poisa nin pûktir khomin inpungtir no'n lân, ni bu a'rchôkin ite hlep no roh.

³⁸Kanaan ram hi nangni ki pêka, nin Pathian ni hrangin Aigupta ram ata nangni hruai suaktuRengpa nin Pathian ki ni.

³⁹Ni chipui Israel chu a sân lei hong inriangin ni suaka hong irzuar khomsian, suak angin ni isor hrang ni mah.

⁴⁰Irhlofa le mikhual angin enkol ni ta, Jubili kuma ni insua nôk hrang a ni.

⁴¹Kha zoi tika chu a nâihai le nang suaksan an ta, an in sêng mihai kuang om nôk an ta, an in le loi kha lua nôk an ti.

⁴²Israel mihai hi ki suak an ni, Aigupta ram ata ki hruai suakhaia, suaka zuar hrang ni mahai.

⁴³Indînhai sabak loiin an chung a nin iom hrang ni ma, Pathian chi roi.

⁴⁴Pasal mani, nupang mani suak nin nangin chu nin kôlvêla nam dang ircho roh.

⁴⁵Nin laia om nam dang nâihai chu ircho thei nin ti, khang mi nâi, nin ina suakhai chu nin ta ni thiai a ti.

⁴⁶Nin nâihaiin dong thei an ti, donghai an ta, an hring sêng chu an suak ni an ti. Aniachu, ni chipui Israel kha deng ni intheitir hrang ni mah.

⁴⁷Nin laia om nam dang chu hong irchong zaphai sian khom, nin chipui Israel mihai rêk chu inriang zapin, kha nam dang kuanga mani, ama chipui kuang mani suaka a'rzua.

⁴⁸Lei irzuar tâk khomsian, irchopai nôk thei a ni, ama urêng laia inkhatin mani,

⁴⁹a pa urêngin mani, a pa urêng nâipahaiin mani, a'rkaipui nâi ual mi dangin mani irchopai nôk thei an ti.



⁵⁰Ama irchôktu leh chong an ta, a irzuar kum ata Jubili kum dênin irhlofa pangaiin i dôr mo hlo irman nih ti insâpin, a'rtanna hrang man chu bituk ni a ti.

⁵¹A sôt mani, sôtloi mani a sôt za chu sûtin an man ata irthokin inkhîr nih a ti.

⁵²Jubili tung dêna, a hlo thei hrang dôr chu, a'rhlotu kuang ata irtan suana hrang man dôr chu a ni.

⁵³Irhlofa, kum khat hranga hmang ang dênin an irsor hrang a ni. A pu khan deng a intheitir hrang ni mah.

⁵⁴I ang lama khom, irtansuak a ni no khomin Jubili kuma chu, a mihai leh insua ngêt hrang a ni,

⁵⁵Israel mi rêng rêng, tukhom suaka an intâng kumkhua hrang ni ma; Israel mihai kha Rengpa suak, Aigupta ram ata a hruai suakhai an nia; Rengpa an Pathian kha ki ni.

Levi Dân 26

Thuzômna hranga satvurna

(Dhn 7.12-24; 28.1-14)

¹“Ite ni ual loi, millim sinhai, lung millimhai, chubai mûk hrangin nin isiam hrang ni ma, kei hi Rengpa nin Pathian ki ni.

²Irngam hrang ki iti nikhuahai ser unglân, chubai nin ni imûkna hrang hmun chu inza roi, kei hi Rengpa ki ni.

³Ki dânhai hi nin zôma, ki thupêkhai tak nin sônin chu

⁴a zoro taka rua inthotir ki ta, nin loi inlâp a ti, nin theihai khom ra nuam a ti.

⁵Grep ra irhmal zoro dênin bu ât nang a ti, bu tû zoro dênin nin grep ra irhmal nang a ti. Nuam do dôra fâk hrang nei nin ta, nin rama khan irtharngam takin om nin ti.

⁶Nin rama irngeina inlêngtir ki ta, chitna om loiin zâl nin ta, ram sahrânghai irzûlpai ki ta, râlin nangni hong doi no nihai.



⁷Nin râlhai chu irzûlhai nin ta, khandaiin that nin ti.

⁸Mi pangaiin mi irzakhat inhnê nin ta, mi irza'n chu mi sîngkhat inhnê thei nin ti.

⁹Sat nangni vur ki ta, nâi le te nangni pe nghek ki ta; ki thuthung angin keiin ki itho hrang chu nangni tho pe thiai ki ti.

¹⁰Bu milui nin nêk zoi loi chu a thar siana hrangin pai nang a ti.

¹¹Nin laia om ki ta, nangni intha viat no ning.

¹²Nangni ompui ki ta, nin Pathian ni ki ta, ki mihai ni nin ti.

¹³Kei Rengpa, nin Pathian hin, suak ni ta loi hrangin Aigupta ram ata nangni hruai suak ki ta, nin ringkolhai kha nangni inkhiakpai pea, irthiphaiin nin lêng thei ta a ni.”

Thuzômloi hremna

(Dhn 28.15-68)

¹⁴“Ki thu nin irngaitua nuam noa, ki thupêkhai nin zôm nuam noa,

¹⁵ki dânhai nin hnôla, omdân hrang ki iti nin hnuaisiaa, tho hrang ki itihai nin tho nuam noa ki thuthung nin tho'nsualin chu,

¹⁶hiang hin nangni hrem ki ti: chamairakin nangni inomtir ki ta, inkhurpui, dam thei loi hri irvei nin ta, nin mit dolde suak a ta, hring suakpui no chin ni.

¹⁷Nangni irheisan ki ta, nangni khôkmâktuhai chu nin chungaroirêltuhai ni an ta, irzûl loi khomin intâ tânin om nin ti.

¹⁸Khan khomin ki thu nin la'rngai mai no'n chu a bâk sari'n nangni hrem ki ti.

¹⁹Nin isong tak tak, nin hrâtna chu, nangni insiat pe ki ta; nin ta hrangin irvân chu thîr anga rua insum loiin nangni siam ki ta, nin loihai khom dâr angin châr a ti.

²⁰Môk sin sosôl ni nin ti, nin loia ât hrang om no nia, nin thei kunghai khom ra ual no ni.



- 21“ A ni doi lamin nin oma, ki thu nin la uksak nuam mai no'n chu nin sual nêka irphu bâk saria irkhêlin hri nangni irveitir ki ti.
- 22 Ramsa hâitak tak hong tîr ki ta, nin nâihai le nin sahai hong sê an ta.
- 23“ Hi hremna nin tong hnung khoma ki tiang nin irhei noa, nin ni doi maiin chu,
- 24 nangni irkalpui lamin om ki ta, a bâk saria nain nangni hrem ki ti.
- 25 Nin laia râl hong tîr ki ta, thuthung nin itho'nsiatna phuba nangni hong la an ti. Nin khopui kul sînghaia nin irbîk khomin hri inlêngtir ki ta, râlhaiin hong la dên an ti.
- 26 Nin fâk irvaina inpingtir ki ta, lungthu sôm hmanga fâk le nêk suang nuhai khan lungthu inkhat vai hmangin fâk le nêk suang ta an ti. Sem viviat a ta, an dongtum an fâk zoi hnung khom an phîng la châm dên a ti.
- 27“ Khaang dôr tena khom ki thu nin irngai nuam noa, nin ni la doi maiin chu,
- 28 ningmurin nin chung a insum ki ta, a bâk saria nain nangni hrem ki ti.
- 29 Nin nâipahai le nin nâinuhai hme fapuina rak nin ti.
- 30 Nin millim pathian biakna hmun irsânghai kha insiatpai ki ta, nin mirimhoi hâlna maichâmhai kha insiat ki ta, nin ruakhai chu nin millim biakhai chung a pai ki ta, ki hringna khan nangni khôkmâk a ti.
- 31 Nin khopuihai kha insim ki ta, nin pathian biakhai kha inramtir ki ta, nin irbôlnahai kha nangni lei pom pe no ning.
- 32 Nin ram inkoltir zit ki ta, a luatu nin râlhai khan, a'rkhêl ti tak tak an ti.
- 33 Irdoina hong tung a ta, nam dang rama nangni hruai indarh an ta, nin khopuihai kha chim remrum a ti.
- 34 Nin râlhai rama nin om sûngin nin ram chu irngam a ti.
- 35 Nin om sûngin nin ram kha inôltir nuam mak chêia, nin om no sûng chu a irngam ta hrang a ni.



³⁶Nin râlhai rama hruaihai chu chi tak tak an ta, sùlhna inlêng maia luan intân an ta, khandaiia irzûl ang dênin tûte irzûl loi khomin tûk an ti.

³⁷Khandaiia irzûl ang dênin irpalthût irhlôm an ta, râl doi nôk hrang tûte om no chin ni.

³⁸Mi rama thi nin ta, kha khan nangni phûm an ti.

³⁹Nin râlhai rama la dam sun omhai khom nin سوالنا sik le nin pahai سوالنا sikin zui irhmang nin ti.

Thil sa hong tung hrang a ni

⁴⁰“Nin ni doia, nir heisanin kha mihai khan an pahai leh thilsual an tho a nih ti inhre suak an ta,

⁴¹anni sikin ki'rheisana, an râlhai rama kin hnotsuak a nih ti irhriat an ta; khanchu, an lungrîl irhnuai an ta, an سوال man an pêl hnung chu,

⁴²Jakoba, Isaka le Abrahama hai kuang ki chonginkung kha inhriat mai ki ta, ki mihai chu, hi ram hi ki pêk hrang nôk thu hril thar nôk ki ti.

⁴³Aniachu, ram chu a'rngam theina hrangin ram ata mihai kha lâk suak bak hrang a ni. Ki dânhai le ki thupêkhai hnôla an thilsual tho man kha an ituang bak hrang a ni.

⁴⁴Khaang tak khan hrem khom inlân an râlhai rama an om kha, sehai rak no ninga, inboipaihai zit ual no ning.

⁴⁵An irchibulhai leh ki thuthung kha inthar nôk ki ti. Aigupta ram ata khan nam tin hmua ki mihai kha, kei Rengpa hi an Pathian ni hrangin ki ihruai suak an ni kha te. Kei hi Rengpa ki ni,” a tia.

⁴⁶Hi hi Sinai tânga Mosia kuang Rengpa dân le a thupêk, Israel mihai hranga pêk kha a ni.

Levi Dân 27

Rengpa kuanga thilpêk chungchâng

¹Rengpa'n Mosia kuang:



- ²“Israel mihai kha hril ro: mi’n Rengpa kuang mihriam kha pêk inkung sianlân, kha mihriam irphutôk inkung kha Rengpa dongtum ni a ti.
- ³pasal, kum sômhni ten, kum sômruk dênin, sumru sekel sômringa varh ni a ti.
- ⁴Nupang puihling tâk chu sumru sekel sômthum varh ni a ti.
- ⁵Pasal nâipang, kum ringa ten kum sômhni dênin sumru sekel sômhni varh ni a ta, nupang a niin chu sumru sekel sôm varh ni a ti.
- ⁶Nâitesen tha khat tena kum ringa dênin pasal chu sumru sekel ringa varh ni a ta, nupang chu sumru sekel thum varh ni a ti.
- ⁷Kum sômruk chung tianga pasal chu sumru sekel sômhlel ringa varh ni a ta, nupang chu sumru sekel sôm varh ni a ti.
- ⁸A pêktu chu a sân an riang sikin a’rtansuakna man tuk dôr khi a pêk thei no’n chu pe hranga a inkung mihriam kha ochai kuang hong hruai a ta, ochai khan bituk nêka tôm ual, a pêk thei hrang dôr irhoi, lei tuk pe a ti.
- ⁹Rengpa kuang thilinhlan hmangrua mi’n sa pe hrangin an kungin chu Rengpakuanga pêk chu ser irthiang khak a ni ta.
- ¹⁰A pêktu khan a pêk suana hrang mani, a nêka thil dang mani pe thei ta no ni; khaanga tho a tumin chu a ruaiin Rengpa ta hrang ni a ti.
- ¹¹Sa, fâk irthiangloi zât, Rengpa kuang thilinhlan hmangrua loi chi a pêkin chu ochai kuang hong kai a ta,
- ¹²ochai khan a man hrang zât a bi lei tuk a ta, khang dôr kha a mana tep hrang a ni.
- ¹³A pêktu khan irtan a nuamin chu a man bituk dôr le, kha hmun ringaa hmun khat bêlin irtan thei a ti.
- ¹⁴Mi’n ama in ngei Rengpa kuang pêk inkung sianlân, ochaiin a in kha a sa le saloia zirin a man inrît a ta; a inrît dôr kha in man hrangin tep ni a ti.
- ¹⁵A in kha irtan a nuamin chu a man inrît dôr kha pe a ta, hmun ringaa hmun khat a ipêk belsa hrang a ni.



- ¹⁶Mi'n ama ram chimrip Rengpa hrangin pêk an kungin chu chîmu a isonga zirin a man chu inrît ni a ta; barli tân sômminli suakna kha sumru sekel sômringa varh mânin tep ni a ti.
- ¹⁷Jubili kum zoi renga pêk a niin chu a man chuka tep hrang a ni.
- ¹⁸Kum danga pêk a ni'n chu ochaiin Jubili dênin i dôr mo rama suak thei ti insâp a ta, khaanga khan a man chu ti hrang a ni.
- ¹⁹A neitu khan ram kha a'rtan nuamin chu a man ti dôr kha pe a ta, hmun ringaa hmun khat a ipêk bel hrang a ni.
- ²⁰A loi kha ama'n a'rtan nuam no'n mani, mi dang irchotir mani a ni'n chu irtan thei ni ta no ni.
- ²¹Jubili kuma chu ram kha Rengpa tah hrangin ser a ni tâka, pêk a ni tâk sikin ochai ta hrang a ni ta.
- ²²A ram irchôk, a dongtum ram ni loi, a pêkin chu,
- ²³ochaiin Jubili dênin a man insâp a ta, kha ni ngêta khan a chimrip kha pe a ta, a poisa chu Rengpa ta a ni.
- ²⁴Jubili kuma chu a neitu kuanga khan mani, a'rchi hai kuang mani, pêk kîr nôk hrang a ni.
- ²⁵Hi thil man insâp hi tempil varh lung tianlai anga insâp hrang a ni. Sekel khat kha Gera sômhni dôr a ni.
- ²⁶Sa suak masatak chu Rengpa ta sai a nia, nuam thilinh lana mani pe hrang ni ma: sehrâtte khom kêlte khom Rengpa ta sai a ni.
- ²⁷Sa fâk irthiangloi ata masatak rêk chu a man inrît dôr le hmun ringaa hmun khat belin irtan thei a ni; a pêktu'n a'rtan nuam no'n chu mi dang kuang a man inrît ang khan zuar hrang a ni.
- ²⁸Rengpa ta hrang lele mi'n ainei ang ang, mihriam mani, sâ mani, a dongtum ram mani, a iser tâk chu zuar thei ni ma, irtan thei ni ma, kumkhua'n Rengpa ta ni ta a ti.



²⁹Mihriam khom nisian, khaanga pêk tâk chu irtansuak thei ni ta ma, thatpai hrang a ni.

³⁰Loi ram ata hong suak rêng rêng, bu khom, thei khom, sôma inkhat chu Rengpa ta a ni.

³¹Mi'n kha kha a'rtan nuamin chu a man pangai bana hmun ringaa hmun khat pêk belin irtan thei a ti.

³²Sa vâi rêng rêng sôma inkhat chu Rengpa ta a ni.

³³Sa neitu khan a sisiat sômnaa a isia hrang ni ma, a sa ual kha a siat ualin thûl hrang ni ma, thûl a tumin chu Rengpa ta ruruai ni a ta, irtan thei khom ni no ni.

³⁴Hi thupêk hi Sinai tânga Mosia kuanga Israelhai hrangin Rengpa ipêk a ni.



Nambar

Nambar 1

Israelhai irtepnâ maton tak

- ¹ Israelhaiin, Aigupta ram an suaksan zoi kum hnina, a tha hnina, sùn maton taka khan, Sinai ramchâra irtongna Biakbuk khan Rengpa'n Mosia kha a chongpuia,
- ²“Nangma le Arona hin Israel irchihai chu an panam dungzuiin le an in sùng mi angin tephai roi.
- ³Râl doi thei tak pasal kum sômhni le a chung tianga mi chu tephai ving roi.
- ⁴Nang changpui hrangin panam tina pâfonghai chu inhrilhai ro,” a tia.
- ⁵Hi sinthopui hranga panam tina an inthang suakhai chu hihai hi an ni: Reubena panama mi Sedeura nâipa Elizura,
- ⁶Simeona panama mi Zurisadaia nâipa Selumiela hai,
- ⁷Juda panama mi Aminadaba nâipa Nasona hai,
- ⁸Isakara panama mi Zuara nâipa Nethanela hai,
- ⁹Zebulun panama mi Helona nâipa Eliaba hai,
- ¹⁰Josefa irchi Efraima panama mi Amihuda nâipa Elisama hai, Manasea panama mi Pedazura nâipa Gamaliela hai,
- ¹¹Benjamina panama mi Gideona nâipa Abidana hai,
- ¹²Dana panama mi Amisadaia nâipa Ahiezera hai,
- ¹³Asera panama mi Okrana nâipa Pagiela hai,
- ¹⁴Gada panama mi Deuela nâipa Eliasapha hai,
- ¹⁵Naftalia panama mi Enana nâipa Ahira hai hi.
- ¹⁶Annihai hi mipuihai inthang, an panam sùnga hruaitu, Israel in sùngkua pâfonghai kha an ni.
- ¹⁷Mosia le Arona chu hi mi sômhleihnihai hin an isanhai a nia,



¹⁸khanchu Israel nam murdihai chu tha hni sũaga sũan masa taka khan an koibukhaia, panam tin le in sũangkuahai an tephaia. Pasal kum sũamhni chung tianga mi chu irziakin an itephai a ni tâka.

¹⁹Rengpa'n thu a ipêkhai ang takin, Mosia'n Sinai ramchâra khan mipuihai kha a itephai a ni.

²⁰Passal kum sũamhni le a chung tianga râl doi theihai kai chu, an panam le an in sũangkua ang takin an irhming an irziakhaia, Jakoba nâilutîr, Reubena panam ata phutin hiang hin an tam dân chu a ni.

²¹Reubena panama mihai chu sũangminli sũangruk le irzaringa an ni.

²²Simeona panama irchihai chu an itam lam angin pasal kum sũamhni chung tianga râl kâp thei dôrhai chu,

²³Simeona irchihai murdi chu sũangringa sũangkuak irzathum an ni.

²⁴Gada panama irchihai chu an irhming tam dân angin kum sũamhni chung tianga râl doi thei dôr chu,

²⁵Gada irchihai chu sũangminli sũangringa irzaruk le sũamringa an ni.

²⁶Juda panama irchihai chu an irhming tam dân angin kum sũamhni chung tiangahai chu,

²⁷râl doi thei dôra mi a chung tiang Juda irchihai chu sũangsari sũangminli le irzaruk an ni.

²⁸Isakara panama irchihai chu an itam dân angin kum sũamhni chung tianga râl doi thei dôrhai chu,

²⁹Isakara irchihai chu sũangringa sũangminli irza minli an ni.

³⁰Zebulun panama irchihai chu, an irhming tam dân angin kum sũamhni chung tianga mi chu

³¹râl doi thei tena mihai chu an rêuंगin sũangringa sũangsari le irzaminli an ni.

³²Josefa panam laia mi Efraima irchia mi an tam dân angin kum sũamhni chung tianga râl doi thei



- ³³Efraima irchihai chu sîngminli irzaringa an ni.
- ³⁴Manasea panama irchi an irhming tam dân angin kum sômhni chung tianga râl kâp thei
- ³⁵Manasea irchihai chu an rêngin sîngthum sânghni irzahni an ni.
- ³⁶Benamina panama irchihai, an irhming fe dân angin kum sômhni chung tianga râl doi thei,
- ³⁷Benamina panamhai chu sîngthum le sângringa irzaminli an ni.
- ³⁸Dan panama irchihai chu an irhming irziak dân angin kum sômhni chung tianga râl doi thei
- ³⁹Dan irchihai chu sîngruk sânghni irzasari an ni.
- ⁴⁰Asera panama irchihai chu an irhming irziak dân angin kum sômhni chung tianga râl doi thei
- ⁴¹Asera irchihai chu an rêngin sîngminli sângkhat le irzaringa an ni.
- ⁴²Naftalia panama irchihai chu an irhming irziak lam angin kum sômhni chung tianga râl doi thei
- ⁴³Naftalilai chu sângringa sângthum irzaminli an ni.
- ⁴⁴Hihai hi an ni, Mosia le Arona'n Israel nam pâfonghai sômhleihni an itep hai thei chu an ni.
- ⁴⁵Khanchu râl doi thei dôrhai chu Israel irchi, a panama tepin kum sômhni chung tianga itep hai chu an ni.
- ⁴⁶An rênga tep theia om dôr chu nuairuk sângthum irzaringa le sômringa an ni.
- ⁴⁷Levi mihai chu panam danghai laia khan tep sa ni mahaia,
- ⁴⁸Rengpa'n Mosia kuang khan,
- ⁴⁹"Râl kâp thei hrang dôr pasal ni tep hai tena khom Levihai chu ni itep sahai hrang ni ma;



⁵⁰Levi irchihai chu inhriattirna Biakbuk le a neinun hmangruahai kha inenkoltirhai roh. A neinunhai kha irzônhai sianlân, donsuihai sian, a kôlvêla khan an puan inhai inzar ngai an ti.

⁵¹Khan, nin Biakbuk kha nin son hrang rikipa, Levia irchihai khan insiat an ta, nin inzar nôk hrang khomin Levia irchihai khan an inzar hen hrang a ni; mi dang hong irrol tumhai chu thatpaihai hrang an ni.

⁵²Khanchu Israel mihaiin an omna hmun senga, a pa pâlîn, an tam dân izirin riakbukhai chu siam an ti.

⁵³Khannisian Levia irchihaiin chu Biakbuk vêla khan riakbuk irfûktir hrang a ni. Biakbuk kha enkol an ta, kha no'n chu mihaiin hong nâi an ta, Israelhai chungang nîngmurna hong tungna lik a ti," a tia.

⁵⁴Khaang tak khan Israel mihai khan Rengpa'n Mosia kuanga a ihril pe lam ang takin an tho tâka.

Nambar 2

Panam tinhai riakbuk khuar dân

¹Rengpa'n Mosia le Arona a chongpuihaia,

²"Israel mihaiin riakbuk an siam tika chu, mi tinin mâni pâl irsinsiana le mâni panam puanzâr târ an ti.

³Nisua tianga Juda panam irsinsiana hnuaia a pâl pâlâ puanzâr hranga an hruaituhai chu hihai hi an ni. Aminadaba nâipa Nasona ni a ti.

⁴A pâlhai tam lam chu sîngsari le sângminli irzaruk an ni.

⁵Khan ama zoia puan in zârtu hrang chu Isakara irchia mi ni a ti.

⁶Isakara irchihai hruaitu chu Zuara nâipa Nethanela ni a ti, an tam lam chu sîngringa sângminli le irzaminli an ni.

⁷Zebulun irchihai hruaitu hrang chu Helona nâipa Eliaba mi chu

⁸an tam lam chu sîngringa sângsari le irzaminli an ni.



- ⁹An pâl tam dân angin Juda mi an itephai chu nuaikhat sîngriat sângruk le irzaminli an ni. Annihai hin an ihruaihai mai hrang a ni.
- ¹⁰An pâl tam dân izir angin sim tiang panga khan Reubena hai leh om an ta; Reubena irchihai hruaitu hrang chu Sedeura nâipa Elisura ni a ti.
- ¹¹An tam dân chu sîngminli sângruk le irzaringa an ni.
- ¹²Khan anni zoia zâr hranghai chu Simeona irchihai ni an ta, Simeona irchihai hruaitu hrang chu Zurisadaia nâipa Selumiela ni a ti.
- ¹³An tam lam dân chu sîngringa sângkuak le irzathum an ni.
- ¹⁴Khan, Gada irchihai chu an hruaitu hrangin Reuela nâipa Eliasapha ni a ta;
- ¹⁵an tam lam chu sîngminli sângringa irzaruk le sômringa an ni.
- ¹⁶Reubena mihai tam dân chu nuaikhat sîngringa sângkhat irzaminli le sômringa an ni. Annihai hi a dôntea suak hrang chu an ni.
- ¹⁷Khanchu irtongna puan in kha suaksan an ta, Levi irchihai chu a laia om an ta; an omhmun izir angin a pa pâl in fe an ti.
- ¹⁸An tam dân izir angin nitâk tiang panga khan Efraimahi om an ta, an hruaitu chu Amihuda nâipa Elisama ni a ti.
- ¹⁹An tam lam chu sîngminli irzaringa an ni.
- ²⁰Anni zoia chu Manasea hai ni an ti,
- ²¹Manasea hai hruaitu hrang chu Pedazura nâipa Gamaliela ni a ti; an tam lam chu sîngthum sângghni le irzahni an ni.
- ²²Anni zoia chu Benjamina irchihai, an hruaitu hrang chu Gideon nâipa Abidana ni a ti.
- ²³An tam dân chu sîngthum sângringa le irzaminli an ni.
- ²⁴Efraima mi tam lam chu nuaikhat sîngriat irzakhat an ni. Anni hi a dônte'n an isuak hrang a ni.
- ²⁵“An pâl tam dân angin Dan mihai chu hmâr tiang khan om an ta, Dan irchihai hruaitu hrang chu Amisadaia nâipa Ahiezera ni a ti.



²⁶An tam lam chu sîngruk sângzni le irzasari an ni.

²⁷Anni zoia puan in zâr hranghai chu Asera irchihai ni an ti. Asera irchihai hruaitu chu Okrana nâipa Pagiela ni a ti.

²⁸An pâl tam lam chu sîngminli sângkhat le irzaringa an ni.

²⁹Anni zoia hrang chu Naftalia irchi hai; an hruaitu hrang chu Enana nâipa Ahira ni a ti.

³⁰An tam lam chu sîngninga sângthum le irzaminli an ni.

³¹Dan mihai tam lam chu nuaikhat sîngninga sângsari le irzaruk an ni. Khan annihai hin a pa pâlâ suakin an ife irzôt chit hrang a ni,” tiin.

³²Hihai hi Israel irchihai insûngkua tina mi, an itephai chu an ni, an rêngin nuairuk sângthum irzaringa le sômninga an ni.

³³Khannisian, Levi irchihai kha chu Rengpa'n Mosia thu a ipêk angin, Israel irchihai laia khan tep sa ni mahai.

³⁴Rengpa'n Mosia thu a ipêk ang khan Israel irchihaiin a pa pâlâ puanzâra, a panam ang dungzuiin a pa pâlîn an suak ngai a ni.

Nambar 3

Arona insûngkuahai

¹Hihai hi Sinai tânga Rengpa'n Mosia a chongpui laia Arona le Mosia in sûngkuahai chu an ni.

² Arona'n nâipasal minli a neia, a nâilutîr tak chu Nadaba a nia, khan Abihua, Eleazara le Ithamara hai hi an ni.

³Anni chu sahriak nâl an nia, ochai hranga inhlan an ni.

⁴ Khannisian Nadaba le Abihua chu Rengpa kuang mei irthiang loi Sinai ramchâra khan an inhlan sikin, Rengpa makunga khan an thi tâka, nâi khom nei mahaia. Eleazara le Ithamara hin an pa Arona dam sûng hin ochai sin an itho a ni.

Levi irchihai ochai sintho hranga inkung an ni

⁵Khanchu Rengpa'n Mosia a chongpuia,



⁶“Levi irchihai kha ochai Arona kuang hruaihaiin lân, a sin an tho pe theina hrangin a kuang inomtirhai roh.

⁷Ama le mipuihai sin thoin, irtongna puan in Biakbuk puan ina khan Biakbuk sin chu tho an ti.

⁸Neinunhai kha enkol an ta, Israel irchihai ta hrangin Biakbuk sin chu tho an ti.

⁹Levihai sintum tak chu Arona le a nâipasalhai ta hranga sintho hi a ni.

¹⁰Arona le a nâipasalhai chu ochai sintho hrangin tihai ni ta, nam dang a hong irrolhai chu that ni an ti,” a tia.

¹¹Rengpa’n Mosia a chongpuia,

¹²⁻¹³ “Atûn hin chu Levi irchihai chu ki ta an ni tâka, Aigupta mi nâilutîr murdi ki that lai khan; Israel insûngkua tina nâilutîr le sa a suak masa tak chu keima ta hrangin ki inhlan irthianghaia. Khasikin atûn Israel nâilutîrhai irthûlin Levi irchihai hi ki ta ni an ti; keima hi Rengpa chu ki ni,” a tia.

Levi irchihai tepna

¹⁴Rengpa’n Sinai ramchâra khan Mosia thu a pêka,

¹⁵“Levi irchihai chu an irchi suanpâr angin sûngkua tinhai chu pasal tha khat rengata a chung tianga kai chu tephai roi,” a ti pea.

¹⁶Khanchu Rengpa’n thu a ipêk lam takin Mosia’n a tephai ta.

¹⁷Levia nâipasalhai chu Gersona, Kohata le Meraria hai an ni, an irhming hi an irchihai khan an irput a ni.

¹⁸Gersona nâipasalhai chu Libnia le Simeia an ni.

¹⁹Kohata nâipasalhai chu Amrama, Izara, Hebrona le Uzela hai an ni.

²⁰Meraria nâipasalhai chu Malia le Musia hai an ni. Hihai irhming hi an irchihai khan nam irhminga an irput a ni.

²¹Gersona chu Libni le Simei insûngkua irchihai an ni; hihai hi Gersona in sûng mihai chu an ni.



- ²²Pasal, tha khat chung tianga tephai kai chu mi sângsari irzaringa an ni.
- ²³Gersona irchihai khan Biakbuk kha nitâk tiang an inzar hrang a ni.
- ²⁴Gersona panamhai hruaitu hrang chu Laela nâipa Eliasafa ni a ti.
- ²⁵Gersona mihaiin an ienkol hrang chu Biakbuk le puan in le a chung irkhûna hai, irtongna biakbuk mikot puanzârhai,
- ²⁶A kholâi le maichâm irkulna puanzârhai a kholâi kotbâia puanzârhai hi ni a ti. Annihai hi, hi sina hin mophurtu an ni.
- ²⁷Amrama mihai, Izhara mihai, Hebrona mihai, Uziela mihai, hi Kohata panama mi an ni.
- ²⁸Pasal, tha khat ata a chung tianga tepa om thei kai chu sângriat irzaruk an ni.
- ²⁹Hi namhai hi Biakbuk sim tiang puan in inzâr an ti.
- ³⁰Kohatha mihai hruaitu hrang chu Uziela nâipa Elizafana nih a ti.
- ³¹An ienkol hrang chu Thuthung Bôm doina, meiser intoina, maichâmhai le ochaihaiin hmun irthianga an ihmang bêl le bûrhai le puanzârhai, kha tianga sin kha an itho ual hrang a ni.
- ³²Levi irchihai hruaitu ulian tak chu Arona nâipa Eleazara ni a ta, hmun irthiang enkoltuhai ir-ôihai a ti.
- ³³Mali le Musi hi Meraria nama mi an ni.
- ³⁴Pasal, tha khat ata a chung tianga itep theihai chu mi sângruk irzahni an ni.
- ³⁵Hi namhai hin Biakbuk hmâr tiang puan inzar an ta, Abihaila nâipa Zuriela chu anni laia hruaitu tak ni a ti.
- ³⁶Meraria nam enkol hranga inkunga om chu, Biakbuk thingphêkhai, tângkhanghai, chopuihai, a'rngatna bul, khang sin kha an itho ual hrang chu a ni.
- ³⁷Khabana, chopuihai, a bulhai, hêmfunghai le a hruihai hi an ienkol sa hrang a ni.



³⁸Mosia le Arona le a nâipasalhai chu Biakbuk maton tiang, nisua tianga puan in inzar an ti. Anni chu Israel mipuihai ta hrangin hmun irthianga sin thôna mophurtu ni an ta, mi danghai an irrolin chu that ni an ti.

³⁹Rengpa'n Mosia thu a ipêk angin Levi irchia mi pasal tha khat ata a chung tianga mi tepa omhai chu sînghni le sânghni an ni.

Levi irchi le nâilutîr irtanna

⁴⁰⁻⁴¹Rengpa'n Mosia kuang, "Israel nâilutîr pasal kai chu keima ta an nia. Khasikin tha khat rengata a chung tianga nâilutîr pasal kai chu tephai roi. Khannisian anni irthûla khan Levi irchihai hi keima ta hrangin ki innanghai an ni, kei hi Rengpa chu ki ni. Khabana Israel irchihai, sa an tê maton takhai irthûlin Levi irchihai sa chu ki izong sa a ni," a tia.

⁴²Khanchu Rengpa'n thu a ipêk ang lam takin Mosia'n Israel irchihai laia nâilutîrhai chu a tep tâka.

⁴³Tha khat ata a chung tianga mi kai chu a rêngin sînghni le sânghni irzahni sômsari inthum an ni.

⁴⁴Khan Rengpa'n Mosia kuang,

⁴⁵"Atûn chu Levi irchihai le an sahai kha Israel nâilutîrhai irthûla le an sa inte maton takhai kha keima ta hrangin inhlan irthiangtirhai roi.

⁴⁶Khanchu Levi irchihai nêkin Israel nâilutîrhai chu mi irzahni sômsari inthumin an tam sikin irtan ni an ti.

⁴⁷A lu kipa, hmun irthianga Sekel tep dân angin sekel ringa leh irtanhai ni ti.

⁴⁸Kha tangka kha Arona le a nâipasalhai kuang pe ni ti," a tia.

⁴⁹Mosia'n khaang khan a thoa,

⁵⁰Sekel sângkhat irzathum sômruk ringa a chôia,

⁵¹Arona le a nâipasalhai chu a pêkhai tâka.

Nambar 4

Levi irchihai laia Kohatha irchihai

¹Khan, Rengpa'n Mosia le Arona kha a chongpuihaia,



- ²“Levi irchihai laia Kohatha mihai kha an panam le an insûngkuaa om dôr tephai unglân,
- ³irtongna Biakbuka sintho thei hrang pasal kum sômthum le sômringa kêra mi chu tephai ving roi.
- ⁴Irtongna Biakbuk hmun irthiang taka Kohatha mihai sintum chu hihai hi a ni.
- ⁵Riakbuk irthonna a om hrang tika chu, Arona le a nâipasalhaiin hmun irthianga Thuthung Bôm maton tianga puanzâr kha lapai an ta, Thuthung Bôm kha irkhû an ti.
- ⁶Kha kha savun leh inkhumtir an ta, kha zoia chu a chung taka khan puan dum leh inkhum sa an ta, a zônfung khom inkhop an ti.
- ⁷Khanchu inentirna bai dokâng chung a khan khêng hai, mirimhoi siana khuri hai, khilât ir-ûm le uain thilinhlan na khilât lianhai sia an ta; kha dokânga khan bai kha chu a iom mai hrang a ni.
- ⁸Kha kha puan a seninlâr leh irkhu an ta, savun leh tuam an ta, khanchu a zônfunghai kha inkhop an ti.
- ⁹Khanchu meiserhai leh a toina hranghai khom meichephai, a’rvut siana hai, le oliv hriak siana hai chu puan dum leh irkhu an ti.
- ¹⁰Khahai kha a neinun le savunin infûn an ta, a’rzônna khom sia an ti.
- ¹¹“Kha hnung chu rângachak maichâm kha puan dum leh irkhu an ta, savun leh irkhu an ta, a zônfung khom inkhop an ti.
- ¹²Hmun irthianga bêl le bûrhai kha puan dum leh infûn an ta, savun irkhu an ta, a zônfung khom inkhop an ti.
- ¹³Maichâma meirivâm kha luakpai an ta, a chung a puan senduk irkhu an ti.
- ¹⁴A chung a khan maichâma an sin thônahai kha meiri-al indomna hai, meichep hai, luakor leh tâbor hai kha sia an ti, savun leh irkhu an ta, a zônfung irbun an ti.



¹⁵Khanchu riakbuk irthon hrang tika chu, Arona le a nâipasalhai khan neinun irthiang murdi kha an inkhumhai zoi tena chu Kohatha mihai chu a'rzôn hrangin hong an ti. Kohatha mihai khan neinun irthiang kha an itôn hrang ni ma, an thi lina hrangin. Hihai hi irtongna Biakbuk Kohatha mihai mophurna chu a ni.

¹⁶Ochai Arona nâipa Eleazara sintum chu meiser inchokna hranga sahriak hai, mirimhoi hai, baidi thilinhlan hai, ir-al theina hriak hai le Rengpa kuanga thil tinrêng inhlanna hai tho hi a ni," a tia.

¹⁷Khanchu Rengpa'n Mosia le Arona kha a chongpuihai nôka,

¹⁸"Kohatha irchihai panam chu Levi irchihai ata boi loiin,

¹⁹thil irthiang saihai kôla an hong, an ithi hrang hi phalhai no roi, kha thil khan a dêhai lina hrangin, Arona le a nâipasalhai kha a sûnga lût an ta, mi tinin an itho hrang le an ipêl hrang dân chu hrilhai an ti.

²⁰Khannisian Kohatha irchihai kha lûtin ochaihaiin thil irthiang an irkhu lai kha an va en hrang ni ma, an thi lina hrangin," a tia.

Levi irchia Gersona hai sintum

²¹Khan, Rengpa'n Mosia a chongpuia,

²²Gersona irchihai khom panam le insûngkua om dôr tephai ving roh.

²³Irtongna Biakbuka sintho thei hrang pasal kum sômthum ata sômringa kêra mihai chu tephai ving roh.

²⁴Gersona irchihai sintum chu hihai hi ni a ti:

²⁵Biakbuk le irtongna ina puan zârhai chung irkhumna hai, savun a chung taka inkhumna hai, a kotbâia puanzâr hai,

²⁶Biakbuk kholâia puanzârhai le maichâm kôla puanzârhai a kholâi lûtna kotbâia puanzârhai le a neinun dang murdi chu irzôn an ta, kha thila la nang danghai chu tho ving an ti.

²⁷Mosia le Arona'n Gersona mihai khan an sintumhai thoin, Arona le a nâipasalhai chôi hrang an itihai kha an tho le tho loi en an ti.



²⁸Khahai kha irtongna Biakbuka Gersona mihai sintum chu a nia, an sintum tak chu ochai Arona nâipa Ithamara'n inkung pehai a ti.

Levi irchia Meraria sintum

²⁹Rengpa'n Mosia kuang, Levi mihai laia Meraria panamhai khom a in sêngkuua om dôr tephai ving roh.

³⁰Irtongna Biakbuka sintho thei hrang mi pasal kum sômthum le sômringa kêra mi chu tephai ving roh.

³¹Irtongna Biakbuka sintum chu hihai hi a ni; Biakbuk thingphêk hai, tângkhang hai, chopui hai, a'rngatna bul hai,

³²a mikot irkulna chopui hai, a'rngatna bul hai, a hêmfung hai, a hrui hai le neinun dang murdi irzôn hrang nih a ta, an irhming indangin an sintum ni indang pehai hrang a ni.

³³Hihai hi Meraria namhaiin Biakbuka an sintum chu a ni: ochai Arona nâipa Ithamara enkolna hnuaia irzôn ngai an ti.

Levi mihai irtepna

³⁴Rengpa thupêk angin Mosia, Arona le Israel hruaituhai khan Levi irchia panam inthumhai,

³⁵Kohatha, Gersona le Meraria hai chu an tephai tâka. A panam le a in sêngkuain puan ina sintho thei hrang pasal kum sômthum ata sômringa kêra mi kai chu an tephai vinga.

³⁶A panama tephai chu sânghni irzasari le sômringa an ni.

³⁷Khahai kha an ni, irtongna puan ina sintho ngai, Kohatha irchia an itep, Mosia hmanga Rengpa thupêk Mosia le Arona itep hai chu.

³⁸Gersona nâipasalhai irtongna puan ina sintho hranga hmu zâthai chu.

³⁹A panam dungzui angin kum sômthum ata a chung tiang kum sômringa mi tena tep an ni.

⁴⁰An nam le insêngkuua an itep hai chu sânghni irzaruk le sômthum an ni.



⁴¹Annihai kha Gersona nâipasalhai irtongna puan ina sinthohai chu, Rengpa thupêk angin Mosia le Arona'n an itep hai chu,

⁴²Meraria nâipasalhai irtongna puan ina sintho hranga hmu zâthai chu,

⁴³kum sômthum ata kum sômringa mi ten tep an ni.

⁴⁴A insûngkua puma an itep hai chu sângthum irzahni an ni.

⁴⁵Annihai kha, anni Meraria nâipasalhai Mosia hmanga Rengpa thupêk anga Mosia le Arona'n an itep hai chu,

⁴⁶Levi irchihai irtongna ina sintho hranga mi pêl thei hranghai chu.

⁴⁷A nam le insûngkua angin kum sômthum ata sômringa mi ten Mosia, Arona le Israel hruaituhai itep zât chu an ni.

⁴⁸An itep hai chu sângriat irzaringa le sômriat an ni.

⁴⁹Mosia hmanga Rengpa thupêk angin mi tin an thotum le an sintum dungzuia tep an ni. Rengpa'n Mosia thu a ipêk ang taka a itep hai chu an ni.

Nambar 5

Mi irthiang loihai

¹Khan Rengpa'n Mosia a chongpuia,

²"Israel irchihai kha riakbuk ata kha inphâr murdi, thilsual thohai le mithi sika porinchehai chu inhnotsuak ving hrangin thu pehai roh.

³Hianga porinchehai hi chu kêlsuapahai ro, ki mihai laia ki omna riakbuk kha an porinchetir lina hrangin," tiin.

⁴Israelhaiin khang khan an thoa, riakbuk ata kha an kêlsuahaia.

Tho'nchâina inhriatsuak

⁵Rengpa'n Mosia a chongpuia,

⁶"Israel irchihai kuang hiang hin hril ro, pasalin mani, nupangin mani, Rengpa chung a iamomna nei loiin, mi chung a tho'nsualna a neiin chu, kha mi kha theilo chang hrang a ni.



⁷A tho'nsualna sikin thupha chôi a ta, a tho'nsualna man chu irkip takin tuam a ti; hmun ringa senin hmun khat, a tho insualnapa kha pe sa a ti.

⁸Khannisian kha mi kha a lei thia, tho'nsualna man bêna hrangin sêngsuak irnaipui a nei noa ni'n chu, Rengpa kuang inhlan a ta, ochaihai dongtum ni a ti. Hi tho'nsualna man hi thâr irthiangtirna hrangin kêlbelrachal a la ichôi sa hrang a ni.

⁹Khanchu Israel irchihaiin thil irthiang Rengpa kuang an inhlan murdi chu ochai an ipêkpu takpa dongtum ni a ti.

¹⁰Mi tinin thilinhlan ochai kuanga an ipêkhai kai chu a dongtum ni a ti," a tia.

Dôngma in-ik chungchânga dân om

¹¹Rengpa'n Mosia a chongpuia,

¹²⁻¹⁴"Israel irchihai kuang hrilin lân, an kuang, mi'n a dôngma kha an ika, mi dang leh siatin ama le ama a porinche angin bê ta sian, kha thil kha inhriatpuitu leh a tho lai taka chelin mani om loiin, a pasal kha ip ta ang sianlân; aninole, a pasalin hnarsana'n mani, irthiang chachaka om kha irthiang loi angin lei bê ta sianlân;

¹⁵A kho khom kha lei ni ta sian, pasal khan a dôngma chu ochai kuanga hruai a ta, khabana thilinhlan hrangin baidi Epha hmun sôma senin hmunkhat chôi sa a ta, sahriak a ibuak hrang ni maka, mirimhoi khom a chung a isia sa hrang ni ma; thudik inlangna hrangin pasal inhnina neitu rengata thilinhlan a ni sikin.

¹⁶Ochai khan nupang kha maichâm makunga khan inngîrtir a ti.

¹⁷Ochaiin pil bêla tui irthiang luak a ta, Biakbuk hnuaia pildi la nôk a ta, tuia khan phul a ti.

¹⁸Ochai khan nupangnu kha Rengpa makunga inngîrtir a ta, a samtol insûtir a ta, baidi thilinhlan kha a kuta inchôitir a ti.

¹⁹Khanchu ochaiin nupang kha khomâkirsâmirtir a ta, a kuang, "Ni uire noa ni'n chu kho sâl intungtirtu, hi tui khâ rengata hi zôk ni ti.



²⁰Khannisian ni uirea ni'n chu, zôk no chi ni," a iti hrang a ni.

²¹Khanchu ochaiin nupang kha khomâkirsâm tîr a ta, a kuang, "Rengpa'n ni malpui inchîntîr a ta, ni phîng an vîngtira ni'n chu Rengpa'nnîr chihai laia khomâk tongin nan omtîr ri se.

²²Khomâksâm intungtirtu'n, hi tui hi ni rîla thun a ta, ni phîng invîngtîr a ta, ni mal inchîntîr a ti," ti a ta. Khanchu nupang khan, "Amen, Amen," a lei iti hrang a ni.

²³Khan ochai khan kha khomâkirsâmhai kha lekhabua irziak a ta, tui khâa khan inchie a ti.

²⁴Khanchu nupang kha khosâl intungtirtu tui khâ kha in intîr a ti. Khanchu khosâlna intungtirtu tui kha a phîng sînga lût a ta, a sân hong na pe ta a ti.

²⁵Khanchu ochai khan baidi thilinhlan kha nupang kut ata kha la a ta, Rengpamakunga baidi thilinhlan kha vôi a ta, maichâma khan chôi a ti.

²⁶Ochai khan baidi thilinhlan kha kut kângkhat la a ta, maichâma khan hâl a ta, kha zoiin chu nupang kha in intîr a ti.

²⁷A lei uirea ni'n chu a sân a phîng hong na pe a ta, a phîng hon vîng pe a ta, a nâi vongna hong siat a ta, a mal khom hong chîn pe a ta, khanchu nupang kha a'rchihai laia khosâlin om a ti.

²⁸Khannisian a uire noa ni'n chu, ama chu insiattîr no nia, nâi hong vong thei a ti.

²⁹⁻³⁰Hi hi pasalin dôngma a hnarsâna le uirena thua a in-ikna chungchânga dân om chu a ni. Nupang kha maichâm kôla khan inngîrtîr ni a ta, khanchu ochaiin hi dân ang hin a chung a tho a ti.

³¹Pasal kha chu theiloi changna ata zôk a ta, khannisian nupangin chu kha sualna mô chu pêl a ti.

Nambar 6

Nazarit-hai ta hranga dân

¹Khanchu Rengpa'n Mosia a chongpuia,



²Israel irchihai kuang, hiang hin hril ro, an kuang, pasalin mani, nupangin mani, Nazarit ni hranga a bîk taka chonginkungna neiin Rengpa kuang a'rpêka ni'n chu,

³ uain le zû nghei a ta, grep ra ata siam, zû ite a iin hrang ni mah.

⁴Nazarit mi a'rti sêng kârka chu grep râng a thilhai kha a ifâk hrang ni ma, grep ru le a kôr khom a ifâk thei hrang ni mah.

⁵Nazarit chonginkungna hnuai a om sêng chu, a sam mani, a hnerkamul mani khom epin a irvo hrang ni mah. Chonginkungna sika Rengpa ta hranga irpêkhlet a ni sikin, a sam le a hnerkamul a ihôi hrang a ni.

⁶⁻⁷A sam kha Pathian ta hranga a'rpêk ti entîrna ni a ta, khasikin a pa thina hmuna fein a iporinche hrang ni mah.

⁸Nazarit mi ki nih a'rti kârka chu, Rengpa ta hranga irthiang a ni.

⁹A kôla irningloia a thi an om thutin chu, a sam kha porche a ni sikin, sên sari nghâk a ta, khanchu a sam le a hnerkamul kha voipai a ta; khanchu a hong irthiang nôk hrang a ni.

¹⁰Khanchu sên riat a hong ni tena chu, vasute inhni mani, phervali inhni mani chôi a ta, irtongna Biakbuk kotbâia khan ochai kuang hong chôi a ti.

¹¹Ochai khan mithi sika ama thâr irthiangna hrangin inkhat kha soal irbôlna'n inhlan a ta, inkhat dang kha pum hâlrivôm thilinhlan a khan inhlan a ti; kha ni khan chu a sam kha a irthiangtir nôk nih a ti.

¹²Matona a lei inhlan kha, a sam a porinche tâk sikin pom ni ta no ni. A thar vangin Rengpa kuang Nazarit mi ni theina hrangin a inhlan nôk hrang a ni. Tho'nsualna irbôl hrangin kêlbelrate kum khata mi thilinhlan a hrangin chôi sa a ti.

¹³Hi hi, Nazarit mi, ki ni a'rtihna bîk nikhua a'rkip tena tho hrang dân chu ni a ta; irtongna Biakbuk kotbâia khan hruai ni a ti.



¹⁴Rengpa kuang demnaboi sa inthum inhlan a ta; kêlbelra tuaite kum khata mi pum hâlrivôm thilinhlan hrangin, kêlbelra irlate kum khata mi soal irbôlna hrangin le belrachal kha irngeina hrangin.

¹⁵Khabana bai chol pol loi khamphulu khat; baidi le oliv hriak leh siam baitiam le oliv hriak pol baitiam irphân ni a ta, khanchu buhûm le uain thilinhlan inhlân sa a ti.

¹⁶Ochai khan kha thilinhlanhai kha soal irbôlna le pum hâlrivôm thilinhlanin Rengpa kuang inhlan a ti.

¹⁷Kêlbelrachal le khamphulua bai kha irngeina thilinhlan hrangin Rengpa kuang inhlan a ta; buhûm le uain khom kha inhlan sa a ti.

¹⁸Nazarit mi khan irtongna Biakbuk kotbâia khan a sam ep infâi ving a ta, irngeina thilinhlan hâlna meia khan hâlpai a ti.

¹⁹Khanchu ochaiin kêlbelrachal hmê a dârsuama suang inhmin sai le khamphulua baitiam khat le chol pol loi baitiam irphân inkhat kha la sa a ta, Nazarit mi kuta khan pe a ti.

²⁰Khanchu ochaiin ngaihoi thilinhlan hrangin Rengpa makunga khan chôï a ta, khahai kha ochai dongtum thil irthianghai chu a ni, kêlbelrachal a rôp le a ke ochai dongtum ti bana chu. Khanchu Nazarit mi khan Uain kha in thei ta a ti.

²¹Hihai hi a ni, Nazarit chonginkung dânhai chu, khannisian Nazarit mi'n a chonginkungna a innang khêla, thil dang inhlan sa a nuamin chu, a chonginkunghai kha irkiptir ngêt a ti.

Ochai satvurna chongchai

²²Rengpa'n Mosia a chongpuia,

²³Arona le a nâipasalhai kuang, hi thu hmang hin Israel irchihai chu sat ni ivur hrang a ni:

²⁴Rengpa'n sat nangni vurin, nangni donsui mai ri se;

²⁵Rengpa'n nin chungna a hmêl invâr pe sianlân, nangni inren mai ri se.



²⁶Rengpa chu nangni tiang zuang irhei sianlân, lungirngamna nangni pe ri se, tiin hril roh.

²⁷Khanchu Rengpa'n, "Israel irchihai chung a khan ki'rhming hi satvurna'n an inpuangin chu, kei khomin satvurhai ki ti," a tia.

Nambar 7

Biakbuk inhlanna thu

¹Khanchu Mosia khan Biakbuk kha an dingtir zoiin chu, Biakbuk le a neinunhai chu maichâm le neinun danghai kha hriak a nâla, a'rthiangtirhai ni khan.

²Israel panam laia hruaitu, irtepnâ sinthoa hruaituhai ngêt khan,

³Rengpa kuang an thilinhlanhai an hong chôia; tâli kiruk, hruaitu inhniin tâli, a chung om inkhat le sehrâtchal sômhleihni, hruaitu murdi'n inkha khat an inhlana, an inhlan zoiin chu,

⁴Rengpa'n Mosia a chongpuia,

⁵a kuang, "Hi thilpêkhai hi Biakbuk sinna hrangin lei pom pehai ro, Levi irchihai kuang, an sintum chit pehai ving ro," a ti pea.

⁶Khanchu Mosia'n, tâli le sehrâtchallhai kha a lâka, Levi irchihai kuang a pêkhai tâka.

⁷Gersona irchihai kuang tâli inhni le sehrâtchal minli a pêkhaia.

⁸Meraria irchihai kuang tâli minli le sehrâtchal kiriat a pêkhaia, khanchu sin murdi kha Arona nâipa Ithamara enkolna hnuaia tho ni a ti.

⁹Khannisian Kohatha irchihai kha chu Mosia'n pehai ma, an sintum chu thil irthiang an dârsuama irzôn kha a ni sikin.

¹⁰Khan hruaituhai khom khan maichâm inhlan irthianga a om nî khan, thilinhlanhai an hong chôia; khanchu an thilpêkhai kha maichâma khan an siaa.



¹¹Rengpa'n Mosia kuang, "Sûn sôm hleihni sêng chu hruaituhai khan a nî tin an laia inkhatin thilpêkhai chu maichâm inhlanna hrangin an inhlan hrang a ni," a tia.

¹²Sûn khat nia thilinhlan hrangtu chu Juda irchia mi Aminadaba nâipa Nasona a ni;

¹³a thilinhlan chu sumtak khêng khat, a rik lam chu sekel irzakhat sômthum, hmun irthianga sekel sômsari irangpui anga rik tâbor bôm khat fâk thei thilinhlan hranga hriak pol sai baidi sip khak khak;

¹⁴sekel sôm khat anga rik, mirimhoia sip rângachak khethûk inkhat;

¹⁵pum hâlirvôm thilinhlan hranga sehrâtchal tuai inkhat, belrachal inkhat, belrate a chal kum khat mi inkhat;

¹⁶sual irbôlna hranga kêlchal inkhat;

¹⁷khanchu irngeina irbôlna hranga thilinhlan sehrâtchal inhni, belrachal ringa, kêlchal ringa, belrate inhni, belrachal ringa, kêlchal ringa, belrate a chal kum khata mi ringa, hi hi Aminadaba nâipa Nasona thilinhlanhai chu a ni.

¹⁸A sîn inhni sêng chu Isakara hai hruaitu Zuara nâipa Nethanela'n an hlana;

¹⁹a thilinhlan hrang chu sumtak khêng khat, a rik lam chu sekel irzakhat sômthum, hmun irthianga sekel sômsari irangpuia rik sumtak tom khat, fâk thei thilinhlan hrang hriak pol sai baidi sip mat mat ni a ti.

²⁰Sekel sôm khat dôra rik mirimhoia sip rângachak khethûk khat,

²¹pum hâlirvôm thilinhlan hrangin sehrâtchal tuai inkhat, belrachal inkhat, belrate a chal kum khat mi inkhat;

²²sual irbôlna hrangin kêlchal inkhat;

²³irngeina irbôlna thilinhlan hrangin sehrâtchal inhni, belrachal ringa, kêlchal ringa, belrate a chal kum khata mi ringa an hlana. Hihai hi Zuara nâipa Nethanela thilinhlanhai chu a ni.



²⁴Khan sîn thum ni chu Zebulun irchia hruaitu Helona nâipa Eliaba'n an hlana;

²⁵a thil inhlan chu sumtak khêng khat, a rik lam chu sekel irzakhat sômthum, hmun irthianga sekel sôm̄sari irangpui dôra rik sumtak tom khat, fâk thei thilinhlan hriak pol sai baidi sip mamat ni sa a ti.

²⁶Sekel sôm̄khat dôra rik mirimhoia sip rângachak khethûk khat;

²⁷pum hâlirvôm thilinhlan hrangin sehrâtchal tuai inkhat, belrachal inkhat, bêlrate a chal kum khata mi inkhat;

²⁸sual irbôlna hrang kêlchal inkhat;

²⁹irngeina irbôlna hranga thilinhlan, sehrâtchal inhni, belrachal ringa, belrate a chal kum khata mi ringa a ni. Hi hi Helona nâipa Eliaba thilinhlanhai chu an ni.

³⁰Sîn minli ni chu Reubena irchia hruaitu Sedeura nâipa Elizura'n an hlana.

³¹A thil inhlan chu sumtak khêng khat, a rik lam chu sekel irzakhat sômthum, hmun irthianga sekel sôm̄sari irangpui tâbor inkhat, fâk thei thilinhlan hranga hriak pol sai baidi sip mamat ni a ti.

³²Sekel sôm̄ irangpuia rik mirimhoia sip rângachak khethûk khat;

³³pum hâlirvôm thil inhlan hrangin sehrâtchal tuai inkhat, belrachal inkhat, belrate a chal kum khata mi inkhat.

³⁴Sual irbôlna hrangin kêlchal inkhat, irngeina irbôlna hrangin sehrâtchal inhni;

³⁵belrachal ringa, kêlchal ringa, belrate a chal kum khat mi ringa a ni. Hi hi Sedeura nâipa Elizura thilinhlanhai chu a ni.

³⁶Sîn ringa nî chu Simeona irchi Zurisadaia nâipa Selumiela'n an hlana;

³⁷a thil inhlanhai chu tangkarua khêng khat, hmun irthianga sekel sôm̄sari irangpuia rik, tâbor inkhat hriak pol sai baidi sip ni a ti.

³⁸Sekel sôm̄khata rik mirimhoia sip rângachak khethûk khat;



³⁹pum hâlirvôm thil inhlanna hrangin sehrâtchal tuai inkhat, belrachal inkhat, belrate kum khata mi inkhat;

⁴⁰sual irbôlna hranga kêlchal inkhat;

⁴¹irngeina irbôlna hranga thilinhlan sehrâtchal inhni, belrachal ringa, belrate a chal kum khata mi ringa a ni. Hi hi Zurisadaia nâipa Selumiela thilinhlanhai chu an ni.

⁴²Sûn ruk nia chu Gada irchia an hruaitu Deuela nâipa Eliasafa'n an hlana.

⁴³A thil inhlan chu tangkarua tâbor inkhat, a rik lam chu sekel irzakhat sômthum, hmun irthianga sekel sômsari irangpui sumtak tom khat, fâk thei thilinhlan hranga hriak pol sai baidi sip ni a ti.

⁴⁴Sekel sôm irangpuia rik mirimhoia sip rângachak khethûk khat;

⁴⁵pum hâlirvôm thilinhlan hrangin sehrâtchal tuai inkhat, belrachal inkhat, belrate a chal kum khat mi inkhat;

⁴⁶sual irbôlna inhlan hrangin kêlchal inkhat,

⁴⁷irngeina irbôlna hrangin sehrâtchal tuai inhni belrachal ringa, kêlchal ringa, belrate a chal kum khata mi ringa an ni. Hi hi Deuela nâipa Eliasafa thilinhlan chu a ni.

⁴⁸Sûn sari nî chu Efraima irchihai hruaitu Amihuda nâipa Eliasama'n an hlana;

⁴⁹a thil inhlan chu tangkarua tâbor inkhat, a rik lam chu sekel irzakhat sômthum, hmun irthiang sekel sômsari dôra rik tangkarua tâbor khat, fâk thei thilinhlan hranga hriak pol sai baidi sip ving ni a ti.

⁵⁰Sekel sôm irangpuia rik mirimhoia sip rângachak khethûk khat;

⁵¹pum hâlirvôm thilinhlan hrangin sehrâtchal tuai inkhat, belrachal inkhat, belrate kum khat mi inkhat

⁵²sual irbôlna hrangin kêlchal inkhat;



⁵³irngeina irbôlna hrangin sehrâtchal inhni, belrachal ringa, kêlchal ringa, belrate a chal kum khat mi ringa a ni.

⁵⁴Sûn riat nê chu Manasea irchia an hruaitu Pedazura nâipa Gamaliela kha an inthanga;

⁵⁵a thilinhlanhai chu sumtak khêng khat, a rik lam chu sekel irzakhat sômthum, hmun irthianga sekel sômsari irangpuia rik sumtak tom khat, fâk thei thilinhlan hranga hriak pol sai baidia sip ni a ti.

⁵⁶Sekel sôm irangpuia rik mirimhoia sip rângachak khethûk khat;

⁵⁷pum hâlrivôm thilinhlan sehrâtchal tuai inkhat belrachal inkhat, belrate a chal kum khat mi inkhat;

⁵⁸sual irbôlna hranga kêlchal inkhat;

⁵⁹irngeina irbôlna hranga thilinhlan sehrâtchal inhni, belrachal ringa, kêlchal ringa, belrate a chal ringa a ni. Hi hi Pedazura nâipa Gamaliela thilinhlan chu a ni.

⁶⁰Sûn kuak ni chu Benjamina irchia Gideona nâipa Abidana'n a inhlan a ni.

⁶¹A thil inhlanhai chu sumtak khêng khat, a rik lam chu sekel irzakhat sômthum, sumtak sekel sômsari irangpui tom khat, fâk thei thilinhlan hriak pol sai baidia sip ni a ti.

⁶²Sekel sôm irangpuia rik mirimhoia sip rângachak khethûk khat;

⁶³pum hâlrivôm thilinhlan hrangin sehrâtchal tuai inkhat, belrachal inkhat, belrate a chal kum khata mi inkhat.

⁶⁴Sual irbôlna hrangin kêlchal inkhat;

⁶⁵irngeina soal irbôlna hrangin sehrâtchal inhni, belrachal ringa, kêlchal ringa, belrate a chal kum khat mi ringa a ni. Hi hi Gideona nâipa Abidana thilinhlan chu a ni.

⁶⁶Sûn sôm nê chu Dan irchia mi Amisadaia nâipa Ahiezera'n an hlana;



⁶⁷a thil inhlan chu tangkarua khêng khat, a rik lam chu sekel irzakhat sômthum, hmun irthiang sekel sômshari irangpuia rik tangkarua tâbor khat, fâk thei thilinhlan hriak pol sai baidia sip ni a ti.

⁶⁸Sekel sôm irangpuia rik mirimhoia sip rângachak khethûk khat,

⁶⁹pum hâlvôm thilinhlan hrang sehrâtchal tuai inkhat, belrachel inkhat, belrate kum khat mi inkhat,

⁷⁰sual irbôlna hrangin kêlchal inkhat.

⁷¹Irngaina irbôlna hrangin sehrâtchal inhni, belrachel ringa, kêlchal ringa, belrate a chal ringa a ni. Hihai hi Amisadaia nâipa Ahiezera thilinhlan chu a ni.

⁷²Sûn sômhleikhat nia chu Asera irchia hruaitu Okrana nâipa Pagiela'n an hlana,

⁷³a thil inhlan chu tangkarua khêng khat, a rik lam chu sekel irzakhat sômthum, hmun irthianga sekel sômshari irangpui tangkarua tâbor khat, fâk thei thilinhlan hriak pol sai baidia sip a ni.

⁷⁴Sekel sôm irangpuia rik rângachaka khethûk khat;

⁷⁵pum hâlvôm thilinhlan sehrâtchal tuai inkhat, belrachel inkhat, belrate a chal kum khat mi inkhat;

⁷⁶sual irbôlna hrangin kêlchal inkhat;

⁷⁷irngaina thil irbôlna hranga inhlan chu sehrâtchal inhni, belrachel ringa, belrate ringa kêlchal ringa a ni. Hi hi Okrana nâipa Pagiela thilinhlan chu a ni.

⁷⁸Sûn sômleihni nia chu Naftalia irchia hruaitu Enana nâipa Ahira'n an hlana.

⁷⁹A thil inhlanhai chu tangkarua khêng khat, a rik lam chu sekel irzakhat sômthum, hmun irthianga sekel sômshari irangpuia rik tangkarua tâbor khat, fâk thei thilinhlan hriak pol sai baidia sip ni a ti.

⁸⁰Sekel sôm irangpuia rik mirimhoia sip rângachak khethûk khat;



⁸¹pum hâlrivôm thilinhlan hrangin sehrâtchal tuai inkhat, belrachel inkhat, belrate kum khat mi a chal inkhat;

⁸²sual irbôlna hrangin kêlchal inkhat;

⁸³irngeina irbôlna hrangin sehrâtchal inhni, belrachel ringa, kêlchal ringa, belrate a chal ringa a ni. Hi hi Enana nâipa Ahira thilinhlanhai chu a ni.

⁸⁴Khanchu maichâm sahriak nâl nia Israel hruaitu thilinhlanhai chu tangkarua khêng sômhleihni, tangkarua leh irpol tom sômhleihni, rângachak khethûk sômhleihni;

⁸⁵tangkarua khênghai chu sekel irzakhat le sômthum irangpuia rik inzen a ni; tangkarua bêlbûrhai chu hmun irthianga sekel sângni le irzaminli irangpuia rik a ni.

⁸⁶Mirimhoia sip rângachak khethûk sômhleihni chu hmun irthianga sekel sôm irangpuia rik inzen an ni; rângachak khethûk murdi chu sekel irzakhat le sômni irangpuia rik a ni.

⁸⁷Pum hâlrivôm thilinhlan hrang sehrâtchal murdi chu sômhleihni an ni; belrachel sômhleihni, belrate a chal sômhleihni, fâk thei thil inhlan le; khan sual irbôlna hrangin kêlchal sômhleihni.

⁸⁸Irngeina irbôlna hrangin sehrâtchal sômni minli, belrachel sômruk, kêlchal sômruk le belrate a chal kum khat mi sômruk an ni. Hi hi hriak nâl hnunga maichâma inhlan zoia thilinhlanhai chu a ni.

⁸⁹Khanchu irtongna puan ina, ama biak hrangin Mosia kha a lûtin chu, Thuthung Bôm chungza'rngaina toihmun chung tiang cherub inhnihai kêr taka irthokin ama hong chongpuiin irhâi hi an hriata, irhâi khan a chongpui tâka.

Nambar 8

Meiser sia dân hrang

¹Rengpa'n Mosia a chongpuia,



²“Arona inhrilin lân, a kuang, meiser sarihai kha a siana hmuna an sia tika, kha meiser khan a maton tiang a i-êl hrang a nih ti ro,” tiin.

³Arona’n khang khan a thoa; Rengpa’n Mosia thu a ipêk ang khan, meiser siana maton tiang khan meiserhai kha a choka.

⁴Hi meiser siana hi Rengpa’n Mosia kuang a inentir lam taka siam a ni, a bul ata a rêl dênin rângachak kuta suk leh siam a ni.

Levi irchihai thâr irthiangna

⁵Rengpa’n Mosia a chongpuia,

⁶“Levi mihai kha Israel irchihai lai ata kha a bingin sehaiin lân, thâr irthianghai roh.

⁷Anni kha hiang hin thârhai ro; irthârna tui inthekkhumhaiin lân, an pumpuia irvo infâi hrangin le an puanhai sôp infâi hrangin hrilhai roh. Khanchu Pathian dân angin irthiang an ti.

⁸Khanchu sehrâtchal tuai inkhat le buhûm thilinhlan hriaka pol baidi indi tak leh inlatirhai ni ta; khabana sehrâtchal inkhat soal irbôlna hrangin ni ilâk sa hrang a ni.

⁹Khanchu Israel irchihai kha bukhai ni ta. Levi irchihai chu irtongna Biakbuk mân tiang khan hruaihai roh.

¹⁰Khanchu Israelhai khan Levi irchihai chung a an kut irngat an ta,

¹¹khanchu Israelhai khan Levi mihai kha Rengpa sin an tho theina hrangin Israel irchihai irhmingin ngaihoi thilinhlan Rengpa kuang inhlan an ti.

¹²Khanchu Levi irchihaiin sehrâtchallhai lua khan an kut irngat an ta; Levi irchihai ta hrangin chu irngeina an siam theina hrangin, inkhat chu soal irbôlna hrangin, inkhat dang chu pum hâlvôm thilinhlan hrangin Rengpa kuang inhlan ni a ti.

¹³“Levi irchihai kha Arona le a nâipasalhai makunga inomtirhai ni ta; Rengpa ta hranga ngaihoi thilinhlan kha inhlanhai roh.



- ¹⁴Khaang khan Israel irchihai lai ata kha Levi irchihai kha zêkhaiin lân, khanchu Levi irchihai kha keima ta ni an ti.
- ¹⁵Kha hnung chu Levi irchihai kha irtongna Biakbuka khan Pathian sintho hrangin lût an ta, nangin anni kha thâr irthianghai ni ta, ngaihoi thilinhlan angin ni inhlanhai hrang a ni.
- ¹⁶Israel irchi nâilutîrhai irthûla keima dongtum an ni sikin.
- ¹⁷ Mihriam khom ni sian, sa khom ni sian, Israel irchihai laia nâilutîrhai chu ki ta an nia, Aigupta rama nâilutîr ki that lai khan anni hi chu keima dongtum hrang piala ki isiahai tâk kêng.
- ¹⁸Khasikin Israel irchia nâilutîr murdihai irthûlin Levi irchihai chu ki ilâk tâk a ni.
- ¹⁹Khasikin Israel irchihai irthûlin anni chu irtongna Biakbuka sintho hrang le Israel irchihaiin hmun irthianga an hong nâi khoma, anni laia hri a lêng loina hrangin hrungin Israel irchihai rengata Levi mihai hi Arona le a nâipasalhai ki ipêk a ni,” tiin.
- ²⁰Khanchu Rengpa’n Mosia thu a ipêk angin Mosia, Arona le Israel murdihai khan Levi mihai chu a inhlan irthiangtirhai a ni ta.
- ²¹Khanchu Levi irchihai chu an irthâr irthianga, an puanhai an sôpa; khan Arona’n Rengpa makunga ngaihoi thilinhлана khom an hlana, khabana a thâr irthianghai tâka.
- ²²Levi mihai chungchânga Rengpa’n Mosia thu a ipêkhai lam ang takin mipuihaiin an thoa, khanchu Arona le a nâipasalhai enkolna hnuaia Levi mihai chu irtongna Biakbuka sintho hrangin an om tâka.
- ²³Rengpa’n Mosia a chongpuia,
- ²⁴“Levi irchihai chu kum sômhni ringa mi an ni rengata irtongna Biakbuka sin tho an ta,
- ²⁵khannisian kum sômringa tena mihaiin chu an sin thôna rengata kha irngam an ti.



²⁶Khannisian irtongna Biakbuk sina khan an irchihai kha sanhai thiai an ta, khannisian an bingin chu irbôlna sin chu tho ta no nihai,” a tia.

Nambar 9

Ferkân kût serna thu

¹Rengpa'n Aigupta ram ata an suak hnungin, kum hnina a tha khatna khan, Sinai ramchâra khan Mosia kha a chongpuia,

²⁻³“Hi tha sîn sôm hleiminlina, misa tâk ata irthokin Israel irchihaiin Ferkân kût chu a dân le a balam ang takin an ihmang hrang a ni,” a tia.

⁴Khasikin Mosia'n mipuihai chu Ferkân kût hmang hrangin a hrilhaia.

⁵Rengpa'n Mosia kuang a ihril lam ang takin a tha khatna, sîn sôm hleiminlina misa a tâk rengata Sinai ramchâra khan Ferkân kût chu an hmang tâka.

⁶Khannisian mi senkhat mithi ruak sika irthiangloi an lei oma, kha ni khan Ferkân kût khom chang thei mahaia. Khanchu kha ni khan Mosia le Arona kuang an fea.

⁷Khanchu a kuang, “Mithi ruak sikin irthiang loiin kin oma, khannisian i sikin mo Israel irchihai laia a zoro taka Rengpa kuang thilinhlan kin inhlan hrang hi nin ni ikhap?,” an tia.

⁸Khanchu Mosia'n an kuang, “Rengpa'n nin chungchâng thua hin i zât thu mo a ni ipêk ti hih la nghâk viat hi roi,” a tia.

⁹Rengpa'n Mosia a chongpuia,

¹⁰“Israel irchihai kuang, nangni laia mi khom, nin irchihai laia mi khom mithi ruak sika irthiang loiin inzinin an lei oma, khannisian Ferkân kût kha an hmang nuama ni'n chu,

¹¹tha khat zoia hmang hrangin phal pehai ni ta, a tha hnina sîn sôm hleiminli nikhua maton taka hmang an ti, bai chol pol loi bai le hloihna khâ leh an ifâk hrang a ni.



¹² Zîng khovâr nôka fâk hrang ite an ihrê hrang ni ma, a ru khom an inkhiak hrang ni ma, Ferkân kût dân le balam ang takin an itho hrang a ni.

¹³Khannisian irthiang chaka, inzinna khom nei loia Ferkân kût chang loitu chu a'rchi hai lai ata sâtpaiin om a ta, a zoro taka Rengpakuang thilinhlan chu an hlan no sikin, a sualna man chu ama'n pêl a ti.

¹⁴Khanchu nam dang mi nin kuanga om Rengpa ta hranga Ferkân Kût chang sa nuam a ni'n chu, Ferkân Kût dân le balam ang takin a itho hrang a ni; hi rama mihai le nam danghai ta hrangin dân inkhat nininei hrang a ni.

Sûm irkiang
(Fes 40.34-38)

¹⁵⁻¹⁶Khanchu Biakbuk an indingtir nê khan, sûmzîngin a tuama, zâna chu sûm kha mei angin an langa.

¹⁷Sûmin Biakbuk kha a'rkiangsan rikipa, Israelhai khan fezâi an rêl ngaia; khan sûm kha a'rngamin chu Israelhai khan riakbuk an khuar ngaia.

¹⁸Rengpa thupêk angin Israelhai khan riakbuk an mâksan ngaia, Rengpathupêk ngêtin riakbuk an khuar nôk ngai; Biakbuk chungakhan sûm kha an bok sêng chu, riakbuka khan an om ngaia.

¹⁹Biakbuk chungakhan sûm kha zoro sôtak a omin chu, Israelhai khan Rengpa thu kha zômin fe ngai mahai.

²⁰A kêra chu sûm kha Biakbuk chungakhan sûn sôtnote vai a om ngaia, khan Rengpa thupêk angin an inzin suak ngaia.

²¹Khan a kêra chu, sûm kha khohloi ata zîng khovâr ten vai a om ngaia, sûm kha a'rkiang tena chu, anni khom an inzin suak zoi ngai.

²²Biakbuk chungakhan sûm kha sûn hni mani, tha khat mani, kum khat mani khom a oma ni'n chu, khataka khan Israel irchi hai khom omhmun an khuar ngaia, inzin ngai mahai; khannisian a'rkiang tena chu an inzin suak ngai.

²³Rengpa thupêkin omhmun an khuar ngaia, Rengpa thupêkin an inzin suak ngai, Mosia hmanga Rengpa thupêkin Rengpa thucha an zôm ngai.

Nambar 10



Tangkarua bekulhai

- ¹Khan Rengpa'n Mosia a chongpuia,
- ²"Tangkarua bekul inhni siamin lân, isuka sukin siam ro; mipui bukkhômna hrangin le riakbuk mâksanna hrangin ni ihmang ngai hrang a ni.
- ³Bekul inhnihai kha zoro sôt an tum hnungin mipui murdi chu ni kuang irtongna Biakbuk kotbâia an irbuk zit hrang a ni.
- ⁴Khannisian inkhat vai kha tum a ni'n chu, panam tina pâfonghai vai ni kuang hong irbuk an ti.
- ⁵Bekul kha chomkhat vai an tumin chu, nisua tianga omhai chu suak an ti.
- ⁶Khan bekul kha voihnina an tum nôka nî'n chu sim tianga omhai suak an ti. Riakbuk suaksanna hrangin chu bekulhai kha chomkhat dok tum ni a ti.
- ⁷Khannisian mipui murdi irbukna hrangin chu bekul kha zoro sôtak tum ni a ti.
- ⁸Bekulhai kha Arona nâipasal ochaihaiin tum ngai an ti. Kha kha nin ta hranga kumtuanga dân chu ni a ti.
- ⁹Nin rama nin râlhài doi hrang tika khom, hi bekulhai hi tum unglân, khanchu kei Rengpa nin Pathian hin nangni san ki ta, nin râlhài rengata nangni inzôk ki ti.
- ¹⁰Nin khonhoi nihai, nin Ferkân Kût zoro hai, nin tha thar lôm nihai le nin pum hâlrivôm le irngeina thilinhlan nin inhlan zoro tikhaia khom bekul chu nin itum hrang a ni. Khanchu keima'n nangni san ki ti; kei hi Rengpa nin Pathian chu ki ni.

Sinai ramchâr ata an suak

- ¹¹Khanchu kum hnina, a tha hnina, sîn sôm inhnina khan sôm chu inhriattirna Biakbuk chung ata kha a'rthona.
- ¹²Khanchu Israel irchihai kha Sinai ramchâr ata kha an inzin suaka, Paran ramchâra khan sôm kha a'ngam tâka.
- ¹³Mosia hmangaRengpa thupêk angin an suak nôk tâka.



- ¹⁴Juda pâlhai an pâl tam dâna izirin an suaka; an hruaitu chu Aminadaba nâipa Nasona a ni.
- ¹⁵Isakara panamhai hruaitu chu Zuara nâipa Nethanela a ni.
- ¹⁶Zebulun panamhai hruaitu chu Helona nâipa Eliaba a ni.
- ¹⁷Khanchu Biakbuk kha an seta, Gersona le Meraria namhaiin an irzôn suaka.
- ¹⁸Kha hnungin, Reubena panamhai chu an pâl tam dân angin an suaka; an hruaitu chu Sedeura nâipa Elizura a ni.
- ¹⁹Simeona panamhai hruaitu chu Zurisadaia nâipa Selumiela a ni.
- ²⁰Gada panamhai hruaitu chu Deuela nâipa Eliasafa a ni.
- ²¹Khan, Levi panamhai laia Kohatha irchihaiin thil irthiang kha an irzôna, an suaka; riakbuk kha an va tung mân, Biakbuk kha inding zoi vingin a lei om tâka.
- ²²Efraima panamhai chu an pâl tam dân angin an suaka, an hruaitu chu Amihuda nâipa Elisama a ni.
- ²³Manasea panamhai hruaitu chu Pedazura nâipa Gamaliela a ni.
- ²⁴Benjamina panamhai hruaitu chu Gideona nâipa Abidana a ni.
- ²⁵Khan a hnungkhôn taka chu Dana panamhai chu an pâl tam dân izirin an suaka, an hruaitu chu Amisadaia nâipa Ahiezera a ni.
- ²⁶Asera hai hruaitu chu Okrana nâipa Pagiela a ni.
- ²⁷Naftalia hai hruaitu chu Enana nâipa Ahira a ni.
- ²⁸Khaang kha a ni, Israel irchihai an pâl tam dân anga izirin an fe dân chu; khaang khan an suak tâka.
- ²⁹Khanchu Mosia'n a kumeipa, Midian mi Jethroa nâipa Hobaba kuang, "Rengpa'n ram ni pe hrang a itihna tiang fe hrang kin nia, khataka khan Israelhai chu tuanitungtirhai hrangin chong an kunga; khasikin nangma khom kin kuang hong sa'nlân, ni chungsa satakin om kin ti," a tia.



³⁰Khan Hobaba'n a kuang, "Nin kuang hong sa thei no ning, kin rama ki'rchihai kuang fe hrang ki ni sikin," a tia.

³¹Khanchu Mosia'n a kuang, "Irngaihoi takin ni masan no ro, ramchâra omhmun kin ikhuarna hranghai chu nangin nin hriat uala, khasikin kin mit ni hong chang pe roh.

³²Kin kuang ni hongga niin chu, Rengpa satvurna kin idong murdi chu nang khomin dong sa ni ti," a tia.

Mipuihai an irthon

³³Khanchu Rengpa tâng irthiang Sinai ata sîn thum lama an fea; RengpaThuthung Bôm chu riakbuk an khuarna hrang hmun inchum zongin an matona a fe maia.

³⁴Khan riakbuk an suaksan rikipa, Rengpa sôm chu sîna an chungga a om mai ngaia.

³⁵ Khan Thuthung Bôm kha a suak hrang rikipa, Mosia'n, "O Rengpathoiin lân, ni râlhai chu inhnotin lân, nang a hmumâktuhai chu ni makung ata rot ri sehai," a ti ngaia.

³⁶Khan a'rngat rikipa, "O Rengpa Israel mipuihai laia hin zuang kêr nôk ta ro," a ti ngai.

Nambar 11

Tabera hmun

¹Khanchu an dengtheinahai sikin mipuihaiin Rengpa inhriat hrangin an chiara,Rengpa'n an hriathai tena chu a ning an mura, mipuihai chungga mei a zuang tîra; an laia meichokin, an riakbuk hmor tiang chu a kâng tâka.

²Khanchu mipuihai khan Mosia an koia, Mosia kha Rengpa kuang a chongchaia, mei kha a thi nôk tâka.

³Rengpa mei kha an laia a chok sikin, kha hmun irhminga khan Tabera an ti tâka.

Mosia'n hruaitu sôm̄sari an thanghai



⁴Khan, nam dang senkhat an laia omhai khan a sân hmê irzukna an hong nei tâka, khan Israel irchihai khom kha an chiar sa tâka. “Hmê fâk hrang hi nei inlân chu o!

⁵Aigupta rama khan a man boiin ei nuam dôr nga ei fâka, khabana fanghma hai, vâifanghma hai, purûn sel hai, purûn til hai le purûnngoi hai ei la’nhriat maia;

⁶khannisian atûn hin chu ei bu nêk ei anh fâk zar khom suak ta maka, fâk hrang dang lak ite om ta maka, a nî tina ei ifâk mana ti bana chu,” an tia.

⁷(Mana chu chîmu ru angin an lang dân chu lunghlu ang a nia,

⁸⁻⁹ Zâna riakbuk kôlhaia irdo leh an tâk suama, zîng khovâra chu mipuihaiin an hrûta bu nôina khan an nôi india, suma khom an suk ngaia, khanchu bêla an era, bai khomin an sin ngai, oliv hriak leh bai sin ang hin a om ngai.

¹⁰Khan mipuihai kha a in sîngkua kua’n, an puan in kotbâia an chap ti kha Mosia’n an hriata, khan Rengpachu a sân a ning an mur pe tâka.

¹¹Khan, Mosia khom kha a milunghoi pe ta maka, khanchu Rengpa kuang, “Itho sika mo ni sinthotu hi deng ni ni intheitir? Imo ni milunghoi loina ki chungu ni inei? Hi mipuihai mophurna hi keima chungu ni ibâng?

¹²Hi mipuihai hi ki nâihai mo an nia? An pi le puhai kuanga chonginkunga pêk ni inkungna rama hruai inlûthai hrangin, nâi neitu’n irhnu nêk lai a ipom angin ni ni inpomtir?

¹³Hi mipuihai ruk hrang dôr hi kho rengata mo hmê ki ihmu zoi hrang? ‘Kin fâk hrangin hmê ni pe ro,’ tiin an ni ichapkhum hi.

¹⁴Hihai hi ki bingîn chu hruaihai thei no ning, keima ta hrangin an tak hrai tâk sîkin.

¹⁵Hianga ni lo hrang a ni’n chu, nin renin lân, atûn atûn ni thatpai zel ro, deng nin theitir ta no ro,” a tia.



¹⁶Rengpa'n Mosia kuang, "Israelhai upa mipuihai upa le an hruaitu nia ni inhriat mi sômsari keima kuang hong hruaihaiin lân, irtongna Biakbuka nangma leh ngîrsuam hrangin hong hruaihai roh.

¹⁷Khanchu zuang chum ki ta, khataka khan nang zuang chongpui ki ti; khan nangma kuanga irtha kha an chung a sia ki ta, ni bingin pêl loiin mipuihai puakrik kha nang pêlpui an ti.

¹⁸Khanchu nangin mipuihai kuang, 'Nangtûka hrang hin irthâr irthiang unglân, khanchu hmê fâk hrang chu man ngêt nin ti. Kin hmê fâk hrang tu'n mo a ni ipêk hrang? Aigupta rama khan a ihoi tie le te, tiin Rengpa inhriatin nin chapa, khasikin Rengpa'n hmê nangni pe a ta, fa ngêt nin ti.

¹⁹Sûn khat mani, sûn hni mani, sûn ringa mani, sûn sôm mani, sûn sôminhni mani vai ual khom ni no nia.

²⁰Tha khat sêng chu, hnông raka inluak rakin fa nin ti, nin kuanga om Rengpa hnôla, itho hranga Aigupta rengata suak mo ei ini o, tia nin chap sikin,' ti ro," a tia.

²¹Khan, Mosia khan Rengpa kuang, "Hitaka hin mi nuairuk kir ôihaia, tha khat sêng a an hmê fâk hrang nangni pe ki ti, ni iti hi?

²²Kêlbelra le sa danghai hi that pehai ngânin lân, an ikhop thei hrang ma ni? Tuipuia nga murdi chel pehaiin lân an iruk hrang ma ni?" a tia.

²³Khanchu Rengpa'n Mosia kuang, "Ki'rchamneina hi a ihek thei hrang ma ni? ki iti hi a tung le tung loi inhre lat ta ni ti?," a tia.

²⁴Khanchu Mosia kha a suaka Rengpa thu chu mipuihai kha a hrihaia; khanchu hruaitu sômsarihai a koibûmhaia; Biakbuk kôla khan an ngîrtirhaia.

²⁵Khanchu Rengpa kha sôm laia a zuanga, a chongpuia, Mosia kuang irtha a lei ipêk senkhathai kha lâkin hruaitu sômsarihai kha a pêkhaia. Khanchu irtha kha an chung a chum le zel khan, deipuhai angin thu an hrila, khannisian kha kha chu tho thei mai ta mahaia.



²⁶Khanchu hruaitu sômsarihai laia mi inhni, Eldada le Medada chu Biakbuk sûnga khan an la oma, puan in tiang la fe mahai, kha khan irtha kha an chung a zuang chum pehai nôka, anni khom deipuhai angin thu an hril tâka.

²⁷Khan ruatharte inkhat hi intânin Eldada le Medada sintho kha Mosia an va hrila.

²⁸Khanchu Nuna nâipa Josua, ruatharte a ni lai ata Mosia changpui ngaitu khan, Mosia kuang “Ka pu Mosia khaphai ta ro,” a tia.

²⁹Khan Mosia’n a kuang, “Keima sika hin ni ihnarsâhai mo? Rengpa mi murdihai hi deipu ni vinghai sian, Rengpa’n an chung a irtha sem pehai ving sian ei ti lai hin,” a tia.

³⁰Khanchu Mosia le Israel hruaitu sômsarihai kha riakbuka an kîr nôk tâka.

Rengpa’n mâmim an suhai

³¹Khanchu Rengpa’n phâivua an thotira, tuipui ata mamîm a hong sêm suakhaia, hnuai ata mûk hni irsângin an hong vuanga. Riakbuk le a kôlvêla khan hmun lian tak an dâp zuak tâka.

³²Mipuihai khan sîn nitungin le zân khovârin sîn dang nôka sîn nitungin mamîm kha an irfuanghaia, a’rkhôm intômtak khomin Homer sôm chu an irkhôma; an riakbuk kôla khan an inchârhaia.

³³Khanchu kha hmê kha an fâka, an fâk zoi mânin; mipuihai chung a Rengpa ning kha a zuan mur pea, mipuihai kha hripuiin a hremhai tâka.

³⁴Kha hmun irhminga khan Kibroth Hattaavah an tia; kha hmuna khan hmê irzuka rôlsiahai kha an phûmhai sikin.

³⁵Khanchu mipuihai chu, kha hmun ata kha Hazerot-a an fea, khataka khan omhmun an khuar tâka.

Nambar 12

Miriami hremna thu

¹Miriami le Arona’n, Mosia’n Kus mi dôngma’n a nei sikin, an hrilinsiata.



- ²Anni khan, “Mosia kuang vai hin mo a inih Rengpa’n thu a ihril bîk? Keini kuang khom hin a ihril mo ni ma?,” an tia. Rengpa’n an thuhрил kha an hriata.
- ³Mosia chu irnêng chung a mihriam murdihai laia phûkdâi tak a nia.
- ⁴Khan Mosia le Arona le Miriami kuang khan Rengpa’n, “Nin inthumin hong suak unglân, irtongna Biakbuka hin hong roi,” irningloiin a zuang ti tika khan chu an inthumin an fe tâka.
- ⁵Khanchu Rengpa chu sôm lai ata zuang chumin Biakbuk kotbâia khan a ngîra, Arona le Miriami chu a koihaia, an ruaiin an hong a.
- ⁶Ama’n, “Ki thu hi irngai roi, nin laia deipu nin oma ni’n chu, keima chu an ni kuang inlâr ki ta, an irmang tiang chongpuihai ki ti.
- ⁷Khannisian ki sinthotu Mosia ki ichongpui lam hi chu khaang kha ni no ni, ama chu ki mi Israelhai enkoltu’n ki isiam kêng.
- ⁸Khasikin ama chu hmâi ir-enin, chongkôlâta ni loiin fel takin ki ichongpui a ni, khan ki hmêl khom a ni ihmu infel tâk a ni. Khasikin ki sinthotu Mosia hi itina nin ihrilinsiat lam mo a ini?” a lei tia.
- ⁹Khan Rengpa chu an chung a ning an mura, a fe tâka.
- ¹⁰Khanchu sômin Biakbuk kha a’rkiangsan tena chu, irningloi zelin Miriami kha ivur anga vârin an phâr tâka, khan Arona’n Miriami kha a ena, inphâr a ni tah ti a hmua.
- ¹¹Khanchu Arona’n Mosia kuang, “Ka pu irngaihoi takin kin sual intona sika hremna hi kin chung a intungtir no roh.
- ¹²Mi a thi saia suak, a taksa a chimrip fâkpaia om ang hin chu Miriami hi inomtir hrâm no ro,” a tia.
- ¹³Khanchu Mosia’n, “O Rengpa, irngaihoi takin indamtir nôk ta ro,” a tia.
- ¹⁴Khanchu Rengpa’n, “A pa’n a hmâi an chilkhum khomin sîn sari sûng chu a hmâimôkna kha a ituang hrang mo ni ma, khasikin riakbuk pên tiang sîn sari irkhum in om sian, kha hnunga hruai inlûttir nôk ni ri se,” a tia.



¹⁵Khanchu Miriami chu riakbuk pên tiang sîn sari a'rkhuma, Miriami kha an hruai inlûttir nôk mâka chu mipuihai kha irthon mahai.

¹⁶Kha zoiin chu mipuihai kha Hazerot rengata kha an suaka, Paran ramchâra omhmun an khuar tâka.

Nambar 13

Kanaan enirchik hranga sômhleihni tîrna

(Dhn 1.19-33)

¹Khan Rengpa'n Mosia kha a chongpuia,

²"Israel irchihai ki ipêk Kanaan ram va enirchik hrangin mi tîrhai ro; an panam tina mi, an hruaituhai laia mi inkhat ni itîrhai hrang a ni," a tia.

³Khanchu Paran ramchâr ata Mosia'n Rengpa thupêk angin hruaituhai chu hiang hin a tîrhaia:

⁴Reubena panama hruaitu Zakura nâipa Samua,

⁵Simeona panam mi Horia nâipa Safata,

⁶Juda panam laia mi Jefunea nâipa Kaleba

⁷Isakara panam laia mi Josefa nâipa Igala,

⁸Efraima panam laia mi Nuna nâipa Hosea,

⁹Benjamina panam laia mi Rafua nâipa Paltia

¹⁰Zebulun panam laia mi Sodia nâipa Gadiela,

¹¹Manasea panam laia mi Susia nâipa Gadia

¹²Dana panam laia mi Gamalia nâipa Amiela

¹³Asera panam laia mi Mikaela nâipa Sethura

¹⁴Naftalia panam laia mi Vopsia nâipa Nabia

¹⁵Gada panam laia mi Makia nâipa Geuela.

¹⁶Hihai hi ram enirchik hranga Mosia'n a itîrhai chu an ni. Nuna nâipa Hosea kha Mosia'n Josua tiin a'rhming a thûla.



- ¹⁷Khan Mosia'n a tîr suakhai lai hin, an kuang, "Sim tiang fe phot unglân, tâng ram tiang khan fe phot roi.
- ¹⁸Ram chu i ang mo a ini, idôr mo mi an iom le idôra hrât mo an inih ti khom,
- ¹⁹An omna ram chu a sa le saloi tihai, an omna khuahai chu i ang mo a ini, puan in papai mo a ini, aninole, kul nei in mo a ini, khan an ram khan bu le bâl satna mani, a ram irchang le chang loi khom va enirchik roi.
- ²⁰Khanchu ngam takin om unglân, kha rama thei rahai kha hong pêl roi," a tia. (Grep ra masa zoro lai tak a ni.)
- ²¹Khanchu an suak tâka, ram chu Zin ramchâr ata Hamath lûtna Rehob dênin an enirchik vinga.
- ²²Sim tiang khan an fe baka, Hebron an va tunga, khataka khan Anaka irchihai Ahimana mihai, Sesai mihai, Talmai mihai an oma. (Hebron chu Aigupta rama Zoan om mâna kum sari mâna lei om a ni ta.)
- ²³Khanchu Eskol ivapang an va tunga, khataka khan grep ra irku khat a ônpuimin an sâta, hmol leh mi inhni'n an irzôna, dalim le theipui khom an chôi sa.
- ²⁴Kha hmun kha Eskol ivapang an tia; Israel irchihaiin khataka grep ra irku an sât sikin.
- ²⁵An ram va enirchikna khan sîn sômminli an innanga, khanchu an hong kîr nôka.
- ²⁶Khanchu Paran ramchâr Kades-ah khan Mosia le Arona le Israel irchihai kuang an hong tunga, an ni le mipui murdihai kuang khan thu kha an intunga, kha rama thei an hong ichôihai kha an irhmuhaia.
- ²⁷Mosia kuang, "Ni ni itîrna rama khan kin fea, dûttui le khuaih lutui luangna chu a lei nia; hi hi a rama thei chu a ni.
- ²⁸Khannisian a rama mi omhai chu a sâna mi hrât an nia, an khuahai khom kulnei, roiinpui tak tak a ni. Khanchu Anaka irchihai khom kin va hmuhai sa.



²⁹Amalek mihai chu sim tiang an oma, Hit mihai, Jebus mihai, Amor mihai chu tâng rama an oma, Kanaan mihai chu tuipanga le Jordan tuipanga an om,” tiin an hrila.

³⁰Khannisian Kaleba'n Mosia makunga mipuihai kha an dâipaihaia, “Hong doi hai ei ta, anni nêkin ei hrât uala, an ram chu lapai zel ei ti,” a tia.

³¹Khannisian a ifepuihai khan, “Inhnêhai no ih, eini nêkin an hrât sikin,” an tia.

³²Khanchu an ram hong enirchik kha Israel irchihai kuang khan dik loi takin an hrila, an kuang, “Khi rama a sînga mipui omhai fâk hrang ten lua irzir pehai maka, kin mihriam hmuhai laka chu mirumlîan tatak an ni.

³³ Khan Anaka irchi mi hrâthai khom kin hong hmuhai sa. Keini chu khâitehai ang dôrin kêng kin irbe; anni khomin khâitehai ang dôrin kêng an ni ibe,” tiin an hrila.

Nambar 14

Mipuihai Rengpa chung a chiarna

¹Khanchu kha zâna khan mipuihai chu chardongin inring takin an chapa.

²Israel irchihai murdi chu Mosia le Arona chung a chiara, an kuang, “Aigupta rama lei thi kha ni inlân chu o! aninole, hi ramchâra hin thi thei inlân sa no ni mo!

³Itho sika khandai leh thata om hrangin Pathianin hi rama hin a ni ihruai ma ni? Ei dôngma nâi le tehai lak chu chelhai an ta, khasikin Aigupta rama kîr nôk hi ei ta hrangin chu a isa mo ni ma?,” an tia.

⁴Khanchu anni le anni an chonga, “Aigupta rama ni hruai inkîrtir hrangin hruaitu inthang ei ti,” an tia.

⁵Khanchu Mosia le Arona chu Israel mipui irbukhai makunga an khûksadela.

⁶Khan Nuna nâipa Josua le Jefunea nâipa Kaleba ram enirchiktuhai laia mihai khan, an puanhai a kaithêra;



⁷Israel irchia mi irbûmhai kuang khan, “Enirchik hranga kin va irfangna ram kha ram satak a nia,

⁸ei chung a hin Rengpa a lômin chu, kha rama khan ni hruai a ta, ni pe a ti; dûttui le khuaihlutui luangna ram chu.

⁹ Khasikin Rengpa chung a chiar no unglân, kha rama mihai khom kha chihai viat no roi, oltengin inhnêhai ei ti, Rengpa chu ei kuang a om sikin, an pathianhai chu a inhnêhai zoi tâk kêng, khasikin chi no roi,” an tia.

¹⁰Khannisian mipuihaiin lunga dêng an tumhaia, khannisian irningloiin Rengpa roiinpuina chu irtongna Biakbuka khan Israel irchihai makunga a zuang inlanga.

Mosia'n mipuihai ta hranga a chongchaina

¹¹Khanchu Rengpa'n Mosia kuang, “Hi mihai hin idôr ten mo an ni ihnôl hrang? Anni laia sinirkhêl tamtak ki tho hnung khomin, idôr ten mo ni iamzoi loiin an la iom mai hrang?

¹²Hripui zuang tîr ki ta, inboipaihai ki ti. Khannisian nangma chu nam tinhai pa nang inchangtir ki ta, anni nêka tam ual le hrât ual la ni an ti,” a tia.

¹³ Khannisian, Rengpa'n Mosia kuang, “Hi mipuihai hi Aigupta ram ata nangma sinthotheinaa ni ihruai suakhai an nia, hi mipuihai chung a ni sintho hi, Aigupta mihaiin inhria an ta,

¹⁴hi rama mihai kuang hin hril an ti; hihai hin nang Rengpangêt hi kin kuang hin ni om ti an inhriat tâka, ni sôm chu kin chung a omin, nangma chu fel takin nang an hmu ta, nang chu sûna sôm indingin le zâna meichokin kin mân tiang ni fe ngai ti khom an inhriat tâka.

¹⁵Khasikin atûn ni mihai hi ni thatpaihai vinga a ni'n te, nir hming inthangzia inhriattu namhaiin,

¹⁶chonginkung pe hranga a inkung rama khan a hruaihai thei no sikin ramchâra khan a thatpaihai tina an ti.

¹⁷Khasikin Rengpa, atûn nang ki ngên, ni sinthotheina chu zuan langtirin lân, ni chonginkung chu zuan diktir roh.



¹⁸ Rengpa chu milung ir-uai tak zaidamna sip, pualoina hai, tho'nsualna hai, ngaidam thei ngai, thiamno inchangtira omhai insuaktir zel ngai loi, an pahai pualoina sika an nâihai le nâi nôkhai ten irlo thumna le irlo minli tena hrem ngai a nih ti kha.

¹⁹Ni lungkhamna danglam ngailoi khan, Aigupta rama ni ingaidamhai angin, mipuihai sualna hi ngaidamhai hrâm ro,” a tia.

²⁰Khan Rengpa'n, “Ni thu angin ngaidamhai ki ti,

²¹ khannisian ki ikring mai hrang le Rengpa roiinpuina irnêng murdi a la isip hrang ang hin thu kin kung,

²²Aigupta ram le ramchâr ki roiinpuina le ki sinirkhêl thohai an hmu hnung khomin voisôm an ni la fiaa, ki thu la pomloi mihai hin,

²³an irchibulhai kuang khomâkirsâma ram ki inkung kha hmu thei no nihai.

²⁴Ki sinhotu Kaleba hi chu a va fena rama khan hruai ki ta, a'rchihaiin la lua an ti.

²⁵Atûn hin, Amalek mihai le Kanaan mihai chu iva irhôra hin an om, nangtûk chu kêr nôk unglân, tuiuisen lampui tiang ramchâra lût ta roi,” a tia.

Chiartuhai chungu Pathian hremna

²⁶Rengpa'n Mosia le Arona a chongpuihaia,

²⁷“Idôr ten mo hi mi pualoihai hi ki chungu an la ichiar mai hrang? An ichiarna chu tamtak kin hriata.

²⁸An kuang, ‘Ki hringna sâlin ki ihril a ni, ki mikuar inhriata nin ihril ang takin nin chungu tho ki ta;

²⁹ khanchu thi nin ta, nin ruhahi chu ramchâra hin irthekindarth a ti. Ki chungu nin chiarna sikin nangni laia mi kum sôminhni chung tianga mi rêng rêng, kha rama khan lût no chin ni.

³⁰Kha rama om hrangin chong nangni kin kungu, khannisian Kaleba le Josua ti bana chu tûte lût no chin ni.



31Ei nâi le tehai chu chelin om an ti, nin tia. Khannisian ram nin ihnôla khan hruai inlûthai ki ta, khataka khan vângsak an ti.

32Khannisian nangni chu hi ramchâra hin thi nin ti.

33Nin thi zoi ving mâka chu nin iamom lina sikin nin nâihai chu ramchâra hin kum sômminli sâng chu dengthei takin om an ti.

34Ram nin va enirchikna sôn dôr, sôn sômminli chu, sôn khat irthûla kum khat angin, kum sômminli chu nin tho'nsualna sikin kum sômminli tuang nin ta, khanchu keima nin ni idoina hi a omzia inhre suak ta nin ti.

35Kei Rengpa hin mi pualoi, keima ni doia irbukkhômhai chungga hin hihai hi tho ngêt ki ti. Hi ramchâra hin thi an ti, Rengpa'n a ti' ti roi," a tia.

36-37Khan ram enirchik hranga Mosia'n a itîrhai kha, ram thurchi dikloi hong hrilin mipuihai Rengpa chungga inchiartira. Khasikin, Rengpa'n hripuiin a hremhaia an thi tâka.

38Enirchiktu sômhleihnihai laia Josua le Kaleba vai an hringa.

An ilua hrang ram va doi masa tak tumna

(Dhn 1.41-46)

39Khan, Mosia'n kha thuhai kha Israel irchihai a hrila; khanchu mipuihai chu a sân an char a dong tâka.

40Khanchu zîng nôka chu inmân takin an thoia, tângsîpa an hong fea. "Irngai ro, hi hin kin ihong a ni, Rengpa'n a ni inkung pena hmuna khan fe kin ti. Kin lei itho'nsual a ni ta," an tia.

41Khan Mosia'n, "Tuanitungna ni no nih ti inhriat chakin nin om khominRengpa thupêk nin la izôm loi?"

42Nin laia Rengpa lak om maka, nin râlhai nangni lei that hrangin chu fe no roi.

43Nin mâna khin Amalek mihai le Kanaan mihai an oma, khandaiin nangni lei that an ti. Rengpa kha nin irngatna tak a ni sikin, nin laia Rengpa chu om ta ma," a tia.



⁴⁴Khannisian tângsîpa khan fe ngêt an tuma, Rengpa Thuthungna Bôm le Mosia chu riakbuk rengata chu suak mahai.

⁴⁵Khanchu kha tânga om Amalek mihai le Kanaan mihai chu an zuang chuma, an doihaia, Horma dênin irzûlin an thatpaihai tâka.

Nambar 15

Thilinhlanha chi dang dang dânhai

¹Rengpa'n Mosia a chongpuia,

²Israel irchihai kha inhrilin lân, an kuang, nin omna hranga ram nangni ki ipêk kha nin tung tika,

³Rengpa kuang sehrâtchal mani, belrachal mani, kêl mani, pum hâlivôm thilinhlanha hrangin mani, mâni nuam thua thilinhlanha hrangin mani, chonginkung inkungna hranga irbôlna hrangin mani, nin Ferkân Kût zoro nia thilinhlanha hrangin mani, Rengpa kuang hong chôi a ta, kha kha Rengpa ta hranga mirimhoi chu ni a ti.

⁴⁻⁵Rengpa kuang belra mani, kêl mani, pum hâlivôm thilinhlanha an hlan tika sa le baidi thilinhlanha hrangin ni hong ichôi sa hrang a ni.

⁶Khanchu kêlbelrachal inhlan a ni tika chu baidi her hni oliv hriak khilât sei inkhat le a chimrip irzêl le uain khilât sei khat le a chimrip chu baidi thilinhlanha hrangin inhlan a ini sa hrang a ni.

⁷Hi thilinhlanhai hi Rengpa ta hrangin mirimhoi chu a ni.

⁸Khan, sehrâtchal chu pum hâlivôm thilinhlanha hrangin mani, chonginkung inkungna thilinhlanha hrangin mani, irngeina thilinhlanha hrangin mani, inhlan a ni tika,

⁹baidi thilinhlanha hrangin baidi her thum le oliv hriak khilât sei inhni irzêl sai,

¹⁰uain khilât sei inhni chu inhlan a ini sa hrang a ni. Hi thilinhlanhai hi Rengpa ta hranga mirimhoi chu a ni.



- 11**Anni kha sehrâtchal, kêlbelrachal le kêl inhlan a ni tika inhlan sa hrang chu a ni.
- 12**Khanchu sa chu inkhat nêka tam inhlan a lei ni tâkin chu, thilinhlan dang a zuitu khom kha a tam dang ang dungzuiin inhlan sa thiai ni a ti.
- 13**Kha rama suak murdihaiin chu, hiang tak hin Rengpa ta hranga mirimhoi meia thilinhlan an itho hrang chu a ni.
- 14**Khanchu ram dang mi nin kuanga om ngaitu khan mani, chomkhat hrang vaia ompu khan mani khom Rengpa ta hrangin mirimhoi meia thilinhlan nuamtuhaiin chu nin itho lam angin an itho hrang a ni.
- 15**Nin irchihai le mipuihai le nam dang nin kuanga omhai ta hrang khomin dân inkhat vai a om.Rengpa makunga nam danghai chu nangni ang dên ni an ti.
- 16** Nangni ta hrangin nin kuanga nam dang omhai ta hrangin dân hmunkhat le tho dân hmunkhat vai om a ti.
- 17**Khanchu Rengpa'n Mosia a chongpuia,
- 18**"Israel irchihai inhrilin lân, an kuang, nangni ki hruaina hrang ram chu nin va tunga,
- 19**kha rama bai nin fâk tena chu,Rengpa kuang ngaihoi thilinhlan nin inei hrang a ni.
- 20**Nin bai sin masa tak tiam khat chu ngaihoi thilinhlanana nin inhlan hrang a ni, hruizôla ngaihoi thil inhlan nin inei angin nin itho hrang a ni.
- 21**Nin irchihai dênin nin bai sin masa tak chuRengpa kuang ngaihoi thilinhlanana hrangin nin inhlan mai hrang a ni.
- 22**"Khanchu hi thupêk murdi; Rengpa'n Mosia kuanga a ihril,
- 23**Rengpa'n thu a pêk masa tak rengata nin irchihai dêna hrangin Mosia hmanga thu nangni a ipêk murdi hi nin pom noa ni'n chu, hiang hin hong ni a ti.



²⁴Mipuihaiin kutkechâia an tho'nsual a lei ni'n chu, mipui murdihaiin pum hâlivôm thilinhlan, Rengpa ta hranga mirimhoi hrangin sehrât tuai inkhat inhlan an ta, a dân pangai angin baidi thilinhlan leh khan soal irbôlna hrangin kêlchal inkhat an inhlan sa hrang a ni.

²⁵Khanchu ochaihaiin Israel mipuihai ta hrangin irngeina siam an ta, ngaidam ni an ti; kutkechâia a ni sikin le an thilinhlan kha Rengpa ta hranga meia thilinhlan le an سوالنا irthûla soal irbôlna an inhlan tâk sikin.

²⁶Israel mipuihai chu ngaidam ni an ta, an laia nam dang omhai khom, mipui murdi'n kutkechâia an itho a ni sikin.

²⁷ Khan mimalin kutkechâia an itho'nsual a ni'n chu, soal irbôlna hrangin kêlte kum khat mi a inhlan hrang a ni.

²⁸Kutkechâia Rengpa makunga tho'nsualtu ta hrangin ochaiin irngeina a isiam hrang a ni. Khanchu ngaidam ni an ti.

²⁹Kutkechâia tho'nsualtu ta hrangin Israel irchi le nam dang mi anni laia omhai ta hrang khomin dân inkhat nin inei hrang a ni.

³⁰Khannisian mi tukhom inhre chachaka tho'nsual a lei ni'n chu, kha rama suak mi khom ni sian, nam dang mi khom ni sian, Rengpa a ihmusit a ni sikin, ama chu that ngêt ni a ti.

³¹Rengpa thu chu a hmusita, a thupêk a hnôl sikin, a thina mô chu a chungga om a ti, ti ro," tiin.

Sabat nî hmang indik loi

³²Israel irchihai ramchâra an om lai khan mi inkhat hi Sabat nî sîna thing irkhôm hi an hmua.

³³A thing irkhôm hmutuhai khan Mosia le Arona le mipuihai kuang an hruaia.

³⁴Itina lo hrang mo a inih ti an la'npuang no sikin intângna ina an lei khuma.

³⁵Khanchu Rengpa'n Mosia kuang, "Ama chu that ngêt ni a ta, riakbuk pên tiang mipuihaiin lung leh an idêng hrang kêng," a tia.



³⁶KhanchuRengpa'n Mosia thu a ipêk lam ang takin mipuihaiin riakbuk pên tiang an hruaia, lung leh an dêng that tâka.

Silkai siam hrang dân

³⁷Khan, Rengpa'n Mosia a chongpuia,

³⁸“Israel irchihai kuang, an irchi suanpârhai tenin an sil le kai puan hmora a zia siam an ta, a hmor tina khan hrui dum sia hrangin inhrilhai roh. Hi hi kumtuangin nin itho mai hrang chu a ni.

³⁹Hi puan hmorhai hi nin en rikipa, ki thupêkhai nin inhriat suaka nin zômna hrangin le nin nuamlam anga thil tho ta loa, keima nin ni la iamzoina hrangin.

⁴⁰Ki thupêkhai chu nin inhriat maia, nin zôma, nin Pathian ta hranga nin irthiang theina hrangin a ni.

⁴¹Nin Pathian ni hranga Aigupta ram ata nangni hruai suaktuRengpa nin Pathian chu ki ni, kei hi Rengpa nin Pathian chu ki ni.

Nambar 16

Kora, Dathana le Abirama hai tehelna

¹⁻²Levi nama Kohatha irchi, Izhara nâipa Kora chu Mosia chung a tehelna hrang a zonga, ama chu Reubena nama mi inthum Eliaba nâipasalhai Dathana le Abirama le Peleta nâipa Ona le Israel irchihai laia hruaitu inlâr mi irzahni sômringa'n an thophaia.

³Anni chu Mosia le Arona makunga an irbûma, an kuang, “A sate'n nin om a liana, mipuihai hi Rengpa ta kin nia, Rengpa khom kin kuang a oma. Khasikin, Mosia'n i sika Rengpa mipuihai chung a hin nin irsia irsâng bîk ma ni?” an tia.

⁴Kha thil kha Mosia'n an hriatin chu, an bokkhupa,

⁵Kora le a pâlhai kuang khan, “Nangtûk zîng Rengpa'n ama tahai chu ni'rhmutir a ti; ama tahai le a inthanghai chu maichâm bula ama hong nâi hrangin koihai a ti.



⁶⁻⁷Nangtûk zîng nangma le ni pâla mihaiin mei indomna chôu unglân, meiri-al sia unglân, mirimhoi phul unglân, maichâma va se roi. Khanchu Rengpa'n a tu hi mo a inthang en ei ti, nangni Levi irchia mihai hi a sân tehelzong nin ni," tia.

⁸Khanchu Mosia'n Kora kuang, "Nangni Levi irchia mihai irngai hi roi,

⁹Israelhai Pathianin ama nin nâia, Rengpa Biakbuka sintho, mipuihai makunga ngîra an sin nin tho pehai theina hrangin Israel mipuihai ata a binga nangni a lei isia hi a dik mo nin isôn?

¹⁰Nangni le Levi irchi dang murdihai hi chôirsângna nangni a pêka, atûn chu ochai nina ten khom hi lapai kêng nin inuam tâk na?

¹¹Khasikin nangma le nang a zuituhai murdi hi Rengpa kha doiin nin irbukkhôm a ni. Arona khom hin imo a tho uala a chung a nin ichiar hi?" a tia.

¹²Khanchu Mosia'n Eliaba nâipa Dathana le Abirama kha an koitirhaia. Khanchu anni'n, "Hong no ni ung!

¹³Aigupta ram hoi tak ata ni hong hruai suakin hi ramchâra ni that hrang hi a ruk ni la iti loi mo? Kin chung a khom rêng ni la ichang sa hrang mo?

¹⁴Dûttoi luangna rama ni hruai inlût mak chea, loi le grep irhuan khom irchon hrangin ni pe mak chea, atûn khom ni huang hranga ni ni ikoi a ni sikin hong no ni ung," an tia.

¹⁵Khanchu Mosia chu a sân a ning an mur pe tâka. Khanchu, Rengpa kuang, "Hi mihriamhai hin thilinhlan an hong ichôihai kha lei pom pehai no ro, an chung a ite tho'nsual ma ung; an sakuartung khom inkhat lua la pehai ma ung," a tia.

¹⁶Khanchu Mosia'n Kora kuang, "Nangtûk nangma le ni mi ir-ôihai irzahni sômringahai chu Rengpa makunga nin hong inlang ngêt hrang kêng; Arona khom om sa a ti.



- ¹⁷Nin rêngin mei indomna hong chôï chit unglân, mirimhoi phul nin ta, khanchu maichâm chung a sia nin ti,” a tia.
- ¹⁸Khanchu mi tinin an mei indomna chit chu chôï an ta, meiri-al sia nin ta, a chung a mirimhoi phul nin ta, irtongna Biakbuk kotbâia Mosia le Arona hai le an ngîr tâka.
- ¹⁹Khanchu Kora khan mipuihai kha bûmin irtongna Biakbuk kotbâia Mosia le Arona chu an sêltirhai tâka. Khanchu mipuihai chung a khan Rengpa roiinpuina chu a zuan lang tâka.
- ²⁰Khanchu Rengpa’n Mosia le Arona kuang,
- ²¹“Hi mipuihai lai ata hi a bingin om roi; inrang takin zuang thathai hrang ki ni,” a tia.
- ²²Khannisian Mosia le Arona chu an lu irnêng sikin an inboka, “O Pathian, nang chu hringna chi tinrêng hai bul ni nia; mi inkhat sualna sikin mipui murdi chung a ni ning a inmur hrang ma ni?” an tia.
- ²³Rengpa’n Mosia a chongpuia,
- ²⁴“Mipuihai kuang khan, Kora, Dathana le Abirama hai puan in ata hi a bingin om ta roi, tiin hrilhai ro,” a tia.
- ²⁵Khanchu Mosia kha a thoia, Dathana le Abirama kuang a va fea; Israel upahaiin an zuia.
- ²⁶Khanchu mipuihai kuang, “Hi mi sualhai puan in rengata hi suak unglân, a bingin om roi, an thil neihai khom hi tôn no roi, khano’nchu an sualnai sikin nangni khom irhmang sa nin ti,” tiin a hrila.
- ²⁷Khanchu Kora, Dathana le Abirama hai puan in ata kha an suaka, khanchu Dathana le Abirama chu an puan in ata kha an hong suaka, an puan in kotbâia khan an dôngma hai, an nâipasal hai, an nâinupang hai leh an ngîra.
- ²⁸Khanchu Mosia’n, “Keima irchama tho ni maka, hi thil tho hrang hin Rengpa’n a ni itîr a nih ti hi, hi thila hin inhre suak nin ti.



²⁹Hi mihai thi dân hi mi danghai thi angin an thia, mi danghai anga hrem an nia ni'n chu Pathianin a ni itîr loi ni a ti.

³⁰Rengpa'n thil thar a siama, irnêngin a bâi a ânga, anni le an thil nei murdihai an volpaia; seol-ah an hringna a lûta ni'n chu hi mihai hin Rengpa an irngainêp a nih ti inhria nin ti," a tia.

³¹Kha thilhai kha a hril zoiin chu Dathana le Abirama omna irnêng kha a kikchat phuta.

³²Khanchu anni le an in mihai, Kora hnungzuituhai le an neinun an inei murdi chu involpaiin an om tâka.

³³Khanchu anni le an thil neihai chu a hring pumin seol-ah an lût ving tâka, irnêngin a bâi a'rchîp delhaia; mipuihai lai ata kha an irhmang zoi tâka.

³⁴Khanchu an kôla Israelhai chu an khêk irhâi an inhriat sikin, an intân indarh zoi tâka, "Irnêngin nin volpaina a ti," an tia.

³⁵Khanchu Rengpa kuang ata mei a zuang suaka, mirimhoi inhlantu irzahni sômringahai chu a kâng thathai tâka.

Mei indomnahai

³⁶Khanchu Rengpa'n Mosia a chongpuia,

³⁷"Ochai Arona nâipa Eliazara kha mei ata mei indomna kha la suak hrangin hrilin lân, mei kha indartir chit ri se, mei indomnahai kha thil irthiang a ni sikin.

³⁸Mei indomnahai kha Rengpa maichâm inhlanin a om tâk sikin thil irthiang a ni tâka. Khasikin an سوالنا sika thata omhai mei indomna kha suk irphântirin maichâm tuamna hrangin sin roh. Kha kha Israelhai ta hranga irsinsiana ni a ti," a tia.

³⁹Khanchu ochai Eliazara khan mei indomna kha suk irphânin maichâm tuamna'n a sin tâka.

⁴⁰Kha kha Israelhai ta hranga irsinsiana a nia, Arona irchihai ti bana chu mi danghaiin maichâma Rengpata hranga mirimhoi hâl hrangin an ihong hrang



ni mah. khano'nchu Kora le a mihai ang khan inboipai ni an ti. Rengpa'n Mosia hmanga thu a ipêk lam ang takin Eliazara'n a tho tâka.

Arona'n mipuihai a sansuak

⁴¹Khannisian zîng nôka chu, “Rengpa mihai nin thathai,” tiin Israel mipuihaiin Mosia le Arona kha an chiarkhumhaia.

⁴²Khanchu Mosia le Arona chung a mipui an chiara an irbuk lai khan, irtongna Biakbuk tiang an irheia; irningloiin sûmin a zuang irkhûhaia, Rengpa roiinpuina chu an hmu tâka.

⁴³Mosia le Arona chu irtongna Biakbuk maton tiang an va ngîra,

⁴⁴khanchu Rengpa'n Mosia kuang,

⁴⁵“Hi mipuihai rengata hi a bingin om roi, an omna hmun ngêta khan inboipaihai hrang ki ni,” a tia. Khanchu an ruaiin an lu irnêng sikin an inboka.

⁴⁶Khanchu Mosia'n Arona kuang, “Ni mei indomna kha lan lân, maichâm ata kha meiri-al lâkin mirimhoihai phul ro, khanchu inrang takin mipuihai kuang fe'n lân, thâr irthianghai roh. Inrang ro, Rengpa ninginmurna chu an lang tâka, hripui an lêngtir zôi tâk a ni,” a tia.

⁴⁷Arona'n Mosia ihril ang lam takin mei indomna chu chôiin mipui irbûmhai laia an tâna a lûta, hripui kha a lêng tah ti a hmua meiri-al chung a khan mirimhoi kha a phula mipuihai a thâr irthianga.

⁴⁸Khanchu hri kha a hek zôi zela, ama chu mithi le mihringhai kêra a ngîr tâka.

⁴⁹Kora chungchânga thihai tep loiin, hria thi murdihai chu sîngkhat sângminli le irzasari an ni.

⁵⁰Khanchu hri kha a hek tena chu Arona kha irtongna Biakbuk kotbâia Mosia kuang a kêr nôk tâka.

Nambar 17

Arona khianghrol



- ¹Khanchu Rengpa'n Mosia a chongpuia,
- ²"Israel irchihai inhrilin lân, khianghrol sômhleihni nang pehai sianlân, nam hruaitu tinin inkhat seng nang pe an ta, khianghrol tina khan an irhming irziak ro;
- ³Levi khianghrola khan Arona irhming irziakin lân, nam tina hruaituhaiin khianghrol inkhat seng nei an ti.
- ⁴Khanchu nang ki ichongpuina irtongna Biakbuk, thu inhriattirna, maton tiang khan sehai roh.
- ⁵Khanchu mi ki inthang hrangtu khianghrol kha chu hon cher suak a ta, khanchu Israel irchihai chiarna, ni chung a chiarna hi inboitirpai ki ti," a tia.
- ⁶Khanchu Mosia'n Israel irchihai chu chongpuihai a ta, khanchu nam tina hruaituhaiin khianghrol inkhat seng an pêka, an rêngin khianghrol sômhleihni a ni. Arona khianghrol khom kha an khianghrolhai laia khan a om sa.
- ⁷Khanchu Mosia'n thu inhriattirna puan ina khan Rengpa makunga khianghrolhai kha a siaa.
- ⁸ Khan zîng nôka chu Mosia kha thu inhriattirna puan ina khan a fea, irngai ro, Levi panama khianghrol chu a hon cher suak kha a hmu'n chu a para almond angin a raa.
- ⁹Mosia'n Rengpa makung rengata khianghrol murdi chu Israelhai kuang a chôia, an lei ena, an khianghrol seng an lâka.
- ¹⁰Khanchu Rengpa'n Mosia kuang, "Arona khianghrol kha thu inhriattirna maton tiang khan se nôk ro, kha kha Israel tehelzong nuamhai ta hranga irsinsiana chu ni a ta, an chiarnahai hi an mong noa ni'n chu, thi ving an ti," a tia.
- ¹¹Rengpa'n thu a ipêk lam ang takin Mosia'n a tho tâka.



¹²Khanchu Israel irchihaiin Mosia kuang, “Irngai ro, a’rh mang kin ni ta hi, kin siat zoia kin siat zoi ving ta;

¹³Rengpa Biakbuk nâituhai kai chu an thi hranga a lei ni’n te, kin irh mang ving hrang ni a ti?,” an tia.

Nambar 18

Ochahai le Levi irchihai sintum

¹Rengpa’n Arona kuang, “Nang le ni nâipasalhai le Levi irchihai hin hmun irthianga tho’nsualna mô chu nin chung a chum a ta, khanchu nang le ni nâipasalhai hin ochai nin inina tho’nsualna mô chu nin chung a chum sa a ti.

²Ni sângsuak, Levi mihai chu ni nâipasalhai leh thu inhriattirna puan ina sin nin tho zoroa nangni an san theina hrangin ni kôla a nâinaa inomtirhai roh.

³Ni sinthôna nang san an ta, Biakbuk tiang sin murdi chu tho an ta, khannisian hmun irthianga bêl le bûr le maichâm chu hong nâi no ri sehai, an tona a ni’n chu anni le nang khom thatin om nin ti.

⁴Anni chu nangma leh sintho nin ta, Biakbuk sina an sintum khom chu tho an ta, khannisian nam dang mi’n chu nangni an hong inai hrang ni mah.

⁵Nangma le ni nâipasalhai vaiin hmun irthiang le maichâm sin tho nin ta; khanchu ki ningmurna hi Israel mipuihai chung a insum ta no ning.

⁶Khan irngai ro, keima hin ni sângsuak Levi mihai chu Israel irchihai lai ata kin thangsuakhaia, Biakbuka sintho hrang Rengpa kuanga pêk, ni ta hranga thilpêk ni a ti.

⁷Nang le ni nâipasalhai vai hin maichâm le hmun irthianga ochai sin murdi chu tho thei nin ti. Ochai sin hi ki thil nangni pêk a ni sikin, hihai hi nin sintum chu a ni. Nam dang hong nâituhai kai chu thatpai ni an ti,” a tia.

Deipuhai dongtum hrang

⁸Khanchu Rengpa’n Arona kuang, “Irngai ro, ngaihoi thilinh lana ki kuanga an inhlan murdi pum hâlirvôm an inhlan loi kai chu, nangma tum hranga nang ki ipêk ving a ni. Hihai hi nangma le nir chi suanpârhai tena hrangin kumtuanga nang ki ipêk chu a ni.



⁹Meia an ihâl mihlia thil irthianghai chu ni ta ni a ta; an thilinhlan tinrênghai, an sual irbôlna hai, an theiloi changna thilinhlan ki kuanga an inhlan hrang ten hin nangma le ni nâipasalhai tum hrang chu ni a ti.

¹⁰Hmun irthiang taka fa nin ta, pasal murdi'n fa nin ti, nin ta hrangin chu irthiang ni a ti.

¹¹Khabana Israel irchihaiin ngaihoi thilinhlan an ni ipêk murdi chu nangma ta ni sa a ti. Hi hi nangma le ni nâipasalhai le ni nâinupanghai ta hranga kumtuanga hrangin nangni ki ipêk chu a ni. Ni in sûnga mi murdi Pathian dâna irthianghaiin chu fa thei an ti.

¹²Oliv hriak satakhai, grep ra satakhai, bu satak hai, ra maton takRengpa ta hranga an ipêk murdi chu nang ki ipêk a ni.

¹³Khahai murdi kha ni ta an nia, ni in sûnga mi murdi, Pathian dâna irthiangtu kaiin chu fa thei an ti.

¹⁴ “Israelhai thilinhlan murdi chu ni ta ni a ti.

¹⁵Rengpa ta hrang nâilutîr mani, ra irzir maton tak mani, an ipêkhai kai chu mihriam khom ni ta ni a ta; khannisian nâilutîr chu irtan ni ta, sâ Pathian dâna irthiang loi a tê suak maton tak chu irtan sa ni a ti.

¹⁶Tha khata nî'n chu irtan hranghai chu irtanna man ni inkung angin hmun irthianga sekel tep dân angin, sekel ringa leh ni irtan hrang a ni.

¹⁷Khannisian sehrât, kêlbelra le kêl irzir maton tak chu irtan nang no nia; khahai kha chu keima ta an ni sikin, inhlan ni an ti. An thisen chu maichâma inthek ni a ta, Rengpa ta hrangin mirimhoi tak le an thâihai chu meia thilinhlananna khan ni irô hrang a ni.

¹⁸An hmê chu ni ta ni a ta, ngaihoia thilinhlan a rôp le a mal chang tianga chu ni ta a ini ang hin.

¹⁹Nangma le ni nâipasalhai le ni nâinupanghai kuanga kumtuanga an inhlanhai hi nangni ki ipêk a ni. Hi hi indanglamtir thei loi thuthung nangma le nir chi suanpârhai kuanga ki inkung chu a ni,” a tia.



²⁰Khanchu Rengpa'n Arona kuang, "Irchon lua hrang nei no chi nia, Israel ram rêng rêng khom pêk ni sa no chi ni; Israel irchihai laia nir chon chu keima hi ki ni," a tia.

Levi irchihai dongtum

²¹Rengpa'n, "Israel mihaiin sôma inkhat an ipêk murdi chu Levi mihai ki pêka, hi hi irtongna Biakbuk an sinthôna irthûla ki ipêkhai chu a ni.

²²Khasikin Israel mi danghai rêng rêngin irtongna Biakbuk an hong inai hrang ni maka, an sual man chu pêlin an thi loina hrangin.

²³Atûn ata chu Levi irchihai vaiin irtongna Biakbuk sin chu tho'n an mophurna ni a ti. Hi hi nin irchi suanpârhai tena om mai hrang chu a ni. Levi mihai hin Israel irchihai lai hin irchon nei no nihai.

²⁴Israel irchihaiin sôma inkhat thilinhлана keima an ni ipêk hi ki pêkhai tâk sikin. Khasikin kêng Israel irchihai laia hin irchon nei no nihai ki iti," a tia.

Levi irchihai sôma inkhat pêk hrang dân

²⁵Khanchu Rengpa'n Mosia kuang,

²⁶"Kha ti no khom khan Levi mihai chu inhrilin lân, an kuang, nin irchon hrang Israel irchihai sôma inkhat kha Rengpakuang ngaihoi thilinhлана hrangin nin inhlan hrang a ni.

²⁷Khanchu nin ngaihoi thilinhlan kha hruizôla bu le uain tui sômna uain anga pom thei ni a ti.

²⁸Khaang khan Israel irchihai laia sôma inkhat nin idonghai kha Rengpa ta hranga ngaihoi thilinhлана hrangin nin inhlan ngai hrang chu a ni; khanchu Rengpa ta hranga ngaihoi thilinhlan kha ochai Arona chu nin ipêk hrang a ni.

²⁹Nin thil dong murdi laia a satak, a'rthiang tak chu Rengpa kuang ngaihoi thilinhлана nin inhlan hrang a ni.

³⁰Khasikin an kuang, khataka a satak nin ipêk, Levi mihai ta hranga hruizôla ra suak ang le uaiin sômnaa suak a ibe ni a ti.



³¹Kha hmuna khom fa thei nin ta, nangni le nin in mihai khomin, irtongna Biakbuka nin sintho man a ni sikin.

³²A satak nin ipêk kha a sual man nin chungu chum no nia, Israel irchihai thil irthiang chu porinchetir no roi, nin thi loina hrangin ti ro,” a tia.

Nambar 19

Irthiang loihai thâr irthiangna

¹Khanchu Rengpa'n Mosia le Arona a chongpuihaia,

²Hi hi Rengpa thupêk dân chu a ni; Israel irchihai chu sehrât irla a sen, demnaboi ringkol la pêl ngai loi hong kai hrangin hrilhai roh.

³Ochai Eliazara pe ni ta, ama'n riakbuk pên tiang hruai suak a ta, a makunga that a ini hrang a ni.

⁴Ochai Eliazara'n a thisen kha a kutpâra luak a ta, irtongna Biakbuk tiang voisari inthek a ti.

⁵Sa kha a pumin, a vun, a hmê a thisen le a rîlhai kha ochai makunga hâlpai a ini hrang a ni.

⁶Khanchu ochaiin sidar thing le husop le patzâisen la a ta, sehrât irla an ihâlna khan pai a ti.

⁷Khanchu ochai kha a silkaihai sôp a ta, tui irsil a ta, khanchu riakbuka fe a ta, khohloi dênin ochai kha irthiang loi a ini hrang a ni.

⁸A hâltu khom khan a silkaihai sôp a ta, tui irsil a ta, khohloi dênin irthiang loi ni a ti.

⁹Khan Pathian dâna mi irthiang inkhat khôkin sehrât an ihâlna irvâm kha irkhôm a ta, riakbuk pên tiang, hmun irthiangna khan sia a ta; kha kha Israel mipuihai dâna irthiang loihai thâr irthiangna hrang tui siana hrangin savingin hrê a ti. Hi dân hi sual sôpinfâina hrangin an tho ngai.

¹⁰Khan sehrât irvâm irkhômpu khan a silkaihai sôp a ta, khohloi dênin irthiang loi ni a ti. Hi dân hi Israel irchihai le nam dang an kuanga omhai ta hranga kumtuanga dân hrang chu ni a ti.



Mithi ruak tôna thu

- 11** Mi tukhom ruak tôntu kai chu sôn sari sêng chu irthiang loi ni an ti.
- 12** Ama chu a sôn thum ni le sôn sari nihaia khan tui kathâr leh irthâr irthiang a ta, khanchu irthiang hong ni a ti. Khannisian sôn thum ni le sôn sari ni a'rthâr irthiang noa ni'n chu, irthiang loi la ni a ti.
- 13** Tukhom ruak tôna a'rthâr irthiang noa ni'n chu irthiang loiin om mai a ti, tui kathâr kha a chung a buakin a om no sikin. Rengpa Biakbuk porinchetirtu a nia, khasikin ama chu Israel irchihai lai ata sâtthâkin om a ti.
- 14** Khan mi puan ina thi a ni'n chu, puan ina lûtpuhai le a sênga omtuhai chu sôn sari sêng chu irthiang loi ni an ti.
- 15** Khan bêl le bûr irhong a sêngna leh sêng loi hai khom irthiang loi ni sa an ti.
- 16** Khan mi tukhomin pên tianga irdoinaa thi mani, aninole thi balama thi, a ruak mani, a ru mani, aninole a thân mani khom a tôna ni'n chu, ama chu sôn sari sêng chu irthiang loiin om a ti.
- 17** An irthiang lina irthiangna hrangin sehrât irla a sen, sual infâina hranga an ihâlna irvâm senkhat kha la a ta, bêl sênga thun a ta, tuidunga tui irthiang kha sung a ti.
- 18** Khanchu mi irthiangin husop kha la a ta, tuia khan inchie a ta, puan inhai, bêl le bûrhai, khataka mi a om murdihai ru mani, mithi ruak mani, thân mani a tônpuhai chu inthek a ta;
- 19** khanchu mi irthiangin, a sôn thumna le sôn sarina khan tui kha mi irthiang loitu kha inthekhum a ti, khan a sôn sari ni khan mi irthiang loitu kha thâr irthiang a ta, a silkaihai kha sôpin, tui irsil a ta, khanchu zêng tiang chu irthiang hong ni thei ta a ti.
- 20** Mi tukhom Pathian dâna irthiang loitu chu a'rthâr irthiang mâka chu ama chu irthiang loiin om mai a ti, tui kathâr kha a chung a inthek a la ni no sikin. Rengpa hmun irthiang a porinchetir sikin mipuihai lai ata sâtthâkin om a ti.



²¹Hi dân hi itiklai khomin nin ihmang hrang chu a ni. Tui kathâr inthe KPU khom khan a silkaihai sôp a ta, mi tukhom tui tônpu kai chu khohloi dênin irthiang loiin om an ti.

²²Khanchu mi irthiang loitu khan a itôn kai chu irthiang loi chang an ta, ama tôn nôktu khom kha khohloi dênin irthiang loiin om a ti, a tia.

Nambar 20

Kades hmuna thil tung

(Fes 17.1-7)

¹Khanchu Israel irchi murdihai chu tha khatna khan Zin ramchâra an lûta, Kades hmuna omhmun an khuar tâka. Khataka khan Miriami chu a thia, kha khan an phûm tâka.

²An omhmun khuarna khan, tui om ta maka, khasikin mipuihai irbukkhômin Mosia le Arona chung a chiara.

³Rengpa makunga ei urênghai an thi lai khan eini khom hi Pathianin a ni ithat lolo lei ni sianlân a isa ok hrang a nia,

⁴itho sika Rengpa'n mipuihai hi thi hranga hi ramchâra hin ni ni hong ihruai suak mo, keini le kin sahai dênin?

⁵I lo hranga Aigupta ram rengata hi ram saloi taka hin ni ni hong ihruai inlût? Ansûlhloihna hai, theipui hai, grep hai, dalim omna ram sa lak ni maka, tui in hrang lua hi teh om ri se ba! an tia.

⁶Khan Mosia le Arona chu mipuihai lai ata fe suakin irtongna Biakbuk kotbâia an va fea, an lu irnêng sikin an inboka, khanchu Rengpa roiinpuina kha a zuan lang tâka.

⁷Khan Rengpa'n Mosia a chongpuia,

⁸“Thuthung Bôm maton tianga khianghrol kha lan lân, nang le Arona'n mipuihai kha bukkhômhai unglân, an mithmu ngeia lungpui kha chongpui unglân, tui chu hong suak a ta, khaang khan mipuihai ta hrangin lungpui ata tui kêsua ni ta, mipui le an sahai ta hrangin tui kha pehai ro,” a tia.



⁹Khan, Mosia'n Rengpa makung ata khianghrol kha a thupêk lam ang takin a lâka.

¹⁰Ama le Arona'n mipuihai chu an bukkhômhaia, khanchu Mosia'n an kuang, "Irngai roi, nangni mi têngtôngsiahaio! Hi lungpui ata hi tui nangni kêlsua pe ni ung mo?" a tia.

¹¹Khanchu Mosia'n khianghrol kha a lâka, lungpui kha voihni a hei vîka, khanchu tui tamtak a hong suak tâka, mipui le an sahain tui kha an in tâka.

¹²Khanchu Rengpa'n Mosia le Arona kuang, "Ni iam mak chêia, Israel irchihai mithmua nin ni chôiindôm no sikin, hi mihai hi ki ipêk rama khan hruai intunghai no chin ni," a tia.

¹³Hi hi Israel mipuihaiin Rengpa chung a chiarna hmun Meriba hmuna thil tung a nia, hitaka hin ama chu a'rthiang a nih ti an langtirna a ni.

Edom rêngin Israelhai khapna

¹⁴Mosia'n Kades rêng kuang ata Edom rêng kuang palai a tîra, "Ni sêngsuak Israel irchihaiin hiang hin an ti, kin chung a dengtheina tung murdi hi nin hriata,

¹⁵kin pi le puhai Aigupta rama an fe tâka, zoro sôtak Aigupta rama kin omna thuhai, Aigupta mihaiin kin pi le puhai le kei ngei khom deng an ni intheitir lam kha,

¹⁶khanchu Rengpa kin koia, kin koina kha a le'rngai, vântirtôn a zuang tîra, Aigupta ram ata a ni hruai suaka. Khanchu irngai ro, nangma ram dep Kades-a hin kin om.

¹⁷Irngaihoi takin ni ram hi nin hrotir ro, loia mani, irhuana mani khom fe no ni unga, rungtuia tui suakhai khom in no ni ung, lamliana fe pat kin ta, ni ram kin khêl mâka chu chang tiang mani, vei tiang mani khom pêt viat no ni ung," a tia.

¹⁸Khannisian Edoma'n a kuang, "Nin ni ihrôthal hrang ni ma, nin ni hroa ni'n chu, nangni doi hrangin khandai leh hong suak kin ti," a tia.



¹⁹Khanchu Israel irchihaiin an kuang, “Lamliau vai hro kin ta, keini’n mani, kin sahahiin mani, ni tui an lei ina ni’n chu, a man nang pe kin ta, a hro vai nin hrotir hrâm ro,” an tia.

²⁰Khanchu Edoma’n, “Ni hrothal thei no chin ni,” a tia. Khan, Edom chu mipui tamtak le mi hrâthai le anni doi hrangin an hong suak tâka.

²¹An ihro kha phal pehai ta maka, khanchu Israel mihaiin an rotsan nôk ta.

Hor tânga Arona thina

²²Khanchu Kades ata kha an suaka, Israel mipui tam dôrhai khan Hor tâng kha an va tunga,

²³khan Rengpa’n Mosia le Arona chu Edom ramri khan a chongpuihaia, “Arona chu a’rchihai kuang hruai ni a ta,

²⁴Meriba khan ki thu sêlin a têngtông an setir sikin, Israel irchihai ki ipêkna rama khan lût no ni.

²⁵Arona le a nâipa Eliazara chu Hor tânga khan hong hruaihai roh.

²⁶Arona chu a ochai tukfamhai kha khekpai pe’n lân, a nâipa Eliazara innghâktir roh. Arona chu a’rchihai kuang hruai ni a ta, kha khan thi a ti,” a tia.

²⁷Mosia’n Rengpa thupêk ang lam takin a thoa, mipuihai mithmua Hor tânga khan an hong fea,

²⁸khanchu Mosia’n Arona tukfamhai kha a khekpai pea, Eliazara kha an nghâktira; khanchu Arona chu tângsîpa khan a thi tâka; khanchu Mosia le Eliazara chu tâng ata kha an zuang chuma.

²⁹ Mipuihaiin Arona a thi tah ti an inhriatin chu, sîn sômthum an chûla.

Nambar 21

Kanaan mihaiin Israelhai an doi

¹Khanchu Kanaan Arad rêng sim tianga om khan Israel mihai Atharim kho lampui tiang an hong ti a len hriata, khanchu Israel mihai kha a lei doia, senkhathai chu suak hrangin a hruaihaia.



²Khan Israel mihaiin Rengpa kuang chong an inkunga, “Hi mihai hi kin kuta ni ni pêka ni’n chu, an khuahai hi irhmangtir chit kin ti,” an tia.

³Khanchu Rengpa’n Israel mihai thu kha a poma, Kanaan mihai kha a pêkhaia, anni le an khuahai chu a’rh mangtir zoia. A hmun irhming hrang khan Horma an iti a ni ta.

Sumsen mirûl

⁴Khanchu Hor tâng ata kha tuipuisen tiang Edom ram lôiin an fea, a lampui sika khan an milung a’rzal pehaia.

⁵Mipuihaiin Pathian le Mosia sêlin, “Ramchâra thi hrang pialin Aigupta rengata ni ni ihruai suak? Fâk hrang le tui in hrang lak om loi, hi bai intirom fâk hi chu a sân kin hnông ta,” an tia.

⁶Khanchu Rengpa’n mipuihai laia khan mirûl tûr neihai a tîra, an inchukhaia, Israel mi tamtak chu an thia.

⁷Khanchu mipuihai kha Mosia kuang an fea, “Rengpa le nangma doia kin lei iom hi kin lei itho’nsual a ni ta, kin laia mirûlhai hi nin boi pe hrangin Rengpakuang chongchai ro,” an tia. Khanchu mipuihai hrangin Mosia’n a chongchai pehaia.

⁸Khanchu Rengpa’n Mosia kuang, “Mirûl tûr nei kha a’r lim siamin lân, chopuia inkhâi ro, mirûl inchukhaiin chu kha kha en an ta, khanchu hong dam an ti,” a tia.

⁹Khanchu Mosia’n sumsen mirûl irlim a siama, chopuia an khâia, mirûl inchukhai khan an ena damna an changa.

Hor tâng rengata Moab phâia an fe

¹⁰Khan, Israel irchihai chu an fe maia, Oboth-ah khan omhmun an khuar tâka.

¹¹Oboth ata kha an fe nôka; nisua tiang Moab ramchâr kôla Ijeabarim-a omhmun an khuar ta.

¹²Khatak ata kha an fe nôka, Zered ivapanga omhmun an khuar nôk tâka.



¹³Khatak ata an fe nôkin chu, Arnon tuidung râl tiang Amor mihai ram tung thaia hla ramchâra khan omhmun an khuar nôka. (Arnon chu Moabhai le Amor-hai ramria om a ni).

¹⁴Khasikin Rengpa irdoina lekhabua, “Sufa irhôr Vahep khuaa Arnon irhôrhai,

¹⁵Ar khua omna tianga tâng insuk, Moab rama irnghat, ivadung panghai chu,” tia hril a ni.

¹⁶Khatak ata kha Beer-ah rungtui omna tiang an fe nôka, kha khan Rengpa’nMosia kuang, “Mipuihai koibukhaiin lân, keiin tui pehai ki ti,” a tia.

¹⁷Kha zoro khan Israel mihaiin hi hla hi an saka: “O rungtui, ni tui kha hon suak ro, zâiin in-ôi kin ti.

¹⁸An rêng hai le mipui hruaituhaiin, an ichoi rungtui chu an rêng khianghrol leh hêmvuaka an ichoi chu,” an tia. Khanchu ramchâr ata kha Matan-ah khan an fea,

¹⁹Matan ata kha Nahaliel-ah an fea,

²⁰Nahaliel ata kha Bamotha-a an fea, Bamotha ata kha Moab ivapanga, Pisga tâng hnuai ramchâr Jeshimon irlangna hmuna.

Reng Sihona le Oga inhnêna

(Dhn 2.26–3.11)

²¹Khanchu Israel mihaiin Amor mihai rêng Sihona kuang mi an târa,

²²“Ni ram hi nin hrotir ro, keini le kin sahai hin lamlian hi hro loiin loa mani, grep irhuan khom fe no ni ung, ni rung tuaia tui khom in no ni ung, ni ram kin khêl mâka chu lamlian hi ma viat no ni ung,” tiin.

²³Khannisian Sihona khan Israel mihai kha a ram hro hrang kha phal pehai maka, a sipaihai bukkhômin Israel mihai doi hrangin a suaka. Jahaz an va tunga; khanchu Israelhai kha an doihai tâka.

²⁴Khan Israel mihaiin khandai leh an lei doihai, a ram chu Arnon rengata Jabok dênin, khan Amona irchihai ramri Jazer dênin an lâk pea.



²⁵Israel mihaiin kha khuahai kha an lâka, khanchu Israel mihai kha Amor mihai khuaa khan an om tâka. Hesbon le a kôla khotelai khom khan.

²⁶Hesbon chu Amor mihai rêng Sihona kua a nia, ama chu rêng masa Moab rêng doiin, Arnon tuidung dên raka la petu kha a ni.

²⁷Khasikin hla phuatuhaiin, “Hesbon-a hong unglân, Sihona khopui chu inding indet ni sian,

²⁸Khan voikhat chu Hesbon khopui ata Sihona sipaihai chu mei angin an suaka, Moab rama Ar khopui kha an insiata, Arnon sak tianga tâng chu an lâkpaia.

²⁹Moab mipuihai, nin chung a sân a rik, nangni Kemos chubai mûktuhai siat zoi hrang nin ni ta, nin pathianin pasalhai chu laizâm tho hrangin le nupanghai chu Amor rêng suaka om hrangin a pêka.

³⁰Khannisian atûn chu an irchi suanpârhai chu Hesbon ata Debon Nashim ata Medeba kôl Nofa dên rakin inboipaiin om an ti,” an tia.

³¹Khasikin Israel mihai chu Amor mihai rama an om tâka.

³²Khan Mosia chu Jazer va enirchik hrangin mi a tîra. Khanchu kha hmuna khuahai kha rûnin an lâk tâka. Amor mi omhai kha an irzûlpaihai ta.

³³Khanchu an kîr nôka, Basan lampui tiang an fea, khanchu Basan rêng Oga chu sipai hruaiin Edrei-a doi hrangin a suaka.

³⁴Khan Rengpa’n Mosia kuang, “Ama chu chi no ro, a mihai khom a ram khom ni kuta nang ki ipêk tâk a ni hi, Hesbon-a om Amor mihai rêng Sihona chung a ni itho angin ama chung a khom hin tho hrang ni ni,” a tia.

³⁵Khanchu ama khom a nâipasalhai khom, inzôk viathai loiin an thathaia, a ram khom an luapai pe ta.

Nambar 22

Moab rêngin Balaama koi hrangin mi a tîrna

¹Khanchu Israel irchihai kha an fe maia, Jeriko irdîn Jordan râl Moab phâizôla khan omhmun an khuara.



²Khanchu Moab rêng, Zipora nâipa Balaka'n Israel mihaiin Amor mihai itho dân kha an hriatin chu,

³ama le a mihai khan a sate'n an chi tâka.

⁴Khanchu Moab mihaiin Midian mi upahai kuang, “Hi mihai hin sehrâtin hloisûl a ifâk angin, ei vêla mihai hi an ifâk zoihai hrang kêng,” an tia.

⁵ Khasikin Balaka rêngin Amaw rama Eufrates tuidung kôla Pethor-ah om Beora nâipa Balaama kuang mi a tîra, “Irngai ro, nam inkhat Aigupta rengata hong an oma, hmun tin an sip zoi tâka; ki ram kôla hin an oma.

⁶Keini nêkin an tama, khasikin irngaihoi takin hongin lân, hi mihai hi khua ni va sâl pehai ro; kin inhnêhaia, kin ram ata kin inhnothai theina hrangin a ni, mi sat ni ivurhai chu satvurin an om ngaia, khua ni isâlhai chu khosâlin an om ngai ti kin hriat,” tiin a van koitirhaia.

⁷Khanchu Moab upahai le Midian upahai chu khuasâlna hrang, a man chôiin Balaama kuang an fea, khan Balaka iti khom kha an insîr pea.

⁸Khanchu Balaama'n an kuang, “A vuan zân hi hin riak unglân, nangtûk Rengpa'n keima kuanga a ihrilhai chu, nangni insîr pe ki ti,” a tia. Khan Moab upahai chu Balaama kuang an riak tâka.

⁹Khanchu Balaama kuang Pathian a zuanga, a kuang, “Ni kuanga omhai hi tuhai mo an ini?” a tia.

¹⁰Balaama'n Pathian kuang, “Moab rêng Balaka'n a hong tîrhaia

¹¹irngai ro, Aigupta rengata mi honghai chu ram pumpui hi an sip zoi tâka, hongin lân, khua ni va sâl pehai ro, kin hnêhaia, ki ram ata kin hnotsuakhai theina hrangin,” a tia.

¹²Khanchu Pathianin Balaama kuang, “An kuang ni ife hrang ni maka, kha mihai kha khua khom ni isâlhai hrang ni ma; ki satvurna an chung a iom kêng,” a tia.

¹³Khanchu Balaama kha zînga a thoia, Balaka upahai kuang a fea, an kuang, “Nin ram tiang kîr nôk ta roi, Rengpa'n nin kuanga fe hi ni phal ma,” a tia.



¹⁴Khanchu Balaka kuang an kîr nôka, Balaama'n a hong izui nuam loi thu an inhrila.

¹⁵Khanchu Balaka upa inlal ualhai matona nêka tam a tîrhai nôka.

¹⁶Khanchu Balaama kuang an fea, Balaka he bê kha an va hrila, a kuang, "Balaka'n hiang hin a ti, 'Ki kuanga ni ihong hrang hi ite khâl no ri se,'

¹⁷mi roiinpui takin nang siam ki ta, ki kuanga ni iti kai chu tho ki ti. Khasikin hong suak hrâmin lân, hi mihai hi khua ni va sâl pehai ngêt ro," an tia.

¹⁸Khannisian Balaama'n Balaka mihai chu a sâma, an kuang, "Balaka'n a in sînga tangka le rângachakhai hi ni pe ving hrang ni khomsian, i ang khomin Rengpa ki Pathian thu chu zôm loiin om thei no ning.

¹⁹Khannisian a vuan zân, hi hin riak nôk phot unglân, Rengpa'n ki kuang imo a hril nôk ngân," a tia.

²⁰Kha zâna khan Pathian chu Balaama kuang a zuanga, a kuang, "Hi mihai hi nang a koia zuang an ni'n chu, irsiamin lân, zuihai ro, khannisian ni kuanga tho roh nang ki iti vai hi tho ro," a tia.

²¹Khanchu Balaama chu zîng nôka chu a sakuartung chu a'rsiam infela, Moab upahai chu a zuihai tâka.

Balaama le a sakuartung

²²Khanchu a fe sika khan, Pathian ning a zuan mur pea, Rengpa vântirtôn chu zuang khap hrangin lampuia a lei ngîra. A sakuartung chung a chuanga a nia, a sinthotuhai inhni a kuang an om saa,

²³sakuartung khan Rengpa vântirtôn khandai chôia lampuia ngîr chu a hmua, lampui ata kha a pêta, ramkâr tiang a fe tâka; khan Balaama'n lampui tianga fe hrangin a sakuartung kha a vîka.

²⁴Khanchu vântirtôn kha grep irhuan inhni lai taka lampui irchêpna taka a ngîra.

²⁵Khan sakuartung khan Rengpa vântirtôn kha a hmua, bang kha a va hnenga, Balaama ke chu bang leh khan a epbea, khanchu Balaama'n a vîka.



- ²⁶Khan, Rengpa vântirtôn khan a khêl viata a fe nôka, lampui irchêpna taka, chang tiang le vei tiang, a lôina taka a ngîr pe nôka.
- ²⁷Khanchu sakuartung khan Rengpa vântirtôn chu a hmua, Balaama kha an bokpui raka, khan Balaama chu ningmurin khianghrol leh sakuartung kha a vîk nôka.
- ²⁸Khanchu Rengpa'n sakuartung kha an chongtira, Balaama kuang, "Imo nang ki itho pe, hianga voithum reng ni ni ivîk tâk hi?" a tia.
- ²⁹Balaama'n sakuartung kuang khan, "Deng ni nin theitir sika a ni, khandai chôî sa len vâng inlân chu, nang that ta ki ti," a tia.
- ³⁰Sakuartung khan Balaama kuang, "A vuan sîn tena ni ichuangna ngai sakuartung kha mo ni ma ung? Hiang hin mo nang ki lei lo ta ngaia?" a tia. Ama'n, "Ni la lo ngai mak che," a tia.
- ³¹Khan Rengpa'n Balaama mit chu a hon vârtir pea, khanchu Rengpa vântirtôn khandai chôia lampuia ngîr chu a hmu tâka. A kûna, a lu irnêng sikin an bok rak tâka.
- ³²Khanchu Rengpa vântirtônin a kuang, "Itho mo hianga ni sakuartung voithum ni ivîk? Irngai ro, ni tho dân hi ki mithmua a dik no sikin nang lei khap hranga zuang ki ni.
- ³³Ni sakuartungin a ni hmua, ki makung ata voithum a ipêt a ni kha te; la pêt loi ni sianlân chu, nangma kêng nang ki ithat hrang," a tia.
- ³⁴Balaama'n Rengpa vântirtôn kuang, "Ki lei itho'nsual a ni ta, ni khap hrangin ki lampuia ni ngîr ti lak inhre ma unga, khasikin ni nuam noa ni'n chu kîr nôk zel ta ki ti," a tia.
- ³⁵Khanchu Rengpa vântirtônin Balaama kuang, "Hi mihai hi zuiin lân, khannisian hril hranga nang ki iti vai hi tho ro," a tia. Khanchu Balaka upahai kha a zuihai tâka.

Balaka'n Balaama a lei lôm

- ³⁶Khan, Balaka'n Balaama a hong ti an hriatin chu, Arnon tianga an ramri tena a lei va dona.



³⁷Balaka'n Balaama kuang, "Itho sika mo nang ki hong koi masa khan ni ihong loi? Mi roiinpui takin nang ki isiam thei mo ni ma?," a tia.

³⁸Balaama'n Balaka kuang, "Irngai ro, ki ihong mo ni ta ma, khannisian i thuneina ual mo ki neia? Pathianin hril hrang a ni iti pe vai hi kêng ki ihril hrang," a tia.

³⁹Khanchu Balaama kha Balaka kuang a fea, Kiriath-huzoth an va tunga.

⁴⁰Khanchu Balaka chu sehrât le kêlbelra leh a'rbôla, a hmê chu Balaama le a kuanga upa omhai kha a pêka.

Balaama leihrlina masa

⁴¹Khanchu zîng khovâr mâka chu Balaka'n Balaama chu a hruaia; Baal hmun irsâng tianghai a fepuia, khatak ata kha Israel mipui murdihai kha a va hmuhaia.

Nambar 23

¹Khanchu Balaama'n Balaka kuang, "Hitaka hin maichâm sari ni sinsiam pe'n lân, sehrâtchal sari le kêlbelra chal sari ni ngaitua pe ro," a tia.

²Khanchu Balaka'n Balaama ihril lam angin a thoa. Balaka le Balaama'n maichâm tina sehrâtchal inkhat le belrachal inkhat an inhlana.

³Balaama'n Balaka kuang, "Ni hâlirvôm kôla hin lei ngîr maiin lân, kei chu ki bingin hong fe ki ta, Rengpakha ni chongpui hrangin a zuang khom a ni thei; khan a ni ihril murdi chu nan hril ving ki ti," a tia. Khanchu a bingin tângsîpa hin a hong fe tâka.

⁴Pathianin khataka khan a le'rtongpuia, khan Balaama kuang, "Maichâm sari chu ki lei siam tâka, maichâm tina khan sehrâtchal inkhat le belrachal inkhat seng chu kin hlana," a tia.

⁵Rengpa'n Balaama bâia thusuak chu a hrêa, Balaka kuang kîr nôkin lân, van hril ro, a tia.

⁶Khanchu a kuang a kîr nôka, Balaka chu Moab upahai murdi leh khan pum hâlirvôm thilinhlan kôla khan a lei ngîr kha a va hmua.



⁷Khan Balaama'n hi leihrilna thu hi a hril tâka: “Balaka Moab rêngin Suria ram nisua tianga tânga a ni hruaia, 'Hongin lân, Israel mipuihai khua ni sâl pe ro,' a tia.

⁸Itin mo Pathianin khua a isâl loihai kha khuasâlhai thei ki ta? Itin mo Pathian khosâl a inpêl loihai kha khosâlna a inpêlhai hrang?

⁹Lungpui irsâng tak ata ki hmuhai, tângsîp ata khom ki hmuhai theia; anni chu nam a binga om indet sai an nia; nam danghai nêk khomin satvurin an om ti an inhriata.

¹⁰Israel irchi le suanpârhai chu pildi ang dôr an nia, tep zoi zât ni no nihai. Pathian mihai angin, ki nikhuahai hi hmang zoi inlân, mi felhai angin lungngam takin thi inlân,” a tia.

¹¹Khanchu Balaka'n Balaama kuang, “Imo ni ni itho pe ta ngai? Ki râlhai khua ni sâl pe hrangin kêng nang ki ikoi, khannisian sat te ni vurhai tâka!” a tia.

¹²Khanchu ama'n, “Rengpa'n hril hrang a iti vai kêng ki ihril thei,” a tia.

Balaama leihrilna voihnina

¹³Khanchu Balaka'n a kuang, “Hmun danga fe nôk ei ti, khatak ata kha hmuhai ni ta, maton tianga omhai khom hmuhai thei ni ta, an rêngin chu hmuhai zoi no chi ni; khatak ata kha khua ni sâlkhum pehai ro,” a tia.

¹⁴Khanchu Zofim hai omna Pisga sîpa a hruaia, maichâm tina khan sehrâtchal inkhat le belrachal inkhat an hlana.

¹⁵Khanchu Balaama'n Balaka kuang, “So taka son Rengpa ki va chongpui kêr chu ni hâlirvôm thilinhlan kôla hin lei ngîr mai ro,” a tia.

¹⁶Khan Rengpa'n Balaama chu a le'rtongpuia, a bâia thu a sîaa, “Balaka kuang kêr nôkin lân, a kuang va hril nôk ro,” a tia.

¹⁷Khanchu a kêra, Balaka chu hâlirvôm thilinhlan khan Moab upahai leh ngîr maiin a va hmua, Balaka'n a kuang, “Rengpa'n imo a lei ihril?” tiin a'rdona.



¹⁸Khanchu Balaama'n hi leihrilna hi a hril pea: "Zipora nâipa Balaka hongin lân, ki thu hi hor ngai roh.

¹⁹Pathian chu mihriam minlak ang hi ni maka, Ama chu mihriam milung irletkochok ngai ang hi ni ma; chong a inkung tâk chu a tho ngêt ngai. Thu a hrila, a'zoi zel ngai.

²⁰Satvur hrangin hrilin ki oma; Pathianin sat a ivur tâk chu koi kîr thei ni ta no ning.

²¹Israel sînmatona hin vânsiatna le buaina ite om no nia; Rengpa an Pathian chu an kuang a om sikin, ama chu an rêng a nih tiin an chôindôma.

²²Pathianin Aigupta ram ata a hong hruai suakhaia, ramkâra sele angin a doi pehaia.

²³Dôiâi ihruaina om loiin, Israel namhai chung a hman hrangin ite dôi om mah. Atûn chu mihaiin, 'En roi, Pathianin thil a itho lam hi,' ti an tih.

²⁴Israel namhai chu kâmkeibaknei hrât tak ang a nia; a sa sê a thatpai mâka chu, a sa sê thisen an dôp mâka chu omchian ngai ma," a tia.

²⁵Khanchu Balaka'n Balaama kuang, "Israelhai hi khua ni sâl nuam no khomin sat hi chu vurhai no ro," a tia.

²⁶Balaama'n, "Nang ki ihril mo ni ta mah. Rengpa'n a iti vai kêng ki itho hrang tiin," a tia.

Balaama leihrilna voithumna

²⁷Balaka'n Balaama kuang, "Hong hi ro, hmun danga nang lei hruai nôk hi rong, khatak ata chu khua ni sâl pe hrang hi Pathian a nuam khom a ni thei," a tia.

²⁸Khanchu Balaka'n Balaama chu ramchâr a suk tianga zu en theina hmun Peor sîpa a hruaia.

²⁹Khanchu Balaama'n Balaka kuang, "Hitaka hin maichâm sari ni siam pe'n lân, sehrâtchal sari le belrachel sari ni ngaitua pe ro," a tia.



³⁰Khanchu Balaka'n Balaama ihril angin a tho pea, maichâm tina khan sehrâtchal le belrachal an hlan vinga.

Nambar 24

¹Khanchu Balaama'n Israelhai sat a ivur hi Pathianin a nuampui a nih ti an hriat suak tâka; khasikin matona anga irsinsiana dang zong ta loiin ram tiang a fe tâka.

²Khan Balaama'n Israel irchihai chu ama panama an om kha a hmuin chu, Pathian irtha a chung a zuang tunga,

³khanchu hi thu hi a leihril tâka; "Beora nâipa Balaama leihrilna, fel taka hmu theituhai chu;

⁴Pathianin thu a ihrilhai inhriat theia, mit leh en maia inlârna hmutu, Pathian Itinrêngthothei kuang ata inlârna hmutu'n.

⁵Israelhai puan in chu a sate'n a saa,

⁶Tùm thing irtâng angin a'rtânga, Tuidung kôla irhuanhai ang a ni; Rengpa iphun aloe hai ang a nia, tuidung kôla sidar thing ang a ni.

⁷Rotui tamtak dong an ta, an chîmuhai chu tui omna hmuna tû an ti. An rênghai khom chu Agaga nêkin roiinpui an ta; a roirêlna khom ram hlatak dên a ti.

⁸Pathianin Aigupta ram ata a hruai suakhaia, anni ta hrangin rama sele angin an râlhai a doi pehai ngai. An râlhai chu an hnê pehaia, an ruhai irnoitirin, an sâihlihai khom an khiaktir pehai ngai.

⁹Hi nam hi chu kâmkeibaknei hrât tak ang a nia, a inin chu tûte'n kaithoi ngam ngai mahai. Israelhai satvurtu chu satvurin om a ta, Israelhai khuasâltu chu khosâlin om a ti," a tia.

¹⁰Khanchu Balaama chung a Balaka chu a ning an mur pea; Balaka'n Balaama kuang, "Ki râlhai khuasâl hrangin nang ki koia, khannisian hi voithum sat ni vurhai tâka.



¹¹Khasikin ni omna tiang rot ta ro, roiinpui taka nang chôirsâng ki nuama khannisian Rengpa'n nang phal loi a ni hi," a tia.

¹²Khanchu Balaama'n Balaka kuang, "Palai ni hong itîrhai kuang khom khan ki ihril mo ni ta ma,

¹³ni ina rângachak le tangkahai hi ni pe ving khomin lân,Rengpa thupêk chu zôm loiin, ki bingin ite tho no ning, Rengpa'n hril hrang a ni iti vai kêng ki ihril hrang," tiin.

Balaama leihrilna hnungkhôn

¹⁴Khan Balaama'n Balaka kuang, "Irngai ro, atûn chu ki mihai kuang kîr nôk hrang ki ni ta, khannisian ki kîr nôk mân hin, sûnmatona ni mihai chung a an itho hrang lam hi nang la irhmutir ki ti," a tia.

¹⁵Khanchu hi leihrilna hi a hril pe tâka: "Beora nâipa Balaama leihrilna, fel taka hmu theitu thuhai chu,

¹⁶Pathianin thu a ihrilhai inhriat theia, inchungtak ata inhriatna hmu theitu, mit le en maia inlâr hmutu, Itinrêngthothei ata inlârna hmutu'n;

¹⁷sûnmaton tiang ki ena, Israel namhai ki hmua; ârsi vâk anga rêng kha nam ata la suak a ta, sim tianga meikhu angin Israel ata hong suak a ti. Moab hruaituhai kha doi a ta, Setha mihai chu lan hnêhai a ti.

¹⁸Edom-a râlhai chu doi a ta, an ramhai chu ama ta lan chang ving a ti; Israel chu a râl murdi inhnêin om mai a ti.

¹⁹Israel namhaiin sirphahai an ta, a la hring sunhai khom la'rh mangtir ving thei a ti," a tia.

²⁰Khanchu Balaama inlârna khan Amalek mihai a hmua; hi leihrilna thu hi a hrila: "Amalek chu nam tin laia a hrât tak a nia, khannisian a hnungkhôn taka chu kumtuanga hrangin irhmangin om a ti," a tia.

²¹Khanchu inlârna'n Ken mihai a hmu nôka, hi leihrilna thu hi a hrila: "Ni omna hmun chu a deta, nir bu chu lungpui chung a om a nia,



²²Khannisian Ken mihai chu inboiin la om an ti. Assuria suaka nang an hruai tika,” a tia.

²³Balaama’n hi leihirilna thu hi a hrila, “Kho tianga mi mo an ini, hmâr tiang irbûmhai hi?

²⁴Kittim ram ata irkuanghai hong tung a ta, Assuria le Eber chu rûn an ta, khannisian anni khom chu inboipaiin om an ti,” a tia.

²⁵Khanchu Balaama chu a thoia, an khua tiang a fe tâka, Balaka khom a fe sa tâka.

Nambar 25

Peor hmuna Israelhai an tung

¹Khan Israelhai chu Sitim-ah an om lai khan, Moab nupanghai le om pualoia omin an siat tâka.

²An pathianhai kuang, an irbôlna hruaitheha khan an fialhaia; khanchu an fâka, an pathianhai chu chubai an mûkhai tâka.

³Israelhaiin Peor-a Baal chu an pom tâka, khanchu Israelhai chung Rengpa ning an mur pea,

⁴khanchu Mosia kuang, “Mipui hruaituhai murdi hruaihaiin lân, Rengpaningmurna ichiom tak chu Israelhai chung ata a’rkiang theina hrangin sîn khovâra,Rengpa makunga inkhâi thathai ro,” a tia.

⁵Khan Mosia’n Israel roirêltuhai kuang, “Peor-a Baal biakhai kai chu thatpaihai ving roi,” a tia.

⁶Khan irngai roi, Israel laia mi inkhat, Midian nupang hi Mosia le mipuihai chu irtongna Biakbuk kotbâi kôla an chap lai tak hin an mithmua puan ina a hruaia.

⁷Khan, ochai Arona nâipa Eliazara nâipa Finehasa’n a lei hmua, mipuihai lai ata kha a thoia, ufei a lâka,

⁸khan pasal le nupang kha puan in sûnga a’rzûlhaia, an ruaiin a sun thathaia.



⁹Khanchu Israel chung a hripui lêng kha a mong tâka, khannisian mi sîngni le sângminlihai chu an lei thi irman tâka.

¹⁰Rengpa'n Mosia a chongpuia,

¹¹“Ochai Arona nâi Eleazara nâipa Finehasa sintho sika hin Israelhai chung a hin ki ninginmur ta maka, ama'n chu keima ti bana pathian dang bîk chu irngai thei maka, khasika khan anni chu ki ningmurin inboipaihai ta ma ung.

¹²Khasikin ama le kumtuangin thuthungna siam hrang ki nih ti hril roh.

¹³Ama le a'rchi suanpârhai chu kumtuanga ochai nina pêk an nia, a ni doipuituhai chu irngai thei maka, mipuihai سوالنا ngaidamna khom an tungtir sikin,” a tia.

¹⁴Israel mi Midian nupang le an ithatpai irhming kha Zimria, Simeona, panama mi hruaitu Salua nâipa a ni.

¹⁵Khan Midian nupang an ithatnu irhming kha chu Zura nâinu Kusii a ni; a pa chu Midian mihai panamhai laia hruaitu a ni.

¹⁶KhanRengpa'n Mosia a chongpuia,

¹⁷“Midian mihai chu doi unglân, inboipaihai ving roi.

¹⁸Peor-ah nangni an huanga thil saloi tak nin chung a an thôna sika khan Kusii chungchâng thua vârirleta nangni an ihruai ang khan nangni an la huang mai sika hin,” a tia.

Nambar 26

Moab rama Israel irtepna thu

¹ Khanchu hripui a lêng zoiin chu, Rengpa'n Mosia le Arona nâipa Eleazara a chongpuihaia.

²“Israel irchihai murdi, kum sômhni ata a chung tianga a nam namin, Israel rama râl doi thei dôr chu tephai ving roi,” a tia.

³⁻⁴Khanchu Mosia le Eleazara'n a iti lam ang takin an thoa, pasal murdi kum sômhni le a chung tianga mihai kha a koibûmhaia, Jeriko irdîn Jordan



tuidung kôla Moab pháizôla an bûmhaia. Hihai hi Aigupta ram ata hong suak Israel irchihai chu an ni.

⁵Reubena panam hai: (Reubena chu Jakoba nâilutîr a ni) Reubena nâipasalhai chu Hanoka le Palua

⁶Hezrona, Karmia,

⁷hihai hi Reubena nama mi chu an ni. Anni tep theia om kai chu sîngminli sângthum le irzasari sômthum an ni.

⁸Palua irchi Eliaba;

⁹Eliaba irchihai chu, Nemuela, Dathana le Abirama hai hi an ni. (Hi Dathana le Abirama hai hi an ni, Mosia le Arona hmusita Kora pâl tianga kopaRengpa chung a têngtôngsiahai kha.

¹⁰Irnêng kikin an volpaihaia, Kora le a pâlhai le an thi suama, meiin mi irzahni sômringa a kâng thathai lai khan; anni chu mipuihai ta hranga irsinsiana an hong ni tâka.

¹¹Khannisian Kora nâihai chu thi sa mahai.)

¹²An nam dungzuiin Simeona irchihai chu Nemuela, Jamina, Jakina;

¹³Zera le Saula an ni.

¹⁴Hihai hi Simeona irchihai chu an ni, an rêngin mi sînghni sângni le irzahni pasal an ni.

¹⁵An nam dungzuiin Gada nâipasalhai chu; Zefona, Haggia, Sunia;

¹⁶Oznia, Eria,

¹⁷Arodia le Arelia hai hi an ni.

¹⁸Hi nama mi hi pasal mi sîngminli irzaringa an ni.

¹⁹Juda nâipasalhai hi Era le Onana an ni. Era le Onana chu Kanaan rama an thia.

²⁰Juda irchi fe dân chu hiang hi a ni, Sela, Pereza le Zera an ni.

²¹Pereza irchihai chu Hezrona, Hamula hai hi an ni.



- ²²Hi nama mi hi sîngsari sângruk le irzaringa an ni.
- ²³A sîngkua dôn te'n Isakara irchihai chu: Tola, Tol nam irchibul; Pua, Pu nam irchibul;
- ²⁴Jasuba, Jasub nam irchibul; Simrona, Simrona nam irchibul.
- ²⁵Hihai hi Isakara irchihai chu an ni, mi sîngruk sângminli irzathum an ni.
- ²⁶Zebulun panamhai; Sereda, Elona le Jaleala an ni.
- ²⁷Hihai tam dân chu pasal sîngruk irzaringa an ni.
- ²⁸Josefa panamhai chu, Manasea le Efraima an ni.
- ²⁹Manasea irchihai chu, Manasea nâipa Makira chu Gileada irchihai pa a nia, hihai hi Gilead irchihai chu an ni.
- ³⁰Iezera, Heleka,
- ³¹Asriela, Sekema,
- ³²Semida le Hefera,
- ³³Hefera nâipa Zelofehada'n nâipasal nei maka, nânupang vai a neia, an irhminghai chu, Malaii, Novaii, Hoglaii, Milkaii le Tirzaii an ni.
- ³⁴Hihai tam dân chu pasal mi sîngringa sânghni le irzasari an ni.
- ³⁵Efraima irchihai chu; Suthela, Bekera le Tahana an ni.
- ³⁶Khan Erana irchihai chu Suthela irchi rengata suak an ni.
- ³⁷Hi irchihai tam dân chu pasal mi sîngthum sânghni le irzaringa an ni. Hihai hi Josefa irchi rengata panama suakhai an ni.
- ³⁸Benjamina panamhai chu: Bela, Asbela, Ahirama.
- ³⁹Sefufama le Hufama an ni.
- ⁴⁰Arda le Naamana irchihai hi Bela rengata suak chu an ni.
- ⁴¹Hi panamhai tam dân chu pasal mi sîngminli sângringa le irzaruk an ni.
- ⁴²Dana panamhai chu, Husima a nia,
- ⁴³an tam dân chu pasal mi sîngruk sângminli le irzaminli an ni.



- ⁴⁴Asera panamhai chu; Imnaka, Ishvia le Beria hai an ni.
- ⁴⁵Hebera le Malkiela irchihai hi Beria panama suak an ni.
- ⁴⁶Asera hin nâinupang inkhat a neia, a'rhming chu Seri a ni.
- ⁴⁷Hi panamhai tam dân chu, pasal mi sângringa sângthum le irzaminli an ni.
- ⁴⁸Naftalia panamhai chu, Jahzeela, Gunia,
- ⁴⁹Jezera le Silema an ni.
- ⁵⁰Hi panamhai tam dân chu pasal mi sângminli sângringa le irzaminli an ni.
- ⁵¹Israel irchia mi pasal murdi chu nuairuk sângkhat irzasari sômthum an ni.
- ⁵² Khanchu Rengpa'n Mosia kuang,
- ⁵³“Ram hi nam tin laia an tam dân enin sem pehai roh.
- ⁵⁴⁻⁵⁶Tasânin ram hi semin lân, nam tam ualhai chu a lian ual pehaiin lân, a tôm ualhai chu a chîn ual pehai ro,” a tia.
- ⁵⁷Khanchu hihai hi Levi mihai an nam fe dân anga tepa omhai chu an ni, Gersona Kohatha le Meraria hai hi.
- ⁵⁸Hi nama mi irchi suanpârhai chu Libnia, Hebrona, Mahlia, Musia le Kora hai hi an ni. Kohatha chu Amrama pa a nia,
- ⁵⁹ama chu Levi nâinu Aigupta rama irzir Jokebedi leh an irluaa. Khan Amrama chu nâipasal inhni, Arona le Mosia le nâinupang inkhat Miriami a nei pea.
- ⁶⁰ Arona'n nâipasal minli a neia, Nadaba, Abihua, Eleazara le Ithamara hai hi an ni.
- ⁶¹ Nadaba le Abihua chuRengpa kuang mei irthiang loi an inhlan lai khan an thi tâka.
- ⁶²Levi mi pasal tha khat le a chung tianga tep theia omhai kai chu mi sânghni sângthum an ni. Anni hi chu Israel mihai laia irchon dong hrang an ni no sikin, Israel mihai laia tep sa ni mahai.



⁶³Khan hi panamhai murdi hi Mosia le Eleazara'n Jeriko irdîn, Jordan vapang Moab phâizôla khan Israelhai tepa an om lai khan an tephai,

⁶⁴Sinai ramchâra Israel mihai Mosia le ochai Arona'n an itephai kha inkhat lua om ta mahai.

⁶⁵Rengpa'n "Ramchâra thi ngêt an ti," a lei ti tâk sikin, Jefunea nâipa Kaleba le Nuna nâipa Josua ti no chu tukhom a hring om ta mahai.

Nambar 27

Zelofehada nâinupanghai ngênna

¹Khan, Manasea nâipa Makira, a nâipa Gileada, kha nâipa Hefera, kha nâi nôk Zelofehada nâinupanghai chu an hong, an irhming chu Malaii, Novaii, Hoglaii, Milkaii le Tirzaii an ni.

²Irtongna Biakbuk kotbâia Mosia le ochai Eleazara le mipui murdihai maton tiang an va ngîra,

³"Kin pa chu nâipasal boiin ramchâra khan a thia, ama chu Rengpa doihai, Kora pâlhai lai khan kop sa maka; khannisian a binga سوالنا sikin a thia.

⁴Nâipasal a nei no sik ringotin itho mo kin pa irhming hi a'rchihai lai hin boi zelin a iom hrang? Kin pa urênghai lai hin keini khom hi irchon ni pe roi," an tia.

⁵Khan Mosia'n an thu chu Rengpa kuang an tunga.

⁶Rengpa'n Mosia a chongpuia,

⁷ "Zelofehada nâinupanghai kha a dik pehai, an pa dongtum kha pehai roh.

⁸Khan Israel irchihai kuang khan, mi nâipasal nei loiin a thiin chu, a'rchon chu nâinupang kuang pe roi.

⁹Nâinupang a nei noa ni'n chu, a'rchon chu a urêng pasalhain lua an ti.

¹⁰Khan urêng pasal a nei noa ni'n chu, a pa urêng pasalhain lua an ti.



¹¹Khan a pa khan urêng pasal a nei noa ni'n chu, a parual irnaipui takin lua a ta, ama'n a'rchonhai chu bukkhôm a ti. Khan Mosia'n Rengpa thupêk angin Israel irchihai ta hrangin dân thupêk det ni a ti, tiin hril ro," a tia.

Mosia thûl hrangin Josua inkungna

(Dhn 31.1-8)

¹²Rengpa'n Mosia kuang, "Abarim tânga khin hong fe'n lân, Israel irchihai kuang ki ipêk hrang ram chu hong thîr roh.

¹³Khan ni hong hmu zoi tena chu ni urêngpa Arona chu a'rchihai kuang hruai a ini ang dên khan nang khom hruai ni ta ni ti.

¹⁴Zin ramchâra mipuihai an chiar laia an mithmua tuia khan ni chôindôm hranga thu nang ki ipêk kha, pom loiin ni om sika khan," a tia. (Kha kha Zin ramchâra Kades-ah Meriba tuihai khan a ni).

¹⁵Khan Mosia'n Rengpa a ngêna,

¹⁶"Rengpa mihriam murdi irthahai Pathianin mipuihai chung a hin hruaitu inkung sianlân,

¹⁷Rengpa mipuihai chu a hrungtu nei loi belra ang a an om lina hrangin, an makunga suak le lûta, anni hruaisuaka hruai inlûttu hrangin," a tia.

¹⁸ Khan Rengpa'n Mosia kuang, "Nuna nâipa Josua thiltho thei tak kha hruaiin lân, a chung a ni kut irnghatin lân.

¹⁹Ochai Eleazara le mipuihai makunga inngîrtirin lân an mithmua irchamneina chu pe roh.

²⁰Khan Israel irchi murdihaiin a thu an zômna hrangin a chung a nir chamneina senkhat irnghat roh.

²¹ Khanchu ama chu ochai Eleazara makunga ngîr a ta, a'rchamin suak an ta, ama le Israel irchi murdihai leh," a tia.

²²Khan Mosia'n Rengpa thupêk lam ang takin a thoa, Josua chu a hruaia, Eleazara le mipuihai makunga an ngîrtira.

²³Khan a chung a kut a'rnghata, Mosia hmanga Rengpa'n a ihril ang khan ircham neina a pêk tâka.



Nambar 28

A nî tina thilinhlanhai

(Fes 29.38-46)

- ¹Khanchu Rengpa'n Mosia a chongpuia,
- ²Israel irchihai kha thu pehaiin lân, an kuang, fâk chi thilinhlan ki ta hranga mirimhoi chu a zoro taka nin inhlan ngai hrang a ni, ti roh.
- ³Khan an kuang, hi hi meia thilinhlan Rengpa kuanga nin inhlan hrang chu a ni. Kêlbelrate a chal kum khat mi demnaboi a sîn tin inhni inhlan nin ta.
- ⁴Kêlbelrate inkhat kha zîng tiang inhlan nin ta, inkhat dang kha khohloi tiang inhlan nin ti.
- ⁵Khan baidi thilinhlan hrangin, oliv hriak le irzêl baidi her khat chu inhlan sa nin ti.
- ⁶Hi hi a ni, a nitina pum hâlrivôm thilinhlan chu, Sinai tânga khan fâk chi thilinhlanhai a lei om baka. Kha kha Rengpa ta hranga mirimhoi chu a ni.
- ⁷Khan uain thilinhlan hrangin uain khilât sei khat chu maichâma ni ibuak hrang a ni.
- ⁸Khan khohloi tiang khom zîng tianga ang dênin belra inkhat dang kha inhlan ni ta, uain thilinhlan khom kha ni inhlan sa hrang a ni. Hi khom hi fâk chi thilinhlanhai a ni sikin, Rengpa ta hranga mirimhoi chu a ni.

Sabat nia thilinhlan

- ⁹Khanchu Sabat nia belrate a chal kum khat mi demnaboi chu baidi thilinhlan, oliv hriak leh irzêl baidi her hni le uain thilinhlan leh inhlan nin ti.
- ¹⁰Hi pum hâlrivôm thilinhlan hi a nitina thilinhlan le uain thilinhlan, inhlana om ti bana chu, Sabat nikhua rikipa nin inhlan sa hrang chu a ni.

A tha tina thilinhlan

- ¹¹Pum hâlrivôm thilinhlan chu tha thar rikipa Rengpa kuang inhlan nin ta, sehrât tuai inhni, belrachal inkhat belrate kum khat mi sari leh; an rêngin demnaboi an ini hrang a ni.



¹²Khanchu sehrâtchal tin leh khan, baidi thilinhlan hrangin bai indi tak, hriak leh irzêl her thum; khan belrachal tin leh khan baidi her hni sengin;

¹³khanchu belrate le baidi thilinhlan hrangin baidi her khat sengin inhlan sa hrang a ni. Hihai hi pum hâlrivôm thilinhlan mirimhoi Rengpa ta hranga thilinhlanhai chu a ni.

¹⁴Uain thilinhlan chu hiang hi ni a ti, sehrâtchal leh khan khilât sei inhni ni a ta, belrachal leh khan khilât sei inkhat le a chimrip ni a ta, khan belrate leh khan khilât sei inkhat seng ni a ti. Hi hi kumtuanga a tha tina nikhua masa taka pum hâlrivôm thilinhlan dân hrang chu a ni.

¹⁵Khan a nitina pum hâlrivôm thilinhlanhai le uain thilinhlan ti bana, kêlchal inkhat sual irbôlna hrang inhlan sa nin ti.

Bai chol pol loi kût nia thilinhlan

(Lev 23.5-14)

¹⁶ Khanchu tha maton tak le sùn sômhleiminli nê hi Rengpa Ferkân kût nê sùn a nia,

¹⁷ kha tha sùn sômhleiringa nê rengata kha kût nê sùn sari om a ta, kha ni chu bai chol pol loi vai fâk thei ni a ti.

¹⁸Khanchu kût nikhua masa tak nê khan, Pathian biak hrangin inkhôm nin ta, sin nin itho hrang ni mah.

¹⁹Pum hâlrivôm thilinhlan chu Rengpa kuang inhlan nin ta, sehrât tuai inhni, belrachal inkhat, belrate kum khat mi sari inhlan nin ta, an rêngin demnaboi an ini hrang a ni.

²⁰Baidi thilinhlan dik tak chu oliv hriak leh irzêlin inhlan ni a ti; baidi her thum chu sehrâtchal leh khan inhlan sa ni ta, belrachal leh her hni baidi inhlan sa ni ti;

²¹khan belrate le baidi her khat seng inhlan sa nin ti.

²²Khabana, kêlchal inkhat sual irbôlna hrangin inhlan sa nin ta, khaangin mipuihai thâr irthiang chu tho nin ti.



²³Hihai hi a zîng tina pum hâlrivôm thilinhlan ti bana nin inhlan hranghai chu a ni.

²⁴Khaangin sîn sari sîng chu, Rengpa ta hranga mirimhoi fâk chi thilinhlan chu nin inhlan hrang a ni. Hi hi a nitina pum hâlrivôm thilinhlan le uain thilinhlan ti bana nin inhlan hrang chu a ni.

²⁵Khanchu sîn sari ni chu Pathian biak hrangin inkhôm nin ta, sin rêng rêng nin izong hrang ni mah.

Pentikos kût thilinhlan

(Lev 23.15-22)

²⁶Khanchu Pentikos Kût sîn maton tak nia Rengpa kuang bu thar nin inhlan tika, Pathian biak hrangin inkhôm unglân, sin rêng rêng nin izong hrang ni mah.

²⁷Pum hâlrivôm thilinhlan Rengpa ta hranga thil mirimhoi chu hiang hin inhlan roi. Sehrâtchal tuai inhni, belrachal inkhat, belrate kum khat mi sari a chal, an rêngin demnaboi an ini hrang a ni.

²⁸Baidi thilinhlan chu oliv hriak leh irzêl, hiang hin inhlan roi; sehrâtchal kha baidi her thum leh inhlan nin ta, belrachal chu baidi her hni leh inhlan nin ti.

²⁹Belrate a chalhài kha baidi her khat leh inhlan nin ti.

³⁰Khan soal irbôlna hrangin kêlchal inkhat inhlan sa nin ta, khaang khan mipuihai thâr irthiangna chu tho nin ti.

³¹Hihai hi uain thilinhlan le a nitina pum hâlrivôm thilinhlan le baidi thilinhlan ti bana nin inhlan sa hranghai chu a ni.

Nambar 29

Kum thar Kût thilinhlanhai

(Lev 23.23-25)

¹Khanchu tha sarina sîn masa tak nia Pathian biak hrangin irbûm nin ta, sin rêng rêng nin izong hrang ni mah. Kha nî khan bekul chu tum ni a ti.



²Rengpa ta hranga mirimhoi pum hâlvôv thilinhlan chu hiang hin inhlan roi. Sehrâtchal tuai inkhat, belrachel inkhat, belrate a chal kum khat mi sari inhlan nin ti.

³Baidi thilinhlan oliv hriak leh irzêl, hiang hin inhlan roi; sehrâtchali kha baidi her thum leh inhlan nin ta, belrachel kha baidi her hni leh inhlan nin ti.

⁴Belratehai chu baidi her khat le inhlan nin ti.

⁵Khabana, sual irbôl na hrangin kêlchal inkhat inhlan nin ta, khang khan mipuihai thâr irthiangna chu tho nin ti.

⁶Hihai hi tha khatna sôn maton taka pum hâlvôv thilinhlan le baidi thilinhlan le a nitina pum hâlvôv thilinhlan le baidi thilinhlan le uain thilinhlan ti bana chu nin inhlan hrang chu a ni. Hi fâk chi thilinhlanhai hi Rengpa ta hranga mirimhoi chu a ni.

Irtanna nia thilinhlan

(Lev 23.26-32)

⁷ Khan, tha sarina sôn sôvna nia khan chu, ite fa no unglân, i sin khom nin izong sa hrang ni mah.

⁸Rengpa kuang mirimhoi pum hâlvôv thilinhlan, hiang hin inhlan roi. Sehrâtchal tuai inkhat, belrachel inkhat le belratechal kum khata sari inhlan nin ta, an rêngin demnaboi an ini hrang a ni.

⁹Baidi thilinhlan hriak leh irzêl, hiang hin inhlan nin ti. Sehrâtchal leh khan baidi her thum inhlan nin ta, belrachel leh khan her hni inhlan nin ta,

¹⁰belrate leh khan her khat seng inhlan nin ti.

¹¹Khanchu mipuihai thâr irthiangna hranga kêl inhlana om le a nitina pum hâlvôv thilinhlan le baidi thilinhlan le uain thilinhlan ti bana sual irbôl na hrangin kêl inkhat inhlan sa nin ti.

Kairêng kût thil inhlan hrang

(Lev 23.33-44)



¹² Tha sarina sôn sômhleiringa nîn inkhômpui irthiang nei nin ta; sin rêng rêng nin izong hrang ni mah. Rengpa ta hrangin sôn sari kût nininei hrang a ni.

¹³Khanchu Rengpa ta hranga mirimhoi meia thilinhlan pum hâlivôm thil nin inhlan hrang a ni. Sehrâtchal tuai sômhleithum, belrachel inhni, belrachel kum khata sômhleiminli; demnaboi an ini ngêt hrang a ni.

¹⁴An baidi thilinhlan hriak leh irzêl, sehrâtchal sômhleithum, sehrâtchal inkhata epha hmun sôma sena hmun thum, belrachel inhni, belrachel inkhat hmun sôma sena hmun hni;

¹⁵belrate sômhleiminli, belrate inkhata hmun sôma sena hmun khat;

¹⁶sual irbôlna hrangin kêlchal inkhat le, pum hâlivôm thilinhlan, khataka baidi thilinhlan uain thil inhlan bana khan.

¹⁷Sôn hni tena chu sehrâtchal tuai sômhleihni, belrachel inhni, belrate a chal kum khata demnaboi sômhleiminli an inhlan hrang a ni.

¹⁸An baidi thilinhlan le uain thilinhlan a dân ang takin an tam lam izirin sehrâtchal ta hrangin, belrachel ta hrangin, belrate ta hrangin;

¹⁹sual irbôlna hrangin kêlchal inkhat le pum hâlivôm thilinhlan le khataka baidi thilinhlan, uain thilinhlan tep sa loiin.

²⁰Sôn thum ni chu sehrâtchal sômhleikhat, belrachel inhni, belratechal kum khat mi demnaboi sômhleiminli;

²¹an baidi le uain thilinhlan a dân ang taka an tam lam ang izirin sehrâtchal ta hrangin;

²²sual irbôlna hrangin kêlchal inkhat le pum hâlivôm thilinhlan, khataka baidi thilinhlan le khataka uain thilinhlan tep sa loiin.

²³Sôn minli nî chu sehrâtchal sômkhath, belrachel inhni, belrate a chal kum khat mi demnaboi sômhleiminli,

²⁴baidi le uain thilinhlan a dân ang takin an tam lam angin sehrâtchal ta hrangin le belrate ta hrangin;



²⁵sual irbôlna hrangin kêlchal inkhat le pum hâlrivôm thilinhlan le baidi thilinhlan le uain thilinhlan tep loiin.

²⁶Sûn ringa ni chu sehrâtchal kuak, belrachal inhni, belrate a chal kum khat mi demnaboi sômhleiminli;

²⁷an baidi thilinhlan le uain thilinhlan dân ang takin an tam lam izirin sehrâtchal ta hrangin, belrachal ta hrangin belrate ta hrangin.

²⁸Sual irbôlna hrang kêlchal inkhat le pum hâlrivôm thilinhlan le khataka baidi thilinhlan le uain thilinhlan tep loiin.

²⁹Sûn ruk nî chu sehrâtchal kariat belrachal inhni, belrate kum khat mi demnaboi sômhleiminli,

³⁰an baidi thilinhlan le uain thilinhlan, dân angin an tam lam izirin sehrâtchal ta hrangin, belrachal ta hrangin, belrate ta hrangin.

³¹Sual irbôlna hrangin kêlchal inkhat le, pum hâlrivôm thilinhlan, baidi thilinhlan le uain thilinhlan tep loiin.

³²Sûn sari nî khan sehrâtchal sari, belrachal inhni, belrate a chal kum khat mi demnaboi sômhleiminli,

³³an baidi le uain thilinhlan, a dân ang takin an tam lama izirin sehrâtchal ta hrangin, belrachal ta hrangin, belrate ta hrangin.

³⁴Sual irbôlna hrangin kêlchal inkhat le, pum hâlrivôm thil inhlan, baidi le uain thilinhlan tep sa loiin.

³⁵Sûn riat nî khan chu, inkhômpui roiinpui tak nei nin ta, sin nin izong hrang ni mah.

³⁶Rengpa ta hranga mirimhoi meia thilinhlan pum hâlrivôm thilinhlan chu nin inhlan hrang a ni. Sehrâtchal inkhat, belrachal inkhat, belrate a chal kum khat mi demnaboi sari;

³⁷an baidi le uain thilinhlan, sehrâtchal ta hrangin, belrachal ta hrangin, belrate ta hrangin a dân ang takin a tam lama izirin;



³⁸sual irbôlna hrangin kêlchal inkhat le pum hâlrivôm thilinhlan, baidi thilinhlan le uain thilinhlan tep loiin.

³⁹Nin chonginkunghai, nuam thua thilinhlan hai, nin pum hâlrivôm thilinhlan, nin baidi thilinhlanhai, nin uain thilinhlanhai, nin baidi thilinhlanhai, nin uain thilinhlanhai, nin irngeina thilinhlanhai bâka khan hihai hi nin zoro inkung kût, nin nei nia Rengpa kuanga nin inhlan hrang a ni, tiin.

⁴⁰Rengpa'n Mosia thu a ipêk murdihai kha Israel irchihai kha an hrihai tâka.

Nambar 30

Chonginkungna dân

¹Mosia'n Israel irchihai laia hruaituhai a chongpuihaia, hi hi a ni, Rengpa thupêk chu,

²pasalin Rengpa kuang thilpêk hranga chonginkungna neiin mani, aninole thil senkhat irser hranga chonginkungna neiin mani a lei oma nî'n chu, a chonginkung kha inchâi loiin a inkung ngêt hrang a ni.

³Khan nupang khom a pa ina a la om laiin Rengpa kuang thilpêk hranga chonginkungna neiin mani, aninole thil senkhat irser hranga chonginkungna neiin a lei oma ni'n chu,

⁴a chonginkung kha inchâi loiin a inkung ngêt hrang a ni. a pa khan kha chonginkungna an hriatpuia a nuampui photin chu.

⁵Khannisian a pa khan, kha chonginkungnahai an hriata, a nuampui noa ni'n chu, chonginkung ual nang no ni: Rengpa'n ama chu ngaidam a ti, a pa khan a nuampui no sikin.

⁶Khan dôngmate'n inhre chachakin mani, aninole a hnung a mân ngaitua loiin mani, thil senkhat rengata irser hrangin thu a lei inkunga, khannisian pasal a lâka ni'n chu,

⁷a chonginkung kha a izoi ngêt hrang, a pasalin an hriata, a khap noa ni'n chu.



⁸Khannisian a pasalin an hriata a khapa ni'n chu, a chonginkunghai kha an kung ual nang no nia, ama chu Rengpa'n ngaidam a ti.

⁹Meithâiin mani, aninole pasal imâk hnung nupangin mani, thil senkhat irser hranga chong an kunga ni'n chu, a chonginkung kha a isua ngêt hrang a ni.

¹⁰Khan nupang pasal nei tâkin thil senkhat irser hranga chong an kunga ni'n chu,

¹¹a chonginkunghai chu a isua ving hrang a nia, a pasalin an hriata, a khap no phota ni'n chu.

¹²Khannisian a pasalin an hriata a khapa niin chu, a chonginkung kha sua ual nang no ni. Ama chu Rengpa'n ngaidam a ti. A pasalin a khap tâk sikin.

¹³A pasalin a chong len kungna kha inkungtirna le hnôl theina ircham a nei sikin.

¹⁴Khannisian a chonginkungna kha an hriatpuia, ite nuampuiloina a nei no'n chu, a chonginkunghai kha a isua ngêt hrang a ni. An hriatpuia a khap loina khan a chonginkung kha an detpui tihna a ni sikin.

¹⁵Khannisian an hriat zel noa, inhnunga a khap nôka ni'n chu, a pualoina mô chu a lu chung a irngat a ti, tiin.

¹⁶Hihai hi pasal le nupang kêra le pa le nâi dôngmate, a pa ina a la om laia an kêra dân hranga Rengpa'n Mosia a ipêk chu a ni.

Nambar 31

Midian-hai leh irdoina

¹Rengpa'n Mosia kuang,

²"Israel irchihai chung a sin thônahai sikin Midian mihai chu hremhai ro, khanchu kha thil kha ni tho zoi tika nangma chu nir chihai kuang hruaiin om ta ni ti," a ti pea.

³Khanchu Mosia'n mipuihai chu a hrilhaia, "Rengpa chung a an sinthohai sika khan Midian mihai doi hrangin, irsiam roi.



⁴Israel panam tin lai ata irdoi hrangin mi sângkhat chit nin itîrhai hrang a ni,” a tia.

⁵Khanchu panam tin ata kha mi sângkhat chit an inthang suakhai tâka, irdoi hrangin an rêngin mi sângkhat sânghni an ni.

⁶Khan Mosia’n ochai Eleazara nâipa Finehasa thil irthianghai enkoltu hrangin le bekulhai tuma thupêktu ni hrangin irdoina khan a tîrhai tâka.

⁷Rengpa’n Mosia thu a ipêk lam ang takin Midian mihai chu an doihaia, pasal murdi chu an thathai tâka.

⁸Midian rêng ringa hai, Evia, Rekema, Zura, Hura le Reba hai khom an thathai sa tâka. Beora nâipa Balaama khom an that sa ta.

⁹Israel mihai khan, Midian nupanghai le nâipanghai chu chelhaiin sala an hruaihaia, khan an sâ murdihai an belra murdihai le an irchonhai chu an lâk pehai ving tâka.

¹⁰Khanchu an riakbukhai le an khopui lianhai kha an hâl pehai ving tâka.

¹¹Mihriam le sa le an râlâk murdi fepuihaiin.

¹²Mosia le Eleazara le Israel mi murdi Jeriko irdîna Jordan dung kôla Moab phâia an riakbuk tiang an hong chôihaia.

Sipaihai kîr nôkna

¹³Mosia, Eleazara le Israel nam hruaitu murdihai chu an riakbuk ata suakin sipaihai an lei doihaia.

¹⁴Khan, Mosia chu sipai hruaituhai irdoina ata honghai chung a ning an mura.

¹⁵Khanchu Mosia’n an kuang, “Itho mo nupanghai hi a hringa nin la ihôihai hi?

¹⁶ Irngai roi, Balaama thupêk zômtuhai kha nupanghai hi an nia, Peor hmuna khan mipuihai chu Rengpa chung a an inchâtirhaia, khasik taka khan Rengpa’n mipuihai chu hripuiin a insiathai a ni kha.



¹⁷Khasikin nâipang pasal murdi le nupang mi izâlpui tâk kai chu thathai ving roi.

¹⁸Khannisian nupang mi la izâlpui loihai kai chu nin ta hrangin hôihai roi.

¹⁹Khanchu khohnôma sîn sari riak unglân, tukhom mithi ruak tôntuhai kai chu sîn thum ni le sîn sari ni khan thâr irthiang nin ta, nangni le suaka nin ichelhai leh khan.

²⁰Khanchu silkai murdi le thil dang savun leh mani, kêl mul leh mani, thing leh mani, siama omhai chu nin irthâr irthiang sa hrang a ni,” a tia.

²¹Khan ochai Eleazara’n irdoina hmuna fe irdoi mihai kuang khan, “Hi hiRengpa’n Mosia kuanga thu a ipêkhai chu a ni.

²²⁻²³Rângachak mani, tangkarua mani, sunsen mani, thâr mani, meiin a ikâng insiat thei loihai kai chu mei leh thâr irthianghai nin ta, khan thil dang rêng rêng chu tui kathâr leh thâr irthianghai nin ti.

²⁴Khan, a sîn sari nî khan nin puanhai sôp nin ta, khanchu Pathian dân angin irthiang hong ni ta nin ta, riakbuka lût thei ta nin ti,” a tia.

Râllâk irsemna

²⁵Rengpa’n Mosia a chongpuia,

²⁶“Nang le ochai Eleazara le panam hruaituhai le, mihriam le an sa râllâka an ilâkhai kha tep ving unglân,

²⁷râla thihai kha hmun hniin senhai unglân, sipai irdoina fehâi leh mipuihai kuang sem roi.

²⁸Khan irdoina fe sipaihai dongtum ata kha Rengpa ta hrangin mihriam nâi, sa mani, sakuartung mani, kêl mani, aninole belra mani khom ni sian, irzaringa laia inkhat nin isia hrang a ni.

²⁹Khan ochai Eleazara kuang Rengpa ta hranga ngaihoi thilinhlan hrang pe roi.

³⁰Khan Israelhai dongtum ata kha sômringaa inkhat mihriam khom ni sian, sa khom ni sian, sakuartung khom ni sian, kêl khom ni sian, belra khom ni sian



la nin ta, kha kha Rengpa Biakbuk enkoltu Levi irchihai kuang nin ipêk hrang a ni,” a ti pea.

31Khan Mosia le Eleazara’n Rengpa thupêk ang takin an tho tâka.

32-35Hihai hi sipaihaiin irdoinaa râlâk thil an ta hrang chit an lâk hnunga a la omhai chu a ni. Kêlbelra le kêl nuairuk sîngsari le sângringa, sial sîngsari sânghni, sakuartung sîngruk sângkhat le pasal la izâlpui loi nupang sîngthum sânghni an ni.

36-40Khan a chimrip irdoina hmuna fe sipaihai dongtum kai chu nuaithum sîngthum sângsari le irzaringa, belra le kêl an nia, khatak ata kha Rengpa ta hranga ipêka om kai chu irzaruk sôm sari ringa a ni. Khan sial chu sîngthum le sângruk a nia, sôm sari inhni chu Rengpa ta hranga a ni. Khan sîngthum irzaringa sakuartung a nia, khatak ata kha sômruk inkhat chu Rengpa ta hrang a nia; khan dôngmate irthiang sîngkhat le sângruk an nia. khatak ata kha sômthum inhni chu Rengpa ta hrang an ni.

41Khanchu Rengpa’n thu a ipêk lam angin Mosia’n Rengpa ta hranga ngaihoi thilinhlanhai chu Eleazara kuang a pêk tâka.

42-46Khan, mipuihai dongtum khom chu sipaihai dongtum leh khan a ir-ang maia. nuaithum sîngthum sângsari le irzaringa belra le kêl a nia, sîngthum sângruk sial a nia, sîngthum irzaringa sakuartung a nia, dôngmate irthiang mi sîngkhat sângruk an ni sa.

47Khan Mosia’n hi thilhai rengata hi sômringa sînga inkhat chu mihriam khom ni sian, sa khom ni sian Rengpa thupêk lam angin Rengpa Biakbuk enkoltu Levi mihai chu a pêka.

48Khan sipai hruaituhai chu Mosia kuang an va fea.

49Mosia kuang, “Ka pu kin kuta om sipaihai chu kin tephaia, tûte irhmang mahai.

50Khasikin kin hringna ta hrangin Rengpa kuang thilinhлана inhlan hrangin râlâk thil kin ilâkhai, rângachaka siam bânhril hai, kutsabi hai, kuarkâi hai, irthei hai, chu kin hong ichôi a ni hi,” an tia.



⁵¹Mosia le Eleazara'n rângachaka siam tukrivo neinunhai chu an lâka.

⁵²Sipai hruaituhai thilinhlan murdi chu her irzahni vêl a ni.

⁵³Khan sipai hruaitu ni loihai khan chu an râlâk thilhai kha an ta hrangin an sia chita.

⁵⁴Khanchu Mosia le Eleazara'n rângachakhai kha Israel irchihai inhriat maina hrangin irtongna Biakbuka Rengpa makunga an chôl tâka.

Nambar 32

Jordan nisua tianga nam omhai

(Dhn 3.12-22)

¹Reubena le Gada irchihaiin a sate'n ram an nei intôma; khan Jazer ram le Gilead ram an hmu'n chu, kha hmun kha sa vâina hmun satak a lei nia.

²Khanchu Gada irchihai le Reubena irchihaiin Mosia le ochai Eleazara le panam hruaituhai chu an va chongpuihaia.

³"Atarot, Dibon, Jazer, Nimra, Hesbon, Elealea, Sebam, Nebo le Beon ramhai kha sa vâina hranga satak a lei nia.

⁴Khan, ni sinthotuhai hin sa kin neia, khasikin irngaihoi takin hi ram hi kin irchon hrangin ni pêkin lân, Jordan râl nin kâitirin, so taka son nin omtir no ro," an tia.

⁵Khan Mosia'n an kuang,

⁶"Nin urênghai irdoina hmuna fe an ta, nangni chu hi hin mo nin lei iom rak hrang?"

⁷Itho sika Rengpa'n a ipêk rama lût loi hrangin Israel irchihai milung nin irzaltir mo?

⁸Kadesbarnea ata ram va enirchik hranga ki ti lai khan hiang dên hin nin puhai khan an tia.

⁹Eskol irhôr an hong tung khan ram kha an hong hmua, Rengpa'n ram a ipêka khan an lût loina hrangin Israel irchihai milung an irzaltir pehaia.

¹⁰ Khasikin kha ni khan, Rengpa chu a ning an mura, khomâkirsâmin.



- ¹¹Aigupta, ram ata hong suak, kum sôminhni chung tianga mihai kai chu Abrahamama hai, Isaka hai, Jakoba hai kuanga chonginkung pehai hranga ki inkung ram chu tukhomin hmu no nihai; an ni zui ta tak no sikin.
- ¹²Keniz mi Jefunea nâipa Kaleba le Nuna nâipa Josua hai ti bana chu, anni'n chuRengpa an zui ta tak sikin,' tiin.
- ¹³Khan Israelhai chung Rengpa chu a ning an mura, Rengpa mithmua sinsiat tho irchi murdihai kha an hek mâka chu ramchâra khan kum sômminli an va tîrhai tâka.
- ¹⁴Khanchu irngai roi, Israelhai chung Rengpa ninginmurna ichiom tak chu bôk pe sain nangni irchi pualoihai hin nin puhai hmun chu nin luapai tâka.
- ¹⁵Khan nangni Reubena le Gada panamhai hin nin nuam noa ni'n chu, mipuihai hi ramchâra hin masanhai nôk a ta, an siatna mô chu nin chung a irngat a ti," a tia.
- ¹⁶Khan anni'n Mosia an va nâia, a kuang, "Hitaka hin kin sahai ta hrangin irkul le kin mihai ta hrangin khua nin chuantirin lân.
- ¹⁷Khannisian keini chu an hmun hrang ei tung mâka chu Israel irchihai maton tiang fe mai hrangin râltukfam irfûk saiin om kin ta, hi rama mihai ata zôk theina hrangin kin nâi le têhai chu kulnei khuahai hin om an ta.
- ¹⁸Israel irchi, mi tinin a hmun lua hrang an lua mâka chu kin in tiang kîr no ni ung.
- ¹⁹Kin ilua hrang chu hi tiang râl Jordan nisua a ni sikin Jordan so tiang râl le a khêl tiang chu luapui no ni ung," an tia.
- ²⁰Mosia'n an kuang, "Nin thuhiril kha a diktaka nin ihril a ni'n chu, Rengpamakunga irdoia fe hrangin irsiam diam roi.
- ²¹Nin râl doi mi murdihai chu Rengpathupêkna hnuai a omin Jordan irkân an ta, ei râlhai chu anni'n doi mai an ta,Rengpa'n an boipaihai tâka.
- ²²An ram a lâk pehai mâka chu kîr nôk thei ta nin ti,Rengpa chung a le nin irchipui Israelhai chung a nin sintum chu nin izoi hrang a ni tâk sikin.



Khanchu Rengpa'n hi Jordan nisua tianga ram hi nin ram a nih ti nangni inhrepui ta a ti.

²³Khannisian nin thu inkung kha nin pom maia ni'n chu, irngai roi, nangni ki hril hi, Rengpa chungga nin insual ni a ti. Khasikin nin inchâi viat hrang ni ma, khano'nchu nin sualna sikin hremin om nin ti.

²⁴Khasikin nin omna hrangin khopuihai le nin sahai ta hrangin irkulhai siam roi, khannisian nin iti angin tho ngêt roi," a tia.

²⁵Khan, Gada le Reubena irchihaiin Mosia kuang, "Ka pu ni thupêk ang lam takin tho kin ti.

²⁶Kin dôngma le kin nâihai le kin sial le belrahai chu Gilead rama khopuihai hin lei om an ta,

²⁷khannisian keini chu kin rêngin Rengpa thupêkna hnuaia irdoia fe hrangin irsiam diamin om kin ta, Jordan râl kâiin ni iti lam ang takin doihai kin ti," an tia.

²⁸ Khanchu Mosia'n Eleazara, Josua le Israel irchi hruaituhai kuang hi thu hi a hrilhaia,

²⁹"Khan Gada le Reubena panamhaiin Jordan irkânin Rengpa thupêkna hnuaia irdoina siamin anni zâra ram nin lâka ni'n chu, Gilead ram chu an irchon hrangin pehai roi.

³⁰Khannisian Jordan irkân loiin irdoina khan nangni an zui sa no'n chu, Kanaan rama nangni laia om sa an ti," a tia.

³¹Khan Gada le Reubena panamhaiin, "Ka pu Rengpa thupêk lam ang takin tho kin ti.

³²Ama thupêkna hnuaia kâiin Kanaan rama lût kin ta, khanchu kin ram lua hrang chu Jordan dung râl tiang la ni a ti," an tia.

³³Khanchu Mosia'n Gada le Reubena panamhai le Josefa nâi Manasea nam chimriphai chu Amor rêng Sihona ramhai, Basan rêng Oga ramhai chu a khuaa om murdihai le a vêla ram om murdihai leh khan a pêkhaia.



- ³⁴Khan Gada panamhaiin Dibon hai, Atarot hai, Aroer hai,
- ³⁵Atrot-sofan hai, Jazer hai, Jogbeha hai,
- ³⁶Beth-Nimrah hai, Betharan hai, an indinga, khopui kulneihai, belra irkulhai leh.
- ³⁷Khan Reubena panamhaiin Hesbon Elealea, Kiriathaim,
- ³⁸Nebo, Baal-meon (a'rhminghai hi thûl a ni ta) Sibma hai an indinga; an kho siamhai chu irhming dang an phuaa.
- ³⁹Khan Manasea nâipa Makira irchihai chu Gilead ram chu doiin an lâka. Amor mi, khataka omhai kha an irzûlpaihaia.
- ⁴⁰Khasikin Mosia'n Gilead ram chu Makira irchihai a pêka, khataka khan an om tâka.
- ⁴¹Khan Manasea nâipa Jaira irchihaiin kho senkhat doiin an lâka, "Havot-Jair," tiin an khua irhming an phua tâka.
- ⁴²Khan Noba'n Kenat a va doia, a kho chîn danghai leh a lâka, ama irhming chôiin, "Noba" tiin a phua tâka.

Nambar 33

Aigupta ram ata Moab panna

- ¹Mosia le Arona hruaina hnuaiia Aigupta ram ata a papâlin suaka an ife lam chu hiang hin a ni.
- ²Rengpa thupêkin Mosia'n riakbuk an ikhuarna murdi irhming chu a'rziaka.
- ³Israel mipuihai chu tha khatna, sûn sômhleiringa nî khan Ramases ata an suaka,
- ⁴Ferkân kût nî khan Aigupta mihai mithmua, an nâilutîr murdi Rengpa'n a ithat pehai kha an phûm laiin Israel irchihai chu irkhêl takin an suaka. Rengpa'n an pathianhai khom a hrem pehaia.
- ⁵Khan Israel irchihai chu Ramases ata kha an suaka, Sukoth-ah khan omhmun an khuar tâka.



- ⁶Khan Sukoth ata kha an suak nôka, ramchâr kôl Etham-ah khan omhmun an khuar nôka.
- ⁷Khan Etham ata kha an suaka, Baal-Zefon nisua tiang Pi-hahiroth tiang an kîr nôka, Migdol kôla omhmun an khuara.
- ⁸Khan Pi-hahiroth ata kha an suaka, Tuipuisen hroin Etham ramchâra sîn thum an fea, Mara hmuna omhmun an khuara.
- ⁹Khatak ata kha Elimah an fe, khataka khan tuihnâr sômhleihni le tûm kung sômsari a oma, kha khan omhmun an khuara.
- ¹⁰Elim mâksanin Tuipuisen kôla omhmun an khuara.
- ¹¹Khan Sin ramchâra omhmun an khuar nôka.
- ¹²Khan Dophkah hmuna omhmun an khuar nôka,
- ¹³kha zoiin Alus hmuna an om nôka.
- ¹⁴Khataka khan tui in hrang om loina, Refidim-ah irpuk an siama.
- ¹⁵Khan, Refidim ata kha an suaka, Sinai ramchâra omhmun an khuara.
- ¹⁶Sinai ramchâra irthokin an suaka, Kiroth-hatava-ah omhmun an khuara.
- ¹⁷Kiroth-hava-ah irthokin an suaka, Hazerot-ah omhmun an khuara.
- ¹⁸Hazerot-ah irthokin an suaka, Ritma-ah khan omhmun an khuara.
- ¹⁹Ritma-ah irthokin an suaka, Rimon-perez-ah khan omhmun an khuara.
- ²⁰Rimon-perez-ah irthokin an suaka, Libna-ah omhmun an khuara.
- ²¹Libna-ah irthokin an suaka, Risa-ah omhmun an khuara.
- ²²Risa-ah irthokin an suaka, Kehelatha-ah omhmun an khuara.
- ²³Khelatha-ah irthokin an suaka, Sefer tânga omhmun an khuara.
- ²⁴Khan, Sefer tânga irthokin an suaka, Harada-ah omhmun an khuara.
- ²⁵Harada-ah irthokin an suaka, Makheloth-ah omhmun an khuara.
- ²⁶Makheloth-ah irthokin an suaka, Tahat-ah khan omhmun an khuara.
- ²⁷Tahat-ah irthokin an suaka, Tera-ah khan omhmun an khuara.



- ²⁸Tera-ah irthokin an suaka, Mithka-ah omhmun an khuara.
- ²⁹Mithka-ah irthokin an suaka, Hasmona-ah khan omhmun an khuara.
- ³⁰Hasmona-ah irthokin an suaka, Moseroth-ah omhmun an khuara.
- ³¹Moseroth-ah irthokin an suaka, Bene-jaakan-ah omhmun an khuara.
- ³²Bene-jaakan-ah irthokin an suaka, Hor-hagidgad-ah omhmun an khuara.
- ³³Hor-hagidgad-ah irthokin an suaka, Jothbatha-ah omhmun an khuara.
- ³⁴Jothbatha-ah irthokin an suaka, Abrona-ah omhmun an khuara.
- ³⁵Abrona-ah irthokin an suaka, Ezion-geber-ah omhmun an khuara.
- ³⁶Ezion-geber-ah irthokin an suaka, Zin ramchâra omhmun an khuara, kha kha Kades an ti sa.
- ³⁷Kades-ah irthokin an suaka, Edom ram dep Hor tânga omhmun an khuara.
- ³⁸Khan, ochai Arona khan Rengpa thupêkin Hor tânga khan a hong fea, Israel irchihai Aigupta rama irthoka an hong suak kum sômminli tha ringana, sîn khat nîn khataka khan a thi tâka.
- ³⁹Khanchu, Arona kha Hor tânga a thia khan kum irzakhat sômhni inthum a ni.
- ⁴⁰Khan Kanaan sim tianga Arad rêngin Israelhai an hong ti a len hriata.
- ⁴¹Khan, Israelhaiin Hor tâng ata kha an suaka, Zalmon-ah omhmun an khuara.
- ⁴²Zalmon-ah irthokin an suaka, Punon-ah khan omhmun an khuara.
- ⁴³Punon-ah irthokin an suaka, Oboth-ah khan omhmun an khuara.
- ⁴⁴Oboth-ah irthokin an suaka, Moab ram dep Ije-abarima khan omhmun an khuara.
- ⁴⁵Ijima irthokin an suaka, Dibon-gada khan omhmun an khuara.
- ⁴⁶Dibon-gada irthokin an suaka, Almon-diblathaim-ah khan omhmun an khuara.



⁴⁷Almon-diblathaim-ah irthokin an suaka, Nebo kôla Abarim tânghaia khan omhmun an khuara.

⁴⁸Abarim tânghaia irthokin an suaka, Jeriko irdîn Jordan ivapang, Moab phâia omhmun an khuara.

⁴⁹Jordan vapang, Bethjesimoth-a irthokin Abel-sitim dênin Moab phâia omhmun an khuara.

Jordan kâi mâna an tho hranghai

⁵⁰Khan, Jeriko irdîn Jordan ivapang, Moab phâizôla Rengpa'n Mosia a chongpuia,

⁵¹“Israel irchihai kha hrilhaiin lân, an kuang, Jordan tuidung nin kâia,

⁵²Kanaan ram nin lût tika chu kha rama om murdihai chu inhnotsuakhai ving an ti, lung leh thîra millim an isiamhai le an irbôlnahai insiatpai pehai hrang a ni.

⁵³Khanchu kha ram kha lua nin ta, khataka khan om nin ti, keiin kha ram kha nangni ki pêk sikin.

⁵⁴ Khan kha ram kha panam tinhai laia tasânin sem nin ta, panam tam ualhai chu a tam ual pehai nin ta, a tôm ualhai chu a chîn ual pehai nin ti.

⁵⁵Khannisian kha rama omhai kha nin irzûlpaihai noa ni'n chu, nin mita hranga minim le nin panga hrangin ilhling ang ni an ti: nin omna ram khan nin milung lan zîngtir a ti.

⁵⁶Khanchu hiang hi hong ni a ti, an chung a tho ki inuam chu nin chung a tho ki tih ti ro,” tiin.

Nambar 34

Ramrihai chu

¹Khan Rengpa'n Mosia kuang,

²Israel mipuihai ta hrangin hi thu hi a pêkhaia: “Ram nangni ki ipêk, Kanaan ram chu nin tung tena, nin ramri hrang chu hiang hi ni a ti.

³Sim tiang ramri chu Tuipui thi hekna rengata sak tiang pang ni a ta.



⁴Khan nin ramri chu Akrabim hai fena sim tiang khan kôî a ta, Zin fe pat a ta, kha a hong suakna chu Kades-barnea sim tiang ni a ti.

⁵Khan Hazaradhara fe pat a ta, Azmon-a dên thain; khan ramri chu Azmon ata kha Aigupta tuidung dênin kôî a ta, a suakna chu Tuikhangliana ni a ti.

⁶Khan nitâk tianga ramri hrangin Mediteranean tuipui ata thengthai a ta, Hor tâng huam sa a ti.

⁷Khan hmâr tianga ramri chu Mediteranean Tuipui ata thengthaiin Hor tâng huam sa a ta,

⁸Hor tâng ata kha Hamath lûtna dênin siam ni ta, khan ramri suakna chu Zedad ni a ti.

⁹A ramri chu Zedad ata kha Zefron fe thengin Hazar Enana sun a ti, kha kha hmâr tianga ramri kha ni a ti.

¹⁰“Khan, nisua tianga ramri chu Hazar Enana ata kha fe nôk a ta, Sefam dênin.

¹¹Kha rengata kha Harbel sak tiang, Ain nisua tiang fe a ta, Galili tuipui nisua tâng dung hro a ti.

¹² Kha rengata kha Jordan tuidung sim tiang hroin Tuipui thi dênin ni a ti. Hi irki minli hi nin ramri ni a ti, ti ro,” tiin.

¹³Khan Mosia’n Israel irchihai chu thu a pêka, “Hi hi Rengpa’n panam kuak le a chimriphai pe hranga a inkung, tasâna nin irsem hrang chu a ni.

¹⁴Reubena le Gada le Manasea panam chimriphai khomin.

¹⁵Khan Jeriko irdîn Jordan nisua tiang pang an lei dong tâk sikin,” a tia.

Hruaituhai ram sem hranga mophurna

¹⁶Khanchu Rengpa’n Mosia kuang,

¹⁷“Ochai Eleazara le Nuna nâipa Josua’n ram chu mipuihai lei sem an ta,

¹⁸khanchu nam tin ata hruaitu inkhat chit an ni san hrangin lahai sa ro,” a tia.



- ¹⁹Juda panama hruaitu Jefunea nâipa Kaleba,
²⁰Simeona panama irchi Amihuda nâipa Semuela,
²¹Benamina panam hruaitu Kislona nâipa Elidada,
²²Dana panama hruaitu Joglia nâipa Bukkia,
²³Manasea panama hruaitu Efoda nâipa Haniela,
²⁴Efraima panama hruaitu Siftana nâipa Kemuela,
²⁵Zebulun panama hruaitu Parnaka nâipa Elizafana.
²⁶Isakara panama hruaitu Azana nâipa Paltiela
²⁷Asera panama hruaitu Selomia nâipa Ahihuda,
²⁸Naftalia panam ata hruaitu Amihuda nâipa Pedahela.
²⁹Hihai hi Rengpa'n Kanaan rama Israel irchihaiin ram an ilua hranga semtu hranga inthanghai chu an ni.

Nambar 35

Levi irchihai omna hrang khua inkung a ni

- ¹ Khanchu Jeriko irdîn Jordan ivapang, Moab phâizôla khan Rengpa'n Mosia a chongpuia,
²“Israel irchihai kha thu pehaiin lân, an ramhaia khan Levi mihai omna hrangin khopui senkhathai kha pe ri sehai. Khakhêla sa vâina hrangin khopui kôlhahi khom kha an ipêk sahai hrang a ni.
³Hi khopuihai hi Levi mihai ta hrang ni a ta, khataka khan om an ti, hloisûl satnahai khom kha an sial le an sa danghai ta hrang ni a ti.
⁴Khan hloisûl satnahai khom kha khopui ata mûk sângkhata hla a ini hrang a ni,
⁵Khan kul pên tiang ata irkhî ni ta, nisua tiang mûk sânghni, nitâk tiang mûk sânghni, sim tiang mûk sânghni le hmâr tiang mûk sânghni ni a ta, khopui chu a laitaka om a ti.



⁶Khan Levi mihaiin kutkechâiin mi an thata, an zôkna hrang, irbîkna khopui hrangin khopui kiruk ni ipêkhai hrang a ni. Khabana khopui dang sômminli inhni pehai sa ni ti.

⁷Hloisûl satnahai khom pe ni ta, an rêngin khopui sômminli kiriat a ini hrang a ni.

⁸an ram lua a lian le a chîn dungzuiin nam tinin Levi mihai chu khopui an ipêkhai hrang a ni,” a tia.

Zôkna khopuihai
(Dhn 19.1-13; Jos 20.1-9)

⁹Rengpa'n Mosia kuang,

¹⁰“Israel mihai kuang hrilin lân, ‘Jordan dung nin kâia, Kanaan ram nin lût tika,

¹¹nin kutkechâiin mi an thata, a'rbîka a zôk theina hrangin zôkna khopuihai inthang suak roi.

¹²Kha khopuihai kha phuba lâktu kuang ata zôkna ni a ta, mi thattu chu vântâng laia a chungthu rêl a ni mâka chu, that a ni loina hrangin.

¹³Khopui kiruk inthang suak nin ta,

¹⁴Jordan râla khopui inthum inkunghai nin ta, Kanaan rama khopui inthum ngêt nin inkung hrang a ni.

¹⁵Israel irchihai le ram dang mi an kuang omhai ta hrangin zôkna khopuihai ni a ta, mi tukhomin kutkechâiin mi a lei thata ni'n chu, hitaka hin lûtin zôk a ti.

¹⁶⁻¹⁸“Khannisian mi'n thîr mani, lung mani, thing mani hmangin mi a thata ni'n chu, ama chu mi that chang a ti, mi thattu chu that a ini ngêt hrang a ni.

¹⁹Thata omtuhai in mi chu phuba kha la an ta, an hmu'n chu thatpai zôi an ti.

²⁰Khan, mi'n hmumâkna sikin nam inthekin mani, idêngin mani,



²¹aninole kut leh irchûmin mani a lei thata ni'n chu, a thattu kha mi that a nia, that ngêt hrang a ni, Thata omtuhai in mihai khan phuba la an ta, an hmu tena chu that zôi an ti.

²²Aniachu, roi irlaloi sika khom ni loiin, châirpala tu'n mani, a nam thuta, a thatin mani, khan, inruang ni kher loia dêng mani,

²³an om ti khom inhre loia, a ikhômâm khom ni loia, a poi tho pe khom ni ual loia, lungin mani a dênga, mi a lei ithi mani a ni'n chu,

²⁴pungkhômhaiin hi roirêlna dân ang hin a thattu thisen phuba lâktu roi kha a irêl pe hrang a ni.

²⁵Pungkhômhai khan mi thattu kha thisen phuba lâktua irthokin hrung an ta, pungkhômhai khan a tâna, zôkna khuaa khan inomtir nôk an ta, sahriak irthianga nâl, ochai inlal a thi mâka chu khataka khan a iom hrang a ni.

²⁶Aniachu, itiklai khomin mi thattu chu an tâna, zôkna khua ramri pên tiang a fea,

²⁷thisen phuba lâktu'n a zôkna khua pêna a hmua, thisen phuba lâktu'n a thatin chu thisena khan thiamno chang no ni.

²⁸Ochai inlal a thi mâka chu kha zôkna khuaa khan a om mai hrang sikin; ochai a thi hnunga rêk chu mi thattu kha a omna rama khan a ikîr nôk hrang a ni.

Mi that thua inhreputu le irtanna dân

²⁹Hi thil hi nin irchihai ten khom nin omna kipa nin roirêl dân hrang chu ni a ti.

³⁰Tukhomin mi a thatin chu mi thattu chu inhretuhai bâi ata thu suakin that hrang a ni; aniachu, inhretu inkhat vaiin chu, thatna hrang dân chuk mah.

³¹Khan, mi thattu kha ni irtan hrang ni ma, thina hrang dôra thiamno chang a nia, that ngêt hrang a ni.

³²Khan, ochai thi mâka chu zôkna khuaa intân, a rama om nôk hrang irtanna chu nin ilâk hrang ni mah.



³³Khanchu, nin omna ram kha, porinchetir hrang ni ma, thisen khan ram kha nin porinchetir tâka, thisen suakna ram porinche sôpna hrang khan thisen insuaktu thisen ringot no chu hmang thei ni mah.

³⁴Nin omna ram, ki omna hi nin iporinchetir hrang ni ma, kei Rengpa hi Israelhai laia hin ki oma,' ti ro," tiin.

Nambar 36

Zelofehada nâinupanghai irchon lua dân

¹Khan Gilead irchi panama a luhai, Makira nâihai, Manasea tuhai, Josefa irchi laia mi chu Mosia le Israel irchi hruaituhai makunga an hong, an kuang,

²"Rengpa'n ram hi Israel irchihai kuang tasâna sem hrangin nang a hrila, khabana, kin sângsuakpa Zelofehada irchon khom a nâinupanghai kuanga pe hrangin nang a hril saa.

³Khannisian panam danga mi le an ilua a ni'n chu, an irchon chu kha panamhai ta hong ni ta a ta, kin ram ata kha inhnotpaiin om an ti.

⁴Khan Jubili kum a hong tunga irchon zuara lei om tâk chu, a chongpu kuanga inkhîr nôk nî a hong tung tena khom, Zelofehada nâinupanghai irchon an va ilua panam mihai ta hong ni ta a ta; kin pi le puhai ram ata inhnotin om ta an ti," an tia.

⁵Mosia'n Rengpa thupêk angin Israelhai thu a pêkhaia, "Manasea irchihai thuhiril hi a dik a ni,

⁶Zelofehada nâinupanghai chungchâng thua Rengpa thupêk chu hiang hin a ni: a sa an iti ang chu an lua theia, khannisian an pahai panam chanpui laia mi ngêt an ini hrang a ni. tiin.

⁷Khanchu Israel irchihai ram chu panam danghai kuanga sonpai ni no nia, Israel irchihai hin an pi le puhai ram chu an inei mai hrang kêng.

⁸Israel irchihai laia nupang irchon luatuhai kaiin chu an panamhai laia mi ngêt an ilua hrang a ni. Khaang khan Israel mi tinin an pi le puhai irchon lua an ta.



⁹Khanchu ram chu panam danghai kuang hong son va sonin om no ni. Panam tinin an ram chit chu an ilua hrang a ni,” a tia.

¹⁰⁻¹¹Khan Rengpa’n Mosia thu a ipêk ang lam takin Zelofehada nâinupanghaiin an thoa, Malaii, Tirzaii, Hoglaii, Milkaii le Novaii haiin an pa urêngpa nâipasalhai chu an luahai tâka.

¹²Josefa nâipa Manasea irchihai chu an luaa, an ram chu an panam sâng chita a om mai tâka.

¹³Hihai hi Rengpa’n Mosia hmanga dân le thupêk Israel irchihai kuanga Jeriko irdîna Jordan râla Moab phâizôla a ipêkhai chu a ni.



Dân Inhnina

Dân Inhnina 1

Thumahruai

¹Hi hi Jordan dung sak tiang ramchâra Israelhai an om laia an kuang Mosia thu'nsîr irziakna bu a ni. Jordan dung phâi, Sufa irhôr Tofel khua, Labana khua, Hazerot khua, Dizahab khua hai le Paran ramchâr kêra an om lai a ni.

²Horeb tâng ata Kades-Barnea kha Edom tâng rama fein sîn sômhleikhat fe a ni.

³Aigupta ram an suaksan kum sômminli, tha sômhleikhat, tarik khat nî chu an kuang hril hrangRengpa ihril murdi chu Mosia khan a hrila.

⁴Rengpa khan Amor mi, Hesbon khuaa rêng Sihona kha an hnêa, Basan rama Astarot le Edrei kho rêng Oga khom an hnê tâka.

⁵Moab ram, Jordan dung sak tiang an om lai khan Pathian dân le thupêkhai kha Mosia'n an sîrinfel a ni.

⁶Ama khan, “Horeb tânga kin om lai khom Rengpa kin Pathian khan, Hi tânga hin nin om sôt ta.

⁷Nin irbu insiat unglân, irtôl irson roi. Amor-hai ram, tâng rama khan fe unglân, a kôlvêl ramhai irfang roi. Jordan dung phâi, tâng ram, sim tiang ram hai, Mediteranean tuipei kam dênin fe roi. Kanaan hai ram, Lebanon tâng pên Eufrates dung dênin fe roi.

⁸Hi ram hi a ni, nin irchibul Abrahama, Isaka, Jakoba hai le an irchihai kuang pêk ki inkung ram, irfang unglân, van hnê roi duah” a tia.

Mosia'n roirêltu hrang an kung

(Fes 18.13-27)

⁹Mosia'n mipuihai kuang, Horeb tânga ei om lai khan nangni ki ihril kha. Keima ringotin chu a rik nangni ki tia, zoi ta ma ung.

¹⁰Rengpa nin Pathian khan irvâna ârsi dôrin nangni an puangtira.

¹¹Nin irchibulhai Pathian Rengpa khan atûn hin a bâk sângin nangni inpungtir sianlân a inkung angin nangni irhniangtir ri se.



- ¹²Nin thubuai irngeitir a sân a intak a ni ta; keima vaia tho zoi thei ni ta ma.
- ¹³Mi vâ, thil sût thei le inhriat irzat, nam tin ata inthangsuak unglân, an kuta nangni inhlan ki ti.
- ¹⁴Kha kha thil tho zât tak a ni khom nin inhriat.
- ¹⁵Khanchu, mi vâ le thil inhriat irzat hai, nin nam murdi laia inthangsuakhai kha nangni kin koltira; senkhat chu mi sâng chung a roirêl hrang an nia; senkhat chu irza chung a, senkhat sômringa chung a, senkhat chu sôm chung a: khabana khom nam tina hruaitu hrang nangni phun pe sa ki ti.
- ¹⁶“Anni kha hiang hin ki hrilhaia: Nin mihai laia thubuai om murdi chu ngûk takin irngai unglân, nangni mi vai kêra thu a ni mani, nin laia nam dang om sahai le nin kêr thu mani dik takin, thiarthâk nei loiin rêl ngai roi.
- ¹⁷Indit bîk nei no unglân, tukhom ni sian, hmunkhat zita enin an thu rêl pe ngai roi. Tukhom enbîk nei no roi, nin thurêl inchuk chu Pathian ata zuang suak a ni. Nin ta hranga rêl intak ta hrai chu ki kuang hong intung ngai nin ta, lei rêl ki ti.
- ¹⁸Nin itho hrang danghai khom nangni ki hril kha te.

Kades-barnea ata enirchiktu an tîr

(Nam 13.1-33)

- ¹⁹“Kin Pathian Rengpa thu ang khan kin thoa. Horeb tâng kin suaksana, ramchâr irzat tak le irchel taka Amor-hai omna tâng ram lampui kha kin fe thenga, Kades-barnea kin va tunga.
- ²⁰Keini chu, ‘Amor-hai tâng ram nin hong tung ta, Rengpa kin Pathianin ram kha,
- ²¹en u ta, Rengpa nin Pathianin ram kha nangni a ipêk diam tâk a ni; lût unglân, Rengpa nin pi le puhai Pathianin a lei ihril tâk angin hong lua roi; chi no unglân, zâmirzal sa no roi,’ ki tia.
- ²²“Khannisian, nin rêngin nin hong a, ‘Ram chu enirchika kin fena hrang hai, khopui kin lûtna hrang thurchi hai ni hong nôk hrangin, ei matona, mi va tîrin lân; nin tia.



²³Kha khan a sân a nin lômtira; khanchu nin laia mi sômhleihni, nam khata inkhat kin thangsuaka.

²⁴An taka, tâng rama khan an hong kêia, Eskol irhôr an tunga, an eninfel zita.

²⁵Thei rahai kha an hong chôia, thu an hong intunga, Rengpa kin Pathian ni pêk ram chu a sân a lei sa', an tia.

²⁶ “Khannisianlân, nin fe nuam noa, Rengpa nin Pathian thupêk kha nin hnôl tâka.

²⁷Nin chiara, ‘Rengpa hin a ni ikhômâm a ni, Aigupta ram ata a ni hruai suaka, Amor-hai kuta a ni ipêk hrang a ni, nin siatpai a lei itum a ni hi te.

²⁸Ithoa mo kin hong ife hrang, khi taka omhai chu eini nêkin lian le irsâng tak tak an nia, an khuahai lak a liana, irvân phâkin kul nei an ni; an pathianhai khom kin hmu, tia ei urênghaiin an hong insîr kha kin chi a ni' nin tia.

²⁹Annihai kha chi no unglân, zâmirzalpui no roi,

³⁰Rengpa nin Pathian kha nin mahruaitu a nia, ama khan nangni doipui a ti; Aigupta rama nin hmu ngeia nin ta hrangin thil a tho ngai ang khan a itho thiai hrang a ni.

³¹ Ramchâra nin fe sâng khom khan lam tinrênga nangni a hruaia, pa'n a nâi a ipuak angin hi hmun hi nangni a ipuak intung a nih ti nin inhriat mai a ni,” ki tia.

³² Hi thila hin Rengpa nin Pathian kha nin iiam ngam loi a ni;

³³nin maton a hruai thiaia, nin irbûk irbeina hrang nangni a zong suak pea, zâna mei vâ, sûna sôm indingin nangni a ihruai ngai a ni.

Israel mihai a hrem

(Nam 14.20-45)

³⁴Rengpa'n nin irhâi a len hriata, a sân a ning an mur a ni.

³⁵“Hi irlo soal tak laia inkhat lua'n, ram satak an pahai kuanga, pêk a inkung kha hmu viat no nihai.

³⁶An laia mi inkhat Jefunea nâipa Kaleba vai hin hmu a ti, a isirna ram ka kai kha a nâihai irchon dongtum thiai hrangin ki ti, Rengpa kha a zui ngit sikin,” tiin thu an kung ngita.

³⁷Nangnihai sikin Rengpa kha ki chung a khom ning an mura, “Nang khomin ram kha hmu no chi ni,

³⁸Nuna nâipa, ni sinthotu Josua rêk hi chu hmu a ti: inthor ual ro, hi ram hi Israelhai an luatir hrang a ni.

³⁹Nin nâi le tehai, râl man mai mai hrang nin itihai, a sia a sa lan hre phâk loihai rêk hi chu, kha rama khan lût an ta, nei an ti.

⁴⁰Nin rengin kîr nôk unglân, Tuipui Sen tiang panin ramchâra fe roi,” a tia.

⁴¹Nangni’n chu ki kuang, “Rengpa chung a thil sual kin itho a ni, tâng rama khan hong doi kin ti,” nin tia. Hriamhrei nin chôi senga, tâng rama hong fe chu a sâna ol hrangin nin bêa.

⁴²Rengpa’n ki kuang: “Hong fe no roi, hong doi sa no roi, nin laia om ma ung, nangni lei that ngêt an ti,” tiin hril roh a ni ti a ni.

⁴³Kha kha nangni ki hrila, irngaitua nuam mak chêia; Rengpa thupêk kha zôm nuam mak chêia, tâng rama khan nakhrâtin nin hong fe tâka.

⁴⁴Kha laia tâng rama om Amor mihai khan nangni an lei doia, khuaiin mi a irzûl ang dênin nangni an lei irzûla. Horma tung thaiin nangni an irzûla, Edom tâng rama nangni an inhnê tâk a ni.

⁴⁵Rengpa tiang nin irheia, a kuang nin chapa; khannisian Rengpa khan nin irhâi len hre nuam maka, lei irngaitua nuam sa ma.

⁴⁶Khanchu, Kades-barnea khan sôtak nin om tâka.

Dân Inhnina 2

Ramchâra om sùng

¹ A mong taka chu Rengpa thupêk angin kin kîr nôk lele tâka; Tuipui Sen tiang kin pana, Edom tâng ram chu sôtak ei vêla.

²Rengpa khan,



- ³“Hi tâng hi nin vêl sôt ta hrai ta, hmâr tiang pan roi,” a ni tia.
- ⁴ Edom tâng ram nin ife theng hrang a nia, nin urêng hlatak, Esaua irchihai ram kha nin ife theng hrang a ni, a sân nangni lei chi an ti.
- ⁵Khannisian, nin idoi hrang ni ma, an ram chu buk hni te lua nangni pe no ning. Seir tâng ram kha Esaua irchihai ta hrangin ki pêk tâk a ni.
- ⁶Bu le tui nin nuamin chu an kuang ata nin irchôk hrang a ni, a tia.
- ⁷Rengpa nin Pathian khan lam tinrênga sat nangni a vura, ramchâr irzat taka nin irvâk lai hai khan nangni a enkol thiaia, nin Pathian Rengpa khan kum sômminli sêng chu nangni a ompuia, ite irsam mak chêi kha te.
- ⁸ Khanchu, kin fe thiaia, kin urêng Esaua irchi, Seir tânga omhai kha tehel kin zonga. Elat le Ezion-geber ata Jordan phâi lampui kin pansana; hmâr nisua tiang irheiin Moab ram kin pan tâka.
- ⁹Rengpa'n ki kuang, 'Lota irchi, Moabhai chu, hong inbui no roi, nin idoi hrang ni ma. Ar khopui chu an ilua hranga ki ipêk hrang ni ma,' a tia.
- ¹⁰(Ar khuaa hin mi lian hrâtak tak Em an itihai an om ngai. Mi lian chi dang, Anak an itihai dôra irsâng an ni sa.
- ¹¹Refa-hai ti an ni sa, khannisian, Moabhai khan Emhai an ti ngai.
- ¹²Edom rama hin Hor-hai an om ngai; khannisian, Esaua irchihai hin an irzûlpaihai zit a ni, an indartira, an ram chu an luapai pehai ta a ni. Khaang dên khan Israelhai khomin Rengpa'n ram a pêka lei omhai chu an inhnotsuakhai a ni).
- ¹³Rengpa thupêk angin Zered dung kin irkâna,
- ¹⁴ Kades-barnea kin suaksan ata kha kum sômthum a fe tâka; kha zoro laia varâl kâi kakai chu Rengpa iti ang ngêtin a thi zit nam an ni ta.
- ¹⁵Rengpa khan a'rh mangtirhai ving mâka chu, a idoihai mai a ni.
- ¹⁶An thi zoi zit hnungin,
- ¹⁷Rengpa'n ki kuang,



- ¹⁸A vuan hin Moabhai ramri, Ar khopui kôla fe theng nin ta,
- ¹⁹ Amon-hai, Lota irchihai ram va tung nin ta, anni chu inbuihai no roi, doihai sa no roi, an ram chu an omna hrangin ki ipêk tâk a ni, a hlekte khom nangni pe no ning,' a tia.
- ²⁰(Kha ram kha Refa-hai ram ti a ni ngai. Amon-haiin chu hi mihai leh Zamzum-hai an ti.
- ²¹Anak-hai ang dêna irsâng a ni, tamtak an nia, nam hrât tak an ni ngai; khannisian, Rengpa khan a that zôia; Amon-haiin an ram chu an neia, an lua tâk a ni.
- ²²Esaua irchi, Edom mihai hrangin Seir kha Rengpa'n khang dên khan a itho pe a ni. Rengpa khan Hor-hai kha an boipaia; Edom-haiin an ram kha an lua tâk a ni.
- ²³ Mediteranean tuipei vakama Kret chômbung mihai an lei oma, A phuta om Av-hai kha an irhmangtira, an ram kha an luaa, Gaza dênin an neipai zit tâk a ni.)
- ²⁴Moab ram kin khêl hnungin Rengpa khan, 'Thoiin lân, Arnon dung hi irkân roi, Amor rêng Sihona, Hesbon kho rêng kha, a ramhai leh nin kuta ki pêk tâka; doi unglân, a ram kha irchupui roi.
- ²⁵a vuan ata irthokin nin makunga irvân hnuaia om murdi ki inchitir hrang a ni, nin irhming vai khom an inhriatin inthing nor nor an ti,' a ni tia.

Israelhaiin Sihona an inhnê

(Nam 21.21-30)

- ²⁶Kedemot ramchâr ata Hesbon rêng Sihona kuang irngei thu chôiin palai ki tîra.
- ²⁷'Ni rama hong theng kin ti, chang tiang le vei tiang pêt no ni ung.
- ²⁸Kin nêk hrang bu le kin in hrang tui khom nin kuang ata la zit kin ti; kin Pathian Rengpa ni pêk ram, Jordan râl kin tung mâka chu hong theng kin ti.
- ²⁹Seir rama om Esaua irchihai le Ar khuaa Moab-a omhai kuang kin itho ang dên khan ni ram fe theng ringot ni phal pe ro' ki tia.



³⁰Hesbon rêng Sihona khan a rama kin ife theng chu phal maka, kin inhnêa a ram ei neipai pe theina hrangin Rengpa khan a lungrîl an ngartira, a tukul a inlian a ni; atûn ten a ram kha kin neipai pe tâka.

³¹Rengpa khan, ‘Sihona le a ram kha khom neipai pe unglân, lua roi,’ a tia.

³²Sihona le a pâl murdihai khan Jahaga a ni hong doia.

³³Kin Pathian Rengpakhan ama kha a nâihai le a pâl murdihai khan ama kha a nâihai le a pâl murdihai le a ni pêka, kin that zita.

³⁴A khua murdi kin lâka, kho sûnga omhai kha nupang pasal, a chîn a lian, kin inboipai zita, tûte hôihai ma ung.

³⁵An sâhai rêk chu râlîk suma kin lâka, khuaa râlîk sum danghai leh kin ilâk a ni.

³⁶Arnon dung irhôr tâng chung a khua Aroer ata a tuidunga khopui omhai kha Gilead dênin kin ilâk theiloil zel om ma, Rengpa kin Pathianin a ni pêk zit a ni.

³⁷Amon-hai ram rêk chu hro ma ung, Jabok dung kâi ma ung; vadunga khopuihai le tâng rama khopuihai, Rengpa kin Pathianin hro a ikhaphaia khan chu kâi ma ung.

Dân Inhnina 3

Israelhaiin Oga an inhnê

(Nam 21.31-35)

¹Hmâr tiang panin Basan ram kin tunga, Edrei kho kôla an rêng Oga khan a mi murdi leh an ni lei doia.

²Rengpa khan, ‘Ngîk no ro, a mihai le a ram hi, ama le ile nang ki pêk ta. Amor rêng Sihona, Hesbon kho rêng ni isoisak ang dên khan soisak ro’ a ni tia.

³Khanchu, Rengpa kin Pathianin Basan rêng Oga kha a mihai leh a ni pêka, inkhat lua hôiloiin kin that zithaia.

⁴Argob bial, Basan rêng Oga ram sûnga om khopui murdi kha kin lâka, kho sômruk zel a ni, a khua lâkpai pe loi zel om mah.



⁵Hi khuahai hin kul bang irsâng tak tak, inkhâr le a kalna satak tak a om zita, an kôlvêl khuahai khom kin lâk zit a ni.

⁶Hesbon rêng Sihona kin soisak ang dên khan an khuahai kha kin insiat zita, nupang pasal, nâipanghai ten khom kin that zit a ni.

⁷An sâhai le an thil neihai rêk chu râlâk suma kin lâk zit thiai a ni.

⁸Hi Amor rêng inhni ram, Jordan dung sak tianga mi hi Arnon dung ata Hermon tâng dênin kin irchupuia.

⁹Hermon hi Sidon-hai khan Sirion an tia, Amor-hai rêk chu Senir an ti

¹⁰Basan rêng Oga ram murdi kha kin irchupui zit a ni, tâng sîp zôla khuahai, Gilead biala omhai kha Basan bial pumpui Saleka le Edrei dênin kin dong tâk a ni.

¹¹Refa-hai laia la dam sun chu Basan rêng Oga hi a ni; irngai ta, a'rkuang kha lung irkuang a nia, mûk pangai mûk kuaka sei, mûk minlia irzat a ni: atûn ten Amon-hai khua Raba-ah a la om.

Jordan sak tianga om tâk namhai

(Nam 32.1-42)

¹²Hi ram kin lâk hnung hin Reubena le Gada irchihai kuang Arnon dung irhôr chung tânga Aroer khua sim tiang ram kha Gilead tâng ram chimrip leh kin pêka.

¹³Gilead ram la om le Basan ram kha Manasea irchi chimrip kuang kin pêk saa. Basan ram pumpui hi Refa-hai ram ti a ni ngai.

¹⁴Manasea irchi Jaira khan Argob bial, Basan ram hi, Gesur-hai le Maakahai ramri dênin a lâka; khuahai kha a'rhming kopin irhming thar a phuaa, Harot-Jair atûn ten an la ti a ni.

¹⁵Gilead ram kha Makira, Manasea nâi ki pêka.

¹⁶Reubena le Gada irchihai kha Gilead le Arnon dung kêr ram hi ki pêka. Sim tiang an ramri kha Arnon dung inlai tak a nia, hmâr tiang khan Jabok dung a ni, Amon-hai leh an ri chu.



¹⁷Kho thang tiang ri khi Jordan dung hi a nia, Galili đil ata Tuipui Thi, Pisga tâng kôl ten a dêna.

¹⁸ Kha lai khan thu nangni ki pêka, ‘Rengpa nin Pathianin hi ram hi ramchâr hrangin nangni a ipêk a ni, nin laia hriamhrei chôl thei ten kha nin urêng Israel pâl makunga Jordan dung nin hong ikâi masa hrang a ni.

¹⁹ Sa a sân nin neia, nin sâhai, nin dôngma le nâi le tehai hi chu, hi nangni ki ipêk khuahai hin lei om an ta,

²⁰ nangni ang dêna nin urêng hai hin Jordan thang tiang ram Rengpa pêk hranga lungngam taka an om sa thei mâka chu, nin urêng hai hi, nin ichangpui hrang a ni. Kha zoi tika chu nangni ki ipêk hrang nin rama hin kîr thei nin ti.

²¹ Josua kuang khom ki hrila, nin mit ngeiin rêng inhni chung a Rengpa khan a isoisak hrang a ni.

²² Anni kha ngîkhai no unglân, Rengpa nin Pathian khan nangni doipui thiai a ti.

Mosia, Kanaan ram hmu loi hrang

²³ Kha zoro lai khan Rengpa kuang, ‘O Rengpa Pathian, ni siahlo hi ni roiinpuizia le ni sinthotheizia ni inentir phing a la ni.

²⁴ Irnênga le irvâna, hi thil roiinpui ni itho ang tho thei hi pathian dang zel om mahai.

²⁵ O Rengpa, Jordan dung fe kâiin ram satak, tâng ram satak tak, Lebanon tâng hai kha, lungkham takin nin hmutir sa ta,’ tiin ki ngêna.

²⁶ Nangni sikin Rengpa kha ki chung a ning an murtira, ki thu chu irngai nuam maka, Rengpa khan, ‘a ruk ta, hril khom hril ta no roh.

²⁷ Pisga tâng sîpa kâiin lân, kho thang tiang hai, hmâr tiang hai, sim tiang hai, nisua tianghai thîr vêl ro; ni mit khan enin lân, a sir chu ni isir loi hrang a ni, Jordan dung kâi no chi ni.



²⁸Josua kha a itum inthûktir hrangin inthor ual ualin lân, ni ihmu rama hin, hi mihai hi hruai a ta, a in luatir hrang a ni, a tia.

²⁹Khanchu, Bethpeor kho dep rama khan kin om tâka.

Dân Inhnina 4

Mosia'n thuzôm hrangin Israelhai a ngên

¹Atûn chu, Israelhaio, chonginkung le omdân hrang nangni ki irchutir kha uksak unglân, nin nâihai kuang Rengpa nin Pathianin nangni a ipêk ram kha dam taka nin lua theina hrangin zôm roi.

²Thu nangni ki ipêk hi nin ibelsa hrang ni ma;Rengpa nin Pathian thu nangni ki ihril kha irhmâi nin inei hrang ni ma.

³Peor tânga Rengpa thil tho nin ihmu seng kha, Peor tânga Baal betuhai kha a that zit kha te.

⁴Nangni Rengpa chel ngittuhai rêk chu atûn ten nin la dam hi te.

⁵Irngai u ta, thu'nkunghai le om hrang dân ei Pathian Rengpa ni ihril ang dênin nangni ki'rchutira, nin ipan, nin ram dong hrang nin tung tika zôm ngêt roi.

⁶Hi dânhai hi uksak unglân, zôm khak roi; nam danghaiin an inhriat tika, 'Hi nam hi nam vâz tak le changkâng tak an lei ni hi te,' ti an ta, nin vâzgia le nin changkâng bîkzia inhria an ti.

⁷Ei Pathian Rengpa anga a mihai koina lei sâm thiai ngaitu ang hi, nam dang, nam roiinpui takhai khomin, Pathian an nei moa.

⁸A vuana dân nangni ki izam pe anga dân le thupêk sa khom hi nam roiinpui takhai khomin an inei ma ni?

⁹Khanchu, irdîn unglân, nin mit ngeia nin thil hmuhai kha nin dam sûnga nin irnghil loina hrangin irnak song unglân, nin nâi le te khom, nin tuhai khom, hrilhai ngai roi.

¹⁰'Mihai kha koi bukin lân, an kuang ki insîr kha inhre sian ki inuam a ni; an dam sûng chu ki thu an zôma, an nâihai khom ni chi lam dân irchu thei an



ti,' a tia; khang dên khan tânga nin Pathian Rengpa makunga nin ingîr a ni kha irnghil loiin, nin nâihai kha hril ngai roi.

11 Tâng chu a kânga, meikhu irsa takin a khu khaka, an thim khaka, irvân dênin an thima, a kôla toi hrangin nin va nâi a ni kha.

12 Rengpa khan mei ata nangni a hong chongpuia, a'rhâi kha nin inhriata; khannisian, hmu hrang om ma, a'rhâi vai kêng nin inhriat.

13 A thuthung kha vong ngit hrangin nangni a hrila, thupêk sôm, lungphêk inhnia a irziak kha zôm ngit hrangin nangni a tia.

14 Rengpa khan a dân murdi kha nangni irchutir hrangin a ni ti. Nin omna hrang ram nin tung tika, kha kha nin izôm ngit hrang a ni thuhai nin nâihai nin ihril ngai hrang a ni.

Millim biak loi hrang

15 Horeb tânga khan mei ata Rengpa khan nin kuang thu an sîra; khannisian, a tak chu hmu mak chêi kha te. A sân irdîn roi.

16 Millim, nin ibiak hrang siamin irporinche no roi; pasal irlim mani, nupang irlim mani siam no unglân, inchertir sa no roi.

17 Irrnênga om thilhring tinrêng irlimhai, chung uang vahai irlim,

18 irrnênga inbok irvâka fe, irrnêng hnuai tuia nga irlim nin biakin, nin isiam hrang ni ma.

19 Irvân tiang hong thîr nin ta, misa, tha, ârsihai le irvâna thil dang om tinrêng hai khi chubai mûkin a sintho irzuk chin ni; a sân irdîn roi. Rengpa nin Pathian khan khihai khi nam dang biak hrang vaia a isia a ni.

20 Nangni chu, Aigupta ram, thîr hâl inzôina meipui ata kha, nangni a la suaka, ama dongtum ni hrangin nangni a ihruai suak a ni, atûna nin iom ang hin.

21 Kei chu, nangni sikin Rengpa nin Pathianin nin lua hranga a ipêk ram, ram sataka fe hrangin Jordan dung ki ikâi sa hrang phal ma.



- ²²Kei chu Jordan râl kâi loiin hitaka rama hin ki ithi hrang a ni, nangni rêk chu kâi unglân, ram chu nin va ilua hrang a ni.
- ²³Rengpa nin Pathianin thu nangni a inkungpui kha irnghilna lik chin ni. Rengpa nin Pathianin i dâr khom, nin isiam le nin ibiak kha phal ma.
- ²⁴Nin Pathian Rengpa hi kâng irhmang mei ang a ni, Pathian nunse tak a ni.
- ²⁵Nin ram hranga khan sôt tak nin om hnungin, nâi le te neia tubora, irlo hni irlo thum nin nei tika khom millim rêng rêng i anga irlim khom, nin siama, Rengpa nin Pathian nuam loi lam nin tho tâkin chu, irnêng le irvân sâlin ki insâr a ni,
- ²⁶Jordan dung kâia nin va inei hrang ram ata kha thi zoi zit nin ti.
- ²⁷Rengpa khan nam tin laia nangni indartir a ta, kha khan tômte chu hring suak chu om vi viat nin ti.
- ²⁸Kha rama khan mihriam kuthai irlim, thing mani lung mani, chong theiloi, inhre thei saloi, hmu theiloi le thil mirim khom inhre thei loiin biak nin ti.
- ²⁹Khannisianlân, kha ram ata kha Rengpa nin Pathian kha a sân nin chia, lungrîl murdi le ama nin zongin chu hmu nôk nin ti.
- ³⁰Nikhua hnungkhônhaia chu intak tuang nin ta, a thu zôm ta nin ti.
- ³¹Nin Pathian Rengpa hi Pathian khonza thei tak a nia, nangni masan no nia, nangni insiat sa no ni; nin pahai kuang thu an kung ngit kha irnghil sa no ni.
- ³²Tianlai nin suak mân, Pathianin irnênga mihriam a siam ata kha sui u ta; rammual pumpui hi irdon suak unglân, nin thil hmu ang le nin thil inhriat ang hi an inhriat ngai mo irdonhai u ta.
- ³³Tu nam mo mei ata Pathian thuhrih inhriat ngai, a'rngaituhai dam suak sa ngai?
- ³⁴Aigupta ram ata nin Pathian Rengpa khan a mi hrangin nangni a ihruai suak angin tu Pathianin mo hmun khat ata a mi hrang nam hruai suak ngai an iom? Nangni chu, nin Pathian khan, a sinthotheizia le irdoinahai inomtira;



thilirkhêl le irsinsiana irkhêl tak tak a thoa; thil ichiom tak takhai an tungtir a ni kha te.

³⁵ Rengpa hi Pathian a nia, ama no hi Pathian dang zel om mahai ti nin inhriat theina hrangin khahai kha nangni a inhmutir a ni.

³⁶ Nangni a'rchutir theina hrangin irvân ata a'rhâi nangni a inhriattir a ni, irnênga ngêt a mei roinpui kha nangni an hmutira, khatak ata kha nangni a zuang ichangpui a ni kha te.

³⁷ Nin pahai kha a sân a'rngaiinnat sikin an irchihai chu nangni an thanga, Aigupta ram ata ama ngêtin inhnê'n nangni a ihruai suak a ni.

³⁸ Nin matona, nin irthûla nam lian ual le sinthothei ualhai a'rzûlpaia, an omnaa nangni a hruai lûta, nin ram hrangin an ram kha nangni a ipêk hrang a ni. Atûn ten kha ram kha nin ta a la ni mai.

³⁹ Khasikin, a vuan hin inhre roi, irnghil viat no roi: Rengpa hi chung tiang irvân le hnuai tiang irnênga Pathian omsun a ni, Pathian dang rêng rêng om mahai.

⁴⁰ Khasikin, a thu'nkunghai le a thupêkhai kha zôm roi, nin ta hrangin sa a ta, nin nâi le tehai ta hrangin sa a ti; kumkhuaa nin inei hranga nangni a ipêk rama khan dam insôt nin ti.

Mi thata, intâna hrang kua

⁴¹ Jordan dung sak tianga mi thata, intâna hrang khopui inthum an kunga.

⁴² Kha khuaa khan, mi'n a râl khom ni loi, mi a that palin chu intân thei a ti; an lei inzôk hrang a ni.

⁴³ Reubena irchihai rama, Gilead biala om Ramot kua hai, Manasea irchihai rama Basan bial Golan khuahai kha an kunga.

Dân pêk thua thumahrui

⁴⁴ Hi hi Israelhai ta hrangin Mosia'n dân a itârinlang kha a ni.

⁴⁵ Hi chongbehai le thu'nkunghai le om hrang dânhai hi Aigupta ram ata Israelhai an hong suak lai khan Mosia'n a ihril a ni.



⁴⁶A hrilna hmun kha Beth-peor tâng dep, Jordan dung sak tiang, Amor rêng Sihona ram sũa a ni, ama hi Mosia le Israelhaiin an izoi a ni kha te.

⁴⁷Kha ram kha an lua pea, Basan rêng Oga ram khom an lua pe saa. Hi Amor rêng inhnihai hi Jordan dung sak tianga om a ni.

⁴⁸An ram lua pe chu Arnon dung irhôr chung, tânga om Aroer khua ram hi a ni.

⁴⁹Jordan dung sak tiang ivakam phâi khom Tuipui Thi dênin tâng pang leh a huam a ni.

Dân Inhnina 5

Thupêk sôm

(Fes 20.1-17)

¹Mosia khan Israel mi murdi kha a koi bukhaia, an kuang 'Israelhaio, hi thu'nkung le omdân hrang nin beng inhriata, ki insîrhai hi irngaitua unglân, irchu nin ta, nin izôm hrang a ni.

²Ei Pathian Rengpa khan Horeb tânga thu a nin kungpuia.

³Rengpa thuthung hi ei pahai ta hrang ni ma, eini, a vuana hitaka omhai ta hrang hin a ni lem.

⁴Tânga mei ata khan Rengpa khan hmâi irsongin nin kuang thu a insîr a ni kha te.

⁵Kha zoro lai khan Rengpa le nangni kêra ki ngîra, Rengpa thu insîr nôktua ki chang a ni, mei nin chi sikin tânga nin ife ngam loi a ni.

⁶Rengpa khan hiang hin a ti: 'Suaka nin omna Aigupta ram ata nangni hruai suaktu Rengpa, nin Pathian kha ki ni.

⁷Keima no chu Pathian dang rêng rêng nei no roi.

⁸Ni ta hrangin millim siam no ro, chung tiang irvâna om mani, irnênga om mani, irnêng hnuai tuia thil irlim mani ni isiam hrang ni ma.



⁹ Khahai kha kûnin chubai ni imûk hrang ni ma, an sin ni itho sa hrang ni ma. Kei Rengpa, ni Pathian hi, Pathian nunse tak ki ni; ni khôkmâktuhai chu an irchi irlo thum, irlo minli dên khomin ki hrem ngaia,

¹⁰lung ni thunga ki thupêk zômtuhai rêk chu an irchi, a sâng sâng dên chungâ khom khâzana ki nei ngai a ni.

¹¹ Pathian Rengpa irhming sâlin milak tho no ro; milaka a'rhming sâltu chu Rengpa khan hrem loiin insua no ni.

¹²Rengpa ni Pathianin thu nang a ipêk angin sâbat nî hmangin lân, ser ro.

¹³ Sûn ruk sâng sin tho ni ta, ni sin murdi sin thei ni ti.

¹⁴A sûn sari nî rêk hi chu Rengpata hrang sâbat nî a nia, sin ite ni itho hrang ni ma; ni nâipahai, ni nâinuhai, ni suakpahai, ni suaknuhai, ni sehrâtchal hai, ni sakuartung hai, ni sâ vâi murdihai le ni kho sûnga nam dang om sahai khomin sin an itho hrang ni ma, nangma ang dênin ni suak nupang pasal, an irngam sa hrang a ni.

¹⁵Aigupta rama, mi siahlo nin ini kha inhre mai roi. Khataka ta kha Rengpa nin Pathian hin a sinthotheina roiinpui tak hmangin nangni a ihruaisuak kha. Khasikin, Rengpa nin Pathian khan sâbat nî hi ser hrangin nangni a iti a ni.

¹⁶Rengpa ni Pathianin thu nang a ipêk ang khan ni nu le ni pa chôindôm ro; khanchu dam insôt ni ta, Rengpa ni Pathian nang ipêk rama khan irhniang ni ti.

¹⁷Mi that no ro.

¹⁸ Uire no ro.

¹⁹ Inru no ro.

²⁰ Ni bômhai dôngma milakin hnôl no ro.

²¹Ni bômhai dôngma ni irzuk hrang ni ma, a in le loihai, a suakpa, a suaknuhai, a sehrâtchalhai, a sakuartunghai, a ta rêng rêng ni irzuk hrang ni ma.



²²Rengpa khan hi thupêkhai hi a ni, Horeb tâng kôla nin hong irchunghôm laia nangni a ihril kha. Mei ata le sôm irsa inthim khak ata hi thu hi inring takin a insîr a ni kha te; thu dang insîr nei ma. Lungphêk inhnia a'rziaka, a ni ipêk a ni.

Mipuiin an chi

(Fes 20.14-21)

²³Tâng kha a chok luai luaia, inthim irsa khak ata irhâi nin inhriat khan, nam tin hruaituhai le nin ulianhai ki kuang an hong;

²⁴'Rengpa kin Pathian khan a roiinpuizia le a lianzia a nir hmutir ta, mei ata a'rhâi kha kin inhriata, a vuan hin Pathianin mihriam a chongpuia, mihriam kha thi kher mah ti kin inhriat tâk a ni.

²⁵Aniachu, ithoa mo thi zoi theiin ei iom nôk hrang? Mei irkhêl tak khan ni hong kâng irhmang a ta, Rengpa ei Pathian irhâi kha ei inhriat nôkin chu thi ngêt ta ei ti.

²⁶Mei ata Pathian irhâi inhriata mihriam dam suak zel an om mo?

²⁷Rengpa ei Pathianin a insîr murdi kha ni hrilin lân, lei irngai kin ta, zôm kin ti,' an tia.

²⁸Rengpa khan ki kuang nin thu'sîr kha a lei inhriat. Rengpa khan ki kuang, 'Hi mihai hin ni kuang an thu'sîr hi ki lei inhriata, an hril indik.

²⁹Khaang lungrîl kha irput maihai sianlân chu, i dôra sa hrang mo a ini! Ni chi an ta, ki thupêkhai zôm an ta, an nâihai ten khom kumkhua'n irhniang an ti:

³⁰An kuang zu chumin lân, an irbua inkîrtirhai roh.

³¹Nang rêk chu ki kôla hin lei ngîrin lân, ki thupêk murdihai, ki thuthunghai le om hrang dân ki iti nang lei hril ki ti; kha kha annihai hi ni irchutir hrang a ni; khanchu, ramchâra an ilua hrang ram ki ipêk hranga khan nin izôm ngai hrang a ni,' a tia.

³²Rengpa nin Pathian thupêk hi a sân nin izôm irdîn hrang a ni; inkhat lua nin irhmâi hrang ni ma, nin ibôk hrang ni ma.



³³Rengpa nin Pathianin nin fena hrang a itia khan nin ife thiai hrang a ni; khanchu, dam nin ta, irhniang nin ta, nin ram nei hranga khan sôt tak nin idam hrang a ni.

Dân Inhnina 6

Thupêk roiinputak

¹Hi thupêk hai, thu'nkunghai le om hrang dânhai hi Rengpa nin Pathian khan nangni irchutir hrangin a ni iti a ni. Nin luaa nin inei lat hrang rama khan tho ngai roi.

²Nin nâihai le nin tuhai khomin Rengpa nin Pathian thu'nkung le thupêk nangni ki ihril hi an zômin an itho hrang a ni; khanchu dam insôt an ti.

³Khasikin, O Israelhaio, inhre unglân, tho ngêt hrangin irsinsiam roi; nin ta hrangin sa a ta, khuaih lutui le dûttui luangna rama hin nin pahai kuang Rengpa nin Pathian inkung angin a saterengin nin ipung hrang a ni.

⁴O Israelhaio, irngaitua u ta, Rengpa, Rengpa vai hi kin Pathian chu a ni.

⁵Rengpa nin Pathian chu nin milung murdi'n, nin thei dôrin lungthung roi.

⁶A vuana hi thu nangni ki ipêk hi nin milunga châm mai sianlân,

⁷ngûk takin nin nâihai irchutir roi. In sênga nin toi laiin, lampuia nin fe laiin, nin zâl hrangin, nin thoi hrangin hril ngai roi.

⁸Nin inhriat mai theina hrangin nin bâna khit unglân, michal khitna'n hmanng roi.

⁹Nin mikot chunghaia irziak unglân, nin tual mikothaia khom târ ngai roi.

Thuzôm loi ichiomzia

¹⁰Nin pu Abrahama, Isaka, Jakoba hai kuanga pêk a inkung ram chu Rengpa nin Pathianin nangni pe a ti; khopui lian tak tak le satak tak, nin inding ni viat loi kha dong nin ti.

¹¹Kha khan in sênga khan thil satak tak nin isia ni loi om a ta; sôl taka nin ichoi ni loi tuikhurhai om a ta; grep irhuan le oliv hmun, nin isiam ni viat



loihai dong nin ti. Rengpa'n kha rama khan nangni a hruai intung tika chu ite irsam no chin ni.

¹²A sân irdîn roi, suak nin nina, Aigupta ram ata nangni hruaisuaktu Rengpa hi irnghil viat no chin ni.

¹³Rengpa nin Pathian kha chi unglân, ama vai chubai mûk unglân, ama irhming vai sâmîn khomâkirsâm ngai roi.

¹⁴Nin kôlvêla pathian omhai inkhat lua biak no roi.

¹⁵Nin laia om Rengpa nin Pathian hi Pathian nunse tak a ni. Nin chungarengpa nin Pathian hi a ning an mur likin chu rammual ata hi nangni a inboipai hrang a ni.

¹⁶Masa tui hmuna nin iti ang khan Rengpa nin Pathian hi fia no roi.

¹⁷Rengpanin Pathian thupêk kha kuluk takin zôm unglân, a thu inhriattir le a chonginkung nangni a ihril kha zôm ngai roi.

¹⁸Rengpa ihril ang takin nin râlhai kha nin makunga nangni inhnotsuak pe zit a ti.

¹⁹Rengpa mithmua diktak le satakin nin itho hrang a ni.

²⁰Nakan tena nin nâihaiin, 'Hi thu'nhriattir hai, thu'nkung hai, om hrang dân hai, Rengpa kin Pathian nangni hril hi itin lama mo?' tia nangni an irdon tika chu,

²¹hiang hin sâm ngai roi, 'Aigupta rama Faraa suak kin nia, Rengpakhan Aigupta ram ata kha a ni hruai suaka.

²²Rengpa khan thilirkhêl hai, irsinsiana roiinpui tak tak le irkhêltak tak Aigupta ram haia, Faraa le a zuituhai chung a itho a ni.

²³Khataka khan a ni hruai suak tâka, hi ram, ei pahai kuanga pêk a inkung rama hin a ni hruai inlûta ni pêk a itum a ni.

²⁴Rengpa khan hi chonginkunghai hi tho zit hrangin thu a ni pêka, ei satna hrangin Rengpa kin Pathian kha chi mai hrangin a ni tia; khanchu, ei rêngin a vuan sùn ten hin a ni la ihôi mai a ni.



²⁵Hi a thupêk ni hril murdi hi kuluk taka ei zômin chu Rengpa khan ei chung a lôm a ti; ti ngai roi.

Dân Inhnina 7

Rengpa dongtum Israelhai

(Fes 24.11-16)

¹Rengpa nin Pathianin nin lua hrang rama khan nangni hruai inlût a ta, khataka om nam sari, nangni nêka tam ual le hrât ual, Hit mi, Girgas mi, Amor mi, Kanaan mi, Periz mi Hiv mi le Jebus mihai kha nin matona inhnotsuak a ti.

²Rengpa nin Pathianin nin kuta nangni a pêk tika thathai nin ta, nin ithathai zit hrang a ni; annihai le thu nin irthungpui hrang ni ma, inrenhai sa no roi.

³Irneipol no roi, nin nâihai dôngma pasala irneitirhai no roi.

⁴Nin nâipahai hruai irhmangpaihai an ta, pathian dang inbiaktirna an ti; khanchu Rengpa kha nin chung a ninginmur thut a ta, nangni inboipaina ti.

⁵Khasikin, an maichâmhai kha insiatpai pehai zit unglân, an lungphunhai insiat unglân, an Aseri irlim thing phunhai kha irkit unglân, an thing millimhai kha hâl zit roi.

⁶Nangni chu, Rengpa, nin Pathian ta hrangin ser indang khak nin ta; Rengpa nin Pathian khan rammuala nam tinrêng lai ata a dongtum bîk ni hrangin nangni a inthang a ni.

⁷Nam dang nêka nin tam ual sika lungthunga nangni a inthang ni ma; nam tianga chu a tôm ual tak nin ni.

⁸Rengpa khan lung nangni a thung tak tak sikin le nin pahai kuanga, a thu'nkung inpuihlingtir a nuam sikin Rengpa'n Aigupta rêng Faroa suak ata nangni a irtansuak a ni.

⁹Khasikin, inhre roi, Rengpa nin Pathian hi kêng Pathian a ini, Pathian iamom, a thu'nkung a vong ngita, ama lungthunga, a thupêk zômtuhai chung a irlo sâng dêna khonza ngai kha.



10 Ama khôkmâktuhai rêk chu anni ngei chung a thuana, inse ngaitu a ni; ama khôkmâktuhai chu hôi no ni, an dam sêng lele'n hrem a ti.

11 Khasikin, thupêkhai, thu'nkunghai le om hrang dân hai, nangni ki ihril kha a vuan hin zôm unglân tho roi.

Thuzôm satvurna

(Dhn 28.1-14)

12 Hi om hrang dânhai hi nin uksaka, hiang hin nin oma, nin zômin chu Rengpanin Pathian khan nin pahai kuanga a inkung ang khan a thuthung kha nin ta hrangin hlen a ta, nin chung a khonzâna nei a ti.

13 Lung nangni thung a ta, satvurin nangni inpungtir a ta, nin pahai kuanga pêk a inkung rama khan nin nâihai kha satvur a ta, nin rama nin nâihai kha satvur a ta, nin rama nin thei phunhai inratir mer mur a ta, nin buhai, nin uain hai, nin sahriak hai nin kêl le belrahai inpung tîr tîr a ti.

14 Mi dang murdi nêkin nin râlvân sa a ta, nin laia pasal mani, nupang mani ching om no nihai.

15 Rengpa khan nin lai ata natna tinrêng lapai a ta, Aigupta rama hrihai kha irvei no chin nia, nangni khôkmâktuhaiin irvei lem an ti.

16 Rengpa nin Pathianin nangni a ipêk rama namhai kha inboipai unglân, nin hmu'n lunginkhamhai no unglân, an pathianhai khom nin ibiak hrang ni ma; kha kha nin in-ôkna hrang châng a ni.

17 Hi namhai hi eini nêkin an tama, itin mo ei inhnotsuak thei hrang? ti lungrîl irput no roi.

18 Anni kha nin ingîkhai hrang ni ma. Faroa le Aigupta mihai, Rengpanin Pathianin a isoisak lam kha inhre mai roi.

19 Irkhêl tak taka Faroa a ihremhai kha nin hmua, thil irkhêl le irsinsiana roiinpui tak tak tho'n, ama kut irnak hrât ngêt hmangin inhnê uala nangni a ihruaisuak ni kha: khang dên khan nin ichi mihriamhai chung a tho nôk ri se.



²⁰Kha no khom kha, Rengpa nin Pathianin nin laia ngalchân tîr a ta, nin ithat ban le irbîk nin ihmu loihai kha thathai chit nin ti.

²¹Annihai kha ngîkhai viat viat no roi, Rengpa nin Pathian, Pathian roiinpui tak le ichiom tak hin nangni ompui mai a ti.

²²Rengpa nin Pathianin kha namhai kha zâm zâmin inhnotsuakhai a ti; anni kha thathai zoi no ni, khano'nchu ram sahrâng pung hrât hrai an ti.

²³Rengpa nin Pathianin annihai kha nangni pe ngêt a ti; inchamaihai rak a ta, siat zoi an ti.

²⁴An rênghai kha nin kuta nangni pe a ta, irvân hnuaia an irhming inhre viat ta loi hrangin soisak a ta; tûte nangni lei danh thei reng om no nihai; nin inboipaihai zit hrang a ni.

²⁵Thing millim, an itukhai kha, hâl nin ta, a tuamna sumru le rângachakhai kha irzuk no unglân, la sa no roi; nin ta hrangin in-ôkna le châng ichiom tak ni thei a ti. Rengpa nin Pathian hrangin thil intirom a ni.

²⁶Khaang thil intirom kha nin ina nin la lût hrang ni ma, nangni khom khaang ringot khan chu intirom nin ti. Intir tak tak nin ta, a sân nin ikhômâk sa hrang a ni, Rengpa khosâl tong an ni.

Dân Inhnina 8

Ram satak lua hrang chu

¹Nin pahai kuanga Rengpa nin Pathianin ram pêk a inkung kha dam taka nin luaa, nin neia, nin pung theina hrangin a vuana thupêk nangni ki ihril hi nin izôm zit hrang a ni.

²Kum sômminli sùng ringot Rengpa nin Pathian khan ramchâra nangni a inchaitir kha inhre mai roi; deng nangni an theitira, nangni a fiaa, a thupêkhai kha nin izôm hrang mo zôm loi hrang nin lungrîl inhriat a inuam a ni.

³Deng nangni an theitira, nangni an châmтира, a kêra nin inhriat ngai loi, nin pi le puhai khomin an inhriat ngai loi, bu'n nangni a vâia; mihriam hi bu



ringotin a ihring hrang ni maka, Rengpa bâi ata thu tinrêng suakhai kha a itûng hrang a nih ti nin irchu nuam sika a ni.

⁴Hi kum sômminli sûng hin songkol inkhat lua inngâkin siat mak chêia, nin ke ru invûng ual hliak ma.

⁵Mi'n a nâi a sepa, a ihref ang hin, Rengpa nin Pathian khan nangni a sep ngai ti nin inhriat mai hrang a ni.

⁶Rengpanin Pathian thupêk kha nin zôma, a inuam angin hring nin ta, ama kha nin ichi hrang a ni.

⁷Rengpa nin Pathian khan ram sataka nangni hruai a ta, ivate tui luang zon zon tamna, tuihnâr le irnêng sûngrîl tui zuang luang suak tamna, tâng le irhôr hoitak takhai,

⁸gohu le barli sana ram, grephai, theipui hai khuaihlutui tamna rama khan nangni hruai a ta;

⁹kha khan, irsam nei loiin nuam do dôr bu ne nin ta; kha rama lunghai kha thîr a ni, tânghaia khan dêr choi suak hrang a sân a tam.

¹⁰Ruk dôr fâk hrang nin neia, ram satak nangni a pêk sikin Rengpa nin Pathian kha inpâk nin ti.

Rengpa irnghil loi hranga irdîn hrang

¹¹A thupêkhai, om hrang dân a itihai, a thu'nkunghai a vuana nangni ki ihril hi zôm nuam loiin Rengpa nin Pathian hi irnghil pal nin ti, irdîn roi.

¹²Khop dôr le ruk dôr fâk hrang nin neia, inhoi tak tak nin sina, nin lua tika,

¹³nin sehrât hai, belra le kêl hai an hong punga, sum le rângachak nin nei intama, nin inei murdi a hong irhniang tika,

¹⁴nin lâirpâk lungrîlin Aigupta suak ata nangni hruai suaktu Rengpa nin Pathian kha irnghilna nin ti.

¹⁵ama khan ramchâr irzat tak le ichiom tak taka nangni a hruai intheng sika, mirûl hai, mirûl inchukna mihai le âinuvêt tamna rama hai, tui om loina ramchâra hai nin fe khan lungpui ngar tak ata tui nangni a ipêk kha.



¹⁶Ramchâra khan nin pahai khomin an inhriat ngai loi Mana khan nangni an fâa, nangni fiana hrangin le nin ta hrangin a isa hrang mo saloi hrang nin inhriat theina hrangin intak nangni an tuangtir a ni.

¹⁷Khanchu, nin hrât sik le thil nin thothei sika irchong mo kin ni irti no roi.

¹⁸Rengpa nin Pathianin irchong thei hrangin nangni a inhrâtir a nih ti inhre mai roi; nin irchibulhai kuang a inkung kha ama khan a la inthâ no sika a ni.

¹⁹Rengpa nin Pathian kha irnghil viat viat no roi, pathian danghai uksakin chubai mûksan ual no roi; khaang khan a ni, irhmang ngêt ngêt nin ti.

²⁰Rengpa nin Pathian irhâi hi nin uksak no'n chu, nin iluapai pehai hrang nam Rengpa'n a inboipai angin nangni khom nangni inboi ngêt a ti.

Dân Inhnina 9

Mipui thu zôm loihai

¹O Israel mihaio, irngaitua u ta, a vuan hin Jordan dung a sân nin kêi vâng ta; nangni nêka tam le nam hrât luapai pe hrang le khopui lian tak tak, an irkul bang irvân phâk hrang rakhai kha nin ilâkpai pe hrang a ni.

²A mi omhai lak mi lian tak tak, irsâng tak tak, Anak-hai irchi an nia, 'Tu mo Anak-hai kha danh zoi hrang?' an itihai kha an ni.

³A vuan hin inhre roi, nin mahruaitu kha Rengpa nin Pathian hi a ni, nin matona a sânâ mei kêng angin a ife thiai hrang a ni, insiat a ta, nin matona nangni inlôm-tir mai a ti, Rengpa lei iti tâk angin inhnotsuak zit a ta, irhmangtirhai zit nin ti.

⁴Hi mihai hi Rengpa nin Pathianin an hnotsuak tika, 'Kin sa sikin Rengpakhan hi ram hi a ni pêka, hi namhai hi an sual sikin a inhnot suak a ni,' tihna chin ni.

⁵Nin sa sik le nin omdân inthîk sika an ram hi nin iluapai pehai ni ma; hi namhai hi a sân an sual sikin Rengpa nin Pathian hin a inhnotsuak a ni; Abrahamâ, Isaka, Jakoba hai kuanga a thu'nkung kha inpuihlingtir a itum a ni.



- ⁶Khasikin,Rengpa nin Pathianin ram satak hi, nin sa sika nangni a ipêk ni mah ti hi inhre mai roi, mi tukullian tak nin ni.
- ⁷Ramchâra khan Rengpa nin Pathian kha ning nin inmurtir kha inhre mai unglân, irnghil no roi. Aigupta ram nin suaksan nî ata atûn ten hin Rengpa ata tehel zong intam ngai nin ni.
- ⁸Horeb tânga khom khan Rengpa ning kha nin inmurtira, nangni irhmangtir chit hrang dôrin a ning a inmur a ni.
- ⁹ Nangni leRengpa thuthung, lungphêka irziak kha, la hrangin tânga ki hong fea, sùn sômminli le zân sômminli ite fa ma ung, in ma ung.
- ¹⁰Inkhômpui lai khan nin kuang thu an sîra, khahai murdi kha lungphêka, Pathianin ama kut ngêtin a'rziaka, Rengpa khan a ni pêk a ni.
- ¹¹Sùn sômminli le zân sômminli a hek zoi hnung khan thuthung irziakna lungphêk inhni kha Rengpa khan a ni ipêk a ni.
- ¹²Rengpa khan ki kuang, “Thoiin lân, chum lat ta, Aigupta ram ata ni mi hruai suakhai khu a sân an siat zoi ta, om hrang dân ki ihril an pêtsana, millim mai mai an siam tâk khu te; a tia.
- ¹³Rengpa'n, “Hi mihai tukullianzia hi kin hriat kha te.
- ¹⁴Lei dâihrek ro, tûte inhre viat loiin hong inkamangtir ki ti. Nangma irchihai ata anni nêka thil thothei ual le tam ual nam nangni inding ki ti,” a ti saa.
- ¹⁵Tâng ata kha ki tîra, thuthung irziakna lungphêk inhni kha a chôia.
- ¹⁶Rengpa, nin Pathianin om hrang lam nangni a ihril kha nin lei pêtsan chian tâka, sehrâtte irlim siam chopin nin Pathian ata thilsual nin tho tah ti ki hmua.
- ¹⁷Lungphêk inhni kha ki chôia, nin ihmu ngeia ki dêng khoi tâk a ni kha te.
- ¹⁸Nin سوالنا sîkin leRengpa makunga khan sùn sômminli zân sômminli ite fâkin in loiin nangni kin bok khum nôka.



¹⁹ Nangni inmuai irhmang chit hrang dôrin Rengpa ning kha an mura; a ninginmurna irkhêl tak kha hong suakna a tih ti ki chitinrîm a ni; khannisian, kha zoroa khom khan ki thu kha Rengpa'n a ni lei irngaituaa.

²⁰ That hrang dôrin Arona chung a khom Rengpa ning kha an mura, ama ta hrang khom ki ngên pe a ni.

²¹ Nin thil tho'nsual sehrâtte irlim kha ki lâka, Meia ki roa; vâiphin anga indi chitin ki nôia, tâng ata tui zuang luang tâka khan ki iphul a ni.

²² Tabera-ah, Masa-ah, Kibrot-hatava haia khan Rengpa nin Pathian kha a ning nin inmurtir a ni.

²³ Kades-barnea khan, 'Fe unglân, ram nangni ki ipêk hrang kha hong lua roi,' tiin Rengpa khan nangni a tia; khannisian, Rengpa nin Pathian thupêk kha nin doi khaka, a thu kha iam ngam mak chêia, nin irngai nuam loi a ni.

²⁴ Nangni kin hriattir ata Rengpa chung a tehel nin zong mai a ni.

²⁵ Nangni thatpai chit a tum sikin sîn sômminli le zân sômminli chu Rengpamakunga kin bokhrupa;

²⁶ Rengpa kuanga khan ki chongchaia, O RENGPA PATHIAN ni mi ni'rchon dong hranghai hi thatpai chit no ro, Aigupta ram ata roiinpui takin ni'rtansuaka, inhnê takin ni ihruai suak a ni kha te.

²⁷ Ni siahlo Abrahama, Isaka, Jakoba hai inhre maiin lân, hi mihai tukullianzia hi irngai zâmin lân, an sualna le pualoina hi khôkmâk no roh.

²⁸ khano'nchu, Aigupta mihaiin, 'Rengpa khan pêk a inkung ram kha nangni a ihruai intung zoi loi a ni; nangni a khôkmâk sikin ramchâra that hrangin nangni a ihruai suak a ni hi,' tina'n ti.

²⁹ Ni mi, ni irchon dong tumhai an nia, ni bân irnak hrât taka inhnê taka ni ihruai suakhai kha an ni' ki tia.

Dân Inhnina 10

Mosia'n thupêk a dong nôk
(Fes 34.1-10)



- ¹Rengpa'n ki kuang, 'Lungphêk inhni, matona ang kha, sinin lân, tânga ki kuang hong nôk ro; a kok hrang bakot siam sa roh.
- ²Ni inkhoi tak lunga chuang ang kha, kha lunga khan lei irziak nôk ki ti, koka khan ni isia hrang a ni' a tia.
- ³Khanchu, Sitim thingin bakot ki siama, matona lungphêk inhni ang kha ki siama, an ruai khan ki hong fepui tâka.
- ⁴Lungphêkhaia khan matona thu irziak ang chie, thupêk sôm kha a lei irziak nôka; tâng kôla nin pungkhôm nia mei ata nin kuanga a thu'nsîr kha Rengpa'n a ni pêk a ni.
- ⁵Tâng ata kha ki zuang kîra, kok ki isيامa khan lungphêkhai kha ki siaa, Rengpa ni ihril angin atûn ten a la iom a ni.
- ⁶ Israelhai kha Beerot-Bene-Jaakan ata Mosera-ah an irsona, kha khan Arona kha a thia; kin phûma, a nâipa Eleazara khan a'rthûla ochai inlaltak sin kha a tho tâka.
- ⁷Khatak ata kha Gudgoda-a an irsona, tui tamtak omna hmun Jotbat-a khan an irson a ni.
- ⁸ Kha zoro lai khan Levia irchihai kha Rengpa khan Thuthung Bôm enkoltu hrang le irzôn ngai hrang an kunga; Rengpa makunga an dînga, a sin thoa a'rhminga mipui satvur pe ngai hrangin atûn ten a inkung tâk a ni.
- ⁹Khasika khan, Levia irchihai khan an urêng danghai angin ramchâr le dongtum dang nei no nahaia, Rengpa nin Pathian ihril angin Rengpa kuang thilinhlan hi an dongtum sa hrang kha a ni.
- ¹⁰ Tâng khan sîn sômminli le zân sômminli ki oma, Rengpa khan kha zoro khom khan ki thu a lei irngaituaa, Rengpa khan ki thu a lei irngaituaa, Rengpakhan nangni that loi a sa a ti tâk a ni.
- ¹¹Rengpa khan, 'Thoiin lân, ni mihai mâ hruai ro, an pahai kuanga pêk ki inkung tak ram pana, lua hrangin fe mai ri sehai,' a ni ti a ni.

Pathian inphût



¹²Atûn chu Israelhaio, Rengpa nin Pathian hin nangnia imo nangni a inphût? Rengpa nin Pathian kha chia, a nuamlam murdi tho'n, a saterenga lungrîl murdia ama vai lungthung le a sinthohai,

¹³a vuana nangni ki ihril nin sana hranga a thupêk le a thu'nkung zômhai hi mo ni ma?

¹⁴Irvân pumpui hai, irnêng le a sûnga om murdi neitu hi Rengpa kha a ni;

¹⁵khaang dôra mi roiinpui khan nin puhai kha a sân lung a thunghaia, nam dang murdihai nêkin nangni a inthang lik tâk a ni.

¹⁶Khanchu, atûn hin chu Rengpa thu kha zôm unglân, nin tukul inlian ta no roi.

¹⁷Rengpa nin Pathian hi pathianhai Pathian, rênghai Reng, Pathian roiinpui, sinthothei le ichiom tak kha a ni; tûte theibîk nei maka, inthêm inhnê thei lak ni ma.

¹⁸Farahai le meithâihai thu kha dik takin a ngaitua pehai ngai, nin laia nam dang omhai khom lung a thunga, an fâk hrang, an nêk hrang a pêkhai ngai a ni.

¹⁹Khasikin nin laia ram dang mihai kha lungthung sa unglân, nangni khom Aigupta rama mikhual nin ni kha te.

²⁰Rengpa nin Pathian kha chi unglân, a sintho unglân, ama kha chel khak roi; inkungna hrangin a'rhming vai sâm ngai roi.

²¹Nin mit ngeia nin ihmu, thil roiinpui tak tak le irkhêl tak tak tia nangni chôiindômtu hi nin Pathian chu a ni.

²² Nin puhai, mi sômsari kha, Aigupta rama an chuma, atûn chu Rengpa nin Pathian khan ârsi dôra tamin nangni an pungtir tâk a ni.

Dân Inhnina 11

Rengpa roiinpuizia

¹Khan, Rengpa nin Pathian kha lungthung unglân, a thu zôm unglân, a thu'nkunghai, om hrang dân a itihai, a thupêkhai zôm mai roi.



²Rengpachungchâng, nangni ngeiin nin inhriathai kha a ngaitua ngaia. Kha thil inhretuhai kha nin nâi le tehai ni mahai, nangni ngêt hi nin ni, Rengpa isepna irkhêlzia hai, a roiinpuizia, ircham a neiziahai le sin a tho theiziahai nin hmua.

³ Aigupta rêng Faroa le a ram sũaga irsinsiana thilirkhêl tak tak a ithohai,

⁴ Aigupta sipaihai, an sakorhai le an sakor tâli a isoisak lamhai le nangni an irzûl laia Tuipui Sena a inngîmtir lamhai, a vuan tena a itho'n siat tâk thuhai nin inhriat zit a ni.

⁵Hi hmun nin hong tung mân, ramchâra nin om laia nin chung a sin tho hai,

⁶ Reubena irchi laia Eliaba nâi Dathana le Abirama hai kha, an in sũag mihai, an puan in hai, an siahlohai le an sâhai kha mi tin mithmua irnêng a hong chatin a inlempaihai ving a ni.

⁷Rengpa'n sin roiinpui a ithohai kha nin mit ngeiin nin hmu kha te.

Ram inkunga itinrêng a'rhniang

⁸Thupêk, a vuana nangni ki ihril murdi hi zôm unglân; khanchu, inrûkin irfôk thei nin ta, nin fena hrang rama khan lût thei nin ta, lua thei nin ta,

⁹Khuaihlutui le dûttui luangna ram, nin pahai kuanga khom pêk nangni a inkung tak rama khan dam insôt thei nin ti.

¹⁰Nin ram, nin ilua hrang hi, nin omna ngai Aigupta ram ang kha ni ma; khataka nin chîmu songhai kha tuia infâ'n nin indot a nang ngai.

¹¹Nin ilua hrang ram kha tâng le irhôra sip a nia, irvân rotui dong tamna ram a ni.

¹²Rengpa nin Pathian khan kha ram kha a sân an dota, kum bul ata kum mong dênin a donsui mai a ni.

¹³ Khanchu, a vuana nangni ki ihril thupêkhai hi zôm roi, Rengpa nin Pathian hi lungthung unglân, a sate'n a sin tho roi.

¹⁴Rua masa le ro hnungkhôn kha nin rama a zoro taka inthotir a ta, nin buhai, nin grephai, nin olivhai, a zoro taka ât thei nin ti;



15nin sa fâk hrang sùlhai khom indôn a ti. Nangni khom, khop taka fâk man mai thei nin ta, a sân khop nin ti.

16Irdîn roi, mâni irhuang irhlômin pêtna lik chin ni, pathian danghai chubai mûkin an sin thôna nin ti.

17Rengpa kha a ninginmur a ta, irvânhai khi khârin, rua inthotir no nia, irnênga ite rana no ni. Rengpa nangni pêk ram satak ata hi irhmangna lat nin ti.

18 Khasikin, a sân inhroi unglân, a sân inhlui roi, nin inhriat mai theina hrangin nin bâna khit khop unglân, nin mit kêra michal khitnahaiin hmang roi.

19Nin nâihai khom irchutir roi, in sùnga nin toi laiin, lampuia nin fe laiin, nin zâl hrangin le nin thoi hrangin hril ngai roi.

20Nin mikot chunghaia irziak unglân, nin tual lûtna mikothaia târ roi;

21Khanchu, nin pahai kuang pêk a inkung rama hin nin nâihai leh sôt tak dam nin ta, irnêng hi irvânin a'rkhu sùng chu dam nin ti.

22A thupêk nangni ki ihril murdi hi zôm unglân, tho ngai roi. Rengpa nin Pathian kha lungthung unglân, a nuamlam angin om unglân, ama kha chel khak roi.

23Rengpa khan nin makunga hi nam murdi hi inhnotsuak a ta, nangni nêka nam tam ual le hrât ualhai kha an ram luapai pehai nin ti.

24 Nin isirna kipa nin ram ni thiai a ti. ramchâr le Lebanon kêr, Eufrates dung le Mediteranean tuipei kêr ram kha nin ram ni zit a ti.

25Tûte nangni lei danh thei zel om no nihai. Rengpa nin Pathian khan a lei iti tâk angin nin ifena kipa mihai kha nin makunga lei inchitirhai thiai a ti.

26Satvurna dong theina le khosâl tong theina lampui a vuan hin nangni hril ki ti, inthang roi.

27A vuana nangni ki ihril Rengpa nin Pathian thupêk zôm hi satvur dong theina lampui a ni.

²⁸A vuana nangni ki ihril Rengpa nin Pathian thupêk zôm nuam loihai, tho hrang nangni ki ihril, tho loia pêt irhmang hai, nin la inhriat ngai loi pathian dang biakhai hi khosâl tongna lampui a ni.

²⁹Rengpa nin Pathianin nin ilua hrang ram, nin ipan hi, nangni a hruai intung tika chu Gerizim tânga satvurna lampui hi inpuang unglân, khosâl tongna lampui Ebal tânga inpuang sa roi.

³⁰Hi tâng hai hi Jordan dung thang tiang, Kanaan ram sũaga om Jordan irhôr kho thang tâng, Gilgal kho kôla om a ni.

³¹Jordan dung nin irkân vâng tâka, Rengpa nin Pathianin ram nangni a ipêk kha nin lua vâng ta. Kha ram kha nin lâka, omhmun nin khuar tika chu,

³²thu'nkunghai le om hrang dân a vuana nangni ki ihril murdi hi zôm ngêt roi.

Dân Inhnina 12

Pathian biakna hmun inkhat

¹Rengpa nin Pathian nangni pêk ram nin luaa, nin dam sũaga ngûk taka nin izôm hrang thu'nkunghai le om hrang lam hai kha hi hi a ni.

²Nin va iluapai pehai hrang nam hai an pathian an ibiak, hmun tâng irsângtak taka mihai, muala mihai, thing buk tinrêng buk irhlîma om hai kha, nin insiatpai zit hrang a ni.

³An maichâm hai kha inthe kindarh nin ta, an lungphun hai kha suk insiat nin ta, Aseri irlim an thing phun hai kha hâl nin ta, thinga millim an isin hai kha hlek insiat zit nin ta, hihai makunghaia hin chubai mûka an kûn nôk ta lina hrang dôrin insiatpai nin ti.

⁴Hi mihai itho angin Rengpa nin Pathian hi nin ibiakna hrang ni ma.

⁵Israel nam murdi ramchâr lai ata Rengpa khan a'rhming omna hrang hmun inkhat inthang a ta, kha khan a makunga nin ihong irchun ngai hrang a ni.

⁶Kha khan nin hâlirvôm thilinhlan hai le nin thilinhlan dang hai nin hong inhlan hrang a ni; nin sũama inkhat hai, nin thilpêk hai, nin inkung chumna



thilinhlan hai, nin nuam thilinhlan hai, nin sâ a tê suak masa takhai, nin hong ichôi ngai hrang a ni.

⁷Kha khan Rengpa nin Pathian makunga, nin kutchôi sat a vura, nin thil nei sahai kha, nin sêngkua'n raifân takin nin ifâk ngai hrang a ni.

⁸Kha tika chu atûna mâni nuam nuama nin itho ang hin nin itho ta hrang ni ma.

⁹Atûn chu, Rengpa nin Pathianin nangni a ipêk hrang rama lûtin la'rngam mak chêia.

¹⁰Jordan dung nin kâia, Rengpa nin Pathianin nangni a inluatir hrang rama nin oma, nin kôla nin râlhai ata lungngam taka nin om tika chu,

¹¹Rengpa nin Pathianin a'rhming omna hrang hmun a inthanga khan, nangni ki ihril murdi kha, nin hong ilâk hrang a ni. Nin hâlivôm thilinhlan hai, nin irbôlna hai, nin sôma inkhathai, nin thilpêkhai, Rengpa kuang nin inkung takna thilinhlan hai kha hong chôi ngai roi.

¹²Nin nâinu, nâipa hai, nin suakpa le suaknu hai, nin khuaa om Levia irchihai le Rengpa nin Pathian makunga raifân takin fâkin ne roi.

¹³Nin inuam nuamna hmuna nin hâlivôm thilinhlanhai hi nin inhlan hrang ni ma.

¹⁴Nin laia nam khat ram ata Rengpa hmun inhlana vai nin hâlivôm thilinhlanhai hi inhlan nin ta, tho hrang nangni ki hril murdi hi nin itho hrang a ni.

¹⁵Nin sâ vâihai rêk chu nin omna kipa that thei nin ti. Rengpa nin Pathianin sâ nangni a ipêk ka kai kha fa thei nin ti.

¹⁶Sa thisen rêk chu nin ifâk hrang ni ma, irnênga luang irhmang hrang a ni.

¹⁷Nin ina khan sôma inkhat, nin bu, uain, sahriak hai le nin sâ vâi le belra pâl laia suak masa tak, nin chonginkungnaa, ngaihoi thilinhlan hai, hruaithe irthârna thilinhlan hai kha fa thei no chin ni;



¹⁸Rengpa nin Pathianin hmun inthanga khan, a makunga ngêt nin ifâk lem hrang a ni, nangni le nin nâipahai le nin nâinuhai, nin suakpahai, nin suaknu hai, nin khuaa om Levihai le; Rengpa nin Pathian makunga nin kutsuak murdi raifân takin nin iom hrang a ni.

¹⁹Nin rama nin om sâng chu Levia irchihai hi uksak loiin om no roi.

²⁰Rengpa nin Pathianin a inkung anga nin ramri a'rzattir tika chu nin nuamna kipa nin sâ irzuk ang kha fa thei nin ti.

²¹Rengpa nin Pathianin a'rhming siana hrang hmun a inthang kha, nin omna ata a hla okin chu Rengpa nangni ipêk sâ vâihai kha nangni ki ihril ang hin that thei nin ti, nin nuam dôrin mâni ina a hmê fa thei nin ti.

²²Sakhi le sazuk hme nin ifâk angin mi irthianghai le mi porinchehai khomin a hmê kha fa thei an ti.

²³Sa thisen rêk chu fa viat viat no roi, hringna kha thisena a oma, a hringna le ile nin ifâk hrang ni ma.

²⁴Tui irpai angin irnênga thisen kha irpai ri se, fa no roi.

²⁵A thu anga nin tho'n chu Rengpa chu lôm a ta, nin irchihai le nin ta hrangin la sa a ti.

²⁶Rengpa kuanga inhlan nin inkung thil serhai rêk chu a hmun inkunga khan nin hong ichôi hrang a ni.

²⁷Rengpa nin Pathian maichâma hâlrivôm thilinhlan zâthai, maichâma thisen intheka, a hme fâkhai hrang zât kha, kha ngêta khan nin hong ichôi hrang a ni.

²⁸Hi ki thuhiril murdihai hi zôm rip unglân, Rengpa'n sa a iti lam le a nuamlam kha tho nin ta, nin irchihai le nangni hin kumkhua'n hong sapui nin ti.

Millim biak loi hrang

²⁹Rengpa nin Pathianin, nin va inhnot suakpai hrang namhai kha an boipai pehai tika chu,



³⁰a irhmangpaina ang thil kha nin itho viat hrang ni ma; an ibiak pathianhai kha zong suakin, ‘Itin mo an ibiak ngai?’ tiin an itho anga biak sa tum no roi.

³¹An Pathian an ibiak hrang ni ma; Rengpa intir lam tak, thil chi tinrêng tho hi an uar ngai. An maichâmhai khan an nâinu le nâipa hai ngêt khom hâlrivôm thilinhlan a an hâl ngai a ni.

³² Nangni ki ihril murdi hi tho ngêt roi; ite bôk no roi, ite irhmâi sa ual no roi.

Dân Inhnina 13

¹Nin laia deipu mani, irmang nei uar mani thil irkhêl tak tak le irsinsiana nangni lei hril sianlân,

²an lei ihril ang thil irkhêl tak tak le irsinsianahai kha tung dik ngai khomsian, uksak no roi. “Thoi ba, pathian dang biak hrang zong ei ti, nin la inhriat ngai loihai sintho nin ta,” ti khomsian;

³khaanga lei ti deipu le irmang phan uarhai thu kha uksak no roi; Rengpa nin Pathian kha a sate’n le lungrîl murdi’n lung nin thung le lungthung loi ti Rengpa nin Pathianin nangni a ifia a ni.

⁴Rengpanin Pathian hnung kha zui unglân, a sin kha tho roi.

⁵Khaang deipu le irmang nei uarhai kha nin ithat hrang a ni, Rengpa nin Pathian, Aigupta ram ata nangni hruaisuaktu chung a tehel nangni an zongtira, Rengpa nin Pathianin om hrang dân nangni a inkhîk irhmu ata nangni an pêttir a ni, khaanga nin laia mi sual om kha nin irkiangtir hrang a ni.

⁶Ni urêngpa mani, ni nâipa mani, ni pa’n mani, ni nâinu’n mani ni dôngma nei laiin mani, ni rual irnaipui takin mani, ni nu le ni pahai lan hre ngai loi pathian biak hranga nang an inthêm kha zôm no ro,

⁷Ni kôl nâia omhai pathian mani, irnênga om rêng rêng mi dang pathian mani biak hranga nang an fialin chu,



- ⁸an thu kha irngai no'n lân, uksak hliak no ro; anni kha lunginkham no'n lân, inren ual hliak no ro, sînghual khom tum no ro,
- ⁹khahai kha nin ithatpai hrang a ni, nangin kut tha masa ni ta, an chungamipui an ipût nôk hrang a ni; suak nin nina, Aigupta ram ata nangni pêt irhmangtir a tum sikin.
- ¹⁰Khan Jordan dung nin irkân tenaRengpa'n ram a inkung kha nangni inhriattir a ta, nin râlhai ata nangni hrung a ta, irtharngam takin lêng ta nin ti.
- ¹¹Khanchu, Israel mi murdi'n inhria an ta, chi an ta; nin laia khaanga thilsual kha tho nôk ta ngai no chin ni.
- ¹²Rengpa nin Pathianin nangni a ipêk khopuihaia nin om tika,
- ¹³nin laia mi sual, chukloi tak tak omna khuaa mihai kha, nin la ibiak ngai loi pathian biak hrangin an inthêm lût ta, ti nin inhriatin chu,
- ¹⁴sui nin ta, ngûk takin irdon vêl nin ta, nin laia khaang thil porinche kha a tho an om ngêt ti nin inhriatin chu,
- ¹⁵kha khuaa mihai kha khandaiin nin ithat hrang a ni, a sînga mi murdi le an sâhai kha nin ithat zit hrang a ni.
- ¹⁶An thil nei murdihai nin ilâkhai kha khopui tual zôl irzat taka buk khôm nin ta, an khua le sum nin ilâkpai pehai kha nin ihâl zit hrang a ni;Rengpa ta hranga ser tâk kha tûte'n la no ri sehai; Rengpa nin Pathian ta hrang hâlrivôm thilinhlanâ hâl irhmang zit hrang a ni; kumkhuaa thil chim siat chit ang ni a ta, tûte'n an inding nôk hrang ni ma.
- ¹⁷Rengpa tah hranga ser tâk chu tûte'n la no ri se; khanchu, Rengpa ningmur kha chum a ta, lung nangni inkham a ta, nin chungâ khâzana nei a ta, nin pahai kuanga a inkung angin nangni inpungtir nôk a ti.
- ¹⁸Rengpa nin Pathian irhâi hi irngaitua unglân, a thupêk nangni ki ihril hi zôm unglân, Rengpa nin Pathian nuamlam kha tho zôi zel roi.

Dân Inhnina 14



Mithi sùn dân dikloi tho loi hrang

¹Rengpa nin Pathian mihai nin nia, khasikin, mithi nin sùnir-ât phop no unglân, nin michal sam epinkol sa no roi.

²Rammuala om murdihai laia nangni hiRengpa nin Pathian ta hranga nam inthang, ama hrang ual bîka Rengpa inthang suakhai kha nin ni.

Fâk irthiang le irthiangloi

(Lev 11.1-47)

³Thil porinche rêng rêng nin ifâk hrang ni ma.

⁴An hme nin ifâk thei hrang sâ chu, hihai hi a ni: sehrât, kêl le belra,

⁵sakhi, sangal, sazuk, sarângtun, sarza, ram sial, ram belra,

⁶sâ tinrêng, a ke mitin irphal le insoia fâk ngai chi chu fa thei nin ti.

⁷Insoia, a mitin irkak loi, a mitin irkaka insoi loi hme chu nin ifâk hrang ni ma. saringsei hai, mizupui hai, rôl mizupui mani nin ifâk hrang ni ma; an ifâk kha insoia, an mitin irkak loi a ni; nin ta hrangin a iporinche a ni.

⁸Vok hi a mitin a'rkak, khannisian, a ifâk insoi ngai maka, a hme nin ifâk hrang ni ma, nin ta hrangin a iporinche a ni. An hme nin ifâk hrang ni maka, a thi ruak khom nin itôn hrang ni ma.

⁹Tuia om hihai hi fa thei nin ti: a hlip le mitha nei murdi hme chu fa thei nin ti.

¹⁰a mitha nei loi, a hlip nei loi hme chu nin ifâk hrang ni ma, nin ta hrangin a porinche a ni.

¹¹Vâ fâk thei murdi chu fa thei nin ti.

¹²Hihai rêk hi chu nin ifâk thei hrang ni ma: Irmu, irmu saloi, irmu ârlâk,

¹³râikoso, kâikuangrâl, bukhâite rêng rênghai,

¹⁴vaâk chi rêng rênghai,

¹⁵vâ irsâng, bâk tuikhanglian vâ, irmu chi rêng rêng,

¹⁶suitilil, simbu,

¹⁷tuivaârngoi, râikoso, vadung irmu,



¹⁸tuivaârngoi dîl vâ rêng rêng, vakhohri le bâkhai.

¹⁹thilhring irki minlia irvâk rêng rêng chu nin ta hrangin a porinchea, fâk hrang ni ma.

²⁰Vuang thei zât sâ irthiang ka kai chu fa thei nin ti.

²¹A binga thi chu i ang sâ khom nin ifâk hrang ni ma, nin kho sũa omhai fâk hrangin an kuang pe thei nin ta, zuar sa thei nin ti. Rengpa nin Pathian ta hranga nin iser irthiang hrang nam nin ni.

Sôma inkhat

²²Nin loimâna chîmu tharhai kha sôma inkhata, kum tin sepai hen roi.

²³Rengpanin Pathianin a'rhming omna hranga a inthang hmuna khan fepui unglân, a makunga khan nin buhai, uain hai, oliv hriak hai; nin sehrât le belrate suak masa tak sôma inkhat nin ipêkhai kha fa ngai roi. Rengpa nin Pathian kha a chi hrang lam nin hong inhriat theina hrangin.

²⁴Nin omna kha a sân a hlaa, Rengpa nin Pathian satvurna nin idong kha vong an takin chu,

²⁵zuar unglân, a man kha intêl unglân, Rengpa nin Pathianin nangni a inthangna hmuna fepui roi.

²⁶Kha khan sehrât hai, belra hai, uain hai, zu haiin nin irzuk ka kai ircho unglân, nin sũakua'nRengpa nin Pathian makunga raifân le lôm takin fâk irhlôm roi.

²⁷Nin khuua Levias irchi om sahai kha nin ienkhûmhai hrang ni ma, nin laia irchon lâmkhîl dongtum aninei loi a ni kha te.

²⁸Kum thum kuma nin sôma inkhat kha nin omna khuua hmun inkhata bukkhôm ngai roi.

²⁹Irchon lâmkhîl an nei sa no sikin Levias irchihai khan kha kha fa an ti; mikhualhai, fara le meithâi, nin kho sũa omhai khomin an ifâk hrang a ni; khop takin an ifâk hrang a ni. Hiang hin ti unglân, Rengpa nin Pathian khan nin itho ka kai nangni irhniangtir a ti.



Dân Inhnina 15

Kum sarina

(Lev 25.1-7)

- ¹Kum sari danh zêla nin lâkai intâng nin ingaidam hrang a ni.
- ²Hiang hin ngaidam dân chu a ni; Israel mi rêng rêngin a Israel chanpui sum inpûktir sianlân, a kum sari tôpa chu a ingaidam hrang a ni, a sum intâng kha a isîng hrang ni ma;Rengpa ngêtin a intâng kha an nuai irhmangpai pe tâk a ni.
- ³Nam dangin lâkai an intângin chu sîng thei ni ti; nangni mi, nin kuanga, a lâkai intâng chu nin isîng hrang ni ma.
- ⁴Rengpa nin Pathianin nangni a ipêk rama khan sat nangni a vur hrang sikin mi'nriang rêng rêng inomtir loi nin itum hrang a ni.
- ⁵Rengpa nin Pathian irhâi kha irngaitua unglân, a vuana nangni ki ihril, a thupêk murdi hi zôm phot mai roi.
- ⁶Rengpa nin Pathian hin a inkung tâk angin sat nangni vur a ta, nam tamtak inpûktir nin ta, nangni'n chu pûk pe no chin ni; nam tamtak chung a ircham nei no nihai.
- ⁷Rengpa'n ram nangni a ipêk nin omnaa nin urêng hai laia inriang an omin chu, nin urêng hai inriang hai ata kha nin lungrîl inngar no unglân, irpâlpuihai no roi,
- ⁸Nin tikhohi unglân, an innang do dôr inpûktir roi.
- ⁹Lungrîl sual irput no unglân, kum sarina, lâkai intâng ngaidamna zoro anai tâka; tiin ni urêng inriang kha ngîkin ni mitin kâp no'n lân, itea khom irkômpui no unglân; nin chung a lungchuk loinaRengpa kuang an sîrin chu thilsual tho nina nin ti.
- ¹⁰Irphal takin pe unglân, inpâm lungrîl pumin pe no roi; khaanga nin tho'n chu Rengpa nin Pathianin nin kut inzar satvur a ta, nin itho tinrêng tuanitung nin ti.



11 Nin rama inriang om loi zoro om no nia; khasikin, thu nangni ki pêk, nin rama inriang hai, irsam hai le nin urênghai ata a sân irphalin irhong roi.

Suak ompui lam dân

(Fes 21.1-11)

12 Nin Israel chanpui, pasal mani, nupang mani suaka an hong irzuarin chu, kum ruk sor nin ta, nin insua hrang a ni.

13A kum sarina chu manboiin nin insua hrang a ni.

14Kut rongin nin insua hrang ni ma, belra mani, uain mani Rengpa kuang ata satvurna nin idonghai kha irphal takin pe ngai roi.

15Aigupta rama khan suak nin nih ti kha inhre mai roi; Rengpa nin Pathianin suak nangni a insua a ni.

16Nin suak khan, nin sêngkua kha kanin suak nuam loiin nin kuang om an thang khom a ni thei.

17Khaang khan a ni'n chu, nin mikot kôla inngîrtir nin ta, a mikuar ir-ôngtir nin ta; khanchu, a hring sêngin nin suak ni ta a ti. Nin suaknu khom khaang khan tho ngai roi.

18Inpâm lungrîl angin nin suak kha insua no roi, nin sin kha kum ruk a tho tâka, irhlofâk nin ihruai ni sian nin sum kha bâk hni sêng ta nin ti. Khaang khan tho unglân, lam tinrênga nin Pathian khan nangni irhniangtir a ti.

Sa le belrate suak masa tak

19 Nin sehrât le belrate a suak masa takhai chu Rengpa nin Pathian ta hrangin khâi roi. Sehrât kha sor no unglân, belra khom a mul ep no roi.

20Kum tin Rengpazoro inkunga khan, Rengpa nin Pathian makunga nin sêngkua'n nin ifâk ngai hrang a ni.

21A ke'nbâi mani, a mitcho mani, hmêlvei chu Rengpa nin Pathian kuanga khan nin inhlan hrang ni ma.

22Nin kho sênga rêk chu fa thei nin ti, sakhi hme le sazuk hme nin ifâk angin mi irthianghai le porinchehai khomin fa thei an ti.

23A thisen rêk chu nin ifâk hrang ni ma; tui angin bunpai roi.



Dân Inhnina 16

Ferkân kût

(Fes 12.1-20)

¹ Abib tha hin Rengpa nin Pathianin Aigupta ram ata zâna nangni a hruai suaka; Abib tha hin Rengpa nin Pathian hrangin Ferkân kût hi hmang ngai roi.

² A'rhming omna hrang Rengpa hmun inthanga khan, nin sehrât mani, belra mani, kêt mani Ferkân kût hrangin Rengpa nin Pathian kuang inhlan roi.

³ A hme chu bai chol kop le nin ifâk hrang ni ma; sîn sari sîng chol kop loi bai, tuang entîrna bai kha nin ifâk hrang a ni, Aigupta ram nin suaksan hranga irhnot taka nin ifâk ang khan. Nin dam sîngin Aigupta, nin inriangna ram nin suaksan nikhua nin inhriat maina hrangin fa ngai roi.

⁴ Nin ram sîng rêng rênga sîn sari sîng chu chol a iom hrang ni ma. A sîn masa tak chohnung tiang, nin thil inhlan, nin sa that nin ifâk ban hme khom a tûka hrangin se hrang ni ma.

⁵ Rengpa nin Pathianin lua hranga nangni a ipêk kho sînga khom Ferkân kût hme hi nin inhlan hrang ni ma;

⁶ Rengpa nin Pathianin a'rhming omna hranga a inthangna ngêta khan nin Ferkân kûtna hrang kha, khohloi misa tâk hrangin, Aigupta ram nin suaksan zoro anga khan nin inhlan hrang a ni.

⁷ Rengpa nin Pathian hmun inkunga khan but nin ta, nin ifâk hrang a ni, a tûk zînga chu nin puan in tiang irhei thei nin ti.

⁸ Sîn ruk sîng chu chol kop loi bai fa nin ta, a sîn sari ni'n chu Rengpa nin Pathian hrangin inkhômpui ir-uptak nei unglân, kha nikhuaa khan chu sin rêng rêng tho no roi.

Pentikos kût

(Fes 34.27; Lev 23.15-21)

⁹ Bu ât nin phut nia irthokin hapta sari tep unglân;



¹⁰khanchu, Pentikos kût kha hmang unglân. Rengpa nin Pathianin satvurna tamtak nangni a vur ata ama chôindômna hrangin nin thil manboi pêkhai kha inhlan roi.

¹¹Rengpa makunga khan nin nâihai, nin siahlo hai, nupang pasalin nin khuaa Levia irchi hai, nam danghai, fara hai le meithâi hai nin laia om sahai leh khan raifân takin Rengpa nin Pathianin a'rhming omna hranga a inthangnaa khan hruai inthê roi.

¹²Hi thu'nkunghai hi ngûk takin zôm unglân, Aigupta rama suak nin ni ngai kha inhre mai ngai roi.

Kairêng kût
(Lev 23.33-43)

¹³Buhai nin ât zoi zita, nin grephai nin sôm zoi zit hnunga, sùn sari sùng kairêng kût hmang ngai roi.

¹⁴Nin nâihai, nin suakpahai le suaknuhai, Levia irchihai, ram dang mi om sahai, fara hai le meithâi nin khuaa omhai le raifân takin hruai inthê ngai roi.

¹⁵Rengpa nin Pathianin a'rhming omna hranga a inthangnaa khan sùn sari sùng hmang ngai roi. Rengpa nin Pathian khan nin kut sôlhai kha sat a vura, nangni a'rhniangtir sikin a sân nin lôm hrang a ni.

¹⁶Nin laia pasal murdi chu Rengpa nin Pathian hmun inthanga kum tin chum thum nin ihong ngai hrang a ni; Ferkân kût hai, pentikos kût hai, kairêng kût hai, Rengpa makunga khan kut rongin an ihong hrang ni ma.

¹⁷Mi tinin Rengpa nin Pathian satvurna nin idong ang takin nin thei ang ang nin ipêk hrang a ni.

Thubuai rêl hrang dân

¹⁸Rengpa nin Pathianin khopui nangni a ipêkna kipa roirêltu le hruaitu hranghai inkung ngai roi.

¹⁹Dik takin roirêl an ta, thiarthâk aninei hrang ni ma, fâkinrûkna hin mi vârhai mit an chotir ngaia, mi dikhai chungthu khom dik loi takin a rêl ngai.



²⁰Itiklai khomin a'rhoi tôk tak le dik takin thiltho ngai om tôk tak le dik takin thil tho ngai roi; khanchu, Rengpa nin Pathianin ram nangni a ipêk hi dam takin lua mai thei nin ti.

²¹Rengpa nin Pathian maichâm nin siamnaa kôla khan Aseri irlim, thing nin iphun hrang ni ma.

²²Rengpa nin Pathian ikhômâm lam lung khom nin phun hrang ni ma.

Dân Inhnina 17

¹Rengpa nin Pathian kuang hmêlveina inei sehrât mani belra mani nin inhlan hrang ni ma, a ikhômâm lam tak a ni.

²Rengpa nin Pathianin khua nangni a ipêk sùng ka kai chu pasal mani nupang mani nin Pathian irngai hmo tamtak tho'n, a thuthung tho'nchâi om sianlân,

³ pathian danghai zuiin an sinthoa, biak loi hrang ki itihai, thahai le thil dang tamtakhai khi biak om sianlân,

⁴Khaang mi kha chu an om ti nin inhriatin chu ngûk takin suisuak nin ta, Israelhai laia khaang thil khômâmkom tak tho nin inhriatin chu,

⁵kul mikota, khaang mi kha pasal mani, nupang mani chu, hong hruai nin ta, kha mi kha lungin nin idêng that hrang a ni.

⁶ Thu'nhretu inhni dôr mani, thu sika vaiin kêng dêng that thei nin ti; mi inkhat ringot sika chu nin ithat hrang ni ma.

⁷ Thu'nhretu khan lungin dêng masa an ta, mipuiin dêng thei an ti. Khaang khan nin laia thil saloihai kha nin irthiang infâi hrang a ni.

⁸Mihriam that kha tho'nchâi chu a ni le ni loi chungchânghaia, inru inrûk le inru loi chungchâng haia, nin izêm pâl le pâl loi thuhai dênin a ihuap loi rêl intak nin khuaa khan nin neiin chu, Rengpa nin Pathianin a inthang hmuna khan nin ifepui hrang a ni.

⁹Levia irchi, ochaihai le kha laia roirêltu hranga inkunghai kha irdon nin ta, anni khan a rêl hrang lam nangni hril an ti



¹⁰Rengpa hmun inthang ata tho hrang dân nangni an ihril ang ngeia khan nin irêl hrang a ni,

¹¹nangni an ihril ang ngei le an thu inchuk ang ngêt khan nin irêl ngai hrang a ni.

¹²Rengpa nin Pathian sinthotu ochai thu mani, roirêltu hranga sia thu mani nuam loia tho indanglam viattu chu thatpai hrang a ni, Israel ram sênga khang thil saloi kha nin irthiang infâi hrang a ni.

¹³Mi tinin inhriat an ta, chi an ta, thil tho papai ta no nihai.

Reng nei hrang dân

¹⁴Rengpa nin Pathianin ram nangni a ipêk hranga nin tunga, nin luaa, omhmun nin nei hnung chu, ‘Ei kôlvêla namhai angin rêng nei nin ta,’ la ti nin ti.

¹⁵Nin rêng hrang chu Rengpa, nin Pathian inthang ngêt ni ri se; nangni mi a ini ngêt hrang a ni; nam dang chu nin rêngin siam no roi.

¹⁶ Reng khan a sipaihai hrangin sakor a inei intam hrang ni ma, Aigupta rama sakor la’nsap hrangin mi a itîr hrang ni ma; Rengpa khan ‘Kha tiang khan nin ikîr nôk hrang ni ma,’ a tia.

¹⁷ Đôngma khom a inei intam hrang ni ma, Pathian irheisanna a ti. Sumpuan le rêngachak khom a inei intam hrang ni ma.

¹⁸A ram rêngtoihmuna a toi tika chu Levia irchi, ochaihaiin an idôn Dan bu hi irziak irzôttir a ta;

¹⁹kha kha dôn a ta, a dam sêngin a itep ngai hrang a ni; hi a dânhai le thu’nkunghai hi ngûk takin zôm a ta, Rengpa, a Pathian chu a ichôiindôm ngai hrang a ni.

²⁰Khanchu, a’rchi Israel danghai nêkin irsia irsâng no ni, Rengpa thupêk inkhat lua khom mumal boiin om no nia, sôt tak dam a ta, a’rchi hai khomin Israelhai chung a roirêl mai an ti.

Dân Inhnina 18



Ochaihài dongtum

- ¹Israelhài laia Levia irchi, ochaihài khan ram dongtum an inei hrang ni ma, Rengpa kuanga thilinhlan hâl mihlia kha dong an ta, kha kha an dongtum hrang chu a ni.
- ² Nam dangin ram dongtum an inei angin an inei hrang ni ma, Rengpainkung angin thil inhlan kha an dongtum hrang chu a ni.
- ³ Sehrât mani, belra mani mi'n Rengpa kuanga an inhlan ka kai a dâr hai, a'rkam kianghnhài le a sêngkuahài kha ochai dongtum hrang a ni.
- ⁴ Nin bu thar masa le nin uain ep masahài le nin oliv hriak in-ôt suak masa takhài kha ochai nin ipêk hrang a ni; nin belra mul ep masa tak khom pe ngai roi.
- ⁵ Rengpa nin Pathian khan nin lai ata anni hi an irchi thiaihài le a makunga ngîra, a sintho hrangin kumkhua hranga inkung a ni.
- ⁶ A nuam photin chu Levia irchi rêng rêng chu, kho khua ata khomin Rengpahmun inkunga khan hong thei a ti.
- ⁷ Kha khan Levia irchi mi danghài ang dênin Rengpa a Pathian sin kha tho thei a ti.
- ⁸ Ochai danghài idong ang fâk hrang kha a idong zit hrang a ni, ama in sêng mihàiin thilinhlan hong ithon rêk chu dôn sa thei a ti.

Nam dang tho dân zui loi hrang

- ⁹ Rengpa nin Pathianin nangni a ipêk ram nin hong tung tika, khataka lei omhài thil porinche tho ang kha tho ngai no roi.
- ¹⁰ Nin laia tukhomin maichâma hâlrivôm hrangin nin nâihài nin inhlan sa hrang ni ma; kutzia en hai, tasân hai, pânzia en hai, dôi hai,
- ¹¹ kêl irmei irhli hai ang mani, ramkhohri ikop hmang hai, irtha saloi ikop hai, mithi irtha songhài uar no roi.



¹²Khaang tho uarhai chu Rengpa ikhômâm lam tak an ni; khasika khan kêng Rengpa nin Pathianin hi thil porinche tho uarhai hi nin matona a inhnotsuak a ni.

¹³ Rengpa nin Pathian makunga khan hi thil porinche ata hi nin irkiang zit hrang a ni.

Deipu pêk an kung

¹⁴Hi nam, nin ilûtkhum hranghai hin tasân an uara, ramkhohri ikop thu an irngai ngai; nangni chu Rengpa nin Pathianin khaang nin itho chu phal ma.

¹⁵ Nin laia mi, keima ang, deipu nangni pe a ta, ama thu kha nin izôm hrang a ni.

¹⁶Horeb tâng kôla nin pungkôm nî khan Rengpa nin Pathian makunga, ‘Rengpaei Pathian irhâi kha inhre ta no inlân, ei ithi chian hrang a ni,’ tiin nin ngêna.

¹⁷Rengpa khan ki kuang, ‘An insîr chu a dik,

¹⁸an laia mi ngêt deipu nangni inkung pe ki ta, an kuang insîr hrang hril ki ta, ki thupêk ang kha nangni hril irzôt a ti.

¹⁹ Ki’rhminga thu’nsîr irngai nuam loi ka kai chu keima’n a chungthu ngaitua ki ti.

²⁰Ki thupêk ang chi ni loi, ki’rhminga thu’nsîrtu deipu chu thatpai hrang a ni.

²¹‘Rengpa insîr a ni le ni loi itin mo ei inhriat hrang?’ nin ti’n chu, hiang hin a thiarthâk dân hrang chu a ni.

²²Deipuhaiin Rengpa irhminga thu insîr loi chu hong tung maka, a dik no’n chu, kha kha Rengpa irhminga insîr ni no ni, ama nuam thua insîr a ni, chi no roi.

Dân Inhnina 19

Zôkna khuahai

(Nam 35.9-28; Jos 20.1-9)

¹ Nin iluapai pe hrang namhai chu Rengpa nin Pathian khan an boipaitira, an ram kha nin lâka, an khuahai nin neia, an inahai nin lêng tika chu,



2-3Rengpa nin Pathianin nangni a ipêk ram kha hmun thuma sen unglân, ram bung tina pan olsam hrang, khua inkhat seng inkung ngai roi. Mi'n mihriam that sianlân, kha khuaa khan intân thei a ta, an lei ihrung hrang a ni.

4Ama râl ni loi, mi'n mi dang that châirpal ta sianlân, kha khua khan intân an ta, zôk thei an ti.

5Mi inkhat chu a rual le thing an tana, a hrei hlek irhlêmpaiin a rualpa kha a dêng that tâka, hi khua a kho taka mani intân a ta, zôk thei a ti.

6A intânna hrang khua kha a hla vitin chu a ithatpu phubâ lâktu ninginmur ta hrai laiin irzûl phâk a ta, that chianna ta; that sa kher loi hrang kha that a inina hrang kêng; tianlai khan irkhôkmâkna khom kha mihai khan lei irhoi mahai.

7Khasikin, khua inthum inkung hrangin nangni ki iti a ni kha te.

8Rengpa nin Pathian khan a inkung ang ngeiin ram nangni a pêk belsana, nin pahai kuanga pêk a inkung murdi nangni a pêk tika chu,

9khopui inthum dang inthang sa unglân, (Rengpa nin Pathian kha lung nin thung ta taka, a thu anga om nin tum ngita, a vuana nangni ki ihril murdi hi nin zôm photin chu, ram kha nangni pe ngêt a ti).

10Rengpa nin Pathianin ram nangni a ipêka hin khaang khan tho unglân, poi tholoi thisen insua no roi, a mô nin ipêl sa hrang ni ma.

11Mi'n a râl chu irdîpin a doia, a that tâka; hi zôkna khuaa hin intân thei a ti.

12Khaang thila khan ama omna khua ulianhaiin koi an ta, a ithat pu irnaipui, thisen phubâ la hrangtu kuanga khan pe an ta, lei thatpai a ti.

13Lunginkham viat no roi, Israelhai laia mi that inboi roi; khanchu, lam tinrênga irhniang nin ti.

Tianlai ramri

14Rengpa nin Pathianin ram hi nangni a pêkhai khan a phun tâka, nin kôl kha ramri kha son no roi.

Thu'nhretu chungchâng



¹⁵ Thu'nhretu inkhat vai sikin mi an thil thoa thiam no nin inchangtir hrang ni ma; mi inhni inthuma namindet hrang a ni.

¹⁶ Mi inkhatin mi dang insiat tumin milakin hnôl sianlân,

¹⁷ an inhni khan Rengpa hmun inkunga khan hong an ta, khataka ochaihai le roirêltu hranga inkunghai makunga an ingîr suam hrang a ni.

¹⁸ Roirêltu khan ngûk takin sui a ta, a hnôltu khan milaka hnôl a niin chu,

¹⁹ a ihnôltu insiat a itumna ang tak khan a hnôltu chungka khan an itho hrang a ni; khaang thil saloi kha nin lai ata nin inboipai hrang a ni.

²⁰ Khaang tho saloihai khan an inhriatin chi an ta, khaang thil saloi kha nin laia tukhomin an itho loi hrang a ni.

²¹ Nin inren hrang ni ma, hringna irthûla hringna, mit irthûla mit, ha irthûla ha, kut irthûla kut, ke irthûla ke ni a ti.

Dân Inhnina 20

Irdoi chungchâng

¹ Irdoi hrang nin irthok suakin sakor tâli hai, sakor hai leh nangni nêka tam sipai nin hmu'n nin ichi hrang ni mah. Rengpa nin Pathian, Aigupta ram ata nangni hruaisuaktu kha nin kuang a om sikin.

² Râl doi hranga nin suak hrang tika ochai inlaltak zuang a ta, mihai kha hong inthor a ti.

³ 'O Israelhaio, inhre roi, a vuan hin nin râl doi hrang nin ni tâka, indôp no unglân, chi sa no roi.

⁴ Rengpa nin Pathianin nangni a ompuia, nangni san a ti,' ti a ti.

⁵ Mipui hruaituhai khan mihai kuanga, 'In thar sin inhlan loi mo nin om? A in tiang kîr ri se, irdoinaa thina pal a ti, a in sin kha mi dangin inhlanpaina an ti.

⁶ Grep phuna a ra la fa loi nin om ma ni? A in tiang kîr ri se, a grep ra kha mi dangin fana an ti.



⁷Dôngma khâp tâk, la hruai loi mo nin om? In tiang kîr sianlân, irdoinaa thina lik a ta, mi dangin neipai pena an ti; an iti hrang a ni.

⁸Kha zoia sipai hruaituhai khan, 'Indôp lungrîl chitinrîm nin om mo? Nin omin chu in sâng tiang kîr chian roi, a sipai chanpuihai lungrîl indôptirna a ti,' ti an ti.

⁹Sipai hruaituhaiin khaanga an tho zoi tika chu sipai pôl tin ta hrang hruaitu inkung seng hrang a ni.

¹⁰Khopui nin doi hrangin khuaa mihai kha irpe hrangin ngên masa ngai hen roi.

¹¹An kul mikot nangni an inhong pea, nin kuanga irpêk an niin chu nin suaka om an ta, nuam nuamin sor thei nin ti.

¹²An irpêk nuam noa irdoi an inthangin chu nin irhual khak hrang a ni.

¹³Rengpa nin Pathianin khua kha nangni an lâktir tika chu pasal murdi kha that zithai roi.

¹⁴Nupang hai, nâipang hai, sâhai le kho sâng thil danghai kha mâni ta hrangin nei thei nin ti. Nin râlhai thil kha Rengpa nin Pathian khan nangni a pêk tâka, nin nuam nuamin lêng thei nin ti.

¹⁵Nin ilua hrang rama khopui ni loi, ram pên tiang daia khopuihai nin lâk tika khom, khang khan nin isoisak hrang a ni.

¹⁶Rengpa nin Pathianin nangni a ipêk ram neituhai khopui rêk chu hring ka kaiin chu ite nin ihôi hrang ni ma.

¹⁷Nin ithathai zit hrang a ni. Hit mihai, Amor mihai, Kanaan mihai, Periz mihai, Hiv mihai, Jebus mihai kha Rengpa nin Pathian thupêk zômin thathai zit roi.

¹⁸An pathian biaknaa thil porinche tak tak an ti ngaihai kha, nangni an irchutir laina hrangin, thathai unglân, Rengpa nin Pathian ata thilsual nin itho loi hrang a ni.



¹⁹Kha kha lâk nin tuma, zoro sôtak irhual a nang khomin a kôlvêla thei kung chu phûr no unglân. A ra chu fa thei nin ta, a kung rêk chu phûr no roi, thinghai kha chu nin râl ni mahai.

²⁰Khannisianlân thingkung danghai a ra fa ngai loi chu, phûrpaï nin ta, nangni a doipuhai khopui kha a siat mâka chu kha thinghai kha hmangin nin idoihai hrang a ni.

Dân Inhnina 21

A thattu inhre loi chungchâng thu

¹Rengpa nin Pathianin nangni a ipêk ram sûnga mi ruak hmu unglân, a thatpu inhre no unglân,

²nin hruaituhai le roirêltuhaiin ruakin tu khua mo anai tak ti irkhi hrang a ni.

³Anâi tak kho hruaitu'n chu sehrât irla, la sor ngai loi inthang suak an ta,

⁴Iva kang ngai loi kôla kai suak an ta, irnêng la tuk irlet ngai loia, ite la songna ngai loia sehrât irla ring kha an inol khiak hrang a ni.

⁵Levia chi ochai khom an ikop sa hrang a ni; mi that thubuai rêng rêng hi a'rngeitir hrangtu an nia. Rengpa nin Pathianin ama sinthotua le a'rhminga satvurna insîrtua an inkung a ni.

⁶Lam laia thi ruak nâitak kho ulianhai khan, ivakama sehrât irla, a ring an inol khiak chungka khan an kut irsûk an ta,

⁷'Hi mi hi kin ithat ni maka, a thattu khom inhre ma ung.

⁸Rengpa ni mi Israel, Aigupta ram ata ni ihruai suakhai hi, ngaidam ta. Ngaidamin lân, poi tholoihai thisen mô chu ni mi hai inpêltir no'n lân,' an tia.

⁹Khaanga Rengpa inkung anga nin tho'n chu, mi that mô kha pêl no chin ni.

Irdoinaa nupang man chungchâng

¹⁰Rengpa nin Pathianin irdoina nangni an hnêтира, mi nin manhai oka,

¹¹khahai laia dôngmate hmêl sa nin iti lam tak dôngma'n nei nin inuam a omin chu,

¹²tuang unglân, a lu voi inkol a ta, a kemitin a iep zit hrang a ni.



¹³An chel laia a sil le kai kha thûl sianlân, in sũaga khan a iom chian hrang a ni, tha khat sũag chu a nu le pa, a ihmua ta loi hrang chu, a isũa hrang a ni. Kha zoi tika chu dũagma'n nei thei nin ta, nin dũagma ni ta a ti.

¹⁴Dũagmaa nei nin nuam no'n chu an nuamna taka infetir nin ta, a'rhming nin insiattir tấk sikin, suak enkol angin nin ienkol hrang ni maka, sum le puan khomin nin izuar hrang ni mah.

Nâilutîr irchon lua chungchâng

¹⁵Mi'n dũagma inhni a neia, nâipasal an nei pe ru ruaia; a dũagma inren loi ual nâi chu a inren ual nâipa nêkin chu a uliana,

¹⁶a nâihai kuang irchon a sem hrang tika, a dũagma a inren ual nâi kha indit bîkin nâi lutîr dongtum a ipêk hrang ni ma.

¹⁷A nâipa ulian ual kha, a dũagma irngaiinat ual leh ni no khom sianlân, dongtum inhni a ipêk hrang a ni. Nâilutîrhai hi irngai poimo hrang an ni, dân ang taka an dongtum pêk hrang an ni.

Nâi thuzômloi chungchâng

¹⁸Mi'n nâipa tukullian, irkôk irhel nei sianlân, a nu le pahaiin hrem ngaihai khomsian inlâp no sian;

¹⁹a nu le pahaiin an omna kho hruaituhai toi khôm makunga khan hong hruai an ta;

²⁰ulianhai kuang khan, 'Ei nâipa hi a tukulliana, mi kôkhel tak a ni, kin thu rêng rêng zôm nuam maka, zu le sa ringot a ngaitua chian,' ti an ta.

²¹Kho sũaga mi murdi khan lungin an idêng that hrang a ni; khang thil saloi kha nin lai ata nin inboipai zit hrang a ni. Israel mi murdi'n inhria an ta, chi an ti.

Dân chi dang dang

²²Thil imo khat tho'nchâi sika that kha thingrêla inkhâi a niin chu,

²³ a ruak kha zân inriak hrang ni ma, a thi nî zela khan phũa hrang a ni. Khang mi inkhâi that chu Pathian khosâl tong a nia, Rengpa nin Pathianin nangni a ipêk ram hi nin iporinchetir hrang ni ma.



Dân Inhnina 22

¹ Ni chipui, Israel mi sehrât mani, belra mani an ithung, a suak ni hmu'n chu a hmu loi om tho no'n lân, hôl intung pe roh.

² A neitu chu kho danga hlataka om a niin mani, a neitu ni inhriat loi mani chu ni ina kai pe roh.

³ A sakuartung irhmang ni hmu'n mani, a puan irhmangtir ni hrûtin mani, i thil khom, ni urêng Israel thil irhmang ni hmu'n chu, khang khan tho roh.

⁴ Nin urêng Israel sehrât chal mani, sakuartung mani lampuia tâk ni hmua a hmu loi om tho no ro, kai suapui ro.

⁵ Nupangin pasal sil le kai a irbel hrang ni ma; Rengpa nin Pathianin khang kha a dem a ni.

⁶ Thinga mani irnênga mani vâ irbu op lai, a kêi tâk mani a kêi loi mani ni hmu'n chu a pui kha chel no roi.

⁷ A tê chu la thei ni ti, a pui rêk chu ni insua hrang a ni; khanchu, ni ta hrangin sa a ta, dam insôt sa ni ti.

⁸ Nin in sin kha a chung zôl kha nin irkul hrang a ni; khanchu, tu mani khom tâk palin, thi sianlân, a mô kha pêl no chin ni.

⁹ Grep irhuana thei dang phun no ro, ni phun irkopin chu ni grep ra khom ni thil phun ra khom Pathian ta hranga ser indang ni a ti.

¹⁰ Sehrât chal le sakuartung âl inkaitir suam no roi.

¹¹ Pat le samul irkop songkolin innghâk no ro.

¹² Ni puan sil kil minlia hmor kêi nin inneitir hrang a ni.

Dôngmate ruatharte chungchâng

¹³ Mi'n dôngma a neia, inhnung tena chu a hnông tâka.

¹⁴ Milak phuachôpin thil saloi tak tak a hnôna, 'dôngmate irthiang a nina khom hmu ma ung' tiin mual an phoitira.



¹⁵Khaang thila khan nupang nu le pahai khan an irnuam zâna an puantha thisen kop kha dôngmate irthiang ni ngêt a nih ti fiana hrangin kho ulianhai kuang an intung hrang a ni.

¹⁶Nupang pa khan ulianhai kuang, ‘Hi mi hi ki nâinu kin neitira, nuam nôk ta maka.

¹⁷Milakin thil saloi tak tak an hnôna, ‘Ki nei khan dôngmate irthiang lei ni ma’ tihai a ti. Kin nâinu hi a’rthiang ngêt a nih ti fiana hrangin hi an irnuam ni zâna an puantha thisen kop hi en roi,’ ti an ta; ulianhai makunga kêlsua an ti.

¹⁸Kho ulianhai khan kha pa kha zêm an ta.

¹⁹Israel dôngmate irthiang irhming an siattir sikin tangka sekel irzakhat inchôitir an ta, a nupang pa kuanga khan pe an ta, a dôngma ni mai a ta, a hring sêngin mâk thei no ni.

²⁰Kha pa khan thudik an sîra, dôngmate irthiang a nina fiana a om no’n chu,

²¹a pa mikota hruai an ta, kho sênga mihai khan lungin an idêng that hrang a ni. Israel mihai laia thil porinche tak a itho a ni, a pa ina a la om lai, pasal a la nei mân ruatharte a lei inei tâk a ni. Khaang khan Israel laia thil saloi nin inboipai hrang a ni.

²²Mi dang dôngma zâlputu chu nupang leh an ruaiin thatpai hrang an ni. Khaang khan Israel laia thil saloi nin inboipai hrang a ni.

²³Dôngmate irthiang, pasal hual nei kha, kho sênga mi’n a lei zâlpuuin chu,

²⁴an inhni khan kho kul mikot kôla hruai nin ta, lungin nin idêng that hrang a ni; nupang chu kho sênga ompuiin khêk maka, pasal khom kha mi dôngma hual a lei zâlpui sikin dêng that hrang a ni.

²⁵Dôngmate irthiang pasal ihual nei, ram hnuaia mi’n lei siatpui sianlân, a pasal vai kha dêng that hrang a ni.

²⁶Nupang chungu chu kut thâk hrang ni ma, thina hrang dôr ite thilsual tho maka; mi inkhatin mi dang a beia, a ithat chian ang hi a ni.



²⁷A pasal khan mi dôngma hual ram hnuaia nakhrâtin a châipua, a nupang kha khêk khomsian tûte'n san hrang an iom loi a ni.

²⁸Mi'n dôngmate irthiang, pasal ihual la nei loi siatpui sianlân,

²⁹pasal khan nupang pa kuang dôngma man pangai tangka sekel sômringa a ipêk hrang a ni; nakhrâtin a siatpua, a dôngma ni zôi zel a ti. A dam sângin mâk thei no ni.

³⁰Khanchu, mâni pa dôngmahai laia mi zâlpuiin a pa kha a imualinphoitir hrang ni ma.

Dân Inhnina 23

Pathian mihai laia kop sa theilo

¹Tilru koi mani, ser irtan mani chu Rengpa mihai laia an ikop hrang ni ma.

²Zâinâi chu Rengpa mihai pungkôm laia an ikop hrang ni ma, a'rchi irlo sômna khom Rengpa mihai pungkôm laia kop thei no nihai.

³Amon mihai le Moab mihai kha Rengpa mihai pungkôm laia an ikop hrang ni mah. Annihai kha irlo sôm khom hek sianlân, Rengpa mihai pungkôm laia khan an ikop viat hrang ni mah.

⁴Aigupta ram ata nin hong suak khan fâk hrang le tuidâi ten lua khom chôiin nangni lei nghâk nuam mahai; Mesopotamia ram, Pethor kho mi Beora nâipa Balaama kha khosâl tong hrangin nangni an inphût lem a ni kha.

⁵Rengpa nin Pathian khan Balaama thu kha ngaisak nuam maka, Rengpanin Pathian hin a sân lung nangni a thung sikin a khuasâlna kha satvurnaa an changtir ta lik a ni.

⁶Khasikin, itiklai khomin anni leh hin irngeina siam no unglân, an irhniangna hrang khom nin dam sâng chu tho pehai no roi.

⁷Edom mihai chu nin intir hrang ni ma, nin urênghai an ni; Aigupta mi khom nin intir hrang ni ma, an rama nangni an lei imikhual a ni kha.

⁸An nâi irlo thumnahai kha Rengpa mihai pungkôm laia kop sa thei an ti.

Sipai riakbuk vong irthiang infâi hrang



⁹Râl doi hranga nin irthok suaka, a riakbuka nin riak khomin, thil saloi tinrêng ata nin irkiangpai hrang a ni.

¹⁰Nin zâl zoro'n nin laia mi tukhom, a chi ta sianlân, riak hmun pên tiang sùn sôtin a iom hrang a ni; a riakbuk kêra a hong ilût hrang ni ma.

¹¹Chohnung tiang tui irsil a ta, misa tâk tika chu a riakbukhai laia hong lût thei ta a ti.

¹²Riak hmun pên tiang dâi kalna hrang hmun bîk nin inei hrang a ni.

¹³Thil irzum choi nin ta, kha khan irnêng choi ir-ông nin ta, nin inel nôk hrang a ni.

¹⁴Nin buka khan enkol hrang le nin râlhai kha nangni inhnêtir hrang le nin râlhai nangni inhnêtir hrangin Rengpa nin Pathian kha a zuang ngai sikin nin buk kha nin irthiang hrang a ni, thil porinche nangni a hmu likin chu nangni rotsanna ti.

Dân chi dang dang

¹⁵A pu kuang ata suak rot chu nin kuang a hong intân lûtin chu tîr nôk no roi.

¹⁶Nin laia khan om sa sianlân, nin khua inkhata a inuamna taka om sa ri se, dengintheitir no roi.

¹⁷ Israel mi tukhom, nupang khom pasal khom, tempila notizuara an ichang hrang ni ma.

¹⁸Pasal khom nupang khom, a'rzuar likin chu chonginkungna hrangin Rengpa nin Pathian ina chôi inlût hrang ni ma; khang mihai chu Rengpa nin Pathian intir lam tak a ni.

¹⁹ Nin urêng Israelhai kuang tangka hai, bu hai le thil dang rêng rêng, a pung neiin nin inpûktir hrang ni ma.

²⁰Nam dang chu a pung sîng thei nin ta, ni urêng Israelhai rêk chu a pung nin isîng hrang ni ma. Khanchu Rengpa nin Pathianin nangni a ipêk hrang rama nin om tikin nin thil tho murdia hong irhniang thei nin ti.



²¹Rengpa nin Pathian kuang pêk nin inkunga, pe loiin om chin ni, Rengpa nin Pathian khan nin inkung anga nin itho nangni lei sabei a ta, nin sua no'n chu thilsual tho nina nin ti.

²²Thil pe hranga nin inkung loi hi sual ni ma,

²³nin inkung tâkna na chu nin isua hrang a ni.

²⁴Mi grep irhuana nin fe'n nin nuam dôrin fa thei nin ta; aniachu, inkhat lua nin bêma nin ithun hrang ni ma.

²⁵Mi bu inding lai loia nin fe'n an bu vûi kha nuam dôr khiak thei nin ta, aniachu, kôite'n nin i-ât hrang ni mah.

Dân Inhnina 24

Irmâkna le irnei nôkna thu

¹ Mi'n dôngma a neia, inhnunga chu ama chung a nuam loi lam thil i mani a hmu sikin nuam ta maka; khanchu irmâkna lekha irziak a ta, pe a ta, a in ata insuaktir a ti.

²Khan kha nupang khan pasal dang nei nôk sian,

³kha mi khom khan nuam nôk ta no sian, irmâkna lekha irziak pe'n a in ata kha insuaktir nôk sianlân; a ninole, a pasal inhnina kha a isûn khom a ni thei,

⁴a i ang khom nisian, a pasal masa khan a inei nôk hrang ni ma; porinchetira a ibe hrang a ni; khang kha Rengpa ikhômâm lam tak a ni, Rengpa nin Pathianin nangni a ipêk rama khang thil saloi kha nin itho hrang ni ma.

Dân chi dang dang

⁵Dôngma nei phing chu irdoinaa a ife hrang ni ma, vântâng sina khom an inphût hrang ni ma; kum khat sùng chu a dôngma leh raifân takin an iomsuam hrang a ni.

⁶Tukhomin baidi nôina lung, a'rsâng ual khom ni ri se, thil pûk bondoka se pe no roi, an sùngkua fâk zongna nin ilâkpai pe tihna a ni.



⁷Israel mi'n Israel mi dang inrûkin suaka sor sianlân mani, sala mani a zuarin chu kha mi kha thatpai hrang a ni, khang khan nin laia thil saloi kha nin inboipai hrang a ni.

⁸Pân saloi nin irveiin chu Levia irchi ochaiin tho hrang a iti kha ngûk takin tho roi, an kuanga ki ihril ang khan tho roi.

⁹Aigupta ram ata nin hong suakna lama Miriami chung a Rengpa nin Pathian thiltho kha inhre mai roi.

¹⁰Ni kôlvêla mi thil nin pûktirin a bondok hrang kha, a in ata va la no ro,

¹¹pên tiang ngîr ni ta, ni thil pûktu khan a bondok hrang kha a hong ila suak hrang a ni.

¹²Mi'nriang tak a ni'n chu a puan bânda kha zâlna hrangin hmang pe no roh.

¹³Misa tâkin chu ni inkhîr nôk hrang a ni; ama puan ngei khan irtuam inlum a ta, ni chung a lôm sa a ti; Rengpa ni Pathian khan thil sa tho nang lei pom pe a ti.

¹⁴Mi'nriang le mi'nvâi chu, nangni irchipui a ni mani, nin kho sûnga om sa nam dang a ni'n mani sinthoa nin sorin chu dengintheitir no roi;

¹⁵a sâna irhel a ni sikin a hlo kha a nikhua ngeia, misa tâk mân ngêt, nin ipêk hrang a ni. Nangni ata chiarin Rengpa kuang intungna lik a ta, tho'nsual ni palna nin ti.

¹⁶An nâi le tehai sualna sikin pahai kha thatpai hrang ni maka; pahai sualna sikin an nâi le tehai khom thatpai hrang ni mahai; ama sualna sika vaiin kha mi kha thatpai hrang a ni.

¹⁷Nin laia om sa nam dang mani, fara mani, dongtum kha hlep no roi. Meithâi puan chu bondokin la pe no roi.

¹⁸Aigupta rama nangni khom suak nin ini kha inhre mai roi; Rengpa nin Pathianin nangni a irtansuak a ni kha te; khasikin hi thu hi nangni ki ipêk a ni.



¹⁹ Bu nin âtin bu mût lâk irhmâi nin neiin chu irvai nôk ta no roi; nam danghai, fara hai le meithâi hai dong sa hrang a ni; khanchu, Rengpa nin Pathian khan nin kut suak murdia sat nangni vur a ti.

²⁰ Nin oliv ra, nuam dôra nin nok sil zoia khan nok thing tum nôk ta no roi; nam danghai, farahai le meithâi hai hrangin hôi pehai roi.

²¹ Nin grep ra nin lâk khomin nin irhmal irhmâi kha zong nôk ta no roi, nam danghai, farahai le meithâi hai ta hrangin hôi roi.

²² Aigupta rama suak nin ini kha inhre mai roi; khasikin, hi thu hi nangni ki ipêk a ni.

Dân Inhnina 25

¹ Israel mi, thubuai nei, roirêltu makunga an irsêlin chu inkhat khan thiam chang a ta, inkhat kha chang no ni.

² Thiam chang loi kha zêma hrem hrang a ni'n chu irphu tôkin a inzêmtir hrang a ni.

³ Voi sômminli ten zêm thei a ni, kha nêka tam chu zêm thei ni ma; a nêka tam kha nin zêmin chu urêng kha nin ihnuaisia ni a ti.

⁴ Sehrâtpa bu nin chîltir laiin a hmûr kha khit pe no ro.

Urêng thi hranga tho hrang lam

⁵ Urêng sêngkua khata om suamhai sianlân, inkhat chu nâipasal nei loiin thi sianlân, a dôngma kha an sêngkua laia mi ni loi, mi dang an inneitir hrang ni ma. A pasal sangpa tu mani khôkin dôngma'n nei a ta, a urêng thi tâk irthûl khan.

⁶ Nâipasal an inei masa tak kha a urêngpa thi tâk nâipa anga bê hrang ni a ta, Israel irchi irlo irhming tepnaa a'rhming a iboi bîk hrang ni mah.

⁷ Thi tâk urêngpa'n a lua nuam no'n chu, kha hruaituhai kuang nupang kha fe a ta, 'Ki pasal urêng hin urêng tho hrang, a urêng thi tâk irchi, Israel laia a'rhming loina hrangin chi tha nuam ma,' a iti hrang a ni.

⁸ Kho ulianhai khan koi an ta, lei insîrpui an ta; a lua nuam ual no'n chu,



⁹kho hruaituhai makunga a kekok inkhat kha nupang khan khekpai pe a ta, ‘Mâni urêng irchi thâk pe nuam loi kha hianga tho ni a tih’ ti a ta, a hmâia a inchil hrang a ni.

¹⁰Kha mi irchihai kha Israelhai laia, ‘Kekok khekpai pe sêngkua’ ti an ti.

Dân dang danghai

¹¹Pa inhni irsual chu inkhat dôngma khan a pasal san tumin a irsualpui ser kha inpotpai pe sianlân,

¹²Kha nupang kha inren viat loiin a kut a itan pe hrang a ni.

¹³ Nin hmarsaa varna lung, a rik ual le zâng ual dôn suam no roi.

¹⁴Ivarna khilât lian le chîn ual khom dôn suam no roi.

¹⁵Ivarna lung dik tak, ivarna fâida dik tak nin ihmang hrang a ni; khanchu, Rengpa nin Pathianin ram nangni a ipêka hin dam insôt nin ti.

¹⁶Khaanga thil dikloi tho’n mi huang uarhai chu Rengpaikhôkmâk lam tak a ni.

Amalek-hai that hrang thu

¹⁷ Aigupta ram ata nin hong suaka, lampuia nin om laia Amalek-hai thil tho dân kha inhre mai roi.

¹⁸Pathian chitna zel nei mahai, nin fe sôl lai le nin suak lai hril loiin nin hnung tiang ata nangni an hong doia; nin laia sôl ual, inhnung ualhai kha an that zit a ni kha te.

¹⁹Khasikin, Rengpa nin Pathianin ram nangni a ipêka nin râlhai ata lungthi taka nangni an omtir tika chu Amalek mihai nin ithatpaihai zit hrang a ni, irvân hnuai an sînhnung hmu hrang inkhat lua nin ihôi hrang ni ma. Irnghil no roi.

Dân Inhnina 26

Bu thar inhlan thu

¹Rengpa nin Pathianin ram nangni a ipêk hranga nin va tunga, nin inhnêa, om hmun nin khuar tika,



² Rengpa nin Pathianin ram nangni a pêka, nin thil thar masa tak senkhat mani sia nin ta, Rengpa nin Pathian irhming omna hranga a hmun inthangnaa khan chôî ngai roi.

³ Kha khan ochai lei om kuanga khan, ‘Kin pahai kuang Rengpa ram inkung kha a vuan hin ki va lua tah ti Rengpa ni Pathian makunga kin puang e,’ a iti hrang a ni.

⁴ Ochai khan bêm kha la a ta, Rengpa nin Pathian maichâm makunga khan sia a ti.

⁵ Rengpa nin Pathian kuang hiang hin nin iti sa hrang a ni. ‘Ka pa chu mi chaninvâi, a ram mi a nia. Aigupta rama a zu fea, kha khan a om tâka; a sân an la tôma; khannisian, kha khan nam roiinpui tak, hrât tak le irrual tak an ni tâka.

⁶ Aigupta mihai khan deng an nin theitira, dûk an nin mantir tak taka, suaka nakhrâtin an ni sora.

⁷ Rengpa, kin pahai Pathian kha kin insam tâka, Rengpa khan a lei irngaituaa, deng an nin theitirzia hai, kin sinsôlzia hai dûk an nin mantirzia hai kha a hmua.

⁸ Rengpa khan Aigupta ram ata kha, a bân irnak hrât hmangin, thilirkhêl le irsinsiana irkhêl tak tak a thoa, a ni hruai suak tâka,

⁹ Khuaihlutui le dût tui luangna ram hi a ni ipêk tâk a ni.

¹⁰ O Rengpa, ‘Ni ram ni pêka a thar masa tak chu, nang ki hong chôî pe,’ ti ni ta; Rengpa ni Pathian makunga khan sia ni ta, a makunga khan ni ikûn hrang a ni.

¹¹ Rengpa nin Pathianin thil sa, nangma le ni in sêngkuahai a pêk sikin lômthu insîrin lân, nin laia om sa Levia irchihai khomin lôm takin nang changpui ri sehai.



¹² A kum thumnaa nin chîmu thar sôma inkhat chu, nin laia om Levia irchihai, nam danghai, farahai le meithâi hai pe ngai roi; khanchu, kho tina fa hrang nei seng hrang a ni.

¹³ Khaanga ni tho zoi tika, ‘Thil ser, sôma inkhat kha, ki ina atûn hin inkhat lua dôn ta ma ung; thu a ni ipêk angin Levia irchi hai, nam dang hai, fara hai, meithâi hai kuang ki pêk tâk a ni; sôma inkhat pêk chungchânga ni thupêk murdi zôm loi zel nei ma unga, irnghil nei sa ma ung.

¹⁴ Lusûn laiin inkhat lua nei ma unga, mithi bu hrangin inkhat lua inhlan sa ma ung; O Rengpa, ni thu zôma, sôma inkhat pêk chungchânga ni thupêk murdi kha ki tho zit a ni.

¹⁵ Ni’rvân hmun irthiang ata zuang thîrin lân, ni mi Israelhai hi sat zuang vur ro. Kin irchibulhai kuang pêk ni inkung ram, khuaihlutui le dûttui luangna ram hi satvur ro,’ nin iti hrang a ni.

Rengpa dongtum mihai

¹⁶ A vuan hin Rengpa nin Pathian khan hi thu’nkunghai le omdân hranghai hi zôm hrangin nangni a iti a ni.

¹⁷ A vuan hin Rengpa kha Pathiana nin pom tâka, a thu’nkunghai, a thupêk le omdân hrang a itihai kha zôma tho nin inkunga.

¹⁸ A vuan hin Rengpa khan a inkung angin a mihai ta hrang nangni a pom tak tak tâk a ni.

¹⁹ A siam, nam dang murdi nêkin nangni a roiinputira, an pâk irhlo nin ta, nin irhming inthang sa a ta, mi’n nangni chôindôm an ti, a inkung ang ngeiin Rengpanin Pathian ta hrang nam irthiang ni nin ti.

Dân Inhnina 27

Pathian dân lunga irziak

¹ Mosia khan Israel ulianhai le mihai kuang, ‘A vuana thupêk nangni ki ihril murdi hi zôm zit ngai roi.

² Jordan dung nin irkâna, Rengpa nin Pathianin ram nangni a ipêk nin va lût tika chu lungphêk lian tak tak phun roi; chinaiin inmâi innâm unglân;



³kha khan, hi dân murdi hi irziak ngai roi. Rengpa nin Pathianin nangni pêk a inkung, khuaihlutui le dûtui luangna ram kha lua nin ta,

⁴Jordan râla nin om tika a vuana nangni ki ihril ang hin Ebal tânga lung inthum phun unglân, chinaiin inmâi innâm roi.

⁵ Thîra incher loi lungin maichâm siam roi.

⁶Rengpa nin Pathian ta hranga maichâm nin siam rêng rêngin lung sinsiam loi hmang hrang a ni; kha ngeia khan hâlrivôm thilinhlan kha nin ihâl hrang a ni,

⁷irngeina thil inhlanhaiin irbôl nin ta, kha khan fa nin ta, Rengpa nin Pathian makunga khan raifân takin nin iom hrang a ni.

⁸Lung phuna khan hi Dân thuhai hi nin irziak hrang a ni.

⁹Mosia khan Levia irchi ochaihai le Israel mi murdi kuang, ‘O Israelhaio, nin beng do unglân, ki thu hi irngai u ta. A vuan hin nin Pathian Rengpa mihai nin ni tâk a ni.

¹⁰A thu zôm unglân, a thu’nkung a vuana nangni ki ihril murdi hi zôm roi,’ a tia.

Thu zômloi khosâl tong hrang

¹¹Mosia khan Israelhai kha thu a pêka;

¹² Jordan dung nin irkâna, mipui ta hrang satvurna hril tika hi nam Simona hai, Levi chihai, Juda hai, Isakara hai le Benjamina hai hi Gerizim tânga ngîr an ta;

¹³khosâl inpuang suak tika hi nam Reubena hai, Gada hai, Asera hai, Zebulun hai, Dan hai le Naftalia hai hi Ebal tânga an ngîr hrang a ni.

¹⁴Hi thu hi Levia irchihai khan inring takin an insîr hrang a ni.

¹⁵ ‘Kut theithiam suak Rengpa ikhômâm lung, thing, thîr inrûka biak mani chu khosâl tongin om ri se,’ ti an ti. Mipui murdi’n, ‘Amen’ tiin hong sâm an ti.



- 16 ‘A nu mani, a pa mani, inzâ loi chu khosâl tong ri se,’ ti an ta, Mipui murdi’n chu ‘Amen’ tiin lei sâm an ti.
- 17 ‘Kôl bômhai ramri lung sontu chu khosâl tong ri se,’ ti an ta, Mipui murdi’n chu ‘Amen’ tiin lei sâm an ti.
- 18 ‘Lampui ni loia mitcho infetirtu chu khosâl tong ri se,’ ti an ta, Mipui murdi’n ‘Amen’ lei ti an ti.
- 19 ‘Nam danghai, farahai le meithâihai ata theibîk uar chu khosâl tong ri se,’ ti an ta, Mipui murdi khan, ‘Amen’ tiin lei sâm an ti.
- 20 ‘Mâni pa dôngma laia mi lei zâlpuia, pahai mualinphoitirtu chu khosâl tong ri se,’ ti an ta, Mipui murdi khan, ‘Amen’ tiin lei sâm an ti.
- 21 ‘Sa siatpui chu khosâl tong ri se,’ ti an ta, Mipui murdi khan, ‘Amen’ tiin lei sâm an ti.
- 22 ‘Nu dang pa dang khom ni ri se, mâni farnu siatpuitu chu khosâl tong ri se,’ ti an ta, Mipui murdi’n ‘Amen’ tiin lei sâm an ti.
- 23 ‘Mâni tarpi siatpuitu chu khosâl tong ri se,’ ti an ta, Mipui murdi’n ‘Amen’ tiin lei sâm an ti.
- 24 ‘Inrûka mi thattu khan khosâl tong ri se,’ ti an ta, Mipui murdi’n ‘Amen’ tiin lei sâm an ti.
- 25 ‘Poi tholoi that hranga thamna lâktu kha khosâl tong ri se,’ ti an ta, Mipui murdi’n, ‘Amen’ tiin lei sâm an ti.
- 26 ‘Hi dânhai hi pom nuam loia, zôm nuam loitu chu khosâl tong ri se,’ ti an ta, Mipui murdi’n, ‘Amen’ tiin lei sâm an ti.

Dân Inhnina 28

Thuzôm inlâpzia (Lev 26.3-13; Dhn 7.12-24)

1 Rengpa nin Pathian thu hi nin zôma, a thupêk a vuana nangni ki ihril murdi hi nin zôm thapin chu rammuala nam dang murdihai nêka nangni a isiam roiinpui a ni.



²Rengpa nin Pathian thu kha zôm phot unglân, hi satvurna murdi hi dong nin ta, dong sa pat nin ti.

³In sâng tiang le ram tiang khom Pathianin sat nangni vur a ti.

⁴Nâi tuanitung nei nin ta, nin bu le bâl nangni inlâptir a ta, nin sâ vâihai Pathianin sat nangni vur pe a ti.

⁵Nin bêm hai, nin bu khêng hai, Pathianin sat nangni vur a ti.

⁶Nin thiltho tinrênga nangni irhniangtir a ti.

⁷Nin râlhai leh nin irdoiin Rengpa khan nangni inhrâtir a ta; lam khat tiang hongin nangni hong doi an ta, kil tin panin rot an ta, indarh an ti.

⁸Rengpa nin Pathian khan nin kut tôn murdi sat nangni vur a ta, nin fasiar insiptir a ta, Rengpanin Pathianin ram nangni a ipêk kha nangni inlâptir pe a ti.

⁹Rengpa nin Pathian thu hi nin zôma, a thupêkhai nin zôm ta takin chu a inkung angin ama dongtum, a mi irthiang ta hrangin nangni nei a ti.

¹⁰Rammuala mi murdi'n Rengpami'nthanghai nin nih ti inhriat an ta, nangni chi an ti.

¹¹Nin pahai kuanga pêk a inkung rama Rengpa khan nâihai, sâhai, bu le bâl hai nangni in neitir nghek a ti.

¹²Rengpa khan a'rchon kok ata a zoro taka rua zuang inthotir a ta, nam tin nin thil sat nangni vur a ta, nam tin nin thilhai nei inpûktir nin ta, an thil chu nin ipûk nang no ni.

¹³⁻¹⁴A vuana thu nangni ki ihril hi, a thupêkhai hi ngûk taka nin zôma, pathian danghai irzûlin a vuana thu nangni ki ihril hi chang tiang mani, vei tiang mani nin pêtсан noa, an sin nin tho ual no'n chu Rengpa nin Pathian khan nam tin luah nangni siam a ta, an ikaihruai vai ni no chin nia, a'rhnuai uala ni loiin a chung uala hong ni mai nin ti.

Thuzômloi man

(Lev 26.14-26)



¹⁵Rengpa nin Pathian thu nin zôm noa, a thupêkhai le a thu'nkunghai, a vuana nangni ki ihril hi nin zôm nuam noa, nin tho nuam ual no'n chu hi thil saloi hi nin chung a tung a ti.

¹⁶In sâng tiang le ram tiang siatna tong nin ti.

¹⁷Rengpa khan nin bêm le nin bu khêng nangni irletpai pe a ti.

¹⁸Rengpa khan khua nangni sâl a ta, nâi le têa mani, bu le bâla mani, sâ vâia mani hmang chang no chin ni.

¹⁹Nin thil thôna kipa hlosam nin ti.

²⁰Nin thil tho a sual sik le Rengpa kha nin rotsan sikin khua nangni sâl a ta, nin kuttôn rêng rêng hmang chang no nia, a sân chardongna om a ti, sôlin siatpui ni ti.

²¹Nin ram lua hranga khan vânduaina inzen nangni'n tong nin ta, dam hring suak tûte om no chin ni.

²²Rengpa'n hri nangni irveitir a ta, inkhurpuihai irvei nin ta, invûng sa nin ti. Khua kang a ta, nin chîmuhai inchâtir a ta, thi chianna nin ti.

²³Rua rêng rêng tho no nia, nin loihai kha thîr angin châr a ti.

²⁴Nin loia pildi le vâiphin inthotir a ta, zuang insiat zit a ti.

²⁵Rengpa khan nin râlhai kha inhnêtu ualin nangni inchangtir a ta, lam inkhata fe'n doi nin ta, kil tin panin rot nin ta, indarh nin ti. Rammuala mi murdi'n nin chung a thil tung kha a'rkhêl ti an ti.

²⁶Nin thi tika nin hme kha va le ramsahaiin hong fa an ta, tûte lei khôkmâktu om no nihai.

²⁷Aigupta-hai irvei ang sakhuai hai, ni takpum hong kikin a'rthî suakhai, pân hringhai, uithak hai Rengpa khan nangni irveitir a ti.

²⁸Rengpa khan nangni invêttir a ta, nin mit cho a ta, a sân nangni inkamangtir a ti.



²⁹Mitcho angin sôn khovâra khom zân inthim angin thil inmai inmai nin ta; nin lampui chaninvâi a ta, a sôn nangni irchêp pe a ta; nangni long kochok an ta, changpuitu zel man no chin ni.

³⁰Dôngma hual nin ta, mi'n nangni neipai pe an ti, in sin nin ta, lua no chin ni; grep irhuan siam nin ta, a ra fa no chin ni.

³¹Nin sehrâtchal kha that an ta, a hme khom fa no chin ni; nin hmu zoro laia ngêt nin sakuartung kha nangni lapai pe an ta, tûte'n nangni san no nihai.

³²Nin nâinuhai nin nâipahai kha nin hmu laiin nam dang suaka pe an ta; a nitin anni irngaiin, thîr nin ta, nin mit chavai zoi a ti.

³³Sôl taka nin itho suak kha nin inhriat ngai loi nam dangin nangni hong lapai pe an ta; kha nin dengitheina le opbêna no chu ite hlo no chin ni.

³⁴Nin thil hmuhai chu invêtpui nin ti.

³⁵Rengpa khan nin kea pân dam thei loi nangni irveitir a ta kezapha ata lu sîp dênin sakhuai irvei nin ti.

³⁶Rengpa khan, nin rênghai le nam dang ram, nin pi le puhai la om ngai lina rama khan suaka nangni hruai a ta; kha rama khan thing le lunga siam pathianhai biak nin ti.

³⁷Rengpa nangni indartirna rama khan a hmu ka kai khan nin chung a thil tung kha a'rkhêl ti an ta, nangni hnuaisia an ta, nuiza siamna'n nangni hmang an ti.

³⁸Chîmu song nghek nin ta, tômte vai man nin ti; khâiin nangni fapai pe an ti.

³⁹Grep irhuan siam nin ta, irvotir nin ta, khannisian uain mani, a ra irhmal hrang mani, hmu no chin ni, irnge zoi a ti.

⁴⁰Nin ram pumpuia oliv thing om mur khomsian, a hriak irthu hrang khom nei no chin ni, zungpai zoi a ti.

⁴¹Nâinu nâipa a sôn nei intam nin ta, an irtha fa no chin ni, suaka om zit an ti.



⁴²Nin thei kung le chîmu danghai chu khâiin fapai zit an ti.

⁴³Nin laia nam dang omhai kha inlal tîr tîr an ta, nangni dongtum rêk chu hong tòm sit sit a ti.

⁴⁴Tangka nangni inpûktir an ta, nangni'n chu inpûktir hrang tangka nei no chin ni. A tôpa chu nin puhai la ni an ti.

⁴⁵Rengpa nin Pathian thu nin zôm noa, a thupêk le a thu'nkung nangni an ihril kha zôm mak chêia, nin tho nuam no sikin hi thil saloi murdi hin nangni de a ta, tuang thiai nin ti.

⁴⁶Nin chung a le nin nâihai chung a Pathian a milung chuk mah ti nin inhriat theina irsinsiana hrang a ni;

⁴⁷satvurna tinrêngin nangni vur a ta, raifân le lôm taka Rengpa nin Pathian sin kha nin itho hrang a ni.

⁴⁸Phîngchâm le tuiinhrâlin, korongboi le itinrêng irsamin Rengpa itîr, nin râlhai sin tho nin ta, nin sôlneng hnungin nin ringa thîr ringkol nangni inkoltir an ti.

⁴⁹An chong khom nin inhriat ngai loi, mi nunrông tak tak, kôlkung ata Rengpakhan hong indoitir a ta, irmu angin nangni zuang inbo thut an ti.

⁵⁰Nâipang khom, tar khom, tûte zel lunginkham no ni.

⁵¹Nin sâhai, nin chîmuhai fa zoi an ta, phîngchâmin thi nin ti; nin bu hai, nin uain hai nin oliv hriakhai, nin sâhai hôi no nihai; phîngchâmin thi nin ti.

⁵²Rengpa nin Pathianin nangni a ipêk hrang rama nin lêngna kua murdi doi an ta, nin kul irsângtak tak, det nin ititak takhai kha inchimtir zit an ti.

⁵³Nin râlhaiin nin kulhai an irhualin chu nin phîngchâm ta hraiin, Rengpa nin Pathianin nangni a ipêk nin nâihai hme fa nin ti.

⁵⁴Mi sa le mi irchong tak ngai, ite inret nei ngai loi khan a urêngpa mani, a dôngma nei lai mani, a nâi la dam sunhai mani khom fa hranga khan irlôk nuam an ti.



⁵⁵Râlhàiin nin khua an hual sôtak tak sikin fa hrang an inei loi kamangin a nâihai hme khom fa an ta, mi dang pe nuam no nihai.

⁵⁶Irchongnu, irnêng khom sir ngai loi, inthîk tak tak ngaihai khomin an pasalhai, an nâinu nâipahai lôm an ta,

⁵⁷ râlhàiin an hual insôt sikin ite fa hrang om ta no nia, a phîngchâm kamangin an nei leh ansûl kha inrûkin fa an ti.

⁵⁸Hi lekhabua irziak Dan thu chuang murdi hi kuluk taka zôm loia, tho nuam mak chêia, Rengpa irhming roiinpui tak le ichiom tak hi nin chôiindôm nuam no'n chu,

⁵⁹nin irchihai leh indam thei loi hri nangni irveitir a ta, hong phûl mur mur nin ti.

⁶⁰Aigupta rama an ihmu kha nangni irveitir a ta, hring dam suak ta no chin ni.

⁶¹Hi dân lekhabua chuang loi, natna chi dang dang Rengpa khan nangni irveitir sa a ti.

⁶²Rengpa nin Pathian thu nin zôm no'n chu irvâna ârsi dôrin tam khom unglân, hring dam suak om vi viat nin ti.

⁶³Rengpa khan thil sa nangni tho pe le nangni inpung pe a'rzuk ngai; khaang dênin nangni insiata, nangni that a irzuk hrang a ni. Nin ilua hrang ram ata hi nangni a ilâk suak hrang a ni.

⁶⁴Rengpa khan rammual pumpuia, nam tin laia nangni indartir a ta; kha khan thinga siam le lunga siam pathianhai chubai nin mûka, nin pi le puhai khomin an ibiak ngai loihai kha nin ibiak hrang a ni.

⁶⁵Khoa khom lungthi taka om chi chianna hmun nei no chin ni. Rengpa khan nangni inkamangtir hen a ta, nin beidongin nin sabei dong zit a ti.

⁶⁶Thi chi pu pumin om nin ta, a sôn a zânin chardong takin om nin ta, nin ihring dam suak hrang mo, suak loi hrang khom inhre no chin ni.



⁶⁷Nin thil chi le nin mita ichiom nin ihmuhai sikin zînga, ‘Khohloi ni ri seh ti nin ta, zâna chu khuavâr ta sian,’ ti nin ti.

⁶⁸Rengpa khan Aigupta rama irkuangin nangni tôl thâk a ta, nin ichum nôk hrang ni mah ti a ta; khannisian chum nin ta, nin râlhai la hrangin suakpa mani, suaknu hrang mani, zuar nin ta, khannisian, tûte’n nangni la nuam no nihai.

Dân Inhnina 29

Moab rama Rengpa le Israelhai thuthung

¹Rengpa khan Mosia kuang Israelhai le Moab rama hianga thuthung hrang hin a hrila; Horeb tânga a thuthung belsana a ni.

²Mosia khan Israel mi murdi kha a koikhômhaia, an kuang, “Nin mit ngeiin Aigupta rêng Faroa le a milianhai le an ram sînga Rengpa thiltho kha nin hmua.

³Hri ichiomtak takhai, thil irkhêltak takhai le thil roinputak tak a ithohai kha nin hmua.

⁴A vuan ten nin thil hmuhai kha a’rngaina lam chang inhre mak chêia, a omzia tak lan hre mak chêi.

⁵Kum sômminli sîng Rengpa khan ramchâra nangni a chaninvâtira; khannisian nin songkolhai le nin kekokhai kha milui ual ma.

⁶Bu pangai nêk hrang nei mak chêia, uain le zu in hrang khom nei mak chêia; khannisian, Rengpa khan fâk hrang nangni a tum pea, Rengpa hi nin Pathian a nih ti nin irchu theina hrangin.

⁷Hi hmun nin hong tung khan Hesbon rêng Sihona le Basan rêng Oga khan a ni lei doia, kin inhnêa;

⁸an ram khom kin neipai pehaia; Reubena irchi hai, Gada irchihai le Manasea irchi chimriphai kha an dongtuma kin pêkhaia.

⁹Khasikin hi thuthung thuhai hi zôm unglân, nin thiltho kipa nin irhniang theina hrangin tho roi.



- 10**A vuan hin Rengpa nin Pathian makunga nin ingâr a ni hi, nin hruaituhai, nin upa hai, nin pasal hai,
- 11**nin nupanghai, nin nâihai, nin laia om sa nam dang hai, thing pêla tui nangni chôî petuhai leh nin rêngin a makunga nin ingâr a ni hi.
- 12**A vuan hin Rengpa nin Pathian khan thu nangni an kungpui hrang a ni.
- 13**Khanchu, Abraham, Isaka, Jakoba hai kuang thu a inkung angin a mihai hong ni indet nin ta, nin Pathian ni sa a ti.
- 14**Nangni leh vai, hi thuthung hi a isiam ni ma.
- 15**A vuana hitaka ngâr sahai vai ni loiin ei irchi la suak loihai ten hrangin thuthung thu hi a inkung a ni.
- 16**Aigupta rama kin om laia kin innun dân kha nin inhriat, kin hong suakna lama nam dang lei omhai lei omdân nin inhriat;
- 17**thing tum hai, lung tum hai, tangkarua le rângachaka siam millim intiromtak takhai an biaka,
- 18** pasal khom, nupang khom, sêngkua mani, nam pumpui mani khom, Rengpa ei Pathian irheisanin hi nam dang pathianhai hi biak likna chin ni, nin thil irzum inchor, tûr khatak paia irson liantak ang hi ni nin ti.
- 19**A vuana thu ir-up tak tak ei irngai tâk hi nin laia mi, irngaitu'n chu, 'Tukullian taka mâni nuam ang anga om khom poi no ni' ti lungrîl no ri sehai; khasika khan mi soal mani mi sa mani irhmangna nin ti.
- 20**Khaang mi kha chu Rengpa'ngaidam no nia, a chungga Rengpa ninginmur kha suakna a ti. Hi lekhabua thil saloi murdi hin hong tong a ta, Rengpa khan inboipai zit a ti.
- 21**Rengpa dân bu thuthung irziaknaa khosâl tong hrang chuang murdi, siatna kha a chungga intungtir a ti.
- 22**Sôttak hnunga chu, nin irchihai le nam danghai, ram hlatak taka omhai khan nin rama siatna le tuangna Rengpa intungtir chu hmu an ti;



²³ nin loihai chu ram chôp, kât le chi tamna ram ni a ta, ite phun thei ni no ni, hloisûl ten khom mông thei no ni. Nin ram chu Sodom le Gomora hai, Adma le Zeboim, Rengpa ningmur irkhêl tak sika a insiat tâk khuahai ang kha ni a ti.

²⁴Rammuala mi murdi'n, 'Rengpa hin ithoa mo hi ram hi, hiang taka soisak mo a ini? Imo khang dôra a ninginmur nasan?' ti sup sup an ti.

²⁵Hiang hin sâm an ti: 'An irchihai pathian khan Aigupta ram ata a zu hruai suak lai khan thuthung a siampuihaia, Rengpamihai khan kha kha an tho'nchâia;

²⁶matona an la ibiak ngai loi nam dang pathian, Rengpa'n biak a ikhaphai kha an biak tâka;

²⁷khasikin, Rengpa'n kha a mihai chung a ninginmur kha, hi lekhabua irziak murdi siatnahai hi an rama a intungtir tâk a ni.

²⁸Rengpa kha a sân a ninginmur sikin an hnotsuakhaia, nam dang ram dang daiha an iom tâk a ni,' ti an ti.

²⁹Rengpa ei Pathian hin thu'rthup senkhat kha inpuanga, ei irchihai le kha kha ei izôm hrang a ni.

Dân Inhnina 30

Insa nôkna le satvurna lampui

¹Satvurna dong mo nin inuam khosâl tongna, nin inthang hrangin nangni ki siam pe a ni. Rengpa khan nin chung a hi thil saloihai hi an tungtira, nangni a inhnotsuakna nam dang rama nin om tika nuam inthang thei nin nih ti kha inhre mai roi.

²Nin irchihai leh Rengpa tiang nin hong irhei nôk nuama, a vuana nangni ki ihiril, a thupêkhai hi a satêna zôm nin nuamin chu,

³Rengpa nin Pathian khan nin chung a satna nei nôk a ta, nam dang dang laia nangni a indartirna ram ata nangni hong hruai kîr nôk a ta, nangni irhniangtir nôk a ti.



⁴Rammual ram hlataka fe pat khom unglân, Rengpa nin Pathian khan nangni hruai khôm nôk a ta, nangni hruai kîr nôk a ti;

⁵Khanchu, nin pi le puhai omna ngai ram kha dong nôk nin ta, nin irchibulhai nêk khan hong tam nin ta, hong irchong nôk ual sa nin ti.

⁶Rengpanin Pathian khan nin irchihai leh thu zôm theina milung nangni pe a ta; khanchu, ama kha a sân lungthung nin ta, kha rama khan nin iom mai thei hrang a ni.

⁷Hi khuasâl murdi hi nin râl, nangni khôkmâktu le dengintheitirtuhai hi nangni indongtir a ta;

⁸a thu zôm ta nin ta, a vuana thu nangni ki ipêk murdi hi zôm ta nin ti.

⁹Rengpa khan nin thil thôna kipa hlo nangni inchuktir a ta, nâi le te nei intam nin ta, nin sâ vâihai pung tûr tûr a ta, nin loihai kha inlâp tak tak a ti. Nin pi le puhai irhniangtir, a irzuk angin nangni khom nangni irhniangtir irzuk a ti.

¹⁰A thu rêk chu nin izôm khak hrang a ni, a dân bua chuang thu'nkung le thupêk murdi kha nin izôm zit hrang a ni. Thudik takin ama tiang nin irhei hrang a ni.

¹¹A vuana thu nangni ki ipêk hi nin ta hrangin zôm intak ta hrai ni no nia, inhriat phâk loi hrang ni ual hliak ma.

¹²‘A thu ei inhriata, ei zôm hrangin tu mo irvâna hong kâia ni zuang lâk pe hrang?’ tho hrangin irvâna om pat ni ma.

¹³‘Ei inhriata ei zôm hrangin tu mo tuikhanglian râla fea ni hong lâk pe hrang?’ ti hranga tuikhanglian râl daiha om ni ual hliak ma.

¹⁴Hi hin, ni kôla hin a om mai hi te, nin hriat tâka, an sîr khom nin sîr nin sîr mai kha te; zôm chian ro.

¹⁵A vuan hin imo nin thang nuam, thil sa mo, saloi, hring mo, thi, inthang ro.



¹⁶Rengpa nin Pathian thupêk a vuana nangni ki ihril hi nin zôma, ama kha lung nin thunga, a thu nin irngaia, a dânhai nin zômin chu irhniang nin ta, nam roiinpui tak hong ni nin ti.

¹⁷A thu nin zôm nuam noa, nin irngai nuam noa, pathian danghai nin biak likin chu,

¹⁸nangni ki hril infel, irhmang ngêt nin ta; Jordan râl, nin ilua hrang rama khan dam insôt no chin ni.

¹⁹A vuan hin inthang roi, hringna mo nin nuam thina, Pathian satvurna dong mo khosâl tongna, a kho tak mo nin inthang thu'nhretua irnêng le irvân ki ikoi a ni. Nangni le nin irchihai an dam mai theina hrangin hringna inthang roi.

²⁰ Rengpa nin Pathian kha lungthung unglân, a thu zôm unglân, ama kha chel khak roi; khanchu, nin irchibul Abrahamama, Isaka, Jakoba hai kuanga pêk a inkung rama khan nin irchihai le dam insôt nin ti,' a tia.

Dân Inhnina 31

Mosia thûltu Josua a chang ta

¹Mosia khan Israel mihai kuang thu an sîr thiaia;

² “Kum irzakhat sômhnia ulian ki ni tâka, nuam nuama suak lik thei khom ni ta ma ung; Rengpa khan ‘Jordan kêi thei no chi ni,’ a ni tia.

³Rengpa nin Pathian khan nin maton hruai mai a ta, khataka nam omhai kha nangni thatpai pe a ti; nin iluapai pehai hrang a ni;Rengpa insîr tâk angin Josua hin nangni hruai a ti.

⁴ Rengpa khan Amor-hai rêng Sihona hai le Oga ramhai a soisaka, an mihai a that zit ang khan anni khom soisak a ti.

⁵Rengpa khan anni kha nangni pe a ta, thu nangni ki ipêk ang takin nin isoisak hrang a ni.

⁶Milung inngar unglân, pût si sit roi; ama, Rengpa nin Pathian ngei khan nangni fepui thiai a ta, nangni inthâpaiin nangni rotsan ual no ni,” a tia.



⁷Josua kha Mosia'n a koia, Israel mi murdi inhriata, 'Ni milung inngarin lân, a sân chang ngit ro, an pahai kuanga pêk Rengpa inkung rama khan Israel mihai hi hruai inlût ni ta, ni inluatirhai hrang a ni.

⁸ Ama ngei, Rengpa khan, nangni intha no nia, chi no unglân, kamang no roi,' a tia.

Kum sari danha dân buhai tep hrang

⁹Mosia khan hi Pathian Dân hi lekhabua a irziak, Levia irchi, Thuthung Bôm irzôntu ochaihai kha pe a ti, Israel ulianhai khom a pêka,

¹⁰ Mosia khan an kuang, 'Kum sari mong ten, lâkai intâng ngaidam zoro inkung kuma kairêng kût laiin,

¹¹Rengpa nin Pathian hmun inkunga Israelhai kha a makunga an hong inlang hrang a ni.

¹²Mipui bukkhôm unglân, Rengpa nin Pathian chitna châng an inhriata, ki dân bua thu chuang murdi hi an zôm theina hrangin, pahai, nuhai, nâipang hai le nam dang nin khuua omhai khan irngai ri sehai.

¹³Khaang khanRengpa nin Pathian dân lan hre ngai loi, nin irchihai khomin, inhriat an ta, Jordan dung irkâna nin ilua hrang rama nin om sâng chu Rengpa nin Pathian a chitna lam an inhriat hrang a ni,' a tia.

Mosia kuanga Pathian thu'nsîr hnungkhôn

¹⁴Rengpa khan Mosia kuang, 'Dam insôt ta no chi ni; Josua koiin lân, nin biakna buka puan ina hong hruai ro, a tho hrang lei hril ki ti,' a tia. Mosia le Josua kha irtongna puan ina khan an fea, an va irhlan tâk a ni.

¹⁵Rengpa kha Irtongna puan ina khan sôm indingin hong inlang a ta, puan in mikota khan sôm kha an ding nguta.

¹⁶Rengpa khan Mosia kuang, 'Irngai ta, ni pi le puhai kuang zâl lat hrang ni ni ta; hi mihai hin ni thi tika chu ni uiresan an ta, thu ki irthungpuihai kha tho'nchâi an ta, ni rotsan an ta; an va lêngna hranga lei om nam danghai pathian kha ni biaksan an ti.



¹⁷An chungá ki ninginmur a ta, rotsanhái ki ta, siat zit an ti. thil saloi tak tong an ta; kei an Pathianin ki ompui ta no sikin hi thil hi an ituang a nih ti inhria an ti.

¹⁸Thil saloi tak an thoa, Pathian dang an biak tâk sikin anni ata ki hmêl ki ithup pat hrang a ni.

¹⁹‘Khasikin, hi hla hi irziak suakin lân, Israel mihai kha irchutir ro; an chungá ki milung hoiloizia an inhriatna hrang ni a ti.

²⁰An irchibulhai kuanga pêk ki inkung, khuaihlutui le dûttui luangna rama khan nangni hruai intung ngêt ki ti. Nuam dôr fâk hrang nei mai an ta, mar lu lul an ta, pathian danghai tiang irheiin chubai mûk ual ta an ta; ni hnuaisia’n ki thuthunghai kha tho’nchâi an ti.

²¹Thil irkhêltak takin a dehai hnunga khom hi hla hi an nâihai khomin lan sîr thei mai an ta, an sualzia inhriattir a ti. Atûn ata hi, pêk ki inkung rama ki hruai intung mâka khom hin an lungrîl irput dân kha kin hriat mai kha te,’ a tia.

²²Kha nikhua ngeia khan Mosia khan hla kha a’rziak suaka, Israelhai kha a’rchutir ngut ngut tâka.

²³Rengpa khan Nuna nâipa Josua kuang, ‘Milung inngarin lân, a sân irnak song ro, Israel mihai hi pêk ki inkungna rama khan hruaihai ro, nang ompui mai ki ti,’ a tia.

²⁴Mosia khan Pathian Dân kha lekhabua irkip takin a’rziaka.

²⁵A’rziak zoi tika chu Rengpa Thuthung Bôm irzôntu Levia irchihai kha a pêkhaia.

²⁶‘Hi Dân bu hi la unglân, Rengpa nin Pathian Thuthung Bôm kôla se roi, nin omdân irkhinaa a ikop hrang a ni.

²⁷Nin ihnangzia le nin tukullianzia kin hriat, kei ki la dam lai ngêta khom Rengpa chungá nin nuara, ki thi tena len vâng chu i ang takin mo nin iom hrang.



²⁸Nin ulianhai le nin hruaituhai kha hong pungkômhai sian hihai hi lei hril ki ti; irnêng le irvâna ki thu inhretu hrangin nangni ki ikoi a ni.

²⁹Ki thi hnunga chu a sân siat zoi nin ta, ki thu nangni irchutir kha zôm nuam no chin ni. Inhnung tena len vâng chu Rengpa ikhap kha tho si sit nin ta, a ninginmurtir nin ta, irhmangna nin ti,' a tia.

³⁰Mosia khan hi hla hi a hril suaka, Israel mi murdi'n an irngai mur tâka.

Dân Inhnina 32

Mosia hla

¹Irnêng le irvânhaio, ki thu hi nin mikuar sung unglân, ki thu hi irngaitua roi.

²Ki'rchutirna hi rua angin tho a ta, ki thu hi irdo angin tâ a ti. Hloisûl irnoi chungu rua ang le sûlnhâ chungu rua tui angin:

³Rengpa irhming kha inpuang ki ta, Kin Pathian kha chôindôm roi.

⁴Itinrêng sataka thotu, lungpui a ni, Dik takin roi a rêl ngai, Pathian iamom le dik, thil sa le dik tho ngaitu a ni.

⁵Pualoina ainei ma ni? Nei make, A nâihai kha kêng dem om chu, Irlo beng ngarhai le ihnanghai kha.

⁶Mi'nvêt le mi hnanghaio, hiang hin mo Rengpa nin Pathian kha nin ithuan hrang? Nangni neitu nin pa a ni, nangni a siama, nangni a inpuihlingtir a ni.

⁷Tianlai kha ngaitua suak u ta, Zoro liam pat tâkhai kha, i thil mo tung nin pahai irdon unglân, tianlai rêng thurchi nin ulianhai insîrtir u ta.

⁸An chungtaka namhai ram a sema, Mihai omna hrang an kung pe lai khan, Pathian nâihai phâkin an ramri a khang pehaia.

⁹Rengpa khan a dongtum hrangin Jakoba irchihai a inthang a ni.

¹⁰Ramchâra an chaninvâi a hmua, ram chôp phâivo saloi thônaa khan, a'rhlikhûa, a sân nangni an dota, a mit lailên angin nangni a enkola.



¹¹Irmupuiin a têhai vuang a irchuhai angin, A mitha pharhai chung a inrîm hrang ite boiin a siahai ngaia; khaingin, Rengpa'n Israelhai kha an tûkna hrang ata a hrung hai ngai.

¹²Rengpa vai kha an hruaitu a ni, nam dang pathian kop sa mahai.

¹³Tâng rama an chuang suaktira, rama thil mônghai kha an fâka, lung hmuna khom an oliv a ra mer mura.

¹⁴Dûtui an nei intama, an sehrâthai le kêlhai khan an belrahai lak an thâi, Basan ram belra le kêlchal ang, bu tui tak le grep tui uain ni ina.

¹⁵Israelhai kha an hong irchonga, a sân an hong irhniang tâka, an mar tel tul tâka, Siamtu, an Pathian kha an rotsana, saninhrintu, an lungpui kha an ngainêpa.

¹⁶Millim an ibiak kha a khôkmâk tak taka, thil porinche an ithohai khan a ning an murtira.

¹⁷Pathian ni loi ramilhli an biaka, an pahai inhriat ngai loi le chi ngailoi an biak tâka, pathian thar lâm te tehai.

¹⁸Anni neitu lungpui kha uksak mahai, annihai siamtu Pathian kha an rotsana.

¹⁹Rengpa khan a hmu'n chu a ning an mura, a nâi le tehai kha an thikpai ta.

²⁰Irbîksan ki ta, Itin mo an iom hrang thîr ki ta, irlo ihnang tâk an ni. Nâi sual tûngnaboi an ni.

²¹pathian ni loi an biak tika ki ningmur an kêlsuaa, an millimhai khan ki ning an inmurtira, Irchia tep kâi loihai hmangin ki ninginmurtir an ta, nam invêttak takhai khom hnarsa an ti.

²²Ki ninginmur chu mei angin chok a ta, irnêng thil murdi kâng irhmang a ti. rammual hnuaia zu tung a ta, mualhai irzunghai khom zu fapai ving a ti.

²³Siatna chi tinrêng an chung a intungtir ki ta, an chung a thal intha ki ti.

²⁴Phîngchâm inkhurin thi an ta, hri irkhêltak tak irvei an ta. Ram sahrânghaiin sê an ta, irnêng pila mirûl tûr neihaiin inchuk an ti.



- ²⁵Tuala khandai tong an ta, in sũaga khom thil irkhêltak tak, dôngmate ruatharte, vânglai that an ta, nâipang khom tar khom hôi no nihai.
- ²⁶Tûte inhriat ta loi hrangin ki'rhmagtir chit hrang mani ki ti lik tâk a ni.
- ²⁷'A mihai kha kin soisak ngheka,' tiin. Nin râlhai kha irsor an tih ti ki chitnrîm a ni, A soisaktu chu keima ki ni lik tâk a ni.
- ²⁸Nam invêt tak kha an lei ni, thil rêng rêng inhre thei mahai.
- ²⁹Vâr ualhai sian chu inhre thei an ti, an om hrang dân thîr thei an ti.
- ³⁰An lungpui khan rotsan no sian, An Pathian Rengpa khan inthikpai no sian, inkhatin a sâng têlin an irzûl hrang ma ni? Inhni vaiin a nuai têlin an ingam hrang mo?
- ³¹An râlhai khomin an Pathian kha Israelhai Pathian nêkin chu a nêp ual ti an inhriat.
- ³²Sodom le Gomora anga sual, an râlhai kha grep khâ, tûr nei ang hi an ni.
- ³³An uain khom kha mirûl tûr ang a ni, mirûl inchuk anga ichiom a ni.
- ³⁴An râlhai thil tho Rengpa khan an hriat maia, phubâ lâk zoro'nchum a zong,
- ³⁵ an ke sir kha a'rdang tika phubâ la ki ta, thuan ki ti, an siat zoro kha a hong nâi ta. An chung a hong tung hrang kha tuang lat an ti.
- ³⁶Rengpa khan a mihai san a ta, a siahlohai dongtum siatzia hai, mi ngar khom ngar loi khom a thi ban tômzia a hmuin inren nôk a ti.
- ³⁷A mihai kha 'Nin pathian thilthothei, nin iiam ngaihai kha khôn mo an iom?
- ³⁸An irbôlna thâi fâktu, an iin hrang thilinhlan uain intuhai kha? hong thoiin hong changpui sianlân chu, nangni sũnghualtu hong ni ri se.
- ³⁹Keima vai hi Pathian kha ki ni, om ta tak mahai pathian danghai, ki thathaia, kin damtirhaia, ki ta ni sutpai thei tûte om mahai.
- ⁴⁰Pathian hring ki ni hi, bân pharin ki nuam le thu kin kung ngai.



⁴¹Khandai intât inngaih ki ta, dik takin roirêl ki ti. Ki râlhai chungâ phubâ la ki ta, ni khôkmâktuhai chu hrem ki ti.

⁴²An thisen chu ki thala luang a ta, ki khandaiin thisen insua a ta, râl sam seitak takhai kha sâtpai a ta,

⁴³Namhaio, Rengpa mihai hi inpâk roi, anni thattuhai kha hrem thiai a ta, a râlhai chungâ phubâ la a ta, a mihai sual a ngaidam ngai.

⁴⁴Mosia le Nuna nâipa Josua khan kha hla kha mipui inhriata insîr an ti.

Mosia'n mipui an thorna hnungkhôn

⁴⁵Mosia'n hi thu hi Israel mihai kuang an sîr zoiin chu,

⁴⁶'Hi ki thupêk murdi hi ngaitua sabak unglân, nin nâihaiin hi dân thuhai hi zôm hrangin irchutirhai roi.

⁴⁷Hi thu hi thu mai mai ni ma, hringna thu a ni, Jordan dung fe kâia nin va ilua hrang rama khan tho unglân, dam insôt ni ti,' a tia.

⁴⁸ Kha nikhuuaa khan Rengpa'n Mosia kuang,

⁴⁹"Moab ram, Jeriko dep, Abarim tânga Nebo tâng sîpa khan kâiin lân, an ram hranga Israelhai ki ipêk Kanaan ram kha thîrin lân;

⁵⁰Kha khan, thi ni ta, ni pi le puhai kuang fe ni ta; ni upa Arona, Peor tânga a mihai kuang hruai a ni ang khan.

⁵¹Inzinna ramchâr, Masa-Kades tui hmuna khan Israelhai laia ki thu ni tho'nchâia, Israelhai makunga ni ni ichôiindôm loi a ni.

⁵²Khasika khan ram kha hlatak ata vaiin hmu thei ni ti; Israel mihai omna hranga ki ipêk ram kha sir no chi ni," a tia.

Dân Inhnina 33

Mosia'n Israel namhai sat a vurna

¹Pathian mi Mosia khan a thi mân, hiang satvurnahai hi Israel mihai ta hrangin a ngên pehaia.



- ²Rengpa kha Sinai tâng ata a zuanga, Misa angin Edom rama a suak Paran tâng ata a mihai a zuang êl invâra, Vântîrtôn sîngkhatin an zuia, A chang tiang mei a chok luai luaia,
- ³Rengpa khan a mihai an rena, A tahai kha a enkola, a ke hnung an zuia, a thupêkhai an dong.
- ⁴Mosia'n Dân thu a ni pêka, Jakoba irchihai irchon hlu tak kha.
- ⁵Rengpa kha a mi Israelhai rêng a nia, nam hruaituhai le Israel pungkhômhai chungha khan an lala.
- ⁶Reubena chungchâng hiang hin an sîr: “Reubena kha dam mai sianlân, a mihai kha a sân tôm khomhai sian,” a tia.
- ⁷Juda chungthu insîrin; “O Rengpa, Juda kamang khêk irngaitua'n lân, a urênghai vâv nôk ri sehai, a râlhai doipui ro,” ti hi.
- ⁸Levi hai chungthu an sîra; “Ni siahlo iamom Levia irchihai khan Urim le Thumim dônhai sian, ni thu hril ngai ro, Masa-ah khan ni fiaa, Meriba tuihaia nin ibei kha.
- ⁹A nuhai, an pahai, chungha an iamom nêkin, ni chungha an iiamom ual a ni. Ni thupêk an zôma, ni thuthunga a iamom a ni.
- ¹⁰Ni nâi, Jakoba irchi hai kha ni dân irchutir an ta, ni maichâma mirimhoi hâl an ta, Hâlvôm thilinhlan hâl ngai an ti.
- ¹¹O Rengpa a ineihai kha satvurin lân, a thilthohai lei lôm roh. A râlhai kha an irnak sâtpaiin lân, a khôkmâktuhai kha ngîr suak no ri sehai,” a tia.
- ¹²Benjamina irchihai chungchâng hiang hin an sîr: “Rengpa ditsak bîk le inren bîk a ni, a mithâ hnuiaia lênga, sîn sôtin enkol a ta, a'rnâipui ngit ngai,” a tia.
- ¹³Josefa irchihai chungchâng hiang hin an sîr: “An ram kha Rengpa khan irvân irdo irfîmin infa sianlân, Irnêng sîngrîl ata tui leh satvur ri se.
- ¹⁴An thei rahai khan misa hmu insa sianlân, a zoro taka hmin mer mur ri se,
- ¹⁵tâng an isong irhoitak tak le mualhai kha thei tui tak takin sip ri se.



- 16**An rama khan thil sa sip sianlân, sül buka thu'nsirtu khan satvur ri se, a satvurna kha Josefa lua hong vur sianlân. a urênghai kaihruaitu a ni kêng.
- 17**Josefa chu sehrâtchal anga hrât a ni, Sele irki anga irki sa a nei, a'rkihai kha Manasea irchi sâng pâla Efraima irchi sîngkhat pâl an ni. Nam dang sik a ta, kôlkil dênin vôr indarh a ti," a tia.
- 18**Zebulun le Isakara chungchâng thu hiang hin an sîr: "Tuikhangliana bepâr, Zebulun kha irhniang ri se, Isakara khom in tiang a dongtum kha pungin sa ri se.
- 19**An tângrama om hrangin ram dang an koia, kha khan irbôlna dikin irbôl an ti. Tuikhanglian irchongna an irchôka, a vakam chiaiphoia thil sa an bûma," a tia.
- 20**Gada chungchâng thu hiang hin an sîr: "Gada ram irzattu kha inpâk roi, bân sê tana luvun hlîk hranga kâmkeibaknei irbîk ang hi a ni.
- 21**Ram satak an inthanga, Israel hruaituhai an pungkhôma khan hruaitu dongtum an inchangtira, Rengpa thupêk le dân an zôma," a tia.
- 22**Dana irchi chungchâng hiang hin an insîr: "Dana kha kâmkeibaknei tuai a ni, Basan ram ata a lei zong suaka," a tia.
- 23**Naftalia chungchâng hiang hin an sîr: "Naftalia khan Rengpa satvurna a donga, irhniangin ditsakna a dong, A ram khan dîl ata sim tiang a dên rakin an ramin a suna," a tia.
- 24**Aseri chungchâng hiang hin an sîr: "Nâi danghai nêkin Asera kha a râlvân a sa, a urênghai ditsakna dong sianlân, a ke kha hriaka inchie ri se.
- 25**Thîr le dêrin an khua kha kal an ta, Dam takin lêng mai ri se," a tia.
- 26**Israelhaio, nin Pathian ang hi pathian dang om mahai, Nangni changpui hrangin roiinpui taka sôm chungu chuangin irvân khi a'rfang tuai tuai.
- 27**Kumtuang Pathian kha nangni enkoltu a ni, a bân hrât khan nangni a sînghuala, nin makunga râl an hnotsuaka, "Inboipai zit roi," a ti.



²⁸Jakoba irchi Israelhai kha lungthi takin an om tâka, Bu le uain tamna rama an om tîr tîra, Irvân irdo'rfîm infa inlianhai khan an iam.

²⁹O Israel, ni vânei bâka, Nangma ang hi tukhom om mahai, Rengpa saninhringna nam nin nia, Rengpa kha ni pho le khandai a ni. Nang sînghual hrang le inhnêtu ni ni theina hrangin ni râlhaiin lungkham an ngên tâka; nangin sirpha ni ti.

Dân Inhnina 34

Mosia thi thu

¹Khan, Mosia kha Moab phâia irthokin Jeriko irdîna Nebo tâng, Pisga tâng sîpa khan a hong kêia. Rengpa khan Gilead ram murdi Dan dênin an entir;

²Naftalia le Efraima ram murdi, Manasea le Juda ram murdi, a thang tiang tuikhanglian dênin;

³Sim ram le Tûm khopui, Jeriko phâi irhôr, Zoar dênin.

⁴Khan, Rengpa'n a kuang, "Hi ram hi a ni, Abrahama, Isaka, Jakoba hai kuang, Nin irchihai la pe ki ti, tia irkhâmin, ki lei inkung kha, a hmu kha nang ki'rhmutir phot a ni; khannisianlân, so taka son chu nang infetir no ning," a tia.

⁵Khanchu, Rengpa siahlo Mosia kha Rengpa thu angin Moab rama khan a thi tâka.

⁶Khan, Beth-peor irdîna Moab ram irhôra a phûma; khannisianlân, a thân kha atûn ten tukhomin inhre mahai.

⁷Mosia kha a thi khan kum irzakhat le sômhni mi a nia; a mit zîng maka, a'rnak khom chuai mah.

⁸Israel irchihai khan Mosia kha Moab phâia khan sîn sômthum an châ tâka; kha khan, Mosia sînna chap nikhuahai kha a hong mong tâka.

⁹Khan, Nuna nâipa Josua kha vârna irtha'n a sîpa, Mosia khan a chung a kut a'rngat sîkin; khan, Israel irchihai khan a thu an zôma, Rengpa'n Mosia thu a pêk ang khan an thoa.



¹⁰ Khataka irthoka khan Israelhai laia khan Mosia anga Rengpa'n hmâiirsan ngeia a ibiak deipu zel hong om ta mahaia.

¹¹Irsinsiana murdihai le, thilirkhêl murdihai, Faraa le a siahlohai murdi kuang le Aigupta ram murdia inentira,

¹²kut hrât tak le ichiomtak taka Israel mi murdihai mithmua Mosia'n a itho anga tho om ta mahaia.



Josua

Josua 1

Pathianin Kanaan ram lût hrangin Josua a tîr

¹Rengpa siahlo Mosia thi zoiin Mosia changpuitu, Nuna nâipa Josua kuangRengpa'n,

²“Ki siahlo Mosia chu a thi tâka, Israel mi murdi hi Jordan dung irkânpuî ro, ki ipêk hrang rama fe hrangin irsiam roh.

³ Mosia kuanga ki ihril tâk ang khan nin kezaphaa nin isir murdi chu, nangni pe zit ki ti.

⁴Sim tiang ramkâr ata hmâr tiang Lebanon tâng; sak tiang Eufrates vadung ata nitâk tiang Hit mihai ram, Mediteranean tuipui dênin nin ram ni a ti.

⁵ Josua, ni dam sêngin tukhomin nang inhnê no nihai. Mosia kuanga ki iompui angin nang ompui mai ki ti, nang intha viat no ning.

⁶ Hâitakin irnak song ro; khanchu, an irchibulhai kuanga pêk ki inkung ram chu hruaitu changin lûtpuihai ni ti.

⁷Hâitakin irnak song phot mai ro; Mosia'n ki dân a ihrilhai hi zôm zitin lân, inkhatte lua zôm loiin om no ro; khanchu lam tinrênga hlochuk ni ti.

⁸Itiklai khomin ki dân bu sênga thu irziakhai hi tep irnghil no ro, ni zôm zit theina hrangin a sîn a zânin irchu ngai ro; khanchu lam tinrênga hmanchangin hlochuk zêl ni ti.

⁹Hâitakin irnak la roh ki iti kha inhriat mai ro, chi no'n lân, rot no ro; kei Rengpa hin ni fena tina nang ki ompui mai a ni,” a tia.

Josua thupêk

¹⁰Josua'n Israel mipui hruaituhai kuang,

¹¹“Riakbuk hmuna fe zit unglân, mihai kuanga, ‘Sîn thum sêngin, Rengpa nin Pathianin nangni a ipêk ram lua hrangin Jordan dung ei irkân hrang a nia, fâk nêk hrang siam irfûk roi,’ ti roi duah,” a tia.



¹² Reubena namhai, Gada namhai le Manasea namhai zât chimriphai kuang Josua'n,

¹³“Rengpa siahlo Mosia'n nin kuang hi ang hin a ihril kha inhre mai roi, ‘Nin Pathian Rengpa'n Jordan dung sak tianga ram nin dongtum hrang nangni pêk a ti;

¹⁴nin dôngmahai, nin nâihai, nin sa vâihai chu hi laia hin lei om an ta, nin laia râltuam chôituhai hi tuidung lei kâi masa nin ta, nin urêng Israelhai hi nin ichangpuihai hrang a ni.

¹⁵Rengpa nin Pathianin nangni a pêk hrang ram, Jordan dung nitâk lam tiang chu an lua fela, Israel namhaiin an omna hrang chita hoi taka an om zoi tena vai kîr thei nin ti, Jordan nisua tianga ram, Rengpa siahlo Mosia'n nangni a ipêkna hin om thei nin ti, a ti kha,” a tia.

¹⁶Josua chu an sâma, “Ni nin hril la lamin tho kin ti, ni ni itîrna ti tiang fe zel kin ti.

¹⁷Mosia chong kin izôm ngai angin ni chong khom zôm kin ti; Rengpa nin Pathianin Mosia a iompui ngai ang khan ompui mai ri se.

¹⁸Ni thu hnôla, ni thupêk zôm nuam loi chu thatpai ni ri se. Hâitakin irnak song phot mai ro,” an tia.

Josua 2

Josua'n Jeriko khua va envêl hrang mi a tîr

¹ Nuna nâipa Josua'n Sitim ram ata va envêl hrangin mi inhni a tîra, “Ram chu inrûkin va envêl u ta, Jeriko khua kha chu va en infel ual roi duah,” a tia. Khua an va tungin chu riak tumin notizuar Rahabi in an pana.

²Jeriko rêngin, Israelhai itîr envêltuhai chu kha nî zâna khan an hong tung ti a lei inhriatin,

³Rahabi kuang, “Ni ina hong tunghai kha ram envêl hranga hong an ni, hong hruaihai ro,” ti hrangin mi a tîra.



⁴Kha nu khan mikhual inhnihai chu a hruaia, a thuphaia, “Mi inhni chu an hong tung ngeia, kho tianga mi mo an inih ti inhre viat ma ung.

⁵Zân a zîng vâng vângin, kul mikot an khâr mân viat khan an suak nôk tâk a ni; kho tiang mo an ife hrang ti inhre ma ung; irzûlhai zel unglân, la zu chel irmanhai nin ti,” a tia.

⁶Kha mihai kha in chung a hruaihaia, Nâniang kung irbukkhômna kêra khan a thup inrûkhai a ni.

⁷Rêngin mi a itîrhai chu Israelhai irzûl hrangin an intân suaka, kul mikotpui chu an khâr nôka, Jordan dung dênin an irzûlhaia.

⁸An zâl mânin Rahabi chu in chung a luia,

⁹an kuang, “Rengpa’n ram hi nangni a pêk tâk ti kin hriat.

¹⁰ Aigupta ram ata nin hong suak khan Rengpa’n nin matona Tuipui Sen kha nangni an kangtir pea, Jordan dung râla Amor-hai rêng inhni Sihona le Oga nin ithathai khom kha kin inhriata.

¹¹Kha kha kin inhriatin kin rot zoia, nangni chi sikin mi tin mumal nei loiin kin om ta. Nin Pathian Rengpa hi vâng chung le hnuiaia roirêltu a ni.

¹²Nin chung a sin sa ki itho ang takin, ki insûngkua chung a sin sa tho hrangin Pathian irhming sâmin chonginkung unglân, kha thil inhriatna hrangin irsinsiana ni pe roi duah.

¹³Ka pahai, ka nuhai, ki nuchahai le ki urêng hai, kin sûngkuain nin zôk unglân, ni that loi hrangin chonginkung roi duah,” a tia.

¹⁴Kha mihai khan nupangnu kuang, “Kin hril tum hi kin ti no’n chu Pathianin kin hringna hi la ri se! kin hong lam hi tûte nin hril no’n chu, ram hi Rengpa’n a ni pêk tika, satakin ni chung a tho kin ti,” an tia.

¹⁵Rahabi in hi khopui kulbang irnghata om a nia, tukver ata anni chu hruihrualin an thâkhaia.



¹⁶Khan ama'n, "Tâng tiang nin fe no'n chu nin râlhaiin nangni hmu an ti, sîn thum irbîk unglân, nin râl nangni irzûltuhai an hong kêr nôk tika, nin nuam nuamna fe ta nin ti," a tia.

¹⁷Kha mihai khan, "Ni iti anga tho hrangin chonginkung kin ti, hiang hin ni ti no'n chu keini'n mophur no ni ung.

¹⁸Irngai roh, hi ram kin hong lût tika, hi pat sen hi ni ni inthâkna tukvera khan khit ro. Ni pahai, ni nuhai, ni nuchahai le ni pa insûng mihai kha ni ina koikhômhaiin lân;

¹⁹kholaiia tukhom suak no ri sehai, a suak an omin an thisen mô chu anni'n pêl an ti.

²⁰Kin chong hi mi tukhom ni inhril hrang ni ma, nin hrilin chu keini khomin chong ni ni inkungtir ang kha ti no ni ung," an tia.

²¹Rahabi'n, "Nin thu ang khan ni ri se," a tia. An fetirhaia, an suak tâka. Pat sen chu tukvera khan a khit tâka.

²²Tâng tianga khan an fea, sîn thum an irbîka. An râlhaiin sîn thum an hong zong vêla, aniachu hmu mahai.

²³Kha mi inhnihai kha tâng ram ata an suaka, tuidung an irkâna, Josua kuang an tunga, an thil va tok murdi chu an hrila.

²⁴Josua kuang khan, "Rengpa'n ram pumpui chu a ni pêk ngêt a ni ta, kha rama mi omhai chu eini ni chi'n, an rot thiai ta," an tia.

Josua 3

Israelhaiin Jordan dung an irkân

¹A tûka Josua le Israelhai chu zînga an thoia, Sitim zôl ata Jordan dung kôla an irsona, ivadung an irkân mânin an riaka.

²Sîn thum pêna chu hruaituhaiin an riakna buk chu an irfanga,

³"Rengpa nin Pathian Thuthung Bôm kha ochaihaiin an irzôn nin hmu tena chu, nin omna hmun ata irson unglân, zui zêl roi.



⁴Nin fena ngai loina hmuna fe hrang nin nia, an hnung nin izui zêl hrang a ni. Aniachu, thuthung bôm kha nâi hrai no roi, mêl khat vêl nin kêra irhla ni ri se,” an tia.

⁵Josua'n mipuihai kuang, “Irthiang roi, nangtûk hin Rengpa'n ei laia sinirkhêl tak a itho hrang kêng,” a tia.

⁶Josua'n ochaihai kuang, “Thuthung Bôm chu irzôn unglân, fe masa roi,” a tia. Khanchu, Thuthung Bôm kha an irzôna, mipuihai matona fein mâ an hruai tâka.

⁷Rengpa'n Josua kuang, “A vuan hin Israelhai mithmua nang chôirsâng ki ti, Mosia kuanga ki iom ang khan ni kuanga khom ki om mai, ti lei inhriat an ti.

⁸Khan thuthung bôm irzôntu ochai chu Jordan vadung pang nin tungin chu ngîr mai ri sehai, tiin thu pe ro,” a tia.

⁹Josua'n Israel mihai kuang, “Hong unglân, Rengpa nin Pathian thu hi irngai roi,” a tia.

¹⁰Josua'n, “Pathian hring chu nin laia a oma, nin matona Kanaan mihai, Periz mihai, Girgas mihai, Amor mihai, Jebus mihai hi an hnotsuak ngêt hrang a nih ti inhre ngêt nin ti.

¹¹Jordan vadunga nangni hruaiin rammual pumpuiaRengpa thuthung bôm chu fe masa a ti.

¹²Israel nam tin laia, mi sôm khat inhni inthang suak unglân,

¹³rammual pumpui Rengpa thuthung bôm irzôntu ochaihai kezapha Jordan tuidung an sir laiin, Jordan vadunga tui luang chu chat a ta, sak tiang ata tui hong luang murdi chu hmun khata irchunghôm a ti,” a tia.

¹⁴Mipuihai chu Jordan tuidung kêi hrangin an puan in ata an suaka; thuthung bôm irzôntu ochaihai chu an fe masaa.

¹⁵Kha lai khan bu ât zoro a nia, Jordan vadung lian lai a nia, a kuang kha tui a sip mata. Thuthung bôm irzôntuhaiin Jordan tuidung an va sirin chu,



¹⁶sak tiang ata tui zuang luang chu a chata, a hnâr tianga Zarethan bul Adama khopui dênin tui chu irbukkhômin a'rngama. Araba tianga tuihui thia luang lût ngai chu a kanga, a chat zita; mipuihai chu Jeriko khua kôl irdîn taka khan an irkân kâi tâka.

¹⁷Israel mihai chu an rêngin irnêng châra Jordan vadung chu an irkâna; thuthung bôm irzôntuhai chu li laia khan irnêng châra mipuihai kâi zoi mâka chu an indinga.

Josua 4

Inhriatmaina lung an phun

¹Nam pumpui Jordan dung an kâi zit hnunga chu Rengpa'n Josua kuang,

²"Israel nam tin laia an inthangsuak mi sômkhath inhnihai khan,

³Jordan dunga Ochaihai indingna tak ata lung sômkhath inhni, inkhat zêlin irputhai sianlân, a vuan zâna nin riakna hrang hmuna sia ri sehai," a tia.

⁴Josua'n nam tin ata Israel mihaiin an inthangsuak mi sômkhath inhni chu a koihaia,

⁵an kuang, "Rengpa nin Pathian thuthung bôm chu va khêlin, lung inkhat zêlin, an rêngin Israel nam zât, Jordan dung laitak ata nin dâra irput unglân,

⁶kha lung kha Rengpa sintho inhriatmaina hrang a ni. Nakana nin nâihaiin, 'Hi lunghai hi itina mani an ti tena,

⁷'Rengpa thuthung bômin Jordan tuidung a kâi lai khan Jordan tui luang chu a chata, hi lunghai hi Israel irchihaiin kumkhuaa an inhriatmaina hrang a ni hi,' la ti nin ti," a tia.

⁸Josua thu angin Israelhaiin an thoa, Rengpa'n Josua kuanga a ihril ang tak khan, Israelhai nam Jordan laitaka lung sômkhath inhni chu an lâka, an riakna hmuna khan an irput zêla, kha khan an siaa.

⁹Josua'n thuthung bôm irzôntuhai ngîrna Jordan vadung lai taka khan, lung sômkhath inhni a phun saa, kha kha atûn ten hin a la om mai.



¹⁰Mosia'n Josua kuang thu a lei ipêk tâk murdi anga, Rengpa'n mipuihai kuanga ti hranga, Josua thu a ipêk kha an ti zoi mâka chu ochai thuthung bôm irzôntuhai chu Jordan vadung laia khan an inding maia, khanchu mipuihai kha inrang takin an irkân tâka.

¹¹An kâi zit hnunga Rengpa Thuthung Bôm irzôntu ochaihai chu mipui matona an fe tâka.

¹²Reubena namhai, Gada namhai le Manasea nam chimriphaiin râlthuum chôiin, Mosia kuanga thupêk ang khan, mipui matona mâ hruaiin an kâia.

¹³Rengpa kôla irdoi irsiam sai rêng mi sîng minli'n Jeriko kôl zôl an va tung tâka.

¹⁴Kha laia khan Israel murdi mithmua Rengpa'n Josua chu a chôiiirsânga, a dam sîng chu Mosia ang takin a'rngaiirsânga.

¹⁵Rengpa'n Josua kuang,

¹⁶“Thuthung bôm irzôntu ochaihai kha Jordan vadung ata hong suak ri sehai,” a tia.

¹⁷Josua'n ochaihai kuang, “Jordan dung ata kha hong suak roi,” a tia.

¹⁸Rengpa thuthung bôm irzôntuhai Jordan dung ata an hong suaka, ivadung pang an sirin chu Jordan tui chu a luang nôk zut zut tâka, matona ang dênin ivadung chu a sip nôk tâka.

¹⁹Jordan tuidung chu tha khatna tarik sôm ni khan an irkân a ni. Jeriko sak tiang ramri kôl Gilgal-a omhmun an siam tâka.

²⁰Jordan dung ata an lung lâk sôm khat inhni Josua'n Gilgal-a khan a phuna.

²¹Israel mihai kuang, “Nakana nin nâihaiin an pahai kuang, ‘Hi lunghai hi i thôna ma ni? tia an irdonhai tena,

²²‘Hi zoroa hin Israelhaiin irnêng châra Jordan tuidung an irkân a ni’ tiin nin irchihai chu lan hriattirhai nin ti.

²³Rengpa'n Tuipui Sen kin irkân mâka tuipui a inchattir ang tak khan, Rengpa'n Jordan tuidung kin irkân zit mâka chu tui luang an chattira.



²⁴Hi thil sika hin mi tukhomin Rengpa sinthotheizia inhriat an ti, kumkhuain nin Pathian Rengpa hi chôiirsâng nin ti,” a tia.

Josua 5

¹Jordan dung nitâk tianga om, Amor rêng hai murdi le Mediteranean tuipui panga om Kanaan rama rêng murdihaiin Israelhai Jordan dung an irkân sâng chu vadunga tui chu Rengpa'n an kangtir ti an lei inhriatin an chia, an lei rot zit tâka.

Gilgal-a sertan thu

²Kha lai khan Rengpa'n Josua kuang, meilung chemte siamin lân, Israel mi, ser la tan loihai ser tanna neipuihai nôk ro,” a tia.

³Josua'n meilung chemte a siama, Israelhai chu Gebeat-ha-arat hmuna khan an ser a tan pehaia.

⁴Josua'n an ser a tan nasan chu hi hi a ni: Aigupta ram ata suak pasal râlkâp mi murdihai chu ramkâra an thi zit tâka,

⁵an suak phuta khan ser an tan zit a ni; lampuia an hong sênga suakhai kha chu an ser la tan loi an ni.

⁶Israel mihai chu ramchâra kum sômminli an invâia, Aigupta ram ata an hong suak ata râlkâp mihai chu an thi zit tâk a ni. Rengpa thu an irngai no sikin khuaihlutui le dûttui luangna ram inkung, eini ni pêk hranga a chong a lei inkung kha, tung no nihai, tiin Rengpa'n chong a lei inkunga.

⁷An irthûla, an nâihai a don inlianhaia, kha mihai kha a ni Josua'n ser a itan pehai chu a ni, lampuia an ser an tan no sikin.

⁸Mipuihai murdi ser an tan hnunga an dam mâka chu an riakbuka an oma.

⁹Rengpa'n Josua kuang, “A vuan hin Aigupta mihaiin nangni an hmusitna kha kin boipai tâk,” a tia. Kha hmun kha atûn ten hin Gilgal an ti ta a ni.

¹⁰ Gilgal-a Israelhaiin riakbuk an khuara, Jeriko phâizôla khan, kha tha tarik sôm khat minli ni khan ferkân kût an hmanga.



¹¹Ferkân kût zoia sîna khan, kha rama barli inzêi inphuak, chol pol loi bai le changpêr an fâk sa tâka.

¹²Kha rama bu an fâk ata chu mana khom tâk ta mah. Israelhaiin mana fâk hrang nei ta mahaia, kha nî kum ata chu Kanaan rama bu le bâl thar an fâk tâk a ni.

Josua le mi inkhat khandai chôi

¹³Josua chu Jeriko khua kôla a om laiin mi an envêla, mi inkhat, khandai chôi hi a matona a lei inding a hmua. Josua'n a va pana, "Keini tianga sipai mo ni inih kin râl mo ni ini?" a tia.

¹⁴"Ni make, Rengpa sipaihai hruaitu ki nia, ki ihong tâk a ni hi," a tia. Josua chu irnênga khûksadelin a kûna, "Ni siahlo kuanga hin imo hril ni nuam?" a tia.

¹⁵Rengpa sipaihai hruaitu'n Josua kuang, "Ni kekok kha khek ro, ni ngîrna kha hmun irthiang a ni," a tia. Josua'n a kekok a khek tâka.

Josua 6

Jeriko siat thu

¹Israelhai lût thei loi hrangin Jeriko kul chu an khâr khaka; tûte suak thei mahai, tûte khom lût thei mahai.

²Rengpa'n Josua kuang, "Jeriko khua chu an rêng le a sipai hrât huaisenhai leh nang ki pêk tâk.

³Nang le râlkâp mi murdi'n khopui hi a sîna voikhat hong vêl phot nin ta; khang khan sîn ruk nin ivêl hrang a ni.

⁴Sîn sari ni'n chu ochaihaiin belra chal irki bekul chôiin Thuthung Bôm irzôntuhai matona khan fe an ta, belra irki chu tum an ta, voisari an ivêl hrang a ni.

⁵Khan bekul chu inring takin tum an ta, kha kha nin inhriat tika thei dôrin mipui murdi khêk sup sup unglân; kul chu chim rup a ti; khanchu sipaihai kha irdîn ngitin khopui chu lût thei an ti," a tia.



⁶Nuna nâipa Josua'n ochaihai chu a koia, "RengpaThuthung Bôm chu irzôn unglân, ochai sari, bekul chôituhai malam hruaihai sianlân, zuihai roi," a tia.

⁷Mipuihai kuang, "Fe unglân, khua chu vêl roi, RengpaThuthung Bôm matona khan râlthuam chôituhai fe masa ri sehai," a tia.

⁸Josua'n mipuihai kuang thu a hril zoiin chu a iti ang khan an tia; bekul chôitu ochai sarihaiin bekul chu an tuma; Rengpa Thuthung Bôm irzôntuhaiin an zuia.

⁹Bekul tumtu ochaihai matona râlthuam chôituhai an fea, Thuthung Bôm hnung tianga râlthuam chôituhaiin hnung tiang an hrunga. Bekul chu mong loiin an tum ngota.

¹⁰Josua'n mipuihai kuang, "Khêk roi duah, ki ti tika thei dôrin nin ikhêk hrang a ni, ki ti mân chu nin ikhêk hrang ni ma," a tia.

¹¹Rengpa Thuthung Bôm irzôn pumin khua chu voikhat an vêla, an riakbuka an kîr nôka, zâna an riaka.

¹²A tûka Josua chu zînga a thoia, ochaihaiin Thuthung Bôm chu an irzôn nôka.

¹³Râlthuam chôiin malam an hruaia, ochai sari, bekul chôiin an zuia, bekul chu chumloi chatloiin an tuma; Thuthung Bôm irzôntuhai chu râlthuam chôihaiin an hong hrung thiaia.

¹⁴A sîn hninaa khom khua chu voikhat an vêla, riakbuk tiang an kîr nôka. Khaang ngêt khan sîn ruk an vêla.

¹⁵A sîn sari nî khan chu zînga a vâr tînin an thoia, an tho dân pangaiin khua chu an vêl nôka; kha ni khan chu voisari an vêl irkuala.

¹⁶A voisari an vêlnaa ochaihaiin bekul an hong tumin chu Josua'n, "Khêk ta roi, Rengpa'n khua hi a ni pêk tâk!



¹⁷Hi khopui le a sũaga om murdi hi Rengpa hranga pêkhlet a ni ta. Ei mi tîrhai lei inzôktunu sikin Rahabi le a ina om murdi chu inzôkin a iom hrang a ni.

¹⁸Kha, thilser tak rêng rêng chu ite nin insiat hrang ni mah, inkhat khom nin ilâk hrang ni ma, nin lâkin chu Israelhai om khômna buka siatna irkhêltak a itung hrang a ni.

¹⁹Sumru hai, rângachak hai, dâr hai leh thîrhai chu Rengpa sum ina sataka sia hrang a ni,” a tia.

²⁰Khanchu, ochaihaiin bekul chu intông nuai nuaiin an tuma, mihaiin kha kha an inhriatin chu an khêka, kul bang chu a chim tâka; an mâni mân tiang irdîn ngitin an lût ta sup sup, khua chu an lâk tâka.

²¹Khua chu an insiat zita, a sũaga om nupang pasal, ulian nâipang, sehrât hai, belra hai, sakuartung hai le ileh khan khandaiin an sât thathai zita.

²²Ram envêltuhai kuang, Josua’n, “Notizuar ina fe unglân, kha nu kha a nei murdi le va hruai suak roi,” a tia.

²³Envêltu ruatharte, a ina tunghai khan Rahabi chu a pahai, a nuchahai leh a urêng irnaipui, a iompuihai leh a nei murdi leh ile an hruai suaka, Israel riakna hmuna khan an hruaia.

²⁴Khua leh a sũaga om murdi chu an hâl zita; sumruhai, rângachak hai, dâr bêlhai, thîrhai rêk chu Rengpa sum ina an siaa.

²⁵Jeriko envêl hranga Josua mi tîrhai a lei inzôkhai sikin, notizuar Rahabi chu a pa insũaga mi le, a nei murdi le ileh Josua’n a sansuaka, Israel laia atûn ten hin a la ikop mai a ni.

²⁶Kha zoi chu Josua’n mipui chu hiang hin chong a bêhai tâka: “Jeriko khua inding nôk tumtu chu Rengpa khomâksâm dong ri se, A lungphûm siamirfûk nôktu chu nâilutîr inchân sianlân, A kul lampui siamtu chu a nâimitum inchân ri se,” a tia.

²⁷Rengpa’n Josua chu a ompuia, ram pumpuia a’rhming an thang tâka.



Josua 7

Akana sinsual thu

¹Israelhaiin thil ser tak kha ngaisak mahaia: Juda irchi Zera nâi, Karmia nâipa Akana'n thilser tak senkhat chu a va lâka, Israelhai chungpa Rengpa chu a sân a ning an mur tâka.

²Bethel sak tiang Bethavan kôla om Ai khua envêl hrangin Josua'n Jeriko ata mi a tîra. Anni chu an fea, Ai khua chu an envêla.

³An hong kêr nôka, Josua kuang, "Mi murdi fea doi ual nang ma, mi sânghni sânghthum vêl dôr fehaisian, Ai khua chu hong doi ri sehai, an tômte kêng; mi murdi fe nang no ni," an tia.

⁴Khanchu, mi sânghthum vêlin an hong doia, khannisianlân Ai khua mihai doi ngam loiin an intân zoi tâka.

⁵Ai khua mihaiin kul ata Sebarim dênin an irzûlhaia, an tânhai chu mi sômthum kiruk an thata. Israelhai milung chu a'rhniama, an chia an rot zit tâk.

⁶Josua le Israel upahaiin an puan an inpot thêra, Rengpa Thuthung Bôm mân tiang an inboka, an lua vâiphin an phula, khohloi dênin an oma.

⁷Josua'n, 'A poi okna, Rengpa Pathian, Amor mihai kuta soisak hrang le irhmang zoi hrangin, i sik kher mo Jordan dung hi ni ni inkâtir hi te? Jordan sak tianga om kha lei lungni tôk mai inlân a isa hrang a ni.

⁸O Rengpa, Israelhai chu an râlhaiin an doi mai tâk sikin, chongna hrang khom nei ta loi kin ni hi.

⁹Kanaan mihai le hi rama omhaiin an inhriatin ni'rhual an ta, ni that zit an ti! khanchu, a mihai khom hualsûng zoihai mah ni ti ngêt an ti," a tia.

¹⁰Rengpa'n Josua kuang, "Thoiin lân, irnênga inbok mai ta no ro.

¹¹Israelhaiin thil an insual a ni hi te. Ki Thuthung zôm hranga ki iti kha an insiata, thilser khak ata lâk an nei, an inrûka, kha kha an ni huanga, an neinun kêra an thup inrûk nôka.



¹²Khasika khan a ni Israelhai hin an râlhai an ingam loia, an intân irhmang a ni; khomâksâmna an idong a ni. Lâk loi hrang nin ilâk kha nin pai mâka chu, nin kuang om no ning.

¹³Thoiin lân, mipuihai chu irthiangtirhai ro, an kuang, ‘Nangtûk hin irthiang infâi roi, Israelhai Pathianin hiang hin a ti, “Israelhaio, nin laia khomâksâm an iom a ni, kha nin lai ata nin thonpai no’n chu, nin râlhai doi ngam no chin ni.

¹⁴Khasikin, zîng tiang a nam namin honghai sian, Rengpa hong inthang nam chu a nam namin an ihong nôk hrang a ni; Rengpa’n kha mi nam ata a inthang tâka khan a insûngkua insûngkuain a inthang nôk hrang a ni. Khan,Rengpa’n kha mi insûng ata an inthang tak kha a bing bingin nin ihong inthang nôk hrang a ni.

¹⁵Thilser khak lâktu chu ama leh a nei murdi le meiin hâl zit hrang a ni. Rengpa Thuthung an siata, Israelhai ta hrangin thil inzakpuiom tak a ni,” a tia.

¹⁶Josua chu zîng taka a thoiha, a nam namin Israelhai chu an hongha, Juda irchihai chu chel an ni tâka.

¹⁷Juda irchi laia Zer chi chel an ni nôka, Zer-hai lai ata Zabdia insûngkua chel an ni nôka.

¹⁸Kha mi insûnghai lai ata khan Karmia nâipa Akana, Zabdia tupa chu chel a ni tâka.

¹⁹Josua’n Akana kuanga, “Ki nâipa, Israelhai Pathian Rengpa makunga thu diktak hril ro duah. Sual thupha chôî mai roi, imo ni itho, thup loiin nin hril ro,” a tia.

²⁰Akana’n Josua chu a sâma, “Israelhai PathianRengpa chungha thilsual ki lei itho a ni.

²¹Ei thil man laia Babulon puan satak, sumru sekel irza vêla rik le sekel sômringa vêla rik rângachak le ileh ki hmua, a sân ki’rzuka, ki ilâk zel a ni ta.



Ki puan in sũaga irnênga ki ithupinrûk a ni, a hnuai taka sumru chu ki sia,” a tia.

²²Josua’n mi a tũa, riakbuk puan ina an fea, a lei ithup inrûk ngei chu a nia, a hnuai taka sumru chu a lei oma.

²³Riakbuk puan in ata chu an lâka, Josua leh Israelhai makunga khan an hong chũa, Rengpa makunga khan an siaa.

²⁴Josua le Israelhaiin Zera nũapa Akana chu puanhai, sumruhai, rângachakhai le a dũagma leh a nũahai, a sehrũathai, a sakuartung hai, a belrahai leh a nei murdihai le Akor irhũa an hruaia.

²⁵Josua’n, itho mo ni nin kamangtir bũaka? Rengpa’n a vuan hin ni nin kamangtir tũa a ni hi,” a tia. Mi murdi’n Akana le a insũaghai chu lungin an dũaga, an nei murdi le ileh khan an hũa tũaka.

²⁶Lungin an dũag mur mura, Rengpaningmur chu a dũa tũaka. A vuan sũa ten hin kha irhũa kha Akor irhũa ti a la ni m

Josua 8

Ai kũa ata insiat thu

¹Rengpa’n Josua kuang, “Chi no unglũa, beidong no roi; Israelhai laia irdoi thei mi hruai zitin lũa, Ai kũa doi hrangin fe roi. Ai kũa rũaghai, a mihai, a koppuihai le a ramhai chu ni kũa nang ki pũa tũa a ni.

²An kũa le an rũa chu Jeriko kũa le an rũa ni soisak ang khan soisakhai ro, atũa zoroa hin chu an belra le an sũahai chu mũni ta hrangin la nin ti. Khopui inrũaka irdũa hrang a hnung tiang ata siahai ro,” a tia.

³Ai kũa doi hrangin Josua le a sipaihai chu an irsiama. Josua’n mi feltak tak sũagthum an thangsũaka, zũana an fetirũaia.

⁴Josua’n, “Kũa hnung tianga khan hũa ok loiin irbi zũa roi, irning chakin om roi.

⁵Ki mihai le kũa chu matona ang khan va doi kin ta, ni doi hrangin anni khom hong suak an ta; matona ang khan intũapat kin ti,



⁶khua ata hlataka an ni irzûl zoi tena, matona ang khan kin irzûlhai pat tâk mani ti an ti.

⁷Nin irbukna hmun ata hong suak nin ta, khua chu nin ilâk hrang a ni. Nin Pathian Rengpa'n nangni pêk a ti.

⁸Khua nin lâk zoia chu Rengpa thu angin hâl roi. Nin itho hrang chu kha kha a ni," a tia.

⁹Josua'n anni chu an fetirhaia, Ai khua thang tiang Bethel le Ai khua kêra khan an oma, zâna Josua-hai chu an riakbuka an riaka.

¹⁰Josua chu zîng taka a thoia, a mihai chu a koikhômhaia, Israel upahai le ileh Ai khua chu an pan tâka.

¹¹Khua lûtna kotsua tiang, hmâr tiang a sipaihai chu riakbuk an khuara, Ai khua le an kêra khan irhôr a oma.

¹²Ai khua thang tiang, Bethel le an kêra inrûka lei irbîk hrangin mi sângringa a siaa.

¹³A sipai irbukna hmunpui hmâr tiang ata Ai khua doi hrangin an irning chiana, khua thang tianga lei irbîkrûka lei irning chian khom an oma. Kha ni zân khan Josua chu irhôra khan a fea.

¹⁴Ai khuaa rêngin a lei hmua, a mihai le zînga an thoia; Israelhai le an irdoina hmun Araba irhôra khan Israelhai doi hrangin an zu fe nôk tâka, an hnung tiang ata khopui doi hranga mi lei irbîk inrûk an om ti inhre mahai.

¹⁵Josua le Israelhai chu ichiom ang takin ramkâr tiang panin an intân pata.

¹⁶Ai khuaa mihai chu an ni irzûlhai hrangin an irkoi bûma, Josua chu an irzûla, khua chu an suaksan zit tâka.

¹⁷Ai khua mi murdi'n Israelhai chu an irzûla, khua lei hrungtu mi inkhat lua om mahai, khua chu mâksanin irhonghlangin a oma.

¹⁸Rengpa'n Josua kuang, "Ni ufei khan Ai khua inkhîk ro, khua chu nang pe ki ti," a tia.



¹⁹Josua'n a ufei inlên leh khan Ai khua chu a inkhîka, khaanga a inkhîk lai tak khan lei inruangtuhai kha an irbîkna hmun ata an zuang suaka, khuaa an lûta, an lâk tâka; khua chu an hâl rip tâka.

²⁰Ai khua mihai chu an hnung tiang an irheia, an khua kâng meikhu ngut ngut kha an hmua, ramkâra intânhai khan an doi nôka, intâna hrang rêng rêng inhre ta mahai.

²¹Josua le Israelhaiin an sipai lei irbîkrûkhai khan khua chu an lâka, an hâlna meikhu dût dût kha an hmu'n chu, an hong doihai nôka, Ai mihai chu an that tôlpaihai tâka.

²²Khua lâktuhai khan an hong doi nôka, Israelhaiin an kachêpa, tûte dama intân suak om loiin an that zit tâka.

²³Ai khuaa rêng kha chu a hringin an chela, Josua kuanga an hong hruaia.

²⁴Ai khua mi, Israel irzûltuhai kha ramchâra an lei thathai zita, an sât thathai hnunga chu Ai khuaa Israel mi murdi chu an fea, khataka mi murdi chu khandaiin an that zita.

²⁵Kha nia khan, Ai khuaa mi an thathai chu nupang pasal tepin mi sîngkhat le sânghni an kâi.

²⁶Ai khua mi an that zoi zit mâka chu Josua'n a ufei kha an lek maia.

²⁷Josua kuanga Rengpa thupêk angin sâ an ilâkhai le an râlâk sumhai chu an mâni hrangin an lâka.

²⁸Khan, Josua'n Ai khua chu a hâl insiat zita, atûn ten hin a ram a isiat zit a ni ta.

²⁹Josua'n Ai khuaa rêng chu khohloi dênin thinga an khâi thata, misa a tâkin chu Josua thupêk angin a ruak chu an kaisuma, khua kul mikot sîra khan an paia, lungin a ruak kha an irkhua, atûn ten hin kha kha a la om.

Dân bu Ebal tânga an tep

³⁰Khanchu, Josua'n Israelhai Pathian Rengpa hrangin Ebal tânga maichâm a siama.



³¹ Rengpa siahlo Mosia'n Israelhai kuanga thu a ipêk, Mosia Dân bua irziak angin lung thîr leh siam irfûk ni loiin maichâm an siama. Rengpa kuang hâlrivôm thilinhlan le irpôlkhômna thilinhlan an inhlana.

³² Israelhai mithmu lai ngêta Josua'n Mosia dân chu lunga khan a'rziak suaka.

³³ Israelhai laia an upahai, hruaituhai, roirêltuhai le an laia nam dang omhai le Levi irchi ochaihai irzôn, Thuthung Bôm tiang irheiin, kiang tiang kiang tianga an indinga. A chimripin Gerizim tâng tiang an mâsongin an ngîra, a chimripin Ebal tâng tiang an mâsongin an ngîra. Rengpa siahlo Mosia'n Israelhai kha sat a ivurhai hrang a nih tia thu a lei ipêk tâk ang khan.

³⁴ An inding infel zoiin chu, Dân bua thu murdi, satvurna thuhai, khomâksâmna hrang thuhai chu Josua'n a tep suak zita.

³⁵ Israel mipuihai makunga, nupanghai, nâipanghai le an laia fe sa nam dang mihai makunga Mosia'n thupêk murdi chu a tep suak zita, tep irhmâi nei viat mah.

Josua 9

Gibeona mihaiin Josua an huang

¹ Jordan thang tianga tâng rama omhai, phâi rama omhai, le Mediteranean tuipei kôla Lebanon tâng dêna om Hit-hai rêng le, Amorhai rêng, Kanaan rêng, Periz-hai rêng, Hiv-hai rêng, Jebus-hai rêng haiin Israelhai hrâtzia an lei inhriata.

² An irkoi khôma, Josua le Israelhai chu doi tumin roi an rêla.

³ Gibeon khuaa om Hiv mihaiin Jeriko le Ai khua Josua'n a lâk dân an inhriatin,

⁴ vârirlet takin an irsiam tâka. Palâi ang tak takin an irsiam, hmarsa milui tak hi sakuartung an inpêltira, an uain savun kok, milui takhai kha an irbel rup a nia,

⁵ kekok miluitak tak siat rep rup an irbuna, songkol miluitak tak an inngâka. An bufûn chôi hai chu dâidupin an khirkhaka.



- ⁶Israelhai riakbuk Gilgal-a khan Josua an hong pana, a kuang, “Ram hlatak rengata kin hong, irngeina thu siam ei ti duah,” an tia.
- ⁷ Israel mihaiin Hiv mihai kuang, “Hi lai vêla nâitaka mihai reng nin ang, itin mo irngeina thu nangni kin ithungpui thei hrang,” an tia.
- ⁸Josua kuang, “Ni siahlo kin ni hi” an tia. Josua’n, “Tuhai mo nin ini? kho rengata hong mo nin ini?” a tia.
- ⁹Khan, anni’n Josua kuang, “Ni siahlohai hi ram hlatak ata hong kin ni, ni Pathian Rengpa thurchi kin lei inhriata, Aigupta rama a sintho inthangtak takhai,
- ¹⁰ Jordan râla Amor rêng Sihona, Hesbon rêng chung a le Basan rêng Astarot khuaa Oga chung a sinthohai kin lei inhriata.
- ¹¹Kin upahai le kin rama mihaiin, ‘Zâna riakna cholam bufûn chôî unglân, anni chu va hmu unglân, nin siahlo kin nia, irngeina thu ni thungpui roi, va ti roi, an ni tia.
- ¹²Kin cholam bufûn chôihai hi, kin hong suak phuta khan chu a la lum hlianga, khannisian, atûn hin chu hei en u ta, a châr tâka, a ap zuak ta.
- ¹³Kin savun kok tharhai khom a chet zoi tâka, kin songkolhai, kin kekokhai khom kin hong inzin sôt tâk sikin a ichet fer fur tâk a ni hi,” an tia.
- ¹⁴Israel mihaiinan cholam bufûn chu an lei nêk pehaia. Khannisian, Rengpa kha irdon mahaia.
- ¹⁵Josua’n Gibeon mihai le ileh khan hmang hrangin irngeina thu a thungpuia, thathai loi hrangin chong an kunga, Israel mipui hruaituhai khom chong an inkung sa.
- ¹⁶Irngeina thuthung an siam zoi sîn thum hnunga chu kha mihai kha an kôl vêla omhai an nih ti an inhriat tâka.
- ¹⁷Khanchu, Israelhai chu an irsona, sîn thum an fea; kha mihai omna khua Gibeon hai, Kafira hai, Kiriath-jearim hai chu an va tunga.



¹⁸Kha mihai kha Israel mihai le irlût irsuak irthiang ma, Israelhai PathianRengpa irhmingin an hruaituhaiin chong an lei inkung hlat tâk sikin.

¹⁹Hruaituhaiin mipuihai kuanga, “Israelhai Pathian Rengpa irhming sâmin chong kin lei inkung tâka, kin irtôn irthiang ta ma.

²⁰Chong kin lei inkung tâk sikin an hringna kin inzôk hrang a ni. khano’nchu, Pathian hremna kin ituang hrang a ni.

²¹Inzôkhai unglân, kin thing pêl hrang le kin tui chôî hrangin an iom hrang a ni,” an tia.

²²Gibeon mihai chu Josua’n a koihaia, “Kin kôl vêl nâitaka om chakin, ram hlatak ata hong kin nih tiin itho sika mo nin ni ihuang?

²³Hianga nin ti sikin Pathian khomâksâm nin dong ta, Pathian ina tua hrang thing pêltu le tui chôîtu hrangin siahlo nin ini mai hrang a ni,” a tia.

²⁴Josua chu an sâma, “Rengpa nin Pathianin a siahlo Mosia chu ram pumpui hi pe hrang a tia, nin fena mi om murdi chu that zit hrangin a ti ngeia. kha kha kin lei inhriata, kin chi tak taka, khang khan kin iti mai a ni kha, kin chi sika a ni.

²⁵Atûn hin nin kuta om kin nia, sa nin iti lam ang takin ni ti ta roi,” an tia.

²⁶Josua’n hiang hin a ti tâka: anni chu a hrunghaia, Israelhai that hrang a khapa,

²⁷Suaka an changhaia, Israel mipuihai le Rengpa maichâm hranga thing pêltu le tui chôîtua a hmanghai tâka. A vuan ten hin ama an biakna hrang Rengpa hmun inkunga khan, kha sin kha an tho tâka.

Josua 10

Amor mihai inhnê thu

¹Kha lai khan Jerusalem khuaa rêng chu Adoni-zedeka a nia, Josua’n Ai khua a lâka, an siat chit thuhai, Jeriko le an rêng a ihrem ang khan Ai khua le an rêng a hrem ti thuhai a lei inhriata; Gibeon mihai khomin Israelhai leh irngeina thuthung an neia, an laia an kop sa ta tihai a lei inhriat sa nôka.



²Khasikin, Jerusalem mihaiin a sân an chia; Gibeon khuia len vâng chu rêng khuia liantak rêng khopui ang a ni, Ai khuia nêk khomin an tama, irdoi khom an thiam tak tak a ni.

³Khasikin, Jerusalem rêng Adoni-zedeka'n Hebron rêng Hohama hai, Jarmut khuia rêng Pirama hai, Lakis rêng Jafia hai, Eglon rêng Debira hai chu chong an thuana.

⁴"Hong unglân, Gibeon mihai hi doi ei ti, Josua le Israelhai leh hin irngeina an lei isiam zêt tâk kêng," a tia.

⁵Amor mihai rêng ringa, Jerusalem rêng hai, Hebron rêng hai, Eglon rêng hai chu an irruala, Gibeon khuia chu an irhuala an doi tâka.

⁶Gibeon mihaiin Gilgal-a Josua kuang mi an tîra, "Ni siahlo hi ni mâksan no ro, hong inrang latin lân, ni changpui ro, ni hong inzôk ro! tâng rama omhai Amor rêng haiin ni doi hrangin an irbukkhôm zita," an tia.

⁷Khanchu, Gilgal ata irdoi mi pasal hrâthai chu hruaiin an fe tâka.

⁸Rengpa'n Josua kuang, "Chihai no ro, anni chu nangni ki pêk ta; tûte'n nang lei danh thei no nihai.

⁹Gilgal rengata zân sôtin Gibeon dênin an fea, Amor mihai chu irningloiin an zu doi thuta.

¹⁰Amor mihai chu Israelhai mithmua khan Rengpa'nchitna'n a'rzaltirhai rupa, Gibeona khuia khan Israelhaiin tamtak an thathaia, senkhat chu Beth-Horon tâng fena lam dênin a'rzûlhaia, sak tianga Azeka le Makeda dênin an zu irzûlhai pata.

¹¹Amor mihai kha an intân laiin Rengpa'n irial liantak takin an dêngtira, Azeka an tung dênin irialin a dênghaia, Israelhai ithat nêkin irial idênga thi hi an tam ual.

¹²Rengpa'n Israel mihai chu Amor mihai an hnêtir nî khan Josua'n Rengpa chu a koia, Israelhai inhriata: "Misa, Gibeon khuia chung a hin inding mai ro, Tha nang khom Aijalon irhôra inding mai ro," a tia.



13 An râlhai chung a phuba an lâk mâka chu misa chu an ding maia, tha khom a omna khan a om ngita. Hi thu hi ‘Jasar lekhabu’ an itia khan a’rziak a ni. Vânlazôla misa chu a ngîra, sîn khat reng chu ta loiin a om ngota.

14 Khaang taka mihriam chong Rengpa’n a zôm ni sîn la om ngai ma. Om khom om nôk ta no ni. Rengpa’n Israelhai chu irdoinaa khan a doipuihaia.

15 Kha zoi chu Josua le a sipaihai chu an riakbuk Gilgal-a an kîr nôk tâka.

Josua’n Amor rêng ringa a chel

16 Amor rêng ringahai kha an intâna, Makeda khura an irbîka.

17 Josua kuang, “Rêng ringahai kha kin hmu ta, Makeda khura an irbîk a ni,” an tia.

18 Josua’n, “Khur mikot chu lung lianpapai leh inhruk unglân, a nghâk hrangin mi senkhat sehai roi.

19 Nangni chu nin râlhai kha khêlhai unglân, an khua kula an intân lûtna hrang khâl khakhai roi, Rengpa, nin pathianin nangni a inhnêtir a ni hi,” a tia.

20 Josua le Israelhaiin an râlhai chu an thata, an that infâi zit ang a ni, an ithat mihlia tômte chu an khua kulhaia khan an la lût irmana.

21 Josua riakbuk khuarna Makeda-a khan irtharngam takin hruaituhai chu an hong, Israelhai chu tûte’n a doi ngam zel om mahaia.

22 Josua’n, “Khur mikot kha inhong unglân, rêng ringa kha hong hruai suak u ta,” a tia.

23 Khanchu, Jerusalem rênghai, Hebron rênghai, Jarmut rênghai, Lakis rênghai le Eglon rênghai chu khur ata an hong hruai suakhaia.

24 Hi rêng ringahai hi Josua kuang an hong hruaiin chu Israel mihai chu a koi irbukhaia, a sipai hruaituhai kuang, “Hong unglân, hi rêng ringahai tukburung hi sirbê pehai roi,” a tia. An hong, an tukburung an sirbea.



²⁵Josua'n, chi viat no roi, rot khom rot no roi, hâitakin irnak song roi. Rengpa'n irdoina hmun tina hiang hin nangni a ithopui hrang a ni hi te," a tia.

²⁶Kha zoia chu rêng hai kha Josua'n a thathaia, thing panga an khâi haia; khohloi dênin an ruak chu an khâi ta.

²⁷Misa a tâkin chu an ruak kha an kaithâktirhaia, an lei irbîkna khura ngêt khan an paitirhaia, khur kotbâi chu lunglianpapai leh an inhruka, atûn ten hin a la om.

Josua'n Amor mihai ram dang khom a lâk

²⁸Kha nî khan Makeda khua chu Josua'n a doia, a lâka, an rêng khom a chela; kha khuaa om murdi chu a thathai zita, inkhat khom insua mah, Makeda rêng chu Jeriko rêng a ithat ang khan a thata.

²⁹Khan Josua chu Israelhai murdi le Makeda khua rengata Libna khua chu an doia:

³⁰khanchu Rengpa'n kha khua kha an lalna leh Israelhai kuta a pêk nôka, khan kha khua kha doiin a sînga om murdihai chu khandaiin a thathai vinga; a sînga mi inkhat khom insua viat ma, khanchu Jeriko khuaa rêng chung a itho ang khan kha mi rêng chung a thoa.

³¹Libna khua ata Josua le Israelhai chu Lakis khuaa an fea, an irhuala, an doia.

³²Israelhai kuta Lakis khua chu Rengpa'n a pêka, a sîn hni nî chu an lâk tâka. Libna khuaa an itho ang ngêt khan kha khuaa mi murdi chu a sât thathai zita.

³³Gezer khuaa rêng Horama chu Lakis khua changpui hrangin a zuanga, Josua'n ama chu a sipaihai leh a lei inhnêa, inkhat lua irhmâiloiiin a lei that zita.

³⁴Josua le Israelhai chu Lakis ata Eglon khuaa an fea, an irhuala an doia.

³⁵Kha nî sîn ngêta khan an lâka, kha nî khan mi om murdi an sât tôlhaia, Lakis khuaa deng an ithei ang tak khan deng an intheitirhaia.



- ³⁶Josua le Israelhai chu Eglon ata Hebron khuua an fea, an beia.
- ³⁷Khua chu an lâka, khataka om murdi chu an rêng leh ile a sât thathaia, a kôlvêla khuua omhai khom a sât thathaia. Eglon khuua a itho ang khan Hebron khom an siat zita, tûte hring damin insua mah.
- ³⁸Josua le Israelhai chu an kîra, Debir khua an doia.
- ³⁹Khua chu an lâka, an rêng chu an chela; a kôlvêla khuahai khom an lâka. A sûnga om murdi chu a sât thathai zita, Josua'n Debir khua le an rêng chu Libna khua le an rêng chung a itho ang khan a thoa.
- ⁴⁰Josua'n ram chu a lâk zit tâka, tâng ramhai, nisua tianga tâng dunghai, nitâk tianga phâizôlhai, thang tianga ramhai leh a lâka, an rênghai chu an hnê zita, tûte insua mah. Israelhai Pathian Rengpa chong pêk angin a itho thei taphot chu a that zita.
- ⁴¹Kades-barnea rengata Gaza kongkâr ram murdi, Gosen ram khom, Gibeon dênin Josua'n a lâka.
- ⁴²Kha rama rêng murdi leh an ram chu, Israelhai Pathian Rengpa'n a doipuihai sikin ram kha a mûtpumin Josua'n a lâk ta a ni.
- ⁴³Josua le Israelhai chu an riakbuk Gilgal-a khan an kîr nôk tâka.

Josua 11

Jabina le a rual irkoppuihai Josua'n anhnê

- ¹Hi thu hi Hazor rêng Jabina'n a lei inhriatin Madon khuua rêng Jobaba hai, Simrona khua rênghai, Aksaf khua rêng hai,
- ²Hmâr tiang sim tianga rênghai, Galili dîl thang Araba khuua rênghai, Mediteranean tuipei kôla Dor khua rêng hai,
- ³Nisua tiang le nitâk tianga Kanaan rêng omhai, Amor mihai rêng, Hit mihai rêng, Periz mihai rêng, tâng rama Jebus mihai rêng, Mizpa ram Hermon tâng bula Hiv mihai rênghai chu an irbukkhôma.
- ⁴An sipaihai leh ile an hongga, tuipei kôla chiaiphoi dôrin an tama. Sakorhai, thîr sakorhai khom an hong chôi chita.



⁵Hi rênghai hi an irkop irruala, Israelhai doi hrangin Merom vadung kôla riakbuk an khuara.

⁶Rengpa'n Josua kuang, "Hi mihai hi chihai viat no ro, nangtûk hi zoro vêla hin Israelhai hrangin thathai zit ki ti, an sakorhai chu kholra'n siahai unglân, an thîr sakorhai chu hâl pehai roi," a tia.

⁷Josua le a ihruai ngai irdoi mihai chu an irsiama, Merom vadunga khan an va doihai thuta.

⁸Rengpa'n Israelhai kuta a pêka, an doia, an that zit zoi mâka chu Misrefotmaim le Sidon dênin an irzûla, nisua tianga Mizpa irhôr dênin an irzûlhai pata.

⁹Rengpa chong pêk angin Josua'n an sakorhai chu kholra'n a siahaia, an thîr sakorhai chu a hâla.

¹⁰Josua chu a kêra, Hazor khua a lâka, an rêng chu a sât thata, (Kha laia khan Hazor khua hi kho lian ual tak a lei ni.)

¹¹Khuaa mi murdi chu a sât that zita; tûte damin insua mah. Hazor khua chu a hâla,

¹²Josua'n hi khua murdi hi a lâk zita, an rênghai khom a chela, Rengpa siahlo Mosia thu ang khan a thathai zêla.

¹³Hazor khua, Josua ihâl ti no chu, Israelhaiin an khua insiata in la indinghai chu hâl mahai.

¹⁴Hi khuaa an râllâk sumpuan le insûng sa chu Israelhaiin mâni ta angin an neia, mihriam rêk chu an sât that zita; an itho thei taphot chu a hringa an irhmâi tûte om mah.

¹⁵A siahlo Mosia kuang Rengpa'n thu a pêka, Mosia'n khang ngêtin Josua chu thu a pêka; khang tak khan Josua'n a thoa. Rengpa'n Mosia kuang thu a ipêk murdi chu tho loi rêng rêng nei mah.

Josua ram lâkhai



¹⁶Josua'n ram murdi chu a lâka, Negeb le tâng ramhai, Gosen ram phâihai, tângdung phâituanhai, Jordan irhôrhai, Israel tâng ramhai, a vêl tâng bul phâituanhai a lâk zita.

¹⁷A ram lâk sim tianga Helak tâng, Seir bul ata sak tiang Baalgad, Lebanon irhôr Hermon tâng bul a dêna; an rêng hai chu an hnêa, a chela, a thata.

¹⁸Josua le hi rêng murdihai hi zoro sôtak an irdoi a ni.

¹⁹Gibeon khuaa om Hiv mihai ti no chu Israelhai leh irngeina siam inkhat lua om ma, ilâkin an lâk zit a ni.

²⁰Rengpa'n Israelhai indoitir hrangin hi mihai hi an lungrîl an ngartir pehaia; Mosia kuanga Rengpa thupêk angin inrenna nei viat loiin thatirhmanghai zit hranga lei ti a ni tâk.

²¹Josua chu a fe zêla, tâng rama Hebron khuahai, Debir khuahai, Anab khuahai, milian Anak an ti la omhai chu a that zita. Judai le Israel tâng rama omhai khom, an rêngin an khuahai khom a hâl inram zita.

²²Israel mihai ram chu milian rêng om ta mahai, Gaza khuahai, Gath khuahai, Asdod khuahai vai an la om pher phora.

²³Mosia kuanga Rengpa thupêk angin Josua'n ram a lâka a lâk zit hnungin an ram irchon hrangin Israelhai chu a nam namin a sem tâka. Khanchu kha rama khan irdoina om ta mah.

Josua 12

Mosia inhnê rêng hai

¹Jordan nisua tiang Arnon vadung ata Hermon tâng dênin Jordan dung irhôr ramhai chu Israelhaiin an inhnêa, ram chu anni'n an neipai pehai ta.

²Amor mi Hesbon rêng Sihona le Basan rêng Oga an inhnea. Sihona ramin Gilead ram chimrip a ihuap a ni; Arnon dung irhôr irkua Aroer khuahai le Arnon vadung kôla khuahai rengata Jabok vadung a dêna, kha kha Amon mihai leh an ramrina a ni.



³An rama khan Jordan dung nisua tiang, Galili dîl ata thang tiang vadung phâi murdi, Beth-Jesimot, Tuipui Thi nisua tiang Pisga dênin a huap sa.

⁴Basan rêng Oga chu milian, Refaim an ti, la dam omsun laia mi a ni, Astarot le Edrei khuua rêng a ni.

⁵A ramin Hermon tâng hai, Seleka hai le Basan ram murdi, Gezer le Maaka ramri ten a huapa; Gilead ram chimrip le Hesbon rêng Sihona ramri dênin a huap sa.

⁶Hi rêng inhnihai hi Mosia le Israelhaiin an inhnêa, Rengpa siahlo Mosia'n Reubena irchi le Gada irchihai le Manasea irchi chimriphai kuang an ram irchon hrangin a pêka.

Josua inhnê rêng hai

⁷Sak tiang Baal-gad Lebanon irhôra om le thang tiang Seir tâng bula Halak tâng kêra ram murdi, Jordan dung nitâk tianga om le an rêng hai chu Josua le Israelhaiin an inhnêa. Kha ram hai kha Josua'n Israel nam hai kuanga kumtuanga an ram irchon hrangin a sema.

⁸Hi ram hai ihuap chu: tâng ram hai, nitâk tianga tâng mual hai, Jordan vadung irhôrhai le a tâng phâizôlhai, kha ram nisua tianga tâng hai le Negeb ramchâr hai. Kha rama lei om hai chu Hiv mihai le Jebus mihai an ni.

⁹Israelhaiin rêng hai an inhnêa khuahai chu hi hi an ni: Jeriko khuua rêng, bethel khuua kôla Ai khuua rêng,

¹⁰Jerusalem rêng, Hebron rêng;

¹¹Jarmuth rêng, Lakis rêng;

¹²Eglon rêng, Gezer rêng;

¹³Debir rêng, Geder rêng;

¹⁴Horma rêng, Arad rêng;

¹⁵Libna rêng, Adulam rêng;

¹⁶Makeda rêng, Bethel rêng;

¹⁷Tapua rêng, Hefer rêng;



- ¹⁸Afek rêng, Saron rêng;
¹⁹Madon rêng, Hazor rêng;
²⁰Simron-meron rêng, Aksaf rêng;
²¹Taanak rêng, Megido rêng;
²²Kades rêng, Karmel tânga Jokneam rêng;
²³Mediterranean tuipei kôla Dor rêng, Gilgal-a Goim rêng le
²⁴Tirza rêng. An rêng that murdi chu anrêngin sômthum inkhat an ni.

Josua 13

Ram la lâk hrang hmabâk la omhai

- ¹Josua chu a ulian tâka, a tar ok tâka; Rengpa'n a kuang, "Ulian ni ni'n ni tar ok tâka, ram la lâk hrang lak chu a la tam oka.
²Filistia le Gesur-hai omna ramhai,
³Sim tiang Avim-hai omnahai la lâkloi a ni. Aigupta ramri Sihor vadung ata hmâr tiang Ekron dênin Kanaan mihai rama irngai a ni. Filistia-hai chu Gaza haia, Asdod haia, Askelon haia, Gada haia an rêng an iom a ni.
⁴Kanaan-hai ram le Sidon-hai ram Meara chu Amor ramri Afek dênin la lâk loi a ni.
⁵Gebal mihai ram, Lebanon tâng nisua tiang Hermon tâng kôla Hamath kua lûtna dênin ram la lâk loi a ni.
⁶Lebanon tâng le Misrefotmaim kêra tâng rama om murdi Sidon mihai chu, keima'n Israel mihai matona lei inhnotsuakhai zit ki ti, chong nangni ki pêk angin an ram irchon hrangin Israelhai chu pe phot mai roh.
⁷Khasikin, atûn hin Israel nam kuakhai le Manasea irchi chimriphai kuanga, an ram irchon hrangin sem ro," a tia.

Jordan nisua tianga ram irsem

- ⁸ Manasea irchi chimrip leh Reubena irchi le Gada irchihaiin Jordan nisua tianga an ram irchon hrang Rengpa siahlo Mosia pêk kha an neia.



⁹Arnon dung irhôr sîra khua om Aroer rengata le, irhôr laitaka khopui le, Medeba phâi ram murdi Dibon dênin,

¹⁰Amor mi, Hesbon khua rêng Sihona ram murdi Amonhai ramri dênin a huama.

¹¹Gilead ram huamin Gesur-hai le Maakat-hai omna leh, Hermon tâng le Basan rama Seleka a dêna.

¹²Astarot le Edrei rêng Oga ram Basan hai a huama, ama chu Refaim la om sunhai laia mi a ni; Mosia khan khahai kha an hnêa, an hnotsuak zit a ni.

¹³Aniachu, Gesur mihai le Maakat mihai chu Israelhaiin inhnotsuak mahai, atûn ten hin Israelhai laia an la om sa a ni.

¹⁴Levi irchihai rêk chu an ram irchon pe sahai ma, Israelhai Pathian Rengpa kuanga an thilinhlan hâlirvôm irbôlnaa zôk chu an dongtum hranga pe hrangin Rengpa'n Mosia chu a hril a ni kha.

Reubena irchihai ram

¹⁵Mosia'n Reubena irchihai chu an insûngkua kuaa irsem hrang ram a pêk a ni kha.

¹⁶An ramri chu Arnon irhôr sîra om Aroer khuaa irthokin irhôr lai taka khopui le Medeba tâng inzôlhai,

¹⁷Hesbon khua le a kôlvêl khuaa tâng zôla omhai, Dibon hai, Mamoth-baal hai, Beth-Baalmeon hai,

¹⁸Jahaz le Kedemot hai Mefaat hai;

¹⁹Kiriathaim, Sibma hai, Zereth-sahar, irhôr inzôla omhai;

²⁰Bethpeor hai, Pisga tâng panghai, Beth Jesimoth hai a huama.

²¹Tâng zôla khua om murdi le Amor mi Hesbon rêng Sihona ram murdi a huam sa. Kha kha Mosia'n an hnêa, Midian hruaipu Evia hai, Rekema hai, Zura hai, Hura hai le Sihona hnuaia roirêltu an ni.

²²Israel mihaiin Beora nâipa Balaama, pânzia en thei an that sa.



²³Nitâk tianga an ramri chu Jordan vadung a ni. Reubena irchihai nei hrangin khi khopuihai an vêla khuahai khi an pêka.

Gada irchihai ram

²⁴Mosia'n Gada irchihai chu an insûngkua kuaa irsem hrangin an ram irchon hrang a pêka.

²⁵An ramin Jahaz le Gilead khopui murdi a huama, Amon-hai ram chimrip, Raba khua nisua tianga om Aroer a huam saa.

²⁶Hesbon le Ramat-mizpa le Betonim kêra ramhai, Mahanaim ata Lo-debar ramri inkârhai a huam sa.

²⁷Jordan vadung tiang chu Beth-Haran hai, Beth-Nimra hai, Sukothhai, Zafon hai le Hesbon rêng Sihona ram lei nihai ngai kha a huam tel sa. Nitâk tianga ramri chu Jordan dung, Galili dîl dênin a ni.

²⁸Gada irchihai nei hranga khi khopuihai le a vêla khuahai khi an pêka.

Nisua tianga Manasea irchihai ram

²⁹Mosia'n Manasea irchi chimriphai hranga an insûngkua kuaa irsem hrangin ram irchon an nei hrang a pêka.

³⁰An ramin Mahanaim ata Basan ram, Basan rêng Oga ram murdi a huama, Basan ram Jair bial khua sômruk khom a huam a ni.

³¹Gilead bial chimrip, Astarot hai, Edrei hai, Oga ram Basan khopuihai chu a pêk bel sa. Manasea nâipa Makira irchihai kuanga khi ramhai khi a ipêk a ni.

³²Moab phâia an om lai khan, Jeriko nisua tianga ram chu khi ang khin Mosia'n a sema.

³³ Mosia'n Levia irchihai chu ram inkung pehai mah. Israelhai PathianRengpa kuanga thilinhlan chu an dongtum hranga a inkung a ni.

Josua 14

Jordan vadung nitâk tianga ram irsem



¹Jordan vadung nitâk tianga Kanaan ram chu Israel mihai kuanga ochai Eliazara hai Nuna nâipa Josua hai le Israel nam hruaituhaiin hi ang hin ram an sema.

²Rengpa thupêk angin nam kuak le a chimrip nitâk tianga namhai dongtum hrangin tâ an sâna.

³ Jordan niswana tianga nam hni le a chimrip chu Mosia'n ram irchon hrang a pêk tâka, an laia Levi irchihai chu ram pehai mah.

⁴Josefa irchihai kha nam hni, Manasea le Efraima nama irsen an nia, khannisian Levi irchihai chu ram irchon pehai mah. An omna khua rêk chu an sialhai le belra le kêl satna hrang ram chu a pêkhai.

⁵Mosia kuanga Rengpa thupêk angin Israelhaiin ram chu an irsem tâka.

Kaleba ta hrangin Hebron pêk a ni

⁶ Gilgal-a an om laiin Juda irchi laia mi senkhat Josua kuanga an hong. An laia mi inkhat, Keniz mi, Jefunea nâipa Kaleba'n Josua kuang, "Kades-Barnea ei om laia Pathian mi Mosia kuanga, ei inhni chungchânga Rengpa ihril kha nin hriata.

⁷Rengpa siahlo Mosia'n Kades-barnea hmun ata ram va enirchik hranga mi a itîrhai khan kum sômminli ki ni tâka; khan ki lungrîla om ang tak kha a kuang intung nôk ki ti.

⁸Ki chanpui, ki urênghaiin, mipui an zâmirezaltira, kei rêkin chu ki Pathian Rengpa thu ki zôm ngit a ni kha.

⁹ Kin Pathian Rengpa thu ni zôm indet khak sikin, ni kea ni va isir ram chu nin ram irchon hrangin ni inei ngêt hrang a ni,' tiin Mosia'n kha nî khan chong an kung a ni kha.

¹⁰Irngai ta, Mosia kuanga Rengpa'n thu a ihril kha a vuan ten hin kum sômminli ringa vêl a hong ni tâka, Israelhai ramchâra an irvâk an irvâk lai ata atûn ten hin Rengpa'n a ihril angin hring damin a ni lan zôk tâk hi; en ta, kum sômriat ringa ki hong ni tâka,



¹¹Mosia'n a ni tîr lai ang tak khan a vuan sîn tena khom ki la hrât a ni. Irdoinaa khom fea, nuam nuama suak zêl theiin ki la ihrât a ni.

¹²Khasikin, kei le ki ifepuihai leh ile chong kin hong intung laia Rengpa iti, hi tâng ram hi ni pe ro ba, Anak mi, milianhai chu kul lianpa pa sînga an om tiin nangni kin hong inhril kha;Rengpa'n ni ompui mai a ta, Rengpa thupêk angin kin hnotsuak zit thei itinin," a tia.

¹³Josua'n ama chu sat a vura, Jefunea nâipa Kaleba chu ram irchon hrangin Hebron chu a pêk tâka.

¹⁴Khanchu, Israelhai Pathian Rengpa thu chu a zôm tak tak sikin atûn ten hin Hebron chu Jefunea nâipa Keniz mi Kaleba ram irchon a ni ta.

¹⁵Tianlai khan Hebron chu Kiriath-arba ti a ni ngai, Arba khua tihna a ni. Arba chu Anak mihai laia khan rêng roiinpui tak a nia. Ram chu hoi takin a om tâk.

Josua 15

Juda irchihai ram

¹Juda irchihai, an sîngkua kuain an irsem hrang ram tum, sim tiang mongna tianga Edom ram le Zin ramchâr a oma.

²Sim tiang ramri chu Tuipui Thi sim tiang kil mongna tiang a'rphuta.

³Khan, sim tiang panin Akrabim fena thang tiang a fe pata, Zin ramchâra a lûta, Kades-barnea sim tianga Hezrona dênin a fea, Adar-a khan a tungin a fea, Karka tianga a inhera,

⁴Azmon-a a fe zêla, Aigupta ramri dunga a suna, ivadung chu zoiin Mediteranean tuipuia a zu irchuna. Hi hi Judai ram sim tianga ramri chu a ni.

⁵Nisua tianga ramri chu Tuipui Thi a ni, Jordan dung sua thalin.

⁶Hmâr tianga ramri chu Jordan dung tuisuaa a'rphuta, Beth Hogla-a a tungin a fea, Beth Araba hmâr tiang a fe pata, Bohana lunga a zu suna. Bohana hi Reubena nâipa a ni.



⁷Akor irhôr ata Debir khuua a tungin a fe zêla, khan ivadung sim tianga om Adumin-a fena tianga om Gilgal a dêna. En-semes tuikhura a fe zêla, En-rogela a fea.

⁸Jebus-hai khua Jerusalem omna sim tianga irhôr, Hinom chu a dêna, ramri chu Hinom nitâk tiang panga irhôr bula om tâng sîpa a fea, kha kha Refaim hmâr tiang pang irhôr mongna tak a ni.

⁹Neftoa tuikhura a fea, Efron tânga khuahaia khan a fe thala; Baala khua tiang a inhera; kha khua kha Kiriath-jearim khom an ti ngai.

¹⁰Khan, ramri chu Baala rengata a fe irkuala, Seir tâng a dêna, Jearim tâng sak tiang panga a fea, Beth-semes-a a suaka, Timna a lôi pata,

¹¹Ekron khua hmâr tianga tâng dung a zuia, Sikeron tiang an infetira, Baala tâng khêlin Jamnia khua a dêna, kha rengata Mediteranean tuipuia a monga.

¹²Tuipui liantak chu nitâk tianga an ramri a nia. Kha ramri sêng chu Juda irchihai omna hrang chu a ni.

Kaleba'n Hebron le Debir a lâk

(Roi 1.11-15)

¹³Rengpa thupêk angin Josua'n Jefunea nâipa Kaleba chu Juda irchihai laia khan ram dongtum a sin pe saa. Hebron khua, Kiriath-arba an ti, Arba khua chu a neia, Arba chu Anaka pa a ni.

¹⁴Kaleba'n Anaka nâihai inthum Sesai hai, Ahimana hai, Talmaia hai chu a'rzûl insuaka.

¹⁵Tianlaia Kiriath-sefer an lei iti ngai Debir khua chu an hong doia.

¹⁶Kaleba'n, "Kiriath-sefer hong doia inhnêtu chu ki nâinu Aksaii, hi a dôngma hrangin pe zel ki ti," a tia.

¹⁷Kaleba sangpa Kaneza nâipa, Othniela'n kha khua kha a lâka, Aksaii chu dôngma'n a nei tâka.

¹⁸An irnei nî khan Othniela'n, Aksaii kha a pa kuang ram nghi hrangin an thème. A sakuartung ata a chuma; Kaleba'n a kuang, 'Imo ni inuam?' a tia.



¹⁹Khan ama'n, "Nin renin lân, ram ni ni ipêk hi ramchâr a nia, tui omna ni pe sa ro," a tia. Khanchu, tui hnâr nei khoichung le tuihnâr nei khoihnuai chu a pêk tâka.

Judai ram khua

²⁰Juda irchihai nam an insûngkua kuua, an irsem hrang ram dongtum chu hihai hi a ni.

²¹Sim tianga a mongna tak, Edom ramri depna tiang ram an nâihai chu hi hi a ni: Kabzeel, Eder, Jagur,

²²Kina, Dimona, Adada,

²³Kedes, Hazor, Ithnan,

²⁴Zif, Telem, Bealot;

²⁵Hazor-Hadata, Kerioth-hezron, (Kha kha Hazor a ni.)

²⁶Amam, Sema, Molada;

²⁷Hazar Gada, Hesmona, Bethpelet;

²⁸Hazar-sual, Beerseba, Biziothia;

²⁹Baala, Iim, Ezem,

³⁰Eltolad, Kesil, Horma;

³¹Ziklag, Madmana, Sansana,

³²Labaoth, Silhim, Ain, Rimon, le an kôlvêla khuahai, anrêngin khopui sômhnikuak a ni.

³³Tâng kôla phâi rama khua omhai: Estaol, Zora, Asna,

³⁴Zanoa, Enganim, Tapua, Enam;

³⁵Jarmut, Adulam, Soko, Azeka;

³⁶Saaraim, Adithaim, Gedera, Gederothaim, le an kôlvêla khuahai leh khopui sômkhat minli a ni.

³⁷Hi khuahai khom hi a ni: Zenan, Hadasa, Migdalgad,



- ³⁸Dilean, Mizpa, Joktheel,
- ³⁹Lakis, Boskat, Eglon,
- ⁴⁰Kabon, Lahmam, Kitlis,
- ⁴¹Gederot, Bethdagon, Naama, Makeda le an kôlvêla khuahai leh khopui sôm khat kiruk a ni.
- ⁴²Hi khuahai khom hi a kop: Libna, Ether, Asan,
- ⁴³Ifta, Asna, Nezib,
- ⁴⁴Keila, Akzib, Maresa, le an kôlvêla khuahai leh khopui kuak a ni.
- ⁴⁵Ekron khom a kôlvêla khuahai leh a kopa,
- ⁴⁶Asdod kôla khopui le a kôlvêla khuahai, Ekron le Mediteranean tuipui kâra khuahai khom a kop.
- ⁴⁷Asdod le Gaza, an kôlvêla khuahai le, Aigupta ramri vadung leh an kâra Mediteranean tuipui kôla kua omhai a kop sa.
- ⁴⁸Tâng rama hi khuahai hi a kop sa: Samir, Jatir, Soko,
- ⁴⁹Danna, Kiriath-sana, Debir ti a ni sa;
- ⁵⁰Anab, Estemoa, Anim,
- ⁵¹Gosen, Holon, Gilo, le an kôlvêla khuahai leh khopui sari a ni.
- ⁵²Hi khuahai khom hi a kop: Arab, Duma, Esan,
- ⁵³Janim, Beth-Tapua, Afeka,
- ⁵⁴Humta, Hebron, Zior, an kôlvêla khuahai leh khopui kuak a ni.
- ⁵⁵Hi khuahai khom hi a kop: Maon, Karmel, Zip, Juta,
- ⁵⁶Jezreel, Jokdeam, Zanoa,
- ⁵⁷Kain, Gibeá, Timna, an kôlvêla khuahai leh khopui sôm a ni.
- ⁵⁸Hi khuahai khom hi a kop: Halhul, Bethzur, Gedor,
- ⁵⁹Maarat, Bethanoth, Eltekon, an kôlvêla khuahai leh khopui kuak a ni.



⁶⁰Hi khuahai khom hi a kop: Kiriath-baal, Kiriath-jearim an ti sa, Raba, an kôlvêla khopui inhni a huap sa.

⁶¹Ramchâra, hi khuahai hi a om: Beth-Araba, Midin, Sekaka,

⁶²Nibsan, michi khopui, Engedi, an khua vêla khuahai leh khopui kiruk.

⁶³Juda irchihaiin Jebus-hai, Jerusalema omhai chu inhnotsuak zoi mahai. Juda irchihai leh Jebus-hai chu atûn ten hin an la om mai a ni.

Josua 16

Efraima le nitâk tianga om Manasea irchihai rambung pêk om thurchi

¹Josefa irchihai ram dongtum, sim tianga ramri chu Jordan vadung rengata Jeriko tui suaknahai bula a'rphuta, Jeriko ata fe patin tâng dung chung a tungin a fea, ramchâr fe thalin Bethel dênin a fe pata.

²Khan, Bethel ata Luz khua dênin Ark-hai omna Atarot-a a fea.

³Nitâk tiang panin Jafleta-hai omna ram a fe irkâna, Beth-Horon hnuaia a fe pata. Gezer-a fe patin Mediteranean tuipui a suna.

⁴Josefa irchihai, Efraima le Manasea irchihaiin hi ram hi an ram irchon hrangin an chang a ni.

Efraima

⁵Efraima irchihai, an insûngkua kuain an irsem hranga an dongtum hmâr tianga ramri chu hi hi a ni: Nisuana tianga om Astarot-Adar le Beth-Horon kâra a ni.

⁶Hmâr tianga mongna khua Mikmethat ata nisuana tiang panin ramri chu Tanat-silo tiang a fea, Janoa khuahai, Atarot khuahai, Naara khuahaia a fea, Jeriko a suna, Jordan dung a dêna.

⁷Khan Jona ata kha Atarot le Naara tiang a chum nôka Jeriko sunin Jordan-a a zu monga.

⁸Nitâk tiang Mikmethat khua ata Tapua khua, Kana dunga suakin ivadung chu a zuia, Mediteranean tuipui a zu dêna, kha ramri sînga ram chu Efraima irchihaiin an insûngkua kua'n irsem hranga an dongtum ram chu a ni.



⁹Manasea irchihai ram dongtum lai ata Efraimhai chu khopui senkhat, an kôlvêla khuahai leh khan an pêk saa.

¹⁰ Gezer khuua om, Kanaan mihai chu inhnotsuak mahai, atûn ten hin kha Kanaan mihai chu Efraima-hai laia an la oma, sinthoa an siahlo ni hrangin an om tâk a ni.

Josua 17

Nitâk tianga Manasea irchihai ram

¹Josefa nâilutîr, Manasea irchihai ram chang chu hi hi a ni: Josefa nâipa upa ual Manasea nâipa Makira, Gileada pa chu, mi huaisen a nia. Jordan nisua tianga Gilead le Basan ram chu an dongtum hrangin an pêka.

²Jordan nitâk tianga Manasea nâi danghai hrang ram a pêk saa, kha mihai chu: Abiezera, Heleka, Asriela, Sekema, Hefera le Semida hai an ni. Hihai hi Josefa nâipa Manasea nâipasalhai, insûngkuua ulianhai an ni.

³Hefera nâipa Zelofehada'n nâipasal nei loiin nâinupang vai a neia. A pu chu Makira, Manasea nâi a ni. Zelofehada nâinupanghai chu, Mahlaii hai, Noi hai Hoglaii hai, Milkaii hai, Tirzaii hai an ni.

⁴Anni chu ochai Eleazara hai, Nuna nâipa Josua hai le Israel nam hruaituhai kuang an va fea, 'Rengpa'n kin urêng pasalhai ang takin ram ni pêk hrangin Mosia a inhril kha,' an hong tia. Rengpathupêk ang takin an urêng pasalhai angin ram chu an chang tâka.

⁵Jordan nisua tianga Gilead le Basan ram kopin Manasea irchihai dongtum hmun sôm an nei bîk a ni.

⁶Nâipasalhai ang takin an nâinupanghaiin ram an chang sa tâk sikin Gilead ram chu Manasea irchi danghaiin an chang tâk a ni.

⁷Manasea irchihai ram chang chu Asera-hai ram chang rengata Sekem khuua nisua tianga Mikmethat kua kâr chu a ni. Sim tiang ramri chu a fea, Entapuaa omhai chu a huama.

⁸Tapua ram hi Manasea-hai ichang a ni, a khopui Tapua hi chu Efraimhai ta a ni.



⁹Ramri chu Kana dunghaia a zu chuma. Vadunghai kôl sim tianga khuahai chu Efraimhai ta a ni, Manasea hai ram sũaga om ni khomsian; ramri chu hmâr tianga vadunghai kôla a fe zêla, Mediteranean tuipuia a suaka.

¹⁰Sim tiang Efraimhai an oma, hmâr tiang Manasea-hai an oma, Mediteranean tuipui hi an ramri a ni; Asera namhai chu hmâr tianga niswana tiang Isakara hai an oma.

¹¹Asera-hai le Isakara hai ram chang sũaga Manasea kua Beth-Sean le Ibleam khopui, an kôlvêl khuahai leh a oma. Tuipui kôla Dor khuahai, Endor hai, Taanak hai, Megido hai le an kôlvêla khuahai khom a om.

¹²Hi khuua omhai hi Manasea irchihaiin inhnotsuak thei mahai; khasikin Kanaan mihai chu an la om zêl a ni ta.

¹³Israelhai an hong hrât zêl hnung khom khan inhnotsuak ual mahai, sintho hrangin chu an norhai ngai.

Efraima le nitâk tianga Manasea-haiin ram an zong sa

¹⁴Josefa irchihaiin Josua kuang, “Itho sika mo kin irchon hrang ram hmun khat vai ni ni ipêk. Rengpa lakin sat a ni vura, kin tam lak kin tam oka”? tiin an hrila.

¹⁵Josua’n, “Nin tam oka ni’n chu, Efraima tâng ram hi a chîn viata ni’n chu, Periz le Refaim-hai omna rampuihai hi tukdarh unglân, irthial infâi roi,” a tia.

¹⁶Anni’n, “A tâng ram ringot hi kin ta hrangin chu ruk no ni; phâia Kanaan-hai lakin thîr sakor an neia; Jezreel phâia omhai le Beth-Sean khopui le a kôlvêl khuahaiin irdoina thîr sakor an nei chit a ni,” an tia.

¹⁷Josua’n Efraima le Manasea irchihai chu a sâma, “Nin tam oka, hrât khom nin hrâta, ram changtum inkhat vai ni loiin a nêka tam nei ual nin ti.

¹⁸Tâng ram khi nin changtum hrang ni a ta, rampuipa ringot khom ni sian, tukdarh unglân a ram pumin inhnê roi, Kanaan-hai chu an thîr sakorhai leh hrât tak khomsian, inhnotsuakhai zit an ti,” a ti.

Josua 18



Ram chu mi dang ta hrangin an sem zêl

¹Israel mihai chu Silo-ah an irbukkhôma, Rengpa omna biakbuk puanzâr kha an zâra, ram chu an lâk tâka.

²Israel laia nam sari ram dongtum la pehai loi an oma.

³Josua'n an kuang, "Rengpa, nin pahai Pathianin ram a ipêk tâk hi va lua hrangin idôr mo nin la inghâk?"

⁴Nam tinin mi pasal thum inthangsuaq unglân, anni chu ram va'rfangsuaq hrangin tîrhai ki ta; nam tin changtum hrang inkunghai sianlân, ki kuang hong intung nôk ri sehai.

⁵Ram chu hmun sari'n thêr ni sianlân, Juda le Josefa irchihai chu an idongtum ram sûnga khan om an ti.

⁶Ram hmun saria irsen dân hrang chu irziak an ta, hong chôî an ta, keiin Rengpa ei Pathian kuanga tasân pehai ki ti.

⁷Levia irchihai hrang chu sem no roi, Rengpa Ochai an inina hi an changtum hrang chu a ni. Reubena hai Gada hai le Manasea irchi chimriphai lakin Jordan nisua tianga Pathian siahlo Mosia khan an dongtum hrang chu a pêk tâk kha," a tia.

⁸Josua ihril ang taka tho hrangin mihai chu an fe suaka, an kuang, "Ram pumpui irfangsuaq unglân, irsinsia zit roi; ki kuang nin hong ikîr nôk hrang a ni. Keiin hitaka Silo khuaa hin Rengpa kuanga tasân pehai ki ti," a tia.

⁹Khan, kha mihai kha an suaka, ram chu an irfang zita, khopui omhai chu irsia zitin hmun sari'n an sema, an irziaka. Silo khuaa an riak hmuna Josua kuanga an irziakna lekhabu chu an hong chôîa.

¹⁰Silo khuaa khan Josua'n Rengpa kuanga tâ a sâna, Israel mihai chu a nam namin ram chu a sem tâka.

Benamina-hai ram

¹¹Benamina irchihai ram dongtum, an insûngkua kuaa irsem hrang chu inkung masa tak a nia, Juda le Josefa irchihai kêra an om tâka.



- ¹²Hmâr tianga an ramri chu Jordan vadung rengata Jeriko sîra tâng panga a fe zêla; nitâk tiang panin Bethaven ramchâr a tunga.
- ¹³Luz khua (Bethel an ti sa ngai) a fe zêla, sim tiang panin a fea, Atarot-adar, Beth-Horon tâng dung hnuai khua chu a dêna.
- ¹⁴Ramri chu nitâk tianga tâng dung rengata sim tiang panin a kôia, Kiriath-baal khua, Kiriath-jearim an ti sa ngai chu a dêna; hi khua hi Juda irchihai khopui a ni. Hi hi nitâk tianga ramri chu a ni.
- ¹⁵Sim tianga ramri chu Kiriath-jearim rengata a'rphuta, nisua tiang panin Nefto tuikhura a fea.
- ¹⁶Hinom-a suak tâng dunga fein Refaim phâi lûtnaa khan a suna, Hinom irhôr a pana, Jebus-hai khua sim tiang panin a fea, Enrogel a dêna.
- ¹⁷Ramri chu hmâr tiang a kôia, En-semes a dêna, Adumin hong fena sîra Gilot khuaa a fea, Bohana lunga (Bohana chu Reubena nâipa a ni) a fe zêla.
- ¹⁸Jordan dung sîra tâng hmâr tianga fe'n irhôra a fe thala,
- ¹⁹Beth Hogla tâng dung hmâr tiang a fe zêla, Jordan dung suakna Tuipui Thia a fe lût a ni.
- ²⁰Jordan chu nisua tiang rama ramri mongna a ni. Hi hi Benjamina irchihai insûngkua tina ram changtum hrang ramri chu a ni.
- ²¹Benjamina irchi, an insûngkua kuaa izir ang zêla khua an irsem chu hi hi a ni: Jeriko, Beth-Hogla, Emek-keziz;
- ²²Beth-Araba, Zemaraim, Bethel;
- ²³Avim, Para, Ofra;
- ²⁴Kefaramoni, Ofni, Geba le an kôlvêla khua omhai leh khopui sômhleihni a ni.
- ²⁵Gibeon hai, Rama hai, Beerot hai,
- ²⁶Mizpa hai, Kafira hai, Moza hai,
- ²⁷Rekem hai, Irpeel hai, Tarala hai,



²⁸Zela Haelef hai, Jebus hai (Jerusalem an ti sa), Gibeai hai, Kiriath-jearim hai, an kôlvêla khua omhai leh khopui sômkhath minli a ni. Hi hi Benjamina irchi insûngkua tina dongtum khuahai chu a ni.

Josua 19

Simeona irchihai kuanga ram pêk

¹Tasân voihnina chu Simeona irchihaiin, an insûngkua an insûngkua'n ram irsem hrangin, an changa. An ram dongtum chu Juda irchihai ram chang sûnga a ni.

²Hi khuahai hi a huam: Beerseba, Seba, Molada;

³Hazar-sual, Bala, Ezem;

⁴Eltolad, Bethul, Horma;

⁵Ziklag, Beth-Markabot, Hazar-Susa;

⁶Beth-Lebaot, Saruhen, an kôlvêla khuahai leh ile, khopui sômkhath inthum a ni.

⁷Hi khuahai khom hi a kop: Ain, Rimon, Esther, Asan le a kôlvêla khopui minli a ni.

⁸Hi hin a kôlvêla khua Baalath Beer (Rama an ti ngai) sim tiang dênin a huam a ni. Simeona irchihaiin hi lai ram hi an dongtum hrang piala inkung a ni.

⁹Juda irchihaiin an innang nêka lian ual ram an nei sikin an ram senkhath chu Simeona irchihai kuang ipêk a ni.

Zebulun irchihai kuanga ram lâk

¹⁰Tasân voithumna chu Zebulun irchihai chung a an insûngkua kuaa irsem hrang ram chu an changa, sim tiang a mongna taka Sarid khua a oma.

¹¹Kha rengata nitâk tianga Marala a pana, Debeset va tînin Jokneam nisua tianga tuidunga a suaka.

¹²Sarid nisua tianga Kisloth-tabor ramri a hong suna, Daberat-ah a fe patin ramri Jafia tiang a fea.



¹³A suk tiang fe'n Gath Hefer-a a fe zêla, Ethkazin fe patin Rimon tianga Nea panin a'rkuala.

¹⁴Hmâr tiang panin ramri chu Hanathon tiang a fea, Iftahel irhôra a mong a ni.

¹⁵Kata hai, Nahalal hai, Simrona hai, Idala hai, Bethlehem hai a kôlvêl khuahai leh khopui sômkhath inhni a huam sa a ni.

¹⁶Zebulun-hai chu dongtum rama khan hi khopuihai le a kôlvêl khuahai hi a iom a ni.

Isakara irchihai kuanga ram pêk

¹⁷Tasân voiminlina chu Isakara irchihai chung a an insûngkua kuaa irsem hrangin a chuma.

¹⁸Hihai hi an ram sînga ihuam chu a ni: Jezreel, Kesulot, Sunem;

¹⁹Haferaim, Sion, Anaharat,

²⁰Rabit, Kision, Ebez;

²¹Remet, En-ganim, Enhada le Beth-pazzez.

²²An ramri chu Tabor tânga a fe thala, Sahazumai le Bet-semes fe patin Jordan a dêna, khopui sômkhath kiruk, an kôl vêla khuahai leh a huama.

²³Isakara irchihaiin an insûngkua tin irsem hrangin khi khopuihai le an kôl vêla khuahai leh ile an ichang a ni.

Asera irchihai kuanga ram pêk

²⁴Tasân voiringana chu Asera irchihai chung a an insûngkua kuaa ram irsem hrangin a chuma.

²⁵An ram ihuam kai chu hi hi a ni: Helkat, Hali, Beten, Aksaf;

²⁶Alam Melek, Amad, Misal. Nitâk tianga an ramri, Karmel le Sihor Libnat a zu tunga,

²⁷Misa suakna tiang ramri chu a kôia, Bethdagon fe patin Zebulun ram a suna, Iftahel irhôra a lûta, hmâr tiang panin Bethemek le Neiel tiang a pana, Kabul a dêna.



²⁸Ebron hai, Rehoba hai, Hamon hai, Kana haia a fea, Sidon khopui a suna.

²⁹Khan ramri chu a'rkuala, Rama le Tura khopui kul a suna, Hosa-a a kôia, Mediteranean tuipuia a monga, Mahalab hai, Akzib hai,

³⁰Uma hai, Afek hai, Rehob hai a huama, an kôl vêla khuahai leh ile khopui sômhni inhni a ni.

³¹Hi khopuihai le an kôl vêla khuahai hi Asera irchihaiin insûngkua tin irsem hranga an ram dong chu a ni.

Naftalia irchihai kuanga ram pêk

³²Tasân voirukna chu Naftalia irchihai chung a an insûngkua kuaa irsem hrangin a chuma.

³³Hmâr tianga ramri chu Helef-ah a'rphuta, nisua tianga Elon-Bazanim fe thengin Adamainekeb-ah a fea, Jabneel lûtin Lakum a dêna, Jordan-ah a monga.

³⁴Nitâk tiang panin Aznot-tabor-ah a fea, Hukok a dêna, sim tianga Zebulun dênin a fea, Asera-hai ram a va suna. Nisua tianga Jordan, nitâk tianga Asera-hai ram le ri an irchôi a ni.

³⁵Kul nei khuahai chu: Zidim, Zer, Hamath, Rakat, Kinereth;

³⁶Adama, Rama, Hazor,

³⁷Kedes, Edrei, Enhazor,

³⁸Iron, Migdalel, Horem, Bethanat, le Beth-Semes, an kôl vêla khuahai leh ile khopui sômkhata kuak a huam saa.

³⁹Hi khopuihai le an kôl vêla khuahai hi Naftalia irchihai insûngkua tin irsem hranga an ichang a ni.

Dana irchihai kuanga ram pêk

⁴⁰Tasân voisarina chu Dana irchihai chung a an insûngkua kuaa irsem hrangin a chuma.

⁴¹An ramin hi khuahai hi a huam: Zora, Estaol, Irsemes;

⁴²Saalabin, Aijalon, Ithla;



⁴³Elon, Timna, Ekron;

⁴⁴Elteke, Gibethon, Baalath;

⁴⁵Jehud, Beneberaka, Gath-rimon;

⁴⁶Mejarkon, Rakon le Jopa khua vêl ramhai.

⁴⁷ Dana irchihai hi an râlhaiin an ram an lâk pehaia, Lus khuaa an fea; an hong doia, an lâka, mihai chu an thata; khan kha ram kha anni'n an nei tâk a ni. A khua irhming hi an irchibul tianga irhming chôiin Dan an tia.

⁴⁸Hi khopui le khuahai hi a ni Dana irchihaiin an sângkua ang dungzuia an irchon hranga ram an idong sûnga omhai chu.

Ram sem zoi infelna

⁴⁹Ram an irsem zoi zitin chu, Israel mihaiin Nuna nâipa Josua chu a binga hrangin ram an pêka.

⁵⁰Rengpa thupêk angin ama indita inthang tak Timnat-sera khua an pêka. Efraima tâng rama om a ni; khua chu an ding inthara, kha khan a om tâka.

⁵¹Ochai Eleazara hai, Nuna nâipa Josua hai le Israel nam hruaituhaiin hi ramhai hi tasânin Silo khuaa khan biakbuk puan in mikot bula an sem infel tâka.

Josua 20

Zôkna khopuihai

¹Rengpa'n Josua kuang,

²"Israel mihai hril roh, Mosia ki inhril ang khan zôkna hrang khua inthang roi.

³Châiirpal mani, hmu loi sika mani mihriam thata, an thisen phuba lâktu ata an intâna, an irbîk theina hrangin.

⁴Kha khuaa khan intân an ta, khopui lûtnaa inding an ta, kha khuaa upahai kuang an hong intân nasan kha an ihril hrang a ni; anni'n hmun lei ngaitua pehai an ta, an omna hrang pehai an ti.



⁵Thisen phuba latuhaiin an hong zong khomin an lei ihrung hrang a ni, châirpal a ni sikin, ningmur sika that chu ni no ni.

⁶Kha khuaa khan Israel irbukkhômhaiin an chung thu an rêl mâka le, ochai inlaltak chang lai a thi mâka chu a iom mai hrang a ni; kha zoia chu, kha mi châirpalna mi thattu kha a hong intâna, an khuaa ama ina ngêt kîr nôk thei ta a ti.

⁷Hi a hnuaia khuahai hi Israel mihai ta hrang le an laia om nam danghai zôkna hranga an inkunghai chu a ni. Kades khua, Naftalia ram nitâk tiang Galili biala; Sekem khua, nitâk tianga Efraimahai ram; Kiriath-arba khua (Hebron an ti ngai) nitâk tianga Juda irchihai ram sînga om.

⁸Jordan nisua tianga khua: Bezer khua, Golan khua, Manasea hai ram Basan biala om.

⁹Khahai kha a ni Israel mihai le an laia nam dang omhai ta hranga irhual hranga khua an inkunghai chu a ni. Tukhomin mi that sianlân, hi khuahaia hin an rot thei; an chung thu chu Israel irbukkhômhaiin an rêl infel mân chu thisen phuba lâktu kuta thi no nih.

Josua 21

Levi irchihai khua

¹Levi irchi hruaituhai chu Ochai Eleazara hai Nuna nâipa Josua hai le Israel nam hruaituhai kuanga,

²Kanaan rama Silo khuaa khan an va fea, “Rengpa’n kin omna hrang, khopuihai le a kôl vêla insûng sahai lêngna hranga ram ôl pe hrangin Mosia a inhril kha,” an hong tia.

³Khanchu, Israel mihaiin an ram chang sai sînga hin hi khopuihai le a kôl vêla ram ôl insûng sa lêngna hrangin Rengpa chong angin Levi irchihai chu an pêka.

⁴Levi irchihai laia Kohatha irchihai chu khopui an sem masataka, Arona irchi ochaihai chu Juda irchihai, Simeona irchihai le Benjamina irchihai ram dongtum sîng ata khopui sômkhath inthum an pêka.



- ⁵Kohatha irchihai chu Efraima hai, Dan hai leh nitâk tianga Manasea irchi chimriphai ram sâng ata khopui sômkhath an pêka.
- ⁶Gersona irchihai chu Isakara hai, Naftalia hai, nitâk tianga Manasea hai ram dongtum sâng ata khopui sômkhath inthum an pêka.
- ⁷Meraria irchihai chu Reubena hai, Gada hai le Zebulun ram sâng ata khopui sômkhath inhni an pêka.
- ⁸Mosia kuanga Rengpa thupêk angin Israel mihaiin tasânin hi khuahai le an kôl vêla ram ôl, insâng sa lêngna hranga ram leh ile Levi irchihai chu an pêka.
- ⁹Juda le Manasea irchihai ram sâng ata hi khopuihai hi,
- ¹⁰Levia irchi Kohatha panam Arona irchihai kuanga an pêk chu a ni, anni hi khua an sema, a dong masatak an ni.
- ¹¹Juda rama tâng ram khopui Anaka pa, Arba khua, Hebron an ti ngai le a kôl vêla ram ôlhai leh ile an pêka.
- ¹²Khopui sîr vêl le a kôl vêla khuahai chu Jefunea nâipa Kaleba kuang pêk a lei ni tâk kha.
- ¹³Khan zôkna hranga khua inkung Hebron khua bâka hi khopuihai hi ochai Arona irchihai ta hranga pêk a ni: Libna,
- ¹⁴Jatir, Estemoa,
- ¹⁵Holon, Debir,
- ¹⁶Ain, Juta, Beth-Semes, an kôl vêla ram ôlhai leh ile Juda le Simeona irchihai ram chang sâng ata khopui kuak an pêka.
- ¹⁷Benjamina ram sâng ata hi khopui minlihai hi an pêk sa: Gibeon, Geba,
- ¹⁸Anathot, Almond, le an kôl vêla ram ôlhai.
- ¹⁹An rêngin khopui sômkhath inthum, an kôl vêla ram ôl, insâng sa lêngna hmun hrang leh ile ochai Arona irchihai chu an pêka.



- ²⁰Levia nâipa Kohatha irchi danghai kuanga Efraimahi ram ata khua senkhat an pêk saa.
- ²¹Khopui minli an pêk, zôkna hranga inkung Efraima tâng rama khopui Sekem hai, Gezer hai,
- ²²Kibzaim hai, Beth Horon hai le a kôl vêla ram ôlhai a ni.
- ²³Dan ram sâng ata khua minli an pêk sa: Elteke hai, Gibethon hai,
- ²⁴Aijalon hai, Gath-rimon hai le an kôl vêla ram ôlhai a ni.
- ²⁵Nitâk tianga om Manasea irchihai ram sâng ata khopui inhni an pêk, Taanak le Gath-rimon, an kôl vêla ram ôlhai a ni.
- ²⁶Kohatha irchi danghai kuanga hi khua sômhai le an kôl vêla ram ôl, insâng sa lêngna hmun hranghai leh ile an pêka.
- ²⁷Levia nam senkhat, Gersona irchihai chu nisua tiang Manasea irchihai ram sâng khopui inhni an pêka; zôkna hranga inkung Basan biala Golan le Beestera an kôl vêla ram ôl, insâng sa lêngna hranga ram hoi pêk an ni.
- ²⁸Isakara irchihai ram sâng ata khopui minli: Kision, Daberet,
- ²⁹Jarmut, En-ganim hai le an kôl vêla ram ôl insâng sa lêngna hmun hranga ram leh ile an pêka.
- ³⁰Asera-hai ram sâng ata khopui minli: Misal, Abdona,
- ³¹Helkat, Rehob le an kôl vêla ram ôl insâng sa omna hrang leh ile an pêka.
- ³²Naftalilai ram sâng ata khopui inthum, zôkna hranga inkung Galili rama Kedes, Hamoth Dor, Kartan le a kôl vêla ram ôl insâng sa lêngna hranga hmun leh ile an pêka.
- ³³Gersona irchi insângkua mihaiin khopui sômkhath inthum le an kôl vêla ram ôl insâng sa lêngna hmun hrang leh ile an chang a ni.
- ³⁴Levi irchia mi la omhai, Meraria irchihai chu Zebulun-hai ram sâng ata khopui minli Jokneam, Karta,



³⁵Dimna, Nahalal le an kôl vêla ram ôl insûng sa lêngna hmun hrang leh ile an pêka.

³⁶Reubena-hai ram sêng ata khopui minli: Bezer, Jahaz,

³⁷Kedemot, Mefaat le an kôl vêla ram ôl insûng sa lêngna hmun hrang leh ile an pêka.

³⁸Gad-hai ram sêng ata khopui minli zôkna hranga inkung Gilead biala Ramot, Mahanaim,

³⁹Hesbon, Jazer le an kôl vêla ram ôl insûng sa lêngna hmun hrang leh ile an pêka.

⁴⁰Khanchu, Mararia irchihai chu a rêngin khopui sômkhath in hni an pêkhai a ni.

⁴¹Israel mihai ram sênga Levi irchihai khopui hranga inkung sai chu kua sômminli kiriat a ni, an kôl vêla ram ôl insûng sa lêngna hmun hrang leh ile pêk an ni.

⁴²Rengpa'n an irchibul pi le pu kuanga ram pêk a inkung tâk ram murdi chu Israel mihai kuanga a pêk ta. An lâk zoiin chu an lua tâka.

Israelhaiin ram an lua ta

⁴³An irchibul pi le puhai kuanga pêk a lei inkung sai tâk ram chu Rengpa'n Israelhai chu a pêk tâka. An lâk zoiin chu om hmun an khuar tâka.

⁴⁴Rengpa'n a lei inkung diam tâk angin ram pumpui chu irngeina a inlêngtira. An râlhai inkhat lua'n inhnê mahai, Rengpa'n an hnêtir zit ngai a ni.

⁴⁵Israelhai kuanga chong a inkung tâk sai rêng rêng chu Rengpa'n a tho pe zit ngai a ni.

Josua 22

Nisua tianga omhai Josua'n a tîr nôk



- ¹Josua'n Reubena irchihai, Gada irchihai le Manasea irchi chimriphai chu a koihaia,
- ² an kuang, "Rengpa siahlo Mosia chong nin zôma, ki ihril murdi khom kha nin zôm zêla;
- ³nin urêng hai chu zoro sôt tak sêng irheisan loiin nin Pathian Rengpa chong pêk nin zôm ngita.
- ⁴Atûn chu, Rengpa nin Pathianin a inkung angin nin urêng Israel hai chu hoitakin a inomtir tâk hi, khasikin Rengpa nin Pathian siahlo Mosia'n Jordan râla ram nangni a ipêk tâka khan va kîr nôk ta roi.
- ⁵Rengpasiahlo Mosia'n dân nangni a ipêk kha zôm ngêt unglân, nin Pathian Rengpa chu lungthungin a thupêkhai chu zôm unglân, a nuamlam tho ngai unglân, ama chu iamoma kop indet khakin nin lungrîl murdi le nin irtha murdi'n a sin tho roi," a tia.
- ⁶Khanchu, Josua'n sat a vurhaia, an kîrtirhaia, an in tiang an kîr nôk tâk.
- ⁷Mosia'n Manasea irchi chimriphai chu Jordan nisua tianga Basan ram a pêka, a chimrip dang chu Josua'n Jordan nitâk tianga ram a pêk sa. Josua'n in tiang an kîrtirhaia khan sat a vurhaia,
- ⁸"Belra le kêlhai, sum le rângachak hai, dâr le thîrhai, le puandiar tamtak leh ile, irchong takin in tiang kîr nôk nin ta, nin râlhai thil nin ilâk pehai chu nin urêng dang hai sem sahai roi," a tia.
- ⁹Reubena irchihai, Gada irchihai le Manasea irchi chimriphai chu Silo khua rengata in tiang an kîr tâka. Israel dang hai chu Kanaan rama Silo khuaa khan an mâksanhaia, Mosia kuanga Rengpa thupêk angin an ram chang Gilead ram chu an pan tâka.

Jordan dung kôla maichâm

- ¹⁰Reubena irchihai, Gada irchihai le Manasea irchi chimriphai khan Jordan nitâk tianga om, Kanaan rama Gelilot chu an tunga, ivadung kôla khan ennuam om taka roiinpui maichâm lian an siama.



¹¹Israel mi danghai kha, Reubena hai, Gada hai, le Manasea haiin Kanaan rama Jordan dung kôla, Israel mihai rama khan maichâm an siama, ti mi'n an hrilhaia.

¹²Israel mipuihaiin an lei inhriatin doi an tuma, Silo-ah an irbukkhôma.

¹³Khanchu, Reubena hai, Gada mihai, nisua tianga om Manasea mi chimriphai chu Gileada an om laiin Israel mihaiin ochai Eleazara nâipa Finehasa chu an tîra;

¹⁴ama leh khan milian sôm, Israelhai nam laia sêngkua ulian tak inkhat zêlin le nitâk tianga nam sôm hruaitu tak inkhat zêlin a pâlîn an tîrhaia.

¹⁵Gilead an tunga, Reubena mihai, Gada mihai, le nisua tianga Manasea mi chimriphai kuang,

¹⁶“Mipuihai, Rengpa mihaiin, hi thilsual tak hi Israelhai Pathian chungga i sika nin itho mo? Hi maichâm nin isiam hi Rengpa nin idoi tâk tihna a ni, a thu nin izôm ta loi a ni hi te.

¹⁷ Peor hmuna thilsual ei itho kha nin la inhriat mai mo ni ma?Rengpa'n ama mihai ngei khom hri a'rveitira, a hrem a ni kha,

¹⁸Rengpa chu i sika mo nin izui nuam loi? A vuan hin Rengpa chungga nin nuar sikin nangtûka chu Israel mipuihai chungga a ninginmurna chum a ti.

¹⁹Nin ram hi ama biakna inrukloi raka porinche a ni'n chu Rengpa puan in biakbuk omna tiang hong unglân, kin laia ram nei sa no ung mo; Rengpa chungga le kin chungga nuarin kin Pathian maichâm ni loi chu maichâm dang siam no roi.

²⁰ Zera nâipa Akana khan thil ser tak ansiata, Israel mipuihai chungga siatna a tunga, Akana vai ni loiin mi dang khom an thi kha,” an tia.

²¹Reubena mihai, Gada mihai, nisua tianga Manasea mihaiin Israel hruaituhai chu an sâma,



²²“Rengpa chu pathianhai Pathian a ni. pathianhai Pathian Rengpa’nkin itho lam a inhril hi te; nangni khomin inhriat sa unglân kin nuam. Rengpachunga nuar kin nia, a chung a iamomloi kin nia chu, hring damin nin omtir ta no roi.

²³Rengpa chong zôm loiin hâlrivôm thil inhlanhai kin inhlanna hranga keini maichâm kin isiam a ni’n chu Rengpa ngêtin ni hrem ri se.

²⁴Khaang kha ni ma: nakana nin irchihaiin kin irchihai kuang hiang hin an tih itinin ti hi kin ichi a ni. ‘Rengpa Israelhai Pathian chu, nin ibiak sa hrang ma ni?’

²⁵Ama’n Jordan dung chu Reubena le Gada mihai leh ramri hrangin a siama, Rengpa hi biak sa hrang ni mak chêi’ tiin nin irchihaiin kin irchihai chu khappaina an ti.

²⁶Khasikin, hâlrivôm thil inhlan le irbôlna chi dang inhlanna’n maichâm hi siam ni ma ung.

²⁷Nin mihai le kin mihai, rualthoithar hong ni zêlhaiin Rengpa kuang ngêt hâlrivôm thil inhlanhai, irpôlkhômna thil inhlanhai le irbôlna thil inhlanhai kin inhlan ngai ti an inhriat theina hrang le nin irchihaiin kin irchihai kuanga, ‘Rengpa hong biak hrang ni mak chêi,’ an ti loina hranga kin isiam a ni.

²⁸Khasikin, nakana kin irchihai chung a hianga irtîna chong a hong om tika ngaitua’n, ‘Kin irchibul pi le puhaiin Rengpa maichâm ang chie hin hi maichâm hi an isiam a ni, hâlrivôm thil inhlan mani irbôlna thil inhlan mani kin inhlanna hranga ni maka, nangni le keini kâra irsinsiana hrang kêng,’ tiin an sâm theina hranga kin isiam a ni.

²⁹Rengpa chung a nuar kin itum ni ma, Ama irheisana kin thil inhlan hâlna, kin bu bâl thilinhlan le irbôlna inhlanna hranga maichâm dang siam kin itum khom ni ma, ei Pathian maichâm, a biakbuk kôla om ang kha chu maichâm dang rêng rêng inding ma ung,” an tia.



³⁰Ochai Finehasa le mipuihai hruaitu, nitâk tianga om nam hruaitu sômhain Reubena mihai, Gada mihai nisua tianga Manasea mi chimriphai chong chu an inhriatin an milung a chuk tâka.

³¹Finehasa, ochai Eleazara nâipa'n an kuang, “Rengpa'n a ni ompui mai ti kin inhriat tâk; Rengpa chung a nuar loa nin iom hi; Rengpa'n Israelhai hremhai mah,” a tia.

³²Reubena le Gada irchihai omna Gilead rengata ochai Eleazara nâipa Finehasa le Israel hruaituhai chu Israel mihai omna Kanaan ram khan an kêra, an thu inhriat kha an va hrilhaia.

³³Israel mihai chu an lung a chuk tâka, Pathian an inpâka. Reubena le Gada irchihai omna ram kha insiatpai rip thu chu hril ta mahai.

³⁴Reubena irchi le Gada irchihain kha maichâm kha, “Kin kêra Rengpa hi Pathian chu a nih ti inhriatpuitu a ni,” an tia. Khasikin, a'rhming khom “Thu'nhretu” an phua tâk a ni.

Josua 23

Sekem-ah Josua'n Israel hruaituhai a koi bukhaia, a inthâhai

¹Rengpa'n Israelhai chu an râlhai ata zoro sôtak sînghualin an omtirhai hnungin Josua chu a kum a tamin a tar tâka.

²Khanchu, Israel mi murdi upahai, hruaituhai, roirêltuhai le ulianhai chu a koi bûmhaia, an kuang, “Atûn hin chu a sân ki tar tâka.

³nangni sikin hi namhai chung a nin Pathian Rengpa sinthohai nin hmua; Rengpa nin Pathian chu nin râlhai nangni doi petu a ni.

⁴Kin inhnê tâkhai nam omna ram le kin la inhnê loihai omna ram chu nin irchon hrangin ki sem infel zit tâk a ni; nisua tianga Jordan dung ata nitâk tianga Mediteranean tuipui dênin sem a ni.

⁵Rengpa nin Pathianin nin matona lei inhnotsuakhai zit a ta, nin hmu phâk loina hmuna inhnotsuakhai a ti; Rengpa nin Pathianin a inkung sai tâk angin an ram chu neipai pehai nin ti.



- ⁶Khasikin, Mosia dân lekhabua irziak murdi irdîn takin zôm tum ngit unglân, inkhat lua irhmâi no roi.
- ⁷Nin laia nam dang la om leh hin irpôl no roi; an pathianhai hi koi no roi, an irhming sâmin chong inkung no roi, chubai mûkin an makunga kûn viat no roi.
- ⁸Rengpa chu iamom takin atûn ten nin kop indet ang hin kop indet khak roi.
- ⁹Nam lian tamtak le hrâtak takhai nin maton zela Rengpa'n an hnotsuak zêla, tûte'n lei khâl thei om mahai.
- ¹⁰ A chonginkung angin Rengpa nin Pathianin nin râlhai nangni a doi pe sikin nin laia mi inkhat lua khom sâng têlin an irzûl a ni kha.
- ¹¹Rengpa nin Pathian chu lungthung ngei ngei unglân.
- ¹²Nin irheisana, nin laia nam dang la omhai leh nin irpôlkhôma, nin irneipolin chu,
- ¹³Rengpa nin Pathianin hi namhai hi nin maton zela inhnotsuak viat no ni. Rengpa nin Pathianin hi ram satak nangni a pêk ata nin irhmang zit mâka chu nin hrangin châng mani châng khur ichiom mani ni an ti, hruihruala vîk mani mita ilhling isun mani an ini hrang ti inhre roi.
- ¹⁴“Irngai roi, atûn chu, ki thi zoro anai ta. Tukhomin takirtâi takin a sûtin chu Rengpa nin Pathianin thil sa a inkung sai tâk murdi kha nangni a pêk ti inhre roi. A chonginkung ang takin a tho zêla, inkhat lua irhmâi nei mah.
- ¹⁵Rengpa nin Pathianin thil sa pêk hranga a inkung chu a tho ngai angin thil saloi a inkunga khom a tho ngai.
- ¹⁶Rengpa nin Pathianin zôm hranga a iti, a thuthung kha nin insiata, Pathian dang nin pana, a sin nin zongin chu, Rengpa nin chung a ninginmur a ta, ram satak nangni a ipêk rengata irhmang zit nin ti,” a tia.

Josua 24

Sekem khuua Josua chongbe



- ¹Josua'n Israel namhai chu Sekem khuaa a koibûmhaia. Israel upahai, nam hruaituhai, roirêltuhai le ulianhai chu Pathian makunga an hong irbûma.
- ² Josua'n mi murdi makunga, "Rengpa, Israelhai Pathianin hiang hin a ti: Tianlaia nin irchibul pi le puhai chu Eufrates vadung râla an om ngaia, pathian danghai an biak ngai. An laia mi inkhat chu Tera a ni, ama chu Abrahamama le Nahora pa a ni.
- ³ Nin pu Abrahamama chu Eufrates vadung râl ata Kanaan ram pumpuia ki hruai inlûta, Isaka ki pêka, a'rchi tamtakin kin punga,
- ⁴ Isaka chu Jakoba le Esaua ki pêka, Seir tânghai chu Esaua omna tâng hranga pêk a ni. Jakoba le a nâihai chu Aigupta rama an lûta.
- ⁵ Inhnunga chu Mosia le Arona kha ki târa, Aigupta mihai chu ki hremhai tak taka, nangni chu Aigupta rengata nangni ki hruaisuak tâk a ni.
- ⁶ Nin pi le puhai chu Aigupta ram rengata ki hong hruaisuaka, Aigupta mihaiin sakor thîrtâli le sakor chungu chuang mihai leh ile an hong irzûlhaia;
- ⁷Khannisian, Tuipui Sen an tungin chu changpuitu zongin Rengpa an koia, Aigupta mihai le an kâra inthim an omtira, tuipuia khan Aigupta mihai an tâka, a tânhai tâka. Aigupta rama ki sinthohai chu nin inhriata, ramchâra zoro sôtak nin oma.
- ⁸ Jordan nisua tianga om, Amor mihai omna chu nangni ki hruai intunga, nin irdoia nin inhnêhaia, an ram chu nin nei tâka. Anni chu ki that irhmanghai tâk a ni kha.
- ⁹ "Khan, Zipora nâipa Balaka, Moab rêngin Israelhai chu a lei doia, Beora nâipa Balaama chu khomâksâm khumhai hrangin a lei phuna.
- ¹⁰Khannisianlân, Balaama thu chu irngai nuam ma unga, sat nangni a ivur tâk a ni; khang khan Balaka kut ata nangni ki isansuak a ni;
- ¹¹ Jordan vadung nin kâia, Jeriko khuaa mihaiin nangni an lei doia; Amor mihai, Periz mihai, Kanaan mihai, Hit mihai, Girgas mihai, Hiv mihai le Jebus mihai khomin nangni an lei doia; khannisian nangni ki inhnêtir zit a ni.



- 12** Amor rêng inhnhai len vâng chu khandai mani thal mani hmang nang loiin nin maton tiang khuaibêl ki târa, an hnotsuakhai zit a ni.
- 13** Nin la ichuan viat lolina ram nangni ki pêka, in nin la isin lolina khopui nangni kin omtir a ni. Atûn chu nin iphun loi grep ra nin irhmala, nin iphunloi oliv ra nin fâk tâk a ni hi.
- 14**“Khasikin, Rengpa chu inzâ unglân dik takin a sin tho ngit roi. Mesopotamia ram le Aigupta rama nin pi le puhai ibiak ngai pathian illimhai kha pai zit roi.
- 15**Rengpa sintho hi sa nin ti no’n chu nin irchibul pi le puhai ibiak, Mesopotamia ram pathianhai sin kha mo nin tho nuam, atûna nin omna rama mi, Amor pathianhai hi mo, a vuan hin nin nuam nuam inthang roi. Kei le ki insûng mihai rekin chu Rengpa sin hi a nih kin tho hrang chu,” a tia.
- 16**Mipuihaiin, “Rengpa chu mâksanin pathian danghai sin hi kin itho loi hrang a ni hi!
- 17**Aigupta rama suak kin ni laia ni hruaisuaktu chu Rengpa, ei Pathian hi a ni hi te; thil roiinputak tak a tho kin hmua, nam tin chi tin laia kin fena tina a ni saninzôk mai ngai.
- 18**Hi rama kin hong tung khomin Rengpa’n kin matona lei om, Amor mihai an hnotsuak zit a ni kha. Khasikin, Rengpa sin hi ei tho hrang chu, ama vai hi ei Pathian chu a ni,” an tia.
- 19**Josua’n mipuihai makunga, “Rengpa sin hi tho thei no chin ni: Ama chu mi irthiang a ni, pathian dang rêng rêng irngai thei maka, nin tho inchâinahai le nin sualhai ngaidam thei no ni.
- 20**Rengpa chu irheisanin pathian dang sin ni tho’n chu nangni doiin nangni hrem a ti; nin chung a lei sa ngai khom sianlân, nangni a that irhmang zit hrang kêng,” a tia.
- 21**Mipuihaiin Josua an sâma, “Ni ma! Rengpa sin kin itho hrang a ni,” an tia.



²²Josua'n an kuang, "Rengpa sintho hrang nin inthang hi nangni ngêtin nin inthang a nih ti inhriattuhai chu nin nia," a tia. Anni'n, "O a ni, thu'nhretuhai kin ni," an tia.

²³Josua'n, "Khaang khan a ni'n chu, nam dang pathian illim nin idônhai kha pai zit roi duah: Israelhai Pathian Rengpa vai hi pom roi," a tia.

²⁴Mipuihaiin Josua chu an sâma, "Kin Pathian Rengpa sin hi kin tho hrang a ni, a thu khom zôm zêl kin ti," an tia.

²⁵Khan, kha sîna khan Josua le mipuihaiin thu an thunga; an zôm hrang dân le thupêk a siam pehaia.

²⁶Josua'n kha thu kha Pathian dân bua khan a'rziak lûta; lung liantak a lâka, Sekem khuua Rengpa Hmun Irthiang saisothing kung bula khan a phuna.

²⁷Josua'n mipuihai kuang, "En u ta, hi lung hi ei thu inhretu a ni; ei kuangaRengpa thuhiril murdi kha an hriat zita, nin Pathian nin mâksan loina hrangin nin thu'nhretu a ni," a tia.

²⁸Josua'n mipuihai chu an fetirhaia, an mâni khua senga an kîr nôk tâka.

Josua le Eleazara thi thu

²⁹Kha zoia chu kum irzakhat sômhni a ni'n Josua chu a thi tâka.

³⁰Gaas tâng hmâr tiang, Efraimhai ram, tâng rama ama ram Timat-sera-ah khan an phûma.

³¹Josua dam sîng chu Israelhaiin Rengpa sin an thoa, a thi zoia khom an tho, an mâni mit ngêta Rengpa sintho murdi hmutuhai dam sîng chu an sin zêla.

³²Josefa ruak, Israelhaiin Aigupta ram rengata an hong chôi kha Sekem khuua khan an phûma, Jakoba'n tangka sumru irzakhata Sekema Hamora irchihai kut ata a irchôk ram a ni, hi ram hi Josefa irchihai ta hranga ram irchon a hong ni ta zêla.

³³Arona nâipa, Eleazara khom a thia, Efraima mihai tâng rama om, a nâipa Finehasa an ipêk ram Gibea khuua an phûma.



Roirêltuhai

Roirêltuhai 1

Juda le Simeona irchihaiin Adoni-bezeka an chel

¹Josua thi hnungin Israelhaiin Rengpa an zonga, “Kanaan mihai doi hrangin kin laia tu nam hi mo kop masa tak hrang?” an tia.

²Rengpa’n, “Juda irchihai kop masatak ri sehài, ram hi an kuta ki pêk a ni,” a tia.

³Juda irchihaiin, an urêng Simeona irchihai kuang, “Ei ta hranga inkung rama hin hong unglân, Kanaan mihai hi doihai roi, keini khom, khaang ngêtin nin ram ta hrangin doi hrangin hong kin ti,” an tia.

⁴Khasikin, Simeona nam le Juda namhai chu irdoinaa an fe tâka, Rengpa’n Kanaan mihai le Periz mihai chu an hnêtira, Berek-a mi sîngkhat an inhnêa.

⁵Kha khan Adoni-bezeka a lei oma, an doia,

⁶a intân pata, an irzûla, an chela, a kutpui le a kepui an tanpai pea.

⁷Adoni-bezeka’n, “Rêng sômsari kutpui le kepui ki lei tan inbongpai pea omhai khan ki bu nêkna maichâm hnuai bu’rmal an hrût ngaia, khaanga ki itho ang chie khan Pathianin ki chung a hong tho tâk a ni hi te,” a tia. Khanchu, Jerusalema an hruaia, kha khan a thi tâka.

Judahaiin Jerusalem le Hebron an lâk

⁸Juda irchihaiin Jerusalem an doia, mi an thata, khopui chu an hâla.

⁹Kha zoia chu Juda irchihaiin tâng rama omhai, tâng phâia omhai le Negeb (Kha kha thang ram tiang ramchâr irhming a ni) hmuna om Kanaan mihai chu doi hrangin an irsiama.

¹⁰Hebron kua, Kiriath-arba an ti ngai chu, an doia, Sesai mihai, Ahimana mihai le Talmai mihai chu an inhnêa.

Othniela’n Debir kua a lâk

(Jos 15.13-19)



¹¹Kha rengata Juda irchihai chu Debir doi hrangin an fea, tiana khan kha khua kha Kiriath-sefer ti a ni ngai.

¹²Kaleba'n, "Kiriath-sefer doia, lâk thei chu, ki nâinu Aksaii dôngma hrangin pêk ki ti, a tia.

¹³Kaleba sangpa Kenaza nâipa Othniela'n a lâka, a nâinu chu a dôngma hrangin a pêk tâka.

¹⁴An irnei nî khan a pa kuanga ram ngên hrangin Othniela'n a nora. A sakuartung chung rengata a chuma, Kaleba'n, "Imo ni inuam?" a tia.

¹⁵Nupang khan, "Thilpêk ni pe ro, sim tiang ramchâra ni nin omtir tâk lolo'n chu tui hnâr neihai ni pe'n lân," a tia. Kaleba'n khoichung leh khoihnuai tuihnâr omna chu a pêk tâka.

¹⁶Mosia tarpu tianga irchi, Ken mihai chu Juda irchihai leh tûmzôl khua an ti Jeriko rengata Arad khua sim tiang Judai ramchâra an fea, khataka omhai laia khan an omsuam tâka.

¹⁷Juda irchihai chu Simeona mihai leh an fe suama, Zefat khuaa khan Kanaan mihai chu an doia; khua chu an insiat zita, a'rhming Horma an phuaa.

¹⁸Gaza, Askelon, Ekron hai le a kôl vêla khuahai chu Juda irchihaiin an lâka.

¹⁹Rengpa'n Juda irchihai chu a ompuia, tâng rama omhai chu a inhnotsuaka; tâng phâia omhai rêk chu sakor thîrtali an neia, Juda irchihaiin inhnotsuak thei mahai.

²⁰ Mosia thu angin Hebron chu Kaleba an pêka, anni'n Anaka nâi inthum chu an inhnotsuaka.

²¹Benjamina irchihaiin Jerusalema om Jebus mihai chu inhnotsuak mahai; Jebus mihai chu Benjamina irchihai leh Jerusalema atûn ten hin an omsuam.

Efraima le Manasea irchihaiin Bethel an lâk

²²Efraima le Manasea irchihai chu Rengpa'n a ompuia, Bethel doi hrangin an fea.

²³Matona khan Bethel chu Luz ti a ni. Khua envêl hrangin mi an tîra.



²⁴Mi inkhat khua rengata a hong suaka, khua envêltuhaiin, “Khopui inrûka lût theina nin hril roh, ite nang lo no ni ung,” an tia.

²⁵Khanchu khopui lûtna chu a’rhmuhaia, Efraima le Manasea mihaiin khua chu an lâka, khandaiin mi an that tôla; kha mi inkhat kha chu an insûng mihai leh ile an zôk.

²⁶Ama chu Hit rama a’rthona, khua a chuana, a’rhming Luz a phuaa; atûn ten hin kha irhming kha a la’rput mai.

Israelhai la inhnotsuak loi nam dang

²⁷Manasea irchihaiin Beth-Sean khuaa omhai, Taanak khuaa omhai, Dor khuaa omhai, Ibleam khuaa omhai le Megido khuaa omhai, Kanaan mihai an kôl vêla khuaa omhai leh ile inhnotsuak mahai. Kanaan mihai chu an om mai tâk a ni.

²⁸Israel mihai an hong hrât sit sitin chu Kanaan mihai chu sinthônaa hmang hrangin an siama, an hnot chu inhnotsuak mahai.

²⁹Efraima mihaiin Gezer khuaa Kanaan mi omhai chu inhnotsuak mahai. Kanaan mihai chu an bila Gizer khuaa khan an om sa tâka.

³⁰Zebulun mihaiin Kitron le Nahalal khuaa omhai chu inhnotsuak mahai. Kanaan mihai kha an laia an om kumkhua tâka; aniachu siahloa an siamhai.

³¹Asera mihaiin Ako khuaa omhai, Sidon khuaa omhai, Ahlab khuaa omhai, Akzib khuaa omhai, Helba khuaa omhai, Afek khuaa omhai, Rehob khuaa omhai chu inhnotsuak mahai.

³²Asera mihai chu Kanaan mihai kêra an om sa maia, inhnotsuak mahai.

³³Beth-Semes khuaa omhai, Bethanat khuaa omhai chu Naftalia mihaiin inhnotsuak mahai; kha rama om Kanaan mihai leh khan an om sa tâka; Beth-Semes le Bethanat-a omhai chu sinthônaa hmang hrangin an siama.

³⁴Amor mihaiin Dana irchihai chu tâng rama an inhnotdoka, an omna hmuna lût nôk phal ta mahai.



³⁵Amor mihai chu Har-heres tânghaia, Aijalon khuahaia, Saalabin khuahaia an om mai tâka; khannisian, Josefa insûng mihai chu an hrât zêla, an sinhotua hmang hrangin an hong om tâka.

³⁶Amor mihai ramri chu Akrabim hong fena le hmâr tiang Sela-ah irthokin a tungin a fe pat a ni.

Roirêltuhai 2

Bokim khuaa Rengpa vântîrtôn

¹Gilgal rengata Rengpa Vântîrtôn chu Bokim khuaa a zu fea, Israelhai kuang, “Aigupta ram ata nangni ki hong hruaisuaka, nin pahai kuanga pêk ki inkung rama khan nangni ki hong hruai intunga; ‘Nangni le ki thuthung hi insiat viat no ning,

²kha rama lei omhai leh khan thuthung nin siam hrang ni mak, an maichâmhai nin insiatpai hrang a ni’ ki ti kha; khannisian, ki chong zôm nuam loiin i thil mo nin itho tâk kha?

³Khasikin, nangni ki hril, nin matona hi mihai hi inhnotsuak no ning, nin hrangin râl ni an ta, an pathianhai biak hrangin nangni val an ti,” a tia.

⁴Rengpa vântîrtônin kha thu kha a hril zoiin chu Israelhai chu an chap mur tâka.

⁵Khasikin, kha khua kha Bokim an ti tâk a ni. Kha khan Rengpa kuang thil an inhlana.

Josua thi thu

⁶Josua’n Israel mihai chu an chîntirhaia; an mâni dongtum ram chita lua hrangin an fe seng tâka.

⁷Josua dam sîng chu Israel mihaiin Rengpa sin an thoa, Josua a thi hnunga khom, Israel upahai, Rengpa sintho hmu phâktuhai dam sîng chu mipuihaiin a sin an la tho mai.

⁸Rengpa siahlo Nuna nâipa Josua chu kum irzakhat sôm khat mi a niin a thia.



⁹ Hmâr tiang Gaas tâng, Efraima tâng rama ama ram ngêt Timnat-heres hmuna an phûma.

¹⁰Upahai khom chu an thi zita, Rengpa lan hre ngailoi Israel ta hranga a sintho lan hre phâkloi rualthoithar an hong pung thiai maia.

Israelhaiin Rengpa biak nuam mahai

¹¹Khanchu, Israelhaiin Rengpa nuamloi lam thilsual an thoa. Baalhai kha an biak zêl tâka.

¹²Aigupta ram rengata hruaisuakpu, an pahai Pathian, Rengpa chu an irheisana, an kôl vêla om pathianhai tiang an pana, an biak sa tâka. Rengpa chu a ning an inmurtira.

¹³Rengpa irheisanin, Baalhai, Asterte-hai chubai an mûk tâka.

¹⁴Khanchu, Israelhaii chung a Rengpa chu a saterengin a ning an mur tâka, lei roktuhai an phûta, an râlhai an kôl vêla om nam danghai kuta a pêka, lei doi ngam ta mahai.

¹⁵Irdoi hranga an fe suakna hmun tina a ihril ang ngeiin Rengpa'nchangpuihai nuam ta maka, an lunginzîng tâk a ni.

¹⁶Khanchu, Rengpa'n anni dengintheituhai rengata santu hrang hruaituhai a zong pehaia,

¹⁷khannisian, an hruaituhai chong chu irngai nuam mahaia, Israelhaiin Rengpa chu an irheisana, pathian dang an irzûla, chubai an mûk mai ngai. An pahaiin Rengpa thupêkhai chu an zôma; khannisian an pahai omdân chu zôm nuam ngai mahai.

¹⁸Rengpa'n hruaituhai a pêkhaia, Rengpa'n kha hruaituhai kha a ompuihai ngai, an dam sûng chu an râlhai kut ata a saninzôk ngai; anni dengintheitirtu le opbetuhai sika an inrûm chu Rengpa'n an ren nôkhai ngai.

¹⁹An hruaitu a thi'n chu hnung tiang irletin, an pahai nêka siat ualin an om ngai; pathian dang biak le chubai mûk an uara, nam dang ti dân tinrêng an lâka, an tho insualna mâksan ual mahai.



²⁰Israelhai chung a Rengpa chu a saterengin a ning an mur tâka, “An pahai zôm hranga ki thuthung kha, hi an irchihai hin an insiata, ki hê lak irngai nuam mahai.

²¹Khasikin, Josua a thia, nam dang, a inhnotsuak loihai kha, kei khomin inhnotsuak ual ta no ning.

²²Hi mihai hi, an pahai angin ki lampui an zui mo zui loi mo fiana hrangin ki hmanghai hrang a ni,” a tia.

²³Khasikin, Rengpa'n kha namhai kha inhnotsuak loiin an omtir tâka, Josua kuta khom pe ual loiin, a thi hnung tena khom inhnotsuakhai loiin an omtirhai zêl tâka.

Roirêltuhai 3

Israelhai rama nam dang la omhai

¹Israelhai Kanaan rama râl doinaa chang phâkloihai fiana hranga hi nam senkhathai hi Rengpa'n an omtirhai a ni.

²Israel irchi, thoiinthaerhai, irdoinaa la chang ngai loi mihaiin irdoina an irchu theina hrangin an omtirhai a ni.

³Kha namhai kha chu: Filistia rêng ringa hai, Kanaan mi murdihai, Zidon mihai, Lebanon tâng, Baal Hermon le Hamath kua lûtnaa om Hiv mihai an nih.

⁴An pahai kuanga Rengpa thupêk, Mosia a ihril kha, Israelhaiin an zôm mo zôm mahai moh ti inlang infelna hrangin hi mihai hi a inkung a ni.

⁵Israelhai chu Kanaan mihai, Hit mihai, Amor mihai, Periz mihai, Hiv mihai le Jebus mihai laia an oma.

⁶Kha mihai leh khan nupang pasal an irnei pola, an pathianhai chu an biak nôk tâka.

Othniela roirêltu

⁷Khanchu, Israelhaiin Rengpa nuam loi lam thilsual an thoa, an Pathian Rengpachu an mâksana, Baalhai le Aseri-hai chu an biak tâka.



⁸Khasikin, Rengpa chu Israelhai chung a ning an mura, Mesopotamia ram rêng Kusan-risathaima an hnêtira, Israelhai chu a thuhnuaia kum riat an oma.

⁹Israelhaiin Rengpa chu an koia, Kaleba sangpa, Kenaza nâipa Othniela chu Rengpa'n Israelhai sansuak hrangin a tîra.

¹⁰Rengpa Irtha chu a chung a oma, Israelhai hruaitu a hong ni tâk. Irdoi hrangin a fe suaka, Rengpa'n Mesopotamia rêng Kusan-risathaima chu an hnêtira, a kut ata Israelhai chu a sansuakhai tâka.

¹¹An ram chu kum sômminli sùng irngeina a oma, Kenaza nâipa Othniela chu a thi tâka.

Ehuda

¹²Israelhaiin Rengpa nuam loi lam thilsual an tho nôka. Rengpa'n Moab rêng, Eglona chu Israelhai nêkin an hrâtir tâka.

¹³Eglona'n Amon mihai le Amalek mihai a'rrualpuihaia, Israelhai chu a beia, an hnêa, tûm thing tamna khopui Jeriko chu a lâka.

¹⁴Israelhai chu Moab rêng Eglona hnuaia kum sôm kum riat an oma.

¹⁵Khannisianlân, Israelhaiin Rengpa chu an koia, santu hrang a pêka. Kha mi kha Benjamina irchi, Gera nâipa, Ehuda, vei tianga hmang mi a ni. Israel mihaiin Moab rêng Eglona pêk hrangin thilpêk an inchôitira.

¹⁶Ehuda'n chem ngaih tak mûk khat vêla sei a siama, a puan hnuaia a chang tianga a teêl tiang khan a thup zêta.

¹⁷Moab rêng Eglona chu mi mar tak hi a nia, Ehuda'n thilpêk chu a pêka;

¹⁸thilpêk a pêk zoiin chu thilpêk chôituhai chu in tiang a tîrhai tâk.

¹⁹Gilgal kôla lung khur rengata Ehuda chu a kîr nôka, Eglon kuang a fe nôka, "Mahripom rêngpa, nangma kuang thu'rthup intung hrang ki nei," a tia. Rêngin a siahlohai kuang, "Ni suaksan zit roi duah," a tia. Khanchu, an suaksan tâka.



²⁰Rêng kha a chontan chung taka a sôl inchanna hmun dâina khan a bing dokin a lei toia. Ehuda'n, "Ni kuang Pathian chongbe insîr hrang ki nei," a tia. A toina hmun ata a lei thoia.

²¹Ehuda'n a vei kutin a chang tianga chemte kha a kêldoka, a phînga khan an vit tâka.

²²Chemte chu a tum khîta, a fong khom a lût sa sikin phôiapai mak; a hnung tiang chemte hmor chu a tertota.

²³Ehuda chu pên tiang a suak pata, chontan chung tak inkhâr chu a khâra a kalkhak tâka.

²⁴A suak hnungin chu, rêng siahlohai chu an hongga, chontan mikot chu a'rkalkhaka. 'A chontan sîngrîla irsinsiam hranga fe ni a ti,' an tia.

²⁵Zoro sôtak an nghâka chontan inkhâr chu inhong ta maka, khanchu châbi an lâka, inkhâr chu an inhonga, an pu chu a thia, hnuaichanga a'rhlum raka.

²⁶An buai sup sup lai takin Ehuda chu a suaka, lung khur a fe irkâna, Seira-ah an tân pat tâka.

²⁷Ehuda chu Efraima tâng ram a hong tungin chu bekul a tuma, Israelhai chu tâng ram rengata a kuang an zu fea, ama'n a hruaihaia.

²⁸An kuang, "Ni zui roi, nin râl Moab mihai chu nin kuta Rengpa'n a pêk tâk," a tia. Ehuda chu an zuia, Jordan vadung irkânhai Moab mihai chu an lâk kîrhaia, tûte a kâi irman om mahai.

²⁹Kha zoroa khan Moab mi sîngkhat vêl, mi hrât le mi nakngol ngot an thata, inkhat lua a zôk om mahai.

³⁰Kha nî khan Israelhaiin Moab mihai chu an inhnê ta. Ram chu kum sômriat irngeina a lêng ta.

Samgara

³¹Khan ama hnunga Anata nâipa Samgara khomin Filistia mi irzaruk chu sehrât sunna hmolin an zuithathaia, Israelhai chu a sansuakhai.

Roirêltuhai 4



Debori le Baraka

- ¹Ehuda thi hnunga Israelhaiin Rengpa nuam loi lam thilsual an tho nôk tâka.
- ²Khasikin, Rengpa thuin Kanaan rêng Jabina'n Israelhai an hnêa, Hazor khuua an lala, a sipai hruaitu chu Haroset-Goim-ah om Sisera a ni.
- ³Jabina'n thîr sakortali irzakuak a neia, kum sômhni sîng chu Israelhai deng an theitirhai tak taka, Israelhaiin Rengpa an koia.
- ⁴Deipunu, Debori, Lapidota dôngma chu, Israelhai roi a rêla.
- ⁵Efraima tâng rama, Bethel le Rama kua kâra, Debor khuua tûm thing hnuuaia a toia, Israel mihaiin a kuang chongirdon an fe hena.
- ⁶Kedes-Naftali-ah om Abinoama nâipa Baraka chu a koia, a kuang, "Israelhai Pathianin 'Naftalia le Zebulun irchihai ata mi sîngkhat hruaiin Tabor tâng tiang fe roi,' a iti mo ni mah?"
- ⁷Kanaan rêng Jabina sipai hruaitu Sisera chu a thîr sakor tâlihai le a sipaihai leh ile Kison dunga nangni hruai ki ta, ni kuta nangni pêk ki ti a ti kha," a tia.
- ⁸Baraka'n, "Ni fe'n chu fe ki ta, ni fe no'n chu fe no ning," a tia.
- ⁹Debori'n, "Fe ngêt ki ti; aniachu, ni fe khomin ni roiinpuina hrang ni no ni; Rengpa'n Sisera chu nupangin a inthattir hrang a ni," a tia. Debori chu a thoia, Baraka leh Kedes an pana,
- ¹⁰Baraka'n Naftalia leh Zebulun mihai a koibûmhaia, mi sîngkhatin an zuia, Debori khom a fepuihai sa.
- ¹¹Ken mi Hebera chu Mosia tarpu, Hobaba irchi a nia, Ken mihai lai ata a bingin a oma, Elon-Bezanim bul Kedes vêla khan riakbuk a hong khuara.
- ¹²Tabor tâng tiang Abinoama nâipa Baraka a fe thu Sisera chu an hrila.
- ¹³Khan Sisera'n a thîr sakor tâli irzakuak chu a fepuihaia, Haroset-goim rengata a sipai murdi chu Kison dunga khan a hruaia.
- ¹⁴Debori'n Baraka kuang, "Tho, a vuan hin Rengpa'n ni kuta Sisera hi pêk a ti. Rengpa'n nang a hruai mai mo ni ma?" a tia. Khanchu, Baraka chu Tabor tâng rengata a sipai sîngkhat leh ile an chuma.



¹⁵Baraka'n Sisera chu khandaiin a doi thuta, Rengpa'n Sisera chu a thîr sakor tâli le a sipaihai leh ile an buaihai chit tâka. Sisera chu a thîr tâli ata a chuma, kein an tân pata.

¹⁶Baraka'n a thîr tâlihai le a sipaihai leh ile an irzûla, Haroset-goim dênin an irzûla, Sisera sipaihai chu a sâtthat zita, inkhat lua intâna zôk om mahai.

¹⁷Sisera chu Ken mi, Hebera dôngma Jaeli puan ina an tâna, a lût pata, Hazor rêng Jabina le Habera insûng mihai chu an irngei mai a nih.

¹⁸Sisera don hrangin Jaeli chu an tânsuaka, "Hong intân ro, ka pu, ki kuang hong irbîk ro; chi viat no ro," a tia. A puan ina khan an tâna, a lûta, puanin ar khû tâka.

¹⁹Sisera'n, "Tui in hrang ni pe ta, ki tui an hrâl e," a tia. Sehrât dût bûr an hong, an intira, puanin ar khû nôka.

²⁰Sisera'n, "Puan in mikota khan omin lân, mi an hong, 'Hitaka hong mi an om mo?' tia nang an irdonin, 'Om mah' ni iti hrang a ni," a tia.

²¹Sisera chu a sân a sôla, inmutui takin a ina. Khan, Habera dôngma'n puan in epna irzum le sekchôi a lâka; a in hnungin dâiriamin a va lûta; a inmu irhnik lai taka a zâl laiin puan in kilna irzumin a bangbarêpa a hêma, a hêm intuma, hnuaia an pêr tâka, khanchu a thi tâka.

²²Baraka'n Sisera chu a hong irzûla, Jaeli'n lei don hrangin a lei suaka, a kuang, "Hong ta, mi ni izong chu nang inentir ki ti," a tia. An lût suam tâka, Sisera chu a lei thia, puan in kilna chu a bangbarêpa a'rphun muta.

²³Kha nî sîn khan Israelhai makunga Kanaan rêng Jabina chu Rengpa'n an duaitira.

²⁴Kanaan rêng Jabina chu Israelhaiin an inhnê zêl tâka, a mongna taka chu, an that irhmanghai zit tâk.

Roirêltuhai 5

Debori le Baraka hla

¹Kha nî sîn khan Debori le Abinoama nâipa Baraka'n hiang hin hla an sak:



²Hruaituhaiin Israelhai mâ an hruaia, mipuiin raifân takin an zui dûl dûl mai hi, irzuk takin Rengpa chu inpâk roi.

³Rênghaio, irngai roi, Hruaituhaio, nin mikuar lei sung roi, Rengpa inpâkin hla sak ki ti. Israelhai Pathian Rengpa chu chôirsâng ki ti.

⁴O Rengpa, Seir tâng ni mâksana, Edom ram ni suaksan khan irnêng kha an hnîng dûm dûma, Irvânhai khom rua a zuang zunga, A ni, Sûmhai khan rua an thotira.

⁵Rengpa makunga hin tânghai an inthinga, Sinai tâng ten khom, Israelhai Pathian Rengpa makunga khan.

⁶Anata nâipa Samgara le Jaeli dam lai hai khan, lamlianhai kha a ping khaka, Khualinzin mihaiin lam irthep irkualin kêng an fe ngai.

⁷Debori a hong mâna, Israel nu a hong thoi mân khan, Om mahai, Israel laia om mahai tûte.

⁸Mihaiin pathian dang biak an inthang, Ei rama hin irdoi a suak tâka, Israel mi sîngminli laia pho le ufei chôin nin om mo?

⁹Kin renhai bâka, Israel hruaituhai, irzuk taka zuituhai khom chu: Rengpa chu inpâk roi.

¹⁰Sakuartung chung a chuang ngaihaio. Nangni toihmun irsâ taka toihai khomin lamintûn zongtuhai leh hin hi thu hi inpuang roi.

¹¹Tuikhura irhâi irsê sup sup khan, Rengpa sintho satzia an hril, Israel rama thil roiinpui a itho chu an insîra. Kul mikothaia khom an irbukkhôm tâka.

¹²Har ro, har ro, Debori, har ro, hla lei sak ta, Abinoama nâipa, thoi ta, Baraka, thoi roh. Râl tamtak sala hruai dût dût ro.

¹³Mi lian rualhai khomin an zui saa, Râl doipui hrangin Rengpa mihai an zuang chuma.

¹⁴Efraima ram rengata tuidung tamna tiang an pan, An urêng Benjaminahaiin an hong zuia. Makira mihai mi lianhai an zuang chuma, Zebulun rêng ulianhai leh ile an zuang chum.



¹⁵Isaka mi lianhaiin Debori an zuia, Isaka angin, Baraka khom: Irhôt tianga khan ama leh an intân lûta, Reubena mihai laia chu irthêrin an oma, Fe hrang thu chu siam infel thei mahai.

¹⁶I sika mo belra rual koina theihle tum irngaia, Belra pâl kêra nin itho mai? Reubena mihai lak irsen an oma, Fe hrang thu chu siam irfûk thei mahai.

¹⁷Gada mihai chu Jordan râla an om daih tâka, Dan mihai chu irkuanga an la om maia, Asera mihai khom tuipui muang tianga, Iva panga an om mai.

¹⁸Zebulun le Naftalia mihai rêkin chu thi vângin râl an doia.

¹⁹An rênghaiin an hong doia, Khanchu, Kanaan rênghaiin Megido vadung kôl Tanak-ah khan an irdoia. Khannisian, râllâk sum lâk hrang nei mahai.

²⁰Vâna ârsihai khomin an hong doia, Ârsihaiin an hmun rengata Sisera chu an hong doia.

²¹Kison tui lianin anni chu a hnôl irhmang zita. Tianlai Kison vadungin a tâna. O ki'rtha hrât takin fe mai roh.

²²Sakorhai chu an irchôma, An ke tinhai leh hnuai inrâkin an irchôm an irchôma.

²³Rengpa vântîrtônin, “Meroz chu khosâl inpêl ro,” a tia. “Khataka omhai chu natakin khosâlna inpêl roh. Rengpa changpui hrangin an hong no sikin, râl an idoi nuam loi a ni,” a tia.

²⁴Nupang murdi laia hin Jaeli Ken mi Hebera dôngma hi mi vânei tak ni a ti.

²⁵Sisera'n tui a zonga, dût an intira, Khuri sataka dût inkang a hong chôia, a pêka.

²⁶Nupangnu khan puan in kilna a hong chôia sinthotuhai sekchôi a hong chôia, Sisera chu a sekchôi leh khan a lua a zêm inlûta, A bangbarêp taka a hêma, a hêm that chak tâka.

²⁷A'rkhûka a'rthep rupa, an rîla, a ke bula a that raka. A thi zel ta.



²⁸Sisera nu'n a tukver ata a lei thîra, a zu koia. 'Itho mo a thîr sakortâli a hong tung inhnung bâka? Itina mo a sakorhai chu an ir-ôi bâka,' a tia.

²⁹A rualnu vâr takhaiin a lei inthêma, Ama le ama lungirngamna chong ar sak tâka.

³⁰"Ni man belsa hrang an zong ni ngêt a ti, râlîak sum irsem ngêt hi an zong, Đôngmate inkhat le inhni man belsa hrang an irvâk ni a ti, Sisera chôi pe hrang puan satak an izong vêl ni a ti. Rêngnu sil hrang an izong ngot ni a ti," tiin.

³¹O, Rengpa ni râlhai khaang khan thihai sian, Ni rualhai rêk chu, misa suak angin vâr phut ri sehai tiin. Kum sômminli sùng chu an rama irngeina a lênga.

Roirêltuhai 6

Gideona

¹Israel mihaiin Rengpa nuamloi lam thilsual an thoa; kum sari sùng Midian mihai thuhnuai a an omtirhaia.

²Midian mihai chu Israelhai nêkin an hrâta, khasikin Israel mihai chu tâng panga irbîk hrangin khur an invera, khurhaia an irbîka, kulhai an siama.

³Khan, Israelhaiin chîmu thil an tho'n chu Midian mihai, Amalek mihai le Ramchâra om mihai chu an hong fea, an hong doihai ngai.

⁴Riakbuk an siama, Israelhai chîmu songhai chu an insiat zela, Gaza dênin Israel rama khan fâk nêk om mak; belrahai, sehrâthai, sakuartunghai an lâkpai pehai ngai.

⁵An sa pâlhai an hongpuihaia, puan inhai an hong chôi, khuai pung ang mai an ni, ram chu an hong insiat ngai a ni.

⁶Khasikin, Israelhai chu om nalam inhre ta mahai. Israelhaiin Rengpa an koia.

⁷Midian mihai sikin Israelhai dengthei irhâi chu Rengpa'n a lei inhriata,

⁸Israehai kuanga deipu inkhat a tîra, "Israelhai Pathian Rengpa'n hiang hin a ti: 'Aigupta ram rengata suaka nin om kha, nangni ki hong hruaisuaka.



⁹Aigupta hruaitu le nangni dengintehituhai kut ata nangni ki hruaisuaka, hi ram hi nangni ki pêk tâk a ni.

¹⁰Rengpa nin Pathian chu ki ni. Amor mihai rama om nin nia, an pathianhai chu biak no roi ki iti kha, ki chong zôm nuam mak chêi,' a ti e," a tia.

¹¹Rengpa vântîrtôn chu Ofra khuaa a fea, Abiezera mi Joasa saiso thing bula khan a toi tâka; Joasa nâipa Gideona'n uain in-ôtna khura Midian mihai hmuloi hrangin bu a chîla.

¹²Rengpa vântîrtôn chu a zuang inlâra, a kuang, "Nang mi hrât huaisen, Rengpa chu ni kuang a om," a tia.

¹³Gideona'n, "Ka pu, Rengpa hi kin kuang a omin te hi thilhai hi itina mo kin chung a ichum? kin pahaiin a sintho roiinpui tak tak an ni inhril kha khôn mo a om tâk? Rengpa'n Aigupta ram rengata a ni hruaisuak mani? Atûn hin chu, Rengpa'n a ni pai tâka, Midian mihai kuta a ni pêk tâk a ni hi te," a tia.

¹⁴Rengpa'n ama chu a ena, "Ni hrât zap hi te, Israelhai chu Midian mihai kut ata hi sansuak ta ro, nang ki itîr mo ni ma?" a tia.

¹⁵Gideona'n, "Ka pu, itin mo Israelhai chu ki sansuakhai hrang? Manasea irchi laia hrâtloi tak sînga mi ki nia, kin insîngkua laia khom nâipang tak ki ni," a tia.

¹⁶Rengpa'n, "Nang ompui mai ki ti, Midian mihai chu mi inkhat ang dôrin ol takin inhnê ni ti," a tia.

¹⁷Gideona'n, "Lung nin khamin lân, Rengpa chu ni nih ngêt ti inhriatna hrang ni tho pe roh.

¹⁸Fe pat no'n lân, thilpêk hong lâk ki ta, ni ke bula hong chôi ki ti," a tia. Ama khan, "Ni hong tung mâka chu hin lei om mai ki ti," a tia.

¹⁹Gideona chu ina a lûta, kêltuai a thata, chol polloi bai her sôm a chôi saa. Kêl hme chu baltia a siaa, a tui chu a bêla a siaa. Saiso thing hnuaia Rengpa Vântîrtôn kuang a chôi.



²⁰Rengpa vântîrtônin, “A hme le bai chol polloi kha lung chung a khan sia’n lân, a tui kha buak ro,” a tia. Khaang khan Gideona’n a thoa.

²¹Rengpavântîrtônin a khianghrol hmorin sa le bai chol polloi kha a intôna; lung ata mei a hong suaka, sa le bai chu a kâng irhmang zit tâka. Rengpa vântîrtôn chu a fe irhmang pat tâk.

²²Gideona’n Rengpa vântîrtôn ngêt a nih ti an hriat tâka, “E! O Rengpa Pathian, Rengpa vântîrtôn leh hmâi ir-en ngitin kin irhmu tâk kêng,” a tia.

²³Rengpa’n, “Charindong no ro, irtharngam takin om ro, thi no chi ni,” a tia.

²⁴Kha hmuna khan Gideona’n Rengpa ta hrangin maichâm a siama, Rengpa Salom a phuaa. Abiezer rama Ofra khuaa khan, atûn ten a la om.

²⁵Kha nî zâna khan Rengpa’n a kuang, “Ni pa sehrâtchal le sehrâtchal dang kum saria irchangtak hong kaiin lân, ni pa isiam Baal maichâm chu insiatin lân, a kôla pathian phun khom kha phôipai roh.

²⁶Hi irnêng pônga hin ni Pathian Rengpa ta hrangin maichâm iamom tak siamin lân, sehrâtchal inhnina kha hâlrivôm thilinhlan naa inhlan ro; a hâlna thing chu, ni iphûrpai Aseri thing kha hmang ro,” a tia.

²⁷Khanchu, Gideona’n a siahlo sômkhât a hruaia, Rengpa ihril angin a thoa. A insûngkua mihai le a khuaa mihai a chi sikin sûna chu tho mah, zâna a tho tâka.

²⁸Zînga chu mihai an hong thoia, Baal maichâm chu a lei chima, a kôla Aseri irlim thing phun khom a kiak an hmua; maichâm thara khan sehrâtchal inhnina kha hâlrivôm thilinhlan naa khan inhlan an hmua.

²⁹“Tu itho mani?” an tia. An zong irvêla, “Joasa nâipa Gideona itho a ni,” ti an inhriata.



³⁰Khanchu, khuaa mihaiin Joasa kuang, “Ni nâipa kha hong hruaisuak ro, kin ithat hrang kêng. Baal maichâm an siata, a kôla Aseri irlim irphûm khom a tanpai a ni,” an tia.

³¹Khannisian Joasa’n khaanga tîtuhaia kha a sâma, “Baal hi nin thop mo, san hrang nin itum ma ni? Baal thop murdi chu nangtûk zîng renga hin thatpai an ini hrang a ni. Pathian a ni tak takin chu a maichâm an insiat lai khan ama le ama a irhrung hrang a ni kha te,” a tia.

³²Khasikin, kha nî khan Gideona chu Jerubaala an phua tâk a ni, kha kha “Baal in doi ri se,” tihna a ni. Baal maichâm an siat pe sikin, Baalin hong doi ri se, an tihna a ni.

³³Midian mihai, Amalek mihai, ramchâra omhai chu an irbukkhôma, Jezreel irhônga riakbuk an khuara.

³⁴Rengpa irtha chu Gideona chung a oma, Abiezera mihai koi khômna’n bekul a tuma.

³⁵Manasea mihai, Asera mihai, Zebulun mihai le Naftalia mihai kuang khom palâi a tîrhaia, ama an hong irtongpuina hrangin an hong a.

³⁶Gideona’n Rengpa kuang, “Israel mihai sansuak hrangin hmang ni ni nuamin chu,

³⁷en ro, hruizôla belra mul hi sia ki ta, belra mula vai hin irdo a tâka, a kôl vêl irnêng a châr in chu, ni ihril angin Israelhai hi nangma ni hmangin saninzôkhai thei ki ti, ti inhria ki ti,” a tia.

³⁸Nangtûk zînga a thoiin chu belra mul kha an hera, belra mula irdo chu khilât khat a suaka.

³⁹Gideona’n Pathian kuang, “Ki chung a ningmur no ro duah, voikhat vai lei hril nôk viat rong, enfiana hi Belra mula hin ni pêk nôk ro: A vuan zân chu belra mul hi hul sianlân, a kôl vêla irnêng hi chu dui ri se,” a tia.

⁴⁰Kha nî zân khan Pathian belra mul chu an hula, irnêng chu dui norin irdo’n an phâtira.



Roirêltuhai 7

Gideona'n Midian mihai a inhne

¹Khanchu Jerubaala an iti Gideona le a kuanga mi omhai chu zîng taka an thoia, Herod vadung kôla riakbuk an khuara, Midian mihaiin chu an omna hmâr tiang More tâng kôla riakbuk an khuara.

²Rengpa'n Gideona kuang, "Ni mihai hi a sân an tam, ni kuta Midian mihai ki pêkin chu, Israelhaiin keini kut ngeia saninzôk kin ni hi teh tiin, omlian thôna'n ti.

³Mipui laia hril ro, "Tukhom, irdoina chia thâidôp chu Gilead tâng ata in tiang kîr nôk ri se, tiin inpuang ro," a tia. Khanchu, mi sîngghni le sângghni chu in tiang an kîra, sîngkhat chu an la om.

⁴Rengpa'n Gideona kuang, "Mi an la tam ok, ivadunga hruaihaiin lân, keiin inthangsuakhai ki ti: "Hi hi fe ri seh," ki ti'n chu fepuiin lân, 'Hi hi chu fe no ri se,' ki ti'n chu tîrpai ro," a tia.

⁵Khanchu, ivadunga a hruaihaia, Rengpa'n Gideona kuang, "Ui anga mileia tui inliak chu a bingîn sia'n lân, khûksadela tui indôp chu a bingîn se ro," a tia.

⁶An kut zaphaa inliaka inliakhai chu mi irzathum an nia, mi danghai chu khûksadelin tui an indôp a ni.

⁷Rengpa'n Gideona kuang, "Mi irzathum, an kuta tui thâla indôp hmanghai leh hin nangni sansuak ki ti, Midian mihai chu nin kuta pêk ki ti," a tia.

⁸Khanchu fâk nêk pêltuhai le bekul irputtuhai le mi irzathum ti no chu mi dang chu an in tiang a tîr nôkhai zita. Midian mihai riakbuk chu an thang tiang phâia om a ni.

⁹Zâna Rengpa'n Gideona kuang, "Thoiin lân, an riakbuka, zu fe roh, ni kuta inhnêna ki pêk tâk a ni.

¹⁰Nangma zu fe ni chi'n chu ni siahlo Pura kha hruai sa roh.



11An ihril chu zu'rngaiin lân, kha zoi chu an riakbuk zu doi chu a sate'n nuam ni ti," a tia. Khanchu, a siahlo Pura leh khan râl sipai omna hmor tiang khan an zu fea.

12Midian-hai, Amalek-hai le ramchâra omhai chu irhôra khan an irthek mura, khâi pung ang mai an ni, an saringseihai khom muanga chiaiphoi anga tep zoiloi an ni.

13Gideona hai chu an zu tungin, mi inkhatin a rual chu a'rmang a lei inhrila, "Irmang ki neia, kin riakbuka hin barli bai tang a'rhuma, riakbuk puanin a hong dela, a del siata, hnuai a'rdâp ziak tâk," a tia.

14A rualpa'n, "Joasa nâipa Gideona khandai a ni no'n te imo a ini hrang? Kha Israelpa kuta khan Midian-hai le sipaihai murdi hi Pathianin a pêk tâk a ni hi te,!" a tia.

15Gideona'n irmang le a omzia an ihril kha a inhriatin chu Pathian chubai a mûka; Israelhai riakbuka a hong fea, an kuang, "Thoi roi, Midian mihai chu Rengpa'n nin kuta a pêk tâk," a tia.

16Mi irzathum chu buk thumin a sena; bêl rong le a sûnga meiser om, bekul leh ile a pêkhai chita;

17an kuang, "Mi en chak unglân, ki itho ang tho zêl roi, an riakbuk sîr tak ki tung tika ki itho angin nangni khom nin itho hrang a ni.

18Kei le ki fe chanpuihaiin bekul kin tumin chu kil tina tum chit unglân, 'Rengpa le Gideona ta hrangin' tiin khêk sup sup roi," a tia.

19Gideona le a mi irzakhathai chu zân laia, râl hrungtuhai an irthûl lai takin riakbuk hmor chu an tunga; an bekul chu an tuma, an bêl chu an zêm khoia.

20Pâl danghai khomin an bekul chu an tuma, bêl chu an zêm khoia, meiser chu an vei kutin an intûka, bekul chu an chang kuta intûkin an tuma, "Khandai chu, Rengpale Gideona ta hrangin!," tiin an khêk tâka.

21Râlhai riakbuk irhîlin an ngîrna hmun chita khan an ngîra, riakbuka sipaihai chu an khêka, an intân zoi tâka.



²²Gideona mihaiin bekul irzathum kha an tuma; Rengpa'n râlhai murdi chu anni le anni a'rtuktirhaia; Zarethan tiang Beth-sita dêna rot intân an oma, Tabat bul Abel-mehola ramri dêna rot intân khom an om.

²³Khan, Naftalia irchihai, Asera irchihai le Manasea irchihai Jordan nisua tiang le nitâk tianga omhai chu an koi bukhaia, Midian-hai an inhnotsuakhaia.

²⁴Gideona'n Efraima tâng rama palâi a tîrsuaka, "Hong suak unglân, Midian mihai hong doi unglân, Midian mihaiin Jordan dung le ivadung danghai chu an lei khâlhai zita.

²⁵Midian hruaitu inhni Oreba le Zeeba chu an chela, Oreba lung hmuna Oreba chu an thata, Zeeba chu Zeeb grep sômna khura an thata. Jordan râla Oreba le Zeeba lu chu Gideona kuang an hong chôia.

Roirêltuhai 8

Midian mihai an inhnêna

¹Efraima mihaiin Gideona kuang, "Midian mihai doi hrangin itho sika mo ni ni ikoi loi?" an tia, natakin an hala.

²Gideona'n, "Nangni lei itho ngai leh hin kin itho thei sun hi ite hrilirkhîna om mak! nangni Efraima mihaiin nin itho sunhai khom hi keini namhai, Abiezera mihai itho nêkin chu a roiinpui daih kêng.

³ Pathianin Midian hruaitu lian Oreba hai, Zeeba hai chu nin kuta a pêk tâka, keiin ite ki itho om ual mah hi te," a tia. Khaang khan a chong zoiin an nuarna khom chu a hong dâi tâka.

⁴Gideona le a mi irzathumhaiin Jordan dung an irkâna, an sôl ok khomin, an râlhai chu an irzûl mai,

⁵Sukoth khua an tunga, kha khuaa mihai kuang, Gideona'n, "Midian rêng Zeba le Zalmuna kin irzûla, ki mihai hi a sate'n an sôl tâka, ngaihoitakin fâk nêk pehai ro duah," a tia.

⁶Khannisian, "Sukoth nin kuta nin ichel tâk khom la ni loiin, itin mo ni sipai sôlhai fâk nêk kin ipêkhai hrang?" an tia.



- ⁷Gideona'n, "A dik Rengpa'n Zeba le Zalmuna kin kuta a ni pêk tika chu ramchâra ilhling le sûl ilhling neiin nin vun kai thêr zit ki ti," a tia.
- ⁸Kha rengata Penuel-ah an fea, an kuang, Sukoth mihai a ti ang ngêt khan a ngênhaia, anni khomin Sukoth-hai isâm ang ngêtin an sâma,
- ⁹Penuel-ah mihai kuang khom khan, "Hoitak le dam taka ki hong kîr nôk tika nin khua hi inram chit ki ti," a tia.
- ¹⁰Zeba le Zalmuna chu Karkor khuaa, an sipaihai leh an oma, ramchâra omhai chu mi nuai khat le sîngni irdoinaa an thi tâka, a thi zoiloi la damhai mi sîngkhat le sâng ringa'n chu an la zui mai a ni.
- ¹¹Gideona chu Noba le Zogbeha nisua tiang thingtâng lampuia a fea, irningloiin a râlhai le an irtok thuta.
- ¹²Midian rêng Zeba le Zalmuna chu an intâna; khannisian an irzûla, an chela; an sipaihai chu a saterengin an buai tâka.
- ¹³An irdoi zoiin chu Gideona chu Heres lam tunga a hong kîra.
- ¹⁴Sukoth mi ruatharte inkhat hi a chela, an khuaa hruaituhai le upahai irhming ar dona.
- ¹⁵Gideona chu Sukoth khua a va fea, an kuang, "Zeba le Zalmuna hi en ta roi, Zeba le Zalmuna hi, nin kuta om tâk mannia, 'nin sipai sôlhai hi fâk nêk itin mo kin ipêkhai hrang' tia nin ni ihril kha," a tia.
- ¹⁶Ramchâra ilhling le sûl ilhlingnei a lâka, an khuaa hruaituhai chu a chela, Sukoth mihai mit hmua, kha ilhling leh khan a zêmhaia.
- ¹⁷Penuel kul banghai chu ansiata, a sînga mihai chu a that zita.
- ¹⁸Gideona'n Zeba le Zalmuna chu, "Tabor tânga mi nin ithathai kha i ang mi man ni?" tiin ar donhaia. Anni'n, "An ir-ang zit, rêng nâihai nia irhoi tak an ni," an tia.
- ¹⁹Gideonan, "Ka uhai, ka nu tak nâihai ngêt an ni. Rengpa irhming sâmin ki hril hi, thathai no unglân nangni khom nangni that no ning," a tia.



²⁰A nâipa upatak Jethera kuang, “Thoiin lân, thathai ro,” a tia. Khannisian, khandai chu irlek ma, a la nâipang hrai sikin, a ithat ngamhai loi a ni.

²¹Zeba le Zalmuna khan, Gideona kuang, “Nangma kha hongin lân, ni that ro, pa le pa irdoi hrang a ni hi te,” an tia. Gideona chu a thoia, Zeba le Zalmuna chu a thathaia, an sakuartung ringa irtheihai khom a lâkpai pehaia.

²²Israel mihaiin Gideona kuang, “Midian mihai kut ata ni ni sansuaka, kin chung a roirêltua om roh, ni nâihai, ni tuhai khom roirêltua hong chang zêl ri sehai,” an tia.

²³Gideona’n, “Nin chung a roirêltua chang no ning; ki nâihai khom chang no nihai, nin chung a roirêltu hrang chu Rengpa a ni,” a tia.

²⁴Gideona’n an kuang, “Thil inkhat nangni ngên hrang ki nuam a ni, mi tinin râlhai bômzoi nin ilâk kha inkhat ni pe chit unglân ki nuam!” a tia. (Ismaela mihai an ni sikin rângachak bômzoi an nei seng a ni.)

²⁵Anni’n, “Inhnar ma ung, pe kin ti,” an tia. Puan an dâpa, râl bômzoi an lâk chu an pêk senga.

²⁶Khaang khan an ipêk khom rângachak bômzoi chu her sôminhni vêl a ni. Midian rêng hai irvôna, ringzêlhai, hnâr bethai, puan sendukhai le an saringsei ring khita neihai chu tep sa ni mah.

²⁷Gideona’n kha rângachak hai leh khan Efod a siama, a omna khua Ofra-ah khan a siaa. Israelhaiin an Pathian an mâksana, Gideona le a in mihai ta hrangin châng ichiom tak a hong ni tâka.

²⁸Khanchu, Midian mihai chu Israelhaiin an inhnêhaia, ite châng thei ta mahai. Gideona dam sâng chu ram kha kum sômminli irngeina a lêng.

Gideona thi thu

²⁹Gideona, Jerubaala an ti ngai chu, ama in tiang a fea.

³⁰Gideona’n dôngma a nei intama, nâipasal sôm sari a neia.

³¹Sekem khuaa a lâksîrin nâipasal a nei pe saa, ar hming chu Abimeleka an phuaa.



³²Joasa nâipa Gideona chu a tar ok tena a thia, Abiezera mihai ram Ofra khuua, a pa Joasa thâna an phûm sa tâka.

³³Gideona a thi hnunga chu Israel mihai chu hnungtôlin an oma, Baal an biak tâka, Baal-berith chu pathiana an hong siam tâk.

³⁴Hmun tina an râlhai kut ata sansuaktu Rengpa, an Pathian chu Israelhaiin inhre ta mahai.

³⁵Gideona'n chu Israelhai chung a theidôra irnak songin a om ngaia chu anni'n Gideona insûng mihai chu inren viat ngai mahai.

Roirêltuhai 9

Abimeleka

¹Gideona nâipa, Abimeleka chu Sekem khuua a nu ina khan a fea, a nu insûng mihai le a nu panamhai kuang,

²“Sekem mihai hin, Gideona nâi sômsarihaiin nin chung a roirêl ri seh mo nin ti, mi inkhat vaiin mo, hril roi, nin tia ni'n chu kei hi nin nâihai laia nin thisen irzompui omsun ki ni, nin inhriat mai hrang a ni” a tia.

³A nu nuchahaiin Sekem mihai kuang kha thu kha an hrila, Abimeleka hnungzui chu an nuam tâka, “Kin urêngpa a ni tâk hi te,” an tia.

⁴Khanchu, Baal-berith an biakna in ata tangka sum sômsari an pêka, kha sum leh khan Abimeleka'n mi inriang tak tak le mi hmanghmunboihai a hruaihaia, anni'n ama an zui tâka.

⁵A pa insûng mihai omna Ofra khuua khan a va fea, Gideona nâihai, a uhai sômsari chu lung inkhat chung a that tôla, nâipangtak Jothama rêk chu ar bîka, that mahai.

⁶Khanchu Sekem mi le Bethmilo mi murdi chu an irbukkhôma, Sekem kôla Saiso thing hnuai a Abimeleka chu rênga an siam tâka.

⁷Kha kha Jothama an hrila, Gerizim tâng sîpa khan a fea, theitôpin a khêka, hiang hin a tia, ‘Sekem mihaio, ki thu hi irngai u ta, Pathian khomin nin thu a irngai hrang a ni.



- ⁸Voikhat chu rêng inthang tumin thing murdi an irbukkhôma, oliv thing kuang, “Nang kin rêng ni hrangin om ro,” an tia.
- ⁹Oliv thingin, “Pathian le mihriam chôindômna hrangin an ni hmang tak, ki hriak hi suaksanin thinghai chung a hi tiang kha tiang ki isem vêl thei hrang mo?” a tia.
- ¹⁰Theipui kung kuang, “Nang hongin lân, kin rêng hrangin om ro,” an tia.
- ¹¹Khannisianlân, theipui kungin an kuang, “Ki thumna le ki ra satak hi suaksanin thinghai chung a hi tiang kha tiang ki isem thei hrang mani?” a tia.
- ¹²Khan grep hrui kung kuang, an fea, “Nang ngêt, hongin lân, kin rêng chang hrangin om roh,” an tia.
- ¹³Grep hruiin, “Nangni rêng hrangin om ta inlân, Pathian le mihriam inlômtu, uain sômna hrang grep ra nei hrang mo ki la nia,” a tia.
- ¹⁴Inhningkhôn taka chu, thing murdi chu thing ilhlingnei kuang an fea, “Nang hi chu kin rêng ni ichang ngêt hrang a ni,” an tia.
- ¹⁵Thing ilhlingneiin, “Rêng ni hrangin nin ni nuam tâkin chu ki kung hnuai a hin hong roi; nin hong nuam no’n chu ki ôn ilhling rengata mei hong suak a ta, Lebanon Sidar-hai kâng fâi zit a ti,” a tia.
- ¹⁶Jothama’n a hril zêla, “Abimeleka rênga nin isiam hi dik le fel tak tho mo nin ni? Gideona chu a sintho irphu ang ngei ngaisângin, a insûng mi khom dik takin nin chôindôm nuam mo?”
- ¹⁷Inhre roi, ka pa, Gideona’n Midian mi hai kut ata nangni a sansuaka, thi irhuamin irnak a isong a ni kha.
- ¹⁸Atûn hin chu, ka pa insûng mi hai chung a nin doia, a nâipasal sôm sari chu lung inkhat chung a nin thathaia, a siahlonu nâipa, ni irzirpui nâi Abimeleka hi Sekem khuaa mi hai rênga nin hong isiam tâk a ni hi.
- ¹⁹A vuan sîn hin Gideona le a insûng mi hai chung a thil diktak le feltak nin tho’n chu Abimeleka chu lômtakin zui unglân, ama khomin nin chung a lôm ri se.



- ²⁰Khaang khan a ni no'n chu, Abimeleka rengata mei hong suak sianlân, Sekem le Bethmilo mihai rengata mei hong suak sianlân Abimeleka chu kâng ri se," a tia.
- ²¹A upa Abimeleka a china sikin Jothama chu a rot intâna, Beer khuua a va om tâka.
- ²²Abimeleka'n Israelhai chung a kum thum rêng a changa.
- ²³Abimeleka le Sekem mihai chu Pathianin a'rdoitirhaia, Sekem mihaiin Abimeleka chu vârirlek takin an doi tâka.
- ²⁴Gideona nâi sômsarihai chung a rông taka an that sikin an thisen phuba mophurna chu Abimeleka le ama thoitu Sekem mihai chung a chum tâk a ni.
- ²⁵Sekem mihaiin tâng sîpa Abimeleka lei inruang hrangin mihriam an siahaia, kha mihai khan tukhom kha tianga hong kai chu an lei long polhai ngai. Kha thurchi kha Abimeleka an inhrila.
- ²⁶Khan, Ebeda nâipa Gaala chu a sangpapai leh Sekem-ah an hong; Sekem mihaiin an lei iam zoihaia.
- ²⁷Khanchu, loihaia an fea, grep rahai an irhmala, kût an hmanga, an pathian ina an lûta, an fâkin an ina, Abimeleka chu khua an sâla.
- ²⁸Ebeda nâipa Gaala'n, "Sekem mihai hin imo an inhriata? Itho mo Abimeleka sin nin itho pe? Gideona nâipa kha mo ni ma? Zebula lak hi a thu thua om a nia. Nin pu Hamora irchihai sin hi tho ual roi ba.
- ²⁹Hruaitu ni inlân chu Abimeleka hi inhnotsuak ngêt ki ti. Abimeleka, sipai lâk sa'n lân, hong suak ro, irdoi ei ti, ti ngêt ki ti," a tia.
- ³⁰Khua hruaitu Zebula'n, Ebeda nâipa Gaala thuhiril an hriatin chu a sân a ning an mur tâka.
- ³¹Abimeleka kuanga inrûktein palâi Aruma-ah a tîra, Sekema Ebeda nâipa Gaala le a urênghai an hong, khuua mihai hi ni chung a irdoina siam hrangin an inphûthai tâk.



³²Khasikin, zân zâna hongin lân, ni mihai kha hong hruaiin lân, rama lei inruanghai hrangin thupinrûkhai roh.

³³Zîng taka thoiin lân khopui chu hong irhualrup zel unglân, nangni doi hrangin Gaala le a mihai hong suak chu nin nuamlam ang takin lôhai roi,” a tia.

³⁴Khanchu, Abimeleka chu a mihai leh a zân zânin an irthoka, an suaka, hmun minlia irsemin Sekem khua chu an irhuala.

³⁵Ebala nâipa Gaala chu a hong suaka, kul mikota khan a ngîra. Abimeleka le a mihai chu an irbîk inrûkna ata an hong suaka.

³⁶Gaala khan mipuihai a hong hmu’n chu Zebula kuang, “En ta, tâng rengata mipui an hong suak,” a tia. Zebula’n, “Tâng irhlîm so mihriam mani tiin ni ihmu’nsual ni a ti,” a tia.

³⁷Gaala’n, “En ta, tâng bula so! mi an hong suak ngei so te, pôlkhat dang khom Meonenim rengata an hong so te,” a tia.

³⁸Zebula’n hi ang hin a ti tâka: “Abimeleka hi tu mo a ini, a sin kin itho pe hrang? tia ni ihrilna chongbâi kha khôn mo a om tâk? Ni ihmumâkhai tak tak kha an ni so. Suakin lân, va doihai ta ro,” a tia.

³⁹Gaala’n Sekem mihai chu a hruaisuaka, Abimeleka chu a doia.

⁴⁰Abimeleka’n a’rzûla, an tân tâka. Kul mikot bul dênin mi tamtak pop chitin an irtet phura.

⁴¹Abimeleka chu Aruma khuaa om a nia. Zebula’n Gaala le a urênghai chu Sekem rengata an hnotsuaka, om thei ta mahai.

⁴²Tûk nôka chu Abimeleka’n Gaala le a urênghai chu Sekem khua pên tiang an intân suak hrang ti an hriatin,

⁴³a mihai chu a hruaihaia, pâl thumin a sena, pên tiang a lei inruanga. Mihai chu an hong suaka, a thoia, a doi tâka.



⁴⁴Abimeleka le a mihai chu kul mikot bula inrang takin an intâna, an va nghâka, a rualhai pâl hnihai'n pên tianga lei suak tâkhai kha an irzûlhaia, an that zita.

⁴⁵Abimeleka'n khua chu sùn sôtin a doia, a lâk tâka. A sûnga mihai chu a thathaia, khua chu an siata, michi a phul zuta.

⁴⁶Sekem khuaa hruaitu lian ual ualhai chu Baal-Berith biakna in kul kilkhôra khan an intân khôma.

⁴⁷Khuaa hruaitu ual ualhai an intân khôm thu chu Abimeleka'n a lei inhriata.

⁴⁸Zalmon tânga khan Abimeleka chu a hong luaia, a mihai murdi'n an zuia, Abimeleka'n hrei lian a lâka, thing ôn a tuk thâka, a dâra a'rputa; a mihai kuang, "Ki itho lam ang takin nangni khom tho roi," a tia.

⁴⁹Abimeleka mihai murdi chu thing ôn an lâk chita, Abimeleka itho angin kul kilkhôra khan an sia zêla, kul kilkhôr chu an hâl khum tâka; khuaa hruaitu ual ualhai khom chu an thi zit tâka, pasal le nupang tepin sângkhat vêl an thi.

⁵⁰Abimeleka chu Thebes khuaa a fea, a'rhuala, a lâk tâka.

⁵¹Khuaa khan in irsâng inkhat, iamom tak hi a oma. Kha khan mi murdi nupang pasal, khuaa hruaituhai leh an hong intân khôma, an irkalkhum khaka, in irsâng sîp inzôla khan an hong luaia.

⁵²Abimeleka chu in irsâng bula khan a hong fea, lampui chu hâl tumin a va nâia.

⁵³ Nu inkhatin bu nôina lung chunginta ual hi a lua a zu'nthâka, a lubûr chu a koi tâk.

⁵⁴Ruatharte, a râlthukfam pêlpu chu, a koi lata, "Ni khandai kha lan lân, ni that ro, mi'n nupang ithat kêng tina duai an ti," a tia.

⁵⁵Ruathartepa khan a that sabak tâka. Israel mihaiin Abimeleka a thi tah ti an inhriatin anni khua in tiang an kîr nôk tâka.



⁵⁶Khaang kha a pa le a urêng sômsari chung a thilsual tho sikin Pathianin an tuangtira.

⁵⁷Sekemmihai khom an thilinsual thôna sikin, Pathianin a intuangtirhaia, Gideon a nâipa Jothama khomâksâm chu anni chung a tung tâk a ni.

Roirêltuhai 10

Tola

¹Abimeleka a thi hnunga khan Isakara irchi laia mi Pua nâipa Tola, Dodoa tupa, Efraim tâng ram Samir khuua om chu Israelhai sansuak hrangin ar siama.

²Kum sômhni inthum sâng Israelhai chu a hruaia, a thia, Samir khuua khan an phûma.

Jaira

³Tola thi hnunga Gilead mi Jaira a hong om nôka.

⁴Israelhai chu kum sômhni inhni a hruaihaia. Nâipasal sômthum a neia, kha mihai khan chuanga hrang sakuartung an nei chita.

⁵Gilead rama khopui sômthum an neia, kha kua irhming chu “Jair kua” ti a ni mai tâk. Jaira chu a thia, a omna Kamon khuua an phûma.

Jeftha

⁶Israel mihaiin Rengpa nuam loi lam thilsual an tho nôka; Baalhai, Asterothihai, Amona pathianhai, Zidon mi pathianhai, Moab mi pathianhai, Amor mi pathianhai, Filistia mi pathianhai an biak saa.

⁷Rengpa chu Israelhai chung a sân a ning an mur tâka, Filistia mihai le Amon mihai kuta a pêka.

⁸Amon mihaiin kum sômkhath kiriat sâng chu Jordan nisua tianga Amor mihai ram Gilead-a Israel omhai chu dengtheia lunginzîng takin an siahaia.

⁹Khan Amon irchihai kha Juda, Benjamina le Efraima irchihai doi hrangin Jordan râl an kâia; khasikin Israelhai chu a sân an lunginzîng tâka.



¹⁰Israelhaiin Rengpa an koia, “Kin Pathian kin irheisana, Baal sin kin thoa, ni chung a thilsual kin itho a ni,” an tia.

¹¹RENGPAN Israelhai kuang, “Aigupta mihai, Amon mihai, Amor mihai, Filistia mihai,

¹²Zidon mihai, Amelek mihai le Maon mihaiin deng nangni an intheitira, nin ni koia, nangni ki saninzôk a ni kha.

¹³Khan khomin, nin ni la'rheisana, pathian dang sin nin tho pea; khasikin, nangni saninzôk viat no ning.

¹⁴Nin inuam tak pathian danghai kuanga khan fe ta roi; nangni sansuak hrangin ngên unglân, lunginzîng nin tuang lai khomin nangni sansuak ri se,” a tia.

¹⁵Israelhaiin Rengpa kuanga, “Kin sual a ni, nangin sa ni iti lam ang takin kin chung a tho ro; hi mihai ata hi ni saninzôk phot ro ba,” an tia.

¹⁶Khanchu, an kôla pathian dang irlimhai chu an paia, Rengpa chu chubai an mûk tâka; Israelhai inriang zia a hmu'n chu a sân lung an khamhaia.

¹⁷Khan Amon-hai chu an irbukkhôma, Gilead hmuna riakbuk an khuara, Israelhai khom an irbukkhôma, Gilead biala Mizpa khuaa riakbuk an kuar saa.

¹⁸Israel mihai le Gilead-a an hruaituhaiin, “Amon mihai doi hrangin tu mo malam hruai hrang? Gilead ram pumpui sînga hruaitua la chang a ti,” an tia.

Roirêltuhai 11

¹Gilead mi, Jeftha chu pa hâitak a nia, a nu chu notizuar a ni. Gileada nâi a ni.

²Gileada dôngma'n nâipasal a nei maia, khahai chu an hong ulianin Jeftha chu an inhnotsuaka, ‘Kin pa insûng irchon nangin lua thei no chi ni, nu danga nâi ni ni hi,’ an tia.

³Jeftha chu a urênghai khua rengata a suaka, Tob rama a om tâka. Jeftha chu mi dukdak loihaiin an zuia.



- ⁴Amon mihaiin Israelhai an hong doia khan
- ⁵Gilead hruaituhai chu Tob khuaa om Jeftha chu hruai hrangin an fea,
- ⁶Jeftha kuang, “Amon mihai kin doi theina hrangin kin hruaitu taka hong chang ro ba,” an tia.
- ⁷Jeftha’n Gilead upahai chu a sâma, “Nin ni ennuam no sikin, nin pa in ata nin ni inhnotsuaka, dengtheina nin tuang tena itho sika mo nin ni hong ipan hi?” a tia.
- ⁸Gilead upahaiin Jeftha chu hiang hin an sâma, “Kha sik taka khan a ni, Amon-hai ni doipuia ni hruai hrangin nang kin nuam, Gilead mihai hi nangin ni hruai hrang a ni,” an tia.
- ⁹Jeftha’n, “Amon-hai doi hrangin ni hruai kêra, Rengpa’n a nin hnêtirin chu nin hruaitua chang ki ti,” a tia.
- ¹⁰Gilead upahaiin, “Ni nuamlam angin tho kin ti, Rengpa chu kin thu inhrepu a ni,” an tia.
- ¹¹Khanchu, Jeftha’n Gilead upahai chu a zuia, mihaiin an hruaitua le a lutaka an siam tâka, Jeftha’n a thil phut chu Mizpa khuaa khan Rengpa makunga an inpuanga.
- ¹²Jeftha’n Amon rêng kuang palâi a tîra, “Kin ram doi hrangin itho mo ni hong irrol,?” a tia.
- ¹³Amon rêngin palâihai kuanga, “Aigupta ram ata Israelhai an hong suaka khan ki ram an nir chupuia, khasik taka khan a ni. Arnon dung le Jabok dung kêra, Jordan irhôr chu an ni lâkpai pea, hihai hi hril intam loiin an ni ipêk kêr hrang a ni,” a tia.
- ¹⁴Jeftha’n palâihai chu Amon rêng kuanga a tîrhai nôka,
- ¹⁵“Moab le Amon ram hi Israelhaiin lâkpai mahai.
- ¹⁶Aigupta ram ata Israelhai an hong suak khan ramchâra fe thalin tuipei sena an fea, Kades an tunga.



¹⁷ Edom rêng kuang, ‘Ni ram sũaga lûtin nin fetir ro,’ tia an ngên lai khan lei phal ma, khang ngêtin Moab rêng khom an ngêna, lei phalhai maka; Israelhai chu Kades-ah an om maia.

¹⁸Edom ram lût loiin ramchâra irkual pumin an fea, Moab ram rêng khom phal maka, Moab kua nisua tiang an irkuala, Moab ram lût loiin an ramri dung Arnon phâi, an ram ni loina lam tiang riakbuk an khuara.

¹⁹ Israelhaiin Amor mi Hesbon rêng Sihona kuanga khom, ‘Kin rama fe hrangin ni ram sũag hong lût kin ti,’ tia an ngên kha,

²⁰Sihona’n lei phal maka, a mihai a koikhôma, Jahaz hmuna riakbuk a khuara, Israelhai chu a doi tâka.

²¹Khannisian, Israelhai Pathian Rengpa’n Sihona le a mihai chu Israelhai kuta a pêka, an thata; kha lai ram Amor mihai omna chu an nei tâka.

²²Khanchu, Amor-hai ram, Arnon dung le Jabok dung kêra, ramchâr le Jordan dung kêra ram chu an nei tâk a ni.

²³Rengpa Israelhai Pathianin Amor mihai ram a lâkpai pehaia, Israel mihai a ipêk chu, nangin neipai hrang ni itum ma ni?

²⁴Ni pathian Khemosa’n ram nang a ipêk kha neiin lân, kin Pathian Rengpa ni ipêk tâk ram chu keini’n nei kin ti.

²⁵ Moab rêng Zipora nâipa Balaka nêka hrâtin ni inhriat ma ni?

²⁶Kum irzathum zel Israelhai hin Hesbon khopui le Aroer khopui hi, an kôl vêl khuahai leh ile, Arnon vadung kôl khopui murdi leh hin an hong lua tâka, kha sũaga khan chu lâkpai pe hrang rêng ni itum ngailoi.

²⁷Khasikin, keini’n thilsual kin nei moa, nangni’n nin ni hong idoi mai hi nin itho indik loi a ni. Rengpa Roirêlpu’n, Israel mihai le Amon mihai kêra thu hi rêl fel ta ri se,” a tia.

²⁸Khannisianlân, Amon rêngin Jeftha chong kha irngai pe nuam ual mah.



²⁹Rengpa Irtha chu Jeftha chung a hong tunga, Gilead le Manasea ram chu ar fanga, Gilead bial Mizpa khuaa khan a hong kîr nôka. Amon-hai rama khan a fe tâka.

³⁰Jeftha chu Rengpa makunga chong an kunga, “Amon mihai hi ni nin hnêtir photin chu,

³¹in rengata râl ram kin hong kîr nôka ni lei lôm hranga hong suak masatak chu tukhom ni ri se, Rengpa hranga ser irthiang a ini hrang, hâlvôm thilinhlanin hmang ki ti,” a tia.

³²Jeftha chu Amon mihai rama khan a fe tâka; a va doia, Rengpa’n an hnêtir tâka.

³³Aroer khua ata Minit bial khua sômhni, Abel-Keramim dênin a lâk kêra, a that chita. Israel mihai makunga khan Amon-hai chu an duai tâka.

Jeftha nâinu

³⁴Jeftha chu Mizpa khua a ina a fe nôka. Irngai ta, ama lôm hrangin a nâinu chu khuangtehai leh a lei lâm suaka. Ama chu a nâi neisun a ni, nâipasal mani nâinupang mani nâi dang rêng rêng nei mah.

³⁵A nâinu a hong hmu’n chu beidongin a puan an potthêra, “A poi oke! ki nâinu, nangma kher hi! ki milung nin siatin ki milung ni nin zîngtir tak taka! Rengpa kuanga chong kin kung tâka, sûtpei nôk thei ni ta ma,” a tia.

³⁶Ama’n, “Ka pa Rengpa kuanga chong ni inkung tâkin chu ni thu angin tho ro; Rengpa’n ni râlhai Amon-hai chung a phuba a lâk tâk kha te,” a tia.

³⁷A pa kuanga khan “Hiang hin ni itho hrang; tha hni sîng chu ki bingin ni sia unglân, ki rualhai leh tânga khun zu fe kin ta, nupang dôngmate irthiang ki ni laia tho hrang hi zu sîn ki ti,” a tia.

³⁸A pa’n an fetira, tha hni sîng chu an omtir tâka. A rualhai leh khan tânga an fea, nâi neiloia a ithi hrang chu an sîna.

³⁹Tha hni zoia khan a pa kuanga a hong kîr nôka, Rengpa kuanga a chonginkung chu a tung tâka; nupang dôngmate irthiangin a thi tâka. Kha kha Israelhai nam lei tho dân a ni.



⁴⁰Israelhai laia, Israel dôngmate'n, kum tin Gilead mi Jeftha nâinu sôn hrangin sôn minli an hmang ngai, dâna an hong nei tâka.

Roirêltuhai 12

Jeftha le Efraima mihai

¹Efraima mihai chu an irbukkhôma, Jordan râl Zafon-ah an kâia. Jeftha kuang, “Amon mihai doi hrangin ramri ni khêla, itho sika mo kop sa hrangin ni ni ikoi loi? Ni in chu nang leh ile kin ihâl hrang a ni,” an tia.

²Jeftha'n, “Amon mihai le kin mihai hi thei dôrin kin irkhal a ni. Ni changpui hrangin nangni ki koia, ni changpui loia nin iom a ni kha.

³Ni changpui nuam mak chêi ti kin hriatin mâni hringna irhuamin ramri ki'rkân tâka, kin va doia, Rengpa'na nin hnêtir tâk a ni. Khasikin, ni doi hrangin itho sika mo nin hong irsiam tâk hi?” a tia.

⁴Jeftha'n Gilead mihai chu a koi khôma, Efraima-hai chu a doia, an hnê tâka. Efraima-haiin, “Nangni Gilead-hai hi Efraima le Manasea ram rengata chaninvâia hong intân irhmang nin ni,” an tia.

⁵Gilead-haiin Jordan dâi kâi hrang phalna an hong zongin Gilead-haiin, “Efraima mi mo nin ni?” an lei ti thiaia. “Ni ma ung,” a ti'n chu,

⁶“Shibolet lei ti ta,” an tia; a'rlam dân fia thei loia, ‘Sibolet a ti'n chu an chela, Jordan vadung kôla khan an that zel ngai. Kha zoro nia Efraima mi thi murdi chu sîngminli le sângni an ni.

⁷Jeftha'n Israelhai chu kum ruk a hruaia, a thia, Gilead a omna khuaa an phûma.

Ibzana, Elon le Abdona

⁸Jeftha zoia Bethlehem khuaa mi Ibzana'n Israelhai chu a hruaihaia.

⁹Ibzana'n nâipasal sômthum le nâinupang sômthum a neia. A nâinu sômthumhai chu an mâni irchipui nam ni loi, kho dang mi pasal an neitirhaia; a nâipa sômthumhai khom mâni chipui nei loiin ram dang mi sômthum a hruai pehaia. Ibzana'n Israelhai chu kum riat a hruaia.



¹⁰A thia, Bethlehem khuaa an phûma.

¹¹Ibzana hnunga khan Zebulun mi Elona'n Israelhai chu kum sôm a hruaia.

¹²Elona chu a thia, Zebulun ram Aijalon khuaa an phûma.

¹³Elona hnunga khan Pirathon khuaa mi Hilela nâipa Abdona hin Israelhai chu a hruaia.

¹⁴Abdona'n nâipasal sômminli le tupa sômthum a neia, an chuangna hrang sakuartung sômsari a neia. Abdona'n Israelhai chu kum riat a hruaia.

¹⁵Abdona chu a thia, Efraima ram Amalek-hai omna tâng ram Pirathon khuaa an phûm tâka.

Roirêltuhai 13

Samsona suak thu

¹Israelhai chu Rengpa mit hmua thilsual an tho nôk tâka, kum sômminli sùng chu Filistia hnuiaia Rengpa'n an omtirhaia.

²Khan, Zora khuaa Dana irchi, mi pasal inkhat, Manoa a oma, a dôngma chu a chinga, nâi rêng rêng nei mahai.

³Nupangnu kuang Rengpa vântîrtôn a zuang inlâra, "Irngai ta, nâi nei thei loia ni iching hi, atûn chu inrâi ni ta, nâipasal nei ni ti.

⁴Khasikin, irdîn takin omin lân, uain mani zû mani in viat no ro, Sa irthiangloi khom fa viat no roh.

⁵Nâi ni vong, nâipasal ni inei hrang hi, a lu voiinkol loi hrang a ni. Pathian ta hrangin a suak ata Nazarit mi ni a ti. Ama'n Filistia mihai kut ata Israelhai sansuakna sin tho phut a ti," a tia.

⁶Nupang kha a fea, a pasal kuang, "Pathian mi ki kuang a zuanga, a hmêl chu Rengpa vântîrtôn hmêl ang a ni, a sân ichi a om. Kho tianga mi mani irdon ma ung, ar hming khom nin hril viat mah.

⁷Irngai ta, nâi vong ni ta, nâipasal nei ni ti, uain mani zû mani in viat no ro, sâ irthiang loi khom fâk viat no ro, ni nâi nei hrang chu a suak rengata a thi dênin Pathian ta hranga Nazarit mi ni a ti, tiin a ni hrila," a tia.



⁸Manoa'n, Rengpa kuang a ngêna, O Rengpa, Pathian, mi ni zuang itîr kha zuang nôk ri se ba, nâi zuang suak hrang chu itin mo ki ienkol hrang, nir chu ri se," a tia.

⁹Pathianin Manoa ngêna kha a lei irngaia, khan nupang kha loia a toi laiin Pathian vântîrtôn kha a zuang inlâr nôka, a pasal Manoa chu om sa mah.

¹⁰Khasikin, inrang takin nupang chu a pasal kuang an tâna, "Matona ki kuanga zuang, ki iti kha a zuang nôk tâk e," a va tia.

¹¹Manoa chu a thoia, a dôngma chu a zuia, mi chu a va hmua, "Nupang kuanga thuhritu kha ni ni mo?" a tia. Ama'n, "Ki ni," a lei tia.

¹²Manoa'n, "Ni thu anga thil a hong tung hnunga nâite chu itina enkol hrang mani, itin mo a hringnun a hong ini hrang?" a tia.

¹³Rengpa vântîrtônin, "Ni dôngma itinrêng ki iti pe lam ang takin om ri se,

¹⁴grep kung rengata thil ite a ifâk hrang ni ma, uain mani zû mani in viat no ri se. Ki ihril murdi kha zôm sianlân, thil irthiangloi khom fa no ri se," a tia.

¹⁵Manoa'n Rengpa vântîrtôn kuang, "La om ro, la fe no ro, kêltuaite la that ki ti," a tia.

¹⁶Rengpa vântîrtônin, "Ni khap khom unglân, nin bu anh suang chu fa no ning, hâlivôm thilinhlan ni inhlan hranga ni'n chu Rengpa ta hrangin inhlan ro," a tia.

¹⁷Manoa'n Rengpa vântîrtôn kuang, "Ni thu anga thil a hong tung zoroa nang kin chôindôm theina hrangin nir hming nin hril ro ba," a tia.

¹⁸Rengpa vântîrtônin, "Itho sika mo ki'rhming ni ni irdon, hril thei chi ni ma," a tia.

¹⁹Khanchu, Manoa'n kêlte chu a thata, bu le bâl thilinhlan leh hâlivôm thilinhлана lungpui chung a khan Rengpa ta hrangin an hlan tâka. Thil irkhêl tak zuang om chu Manoa sangramhaiin an en maia.

²⁰Lungpui maichâm rengata meikhû irvân tiang a fe'n chu Rengpa vântîrtôn chu meia khan irvân tiang a fe sa tâka.



²¹Manoa-hai sangramin kha mei kha Rengpa vântîrtôn a nih ti an inhriat tâka, an hmâi irnêng sikin an kûn tâka. Vântîrtôn chu hmu nôk ta mahai.

²²Khan Manoa'n, a dôngma kuang, "Ei ithi ngêt hrang a ni, Pathian ei hmu tâk hi te," a tia.

²³A dôngma rêkin chu, "Rengpa'n ni that nuam ni sian chu hâlvôm thilinhlan le bu le bâl thilinhlan kha pom no ni, hi thilhai khom hi nin hril no ni," a tia.

²⁴Khan, nupangin nâipasal a neia, ar hming Samsona a phuaa; nâi chu a hong liana, Rengpa'n sat a vura.

²⁵Rengpa irtha'n Zora le Estaol kêra Mahane-dan hmuna khan Samsona chu a hong pôl irphut tâka.

Roirêltuhai 14

Samsona le Timna khuua dôngmate

¹Samsona chu Timna khuua a zu fea, Timna khuua Filistia dôngmate inkhat chu a zu hmua,

²a hong kêr nôka, a nu le pa kuanga, "Timna khuua Filistia dôngmate inkhat ki zu hmua, ki dôngma hrangin ni biak pe roi," a tia.

³A nu le a pa'n, "Ei irchipui laia mani, ei mihai laia mani dôngma hrang an om loi mani na? Itho sika mo ser tanloi Filistia mi dôngmaa nei ni inuam tâk?" an tia. Samsona'n a pa kuang, "Nin neitir zel roi, ki indit tak a ni," a tia.

⁴Khannisianlân, a nu le pa'n, kha khaRengpa itho a nih ti inhre mahaia; Filistia mihai chung a zoro inchum a zong a ni, kha lai khan Filistian mihaiin Israel mihai chung a roi an rêl a ni.

⁵Khanchu, Samsona chu a nu le pa leh khan Timna-ah an zu fea, Timna-ah grep irhuan hi an zu tunga; khan irngai ta, kâmkeibaknei hrâtlai hin a hong inhrâm khumhaia.



⁶Irringloiin Rengpa irtha chu a chung a zuang chum thuta, ite khom chôi maka, kêlte ang takin an pot indi chita, khannisianlân, a sintho kha a nu le a pa chu inhrilhai viat mah.

⁷Khan, khuuaa khan a zu fea, nupang chu a zu chongpuia, Samsona'n a sân an dita.

⁸Zoro idôr mani fe hnunga chu zu neia zu hruai hrangin a zu fe nôka, kâmkeibaknei ruak kha en hrangin a va pêta, kâmkeibaknei puma khuai lei om mur mur le khuaihlutui tamtak om kha a va hmua.

⁹Khuai hlutui chu a lâka, a fe balamin a fâk zêla, a nu le a pa khom a pêka, an fâka, kâmkeibaknei ruak ata a lâk a nih ti a pahai hril mah.

¹⁰A pa chu dôngmate ina khan a zu fea; khataka khan ruathartehai iti ngai dân angin Samsona'n hruai an thêa.

¹¹Filistian mihaiin ama rual hrangin ruatharte sômthum an inkung pea.

¹²Samsona'n an kuang, “Irôro nangni irdon ki ti, hruaithe sâng sîn saria a omzia nin inhriatin chu puansil irnêm sômthum le irsakna puan irnêm sômthum nangni pe ki ti.

¹³Nin inhriat no'n chu puansil irnêm le irsakna hrang puan sômthum nin ni ipêk hrang,” a tia. “Ni irôro chu lei hril ta, lei irngai kin ti,” an tia.

¹⁴An kuang, “Fâktu rengata fâk hrang a hong oma, Hrât tak rengata thil thum a hong suak,” ti hi, a tia.

¹⁵Sîn thum an ngaitua khomin a omzia inhre thei mahai. A sîn sari nî chu Samsona dôngma kuang an fea, “Ni pasal chu a irôro hril hrangin ngên ro; khano'nchu, nang le ni insâng mihai hi kin ihâl thathai hrang. Hmâimôk ni sak hrangin mo ni ni ifial?” an tia.

¹⁶Samsona dôngma chu a pasal makunga a chapa, “Ni lungthung viat loia, ni ni ihnôl a ni hi; kin mi ruathartehai irôro nir donhaia, a omzia khom nin hril nuam mak che,” a tia. A kuang, “Ka nu le pa lua khom hril loiin, nang ki inhril hrang mo?” a tia.



¹⁷Hruai an inthê sùng sùn sari sùng chu a chap a chapa, a ngên ngut ngut sikin a sùn sari nî chu a hril pe tâka, a dôngma'n a mihai a hril tâka.

¹⁸Khataka khuaa ruathartehaiin a sùn sari nî, misa tâk mân a kuang an hong, "Khuai hlutui nêka thum imo om? Kâmkeibaknei nêka hrât ual i mani?" an tia. Samsona'n, "Ki sehrât irla hi irnêng inpholtir no unglân chu, ki irôro hi inhre viat no chin ni," a tia.

¹⁹Rengpa Irtha chu a chung a irningloi rengin a zuang chum thuta, Askelon khuaa a zu fea, mi sômthum a zu thata, an neinun chu a lâkpai pehaia, a irôro inhriattuhai kha irsakna puanhai chu a pêkhaia. Ningmur takin a pa in tiang a kîr nôk tâk.

²⁰Khan, Samsona dôngma chu inneinaa rual hranga a ihmang, a rualpa kha a dôngma hrangin an pêk tâka.

Roirêltuhai 15

¹Inhnunga chu bu ât laiin Samsona'n kêlte chôiin a dôngma chu a va pana, "Ki dôngma chontana va lût ki ti," a tia. Khannisian, a tarpu'n lei phal ta maka.

²A tarpu'n, "Ni indit viat ta loi mani kin tia, ni rualpa inkhat kha kin lei inneitir tâk a ni hi te. A sangnu hi a hmêl a sa uala, lungkham takin ama irthûla nei zel ta roh," a tia.

³Samsona'n, "Atûnlai hin Filistia mihai hi lei longnenghai ta rong," a tia.

⁴Samsona chu a suaka, sihal sômthum a chela, inhni an irmei a suiirzomhaia, a suiirzomna taka khan meiser a siaa.

⁵Meiser chu an choka, Filistian-hai loia bubil hmuna khan sihalhai chu an suaa. Bu pâr le bu indinglai chu a kâng suat suata, oliv hmunhai khom a kâng saa.

⁶Filistia mihaiin, "Tu itho ma ni?" an tia. "Timna khua mi mâkpa Samsona itho a ni hi te. A dôngma kha a tarpu'n a lâk pea, a rualpa a pêkpai a ni kha,"



an tia. Filistia mihai chu an hong, kha nupang le a pa chu an in leh ile an hâl thathai tâka.

⁷Samsona'n, "Hianga nin itho a ni'n chu nin chung a phuba ki lâk mâka chu mong no ning," a tia.

⁸Khanchu, an chung a tho tâka, mi tamtak a thata, Etam lungpui khura a lûta, a om mai tâka.

Samsona'n Filistia mi an hnê

⁹Filistia mihai chu an hong fea, Judai rama riakbuk an khuara, Lehi vêla an inzardara,

¹⁰Judai ram mihaiin, "Itho sika mo ni doi hranga nin ihong hi?" an tia. Anni'n, "Samsona khitphiara, a ni ilong lam angin long hrangin kin ihong irsiam a ni," an tia.

¹¹Judai ram mi sângthum Etam rôl khura khan an zu fea, Samsona kuang, "Filistia-hai hi kin chung a thuneituhai an nih ti inhre mak che mo? Kin chung a ni tho lam hi itina mani tâk?" an tia. Ama khan, "An ni ilong angin an chung a ki itho a ni kha," a lei tia.

¹²Anni'n, "Filistia mihai kuta pêk hrangin nang khit hrang kin ni," an tia. Samsona'n, "Nangni'n ki chung a kut insumloi hrangin chong irkhâm phot roi," a tia.

¹³Samsona kuang, "A ni nang khit kin ta, an kuta pêk kin ti, nang that no ni ung," an tia. Khanchu, hruihruai thar inhniin an khita, khur ata chu an hong hruaisuaka.

¹⁴Lehi hmun an hong tungin chu Filistia-haiin an lei dona, an khêk mur mura; Rengpa irtha'n a hong man thuta, an khitna hruihruai thar chu pat ang takin an potsat chit tâka.

¹⁵Sakuartung irkamru thar tak hi a hmua, a lâka, mi sângkhat vêl a van zui thathaia.

¹⁶Samsona'n, "Sakuartung irkam ru maiin ki that tôla, A sâng têlin ki vîk thathaia, Sakuartung irkam ru chârîn," a tia.



¹⁷Kha thu kha a hril zoiin sakuartung irkam ru chu a paia, kha hmun kha Ramat-lehi an phua tâka.

¹⁸Samsona chu a tui an hrâl tak taka, Rengpa chu a koia, “Ni siahlo hi roiinpui takin ni nin hnêtira, tuiinhrâlin ki ithi mai hrang a ni hi te, sertan loihaiin ni hong thatna’n ti,” a tia.

¹⁹Khan, Lehi hmuna khur om chu Rengpa’n ar ônga, tui a hong suaka, a hong in tena chu a sôl a hong chan pe tâka, a hong har tâk. Kha tuikhur kha En-Hakkore an phuaa, Lehi hmuna hin atûn ten hin a la om.

²⁰Filistia mihai zoro lai khan Samsona’n Israel mihai chu kum sômhni a hruaia.

Roirêltuhai 16

Gaza khuaa Samsona a fe

¹Samsona chu Gaza khuaa a fea, notizuar a hmua, a zâlpuia.

²Gaza khuaa hruaituhaiin Samsona a hong ti an inhriatin chu an irhuala, “Khua hong vâp phot ri seh that ei ti,” an tia; dâihrekin kul mikot bula khan zânkhovârin an inruanga.

³Khannisianlân, Samsona chu zân chimrip ten vai a oma; zân chimripa khan a thoia, khopui kul mikot chu a chela, a khâra, a chopui le a kalnahai kha a phôiipai zita, Hebron tâng sîp taka a hong sia tâka.

Samsona le Delili

⁴Kha hnunga khan Sorek irhôra om dôngmate inkhat, a’rhming Delili chu ar ditpuia.

⁵Filistia hruaitu ulianhai ringa a kuang an hongga, “Itina mo hiang dôra a ihrât, itin mo kin inhnê thei hrang, inhriat tum ro ba; ama khita kin soisak theina hrangin tangka sum sângkhat le irzakhat nang pe chit kin ti,” an tia.

⁶Khanchu, Delili’n Samsona kuang, “I sika mo hiang dôra ni ihrât nin hril ro ba; itin mo nang khit inlân nang kin soisak thei hrang?” a tia.



⁷Samsona'n a kuang, "Saihli thal hrui thar la chârloi sari leh hin ni khithai sianlân, hrât no ninga, mi danghai ang mai ni ta ki ti," a tia.

⁸Khanchu, Filistia hruaitu ulianhaiin saihli thal hrui thar la chârloi sari an hong chôia, kha leh khan Samsona chu an khita.

⁹Delili chontan sîngrila lei inruangtuhai an oma, a kuang, "Samsona thoi ro, Filistia mihaiin nang doi hrang an ni," a tia. Khan, saihli thal hruihai chu patzâi meiser leh hâl sat ang maiin a chat chit tâka. A hrât nasan chu lan hre thei mahai.

¹⁰Delili'n Samsona kuang, "Nin hril mak che, ni ni huang a ni: a dik takin nin hril ro, itin mo khith phiar thei ni ini hrang," a tia.

¹¹Ama'n, "Hruihrual thar, la hmang viat ngai loi leh hin ni khithai sian, hrât no ninga, mi danghai ang mai ni ta ki ti," a tia.

¹²Delili'n hruihrual thar la hmang viat ngai loi chu a lâka, a khithphiara, "Samsona, Filistia mihaiin nang hong doi hrang an ni ta," a tia. Lei inruangtuhai chu chontan sîngrila an oma, an hong suaka. Khan, a khitna hruihrual chu patmal ang takin an potsat chit tâka.

¹³Delili'n Samsona kuang, "Ni ni la huang maia, dikloi thu ni ni la ihril nôk a ni hi. Itin tak mo nang khith inlân ni ihrât theiloi hrang?" a tia. Samsona'n, "Ki sam phiar sari hi puana không sa'n lân a kilna leh kil khakin lân, hrât ta no ning, mi danghai angin ni ta ki ti," a tia.

¹⁴Delili'n a sam chu a kil khaka, a kuang, "Samsona, Filistia mihaiin nang hong doi hrang an ni ta," a tia. Ama chu a hong hara, a sam kildêna timmatuahai chu a phôi chita, a sam chu a kêlsua paia.

¹⁵Delili'n, "Voithum reng ni ni huang tâka, itin mo ki lungthung ni ni la iti thei? lung ni thung tak tak mak che, ni hrât nasan khom nin hril nuam mak che," a tia.

¹⁶Sûn tin a nor ngot ngota, a ngên ngut ngut sikin, thipui rak ang dôrin a milung a hong inzîng tâka.



¹⁷Khanchu a lungrîl murdi a hril zit tâka, “Ki suak rengata Pathian ta hranga Nazarit mi ki nia, ki sam hi ziatinkol la ni ngai ma, ki lu hi voiinkol ni sianlân ki hrâtna hi boi a ta, mi dang ang takin ki ihrât loi hrang a ni,” a tia.

¹⁸Delili’n tinrêng a hril tatak tâk a nih ti an hriatin, Filistia hruaituhai chu a koihaia, “Hong suak ta roi, itinrêng a nin hril zit tâk,” a tia. Filistia hruaituhai chu an hongga, sum tangka chu an hong chôia.

¹⁹Khan, a mal chungga lukhamin an intira, mi inkhat a koia, a sam phiar sari chu an tantir zita; a soisaka, a hrâtna chu a hong boi tâka.

²⁰Delili’n, “Samsona, Filistia mihaiin nang an hong idoi hrang a ni,” a tia. A inmu chu a hong hara, “Matona ang khan hrât ki ta, zôkpat ta no ning mo,” a tia. Rengpa’n a mâksan tâk ti inhre mah.

²¹Filistia-haiin an chela, a mitru an kêlsuak pea. Gaza khuua an hruai tâka, kut khitna thîrhruai an inbuntira; intângna ina bu an innôitir ngaia,

²²khannisian a lua sam chu a hong sei nôk tâka.

Samsona thi thu

²³Filistia hruaituhai chu an pathian Dagon kuang thilinhlan tamtak inhlan hrangin an irbukkhôma, “Kin râlpâ Samsona chu kin pathianin a ni pêk tâk hi te,” an tia.

²⁴Samsona an hmu’n chu an pathian an inpâka, “Ei pathianin ei râlpâ le ei ram insiatpu, mi tamtak ni thatpupa chu ei kuta a ni pêk tâk hi te,” an tia.

²⁵An lôm tak taka, “Samsona kh a hong hruai u ta, nuiza siamna’n lei hmang rei,” an tia. Intângna in ata Samsona chu an hong hruai suaka, nuiza siamna’n an hmang tâka, chopui le chopui inhni kêra an inngîrtira.

²⁶Samsona’n a kaipu nâipang kuang, “Hi in doina chopui hi ni hong inthemtir ta, lei irhnêl rong ba,” a tia.

²⁷Ina khan Filistia hruaitu, pasal le nupang an omkhôm mura, a in irchuan chungga khom khan pasal le nupang sângthum vêl an oma. Samsona nuiza siamna’n an hmang chu an ena.



²⁸Khanchu, Samsona'n Rengpa a koia, "O Rengpa Pathian, nin hriat maiin lân, nin hrâttir ro ba; O Pathian, atûna vai hin ni hong inhrâttirin lân ki mitru inhni kêlsuakpaihai phuba Filistia mihai chung a hin hong la vak ki ti," a tia.

²⁹Khan, Samsona'n, kha a irhnêlna chopui inhni chu a bân chang tiang le vei tiang an kuaa. sirsanin a hmanga.

³⁰"Filistia mihai hi lei that hlukhai rong," a tia, chopui chu ar nakhrât thei dôrin a nama, in chu a chim rup tâka, an hruaituhai le a sûnga om murdi chu a del thathaia. A dam laia a ithathai nêkin atûna a ithathai hi an tam ual.

³¹A urêng hai le a pa insûnghai chu an zuanga, a ruak chu an kêlsuaa, a pa Manoa thân Zora le Estaol kêra khan an phûm tâka. Kum sôm inhni Israelhai chung a roi a irêl a ni.

Roirêltuhai 17

Mika millim

¹Efraima tâng rama mi inkhat a oma, ar hming chu Mika a ni,

²a nu kuang, "Ni sumru tangka sângkhat le irzakhat mi'n an inrûk kha, khomâk ni sâma, kei khom ni ni inhril kha, ki ilâk a ni, ki la idôn mai a ni" a tia. A nu'n, "E, ki nâipa, Rengpa'n sat nang vur ri se," a tia.

³Sumru tangka sângkhat le irzakhat chu a nu a pêk nôka, a nu'n, "Ki khomâksâm kha ki nâipa chung a chum lina hrangin keima ngeiin hi sumru tangka hi Rengpa ta hrangin ki inhlân a ni. Thing millim inluanna'n le millim siamna'n ni ihmang hrang a ni. Khasikin, sumru tangka chu nang pêk inkhâr nôk ki ti," a tia.

⁴A nu a pêk inkhâr sumru chu, a nu'n sumru tangka irzahni chu a lâka, millim siam thei kuang thing millim sumru inluanna hrang le a sungna hrangin sumru millim siamna'n a pêka; Mika ina khan an sia tâka.

⁵Mika'n Pathian in a sina, Efod leh millim a siama, a nâipa inkhat chu ochai hrangin an kunga.

⁶Kha lai khan Israel rama rêng la nei mahai, mâni chitin sa an ti angin an om mai a ni.



- ⁷Judai rama Bethlehem khuaa ruatharte inkhat Levia irchia mi hi a oma,
- ⁸Kha mi kha omna hrang zongin Judai rama Bethlehem khua chu a suaksana, Efraima tâng rama a hongga, Mika in chu a hong tunga.
- ⁹Mika'n, "Kho rengata ni ihong mo?" a tia. Ama'n, "Judai rama Bethlehem khuaa om Levi irchia mi ki nia, omna hrang zongin ki ihong a ni," a tia.
- ¹⁰Mika'n a kuang, "Ki kuang om zel ta ro, ka pa le ki ochai ni hrangin chang ta ro; kum khata sumru tangka sômkhata nang pe ki ta, ni puan sil inkhat le ni bu nêk hrang khom nang pe sa ki ti," a tia.
- ¹¹Kha nî ata kha Levia chi chu lungchuk takin a om tâka, a nâipa inkhat ang takin a om sa tâka.
- ¹²Mika'n Levia irchi mi chu sinthôna a pêk tâka, khanchu a ochai hrangin a siaa, Mika ina khan a om sa tâka.
- ¹³Mika'n, "Levi irchia mi ngêt ochai ki nei tâka, Rengpa'n vângsakna ni pe ngêt a ti, ti kin hriat!" a tia.

Roirêltuhai 18

Mika le Dana irchihai

- ¹Kha lai khan Israel rama rêng la nei mahaia. Israel laia ram lua hrang an irsem lai khan Dana irchihai chu ram lua hrang chang sa mahaia, ram lua hrang an zong irvêl mai a ni.
- ²Khasikin, Dana irchihaiin an irchihai lai ata mi pasal sa ringa an inthanga, Zora le Estaol khua ata ramsa zonga envêl hrangin an tîra. Efraima tâng ram an hong tugin Mika ina an fea, an riak tâka.
- ³Mika ina Levia irchi ruatharte chong irhâi chu an inhriat tâka, an va pana, "Hi hin imo ni itho? Tu'n mo nang an hong ihruai?" an tia.
- ⁴Ama'n a sâma, "Mika ina ki hongga, ochai hrangin a ni inkung a ni," a tia.
- ⁵Anni'n a kuang, "Kin fena hrang hi hlo kin ichuk hrang mo, chukloi hrang? Pathian ni zong pe ro," an tia.



⁶Kha ochai khan an kuang, “Irtharngam takin fe roi, Rengpa’n nin fena hranga hin nangni a hruai mai,” a tia.

⁷Khanchu, mi pasal ringahai chu an fea, Lais khua an va tunga. Sidon mihai ang takin kha khuaa mihai chu hoi takin an om ti an hmua. Mi nunirnêm om mai mai, tûte’n inbuaihai loi, itinrênga irfakhop an ni. Sidon khua ata chu hlatak a nia, mi dang tu leh khom irkopna rêng rêng nei mahai.

⁸Mi ringa chu Zora le Estaol khuaa mihai kuang an kîr nôka, kha khuaa mihaiin an kuang, “Imo nin hril hrang nin neia?” an tia.

⁹Anni’n, “Thoi roi, Lais khua chu hong doi ei ti, a ram kin hong hmua, ram satak a ni. Hi hin om mai mai no roi, irhnot unglân, hong lâk ei ti.

¹⁰Nin hong fe photin chu hoitaka om mihai kha hong hmu nin ta, a ram lak chu a liana, Pathianin nangni a pêk tâk a ni, hnuai thil om chu tinrênga irsam nona hmun a ni,” an tia.

¹¹Khanchu, Dana irchihai, hriamhrei chôî mi irzaruk chu Zora le Estaol khua ata an irthoka, an suaka.

¹²Judai rama an hong fea, Kiriath-jearim-ah riakbuk an khuara; khasikin kha khua kha Mahane-dan ti irhming a irput mai tâk a ni.

¹³An fe zêla, Efraima tâng ram, Mika in chu an hong tunga.

¹⁴Lais le a vêla ram hong envêltuhai mi ringa khan an rualhai kuang, “Hi in inkhat sûnga hin thing millim sumrua inluanhai a om ti nin inhriat mo? Millim danghai le Efod khom a om, itin mo tho inlân sa ni?” an tia.

¹⁵Levia irchi ruatharte omna Mika ina khan an fea, kha ruatharte kha, “Ni dam mo?” an tia.

¹⁶Mikot kôla khan hriamhrei chôîin Dan irchihai chu mi irzaruk an ngîra.

¹⁷Mi ringa ram envêltuhai chu kha ina khan an lûta; khan ochai chu mi irzaruk irdoina tukfam irbelhai laia mikot bula khan a ngîra.

¹⁸Mi ringahaiin Mika ina thilser omhai chu an lâk laiin, ochaiin, “Imo nin itho?” a tia.



¹⁹Mi ringahaiin, “Dâihrek ro, chong no ro, kin kuang hongin lân, kin ochaia chang ro, Israel nam pumpui laia ochai chang chu sêngkhat ochai mai mai ni nêkin ni inuam ual hrang mo ni ma?” an tia.

²⁰Ochai chu a sân a rôi a fâna; khanchu, thil serhai chu ama'n a chôia, an laia khan a fe sa tâka.

²¹An hongna lama an kêra, an nâihai le insêng sahai leh ile khan an suak tâka; a fe masahaiin an neinunhai chu an fepuia.

²²Mika in ata hlatak an fe hnungin, Mika tualbômhai chu an irbukkhôma, Dan irchihai chu an va inhnotsuakhai tâka.

²³Dana irchihai chu an va inhnotsuaka, an khêka. Dana irchihai chu an hong irheia, Mika kuang, “Imo a ini tâk, mi an tam bâka?” an tia.

²⁴Mika'n, “Imo a ini tâk nin tia; ki ochai nin ni suta, pathian ki isiamhai chu nin inrûka, ite nin imâksan om ma,” a tia.

²⁵Dana irchihaiin, “Thu dang ite hril no ro, hi mihai hin an ning an murin chu, nang doi an ti. Nin insêngkua murdi hringna inchân rôî an ti,” an tia.

²⁶An fe zêla, Mika'n keima nêkin an hrât ual daih a nih ti an hriatin, a kêr nôk tâka.

²⁷Mika millim siam le a ochai chu an hruaia, Lais an va tunga, hoitaka om mai maihai chu an doia, khandaiin an sât thathaia, khuu chu an hâla.

²⁸Sidon khuu ata a satea hla a ni sikin hong sansuaktu hrang lak tûte om mahai; tûte le khom irkopna rêng rêng nei mahai; Beth-rehob bul irhôra om a ni. Khan, khuu chu an siaminsat nôka, khataka khan an om tâka.

²⁹An irchibul Dana, Israela nâi irhming chôiin kha khuu irhminga khan Dana an phuaa, ar hming masa chu Lais a ni.

³⁰Dana irchihaiin thing millim sumrua inluan chu an biak tâka. Mosia nâi Gersoma nâipa Jothama chu ochaia an hmanga; kha mi irchihai chu suaka intâng ten khan Dana hai ochaia an changa; Mika millim siamhai chu a om mai tâka.



³¹Khanchu, Mika'n a isiam millim siam chop kha Silo khuaa Pathian in a om sâng ten kha a oma.

Roirêltuhai 19

Levi chia mi le a lâksîrnu

¹Kha laia Israel rama rêng an nei no lai khan Levia irchi mi inkhat Efraima tâng ram mongna tiang a oma, Judai ram Bethlehem khuaa mi lâksîr a neia.

²A lâksîrnu'n a mâksana, a pa in tiang, Judai rama Bethlehem khuaa khan a kîra, tha minli vêl a va oma.

³A pasal chu a thoia, chonghoia inthêma hruaikîr nôk tumin siahlo inkhat le sakuartung inhni leh ile a va fea. Nupangin a pa ina a hruai lûta, nupang pa chu a sân a lôma.

⁴Khan, a nupang pa a tarpu khan a kuanga om hrangin a chela, sùn thum chu an fâka, an inah, kha khan a riaka.

⁵A sùn minli nî khan zînga a thoia; ama khom suak tumin an irsiama; khannisian, a tarpu'n, "Imo khôk fâk nêk fa bak unglân, suak nin ti," a tia.

⁶Khanchu, an toi khôma, an ruaiin an fâkin an in tâka. A tarpu'n, "A vuan zân chu riak nôk phot roi, nin lungrîl chu râifân takin om roi," a tia.

⁷Kha nî khan suak an tum nôka; khannisian, a tarpu'n a khap nôka, an châm nôk tâka.

⁸A sùn ringa ni khan suak ta hrangin zîng taka an thoia, a tarpu'n, "Misa a la'rhnuai mân chu om phot unglân, imo khôk fâk nêk fa bak roi," a tia.

⁹Khan ama chu a lâksîr le a siahlo leh ile fe hrangin an irthokin chu a tarpu'n, "Irngai ta, khohloi a ini tâk kêng, la châm nôk hi roi. Misa a tâk hrang reng a ni tâka, hi hin riak unglân, bu le anh la hei fa nôk hi rei. Nangtûk zînga thoi nin ta, in tiang fe nin ti," a tia.

¹⁰Khannisian, ama chu châm nôk hrangin chu nuam maka, a thoia, a suak tâka, Jebus-hai khua Jerusalem kôl chu a puakpêl ngai sakuartunghai leh an tunga, a lâksîrnu khom a om saa.



- 11**Jebus-hai khua an tungin misa ar hnuai ok tâka, a siahlo khan, “En ta, Jebus-hai khuaa hin riak ta ei ti,” a tia.
- 12**A pu’n, “Israel mi ni loi, nam dang khuaa ei iriak hrang ni mah. Gibea khua pan ei ti,” a tia.
- 13**A siahlo kuang, “Gibea khuaa mo Rama khuaa mo ei iriak hrang a ni,” a tia.
- 14**An fe zêl tâka Gibea khua an tungin misa a tâk tâka. Gibea chu Benjamina-hai khua a ni.
- 15**Riak tumin Gibea chu an pana, anni intungtir hranga lei koi tukhom an om no sikin, khopui kholaidung chu an pana, an toi tâka.
- 16**Kha lai taka khan, khohloia tar inkhat a loia fe hi a hongga; ama chu Efraima tâng ram mi a nia, Gibea khuaa om mai ngai a ni; Gibea mihai chu Benjamina irchihai an ni.
- 17**Kha mi khan khopuia kholaidung a hong enin chu mikhual toi a hmua, “Kho taka fe hrang moh? kho rengata hong mo ni ni?” a tia.
- 18**Levia mi khan, “Judai ram Bethlehem-a om kin nia, Efraima tâng ram monga kin va ife a ni, Judai rama Bethlehem-a kîr nôk hrang kin nia, Rengpa ina fe kin tum a ni, tukhomin nin tungtir nuam om mahai.
- 19**Sakuartung fâk hrang faponhai khom kin neia, kei le ki lâksîrnu leh ki siahlo ruatharte hrang khom bu fâk hrang kin nei, ite irsam nei viat ma ung,” a tia.
- 20**Putar khan, chardong tho no roi, nin innang murdi chu keima’n tum zit ki ti, kholaiia hin chu riak viat no roi,” a tia.
- 21**Khanchu, a ina a hruai inlûta, sakuartunghai chu fapon a pêka, an ke an irsûka, an fâkin an in tâka.
- 22**Râifân le lômtaka bu an fâk laiin khopuia mi sual pôlin in kha an hong irhuala, mikot chu an hong suk tuk tuka, in neipu tarpa kuang, “Ni ina mikhual tunghai kha hong hruaisuak ta, lei irpôlpuihai ro ung,” an tia.



²³In neitupa chu a suaka, “Ni make, ki urênghai, khaanga thil saloi tak chu tho tum no roi; hi mi hi ki ina mikhual tung a ni, hi thil saloi hi a chung a tho no roi,

²⁴en ta, ki nâinu, pasal la pôlloi le hi mi lâksîr hi, hong hruaisuak ki ta, lei hruai roi, nin nuamlam ang angin lôhai roi, hi mi chung a rêk hin chu thil saloi tho no roi,” a tia.

²⁵Aniachu, mihaiin a chong irngai pe nuam mahaia; khanchu, kha Levia mi khan a lâksîr chu a hruaisuaka, anni’n an lei irpôlpuaia, zân sôtin an soisaka, zîng khua a hong vâra, misa a hong suak vângin chu an insua tâka.

²⁶Nupang chu zînga a pasal tungna ina khan a va fea, mikot bula khan a’rtet raka, khovâr mân chu kha khan a om tâka.

²⁷A pasal chu zînga a thoia, fe suak tumin mikot chu a hong inhonga, a lâksîrnu chu mikot bula a lei irtet raka, a kutin mikot chelin a hmua.

²⁸Ama’n, “Thoi ro, fe ei ti,” a tia. Khannisianlân, ite sâm maka. Khanchu, a sakuartung chung a khan an kâitira, a thoia, a in tiang a fe tâka.

²⁹In a va tungin chu chemte a lâka, a lâksîr chu a ru pumin sômkhât inhni’n a’rchanchita, Israel ram sîng pumpuaia a thon suaka.

³⁰A lei hmu murdi’n chu, “Israelhai laia Aigupta ram rengata an hong suak ata hiang thi rêng rêng hi la om viat ngai ma; ngaitua unglân, chong khômin ngaidân lei hril ta rei,” an tia.

Roirêltuhai 20

Israelhaiin irdoi hrang an irsiam

¹Israel mi murdi chu thukhat chelin Mizpa khuaa Rengpa makunga an irbuk khôma, Dan le Beerseba khua inkâra mi murdi le Gilead ram mihai leh ile an fe khôm a ni.

²Israel nam tin hruaituhai khom Pathian mihai pungkômhai laia khan an changa. Sipaihai khandai le thal irlek thei mi nuai minli an ni.



³Benjamina irchihaiin Israelhai kha Mizpa khuaa an irbukkhôm ti an lei inhriata. Israel mihaiin, “Itina mo hi thil saloi tak hi a hong itung dân hi nin hril u ta,” an tia.

⁴Levi irchia, nupang an ithat pasal khan, “Benjamina-hai khua Gibea ki va tunga, ki lâksîrnu leh kin riaka.

⁵Gibea mihai chu zâna ni doi hrangin an hong irthoka, ki tungna in kha an hong irhuala; ni that an tuma, ki lâksîrnu chu an siatpuia, a thi chak tâk a ni.

⁶Ki lâksîrnu ruak chu insûnga ki hruaia, a taksa chu ki’rchanchita, Israel rama ki thon darh a ni kha, hiang dôra porinchea hur an ni.

⁷Irngai u ta, Israel nâihaio, hi hin nin om irkip zita, itina tho hrang mani, nin ngaidân hril u ta?” a tia.

⁸Khanchu, mipui murdi chu thu inrual takin an thoi huaka, “Tukhom mâni puan in tiang mo mâni in tiang mo, tûte kîr no ma ni.

⁹Hiang hin Gibea chu soisak ei ti, tasânin doi ei ta, mi senkhat Gibea doi hrangin inthanghai ei ti.

¹⁰Kin laia sôma inkhat ei fâk hrang tum kin ta, mi dangin Gibea mihai chu hremhai an ti, hiang thil hurna porinche an tho sikin,” an tia.

¹¹Khanchu, Israel rama pasal murdi chu lungirrual takin khopui chu insiat tumin an irbukkhôma.

¹²Israel namhaiin Benjamina namhai ram tina palâi an tîra, “Ithoa mo hianga thilsual hi nin itho?

¹³Gibea khuaa mi, hianga thilsual thohai hi hong hruai unglân, that hrang kin ni, hianga thilsual hi Israel laia kin inboi hrang a ni,” an tia. Khannisianlân, Benjamina-haiin Israelhai chong kha ite uksak mahai.

¹⁴Benjamina-haiin kho tin ata Israel mi danghai lei doi hrangin Gibea khuaa an hong irbukkhôma.



¹⁵Gibea kua mihai bâka Benjamina mi kho dang dang ata honghai chu khandai le thal chôi mi sînghni le sângruk an ni. Gibea mi khom inthang sai mi irzasari an ni.

¹⁶Hi mi inthangsuakhai laia mi irzasari chu vei kut hmang mi an ni, sâilungdêngin sammal khom insel loiin dêng thei an ni.

¹⁷Israel mi, Benjamina-hai doi hrangin mi nuai minli khandai thal chôi sipai an ni, khahai kha irdoi mi ving an ni.

Benjamina-hai doina

¹⁸Israel mihai chu an irthoka, Bethel-a an fea, Pathian an zonga, “Benjamina irchihai doi hrangin tu nam mo fe masa hrang?” an tia. Rengpa’n, “Juda irchihai fe masa ri sehai,” a tia.

¹⁹Khanchu, Israel mihai chu zînga an thoia, Gibea kua irhualin riakbuk an khuara.

²⁰Benjamina irchihai doi hrangin an irthoka, an suaka, khopui tiang irnghatin an sipaihai chu an irtânga.

²¹Benjamina irchihai chu Gibea kua ata an hong suaka, kha nî khan Israel mihai chu mi sînghni le sângni an thata.

²²Israel mihai chu an irthor irhlom nôka, an tho phut nia an irsiamna hmun ngêt khan an irdarh nôka.

²³Kha nikhua mân khan Israelhai chu Rengpa makunga chapin khohloi dênin an oma, “Kin urêng Benjamina irchihai doi hrangin kin irthok nôk hrang mani?” tiin an irdona. Rengpa’n, “Doihai nôk roi,” a ti a ni.

²⁴A voihnina khom khan Israelhai chu Benjamina irchihai doi hrangin an irthoka.

²⁵Benjamina irchihai chu a sîn hni nî khom khan Gibea kua ata an hong suaka, râlthuum chôi mi sipai sîngkhat le sângriat an that nôk tâka.



²⁶Israel mi murdi chu Bethel-a an fea, Rengpa makunga an chapa, an toia, khohloi dênin bu an ngheia, hâlrivôm thilinhlan le irngeina thilinhlan an inhlana.

²⁷Kha lai khan Pathian Thuthung Bôm chu kha khan a oma, Rengpa chu an irdona.

²⁸Arona nâi Eleazara nâipa Finehasa chu Thuthung Bôm enkolpu a ni. Mipuiin Rengpa kuang, “Kin urêng, Benjamina irchihai doi hrangin kin irthok hrang mo, irthok loi hrang mo?” tiin an irdona. Rengpa’n, “Fe nôk roi, nangtûka nin kuta nangni pe ki ti,” a tia.

²⁹Khasikin Israel mihaiin Gibea khua kôla râl sipai inrûkin an lei thuphaia.

³⁰Sûn dang ang ngêtin Israelhai chu a sûn thum nî khan, Benjamina irchihai doi hrangin Gibea khopui tiang irheiin an irzara.

³¹Benjamina irchihai chu lei doihai hrangin an va suaka, khua ata an irzûl suakhaia, sûn dang ang ngêtin loa, lampuilian Bethel le Gibea panna lamhaia khan Israel mihai sômthum an that nôka.

³²Banjamina irchihaiin, “Matona ang khan kin thathai nôk tâk,” an tia. Israelhaiin, “Tho intân ei ti, khopui ata hi lamliana hin va suak ei ti,” an tia.

³³Israel sipai murdihai chu Baaltamar hmuna an irbukkhôma, sirsan an lâk tâka, khan Gibea khua irhuala lungpui kâra irbîk inrûkhai kha an zuang suak saa.

³⁴Khan, Israel mihai laia inthang mi sîngkhatin Gibea khua chu an doi tâka, Benjamina irchihai khan an ihrât loi hrang ti inhre viat mahai.

³⁵Rengpa’n Israelhai chu Benjamina irchihai an hnêtira, Israelhaiin mi sîngni le sângringa le irzakhat an thata. Khahai kha Benjamina mihai sipai zit an ni.

³⁶Benjamina irchihaiin an ihrât loi hrang ti an inhriat tâka.

Israelhai hrât dân

Israel sipai bulpuihai khan Gibea khua irhuala lei irbîk inrûka an isiahai kha irnghatin Benjamina mihai chu hnung tiang an siasanhaia.



³⁷Kha mihai chu Gibeá khuaa khan irningloiin an intân lût thuta, an irsemdara, an ihmu ta phot chu an thata.

³⁸Israel sipai bulpui le lei irbîk inrûka omhai khan irsinsiana an siama, khua ata meikhu a suak zut zut an hmu'n chu,

³⁹irdoina hmuna Israel omhai chu an tho nôk hrang ti a ni. Kha lai khan Benjamina irchihaiin Israel mi sômthum an lei that tâka. “Matona kin itho ang takin kin itho nôk hrang a ni,” an tia.

⁴⁰Khua rengata meikhu a suak zut zutin chu Benjamina irchihaiin an hong thîra, khua a kâng zit tâk ti an hmu'n chu ar khêl an ti tak taka.

⁴¹Khan Israel mihai chu an hong irhei nôk tâka, Benjamina mihaiin thi zit hrang kin nih ti an inhriatin a sân an char an indong tâka.

⁴²Israel mihai ata ramchâr tiang an intân tâka, tûte om loina tiang intân an tuma; khannisian, intânsuak thei mahai, sipai bulpuihai le khua ata hong suakhai khan kiang tiang kiang tiang an doihaia,

⁴³Israel mihaiin an râlhai chu an irhualhaia, misa suakna tiang Gibeá tiang an intâna, an irzûlhai pata, an that zêla.

⁴⁴Benjamina sipai satak tak mi sîngkhat le sângriat an thata.

⁴⁵Senkhat chu Rimon khur panin an intâna, lampuia mi sângringa vêl chu an thia. Israelhaiin Gidon dênin an irzûlhaia, mi sânghni chu an thata.

⁴⁶A rêngin, Benjamina mihai chu mi sînghni le sângringa irdoi mi ringot an ithi a ni.

⁴⁷Mi irzaruk chu ramchâr tiang Rimon rôl khura an intâna, kha khan tha minli vêl an oma.

⁴⁸Israelhai chu Benjamina mihai an doi zêla, pasal le nupang nâipang khom, an insûng sâhai ten khom an that fâi zita. Kha vêla an khua murdi chu an hâl fâi zit tâka.

Roirêltuhai 21

Benjamina mihai dôngma hrang



¹Israel mihai chu Mizpa khuaa an irbukkhôma, khan Rengpa makunga, “Mi tukhomin kin nâinuhai hi Benjamina mi kin inneitir hrang ni ma,” tiin chong an inkung ngita.

²Khanchu, Israel mihai chu Bethel-a an fea, Pathian makunga khohloi dênin an toia, inringtak le beiindong takin an chapa,

³“O, Rengpa, Israelhai Pathian, hianga thil hi itina hong tung mani tâk na, Israelhai lai ata Benjamina irchihai hi an irhmang zit hrang tâk hi?” an tia.

⁴A tûk zînga chu zîng taka maichâm an siama, irngeina thilinhlan le hâlirvôm thilinhlan an inhlana.

⁵“Israel nam laia Mizpa khuaa irbukkhômna hmuna chang sa loi an om mo?” tiin an irdon irhlôma. Mizpa khuaa Rengpa makunga hong fe loi chu, ‘that ngêt hrang ni a ti,’ tiin chong an inkung ngita.

⁶Israelhaiin an urêng Benjamina irchihai chu an lunginkham tak taka, “A vuan hin Israelhaiin kin laia nam inkhat chu kin inchân a ni ta.

⁷Benjamina nam la dam sunhai ta hrangin itin mo dôngma kin izongpuihai ta hrang? Rengpa makunga kin nâinuhai chu dôngmaa inneitirhai viat loi hrangin chong lak kin lei inkung khak tâka,” an tia.

⁸Khan anni’n, “Israel nam laia mi a tu nam tak hi mo Mizpa khua inkhômpuia chang sa loi?” an tia. Kha inkhômpuia khan, Gilead rama, Jabes khuaa mi chu inkhat lua hong mahai ti an hmu tâka.

⁹Irhming an hong koihaiin chu Jabes khuaa mi chu tûte om mahai.

¹⁰Irbukkhôm nahruaituhaiin an laia mi huaisen sîngkhat le sânghni an tîra, “Fe unglân, Jabes khuaa mi murdi, nupang le nâipang khom va that zit roi,

¹¹pasal that zit unglân, nupang khom pasal lei siatpui tâkhai rêng rêng chu that zit roi,” an tia.

¹²Jabes-hai laia khan dôngmate, pasal la isiatpui loi irzaminli an hmua, Silo khuaa Kanaan rama khan an hong hruaihaia.



13Rimon rôl khura om Benjamina irchihai kuang palâi an tîra, irdoi inmong ta hrang thu an hrila.

14Benjamina irchihai chu an hong kêra, Israelhaiin Jabes dôngmate, an ithat loihai chu an dôngmahai hrangin an pêka; aniachu, chuk mahaia.

15Rengpa'n Israel irpumkhatna a senindarh tâk sikin mipuihai chu a sân poi an tia, Benjamina irchihai chu an irngaiinhluhaia.

16Irbukkhôma hruaituhaiin, "Benjamina laia nupang om ta mahai, a la damhai dôngma hrang hi itin mo ei izongpuihai ta hrang?" an tia.

17Israel nam sôm nam hnihai laia hin nam khat khom irhmang phal ma ung. Khasikin, Benjamina la dam sun omhai ta hrangin irchi ei inneitirhai ngêt hrang a ni.

18Khannisian, ei nâinuhai lak dôngma inneitirhai hrangin phal mak mea. "Mi tukhom mâni nâinu Benjamina mi inneitir chu vânnisalin om ri se, tiin chong ei lei inkung tâka," an tia.

19"Irngai ta, Rengpa hranga kum tin Silo khuaa kût om ngai chu a zoro anaiteng tâk kêng," tiin an ngaituaa. (Silo hi Bethel hmâr tiang, Bethel ata Sekem panna lamlian niswana tianga om, Lebanon sim tianga om a ni).

20Benjamina irchihai chu chong an bêhaia, "Fe unglân, Grep irhuanhaia lei irbîk unglân,

21lei thîr mai unglân, Silo khuaa dôngmate rual lâm hrangin hong suak an ta, nangni khom grep irhuan ata hong suak unglân, Silo khuaa dôngmatehai chu mâni dôngma hrang seng chel unglân, Benjamina rama nin ihruaihai hrang a ni.

22An pahai mani an nuchahaiin mani nangni an hong inbuai khomin, "Lungkham takin inneitirhai mai roi, râl anga irdoiin dôngmaa an ichelhai khom ni maka; nangni lakin nin nuam sika nin ipêk khom ni ual loia, nin chonginkung khom nin insiat ual mani, lei ti kin ti," an tia.



²³Khan Benamina irchihaiin an ihrilhai angin an thoa, Silo khuaa dôngmate rual lânhai laia mi, mâni dôngma hrang seng an chela, an ram tiang an fepuihai tâka, khopuihai chu an siam insata, kha khan an om tâka.

²⁴Kha rengata kha Israel danghai chu mâni rama an irchi chi le mâni nam ram senga an kîr nôk tâka.

²⁵ Kha lai khan Israel rama rêng om mahai, sa an iti ang angin mi tin an om ngai a ni.



Ruthi

Ruthi 1

Elimelek le a insûng mihai Moab rama an irthon

¹Tianlaia roirêltuhaiin roi an rêl lai khan, Israel rama châm a tâka. Judai ram Bethlehem khuaa mi inkhat chu a dôngma le a nâipasal hnihai leh Moab rama om hrangin an fea.

²A'rhming chu Elimelek a nia, a dôngma irhming chu Naomi a ni, a nâipasal hnihai irhming chu Mahlona le Kilionan ni. Judai ram Bethlehem khuaa Efrata mi an ni. Moab rama khan an fea, kha khan an om mai tâka.

³Naomi pasal Elimelek chu a thia, khanchu, Naomi le a nâipasal hnihai leh vai an om tâka.

⁴A nâipasalhaiin Moab mi dôngma'n an neia, inkhat irhming chu Orpi a nia, inkhat irhming chu Ruthi a ni. Kha rama khan kum sôm vêl an om hnungin,

⁵Mahlona le Kilionan khom an thia, khanchu Naomi kha a pasal leh a nâipasal hnihaiin an thisan tâk a ni.

Naomi le Ruthi Bethlehem-a an kîr nôk

⁶Khan Rengpa'n a mihai changpuia fâk nêk a pêkhai ti thu Moab ram ata a lei inhriat sikin, a moiha in hni le Moab ram ata kîr nôk hrangin an irsiam tâka.

⁷Khanchu a moiha in hni leh khan an omna mâksanin Judai ram an pan tâka.

⁸Naomi'n a moiha in hni kuang, "Fe unglân, nin nuhai in tiang kîr nôk chian ta roi, nin pasal thi tâkhai le ki chungsa satna nin inlangtir lam ang takin, Rengpa'n nin chungsa satna inlangtir ri se.

⁹Nin ruaiin pasal dang nin nei nôk theina hrangin Rengpa'n nangni ngaitua pe ri se," a tia. Annihai kha a tumhaia, inring takin an chap tâka.

¹⁰A moiha in khan, "Fe no ni ung, ni mihai kuang ni ifena hrang hmuna nang zui kin ti," an tia.

¹¹Naomi'n, "Ki nâinuhaio, kîr nôk chian roi, ithoa mo nin ni zui nuam bâka! Nin pasal hrang nâipasal ki la inei nôk thei hrang ma ni?"



¹²Ki nâinuhaio, nin in tiang kîr nôk ta roi, pasal la nei nôk hrangin chu ki tar ok tâk sikin. Khan tûngna ki la nei itinin, a vuan zân ngân hin pasal neiin nâipasalhai hong nei ngân ta inlân,

¹³an ulian dênin nin inghâk mai hrang ma ni? Pasal boiin nin iom mai hrang mo? Ni thei make, ki nâinuhaio, nangni sikin ki milung a sân a na, Rengpa kut ki ituang tâk a ni hi,” a tia.

¹⁴Khanchu, irhâi inringtakin an chap nôk tâka, Orpi’n a tarpi kha a tuma, a kîrsan tâka, Ruthi rêkin chu a tarpi a chel ngita.

¹⁵Khan Naomi’n, “En ta, ni moi chanpuinu chu a mihai le a pathian tiang a kîr nôk tâk so, nang khom ni moi chanpuinu zuiin ni in tiang kîr nôk ta roh,” a tia.

¹⁶Khannisianlân Ruthi’n chu, “Nang mâksan hrang le nang zui loi hrangin chu nin thêm no ro; ni fena ti tiang fe ki ta, ni riakna ti tiang riak ki ta, nir chihai chu ki’rchihai ni an ta, ni Pathian chu ki Pathian ni a ti.

¹⁷Ni thinaa thi ki ta, kha khan phûmin om ki ti. Nang le kei hi thina ni loia thil dangin ni sen hrang nêkin chu Rengpa’n i ang khomin a nuam nuamin ni lo ri se,” a tia.

¹⁸Ama zui a tum ngit a nih ti an hriatin Naomi’n a dâisanhrek tâka.

¹⁹Khanchu, an ruaiin Bethlehem dên rakin an fe tâka. Bethlehem an tungin chu, a kho mihai an lei inlâi phuata, nupanghaiin, ‘Hi nu hi Naomi kha ma ni?’ an tia.

²⁰Naomi’n an kuang, “Naomi ni ti ta no roi, Mara ni ti ta roi. Tinrêng thotheitu’n na takin a nin tuangtir tâk a ni hi te.

²¹Irkip takin ki suaka, Rengpa’n kut rongin a ni hruai kîr nôk ta. Rengpa milung hoiloina ki chung a an langtira, Tinrêng thotheitu’n ki chung a dengtheina an tungtir hnungin, itho mo Naomi nin ni la iti mai hi?” a tia.



²²Khanchu, Naomi chu a moinu Moab mi Ruthi leh Moab ram rengata an hong kîra, barli ât a'rphut laitakin Bethlehem khua chu an hong tung tâk a ni.

Ruthi 2

Boaza loia Ruthi sintho a fe

¹Naomi khan a pasal Elimelek urêng irnaipui, a'rhming Boaza, mi neinung tak a neia.

² Moab mi Ruthi'n Naomi kuang, "Loi tiang va fe ki ta, faôï va zong ki ti, ni lei inrentu chu va hmu ngêt ki ti," a tia. Naomi'n, "Fe ro ba, ki nâinu," a tia.

³Khanchu a fea, bu âttuhai lâksel chu a va zong irkhôm tâka. Elimelek urêng Boaza loi khera khan a va fe tâka.

⁴Boaza khom Bethlehem rengata a hong tunga, bu âttuhai kuang, "Rengpa nin kuang om ri se," a tia. "Rengpa'n sat nang vur ri se," tiin an thuana.

⁵Boaza'n a siahlo, bu âttuhai chungu hruaitu kuang, "Hi hi kho tianga nupang ma ni?" a tia.

⁶A siahlo, bu âttuhai chungu hruaitu'n, "Hi mi hi Moab nupang, Moab ram ata Naomi leh hong kha a ni.

⁷Bu âttuhai hnung zuiin, an bu irkhôm zoi mihlia zong irvai thiai ki ti,' tiin a ni ngêna; zoro sôtloite ichua a'rngam ti no chu zîng rengata atûn ten hin a la izong irkhôm mai a ni," tiin a sâma.

⁸Khan Boaza'n Ruthi kuang, "Ki nâinu, irngai ro. Loi danga chu faôï zong hrangin fe no'n lân, hi hmun ata hmun danga irson no roh, ki siahlo dôngmatehai kuanga hin om maiin lân;

⁹kho tiang mo bu an ât en vêlin lân, dôngmatehai hi zuihai mai roh. Ruathartehaiin ite nang an ti lolina hrangin ki hrilhai ta; ni tui an hrâlin chu tuibêla ruathartehai tui chôi sai kha va in ngai ro," a tia.

¹⁰Khanchu, Ruthi chu irnênga a kûna, "Kei nam dang mi hi ni nin hriat nuama, hiang taka lung ni ni inkham hi, itina ma ni tâk?," a tia.



¹¹Boaza'n hiang hin a sâma, "Ni pasal a thi rengata ni tarpi chung a ni sintho murdi mi'n an nin hrila; ni pahai, ni nuhai, le ni'rsiangna ramhai mâksana, mi ni la inhriat ngai loihai laia om hranga ni hong dânhai ti khom mi'n an nin hril zit a ni.

¹²Rengpa'n ni sinthôna man nang thuan sianlân; Rengpa, Israelhai Pathian, irsûnghualna hranga a mithazâr hnuai, a zuang inkhumin chu, ni satna man nang pe ok ri se," a tia.

¹³Ruthi'n, "Ka pu, nangin ni nin ren sikin ki'rtha a'rngam ta. Ni siahlo dôngmatehai laia mi ni no khom inlân, ni siahlonu hi satakin ni ni ichongpui hi ki ta hrangin lunginkhamtu liantak ni ni," a tia.

¹⁴Khanchu, bunêk zoro laiin Boaza'n Ruthi kuang, "Hitaka hin hongin lân, baihai hi hong fa ro, bai tanghai hi uain thûra inchie sa ro," a tia. Bu âttuhai kôla a toia; Boaza'n changpêr a lei pêka, khop telin a fâka, a khop hnungin a fâk mihlia a la nei ok.

¹⁵Khan, faôi zong irfuang hrangin a'rthok nôkin chu, Boaza'n a ruathartehai kuang, "Bumût laia bu khom la sianlân hal no roi.

¹⁶A têt lai ata bupâr khom kaidok pe unglân, mâksan rak unglân hrût ri se, hal viat no roi," tiin chong a bêhaia.

¹⁷Ruthi chu khohloi dênin faôi a zong irkhôma, a irkhômhai kha an chîla, barli epna khat vêt a ni.

¹⁸A bu zong irkhôm kha kho sêng tiang a pêla, a tarpi chu an entira, bai a fâk zoiloi khom a kêlsuaa, a tarpi a pêka.

¹⁹A tarpi'n a kuang, "A vuan sîn hin kho tianga faôi mo ni izong irkhôm? Tu loia mo ni va isin? Nang a lei inrentu chu satvurin om ri se," a tia. Ruthi'n a tarpi kuang a va sinna chu, hiang hin a hrila, "A vuan sîna sin ki va ithônapa irhming chu Boaza a ni," a tia.

²⁰Naomi'n a moinu kuang, "Rengpa mihring le mithi chung a lungkhamna irsam ngailoitu'n ama chu satvur ri se, kha mi kha kin urêng irnaipui tak a ni," a tia.



²¹Moab mi Ruthi'n, "A ni duah, bu hi an ât zoi mâka chu ki sinthotuhai laia hin sin sa mai ro, a ni iti kêng," a tia.

²²Naomi'n a moinu Ruthi kuang, "A sa kha te, ki nâinu, a sinthotu dôngmatehai laia vai sintho ro, loi danga chu buaina ni tong itinin," a tia.

²³Khanchu, Ruthi'n chu Boaza siahlo dôngmatehai sinthoin a oma, barli le gohu ât zoi dênin faôi a zong irfuangin a om ngai. A tarpi kuang a om mai tâka.

Ruthi 3

Ruthi'n a pasal hrang a hmu

¹Kha zoiin, Naomi'n Ruthi kuang, "Ki nâinu, ni ta hranga vângsakna in hoitak nang ngaitua pe ki ti.

²A siahlo dôngmatehai leh sin ni va ithôna loi neitupa kha kin urêng irnaipui Boaza a ni. Irngai ro, a vuan zân hin hruizôla barli a zâp infâi zân a ni.

³Khanchu tui irsilin lân, sahriak mirimhoi irpolin lân, ni sil le kai puan satak irbelin hruizôla khan zu fe roh. Aniachu, fâk nêk a zong zoi mâka chu a kuang, inlang no roh.

⁴A zâl tika a zâlna kha irsinsia'n lân, khanchu fe'n lân, a ke tianga puan kha lîmin lân zâl roh, khanchu, ama'n ni tho hrang chu nang lei inhril zel a ti," a tia.

⁵Ruthi'n, "Ni ti anglam takin tho ki ti," a tia.

⁶Khanchu, hruizôla khan Ruthi a zu fea, a tarpi ihril lam ang takin a thoa.

⁷Boaza chu fâk nêk ar zoiin raifân takin bu pông kôla khan zâl hrangin a fe tâka.

⁸Zân chimrip tena chu Boaza a hong hara, a va'rheiin chu a ke thuana nupang lei zâl mai kha a hmu tâka.

⁹"Tu mo ni ini?" a tia. Ama'n, "Ni siahlo Ruthi ki ni, kin urêng irkaipui bulpui ni ni sikin ni puan kha ni hong irkhu sa ro," a tia.



¹⁰Boaza'n, "Ki nâinu, Rengpa'n sat nang vur ri se; ruatharte inriang mo irchong mo zui papai loia ni ioma hin, matona nêkin atûna hin ni felzia nin langtir ual tâk a ni.

¹¹Atûn hin, ki nâinu, chi no ro; ni izong ang lam takin ni chung a nang tho pe ki ti. Kin khuaa mi murdihaiin nupang fel tak ni nih ti nang an inhriat ving kêng.

¹²I khom ni sian, ni urêng irkaipui chu ki ni, aniachu keima nêka irnaipui ual a la om.

¹³A vuan zân chu riak photin lân, nangtûka ni urêng irnaipuiin a itho hrang a tho nuam no'n chu keima'n tho ki ti, ti Pathian hring irhmingin chong kin kung, khovâr mân chu zâl phot ro," a tia.

¹⁴Khanchu, zîng khovâr dênin a ke thuana khan a zâl tâka, mi tukhomin an hmu infel thei lina hrangin zînga a thoia; Boaza'n, "Hruizôla ni ihong hi mi tukhomin inhre no ri sehai," a tia.

¹⁵Boaza'n a kuang, "Ni puan sil kha hong chôiin lân, dô ro," a tia. Khanchu a dâpa, barli tân khat ar tê pea, an pêltira. Ruthi chu a khua tiang a fe tâka.

¹⁶A tarpi kuang a hong tungin chu, "Ki nâinu, imo ni hong chang?" a lei ti pea. Ruthi'n a chung a Boaza'n thil a itho pe murdi kha a hril zita.

¹⁷"Ni tarpi kuang kut korongin kêr no ro, tiin hi barli tân khat hi a ni ipêk a ni" a tia.

¹⁸Naomi'n, "Ki nâinu thil hong om hrang dân nin hriat mâka chu lei nghâk zâm ro; a vuan hin thil a hong infel mâka chu om chian no ni," a tia.

Ruthi 4

Boaza'n Ruthi dôngma'n a nei

¹Boaza chu roirêlna hmun, dâi mikota a hong fea, a toia. An urêng irkaipui tak chungchâng thu Boaza'n a ihril kha a hong a. Boaza'n, "Ki rualpa, hi tiang hongin lân, hong toi ta," a tia. Ama chu a va fea, a toi tâka.



²Boaza'n kha khuaa mi upa sômkhât a koi bûmhaia, an kuang, "Hitaka hin toi khôm u ta," a tia; khanchu an toi tâka.

³An irkaipui irnai takpa kuang, "Moab ram ata hong kîr, Naomi'n ei urêngpa Elimelek ram kha zuar a nuama;

⁴nangma hi inhril masa zât ni nih ti kin hriata, ni'rtan nuama ni'n chu hi upahai inhriata hin irtan roh; ni'rtan nuam no'n chu nin hril ro; nangma ti no chu tûte a'rtan zât om mahai; khan, ni'rtan thei no'n chu kei hi a'rtanrua ki ni," a tia. Ama'n, "Irtan ki ti," a tia.

⁵Boaza'n, "Naomi kut ata ram ni'rchôk nî khan meithâi Moab mi, Ruthi ni inei sa hrang a om maia, a'rchon luatu hrang an om zêl theina hrangin," a tia.

⁶An urêng irkaipuiain, "Keima ta hrangin chu thei no ning, anino'nchu keima irchon luana hrang tiang inbuaina ki ti, irtan theitu ki nina chu nangma'n chang ta ro; keima'n chu ki irtan thei ta loi a ni hi," a tia.

⁷ Tianlaia Israelhai laia thil an irchôkin mo an irthûlin mo an namindetna hrangin a zuartu'n a kekok khek a ta, ar chôktu kuang a pêk ngai. Hi hi Israelhai laia thil namindet dân chu a ni.

⁸An urêng irkaipuiain khan Boaza kuang, "Nangma'n ni ta hrangin ircho ta ro," tiin a kekok chu a kheka a pêk tâka.

⁹Boaza'n upahai le mipui murdihai kuang, "A vuan sîn hin Elimelek thil nei murdi le Kilonia le Mahlona thil nei murdi chu Naomi kut ata ki'rchôk tah ti inhriatpuituhai nin ni.

¹⁰ Khabana, mithi chu a'rhming a om maina hranga ar chon luatu siam pe hrang le mithi chu a urênghai laia le a omna mikota ar hming ar hmang loina hrangin, Moab meithâi, Mahlona dôngma chu ki dôngma ni hrangin ki nei ta; a vuan hin nangnihai hi an hriatpuituhai nin ni," a tia.

¹¹ Khanchu, dâi mikota mipui murdihai le upahaiin, "An hriatpuituhai kin ni. Ni ina nupang hong lût chu Israel in sêngkua indingtu inhni Rakili le Leaii angin Rengpa'n siam ri se. Nang khom, hi Efrata nam laia hin mi roiinpui tak nin lân, Bethlehem-a irhming inthang takin om roh.



¹² Rengpa'n hi nupang ata irchi a la hong isiam pe hrang sika hin, ni in sêngkua chu Juda'n Tamari nupang ata nâi ainei Pereza in sêngkua angin hong ni ri se," an tia.

Boaza le a'rchihai

¹³Khanchu Boaza'n Ruthi chu dôngma hrangin a hruaia, an omsuam tâka. Rengpa'n Ruthi chu nâi an vongtira, nâipasal a nei tâka.

¹⁴Khataka nupanghaiin Naomi kuang, "Nangma nang enkol hrangtupa nang inneitirtu Rengpa chu inpâkin om ri se. Hi nâipang hi Israel rama hong inlal ri se!

¹⁵ama chu ni ta hranga hringna inthar nôktu le ni tar tianga nang a donsuitu la hong ni a ta, ni moinu nang lungthungtu hi nâipasal sari nêka tama hlu ual, ama chu nang a nei pe tâk a ni," an tia.

¹⁶Naomi'n nâite kha a lâka, a rôpsuama a poma, a donsui tâka,

¹⁷Khanchu, a tualbôm nupanghaiin, nâite irhming an hong phua tâka, "Naomi'n nâipasal a nei ta," ti'n a'rhminga Obeda an phuaa; ama chu Davida pu Jesaia pa a hong ni ta.

¹⁸Hi hi Pereza irchi hong omdân chu an ni; Pereza chu Hezrona pa a ni.

¹⁹Hezrona chu Rama pa a ni, Rama chu Aminadaba pa a ni.

²⁰Aminadaba chu Nasona pa a ni, Nasona chu Salmona pa a ni.

²¹Salmona chu Boaza pa a ni, Boaza chu Obeda pa a ni.

²²Obeda chu Jesaia pa a ni, Jesaia chu Davida pa a ni.



1 Samuela

1 Samuela 1

¹Efraima tâng rama Ramathaimzofim khuua hin Efraima nama mi inkhat ar hming Elkana a oma. Ama hi Zufa panama mi, Tohua in sêngkuua mi Elihua nâi Jerohama nâipasal a ni.

²Elkana hin dôngma inhni a neia, Hani le Penini hai an ni. Penini hin nâi a neia, Hani hin chu nâi nei ma.

³Elkana kha, Rama khuua ata Silo khuua, tinrêng thothei Rengpa chubai mûk hrang le irbôl hrangin a kum tin a fe ngaia. Kha khan Elia nâipasalhai ruai Hofnia le Finehasa hi Rengpa ochai hrangin an lei oma.

⁴Elkana'n irbôlna an hlan rikipa a dôngma Penini le a nâihai murdi dongtum a siam pehai ngai.

⁵Hani kha lungthung ok khom sianlân, Rengpa'n nâi nei thei loiin a siam sikin a dongtum inkhat vai a isiam pe ngai a ni.

⁶Nâi a nei thei no sika a beidongna irbôktir pe ual hrangin ama irsiatpuinu Penini hin hmusitin a lei êsêl ngaia.

⁷Khaang khan a kum tin a hong ni maia, Rengpa ina an fe rikipin Penini khan Hani kha beidong ngaisiat a irhlotir ngai a ni. Khasikin Hani chu chap chiana omin bu khom ne nuam ngai maka.

⁸Khanchu a pasal Elkana khan a kuang, "Hani, itho mo ni chapa? Itho mo bu ni inêk loi? Itho mo beidong ngaisiata ni iom? Nâipasal sôm khat nêk khomin ni tah hrangin chu ki isa ual loi ma ni?" a ti pea.

Hani le Elia

⁹Sûn khat chu Silo khuua Rengpa ina bu a nêka, an nêk zoiin chu Hani kha a thoia, a bei a dong pe oka,

¹⁰Khanchu Rengpa kuang a chongchaia, beidong takin a chapa, kha laia khan deipu Elia chu Rengpa biak in kotbâi chopui bula a toina hmun khan a toi chiana.



¹¹ Hani khan chong an kunga, “O itinrêng sin thei Rengpani suaknu irhnuai lam hi nin hriatin, ni ni lan hriat maia, ni’rngihl viat mak che. Ni suaknu hi nâipasal ni ni pêkin chu, kha nâi kha chu a dam sêng kârka chu ni ta hrangin ser indang bîk ki ta, a sam khom ep pe viat no ning,” a tia.

¹² Hani kha Rengpa kuang a la chong lai takin Elia khan a hmûr inchâng kha a lei sinsiaa.

¹³ Hani khan a lungrîl taka chongchai a nia; a hmûr chu an châng, ar hâi chu inhre thei ni maka. Khasikin Elia hin zu a inrui ni le hin a iama.

¹⁴ Khan Elia hin a kuang, “I dôra sôt mo ni inrui ta hrang? Ni uain tui kha pai ta ro,” a tia.

¹⁵ Hani khan, “Ka pu inrui ma ung, nupang beidong inren om tak ki ni; uain khom, zu khom in viat ma ung. Rengpa kuang ki lungrîl ki iphorsuak kêng a ni.

¹⁶ Ni suaknu hi Beliala nâinu’n ni bê no ro. Ki lungrîla sipliam beidongna le chardongna ki insîr a ni hi,” tiin a sâma.

¹⁷ Elia khan, “Irtharngam takin fe ro, Israelhai Pathian khan ni thil ngên chu nang pe ri se,” a tia.

¹⁸ Hani khan, “Ni suaknu hin ni mit tungin om ri se,” a tia. Khanchu nupangnu chu a fe tâka, bu a nêka, beidong hmêl irput ta ma.

Samuela suakna le inhlanna thu

¹⁹ Zîng nôka chu Elkana le a in sêng mihai kha zînga an thoia. Rengpa leh an chong zoiin chu Rama khua an ina an fe nôk tâka, Elkana khan a dôngma Hani kha a’rpôlpuia; Rengpa’n Hani chongchaina chu a sâm pe tâka.

²⁰ Khanchu Hani khan nâi a vong tâka, nâipasal a neia; “RENGPAA ki izong a ni,” tiin a’rhming khom Samuela tiin a phua tâka.

²¹ Elkana le a in sêng mihaiin a kum tina Rengpa kuanga irbôlna inhlannang le an chonginkung thangsua hranga Silo khua an fe zoro, a hong chuk nôk tâka.



²²Khannisian hi zoro hin chu Hani chu fe sa maka. A pasal kuang khan, “Kei chu nâite hin irhnu nêk a bâng tena Rengpa ina hruai ki ta, khatak khan a dam sâng chu a iom mai ta hrang a ni,” a tia.

²³A pasal Elkana khan a kuang, “A dik ni iti lam takin tho ro; irhnu nêk nin bângtir mân chu in sînga om ro. Rengpa’n ni chonginkung chu nang indet pe khak ri se,” a tia. Khanchu irhnu nêk a bâng mâka chu Hani chu in sînga a oma, a nâi kha a dona.

²⁴Irhnu nêk a bâng tena chu baidi her sôm khat le uain ûm khat chôiin le sehrâtchal tuai inthum mi kaiin Hani khan a nâipa chu Silo khuuaa Rengpa ina khan a fepui tâka; a nâi chu a la nâiin pang ok a ni.

²⁵serâtchal tuai kha an that zoiin chu nâipangte kha Elia kuang an hruaia.

²⁶Hani khan a kuang “O ka pu, ni’rhming inzakupumin hi hi ki hril, keima hi chu ka pu, hi hmuna hin ni kôla ngîra Rengpa kuanga chongchaitu kha ki ni;

²⁷Hi nâipang ngên hin ki ichongchai a ni; Rengpa khan ki ingên kha a ni pêk tâka.

²⁸Khasika khan keima khomin Rengpakuang ki inhlân a ni, a dam sâng chu Rengpa ta hranga ser irthiang ni ta ri se,” a tia. Khanchu kha hmuna khan Rengpa chubai an mûk ta.

1 Samuela 2

Hani chongchaina

¹ Hani kha a chongchaia, “Rengpa chung a ki lungrîl a lôm tak taka, ki hrâtna chu Rengpa chôiirsângin a om ta, ki râlhai chu ki bâiin a phenênga, Pathian saninhringna khan ki lôm tak tak a ni ta.

²Rengpa anga irthiang hi om mahai; Ama ang zel om mahai. Ei Pathian anga lungpui det zel tûte om mahai.

³Lâiripâk chong hmang irngam unglân, Ni bâi ata ite irsongna chong suak ta no ri se. Rengpa chu vârna Pathian a nia. Ama’n a nitina nin sintho kha a izêk ngai a ni.



- ⁴Mi hrâthai thalngul an khiaka, mi hrât loihai an hong hrât ta.
- ⁵A lei khopa omhai kha fâk hrang zongin an irhlo tâka, phîngchâma lei omhai kha an hong khop ta. A ni, nupang chingnu khan nâi sari a nei tâka. Nâi tamtak neinu kha kut korongin a om ta.
- ⁶Rengpa khan a that theia, an hring nôk thei ngai; thâna an fetira, a hong hruai nôk ngai.
- ⁷Rengpa khan inriangin a siamhai ngaia, a'rchongtirhai nôk ngai. An temtirhai ngaia, a chôiirsângtirhai thei.
- ⁸Vâiphin ata inriang kha a kaithoi thei ngai. Inriangtengtêr kha vâiphin ata an domirsângtir theia, Mi lianhai kuang an omtir thei. Roiinpuina rêngtoihmun an lua theina hrangin. Irnêng irnghatnahai hi Rengpa ta a nia, a chung a khan rammual hi a irnghat tâk a ni.
- ⁹A mi irthianghai ke chu a hrung inzôk ngaia, Mi siathai chu an thimbup zoro hin an irhmang ngai; hrâtna ringotin chu tûte'n inhnêna chang thei no ni.
- ¹⁰Rengpa doituhai chu koi irnôi chit an ta, Irvân ata khonri'n doi a ti. Rengpa khan rammual pumpui chung a roirêl a ta; a rêng kha hrâtna pe a ti. A hriak irthu ngai hrâtna kha chôiirsâng a ti," a tia.
- ¹¹Khanchu Elkana kha Rama khua, a ina khan a kîr tâka. Khannisian nâipangte Samuela chu Silo khuaa a om mai ta, ochai Elia makunga khan Rengpa sin a tho tâka.

Elia nâipasalhai

- ¹²Elia nâipasalhai kha mi chanlamboi an nia, Rengpa khom mahrip tho loi
- ¹³mipuihai chung a ochaihai tho dân khom ngaisak ngai loi mi an nia. Mi'n irbôlna an hong inhlân rikipa hin ochai hnungzui, sa inthilna thîrtûl irzum inthum nei ngai chôiin an hong a, sa an suang lai takin.
- ¹⁴Sa suangna bêla khan sa inthilna thîrtûl leh khan zu sun a ta, kha sa inthilna thîrtûla a ikêlsua dôr kha ochai dongtum ni a ti. Khaang khan Israel mi Silo khuaa irbôlna inhlân hranga hong murdihai kha an lei itho ngai a ni.



¹⁵Khabana khan, a thâi kha an lâkpaia, an hâl mân zelin, ochai hnungzui kha hongin ar bôltu kuanga khan, “Ochai ta hrangin ir-em inhmin hrang, sa ni pe ro; ni sa suang sai kha nuam maka, a sel kêng a inuam,” a ti ngaia.

¹⁶Ama khan an kuang, “A thâi kha hâlpai bak ni sianlân, kha hnung chu ni inunuam la ta ro,” tiin a lei sâmin chu ochai hnungzui khan, “Ni ngai ma, atûn ni pe zel ro, ni ni pêk no’n chu nakhrât songin ki ilâk hrang a ni,” a ti ngaia.

¹⁷Hi Elia nâipasalhai سوالنا hi Rengpa mithmua irkhêl tak a nia; mihaiin Rengpakuanga irbôlna inhlanhai kha mahrip tho viat loiin an tho tâk sika a ni.

Silo khuua Samuela a om ta

¹⁸Khannisianlân Samuela chu nâipangte ni khomsian, puan irphân ochai songkol inngâkin Rengpa sin a tho ngaia.

¹⁹Khakhêla khan a nu’n songkol irfual an sui pea, a kum tina irbôlna inhlan hranga a pasal leh an fe’n an chôi pe ngai.

²⁰Khante, Elia khan Elkana le a dôngma kha sat a vurhaia, an kuang, “Rengpakuanga nin thilinhlan hi, hi nupangnu irchia hin Rengpa’n nang thuan ri se,” a tia. Kha hnung chu an in tiang an kîr nôk tâka.

²¹Rengpa khan Hani kha bor a pêka, nâipasal inthum le nupang inhni a pêk nôka. Nâipang Samuela kha Rengpa kuang khan a hong seilian ta.

Elia le a nâihai

²²Elia kha a hong tar ok tâka; Israel mi murdihai chung a nâihai sintho murdi leh irhmûna puan in kotbâi kôla sinthotu nupanghai an lei zâlpuihai ngai thu an hriata.

²³Khanchu an kuang, “Itho mo khaanga thil nin itho hi? Mi tinin nin thiltho saloihai an nin sîr pea.

²⁴E he! ki nâihai, nin thurchi ki inhriat hi a siatna tiang inzen a ni.

²⁵Mi inkhatin mi dang chung a سوالin chu porinchetir a ni, Pathianin a chung a rêl pe a ta, khannisianlân, mi Rengpa chung a سوالin chu tu’n mo a



ingênpui ta hrang?” a tia. Kha dôr ten khom khan an pa thu zôm nuam loiin an oma. Khasikin Rengpa khan anni kha a ithathai ngêt hrang a ni.

26 Nâipang Samuela kha a hong irsôn tîr tîra; Pathian le mihriam mit tungin a om tâka.

Elia in sùng mihai lei hrilna

27 Elia kuang khan Pathian mi inkhat a hong, a kuang Rengpa thu a hon tunga; “Nin irchibulhai kha Aigupta rama Faroa suaka an om lai khan an kuang ki inlâr mo ni ma?

28 Khante Israel nam murdihai laia ki maichâma fea, mirimhoi hâla, ki makunga ochai songkol innghâk hrangin, ki ochai chang hranga ama kha ki inkung mo ni ma? Ni’rchibulhai kha Israel mihai hâlrivôm thil mo ki inhlanhai ni ma?

29 Itho sika mo ki omnaa inhlan hranga ki inkung, ki kuanga irbôlna le ki dongtum thilinhlan kha nin sirbea? keima nêkin ni nâipasalhai ni inhlu ual, nangni irvâi marna hrangin mo ki mi Israelhai irbôlna sahai nin ihmang hi?

30 Khasikin keima Rengpa Israelhai Pathian hin ni in sùngkuahai le ni pa sùngkuahai kha kumtuanga ki ochai changin ki makunga om mai nin ti, tiin ki len kunga. Khannisianlân atûn chu om viat ta no chin nih ki iti a ni. Ni chôiirsângtuhai chu chôiirsâng ki ta, a ni hmusithai chu hnuaisiahai ki ti.

31 Irngai ro, ni in sùngkua le ni panam laia vânglaihai murdi ki thatna hrang nikhua chu a hong itung thiai tâk a ni, khanchu ni ina tar kûna dam zel om ta no nihai.

32 Khanchu Israel mihai vângsakna ki ivur murdi kha irzugin thîr ni ta, inchop irkhêl takin om ni ta; khanchu ni ina tar kûna dam zel om no ni.

33 Khan ni mi ki maichâm ata ki irhmangtir loi chu, ni mit en inkhamtirtu le, ni milung innatirtu vai ni a ti. Ni ina zuang suak dang murdi chu an vânglai zoro takin thi an ti.

34 Khante ni nâipasalhai ruai Hofnia le Finehasa chung a thil hong tung hrang kha ni ta hrangin irsinsiana ni a ta, sùn khat sùngin an ruaiin thi an ti.



³⁵Ochai iamom tak ki ta hrangin inthang nôk ki ta, ama khan ki lungdo inchuk a ti. Sûngkua det takin siam ki ta, kumtuangin ki sahriak irthu makunga khan sintho a ti.

³⁶Hiang hin ni a ta, ni ina la om murdihai kha tangka le bai ngênin, kha ochai kuang khan fe an ta, bai a chînte lua fa hrang ki hmu theina hrangin ochai sin, i khôk mani nin thotir ro, ti an ti,” a tia.

1 Samuela 3

Samuela kuanga Rengpa inlârna

¹Khan nâipang Samuela kha Elia makunga Rengpa sin a tho laia khan Rengpakuang ata chongbe om lele ngai maka; inlârna tihai khom.

²Kha zoro khan zân khat chu Elia mit zîng tâk khan, ama tentan sûnga a zâla;

³Samuela chu Pathian Thuthung Bôm omna hmun biak ina khan a zâla, khovâr mân meiser a lan chok mai laiin,

⁴Rengpa khan Samuela chu a koia. Ama'n, “Ka pu hin ki om,” a tia.

⁵Khante, Elia kuang khan a van tâna, “Hin ki om, ni ni ikoi ma ni,” a tia. Khannisianlân Elia khan, “Nang koi ma ung, va zâl nôk ta ro,” a tia. Khanchu Samuela chu a fea, a va zâl nôk tâka.

⁶Rengpa khan Samuela kha a koi nôka, kha lai khan nâipang Samuela khan Rengpa ikoi a nih ti inhre thei maka, Rengpa'n a kuang thu a lan puang pe ngai no sikin.

⁷Khanchu Samuela chu a thoia, Elia kuang khan a fea, “Hin ki om ni ni koi maia,” a tia. Khan Elia khan a sâma, “Nang koi ma ung, ki nâipa va zâl nôk ta ro,” a tia.

⁸Voithumna tena chu Rengpa khan Samuela kha a koi nôka. A thoia Elia kuang khan a fe nôka, “Hin ki om ni ni koi maia,” a tia. Khanchu Elia khan nâipang kha Rengpa'n a ikoi a nih ti an hriat tâka.



⁹Khanchu Elia khan Samuela kuang khan, “Fe’n lân, va zâl nôkin lân, nang a koi nôkin chu, Rengpa thu insîr ro, ni suak hin ar ngai chian, ti ro duah,” a tia. Khanchu Samuela kha a fea, a va zâl nôka.

¹⁰Rengpa kha a zuanga, matona a ikoi ang lam ngêtin, “Samuela, Samuela,” tiin a koi nôka. Khanchu Samuela khan, “Thu insîr ro, ni suak hin ar ngai chian,” a tia.

¹¹Kha hnung chu Rengpa khan Samuela kuang, “Irngai ro, Israel rama hin an hriat murdihai irngai nuam loi tamtakin thil irkhêl tak tho hrang ki ni.

¹²Kha nikhua khan Elia in sâng mi thurchi ki insîr murdi kha a bula irthokin a mong dênin ki itho hrang a ni.

¹³A nâipasalhaiin Pathian an insîrinsiatna sual kha inhriat chakin a khap no sikin a in sângkua chu kumtuanga hrangin kuttum ki itho hrang a nih ti hi ki lei ihril zoi tâk a ni.

¹⁴Khasikin Elia in sâng mihai siatna kha irbôlna hrangin mani, thilinhlanin mani, itiklai khomin irlêk thei ni no nih tiin chong ki lei inkung tâk a ni,” a tia.

¹⁵Samuela kha a vâr dênin a zâlmuna khan a oma; khanchu a hong thoia, Rengpa khan mikothai kha an hongga, kha inlârna kha chu Elia hril hrangin a sân a chi tâka.

¹⁶Khanchu Elia khan Samuela kha a koia, “Samuela ki nâipa,” a tia. Samuela khan, “Hin ki om ka pu,” a tia.

¹⁷Elia khan, “I thil mo Rengpa’n ni kuanga a insîr? keima kuang ite ip nei no ro duah. Ni kuanga a insîr murdi kha keima kuang ip ni neiin chu, Pathianin irkhêl takin kuttum nan tuangtir ri se,” a tia.

¹⁸Khanchu Samuela khan itinrêng a hril pe ving tâka; ite ip nei viat loiin. Elia khan, “Ama chu Rengpa a nia, a sa a iti lam takin tho ri se,” a tia.

¹⁹Samuela chu a hong irsôn tîr tîra, a kuang Rengpa a om maia. Samuela chongbâi suak tinrêng chu thudikin a siama.



²⁰Khanchu Dan khua ata Beer-seba dên rakin Israel mi murdihai khan Samuela chu Rengpa deipu hranga indet a nih ti an hon hriatsuaka.

²¹Rengpa chu Silo khan an lâr nôka, kha khan Rengpa chu thuin Samuela kuang Silo-a khan a inlâr a ni. Khan, Samuela thu kha Israel mi murdi laia khan an thangsuak tâka.

1 Samuela 4

Thuthung Bôm Filistia-haiin an man

¹Kha laia khan Filistia mihai chu Israelhai doi hrangin an irfôka. Khasika khan Israel mihai kha Filistia mihai doi hrangin an irthok suaka. Ebenezar kôla omhmun an khuara; Filistia mihaiin Afek-a hmun an khuara.

²Filistia mihai kha Israel mihai lei danh hrangin an lei irzara; an hong irdoiin chu Filistia mihai kuanga khan, Israel mihai chu an dok tâka, irdoina hmuna khan sipai sângminli vêl an thata.

³A la dam sipaihai kha an riakbuka an va kîr nôkin chu Israel ulianhai khan, “Itho sika mo a vuan hin Filistia mihai kuta Rengpa’n a ni indoktir hi o? Ei kuang a oma, ei râlhai kut ata ni saninzôk hrangin Silo ata Rengpa Thuthung Bôm kha hong la ei ti,” an tia.

⁴Khanchu mipuihai khan Silo-a khan mi an tîra. Khatak ata kha Cherubim chungga toi, Itinrêng sin thei Rengpa Thuthung Bôm kha an va lâk tâka. Thuthung Bôm an zuang chôia khan Elia nâipasalhai Hofnia le Finehasa hai an ruaiin an zuang saa.

⁵Rengpa Thuthung Bômin an riakbuk a zuang tungin chu, Israel murdihai kha inring takin an khêk dur dura, irnêng an tor chita.

⁶Filistia mihaiin an khêk irhâi an inhriatin chu, “Hebraihai riakbuka mi khêk irhâi kha itho sika ma ni tâk?,” an tia. Hebraihai riakbuka Rengpa Thuthung Bôm a zuang itung a nih ti an inhriat tâka.

⁷“An riakbuka Pathian a izuang a ni. Ei ta hrangin intak a ti! matona khan chu hianga hi la om ngai maka, ei ta hrangin irhel zap a ti!



⁸Kha Pathian kut hrât tak ata kha tu mo nin zôk thei ta hrang? kha Pathian kha a ni, Aigupta mi hai ramchâra hripui chi tinrêng that theitu kha.

⁹O nangni Filistia mi haio, nin suaka an iom anga khan Hebrai hai suaka nin om loina hrangin hrât takin om unglân pasal hrâtin om roi: Pasal hrât takin om unglân, pasal hrât angin doi mai roi,” an tia.

¹⁰Khanchu Filistia mi hai khan hrât takin an doia. Israel mi hai chu an doka, an mâni insûng tiang lâizâm an tho tâka, an that intam hai oka: Israel mi sipai sîngthum an ithi a ni.

¹¹Pathian Thuthung Bôm kha an lâk pehaia; Elia nâipasal hai ruai Hofnia le Finehasa hai kha an that saa.

Elia thi thu

¹²Sipai hai laia Benamina irchia mi inkhat irsualbual ata kha an tâna, a puan diar chet duarin le a lu chung a pil kop zuakin, kha nî sîn ngêta khan Silo a hong tunga.

¹³Elia khan lampui sîra a toihmuna toiin a lei thîr chiana, Pathian Thuthung Bôm sika khan a lungrîl chu irlo'nthingin a oma. Kha mi kha kho sînga a hong tunga, thurchi kha a hon sîrin chu an kho pumpuiin irlo'nthingin an khêk vung vung tâka.

¹⁴Elia khan an khêk irhâi a len hriata, “Kha dôra irhâi a isiat so itho sika mo a ini,” a tia. Kha mi kha irhnot takin a va fea, Elia kha a va hrila.

¹⁵Elia chu kum sômkuak kariat mi a nia, a mit a zîng pe tâka, kua hmunfel thei ta maka.

¹⁶Kha mi khan Elia kuang khan, “Irsualbual ata hong zôk ki nia, a vuan hin irsualbual ata hong rot ki ni,” a tia. Elia khan, “Ki nâipa itin mo thil a iom lam?,” a tia.

¹⁷Thurchi hong intungpu khan a sâma, “Israel mi hai chu Filistia mi hai ata kha lâizâm an thoa, mipui laia irthatna irkhêl tak a oma, ni nâipasal hai ruai Hofnia le Finehasa hai khom an thia; Pathian Thuthung Bôm khom an lâkpai pehai ta,” a tia.



¹⁸Kha mi khan Pathian Thuthung Bôm thu a hon sîr zela khan, kotbâi kôla a toihmun ata kha Elia chu a thal tiang an rîla, a ring a kiak pea, a thi tâka, a tar ok tâka, a mar sika a ni, Israelhai chung a kum sômminli roi lei rêl tâk a ni.

Finehasa dôngma thina thu

¹⁹Elia moinu Finehasa dôngma khan nâi a vonga, a neina hrang anâi teng tâka, Pathian Thuthung Bôm an lâkpai pe ti thu an hriata, a pu le a pasal an thi thu a hon hriatin chu a lu a kûna, nâiha'n a sea, nâi a nei tâka.

²⁰A thi vâng tâka, a kôla nupanghai khan a kuang, “Chi no ro, nâipasal ni nei ta hi te,” an tia. Khannisianlân irngai viat maka, a sâm khom sâmhai mah.

²¹“Roiinpuina khan Israel chu a mâksan ta,” tiin nâite irhming chu Ikaboda a ti tâka. Pathian Thuthung Bôm chu an lâkpai pea, a tarpu le a pasal an thi tah ti tetûkna a ni.

²²“Pathian Thuthung Bôm chu mi'n an lâk tâk sikin Roiinpuina khan Israelhai chu a imâksan tâk a ni,” a tia.

1 Samuela 5

Thuthung Bôm Filistia mihai laia om

¹Khan Filistia mihaiin Thuthung Bôm an lâk hnunga khan chu; Thuthung Bôm kha Ebenezerata Asdod khuua an hong chôia,

²an Dagon pathian ina an lâk lûta, Dagon irlim kôla khan an siaa.

³Khante, Asdod kho mihai kha zînga an thoiin chu, Rengpa Thuthung Bôm omna khan Dagon millim kha a khubtakin a len rîl raka. Khanchu an kaithoia, a omna hmun ngêta khan an sia nôka.

⁴Zîng nôka zînga an thoiin chu Rengpa Thuthung Bôm kôla khan Dagon millim kha a khubtakin a len rîl nôka. Hi zoro hin chu Dagon lu le a bân khampaiin kotbâi kôla khan a lei om raka; a takpum vai kha a lei om rak tâka.

⁵Khasika khan Dagon ochaihai le Dagon biak ina hong ngaihai khomin Asdod khuua Dagon kotbâia khan atûn ten hin an ilût ngam loi a ni.



⁶Rengpa kut khan Asdod kho mihai kha a chelhai maia, siatna an tung pehaia. Asdod khua le a kôlvêlhai kha pangpo hripuiin a thohaia.

⁷Khanchu Asdod kho mihaiin khaanga om a nih ti an inhriatin chu, “Israelhai Pathian Thuthung Bôm kha ei kôla om mai ta no ri se, eini chung a le pathian Dagon chung a kuttum thâk a nahrai ta,” an tia.

⁸Khanchu Filistia rêng ringahai kha an koibukhaia, “Israelhai Pathian Thuthung Bôm kha imo kin ilo hrang?,” an tia. Anni khan, “Gath khuaa va thak roi,” an tia. Khanchu Israelhai Pathian Thuthung Bôm kha Filistia khuaa ngêt Gath khuaa khan an va thak tâka.

⁹Khannisianlân kha khua kha an van tungin chu Rengpa kut khan Gath khua kha an buai nuai nuai tâka, a kho mihai kha a chîn ata a lian dênin kuttum an tuang nôka, pangpo hripui an lêngtir nôka.

¹⁰Khanchu Thuthung Bôm kha Filistia-hai khuaa ngêt, Ekron-a khan an thon nôka, khannisianlân kha khua kha a va tungin chu Ekron kho mihai khan, “Israelhai Pathian Thuthung Bôm kha eini le ei nâihai ni thatna hrang pialin an hong ichôi a ni,” tiin an khêk nôk sup sup.

¹¹Khanchu Filistia rêng ringahai kha an koibukhai nôka, “Israelhai Thuthung Bôm hin keini le kin in mihai a ni that irhmang zoi lolina hrangin a omna hmun ngêta thonpai nôk ni ri se,” an tia. Pathianin natakin kuttum a tho sikin an kho pumpuiin an buai nôk tâka.

¹²A thi loihai kha an popa, khanchu kha kho sênga mihai kha changpuina zongin an pathianhai an zong ta.

1 Samuela 6

Thuthung Bôm kîr nôk thu

¹Rengpa Thuthung Bôm kha Filistia mihai rama khan tha sari a om tena chu,

²Filistia mihaiin ochaihai le tasân theihai an koihaia, “Rengpa Thuthung Bôm kha imo kin ilo ta hrang? A omna hmun ngêta thak kîr nôk hrang dân nin hril roi ba,” tiin an irdonhaia.



³Anni'n, "Israelhai Pathian Thuthung Bôm hi nin thak kîr khoma, a korongin infetir no roi, a kuang siat irbôlna thilinhlan thon sa roi, khan kêng damin nin iom hrang, khanchu itho mo a kuttum nin ituang ti inhre suak nin ti," an tia.

⁴Mipuihai khan, "Ama kuang kin siat irbôlna inhlan hrangin imo kin itho hrang?," an tia. Anni khan, "Filistia rêng om dôrin pangpo millim ringa le châichek millim ringa; rângachakin siam unglân; nangni le nin rêng hai chung a hri lêng kha hmunkhat a ni.

⁵Pangpo millim ringa le nin ram insiattu châichek millim ringa nin isiamhai khan Israelhai Pathian kha chôindôm roi. Khanchu nangni le nin pathianhai le nin ram kha kuttum nangni a tho ta no khom a ni thei.

⁶Aigupta mihai le Faroa lungrîl an inngar anga khan itho mo nin lungrîl nin inngar hi? Aigupta ram ata Israel mihai kha an tîrpaihai mâka chu Pathianin anni kha chanlamboiin a isiam dân kha irnghil no roi.

⁷Khasikin, atûn hin tâli thar kha sinsiam unglân, sehrâtpui hni dût sôm lai, ringkol la pêl ngai loi kha tâlia khan thung pe khak unglân, a têhai kha insûng tiang hong hruaipai pe roi.

⁸RengpaThuthung Bôm kha la unglân, tâlia khan bâng unglân, siat irbôlna nin inhlan rângachak thil hlulai kha bakot sûnga thunin a kôla khan se roi. Tâli kha a fena hrang lampuia irthok sianlân, a bingin infetir roi.

⁹Khanchu en chian unglân, Beth-Semes khua tiang a fe'n chu ei chung a thil saloi tak hong tung hi Israelhai Pathian itho ni a ti. Khaang khan a fe no'n chu kuttum ni thotu kha ama ni mah ti inhre suak ei ta, ei chung a hong iom angin bê ei ti," an tia.

¹⁰Mihai khan khaang khan an thoa, sehrâtpui a dût sôm lai inhni an hruaia, tâlia khan an khit pehaia, a têhai chu in sûnga an khum pehaia.

¹¹Thuthung Bôm kha tâlia an siaa, rângachaka siam châichek millim le pangpo millim siana bakot leh khan.



¹²Sehrâtpuihai khan Beth-Semes tiang panin an fe thal thala; inhrâm thiaiin a lampuia khan an fea, chang tiang vei tiang pêt viat mahaia, Filistia-hai rêng ringahai khan Beth-Semes ramri dên thalin an zuihai ta.

¹³Beth-Semes kho mihai khan phâizôla khan bu an lei âta, an hong irheiin chu Thuthung Bôm kha an hong hmua, an lômtak taka.

¹⁴Tâli kha Beth-Semes kho mi Josua loia khan a hong lûta; lungpui lianpa kôla khan a ngîr chiana, mihaiin tâlia thinghai kha an tuka, sehrâtpuihai kha an thata, Rengpa kuang hâlvôm thilin an inhlana.

¹⁵Levi irchihai khan, Rengpa Thuthung Bôm le rângachak thil hlu omna bakot kha an chôia, lungpui chung a khan an siaa. Kha hnung chu Beth-Semes khuaa mihai khan kha nî sôn ngêta khan hâlvôm thilinhlan le irbôlnahai Rengpa kuang an inhlana.

¹⁶Kha kha Filistia rêng ringahaiin an en zoiin chu, kha nî ngêt khan Ekron kho tiang an kîr nôk ta.

¹⁷Filistia mihaiin rângachak le pangpo millim ringa Rengpa kuang an siat irbôlna hranga an inhlana kha; an khopui ringahai, Asdod, Gaza, Askelon, Gath le Ekron-hai le hmunkhat ang a ni.

¹⁸Rângachak châichek millim kha, kha kho sûnga an kulpui nei le thingtâng khuaa khom tep vinga Filistia rêng ringahai khua dôr ang a ni. Rengpa Thuthung Bôm an irngatna lungpui. Beth-Semes kho mi Josua loia om kha atûn ten hin a la iom mai a ni.

¹⁹Khan, Rengpa Thuthung Bôm sùng an en sika khan Beth-semes khuaa mihai kha a hrema, mi sômsari reng a thathaia. Rengpa'n a hremhai hrai sikin mipuihai kha a sân an kamang tâka.

Kiriath-jearim khuaa Thuthung Bôm

²⁰Beth-Semes kho mihai khan, “Hi Pathian irthiang Rengpa makunga hin tu mo a ngîr ngam hrang? Ei kuang ata hi tuhai kuang mo ei itîr ta hrang na?” an tia.



²¹Khaang khan Kiriath-jearim kho mihai kuang khan, “Filistia mihai khan RengpaThuthung Bôm chu an hong sia nôk tâka, zuang unglân, nin kuang zuang la roi,” ti hrangin mi an târa.

1 Samuela 7

¹Khanchu Kiriath-jearim kho mihai kha an zu fea, Rengpa Thuthung Bôm kha tâng chungga, Abinadaba ina an chôl lûta, a nâipa Eliazara kha Rengpa Thuthung Bôm enkoltu hrangin an inthanga.

Samuela'n Israel chungga roirêlna

²Rengpa Thuthung Bôm kha Kiriath-jearim-ah khan zoro sôtak kum sômhni dênin a oma. Kha sûnga khan Israel mi murdihai khan Rengpa irngaiin an chap ngaia.

³Khante Samuela khan Israel mihai kuang khan, “Nin lungrîl taka Rengpatiang nin irngat tak takin chu, ram dang pathianhai le Asterothi pathiannuhai millim kha nin lai ata pai ving roi. Nin lungrîl kha Rengpa ta hrangin sinsiam unglân, ama sin vai tho roi; khanchu Filistia-hai kut ata hi nangni a isansuak hrang a ni,” a tia.

⁴Khanchu Israel mihai khan an Baal millimhai le Asterothi millimhai kha an pai vinga, Rengpa sin vai an tho tâka.

⁵Kha hnung chu Samuela khan, “Israel mi murdihai chu Mizpa khuua koibûmhai ving unglân, Rengpa kuang nangni chongchai pe ki ti,” a tia.

⁶Khanchu Mizpa-a khan an irbûm tâka, tui an chôia, Rengpa kuang thilinhlanhai an bunthuana, kha nê khan chu a sîn nitungin bu an ngheia. “Rengpa chungga khan kin lei isual tâk a ni,” an tia. (Mizpa-a khan a ni Samuela'n Israelhai roi a irêl pehai.)

⁷Filistia mihai kha Israelhaiin Mizpa-a khan an irbûm ti an inhriatin chu Israel mihai doi hrangin Filistia rêng ringahai kha an hong irthoka, Israelhaiin an len hriatin chu an lei chia.

⁸Khanchu Israel mihai khan Samuela kuang, “Filistia mihai kut ata nin zôk hranga Rengpa ei Pathian ni izong kha mong viat no roi,” an tia.



⁹Samuela'n kêlbelrate irhnu nêk lai kha a lâka, a thata, pumhâl thilinhlaninRengpa kuang ar hlana. Kha hnung chu Israel mihai ta hrangin Samuela khanRengpa kha a koia. Rengpa'n a don tâka.

¹⁰Samuela'n hâlirvôm thil an hlan lai takin Filistia mihai khan Israelhai doi hrangin an hong suaka; khannisianlân kha ni khan chu Rengpa'n Filistia mihai chung a khonri irhâi siat takin an tongtir pehaia. Anni chu a satea buaia lunginzîngin lâizâm an tho tâka.

¹¹Israel mihai kha Mizpa ata khan an suaka, Filistia mihai kha Bethkar dên thalin an irzûlhaia, an ithathai thiai a ni.

¹²Kha hnung chu Samuela khan lung a lâka, Mizpa le Sen kêra khan a phuna, "Hi ten dên hin Rengpa'n a ni isan a ni," tiin ar hming khom Ebenezara a tia.

¹³Khanchu Filistia-hai kha an dok tâka, Israelhai ram kha hong rûn nôk ta mahai.Rengpa kut khan Filistia mihai chu Samuela dam sêng kêrka chu a doihai mai tâka.

¹⁴Filistia mihaiin Israel mihai khua an ilâkhai chu Ekron-a irthokin Gath dênin Israel mihai an pêk kêr nôka. Khaang khan Israel mihai khan an ram murdi chu an idong nôk tâk a ni. Israel mihai le Amor mihai chu irngeiin an om ta.

¹⁵Samuela dam sêng kêrka chu Israel mihai roi a rêl pehai ta.

¹⁶A kum tin Bethel le Gilgal le Mizpa hi a ihrosuak ngai a ni; kha hmunhai khan chu Israel mihai thubuai a irêl pehai ngai a ni.

¹⁷Kha hnung chu ama omna Rama khuaa khan a kêr nôk ngaia; kha hmuna khom khan Israelhai roi a rêl pehai sa a ni. Rama khua khan Rengpa ta hrangin maichâm a isiam a ni.

1 Samuela 8

Mipuihaiin rêng nei an nuam

¹Khanchu hiang hin a hong ni ta, Samuela kha a hong tar tena chu a nâipasalhai kha Israelhai laia roirêltu'n a siamhaia.



²A nâi ulian irhming chu Joela a nia; a nâipang ual chu Abija a ni; Beer-seba khuaa roirêltu an ni.

³Khannisianlân, anni khan an pa omdân zui loiin, sum le puan tiang an huatirhama, khasikin fâk inrûkhai an hmanga, dik loi takin roi an rêl ngaia.

⁴Khanchu Israelhai laia hruaitu murdi an irbûma, Rama khuaa Samuela kuang an fea;

⁵a kuang, “En ta, ni hong tar ok tâka, ni nâipasalhai lakin ni omdân kha zui thei mahaia, khasikin nam dang murdihai anga kin chung a roi ni rêl pe hrangin rêng ni siam pe ro,” an tia.

⁶Khannisianlân a kuang, “Roi ni rêl pe hrang rêng ni pe ro,” an iti thu khan Samuela chu lôm thei rak maka; khanchu Rengpa kuang a chongchaia,

⁷Rengpakhan Samuela kuang, “Mipuihaiin ni kuanga an iti hi irngai ro; nangma nang an indit loi ni maka, an chung a rêng chang hrangin keima hi an ni indit loi a ni.

⁸Aigupta ram ata ki hruai suakhai nî ata atûn tena an thil tho dân murdi, hnung ni songsana pathian dang sinhai an itho ngai ang dênin, ni chung a an itho a ni hi,

⁹khasikin an thu kha irngai ro. Khannisian irningna thu ngartak pehaiin lân, an chung a rêng roirêltu chang hrang dân fel takin insîr pehai ro,” a tia.

¹⁰Samuela khan Rengpa thu murdi kha rêng hong zongtu mipuihai kha an sîr pehai vinga.

¹¹“Nin chung a roirêltu hrang rêngin nangni a ilo hrang chu hiang hin ni a ti. Nin nâipasalhai kha sipaiin siamhai a ta; senkhat chu râlhai tâlia, senkhat chu sakor chung chuang mi, senkhat chu tâlihai matona intân hrangin hmang a ti.

¹²Senkhat chu sipai sângkhat hruaitu, sômringa hruaitua nangni phun a ta; senkhat chu ama loa irnêng pil tuk nin ta, a bu ât hrang le irdoina hmang hrang râltukfam siamtu hranghai, a tâlia hmangrua siam hrang leh khan nangni hmang a ti.



¹³Nin nâinupanghai kha ama hrangin mirimhoi siamtu, bu an suangtu le bai siamtuin hmanghai a ti.

¹⁴Ama'n nin loihai, nin grep irhuanhai, nin oliv bilhai, a sa u ualhai nangni lapai pe a ta, a mi lianhai pehai a ti.

¹⁵Nin bu le nin grep irhuana mi sôma inkhat nangni la pe a ta, a mi lianhai le hruaituhai pehai a ti.

¹⁶Nin suakhai le nin sâhai le nin sakuartunghai a sa u ual nangni la pe a ta, a sin thôna hrangin hmang a ti.

¹⁷Nin kêlbelra pâla mi sôma inkhat nangni la pe a ta, nangni zel kha a suak chang nin ti.

¹⁸Kha tena chu nin la inthang hrang rêng hrangin lan rung nin ta; khannisianlân, kha tika khan chu Rengpa'n nangni san ta no ni," a tia.

¹⁹Nikhomsianlân, mipuihaiin Samuela thu kha pom nuam mahaia, "Ni ma, rêng kin inei ngêt hrang a ni;

²⁰khan kêng nam danghai angin kin hong iom hrang; kin rêngin roi ni rêt pe a ta, kin râl doihai ni doipui a ta," an tia.

²¹Samuela khan mipuihai thuhiril kha ar ngaia, khanchu a fea, Rengpa an hril tâka.

²²Rengpa khan Samuela kuang, "An thu kha pomin lân, rêng phun pehai ro," a tia. Khanchu Samuela'n Israel mihai kuang khan, "Mi tin mâni kho sênga fe nôk ving ta roi," a tia.

1 Samuela 9

Saula le Samuela irtongna

¹Benjamina rama, Benjamina irchia mi inkhat, mi hrât mi huaisen inkhat hi a oma, ar hming chu Kisa a nia, kha mi kha Afia panama mi Bakoratha in sêngkuua Zerora nâi Abiela nâipa a ni.



²Ama hin nâipasal a neia, ar hming chu Saula a nia, ruatharte hmêl sa le vânglai tak a nia, Israel mihai laia khan ama nêka hmêl sa dang zel om mahaia.

³Saula pa Kisa sakuartung senkhat an irhmanga, khanchu Kisa khan a nâipa Saula kuang khan, “Thoiin lân, ni hnungzui laia mi inkhat hruaiin lân, sakuartunghai va zonghai ro,” a tia.

⁴Khanchu Efraima tâng ramhai kha a’rfanga, Salisa ram khom a’rfang saa, khannisian hmuhai maka; khanchu Saalim ram a’rfang nôka, kha hmun khom khan sakuartunghai kha om maka. Kha zoiin chu Benjamina mihai ram an irfang nôka, khannisianlân hmu ual mahai.

⁵Zufa ram an tungin chu Saula khan a hnungzuitu kuang khan, “Tho, in sâng tiang kîr nôk ta ei ti, khano’nchu ka pa’n sakuartunghai insâp ta loiin, eini kêng a ni insâp hrang tâk,” a tia.

⁶A hnungzuitu khan, “Irngai ro, hi khuaa hin Pathian mi a oma, mi mahripom tak a ni, a insîr murdi chu a hong itung indik ngai a ni. Tho kha khan fe ei ta, sakuartunghai omna a nin hril thei duai khom a ni thei,” a tia.

⁷Saula khan a zuitu kuang khan, “Fe ta ngân inlân, imo ei ichôi pe hrang? Ei phura ite bai lak nei ta mak mea, Pathian mi kha ite lômman chôi pe hrang lak nei mak mea, imo ei irhmu ta hrang o?” a tia.

⁸A zuitu khan Saula kuang, “Tangka sum tômte chu ki la nei; hi hi pe ki ta, sakuartunghai ei hmu theina hrang lam a nin hril duai khom a ni thei,” a tia.

⁹⁻¹¹Khante Saula khan a zuitu kuang khan, “A sa khate, tho fe ei ti,” a tia. Khanchu Pathian mi omna khua panna lam tung an hong lui laia khan, dôngmate tui chôi hranga zuanghai leh an irtonga, an kuang, “Hi hin hmutheitu mo a om?” tiin an irdona. (Matona khan chu Israelhai laia, mi’n Pathian chongpui an nuama hin chu, “Tho hmutheitu kuang fe ei ti,” an ti ngaia.

¹²⁻¹³Anni khan, “O, a om nin matona a lei fe chak a ni. Irhnot unglân la va phâk nin ti. Kho sâng nin hong lût le hmu zel nin ti, a vuan hin kho sâng a



zuang itung a ni. A vuan hin tâng chung a maichâma mihaiin irbôlna an inhlan a ni. Kha irbôlna kha bor pêktu hrang a lei ni sikin a tung mâka chu mipuihaiin khalâi an irhîl thei loi hrang a ni. Bor a pêk zoi tena kêng an ikoihai khan an la ifâk thei ngai a ni, khasikin nin fe lata niin chu tâng chung a bu nêk hrang a fe mân hong hmu zel nin ti,” an tia.

¹⁴Khanchu Saula le a zuitu kha kho sînga khan an fe tâka, khua an hong lûtin chu Samuela kha chubai mûkna hmun irsâng panin anni tianga hongin an hmua.

¹⁵Khan sîn khat mâna Rengpa'n Samuela kuang,

¹⁶“Nangtûk hi zoro lai taka hin Benjamina nam ata mi inkhat ni kuang hong tîr hrang ki ni, ki mi Israelhai chung a hruaitu ni hrangin sahriak lei pol ro. Ama khan Filistia mihai kut ata ki mihai inzôk a ti. Ki mihai tuangna kha ki hmu tâka, an khêk irhâi ki kuang a hong itung tâk a ni,” a tia.

¹⁷Khan, Samuela'n Saula a hmu'n chu, Rengpa'n a kuang, “En ro, hi mi chungchâng hi kêng nang ki ihril kha, ama hin kêng ki mihai chung a ircham nei a ti,” a tia.

¹⁸Khanchu Saula'n kul mikota khan Samuela kha a va pana, “Hmutheitupa in chu kho tiang mo a inih nin hril ro ba,” a tia.

¹⁹Khanchu Samuela'n Saula kha a sâma, “Keima hi Hmutheitu chu ki ni, ki maton tiang bozôl panin fe'n lân, a vuan hin ki kuang bu ni inêk hrang kêng, khan kêng nangtûk zîng nang ki infetir hrang, ni milunga om murdi khom nan hril ki ti.

²⁰Khanchu ni sakuartung sîn thum le'rh mang tâk kha ni kângindoitir ual no ro, an hmuhai nôk ta. Israelhai laia roiinpuina hi tuhai ta hrang mo a ini? Nangma le ni pa ina mi om murdihai ta hranga mo ni ma?,” a tia.

²¹Khanchu Saula'n a sâma, “Israel nam laia a chîn tak, Benjamina nama mi mo ni ma ung. Khanchu kin in sîng khom hi Benjamina nam laia a chîn tak mo ni ma. Itina mo hianga keima kuanga ni ihril hi?,” a tia.



²²Khanchu Samuela'n Saula le a sinthopuihai kha a hruaihaia, mikhual omna tentana khan a hruai lûthaia, mi an koia sômthumhai laia khan hmun roiinpui taka an toitira.

²³Khan Samuela'n bu erpu kuang khan, "Ni kuang a bingin hrê roh tia hme nang ki ipêk kha hong chôï ro," a tia.

²⁴Khanchu bu erpu khan a malpui le a chung a hmê kha a hong chôïa, Saula makunga khan a va siaa. Khan Samuela'n "En roh nangma ta hrang piala a bingin ki lei isia a ni! O ti'n lân fa ro, hi hi a zoro taka nang kin lei inkung pe a ni, mi khom ki lei fialhai ta," a tia.

²⁵Khanchu kha ni zela khan Saula chu Samuela hai leh khan bu khalâi hmunkhatin an otsuam tâka. Khanchu bozôl ata kho sêng an fea, Samuela chu Saula leh in chung a Saula zâlna an isiam pena khan an zâl tâka.

Samuela'n Saula roirêltu ni hranga sahriak nâl

²⁶Zînga kôl a hor sal tena chu Samuela'n Saula in chung a zâl kha a koia, "Thoiin lân nang tîr ta ki ti," a tia. Khanchu Saula kha a thoia, Samuela leh an ruaiin an suak ta.

²⁷Khan kho kôl an zu tung tena chu Samuela'n Saula kuang khan, "Sinthotu hi ki maton tiang infetirin lân, (ama kha a fe tâka) Khannisian nangma chu la ngîr viatin lân, Pathian ata thu suak kha nang lan hril bak hi rong," a tia.

1 Samuela 10

¹Khanchu Samuela'n sahriak bûr kha a lâka, Saula lu chung a khan a buaka, a tuma. Rengpa khan, "A mi Israelhai chung a hruaitu ni hranga sahriak nang a inâl mo ni ma?"

²A vuan ni ni fesan hnungin Benjamina ramria, Zelza hmun, Rakili thân kôla mi inhni hmu ni ti. Anni khan nangma kuang, sakuartung ni izonghai kha an hmu ta, irngai ro, ni pa khan sakuartung kha insâp ta maka, nangma kêng nang a insâp ual tâk, ki nâipa hi imo ki ilo ta hrang, a ti mai, ti thu nang hril an ti.



³Khanchu kha rengata fe maiin lân, Tabor-a seso thing ni va tung tena chu, kha khan mi inthum Bethel-a Pathian kuanga fe hranghai leh irtong nin ta, inkhatin kêlte inthum pom a ta, inkhatin bai tiam inthum chôï a ta, inkhatin savun koka uain chôï a ti.

⁴Anni khan chubai nang mûk an ta, bai tiam hni nang pe an ta, kha bai kha la ro.

⁵Kha hnung chu Filistia sipaihai omna Pathian tâng va tung ni ta, hiang hin hong ni a ti, kha khua lûtnaa khan, deipuhai perkhuang, khuangte, theihle le serânda chôïa bozôl ata zuanghai irtongpuihai ni ta, khêkpuma lâmin om an ti.

⁶Khanchu Rengpa irtha ni chung a zuang chum a ta, nang khom an thuhriina khan kop sa ni ta, nang khom mi dang chang ta ni ti.

⁷Hi thilhai hi a hong tung tena chu Pathianin nang a ihruai lam takin tho ro.

⁸Khanchu ki fe mân hin Gilgal-a lei zu fe'n lân, keima khom pum hâlivôm thilinhlan le irngeina irbôlnahai inhlan hrangin nangma kuang zuang ki ta; ki zuanga, ni itho hrang dân nang ki zuang hril mân sîn sari ni lei iom hrang a ni," a tia.

⁹Khanchu khang khan a hong ni tâka, Saula'n Samuela kha teipui hrangin hnung a songsan tena chu Pathianin lungrîl danglamna a pêk tâka; kha ni khan Samuela'n a kuanga a ihrilhai kha a tung irkip ving tâka.

¹⁰Khanchu tâng kha an hong tung tena chu, deipuhai khan an irtongpuia, Rengpa irtha a zuang chum pea, an thuhriina khan a kop sa tâka.

¹¹Khanchu hiang hi a hong nia, matona ama lei inhriatpuihai deipuhai thuhriina hmuna khan a kop sa tâk, ti an inhriatin an hrila, "Kisa nâipa chung a thil zuang tung hi imo a ini tâk? Saula khom hi deipuhai laia a ikop sa tâk ma ni?" an tia.

¹² Khanchu a omna khuaa mi inkhatin a dona, "An pa chu tu mo a ini ual?," a tia. Khasikin, "Saula khom deipu a ini tâk ma ni?" ti chu tufiam thôna takin an hmang tâka.



¹³Khan an thuhirilna a kop zoiin chu bôzôl chu a tung tâka.

¹⁴Khan Saula pa urêngpa'n ama le a sinthopuitu kuang khan, "Khôn mo nin ife?," a tia. Ama'n, "Sakuartung kin izong kêng, kin hmu no tena chu Samuela kuang kin ife a ni," a tia.

¹⁵Khan, Saula pa urêngpa khan, "Samuela'n ni kuang imo a ihril, nin hril ro," a tia.

¹⁶Saula pa urêngpa kuang khan, "Sakuartunghai kha an hmu tah ti thu an nin hril," a tia. Khannisianlân rêng hong chang hrang chungchâng thu Samuela'n a ihril chu hril mah.

Saula rêng ni hranga inpuang

¹⁷Khan, Samuela'n mipuihai chu Mizpa-a Rengpa kuang a koi bûmhaia, Israel irchihai kuang,

¹⁸"Rengpa Israelhai Pathianin hiang hin a iti a ni, 'Israelhai chu Aigupta rengata ki hruai suakhaia, Aigupta mihai kut ata le nangni hmusittu ram murdihai ata nangni ki sansuaka.

¹⁹Khannisian a vuan nin milung inzîngnahai le nin dengtheinahai ata nangni inzôkpu nin Pathian kha indit mak chêia, a kuang rêng ni siam pe roh nin tia,' tiin. Khasikin, atûn ar chi le a panamin Rengpamakunga hong inlang roi," a tia.

²⁰Khanchu Samuela'n Israel irchi murdihai chu an langtira, khan Benjamina irchi chu inthangin an om tâka.

²¹Khan Samuela'n Benjamina irchihai chu a in sêngkua tam dôrin an langtirhaia, Matria in sêng mihai kha inthangin an om tâka. Khanchu Kisa nâipa Saula kha inthang a ni tâka, ama an zonga, khannisian hmu mahai.

²²Khanchu Rengpa kha a'rdon nôka, "Mi dang a la iom mo?" an tia. KhanRengpa'n a sâma, "Irngai roi, neinunhai kêra son ar bîk," a tia.

²³Khanchu an van tâna, an va hruai suaka, khanchu mipui laia a ngîr suaka ni'n chu mi danghai nêkin a sei uala.



²⁴Khanchu Samuela'n mipuihai kuang, "Rengpa'n mi a inkung hi nin hmu mo? eini lai ata ama ang hi tûte om mak me," a tia. Khanchu mipui an khêka, "Reng hi hring insôt ri se," an tia.

²⁵Khanchu Samuela'n mipuihai chu rêng om dân hranghai a hrihai a hrihaia, lekhabua a'rziaka, hmun irthianga a siapai tâka. Khanchu Samuela'n mipuihai chu an mâni in sêng tiang an kîrtirhai nôk tâka.

²⁶Khan Saula khom kha Gibe khuaa a in tiang a fea; khan mi hrât senkhat, Pathianin an lungrîl a itôn pehai khom kha an fe saa.

²⁷Khannisianlân, Beliala nâi senkhathaiin chu "Hi pa hin itin mo a ni isansuak thei hrang?" an tia. Khanchu an hmusita, lômman ite pe nuam mahaia, khannisian ama chu ite ti loiin a dâihreka.

1 Samuela 11

Saula'n Amon mihai an hnêna thu

¹Khan, tha khat a'rzoiin chu, Amon rêng Nahasa chu Gilead rama Jebes khopui doi hrangin a sipaihai a hruaihaia. An inhnê tâka. Jebes khuaa mihaiin Nahasa kuang, "Kin kuang thu inkungin lân, khan kêng kin roirêltu hrangin nang kin ipom hrang," an tia.

²Nahasa khan hiang hin a sâma, "Hiang hin nin kuang thu inkung ki ti: Nin chang tianga mitru murdi kêlsua ki ta, kha kha Israelhai irhming siatna ni a ti," a tia.

³Khanchu Jebes khuaa hruaituhaiin, "Israel ram murdia mi kin tîr theina hrangin sîn sari ni la nghâk phot ro, kha tena khom a ni saninzôk hrang mi tûte an om noa ni'n chu, nangma kuang irpe zel ta kin ti," an tia.

⁴Khanchu mi an itîrhai khan, Saula omna Gebe kha an va tunga, mipui inhriatin kha thu kha an hrila; mipui vântânghai chu inring takin an chap tâka.

⁵Khan Saula chu loi rengata sechalhai leh an hong tung chak a nia, Saula khan, "Itho sika mo hianga mipuihai hi an ichap?" a tia. Khanchu Jebes khua mihai thuhriil kha an inhrila.



⁶Kha thurchihai kha an hriat infel tena chu, Saula chung a khan Pathian irtha a satêrengin a zuang chuma, a ning a sate'n an mur pe tâka.

⁷Khanchu sehrât bop khat a thata, a hme ar chan chita, Israel ram hmun tina a sem suak vinga; “Mi tukhom Saula le Samuela irdoina zui nuam loitu kai chu an sehrâtchal hiang hin iloh ni a ti,” tiin. Khanchu mipuihai chung a Rengpa ichiomzia a tunga, lungirrual takin an irthok suak thei tâka.

⁸Khanchu Saula'n Bezek hmuna khan a bukkhômhaia, Israel mi chu nuai thum an nia, Juda mi chu sîngthum an ni.

⁹Jebes rengata palai an itîrhai kuang khan, “Nin mipuihai kha hrilhai unglân, nangtûk misa a lum lai takin sansuak nih nin ti, va ti roi,” an tia. Khanchu Jebes mihaiin kha thu kha an inhriatin chu a sân an rai a fân pehai tâka.

¹⁰Khanchu Nahasa kuang, “Nangtûk nin kuang irpe kin ta, nin nuam takin ni lo ta roi,” an tia.

¹¹Khanchu zîng nôka chu a mihai kha pâl thumin a zêkhaia, thingchangvârro vêla hin an irdoipuihai riakbuka an va lût khumhaia, Amon mihai chu sîn misa lum dên rakin an thathaia; an ithat selhai chu an indarh chita, a bopa om rêng irhmu ta mahaia.

¹²Khanchu Israel mihaiin Samuela kuang, “Tuhai mo an ini, Saula hin ei chung a thu a inei hrang ma ni? tituhai kha? kha mihai kha hong hruai suakhai unglân, lei thatpaihai kin ti,” an tia.

¹³Khannisianlân, Samuela'n, “A vuan sîn lele hin chu tûte that ni no ri sehai, Rengpa'n Israel a saninzôk ni sîn a ni sikin,” a tia.

¹⁴Khanchu Samuela'n mipuihai kuang, “Tho Gilgal-a fe ei ti, khatak ata ram hi inding thar nôk tah ei ti,” a tia.

¹⁵Kha tena chu mipui murdi Gilgal panin an fe tâka, Saula chu Rengpa makunga an rêng an inchangtir tâka. Khataka khan Rengpa makunga irngeina thilinhlanhai an pêka; khanchu kha hmuna khan Saula le Israel mi murdihaiin lômna an siam ta.



1 Samuela 12

Mipuihai laia Samuela thuhri

¹Khan Samuela'n Israel mipuihai kuang, "Irngai hi roi, keima kuanga tho hranga nin inkung chu ki tho zoi tâka, nin laia roirêl hrangin rêng khom nangni kin thang pe tâka.

²Atûn chu nangni hruai hrang khom nin nei tâka, kei lak ki tarin ki samhai khom a chuak ta, nâi pâl khom nin laia hin ki neihaia, ruatharte ki ni lai ata atûn ten hin nangni ki lei ir-ôi mai tâka.

³Tho'nchâi ki lei nei duai khomin, hi hmuna hin ki om Rengpa makunga le a inthang rêng makunga hin ni sêl roi, mi sial mani, mi sakuartung mani ki lei lâk ngai khomin, mi huangin mani, dengintheitirin mani ki om ngai mo? Ki mit inchotir hrangin tu kuanga mo fâkinrûk ki itho? mihai kuang ata minlak ki thôna a omin chu a rêngin tuam nôk ving ki ti," a tia.

⁴Khan mipuihaiin, "Ni huang mak che, deng khom nin thei mak che, tûte kuang ata khom ite la ngai mak che," tiin an sâma.

⁵Khan Samuela'n, "Rengpa le a inthang rêng hi a vuan hin ite ki tho'nchâina nei ma ung ti nin mithmua an hriatpuitu chu an ni," a tia. Khanchu anni'n, "A ni,Rengpa chu an hriattu chu a ni," an tia.

⁶Samuela'n mipuihai kuang, "Mosia le Arona inthangtu le Aigupta ram ata nin irchibulhai hruaisuaktu chu Rengpa a ni.

⁷Khasikin Rengpa makunga atûn ngîr unglân, Rengpa'n nin chung a le nin irchibulhai chung a thil a lei itho infel dang nangni sût pui hi rong.

⁸Aigupta rama Jakoba le a in mihai an fe lai khan, Aigupta mihaiin deng an intheihaia; nin irchibulhaiin Rengpa chu an koia, ama'n, Mosia le Arona tîrin Aigupta ram ata an hruai suaktirhaia, hi ram hi omna hrangin a pêkhaia.

⁹Khannisianlân Rengpa an Pathian kha an irnghila, khasikin Hazor rêng Jabina, a sipai hruaitu Sisera le Filistian mihai le Moab rêng hai chu an doitirhaia, nin irchibulhai chu an kuta a pêkhai tâka.



- ¹⁰ Khanchu Rengpa kha an koia, ‘Rengpa chu kin irheisana, Baal hai, Astarot hai kin lei biak tâk sikin kin lei itho’nsual tâk a ni; khannisian kin râlhai kut ata hi chu ni sansuak ro, nangma vai nang bê ta kin ti,’ an tia.
- ¹¹ Khan Rengpa’n Jerubaala hai, Bendana hai, Jeptha hai le keima a hnungkhôn taka a ni zuang tîra. Kin rêngin nin râlhai ata kha nangni kin saninzôka, lungirngam takin nin om tâka.
- ¹² Khannisianlân, Amon mihai rêng Nahasa chu nangni doi hrangin a hong ti nin inhriat tena chu Rengpa chu nin rêng lei ni khom sian nin hnôla, keima kuang, ‘Roi ni rêl pe hrangin rêng kin innang,’ nin tia.
- ¹³ Khasikin nin rêng inthang le nin izong chu en roi, Rengpa’n chu rêng nangni a isiam pe tâk a ni hi.
- ¹⁴ Rengpa chu nin chia, a sin nin thoa, a hê nin irngaia, Rengpa thupêk nin pêtsan noa ni’n chu, nangni le nin chung a roirêltuhai le Rengpa nin Pathian zuituhai nin ni’n chu, sa a ti.
- ¹⁵ Khannisianlân Rengpa he irngai loa, Rengpa thupêk nin pêtsana ni’n chu nin irchibulhaiin Rengpa kuttum an ituang angin nangni khomin tuang nin ti.
- ¹⁶ Khasikin nin omna hmun senga khan ngîr unglân, Rengpa’n nin mithmua thil roiinpui tak a itho hrang hi en chian roi.
- ¹⁷ Bu ât zoroa om mo ni mak me? khannisianlân, Rengpa kha koi ki ta, ama’n rotui le khonri inthôtir a ti. Kha tena chu rêng nin izong chungchânga hin Rengpamithmua thil nin lei itho inchâi hmu’nfelin inhre ta nin ti,” a tia.
- ¹⁸ Khanchu Samuela’n Rengpa a koia, Rengpa’n kha ni khan rotui le khonri an thôtir tâka; kha tena chu mipuihaiin Rengpa le Samuela kha a sân an chi tâka.
- ¹⁹ Khanchu mipui murdi’n Samuela kuang khan, “Kin thi loina hrangin Rengpa ni Pathian kuang ni sinthotuhai ta hrang hin ni chongchai pe ro, hi thil saloi tak, rêng kin lei izong hi, kin sinsual danghai nêka kin insualna tak chu a ni,” an tia.



²⁰Khan Samuela'n mipuihai kuang, "Chi no roi, hi thil saloi hi a tho chu nin lei tho tâka, khannisianlân Rengpa nin izui hi pêt-san ual no unglân, nin milung murdi'n Rengpa sin chu tho mai roi.

²¹Ite irfêna boi le nangni sansuak thei loi hrang chu zuiin pêt-san ual no roi, khahai kha ite hmang hmunboi a ni.

²²A chonginkung dettak sika hin Rengpa'n a mihai chu masan no nia, a mi ni hrangin nangni a len sâp tâk sika hin.

²³Kha vai kha ni loiin nin ta hranga chongchai hi mongin, Rengpa chung a hin insual ual no ning, hi nêka lampui sa dik nangni irhmu ual ki ti.

²⁴Rengpa chu chi phot unglân, nin milung murdi'n ama sintho unglân, nin laia a sintho roiinpuihai le nin milung sênga vong mai roi.

²⁵Khannisianlân sual sin nin la tho maia ni'n chu, nangni le nin rênghai khom la'rh mang ving nin ti," a tia.

1 Samuela 13

Filistia mihai leh irdoina

¹Saula chu kum sômthum mi a ni'n a hong inlala, Israelhai chung a kum hni an lala.

²Saula khan Israelhai laia mi sângthum an thangkaia; sângnihai kha Mikmas-a le Bethel tânga ama kuang an oma, sângkhat kha Benjamina rama Gibe khuaa Jonathana kuang an oma. A danghai chu an in omna chita an fea.

³Jonathana khan Gibe khuaa Filistia sipaihai kha a doi inhnêa, Filistia mihaiin an len hriata. Kha hnung chu Saula khan Hebrai mi murdi irdoina koi hrangin mi a târa, an ram pumpuia khan bekul an tuma.

⁴Israelhai murdi khan Saula kha Filistia sipaihai a doi ti le Israel mihai chu Filistia mihaiin ngam takin an ngam ti thu an len hriat tâka. Khanchu mipuihai kha Saula kuang Gilgal-a an irbukkhôm ving tâka.

⁵Filistia mihai kha Israelhai doi hrangin an irbukkhôm zoi tâka; tâli sângthum, sakor chung chuang mi sângruk, sipaihai chu tuikhanglian kôla



chiai tamtak an nia. Anni chu Bethaven nisua tiang panga Mikmas-a khan an fea, omhmun an khuara.

⁶Kha hnung chu anni khan ichiom tak zelin an hong doihaia, Israelhai chu an hong hmosonghaia. Israel mi senkhathai chu rôl kêra hai, khur sũaga hai, lungpui kêra hai, tuisunsua haia an irbêka;

⁷senkhathai chu Jordan râla Gad le Gilead ram tianghai lâizâm an thoa. Saula chu Gilgal-a a la om maia, a kuanga om mipuihai kha irlo'nthing natin an chia.

⁸Samuela'n he a ibehai ang takin sũa sari Samuela kha an nghêka, khannisianlân Samuela kha Gilgal-a khan la zuang maka. Mipuihaiin Saula kha an mâksan thiai tâka.

⁹Khanchu Saula khan, "Hâlrivôm thilinhlan hrang le irngeina thilinhlan hranghai kha keima kuang hong chôi roi," a tia. Khanchu hâlrivôm thil kha an inhlana.

¹⁰Hâlrivôm thil an hlan zoiin chu Samuela kha a zuang tung tâka. Saula kha chubai va mûka lei va don hrangin a hong suaka.

¹¹Khannisian Samuela'n, "Imo ni lei itho tâk na?" a tia. Saula khan, "Mipuihaiin an ni mâksan thiaia, nangma lak ni sũa inkung sũaga zuang suak mak chea; khabana Filistia mihai khom Mikmas-a an irchun ving tâk ti kin hriata.

¹²Khasikin, Filistia mihaiin Gilgal-a hin an ni zuang idoi hrang a ni tâka. Rengpa lungkhamna la zong ma unga, ki tia. Khasikin hâlrivôm thilinhlan chu inhlan loi thei loi ki ni," a tia.

¹³Samuela'n Saula kuang khan, "Ni sintho hi into sintho dân a nia, Rengpa ni Pathianin thu nang a ipêk kha ni izôm loi a ni. Ni izôm ni sianlân chu Rengpa khan Israelhai chungga nin lalna hi kumtuangin a indet hrang a ni.



¹⁴ Khannisian atûn chu nin lalna hi hek hrang a ni ta. Rengpa thupêk ni zôm no sikin, Rengpa khan ama lungrîl irput mi zong a ta, a mihai chung a hruaitu hrangin a isiam hrang a ni,” a tia.

¹⁵Samuela chu a thoia, Gilgal ata kha a rot tâka. Mipuihaiin Saula chu a sipaihai inthêm hranga a fe kha an zuia. Gilgal ata kha Benjamina rama Gibe khuaa khan an hong fe tâka. Saula khan mipui a zuituhai kha a tephaia, irzaruk vêl an ni.

¹⁶Saula le a nâipa Jonathana le an kôla mi omhai kha Benjamina rama Gibe khua khan an oma; khannisianlân Filistia mihai khan Mikmas-a khan omhmun an khuara.

¹⁷Khante an râl doi pâlhai kha Filistia mihai omhmun ata kha pâl thumin an hong suaka, pâl khathai khan Sual rama Ofra tianga panin an fea;

¹⁸pâl khathai khan Beth Horon tiang panin an fea; pâl dang nôk khan, Zeboim phâi dep le ramchâr tianga panin an fea.

¹⁹Israelhai ram pumpuia khan thîrsu tûte om mahaia; Filistia mihai khan, “Hebrai mihai hin khandaiin mani, ufeiin mani, an irsiam duaiin chu,” an iti a ni.

²⁰Israel mihaiin kodâl, tutho, hreipui le kôite, lêngkol thîrhai a môl le incher inngaihna hrangin Filistia mihai kuang an zu ife ngai a ni.

²¹Kha an lêngkol thîr le kodâl incher inngaina man chu Sekel hmun thuma semin hmun hni a nia, hreipui le tutho incher na man chu sekel hmun thuma semin hmun khat a ni.

²²Khang khan an irdoi nê khan Saula le Jonathana ti no chu Israel sipaihaiin tûte’n khandai le ufei nei mahaia.

²³Filistia-hai khan sipai pâl Mikmas panna lama khan len ruang hrangin an tîrhai tâka.

1 Samuela 14

Jonathana huaisenzia



¹Sûn khat chu Saula nâipa Jonathana khan râltukfam chôitu ruathartepa kuanga khan, “Tho so varâl tianga Filistia mihai riakbuka son la va fe rei,” a tia. Khannisian Jonathana’n a pa chu inhril maka,

²Saula khan Gibeia kho kôl Migron-a theipui kung hnuaia a oma; a kuang mi irzaruk vêl an oma.

³Khante, Silo khuaaRengpa ochai Elia nâipa Finehasa nâi Ikaboda sangpa Ahituba nâipa Ahia kha ochai songkol inngâkin a oma. Jonathana a fe ti kha mipuihai khan inhre mahaia.

⁴Jonathana’n Filistia mihai riakbuk fena hranga rotna hrang Mikmas fena tiang khan hi tiang hi tianga lungpui irdo hi a oma; inkhat irhming chu Bozez a nia, inhnina chu Senea a ni.

⁵Lung irdo inkhat kha chu hmâr tianga om a nia, Mikmas tiang a’rheia, a dang inkhat kha chu sim tianga om a nia, Geba tianga irhei a ni.

⁶Jonathana khan a râltukfam chôitu ruathartepa kuang khan, “Tho sertan loi Filistia sipaihai omna son la va fe rei. Rengpa’n a ni san duai khom a ni thei; a ni sanin chu ei tôm khoma ei tam khoma a saninzôka om Rengpa ta hrangin ite tho thei loi om ma,” a tia.

⁷Ruathartepa khan, “Ni lungrîla hong om tak ang khan tho ro, nangma lungrîl ang kha keima khom a ni,” a tia.

⁸Jonathana khan, “A sa, an kuang va fe ei ta, Filistia-hai son ni lei hmu ri sehai.

⁹Khanchu ei kuang, ‘Nin laia kin zuang tung mâka chu lei om roi,’ an ni ti’n chu ei omna hmuna lei om chian ei ta,

¹⁰khannisianlân keini tiang hong roi, an ti’n chu fe ei ti, kha kha Rengpa’n ei kuta a ni ipêk hrang a nih ti irsinsiana ni a ti,” a tia.

¹¹Khanchu an ruaiin Filistia mi râl entuhai mithmu hranga khan an var langa; Filistia-hai khan, “En roi Hebrai mihai an irbîkna khur sùng ata an hong suak ta,” an tia.



¹²Kha hnung chu Jonathana le a râtukfam chôitu ruathartepa kha an koia, “Hong roi, thil nangni kin ihril hrang a om,” an tia. Jonathana khan a râtukfam chôitu ruathartepa kuang khan, “Ni zui ro; Rengpa khan annihai so Israelhai kuta a ipêk tâk a ni,” a tia.

¹³Khanchu Jonathana kha a kut le a ke hmangin a luia, a râtukfam chôitu khan a zuia. Jonathana khan, Filistia-hai chu a doia, an intâl rum tâka, râtukfam chôitu khom khan a hong thathai thiaia.

¹⁴Khaang khan Jonathana le râtukfam chôitu ruathartepa le an that maton taka an kê irhla lam chu nôl dung tuan khat sũa zel khan mi sômhni vêl an ithathai a ni.

¹⁵Filistia mi murdi tâng rama omhai khom an irlo a len thing sêpa; râl hrungtuhai le riakbuka omhai khom a satêrenga irlo inthinga ichiin an oma, irnêng inhnînga, chardong irkhêl tak an ituang a ni ta.

Filistia mihai inhnêna

¹⁶Khan, Benjamina ram Gibeia khuua Saula râl hrungtuhaiin an hong thîrhaia. Filistia-hai chaninvâia intânhai kha an hmuhaia.

¹⁷Khanchu Saula khan a kôla mipui omhai laia khan, “Atûn hin irtep unglân tu mo a om loi infel roi,” a tia. An hong irtepin chu Jonathana le a râtukfam chôitu kha om mahai ti an inhriat suaka.

¹⁸Saula khan ochai Abija kuang khan, “Ochai songkol kha hong chôi ro,” a tia. Hi nî hin Abija’n Israelhai makunga a hong ichôi a ni.

¹⁹Saula khan ochai le an chong lai takin Filistia mihai riakbuk tianga buaina kha ar sâng ual ual sikin, khanchu Saula khan ochai kuang khan, “Pathian chongpui zoro om thei ta ma,” a tia.

²⁰Kha hnung chu Saula le a kôla mipui omhai murdi kha an irbûma, Filistia mihai buaia lungzîng taka an binga irdoi, khandai irthathai doi hrangin irdoina bual panin an suak tâka.



²¹Filistia mihai thopa anni laia an riakbuka lei fe tâk, Hebrai mi senkhathai khom kha Saula le Jonathana kuanga om Israel mihai tiang an hong kop nôka.

²²Khaang dênin Efraima tâng rama Israel mi irbîk murdihai khom khan Filistia mihai lâizâm an tho ti an len hriata, anni khom irdoina kop sain Filistia-hai an le'rzûlhaia.

²³Bethaven khêl rakin an doihaia, khaang khan Rengpa'n Israelhai a saninzôk a ni.

An irdoi zoi le thil tung thar

²⁴Kha ni sîn khan chu Israel mihai chu châmsôl an irveia a sîn an irzala. Saula khan, “Ki râlhai chung a phuba ki lâk mâka mi tukhom a vuan hin fâk zongtu chu vânnisalin om ri se,” itia khomâk irsâmin mipuihai thu ngar tak a pêkhai sikin. Mi tûte khom kha ni sîn chu ite fâk reng zong viat mahaia.

²⁵Mipuihai khan ram hnuai an va tunga, khuaihlutui a lei oma.

²⁶Ram hnuai kha khuaihlutuiin a sipa, khannisian tûte'n irtem viat mahai; mipuihai khan Saula khomâksâmna kha an ichi a ni.

²⁷Khannisianlân Jonathana khan a pa Saula'n mipuihai kha khomâk irsâmin a lei insîhai kha inhre maka; a khianghrol chôi leh khan khuaihâr kha a suna, a fâk tâka. Voikhat fâk zelin a hong har hupa.

²⁸Khanchu mipui laia mi inkhatin a kuang khan, “Châmsôl irveiin kin isôl ok chu a ni ta, khannisianlân ni pa'n mipuihai hi, ‘a vuana fâk zongpu tak chu vânnisalin om ri se,’ tiin thu ngar tak a ni ipêk a ni,” an tia.

²⁹Jonathana khan, “Ka pa hin kin mihai lungzîng a isakhai a ni hi te na! En ro, khuaihlutui a chînte ki hong in khoma ki hong ihar ok a nia!

³⁰Mipuihai hin an râlâk thil an ihmu dôr a vuan hin an inuam dôr fahai sian chu Filistia mihai hi, hi nêk hin an la ithat intamhai hrang a ni,” a tia.

³¹Hi ni sîn hin Israel mihaiin Filistia-hai an inhnêa, Mikmas-a irthokin Aijalon dênin Filistia-hai an doia, Israel mihai chu châmsôl irveiin an sôl ok tâka.



³²Khanchu mipuihai khan an rállâk thilhai kha irchu zelin an irchua, kêlbelra hai, sechal hai, sehrâtte hai an chelhaia, kha zela khan an thathaia, a hme thisen kop pumin an fâka.

³³ Khanchu, “Irngai ro, mipuihai khan, thisen kop puma fâkinRengpa chungga thil an tho insual tâk,” tiin Saula kha an hrila. Saula khan, “Vârirlet takin thil nin thoa, atûn hin lung lianpa ki maton tiang hin zuan hlum roi,” a tia.

³⁴Khanchu Saula ngêtin, “Mipui laia fe unglân, an kuang, ‘Mi tinin mâni sehrât le kêlbelra fa ri se, a thisen kop pumin Rengpa chungga thil an itho insual hrang ni mah’ ti roi,” a tia. Kha nî khan chu an sehrâthai an hong kaia, an that tâka.

³⁵Saula khan, Rengpa hrang maichâm a siama, hi hi Rengpa hranga maichâm siam masa tak a ni.

³⁶Saula khan, a mihai kuang, “Zâna Filistia-hai zu rûnhai ei ta, zîng khovâr dênin inmokhai ei ti, thatpaihai ving ei ti,” a tia. Khanchu anni khan, “A sa ni ti lam takin tho ro,” an tia. Khannisianlân ochaiin, “Pathian chongpui bak hi rei,” a tia.

³⁷Khanchu Saula khan Pathian a chongpuia, “Filistia-hai kha zu doihai ning mo? Nin hnêtirin mo?” a tia. Khannisianlân hi nî hin Pathianin sâm maka.

³⁸Khanchu Saula khan, mipui hruaituhai laia, “Hin hong unglân, a vuan hin i thil mo ei itho insual zongsuak ei ti.

³⁹Israelhai saninzôk ngaitu Rengpa hringna hmangin khomâk ki’rsâm, thil sual thotu chu a ithi ngêt hrang a ni, ki nâi Jonathana khom ni sianlân,” a tia. Khannisianlân tûte’n ite hril viat mahaia.

⁴⁰Kha hnung chu Saula khan an kuang, “Nangni chu a bingin om unglân, keima le ki nâipa Jonathana, a bingin om kin ti,” a tia. Mipuihai khan, Saula kuang, “A sa ni ti lam takin tho ro,” an tia.

⁴¹ Khanchu Saula khan Rengpa Israelhai Pathian kuang khan, “Rengpa a vuan hin itho mo ite ni ni isâm ta loi? Rengpa Israelhai Pathian hin ni sâm ro. Thil tho’nsualtu chu keima mo ki ini, Jonathana mo a ini Urim hmuna hin ni sâm



ro,” a tia. Kha sâмна kha Jonathana le Saula chungа khan a chum tâka; mipuihai chu an irthianga.

⁴²Khanchu Saula khan, “Keima le ki nâipa Jonathana kâra infel ni ri se,” a tia. Khanchu Jonathana chungа khan a chum tâka.

⁴³Kha zoiin chu Saula khan Jonathana kuang, “I zât ual mo ni itho, insîr ro,” a tia. Jonathana’n, “Ki khianghrol hmor leh a chînte khuaihlutui ki irtem a ni: hin ki om, thi hrang khom ki irhuam a ni,” a tia.

⁴⁴Saula’n a kuang, “Nang a that noa ni’n chu Pathianin nang a ilo lam takin nang lo ri se, kha nêka intak ual khomin,” a tia.

⁴⁵Khannisian mipuihaiin Saula kuang khan, “Israelhai laia hin saninzôkna roiinpui tak thosuaktu Jonathana chu a ithi hrang ma ni? Ni thei no ni. Rengpairhming sâmin kin ihril a ni, a sam irmal khat khom irnênga hin chil viat no ni; a vuan hin Pathianin a ichangpui a ni,” an tia. Khaang khan mipuihaiin Jonathana chu thi loiin an inzôk a ni.

⁴⁶Kha zoiin chu Saula’n Filistia mihai a irzûl kha a’rngama, a kîr tâka; Filistia-hai chu an omhmun panin an fe nôk ta.

Saula inlalna le a insûngkua

⁴⁷Saula kha Israelhai chungа rêng a chang hnunga hin, hmun tina a râlhai, Moab-hai, Amon-hai, Edom mihai, Zoba rênghai, Filistia mihai kha a doia. A ithôna tiang ang khan an hnêhai thiaia.

⁴⁸Hâitakin a doihaia, Amalek mihai khom an hnehaia, Israelhai chu a doituhai kut chung ata a isansuakhai a ni.

⁴⁹Saula nâipasalhai chu, Jonathana, Isvia le Malkisua hai an ni. A nâinupang ulian ualnu chu Merabi a nia, nâipang ualnu chu Mikali a ni.

⁵⁰Saula dôngma chu Ahinoami a ni, Ahimaaza nâinu a ni. A sipai ulian tak chu Abnera a ni, Saula pa nâipang Nera nâipa a ni.

⁵¹Saula pa Kisa le Abnera pa Nera kha Abiela nâipahai an ni.



⁵²Saula dam sâng kârka chu Filistia mihai leh a satêrengin an irdoi mai ngaia, khasika khan Saula'n mi hrât le mi hâi a ihmu murdi chu, ama sipai hrangin a ilâklût ngai a ni.

1 Samuela 15

Amalek-hai leh irdoina

¹ Samuela'n Saula kuang, "Rengpa'n a mi Israelhai rêng hranga sahriak irthûtir hranga a itîr kha ki ni. Atûn hin, Rengpa thu'nsîr kha irngai ro.

² Itinrêng sinthei Pathian khan, Amalek mihaiin Israelhai chung a an thil tho, Aigupta ram ata an hong suak laia an lei idoihai dân kha ki inhriat mai a ni.

³ Amalek-hai doi hrangin fe'n lân, an thil nei murdi hôi viat loiin thathai ving ro, nupang pasal, nâi irhnu nêk laihei, sechalhai, kêlbelrahai, saringseihai, sakuartunghai; a iti a ni," a tia.

⁴ Khaang khan Saula'n mipuihai kha a bukkhômhaia, Telem khuaa a tephaia, Israel ata irthokin sipai nuai hni le Juda ata sipai sîngkhat an nia.

⁵ Khanchu Saula kha a mihai leh Amalek-hai khuaa khan a fea, ivadung kôl phâizôla an irsanga.

⁶ Saula'n Ken mihai kuang khan, "Suak unglân, Amalek-hai lai ata hi irthîn roi, khano'nchu nangni ki that irnghil duai khom a ni thei; nangni'n chu Israel irchi murdihai Aigupta rama irthoka an hong suak lai khan lung nin len khamhaia," a tia. Khanchu Ken mihai kha Amalek mihai rengata an le'rkhai tâka.

⁷ Saula khan Amalek mihai kha Havila irthokin Aigupta nisua dep tianga Sur dênin a doihaia.

⁸ Amalek mihai rêng Agaga kha a hringin an chela, mipuihai chu a thathai ta.

⁹ Khannisianlân Saula le a mihaiin Agaga kha an inzôka kêlbelra satak takhai le sehrâtchal satakhai le, kêlbelrate a sa murdihai khom that mahaia, a sa ok loi an inpâm loihei chu an thatpai vinga.

Saula hnôlna



¹⁰Rengpa thu chu Samuela kuang a zuang tunga,

¹¹“Saula rêng ki lei inchang hi chu ki irsîr a ni; hnung a ni songsana, ki thupêkhai zôm maka,” a tia. Samuela chu a ning an mur pea, zân khovârin Rengpa an sama.

¹²Zînga chu Samuela’n Saula irtongpui hrangin a fea, “Saula chu Karmel khuua a fea, ama inhriat maina hrang lung a phuna, kha hnung chu Gilgal-a a fe ta,” tiin Samuela kha an hrila.

¹³Samuela chu Saula kuang a fea, Saula khan a kuang, “Rengpa’n sat nang vur ri se; Rengpa thupêk angin ki itho tâk a ni,” a tia.

¹⁴Khanchu Samuela’n, “A ni no’n te, sial le kêlbelra inhrâm ki inhriat hi imo a omzia?” a tia.

¹⁵Saula khan, “Ki mihaiin Amalek-hai ta an hong ilâk pehai a ni. Rengpa ni Pathian kuang irbôlna hranga mipuihaiin kêlbelra satak takhai le sehrâtchal sahai an ihôi a ni; a dang chu kin ithathai zit a ni,” a tia.

¹⁶Samuela khan Saula kuang, “Dâihrek ro, zânina Rengpa’n ki kuanga a thu irsîr, nan hril ki ti,” a tia. Saula khan a kuang, “Nin sîr pe ro,” a tia.

¹⁷Samuela’n, “Nangma insâpin mi chînte angin irbe khomin lân, Israel nam pumpui hruaitu kêng ni ini, Rengpa’n Israelhai rêng ni hranga sahriak nang a irthutir a ni.

¹⁸Ama’n nang a tîr suaka, ‘Fe’n lân, Amalek mihai a lei siat tâkhai kha thatpaiin lân, an irhmang zoi mâka chu doihai mai ro,’ nang a tia.

¹⁹Khan, itho sika Rengpa thu kha zôm loiin, râlâk thilhai kha inbo zela ni inbo, Rengpamithmua thil saloi ni tho tâka?” a tia.

²⁰Saula khan Samuela kuang, “Rengpa thu chu ki izôm mo ni ma, a ni tîrna tiang ang ki fea, Amalek rêng Agaga ki hong chela, Amalek mihai ki thatpaihai mo ni ma.



²¹Khannisianlân, ki mihai khan, rállâk thil kêlbelrahai le sehrâtchalhai that irhmangpai ving hrang laia a sahai kha Gilgal khuua Rengpa ni Pathian kuang irbôlna hrangin an hong ilâk a ni,” a tia.

²²Samuela’n, “Rengpa khan thuzôm a inuam ang khan hâlirvôm thilinhlanhai le irbôlnahai hi a ilôm ngai ma ni? Irngai ro, irbôlna nêkin thuzôm hi a sa uala, kêlbelrachal satak nêkin, a thuzôm hi a sa ual a ni.

²³A chung a sualnahai hi tasân theihai sualna leh hmunkhat a ni, tukulliannahai hi millim biakna leh hmunkhat a ni. Rengpa thupêk ni hnôl tâk sikin ama khomin rêng hrangin nang a inuam loi a ni,” a tia.

²⁴Saula khan, Samuela kuang, “A ni ki lei isual ok tâk a ni. Rengpa thupêk le ni thu kha ki lei izôm ta loi a ni, ki mipuihai ki chia, an thu ki lei ipom ual tâk a ni.

²⁵Khannisianlân atûn hin ki soal ngaidamin lân, Rengpa chubai ki mûk theina hrangin Gilgal-a ni fepui ro,” a tia.

²⁶Samuela’n Saula kuang, “Nang fepui viat no ning, Rengpa thupêk ni hnôl tâka. Rengpa khomin Israel rêng ni hrangin nang a inuam ual ta loi a ni,” a tia.

²⁷ Kha hnung chu Samuela kha fe hrangin a hong irsiamin chu, Saula’n a puan hmor kha a hon pota, a têt pe tâka.

²⁸Samuela’n a kuang, “A vuana irthokin Rengpa’n Israel ram hi ni kut ata a lâkpai tâka, nangma nêka sa ual mi ni kôlvêla om a ipêk tâk a ni.

²⁹Israelhai roiinpuina Pathian kha irsîr no nia, a lungrîl khom thûl no ni. Ama chu mihriam anga lungrîl irthûl ngai ni ma,” a tia.

³⁰Saula khan, “Ki lei isual tâk a ni; khannisian ki mihai le hruaituhai Israel mipuihai kôla hin ni chôindôm hrangin nang ki ingên a ni. Rengpa ni Pathian chubai ki mûk theina hrangin ni fepui ngêt ro,” a tia.

³¹Khanchu Samuela’n Gilgal-a a fepuia, Saula khan Rengpa chubai a mûk tâka.



³²Khaang khan, Samuela'n, "Amalek mihai rêng Agaga kha keima kuang hong hruai roi," a tia. Khanchu Agaga kha irlo'nthing puma chiin a va fea, a lungrîlin, "Thina chu ki zôk tâk chu ni a ti," a tia.

³³Samuela'n, "Ni khandaiin nu tamtak nâi boiin a isiam angin, ni nu khom nupang laia nâi boia siam ni ta a ti," a tia. Khanchu Samuela khan, Agaga chu Gilgal khuua Rengpa maichâm kôla khan ar chan indi tâka.

³⁴Kha hnung chu Samuela kha Ramah khuua a fea, Saula in omna Gibeia kuaa khan a fe tâka.

³⁵Khaangin Samuela chu a thi nî dênin Saula chu va'rtongpui nôk ta maka; khannisianlân, Samuela kha Saula sikin beiindong takin a iom tâk a ni. Rengpa khan Israelhai rêng ni hranga Saula a lei iphun kha a irsîr tâk a ni.

1 Samuela 16

Davida rêng hranga sahriak irthutir

¹Rengpa khan Samuela kuang, "Israel mihai rêng hranga ki inuam loi tak hnunga Saula sika hin idôra sôt mo irngaiinsiatin ni iom hrang? Ni sial irki sînga khan sahriak thun insipin lân, Bethlehem-a mi Jesaia kuang khan fe ro; a nâipasalhai laia mi rêng hrangin ki inthang zoi tâk a ni," a tia.

²Samuela khan, "Itin mo ki ife thei hrang? Saula'n a len hriatin chu a ni ithat hrang kêng," a tia. Rengpa khan, "Sehrât pâl kâra hruaiin lân, 'Rengpa kuang irbôl hranga zuang kêng ki ni,' ti ro.

³Irbôlna khan Jesaia kha koiin lân, ni tho hrang dân nan hril ki ti. Mi ar hming nang ki ihriltak kha rêng hrangin sahriak ni irthutir hrang a ni," a tia.

⁴Khanchu Samuela'n Rengpa iti lam angin a thoa, Bethlehem-a khan a fe tâka. A khuua ulianhai khan irlo'nthing pumin an lei dona, "A sa lampanga zuang chu ni ini ma ni?," an tia.

⁵Ama khan, "A sa lam tianga chu a ni. Rengpa kuang irbôl hranga zuang ki ni. Irthâr unglân, irbôlna hmuna ki kuang hong sa roi," a tia. Ama khan Jesaia le a nâipasalhai khom kha irthâra, irbôlna hmuna hong hrangin a koihaia.



⁶Khan an hong tungin chu, Samuela khan Jesaia nâipa Eliaba a lei ena, a lungrîlin “Hi mi hiRengpa kuanga ngîra inthang chu ni ngêt a ti,” a tia.

⁷Khannisianlân Rengpa khan Samuela kuang, “A hmêl satna mani, a dung sei dân mani, en no ro. Ama hi chu ki inuam loi a ni. Keima’n chu mihriam en dân angin ki ien loi a ni. Mihriamin chu pên tianga inlang an en ngaia. Rengpa’n chu lungrîl a ien ngai a ni,” a tia.

⁸Kha hnung chu Jesaia khan a nâipa Abinadaba a koia, Samuela kuang a hong hruaia. Khannisianlân Samuela’n, “Hi khom hi Rengpa inthang la ni ma,” a tia.

⁹Khan, Jesaia khan Sama a hong hruai nôka. Samuela khan, “Hi khom hi Rengpainthang la ni ma,” a tia.

¹⁰Khang khan Jesaia’n a nâipasal sari Samuela makunga a hong hruaihaia. Samuela khan Jesaia kuang, “Rengpa’n hihai hi a inthang ni ma,” a tia.

¹¹Kha zoiin chu Samuela’n Jesaia kuang khan, “Hi hin ni nâihai chu an om irkip ving mo?” a tia. Jesaia’n, “A mitum takte chu a la oma, khannisian kêlbelra enkoltu a ni,” a tia. Khan, Samuela’n, “Va’nkoitirhaiin lân, a hong tung mâka chu irbôlna thil ei inhlan hrang ni ma,” a tia.

¹²Khanchu Jesaia’n a va’nkoitirhaia, a hong hruaia. Ama chu mi mar hmêlsa, a mit meng enhoi a nia, Rengpa khan Samuela kuang, “Thoiin lân, sahriak irthûtir ro, ama hi a ni,” a tia.

¹³Khanchu Samuela khan sahriak thunna sial irki kha a lâka, a urênghai mithmua khan Davida chu sahriak a’rthutira. Voikhat zelin Rengpa irtha kha Davida chung a zuang chuma, kha nî rengata kha a ompui mai tâka. Khan Samuela chu Ramah khua tiang a kîr nôk tâka.

Saula ina Davida’n irhâihoi a tum

¹⁴Rengpa irtha khan Saula kha a mâksana, Rengpa itîr ramilhli khan an buaitir ngaia.

¹⁵Saula zuituhai khan a kuang, “Irngai ro, Pathianin nang inbuai hrangin ramilhli a zuang itîr a ni.



¹⁶Khasikin ka pu thu ni pe'n lân, perkhuang suk thei tak zong kin ti. Khanchu ramilhli'n nang a chel rikipa, kha mi khan perkhuang suk a ta, hong dam nôk zôi ni ti," an tia.

¹⁷Saula khan a zuituhai kuang khan, "A suk thei tak kha ni zong pe unglân, keima kuang hong hruai roi," a tia.

¹⁸A kôla om ruatharte inkhat khan hiang hin a ti pea, "Bethlehem kho mi Jesaia nâipa ki hmu tâka, kha mi kha irhâihoi tum thei tak chu a ni, khakhêla mi hâi le hmêl satak sipai satak le thuhiril thei tak a ni, a kuang Rengpa khom a iom a ni," a tia.

¹⁹Khanchu Saula khan, Jesaia kuang mi a tîra, "Ni nâipa Davida kêlbelra enkola om ngai kha keima kuang hong tîr roh," ti hrangin mi a tîra.

²⁰Jesaia khan sakuartung, bai le uaina kop sipin kêlte a lâka, a nâipa Davida kuta Saula pe hrangin an chôitira.

²¹Davida khan Saula kuang a va tungin chu, a makunga a ngîra, Saula khan a lei kan oka, râltukfam chôitu hrangin a len thanga.

²²Khanchu Saula khan Jesaia kuang, "Davida hi keima kuang om ri se, ki milung a inchuktir a ni," itia hril hrangin mi a tîra.

²³Khaang khan Saula chu ramilhli'n a chel rikipin, Pathian itîr Davida khan perkhuang a lâka a suk pea. Khanchu ramilhli'n a mâk ngaia. Saula chu a hong hara, a hong idam nôk ngai a ni.

1 Samuela 17

Goliatha'n Israelhai a sarai ngai

¹Khan Filistia mihai khan irdoi hrangin Judai ram sîng Soko khuua an sipaihai an bûma; Soko le Azeka kho kâra Efes Damim hmuna khan, omhmun an khuara.

²Saula le Israel mihai kha an irbûma, Ela phâia omhmun an khuara.

³Filistia mihai kha tâng dunga an oma, Israel mihai kha varâl tianga tâng panga an oma, an kâra phâizôl a oma.



⁴Khan, Filistia-hai omhmuna irthokin an mi hrât, ar hming Goliatha, Gath kho mi, mûk ruk le khâp khata dung sei hi a hong suaka, Israelhai kha a hong saraihaia.

⁵Ama hin thîr dâr lukhum a khuma, dâr suma inluan rôppho an nghâka; a pho rik dân chu her sômringa le her sari vêla rik a ni.

⁶A'rngala khan khom pho a'rbela, a dâra khan dâr ufei a'rvâ saa.

⁷A ufei ngul chu puan rikol anga om a nia, a ufei lu tianga khan thîr her saria rik a ni. A pho chôitu sipai kha a maton tiang a fea.

⁸Goliatha kha a ngîra, Israel sipaihai kha a khêkkhumhaia, an kuang, "I lo hrang sika irdoi hranga nin zuang irtâng mo? keima chu Filistia mi ki nia, nangni chu Saula suak kêng nin nia! Nin laia mi inkhat inthang unglân, ni hong irsualpui ri se.

⁹Ama khan a nin hnêa, a ni thatin chu, nin suak chang kin ti. Khannisianlân, keima'n kin hnêa, ki thatin chu kin suak chang nin ti.

¹⁰Atûn hin Israel sipaihai chu nangni ki saraiin nangni ki i-ot a ni, mi inkhat hon thang unglân, lei irsual hi ro ung," a tia.

¹¹Khan Saula le Israelhai murdi'n Filistia mi thu'nsîr kha an inhriatin chu irlo'nthingin an chi tâka.

Saula riakbuka Davida a fe

¹²Khan, Davida chu Jesaia nâipa a nia, Judai ram Bethlehem-a Efrata mi a nia, Jesaia'n nâipasal kiriat a neia; ama chu Saula inlal lai khan a lei tar ok tâka.

¹³Jesaia nâi ulianhai inthum khan irdoina hmuna Saula kha an zuia. A nâipasalhai irdoina fehai irhming chu, a ulian tak Eliaba, inhnina Abinadaba, inthumna Sama hai an ni.

¹⁴Khan Davida chu a mitum tak a nia, khan a urêng inthumhai kha Saula kuang an om laiin,



- ¹⁵ Davida chu Saula kuang ata Bethlehem-a a pa kêlbelra enkolin a va fe ngaia.
- ¹⁶ Goliatha'n zîng le khohloi rikipa hin sîn sômminli sîng Israelhai kha a sarai mai ngaia.
- ¹⁷ Sîn khat chu Jesaia khan a nâipa Davida kuang khan, “Bu inzêi her sôm le bai tiam sôm hi chôiin lân, ni urêng hai kuang an riakbuka va fepui zel ro.
- ¹⁸ Khan dût thâi inkang hlûm sôm hi an laia mi hruaitu kha chôi pe'n lân, ni urêng hai itin mo an om hong irdonin lân, an thurchi hon hre'nfel roh.
- ¹⁹ Reng Saula le ni urêng hai le Israel mi murdihai kha Filistia mihai doiin Ela phâizôla an iom a ni,” a tia.
- ²⁰ Davida chu zînga âr khuangin a thoia, kêlbelrahai kha mi dang a len enkoltirhaia, Jesaia iti pe lam angin fâk zâthai kha a chôi, a fe tâka. Israel sipaihai kha irdoina hmuna fe hrangin an irthok lai takin le an lei khêk sup lai takin, an riakbuk kha a va tunga.
- ²¹ Khan Israelhai le Filistiahai chu irdoi hrangin an le'rtâng tâka, sipai le sipai hmâi irsongin an lei oma.
- ²² Davida khan fâk zât a ichôi kha fâk nêk enkoltu kuang khan a pêka, sipaihai tiang khan a van tâna, a uhai kha chubai a va mûkhaia.
- ²³ Khan an chong lai takin Goliatha kha Filistia mihai sipai pâl lai ata kha a hong suaka, matona a itho ngai ang dênin Israelhai kha a saraihaia. Kha kha Davida'n an hriata.
- ²⁴ Israel mi murdihai khan kha mi kha an hong hmu'n chu chipumin lâizâm an thoa.
- ²⁵ Israel mihai khan, “Kha mihriam hong suak kha nin hmu mo? Israel mihai sarai hrang ngêta hong suak a ni. Tukhomin kha mi kha a that theitu chu rêngin lômman satakin satvur a ta, a nâinu kha dôngma'n inneitir a ta, khanchu a pa insûngkua kha Israelhai laia hin khâzana khom chôi ni no ni,” an tia.



²⁶Khanchu Davida khan a kôla ngîrhai kha ar donhaia, “Hi Filistia mi hi that theia, Israelhai irhming siatna inboitirtu kha imo an ipêk hrang? Hi sertan loi Filistia mi hi tu ngân mo a ini, Pathian hring sipaihai a isarai ngân hi?,” a tia.

²⁷Mipuihaiin, “A thatpu tak chu kin iti angin itinrêng tho pe ni a ti,” an tia.

²⁸Khan a uliantak Eliaba kha Davida chungu khan a ning an mur pe thuta, a kuang, “Hi hin imo ni zuang izong? Ramkâra ni kêlbelra omhai, tu mo ni zuang inenkoltir ngân? Ni lâiripâk lam le ni lungrîl saloi lam hi kin hriat. Irdoi en hrang ringota ni izuang papai a ni,” a tia.

²⁹Davida khan, “I ngân mo ki tho? Chongbâi khat lua mo ki irdon thei loi hrang,” a tia.

³⁰Mi danghai tiang a’rheia, kha ngêt kha a’rdonhaia; mipuihai khan matona an iti ang ngêt khan an tia.

³¹Mi senkhatin Davida thu’nsîr kha an inhriatin chu, Saula kuang an insîr pe nôka, ama khan a koia,

³²Khan Davida’n Saula kuang, “Ama Filistian mi sika son tukhom chi no ri sehai, kei va fe ki ta, va doi ki ti,” a tia.

³³Saula’n Davida kuang, “Nangma’n chu Filistia mihai so la doi thei no chi ni, ni la nâiinpang hraia. Ama kha chu a thoibop ata irdoi mi a lei nia,” a tia.

³⁴Davida khan Saula kuang khan, “Ni suak hin ka pa kêlbelra ki enkol ngaia; kâmkeibaknei hai, savom hai an hongu kêlbelra laia kêltehai an that tumhai hin,

³⁵ki’rzûlhaia, ki’rsualpuihaia, kêltehai kha an bâi sùng ata ki isansuakhai ngai a ni. Kâmkeibaknei le savomhai hin ni sê hrangin an hongu an bak mula ki chelhaia ki ithathai ngai a ni.

³⁶Kâmkeibaknei le savom ki thathai suam thei ngaia, kha sertan loi Filistia mi, Pathian hring sipaihai hong saraitu kha lo pol chit ki ti.

³⁷Kâmkeibaknei le savomhai kut pâr ata ni sansuaktu Rengpa khan, kha Filistia mi kut ata kha ni sansuak ngêt a ti,” a tia. Khanchu Saula khan



Davida kuang khan, “A sa fe ngânin lân, Rengpa khan nang ompui ri se,” a tia.

³⁸Saula khan Davida kha a râltukfam ar beltira, dâr lukhum an khumtira, rôppho a’rbeltira.

³⁹Davida khan a râltukfam chung a khan Saula khandai kha a vonga; ama khan a la’rvo ngai no sikin, chângpui thei ta maka, khanchu Davida’n Saula kuang khan, “Hiang hin chu irsualpui thei no ning, hiang hin ki la tho ngai no sikin,” a tia. Khanchu Davida kha ar khek nôk vinga.

⁴⁰A kêlbelra hôlna khianghrol kha a chôia, ivadunga lung irhlûm nâmtak chêng ving ringa a hrûta, a hmarsa sînga khan a thuna, a sâilung dêng kha a chôia, Goliatha kha a va pan tâka.

Davida’n Goliatha thatna

⁴¹Filistia mi kha a hong irthoka, Davida kha a hong pana; a pho chôitu kha a matona a fea.

⁴²Filistia mipa khan a hei ena, Davida kha a va hmu infelin chu a hmusit oka, Davida chu takmar pama om, mit meng enhoi, a thoibop a nia.

⁴³Khanchu Filistia mi khan Davida kuang khan, “Ui mo ni ni isôn, khianghrol leh ni ni hong ipan kha?,” a tia. Khanchu Filistia mi khan a pathian insamin Davida kha khua a sâla.

⁴⁴Davida kuang khan, “Hong ro, tho ni hmehai kha chung tianga vuang, vâhai le ramsahai lei pehai hi rong,” a tia.

⁴⁵Davida khan, “Nangma’n chu khandaihai, ufeihai chôiin ni hor thoka; khannisian keima chu itinrêng sin thei Israel sipaihai Pathian ni ihmusit irhmingin ki hong irthok a ni.

⁴⁶A vuan hin Rengpa’n nangma hi ki kuta a ni ipêk hrang a ni; nang that ki ta, ni lu nang tan pe hrang ki ni. Filistia sipaihai ruak chu a vuan hin chung tianga vâhai le ramsahai ki infâktir hrang a ni. Kha zoiin chu irnêng chung a mi murdihai hin Israelhai laia hin Pathian a om iti inhre suak ta an ti.



⁴⁷Khanchu hitaka ar bûmhai murdi'n Rengpa khan a mihai saninzôkna hrang khandai le ufeihai ite nang mah ti hmu infel an ti. Irdoina chu Rengpa irdoina a nia, ama'n nangnihai hi ki kuta a ni ipêk hrang a ni," a tia.

⁴⁸Goliatha kha a hor thoka, Davida doi hrangin a hong nâi tîr tîrin chu, Davida kha Filistia mihai irtongna tiang Goliatha doi hrangin inrang takin an tâna,

⁴⁹Davida khan a hmarsa a zu'npûra, lung sâihlûm a lâka, a sâilungdêng leh khan Goliatha kha a hong dênga. A chaldôr taka a hong dêng pea, a michala khan lungsâihlûm kha a lûta, Goliatha chu a khupin an rîl tâka.

⁵⁰Khanchu Davida'n khandai chôî loiin Goliatha kha sâilungdêng le saihlûmin a thatpai ta.

⁵¹Kha hnung chu Davida kha an tâna, Goliatha khandai kha a phôia, a lu a tan pea, a that tâka. Filistia mihaiin an rêngpa kha a thi ti an inhriatin chu lâizâm an thoa.

⁵²Israel mi le Juda mihai kha an thoia, huaizâm an thoa, Filistia mihai chu Gath dênin le Ekron kul dênin an irzûlhai ta. Filistia mi popliamhai kha Saraim lam tuanin Gath le Ekron dênin an dalh phôta.

⁵³Israel mihaiin Filistia mihai irzûl an hong kîr nôka, an riakbuk an inmok pehai chita.

⁵⁴Davida khan Goliatha lu kha a lâka, Jerusalema a chôia, khannisian Goliatha râltukfamhai chu a puan ina a siaa.

Saula makunga Davida a ngîrna

⁵⁵Saula khan Goliatha doi hranga Davida fe kha a hmu'n chu a sipai hruaitu Abnera kuang khan, "Abnera hi nâipangte hi tu nâi mo a ini?," a tia. Abnera'n, "O rêngpa, ki inhriat viat loi kêng," a tia.

⁵⁶Saula khan, "Khanchu fe'n lân, hi nâipang hi tu nâi mo a inih irdon infel ro," a tia.



⁵⁷Khanchu Davida khan Goliatha a that zoia, a hong kêr nôk tiang khan Abnera'n Saula kuang a hruaia, Davida khan Goliatha lu kha a la chôl maia.

⁵⁸Khan, Saula khan a kuang, "Ruatharte tu nâi mo ni ini?," a tia. Davida khan, "Bethlehem mi, ni suak Jesaia nâipa ki ni," a tia.

1 Samuela 18

Jonathana'n Davida rual ar changpui

¹Saula le Davida chongna a hek tâka, kha zoiin chu Saula nâipa Jonathana khan Davida kha a'rngaiinnat ual tâka. Khanchu ama hringna lung a inkham angin Davida kha lung an kham tâka.

²Saula khan hi nê ata hi Davida chu ama kuang an omtir zôi tâka. A pa ina fe khom phal pe ta maka.

³Khang khan Jonathana'n ama hringna lung a inkham angin Davida kha lung a thung sikin rual irchangna thuthung an neia.

⁴Khanchu Jonathana khan a songkolirfual a inngâk lai kha a kheka, Davida a pêka, a râltukfam le a khandai le a kongkhithai khom a pêka.

⁵Saula'n a itirna hmun tina Davida chu a fea, hlo a chuk maia; khanchu Saula khan a sipai hruaitu ni hrangin a siama, ama kha Saula mi lianhai le mi murdi irngai dâna khom a sa an iti ok a ni.

Saula'n Davida a hnarsâna

⁶Davida kha Goliatha a that zoia a hong kêr nôka, a sipaihai leh insung tiang an hong a khan, Israel nupang kho tina hla sakhaiin lâp pumin khuangte le têngrephai sukin râifân takin rêng Saula irhmupui hrangin an hong suaka.

⁷Khanchu nupanghai khan lâp pumin hla an irkhena; "Saula'n a sâng a sângin a thata, Davida'n chu a sâng a sângin a thata," an tia.

⁸Saula'n kha kha irngai nuam maka, a ning an mur pea. Ama khan, "Davida chu a sâng a sâng a thatin an bêa, keima chu a sâng a sâng vai thatin an ni bêa. Inhnunga chu ama hi kêng rêngin an la isiam ngêt hrang a nih hi te," a tia.



⁹Khanchu Saula khan kha nia irthokin Davida kha mitsunin a nei tâka.

¹⁰Khan, zîng nôka chu Saula chung a Pathian itîr ramilhli a hong tunga, insûnga khan invêt angin a chiar suat suat ngaia. Davida khan sîn danga a itho ngai ang dênin perkhuang a suka; Saula khan ufei a'rlên chiana.

¹¹Saula khan a lungrîlin, “So banga son Davida len kho irmantir rak rong,” a tia. Khanchu Davida kha voihni zel a len khoa, khannisian an kho rikipa khan Davida kha a le'rthîn pe hena.

¹²Davida kuang khan Rengpa a om pe sikin le Saula a mâk tâk sikin Saula khan Davida kha a chia.

¹³Khanchu Saula khan a kuang ata Davida kha a thonpaia, a sipai sângkhathai chung a hruaitu ni hrangin a siana. Khan, Davida chu sipai hruaiin a lûtin a suaka.

¹⁴A sinthôna hmun tina hlo a chuk maia. Rengpa chu ama kuang a ompui maia.

¹⁵Saula khan Davida hlochuk lam kha a hmu'n chu, a chi ual tâka.

¹⁶Khannisianlân, Israelhai le Judahai murdi khan Davida chu an irngaiirsâng ual tâka, hruaitu hlochuk tak a ni sikin.

Saula nâinu Davida'n dôngma'n a nei

¹⁷Kha hnung chu Saula khan Davida kuang, “Irngai ro, ki nâinu ulian ual Merabi hi dôngma'n nang inluatir ki ti, sipai hâitak le iamom takin ni thop khakin lân;Rengpa irdoinahai chu doi mai ro,” a tia. (Saula khan, keima'n a chung a kut thâk viat loiin Filistia mihaiin a chung a kut thâk tong ri se, ti a ingaitua a ni.)

¹⁸Davida khan Saula kuang, “Tu ngân mo ki nia, Israelhai laia ka pa insûngkua khom kha imo a nia, rêng mâkpa ki nina hrang hi?,” a tia.

¹⁹Khannisian Saula nâinu Merabi kha Davida innei zoro a hong ni'n chu Meholat mi Adriela dôngma hrangin a pêk tâka.



²⁰Khannisianlân, Saula nâinu Mikali khan Davida kha lung a thunga; Saula khan an hriatin chu a lôm oka.

²¹Saula khan a lungrîlin, “A khitna hranga châng a ni theina hrangin le, Filistia mihaiin a chung a kut an thâk theina hrangin, Mikali hi chu Davida inluatir hi rong,” a tia. Khanchu Saula khan voihnina khan Davida kuang, “A vuan hin ki mâkpa ni ichang hrang a ni,” a tia.

²²Kha hnung chu Saula khan a mi lianhai kha dâihrekin Davida kha chongpuia, a kuang, “Reng chu ni chung a hin a lôm oka, a mi lianhai murdi khomin nang an irngaisânga; atûn hin rêng mâkpa ni ta hrangin a isa a ni,” ti hrangin thu a pêka.

²³Khanchu kha thu kha Davida mikuar inhriata khan an insîra. Khanchu Davida khan, “Mi inriang le tûte inhre loi keima anga hin rêng mâkpa ni hrang hi an dôk nin isôn ma ni?,” a tia.

²⁴Saula mi lianhai khan, Davida chonghai kha an insîr pea.

²⁵Khanchu Saula khan anni kha Davida kuang, “Reng khan a râlhai phuba lâkna’n Filistia mihai an servun irzakhat ti no chu a man ite la no ni,” va ti hrangin thu a pêka. (Khang khan Saula khan Davida chu Filistia mihai kuta that hranga a insâp a ni.)

²⁶Saula mi lianhai khan, kha thu kha Davida an hong hrilin chu, rêng mâkpa a hong ini hrang kha Davida hin a lôm oka. Irnei hrang nî sùn an ikhit kha a hong phâk mân khan,

²⁷Davida le a mihai kha an fesuka, Filistia mihai irzahni an va thathaia. Khanchu, Davida khan an servun a hong chôia, khanchu rêng mâkpa a ni theina hrangin rêng kha irkip takin a pêka. Khanchu Saula khan, a nâinu Mikali chu dôngma’n aneitir tâka.

²⁸Saula khan Davida kuang khan Pathian a om ti an hriat infel tâka; kha bana a nâinu Mikali khan Davida chu lung a thung tak tak iti an hriata.

²⁹Khanchu Saula khan Davida chu a chi ual tâka, khanchu Saula chu a dam sâng kârka chu Davida râl a ni tâka.



³⁰Khaang khan Filistia sipaihai kha hong irthok suakin, an hong doihai ngaia. Khannisianlân, an irdoi rikipa Davida chu Saula mi lian danghai murdi nêkin hlo a chuk ual ngaia. Khasika khan Davida irhming chu a hong inthang tâka.

1 Samuela 19

Saula'n Davida deng an thei

¹Saula khan a nâipa Jonathana le a mi lianhai murdi'n Davida that hrangin hê a bêa, khannisian Jonathana khan Davida kha arngaiinnat tak taka.

²Khanchu Jonathana khan Davida kuang, “Ka pa Saula hin nang that a inuam a ni; khasikin nangtûk zîng chu irdîn ro, hmun irthupa irbi chian roh.

³Khan fe ki ta, ni irbîkna rama ka pa makunga va ngîr ki ta, ni chungchâng thua ka pa chongpui ki ta; i mani ki inhriat a omin chu nan hril ki ti,” a tia.

⁴Jonathana khan a pa Saula makunga Davida chu an pâka, a kuang, “Reng khan a suak Davida chung a hin thil soal tho viat no ri se. Ni chung a ite tho'nsualna nei maka, kha nêkin a sinthohai kha ni ta hrangin a sa inzen a ni ual.

⁵Thi khom chi loiin Goliatha kha a doia, khan Rengpa'n Israelhai murdi saninzôkna roiinpui tak a itho suak a ni. Nang khomin ni hmua, ni lôm oka, itho hranga mo nin nunsiat ama chung a ni inthâk? A bi ite om loiin, Davida nin ithat hrang,” a tia.

⁶Khaang khan Saula khan Jonathana thu insîr kha a poma, Saula khan chong ar khâma, “Rengpa irhmingin ki insîr a ni, Davida chu that hrang ni viat ma,” a tia.

⁷Khanchu Jonathana khan Davida kha a koia, kha thuhai kha an sîr pehaia. Kha hnung chu Jonathana khan Davida chu Saula kuang a hruaia, matona ang ngêt khan rêng sin kha a tho nôk tâka.

⁸Khan, Filistia mihai leh irdoina a hong om nôka, khanchu Davida kha a'rthok suaka, Filistia mihai chu a va doia, a thathaia, khanchu lâizâm an tho tâka.



⁹Sûn khat chu Saula khan a ina ufei chôi chiana a om laiin Rengpa itîr ramilhli a chung a hong tunga; Davida khan perkhuang a suka.

¹⁰Saula khan a ufei leh khan Davida kha banga inkho de khap a tuma; khannisianlân Davida kha a lei irhei lata, ufei kha banga a chum rak tâka. Davida kha an tâna, kha zâna khan a zôk ta.

¹¹Kha zân ngêta khan Saula khan Davida in tiang zînga len ruanga, that hrangin mi a tîra. Davida dôngma Mikali khan, “A vuan zân hin ni rot no’n chu, nangtûk nang an ithat hrang a ni,” a tia.

¹²Khanchu Mikali khan Davida kha tukvera an suma; khanchu Davida chu a rot tâka.

¹³Kha hnung chu Mikali khan millim kha a lâka, zâlmuna khan an zâla, khanchu a lu tiang khan kêl mul a siaa, puan leh ar khûa.

¹⁴Davida hruai hranga Saula’n mi a hong itîrhai kuang, Mikali khan, “Dam maka,” a lei tia.

¹⁵Khannisianlân Saula khan Davida kha anni ngêtin va en hrangin a hong tîrhai nôka, an kuang khan, “A zâlmun pumin, hin hong irzôn unglân, keima’n lei that ki ti,” a tia.

¹⁶A mi tîrhai kha an va tungin chu zâlmuna khan millim kha a lu tianga kêl mul lukham khampumin an va hmua.

¹⁷Saula khan Mikali kuang, “Ithoa mo hianga ni ni ihuang, ki râl ni inzôk hi?” a tia. Mikali khan Saula kha a koia, “A zôkna hrang ki san no’n chu ni that kêng a itum,” a tia.

¹⁸Khan Davida kha a rota a zôk tâka. Ramah khuaa Samuela kuang a fea, a chung a Saula thil tho murdi a hrila. Kha hnung chu ama le Samuela kha an fea. Naioth khan an om tâka.

¹⁹Davida chu Ramah khuaa Naioth-ah khan a om ti Saula kha an hrila.

²⁰Khanchu Davida hruai hrangin Saula khan mi a tîrhaia. Anni khan deipu pâlhai lâm puma thu’nsîr sup sup lai le Samuela chu an chung a hruaitu a nih



ti kha an va hmua. Khanchu Saula mi tîrhai chung a khan Pathian irtha a zuang tunga, anni khom khan lâm puma thu'nsîrin an om tâka.

²¹Kha thu kha Saula'n a len hriatin chu, mi dang a tîrhai nôka, anni khom khan lâm pumin thu an van sîr sup sup. Saula khan voithumna khan mi a tîr nôka, anni khom khan lâm pumin thu an van sîra.

²²Kha hnung chu ama khom kha Ramah khuuaa khan a va fe sa tâka. Seku hmuna tuikuang irzatak kha a va tunga, Samuela le Davida hi kho tiang mo an iom, a tia.

²³Ramah khuuaa Naioth-ah a fe laia khan Pathian irtha a chung a khan a zuang tung sa tâka, lampui tuana khan Ramah khuuaa Naioth tung dênin lâm pumin thu an sîr buan buana.

²⁴ Khanchu ama khomin a silkaihai a'rkheka, Samuela makunga khan a lâma, thu an sîr sa tâka. Kha nî sîn intuanin le kha zân intuanin korongin a zâl tâka. (Khasika khan, "Saula khom kha deipu a ini sa tâk ma ni?," iti hi an isôn tâk a ni.)

1 Samuela 20

Jonathana'n Davida a san

¹Kha hnung chu Davida kha Ramah khuuaa Naioth rengata kha a rota, Jonathana kuang a fea, "I ngân mo ki itho? Imo ki itho inchâi? Ni pa chung a hin imo ki tho'nsualna, hianga ni that a itum hi?," a tia.

²Jonathana khan, "Nang that no nia, thi viat no chi ni, ka pa khan ite nin hril loiin lian ri se, chîn ri seh khom tho ngai ma. Itho sikin mo hi thu hi keima kuang a iip hrang, ip viat no ni," a tia.

³Khannisian Davida khan, "Ni pa khan lung ni ni inkham dân hi an hriat infel vinga, khasikin Jonathana khan hi thu hi chu inhre ual no ri se. khano'nchu, a lungrîl a na pe hrai itinin, a iti khom a ni thei. Khasikin Rengpa irhming chôiin ni kuang chong kin kung a ni, thina le kin kâr chu kalkhat vai a ni," a tia.

⁴Kha hnung chu Jonathana khan, "Ni inuamtak nang tho pe mai ki ti," a tia.



⁵ Khanchu Davida khan, Jonathana kuang, “Nangtûk hi tha thar kût nî sîn a nia, rêng kuang khalâi irhîl ngêt hrang ki nia. Khannisian, a sa ni ti’n chu nangtûk pên khohloi dên thaiin rama irbi hrangin fe ki ti.

⁶Ni pa hin ki omna hi a hon hriat suak duaia ni’n chu, Davida khan a khua Bethlehem-a va fe vak a ni ngêna; a in sîngkuahai hrangin an kum tina irbôl zoro a nia, lei ti’n lân.

⁷Khan, ‘A sa a ti’n chu,’ ki izôk ni a ta, khannisian a ning an murin chu thil saloi tho a itum a nih ti zel ro.

⁸Irngaihoi takin lung nin khamin lân, keima kuang ni thuthung siam kha vong mai ro. Khannisianlân, pualoina nei ki nia ni’n chu nangin ni that zel ro. Itho hrangin mo ni pa kuanga ni fepui ngêt a inang?,” a tia.

⁹Jonathana khan, “Khaanga thil kha ngaitua viat no ro. Ni chung a thil saloi tho, ka pa’n a tum iti kin hriat ngânin chu nang ki inhril loi hrang mo?,” a tia.

¹⁰Kha hnung chu Davida khan Jonathana kuang, “Ni pa khan henhrum takin nang lei don ta sianlân, tu’n mo nin hril ta hrang?,” a tia.

¹¹Jonathana khan Davida kuang, “Thoiin lân, rama va fe ro,” a tia. Khanchu rama khan hmunkhatin an fea.

¹²Jonathana khan Davida kuang, “Rengpa Israelhai Pathian chu nin hriatpuitu ni ri se. Nangtûk le nangtûk pên hiang zoroa hin ka pa hong chongpui ki ta, ni chungchâng thua, a sa lampanga ni’n chu ni kuang mi târin nang hong hril ki ti.

¹³Khanchu ka pa khan ni chung a thil saloi tho a tuma nang ki hong hril noa, ni zôkna hrang lampui nang ki zong pe no’n chu Rengpa’n a ni lo lam takin ni lo ri se. Kha nêka natinsat ual khomin. Rengpa chu ni kuang om ri se. Ka pa kuanga a iom ngai ang khan!

¹⁴Ki hring sîng chu, ni thuthung irthiang vong ngitin lân, ki chung a iamomin om ro; khannisian ki thi duai tâka a ni khomin,



- ¹⁵Kumtuangin ki in sêngkuahai kha lungkhamhai mai ro. Rengpa khan ni râlhai murdi irnêng chung ata an irhmang zoi ten khomin,
- ¹⁶ei ruaia thuthung hi khiakin om no ri se, a kiakin a omin chu Rengpa'n kuttum nang a itho hrang a ni," a tia.
- ¹⁷A thar vangin Jonathana khan ama lungthungna sikin Davida kuang chong ar khâm nôka, ama hringna lung a ithung ang takin Davida kha lung a ithung a ni.
- ¹⁸Kha hnung chu Jonathana khan a kuang, "Nangtûk hi chîmu thar kût a nia; ni toina a rong hrang sikin ni omna hmun inlang ngêt hrang a nia.
- ¹⁹Nangtûk pên a inlang ual hrang a ni; khasikin matona nir bîkna ngai hmun ngêta khan fe zelin lân; lung buk irhlia khan irbi chian ro.
- ²⁰Ki iti tâk ang khan a kôla ki thal inthum hong kâp ki ta,
- ²¹kha hnung chu ki hnungzuihai laia, fe'n lân, thalhai kha va zong ro, tiin tîr ki ta. A ni zuitu kuang khan, 'En ro, thalhai kha ni sîr tiang khan a oma, lan lân, hong ro,' ki ti'n chu Rengpa hringna sâmin ki iti a ni, ni ta hrangin lungthia omin chi hrang ite a iom loi ni a ti.
- ²²Khannisianlân a ni zuitu kuang khan, en ro, thalhai chu nangma khêl tiang son an om, ki ti'n chu rotpat ro, Rengpakhan nang a tîrin chu fe ni ta;
- ²³eini ruai kâra thu ei ithung chungchânga chu Rengpa'n ei ruaia kâra kumtuangin nin det pe mai a ti," a tia.
- ²⁴Khanchu Davida kha rama khan ar bîk tâka. Tha thar kût nî sîn khan, rêng Saula kha khalâi irhîl hrangin a hong;
- ²⁵sîn danga a toina ngai bang kôla khan a toia. Jonathana kha Saula irdîna maton taka khan a toia, Abnera kha Saula kôla a toia. Davida hmun kha chu a rong.
- ²⁶Nikhomsianlân, Saula khan kha ni khan chu ite ti maka, a lungrîlin, "A chung a thil i mani a tunga, a irthiang loi ni ngêt a ti," a tia.



²⁷Khan, zîng nôk nî tha thar kût nia khan Davida hmun kha a la rong maia; khanchu Saula khan a nâipa Jonathana kuang khan, “Itho mo Davida hi mizân le a vuan hin khalâi irhîl hrangin a ihong loi hi?,” a tia.

²⁸Jonathana’n Saula kha, “Davida’n Bethlehem-a fe a ni ngên ngota.

²⁹Irngaihoi takin nin fetir ro, kin insûng mihai khom kin khuaa irbôlna an nei hrang sikin, ki urênghaiin om sa hrangin an ni hong ngêna, khasikin lung ni nin kham theiin chu nin fetirin lân, ki urênghai la va hmuhai rong,” a tia. Khasikin kha zoro taka khan a iom loi a ni, a tia.

³⁰Kha hnung chu Jonathana chungu Saula ning an mur pe tâka, a kuang, “Invêtpa! atûn hin Jesaia nâipa Davida kha ni mualinphoina hrang le ni nu mualphoi irlatir hrangin ni ithop a nih ti kin hriat.

³¹Davida hi, hi irnêng chungu a om kârka chu hi rama hin rêng chang no chi nih ti ni inhriat loi ma ni? Atûn hin fe’n lân, va hruai ro, a ithi ngêt hrang a ni,” a tia.

³²Jonathana’n a pa Saula kha hiang hin a tia, “Itho sikin mo an ithat hrang? I sin mo a insiat?,” a tia.

³³Kha tena chu Saula khan that tumin Jonathana kha ufei leh an khoa; khasika khan Jonathana khan a pa’n Davida kha that a lei itum mai a nih ti an hriat tâka.

³⁴Kha hnung chu Jonathana kha khalâi dokâng ata kha ningmur irlâkin a thoia, kha nia tha thar kût sîn hnina khan ite fa ta maka. A pa Saula khan Davida mualphoi a sak tâk sikin ar ngai a siatpui oka.

³⁵Zîng nôka chu Jonathana kha nâipangte hruaiin ram tiang Davida leh an hmun indangna khan a fe tâka.

³⁶A nâipang hruai kuang khan, “Intânin lân, ki thal kâphai so va zong ro,” a tia. Nâipang kha an tân lai khan, a kôla khan thal a va kâpa.

³⁷Nâipang khan Jonathana thal kâp tâkna hmun a va tungin chu, Jonathana’n nâipang kuang khan, “Thal kha ni pên tianga khan kêng a om.



³⁸Kha khan ngêr chian no ro; irhnotin lân, ir-ial no ro,” a va tia. Nâipang khan thal kha a hrûta, a pu kuang a hong chôia.

³⁹Khannisianlân, nâipang khan ite inhre maka, Jonathana leh Davida vai khan thil omzia kha an inhriata.

⁴⁰Jonathana khan kha nâipang kha a hriamhrehai a pêka, a kuang, “Fe’n lân, kho sêng hong chai ro,” a tia.

⁴¹Khanchu nâipang kha a fe zoiin chu, Davida kha a omna hmun lung buk ilhlî ata kha a hong thoia, khûksadelin, a hmâi irnêng sikin voithum an boka, Jonathana leh an ruaiin an irphâma, an chapa. Khanchu Davida kha Jonathana nêkin a lungrîl a na pe uala.

⁴²Kha hnung chu Jonathana khan Davida kuang, “Irtharngam takin fe’n lân, Rengpa ei ruaia thuthung, nangma le ei kêr le ki’rchihai le nir chihai kêra khom kumtuangin indet mai ri se,” a tia. Khanchu Davida kha a thoia, a fe tâka; Jonathana chu kho sêng tiang a kêr nôk ta.

1 Samuela 21

Saula kuang ata Davida a rot

¹ Khan, Davida kha Nob khuua ochai Ahimeleka kuang khan a fea, Ahimeleka khan irlo’nthing pumin Davida kha a’rtongpuia, a kuang, “Ithoa mo ni bing vaiin te ni hong tâka, chanpui khom hong nei mak chea,” a tia.

²Davida khan ochai Ahimeleka kuang khan, “Rengin sintho hrangin thu a ni pêka, ki itho hrang chu tûte inhre loi hrangin hê a ni bêa. Ki ruathartehai chu hmun ki indang pena khan ni’rtongpui hrangin ki iti pehai a ni.

³Atûn hin imo ni kuta fâk zât ni inei, bai tiam ringa ni pe’n lân, a ninole ni inei tak,” a tia.

⁴Ochai khan, “Bai papai chu nei ma ung, bai irthiang vai kêng ki inei; ni ruathartehai kha nupang chung a an irthiangin chu fa thei ni ti,” a tia.

⁵Davida khan ochai kha hiang hin a sâma, “Nupang chung a chu a’rthiang inzen kin ni. Sintum narân sin hranga kin fe luaa khan ruathartehai kha an



irvong irthiang maiin an om ngai, a vuana sintum roiinpui tho hrang le vâng hin chu an irvong irthiang nôk ual a ni,” a tia.

⁶ Khanchu, ochai khan Davida kha bai irthiang kha a pêka; a san chu dokâng irthianga irthoka a ilâk tâk Pathian kuanga inhlan sai ti no chu bai dang ite a inei ta loi a ni.

⁷(Kha ni khan Saula kêlbelra entu ulian tak Doega, Edom mi kha Rengpa kuang a thotum zoi hrangin a lei iom sa a ni.)

⁸Davida khan Ahimeleka kuang khan, “Ufei mani, khandai mani, ite mo nei mak che? Reng sintho kha irhnot a nang hrai sikin ki khandai leh ki hriamhrei ite ki hong ichôi irman loi a ni,” a tia.

⁹Ahimeleka khan, “Filistia mi Goliatha, Ela phâizôla ni thata khandai kha chu a om; ochai songkol irfual khêla, puan irtuamin a om. Ni nuamin chu la ro, kha ti no kha chu a dang om ma,” a tia. Davida khan, “Kha ti no kha imo a la nanga, ni pe ro,” a tia.

¹⁰Khanchu Davida kha a thoia, kha nî khan Saula chiin laizâm a thoa, Gath-a rêng Akisa kuang a fe tâka.

¹¹ Akisa mi lianhai khan Akisa kuang, “Hi mi hi an rama rêng Davida kha mo ni ma? Saula’n a sâng a sângin a thata, Davida’n a sîng a sîngin tia lâm puma a chungchâng thu nupanghaiin hla an isak dur dur kha ni ma mo?,” an tia.

¹² Davida khan kha thuhai kha a lungrîla a vong maia, Gath ata Akisa kha a chi tâka.

¹³ Khanchu kha mihai makunga khan a om dân an danglamtira, an mithmua khan invêt orhto a thoa, khopui kotbâihai kha an kêlterhaia; a hnerkamulhai khan khasuai a kâi dêng duanga.

¹⁴Khanchu Akisa khan a mi lianhai kuang, “En hi roi ni invêt a nih ti nin inhriat maia, ithoa mo keima kuang nin hong ihruai hi?

¹⁵Invêt ki irsam sika mo, an vêtzia inlangtir hranga ki makunga nin hong ihruai? Hi mi hi mo ki insûnga hong lût hrang?,” a tia.



1 Samuela 22

Saula'n ochaihai a that

- ¹ Davida kha Gath khua ata a rota, Adulam kho kôla rôla khan a fe tâka. A urêng le a pa insûng mihaiin kha hmuna khan a om ti an len hriatin chu a kuang an zu fea.
- ² Mi ihnuaisiahai, lâkai intânghai, milunghoi loihai laia khan an irbukkhôma, mi irzaminli vêl an nia, hruaituin a oma.
- ³ Davida chu khatak ata kha Moab rama Mizpa-a a fea; Moab rêng kuang khan, “Pathianin thil a ni itho pe hrang kin hriat mâka chu ka nu le ka pahai hi ni kuang lei om ri sehai duah,” a tia.
- ⁴ Khanchu Davida khan a nu le a pahai kha Moab rêng kuang khan a mâkhaia, khanchu Davida kha rôla khan ar bîk sûng chu an lei om tâka.
- ⁵ Kha hnung chu deipu Gada kha Davida kuang a hong a kuang, “Rôla hin om chian mai ta no ro; suakin lân Judai rama fe zel ro,” a tia. Khanchu Davida kha a suaka, Hereth ramkâra khan a fe tâka.
- ⁶ Sûn khat chu Saula kha Gibeia tânga Tamarik thing hnuaiia ufei chôiin a toia, a kôlvêla khan a mi lianhai kha an ngîra, Davida le a kuanga omhai kha an hmu tâk ti Saula kha an hrila.
- ⁷ Saula khan a mi lianhai kuang khan, “Nangni Benjamina mihaio, irngai roi; Davida hin loi le grep irhuanhai nangni a pêka, a sipai sâng hruaituhai, irza hruaituhaiin nangni a isiam ving hrang ma ni?”
- ⁸ Khasika nin ichinrûk mo a ini? Ki nâipa'n Jesaia nâipa kuanga thu a ithung, keima kuanga inlang zel om mak chêia, lunghnâng nir lâkpui zel om mak chêia, ki nâipa'n keima mihriam Davida hi ni doi hrang le a vuan sînhaia ni that hranga râluang ni chuan hranga an thortu hi ki kuanga inlang om mak chêi,” a tia.
- ⁹ Saula mi lianhai kôla ngîr Edom mi Doega khan hiang hin a sâma, “Davida chu Nod khuaa Ahituba nâipa Ahimeleka kuanga hong ki hmua.



10Ahimeleka khanRengpa a chongpuia, fa hrang a pêka, Filistia mi Goliatha khandai khom a pêk sa,” a tia.

11Khanchu rêng Saula khan, Ahimeleka le a urênghai, Nod khuaa ochai om murdi a koihai vinga, a kuang an hongga,

12Saula khan Ahimeleka kuang, “Ahimeleka irngai ro,” a tia. Khanchu ama khan, “I ma nih ka pu,” a tia.

13Saula khan a kuang, “Itho sika mo nangma le Davida hin nin ni ithup? Itho sika mo bai le khandai ni pêka, ama hrangin Rengpa ni lei ichongpui pe? Atûn hin a ni doiin, râlruang a ni ichuan tâk a ni,” a tia.

14Ahimeleka hin rêng kha a sâma, “Davida chu mi lian murdihai laia mi iamom tak a ni. Ama kha ni mâkpa a nia, nang a hrungtuhai laia a lian tak, ni rêng ina khom mi mahripom tak a ni.

15A dik, a ta hrangin Pathian ki chongpui pea, khan voikhatna chu ni maka. Nang an ithupinrûk chungchâng thu chu rêng kha keima mo ki ni, ka pa in sêngkuahai mo an ni, ite nin tum no ri se. Hi thua hin chu ite ki inhriat loi a ni,” a tia.

16Reng khan, “Ahimeleka, nangma le ni pa insûng mihai hi nin ithi ngêt hrang a ni,” a tia.

17Kha hnung chu rêng khan a kôla ngîr sipaihai kuang khan, “Fe unglân,Rengpa ochaihai hi that roi; Davida tiang an kopa, laizâm a tho ti an inhriat chak khomin, keima kuang an insîr nuam loi a ni,” a tia. Khannisianlân sipaihai khanRengpa ochaihai chungga khan thathai hrangin an kut insum nuam mahaia.

18Khanchu Saula khan Doega kuang khan, “Nangma’n ochaihai hi thathai ro,” a tia. Khanchu Edom mi Doega khan an rêngin a thathaia. Kha nî khan puan irphân ochai songkol inngâk mi sômriat ringa a ithathai a ni.

19Kha bana Saula khan Nob ochai khua kha khandai leh a rûna; nupang pasal nâipang le irhnu nêk lai dênin, sehrâthai, sakuartunghai, kêlbelrahai a rêngin a thatpai vinga.



²⁰Khannisianlân Ahimeleka nâipa laia inkhat a'rhming Abiathara kha a zôka, Davida kuang an tân pata.

²¹Abiathara khan Saula'n Rengpa ochaihai a that thu kha a hrila.

²²Davida khan Abiathara kuang, "Edom mi Doega kha, kha nî khan khataka om ki hmu ata kha Saula inhril ngêt a tih iti ki inhriat sai a ni. Khasikin ni pa insûng mihai murdi chu keima sika thi ni an ti.

²³Nang chu keima kuang omin lân, chi no ro. Saula khan, nangma le keima ei ruaiin ni that a itum a ni, khannisianlân keima kuang ni omin chu zôk ni ti," a tia.

1 Samuela 23

Keila khua Davida'n a sansuak

¹Davida'n Keila khua chu Filistia mihaiin an doia, hruizôla buhai khom an lâk pehai ving ti thu a len hriata.

²Khanchu Davida khan Rengpa kuang, "Filistia mihai khu ki zu idoihai hrang mo?," iti ar dona. Rengpa khan Davida kuang, "A sa, Filistia-hai khu zu doiin lân, Keila khua chu zu'nzôk ro," a tia.

³Khannisianlân Davida mihaiin Davida kuang, "Irngai ro, Judai rama om khom hin ei ichi a nia, Keila khua zu fea, Filistia mihai zu doi hrang chu ichi teh a om bâka!" an tia.

⁴Khanchu Davida khan Rengpa kha ar don nôka, Rengpa khan, "Thoiin lân, Keila khuaa zu fe ro, Filistia mihai chu ni kut chungang nang pe ki ti," a tia.

⁵Khanchu Davida le a mihai chu Keila khuaa an zu fea, Filistia mihai kha an zu doia, mi tamtak an thathaia, an ramhai an lâk pehaia. Khaang khan Davida'n Keila khuaa mihai kha a inzôk a ni.

⁶Ahimeleka nâipa Abiathara a zôka, Keila khuaa Davida kuang lâizâm a tho laia khan ochai songkol irfual chôia fe a ni.



⁷Keila khuaa Davida a fe ti Saula an hrila; Saula khan, “Pathianin ki kuta a ni ipêk a ni ta, Davida chu kulpui le dâimikot kalna khuaa lûtin ar khum sikin,” a tia.

⁸Khanchu Saula khan râl kâptuhai kha irdoi hrangin Keila khua zu doia, Davida le a mihai zu hual hrangin a bukhaia.

⁹Davida chu Saula’n a chung a thil saloi tho hrang a tum ti a len hriatin chu, ochai Abiathara kuang khan, “Ochai songkol kha hin hong chôi ro,” a tia.

¹⁰Khanchu Davida khan, “O Rengpa Israelhai Pathian, Saula khan keima ni suak sika hin Keila khuaa zuanga hi khua hi zuan siat chit hrangin ar siam ti kin hriata.

¹¹Keila kho mihai hin Saula kuta ni pe nihai mo? Ni suak hin ki lei inhriat lam ang hin Saula khi zuang ni mo? O Rengpa Israelhai Pathian, lungkham takin ni suak hi nin hril ro,” a tia. Rengpa khan, “Zuang a ti,” a tia.

¹²Davida khan, “Keila kho mihai khan keima le ki mihai hi Saula kuta ni pe nihai mo?,” a tia. Rengpa khan, “Pe an ti,” a tia.

¹³Khanchu Davida le a mihai irzarukhai kha an thoia, Keila khua ata kha an suaka, fena hrang inchumna tiang an fea, Davida kha Keila khua ata a rot tah ti Saula’n an hriatin chu a thiltum kha a’rlêktira.

Davida tâng rama omna

¹⁴Davida chu Zif ramchâr kôla tâng rama irbîkin a om chiana. Saula khan a zong maia, khannisianlân a mi Davida chu a kuta pe maka.

¹⁵Davida khan ama that hrangin Saula a hor thok ti an hriata. Davida chu Zif ramchâr kôla Hores-a khan a oma.

¹⁶Saula nâipa Jonathana kha a thoia, ramkâra Davida omna khan a fea, Pathianin nan zôk mai a tih ti lungngam a va saka.

¹⁷A kuang, “Chi viat no ro, ka pa Saula kutin nan siat thei viat no ni. Israelhai rêngin nangma om ni ta, keima ni thuai zela om ki ti, ti khom hi ka pa Saula hin a inhriat chian a ni,” a tia.



- ¹⁸Khanchu an ruaiin Rengpa makunga thu an thung tâka. Davida chu ramkâra a om maia, Jonathana kha a in tiang a kêr nôk tâka.
- ¹⁹Zif ata mi senkhathai kha Gibeaa Saula kuang an fea, “Davida chu kin rama Hores-a Judai ramchâr sim tiang pang Hakila tânga khin ar bîk chian.
- ²⁰Khasikin o rêngpa ama khi chel ni inuam a nia, khasikin kin rama zuangin lân, keini lei tho dân hrang chu rêng kuta ama lei inhlan kin ti,” an tia.
- ²¹Saula khan, “Rengpa’n sat nangni vur ri se, nangni hin lung nin ni inkham ok a ni.
- ²²Fe unglân, van fel nôk ual roi, a hnung va sui unglân, a hmutu khom kha van fel roi. Ama chu vârirlet takin thil a tho ngai ti mi’n an nin hril.
- ²³Khasikin ar bîkna ngai hmunhai infel ving unglân, keima kuang hong nôk ngêt unglân, khanchu nin kuang zuang ki ta, kha rama khan a la om ngânin chu Judai ram pumpuia zong hrang a ni khoma zong suak ki ti,” a tia.
- ²⁴Khanchu kha khan Saula fe mânin Zif rama an fe tâka. Davida le a mihai chu Judai ramchâra sim tiang Araba rama Maon ramchâra khan an oma.
- ²⁵Saula le a mihai kha Davida zong hrangin an fea, khannisianlân Davida’n a len hriata, khanchu Maon ramchâr lungpui tânga khan a lua, khatak khan a om tâka.
- ²⁶Saula le a mihai kha tâng kiangdang tiang an oma. Davida chu Saula chiin irhnot takin an tâna. Saula le a mihai khan Davida le a mihai kha chelhai hrangin an hong pan nâihai tâka.
- ²⁷Kha lai taka khan thanginthei mi a hong tunga, Saula kuang, “Irhnot takin zuang ro, Filistia mihaiin ei ram an hong idoi a ni,” a tia.
- ²⁸Khanchu Saula khan Davida irzûl kha a mâka, Filistia mihai doi hranga khan a fe tâka. Khasika khan kha hmun irhming kha Sela-hamalekot irsenna tâng an iti tâk a ni.
- ²⁹Davida chu khatak ata kha a rota, Engedi rama khan a fea, khatak khan a irbîk tâk a ni.



1 Samuela 24

Davidan Saula hringna a hoi

¹Saula hin Filistia mihai a va irzûlhai zoiin chu, “Davidan chu Engedi ramchâra a om,” ti an hrila.

²Khanchu Saula khan Israel mi murdihai lai ata sipai sa inthangsuak, mi sângthum a hruaihaia, sarza lêngna ngai lungpui bil tiang khan Davidan le a mihai zongin an fe tâka.

³Khan lam laia khan kêlbelra irkul, rôl omna hi a va dêna, Saula chu irngam viat hrangin a va lûta. Kha khan Davidan le a mihai kha rôl sîngrîl tiang khan an oma.

⁴Davidan mihai khan, Davidan kuang, “Irngai ro, Rengpa’n ni kuang ni râl kha nang pe ki ta, a chungan sa ni iti lam ang takin tho ni ti, a iti sîn kha a ni ta,” an tia. Khanchu Davidan kha a thoia, dâihrekin Saula puanhmo kha a va ât tana.

⁵Khannisianlân nakana chu Saula puanhmo a va i-ât khan Davidan lunggrîl a na pe oka.

⁶Khanchu a mihai kuang khan, “Rengpa sahriak irthu ki rêngpa chungan kut thâk loi hrangin Rengpa’n nin omtir ri se. Amana kha Rengpa sahriak irthutir a ni sikin a chungan kut ki thâk lina hrangin,” a tia.

⁷Khanchu Davidan kha thua khan a mihai a khapa, Saula va doi hrang kha phal pehai ta maka. Saula kha rôl ata kha a suaka, a fe nôk ta.

⁸Kha hnung chu Davidan khan a zuia, “Rengpa, ki rêngpa,” tiin Saula kha an sama. Saula a hor hein chu Davidan khan a hmâi irnêng sikin chubai a mûka.

⁹Davidan khan Saula kuang, “Irngai ro, Davidan ni siatna hrang a izong a nih itia mihaiin ni kuangan an insîr kha itho mo tak ni isôn ngai?”

¹⁰En ro, a vuan hin Rengpa’n rôl sînga kin kuta nang a inhlam lam hi ni mitin ni hmu theia, ki mi senkhathai khan chu, nang that hrangin an ni tîra, khannisian ki Rengpa sahriak irthutir ni nih sikin nang ki la ihoi a ni.



11Kha vai kha ni loiin, ka pa en ro, hi ni puanhmo ki ichôi chian a ni. Nang ki ithat thei a nia, khannisianlân, hi nêka hin ni puanhmo ki i-ât a ni. Hi hin thil saloi le tho'nchâina om mah ti le ki hringna la hrangin ni zong mai khomin lân, ni chung a ite sual ma ung ti hi inhre suak ngêt ro.

12Rengpa'n nangma le ei chungchâng chu rêl ri se, Rengpa khan ki chung a ni thil tho hin kuttum nan tuangtir ri se. Khannisian keima'n chu ni chung a kut zel tha viat no ning.

13Tianlaia thuvârin, 'Mi suala irthokin sual a hong suak ngai,' iti khom nin hriata. Khasika khan ni chung a kut tha no ning.

14 Israel rêng kha tu zonga zuang suak mo a ini? Tu ngân mo a irzûl? Ui thi sai, uihrikte kha!

15Rengpa khan rêl sianlân, tu khôk mo a dik loi ei ini infel ri se. Thu kha ngaitua sianlân, ni thop sianlân, ni kut ata ni sansuak ri se," a tia.

16David a'n Saula kuang hi thu hi a ti zoiin chu, Saula khan, "Nangma ni nina, ki nâipa David a?" a tia. Saula chu a chap ngûk ngûk tâka.

17Kha hnung chu David a kuang khan, "Nangma ni dika, keima ki idik loi a ni, nangin chu ki chung a thil sa ni thoa, keima'n chu thil saloi ni chung a ki itho a ni.

18A vuan hin ki chung a thil sa ni thozia ni inlangtir a ni; Rengpa'n ni kuta a ni pêk khoma ni ni ithat loina hin.

19Mi'n râl hmu sianlân, a la insua hrang ma ni? Khasikin a vuana ki chung a ni thil tho hin Rengpa'n thil sain nang thuan ri se.

20Irngai ro, atûn hin Israelhai rêng la ni ngêt ni ta, ni roirêlna hnuaia ram chu inding mai a ti, iti kin hriat suak ta.

21Khasikin ka pa insûngkua irhming irhmang phara a om loina hrangin ki hnunga ki'rchihai hôihai hrangin Rengpa irhmingin chonginkung ro," a tia.



²²Khaang khan Davida khan Saula kuang chong an kunga, kha hnung chu Saula kha a in tiang a kîr tâka, Davida le a mihai chu an irbîkna ngai hmuna khan an fe nôk ta.

1 Samuela 25

Samuela thina thu

¹Samuela chu a thi tâka, Israel mihai kha an irkoi bûma, an châ tâka. Kha hnung chu Ramah khuua a in kôla khan an phûm tâka.

Davida le Abigaili

Kha zoiin chu Davida chu Paran ramchâra a fe tâka.

²⁻³Maon khuua khan Kaleba irchia mi inkhat ar hming Nabala a oma, Karmel kho kôla khan hmun a neia, mi irchong tak a nia, kêlbelra sângthum le kêl sângkhat a neia. A dôngma Abigaili khom nupang bengvâr tak le satak a nia. Khannisianlân Nabala kha chu mi tiksia le lungrîl saloi tak a nia. Nabala khan Karmel tânga khan a kêlbelra mul a epa.

⁴Davida khan ramchâra irthokin Nabala'n kêlbelra mul a ep ti a len hriata.

⁵Khanchu Davida khan ruatharte sômkhat a tîra, ruathartehai kuang khan, “Karmel tânga fe unglân, Nabala kuang thengthai unglân, ki'rhmingin chubai hong mûk roi.

⁶Nabala kuang khan hiang hin ti roi, nangma chung a le ni insûngkuahai chung a le ni inei murdi chung a irtharngamna om ri se.

⁷Ni kêlbelra mul epin ni om iti ki len hriata, ni kêlbelra enkoltuhai kha ki kuang hin an om ngaia, an ningmurna ite sin ma ung, Karmel tânga an om sûng chu ite dok mahaia.

⁸Ni ruathartehai irdonhaiin lân, nang hril zêl an ti. Khasika khan ruathartehai hi lunginkhamhaiin lân; hruaithe nî sîn takin kin ihong a ni. Irngaihoi takin, ni inei lam ang takin ni suakhai le ni rualpa Davida hi lei pe ro. Davida'n a ti va ti roi,” a tia.

⁹Davida ruathartehai kha an va tungin chu, Davida irhmingin kha thu murdi kha Nabala kuang khan an hrila. Khanchu an nghâk tâka.



¹⁰Nabala khan Davida ruathartehai kha an samhaia, “Davida kha tu mo a ini? Jesaia nâipa kha tu mo a ini? lan hre ngai ma ung. Atûn lai hin suak tamtak an puhai in ata rot an tam a ni.

¹¹Ki baihai, ki tuihai le ki belra mul eptuhai hranga ki sa that kha tuhai mo an ini ite khom ki inhriat phâk loihai hi ki ipêk hrang mo?” a tia.

¹²Davida ruathartehai kha an kîr nôka, Nabala ihril murdi kha Davida an hrila.

¹³Davida khan a mihai kuang khan, “Nin khandai vong chit roi,” a tia. Davida khomin a vonga, mi irzaminli vêlin an zuia, mi irzahni chu neinun nghâkin an oma.

¹⁴Nabala suak inkhatin, Nabala dôngma Abigaili kuang khan, “Irngai ro, Davida khan ramchâra irthokin ka pu chubai hong mûk hrangin mi a hong tîra, ama’n a lei hala.

¹⁵Nikhomsianlân kha mihai kha kin chung a sa oka, kin theimâk ite tho mahai, rama kin om laia hmunkhatin kin om kêra khan ite dok ual ma ung.

¹⁶Kêlbelra enkolin an kuang kin om sûng chu sûn le zân kin ta hrangin kul an ni ichang pe a ni.

¹⁷Khasikin imo ni itho hrang a satak ngaitua ro; kin pu chung a le a insûngkua murdihai chung a hin thil saloi a itung thei a ni. Ama lak hi lungrîl saloi, tûte ichongpui thei loi a ni,” a tia.

¹⁸Abigaili khan irhnot takin bai tiam irzahni le uain kok hni le kêlbelra ringa ir-em inhmin sai le bu inzêi her sôm her sari le, grep inhroi inchâr irzakhat le theipui bai hlûm irzahni a lâka, sakuartung an pêltira.

¹⁹Kha hnung chu a zui ruathartehai kuang khan, “Ki matona hin fe mai unglân, nangni hong zui ki ti,” a tia. Khannisianlân a pasal Nabala kha chu inhriil maka.

²⁰A sakuartung chung a chuangin mual le mual kêra a fe laiin Davida le a mihai kha a’rtongpuihaia.



²¹Davida khan a lungrîlin, “Hi pa neinun hi ramchâra hin a man boiin ki inrûk pe a ni hi te; thil sa kha thil saloiin a ni tuam tâka.

²²Nangtûk zîng khovâr mân, kha pa ta murdi laia pasal nâipang inkhat lua khom ki hôi pea ni’n chu Pathianin Davida hi a nuam nuamin ni lo ri se. Hi nêka na ual khomin ni lo ri se,” a ti tâka.

²³Khanchu Abigaili khan Davida a hmu’n chu, a sakuartung ata kha a chum zôi zela. Davida makunga khan irnêng sikin chubai a mûka.

²⁴Davida ke bula inbok pumin a kuang, “Keima’n ka pu, keima ngêtin pualoina chu pêl ki ti, irngaihoi takin nir ngai pe ro.

²⁵Irngaihoi takin mi chanlamboi Nabala kha ite bêin bê no ro, ar hming om lam ang chie hi a nia, Nabala an iti ang hin into a ni, keima ni suaknu lak hin ruatharte ni hong itîrhai kha lei hmu ma unga.

²⁶Khasikin atûn hin ka pu, Rengpa hringna le ni hring irhmingin ki iti a ni, Rengpa’n thisen insua loi hrang le ni kuta phuba la loi hrangin nang a siama, atûn hin ni râlhai le ni chung a thil saloi tho tum murdihai chu Nabala angin kuttum tuang ri sehai.

²⁷Khan irngaihoi takin ka pu, ni ta hranga thilpêk ki hong ichôi hi ni pom pe’n lân, ka pu ruathartehai hi pêk ni ri sehai.

²⁸Nang a zuinu tho’nchâina hi irngaihoi takin inza roh. Rengpakhan insûngkua det takin nan dingtir ngêt a ti. Rengpa irdoinahai ni doipui sikin, ni dam sûng kêrka chu nangma hin سوالna hmu hrang om no ni.

²⁹Nangma irzûl hrang le ni hringna irhmangtir hrangin mi hor thokhai khom sianlân, ni hringna chu Rengpa ni Pathianin nang hrung inzôk ri se. Ni râlhai hringna kha chu sâihlia sâihlûm kêpa fe angin fe a ti.

³⁰Rengpa’n ni chungchâng thu chu, a thil sa inkung murdi ni chung a tho tika Israelhai rêngin nang a siam tika chu,



³¹a bi om loia, thisen nin sua noa, phuba ni ilâk viat loi hi ni ta hrangin lungchuk loina mani, irsârna mani ite ni viat no ni. Rengpa'n ni chung a thil sa a tho tika khan irngaihoi takin nang a zuinu hi irnghil viat no ro," a tia.

³²David a khan Abigaili kuang khan, "A vuana ni lei don hranga nang a tirtu Rengpa Israelhai Pathian chu inpâkin om ri se.

³³Ni bengvârna kha satvurin om sianlân, thisen insua thei loi changna ata nin zôktu le keima kuta phuba la loia ni siamtu, nangma chu satvurin om roh.

³⁴Nangma khan ni lei don zel no'n lân chu, Rengpa Israelhai Pathian hring irhmingin ki iti a ni, nangtûk khovâr tena khan chu Nabala kha nâipang inkhat lua khom hôi pe viat no ning," a tia.

³⁵Kha hnung chu David a khan a thil hong chôî pehai kha a lâka, a kuang khan, "Irtharngam takin in tiang kîr nôk tan lân; ni hê ki lâka, ni ingên kha nang ki pom pe duah," a tia.

³⁶Abigaili chu Nabala kuang a hong fea, khanchu a ina khan, rêng hruaithe ang dôrin hruai a len thea, an rui ok sikin Nabala chu a rai a fân pe vura. Khasikin zîng khua a vâv mîka chu ite hril pe maka.

³⁷Kha hnung chu zîng tiang Nabala inrui kha a hong harin chu, a dôngma khan kha thu kha a hong hrila; a lungrîl an thing pe raka, a hnung zuak tâka.

³⁸Sûn sôm zoia chu Rengpa'n Nabala chung a kut a thîka, a thi tâka.

³⁹David a khan Nabala a thi ti a hon hriatin chu, "Nabala'n a ni hmusitna sikin Nabala chung a phuba a lâka, a suak hi thil saloi tho loiin a ni khaptu Rengpa chu inpâkin om ri se. Nabala thil saloi tho chu Rengpa'n ama chung a ngêt a insumpai pe a ni," a tia. Kha hnung chu David a khan Abigaili kha dôngmaa va biak hrangin mi a tîra.

⁴⁰David a zuihai khan Karmel tânga Abigaili kuang an va tungin chu, "David a khan a dôngma hranga nang hruai hrangin a ni hong itîr a ni," tiin an chongpuiin an biaka.



⁴¹Abigaili khan a hmâi leh irnêng sikin an boka, “Irngei roi, a zuinu ki nia, ka pu zuituhai ke irsûk hrangin ki irsiam chian a ni,” a tia.

⁴²Khanchu Abigaili chu a thoi hluta, sakuartung chung a chuanga, a dôngmate ringahai leh khan, Davida hong itîrhai kha an zuihaia, a dôngma a chang tâka.

⁴³Davida khan Jezreel-a mi Ahinoami a lei nei sa tâka, khanchu Abigaili leh khan a dôngma changin an omsuam tâka.

⁴⁴ Kha laitaka khan Saula'n a nâinu Mikali, Davida dôngma kha Galim kho mi Laisa nâipa Paltia a lei inluatir tâk a ni.

1 Samuela 26

Davidan Saula hringna a hoi pe nôk

¹ Zif mi senkhathaiin Gibea khuaa Saula kuang an fea, “Davida chu Judai ramchâr kôla Hakila tânga khan ar bîk chian a ni,” iti an va hrila.

²Khanchu Saula kha Israel mihai lai ata sipai inthang ngot mi sângthum hruaiin Zif ramchâra Davida zong hrangin a fe zel tâka.

³Saula khan Hakila tânga lampuia khan riakbuk a khuara. Davida chu ramchâra khan a om maia, Saula chu ama zongin ramchâra a hong ti an hriatin chu,

⁴a enirchik hrang mi a tîra, Saula a ihong ta tak a nih ti an hriat infel tâka.

⁵Kha hnung chu Davida kha a thoia, Saula riakbuk khôrna khan a fea, Davida khan Saula le a sipai hruaitu Nera nâipa Abnera zâlna kha irsin a siaa, Saula chu riakbuk sînga khan a zâla, a kôlvêla khan riakbuk an irfûktira.

⁶Kha hnung chu Davida khan Hit mi Ahimeleka le Joaba sangpa Abisaia kuang, “Tu mo keima kuanga Saula riakbuka hong hrang?,” a tia. (Joaba le Abisaia-hai nu chu Zeruii a ni.)

⁷Khanchu kha zâna khan Davida le Abisaia chu Saula riakbuka an fea. Saula chu riakbuk inlaina taka khan a lei zâla, a luthun tiang ufei kha irnênga a thun nguta. Abnera le sipaihai khan an lei hrunga.



⁸Abisaia khan Davida kuang, “A vuan hin Pathianin ni râl kha ni kuta nang a ipêk a ni, khasikin ufei leh hin irnêng la hong sun bê ta hi rong duah, voi hni chu sun no ning,” a tia.

⁹Khannisianlân Davida khan Abisaia kuang, “A chung a kut tha no ro, Rengpasahriak irthûtir chung a kut thâka tûte thiamchang om mahai,” a tia.

¹⁰Davida ngêt khan, “Rengpa hringna sâmin ki iti a ni, Rengpa khan Saula chung a kut tha a ti, thi pangaia thi nî mani, a ni no le irdoina fe a ta, thi a ti, ti kin hriat.

¹¹Rengpasahriak irthu chung a khan kut tha thei no chi ni! A ufei le a tuiûm kha chu lapai ei ta, khanchu fe ei ti,” a tia.

¹²Khanchu Davida khan Saula luthuna ufei le tuiûm kha a lâka, an fe tâk, tûte’n hmu mahai, tûte a har khom om mahai. Rengpa’n inmu irhnik takin an intirhai lai tak a ni sikin.

¹³Kha hnung chu Davida kha varâl dang tiang a fea, hla vita tâng inkhata khan a ngîra, ram hlatak a ni ta.

¹⁴Davida khan sipaihai le Abnera kha, “Abnera nin hriat thei mo?,” tiin ar dona. Abnera khan, “Pâi pumin, rêng inthangtu tu ngân mo ni ini kha?,” a tia.

¹⁵Davida khan Abnera kuang, “Abnera, Israelhai laia mi hâi tak mo ni mak che? Ithoa mo, ni pu rêng kha ni ihrung inzôk loi? Atûn hin rêng ni pu that hrangin tu ma ni riakbuka a zuang lût kha te.

¹⁶Abnera, ni sinthôna hlo ni isam a ni. Rengpa irhmingin ki iti a ni, Rengpa sahriak irthûtir ni pu kha ni hrung insa no sikin, thi zôi inruk ni ni. Reng luthuna ufei le tuiûm kha khôn mo a iom tâk, hong en ngân ta,” a tia.

¹⁷Saula khan Davida irhâi kha a hon hriata, “Nangma mo ni ini, ki nâipa Davida?,” a tia. Davida khan, “O, rêngpa ka pu, keima ki ni,” a tia.



¹⁸ Davida ngêt khan, “I tho hrangin mo ka pu ni suak hi ni ni’rzûl maia? I zât thil mo ki itho? I zât sual mo ki isin?”

¹⁹ rengpa ka pu, ki thu’nsîr hrang hi irngai ro, ni doi hranga ni lungrîl nan thortirtu kha Rengpa a ni’n chu, a kuanga thilinhlan kha pom sianlân; khannisianlân mihriam nâihai an ni’n chu Rengpa makunga khosâlin om ri se. Ama khan, Rengpa ram ata kha ram dang pathianhai vai chubai ki mûk theina hrangin ram kêra an ni irzûl a nia.

²⁰ Khasikin ki thisen chu Rengpa hmu phâk lolina ram dang irnênga luang no ri se. I lo hrang mo Israel rêng kha keima anga uihrikte that hrangin a ihong? I lo hrang mo varungtehai chel hrang anga tâng sîphai hin a hong irvâk hi?,” a tia.

²¹ Saula khan, “Thil ki itho inchâi a ni hi. Ki nâipa Davida hong kêr nôk ta ro. A vuan hin ki hringna ni ni hôi pe sikin, ite nang ti ta ngai no ning. Thil invêt tak ki lei itho tâk a ni, ki lei itho insual ok tâk a ni,” a tia.

²² Davida khan a sâma, “O rêngpa ni ufei, hin a om, ruatharte inkhat hong sianlân, hong la ri se.

²³ Rengpa khan, mi tin an felna le iamomna man chu a ipêk ngai a ni. A vuan hin Rengpa’n nangma hi ki kuta a ni pêka khannisianlân Rengpasahriak irthutu chung a hin ki kut ki ithâk nuam loi a ni.

²⁴ A vuana ni hringna nang ki irngaiinhlu pe ang hin, Rengpa khan ki hringna ni’rngaiinhlu pe sianlân, lungzîngna tinrênga hin ni saninzôk ri se,” a tia.

²⁵ Saula khan Davida kuang, “Ki nâipa Davida, Pathianin sat nang vur ri se. Ni sinthôna kipa manchangsua mai ni ti,” a tia. Khanchu Davida kha a fe tâka, Saula chu a in tiang a kêr nôk tâka.

1 Samuela 27

Filistia mihai laia Davida a om

¹ Davida khan a lungrîlin, “Itik nî mani chu Saula kuta hin ki la ithi ngêt hrang chu ni a ti; khasikin Filistia mihai kuanga laizâm tho ti no hi chu a sa



dang om no ni. Khanchu Saula khan Israel ram pumpuia a ni zong hi a beidong pe ta a ti. Khanchu a kut ata zôk ki ti,” a tia.

²Khanchu Davida le a kuanga om irzaruk omhai kha Maoka nâipa, Gath-a rêng Akisa kuang an fe tâka.

³Davida kha ama le a mihai, an in sêngkuahai leh, Davida khom a dôngmahai a hruaia, Jezreel mi Ahinoami le Nabala dôngma Karmel tânga mi Abigaili hai leh Gath khuaa Akisa kuang an om tâka.

⁴Davida chu Gath khuaa laizâm a tho ti Saula'n a len hriatin chu, zong tum ta maka.

⁵Davida khan Akisa kuang, “Lung nin khamin lân, ni ram sênga khua inkhata hin om hmun ni pe'n lân, khatak khan lei om ta rong, ni suak hi i lo hrangin mo rêng khuaa nangma kuang a iom mai hrang?,” a tia.

⁶Khanchu Akisa khan Ziklag khua kha a pêka, khasika khan Ziklag kha atûn ten hin Judai ram rêng hai ta a ini mai a ni ta.

⁷Davida kha Filistia-hai rama khan kum khat tha minli a oma.

⁸Kha sênga khan Davida le a mihai kha an fea, kha rama khan tian rengata lei om tâk Gesur mihai, Girzi mihaiin, Amalek mihai an rûna. An ram kha Aigupta dên rakin Sur khua dênin an irûn a ni.

⁹Nupang pasal an rêngin an ithathai a nia, kêlbelrahai, sialhai, sakuartunghai, saringseihai, an sil le kaihahi an lâk pehaia; khanchu a hong kîr nôka, Akisa kuang a fea.

¹⁰Akisa khan, “A vuan hin kho tiang mo ni irûn?” a tia. Davida khan, “Juda sim ramhai, Jeramil-hai ram, Ken mihai omna ram,” a iti pe a ni.

¹¹Davida khan nupang pasal a rêngin a thathaia, Gath khuaa a fea, ama le a mihai thiltho hon sîr hrang kha a ihôi ngai loi a ni.

¹²Khannisianlân, Akisa khan Davida thu'sîr kha a pompuia, “Ama mi Israelhai khan an ngam sabaka. Khasikin a hring kongkâr chu ki sin a itho mai hrang a ni,” a tia.



1 Samuela 28

¹Zoro sôt ian hnunga chu Filistia mihai khan an sipaihai kha Israel mihai doi hrangin an irbuka. Akisa khan Davida kuang, “Nangma le ni mihai kha keima ni thopin nin idoi hrang a nih ti nin hriat kha te na,” a tia.

²Davida khan Akisa kuang, “O kin hriat, ni suak thil tho thei dân hi nangma ngêtin hmu ni ti,” a tia. Akisa khan Davida kuang, “A sa! a ni hrungtu det takin nang siam ki ti,” a tia.

Saula'n tasân theihai a hmang

³Samuela kha a thi tâka, Israelhaiin an châ tâka. Ama omna khua Ramah khuaa khan an phûm ta. Saula khan tasân theihai le dôl theihai kha a ram ata an hnotsuakhai tâka.

⁴Filistia mihai an irbûma, Sunam khuaa khan omhmun an khuara. Saula khan, Israelhai a bûma, Gilbo khuaa omhmun an khuara.

⁵Saula'n Filistia sipaihai a hmu'n chu a chia, ar lo an thing tâka.

⁶Khanchu Rengpa a chongpuia. Khannisianlân, Rengpa khan irmangin mani, Urim le Thumimin mani, deipu khomin don ual ta mahaia.

⁷Kha hnung chu Saula khan a mi lianhai kuang, “Tasân thei nupang ni zong pe unglân, a kuang fe ki ta, lei chongpui rong,” a tia. Anni khan a kuang, “Endor khuaa tasân thei nupang inkhat a oma,” an tia.

⁸Khanchu Saula kha irvo danglamin a'rvoa, puan danglam a sila, zâna khan mi dang inhni hruaiin nupangnu kuang khan an fe tâka. Khanchu ramilhli, tasân theinu kuang khan, “Tâ ni sân pe'n lân, ni kuanga a'rhming ki isâm kha ni koi pe ro,” a tia.

⁹Nupangnu khan a kuang, “Irgai ro, Saula thiltho kha nin hriata, a ram sînga tasân theihai le dôl theihai kha an hnot suakhaia, i lo hrang mo ki thina hrangin châng ni ikam hrang?” a tia.

¹⁰Kha hnung chu Saula'n chong an kunga, “Rengpa irhmingin ki iti a ni, hi thil sika hin ni chung a kuttum tung no ni,” a tia.



¹¹Khanchu nupangnu khan, “Tu mo nang ki ikoi suak pe hrang?,” a tia. Saula khan, “Samuela ni koi suak pe ro,” a tia.

¹²Nupangnu khan Samuela a hong hmu’n chu a khêk raka, Saula kuang, “Itho mo ni ni huanga, rêng Saula kêng ni ni duah,” a tia.

¹³Reng khan nupangnu kuang khan, “Chi no ro, imo ni hmu?” a tia. Nupangnu khan Saula kuang, “Irnêng ata pathian nia irhoi tak a hong suak ki hmu,” a tia.

¹⁴A kuang khan, “Itin mo a om?” a tia. Nupangnu khan, “Tarpa hi a hong suaka, songkol irfual an nghâka,” a tia. Kha hnung chu Saula khan Samuela a nih ti an hriata, a hmâi irnêng sikin chubai a mûka.

¹⁵Samuela khan Saula kuang, “Itho mo hianga ni ni inbuai? Itho mo zuang nôk hrangin ni ni dona?,” a tia. Saula khan, “Ki milung a zîng tak taka. Filistia mihaiin an ni doia, Pathian lakin hnung a ni songsana, deipu’n mani, irmangin mani lua khomin ni sâm maka; khasika khan ki sin hrang nin hril hrangin nang ki ikoi a ni,” a tia.

¹⁶Samuela khan, “Khaanga Rengpa’n hnung nang a songsana ni râi a hong ni tah iti inhre pumin itho mo hi thu hi ni ni irdon?”

¹⁷Keima hmangin a insîr ang khan ni chung a itho tâk a ni hi. Rengpa khan ni kut ata ram kha nang a sutpai tâka, Davida kha a ipêk tâk a ni.

¹⁸Rengpa thupêk zôm loia, Amalek-hai chung a ningmurna natinsat tak ang a khan zoi mak chea. Khasika khan atûn hin ni chung a hi thil hi a itho tâk a ni.

¹⁹Kha vai kha ni loiin Rengpa khan nangma le Israelhai khom kha Filistia mihai kuta pe a ta, nangtûk hin nangma le ni nâipanghai chu keima kuang hong ta an ti, Rengpa khan Israel sipaihai khom kha Filistia mihai kuta pe a ti,” a tia.

²⁰Kha hnung chu Samuela thu’nsîr sikin Saula chu a chi tâka, voikhat zelin irnênga an rîl raka, a zâl rak tâka. Sûn le zân ite a fâk viat ta no sikin irnak irvun nei ta maka.



²¹Khan nupangnu kha Saula kuang a fea, a bei a dong ti an hriata, khanchu a kuang, “Irngai ro, ka pu nang a zuinu hin ni iti ang ki zôma, ki thi le thi tiin ki kuanga ni thu’nsîr kha ki ipom a ni.

²²Atûn hin irngaihoi takin nangma khomin ni suaknu hi a thu irngai pe ro duah. Bu a chînte nang siam pe ki ta, khanchu ni kîr nôk tika irnak ni nei theina hrangin ne ngêt ro,” a tia.

²³Khannisianlân Saula khan nuam maka, “Ite ne no ning,” a tia. Khannisianlân a mi lianhai khom khan fâk nêk zong hrangin an inthêm maia, an he a lâk tâka, khanchu irnêng ata kha a thoia, zâlmuna khan a toia.

²⁴Nupangnu khan sehrâte a mar tak kha a lâka, a thata, kha hnung chu baidi kha a lâka, an hmeta, chol pol loi bai hriamin a sina.

²⁵Saula le a mi lianhai makunga khan khalâi a va doa, an nêk tâka, kha hnung chu a thoia, kha zân zela khan a fe tâka.

1 Samuela 29

Filistia mihaiin Davida an hnôl

¹Filistia mihai le an sipaihai chu Afek-ah an irbûm vinga; Israel mihai khan Jezreel phâia tuipui kôla omhmun an khuara.

²Filistia-hai rêng ringahai kha an sipai irzakhat vêlin, sâng têlin an irkôi zun zuna, Davida le a mihai chu Akisa leh inhnung an intaa.

³Filistia sipai hruaituhai khan an hmua, “Hi Hebraihai hin imo an itho?,” an tia. Akisa khan, Filistia hruaituhai kuang khan, “Ama hi Davida, Israelhai rêng Saula mi lian a ni, zoro sôtak ki kuang a om tâka. Ki kuang a hor bei ata atûn ten khom hin a sualna ite ki la ihmu loi a ni,” a tia.

⁴Khannisianlân, Filistia hruaituhai kha Akisa chung a an ning an mura, a kuang, “Kha mi kha chu khua ni ipêkna khan tîrpai nôk ta ro, irdoina hmuna keini kôla chu hong no ri se. khano’nchu irdoina hmuna khan ei râlhai tiang kop duaina a ti, a pu le irngei nôkna hrangin ei mihriamhai lu lana a ti.

⁵Hi Davida hi ni ma mo, nupanghaiin lâm puma ‘Saula’n a sâng sângin a thata, Davida’n a sâng a sâng,’ tia hla an isak kha?,” a tia.



⁶Kha hnung chu Akisa khan Davida kha a koia, a kuang, “Israelhai Pathian hringna irhmingin ki iti a ni, mi diktak ni nia, sipaihai laia ki kuang ni fea, irdoina ni ni doipuia, ki inuam a ni. Ki kuang ni zuang nî ata, a vuan sùn ten hin ni chung a ite saloina la hmu viat ma ung. Khannisian rêng danghai hin nang an ipom loi a ni.

⁷Khasikin Filistia-haiin an milung a chuk theina hrangin kîr nôkin lân, milungchuk takin fe ro,” a tia.

⁸Davida khan Akisa kuang, “Ka pu imo ki itho insual tâk? ni iti lam angin, ni kuang ki om sùng kârka ki tho insualna ni hmu no’n te, i lo hrangin mo ka pu le rêng râlhai kha doi loiin ki ikîr nôk hrang?,” a tia.

⁹Akisa’n Davida kuang, “A dik, ki mithmua khan Pathian vântirtôn ang dôrin ni isa a ni. Khannisianlân Filistia rêng danghaiin, ‘Irdoina hmuna kin kuang hong sa no ri se,’ an tia.

¹⁰Khasika khan ni kuanga hong sa ni pu Saula zuituhai leh hin zînga thoi unglân, khua a vâ le nin irot hrang a ni,” a tia.

¹¹Khanchu Davida le a mihai kha Filistia rama kîr nôk hrangin zîng taka an suaka, Filistia mihai chu Jezreel-a an fe tâka.

1 Samuela 30

Amalek mihai leh irdoina thu

¹Sùn thum ni tena chu Davida le a mihai Ziklag an tungin chu, Amalek-haiin, Judai sim tiang le Ziklag khua kha an lei rûn tâka. Ziklag khua kha an hâla.

²Nupanghai le kha khuaa om murdihai kha a lian a chîn an chelhaia, tûte that loiin an hruaihaia, an rotpuihai ta.

³Davida le a mihaiin kho sùng an va tungin chu, a lei kâng inhek zoi tâka; an dôngmahai, an nâipasalhai, an nâinuhai chu an lei hruaipaihai tâka.

⁴Kha hnung chu Davida le a kuanga omhai chu an chap tâka, sôl takin an oma.

⁵ Davida dôngmahai ruai Ahinoami le Abigaili khom an ihruaihai sa a ni.



⁶Davida milung a zîng pe sabaka, a mihai le an nâihai an inchân zoi tâk sikin, an lungrîl a na hraia, ama kha lung leh dêng that hrangin an insî sikin, khannisianlân Davida kha Pathian Rengpa khan milung ngar ar saka.

⁷Davida khan Ahimeleka nâipa ochai Abiathara kuang khan, “Ochai songkol ni va la pe ro,” a tia. Abiathara khan ochai songkol kha a va lâk pea.

⁸Davida khan Rengpaa chongpuia, “A ni rûntuhai hi ki irzûl hrang mo? Irzûl inlân la phahai ning mo,” tiin ar dona. Ama khan, “Irzûl ro, la phahai ngêt ni ti, an ichelhai khom saninzôkhai ving ni ti,” a tia.

⁹Khanchu Davida le a mi irzarukhai kha an irthoka, Besor vadung kha an va tunga, kha tena khan a sen a zârhai kha an va phâkhaia.

¹⁰Davida le a mi irzaminlihai khan chu an irzûlhai maia, mi irzahnihai kha chu an sôl hrai tâk sikin Besor vadung kha irkân thei ta mahaia, khatak khan an lei iom tâk a ni.

¹¹Davida kuanga la omhai khan rama hin Aigupta nâipang hi an va hmua, Davida kuang an hong hruaia, bai le tui in hrang an pêka.

¹²Theipui chârhai le Grep hroi irku hni an pêka. Khahai kha a fâk zoiin chu a hong har suak nôka, sîn thum le zân thum chu bu le tui in loi a nia.

¹³Khanchu Davida khan a kuang, “Tu mo ni ini? Khôtaka irthoka hong mo ni ini?,” a tia. Ama khan, “Aigupta mi ki nia, Amalek mi suak ki ni. Sîn thum a ni ta, ki dam no sikin, ka pu’n a ni mâk raka.

¹⁴Judai sim tiang pang ram Keret mihai ram kha kin rûna, Kaleba irchihai ram khom kin rûna, Ziklag khua khom kin hâl,” a tia.

¹⁵Davida khan a kuang, “Khahai omna khan ni hruai theiin mo?,” a tia. Ama khan, “Ni that loi hrang le ka pu kuanga ni pe ta loi hrangin Pathian irhming sâmin keima kuang chonginkungin lân, khanchu annihai omna khan nang hruai ki ti,” a tia.



¹⁶Khanchu Davida kha anni kuang a hruai tâka. Khan, a rûntuhai khan Filistia rama le Judai rama râllâk tamtak an lâk sikin, hruai an inthea, an fâkin an ina, an le'rthek bet buta.

¹⁷Khanchu Davida khan zîng khua a vâu u uai ata khohloi dênin annihai kha a doihaia, ruatharte irzaminli le saringsei chungu chuanguin lâizâm thohai bana chu tûte a zôk zel om mahaia.

¹⁸Davida khan Amalek mihai an ichelhai kha an zôkhaia, an thil lâkhai khom a lâkpai pehaia, a dôngmahai ruai khom kha a saninzôkhaia.

¹⁹Ite dok viat maka, Davida khan a mihai, a nâihai, murdi le râllâk thil, Amalek-hai lei ilâkhai kha a ilâk kîr nôk ving a ni.

²⁰Davida khan kêlbelra pâlhai le sa pâl murdi khom kha a lâka, a mihaiin a maton tiang an hôla, "Hihai hi Davida râllâkhai an ni," an tia.

²¹Kha hnung chu Davida kha, an sôl hrai sika a kuanga fe thei ta loia, Besor vadunga lei om tâkhai mi irzahnihai kuang a fea. Anni khan Davida le a kuanga omhai don hrangin an lei hongu, Davida'n an kuang a va tungin chu, lôm takin chubai a mûkhaia.

²²Khannisian Davida kuanga fehài laia mi senkhat mi chanlamboi, mi tiksiahai khan, "Eini kuanga an fe no sikin ei râllâk thilhai chu semhai no ih. An dôngmahai le an nâihai chu hruaihai sian fe ri sehai," an tia.

²³Khannisianlân, Davida'n, "Urênghaio, Rengpa ni ipêk chungu hin ite tho thei no chin ni. Ama'n a ni hrung inzôka, a ni rûntuhai kha ei kut chungu a ni ipêk a ni.

²⁴Khasikin tûte'n nin thu kha pom no nihai. Irdoina zu fehài dongtum ang dên kha, neinun enkola lei omhai khomin an idong hrang a ni," a tia.

²⁵Khanchu Davida'n kha dân kha a siam tâka, kha rengata atûn ten hin Israelhaiin an la hong izui mai a ni.



²⁶ Davida khan Ziklag khua a tungin chu, râlâk thil senkhat kha Juda hruaitu, a rualhai kuang a thona, “Hi hi, Rengpa râlhai ata râlâk, lômman hrangin nangni ki ithon a ni,” a tia.

²⁷ Bethel-a omhai, Judai ram sim tiang panga Ramah khuaa omhai, Jatir khuaa omhai,

²⁸ Aroer khuaa omhai, Sifmot-ah omhai, Estemoa omhai,

²⁹ Rakal-ah omhai, Jerameel khuaa omhai, Ken mi khuaa omhai,

³⁰ Horma khuaa omhai, Barosan-ah omhai, Athak-ah omhai,

³¹ le Hebrona omhai kuang a thona. Ama le a mihai chênginbualna ngai hmun murdia om Juda hruaitu a rualhai kuang a ithon a ni.

1 Samuela 31

Saula le a nâipasalhai thina thu

(1 Tsn 10.1-12)

¹ Filistia mihaiin Israelhai chu Gilbo tânga khan an doia, kha tânga khan Israel mi tamtak thatin an oma; rêng Saula le a nâipasalhai le mi danghai kha Filistia mihai ata lâizâm an tho tâka.

² Khannisianlân Filistia mihai khan Saula le a nâipasalhai an irzûlhai thala, an phaa, Saula nâipasalhai kha Jonathana le Abinadaba le Malkisua kha an thata.

³ Khan, Saula kha an doi natinsat tak taka, thalin a tok tâka, a sate'n a popa.

⁴ A râl tukfam chôitu ruatharte kuang khan, “Ni khandai phôiin lân, ni that ro; khano'nchu hi sertan loihai hi hong an ta, ni that an ta, ki chung a irpâkna an ti,” a tia. Khannisianlân râl tukfam chôitu khan that hrangin ngam maka. khanchu Saula khan a khandai kha a lâka, ar sun that ta.

⁵ A râl tukfam chôitu khan Saula a thi ti an hriatin chu, ama khom kha a bingin ar sun that sa tâka, an ruaiin an thi ta.

⁶ Khaang khan Saula le a nâipasal inthumhai le a râl tukfam chôitu kha an ithi a ni. Kha nî khan Saula mihai murdi an thi ving ta a ni.



⁷Israel mi Jezreel phâi varâl tianga omhai le Jordan râl nisua tianga omhaiin, Israel sipaihai lâizâm an thoa, Saula le a nâipasalhai an thi ti an inhriatin chu lâizâm an tho tâka. Khanchu Filistia-haiin an khua an va ilua tâk a ni.

⁸Irdoi nî zîng nôka chu Filistia-haiin an râl thathai inmok hrangin an va fe'n chu Saula le a nâipasal inthum, Gilbo tânga lei thi, ruak zâl kha an va hmua.

⁹Saula lu kha an tana, a râltukfam kha an khekpai pea, kha thurchi kha an millim biakna ina le an mihai kuang inpuang hrangin Filistia rama khan mi an tîrhaia.

¹⁰Khanchu Saula râltukfamhai kha Astoret biak ina an siaa, a ruak kha Beth-san khopui kul banga an târa.

¹¹Jabes Gilead-a omhaiin Filistia mihaiin Saula an tho dân chungchâng thu kha an inhriatin chu,

¹²mi murdi an irthoka, zân sôtin an fea, Saula ruak le a nâipasalhai ruak kha Beth-san kul bang ata kha an lâka, khanchu Jabes khopuia an hong tungpuia, an hâl tâka.

¹³Kha hnung chu an ruhai kha an irkhôma, Jabes hmuna Tamarik thing hnuaia an phûma, khanchu sîn sari bu an nghei tâka.



2 Samuela

2 Samuela 1

Davidan Saula thi thu an hriat

¹Khan, Saula thi zoi hnungin Davida kha Amalek-hai a rûn zoiin a hong kîr nôka, Ziklag khuaa khan sîn hni a om tâka.

²Sîn thum nî khan chu ruatharte inkhat Saula riakbuk ata irthokin a zuang tunga. A beidong inlangtirna hrangin a puanhai an pot thêra, a lua pil ar thua. Ama kha Davida kuang a fea, irnênga inbokin chubai a mûka.

³Davidan a kuang, “Kho tianga irthoka zuang mo ni ini?,” a tia. Ama khan, “Israelhai omhmun ata zuang ki ni,” a tia.

⁴Davidan khan a kuang, “Itin mo thil a iom nin hril ro,” a tia. Ama khan a sâma, “Irdoina hmun ata ei sipaihai kha laizâm an thoa, ei mihai tamtak an thata, Saula le a nâipa Jonathana khom an thi sa tâk,” a tia.

⁵Davidan khan a hriltu ruathartepa kuang, “Itin mo Saula le a nâipa Jonathana an thi ti ni inhriat thei?,” a tia.

⁶Ruatharte khan, “Gilbo tânga khan ki lei va om ropa, Saula kha ufei irhnêla ngîrin ki hmua, râlhai tâlihai le sakor chung chuang mihai lakin an hong nâi tâk sikin.

⁷Khanchu a hnung tiang ar heiin ki hmua, a ni koia ‘Imo ki itho thei hrang,’ ki tia.

⁸Khanchu ki kuang, tu mo ni ini? a ni tia. Keima’n, ‘Amalek mi ki ni,’ ki tia.

⁹Kha hnung chu aman ki kuang, ‘Hin hongin lân, ni that ro, ki sâbe tuang a na hrai ta, ki ithi ngêt hrang a ni ta,’ a tia.

¹⁰Khanchu a kôla ki fea, an rîlin chu a ithi ngêt hrang a nih ti kin hriat sikin, ki ithat tâk a ni. Kha hnung chu a lu rênglukhum le a bâna bâla kha ki lâka, ka pu, hin ni kuang ki zuang ichôi a ni,” a tia.

¹¹Kha hnung chu Davida hin beidongin a sil le kaihai an potthêr a ni; khang khan a kôla om murdihaiin an thoa.



¹²Khanchu Saula le a nâipa Jonathana leRengpa mihai kha khandaia that an ni tâk sikin, Israel mihaiin an sîna, an châ tâka. Khohloi dênin bu an ngheia.

¹³Davida khan thurchi zuang hriltu ruatharte kuang khan, “Kho tianga mi mo ni ini?” a tia. Ama khan, “Amalek mi ki nia, khannisian nin rama om ki ni,” a tia.

¹⁴Davida khan a kuang, “Rengpa sahriak irthûtir irhmangtir hrang chung a kut ni thâka, itina chi loi ngân mo ni ini?,” a tia.

¹⁵Khanchu Davida khan a mi inkhat a koia, “Fe’n lân va that ro,” a tia. Amalek mi kha a va tuk that paia.

¹⁶Davida khan Amalek mi kuang khan, “Ni thisen chu nangma lu chung a om ri se. Ni bâi ngeiinRengpa sahriak irthutir kha ki ithat tiin nin puang tâk sikin,” a tia.

Davida’n Saula le Jonathana a sînhai

¹⁷Davida khan Saula le a nâipa Jonathana kha hiang hin a châhaia.

¹⁸ (Hi hla hi Juda irchihai irchuhai hrangin thu a pêka; khanchu hi hla hi Jasara lekhabua chuang a ni.)

¹⁹“Israel tânghaia khan ei hruaituhai an thi ta na! Ei sipai hrâthai an inrîl zoi ta!

²⁰Gath khuaa khan insîr no unglân, Askelon kotsuuhai khan inpuang no roi; khano’nchu Filistia nâinuhai lôm an ta, sertan loi nâinuhai raifânin pâi an ti.

²¹Gilbo tâng hai khan irdo le rua tho no sian, Loia khom ite vâng no ri se! kha hmuna mi lian pho kha mualphoi takin paiin a oma, Saula pho ngei kha sahriak pol ta loiin a iom a ni.

²²An ithathai thisena irthok le, mi lian thala irthokin Jonathana thal kha kîr ngai maka, Saula khandai kha chanlamboiin kîr ngai ma.

²³Saula le Jonathana chu inditomin an sa vang na! An hring khomin, an thi khomin, irsen ngai mahai. Irmupuihai nêkin an hrât uala, kâmkeibakneihai nêkin an ihrât ual a ni.



²⁴Nangni Israel nâinuhaio, Saula kha châ roi, puan sen satakhai leh nangni a'rvotira, rângachak le lungluhaia nangni irvotu kha.

²⁵Sipai hrâthai an inrîla, irdoina khan an thi tâk e; Jonathana chu tâng chungga khan a thi ta.

²⁶Ki'rzirpuipa Jonathana, ni chungthua hin ki bei a idong a ni; ki ta hrangin ni hlu vang na! Lung ni ni thung dân hi ar khêla, nupanghai lungthungna a ikhêl a ni.

²⁷Sipai hrâthai an inrîla, An hriamhrehai khom ar hmang zoi tâk e," tiin.

2 Samuela 2

Judahai rêngin Davida a om

¹ Kha zoiin chu Davida khan Rengpa kuang, "Judai ram khopuihaia khan ki hong ife hrang mo?" tiin Rengpa a chongpuia. Rengpa khan a kuang, "Hong fe ro," a tia. Davida khan, "Tu khuaa mo ki hong ife hrang?," a tia. Rengpa khan, "Hebrona" a tia.

²Khanchu Davida chu Hebrona a fea, a dôngmahai ruai Jezreel mi Ahinoami le Karmel mi Nabala dôngma Abigaili-hai kha a hruaihaia.

³Davida khan a mihai leh a insûngkuahai khom kha a hruaihai saa, Hebron kôlvêla khuahai khan an om tâka.

⁴ Kha hnung chu Judai rama mihai kha Hebrona an hongga, Juda mihai chungga rêng hrangin Davida kha sahriak an irthûtira. Davida'n Saula phûmtuhai chu Jabes Gilead mihai an nih ti an hriatin chu,

⁵an kuang khan Davida'n mi a tîra, an kuang, "Nin rêng Saula chungga nin iamomzia inlangtirin nin lei phûm sikin Rengpa khan sat nangni vur ri se.

⁶Rengpa khan nin chungga lungkhamna le thutak inlang sianlân; hi thil nin tho sika hin kei khomin nin chungga satakin tho ki ti.

⁷Hrât tak le hâitakin om roi! Nin rêng Saula chu a thi tâka, Juda irchihai khan an rêng hrangin sahriak an ni irthutir tâk a ni," a tia.

Israel rêng hrangin Isbosetha an phun



⁸Nera nâipa Abnera, Saula sipaihai hruaitu kha Saula nâipa Isboetha leh khan Jordan râl Mahanaim hmuna laizâm an thoa.

⁹Kha khan Abnera khan Isboetha kha Gilead, Asera Jezreel, Efraima le Benjamina ramhai chungu, a ni Israel ram pumpui chungu rêngin an siam tâka.

¹⁰Saula nâipa Isboetha kha Israel chungu an lal phut laia khan kum sômminli mi a nia, kum hni a inlal a ni. Khannisianlân Juda mihaiin Davida chungu iamomin an om maia,

¹¹Davida'n Hebron khuua khan Juda irchihai chungu kum sari le tha ruk roi a irêl a ni.

Juda le Israel irdoina

¹²Isboetha mi lianhai le Abnera kha Mahanaim rengata suakin Gibeona an fea.

¹³Zeruii nâipa dîla khan an irtongpuia; khanchu senkhathai kha dîl râl kiang tiang panga an toia, senkhathai nôk kha kiang dang tiang an toia,

¹⁴Abnera khan Joaba kuang, “Hi tiang le hi tiang ruathartehai inthanghai ei ta, irsual ri sehai,” a tia. Joaba khan, “A sa,” a tia.

¹⁵Khanchu an sîn nikhua a hong tung tena chu, Benjamina irchi, Isboetha tianga kop mi sômhleihni le Davida mi sômhleihnihai kha an irsuala.

¹⁶An irotpuihai leh khan an lua an irchela, an i-âthai kha an kuanga khandai leh an irsuna, khanchu mi sômhni minlihai kha an rêngin an inrîl vinga, an thi tâka. Khasika khan Gibeon hmun kha Helkat-Hazurim an ti tâka.

¹⁷Kha hnung chu, kha nî zela khan irdoipui a suak tâka; Abnera le Israel mihai kha Davida mihai ata khan an dok tâka.

¹⁸Kha hmuna khan Zeruii nâipasalhai inthum Joaba, Abisaia le Asahela hai an oma. Asahela kha sazuk ang dôra ngalhrât a nia.

¹⁹Khanchu Asahela khan Abnera kha a'rzûla; Abnera irzûl kha vei tiang mani, chang tiang mani pêt viat loiin a'rzûl thala



- ²⁰Abnera chu a hong irheia, “Nangma kêng hi ni inina, Asahela?” a hong tia. Asahela khan a sâma, “O keima ki ni,” a tia.
- ²¹Abnera khan a kuang, “Ni’rzûl ta no ro, ni chang tiang mani, ni vei tiang mani pêtin lân, ruatharte inkhat kha chelin lân, a râtukfam irvonahai kha lapai pe ro,” a tia. Khannisianlân, Asahela khan Abnera kha a’rzûl maia.
- ²²A thar vangin Abnera khan Asahela kuang, “Ni’rzûl ta no ro, i lo hrang mo nang ki isun that hrang? Itin mo ni upa Joaba hmêl ki ihmu ngam ta hrang?” a ti nôka.
- ²³Khannisianlân, Asahela khan pêt nuam ual maka, khanchu Abnera khan a ufei hmor leh khan a phînga a suna, ufei khan a hnung tiang ar hlet thala, Asahela chu irnênga an rîla, a thi tâka. Khan, Asahela inrîlna a thina hmun hong tunghai kai chu an irngama, an ngîr chian ta.
- ²⁴Khannisianlân Joaba le Abisaia khan Abnera chu an irzûl maia; Gibeon ramchâr lampuia Gia nisua tiang Amma tâng an tungin chu misa a tâk tâka.
- ²⁵Benjamina irchihai kha Abnera kuang an irbûma, pâl khatin an irsiama, tâng sîpa khan sirsan an va lâka.
- ²⁶Kha hnung chu Abnera khan Joaba a koia, “Kumtuangin ei irdoi mai hrang ma ni ta? A mongna chu beidong ngaisiat om tak a ini hrang iti hi nin hriat mo? I dôra sôt mo ni mihai khan an urêng hai irzûl an imong hrang iti ni ihril ta hrang?” a tia.
- ²⁷Joaba khan, “Pathian hringna irhmingin ki iti a ni, ite ti no’n lân chu, nangtûk zîng dênin ki mihaiin nangni an irzûl hrang a ni,” a tia.
- ²⁸Kha hnung chu Joaba khan bekul a hong tuma, mipuihai an inding chiana, Israel mihai kha irzûl ta mahaia; irdoi nôk ta mahaia.
- ²⁹Abnera le a mihai kha Jordan phâi an hroa, zân sôt an fea; Jordan dung an irkâna, zîng nôka sîn sôtin an fea, Mahanaim an tung nôk tâka.
- ³⁰Joaba kha Abnera irzûl a kîr nôkin chu, a mihai a bûmhai vinga, mi sôm hleikuak le Asahela chu irkip ta loiin a om ti an hmu suaka.



³¹ Davida mihai khan Benjamina nama irthokin Abnera mihai kha irzathum sômhni an thata.

³² Joaba le a mihai khan Asahela ruak kha an chôia, Bethlehem-a a pa tâna an phûma. Kha hnung chu Joaba le a mihai kha zân sôtin an fea, khua a vârin chu Hebron an tung nôk tâka.

2 Samuela 3

¹ Khan Saula insûngkua thophai le Davida thophai kha zoro sôtak an irdoia. Davida kha a hong hrât ual uala, Saula insûngkuahai kha an dok tîr tîra.

Davida nâipasalhai

² Davida khan Hebron khuaa khan nâipasal ruk a neia; a ulian dônin hihai hi an ni. Amnona, a nu chu Jezreel mi Ahinoami kha a ni.

³ Kileaba, a nu chu Karmel mi Nabala dôngma Abigaili kha a ni. Absaloma, a nu chu Gesur rêng Talmaia nâinu Maaki a ni;

⁴ Adonija, a nu chu Hagithi a nia. Sefatia, a nu chu Abitali a nia.

⁵ Ithreama, a nu chu Egli a ni. Hihai hi Davida nâi Hebrona suakhai chu an ni.

Davida tiang Abnera a kop

⁶ Saula in sûngkua tianga thophai le Davida mihai an irdoi sûnga khan Abnera kha Saula thohtuhai laia khan thu a hong nei u uala.

⁷ Sûn khat chu Isboetha khan Abnera kuang, “I lo hrangin mo ka pa Saula lâksîrnu Rizpii, Aii nâinu kha ni izâlpui?” a tia.

⁸ Isboetha thuhiril khan Abnera lungrîl a dêng pe hraia, a ning an mur pe oka, “Judahai ui lu ang ringot hi mo ki ini? A vuan tena hin ni pa Saula chungale a urêng hai chungale a rualhai chungale iamomna kin langtira, Davida kuta nang inhlan ma unga, nikhomsianlân a vuan hin nangma’n hi nupang chungale sualin ni ni ibe tâka.

⁹⁻¹⁰ Saula le a insûngkuahai kut ata ram kha lapai pea, Israelhai le Judahai chungale Dana irthokin Beerseba dênin Davida rêngtoihmun indingtir nôk hrangin Rengpa’n Davida kuang chong a irkhâm angin ki tho tuanitung no’n



chu Pathianin Abnera chu a ilo lam takin lo ri se, kha nêka irkhêl ual khomin,” a tia.

¹¹Khanchu Isbosetha khan Abnera kha a chi sik ringotin ite don ngam maka.

¹²Abnera khan Hebrona om Davida kuang mi a tîra, a kuang, “Hi ram sûnga hin tu mo roirêl hrang? Keima kuang thuthungin lân, khanchu Israel mi murdihai hi nangma tianga kop chang hrangin nang thop ki ti,” a tia.

¹³Davida khan, “A sa, nangma kuang thu thung ki ti. Khannisianlân, thil inkhat nan phût hrang ki nei, nir hmupui hrangin ni hong tika Saula nâinu Mikali hong hruaiin lân, khanchu ki hmêl hmu thei ni ti,” a tia.

¹⁴ Davida khan Saula nâipa Isbosetha kuang khan, “Filistia mihai servun irzakhata ki irchôk ki dôngma Mikali kha ni hong pe ro,” tiin mi a tîra.

¹⁵Khanchu Isbosetha khan a pasal Laisa nâipa Paltiela kuang ata kha an hruaia.

¹⁶A pasal khan chap pumin Behurim kho dênin a hong zuia. Khannisianlân Abnera’n a kuang, “Kîr nôk ta roh,” a tia. A kîr nôk tâka.

¹⁷Abnera kha Israel hruaituhai kuang a fea, an kuang, “Matona khan chu Davida kha nin rêng hrangin nin nuam ngaia.

¹⁸Atûn hin nin tah hrangin zoro inchum a ni. Rengpa’n Davida chungthua khan, ‘A ni zui Davida kutin ki mi Israelhai kha Filistia mihai kut ata le an râlhai murdi kut ata kha saninsuahai ki ti,’ a iti kha inhre mai roi,” a tia.

¹⁹Abnera’n Benjamina namhai khom kha a chongpuia, kha hnung chu Abnera kha Israel mihai le Benjamina nam murdihaiin, a sa an iti murdi Hebrona Davida mikuar inhriata insîr hrangin a fe tâka.

²⁰Abnera kha Hebrona Davida kuang mi sômhnihai leh an fea, Davida khan Abnera le a kuanga sômhleihnihai ta hrangin hruai an thea.

²¹Abnera khan Davida kuang, “Thoi ki ta, ni kuang thu an thung theina hrangin Israel mi murdihai hi ki rêngpa kuang koi bûmhai hrangin fe ta ki ti,” a tia. Davida khan, Abnera kha a tîra, khanchu irtharngam takin a fe tâka.



Joaba'n Abnera a that

²²Inhnung ual viata chu Joaba le Davida mihai ram riak kha an hong kêra, râlâk sum tam tak an hong chôia. Khannisianlân Abnera kha Hebrona Davida kuang khan lei om ta maka; Davida'n a lei tîr tâk sikin, ama khom irtharngam takin a ife tâk a ni.

²³Joaba le a kuanga mipuihai kha an hong tungin chu, “Nera nâipa Abnera rêng kuang a hong, ama khan a len fetir nôk tâka,” ti Joaba kha an hrila.

²⁴Khanchu Joaba kha rêng kuang a fe thala, “Ni thil lei tho hi itina mo a ini? Abnera kha ni kuang a hong, itho mo khaanga ni lei itîrpai nôk?”

²⁵Ama khan nang huang hrang le ni fena, ni hongna le ni thiltho murdi inhre hranga hong kêng a ini,” a tia.

²⁶Davida kuang ata a hong suakin chu Joaba khan Abnera irzûl hrangin mi a tîra, Sira tuisunsuaka irthokin an hong hruaipai nôka, nikhomsianlân Davida khan kha thu kha ite inhre maka.

²⁷Abnera kha Hebron a hong tungin chu Joaba khan kul kotbâia inrûkin chongpui zâi hrangin a koia khanchu Joaba khan a sangpa Asahela thisen suak thuanna hrangin Abnera kha a phînga a sun that tâka.

²⁸Inhnung Davida'n an hriat tena chu, Davida khan, “Nera nâipa Abnera thisen suak thua hin keima le ki ram chu Rengpa mithmua irthiang kumkhua kin ti.

²⁹Kuttum kha Joaba le a insûngkuahai murdi chung a chum ri se. A irlo rikipa Joaba insûngkuahai laia khan pân saloiin mani, inphârin mani, nupang sin vai tho theiin mani, khandaia thi mani, fâk irsamin om ri sehai,” a tia.

³⁰Khaang khan Joaba le a sangpa Abisaia khan an sangpa Asahela kha Gibeona irdoina khan a that sikin Abnera kha an ithat tâk a ni.

Abnera an phûm

³¹Kha hnung chu Davida khan Joaba le a kuanga mipui om murdihai kuang khan, “Nin puanhai inpotthêr unglân, bora puan sil unglân, Abnera kha sîn roi,” ti thu a pêka. Reng Davida khan irlâng kha a chela.



³²Abnera kha Hebrona khan an phûma, rêng kha Abnera thâna khan a chap ngûk ngûka; mipui om murdi khom an chapa.

³³Davida khan Abnera kha a châ sabaka, “Itina mo Abnera hi into thi angin te a ithi tâk hi o?”

³⁴Ni kut kha khitindet ni ual maka, Ni ke khom thîrhruî bun ni ual maka, Mi sualhai makunga mi an inrîl angin te nin rîla?,” a tia. Khanchu mi murdiin an châ nôk tâka.

³⁵Sûn sôtin mi murdihai khan Davida kha fâk inzongtir hrangin an inthêma; khannisianlân Davida khan, “Misa a tâk mâka chu bu mani, thil dang mani ite ki irtem a omin chu, Pathianin a ilo loin ni lo ri se, hi nêka irkhêl ual khomin,” tiin chong an kunga.

³⁶Ama kha mi murdi’n an inhriatin an lôm oka, rêng thiltho murdi khan mipuihai kha an lômtirhai maia.

³⁷Davida mi murdihai le Israelhaiin Nera nâipa Abnera thata om kha rêng thu suak ni mah ti an hon hriat suaka.

³⁸Reng khan a mi lianhai kuang, “A vuan hin Israel mi lian le roiinpui a ithi a ni, iti nin inhriat loi ma ni?”

³⁹Reng hranga Pathian sahriak irthutir ni khomin lân, a vuan hin ki irzal zap a ni. Hi mi Zeruii nâipa hai hi ki ta hrangin an ivîk hrai a ni. Rengpa’n thil saloi thotuhai kha an sual lam ang takin thuanhai ri se,” a tia.

2 Samuela 4

Isbosetha thatin a om

¹Saula nâipa Isbosetha khan Hebrona Abnera a thi ti an hriatin chu a lei chi tâka, Israel mihai kha an phûk an thing tâka.

²Isbosetha khan sipai pâl hruaitu inhni Baana le Rekaba a neia; anni kha Benjamina irchia Beerot mi Rimona nâipasalhai an ni. (Beerot chu Benjamina rama ibe a ni.



³Lei om masa a ram mihai kha Gataim-ah laizâm an thoa, atûn ten hin an iom mai tâk a ni.)

⁴Saula irchia mi dang la om chu Jonathana nâipa Mefiboseta a nia, Saula le Jonathana an that laia khan kum ringa mi vai a la nia. Jezreel-a irthokin Saula le Jonathana thi thu an len hriatin chu a enkoltunu khan a poma, laizâm a thopuia; khannisianlân laizâm thopui hranga a'rhnot hrainaa khan an thâka, a ke a hon bâi tâk a ni.

⁵Rekaba le Baana kha Isbosetha in panin an fea, sîn laitaka Isbosetha sîn irngam laitakin an va tunga.

⁶Kotbâia nupang bu lei irkheinu kha inmusuin a oma, a in irnghila, khanchu Rekaba le Baana kha insûnga an lût zâia.

⁷Insûng an va lûtin chu, Isbosetha zâlna tentana an fea. Isbosetha lei in irnghil kha an suna, an thata. Kha hnung chu a lu an tana, an chôia, Jordan phâi fe thalin zân sôt an fea.

⁸Isbosetha lu kha Hebrona Davida kuang an hong chôia, rêng kuang khan, “En ro, hi nang that tum ni râl Saula nâipa Isbosetha hi; Rengpa khan ki rêngpa phuba kha a vuan hin Saula le ar chi chung a ilâk pe tâk a ni,” an tia.

⁹Davida khan Rekaba le Baana kha a sâmhaia, an kuang, “Rengpa ki lungzîngna murdi ata ni saninzôktu hringna irhmingin ki iti a ni.

¹⁰Thurchi sa zuang tung hrang irngaiin, Saula kha a thi ta, tiin mi inkhatin a ni zuang hrila, ama kha ki chela, Ziklag khua khan ki thata; ama kha thurchi sa zuang intung mâna ki lei ipêk kha a ni.

¹¹Mi fel ama insûngluma, a zalhmuna om, Saula an ithat thisen man khan nin chung a ki inphût nôk ual, atûn hin irnêng ata nangni irhmangtir hrang ki ni,” a tia.

¹²Kha hnung chu Davida khan a ruathartehai kha thu a pêkhaia, anni kha Rekaba le Baana kha an thata, an kut le ke an tan pehaia, Hebron dîl kôla



khan an inkhâihaia. Isboetha lu kha an lâka, Hebrona Abnera tâna an phûm tâka.

2 Samuela 5

Davida chu Israel le Juda rêng a hong ni ta

(1 Tsn 11.1-9; 14.1-7)

¹Kha hnung chu Israel nam murdihai chu Hebrona Davida kuang an hong, a kuang “Kin thisen irzompui ni nia.

²Zoro lei fe tâka khan Saula chu ei chung a an lal lai khom khan irdoina buala Israelhai hruai ngaitu a ni; Rengpa khan ni kuang, ‘Ki mi Israelhai hruai ni ta, an chung a hruaituin om ni ti,’ a iti a ni,” an tia.

³Khanchu Israel hruaitu murdi’n Hebrona rêng Davida kuang an hong, Reng Davida khan Hebrona khan Rengpa makunga an kuang thu a thunga. Anni khan Davida kha Israelhai chung a rêng hrangin sahriak an irthutira.

⁴ Davida an lal phuta khan kum sômthum mi a ni, kum sômminlia inlal a ni.

⁵Hebrona khan Judahai chung a kum sari le tha ruk an lala, Jerusalema Israelhai le Judahai murdi chung a kum sômthum inthum a inlal a ni.

⁶ Davida le a mihai kha, kha rama om Jebus mihai rûn hrangin Jerusalema an fea; khahai khan Davida hong lût thei loi hrangin an iama. Davida kuang, “Hin hong lût thei viat no chi ni; mitcho le ke’nbâihai luan nang lei khap thei an ti,” an tia.

⁷(Khannisianlân Davida khan an Zion kulpui kha a lâka, kha kha Davida khopui a hong inchangtir a ni.)

⁸Kha nî khan Davida’n a mihai kuang, “Jebus mihai ki ingamhai dôr chu that irhmang ngam mo nin om? Mitcho le ke’nbâihai doi nuamhai chu tui luangna zuiin lût khum ri sehai,” a tia. (Khasika khan mitcho le ke’nbâihai kha Rengpa ina an ilût hrang ni mah iti a lei ini tâk a ni.)

⁹Kulpui kha a lâk zoiin chu Davida kha, kha hmuna khan a om tâka, “Davida Khopui,” iti a ni ta. Davida khan Milo sâng tianga irthokin a kôlvêla khan khopui kha a siam tâka.



¹⁰Rengpa itinrêng sin thei Pathian kha a kuang a om mai sikin, Davida chu a hong iroiinpui u ual a ni ta.

¹¹Khan, Tura rêng Hirama'n Davida kuang mi a tîra, meisâr thing a thona, kut theithiamhai le lung suktuhai a tîrhai saa, Davida rêng in chu an sin pea.

¹²Davida kha Rengpa'n Israel mihai chung a rêng hrangin a namindeta; a mi Israelhai sikin ram kha a isiam insa a nih ti an hriat suak ta.

¹³Davida khan Hebrona irthokin Jerusalema a'rthon hnunga khan, dôngma le lâksîr a nei belsaa, nâipasal le nâinupanghai a nei intam ual tâka.

¹⁴Jerusalema a nâi neihai chu Samua, Sobaba, Nathana, Solomona,

¹⁵Ibara, Elisua, Nefega, Jafia,

¹⁶Elisama, Eliada le Elifeleta hai an ni.

Filistia-hai inhnêna thu

(1 Tsn 14.8-17)

¹⁷Filistia mihaiin Davida kha Israel mihai rêng hrangin sahriak an irthutir ti an hriatin chu an sipai murdi kha Davida chel hrangin an irthoka. Davida khan a len hriata, kulpuia a lei zu fea.

¹⁸Filistia mihai kha Refaim phâizôl an hong tunga, kha khan an irzara.

¹⁹Davida khan, "Filistia mihai doi hrangin ki ife hrang mo?," tiinRengpa a chongpuia. Rengpa khan Davida kuang, "Doi ro, Filistia mihai chu ni kuta nang ki ipêk ngêt hrang a ni," a tia.

²⁰Khanchu Davida kha Baal-perazim-ah a fea, kha khan Davida'n Filistia mihai chu an hnê tâka. "Rengpa'n ki râlhai chu tui tial sai ang dôrin ki makunga an chê zoi tâka," a tia. Khasikin kha hmun irhming hranga khan Baal-perazim a iti a ni ta.

²¹Filistia mihaiin laizâm an tho lai khan an millimhai an mâksana; Davida le a mihai khan an lâkpai tâka.

²²Kha hnung chu Filistia mihai kha an fe nôka, Refaim phâizôla an irzar nôka.



²³ Davida'n Rengpa a hong chongpui nôka, ama khan, "Hitaka irthokin chu doi no ro; an hnung tiang fe'n lân irhualhai ro, thingtheimu kung irdîna khin hong doihai roh.

²⁴ Thingtheimu kung rêla lui irhâi nin hriat tena châng ro! Filistia sipaihai doi hrangin ni matona keima Rengpa ki suak ta tihna ni a ti," a tia.

²⁵ Khan, Rengpa'n thu a ipêk angin Davida khan a thoa, Filistia mihai chu Geba-a irthokin Gezer dênin an irzûlhai tâka.

2 Samuela 6

Jerusalema Thuthung Bôm lâk kîr a ni

(1 Tsn 13.1-14; 15.25–16.6,43)

¹ Davida khan Israel mihai laia sipai inthang ngot mi sîngthum a buk nôka.

² Judai rama Baala khuaa irthokin cherubhai chungga chuang itinrêng sinthei Rengpa irhming irput Thuthung Bôm kha zu la hrangin Davida khan a fepuihaia.

³ Pathian Thuthung Bôm kha tâng chungga Abinadaba in ata an lâksuaka, tâli thara an bângga. Abinadaba nâipasalhai Uza le Ahioa hai khan tâli thar kha an chalaia;

⁴ Ahioa kha Pathian Thuthung Bôm maton tiang khan a fea.

⁵ Davida le Israel mihai khan an hrâtna murdi le hlasaka lâm pumin Rengpa an chôindôma, irhâihoi chi tinrêng perkhuang hai, belem hai, khuang hai leh rosem hai, dâr irbu hai sukin an oma.

⁶ Nakona hruizôl kha an tungin chu sehrât kha a pêmlûta, Uza khan a hon bana, Thuthung Bôm kha a hong intûka.

⁷ Rengpa ning kha Uza chungga an mur pe thuta, Thuthung Bôm a hong tôn sika khan Pathianin kha zela khan a thata. Pathian Thuthung Bôm kôla khan a thi tâka.

⁸ Khasika khan kha hmun irhming hranga khan Pereza Uza iti a ni ta. Rengpa khan ningmurin Uza kha kuttum a tho tâk sikin Davida kha a ning an mur pea.



⁹Kha hnung chu Davida khan Rengpa kha a chia, “Itin mo Rengpa Thuthung Bôm kha ki kuang ki ichôi thei hrang?,” a tia.

¹⁰Khanchu Davida khan Rengpa Thuthung Bôm kha Jerusalema chôi ta loi hrangin a ngaituaa; Git mi Obed-edoma in sâng tiang a sia tâka.

¹¹ Rengpa Thuthung Bôm kha Git mi Obed-edoma ina khan tha thum a oma, khanchu Rengpa khan Obed-edoma le a insûngkuahai kha sat a vurhaia.

¹²Reng Davida khan Pathian Thuthung Bôm sika khan Obed-edoma in sêngkua le loi murdi Rengpa’n sat a vur ti an hriat tâka. Khanchu Davida khan Pathian Thuthung Bôm kha Obed-edoma in ata Jerusalema chôi hrangin a zu lâk tâka.

¹³Thuthung Bôm irzôntuhai kha kal ruk an phêt tena chu Davida’n a’rngamtirhaia, sehrâtchal le sehrâttehai kha irbôlna hrangin Rengpa kuang an hlana.

¹⁴Davida khan puanzâirhmi ochai songkol irfîngte vai inngâkin thei dôrin Rengpa makunga a lâma.

¹⁵Khaang khan Davida le Israel mihai kha râifâna pâi pumin le bekul tum irhâi inring du durin RengpaThuthung Bôm kha Jerusalema an hong ichôi a ni.

¹⁶Khan, Rengpa Thuthung Bôm kha Davida khopuia hong chôi inlût a ni lai khan Saula nâinu Mikali khan tukvera irthokin a lei thîra, Rengpa makunga Davida irchôm le lâm kha a hmuin chu, a hmusit lungrîl tâka.

¹⁷Thuthung Bôm kha an hong chôi, a siana hranga Davida indang sai, puan in sênga a hmun hranga khan an sia tâka. Kha hnung chu Davida kha hâlrivôm thilinhlanhai le irngeina thilinhlanhai Rengpa kuang an hlan tâka.

¹⁸Davida’n hâlrivôm thilinhlan le irngeina thilinhlanhai kha an hlan zoiin chu itinrêng sinthei Rengpa irhmingin mipuihai kha sat a vura,



¹⁹ mipui murdi, Israel pumpuihai kha nupang le pasal, mi tinin bai tiam inkhat le sa tin inkhat le grep ra châr a sem pehai chita. Khanchu an mâni in chita an fe ta.

²⁰ Kha irzoiin chu Davida kha a insûng mihai satvur hrangin a kîr nôk tâka. Saula nâinu Mikali kha Davida don hrangin a hong suaka, “A vuana Israel rêng chu a roiinpui vang na! Mi chanlamboi inzakna inhre viat loi, korongboia om ang dôra a vuan hin a zuitu dôngmatehai mithmua korongboiin a iom kha na!” a lei tia.

²¹ Davida khan Mikali kha a sâma, a kuang, “Ni pa le a in sûngkuahai murdi nêkin Israelhai chung a rênga nin thangtu Rengpa makunga kêng ki ilâm. Rengpamakunga khan ki ilâm mai hrang a ni.

²² Hi nêk khom hin inzakpuiin om ki ti, keima le keima khom la’rsit ki ta; khannisianlân kha a zuitu dôngmate ni itihai chôindômin om ki ti,” a tia.

²³ Khaang khan Saula nâinu Mikali khan a thi dênin nâi nei ta maka.

2 Samuela 7

Davida kuanga deipu Nathana chongbe

¹ Reng Davida kha a ina a oma, Rengpa khan a râlhai lai ata lungngam takin an omtir tâka.

² Kha hnung chu rêng khan deipu Nathana kuang, “Hin keima chu, sidar thinga siam ina ki oma, nikhomsianlân Pathian Thuthung Bôm kha chu puan in ma maia a oma,” a tia.

³ Nathana khan, “Ni lungrîla om lam takin tho ro, Rengpa ni kuang a om mai kha te,” a tia.

⁴ Khannisian kha ni zân ngêta khan Rengpa’n Nathana kuang,

⁵ “Fe’n lân, ki suak Davida kha va hril ro, Rengpa khan ki omna hrang tempil chu nangma’n sin no chi ni.

⁶ Israel irchihai Aigupta ram ata ki hruai suaka irthokin atûn ten hin tempila la om mai ma ung, puan ina kêng ki la iom.



⁷Israel irchihai laia ki fena hmun tina khom ki mi Israelhai enkol hranga thu ki ipêk nam hruaituhai kuang, itho mo sidar thing leh in nin ni isin pe loi? ti ngai ma ung.

⁸“Khasikin ki suak Davida kuang, itinrêng sinthei Rengpa khan hiang hin a ti, kêlbelra lêngna khan belra enkolin ni oma, ki mi Israelhai chungu hruaitu hrangin nang kin thang suaka.

⁹Ni fena hmun tina ni kuang ki om maia, ni maton tianga râl omhai ki’rzûlpaihai ngaia. Irnênga mi inthangtak takhai irhming angin irhming inthangin nang ki siama.

¹⁰Ki mi Israelhai hrang hmun kin kung, kha khan anni chu mihai sirbea an om loina hrangin ki inomtir tâk a ni. Hi ram an hong lût ata mi pualoihai deng an intheitirhaia, khannisian khaang kha chu om viat ta no ni.

¹¹Ni râlhai lai ata zôkin nang inomtir ta ki ti, khabana irchi suanpâr nang pe ual ki ti.

¹²Ni zoro a heka ni puhai kuang ni zâl tika khan, nir chi, ni rîla ra nâipasal inkhat rêng inchangtir ki ta, a ram kha indet ni a ti.

¹³Ama khan keima tempil sintu chu ni a ti, a ram rêngtoihmun chu kumtuanga hrangin indettir ki ti.

¹⁴A pa ni ki ta, ama kha ki nâipa ni a ti. Khan, ama khan thil a tho insualin chu mihriamin nâi a ihêm ngai angin hêm ki ti.

¹⁵Nikhomsianlân, rêng ni chang theina hrangin Saula ki ikhâi irhmang kuang ata lungkhamna ki ilâkpai pe ang khan ama chu masan ual no ning.

¹⁶Ni in sêngkua le ni ram kha kumtuangin indet ni a ta, ni rêngtoihmun kha kumtuangin indet ni a ti,” tiin Rengpa thu a zuang tunga.

¹⁷Rengpa’n a kuang thu a inlang murdi kha Nathana khan Davida kuang an sîr tâka.

Davida lônthu hrilna chongchai

(1 Tsn 17.16-27)



¹⁸Khanchu Davida kha irtongna puan ina khan a lûta, Rengpa makunga toiin a chongchaia, “O Rengpa Pathian, tu mo ki nia, ki in sêngkuahai khom i ual mo kin nia, hi ten ramhai hi ni ni ihruai?

¹⁹O Rengpa Pathian hi khom hi nangma mithmua chu thil chînte ni a ti, khannisian kum tamtak la hong tung hranga ni suak irchi suanpârhai hong om mai hrang lam lei hrilin, O Rengpa Pathian thoithar la hong om hrang kha ni nir hmutir tâka.

²⁰Davida kuang hin imo la hril infel ual hrang? Ni suak hi ni nin hriat hleta, O Rengpa Pathian.

²¹Ni suak hi nir chutir hrangin ni lungdo le thiltum ang lam takin hi thil roiinpui tak hi ni tho tâka.

²²Khasika khan O Rengpa Pathian nang chu ni iroiinpui a ni; nangma anga hi tûte zel om mahai. Nangma tih no chu Pathian dang zel om mahai ti ki inhriat mai ngai a ni.

²³ Nangma mi innitir hrang, sal ata ni irtansuakhai, ni mi Israelhai anga rêng rammuala hin om mahai. An ta hranga thil roiinpui le thil irkhêl ni ithohai khan rammual pumpuia nir hming chu inthangin a iom a ni. Aigupta ram ata ni dongtum hranga ni inzôkhai kha, ni mihai kha maton tiang an fe mai lai khan nam dang le an pathianhai kha nin hnotsuak pehaia.

²⁴Khaang khan Israelhai chu kumtuanga ni mihai ni hrangin ni siamhai tâka. Nangma, Rengpa chu an Pathian ni nia.

²⁵“Khan, atûn hin O Rengpa Pathian, ni suak chungchâng thu le ar chi suanpârhai chungthu ni insîr kha kumtuanga hrangin indetin lân, ni ihril tâk ang khan tho roh.

²⁶Itinrêng sinthei Pathian chu Israelhai Pathian a nia tiin nir hming chu kumtuangin chôindômin om ri se. Khanchu ni suak Davida in sêngkua khom ni makunga indetin om ri se.



²⁷O itinrêng sinthei Rengpa, Israelhai Pathian, ni suak kuang hin, Ni'rchi hai rêngin siam ki ti, tiin nin puang tâka, khasikin ni suak hin hi chongchaina hi ni kuang a intung ngam a ni.

²⁸O Rengpa Pathian nang chu Pathian ni nia, ni thu chu thutak a ni, hi thil sa hi ni suak kuanga ni inkung tâk a ni.

²⁹Khasikin ni suak in sêngkuahai chu ni makunga kumtuanga a om mai theina hrangin satvur ro; o Rêngpa PATHIAN, ni lei inkung tâka, ni satvurna'n ni suak irchi hai hi kumtuangin satvurin om ri sehai," a tia.

2 Samuela 8

Irdoinaa Davida hrâtna thu

(1 Tsn 18.1-17)

¹Zoro sôt ian hnunga chu rêng Davida khan Filistia mihai kha a doia, an hnea. Khanchu Davida khan Filistia mihai thuneina bulpui kha a lâk pea.

²Kha zoiin Moab mihai a doi inhne nôka, a hringa a ichelhai kha irnênga an zâltirhaia, inthum laia inhni a thathaia. Khanchu Moab mihai kha a thuhnuaia an om tâka, khâzana an hong ichôi ngai a ni ta.

³Kha hnung chu Davida khan Eufrates vadunga a ram la nôk hrangin a fe malamin Zoba rêng Rehoba nâipa Hadadezera khom a doi inhnêa.

⁴Khanchu Davida khan a sakor chung chuang mi sângkhat irzasari le sipai sîngni a chel pea. Khan Davida khan, tâli irzakhat kai hrang sakor rukbak a lâka, a dang kai chu an irthahrui a tuk sat pehaia.

⁵Damaska-a Suria mihai Zoba rêng Hadadezera san hranga fehài kha Davida khan a lei doia, mi sîngni le sîngni a thata.

⁶Kha hnung chu Davida khan Suria rama Damaska khan sipai a siaa; khanchu Suria mihai kha Davida thuhnuaia an om tâka; khâzana an hong pêk ngaia. Rengpa'n Davida chu a fena tina inhnêna a pêka.

⁷Davida khan Hadadezera mi lianhai rângachak phohai a lâkpai pea, Jerusalema a chôia,



⁸Hadadezera khua Beta irthokin, Berothai-a irthokin, Davida khan dâr tamtak a lâka.

⁹Hamath rêng Toia khan Hadadezera sipai murdi Davida'n an hnê ti a len hriata.

¹⁰Khanchu Hadadezera kha a doia, an hne sikin chubai mûk hrang le lômpui hrangin Toia khan a nâipa Jorama kha Davida kuang a tîra. Hadadezera khan Toia hi a lei idoi ngai a ni. Khante, Jorama khan sumru le rângachak hai, dâra siam thil a hong chôi pea.

¹¹Reng Davida khan kha thilhai kha Rengpa ina hmang hrangin an hlana, khabana ram dang mi a inhnê tâkhai ata sumru le rângachak a ilâkhai khom kha an hlan sa tâka.

¹²Khahai kha Surihai ta, Moabhai ta, Amona irchihai ta, Filistia-hai ta, Amalek-hai ta, Zoba rêng Rehoba nâipa Hadadezera rengata a râlâkhai an ni.

¹³ Davida kha michi phâizôla, Edom mihai sîngkhat le sângriat a that zoia a hong kîr tena len vâng chu ar hming kha a inthang ual hrang a ni.

¹⁴Edom ram hmun tina sipai a siahaia, khanchu Edom mi murdi kha Davida thuhnuaia an om tâka, khâzana an hong chôi ngaia. Rengpa'n Davida chu a fena kipa an hnêtir maia.

¹⁵Davida khan Israel mihai chung a roi a rêla, mi murdi chung a khan fel takin roi a rêla.

¹⁶Zeruii nâipa Joaba kha sipai hruaitu ulian tak a nia; Ahiluda nâipa Jehosafata kha thurchi irziaktu a ni;

¹⁷Ahituba nâipa Zadoka le Abiathara nâipa Ahimeleka kha ochai an nia; Seraia kha ziaktu a ni;

¹⁸Jehoiada nâipa Benaia kha Davida hrungtu laia hruaitu a nia; Davida nâipasalhai kha ochai an ni.

2 Samuela 9

Davida le Mefiboseta



- ¹ Sûn khat chu Davida khan, “Jonathana sika lungkhamna kin langtir theina hrangin Saula insûng mihai laia mi mo la om nihai o?,” a tia.
- ²Khante, Saula in sêngkuahai zui inkhat ar hming Ziba a oma, Davida kuanga fe hrangin a koia, rêng khan a kuang, “Ziba mo ni ni?,” a tia. Ama khan, “O ki ni, ka pu nang a zui hi,” a tia.
- ³ Reng khan, “Pathian lungkhamna kin langtir theina hrangin Saula insûng mihai laia mi a la dam mo an om?,” a tia. Ziba khan rêng kuang, “Jonathana nâipasalhai laia inkhat a la om, ama chu ke’nbâi a ni,” a tia.
- ⁴Reng khan a kuang, “Kho tiang mo a iom?,” a tia. Ziba khan rêng kuang, “Lo-debar khuua Amiela nâipa Makira ina a om,” a tia.
- ⁵Khanchu rêng Davida khan mi a tîra, Lo-debar ata Amiela nâipa Makira in ata kha a va hruaia.
- ⁶Saula nâipa Jonathana nâipa Mefiboseta kha Davida kuang khan a hongin chu, a hmâi irnêng sikin Davida kha chubai a mûka. Davida khan “Mefiboseta,” a tia. Ama khan, “En ro, nang a zuitu hi,” a tia.
- ⁷Davida khan a kuang, “Chi no ro, ni pa Jonathana sikin lung nang inkham ngêt ki ti, ni pu Saula ram murdi nang pe nôk ki ta, ki dokânga khalâi ot sa mai ta ni ta,” a tia.
- ⁸Mefiboseta khan chubai a mûka, a kuang, “Keima ui thi sai ang maia nang a zuitu chung a hin hiang dôra ni satna ni insua hi?,” a tia.
- ⁹Khanchu rêng khan Saula zuitu Ziba kha a koia, a kuang, “Saula thil murdihai le a in sêngkuahai thilhai kha ni pu tupa hi ki ipêk ving a ni.
- ¹⁰Nangma le ni nâipasalhai le nang a zuituhai ta hrangin ram kha chîmu song pehai nin ta; ni pu nâipa khan fâk hrang a nei theina hrangin ni chîmu invânghai kha ni hong ichôi pe ngai hrang a ni. Mefiboseta hi chu ki dokânga khalâi a iot mai hrang a ni,” a tia. (Ziba khan nâipasal sôm hleiringa le a zuitu sômhni a ineihai a ni.)



¹¹Ziba khan rêng kuang, “Rêng ka pu’n thu ni ni ipêk lam ang takin tho ki ti,” a tia. Khanchu Mefiboseta khan rêng nâi inkhat anga rêng dokânga khan khalâi a ot mai tâka.

¹²Mefiboseta khan nâipa, la nâipangtê a neia, ar hming chu Mika a ni. Ziba ina om murdi kha Mefiboseta zui an hong ni tâka.

¹³Khanchu Mefiboseta a ke inhnia inbâi kha Jerusalema a oma, rêng dokânga khalâi a iot mai tâk a ni.

2 Samuela 10

Davidan Amon le Suria mihai an hnêna

(1 Tsn 19.1-19)

¹Zoro sôtak hnunga chu Amon rêng Nahasa kha a thia, a nâipa Hanuna kha rêng a hong chang tâka.

²Reng Davida khan, “A pa Nahasa khan lung a ni lei inkham ang khan kei khomin Hanuna hi lung ki inkham hrang a ni,” a tia. Khanchu Davida khan a pa chungchâng thua lungngam sak hrangin a mihai a tîra. Davida mihai kha Amona irchihai omna ram an va tungin chu,

³Amona irchihai hruaituhai khan an rêng Hanuna kuang khan, “Davida hin ni pa mahrip a tho sikin lungngam nang sak hrangin a mihai ni kuang a hong itîr ni isôn ma ni? Ni ma, Davida hin a nin hnê theina hranga le hi khua hong en infel hranga anni hi, a hong itîrhai an ni,” a tia.

⁴Kha hnung chu Hanuna khan Davida mihai kha a chela, an hnerkamulhai a ep inkolpai pehaia, an silkaihai khom a chimrip an zer bul tena hin a tan inbongtir pehaia, a tîr paihaia.

⁵Insûnga hong kîr kha an inzak ok tâka, Davida’n kha thu kha an hriatin chu, a don hrangin mi a tîra, “Nin hnerkamul a mônga a sei mâka chu Jeriko-a om unglân, kha zoi le la hong ta roi,” a tia.

⁶Amona irchihai khan Davida kha râl an inchangtir tah ti an hriat tâka. Khanchu Amon irchihai khan Bethrehob-a le Zoba ata Suria sipai sînghni, Tob ata mi sîngkhat sînghni le rêng Maaka mi sîngkhat an hruaihaia.



⁷Davida'n kha kha a len hriatin chu Joaba le sipai irdoi mi murdihai kha anni doi hrangin a tîra.

⁸Amon irchihai kha an hong suaka, an rêngpa khopui, Raba lûtna kotbâi tianga khan omhmun an siama; mi danghai Zoba le Rehoba ata Suria sipaihai le Tob mihai le Maaka mihai kha chu a bingin irnak songna hmun an siama.

⁹Khaangin an maton tiang le an hnung tiang râlhai khan an hong idoi hrang a nih iti Joaba'n an hriatin Israel sipaihai laia mi hrât le sa an thanghaia, Suria mihai doi hrangin omhmun an lei siama.

¹⁰A sipai danghai murdi kha a sangpa Abisaia hruaina hnuai a siahai vinga, Amon irchihai doi hrangin irnak songna hmun a lei siam saa.

¹¹Joaba khan a sangpa Abisaia kuang, "Suria mihai kin hnê no hrangin chu, nangin ni hong san ni ta; khante nangma'n Amon irchihai nin hnê no hrangin chu, nang hong san ki ti.

¹²Hrâttak le hâitakin om unglân, ei mihai le ei khopuihai sanin pasal satakin doi ei ti duah; Rengpa khan a sa a iti lam takin tho ni ri se," a tia.

¹³Joaba le a mihai khan, doi hrangin an hong panin chu Suria mihai kha laizâm an tho tâka.

¹⁴Amon irchihaiin Suria mihai laizâm an tho ti an inhriatin chu anni khom kha Abisaia kuanga khan laizâm an tho tâka, khuua khan an lûta, kha hnung chu Joaba khan Amon irchihai kha a mâkhai raka, Jerusalema a kîr tâka.

¹⁵Suria mihaiin Israelhai kôla an dinghmun siatzia an hon hriatin chu, an sipai murdi an koi bûma,

¹⁶Reng Hadadezera khan mi a tîra, Eufrates vadung nisua tiang Suria mihai kha a hruai suakhaia, Zoba rêng Hadadezera sipai hruaitu Sobaka khan a hruaihaia, Helama an fea.

¹⁷Kha kha Davida'n a len hriatin chu Israel sipaihai a bûm nôka, Jordan dung an irkâna, Helema khan an fea, Suria mihai khan Davida doi hranga khan omhmun an lei siama, an lei doia.



¹⁸Suria mihai kha Israelhai kuanga khan laizâm an tho tâka, Davida le a mihai khan Suria mi tâli chungu chuang mi irzasari le sakor chung chuang mi sîngminli an thata, an sipai hruaitu Sobaka khom an inphop nenga, irdoina hmuna khan a ithi tâk a ni.

¹⁹Khaang khan Hadadezera thuhnuaia an rêng hai khan Israelhai makunga an dingmun a siat tâk ti an inhriatin chu, Israelhai leh irngeina an siama, an thuhnuaia an om tâka. Khanchu Suria mihai khan Amon irchihai kha san nôk ngam ta mahai.

2 Samuela 11

David a le Bethsebi

¹Kum a hong heka, rêng hai irdoi hranga an suak zoroa khan, Davida'n Joaba kha a mi lianhai le Israel sipaihai leh khan a tîra, anni khan Amon irchihai kha an inhnêhaia, Raba khua kha an irhual vinga, khannisian Davida chu Jerusalema a oma.

²Sûn khat chu, khohloi misa dâia zâlmun ata Davida kha a thoia, rêng in chungu a hong fea. In chungu a hong fe'n chu nupang inkhat tuiisil lai hi a hmua, kha nupang kha hmêl satak a nia.

³Khanchu Davida khan nupang thurchi inhriat infel hrangin mi a tîra. "Eliama nâinu, Bethsebi, Hit mi Uria dôngma a ni," an tia.

⁴Davida khan hong hruai hrangin mi a tîra, an hong hruaia, a lei zâlpui tâka. (Ama kha a tha tina irvei a hmua irthâr zoi chak a nia.) Khanchu a in tiang a kîr nôk tâka.

⁵Khanchu nupangnu kha a hon rai tâka; "Nai ki vong ta," iti kha Davida a hong inhrila.

⁶Kha hnung chu Davida khan Joaba kuang, "Hit mi Uria kha ki kuang hong tîr roi," ti'n chong an thuana, khanchu Joaba khan Uria kha Davida kuang a tîr tâka.

⁷Uria kha a hong tungin chu, Joaba le a sipaihai kha an dam mo, irdoina te itin mo a om iti ar dona.



⁸Kha hnung chu Davida khan Uria kuang, “Ni ina fe’n lân, ni sôl zu irngam ro,” a tia. Uria kha rêng in ata a suaka, rêng khan fâk zât a zun thaktirhaia.

⁹Khannisian Uria kha a ina fe maka, rêng hrungtuhai laia rêng in kotbâi kôla khan a riaka.

¹⁰Davida khan Uria kha a ina fe mah ti an hriatin chu Davida’n Uria kuang, “Nikho thang a sôt ok zoia hong mo ni mak che, Itho mo ni ina ni ife nuam loi?” a tia.

¹¹Uria khan Davida kuang, “Israelhai le Judahai kha irsual buala an oma, Thuthung Bôm kha an kuang a oma, ka pu Joaba le a mi lianhai kha rama riakbuka an oma. Itin mo keima hi ki ina fein, ki fâkin ki in hrang, ki dôngma kôla ki izâl ngam hrang? Khaanga thiltho irhoilo chu tho viat no ning,” a tia.

¹²Khanchu Davida khan Uria kuang, “A vuan chu hin om tan lân, nangtûk la fe ta roh,” a tia. Khanchu Uria kha Jerusalema khan, kha nî sún le zînga khom a om tâka.

¹³Davida khan khohloi bu khalâi otpui hrangin a koia, an ruitir nenga. Khannisianlân kha zân khom khan Uria kha a ina fe maka; a hrungtuhai tentana khan a riak nôk tâka.

¹⁴Zîng nôka chu Davida khan Joaba kha lekha a thona, Uria kha an chôitira.

¹⁵A lekhatona khan, “Uria kha râl ichiomna tiang taka maton insatir unglân, an thata a thi theina hrangin a bing ualin om ri se,” tiin a’rziaka.

¹⁶Khanchu Joaba’n khua a’rhual khap laia khan râl hrât omna tia inhriatna hmuna khan Uria kha a tîra.

¹⁷Kho sînga mihai kha an hong suaka, Joaba kha an doia, mi senkhat Davida mi lianhai laia mihai kha an thata, Hit mi Uria khom kha a thia.

¹⁸Khanchu Joaba khan irdoi chungchâng thu kha Davida hril hrangin mi a tîra.

¹⁹A mi tîr kuang khan, “Reng kuang irdoi thurchi murdi nin sîr zoia,



²⁰a ning an mur thuta, ‘I lo hrang mo khang dôr nâirêta nin va idoi? Kulpui ata nangni an ikâp hrang ti nin inhriat loi ma ni?

²¹Jerubesetha nâipa Abimeleka kha tu mo a thatpu? Nupangin bu nôina lungin kulpuia irthokin a zu dênga, Thebez-ah khan a thi mo ni ma? Itina mo kulpui nâirêta nin ife a niin te, ni mi lian Hit mi Uria khom kha a thi sa tâk,’ ti ro,” ti’n a hrila.

²²Khanchu a mi tîr kha Davida kuang a fea, Joaba’n a itîrna san murdi kha a hril tâka.

²³Davida kuang, “Ei râlhai kha an hong suaka, rama an ni hong doia, khannisian keini’n a kho lûtna kotbâi dên rakin kin irzûlhaia.

²⁴Khanchu kulpuia irthokin an ni hong kâpa, khanchu rêng mi lian senkhathai kha an thia, ni mi lian Hit mi Uria khom kha a thi ta,” a tia.

²⁵Davida khan thurchi hong hriltu kuang khan, Joaba kuang khan hiang hin van sîr ro, “Hihai hin ni milung insôltir bâk no roh, khandaiin tûte inhnê thei ual ma, hi nêka na ual hin doi unglân kho sîng kha insiat chit roi, tiin inthorhai ro,” a tia.

²⁶Bethsebi khan a pasal Uria a thi ti a len hriatin chu a sîna.

²⁷A sîn zoro a khêl tena chu Davida khan a in tiang a hruaia, dôngma’n a nei tâka, nâipasal a nei pea. Khannisian Davida thil tho kha Rengpamilung chuk pe maka.

2 Samuela 12

Nathana thu intung le Davida irletna

¹Rengpa khan Davida kuang deipu a tîra, Nathana kha Davida kuang a fea, “Khua inkhata hin mi inhni an oma; inkhat kha mi irchong a nia, inkhat kha mi inriang a ni.

²Mi irchongpa khan kêlbelra tamtak le sâ tamtak a neia,



³mi inriangpa khan kêlbelra a chînte inkhat vai ar chôka, a ivâi inkhat vai a neia. A insûnga a nâihai leh seilian an ni, a ifâk ang an fâktira, ama khilâta ngei an intir ngaia, a mal chungpa pomin a moinu angin a ibe a ni.

⁴Sûn khat chu mi irchongpa kuang khan khualinziin mi inkhat hi a va tunga; mikhual hong tung kha ama belra le kêl thatpui nuam loiin, mi inriang belrate kha a va sutpaia, a mikhualpa kha a ithatpui a ni,” a tia.

⁵David a kha mi irchongpa chungpa khan a ning an mur pe tâka; Nathana kuang khan, “Rengpa irhming sâmin ki iti a ni, kha thil thotu kha chu that inruk a ni.

⁶Khaanga thil kha a tho sikin le lungkhamna a nei no sikin, a kêlbelrate lak kha ama’n bâk minliin a ithuan hrang a ni,” a tia.

⁷Khanchu Nathana khan David a kuang, “Kha mi kha nangma hi ni ni,” Rengpa Israelhai Pathian khan hiang hin a iti a ni, “Israel rêng hrangin sahriak nang ki’rthutira, Saula kut ata nang ki saninzôka,

⁸a rêng ram le dôngmahai nang ki pêka; Israelhai chungpa le Judahai chungpa rêngin nang ki siama. Khahai kha a la tôm hraiin chu thil danghai khom nang ki ipêk nôk hrang mo ni ma?

⁹Itho mo ki thupêkhai zôm loa, hi thil saloi tak hi ni itho tâk? Hit mi Uria kha irdoina hmuna nin thattirhaia, Amon irchihai nin thattirhaia, khanchu a dôngma kha ni luapai pea.

¹⁰Khasika khan khandai khan ni insûngkua kha masan viat no ni, nangma’n ki thu zôm loiin Hit mi Uria dôngma ni sutpaia.

¹¹Irngai roh, nangma insûngkua laia irthokin ni chungpa thil saloi insua ki ta, ni mithmu ngêta ni dôngmahai nang sut ki ta, ni kôla mihai pehai ki ti. Khanchu sîn khovâra ni dôngmahai zâlpuihai an ti.

¹²Nangma’n chu inrûkin sual ni sina, keima’n chu Israel mi murdi mithmua sîn khovâra, khahai kha nan tungtir pe hrang ki ni,” a tia.



¹³Davida khan Nathana kuang, “Rengpa chung a thil ki tho insual tâk a ni,” a tia. Nathana’n, “Rengpa khomin nang an za ta, thi no chi ni.

¹⁴Khannisianlân hi ni thil tho hin Rengpa irhming a insiat hrai sikin ni nâi kha chu a ithi ngêt hrang a ni,” a tia.

¹⁵Kha hnung chu Nathana kha a ina a fe tâka.

Davida nâi thi thu

Uria dôngma’n Davida nâi a ineipui chung a khan Rengpa’n kut a thâka, dam loiin a na ok tâka.

¹⁶Davida’n nâite ta hranga khan Pathian kuang a chongchaia, bu a ngheia, a tentana a lûta, zânsôt irnênga a zâl raka.

¹⁷A ina mi lianhai kha an hong lûta, irnêng ata kaithoi an tuma, khannisian thoi nuam maka, an laia khom bu khalâi ot nuam maka.

¹⁸Sûn sari nî chu nâite kha a thi tâka. Davida mi lianhai khan nâipangte kha a thi tah ti hril kha an chia. Anni khan, “Nâite a dam laia an kuanga thu a insîr kha ei chong irngai nuam ngai maka, nâite kha a thi ta, itin mo ei insîr ngam ta hrang? thil saloi a tho itinin,” an tia.

¹⁹Khannisian Davida khan an chonginrûk kha a hmuhaiin chu nâite kha a ithi tâk a nih ti an hriat tâka. Khanchu Davida khan an kuang, “Nâite kha a ithi ta mo?,” a tia. Anni khan, “O a thi ta,” an tia.

²⁰Khanchu Davida kha irnêng ata a thoia, tui a’rsila, sahriak a’rthua, a silkai a thûla, khanchu Rengpa ina a fea, Pathian chubai a mûka. A ina a zuang kîr nôkin chu bu a zonga, a makunga an hong doa, a nêk tâka.

²¹A mi lianhai khan a kuang, “Ni thil tho hi itina mo a ini? Nâite a la dam lai khan bu ni ngheia, ni chapa, khannisian nâite a thi leh chu ni thoia, bu ni inêk tâk hi,” an tia.

²²Davida khan, “Nâite dam lai khan bu ki ngheia, ki chap ngaia. Nâite a dam theina hranginRengpa’n lung a nin kham duaiin ki iti a ni.



²³Khannisian atûn hin chu a thi tâka, itho mo bu ki la inghei mai hrang? Nâite kha ki la ikoikhîr thei hrang mo? Itik nî mani chu ama kuang keima hi ki la ife ngêt hrang a nia. Khannisianlân, ama chu keima kuang zuang kîr ta no ni,” a tia.

Solomona suakna

²⁴Kha hnung chu Davida khan a dôngma Bethsebi kha lungngam a saka, a kuang a va lûta, a zâlpuia, nâipasal a neipuia. Davida'n a nâi irhming kha Solomona tiin a phua tâka. Nâipang kha Rengpa'n lung a thunga.

²⁵Khanchu deipu Nathana kha a tîra, nâipang kha Rengpa lungthung a ni sikin, nâipang irhminga khan Jedidia ti hrangin thu a pêka.

Davida'n Raba a lâkna

(1 Tsn 20.1-3)

²⁶Kha laia khan, Joaba khan Amon irchihai khopui Raba kha a rûna, khopui kha a lâk tâka.

²⁷Joaba khan Davida kuang mi a tîra, “Raba kha ki rûna, a tui fâk chu ki lâk tâka.

²⁸Atûn hin ni sipai la omhai kha bûmhaiin lân, khopui kha rûnin lân, nangma ngêtin la roh. Keima'n khopui kha ki lâkin chu irhming satna irputna ki ti,” a tia.

²⁹Khanchu Davida khan a sipaihai kha a bûma, Raba-ah khan a fea, an va rûna, an va lâkpai tâka.

³⁰Amon irchihai pathian Milkoma illima irthokin Davida khan rângachak rênglukhum her sômthum ringa dôra rik kha a lâka, lukhama khan lunglului kha a kop saa. Davida khan a lâka, a lua a khuma. Khopuia irthokin râlâk sum tamtak an lâka.

³¹Khopuia mihai kha thing âtna hai, kodâl hai, hreipui hai, hmangin sin an thoa, pilrôngar hai an siama, Amon irchihai khopui murdihai chu khang khan an loa. Kha hnung chu Davida le a mihai kha Jerusalema an kîr nôk tâka.



2 Samuela 13

Amon le Tamari

¹Davida nâipa Absaloma khan farnu hmêl satak hi a neia, ar hming chu Tamari a ni. Davida nâipa ngêt Amnona'n an dita.

²Khanchu Amnona khan a farnu Tamari sika khan a buai ok tâka, dam loiin a oma; ama lak kha dôngmate irthiang a nia; a chung a i mani thil hong tho kha Amnona ta hrangin thil saloi tak a nia.

³Khannisianlân Amnona khan rual a neia, ar hming kha Jonadaba a nia, Davida upa Simeia nâipa a ni. Jonadaba kha vârirlet tak a nia.

⁴Jonadaba khan Amnona kuang, “Reng nâipa ni nia, khannisian itho mo a sîn tin ni ingûi mai ngai hi? I sika mo a ini?,” a tia. Amnona khan, “Ki irzirpuipa Absaloma farnu hi ki indit tak tak a ni,” a tia.

⁵Jonadaba khan, “Ni zâlmuna zâl chianin lân, dam loi orhto tho'n lân, ni pa'n nang a hong en tika, 'Irngaihoi takin ki farnu Tamari kha ki kuang hong sianlân, bai ni hon fatir ri se. Hin ki mithmu theina hin fâk hrang ni sinsiam pe sianlân nin fatir ri se,' khanchu ama kut ngêtin khalâi nir fûktir pe ri seh lei ti roh,” a tia.

⁶Khanchu Amnona kha a zâla, dam loi orhto a tho tâka. Reng Davida khan a va enin chu Amnona'n a kuang, “Irngaihoi takin ki farnu Tamari hong sianlân, ki mithmu ngêta hin bai tiam inhni ni sin pe sianlân, ama kut ata lei fa ki ti,” a tia.

⁷Khanchu Davida khan Tamari kuang, “Ni nuchapa in tiang fe'n lân, fâk hrang va sinsiam pe ro duah,” ti hrangin mi a tîra.

⁸Tamari khan a nuchapa Amnona in tiang khan a fea, ama kha a lei zâl chiana. Khante, bai hlûm kha a lâka, an hmeta, a mithmua bai tiam kha a siam pea, an zêia.

⁹An zêina ata kha a fâk hrangin a makunga a sia pea, khannisian fa nuam maka. Amnona khan, “Mi murdi suak ving ri sehai,” a tia. Khanchu an suak pe vinga.



10Amnona khan Tamari kha, “Ni kuta ki fâk theina hrangin fâk hrang kha hong chôiin lân ki tentana hin hong lût ro,” a tia. Tamari khan a bai tiam kha a chôia, a nuchapa Amnona kuang a tentan sũaga khan a lûta.

11Infatir hrangin a kôlhrêta a va fea ni’n chu a chelthunga a kuang, “Hongin lân hmunkhatin zâl ei ti,” a tia.

12Ama khan, “Ni ngai ma, ki nuchapa, hi thil mualinphoi tak hi ni thopui no roh. Israelhai laia hianga thil hi tho hrang ni mah; hi thilsual porche hi tho no roh.

13Ki ta hrangin mualinphoina ni a ta, khôn mo ki mit ki imeng ngam hrang? Nang khom Israelhai laia hin mi invêt kêng nang an iti hrang a ni. Khasikin rêng chongpuiin lân, ni ni ilua nuama ni’n chu sêl ual no ni,” a tia.

14Khannisianlân a chong kha irngai maka; ama nêkin hrât lak a hrât ual sikin, nakhrâtin a namphaa, a zâlpui tâka.

15Kha hnung chu Amnona khan a hmumâk nôk tâka, a ihmumâkna kha an dit laia nêkin a ien nuam loi a ni ta. Khanchu Amnona khan a kuang, “Thoiin lân, rot ta ro,” a tia.

16Tamari khan a kuang, “Hiang hin chu a ini hrang ni ma, hianga dik loi taka ni ni irzûlpai hi chu ki chungga ni thil tho tâk leh khan a isa nôk ual loi a ni,” a tia. Khannisianlân Amnona khan a chong kha irngai pe ual maka.

17A sinthotu a zui kha a koia, “Hi nupang hi ki kuang ata kêlsuapaiin lân, inkhâr kal pe khap ro,” a tia.

18Khanchu a zuitu khan pên tiang a kêlsuaa, inkhâr a kal pe khak tâka. Khanchu, Tamari khan songkol irfual ze da danga irziak, rêng dôngmate irthianghai inngâk ngai kha an nghâka.

19Tamari khan a lua irvut ar thua, a songkol irfual kha an potthêra, a kut leh a hmâi a hîpa, inring taka chapin a fe tâka.

20A nuchapa Absaloma khan a lei hmu’n chu a kuang, “Amona kha ni kuang a hong ilût a ni na? Khannisianlân ki farnu ni irngaiinsiat hrai no ro. Ama



khom ni nuchapa a nia, khasikin hi thu hi tûte hril no ro,” a tia. Khanchu Tamari kha a chapa a nuchapa Absaloma ina beidong takin ar khum zêt tâka.

²¹Reng Davida khan kha thilhai kha an hriatin chu, a ning an mur pe oka.

²²Absaloma khan a farnu Tamari nakhrâtsonga a zâlpui pe sikin Amnona kha a hmumâk khak tâka, chong lua chongpui viat ta maka.

Absaloma'n phuba a lâk

²³Kum hni a hek zoiin chu, Efraima kho kôla Baal Hazora-a Absaloma'n a kêlbelra mul a epa; ama'n rêng nâipasalhai kha a koihaia.

²⁴Absaloma kha rêng kuang a fea, “Rengpa ki kêlbelra mul ki epa, nangma leh ni mi lianhai kha zuangin, hruaithe na zuang chang thei ung mo?,” a tia.

²⁵Rengin Absaloma kuang, “Ni ma, ki nâipa, kin rêngin kin zuangin chu, ni ta hrangin rik hrai a ti,” a tia. Absaloma khan a ngên ngut nguta, khannisian rêng kha fe nuam ual maka, sat a vura.

²⁶Khanchu Absaloma'n, “khano'nchu, ki irzirpuipa Amnona chu kin kuang zuang ri se,” a tia. Reng khan a kuang, “Itho mo ama kha a izuang bîk hrang?” a tia.

²⁷Khannisian Absaloma khan a ngên hrai tâk sikin, Davida khan Amnona le rêng nâipasalhai kha fe hrangin a tihai. Absaloma'n hruai roiinpui tak an thea.

²⁸Absaloma'n a zuituhai kha chong a bêhaia, “Amnona'n uain a ina an rui kha lei en chak unglân, that hrangin thu nangni ki pêkin chu, that roi, chi no roi. A mophurna chu keima'n pêl ki ti. Hâitakin om unglân, lungôkinchain om no roi duah,” a tia.

²⁹Khanchu a zuituhai khan Absaloma he bê lam angin an thoa, Amnona kha an that tâka. Davida nâipasalhai murdi kha an thoia, an sakuartung chung a an chuanga laizâm an tho tâka.

³⁰Lam laia an la om laiin, Absaloma'n, “Rêng nâipasalhai murdi kha a thathai vinga, inkhat lua hôi ta maka,” ti'n Davida kuang thu a hong tung tâka.



³¹Khanchu rêng kha a thoia, a silkaihai kha an potthêra irnênga a zâl rak tâka. A zuitu a kôla om murdihai khom khan an sil le kaihai an inpotthêr sa tâka.

³²Khannisianlân Davida upa Simeia nâipa Jonadaba khan, “Ka pu rêng nâipa ruatharte murdihai kha thathai zoi mah. Amnona vai kêng a thi. A farnu Tamari kha Amnona’n nakhrâtin a zâlpui pea irthoka khan Absaloma’n hianga tho hi a lei itum mai tâk a ni.

³³Khasikin ka pu, rêngpa hin a nâipasalhai murdi kha an ithi ving tâk a nih ti iamin lungkâng tuang ta no ri se; Amnona vai kêng a thi chu a ini,” a tia.

³⁴Absaloma kha chu laizâm a tho tâka, râl hrungtu ruatharte khan a mit an lêngtira Hononaim-a irthokin tâng lampui tiang khan mi tamtak hong a hmuaia. Ama kha rêng kuang a fea, a thil hmu kha a va hrila.

³⁵Jonadaba khan rêng kuang, “Khahai kha rêng nâipasalhai hong thak a ni, ki iti ang lam tak kha a ini a ni,” a tia.

³⁶A hril zoiin chu rêng nâihai kha an hong tung zela, an chap tâka. Davida le a mi lianhai khom kha an rêngin an chapa.

³⁷⁻³⁸ Absaloma kha chu laizâm a thoa, Gesur rêng Amihuda nâipa Talmaia kuang a fea, kha khan kum thum a va oma. Davida khan zoro sôtak a nâipa Amon kha a chûlpuia,

³⁹khannisianlân Amnona thina chungchâng thua khan ar tha a hor ngam tena chu a nâipa Absaloma kha ar ngaia a bei a dong pe tak taka.

2 Samuela 14

Absaloma hong kîr nôkna hranga Joaba insâp

¹Joaba khan rêng Davida lungrîl kha Absaloma chung a om pe mai ti an hriata.

²Khanchu Joaba khan Tekoa khuaa om nupang vârtak inkhat va hruai hrangin mi a tîra. Nupangnu kha a hong tungin chu Joaba khan a kuang, “Lusûn angin irsiamin lân, lusûn puan silin lân, sahriak khom irthu loiin nupang sôtaka mithi chûl angin om roh.



³Kha hnung chu rêng kuang fe'n lân, ki he nang bê lam ang tak hin va ti ro duah," a tia. Khanchu Joaba khan a ti hrang kha an hril tâka.

⁴Nupangnu kha rêng kuang a fea, a makunga irnêng sikin an boka, chubai a mûka, rêng kuang khan, "O rêngpa, ni san ro," a tia.

⁵Reng khan a kuang, "Imo a ini tâk?," a tia. Nupangnu khan, "Meithâi ki nia, ki pasal a thi tâka.

⁶Ka pu, nâipasal hni ki neia, sîn khat chu loia an ruaiin an irsuala, tûte a sel hrang lak om mahaia, inkhat khan a thatpai tâka.

⁷Atûn hin ki urênghaiin an ni hmumâka, a'rzirpuipa thattu kha, a urêngpa a that sikin an that theina hrang zongin ki nâipa kha an kuta bâng hrangin an ni tia. Khaang khan an that nôkin chu nâipasal boiin om ki ta, ki sabeina la omsun lua kha a ihek hlet hrang a ni. Ki pasal kha irhming nei loi le irnêng chung a irchi nei ta loiin a iom hrang a ni ta," a tia.

⁸Reng khan nupangnu kuang, "Ni ina fe nôk tan lân, ni chungchâng chu la ngaitua rong," a tia.

⁹Nupangnu khan rêng kuang, "O rêngpa, ka pu i khom tho'n lân, a mophurna chu keima leh ki in mihaiin la pêl ro ung; rêng le rêng insûngkua khan mophur no ri sehai," a tia.

¹⁰Reng khan, "Mi tukhomin nang an insîn chu, ki kuang hong hruaiin lân, nangni inbuai ta no nihai," a tia.

¹¹Nupangnu khan, "O rêngpa, ki nâipa thina chungchânga thisen phuba lâk hrang chu ki takmitihai hin ki nâi la omsun, thatpai nôkna hrangin irkhêl tak an tho ta loina hrangin Rengpa ni Pathian kuang chongchai mai ro duah," a tia.

¹²Nupangnu khan, "Irrgaihoi takin, o rêngpa ni kuang thu bâikhat ngot la ti nôk ki ti duah," a tia. Ama khan, "Ti roh," a tia.

¹³Nupangnu khan, "Itho hranga mo Pathian mihai chung a hianga dik loi ni itho mo? Ni nâipa lele kha a laizâm thôna hmun ata hong kêr nôk hrangin



phal pe mak chea. Khasikin atûna ni thu tihaiia irthokin nangma le nangma thei loi ni ichang a ni.

¹⁴Ei rêngin ei la ithi ngêt hrang a ni; eini chu tui irnênga irpai tâk ei ihrût thei ta loi ang hi ei nia; Pathian lua khomin mi thi tâk chu hringna pe ual ta ngai ma, khannisian rêng khan a rot tâk mi kha hong hruai kîr nôk hrang dân lampui a izong thei a ni.

¹⁵Atûn hin rêngpa hi thu insîr hranga ki ihong khom hi mi'n an ni khâl luan ni lei intungtir pe a tih ti ki sabe.

¹⁶Reng khan keima le ki nâipa hi Pathianin a mihai a ipêk ram lua loi hranga irhmangtir tumtu ata ni saninzôk hrangin ni lei irngaitua pe ni ti, ki tia.

¹⁷Hiang hin nang a zuinu ta hrangin ka pu, ni thu kha irtharngam om tak a ni; a sia le sa theithâk hrangin rêng chu Pathian vântirtôn ang an nih ti ki iti a ni. Rengpa ni Pathian chu ni kuang om ri se," a tia.

¹⁸Reng khan, nupangnu kuang, "Thu inkhat nang irdon ki ta, ite ip viat loiin thudik ni insîr hrang a ni duah," a tia. Nupangnu khan, "Rengpa ka pu, nir don roh," a tia.

¹⁹Reng khan, "Hi thu rêng rênga hin Joaba hin kopna mo a nei?," a tia. Nupangnu khan, "Rengpa, ka pu nir hmingin ki iti a ni, ni chong irdon kha tûte'n vei tiang mani, chang tiang mani, pial thei no ni. Ni sipai hruaitu Joaba khan a ni tîra, ki tho hrang le ki iti hrang murdi he a ni ibe ving a ni.

²⁰Khannisianlân hi chungchâng thuhai hi siam intûn nôk hrangin Joaba khan a itho a ni. Rengpa ka pu chu, Pathian vântirtôn ang dôra vâa a nia, rammuala thil tung murdi hi an hriat ving," a tia.

²¹Inhnunga chu rêng khan Joaba kuang, "Irngai ro, ni inuam lam taka tho hrangin ki inuam a ni. Fe'n lân, ruatharte Absaloma kha va zongin lân, hin hong hruai nôk ta ro," a tia.

²²Joaba kha a hmâi irnêng sikin Davida makunga khan an boka, chubai a mûka, a kuang, "O rêngpa, Pathianin sat nang vur ri se. Ki ingênna kha hlo a nin chuktir pe sikin. A vuan hin ni mit ki tung ti kin hriat ta," a tia.



²³Kha hnung chu Joaba kha a thoia, Gesur-a khan a fea, Absaloma kha Jerusalema a hruaia.

²⁴Khannisian rêng khan Absaloma kha rêng ina om loi hrangin thu a pêka, “Ama in tiang fe sianlân, ki hmêl la hong hmu no ri se,” a tia. Khanchu Absaloma kha ama in tiang khan a om tâka, rêng hmêl kha la va hmu maka.

Absaloma le Davida an irngei nôkna

²⁵Israel murdi laia Absaloma ang dôra hmêl sa le inpâk inruk tûte om mahaia. A kemitin ata a lusîp dênin demna zel a iom loi a ni.

²⁶A sam khom a tama, a sei pe'n chu a rik hrai ngai sikin, a kum tin voikhat chu a iep ngai a ni. A sam ep kha an var ngaia, rêng varna ngai khan her hni nêka rik a ni ngai.

²⁷Absaloma khan nâipasal thum le nâinu inkhat a neia, ar hming chu Tamari a nia, hmêl satak a ni.

²⁸Absaloma kha kum hni Jerusalema a oma, khannisian rêng hmêl kha hmu viat maka.

²⁹Kha hnung chu Absaloma khan rêng kuanga tîr hrangin Joaba kha chong an thuana, khannisian Joaba kha hong nuam maka. Absaloma khan chong an thuan nôka, Joaba kha nuam pe nôk maka.

³⁰Khanchu Absaloma khan a zuituhai kuang, “Tho Joaba loi chu ki loi kôla om a nia, barli a neia, fe unglân va hâl roi,” a tia. Khanchu an fea loi kha an va hâlpai tâka.

³¹Kha hnung chu Joaba kha Absaloma ina a fea, a kuang, “Itho sika mo nang a zuituhai khan ki loi an ihâl?,” a tia.

³²Absaloma khan Joaba kuang, “Irngai ro, i lo hranga mo Gesur ata hi ki ihong? Gesur-a khan om mai inlân, ki ta hrangin a isa ual hrang ti hrangin rêng kuanga fe hrangin nang ki tia, ni ihong nuam loi. Khasikin rêng hmêl ki hmu theina hrangin zoro nir fûktir pe hrangin nang ki inuam a ni. Siatna ki neiin chu ni thatpai zel ri se,” a tia.



³³Khanchu Joaba kha rêng Davida kuang a fea, Absaloma thu hril murdi kha a hril tâka. Reng khan Absaloma kha a koia, rêng kuang a fea, rêng makunga khan irnêng sikin an boka. Reng khan Absaloma kha a lei tuma a lôm oka.

2 Samuela 15

Absaloma'n pualoi sin tho a tum

¹Kha zoiin chu Absaloma khan tâli le sakorhai le mi sômringa a matona fe hrangin a'rsiamtirhaia.

²Absaloma kha zîng taka thoiin a fea, kul kotbâi lampuia khan a lei ngîra, rêng kuanga an thubuai hong intung hranga honghai kha Absaloma'n a lei koihaia, "Tu kho mi mo nin ini?" tiin a lei irdonhaia, khante mihai khan tu nama mi mo an inih ti an hril zoiin chu,

³Absaloma khan, "Nin sûnga nin thu kha a dikin a isa a ni; khannisian a lei irngaitu rêng khan tûte phun ual ma," a lei ti pehaia.

⁴Absaloma khan, "Mi tin thubuai neihai mani, zong hrang neihai mani chu keima kuang an hong theina hrangin keima hi, hi rama roirêltu'n ni siam sianlân, ki inuam a ni. Khanchu fel takin rêl pehai ki ta, a lei ti pehai sa ngaia.

⁵Kha bana tukhom ama chubai mûk hranga honghai kha a lei chelhaia, an kuahaia, a tum tumin chubai a lei thohai ngai.

⁶Khang khan Israel mi, rêng kuanga an thu intung hranga honghai kha Absaloma khan a lei ilômhai ngai a ni, khanchu an lungrîl kha a len hôp inhnê pehai tâka.

⁷Kum minli ar zoi tena chu Absaloma khan rêng Davida kuang, "RENGPA kuanga ki chonginkung thangsua hrangin Hebron khuaa ni tîr ro.

⁸Suria rama Gesur-a ki om laia khan, Rengpa'n Jerusalema a ni hruai nôkin chu Hebron khuaa Rengpachubai mûk ki ti," tiin Rengpa kuang chong ki lei inkung tâk a ni, a tia.

⁹Reng khan a kuang, "Irtharngam takin fe ro," a tia. Khanchu Absaloma kha Hebron khuaa a fe tâka.



¹⁰Khannisian, Absaloma'n nam tin laia palai a tîrhaia, “Bekul irhâi nin inhriat tena chu Absaloma chu Hebrona khan rêng a chang ta ti roi,” tiin an hriltirhaia.

¹¹Absaloma kuang khan a mi fial, irzahnihai Jerusalema irthokin an fea, lungrîl satak irputin an fea.

¹²Absaloma khan irbôlnahai kha an hlan laiin, Gilo khuaa mi Ahithofela, Davida roizêkpui ngai mi inkhat kha, kha khua Gilo ata kha a koia, rêng chung a an thuphan inrûk kha a'rkhêl hraia; Absaloma tiang khan mipuihai kha an pung tîr tîr tâka.

Jerusalema irthokin Davida a rot

¹³Davida kuang khan, “Israel mihai lungrîl kha Absaloma tiang a fe ok tâk,” tiin mi inkhatin a hong hrila.

¹⁴Khanchu Davida khan Jerusalema ama kuanga omhai mi lianhai murdi kuang khan, “Absaloma kut ata zôk ei nuamin chu laizâm ei itho zel hrang tâk a ni. khano'nchu hin a ni hong ide zel hrang a nia, ei chung a thil saloi a hong itho hrang a nia, khopuia mihai hi a hong ithat hrang a ni,” a tia.

¹⁵Reng mihai khan rêng kuang, “A ni, ka pu, nang a zuituhai hin kin pu iti murdi tho hrangin kin irsiam diam a ni,” an tia.

¹⁶Khanchu rêng kha a suaka, a in sîng mi murdi le a mihai khan an zuia. Rengin a in nghâk hrangin lâksîr sômkhathai vai kha a mâka.

¹⁷Reng le a mihai murdiin khopui ata an suak lai khan, inhnungkhôn taka an la'rngam chota.

¹⁸A mi lianhai kha a makunga an ngîra, rêng hrungtu sipai kha a maton tiang a hong thenga. Sipai irzaruk Gath-a irthokin ama hong zuituhai khom kha an hong tunga,

¹⁹rêng khan an hruaitu Git mi Itaia kuanga khan, “Itina mo nangma khom hi kin laia ni ihong sa mo? kîr nôkin lân, rêng thar kuang khan om ro. ram dang mi ni nia, ni ram rengata hong irthon ni nia.



²⁰Mizâna la hong chak ni nia, a vuan hin kin laia a suk a tunga ni zui hrangin nang ki iti hrang ni mak che? Ki fena hrang lua ki la inhriat loi a ni, nang chu kîr nôkin lân, ni urênghai kha hruai kîrhai ro. Pathian lungkhamna le thutak ni kuang om ri se,” a tia.

²¹Khannisianlân, Itaia khan rêng kuang khan, “Rengpa hringna le rêng, ka pu hringna irhming sâmin ki ti, thi le thi, dam le dam, ni fena hmun tina ki ife sa hrang a ni,” a tia.

²²Davida khan Itaia kuang, “A sa fe sa mai ta ro,” a tia. Khanchu Git mi Itaia kha a mihai murdi le, a nâitehai leh khan an fe tâka.

²³Davida le a mihai kha an fe tâka, mipuihai khan, a ram châ pumin an irzuka. Reng khan Kidron vadung a’rkâna, a mihaiin an zuia, an rêngin ramchâr panin an fe tâk.

²⁴Ochai Zadoka kha Pathian Thuthung Bôm irzônin Levihai murdi leh a kuang an fe sa tâka. Pathian Thuthung Bôm kha an insuma, mipuihaiin kho sâng kha an mâk irkip zoi mâka chu a oma. Ochai Abiathara khom kha kha khan a om saa.

²⁵Kha hnung chu rêng khan Zadoka kuang, “Pathian Thuthung Bôm kha khopui sâng irzôn kîr nôk roi, Rengpa mit tunga ki omin chu itik ni mani chu ni hruai kîr nôk a ta, Pathian Thuthung Bôm le a omna kha ni’rhmû nôk a ti.

²⁶Khannisian ki chungâ lômna zel a nei noa ni’n chu hiang hi ki nia, a sa a iti lam takin ki chungâ hin tho ri se,” a tia.

²⁷Reng khan ochai Zadoka kuang, “En ro, hi nâipa Ahimaaza le Abiathara nâipa Jonathana hi hruaihaiin lân, lungngam takin khopuia kîr nôk roi.

²⁸Keima chu nin ni hong hril nôk mâka chu ramchâra ivadung omna hin ki lei iom mai hrang a ni,” a tia.

²⁹Khanchu Zadoka le Abiathara khan Pathian Thuthung Bôm kha Jerusalema an fepui nôka, khatak khan an om ta.



³⁰Davida chu chap pumin oliv tâng kha a lua, a beidong inlangtirna hrangin a lu a'rkhûa, ke leh ngot a fea. A kôla mihai khan an lu an khum chita, chap pumin an lui sa tâka.

³¹Mi tu'n mani, Davida kha, Ahithofela kha Absaloma tianga kopin a thupêktuhai laia a kop sah ti an hrila. Davida khan, "O Rengpa Ahithofela roizêk kha chanlamboi inchangtir pe ro," tiin a chongchaia.

³²Davida kha Pathian biakna tâng sîp a hong tungin chu, a rual satak Ark mi Husaia kha a silkaihai inpotthêr kha inngâkin, a lua vâiphin sip khakin ama don hrangin a lei hongga.

³³Davida khan a kuang, "Keima kuang ni hong sa'n chu ite ni san thei no chi ni.

³⁴Khannisian khopui tiang khan kîr nôkin lân, Absaloma kuang, o rêngpa ni sinhotu inkhatin om ki ta, matona ni pa sinhotua ki iom ang khan atûn khom hin ni sin thoin om ki ti, ni va ti'n chu ni san thei ni ti. Khanchu, Ahithofela roizêk kha ni thei dôrin sêl inkal pe'n lân.

³⁵Ochai Zadoka le Abiathara khom kha an iom sa a ni; rêng ina thu suak ni inhriat dôr chu ochai Zadoka le Abiathara inhril ngai ni ta.

³⁶An nâipasalhai ruai Zadoka nâipa Ahimaaza le Abiathara nâipa Jonathana khom an laia om an ni. Ni thil inhriat murdihai kha ni hong hril hrangin annihai kha ni hong itîrhai hrang a ni," a tia.

³⁷Khanchu Davida rualpa Husaia kha Jerusalem khopuia khan Absaloma a hong tung le khan a lût tâka.

2 Samuela 16

Davida le Ziba

¹ Davida khan tâng sîp a lui zoiin chu Mefiboseta zuitu Ziba khan a lei sâma, sakuartung inhni irfûkin, bai hlûm irzahni grep rachâr irku irzahni, fûr thei irzahni le uain bûr khat a hong chôia.

²Reng Davida khan, Ziba kuang khan, "Khahai kha imo ni ilo hrang?," a tia. Ziba khan, "Sakuartunghai hi rêng in sêng mihai chuangna hrang a nia, bai le



theihai hi ruathartehai fâk hrang a ni, uain hi chu ramchâra a sôl murdihai in hrang a ni,” a tia.

³ Reng khan, “Khante Saula tupa Mefiboseta teh kho tiang mo a iom?,” a tia. Ziba khan, “Jerusalema a om, a vuan hin Israelhaiin ka pu ram an ni ipêk nôk hrang a ni, a ti khate,” a tia.

⁴ Reng khan Ziba kuang khan, “Mefiboseta thil nei murdihai hi chu ni ta inzen a ni,” a tia. Ziba khan, “Chubai nang ki imûk ta tak a ni; o rêngpa, ka pu, ni mit intungtir mai tum ki ti,” a tia.

Davida le Simeia

⁵ Reng Davida kha Behurim a tungin chu, Saula urêng hai laia mi Gera nâipa Simeia a lei hong suaka, a hong balamin khomâk a hong sâm thiaia.

⁶ Simeia khan Davida le a mi lianhai kha lung leh a dênga, a mipuihai leh a sipaihai murdihai khan Davida kha vei le chang tianga irhual pumin.

⁷ Simeia hin khomâk a sâma, hiang hin a tia, “Fe irhmang ta ro, fâk irhmang ta ro, nangma thisen insuak ngai, mihriam sa loipa.

⁸ Saula rêng ram kha ni lâkpai pea, atûn hin Saula in sûng mihai thisen kha Rengpa’n ni chung a insum a ni ta. Rengpa khan ram kha ni nâipa Absaloma a ipêk a ni ta. Thisen insua ngai mi ni ni sikin ni bingin siatna ni chung a ni intungtir tâk a ni,” a tia.

⁹ Zeruii nâipa Abisaia khan rêng kuang, “I lo hrang mo hi mi hin rêngpa ka pu hi khomâk a isâm? Fe ki ta, a lu la va tanpai pe rong dua,” a tia.

¹⁰ Reng khan, Abisaia le a urêngpa Joaba kuang khan, “Nangni’n nin ni inhriatpui hrang ni ma. Rengpa’n ama kha khomâksâm roh a iti pe kêng, khasikin khomâk a ni isâm a ni’n te tu ngân mo a ini? I lo hranga mo hianga a itho? Tu ngân mo a ti thei hranga,” a tia.

¹¹ Davida khan Abisaia le a mi lianhai murdi kuang khan, “Irngai ta roi, ki nâipa, ki rîla ra ngêtin, ni that a itum a ni; khasikin hi Benjamina len vâng hin chu a itum irkhêl ual hrang a ni. Khasikin ite lôhai no roi, khomâk kha ni sâm ri sehai; Rengpa’n khomâk a ni isâm a ni.



¹²Rengpa'n ki dengtheizia hi zuang hmu a ta, Rengpa'n a vuana khomâk a ni isâm hi a sa lam pangin a ni thuan duai khom a ni thei," a tia.

¹³Khanchu Davida le a mi lianhai kha lampuia an fe maia. Simeia khan a phâkhaia, tâng panga khan a luia, a fe pumin khomâk a sâm thiaia, lung leh a dêng maia, pildihai leh a dênga.

¹⁴Reng le a kuanga om murdihai khan sôltakin Jordan an tunga, khatak khan an sôl an irngamtir tâk a ni.

Absaloma'n Jerusalem khua a lût

¹⁵Absaloma le a kuanga Israel mi om murdihai khan Jerusalem an hong lûta, an laia khan Ahithofela khom a oma.

¹⁶Ark mi Husaia, Davida rualpa khan Absaloma kuang a tungin chu, a pâia, "Reng chu dam sôt ri se, rêngpa chu dam sôt ri se," a tia.

¹⁷Absaloma khan Husaia kuang, "Hiang hin kêng a ini na, ni rualpa lung ni inkham dân chu? Itho mo ni rualpa kuanga ni ife loi?," a tia.

¹⁸Husaia khan Absaloma kuang, "Itin mo ki ife hrang? Rengpa le hi mipuihai le Israel mi murdi'n an inthangpu tianga kop ki ni. Ni kuanga om hrang ki ni.

¹⁹Tu sin mo ki itho hrang? a nâipa sin ki itho hrang mo ni ma? Ni pa sin ki itho ngai ang khan, ni sin ki itho hrang a ni," a tia.

²⁰Khanchu Absaloma khan Ahithofela kuang, "Itin mo ei itho ta hrang, nir ngaidân insîr ro," a tia.

²¹Ahithofela khan Absaloma kuang, "Ni pa'n lâksîrnu in nghâka a isia kha zâlpuiin lân; khanchu Israel mi murdi'n ni pa inuam loi sin ni tho ti len hria an ta, khanchu nangma tianga kophai kha inthor inhrât ok a ti," a tia.

²²Khanchu rêng in chung a khan Absaloma ta hrang puan in an sunga, Israel mihai murdi mithmua Absaloma kha a pa lâksîrnu zâlpui hrangin a lût tâka.

²³Kha laia khan chu Ahithofela roizêkhai chu Pathian thu ang dôrin an ibe ngai a ni; Davida le Absaloma khan an izôm ngai a ni.

2 Samuela 17



Husaia'n Absaloma a hruai insual

¹Zoro sôtloite hnunga chu, Ahithofela khan Absaloma kuang, “Mi sîngni inthang suak ki ta, a vuan zân Davida irzûl hrangin irthok suak ki ti.

²A irzal le a beidong zoro lai tak son va doi ki ta, irlonthingin chi a ta, khanchu a kôla om murdihai kha laizâm tho an ta, khanchu rêng kha va thatpai ki ti.

³Khanchu mipuihai kha ni kôla, moi a pasal kuanga hong angin hong hruaihai ki ti. Mi inkhat vai that ni inuam a ni; mi danghai chu zôkin om an ti,” a tia.

⁴Khanchu kha thu khan Absaloma le Israel hruaituhai murdi kha an lômtirhai tâka.

⁵Absaloma khan, “Ark mi Husaia kha koi phot unglân ama'n te imo a hril, la'rngai bak rei,” a tia.

⁶Husaia a hong tungin chu, Absaloma khan, “Ahithofela khan hiang hin a tia, a iti lam ang hi ei itho hrang mo? Aninole nangma te imo nir ngaidân?,” a tia.

⁷Husaia khan Absaloma kuang, “Atûn laia Ahithofela roizêk hi a isa loi a ni.

⁸Ni pa le a mihai kha nin hriata, sipai hâitak inthang, milung ngar tak, rama savom a tê lâkpai thei ang dôra hâi a nia. Ni pa kha irdoi mi a nia, mipui laia a riak ti khom inhre mak mea.

⁹Atûn khom hin kho tianga rôla mani, ar bîk chian khom a ni thei, Davida'n a zuang doia mi senkhat an inrîla, an hriat murdi'n Absaloma zuituhai an that inhnêhaia, an iti hrang a ni.

¹⁰Khanchu sipai hâitak, kâmkeibaknei ang dôra hâi khom an lei indôptir hrang a ni, Israel mi murdi lak khan, ni pa kha sipai hâi tak a ni le a kuanga omhai kha mi hâi inzen an nih ti an inhriat vinga.

¹¹Keima roizêk dânin chu, Israel mihai, Dan le Beerseba kêra om murdihai kha tuikhangliana chiaî zât ni kuang koibûmhaiin lân, irdoinaa khan nangma ngêtin hruaihai ro.



¹²Khanchu Davida kha kho hmuna khom ei irtokpuina taka, irnênga irdo tâk ang dôrin doi ei ta; ama le a kuanga om murdihai kha inkhat lua hôihai no ih.

¹³Kho sũaga a lûtin chu ei mihaiin hrui chôiin kha khua khan va fe an ta, lungtehai lua om thei loi rakin ivadunga inthapai ei ti,” a tia.

¹⁴Khanchu Absaloma le Israelhai khan, “Ark mi Husaia roizêk kha Ahithofela roizêk nêkin a sa ual,” an ti tâka. Absaloma chung a thil saloi a tung theina hrangin Rengpa khan Ahithofela roizêk satak kha zôm loi hrangin a lei inkung sai tâk a ni.

David a inhrl le a zôkna

¹⁵Kha hnung chu Husaia khan ochai Zadoka le Abiathara kuang khan, Ahithofela'n Absaloma le Israel hruaituhai roi a zêkpui dân hai, ama khomin roi a zêkpuihai dân kha a hrila.

¹⁶Khanchu Husaia khan, “Atûn hin irhnot roi! a vuan zân chu ramchâra Jordan vadung kâinahai khan riak ta loiin irkânpai ngêt ta roi; khano'nchu rêng le a kuanga omhai kha an irhmang ving hrang a ni, iti Davida van hril zôi zel roi,” a tia.

¹⁷Abiathara nâipa Jonathana le Zadoka nâipa Ahimaaza kha Enrogel-a an oma, khopui an lût mi'n an hmuhai loina hrangin Jerusalem kho kôla khan an iom a ni. Suaknu inkhat hin thil omdânhai a va hrilhai mai ngaia, anni khan rêng Davida kha an va ihril nôk ngai a ni.

¹⁸Khannisian sîn khat chu irbi hrangin Bahurim-a mi inkhat ina irhnot takin an fea. Ama khan a kholaiia tuisunsuak a neia, kha khan an lûta.

¹⁹Kha pa dôngma khan tuisunsuak kha a sũaga leh a sũaga, tûte inhre thei loina hrangin a chung a khan bu a phoia.

²⁰Absaloma mihai kha, kha ina khan an hongga, nupangnu kuang khan, “Ahimaaza le Jonathana-hai kha khô tiang mo an om?” an tia. Khante nupangnu khan, “Vadung chu irkân ta an ti,” a lei tia. An va zonga, khannisianlân hmu mahaia, khanchu Jerusalema an kîr nôk tâka.



²¹An fe zoi hnung chu Ahimaaza le Jonathana kha tuisunsuak ata kha an hong suaka, rêng Davida kha an va hrila. Ahithofela'n a thuphan dânhai kha an hrila, a kuang, "Irhnot unglân, vadung kha irkân zel roi," an tia.

²²Khanchu Davida le a mihai khan Jordan dung an irkân zel tâka, khua a hong vârin chu an rêngin an irkân ving tâka.

²³Ahithofela'n a roizêk kha zôm mah ti an inhriatin chu, a sakuartung an irfûka an suaka, an khuaa a fe tâka. A in sêngkuahai roizêk dân hrang a'rfûk pehai diama, a'rkhâithat tâka. Khanchu an in mihai thâna an phûm tâka.

²⁴Absaloma le a kuanga Israel mi murdihai khan Jordan dung an irkân laia khan, Davida chu Mahanaim khua a lei tung tâka.

²⁵Absaloma khan Joaba irthûlin Amasa kha sipai hruaituin a phuna. Amasa kha Ismaela mi Jethera nâipa a nia; Amasa nu chu Nahasa nâinu Abigaili Joaba nu, Zeruii irzirpuinu a ni.

²⁶Absaloma le a mihai khan Gilead rama omhmun an va khôra.

²⁷Davida'n Mahanaim khua a va tungin chu Amona irchi Raba khuaa mi Nahasa nâipa Sobia hai, Lo-debar khuaa mi Amiela nâipa Makira hai, Rogelim khuaa Gilead mi Barzilaia hai khan an lei hong dona.

²⁸⁻²⁹Davida le a mihai kha ramchâra khan phîngchâmin, tuiinhrâlin, an sôl tak tak ti an inhriata. Anni khan puantha hai, irhuina hai, pilbêl hai, an hong chôl pehaia, khakhêla bu hai, barli hai, baidi hai, bu'nzêi hai, bera hai, chana hai, khuitui hai dût hai, dût kang hai, le bera hai, Davida le a kuanga mi omhai fâk hrang an hong chôl pehai saa.

2 Samuela 18

Absaloma thina thu

¹Davida khan a kôla mi om murdihai chu a bûmhai vinga, sângkhat pâl, irzakhat pâl in a zêkhaia, an chung a hruaitu a siahaia.

²Khanchu Davida khan a mihai pâl thumin a tîrhaia, pâl khat kha Joaba'n a hruaihaia, pâl khat kha Joaba sangpa Abisaia'n a hruaihaia, pâl khat kha Git



mi Itaia'n a hruaihaia. Rengin a mihai kuang khan, "Keima khom nin laia fe sa zêl ki ti," a tia.

³Khannisianlân mipuihai khan, "Nang chu keini laia hong sa no chi ni. Keinihai hi chu laizâm tho chuk duai ta sianlân, râlhaiin ite bêin ni bê no nihai, a chimrip va thi khomin lân; ite bê'n bê viat no ni; khannisian nangma chu keini sîngkhat nêkin ni ihlu ual a ni. Khasikin khopuia ni om chiana, ni san hrang mi ni hong itêr kha a isa ual a ni," an tia.

⁴Reng khan an kuang, "A sa nin ti lam takin tho ki ti," a tia. Kha hnung chu rêng kha kul kotbâia khan a ngêra, a mihai kha irzakhat le a sâng têlin an suak sup supa.

⁵Reng khan Joaba le Abisaia le Itaia kha, "Keima sikin ruatharte Absaloma kha va'nnatir no roi duah," a tia. Sipaihai khan, Absaloma chungchâng thua rêngin sipai hruaituhai laia a iti kha an inhriata.

⁶Davida sipaihai kha ramkâr tiang an fea, Israel mihai kha Efraima ramkâra khan an doi tâka.

⁷Davida mihai khan Israel mihai kha an inhnêhai tâka, kha ni khan mi sînghni an ithathai an ni.

⁸An irdoina hmun ram pumpui a huap zita; kha ni khan khandaia thi nêkin rampuia thi an itam ual a ni.

⁹Absaloma khan Davida mihai kha a va tonghai thuta; Absaloma kha sakuartung chung a chuanga, sakuartung kha seso thing hnuaia an tân lûta, Absaloma lu kha seso thing ôn khan a toka, sakuartung kha an tân pata, Absaloma chu thing ôna khan a'rtûl raka.

¹⁰Davida mi inkhat hin a hmua, Joaba a hrila, "Ka pu seso thinga Absaloma irkhâi chian ki hmu," a tia.

¹¹Joaba khan an sêr pepu kuang khan, "Ni hmu'n te, itho mo ni ithat loi? khang khan tho'n lân chu tangka sôm le kongkhit nang ki ipêk hrang," a tia.



¹²Khannisianlân kha mi khan Joaba kuang, “Tangka sângkhat khom nin pe’n lân, rêng nâipa chung a ki kut zel tha no ning. Ki mithmua rêngin nangma le Abisaia le Itaia kuang, ‘Keima sikin ruatharte Absaloma kha chu innatir no roi,’ iti thu nangni a ipêk a ni.

¹³Reng thu zôm loiin lei thatpai ta khomin lân, rêngin len hria a ta, (rêng kuang khan ite thup lak ni no ni.) Nangma lak chu zôk phar rêk ni ta,” a tia.

¹⁴Joaba khan, “Hiang hin nangma kuang zoro inhek thei no ning,” a tia. Khanchu ufei inthum a chôia, seso thing ôna irtûl chian a lei hring mai Absaloma kângirbua khan a suna.

¹⁵Kha hnung chu Joaba râltukfam chôitu sipai sômkhathai khan an hong pana, Absaloma kha an suna, an thatpai tâka.

¹⁶Joaba khan irsual irngamtirna hrangin bekul a tuma, Israel mihai irzûltu sipaihai kha an hong kîr nôk ta.

¹⁷Absaloma ruak kha an lâka, rampui hnuiaia rôl inthûk taka khan an pai tâka, a chung a lung leh an irkhûa, Israelhai kha mâni in senga an pan ta.

¹⁸Absaloma khan a dam laiin rêng phâia khan ama inhriat maina hrangin lung a lei buk irchuan thâma, “Ki’rhming a dâi nona hrangin nâipasal lak nei ma unga,” a tia. Kha lung irchuan irhming hranga khan irputin atûn ten hin “Absaloma inhriat maina,” iti a ni ta.

Absaloma thi thu Davida an hril

¹⁹Khanchu Zadoka nâipa Ahimaaza khan, “Va intân ki ta, Rengpa’n a râl phuba a ilâk pe dân kha rêng hi la va hril hi rong dua,” a tia.

²⁰Joaba khan a kuang, “A vuan chu ite thurchi la va hril no ro, sîn danga la va hril ro, rêng nâipa kha a ithi sai tâk a nia, a vuan chu ite va hril no ro,” a tia.

²¹Kha hnung chu Joaba khan Kus mihai kuang khan, “Fe’n lân ni thil hmu kha rêng va hril ro,” a tia. Kus mi khan Joaba kha kûnin chubai a mûka an tân tâka.



²²Ahimaaza khan Joaba kuang, “I khom ni sianlân, irngaihoi takin thurchi kha la van hrilhai sa rong,” a tia. Joaba khan, “Ki nâipa, thurchi hril man ite hmu ual no chi ni, i lo hrang mo van tân hranga?,” a tia.

²³Khannisian Ahimaaza khan, “I khom ni sianlân, ki ife nuam a ni,” a ti nôka. Khanchu Joaba khan, “Khano’nte fe ta ro,” a tia. Khanchu Ahimaaza kha phâizôl tiang lampuia an tâna, Kus mi kha a khêlpaia.

²⁴Davida kha kul kotbâi pên tiang le sâng tiang laitaka khan a lei toia. Râl hrungtu khan kul kotbâi sâng tiang ual chung tiang khan a hong luaia, a hong ngîra, ar hei vêlin chu mi inkhat a bing vaia hon tân hi a hmua.

²⁵Râl hrungtu kha a khêka, rêng kha an hrila. Rêng khan, “Mi inkhat vai a ni’n chu thurchi ni hon hril hrang ni ngêt a ti,” a tia. A hon tântu kha a hong nâi tîr tîr tâka.

²⁶Kha hnung chu râl hrungtu khan mi dang a bing doka hon tân a hmu nôka, râl hrungtu khan kotbâi hrungtu a koia, “En ta, mi dang a bing doka hon tân a om nôka,” a tia. Reng khan “Ama khom khan thu a hong intungtir sa hrang ni a ti,” a tia.

²⁷Râl hrungtu khan, “Maton hon sa ualpu so chu Zadoka nâipa Ahimaaza kêng a ang,” a tia. Reng khan, “Ama kha mi satak a nia, thurchi a hong intung hrang ni a ti,” a tia.

²⁸Ahimaaza kha a khêka, rêng kuang, “A sa inzen,” a tia. Khante a hmâi irnêng sikin rêng makunga khan chubai a mûka. “Rengpa nang a doitu kut thâk nang tumtuhai chung a inhnêna nang pêtutu Rengpa ni Pathian chu inpâkin om ri se,” a tia.

²⁹Reng khan, “Ruatharte Absaloma kha te a la dam mo?,” a tia. Ahimaaza khan, “Ka pu, ni sipai hruaitu Joaba khan a ni tîr suak lai khan an buai sup sup hi ki hmua. Khannisian imo a ini chie chu nang hril thei no ning,” a tia.

³⁰Khante rêng khan, “Khan lei ngîr hi ro,” a tia. A’rthîna, a lei ngîr tâka.

³¹Kha hnung chu Kus mi kha a hong tunga, rêng kuang khan, “Rengpa ka pu, ni ta hrang thurchi sa ki hong intung a ni,” a tia.



³²Reng khan Kus mi kuang khan, “Ruatharte Absaloma kha a la dam chu a ini ma ni?,” a tia. Kus mi khan, “Ka pu, ni râlhai le ni siatna zongtuhai murdi chu, kha ruatharte ang khan om ving ri sehai,” a tia.

³³Khanchu rêng kha ngaisiatna’n a hong de tâka; kul kotbâi chung a tentana khan a fea, a chapa. A chap pumin, “O ki nâipa Absaloma, ki nâipa, ki nâipa Absaloma, ki nâipa, nir thûl hin keima ki lei ithi ni sianlân chu o! O Absaloma ki nâipa, ki nâipa!,” a tia.

2 Samuela 19

Joaba’n Davida a ngona

¹Joaba kha an inhrila, “Reng khan Absaloma kha a châa, a chûla,” an tia.

²Kha ni khan chu rêng kha a nâipa sika khan a bei an dongtir tâka, an iti kha mipuihai khan an len hriat sikin an inhnê laia raifân kha mi murdi ta hrangin chûlna a hong ni ta.

³Sipaihai kha irdoinaa mi laizâm tho, inzakna sika dâihreka an ihong ngai ang khan, kha ni khom khan dâihrekin khopui an hong lûta.

⁴Reng khan a hmâi a hîpa, “O ki nâipa Absaloma, o Absaloma ki nâipa, ki nâipa,” tiin a chap ngûi ngûia.

⁵Joaba kha rêng ina a va fea, rêng kuang khan, “Ni hringna hai, ni nâipasal hai le ni nâinuhai hringna le ni dôngma le ni lâksîrnuhai hringna inzôktu ni mihai kha a vuan hin hmâimôk ni irlâktirhai a ni.

⁶Nangma lung nang thungtuhai ni hnôla, nang a hnôltuhai lung ni thunga. Ni sipai hruaituhai le ni mihai kha ni ta hrangin ite an ini loizia a inlang a ni. Absaloma kha hring sianlân, keinihai hi thiin lân, ni ilôm ual hrang a ni.

⁷Khasikin thoiin lân, suak zelin lân, ni mihai milung inchuk lam takin thu hril ro. Khaangin ni tho noa ni’n chu Rengpa irhmingin ki ti, nangtûk zîng tena chu ni kuanga inkhat lua om ta no nihai. Ama kha ni ta hrangin ni hringnuna atûn tena ni chung a thil saloi tung murdi laia thil saloi irkhêl tak ni a ti,” a tia.



⁸Kha hnung chu rêng kha a thoia a fea, kul kotbâi kôla khan, a toi ti an inhriatin chu an rêngin a kôla an hor bûm tâka.

Davida Jerusalema a kîr

Israelhai kha chu mâni puan in chita laizâm an thoa.

⁹Ram pumpuia khan, “Reng Davida khan ei râlhai kut ata a nin zôktir ta. Filistia mihai kut ata a nin zôktir tâka; khannisian atûn hin hi rama irthokin Absaloma chiin laizâm an tho tâk.

¹⁰Absaloma ei rêng hranga sahriak ei irthutir laka kha irdoina khan a thi tâka. Khasikin itho sikin mo rêng Davida kha koi kîr hrangin ei iti viat loi,” tiin Israel mihai kha an irsêl sup sup tâka.

¹¹Israel mihaiin rêng hruai nôk hrang thu an insîr kha rêng Davida mikuar a hong tung tâka. Juda hruaituhai irdon hrangin rêng Davida khan ochai Zadoka le Abiathara kha a tîrhaia; “I lo hrang mo rêng kha a in tianga hruai kîr nôk thua nin ir-ial?

¹²ki urêng hai nin nia, ki thisen irzompui nin nia; itho mo nin hruai kîr nôk hrang thua hin nin ir-ial mo a ni?,” a tia.

¹³Amasa kuang, “Ki thisen irzompui mo ni mak che? Atûna irthokin Joaba irthûla ki sipai hruaituin nang ki siam no’n chu, Pathianin a nuam nuamin ni lo ri se, kha nêka na ual khomin, a ti va ti roi,” a tia.

¹⁴Khanchu Judahai murdi’n an lungrîl kha Davida tiang ar hei nôk tâka. Khanchu rêng kuang, “Ni mihai leh khan hong kîr nôk ta roi, ti hrangin mi a hong tîra.

¹⁵Khanchu rêng kha a hong kîra, Jordan dung tena a hong a, Jordan dunga lei zu hruai inkâtir hrangin Judahai Gilgal-a an lei zuanga.

¹⁶ Kha laia khan Behurim khuaa mi Benjamina mi Gera nâipa Simeia khom kha irhnottak rengin Davida don hrangin Judahai leh khan Jordan dunga an fea.



¹⁷A kôla Benjamina mi sîngkhat hruaiin a zuanga, Saula in sîng mihai enkoltu Ziba le a nâipasalhai sôm hleiringa le a zui sômhnihai khom rêng tung mân Jordan dung an zuang tunga.

¹⁸Reng in sîng mihai hruai inkâi hrang le rêngin a sa a iti murdi tho hrangin Jordan dung an irkân tâka.

Davidan Simeia lung an kham

Reng kha Jordan dung irkân hranga a'rfôk laiin Gera nâipa Simeia kha rêng makunga khan an boka.

¹⁹Reng kuang khan, "Ka pu Jerusalem ni mâk nia dik loi taka ki lei itho tâkhai kha irngaihoi takin ni'rngil pe ro. Siatna neiin ni bê no'n lân, nin hre pe ta no ro.

²⁰Ka pu thil ki tho'nsual a nih ti kin hriat suaka, khasikin hmâr tianga nam murdihai laia nang don hranga a vuan hin zuang suak masa tak ki ichang a ni," a tia.

²¹Zeruii nâipa Abisaia khan, "Rengpa sahriak irthutir kha khomâk a sâm sikin Simeia hi that hrang a ni," a tia.

²²Khannisian Davida khan Abisaia le a upa Joaba kuang khan, "Nin irngaidân hril hrangin tu'n mo nangni a inphût? Nin ni inbuai hrang mo a ini? A vuan hin Israel rêng chu keima kêng ki ini. Khasikin a vuan hin Israel mi murdi that hrang ni maka," a tia.

²³Reng khan Simeia kuang, "That ni no chin ni," tiin chong an kunga.

Davidan Mefiboseta lung an kham

²⁴Kha hnung chu Saula tupa Mefiboseta kha rêng don hrangin a zuanga. Rengin Jerusalem a mâk nia irthokin râl irngam taka a hong kîr nôk ni dêna khan Mefiboseta kha a ke khom irsu loiin, a hnerkamul khom ep irrualtir loiin, a puanhai khom irsu loiin.

²⁵Reng don hrangin Jerusalema irthokin a zuang tungin chu, rêng khan a kuang, "Mefiboseta itho mo ni ni izui sa loi?," a tia.



²⁶Ama khan, “O rêngpa, ke’nbâi ki nih ti khom nin hriata. A ni zuitu kuang, rêng le kin fe suam theina hrangin ki chuangna hrang sakuartung nir fûktir pe’n lân, ki tia, khannisian a ni huanga.

²⁷Khante o rêngpa ni kuang a ni zuitu khan a ni hnôla, nikhomsian nang chu Pathian vântirtôn ang ni nia, khasikin a sa ni ti lam takin tho ro.

²⁸Ka pa in sâng mi murdi kha, o rêngpa, ka pu ni ithat paihai vinga ruk an ni. Khannisian nang a zuitu hi ni khalâi irhîlpuihai laia nin thanga. Khasikin rêng kuanga thil dang indit bîkna zong ngam zât ni ta ma ung,” a tia.

²⁹Reng khan a kuang, “Ni chungchâng thu ite ni insîr nang ta ma. Saula thil nei murdi nangma le Ziba khan irsem ri sehai,” a tia.

³⁰Mefiboseta khan rêng kuang, “Ziba khan dong ving ri se. Rengpa kha ama ina inzôk riama a hong tung nôk hi, ki ta hrangin chu a iruk a ni,” a tia.

Davidan Barzilaia lung an kham

³¹Gilead mi Barzilaia kha Rogelim-ah irthokin rêng kha Jordan-a a hruai inkhâi hrangin a lei zuanga.

³²Barzilaia kha kum sômriata mi ulian a ni. Mi irchong tak a nia, Mahanaim-a rêng a om sâng khan chu fâk hrang lei enkoltu a ni.

³³Reng khan Barzilaia kuang, “Ki kuang Jerusalema hong ro, keima’n nang enkol ki ti,” a tia.

³⁴Khannisianlân Barzilaia khan rêng kuang, “Idôra dam hrang mo ki la ni; i lo hrang ngânin mo Jerusalem rêng kuang ki ife hrang?”

³⁵Atûn hin kum sômriat mi ki ni tâka, ite khomin raifâna ni pe thei ta mah. Ki fâk ki nêk khomin a tui a thâi inhre thei ta ma unga, hlasaktuhai hlasak khom inhre thei ta ma unga. Khasikin ni ta hranga puakrik kai kêng ki ini ta hrang.

³⁶Khang dôra satna roiinpui dong hrangin irchukna nei ma ung. Khasikin Jordan râl kêi zoi hnungin zoro sôtloite nangma kuang om ki ta,



³⁷kha hnung chu irngaihoi takin ki in tiang nin fetir ro. Ka nu le ka pa thân omna, keini khua ngêta thi ki ti. Khanisian en ta, hi ki nâipa Chimhama hin ni sin tho ri se. Ni kuang hruaiin lân, a chung a sa ni ti lam takin tho ro,” a tia.

³⁸Khante rêng khan, “Chimhama chu ki kuang hruai ki ta, ni nuam lam ang takin a chung a tho ki ti. Thil i khom ni ni inghi kai chu nang tho pe mai ki ti,” a tia.

³⁹Kha hnung chu Davida le a mihai khan Jordan râl an kêi tâka. Reng khan Barzilaia kha a tuma, sat a vura, khante Barzilaia chu a in tiang a kêi nôk ta.

Reng Davida chungchânga Judahai le Israelhai irsêl

⁴⁰Juda mihai le Israel mi a chimriphaiin rêng kha Jordan an hruai inkâtir zoiin chu, rêng kha Gilgal-a a fea, Chimhama kha an kuang a fe saa.

⁴¹Kha hnung chu Israel mihai kha rêng kuang an fea, rêng kuanga khan, “O rêngpa, itho mo kin urêng Juda mihai hin anni ta bîkin nang an bêa, nangma le ni in mihai le khom Jordan râl a nangni an ihruaipai zit hi?,” an tia.

⁴²Juda mihai murdi khan Israel mihai kha, “Reng chu kin takmiti a ni sikin a ni. I lo hrang mo hi thua hin nin ning a inmur? Reng thil nei tûnga om mo kin nia? Thilpêk ite lua mo a ni pêk ngai?,” an tia.

⁴³Israel mihai khan Juda mihai kha, “Nin takmiti ni khom sianlân, rêng Davida rêng inchang thua, a bân sôm khat chung a thu kin inei kêng a ni. Hiang hin ni enkhûm no roi. Reng hruai kêi nôk hrang thu kha keini kêng a ni iti masa,” an tia. Khannisianlân, hi thua hin Juda mihai kha Israel mihai nêkin chu an inhrum ual a ni.

2 Samuela 20

Seba tehel thu

¹ Gilgal-a khan Benjamina rama mi Bikria nâipa Seba; mi nunsia inkhat hi a lei oma. Ama khan bekul a tuma, “Davida kuang hin ite dongtum nei mak me, zui ta no ih! O Israel mihai mâni in chita kêi ta ei ti,” a tia.



²Khanchu Israel mihaiin Davida zui ta loiin Seba hai leh an rot tâka; khannisian Juda mihai kha chu an det maia, Davida kha Jordan dunga irthokin Jerusalem dênin an zui tâka.

³ Davida khan Jerusalema a rêng in kha a tungin chu, a lâksîr sômkhath, in a inngâktirhai kha a hruaihaia, a khumpaihaia, an innang murdi a lâk pehaia. Khannisian anni kha chu zâlpuihai ta ma. Khaang khan an thi ni dênin ikhumin meithâiin an om tâka.

⁴Reng khan Amasa kuang, “Sûn thum sângin Juda mihai koi bûmin lân, nangtûk pên annihai leh hin hong roi,” a tia.

⁵Amasa kha Juda mihai koi bûm hrangin a fe tâka; khannisian a sîn khith pe nêkin a va sôta.

⁶Khanchu rêng khan Abisaia kuang, “Seba hin Absaloma nêkin a ni inbui ual hrang kêng. Ki mihai hi hruaiin lân, irzûl roi, khano'nchu kua kulpui neia lût irman a ta, ei kut ata a izôkna hrang kêng,” a tia.

⁷Khanchu Joaba pâl, rêng hrungtu pâlhai le sipai dang murdihai khan Abisaia an zuia, Jerusalema irthokin Seba irzûl hrangin an suak tâka.

⁸Gibeona lungpui an va tungin chu, Amasa khan a lei sâma. Joaba kha irdoina râltukfamin a'rvoa. Khandai kha a kok pumin a kongkhita a vonga, a fe pumin a khandai kha an thâka.

⁹Joaba khan Amasa kuang, “Ki rualpa ni idam chu a ni mo?,” a tia. Joaba khan Amasa tum hrangin a hnermul kha a chang tiang an tûka.

¹⁰Amasa khan Joaba'n khandai kut hi tianga a ichôi kha uksak ta maka, khanchu Joaba khan a phînga an vita, a rîlhai kha a che duar tâka. Voikhat zelin a thi tâka. Joaba khan sun nôk ual ta maka. Kha hnung chu Joaba le a sangpa Abisaia khan Seba kha an irzûl thala.

¹¹Joaba pâlhai laia ruatharte inkhatin, kha Amasa ruak kôla a ngîra, “Joaba le Davida tianga kop murdi khan Joaba zui mai ri se,” a tia.



¹²Amasa ruak, thisen irsil zit kha lampui inlaina taka khan a lei intâl raka. Joaba mi khan Amasa ruak kôla mi, en ngîr rumhai a va hmu'n chu, Amasa ruak kha lamlian ata ram tiang a kaia, puan leh a'rkhu tâka.

¹³Lampui ata a ruak kha khâipai a ni tena chu, Seba irzûl hrangin mi murdi'n Joaba kha an zui tâka.

¹⁴Seba khan Israel namhai murdi ram kha hroin Abela Beth Maaka khopuia a tunga; Bikria panama mihai murdi an irbûma. Khopuia khan an zui tâka.

¹⁵Joaba mihai khan Seba kha Abela Beth Maaka khopuia a om ti an inhriatin chu khopui kha an irhual khak tâka. Kulpui pên tiang irdîna khan irnêng an inpônga. Inchimtir hrangin kulpui bul kha an choi suaka.

¹⁶Khopuia khan nupang vâr inkhat a oma, kulpui ata a zuang khêka, "Lei irngai roi, lei irngai roi! Joaba kha hin hong hrangin hril roi, ki ichongpui nuam a ni," a tia.

¹⁷Joaba kha a fea, a va nâia; nupangnu khan, "Joaba mo ni ni?," a tia. Ama khan, "O ki ni," a tia. Khanchu nupangnu khan, "Ka pu ki thu'nsîr hi ni lei irngai pe ro," a tia. Joaba khan, "Tho ki'rngai," a tia.

¹⁸Nupangnu khan, "Tianlai khan chu, Abela khuaa khan fe'n lân, sâmna chu hmu ni ti, an ti ngaia; khang khan thu an itan ngai a ni.

¹⁹Hi kin khua hi Israel khua laia chu irngei nuam le kho iamom pâla mi kin ni. Nangma'n chu Israel khuaa kulpui hi itho mo irhmangtir ni itum hi? Rengpa irchon hi itho mo irhmangtir ni itum?," a tia.

²⁰Joaba khan, "Khang khan ni no ni, nangni insiatchit mani, nangni irhmangtir mani ite tum ma ung.

²¹Kha kha kin thiltum ni ma. Efraima tâng rama mi Bikria nâipa ar hming Seba khan rêng Davida chung a tehelzongin a kut an leka; ama kha ni pe unglân, khuaa irthokin kîr nôk zel ki ti," a tia. Nupangnu khan Joaba kuang, "A lu kha kulpui chung a irthokin nangni zuan tha pe kin ti," a tia.



²²Kha hnung chu nupangnu vârna hmangin khopuia mipuihai laia khan a fea. Bikria nâipa Seba lu kha an tanpaia, Joaba kuang tiang khan an paisuak tâka. Joaba khan a mihai khopui an mâkna hrangin bekul a tuma, khanchu an mâni in chita an lût tâka. Joaba chu Jerusalema rêng kuang khan a kîr nôk tâka.

David a hnuaia hruaituhai

²³Joaba kha Israel sipai murdi hruaitu a nia, Jehoiada nâipa Benaia kha rêng hrungtuhai hruaitu a nia.

²⁴Adonirama kha sintho hranga nakhrâta an ihruaihai hruaitu a nia; Ahituba nâipa Jehosafata kha thurchi irziaktu a nia.

²⁵Seva kha irziaktu a nia, Zadoka le Abiathara hai chu deipu an nia,

²⁶Jair kho mi Ira khom kha Davida ochai inkhat a ni sa.

2 Samuela 21

Saula irchihai an that

¹Khan Davida inlal lai khan kum thum châm a tâka. Khanchu Davida khan kha thua khan Rengpa a chongpuia, Rengpa khan, “Saula le a in mihaiin thisen an insuaa, Gibeon mihai an that sika a ni,” a tia.

²Gibeon mihai kha Israel irchi ni mahaia, Amor mi la omsunhai, Israelhaiin hrung inzôk hranga chong an lei inkung pehai kha an ni. Khannisian Saula khan Israel irchihai le Juda irchihai hranga sathnem irngai sika that irhmang a lei itum ngai a ni.

³Khanchu Davida khan Gibeon mihai kha a koihaia, an kuang, “Imo nangni ki itho pe hrang? Rengpamihai kha sat ni vur theina hrangin nin chung a tho’nsual lei nei tâk chungchânga i anga irngeina mo nangni ki isiam pe hrang?,” a tia.

⁴Anni khan a kuang, “Saula le a in mihai le, kin chungthu hin tangka le rângachak indamtir thei ni maka; Israel mi tûte kin ithat thei khom ni ma,” an tia. Khan Davida’n, “A ni ngânin te imo nangni ki itho pe hrang nin inuam?,” a tia.



⁵Anni khan, “Saula khan nir hmangtir vinga, Israel ram sũaga nin omtir ta loi hrangin a inuam a ni.

⁶Khasikin Saula nâipasalhai laia mi pasal sari ni pe'n lân,Rengpa rêng inthang Saula khua Gibeia khan Rengpa makunga inkhâi that kin ti,” an tia.

⁷ Khannisianlân rêng khan, Jonathana le an ruaia kâra thuthung an lei nei tâk sikin Saula tupa Mefiboseta chu an hôia.

⁸ Khanchu rêng khan Aii nâinu Rizpii, Saula nâipasal hni a inei pehai ruai Armonia le Mefiboseta kha a hruaia; khabana Meholat mi Barzilaia nâipa Adriela, Saula nâinu Mikali nâipa ringa a inei pehai leh khan a hruaia.

⁹Gibeon mihai kuta khan a pêka, anni khan Rengpa makunga tânga khan ankhâi that tâka. Khaang khan pasal sarilai kha an rêngin an ithi zoi tâk a ni. An that lai hi bu ât zoro, barli ât phut tianga a ni.

¹⁰Kha hnung chu Aii nâinu Rizpii kha bora puan a lâka, bu ât phut ata irvâna rua a zuang tho dênin a omna hrangin ruak omna kôla lungpui chung a ngîra, sủn tianga chung vuang vatehai hrungin a ruak kha a hrunga, zâna ramsahai a ihrung sa ngai a ni.

¹¹Rizpii thil tho kha Davida'n an hriatin chu,

¹² a fea, Jabes Gilead mihai kuang ata Saula ru le a nâipa Jonathana ruhai kha a lâka. (Filistia mihaiin Gilbo tânga Saula an that nia Filistia mihaiin Beth-san kotsua an inkhâi laia Jabes Gilead mihaiin an lei inrûk a ni.)

¹³Davida khan Saula ruhai le a nâipa Jonathana ruhai kha a lâka, khabana a inkhâi that tâk mi pasal sarilai ru kha a lâk khôma.

¹⁴Khanchu Saula ruhai le a nâipa Jonathana ruhai kha Benjamina rama Zela khuaa a pa Kisa thâna an phûma; khanchu rêng thupêk ang tak khan an thoa. Kha zoiin chu ram ta hranga an ingênnahai chu Pathianin a sâmhai ta.

Filistia milian inthanghai leh irdoina

(1 Tsn 20.4-8)



¹⁵Khan Filistia mihaiin Israel mihai kha an doi nôka. Davida kha a mihai leh an fea. Filistia mihai kha an zu doia. An irdoi lai khan voikhat chu Davida khom a sân a sôl tâka.

¹⁶Milian inthang inkhat ar hming Isbibenoba, dâr leh siam ufei a rik lam chu her thum le a chimrip, khandai thar vongtu khan Davida kha that a tuma.

¹⁷Khannisian Zeruii nâipa Abisaia khan Davida kha a sana, Filistia milianpa kha a doia, a that tâka. Kha hnung chu Davida mihai khan Davida kha irdoina hmuna fe ta loi hrangin chong an inkungtira. “Israelhai roiinputir tak ar hmang loina hrangin irdoi hrangin kin laia hong suak ta no ro,” an tia.

¹⁸Kha zoiin chu Filistia mihai leh Gob khuaa irdoina a om nôka, kha zoroa khan Husa mi Sibekaia khan mi lian inthangpa inkhat a’rhmung Safa a thata.

¹⁹Filistia mihai leh Gob khuaa an irdoi nôka, Bethlehem mi Jaira nâipa Elhana’n Gath mi Goliatha a thata, a ufei ngul chu puan rikol ang dôr a ni.

²⁰Kha hnung chu Gath khuaa irdoina a om nôka, kha khan irsual nuam mi lian inthangpa a oma. Kutpâr kiruk le kepâr kiruk nei hi a nia, a rêngin sômhniminli nei mi a oma.

²¹Ama khan Israel mihai kha a va sarâia, Davida sangpa Simeia nâipa Jonathana khan a lei thata.

²²Kha pasal minlihai kha Gath khuaa milian irchihai chu an ni. Anni kha Davida le a mihai kuta an ithi a ni.

2 Samuela 22

David a inhnena hla

(lpin 18)

¹Khante Davida khan a râlhai kut ata le Saula kut ata Rengpa’n a saninzôk hnunga khan Davida khan hi hla hi Rengpa kuang a saka:

²Rengpa chu ki lungpui le ki kulpui det le ni saninzôktu a ni.

³Ki Pathian chu a ni hrungtu a nia. Ama zârin zôkin ki om thei ngai. Ama khan pho angin a ni hruaia. Ni hrungin a nin zôktir ngai. Ni saninhringtu a nia; irvîk irhêma irthokin a nin zôktir ngaia.



⁴Rengpa chu ki koia, ama khan ki râlhai kut ata a nin zôktir ngai. Rengpa chu inpâkin om ri se!

⁵Thina tui irsokin a ni hor huala, Siatna tinin a ni zâpa.

⁶A ni thina hri tinin a ni bôma, Thân bài rongin a ni nghâk chiana.

⁷Ki milung zîng laiin Rengpa chu ki koia, ki Pathian chu ni changpui hrangin ki koia. Ama khan a biak ina ki'rhâi an hriata; Ni changpui hranga ki khêk irhâi a len hriata.

⁸Kha hnung chu irnêng an hnînga an thing tâka, Pathian ning an mur pe sikin, irvân irnghatnahai khom inthingin an hnîng zoi ta.

⁹A hnâra irthokin meikhu a suak zut zuta; A bâia irthokin meichok le meiri-al a suaka.

¹⁰Ama khan irvân a thêra, a zuang chum tâka. A ke hnuai tiang khan sômzîng hi a lei oma.

¹¹Ama chu irvân tâli chung a chuangin a vuanga; A ni, phâivua irthahai chung a vuang duai duaia.

¹²Ama chu inthim le vârin ama le ama irkhumin a oma, sôm irsatak tuia sip khan ar hual khuma.

¹³A makunga vâ irkhêl tak khan mei ir-alhai kha an choktira.

¹⁴Kha hnung chu Rengpa kha irvâna irthokin an ri dur dura; an chungtaka irhâi kha an thangtir tâka.

¹⁵Ama khan a thalhai a kâp suaka, a râlhai an irthekindartir chita; kôl a'rtêktira, anni chu laizâm an tho zoi ta.

¹⁶Rengpa'n a râlhai a ngoa, anni kha ningmurin a râiin chu, tuikhanglian inli luang khom an langtira, irnêng irnghatna khom an lang ving ngai.

¹⁷Rengpa khan chung tianga irthokin a ni zuan bana, a nin tâka; tui inthûk takhaia irthokin a ni kêlsua tâka.



- 18**A ni doitu hrât takhai laia irthokin a ni saninzôk tâka. A ni, a ni hnôltuhai ata khom, anni kha keima hrangin an ihrât hrai a ni.
- 19**Anni khan ki milung zîng laiin an ni doia, khannisian Rengpa kha ki itûng zoi a ni.
- 20**Ama khan ichioma a ni changpuia; Ki chung a lôm sikin a ni inzôk tâk a ni.
- 21**Rengpa'n ki fel dân ang takin ki chung a sina, ki kut irthiang lam ang takin sat a ni vur a ni.
- 22**Rengpa dân kha ki zôm maia; ki Pathian kuanga irthokin sual takin fe ngai ma ung.
- 23**A dânhai chu ki vong maia, a thupêkhai chu zôm loiin om ngai ma ung.
- 24**ama khan sêlna boi ki ini lam le, tho'nchâi loi hranga ki irdîn dân an hriata.
- 25**Khasikin Rengpa khan ki felna lam angin a ni thuana, Ki kuthai a mithmua a irthiang lam angin.
- 26**O Rengpa, nang chu ni chung a iamomhai chung a ni iamoma; mi satirkiphai chung a ni satirkip ngaia.
- 27**Mi irthianghai chung a ni'rthianga, Mi siathai chung a kuttum nin lek ngai.
- 28**Mi irngaiintôm theihai chu ni saninzôk ngaia, khannisian lâirpâkhai chu nin temtir ngai.
- 29**O Rengpa nang chu ki meiser ni nia; Keimaa inthim om hi nin vârtir pe roh.
- 30**A ni ki râlhai rûn theina hrang irtha hrât ni pe'n lân; an kulpui inhnêna hrang irnak leh khan.
- 31**Pathian chu a sin thôna khan ar kipa, A thuhai chu pom inruk a ni, Ama iamna irnghattu murdihai tah hrangin ama chu pho ang a ni.
- 32**Rengpa vai hi Pathian a nia; Ama vai hi ei lungpui irbîkna a ni.
- 33**Pathian chu ki kulpui det tak a nia, ki lampui khom a ni'rthial infâi pe ngai.



- 34 Ki kehai khom hi sazuk ke angin a siama; Tâng chung a khom zôk takin a nin omtir ngai.
- 35 Râlbuala hrangin irsual dân a ni'rchutira; Khanchu thal kâp dân ki hmang theina hrangin.
- 36 O Rengpa ni saninhringna pho kha ni ni pêka; Nangma changpuina khan a ni isiam inliantir a ni.
- 37 Râlhài kuta hrât loi hrangin ni phal mak chea. Khasikin ki inrîl viat loi a ni.
- 38 Ni doituhai chu ki'rzûla ki chelhaia; Annihai kha an irhmang zoi mâka chu mâk ngai ma ung.
- 39 Anni chu thoi thei ta loi hrangin ki sâthai chita; ki makunga an idok tâk a ni.
- 40 Nangin irdoina hrang hrâtna ni ni pêka, A ni doituhai chu ki hnuai tiang an inrîl zoi ta.
- 41 Nangma'n ki râlhài chu ki kuang ata laizâm nin thotirhaia, a ni hnôltuhai khom an irhmang zoi ta.
- 42 Ama chu changpui irngaiin a khêka, nikhomsianlân tûte a saninzôk hrang om mahaia, Rengpa kha an koia, nikhomsianlân sanhai maka.
- 43 Anni chu irrênga vâiphin angin ki suk india, kholaidunga dialdôk ang dôrin ki sirchîlhai chita.
- 44 Ki mi pualoihai ata khom ni nin zôktira, nam tinhai lu ni hrangin ni ni hrung sua tâka. Atûn chu ki inhriat ngai loi mihai khom ki sinthotu an hong ni ta.
- 45 Ram dang mihai khom ki makunga an kûna, Ki thurchi an inhriatin chu ki thu an zôm ngai.
- 46 Anni chu an thâi an dôptira, an kulpuia irthokin inthing pumin an zuang suak ngai.
- 47 Rengpa chu a hring maia; ki lungpui irbîkna inpâkin om sianlân; Ni saninhringtu Pathian roiinpuina chu inthangin om ri se.



⁴⁸Ama khan ki râlhai chung a inhnêna a ni pêka, nam tin ki ke hnuaia an om vinga.

⁴⁹Ni doituhai lai ata a ni sansuak tâka. A ni, nangin ni doituhai chung tiang khan ni ni chôirsângtira. Mi pualoihai kut ata ni nin zôktira.

⁵⁰Khasikin O Rengpa, nam tin laia khan nir hming inpâk ki ta, nangma inpâkin zâi ki ti.

⁵¹Pathian khan inhnêna roiinpui tak, a rêng inthang kuang khan a pêk ngaia; a sahriak irthûtu Davida le ar chihai chung a khan, kumtuangin a lungkham lianzia an langtir ngai.

2 Samuela 23

David a thuhiril hnungkhôn tak

¹Jesaia nâipa Davida chu Pathianin mi roiinpuiin a siama, Jakoba Pathianin rêng hrangin an thanga, Israelhai hranga hla satak phuat a ni. Hihai hi Davida thuhiril hnungkhôn tak a ni.

²Rengpa irtha khan keima hmangin an sîra, A thu kha ki mileia hin a oma.

³Israelhai Pathian khan an sîra, Israelhai saninzôktu khan ki kuang, “Rêng, mi chung a fel taka roirêl ngai, Pathian chi puma roirêl ngai kha.

⁴Misa a hong suaka, sôm om viat loi kha, zîng irlen ving ang hi a nia, Rua tho zoia hloisûl inhartir ang hi ni a ti,” a tia.

⁵“Khang khan Rengpa’n ki’rchihai hi sat a ivur hrang a ni, kumtuanga thuthung kha keima kuang a tung tâk sikin, thuthung inkhiak thei loi. A ni, chonginkung danglam thei loi ngêt kha, ama kha ki saninhringna irkip le ki lungdo irkip a nia. Rengpa’n intungtir ngêt a ti.

⁶Khannisianlân mi siathai kha chu an rêngin a pai irhmangtir ngaia, ilhling ang an ni. Tûte’n kut korongin tôn thei no ni.

⁷A tôntu hrang khan thîr hriamhrei le ufei ngul a ihmang ngêt hrang a ni; khanchu an hmuna hâlrivôm ving ni an ti,” tiin a hrila.

David a sipai irhminginthanghai

(1 Tsn 11.10-41)



⁸Hihai hi Davida sipai hâitakhai irhming chu a ni, a maton taka chu Takemon mi Joseb-basebetha, sipai hâitak inthumhai laia hruaitu a nia, ama hin voikhat irdoina khan mi irzariat ufei leh a idoi a ni, an rêngin a thathai ving a ni.

⁹Inhnina chu Aho panama mi Dodoa nâipa Eleazara a nia. Sûn khat chu ama le Davida khan Filistia mihai irdoi hranga irbûm kha irsual an va ota. Israel mihai hnung an irtôl vinga.

¹⁰Khannisian ama chu a om chiana, Filistia mihai kha a kut a khama khandai khom intha thei loi rakin a thata. Kha ni khan Rengpa'n inhnêna roiinpui tak an tungtir pea. Kha irzoiin chu Israel mihai kha Eleazara omna an hong kîr nôka, mithihai hriamhrei kha an hong ilâkpai a ni.

¹¹Inthumna pu chu Horar mi Agea nâipa Sama a nia. Dâl kung omna hmuna Lehi-ah khan Filistia mihai kha an irbûma, Filistia mihai laia irthokin Israel mipuihai kha laizâm an thoa.

¹²Khannisian Sama chu kha hmuna khan a om chiana, a hrung maia, Filistia mihai kha a thata. Rengpa'n inhnêna roiinpui tak, kha nî khan an tungtir pe a ni.

¹³Sipai hâitak sômthumhai laia pasal thumhai kha bu ât irphut lai takin Davida omna Adulam rôla khan an fea; Filistia sipaihai khan Refaim phâia omhmun an khuara.

¹⁴Kha zoroa khan Davida chu tânga irhuana a oma, khan Filistia sipaihai pâl khan Bethlehem-a an oma.

¹⁵Davida khan a khuaa tui kha a sân a'rzuka, "Bethlehem-a tuisunsuak tui, kul kotbâi kôla khan mi tu'n mani ni va chôi pe sianlân chu o!," a tia.

¹⁶Khanchu sipai hâitak pasal thumhai khan Filistia sipaihai kha an palthûkhaia, Bethlehem kul kotbâi kôla tuisunsuak tui ngêt kha an thâla, Davida kuang an hong chôi. Khannisian Davida'n lei in nuam maka, Rengpa kuang thilinhlanin a bun thuana.



¹⁷“O Rengpa hi hi in viat no ning, thi ngama fehaisi in ang ki ini hrang a ni,” a tia. Khanchu in nuam loiin, khahai thil kha sipai inthang hâitak inthumhai khan an itho a ni.

¹⁸Zeruii nâipa Joaba sangpa Abisaia kha sipai inthang hâitak sômthumhai laia hruaitu tak a nia, a ufei leh mi irzathum a doihaia, a thata, mi hâitak sômthumhai laia khan an lârtak a ni tâka.

¹⁹Sômthumhai laia khan an lârtak a ni tâk sikin an hruaitu tak a ni tâka. Khannisian mi hâitakhai pasal thumhai laia chang pha maka.

²⁰Kabzeel mi Jehoiada nâipa Benaia kha sipai hâitak inkhat chu a ni saa. Ama khan thil ichiom tamtak chu a thoa, Moab mihai râlpâ inthang inhni a ithathai a ni. Voikhat chu ivur tâk zoro lai takin khurpuia a fea, kâmkeibaknei a zu thata.

²¹Ama hin Aigupta mi roiinpui tak a thata, Aigupta mi khan ufei a chôia, nikhomsian Benaia khan hêmvuak chôiin a va pana, Aigupta mi ufei chôi kha a sutpaia, ama ufei leh khan a sun thatpai a ni.

²²Jehoiada nâipa Benaia thilthohai kha khang kha a ni, sômthumhai laia khan irhming sa a ihlo a ni.

²³Mi sômthumhai laia khan mi inlârtak a nia, khannisian râlpâ hâitak pasal thumhai dôr chu ar hming lan thang ma. Ama kha Davida khan ama hrungtuhai laia hruaituin a sia tâka.

²⁴Joaba nâi Asahela kha mi huaisen sômthum laia mi a nia. Bethlehem khuua mi Dodoa nâipa Elhanana hai,

²⁵Harod mi Sama hai, Harod mi Erika hai,

²⁶Pelet mi Heleza hai, Tekoa mi Ikesa nâipa Ira hai,

²⁷Anathot mi Abiezera hai, Husa mi Mebunaia hai,

²⁸Aho mi Zalmona hai, Netofa mi Maharaia hai,

²⁹Netofa mi Baana nâipa Heleba hai, Benjamina irchi Gibeia kho mi Ribaia nâipa Itaia hai,



- ³⁰Pirathon mi Benaia hai, Gaas vadungtea mi Hidaia hai,
³¹Arabat mi Abi-Albon-a hai, Bahurim mi Azmaveta hai,
³²Saalbon mi Eliaba hai, Jasena nâipahai laia mi Jonathana hai,
³³Harar mi Sama hai, Harar mi dên Sarara nâipa Ahicama hai,
³⁴Maaka mi Ahasbaia nâipa Elifeleta hai, Gilo mi Ahitofela nâipa Eliama,
³⁵Karmel mi Hezroa hai, Arba mi Paaraia hai,
³⁶Zoba mi Nathana nâipa Igala hai, Gad mi Bania hai,
³⁷Amon mi Zeleka hai, Joaba râltukfam chôitu Beerot mi Naharaia hai,
³⁸Jatir mi Ira le Gareba hai,
³⁹Hit mi Uria hai an ni. An rêngin chu sômthum sari an ni.

2 Samuela 24

Davidan Israel le Judahai irteppuina a nei

(1 Tsn 21.1-27)

- ¹Khan Rengpa ningmurna kha Israelhai chung a zuang tung nôk thuta. Davida kha an chung a siatna intung hrangin an phûta, a kuang, “Fe’n lân, Israel mi le Juda mi tephai ving ro,” a tia.
- ²Khanchu Davida khan a sipai hruaitu Joaba kuang khan, “Israel nam murdi laia hin Dan-a irthokin Beerseba dênin irfangin lân mi iza ngân mo an inih ti inhriat theina hrangin tephai ving ro,” a tia.
- ³Khannisian Joaba khan rêng kuang, “O rêngpa, Rengpa ni Pathian khan Israel mipuihai kha atûna nêkin a lêt irzain punghai sianlân, kha kha rêngpa ka pu hin hmu ri se. Khannisian o Rengpa i lo hrang mo thil hi an hriat ni inuam kher hi?” a tia.
- ⁴Khannisian rêng khan Joaba le sipai hruaituhai khan a thu kha an zôm tâka. Khanchu Joaba le sipai hruaituhai kha Israel mi hai tep hranga khan rêng kuang ata an suak tâka.
- ⁵Jordan râl an va kâia, Gad ram huala phâi inlaina taka khopui, Aroer sim tiang khan hmun an khuara. Khatak ata hmâr tiang Jazera hai,



⁶Gilead ram hai, Kades rama hai, Hit mihai rama an fea. Kha hnung chu Dan tiang an fea, Dan ata kha nitâk tiang Sidon-ah an fea.

⁷Kha hnung chu sim tiang Tura khopui kulpui neina khan an fea, Hit mihai le Kanaan mihai khua murdi an irfanga, Judai ram sim tiang Beerseba khan an fea.

⁸Khanchu ram pumpui an irfang suak zoi hnungin tha kuak le sîn sôminhni irzoiin Jerusalema an kîr nôka.

⁹Khanchu Joaba khan mihriam om dôr kha rêng kuang a pêka. Israel rama khan pasal râl doi thei takhai chu, Israel mi nuai riat an oma, Juda mi kha nuai ringa an iom a ni.

¹⁰Khannisian mihriam a hong tep zoi tena chu Davida lungrîl kha a na pe oka. Davida khan Rengpa kuang, “Ki thil thoa hin a satêrengin ki lei insual tâk a ni. Nikhomsianlân atûn hin o Rengpa, mi sual pualoina hi nin za hrangin nang ki ingên a ni. Invêt chângin ki lei châng tâk a ni,” a tia.

¹¹⁻¹²Khan Rengpa thu kha Davida deipu Gada kuang a zuang tunga, “Fe’n lân, Davida kuang thil inthum inthang hrang ki pêk. A inthangtak chu ki itho pe hrang a nih ti va hril ro,” a tia. Zînga Davida a thoi tena chu

¹³Gada kha a kuang a fea, Rengpa thu suak kha a hrila, a kuang, “I tak hi mo ni iti? Ni ram sînga kum thum châmpui tâk hi mo, ni râlhài lai ata laizâm tho hi mo, aninole ni ram sînga sîn thum sînga hripui inlêngtir hi mo? a ni tîrpu Rengpa kuang intung nôk hrangin irngaitua’n lân, ni iti nuam chu nin hril ro,” a tia.

¹⁴Davida khan Gada kuang, “Ki milung kêng a zîng khak! I khom ni sian, mihriamhai kuttum ni tho chu nuam ma unga; Rengpa kuta irpe ki ta, a lunginkhamna a liana,” a tia.

¹⁵Khanchu Rengpa khan Israel mihai chungã khan zînga irthokin zoro inkung a dên mâka chu hripui an lêngtir tâka. Dana irthokin Beerseba dênin Israel mi sîngsari an thia.



¹⁶Rengpa vântirtôn khan insiat hrangin Jerusalem tiang a kut a hor leka, khan Rengpa'n a mihai kuttum tho hrang a iti kha a milung a'rthûltira, mi thattu vântirtôn kuang khan, "A ruk ta, ni kut irlek ta no ro," a tia. Rengpa vântirtôn kha Jebus mi Arauna hruizôl kôla khan a oma.

¹⁷Davidan mi thattu vântirtôn kha a hmu'n chu, Rengpa a chongpuia, "Irgai ro, keima kêng a tho'nchâi ki ini; dik loi taka thil tho insualtu chu keima ki ni. Hi kêlbelrahai hin i thil mo an itho insual? Keima le ki in sêng mihaiin kuttum kha kin ituang hrang a ni lem," a tia.

¹⁸Kha ni sîn ngêta khan, Gada kha Davida kuang a fea, a kuang, "Fe'n lân, Jebus mi Arauna hruizôla Rengpa ta hrangin maichâm hong siam ro," a tia.

¹⁹Davidan Rengpa thupêk kha a zôma, Gada iti pe lam angin a fe tâka.

²⁰Arauna khan a hong thîr vêlin chu, rêng le a mi lianhai hong kha a hmua, khanchu Arauna kha a suaka, a hmâi irnêng sikin rêng makunga khan an boka.

²¹Arauna khan, "Rengpa ka pu, itho sika hong mo ni ini?," a tia. Davida khan, "Mipuihai chung ata hripui ar kiang theina hranga Rengpa ta hranga maichâm siamna hranga hruizôl irchôk hrangin," a tia.

²²Arauna khan Davida kuang, "O rêngpa, lan lân, a sa ni iti murdi Rengpa kuang inhlan ro. Hâlvôm inhlanna hrang sehrâtchal chu hin a oma, thingtua hrang chu hruizôla hmangruahai le sehrâtchal ringkolhai kha a iom a ni," a tia.

²³Arauna khan hihai murdi hi rêng a pêk vinga, a kuang, "Rengpa ni Pathian khan, ni thilinhlan nang pom pe ri se," a tia.

²⁴Khannisian rêng khan Arauna kuang, "Ni ma, a man omin irchôk ngêtin ki irchôk hrang a ni; ite thâm loiin Rengpa ki Pathian kuang, hâlvôm thilinhlanhai inhlan no ning," a tia. Khanchu Davida khan hruizôla sehrâtchal kha tangka sômringa leh ar chôk tâka.

²⁵Kha hnung chu Davida khan kha hmuna khan Rengpa ta hrangin maichâm a siama, hâlvôm thilinhlan le irngeina thilinhlanhai a neia. Rengpa khan



Dauida'n a ram ta hranga chongchaina kha a sâma, Israel ram ata kha hripui kha ar kiangtir tâka.



1 Rêng hai

1 Rêng hai 1

David a hong ulian lam

¹David a chu a hong ulianin a sân a tar tâka, puanlum an insiltir khomin a lum inhre thei ta maka.

²A siahlohain a kuang khan, “Ka pu ni kôla oma, nang a enkol hrangin dôngmate nang zong pe kin ti. Ama khan ni kôla nang zâl pe a ta, khan kêng lum takin ni izâl thei hrang,” an tia.

³Khanchu, Israel ram pumpuia dôngmate hmêl sa an zonga. Sunam mi, Abisagi an va hmua, rêng kuang khan an hong hruai ta.

⁴Khanu kha dôngmate hmêl satak a nia, rêng kha a enkol ta, a kôla ompuiin, khannisianlân, rêng khan ite irpôlpui ma.

Adonija rêng chang tumna

⁵Hagithi le Davida nâipa Adonija chu rêng nâi la damhai laia a lutîr tak a ni sikin rêng chang hrangin a lei irsabeia; tâli le sakor chung chuang thei le ama hrung hrang mi sômringa a len thanghai vinga.

⁶A pa lakin, “Itho mo hianga ni irsiam irsak hi” lei ti pe ngai maka. Ruatharte hmêl satak Absaloma hnuai renga mi a ni.

⁷Adonija’n chu Zeruii nâipa Joaba le ochai Abiathara hai vai a lei hrilhaia. Ama sanin an lei changpui ngaia.

⁸Ochai Zadoka, Jehoiada nâipa Benaia, deipu Nathana, Simeia, Reia le mi hâitak Davida enkoltuhain chu Adonija kha zui nuam mahaia.

⁹Adonija khan Enrogel kôla khan Zebelet lungpui kôla khan irbôlna belra le sehrâtchal a martak tak a lei inhlân tâka. A urêng rêng nâi murdihai le Judai ram rêng inzakomhai a bukkhômaia.

¹⁰Deipu Nathana, Benaia, mihai rêng enkoltuhai le a sangpa Solomona chu koihai maka.

Solomona rêng inchangtir a ni



- 11** Nathana'n chu Solomona nu Batsebi kuang khan, "Hagithi nâipa Adonija hi kin pu Davida inhre loiin rêng a chang tah ti lan hre mak che mo?"
- 12** Atûn hin ni zôk theina hrang le ni nâipa Solomona zôkna hrang lam nang hril ki ti.
- 13** Reng Davida kuang va lûtin lan, a kuang 'O rêng inthang, ka pu, ni siahlo kuang hin, Solomona hi ki'rthûla rêng hrang chu a ni, ki rêng toihmun lua a ti, ni iti mo ni ma? itin tâk mo Adonija te rêng a ichang tâk hi te? va ti ro,' a tia.
- 14** Reng chu ni chongpui lai takin hong lût ki ta, ni ihril murdi thopin nang san ki ti," tiin a hrila.
- 15** Batsebi chu rêng omna hmuna a va fea, rêng chu a sân a tar tâka, Sunam mi Abisagi leh an lei oma.
- 16** Batsebi khan rêng chu khûksadelin chubai a mûka, rêngin chu "Imo ni indit ti ro,?" a lei tia.
- 17** Ama khan, "Ka pu ni suaknu kuang hin Rengpa ni Pathian irhming sâmin, ni nâipa Solomona hi ki'rthûlin rêng chang a ta, ki rêngtoihmun lua a ti, tia ni inkung a nia.
- 18** Khannisianlân, Adonija kêng rêng a ini ta, nang ka pu lakin inhre mak chea,
- 19** sehrâtchal le sa a mar sai hai thatin, rêng nâipahai le ochai Abiathara le sipai ulian Joaba hai a koihaia, ni siahlo Solomona chu koi loiin a thoa,
- 20** ka pu Israelhai hin rêngtoihmuna tu mo ni intoitir hrang ti an inghâk mai a ni.
- 21** Hi thu hi nin fel no'n chu, ka pu kei le ki nâipa Solomona chu ni thi zoiin chu dohasa kêng kin irhlo hrang," a tia.
- 22** Khaanga rêng a chongpui lai takin deipu Nathana kha a hong lûta.
- 23** Deipu Nathana khom a hong tiin rêng kha an hrila. rêng kôla khan kûnin a hmâi hnuai enin chubai a mûka.



²⁴Nathana khan, “Ka pu rêng inthangtak hin Adonija chu ki’rthûlin rêng chang a ta, ki rêngtoihmun lua a tih ni lei iti ma ni?”

²⁵A vuan hin ar siamin sehrâtchal tamtak le belra mar saihai thatin, rêng nâihai le sipai ulianhai le ochai Abiathara hai a koi bûmhaia, atûn son an fâkin an inêk a ni so, rêng Adonija dam sôt ri se tiin an ikhêk a ni.

²⁶Kei ni siahlo hi ochai Zadoka, Jehoiada nâipa Benaia le ni siahlo Solomona hai chu nin hril mahai.

²⁷Hihai hi ka pu rêng inthangtak iti a ni lele’n chu, ka pu hi a thi zoi le a rêngtoihmun lua hrangin a siahlohai hi a ihril nuam loi a ni hi tena?” a tia.

²⁸Reng Davida’n, “Batsebi kha hong koi roi,” a tia. Reng kôla khan a va lûta, a kôla a ngîra.

²⁹Reng khan hiang hin a hrila, “Chardongna tinrêng ata nin zôk ngaitu Rengpa irhming sâmin ni kuanga ki inkung tâk chu thangsua ngêt ngêt ki ti.

³⁰Ni nâipa Solomona chu keima irthûlin inlal a ta, ki rêngtoihmun hi lua a ti,” a tia.

³¹Batsebi chu a hmâi hnuai enin rêng chu chubai a mûka, “Ka pu, rêng Davida chu dam sôt ri se,” a tia.

³²Khan, rêng Davida khan, “Deipu Zadoka hai, deipu Nathana hai, Jehoiada nâipa Benaia hai ni hong koi pe roi,” a tia. Khan, anni chu rêng kuang an va fe tâka.

³³Reng kôla khan an hong, rêng khan an kuang, “Mi lianhai hruai unglân, ki nâipa Solomona kha ki sakuartung chung a inchuangtir unglân, Gihon-a hruai sa roi.

³⁴Ama khan ochai Zadoka le deipu Nathana haiin Israelhai rêng hrangin sahriak pol ri sehai. Bekul tum unglân, ‘Reng Solomona chu dam sôt ri se,’ tiin khêk roi.



³⁵Ama chu irzôn unglân, ki rêngtoihmuna toi sianlân, ki'rthûlin inlal ri se. Ama hi Israel le Judai ram sînga roirêltu hrangin ki inkung a ni," a tia.

³⁶Jehoiada nâipa Benai khan, "Amen, ka pu, ni Pathian Rengpa'n namindet ri se.

³⁷Rengpa chu, ka pu inlaltak kuang a iom ngai angin Solomona kuang khom om sianlân; ka pu rêng Davida rêngtoihmun nêkin a rêngtoihmun chu indet ual sianlân," a tia.

³⁸Ochai Zadoka, deipu Nathana, Jehoiada nâipa Benaia, Kret mihai le Pelet nuhai chu an fea, Solomona chu Davida sakuartung chung a an inchuangtira, Gihon hmuna an hruaia.

³⁹Ochai Zadoka'n hmun irthianga sahriak siana ûm a lâka, Solomona chu a pola. Bekul an tuma, mi murdi'n, "Reng Solomona dam sôt ri se," an tia.

⁴⁰Mipui murdi'n ama chu an zuia, theihlehai tumin a sate'n raiinfân takin an oma, an irhâi chu hnuai intor diaiin an om a ni.

⁴¹Adonija le a ibûmhai murdi chu ruai an inthe zoiin chu, an irhâi kha an in hriata, bekul irhâi an inhriatin chu Joaba'n, "Khopui sînga an irhâi inring dur dur chu imo a omzia a ini tâk?" a tia.

⁴²Kha thu a hril lâi takin ochai Abiathara nâipa Jonathana a hong tunga, Adonija'n, "Hong vak hi ro," "Nang chu ruatharte fel tak ni nia, thurchi lômom hon hriat le nir hoi?" a lei ti pea.

⁴³Jonathana khan, "Ite ual hon hre ma ung, ei pu Davida'n chu Solomona kha rêng an changtir ta.

⁴⁴Rengin ochai Zadoka deipu Nathana, Jehoiada nâipa Benaia, Kret mihai, Pelet mihai chu ama hrung hrangin a tîrhai. Ama chu rêng sakuartung chung a an inchuangtir ta.

⁴⁵Ochai Zadoka le deipu Nathana'n chu Gihon-a khan rêng hrangin sahriak an pola, khatak ata raifân takin an hong kîr nôka, an irhâi khopui intorin a oma.

⁴⁶Solomona chu rêngtoihmun luain a om ta.



⁴⁷Mi lianhai khom an hongga, ei pu Davida kuang khan, ‘Ni Pathian khan Solomona chu nangma nêkin roiinputir sianlân, nin rêngtoihmun khom nangma nêkin inlal ual ri se,’ tiin an lômpuia.

⁴⁸Reng khom khan a zâlmun rengata lômpuina chubai a mûka, ‘Rengpa Israelhai Pathian, a vuana ki rêngtoihmun ki’rthûla nir hmutirtu chu inpâkin om ri se,’ tiin lômthu a ihril a ni,” a tia.

⁴⁹Kha tena chu Adonija le a mi fialhai khan an chia, an intânsan zoi ta.

⁵⁰Adonija khan Solomona kha a ngîkin a chi tâka, a thoia maichâm irkî chelin a om ta.

⁵¹Solomona kuang khan, “Reng Solomona a siahlo khandaiia that loi hrangin thu inkung sianlân, a ti,” tiin Solomona chu an va hrila.

⁵²Ama’n chu “Iamom takin a omin chu a sam malkhat khom tôn viat no ning. A sualna hmu dok a ni’n chu thi a ti,” a tia.

⁵³Reng Solomona’n mi a tîra, maichâm ata an va hruai suaka, Adonija chu a hongga, rêng Solomona chu kûnin chubai a mûka, “Ama’n chu, ni in tiang va fe ta ro,” a tia.

1 Rêng hai 2

Davidan Solomona chong a bê

¹Davida thi hrang zoro a hong nâi tâk sikin a nâipa Solomona chu hiang hin chong a bêa.

²“Mihai ang dênin kei khom ki ithi hrang a ni sikin, puihling takin omin lân, chi viat no roh.

³Rengpa ni Pathianin nang a inphût murdi tho’n lân, a lampui hro ro, a thu’nkung le a thupêkhai, om hrang dân a iti le a thu nan hriattir, Mosia dân bua a irziakhai chu zômin lân; khan ni sintho murdi, ni fena hmun tina, thangsua ni ti.



⁴Rengpa khan, nir chihai khom irdîn takin om an ta, lungrîl le thu takin ki thupêkhai an zômin chu Israel rêngtoihmun hi lua thei mai an ti, tia a lei inkung kha a tak chang a ti.

⁵Zeruii nâipa Joaba hin ki milung a innatir hi inhre mai ro; Israel sipai hruaitu inhni, Nera nâipa Abnera le Jethera nâipa Amasa a that kha. Râl hek hnunga irdoi om anga tho'n thisen phuba an ilâk thu kha, mi dik thisen an insuak hi mo ki ipêk a ni, keima hrangin a sân a intak a ni.

⁶A tho hrang dân chu inhre zel ni ti, tar kûnin dam no ri se.

⁷Gilead mi Barzilaia nâihai chu lung inkhamhaiin lân, ni bu nêkna hmuna bu innetirhai roh. Ni urêngpa Absaloma chi sika laizâm ki tho lai khan, an lungkhamna ki idong a ni.

⁸Khanchu Bahurim khua mi Benjamina irchi, Gera nâipa Simeia hi ni kuanga om a nia; ama hi Mahanaim pana ki fe lai khan deng a ni len theitira; khannisian, Jordan-a ni don hrangin a lei zuanga, ama khan, khandaiin nang that no ning tiin Rengpa irhming lâkin thu ki len kunga.

⁹Khannisianlân, denginthei loiin chu insua no ro, pasal puihling ni nia, a tho hrang lam chu inhria ni ti. A tar tena ni that hrang sikin,” a tia.

Davida thina thu

¹⁰Davida chu a thia, Davida khopuia an phûma.

¹¹Israelhai chung a kum sômminli an lala, kum sari Hebron-a, kum sômthum inthum Jerusalema.

¹²Solomona chu a pa irthûlin an lal tâka, a ram chu indetin a om ta a ni.

Adonija a thi

¹³Hagithi nâipa Adonija chu Solomona nu Batsebi kuang a fea, ama khan, “Rual sa pana, ni ni hong ipan chu ma ni?” a tia. Adonija khan, “O rual sa pana nang ki hong ipan chu a ni,” a tia.

¹⁴Ama khan, “Ni kuanga hin hril nuam ki nei” a tia. “Batsebi'n hril ro ba,” a tia.



¹⁵Ama khan, “Ram hi ki ta a lei ni bak tâka, Israelhai murdi’n an rêng enin an ni en ti khom nin hriata; khannisian thil a hong danglam tâka, ram chu ki urêngpa dongtum a hong ni tâka, Rengpa lei irfûktir chu a ni.

¹⁶Atûn chu thil inkhat nang a nghi ki nuam, a sa ni tipui thei hrâm ro,” a tia. Ama khan, “I thil ual mo a ini tâk?” a tia.

¹⁷ Adonija khan, “Lungkham takin rêng Solomona ni chongpui pe ro, nangma thu chu hnôl ngam no nia, Sunam mi Abisagi hi dôngma’n nin neitir sianlân,” a tia.

¹⁸Batsebi khan, “A ni, rêng chu nang lei chongpui pe ki ti,” a tia.

¹⁹Batsebi chu Adonija ta hrangin rêng Solomona kuang a fea; rêng chu ama lôm hrangin a lei thoia, kûnin chubai a mûka, a rêngtoihmuna a toi nôka, rêng nu ta hrangin toihmun dang an hong pêka, a chang tiang an toitira.

²⁰Reng nu khan, “Thil chînte nang ki nghi nuama, a sa ni tipui hrâm theiin lân,” a tia. Reng khan, “Imo a ini tâk? ka nu a sa nang tipui ki ti,” a tia.

²¹Ama khan, “Sunam mi Abisagi hi ni urêngpa Adonija dôngma hrangin pe ro,” a tia.

²²Reng Solomona’n a nu kuang, “Itho sika Sunam mi Abisagi hi Adonija ta hranga ni izong pe mo? rêngtoihmun khom hi zong pe sa zelin lân; ka upa a nia, ama hranga, a lei sanhai ochai Abiathara le Zeruii nâipa Joaba ta hrang khomin,” a tia.

²³Reng Solomona’n Rengpa irhming sâmin hiang hin chong ar chama, “Adonija’n chu a thina hrang a izong a ni no’n chu Pathianin a inuam angin a ni lo khoma a satea dengthei khomin a tia.

²⁴Atûn hin Rengpa’n a chonginkung anga ka pa rêngtoihmuna nin toitirtu le nin dettu, kin sêngkua inlalna nin dingtu hringna zârin ki hril, a vuana Adonija hi chu thatpai hrang a ni,” a tia.

²⁵Reng Solomona’n Jehoiada nâipa Benaia chu a tîra, Adonija chu a doia, a thatpai tâka.

Abiathara inhnotsuakna le Joaba thi thu



²⁶ Reng khan, Abiathara kuang, “Ni khua Anathot-a khan rot ta ro, thi mai theia om kêng ni ni: atûn zel chu that la ni ual no chi ni. Ka pa Davida hmâikunga itinrêng Rengpa bôm ni le’rzôn ngai sikin,” a tia.

²⁷ Solomona’n Abiathara chu Rengpa ochai a nina sin a pai pea, Elia in sêng mihai chungchâng Silo khuaa Rengpa ihril chu a tak a chang ta.

²⁸ Kha thu kha Joaba’n a len hriata, Absaloma tiang a kopna hi, Adonija tianga lei kop ngai a nia, khanchu Rengpa ina a lûta, maichâm irkî chelin a oma.

²⁹ Joaba chu Rengpa puan in sênga a lûta, maichâm kôla a toia, “Fe’n lân, va that ro,” a tia.

³⁰ Khanchu a va hrila, ama’n chu, “Ni suak, hi hmuna hin la thi chian rong,” a tia. Benaia’n, Joaba khan hiang hin a ni lei don, itinrêng chu a va hrila.

³¹ Reng khan, “A iti ang takin va thatin lân, phûm zel roh. Kei le ka pa in sêng mihai vai Joaba’n mi fel thisen a insuak ata hi kin dik ti an langna hrangin.

³² Ka pa Davida inhre loiin mi inhni a doihaia. Rengpa khan an thisen suakna man tuam ri se. Khan mi inhni, Nera nâipa Abnera, Israel, sipai ulian le Jethera nâipa Amasa Juda sipai ulianpu kha, ama irthûla that le invûng an ini a nia.

³³ An thisen suak man chu Joaba le a’rchihai lu chung a kumkhua’n chum mai ri se. Davida le ar chi le a in sêng mi le a rêngtoihmunhai chu Rengpa’n siam in sa pe mai ri se,” a tia.

³⁴ Jehoiada nâipa Benaia kha a hong fea, Joaba kha ar doipuia, a that ta.

³⁵ Rengin Jehoiada nâipa Benaia chu sipai ulian tak hrangin Joaba hmuna a sia tâka, ochai Zadoka chu Abiathara irthûlin an omtir ta.

Simeia a thi

³⁶ Rengin Simeia an koitira, a kuang, “Jerusalema in sinin lân, kha khan omin lân, khô te suak no roh.



³⁷Ni suaka, Kidron phâi nir kânin chu ni thi a nih ti inhre ro; ni thisen mô chu nangma'n pêl ni ti," a tia.

³⁸Simeia'n rêng kuang khan, "A ni,Rengpa ka pu'n ni iti lam ang takin ni siahlo hin tho ki ti," a tia. Simeia chu Jerusalema a om chian ta.

³⁹Kum thum zoia chu Simeia siahlohai laia inhni chu Gath khuaa rêng Maaka nâipa Akisa kuang tiang an intâna. Mihaiin Simeia kuang khan, "Ni siahlohai Gath khuaa an om," tiin an hrila.

⁴⁰Kha rêng khan, Simeia'n a sakuartung a'rsiamtira, a siahlohai zong hrangin Gath khua tiang Akisa kuang an fea. Simeia'n a siahlohai chu Gath khua rengata a hruai kîrhai nôka.

⁴¹Simeia chu Jerusalem ata Gath khuaa a fea, a hong kîr nôk ti thu Solomona an inhrila.

⁴²Reng khan Simeia chu a koia, a kuang khan, "Hmun danga ni suakin chu ni suak ni taka thi ni ti, tiin Rengpa irhming sâmin khomâk nang ki sâm ti nang ki lei ihril pe mo ni ma? kha lai khan chu nang khomin ki kuang, a ni, zôm ki tih ni tia.

⁴³Itho moRengpa kuanga ni chonginkung ni izôm loina, thu nang ki ipêk ni izôm loi?," a tia.

⁴⁴Rengin Simeia kuang khan, "Ka pa Davida chungâ ni isualzia lak nin hriat vinga, atûn chu Rengpa'n ni sualna man nang thuan a ti.

⁴⁵Kei chu sat ni vur a ta, Davida rêngtoihmun chu Rengpa makunga det takin ngîr a ti," a tia.

⁴⁶Rengin Jehoiada nâipa Benaia chu thu a pêka, ama kha a var doipuia, a that ta. Solomona chu det takin an lal mai ta.

1 Rênghai 3

Vârna zongin Solomona a chongchai

(2 Tsn 1.3-12)



¹Solomona chu Aigupta rêng Faroa le irkaipui a nâinu dôngma'n a neia; rêng inhai, Tempil le Jerusalem kua kul banghai a sin zoi mâka chu a dôngma chu Davida khopuia a sia maia.

²Mihai chu hmun irsânghaia an irbôl ngaia, Rengpatempil sin a la ni no sikin.

³Solomona chu Rengpa lung a thunga, a pa Davida irchutirnahai zômin; khannisian, hmun irsânga thil inhlanin mirimhoihai hâlin a oma.

⁴Reng chu thilinhlan hrangin Gibeona a fea, kha hmun kha thilinhlan hmun roiinpui tak a ni. Solomona'n kha maichâma khan hâlivôm thil inhlan'a thil hring sângkhat a lei inhlan tâka.

⁵Gibeona'n Solomona irmanga Rengpa a inlâr pea, Pathianin "Ni inuam murdi zong ro, nang pe ki ti," a tia.

⁶Solomona'n, "Ni siahlo Davida, ka pa chu nangma hrangin iamom takin a oma, dik tak le lungrîl fel le irthiang takin a om sikin, ni'rngaiinnata, a chung a ni khonzâna irsâng tak pêkin atûn hin rêngtoihmuna toi hrangin a nâipa ni pêka.

⁷Atûn hin, o Rengpa ki Pathian, ni siahlo hi ka pa Davida irthûlin nin laltira, kei lak nâipang ki nia, ki tho hrang tum khom inhre zoi loiin ki oma.

⁸Ni siahlo hi ni ni inthang, mi idôr vêlpa mo an ini inhre zoi loi chung a ni nin laltira.

⁹Thudik le dik loi hai theithâka fel taka roi ki rêl theina hrangin ni siahlo hi vârna pe ro. khano'nchu, mi hi dôra tamhai laia hin roirêl thei no ning," a tia.

¹⁰Solomona vârna zong sikin Rengpa chu a sate'n a chung a lôm tâka,

¹¹khanchu Pathianin a kuang khan, "Dam sôt na hai, irchongna hai, ni râlhai thi theina zong loiin, dik taka roirêl theina ni zong sikin,

¹²ni izong chu nang pe ki ti, mi tûte la inei ngai loi le inhnunga mi inei thei loi hrang vârna le roirêl theina nang pe ki ti.

¹³Ni izong loi irchongna hai le irhming satna hai khom nang pe sa ki ti, ni dam sângin rêng tukhomin nang a phâk om ngai no nihai.



¹⁴Ni pa Davida anga ki lampui ni hroa, ki thu'nkung le ki thupêkhai ni zômin chu zoro sôtak nan damtir ki ti," a tia.

¹⁵Solomona chu a hong hara, a'rmang tiang Pathianin thu a ihril pe a nih ti an hriat tâka, Jerusalem tiang a hongga, Rengpa Thuthung Bôm kôla a ngîra, hâlrivôm thilinhlan le irngeina thilinhlanin, a siahlo murdihai fâk hrangin hruai an thea.

Solomona'n thubuai intak a rêl infelna

¹⁶Sûn khat chu notizuar inhni rêng kuang an hongga; a kôla an ngîra.

¹⁷Inkhat nu khan, "Ka pu hi nupangnu leh hin in sêngkhata om ngai kin nia; hmun khata kin om laiin, nâi ki neia.

¹⁸Nâi ki nei nî ata sun thum zoia, hi nupang khom hin nâi a neia, kha ina khan tûte mi dang om mahaia, kin ruai vaia om kin nia.

¹⁹Zâna a inkâr, hi nupangnu hin a nâi chu a del thata.

²⁰Zânlaia a thoia, ni siahlo hi a poma, a nâipa thi sai kha a nin pomtir a ni:

²¹Zînga irhnu pe hrangin ki thoiin chu, nâite kha thi saiin ki hmua, ki en infel sabakin chu ki nâipa, ki inei kha ni ta maka," a tia.

²²Inkhatnu khan, "Ni mah a dampu kêng hi ki nâipa a ini, a thi hi kêng nangma nâi a ini" a tia. Maton uala nu khan, "Ni ma, a thi kêng hi nangma nâi a ini, a dampu kêng hi keima nâi a ini," a ti ngit tâka. Khaang khan rêng kôla an irsêla.

²³Khanchu rêng Solomona'n, "Nin ruaiin, a hring hi ki nâipa a nia, a thi hi kêng ni nâipa nin irtia," a tia.

²⁴Khandai ni hong pe roi, a tia, khanchu an hong chôi tâka.

²⁵Khandai chu an hong pêka, rêng khan, "Nâite a la dam kha bong hniin sât nghet unglân, bong kha khatin semhai roi," a tia.

²⁶Nâipang a la dam nutak khan chu, a nâi kha lung a thung hrai sikin rêng kuang khan, "Ka pu, lungkham takin nâite chu hi nu hi pe chian ro: that no



ro,” a tia. Inkhatnu khan chu, “Bonghni inchangtirin lân, tûte’n kin dong no khoma,” a tia.

²⁷Reng khan, “Hiang hin irngeina a siama, nâtesen dam chu nu a matona thuhirilnu hi pe unglân, that no roi, hi kêng hi a nutak a ini,” a tia.

²⁸Israel mi murdi’n rêng thurêl kha an inhriatin chu a sân an inzâ ual uala, Pathianin roirêl theina dik tak a pêk ti an inhriat suak a ni.

1 Rêng hai 4

Solomona hnuai hruaituhai

¹Reng Solomona chu Israel mi murdihai rêng a nia.

²Hihai hi a mi lian hmang hai chu an ni. An ochai chu Zadoka nâipa Azaria a ni.

³Ziaktu lian chu Elihorefa le Sisa nâipa Ahija an ni. Ahiluda nâipa Jehosafata chu thurchi irziaktu a ni.

⁴Jehoiada nâipa Benaia chu sipai hruaitu a ni. Zadoka le Abiathara chu ochai an ni.

⁵Nathana nâipa Zabuda chu rêng ochai le rêng chang hai enkoltu a ni.

⁶Ahisara chu rêng in enkoltu a ni:

⁷Solomona’n Israel ram pumpui chu bial sôm khat inhniin a khoia, an rêng in hruaitu a phun hai chita. Khahai khan rêng hrang le a in sung mihai fâk hrang an pêk ngai a ni. Hruaitu inkhatin tha khata an fâk inruk hrang kum sôtin an itum ngai a ni.

⁸Hihai hi an hruaituhai irhming le an omna bial irhming hai chu a ni; Efraima tâng ram Benhura.

⁹Makaz, Salbim, Beth-emes, Elon le Beth-hanan khua hruaitu chu Bendekera a ni.

¹⁰Arubot le Soko hai le Hefer ram murdi enkoltu chu Benheseda a ni.



¹¹Dor bial pumpui enkoltu chu Ben-Abinadaba a ni. Ama hin Solomona nâinu Tafati dôngma'n a neia.

¹²Tanak le Megido Zerethan dep Zezreel hnuai, Beth-san ata Abela Mehola le Jokmeam dênin, Beth-san ram pumpui enkoltu chu Ahiluda nâipa Baana a ni.

¹³Gilead rama Ramot khua, Manasea irchi, Jair in mihai omna khua Gilead rama mihai, Basan ram, Argob biala kul le thîr mikot nei khua sômruk hai enkoltu chu Ido a nâipa Ahinadaba a ni.

¹⁴Mahanaim khuaa Ido a nâipa Ahinadaba.

¹⁵Naftalia bial enkoltu chu Ahimaaza a ni. Ama hin Solomona nâinu Basemathi dôngma'n a neia.

¹⁶Asera le Bealot bial enkoltu chu Husaia nâipa Baana a ni.

¹⁷Isakara bial enkoltu chu Parua nâipa Jehosafata a ni.

¹⁸Benjamina bial enkoltu chu Ela nâipa Simeia a ni.

¹⁹Gilead ram, Amor rêng Sihona ram Gilead, Oga ram, Basan huama enkoltu chu Uria, Gebera nâipa a ni. Hi mi sômkhath inhnihai khêla ram pumpui chung a hruaitu inkhat a la om sa a ni.

Solomona rêng chang sũa satvurna

²⁰Judahai le Israelhai chu tuipui kôla chia tam nêkin an punga, raifân taka fâk nêkin an om a ni.

²¹Solomona chu Eufrates tuidung ata Aigupta ram dep Filistia ram dênin roi a rêla. Kha ram pumpuia khan Solomona kuang omna man chôin an oma, Solomona dam sũa chu a khua le tuia tep sa an ni.

²²Solomona'n a sũa tina bai sa ual chi a innang ngai chu, her sângkhat le a saloi ual chi chu her sângkhat a ni;

²³Sechal mar sômkhath, ram sial sômhni, belra irzakhat le sakhi, sazuk, sarza le ârhmehai an ni.

²⁴Solomona'n Eufrates tuipui nitâk tiang Tifsa khua ata Gaza dênin roi a rêla. A kôlvêla ram danghai leh khom an irngei a ni.



²⁵Solomona dam sâng chu Judahai le Israelhai ata Beerseba dênin lungngam takin mâni grep irhuan le theipui bila an om thei a ni.

²⁶Solomona'n, tâli ikai hrangin sakor sângminli le sakor chung chuang thei zât sângkhat le sânghni a neia.

²⁷Ram optuhaiin mâni sintum chita rêng Solomona le a bu nêkna hmuna bunêk ngaihai ta hrangin an ngaitua delhai ngaia, ite irsamtirhai ngai mahai.

²⁸Kha mihai khan a dônte'n sakor, tâli ikai sakorhai ruk bak hrangin fapôl le barli an pêk ngai a ni.

²⁹Pathianin Solomona chu vârna le inhriatna inthûk tak a pêka, lungrîl ngaituana irzat suisuak phâk loi rak a pêka.

³⁰Solomona chu nisua tianga mi vârhai le Aigupta mi vârhai nêkin a vâra.

³¹Rammuala mi vârtak a ni. Ezra mi Ethana, Mahola nâi Hamana Kalkola le Darda hai nêkin a vâ uala, hmun tin le ram tina a'rhming a inthang a ni.

³²Thuvâr sângthum a phuaa, hla sângkhat le ringa a phua saa.

³³Chîmu thurchi Lebanon tânga sidar thing ata kulbanga mông thei dênin an hriat vinga. Ramsa, vate le bokvâka fe ngai dôr le nga thurchi khom an hriat hlet a ni.

³⁴Rammuala rêng murdihaiin Solomona vârzia irchu hrangin an mihai a kuang an itîrhai ngai a ni.

1 Rênghai 5

Tempil sin hrangin Solomona a irsiam

(2 Tsn 2.1-18)

¹Tura rêng Hirama'n Solomona chu a pa Davida thûl hranga sahriak pol a ni tah ti thu an hriatin chu palai a tîra, a pa Davida leh rual an le'rchang sikin.

²Solomona'n Hirama kuang hiang hin he a bê nôkhaia.

³"Ka pa Davida khan chu a kôlvêla ram danghai leh an le'rdoi ngaia, Rengpa'n a râlhai an hnêtir zoi mâka chu Rengpa a Pathian biakna hrang tempil sin thei mah ti chu nin hriata.



⁴Atûn chu Rengpa ki Pathianin ki kôlvêla ram danghai leh a ni irngeitira, râle nin buai dang ite om ta maka.

⁵Rengpa khan ka pa Davida kuang, ni nâipa rêngtoihmun luatu hin chu ki'rhming chôiindômna hrangin tempil la sin a ti; tia a lei inkung ang tâk khan, Rengpa ki Pathian irhming roiinpuina hrangin tempil sin ki itum tâk a ni.

⁶Atûn hin Lebanon tânga sidar thing ni hong thak hrangin thu pehai ro; ki mihai le ni mihai sin suamhai sianlân, ni mihai chu ni izong dôr an hlo pehai ki ti. Sidon mihai anga thing tuk thei mi tûte nei ma ung ti lak nin hriat infel," a tia.

⁷Hirama'n Solomona chongbâi an hriatin chu a sân a lôm oka, a kuang khan, "Hin nam roiinpui tak chungaroirêl hranga nâipa vârtak Davida irchia pêktu Rengpa chu a vuana hin inpâkin om ri se," a tia.

⁸Hirama'n Solomona kuang khan, "Ni chong hong bê chu ki len hriata, sidar le meisâr thing chu ni innang dôr nang pe ki ti.

⁹Ki mihaiin thing chu Lebanon tâng ata tuipei dunga zuan tha an ta, bukkhomin a siana hrang hmun ni itina dênin nang zuan tung pe an ta, an sinsiam zoi tena ni mihaiin hmang an ti. Nang khomin ki mihai hi an fâk hrang chu ni lei ipêkhai nang a ti," a tia.

¹⁰Hirama'n sidar le meisâr thing a innang dôr chu a pêk tâka.

¹¹Solomona khomin Hirama chu bai tui zât nuaiminli le oliv hriak tin irzaminli, a mihai fâk hrang a pêka. Khaang khan a kum tin Solomona'n Hirama kha a pêka.

¹²A lei inkung tâk angin Rengpa'n chu Solomona chu vârna a pêka, Solomona le Hirama chu rual satak an ni ual uala, irngeina thu an thunga.

¹³Solomona'n chu Israel ram pum huapin sintho nuam loihai inphûtin mi sîngthum lai a neihai.



¹⁴ Adonirama chu an nihai enkoltu'n a siama, an nihai kha buk thumin a zêkhaia, mi sîngkhatin tha khata irthûlin Lebanon-ah an hong oma, in sîng tiang tha hni hniin an sintirhaia.

¹⁵ Solomona'n neinin pêl mi sîngsari le lungtuk thei mi sîngriat tâng rama khan a neihaia.

¹⁶ Khakhêla, sinthotuhai enkol hrangin mi sângthum irzathum a dônyaia.

¹⁷ Reng thupêk ang takin lung a sôl zât chi lian ta takin tempil lungphûma irchuan hrangin an hong chôia,

¹⁸ in sintuhai, Solomona mihai, Hirama mihai le Gebal kha mihai le lung le thinghai chu tempil irfûkpui hrang lam takin an siam tâka.

1 Rênghai 6

Solomona tempil sin phutna

¹ Israel nâihaiin Aigupta an suaksan rengata kum irzaminli sômriat, Israel rêng Solomona kum minli tha hnina, Ziv thaa chu Solomona'n Rengpa tempil sin a phuta.

² Solomona'n Rengpa ta hranga a tempil sin chu, a dung mûk sômruk, a khang mûk sômhni, ar sâng lam chu mûk sômthum a ni.

³ Tempil hmun irthiang maton tiang sum hrêna pûk a'rzat lam mûk sômhni le an thûk lam mûk sômin, a siama.

⁴ Tempil banga chu tukver chîntehai ar ônga

⁵ tempil banga bê theiin chontan irchuan thumin a sina,

⁶ ar hnuai tak chu mûk ringaa lian a nia, a lâi chu mûk ruk, a'rsâng tak chu mûk saria lian a ni. Tempil chontan irsâng tak bang chu a hnuai tiangahai nêkin a'rphântira.

⁷ Tempil sinna hranghai chu lung lâkna hmun sinsiam sai a ni sikin tempil sin lai chu sîna khom thîrhêm irhâi ite inhriat hrang om ngai mah.

⁸ In sîng ar hnuai tak lûtna chu tempil sim tianga irngaha a nia, chontan, inhni le inthumna fena hrangin leidâk a doa.



⁹Khaang khan tempil chu a siam zoi ta, a sâng tiang chu sidar thing âtin a tuama.

¹⁰Tempil bang hnenga tentan siamhai chu mûk ringa zitin a siama; hmun tina sidar thing tângkhangin a hmanghai vinga.

¹¹Rengpa thu chu Solomona kuang a zuang tunga.

¹²“Atûn tempil chu ni sin zoi tâka, ki dân le ki thu nan hriattir ni’rngaisânga, ki thupêkhai ni zômin chu ni pa Davida kuanga ki thu inkunghai chu nangma chung a intung ki ti.

¹³Israelhai laia om ki ta, ki mi Israelhai chu masanghai no ning,” a tia.

¹⁴Khan, Solomona’n tempil chu a sin zoi tâka.

Tempil sâng irvotir dân

(2 Tsn 3.8-14)

¹⁵Tempil sâng bang epna’n sidar thing a hmanga, a hnuai ata a chung dênin, thing ât phêk ar bel vinga; a hnuai tiang meisâr thing a dâpa.

¹⁶ Chontan, lailung, hmun irthiang taka khan chu tempil lian dân chu mûk sômhnia irvêl irkualin a siama, a hnuai ata a chung dênin sidar thing leh a tuamhai chita;

¹⁷Hmun irthiang tak lûtna hrang tôna tentan chu mûk sômminlia sei a nia.

¹⁸Tempil sâng irvotirna sidar thing banghaia khan, pâr dûr irlimhai siamin sidar thinghai chu sip khakin a lung hmang irlangtir loiin a’rvoa.

¹⁹Tempil sâng lailung chu Rengpa Thuthung Bôm siana hrangin a siama.

²⁰Kha sâng kha chu mûk sômhnia irleng irkualin, ar sâng lam khom mûk sômhni ngêtin a siama. A sâng chu rângachakin a tuama. Sidar thinga siam maichâm khom kha rângachakin a tuam dela.

²¹Solomona’n tempil sâng chu rângachakin a tuam del zita, chontan lailung tak lûtna mikot lua khan chu rângachak thîrhui an khâia, a mikothai khom rângachaka tuam a ni.



- ²²Tempil sâng murdi le hmun irthiang taka maichâm om khom kha rângachaka tuam ving a ni.
- ²³Hmun irthiang taka khan oliv thinga siam cherub irlim mitha inhni nei mûk sôma irsâng inhni a oma.
- ²⁴Cherub inkhat mitha chu mûk ringaa sei a ni, a mitha inhni'n ar anga, a mitha inkhat leh ar kêr lam chu mûk sôma irhla a ni.
- ²⁵Cherubhai chu irang zekin an lian lamhai khom an hmêl khom a nia.
- ²⁶Mûk sôma irsâng an nia.
- ²⁷Tempil sâng hmun irthiang taka khan cherubhai chu a siahaia, mithahai phar pumin. Cherub mitha inhni chu a laia irsuktirin, cherub inkhat mitha le tianga hmora khan bang dang an suntira.
- ²⁸Kha cherubhai khom kha rângachaka tuam ving an ni.
- ²⁹Tempil sâng tianga banghai le hmun irthiang tak banghai chu cherub irlim hai, tûm thing irlimhai le pâr irlimhaiin a'rvotira.
- ³⁰Hmun irthiang tak hnuai le a danghai khom kha rângachakin a tuamhai vinga.
- ³¹Hmun irthiang tak lûtna mikot chu oliv thinga siam a ni, inkhâr lu chungsâp irzum a ni.
- ³²Oliv thingin inkhâr inhni a siama, cherub irlimhai, tûm thing irlim hai le pâr irlimhai sinin rângachakin a tuamhaia.
- ³³Tempil sâng lûtnaa khan mikot kil minli nei, irki minlia ir-ông vingin oliv thingin a siama.
- ³⁴Mikot thep thei inhni meisâr thingin a siama.
- ³⁵Khahai khom khan cherub mitha nei irlim, tûm thing irlim le pâr irlimhaia irvoin rângachak leh a tuamhaia.
- ³⁶Tempil hnuai tiang khan tual lian takin a siama, lung sinsai irkhamin chontan inthumin a tentana, sidar thing phêk leh a'rkula.



³⁷Solomona inlal zoro kum minlinaa Ziv tha tempila lung an iphûm a nia.

³⁸Solomona inlal kum sômhleikhatna le tha riat bul, thaa chu ki iti angin tempil chu sin zoi a ni ta a ni. Kum saria sin zoi a ni.

1 Rênghai 7

Solomona rêng in

¹Solomona in chu kum sômhleithuma sin zoi a ni.

²In liantak, “Lebanon ram pui in,” a iti kha a dung mûk irzakhat, a khang mûk sômringa, ar sâng lam mûk sômthumin a sina. Sidar chopui irthua thumin a phuna, sidar miliangin a hmanga, a siling khom sidar thing a ni.

³Irthua khatna khan chopui sômkhath ringa a phuna, a rêngin chopui sômminli ringa a ni.

⁴Tukver khom irsâng vitin irthua thumin a siama, a banghai khom sak tiang le thang tiang a rêngin a’rзомtirhai chita,

⁵tukver le mikothai chu, irkî minliin irang chitin a siama, a mân tianga tukver irthua thum le hnung tianga tukverhai khom ar dîntirhai chita,

⁶chopui neiin tuala irnghâkna hrang a siama, a dung mûk sômringa, a khang mûk sômthumin, doirikho pêkin a lûtna hrang leidâk a doa.

⁷Roirêlna hrang a siam saa, rêngtoihmun ar kula, hi hi chu roirêlna hmun a ni. A hnuai le a chunghai dênin sidar thing phalin a tuamhai ving a ni.

⁸Roirêlna inhnung tiang khan ama omna hrang, in dang a isinhai angin a sina, khan a dôngma Faroa nâinu irhmingin in dang a sin nôka.

⁹Kha inhai murdi chu a mikothai ata enin le a lungphûm ata a milianghai dênin lung sa chi inzen a ni, lungtukna hmuna sinsiam sai, a pên le sâng tianga innâm sataka sin sai a ni.

¹⁰A lungphûm hrangin lung sa chi, liantak taka sin mûk sôm le mûk riathaia ihmang a ni.

¹¹A chung chu lung sa ual a rukbaka sin sai irchuanin a siama, miliang chu sidar thing a hmanga.



¹²A in tual chu ar hîlin lungin ar kula, sidar thingin a tuam irkul saa, Rengpa tempil kholâi ang dênin a irvotir a ni.

Hurama sintum

¹³Reng Solomona'n Tura khuaa mi inkhat, Hurama chu chong an thuana. A nu chu Naftalia nama meithâi a ni.

¹⁴A pa chu Tura khua mi thîrsu thei tak a ni. Hurama khom zoro sôtak dâr chi tinrêng suk thei mi a nia, rêng Solomona kuang a hongga, a iti angin thîr tianga sin thopui hrangin sin a ithopui a ni.

Dâr chopui inhni

(2 Tsn 3.15-17)

¹⁵Hurama'n dâr chopui inhni, mûk sômhleiriata irsângin, ar hlûmin mûk sômhleihnua lian, tempil lûtna kôla a phuna.

¹⁶Chopui lu taka khan dâr thîrin an chertira, a inchertir khom kha mûk ringaa irsâng a ni.

¹⁷Chopui sîpa incher chu, thîrhui irlim, voisaria vêlin ar khittira irvo a nia.

¹⁸Chopui sîp irzuma khan dalim thei irlim a sinhaia.

¹⁹Irgamna tual in chu lili pâr angin en a hoia, mûk minlia irsâng a ni.

²⁰Chopui sîp inchor inhni, irhlûm vunga thîrhui irlim inhli anga irvotira dalim thei irlim irza vêlin a kâi rumin a siama.

²¹Tempil maton tianga dâr chopui inhni sim tianga irphun chu Jakin chopui a tia, hmâr tianga phun chu Boaza chopui an tia.

²²Chopui lusîp inchor chu Lili pâr anga enhoi takin chopuihai chu siam zoi a ni tâka.

Dâr tuipang

(2 Tsn 4.2-5)

²³Hurama'n dâra inluan tuipang lianpa'n a siama, a lâia ir-ông lian chu mûk sôma irzâ a nia, an thûk lam chu mûk ringa irsâng a ni, ar hlûm lian chu mûk sômthum vêl a ni.



- ²⁴A tuipang chu a sate'n inmâi innâmin, vêlhnia irsain an mâi innâma, a tuipang leh voikhata siam irfûktir a ni.
- ²⁵Tuipang chu sechal irlim sômhleihni chung a toia, inthumin hmâr tiang an ena, inthumin sim tiang an ena, inthumin nisua tiang an ena, inthumin nitâk tiang an ena, an chung a khan tuipang chu an toia, sechalhai chu an zer tiang a'rtôntirhai chita.
- ²⁶Tuipang irsa lam chu kutzapha dôra irsa a ni, khilât anga irtêkin lili pâr irmuam angin a'rmuama, tui litar sîngminli keng theina a ni.
- ²⁷Hurama'n tâli irlim sômkhata a siama, irkî minli mûk minlia lianin a siama. A'rsâng lam chu mûk thum a ni.
- ²⁸A banghai chu sui innâmin, kâmkei irlimhai, sechal irlimhai, cherub irlimhai a chuanga.
- ²⁹A'rmantirna chung tiang le hnuai tianga kâra khan ar dîntira.
- ³⁰Tâli tina khan dâr a siama, a ke inkûi thei a siama, a rêng khan a chung a tui siana hmun a siama.
- ³¹A rêngin tui siana indettirna hrui dôrin a siama; tui siana chu mûk khatin an seitira, tâli chung a khan mûk khat le a chimripin ar hnuai.
- ³²A ke inkûi thei chu dâr a ni; mûk khat a chimripa irhlûm a ni, a bang hnuai om a ni.
- ³³A ke inkûi thei chu sakor tâli ke anga siam a ni.
- ³⁴A rênga sînga khan irkî minli nei irzompui minlia siam a ni.
- ³⁵A maton tianga bang chu mûk chimripa irsângin a oma, a danghai chu a chopui danghai leh a ir-angtira.
- ³⁶A doinahai le a pum banglâi kâra khan cherub irlimhai, kâmkei irlim hai, tûm thing hai siamin, a iphâk lina hai chu kôi etotin a'rvotira.
- ³⁷Hurama'n hiang hin tâli hnôl thei chu a siama, irangin an irtiat ving a ni.



³⁸Hurama'n tuipang khôl, tâli hnôl thei chung a siamhai vinga, mûk minlia irsâng a ni.

³⁹Tâli hnôl thei ringahai chu tempil sim tiang a siaa, ringa dang kha hmâr tiang a siaa; tuipang chu simnisua irkia a isia a ni.

Tempil sũaga neinunhai

(2 Tsn 4.11–5.1)

⁴⁰Hurama'n tui irsilna bêlhai, tâbor le khuri a siama. Khanchu Rengpa tempil ta hrangin rêng Solomona'n a isiam murdi ar zoi tâka.

⁴¹Dâr chopui inhni, a lu inchor khilât anga nâm, chopui lua thîrhruï inhnia irkhit.

⁴²Chopui lua dalim thei ra irzaminli, irchuan hnïa inkhâia a isiam hai,

⁴³tâli hnôl theiin sômkhath le tuipang sômkhathai,

⁴⁴Sechal sômhleihni chung a dâra inluan tuipang hai,

⁴⁵bêl hai, khuri hai, thîr kutnei hai chu, Rengpa tempil neinun rêng Solomona'n Hurama isiam pe murdi thîr dâr irtêka siam ving a ni.

⁴⁶Rengin Jordan phâizôl Sukoth le Zereda kâra an chuangtira.

⁴⁷Hi neinunhai hi a tam hrai sikin idôr vêl chia mo a inih ti chu inhriat thei ni mah.

⁴⁸Solomona'n Rengpa bêlbûr a isiamhai chu rângachak maichâm hai, Pathian kuanga inhlan bai irthiang sinna rângachak maichâm hai,

⁴⁹rângachak inzena siam meiser siana sômkhath, hmun irthiang tak hnuaia ar kula, ringa sim tiang, ringa hmâr tiang, pârte hai, meiser le meichep.

⁵⁰Rângachak khilât, meiser infâina hai, mirimhoi hâlna kok hai, mei siana hai chu rângachakin a siamhaia. Tempil hmun irthiang tak le a danghai tentanin inkhâr le a kôl vêlhai rângachaka siam a ni.

⁵¹Reng Solomona'n Rengpa tempil a sin zoiin chu a pa Davida'n a lei iser ngai hai, sumru hai, rângachak hai, bêlbûr hai, chu tempil sum sianaa khan a hrêhai ta.



1 Rêng hai 8

Tempil sũa Thuthung Bôm lâklût

(2 Tsn 5.2–6.2)

- 1 Reng Solomona'n Israel ulianhai, nam hruaitu hai chu Davida khopui Zion ata Jerusalem a omna hmuna Thuthung Bôm chu a lâka, tempila thon hrangin a koi bukhaia.
- 2 Israel mi murdihai chu tha sarina, Ethanin thaa kût hmang hrangin Solomona kuang an hong.
- 3 Israel ulianhai an hong tungin chu, ochaihaiin a bôm kha an irzôna.
- 4 Rengpa bôm hai, puan inhai, le bungrua irthianghai chu tempila an hong siaa. Ochaihai le Levi irchihaiin an irzôna.
- 5 Israel mi a kôlvêla omhaiin chu rêng Solomona hai leh Thuthung Bôm maton tiang an irkôia; belra le sehrât tep zoi loi thilinhlanin an thata.
- 6 Ochaihaiin Rengpa Bôm chu tempil sũa an thun lûta, a omna hrang hmun irthiang tak, cherub mitha zâr hnuaiia an siaa.
- 7 Cherub mitha zâr khan Bôm le a'rzônna fung kha a'rkhûa.
- 8 A'rzônna fung hmun chu hmun irthiang tak lampui irdîn taka ngîrin an lang thei, pên tiang ata chu irlang thei ma. A'rzônna funghai chu atûn ten hin a la om mai a ni.
- 9 Bôm chungka khan ite a dang om ma, Israel nâihai Aigupta ram ata an hong suak laia Horeb tânga Rengpa Thuthung irziakna lungphêk inhni Mosia isia kha a iom sa a ni.
- 10 Ochaihaiin hmun irthiang tak an suaksanin chu Rengpa tempil chu sũmin ar khûa,
- 11 Sũmzîng sikin ochaihai chu sin tho thei ta mahaia, Rengparoiinpuina khan tempil chu a sip zoi zit tâka.
- 12 Solomona chu a chongchaia, "Rengpa khan a zîng irsatak kêra om ki tih ni lei tia.



¹³Tempil roiinpui tak ni ta hrangin ki sin zoi tâka, kumtuanga ni omna hrang a ni,” a tia.

Mipuihai laia Solomona thuhiril

(2 Tsn 6.3-11)

¹⁴Israel mipui murdi laia Solomona'n a enhaia, Pathianin satvurna pehai hrangin bor a pêkhaia.

¹⁵Hiang hin, “Israelhai Rengpa chu inpâk roi, ama'n chu ka pa Davida kuanga a chonginkung hlo a nin chuktir pe tâk a ni.

¹⁶Rengpa khan, ki mihai Aigupta ram rengata ki hruaisuak nî ata atûn ten hin Israel khopui kho hmun khom nin ni biakna hrang hmun tempil lan thang ma ung. Davida nangma rêk chu, ki mihai chung a roirêltu hrangin nang kin thang a ni; a iti kha” a tia.

¹⁷Solomona'n an sîr sui irzom maia, “Ka pa Davida khan Rengpa Israelhai Pathian biakna hrang tempil sin a lei tum ngaia.

¹⁸Khannisian, Rengpa khan ka pa Davida kuang khan, “Tempil ni sin pe hrangin ni tuma ni tho'n sa.

¹⁹Khannisian, nangma'n chu tempil sin no chi ni; ni nâipa ni rîla ra khan kêng ki tempil chu a isin hrang,’ a iti a ni kha.

²⁰“Rengpa'n a chonginkung chu an hriat maia, ka pa Davida irthûlin ki hong inlala, atûn hin Israelhai rêng ki ni tâka, Rengpa'n a lei inkung tâk angin, Israelhai Pathian chubai mûkna hrangin tempil chu ki hong isin thei a ni ta.

²¹Thuthung Bôm, ki'rchipuihai Aigupta ram ata an hong suaka Rengpa leh an thuthung irziakna lungphêk khom tempila siain a om tâk,” a tia.

Solomona Chongchaina

(2 Tsn 6.12-42)

²²Solomona chu mipuihai maton tiang, Rengpa maichâm kôla a ngîra, bân phar pumin,

²³a chongchaia, “O Rengpa Israelhai Pathian, chung vânhai le, hnuai rama khom, nangma anga Pathian dang rêng om mahai. Ni mihai le nin thuthung



chu nin hriat maia; a dik takin ni thupêk an zôm photin chu, ni lungkhamna nin langtir ngaia.

²⁴Ka pa Davida kuanga ni thu'nkung hlo nin chuk tâk a ni.

²⁵ “O Rengpa Israelhai Pathian, ka pa Davida khan ni dânhai ang taka ar chihai khomin an ngîk maiin chu, ar chi laia inkhat a ni khoma, Israelhai rêngtoihmuna toi thei mai an tih ni iti khom hi a tak chang sianlân.

²⁶Ka pa Davida ni siahlo kuanga ni inkung murdi chu, O Rengpa Israelhai Pathian a vuana ni irnghil loi ang hin hlochukna pe mai ngai roh.

²⁷ “Khannisian nang Pathian tak hin irnêng mihai laia hin om nuam ual le nang irhoitir ma ung? Irvâna lua om loi ni nia. Ki tempil sina hin om nuam theiin mo?

²⁸O Rengpa ki Pathian, ni siahlo ki nia, a vuana nang ki izong hi nir ngai poimo pe'n lân, ni phal pe roh.

²⁹ Hi Tempil nangma biakna hranga inhlân hi, a sîn a zânin vêngin lân, hi tempila ki chongchaihahi hi irngai roh.

³⁰Ki chongchai irngaiin lân ni mihai khom hi tempila an chongchainahai chu sâmhahi ro, ni omna irvân ata inhren lân, ni ngaidam roh.

³¹“Tukhom thil saloi tho an itum, ni maichâm kôla hong lûta, a dikna thu hrila khomâk a hor sâmin chu,

³²O Rengpa irvân ata le'rngaiin lân, ni siahlohai chungchâng chu a dik takin nangin lei sâmhahi ro, a siat sintu chu a insiat angin rêlin lân, a dik chu insua roh.

³³Ni chungâ an sual sika, ni mi Israelhai chu an râlhaiin an inhnêa, nangma tiang an ho'rleta, hi tempila hin an hongâ ngaidam an hong zongin chu,

³⁴Irvân ata le'rngaiin lân, ni mihai sualna chu ngaidamin lân an irchihai ni ipêkhaina rama hin hruaihai nôkin lân,

³⁵ni mihaiin thil an tho inchâia mittui angin, an sual an irleta an sual ngaidama an chongchaiin chu.



³⁶Irvân ata le'rngaitua'n lân, rênghai سوالنا le Israelhai سوالنا ngaidamin lân, thil dik tho hrang irchutirhai roh. Khanchu, O Rengpa ni mihai omna hrang ram ni ipêka hin rua inthotirin lân.

³⁷Hi rama hin châm a tâka, hri a lênga, chîmuhai a siata, hri a punga, an râlhaiin ni mihai an doia, inkhur khobûr a lênga an tong zoro khom,

³⁸an chongchaina lei sâmhahi ro, ni mi Israel tukhom irlet tataka irleta tempila kutphara a chongchaiin chu.

³⁹An chongchaina chu sâmhaiin lân, ngaidamin lân, changpuihai roh. Nangma vaiin kêng mihriam ngaituana sîngrîl inhriat thei. Mi murdi an sintho lam angin rêlhaiin lân,

⁴⁰khanchu, hi rama kin pi le pu ni ipêkhai rama hin kin dam sîngin kin ilua thei hrang, a tia.

⁴¹⁻⁴²“Nam dang, Israel ni loi, ram hlataka omhai khomin ni roiinpuizia le sinthotheina an inhriatin, nang an biak theina hrang le, hi tempila a chongchaiin chu,

⁴³An izong chu sâmhaiin lân, khanchu, rammuala mi murdi'n ni mi Israelhai ang dênin nang an inhriat theina hrangin. Hi tempil ki isin hi nangma chubai mûkna a nih ti an inhriat theina hrangin.

⁴⁴Râl doi hrangin ni mihai an irsiamin chu, kho hmuna khom an chongchaia, tempil ngaisângtuhai chu donsuiin lân,

⁴⁵an izong chu sâmhaiin lân, irvân ata ensuiin an râlhai inhnêtirhai roh.

⁴⁶“Ni mihaiin thil an tho inchâiin chu, (tûte thil سوال tho loi om mahai) ningmurin an râlhai nin hnêtira, suaka hruaiin, ram hlatak ni khomsian,

⁴⁷ni mihai chongchaina chu sâmhaiin lân, kha an omna ram ata an سوال an irleta, an insiatnahai ata thupha an hong zongin chu, O Rengpa, an chongchaina lei sâmhahi roh.



⁴⁸Kha rama an om sângin an sual an irleta, irsîr taka an irchibulhai ram ni ipêkhai ram tiang, ni khopui irthiang tiang, nangma hranga ki isin tempil tiang irngaia an chongchaiin chu,

⁴⁹lei irngaiin lân, ni omna vân chung sâng ata len hre maiin lân,

⁵⁰ar ngai lei theihaiin lân, ni mihai sualna le an sin insiatnahai murdi chu ngaidamin lân, an râlhai chu milung sa irputtirhai roh.

⁵¹Kâng irhmang thei meipui Aigupta ram ata ni ihruai suak nangma mihai an ni hi.

⁵²Itinrêng thotheiRengpa, ni mi Israelhai le an rêng hai chung a za irngai theiin lân, changpui innangin nang an koi zoroa chu irngai pehaiin lân,

⁵³Anni chu rammuala nam tinrêng hai ni siahlo Mosia kin puhai Aigupta ram ata a hruai suak lai khan, ni lei insîr pehai tâk ang khan,” a tia.

Chongchai mongna tiang

⁵⁴Khan, Solomona chu Rengpa kuang a chongchai zoiin chu bân phara a chongchaina hmun maichâm kôl ata chu a ngîra.

⁵⁵Mipui hong uaptuhai ta hrangin Pathian kuang satvurna inring takin a zong pehaia.

⁵⁶“A lei inkung tâk angin a mihai laia irngeina pêk theitu Rengpa chu inpâkin om ri se. A siahlo Mosia hmanga a chonginkunghai chu inhre mai a ta,

⁵⁷kin puhai lai ata a iompuihai angin, Rengpa ei Pathian chu ei kuang om mai ri se.

⁵⁸A thu zôm theina hrangin ni ompui sianlân, khanchu an dit lam takin lêng thei kin ti, kin puhai kuanga a thupêkhai murdi kin zôm theina hrangin.

⁵⁹Rengpa ei Pathianin ei chongchaina murdi le ei inghi murdi inhre mai sianlân. Israel le an rêng hai lunginkham sianlân, an innang murdi pe mai ri se.



⁶⁰Khanchu, rammuala nam murdi'n Rengpa vai hi Pathian a nih ti inhrehai sian.

⁶¹Nangni a mihaio, Rengpa ei Pathian ta hrangin iamom zoi unglân, a dân le a thupêkhai chu atûna nin izôm ang hin zôm mai ngai roi," a tia.

Tempil inhlanna

(2 Tsn 7.4-10)

⁶²Khan, rêng le Israel mipuihaiin Rengpa kuang hâlvôm thil an inhlana.

⁶³Reng Solomona'n Rengpa ta hrangin sehrâtchal sîngni le sângni (22,000) an hlana, kêlbelra nuaikhat sîngni (1,20,000) an hlana. Khanchu rêng le Israel mipuihai khan tempil chu an inhong ta.

⁶⁴Kha ni sîn ngêta khan Solomona tual in mikot nghâkna in, tempil kôla om khom kha an hong; hâlvôm thilinhlanhai, bu le bâl thilinhlan hai le sa a tui chi fâkhai siamin, dâr maichâm a isiam chung a keng zoi thei no sikin tual tiang khom kêlsuain an hâlvôm a ni.

⁶⁵Reng Solomona le Israel mipuihaiin tempila khan, kairêng kût sîn sari an hmanga. Khatak ata Israel ram hmâr tiang dep Hamath khêl ata Israel ram sim tianga Aigupta tui kôla mi murdi chu an hong irbukkhôma, mi tamtak an ni.

⁶⁶Sîn riat nî tena chu Solomona'n mipuihai chu a tîrhai nôk ta, Rengpa khan a siahlo Davida le ar chihai chu sat a vur sikin raifân takin an chîn theia, Solomona chu an inpâk ok a ni.

1 Rêng hai 9

Solomona kuanga Pathian inlâr nôkna

(2 Tsn 7.11-22)

¹Reng Solomona'n tempil, rêng in le a danghai a sin zoiin chu,

²Gibeon-a a om lai ang khan Rengpa chu a kuang an lâp pe nôka.

³Rengpa khan a kuang, "Ni chongchaina ki len hriata, hi tempil ni isin hi kumtuanga nin ni biakna hmun ni hrangin kin thang ta. Hrunng ki ta, enkol mai ki ti.



⁴Ni pa Davida angin iamom tak le dik takin ki sin ni thoa, ki dânhai le ki thupêkhai ni zômin chu,

⁵ ni pa Davida kuanga ki chonginkung, nir chihai chu Israelhai rêng hong chang irzôm mai an tih tia ki chonginkung kha a tak hon changtir ki ti.

⁶Nang le nir chihaiin a ni zui nin hnônga, nin rota ki thupêkhai zôm loiin, pathian dang nin biakin chu,

⁷ki mi Israelhai chu an ni lua hrang ram ki ipêkhai rengata inhnothai ki ti. Hi tempil nin ni biakna hrang hmun hranga ki inhlan irthiang sai khom hi rotsan ki ti. Rammuala nam tinhaiin Israelhai chu êsêlin innuisan ni an ti.

⁸ Hi tempil hi siat ving a ta, a hmupuhai dôrin a'rkhêl ti an ta, 'Itho sikin mo Rengpa'n hi ram le tempil hi a isoisak'? ti an ti.

⁹Mihaiin, an irchihai Aigupta rengata hruai suaktu Rengpa an Pathian an rotsan sika a ni hi te, pathian dang an zonga, a sin an tho sika Rengpahin a isoisak a ni hi, tiin sâmhai an ti," a tia.

Solomona le Hirama irngeina

(2 Tsn 8.1-2)

¹⁰Solomona'n chu Rengpa tempil le ama in chu kum sômhni sângin a sin zoia,

¹¹Tura rêng Hirama'n sidar thing meisâr thing le rângachakhai le a innang murdi, hi inhai sinna hrangin a pêka.

¹²Hirama'n khuahai kha a va hmu'n chu lôm thei rak maka.

¹³Khanchu, Solomona kuang khan, "Urêngpa hihai ang hi mo ni ni ipêk?"

¹⁴Ite lua khom hman ruk loi, Kabul ram a ni hi," a tia. Atûn ten hi irhming hi a irput a ni ta. Hirama'n Solomona kha rângachak her sômminli chu a lei thon nôk tâka.

Solomona sintho danghai

(2 Tsn 8.3-18)

¹⁵Reng Solomona'n tempil hai, ama inhai, khopui nisua tiang lua bit hrangin kul bang siam hrangin sinthotuhai nakhrât pôl a neia. Khanchu, hi kha hai, Hazor, Megido, Gezer hai hi a siam insathaia.



- ¹⁶Aigupta rêng Faraa khan Gezer khua a doia, a hâlpai, mihai khom a thatpaihai vinga, a nâinu Solomona dôngma an dongtira.
- ¹⁷Solomona'n a siam insat nôka; sintho hranga nakhrât pâlhaiin Beth Horon, chuanhnuai hai,
- ¹⁸Baalath khua, Judai ram ramchâra Tamar khua a siam insatirhai sa.
- ¹⁹Thil siakhômna khua, sakor le sakor tâli omna khua, Jerusalem, le Lebanon le a ram sâng hmun tina siam insat nanghai chu a siam zoi tâka.
- ²⁰Hi nam Amor, Hit, Periz, Hiv le Jebus mihai hi,
- ²¹Israelhaiin Kanaan ram an lûta khan thathai zoi loi, Solomona'n sintho hrangin nakhrât pâl a ihmanghai irchi chu atûn ten hin suak angin an om mai ta.
- ²²Solomona'n Israel mi tukhom suak angin hmang ngai maka, sipai hrang le hruaitu hrangin chu a hmanghai.
- ²³Solomona'n a sintuhai enkol hrangin mi irzaringa sômringa an om.
- ²⁴Solomona dôngma Aigupta rêng nâinu chu Davida khopui ata ama hrang piala a in sina khan ar thona, kha zoiin chu khopui nisua tiang chu an bit zoi tâka.
- ²⁵ Solomona'n Rengpa ta hranga maichâm a isiam chung a khan hâlvôm thilinhlan le fâk hranghai thilinhlanin a kuma voithum an hlana. Rengpa hrang mirimhoi a hâla. Khanchu, tempil sin zoi a ni.
- ²⁶Reng Solomona'n Edom rama Eloth kôla Agaba irkuang irngamna Eziongeber khuaa irkuang tamtak a siama.
- ²⁷Reng Hirama'n irkuanga mihai kha, Solomona changpui hrangin a tîrhaia.
- ²⁸Ofir rama an fea, rângachak her sângkhat irzaminli a va lâka, Solomona an va pêk ta.

1 Rêng hai 10

Seba rêngnu'n Solomona a panna

(2 Tsn 9.1-12)



- ¹ Seba rêngnu'n Solomona irhming inthang thu an hriata, thu'ntakhai irdon infel hrangin Jerusalema a hongga.
- ² Hnung zuitu tamtak neiin, saringsei tamtak a hruaihai saa, lung mantam Mosola le rângachak hai chôiin, Solomona le an irhmua, a irdon nuam murdi ar dona,
- ³ A irdon murdi Solomona'n a hril pe thei vinga; ite intak ti viat reng nei maka.
- ⁴ Seba rêngnu khan Solomona vâi dân kha a hmua, a in sin hoitak khom a hmua.
- ⁵ Solomona fâk zong an irfûk pe dân hai, a siahlohai omna inhai, rêng sinthotuhai sin irzêk dân hai, an tukfam sa lam dânhai, a enkoltu hai tukfam sa lam, tempila hâlrivôm thilinhlan a inei intam lamhai a hmu'n chu, a'rkhêl tiin a enhaia, a mit insim loi rakin.
- ⁶ Rengnu khan Solomona kuang, "Ni sinthohai le ni vâi lamhai kin ram ata ki inhriat hi a dik a ni.
- ⁷ Ki hongga, ki mitin ki hmu mân chu lei iam thei ngai ma unga, khannisian, ni vâina le nir chong lamhai hi a chimrip lua an insîr loi kêng a lei ini, an insîrhai nêka roiinpui a ni.
- ⁸ Ni dôngmahai chu râlvân satak an ni! ni siahlo ni kôla sinthotuhai khom hi râlvân satak an lei ini! pial a ni,
- ⁹ ni Pathian Rengpa chu inpâkin om ri se, ama chu ni chungga hin a lôma, Israelhai rêngin nang a isiam a ni. Ni Pathianin Israelhai lung a thunga, dik taka an chungga roirêltu hrangin, nang a indit a ni hi," a tia.
- ¹⁰ Thilpêk hranga a ichôi chu a pêka, rângachak her sângminli vêl, mosola tamtak, le lung mantam tamtak tak a pêk sa a ni. Mosola thil mirimhoi itiklai khom kha dôra tam a la iman ngai loi,
- ¹¹ Hiram a irhming hai, Ofir ram ata rângachak zuang pêtuhaiin Almug thing le lung mantam tamtak an zuang chôi sa.



¹²Reng khan kha thinghai kha Rengpa tempil le rêng in irkulna'n a hmanga, hlasak inhoitirna perkhuang le a danghai sinna'n an hmanga, khaang dôra tam Almug thing Israel rama lâklût la ni ngai maka, a hmu khom la hmu ngai mah.

¹³Reng Solomona'n Seba rêngnu chu a izong murdi a pêka, khakhêla, a thil zuang chôi nêka tam a pêk a ni. Khanchu, a zuituhai leh khan an ram tiang an kîr nôk ta.

Solomona Irchong lam
(2 Tsn 9.13-29)

¹⁴Solomona'n a kum tin rângachak her sîngthum le sângthum a hmu ngaia.

¹⁵Irvai mihai le dukan thotuhaiin an tho manhai an pêk ngaia, Arabia rêng hai le Israel rama bial tina ram optuhaiin an pêk saa.

¹⁶Solomona'n pho lianpa hai, rângachak siana khêng irzahni a siama, pho inkhat sinna khan rângachak her sari a hmang a ni.

¹⁷Pho chîn ualhai chu rângachak her hni vêl polin a inluan sa ngai a ni, phohai chu Lebanon roiinpui an iti sînga khan an siaa, rângachak inluan saiin.

¹⁸Reng toihmun irthiang chu sâiha leh siam a nia, rângachaka inluan a ni.

¹⁹Rengtoihmun a luina leidâk kkuat ruk neiin a siama, tûkbân neiin, leidâk sîr tiang khan kâmkeibaknei irlim an ngîrtira,

²⁰sôm khat inhninaa rêngtoihmun hnung tiang khan, sehrâtchal lu irlim a oma, a sîr tianghai khan kâmkeibaknei irlim a om sa, khaang dôra rêng toihmun hoi le roiinpui chu kho rama khom la om ngai mah.

²¹Solomona khilâthai chu rângachak inzen a ni, Lebanon rampui an iti in sînga an fâk zongna bêlbûrhai khom rângachaka siam ving a ni. Solomona zoro lai khan chu sumruhahi hi inhlu rak maka, a hmangna khom om rak mah.

²²Irkuang a neihaia, rêng Hirama irkuanghai leh khan an irkopa, Tarsis tianga fein, kum thum zoia an hong kîr ngaia, rângachak hai, sumru hai, sâiha le zôngte hai le vahrohai an irkat ngai a ni.



²³Reng Solomona chu rêng danghai nêkin ar chonga, a vâi khom a ivâr ual a ni.

²⁴Pathianin a kuang vârna a ipêk kha irchu hrangin ram tina mihaiin an hong ipan ngai a ni.

²⁵A kuanga hong murdihaiin sumru le rângachaka siam, puan mani, râl doina neinun, mosola, sakor, le sakor puak pêl theihai an hong ipêk ngai a ni. Hiang hin a kum tin an ipêk ngai a ni.

²⁶Solomona'n sakor tâli sângkhat irzaminli le sakor chung chuang thei sângkhat sânghni a neia. Senkhat chu Jerusalema a siaa, a danghai chu khopui hmun da danga a siahaia,

²⁷An lal sâng chu sumru chu lungtehret anga tamin Jerusalema khan a tama. Sidar thing khom mual puia bit angin a bit khak a ni.

²⁸Rengin mi a idônhai khan Musri le Kue ata sakor an thon suaka;

²⁹Aigupta rama sakor tâli an thon sa. Hit mi le Suria rênghai kuang sakor tâli inkhatin sumru irzaruk le sakor inkhatin sumru irzakhat sômringa'n an izuar a ni.

1 Rênghai 11

Solomona'n Pathian ar heisan

¹Solomona'n Faroa nâinu dok ni loiin nam dang dôngmatehai lung ar thungpuihaia, dôngma hrangin Moab mi, Amon mi, Edom mi, Sidon mi le Hit mihai dôngma'n a neihaia.

²Rengpa khan Israelhai kuang, "Nam dang dôngmatehai dôngma'n neihai no roi, an pathianhai zuipuihai sa nin ti," a ti inhriat chakin a neihaia.

³Solomona'n rêng nâi irzasari dôngma'n a neia, lâksîr irzathum a neihai sa, a dôngmahaiin an ihruai insual tâk a ni.

⁴A hong tar hnungin chu, a dôngmahaiin an pathian biak hrangin an ihruai tâk a ni, a pa Davida ang khanRengpa a Pathian mit tung thei ta maka.



⁵Sidon mihai pathiannu Asterothi le Amon mihai pathian intirom tak Milkoma chu a izui a ni ta.

⁶Solomona'n Rengpamithmuin thil saloi a thoa, a pa Davida ang khan iamom loiin a oma.

⁷Jerusalem nisua tianga Moab mihai pathian intirom tak Khemosa biakna hmun a siama, Amon mihai pathian intirom tak Milkoma biakna khom a siam saa.

⁸Nam dang mi a inei, a dôngmahai pathian kuang mirimhoi hâlna le irbôlna hmunhai a siam pehaia.

⁹Rengpa Israelhai Pathian chu a kuang khan voi hni vêl an lâr pea, nam danghai pathian biak loi hrangin a ti pe khoma,

¹⁰Solomona'n Rengpa thu irngai maka, Pathian ar heisan ta,

¹¹Rengpa chu Solomona chung a sate'n a ning an mura, a kuang, "Nangma leh ei thuthung chu êsêl takin nin siata, ki thupêkhai zôm ta mak chea, khasikin ram chu nang sutpai nôk ki ta, ni mihai laia mi inkhat kuang pe ni ta a tih ti nang ki hril.

¹²Khannisianlân, ni pa Davida zârin ni dam sâng chu ni no nia, ni nâipa roirêl sângin kha thil kha chu inlangtir ki ti.

¹³Ram pumpui nang sut zit no ninga, ki siahlo Davida le ki ta hranga ki inding Jerusalem sikin nam inkhat chu la chang a ti," a tia.

Solomona râlhai

¹⁴Rengpa khan Solomona doi hrangin Edom rêng irchia mi Hadada chu an phûta;

¹⁵matona khan Davida le Edom mihai an irdoia, Davida sipai ulian Joaba chu an mi thathai phûm hrangin a hong fea.

¹⁶Joaba le a sipaihai chu Edom rama tha ruk an oma, kha hmuna an om sângin pasal murdi chu an thathai vinga.

¹⁷Hadada chu a pa siahlohai leh Aigupta rama an rota, nâipangte a la ni sikin.



¹⁸Midian ram an suaksana, Paran-ah an fea, mi senkhatin an zuia, Aigupta-a an oma, rêngin an omna hrang ram, in le loi fâk le nêk hrang a pêkhaia.

¹⁹Hadada chu rêngin a tûng zoi sikin rêngnu Tahpenesi urêngnu chu Aigupta rêngin dôngma'n an neitira.

²⁰A dôngma khan nâipasal Genubata a neipuia, rêng nâi danghai angin rêngnu khan a enkola.

²¹Davida thi thurchi le sipai ulian Joaba thi thu Hadada'n Aigupta ram ata a len hriata, rêng kuang khan, "Kin rama nin fetir nôk ta ro," a tia.

²²Reng khan, "Imo ni iti na?" "Imo a'rsam ti ni inhriat, nin rama fe ni irzuk," a tia. Hadada'n, "Ite ual chu irsamna nei ma ung; Khannisian, nin fetir ta hi ro," a tia. Edom rêng Hadada chu Israelhai râl inhnê intak tak a hong ni ta.

²³Pathianin Eliada nâipa Rezona chu Solomona an hmumâktira, Rezona chu a pa Hadadezera, Zoba rêng kuang ata a rota.

²⁴Irhel pôlhai hruaitu a chang tâka, hi hi Davidan Hadadezera an hnêa, a râlhai le a mihai chu an suaka, Damaska khuaa an oma, a zuituhai khan Suria ram rêng hrangin an inkunga,

²⁵Solomona dam sêng chu Israelhai râl a ichang a ni ta.

Jeroboama kuanga Pathian thu'nkung

²⁶Solomona doitu mi dang inkhat chu a hnungzui laia mi Jeroboama, Nahata nâipa, Efraima ram Israel khua mi, a nu chu Zeruii, meithâi a ni.

²⁷A tehelzong lam chu hiang hin a ni, Solomona'n Jerusalem nisua tiang ram a lua inbita, kulhai a siam insata,

²⁸Jeroboama chu ruatharte feltak le takirtâi tak a nih ti inhriatin Manasea bial le Efraima bial sênga sinthotuhai enkol hrangin a hmanga.

²⁹Sûn khat chu Jerusalem ata Jeroboama chu a hong, Silo khua ata hong deipu Ahija le ram hnuaia an irtoka.

³⁰Ahija'n a songkol irfual a khek pea, Jeroboama kuang inhni inchangin ar ekthêr pea,



³¹Jeroboama kuang, “Thêr sôm hi nangin la ro;Rengpa Israelhai Pathianin hiang hin a ti. Irngai ro, Solomona ram hi sutpai ki ta, nam sômhai hi, nangma nang pe ki ti.

³²Ki siahlo Davida zârin Israel ram pumpui ki ta hrang bîka ki inhlan, Jerusalem sikin nam inkhat chu chang ri se.

³³Ama'n chu Sidon mihai pathiannu Asterothi hai, Moab mi pathian Khemosa, Amon mi pathian Milkoma hai zômin, ki lampuia irlôiin, le ki mihai mithmua thil dik a tho no sikin,

³⁴khannisian Solomona chu ram pumpui chu sut ving no ninga, ki siahlo Davida ki inthang le ki dân thupêkhai zômту sikin a dam sâng chu inlaltir ki ta.

³⁵A nâipa kut rengata ram chu sutpai ni a ti, nam sôm khat nang pe ki ta.

³⁶Nam khat chu a nâipa pe ki ti, an ni biakna hranga ki inthang Jerusalem khuaa Davida irchihaiin roirêl an ti.

³⁷“Nangma rêk chu ram liantak chung a roirêl ni ta, Israelhai rêngin om ni ti.

³⁸Ki siahlo Davida anga, ki thu zôma, ki dân ngîka, ki mithmua satakin ni omin chu ni kuang om mai ki ta, Israelhai rêngin nang phun ki ta; Davida kuanga ki inkung angin, nir chihaiin ni hnunga khom roirêl mai an ti.

³⁹Solomona sualna sikin Davida irchihai chu dengintheitirhai ki ti, kumtuangin chu ni ual no ni,” a tia.

⁴⁰Solomona khan Jeroboama chu that a tum tâka, Jeroboama chu Aigupta rêng Sisaka kuang a rota, Solomona thi mâka chu a iom a ni ta.

Solomona thina

(2 Tsn 9.29-31)

⁴¹Solomona thurchi dang, a sin thôna le a vârna thuhai chu Solomona thurchi irziakna bua a chuanga.

⁴²Israel ram pumpuia kum sômminli sâng Jerusalema roi a rêla.

⁴³Solomona chu a thia, a pa Davida khopuia an phûma, a nâipa Rehoboama chu a pa irthûlin an lal nôk ta a ni.



1 Rêng hai 12

Hmâr tianga mihai tehelna

(2 Tsn 10.1-19)

- ¹Rehoboama chu Sekem khuua a fea, kha hmuna khan rêng inthang hrangin Israel hmâr tianga omhai an irbukkhôma.
- ²Nebata nâipa Jeroboama chu Solomona a chi sikin Aigupta rama a rota, a thi ti thu inhriatin a hong nôk tâka.
- ³Hmâr tianga Israelhai khan an va pana, Rehoboama hai leh an fe suam tâka, a kuang khan,
- ⁴“Ni pa khan chu a sân a ni hmanga, kin phur a nin riktir pe ok ngaia, nangma’n chu ni ni hmang khomin kin phur nin zâng pe ualin lân, nin kua le tua om kin ti,” an tia.
- ⁵Rehoboama khan, “Sûn thum zoia zuang nôk unglân,” a tia. Mipuihai chu an chîn ta.
- ⁶Reng Rehoboama’n a pa Solomona dam laia a iompui ulianhai ar donhaia, “Hi mihai hi itin mo ki iti pehai hrang?” a tia.
- ⁷Anni khan, “Hi mihai hi sataka enkol ni nuamin chu, an izong hi satakin donhaiin lân, khanchu ni ta hrangin iamom takin kumtuangin om an tih tiin,” an sâma,
- ⁸ulianhai ihril kha pom nuam maka, thoithar, ama rualhai ar donhai nôka.
- ⁹“Hi mihai hi kin phur nin zângtir pe ual ro tihai hi, itin mo ki iti pehai hrang?” a tia.
- ¹⁰Ama rualhai thoitharhaiin chu, “Hihai hin, ni pa khan kin phur a nin riktir pea, nangma’n nin zângtir pe ual roh tihai hi, hiang hin ti pehai ro; ki kutte khom hi ka pa kong nêkin chu ngar ual a ti.
- ¹¹Ka pa’n nin phur a inriktir a ni’n chu, keima len vângin chu kha nêka rik nang ni bôk pe nôk ki ti. Hmolin nangni a vîkin chu, keima’n chu, sakor isep angin nin chung a chuangin nangni sep ki ti,” ti roh an ti pea.



¹²Sûn thum zoia chu Jeroboama le Israel mihai chu Rehoboama iti angin an hong pan nôka.

¹³Reng khan ulianhai iti pe chu zôm nuam maka, kha mihai kha henhrum takin a le'rkôkhaia.

¹⁴A rualhai iti ang khan, kha mihai kuang khan, “Ka pa khan nin phur a inriktir ok a ni mo? keiin chu nangni bôk pe sa ki ti, hmolin nangni a vîka, keiin chu sakor isep chung chuang irchu angin nangni soisak ki ti,” a tia.

¹⁵Silo khuaa deipu Ahija Nebata nâipa'n Jeroboama kuanga a ihril kha a tak a chang theina hrangin Rengpa khan a intitir a ni. Hi sika hin kêng rêngin mipuihai kha a idonhai nuam loi.

¹⁶ Israel mihai khan rêngin an thu irngai pehai mah ti an inhriatin chu rêng kha an irdona. “Davida rama imo kin dongtum hrang? Jesaia irchihai laia imo kin dongtum nei hrang? Davida irchihai chu an om balamin om ri sehai,” an tia. Israel mihaiin chu an in tiang an rotsana.

¹⁷Judai rama Israel mi omhai chung vai Rehoboama chu an lal tâka.

¹⁸Reng Rehoboama chu sintho hranga a ihmanghai hruaitu Adonirama chu Israelhai koi hrangin a tîra. Ama chu lung leh an lei dêng that ti an hriatin chu Rehoboama chu a tâlia a chuanga, Jerusalem tianga intânin a fea.

¹⁹Kha tena chu hmâr tiang rama om Israel mihai chu Davida irchihai lai ata atûn ten hin tehel an izong tâk a ni.

²⁰Israel mihaiin, Jeroboama chu Aigupta ram ata a hong ti an inhriatin chu, an irbukkhômna ngaia an koia ama chu Israelhai rêng hrangin an siam ta. Juda namhai vai kêng Davida tianga om an ni ta.

Deipu Simeia thuhri

(2 Tsn 11.1-4)

²¹Reng Rehoboama Jerusalem a tungin chu, Benjamina mi le Juda mihai laia sipai hrâttak takhai nuaikhat sîngriat (1,80,000) a bukhaia. Hmâr tianga om Israelhai chu ama hnuaia om hranga doi hrangin ar siampuihaia.

²²Khannisian, Pathian mi Simeia kuang khan, Rengpa thu a zuang tunga.



²³Juda rêng Solomona nâipa Rehoboama kuang khan, Juda nam pumpui le Benjamina namhai le mi dang omhai kuang,

²⁴“Rengpa’n hiang hin a ti, nin urêng Israelhai chu doi no roi, nin rêngin rot nôk ving roi, an sintho hi keima itho kêng a ni, tiin a hril,” an tia. Khaang khan Rengpa thupêk zômin an mâni in tiang an kîr nôk ving ta.

Jeroboama’n Pathian ar heisan

²⁵Israel rêng Jeroboama’n Efraima tâng rama Sekem khua kha irkulin, zoro sôtnote a oma. A suak nôka, Penuel khua chu a’rkul nôka.

²⁶Jeroboama’n chu, “Ram hi Davida in sùng mihaiin lua nôk ta ri sehai mani! ti’n an chonga;

²⁷Mihai chu Jerusalema Rengpa kuang irbôlin an fe maia a ni’n chu an pu Rehoboama Juda rêng hong thop an ta, ni thatpaina an ti,” a tia.

²⁸Khaanga thil ar ngaitua zoiin chu, rângachakin sehrâtte irlim inhni a siama, a mihai kuang khan, “Nin ta hrangin Jerusalema fe mai mai nangni an tak pe hrang sikin, hi hi nin Pathian, Aigupta ram ata nangni hruai suak kha a ni hi,” a tia.

²⁹Khan inkhat chu Bethel-a a siaa, inkhat dang chu Dana a siaa.

³⁰Mihaiin Bethel le Dan khuaa fein thil an lei tho’nsual tâka.

³¹Jeroboama’n chu, tâng sîphaia Pathian biakna hmun a siama, Levi irchi khom ni loi, a inunuam ochai hrangin an thanghai tâka.

Bethel-a Irbôlna hmun demna

³²Jeroboama’n chu Judai rama kût an inei ngai angin, tha riatna ni sùn sôm sùn ringa ni sùn chu, kût hmang ni sùn an danga. Bethel maichâma khan, rângachaka siam sehrâtte kutsinhai kuang khan ar bôl tâka. Tâng sîp irbôlna hmuna ochaihai a isia ang khan Bethel-a khan ochaihai a siahaia.

³³A tha riatna sùn sôm sùn ringa ni sùn Israel mipuihai hranga sùn inkung kût ni khan Bethel-a a fea. Maichâma khan irbôlna thil an hlan ta.

1 Rêng hai 13



- ¹Jeroboama chu maichâm bula thilinhlan hranga a ngêr laiin, Rengpa itîr deipu, Judai ram ata Bethel hmuna a hong tunga.
- ²Rengpa thupêk angin deipu khan maichâm kha hiang hin ar kôka; “Maichâm, maichâm, Rengpa’n hiang hin a ti. Davida irchi ata ar hming Josia a suaka, ni chung a millim pathianhai kuang, rimhoi hâlhai ngai deipuhai chu hâlhai a ta, ni ruhai leh hâl irhmang ni a tih tiin.
- ³Deipu khan a sunzom maia, hi maichâm hi khoiphât a ta, a chung a meirivâm khom indarh ving a ti. Khanchu Rengpa khan, keima ni hmangin thu a ihril a nih ti lan hria ni ti,” a tia.
- ⁴Bethel-a maichâm chu Pathian mi’n ar kôk a nih ti rêng Jeroboama’n an hriatin chu, maichâm bul ata a va’rkôka, “Chelpai roi,” a tia. Kha zela khan rêng kut chu châng thei maka, inban thei ta maka.
- ⁵Maichâm chu a’rphaltir hlanga, meirivâm chu Rengpa deipu’n a ihril ang khan hnuaia a’rthek indarh zoi ta.
- ⁶Reng Jeroboama’n deipu kuang khan, “Lungkham takin Rengpa ni Pathian kuang ki bân damna hrang ni zong pe ro,” a tia. Deipu khan Rengpa kuang a chongchai pea, rêng bân chu a dam pe ta.
- ⁷Reng khan deipu kuang, “Ki ina hongin lân, ki kôla fâk nêk zong ro; khanchu lômman nang pe ki ti,” a tia.
- ⁸Deipu khan rêng kuang, “Ni sum a chimrip ni ni pêk hrang khomin, ni ina chu hong no ning, ite fâk nêk khom fa no ning.
- ⁹Rengpa khan ite fâka in loi hrang le ki hongna khom kîr loi hrangin a ni ti a ni,” a tia.
- ¹⁰Khanchu Bethel panna a hongna lampui tiang fe loiin a dang tiang a fe ta.
- ¹¹Deipu tar inkhat hi Bethel-a khan a oma. A nâipa inkhatin kha nia Judai ram ata deipu hong Bethel-a a sintho le rêng Jeroboama kuanga a thuhrihai chu an sîr pea.



- ¹²Deipu tar khan a nâihai kuang, “kho tiang mo a ife tâk kha,?” a tia. A fena lampui an inhrila,
- ¹³Sakuartung kha irsiamtir roi a tia, a fena hrang an irfûktir pe zoiin chu;
- ¹⁴Judai ram ata deipu hongpa chu a’rzûl tâka. Ama chu Sesua thing dâihlim hnuai a lei toia, “Judai rama deipu kha mo ni ni?” a tia. Ama khan, “O ki ni” a tia.
- ¹⁵Deipu tarpa khan, “Hongin lân ki ina bu hong ne ro,” a tia.
- ¹⁶Judai rama deipu khan, “Nangma leh hmunkhata fe zât ni ma unga, ni kôla bu anh fâk zât khom ni ma ung.
- ¹⁷Rengpa’n ite fa loi hrang le ki hongna lampui tiang kîr loi hrangin a ni iti kêng,” a tia.
- ¹⁸Bethel-a deipu tarpa khan a kuang, “Kei khom nangma ang dênin deipu ki nia,Rengpa itîr vântîrtônin ki kuang, ni ina fâk nêk zong hrangin ama kha hong hruai roh a ni iti a ni,” tiin minlak a thoa.
- ¹⁹Judai rama deipu khan deipu tarpa chu a zuia, a kuang bu a nêkpui ta.
- ²⁰Bu a nêk laiin Rengpa thu chu deipu tarpa kuang a zuang tunga.
- ²¹Judai ram ata hong deipu kuang khan, “Rengpa thu zôm loiin, a thupêkhai khom zôm nuam mak che.
- ²²Ni kîr nôka, fâk nêk zong loi hrang a itihna hmuna ni fâk ni nêk sikin thi ni ta, ni ruak chu ni in mihai tâna phûm ni no ni,” a tia.
- ²³An nêk zoiin chu, deipu tarpa khan Judai rama deipu chuangna hrang sakuartung ar fûk pea.
- ²⁴An chuangtira, lampuia kâmkeibaknei a va’rtokpuaia, a lei sêthat ta. A ruak chu lampuia a lei thal raka, a kôla sakuartung le kâmkeibakneihai an ngîra.
- ²⁵Lampuia mi irlôihaiin a ruak chu an hmua, kâmkeibaknei a kôla nghâkpu leh khan, Bethel khuaa an van tâna, an thil hmu chu an insîr ta.



²⁶A lei hruaitu deipu tarpa khan an hriatin chu, “E, Rengpa thupêk zôm loitu deipu kha a ni kha te. Rengpa iti angin kâmkeibakneiin sê that hrang a itipu khan a ise that a ni ta,” a tia.

²⁷A nâihai kuang khan, “Ki Sakuartung kha chuangna hrang ni hong sin siam pe roi,” a tia. An sinsiam pe zoiin chu,

²⁸an tâna deipu pa ruak lampuia a thal rak chu a va hmua, sakuartung le kâmkeibaknei lei ngîr a hmuhaia, kâmkeibakneiin deipu ruak chu fa viat maka, sakuartung khom ite lei ti viat ma.

²⁹Deipu tarpa khan a ruak chu a tuama a sakuartung chung a chôia, Bethel-a phûm hrangin.

³⁰Deipu tarpa khan, a in mihai tâna a phûma, “O ki urêngpa, ki urêngpa,” tiin a nâihai leh an châa.

³¹An irvûi zoiin chu a nâihai kuang khan, “Ki thi tena chu hi tâna hin kei khom ni phûm unglân hi pa kôla hin nin zâltir roi, a tia.

³²Rengpathupêk Bethel maichâm thu le Samari irbôlna hmun thurchi a lei insîrhai chu a hong itung indik ngêt hrang a ni,” a tia.

Jeroboama siatpuina سوال

³³Israel rêng Jeroboama’n a nunchan سوالna ata irlet nuam loiin, mi narânhai lai ata a maichâm siam ata sinthopui hrang deipu tharhai a siamhaia. Deipu chang nuam murdi’n hmun irsânga sintho hrangin a tihai.

³⁴Hi thil سوال a ithohai hin, ama siatna le ar chihai dêna irhmangna a intung ta a ni.

1 Rêng hai 14

Jeroboama nâipa thina

¹Jeroboama nâipa Abija chu dam loiin a oma,

²Jeroboama’n a dôngma kuang khan, “Ki dôngma ni nih ti tûte’n nang an inhriat thei lina hrangin irvo danglamin tho’n lân, Israel rêng ki ichang hrang thu ni hritu deipu Ahija Silo khuaa om kuang son va fe’n lân,



³Bai tiam sôm le kêk tômtê le khuaitui chînte chôi pe'n lân, ei nâipa om hrang lam hi nang lan hril thei a ti," a tia.

⁴A iti angin a dôngma chu Silo khuaa Ahija ina a va fea. Ahija chu a lei tar tâk sikin len fel thei ta maka.

⁵Rengpa khan Ahija kuang, "Jeroboama dôngma a nâi dam loi thu irdon hrangin a hongga, hiang hin lei ti pe roh. Mi papai angin irvo danglam pai a ni," a tia.

⁶Inkhâra a hong lût irhâi Ahija'n a len hriatin chu, "Hong lût ro, Jeroboama dôngma kha mo ni mak che? Ithoa irvo danglam mo ni ni? Thurchi saloi tak nang len hril rong," a tia.

⁷Fe'n lân, Rengpa Israelhai Pathian thu suak hi, "Jeroboama kuang hiang hin van sîr pe roh. Mipuihai lai ata nang ki chôiirsângga, ki mi Israelhai hruaitu hrangin nang ki siaa.

⁸Davidai hai in mi ramhai nang ki lâk pea, ipêk ni nia, khannisian, Davidai angin om mak chea, ama'n chu ki thupêkhai a zôma, a dik takin a ni zuia, ki mithmua thil dik a tho ngaia.

⁹Nang chu ni matona mihai nêkin ni sual uala; ki itheimâk tak, pathian danghai, millimhai siamin ni ni mâksana.

¹⁰Hitak sik hin nir chia pasal nâi om murdi nâite ata ulian dênin inram ving ki ti, sahrok phît infâi angin nir chihai phît infâi la ni a ti.

¹¹Jeroboama urênghai, khopuia thihai ruak chu uihaiin fa an ta, ram danga thihai ruak chu chunglêng vahaiin hrût an ti, hi hi Rengpa thu suak a ni," a tia.

¹²"Nang khom fe'n lân, khuai ni lût chakin ni nâi chu thi a ti,

¹³Israel mi murdi'n châ an ta, phûm an ti, Jeroboama in mihai laia chu ama vai hi Rengpa Israelhai Pathian mithmua satak a ni sikin Jeroboama irchihai laia chu thâna phûm ni a ti.



¹⁴Jeroboama-hai in sêngkua inhekpai hrangin Rengpa'n Israelhai laia roirêltu a indittak inthang lat a ti.

¹⁵Rengpa'n Israelhai chu soisakhai a ta, tuipei kôla phâiruang kung angin inhnîng sup sup an ti. Israel mihaiin pathiannu Aseri irlimhai an siama, Rengpa ning an inmurtir pe sikin, an puhai ata ram satak a ipêkhai ata chu inhnotsuakhai a ta, Eufrates tui râla semindarh ving an ti.

¹⁶Israelhai chu Jeroboama'n a hruai sualhai sikin, Rengpa'n chu masanhai a ti," a tia.

¹⁷Jeroboama dôngma chu Tirza khua tiang a kîr nôka, in sêng a va tung le zel a nâi chu a thi pe ta a ni.

¹⁸Rengpa siahlo Ahija'n a lei ihril tâk angin Israel mihaiin nâipang chu an châ tâka, an iphûm a ni ta.

Jeroboama thina thu.

¹⁹Jeroboama thurchi dang chu a râl doina, le a roirêl dânhai chu Israel rênghai thurchi irziakna bua a chuang.

²⁰Jeroboama chu kum sômhni inhni sêng an lala, a thia phûmin a oma, a nâipa Nadaba khan a hmun a lua nôk ta.

Rehoboama Judai ram rêng

(2 Tsn 11.5–12.15)

²¹Solomona nâipa Rehoboama chu kum sômminli kum khat a ni leh Judai rama an lal irphuta. Israel pumpuiin ama biakna hmun hrang Rengpa inthang Jerusalema kum sômhleisari roi a rêla, a nu chu Amon nama mi Naami a ni.

²²Juda mihai chu Rengpa mithmua a sân an sual sikin, an puhai nêkin Rengpaning an mur pe uala.

²³ Millim pathian biakna hmun tamtak an siama, tâng sîphai le thing hnuai haia, lung saloi le pathiannu Aseri irlimhai an phuna.

²⁴ Khahai nêka la sual ual chu an millim siam laia nupang le pasal enhoi loitaka an om laihai siamin an oma, Israel nâihai Kanaan rama an hong lûta



an inhriat suakhai nam an omdân saloi murdi chu Judahai hin an irchu tâk a ni.

²⁵ Reng Rehoboama inlal kum ringana Aigupta rêng Sisaka khan Jerusalem a doia.

²⁶ Rengpa tempila irchon, rêng ina irchon le Solomona ina rângachak pho a isiamhai chu a lâkpai vinga.

²⁷ Reng Rehoboama'n kha pho an ilâkpai pehai irthûlin dâr thîrin pho a siam nôka, rêng in enkoltu kuta a pêkhaia.

²⁸ Reng khan Rengpa tempila a fe rikipa a enkoltuhaiin pho chu an chôia, kha zoiin chu a siana hmuna an isia nôk ngai a ni.

²⁹ Rehoboama thurchi danghai le a sin thôna thu chu Juda rênghai thurchi irziakna bua a chuang.

³⁰ An lal sêngin Rehoboama le Jeroboama chu an irdoi maia.

³¹ Rehoboama chu a thia, Davida khopuia an phûma, a nu chu Naami, Amon mi a ni. A nâipa Abija'n a ithûl nôk a ni.

1 Rênghai 15

Judai ram rêng Abija

(2 Tsn 13.1–14.1)

¹ Nebata nâipa Jeroboama, Israelhai rêng chu kum sômhleiriat an lal kumin, Judai rama Abija khom an lala.

² Jerusalema kum thum an lala, a nu chu Maaki, Absaloma nâinu a ni.

³ A pa angin thil sual a thoa, a pu Davida inhlan angin a lungrîl chu Rengpa kuang irpe maka.

⁴ Khannisianlân, Davida zârin Rengpa a Pathianin Abija chu a thi zoia Jerusalema inlal hrangin nâipasal a pêka, Jerusalem kua khom a ihrungpui a ni.

⁵ Hit mi, Uria chung a thil saloi a tho ti no chu Davida'n a dam sêngin Rengpa mithmua thil sa a thoa, a thupêkhai khom a zôm ngaia.



⁶ Abija roirêl sêng chu Jeroboama leh an irdoi maia.

⁷ Abija thurchi dang, a sinthohai chu Juda rêng thurchi irziakna bua a chuang.

⁸ Abija chu a thia, Davida khopuia an phûma, a nâipa Asa chu a pa irthûlin an lal nôk ta.

Judahai rêng Asa

(2 Tsn 15.16–16.6)

⁹ Israel rêng Jeroboama inlal kum sômhni a niin, Asa chu Judai rama an lala.

¹⁰ Kum sômminli inkhat Jerusalema an lala, a pi chu Absaloma nâinu Maaki a ni.

¹¹ Ama khom a pu Davida angin Rengpa nuam lam a zong ngaia.

¹² Millim pathian biakna hmuna nupang le pasal irzuar mihai chu an hnotsuakhaia, a puhaiin millim pathian an isiam murdi an siatpai pehaia.

¹³ A pi Maaki'n Aseri irlim intirom tak a phun sikin rêngnu a initna ata a paia. Asa'n millim pathianhai chu a tukirkithaia, Kidron phâiruama a hâla.

¹⁴ A ram sênga pathian dang an ibiakna ngai hmun murdi khom rêng Asa hin an siat pehai zoi no khomin, khannisianlân, a dam sêng chu Rengpa vai hin a'rngkata.

¹⁵ A pa'n Pathian kuanga a thilpêk murdi chu Asa hin tempila a siaa, ama kut ngêtin rângachak le sumru a inhlan chu a siaa.

¹⁶ Juda rêng Asa le Israel rêng Baasa chu an inlal sêng an irdoi maia.

¹⁷ Israel rêng Baasa'n Judai ram a hong doia, Judai ram ata mi an zuang suaka, mi dang Judai rama an lût thei lona hrangin Ramah khuaa kul a siama.

¹⁸ Asa'n tempil sum thunna rengata le rêng ina rângachak le sumruhai chu a lâksuaka, Damaska khuaa om Suria rêng Benhadada kuang a thona. Benhadada chu Heziona tupa, Tabrimona nâipa a ni. A mi tîrhai khan hiang hin an hrila.



¹⁹“Ka pa le ni pa an irkop ang khan, en roh rângachak le sumru nang ki hong thon. Israel rêng Baasa le rual nin irchangna hi teipuiin lân, ei ram sînga sipaihai hruai paihai ri se,” a tia.

²⁰Benhadada’n Asa iti pe angin a lei pompuia, a sipai ulian a koia, a sipaihaiin Israel ram chu an rûnhaia. Ijon hai, Dan hai, Abela Beth Maaka hai an lâka, Galili dîl kôla ramhai khom Naftalia bial pumpui an lâkpai pehai tâka.

²¹Kha thu kha rêng Baasa’n an hriatin chu Ramah khuaa a kul siam chu a’rngama, Tirza khuaa a om ta a ni.

²²Reng Baasa’n Ramah khuaa a kul siama lung le thing a ihmanghai chu va la hrangin Asa’n Juda rama mihai chu an phûthaia. Benjamina biala Geba le Mizpa khua kul siamna hrangin a hmanga.

²³Reng Asa sin tho dang, a hâi lamhai, khua a irkul lamhai chu Juda thurchi irziakna lekhabua a chuanga. A tar tiang chu a kea natna saloi irveiin kalchôi thei loi bokvâkin a oma.

²⁴Asa chu a thia, Davida khopui rêng irphûmna hmuna an phûma, a nâipa Jehosafata chu ama irthûlin an lal nôk ta.

Israel rêng Nadaba

²⁵Judahai rêng Asa inlal kum hnina rengata chu rêng Jeroboama nâipa Nadaba chu Israel rama an lal nôka, kum hni roi a rêla.

²⁶A pa ang ngêtin Rengpa mithmua thil sual a thoa, Israelhai chu a hruai sualhai tâka.

²⁷Ahija nâipa Baasa Isakara nam a inei khan Nadaba chu a huanga a sipaihai leh Filistia rama Gebethon khuaa an om lai takin Baasa’n Nadaba chu a thata.

²⁸Juda rêng Asa inlal kum thumna chu Baasa’n Nadaba chu a thata, ama irthûlin Israel rama an lal tâka.

²⁹Reng a hong chang zoi le zel Jeroboama in mihai chu a thatai vinga. Rengpa khan a siahlo Ahija Silo khua mihai kuang a ihril tâk ang khan, Jeroboama in mihai chu tûte hoi loiin a thatai ving tâka.



³⁰Jeroboama thil saloi tho sikin, Israelhai chu a hruai insualhaia, kha thua khan Rengpa Israelhai Pathian ning an murtira.

³¹Nadaba thurchi dang, a sintho murdi chu, Israel rêng hai thurchi irziakna lekhabua a chuang.

³²Judahai rêng Asa le Israel rêng Baasa chu an inlal sêng an irdoi mai a ni.

Israel rêng Baasa

³³Juda rêng Asa inlal kum thumna Ahija nâipa Baasa chu Israel mihai chung a an lala, Tirza khuaa kum sôminhni kum minli roi a rêla.

³⁴Rengpa mithmua thil soal a thoa, Jeroboama angin Israelhai hruai insualtu a ni.

1 Rêng hai 16

¹Baasa chungchâng, deipu Jehua, Hanania nâipa kuang, hiang hin Rengpa thu a zuang tung.

²“Ite bêa ibe ngai loi chu, Israelhai roirêltu hrangin nang kin thang. Atûn hin Jeroboama angin thil saloi tho’n ki mi Israelhai hruai suala, an sualna’n ki ning an inmurtir ta a ni.

³Khasikin, Nahata nâipa Jeroboama in sêng mihai laia ki itho angin, ni in mi murdi nangni inboipai ving ki ti.

⁴Nin in mi khopui sênga thi chu uihaiin fahai an ta, ramkâra thi chu chunglêng vahaiin irsemdarh an ti,” a tia.

⁵Baasa thurchi dang, a sin thôna le a hâi lamhai chu Israelhai thurchi irziakna lekhabua a chuang.

⁶Baasa chu a thia, Tirza khuaa an phûma, a nâipa Ela chu ama irthûlin an lal ta.

⁷Baasa le a in mihaiin, Rengpa mithmua thil saloi an tho hrai sikin Hamania nâipa deipu Jehua kuang Rengpa thu a zuang tunga. Reng Jeroboama anga thilsual a tho sikin le Jeroboama in mihai a thathai sikin Rengpa’na chung a ning an mur pe ok a ni.



Israel rêng Ela

⁸Juda rêng Asa kum sômhni kiruk an lal tena chu Baasa nâipa Ela chu Israel rama an lal nôka. Tirza khuaa kum hni an lala.

⁹A rualhai laia mi inkhat Zimria, a tâli hmang laia hruaitu hranga a isia pa chu tehel a zong pea, kha laia khan Ela chu Tirza khuaa om a nia. Reng in enkoltu Arza ina zu a len rui pea.

¹⁰Zimria chu in sînga a va lûta Ela chu a thata, ama irthûlin an lala. Kha thu kha Juda rêng Asa inlal kum sômhni sarina kuma a ni.

¹¹Zimria khan rêngtoihmun a luaa, a pa Baasa in mihai a thathai nôk vinga, pasal a urêng sîngsuak tûte hôi nei viat loiin,

¹²Baasa chungchânga deipu Jehua kuang Rengpa thu zuang tung khan, Zimria khan Baasa in mihai a thathai zoia.

¹³Millim pathian an biaka, Israelhai an hruai insual sikin Baasa le a nâipa Ela khan Rengpa Israelhai Pathian ning an inmurtir sika a ni.

¹⁴Ela sintho murdi chu Israel rêng hai thurchi irziakna lekhabua a chuang.

Israel le Zimria

¹⁵Judahai rêng Asa kum sômhni kum sari an lal kumin, Zimria chu Tirza khuaa sîn sari Israelhai chung a an lala, Israel sipaihaiin Filistia khuaa Gibethon chu an irhuala.

¹⁶Zimria khan rêng chu a khit phiara, a thatpai ti an inhriatin chu, an khua irhualtuhai khan, an riakhmun zela khan an hruaitupa Omria chu Israel rêng an inchangtir zela.

¹⁷Omria le a kôla mi om murdihai khan Gibethon chu an rotsan tâka, Tirza khua an hong irhual nôk a ni.

¹⁸Khua kha an hong rûn ti Zimria'n an hriatin chu, rêng in sîng rîla an tân lûta, irkalkhum pumin a ikâng that a ni.

¹⁹Rengpa mithmuin thil a tho insual sikin, Jeroboama lampui a hroa, Israelhai hruai sualna sikin thil chu a chung a itung a ni ta.



²⁰Zimria thurchi dang, ikhit phiar a tuangnahai thurchi chu Israel rêng hai thurchi irziakna lekhabua a chuang.

Israel rêng Omria

²¹Israel mipuihai chu pôl hniin an irsema, a chimriphaiin Ginata nâipa Tibnia chu rêng inchang nuam pôl an oma, a chimripin Omria zui pôl an om nôka.

²²Omria zuituhaiin Ginata nâipa Tibnia zuituhai chu an inhnêhaia. Tibnia chu a thia, Omria a hong inlal tâka.

²³Judahai rêng Asa inlal kum sôm thum inkhatna kumin Omria chu a hong inlal phuta, kum sômhleihni an lala, a maton tianga kum ruk sâng chu Tirza khua a opa.

²⁴Semera kuang ata Samari tânga sumru sângruk leh a'rchôka, kha hmuna khan khopui an dinga, kul a siama, kha tâng neitu irhming Semera chôiin a khua irhming khom Samari a tia.

²⁵Omria'n Rengpa mithmua thil sual a tho ngaia, a matonahai nêkin a sual uala.

²⁶Nebata nâipa Jeroboama omdân saloi murdi a lâka, Israelhai chu a hruai sualhai a nia, an millim biakhai sik ualin Rengpa Israelhai Pathian chu a ning an mur pe a ni.

²⁷Omria thurchi dang, a sinthotheiziahai chu Israel rêng hai thurchi irziakna lekhabua a chuang.

²⁸Omria chu a hong thi tâka, Samari khuaa an phûma, a nâipa Ahaba chu a pa irthûlin an lal nôk ta.

Israel rêng Ahaba

²⁹Judahai rêng Asa chu kum sômthum kariat a hong inlal kumin Omria nâipa Ahaba chu Israelhai chung a an lala, Omria nâipa Ahaba chu Samari khuaa kum sômhleihni a ophaia;

³⁰Omria nâipa Ahaba'n a matona rêng hai nêkin thilsual a tho nôk uala,



³¹Nebata nâipa Jeroboama angin sual mai a nuam sikin, Sidon rêng Ethbaala nâinu Jezebeli chu dôngma'n a neia, Baal pathianhai a biakpui tâka.

³²Samari khuaa Baal pathian maichâm an dinga, Baal biakna hrang in a sina,

³³Ahaba'n Asera millim a phuna, a matona Israel rêng murdihai nêkin RengpaIsraelhai Pathian ningmak a tho ual sikin,

³⁴ Ahaba inlal laiin Bethel mi Hidaia'n Jeriko khua an ding thar nôka; Nuna nâipa Josua kuang Rengpa iti tâk angin Hidaia'n lungphun a phûm tâk sikin, a nâi uliantak Abirama an châna, kul mikot a siam insa nôk sikin a nâi mitumtak Seguba khom a inchân nôk a ni.

1 Rênghai 17

Elija'n khosâl hrang a lei hril

¹ Gilead rama Tisbe mi Elija'n Ahaba kuang khan, "Rengpa Israelhai Pathian a sin ki itho pe ngai irhmingin nangni kin hril, kum hni kum thum sêng chu keima ircham ni loiin irnêng chung a hin irdo le rua ite tho viat no ni," a tia.

²Rengpa thu chu Elija kuang a zuang tunga.

³"Hi hmun ata hi suakin lân, nisua tiang fe'n lân, Jordan nisua tiang Kerit tui kôla irbi roh.

⁴Vadunga tui chu tûng thei ni ti, nang an fâ hrangin vaâkhai thu ki pêkhai ta," a tia.

⁵Rengpa iti angin a thoa, Jordan nisua tiang Kerit tui chu a pana a om tâka.

⁶Zîng le khohloia vaâkhaiin bai le hme an hong pêk ngaia, vadunga tuihai inin a oma.

⁷Kha rama khan rua a tho ta no sikin vadung tui khom a kang zoi tâka.

Elija le Zarefat meithâi

⁸Khan, Rengpa'n Elija kuang,

⁹ "Thoiin lân Sidon biala Zarefat khuaa fe'n lân, kha khan om ro, nang an fa hrangin meithâi inkhat nang kin thang pe ta," a tia.



10Zarefat khuuaa khan a fe tâka; kha kul mikot a va tungin chu, meithâi inkhat hin thing a lei tana, kha meithâinu kha a hon sama, “Tui chînte nin sua pein lân lei in rong,” a tia.

11Pe hrangin a hei fein chu, “Lungkham takin bai chînte ni hong chôi pe sa ro,” a ti nôka.

12Meithâinu khan, “Rengpa ni Pathian hring irhmingin nang kin hril, bai chu nei ma ung, bêla baidi kut kângkhat le sahriak a chînte vai ki nei. ki nâipa leh kin fâk hrang sin siamna hrangin thingchâr ki’rfuanga, kha kin ineite kha kin fâk zoiin chu phîngchâmin la thi ta ro ung,” a tia.

13Elija’n, “Ni charindong no ro, inhongin lân, nin fâk hrang chu va siam roh. Khannisianlân, bai a chînte a ni khomin ni siam pe bakin lân, ni hong pe ro, a dang chu ni nâipa leh la fa ta roi,” a tia.

14Rengpa Israelhai Pathianin hiang hin a ti; “Rua kin thotir mâka chu baidi omna hmun chu rong no nia, sahriak bûr khom châr no nih a iti kêng,” a tia.

15Meithâinu chu a fea, Elija ihril angin a va tho pea, khanchu an rênga fâk hrang sùn tamtaka hrangin a lei om pea,

16Rengpa’n Elija kuanga a iti angin baidi siana bêl chu rong maka, sahriak bûr khom châr maka.

17Kha hnung chu meithâinu nâipa dam maka, a na an rik pe sisita, a thipui tâka.

18Meithâinu khan Elija kuang khan, “Pathian mi, itho mo hianga ni ni ilo? Pathian kuang ki sualna târinlang hrang le ki nâipa that hranga ni ihong kêng a ni hi te,” a tia.

19Elija’n, “Ni nâipa chu ni hong pe hi ro,” a tia, a nu ipominkua chu a hruaia, a omna hmuna pomin a lûtpuia, a zâlmuna an zâltira.

20Khanchu inring takin a chongchaia, “O Rengpa, ki Pathian, itho mo hi thil saloitak hi, hi meithâi chung a ni intungtir pe? hi nu hi phûkdâi taka ni donsuitu a nia, itho mo hianga a nâipa ni ithat pe?” a tia.



²¹Khanchu nâipang chung a khan voithum an boka, a chongchaia, “O Rengpa ki Pathian, hi nâipang hi indam nôk ro,” a tia.

²²Rengpa khan Elija chongchaina chu a sâma nâipang chu a hong har suaka, a dam nôk ta.

²³Elija khan nâipang kha a nu kuang a fepui nôka, a kuang khan, “Hi ni nâipa chu a dam nôk ta,” a tia.

²⁴Meithâinu khan, “Pathian mi ni nia, Rengpa hin ni kuanga thu an sîrin, nang a sâm ngai a nih ti atûn hin kin hriat infel suak ta,” a tia.

1 Rênghai 18

Elija le Baal deipuhai

¹Kum thum ten khua a châr zoiin chu, “Ahaba kuang fe ro, rua inthotir hrang ki ni a ti, va ti ro,” a tia.

²Elija chu Ahaba kuang a va fea, Samari rama a sate'n châm a tâka,

³Khan, Ahaba'n rêng in enkoltu Obadia a koia, ama hi Rengpa chi mi a nia.

⁴Jezebeli'n Rengpa deipu a that lai khan, Obadia hin deipu irzakhat a hruaia, pâl hnia zêkin sômringa ngain rôla a thuphaia, bu le tui a pêkhaia.

⁵Ahaba'n Obadia kuang khan, “Tho vadung murdi chaiin tui la va zong rei ba, sakor le saringseihai hi ei saninhringhai theina hrangin hloisûl sana va zong ei ti; khano'nchu, ei sialhai hi ei inchânhai zoi hrang kêng,” a tia.

⁶Khanchu an fena hrang ram chu an irzêka, Ahaba le Obadia chu mual da danga an fe tâka.

⁷Obadia chu a fe maia, lampuia khan Elija a'rtongpui thuta, Obadia hin ama hi a len hriat ngaia, kûnin chubai a mûka, a kuang khan, “Ka pu Elija, nang mo ni ini?” a tia.

⁸Ama khan “O keima ki ni, fe'n lân ni pu kuang Elija hin a om va ti ro,” a tia.

⁹Khan Obadia'n, “Imo ki itho insual tâk, ni siahlo hin thi hranga Ahaba kuanga pêk ni itum?”



10Rengpa ni Pathian hring sâmin nang ki hril, ka pu'n ramhai hi mi murdi'n an zong lai tak a ni. Hi hin om mah titu chu rêng in hmu ngai mahai a nih ti felna hrangin khomâk a irsâmtirhai ngai a ni.

11Nangma rêkin chu, ka pu kuang fe'n lân, Elija kha hin kêng a om ti thu va hril hranga ni ni iti," a tia.

12Nang ki rotsan zoi le hin, Rengpa irtha hin ki inhriat lolina tiang nang hruai a ta, Ahaba ki va hrila, nang a hmu nôk no'n chu a ni ithatpai hrang kêng. Khannisian kei ni siahlo hi ki thoibop ata Rengpa biaktu kêng ki ni.

13Ka pu hin Jezebeli'n, "Rengpadeipu a thathai laia ki sintho kha ni inhriat loi ma ni? Rengpa deipu irzakhat pâl hnia zêkin rôla ki thuphaia, bu le tui ki pêk ngai a ni.

14Atûn ka pu kuanga fea, Elija hin a om, ti thu va hril hranga ni ni iti hi chu a ni lei ithat nuam hrang a ni," a tia.

15Elija khan, "A sin ki itho ngai Rengpa itinrêng chung a rêng mihringhai zârin a vuan hin Ahaba kuang kin inlang ngêt hrang a ni," a tia.

16Obadia chu Ahaba irhmupui hrangin a fea, a va hrila, Ahaba chu deipu Elija irhmupui hrangin a fe nôka.

17Ahaba'n Elija a hmu'n chu a kuang, "Israel ram inbuituhai mo ni lei iom?" a tia.

18Elija'n, "Israelhai inbuai ngai ma ung, nangma le ni pa kêng an buaihai ngai nin ni. Rengpa thupêk zôm loiin, Baal kêng nin ibiak.

19Khasikin, Israel mi murdi ni hmupui hrangin Karmel tânga koihai ro; Baal deipu irzaminli sômringa le Asera deipu irzaminli Jezebeli infâhai kha hong hruaihai ro," a tia.

20Ahaba khan Israel ram murdia thang an theia, Baal deipuhai chu Karmel tânga a koihaia.



²¹Elija chu mipui lai ata a ngîra, an kuang, “Sirirkain i dôr ten mo nin iom hrang? Rengpa hi Pathian nin iti a ni’n chu biak unglân, Baal nin biakin chu biak sabak roi,” a tia. Mipuihai chu an ngûi chit tâka.

²²Elija’n mipuihai kuang, “Rengpa deipu la dam sun ki nia, Baal deipuhai chu irzaminli sômringa an la ni.

²³Sechal inhni hong kai unglân, inkhat chu Baal deipuhai hrangin thathai sianlân; inchârin thing chung a sehai sian, hâl no ri sehai. Sechal dang chu keima’n sinsiam ki ta, thing chung a sia ki ta hâl ual no ning.

²⁴Nangni Baal deipuhaiin nin pathian koi nin ta, kei khom Rengpa koi ki ta, mei ikâng masa tak chu Pathian dik ni a ti,” a tia. Mipuihai khan, “O, khang khan ni ri se,” an tia.

²⁵Elija’n Baal deipuhai kuang khan, “Nangni nin tam ual sikin sechal hi sinsiam bak unglân nin pathian koi roi, a hâl chu hâl no roi,” a tia.

²⁶Khan, anni hranga sechal chu an lâka, an sinsiama, “O Baal ni zuang sâm ta ro,” tiin zîng ata sîn sôtin an khêka, an maichâm siam chu namhrualin an khêka. Khannisianlân, ite sâmhai maka.

²⁷Sûna chu Elija’n innuipumin, “khêk ual roi ba, Pathian a ini loi ma ni? a la insâp mani ramfe itin ma ni, aninole khual a inzin ma ni! a in irnghil mani, kaithoi roi ba,” a tia.

²⁸An khêk inring ual uala, an lei itho lam angin, chemte le ufeiin thisen suak rarakin an irvit phopa.

²⁹Misa kôlkai dênin irbôlna hmuna khêkin, tûte a sâmtu om loiin, ite irhâi inhriat hrang om loiin an oma.

³⁰Elija’n mipuihai kuang khan, “Hong nâi ual hi roi,” a tia. Mipuihaiin an va nâia, Rengpa maichâm chiam remrum chu a siam insa nôka.

³¹ Rengpa nir hming chu Israel ti an tih tia Jakoba nâi sômhleihnihai hrang bîka lung sômhleihni chu Elija’n a lâka.



³²Kha lung leh khan Rengpa hrangin maichâm a siama. Maichâm kôla khan khur a choia, tui litar sômkhât minli keng thei a nia.

³³Maichâm chungâ khan thingher a siaa. Mipuihai kuang khan, “Sehrâtchal kha thatin thing chungâ khan se unglân, Bêl minli vêl tui thun inbit unglân, hâlvôm thilinhlan le thinghai hi buakkhum roi,” a tia.

³⁴An buakkhum vinga, voithum rak an buak irzo zoiin chu,

³⁵maichâm kôla tui siana a ichoi khom kha an buak irzo vinga.

³⁶Khohloi irbôlna zoroa chu deipu Elija’n maichâm chu a hong nâia, a chongchaia, “O Rengpa Abrahamâ, Isaka le Jakoba Pathian, Israelhai Pathian ni ni le ni thupêkin hi thil ki ini le ni loi atûn hin târinlang roh.

³⁷O Rengpa ki chongchaina irngaiin lân, ni sâm ro! khanchu hi mihai hin Rengpa Pathian chu ni nih ti an inhriat theina hrang le irletin nangma tiang an hong kîr theina hrangin,” a tia.

³⁸Rengpa’n mei a zuang tîra, hâlvôm thilinhlanhai le thing le lunghai chu a kâng irvôm vinga, irnêng khom sen vungin a kânga, khura tui khom an döp inhekpaia.

³⁹Mipuihaiin kha thil kha an hmu’n chu irnênga an khûksadela, “Rengpa hi Pathian chu a ni, Rengpa hi Pathian tak lele chu a ni hi te,” tiin an khêk suak tâka.

⁴⁰Elija’n mipuihai kuang khan, “Baal deipuhai tûte insuahai loiin chelpaihai ving roi,” a tia. An chelhaia, Elija’n Kison phâiruama a hruaihaia, khataka khan an thathai ving ta.

Châm hekna tiang

⁴¹Elija’n Ahaba kuang, “Tho atûn chu fâkin in ta ro, rua zuang tho hrang a ni ta,” a tia.

⁴²Ahaba chu fâk nêk zong hrangin a fea. Elija chu Karmel tâng sîp panin a fea, hnuai tiang kûnin, ar khûk le ar khûk kâra a lu a siaa.



⁴³Khan a siahlo kuanga khan, “Fe suakin lân, tuikhanglian tiang thîr ro,” a tia. Khanchu a thoia, a hei thîr vêla; ite hmu ma ung a tia. Elija’n khaanga tho hrangin voisari vêl a tîra.

⁴⁴Voisari changna tena chu a siahlo khan, “Tuikhanglian rengata kuttum tiata sôm a hong so,” a tia. Elija’n a siahlo kuang khan, “Fe’n lân, Ahaba chu a tâli sinsiam lat sian suak lat hrangin va hril ro, ropuiin danna a ti,” a tia.

⁴⁵Sôtloite hnunga chu sôm dum irvân dâpin an langa, phâivua a hong thoa, ropuivânsâng a zuang thoa, Ahaba chu a tâli lâkin a chuanga, Jereel tiang intânin a fe ta.

⁴⁶Rengpa sinthotheina khan Elija chung a tunga, a songkol irfual chu a kong tiang a khit indeta, Jereel panin Ahaba khêlpaiin a fe ta.

1 Rênghai 19

Elia Sinai tânga

¹Khan Ahaba’n Jezebeli kuang, Elija sintho murdi chu deipuhai khandaia a ithathai thu a hril.

²Jezebeli’n Elija kuang khan, “Deipuhai chung a ni itho angin nangtûk, hiang zoro hin nang ki that no’n chu pathianhaiin an inuam angin ni lo ri sehai, a sate’n deng nin theitir ri sehai,” a tih tia hril hrangin mi a tîrhaia.

³Khan Elija’n a chia, irbîkna a lei zonga, Judai rama Beerseba a hong tunga, a siahlohai a mâkhaia,

⁴ ama chu sôn sôtin ramchârna hmuna a oma, thing daihlîm hnuaia a toia, thi hrangin a’rzonga, “Inruk ta ma ung, o Rengpa, ki hringna hi ni lapai pe ro, ki hrangin thi a sa ual ta,” a tia.

⁵Thing hnuaia toiin a in irnghil tâka, vântîrtônin a kaithoia, a kuang khan, “Thoiin lân fa ro,” a tia.

⁶Khanchu a hei en vêla, a luthuna khan baitiam le tuiûm hi a lei oma. Khanchu a fâka, a ina, a zâl nôk tâka.



⁷Khan Rengpa vântirtôn a zuang nôka, a kaithoi nôka, “Thoiin lân fa ro, ni fena hrang lak a la hla zana,” a tia.

⁸Khanchu a thoia a fâkin a ina, fâk a zong sikin a hong hrât uala, Pathian tâng Horeb a tung dênin sîn sômminli le zân sômminli lam a ni.

⁹Kha hmuna rôl inkhata hin riak hrangin a lûta, Rengpa’n a kuang khan, “Elija hi hmuna hin imo ni itho?” a tia.

¹⁰ “Itinrênga hin Rengpa tah hrangin sathnem ki’rngaia, khannisianlân, Israelhaiin ni thuthung an zôm no sikin, ni maichâm an insiata, ni deipuhai khom khandaiin an thathaia, keima vai hi a dam sun ki ni tâka, kei khom hi ni that hrangin an ni izong mai a ni,” a tia.

¹¹Rengpa’n a kuang khan, “Hong suakin lân, tâng sîpa hin hongin lân, Rengpa makunga hin hong ngîr ro,” a tia. Rengpa chu a hong nâia, phâivupui hrât tak a hong thoa, tânghai a chima, lungpuihai a chim remruma; khannisianlân, phâivua kêra khan Rengpa chu om ual mah. Phâivua a chumin chu hnîngnu a hong inhnîng nôka, hnîngnu kêra khom khan Rengpa om ual maka.

¹²Khan hnîngnu a tho zoiin chu mei a hong suaka, kha mei laia khom khan Rengpa chu om maka, mei a hong suak zoiin chu irhâi irrêma chong an hriata.

¹³Elija’n an hriatin chu a songkol irfual leh a hmâi a hîpa, rôl kotbâia hin imo ni itho? a tia.

¹⁴Elija’n, “Itinrêng chung a Rengpa hrang sathnem ki’rngaia, khannisianlân, Israelhaiin ni thuthung zôm loiin, ni maichâmhai an insiata, ni deipuhai an thathaia, kei vai hi a dam sun ki ni tâka, keima khom hi ni that an ni tum a ni,” a tia.

¹⁵ Rengpa’n a kuang khan, “Ramchârna tiang khan kêr nôkin lân, Damaska khuaa lût ro, Hazaela kha Suria rêng hrangin sahriak pol roh.



¹⁶ Nimsia nâipa Jehua khom kha Israel rêng hrangin sahriak pol roh. Khanchu Abel Mehola khuaa, Safata nâipa Elisa chu ni'rthûla deipu sintho hrangin sahriak pol sa roh.

¹⁷ Khan Hazaela khandai ata zôk murdi khom Jehua'n nangni that a ta, Jehua khandai zôk khom Elisa'n nangni that a ti.

¹⁸ Khannisian, Israel rama hin Baal chubai la mûk ngai loi le la tum ngai loi mi sângsari, keima hrang hôi ki ti," a tia.

Elisa koina

¹⁹ Elija chu a suaka, Safata nâipa Elisa-hai khan sehrâtchal bop sômkhath inhni ân an lei inkaitirhaia, Elisa'n bop sômkhath inhnihai kha a hôlhaia. Elija'n a va pana, a puansil chu an siltira.

²⁰ Khanchu Elisa'n a sialhai chu a mâksanhaia, Elija a zui ta. Elija kuang khan, "Ka nu le ka pa chubai va mûkhai bak ki ta, khanchu nang zui ki ti," a tia. Elija khan, "Va fe ro, ni chungga ki thil tho kha nin hriat kha te?" a tia.

²¹ Elisa chu a hong kêr nôka a sialhai chu a thathaia, a sin thôna rua thinghai chu bu anh suangna'n a hmanga, a hme chu mihai semhaiin an fâka, kha hnung chu Elija zui hrangin a suaka, a sin a itho pe a ni ta.

1 Rêng hai 20

Suria leh irdoina

¹ Suria rêng Benhadada'n a sipaihai a bukkhôma, rêng sômthum inhnihaiin an sakor le tâlihai inh mangtirin tâ an sâna. Samari khua panin an idoihai phut a ni.

² Ama'n khopui sûnga mi a tîra, Israel rêng Ahaba kuang khan,

³ "Ni irchongna murdi le nin dôngma le nin nâihai le irpe ta roi," tiin a ngoa.

⁴ Khan Israel rêngin "O rêng inthang ka pu, ni iti angin keima le ki inei murdi hi ni ta a ni," a tia.

⁵ Benhadada'n Ahaba kuang mi a tîr nôka, "Nin sumruhai le rângachak, nin dôngma le nin nâihai leh irpe roi ki ti nâkin,



⁶nangtûk hiang zoro hin ki mihai zuang tîrhai ki ti; ni in le ni mi lian ualhaiin zuang irfang an ta, nin irchonhai nangni la pe an ti,” a tia.

⁷Khanchu Israel rêngin a rama hruaitu murdi a bukkhômhaia, an kuang khan, “Hi mi hin ni that inhek ving a itum a nih ti nin inhriat, ki dôngma, ki nâihai, ki sumru le rângachak a ni nghia, pêk ki lei inkung a ni,” a tia.

⁸Khan hruaituhai le mipuihaiin, “A hê la no’n lân, a izong ite pe no ro,” an tia.

⁹Khanchu Ahaba’n Benhadada kuang mi a tîra, “Reng inthangtak ka pu kha hiang hin va hril ro, ni siahlo hin ni izong masa chu a sa ki tia, khannisian, inhnunga ni izong nôk hi chu nuam ma ung a tia” tiin mi a itîrhai khan an va hrila.

¹⁰Khan Benhadada’n hiang hin a hong hril nôka, “Samari khua irhmangtir chit hrangin ki mi tamtak zuang tîr ki ta, ite inzôk no ni ung. Khaang khan ki tho no tâkin chu, Pathianhaiin an inuam angin ni soisak ri sehai” a tia.

¹¹Khan Israel rêngin, “Sipai hrâthai chu irdoi mân ni loiin, irdoi zoia kêng chong an la irpâk ngai ti va hril roi,” a tia.

¹²Khan Benhada le a rual rêng danghai le an puan ina zu an in laiin, kha thu kha an inhriata, a sipaihai chu khopui doi ta hrangin thu a pêkhaia, an irsiam ta.

¹³Kha laitaka khan, deipu inkhat hi rêng Ahaba kuang a hongga, “Rengpa’n hiang hin a ti; hi sipai tamtakhai hi chihai viat no ro, a vuan ni kuta nang pe ki ti; khanchu, Rengpa ki nih ti inhria ni ti,” a hong tia.

¹⁴Khan Ahaba’n “Tu’n mo a ir-ôi hrang?” a tia. Deipu khan, Rengpa’n hiang hin a ti, “Ram dang hruaituhai sipaihai inthangsuakhai khan ir-ôihai an ti,” a tia. Ahaba’n, “Tu’n mo hruai hrang?” a tia. Deipu khan, “Nangma’n,” a tia.

¹⁵Khanchu Ahaba’n ram dang hruaitu hnuai sipai hrât takhai a koi bukhaia, an rêngin irzahni sômthum an ni, Israel sipaihai khom a koi bukhaia, sângsari an ni.



¹⁶Khan sũa irdoi an phuta Benhadada le a rual danghai rêng sômthum inhnihai chu an puan ina a sũa an len ruia.

¹⁷Ram dang hnuai sipaihaiin an hong panhaia, Benhadada râl vêngtu khan, “Samari khua ata sipai an hong suak ta,” a tia.

¹⁸Khan ama khan, “Irngeina thu hril hranga mo, a ni doi hranga mo an ini, a hringin lei chelpaihai roi,” a tia

¹⁹Ram danga sipai irchunhai khan an doihaia, sipai a zuituhai leh khan,

²⁰mi tukhom an irdũa om chu an thathaia, Suriahai chu an intân tâka. Israelhai khan an irzũaia, Suria rêng Benhadada chu a sakor chung chuang zât senkhathai leh an intân suak hrũa.

²¹Israel rêngin a va pana, sakor le tâlihai chu a doia, Suria mihai chu a thathai oka.

²²Khan, rêng Ahaba kuang deipu a hong a kuanga khan, “Fe’n lân sipai intam sa ro, irdũa takin thil irfũkpuihaiin lân, nakum sũa chu Suria rêngin nang doi nôk hrang a ni,” a tia.

Suriahai leh irdoi voihnina

²³Khan Suria rêng kuanga a hnung zuihaiin, “Israel Pathian chu tâng ram Pathian a nia, khasika ei inhnê loi a ni, phâyôla doi inlân chu inhnêhai ei ti,” an tia.

²⁴“Reng sômthum inhnihai kha an thuneina sutpaihaiin lân, an irthũl hrang mi dang pehai roh.

²⁵Khanchu sipai ni lei inchân ang dôr chie kha la thar nôkin lân; sakor le tâli ni inei dôr ngêt ang kha irsiamin lân, khanchu, Israelhai chu phâyôla doihai ei ta inhnêhai ngêt ta ei ti,” an tia. Khanchu Benhadada’n an iti angin a pompuihai tâka.

²⁶Khan kum nôk, sũa chu Benhadada’n a sipaihai a koi bukhaia, Israelhai doi hrangin Afek khuaa a fepuihaia.



²⁷Israelhai khom an irkoibuka, fâk hrang an sin siama. An hong suak tâka, Surihai vaiin hmun hnia omhmun an khuara. Surihai enin chu Israelhai chu kêltehai tømtea irbukkhôm ang an ni. Surihai chu ram pumpuia an sip vinga.

²⁸Khan deipu inkhat hi Israel rêng Ahaba kuang a hong, “Rengpa’n hiang hin a ti; Surihaiin Rengpa chu tâng ram Pathian a nia, phâizôl Pathian chu ni mah an ti sikin hi sipai tamtak hi ni kuta nang ki pêk, nang le ni mihai hin Rengpa ki nih ti nin inhriatna hrangin,” a tia.

²⁹Khan sùn sari sùng chu Surihai le Israelhai chu an omhmun ata an irsiama, sùn sari nî tena chu an irdoi tâka. Israel sipaihai khan Suria sipai nuaikhat vêl sùn khatin an thathaia.

³⁰A la damhai chu Afek khua sunga an intân lûta, a khua kulbang chimin sîngni sângsari a del thathai nôka; Benhadada chu khopui sunga an tân lûta, a in ikil irthupnaa ar bîka.

³¹Khan a mi la damhaiin a kuang khan, “Irngai roh Israelhai chu an nun a hoi ti thu kin inhriat, bora puan silin kin ringa hruizêlin, Israel rêng kuanga fe hrangin ni phal ro, khanchu nang an zôk khom a ni thei,” an tia.

³²Khanchu, bora puan sila hrui inhliin Israel rêng kuang an fea, “Ni siahlo Benhadada’n, lungkham takin nin zôk ri se a ti,” an tia. Ahaba’n, “A la idam chu ma ni? ki urêngpa kêng a ini,” a tia.

³³Khanchu mihaiin chonghoiin, “O ni urêngpa a ni,” an tia. Reng khan, “Va fe unglân hong hruai roi,” a tia. Benhadada chu a hong suaka, Ahaba’n a kuang, tâlia chuang hrangin a ti pea.

³⁴Khan Benhadada’n, “Ka pa’n ni pa khua a lei ilâk pehai chu nang pe nôk ki ta, ka pa’n sum irvaina hmun Samari khua a isiam ang khan Damaska khua siam ni ti,” a tia. Khan Ahaba’n, “Khaanga chonginkung tâk sikin nan sua ta ki ti,” a tia.

Deipu’n Ahaba a dem



³⁵Khanchu deipu laia mi inkhatin Rengpa thupêkin a deipu chanpui inkhat kuang, “Ni hei vîk ta,” a tia. Ama khan vîk nuam maka.

³⁶Deipu khan, “Rengpathu ni zôm no sikin ni ni rotsan tika, kâmkeibakneiin nang sê that ri se,” a tia. A hei suaksana, kâmkeibakneiin a sê that ta.

³⁷Deipu khan, mi dang a va hmu nôka, “Ni hong vîk ro,” a ti nôka. Ama’n chu a satea nain a vîka, a pop ta.

³⁸Deipu khan, hmêl thupna’n a hmâi puan leh a tuama, Israel rêng hong hrang nghâkin lampuia a lei oma.

³⁹Khan rêng a hongin chu, deipu khan a len sama, “Ni siahlo hi irdoina hmuna ki fea, mi inkhatin râl a hong tuanga, ama hi ensui ro, a rotin chu ar thûl nangma nang that hrang, khano’nchu, tangka irzathum ni ichôi hrang, a ni tia.

⁴⁰Ni siahlo hin thil dang ki tho lai takin a ni lei rot pe tâka,” a tia. Israel rêngin, “Ni idik loi a ni, a mô chu nangin pêl ni ti,” a tia.

⁴¹Kha renga khan deipu’n a mit tuamna a sûta, Israel rêng khan deipuhai laia inkhat kha a nih ti an hriat suak tâka.

⁴²Khanchu deipu’n rêng kuang khan, “Rengpa’n hiang hin a ti, mithi hranga ki iti nin sua sikin, a thi irthûlin thi ni ti, a mihai tuangtum khom ni mihaiin tuang an ti,” a tia.

⁴³Khanchu Israel rêng chu a ning an mur pea, nuar pumin Samari khuaa a fe tâka.

1 Rênghai 21

Nabota grep irhuan

¹Jereel khuaa Samari rêng Ahaba in kôla khan Jezreel mi Nabota an iti khan grep irhuan a neia.

²Ahaba khan Nabota kuang, “Ni grep irhuan hi ansuangrua songna hrangin ni pe roh. Hi nêka sa grep irhuan nang pe ki ti, ni nuam paiin chu sum khom a’rphu lam tôkin nang pe sa ki ti,” a tia.



³Nabota'n Ahaba kuang, "Kin puhai hun lai ata kin irchon a ni sikin, hianga nangma nang pêk hi chu Rengpa irngai khom hoi no ni," a tia.

⁴Jezreel mi Nabota'n, kin puhai irhuan irchon nang pe thei no ning a ti sikin ningmur puma nuarin a in tiang Ahaba chu a rota. Bang tianga irheiin a zâlmuna a zâla bu khom ne nuam ta maka.

⁵A dôngma Jezebeli a va fea a kuang khan, "Ithoa mo ni ngûirula bu ni inêk nuam loi?" a tia.

⁶Ama khan, "Jezreel mi Nabota'n a grep irhuan nir chotir ro ki tia, ni nuam paiin chu hi nêka sa grep irhuan dang nang pe ki ti," ki tia. Ama'n, "Ki grep irhuan dang nang pe thei no ning tiin a ni sâm sika a ni hi te," a tia.

⁷Khan a dôngma Jezebeli'n, "Thoiin lân, raifân takin bu ne ro, Jezreel mi Nabota grep irhuan ni lâk thei hrang dân nang ngaitua pe ki ti," a tia.

⁸Khanchu, Ahaba irhmingin lekha a'rziaka, irsinsiana an danga, Nabota omna khuaa ulian roirêltuhai a thona.

⁹Hiang hin a'rziaka, "Bu nghei hrangin inpuang unglân, mipui koibûmin Nabota kha mipuihai makunga intoitir unglân,

¹⁰mi soal inhni ama sêl hrangin a maton tiang inlôitirhai unglân, 'Pathian le rêng nin sîrinsiat a ni,' tiin sêlhai sian kho sêng ata hruaisuak unglân, dêng that roi," tiin.

¹¹Khanchu, Nabota omna khuaa ulianhai le roirêltuhaiin Jezebeli'n a iti lam angin an thoa.

¹²Bu nghei ni sîn an inpuanga, mipui an bukhaia, Nabota chu a laia an intoitira.

¹³Mi soal inhni hin "Pathian le rêng an sîrinsiat a ni," tiin an sêla. Nabota chu kho sêng ata an hruaisuaka, an dêng that ta.

¹⁴Khanchu Jezebeli kuang khan, "Nabota chu a thi ta," tiin an hrila.



¹⁵Jezebeli'n Nabota an dêng that tah ti an hriatin chu, Ahaba kuang khan, "Thoiin lân Jezreel mi Nabota grep irhuan nang irchotir nuam loi kha, va nei ta ro, ama chu a thi ta," a tia.

¹⁶Khan Ahaba'n Nabota a thi tah ti an hriata a grep irhuan lua hrangin a suak tâka.

¹⁷Rengpa thu chu Tisbe mi Elija kuang a zuang tunga.

¹⁸"Thoiin lân, Samari khuaa om Israel rêng Ahaba irhmupui hrangin fe roh. Atûna Nabota grep irhuan lua tumin kha khan a om.

¹⁹ A kuang Rengpa'n hiang hin a ti, Nabota thatpai a ruk ti loa, a grep irhuan khom lua ni itum ma ni? va ti ro, Rengpa'n hiang hin a ti. Uihain Nabota thisen an inliakna hmun ngêta hin ni thisen inliak an ti," a tia.

²⁰Khan Ahaba'n Elija kuang khan, "A ni inhriatsuak a ni ta hi te ki râlp'a'n?" a tia. Elija'n, "O nang kin hriat ta, Rengpa mithmua thil dikloi tho hranga irzuartu.

²¹Ni chungã siatna zuan tungtir ki ti. Nin in sêngkuãa patung nâi murdi chu nâipang le tar khom, nangma le nin rêngin nangni inhekpai ving ki ti.

²²Ni in mihai chu Nabota nâipa Jeroboama in mihai ang le Ahija nâipa rêng Baasa in mihai angin nangni soisak ki ti; ki ning nin murtira Israelhai ni hruai insualhai tâk sikin.

²³Rengpa'n Jezebeli chungchâng khom hiang hin a ti. Jezreel khopuia uihaiin a hme la fa an ti. Ahaba in mihai laia khopui sênga thi murdi uiin fahai an ti.

²⁴Ram hnuãia thi murdi chunglêng vahaiin fahai an ti," a tia.

²⁵A dôngma Jezebeli'n thil saloi hrila Rengpa mithmua thil saloi tho hranga irpêk, Ahaba ang hi tûte om mahai.

²⁶Israelhai kuanga, Rengpa inhnotsuak Amor-hai angin Ahaba hin millim a biaka, thil intirom takhai a tho ngai.

²⁷Elija'n kha thu a hril zoiin chu Ahaba khan a puansil an potthêra, bora puan a sila, bu a ngheia, bora puan leh a zâla, ngûi takin a om tâka.



²⁸Rengpa thu chu Tisbe mi Elija kuang a zuang tunga,

²⁹“Ahaba ki makunga a’rngaiintômzia hi nin hriat mo? hianga irngaiintôm sikin a dam sâng chu a chung a siatna intungtir pe no ning, a nâipa zoro sâng a in mihai siatna intungtir ki ti,” a tia.

1 Rêng hai 22

Deipu Mika’n Ahaba a irchu

(2 Tsn 18.2-27)

¹Kum thum sâng chu Suriahai le Israelhai irdoi loiin an oma.

²Kum thum changna tena chu Judahai rêng Jehosafata’n Israel rêng Ahaba kuang a zu fea.

³Israelhai rêng khan a ulianhai makunga, “Gilead rama Ramot kua hi kin ta a nia, itina mo Suria rêng kuang ata kin ilâk kîr loi?” a tia.

⁴Jhosafata kuang khan, “Ramot kua hi ni doipui theiin mo?” a tia. Jehosafata’n Israel rêng kuang khan, “Nangma ni nuam ni tak ti ro, ki sipaihai leh nang doipui hrangin kin irsiam.

⁵Khannisianlân, Rengpa thu la hei irngai phot bak ei ti,” a tia.

⁶Ahaba’n deipu irzaminli vêl a koibukhaia, “Ramot kua mo hong doi ning?” tiin ar donhaia. Anni khomin, “Doi roh Rengpa’n nan hnêtir a ti,” an tia.

⁷Jhosafata’n, “Deipu dang, Rengpa ni zong pe hrang an iom mo ni ma?” a tia.

⁸Israel rêngin Jehosafata kuang khan, “Imla nâipa Mika a om. Ama hin ite thil sa ni zong pe thei ngai ma, en nuam ma ung. Thil saloi kêng i zât ma ni a ihrilsuak rêk hrang,” a tia.

⁹Khanchu rêngin hruaitu inkhat a koia, Mika hruai hrangin a tîra.

¹⁰Rêng inhni chu Samari khopui lamsua pênâ hruia rêngtoihmun an isiamâ khan an toia, deipuhaiin an vêlhaia, thu an hrilpuihaia.

¹¹Anni laia inkhat Kenaana nâipa Zedekia’n, thîrsum seki illim a siamâ, Ahaba kuang, “Rengpa’n hiang hin a ti, Suriahai chu hi leh hin doihai ei ta, inhnê paihai ei ti,” a tia.



- ¹²Deipu danghai khomin khang khan an tia, “Fe’n lân Ramot kua chu hong doi ro, inhnê ngêt ni ti, Rengpa’n nan hnêtir ngêt a ti,” an tia.
- ¹³Mikaia hruaitu hranga an iti kuang khan, “Deipu dang murdi’n a sa lam takin rêng kuang an puanga, nang khomin khang khan ti pe ro,” a tia.
- ¹⁴Khan Mikaia khan, “Rengpa mihriam hring irhming a hong kîr khan, Rengpa’n hril hrang a nih iti vai kêng ki ihril hrang,” a tia.
- ¹⁵Rêng Ahaba kuang a va tungin chu rêngin, “Mikaia, Gilead rama Ramot kua hi ki idoi hrang mo doi loi hrang?” a tia. Mikaia khan, “Hong doi ngân roi ba, inhnê ni ti, Rengpa’n nang ni inhnêtir ri se ba,” a tia.
- ¹⁶Khan Ahaba’n, “Rengpa irhmingin ki kuang thu ni hrilin thudik vai ni hril ro, voi iza mo nang ki iti hrang?” a tia.
- ¹⁷ Mikaia khan, “Hruaitu nei loi belra angin Israelhai chu tânga an irthekindarh rumin ki hmua, Rengpa’n hiang hin a ti, hi mihai hin hruaitu nei mahai, irtharngam takin an in lam tiang fe ta ri sehai a ti,” a tia.
- ¹⁸Ahaba’n Jehosafata kuang, “Irngai ta ro, ki kuang keima hrangin ite thil sa hril ngai ma, nang ki iti pe kha, thil saloi lam vai kêng a ihril ngai,” a tia.
- ¹⁹Mikaia’n a hril maia, “Rengpa thu hi irngai sabak ro, irvâna rêngtoihmuna Rengpatoi lai ki hmua; vântîrtônhaiin an irhuala.
- ²⁰“Tu mo Ahaba kuang zu fe hrang, Ramot doia thi hranga zu huang thei hrang?’ Rengpa’n a ti. Vântîrtôn senkhatin kha thu kha an hrila, a danghaiin thu dang an hrila.
- ²¹Irtha inkhat hi a zuanga, Rengpa makunga a va ngîra, ‘Zu huang ki ti,’ a tia.
- ²²Rengpa’n, “Itin mo ni ihuang hrang,?” a tia. Irtha khan, “Zu fe ki ta, Ahaba deipuhai laia minlak tho pehai ki ti,” a tia. Rengpa’n “Fe’n lân, zu huanghai ro, hlo hong chuk ni ti,” a tia.
- ²³Mikaia’n, “Khang khan a ni, Rengpa’n hi deipuhai hi ni makunga minlak a inthotir ngai a ni, Rengpa zelin ni siatna hrang thu a lei inkung a ni,” a tia.



²⁴Deipu Zedekia'n Mikaia chu a pana, a mikuar kôla, "Itiklai khan mo Rengpairtha'n a ni imâksana, nangma kuang thu a ihril tâk?" a tia.

²⁵Mikaia'n hiang hin a sâma, "Ni ikil sũaga nir bîk tena inhria ni ti," a tia.

²⁶Ahaba'n hruaitu inkhat kuang, "Mikaia kha chelin lân, kua optu Amon kuang hruaiin lân, rêng nâipa Joasa khom irhmutir sa roh.

²⁷Zâm zâma ki hong kîr nôk mâka chu lei khum unglân, bai le tui vai lei pe ri sehai," a tia.

²⁸Mikaia'n, "A hring a dama ni hongin chu Rengpa inhre ri sehai," a tia.

Ahaba thina thu

(2 Tsn 18.28-34)

²⁹Rêng Ahaba le rêng Jehosafata chu Gilead biala Ramot kua doi hrangin an suak tâka.

³⁰Ahaba'n Jehosafata kuang, "Ei irdoi tika chu ki'rvôna indanglamtir ki ta, nang chu ni rêng tukfam leh irvo mai ro" a tia. Rêng Ahaba chu irvo danglamin a'rvoa, irdoina buala a kop sa tâka.

³¹Suria rêngin tâli chalaitu hruaitu sômthum inhnhai chu, "Israel rêng ti no chu tûte a dang ir-otpuihai no roi," a tia.

³²Khahai khan Jehosafata an hmu'n chu Israel rêng sônin an doi tâka. Jehosafata chu a khêka,

³³Tâli chalaitu hruaitu khan Israel rêng ni mah ti an hriatin chu, irzûl nuam ta maka.

³⁴Suria sipai thal kâphai hin rêng Ahaba chu a râlthum irbel kâra khan a kâpa, a tâli chalaitu kuang khan, "Sâbe ki tuang ta hi te, kîrin lân, irdoina hmuna intân ta ro," a tia.

³⁵An irdoi lai takin Ahaba chu a tâli bang irhnêlin, Suria mihai thîrin ar tunga, thisen chu a tâli chung a irting hlukin a suaka, khohloi tiang chu a thi tâka.

³⁶Misa tâk tônia chu Israel sipaihai kuang thu a zuang tung nôka, "Mi murdi mâni kua chita kîr nôk hrang," an tia.



³⁷Reng Ahaba chu a thi tâka, a ruak chu Samari khuua an fepuia, an phûm ta.

³⁸A tâli chu notizuarhai tui irsilna ngai Samari dîla an irsûk infâia; uihaiin a thisen chu an inliaka, Rengpa ihril angin a ituang ta a ni.

³⁹Reng Ahaba sintho danghai, a rêng in irvotir dânhai, khopui a irvotir dânhai chu Israel rêng hai thurchi irziakna lekhabua a chuang.

⁴⁰A thi zoiin chu a nâipa Ahazia chu ama irthûlin an lal nôk tâka.

Juda rêng Jehosafata

(2 Tsn 20.31–21.1)

⁴¹Israel rêng Ahaba rêng kum minlina, Asa nâipa Jehosafata chu Judai rama an lala,

⁴²Jhosafata inlal ar phutin kum sômthum ringa mi a ni. Jerusalema kum sômhni ringa ten roi a rêla, a nu chu Azubi Silhia nâinu a ni.

⁴³A pa angin Pathian mithmua sin sa a thoa. Millim biakna hmun irsâng chu insiat ual maka; khasikin mipuihai chu kha hmun irsânga khan an la irbôl mai ngaia, mirimhoihai an la ihâl ngai a ni.

⁴⁴Jhosafata chu Israel rêng leh an irngeia.

⁴⁵Jhosafata sintho danghai, irdoina hmuna a ihâi dânhai, chu Juda rêng hai lekhabu irziakna bua a chuang.

⁴⁶A pa Asa dam laia pasal le nupang millim biakna hmuna irzuar ngai chu a khap vinga.

⁴⁷Edom ramin rêng nei mahaia. Juda rêng in a'rthûl a siaa.

⁴⁸Ofir rângachak pêl hrangin rêng Jehosafata'n irkuang a siamhaia; khannisian, Ezion-geber a siat tâk sikin inzin thei ta mahai.

⁴⁹Israel rêng Ahazia'n a mihai chu Jehosafata mihai leh inzin suam ri sehai a tia; khannisian Jehosafata'n nuam maka.

⁵⁰Jhosafata chu a thi tâka, Davida khopuia rêng hai thâna an phûma. A nâipa Jehorama chu ama irthûlin an lal nôk ta.

Israel rêng Ahazia



⁵¹Judahai rêng Jehosafata inlal kum sômhleisarinaa chu Ahaba nâipa Ahazia chu Israelhai chungã roirêl hrangin Samari khuaa an lala, kum hni sâng roi a rêla.

⁵²RENGPA nuam loi lam thil a tho insuala, a pa Ahaba, a nu Jezebeli rêng Jeroboama hai angin thilsual a thoa, Israelhai hruai sualtu a ni.

⁵³A pu ang ngêtin Baal pathian sin a tho sikin Israelhai Pathian RENGPA chu a ning an murtir pea.



2 Rêng hai

2 Rêng hai 1

Elia le Ahazia

¹Israel rêng Ahaba a thi zoiin chu Moabhai chu kha Israelhai leh ir-en nuam mahaia.

²Reng Ahazia chu Samari khuua a omna in chung sîpa a tâka, a na oka a dam le damloi hrang thua Filistia Ekron khuua pathian Baalzebuba irdon hrangin mi a tîra.

³Rengpa vântîrtônin Tisbe mi Elia kuang, “Thoiin lân, Samari rêngin mi a itîrhai irtongpui hrangin fe roh. Israel rama Pathian a iom loi ma ni, itho sika Ekron pathian Baalzebuba irdon ni ife?”

⁴Rengpa'n hiang hin a ti, ni omna zâlmun ata kha chum thei ta no chi nia, thi hrang ni ni ta, ti pe hrangin a tîra.” Elia chu a fe tâka.

⁵Rengin mi a itîrhai khom an hong nôk lata, an kuanga, “Itho mo nin hong ikîr nôk lat?” a lei tia.

⁶Anni'n, “Mi inkhat leh kin irtoka, a tîrtu rêng kuang khan kîr nôk unglân, Rengpa'n hiang hin a ti, Israel rama Pathian a iom loi ma ni Ekron pathian Baalzebuba irdon hranga mi ni itîr? ni zâlna hmun ata chum thei ta no chi ni, ni ithi hrang tâk a ti, tiin hril roi,” a ni ti, an tia.

⁷“Hi thu nangni hriltu hi i ang mihriam mo a ini?” a tia.

⁸Anni khan, “Pa mul tamtak nei mi a ni; savun kongkhit ar buna,” an tia. Ama khan, “Tisbe mi Elia ni a ti,” a tia.

⁹Rengin a sipai hruaitu, sômringa sipai leh a tîra. Anni khan tâng sîpa Elia lei toi an va hmua, a kuang, “Nang Pathian mi, rêngin zuang ro nang a ti,” an tia.

¹⁰Elia'n, “Pathian mi ki niin chu irvân ata mei zuang ta sianlân, nang le ni mi sômringahai kha nangni kâng that ri se,” a tia. Irvân ata mei a zuang tâka, sipaihai chu an hruaitupa leh a kâng thathaia.



11Rengin sipai dang sômringa le hruaitu a tîrhai nôka. Ama'n hiang hin a tia, "Nang Pathian mi, rêngin zuang lat ro nang a ti," a tia.

12Elija'n, "Pathian mi ki niin chu, irvân ata mei zuang ta sianlân, nang le ni rualhai kha nangni kâng that ri se," a tia. Pathian mei chu a zuang tâk zela, hruaitu leh a sipaihai chu a kâng thathai vinga.

13Rengin sipai le hruaitu dang sômringa sipai a tîrhai nôka. Tânga a hong luia, Elija hmâikunga a khûksadela, "O Pathian mi, kei le ki sipaihai hi lung nin khamin lân, kin hringna hi ni hôi pe roh.

14Sipai hruaitu inhni le an sipaihai irvân ata meiin a kâng thathai tâka, keini hi chu lungkham takin nin zôk ta ro," an tia.

15Rengpa vântîrtônin Elija kuang, "A rualin fe roi chi no ro," a zuang tia. Khanchu, a thoia, anni pâla khan an fea, rêng irhmupui hrangin.

16Reng kuanga khan, "Ekron pathian Baalzebuba irhmupui hrangin mi ni itîr ma ni? Israel rama Pathian irdon hrang ni iiam loi mo? ni zâlna hmun ata kha chum ta no chi ni, ni ithi ta hrang kêng," a tia.

17Elija ihril Rengpa iti angin Ahazia chu a thi tâka. Ahazia hin nâipasal nei maka, Judai rama rêng Jehosafata nâipa Jehorama inlal zoro kum hnina tena chu a sangpa Jorama chu ama irthûlin an lal nôk ta.

18Reng Ahazia sintho danghai chu Israel rêng hai thurchi irziakna bua a chuang.

2 Rêng hai 2

Elija irvâna hruaina

1Rengpa'n Elija chu irvân tiang kèllaiherin a hruaina hrang zoro a hong tunga. Elija le Elisa chu Gilgal ata an fea, lampuia an fe laiin,

2"Hi hin lei om ro, Rengpa'n Bethel nei hrangin a ni tîr," Elija'n a tia. Elisa'n, "Pathian hring le ni hringna sâlin nang ki ti, lei om no ning," a tia. Bethel hmuna an fe suam ta.



³Kha laia deipu pâl omhai khan, Elisa kuang an va fea, “A vuan hin ni pu hi Rengpa’n a ilâk hrang a nih ti mo nin hriat?” an tia. Ama’n “Kin hriat dâihrek hi roi,” a tia.

⁴Elija’n Elisa kuang, “Hi hin lei om ro, Rengpa’n Jeriko-a fe hrangin a ni ti,” a tia. Elisa rêkin chu, “Pathian hring le a hringna sâlin nang ki ti, nang om pe ual no ning,” a tia. Khanchu, Jeriko-a khan an fe suam nôk tâka.

⁵Khataka deipu rual omhai chu Elisa kuang an hongga, “A vuan hin Rengpa’n ni pu hi a ilâk hrang a nih ti mo nin hriat?” an tia. Ama’n, “Kin hriat, dâihrek hi roi,” a tia.

⁶Elija’n Elisa kuang, “Hi hin lei om ro, Rengpa’n Jordan dunga fe hrangin a ni ti,” a tia. Elisa’n hiang hin a sâma, “Pathian hring le ni hringna hin, nang om pe no ning,” a tia.

⁷An fe nôk suama, deipu sômringa’n an zuia, hla vit ata an thîrhaia, Jordan dung kôla khan an ngîra.

⁸Elija’n a puan ar kheka, a thepin, vadung tui a vîka, a’rsen phata, tui tôn viat loiin an irkâna,

⁹Tui an irkân zoiin chu, Elija’n Elisa kuang, “Nangma rengata ilâkin ki om mân, imo nang tho pe inlân ni nuam?” a tia. Elisa’n, “Ni’rtha man bâk hni ang hi dong ki nuam,” a tia.

¹⁰Elija’n, “Thil intak tak ni izong a ni; khannisianlân, an ni lâk lai tak ni ni hmu’n chu chang ni ta, ni ni hmu no’n chu chang no chi ni,” a tia.

¹¹Fe puma an chong lai takin, mei sakor le mei tâli ikai an hongga, an laia a senhai raka. Elija chu kèllaiherin irvân tiang an lâkin a vuangpui tâka.

¹²Elisa’n a hmua, “Ka pa, ka pa, Israelhai hruaitu inthang, ni ife tâk mo?” a tia. A hmu no tena chu, a puansilhai a kheka, bong hniin an potthêra.

¹³A chungga Elija puan zuang tâk chu a lâka, a kîr nôk ta. Jordan tui kôla khan a ngîra.



¹⁴A chung a Elija puan zuang tâk kha a lâka, tui kha a vîknaa, “Kho mo Elija Pathian Rengpa chu,” a tia. Tui a hei vîkin chu tui kha a’rsen phata, Elisa chu varâl a’rkân thei tâka.

¹⁵Jeriko-a om deipu sômringahaiin an hmua, “Elija irtha dong ang kha Elisa chung a iom a ni ta hi te,” an tia.

¹⁶Ama irtongpui hrangin an fea, a makunga an khûksadela, “Iringai ro, mi hrâttak tak sômringa kin oma, ni pu chu Rengpa irtha’n a hruaia kho tiang tânga mo, phâia mo a imâksan rak a ni ngânin te, lungkham takin keini’n va zong kin ti,” an tia. Elisa’n, “Va zong no roi,” a tia.

¹⁷Elisa ta hranga inzak rak ang dôrin an ngên sikin, “Va fe roi,” a tia.

¹⁸Kha tena chu mi sômringahaiin sîn thum an zonga, hmu mahaia, Jeriko-a Elisa a om laiin an kîr nôka, “Fe no roi nangni ki ti kha te,” a tia.

Elisa sinirkhêl thôna

¹⁹Jeriko khuaa mi a senkhathai Elisa kuang an hong a, “Kin khua hi ni ihmu tâk angin kho hoitak a nia. Khannisianlân, kin tui fâk a sa no sikin nâi inhring thei ma ung,” an tia.

²⁰Ama’n, “Berbu thara michi se unglân, ni hong pe roi,” a tia. An lâk pea.

²¹Tuikuanghaia khan a fea michi a phul pehaia, “Rengpa’n tuihai chu a’rthiangtir tâka, tûte thi pai ta no chin ni,” a tia.

²²Atûn ten hin Elisa iti angin tuihai hi a irthiang tâk a ni.

²³Kha hmun ata kha Bethel khuaa a fe tâka; lampuia a fe laiin kho sùng rengata nâipang an hong a, innuisanna hrang takin, “Lukol, lukol, kîr nôk ta ro,” an tia.

²⁴A hong irheiiin chu a hmuhaia, Rengpa irhmingin khomâk a sâmhaia. Rampui ata savompui inhni an hong suaka, nâipang sômminli inhni an sê thathai zela.

²⁵Khatak ata chu Samari khua tiang a pan nôk ta.



2 Rêng hai 3

Israel le Moab irdoina

- ¹Judai rama Jehosafata kum sômhleiriat an lal kumin, Ahaba nâipa Jehorama chu Israel rama an lala. Samari khuaa kum sômhleihni an lala.
- ²Rengpa mithmua thilsual a thoa, a nu Jezebeli le a pa ang dôra sual chu ni maka. A pa millim, Baal biakna hmun a isiahai chu an siatpai pea.
- ³Khannisian, a matona rêng Nabota nâipa Jeroboama thilsual tho chu masan thei maka Israelhai a hruai insuala, irlet nuam maka.
- ⁴Moab rêng Mesa khan kêlbelra a vâia, a kum tin Israel rêng kuang chôirual angin belrate nuaikhat le belrachal nuaikhat mul a pêk ngaia.
- ⁵Israel rêng Ahaba a thi'n chu, Moab rêng chu Israelhai a doia.
- ⁶Reng Jehorama chu Samari khua ata a suak lata, a sipaihai a buk khômhaia.
- ⁷Judahai rêng Jehosafata kuang, “Keini chung a hin Moab rêng a ni tehel pe tâka, ni doipui theiin mo?,” tiin chong an thuana. Reng Jehosafata'n, “Nangni hong san ki ti; ki mihai le ni mihai chu pumkhat kêng ei ni.
- ⁸Kho tiang ata mo hong doihai ning?” a tia. Jehorama'n, “A hlana tiang Edom tâng châr ata hong phut ki ti,” a tia.
- ⁹Reng Jehorama, Judai rêng le Edom rêng hai chu an hong irsiam suaka, sîn sari an fe tena chu tui an irsama. Mihriam in hrang le an puakpêl sahai in hrang ite an nei ta no sikin.
- ¹⁰Jehorama'n, “Ei Pathian Rengpa hin Moab rêng in a nuam taka nin soisaktir hranga a ni hong ihruai a ni hi te, a'rkhêl bâka,!” a tia.
- ¹¹Reng Jehosafata'n, “Rengpa kin irdon hrang deipu mo an om?” a tia. Jehorama sipai hruaitu inkhat hin, “Safata nâipa Elisa, hitaka hin a om, deipu Elija hnungzui ngai kha,” a tia.
- ¹²Reng Jehosafata'n, “Deipu diktak a ni kha te,” a tia. Reng inthumhai chu deipu Elisa kuang an va fea.



¹³Elisa'n Israel rêng kuang khan, "Itin mo nangni ki isan hrang nin nu le pahaiin an lei irdonhai ngai deipuhai var donhai unglân sa no ni mo," a lei ti pehaia. Jehorama'n, "Ama Rengpa kêng hi a ini eini rêng inthumhai Moab rêng kuta ni siatu chu," a tia.

¹⁴Elisa'n, "A sin ki tho mihring Rengpa irhmingin Judai rama rêng Jehosafata hi irngaisâng no inlân chu i ang khomin nangni san lam inhre ma ung kêng nangni ki iti na mo ni ma," a tia.

¹⁵Elisa'n, "Irhâihoi tum thei hong hruai hi roi" a tia. Irhâihoi tum theiin a hong tum inringin chu, Rengpa kutin Elisa kut a zuan thema.

¹⁶"Hi irhôra hin khur choi unglân, Rengpa'n a ti.

¹⁷Rengpa'n hiang hin a ti, 'Phâivua tho loiin sôm hmu khom unglân, hi irhôrhai hi tuiin sip zit a ti; khahai kha nin neinun vâihai le nin rêngin in ta nin ti,' a tia.

¹⁸Khaanga hai kha chu Rengpa hranga tho intak ni ma, nin kuta Moab hai khom nangni pe a ti.

¹⁹Kul neihai le khua hoi ualhai insiat unglân, thing sa chihai irkit unglân, tuikuang sênga buk unglân, loi hoina hmunhai khom lung dêng hnôk inbit roi," a tia.

²⁰Zîngkhua a hong vâra hâlrivôm thil an inhlan zoro a hong phâkin chu, Edom ram rengata tui a zuang luanga, an omna hmunhai tuiin a sip tâka.

²¹Moab haiin, an nihai doi hranga rêng inthumhai an hong tih an inhriatin chu pasal diarkai thei murdi'n, nâipang ata ulian dênin an irbuka, an ramrihai an hrung tâka.

²²Zîngkhua a hong vâra, misa a hong suakin chu tui a êl insen phuta, thisen anga senin an langa.

²³"Thisen a ni khu te, sipai pâl thumhai an irdoia, an irthat ngêt ni a ti. Tho an omna hmun zu en ei ti," an tia.



²⁴An râlhai omna hmun an zu tungin chu Israelhaiin an lei doihaia, an irzûl kîrhaia, Israelhaiin an irzûlhai maia, Moabhai chu an thathai oka.

²⁵An khua khom an insiat pehaia, an loi hmun hoihaia khan Israelhai fe hongna lamin lung an intheka, an loihai chu lungin a sip zoi tâka. An tuikuanghai khom thing leh an inbit pehai tâka, a hnungkhôn taka chu an khopui Kir-hareseth vai la siat maka, kha khom kha sâilungdêng hmang theihaiin an irhuala.

²⁶Moab rêngin a râlhai inhnê loi hrang ti an hriatin chu khandai chôî sipai irzasarihai leh a râlhai chu nakhrât songin a palthûthaia, Suria rêng rama intân a tuma; khannisian intân thei maka.

²⁷Khanchu, a nâipa uliantak, ama thûl hrangtu chu, a chela, Moabhai pathian kôla kulbang bula khan a thata, ar hlan tâka. Israel mihaiin an hmu'n chu an chia, kha khua kha an mâksana, an rama an ikîr nôk tâk a ni.

2 Rênghai 4

Meithâi inriang Elisa'n a changpui

¹Deipu pâlkhat laia mi inkhat dôngma chu deipu Elisa kuang a hongna, “Ka pu, ni siahlo ki pasal chu a thia, ni inhriat angin Pathian chi mi a nia; a lâkai len tângnapa'n ki nâipasal hni suaka intânga, ki pasal intângna tuam hrangin ni lâk pe hrangin ar siam,” a tia.

²Elisa'n, “Imo nang ki itho pe ta hrang! ni ina neinun sa ni inei mo a om” a tia. Ama khan, “Ite nei ma ung, oliv sahriak bûr chînte inkhat vai ki nei,” a tia.

³Elisa'n, “Fe'n lân ni tualbômhai bûr, ni theidôr va'rfuangin lân.

⁴Ni nâihai leh in irkhârkhum unglân, a bit dôr chu a bingin se thiai unglân,” a tia.

⁵A fea, a nâihai leh in an irkhârkhuma, bûr rong chu a nâihaiin an lâka, ama'n a thun insiphaia.

⁶An bûr irfuang a thun insip zoiin chu, “Bûr dang hong zong nôk roi,” a tia. Anni khan, “Bûr dang om ta ma,” an tia. Sahriak khom kha a kang tâka.



⁷Pathian mi kha a va hrila, ama'n, "Fe'n lân, sahriak kha va zuar ta ro, nin lâkaihai chu tuam unglân, a la zôk chu ni nâihai leh fa roi," a tia.

Elisa le Sunam irchongnu

⁸Sûn khat chu Sunam khuaa Elisa a fea; kha khuaa khan nupang irchongnu a oma. Elisa chu bunêk a koia, kha ni rengata chu Sunam khua a fe paiin chu, kha nu kuanga khan bu anh a fâk ngaia.

⁹A pasal kuang, "Hi ni hong hro ngaitupa hi Pathian mi irthiangtak chu nih a ti.

¹⁰Tho in sûnga a riakna hrang tentan siam pe inlân, zâlmun, dokâng, le toihmun do pe inlân, a ni hong hro rikipa a omna hrangin," a tia.

¹¹Sûn khat chu Elisa a hong nôka, a zâlmun hranga tentana khan sôl a'rngama.

¹²Sunam nupangnu koi hrangin a hnungzui Gehazia chu a tîra, nupangnu chu a hong.

¹³Elisa'n Gehazia kuang, "Hi nu hin a nin ren bâka, imo ei itho pe ta hrang? Reng mo, sipai hruaitu chongpui a inuam mo a om irdon ro," a tia. Kha nu khan, "Mâni irchipuihai laia om kêng ki nia, ite innang nei ma ung," a tia.

¹⁴Elisa'n, Gehazia kuang, "I tak mo ki itho pe ta hrang?" a tia. Ama'n, "Nâipasal chu nei ma, a pasal lak a tar ok tâka," a tia.

¹⁵Elisa'n, "Hin hong hi ri se," a tia. A hong, mikota a ngîra.

¹⁶ Elisa'n a kuang khan, "Nakum hiang tika hin chu nâipasal pom tah ni ti," a tia. Kha nu khan, "Pathian mi ni nia, minlak thu ni hril no ro," a tia.

¹⁷Elisa iti lam angin nâi a vonga, a kum nôk a phâkin chu nâipasal a nei tâka.

¹⁸Nâipang chu a hong lian tîr tîra, voikhat chu a pa kôla bu âttuhai leh an bu âtna hmuna a fea.

¹⁹A pa kuang khan, "Ki lu, ki lu," a tia. A siahlo kuanga khan, "A nu kuang puakin lân fepui ro," a tia.



²⁰A siahloin a nu kuanga puakin a fepui tâka, sîn sôt a nu'n a poma, a thi pe tâka.

²¹Elisa omna tentana a lûtpuia, a zâlmuna an zâla; a suaka, in a khârkhuma.

²²A pasal a koia, “Siahlo inkhat leh sakuartung inkhat hong tîr ro, Pathian mi kuang la va fe hi rong, hong kîr nôk zôi ki ti,” a tia.

²³Ama'n, “Tha thar kût khom ni maka, Sabat ni khom ni ual maka, itho sikin mo a vuan sîn kher a kuanga fe ni inuam?” a tia. Khan ama khan, “Fe a nang a ni,” a tia.

²⁴Sakuartung chu ar siam infel zoiin chu a siahlo kuang khan, “A hrât thei dôra hrâtin sakuartung hi chalai ro; ite nang ki ti mâka chu ir-ial viat no ro,” a tia.

²⁵Elisa omna Karmel tâng panin an suaka. Hlataka an la om laiin Elisa'n a lei hmuaia, a hnungzui Gehazia kuang khan, “En ro, Sunam-ah nupangnu kha a hong so,

²⁶a pasal le a nâihai chu an dam mo tiin lei va don lat ro,” a tia. Ama'n “Kin dam,” tiin a lei sâma.

²⁷Tânga Pathian mi kuang khan a tungin chu a ke a chel pe khaka, Gehazia'n, namirthîn a tuma, khannisian Pathian mi khan, “Ite tho pe no ro, a milung a na pe a ni, Rengpa lakin a ni thupa, ni la hril maka,” a tia.

²⁸Nupangnu khan, “Ka pu nâipasal mo nang ki nghi? ni huang no roh mo nang ki iti ni ma kha?” a tia.

²⁹Gehazia kuang khan, “Irsiamin lân, ki khianghrol hi chôiin lân fe roh. Mi ni irtokpui khom chubai mûk no'n lân, chubai nang an mûk khomin donhai viat no roh. Ki khianghrol hi nâipang hmâi chung a va'rngat ro,” a tia.

³⁰Nâipangte nu khan, “Rengpa mithi le mihring irhming sâmin ki hril, ni hong no'n chu kei khom fe viat no ning,” a tia. Khanchu, a thoia nupangnu chu a zuia.



³¹Gehazia chu maton tiang a lei fea, nâipang hmâia khianghrol a lei khanga; khannisian ite danglam maka, a om balamin a om maia. Elisa irtongpui nôk hrangin a lei hong kêra, “Nâipang chu thoi ta ma,” a hong tia.

³²Elisa chu in a va tunga, nâipang chu a thia, a zâlna khan a lei zâla.

³³A lûta, an ruai vaiin an irkalkhuma.

³⁴Zâlmuna khan nâipang chu an bokdela, a hmûr le a hmûr, a mit le a mit, a kut le a kut, a’rtôn irhlômputa; khaanga a thopuiin chu nâipang takpum chu a hong lum irphuta.

³⁵Zâlmun ata a chuma, hnuaia voihni vêl ar lôi zoiin a lui nôka, nâipang chungka khan an bok nôka, nâipang chu voisari a ha a hong riala a hong hring nôk tâka.

³⁶Gehazia chu a koia, “Sunamnu kha hong koi ro,” a tia. A hong koia, a zuangin chu, “Ni nâipa hi pom ta ro,” a tia.

³⁷A tentan sûnga khan a lûta a ke bula khûksadel pumin, a nâipa chu a pom suak tâka.

Thil irkhêl dang inhni

³⁸Voikhat chu, ram pumpuia châm a tâk laiin Elisa chu Gilgal-a a fea, deipuhai ar chutirhaia; a siahlo kuang khan, “Bêl lian kha lan lân, deipu irchulaihai fâk hrang inchuan ro,” a tia.

³⁹An laia mi inkhat chu rama, anh-a thâk sa hrang zong a fea, hruirâng i zât mani khôk a hong pom hluka, a zena anh-a khan a thâk sa tâka.

⁴⁰Fa hrangin an chomin chu, “Ei Pathian mihai an bêla hin tûr a om,” an tia, fa thei ta mahaia.

⁴¹Ama’n, “Baidi hong la nôk roi” a tia. Bêla khan a thâka, a mihai kuang khan, “Thur roi fa thei ta nin ti,” a tia.

⁴²Baal-salisa rengata mi inkhat a hongka, Pathian mi chu bai dang (barli) sômhni le buvûi a hong chôi pea; “Hi mihai hi infatirhai ro,” a tia.



⁴³A siahlo khan, “Itina ni iti mo? hi tê leh hin ulian pâl irzakhat vêl an iruk hrang” a tia. Ama’n, “Sem phot ro, fa ri sehai, Rengpa’n fahai sian fa zoi no nihai a iti kêng” a tia.

⁴⁴Khanchu, a semhaia an fâka, Rengpa iti ang khan fa zoi loiin an om ta.

2 Rênghai 5

Inphâr Naamana indam

¹ Suriahai sipai hruaitu ulian Naamana chu Rengpa’n Suria râl inhnêtirtu a ni sikin rêngin a’rngaiirsânga, an hlu oka. Mi hrât le mi hâitak ni khom sianlân inphâr mi a nia.

²Suria sipaihai a papâlin ram kêra an riak ngaia. Israel rama mi nupang nâipangte hi an chela, Naamana dôngma’n a siahlo ni hrangin a hmanga.

³A pi kuang khan, “Ka pu hi Samari khuaa deipu kuanga va fe sianlân chu an phâr hi dam ngêt a ti,” a tia.

⁴Naamana’n an hriatin chu a pu rêng kuang khan a fea, “Israel rama nupang nâipangtenu khan khang khan te ni zu ti tâka,” a tia.

⁵Suria rêngin, “Va fe’n lân, Israel rêngpa hrang lekha nan chôitir ki ti,” a tia. A fe tâka, sumru sîngthum, rângachak sângruk le puan irnêm sil sômkhata a chôia.

⁶Israel rêng kuang lekha chu a pêka, hiang hin a’rziaka, “Hi lekha chôitu hi, ki siahlo, Naamana hi an phâra, len dam hrangin ki hong itîr a ni,” tiin a’rziaka.

⁷Israel rêngin lekha irziak kha a tepin chu, a puan an potthêra, “Mi thata indamtir thei Pathian mo ki ni, hi mi hin inphâr indamtir hranga a ni hong iti? a ni doi theina hrang lampui a izong mai a ni,” a tia.

⁸Reng chardong hraiin a puan an potthêr tah ti Pathian mi Elisa’n a len hriatin chu rêng kuanga mi a tîra. “Itho mo ni puan teh nin potthêra? ki kuang zuang sianlân, Israel rama deipu a om ti inhria a ti,” a tia.

⁹Naamana chu a sakor le sakor tâlihai hmangin Elisa kuang a fea.



10Elisa'n mi a tîra, "Fe'n lân, Jordan vadung tuia voisari irsilin lân, ni vun diktak ang ni nôk a ta, irthiang ta ni ti," a tia.

11Naamana chu ningmur hmêl irputin a fea, "Hong suak a ta, ki kôla ngîrin Pathian Rengpa irhming sâmin a natna lai hai inthem in, nin dam a tih ki ti lai in.

12Damaska kôla Abana le Pharpar vadung tui chu Israel vadung tui nêkin a irthiang ual mo ni ma?" ti in ningmur takin a fe tâka.

13A siahlo inkhat a hong a, "Ka pu deipu khan thil ichiom tak tho roh nang ti khom sianlân, ni itho loi hrang ma ni? var silin lân, irthiang ni ti, nang a iti a ni'nte, var sil ta ro ba?" a hong tia.

14Deipu iti angin Naamana chu Jordan dung a pana, voisari a'rphûma, a vun chu nâipang vun a hong ang pe nôka, a'rthiang tâka.

15A neinin hmang murdihai leh khan Pathian mi kuanga a hong kîr nôka, a hmâikunga a ngîra, "Israel rama ti no hin chu ram danga Pathian om mah ti kin hriat ta, en ro, ni siahlo hin thil nang ki ipêk hi lungkham takin ni la pe ro," a tia.

16Ama khan, "Matona ki omna ngai mihringhai Rengpa irhming sâmin la thei no ning," a tia. La ngêt hrangin a ngêna, khannisianlân, nuam pe thei viat maka.

17Naamana'n, "Ni lâk nuam zel no'n chu ni siahlo hi sakuartung inhni pêl inruk irnêng ni pe'n lân, ni siahlo hin Rengpa ti no hi chu Pathian tu kuanga khom hâlirvôm thil inhlân ta no ning.

18Khannisianlân, Suria pathian Rimon biak hrangin ka pu a fe zoro hin a hnung ki zui ngaia; khaanga Rimon tempila ki fea, khûksadelin chubai ki mûk khomin Rengpa'n a ni ingaidam a ni," a tia.

19Ama'n, "Irtharngam takin fe ro," a tia. Kha tena chu a fe tâka.

20Hlataka a fe mân zel khan, Pathian mi Elisa hnungzui Gehazia'n, "Ka pu hin Naamana chu ite la loi in an fetira, kha Suria mipa'n pêk a itum kha la sianlân



a isa hrang, Rengpa irhming sâmin la va'rzûl hi rong, i zât mo khôk la va sut ngêt hrang,” a tia.

²¹Khanchu Naamana chu Gehazia'n a va'rzûla, Naamana mi inkhatin a ho'rzûl a nih ti a hmu'n chu a tâli ata chumin a lei va dona, a kuang, “A sat lama ni ihong chu ma ni?” a tia.

²²Ama khan, “A sa lama chu a ni, ka pu'n, Efraima tâng ram rengata deipu inhni an hong, tangka sum sângthum le puan sil inhni mo pe thei ni?” a ti va ti ro, a tia.

²³Naamana khan, “Tangka sum sângruk vai hi ni la pe ro,” a tia. La ngêt hrangin an kunga tangka chu hmarsa inhnia a thuna, puan sil hni leh a siahlohai an pêltirhaia an fe tâka.

²⁴Tâng sîp an hong tungin chu an kut ata a lâkpai pehaia, a ina a hrê zoi hnungin, a tîrhai nôk ta.

²⁵Ama chu in sînga a lûta, a pu kôla khan a va ngîra, Elisa'n, “Gehazia kho rengata hong mo ni ni?” a tia. Ama khan, “Kho te lua fe ma ung kha te,” a tia.

²⁶Ama khan, “Nang a don hranga a tâli ata a zuang lai khan ki'rtha kha ni kôla khan a iom loi ma ni? tangka le puan kha ni ilâk mo ni ma? grep irhuan, belra le sehrâthai kha, siahlo pasal le nupang irchohai ta roh.

²⁷Naamana inphâr irvei hi nangma le nir chihai chung a nangni kâi pe ta ri se,” a tia. A pu makung ata a suakin chu, ivur anga vârin a vun chu inphârin a tuam invâr pe ta.

2 Rênghai 6

Hrei irhmang hmu nôkna thu

¹Deipu irchuhaiin Elisa kuang khan, “Kin omna in hi a chîn hrai sikin,

²Jordan tui kôla fe'n lân, ei omna hrang in lian ual zu sin kin ti,” an tia. “Fe roi,” a tia.



³Anni laia mi inkhatin, “Lungkham takin nang khom zuang ro,” a tia. “O, a ni le zuang ki ti,” a tia.

⁴An rêngin an fe tâka, Jordan dung an zu tungin chu thing an tana.

⁵Mi inkhat thing a tan lai takin, a hrei ar khek pea, tuia a tâk pea, “Ka pu itina hrang ma ni ta, mi ta kêng kin ihmang,” a tia.

⁶Pathian mi khan, “Kho taka mo a itâk?” a tia. A tâkna lai tak chu an khîk irhmua.

⁷Thing ôn a tana, a zu dêngnaa, hrei chu a hong kêlsuaa, “La ta ro,” a tia; a hon bana a lâk tâka.

Suria sipaihai an dok

⁸Suria rêngin Israel rêng doi a tuma, kho hmun tianghai hin mo an inruanghai hrang ti a rualhai leh an hrila.

⁹Pathian mi Elisa’n, Israel rêng kuang khan, “Hi hmunhai hin chu fe no roi, Suria rênghaiin nangni an inruang hrang kêng a ni,” a ti pe thiaia.

¹⁰Israel rêngin Pathian mi iti pena hmuna omhai chu a hrila, an le’rtûng irman vinga; voi tamtak an hrilhai a ni.

¹¹Suria rêng chu irmang a phana, a rualhai a koihaia, “Israel tianga kop ei laia hin tu mo a ini nin hril roi” a tia.

¹²A hruaituhai laia mi inkhat hin, “Keini laia hin hianga milung inchong inkhat lua om ma ung, an chungtakpu, Israel laia, deipu Elisa’n, ni in sînga ni thu hril murdi khom, Israel rêng a ihril mai a ni,” a tia.

¹³Ama khan, “khôn mo a om va zong roi, mi tîr ki ta, va chel roi,” a tia. “Dothan khuua a om” an tia.

¹⁴Khanchu, sakor le tâlihai irfûkin sipai tamtak a tîra, kha khua kha zâna an va irhuala.

¹⁵Pathian mi siahlo ruatharte an laia a ngîra, zînga a thoiin chu, a suaka sipai tamtak le sakor leh tâli hmangin an khua an irhual chu a hmua, a pu kuang



khan, “Ka pu dik loi kêng a ni ta! itin mo ei itho ta hrang? eini tianga ni san hrang an tam,” a tia.

¹⁶Khan, Elisa’n, “Chi no ro, anni tianga kop nêkin eini tianga kop an tam ual,” a tia.

¹⁷Elisa a chongchaia, “O Rengpa ni mit ni zuang inmeng pe ta ro,” a tia. Rengpa’n ruathartepa mit chu a zuan vâp pea, a hmuhai, Elisa omna hmun sak tiang pang chu mei sakor le mei tâli om rem rum a hmua.

¹⁸Elisa chu, Rengpakuang a chongchaia, “An mit inchotir pehai ro,” a tia. Elisa iti angin an mit an chotir pehai.

¹⁹Elisa’n an kuang, “Hi hi lampui ni mah, nin mihriam hong zong omna khua lak ni maka, a omna hmuna nangni hruai ki ti,” a tia. Samari khuaa a hruaihai tâka.

²⁰Samari khua an va tungin chu, Elisa’n, “O Rengpa hihai mit hi invâr pehaiin lân hmu ta ri sehai,” a tia. Rengpa’n an mit an vâp pehai, an hmu thei tâka. An thîrin chu Samari khua a ni pehai tâka.

²¹Israel rêngin Elisa kuang, “Thatpaihai ning mo,” a tia.

²²Elisa’n, “Khandai le thala nin irdoipua nin ichelhai lua that loiin te, an fâk hrang bu le tui pehaiin lân fâkin inhai sianlân, an pu kuang tiang inkîrtirhai ro,” a tia.

²³Bu tamtak a er pehai, an nêka, an khop tena chu an suahaia, an pu kuang tiang an fe ta. Suria rêng sipaihaiin chu Israel ram chu doi ngam ta mahaia.

Samari khua an irhualna thu

²⁴Zoro sôt ian hnunga chu Suria rêng Benhadada’n sipai a bukhaia, Samari khua panin ar hualpuihaia.

²⁵An irhual sôt tâk sikin Samarihai chu a sân an châm tâka, sakuartung lu inkhat hi tangka sômriatin an zuara, phervali gram khat irzahni hi tangka ringa man a nia.



²⁶Israel rêng chu kul bangbul irfangin a fea, nu inkhat hin, “Ni changpui ro, o rênginthang ki rêngpa,” a tia.

²⁷“Rengpa’n nang a san no’n chu bu le khura sahriak khom nei ta ma ung hi te,” a tia.

²⁸Rengin, “Imo ni itihna?” a tia. Ama khan, “Hi nupang hin ni nâi kha hong hruaiin lân, a vuan fâk ei ta, nangtûk ki nâi fa nôk ei ti, a tia.

²⁹ Ki nâi chu kin suanga, kin fâk tâka. Nangtûk chu ni nâi hong hruaiin lân, fa ei ti ki tia; khannisianlân a nâi chu a thuppaia,” a tia.

³⁰Rengin kha thu kha a hon hriatin chu a puan an potthêra; kulbang ar fang maia, mipuiin an enin chu a puan hnuaiia bora puan a sil chiana.

³¹“A vuan misa a tâk mân hin Safata nâipa Elisa lu hi ki lâk no zelin chu Rengpa’n a nuam a ningin ni soisak ri se,” a tia.

³²Elisa chu a in sûnga a toia, ulian danghai leh rêngin mi a tîra, kha an mi tîrpa tung mân Elisa’n ulianhai makunga khan, “Irngai roi, hi mi that ngaipa hin ki lu la hrangin mi a hong itîr a ni. A mi hong tîrpa chu in khârkhum unglân, lei danh khak roi. Kha a hong zuitu irhâi khan a pu rêng kalchôi irhâi mo ni mah?” a tia.

³³A lan sîr laiin rêng chu a hong tung zel tâka. “Hiang dôra chardong nin lâktirtu chu Rengpa a nia! itin mo Rengpa thu ki la irngai mai hrang,?” a tia.

2 Rênghai 7

¹Elisa’n, “Rengpa thu hi irngai hi ro, nangtûk hiang zoroa hin Samari khuaa baidi a sa chi her thum le barli bai her ruk, tangka sumru inkhat leh ircho thei nin ti, a iti kêng,” a tia.

²Reng hrung ngaitu sipai hruaituin, Pathian mi chu hiang hin a sâma, “Rengpa’n irvân tukver inhongin rua inthotir khomsian, khang khan chu tung ual le irhoi ma!” a tia. Elisa’n, “A hmu chu hmu thei ni ta, fa thei ual no chi ni,” a tia.

Suria sipai irthek indarna



³Samari khua pêñ tiang khan inphâr minli hi an oma, “Itho sika mo a thi ringot nghâkin ei iom hi?”

⁴Kho sũa lûtin lân, khano’nchu phêngchâmin ei ithi hrang kêng, hitaka om mai hi chu. Tho Suriahai hnuaia va irpelût ta ei ti, an nuam le ni thathai sian; a that tak chu ni ngam ual no nihai,” an tia.

⁵A zîngbup tena chu Suriahai kuanga fe hrangin an irsiama, Suriahai omna an va tungin chu tûte lei om mahaia.

⁶Rengpa’n Suriahai kha sakor tâli le sakor intân irhâi an hriattirhaia, “Israel rêng hin Hit rêng Aigupta rêng haiin ni doi hrangin an hong irsiam a ni hi,” an ti a ni.

⁷Khasika, a zîngbupa hin bâk lêng angin an isuak a nia, an in sakuartung le an in tuala thilhai mâksanin an irotsan pher phur a ni ta.

⁸Inphâr haiin tual an va tungin chu, in inkhata an lûta, an va thup irsiata, a danga an irthon nôka, khang ngêtin an tho nôka.

⁹An chonga, “Ei tho dân hi a idik ta loi kêng. A vuan hin zoro a la om, ei dâihreka khovâr ei nghâkin chu an ni la isoisak hrang kêng; khasikin thurchi sa hi rêng in sũa mihai inhrilhai ei ti,” an irtia.

¹⁰Khua kul mikota khan an fea, mikot hrungtu kuang khan, “Suriahai tuala kin va fea, tûte lei om mahaia, tûte chongpui hrang lei om mahai. An sakorhai, an sakuartung chu an la khithaia, an inhai khom a om balamin a la om chiana,” an tia.

¹¹Mikot hrungtuhai kha rêng in sũa an va fea, an hrilhaia;

¹²zâna rêng chu a thoia, a rualhai kuang khan, “Suriahaiin an ni irdoitir dân hi nangni hril ki ti. An khuaa kin châm hrang hi an inhriata, an in mâksanin ramkâra an irbîk nih a ti, kho sũa ata hong suak an ta, a hringin chelhai ei ta, an khua lua pehai ei tih an irti ni a ti,” a tia.



¹³A rualhai laia mi inkhatin, “Hi khuaa mi hi ei irchêk ok tâka, ei thi ok tâk sikin, sakor ringa ei la neia, a chungu chuang thei inthang ei ta, hi thu hi van fel ri sehai,” a tia.

¹⁴Mi an inthanghaia, rêngin sakor tâli inhni a pêkhaia, Suria sipaihai thurchi inhriat infel hrangin a tîrhaia.

¹⁵Kha mihai kha Jordan vadung an va dêna, Suria sipaihai puandiar mâk zen zun an va hmua, an hong kîr nôka rêng kuang an hong hrila.

¹⁶Samari mihai chu an khua ata an suaka, Suriahai hmun khuar chu an lût khumhaia. Rengpa iti angin baidi a sa zât her thum le barli her ruk, tangka sumru inkhatin an zuara.

¹⁷Israel rêngin ama hrung ngaitu sipai hruaitu kha mikot hrung hrangin a lei phun khera. Elisa hmu hrangin rêng leh an hongu, a iti angin sipai hruaitu chu mipuiin an bôma a thi tâka.

¹⁸Elisa’n, “Nang, hiang tik zoro hin baidi a sa chi her thum le barli her ruk, tangka dêrkhat man ni ti,” a tia.

¹⁹Kha sipai hruaitu khan, “Rengpa’n irvân tukver inhongin rua inthotir thei khomsian kha dôrpa kha chu intungtir ual no ni,” a tia. Elisa’n hiang hin a sâma, “A hmu chu hmu thei ni ta, a fâk chu fa thei no chi ni,” a iti a ni kha te.

²⁰Khang khan a hong om tâka, khua kul mikot kha mipui an bita, an ihneng that a ni ta.

2 Rênghai 8

Sunam nupang hong kîrna

¹Rengpa’n kum sari sîng Israel rama châm a tâk hrang thu, Elisa’n Sunam nupangnu nâi a indam pe nu kha a hrila, an in mihai leh hmun dangu irson hrangin a hrila.

²Pathian mi thu chu a zôma, an rêngin Filistia rama an fea, kum sari an va om tâka.



³Kum sari a hek hnungin chu nupangnu chu Israel rama a kîr nôka, rêng kuang khan a in le a ramhai chu ni pe kîr nôk ta roh tiin a hrila.

⁴Reng le Elisa hnungzui Gehazia chu an lei chonga, Elisa thil irkhêl tho chu rêngin an hriat nuama, a le'rdona.

⁵Elisa'n mithi an hringtir nôkna thu Gehazia'n a hril lai takin nupangnu kha rêng makunga a hong ngîra. Gehazian, "Ka pu, ki insîr nupang kha hi nu hi a ni; Pathian mi Elisa'n a inhring nôk khom kha a nâipa a ni," a tia.

⁶Rengin a dik le dikloi ar dona, "O a dik," a tia. Rengin a thu ngaitua infel hrang hruaitu inkhat an thang pea. "A inei ngai murdi pe kîr nôkin lân, a om no kêra a ram ata thil thar suak khom a man hrang dôr insâpin pe ro," a ti pea.

Elisa le Suria rêng Benhada

⁷Suria rêng Benhada dam loi lai takin Elisa chu Damaska khua a hong lûta, "Pathian mi a hong tiin an hrila.

⁸Rengin Hazaela kuang khan, 'Imo khôk thilpêk hrang chôiin lân, Pathian mi var hmupui ro, ki la idam suak hrang le damloi hrang, Rengpa ni var don pe ro,' a tia.

⁹Khanchu, Hazaela chu var hmupui hrangin a fea, Damaska khuaa thil sa le hlulai a chôia, saringseiin voisôm minli pêla tam a chôia, a fea a kuang khan, 'Ni nâipa Suria rêng Benhadada'n, a ni hong itûr a ni, a natna ata hi la dam ning mo? a ti,' a tia.

¹⁰Elisa'n a kuang, "Fe nôkin lân, la dam suak ngêt a ti, ti va hril roh. Khannisianlân, Rengpa'n voikhat chu a la ithi ngêt hrang a nih ti a nir hmutir," a tia.

¹¹Hazaela chu inzak hmêl irputin a hei ena; Pathian mi chu a chapa.

¹²Hazaela chu, "Ka pu, itho mo ni chapa," a tia. Ama'n hiang hin a sâma, "Israel mihai chunga thil saloi ni itho hrang ki hmu sikin, an kulhai la hâl pehai ni ta, an ruathartehai khandaiin tukhai ni ta, an nâitesuihai hnuai



changa vîk thathai ni ta, an kho nupui, nâi vonghai khom an phînga irkhit thathai tum ni ti,” a tia.

¹³Hazaela’n, “Kei ni siahlo hin an nihai ang tho thei hrangin mo ni ni ibe?” a tia. Elisa’n, “Rengpa’n Suria rêng ni ichang hrang a nir hmutir a ni,” a tia.

¹⁴Elisa’n a mâksana, a pa kuang a va fea, “Ama’n Elisa’n imo nang a lei ti pe?” a tia. “Ni la idam suak ngêt hrang ti thu a hril,” a tia.

¹⁵Zîng nôka chu Hazaela’n puan a lâka, tuia a phûma, rêng kha a’rkhûa a thatpai ta. Hazaela chu Benhada irthûlin Suria rêng a chang nôk ta.

Juda rêng Jehorama

(2 Tsn 21.1-20)

¹⁶Israel rêng Ahaba nâipa Jorama rêng inlal kum ringana tena chu Jehosafata nâipa Jehorama chu Judai rama rêng a changa.

¹⁷Kum sômthuminhni a niin an lal irphuta, Jerusalema kum riat an lala.

¹⁸A dôngma chu Ahaba nâinu a ni. Ahaba irchihai om dân ang ngêtin Israel rêng hai omdân saloi lâkin a oma. Rengpamithmua thil saloi a thoa.

¹⁹Rengpa’n Judahai chu thathai zoi nuam maka, a siahlo Davida kuanga, “Ni’rchihai chu rêng hong chang mai an ta, ti a lei tep ving tâk sikin.

²⁰Jehorama inlal lai tak hin Judai ramhai chung a Edom-hai tehel an zonga, an bingin rêng an neia.

²¹Jehorama chu Zair tiang panin a sakor tâli chôiin a fea, Edom-haiin an irhuala zân laia a tâli chalaituhai leh an intân suak thei hrâma, a sipaihai chu an indarh chita, an mâni in tiang an rot nôka.

²²Khatak ata chu Edom-hai hi Judahai hnuiaia om nuam ta mahaia, hi zoro ngêt hin Libna khuahai khom tehel an zong phut nôk sa a ni.

²³Jehorama sintho dang murdi chu Juda rêng hai thurchi irziakna lekhabua a chuang.

²⁴Jehorama chu a thia, Davida khopuia rêng irphûmna thâna an phûma, a nâipa Ahazia chu a’rthûlin an lal nôk ta.

Juda rêng Ahazia



(2 Tsn 22.1-6)

²⁵Israel rêng Ahaba nâipa Jorama rêng kum sômhnina tena Jehorama nâipa Ahazia chu Judai rama rêng a changa.

²⁶Kum sômhni inhni a niin an lal irphuta, Jerusalema kum khat an lala, a nu chu Ahaba nâinu Athali, Israel rêng Omria tunu a ni.

²⁷Ahazia'n Ahaba nâinu dôngma'n a nei sikin Ahaba urêng danghai anginRengpa mithmua thilsual a thoa.

²⁸Reng Ahazia le Israel rêng Jorama chu Suria rêng Hazaela doi hrangin an inthuruala. Gilead biala Ramot khuua, an sipaihai an irdoia; Jorama'n irdoina khan sâbe a neia.

²⁹A damna hrang zongin Jezreel khuua a hongga, Ahazia'n a va pana.

2 Rêng hai 9

Israel rêng hrangin Jehua sahriak nâlin a omna thu

¹Kha zoroa khan deipu Elisa'n deipu ruatharte nâipang tak hi a koia, "Irsiamin lân, hi sahriak bûr hi chôiin lân, Ramot Gileada va fe roh.

²Ni va tungin chu Nimsia tupa Jehosafata nâipa Jehua zong suakin lân, a omna ina lûtin lân, a rualhai lai ata in sîngrîla hruai lûtin lân,

³a lu chungga hi oliv hriak hi buak pe'n lân, 'Rengpa'n Israelhai rêng hrangin sahriak nang a ibuak a ni ta, tin lân. Mikot inhongin lân suakpatin lân, ir-ial ta no ro,' a tia.

⁴Deipu ruatharte nâipang chu Ramot-gilead-ah khan a fea.

⁵A va tungin chu sipai hruaituhai an le'rbukkhôma. "Ni kuanga thu hril hrang ki nei, sipai hruaitu," a tia. Jehua'n, "Kin laia hin tu hi mo ni ichongpui nuam?" a tia. Ama khan, "O sipaihai hruaitu nang kha ni nih nang ki ichongpui nuam chu," a tia.

⁶A thoia, in sînga a lûta, a lua sahriak a buaka, "Israelhai chungga rêng hrangin sahriak nang ki buak ta a ti a ni," a tia.



⁷“Ni pu Ahaba in mihai that ni ta, ki siahlohai thisen, Rengpasiahlohai thisen Jezebeli insuakhai thisen phuba chu an chung a ki ilâk hrang a ni.

⁸Ahaba irchihai chu thatpaihai hlet ni ta, nâipang khom ulian khom pasal chu hek ving an ti.

⁹Ahaba in mihai chu Nebata nâipa Jeroboama in mihai le Ahija nâipa le Baasa in mihai ang khan soisakhai ki ti.

¹⁰ Jezebeli chu Jezreel-a uihaiin a hme fa an ta; tûte a phûm hrang om loiin,” a tia. Inkhâr kha an hong a, a suakpat tâka.

¹¹Jehua chu a puhai lai ata a hong suaka, mi inkhatin, “I thurchi ma ni tâk? mi’ntopa kha i lo hranga ni hong ihruai mo?” a tia. Jehua’n, “A izong chu nin inhriat kha te,” a tia.

¹²Anni khan, “Inhre ma ung dua, hril ro ba,” an tia. Rengpa’n “Israel rêng hrangin sahriak nang ki buak ta kêng a ni, a iti mo ni ma,” Jehua’n a tia.

¹³Sipai hruaitu danghaiin an puan an kheka, Jehua omna hrangin an dâpa, bekul an tuma, “Jehua hi rêng a ni ta,” an tia.

Israel rêng Jorama thatna thu

¹⁴Nimsia tupa, Jehosafata nâipa Jehua’n Jehorama chu a khitphiara.

¹⁵Jorama chu Suria rêng le Ramot khuaa irdoi lai khan sipai lei nei tâk a nia. Jezreel khuaa lei irngam hranga fe a ni, Jehua’n a rualhai kuang khan, “Keima tiang nin kopin chu Ramot khuaa irthokin Jezreel mihai kôla tûte thurchi hril hrangin insua no roi,” a tia.

¹⁶A tâli chung a chuanga, Jezreel khua panin a fea, Jorama chu la dam infel maka, Juda rêng Ahazia’n a va pana a lei om lai tak a ni.

¹⁷Jezreel in irsâng chung a râl entu khan Jehua le a rualhai hong lai chu a hmuaia, “Sakor chung a chuang mi tuhai mani ki hmu,” a tia. Jorama’n, “Râl an ini le ni loi eninfel hrangin sakor chuang thei mi inkhat va tîr roi,” a tia.



¹⁸An itîrpa chu Jehua hai omna a va tunga, “Rengin rual sa anga hong ni ini le ni loi an hriat nuam,” a tia. Jehua’n, “Nangma inhriat ite nang ma, hnung tiang khan fe nôk ro,” a tia.

¹⁹Râl hrungtu khan, “Mi honghai khan, ei mi tîr chu a va huanghaia, hong kîr nôk ta ma,” a tia.

²⁰An hruaitu khan, a tâli chu invêt angin a chalaia Jehua angin a om a tia.

²¹Reng Jorama’n, “Ki tâli sinsiam unglân,” a tia. An sinsiam zoiin chu Juda rêng Ahazia le an tâlihaia chuangin Jehua var hmupui hrangin an suaka. Nabota irhuana an va hmua.

²²Jorama’n, “Jehua, a sat lama ni ihong chu ma ni?” a tia. Jehua’n, “Ni nu Jezebeli’n millim biak le irdoi hmang thu inthang kêra hin thil sa lam hril hrangin itin mo a ini thei hrang?” a tia.

²³Jorama’n, “Ahazia hi, hi mihai hin that an itum a ni,” tiin a khêka, a tâli a kai irhêla, an tâna.

²⁴Jehua’n a thalngul chu a thei dôra irnak songin a kaidoka, Jorama hnung tiang a kêpa, a thalin a milung irbutak a va toka, a tâli chungu khan a thi tâka.

²⁵Jehua’n a hnung zuitu Bidkara kuang khan, “A ruak so Nabota irhuana pai roi. Jorama a pa Ahaba hnungzui, a sakor kin chuang laia Ahaba chungthu Rengpa ihril kha inhretir mai roh.

²⁶ Nabota le a nâihai mizâna an thi dânhai kha kin hriat mai a ni; khasikin hi hmuna hin ki la isoisakhai hrang a ni; a iti kha, Jorama ruak chu a lâka, Nabota irhuan sênga, Rengpa iti angin pai roi,” tiin a hnungzuitu kha a hrila.

Juda rêng Ahazia thatna

²⁷Juda rêng Ahazia’n hi thilhai hi a hmu’n a tâli leh Beth Hagan tiang a fea, Jehua’n, a’rzûla, a rualhai kuang khan, “A tâlia chuangpu so that roi,” a tia. Ibleam kho kôla Gur pana a fe laiin an kâp inphopa, Megido tiang a fea; kha hmun khan a thipui tâka.



²⁸A rualhaiin a ruak chu tâli chung a chôiin Jerusalema an chôi tâka, Davida khopui rêng thâna, an phûm ta.

²⁹Ahaba nâipa Jorama kha Israel rêng kum sômhleikhat a ni kumin Ahazia hi Judai ram rêng a ni.

Rengnu Jezebeli thina thu

³⁰Jehua'n, Jezreel a hong tung ti Jezebeli'n an hriatin chu a mit an hânga, a sam sinsiam indanglamin rêng in irsângtak ata a thîra.

³¹Kul mikota Jehua hong lût lai khan, "Ama puhai thattu Zimria, khan a sat lama hong mo ni ni?," tiin a khêka.

³²Jehua chu a hor heia, "A ni san hrang mo nin om?" a tia. Hruaitu inhni inthum tukvera an hong suaka.

³³Jehua'n an kuang, "Zuang namtha roi," a tia. Khanchu, Jezebeli chu an namthâka, a thisenin a sîta, bang le sakorhai khom a sût chita, a ruak khom an inrâk phiar saa.

³⁴In sînga Jehua a lûta, bu a nêka, "Kha nupang sualnu ruak kha phûm roi, rêng nâinu a ni sikin," a tia.

³⁵Phûm hrang an va fea, a lu, a ru le a kut le ke ti no chu hmu hrang om ta mah.

³⁶Jehua an hong hril nôka, "A siahlo Tisbe mi Elija bâia Rengpa ihril, Jezebeli chu Jezreel khuaa uihaiin fa an ta,

³⁷an ifâk mihlia chu tu ruak mo a inih ti inhre thei loi rakin ar thek indara a iti kha a hong itung a ni ta," an tia.

2 Rênghai 10

Ahaba irchihai thina

¹Samari khuaa khan Ahaba nâipasal sômshari an oma. Samari khuaa a pahai leh hruaitu Ahaba nâi enkoltuhai kuanga Jehua'n lekha a thona hiang hin a'rziak.



²“Reng nâihai chu nin kuta an oma. Tâli, Sakor, râlthuum le kulnei khuahai khom nuamin nin hmang theia.

³Ki lekha hi nin hmuin chu rêng nâihai laia a feltak inthang unglân, rêngin siam roi, pu thar nin inei sûnghual roi,” tiin.

⁴Samari khuaa hruaituhaiin nangni an chia. “Reng inhni luan nangni ngam loiin, keini hin itin mo nangni kin ingam hrang?” an tia.

⁵Reng in enkoltuhai, kho sêng hruaituhai upahai le rêng nâi enkoltuhaiin an sâma, “Ni siahlo kin nia, tho hranga ni ni inphût dôr chu tho hrangin kin irsiam mai. Tûte mi dang rêng inchang nuam ma ung, a sa ni iti lam takin tho ro,” an tia.

⁶Jehua’n lekha dang a thon nôka, “Keima tianga kop nin nia, ki thu nin zôm hrangin chu, nangtûk hiang zoro hin Jezreel khuaa rêng nâihai lu lahai roi,” tiin. Ahaba nâi sômsarihai chu Samari khua hruaitu enkolna hnuai seiliana om an nia.

⁷Jehua lekha an hmu’n chu Samari khuaa hruaituhaiin Ahaba nâi sômsarihai chu an thathaia, an lu chu bêma an thunhaia. Jezreel khuaa Jehua kuanga an thon tâka.

⁸Ahaba nâihai lu an hong lâk tah ti Jehua an hrila. Anni’n, “Khopui kul mikot bula buk hniin le’rbukkhôm unglân, nangtûk ten lei om ri sehai,” a tia.

⁹Zînga kul mikot bula a va fea, khataka lei omhai kuang khan, “Reng Jorama khitphiara thattu ki ni, ama mô kha chu nangni’n pêl no chin ni. A mihai hi tu ithat mo?

¹⁰Ahaba nâihai chungchânga Rengpa thuhiril kha mâkana ni mah ti inhre roi. Rengpa’n a deipu Elija kuanga a ihril murdi a inlang a ni ta,” a tia.

¹¹ Jezreel khuaa Ahaba urêng hai le sipai hruaituhai le a rual sahai le ochai inkhat lua hôi loiin a thathaia.

Reng Ahazia urêng hai thina

¹²Jehua’n Jezreel a suak sana, Samari khuaa fe a tuma, Lampuia belrapu tual; an itihna khan,



¹³Juda rêng Ahazia in mihai a'rtongpuihaia, "Tuhai mo nin ini," a tia. "Ahazia urênghai kin ni, rêngnu Jezebeli nâihai le rêng in mihai chubai mûk hrangin Jezreel khuaa fe kin itum a ni," an tia.

¹⁴Jehua'n a rualhai kuang khan, "A hringin chelpaihai roi," a tia. An chelhaia, Betheged in khur kôla khan an thata an rêngin mi sômminli inhni an ni, inkhat lua hôihai mahai.

Ahaba urêng la damhai that zoina

¹⁵Jehua chu a fe maia, Rekaba nâipa Jehonadaba'n a'rtongpuia. Jehua'n chubai a lei mûka, "Ni chung a ki milung inchong ang hin, ki chung a lungrîl sa mo ni'rput?," a tia. Jehonadaba'n, "Ki'rput" a tia. Jehua'n "Ni'rputin teh ni kutin ni hon ban ro," a tia. An kut an irtûka, Jehua'n tâli chung a an chuangtira.

¹⁶"Ni hong zuiin lân,Rengpa ta hranga sathnem ki irngaizia hi nangma'n hmu ni ti," a tia. Samari khua panin tâlia chuangin an fe tâka.

¹⁷An va tungin chu, Ahaba urêng murdi chu inkhat lua hôi loiin a thathai vinga. Elija kuanga Rengpa ihril kha a itung a ni ta.

Baal biakhai thatna thu

¹⁸Jehua'n Samari mihai a koi bukhaia, an kuang, "Reng Ahaba khan intôm takin Baal tah hrangin sin a thoa, Jehua rêkin chu a sân uar ok a ti.

¹⁹Baal deipuhai, ama biaktu murdi le ochai murdi koibukhai roi. Tûte irnghil loiin, Baal kôla thil roiinputak inhlan hrang ki ni, a suak loi kai chu thatpai ni an ti," a tia. (Baal biakhai thatpaihai ving a tum sikin, khaanga vâi irlet thu a insuak a ni.)

²⁰"Baal biakna hrang nî sîn indang roi," Jehua'n a tia. A sîn an indang tâka.

²¹Jehua'n Israel rama mihai chu a bukkhômhaia; Baal biaktu murdi chu an hong a hong loi zel om mahaia. Baal tempila an irbukkhôma.

²²Ochahai songkol enkoltuhai kuanga, "Baal biaktu murdihai sil hrang chu an lâka.



²³Jehua le Rekaba nâipa Jehonadaba chu Baal tempila khan an lûta, Baal biak ngai ni loi, Rengpa biak ngai, hi hin an om le om loi satakin zong roi,” a tia.

²⁴Hâlirvôm thilinhlan le thil dang inhlanin Baal tempila khan an lût tâka. Jehua’n mi sômriat pên tiang khan a thuphaia, an kuang khan, “Hihai hi nin ithathai ving hrang a ni, nin inzôkhai paiin chu an zôktu tak chu suak nêkin thatpai zôi zel ni nin ti,” a tia.

²⁵Hâlirvôm thil ar hlan zoiin chu Jehua’n a sipai le a hruaituhai kuang, “Lût unglân, tûte hôihai loiin thatpaihai ving roi,” a tia. Baal tempila khan an lûta khandai irdok saiin, an thathaia; an ruakhai an hong kêlsua paihaia; tempil sîngrîla an lûta.

²⁶Kha hmun khan Baal illim thinga an isin, phun indet kha an lâka, an hâlpaia.

²⁷Baal illim lungphuna an isinhai an inkhiak pehaia, tempil kha an insiata, atûn ten hin mihaiin ramfenahaiin an ihmang tâk a ni.

²⁸Khaang dôra siatin Baal biakna hmun Israela om chu insiat a ni.

²⁹Nebata nâipa Jeroboama سوالنا sikin, Israelhai hruai insualna chu Jehua’n thathai zoi nuam maka. Bethel le Dan khuua rângachak illima siam sehrât illim kha an la biak mai a ni.

³⁰Rengpa’n Jehua kuang, “Ki mithmua thil sa ni thoa, ki inuam lam angin Ahaba in sâng mihai ni soisak thei sikin nir chihai chu irlo minli dênin Israel rama inlal an ti,” a tia.

³¹Khannisianlân, Jehua’n Rengpa, Israelhai Pathian dân chu a dik takin zôm nuam maka; Jeroboama سوالنا, Israelhai hruai سوالنا kha irnghil thei maka.

Jehua thina thu

³²Kha lai khan Israel ram chu Rengpa’n an chîntira, Suria rêng Hazaela’n Israel ram kha a hong doia.



³³Jordan dung nisua tiang panga ram, Gilead hai, Gad hai, Reubena hai le Manasea hai omna ram Arnon tui kôlhaia, Aroer, an khopui Gilead le Basan dênin a lâkpai tâka.

³⁴Jehua sintho danghai chu, a hrât lamhai chu Israel rêng hai thurchi irziakna bua a chuang vinga.

³⁵Jehua chu a thia, Samari khuua an phûm tâka. A nâipa Jehoahaza chu ar thûlin an lal nôka.

³⁶Kum sômhni kiriat sêng chu Samari khuua Jehua chu a inlal a ni.

2 Rêng hai 11

Juda rêng nu Athali

(2 Tsn 22.10–23.15)

¹Reng Ahazia thina thu a nu Athali'n an hriatin chu rêng in sêng mihai an thattirhaia.

²Ahazia nâipa Joasa irchia mi ithat zoi loi, rêng Jorama nâinu Jehosebi, Ahazia farnu'n a thup inrûk a ni. A dontu leh tempil hmun khata hin Athali hmu thei lina hrangin thup inrûk a nia, thatpai theilo a ni.

³Athali inlal zoro kum ruk sêng chu Jehosebi khan tempila thupin, a ienkol a ni.

⁴A kum sarina tena chu ochai inlaltak Jehoiada'n rêng hrungtu Keret sipai irzakhat hruaitu le rêng in hrungtu sipaihai chu a koibukhaia; an thiltho tum chu a hrilhaia, tempil sênga khomâkirsâmin a sa a tipuia, rêng Ahazia nâipa Joasa chu a hmua.

⁵Khan ama'n, "Nin tho tum chu hiang hin a ni: nin laia irngam nia hong hranghai hi hmun thuma sena, hmun khatin rêng in chu hrung ri sehai.

⁶"Hmun thuma hmun khatin Sur lampui hrung unglân; a dang hmun khathaiin a hrungtu hai hnunga lampui hrung roi,

⁷a hrungtu pâl hni Sabat nia irngam hranghaiin rêng in hrung hrangin tempila an iom hrang a ni.



⁸Reng Joasa hi khandai kêlsua saia chôiin nin ihrung hrang a ni, a fena hmun tina zui unglân; a hong nâi murdi chu lei thathai roi,” a tia.

⁹Sipai hruaituin Jehoiada thu suak chu an zôma, an sipai Sabat nia irngam hranghai le sintho hranghai chu an hong hruaihaia.

¹⁰Tempil sũa an ihrê insa rêng Davida ufei le a phohai chu sipai hruaituhai kuta an pêka.

¹¹Tempil maton tiang khandai kêlsua sai chôiin rêng in hrung hrangin ar tângtirhaia.

¹²Jehoiada'n Joasa chu a hruai suaka, rêng lukhum chu an khumtira, rêng om hrang dân hrang irziakna bu chu a pêka; Joasa chu sahriak a pola, rêng a chang tâka. Mipuihaiin an kut an inbên dur dura, “Reng chu dam sôt ri se,” an tia.

¹³Rengnu Athali'n a hrungtuhai le sipaihai irhâi an hriatin, mipui irbukna tempil tiang inrang takin a fe suaka.

¹⁴Reng thar chu rêng hai ngîrna hmun hranga inkungna tempil lûtna bang bula khan a lei ngîra. Sipai hruaitu le bekul tum theihaiin an le'rhuala, mipuihai chu raifân takin an len nui dur dura. Bekul an tuma. Athali chardongin, a puan an potthêra, “An ni ihuang kêng a ni hi te,” a tia.

¹⁵Jehoiada'n tempil irkulna sũa Athali that chu a sa ti maka, sipai hruaituhai kuang khan, “Sipai irtâng hai laia hruai suak unglân, a san hranga hong murdi lei thatpaihai roi,” a tia.

¹⁶Athali chu an chela, rêng in tiang panin an hruaia, sakor mikot an itina hmuna khan an thatpai tâka.

Jehoiada-hai thilsiam insat

(2 Tsn 23.16-21)

¹⁷Ochai, Jehoiada'n rêng Joasa le mipui chu Rengpa mi ni hrangin chong an kungtirhaia. Reng le mipuihai kêra thuthung a siama.



¹⁸Mipuihai chu Baal tempila an fea, an insiata, maichâmhai insiatin, millimhai chu an vîk siathai vinga. Baal ochai Matana chu a maichâm kôla khan an thata. Ochai Jehoiada'n tempil hrung hrangin mi a siaa.

¹⁹Reng hrungtu Keret sipai irzakhat hruaitu, rêng in hrungtu sipai hruaitu leh khan, tempil rengata rêng chu reng ina an hruaia, mipuiin an zuia. A hrungtuhai mikota Joasa chu a lûta, rêngtoihmunna khan a toi tâka.

²⁰Mipuihai chu a sâna raiinfânin, Athali chu rêng ina an that sikin, kho sûnga ite buaina om ta mah.

²¹Khanchu Joasa khom kum sari a niin Judai rama rêng a chang tâka.

2 Rêng hai 12

Juda rêng Joasa

(2 Tsn 24.1-16)

¹Israel rama Jehua kum sari an lal kuma khan Joasa khom Judai rama an lala, Jerusalema kum sômmînli an lala. A nu chu Berseba khuaa mi Zibi a ni.

²Ochai Jehoiada ikaihruai ngai a ni sikin a dam sûng chu Rengpa nuam lam tho ngai mi a ni.

³Khannisian nam danghai pathian biakna hmunhai chu masan thei loiin a oma, mihaiin thil an la inhlan thei mai a ni.

⁴Jehoiada'n ochaihai chu a koi bukhaia, tempila thilinhlan balamin thil pêk an hong chôî ngai a ni, senkhat chu thilinhlan khan pe ngêt hranga hril a ni sikin, lômna thilpêkhai chu sataka se hranga hril an ni.

⁵An sinhotuhaiin kha sumhai kha a chôitu chu ochai sinhotuhaiin dong an ta, tempil siam insatna'n an ihmang ngai a ni.

⁶Kum sômhni inthum Joasa an lal zoi khomin tempil chu siam insat loiin a om maia.

⁷Jehoiada le ochai danghai chu a koihaia, "Itina mo tempil nin la isiam insat mai loi hi? Atûn ata chu nin poisa dôn ngai kha dôn ta no roi, a siana nin isia ngêt hrang a ni ta; khan kêng tempil siam insat a ini ta hrang," a tia.



⁸Ochaihaiin mihai kuang ata tangka la ta loi le tempil siat siamtu ni loi chu a sa an tia.

⁹Ochai liantak Jehoiada'n bôm a siama, a sîng a'r-ôngtira, maichâm kôla tempil lûtna chang tiang a siaa. Tempil lûtna bula ochai lei ompu khan Pathian kuanga thilpêkhai lâk ngaitu khan a lei lâka, bôm sînga khan a thona.

¹⁰Bôm sînga sum a tam tena chu rêng lekha irziaktu le ochai Jehoiada chu an hongga, tangka sum chu an hâl inzôia, irkhîsiarin an siaa.

¹¹An irkhî zoiin chu tempil siam insatna sin enkoltuhai kuang an pêka, annihaiin sinthotu mistirihai hlo an pêka.

¹²Lungtukhai le a sintuhaiin tempil siam insatna hrang thing le lung an irchôka, poisa hmangna hrang hmuna poisa an pêkhaia.

¹³Tholôm poisa chu tangka ru le berbu hai, bekul le meiser enkolna hmangrua hai, sumru le rângachak thil chi dang dang siamna'n chu hmang nuam viat mahai.

¹⁴Sin thotuhai hlo le neinun irchôkna vaiin an hmang a ni.

¹⁵Sin thotuhai chu mi diktak an nia, an poisa hmang lam khom ite enpui nang mahai.

¹⁶Sual irbôlna le siatna man thilinhlan balama an thilpêkhai chu sia sa ni maka, ochaihai dongtum pial a ni.

¹⁷Kha laia khan, Suria rêng Hazaela'n Gath khua a rûna, an hnêa, Jerusalem khom rûn a tuma.

¹⁸Juda rêng Joasa'n a matona rêng Jehosafata hai, Jehorama hai le Ahazia haiin Rengpa ta hranga an thilpêkhai chu a lâka, ama ipêk khom belsain; tempil le rêng in sum bôma rângachak murdi chu a rêngin rêng Hazaela chu thilpêkin a pêk tâka, a sipaihai chu Jerusalem ata a hruai suakhai ta.

¹⁹Reng Joasa thiltho dang murdi chu Juda rêng hai thurchi irziakna lekhabua a chuang;



²⁰Joasa chu a rualhai inhni leh an khitphiarhaia.

²¹A thattuhai chu Simeata nâipa Jozakara le Somera nâipa Jehozabada an ni. A thia, Davida khopuia rêng thâna an phûma, a nâipa Amazia chu a'rthûlin an lal nôk ta.

2 Rêng hai 13

Israel rêng Jehoahaza

¹Ahazia nâipa Joasa chu Judai rama kum sômhni inthum an lalna kum a niin chu, Jehua nâipa Jehoahaza khom Israel rêngin an lala. Samari khuua, kum sômhleihni an lala.

²Reng Jeroboama Nebata nâipa angin Rengpa ta hrangin thil soal a thoa, Israelhai a hruai insualhaia, a thil saloi thohai masan nuam maka.

³Khasikin Israelhai chung a Rengpa ning an mura, Suria rêng Hazaela le a nâipa Benhadaba'n Israelhai chu inhnê hrangin a'rsabeia.

⁴Jehoahaza chu Rengpamakunga a chongchaia, Suria rêngin Israelhai deng an theitirhai lam a hmuin a chongchaina a zuang sâm nôka.

⁵Rengpa'n Israelhai kôla a san hrang a tîr pehai ngaia. Suriahai ata chu a sansuakhaia, irtharngam takin an om nôk ngai.

⁶Nebata nâipa rêng Jeroboama in sùng mihaiin Israelhai an ihruai insualna dikloi ata irlet nuam loiin, an la soal maia, Asera illim chu Samari khuua khan an la donsui mai ngaia.

⁷Jehoahaza chu sipai tômte a nei tâk sikin, sakor chung chuang mi sômringa, tâli sômkhât le kea fe sipai sîngkhât vai a neihai tâka, Suria rêngin an hnê hrai sikin, kea pil vâiphin sir angin a isirbe a ni.

⁸Jehoahaza thil tho danghai chu, a ihâi lam dân chu Israelhai thurchi irziakna lekhabua a chuang.

⁹A thia, a nâipa Jehoasa'n ar thûlin a inlal nôk a ni ta.

Israel rêng Jehoasa



¹⁰Judai rama Joasa kum sômthum sari an lal kumin Jehoasa chu Israel rêng a nia; Samari khuaa kum sômhleiruk an lala.

¹¹Ama khomin Rengpa mithmua thilsual, Israel rêng Nebata nâi Jeroboama'n Israelhai a hruai sualna kha masan thei loiin a sunzom maia.

¹²Jehoasa thil tho dang Judahai rêng Amazia le an irdoia, a ihâi lam dân thuhai chu Israel rêng hai thurchi irziakna lekhabua a chuang.

¹³Jehoasa chu a thia, Samari khuaa rêng hai thâna an phûma. A nâipa Jeroboama inhnina chu ar thûlin an lal nôk ta.

Elisa thina thu

¹⁴Deipu Elisa chu a thipuina hrangin natna tuangin zâlmuna a zâla, thi anai pe tâk sikin rêng Jehoasa'n a va pana; “Ka pa, ka pa, Israelhai inzôktu roiinpui tiin,” a châ tâka.

¹⁵Elisa'n a koia, “Thal ngul nei le thal chi dang hai ni pe hi roi,” a tia.

¹⁶Israel rêng kuang khan, “Thal ngulnei hi chel ro,” a tia. A chel zoiin chu Elisa'n rêng kut intûkin, “Sak tianga tukver kha inhong hi roi” a tia. an inhong pea.

¹⁷“Thal kha hei kâp ta” a tia. A hei kâpa, deipu Elisa'n, “Suria inhnê hrang Rengpa thal ni ni, Suriahai le Afek-ah irdoi nin ta, an hnêtu ni ni ti,” a tia.

¹⁸Elisa'n rêng kuang khan, “Thal dang kha la nôk ro,” a tia. A hei lâka, “Irnêng kha sun ro,” a tia, voithum a suna a mong tâka.

¹⁹Pathian mi kha a ning an mur pea, voirenga voiruk khom sun ro, Suriahai chu inhekhai zoi ni ti, voithum kêng ni inhnêhai hrang a tia.

²⁰Elisa chu a thia, an phûm tâka, kum a hong thar rikipin Moabhain Israel ram an hong doihaia.

²¹Mi inkhat hi a thia, phûm an irsoi lai takin Moab rual pâl khat an hong, Elisa thâna khan an van boka an intâna. Kha pa ruak leh khan Elisa ru a zu tînin chu a hong hring zela, a ngîr suak tâka.



Israel le Suriahai irdoina

²²Jehoahaza dam sâng chu Suria rêng Hazaela'n Israelhai chu deng an theitira.

²³Khannisianlân, Rengpa'n lung a thunghaia, insiat chit an ini hrang a nuam no sikin, Abrahamama, Isaka le Jakoba hai kuanga a thuthung chu a'rngaiinnatin, irnghil thei maka, atûn ten hin a la irngaisâng a ni.

²⁴Suria rêng Hazaela chu a thia, a nâipa Benhadada chu ar thûlin an lala.

²⁵Jehoahaza nâipa Jehoasa'n Hazaela nâipa Benhadada kut ata a pa Jehoahaza khua le tui an ilâkpai pehai chu a lâk kîr nôka, an irdoina voithum an hnêa, Israel ram khuahai chu a sutpai zoi tah a ni.

2 Rênghai 14

Juda rêng Amazia

(2 Tsn 25.25-28)

¹Jehoahaza nâipa Jehoasa chu Israel rêng nih a ta, kum hninaa khan Joasa nâipa Amazia chu

²kum sômhni ringa mi a niin Judai rama rêng a changa, Jerusalema kum sômhni kum kuak an lala, a nu chu Jerusalem khuaa mi Jehoadini a ni.

³Rengpa mithmua sin a thoa, a pu rêng Davida ang dôr a ni no khomin, a pa Joasa ithohai anga tho theiin a oma.

⁴Nam dang pathian an ibiakna hmunhai chu insiat ual maka, mipuihaiin thilinhlanin rimhoi an la hâl mai ngai a ni.

⁵Amazia an lal det ata chu, a pa thattuhai a thathaia.

⁶An nâihai chu thathai ma; Mosia dân buaRengpa thupêk, "Nâihai chu an pahai sual sika thathai hrang ni ma, an pahai khom nâi sual sikin that hrang ni ma, mi tin mâni sualna sik vaiin kêng that an ini hrang ti kha a izôm a ni.

⁷Amazia chu michi suakna hmuna, Edom mi in sângkhat a thathaia, Sela khua a doia an hnêhaia, ar hming khom Joktheel tiin a phuaa, atûn ten hi khua irhming a la ni mai.



⁸Amazia chu Jehoahaza nâipa Jehoasa, Israel rêng kuang palai a tîra, “Pasal le pasal ir-en ei ti,” a tia.

⁹Israel rêng Jehoasa’n Judahai rêng Amazia chu chong an thuana, “Lebanon tânga thing saiso kôla khan, ni nâinu kha ki nâipa dôngma hrangin ni pe ro, a tia. Ramsahai hin thing sùlhnahai hi an isir siat zoi hrang nêkin chu, a tia.

¹⁰Edom-hai kin hnê ta ni tia, ni irsorpui ok mani ta; lunghoi takin in sênga irngam chian ta ro, nangma le Judai ram siatna hrang buaina kêlsua ta no ro,” a tia.

¹¹Amazia’n ite bê’n bê maka, Israel rêng Jehoasa chu ar siam irfôk nôka, Juda khuaa khan, pasal le pasal an irtong tâka.

¹²Judahai chu dokin, an in tiang an rot tâk a ni.

¹³Israel rêng Jehoasa’n Juda rêng Amazia chu Beth-Semes-a khan an chela. Jerusalema an hruaia, kul bang Efraima inkhâr ata kul lampui kôina inkhâr dênin, mûk irzaminli tena hla chu an siata.

¹⁴Rengpa tempil sêng le rêng sum siana in tangka le rêngachak bêl le bûrhai a lâka, Samari khuaa tiang panin an fe tâka.

¹⁵Jehoasa sintho dang, a roiinpuina; Juda rêng Amazia leh an irdoina thuhai chu Israel rêng hai thurchi irziakna lekhabua a chuang.

¹⁶Jehoasa chu a thia, Samari khuaa rêng hai thâna an phûma, a nâipa Jeroboama inhnina chu ar thûlin an lal nôk tâka.

Juda rêng Amazia thina thu

(2 Tsn 25.25-28)

¹⁷Israel rêng Jehoahaza nâipa Jehoasa thi hnungin Amazia chu kum sômhleir ringa a la dama.

¹⁸Amazia sintho dang hai chu Juda rêng hai thurchi irziakna bua a chuang.

¹⁹Jerusalema, Amazia chu an khita, Lakis khuaa an tâna; khannisian a râlhaiin an irzûla an thatpai ta.

²⁰A ruak chu Jerusalem tiang sakorin an pêla; Davida khopuia, rêng hai thâna an phûma.



²¹Judai ram mihaiin a nâipa kum sômhleiruka, a nâi Uzia chu a pa Amazia irthûlin rêng an inchanga.

²²A pa thi zoiin Uzia'n Elat khua chu Judai ram an changtira, a isiam insa nôk a ni.

Israel rêng Jeroboama inhnina

²³Joasa nâipa Amazia chu Juda rêng kum sômhleiruka a ni kumin Jehoasa nâipa Jeroboama inhnina chu Israel rêng a nia. Samari khuaa kum sômminli an lala.

²⁴Rengpa mithmua thilsual a thoa, an pu Nebata nâipa Jeroboama thilsual tho, Israelhai a hruai insualna chu masan nuam maka.

²⁵Israel ram lei ni ngai, Hamath fena tianga tuipui thi kêra ram chu a lâk kêr nôka. Kha ram kha a siahlo Gath Hoper mi Amitaia nâipa, deipu bâia Rengpa Israelhai Pathianin a insâr kha a ni.

²⁶Israelhai ituang intak lam chu Rengpa'n a hmua, khit thung irkhol loi reng om mahaia, tûte changpuitu nei mahaia.

²⁷Rengpa'n Israelhai chu insiathai chit chu tum maka, a sanhai hrangin Jeroboama inhnina hi a zuang ihmang nôk a ni.

²⁸Jeroboama sintho dang murdi chu, irdoina hmuna a hâi lam le Damaska le Ferkâna Hamath, Israelhai ram a ilâkna thuhai chu Israel rêng hai thurchi irziakna lekhabua a chuang.

²⁹Jeroboama chu a thia, Samari khuaa rêng hai thâna an phûma, a nâipa Zakaria chu a'rthûlin an lal nôk tâka.

2 Rêng hai 15

Juda rêng Uzia

(2 Tsn 26.1-23)

¹Jeroboama inhnina chu Israel rama kum sômhni sari an lal kumin,

²Amazia nâipa Uzia chu kum sôm kum ruk mi a nia. Judahai rêng a nia, Jerusalema kum sômringa kum hni an lala. A nu chu Jerusalem mi Jekoli a ni.



³A pa Amazia angin Rengpa mithmua thil sa a thoa, nam dang pathianhai biakna hmun chu insiat nuam maka, mihaiin thilinhlânin mirimhoi an la ihâl mai a ni.

⁴Khasikin, rêng kha Rengpa'n a zuang tônia, a dam sũaga inphâr, a bingin an isia a ni ta.

⁵A nâipa Jothama'n rêng in sũagkua chu a hruaia, Judai ram chu a ilua a ni ta.

⁶Uzia sintho danghai chu Juda rêng hai thurchi irziakna bua a chuang.

⁷Uzia chu a thia, Davida khopuia rêng hai irphûmna thâna an phûma, a nâipa Jothama chu ama irthûlin an lal tâka.

Israel rêng Zekaria

⁸Uzia chu Judai rama kum sômthum kum riat an lal kumin, Jeroboama nâipa Zekaria chu Israel rêng a hong nia, Samari khuaa tha ruk an lala.

⁹Ama matona rêng danghai angin, Rengpa mithmua thilsual a thoa, Israel hai a ihruai insualna sual kha, masan thei loin.

¹⁰Jabesa nâipa Zaluma khan Zekaria chu a khitphiara, Ibleam khuaa a thata, ar thûlin an lal ta.

¹¹Zekaria sintho danghai chu Israel rêng hai thurchi irziakna lekhabua a chuang.

¹²Jehua kuanga Rengpa thuhiril, "Ni'rchi chu irlo minli dênin Israel hai rêng nih an ti," a iti angin a hong ichuk a ni ta.

Israel rêng Saluma

¹³Uzia chu Juda rêng, kum sômthum kuak a ni kumin Jabesa nâipa Saluma chu Israel rêng a nia. Samari khuaa tha khat an lala.

¹⁴Gadia nâipa Menahema chu Tirza rengata Samari khuaa a hong, Saluma chu a thata, ar thûlin an lal tâka.

¹⁵Saluma sintho danghai chu Israel rêng hai thurchi irziakna lekhabua a chuang.



¹⁶Tirza rengata Menahema a hong hro lai khan Tapua kua chu ama thu hnuaia an om nuam no sikin, an siatpaia, a sũaga omhai le a ram vêla omhai chu a thathaia, nupang inrâi lai hai khom an phing vun a sunthêr pehai a ni.

Israelhai rêng Menahema

¹⁷Uzia chu Juda rêng kum sômthum kuak a ni kumin, Gadia nâipa Menahema chu Israel rêng a nia. Samari khuaa kum sôm an lala.

¹⁸Rengpa mithmua thilsual a thoa, Nebata nâipa Jeroboama thilsual tho, Israelhai hruai insualna sual kha a dam sũagin masan thei maka.

¹⁹Reng Tiglat Pilesera'n Israel ram a doia, Menahema'n tangka sumru her sũagthum sũagminli a lei pêka, ni nuampui a tih iti sabein.

²⁰Menahema'n Israel mi irchonghai tangka sômringain a suthaia, kha sum kha a pêka; khanchu, Tiglat Pilesera chu an ram tiang a fe nôk ta.

²¹Menahema sintho danghai chu Israel rêng hai thurchi irziakna lekhabua a chuang.

²²A thia, an phũama, a nâipa Pekahia chu a'rthulin an lal nôk ta.

Israel rêng Pekahia

²³Uzia chu Juda rêng kum sômringa a ni kumin, Menahema nâipa Pekahia chu Israel rama an lala, Samari khuaa kum hni an lala.

²⁴Rengpa mithmua thilsual a thoa, Nebata nâipa Jeroboama thilsual tho, Israelhai hruai insual kha masan nuam loiin,

²⁵a sipai hruaitu inkhat Ramalia nâipa Pekahia'n Gilead kua mi sômringahai leh an khithaia. Pekahia chu Samari kua kul Argob le Aria kôla an thata. ar thulin an lal nôk ta.

²⁶Pekahia sintho murdi chu Israel rêng hai thurchi irziakna lekhabua a chuang.

Israel rêng Pekahia

²⁷Uzia chu Juda rêng kum sômringa inhni a ni kumin, Remalia nâipa Pekahia chu Israel rêng a nia. Samari khuaa kum sômhni an lala.



²⁸Rengpa mithmua thilsual a thoa, Nebata nâipa Jeroboama thilsual tho Israelhai hruai insualna masan loiin a oma.

²⁹Pekahia inlal zoro hin Assuria rêng Tiglat Pilesera hin Ijon khua, Abela Bethmaka, Janoa, Kades le Hazor khua hai lâkin, Gilead ram, Galili ram le Naftalia ramhai a lâk saa, mipuihai chu Suria rama a thonhaia.

³⁰Uzia nâipa Jothama chu Judahai rêng kum sômhni a chang kumin, Ela nâipa Hosea'n Pekahia chu khithphiarin a doia, a that tâka, ar thûlin an lal ta.

³¹Pekahia thiltho danghai chu Israel rêng hai thurchi irziakna bua a chuang.

Juda rêng Jothama

(2 Tsn 27.1-9)

³²Remalia nâipa Pekahia chu Israel rêng kum hni a chang kumin, Uzia nâipa Jothama chu,

³³kum sômhni ringa mi a nia, Judahai rêng a changa, Jerusalema kum sôm kum ruk an lala, a nu chu Zadoka nâinu Jerusi a ni.

³⁴A pa Uzia sintho angin Rengpa mithmua thil sa a thoa.

³⁵Nam dang pathian biakna hmun irsânghai chu masan loiin; mihaiin thil an la inhlan nôk maia, thil rimhoi an la ihâlna mai a ni. Tempil hmâr tianga inkhâr hi Jothama isiam a ni.

³⁶Jothama sintho danghai chu Juda rêng hai thurchi irziakna lekhabua a chuang.

³⁷An lal lai hin Rengpa'n Suria rêng Rezina le Israel rêng Pekahia chu Judai ram doi hrangin a hong tîr a ni.

³⁸Jothama chu a thia, Davida khopui rêng hai thâna an phûma, a nâipa Ahaza chu a'rthûlin an lal nôk ta.

2 Rêng hai 16

Juda rêng Ahaza

(2 Tsn 28.1-27)

¹Remalia nâipa Pekahia chu Israel rêng kum sômhleisari a ni kumin, Jothama nâipa Ahaza chu



²kum sômhni mi a nia, Juda rêng a changa. Jerusalema kum sômhleiruk an lala. A pu Davida angin Rengpa mithmua thil sa tho maka; Rengpanuam lam tho loiin a oma.

³ Israel rêng hai tho dân saloi a zui a ni. Ama nâipa inkhat chu hâlvôm thilinhlan hrangin a thata. Millimhai makunga ar hlana; Israelhai kôla Rengpa inhnotsuakhai nam danghai thil tho intirom tak an itho ngai a thopuihai a ni.

⁴Tâng tianghaia, thing inhripom tak takhai omna rikipa thilinhlanin, rimhoihai a hâla.

⁵ Suria rêng Rezina le Israel rêng Pekahia khan Jerusalema an doia; khannisianlân, inhnê loiin an oma.

⁶Hi zoro hin Edom rêng Rezina'n Ela kua a suthaia, Juda omhai chu an hnotsuakhaia, Edomhai chu Ela kuaa atûn ten hin an iom tâk a ni.

⁷Ahaza'n Assuria rêng Tiglat Pilesera kuang palai a tîra, "Ni siahlo, ni nâi ki ni, Suria rêng le Israel rêngin an ni doia, khasikin anni kut ata hi ni sansuak ta ro," a tia.

⁸Khan Ahaza'n Rengpa tempil le rêng sum siana in ata tangka le rângachak om chu Assuria rêng êsêl entîrna'n a thona.

⁹Assuria rêngin Ahaza ingên angin Damaska kua chu a sipaihai leh an doia, a lâka, Rezina chu a thata, a mihai chu a khopui Kir kuaa suakin a dônhaia.

¹⁰Assuria rêng Tiglat Pilesera hmu hrangin Ahaza chu Damaska kuaa a fea, Damaska kuaa maichâm chu a ena, ochai Uria a koia, an maichâm siam dân chu chipchiar takin an entira.

¹¹Uria'n Damaska kuaa maichâm ang zekin a siama, Ahaza hong kêr mân a siam zoia.

¹²Damaska kua ata a hongin chu, Ahaza'n maichâm siam zoi sai chu a hmua.



¹³Rengin hâlirvôm thilinhlanin, bu le bâl thil inhlanin, Uain thilhai le, a fâk nêk zongtu thisen nei thil inhlanhai chu maichâma khan an theka.

¹⁴Dâr maichâm, Rengpa makunga inhlan sai maichâm thar le tempil kêra khan a oma, a thonpaia, maichâm thar hmâr tiang khan a sia pea.

¹⁵Uria kuang khan, “Ki maichâm hi a lian ual a nia, zîng tiang le khohloi tianga hâlirvôm thilinhlan’ n hmang inlân, rêng hai le mipuihai hrang bîka thilinhlan’ n bu le bâlhai khomin hmang sa inlân, mipui uain thilinhlan khan bun sa ngai ro. Hâlirvôm le thil dang thisen khom hi maichâm hi inthek ngai ro. Dâr maichâm chu ki Pathian biakna hrangin hrê irthiangtir ro,” a tia.

¹⁶Uria’ n rêng thupêk angin a thoa.

¹⁷Reng Ahaza’ n dâr irbu irsût thei chu a kheka, tui siana tuibêl chu a lâka. Dâr tui pang sechal sômhleihni chung a om chu a sonpaia, lung irchuan chung a siaa.

¹⁸Assuria rêng hrât loi lungchukna’ n Ahaza chu tempil ata irthokin rêngtoihmun irkulna toihmun a lâk sona, tempila rêng lût na hrang bîka siam lampui an hrukpai tâka.

¹⁹Reng Ahaza sintho dang murdi chu Juda rêng hai thurchi irziakna lekhabua a chuang.

²⁰Ahaza chu a thia, Davida khopui rêng thâna an phûma, a nâipa Hezekia chu a’ rthûlin an lal nôk ta a ni.

2 Rêng hai 17

Israel rêng Hosea

¹Ahaza chu Judahai rêng kum sômhleihni a ni kumin, Ela nâipa Hosea chu Israel rêng a nia, Samari khuaa kum kuak an lala.

²Rengpa mithmua thilsual a thoa, matona Israel rêng hai ang dôra sual chu ni ual maka.

³Assuria rêng Salmanesera’ n a doia, Hosea khom a le’ rpêk saa, kum tin khâzana a chôipuihaia,



⁴Kum khat chu Hosea'n Aigupta rêng Soa kuang palai a tîra, a changpui hrangin a ngêna, a kum tin khâzana chôia Assuria kuanga a ipêk ngai kha pe nuam ta maka. Salmanesera'n kha thu kha an hriatin, Hosea a chela, zêl ina a khum tâka.

Samari khua siatna thu

⁵Salmanesera'n Israel ram chu a doi tâka, Samari khua kha ar huala; kum thum ar hual tena chu,

⁶Hosea kum kuak an lal kumin, Samari khua chu Assuria rêngin a lâk tâka; Israelhai chu suakin a hmanghai ta. Assuria rama a hruaihaia, senkhat chu Hela khuaa an omtirhaia, senkhat chu Gozan bial Habor tui kôla le Media ram khuaa an omtirhaia.

⁷Israelhaiin an Pathian Rengpa rengata thilsual an tho sikin, Samari khua chu a isiat a ni ta. Aigupta rêng kut ata a sensuaka, Aigupta rengata a hruai suaka; khannisian, pathian dang an biaksan ta.

⁸Nam dang, anni ata inhnotsuakhai omdân kha an lâka, Israel rênghaiin thil saloi tak an itho ngai kha an la tho nuam maia.

⁹An Pathian nuam loi lam tak Israelhaiin an thoa; an omna khua a chîn le a lian hmun tina, nam dang pathian biakna hmun irsâng an siamhai maia.

¹⁰ Mual le tâng tam dôrin, thingkung sa le inhrip omna dôra lung millim le pathiannu Aseri irlim thing an phun insiphaia.

¹¹Ram ata Rengpa inhnotsuak tho dân angin nam dang maichâmhaia khan rimhoi an hâla. An thilsual thohai khan, Rengpa chu a ning an inmurtir uala.

¹²Rengpa thupêk, millim biak loi hrang a iti zôm nuam loiin an oma.

¹³Rengpa'n Israelhai le Judahai hril hrangin a tirtôn le deipuhai a tîr ngaia, "Nin omdân intirom hi masan unglân, nin irchibulhai laia ki dân pêkna lekhabua chuang ki siahlo deipuhai ihril; ki thupêk le ki inkunghai zôm unglân, tiin.

¹⁴Khannisian, zôm nuam viat mahaia, an puhai angin tukullian an songa, an Pathian Rengpa chu iam nuam viat loiin an oma.



15A thupêkhai kha zôm nuam loiin an oma, an pahai le thuthung chu an mâksana, an irchutirna inkhat khom zôm nuam loiin an oma. Chanlamboi thu, millimhai biakin an oma, Rengpa'n an omdân la no roi" a ti an kôla nam danghai omdân an lâka.

16 Rengpa an Pathian thupêk murdi chu an hnôla, dâr thîrin sehrâtte irlim inhni an irkula, chubai an mûka. pathiannu Aseri irlim an siama, ârsi chubai an mûka, Baal sin an thoa.

17An nâinu le nâipahai khom nam dang pathian makunga hâlivôm thil inhlanin ram khohri le mitphil theihai leh irthopin. Rengpa mithmua thil saloi tinrêng tho hrangin an irpêk lût a ni; khasikin, a ning an inmurtir a ni.

18Israel mihai chungu Rengpa ninginmur, a hmu loina hmuna a'rzûlhaia, Judahai vai an iom tâk a ni.

19Judahai khomin an Pathian Rengpa thupêkhai zôm ual loiin, Israelhai tho dân angin an oma.

20Rengpa'n Israel murdi chu a ihnôlhai a ni ta, deng an theihaia, râl ichiom tak takhai kuta a pêkhaia, a hmu phâk loina hrang hmuna a tîrhai ta a ni.

21Rengpa'n Israelhai kha Judahai leh a'rsentirhai zoiin, Nebata nâipa Jeroboama chu rêngin an siama, Rengpa mâksan hrangin Israelhai chu a hrilhaia, sual saloi tak a inthotirhai a ni kha.

22Jeroboama hnung an zuia, thilsual a itho dôr, anni khomin an thoa.

23A siahlo deipuhai hmanga a ihril angin a hmuphâk loina rama a inhnotpai sabak a ni ta. Khanchu, Israel mihai chu Assuria rama atûn ten hin sala an intâng a ni ta.

Assuria-hai Israel rama an om

24Assuria rêngin Babulon hai, Kuth hai, Iva hai, Hamath le Sefarvaim khuua omhai chu a hruaia; Israel suaka hruaia omhai irthûlin Samaria rama an omtira; kha khuahai kha an luaa an iom a ni ta.

25An om phut laiin chu Rengpa biakna lam châng inhre loiin; kâmkeibaknei a tîra, a sêhaia.



²⁶Assuria rêng chu Samari ram khuaa mihriam siahaiin kha rama an Pathian dân inhre loiin an oma, khasikin chung Pathianin kâmkeibaknei a sê hranga a itîr a nih ti thu a hrila.

²⁷Rengin, “Suaka kin ichel ochai inkhat kha insuain lân, an ram Pathian dân irchutira, an laia oma irchutirhai hrangin tîr roi,” a tia.

²⁸Khanchu, Israel ochai inkhat Samari khua ata suaka an ichel chu a fea, Bethel-a a lei oma; khatak ata mihaiin Rengpa biak hrang dân ar chutir ta.

²⁹Samari rama om tâkhaiin anni millim an siamhaia. Israelhai Pathian biakna hmun hranga an isيامa khan an siaa, pól tamtakhai khomin an omna hmun tina millim an siamhai maia.

³⁰Babulon ata honghaiin Sukoth Benot illim an siama, Kuth mihaiin Nergal-a illim an siama, Hamath-haiin Asima illim,

³¹Iva mihaiin Nibaza illim le Tartaka illim, Sefarvaim haiin an pathian Andramelek le Anamelek illim kôla an nâinu le nâipahai hâlirvôm thilinhlan hrangin an thathaia.

³²Hi mihai hin Rengpa chu an ibiak tâk a ni, an laia tukhom ochai an changtirin chu nam dang pathian biakna hmun irsânga ochai sin an inthotira, an thilinhlan hrang an lei irfûk pehai ngai a ni.

³³Rengpa chu an biaka, an hongna ram tho dân angin an pathianhai an ibiak sa mai ngai a ni.

³⁴A vuanhai tena an tho dân milui an la itho mai a ni. Rengpa chu an ibiak taktak thei loi a ni, a dân le a thupêk, Jakoba irchi, Israel irtihai laia pêk chu an izôm loi a ni.

³⁵Israel mihai le Rengpa'n a thuthunga, “pathian dang biak no roi, chubai khom mûk no roi, an sin khom tho no roi, an kôla thil khom inhlanhai no roi.

³⁶A zoi tâkhai le thei taka Aigupta ram ata la suakhai thu hi zôm roi, chubai ni mûk nin ta, thil khom nin inhlan hrang a ni.



³⁷Nin ta hranga ki irziak, dân le thupêkhai hi nin izôm mai hrang a ni, pathian danghai thu nin izôm hrang ni ma.

³⁸Thuthung nangni ki isiam pehai hi nin irnghil viat hrang ni ma.

³⁹Kei nin Pathian, Rengpa thu hi nin izôm hrang a ni; khanchu nin râlhai ata nangni sansuak ki ti,” a tia.

⁴⁰Khannisianlân, kha mihai khan an mikuar lût no ni, an tho tum chu tho mai an ti.

⁴¹Hi mihai hin Rengpa chu chubai ar hmingin an imûk a ni, an millim chubai mûk an la irhnik ual a ni, an irchihai khomin atûn ten an la itho mai a ni.

2 Rênghai 18

Juda rêng Hezekia

(2 Tsn 29.1-2; 31.1)

¹Ela nâipa Hosea chu Israel rêng kum thum an lal kumin, Ahaza nâipa Hezekia chu

²kum sômhni ringa a ni kumin Judahai rêng a changa, Jerusalema kum sômhni kum kuak an lala. A nu chu Zekaria nâinu Abija a ni.

³A pu Davida anginRengpa mithmua thil sa a thoa.

⁴Nam dang pathian biakna hmun irsânghai an siata, an lungphunhai khom an khiakpaia, pathiannu Asera illim, thing an iphunhai khom an siatpaia, Mosia dâr mirûl illim siam Nehustan an iti khom kha an siatpaia, kha zoro dênin Israelhaiin dâr mirûl illim ta hranga hâlrivôm thilinhlan ngai a ni.

⁵Hezekia'n Rengpa Israelhai Pathian irnghatin a oma. Judahai rêng, ama ang hi om mahai, a om khom om ta no nihai.

⁶A Rengpa intûk indetin a oma, a he khom sêl ngai maka, Mosia kuanga Pathian thupêk kha satakin a izôm ngai a ni.

⁷Khasikin, Rengpa'n a ompuia, a sin thôna murdi hmang a ichang pe a ni. Assuria hai a doihaia, an thu la nuam loiin a oma.



⁸Filistia mihai a soisakhaia, an omna murdia a doihaia, kua lian le chin Gaza le a kôlvêla ramhai khom an mâk zoi ta.

⁹Hezekia kum minli an lal kumin, Hosea chu Israel rêng kum sari a lei ni tâka, Assuria rêng Salmanesera khan Israel ram a hong doia; Samari kua a hor huala.

¹⁰Kum thum an irhual kum Hezekia rêng kum rukna tena chu an lâk tâka, Hosea inlal kum kuakna a ni.

¹¹Assuria rêngin Israelhai chu suaka an hruaihaia, Assuria rama an hruaihaia, Gozan ram Habor tui kôlhaia le Media khuahaia an inomtirhaia.

¹²Israelhaiin an Pathian Rengpa thu an zôm no sikin, Samari kua chu an ilâk pehai a ni, thuthung a isiam kha an zôm nuam no sikin, Rengpa siahlo Mosia dân an zôm nuam viat no sikin, ar ngai khom irngai nuam mahai, a zôm an tum no sikin.

Assuria mihaiin Jerusalem an nuar

(2 Tsn 32.1-19; Isa 36.1-22)

¹³Hezekia kum sôm kum minli an lal kumin, Assuria rêng Senakeriba'n Judai ram kul neina khuahai chu a doia, an hnêhaia.

¹⁴Lakis kua Senakeriba khuaa om chu Hezekia'n, "Thil ki lei itho indik loi kêng a ni ta. Ni rotsan ta ro, ni izong tak nang pe ki ti," tiin lekha a thona. Assuria rêngin sumru her sîngkhat le rângachak her sângkhat chôi ro, a ti pea.

¹⁵Tempil le rêng sum koka sum om murdi chu a thona,

¹⁶Tempil mikota rângachak bêl illimhai khom a khoka, a kutin inkhâr irvôna rângachak kha a khoia, Senakeriba chu a thon tâka.

¹⁷Assuria rêngin Jerusalema Hezekia doi hrangin sipai tamtak a tîra, sipai hruaitu lian inthum, Tartana, Rab-saria le Rab-sakea hai a hruaihaia. Jerusalem an hong tungin chu dîl sak tiang ata tui lama puan irsûkna hmun fena lama khan an oma.



¹⁸Reng chu an insama, rêng in enkoltu Hilkia nâipa Eliakima lekha irziaktu Sibna, Asafa nâipa, thil irsinsia ngaitu Joa chu a zuang suaka.

¹⁹Rab-sakea'n a kuang khan, "Hezekia hi hong hril ro, rêng roiinpui Assuria khan hiang hin a ti, Tu mo ni la isabei, hianga ni la irsong!

²⁰Hmûrthiam ringotin sipai hrâtna irdoi theihai hi ni la ingam mai mo a ini? Assuria doi hrangin tu ngân mo nang a la hong san hrang?

²¹Aigupta'n ni la san a tih ni la isôn mai ma ni? thingluang ang mamaia om a ni, ni la inhriat loi ma ni, kiak a ta ni kut kêng nang a la isun pena hrang. Aigupta rêng Faroa chu ama iamtuhai chu ite bêa an ibe loi a ni ta.

²²Nin Pathian Rengpa chu kin irngat nin itihna mo a ini? Judahai le Jerusalem mihaiin Jerusalema vai Rengpa chu biak hrang a nih tiin hmun dangaRengpa maichâm le a biak in hmun insiattu chu Hezekia hi a ni.

²³Khanchu, ka pu Assuria rêng leh hin irngei unglân chu; nang a san hrangin sakor sângni, atûn zel nang pe ki ti, a tia.

²⁴Assuria sipai hruaitu laia nâipang tak khom pha mak chêia, sakor puakpêl, le sakor chung chuang theihai hi nang hong thon nuam viat no ni?

²⁵Nin ram kin hong rûna, ki ilâk hi Rengpa thu a ini loi ma ni? Ama Rengpangêtin, hong rûnin lân, la ving ro; a ni iti a ni," a tia.

²⁶Eliakima, Sebna le Joa haiin, "Suria chongin thu hril ro, kin inhriat thei; Juda chong chu hmang no ro, kul bang bula toihai hin an irngai nuam a ni," an tia.

²⁷Ama'n, "Assuria rêngin nangni le nin rêng Hezekia kuang ringot thuhiril hrangin nin ni itîr ma ni? ni ma, mipui atûna kul bang bula toihai le nangnihai ang dêna mizun le êk la fâk hranghai laia khom thu ki ihril a ni hi," a tia.

²⁸Khanchu, Rab-sakea a ngîra, Juda chongin a khêka, "Reng roiinpui Assuria thu hi irngai roi,

²⁹Hezekia'n nangni huang no ri se, keima ata hi zôk ual bîk no ni, rêngin a ti.



³⁰Rengpa'n ni san a ti. Assuria rêngin hi khua hi inhnê no ni, tiinRengpa iam hrangin nangni huang no ri se.

³¹Hezekia thu irngaiirsâng pe no roi, Assuria rêngin, irngeina siam unglân, hong suak roi, ki hong tung nôk mâka chu mâni grep ra fa unglân, mâni theipui ra lei tûng roi, mâni tui panga tui lei in mai roi.

³²Rengin ram sataka, grep irhuan satak taka uain tamna rama nangni lan omtir a ti, baidia siam hrang bu sana rama, oliv kung, le a hriak, le khuaitui tamna rama nangni inomtir a ti, a thu nin zômin chu a hring, a damin la suak nin ta, thi no chin ni. Rengpa'n ni sansuak ngêt a ti, tiin Hezekia'n nangni huang no ri se.

³³Assuria rengata irthokin a ram san suakpui thei hrang nam, tu Pathian mo om?

³⁴Hemat le Arpad pathianhai kha khôn mo an om zoi ta? Sefarvaim pathianhai Hena le Iva pathianhai kha khôn mo an om zoi ta? Samari khua sansuak thei mo an om?

³⁵Hi ram murdia pathianhai hin itika khan mo an ram an idok ngai? Rengpa khomin Jerusalem hi sansuak thei ual ni mo?" a tia.

³⁶Rengin, tûte'n sâm no roi a ti sikin, an dâihreka bâi khat khomin ite sâm mahai.

³⁷Reng in sûng enkoltu Hilkia nâipa Eliakima changpuitu Sebna irsinsiatu Asafa nâipa Joa haiin an puan an inpotthêra, an hongga, Rab-sakea thu chu Hezekia an hril ta a ni.

2 Rênghai 19

Rengin Isaia ar donna

(Isa 37.1-7)

¹Reng Hezekia'n kha thu kha an hriatin chu a puan an potthêra, bora puan a sila,Rengpa tempila a lûta.

²Reng in sûng enkoltu Eliakima, changpuitu Sebna le ochai laia ulianhai chu bora puan sil deipu Isaia kuang a tîra.



³Reng Hezekia'n hiang hin a tia. "A vuan hin kin ta hrangin lungzîngna a itung a ni ta, an ni hmumâka, an ni hnuaisia ok ta a ni. Nâi nei zoro a tunga nuhai an irzal ngô ngô angin kin iom a ni ta.

⁴Pathian hring êsêl hranga Assuria rêng itîr, Rab-sakea ihril ang kha, Rengpa ni Pathianin nang len hre suak a ti; Rengpa ni Pathianin inhriatin deng nan theitir khomsian, kin mihriam a la damhai ta hrangin, nangma'n chongchai ro," an va tia.

⁵Reng Hezekia mi a itîrhai khan Isaia kuang an va tunga,

⁶Isaia'n an kuang, "Rengpa'n hiang hin a ti; Assuria rêng siahlohain an ni imanêp dân thu ni inhriat kha chi ual no roh.

⁷Irgai ro, a lungrîl indôptir ki ta, thu nan hretir ki ti; a rama kêr nôk a ta, a ram sînga ngêt chemseiin thatpai an ti, tiin nin pu makunga hril roi," a tia.

Assuria rêngin a rai nôk

(Isa 37.8-20)

⁸Rab-sakea chu a chuma, Lakis ata Assuria rêng chu a'rsona Libna khua a doi ti an hriatin chu, kha lam kha a pana, a va hmua,

⁹Ethiopia rêng Tirhaka thurchi Assuria rêng chu an hrila. Ama doi hrangin a hor thok a nih ti an hriatin Hezekia kuanga tirtôn a tîra, lekha a thona,

¹⁰"Judai ram rêng Hezekia kuang, ni iam ngai ni Pathianin Assuria rêng kuta Jerusalem chu pe no ni, tiin nang ni huang no ri se.

¹¹Assuria rênghain a ram lua murdia an sinthohai le, an ram an insiat thu chu nin hriata. Nangma hi mi nin zôk thei ual bîk hrang ma ni?

¹²ka pahain an insiathai nam Gozan, Haran, Rezep le Telasar-ah om Edom mihai kha an pathianhain an isan theihai hrang mo?

¹³kho tiang mo Hamath hai rêng, Arpad rêng Sefarvaim khuaa om rêng Hena rêng Iva rênghai kha an iam ta va ti ro," an tia.

¹⁴Rual koi fe lekhaton chôitu kha Hezekia'n a lei hmu'n chu a lekhaton a tepa, Rengpa tempila a lûta, Rengpa makunga khan a phara.



¹⁵ Hezekia chu Rengpamakunga a chongchaia, “O Rengpa, Israelhai Pathian, cherub chung a toi, nang hi Pathian tak chu ni ni, ram murdi luatu le roirêltu ni nia, irnêng le irvân khom hi nangma isiam a ni.

¹⁶Rengpa ni mikuar sungin lân irngai ro. O Rengpa, mengin lân, hei en ro; Pathian hring hnuaisia hranga Senakeriba’n thu a ihrilhai hi irngai ro.

¹⁷O Rengpa Assuria rênghaiin nam tin an doia, an ramhai an insiat pehaia.

¹⁸An pathianhai chu meia an hâl pehaia, khahai kha chu pathian chu ni mahaia, mihriam kuta siam thing le lung mamai an ni, siat thei thil chu an ni.

¹⁹O Rengpa, hi a kut ata hi ni sansuakin lân; khanchu, rammual hmun tina mihaiin nang vai hi Pathian Rengpa ni nih ti nan hrethei an ti,” a tia.

Reng kuanga Isaia chongbe

(Isa 37.21-38)

²⁰Amoza nâipa Isaia’n Hezekia kuanga mi a tîra, a kôla ni chongchaina chungchâng le Assuria rêng Senakeriba chungchânga

²¹Israelhai Pathian Rengpathuhiril chu, hi hi a ni. Zion nâinu’n nang en nuam maka, nang an nuisana. Jerusalem nâinu’n nang a rotsana a lu nang an thik khuma.

²²Tu mo nin nuisana, nang a inlâp pe? tu hrangin mo ni hnuk irhâi ni inringtir? Tu kôla mo mualphoi ni irlâk loi? Israel mi irthianghai lai ata a ni.

²³Ni siahlohai hmangin “Rengpa ni hnuaisiaa, tâli tamtak le tâng irsânghaia ni luaia, Lebanon tâng hmun tin ki’rfanga, Sidar thingkung irsâng ki ngôta, Meisâr thing sa zâthai ki iphûr ngai a ni. A tâng irsânghaia ramrîlhai khom ki’rfang vinga.

²⁴Tui ki sun suaka, ki in ngai a ni, Aigupta tuihai ki kezaphain ki sira. ki sir chîl ta,” ni tia.

²⁵Tian ata ki lei itho nuam a nia, lan hre mak che mo? Atûna thil hong tung hi tiana ki lei irêl zoi tâk a ni. Kulnei khuahai nin siatpaia.



²⁶A sũaga omhai an thâiindôp lam le beidong taka mual an inphoi dân, ram le muala hloisûl pâr In chung laia phâizôl anga omhai le, phâivua lum isêm inthêmhài khom ki lei irêl sai tâk a ni.

²⁷Ki chungà ni hla irkhenhai, ni toi le ni lûthài khom ki irêl sai a ni.

²⁸Ki chungà hin ni chiar ngaia, ni mualinphoi dân ki len hriat ta, ni hnâra hin hnâr infôktirna irbun ki ta. Pat ritui hmuam angin, ni hongna lam tiang kaizang ki ti tiin.

²⁹Reng Hezekia kuanga, “Hi hi ni hrangin irsinsiana ni a ti. Kumin hin farhli tûng nin ta, nakum khom kha farhli ngêt kha la tûng nin ti. A kum thumna tena chu ansuangrua song nin ta, a ra irhmal ta nin ti. Grep ling unglân, a ra fa ta nin ti.

³⁰Judai rama la dam sunhai chu theikung, inthûk taka irzungthâka ra irkukhak ang la ni an ti.

³¹Jerusalem ata la dam suak hrang an oma, Zion tânga a thi zoi loi an iom ngêt hrang a ni. Rengpa sathnem irngaina’n hi thil hi a itho ngêt hrang a ni.

³²Khasikin Assuria rêng chungchângà Rengpa’n hiang hin a ti, “Hi khopuia hin lût no nia, sîrkhat khom sir no nia, pho leh khom doi no nia, irnêng irkulna khom tuk ual no ni.

³³A hongna lama ngêt kîr nôk a ta, kua lût viat no ni. Rengpa thu suakin a ti.

³⁴Hi kua hi keima le ki siahlo Davida sikin hrung ki ta, ki inzôk hrang a ni,” a tia.

³⁵Kha zâna khan, Rengpa tirtôn chu Assuria hai tuala khan a fea, mi nuaikkhat le sîngriat a thathaia, zînga an thoiin chu mi ruakin a sip zit tâka.

³⁶Assuria le Senakeriba chu an chîna, Ninevi khuaa an om ta.

³⁷Nisroka tempila Pathian a biaka, a kûn lai takin a nâipa Andramelek le Sarezera haiin khandaiin an tuk thata, Ararat rama an rotsan tâka. A nâipa Esarhadona chu ar thûlin an lal nôk ta.



2 Rênghai 20

Hezekia damloi dam nôkna

(Isa 38.1-8; 2 Tsn 32.24-26)

¹Kha laia khan rêng Hezekia chu thi hrang angin a naa. Amoza nâipa Isaia'n a hong pana. "Rengpa'n hiang hin a ti, nin sêngkua rêl infel ro, ni thi hrang a ni sikin, dam suak ta no chi ni," a hong tia.

²Hezekia'n bang tiang a'rheia, a chongchaia:

³O Rengpa ni mithmua hin dik takin ki om ngaia, lungrîl irthiang irputin thil sa ki tho ngaia, irngaihoi takin inhre mai ro, a tia, a chap ngûi ngûia.

⁴Isaia chu a fea, rêng in tual a khêlin an Rengpa mihai chung a roirêltu Hezekia kuang khan Rengpa'n a tîr kîr nôka.

⁵"Kei Rengpa ni pu Davida Pathian hin ni chongchaina kin hriata, ni mitrithi tâk ki hmua, nan damtir ki ta a vuan ata sîn thum zoia chu tempila fe thei ni ti.

⁶Kum sôm kum ringa ni dam sêng kum nang ki bôk pe. Assuria rêng kut ata nangma le ama khua hi kei leh ki siahlo Davida zârin inzôk ki ti, a ti va ti ro," a tia.

⁷Isaia'n, "Theipui ra hmin hor hmal roi," a tia. Thei ra hmin chu an lâka, a sakhuaia khan an khop pea, a hong dam pe ta.

⁸Reng Hezekia'n, "Rengpa'n nin damtir a ta, sîn thum zoia chu tempil fe thei ki tih iti, itina kin inhriat thei mo?" a tia.

⁹Isaia'n, "Rengpa'n nang indam a tih ti inhriatna hrang irsinsiana nan entir a ti, nir hlîm so kal sôm a fe mo ni nuam kal sôma kîr nôk mo, ni inuam tak inthang ro," a tia.

¹⁰Hezekia'n, "kal sôma infetir chu a olhrai ta, kal sômin kîr nôk ri se," a tia.

¹¹Isaia chu a chongchaia, rêng Ahaza irhlîm siam chu Rengpa'n kal sôm an kîrtira.

Babulon rêng palai

(Isa 39.1-8)



¹²Kha laitaka khan Babulon rêng Balada'n nâipa Merodak-baladana'n Hezekia chu a dam nôk tah ti an hriatin thilpêk le lekha a hong thona.

¹³Hezekia chu a sân a lôma, a sum siana inhai an entira, a sumru, le rângachak hai, a mosola le mirimhoi danghai, a râlthuam hrêna inhai le a ram sînga hmun poimohai inentir loi zel nei maka.

¹⁴Deipu Isaia chu Hezekia kuanga a fea, "Hi mihai hi kho rengata hong mo an ini, imo an hong ihril?" a tia. Hezekia'n, "Ram hlatak, Babulon ata hong an ni," a tia.

¹⁵Isaia'n, "Reng ina i zât thil mo an hmu?" a tia. Rengin, "Itinrêng an hmu ving thil hrênahai khom itinrêng hmu loi zel nei mahai," a tia.

¹⁶Isaia'n Hezekia kuang, "Irngai roh Rengpa thu hi:

¹⁷ ni ina thil om murdi, ni pahaiin a vuan sîn tena an ihrêkhômhai hi Babulon-a an lâk ving zoro hong tung hrang a ni, ite mâksan ni no nihai, Rengpa'n a ti.

¹⁸ Nangma inei ngei, ni nâipasalhai chel an ta, an til la pehai an ta, Babulon rêng sintho pe ta an ti," a tia.

¹⁹Reng Hezekia chu a dam sîng kum chu raifân takin om a ta, an izôk hrang tiin ar bêa, "Rengpa thu ni zuang intung chu raifân a om" a tia.

Reng Hezekia thi thu

²⁰Reng Hezekia thil tho danghai chu, a hâi lam le tui lût thei loina hmun Akera khuaa tui a inlûtna thu hai, Juda rêng hai thurchi irziakna lekhabua a chuang ving.

²¹Hezekia chu a thia, a nâipa Manasea chu ar thûlin an lal nôk ta.

2 Rêng hai 21

Manasea Judahai rêng

(2 Tsn 33.1-20)

¹Kum sômhleihni a ni kumin Manasea chu Judahai rêng a chang irphuta, Jerusalema kum sômringa an lala. A nu chu Hezibi a ni.



- ² A mipuihai laia, Rengpainhotsuakhai nam tho dân intiromtak takhai khom Manasea'n a thoa, Rengpamithmua thil saloi a thoa.
- ³ A pa Hezekia insiat, nam dang pathian biakna hmun irsânghai chu a siam insata, Baal ta hrangin maichâm a siama, Israel rêng Ahaba ang khan Aseri irlim a phuna, irvâna ârsihai khom a biak ngaia.
- ⁴ Jerusalem khua hi nin ni ibiakna hrang hmun chu a ni; tiin Rengpa'n a inthang a ni; kha tempila khan maichâm chi tinrêng a isia a ni.
- ⁵ Tempil sũaga tentan inhnia khan irvâna ârsihai hrang maichâm ar tâng inbita.
- ⁶ A nâipa inkhat chu hâlirvôm thilinhanna hrangin a thata. Kutzia en le tasân a hmang uara, ramkhohri le mithi kaithoi theihai an phûthai ngaia. Rengpamithmua thilsual tamtak a thoa, a milung an natir pe a ni.
- ⁷ Davida le a nâipa Solomona kuanga Rengpa'n, "Hi Jerusalem khuaa tempil hmun hi Israel nam sôm le nam hnihai laia ram murdihai ni biakna hmun hranga ki inthang a ni a ti, tempil sũaga khan Aseri irlim a iphun a ni.
- ⁸ "Israel mihaiin ki thupêkhai an zôma, ki dân, Mosia ihril kha an zôm zita a niin chu an irchihai hi, ram ki ipêkhai ata hi inhnothai no ning, a ti a ni.
- ⁹ Judai rama mihaiin Rengpa thu zôm loiin, an matona Rengpa inhnotsuakhai nam tho dân anga thilsual ual tho hranga Manasea'n a ihruai a ni.
- ¹⁰ Rengpa'n a siahlo deipuhai hmangin hiang hin a hril.
- ¹¹ "Manasea'n thil intiromtak takhai, hi rama an om mân ata om Kanaan mihai itho ngai nêka intirom a thoa, millim siamin Judahai a ihruai insual a ni.
- ¹² Khanchu, kei Rengpa, Israelhai Pathian hin, an hriat murdihaiin a'rkhêl an ti thei hrang dôrin Jerusalem le Judai ram siatna intungtir ki ti.
- ¹³ Samari khua le Israel rêng Ahaba ki isoisak ang khan, Jerusalem khom soisak ki ti. Khêng ei irsûkinfâia ei inkhub ang hin Jerusalem khom a sũaga omhai hi irsûkinfâihai ki ti.



¹⁴Ki mi, la thi zoi loihai khom hi hnôlhai ki ta, an râlhai kuta la pe ki ta, khanchu an nuam takin soisakhai an ti.

¹⁵An irchihai Aigupta ram ata an hong suaka irthokin, atûn ten hin, an la itho insual a ni! ki iti anga om loiin ki ningmak an la itho mai ang hin ki mihai a sate'n la soisakhai,' ki ti.

¹⁶Manasea'n ite ti loihai a that intamhaia, Jerusalema thisen a iluang hluk a ni. Juda mipuihai chu millim biak an uartirhaia, Rengpa ta hrangin thilsual an itho a ni ta.

¹⁷Manasea sintho dang thilsual a ithohai chu Juda rêng hai thurchi irziakna lekhabua a chuang.

¹⁸Manasea chu a thia, a rêng irhuan, rêng Uzia irhuan sînga an phûma, a nâipa Amon chu a'rthûlin an lal nôk ta.

Juda rêng Amon

(2 Tsn 33.21-25)

¹⁹Amon chu kum sômhni inhni a ni kumin Judahai rêng a changa, Jerusalema kum hni an lala, a nu chu Jotba khuaa mi Haruza nâinu Mesulemiti a ni.

²⁰A pa Manasea angin Rengpa mithmua thilsual a thoa.

²¹A pa tho dân a lâka, a millim biak ngai a biak uara,

²²An irchibulhai Pathian Rengpa chu a hnôla, Rengpathupêkhai zôm nuam loiin a oma.

²³A ituanghai laia mihaiin an khitphiara, rêng in sînga an thata.

²⁴Judahaiin Amon nâipa Josia chu ar thûlin rêngin an siam nôk ta.

²⁵Amon sintho danghai chu Juda rêng hai thurchi irziakna lekhabua a chuang.

²⁶Amon chu Uzia irhuan thâna khan an phûma, a nâipa Josia chu a'rthûlin an lal nôk ta.

2 Rêng hai 22

Judahai rêng Josia

(2 Tsn 34.1-2)



¹ Josia chu kum riat a ni kumin Judahai rêng a changa. A nu chu Boskat khuaa mi Adaii nâinu Jedidi a ni.

² Josia chu Rengpa nuam lamin a oma, a pu Davida omdân a lâka, Pathian dânhai kuluktakin a zôm irkiptir a ni.

Dan Lekhabu hmu suakna

(2 Tsn 34.8-28)

³ Kum sômhleiriatna an lal kumin Josia'n a'rziakpuipu Safana, Azalia nâipa, Mesulam tupa Rengpa tempila a tîra.

⁴ "Ochai inlaltak Hilkia kuang fe'n lân, tempil mikot bula mipuihai tholôm ochaihai irfuang kha i dôr mo a ni ta tiin var donhai roh.

⁵ Tempil siam insatna hranga mi an inthanghai kuta pehai sian, anni haiin,

⁶ mistiri hai le, in sintu dang le lungtukhai kuanga pe ri sehai; tempil siam insatna hranga thing le lung ircho ri sehai.

⁷ Hi mi ei inthanghai hi mi iamom tak tak an ni, ite enpui ual nang no nihai," a tia.

⁸ Ochai inlaltak Hilkia'n a'rziakpuipu Safana kuang, "Tempil sînga dân lekhabu ki man," a tia. a pêka, Safana'n a tep inlanga,

⁹ Reng kuang a hong kîr nôka, "Ni siahlohain in sînga tangka an iman kha an phora, Rengpa tempil siam insatna hranga mi an inthanghai kuta an pêkhai ta," a tia.

¹⁰ Reng kuang khan, "Ochai Hilkia khan hi lekhabu hi a ni lei ipêk a ni," a tia. Reng inhriat hrangin Safana'n a tep pea.

¹¹ Rengin dân lekhabu thu kha an hriatin chu a puan an potthêra.

¹² Ochai Hilkia Safana nâipa Ahikama, Mikaia nâipa Akbora, irziaktu Safana rêng in enkoltu Asaia hai makunga rêngin,

¹³ "Fe unglân mipuihai le Judai rama mi murdihai hranga hi dân bu irchutirna chungchânga hin Rengpa ni var don pe roi. Kin puhaiin chu hi dân bua irziakhai hi ite bêin bê ngai mahaia, tho hrang tihai hi tho nuam ngai mahai sikin, Rengpa chu a ning an mur a ni," a tia.



¹⁴Ochai Hilkia, Ahikama, Akhora, Safana le Asaia hai chu deipunu, Mika nâipa Saluma dôngma Huldaii kuang an fea. A pasal Saluma hi Tikva nâipa a ni, rêng silkai enkoltu a nia, Harhasa tupa a ni, Jerusalem kho thara om an ni.

¹⁵An kuanga khan, “Israelhai Pathian Rengpa’n hiang hin a ti, nangni hong tîrhai chu hrilhai roi,

¹⁶Juda rêngin a itep lekhabua chuang ang khan Jerusalema omhai chu a sate’n soisakhai ki ti.

¹⁷An ni rotsana, pathian dang kuanga thil an inhlana, an sintho dânhai hi ki ning a inmur a ni. Jerusalem chung a hin ki milung ir-al a ta, doi thei ta no ni. Rengpa’n a ti.

¹⁸Rengpa irdon hranga nangni zuang tîrtu rêng kuang khan hril roi, Israelhai Pathian Rengpa’n lekhabua thu chuanghai chu ni’rngaiirsânga,

¹⁹Jerusalem le a vêla omhai ki soisak dân hrang nin hriata, a na ni iti a ni, Rengpamakunga nir hnuai, puan inpotthêrin ni chapa. En irkhêltak le vânnisal irkhêltak tong hrangin khopui chu soisak ni a ti; khannisian, ni chongchaina chu kin hriata.

²⁰Ni thi mâka chu Jerusalem chu soisak no ning, irtharngam takin nang chu la thi ni tih a ti,” a tia. Reng kuanga kha thu kha an hong hril nôk a ni.

2 Rênghai 23

Judai rama nam dang pathian an biak dân

(2 Tsn 34.3-7,29-33)

¹Rêngin Judai le Jerusalema upahai a bûmhaia.

²Judai le Jerusalema om ochai le deipuhai, mipuihai, inriang le irchonghai, an rêngin tempila an hong a, kha tempila an ihrût thuthung bu kha rêngin an rênga inhriat hrangin a tep suaka.

³Ngîrna hranga an isيامa khan rêng kha a ngîra, Rengpa hnungzuia a thupêk zôma, a thu’nkung le a thudikhai zôm hrangin Rengpa kuang thu an inkunga. Lungrîl pêk tak le diktakin thuthungna thu lekhabua chuanghai pom ngit



hrangin an inkunga. Mipui murdihai khomin kha thuthung kha pom ngit hrangin an inkunga.

⁴ Reng khan ochai inlaltak Hilkia le a hnuaia ochai danghai le mikot hrungtuhai khom Rengpa tempil sũaga Baal hai Aseri le vãn ârsi an ibiakna thil tuidung irhõra khan a hâla, a'rvâm kha Bethel-a khan an chõitirhaia.

⁵ Juda khopui le Jerusalem vêla nam dang pathian biakna hmun irsũaga thil inhlantu hranga Juda rênghaiin ochai an lei isia, Baal kôla, misa le tha kôlhaia ârsi le irvâna thil omhai kôla thilinhlan murdi kha a mâka.

⁶ Rengpa tempil sũaga pathiannu Aseri irlim an iphun kha a lâka, Jerusalem dâi Kidron irhõra khan a hâla, a'rvâm chu an hmet india, vântâng thânmuala khan an thek ta.

⁷ Tempila notizuarhai omna, Aseri biakna hranga, nuhaiin puan an ikhôngna hmun khom a set pehaia.

⁸ Judai ram sũaga khopui tamtaka Geba le Berseba kâra om ochaihai a hruaihaia, nam dang pathian ta hranga thilinhlan hmunhai an siat pehaia, khopui lûtna vei tianga inkhâr, khopui optu Josua isiam mikot kôla maichâm kêlhai illim an ibiak ngai khom an siat pehaia,

⁹ khaanga ochai lei changhai kha chu tempila Pathian biak phalhai maka, an rual ochai danghai kôla an bai chol pol loi man tum ti no chu fa thei mahai.

¹⁰ Molekhai, an nâipasalhai an that thei ta loi hranga Hinom irhõra Tofet kha a soisak ngheka.

¹¹ Juda rênghaiin misa ta hranga thil inhlân hrang sakor an ipêkhai kha chu tempil inkhâr tuala khan, sorkâr mi liantak Nathan-meleka omna in ata hla ok loiin an siahaia. Khahai kha hrêpaiin, a kaia an ikai ngai tâli chu a hâlpaia.

¹² Reng in le Ahaza in chung inzõla an maichâmhai le tempil sũaga maichâm inhni Manasea isiamhai leh khan a sutpaihaia an siat pehai vinga, Kidron irhõra a paia.



¹³ Jerusalem nisua tianga oliv tâng sim tianga Sidon pathian intirom Asterothi illim, Moab pathian intirom Khemosa, Amon-hai pathian hmumâkom tak Milkoma illim an biakna hrang hmun irsâng Israel rêng Solomona isiamhai kha maimang an changhai vinga.

¹⁴Josia'n lungphunhai chu ar chûm khoihaia, pathiannu Aseri irlim kôla tûngsam thing an iphun khom a tan irkita; kha hmunhaia khan mihriam ru a sia pehaia.

¹⁵ Israelhai hruai insualtu Nebata nâipa Jeroboama'n bethel khuaa Pathian biakna hranga maichâm a isiamhai khom Josia'n an siatpaia, a lunghai an khoihaia. Aseri irlim khom a hâlpaia.

¹⁶ Josia'n a hei thîr vêla, mual inkhata khan thân a hmua, a choia, mihriam ruhai kha ar fuanga maichâma khan a hâla, Khaanga thil hong om hrang chu matona kût hmang laia rêng Jeroboama'n maichâma thil ar hlan laia deipu'n thil a lei insîr kha Josia'n a hei insâp vêlin chu kha laia thu lei insîrtu

¹⁷ deipu thân a hmua, "Tu thân mo?," a tia. Bethel khuaa mihaiin, "Judai ram ata hong deipu, hi ni thil thohai len sîrtu thân a ni," an tia.

¹⁸Josia'n, "Inthem viat no roi, a ruhai khom hiang hin om chian ri se," a tia. Khanchu a ruhai khom tûte'n inthem loiin an oma, Samari khuaa mi deipu ru khom ite inthem mahai.

¹⁹Israel ram hmun tina Israel rênghaiin nam dang pathian biakna hmun siamhai an siata, kha rênghaii khan kêng Rengpa milung an inchuktir loi a ni. Bethel khuaa maichâm a insiat ang khan an siatpaia.

²⁰Khaanga sinhotu ochaihai a thata maichâma khan mihriam ru a hâla, Jerusalema a hong kîr nôk ta.

Josia'n Ferkân kût a hmang

(2 Tsn 35.1-19)

²¹Thuthung lekhabua irziak angin an Pathian Rengpa chôindômna'n mipuihai chu ferkân kût hmang hrangin Josia'n a ti pehaia.



²²Hi zoroa kût roiinpui hi Israel rêng, Juda rêng tu roirêlna hnuaia khom la om ngai ma.

²³Khaangin Josia rêng kum sômhleiriatna kuma hin Jerusalema ferkân kût an ihmang a ni.

Josia thilsiam insatdanghai

²⁴Ochai inlaltak Hilkia'n tempila dân lekhabu a imana chuang, dânhai chu an zôm theina hrangin Josia'n Jerusalem khua le Judai ram ata kutzia en theihai mi chinginrîla thi len tumhai ngai, in sêngkua pathian lei biakhai, millim le nam dang pathian biakhai khom an paitirhaia.

²⁵Lungrîl taka thutakin theitôp insuakinRengpa sintho le Mosia dân zôm hi tian ata tu rêng khom la om ngai mahai, hi zoi khom hin a om khom om ta no nihai.

²⁶Reng Manasea sintho sika khan Judahai chungu Rengpa ning an mura, atûn ten khom hin a la inmur mai a ni;

²⁷“Israelhai chungu ki itho ang kha Judahai chungu khom tho ki ti, Judahai chu ki ihmu phâk lolina rama inhnotsuakhai ki ti. Ki omna thân hmun, ki inkung tempil chu suaksan ki ti,” a ti a ni.

Josia zoro hnungkhôn

(2 Tsn 35.20–36.1)

²⁸Josia sintho danghai chu Juda rêng hai thurchi irziakna lekhabua a chuang.

²⁹Josia inlal lai hin Aigupta rêng Neko khan a sipaihai Eufrates tuia Assuria rêng changpui hrangin a hruaia. Reng Josia hin lei khâl a tuma. Megido le an irdoina hin a thi ta a ni.

³⁰A rualhaiin a ruak chu tâlia an bângu an chôia, rêng hai thâna an phûm ta. Judahaiin Josia nâipa Jehoahaza kha rêngin an inthanga, hriak an pol tâka.

Juda rêng Jehoahaza

(2 Tsn 36.2-4)

³¹Jehoahaza chu kum sômhni inthum a niin Judahai rêng a changa, Jerusalema tha thum an lala. A nu chu Libna khuaa mi Jeremia nâinu Hamutali a ni.



³²A puhai angin Rengpa mithmua thilsual a tho a ni.

³³Aigupta rêng Nekoa khan Hamath biala Ribla hmuna suakin an tânga, an lal zoro a ihêk a ni. Aigupta rêngin Judahai chu sumru her sângringa le rângachak her sômringa an chôitirhai a ni.

³⁴Reng Nekoa'n Josia nâipa inkhat Eliakima chu a pa irthûlin rêng an changtira, a'rhming a thûl pea Jehoiakima a iphua a ni, Jehoahaza chu Aigupta rama a hruaia a thi ta a ni.

Judahai rêng Jehoiakima

(2 Tsn 36.5-8)

³⁵Reng Jehoiakima chu Aigupta rêngin khâzana chôî an phûta, pe ngêt hrang mipuihai kôla ar chong an riang ti loiin an phûthai a ni.

³⁶Jehoiakima chu kum sômhniringa a niin Judahai rêng a changa; Jerusalema kum sômhleikhat an lala. A nu chu Ruma khuaa mi Pedaia nâinu Zebidi a ni.

³⁷A puhai ang dênin Jehoiakima'n Rengpa mithmua thilsual a tho a ni.

2 Rênghai 24

¹Jehoiakima an lal lai hin Babulon rêng Nebukadnezara'n Judai ram a doia, a hnuaia Jehoiakima chu kum thum an lala, a tehel pe tâka.

²Rengpa'n Babulon sipai rualhai, Moab hai, Amon sipaihai hmangin Jehoiakima a doia. Judai ram insiat hrangin a tîra. Hianga a tho hrang thu hi Rengpa'n a deipuhai hmangin a lei insîr sai a ni.

³Reng Manasea thilsual tho hai, ite ti loa a thathai hluk sikin, a hmuphâk lolina rama Judahai a'rzûlhai theina hrangin hi thil hi Rengpa thupêk zuang tung a ni;

⁴Rengpa'n Manasea thilthohai hi a ingaidam thei loi a ni.

⁵Jehoiakima thiltho danghai chu Juda rênghai thurchi irziakna bua a chuang.

⁶Jehoiakima chu a thi tâka a nâipa Jehoiakina an lal nôk tâk a ni.



⁷Eufrates tui le Aigupta hmâr tiang ramri kêr murdi hi Babulon rêng thuneina hnuai a om tâk sikin Aigupta rêng le a sipaihai chu irthok suak ngam ta mahai.

Juda rêng Jehoiakina

(2 Tsn 36.9-10)

⁸Jehoiakina chu kum sômhleiriat mi a niin Judahai rêng a changa, Jerusalema tha thum an lala. A nu chu Jerusalema mi Elnathana nânu Nehusti a ni.

⁹A pa angin Jehoiakina khomin Rengpa mithmua thilsual a itho a ni.

¹⁰An lal lai hin rêng Nebukadnezara sipaihaiin Jerusalem an hong irhuala.

¹¹An irhual lai hin rêng Nebukadnezara chu Jerusalema a lei hon zin lai tak a nia.

¹²A nu nâi a sipaihai le rêngin a mi lian omhai le Jehoiakina chu Babulon kuta a irpêk lût a ni. Nebukadnezara'n an lal kum riatna hin Jehoiakina chu suakin a chela.

¹³Tempil le rêng ina sum om murdi le Babulon khuaa a chôia, Rengpa lei ihril tâk angin rêng Solomona tempila hmang hrang rângachak bêlbûr a isiahai an siata.

¹⁴Reng Nebukadnezara'n Jerusalem khua mi, rêng in sâng mi murdi mi lian ualhai sângkhat suak chang hrangin a hruaihaia. mi kut theithiam, thîrsuhai khom a hruaihai zita. Judai rama chu mi'nmôltehai vai a mâksanhai ta.

¹⁵Nebukadnezara'n Jehoiakina chu a nu le a dôngma a mi lianhai le Judai rama mi lian ualhai chu Babulon suaka an omtira.

¹⁶Nebukadnezara'n sipai chang thei loihai chu Babulon tiang a hruaihai zita, mi sângsari le kut theithiam, thîrsuhai sângkhat a hruaihai a ni. Sipai chang zit an ni.

¹⁷Nebukadnezara'n Jehoiakina pa sangpa Matania chu Judahai rêngin a siaa, a'rhming a thûl pea, Zedekia a iphua a ni.

Judahai rêng Zedekia

(2 Tsn 36.11-12; Jer 52.1-3)



¹⁸ Zedekia chu kum sômhni inkhat a niin Judahai rêng a changa. Jerusalema kum sômhleikhat an lala. A nu chu Libna khua mi Jeremia nâinu Hamutali a ni.

¹⁹Reng Jehoiakina angin Rengpa mithmua thilsual a thoa.

²⁰ Rengpa chu Jerusalem le Judai ram mihai chung a ning an mura, a hmuphâk lolina rama an hnotsuakhai tâk a ni.

2 Rêng hai 25

Jerusalem siatna thu

(2 Tsn 36.13-21; Jer 52.3-11)

¹ Zedekia chu Babulon rêng kôl ata a'rhela; khanchu Zedekia kum kuak an lal kuma tha kuakna sîn sôm niin, Nebukadnezara chu a sipaihai leh an hong, Jerusalem an hong rûna an khuaa dâi kôla hmun an khuara, bang an irkul vinga.

²Zedekia inlal kum sômhleikhatna dênin an irhuala.

³Kha kuma tha minlina sîn kuak nî chu an khua khom châm a sate'n a tâka, tûte fâk hrang nei ta mahaia.

⁴Khua an irkulna bang chu an inseta, Babulon haiin irhualhai khomsian sipai le rêng hai zâna an suak tâka. Reng irhuan kôla an fea, kulbang inhni kâra mikota an suaka, Jordan tui panin an intân tâka.

⁵Babulon sipaiin rêng Zedekia chu an irzûla Jeriko kôla phâirama an chela, a sipaihaiin an rotsan vinga.

⁶Zedekia chu Ribla khua Nebukadnezara makunga an hruaia, a chungthu a lei rêl pe zôia.

⁷ Zedekia mithmua ngeiin a nâihai chu Nebukadnezara'n a thathaia, Zedekia mit ru khom a kêlterpai pe sa; kut khit pumin Babulon-a a hruai ta.

Tempil insiatna

(Jer 52.12-33)



⁸Babulon rêng Nebukadnezara inlal kum sômhleikuakna tha ringa le sôn sari ni sôn chu Nebukadnezara hrungtu hai laia an ulian Nebukadnezara chu Jerusalem khuua a lûta.

⁹Tempil chu a hâla, rêng inhai le Jerusalema mi lianhai in khom a hâl pehaia.

¹⁰A sipaihaiin khuua an irkulna bang an seta.

¹¹Nebukadnezara'n khopui sênga mi la omhai chu Babulon tiang a hruaihaia, mi kut theithiamhai le Babulon la hmu ngai loihai khom suak hrangin a hruaihaia.

¹²Mi chukloitehai vai grep irhuan le loi infâi hrangin Judai rama a mâksanhaia.

¹³Kaldaihaiin tempil dâr chopui, tâli le tuipanghai an insiat, a dâr pumin Babulon-a an chôi.

¹⁴Maichâma irvut luakna le a siana, meiser siana hmangrua, thilinhlan zoro thisen dôna tâbor, mirimhoi hâlna, tempil sin thôna an ihmang dâr lam pang rêng rêng chu an lâk vinga.

¹⁵Rângachak le sumrua siam murdi chu berbu lian le a chîn tetehai ite hôi loiin an ilâk infâi ving a ni.

¹⁶Solomona'n tempila hrang dâra siam chopui, tâli, tuipanghai chu var thei loi raka rik a ni.

¹⁷Chopui inhnihai chu an irang mai, mûk sômhleiriata irsâng an ni.

Judahai Babulon-a an hruai

(Jer 52.24-27)

¹⁸Sipai uliantak Nebuzaradana'n ochai inlaltak Seraia le a hnuai ochai Zefania le tempila ulian inthumhai khom Babulon-a a hruai.

¹⁹Kho sênga ulian dang la omhai, sipai hruaitu dang sipai irdâi tianga thei le mi kâmnang a dang sômrukhai chu,

²⁰Nebuzaradana'n Hamath bial Libna khuua Nebukadnezara omna khuua khan a hruaihaia.



²¹Reng a vîkhaia, a lei that polhaia. Khaang khan an rama suaka hruai an ni ta.

Judai ram optu Gedalia

(Jer 40.7-9; 41.1-3)

²²Babulon rêng Nebukadnezara'n Ahikama nâipa Gedalia, Sefama tupa chu Judai ram op hrangin an thanga, Babulon-a hruai loihai enkolin a kuta pêkin a oma.

²³Juda sipai le an ulian Babulon rêng kôla irpêklût nuam loihaiin an inhriatin chu Mizpa khuaa Gedalia kuang an fea; kha sipaihai kha Nethania nâipa Ismaela, Karea nâipa Johana'n le Netofa khua mi Tanhumeta nâipa Seraia le Maaka khua mi Jaazania le a mihai an ni.

²⁴Gedalia'n an kuang le an mihai inhriatin, "Kaldai sorkâr sinthohai hi chi no ro. Rama hin om papai unglân, Babulon rêng hnuai kûn unglân nin ta hrangin sa a ti," a tia.

²⁵Kha kum sêng tha sarina chu Nethania nâipa Ismaela Elisama tupa, rêng irchia mi chu mi sômkhathai le Mizpa khuaa an fea, Gedalia chu a doia, a thatpai tâka. A kôla om Israel le Babulon mihai khom a thathai saa.

²⁶Israel mi murdi inriangtehai le sipai ulian lei ni tâkhaiin Babulon-hai an chi no sikin Aigupta ram an fe ta.

Jehoiakina zêl intâng suakna

(Jer 52.31-34)

²⁷Evilmerodaka babulon rêng a ni kumin, Judai rêng Jehoiakina chu lung an khama, intângna in ata an suaka, Jehoiakina chu kum sômthum sari le tha sômhleihni sîn sômhni sîn sari ni an tâng zoiin an insuaka.

²⁸A sate'n a chong a hoia, a rêngtoihmun chu rêng danghai nêkin a'rsângtir pea.

²⁹Intângna ina songkol a kheka, a dam sêng chu rêng kôla bu a nêk tâka.

³⁰Sîn tin a bituk neiin a innang murdihai chu an pêk mai ta ngai a ni.



1 Thurchi Suina

1 Thurchi Suina 1

Adama Irthokin Abrahamama dênin

(Irp 5.1-32; 10.1-32; 11.10-26)

- ¹Adama irchi ar lo fe dân angin Setha, Enosa,
- ²Kenana, Mahalalela, Jareda,
- ³Enoka, Methusela, Lameka,
- ⁴Nova, Nova hin nâipasal inthum a nei, Setha, Hama le Jafeta, an ni,
- ⁵Jafeta nâihai Gomera, Magoga, Madaia, Javana, Tubala, Tirasa,
- ⁶Gomera hi Askenaza hai, Difat hai, Togarma mihai irchi an ni.
- ⁷Javana hi Elisa hai Tarsis hai, Kitima hai, Rode hai, irchi an ni.
- ⁸Hama hi Kusa hai, Mizraima hai, Puta hai, irchi an ni.
- ⁹Hama nâi Kusa hi Seba hai, Havila hai, Sabta hai, Raama hai Sapteka hai irchi an ni.
- ¹⁰Kusa hin nâipasal, rammual inhnêtu roiinpui masa tak Nimroda a nei.
- ¹¹Khan, Mizraima'n Ludima hai, Anamima hai, Lehabima hai, Naftuhima hai,
- ¹²Patros hai, Kaslu hai, (Filistia mihai hi an hong suak a ni) Kafto hai a neia.
- ¹³Kanaan nâilutîr Sidon le Hetha hi Sidon hai le Hit hai irchi an ni.
- ¹⁴Kanaan hi Jebus hai Amor hai, Girgas hai,
- ¹⁵Hiv hai, Arka hai, Sin hai,
- ¹⁶Arvad hai, Zemar hai, Hamath hai irchi an ni.
- ¹⁷Sema irchihai chu Elama hai Asura hai, Arpaksada hai, Lud hai, Arama hai, Uzi hai, Hula hai, Gether hai, Mesek hai hi an ni.
- ¹⁸Sema nâi Arpaksada khan Sela a neia, Sela'n Ebera,



¹⁹Ebera'n nâi inhni a neia, inkhat chu a dam laiin mihriamhai an irsem indarh sikin ar hming khom Pelega an phua a ni. Inkhat irhming chu Juktana a ni.

²⁰Juktana hi an irchia mi a ni. Almodada, Selef, Hazarmavetha, Jera,

²¹Hadorama, Uzal hai, Dikla hai,

²²Ebal, Abimael, Seba,

²³Ofir, Havila le Jobaba.

²⁴Sema irchi ata Abrahamama dênin hihai hi an ni: Arpaksada, Sela,

²⁵Ebera, Pelega, Reua,

²⁶Seruga, Nahora, Tera,

²⁷Abram, Abrahamama ti irhming pël tak hi.

²⁸Ama hin Isaka le Ismaela a neihaia.

Ismaela Irchihai

(Irp 25.12-16)

²⁹Ismaela'n nâi sômhleihni a nei, a lutîr tak chu Nebaiota a ni. A nâihai hi anni irchia mi an ni; Nebaiot hai, Kedara hai, Adbeela hai Mebsam hai

³⁰Misama hai, Duma hai, Masa hai, Hadada hai, Tema hai,

³¹Jetura hai, Nafis hai, Kedema hai an ni.

³²Abrahamama lâksîrnu Keturi hin nâipasal kiruk a nei. Zimrana, Joksana, Medana, Midian, Isbaka le Sua. Joksana'n Seba le Dedana a neia.

³³Midian hi Efa, Efera, Hanoka, Abida, Elda hai a nei, hihai hi Keturi irchihai an ni.

Esaua Irchihai

(Irp 36.1-19)

³⁴Abrahamama nâi Isaka'n nâi inhni Esaua le Jakoba a neia.

³⁵Esaua nâihai chu: Elifaza, Reuela, Jeusa, Jalam, le Kora hai an ni.

³⁶Elifaza hi Temana hai, Omara hai, Zefi hai, Gatama hai, Kenaza hai, Timna hai, Amalek hai irchi an ni.



³⁷Reuela hi Nahat hai, Zera hai, Sama hai, le Miza hai irchi an ni.

Edom rama omhai

(Irp 36.20-30)

³⁸Edom rama lei om masahai chu Seira nâihai an ni. Seira nâihai chu Lota'n, Sobala, Zibeona, Ana Disona, Ezera, Disana an ni.

³⁹Lota'n Horia hai le Homana hai irchi an ni, a farnu chu Timnai a ni.

⁴⁰Sobala chu Alian hai, Manahat hai, Ebal hai, Sefi hai le Onam hai irchi a ni.

⁴¹Ana hin Disona a neia, Disona chu hihai irchi hi a ni; Hamrana, Esbana, Ithrana, Kerana hai hi.

⁴²Ezera chu Bilhana hai, Zavan hai, Jaakana hai irchi an ni. Disana chu Uz-hai le Arana hai irchi a ni.

Edom rama rênghai

(Irp 36.31-43)

⁴³Israel rama rêng om mâna, Edom rama rêng lei omhai chu hihai hi an ni; Beora nâipa Bela chu Edom rama rêng a changa; a khopui chu Dinhaba a ni.

⁴⁴Bela a thi zoiin Bozra kho mi Zera nâipa Jababa'n ar thûl a changa.

⁴⁵Jababa thi zoiin Temana ram mi Husama'n a thûla.

⁴⁶Husama a thi le chu Bedada nâipa Hedada'n a thûl nôka, ama hi Moab rama Midian hai inhnêtu kha a ni. A omna khopui chu Avit a ni.

⁴⁷Hadada a thi zoiin chu Masreka kho mi Samla a'rthûlin a oma.

⁴⁸Samla a thiin, Rehobot kho omna tuipui an iti ata hong Saula chu a'rthûlin a oma,

⁴⁹Saula a thiin chu, Akbora nâipa Baal-Hanana'n a thûla.

⁵⁰Baal-Hanana a thiin, Hadada'n a thûla, a omna khopui irhming chu Pai a ni. A dôngma chu Mehetabeli a ni, Matreda nâinu a ni, a pu chu Mezahaba a ni.

⁵¹Hadaba chu a thia, Edom-hai chi dang dang hiang hin an om; Timna, Alva, Jethetha,

⁵²Oholibami, Ela, Pinon,



⁵³Kenaza, Temana, Mibzar,

⁵⁴Magdiel le Iram hai an ni.

1 Thurchi Suina 2

Juda Irchihai

¹Jakoba'n Reubena, Simeona, Levi, Juda, Isakara, Zebulun,

²Dana, Josefa, Benjamina, Naftalia, Gada le Asera a neihaia.

³Juda hin nâipasal ringa a nei; Kanaan nupang Batsuii leh nâi inthum Era, Onam le Sela a neihai. A nâilutîr tak Era hi a sual hrai sikin Rengpa'n a thatpaia.

⁴A moinu Tamari leh nâi inhni Pereza le Zera a neihai sa.

⁵Pereza hin Hezrona leh Hamula a neihaia.

⁶Zera hin nâipasal ringa; Zimria, Ethana, Hemana, Kalkola le Dara hai an ni.

⁷Zera irchi laia mi Karmia nâi Akhara hin Pathian ta hranga ser ir-uptir hlat a tum tâk sikin Israelhaiin an lei tuanga.

⁸Ethana hin Azaria a inei a ni.

Reng Davida Irchihai

⁹Hezrona hin nâi inthum Jerameela, Rama, le Kelubaia a neia.

¹⁰Rama hin Aminadaba a neia. Ama hin Juda nam laia mi roiinpui tak Nasona a neia.

¹¹Nasona hin Salmona a neia, ama hin Boaza a neia.

¹²Boaza nâi chu Obeda a ni, Jesaia neitu a ni.

¹³Jesaia hin nâipasal sari a neia; a ulian dônin Eliaba, Abinadaba Simea,

¹⁴Nathanaela, Radaia,

¹⁵Ozema, Davida.

¹⁶An farnuhai chu Zeruii le Abigaili an ni. Zeruii hin nâipasal inthum Abisaia, Joaba, Asahela hai an ni.



¹⁷Abigaili hin Amasa a neia, a pasal chu Ismaela irchia mi Jethera a ni.

Hezrona Irchihai

¹⁸Khan, Hezrona nâipa Kaleba'n a dôngma Azubi, Jeriotha nâinu ata khan nâi a neihai; Khan, hihai hi a nâipahai chu an ni: Jesera, Sobaba le Arдона.

¹⁹Azubi thi zoiin Kaleba'n Efrati dôngma'n a nei nôka, nâipasal Hura an neia.

²⁰Hura'n Uria a neia, ama hin Bezalela a nei nôka.

²¹Kum sômruk a niin Hezrona'n Makira nâinu Gilead farnu dôngma'n a neia. Nâipasal Seguba an neia.

²²Seguba khan Jaira a neia, hi mi hi Gilead rama khua sômhni inthum chung a rêng a ni.

²³Gesur hai le Amor haiin kha hmuna ram, khua sômruk kha an lâka, Jair le Kana khua le a kôlvêlhai chu an lâka. Kha khuaa omhai kha chu Gilead-a le Makira irchihai an ni.

²⁴Hezrona chu a thia, a nâipa Kaleba'n a pa dôngma a ithisan Efrati chu dôngma'n a neia, nâipasal Asura an neia, ama hi Tekoa khua indingtu masatu kha a ni.

Jerameela Irchihai

²⁵Hezrona nâipa ulian tak Jerameela'n nâipasal ringa a neia, a uliantak chu Rama a ni, a danghai chu Buna, Orena, Ozema le Ahija hai an ni.

²⁶Rama hin nâipasal inthum Maaza, Jamina le Ekerai hai an ni.

²⁷Jerameela hin dôngma dang Atari a neia, nâipasal Onam an neia.

²⁸Onam hin nâipasal inhni Samaia le Jada a neia. Samaia khom hin nâi inhni, Nadaba le Abisura a neia

²⁹Abisura hin dôngma Abihaili a neia, nâi inhni Abana le Molida an neia.

³⁰Abisura upa Nadaba khom hin nâipasal inhni Seleda le Apaima a neia, Seleda chu nâi nei loiin a thia.

³¹Apaima'n Isia a neia, Isia'n Sesana, Sesana khan Ahlaia a neia;



³²Samaia sangpa Jada'n nâipasal inhni Jethera le Jonathana a neia, Jethera chu nâi nei loiin a thia,

³³Jonathana'n nâipasal inhni Peleta le Zaza a neia. Hihai hi Jerameela irchihai chu an ni.

³⁴Sesana hin nâipasal nei maka, nâinupang vai a nei a ni. Siahlo Aigupta mi Jarha an neia,

³⁵Ama hi a nâinu an luatira, nâipasal Ataia an nei.

³⁶Ataia hin Nathana a neia, ama hin Zabada a nei a ni.

³⁷Zabada hin Eflala a neia, ama hin Obeda a neia.

³⁸Obeda hin Jehua a neia, Jehua'n Azaria a neia,

³⁹Azaria hin Heleza a neia, ama hin Eliasa a neia.

⁴⁰Eliasa hin Sismaia a neia, ama hin Saluma a neia.

⁴¹Saluma hin Jekamia a neia, ama hin Elisama a nei a ni.

Kaleba Irchihai

⁴²Jerameela upa Kaleba nâi ulian tak chu Mesa a ni, Zifa irchibul chu a nia. Zifa hin Maresa a neia, ama hin Hebron a neia.

⁴³Hebronin nâipasal minli, Tepua, Kora, Rekema, le Sema hi an neia.

⁴⁴Sema chu Rahama pa a ni, Rahama hin Jorkeama a neia, Sema upa Rekema'n Samaia a neia.

⁴⁵Ama hin Maona a neia, Maona hin Bethzura a neia.

⁴⁶Kaleba'n chu lâksîr Efaii a luaa, ama leh hin nâi inthum, Haran, Moza, Gazeza hai an nei a ni. Haran khom hin nâipasal Gezeza ngêt a phua nôk a ni.

⁴⁷Mi inkhat Jadaii khan nâipasal kiruk, Regema, Jothama, Gesana, Pelet, Efa le Saafa hai hi an neia.

⁴⁸Kaleba hin lâksîr dang Maaki a nei nôka, nâipasal inhni, Sebera le Tirhana a neipua.



⁴⁹Zoro sôtvit hnunga nâi inhni Saafa le Seva a neipui nôka, Saafa hi Madmana khua indingtirtu a nia, Seva hi Makbena le Gibea khua chuan masatu a ni. Kaleba'n nâinupang Aksaii a nei a ni.

⁵⁰Hi mihai khom hi Kaleba irchi an ni; Kaleba le Efrati nâi ulian tak chu Hura a ni. Hura nâipasal Sobala chu Kiriath-jearim khua indingtu a ni.

⁵¹A nâipa Salma chu Bethlehem khua indingtu a ni, a nâi mi tumtak Harefa chu Bethgadar khua indingtu a ni.

⁵²Kiriath-jearim indingtu Sobala chu Haroe le Menuhot-ah omhai a chimriphai irchibul a ni.

⁵³Kiriath-jearim-ah omhai Ithra hai Put hai, Sumat hai le Misra hai irchi a ni sa. Zera le Estaol khuaa omhai khom, hihai hi an irchi suanpâr a ni sa.

⁵⁴Bethlehem khua indingtu Salma chu Netofat, Atrot-beth-Joab khuaa omhai irchi sînga mi a ni. Manahat-ah om a chimriphai dôr chu Zor-hai irchi sînga mi an ni.

⁵⁵Lekha irziak mi, Jabez khuaa om Tirat-hai, Simeat-hai, Sukat-hai le Kenhai leh hin irchi khata mi an nia, Rekab-hai leh hin an irneipol a ni.

1 Thurchi Suina 3

Reng Davida irchihai

¹Davida Hebron khuaa a om laia a nâilutîr dôna a ineihai chu Amon, a nu chu Jezreel mi Ahinoami a ni; Daniela nu chu Karmel mi Abigaili a ni.

²Absaloma, a nu chu Gesur rêng Talmaia nâinu Maaki a ni; Adonija, a nu chu Hagithi a ni;

³Sefatia a nu chu Abitali a ni; Ithreama, a nu chu Egli a ni.

⁴Hebron khuaa kum sari le a chimrip an lal laiin Davida hin nâipasal kiruk a nei irmana. Jerusalema kum sômthum inthum an lala,

⁵Nâi khom tamtak a nei; Amiela nâinu Bethsebi leh hin nâipasal minli, Simea, Sobaba, Nathana le Solomona hai a nei a ni.

⁶Nâipasal dang kuak, hihai hi a nei sa; Ibhara, Elisua, Elfeleta



⁷Noga, Nefega, Jafia

⁸Elisama, Eliada le Elifeleta

⁹Hi khêla lâksîrhai leh a nâihai khom an om sa, nâinupang Tamari khom hi a ni.

Reng Solomona irchihai

¹⁰Reng Solomona irchihai khom hihai hi an ni. Rehoboama, Abija, Asa, Jehosafata,

¹¹Jehorama, Ahazia, Joasa

¹²Amazia, Uzia, Jothama

¹³Ahaja, Hezekia, Manasea,

¹⁴Amon, Josia,

¹⁵Josia hin nâipasal minli, Johanana Jehoiakima, Zedekia, le Saluma a neia.

¹⁶Jehoiakima hin nâipasal hni Jehoiakina le Hezekia a neia.

Reng Jehoiakina irchihai

¹⁷Babulon sala hruai rêng Jehoiakina khan nâipasal sari, Sealtiel

¹⁸Malkirama, Pedaia, Senazara, Jekamia, Hosama, Nedabia a neihai.

¹⁹Pedaia hin nâipasal inhni, Jerubabela le Simea, Zerubabela hin nâipasal hni Mesulama le Hanania a neia, nâinupang Selomiti a nei.

²⁰Nâipasal dang ringa Hasuba, Ohela, Berekia, Hasadia le Jusab-heseda hai an ni.

²¹Hanania hin nâipasal hni Pelatia le Jesaia a neia. Jesaia hin Refaia a neia, hi mi hin Arnana a neia; Arnana hin Obadia a neia, ama hin Sekania a neia.

²²Sekania hin nâipasal inkhat Semaia a neia, tû ringa Hatusa, Igala, Baria, Nearia le Safa hai a neihai.

²³Nearia hin nâipasal inthum Elioenaia, Hizkia, Azrikama a neihai.

²⁴Elioenaia hin nâipasal sari Hodavia, Eleasiba, Pelaia, Akuba, Johanana, Delaia le Anania hai an ni.



1 Thurchi Suina 4

Juda irchihai

- ¹Hihai hi Juda irchi senkhathai chu an ni. Perezza, Hezrona, Karmia, Hura, Sobala,
- ²Sobala'n Reaia a neia, ama hin Jahata a neia. Jahata hin Ahumaia le Lahada Zora khuaa omhai neitu a ni.
- ³Kaleba le Efrati nâilutîr chu Hura a ni, Bethlehem khua indingtirtu a ni. Hura'n nâipasal inthum Etama, Penuela le Ezera a neia. Etama'n nâipasal inthum Jereel, Isma, Idbasa hai a neia, nâinupang inkhat Hazelelponi a nei.
- ⁴Penuela hi Gedor khua indingtirtu a ni, Ezera hi Husa khua indingtirtu a ni.
- ⁵Tekoa khua indingtu Asura'n dôngma inhni Heli le Naari a neia,
- ⁶Naari leh nâipasal minli, Ahuzama, Hefera, Temenia le Hahastaria a neia.
- ⁷Heli leh nâipasal inthum, Zereta, Izhara, Ethnana hai an ni.
- ⁸Khan, Hakoza'n Anuba hai, Zobeba hai, Haruma nâipa Aharhela irchihai a neia.
- ⁹An irchi laia mi mahripom tak Jabeza a oma, a nu hin, "Na ti ngôia ki inei a ni sikin," tiin ar hming khom Jabez a iphua a ni.
- ¹⁰Israel hai Pathian kuang Jabeza chu a chongchaia, "O Pathian, sat ni vurin lân, ram irzat tak ni pe'n lân, nâ ki tuang lolina hrangin thil saloihai ata ni hrungin lân, ni ompui mai ro," a tia. Khanchu Pathianin a izong angin a ompui a ni.

In sêngkua dang thurchi

- ¹¹Suha urêngpa Kaleba'n nâipasal Mehira a neia, Mehira'n Estona a neia,
- ¹²Ama hin nâipasal inthum, Bethrafa, Pasea, Tehina a nei hai, Tehina hi Nahas khua indingtu a ni. Hi irchihai hi Reka khuaa om an ni.
- ¹³Kenaza khan nâipasal inhni, Othniela le Seraia a neia. Othniela hin nâipasal hni, Hathata le Meonothaia a neia.



¹⁴Meonothaia hin Ofra a neia, Seraia hin Joaba a nei a ni. Hitaka omhai hi kut theithiam inzen omkhôm an ni.

¹⁵Jefunea nâipa Kaleba'n nâipasal thum, Irua, Ela, le Naama hai a neia. Ela hin Kenaza a neia.

¹⁶Jehalela nâipasal minli, Zifa, Zifaia, Tiria le Asarela hai a neihai.

¹⁷Ezra'n nâi minli Jethera, Mereda, Efera le Jalona a neia. Mereda hin Aigupta rêng nâinu Bithiaii dôngma'n a neia, nâinupang inkhat Miriami leh nâipasal inhni Samaia le Isba a neia, Isba hi Estemo khua indingtirtu a ni.

¹⁸Mereda hin Juda nama mi dôngma'n a neia, nâipasal inthum Jereda, Hebera le Jekuthiela a neihai, Jereda hi Gedor khua indingtirtu a ni, Hebera hi Soko khua indingtirtu a ni; Jekuthiela hi Zano khua indingtirtu a ni.

¹⁹Hodia hin Nahama farnu dôngma'n a neia, an nâihai chu Keila khua Garm hai le Estamo khuaa om Maaka hai irchibul a ni.

²⁰Simona hin nâipasal minli Amnona, Rina, Benhanana le Tilon a neia. Isia hin Zoheta le Benzoheta a neia.

Sela irchihai

²¹Juda nâi Sela irchihai chu hihai hi an ni. Era, Leka khua indingtirtu; Laada chu Maresa khua indingtirtu a ni; a'rchihai chu Beth Asbe khua omhai hi an ni, Ladek mi an ni.

²²Jokima Kozeba khuaa omhai leh hin; Joasa le Sarafa a nei. Moab dôngmate dôngma'n a neia. Bethlehem khuaa an om ta. (Hi thurchi hi tianlaia irchi irsuina ata lâk a ni.)

²³Reng ihmanghai bêl vuak mi an nia, Netaim le Gedera khuaa om an ni.

Simeona irchihai

²⁴Simeona nâipasal ringa, Nemuela, Jamina, Jariba, Zera le Saula hai an ni.

²⁵Saula hin Saluma a neia, ama hin Mibsama a neia, Mibsama hin Misma a neia,



²⁶Misma hin Hamuela a neia, ama hin Zakura a neia, Zakura hin Simeia a neia,

²⁷Simeia hin nâipasal sômhleiruk le nupang kiruk a neia, khannisian a urêng danghaiin chu nâi nei intam mahai; Simeona irchihai chu Juda irchihai angin pung thei mahai.

²⁸ Davida inlal zoro dên khan chu Simeona irchi hi Beerseba, Molada, Hazarsuala,

²⁹Bilha-ah, Ezem-ah, Tolad-ah,

³⁰Bethuel-ah, Horma-ah, Ziklag-ah,

³¹Beth-markabot-ah, Hazarsusim-ah, Bethberi-ah, Saaram khuahaia an om ngai.

³²Etam haia, Ain haia, Rimon haia, Token haia, Asan khuahai le

³³a kôlvêl khua Baalath khua sim tianga tâng an omna a ni. An sêngkua thurchi le an omna hmunhai irziakna lekhabua an nam hruaituhai chu hihai hi an ni.

³⁴Mesobaba, Jamleka, Amazia, nâipa Josa,

³⁵Joela, Jehua, (Jehua hi Josibia nâi a ni, a pu chu Asiela nâi Seraia a ni).

³⁶Elioenaia, Jakoba, Jesohaia, Asaia, Adiela, Jesimiela, Benaia,

³⁷Ziza, Ziza hi Sifia nâi a ni; kha pa kha Alona nâi a ni; Alona hi Jedaia nâi a ni, a pa chu Semaia nâi Simria a ni.

³⁸Hihai irchi hi an pung hrât tak taka.

³⁹Nitâk tianga Gerar dênin an indarh zoia, kha khua omna irhôr kho nisua tianghai khom kêlbelra an insuahai a ni. Ram ôl lian, hloisûl satna hmun, ram hrisêl irtharngamna tamtak an hmu a ni. Hihai lai hin Hama hai an om ngai a ni.

⁴⁰Judai ram rêng Hezekia zoro lai khan annihai khi Gerar-a an fea, khataka lei omhai puan in le bokrop neihai an insiatpai pehaia. An belra satna



hrangin hloisûl a sa pehai hrai sikin, kha hmuna lei omhai kha an inhnotpaihaia, anni'n an iluapai a ni ta.

⁴¹Isia nâi Pelatia, Nearia, Refaia le Uziela haiin Simeona irchihai laia mi irzaringa chu nisua tiang Edom rama an fea.

⁴²Amalek leh omhai chu an thathaia, atûn ten hin an iom ta a ni.

⁴³Khan, Amalek mi rothai a la om sunhai kha an thata, an hmuna khan a vuan sûn ten hin an la om a ni.

1 Thurchi Suina 5

Reubena irchihai

¹ Jakoba nâi ulian tak Reubena irchihai chu hihai hi an ni. (Reubena hin a pa lâksîr a zâlpui sikin a nâilutîr tak sutpai a nia, Israel nâi Josefa inchangea pêk a ni, khasikin nâilutîr irtepa hin ar hming a iom ta loi a ni).

² Juda irchihai hin an urênghai an khêla, anni lai ata rêng a hong suak mâka chu nâilutîr nitna chu Josefa changtum a ni ta.

³Israel inei masa tak Reubena'n nâipasal minli, Hanoka, Palua, Hazrona, le Karmia a neihaia.

⁴Joela irchihai chu a'rlo fe dân angin Semaia, Goga, Simeia

⁵Mika, Reaia, Baala

⁶le Beera hai an ni, Beera hi Reubena irchihai laia a hruaitu tak a ni. Assuria rêng Tilgatpilnesera'n a chela, salin a hruaia.

⁷An sêngkua thurchi irziakna hin Reubena irchi laia hruaituhai irhming vai hi a chuang. Jeiela, Zekaria,

⁸Bela hi Azaza nâi a ni, a pu chu Sema, Joela irchi mi a ni. Joela irchihai hi Aroer khuua an om. Hmâr tiang ram Nebo le Baal-meon dênin an donga.

⁹Gilead rama hin belra le kêl an nei intama; khasikin nisua ramchârna ram, Eufrates vadung dênin an ilua a ni.



¹⁰Reng Saula zoro lai khan Reubena hai hin Hagari hai an doihaia, an thathaia, Gilead ram nisua tianga an ram an sutpaihai tâka.

Gada irchihai

¹¹Reubena hai zoia chu Basan rama hin Gada irchia mihai an oma, nisua tiang Saleka dênin an sipa.

¹²Joela irchia mi hi a tam ual tak an nia, Sefama irchia mihai hi anni zoi renga tam an ni. Janaia le Sefata irchi hi Basan rama irchi dang viat omhai chu an ni.

¹³Gada nam laia hi irchi sarilai khom hi tep sa an ni; Mikaela, Mesulam, Seba Joraia, Jakana, Zia, Ebera hai hi, an rêngin sari an ni.

¹⁴Hihai hi Huria nâipasal Abihaila irchihai an ni. Huria pa chu Jaroa a ni, kha mi pa kha chu Gilead a ni, a pa chu Mikaela a ni. Mikaela pa chu, Jesisaia a ni, ama pa nôk chu Jadoa a ni, a pu chu Buza a ni.

¹⁵Hi irchihai sênga a hruaitu tak chu Abdiela nâipasal Ahia a ni, a pa chu Gunia a ni.

¹⁶Gilead le Basan rama khua chîntea om a ni, Saron ram hnuiaia an irthek indarh a ni.

¹⁷Juda rêng Jothama le Israel rêng Jeroboama hai zoro lai hin rêngin hi irchi irsui dân hi an irziak suak a ni.

Nisua tianga sipai omhai

¹⁸Reubena hai, Gada hai le nisua tianga om Manasea nam tômtehaiin pho, khandai le thal hmang dân thei sipai sêngminli sêngminli le irzasari sômruk an neia.

¹⁹Hagari nam Jetura, Nafis, Nodab hai leh an irdoia.

²⁰Pathian an iama, changpui hrangin an ngêna, Pathianin an chongchaina chu a sâmhaia, Hagari hai chu an lei irsanpui namhai leh an inhnêhai tâka.

²¹An râlhai saringsei sêngringa, belra nuaihni sêngringa, sakuartung sêngghni le mihriam nuaikhat an chelhaia.



²²Pathian irhminga irdoi an nia, mi tamtak an ithathai a ni. Sala an intâng mân chu kha rama khan an om ta a ni.

Nisua tianga Manasea hai

²³Nisua tianga Manasea irchia mi omhai chu Basan le hmâr tianga om Baal-Harmon, Senir, Hermon tâng dênin an oma, a sate'n an pung hrâta.

²⁴An laia hruaituhai chu Efera, Isia, Eliela, Azriela, Jeremia, Hodavia le Jadiela hai an ni. Sipai hâitak tak an ni, an irchihai laia chu hruaitu satak an ni.

Nisua tianga nam omhai sala hruai

²⁵Mihaiin an pahai Pathian mâksana; kha rama lei om, Pathianin a inhnotsuak hai pathian an biak tâka.

²⁶Khasikin Pathianin Assuria rêng Pula, Tilgatpilnesera an iti pa chu an omna ram a hon doitira, Reubena irchihai, Gada irchihai le nisua tianga om Manasea irchihai chu a koibukhaia, Hala, Habor, Hora, le Gozan tui kôla an omtirhai tâka.

1 Thurchi Suina 6

Ochai inlalahi hong irzom dân

¹Levi hin nâi inthum, Gersona, Kohata, Meraria a neihaia.

²Kohata hin nâi minli Amrama, Izhara, Hebron, le Uziela a neihaia.

³Amrama hin nâipasal hni Arona le Mosia a neia, nâinupang Miriami a nei sa. Arona hin nâi minli Nadaba, Abihua, Eleazara le Ithamara a neia.

⁴Eleazara irchihai chu a dôntea suiin hihai hi an ni. Finehasa, Abisua

⁵Bukia, Uzia,

⁶Zerahia, Meraiota,

⁷Amaria'n, Ahituba,

⁸Zadoka, Ahimaaza,

⁹Azaria, Johanana



¹⁰Azaria (Jerusalem tempil Solomona isina sinhotu kha a ni).

¹¹Amaria, Ahituba,

¹²Zadoka, Saluma,

¹³Hilkia, Azaria,

¹⁴Seraia, Jehozadaka.

¹⁵Jehozadaka hi rêng Nebukadnezara'n salin Judai ram le Jerusalema mi danghai laia khan a hruai sa, Rengpa'n sala a intângtir a ni.

Levi irchi danghai

¹⁶Levi hin nâi inthum Gersona, Kohata, le Meraria a neia.

¹⁷Khang khan nâipasal an nei vinga. Gersona'n Libna le Simeia a neia.

¹⁸Kohatha nâipahai chu Amrama, Izhara, Hebron le Uziela a neia.

¹⁹Meraria hin Mahlia le Musia a neia.

²⁰Gersona irchihai khom hiang hin an ni. Libni, Johatha le Zima,

²¹Joa, Ido, Zera, Jeatheraia,

²²Kohata irchihai khom hihai hi an ni, Aminadaba, Kora, Asira,

²³Elkana, Ebeasafa, Asira,

²⁴Tahata, Uriela, Uzia, Saula.

²⁵Elkana'n Amasaia le Ahimota a neia.

²⁶Ahimota irchi khom hiang hin an ni; Elkana, Zofaia, Nahata,

²⁷Eliaba, Jerohama, Elkana

²⁸Samuela nâi ulian chu Joela a nia, a nâipang ual chu Abija a ni.

²⁹Meraria irchihai khom hihai hi an ni. Mahlia, Libnia, Simeia, Uza,

³⁰Simeia, Hogia, Asaia.

Tempil zaipôlhai

³¹Jerusalem khuua Thuthung Bôm an lâklût zoiin rêng Davida'n hi mihai hi Pathian biak zoroa zaipôl sak hrangin an kunghaia.



³²Reng Solomona'n tempil a sin zoiin hi mihai hi pôla irsiamin irtongna puan ina hlasak hrangin an irthûl irtheng ngai a ni.

³³Hi mihai irchi suina chu hiang hin a ni. Kohata irchihai, zaipôl inkhat hruaitu chu Joela nâipa Hemana a ni. Hemana nâihai chu hihai hi an ni; Joela, Samuela,

³⁴Elkana, Jerohama, Eliela, Toa,

³⁵Zufa, Elkana, Mahata, Amasaia,

³⁶Elkana, Joela, Azaria, Zefania

³⁷Tahata, Asira, Ebiasafa, Kora,

³⁸Ishara, Kohata, Levi Jakoba.

³⁹Asafa chu zaipôl dang hruaitu a ni, Asafa irchihai chu hihai hi an ni. Berekia, Simea,

⁴⁰Mikaela, Baaseia, Malkija,

⁴¹Ethnia, Zera, Adaia,

⁴²Ethana, Zima, Simeia,

⁴³Jahata, Gersona, Levi.

⁴⁴Meraria irchi Ethana chu zaipôl dang hruaitu a ni, Ethana irchihai chu hihai hi an ni. Kisia, Abdia, Maluka,

⁴⁵Hasabia, Amazia, Hilkia,

⁴⁶Amazia, Bania, Semera,

⁴⁷Mahlia Musia, Meraria, Levi.

⁴⁸An irchibul Levi irchi danghai chu Pathian biakna hmuna sintho hrang danga irzêkin sin an irsem chit a ni.

Arona irchihai

⁴⁹Arona le a'rchihai hi maichâma mirimhoi hâlin, hâlivôm thilinhlan ngaitu an ni. Hmun irthianga Pathian biak hi, annihai tho hrang bîk a ni. Pathianin



a mihai sualna a ngaidamna hrangin, thilhai khom annihai hin an inhlan ngai hrang a ni. Pathian siahlo Mosia ihril ang takin an itho ngai a ni.

⁵⁰Arona irchihai chu hiang hin an ni, Eleazara, Finehasa, Abisua,

⁵¹Bukia, Uzia, Zerahia,

⁵²Meraiota, Amaria, Ahituba,

⁵³Zadoka, Ahimaaza.

Levi irchihai omna

⁵⁴Arona irchi Kohata hai omna ram chu hihai hi a ni. Levi irchihai omna hranga inkung masa khan an oma.

⁵⁵Judai rama khan Hebron-ah an inomtira, a kôlvêla ram satnahai khom ama idong sa a ni.

⁵⁶Hi khua huam sînga kho ulenâi le a lei ram tâk chu Jefunea nâipa Kaleba dongtum a ni.

⁵⁷Arona irchihai omna ram chu hihai hi a ni, Hebron hai zôkna khua an iti. Libna, Jatir, Estamo,

⁵⁸Hilen, Debir,

⁵⁹Asan, Beth-Semes kho kôl sa lêngna hmunhai le,

⁶⁰Benjamina hai biala hi khua le sa lêngnahai an indongtir a ni. Giba, Alemeta, Anathot. An in mihai omna hranga an ipêkhai chu kho sômhleithum a ni.

⁶¹Nitâk tianga Manasea irchihai biala Kohata irchia mi danghai omna hranga tasânin an in mi tam angin kho sôm an pêkhai a ni.

⁶²Gersona irchihai a in mi, a omna hrang Isakara hai rama, Asera-hai Basan rama khua sômhleithum an pêkhai.

⁶³Khaang dênin Reubena hai, Gada hai le Zebulun hai omna rama khua sômhleihni Meraria irchihai omna hrang an pêkhaia.



- ⁶⁴Khaang dênin Israel mihaiin Levi irchihai omna hrang khua le sa lêngnahai an indang pehai a ni.
- ⁶⁵Juda hai, Simeona hai, Benjamina hai, ram an indang pehai khom tasânin an ipêkhai a ni).
- ⁶⁶Kohata irchi senkhathai chu Efraima hai omna ram le a kôlvêla sa lêngna lai hai chu lua hrangin an inkung pehaia.
- ⁶⁷Efraima tâng rama zôkna khua Sekem, Gezer,
- ⁶⁸Jokmeam, Beth-Horon,
- ⁶⁹Aijalon le Gath-rimon hai hi.
- ⁷⁰Nitâk tianga Manasea hai ram khom Aner le Bileam hai chu a kôl vêla sa lêngna lai vêl chu an dongtum nia ipêk an ni.
- ⁷¹Gersona irchihai omna hrangin hi khuahai hi a kôlvêl sa lêngna hmun pêk inkung a ni. Nisua tianga Manasea hai omna Basan biala Golan le Astarot khuahai hi.
- ⁷²Isakara hai omna, Kades khua, Deberat khua,
- ⁷³Ramot khua, le Anem khuahai hi a ni.
- ⁷⁴Asera hai omna, Masal khua, Abdon khua,
- ⁷⁵Hukok khua, Rehob khua hai hi.
- ⁷⁶Naftalia hai omna, Galili Kedes khua, Hamon khua, Kiriathaim khua hai hi.
- ⁷⁷Meraria irchia mi danghai chu hi khua le sa lêngnahai hi pêk inkung an ni. Zebulun hai omna. Rimon le Tabor khua
- ⁷⁸Jordan nisua tiang pang Jeriko irdîn Reubena hai omna; tâng sîp zôla, Bezer khua, Jaza khua,
- ⁷⁹Kedemot khua, Mefaat khuahai hi a ni.
- ⁸⁰Gad-hai omna, Gilead biala Mahanaim khua.
- ⁸¹Hesbon khua le Jazer khuahai hi a ni.



1 Thurchi Suina 7

Iskara irchihai

- ¹Iskara hi nâipasal minli, Tola, Pua, Jasuba, le Simrona a neihaia.
- ²Tola hin nâi kiruk, Uzia, Refaia, Jeriela, Jamaia, Ibsama le Semuela hai an ni. Hihai hi Tola irchia an hruaitu, mihai le irhming inthanghai an ni, Davida zoro lai hin an irchia mi chu sînghni sânghni le irzaruk an ni.
- ³Uzia hi nâipasal inkhat Izrahia a neia, Izrahia hin nâipasal minli a neia, hihai hi an ni. Mikaela, Obadia, Juda, Isahia hai hi an hruaitu an nia.
- ⁴Dôngma an nei intama, nâi khom an nei intam a ni, irdoi mi sîngthum sângruk an om.
- ⁵Iskara irchi sînga hin sipaia chang thei mi sîngriat sângsari irhming irziak a ni.

Benamina le Dan irchihai

- ⁶Benamina nâipasal thum, Bela, Bekera, Jadiela hai an ni.
- ⁷Bela hin nâi ringa, Ezbona, Uzia, Uziela, Jerimota le Iria hai a neia, irchi khat laia hruaitu an ni seng, an irchia mi hi sînghni sânghni le sômthum minli sipaia hmang thei an ni.
- ⁸Bekera hin nâipasal kuak a neia, Zemira, Joasa, Eliazara, Elioenaia, Omria, Jeremota, Abija, Anathota, le Alemeta an ni.
- ⁹Irchi tina an irtep dânin sipai fe thei mi sînghni irzahni an ni.
- ¹⁰Jadiela hin nâi inkhat, Bilhana a neia. Bilhana hin nâipasal sari Jeusa, Benamina, Ehuda, Kenaana, Zethana, Tarsisa le Ahisara hai a neia.
- ¹¹Annihai kha irchi khat lu seng an nia an huaisenin irhming inthang an ni, an irchi laia mi sipaia fe thei sîngkhat sângsari le irzahni an om.
- ¹²Supim le Hupima hai khom anni irchia tep inlût an ni, Husima hi chu mi dang irchia mi a ni.

Naftalia irchihai



¹³Naftalia hin nâipasal minli, Jaziela, Gunia, Jezera le Saluma a neihaia. (Annihai hi Bilhahi irchihai chu an ni.)

Manasea irchihai

¹⁴A dôngma Arama mi le Manasea hin nâi inhni Asiriela, Makira a neia. Makira hi Gileada pa a ni.

¹⁵Makira hin Hupima le Supim ta hrangin dôngma a zong pehaia. A farnu chu Maaki a ni, Makira nâi inhni chu Zelofehada nâi, ama hin nâinupang ngot a neia.

¹⁶Makira dôngma Maaki hin nâipasal inhni Peresa le Seresa a neia, Peresa hin nâipasal inhni Ulama le Rekema a neia.

¹⁷Ulama hin nâi inkhat Bedana a neia, a pu chu Manasea a ni.

¹⁸Gileada farnu Hamoleketi'n nâipasal thum a neia: Isoda, Abiezera, Malaa hai hi an ni.

¹⁹(Semida hin nâipasal minli, Ahiana, Sekema, Likhia le Aniamia a neia.

Efraima irchihai

²⁰Efraima irchihai chu hihai hi an ni, Suthela, Bereda, Tahata, Eleada, Tahata

²¹Zabada, Suthela hai hi. Efraima hin nâipasal Ezera, Eliada, a neihaia. Khannisian Gath khua mihai belra an inrûk an that pehaia.

²²An pa Efraima'n a chûla, a urênghaiin an hong pana, irtharngam an saka.

²³A dôngma a'rpôlpui nôka, nâi a vonga, nâipasal a neia, an chung a buaina a tung sikin ar hming khom Beria an iti a ni.

²⁴Efraima'n nâinupang Seeri a neia, Beth-Horon chuanchung le chuanhnuai le Uzen-seer khuahai hi a siam a ni.

²⁵Efraima hin nâipasal dang Refa a nei saa, a'rchihai chu hihai hi an ni. Resefa, Tela, Tahana,

²⁶Ladana, Amihuda, Elisama

²⁷Nuna le Josua.



²⁸An ram thar lâk an omna ram Bethel le a kôlvêl khua ata nisua tiang Naaran khua a tunga, nitâk tiang Gezer le a kôlvêl dênin Sekem le Ai khua, le a kôlvêl khuahai a huam sa.

²⁹Hi khopui Beth-Sean Taanak, Megido, Dor le a kôlvêl khua Manasea irchihai thu hnuai an om, kha hmunhai khan Jakoba nâi Josefa irchihai omna ram a ni.

Asera irchihai

³⁰Hi hi Asera irchihai suina chu a ni. Nâipasal minli Imna, Isva, Isvia le Beria hai an ni. Nâi nupang sari a nei sa.

³¹Beria hin nâipasal Hebera le Malkiela a neihaia, Malkiela hin Birzait khua hi a inding a ni.

³²Hebera hin nâipasal thum Jafleta, Somera le Hothama a neihaia, nâinu Suai a nei sa.

³³Jafleta khomin nâipasal thum Pasaka, Bimhala, Asvata a neihai.

³⁴A sangpa Somera khom hin nâipasal thum, Roga, Jehuba le Arama a neihai.

³⁵An mitum tak Hothama hin nâipasal minli, Zofa, Imna, Selesa le Amala a neihai.

³⁶Zofa nâihai chu hihai hi an ni, Sua, Harnefera, Saula, Beria, Imra,

³⁷Bezera, Hoda, Sama, Silsa, Ithrana, Beera.

³⁸Jethera irchihai chu Jefunea, Pispas, Ara hai an ni.

³⁹Ula irchihai chu hihai hi an ni, Ara, Haniela, Rizia hai an ni.

⁴⁰Khihai khi Asera irchihai chu an ni; ar chi dang sênga hruaitu irdoina irhming inthang le hruaitu fel ta tak an ni. Asera irchi lai ata sipai chang thei mi sêngni sângruk an om.

1 Thurchi Suina 8

Benjamina irchihai

¹Benjamina'n nâipasal ringa a neia, a ulian dônin hihai hi an ni. Bela, Asbela, Ahara,



²Noha, Rafa,

³Bela'n nâipasal hihai hi a nei. Adara, Gera, Abihuda,

⁴Abisua, Naamana, Ahoa,

⁵Gera, Sefufana le Hurama.

⁶Ehuda irchihai chu Naamana, Ahija, le Gera hai an ni. Geba khua irchi danga mihai laia hruaitu an ni. Salin Manahat hmuna an hruai hai,

⁷kha hmuna khan an om ta a ni. Uza le Ahihuda pa Gera haiin a ihruaihai an ni.

⁸Saharaima khan a dôngma inhni Husimi le Baari hai chu a senhaia; kha zoiin Moab rama a om ta.

⁹Dôngma Hedesi a neia, nâipasal sari Jobaba, Zibia, Mesa, Malkama,

¹⁰Jeuza, Sakia le Mirma a neihaia. A nâihai chu hruaitu an ni.

¹¹Husimi leh hin nâipasal hni Abituba le Elpaala a neihai.

¹²Elpaala nâipasal thum, Ebera, Misama le Sameda a neihaia. Sameda hin Ono le Lod hi an kôlvêla khua indingtirtu an ni.

Gath le Aijalon-a Benjamina hai omna

¹³Beria le Sema hi Aijalon khuaa omhai hruaitu an ni. Gath khuaa lei omhai ngai chu an irzûlhaia.

¹⁴Beria irchihai chu hihai hi an ni. Ahioa, Sasaka, Jeremota,

¹⁵Zebadia, Arada, Edera,

¹⁶Mikaela, Ispa, le Joha.

Jerusalema Benjamina omhai

¹⁷Elpaala irchihai chu, Zebadia, Mesulam, Hizkia, Hebera,

¹⁸Ismeraia, Izlia, Jobaba hai an ni.

¹⁹Simeia irchihai chu, Jakim, Zikri le Zabdi an ni.

²⁰Elienai, Zilethai, Eliel,



²¹Adaia hai, Beraia le Simrata hai an ni.

²²Sasaka irchihai chu, Ispana, Ebera, Eliela,

²³Abdona, Zikri, Hanan,

²⁴Hanania, Elama, Anthothiza,

²⁵Ifdeia le Penuela hai an ni.

²⁶Jerohama irchihai chu, Samseraia, Seharia, Athalia,

²⁷Jaaresia, Elija le Zikri hai an ni.

²⁸Hihai hi an irchibulhai chu an ni, an irchihai hi Jerusalema om an ni.

Gibeon le Jerusalema Benjamina in omhai

²⁹Jeieia'n Gibeon khua hi an dingin a oma. A dôngma chu Maaki a ni.

³⁰A nâilutîr tak chu Abdona a ni, a nâi danghai chu Zura, Kisa, Baala, Nera, Nadaba,

³¹Gedora, Ahioa, Zekera,

³²Miklota, an ni Miklota hi Simea pa a ni. Hihai irchi hi Jerusalema an oma.

Reng Saula in mihai thurchi

³³Nera hin Kisa a neia, Kisa hin rêng Saula a neia. Saula hin nâipasal minli, Jonathana, Malkisua, Abinadaba le Esbaala a neihaia.

³⁴Mika pa Merib-baala chu Jonathana nâi a ni.

³⁵Mika hin nâipasal minli, Pithona, Melek, Tarea, Ahaza, hai a neia.

³⁶Ahaza'n Jehoda a neia, ama hin nâi inthum, Alemeta, Azmaveta, Zimria a neia, Zimria'n Moza a neia.

³⁷Ama hin Binea a neia, Binea hin Rafa a neia, ama hin Eleasa a neia, Eleasa hin Azela a neia.

³⁸Azela'n nâi kiruk, Azrikama, Bokerua, Ismaela, Searia, Obadia le Hanana a neia.

³⁹Azela sangpa Eseka hin nâi inthum, Ulama, Jeusa le Elifeleta a neia.



⁴⁰Ulama nâihai hi sipai huaisen tak tak an ni. Thal kâp thei an ni, a tu le a nâi irzakhat sômringa a nei. An rêngin Benjamina nama mi an ni.

1 Thurchi Suina 9

Babulon sala intâng kîr nôkhai

¹Israel mi murdihai irhming chu irziak ving a ni. “Israel rêng hai ti lekhabua” irziak lût a ni. Judai ram mi murdihai sualna sikin Babulon sala hruai lût ving an ni.

²An in le loi omna khuahai kîr masahai chu, Israel mi narân hai, ochai, Levi irchia tempil enkoltuhai an ni.

³Juda nam, Benjamina nam, Efraima nam, le Manasea hai chu Jerusalem khuua om hrangin an fea.

⁴Juda nâi, Perez a irchihai hruaitu Amihuda nâi pasal Uthaia a ni, a pu chu Omria a ni. A’rchihai laia Imria le Bania an om sa.

⁵Juda nâi Sela irchihai hruaitu chu Asaia a nia, an hruaitu tak a ni.

⁶Juda nâi Zera irchihai hruaitu chu Jeuela a ni, Juda irchi Jerusalema omhai chu mi irzaruk sômkuak an ni.

⁷Benjamina nam sênga lût Jerusalema omhai chu hihai hi an ni. Mesulama nâi Salua hai in mi, Mesulama pa hi Hodavia a nia, a pu chu Hasenua a ni.

⁸Jehorama nâipasal Ibneia hai in mi. Uzia nâipa Mikria tupa Ela-hai in mi, Sefatia nâi Mesulama hai sêngkua: Sefatia Reuela nâi Ibnija tupa a ni.

⁹Hi namhai hi Jerusalema in sêng mi irzakuak sômringa kiruk an om. An irhming târinlang hai hi an hruaituhai an ni.

Jerusalema ochai omhai

¹⁰Hi ochaihai hi Jerusalema om an ni. Jedaia, Jehoiariba, Jakina, Hilkia nâipa Azaria, ama hi an tempil sênga an hruaitupa tak a ni. A puhai chu a dônte’n hihai hi an ni.

¹¹Mesulama, Zadoka, Meraiota, Ahituba, Jehorama, nâipa Adaia a ni, ama hi a pu chu Pasura le Malkija hai an ni.



¹²Adiela nâipa Maasaia, a puhai chu Jazera, Mesulama, Mesilemita le Imera hai an ni.

¹³Ochai in sâng mi ulianhai chu mi sângkhat irzasari sômruk an ni, tempila tho hrang tinrêng tho thei ving an ni.

Jerusalema Levi omhai

¹⁴Levi in sâng mi Jerusalema omhai chu: Hasuba nâipa Semaia, a puhai chu Azrikama le Hasabia an ni, hihai hi Meraria nâihai an ni.

¹⁵Bakbakara, Heresa, Galala le Mika nâipa Matania, hi hi Zikri nâipa a nia, ama hi Asafa nâipa a ni.

¹⁶Semaia nâipa Obadia, ama hi Galala nâipa a nia, ama hi Jeduthuna nâipa a ni. Khan, Asa nâipa Berekia hi Netofa khuaa mi Elkana nâipa a ni. Netofa khoram sângkuaa om ngai an ni.

Jerusalem tempila sipai omhai

¹⁷Hi sipaihai hi Jerusalem tempil sâng a om an ni. Saluma, Akuba, Talmona, Ahimana le Saluma, hi pa hi an ulian tak a ni.

¹⁸Hi zoro tena hin chu rêng mikot an iti nisua tianga om ngai an ni. Atûn hin chu Levia irchihai omna mikot an ihrung a ni ta.

¹⁹Korea nâipa Saluma, Ebiasafa tupa chu Kora irchihai le an biakbuk inkhâr enkoltu a ni, an irchihai khom Rengpa omna in enkoltu an ni.

²⁰Eleazara nâipa Finehasa chu Rengpa'n ompui ri se, an ulian tak a ni.

²¹Meselemia nâipa Zekaria khom biakbuk inkhâr enkoltu a ni.

²²Inkhâr entu mi irzahni sômhleihni an inthang suakhaia. An omna khua a dônte'n an irhming an irziak pehai. Reng Davida le deipu Samuela'n an sintum an izêk pehai a ni.

²³Annihai le an irchihai hin tempil inkhâr chu an ihrung a ni ta.

²⁴Sim tianga, hmâr tiang, nisua le nitâk tianga inkhâr omhaia khan, an sika hruaitu an om chita.



²⁵Khan, an urêng hai, an khuaa omhai kha, sîn sari sîng rikipa sin thoa anni leh om hrangin a kêr kêrin an ihong ngai hrang a ni.

²⁶Hi hruaitu minli, irchamneituhai hi Levi irchia mi an ni. Tempila tentan dang dang le a sînga thil irhmang thei loi hrang tena hi, an mophurna a ni.

²⁷Khaangin, a zîng tin hi tempil inhongin, a enkol pumin an ihrung mai ngai a ni.

Levi Irchia mi dang hai

²⁸Levi irchi sînga mi dang hai chu tempila bêlbûr enkoltu an ni, an hmang hrang an irsinsiahai vinga, an hmang zoiin an hong pêk kêr nôk khomin an irsinsia le an lei en indik ngai a ni.

²⁹Senkhat chu tempil thil ser enkoltu an ni; baidi, uain, oliv hriak, mirimhoi hâl zât, mosola hai ten an kut chung a om a ni.

³⁰Mirimhoi hâl hrang le mosola irzêl chu ochaihai tho hranga a ni.

³¹Kora irchia Saluma nâilutîr Matithia chu khuria thil inzêi tianga enkolna sin ngai a ni.

³²An urêng senkhathai, Kohatha mi irchihai chu sabat nia bai siam ngaihai an ni.

³³Levi irchia mi, mi senkhat chu tempila irhâihoi tumtu an ni, a sîn le zân itiklai khoma hmang thei an ni sikin, an hruaituhai chu tempil tentan senkhata omin ite sin dang tho ta ngai mahai.

³⁴Hi irhming târinlang hai hi Levi irchi dang dang, an irchi suina khoma an hruaituhai an ni, Jerusalema an hruaituhai an ni.

Reng Saula neitu le ar chihai

(8.29-38)

³⁵Gibeon hai hruaitu Jeie la chu Gibeon khu a mi a nia, a dôngma chu Maaki a ni.

³⁶A nâipa ulian tak chu Abdona a ni. Ama nâihai chu Zura, Kisa, Baala, Nera, Nadaba,

³⁷Gedora, Ahioa, Zekaria le Miklota an ni.



³⁸Miklota hi Simea pa a ni. Hihai hi Jerusalema an irchi a dang omhai chu an ni.

³⁹Nera hin Kisa a neia, ama hi Saula pa a ni. Saula hin nâi minli a neia, Jonathana, Malkisua, Abinadaba le Esbaala hai hi an ni.

⁴⁰Jonathana hin Merib-baala a neia, ama hi Mika pa a ni.

⁴¹Mika hin nâipasal minli Pithona, Meleka, Tarea, le Ahaza a neihai.

⁴²Ahaza'n Jara a neia, ama hin nâipasal inthum Alemeta, Azmaveta le Zimria a neihai. Zimria hin Moza a neia.

⁴³Moza nâipa Binea a nia, Binea chu hin Refaia a neia, Refaia hin Azela pa Eleasa a nei.

⁴⁴Azela hin nâipasal kiruk, Azrikama, Bokerua, Ismaela, Searia, Obadia le Hanana hai hi an ni.

1 Thurchi Suina 10

Reng Saula thina thu (1 Sam 31.1-13)

¹Filistia le Israelhai chu Gilbo tânga an irdoia, Israel mi tamtak thatin an oma, mi danghai le Saula ineihai leh an intâna.

²Filistia haiin an phâkhaia, Saula nâi inthum Jonathana, Abinadaba le Malkisua, hai an thathaia.

³Saula chu a sate'n an doia, thal leh an kâpa a pop inna oka.

⁴Ruatharte a râlthuum chôitu kuang, "Ni khandai phôiin lân, ni that ta ro, Filistia mi sertan loihaiin nin dôî hrai an ti," a tia. Khannisian ruathartepa khan a chi hrai sikin that ngam maka. Khasikin Saula hin a khandai a lâka a bingin ar vita.

⁵Ruathartepa khom khan Saula thi kha a va hmu'n chu, ama khandai a phôia ar vit that nôk ta a ni.

⁶Saula le a nâi inthumhai chu an thia an inlalna khom a hek ta a ni.



⁷A sipaihai an rota, Saula le a nâihai an thi ti an inhriatin Jereel phâia omhai khan khua kha an mâksana, Filistia mihai kha an hong a hong lua tâka.

⁸Zînga chu Filistia mihaiin an ithathai râlthuum irfuang hrangin an suaka, Gilbo tânga Saula le a nâihai ruak an va hmua.

⁹Saula lu chu an lâka, a râlthuum khom an lâka, khanchu Filistia ram hmun tina, hi thil lômom tak hi an milimhai le an mihai hril hrangin thanginthei an tîra.

¹⁰Saula râlthuamhai chu an Pathian tempila an siaa, a lu chu an Pathian Dagona tempila an târa.

¹¹Gilead rama Jabez khuaa mihaiin Filistia-haiin Saula an isoisak dânhai an inhriatin chu,

¹²an pasal sahai an irthok suaka, Saula le a nâihai ruak an var fuanga, Jabes khuaa an hong chôia, ama kha seso thing hnuiaia an phûmhaia, sîn sari bu an ngheia.

¹³Rengpa ata an sin insiatna sikin Saula chu a thi tâka, Rengpa thu a zôm no sikin.

¹⁴Rengpa irhletpui loiin mithi irthahai irdon sikin Rengpa'n a irthattir a ni, a ram chu Jesaia nâipa Davida kuang a pêk ta a ni.

1 Thurchi Suina 11

Israel le Judahai kuanga Davida Inthangna

(2 Sam 5.1-10)

¹Hebron khuaa Davida kuang Israel mi murdihai an fea, “Ni thisen irzompui kin nia,

²rêng Saula an lal lai khom khan Israel mihai chu irdoina hmuna ni hruaihai ngaia. Rengpa ni Pathian khomin, ki mi Israelhai hi ni kai hruaiin an roirêltu ni ni, tiin ni len kunga,” an tia.

³Israel hruaituhai murdi chu Hebron khuaa Davida kuang an fea, Davida'n Rengpa kuang khan an rêngin thu a thungpuihaia, hriak nâlin a oma, Samuela hmangin Rengpa inkung ang khan Israelhai rêng a ni tâka.



⁴ Reng Davida le Israelhai chu an fea, Jerusalem khua an doia, kha zoro khan chu Jebus an iti ngai a ni, Jebus mi a phuta omhai khom an la iom mai a ni.

⁵ Jebus mihaiin, “Kho sùng hong lût thei viat no chi ni,” an lei tia. Khannisian, Davida’n Zion kul chu a lâk tâka, kha kul omna mual kha, Davida khopui tih a ni ta.

⁶ Davida khan Jebus mi a that masatak chu sipai ulian tak inchangtir ki ti, a tia. Jeruii nâipa Joaba khan doi hrangin a hruaihai tâka, sipai ulian tak a ichang a ni ta.

⁷ Kha kula khan Davida a om tâk sikin Davida khopui ti a ni ta.

⁸ Kha kul kha Milo an iti tâng sak tiang irhôra irrêng tukinchamin a siama, a danghai chu Joaba’n a sunzom nôk ta a ni.

⁹ Reng Davida chu a hrât tîr tîra, itinrêng chungarengpa’n a ompui mai a ni.

Davida sipai irhming inthanghai

(2 Sam 23.8-39)

¹⁰ Hihai hi Davida sipai irhming inthanghai chu an ni, Israel mi danghai le Pathian chonginkung angin Davida chu an inlaltir oka, a ram khom an iroiinputir a ni.

¹¹ “Pasal sa” inthum an iti laia a hruaitutak chu a doihaia, voikhat rengin a thathai vinga.

¹² Pasal sa inthumhai laia inkhat nôk chu Ahoa irchi Dodoa nâipa, Eleazara a ni. Pas-damim-ah Filistia-hai le Davida hai an irdoia.

¹³ Annihai hi Davida tianga kop an ni. Barli hmuna an om laiin Israelhai chu an rota.

¹⁴ A nâihai leh an ngîra, Filistia-hai an thathaia, Rengpa’n an hnêtir a ni.

¹⁵ Sûn khat chu Davida omna Adulam khura, pasal sa sômthumhai leh an oma. Filistia pâl khathai chu Refa-hai omna phâia om hmun an khuara.

¹⁶ Kha hmuna an om laiin Davida om lai takin Filistia mihai chu Bethlehem khua an irhuala.



¹⁷ Davida'n chu a omna khua Bethlehem a sân ar ngaia, "Bethlehem mikot bula tuikuang tui ni va chôi pe thei hrang omhai sianlân chu o," a tia.

¹⁸ Pasal sa inthumhaiin Filistia sipaihai chu khêlhain, Bethlehem kul mikot bula tui chu an va thâla, Davida an hong pêka; khannisian lei in nuam nôk maka. Rengpa kuang inhlanin a ibunpai a ni.

¹⁹ "Hi tui hi in thei no ning mihai thi irhuamhai thisen kêng ki i-in hrang, thi irhuama an va ichôi a ni sikin," a tia.

²⁰ Joaba upa Abisaia chu, "Pasal sa sômthumhai" laia a hruaitutak a ni. Ufei leh mi irzathum a doihaia, a thatpai vinga, ar hming satna a hlo a ni.

²¹ Pasal sa sômthumhai laia irhming inthang tak a nia, an ulian tak nina a chang ta. "Pasal sa inthum" an itihai laia chu la chang thei ma.

²² Kabzael khuaa pasal sa; Jehoiada nâipa Benaia khomin thil irkhêl tak a thoa. Moab isong takhai mi lian inhni a thathaia, ivur tâk lai takin kâmkeibaknei a khura a that sa a ni.

²³ Aigupta mi pumlian tak, mûk ringaa dung sei a that sa a ni. Hi pa hin zaper dôra lian ufei a hmanga, Benaia hin chu hmoltôk hmangin a doia, a ufei a sutpaia, kha a ufei leh khan Aigupta mipa kha a isun that a ni.

²⁴ Pasal sa sômthum laia mi Jehoiada nâipa Benaia'n hi thilhai hi a itho a ni,

²⁵ khannisian, "Pasal sa inthumhai" laia chu la chang thei ma, Davida'n ama hrung hai laia hruaituin an omtira.

²⁶ Pasal sa danghai, Joaba sangpa Asahela, Bethlehem mi Dodoa nâipa Elhanana,

²⁷ Haror mi Samota, Pelon mi Heleza,

²⁸ Tekoa mi Ikesa nâipa Ira, Anathot mi Abiezera,

²⁹ Husa mi Sibekaia hai, Aho mi Ilaia hai,

³⁰ Netofa mi Maharaia, Netofa mi Baana nâi Heleda,

³¹ Benamina irchia mi Gibeia khua mi Ribaia nâi Itaia, Pirathon mi Benaia,



- ³²Nahalegaas mi Huraia, Arbat mi Abiela,
³³Bahurum mi Azmaveta, Saalbon mi Eliaba,
³⁴Gizon mi Hasama, Herar mi Sagea nâipa Jonathana,
³⁵Harar mi Sakora nâi Ahiamas, Ura nâi Elifala,
³⁶Mekerat mi Hefera, Pelon mi Ahija,
³⁷Karmel mi Hezrua, Ezbaia nâi Naaraia,
³⁸Nathana sangpa Joela, Hagria nâi Mibhara,
³⁹Amon mi Zeleka, Berot mi Naharaia hi Zeruii nâipa Joaba râltuam chôitu a ni.
⁴⁰Ithra mi Ira le Gareba,
⁴¹Hit mi Uria, Ahlaia nâi Zabada,
⁴²Siza nâi Adina, ama hi Reubena irchi laia hruaitu a ni, a'rchia mihai hruaiin, mi sômthumhai le;
⁴³Maaka nâi Hanana, Mithna mi Josafata.
⁴⁴Asterat mi Uzia, Aroer mi Hothama nâi Sama le Jeiela,
⁴⁵Tiz mi Simria nâi Jediaela le a sangpa Joha, Mahava mi Eliela,
⁴⁶Elnaama nâi Jeribaia le Josavia, Moab mi Ithma,
⁴⁷Eliela, Obeda, Mezobia mi Jaasiela an ni.

1 Thurchi Suina 12

Benamina mi Davida zuihai

¹Reng Saula chia Ziklag khuaa, Davida intânin a om lai khan, Saula chu an irchipui Benamina irchia mi ni khomsian irdoia lei kop ngai mi iamom taktak Benamina irchi mihaiin an hong pana.

²Chang tiang le vei tiang inchanghlanga hmang thei an nia, sâilungdêng thei khom an ni sa.



³Gibeá mi Sama nâi Ahiezera le Joasa-hai an hruaihaia, kha sipaihai chu hihai hi an ni. Azmaveta nâi Jeziela le Pelet Anathot kua mi Bereka le Jehua.

⁴“Pasal sa sômthumhai” laia mi sipai irhming inthang Gibeá mi Ismaela, Gedera mi Jeremia, Jahaziela, Johanana le Jozabada.

⁵Harif mi Eluzai, Jerimota, Bealia, Semaria, Sefatia,

⁶Kora irchia mi Elkana, Isia, Azarela, Joezera, Jasobeama,

⁷Gedor mi Jerohama nâi Joela, Zebadia.

Gada mi Davida zuihai

⁸Ramchâra ar bîkna hmuna a om laiin Gada irchia mi irdoia kop sipai irhming inthanghai hin an hong panhaia, pho le ufeia râl doi thei an ni, kâmkeibaknei hmêl irput an ni, rôla sarza anga hrât an ni.

⁹An rêng hai angin an irhming hai chu Ezera, Obadia, Eliaba,

¹⁰Mismana, Jeremia,

¹¹Ataia, Eliela

¹²Johanana, Elzabada

¹³Jeremia le Makbanaia hai an ni.

¹⁴Gada irchia mi sipai senkhathai chu sângkhat hruaitu an nia, a la thar ualhaiin chu irza hruaitu an ni.

¹⁵Kum phuta, tha maton taka, Jordan tui lian laiin an hong irkâna, tui hrât laiin nisua tiang le nitâk tianga omhai chu an irzûlhai ta.

Benjamina le Juda Davida zuihai

¹⁶Benjamina le Juda irchia mi senkhathai chu Davida omna khur an pana,

¹⁷Davida'n a lei donhaia, “Keima tianga kop hranga hong nin niin chu, satakin nangni lei pom ki ti; thil saloi ite nin ta hrangin ki tho no khoma, ki râlhai kuanga ni ni pêk no hrangin chu kin pa Pathianin an hriat, nangni soisak ngêt a ti,” a tia.



¹⁸An laia hruaitu inkhat Amasaia chu Pathian irthain an thuama, hiang hin chong an kung tâka: “Ni mihai kin ni, Davida, Jesaia nâipa, nangma mi kin ni. Irtharngamna ni kuang om sianlân, nang a san hrangtuhai kuanga khom om sianlân, Pathianin nang changpui ri se,” a tia. Davida’n a lei lômhaia, a sipai hruaitua a siahai ta.

Manasea irchi Davida zuihai

¹⁹Filistia-haiin Saula doi hranga an irsiam lai khan Davida khom a om saa, Manasea-hai khom senkhatin Davida tiang an kopa; khannisianlân, Filistia hruaituhai chu hmanghai ual ma; a pu Saula tiang kop a tih ti kha a chia, Ziklak khuaa an itîrpai a ni.

²⁰Ziklag khua a hong tungin chu Manasea-hai laia sipai sângkhat hruaitu, Adna, Jozabada, Jediaela, Mikaela, Jozabada, Eliahua, Zilethaia hai ama tiang an rota.

²¹Davida’n sipai ulian pôl a doipuihaia, mi hrât pâl an nia,

²²A nitin Davida san hrangin an hong bôk maia, Pathian sipaihai angin sipai pôl roiinpui tak an ni ta.

Davida sipaihai

²³Rengpa thu angin Saula ram Davida ilua hrang Hebron khuaa Davida kuang irdoina râltukfam irbela fehaisai chu hiang hin a ni.

²⁴Juda irchia irdoina râltukfam irbela, pho le ufei chôihai chu 6,800 an ni.

²⁵Simeona irchi irdoina mi hrâthai chu 7,100.

²⁶Levia irchi 4,600.

²⁷Jehoiada chu Arona irchihai hruaitu a nia, a kôla 3,700 an om pea;

²⁸Zadoka ruatharte hrâthai chu sipai hruaitu 22 hai le

²⁹Benjamina irchihai laia mi, Saula irchihai, 3,000 matona khan chu a tam ual hi Saula tianga kop ngai an ni.

³⁰Efraima irchihai laia mi, mi hrât an in mi laia irhming inthang 20,800,



³¹khan Manasea nam chimriphai laia mi Davida rênga siam hranga honghai chu 18,000.

³²Isakara irchi laia mi, kha laia thil inhriat mi Israelhai sintho hrang kâmnang inhriat mi a ulian ualhai chu 200, an urênghai chu an thu hnuaia om an ni.

³³Zebulun hai laia mi, râl doi thei, irdoina hmangrua hman thei ving 50,000 lungrîl det irput mi an ni.

³⁴Naftalia hai laia mi sipai hruaitu 1,000 pho le ufei chôl mihriam 37,000 hai le

³⁵Dan hai laia mi râlruk irvoa irbel sai 28,600.

³⁶Asera hai laia mi râl doi thei ving 40,000.

³⁷Khan Jordan râl Reubena-hai laia mi, Gad-hai laia mi, Manasea nam chimrip laia mi irdoina hmangrua tinrêng hman thei 1,20,000.

³⁸Khahai murdi kha irdoi mi, irbîk thei an ni, Davida chu Israelhai laia rênga siam hranga milung hmunkhat irputin Hebrona an fea; Israel danghai khomin Davida chu rênga siam hrangin lungrîl hmunkhat an irput vinga.

³⁹Khanchu Davida kuang khan, sùn thum fâk zongin an oma; an urênghaiin an isuang pehai ving a ni.

⁴⁰Kha vai kha ni loiin an kôlvêla, Isakara ram ata honghai, Zebulun ram ata honghai Naftali ram ata sakuartung hai, saringsei hai, sakor hai, sehrâtchal hai le fâk thei thil bai, theipui ra, grep ra, uain, sahriakhai an pêla, sehrât, kêlbelra tamtak an hong chôia, Israel ram chu lômna'n a sipa.

1 Thurchi Suina 13

Kiriath-jearim kha ata Thuthung Bôm son

(2 Sam 6.1-11)

¹Khan, rêng Davida'n hruaitu murdi sângkhat hruaitu le irza hruaituhai irdonin.

²Davida'n Israel irbukkhômhai laia, "A sa nin iti lam a nia, Rengpa ei Pathianin ar fûk a tiin chu, Israel ram murdia ei urêng la omhai chu, ram kilkhôra om ochai le Levi hai chu ei kôla om hrangin koihai ei ti.



³Khanchu ei Pathian bôm hi lapai nôk ta ei ti, Saula inlal lai khan ite ngaitua loiin ei oma,” a tia.

⁴Khanchu ar bukkhôm murdihai khan, khaanga tho hrangin an nuama, mi irngai dâna khom thil dik a nia.

⁵ Khanchu Davida’n Aigupta tui Sihor ata Hamath khua lûtna dênin Israel mihai chu Kiriath-jearim khuaa Pathian bôm la hrangin a bukhaia.

⁶ Khanchu Davida le a mihai murdi Judai rama Baal Kiriath-jearim an itihna khan Cherub hai chung a toiRengpa irhming chuangna Thuthung Bôm chu la hrangin an hong fea.

⁷Khan Pathian bôm chu Abinadaba in rengata tâli tharin an fepuia, Uza le Ahioa’n tâli chu an chalaia.

⁸Khan Davida le Israel mihaiin hla sakin, theihle, belem, perkhuang, bekulhai inringin Pathian makunga an lâm sup sup.

⁹Khan Kidon hruizôl an hong tungin chu, Uza khan Thuthung Bôm chu chel hrangin a hon bana, sehrâthai kha an irpal sakin,

¹⁰khan irningloirengin Rengpachu Uza chung a khan a ning an mura, Bôm kha a tôn sika khan, a that tâka. Kha hmuna khan Pathian makunga a thi tâka.

¹¹Khan Rengpa’n Uza chung a ningmurin a kut a thâk sakin, Davida chu a ning an mura; kha hmun kha Perez-uza a chongpuia, atûn ten hin a la ni mai a ni.

¹²Khan Davida’n kha nî rengata kha Pathian a chi tâka, “Itin mo Pathian Bôm chu ki hong ichôi thei hrang tâk?” a tia.

¹³Khanchu Davida’n Bôm kha Jerusalem khuaa ama kuang chôi maka,

¹⁴ Pathian Thuthung Bôm kha Gath mi Obed-edoma ina khan tha thum a oma; khanchu Obed-edoma insûngkua le a inei murdihai chu Rengpa’n sat a vura.

1 Thurchi Suina 14

Jerusalema Davida sintho

(2 Sam 5.11-16)



¹Sum le pâia irsanirhlômna hrangin Tura rêng Hirama'n Davida kuang palai a tîra. Reng in sinna hrangin sidar thing a pêka, lung suk thei hai le, thing tianga mistiri a ngaitua pe saa.

²Rengpa'n Israelhai chung a lalna an dettira, a mi Israelhai sikin a ram khom chôiindômin a om ti Davida'n an hriata.

³Davida'n Jerusalema dôngma tamtak a nei nôka, nâinu nâipa a neihai saa.

⁴Jerusalema a nâihai chu hihai hi an ni, Samua, Sobaba, Nathana, Solomona,

⁵Ibhara, Elisua, Elpeleta,

⁶Noga, Nefega, Jafia,

⁷Elisama, Beelliada le Elifeleta,

Filistia hai inhnêna

(2 Sam 5.17-25)

⁸Filistia mihaiin Davida chu Israel ram pumpuia an lal ti an inhriatin chu, chel hrangin sipai an tîra. Davida'n a len hriata doihai hrangin a'rthoka.

⁹Filistia sipaihai chu Refahai omna irhôr an hong tunga, mi an inmokhaia.

¹⁰Davida'n, "Filistia-hai hi doihai ning mo? Nin hnêtir ni mo?," tiin Pathian ar dona. Rengpa'n "Doihai ro, nan hnêtir ki ti," a tia.

¹¹Davida'n Baal-Perezima a doia, an hnê tâka. "A râl sipaihai chu tuilian ni itân angin Pathianin a ni insoisaktir hi," a tia. Kha hmun kha Baal-Perezim a ti tâka.

¹²Filistiahaiin an Pathian irlimhai chu an mâksana, Davida'n an hâltirhai vinga.

¹³Zoro sôtloite hnunga chu kha hmun ngêta khan Filistia hai an hong, kha hmuna mihai kha an inmokhaia.

¹⁴Davida'n Pathian ar don nôka, ama'n "Hi tiang ata hi chu doihai no'n lân, varâl tianga Thingtheimu bil tiang son fe'n lân, kha hmun ata kha doihai roh.

¹⁵Thingtheimu rêla an hong irhâi nin hriat tena, pût roh.



¹⁶Pathian thupêk angin Davida'n a thoa, Gibeon ata Gezer dên rakin Filistia-hai chu a'rzûlhaia.

¹⁷Davida irhming chu ram tina an thanga Rengpa zârin nam tinin an ichi a ni ta.

1 Thurchi Suina 15

Thuthung Bôm lâk an tum nôk thu

¹Davida'n a omna hrangin “Davida khopuia” in a sina, Pathian Thuthung Bôm siana hrang hmun a sinsiama, puan in khom a sin saa.

²“Levi irchihai vaiin Thuthung Bôm chu an irzôn hrang a ni, a'rzôn hrangtuhai leh kumtuanga sintho hrangin Rengpa'n hihai hi an thang,” a tia.

³Davida'n Israel mi murdihai chu Jerusalema Thuthung Bôm siana hranga a isinsiana khan a bukkhômhaia.

⁴Arona irchi le Levihai chu a koihaia,

⁵Levi irchi, Kohata irchihai chu irzakhat sômhni, Uriela hai leh an hongga.

⁶Meraria irchi ata irzahni sômhni, Asaia hai leh an hongga.

⁷Gersona irchi ata mi irzakhat sômthum, Joela hai leh an hongga.

⁸Elizafana irchi ata mi irzathum, Semaia hai leh an hongga.

⁹Hebron irchi ata mi sômriat, Eliela hai leh an hongga.

¹⁰Uziela irchi ata mi irzakhat sômhleihni, Aminadaba hai leh an hongga.

¹¹Davida'n ochai Zadoka le Abiathara hai a koihaia, Levi irchia mi kiruk, Uriela, Asaia, Joela, Semaia, Eliela, Aminadaba hai a koihaia,

¹²an kuanga khan, “Levi irchia hruaitu nin nia, irthiang infâi unglân, nin Levi chanpuihai khom irthiang infâihai roi. Rengpa Israelhai Pathian Thuthung chu a siana hmuna ki isinna dênin nin irzôn intung hrang a ni.

¹³Lâk kin tum matona khan om mak chêia, Rengpa kin Pathian chu a lâk hrang dân irdon loiin kin oma, a ni isoisak a ni,” a tia.



¹⁴Rengpa Israelhai Pathian Thuthung Bôm lapai hrangin chu ochaihai le Levihai chu an irthiang infâi zoi tâka.

¹⁵Mosia kuanga Rengpa ihril angin Levi irchihaiin bôm chu a zônfung leh an irzôn tâk a ni.

¹⁶Levi irchihai chu zaipôl hai, perkhuang suka têngrep intôka tîr hrangin an ulianhai chu Davida'n a hrihaia.

¹⁷Têngrep inring tak suk hrangin hi mihai hi a bêhaia.

¹⁸Joela nâipa Hemana, a sanghai Berekia nâipa Asafa,

¹⁹an sangpa Meraria irchia mi Kusaia nâipa Ethana hai.

²⁰Annihai hi changpuia perkhuang sa zât chi inper hrangin Levi irchihai an kunghaia. Zekaria, Aziela, Semiramota, Jehiela, Unia, Eliaba, Maaseia, Benaia.

²¹Perkhuang irhâi chi thum inper hrangin Levi irchia mi, hihai hi an thang suakhaia. Matithia, Elifelehua, Mikneia, Azazia, tempila pulis Edoma le Jeiela hai leh.

²²Kenania chu thil tum thei tak a nia, Levi irchia irhâihoi tumtuhai chu a hruaihaia.

²³Berekia le Elkana chu Obed-edoma le Jehia le Thuthung Bôm hrung hrangin an thanghaia.

²⁴Ochai Sebania, Josafata, Nathanela, Amasaia, Zekaria, Benaia, Eliazara hai chu Thuthung Bôm matona fein bekul tumtu hrang an ni.

Thuthung Bôm Jerusalema an chôi

(2 Sam 6.12-22)

²⁵Reng Davida, Israel ulianhai le sipai sângkhat hruaitu chu Obed-doma ina Thuthung Bôm la hrangin raifân takin an fea.

²⁶Rengpa'n Levi irchi, Thuthung Bôm irzôntu hrang a changpui theina hrangin an kuang, sehrâtchal sari le kêlbelra sari an inhlana.



²⁷ Davida'n puanze irhmi a satak a sila, hla saktuhai khom, an hruaitu Kenania le Bôm irzôntuhai le an rêngin khaang khan an irvo vinga; Davida'n puanze irhmi Efod ar bel saa.

²⁸ Israel mi murdihai chu raifân takin an khêka, bekulhai, kêl irkîhai tumin, têngrep hai sukin, perkhuanghai inper pumin Thuthung Bôm chu Jerusalema an chôikâi tâka.

²⁹ Kho sûnga bôm an irzôn lût laiin Saula nâinu Mikali'n tukver ata a thîrhaia, rêng Davida lôm sika lâm le fuan kha a zu hmua, a lungrîla a hnuaisiaa.

1 Thurchi Suina 16

Thuthung Bôm chu Davida isinsiam puan ina

¹ Thuthung Bôm chu Davida isinsiam puan ina an irzôn lûta, an sia tâka. Rengpamakunga hâlrivôm thilinhlan le fâk suam thil an inhlana.

² Davida'n thil ar hlan zoiin chu Rengpa irhmingin mipuihai ta hrangin satvurna a pêkhaia; fâk hranghai a sem pehaia.

³ Israel rama mi murdi nupang le pasal an rêngin, bai tiam khat le sa rô sai tinte kha khatin, grep tui kop chînte te a pol pehaia.

⁴ Thuthung Bôm kôla Rengpa biakna hruaia, inpâkna hlasak hrangin Levi irchia mi senkhathai chu Davida'n an thanghaia.

⁵ Asafa chu an hruaitu tak a nia; Zekaria hi a hnuai renga mi a ni; Jeiela, Semiramota, Jehiela, Matithia, Eliaba, Benaia, Obed-edoma, Jeiela hai chu perkhuang le belem tum hranga an ni, Asafa chu têngrep inring taka suk hrang a ni.

⁶ Ochai inhni, Benaia le Jahaziela chu Thuthung Bôm kôla a kakâra bekul tum hranga inkung an ni.

⁷ Asafa le ar chia mi Levi irchihai chu Rengpa inpâkna hlasak kaihruaitu hranga inkung masa taktu chu Davida hi a ni.

Inpâkna hla

(Ipn 105.1-15; 96.1-13; 106.1,47-48)



- ⁸Rengpa chung a lômthu hril unglân, ar hming irlam ngai roi. A sintho hi nam tinrêng hrilhai roi.
- ⁹Ama inpâkin sak unglân, Thil irkhêl a ithohai hi hrilhai roi.
- ¹⁰A'rhming irthiang hi song unglân, Rengpa zongtuhai chu raiinfân ri sehai.
- ¹¹Rengpa zong unglân, a hrâtna zong roi, ama hi pan mai ngai roi.
- ¹²A sintho roiinpui takhai le, thil irkhêl a itho le a roirêlnahai kha, inhre mai ngai roi.
- ¹³O, a siahlo Israel irchihai, A inthang Jakoba nâihaio inhre mai roi.
- ¹⁴Ama hi Rengpa kin Pathian a ni, Rammual pumpuia roirêltu a ni.
- ¹⁵A thuthung chu inhre mai roi, irlo tin tin hranga a thupêkhai chu.
- ¹⁶Abrahama kuanga a thuthung le Isaka kuanga a chonginkung chu a inhriat mai a ni.
- ¹⁷Khahai kha Jakoba irchihai dân hranga namindet a ni. Israelhai kumtuanga thuthung hrangin.
- ¹⁸“Tho Kanaan ram hi nangni pe ki ti nin irchon a ni theina hrangin,” a tia.
- ¹⁹Ite ual ni loi, mikhual ma mai an ni lai khom khan,
- ²⁰Nam tinrêng laia chaninvâiin, kho tin sirin an irthona.
- ²¹Khannisian, tûte hrilsiat phal ni maka, Annihai sikin rênghai an irchutirhaia.
- ²²“Ki sahriak irthûtir hi, inthem no unglân, ki deipu hi ite irkôk no roi,” a tia.
- ²³Rammuala mi murdihaio, Rengpa inpâkin hla sak roi. a ni saninzôkna thu hi a nitin inpuang roi.
- ²⁴A roiinpuizia hi nam tin laia hril unglân, Mi tin laia thil irkhêl a ithohai hi inpuang roi.
- ²⁵Rengpa chu a roiinpui sikin, inpâk mai hrang a ni, pathian danghai nêkin inza hrang a ni.



²⁶Nam dang pathianhai chu a'rlim hrang vai a nia, Rengpa hi chu irvân siamtu a ni.

²⁷Roiinpuina le chôindômna haiin a tuama, a hmun irthiang chu, sinthotheina le lômnain a sip.

²⁸Rammuala nam tinrênghaio, Rengpa chu inpâk unglân, Rengpa roiinpuina le hrâtna chu inpâk roi.

²⁹Rengpa irhming roiinpui chu inpâk unglân, thilpêk hrang chôiin a ina hong lût roi. Irthiang le enhoi taka irvoin, Rengpa makunga hong kûn roi.

³⁰Irnêng mi murdihaio, a makunga hin inthing unglân, inhnîng loi hrangin irnêng hi a idet a ni.

³¹Irvânhaio raiinfân roi, o irnêng nang khom lômin lân, Rengpa hi rêng a nih ti nam tin hrilhai roi.

³²Tuikhanglian le a sûnga omhai chu khêkhai sianlân, ram le a sûnga omhai khom raiinfânin.

³³Rampuia thing murdihai khom châng sup sup ri sehai, Irnênga roirêl hrangin a zuang tika chu.

³⁴Rengpa hi a sa hrai sikin lômthu hril roi; Kumtuanga phûkdâi a ni sikin.

³⁵O, Rengpa kin Pathian, ni sansuakin lân; nam danghai lai ata ni hruai nôk roh. Ni'rhming irthiang inpâkin roiinpui takin nang chôindôm kin ti.

³⁶Rengpa Israelhai Pathian chu inpâk unglân, Kumkhua, kumkhontuanguin inpâk roi, Mi murdihaiin "Amen," an lei tia, Rengpa chu an inpâka.

Jerusalem le Gibeon khua Pathian biak hruaituhai

³⁷Rengpa Thuthung Bôm an isiana hmuna Pathian biak inkhôm hruaitu Asafa le ar chipui Levi irchihai chu Davida'n a sia indethaia, an sin a hong ni tâka.

³⁸Jeduthuna nâipa le ar chipuihai mi sômruk inhnihaiin an sanhai ngaia. Hosa le Obed-edoma chu mikot hrungtu an ni.

³⁹Ochai Zadoka le a ochai chanpui danghai chu Rengpa an biakna hmun Gibeon khuaa inkhômna hruaitu an ni.



⁴⁰Israelhai kuanga Rengpa thupêk, Rengpa dân bua irziak angin a zîng a zâna maichâma hâlrivôm thil an inhlan ngai hrang a ni.

⁴¹Hemana le Jeduthuna khom mi dang irtansuakhai leh an omsuama, a lungkhamna hek ngai loiin, Rengpa inpâkna hla sak hrang an ni.

⁴²Inpâkna hla an saka lei irfûktir hrang bekul, têngrep le irhâihoi danghai tum tianga hruaitu Hemana le Jeduthuna hai hi an ni. Jeduthuna irchipuihai chu inkhâr enkoltu an ni.

⁴³ Mi tin an in tiang an fea, Davida khom a in mihai uap hrangin a fe tâka.

1 Thurchi Suina 17

Davida kuanga Nathana thu intung

(2 Sam 7.1-17)

¹Reng Davida chu in sînga a om ual tâka. Sîn khat chu deipu Nathana a koia, a kuang, “Sidar thinga siam ina ki oma, Rengpa Thuthung Bôm lak puan in papaia a oma,” a tia.

²Nathana khan, “Insâpna mai ni ti hi te, thoiin lân, Pathianin nang ompui a ti,” a tia.

³Khannisian, kha ni zân khan Pathianin Nathana kuang khan,

⁴“Fe tan lân, ki siahlo Davida kuang ki thu hi va hril ro, nangma hin ki omna hranga tempil sin hrang ni mak che,

⁵atûn ten hin Israel mihai Aigupta ram ata ki hruaisuak ata kha tempila la om ngai ma ung. Puan in papaia kêng ki iom ngai, hmun dang danga ki irson thi thiai a ni.

⁶Israel mihai ki fepuihai laia khan, hruaitu hranga ki ibehai, mi tukhom sidar thinga tempil ni sin pe hrang inphûthai ngai ma ung.

⁷“Khasikin ki siahlo Davida kha hril ro; kei itinrêng Rengpa hin a kuang, rama ni kêlbelra en lai takin nang ki hruaia, ki mi Israelhai rêngin nang ki siama.

⁸Ni fena hmun tina nang ki ompuia, ni idoi, ni râlhai murdi, nang kin hnêtira, rammuala rêng irhming inthang takin nang siam ki ta.



⁹Mi tûte nang isêl loina hrang hmun, ki mi Israelhai hranga ki inthanga nang kin omtira, mi hrât tak takhaiin nang an doia; atûn ata nang doi ta no nihai.

¹⁰Ki mi Israelhai hrangin roirêltu kin danga, ni râlhai murdi nang an hnêpui le irchi tamtak pêk kin kunga.

¹¹Ni thi tena, ni pahai kuang ni fe tena, ni nâihai laia inkhat chu rêngin siam ki ti.

¹²Ama khan in ni sin pe a ti, kumtuanga inlal hrangin siam indet ki ti.

¹³A pa ni ki ta, ki nâipa ni ta a ti, nin lal laia rêng ki irheisan ang khan irheisan ta no ning.

¹⁴Ki mihai le ki ram sûnga roirêltu'n sia ki ta, a'rchia mihai ngêtin a rêngtoihmun chu hong lua pat an ti," a tia.

¹⁵Pathianin thu a ihril murdi chu Nathana'n Davida a hrila.

Davida Lômthu hril chongchaina

(2 Sam 7.18-29)

¹⁶Reng Davida chu Biakbuka khan a fein a toia, a chongchaia, "O RengpaPathian, kei le ki in mihai hi ithoa mo hiang dôra ni ni inhlû?

¹⁷Kha ten khom khan a ruk ti loiin ki'rchia mihai khom siam insahai mai hrang nin kunga, a ni, oRengpa Pathian, mi roiinpui tak angin ni ni'rvôtira.

¹⁸Imo nang ki la izong ual hrang? Ni siahlo hi ni nin hriat suak ving a ni.

¹⁹O Rengpa, ni siahlo hi ki sa theina hrangin, nangma thuin ni chôindôm ni tuma; ki'rchi hai khom chôindômhai ni tum mai a nih ti ni nin hrila.

²⁰O Rengpa, nangma ang hi tûte om mahai, ki inhriat sûnga chu nangma vai hi Pathian chu ni ni.

²¹Israel mihai ang hi rammuala nam dang om mahai, suak ata nir tana, Aigupta ram ata ni hruai suakhaia, thil roiinpui le irkhêl ta tak ni thoa nir hming an lâr tâka.

²²Israel mihai chu kumtuanga ni mi ni hrangin ni tia, o Rengpa nang hi Pathian tatak ni ni ngê a ni.



²³“Khante o Rengpa kei le ki’rchihai laia ni thu inkung nuam hi, ni thu ang takin hlo inchuktur roh.

²⁴Ni’rhming roiinpui a ta, ni mihaiin itinrêng Rengpa hi Israelhai hrangin Pathian tak a lei ni tâk hi; la ti an ti. Kin lalna khom hi kumtuangin indet ni ti.

²⁵Ni siahlo hi thil tinrêng ni hrila, ki’rchihai khom hon lal mai an tih ni ti sikin, ni kuang hi hi ki hong ihril ngam a ni.

²⁶Nangma chu o Rengpa, Pathian ni nia, hi thil roiinpui tak tho hrang ni nin kung pe tâka.

²⁷An chung a ni phûkdâi nin sua mai theina hrangin satvurin lân, o Rengpa, nangin sat ni vur tâka, ni satvurna chu an chung a om mai ri se,” a tia.

1 Thurchi Suina 18

David a râlâk mihai

(2 Sam 8.1-14)

¹Zoro sôtnotea chu Filistia-hai chu Davida’n a doihaia, an hnêhai tâka, Gath khopui le a kôlvêl khuaa omhai chu a sutpaihaia.

²Moabhai khom an hnêhaia, a thu hnuaia an oma, ama kuang khâzana an bê tâka.

³Hamath tianga, Zoba rêng Hadatezera’n Eufrates tuidung hmâr tianga ram lua a tuma, a doi sikin Davida’n a rûna.

⁴Davida’n a sakor tâli sângsari le sakor chung chuang mi sângsari le kea fe sipai sînghni a chelpai pea. Tâli irzakhat kai tól thei hrang sakor a hôihaia, a danghai chu an ke irthahrui an satpai pehaia.

⁵Suria mi, Damaska rêngin Hadatezera chu san hrangin sipai a tîra. Davida’n a lei doia, sipai sînghni le sînghni a lei thatpai pea.

⁶Suria rama khan sipai a siahaia, Davida khua le tui an chang tâka, a kuang khâzana an chôi tâka, Rengpa’n Davida chu kil tina an hrâtira.

⁷Hadatezera hai rângachak pho a lâkpai pehaia, Jerusalema a chôi,



⁸ Hadadezera khua Tibhat le Kun khua ata khom dâr tamtak a lâka; kha leh khan Solomona tempila tuipanghai, dâr chopuihai le bêl a siama.

⁹Hamath khuaa rêng Toia khan Hadadezera le a sipaihai chu Davida'n an hnêhai ti a len hriata.

¹⁰Toia le Hadadezera an le'rdoi mai ngai tâka, Davida hin an hnê tâk sikin lei don hrang le lômpui hrangin a nâipa Jorama chu Toia hin a tîra. Jorama hin rângachak hai, sumru hai, le dâra siam tamtak a pêka.

¹¹Edom hai, Moab hai, Amon hai, Filistia hai le Amalek hai a sutpaia, rângachak hai, sumru hai le dârhai chu Davida'n tempil sinna hrangin a pêkpai vinga.

¹²Zeruii nâipa Abisaia'n michi khur irhôra Edom-hai a soisaka, mi sîngkhat sângriat a thathaia.

¹³Edom rama sipai a siahai hluka, Davida khua le tui an chang zoi ta. Rengpa'n Davida chu khô hmuna khom an hrâttir mai ta.

¹⁴Davida chu Israelhai rêng a ni tâka; tûte theibîk boiin roi a rêl ngaia.

¹⁵Zeruii nâipa Joaba hi sipai hruaitu inlal tak a nia, Ahituba nâipa Jehosafata chu ziaktu lian tak a nia.

¹⁶Ahituba nâipa Zadoka le Abiathara nâipa Abimeleka chu ochai hruaitu an ni; Seraia chu ziaktu a ni.

¹⁷Jehoiada nâipa Benaia chu Keret le Pelet, rêng hrungtuhai hruaitu a ni. Reng Davida nâipahai khom a ram sînga mi lian ta tak an ni.

1 Thurchi Suina 19

Amon le Suria Davida'n an hnêhai

(2 Sam 10.1-19)

¹Khan Amon rêng hai Nahasa chu a thia, a nâipa'n a'rthûl a changa.

²Davida'n, "Khôn mo, Nahasa khan a nin rena, a nâipa Hanuna inren hrang hi ki intâng a ni," a tia. A pa râl hrangin mi a tîra. Hanuna râl hrangin Davida siahlohai an fea, Amon-hai rama Hanuna in chu an va tunga.



³Amon mi lianhaiin Hanuna kuang khan, “Davida hin sînpui ta taka râl hrangin mi hong tîr hrangin ni iam mo? Ei ram hi an lâk theina hrangin a siahlohai hi eninrûk hranga a hong itîr a ini loi ma ni?” an tia.

⁴Davida palaihai chu Hanuna’n a chelhaia, an hnermul a voipai pehaia, an songkol irfualhai khom an kong tena a tanpai pehaia, an fetirhaia.

⁵An lei isoisak dân chu Davida inhril hrangin mi an tîra, anni chu an inzak luatin, rêng kuang fe an chia, Davida’n, “Jeriko khuua om unglân, nin hnermul a sei nôk ual tena la hong ta roi,” tiin mi he a bêhaia.

⁶Reng Hanuna le Amon mihaiin Davida ningmur dân an inhriatin chu Mesopotamia rama mihai le Suria rama Maaka le Soba mihai sakor tâli le sakor chung chuang lana hrangin tangka her sîngthum sângminli an pêka. Tâli sîngthum sângni an hruaia, annihai leh khan Maaka rêng le a sipaihaiin Medeba kula riakbuk an khuara.

⁷Amon mihai khom kho tin ata irdoi hrangin an hor thoka.

⁸Kha kha Davida’n a len hriata, a sipai hruaitu Joaba chu a koia, a sipai hrât pâlhai a bukkhômhaia.

⁹Amonhai chu an irsiama, an rêng omna khopuia Raba kul pên tiang omhmun an khuara; anni tianga kop rêng hai le sipai lei sinhaiin ramri bulhaia hmun an siama.

¹⁰Joaba’n a maton tiang le a hnung tianga râlhaiin hong doi a tih ti an hriatin chu, a sipai sa ualhai chu an thang suakhaia, Suria ram ata sipai hong doi hrangin an irtângtirhaia.

¹¹Sipai danghai chu a upa Abisaia an hruaitira, Amon-hai doi hrangin an irtânga.

¹²Joaba’n, “Suria rama mihai kin hnê no’n chu ni hong sanin lân, Amon-hai nin hnê no’n chu nang hong san ki ti,

¹³a sân irnak songin lân, ki mihai le ki Pathian omna khuahai sansuak ei ti. Rengpa’n chu a sa a iti lam angin ni lei san a ti,” a tia.

- ¹⁴Joaba le a mihaiin Suria mihai an doia, inhnê loiin an rot tâka.
- ¹⁵Amon mihaiin Suriahai rot an hmu'n chu Joaba upa Abisaia kuang an rota, an khua kul sũaga khan an lũata, Joaba'n Jerusalem tiang a rotsanhaia.
- ¹⁶Suria mihaiin Israelhai chu ngam mahai ti an inhriatin chu Eufrates tui varũala Suria mi danghai chu an punga, Zoba rêng Hadadezera sipai hruaitu Sofaka hai an hong irthoka.
- ¹⁷Kha thu kha Davida an hrila, Israel mihai a bukhaia, Jordan an irkũana, an omna a va tunga. Suriahai kha an hong doi tâka.
- ¹⁸Davida'n tâli chalaituhai sũagsari a thathaia, kea fe sipai sũagminli hai le an hruaitu Sofaka khom a that saa.
- ¹⁹Hadadezera haiin Israelhai chu ngam mahai ti an inhriatin chu, Davida leh an chonga, irngeiin a khua mi le sa an chang ta. Suria mihaiin Amon-hai khom san nuam ta mahai.

1 Thurchi Suina 20

Davidan Raba kul a lâk

(2 Sam 12.26-31)

- ¹Kum a hong thara, fũa a hong nũaia, rênghai ram en zoro a hong nia. Joaba'n sipai a hruaia, Amon-hai ram a va doia. Reng Davida chu Jerusalema a la oma. Raba khua an irhuala, an rũana an insiata.
- ²An Pathian irlim Milkoma lukhum chu rũagachak her sũamthum minlia rik a nia, lunghlu khom a kop saa; kha kha Davida khomin a rũag lukhuma khan a phũa saa. Kho sũag ata thil tamtak rũallak sum a lũaka.
- ³Kha khuaa mihai kha thing ât, âlkai le hreia thing tanin a hmanghaia. Amon mi kho danga mihai khom khang dênin a hmanghaia, a rualhai leh Jerusalem tiang Davida chu a kũar nũak tâka.

Filistia mi lianhai leh irdoi

(2 Sam 21.15-22)

- ⁴Zoro sũanotea chu Filistia mihai le Gezerak an irdoi nũaka, Hamath mi Sibekaia khan Filistia mihai laia mi lian irchi Sifaia a thata, Filistia-hai chu an dok tâka.



⁵ Filistia mihai leh an irdoi nôka, Jaira nâipa Elhanana'n Goliatha sangpa Lahmia, Gath khuaa mi chu a thata, kha ufei kha zaper dôra lian a nia.

⁶ Gath khuaa hin irdoina a oma, mi lian inkhat kutpâr kiruk nei le kepâr kiruk nei hi a oma, tianlaia mi lianhai irchi a nia.

⁷ Israelhai chu a othaia, Davida upa Simeia nâipa Jonathana'n a lei thata.

⁸ Davida le a pâlhai ithat mi lianhai hi Gath khuaa om, mi lianhai irchihai an ni.

1 Thurchi Suina 21

Davida haiin irtepnâ an nei

(2 Sam 24.1-25)

¹ Setana'n Israelhai soisak a nuama, Davida'n Israelhai kha irtepnâ a neipuihaia.

² Joaba le hruaitu danghai laia, "Israel ram hi a kil khôra Beerseba rengata Dan dênin irfang suak ving unglân, Israel mi iza mo an iom irziakhai ving roi," a tia.

³ Joaba'n "Rengpa hin atûna Israel omhai nêka tam inomtir a ta; ka pu nangma mihai an nia, itho ual sikin mo hi thil hi ni ni inphût, kin nam pumpuiin thei loi kin ichang hrang anga?" a tia.

⁴ Khannisian rêng thu kha a len thang tâk sikin Joaba'n Israel ram chu ar fang suaka, Jerusalema a hong kîr nôka.

⁵ Joaba'n Israel mi om zât chu a hrila. "Sipaia chang thei zât mi nuai sômhleikhat Israel rama an oma, Judai rama nuaiminli le sîngsari an om," a tia.

⁶ Reng thu kha a zômputi no sikin Joaba'n Levi irchi le Benjamina irchia mihai kha tep sahai maka.

⁷ An sin thôna kha Pathianin lôm maka, Israel mihai kha a hremhaia.

⁸ Davida'n Pathian kuang, "Thil ki tho inchâia, invêtom tak a ni, ni ngaidam ro," a tia.



⁹Rengpa'n Davida deipu Gada kuang,

¹⁰"Fe'n lân, lam inthuma kho tak hi mo an thang nuam, a inthang tak hi tho pe ki ti a tih ti Davida kha va hril ro," a tia.

¹¹Gada kha Davida kuang a fea, Rengpa thuhril kha a van sîr pea, "A kho tak hi mo ni inthang nuam hril ro,

¹²kum thum châm tuang hi mo, tha thum râl irzûl mo, sîn thum Rengpa vântîrtônin Israel ram pumpui khandeia soisak le hria hrem?Rengpa ni tîrtu kha itin mo ki lei isâm hrang; irngaitua'n lân, ni hril roh," a tia.

¹³Davida'n Gada kha hiang hin a ti pea, "A'rngai lam reng inhre ma ung! Mihriamhai kuttum tuang nuam ma ung, Rengpa kuttum tuang ki nuam ual, ama chu phûkdâi a ni sikin," a tia.

¹⁴Khanchu Israelhai laia hri a hon lêngtira; mi sîngsari an thia.

¹⁵Rengpa'nJerusalem insiat hrangin vântîrtôn a zuang tîra, nuam nôk maka, vântîrtônhai kuang khan, "A ruk ta, tho ta no ro," a tia. Khan vântîrtôn kha Jebus mi Arauna hruizôla khan vântîrtôn kha a ngîra.

¹⁶Davida'n a hong ena, Jerusalem insiat hrang vântîrtôn khandai chôi, irnêng le irvân kâra ngîr a hmua, Davida le mipui hruaituhai khan bora puan an sil vinga, hnuai enin an kûna.

¹⁷Khan Davida a chongchaia, "O Pathian, thil sual thotu chu keima hi ki ni; irteppui kha ki inthotir a ni; hi mipui ite inhre loihai hin ite tho inchâina nei mahai. Keima leh ki in mihai hi ni hrem ta ro, ni mihai hi chu hôihai ro," a tia.

¹⁸Rengpa vântîrtônin Gada kuang khan, "Davida chu Jebus mi Arauna hruizôla maichâm sin hrangin hril ro," a tia.

¹⁹Davida'n Rengpa thu a zôma, Gada hril angin a fe tâka.

²⁰Hruizôla khan Arauna le a nâipa minlihai khan gohu an lei chîla, vântîrtôn an hmu'n chu an lei irbîka.



²¹Arauna'n Davida hong a hmu'n chu hruizôl ata kha a zuang chuma, hnuai en pumin chubai a mûka.

²²Davida'n, "Hri a om lolina hrangin ni hruizôla hin maichâm siam ki ti, nir chotirin lân, a man nang pe ki ti," a tia.

²³Aruana khan, "Ka pu la ta ro, a sa ni iti lam tak ni ta ri se. Maichâma thilinhlan hrang sehrâtchal khom a om, a hâlna hrang thing khom a om ving ta; baidi thilinhlan hrang bai khom nang ki pêk sa, itinrêng tum ving ki ti," a tia.

²⁴Reng Davida'n a sâma, "Ni ma, a man dik tak nang pe ki ti, Rengpa ta hranga thilinhlan hrangin ni ta ite a man boiin la no ning; a man boiin hâlvôm thilinhlan hrang khom inhlan no ning," a tia.

²⁵Davida'n Arauna chu a hruizôl mana khan rângachak tangka irzaruk a pêka.

²⁶Kha hmuna khan Rengpa hrang maichâm a siama, hâlvôm thilinhlan le irngeina thilinhlan an hlana. A chongchaia, Rengpa'na zuang sâma, maichâma hâlvôm thilinhlan chu irvân ata meiin a zuang kâng inhekpaia.

²⁷Rengpa'n vântîrtôn khandai kha khâipai hrangin a hrila, a iti angin a thoa.

²⁸Rengpa'n a chongchaina a sâm a nih ti Davida'n an hriata, Arauna hruizôla maichâma khan thil an hlan tâka.

²⁹Kha laia khan Biakbuk in le thilinhlan maichâm Mosia isiam kha Gibeon-ah a la om maia;

³⁰khannisian, Rengpa khandai tuang a chi sikin Pathian biak hrangin khatak khan Davida chu fe ngam loiin a om tâka.

1 Thurchi Suina 22

¹Davida'n, "Hi zoro hin, Rengpa, Pathian tempil chu a iom hrang a ni. Hi maichâm hi a ni Israelhaiin hâlvôm thil an inhlan hrang chu," a tia.

Tempil irfûktirna

²A ram sûnga nam dang om murdihai chu Davida'n a bukhaia, sintho hrangin a hmanghaia, senkhatin tempil sinna hrang lung an tuka.



³Mikota hmang hrang thîr a kalna hai, kopza le thîr tamtak le dâr tamtak, var zoi loi dôra tam an suktirhaia.

⁴Tura le Sidon mihai chu sidar thingngol tamtak zuang chôî hrangin a ti pehaia.

⁵Davidan, “Ki nâipa Solomona sin hrang tempil chu roiinpui tak, rammuala irhming inthang a ini hrang a ni. A la nâipanga, a duk a dak lan hre maka, a irzukna lan suaktir pe ki ta,” a ti lungrîla. Khanchu a thi mân tempil sinna hrang hrâtna tamtak a lei irfûktir pe a ni.

⁶A nâipa Solomona chu a koia, Rengpa Israelhai Pathian hrang tempil sin pe hrangin a hrila.

⁷ Davidan, “Kei khomin ki Pathian Rengpa irhmingin a sin ki nuama.

⁸Khannisianlân, Rengpa ina thisen nin suaktir hrai, irdoi lak ni uara, nangma sikin irrênnga thisen luang ki hmu intam hraia; nangin chu ki in sin thei no chi ni.

⁹Irngei nuam tak nâipasal Solomona ni neia, ar hming hi, irngeina ti a ini angin a kôl vêla râlhain irtharngam takin kin omtira, an lal sûngin Israel ram râl irvei no nia, irtharngam takin om a ti.

¹⁰Aman keima in hrang sin a ta, keima hrangin nâipasal nih a ti, ama hrangin a pa ni ki ti; Israelhai laia rêngtoihmun chu kumkhontuanga hrangin indet ki ti, tia a ni ihril a ni.

¹¹“Khasikin, ki nâipa, Rengpa chu ni kuang om sianlân, sat nang vur ri se, a iti ang ngêtin Rengpa ni Pathian in hrang chu sin ri se.

¹²Vârna le hmangrua inhriat theina nang pe sianlân, Israel mihai chu Rengpa ni Pathian dân hrangin roirêl pehai thei ni ti.

¹³ Israelhai hranga Rengpa thu'nkunghai le dân, Mosia ihrilhai kha, zômin lân, itinrêng lama hlochuk ni ti. Hâi takin irnak songin lân; chi viat loiin, ni beiindongtir no roh.



¹⁴Rengpa in sinna hrang rângachak her sîngthum le sângminli, sumru her nuaithum sîngminli, ki lei irtik zazâm sai, dâr le thîr vâng chu var zoi loi, thing le lung khom ki lei ibuk sai la lâk sa a nang hrang khoma.

¹⁵Sintho hrang mi tamtak an oma, lungtuk mihai le thing sin mihai,

¹⁶rângachak hai, sumru hai, thîr le dâr sin thei tak takhai khom an itam a ni. Phut pehai ta ro, Rengpa'n Sat nang vur ri se," a tia.

¹⁷Davidan Solomona san hrangin Israel hruaituhai a hrilhaia,

¹⁸"Rengpa nin Pathianin nangni an omtir hi. Hi rama lei omhai ngai chu Rengpa'n a nin hnêtira, ramhai hi ni thu hnuaia om a ni ta.

¹⁹Nin lungrîl murdi'n Rengpa nin Pathian sin chu a dik takin sin ta roi. Rengpa Thuthung Bôm le Pathian bêlbûr irthiang siana in sin ta roi," a tia.

1 Thurchi Suina 23

¹Davidan chu a ulianin a hong tar ok tâka. Solomona kha Israelhai rêng a hon changtir tâka.

Levi irchihai sin

²Israel hruaituhai, ochaihai le Levi irchi murdihai chu Davidan a bukkhômhaia.

³Levi irchia mi kum sômthum chung tianga mi a tephaia, mi sîngthum le sângriat an dêna.

⁴Mi sînghni le sângminlihai chu tempil sin enkoltuin a siahaia; mi sângruk chu thil irziak infela thu buaihai infel hrang a tia.

⁵Mi sângminlihai chu sipai sintho hrangin a tia; mi sângminli danghai chu rêngin a ipêk thil tum inring thei hai, tum puma Rengpa inpâkna hla sak hrangin a tia.

⁶Davidan Levi irchihai chu an irlo fe dân enin pôl thumin a senhaia. Gersona, Kohata le Mararia pôlhai an ni.

⁷Gersona khan nâipasal inhni Ladana le Simeia a neia.



- ⁸Ladana'n nâipasal inthum Jehiela, Zethama le Joela a neihaia.
- ⁹Hihai hi Ladana irchia hruaituhai chu an ni.
- ¹⁰Simeia irchihai chu a ulian dônin hihai hi an ni; Jahata, Zina, Jeusa, Beria.
- ¹¹Hi mi minlihai hi Simeia nâihai chu an ni. Jahata chu a hruaitu tak a nia, Ziza chu a hnuai renga a ni; Jeusa le Beria hin nâi nei intam mahai, irchi khat anga tep an ni.
- ¹²Kohata hin nâipasal minli Amrama, Izhara, Hebrona, le Uziela a neia.
- ¹³Amrama hi Arona le Mosiahai pa a ni. Arona hi ar chihai le, Rengpa biakna mirimhoi thilinhlanhai inhlana bêlbûr irthiang enkoltu le Rengpa irhminga mipuihai hranga satvurna hriltu hranga indang bîk a ni.
- ¹⁴Pathian mi Mosia irchihai rêk chu Levi irchihai laia tep sa an ni.
- ¹⁵Mosia'n nâipasal inhni Gersoma le Eliezera a neia.
- ¹⁶Gersoma irchihai laia mi inlâr Sebuela a ni.
- ¹⁷Eliezera hin nâipasal inkhat vai Rehabia a neia. Rehabia hin chu nâi a nei intama.
- ¹⁸Kohata nâi ulian tak hnuai Izhara'n nâipasal Selomita a neia; ama hi an hruaitu tak a ni.
- ¹⁹Kohata nâi nôk le Hebrona'n nâipasal minli Jeria, Amari, Jahziela le Jekameama a neia.
- ²⁰Kohata nâi mitum Uziela'n nâipasal inhni Mika le Isia a neia.
- ²¹Meraria nâihai chu Mahlia le Musia an ni. Mahlia nâihai chu Eliazara le Kisa an ni.
- ²²Eliazara hin nâinupang vai a neia, nâipasal nei loiin a thia. A nâinu hi Kisa nâipasalin a neia.
- ²³Meraria nâipasal Musia hin nâi inthum Mahlia, Edera le Jeremota a neia.
- ²⁴Hihai hi an irchihai chung irhming irziak ving, Levi irchihai chu an ni, kum sômhni chung tianga mihai chu,



²⁵ Davida'n, "Rengpa Israelhai Pathianin a mihai chu râlrvei loiin an omtirhaia. Jerusalema a om mai hrang sikin.

²⁶ Levi irchihaiin Rengpa omna hrang bokrop le bungrua danghai chu irzôn thi thiai nang ta no ni," a tia.

²⁷ Davida thu angin Levi irchihai chu kum sômhni an kâiin chu sinthothei hranga irhming irziak ving an ni.

²⁸ Hi sinhai hi an itho hrang chu a ni. Arona irchia ochaihai Pathian biakna changpui le tempil kholâia tentan sûnga bêlbûr irthiang vong infâi,

²⁹ Pathian ta hranga bai ser inhlan hrang siam le, chol kop loihai thep le baidi oliv hriak leh irzêl, tempila thil inhlan lei lâka irtê infel.

³⁰ A sîn a zâna Rengpa inpâka hla sak hi a ni.

³¹ Sabat nihaia, tha thar nî sûna, kût nî sûna, hâlrivôm thilinhlan laia inpâkna hlasak hrang mi an inkunghaia, khahai khan inpâkna hla an isak mai hrang a ni.

³² Hmun irthianga Biakbuk in chu enkol an ta, ochai Arona irchi le an urênghai sin an itho pehai hrang a ni.

1 Thurchi Suina 24

Ochaihai sintum

¹ Hihai hi Arona irchi danghai chu an ni, Arona hin nâipasal minli, Nadaba, Abihua, Eleazara le Ithamara hai an ni.

² Nadaba le Abihua hi an pa thi mân nâi nei loiin an thia, Eleazara le Ithamara chu ochai an lei ni tâka.

³ Reng Davida'n ochaihai chu an thotum chita pôl isem an nia, Eleazara irchi Zadoka le Ithamara irchi Ahimeleka'n Davida an thopuia.

⁴ Eleazara irchia hin hruaitu hrang pasal an tam sikin pôl sômrukin an irzêka.

⁵ Tempila hruaituhai le Pathian sinthônaa hruaituhai an ni sikin, sintho hrangtu tasânin Eleazara le Ithamara irchihai a dônte'n an thanghaia.



⁶Eleazara irchihai le Ithamara irchihai chu tasânin sin an irsema. Nethanela Levi irchia mi irziaktu'n, rênghai, hruaitu lianhai, ochai Zadoka le Abiathara nâipa Ahimeleka inhriatpuiin irsin a siaa, ochai laia hruaituhai, Levi irchi laia hruaituhai inhriatpuiin.

⁷Pôl sômhni minlihaiin hianga irsemin sin an itho hrang a ni, Jehoiariba pôl Jedaia pôl,

⁸Harima pôl, Seorima pôl,

⁹Malkisa pôl, Mijamina pôl

¹⁰Hakasa pôl, Abija pôl,

¹¹Jesua pôl, Sekania pôl,

¹²Eliasiba pôl, Jakima pôl,

¹³Hupa pôl, Jesebeaba pôl,

¹⁴Bilga pôl, Imera pôl,

¹⁵Hezira pôl, Hapizeza pôl,

¹⁶Pethahia pôl, Jehezkela pôl,

¹⁷Jakina pôl, Gamula pôl,

¹⁸Delaia pôl, Maazia pôl.

¹⁹RengpaIsraelhai Pathian thupêk anga an irchi Arona'n an tho hrang tempila an fe le an tho hrang lamhai a hril a ni.

Levi irchia hruaituhai

²⁰Levi irchia in sêngkuua mi dang hruaituhai chu hihai hi an ni. Amrama irchi laia mi Subaela irchi Jedeia.

²¹Rehabia irchia Isia,

²²Izhara irchia mi Selomota irchi Jahata.

²³Hebrona nâi a ulian dônin Jeria, Amaria, Jehaziela, Jekameama.

²⁴Uziela irchia mi Mika irchia Samira,



²⁵Uziela irchi laia mi Mika sangpa Isia irchi Zekaria,

²⁶Meraria irchia mi Mahlia, Musia, Jaazia,

²⁷Jaazia hin nâipasal inthum Sohama, Zakura, Ibria hai a neia.

²⁸Mahlia hin nâipasal inhni, Eleazara le Kisa a neia.

²⁹Eleazara hin nâipasal nei maka, Kisa hin nâipasal inkhat Jerameela a neia.

³⁰Musia hin nâi inthum Mahlia, Edera le Jeremota a neihaia. Hihai murdi hi Levi irchihai chu an ni.

³¹An sangpa Arona irchihai tho dân ang khan an in sũaga hruaitu tak le a sanghai laia mi inkhatin Levi irchihai laia sinthotu inhriat maina tâ a sũana, rêng Davida, Zadoka le Ahimeleka, ochaihai laia hruaitu le Levi irchia hruaituhai khom an inhriattir ngai.

1 Thurchi Suina 25

Tempila zaipôl

¹Reng Davida le Levi irchia hruaituhaiin hihai hi Pathian biak ina kaihrhaitu hrangin an inthanghaia: Asafa, Hemana, Jeduthuna hai, serânda le perkhuang an suka, têngrep sukin Pathian chongbe inpuang an ta. Pathian biak kaihrhaina an tho hrang dân hiang hin inkung pe an nia.

²Asafa'n nâipasal minli, Zakura, Josefa, Nethania le Asarela hai kaihrhiai a ta. Rengin Pathian thu inpuang hranga a iti ang dungzuiin an ihril hrang a ni.

³Jeduthuna'n nâipasal kiruk, Gedalia, Zeria, Jesaia, Simeia, Hasabia, Matithia hai hruaihai a ta, perkhuang sukin Pathian thu inpuang an ta, inpâkna le lômthu hrilna hla sak an ti.

⁴Hemana hin nâipasal sômhleï minli, Bukia, Matania, Uziela, Sebuela, Jerimota, Hanania, Hanana, Eliatha, Gidaltia, Romamti-ezera, Josbekasa, Malothia, Hothira le Mahaziota hai a neia.

⁵Hemana hi rêng deipu a nia, inlaltir an kung sikin Pathianin nâipasal sômhleï minli le nânupang inthum a pêka.



⁶A nâihai hin an pahai le perkhuang le serânda le têngrephai sukin tempila hla an sak thei vinga. Asafa, Jeduthuna le Hemana hai hi rênga inthang an ni.

⁷Hi mi sômhni minlihai hi thil tum thei ving an ni. An irchipui Levi chi dang, hla sak theihai le an rêngin pasal irzahni sômriat kiriat an ni.

⁸An tho hrang inhriatna hrangin, nâipang mo, ulian mo, irchutirtu mo, irchulai mo an ni khomin an lai ata tâ an isân ngai a ni.

⁹Hi hi pôl tina hruaitu, an nâihai le an urênghai le mi sômhleihnua a hun bîka tho hranga inkung an ni. Asafa nâi Josefa hai, Gedalia hai,

¹⁰Zakura hai,

¹¹Isria hai,

¹²Nethania hai,

¹³Bukia hai,

¹⁴Jesarela hai,

¹⁵Jesaia hai,

¹⁶Matania hai,

¹⁷Simeia hai,

¹⁸Azarela hai,

¹⁹Hasabia hai,

²⁰Subaela hai,

²¹Matithia hai,

²²Jeremota hai,

²³Hanania hai,

²⁴Josbekasa hai,

²⁵Hanana hai,

²⁶Malothia hai,

²⁷Eliatha hai,



²⁸Hothira hai,

²⁹Gidaltia hai,

³⁰Mahaziota hai,

³¹Romanti-ezera hai.

1 Thurchi Suina 26

Tempila pulis

¹Levi irchia, tempil pulis a ihmang mi da danghai chu hiang hin a ni. Kora irchi laia mi Kora nâipa, Asafa in mihai laia mi Meselemia khan

²nâipasal sari a neia, a ulian dônin hihai hi an ni, Zekaria, Jediaela, Zebadia, Jathniela,

³Elama, Jehohanana le Eliehoenaia.

⁴Obed-edoma khom Pathianin sat a vura, nâipasal sari a neia. A ulian dôna irziakin Simeia, Jehonadaba, Joa, Sakara, Nethanela,

⁵Amiela, Isakara, Peulethaia hai,

⁶Obed-edoma nâipasal ulian tak Semaia hai nâi kiruk Othnia, Refaela, Obeda, Elzabada, Elihua, Semaia hai an nia.

⁷An irchihai laia mi ingîk, mi isong tak tak an ni. A nâipang ual inhnihai vâng hi chu mi hrât ichiom tak an ni.

⁸Obed-edoma irchihai ata anni sinthoa fel tatak mi sômruk inhni an om.

⁹Meselemia irchi laia mi hlo chuk sômhleiriat an om.

¹⁰Meraria irchi Hosa'n nâipasal minli a neia, Simria,

¹¹Hilkia, Tebalia, Zekaria hai. Hasa irchihai laia tempil pulis sômhleiringa an om.

¹²Tempil pulishai chu an irlo fe dân angin pôl da dangin an oma, Levi irchihai ang dênin tempila sintho hrang zoro an indang pehaia.

¹³A tha tin tam le tôm thu ni loiin, khô mikot kha mo an ihrung hrang ti inhriatna hrangin tâ an sân ngai.



¹⁴Selemia haiin nisua tianga mikot an changa, a nâipa Zekaria'n hmâr tianga mikot a changa, Zekaria hi roirêl pôlhai laia vâk tak a ni.

¹⁵Obed-edoma haiin sim tianga mikot an changa, a nâihaiin tempila thil siakhômna in kha an changa.

¹⁶Supima le Hosa chu nitâk tianga mikot an changa, lampui kôla Saleket mikot an iti khom an hrung sa. Sin chu an irsem irhlôm ngai a ni.

¹⁷Nisua tianga mikota khan a sîn tin mi kiruk an ngîr ngaia, hmâr tianga khan mi minli, sim tiang khom mi minliin an hrunga, thil siakhômna hrung khom a sîn tin pasal minli, thil siakhômna inkhat hi mi inhniin an ihrung ngai a ni.

¹⁸Nitâk tianga tentan hai, lampui kôla mi minli, tentan sûnga mi inhni an siahaia.

¹⁹Ama hi Kora le Meraria irchihai hrung hranga a ni.

Tempila sin dang

²⁰Levi irchi, mi senkhat chu tempil tholôm kok le thilpêk bukkhômna tentan enkoltu an ni.

²¹Gersona nâipasal inkhat Ladana chu ama nâi Jehiela irchihai le Gersona hai hruaitu tak a ni.

²²A nâipasal hni Zethana le Joela'n tempil tholôm kok le thilpêk bukkhômna an enkola.

²³Amrama irchihai, Izhara irchihai, Hebron irchihai le Uziela irchihai chôitum an tuk pehaia.

²⁴Gersoma nâipa Sebuela, Mosia tupa chu tempil sum enkoltu lutak a ni.

²⁵Gersoma urêngpa Eleazara sikin Selomit-hai le in sûng khat mi angin an oma, Eleazara'n Rehabia a neia, ama hin Jesaia a neia, ama hin Zikria a neia, Zikria hin Selomita a nei a ni.

²⁶Selomita leh a nâihaiin rêng Davida, in sûng mi hruaitu hai le irchi da danga hruaitu le mipui hruaituhaiin Pathian hranga thilpêk irfuang hai kha



an en infela, tempil sinna'n irdoinaa râlâk sumhai kha an hong ipêk ngai a ni.

²⁷Selomita le a nâihain tempila hmang hrang mihai hong ipêk murdi an enkola,

²⁸deipu Samuela hong ipêk hai, rêng Saula ipêk hai, rêng Davida ipêk hai le Nera nâipa Abnera ipêk, Zeruii nâipa Joaba ipêk hai khom an enkol sa a ni.

Levi irchi senkhathai tho hrang

²⁹Izhara irchi laia mi Kenania le a nâihai chu khopui pên tianga ram opna sin an inthotirhaia, thurchi vong insa, Israel mihai thubuai an irfûktir ngai a ni.

³⁰Hebron irchihai laia mi Hasabia le a in mihai mi sângkhat irzasari chu Jordan nitâk tianga optuin a siaa, sakhua le vântâng thil ngaitua ngai a ni.

³¹Hebron irchi hruaitu tak chu Jeria a ni. Davida rêng kum sômminlinaa Hebron irchihai thurchi kha an sua. Hi irchia mi sipai hrâttak tak Gilead bial Jazer khuaa an oma.

³²Jeria urênghai laia rêng Davida in mi sângghni irzasari, hruaitu fel tak tak an thang suakhaia, Jordan tui nisua tianga bial sînga, Reubena irchihai, Gada irchihai, le nisua tianga Manasea irchihai omna bial sakhua le khotâng thila optuin a sia ta.

1 Thurchi Suina 27

Sipai le sorkâr sintho

¹Israel mi om zât a in sînga a hruaituhai sângkhat pôl hruaitu hai, irzakhat hruaitu hai le lekha irziaktu hai, rêng kôla sorkâr sintho pôl khata mi sîngghni sângminli an nia, kumtuangin a tha tina hruaitu irthûl ngai an ni.

²Tha khatna sintuhai mi sîngghni sângminlihai chu Zabdiela nâipa Jesobeama'n a hruaia.

³Ama hi Juda nâi Pereza irchia mi a ni.

⁴Tha hnina sinthotuhai chu sîngghni sângminli hai chu Aho mi Dodaia'n a hruaia. Hi pôl hruaitu tak hnuaia mi chu Miklota a ni.



⁵Tha thumna sinhai chu mi sînghni sângminlihai chu ochai Jehoiada nâipa Benaia'n a hruaia.

⁶"Pasal sa sômthum" tihai laia om kha a nia. A nâipa Amizabada'n hi pôl hi a hruaina sin kha a isan ngai a ni.

⁷Tha minlina sinhai chu mi sînghni sângminli chu Joaba sangpa Asahela'n a hruaia. A nâipa Zebadia khan hi pôl hi a hruaihai sa ngai.

⁸Tha ringana sinhai chu mi sînghni sângminli chu Izra mi Samhutan khan a hruaia.

⁹Tha rukna sinhai chu mi sînghni sângminli chu Tekoa khuaa mi Ikesa'n a hruaia.

¹⁰Tha sarina sinhai chu mi sînghni sângminli chu Pelon mi Efraima irchia Heleza'n a hruaia.

¹¹Tha riatna sinhai chu mi sînghni sângminli chu Hosa mi Sibekaia'n a hruaia. Ama hi Judahai laia Zera irchia mi a ni.

¹²Tha kuakna sinhai chu mi sînghni sângminlihai chu Benjamina bial Anathot khuaa mi Abiezera'n a hruaia.

¹³Tha sômna sinhai chu mi sînghni sângminli chu Netofa khuaa mi Maharaia'n a hruaia. Ama hi Zera irchi laia mi a ni.

¹⁴Tha sômhleikhatna sinhai chu mi sînghni sângminlihai chu Efraima bial Pirathon mi Benaia'n a hruaia.

¹⁵Tha sômhleihnina sinhai chu mi sînghni sângminli Netofa khua mi Othniela irchi Heldaia'n a hruaia.

Israel nam hruaituhai

¹⁶Reubena irchia hruaitu chu Zikri nâipa Eliazera a ni. Simeona irchi hruaitu chu Maaka nâipa Sefatia a ni.

¹⁷Levi irchi hruaitu chu Kemuela nâipa Hasabia a ni. Arona irchi hruaitu chu Zadoka a ni.



¹⁸Juda irchia hruaitu chu Davida upa Elihua a ni. Isakora irchi hruaitu chu Obadia nâipa Omria a ni.

¹⁹Zebulun irchia hruaitu chu Obadia nâipa Ismaia a ni. Naftalia irchi hruaitu chu Azriela nâipa Jeremota a ni.

²⁰Efraima irchia hruaitu chu Azazia nâipa Hosea a ni. Nitâk tianga om Manasea irchia hruaitu chu Pedaia nâipa Joela a ni.

²¹Nisua tianga Gilead-a om Manasea irchia hruaitu chu Zekaria nâipa Ido a ni. Benamina irchia hruaitu chu Abnera nâipa Jaasiela a ni.

²²Dana irchia hruaitu chu Jerohama nâipa Azarela a ni. Hihai hi Israel nam bing binga hruaituhai chu an ni.

²³Irteppuia khan rêng Davida'n kum sômhni hnuai tianga mi chu tep sa maka, mihai chu irvâna ârsi angin tam an tih Rengpa'n chu a tephai mai sikin.

²⁴Zeruii nâipa Joaba'n irteppui chu a hruaia. Khannisian zoi irman maka, hi irteppui sikin Pathianin Israelhai chu a soisaka, mi idôr ngân mo an om tia rêng Davida thurchi irziakna khom khan irziak ni ma.

Reng sum enkol

²⁵Reng sum enkoltu chu Adiela nâipa Azmaveta'n a enkola, kho dadanga rêng hranga puan siana inhai chu Uzia nâipa Jonathana'n a enkola.

²⁶Reng loia sinhotuhai chu Keluba nâipa Ezria'n a enkola.

²⁷Reng grep enkoltu chu Rama mi Simeia a ni. Uain siakhômna enkoltu chu Sefam mi Zabdia a ni.

²⁸Nitâk tianga tâng irphutna rêng, oliv le theipui irhuan chu Gedar mi Baal-Hanana'n a enkola. Oliv sahriak enkoltu chu Joasa a ni.

²⁹Saron phâia rêng sa enkoltu chu Saron mi Sitraia'n a enkola. Phâi dadanga sa enkoltu chu Adlaia nâipa Safata khan a ienkol a ni.

³⁰Saringsei enkoltu chu Ismaela mi Obila a ni. Sakuartung enkoltu chu Meronot mi Jehdeia a ni.



³¹Kêlbelra le kêl rual chu Hagra mi Jaziza ienkol a ni. Hi mihai hi Davida mi, a sum le pâi enkoltuhai chu an ni.

Davida thurônhai ngai

³²Davida pa tianga mi, Jonathana, mi vâ tak, lekha thei tak chu, a thurôn ngai a ni. Hakmona nâipa Jehiela le rêng nâi irchutirtu an ni.

³³Ahithofela chu rêng thurôn ngai a nia, Ark mi Husaia chu rêng rualpa a ni.

³⁴Ahithofela thi zoia Benaia nâipa Jehoiada le Abiathara chu rêng thurôn ngaihai an ni, Joaba chu rêng sipai hruaitu a ni.

1 Thurchi Suina 28

Tempil chungchânga Davida chongbe

¹Davida'n Israel ulian hai, nam chi da danga hruaitu hai, rêng makunga sintho hranga a tha tina irthûlhai ngai, sâng chung thuneitu hai, irza chung hruaitu hai, rêng sum le pâi ram enkoltu hai, ama nâihai le sorkâr sinthotu hai murdi le pasal sahai chu Jerusalema a bukkhômhaia.

² Davida chu an lei chia an ngîra, an kuang khan, “Ki urêng ki mihriamhaio, ki thu hi irngai roi. Rengpa Thuthung Bôm siana, a ke irngatna hrangin sin ki'rzuk ta taka, a hrât danghai khom ki panhaia.

³Khannisianlân sipai ki nia, thisen kin suaktir hrai tâk sikin Pathianin keima isin phal maka.

⁴Rengpa Israelhai Pathianin, ki urêng hai laia, ki dam sûnga inlal hrangin a nin thang suaka, nam hruaitu Juda irchihai hi a indanghai a ni. Judahai laia chu keini in sûng mi hi a nin thanga, kin in mi laia keima hi a nin dit bîka, Israelhai rêngin a ni siama.

⁵Nâipasal tamtak a nin neitira, anni laia mi Solomona hi Rengpa rama Israelhai chung rêng hrangin an thanga.

⁶Rengpa'n ki kuang, ‘Ni nâipa Solomona hin ki tempil chu sin ri se, ki nâi hrangin kin thanga, a pa ni pe ki ti,



⁷ki thu'nkung hai, ki thupêk hai, a zôm maiin chu an lalna hi kumtuanga indetin om a ti.'

⁸Khasikin, Israel mi murdi, Rengpa mi pungkhômhai le kin Pathian mithmua Rengpa'n a thupêkhai chu irngaitua'n irdîn takin om roi; khanchu hi ram satak hi nei nin ta; nin nâihai khomin kumtuangin fa thei an ti," a tia.

⁹Solomona kuang khan, "Nang ki nâipa Solomona, ni pa Pathian hi pomin lân, irzuk tak le dik takin a sin tho'n lân, kin ingaitua le kin itumhai hi an hriat ving a ni. Ama hi ni zong photin chu hmu ngêt ni ti, nir ngaitua no'n chu nang pai zôi a ti.

¹⁰A hmun irthianga in sin hrangin Rengpa'n nang an thang ti inhre ro, irnak songin lân, sin phut chian ta ro," a tia.

¹¹Davidan a nâipa Solomona kuang khan tempil sinna hrang irfûka, a thil siakhômna hmun le tentan chi da dang, hmun irthiang tak le sual ngaidamna hmun siam hrang dânhai a pêka.

¹²A kholâi irkul irvôtir hrang dânhai, a kôla insin hrang dânhai, tempila hmang hrang bêl le bûr siana hrang hmun hai, Rengpa makunga thilpêk sia irfûkna sin hrang dânhai a hril pe vinga.

¹³Ochahai le Levihai sintho hrang, tempil sînga an sintho hrang dân hai, tempila bêl le bûr enkol dân hrang hai a hril saa.

¹⁴Bêl le bûr siamna hrang sumru le rângachak i dôr mo hmang hrang ti le,

¹⁵meiser le a siana siam hrang dân,

¹⁶sumrua siam dokâng, Pathian hranga bai ser bîk siana dokâng siama sumru a ihmang hrang zâthai a hrila.

¹⁷Thîr kut hai, tâbor hai le uain tui siana rângachaka siam hmang zât hrang hai, khêng siamna hranga sumru le rângachak hmang hrang dânhai a hril pe vinga.



¹⁸Mirimhoi hâlna hranga dokâng siamna hrangin rângachak inzen hmang zât hrang hai le, Rengpa Thuthung Bôm chungâ Cherub mitha phar tâli siamna'n rângachak inzen hmang zât hranghai a hrila.

¹⁹Reng Davida'n, "Rengpa ni ihril lam taka tho hrangin hihai hi irziak ving a ni," a tia.

²⁰Reng Davida'n, a nâipa Solomona kuang, "Ni tumna inthûktirin lân, irnaksongin lân, sin phut ta ro, tûte'n nan hnungtir no ri sehai, ki Pathian a sin ki itho pe ngaiin nang ompui a ti. Rengpa'n a tempil ni sin zoi mâka nan tha no ni.

²¹Tempila ochaihai le Levi irchihai tho hrang infel a ni tâka, mi theithiamhai sin irzuktak tak an tama, mihai le an hruaituhai chu ni thu nghâkin an iom rum a ni," a tia.

1 Thurchi Suina 29

Tempil sinna hranga tholôm

¹ Reng Davida'n irbukkhômhai laia, "Ki nâipa Solomona hi Pathian inthang mi a nia, khannisian, a la nâiinpang hraia, a sia le sa lan hriat infel maka. Sin tho hrang lak a tama, a isin hrang lak hi mihriam in ni maka, Rengpa Pathian in a ni.

²Ki thei la lamin ki hrâtna ki lei hmang tâka, rângachak hai, sumru hai, dârhai, thîr hai, thing hai, lunghlu hai, lung mantam hai, lung enhoi, le sailungvâr hai ki bukkhôm tâka.

³Hi khêla khom keima sum rengata sumru le rângachak ki pêka, Pathian tempil hrang hi ki'rvei sikin.

⁴Ofir rângachak a sa zât her nuaikhat, hâl irthiang sai sumru her nuai hni sîngminli vêl tempil sîng tianga bang irvôtirna hai,

⁵A theithiamhaiin an nuam lam taka irvôtirna hrangin ki pêka, Rengpa hrangin tu mo thilpêk sat irngaia pe thei?" a tia.

⁶Nam tina hruaitu hai, le sorkâr sinthohaiin irphal takin thil an pêk tâka.



⁷Tempil sinna hrangin rângachak her nuaikhat sîngsari, sumru her nuai irzathum sômminli, dâr her nuai irzaruk sômhni, thîr her nuai sômthum irzaminli nêka tam khom an pêka.

⁸Lung mantam neihai khomin, Rengpa tempil hrangin an pêka, Gersona irchi Jehiela'n a enkola.

⁹Mipuihai an rai a fân pehaia, phal takin mâni thua Rengpa hranga pêk an ni sikin an lôm a ni, rêng Davida khom a sate'n a lôm a ni.

Davida'n Pathian a inpâk

¹⁰Khasikin, Davida'n Israel irbukhai laia Rengpa an pâka, "O Rengpa kin pu Israelhai Pathian, kumtuanga inpâk inruk ni ni.

¹¹ Ni roiinpuia, sinthothei tak ni nia, ni'rsânga, ni saa, irnêng le irvâna thilhai hi ni ta a nia, o Pathian an laltak ni nia itinrêng chungu thuneitu ni ni.

¹² Irchongna le chôindômna murdihai hi nangma ata hong suak a nia, hrâtna le sinthotheina ni neia, mi ni siam inlianin nin hrâttir thei.

¹³ Khasikin kin Pathian kuang lômthu kin hril, nir hming roiinpui kin inpâk a ni.

¹⁴ "Keima le ki mihaiin hi dôra tam ni makunga thilinhlan kin ipêk thei hi, kin thei sika ni maka, itinrêng hi ni ta a nia, khasikin ni ta hi kin hong ipêk nôk a ni.

¹⁵ O Pathian, ni makunga chu kin pi le puhai ang khan, keini khom mikhual, zoro sôtnotea om ang hi kin nia, kin dam lai nihai chu irhlîm anga om a nia, a ihek zôi ngai a ni.

¹⁶ O Rengpa kin Pathian nir hming inpâkna hranga ni in sinna kin hrâtna hai kin insuakhai hi, nangma ata suak a nia.

¹⁷ Mi lungrîl ni fia ngaia, mi nun sahai chu ni lôm ngai. Keima'n chu hi thilhai hi phal taka lungrîl fel le dik tak irputin ki hong inhlan a ni, ni mi hong pungkhômhai khomin thilinhlan hong pêk nuam dân ki ihmu a ni.



¹⁸O Pathian kin irchibul Abrahamana hai, Isaka hai, Jakoba hai Pathian, hianga lungrîl hi ni nâihai irputtirhai maiin lân, nangma hranga iamoma an om mai theina hrangin hrung hai ro.

¹⁹Ki nâipa Solomona hi, ni thupêk irzuk taka a zôm theina hrangin hrungin lân, ni tempila hmangrua ki ilâk pehai hi, a sin zoi theina hrangin changpui mai ro,” a tia.

²⁰Davida'n mipuihai chu, “Nin Pathian Rengpa hi inpâk roi,” a tia. Irbukkhômhaiin an irchi Pathian Rengpa an inpâka, an kûna, Rengpa chôindômin, rêng khom an chôindôm sa.

²¹Zînga chu sa an thata, Rengpa hrang thil an inhlana, mipuihai khom an infâktir hai, sehrât sângkhat, kêlbelra sângkhat, belrate sângkhat an thata, maichâma hâlrivôm thil an inhlana. Uain thilinhlan khom an neia.

²²Kha ni khan chu Rengpa kuang raifân takin an fâkin an ina. Solomona chu rêng a nih ti an inpuang nôka, Rengpa irhmingin roirêltua sahriak an pol nôka, Zadoka khom ochai ni hrangin sahriak an pol tâka.

²³Khanchu, Solomona'n a pa rêngtoihmun, Rengpa inding pe kha a lua tâka, rêng hlochuk tak a nia, Israel mi murdi'n a he an lâka.

²⁴Sorkâr mi lian, sipaihai le Davida nâi danghai khomin Solomona chu an rênga tep hrangin chong an inkunga.

²⁵Solomona chu Rengpa'nam pumpuihai irngaisâng an nitira, Israelhai chung a roirêltu murdi irthûlin, Solomona'n a mihai a ichôiirsâng a ni.

Davida inlal sâng

²⁶Jesaia nâi Davida chu Israel murdihai chung a,

²⁷Kum sômminli an lala, Hebrona kum sari, Jerusalema kum sômthum inthum.

²⁸Tar kûna damin a thia, ar chonga, mi'n an inzaa, a nâipa Solomona'n ar thûlin an lal nôk ta.



²⁹Davida thurchi a phut ata a mong dênin deipu inthum Samuela, Nathana le Gada hai lekhabua irziak ving a ni.

³⁰A roirêl dânhai, a sinthothei lamhai, a chungá thil tunghai, Israel le a kôlvêl ram chungá thil tunghai an irziak ving a ni.



2 Thurchi Suina

2 Thurchi Suina 1

Solomona'n vârna a zong

(1 Rng 3.1-15)

¹Reng Davida nâipa Solomona'n a ram sũaga inhrât le indetin a oma. Rengpa a Pathianin sat a vura, a hong roiinpui ok tâka.

²Khan Solomona chu Israelhai murdi chu sipai sũag hruaituhai, irza hruaituhai, roirêltuhai le Israel ram pumpuia mi lianhai, in sũaga ar lua murdihai chu a chongpuihaia.

³Khanchu Solomona leh inkhôm mihai murdi chu Gibeon khua hmun irsũaga khan an fea; kha khan Rengpasiahlo Mosia'n ramchâra Pathian biakna in a sina.

⁴Pathian bôm rêk chu Davida'n a lei isinna hmuna Kiriath-jearim ata Davida'n a lei lâk nôk tâka, Jerusalema a siana hrang puan in a lei zar tâka.

⁵Khanchu Hura nâi Uria nâipa Bezalela isin dâr maichâm kha Rengpa biakna in kôla khan a oma; khan Solomona le mipuihai khan an va pana.

⁶Solomona chu irtongna puan in kôla dâr maichâm omna Rengpamakunga khan a hong fea, hâlrivôm thilinhlan sũagkhat a hong inhlana.

⁷Kha ni zân khan Solomona kuang Pathian a inlâra, a kuang, "Imo nang ki ipêk hrang? ni zong ro," a tia.

⁸Khan Solomona'n Pathian kuang, "Ka pa Davida kuanga khan lungthungna irkhêltak nin langtira, ama irthûlin rêngin ni ni siama.

⁹Khanchu, o RengpaPathian, ka pa Davida kuanga ni chonginkung kha hlo inchuktir ro, nangin mipui tamtak tep zoi loihai chung a rêngin ni ni siama.

¹⁰Khanchu hi mipuihai kôla suak le lûta ki om theina hrangin vârna le inhriatna ni lei pe ro; ni mi, hi dôra tamhai laia hin tu mo roirêl pehai hrang?" a tia.

¹¹Khanchu Pathianin Solomona kuang, "Hiang hin lungrîl ni'rputa sum le pâihai, irchongnahai, chôiindômna hai, nangma kaihruitu kuang hringna



zong loiin, dam sôtnahai khom zong loiin, an chung a rênga nang ki isiamnahai ki mihai chung a roi ni rêl theina hrangin vârna le inhriatnahai ni zong sika hin.

¹²Vârna le inhriatnahai chu pêk ni ni tâka. Khan matona rênghai khomin an la inei ngai loi, inhnunga khom an inei loi hrang sum le pâihai, irchongna hai, chôiindômna hai nang pe sa ki ti,” a tia.

Reng Solomona irchongna le irchamneina

(1 Rng 10.26-29)

¹³Khanchu Solomona chu hmun irsâng kôla biak in omna Gibeon khuua inzin chu Jerusalema a fea, Israelhai chung a roi a rêla.

¹⁴ Khan Solomona'n tâli le sakor chung chuang mihai a koibukhaia, tâli sângkhat le irzaminli le sakor chung chuang mi sângkhat sângni a neia, khahai kha tâli hrêna khuahai, Jerusalem khuua rêng omnahai khan a hrêa.

¹⁵Khan, rêngin Jerusalem khuua khan rângachak le tangkaruahai chu lung anga ngaiin a siahai hluka.

¹⁶ Khan, Solomona inei sakorhai chu Aigupta ram ata zuang hôlhai an nia; rêng suminpâr mihaiin an lei lâk pe ngaia.

¹⁷Aigupta rama mi tâli chu tangkarua sekel irzaruk le an irthûlpuihaia, khan sakorhai chu tangkarua sekel irzakhat sômringain, khahai ang khan Hit mihai rêng murdihai le Suria rênghai khom an irthûlpuihai a ni.

2 Thurchi Suina 2

Tempil sin hranga irsiamna

(1 Rng 5.1-18)

¹Khan Solomona'n Rengpa ta hrangin tempil sin a tuma, ama rêng in hrang leh khan,

²Solomona'n thil pêl hrang mi sîngsari le lungtuk mi sîngriat a hmanghaia, sinhotuhai enkol hrangin mi sângthum irzaruk an thanghaia.

³Solomona'n Tura rêng Hirama kuang palai a tîra, “Ka pa Davida ta hrangin sidar thing ni lei ipêk ngai ang khan kei khom ni pe theiin lân.



⁴Ki Pathian chôindômna hrang tempil sin ki tuma, kei le ki mihai ta hrangin hmun irthiang ni a ta, kha khan mirimhoihai hâlin kin Pathian chu kin ibiak thei hrang a ni; bai irthianghai se ngai kin ta, zîng le khohloia, sabat nîhai le tha thar kûta le kût da danga hâlrivôm thilinhlanhai, Rengpa kin Pathian kuanga kin inhlanna hrang ki isin hrang a ni. Khaanga ama chôindômna hrangin Israelhai chu kin Pathian hin thu a ipêk a ni.

⁵Tempil roiinpui tak sin ki tuma, kin Pathian chu a roiinpui tak a ni sikin.

⁶A diktakin Pathian ta hrangin tûte'n sin thei no nihai, irvâna khom khin inleng no nia, Pathian ta hrangin mirimhoi hâlna hmun ti loiin chu keima hin a in hrang sin thei le mo ki'rhoi.

⁷Khasikin Judai ram le Jerusalema mi kut theithiamhai, ka pa Davida'n a lei ihmang ngaihai, atûna ki kôla omhai laia sintho hranga hin mi inkhat, rângachak hai, tangkarua hai, dâr hai, thîrsuk theihai, puan senduk le a seninlâr le a dumpôla siam thei a zia i anga khom a sin theihai ni hong tîr pein lân.

⁸⁻⁹Lebanon-ah mi sidar thinghai, meisâr thinghai, algum thinghai ni hong thonin lân; ni mihaiin Lebanonah thing phûr an thei sabak ti kin hriata; khasikin irngai ro, thing tamtak ni sinsiam pe hrangin ki mihai chu ni mihai kuang hong ri sehai; ki in sin hrang hi in roiinpui tak a nia.

¹⁰Khan, irngai ro, ni mi thing âttuhai ta hrangin bai tîn sînghni le barli sînghni le uain her sînghni le oliv hriak sînghni pe ki ti, tiin mi a tîra.

¹¹Khanchu, Tura rêng Hurama'n, "Rengpa'n a mihai lung a thung sikin an rêngin a isiam a ni hi," ti'n Solomona chu lekha a thona.

¹²Hurama'n, "Rengpa Israelhai Pathian irnêng le irvân siamtu, Rengpa in le rêng in sin hranga vârna inhriatna nei nâipasal vâ tak rêng Davida pêktu chu inpâkin om ri se.

¹³⁻¹⁴Mi kut theithiam, vârna le inhriatna nei, Dana irchia mi nupang inkhat nâi, ar hming Hurama ki hong tîra, a pa chu Tura khuaa mi, rângachak hai, tangkarua hai, dâr hai, thîr hai, lung hai, thing hai, puansenduk hai, a



duminpôl hai, puan ze chi tin seninlâr hai sin thei, ze chi tin thothei mi a nia; ni mi kut theithiam hai ka pu ni pa Davida kut theithiamhai kuang khan hong sin sa ta a ti.

¹⁵Khanchu, bu hai, barli hai, hriak hai, uain hai ki rêngpa'n a iti chu a siahlohai kuang hong thonin lân.

¹⁶Khanchu keini'n Lebanon-ah thing chu ni inuam dôr tuk thei ni ta, tuikhangliana Jopa dênin nang zuang tôlpui kin ta, khanchu nangin Jerusalem intungtir ni ti," a tia.

Tempil sin an phut

(1 Rng 6.1-38)

¹⁷Khan, Solomona'n Israel rama a pa Davida'n a lei itep sai nam dang murdihai chu a tephai nôka, nuaikhat sîngringa sângthum le irzaruk an nia.

¹⁸Khan, thil pêl thei mi sîngsari an nia, tânga thing tukhai mi sîngriat le mipuihai enkoltu mi sângthum irzaruka inkunghai an ni.

2 Thurchi Suina 3

¹ Khanchu Solomona'n Jerusalema, Moria tânga, a pa Davida kuanga Rengpainlârna, Jebus mi Ornana hruizôl, Davida'n hmun a lei isinsiam pena khan Rengpain chu a sin tâka.

² An lal kum minlina tha hni le sîn hni niin a sin phuta.

³ Pathian in sin hrang dân Solomona iti dân chu hiang hin a ni. A dung sei lam chu mûk sômruk a nia, a khang lian lam chu mûk sômhni a ni.

⁴ A mân tianga tual sei lam chu a khang lian dôr mûk sômhni a nia, ar sâng lam chu irzakhat sômhni a ni; a sâng chu rângachak tui leh an luana.

⁵ Khan tentan lian ual tak banga khan sidar thing ar bela, kha kha rângachak tui leh an luana, kha khan tûm thing le zîngziri irlim an chuangtira.

⁶ Khan a en inhoitirna hrangin lunghluhai leh a'rvotira, rângachak chu Parvaim rama rângachak a ni.

⁷ A in chu tângkhang hai, bang hai, a sâng dôphai, a inkhârhai chu rângachak leh an luana; a banghai khan cherub irlim an chuangtira.



⁸ Khan Hmun Irthiang tak a sina; a sei lam chu a khang lian dôr mûk sômhni a nia, rângachak tui leh an luana, rângachak her sângni an hmanga.

⁹Khan, a kalna rik lam chu rângachak sekel sômringa a ni. Khan, tentan irsâng tak chu rângachak leh an luana.

¹⁰ Khan, Hmun Irthiang taka khan cherub irlim inhni a sina; kha khom kha rângachak leh inluan a ni.

¹¹Khan cherub mithahai khan mûk sômhnia seia, cherub inkhat mitha kha chu mûk ringa a nia, bang a va dêna, khan a mitha dang khom kha mûk ringa ngêt a nia, cherub inkhat mitha leh ar phâka.

¹²Khan, cherub inkhat mitha khom kha mûk ringa a nia, bang kha a va dêna; kiangkhat tianga leh ar phâka mûk ringa dêna sei a ni.

¹³Kha cherubhai kha mûk sômhni delin an mitha an phara, an ngîra, in sâng tianga irheiin an ngîra.

¹⁴ Khan, puanzâr hrang a duminpôlhai, a sendukhai, a seninlârhai, patzâi irhmihai leh a sina, kha khan cherub irlimhai an chuangtira.

Dâr chopui inhni

(1 Rng 7.15-22)

¹⁵Khan, a maton tiang khan mûk sômthum mûk ringaa irsâng chopui inhni a phuna, annihai sîpa khan mûk ringa a ni.

¹⁶Khataka khan zîngziri a sina, chopui sîpa khan a târa; khan dalim irzakhat a sina, zîngziria khan an khâia.

¹⁷Khan, biak in maton tianga khan chopui a phuna, a chang tiang inkhat, a vei tiang inkhat, chang tianga kha Jakin a tia, vei tianga kha Boaz a tia.

2 Thurchi Suina 4

Tempil sûnga neinun

(1 Rng 7.23-51)

¹ Khan, dâr maichâm a sei lam mûk sômhni a lian lam mûk sômhni, ar sâng lam mûk sômin a sin saa.



- ²Dâr tuipang lianpa mûk sôma lian, ar sâng lam chu mûk ringa a ni; a lian lam chu mûk sômthum vêl a ni.
- ³Dâr tuipang pên tiang chu thâr hniin an irvôtira, an irvôtirna chu sehrâtchal irlim a ni, a panga inkhop sa a ni.
- ⁴Dâr tuipang chu sehrâtchal irlim sômhleihni chung a irnghatin, inthumin sim tiang an irheitira, hmâr tiang, nisua tiang le nitâk tiang inthu thumin an irheitirhai chita, an hnung irsongsanin.
- ⁵Dâr tuipang chu kutzapha dôra irsa a nia, a hner par chu khilât par angin, lili pâr ang hin a para.
- ⁶Tui irsilna hrang tâbor lian sômkhata sina, chang tiang ringa a siaa, vei tiang ringa a siaa; annihai kha hâlvôm thilinhlan na hrang a ni; dâr tuipang rêk chu ochaihai tui irsilna hrang a ni.
- ⁷Khan, a sin hrang dân a ihril angin rângachak meiser siana sômkhata sina, biak in sûnga chang tiang panga le vei lampanghai khan a siaa.
- ⁸Dokâng sômkhata sin saa, biak in sûnga khan chang tiang le vei tiang a siahaia. Khan, rângachak tâbor lian irzakhat a sin saa.
- ⁹Kha ti no khom kholâi ochaihai ta hrang le, a pên tiang uala khom kholâi lian ual ar kul saa, inkhâr lianpa a sin saa, dâr tui leh an luana.
- ¹⁰Khan, dâr tuipang chu simnisua tianga enin ar kula,
- ¹¹khan Hurama'n, bêlhai, irvut painahai, tâborhai a sina; khanchu Hurama'n a'rzoitir tâka.
- ¹²Chopui inhnihai, bêl anga a ring omin, chopui sîpa bêl anga a ring nei inhni tuamna chial chikchak inhnihai,
- ¹³annihai tuamna chial chikchak inhnihai hrangin dalim irzaminlihai, chopui sîpa bêl anga a ring nei inhni tuamna hrang chial chikchak ru ruai ta hrangin dalim thuahni hai,
- ¹⁴suankualhai a sina, suankual chung a tâborhai an toitira,
- ¹⁵tuipang inkhat le a hnuaia sehrâtchal sômhleihnihai le,



¹⁶bêlhai, irvut painahai, dâr thîrkut le bêlbûr murdihai kha Hurama khan Rengpa in ta hrangin dâr innôt irtêka rêng Solomona isiam pe a ni.

¹⁷Khahai kha Jordan phâizôla Sukoth le Zereda pil sungna hmuna, rêng khan a sunga.

¹⁸Khaang khan Solomona'n bêlbûr tamtak a sina, dâr chu varh zoi zât ni maka.

¹⁹Khan, Solomona'n Pathian ina bêlbûr om murdi chu a sina, rângachak maichâmhai, bai siana dokânghai;

²⁰a iti angin Hmun Irthiang kôla inchok hrang meiser siana hai, meiser hâlin, rângachak fel fâi tak leh a sina;

²¹Khan, pârhai, meiserhai le meichephai chu rângachak feltaka sin a ni.

²²Khan, meiser puan inchezna hai, tâbor hai, mikhe hai, mei lâkna hai khom rângachak feltaka sin sain; khan in sêng lûtna, in sênggrîl uala Hmun Irthiang tak inkhârhai le a in, biak inhai chu rângachakin a sina.

2 Thurchi Suina 5

¹ Khanchu, Solomona'n Rengpa in ta hranga a isin chu a zoi diam tâka: khanchu Solomona'n a pa Davida'n thil a lei inhlân tâkhai kha a bukkhôm nôka; tangkarua hai, rângachak hai, hmangrua dang murdi chu Pathian ina irchon hrêna khan a sia tâka.

Thuthung Bôm tempil sûnga sia

(1 Rng 8.1-9)

² Khanchu, Solomona'n Israel ulianhai le an nam hruaitu murdihai chu, Davida khopui Zion ata Rengpa Thuthung Bôm irzôn hrangin Jerusalem khuua a bukhaia.

³Khanchu, Israel mi murdihai chu tha sarina kût an ihmang hranga khan an rêng kuang an irchuna.

⁴Khanchu Israel ulianhai kha an hongga, Levi irchihaiin bôm kha an irzôna.

⁵Khan, Rengpa bôm le irtongna puan in le puan ina bêlbûr irthiang murdi chu an lâkhaia; annihai kha ochai Levi irchihaiin an irzôna.



⁶Khan, rêng Solomona le Israel a honghai khan a kuanga hong irbukhai chu bôm kôla khan an irchuna, kêlbelra le sehrâtchal tep zoi loi le hril zoi loihai leh an irbôla.

⁷Khanchu, ochaihaiin Rengpa Thu'nkungna Bôm chu a omna hranga khan an siaa, in sînga ama biakna hmun, hmun irthiang tak, cherub hai mitha hnuaia khan.

⁸Cherubhaiin bôm omna chung irdîna khan an mitha an phar chiana, cherubhai khan bôm le a'rzônna zônfunghai kha an irkhupai vinga.

⁹Kha a zônfunghai chu a sei oka, a zônfung hmorhai chu biakna hmun kôla Hmun Irthiang ata ar hmu theia; khannisian pên tiang ata chu irlang thei ual ma; atûn ten hin a la iom mai a ni.

¹⁰Aigupta ram ata an suaka, Rengpa'n Israel irchihai kuang thu a intung laia Mosia'n Horeb tânga lungphêk inhni a isia tih no chu, kha bôm kôla khan ite a dang om mah.

Rengpa roiinpuina

¹¹Khanchu hiang hin a nia, ochaihai chu Hmun Irthiang ata an hong suak le khan, (Ochai omhai murdi chu an irthâr irthianga, a pâlin irsiam ual loiin;

¹²Levi irchi hla sak mihai khom an rêngin, Asafa hai, Hemana hai, Jeduthuna hai, an nâipasalhai le nâinupanghai, puanchek sila irvôin têngrep hai, perkhuang hai, dâr hai le maichâm nisua tiang an ngîra, an laia ochai irzakhat sômhni bekul tumin an om a ni.)

¹³Hiang hi a nia, bekul tumhai le hla saktuhaiin Rengpa inpâkna le lômthu hrilna an itumhai chu hmunkhata inhriat thei a ni; bekul le têngrep le thil dang irhâi an hon suaa, "Ama lak a satak a nia, a khonzâna lak kumtuanga om hrang a nia," tia Rengpa an hon pâkin chu, Rengpa in chu sumpuiin a sip zit tâka.

¹⁴Khanchu, sôm sika khan ochaihaiin an sin khom tho thei loiin an oma, Rengparoiinpuinain Pathian in chu a isip zoi tâk a ni.

2 Thurchi Suina 6



Mipui kuanga Solomona thuhiril

(1 Rng 6.12-21)

- ¹Khanchu, Solomona'n thu a hrila: "Rengpa'n inthim irsakhaka khan om ki ti, a tia.
- ²Khannisian ni omna hrangin, kumtuanga ni omna hrangin nang ki lei sin pe tâk a ni hi," tiin.
- ³Khanchu rêng kha a hor heia, Israel mi irbukhai kha sat a vura; Israel mipuihai kha an ngîr chiana.
- ⁴ Khan, ama'n chu, "Rengpa Israelhai Pathian, ka pa Davida kuanga ama bâi ngêtin,
- ⁵Aigupta ram ata ki mi Israelhai ki hruaisuak ni ata Israelhai nam lai ata a tu khua khom hi ki'rhming omna hrang in sin hrangin lan thang ma unga, ki mi Israelhai chungu hruaitu hrang tûte lan thanghai ma ung;
- ⁶khannisian ki'rhming omna hrangin Jerusalem hi ki len thang tâka, ki mi Israelhai hruaitu hrangin Davida hi ki inthang tâk a ni, tia lei hriltu, ama kut ngêta hlo'nchuktirtu hi inpâkin om ri se.
- ⁷Ka pa Davida khan Israelhai Pathian, Rengpairhming hrangin in sin a lei tum ngaia.
- ⁸Khannisian Rengpa'n ka pa Davida kuang, 'Ki'rhmingin in sin ni lei tum ngaia, hianga lungrîl ni lei idôn hi ni tho insa;
- ⁹khannisian nangma'n chu in hi la sin no chi ni; ni nâipa ni sùng ata irzirin kêng keima in chu a isin hrang,' a lei ti tâka.
- ¹⁰Khan, Rengpa'n a thuhiril chu hlo an chuk pea; Rengpa ki inkung tâk angin ka pa Davida hmun chu ki lei luaa, Israel rêngtoihmuna ki lei toia, Israelhai Pathian, Rengpa irhming hrangin in chu a sin tâka.
- ¹¹Khataka khan Israel irchihai kuanga a lei inkunga, Rengpa Thu'nkungna Bôm chu ki lei hrê tâka," a tia.

Solomona chongchaina

(1 Rng 8.22-53)



¹²Khanchu, Rengpa maichâm kôla Israel irbukhai mithmua khan a ngîra, a bân a phara,

¹³(Solomona dâr dokâng a sei lam mûk ringa, a lian lam mûk ringa, ar sâng lam mûk thuma sin biak in kotsua taka khan khûksadelin irvân tiang enin a bân a phara.)

¹⁴O Rengpa, Israelhai Pathian irnêng le irvâna hin nangma anga zel Pathian om mahai, an lungrîlhaia ni lampui hrôtu ni siahlohai chung a khan thuthung intungin lung ni lei thunghaia;

¹⁵ni siahlo ka pa Davida kuanga ni chonginkung ni zoia, a ni a vuan hin ni bâia ni lei ihril tâk chu ni kut leh hlo nin chuktira.

¹⁶ Khasikin O Rengpa, Israelhai Pathian, ni siahlo ka pa Davida kuanga, “Ni’rchihai chu nangma omdân angin an omdân an irdîn photin chu, ki mithmua Israelhai rêngtoihmuna toi hrang chu irhmâi no chi ni,” tia ni lei inkung kha hlo’nchuktir roh.

¹⁷Khanchu Rengpa, Israelhai Pathian, ni siahlo Davida kuanga ni thuhiril kha hlo’nchuktir ngêt roh.

¹⁸ Khannisianlân, nang Pathian hring chu irnênga mihriamhai laia ni om ngêt hrang ma ni? Irngai ro, irvân irzâ taka khin irleng mak chea, hi keima in sin len vâng hin te irleng le khom irhoi mak chea!

¹⁹Nikhomsianlân o Rengpa ki Pathian ni siahloin nang a ikoina le a chongchaina hi irngaitua pe’n lân, ni siahlo chongchaina le nang a inghi hi lei irngaitua pe’n lân.

²⁰ Ama hmun tianga irheia ni siahlo hin a chongchaina irngai pe ro, kha khan ki’rhming chu om a ta, ni itihna hmun ngêia, in sâng tiang a sîn a zâna ni mit nin lêngtir theina hrangin.

²¹Khan, ni siahlo le ni mi Israelhai hin hi hmun tianga irheia an chongchai sîn hin an izonghai lei ngaitua pehaiin lân, a ni, ni omna hmun irvâna lei irngai pehaiin lân; irngaitua pehaiin ngaidamhai ro.



²²Mi tukhom a khuahai chung a thil tho'nsualin, khomâk irsâmtir nang ta sianlân, hi ina ni maichâm kôla hin hor sâmhâi sian,

²³nangin irvân ata le'rngaiin lân, mi sual chu a sualna man thei loi inchangtirin lân, mi fel chu a felna thiam inchangtirin ni siahlohai roirêl pehai ro.

²⁴Ni mi Israelhai hin ni chung a thil an tho'nsualna sikin an râlhai ata an doka, nangma tiang an hor heia, nir hming sâmin, hi ina hin chongchaia thil an hong zongin chu,

²⁵nangin irvâna le'rngai pehaiin lân, ni mi Israelhai sualna chu ngaidamin lân, anni le an pi le pu ni ipêkhaina rama khan hruaihai nôk ro.

²⁶Ni chung a thil an tho'nsualna sikin, irvân a pinga, rua tho ta maka, hi hmun tianga irheia an chongchaia nir hming an sâma, anni deng nin theitirhai sika an sualna an irletin chu,

²⁷nangin irvân ata le'rngai pehaiin lân, an fena hrang lampui sa irhmuhaiin ni siahlohai le ni mi Israelhai sualna hi ngaidamin ni mihai irchon hranga ni ipêkna ramhai hin rua zuan thotir ro.

²⁸“Kin rama hin châm a hong tâka, hrihrâi a lênga, phâivua lumin chîmu a sêm insiata, khâi an intâma, râlhai an hong lian le ni mihai dam loiin an hong om tena hai,

²⁹an chongchaina irngai pehaiin lân; ni mi Israelhai irlet ta taka ni tempil tiang an chongchaiin chu,

³⁰an izong kha inhren lân, irvân ata le'rngaiin lân, ngaidamhai ro, nangma vai hin mihriam sîngrîl ngaituana ni hmu theia,

³¹kin irchihai ni ipêkna rama an om sîng chu nangma hi nang an chia, ni thu an lâk theina hrangin an irhoipui ang takin an chung a tho ro.

³²“Nam dang, Israel mi ni loi ram hlataka omhai khomin ni roiinpuizia le ni sinthotheizia an inhriata, ni changpuihai nuam mai ti inhriata hongin, hi in tianga irheia an chongchaiin chu,



³³an izong chu irngai pehaiin lân, ni omna irvân ata irngaiin lân, an izong chu tho pehai ro; rammuala mi murdihaiin ni mi Israelhai angin nan hria an ti. Hi ki tempil sina hin chubai nang an hong mûk ti inhria an ti.

³⁴An râlhai doi hranga ni mihai an suaka, kho tiang rengata khom, nangma hranga ki tempil sin tianga irheia an chongchaiin chu,

³⁵irngai pehaiin lân, irvân ata inhren lân, an râlhai chu inhnêpuihai ngêt ro.

³⁶Ni mihaiin nangma ata thilsual an thoa, thilsual tho loi tûte om mahai, ni ningmurin an râlhai nin hnêtira, suaka an hruaihaiin, an ihruaihaina ram hlatak ni khomsian.

³⁷Ni mihai chongchaina chu irngaitua pehaiin lân, kha rama khan an sual an irleta, an sualna le an dik lolina thupha an chôiin chu, o Rengpa, an chongchaina chu irngai pehai ro.

³⁸Kha rama an om zoiin an sual an irleta, irsîra an irchihai kuanga ni ipêkna ramhai, nangma hranga ni khopui irtan hai, ni ta hranga ki isin tempil tianga an chongchaiin chu,

³⁹le'rngaiin lân, ni omna irvân ata irngaitua pehai ro, an chungga khonzâna neiin lân, ni mihai sualna murdi ngaidamhai ro.

⁴⁰“O ki Pathian, ni zuang thîrin lân, hi hmuna kin chongchaina hi ni le'rngaitua pe ro.

⁴¹ O Rengpa Pathian, zuar siam suakin lân, ni omna hranga hin zuang ro, ni roiinpuizia inlangna bôm leh hong lût ro. O Rengpa Pathian ni ochaihai chu an sin thônahai hi satvurhaiin lân, ni mi irthianghai chu ni thil sa tho pehai hin lômhai sian.

⁴²O Rengpa Pathian, ni sahriak pol hi masan no'n lân, ni siahlo Davida thil sa thohai inhre mai ro,” a tia.

2 Thurchi Suina 7

Tempil inhongna

(1 Rng 8.62-66)



- ¹ Reng Solomona a chongchai zoiin chu irvân ata mei a zuang tâka, thilinhlanhai chu a kâng irvôm tâka; tempil sêng chu Rengpa roiinpuina'n a sip tâka.
- ² Rengpa in sêng chu a roiinpuina'n a sip zoi tâk sikin, ochaihai chu Rengpa tempila khan lût thei mahai.
- ³ Irvân ata mei zuang tâk le a in sêng chu Rengpa roiinpuinaa isip chu Israel mihaiin an hong hmuin chu, tuala an hmâi irnêng enin an inboka, Pathian chubai an mûka, a satnahai le a khonzâna nei kumtuangna sikin an inpâka.
- ⁴ Solomona le a mihaiin Rengpa kuang thil an inhlana.
- ⁵ A fâkhai hranga thilinhlanha hrangin sehrât sîngni le sângni, kêlbelra nuaikhat le sîngni an hlana. Khaanga thoin Solomona le a mihaiin tempil chu an inhong tâka.
- ⁶ Ochaihai chu an omna hrang hmun indanga khan an ngîra, Levi irchihai chu Davida ipêk thil tum inring theihai leh Rengpa inpâkna hla, Kumtuanga lung ni thungtu a nih ti hla, Davida'n sak hranga a iti ang ngêtin an sak tâka, ochaihai khomin mipui ngîrhai makunga bekul an tuma.
- ⁷ A tual irkul sêng kholâi khom Solomona'n an hong, hâlirovôm thilinhlanhai, bu le bâl thilinhlanhai, fâkrua thilinhlan, sa marhai an roa, dâr maichâm a isin kha hihai murdi inhlanna hrangin a chîn hraia, a'rleng ta loihai chu tuala an ihâl ngai a ni.
- ⁸ Reng Solomona le Israel mi tinhai khan, kairêng kût sîn sari sêng an hmanga, Israel ram hmâr tiang a hekna Hamath khêl le sim tianga Aigupta tuidung kêra mi murdi chu an hor buka, mi tamtak an ni.
- ⁹ Maichâm lômna khan sîn sari a nanga, kairêng kût hin sîn sari dang a nang nôka. Kût sîn hnungkhôn taka khan kût chînna inkhôm roiinpui tak an neia.
- ¹⁰ Zîng nôk tha sarina sîn sômhni sîn thum nî chu Solomona'n mipuihai chu an chîntirhaia; Rengpa'n Israelhai chu sat a vura, Davida hai, Solomona hai sat a vurhai sikin mipuihai chu an lôm tak taka.

Solomona kuanga Pathian inlâr nôkna



(1 Rng 9.1-9)

- 11**Reng Solomona'n a iti angin tempil le a in a sin zoi hnungin chu,
- 12**zânaRengpa chu a kuang a zuan lâr pea, “Ni chongchaina ki len hriata, tempil hi ki kuanga thil nin hong irhlanna hmun hrangin kin thanga.
- 13**Khua inluntirin mo, chîmu fâk insiat hrang khâi inpungtirin mo, hri kin lêngtir tika mo,
- 14**ki'rhming irputin ki mihai thuhnuaîrôl taka ki kuang an hong chongchaia, an ni hong pana, an sualna ata an irleta irvân ata len hria ki ta, an sualnahai ngaidamhai ki ta, an ramhai khom indingpuihai ki ti.
- 15**Tempil hi vêl mai ki ta, hi hin an chongchaiin chu ki mikuara lût a ti;
- 16**kumtuanga an ni biakna hrang hmun hrangin kin thanga, ki'rthiangtir tâk sikin vêl mai ki ta, hrung mai ki ti.
- 17**Nang khom, ni pa Davida thu angin ni thoa, ki thupêkhai ni zôma, ki itihai ni zôma, omdân hrang ki iti angin ni omin chu,
- 18** ni pa Davida kuanga ki chonginkung intung ki ta, ar chihai chu Israelhai rêng chang mai an ti, ki lei iti a ni.
- 19**Nangni hranga ki thupêkhai, ki chonginkunghai nin ngaisak noa, zôm nuam loiin, pathian danghai nin biaka, an sin nin tho pehaiin chu,
- 20**nangni ki ipêkna ram ata hi nangni paisuak ki ta, nin ni ibiakna hrang hmun, ki tempil ki irthiangtir sai khom hi irzêltir nôk ki ta, mi tinin innuisan an ta, hmusit ok an ti.
- 21**“Atûn chu hi in hi mi tinin irngaiirsâng an ta, kha tena chu a kôla fe murdihaiin ar khêl tih an ta, Itina mo Rengpa hin hi ram le hi tempil hi hianga a isoisak hi! ti an ti.
- 22**Mi senkhatin, an irchi suanpârhaiin Aigupta ram ata hruaisuaktu Rengpa an Pathian chu an mâksan sika a ni hi teh; pathian danghai an poma an sin an tho pehai sikin Rengpa hin a isoisak a ni, tiin sâmhai an ti,” a tia.

2 Thurchi Suina 8



Solomona sinthohai

(1 Rng 9.10-28)

- ¹Rengpa tempil le ama in a sin sâng kum sômhni a hong niin chu Solomona'n,
- ²Hirama ipêk khopuihai chu Judai rama mihai an luatirhaia.
- ³Solomona'n Hamat-zoba a doia, an hnêa.
- ⁴Ramchâra Tadmor kul chu a sin insatira, Hamath biala khuahai chu thil siakhômna hrangin a sin insahai nôka.
- ⁵Solomona'n Beth-Horon chu chuanchung le chuanhnuai kul banghai chu a sinsiama, inkhârhai khom a kalnahai a sina.
- ⁶Baalath khopuihai le a neinun a isiana khopui hai, a sakor hai le a tâli siana khopui hai khom a sin insahai nôk vinga. Jerusalem hai, Lebanon hai le a ram sâng murdia in sin a itum kai chu a sinhai vinga.
- ⁷Israel mi ni loi, Hit mihai, Amor mihai, Periz mihai, Hiv mihai, Jebus mihai, Kanaan rama lei om, Israelhaiin Kanaan ram an luaa,
- ⁸an ithat zoi loihai kha Solomona'n suak anga hmang hrangin sintho pâl an dinga, khahai kha atûn ten hin an la om.
- ⁹Israel mihai rêk chu sintho hranga inphût ni mahai, sipaihai, hruaituhai, tâli chalaithuai le sakor chung chuang mi an chang saa.
- ¹⁰In sinna enkoltu mi irzahni sômringa an om.
- ¹¹Solomona'n a dôngma, Aigupta rêng nâinu ta hrangin in a sina, Davida khopui ata a lâksuaka, a in sina khan an omtira, "Ki dôngma hi Israel rêng Davida ina om hrang ni ma. Thuthung Bôm omna murdi hi hmun Irthiang a nia," a tia.
- ¹²Tempil mikota maichâm a sina, Solomona'n hâlvôm thilinhlan an hlana.
- ¹³Mosia dân bua chuang angin a ni tina inhlan hranghai, sabat nia inhlan hranghai, tha thara inhlan hrang le kum khat sâng kât voithum chol pol loi kât hai, pentikos kûthai, kairêng kûta inhlan hrang a bituk chu an hlana.



¹⁴A pa Davida inkung sai angin ochaihai a ni tina an tho hrang infelpuia, ochaihai hla saka lei changpui hrang Levia irchihai tho hrang khom infel pea. Tempil sipaihai a ni tina an sin hrang hai, inkhâr hrang hai, Pathian mi Davida ihril angin an danghai vinga.

¹⁵Thil siakhômna le thil dang chungchâng ochaihai le Levi irchihai kuanga Davida thupêk murdi kha itinrêng a tho vinga.

¹⁶Rengpa tempil an sinna hrang lung an phûm nî ata ar zoi ving tena Solomona'n tho hrang a iti murdi an tho zoi vinga, Rengpa tempil chu hlo an chuktir tâka.

¹⁷Khan Solomona chu, Edom rama Ezion-geber le Eloth khuuaa khan a fea.

¹⁸Reng Hirama'n irkuang le a chalaitu thei ta tak a hong thonhaia, Solomona mihai leh Ofir rama an fea, rângachak her sîngkhat le sângringa nêka tam an hong chôia, rêng Solomona kuang an hon tunga.

2 Thurchi Suina 9

Seba rêngnu'n Solomona a hro

(1 Rng 10.1-13)

¹Seba rêngnu'n Solomona irhming inthangzia an hriatin chu thu intakhai irdona hrilfia pe hrangin Jerusalema a fea. Hnungzui tamtak a neia, mosola pêl hrangin saringsei tamtak a hruaia, mosola hai, lungmantam hai, rângachak hai a chôi intam oka. Solomona leh an irhmuin chu irdon a inuam dôr chu ar don vinga.

²A irdon murdi chu Solomona'n a sâm pe vinga, intak a iti zel om pe maka.

³Seba rêngnu'n Solomona vârzia chu an hriata, a in sin roiinpuiziahai khom a hmua.

⁴Solomona fâk hrang an hong idôn hai, a siahlo omna inhai, rêng ina sinthotu sin irsem dân hai, an silkai enhoizia hai le a hrungtuhai irvo dân sahai, tempila hâlrivôm thilinhlan a inhlân intam dânhai, a hong hmuin chu, ar khêl a ti oka, a char a dong pe tâka.



⁵Rengnu khan, “Ni sinthohai le ni vârziahai kin rama ki inhriathai kha a idik chu a ni hi te,

⁶ki hong, ki hong hmu mân khan chu, an ihrilhai kha taksôn ma unga; khannisian ni vârziahai hi a chimrip khom an insîr ni ma, an ihril nêkin a roiinpui ok a ni.

⁷Ni dôngmahai chu an vân a sa! ni siahlo a ni tina ni kôla oma, ni vârzia irngaituhai khom hi an vân a sa vang na!

⁸Ni Pathian Rengpa chu inpâkin om ri se, ama chu ni chung a lôma, ama irthûla roirêltu, rêngin nang a inthang a ni. Ni Pathianin Israelhai hi lung a thunga, an rêng indiktaka an chung a roirêltuin nang a siaa,” a tia.

⁹Thilpêk hranga a hong ichôi kha a pêka, rângachak her sângminli nêka tam, mosola tamtak le lunghlu tamtak Solomona kha a pêka.

¹⁰Reng Hirama hai le Solomona haiin Ofir rângachak an hong chôia, algum thing le lunghluhai khom an hong chôia.

¹¹Algum thing le tempil tentan sâng le ama in luina leidâk a sina, thing chu perkhuang leh irhâihoi sinna’n a hmanga, Judai rama hianga thing hi la hmu ngai mahaia.

¹²Reng Solomona’n Seba rêngnu izong dôr a pêka, khakhêla thilpêk an hong ichôi pe nêka tam a pêka, an rama a zuituhai leh an kîr nôk tâka.

Solomona irchong lam

(1 Rng 10.14-25)

¹³Solomona chu a kum tin rângachak sîngni le sângthum a man ngaia.

¹⁴Suminpâr mihai le dukan thohaiin khâzana an ipêk bâka Arabia rênghai le Israelhai bial tina ram optuhaiin rângachak le tangka Solomona kha an pêk ngaia.

¹⁵Pho lianpapai rângachak kop phêk irzahnia leh a sina, pho inkhata rângachak her sari vêl a hmang a ni.

¹⁶Pho chîn ual rângachak phêk her thum rik leh a tuama, Lebanon rampuia in an iti tentana khan an siaa.



¹⁷Rengin sâiha leh rêngtoihmun roiinpui tak a sina, rângachak fel takin a tuama,

¹⁸rêngtoihmuna luina hrang rângachak leidâk kalbi kiruk a sirnahai leh a sina. Toihmun thar chopui a neia, a chopui sîra khan kâmkeibaknei irlim an ngîrtira.

¹⁹Kâmkeibaknei irlim sômhleihni leidâk sîr tiang khan an boktirhaia, khaang dôra roiinpui kha tûte rama la om ngai ma.

²⁰Solomona khilât chu rângachak inzen a nia. Lebanon rampuia in an iti tentana khan an nêk fâkna bêl le bûrhai khom rângachaka sin a ni. Solomona zoro lai khan chu tangkarua hi chu ite bê'n bê mahai.

²¹Irkuang khom a nei intam oka, a rêng Hurama irkuanghai leh an irhlopa, Tarsis haia fein kum thum dana an hong nôka, rângachak hai, sumru hai, sâiha hai, zông hai, vahro hai an hong chôï pe ngaia.

²²Reng Solomona chu rammuala rêng danghai nêkin ar chonga, vâr khom a vâr tak a nia.

²³Solomona kuanga Pathianin vârna a ipêk chu inhriat nuamin an hong pan sup sup ngaia;

²⁴sumru le rângachaka thilsiamhai, puanhai, rântukfam hai, mosola hai, sakor hai, sakor puakpêl zâthai an hong pêk zut zuta, a kum tin hiang hin an tho ngaia.

²⁵ Reng Solomona'n sakor vâina hmun sângminli a neia, khatak khan a sakor tâli le sakorhai a siahaia, irdoina sakor khom sîngkhat le sângni a neia, senkhat chu Jerusalema an oma, a danghai chu kho dang danga a siahaia.

²⁶ Eufrates vadung le Filistia ramria, Aigupta tui dênin kha ram sînga khan an lal tâk a nia,

²⁷Solomona inlal laiin Jerusalem khuaa khan tangkaruahi chu lungtehai ang ma mai an nia, sidar thing lak tâng sîphai, thang tianga phâia theipui thinghai angin tamtak a nia.



²⁸ Solomona'n Aigupta ram le hmun dang dang ata sakor leh a'rthaka.

Solomona inlal laia thu

(1 Rng 11.41-43)

²⁹A phut ata a mong dênin Solomona thurchi hi deipu Nathana lekhabua hai, Silo mi Ahija thuhiril irziakna bu hai, Nebata nâipa Israel rêng Jeroboama chungchânga deipu Idoa inlârna irziakna bua a chuang.

³⁰Solomona chu Jerusalema Israel mi murdihai chung a kum sômminli an lala.

³¹Khan, Solomona chu a thia, Davida khopuia an phûma, a nâipa Rehoboama chu ama irthûlin an lal tâka.

2 Thurchi Suina 10

Hmâr tianga nam tehelna thu

(1 Rng 12.1-20)

¹Rehoboama chu Sekem khuaa a fea, kha khan rêng chang hrangin Israelhai, hmâr tianga omhai chu an lei irbukkhôma.

²Nebata nâipa Jeroboama chu Solomona chiin Aigupta rama a rota, a thi thu an hriatin chu a hong kîr nôka.

³Hmâr tianga Israelhai an va pana, Rehoboama kuang khan an fesuama, an kuang,

⁴"Ni pa khan a sate'n a ni len nang ngaia, kin puak a nin riktir pe ok ngaia, nangin chu ni nin nang khomin kin phur nin zângtir pe'n lân, ni khua le tuaia om kin ti," an tia.

⁵Ama khan an kuang, "Sûn thum zoia hong nôk unglân," a tia, khanchu mihai kha an fe tâka.

⁶Reng Rehoboama chu a pa Solomona dam laia a kôla om ngai ulianhai ar donhaia, "Hi mihai hi itin mo ti pehai inlân nin ni tipui?," a tia.

⁷Anni'n chu, "Hi mihai chung a hin khonzâna neiin lân, satakin chongpuihai ro, kumtuangin ni mi ni an ti," tiin an sâma.

⁸Ulianhai iti kha irngai nuam loiin, ruatharte, ama rualhai kha ar donhaia,



⁹ni pa khan kin puak a nin riktir pe hi nin zângtir pe ro, hong tihai hi itin mo ti pehai inlân sa ni?, a tia.

¹⁰Ama rual ruathartehaiin, “Hihai hi ni pa’n kin puak a nin riktir pea, khasikin nangma’n chu kin puak nin zângtir pe ro, tihai hi, hiang hin ti pehai ro, ki kutte khom hi ka pa lampui nêkin ngar ual a ti,

¹¹ka pa khan nin puak a inriktir ok a ni’n chu keima’n chu bôk sa nôk ki ti; hrui leh vîkna tonghaiin keima’n chu âinuvêt leh nangni hrem ki ti, ti ro,” an tia.

¹²Sûn thum zoia chu Jeroboama le Israelhai chu Rehoboama kuanga a ihril angin, an hongga.

¹³Rengin ulianhai chongbe kha irngai nuam loiin mihai kha inhram takin a chongpuihaia.

¹⁴Ruathartehai chongbe angin Rehoboama’n, mihai kuang, “Ka pa khan nin puak an riktir hrai ma ni? keima’n bôk sa nôk ki ti. Hrui leh vîkin nangni a hrema, keima’n chu âinuvêt leh nangni hrem ki ti,” a tia.

¹⁵Rengin mipuihai thu irngai nuam loiin Silo mi deipu Ahija kuanga Nebata nâipa Jeroboama chungchânga Pathianin a iti kha Rengpa’n hlo a inchuktir theina hrangin Pathianin a intitir a ni.

¹⁶ Israel mihaiin rêngin an thu a irngaitua pehai loi a nih ti an inhriatin chu, hiang hin an tia. “Davida rama imo dongtum kin neia? Jesaia irchihai lai ata dongtum i ual mo kin nei? Davida irchihai chu an omin om ri sehai,” an tia. Israel mihai chu anni in tiang an fe tâka.

¹⁷Judai rama om Israel mihai chungga vai khan Rehoboama chu an lal tâka.

¹⁸Reng Rehoboama’n Hadorama, sintho inphûthai pâl hruaitu chu Israelhai koi hrangin a va tîra, anni’n lung leh an lei dêng thata. Khasika khan Rehoboama chu a sakor tâlia khan a va chuanga, Jerusalema an tân tâka.

¹⁹Khataka irthokin Israel mihai chu Davida irchihai lai ata atûn ten hin tehel an izong tâk a ni.



2 Thurchi Suina 11

Deipu Semaia thuhri

(1 Rng 12.21-24)

¹Reng Rehoboama Jerusalem a va tungin chu, Benjamina mi le Judahai laia sipai sahai nuaikhat le sîngriat a bukhaia, hmâr tianga om Israelhai chu a thuhnuaia siahai nôk hrangin a ibei tum a ni.

²Khannisian, Pathian mi, Semaia kuang Rengpathu a zuang tunga:

³Reng Rehoboama hai, Juda le Benjamina mihai kuang hiang hin an hriattira:

⁴“Nin urêng Israelhai chu doihai no roi, rot ving ta roi. An sintho chu keima thua an itho a ni,” tiin Rengpa thupêk an poma, Jeroboama kha doi ta mahaia.

Rehoboama'n kul a sin

⁵Rehoboama chu Jerusalema a oma, Judai ram le Benjamina-hai ram sînga hi khuahai hi ar kula.

⁶Bethlehem hai, Etam hai, Tekoa hai,

⁷Bethzur hai, Soko hai, Adulam hai,

⁸Gath hai, Maresa hai, Zip hai,

⁹Adoraim hai, Lakis hai, Azeka hai,

¹⁰Zora hai, Aijalon hai, Hebron hai,

¹¹Hi khuaa kulhai hi iamom takin a sina, kho tina hruaitu an thanghaia, kho tina buhai, oliv hriakhai, uainhai a bukkhôma.

¹²Ufeihai le pho a buka, khang khan Judai ram le Benjamin rama mihai chu a thuhnuaia a isiahai thei a ni.

Ochahai le Levi irchihai Judai rama an lûtna

¹³Israelhai ram bial tina om ochahai le Levi irchihaiin sim tiang an pana, Judai rama an lûta.



¹⁴Levi irchihaiin an sâ vâina sahai leh an ram an inhroi kha an mâksana, Judai rama Jerusalema an hongga, Jeroboama le a thûl hrangtuhai khanRengpa ochaiin hmang nuam mahaia.

¹⁵Jeroboama khan nam dang pathian biakna hmun irsânga sintho hrang, sehrâtchal irlim siam chophai le khohri biakna hmuna sin hrangin ama ochai a inkung a ni.

¹⁶Israel namhai laia Rengpa, Israelhai Pathian bê ta tak nuamtuhaiin Jerusalema Levi irchihai an hong zuia, an irchihai Pathian Rengpa kuang thilinhlan an inhlan theina hranga hong an ni.

¹⁷Hi sika hin Judai ram chu Solomona nâipa Rehoboama tiang an kopa, rêng Davida le Solomona inlal lai ang khan an iom a ni.

Rehoboama in sângkua

¹⁸Rehoboama'n Davida nâi Jeremota nâinu Mahalati chu dôngma'n a neia, a nu chu Eliaba nâinu, Jesaia tunu Abihaili a ni.

¹⁹Nâipasal inthum Jeusa hai, Semaria hai, Zahana hai an neia,

²⁰zoro hong sôt ual tena chu Absaloma nâinu Maaki a nei nôka, nâipasal minli Abija hai, Ataia hai, Ziza hai, Selomita hai a neihaia.

²¹Rehoboama hin dôngma sômhleiriat le lâksîr sômruk a neia, nâipasal sômthum kiriat le nâinupang sômruk kiriat a neia. A dôngma le a lâksîrhai laia Maaki hi an dit tak a nia,

²²Abija hi a nâihai laia a inhlutak a nia, ama thûl hranga rêng chang hrangin a inthang a ni.

²³Rehoboama'n a nâihai hmang dân a theia, Judai le Benjamina ram sâng khopui kul nei murdia hruaitu a siahaia, anni hrangin ar phal oka, dôngma khom an neitirhai tuaia.

2 Thurchi Suina 12

Aigupta-haiin Judai ram an rûn

(1 Rng 14.25-28)



- ¹Rehoboama rêng a hong chang indet zoiin chu a mihai leh Rengpa dân uksak loiin.
- ²Rehoboama kum ringa an lal kumin Rengpa an uksak no sikin hremna an tuanga, Aigupta rêng Sisaka khan
- ³sakor tâli sângkhat irzahni, sakor chung chuang mi sîngruk le sipai tep zoi loi, Lub hai, Suki hai le Sudan sipai pâlhai leh Jerusalem chu an hong rûna.
- ⁴Judai ram kho kul neihai an hong lâka, Jerusalem khom an hong tung tâka.
- ⁵Sisaka chia Judai ram hruaitu Jerusalema hong rothai le rêng Rehoboama kuanga khan deipu Semaia chu a fea, an kuang, “Hi hi Rengpa thu chu a ni. Nin ni mâksana, kei khom Sisaka kuta nangni ki imâksan a ni,” a hong tia.
- ⁶Reng le hruaituhaiin, “Thilsual kin itho a ni, Rengpa hin a tho indik a ni,” an tia.
- ⁷An sinthohai kha an hriatin Rengpa thu chu Semaia kuang a zuang tunga, a kuang, “Thilsual kin tho an ti tâk sikin inhekhai ta no ning. Sisaka hin Jerusalem a hong doi tena, ki ningmurna chu Sisaka hmangin an chung a insum ual no ning, a sen chu an dam suak ki iphal pehai hrang a ni.
- ⁸Sisaka’n khua chu la a ta, irnêng rêng sintho le ki sintho an nang loizia inhria an ti,” tiin.
- ⁹ Sisaka’n Jerusalem chu a doia, a tempil le a rêngin thilhlu omhai chu a lâkpai vinga. Reng Solomona’n rângachak pho a isinhai khom a rêngin a lâkpai vinga.
- ¹⁰Khahai nêkin Rehoboama’n dâr le pho a sina, rêngin mikot hrungtuhai kuta a pêka,
- ¹¹rêng chu tempila a fe richamin a hrungtuhaiin pho an chôia, an zuia; a hrungna sînga an sia nôk ngaia.
- ¹²Rengpa kuang irhnuai takin an intûklût tâk sikin, Rengpa ningmur khan soisakhai ta maka, Judai rama mihai khom hoi takin an iom nôk thei a ni.

Rehoboama inlal sîng thu



¹³Rehoboama chu Jerusalema an lala, a rêng chang chu a det pe oka, rêng a changa hin kum sômminli mi a nia, Jerusalema kum sômhleisari roi a rêl saa. Israel ram murdia khuahai chu ama chubai mûkna hmun hrangin, Rengpa khan a inthang a ni. Rehoboama nu chu Amon mi, Naamaii a ni.

¹⁴Rengpa nuamlam sin tho hrang a ngaitua no sikin thilsual a thoa.

¹⁵A phut ata a mong dênin Rehoboama sintho le a in mihai thurchi chu deipu Semaia thurchi irziakna lekhabua a chuang. Rehoboama le Jeroboama chu an irdoi mai a ni.

¹⁶Rehoboama chu a thia, Davida khopuia an phûma, a nâipa Abija chu ama irthûlin an lala.

2 Thurchi Suina 13

Abija le Jeroboama irdoina

(1 Rng 15.1-8)

¹Israel rêng Jeroboama kum sômhleiriat an lal kumin Abija chu Judai rama rêng a changa,

²Jerusalema kum thum an lala, a nu chu Gibea kho mi Uriela nâinu Mikaii a ni. Abija le Jeroboama chu an irdoia,

³Abija chu sipai hâi inthang nuaiminli a hmanghaia,

⁴Efraima tâng ram Zemaraim tâng sîpa Abija a ngîra, Jeroboama le Israelhai chu an khêka, “Ki thu hi lei irngai roi,

⁵Rengpa, Israelhai Pathianin, Davida le a’rchihai kuang Israel mihai chung a rêng nina chu thuthung neiin a pêk tâka, ti nin la inhriat loi ma ni?

⁶Davida nâipa, Solomona siahlo Nebata nâipa Jeroboama chu a pu kuang ata tehel a zonga, mi chanlamboihaiin an inpâka.

⁷Solomona nâipa Rehoboama chu ite bêin bê maka; ama lak nâipang a nia, annihai ngam hrangin a lungrîl la puihling maka.

⁸Davida irchihai kuang rêng thuneina Rengpa ipêk khôkmâkin nin sipai tam le Jeroboama sehrât irlim, nin pathian hranga a isiam songin nin hong pûta.



⁹Rengpa ochaihai le Levi irchihai kha nin inhnot dokhaia, nam danghai tho dân angin ochai hrang nin inkunghaia. Sehrâtchal hong kaihai chu kêlbelra sari mani, hong hôlhai kai chu, kin ochai tiin nin lei hmang nuamhai ngaia.

¹⁰“Keini’n chu kin Pathian Rengpa sin kêng kin itho, la irheisan ngai ma ung, Arona irchia ochaihaiin an thotum an thoa, Levi irchihaiin an ihruaihai a ni.

¹¹Zîng tin le khohloi tina Rengpa ta hrangin mirimhoi an hâla, hâlvôm thilinhlanhai khom an inhlan ngai a ni. Bai kathâr chu dokâng irthianga an sia mai ngaia, khohloi tiang chu rângachak meiser khom an la ihâl mai ngai a ni. Keini’n chu Rengpa thupêk kin la zôm mai ngai a nia, nangni rêkin chu nin imâk tâk a ni.

¹²Pathian chu a ni hruaitu a nia, a ochaihai khom irdoina bekul tum hrangin an irsiam diam a ni. O Israelhai, nin irchibulhai Pathian Rengpa hi lei doi no roi, zoi no chin ni,” a tia.

¹³Khaang khan Jeroboama’n a sipai senkhathai chu Juda sipai hnenghai hrangin a siahaia, senkhat chu an hnung tianga doihai hrangin an fetirhaia.

¹⁴Judahaiin an hong thîrhaia, an râlhaiin an irhualhai tâka, Rengpa chu an koia, ochaihaiin bekul an tuma,

¹⁵Judahai chu an khêklula, Abija’n a hruaihaia, an doia, Pathianin Jeroboama le Israelhai chu an hnêhai tâka.

¹⁶Israelhai chu Judahai makunga an intâna, Pathianin Judahai chu an hrâttrhai tâka.

¹⁷Abija le a sipaihaiin Israel sipaihai chu an doktirhai tâka. Israel sipai sahai nuairinga vêl an thathai a ni.

¹⁸Judahaiin an irchihai Pathian Rengpa chu an irnghatna a ni sikin Israelhai an inhnêna a ni.

¹⁹Abija’n Jeroboama sipaihai chu a’rzûlhaia, an khopui senkhat Bethel hai, Jesana hai, Efron hai le a kôlvêla khuahai a sutpaihaia.



²⁰Abija dam sângin Jeroboama chu ngîrsuak thei ta maka, Rengpa'n a ithatpai tâk a ni.

²¹Abija chu a hong hrât sit sita, dôngma sômhleiminli a neia, nâipasal sômhni inhni le nâinupang sômhleiruk a neia.

²²Abija thurchi dang, a thuhiril le a sin thohai chu deipu Ido a thurchi irziakna lekhabua a chuang.

2 Thurchi Suina 14

Reng Asa'n Ethiopia mi an hnêna

¹Reng Abija chu a thia, Davida khopuia rêng hai thâna an phûma. A nâipa Asa chu ama irthûlin an lala. Asa inlal kum sôm sâng chu râi irvei loiin an oma,

²Asa'n thil dik le thil sa, a Pathian Rengpa mithmua a tho ngaia.

³Nam dang maichâmhai le an pathian biakna hmun irsâng hai a pai pehaia, an lung millimhai an khoipai pehaia, Aseri irlim an iphun kha an siat pehaia.

⁴Judai rama mihai chu an irchibulhai Pathian Rengpa nuam lama sintho le a dân hai zôm hrangin a hrilhaia.

⁵Judai ram sâng kho tina nam dang pathian biakna hmun irsâng hai le an mirimhoi hâl na maichâmhai chu a pai pehaia, an lal sâng chu lungthi takin an iom a ni.

⁶Rengpa khan lungthi takin an omtira, irdoina a om no kê hin Judai rama kulhai an sintira.

⁷Judai rama mihai kuang, "Tho ei khuahai hi siam insa nôk ei ta, lung kulhai sin ei ta, râi hrungna kul irsâng hai mikot le a kalnahai sin ei ti. Rengpa ei Pathian chu a neitu'n a bê sikin, hi rama hin thu ei la inei a ni; ama ei pom sikin hmun tina râiboiiin a ni inomtir a ni hi," a tia. Khaang khan, kulhai kha an siama, satakin an zoi tâka.

⁸Reng Asa'n pho le ufeihai chôiin, Judai ram ata sipai nuai thum le Benjamina ram ata irdoi thei, rôppho inngâk le thal chôi sipai nuai hni sângriat a neia; mi hrât irdoi thei tak tak an ni.



⁹Ethiopia mi Zera khan sipai nuai sôm irzakhat le sakor tâli irzathum hruaiin Judai ram a hong rûna, Maresa a hong tung rak tâka.

¹⁰Lei doi hrangin rêng Asa chu a le'rsiama, Maresa kôla Zefata irhôra khan a le'rsang tâka.

¹¹Asa chu a Pathian Rengpa kuanga a chongchaia, “O Rengpa sipai hrât loihai, hrât taka inchangtir theitu, nangma ang hi tûte om mahai. O Rengpa kin Pathian, ni zuang changpui ro, nangmaa hin kin irnghata, nangma irhming sâmin hi mihai doi hrangin kin irthok a ni. O Rengpa kin Pathian ni nia, mihriamin nang ngam no ri sehai,” a tia.

¹²Rengpa'n Ethiopia mihai chu Asa le Juda sipaihai makunga khan an hnêa, an rot zoi tâka.

¹³Asa le a rualhaiin Gerar dênin an irzûlhaia, Ethiopia mihai chu an thathai oka, a lei pût thei zel om ta mahai. Rengpa le a sipaihai chu an ingamhai viat loi a ni, sipaihaiin râllâk sum tamtak an lâka.

¹⁴Gerar le a kôlvêla khopuihai khom an insiat thei ving a ni; khataka mi lei omhai khan Rengpa kha an chi tak taka, khuahai an inmoka, râllâk sum tamtak an lâka.

¹⁵Belrapu omnahai an hâla, belra tamtak an chelhaia, saringseihai an chelhaia, Jerusalema an kîr nôk tâka.

2 Thurchi Suina 15

Reng Asa'n Pathian biak dân a siam insa

¹Obeda nâipa Azaria chungu Pathian irtha a zuang tunga.

²Reng Asa irhmupui hrangin a fea, a khêka, “Reng Asa nangni Judai le Benjamina mihaio, ki thu hi irngai roi. Ama tiang nin kop sùng chu Rengpa khom nangni tiang om a ta, nin zongin chu hmu nin ti, nin mâksanin chu nangni masan a ti.

³Israelhaiin chu Pathian tak biak loiin zoro sôtak an oma, ar chutir hrang ochai khom nei mahaia, dân khom inhre mahai.



- ⁴Khannisian chardongna an tong zoro'n Israelhai Pathian Rengpa tiang an irheia, ama an zonga, an hmu ngai.
- ⁵Kha lai khan ram a buaia, ite mumal a nei no sikin tûte irvâksuak ngam zel om ngai mahai.
- ⁶Nam le nam deng an irthei irhlôma, kho sâng le kho sâng deng an irthei irhlôma. Pathianin buaina le chardongna a intungtir a ni.
- ⁷Nangni'n chu chi loiin irnaksong unglân, nin sintho ra chu hmu ngêt nin ti," a tia.
- ⁸Reng Asa'n deipu Azaria, Obeda nâipa thu an hriatin chu a'rsongpuia, Judai le Benjamina rama millim om murdi chu a paihai vinga, a pa'n tâng ram khua a ilâk murdi an boipai vinga. Tempil tuala Rengpa maichâm khom a sin insa nôka.
- ⁹Rengpa'n a ompui a nih ti an hriatin, Efraima ram ata Samaria hai ram ata ama tianga kop mi tamtakin Asa an hor hnêla. Asa'n khahai kha Judai ram le Benjamina rama mihai a bukkhômhaia.
- ¹⁰Asa inlal kum sômhleiringa tha thumna khan chu Jerusalema an irbukkhôm nôka.
- ¹¹Kha ni khan an râllâk sehrât irzasari le kêlbelra sângsari Rengpa kuang an inhlana.
- ¹²An irchihai Pathian Rengpa chu lungrîl taka a dik taka biak hrangin thu an thunga.
- ¹³Ulian khom nâipang khom, pasal khom nupang khom, Israelhai Pathian Rengpa biak nuam loi chu that hrang a ni, an tia.
- ¹⁴Inring taka khêkin Rengpa irhming sâmin khomâk an irsâma; an thuthung chu an pom khaka, an khêka bekul an tuma.
- ¹⁵A diktakin thu an thung indet tâk sikin, Judai rama mihai chu an lôm tak taka. Rengpa sintho chu a hoi an tia, ama'n a lei poma, hmun tina irngeina an lêngtira.



¹⁶A pi rêngnu, Maaki'n Aseri irlim intirom tak a phun sikin rêngnu nina a pai pea; Aseri irlim kha Asa khan a tuka ilhlele hlekin Kidron tui kôla a hâlpai vinga.

¹⁷Ram sênga hmun irsâng pathian dang an ibiakna murdi chu rêng Asa'n pai zoi no khomsian a dam sêng chu, Rengpa vai an tûka.

¹⁸A pa Abija'n Pathian kuanga thilpêk murdi chu Asa'n tempila a siaa, ama ngêtin rângachak le tangkarua a inhlanhai khom a sia saa.

¹⁹Asa hin kum sômthum ringa roi a rêl sêng chu irdoina om nôk ta maka.

2 Thurchi Suina 16

Israelhai laia buaina

(1 Rng 15.17-22)

¹Judai rama Asa kum sômthum ringa an lal kumin, Israel rêng Baasa'n Juda rêng Asa ram ata tûte an hong thei loina hrangin le tûte an fe loina hrangin Rama khuua kul a sina.

²Asa'n Tempila sum kok ata tangkarua le rângachak a lâksuaka, Damaska khuua om Suria rêng Benhadada kuang a thona, a kuang,

³"Ka pa le ni pa an irsan ang khan, eini khom irkop ei ta, en ro, tangkarua le rângachak ki hong thona, Israel rêng Baasa leh nin rual irchang masan tan lân, ki ram ata a sipaihai khâipai sian," a tia.

⁴Benhadada'n Asa iti chu a sa a tia, a sipai hruaitu a koia, Israel ram chu a rûn tâka, Ijon hai, Dan hai, Abel-maim hai le Naftalia hai biala neinum omna khuua murdi chu a lâka.

⁵Kha thilhai kha rêng Baasa'n a inhriatin Rama khuua kul a isin chu a'rngamsan tâka.

⁶Rama kul sinna hrang lung le thinghai chu la hrangin Judai rama mi murdi chu Asa khan a pana, Geba le Mizpa kul sinna'n a hmanga.

Deipu Hanania



⁷Kha laia khan deipu Hanania chu rêng Asa kuang a hong, a kuang, “Pathian Rengpa iam loiin Suria rêng iampumin ni oma; khasikin, Israel rêng sipaihai chu nin suhai tâka.

⁸Ethiopia le Libua mihai khan sipai le sakor tâli tamtak le sakor chung chuang mi tamtak an inei mo ni ma? Rengpa chu ni tûnga nang a inhnêtir a ni kha.

⁹Rengpa'n ama iamzoi loihai chu changpui hrangin rammual pumpuia a mit a inlêngtir ngai a ni. Atûn ata chu doi hrang nei mai ta ni ti, inzakpuiom takin thil ni itho a ni hi,” a tia.

¹⁰Deipu chung a khan Asa chu a ning an mur pea, a kut thîr bânhril leh a khita, intângna ina a khuma, khatak ata chu mi dang chung a khom nghaltôk song a phut tâka.

Asa inlal mongna tiang thu

(1 Rng 15.23-24)

¹¹Asa inlal phut ata a mong dêna thurchi chu Juda le Israel rêng hai thurchi irziakna bua a chuang.

¹²Asa chu kum sômthum kuak an lal zoiin a ke a pân pea, an bân tâka, Rengpa pan loiin daktor a pana.

¹³Kum hni zoia chu a thia;

¹⁴Davida khopuia, a thân hranga a ichoina khan an phûma. An phûm mân mosola hai, sahriak mirimhoihai an pola, ama sûnpuina'n meipui an sêm ir-al tâka.

2 Thurchi Suina 17

Jehosafata rêngin a om

¹A pa Asa irthûlin Jehosafata chu rêng a changa, Israelhai doi thei hrangin ar sinsiama.

²Judai ram kul omna khuahaia sipai a siaa, Judai ram thingtânga sipai a siahaia.



³An lal phut laia a pa itho ang khan Jehosafata khomin a thoa, Baal biak nuam maka. Rengpa'n sat a vura.

⁴A pahai Pathian sin a zonga, Pathian thupêkhai a zôma, Israel rêng hai angin om maka.

⁵Rengpa'n Jehosafata chu Judai rama an lal indettira, mihaiin khâzana an hong pêk ngaia, a irchong ok tâka, mihaiin an irngaiirsâng tâka.

⁶Rengpa sintho chu a inuam lam tak a nia, an millim biakna hmun irsâng hai, Aseri irlimhai Judai ram ata an boipaia.

⁷Kum thum an lal zoiin Benhaila hai, Obadia hai, Zekaria hai, Nethanela hai, Mikaia hai, Judai ram khopuia irchutirtu a tîrsuaka.

⁸Levi irchia mi kuak le ochai inhni an fe saa, Levi irchihai chu Semaia hai, Nethania hai, Zebadia hai, Asahela hai, Semiramota hai, Jehonathana hai, Adonija hai, Tobija hai, Tobadonija hai an nia, ochaihai chu Elisama le Jehorama an ni.

⁹Rengpa dân lekhabu chu an chôia, Judai rama khuahai chu an irfangpuia, mihai an irchutirhaia.

Jehosafata roiinpuizia

¹⁰An omna ram sînga chu Jehosafata doi ngam loi hrangin Rengpa'n an dôptirhaia.

¹¹Filistia mi senkhathaiin khâzana tangkarua le thilpêk dang tamtak an hong pêk ngaia. Arab mi senkhathai khomin kêlbelra sângsari irzasari le kêl sângsari irzasari an hong pêk saa.

¹²Khanchu, Jehosafata chu a hon lal ual uala, Judai ram sînga a dung le a khangin kulhai a sina, khopuihai an dinga.

¹³Khahai hmuna khan fâk zât a hrê pehai oka. Jerusalem khuua sipai hruaitu lian mi hâitak takhai a siahaia.

¹⁴An irlo fe dân angin hruaitu a siahaia. Juda irchia sipai hruaitu tak chu Adna a ni, sipai nuai thum ar ôia.



¹⁵A hnuai renga chu Jehohanana a ni, sipai nuai hni le sîngriat ar ôia,

¹⁶inthumna chu Zikria nâipa Amasia a ni, sipai nuai hni ar ôia.

¹⁷Benjamina irchia sipai hruaitu tak chu sipai songinruk tak Eliada a ni, sipai nuai hni rôppho le thal chôi hai ar ôia.

¹⁸A hnung renga chu Jehozabada a ni, irdoi irsiamchak sipai nuai khat le sîngriat ar ôia.

¹⁹Jerusalema, hi sipai hai hi rêngin a isonghai a nia, hi khêla hin Judai rama kho kulhaia sipai a sia sa a ni.

2 Thurchi Suina 18

Deipu Mika'n Ahaba a ngo

(1 Rng 22.1-28)

¹Juda rêng Jehosafata chu ar chong ok tâka, ar hming an thang ok zoiin chu Israel rêng Ahaba leh irkop hrangin an tia, an nâi hai an irneitirhaia.

²Kum tamtak zoia chu Jehosafata chu Samari khuaa Ahaba hmu hrangin a suaka. Jehosafata le a rualhai lômna'n Ahaba'n kêlbelra le sehrât tamtak a thata, hruai an thea. Gilead biala Ramot khua doipui hrangin a koia.

³"Ramot khua doi hrangin ni fe nuam mo?," a tia. Jehosafata chu, "Ni fe nuam te tena kei le ki sipai hai fe an irsiam mai, nang san ki ti," a tia.

⁴"Rengpa irdon masa phot ro," a ti saa.

⁵Ahaba'n deipu irzaminli vêl chu, "Ramot khua ki idoi hrang le doi loi hrang?" tiin ar dona. Anni khan, "Doi ro, Pathianin nang ompui a ti," an tia.

⁶Jhosafata'n, "Deipu dang Rengpa nir don pe thei an iom loi ma ni?" a tia.

⁷Ahaba'n, "Inkhat, Imla nâipa Mikaia chu a la om, sin sa ite ni la zongpui thei ngai ma, ennuam ma ung, sin saloi i mani a ihrilsuak ngai kêng," a tia. Jehosafata'n, "Reng takin khaanga ti hrang chu ni ma duah," a tia.

⁸Reng khan hruaitu inkhat a koia, Mika hruai hrangin a tîra.

⁹Reng inhni chu Samari khopui lampui pên tiang hruizôla rêngtoihmuna khan an toia; deipuhaiin an hrilhaia, thu an hril kumhaia.



¹⁰An laia mi inkhat, Kenaana nâipa Zedekia'n thîr se'rki illim a sina, Ahaba kuang, "Surihai chu hi leh hin beihai ei ta, inhnêhai ei ti," a tia.

¹¹Deipu danghai khomin khaangin an tia. "Fe'n lân, Ramot khua chu doiin lân, man ngêti ni ti. Rengpa'n nan hnêpui a ti," an tia.

¹²Mikaia hruai hranga an tîrin chu a kuang, "Deipu dang murdi'n a sa tiin rêng kuang khan thu an hrila, nang khomin ang khan ti ro," a tia.

¹³Mikaia'n, "Rengpa mihring irhming sâmin ki hril, ki Pathianin hril hranga a ni inhril chu ti ki ti," tiin a sâma.

¹⁴Reng Ahaba makunga a va tungin chu, rêngin, "Mikaia, rêng Jehosafata leh Ramot khua kha doi hrang mo doi loi hrang mo?," a tia.

¹⁵Mikaia khan, "Hong doi ngân u ta, nin inhnê mo, Rengpa'n nangni inhnêtir a ti," a tia. Ahaba'n, "Rengpairhmingin ki kuang thu ni hrilin thudik vai nin hril ro, voi iza mo ki iti hrang?" a tia.

¹⁶ Mikaia'n, "Kêlbelra hrungtu nei loi angin Israel mihai chu tânga an indarh ki hmua. Hihai hin hruaitu nei mahai; mâni in lama, a chîn tete'n fe ri sehai, a ti e," a tia.

¹⁷Ahaba'n, Jehosafata kuang, "Irgai ro, keima hranga thil sa hrang ite hril ngai mah ti nang kin hril. Thil saloi inzen a hril ngai," a tia.

¹⁸Mikaia'n, "Rengpa thu hi le'rngai roh. Irvâna a rêngtoihmun Rengpa thu chu ki hmua, vântîrtônhaiin an irhîlhaia.

¹⁹Tu mo Ahaba kuanga fe hranga, Ramot doia thi hranga zu huang hrang? Rengpa'n a tia, vântîrtôn senkhatin chu thu an hrila, a danghaiin thu dang an hrila.

²⁰Irtha inkhat hi a zuanga, Rengpa makunga a va ngîra, 'La zu huang hi rong a ti,' a tia. Rengpa'n 'Itin mo ni zu ihrung hrang?' a tia.

²¹Irtha khan, 'Ahaba deipuhai minlak inthotir hrang,' a tia.

²²Khaang khan a ni, Rengpa'n hi deipuhai hi ni kuang minlak a inthotir. Rengpa'n ni siatna hrang a inkung a ni," a tia.



²³Deipu Zedekia'n Mikaia a va pana, "Itiklai khan mo Rengpa irtha'n a ni mâksana, ni kuang a iom tâk?," a tia.

²⁴Mikaia'n hiang hin a sâma, "Tentan sêngrîla irbîk hranga ni fe tika, inhria ni ti," a tia.

²⁵Ahaba'n hruaitu inkhat kuang, "Mikaia kha chelin lân, kho sêng hruaitu Amon kuang hruaiin lân, rêng nâipa Joasa khom irhmutir roh.

²⁶Dam takin ki hong kîr nôk mâka chu intângnaa khumin lân, bai le tui vai pe ri se," a tia.

²⁷Mikaia'n "Dam taka ni hong kîrin chu Rengpa'n a ni ichongpui loi ni a ti; ki iti hi mi tinin inhre ri sehai," a tia.

Ahaba thina thu

(1 Rng 22.29-35)

²⁸Reng Ahaba le rêng Jehosafata chu Gilead biala Ramot khua doi hrangin an fe tâka.

²⁹Ahaba chu Jehosafata kuang, "Ei irdoi tena irvô indanglam ki ta, nang chu rêng irvôna leh irvô mai ro," a tia. Reng Ahaba chu a tukrivo a thûla, irdoina khan a va kop sa tâka.

³⁰Suria rêngin tâli chalaitu hruaitu chu, "Israelhai rêng ti no chu tûte doihai no roi," a tia.

³¹Khahai kha Jehosafata'n a hmu'n chu Israel rêng mani a sôna, a hong bei tâka. Jehosafata chu a khêka, Rengpa Pathianin a sâma, a doituhai kha an hnotpaihai nôka.

³²Tâli chalaitu hruaituhai khan Israel rêng ni mah ti an inhriatin chu, irzûl ta mahaia.

³³Suria sipai thal kâpte hin mo rêng Ahaba chu râltukfam leh irvo a kârhai hin hong tok pal lik a ti, a tia. A tâli chalaitu kuang khan, "Sâbe ki tuang ta e, kîrin lân, irdoina hmun ata hi rot ta ro," a tia.

³⁴An irdoi lai taka hin Ahaba chu tâli chung a bâng, misa a tâkin chu a thi tâka.



2 Thurchi Suina 19

Deipu inkhatin Jehosafata a ngo

¹Jerusalema a omna ina Jehosafata chu dam takin a kîra.

²Deipu inkhat, Hanana nâipa, Jehua'n rêng kha a hmua, a kuang, "Mi sual changpuia Rengpa ihruaihai tianga kop hi a sa mo ni ti? ni sintho hin Rengpa ning an murtir pe ok a ni.

³Kha sînga khom khan satna viat chu ni nei; mihai ibiak Aseri irlim murdi inboia Pathian nuamlam ni izong hi," a tia.

Jehosafata'n roirêl dân a siam insa

⁴Jehosafata chu Jerusalema a oma, a takirtâi zapa; sim tiang Beerseba ata hmâr tiang Efraima tâng hekna tianga khuahai chu an irchihai Pathian Rengpa tiang a inkîrtirhai tumin a hrohaia.

⁵Judai rama kul nei khuahai murdi chu roirêltuin a siahaia, hiang hin a hril pehaia:

⁶"Roi hi rêlinsat pa pai no roi, nin sin hi mihriamhai irchama tho ni mak chêia, Rengpa irchama rêl nin nia, nin irêl chu Rengpa irêl a nih ti inhre roi.

⁷Rengpa kha chi unglân, irdîn takin itinrêng tho roi, Rengpa ei Pathian chu mi huanghai, theibîk neihai, thamna neihai hi a inuam loi a ni," a ti ngaia.

⁸Jerusalem khuaa khan Levi irchihai, ochaihai le kho sînga hruaitu ual senkhathai chu roirêltu'n a bêhaia. Rengpa dân insiatna hrang thuhai, khotâng dân a khua mihai ngaitua hrang an ni.

⁹Hiang hin a tia, "Rengpa chipumin ama sin nin itho hrang a ni; nin itho kai chu iamom takin tho unglân,

¹⁰khô khua ata khom nin irchi chanpuihai leh mihriam that hrangin mo, dân le thupêk insiatna thu mo an hon tungin chu, an thu ngaitua pumin an omdân hrang fel takin hrilhai roi; RENGPAA khan thilsual tho no chin ni.

¹¹Sakhua tiang thila ochai inlal tak Amaria thu inlal tak a ta, khotâng thila chu Judai ram optu inlal tak ni a ti. Levi irchihaiin hi roirêltu thu hi an izôm



hrang a ni. Hâitakin ama hi zômhai sian,Rengpa chu mi dikna tiang, a kop ngai,” tiin.

2 Thurchi Suina 20

Edom leh irdoina

¹Zoro hong sôt ual tena chu Moab le Amon-haiin an irkoppui Meun-hai le Jehosafata ram chu an hong doia;

²mi senkhat an hong, Jehosafata kuang, “Tuipui thi râl Edom ram ata sipai tam takin nang hong doi an ta, Hazazon Tamar khua chu an lâkpai ta,” a tia.

³Jehosafata chu a char a dong pe oka, thil tho dân hrang Rengpa ar dona. Ram pumpuiin bu nghei hrang a tia.

⁴Judai ram kho tin ataRengpa irdon hrangin Jerusalema mi an hong hluk tâka.

⁵Annihai le Jerusalema mihai chu tempil tual sin intharna khan an irbuka, rêng Jehosafata chu an makunga a va ngîra.

⁶Inring takin a chongchaia, “O Rengpa, kin irchibulhaiin Pathian sinthothei tak ni ni, tûte chelthung thei ni mak che.

⁷ Hi rama lei om ngaihai kha ni mi Israelhai makunga nin hnotsuakhaia, ni rualpa Abrahamama irchihai inei kumtuanga hrang ni ipêk mo ni ma? o kin Pathian!

⁸Hi rama hin an om tâka, nangma biakna hrang hmun Irthiang an sina.

⁹A ni hremna hrangin irdoina hai, hri hai, châm hai, thil saloi chi tinrêng hong tung khomsian, hi in mikot, nangma biakna hranga ni inkunga hin ngîr kin ta, ni san ni ti, an iti a ni.

¹⁰Irngai ro, atûn hin Amon mihai, Moab mihai le Edom mihaiin an ni doia, kin irchibulhai Aigupta rengata an hong suak khom khan an rama fe phalhai mak chea. Kin puhaiin an ram chu an irhuala, insiat thei mahai.

¹¹Irngai ro, ramchâra kin inei ta hranga ni ni ipêk ram rengata nin hnotsuak tumin an hong irthok tâk a ni!



¹²O kin Pathian an chung a roi hong rêlin lân; a ni doi hrang sipaihai hi an tama, ite châng thei ma ung. A thôna lam zel inhre ta ma ung, ni makunga kin hong intung phot a ni hi,” an tia.

¹³Judai rama mi murdi chu an dôngma le an nâihai leh tempil mikota an ngîra.

¹⁴Khataka om sa Levi irchia mi inkhat, Zekaria nâipa Jahaziela chung a Rengpairtha a zuang tunga. Ama chu Asafa pâla mi a ni, Zekaria hi Benaia nâi a nia, Benaia hi Jeiela nâi a ni, a pu chu Matana a ni.

¹⁵Jahaziela'n, “Judai rama mi murdi le Jerusalema omhai le nang Jehosafata, Rengpa'n hiang hin a ti, sipai an tam hrai sikin chi no'n lân, ngîk viat no ro. Irdoina chu ki kuta om a ni, nin kuta om ni ma.

¹⁶Nangtûk chu Zif irkâna an hongin lei doihai unglân, phâizôl tung mân Jezruel kôl, ram irhelna laia lei inruanghai roi.

¹⁷Hi irdoina hin nin idoihai nang no ni, nin omna hranga khan lei inruanghai phot roi. Rengpa'n nangni inhnêtir a ti. Judai ram le Jerusalema mihaio, chi no roi, ngîkhai viat no roi, doi hrangin irthoksuak roi, Rengpa chu nangni tiang kop a ti,” a tia.

¹⁸Reng Jehosafata chu a hmâi kûnin irnêng a sika, mipuihai khom an kûna, Rengpa chubai an mûka.

¹⁹Levia irchi, Kohata le Kora pâlhai chu an ngîra, Israelhai Pathian Rengpa chu inpâkin inring takin hla an saka.

²⁰Zînga chu mihaiin Tekoa khua kôl ram irchêpna tiang an pan hrang a nia, an suak hranga khan Jehosafata'n an kuang, “Juda le Jerusalem ruathartehaio, Rengpa nin Pathian chu song unglân, ngîrsuak thei nin ti. A deipu thuhiril kha iam unglân, hlochuk nin ti,” a tia.

²¹Rengin mihai kha a chongpuihaia, Levi irchia zaipôl sakhai chu hun ser bîka inngâk hrang tukfamhai irbelin sipaihai mahruai hrangin an tia; Rengpa chu inpâk roi, “A khonzâna chu kumtuangin a om hrang sikin,” ti hla an saka.



²²Khaanga hla an sak laiin a doitu sipaihai an tei phuata,

²³Amon-hai le Moabhain an doihai, an that phiarhaia, a sate'n an irdoi tâka.

²⁴Judai rama sipaihaiin ramchâra in irsâng an va dêna, an râlhai an thîrhaia. An rêngin hnuaichanga an inrîl dûla, an lei thi vinga, inkhat lua an tânsuak om mahai.

²⁵Jehosafata le a rualhai chu râllâk sum la hrangin an fea. Kha laia khan sehrât tamtak an om saa, fâk hranghai, tukfamhai, le thilhlu tamtak an hmu sa. Râllâk sum lâk hrang tamtak a nia, sîn thum sîng chu an ilâk mai a nia, an ipêl zoi loi rakin an ilâk a ni.

²⁶A sîn minli nî chu, Baraka irhôra an irchuna, anni hranga a sinthohai sikin Rengpa chu an inpâka. Khasikin kha hmun kha Beraka, an iti tâk a ni.

²⁷Rengpa'n an râlhai an hnêtirhai tâk sikin Jehosafata le a rualhai chu lôm takin Jerusalema an fe tâka.

²⁸Khua an tung tôn chu, perkhuanghai, têngrephai le bekulhai tum pumin tempil an pana.

²⁹Israelhai râl, Rengpa an Pathianin a isoisak dân chu an kôlvêla namhaiin an inhriatin chu, Pathian kha an chia.

³⁰Jehosafata chu râl boiin an lala, Rengpa'n kil tin le hmun tina a vêng mai sikin.

Jehosafata zoro hek tiang pang

(1 Rng 22.41-50)

³¹Jehosafata chu kum sômthum hleikhata khan Judai rama rêng a changa, Jerusalema kum sômhni ringa an lala. A nu chu Azubai, Silhia nâinu a ni.

³²A pa Asa ang khan Rengpa makunga sin sa a thoa.

³³Nam dang pathian biakna, hmun irsânghai insiat zoi maka, mipuihai khomin an irchibulhai Pathian biak uar ok ta mahai.

³⁴Jehosafata sintho murdi, rêng a chang phut ata a thi ni dêna thuhai chu Hanania nâipa, Jehua thurchi ti irziakna lekhabua a irziak a ni. Israelhai rêng thurchi ti irziakna lekhabua a om.



³⁵Voikhat chu Judai rama rêng Jehosafata'n Israel rêng Ahazia, thil dikloi tho ngaitu leh rual an irchanga.

³⁶Ezion-Geberah Tarsis khuua fe hrangin irkuanga an kâia.

³⁷Maresa kho mi, Dodavahua nâipa Eliezera'n Jehosafata kuang, "Israel rêng Ahazia-hai leh nin irrualpuihai sikin, Rengpa'n ni sintho insiat a ti," a tia. An irkuanghai a koi pehaia, Tarsis khuua fe thei zât zel om ta maka.

2 Thurchi Suina 21

¹Jehosafata chu a thia, Davida khopuia an phûma, a nâipa Jehorama chu ama irthûlin an lala.

Judai rama rêng Jehorama

(2 Rng 8.17-24)

²Judai rama rêng Jehosafata nâipa Jehorama'n nâi kiruk, Azaria hai, Jehiela hai, Zekaria hai, Azariahua hai, Mikaela hai, Sefatia hai a neihaia.

³An pa'n rângachakhai le irchonhlu tamtak a pêkhai vinga, Judai ram khopui kul nei, enkoltu hrang an kung pehai vinga. Jehorama chu a nâi ulian tak a ni sikin Jehosafata'n an laltira.

⁴Jehorama chu a hon lal indeta, a sanghai chu an thattirhaia. Israelhai laia hruaitu senkhat khom an thattirhai sa.

⁵Kum sômthum hleihni a ni kumin Jehorama chu rêng a changa, Jerusalema kum riat an lala,

⁶Israel rêng Ahaba le rêng dang sual ta takhai angin an oma, Ahaba nâinu khom dôngma'n a neia. Rengpa chung a thilsual a thoa;

⁷khannisian, Rengpa'n Davida kuanga a thuthungna le ar chihai chu inlaltirhai mai a tum tâk sikin, Davida irchihai inboi chu nuam maka.

⁸Jehorama inlal laiin Judahai ata Edom-hai tehel an zonga, rêng a bingin an neia.

⁹Jehorama le a rualhai chu sakor tâli leh Edom-hai chu an va rûnhaia, Edom sipaihaiin an le'rhualhaia; khannisian zân inthim laia an la pût thei hrâm sikin,



¹⁰khatak ata chu Edom-haiin Judahai hnuaia om loiin atûn ten hin rêng dang an inei mai a ni ta. Jehorama'n, Rengpa, a'rchibulhai Pathian chu a uksak no sikin, kha lai zoro vêl khan Libna khuahai an irhel pe nôka.

¹¹Judai ram tâng rama pathian dang biakna hmun irsâng a sinhai hluka. Judai ram le Jerusalem mihai chuRengpa ata tehel zonga, thilsual tho hrangin a kaihruaihaia.

¹²Deipu Elija'n lekha a thona, "Ni'rchibul Davida Pathian, Rengpa'n ni pa Jehosafata le ni pu Judahai rêng Asa hai omdân ang khan ni om no sikin theiloi ni ichang a ni.

¹³Israel rêng hai omdân angin ni om tâk sikin, Ahaba'n Israel mihai pathian dang hai kuang a uirepui ang khan nang khomin Judai rama mi le Jerusalema mihai chu ni uirepuia. Nangma nêka sa, ni sang hai lak ni thatpaihaia.

¹⁴Khasikin, Rengpa'n ni mihai, ni nâihai, ni dôngmahai hripuiin hremhai a ta, ni inei murdi nan siattir pe a ti.

¹⁵Nang khom, ni sâng nang innatir pe a ta, a nitin nang na pe mai a ti," tiin.

¹⁶Filistia mi le Arab mi senkhat, tuipei kôla Ethiopia mi lei omhai kôla an oma.Rengpa'n khahai kha Jehorama doi hrangin an phûthaia.

¹⁷Judai ram chu an hong rûna, rêng inhai an inmoka, rêng dôngmahai le an nâipasalhai chu suaka an chelhai vinga, a nâi mitum Ahazia chu chel mahai.

¹⁸Kha irzoiin chu Rengpa'nrêng phîng sâng kha an natir pe nôka,

¹⁹kum hni sâng chu a na pe mai tâka, a rîl a hmon pea, a satea natna tuangin a thi tâka. A puhai thia an itho ngai angin a mihaiin ama súnna hrangin meipui sêm inchok ta mahai.

²⁰Jehorama chu kum sômthum hleihni a niin an lal irphuta, Jerusalema kum riat an lala, a thi hi tûte'n a poi ti om mahai, Davida khopuia khan an phûma, rêng hai tâna chu phûm mahai.

2 Thurchi Suina 22

Juda reng Ahazia
(2 Rng 8.25-29; 9.21-28)



- ¹Arab mi senkhathaiin Jehorama chu an doia, a nâi mitum Ahazia ti no chu a nâi danghai chu an that pe vinga. Jerusalema mihaiin a pa irthûl hrangin Ahazia chu rêng an inchangtira.
- ²Ahazia chu kum sômhni inhni a ni le an lal irphuta, Jerusalem-a kum khat an lala. A nu chu Athali, Israel rêng Ahaba nâinu, Omria tunu a ni.
- ³Ama khom Ahaba in mihai omdân angin a oma, a nu thu a zôm ngaia.
- ⁴Rengpa mithmua thilsual a tho ngaia, a pa thi zoiin Ahaba in sûng mihai laia senkhat chu a thu lâkna tak an ni tâka, a isiatpui tâk a ni.
- ⁵An thu irdon angin Suria rêng Hazaela doi hrangin Israel rêng Jorama rual ar changpuia, Gilead biala Ramot khua an doia, an irdoina rêng Jorama chu sâbe a neia.
- ⁶Jezreel-a om hrangin a fea, Juda rêng Jehorama nâipa Ahazia an va hroa.
- ⁷Jorama a va hro chu Pathianin Ahazia siatna hranga a inkung a ni. An omsuam laiin mi inkhat Nimsia nâipa Jehua a hongha, ama hi Ahaba inkamangtir hranga Rengpa mi tîr a ni.
- ⁸Jehua chu Ahaba irchihai chungha kut a thâk laiin Jorama dam loi en hrangin Ahazia hai Juda hruaituhai le Ahazia urênghai chu Jehua'n a hmua, a thatpaihai sa tâka.
- ⁹Ahazia kha an zonga, Samari khuaa a le'rbîka, Jehua kuang an hruaia, a lei thatpaia. A pu Jehosafata'n theidôr insua'n Rengpa iamtu chu an inzâna sikin a ruak chu satakin an phûma. Ahazia in sîngkua mi laia tûte an lal hrang om ta mahai.

Juda rêngnu Athali

(2 Rng 11.1-3)

- ¹⁰A nu Athali'n Ahazia thi an hriatin chu, Juda rêng in mihai an thattirhaia.
- ¹¹Ahazia khan farnu Jehosebi a neia, a ochai Jehoiada chu pasalin a neia. Ahazia nâipasal inkhat, Joasa chu inrûkin an ruanga, rêng nâi dang thi hranghai ata a lâksuaka, tempila zâlna tentan inkhata a thupa, a om tâka. A thup khak sikin Athali'n that thei maka.



¹²Kum ruk sâng a thupa, Athali chu rêng a chang tâka.

2 Thurchi Suina 23

Rengnu Athali chungu tehelna thu

(2 Rng 11.4-16)

¹A kum sarina khan chu ochai Jehoiada le sipai irza hruaitu ringahai chu an irhlet irhlôma. Kha mihai kha Jehorama nâipa Azaria hai, Jehohanana nâipa Ismaela hai, Obeda nâipa Azaria hai, Adaia nâipa Maaseia hai, Zikria nâipa Elisafata hai an ni.

²Judai ram an irfangsuaka, Levi irchihai le nam dang hruaituhai chu Jerusalema an hruai bukhaia.

³Tempila khan an irbuka, Joasa, rêng nâipa leh khan chong an irkhâma. Jehoiada khan an kuang, “Rengpa khan Davida irchihai chu rêng hrangin an kunga, hi rêng a lei thi tâk nâipa hi rêng chang hrang chu a ni.

⁴Hiang hin thil tho ei ti, Sabat nia ochai le Levi irchihai sintho hrangin an hong tena, hmun thuma semin hmunkhat chu tempil mikothai hrung an ti.

⁵Hmun thuma hmun khathaiin chu rêng in hrung an ti, a danghai chu ‘Lung phûm’ mikot kôla om an ti. Mipuihai chu tempil tuala an iom hrang a ni.

⁶Tempil sângu chu ochai le Levi irchi sintho lai tak ti no chu, tûte an ilût hrang ni mah. Anni chu serindang an ni sikin, lût thei an ti; mi danghai chu Rengpa thu zômin an ilût hrang ni ma.

⁷Levi irchihai chu rêng hi irhual khak an ta, khandai phôi sai chôiin an ihrung hrang a ni, rêng fena hmun tina an izui hrang a ni. Tempil sângu lût tumtuhai chu an ithathai hrang a ni,” a tia.

⁸Levi irchihai le Judai rama mihaiin Jehoiada ihril angin an thoa. Sabat nia irngam hranghai chu an chela.

⁹Davida’n tempila a siaa, ufei le phohai chu Jehoiada’n a sema.

¹⁰Tempil mikota khandai phôi sai chôiin ar tângtirhaia, rêng kha an hrungtirhai khapa.



¹¹Jehoiada'n Joasa kha a hruaisuaka, rêng tho hrang dân bu kha a pêka, rêngin an siam tâka, ochai Jehoiada le a rualhaiin Joasa chu sahriak an pola, "Reng hi dam sôt ri se," tiin an khêka.

¹²Athali'n rêng an chôindôm ti an hriatin chu, mipui irbukna tempil tiang a fea.

¹³Reng thar chu rêng ngîrna hranga an indang, tempil sùng lûtna kôl bang kôla ngîr kha a hong hmua, sipai hruaituhai le bekul irputhaiin an irhuala. Mipuihai chu raifân takin an khêk dur dura, bekul an tuma, tempila zaipôlhain an thil tum irhâi leh hla an hruaia. Annihai kha a hong hmuin chu ningmurin a puan an pot thêra, "Nin ni ihuang a ni," tiin a khêka.

¹⁴Jehoiada'n tempil vêla that nuam maka, sipai hruaituhai kha a koia, "A hrung hrangin sipai irtâng unglân, a lei inruang nin hmu'n chu thatpai roi," a tia.

¹⁵Athali chu an chela, rêng in tiang an hruaia, sakor mikot an itina kôla khan an thata.

Jehoiada'n Pathian biak dân a siam insa

(2 Rng 11.17-20)

¹⁶Rengpa mi ni hrangin ochai Jehoiada'n rêng Joasa le mipui chu thu a thungpuia.

¹⁷Baal an ibiakna hmuna khan an rêngin an fea, an insiata. Maichâm kha an insima, millimhai kha an irfûi inkhoia, Baal ochai Matana chu maichâm kôla an thata.

¹⁸Jehoiada chu ochaihai le Levi irchihai chu tempila an sintho hrang, an inthotirhaia, rêng Davida iti angin an tho hrang an semhaia, Mosia dân bua irziak angin Rengpa kuang hâlrivôm thilinhlanhai an inhlana. Irhâihoi tumhai, hla sakhai le hla hruaituhai khomin an itho hrang a ni.

¹⁹Jehoiada'n chu tempil mikothai an hrungtirhaia, mi porinche tûte inlûttir phal hrang ni ma.



²⁰Sipai hruaituhai, ram hruaituhai le mipuihaiin Jehoiada pâlin lampuia an irkôia, rêng chu tempil ata rêng ina an hruaia, mikotpuia an lûtpuia, rêngtoihmuna khan rêng chu a toia.

²¹Mi murdi'n an rai a fâna: Athali chu an tuk that tâk sikin kho sînga khan buaina om ta mah.

2 Thurchi Suina 24

Juda rêng Joasa

(2 Rng 12.1-16)

¹Joasa chu kum sari mi a niin Judai rama rêng a changa, Jerusalema kum sômminli an lala, a nu chu Zibi, Beerseba khuaa mi a ni.

²Ochai Jehoiada dam sîng chu Joasa'n Rengpa nuamlam a tho ngaia.

³Jehoiada'n rêng Joasa chu dôngma inhni an neitira, nâinupang le pasal a neipui oka.

⁴A hong inlal ual tena chu tempil irvo insatir a tuma.

⁵Ochai le Levi irchihai chu Judai ram khopui ar fangtirhaia, a kum tina tempil irvotirna ruk hrang dôr tholôm ar fuangtirhaia. Irhnot hrangin a tia, khannisian Levi irchihai chu an ir-ial pe oka.

⁶Khanchu Jehoiada a koia, "Levi irchihai hin Judai ram le Jerusalem mihai kuang ata, 'Irtongna in,' enkolna hrang Rengpa siahlo Mosia chu an irfuang indik le dik loi itina mo ni ienpui loi?,"; a tia.

⁷(Mi sualnu Athali zuituhai kha tempila an lût khumhaia, thil irthiang tamtak Baal biakna makunga an ilâksuak a ni.)

⁸Rengin Levi irchihai chu tholôm kok sina, tempil lûtna mikot bula sia hrangin a tia.

⁹Jerusalem le Judai ram murdia Pathian siahlo Mosia'n ramchâra mipui tho hrang a indang pehai ang khan hong chôî mai hrangin he a bêhaia.

¹⁰Mipuihai le a hruaituhaiin lôm takin tho hrang bituk zât chu an hong chôia, bôm kha an thâk inbit tâka.



¹¹Levi irchihaiin bôm chu a ni tin, a enkol hrangin rêngin a indang pehai kuang an lâk ngaia, bôm kha a bitin chu ochai ulian tak Jehoiada irthûlpuitu le rêng mi indang irziaktu khan an lei lâksuaka, bôm chu a siana khan an sia nôk ngai. Tangka tam tôktak an thosuak tâka.

¹²Reng le Jehoiada khan tempil irvo insatirna sin enkoltuhai kuang poisa kha an pêkhai ngaia, anni'n lungtuk mihai, thing sin theihai, thîrsuk theihai, tempil irvo insatir hrangin an hmanghaia.

¹³Inhnê takin mistirihaiin an sina, tempil chu a phuta angin an irvo insa'n an indettira.

¹⁴Sintho hrang an tho zoiin chu rângachak le tangkarua an ihmang ban chu ochai inthang tak Jehoiada an pêka; ama'n tempila hmang hrang tâbor le bêlbûr dang a sina.

Jehoiada ithotum an sutpai

Jehoiada dam sêng chu a nitin tempila thil an inhlan ngaia.

¹⁵Tar kûnin a dama, kum irzakhat sômthum a dênin a thi tâka.

¹⁶Israel mihai kuang Pathian ta hrang le tempil ta hrangin sin a tho insa sikin, Davida khopuia rênghai thâna an phûma.

¹⁷Jehoiada a thi zoiin chu Judai rama mipui hruaituhaiin an thu irngai ual hrangin rêng kha an inthêma.

¹⁸Mipuihaiin an irchibulhai Pathian Rengpa chu tempila biak nuam ta mahaia, millim hai, pathiannu Aseri irlimhai an biak tâka. An سوالنا sikin Judai rama mihai le Jerusalema mihai chungu Rengpa ning an mur pea.

¹⁹Rengpa'n anni chu hruai kîr hrangin deipuhai a tîra; khannisian mihaiin an thu irngai pe mahaia.

²⁰Ochai inlal tak Jehoiada nâipa Zekaria kuang Pathian irtha a zuang tunga, mipuihai hmu theina hranga khan a ngîra, inring takin a khêka, "Rengpa Pathianin hiang hin a ti, itina mo ki thupêkhai zôm nuam loiin nin chungu siatna nin intungtir hrang? ama nin mâksana, ama khomin nangni masan a ti," a tia.



²¹Zekaria kha an thuphana khan, rêng thuin tempil tuala khan an dêng thatpai tâka.

²²Rengin Zekaria pa Jehoiada, ama ta hranga a kâmnang kha a'rngilpaia, Zekaria chu an thattirhaia. Zekaria thi hrangin chu, “Ni sintho hiRengpa'n hmu sianlân, phuba la ri se,” a tia.

Joasa rêng zoro hnungkhôn

²³Kum a hong tharin chu, Suria sipaihaiin Judai ram le Jerusalem chu an hong doia, hruaitu tamtak an thata, râlâk sum tamtak Damaska khuaa an chôia.

²⁴Suria sipaihai chu an huanghai nâkin, anni nêka tam ual Juda sipaihai chu an inhnê a ni. An irchibulhai Pathian Rengpa chu an mâksan sikin an ihrât loi a ni. Reng Joasa'n a ituang a ni tâk a ni.

²⁵Joasa'n sâbe lian tak a tuanga, râlhai an chîn zoiin chu a rualhai inhni an irruala, ochai inlaltak Jehoiada nâipasalhai a ithat, phuba chu an lâka, zâlmuna zâl kha an thata, rêng thâna ni loi, Davida khopuia an phûm tâka.

²⁶(Irruala thattuhai kha Amon mi Simeata nâipa Zabada le Moab mi Simriti nâipa Jehozabada hai an ni.)

²⁷Renghai lekhabu hrilfiana bua Joasa thurchihai, a chungchânga deipu thu leihirilna hai, tempil irvo insatir thuhai a chuang. A nâipa Amazia chu ama irthûlin an lal tâka.

2 Thurchi Suina 26

Juda reng Uzia

(2 Rng 14.21-22; 15.1-7)

¹Judai rama mi murdihaiin kum sômhleiruka ulian Amazia nâipa Uzia chu a pa irthûla rêng hrangin an inthanga.

²(Amazia thi zoiin Uzia hin Elat khua a lâk nôka, Judai ram inding nôktu kha)

³Uzia chu kum sômhleiruk a niin an lal irphuta, Jerusalema kum sômringa kum hni an lala. A nu chu Jerusalema mi Jekoli a ni.



- ⁴Amazia angin Rengpa nuamlam a thoa,
- ⁵Pathian thu tianga kaihruaitu Zekaria dam sâng chu Rengpa thu a poma, Pathianin a irhniangtira.
- ⁶Uzia chu Filistia mihai a rûna, Gath khua kul banghai an siata; Askelon kôla le Filistia ram hmun da danga kul a sina.
- ⁷Pathianin Filistia mihai, Gurbala om Arab-hai le Meun-hai chu an hnêpuia,
- ⁸Amon-hai khomin, Uzia kuang, khâzana an chôia; roiinpuiin Aigupta ram dênin ar hming an thang tâka.
- ⁹Jerusalem kul bang chu a sinsiam inthara, bangkil mikot an itihai, Irhôr mikot an itihai, kul kôina taka inkhârhaia in irsâng a sina.
- ¹⁰Khan, kholaiia khom kul nei khua an dinga; tuipang a choi saa; nitâk tianga omhai, tâng sîphaia sehrât a vâi intam hluka, loi inmân tiang ar hnik oka, tâng rama khom grep an phuntirhaia, phâiram sahai khan thôl an thotirhaia.
- ¹¹Sipai tamtak, irdoi thei zât a neia. An thurchi irziakna chu ziaktu Jeiela le Maaseia, rêng milian Hanania haiin an vonga.
- ¹²Hruaitu sânggni irzarukin a sipaihai an hruaia.
- ¹³Reng tianga kop, râlhai doi thei zât, mi nuai thum sângsari le irzaringa a nei.
- ¹⁴Uzia'n chu a sipaihai phohai, ufeihai, thîrlukhumhai, thîr songkolhai, thalhai, sâilungdênga hrang lung inhlûm a pêk saa.
- ¹⁵Jerusalema khan a mi kut theithiamhai isin thal kâpna khôlhai, lung lianpapai hlôn theina khôlhai, in irsânghai le kul kalnahai a buna, a'rhming khom an thang pe ok tâka. Pathianin a changpui sikin khaang taka roiinpui a ni.

A'rsongna sikin Uzia'n hremna a tong

- ¹⁶Reng Uzia chu a roiinpui ok zoiin chu, a'rsong pehaia, a isiatpuina chu a ni. A Pathian Rengpa thu poi ti loiin mirimhoi hâlna dokânga mirimhoi hâl hrangin tempila a lûta.



¹⁷Ochai inlaltak Azaria le ochai hâitak takin

¹⁸ khap tumin an zuia, “Uzia Rengpa kuang mirimhoi ni ihâl hi irthiang ma. Arona irchia ochaihai vaiin kêng, hi sin tho hranga ser indang chu an ni. Hi hmun Irthiang hi suaksan roh. Rengpa Pathian ning nin murtira, nangma tiang kop ta ma,” an tia.

¹⁹Uzia chu tempil sũaga mirimhoi hâlna dokâng kôla khan a ngîra, mirimhoi hâlna bûr a chôia, ochaihai chungga khan a ning an mur pea; khannisian an makunga ngêt, Rengpa in sũaga mirimhoi hâlna dokâng kôla khan a michala pânsiain a kêi thuta.

²⁰Azaria le ochaihaiin rêng michal an ena niin chu, an inlâi raka, tempil sũaga ata kha an inhnotsuaka. Rengpa khan a hrem tâk sikin irhnot takin a suak tâka.

²¹A natna sikin rêng Uzia chu a dam sũagin a porinche tâka, tempila lût a’rthiang ta no sikin, ama ina a om chian tâka, a sin tho thei ta maka, a nâipa Jothama’n ram chu a op tâka.

²²Khan, Uzia inlal sũaga a sintho murdi chu deipu Isaia’n a’rziaka.

²³ Uzia chu a thia, rêng hai thânmuala an phũa, pân irvei a ni sikin rêng hai thâna se nuam mahaia. A nâipa Jothama chu ama irthûlin an lal tâka.

2 Thurchi Suina 27

Judai rama rêng Jothama

(2 Rng 15.32-38)

¹Jothama chu kum sômhni ringa mi a niin an lal irphuta, Jerusalema kum sômhleiruk an lala. A nu chu Zadoka nâinu Jerusaii a ni.

²A pa angin Rengpanuamlam a thoa; a pa’n tempil chungga mirimhoi a ihâl angin chu tho maka. Mipuihai rêk chu an sual balamin an la sual maia.

³Tempil hmâr tianga lampui hi Jothama isin a ni, kho kulbang khom a siam insa intama, ‘Ofel’ an itihna len vâng chu a sate’n a sinsiam a ni.

⁴Judai ram sũaga khuahai a sina, rampuia kulhai le râl hrungnahai a sinhai hluka.



⁵Khan, Amona irchihai rêng a doia; an hnê tâka. Khan, Amona irchihai khan kha kuma khan tangkarua her sângthum irzaminli le gohu phur sîngkhat le barli phur sîngkhat an pêka. Khaang dênin Amona irchihai khan a kum hnina le a kum thumnaa khom an pêka.

⁶Khanchu Jothama khan Rengpa a Pathian makunga a lampui a rêl infel sikin a sân a hong ihrât tâk a ni.

⁷Jothama rêng a chang laia thil tunghai thurchi, an irdoina thuhai le a thil rêl dânhai, Israel le Judahai thurchi irziakna bua a chuang ving a ni.

⁸Jothama chu kum sômhni ringa a niin an lal irphuta, Jerusalema kum sômhleiruk an lala.

⁹A thia, Davida khopuia an phûma, a nâipa Ahaza chu ama irthûlin an lal tâka.

2 Thurchi Suina 28

Juda rêng Ahaza

(2 Rng 16.1-4)

¹Ahaza chu kum sômhni a niin an lal irphuta, Jerusalema kum sômhleiruk an lala. A pu Davida tho dân ang zôm nuam loiin Rengpa indit loi lam a thoa.

²Israel rêng hai tho dân a lâka, Baal irlim an sintirhaia.

³Hinom irhôra mirimhoi a hâla, Israel mihai makunga Rengpa inhnotsuakhai nam dang tho dân intirom tak takhai chu a thoa, a nâipasalhai ngêt khom millimhai makunga hâlrivôm thilinhlan hrangin a thata.

⁴Tânga nam dang pathian biakna hmun irsânghai, thing dâihlim satak hnuai hai, Ahaza chu ar bôl ngaia, mirimhoihai a hâl ngaia.

Suria leh Israelhai irdoina

(2 Rng 16.5)

⁵Ahaza'n thilsual a tho sikin, Suria rêng kuta Pathian Rengpa'n a pêka; Damaska khuaa Juda mi tamtak Suria rêngin a hruaia.

⁶Israel rêng Remalia nâipa Pekahia khomin Ahazia chu a doia, an hnêa. Juda sipaihai satak tak mi nuai khat le sîng hni a thata. Judai rama mihai chu an



irchibulhai Pathian Rengpa chu an mâksan sikin Rengpa'n kha thilhai kha an chung a intungtir a ni.

⁷Israel sipai Efraima pasal sa Zikria'n Ahaza nâipa Maaseia chu a thata. Reng in enkoltu Azrikama a that saa; rêng hnuai mi Elkana khom a thata.

⁸Judahai chu a urênghai an ni nâkin, Israel sipaihai chu nupang le nâipang nuai hni suaka an chelhaia. Samari khuaa an kalkhumhaia, râlâk sum tamtak an chôï pehaia.

Deipu Obeda

⁹Samari khuaa khan Rengpa deipu inkhat Obeda a oma, Israel sipai rualin Judai ram ata an suaka, an ichelhai le Samari khuaa lût hrang kha a lei hmuaia, an kuang, “Nin irchibulhai Pathian Rengpa chu Judahai chung a ninginmura, nangni a inhnêtir tâk a ni; khannisian nin thata, an chung a nin nunsiatzia a ihmu mai a ni.

¹⁰Jerusalem le Judai rama om pasal le nupang suaka inomtirhai nin itum mai a ni hi. Nangni khomin Rengpa, nin Pathian ata thilsual nin tho ti hi nin la inhriat loi ma ni?

¹¹ki thu hi irngai hi roi, hi sala nin ichelhai hi nin urênghai, nin farnuhai kêng an ini, insuapaihai roi, khano'nchu, Rengpa ninginmur a ta, nangni soisak a ti,” a tia.

¹²Hmâr tianga rêng hruaitu lian minli, Jehohanana nâipa Azaria hai, Mesilemota nâipa Berekia hai, Saluma nâipa Zehiskia hai, Hadlaia nâipa Amasa hai khomin sipaihai sintho chu a sa ti mahaia.

¹³An kuang, “Nin sala nin ichelhai hi, hin hong hruaihai no roi, Rengpa ata thilsual kin tho tâk sikin a ni hrem nuamlam takin, a ning kin inmurtir a ni. Kin thilsual lei tho tâkhai khêla ni la bôk pe nin inuam ma ni?” an tia.

¹⁴Khanchu, sipaihaiin sala an ichel le râlâk sum an hong ichôi chu mipui le an hruaituhai kuta an inhlan tâka.

¹⁵Mi minlihai hi an râlâk sum ata sala an ichelhai kuang sil le kai pehai hrangin an tia, silkai hai, kekok bun hranghai an pêka, an sâbe pol hrangin



oliv hriak an semhaia. Mâni kea fe thei loi raka irzanghai chu sakuartung chung a an inchuangtirhaia; sala an ichelhai murdi chu Judai ram Jeriko-a an hruai kêrhai vinga. Khan, Israelhai chu Samari tiang an fe tâka.

Ahaza'n Assuria changpuina a zong

(2 Rng 16.7-9)

16Kha laia khan rêng Ahaza chu ama changpui hrangin Assuria rêng hai a koia.

17Edom-haiin Judai ram an hong doia, an inhnêa, mi tamtak an chelhai a ni.

18Filistia-hai lakin nitâk tianga tâng mongna phâi khuahai le Judai ram Negeb-hai an hong doi nôka. Anni len vâng chu Beth-Semes hai, Aijalon hai, Gederot hai, Soko le a kôlvêla khuahai, Timna le a kôlvêla khuahai Gimzo le a kôlvêla khuahai an lâka, an lua pehaia.

19Juda rêng Ahaza chu a mi hai satna hrang ngaitua viat loiin, Rengpa chu ite bêa bê loiin Judahai an doktirhai a ni.

20Assuria rêng Tiglat-Pilesera chu Ahaza chu va san nêkin intakna an tungtir pea.

21Ahaza chu tempila rângachak hai, rêng ina mi hai le mi irchong ualhai ina mi hai a lâkhaia, Assuria rêng chu a pêka, khannisian a'rfêna om maka.

Ahaza sualzia

22A sân a charindong lai tak khomin Ahaza chu Rengpa ata a soal uala.

23Ama inhnêtu Suriahai pathianhai chu chubai a mûkhaia, Suria pathianhai hin Suria rêng an changpuia, khasikin an kuang thilinhlan hrangin ni changpui ngêt a ti, iti a ni. Kha kha a mi hai leh an isiatpui nôkna chu a ni.

24Khakhêla tempila hmangrua a lâksuaka, an siata, tempil chu a khâra; Jerusalem khuaa maichâm a sinhai hluka;

25Judai ram khopuia le kho sînga hai nam dang pathian biakna hmun irsâng, mirimhoi hâlna hrang a sin pher phura. Hiang hin ar chibulhai Pathian Rengpa chu a ning a inmurtir a ni.



²⁶A roirêl sînga a thurchi danghai chu a phut ata a mong dênin, Juda le Israel rêng hai thurchi irziakna bua a chuang.

²⁷Ahaza chu a thia, rêng hai thâna ni loiin Jerusalema an phûma, a nâipa Hezekia chu ama irthûlin an lal tâka.

2 Thurchi Suina 29

Juda rêng Hezekia

(2 Rng 18.1-3)

¹Hezekia chu kum sômhni ringa a niin Judai rama rêng a chang irphuta, Jerusalema kum sômhni kuak an lala. A nu chu Zekaria nâinu Abija a ni.

²A pu Davida'n Rengpa nuamlam a itho ngai angin ama khomin a thoa.

Tempil thâr irthiangtirna

³An lal phut kum, tha maton taka, Hezekia chu tempil inkhârhai chu an honghaia, a siathai chu an sintirhaia.

⁴Tempil nisua tianga tuala khan ochaihai le Levi irchihai a koibukhaia.

⁵An kuang, "Nangni Levi irchihaio, irthiang infâi unglân, nin pahai Pathian Rengpa in hi irthiang infâtir roi; tempil ata hi thil porinche murdi paisuak ving roi.

⁶Kin pahai chu Rengpa kin Pathian ata iamom loiin, a inuam loi lamtak an thoa. Tehel an zong pea, a omna in chu mâksanin an hnôla.

⁷Tempil mikot chu an kala, meiser an thata, mirimhoi hâl mahaia, hmun Irthianga Israelhai Pathian ta hrang hâlrivôm thilinhlan inhlan mahai.

⁸Hi sika hinRengpa chu Juda le Jerusalema mihai chung a ning an mura, mi tinin ar khêl tia danginçek khum rakin an isoisak tâk a ni; khahai kha nangni khomin nin ihmu mai a ni.

⁹Kin pahai chu khandai leh tukthat an nia, kin nâinuhai le nâipahai, kin dôngmahai leh sala an chelhai a ni.

¹⁰Kin chung a ningmurna hi an tômtir sabeiin Israelhai Pathian Rengpa leh Thuthung siam ki itum tâk a ni.



¹¹Ki nâihaio, omchian ta no roi, Rengpa chu a makunga a ngîra, a sin tho hrangin nangni an thanga, khasikin a sin zong unglân, thilinhlanhai inhlan roi,” a tia.

¹²Khahai laia khan Levi irchihai hi an oma: Kohata irchihai laia mi, Amasaia nâipa Mahata le Azaria nâipa Joela, Meraria irchihai laia mi: Abdia nâipa Kisa le Jahalelela nâipa Azaria; Gersona irchihai laia mi. Zima nâipa Joa le Joa nâipa Edena.

¹³Elizafana irchi laia mi: Simria le Jeuela; Asafa irchi laia mi; Zekaria le Matania;

¹⁴Hemana irchi laia mi: Jehuela le Simeia; Jeduthuna irchi laia mi: Semaia le Uziela.

¹⁵Hi mihai hin an irchipui Levi irchihai an bukkhoma, an irthiangtirhaia; rêng thupêk angin tempil an irthiangtira. Rengpa dân bua hril angin an irthiangtira.

¹⁶Rengpa tempil sũaga ochaihai an lûta, thil porche an ihmu murdi chu Rengpa in tuala khan an hong sia suakhaia; Levi irchihai chu Kidron tuia an paia.

¹⁷Tha khatna, sũa maton taka tempil irthiangtir an phuta, a sũa riatna nî chu tempil sum omna dênin an infâia. Sũa riat dang, sũa sômhleiruk dênin tempil sũa chu Pathian biakna inruk hrangin an infâi nôka, an irthiangtir tâka.

Tempil inhlan thar nôkna

¹⁸Levi irchihai chu rêng Hezekia kuang an fea, “Tempil sũa kin irthial irthiangtir ta. Hâlrivôm thilinhlan hâlna maichâmhai, bai ser siana dokânghai le a hmangrua murdi kin irthiangtir ta.

¹⁹Ahaza’n Rengpa kuang ata tho’nchâina sual a tho laia tempil bêlbûr a ilâksuakhai kha kin sia nôk ta, kin irthiangtir zoi tâka, Rengpa maichâm kôla itinrêng hrê infel a ni ta,” an hong tia.

²⁰Reng Hezekia chu Jerusalema hruaitu u ualhai chu a koibukhaia, Rengpatempila khan an fea.



²¹sherâtchal sari, kêlbelrachal sari, kêlbelrate sari le sual irbôlna thilinhlan kêlchal sari an hong chôia; ochaihai chu Rengpa maichâma inhlan hrangin a tia.

²²Sehrâthai chu an thata, an thisen chu maichâma an intheke, kêlbelrate khom kha an thata, a thisen chu maichâma an intheke.

²³Reng le pungkhômhai makunga khan sual irbôlna thilinhlan hrangin kêlchalhai an hong kaia, an lu chung a an kut an irnghata,

²⁴ochaihaiin an thata, an thisen chu sual irbôlna'n an hmanga, Israel mi murdihai sual irbôlna'n an inhlan a ni. Reng thu angin hâlrivôm thilinhlan le sual irbôlna thil inhlan chu Israel mi murdi ta hranga inhlan a ni.

²⁵Reng deipu Gada le deipu Nathana hmanga Davida kuang Rengpa iti angin Levi irchihai chu perkhuang, serânda le têngrep chôiin tempila khan an siaa.

²⁶Davida itum ngai ang tum zât an chôia. Ochaihai khom bekul chôiin an ngîra,

²⁷Reng Hezekia chu hâlrivôm thilinhlan chu inhlan hrangin an hrila; an hor hlanin chu mipuihaiin Rengpa inpâkna hla an saka, bekulhai an tuma, chi danghai khom an tum tâka.

²⁸Khataka om murdihaiin Pathian chubai an mûka, hla an saka, an thilinhlan a kâng zoi mân chu mirimhoi an hâl zui pata.

²⁹Reng Hezekia le mipuihai chu an khûksadela Pathian chubai an mûka.

³⁰Reng le hruaituhaiin Davida le deipu Asafa hla phua, Rengpa inpâkna hla kha, Levi irchihai an insaktirhaia. Khûksadela Pathian chubai mûkin an rêngin râifan takin an om tâka.

³¹Hezekia'n mipuihai kuang, “Rengpa hrang nin infâi irthiang tâka; thilinhlanhai, lômthu hrilnahai, Rengpa tempila hong la ta roi,” a tia.

³²A'rbukkhômhai khan thilinhlanhai, lômthu hrilnahai an hong inhlan, a nuam murdihaiin hâlrivôm thilinhlanhai an inhlan. A'rbukkhômhaiin



hâlvôvôm thilinhlan hrang an hong ichôihai chu sehrâtchal sômsari le belrate irzahni le belra irzakhat a ni.

³³Sehrâtchal irzaruk le belra sângthum khom thilinhlan chi danga an inhlana.

³⁴A that hrang ochai an ruk no sikin an that zoi mân chu Levi irchihaiin an sanhaia. A hnungkhôn tiang chu ochai tam ual khom an thâr irthianghai tâka. Levi irchihai hi ochaihai nêkin an lei irvong irthiang thei ual a ni.

³⁵Mipuihai thilinhlan hâlhai hi ochaihai tho hrang a nia, an sa that mipuihai fâk hranghai khom hi an ihâl hrang a ni; hâlvôvôm thilinhlan leh irrualin uain an hong inhlanhai khom hi ochaihaiin anibun bak hrang a ni. Khanchu tempil sin thôna chu an phut nôk tâka.

³⁶Reng Hezekia le mipuihai chu an râinfân oka, Pathianin hianga tho thei nôk hranga a tempila hmang thei hrang le hruai theia an om sika hin.

2 Thurchi Suina 30

Ferkân kût hmang hrang

¹Mipuihaiin a zoro taka Ferkân kût hmang thei mahaia, ochai tamtak irthâr irthiang zoi irman mahaia, mipui khom Jerusalema irbuk an la tôma.

²Reng Hezekia le a rualhai le Jerusalema mihai an irhrila, a tha khatna ni loiin, tha hninaa Ferkân Kût hmang an inchuka, rêngin Israel ram le Judai rama thu a thonhaia.

³Efraimhai le Manasea-hai len vâng chu Jerusalem tempila hongarêngpa chôindôma Ferkân kût hmang hrangin lekha an thonhaia.

⁴Reng le mipuihaiin an thil tho chu a sa an tia.

⁵Hmâr tianga, Dan rengata sim tiang Beerseba kêra Israel mi murdi chu Jerusalema a tam thei dôr hongarêngpa, ferkân kût hmang hrangin an koihaia.

⁶Reng le a rualhaiin palaihai chu Judai ram le Israel rama mihai va fialhai hrangin an tîrhaia, ngênna lekha hiang hin an thonhaia, “Israel mihaio, Abrahamahai, Isakahai, Jakobahai Pathian Rêngpa tiang hong irhei roi; keini, Assuria kuttum tuang loi, a hring a dama la omhai tiang hong unglân.



⁷Nin pahai le nin uhai nin irchibulhai Pathian Rengpa ata an ilêng inchâi ang khan tho ta no roi, nin ihmu angin a sân deng an ithei a ni kha.

⁸Anni angin nin tukulinlian ta no roi, Rengpa thu chu zôm ta roi. Nin Pathian RengpaIrthiangtir sai Jerusalem tempila hin hong ta unglân; hitak hin ama chubai hong mûk roi. Khanchu a ningmurna hek a ti.

⁹Rengpa tiang nin hor hei photin chu nin râlhaiin sala an ichel nin rual lungthunghai kha, len renhai an ta, hong hruaihai an ti. Rengpa nin Pathian hi Pathian khonzâna nei a nia, ama tiang nin hor heia niin chu nangni irheisan no ni, ti irziak a ni.

¹⁰An mi tîrhai chu Efraima le Manasea irchihai omna ram kho tina an fea, Zebulun ram khom an tunga; khannisian mihaiin an nuisohaia.

¹¹Khaang pum khom khan Asera hai, Manasea hai, Zebulun hai, Jerusalema hong nuam an oma.

¹²Judai rama khom Pathianin sin a thoa, rêng le a rualhai thu anga lungrual taka Pathian nuamlam tho an irzuk ok tâka.

Ferkân kût an hmang

¹³Tha hni zoia chu bai chol pol loi kût hmang hrangin Jerusalema mi tamtak an irbuka.

¹⁴Jerusalema pathian dang, biakna maichâm om murdi chu, mirimhoi hâlna maichâmhai leh an lâka, Kidron tuia an paia.

¹⁵Sûn sômhlei minli ni chu ferkân kûta thilinhlan kêlbelrate chu an thata. Ochai le Levi irchi, porinchehai kha an inzâhai hrai sikin Rengpa hrangin an le'rthiang infâi ving tâka, hâlvôm thilinhlan khom tempila an inhlan thei tâk a ni.

¹⁶Pathian mi Mosia dân bua hril angin an omna hrang hmun indanghaia an om vinga. Levi irchihaiin thilinhlan thisen chu ochaihai an pêka, anni'n maichâma an intheka.

¹⁷Mi tamtak chu an porche sikin ferkân kûta kêlbelrate that irthiang maka, Levi irchihai khan an that pehaia, Rengpa kuang an inhlana.



¹⁸Efraïma hai, Manasea hai, Isakara hai, Zebulun hai laia mi tamtakhai chu an irthâr irthiang no sikin dân loi angin ferkân kût an ihmang a ni.

¹⁹Reng Hezekia chu khahai ta hrangin a chongchaia, “ORengpa, kin irchibulhai Pathian, porche an ni pum khomin lungrîl taka chubai mûkhai chu ni thathai sikin ngaidamhai ro,” a tia.

²⁰Rengpa’n Hezekia chongchaina kha a irngaia, mihai chu a ngaidama, itin te lo maka.

²¹Râifân takin sîn sari sîng chu Jerusalema honghaiin bai chol pol loi kût chu an hmanga, a sîn tin Levi irchihai le ochaihaiin hnuk inring takin Rengpainpâkna hla an saka.

²²Rengpa biakna hranga an thil neihai leh inkhôm kaihruai an thei sikin, Levi irchihai chu rêng Hezekia’n an pâkhaia.

Ferkân kût hmang nôk a ni

An irchibulhai Pathian Rengpa chu sîn sari thilinhlan an fâk zoiin

²³sîn sari dang kût hmang nôk an nuama, raifân takin an hmang nôka.

²⁴Reng Hezekia chu sehrât sângkhat le kêlbelra sângsari, mipui thilinhлана hruai an inthea, an hruaituhaiin sehrâtchal sângkhat le kêlbelra sîngkhat an tho saa. Ochai tamtak an irthâr irthiang tâka.

²⁵Mi tukhom Judai rama mi honghai le Levi irchihai, ochaihai, Israel ram ata honghai, Judai ram le Israel rama nam dang oma honghai khom an raifân tak taka.

²⁶Jerusalem khuaa khan tukhomin an lôma, Davida nâipa Solomona thi hnunga khang dôra raifânna la om ngai ma.

²⁷Levi irchihai le ochaihaiin mipui ta hranga satvurna an hrila, Rengpa’n a le’rngai pehaia, an chongchaina chu a hmun irthiang irvân a idên a ni.

2 Thurchi Suina 31

Hezekia’n sakhua lama omdân siamintharna



¹Kût an chînin chu Israel mihai chu Judai ram kho tina an fe irtheka, an lungphunhai, an pathiannu Aseri irlim an iphunhai an naminrîla, maichâmhai le hmun irsâng, nam dang pathian an biakna hmunhai an insiata, Judai ram khêla Benjamina hai, Efraima hai le Manasea biala mihai khom an insiata, mâni in tiang an kîr nôk tâka.

²Reng Hezekia chu ochaihai le Levi irchihai chu sin an irsem ngai ang khan an tho hrang dân an fel pehaia. An sin hrang chu hâlrivôm thilinhlanhai, irngeina thilhai le tempila Pathian biakna bukhalâi hai, tempil mikot kôla Rengpainpâkna hla saka, lômthu hrilhai a ni.

³ Hezekia chu ama sehrât le kêlbelra rual rengata a sùn tin le a zân tin hâlrivôm thilinhlan hranghai le, sabat nihai, tha thar nihai le kût zoroa hâlrivôm thilinhlan Rengpa dân bua inhlan hrang a iti dôr chu a itum ving a ni.

⁴Rengpa dânin a inphût angin, an zoro nei an hmang theina hrangin, ochaihai le Levi irchihai dongtum thilinhlan chu pe mai hrangin Jerusalema mihai chu Hezekia'n a hrila.

⁵Khaanga thu a pêkin chu Israel mihaiin an thilpêk bai indi a sa zâthai, uainhai, oliv hriakhai, khuaihlutui hai le an thil tharhai le an inei murdi an sôma inkhat leh an hong pêk tâka.

⁶Judai ram khopuia om murdihaiin an sâ sôma inkathai, an Pathian Rengpa kuang thil tamtak an ipêkhai chu an hong chôi ngaia.

⁷A tha thumna ata chu an hong pêk phut tâka, tha sari tena an hong ipêkhai chu a irbuk hluk tâk a ni.

⁸Reng Hezekia le hruaituhaiin thilpêk tam lam kha an hmu'n chu Rengpa an chôiindôma. Israel mipuihai khom an inpâka.

⁹Rengin ochaihai le Levi irchihai kuanga thilpêk lam chu an ikhop le khop loi ar donhaia.



¹⁰Zadoka irchia ochai inlaltak Azaria'n, "Mihaiin thilpêk tempila an hong chôia ta hi chu fâk hrang kin nei tâka, fâk sêng loi tamtak a izôk a ni, Rengpa'n a mihai sat a vura, hihai ang hi ei inei thei a ni," a tia.

¹¹Reng thupêk angin tempil ram sûnga hin neinun siakhômna an sina.

¹²An thilpêk le sôma inkhat chu a porinche lolina hrangin an siaa. A enkol hrangin Levi irchia mi Konania an inkunga, a sangpa Simeia'n a changpuia.

¹³Anni hnuaia sin hrangin Levi irchi Jehiela hai, Azazia hai, Nahata hai, Asahela hai, Jerimota hai, Jazabada hai, Eliela hai, Ismakia hai, Mahata hai, Benaia haiin chu rêng Hezekia le ochai inlaltak Azaria kha an inkunga.

¹⁴Imna nâipa Korea, tempil nisua tianga mikot hrungtu hruaitutak chu Rengpa kuanga an thilinhlan le ser bîkhai zêk hrangin an inkunga.

¹⁵Kho dang, ochaihai omna khan hi Levi irchi Edena hai, Miniamina hai, Jesua hai, Semaia hai, Amaria hai, Sekania hai chu fâk hrang kha satakin an sempuia, an Levi irchi chanpuihai khom; a poimo le poimo loihai khom ti loiin an isem sîp sîp ngai a ni.

¹⁶Pasal kum sômthum chung tiang, tempila sintho theihaiin chu an dinghmun enin an donga.

¹⁷Ochaihai chu an irchi anga irsan thei hrangin sin an irsema; Levi irchi kum sômhni chung tianga mihai chu a pa pâla sintho hrangin an semhai a ni.

¹⁸An irhming chu an dôngmahai, an nâihai le an iompui indethai leh an irziak vinga, itiklai khoma sintho hranga koihai thei an ni.

¹⁹Arona irchihai omna hrang thingtâng khua le a kôlvêla sâ vâina ram inkunga om, ochaihai kuanga fâk le nêk hrang sem hrang an inkunghaia, Levi irchihai irhming chuanghai khom an pêkhai ngai.

²⁰Judai ram pumpuia rêng Hezekia chu a Pathian Rengpa kuang, sin sa le a lôm lamin sin a thoa.

²¹A diktakin a Pathian sin a thoa, tempil a'rngaiirsânga, a dânhai a zôm hrai sikin, lam tinrênga a irhniangtir a ni.



2 Thurchi Suina 32

Assuria-haiin Jerusalem lâk tumin an ngo

(2 Rng 18.13-37; 19.14-19,35-37; Isa 36.1-22; 37.8-38)

¹Hezekia'n Rengpa sin satakin a tho zoia hin Assuria rêng Senakeriba'n Judai ram a hong doia, kul nei khuahai chu a sipaihai ar hualtira, kul banghai an siattirhaia.

²Hezekia'n Jerusalem khom doi a tum ti an hriatin chu

³a rualhai leh an irhlet irhlôma, Assuria-haiin Jerusalem an hong nâi tena tui in hrang an nei loina hrangin kho kôla tuikuanghai chu nelinbitpai zit hrangin roi an rêla.

⁴Hruaituhai khan mi tamtak an hruaihaia, tuikuang om murdi chu tui irhmu loiin an nelinbit zita.

⁵Rengin kho kul bang indernahai kha a phoa, in irsânghai a sina, Jerusalem kho milui Milo an iti irnêng an inelinbitna kul banghai a sin insatira, ufei le phô tamtak an sintirhaia.

⁶A kho mihai chu sipai hruaituhaiin an hruaihaia, khopui lûtna mikot tualzôl lian taka khan mihai an bukkhômhaia, ar chuhaia.

⁷An kuang khan, "Huaisen takin om unglân, irnak song roi. Assuria le a sipai tamhai hi chihai no roi, nin ichi viat hrang ni ma, anni nêka roiinpui ei kôla hin a iom a ni.

⁸Ama chu mihriam hrâtnain a'rngata, eini chu Rengpa, ei Pathianin ni san a ta, râl ni doipui a ti," a tia. Mipuihai chu Juda rêng Hezekia thu sikin an irtha a'ngam pehai tâka.

⁹Senakeriba sipaihai chu Lakis khuaa an om zoiin Hezekia le Judai rama mi a hruaia, Jerusalema omhai kuang palai a tîra.

¹⁰Assuria rêng Senakeriba'n hiang hin a tia, "Jerusalem lâka om hranga khan imo nin la iam sika nin la iom mai?

¹¹Hezekia khan, Rengpa kin Pathianin Assuria kut rengata ni san a ta, tiin tuiinhrâl le phîngchâma thi hrangin nangni a ihuang mo ni ma?



12Nin Pathian biakna hmun irsâng le maichâmhai setin Jerusalem le Judai rama mihai chu maichâm inkhata Pathian chu chubai mûk nin ta, khatak khan thil inhlan nin ti, titu kha hi Hezekia hi mo ni ma?

13Keima le ka pahaiin ram tina nam danghai kin isoisak dânhai kha nin lan hriat mo? Anni pathianhaiin an mihai kha ki kut ata an ni sut thei ngai mo?

14Ka pa khan an pathianhai kha an doktirhai vinga, nin Pathian hin a kut ata nangni san le mo nin iam?

15Khasikin, Hezekia hin nangni huang no ri se, a he la no unglân, Assuria rengata a biaktuhai khan a san thei tûte nam pathian om mahai. Nin Pathian khomin nangni sansuak zoi ni mo,” a tia.

16Assuria sipai hruaitu khan Rengpa Pathian le a siahlo Hezekia chu hi nêka sa loiin a hril insiata.

17Assuria rêngin lekha leh Israelhai Pathian Rengpa chu irkhâmpui maka, nam dang pathianhai khomin a kut ata chu, nang sansuak thei maka, Hezekia Pathian khomin a mihai chu ama ata nangni sansuak thei ni mo? tiin a’rziaka.

18Khua inhnê olsam ual sabeiin Jerusalem kul kôla omhai insî a tuma, Hebrai chongin thu a hrila.

19Jerusalem Pathian chu nam dang pathian, mihriam isiamhai angin a soisak a ni.

20Reng Hezekia le Amosa nâipa deipu Isaia chu an chongchaia, Pathian an koia.

21Rengpa’n vântîrtôn a zuang tîra, Assuria sipaihai le an hruaituhai a zuang thata. Assuria rêng chu mualphoi takin an khua tiang a kîr tâka. Sûn khat chu an pathian biak ina a om laiin a nâi senkhathaiin khandai leh an tuk thata.

22Reng Hezekia le Jerusalema mihai chu khaangin Assuria rêng Senakeriba le an râlhai kut rengataRengpa’n a sansuaka. An kôlvêla ramhai leh irngei takin an omtir tâka.



²³Jerusalema Rengpa kuang thilinhlan hrang mi tamtak an hong, Hezekia kuang khom thilpêk an hong pêka, nam tinin Hezekia an irngaiirsâng a ni.

Hezekia dam loi le a irsong thu
(2 Rng 20.1-3,12-19; Isa 38.1-3; 39.1-8)

²⁴Kha zoro laia khan Hezekia chu thi vângin a naa, a chongchaia, a dam nôk hrang thu irsinsiana Rengpa'n a sin pea.

²⁵Khannisian, Hezekia chu Rengpa'n a chung a itho pe angin tho loiin a'rsongpuia, khasikin Judai ram le Jerusalemaiin an tuang tâka.

²⁶Inhnung tiang chu Hezekia le Jerusalema mihai an irsîra, an irngaiintôma, Hezekia dam sâng chu Rengpa ningmurna an chung a tung pehai ta ma.

Hezekia irchong lam le roiinpui lam

²⁷Reng Hezekia chu a'rchong ok tâka, tukhomin an irngaiirsânga, a rângachak hai, tangkarua hai, lungmantam hai, thil mirimhoi hai, pô le thil dang hlutak tak hrêna hrangin in a sina.

²⁸A buhai, uainhai, oliv hriakhai siana hrang siakhômna in a sina; sehrât inhai, kêlbelra irkul a sina.

²⁹Hihai khêla hin Pathianin kêlbelra hai, sum le pài chi tinrêng a pêk saa, khuahai a sinsiama.

³⁰Hezekia hin Gibon tui a tiala, tui lam a sina, Jerusalem kho sînga khur inkhata an luang irchuntirhai a ni. Hezekia chu a sintho hmun tina manchang a sua.

³¹A chung a sinirkhêl irsinsia hrangin Babulon rêngin palai a hong tîrin chu mi i ang mo a ini iti, Pathianin eninfel hrangin a bingin a isia a ni.

Hezekia zoro hnungkhôn
(2 Rng 20.20-21)

³²Reng Hezekia sintho danghai, a sintho sahai chu, Amoza nâipa deipu Isaia lekhabu le Israel le Judai rêng hai thurchi irziakna bua a chuang.

³³Hezekia chu a thia, rêng thânmual chuanchung a an phûma, Judai ram le Jerusalemin a thi kha an chôindôm oka. A nâipa Manasea chu ama irthûlin an lal tâka.



2 Thurchi Suina 33

Juda rêng Manasea

(2 Rng 21.1-9)

¹Kum sômhleihni a niin Manasea chu Judai rama an lal irphuta, Jerusalema kum sômringa le ringa an lala.

²Khan, Rengpa sikin an ihnôlna rama namhai thil intirom thohai ang kha a thoa.

³A pa Hezekia'n a lei insiatpai tâk, nam dang pathianhai biakna hmun irsânghai kha a sin insatira, Baal makunga irbôlna inhlanna hranga maichâm an sintira, pathiannu Aseri irlimhai an sintira, ârsihai chubai a mûka.

⁴Kumtuanga Rengpa biakna hrang tempil an kunga khan nam dang pathian maichâm a sina.

⁵Tempil tentan inhnia khan ârsi biakna hrang maichâm a sina.

⁶Hinom irhôra hâlrivôm thilinhanna'n a nâipahai an hlana;

⁷tasânhai le kutzia en theihai, ârsi en theihai a hmanga, mithi châ theihai, tasân theihai a hmanghaia. Rengpa'n a sa a iti loihai a thoa, a ning an mur pe ta a ni.

⁸A millim siam chu tempila a siaa, Pathianin Davida le Solomona kuanga, "Israel nam murdihai laia Jerusalem le hi in hi ki'rhming lamna hranga inthang a ni. Kumtuanga ki thupêk murdi an zôma, ki thu'nkunghai le ki dânhai, ki siahlo Mosia ihrilhai kha an zômin chu Israelhai hi itiklai khoma an pahai kuanga ki ipêk hrang ram ata hi inhnotsuakhai no ning," a tih tâka.

⁹Manasea'n Judai ram le Jerusalem mihai chu thil dik loi an thotirhaia, Israelhai makunga a inhnotsuak namhai ti nêka sual lian ual an tho tâk a ni.

Manasea irsîrna

¹⁰Rengpa'n Manasea le a mihai kuang thu a hrila, irngai pe nuam mahaia; khasikin Assuria sipai hruaitu chu Rengpa'n Judai ram an doitira.

¹¹Manasea chu an chela, zîngziri hrui leh an vîka, Babulon-a thîrhruai leh an kaia.



¹²A chardong hrai sikin Pathian Rengpa makunga irhnuai takin, changpuina ar zong tâka.

¹³Manasea chongchaina chu a le'rngaitua pea, a izonghai chu sâmin Jerusalema an fetir nôk tâka. Manasea'n chu Rengpa chu Pathian a nih ti an hriat infel thei tâka.

¹⁴Kha zoiin chu Davida khopui nisua tianga kul bang pên tiang khan Manasea'n in a zom irsânga, Gihon tui omna irhôr hmâr tianga Nga mikot kôla 'Ofel' an itihna dênin a sina. Judai rama kul nei khua tina sipai pâl khat, hruaitu inkhatin a siahaia.

¹⁵Tempil ata nam dang pathian irlim le millim inluan, ama isiahai chu a thonpaia. Tempil mual le Jerusalem khua nam dang pathian biakna maichâm om khom kha a lâka, a paia.

¹⁶Rengpa biakna maichâm balhai kha a sina, irngeina thilinhlanhai; lônthu hrilna thilinhlanhai an hlana, Judai rama mi murdi chu Israelhai Pathian Rengpa an biaktirhaia.

¹⁷Mipuihai kha irbôlna hmun pângai la irbôl maihai khomsian, Rengpa kuang vai an irbôl ta a ni.

Reng Manasea zoro hnungkhôn

(2 Rng 21.17-18)

¹⁸Manasea thil tho dang murdi, Pathian kuanga chongchaina hai, Israelhai Pathian Rengpa irhminga deipuhaiin a kuanga an thuhrilhai chu Israel rêng hai thurchi irziakna bua a chuang.

¹⁹Reng Manasea chongchaina le Pathian isâmna hai, a irlet zoia thilsual a ithohai thurchi, nam dang pathian biakna hmun irsânghai, Aseri irlim sina, a millim inluan a ibiakna thu hai, deipuhai thurchi irziakna bua a chuang sa ving a ni.

²⁰Manasea chu a thia, rêng ina an phûma, a nâipa Amona chu ama irthûlin an lal tâka.

Juda rêng Amona

(2 Rng 21.19-26)



²¹Amona chu kum sômhni inhni a niin Judai rama an lal irphuta, Jerusalema kum hni an lala.

²²A pa Manasea angin Rengpa chung a thilsual a thoa, a pa millim inluanhai chu chubai a mûkhai tâka.

²³Khan, a pa angin irngaiintômna nei maka, Rengpa tiang irhei nuam maka, a pa nêkin a isual ual a ni.

²⁴A rualhaiin an khita, a ina an thata,

²⁵Judai rama mihaiin Amona thattuhai kha an thathaia, a nâipa Josia chu rêngin an siama.

2 Thurchi Suina 34

Juda rêng Josia

(2 Rng 22.1-2)

¹ Josia chu kum riat mi a niin Judai rama rêng a chang irphuta, kum sômthum inkhat Jerusalema an lala.

²Rengpa nuamlam a thoa, ar chibul Davida omdân angin a oma. Pathian dân chu kuluk takin a zôma.

Nam dang pathian biak a doi

³Josia kha kum riat an lal zoiin chu, la nâiin pangte khomsian, a'rchibul Davida Pathian chu a biak zôi tâka; kum minli zoia len vâng chu nam dang pathian biakna hmun irsânghai, Aseri irlimhai le a millim danghai chu an siat vinga.

⁴ Ama thuin a rualhaiin Baal biakna maichâmhai chu an insiata, a kôla mirimhoi hâlna maichâmhai khom an insiata; Aseri irlimhai le a millim danghai chu an insiata, ama biaktuhai thâna an phûma.

⁵ Nam dang ochaihai ruhai chu an pathian biakna maichâma khan an hâla. Khanchu Judai ram le Jerusalem khua chu an thâr irthiang tâka.

⁶Khaingin Manasea hai, Efraima hai le Simeona ram, hmâr tiang Naftalia ram dênin an khopui mi le an rama mihai chu a thâr irthianga.



⁷Israel hmâr tiang bial sũa maichâmhai le Aseri irlim an siata, millimhai chu a sunkhoia, mirimhoi hâlna maichâmhai khom an siat vinga, Jerusalema a kîr nôk tâka.

Dan bu an hmusuak

(2 Rng 22.3-20)

⁸Nam dang pathian biakna an hektira, ram le tempil a'rthiangtir zoi kum sômhleiriat an lal kumin Josia'n tempil sũa sin insa hrangin mi inthum, Azalia nâipa Safana hai, Jerusalem khua optu Maaseia hai, Joahaza nâipa hruaitu inlaltak Joa hai a tîra.

⁹Levi irchi, lampui hrungtuhaiin tempila sum hmang hrang an irfuang kha, ochai inlaltak Hilkia kuang an irhlana. (Efraima mihai, Manasea mihai le Israel hmâr ram tianga mihai kôl ata le Judai ram mihai, Benjamina ramhai le Jerusalema mihai kuang an irfuang ngai a ni.)

¹⁰Hi tangka hi, hi mi inthumhai kuta hin an pêka, anni'n chu

¹¹mistirihai le in sintuhai kuang lung le thing irchôkna thil lei siat tâkhai, Juda rêng hai lei ingaisak loi, bangrua hai, tângkhang hai siam insatna hrangin an pêka.

¹²Sinthotuhaiin kuluk takin sin an thoa, Levi irchia mi minli, Meraria irchia Jehata le Obadia hai, Kohata irchia Zekaria le Mesulama haiin an hruaia. Hi Levi irchihai hi thil tum thei mi inzen an ni.

¹³Khan, puakrik pêltuhai enkoltuhai khom an ni saa, sinthôna sin chu lam i anga khom an enkol maia; khan, Levi mihai chu ziaktuhai, hruai tuhai le mikot vêngtuhai an oma.

¹⁴Sum sia khômna ata tangka an lâkin chu Rengpa dân bu, Mosia kuanga Pathian ipêk kha, Hilkia'n a hmua.

¹⁵Safana kuang, “Hi tempil sũa hin dân bu ki mana,” a tia, a pêka.

¹⁶Safana khan rêng kuang a fepuia, “Ni ihrilhai chu kin tho zoi ta.

¹⁷Tempila hrê insa tangka chu kin lâka sinthotuhai le a enkoltuhai hlo hrangin kin pêka.



¹⁸Hi, Hilkia ni ipêk, lekhabu ki hong chôi,” a tia. Reng inhriat hrangin a tep tâka.

¹⁹Dân bu an itep kha rêngin a hor ngaiin chu a puan an pot thêra,

²⁰Hilkia hai, Safana nâipa Ahikama hai, Mika nâipa Abdona hai, lekha irziaktu Safana hai, rêng enkoltu Asaia hai chu a koihaia.

²¹Hi dân bu chungchâng thua ki isanhai, Israel le Judai rama la dam sunhai hrangin, Rengpa kha ni var don pe hi roi, kin irchibulhaiin Rengpa thu zôm nuam mahaia. Hi lekhabua tho hranga a itihai hi an tho no sikin, kin chung Rengpa ning a inmur a ni, tiin a tîra.

²²Hilkia le rêngin mi a itîr danghai chu Tokhata nâipa Saluma dôngma deipu Huldaii kuang an fea, Tokhata hi Hasra nâipa a ni, Saluma hi tempila ochai tukfam enkoltu Jerusalem kho thara om a ni. Thil omdân a hrila.

²³Reng kuang a tîr nôka,

²⁴Rengpa thu chu hiang hin an hriattira: “Reng inhriatin an tepsuaka, lekhabu irzuata khosâlnahai kha Jerusalem le a sũaga omhai chung Rengpa intungtir ki ti.

²⁵Anni hnôla, pathian dang kuang thilinhlanhai an inhlana, an sintho’n ki ning an inmurtir a ni. Jerusalem chung Rengpa ki ning an mur tak taka, dâi thei lik no ni.

²⁶Reng chungchâng rêk kha chu, keima Rengpa, Israelhai Pathian hin hiang hin ki iti a ni. Lekhabua thu irziak chu ni’rngai tâka,

²⁷ni’rleta, ni’rhnuai tâka. Jerusalem le a sũaga mi hrem ki ti, ki ti lai khan poi ti takin ni puan ni ir-ekthêra, ni chapa.

²⁸Jerusalem chu ni thi zoi le vai hrem ta ki ti, irtharngam takin nan thitir ki ti,” tiin. Kha thu chôiin mihai chu rêng kuang an hong kîr nôka.

Josia thu zôm hrangin Josia chonginkung

(2 Rng 23.1-20)

²⁹Reng Josia chu Judai ram le Jerusalema ulianhai chu a koibukhaia.



³⁰Ochahai le Levi irchihai chu tempila an fea, mi irchong le inrianghaiin an zuihaia. Rengin tempil sũaga thuthung bu an ihrût kha mipuihai makunga an tepa.

³¹Reng ngîrna hranga inkung chopui kôla khan a ngîra, Rengpa kuang thu a thunga, a thu a zôma, lungrîla a diktakin a dânhai le a thupêkhai chu zôm hrangin chong an kunga, lekhabua thu chuang murdi zôm hrangin an kunga.

³²Benjamina-hai le Jerusalema om murdi chu thuthung vong hrangin chong an kungtirhaia. An puhai Pathian le thuthung lei sin sai tho hrang omhai chu Jerusalema mihaiin an thoa.

³³Reng Josia chu Israel mihai ram sũaga millim intirom tak tak chu an siat vinga, a dam sũag chu kha mihai kha an irchibulhai Pathian Rengpa sin an thotirhai ta. A dam sũag murdia chu an irchihai Pathian Rengpa zuinaa irthok khan pêtirhmang mahai.

2 Thurchi Suina 35

Josia'n ferkân kût a hmang

(2 Rng 23.21-23)

¹Reng Josia'n Rengpa irhmingin Jerusalema Ferkân kût a hmanga. Tha khatna sũa sômhleiminli nê chu kûta hmang hrang sa a thata.

²Ochahai chu tempila an sin hrang a sem pehaia, sataka sin hrangin an thorhaia,

³Rengpa ta hranga ser bîka, dân irziaktu Levi irchihai khom hiang hin a hrihai. “Davida nâipa Solomona in sin sũaga khan Thuthung Bôm hi chu se roi, nangni irzôn kochok nang ta no ni. Nin Pathian Rengpa le a mi Israelhai sin nin itho hrang a ni.

⁴A chi chiin tempila nin omna hranga om unglân, nin itho hrang rêng Davida le a nâipa Solomona inkung ang khan tho roi.

⁵Sin nin irsem tena Israel in sũag mihai changpuitu hrang mi senkhat nangni bê ki ta,



⁶ ferkân kûta sa hrang kêlbelra le kêl nin ithat hrang a ni. Atûn irthâr irthiang roi, an thilin hlan hranghai inhlanpuihai unglân, Mosia kuang Rengpa thupêk ang khan nin urêng Israelhaiin an zôm theina hrangin,” a tia.

⁷Mipuihai hmang hrangin Josia’n ama sâhai laia mi kêlbelra hai, kêlbelrate hai le kêltak sîngthum le sehrâtchal sângthum a thata.

⁸A ihruai mi lianhai khomin mipuihai, ochaihai le Levi irchihai fâk hrang an tho saa. Tempil hruaitu ochai inlaltak Hilkia hai, Zekaria hai le Jehiela haiin belrate le kêltak sîngthum sângruk le sehrâtchal irzathum, kût sînga thilinhlan inhlan hrangin ochaihai chu an pêka.

⁹Levi irchihai hruaitu Konania hai, Semaia hai le a sangpa Nethanela hai, Hasabia hai, Jeiela hai, Jozabada haiin kêlbelrate le kêltak sângkinga le sehrâtchal irzaringa, Levi irchihai thilinhlan hmang hrang an tho saa.

¹⁰Ferkân kût hmangna hrangin itinrêng an infel zoiin chu, an omna hmun inkunga an oma.

¹¹Kêl le belra an that zoiin chu Levi irchihaiin a vun an hlâia, ochaihaiin a thisen kha maichâma an intheke.

¹²Hâlrivôm thilinhlan hmang hrang chu Mosia dân bua a irziak anga inhlan hrangin an sema.

¹³ Levi irchihai chu dân angin ferkân kût hme chu an hâl inhmina, hme irthiang senkhat chu bêla hai, thîr bêla hai, bêl lianhaia an suanga, a hme chu mipui an semhaia.

¹⁴Kha zoiin chu anni fâk hrang le Arona irchi ochaihai hrang an suang nôka, ochaihai khan hâlrivôm thilinhlan le an thilinhlan a thâi hâlna mei chu zânkhuain an buaipuia.

¹⁵ thil tum thei mi, Asafa irchi, Levi irchi, hihai hi rêng Davida tho dân angin an omna hrang hmuna, Asafa hai, Hemana hai, Jeduthuna hai, rêng deipuhai hin sin an thoa. Tempil hrungtuhai hrang khom irthon nang maka, an rual Levi irchi, mi danghai khan ferkân kût hme chu an lei sinsiam pehaia.



¹⁶Reng Josia thu angin Rengpa chu an chongpuia, tho hrang murdi, ferkân kût hmang hai, maichâma hâlrivôm thilinhlan inhlanhai chu an thoa.

¹⁷Sûn ruk sâng chu ferkân kût le bai chol pol loi kût chu Israel mihaiin an hmanga.

¹⁸Deipu Samuela thi zoiin hianga roiinpui hin ferkân kût la hmang ngai mahaia. Reng Josia hai, ochai hai, Levi irchihai, Juda le Israel rama omhai le Jerusalema omhaiin ferkân kût an ihmang ang hi la hmang ngai mahai.

¹⁹Reng Josia kum sômhleiriat an lal kumin an ihmang a ni.

Josia rêng zoro hnung tiang

(2 Rng 23.28-30)

²⁰Reng Josia'n hiang dôra tempil a'rvôtir zoi hin Aigupta rêng Nekoa chu Eufrates tui kôla, Kharkemisa, irdoi hrangin a sipaihai a hruaia. Josia'n lei danh a tuma.

²¹Nekoa khan, "Nang Juda rêng, hi thila hin ite ni kopna hrang om ma. Nang doi hrangin zuang ma ung, ki râlhai doi hranga zuang kêng ki ni. Pathianin irhnot hrangin a ni tia, keima tianga kop a nia, khasikin ni lei khâl tum no ro, nan siatna a ti," tiin palai a tîra.

²²Josia'n lei doi a tum maia, Nekoa hmanga Pathian thu hril chu nuam maka, a irvo danglamin, Megido phâia an irdoina khan a fea.

²³An irdoi lai khan Aigupta sipaihai thalin Josia kha a tok tâka. A tâli chalaitu kuang, "An nin phop innatir hraia, irdoina hmun ata hi ni suakpui ro," a tia.

²⁴Ama tâli ata an irzôn suaka, tâli dang chung a an siaa; Jerusalema an tuanga. A thia, rêng hai thâna an phûma, Judai ram le Jerusalem mihaiin an inhroia, an sînpuia.

²⁵Deipu Jeremia chu Josia sînna hla a phuaa, Israelhai laia hla sak mi, nupang le pasal rêng sînna hla an saka. Sînna hla irziak khômna bua, kha hla kha a chuanga.

²⁶Josia thil tho murdi le Rengpa a irngaiinna lamhai, dân a izôm lamhai,



²⁷a phut ata a mong dênin a thurchi chu Israel le Juda rênghai thurchi irziakna khan a ichuang ving a ni.

2 Thurchi Suina 36

Juda rêng Joahaza

(2 Rng 23.30-35)

¹Judai rama mihaiin Josia nâipa Joahaza chu rêngin an inthanga, Jerusalema sahriak an pola.

²Joahaza chu kum sômhni inthum a niin Judai rama rêng a changa, tha thum an lal irmana.

³Aigupta rêng Nekoan sala a chela, Judai ram chu, khâzana tangkarua her sângthum irzaminli le rângachak her sômthum minli an chôtira.

⁴Khan, Nekoan Joahaza upa Eliakima chu Judai rama rêngin a siama, a'rhming khom Jehoiakima tiin a phua nôka, Joahaza chu Aigupta rama a hruaia.

Juda rêng Jehoiakima

(2 Rng 23.36–24.7)

⁵Jehoiakima chu kum sômhni ringa a niin Judai rama rêng a changa. Jerusalema kum sômhleikhat an lala.

⁶Babulon rêng Nebukadnezara chu Judai ram a doia, Jehoiakima chu a chela, thîrhruil leh khitpumin Babulon-a a hruaia.

⁷Nebukadnezara'n tempila thil hlu senkhat chu a chôi pea, Babulon khua, a ina a siaa.

⁸Jehoiakima sintho murdi chu, thil intirom tak tak a ithohai le thil sual a ithohai chu Israel le Juda rênghai thurchi irziakna bua a chuang ving a ni; ama irthûlin a nâipa Jehoiakina chu an lal tâka.

Juda rêng Jehoiakina

(2 Rng 24.8-17)

⁹Jehoiakina chu kum sômhleiriat mi a niin Judai rama rêng a changa, Jerusalema tha thum le sîn sôm an lal irmana. Ama khom Rengpa chung a thil sual a thoa.



¹⁰Kholum a hor phut tiang chu rêng Nebukadnezara a hong, Babulon sala a hruaia; tempila thil hlu murdi a chôipai vinga. Nebukadnezara'n Jehoiakina sangpa Zedekia chu Judai ram le Jerusalema rêngin a sia tâka.

Juda rêng Zedekia

(2 Rng 24.18-20; Jer 52.1-3)

¹¹ Zedekia chu kum sômhni inkhat mi a niin Judai rama an lala. Jerusalama kum sômhleikhat sêng an lala.

¹²Rengpa mithmua thil soal a thoa; Rengpa thu intungtirtu deipu Jeremia thu lak irngai zât om mah a ti ngaia.

Jerusalem siatna

(2 Rng 25.1-21; Jer 52.3-11)

¹³ Zedekia chu Nebukadnezara ata tehel a zonga, Pathian irhmingin iam omna thu an kungpuia, rêngin a siam tâka. Tukullian a songa, irlet nuam maka, Israelhai Pathian Rengpa tiang irhei nuam maka.

¹⁴Juda ulianhai, ochaihai le mipuihai lakin an kôlvêla nam sualhai omdân lâkin, Rengpa irthiangtir sai tempil chu millim biakin an innimtira.

¹⁵Tempil le a mihai chu a san nuamhai sikin, mipuihai irchutir hrangin an irchihai Pathian khan deipuhai a tîrhai maia.

¹⁶Khannisian Pathian mi tîrhai chu an lei manêphaia, an thu lak ite la pehai mahaia. Deipuhai chu innuisanhaiin, inhnung tiang chu Rengpa kha a sate'n a ning an mur pea.

¹⁷Rengpa'n anni soisak hrangin Babulon rêng a hong hruaia, rêngin Judai rama ruathartehai chu tempil sênga khom a that phiarhaia. Ulian le nâipang lêk loiin, nupang pasal, hrisêl le sêl loi dênin ite inrenna boiin. Pathianin a kuta a ipêk ving a ni.

¹⁸Babulon rêngin tempil kha an moka, thilhlu an ihrêhai a lâka, rêng in le mi lianhai ina thil omhai khom Babulon-a a chôl vinga.

¹⁹Tempil le kho sênga inhai chu a hâla, khopui kul bang neihai a seta.

²⁰ A thi zoi loihai chu Babulon-a a hruaihaia, ama le a rualhai chu suaka, Persia hai an hong tung dênin an oma.



21Jeremia bâia Rengpa thu lei hril chu, Kum sômsari sâng chu nin ram châr a ta, a iti kha a hong itung a ni ta.

Reng Kura'n Judahai an fetirhai

(Ezr 1.1-4)

22Persia rama rêng Kura an lal phut kumin, Rengpa'n Jeremia bâia a thu hril hlo a hon chuktira. Reng Kura kha a kaihara, hiang hin thu an pêktirhaia: a ram sâng hmun tina tep thei hrangin irziakin thu a thon dara:

23 “Hi hi Persia rêng Kura thupêk chu a ni. Rengpa, irvân Pathianin rammual pumpuia roirêltu mi a siamhaia. Judai ram le Jerusalema hrang tempil sin hrangin a ni tia. Khasikin, Pathian mihaio, nin rêngin kha khan fe roi, nin Pathian Rengpa'nnangni ompui ri se,” tiin.



Ezra

Ezra 1

Reng Kura'n Judahai kîr hranga thupêk

¹ Persia rêng Kura inlal kum khatna deipu Jeremia hmanga a lei ihril tâk khaRengpa'n an tungtir tâka. Ama thupêk, a ram pumpuihai inhriat hranga tep suak hrangin Rengpa'n Kura lungrîl an thor pea.

² “Persia rêng Kura'n hiang hin a ti, ‘Rammuala ram murdi chu Rengpa irvân Pathianin a ni pêk ta; khan Judai rama Jerusalema in sin hrangin thu a ni pêka.

³ Nin laia ama mihai murdi chungu Pathian chu om ri se; khanchu Judai ram Jerusalema fehaisian, Rengpa Israelhai Pathian, ama chu Jerusalema om Pathian in chu hong sin ri sehai; ama chu Pathian a ni.

⁴ Mi tukhom, kho hmuna khom inhnotsuaka om khom ni sian, an omna hmuna Pathian in hrangin, an nuam thua tho hrang ni loiin, sumru, le rângachak, bungruahi le sahai khom lei changpui ri sehai,’ tiin.

⁵ Khasikin, Juda le Benjamina irchi, in sînga a lu u ualhai, ochaihai, Levi hai, Jerusalema Rengpa in hong sin hranga Pathianin an lungrîla a inthorhai chu an hong sina.

⁶ Anni lungrîl nuamlam anga ni loiin, an kôla mi tamtak sumrua siam bungrua, rângachak, sahai, le thil hlu tamtak pêkin, an changpuihaia.

⁷ Reng Kura khomin, Nebukadnezara'n Rengpa ina bungrua Jerusalem ata a lâk suaka, a pathian ina a isiahai kha a lâksuak nôka,

⁸ a isiahai kha Persia rêng Kura'n a enkoltu Mithredata kha an kêlsuatira, a tepa, Judahai hruaitu Sesbazara kuang a pêka.

⁹ Khan hihai hi a om zât chu a ni: rângachaka siam tâbor sômthum, sumrua siam tâbor sângkhat chemte sômhni kuak;

¹⁰ rângachak khilât sômthum, sumrua khilât chi da dang irzaminli sômkhat, bungrua dang sângkhat le



¹¹Rângachak le sumrua bungrua murdi chu sângringa irzaminli a ni. Sal intâng hai chu Babulon ata Jerusalema an hruai hai lai khan Sesbazara khan hihai murdi hi a hong ichôi a ni.

Ezra 2

Sala intâng hong kêr nôkhai

(Neh 7.4-73)

¹Judai rama mi sala hruai, Babulon rêng Nebukadnezara'n a ihruai, Jerusalem le Judai rama kêr hai, mi tin mâni khua tianga kêr nôkhai chu hihai hi an ni.

²Hihai hi Zerubabela, Jesua, Nehemia, Seraia, Reelaia, Mordekaia, Bilsana, Mispara, Bigvaia, Rehuma, le Baasa hai an ni. Israel mi pasal sa tam lam chu:

³Parosa irchihai chu 2,172,

⁴Sefatia irchihai chu 372.

⁵Ara irchihai chu 775.

⁶Pahat-Moab irchi laia Jesua le Joaba irchihai chu 2,812.

⁷Elama irchihai chu 1,254.

⁸Zatua irchihai chu 945.

⁹Zakai irchihai chu 760.

¹⁰Bania irchihai chu 642.

¹¹Bebaia irchihai chu 623.

¹²Azgad irchihai chu 1,222.

¹³Adonikama irchihai chu 666.

¹⁴Bigvaia irchihai chu 2,056

¹⁵Adina irchihai chu 454.

¹⁶Atera, Hezekia an iti irchihai chu 98.

¹⁷Bezaia irchihai chu 323.

¹⁸Jora irchihai chu 112.



- ¹⁹Hasuma irchihai chu 223.
- ²⁰Gibara irchihai chu 95.
- ²¹An irchihai ata hi khuua omhai khom hiang hin an hong kîra: Bethlehem mihai chu 123.
- ²²Netofa mi chu 56.
- ²³Anathot mi chu 128.
- ²⁴Azmaveta mi chu 42.
- ²⁵Kiriath-Jarima, Kefira, Beerota mihai chu 743.
- ²⁶Rama le Geba mihai chu 621.
- ²⁷Mikmas mihai chu 122.
- ²⁸Bethel le Ai mihai chu 223.
- ²⁹Neboa mihai chu 52.
- ³⁰Magbis mihai chu 156.
- ³¹Elam danga mihai chu 1,254.
- ³²Harima mihai chu 320.
- ³³Loda, Hadida le Ono kho mihai chu 725.
- ³⁴Jerikova mihai chu 345.
- ³⁵Sena mihai chu 3,630.
- ³⁶Ochaihahi: Jesua in mihai laia Jedaia irchihai chu 973.
- ³⁷Imera irchihai chu, 1,052.
- ³⁸Pasura irchihai chu 1,247.
- ³⁹Harima irchihai chu 1,017 an ni.
- ⁴⁰Levi irchi: Hodavia irchi Jesua le Kadmiela irchihai chu 74 an ni.
- ⁴¹Hla saktuhai: Asafa irchihai chu 128 an ni.



⁴²Mikot hrungtu irchihai: Saluma irchihai, Atera irchihai, Talmona irchihai, Akuba irchihai, Hatila irchihai, Sobaia irchihai chu an rênga irchunin 139 an ni.

⁴³Nethinim hai: Ziha irchihai, Hasufa irchihai, Tabaota irchi,

⁴⁴Kerosa irchihai, Siaha irchihai, Padona irchihai;

⁴⁵Lebana irchihai, Hogabaha irchihai, Akuba irchihai;

⁴⁶Hagaba irchihai, Samlaia irchihai, Hanana irchihai;

⁴⁷Gidela irchihai, Gahara irchihai, Reaia irchihai;

⁴⁸Rezina irchihai, Nekoda irchihai, Gazama irchihai;

⁴⁹Uza irchihai, Pasea irchihai, Besaia irchihai;

⁵⁰Asna irchihai, Meunima irchihai, Nefisima irchihai;

⁵¹Bakbuka irchihai, Hakufa irchihai, Harhura irchihai;

⁵²Bazlutha irchihai, Mehida irchihai, Harsa irchihai;

⁵³Barkosa irchihai, Sisera irchihai, Tema irchihai;

⁵⁴Nezia irchihai, Hatifa irchihai.

⁵⁵Solomona siahlo irchihai: Sotaia irchihai, Hasofereta irchihai, Peruda irchihai;

⁵⁶Jaala irchihai, Darkona irchihai, Gidela irchihai;

⁵⁷Sefatia irchihai, Hatila irchihai, Pokeret-hazebaima irchihai, Amia irchihai:

⁵⁸Nitin mihai murdi le Solomona siahlo irchihai chu 392 an ni.

⁵⁹Khan mi 652 Delaia irchihai, Tobia irchihai, Nekoda irchihai, Telmela ata, Tel-harsa khuahai, Kerub khuahai, Adam khua le Imer khua ata hong suak an om sa,

⁶⁰khannisian Israel mi an ini le ni loi sui thei mahaia.

⁶¹Khan ochai irchihai laia Habaia irchihai, Hakoza irchihai, Gilead mi Barzilaia nâinu mi dôngma neia an irhming irput Barzilaia irchihaiin,



⁶²irlo suina irhming irziak hmu zoi mahaia, khasikin ochaia pom ni thei mahai.

⁶³Ram optuin Urim le Thumim hmang hranga ochai a om mâka chu bu irthiang nêk an khapa.

⁶⁴Mipui irbuk murdi chu 42,360 an nia,

⁶⁵an siahlo nupang le pasal 7,337 tep loiin: khan hla saktu nupang le pasal 200 a neihai sa,

⁶⁶An sakor chu 736 a nia; an sakuartung chu 245 a nia;

⁶⁷an saringsei chu 435 a nia. an sakuartung a chîn zât chu 6,720 an ni.

⁶⁸Jerusalema Rengpa in an tungin chu a ina ar lua senkhathaiin Pathian in chu a hmuna inding nôk hrangin thil irhlan an pêka.

⁶⁹An inei ang ang kha an pêka, a rêngin rângachak her 500, tangkarua her 2,800 le ochai inngâk hrang puan 100 a ni.

⁷⁰Kha tena chu ochai irchihai, Levia irchihai, vântâng senkhathai le hla saktuhai, mikot hrungtu le Nethinimhai chu an khuaa an om ta, Israel mi murdihai chu an omna khua chita an pana.

Ezra 3

Jerusalema Pathian biak phutna

¹Khan tha sarina a hong tung tena chu Israel mihai kho sûnga an om laiin, mihai kha irrualin Jerusalema an irbûma.

²Khanchu Jozadaka nâipa Jesua le a sangpa ochai le Sealtielâ nâipa Zerubabela le a urêng hai an hong thoia, Pathian mi Mosia dâna chuang angin hâlirvôm thil irhlanna'n Israelhai Pathian maichâm an siama.

³Khan maichâm chu a omna hmun pangaia khan an siaa; khataka omhai khan chi zaphai khomsian, maichâma khan Rengpa hrang hâlirvôm thil an inhlana.

⁴An irziak angin Kairêng kût an hmanga, a nitina tho hranga inkung angin a dôn te'n a nitin thil chu an irhlana.



⁵Kha zoiin chu a nitin thil inhlanhai, tha thar thil inhlanhai, Rengpa hranga sîn an inkung ang takin an sera; an nuam lam takaRengpa kuanga lôm takin an irhlana.

⁶Tha sarina, sîn khat nî ata hâlvôm thil inhlanhai Rengpa kuanga an iphut a ni; khannisianlân Rengpa Biak in lungphûm chu la phûm mahai.

Tempil sin inthar

⁷Lung tukhai le kuttheithiamhai sum an pêka; Persia rêng Kura iphal dân angin, Sidar thing Lebanon ata tuipua Jopa tena lei la hrangin Sidon le Tura mihai chu fâk nêk le sahriakhai an pêka.

⁸Khan Jerusalema Pathian in an intung hnunga kum hni tha hnina nî chu Sealtielâ nâipa Zerubabela hai, Jozadaka nâipa Jesua hai, an urêng ochai le Levia irchi danghai sala zôk murdi Jerusalema fehâi an rêngin an pûta; Levi irchihai chu kum sômhni chung tianga mihai chu Rengpa in sina hruaitu hrangin an inkunghaia.

⁹Kha tena chu Jesua chu a nâihai leh a urêng hai le Kadmiela nâihai le, Juda nâipa leh khan Pathian in sintuhai kha an ir-ôihâia: Henadada nâihai; an nâihai le an urêng Levia irchihai le,

¹⁰ Khan a sintuhaiin Rengpa in lung phûm an hor khamin chu ochaihai chu an tukrivo irbelin, bekul chôiin Levia irchi Asafa nâihai chu Israel rêng Davida'n tho hrang dân a lei inkung angin Rengpa inpâk hrangin an inngîrtirhaia.

¹¹ “Ama chu a saa, a lungkhamna khom Israel mihai chungâ om kumkhua a ti,” tiin Rengpa inpâk le a kuanga lômthu hrilin hlain an saka. Rengpa in lungphûm an phûm tâk sikin Rengpa an inpâkna khan mipuihai chu an khêk sup supâ.

¹²Ochai le Levia irchi leh a ina a lu u ual tamtakin, a in milui hmutuhai putarhai chu an mithmua hi lungphûm hi an hmu nôkin chu an chapa; mi tamtak lôm sikin an khêka:



¹³Khanchu mihai khan an lôm sik le an chap sika an ikhêk kha theitha loiin; mipuihai chu inring ualin an khêka, an irhâi chu hlatak ata inhriat thei a ni.

Ezra 4

Tempil sin irkalna

¹Juda mi le Benjamina mi râlhai khan, sala intâng zôkhain Rengpa Israelhai Pathian biak in an sinpuihai ti an inhriatin chu.

²Jerubabela le an in sînga a lu u ualhai kuang an va fea, an kuang, “Nangni sinpui kin ti; keini khomin nin izong ang hin, nin Pathian zong kin ti; hitaka ni hong hruaitu Assuria rêng Esarhadona an lal lai ata a kuanga kin irbôl ngai kêng,” an tia.

³Khannisianlân Zerubabela le Jesua le Israelhai in sînga ulianhai leh a danghaiin an kuang, “Kin Pathian in sinna hin, nin kopna hrang ite lampui om mah; Persia rêng Kura’n thu a ni ipêk ang hin keinihai vaiin kêng Rengpa Israelhai Pathian in chu kin isin pe hrang,” an tia.

⁴Khanchu kha rama mihai khan Judahai kut an irzaltir pehaia, an inbuaihai ta.

⁵Persia rêng Kura inlal sîng chu, Persia rêng Daria inlal dênin an sintumhai sin thei loi hrangin a hrilpui hrang irbe’n an om ta.

Jerusalem inding le hnôl thu

⁶Khanchu Ahasuera inlal a hor phut le khan Judai le Jerusalema omhai sêlna lekha an phuaa,

⁷khan Artazerzia inlal laiin Bislama hai, Mithredata hai, Tabeela hai le an rual danghaiin Persia rêng Artazerzia kha lekha an thona; an lekha irziak chu Aramaik chong, Aramaik horopa irziak a ni.

⁸Hruaitu Rehuma le lekha ziaktu Simsaia’n Jerusalema mihai sêlin Persia rêng Artazerzia chu hiang hin lekha an thona:

⁹Lekhathontu chu: Hruaitu Rehuma le lekha irziaktu Simsaia le a rualhai roirêltu danghai, ram optu Persia mihai, Elam rama om ngai Erek mihai, Babulon mi le Susa mihai;



10mi roiinpui Asurbanipala'n suaka hruai Samaria khuaa le Eufrates tui kôla tâng tea omhai kha an ni.

11Reng Artazerzia chu hiang hin lekha an thona, "Inlaltak Artazerzia ni siahlo Eufrates tui kôla omhaiin chubai nang kin mûk.

12Ni kôla Juda mi ki kuanga honghai kha Jerusalema an hong; khua mi he lâkloi ngai le sualnahai an inpunga, a kul khom an pai tâka, a lungphûm chu an siam insa nôk tah ti rêngin inhre ri se.

13Hi khua hi an indinga a kulhai an siam zoiin chu, omna man chôina, thil man le irnêng manhai chôî nuam no nihaia, a hnungkhôn taka chu rênghai hrangin siatna vai kêng a ini hrang ti rêngin len hre ta ri se.

14Reng michi inliak kin nia, khasikin rênghai satloina hmu hi keini hrangin fel loitak ni a ti;

15Khasikin ni pi le puhai thil irsinsiana irziakna lekhabu chu zongin hong hmu ni ta, hi khuaa mihai hi mi irhel le tukullian song le an rênghai le an ram ta hranga ichiom tak an nia, kumtuangin an irhela. Khasikin hi khua hin siatna a itung a ni, ti lekha thonin rêng kin inhriattir a ni.

16Hi khua hi an indinga a kulhai a'rzoi vingin chu tui râl tianga ramhai chungu chu ite ircham nei thei ta no chi nih, ti rêng nang kin inhriattir," an tia.

17Khanchu inlaltak khomin hiang hin lekha a thonhaia, "Hruaitu Rehuma lekha irziaktu Simsaia le an rama rual dang Samari le Eufrates tui tâng rama omhai chubai nangni ki mûk.

18Nin lekha hong thon kha, ki kôla fel takin an tepa.

19Khanchu thu ki pêkhaia, hi khua hi tian ata rêng chungu hin an irhela, khasikin nuarna le buaina a om ti kin hmusuak a ni.

20Jerusalema khan rêng sin tho theihai, varâl tianga roirêltuhai tenin an lei om tâka; khanchu omna manhai, thil manhai an le'rfuang ngai a ni.



²¹Khaang mi hai kha irngamtir unglân thu kin sua mâka chu kua kha inding no ri sehai.

²²Ir-ial ta no roi: Itho ual mo rêng hai hrangin thil saloi a hong ipung hrang?" a tia.

²³Khanchu rêng Artazerzia lekha kha Rehuma le lekha irziaktu Simsaia le a rual dang hai makunga an tep zoiin chu irhnot takin Jerusalema Juda om hai kuang an fea, thuneina insuain an inmâksantirhaia.

²⁴ Kha tena chu Jerusalema Pathian in an isin chu an mâksana; Persia rêng Daria inlal kum hnina dênin an imâksan a ni ta.

Ezra 5

Tempil sin phut nôkna

¹ Kha zoroa khan deipu inhni Hagaia le Idoa nâipa Zakaria haiin Judai ram le Jerusalema Juda om hai laia Israel hai Pathian irhmingin thu an hrila.

² Khanchu Sealtiel nâipa Zerubabela le Jozadaka nâi Jesua'n Jerusalema Pathian in chu an hong sin phut nôk tâka; khan an kôla Pathian deipuhai chu anni changpuihai hrangin an oma.

³ Khaangin tui varâl tianga ram optu Tatenai le Sethar-bozenai le an rual hai an kuang an va fea, hiang hin an va ti pehaia, "Hi in sin nôk hrang le hi kul zoi hrangin tu'n mo thu nangni a ipêk?" an tia.

⁴ Khanchu hiang hin an kuang, "Hi in sintuhai hi an irhming tuh hai mo an ini?" kin tia.

⁵ Khannisianlân an Pathian mit chu Juda ulian hai chung a chuma, Daria kuang an thu kha a tunga, a sâмна an inhriat nôk mâka chu an ram optuhai khan inmatir hai ual mahai.

⁶ Tui varâl ram optu Tatenai le Sethar-bozenai le a rual hai, varâla om, Apharsak-haiin rêng Daria kuang lekha an thona, hiang hin an irziaka:

⁷ "Reng Daria kuang irngeina om ri se:



⁸hi hi rêngin len hre ri se, Judai rama Pathian roiinpui takin, lung liantak taka sin le thing banga sung, takirtâina insua an lei idoina hmun kin fea.

⁹Khanchu hi in sin hrang le kul zoi hrangin tu'n mo thu nangni a ipêk? tiin an ulianhai kin irdona.

¹⁰An hruaituhai irhming kin irziaka, kin infelhai theina hranga an irhming nangni kin irdon a ni.

¹¹“Hiang hin an ni sâma, ‘Irnêng le irvân Pathian siahlohai kin ni, kha dôr kuma sin, Israel rêng roiinpui tak inkhat lei isin sai kin isinsiam nôk a ni.

¹²Khannisianlân kin pi le puhaiin irvân Pathian kha a ning an inmurtir le a milung an inchuk no sikin Kaldai mi Babulon rêng Nebukadnezara kuta a pêka, hi in hi a insiat a nia, mihriamhai chu Babulon tiang a hruaia.

¹³ Khannisianlân Babulon rêng Kura inlal kumin, rêng Kura'n hi Pathian in sin insa nôk hrangin thu a pêka.

¹⁴Khan Pathian ina rângachak le sumrua siam bungrua Jerusalem Pathian ina mi Nebukadnezara ilâksuak, Babulon biak ina a isiahai kha rêng Kura'n Babulon biak in ata a lâksuak nôka, mi inkhat ar hming Sesbazara, ram optu kuang a pêka;

¹⁵A kuanga khan hi bungruahai hi lan la, fe ro, Jerusalem biak ina sian lân, khan biak in chu a hmun pangaia sin ni ri se, a tia.

¹⁶Khanchu Sesbazara kha a fea, Jerusalem biak in lungphûm chu a phûma, khatak ata chu atûn ten hin sin a ni ta; khannisian la'rzoi loi a la ni maia.

¹⁷“Khan rêngin sa a ti a ni'n chu, a iti lam a ni le ni loi, Babulon sum ina mi kha hong zong sianlân, rêngin hi thua hin a inuam lam ni hon hril nôk ri se,” tiin.

Ezra 6

Reng Kura thupêk tep suakna

¹Khanchu rêng Daria'n thu a pêka, Babulon-a an irchon bukkhômna, lekhabu in chu an zonga.



²Khanchu Media biala Ekbatan khuuaa rêkin chu hi thu chuangna hi an hmu suaka:

³“Jerusalem Pathian in chungchânga rêng Kura’n an lal irphut kumin hiang hin thu a pêka: an irbôlna ngai in chu siaminsat nôk ni sian; a lungphûm khom dettaka phûm ni sianlân.

⁴A’rsânglam mûk sômruk, a’rza lam khom mûk sômruk, lung lianpahai zora thuma irchuan hnungin, thing phêk leh irmîltir hrang a nia, a sinna hi rêng sumpuan ata pe hrang a ni.

⁵Khan Pathian ina rângachak le sumru bêl le bûr chu Nebukadneza’n Jerusalem biak in ata a ilâksuak Babulon-a omhai khom pe kîr nôk ni sian, Jerusalema an omna hmun chita sia ni sianlân, Pathian ina hrê hrang a ni,” tiin.

Reng Daria’n a sin sunzom thu a pêk

⁶Reng Daria khan hiang hin a sâma: “Eufrates nitâk tianga ram optu Tatenai hai, Sethar-bozenai hai le an isinpui Eufrates nitâk tianga omhaio: Tempil chu hong nâi no roi,

⁷hi Pathian biak in an isin nôk hi ite tihai ta no roi; Judahai optu le Juda hruaituhaiin hi Pathian in hi a hmun pangaia sin ri sehai.

⁸Kha in an isin nôkna hranga changpui hrangin thu nangni ki pêk. Sin a’rngam loina hrangin Eufrates tuidop tianga bialhaiin, rêng sum hranga an isia kha pe lat hrang a ni.

⁹Irvân Pathian ta hrangin hâlrivôm thil inhlan hrang an innang murdi, sehrâtchaltuai, Belrachal le a tê, fachî, uain, sahriak hai, Jerusalema deipuhai thu ang takin a nitina pe ngêt hrang a ni.

¹⁰Khan kêng irvân Pathian kha mirimhoi irbôlnahaiin an irhlan thei hrang, rêng le a nâihai an dam sôt theina hrangin an ichongchai thei pehai hrang.

¹¹Mi tukhom hi thu indanglamtirtu chu a ina pakhalâi kaidoka, ama chu khatak khan inkhâi ni ri se, hi sika hin a in chu êk painaa siam ni ri seh ti thu nangni ki pêk.



¹²khan khataka ama irhming inomtirtu Pathian khan Jerusalema Pathian in insiat tuma kut thâkhai chu, an rêng hai le nam om murdihai inboipai ving hrang a ni. Kei, Daria hin thu ki pêk a nia; a zôm khom an izôm zôi zêl hrang a ni.

Tempil inhlan

¹³Khanchu tui varâl tianga ram optu Tatenai le Sethar-bozenai le a rualhaiin rêng Daria lekhaton sikin, khang tak khan an tho tâka.

¹⁴ Khan deipu Hagaia le Idoia nâipa Zakaria thuhiril sikin Juda ulianhaiin an sin tâka; Israelhai Pathian thupêk ang le Persia rêng Kura le Daria le Artazerzia hai thupêk angin an sina, an zoi tâka.

¹⁵Kha in kha rêng Daria inlal kum rukna Adar tha sùn thum niin chu zoi a ni tâka.

¹⁶Khanchu, Israel irchihai, ochaihai, Levia irchihai le sala intâng hong zôkhaiin, kha Pathian kha lôm takin inhlanna an hmang tâka.

¹⁷Khan, kha Pathian in inhlanna hrangin sehrâtchal irzakhat, kêlbelrachal irzahni, bêlrate irzaminli an irhlana; khan Israel mi om murdi'n an sual irbôlna hrangin kêlchal sôm khat inhni seng an pêka.

¹⁸Mosia lekhabua chuang angin Jerusalema Pathian sintho hrangin ochaihai, Levi irchihai chu a pôlin an inomtirhaia.

Ferkân kût

¹⁹ Khan sala intâng zôkhai khan tha khatna, sùn sôm sùn minli nî chu Ferkân kût chu an hmang tâka.

²⁰Ochaihai le Levi irchihai chu an bing in an lei irthiang tâk sikin, an rêng in irthiang an ni tâka. Khanchu ferkân kût na hrangin sala intâng zôkhai leh an urêng ochaihai le, anni ta hrangin an that tâka.

²¹Israel irchi sala zôk nôkhai le Rengpa Israelhai Pathian zong hranga kha rama Pathian thu zômloi porchena ata irthianga, anni zômhai murdi kha an fâka,



²²chol koploi bai kût chu lôm takin sùn sari an hmanga: Rengpa'n anni kha an lômtirhaia, Pathian, Israelhai Pathian in sinna hrangin an kuthai inhrâtir hrangin Assuria rêng lungrîl chu anni tiang a irheitir a ni.

Ezra 7

Ezra Jerusalema a tung

¹Khan kha irzoiin chu Persia rêng Artazerzia inlal laiin Ezra chu Babulon ata a hongga; ama hi Seraia nâi a nia, ama hi Azaria nâi a nia, ama kha Hilkia nâi a ni,

²ama hi Saluma nâi a nia, ama kha Zadoka nâi a nia, ama kha Ahituba nâi a ni,

³Ama kha Amaria nâi a nia, ama kha Azaria nâi a ni, ama kha Meraiota nâi a ni,

⁴ama kha Zerahia nâi a ni, ama chu Uzia nâi a ni, ama kha Bukia nâi a ni,

⁵ama kha Abisua nâi a nia, ama kha Finehasa nâi a nia, ama kha Eleazara nâi a nia, ama kha chu ochai rêng Arona nâi a ni:

⁶Ezra chu lekha irziaktu, Rengpa Israelhai Pathian ipêk Mosia dân inhre mi tak a ni. Rengpa a Pathianin an ditna sikin a izong murdi a pêk maia.

⁷Reng Artazerzia an lal kum sarina khan Israel irchia mi senkhat, ochai senkhat, Levi irchi senkhathai, hla sak ngai mi senkhat hai, mikot hrungtu senkhathai le Nethinim mihai chu Jerusalema an hong fea.

⁸Khan, rêng kha kum sari an lal kum, a tha ringa nî chu Jerusalema a hong fea.

⁹Tha khatna sùn khat niin Babulon ata a suaka, Pathian hruaina zârin tha ringana a sùn khat nî chu Jerusalem a tung ta.

¹⁰Ezra'n Rengpa dân chu inhriata zômin le Israel hruaituhai lei inkung le roirêlhai irchûtir hrangin a lungrîla a'rvei maia.

Reng Artazerzia'n Ezra lekha a pêk



- ¹¹Khan, ama hi rêng Artazerzia ochai, Ezra lekha irziaktu Rengpa thupêk thu le Israel mihai hranga thu'nkung irchû kuanga lekha thonna thu chu a ni.
- ¹²“Renghai rêng Artazerzia'n, ochai Ezra, irvân Pathian dân irziaktu chubai ki mûk.
- ¹³Ki ram sînga Israel mi murdi le ochaihai le Levi irchi Jerusalema mâni irzuknaa fe nuamtuhai chu ni kuanga hong hrangin thu ki pêk.
- ¹⁴Pathian dân ang taka Judai ram le Jerusalem thurchi inhriat infel hrangin.
- ¹⁵Jerusalema om Israel Pathian, mâni nuam lam ang taka an ipêk sum tangka le rângachak chôi hranga rêng le roirêltu sarihaiin nang an itîr a ni,
- ¹⁶Babulon ram tina ni ihmu dôr tangka le rângachak, mâni phal taka mipuihai le deipuhai ipêk, Jerusalema an Pathian in hranga lômtaka an ipêk leh;
- ¹⁷khasikin hi tangka hin sehrâtchal, kêlbelrachal, kêlbelrate, fâk le nêk hrang thilinhlan hrang leh irchôkin lân, Jerusalema nin Pathian ina maichâma ni inhlan hrang a ni.
- ¹⁸Khan tangka le rângachak hmang banhai chu nin Pathian nuamlam angin, nang le ni urênghaiin a sa nin tihna taka hmang roi.
- ¹⁹Khan ni Pathian in sin thônâ hranga bungrua nang an ipêkhai chu Jerusalema Pathian kuang inhlan roh.
- ²⁰Khan, ni Pathian in hranga hmang hrangin, a nangna a omin chu rêng sum ina kha hmang zel roh.
- ²¹“Kei rêng Artazerzia ngêtin tui varâl tianga sum enkoltuhai chu, ‘Ochai Ezra irvân Pathian dân irziaktuin a izong murdi chu,
- ²²tangka talênt irzakhat, bu khom irzakhata varin, uain khom botol irzakhat, sahriak khom irzakhat, chîmu chu a zât ti ual loiin pehai zêl roi,’ tiin thu ki pêk.



²³Irvân Pathianin thu a ipêk murdi chu, khang takin irvân Pathian in hrangin tho ri se; ningmurna chu rêng le a nâihai ram sînga hin itho ual mo om a ta?

²⁴khan ochaihai, Levi irchihai, hla saktuhai, mikot hrungtuhai, Nethinim hai, ni Pathian ina sinthotuhai hi inhminhai ro, thil man omhai, irnêng manhai khom chôi ta loi hrangin nang kin hriattir.

²⁵“Khan nang Ezra, niinei Pathian vârna nang pêk angin tui varâl tianga omhaiin roirêl theina hrangin an hruaituhai le roirêltuhai, mi Pathian dân inhriat mi inthanghaiin lân, an hriat loihai chu irchutirhai roi.

²⁶Khan mi tukhom ni Pathian dân le rêng dân zôm loihai chu thi thei rakin, ram ata inhnotsuakin mani; an bungrua lâkpai pehaiin mani, intângna ina omin mani, an chungaroirêlna om zôi hrang a ni,” a tia.

Ezra'n Pathian an pāk

²⁷Jerusalema Rengpa in en inhoitir hrang rêng chu, hianga lungrîl invongtirtu le rêng le roirêltu rêng milian inlârtakhai kôla ki chungarungkhamna insuatirtuRengpa, kin pi le puhai Pathian chu inpâkin om ri se.

²⁸Khan Rengpa ki Pathianin a nin rena, a nin hrâtira, khanchu a kuanga hong fepui hrangin Israel laia mi hruaitu u ualhai kin thang suakhai tâka.

Ezra 8

Sal ata hong kîr nôkhai

¹Hihai hi rêng Artazerzia inlal laia Babulon ram ata ki kuanga honghai, in sîngkua le an irchihai irhming chu a ni.

²Finehasa irchihai laia Gersoma; Ithamara irchihai laia Daniela; Davida irchihai laia Hatusa;

³Sekania irchihai; Parosa irchihai laia Zakaria; pasal irzakhat sômringahai le.

⁴Pahat-moaba irchihai laia Zerahia nâi, Eliehoenaia; pasal irzahni le.

⁵Sekania irchihai laia Jahaziela a nâi, pasal irzathum le.

⁶Adina irchihai laia Jonathana nâi Ebeda, pasal sômringahai le.



- ⁷Elama irchihai laia Athalia nâi Jesaia, pasal sômsarihai le
- ⁸Sefatia irchihai laia, Mikaela nâi Zebadia, pasal sômriathai le.
- ⁹Joaba irchihai laia Jehiela nâi Obadia, pasal irzahni sômhleiriat hai leh.
- ¹⁰Selomita irchihai laia Jasifia nâi pasal irzakhat sômrukhai le.
- ¹¹khan Bebaia irchihai laia Bebaia nâi Zekaria, pasal sômhni kiriathai leh.
- ¹²Azgad irchihai laia Hakatana nâi Johanana, pasal irzakhat sômkhathai le.
- ¹³Adonikama irchihai laia an irhming chu hihai hi an ni; Elifeleta, Jeuela, Semaia, pasal sômrukhai leh.
- ¹⁴Bigvaia irchihai laia Uthaia le Zakura, pasal sômsarihai le

Tempil sintho hrang Levia irchi Ezra'n a buk

- ¹⁵Ahava tuidunga ki buk khômhaia; kha khan sùn thum kin oma; mipuihai le ochaihai ki enhaiin chu, Levi irchihai zel hmuhai ta ma unga.
- ¹⁶Khasikin a hruaitu u ualhai, Eliezera, Ariela, Semaia, Elnathana, Jariba, Elnathana, Nathana, Zekaria, Mesulama hai ki koihaia: mi irchutu Joiariba le Elnathana hai khom.
- ¹⁷Khan Kasifia hmuna hruaitu Idoa kuanga ki tîra; kin Pathian ina sintho hrang hong hruai hranga Kasifia hmuna Idoa le a urênghai Nethinim hai kuanga an hong tîrhai hrang ki hrilhaia.
- ¹⁸Khan Pathian inrenna sikin Issekela; Mahlia irchihai laia; Israel nâipa, ama nâipa Levia; Serebia, a nâihai le a urêng sômhleiriathai le:
- ¹⁹Hasabia, Meraria irchihai laia Jesaia, le a urênghai le an nâihai sômhnihai le;
- ²⁰Nethinim hai, Davida le an milianhai le Levia irchi a sintho hranga irpêkhai laia mi Nethinim hai irzahni sômhnihai a ni hruai pea: an rênga irhming irziak an ni.

Ezrahai bu ngheia chongchaina



²¹Khanchu kin Pathian makunga kin irhnuaia; a kuanga keini le kin nâihai leh kin bungrua murdihai kin chôî theina hrangin Ahava tuidunga khan bu nghei hrang thu kin inpuanga.

²²“Kin Pathian inditna chu ama zongtuhai murdi chung a sana hrangin an langtir maia; a sinthotheina le a ningmurna chu ama mâksantuhai chung a langa,” tia rêng kuanga kin hril tâk sikin, lampuia kin râlhai ata ni san hrangin ni sipai le sakor chung chuang mi rêng kuanga zong chu inzak ki tia.

²³Khanchu bu kin ngheia, kin Pathian kuanga zong tatakin; kin izongna chu hlo a nin chuktir pea.

Tempil sinna hranga thilpêk

²⁴Khanchu ochai bîk ualhai laia mi sômhleihni Serebia le Hasabia le an urêng hai laia mi sôm khat kin danghaia,

²⁵rêng le a roirêltu, a milianhai, le khataka om Israelhaiin kin Pathian in hranga thilinhlan sumru, rângachak, bungruahai ki buka, kin hlana;

²⁶ki ibuk sînga an kuta ki inhlan chu sumru, talênt irzaruk sômringa, bungrua talên irzakhat; rângachak talênt irzakhat;

²⁷rângachak berbu sômhni, sumthîr sângkhat chitin; dâr irtêk enhoi tak, rângachak anga hlu bungrua inhni a nia.

²⁸An kuang, “Rengpa hranga irthiangtir nin nia, bêlbûrhai khom nin irthiangtir a ni; sumru le rângachak hai hi Rengpa, nin pi le puhai Pathian hranga, mâni nuam thua irhlan a ni.

²⁹Ochai hruaitu inchang ualhai le Levi irchi le Israel mi in sîngkua ar luahai laia Jerusalema, Rengpa ina tentan an sin mân chu hrung unglân, fe roi,” ki tia.

³⁰Khanchu ochaihai le Levi irchihaiin Jerusalema kin Pathian ina chôî hrangin sumru le rângachak le bêlbûr bukhai chu an lâk tâka.

Jerusalema kîr nôkna



³¹Khanchu Jerusalema kîr nôk hrangin tha khatna, sùn sômhleihni nia chu, Ahava tuidung ata kin suaka; kin Pathianin a nin rena, râlhai ata le lampuia ni len ruanghai ata a nin zôktira.

³²Jerusalem kin tung tâka, sùn thum sôl irngamin kin oma.

³³Khan sùn minli nî chu, sumruhai, rângachak hai, bungruahai chu kin Pathian inah bukin ochai Uria nâipa Meremota kuta kin irhlana; a makunga khan Finehasa nâipa Eleazara a oma; an kôla khan Levia irchi Jesua nâipa Jozabada le Binuia nâipa Noadia hai an oma:

³⁴Tep le varh ving a nia; an ivarh zât khom an irziak vinga.

³⁵Sal ata zôkhain Israelhai Pathian kuanga hâlrivôm thil an inhlana, Israel mi murdihai hrangin sehrâtchal sômhleihni, kêlbelrachal sômkuak kiruk, Belrate sômsari sari; sual irbôlna kêlchal sômhleihni: hihai murdi hi Rengpa kuanga hâlrivôm thilinhlan ving an ni.

³⁶Khan rêng thu'nkunghai chu rêng ulianhai le varâl tianga ram optuhai an hrilhaia; anni'n mipuihai changpuiin Pathian in sin chu an suiirzompuihai tâka.

Ezra 9

Nam dang leh irnei Ezra'n a thiarthâk

¹Khahai kha a'rzoiin chu, mi lianhain, "Israel mihai le ochaihai, Levi irchihai chu hitaka mihai leh hin ite danglamna boiin, Kanaan hai, Hit hai, Periz hai, Jebus hai, Amon hai, Moab hai, Aigupta hai, Amor hai sintho intirom an itho angin an thoa.

²An nâinuhai khom an nâipasalhai leh an irneipola; kha irchi irthianghai kha, hi rama mihai leh hin an irneipol tâka; an milianhai le roirêltuhai hi irneinaihai hin a tu tak mo an inih ti an ni hong hrila.

³Kha thil kha kin hriatin chu, ki songkol le ki diar ki'r-ekthêra, ki sam le ki hnermul ki phôia, chardongin ki toirak tâka.



⁴Khanchu sal intâng zôkhai inchâina sika Israelhai Pathian thua irthiang murdihai chu ki kuang an hongga; khohloi tianga irbôlna zoro phâk dênin a lô lam inhre loiin ki toi raka.

⁵Khohloi tianga irbôl zoroa khan beidong pumin songkol le diar chet pumin ki thoia; ki khûksadela, Rengpa ki Pathian tiang ki bân ki phara;

⁶“O ki Pathian, nangma tianga hor hei hi kin zaka, ki hmâi a isen hlut hlut ngai a ni, ki Pathian, kin inchâinahai chu ni delpha thei rakin a punga, kin thei loinahai hin irvân a suna.

⁷Kin pi le puhai ata atûn ten hin theiloi kin ichang zoi a ni; kin inchâinahai sikin kin rêng hai le kin ochaihai le ram danga rêng an ichela, khandaia thathai, sala intâng hai, inrûknahai kin tonga, a vuanhaia kin iom ang hin.

⁸Atûn hin kin Pathianin kin mit an vârtira, kin sal omna a nin hriat suaktira, a hmun irthianga khan a nin om indet theina hrangin a la om sunhai a nin suaktira, Rengpa kin Pathian lungthungna kin la idong a ni.

⁹A’rh mang zoi hrang chu kin nia; khannisian kin Pathianin ar hmang zoi hranga kin om laiin, ni’rng hil maka, nin hartir le kin Pathian in indingtir nôk, a siat tâk irvo insatir nôk hranga Judai ram le Jerusalema Kul nei hranga Persia rêng mithmua kin chungga inrenna a zuang irzâm tira.

¹⁰“O kin Pathian, atûn hin imo kin ihril ta hrang? Ni thupêkhai kin mâksan tâk sikin,

¹¹ni siahlo deipuhai hmanga, nin fena hrang, nin ram lua hrang rama mi omhai, porchena sikin a porche tâka, hmun tin kil tin intir a iom zoi a ni ta.

¹²Khasikin nin nâinuhai khom an rêng nâipasalhai irneitirhai ta no roi, nin nâinuhai khom an nâipasalin nei ta nohai sian, an raifâna le a hoi an itihna ite bê’n bê ta no unglân, nin hrât sikin, kha rama thil kha nin fâka, kumtuanga nin nâihai leh nin irdîn suak theina hrangin.

¹³Kin sintho insual sikin le inchâinahai sikin kin chungga hianga thil a hong itung a nia, nang kin Pathianin kin inchâinahai nêka irnêpin deng ni nin thei zoia khom a la omhai khom ni ni la hôi pe ti inhre maiin,



¹⁴ni thupêk kin insiat zoi khom hin hianga thil intirom thotuhai leh hin kin la irnei mai hrang ma ni? A zôk le a khêl thei om loiin, irhmang ving hrang anga kin chung a hin ni ning mo inmur no ni?

¹⁵O Rengpa Israelhai Pathian, nang chu ni fela; a la zôk thei kin nia, a vuana keini ang hin, irngai ro, theiloi changin ni kôla kin oma, hihai sikin tûte ni makunga ngîr thei kin iom loi a ni,” ki tia.

Ezra 10

Irnei ta loi hranga dân siam

¹Pathian in tianga irheiin khûksadela chapin Ezra'n a chongchaia, ngaidam ar zong lai takin a kôla khan Israel mi, mi tamtak, nupang pasal le nâipang pâl an hong irbuka; mipuihai kha a sân an chapa.

²Elama irchi laia mi Jehiela nâipa Sekania khan Ezra kuang, “Kin Pathian chung a hin, thil kin tho'nsual tâka, hi rama nam dang nupang dôngma'n kin neia; khannisianlân Israel mihai hrangin hi thua hin sabeina a la iom a ni.

³Khasikin tho, ka pu le kin Pathian thupêka inthing murdi'n, hi mipuihai anni lai ata suak murdi hi teipuihai hrangin ei Pathian kuanga thuthung ei ti; ama khom hi dân ang taka tho ni ri se.

⁴Tho hi thu hi nangma chung a irngat a nia, keini khom nangma tianga om kin nia, hâitakin omin lân tho roh,” a tipuia.

⁵Khanchu Ezra kha a thoia, ochai irchi u ualhai le Levi irchi le Israel mi murdihai chu, khaanga tho hrangin khomâk a'rsâm tirhaia. Khomâk an irsâm tâka.

⁶Khanchu Ezra Pathian in tianga irhei kha a hong thoia, Eliasiba nâipa Jehohanana tentan omna hmuna a lûta; kha khan zân khovârin sala hong zôkhai thilsual tho sikin irngaisiatin bu nêk loiin khua an vâra.

⁷Khan Judai ram tin le Jerusalema sala zôk murdihai laia, Jerusalem-a inkhôm vinga;



⁸mi tukhom an milianhai le upahai thupêk anga, sîn thum sînga hong loihai chu a bungrua murdi khitpai pea, ama khom sal intâng zôkhai lai ata, inhnotpai ni a tih, ti thu an inpuanga.

⁹Khanchu Juda mi le Benjamina mihai chu, kha sîn thum sîngin Jerusalema an irbuk vinga; kha kha a tha kuakna, sîn sômhni ni a nia; Pathian in mikot irzataka khan mipuihai kha an toia, kha thu le ropuivânsâng tho sikin an inthing sup supa.

¹⁰Khan ochai Ezra chu a ngîra, an laia, “Thil nin lei tho inchâi tâk sikin, Israel mihai thei lolina belsa’n nam dang nupanghai dôngma’n nin neia.

¹¹KhasikinRengpa nin pi le puhai Pathian kuanga khan ngaidam irzong unglân, a nuamlam sin ta roi; hi rama nam dang le an nupanghai ata hi irdîn ta roi,” a tia.

¹²Khanchu mipui murdi’n an sâma, inringtaka khêkin, “Kin chungchâng thu chu ni iti ang takin kin itho ngêt hrang a ni.

¹³Khannisian mi kin tam hraia, rotho lai tak a ni sikin, pên tiang hin om thei ta ma unga, khan sîn khat sîn hni sînga tho zât lak a ni no sikin: hi sika hin a sân kin lei inchâi ok tâka.

¹⁴Mipuihai irthûlin kin milianhai inkung ni sianlân, kin chung Pathian ningmurnahai hi a heka, hi thu hi kin infel mâka chu, kin khuua nam dang dôngma lâkhaiin khuua tina an ulianhai le upahai an hong hrang zoro indanga hin hong ri se,” an tia.

¹⁵Asahela nâipa Jonathana le Tikva nâipa Jahzeia hai vaiin hi thu hi an sêla: Levi irchi Mesulama le Sebethaia’n an changpuia.

¹⁶Khan sala intâng zôkhaiin khang tak khan an tho tâka. Ochai Ezra’n in sîngkuua a luhai irhming hmor a’rziak indang vinga; tha sômna sîn khat nî tena chu kha thu kha ngaitua’n an irbukkhôma.

¹⁷Khan tha khatna sîn khat ni chu nam dang nupang dôngma neihai chu an infel thei tâka.

Nam dang dôngma lâk chungchâng



- ¹⁸Khan ochai nâihai laia nam dang nupang dôngma lâk an inhriathai chu: Jesua le a urênghai laia Jozadaka nâipa le a urêng Maaseia, Eliazara, Jariba, le Gedalia hai
- ¹⁹Annihaiin an dôngmahai mâk hrangin thu an inkunga; khan an thei loina sikin, an thei loi changna chu belrahai pâla mi belrachal inkhat leh irbôlin.
- ²⁰Khan Imera irchihai laia Hanania le Zebadia.
- ²¹Harima irchihai lai ata Maaseia, Elija, Semaia, Jehiela, Uzia hai.
- ²²Pasura irchihai lai ata Elioenai, Maaseia, Ismaela, Nethanela, Jozabada le Elasa an nia.
- ²³Khan Levi irchi laia Jozabada, Simeia, Kelaia, Pethahia, Juda le Eliazara hai an nia.
- ²⁴Hlasaktuhai laia Eliasiba a nia, mikot hrungtu laia Saluma, Telema le Uria hai an nia.
- ²⁵Israelhai laia Parosa irchia mi Ramia, Izia, Malkija, Mijamina, Eliazara, Malkija le Benaia hai an ni.
- ²⁶Elama irchia mi Matania, Zekaria, Jehiela, Abdia, Jeremota, Elija hai.
- ²⁷Zatua irchi laia mi Elioenai, Eliasiba, Matania, Jeremota, Zabada, Aziza hai,
- ²⁸Bebaia irchia Jehohanana, Hanania, Zabaia, Ahlaia hai
- ²⁹Bania irchi laia Mesulama, Maluka, Adaia, Jasuba, Seala, Jeremota hai.
- ³⁰Khan Pahat-Moab irchia mi Adna, Kelala Benaia, Maaseia, Matania, Bezalela, Binuia, Manasea,
- ³¹Harima irchi laia Eliazara Isija, Malkija, Semaia, Simeona hai;
- ³²Benjamina, Maluka, Semaria, hai.
- ³³Hasuma irchi laia Matenaia, Matata, Zabada, Elifeleta, Jeremaia, Manasea, Simeia hai,
- ³⁴Bania irchi laia mi Maadaia, Amrama, Uzia hai;
- ³⁵Benaia, Bedeia, Keluhia hai;



³⁶Vania, Meremota Eliasiba hai;

³⁷Matania, Matenaia, Jaasua hai;

³⁸Bania, Binuia, Simeia, hai;

³⁹Selemia, Nathana, Adaia, hai;

⁴⁰Maknadebaia, Sasaia, Saraia, hai;

⁴¹Azarella, Selemia, Semaria, hai;

⁴²Saluma, Amaria, Josefa hai.

⁴³Neboa irchia mi Jeiela, Matithia, Zabada, Zebina, Idoa, Joela, le Benaia hai an ni.

⁴⁴Hihai murdi hin nam dang dôngma lâk an ni; senkhathaiin an dôngmahai leh nâi le tê lei nei tâk an ni.



Nehemia

Nehemia 1

Nehemia'n Jerusalem a'rveina

¹Hakalia nâipa Nehemia thuhai chu hiang hin a nia, kum sômhina, Kisleu thaa rêng khopui Susa-ah ki om laiin,

²ki urêng inkhat Hanania le Judai ram ata mi senkhat an hong; khan Judahai sala om a la damhai thurchi le Jerusalem thurchi ki'rdonhaia.

³Khan ki kuang, "Sala om suakhai chu, kha rama khan vânduai taka insîrinsiatin an oma: khan Jerusalem banghai khom a chim rem ruma, a inkhârhai khom a kâng ta," an tia.

⁴Khan hiang hi a nia, kha thu kha kin hriatin chu ki toiraka, ki chapa, sîn iza vêl mani chu a sîn ki ngûipua; bu ki ngheia, irvân Pathian makunga ki chongchaia,

⁵"O Rengpa, irvân Pathian, Pathian roiinpui le ichiom, nangma lungthunga ni thupêk pomtuhai chung a thuthung intunga lungkhamna inlangtu;

⁶Israel irchihai sualna, ni chung a kin inchâina ngaidam ki'rzong sùng hin ni mit mengin ni mikuar lei sungin lân, ni siahlo chongchaina, a sîn a zânin ni siahlo Israel irchihai ki zong pehai hi, le'rngaiin lân; kei leh ka pa in sùng mihai kin sual tâka.

⁷Ni chung a saloi takin thil kin lei tho tâka, ni siahlo Mosia kuanga ni thupêkhai le ni dânhai lak lei zôm ta ma unga.

⁸ Ni siahlo Mosia kuang, 'Nin insiatnahai sikin nam tin laia irthekindarh nin ta;

⁹ aniachu keima tiang nin hong kîr nôka, ki thupêkhai nin poma, nin zômin chu, nin laia mi, irvân tena inhnot ni khom sianlân, khatak ata khom nangni bukkhôm nôk ki ta, ki'rhming omna hmun ki indangna khan nangni hruai nôk ki ti,' tia ni thupêk kha irngaihoi takin inhre mai roh.



¹⁰“Khan hihai hi ni siahlohai le ni mihai, ni sintho theina irkhêltak le kut hrât taka ni irtansuakhai an nia.

¹¹O ki Rengpa lungkham takin ni siahlo chongchaina le nir hming inlôm-tir hranga nei, ni siahlohai chongchaina hi ni mikuar lei sung ro; a vuan hin ni siahlo hi hlo nin chuktirin lân, hi mihai mithmua hin lungkham takin phûkdâina nin dongin lân,” ki tia. Kei chu rêng khilât inhlantu ki nia.

Nehemia 2

Nehemia Jerusalem a fe

¹Khan hiang hi a nia, rêng Artazerzia kum sômhni an lal kum, Nisan tha uain an sôm zoiin uain kha ki lâka, rêng ki pêka. Matona khan chu a makunga beidong hmêl irput ngai ma unga.

²Rengin ki kuang, “Damloi khom ni ual mak chea, itina mo beidong hmêl ni irput tâk hi te? thil dang ni no ni, ni lungrîl a isôl kêng ni a ti,” a ni tia. Khanchu a sân ki chi tâka.

³Keima’n rêng kuang khan, “Reng chu kumtuangin dam sôt ri se: ki irchibulhai thân omna khua chu a ramin a inkhârhai a kânga, beidong hmêl irput loiin mo ki ini hrang?” ki tia.

⁴Khanchu rêng khan, “Imo ni izong?” a tia. Khanchu irvân Pathian kuang ki chongchai tâka.

⁵Reng kuang khan, “Rengin a sa a iti lam a niin chu, ni siahlo hin ni mit ki lei tung ngaiin chu, Judai rama ki’rchihai thân omna khuaa nin fetir ro, khua la va inding nôk hi rong,” ki tia.

⁶Rengin ki kuang, “I dôr ten mo ni va iom hrang, itik tena mo ni ihong thei nôk hrang?” a tia. Khanchu rêngin lôm takin a nin fetira; keima’n hunbi kin danga.

⁷Kha vai kha ni loiin rêng kuanga khan, “Rengin a sa a ti’n chu varâl tianga roirêltuhai irhmupuihai hrangin Judai ram ki fe theina hrangin lekha ni pe’n lân;



⁸khan rêng ram nghâktu Asafa hmu hrangin irhrungna kul inkhâr enna, khopui kul hrang le, ki va iomna hrang in le thing an ni pêk theina hrang lekha ni pe sa ro,” ki tia. Khan ki Pathianin a nin dit sikin rêng kuanga ki izong ang a ni pêka.

⁹Khanchu varâl tianga roirêltuhai kuanga ki va tunga, rêng lekhai chu ki pêka. Rengin ki kuanga sipai hruaitu le sipai sakor chung chuang mi an fetirhaia.

¹⁰Khan Horon mi Sanbalata le Amon mi siahlo Tobia haiin an len hriatin chu Israelhai san hrangin an hong a nih tiin an milung chuk pehai maka.

¹¹Khanchu Jerusalem ki hong tunga, sîn thum ki'rngam baka.

¹²Zâna chu ki thoia, kei le mi dang tômtein: Jerusalem tah hranga ki itho tum ki Pathianin ki lungrîla a isia chu tûte hril ma unga, ki ichuangna ti no chu sa dang ite chôihai ma unga.

¹³Khan zâna chu phâi tianga mikota ki suaka, Dragon tuisunsuakna tiang le sahkrok paina tiang ki fea, Jerusalem kul chim le a inkhâr kânghai ki en vêla.

¹⁴Khan tuisunsuakna lam le rêng dîl dênin ki fea: khannisian ki chuangna sa fe thei ving lolina hmun a nia.

¹⁵Khanchu zâna vadung ki'rvâka, kulhai kha ki ena; ki hong kîr nôka, phâi tianga mikota khan ki lûta, kha tiang khan ki hong kîr nôka.

¹⁶Roirêltuhaiin khôn mo ki ife le imo ki itho khom inhre loiin; khan Judahai ochai, mi thathai, roirêltu le mi dang sinthohai ngai khom la hrilhai ual ma unga.

¹⁷Khanchu an kuang, “Kin ngîrhmun a isiat lam hi nin hmua, Jerusalem a ram ti le, a inkhârhai a kâng ti khom nin inhriata: tho insîrinsiata ei ni lolina hrangin Jerusalem kul chu indingtir nôk ei ti,” ki tia.

¹⁸Khan ki Pathianin a ni inuampui lam kin sîra, ki makunga rêng thuhrihai khom. Khanchu anni'n, “Thoi ei ta, indingtir tak tak ei ti,” an tia. Khanchu kha sin sa tho hrangin an kut an inhrâtira.

¹⁹Khannisian Horon mi Sanbalata le Amon mi, siahlo Tobia le Arab mi Gesema'n haiin an inhriatin chu an nin nuisanin, an ni hmusita, "Nin sintho hi itho sika mo? Reng chungá hin nin tehel nin izong ma ni?" an ni tia.

²⁰Khanchu hiang hin ki sâmhaia, "Irvân Pathianin ni'rngnil maka; khasikin keini a siahlohai hi thoi kin ta, indingtir nôk kin ti; nangnihaiin chu Jerusalema hin dongtum mani, irchamneina mani, hnungmân mani ite nei thei no chin ni," ki tia.

Nehemia 3

Jerusalem kul indingthar nôkna

¹Khanchu ochai inlal Eliasiba chu a urêng ochaihai leh an thoia, belra lampui an siama; an irthiangtira, a inkhârhai an sina; Hamea in irsâng dênin an irthiangtira, Hananela in irsâng dênin.

²Kha zoiin chu Jeriko mihaiin an siama. Khan anni zoia chu Imria nâipa Zakura'n a siama.

³Khan ngahai lampui chu Hasena nâihaiin an sina, a neinunhai an siaa, a inkhârhai an charêla; a kalna le an tûknahai an sina.

⁴Anni zoiin chu Hakoza nâi Uria nâipa Meremota'n a siam insaa. Anni zoia chu Mesezabela nâi Berekia nâipa Mesulama khan a siam insaa, anni zoi nôkin chu Baana nâipa Zadoka'n a siama.

⁵Khan, anni zoiin chu Tekoa kho mihaiin an siam insaa, khannisian an mi lianhaiin an hruaituhai sina khan irpôl nuam mahaia.

⁶Khan inkhâr milui chu Pasea nâipa Joiada le Besodeia nâipa Mesulama mihaiin an siam insaa, a rêla an siaa, a lampuihai an charêla.

⁷Khan anni zoia chu Gibeon mi Melatia le Meronot mi, Jadona'n, varâl tianga ram optu thu hnuaiá om Gibeon mi le Mizpa mihai le an siam insa nôka.

⁸Kha zoiin chu rângachak siamtu laia mi Harhaia nâipa Uziela'n a siama. Kha irzoiin chu mirimhoi siamtu laia mi Hanania'n a siam nôka, Kul irsahai dênin Jerusalem chu an siam insa nôka.



⁹Anni zoiin chu Jerusalem bial chimrip hruaitu Hura nâipa Refaia khan a siama.

¹⁰Khan anni zoiin Harumafa nâipa Jedaia'n a siam insa, kha irzoiin chu Hasabneia nâipa Hatusana'n a siama.

¹¹Harima nâipa Malkija le Pahat-moaba nâipa Hasuba haiin hmun dang le meipui sêmna in irsâng an siam insaa.

¹²Kha zoiin chu Jerusalem bial chimrip hruaitu Halohesa nâipa Saluma'n a nâinuhai leh an siama.

¹³Phâiruam inkhâr chu Hanuna le Zanoa haiin an siam insaa; a inkhârhai charêlin, a kalnahai siamin an tûkna an sin insatira. Khan sahrok paina tianga inkhâr dênin kul mûk sângkhat an sin saa.

¹⁴Sahrok paina inkhâr chu Bet-hakerem bial hruaitu Rekaba nâipa Malkija'n a siam insatira, inkhârhai le a kalna le an tûknahai a siama.

¹⁵Khan Mizpa bial hruaitu Kolhozea nâipa Saluma, tuikuang lampui chu a siam insaa, ar khûtira, a lampuihai siamin a kalna le an tûknahai irfûkin, khan rêng irhuan kôla, Sela dîl irkulna chu Davida omna khua ata chum theina leidâk dênin a siam insaa.

¹⁶Kha zoiin chu Azbuka, Betzur bial chimrip hruaitu nâipa Nehemia'n Davida thân irdîn le dîl khua le mi hrâthai in irdîn dênin a siam insaa.

Levi irchi kula sinthohai

¹⁷Kha zoiin chu Levi irchihaiin an siam insa nôka; Bania nâipa Rehuma haiin. Kha irzoiin chu Keila bial chimrip hruaitu Hasabia'n a bial irhmingin a siam insaa.

¹⁸Ama zoiin chu a urênghaiin an siam nôka; Keila bial chimrip hruaitu Henada nâipa Bevaia haiin;

¹⁹kha zoiin chu Mizpa hruaitu Josua nâipa Ezra'n hmun dang kul kôi irphutna râltukfam siana panna lam a siam insata.



²⁰Kha irzoiin Zabaia nâipa Baruka'n, sathnem irngaitakin hmun dang kul kôi irphutna ata ochai inlal Eliasiba in lampui dênin a siam insaa.

²¹Kha irzoiin Hakoza nâi, Uria nâipa Meremota'n hmun dang Eliasiba in lampui ata Eliasiba in hekna dênin a siama.

Ochahai kula sinthotuhai

²²Khanchu a kôlvêla ochaihaiin an siam insa nôka.

²³Anni zoiin Benamina le Hasuba'n an in irdîn an siama. Anni zoiin Anania nâi Maaseia nâipa Azaria'n a in kôl kha a siama.

²⁴Ama zoi le chu Henadaba nâipa Binuia'n hmun dang, Azaria in ata kul kôi irphutna a kil dênin a siam insaa.

²⁵Uzia nâipa Palala'n kulkôi irphutna irdîn le intângna in kôla rêng in irsâng ual ata irlôinahai a siam insatira. Kha zoia chu Parosa nâipa Pedaia'n a siam insaa.

²⁶Nethinim haiin nisua tianga tui mikot irdîn dênin in irsâng irlôina dênin an siam insa nôka.

Sinthotu danghai

²⁷Kha zoiin chu Tekoa kho mihaiin hmun dang, in irsâng lianpa fena le Ofel kul dênin an siam insa.

²⁸Sakor lampui chung tiang chu ochaihaiin mâni in irdînhai an siama.

²⁹Anni zoiin chu Imera nâipa Zadoka'n a in irdîn dênin a siam insaa. Kha zoiin nisua tianga mikot hrungtu Sekania nâipa Semaia'n a siam insaa.

³⁰Kha zoiin chu Selemia nâipa Hanania le Zalafa nâipa kirukna Hanuna haiin hmun dang an siama. Kha zoiin Berekia nâipa Mesulama khan a omna irdîn a siam insaa.

³¹Ama zoiin chu rângachak siamtu laia mi Malkija'n Hamipkad mikot irdîn Nethinim hai in le bepâr thohai in dênin a kil panna dênin a siam insa nôka.

³²Khan a kil fena le kêlbelra mikot kêr chu rângachak siamtu le bepâr thohaiin an siam insa a ni.



Nehemia 4

Nehemia'n a sêltuhai an hnê

¹Khannisianlân hiang hin a nia, Sanbalata'n kul kin sin ti an hriatin chu, a ning an mura, a sate'n a milung hoi pe maka, Judahai a'rzûl tôlhaia.

²Khanchu a urênghai le Samari sipaihai makunga thu a hrila, “Hi Juda mi siat le sahai hin i zât mo an itho? khopui siam insa nôk an itum ma ni? An irbôl thei hrang mo an isôn? Sûn khat sînga hin hlo mo chuk thei nihai? Sahrok om khômna vai a sa tâk hi, lung kâng zoi saihai hi, an indingthar thei nôk hrang mo?,” a tia.

³Khan a kuang Amon mi Tobia khan, “Hong inding ngân ri sehai; Sihal khom luihai sian, an lung irkulnahai chu chim pehai ta no ni mo,” a tia.

⁴O kin Pathian irngai ro, êsêlin kin iom a ni; an ni insîr insiatnahai hi anni chung a irlet pehaiin lân, anni khom kho rama mo intângtirhaiin lân;

⁵an insiatnahai irkhû no'n lân, an sualnahai chu irnghil pehai no ro; kul siamtuhai chung a ning an mur kêng a ni.

⁶Khanchu kul kha kin sina, ar sâng lam chimripin kul lian dôrin kin irsua vinga; mipuihaiin sin hrâtna lungrîl an irput maia.

⁷Khannisian hiang hi a nia, Sanbalata, Tobia, Arab mihai, Amon mihai le Asdod mihaiin Jerusalem kul chu siam insa a ni mai ti le a siatna lai kin pho mai ti an inhriatin chu, an ning an mur pehai uala;

⁸khanchu Jerusalem kha hong doia buaina siam hrang an irti nôk tâka.

⁹Khannisianlân annihai zârin kin Pathian kuang kin chongchaia, a sîn a zân, an ni hrung hrangin kin irbea.

¹⁰Khan Juda khan, “Sinhotu sahai an irzala, sahrok lak a tama, kul chu kin isin siam thei ta loi hrang kêng,” a tia.

¹¹Khan kin râlhai lakin, an laia kin hong fea, kin thathaia, sin kin mâksan mân chu inhre no nahaia, ni hmu thei no nihai an lei ti tâk sikin.



¹²Khannisianlân, Juda mi an kôla omhaiin, kin kuang an hong, kin râlhaiin an ni ikhitna lai hai chu an ni hril mai ngaia.

¹³Khasikin kul siatna ar hnuaina lai taka, hmun irthôlna taka mipuihai chu an in sâng mia irpâlin, an khandai, an ufeihai, an thal ngulhai chôiin irbîk hmun an zonga.

¹⁴Khan ki hong en vêla, ki thoia, mi sahai le roirêltuhai, mipui danghai laia, “Annihai so ite chihai viat no unglân, Rengpa roiinputak le ichiom tak chu inhre maiin, nin urênghai, nin nâihai nin dôngmahai, nin in inzôk tumin doihai roi,” ki tia.

¹⁵Khanchu hiang hin a hong nia, kin râlhaiin an len hriat ti le an sintho tum chu Pathianin ite bê'n bê mah ti an inhriatin chu, kul tianga mâni sin thôna hmuna kin fe nôka.

¹⁶Hiang hin a nia, kha rengata chu kin ruathartehai a chimripin sin an thoa, a danghaiin ufeihai, pho, thalngul, rôpphohai an dôna; khan roirêltu'n Juda in mihai, kul siamtu murdihai an sanhai maia.

¹⁷Kul siamna hrang hmangrua pêlhai khomin, an kut kiang khat tiang sin an thoa, kiang khat tiang hriamhrei an chôia;

¹⁸a siamtuhaiin an khandai an vong chita; khaang dôra intak tuangin an sina, khan bekul tum hrangtu khom an kôla omin.

¹⁹Khan mi sahai le roirêltuhai le mipuihai laia, “Sin hrang a tam hraia, kula hin irthekindarin an sinnahai lak a'rhla za zapa;

²⁰Bekul irhâi nin inhriatna hmun taka chu kin kuang hon tân unglân; ei Pathianin ni doipui a ti,” ki tia.

²¹Hiang hin sin chu kin thoa; khan a chimripin chu a zîngbup ata ârsi ar lang mâka chu ufei an chôi maia.

²²Kha lai taka khan, mipuihai laia, “Zâna an ni hrunga, sûna sinthoin tukhom an siahlohai leh Jerusalem sînga riak ving ri sehai,” ki tia.



²³Khaang khan keima khom, ki urênghai khom, ki ruathartehai khom, a ni zuia ni hrung hai leh, tûte'n kin tukrivô irkhek loiin hriamhrei irbel pumin tui tiang khan kin irvâk ngai a ni.

Nehemia 5

Inriang intak tuangna

¹Khanchu mipuihai le an dôngmahai chu an urêng Judahai chung a nuarin an khêk sup sup.

²“Keinihai hi kin nâihai le kin tama, fâk nêk khom kin neia,” an tia.

³Senkhatin, “Kin tama, fâk hrang nei ma ung. Kin loihai mi kuta kin pêka,” an tia.

⁴“Reng kuang khazana chôi hrangin sum kin pûka, ama hranga khan kin loi le grep irhuan mi kuta bânda kin intunga,

⁵kin taksa laka kin urênghai taksa ang a nia, kin nâihai khom an nâihai anga om an nia: khannisian hi kin nâinuhai le kin nâipasalhai hi mi siahlo hrangin suaka kin ithunhai zoi hrang a nia: kin nâi senkhathai chu suaka an ilût zel a ni ta: a san hrang dân inhre loi, mihaiin kin loi le kin grep irhuanhai an inei a ni tâka,” iti pâl khom an oma.

⁶Kha ang thu hai khan an khêk irhâi kin hriatin, ki ning an mura.

⁷Khanchu ki lungrîla hiang hin ki ngaituaa, mi sahai le roirêltuhai laia khan, “Mi tinin nin urênghai sumsût omin nin inpûktirhaia,” ki tia. Khan an chungthu ngaitua hrangin mi ki bukhaia.

⁸Anni laia, “Nam danghai laia zuara om, kin urêng Judahai chu thei lalamin kin irtanhaia; nangni'n nin urênghai zuar nin itum a ni mo? keini kuanga hin zuar an ini thei hrang ma ni?,” ki tia. Khanchu an dâihreka, a sâмна lam ite inhre mahai.

⁹“Nin sintho hi a isa viat loi a ni; kin râlhai nam danghai insîrinsiatna sikin kin Pathian ngîka nin iom mo ni ma?”



¹⁰keima le ki urênghai, ki ruathartehai khomin khang khan a sût omin sum kin inpûktirhai a ni, a sût oma ei itho hi masan ta ei ti.

¹¹A vuan sùn ngêt hin nin loihai, grep irhuan, oliv irhuan, an in le sum, an bu le uain, sahriak hmun irzakhat sûnga hmunkhat nin ilâk ngai khom kha pe nôk ving ta roi,” ki tia.

¹²Khanchu anni khomin, “Pe nôk ving ta kin ti, anni ata ite irdon loiin, ni iti ang lam takin tho kin ti,” an tia. Khanchu ochaihai ki koihaia, an kuanga an chonginkung ang lam taka pe hrangin khomâk ki’rsâm tirhaia.

¹³Ki puanbom chu kin thika, “Hi chonginkung anga tho loihai chu Pathianin a in ata le a sin thôna ata hiang hin inthikpai ri se; inthikpaia omin, a korongin om ri se,” ki tia. Khan a hong irbukhai murdi’n, “Amen,” an tia, Rengpa an inpâka. Khan mipuihaiin kha chonginkung ang tak khan an tho tâka.

Nehemia irphalzia

¹⁴Kha ti no khomin Judai rama annihai optu hranga inkung ki ni ata, rêng Artazerzia kum sômhni an lal ata kum sômthum inhni an lal kum dênin, kum sômhleihni sùng chu kei le ki urênghaiin ram optu bu vai la ma unga.

¹⁵Khannisian matona ram optu chu a le’rchong oka, tangka sekel sômminli tep loiin, an bu le uainhai an lâk pehaia; a hnung le a mân tianga siahlohai chu an inlal oka; khannisian keima’n chu Pathian chitna’n khang khan tho ma unga.

¹⁶Hi kul sintho hrang hin ki om maia, ram khom ite ircho ma unga; ki ruathartehai khom sintho’n kha hmuna khan an iom a ni.

¹⁷Kha vai kha ni loiin, kin kôla nam danghai lai ata honghai tep loiin Judahai le roirêltuhai laia ki bu khalâi ottuhai chu mi irzakhat sômringa om mai an ni.

¹⁸Khan sùn khata fâk hrang khom sehrâtchal inkhat le kêlbelra kiruk a sa tatak a nia; khan keima hrang khom âr an that saa, sùn sôm dan uain chi dadang tam uala in a nia; kha dôr khan sinsiamhai khomsian, hi mihai ituang hi an takin, ram optu ni hi ki irphu loi a ni.



¹⁹O ki Pathian, hi mihai hranga ki sintho murdi hi, ki sa theina hrangin inhre mai roh.

Nehemia 6

Nehemia chungá inrûka thuphan

¹Khan hiang hin a nia, Sanbalata le Tobia le Arab mi Gesema leh kin râl danghaiin kulhai ki siama, a chetna om ta mah ti an inhriatin chu, aniachu kha laia khan mikot inkhârhai chu la siam ma ung.

²Sanbalata le Gesema'n, "Hongin lân, Ono phâia khua inkhata irhmûna nei ei ti," tiin thu an ni hong thona. Khannisian ki chungá thil saloi tho an itum chian a lei nia.

³Khan keima'n anni kuang, "Sin roiinputak ki thoa, khasikin hong thei no ning; nangni kuanga ki hong kârin ki sin a'rngam hrang sikin," tiin mi ki târa.

⁴Khaang ngêt khan voiminli an ni hong tia; kei khom khaang ngêt khan ki sâmhái hena.

⁵Khanchu Sanbalata'n khaang ngêt khan a voiringanaa khan a siahlo lekhaton hon chôiin a hong târa;

⁶khataka khan, "Nang le Judahaiin tehelzong hrang nin lunginchong a nia, khasikin kêng hi kul hi ni isiam ti thu nam danghai laia an thanga, Gesema khomin a ti saa; an ihril dânin chu nangma hi an rêng hrang ni nuam an tia.

⁷Judai rama chu rêng a om tia Jerusalema inpuang hrangin deipu khom nin thang tâka, hi thu hi hril lat an ta; khasikin hongin lân, chongkhôm hi rei," ti a chuanga.

⁸Khanchu a kuang, "Ni iti ang hin ite tho ni maka, ni iphuakhôm a ni," tiin a kuang mi ki târa.

⁹"An sintho chu hlo an chuk lina hrangin an kuthai a'rzalin a om ta," tia mihai ihril a nia. Khasikin o Pathian, ki kuthai hi nin hrâtir pe roh.

¹⁰Kha irzoiin chu Mehetabela nâi Delaia nâipa Semaia, suak vak theiloi ina ki fea; ama'n, "Pathian ina, biak in sâng ngêta irhmu inlân, biak in inkhârhai



khâr pumin; nangma that hrang tumin an ihong hrang a ni; zâna hong that nang an itum a ni,” a lei tia.

¹¹Keima’n, “Keima anga mi hi ki lei intân hrang mo ni ni sôn? Mâni hringna inzôk hrangin tu mo biak in sûnga lût hrang? lût viat no ning,” ki tia.

¹²Khanchu ki hon hriat suaka, Pathian itîr lei ni viat maka, keima ni lei doina hrangin kha thuhai kha a lei ihril a nia, Tobia le Sanbalata lei inphût a nia.

¹³Ki chia, a iti anga nuamin thil kin châia, ki’rhming siatna hrang an hmua, an nin sîrinsiat theina hrangin an lei ihmang a nia.

¹⁴O ki Pathian, Tobia le Sanbalata sintho ang hin inhre pehai maiin lân, deipunu Goadii le deipu dang mi insî tum murdihai leh hin.

An sin an zoi

¹⁵Khanchu kul kha sîn sômringa sîn hnina, Elul tha sîn sômhni le ringa ni sîn tena chu irzoi a ni tâka.

¹⁶Hiang hin a hong nia, kin râlhai murdi’n kha thu kha an len hriatin chu, kin kôla nam danghaiin an lei chia, dormusiat okin an irhriata, sin chu kin Pathian itho a nih ti an inhriata.

¹⁷Khan khomin, kha laia khan Juda mi felhaiin Tobia chu lekha tamtak an lei thona, Tobia lekha khom an lei man tâka.

¹⁸Ama chu Ara nâipa Sekania mâkpa a ni sikin Judai rama mi tamtak khomâksâma a lei irrualpui an oma; a nâipa Jehohanana Berekia nâipa Mesulama nâinu dôngma’n a neia.

¹⁹Keima inhriata a sintho insa an hrila, ki thuhrihai khom an insîr pe ngai. Khanchu Tobia’n a ni insî hrangin lekha a hong ithon ngai a ni.

Nehemia 7

¹Khanchu hiang hi a hong nia, Kulhai kin siama; a mikothai ki’rfûka, mikot hrunghai, hla saktuhai, Levihai indang an ni zoiin chu,

²ki urênghai Hanania le Kul irsâng hruaitu Hanania chu Jerusalem kin optira: mi iamom tak, Pathian chi mi a nia.



³Jerusalem kul mikothai misa a hor sâng tal no'n chu inhong no roi, khohloia a hrungtuhai an chîn mân khârhai sian, kal ving ri sehai. Khan Jerusalema omhai laia mi a hrung hrang indanghai unglân, an omna hrang hmuna omhai sian, senkhatin mâni in omna kôlhai khom an ihrung sa hrang a ni.

Sala om hong kîrhai
(Ezr 2.1-70)

⁴Khua kha a lianin a'rzat oka; khannisian mihriam omhai chu tômte an nia, inhai khom la sin loi ang a nia.

⁵Pathianin ki lungrîla mi felhai, roirêltuhai le mipuihai koi bukin, an irchihai irhming irziak hrangin a nin hriattira. Khan a phut taka fehais irhming irziakna kha ki hmua, hiang hin irziak ki hmua.

⁶Sala hruai, Babulon rêng Nebukadnezara'n a ihruaihai laia sala om hong suakhai, Jerusalem le Judai rama mâni khuaa om, kha rama om tâkhai chu, hihai hi an ni:

⁷Zerubabela, Jesua, Nehemia, Azaria, Ramia, Nahamania, Mordekaia, Bilsana, Mispereta, Bigvaia, Nehuma le Baana hai rualin an ife a nia. Israelhai laia mi vântâng tam lam chu:

⁸Parosa irchihai 2,172,

⁹Sefatia irchihai 372;

¹⁰Ara irchihai 652;

¹¹Jesua le Joaba irchihai laia Pahat-Moaba mi 2,818;

¹²Elama irchihai 1,254;

¹³Zatua irchihai 845;

¹⁴Zakaia irchihai 760;

¹⁵Binuia irchihai 648;

¹⁶Bebaia irchihai 628;

¹⁷Azgad irchihai 2,322.

¹⁸Adonikama irchihai 667;



- ¹⁹Bigvaia irchihai 2,067;
- ²⁰Adina irchihai 655;
- ²¹Hezekia irchia mi Atera irchihai 98;
- ²²Hasuma irchihai 328;
- ²³Bezaia irchihai 324;
- ²⁴Harifa irchihai 112;
- ²⁵Gibeona irchihai 95;
- ²⁶Bethlehem le Netofa khua mi 188;
- ²⁷Anathot khuaa mi 128;
- ²⁸Bet-azmavet khua mi 42;
- ²⁹Kiriath-jearim hai, Kephira hai le Berot khua mi 743;
- ³⁰Rama le Geba khua mi 621;
- ³¹Mikmas khua mi 122;
- ³²Bethel le Ai khua mi 123;
- ³³Nebo kho danga mi 52;
- ³⁴Elam danga irchihai 1,254;
- ³⁵Harima irchihai 320;
- ³⁶Jerikova irchihai 345;
- ³⁷Lod hai, Hadid hai le Ono irchihai 721;
- ³⁸Sena irchihai 3,930.
- ³⁹Ochaihahi: Jesua in mihai laia Jedaia irchihai 973;
- ⁴⁰Imera irchihai 1,502;
- ⁴¹Pasura irchihai 1,247;
- ⁴²Harima irchihai 1017.
- ⁴³Levi irchihai: Hodeva irchia mi Jesua le Kadmiela irchihai 74;



- ⁴⁴Hla saktuhai: Asafa irchihai 148.
- ⁴⁵Mikot hrungtuhai: Saluma irchihai, Atera irchihai, Talmona irchihai, Akuba irchihai, Hatita irchihai, Sobaia irchihai 138.
- ⁴⁶Nethinim hai: Ziha irchihai, Hasufa irchihai, Tabaota irchihai;
- ⁴⁷Kerosa irchihai, Sia irchihai, Padona irchihai;
- ⁴⁸Lebana irchihai, Hagaba irchihai, Samlaia irchihai;
- ⁴⁹Hanana irchihai, Gidela irchihai, Gahara irchihai;
- ⁵⁰Reaia irchihai, Rezina irchihai, Nekoda irchihai,
- ⁵¹Gezama irchihai, Uza irchihai, Pasea irchihai;
- ⁵²Besaia irchihai, Meunima irchihai, Nefusesima irchihai;
- ⁵³Bakbuka irchihai, Hakupha irchihai, Harhura irchihai;
- ⁵⁴Bazlitha irchihai, Mehida irchihai, Harsa irchihai;
- ⁵⁵Barkosa irchihai, Sisera irchihai, Tema irchihai.
- ⁵⁶Nezia irchihai, Hatifa irchihai.
- ⁵⁷Solomona siahlohai irchihai: Sotaia irchihai, Sofereta irchihai, Perida irchihai;
- ⁵⁸Jala irchihai, Darkona irchihai, Gidela irchihai;
- ⁵⁹Sefatia irchihai, Hatila irchihai, Pokeret-hazebaima irchihai, Amona irchihai.
- ⁶⁰Nethinim mi murdi le Solomona siahlohai irchi chu 392 an ni.
- ⁶¹Khan Tel-mela, Tel-harsa, Kerub hai, Adon hai, Imer ata honghai chu, hihai hi an ni; khannisianlân an pi le puhai in mihai le an irchihai chu Israel mi an ini le ni loi sui thei mahaia;
- ⁶²Delaia irchi, Tobia irchi, Nekoda irchihai chu 642.



⁶³Khan ochaihai laia mi, Hobaia irchi, Hakoza irchi, Gilead mi Barzilaia nâinuhai laia mi dôngma'n a neia; an irhming anga irput Barzilaia irchihai chu:

⁶⁴Khahai khan an irchihai anga tep theia an irhming irziak zongna khan hmu thei mahaia: khasikin intiroma bêin an oma, an ochai ninahai chu an mâka.

⁶⁵ Khan ram optu khan anni chu Urim le Thumim irbela ochai an inding nôk mâka chu thil serhai kha an ifâk hrang ni mah tiin a hrila.

⁶⁶Mipui irbuk murdi chu 42,360 an ni.

⁶⁷an siahlo nupang le pasal 7,337 tep loiin: khan hlasakhai nupang le pasal 245 an nia.

⁶⁸An sakor chu 736 a nia: an sakuartung lian zât chu 245 a nia;

⁶⁹an Saringsei chu 435 a nia, an Sakuartung chîn zât chu 6,720 a ni.

⁷⁰Khan a ina ar hlohai senkhatin kha sin tho hranga khan thil an irfûktir a ni. Ram optu khan tholôma hrang rângachak dâr sângkhat, tâbor sômringa, ochai tukfam irzaringa sômthum a pêka.

⁷¹Khan a ina ar lua senkhatin in sinna hranga tholôm rângachak dâr sînghni le sumru varh sânghni irzahni a pêka.

⁷²Khan mi danghai ipêk rângachak dâr sînghni le tangka sumru sânghni le ochai tukfam sômruk sari a ni.

⁷³ Khanchu ochaihai, Levihai, mikot hrungtuhai, hla saktuhai, le mi senkhathai le Nethinim hai le Israel mi murdi chu mâni khua chita an om tâka. Khanchu tha sarina a hong tungin chu Israelhai chu an khuaa an om ta.

Nehemia 8

Mipuihai laia Ezra'n Dân bu a tep

¹Khan, mi murdi an rênga inrualin tui mikot hmâi tiang hmun irzatna lai taka an irbûma; khanchu lekha irziaktu Ezra chu Rengpa'n Israelhai zôm hranga a thupêk, Mosia dân bu chu hong chôi hrangin an tia.



²Khanchu tha sarina sîn khat nî chu ochai Ezra'n ar bûmhai nu le pa an hriat theihai laia khan dân bu kha a hong chôia.

³Khan khataka mi chu tui mikot hmâi hmun irzatna taka nupang le pasal le an hriat theihai laia zîng ata sîn sôt a tepa, mi murdi'n kha dân bu thua khan an mikuar an sung chita.

⁴Khan khang hrang piala an isin thing dokâng irsânga khan lekha irziaktu Ezra chu a ngîra; a sîr chang tiang khan Matithia, Sema, Anaia, Uria, Hilkia, le Maaseia hai an ngîra; a vei tiang khan Pedaia, Misaela, Malkija, Hasuma, Hasbadana, Zekaria le Mesulama hai.

⁵Khan Ezra'n mi murdi mithmu laia lekhabu irzuat kha a sûta. A hong sûtin chu mi murdi an ngîr vinga:

⁶Khanchu Ezra'n Rengpa Pathian roiinpui tak chu an pâka. mipui tam dôrin an bân an phara, "Amen, Amen," tiin an chôiirsânga; khanchu an kûna, an hmâi hnuai intônin Rengpa chu chubai an mûka.

⁷Khan Jesua hai, Bania hai, Serebia hai, Jamina hai, Akuba hai, Sebethaia hai, Hodija hai, Maaseia hai, Kelita hai, Azaria hai, Jozabada hai, Hanana hai, Pelaia hai, le Levi haiin mipuihai chu dân an hrilfia pehaia; mipuihai chu an omna hmuna an om maia.

⁸Khan lekhabu, Pathian dân bua mi kha fel takin a tepa; a omzia a hrilfiaa, an itep sai kha an hriat infeltirhaia.

⁹Khan ram optu Nehemia le ochai lekha irziat thei Ezra le mipui irchutirtu Levi haiin mipuihai laia khan, "A vuan hin Rengpa nin Pathian hrangin sîn irthiang a nia; nin milung indûk no unglân, chap khom chap no roi," an tia. Dân thu kha an inhriatin chu mipuihai an chap chi chiana.

¹⁰Khanchu an kuang khan, "Fe unglân, thil thâi fa unglân thil thum in roi, ite suang hrang boihai hrangin thonhai unglân, a vuan hin Rengpa ta hrangin sîn irthiang a ni, nin milung insiat no unglân; Rengpa chung a lômna kha nin hrâtna a ni," a tia.



¹¹Khanchu Levi haiin, “Dâihrek roi, a vuan hin sîn irthiang a ni; nin milung inzîngtir no roi,” mipui murdi chu dâihrekin an irngaia.

¹²Khanchu a thu hrilfia kha an inhriat thei sikin mipuihai kha fâk hrang le in hrang, mihai thon hrang le raifân taka omin an chîn thei ta.

Kairêng kût an hmang

¹³Khanchu, sîn hnina nî chu mipuihai laia a ina ar luahai le ochaihai, Levi hai chu dân thu irchu hrangin lekha irziaktu Ezra kuang an fea.

¹⁴Rengpa'n Mosia kuanga zôm hranga a thupêk dân chu tha sarina kût lai taka Israel irchihai irngamna hmuna, omna thu irziak an hmua.

¹⁵ “Tânga fe unglân, oliv ônhai, irhmûi ôn zârhai, le tûm ôn hai, thing lianpapai irngamna hmun sinna hrangin va la roi,” tiin an khua le Jerusalem khuaa inpuangin a om hrang thu an tepa.

¹⁶Khanchu mipuihai kha an fea an va lâka, mihaiin an in sînga, an mikota, Pathian mikota, Tui mikot hmun lianna takhaia, Efraima mikot hmun irzatna haia, irngam hmun an sina.

¹⁷Sala zôk irbukhaiin ngam hmun an sina, kha hmuna khan an oma; Nuna nâipa Jesua zoro rengata, kha nî sîn dênin Israel irchihai khan khang khan tho ual ngai mahaia. Khanchu lômna liantak a hong ni pehaia.

¹⁸A sîn tin a'rphut ata a tôp dênin Pathian dân bu a tepa, khan sîn riat nî chu kût hek nî a nia, thupêk angin ir-up taka inkhômin an ichîn ngai a ni.

Nehemia 9

Mipuihai sual irphuang

¹Khanchu kha tha sînga sîn sômhni minli nî chu Israel irchihai chu bu an ngheia, bora puan silin, irnêng tôn duangin an fea.

²Israel namhai chu nam danghai rengata a bingin an oma, an ngîra, an sualnagai le an pi le pu sin insiatnagai ngaidam an irzonga.



³An omna hmun chita an ngîra, kha nikhua hmun minlia semin, hmunkhat chu Rengpa an Pathian dân bu an tepa; khan hmun minlia sena hmunkhat dang sũaga khan thupha an chũaga, Rengpa an Pathian an biaka.

⁴Khasikin, Levi hai dokâng irsũaga khan Jesua hai le Bania hai, Kadmiela hai, Sebania hai, Bunia hai, Serebia hai, Bania hai, Kenania hai chu an ngîra inring takin Rengpa an Pathian chu an koia.

⁵Khasikin Pathian biak hranga koihai chu; Levi mi, Jesua le Kadmiela hai, Bania hai, Hasabneia hai, Serebia hai, Hodia hai, Sebania hai, le Pethahia haiin, “Ngîr unglân, Rengpa nin Pathian chu kumtuanga hrangin inpâk roi. Chũaindũana le inpâkna murdiin a iphâk loi irhming roiinpui chu inpâkin om ri se,” an tia.

Mipui chongchaina

⁶Israel mipuihai chu hiang hin an chongchaia, “Rengpa, nangma vai hi Rengpa ni nia, irvân le a sũaga om murdihai leh, irnêng le a sũaga om murdihai le, tuikhanglian le a sũaga om murdihai ni kut suak a nia; khan irvân tianga omhai khomin chubai nang an mủk ngaia.

⁷ Abrama chu tũaga, Kaldai ram Ur kũaga ata hrũaga suaka, ar hming Abrahamia tia phuatũ, Rengpa Pathian ni nia;

⁸ khan, a milung khom iam om zoi a nih ti nin hriata, Kanaan hai, Hit hai, Amor hai, Periz hai, Jebus hai le Girgas hai ram chu pe hrangin, ar chihai laia thu ni thũaga, hlo nin chuktira, mi feltak ni nia.

⁹ Aigupta rama kin pi le puhai intak tuangzia chu ni hmũa, Tuikhanglian sen kũaga an khêk irhũaga chu nin hriata;

¹⁰ Faraa le a sũagho hai murdi le a ram sũaga mi murdi laia irsinsiana le thilirkhêl nir langtira; lâripâk takin an chũaga sin an tho ti nin hriata, atũn ten hin irhming nin neitirhai tũaga.

¹¹ Khan an matona tuikhanglian chu ni’rsentira, khanchu tuikhanglian kũaga tui kangin an fe thei tũaga; khan a hong irzũltũhai chu, tui inthũk taka lung ei inthũk angin ni pai lũaga.



- 12** Khan, sũana chu sũmpuĩn ni hruaia, zũana khom an fena hrang lampui an hmu theina hrangin meichokin ni hruaia.
- 13** Sinai tũana khan ni hongã, irvãn ata anni laia thu nin sũana, roirũana dik takhai, dân diktak, thu'nkung le thupêk satak ni pêka.
- 14** Khan irngam nũ irthiang chu nin hriattirhaia, ni siahlo Mosia hmangin thupêk hai, thu'nkung hai, dânhai ni pêka;
- 15** an phĩngchãm khopna hrangin irvãn ata bai ni pêka, an tui inhrâl channa hrangin lungpui sũng ata tui ni sunsuaka, pêk ni inuamna ram chu ni pêka.
- 16** Khannisianlãn anni le kin pi le puhaiin lãrĩpãk takin sin an thoa, an tukul a liana, ni thupêkhai pom loiin,
- 17** zũm khom zũm nuam mahai, an laia ni thil irkhêl thohai khom irngai nuam ta loiin; an tukullian songin, tehelzongin, an sal changna tianga kũr hrangin hruaitu an irthang ual a ni: khannisianlãn, nang chu ngaidam hranga irsiam sai Pathian, mi lunginkham thei, Inrennaa sip, mi ingam, annihai khom irnghil nuamhai mak chea.
- 18** Sehrãtte irlim an siama, "Hi hi a ni, Aigupta rama nang a hruaitu Pathian chu," an tia, ningmur om tak thil an tho lai khomin,
- 19** ni phũkdũina khan ramchũana nin thũ mak chea; lampuia hruai hrang khomin sũana sũmin masan maka, anni êl hrang le an fena lampui irhmu hrangin mei angã vãnĩn zũana a êlhaia.
- 20** Annihai irchutir hrangin irtha diktak ni pêkhaia, Mana hai le nin fũahaia, dangchũrhai tui ni pêka.
- 21** Ramchũrna hmun khan kum sũmminli nin fũahaia, ite irsam loiin; an silkaihai khom inrũ loiin, an kehai khom invũng loiin.
- 22** Ram le namhai khom ni pêka, an dongtumhai ni sem pea: khanchu Sihona ram, Hesbon rẽng ram le Basan rẽngin Oga ram an luaa.
- 23** An irchihai khom irvũana ãrsi nẽkin nin pũana, an ilua hrang ram an pi le puhai kuanga ni lei ihrilna rama nin tunghaia.



²⁴ Khanchu an irchihai khan ram an lua tâka, khan kha rama om Kanaan mihai chu an intema, an nuam taka lohain an rênghai le a mipuihai kha an kuta ni pêka.

²⁵ Kul nei khopuihai, ram satak tak an lâka, thil sa tinrênga bitin an luaa, tuikuang tuk saihai, grep irhuanhai, oliv irhuanhai le theikung dang tamtak an neia: khanchu an fâkin, an khopa, an hong mara, ni satna sikin hoi takin an oma.

²⁶ Khannisian an irhmôla, nang an tehel pea, ni dânhai mâksanin, nangma tianga hong nôk hranga hriltu deipuhai an thata, ningmurom thilhai an thoa.

²⁷ Khasikin anni dengintheitirtu an râlhai kuta ni pêka; an chardong laia nang an insam kha irvân ata ni len hriata; phûkdâi takin an râlhai ata sansuak hrangin mi'nzôkpu ni pêka.

²⁸ Khannisian râl irvei loiin an om zoiin, ni mithmua thil saloi an tho nôka; khasikin an râlhai kuta ni pêkhaia, khanchu an chungu thu an neia; an kîra nang an koi lai khan, irvân ata ni len hriata, voi iza ni phûkdâi sikin ni sansuakhaia;

²⁹ ni dâna ni hruai lûthai theina hrangin nir chutirhaia; khannisian lâiripâk takin sin an thoa, ni thupêkhai pom loiin ni roirêlna sêlin thilsual an thoa, an zôma hringpui nêkin an tukullianin irngai nuam mahai.

³⁰ Khannisian kum tamtak anni chu ni donhaia, irtha tianga deipuhai hmangin nir chutirhaia; khannisian an mikuar sêt angin an oma; khasikin kha rama mihai kuta khan ni pêk ta.

³¹ Khannisianlân ni lungkhamna zârin a hekna chu intungtir pehai mak chea, mâk khom masanhai loiin; Pathian lungkham thei taka sip ni ni sikin.

³² Khasikin, kin Pathian, roiinpui, itinrêngthothei le ichiom, thuthung dêna lungkhamna inlangtu khan kin rênghai kin mi lianhai, kin ochaihai, kin deipuhai, kin pi le puhai le ni mihai murdi chungu Assuria rênghai inlal lai ata atûn tena dengtheina hong omhai hi a mai maiin insâp no'n lân.



³³I khomnisian, kin chung a thil hong omhai hi nang chu ni fela; dik takin thil ni thoa, keini'n chu dikloi takin kin oma:

³⁴kin rêng hai, kin milian hai, kin ochai hai, kin pi le puhai khomin ni dân zôm mahaia, ni thupêk le ni thu inhriattir, anni irchutirna khom pom nuam mahai.

³⁵An chung a ni isa pehai hrai hi, an ram khom ram liantak le satak ni ipêk khan ni sintho loiin, an sintho indik loi hai mâk nuam loiin.

³⁶Irrngai ro, atûn hin chu suak kin ni tâka, a sûnga thil sa le thil ra tamtak kin pi le puhai fâk hranga ni ipêkna rama hin suak kin nia.

³⁷Kin sual sikin kin chung a rêng hrang ni indang hai lakin an irchongpuia: kin taksa le kin sa chung a khom anni thu tak a ni tâka, kin ikamang zoi a ni ta.

Mipuihai chonginkung irziak

³⁸Khahai sika khan thu det kin inkunga, kin irziak; kin milian hai, kin Levihai le kin ochai hai in an ni indetpui a ni.

Nehemia 10

¹Khanchu a ni namindet puituhai chu hihai hi an ni; Hakalia nâipa ram optu Nehemia le Zedekia;

²Seraia, Azaria, Jeremia hai,

³Pasura, Amaria, Malkija hai;

⁴Hatusa, Sebania, Maluka hai;

⁵Harima, Meremota, Obadia hai;

⁶Daniela, Ginethona, Baruka hai;

⁷Mesulam, Abija, Mijamina hai;

⁸Maazia, Bilgaia, Semaia hai: hihai hi ochai an ni,

⁹Khan Levihai: Azania nâipa Jesua, Henadada, nâihai laia mi Binuia, Kadmiela hai;

¹⁰An urêng Sebania, Hodija, Kelita, Pelaia, Hanonia-hai;



- ¹¹Mika, Rehoba, Hasabia hai;
- ¹²Zakura, Serebia, Sebania hai;
- ¹³Hodia, Bania, Beninua hai;
- ¹⁴Mipuihai: Parosa Pahat-Moaba, Elama, Zatura, Bania hai;
- ¹⁵Bunia, Azgad, Bebaia hai;
- ¹⁶Adonija, Bigvaia, Adina hai;
- ¹⁷Atera, Hezekia, Azura hai;
- ¹⁸Hodia, Hasuma, Bezaia hai;
- ¹⁹Harifa, Anathota, Nebaia hai;
- ²⁰Magpiasa, Mesulama, Hezira hai;
- ²¹Mesezabela, Zadoka, Jadua;
- ²²Pelatia, Hanana, Ana hai;
- ²³Hosea, Hanania, Hasuba;
- ²⁴Halohesa, Pilha, Sobeka hai;
- ²⁵Rehuma, Hasabna, Maaseia hai;
- ²⁶Ahia, Hanana, Anana hai;
- ²⁷Maluka, Harima le Baana hai an ni.

An chonginkung irziak

- ²⁸Khan, mi dang, ochaihai, Levihai, mikot hrungtuhai, hlasaktuhai, Nethinim hai le Pathian dân zôm tuma kha rama mihai lak ata irkiang murdihai, an dôngma le an nâihai, a sia le sa inhriat thei dôrhain,
- ²⁹an urênghai, an milian hai kha mahai loiin Pathian siahlo Mosia pêk Pathian dân zôm hranga, Rengpa kin Rengpa thupêk murdi le a roirêlnahai le a thu'nkung chu zôm le vonga,
- ³⁰ Kha rama mihai chu kin nâinuhai inluatirhai loa, kin nâipasalhai hrangin an nâinuhai nei loiin,



³¹ kha rama mihai irngam nia thil zuar hrang neinun mani, fâk hrang mani, an hong lâka irngam nia mani, sîn ser bîknaa khom ircho pehai loa; kum sarina tena ram man chôina murdi an lâkaihai sîng loi hrangin khomâk an irsâma.

³² Khan kin Pathian in tianga sin thôna hrangin sekel hmun thuma sena hmunkhat, a kum tina pe hrangin dân kin siama.

³³ Bu siana hrang hai, baidi thil inhlan mai hrang hai le, hâlrivôm thilinhlan mai hrang hai, irngam ni hranga le, tha thara hrang, hunbi nei kûta hrang, thil irthiang hai, Israel mihai hranga irngeina siamna hranga soal irbôlna hrang le kin Pathian in tianga a nang murdi thôna hrang hai.

³⁴ Kin pi le pu in sîng mihai anga a kum tin zoro bîk indanga dân bua irziak anga Rengpa kin Pathian maichâma hâl hrang thinghlek hrangtu inhriatna hrangin ochaihai le Levihai, mipuihai leh tâ kin sâna:

³⁵ a kum tina kin loa a vâng masatak le thing tinrêng laia a ra masa tak Rengpa ina sia hranghai,

³⁶ dân bua irziak angin kin nâilutîr le kin sa laia a suak masa tak, kin sehrât le kêlbelrahai laia a suak masa tak, kin Pathian ina sinthotu ochaihai kuanga Pathian ina hruai hrang hai.

³⁷ Kin Pathian in tentana ochaihai le kin bai fâk hrang masa tak, kin ngaihoi thilinhlan hrang chi tinrêng rahai le, uain le sahriak chôî hrang hai; kin loa mi sôma inkhat Levi hai pêk hranghai dân kin siama, Levi haiin kin kho sînga loi tho ngai khua murdia sôma inkhat an lâk ngaia.

³⁸ Khanchu Levihaiin sôma inkhat an lâk laiin, Arona irchia mi ochai chu Levihai laia a iom hrang a ni: Levi haiin sôma inkhat an lâk ata sôma inkhat chu kin Pathian ina, irchon bukkhômna tentana khan an hong isia hrang a ni.

³⁹ Israel irchihai le Levi irchihaiin bu le uain le sahriak vôka thil inhlan chu hmun irthiang bêlbûr le sinthotu ochaihai, mikot hrungtu hai, hlasaktu hai, omna tentana khan an isia hrang a ni; hihai anga hin a ni, kin Pathian in chu masan loi hranga dân kin isiam a ni.



Nehemia 11

Jerusalem khuaa omhai

¹Mipui hruaituhai chu Jerusalema an oma; sômkhath laia inkhat khopui irthiang Jerusalema inomtir le sômkhath laia kuak kho dangha om hrang hai inhriatna'n mipuihaiin tâ an sâna.

²Milungchuk taka Jerusalema om hrang irpêkhai khan mipuihai inpâk an hloa.

³Hihai hi mi rama hruaitu Jerusalema omhai chu an ni: khannisianlân Judai ram sûnga khuahaia khan, an omna hrang khuahaia an oma; khahai kha chu Israelhai, ochaihai, Levi hai, Nethinim hai, le Solomona siahlohai irchi an ni.

⁴Jerusalema khan Juda irchihai laia mi: Zekaria tupa, Uzia nâi Athaia; ama hi Juda nâipa Pereza irchi a ni, a puhai chu Amaria hai, Sefatia hai, Mahalalela hai an ni.

⁵Kolhozea tupa, Baruka nâipa Maaseia; ama hi Juda nâi Sela irchi laia mi a ni. A puhai chu Hazaia hai, Adaia hai, Joiariba hai le Zekaria hai an ni.

⁶Pereza irchia mi chu irzaminli sômruk kiriatin Jerusalem khuaa in le loi an nei.

⁷Benamina irchi laia mi chu hihai hi an ni: Jesaia nâipa Ithiela, ama nâipa Maaseia, a nâi nôk Kolaia, ama nâipa Pedaia, ama nâi nôk Joeda, ama nâipa Mesulam, ama nâi nôk Salua.

⁸Ama zoi nôk chu Gebaia, Salaia, an rêngin Benamina irchi Jerusalema omhai chu irzakuak sômhni kariat an ni.

⁹Khan Zikria nâipa Joela chu an hruaitu a ni; Hasenua nâipa, Juda chu a khuaa ulian tak hnuai renga mi a ni.

¹⁰Hi ochaihai hi Jerusalem-ah an om sa: Joiariba naipa Jedaia le Jakina.

¹¹Mesulama tupa Hilkia nâipa Seraia. Ama hi a puhai chu Zadoka hai, Meraiota hai, le Ochai inlaltak Ahituba hai an ni.



¹²Hi mihai irchi hi irzariat sômhni inhniin Tempila sin an itho ngai a ni. Pelaia tupa Jerohama nâipa Adaia. Ama puhai hi chu Amazia hai, Zekaria hai, Pasura hai le Malkija hai an ni.

¹³An rêngin hi irchihai hi an insûngkuua hruaituhai le mi irzahni sômminli inhni an ni. Ahzaia tupa, Azarela nâi Amasaia. Ama hi a puhai chu Mesilemota hai le Imera hai an ni.

¹⁴Hi irchihai hi mi irzakhat sômhni kiriat an om, sipai hâitak tak an ni. An hruaitu chu Hagadolim nâipa Zabdiela a ni.

¹⁵Levia irchi Jerusalem-ah omhai: Azrikama tupa, Hasuba nâipa Semaia. Hi Semaia puhai chu Asabia hai le Bunia hai an ni.

¹⁶Sebethaia le Jozabada. Anni hi Levia irchi, mi inlâr tak, Tempil pên tianga sin enkoltu an ni.

¹⁷Asafa irchi, Zabdia tupa, Mika naipa Matania. Ama hi Tempil zaipôl lômna hla sak hruaitu a ni. Bakbukia: ama hi Matania changpuitu a ni. Galala tupa, Samua nâipa, Abdia: ama hi Jeduthuna irchia mi a ni.

¹⁸Jerusalem kho irthianga Levia irchi om murdihai chu mi irzahni sômriat minli an ni.

¹⁹Kha tih no khom kha mikot hrungin Akuba hai, Talmona le an urênghai kul mikot entuhai irzakhat sômnsari inhni an nia.

²⁰A ban Israelhai, ochaihai, le Levihai chu Judai ram khua tina mâni ram chita an oma.

²¹Nethinim hai chu Ofel-ah an om: Ziha le Gispa chu Nethinim hai hruaitu an nia.

²²Jerusalem khuaa Levihai hruaitu chu Asafa nâi, hlasaktuhai laia mi Mika, ama nâipa Matania, ama nâipa Hasabia, ama nâipa Bania, ama nâipa Uzia a ni, Pathian in tiang sinchuan thôtu tak a ni.

²³An chungchânga hin rêng thupêk a oma, hla saktuhai khom a nitina an sak hrang bituk a oma.



²⁴Juda nâipa Zera irchia mi Mesezabela nâipa Pethahia chu mipuihai chungathuneitu rêng irthûla om a ni.

Kho danga omhai

²⁵Khante, mipuihai kha an loimân nâina khuahaia khan an oma. Juda nama mi senkhathai chu Kiriath-arba le a kôla khotehaia Dibon le a kôla khotehaia, Zekabzeel le a kôla khotehaia;

²⁶Jesua le Molada le Betpeleta haia an oma.

²⁷Khan, Hazarsuala hai, Beer-seba le a kôla khotehaia,

²⁸Ziklag-ah le Mekona le a kôl khotehaia,

²⁹Enrimon haia, Zora haia, Jarmut haia;

³⁰Zanoa hai, Adulam, le an khua vêla Lakis le a ram sînga hai, Azeka le khua vêla an oma. Khanchu Beer-seba ata Hinom irhôr dênin omhmun an khuara.

³¹Benjamina irchihai chu Geba khêla Mikmas haia, Ai haia le Bethel le khotehai;

³²Anathot haia, Nob haia, Anania haia;

³³Hazor haia, Rama haia, Gitaim haia,

³⁴Hadid haia, Zeboim haia, Nebalat haia;

³⁵Lod haia le Ono haia kuttheithiamna irhôrhaia an oma.

³⁶Khan, Judai rama om ngai Levihai pâl senkhathai chu Benjamin hai laia an omtir tâka.

Nehemia 12

Ochai le Levihai irhming

¹Sealtiel nâipa Zerubabela le Jesua kôla fe ochaihai le Levihai chu hihai hi an ni: Seraia, Jeremia, Ezra hai,

²Amaria, Maluka, Hatusa hai,

³Sekania, Rehuma, Meremota hai,

⁴Idoa, Ginethoia, Abija hai;



⁵Mijamina, Maadia, Bilga hai;

⁶Semaia, Joiariba, Jedaia hai;

⁷Salua, Amoka, Hilkia, Jedaia. Hihai hi Jesua dam laia ochai le an urênghai laia hruaituhai an ni.

⁸Hihai khêla hin Levihai: Jesua hai, Binuia, Kadmiela, Serebia, Judahai lômthu insîrna an hruaitu Matania hai le a urênghai chu

⁹Bakbukia le Unoa le an urênghai khom a papâlin an irthûl ngai a ni.

¹⁰Khan Jesua'n Joiakima a neia, Joiakima'n Eliasiba a neia, Eliasiba'n Joiada a neia.

¹¹Joiada'n Jonathana a neia. Jonathana'n Jadua a neia.

Ochai irchi hruaituhai

¹²Khan, hihai hi Joiakima dam laia ochai, a ina ar luahai chu an ni: Seraia irchia mi Meraria hai, Jeremia irchia mi Hanania hai,

¹³Ezra irchia mihai laia Mesulama hai, Amaria irchia mi Jehohanana hai:

¹⁴Maluka irchia mi Jonathana hai, Sebania irchia mi Josefa hai:

¹⁵Harima irchia mi Adna hai, Meraiota irchia mi Helkaia hai;

¹⁶Idoa irchia mi Zekaria hai, Ginethona irchia Mesulama hai.

¹⁷Abija irchia mi Zikria hai, Miniamina irchia mi, Moadia irchia mi Piltaia hai,

¹⁸Bilga irchia mi Samua hai, Semaia irchia mi Jehonathana hai,

¹⁹Joiariba irchia mi Matenaia hai, Jedaia irchia mi Uzia hai,

²⁰Salaia irchia mi Kalaia hai, Amoka irchia mi Ebera hai;

²¹Hilkia irchia mi Hasabia hai, Jedaia irchia mi Nethanela hai.

Ochai le Levi irchi irsinsiana bu

²²Levi irchihai chungchânga hin, Eliasiba, Joiada, Johanana, Jadua dam laia a ina ar luahai infelna a nia; khaangin ochaihai khom Persia rêng Daria inlal dênin irsinsiana an nia.



²³Eliasiba nâipa Johanana dam lai dên khomin Levi nâihai in sêngkua irhming irziakna bua chuang a ni.

Tempila sin irsem dân

²⁴Khan, Levi ulianhai chu: Hasabia, Serebia, Kadmiela, Jesua le Binuia, a urêng, Pathian mi Davida thupêk anga a pâl pâl irthûla, inpâk le lômthu insîr hranghai leh.

²⁵Matania, Bakbukia, Obadia, Mesulama, Talmona, Akuba hai chu mikot kôla neinun siakhômna in le mikot hrungtuhai an ni.

²⁶Hihai hi Jesua, Jozadaka, nâipa nâi Joiakima dam laia mi le ram optu Nehemia le Ezra ochai le lekha irziaktu dam laia mi an ni.

Nehemia'n kul a inhlân

²⁷Jerusalem kul an inhlana khan, têngrep hai, perkhuang hai, belem hai le hlasaka lômthu hrila lôm taka inhlanna inkhôm hmang hranga Jerusalema hong hrangin Levihai chu an zong suakhaia.

²⁸Jerusalem kôlvêl ata Netofa hai khua ata hla saktuhai an hong;

²⁹Bethgilgal ata le Gebe-a le Azmaveta ram ata khom hla saktuhai khan Jerusalem kôla khan khophâi an sâta.

³⁰Khan ochaihai le Levihai an irthiangtirhaia, mipuihai, kulhai, le a mikothai an irthiangtira.

³¹Khanchu Juda mi ulianhai chu kul sênga khan ki hruaihaia, thuhrila irzui dûl dûla fe hrang, pâl lian tak tak inhni ki siama, pâl khat chu sahrok paina lampui tiang kul chang tiang an fea;

³²khan, anni chu lôm takin Hosaia le Juda mi lianhai a chimrip,

³³Azaria, Ezra, Mesulama hai,

³⁴Juda, Benjamina, Semaia le Jeremia hai,

³⁵Bekul chôî ochai nâi senkhathai le, Asafa nâipa Zakura, ama nâipa Mikaia, a nâi nôk Matania, ama nâipa Semaia, ama nâi nôk Jonathana, ama nâipa Zekaria;



³⁶a urêng Semaia, Azarela, Milalaia, Gilalaia, Maaia, Nethanela, Juda, Pathian mi Davida itum ngai thilhai chôî ngai, Hanania haiin an zuia; khan lekha irziaktu Ezra'n a hruaihaia:

³⁷Tuikuang lampui mikot an tungin, kul irphutna an maton tiang Davida khua luina tianga fe'n Davida in sak tiang an fea, sak tianga tui lampui dên thaiin.

³⁸Khan lômthu hril hrang pôl danghai chu anni don hrangin an fea, keima'n mipui a chimriphai le meipui sêmna in irsâng saka, kul irsa dênin kin zuia;

³⁹Efraima mikot chungu, Jeshana mikot chungu ngahai irlôina chungu, Hananela in irsâng le Hamea in irsâng chungu, kêlbelra mikot dên rakin: intângna in mikota khan an ngîra.

⁴⁰Khanchu lômthu hril hrang pâlhai pôl hnihai chu Pathian ina an ngîra, kei leh roirêltu a chimriphai leh,

⁴¹Bekul chôî ochai Eliakima, Maaseia, Miniamina, Mikaia, Elioenaia, Zekaria, Hanania hai;

⁴²Maaseia, Semaia, Eleazara, Jehohanana, Malkija, Elama, Ezera hai khom. Khan, hla saktuhaiin an hruaitu Jezrahia haiin inring takin an saka.

⁴³Kha nî khan irbôlna a sate'n an inhlana, an rai a fân ta taka; Pathianin raifân theina a pêkhaia; nupang le nâipanghai khom an lôma; khanchu Jerusalem lômna chu ram hlatak ata an inhriata.

Tempila hmang hrang thil

⁴⁴Kha nikhua khan chu tholômhai, ngaihoi thilinhlanhai, neinun vâng masa tak hai, sôma inkhat siana hmuna tentana hruaitu, dân ang taka an inkung, ochai le Levihai dongtum, khua tina a le'rchûtir hranga inkung an nia; Judahai chu sinthotu ochaihai le Levihai sikin an lôma,

⁴⁵ Davida le a nâipa Solomona thupêk angin, hla saktu le mikot hrungtuhai khom an Pathian sintho hrang dân le irthiangtirna dân chu an zôma.

⁴⁶Tianlaia Davida le Asafa dam laia hlasak pâlhai hruaitu an oma, Pathian inpâkna le lômna hlahai an sak ngaia.



⁴⁷Zerubabela dam lai le Nehemia dam laiin Israel murdihaiin hla saktuhai le mikot hrungtuhai chu a nitina an irhoipui lamin thu an neia: khan Levihai dongtum chu a dangin a siaa; khan Levi haiin Arona nâipahai dongtum an indanglamtir pehaia.

Nehemia 13

Nam danghai ata irkiangna

¹ Kha nê khan chu mipuihai mikuar inhriatin Mosia lekhabu a tepa; hi lai hin Amon mihai, Moab mihai chu Pathian mihai inkhômnaa khan itiklai khomin an iom thei hrang ni mah ti a chuanga.

² Israel irchihai bai le tui khoma dôn loia, anni khomâksâm hranga Balaama an hmang sikin: khannisianlân kin Pathianin khomâksâmna chu satvurna an changtir pehaia.

³Khanchu hiang hin a nia, dân an irngai zoiin chu Israel mihai laia lei irzêl tâkhai nam dang mihai an zenhaia.

Nehemia dân siam insathai

⁴Khan matona khan kin Pathian in tentan sênga hruaituin a siahaia, ochai Eliasiba, Tobia tianga kop angin.

⁵Maton tianga Levihai, hlasaktu hai, mikot hrungtuhai dongtum, baidi thilinhlan, mirimhoi, bêlbûr bu, sôma inkhat, uain le sahriak le ochaihai hranga ngaihoi thilinhlan an isiana ngai tentan lian tak kha Tobia hrangin a sinsiam pea.

⁶Khannisian, kha thil a om laia khan, Jerusalema om ma unga, Babulon rêng Artazerzia kum sômthum kum hni an lal kumin rêng kuang ki fea, sîn iza zoia phalna ki zonga

⁷khanchu Jerusalema ki fea, Pathian in irkul kholâia tentan sinsiama Tobia hrang Eliasiba'n thil saloi a itho kin hriata.

⁸Ki milunghoi thei ta maka: khasikin Tobia in sênga bungrua murdi, kha tentan ata kha kin thekpai pea.



⁹Thu ki pêka, tentanhai an irthiala; khanchu Pathian ina bêlbûrhai chu baithep thil inhlan le mirimhoihai leh ki lâk lût nôka.

¹⁰Khan Levihai le, hla saktuhai chu an dongtum an pêkhai no sikin, a ni loi lam tiang an rot tah ti kin hriata.

¹¹Khanchu roirêltuhai ki halhaia, “Itina mo Pathian ina khan a la irsam thei?” ki tia. Khanchu ki koibukhaia, an omna khan kin omtirhai nôka.

¹²Khanchu Juda nâihai murdi’n bu, sôma inkhat, uainhai, sahriak hai, tholôm bukkhômna khan an hong chôia.

¹³Khan ochai Selemia le lekha irziaktu Zadoka le Levihai laia Pedaia hai chu tholôm siakhômna hruaitu hrangin ki siamhaia; anni leh irhlet hrangin Matania nâi Zakura nâipa Hanana a oma: iamom taka irngai mi a nia, a sintho chu a urênghai laia thil sem ngai a ni.

¹⁴O kin Pathian, hi thua hin nin hre mai ro, ki Pathian in le sin thôna hrangin ki sintho insahai chu ni pai pe no roh.

¹⁵Kha laia khan Judai rama irngam nia uain tui sinhai, bumût hong pêl hai, grep, theipui le puakrikhai inpêltir hranga sakuartunga an isiam lai ki hmua, annihai kha irngam nê sîn Jerusalema an hong tungpuia, khan fâk hrang zuar mihai khan a dik loizia kin hriattira.

¹⁶Tura rama mi, khataka omhai khomin ngahai le hmangrua tinrênghai an hong lâka, irngam ni sîna Juda mihai leh Jerusalema an zuara.

¹⁷Khanchu Juda mi lianhai kha ki halhaia, “Irngam nê porinchetira thil saloi nin itho hi imo a omzia?”

¹⁸Nin pi le puhai khomin hiang hin an lei thoa, kin Pathianin hi thil saloi murdihai hi kin chungale hi kho sînga hin a hong intungtir nin isôn loi ma ni? khaang dôra irngam nê porinchetirin Israel mihai laia ningmurna nin ni la intungtir pe mai,” ki tia.

¹⁹Khanchu hiang hi a nia, irngam nê a hong ni nôkin chu Jerusalem kul mikot a hong inthim nôka, khanchu mikothai khâr hrangin thu ki pêka, irngam nê a



hek mâka chu inhong loi hrangin thu ki pêka; irngam nia an thil hong pêlhai an lâk thei lolina hrangin ki ruatharte dônhai mikot kin hrungtirhaia.

²⁰Khanchu bepâr thohai le neinun zuar mihai chu voikhat, voihi ni vêl Jerusalem pên tiang an riaka.

²¹Khanchu an dik loizia kin hriattirhaia, an kuang, “Ithoa mo kul kôla nin iriak? Hiang hin nin tho nôkin chu nin chung a ki kut la tha ki ti,” ki tia. Kha rengata chu irngam nê sîn chu hong ta mahai.

²²Khanchu Levihai chu irsinsiam a, irngam nia irthiangtirna kul mikothai hrung hrangin thu ki pêka. O ki Pathian hi thua hin nin hre mai ro, ni lungkhamna zârin ni la hôiin lân.

²³ Kha zoroa khan Juda mi, Asdod, nupanghai, Amon nupanghai, Moab nupanghai, dôngma neihai ki hmua;

²⁴an nâihai chu Asdod chongin an chonga, anni chong ti loiin chu Juda chong an irnghil ta.

²⁵Khan annihai kha ki halhaia, khomâk ki sâmbhaia, senkathai chu ki vîkhaia, an samhai kin potpai pehaia, an nâinuhai chu an nâihai pasal an inneitirhai loi hrangin, an nâipasalhai khomin dôngma nei ta loi hrangin Pathian irhmingin khomâk ki’rsâmtirhaia.

²⁶ “Israel rêng Solomona khom khaanga thil sa tho’n a isual mo ni ma? khaang dôra tho khomin nam tamtak laia ama anga rêng om mahaia, a Pathianin a indit tak a la nia, Pathianin Israel ram murdi chung a rêngin a siama; khannisian ama ngêt khom kha ram dang nupangin an insiattir a ni.

²⁷Khasikin ram dang nupang luaa kin Pathian chung a thil saloi thoin, nin thu kin izôm hrang ma ni?,” ki tia.

²⁸ Khanchu ochai inlal Eliasiba nâi, Joiada nâipa pasal khat chu Horan mi Sanbalata mâkpa a nia, khanchu ki makung ata ki’rzûlpaia.

²⁹O ki Pathian, ochai sin le ochai sintho hranga thuthung le Levihai thuthung an porinchetir sikin inhre pehai mai roh.



³⁰Khaang khan ram dang mihai ata ni'rthiangtirhai, ochaihai, Levihai sin thôna murdia sin tho hrang dân ki zêk pehaia.

³¹A zoro ang taka thil inhlan hrang le, chîmu vâng masa inhlan hranghai le, o ki Pathian a satna lam takin nin hre mai roh.



Estheri

Estheri 1

Rengnu Vasti'n rêng Ahasuera chong a hnôl

¹ Reng Ahasuera'n India ram rengata Sudan dênin ram bial, irzakhat sômhni sari chung a roirêltu a chang laia hi thil hi a hong itung a ni.

² Kha laia khan rêng chu Susa khopuia a oma.

³ Reng a chang kum thumna khan a rama mi lianhai, a sinthotuhai Persia le Media sipai hruaituhai, bial tina ram optuhai le rêng nâihai le mi felhai ta hrangin hruai an thêa.

⁴ Tha ruk sêng a ram roiinpui taka a'rchongzia, an lalzia le a neinungziahai an entira.

⁵ Kha zoia chu a omna khopui Susa khuaa a fea, mi lian le mi chînhai ta hrangin rêng irhuan sêng tuallaia sîn sari hruai an thê nôka.

⁶ Kha khan puan ngoi, puan duk, puan sendukhai an zâra, a zârna hruihruai chu sâilungvâr chopuia tangkarua suankuala khan puanirnêm an thunga. Rângachak le tangkaruaa siam toihmunhai chu siam irfûk an nia; a tualzôla khan sâilungvâr hai, lunghlu chi dang dang a sen, a êm, a dukinpôlhai an dâp saa.

⁷ An zû semna khilât chu rângachak khilât a ni, an khilât kha chi dang dang a ni; rêngin uain chu tamtakin a pêkhaia.

⁸ A in lam dân khom bituk ual om ma, tukhom an nuam ang taka in intirhai hrangin rêngin a siahlohai chu a ihril diamhai a ni.

⁹ Rengnu Vasti khomin rêng Ahasuera in danga nupanghai ta bîk hrangin hruai an thea.

¹⁰ Sîn sari nia chu, uain sikin rêng lungrîl a hong lôm tâka, khanchu, thainuzel sarikai Mehumana, Biztha, Harbona, Bigthana, Abagtha, Zethara, Karkasa ama siahlo bîkhai chu a koihaia.



¹¹Rengnu Vasti chu a rênglukhum khum pumin va hruai hrangin a tîrhaia. Rengnu chu nu hmêl satak a ni, a hmêl sa lam chu a mi lianhai le a mikhual murdihai inentir a itum a ni.

¹²Reng thupêk an inhrila rêngnu Vasti chu fe nuam ta maka. Reng chu a sân a ning an mur tâka.

¹³Renghaiin dân le an fepui hrang lam chungchânga dân inhriat mihai an irdon infel ngai. Khasikin, rêng Ahasuera khomin dân inhriat mi a koihaia.

¹⁴A ikoihai chu Karsena, Sethara, Admatha, Tarsisa, Maresa, Marsena, Memukana, Persia le Media rama milian, rêng kôla om ngaihai an ni.

¹⁵Rengin, “Kei, rêng Ahasuera’n ki siahlohai kha rêngnu Vasti ki van koitirhaia, ama khan ki thu kha lei pom maka. Hi ang chungchânga ei ram dân hi i ma ni, itina tho hrang ma ni?” tiin anni chu a’rdonhaia.

¹⁶Memukana’n rêng le mi lian danghai makunga, “Rengnu Vasti hin rêng vai hi a hnuaisia ni maka, a rama mi lianhai le ram pumpui sînga pahai khom hi a ihnuaisia a ni.

¹⁷Rengnu thiltho dân hi nuhaiin an inhriat tika an pasalhai hnuaisia an ti, ‘Reng Ahasuera’n rêngnu Vasti a koi khomin fe nuam mah kha te;’ ti an ti.

¹⁸Misa tâk mân Persia le Media rama mi lian dôngmahai khomin rêngnu om dân an inhriatin an pasalhai thu zôm no nihaia, pahai chu an ninginmur a ti.

¹⁹Rengin sa a tiin chu rêngnu Vasti hin, ‘Reng hmêl hmu viat ta no ni,’ tiin rêng thupêk insua roh. Thûl nôk thei viat chi ni mah tiin Persia le Media dân bua irziak ni ri se. Rêngin a rêngnu nina hi ama nêka sa ual nei nôk ri se.

²⁰Kha thupêk kha ni ram irzat taka khan inpuang a ni zoia chu nuhaiin an pasalhai chu an inriang mo, an irchong mo mahrip tho an ti,” a tia.

²¹Reng le mi lianhaiin kha kha sa an iti tâk a nia, Memukana iti angin rêngin a tho tâka.

²²A ram bial tina, kha bial chong le horop hmangin thupêk a sem indarh tâka; “In sîngkua tina pa hi an laltak ni a ta, a thu chu zôm ving hrang a ni,” tiin.



Estheri 2

Estheri rêngnu a hong chang thu

¹Reng kha a ninginmurna a dâi hnung khomin Vasti thiltho dân le a chungchânga thupêk om chu a ngaitua maia.

²Reng sinthotuhaiin rêng kuang, “Reng ta hrangin dôngmate irthiang, hmêl satak zong ni ri se.

³Bial tina hruaitu inkung sian, anni’n bial tina dôngmate hmêl sa zong suakhai sianlân, hi khopui Susa khuua rêng ina hong hruai khôm ri sehai. Reng ina nupanghai omna tentan enkoltu, thainuzel Hagaia kuang honghai sianlân, irvô dân irchû ri sehai.

⁴Khanchu dôngmate ni indit tak inthang ni ta, Vasti irthûla rêngnu’n siam ni ti,” an tia. Rengin sa a tia, khang khan an tho tâka.

⁵Susa khopuia khan Juda mi Zaira nâipa Mordekaia a oma, Benjamina nama Kisa nâipa Simeia irchia mi a ni.

⁶Babulon rêng Nebukadnezara’n Jerusalem ata Judai rama rêng Jehoiakina leh mi a ichelhai sala a hruaihai lai khan Mordekaia khom hi a kop sa.

⁷A pa tianga nu le pa murdi an thi tâk sikin an nâinu Estheri, Hebrai chonga Hadasa an iti chu, a donsui inliana, ama nâinu ang dênin a ienkol a ni, dôngmate hmêl satak a ni.

⁸Reng thupêk an inpuang zoia chu Susa khopuia Hagaia enkol hrangin dôngmate tamtak an hong hruai zut zuta. Estheri khom rêng ina nupanghai omna tentan enkoltu, Hagaia kuang an hruai sa tâka.

⁹Nupang hmêl satak a nia, a lei indot tak taka. a irvôna hrang chu a pêk zut zuta, fâk nêk tui tak tak a pêka, ama sinthotu hrang le ama irvôtir hrangin rêng ina dôngmate sari an thang saa. Reng ina nupang omna hmun hoi taka a siahlohai leh an omtir tâka.

¹⁰Estheri’n tu nam mo a ini, tu in sêngkua mo a ini ite hril ma; Mordekaia’n hril loi hrangin a khap ngit sikin.



¹¹Estheri kha imo a itho, itin mo a hong om ngai, ti inhre hrangin a nitin rêng ina nupanghai omna tentan mikota khan Mordekaia chu a fe mai ngai.

¹²Reng dôngma hrang chu irvôna zoro ringot khom kum khat a nang ngai. Tha ruk sâng chu Mura hriak an irpola; kha zoia tha ruk sâng ngêt sahriak mirimhoi chi dang dang an irpol nôk ngai. Khaanga an irvô zoia vai khan rêng kuang an ife thei ngai a ni.

¹³Reng makunga an fe'n chu nupang omna tentan sâng a an indit tak an hruai sa ngai.

¹⁴Zân tiang rêng makunga an hruaia, zînga rêng dôngmahai omnaa thainuzel Saazgasa kuta an sia ngai. Rengin a nuama, ar hminga a koi no'n chu rêng makunga fe nôk ta ngai mah.

¹⁵Khanchu, Estheri chu rêng makunga fe zoro a hong tung tâka. Estheri hi Mordekaia irkaipui Abihaila nâinu a nia, ama nâinu angin a idonsui tâk a ni. Estheri chu rêng makunga fe a hong chuk tikin, nupang omna tentan enkoltu Hagaia'n a ruk tôkin a'rvotira, a hmu murdi'n a sân a hmêl a sa an tia.

¹⁶Reng Ahasuera, kum sari an lal kum, tha sômna, Tebet tha khan Estheri chu rêng makunga an hruaia.

¹⁷Rengin dôngmate dang danghai nêkin Estheri chu an dita, an renin lung an kham bîka, rênglukhum an khumtira, Vasti irthûla rêngnu'n a sia tâka.

¹⁸Khan, rêng khan a rêng hai le a siahlohai murdi ta hrangin, hruai roiinpui tak Estheri hruaithe kha a siam tâka, a ram puipuia mi hai ta hrangin irngam nî sîn a siam tâka, rêng tikhoina ang takin lômmanhai khom a pêk saa.

Mordekaia'n rêng hringna a inzôk

¹⁹Rengin Mordekaia chu sorkâr sin liantak an sintir tâka.

²⁰Estheri chu Juda mi a nih ti tukhom inhril maka, Mordekaia'n tûte hril loi hranga a iti kha, a nâipangte ata a thu a izôm ngai ang khan a la zôm mai a ni.



²¹Mordekaia chu rêng ina sorkâr sin liantak rêngin an sintir sikin rêng in mikot nghâktu thainuzel inhni Bigthana le Teresa haiin rêng Ahasuera chung a nuara, rêng chu that an tum tâka.

²²Kha thil kha Mordekaia'n inrûkin an hriata, rêngnu Estheri chu an hriila; khanchu, Estheri'n Mordekaia irhmingin rêng an hril nôka.

²³Thil omdân an suisuak infela, kha kha a dik a ni sikin, an ruaiin an inkhâi thathai tâka. Kha thu kha rêng irsinsiana bua an irziak inlût tâk a ni.

Estheri 3

Hamana'n Judahai that a tum

¹Kha zoia chu Agag mi Hamedata nâipa Hamana chu rêng Ahasuera'n ngîrhmun irsânga a siaa, hruaitu murdi chung a sia ta.

²Reng thupêk angin rêng ina sintho murdi'n Hamana chu khûksadelin chubai mûka, inzâ hrang a ni. Mi tinin chubai an mûka, Mordekaia vaiin mûk mah.

³Reng ina sinthotuhaiin Mordekaia kuang, "Reng thupêk hi itina mo ni izôm nuam loi?" an tia.

⁴Reng thupêk chu zôm ngêt hrangin an inhrila, khannisian, Mordekaia'n, "Juda ki nia, Hamana makunga kûn thei no ning," a tia. Khanchu Mordekaia om dân chu ar ngai thei mo, irngai thei ma moh ti inhriatna hrangin Hamana chu an inhril tâka.

⁵Mordekaia chu Hamana makunga kûn nuam maka, chubai khom mûk nuam mah ti Hamana'n an hriatin chu a ning an mur ok tâka,

⁶khan, Mordekaia chu Juda mi a nih ti an hriatin Mordekaia vai ni loiin Persia rama Juda om murdi chu that ving a tum tâka.

⁷Ahasuera rêng a changna kum sômhleihnina tha masa tak, Nisan tha khan Hamana tho tum irchûtirna hrangin i nikhua le i tha mo a isatak hrang tih inhriatna hrangin tâ an sâna; kha tasân nî chu zoro'nchum tak angin an bêa.

⁸Hamana'n rêng kuang, "Ni ram sûnga hmun dang danga nam inkhat irzep an oma, bial tina an om indarh a ni. Nam dang dân ang ni loi, an binga dân bîk



an neia, a ram dân khom zôm nuam mahai. Annihai hi an om maiin chu nangma hrangin sa no ni.

⁹Rengin, sa a ti'n chu thathai zit hrangin thupêk insua ri se. Khaang takin ni tho'n chu ni ram opna hrangin rêng suma tangkarua nuai thum le sîng minli her nang pe thei ki ti," a tia.

¹⁰Thupêk inpuang namindetna kutsabi chu rêngin a lâka, Judahai râlpa Agag mi Hamedata nâipa Hamana chu a pêka.

¹¹"Mipuihai leh an sum chu ni kuta nang ki pêk ta, ni nuamlam ang takin tho ro," a tia.

¹²Tha masa tak tarik sômkhath inthum nî khan rêng lekha irziaktuhai chu Hamana'n a koihaia, rêng thupêk inpuang chu a'rziaktira, a ram sînga chong chi tinrêng le an horop hmangin ar hlettirhai zôia, rêng irthûla, ram optuhai le roirêltuhai kuang rêng kutsabi lekha a irbela thon suak hrangin ar siam tâka.

¹³Ram pumpui sînga bial tina, rêng thupêk chu an thon suaka. Kha thupêk kha, kha nikhua ngêt, tha sômhleihni, Adar tha, tarik sômhleiminli nî hmang hrang a ni. Juda mi murdi, vânglai le tarhai, nupang nâipang that zit hrang le, neinunhai khom lapai pehai zit hranga thupêk a ni.

¹⁴Bial tinin kha thupêk kha tepsuak zit hrang a ni, a zoro taka, thupêk lam ang takin an tho theina hrangin.

¹⁵Susa khopuia khom thupêk kha rêngin an puangtira; bial dang danga khom lekha chu an intânpuia. Reng le Hamana chu zu an in mai lai takin Susa khuaa mi chu an char a dong zit tâka.

Estheri 4

Mordekaia'n Estheri changpui hrangin a ngên

¹An thiltho dân murdi kha Mordekaia'n an hriatin chu a puan an potthêra, bora puan a sila a lua irvut ar pola, beidong takin a chap ngûi ngûia; kha sînga khan khua chu ar fanga,



²Reng in tual lûtna mikot chu a va tunga; bora puan sil chu tûte inlûttir phal ngai mahai sikin, rêng in tual sûnga khan lût mah.

³Ram bial tina rêng thupêk an inpuangna hmun tina, Judahai chu an chap mur mura; bu an ngheia, mi tamtak chu bora puan silin irvut an irthua.

⁴Mordekaia omdân chu siahlo dôngmatehai le thainuzel saihaiin Estheri chu an hong inhrila, rêngnu chu a bêi an dong tâka, bora puan khekpaia a sil hrang puan dang Mordekaia chu a pêka, lei nuam maka.

⁵Ama enkoltu hranga rêngin thainuzel sai inkhat a inkung pe, Hathaka chu a koia, thil omzia irdon infel hrangin Mordekaia kuang a tîra.

⁶Hathaka chu rêng in lûtna mikot tuala khan a va suaka.

⁷Mordekaia'n thil omdân murdi chu a lei inhrila, Judahai that zit an niin chu rêng sum bakota hin Hamana'n sum tamtak thun lût hrang a tum thuhai khom a lei inhrila.

⁸Judahai thatna hranga thupêk Susa khopuaia an inpuangna lekha irziak khom Hathaka a pêka. Mordekaia'n lekha chu Estheri pe hrangin a ngêna, thil omdân murdi a hril pe zita.

⁹Hathaka'n kha chong kha a van tungtira.

¹⁰Estheri'n hianga thu hi Mordekaia inhril hrangin Hathaka a tîr nôka.

¹¹“A ram sûnga mi tukhom pasal khom nupang khom, koi loa rêng in sûnga lûta, rêng va hmu chu, a sinhotuhai ngei khom, that hrang ti mi murdi'n an inhriat, rêngin a rângachak khianghrol an lek pehai vaiin a ina lût thei a ni. Sûn sômthum reng ni koi ta mah,” tiin Mordekaia chu an inhriattira.

¹²Estheri chong chu Mordekaia an hrila.

¹³Mordekaia'n hianga hril hrangin Estheri kuang a tîr nôka, “Reng in sûnga ni om sikin nangma vai zôk ki ti, ti irsôn no roh.

¹⁴Atûn zoro hin ni la dâihrek maiin chu hmun danga Juda omhai chu iti tin mani saninzôkin an om khomin nang le ni pa in sûng mihai chu ei ithi ngêt hrang a ni. Hiang ngîrhmunahin rêngnua ni ichang a ini loi ma ni?” tiin



¹⁵Estheri'n Mordekaia kuang a tîr nôka,

¹⁶“Fe'n lân, Susa khuaa Juda om murdi koi khômin lân, ki ta hrangin a sîn a zânin bu ngheiin sîn thum sîng chongchai roi. Ki siahlo dôngmatehai leh hin keini khomin khang khan chongchai kin ti. Kha zoia chu dân ni no khom sian rêng makunga ki thi le ki thi irhuamin, va fe ki ti,” a tia.

¹⁷Mordekaia chu a hong, Estheri iti ang takin a va tho zit tâka.

Estheri 5

Estheri'n rêng le Hamana bu nêk hrangin a koi

¹Sîn thum bu a nghei zoiin, Estherin rêng puansil ar bela, rêng tentan irkul sîng tual, rêng toihmun omna mikota khan a fea. Mikot tiang hmâi songin rêng toihmuna khan rêng chu a lei toia.

²Estheri, pên tianga ngîr chu rêngin a va hmua, a lei inrena, a rângachak rêng khianghrol kha a lei irlek pea. Estheri'n a va pana, a khianghrol hmor chu a va tôna,

³“Rengnu Estheri, imo ni inuam nin hril ro, ki ram chimrip khom ni ri se nang pe ki ti,” a lei tia.

⁴Estheri'n a sâma, “Rengin sa ni tiin chu a vuan zân hin nang le Hamana hin ki hruaithe siam ni hong fapui hrangin nangni ki fial,” a tia.

⁵Rengin Hamana chu rêngnu hruaithe otpui hrangin, hong lat hrangin chong an thuana, rêng le Hamana chu rêngnu hruaithe otpui hrangin an fe tâka.

⁶Uain an in laiin rêngin, “Imo ni inuam, ki ram chimrip khom ni ri se, nang pe ki ti,” a ti nôka.

⁷Estheri'n a sâma,

⁸“Rengin ni ni lunginkhama, ki thil zong hi ni ni iphal hrang a niin chu nangtûk zâna hruaithe siam nôk ki ta, Hamana leh hong fa nôk unglân, ki thil zong chu nang hril ki ti,” a tia.

Hamana'n Mordekaia that a tum



⁹Hamana chu hruaithe fâk zoia raifân le lôm takin a kîra, khannisian, Mordekaia chu rêng in irkul hualsûng mikot bula a hmua, lei inza loiin ngîr khom ngîr nuamloi a hmu'n chu Hamana chu a sân a ning an mur tâka.

¹⁰Khannisianlân, Hamana chu an sum zâma, a in tiang a kîr ta. A rualhai le a dôngma Zeresi chu a ina a koi bûmhaia.

¹¹A'rchongzia hai, nâipa a nei intamzia hai, rêngin ngîrhmun irsânga a siazia hai, rêngin mi lian danghai nêkin a'rngaisângzia hai a hril zita.

¹²“Rengnu khomin rêng le kei vai a hruaithe fa hrangin a ni ikoi a ni, nangtûk zâna khom a ni ifial nôk a ni.

¹³Aniachu, rêng in lûtna mikot bula Juda mi Mordekaia toi ki hmu sûng chu hi thilhai hin nin lômtir ual ma,” a tia.

¹⁴Khanchu a dôngma le a rualhaiin, “Mûk sômringa irsânga inkhâi thatna hrang siamin lân, nangtûk zîng, rêng makunga Mordekaia chu inkhâi that hrangin ngênin lân, raifân takin hruaithe chu otpui thei ni ti,” an tia. Hamana'n sa a ti tak taka, inkhâi thatna hrang chu a siam tâka.

Estheri 6

Rengin Mordekaia a chôirsâng

¹Kha nî zân ngêta khan rêng chu inmu man thei maka, thil milui irsinsiana lekhai kha kêlsua hrangin thu a pêka, an itepsuak chu ar ngaia.

² Reng ina thainuzel Bigthana le Teresa hai inhni'n rêng that tuma an irsiam thu kha an tep suaka.

³Rengin, “Hi mi sika hin Mordekaia hi chôindômin lômman kin pêk mo?” a tia. A siahlohaiin, “Ama hrangin ite tho pe ma ung,” an tia.

⁴Rengin, “Tu mo rêng in tuala om so?” a tia. Hamana'n Mordekaia irkhâi thatna hrang chopui a siam pea, inkhâi that hranga ngênna rêng inhual sûnga a ihong a ni.

⁵Reng siahlohaiin, “Nang hmu tumin Hamana a hong a ni,” an tia. Khan rêngin, “Hong lût ri se,” a tia.



⁶Hamana a hong lûtin chu, “Mi inkhat chôindôm ki nuama, itin mo ki itho hrang?,” rêngin a lei tia. “Rêngin kei ti no chu tu mo a ichôindôm a nuam hrang,” tiin a milung an chonga.

⁷Reng kuanga khan, “Rêngin chôindôm a inuamhai chu,

⁸rêng inngghâk ngai songkol la sianlân, a chuangna ngai sakor hong kai ri se, chôindômna lukhum inkhumtir ni ri se.

⁹Ni mi lianhai laia a roiinpui tak koiin lân, rêng songkolhai chu inngghâktir sianlân, sakor chung a inchuangtir sianlân, khopuia chaipui ri se. An fepui laiin, rêngin mi a ichôindôm ni a ti, ti zêl ri se,” a tia.

¹⁰Rêngin Hamana kuang, “Irhnotin lân, rêng songkolhai le sakorhai chu lan lân, Juda mi Mordekaia hi ni iti lam takin chôindôm roh. Ni iti murdi ang khan tho ro, rêng tual lûtna mikot bula son a om so,” a tia.

¹¹Khanchu Hamana’n rêng songkolhai chu a lâka, Mordekaia chu an ngghâktira; Mordekaia chu sakora khan an chuangtira; khopui irhîlin Hamana’n sakor chu a kaia, an fe laiin mipui inhriata, “Rêngin chôindôm ni a ti,” tiin an insam thiaia.

¹²Mordekaia chu rêng tual lûtna bula khan a va fe nôka; Hamana rêk chu inzaka a hmâi hîpin ina a hong a.

¹³A dôngma leh a rualhai chu a chung a thil tung murdi chu a hril zita. A dôngma le a rual vâ tak takhaiin, “Mordekaia hi Juda mi a nia, ngam no chi ni, ni ihrât loi ngêt hrang a ni hi te,” an tia.

¹⁴Khaang thu an hril laiin Hamana chu rêng ina Estheri hruaithe fâk hranga hruai zôi zel hrangin thainuzelhai an hong a.

Estheri 7

Hamana ar khâi that

¹Reng le Hamana chu Estheri hruaithe siam fâk hrangin an fea.

²Uain an in lai takin rêngin, “Rengnu Estheri, imo ni nuam nin hril ro, ki ram chimrip khom ni ri se, nin hrilin lân, nang pe ki ti,” a tia.



³Rengnu Estheri'n a sâma, "O Rengpa, rêngin lung a nin khama sa a tiin chu ki hringna le ki mihai hringna khom inzôk hrangin nang ki ngên.

⁴Kei le ki in sâng mihai chu that irhmang zit hranga rêl kin ni tâka. Nupang pasal suaka ni zuar hrang ni sianlân chu ite ti no ning, khannisianlân atûn hin kin râlhaiin ni that irhmang zit hrang an ni," a tia.

⁵Reng Ahasuera'n Estheri kuang, "Khaanga tho ngam kha tu ma ni, khôn mo a iom? a tia.

⁶Estheri'n, 'Kin râl leh nir doipuitu chu, hi mi sualpa Hamana hi a ni hi te,' a tia. Hamana chu rêng le rêngnu kôla khan chi le inthingin a om tâka.

⁷Reng chu a ninginmurin uain a in laiin a thoia, rêng irhuana khan a zu fea. Hamana chu rêngin hrem hrang a ni tih a lei inhriata, khasikin in sâng khan a oma, rêngnu kuang a hringna inzôk hrangin a ngên a ni.

⁸Reng chu irhuan ata hongin uain an inna tentana khan a hong lût nôka, Estheri toinaa Hamana chu inbok hrupa lei om a hmua. Rengin, 'Ki ina, ki mithmu ngeia khom rêngnu hi siatpui a itum a ni moh?' a tia. Reng a hong chong suakin chu Hamana hmâi an tuama.

⁹Reng kuanga om ngaitu thainuzel inkhat Harbona'n, 'Reng ta hranga sin sa tho ngai Mordekaia inkhâi thatna hrang mûk sômringaa irsâng Hamana'n a in kôla chopui a phun kêng,' a tia.

¹⁰Khanchu, rêngin, 'Khataka khan inkhâi that roi,' a tia. Mordekaia inkhâi thatna hranga a isيامa khan, Hamana chu an inkhâi that tâka, rêng ningmur chu a hong boi tâka.

Estheri 9

Judahaiin an râlhai an that

¹Reng thupêk hmang hrang sîn, Adar tha tarik sômkhath inthum nî chu a hong tung tâka. Kha ni sîn kha an râlhaiin Judahai that irhmang zit an tum ni kha a nia; khannisianlân, Judahaiin an inhnêhai tâka.



²Reng Ahasuera ram pumpui sînga Judahai chu an khopuihaia khan an irbukkhôma, anni hong doi tumtu chu doi nôk hrangin an lei irsiam diama. Tu nam khomin Judahai chu an chia, doi ngam mahai.

³Bial optu rêng irthûla ram optuhai le sorkâr sinthotuhaiin Mordekaia an chi sikin Judahai chu an changpuihai tâka.

⁴Ram pumpuia Mordekaia chu ircham a hong nei ta, ti mi tinin an inhriat tâka, a hong inlal ual ual tâk a ni.

⁵Khasikin Judahaiin an râlhai chu an nuam nuamin an longhaia, chemin an doia, an râl murdi chu an that zit tâka.

⁶Susa khopuia khom Judahaiin mi irzaringa vêl an thata.

⁷Hi mi Parsandata, Dalefona, Aspata,

⁸Porata, Adalia, Aridaia,

⁹Parmasta, Arisaia, Aridaia, Vaizata hai

¹⁰Juda râl Hamedata nâipa Hamara nâi sômhai khom hi Judahaiin an thata; aniachu tûte ina râlâlâk sum la mahai.

¹¹Kha nî sîn khan rêng khopui Susa khuua mi an ithat zât chu rêng an inhrila.

¹²Rengin rêngnu Estheri kuang, “Reng khopui Susa-ah khom Judahaiin mi irzaringa le Hamana nâipasal sôm an that tâk. Reng ram sîng bial danga itin tak mo tho ta nihai na! Ni inuam dang a la om mo? Nin hril ro, nang tho pe zit ki ti,” a tia.

¹³Estheri’n, “Rengin sa a tiin chu, a vuana an itho angin Susa khuua Judahaiin nangtûka khom tho nôkhai sian, Hamana nâipasal sômhai chu thinga inkhâi that ni ri sehai,” a tia.

¹⁴Khaanga tho hrangin rêngin thupêk an suaka, Susa khuua an puanga. Hamana nâipasal sômhai khom chu thinga an inkhâia.



¹⁵Susa khuaa Juda omhai chu Adar tha tarik sômkhath minli nê chu an irbukkhôm nôka, Susa khuaa mi irzathum an that nôka, aniachu, tûte ina râlâlak sum la mahai.

¹⁶Ram sâng bial tina Judahai khom chu an mâni irhrung hrangin an irbukkhôma. an râlhai laia hruaitu mi sîngsari le sângringa an thata; aniachu, tûte ina râlâlak sum la mahai.

¹⁷Khaangin Adar tha tarik sômkhath inthum nê khan an thoa. Zîng nôk tarik sômkhath minli nê khan chu tukhom that ta mahai, raifânna kûth sîn an hmang tâk a ni.

¹⁸Susa khuaa Judahaiin chu tarik sômkhath ringa nê khan omnê an neia, tarik sômkhath inthum le sômkhath minli nê chu an râlhai an thata, tarik sômkhath ringa nê chu an monga, hruaithe ni le raifân nia an siama.

¹⁹Khasika khan kho sînga om Judahai chu Adar tha, tarik sômkhath minli nê hi omnê an neia, raifân takin hruai an inthea, thilpêk an irpêk irhlôm ngai.

Purim Kûth

²⁰Mordekaia'n hi thurchihai hi lekhabua a'zriak zita, Persia ram sînga Juda om murdi, a hla le anaia omhai khom lekha a thona.

²¹Adar tha tarik sômkhath minli nê le sômkhath ringa nê, kum tin om nê sera; kûth nei hrang a ni.

²²Hi sînhaia hin Judahaiin an râlhai ata an zôka, beidong le chardong tha chu raifânna le lômna tha inchang nê a ni. Hruaihai an inthea, raifân taka hmangin fâk nêk irpêk irhlôm hrangin a hrila; mi inriang khom fâk nêk pêk hrangin a hril saa.

²³Judahaiin Mordekaia thupêk chu an zôma, kum tin kûtna an nei tâk a ni.

²⁴Agag mi Hamadata nâipa Hamana, Judahai râlpa khan Judahai that irhmangna hrangin i sîn mo a isa hrang ti inhriatna hrangin tasânna a neia.

²⁵Khannisianlân, Estheri chu rêng kuang a fea, rêngin thupêk an sua tâka. Kha thupêk sikin Judahai tuang hranga a isiam chu Hamana le a nâipasalhain an tuang tâka, thinga an inkhâi thathai tâk a ni.



²⁶An chung a thil hong tunghai sik le Mordekaia lekha sikin kha kût kha, Purim “tasân” kût an phua tâk a ni.

²⁷Judahai chu an irchihai dênin a zoro taka, kum tin Mordekaia ihril angin hi sîn hni hi omnî an inei hrang a ni tih dân an siam tâka.

²⁸Juda sêngkua tinin, sîn matona irchi la hong om zêlhaiin bial tina mi le khua tina mi'n inhriat maina hrangin hi Purim kût hmang ngai hrang a nih ti thu an inkunga.

²⁹Rengnu Estheri, Abihaila nâinu'n, Purim kût chungchânga Mordekaia lekha chu a namindet a nih ti thu chu, Mordekaia lekhaa khan a thon suak zêla.

³⁰Lekha chu Juda mi murdi ta hrangin thon a ni; Persia ram bial irzakhat sômhni sari kuanga ar kopin an pêk saa; Judahai chu irtharngam tak le hoi taka om hrangin lekha thonhai chu an thon tâka.

³¹Judahai chu, an irchihai dênin a zoro taka bu nghei le lusûn tho dân an nei angin Purim nî hi hmang ngai hrangin chong a pêkhai saa. Kha kha Mordekaia le rêngnu Estheri chong a ni.

³²Rengnu Estherin Purim kût chungchâng an namindetna thu chu lekhabua irziak a ni.

Estheri 10

Reng Ahasuera le Mordekaia an roiinpuizia

¹Reng Ahasuera'n a ram kil khôr taka omhai le tuipui kôla omhai chu ram khâzana an chôitir zita.

²A sin tho roiinpui le irkhêl tak tak, Mordekaia sorkâr mi lian taka a isiam thuhai chu Persia le Media rênghai thurchi irziakna bua irziak a ni.

³Mordekaia chu rêng Ahasuera irthûla om a ni. A mi Juda ulianhai khomin an irngai inhlua, an irngaisâng tak tak a ni. A mihai insana hrangin sin a thoa, an irchihai khom irtharngam taka an om theina hrangin lampui a zong pehai zôi zela.



Joba

Joba 1

Setana'n Joba a fia

¹Uz rama mi inkhat a oma, a'rhming chu Joba a ni; hi mi hi sêlnaboi, Pathian chi mi, mi iamom, thil saloihai ata irdîn thei mi a ni.

²Nâipasal sari le nupang inthum a neia.

³A'rchong lam dân chu hiang hin a ni: kêlbelra sângsari, saringsei sângthum, sehrâtchal a bopin irzaringa, sakuartung a pui irzaringa le siahlo tamtak a neia. Nisua tiang rama khan chu irchongtak a ni.

⁴A nâihai hin an mâni inhaia hruai an inthe irthâk ngaia, an far inthumhai khom an hruaithe fâk nêk zongpuihai hrangin an fialhai ngai.

⁵Khaanga hruaithe an zoiin chu Joba'n a koihaia, an hlan irthianghai ngai. Zînga a thoia an irhming chitin hâlvôm thil an hlan pehai ngai. Khan, Joba'n, Ki nâihai hin thilsual thoin an lungrîlin Pathian insîrinsiat rôl an tih tia a itho a ni. Joba'n, hiang hin a itho mai ngai a ni.

⁶Khan vântîrtônhai, Rengpa makunga an inlang nî sùn a hong tunga. Setan khom an laia a om saa.

⁷Rengpa'n Setan kuang, "Kho rengata hong mo ni ni?," a tia. Setana'n Rengpa kuang khan, "A suk a tunga irnêng ki'rfangna rengata," a tia.

⁸Rengpa'n Setan kuang, "Ki siahlo Joba hi ni ngaitua ngai mo? Irnêng chung a hin ama anga sêlnaboi, mi dik, Pathian chi mi, thil saloi lai ata irdîn thei om mahai," a tia.

⁹Setana'n Rengpa kuang khan, "Joba hin a bi boiin nang a irngaisak ma ni?"

¹⁰Ama chu a in le, a inei murdi kil tina ni pêk sika ni ma mo? A kut sintho sat ni vura; a sâhai khom ram an ibit pe a ni ta.

¹¹Khannisianlân, atûn hin ni kut pharin lân, a inei murdi lapai pe nôkin lân, ni hmâi makunga nang a ihrilsiat ngêt hrang," a tia.



¹²Khanchu, Rengpa'n Setan kuang, "Tho atûn hin a inei murdi nangma kuta nang ki pêk, ama chu innatir ro," a tia. Setan chu Rengpa kuang ata a suak ta.

Joba irchon le a nâihai an irhmang

¹³Sûn khat chu a nâinuhai le pasalhain a ulian takpa ina bu an nêka, Uain an in lai takin,

¹⁴Joba kuang thanginthei an hong tunga, "Sehrâtchalhain âl an kaia, sakuartunghai hlataka an om lain,

¹⁵Seba mihain an ni hong doi thuta, an lâkpai vinga, siahlohai chu khandai leh an thathaia, keima vai hi nang an hril hranga hong suak thei ki ni," a tia.

¹⁶A la hril laitakin mi dang a hong tung nôka, "Irvân ata Pathian mei a zuang tâka, kêlbelra le siahlohai a kâng thathaia, keima vai hi a hril hranga hong suak thei ki ni ta," a tia.

¹⁷A la hril laitakin mi dang inkhat a hong nôka, "Kaldaihai pôl thuma irsiamin an ni hong doia, saringseihai an lâkpaihaia, siahlohai khom khandain an thathaia, keima vai hi a hril hranga hong suak thei ki ni," a tia.

¹⁸A la hril laitakin, mi dang a hon tân nôka, "Ni nâipahai le ni nâi nupanghain an upatak ina bu an nêka uain an in lain,

¹⁹irngai ro, ramchâr ata phâivopui a hong thoa, in kha ar kê minli tiang a nam siata, ruatharte le dôngmatehai chu a dela, an ithi a ni ta, keima vai hi nang hril hranga hong suak thei ki ni ta," a tia.

²⁰Khanchu Joba kha a thoia, a songkol irfual an pot thêra, a lu a voi inkola; hnuaia inbokin Pathian a biaka.

²¹"Ka nu sâng ata korongin ki zuang suaka, a korong ngêtin ki ikâr nôk hrang a ni hi te, Rengpa khan a pêka, Rengpa hin a ilâk nôk a ni hi te, Rengpa irhming chu inpâkin om ri se," a tia.

²²Hi thil a tung pe khom hin Joba chu sual maka, Pathian khom insîrinsiat mah.



Joba 2

Setana'n Joba a fia nôk

¹Vântîrtônhai Rengpa makunga inlang zoro a hong om nôka, Setan khom Rengpamakunga inlang hrangin an laia a om saa.

²Rengpa'n Setan kuang, "Kho tiang ata hor thok mo ni ini?" a tia. Setana'n Rengpa kuang khan, "A suk a tunga irnêng ki'rfangna hmun ata," a tia.

³Rengpa'n Setan kuang khan, "Ki siahlo Joba hi ni ngaitua ngai mo?" a tia. Irnêng chung a hin ama anga sêlnaboi, mi dik, Pathian chi mi, thil saloi lai ata irdîn thei mi dang om mahai. A bi boia, ama insiat hrang ni nin thê m zoia khom hin, a la iamom mai a ni," a tia.

⁴Setana'n Rengpa kuang khan, "Vun irthûla vun ti a nia, a ni, mi'n a hringna hrangin a inei murdi pe phal a ti.

⁵Atûn ni kutin a ru le a taksa hong innatir pe ngân ta, ni hmâi makunga nang an sîrinsiat no tâkin chu," a tia.

⁶Khanchu Rengpa'n Setan kuanga khan, "Irngai ro, ama khom ni kuta om a nia, a hringna vai hi hôi pe ro," a tia.

⁷Khanchu, Setan kha Rengpa kuang ata a suaka, Joba chu a ke ata a lu dênin pân hring a'rveitira.

⁸Joba kha a suaka, ar hriatna hrangin bêlkoi hârte a lâka, pil chung a toia.

⁹A dôngma'n a kuang khan, "Ni lungrîl ni la ithûl loi hrang mo? Pathian insîrinsiatin lân, thi rak ta ro!" a tia.

¹⁰Khannisianlân, Joba'n a kuanga khan, "Nupang into chong angin te ni chonga. Pathian kuang ata thil sa ei donga, thil saloihai khom ei idong loi hrang mo?," a tia. Hianga thil a tuang khom hin a Pathian chu insîrinsiat mah.

Joba rualhaiin an hong pan

¹¹Joba rual inthumhaiin a chung a thil saloi tung pe kha an inhriata, ama en hrangin an omna ata an hong pana. Annihai chu Elifasa, Temana khopui



mihai, Bildada, Sua ram mi, Zofara, Naama ram mihai an ni. Ama tuangpui le lungngamsak hrangin zoro an indang angin an hongga.

¹²Hlatak ata Joba chu an hong ena, khannisian infel mahaia. Khan, an va hmu tena chu, an khêka, an chapa; an puanhai an inpot thêra, an lu chungga vâiphin an phula.

¹³Khanchu, irnênga sîn sari le zân sari an toipuia; tûte'n chongbâi khat khom chong loiin, a ituang lam chu natak a nih ti an hmu sikin.

Joba 3

Pathian kuanga Joba chiarna

¹ Kha irzoiin chu Joba a hong chong suaka, a suak nî sîn khomâk a sâma.

²Hiang hin Joba'n a hril ta:

³Ki suak nî sîn chu irhmang ta sian, "Nâipasal a vong ta," an ti nî zân leh khan!

⁴Kha nikhua kha a zîng hong chang sian, chung tianga irthokin Pathianin irngai ta no sian, A vâi khom a chungga vâi pe ta no ri se.

⁵Beidongna le inthim irsa khakin, an dongtum irchu sian, sûmin inbokdel sian, sîn vâi inthimtir kha a charindongtir ri se.

⁶Kha zân kha sûmin irkhukhak sianlân, kha kum sîng kha sîna tep loiin om sian, tha tepna khom khan tep ni ta no ri se.

⁷Kha zân kha zân beidong ni sian, râifâna irhâi ite om no ri se.

⁸Sîn khi khomâksâm theihaiin, kha nî sîn kha khuasâl ri sehai, Leviathan enkol theihaiin.

⁹A zîngbupa ârsi kha inthim sianlân, vâi lei nghâkin hmu ta no sian, Thingchangvârroa khom hmu no ri se.

¹⁰Kha zân khan ka nu sul ar khâr no sikin le ki mit hmua buaina ar thup no sikin.



- 11 Ithoa mo sul sũaga khan ki ithi loi, ki hong suaka zel khan ki phũk a irbôn loi?
- 12 Ithoa mo a malpui chung a ni ipom, ki inêk hrang irhnu'n a ni lei inghâk?
- 13 Khanchu, zâl ki ta, dâihrek ta ki ti, in irnghil ki ta, irngam chian ta ki ti.
- 14 Irnêng rênghai le roirêltuhai, Mâni hranga ram indingtuhai leh khan.
- 15 rângachak tamtak nei rêng nâihai le an in khom tangkarua inbittuhai leh khan.
- 16 Aninole, a zoro loia suak thup irhmang ang ki ini hrang, nâitesen vâ la hmu ngai loi ang hin.
- 17 Kha khan mi sualhain, inbuitir ta no nihaia, a'rzalhai irngam ta an ti.
- 18 Mi intânghai irngam ta an ti, a hrungtuhai irhâi khom inhre no nihai.
- 19 Mi lian le mi chîn hmunkhatin omkhôm an ta, siahlo khom a pu kôl ata zalên ta a ti.
- 20 Ithoa mo dengthei tuanghai kuang vâ pêk a ini? itho mo lungrîla sôlhai kuanga khan hringna pêk a ini.
- 21 Thi irzukhai thi thei loiin, irchon phũm zong inrũk nêka irkhêlin thina zongtuhai.
- 22 Thên chu a hmu suak thei tâka, A saterenga râiinfân tak tak hrang kuanga khan.
- 23 I sika mi, a lampui thupa om kuang le, Pathian paltâng a'rhualkhum kuanga khan vâ pêk mo a ini?
- 24 Bu ki nêk mân ki sabei dongna a hong tunga, kin hrũmnahai chu tui anga bunthâk an ni ngaia.
- 25 Ki ichi ngai tak ki chung a tunga, ar khêl ki iti tak ki itong a ni ta.
- 26 Ki'rtha irngam maka, omchian thei ta ma ung, sôl irngam thei loiin, buaina vai kêng a ni ta.

Joba 4



Chongna nei matontak

(4.1–14.22)

ELIFAZA

- 1** Temana mi'n hiang hin a hrila;
- 2** ni kuang chongbâi khat ki hril nuama, inhuat zapin mo? Dâihrek thei lak ni ta maka?
- 3** Irgaitua ro, mi tamtak ni lei irchutirhaia, kut hrâtloihai, ni len hrâtir pehaia.
- 4** Ni thu'n a'rtethai, ni kaithoihaia, irkhûk zenghai nin hrâtirhaia.
- 5** Intakna ni chung a hong tung tâka, ni'rzal zap tâka, nang ar bôk pe maia; ni ibuai zoi a ni ta.
- 6** Sakhua mi ni nitna hin ni'rtha a'rngam thei loi ma ni? Ni nun a hoi sika hin, ni'rngai a isiat ma ni?
- 7** Irgaitua sabak ro, Ite a siatna om loiin tu mo siatna tong ngai. Kho tiang mo mi dikhai an dâihrek ngai ti ni inhriat?
- 8** ki lei hong ihmu dânin chu tukhom a dik lina, âlkai anga inrang taka buaina chi inthe kin, a pangai an hmu ngai.
- 9** Pathian phûka an irhmang ngaia, ningmurna sêmin an irhmang ngai.
- 10** Kâmkeibaknei inrûm le a harialhai a'rngamtir pea, kâmkeibaknei vânglai ha ngaih tak an khiaktir pea.
- 11** Kâmkeibaknei tar chu fâk hrang irsamin, ar hmanga, a pui nâi ir-ôi laihai khom an indarh zoi ta.
- 12** Dâihrekin ki kuang thu a zuang tunga, ki mikuar kôla dâi za zatin kin hriata.
- 13** Zân dâichit lai taka, zân inlârna kha ki ngaitua laiin,
- 14** phûk inthingin kin thing nor nora, ki lungrîl an chûka.
- 15** Khanchu, ki hmâia vâ a hong êla, ki pangmulthi an ding sup sup.



¹⁶Ki hong ngîra; khannisian a hmêl inlang dân chu hmu'nfel thei ma unga, a châng dep dupin ki hmua, a hong dâihreka, khanchu irhâi kin hriata.

¹⁷Mihriamhai hi Pathian mithmua a felin mo nin hriat? A siamtu makunga hin a'rthiangin mo nin hriat?

¹⁸Irvâna a siahlohai khom iam zoi maka, a tîrtônhai fel loina khom hmutheitu khan.

¹⁹Pil ina omhai hi iam zoi thei imo, vâiphina siam mai an nia, phehlep anga inrôp nôk chian ang an ni.

²⁰Zîng le khohloi kêra irngêhai ifâk irhmang hrang ang a ni.

²¹An chung a puan in khitna hrui chatin, an ithi mai hrang mo ni ma, vârna nei loiin?

Joba 5

¹Hong koi ngân ta, tu'n mo nang a sâm hrang? mi irthiang tu ngân mi mo ni ipan ta hrang?

²Mi'nto chu chiar chiarin thi a ta, irhnarsâna hin mi'nmôl a that thei.

³Mi'nto irkôkpoploi ki hmua, khannisianlân, a omna chu khua ki sâl pea.

⁴A nâihai khom zôk thei viat no nihaia; kul mikot bula khan sirbein an oma, sansuaktu hrang tûte om mahai.

⁵Phîngchâmin a bu le bâl fa pe an ta, ilhling le a irkulhai khom, ar chongnahai kha, mi huatirhamhaiin irzuk an ti.

⁶Tuangnahai hi pil ata hong suak ni maka, buainahai khom hi irnêng ata hor phut ni ma.

⁷Meirisi chung tiang a irlêng ang hin, mihriam hi buai hrang piala zuang suak a ni.

⁸Keima'n chu Pathian zong mai ki ta, Pathian kuang ki chungthu inkoltir ki ti.



- ⁹Thil roiinpui tak a ithohai inhriat phâk thei loi; thilirkhêlhai tep zoi loi thotu chu.
- ¹⁰Irnênga rua inthotirin, loihai khom tui a pêk ngaia.
- ¹¹Khaangin, mi irhniamhai a chôirsâng ngaia, beidonghai chu an hnêmhài ngai.
- ¹²Irhuang hmanghai ngai lunginchong hlo inchuk pehai ngai maka. a kut sintho khom hlochuk thei ngai ma.
- ¹³ Mi vârhài chu an vârna khan irkhit an ti, mi vârilletthai thil ngaituana khan ite changpui ngai mahai.
- ¹⁴An nihai hrangin chu sîn vâra khom an thim pehai ngai. Sîn laihaia khom zân angin an irmai ngai.
- ¹⁵An bâia khandai ata khom inrianghai chu a saninzôk ngai. Mi hrât kut ata khom a sansuak ngai.
- ¹⁶Khanchu inrianghai chu sabeina an neitirhai nôka. Mi sualhai chu an bâi an hruk pehai ngai.
- ¹⁷ Pathianin mi a irchutir chu irkhêl loiin, khasikin itinrêng thothei thupêk chu ngainêp no roh.
- ¹⁸ Pathianin a inphophai kha a tuam nôka; a kuta a innatirhai kha an damhai nôk ngai.
- ¹⁹Voiruk voisari khom buaina tokin lân, nang sansuak a ti, thil saloiin nang tôn thei no ni.
- ²⁰Châm tâk laia khom thina ata nang sansuak a ti; irdoina hmuna khom khandai sinthotheina ata nang sansuak a ti.
- ²¹Chong saloi tak ata khom nang hrung a ta, siatna hong tung khomsian chi no chi ni.
- ²²Siatna le châmpui tâk khom kha innuisan ni ti, ramkâra sahrâng khom chi no chi ni.



²³Irnêng pil ni ituknaa khom lung om no nia; rama sahrâng khomin nang doi no nihai.

²⁴Ni puan ina irtharngam takin om ni ta, ni belra omna ni fe khomin irkip dîpin om an ti.

²⁵Ni'rchi tamtak la hmu phâk ni ti, ni rîla rahai khom hloisûl angin bit an ti.

²⁶A zoro taka bu an i-ât ngai angin, tar dêna kûnin thânmual liam ni ti.

²⁷Irngaitua infel ro, hong sût sabakin lân. Hihai ang hin a hong nia, irngaiin lân ni ta hrangin satna a nih ti inhre roh.

Joba 6

Joba

¹Khanchu Joba'n hiang hin a sâma,

²"Ki chardongna hi varh thei ni sianlân, ki vânduainahai khom hi tûla varh thei ni sianlân chu na!

³Tuipuia chiaî nêkin rik a ti; khasikin ki hê a isuak thei loi a ni.

⁴Itinrêngthothei Pathianin thalhai leh a ni suna, a tûrin ki taksa a ni zô zita, Pathian chitna'n ki sip ta.

⁵Rama sakuartungin sûl a fâk laiin, an hrâm ngai moa? Sehrât khom fapôl a fâk laiin inhrâm ngai mah.

⁶Irthiboi thil hi michi boiin fâk thei zât ma ni? Ârtui kôr hin ite a irhnikna a om mo?

⁷Kha bu kha irzukna zel nei ma unga, ki ta hrangin nêk intirom tak a ni.

⁸O, ki izonghai hi hmu thei inlân chu, Pathianin ki inuam lam hi ni pe thei sianlân.

⁹Pathianin ni'rnôitir chit nuamin, a kutin ni tan irnôi chit khom sian!

¹⁰Ki milung la'rngam mai a ti, irkhol loiin a na tuang khom inlân, lôm mai ki ta. Pathian chu a'rthiang ti kin hriata, a thupêkhai chu hnôl viat ma ung.



11Ki hrâtna hi imo a nia ki hong inghâk mai hi? Sabeina dang nei loi hi imo ki dam nasan?

12Ki hrâtna hi lung anga ngar mo ki ni? Ki taksa khom hi dâr thîr ang ma ni?

13Keima hin irsongpui hrang nei ma ung, changpui hmûna dang nei ta ma ung.

14Irzal taka om tâk chungâ khan, lungkhamna a inei hrang a ni. Itinrêngthothei hnung songsantu chungâ khan.

15Ki urênghai chu vadungte angin an ni huanga, vadungte a tui rel irhmang ang an ni.

16Tuipui dung ivur tuia dum ul, vadung kha a hong kanga, a hong duka, ivur irbukna kha,

17a lum tena chu ar hmang zôi ngai. An omna ata kha ar hmang zit ta.

18Khual inzinhaiin tui zongin an irvâk ang hi a nia, ramchârnaa khan irvâkin an irhmang ngai a ni.

19Tema rama bepâr thohaiin an zonga, Seba rama khual inzintuhaiin chu hmu ngêt hrangin an sabeia;

20sabei ngita an izong chu hmu thei loiin, beidong takin an ikîr nôk a ni.

21Ki chungâ hiang hin nin ni ngai, ki siatna tonghai nin hmua, nin ni chia.

22Thilpêk zongin, nin sum le pâi man boiin ni pe roi moh nangni ki ti ngai.

23Râlhai kut ata ni sansuak hrangin mani, ti nangni ki ngên ta mo? Ni opbêtu hai kut ata nir tansuak roh mo ki ti ngai.

24Ni'rchutir unglân, le'rngaitua rong, ki dik loina nin hril roi.

25Thudik hin mi an hnê ngaia, khannisian an ni isêlna hi, sêlna chanlamboi mamai mo ni ma?

26Mi sêl nuam a nih ti'n nin ni insâpa, sabeidong taka ki itihai hi, ki iti papai mo nin ni isôn?



²⁷Nâi farahai chu lilâmin nin zuarhaia, nin rualsahai khom a zuar nin nuam ngaia.

²⁸Atûn hin ni hong en hi roi, nin makunga irdôi ual no ning.

²⁹Irlet unglân, thil dikloi tho ta no roi, ki thu irngaitua infel roi, ki thu hi a dik a ni.

³⁰Ki ihrilhai laia hin a dik lolina nin inhriat mo a oma. Thil saloi chu keima khomin kin hriat infel thei dua?.

Joba 7

¹Irnêng chungâ mihriamhai hi, sin intak taka sin zong hrang an ini loi mo nin isôn? A dam sêng chu irhlo fâk anga sin hrang a nih ti nin inhriat loi ma ni?

²siahlo dâihlîm irzuk ngôi ngôi le irhlo fâk a hlo nghâktu angin:

³A tha tin hin ki'rtha a'rzal mai ngaia, a zân tin beidongna a tung ngai.

⁴Ki zâlin, itika mo ki thoi ki tia; Khannisian, zân hi a sôtak taka, Zîng khovâr nghâkin in thei loiin hongirlet var letin ki oma.

⁵Ki taksa pumpui lak a pânin a zor zoi tâka, ki vunhai inkhirin a chila vun tharin a hong om ta.

⁶Ki dam lai sînhai hi puan khôngtu'n a puan không bit inrangin an rang tâka, sabeina dang boiin a hek inrang a ni ta.

⁷Ki hringna hi pháivua ang a nih ti inhre'n lân, ki mit hin thil sa zel a ihmu thei ta loi a ni.

⁸Atûna a ni hmutu hin ni hmu ta no nia, ni hmu tum khomsian ni hmu thei ta no ni.

⁹Sûm ar kianga, a irhmang ang hin Seol-ah zu fe tâkhai chu suak nôk ta ngai mahai.

¹⁰In sêng tiang hong kîr ta no nia, a hmunin ama inhre nôk ta no nihai.

¹¹Khasikin, ki hmûr insum viat no ninga, milung hoiloi takin hril ki ta, lungrîl natakin chiar ta ki ti.



¹²Tuipui ual mo ki nia, tuipui rûlpui ang mo ki nia? A ni hrung hrang ni ni isia pe?

¹³Zâlmuna zâlin sôl irngam ki tuma, ki natnahai mo a hoi ual, ki tia.

¹⁴Nangma'n irmang ichiom pahai ni nin phantira, inlârnahai hmangin ni nin chitira,

¹⁵hianga natna tuang puma om mai nêkin chu, ki hringna hin irvit that hi a inthang ual a ni ta.

¹⁶Hringna hi ki hnông ta, dam sôt nuam ta ma unga, ki hringna hi ite omzia nei ta mah ni masan ta roh.

¹⁷ Mihriam hi imo a ini, ni irngaisâng hi? A chung a ni lungrîl ni'rngkata.

¹⁸A sîn tin ni kana, itiklai khom hin ni ifia mai ngai?

¹⁹Pathian keima tiang en loi rêng rêngin om ngai mak chea, michil invol kêr sâng lua, ni ensan loiin om mak chea?

²⁰Nang mihriamhai enkoltu, ki sual a ni tâk khomin i zât tak hi mo ni chung a ki itho? Itho mo nangma irsinsiana hrangin ni ni isia? Itho sika mo ni ta hrangin puakrik tak ki ni tâk hi?

²¹Ithoa mo ki sinsiatna ni ni ingaidam thei loi, ki dikloinahai ni ilâkpai loi hi? kei chu thi duai hrang ki ni tâka, Ni zong khomin lân, ki iom loi hrang a ni ta.

Joba 8

BILDADA

¹Khanchu Bildada, Sua mi'n hiang hin a tia.

²Idôr ten mo hiang hin ni iti hrang? ni chong a na bâka?

³Pathian irêl sai tâk hi an danglam nôk ngai mo ni isôn? Itinrêngthothei hin a dik a iti hi a thûl ngai mo ni isôn?

⁴Ni nâihai ama chung a an sualin chu, an sual man chu intuangtirhai a ti.



- ⁵A dik takin Pathian ni zonga, Itinrêngthothei kuang nghina ni siamin chu, ama'n nang irngaitua ngêt a ta, sat nang vur ngêt a ti.
- ⁶Irthiang le diktakin ni om maiin chu, Pathianin nang san a ta, ni insûngkua khom sat nang vur a ti.
- ⁷Ni iphutna chînte ni khomsian, inhnunga chu hong lian a ti.
- ⁸Tianlai sûnhai hor ngaitua'n lân, an pi le pu thil inhriathai kha hong sût ngaiin lân.
- ⁹Mizâna nâihai dôr kêng ei nia, ite lan hre mak me, irnênga ei om sêng hi irhlîm ang mai a ni hi.
- ¹⁰Kha laia thuhai khan ni le'rchutir a ta, an inhriat insahai kha an ihril suak loi hrang ma ni?
- ¹¹Tuichir ni loaia hin tuichir hloi mo a mông thei? Tui om loinahai hin sûl hring thei ngai ma.
- ¹²Sâtpaia, hmang hrang a la ruk mân khom, Tui a kang pe'n chu, hloisûl danghai nêkin a thêm inmân ngai.
- ¹³Pathian a nih ti inhre loihai khom, khang khan an om ngaia, Pathian inhre loihai chu an beidong a ti.
- ¹⁴An irnghatna chu a derindêpa, Âiom râng ang mai a ni.
- ¹⁵Kha kha irhnêlin lân a det hrang ngân mo? va chelin lân a idet hrang mo?
- ¹⁶Misa suak mân chu a hringa, a tuaihai chu irhuan sênga khan a hong zapa.
- ¹⁷A'rzunghai chu irnêng rîla lûtin lung a kher indeta.
- ¹⁸Khannisian an phôiapaiin chu tûte'n lung chung a mông sôn ngai mahai.
- ¹⁹Irngai ro, hi hi a lampui râifâna chu a ni, Nêngpila irthokin hong mông suak a ti.
- ²⁰Irngai ro, Pathianin misa chu pai tha no nia, thilsual thohai ngai chuchel innghîrtir ngai mah.
- ²¹Râifân takin nang lan nuitir a ta, lômtakin om nôk ni ti.



22Ni râlhai chu inzakin kûn chian an ta, mi dukdakboihai puan in omna inkhôm om ta no ni.

Joba 9

Joba

1Joba'n hiang hin a sâm;

2 Ni ihrilhai chu a dik ti khom kin hriat,

khannisianlân, Pathian mit hmuin mihriamhai hi dik zit thei nihai mo?

3Pathian chu sêl ngânhai sianlân,

voi sângkhat laia hin,

voikhat khom sêl thei no nihai.

4Pathian chu vârna tinrênga sip,

sinthotheina hrât nei a ni.

Ama doi thei hrang tu mo om an ta?

5An inhriat no kârin tânghai a thonpaia,

a ning an murin an siatpai ngai.

6Irnêng khom a omna rengata an hnîngtir theia,

a chopuihai chu det thei ni ta ngai mah.

7Misa khom thu a pêka suak maka,

ârsihai khom ar khûpai khipa.

8A bingin irvân khom khi a kaiphar theia,

tuipui irsok chung a kalchôi chu.

9 Pathianin irvâna sîkhovâr le sîruk hai,

sahrâng ichiom le sim tianga ârsihai chu a siama.

10Thil roiinpui tamtak suisuak zoi loihai le thilirkhêl hril theiloihai thotu a nia.



11 Irngai roh ki kôla a zuanga,

hmu thei ma ung,

ki'rkhêlpuia, hmu thei loiin ki om.

12 Irngai ta, a inuam murdi a lâk khomin tu'n mo a khap thei?

Tukhomin ama chu imo ni itho?

ti ngam mahai.

13 Pathianin a ninginmur insum no nia,

Rahab changpuituhai chu a hnuaia an kûna.

14 Itin mo keima bingdok hin,

ama ki isan thei hrang,

Ama hnôlin i thu mo ki la hrilsuak thei hrang?

15 Dik zap khom inlân,

ite don thei no ning,

ki chungthu rêltu kuanga hin lungkhamna vai nghi ki ti.

16 Ki koia, a len hriat khomin,

ki thu nir ngai pe le irhoitir ma ung.

17 Phâivopui hmangin a ni sêm phîta,

A san om loiin ki pop ki liama.

18 Thoi irman loi rakin ki oma,

dengtheina'n ki sip zoi ta.


19 Hrâtna ringot hin chu ama phâk om mahai!

ir-otpui inlân tu'n mo doi ngam hrang?

20 Sual ki nih irti no khom inlân,

ki chongbâi suaka hin thei loi a ni inchangtir a ni ta,

demna nei ma ung ti khom inlân,



ki dik loina a hmu ta.

21Sêlna boi ni khom inlân,

irngaiirsâng thei ta ma ung,

ki hringna hi ki ingainêp a ni.

22Khasikin kêng mi soal le mi dikhai khom ir-angnatin inhekhai a tih ki iti.

23Thil ichiom a tung tena khom mi poi tôn loi chu thatin a oma,

Pathianin ama chu an nuisan mo?

24Rammual hi mi sualhai kuta pêk a nia,

roirêltuhai mit khom a inchofir a ni;

Ama itho a ni no'n,

tu itho mo a ini hrang?

25Ki dam lai sûnhai a hek inranga,

thil sa tho irman loiin a ihek ngai a ni.

26Irkuang hrâttak angin a ni khêlpaia,

irmu vuang inrang ang hin.

27Ki chiarnahai hi irnghil ki ta,

ki beidongna irnghilin râiinfân ta ki tih ki ti khomin,

28ki lei tuangnahai hin a ni irzaltir a ni.

Nangma'n soal angin ni nin sâpa.

29Mi soal laia tep ki ni tâka,

itho mo chanlamboiin ki la iom mai hrang?

30Ivur tui leh irsil infâi khom inlân,

ki kuthai chang-al leh irsûk infâi khom inlân.

31Nangin porchena khura ni ni pai tâka,



ki puansilhai ten khom ni nin tir tâka.

32Roirêlna hmuna inding suama sâm hrangin,

Ama chu keima anga mihriam ringot khom ni mah.

33Kin kêra ni sel hrang khom tûte om mahaia,

kin chungâ ni thuneitu dong khom tûte om mahai.

34A ni ivîkna hmol khâipai khom sianlân,

A kuttum tuang hrang khom nin chitir ta no ri se.

35Keiin chu chi no ning,

Ki lungrîla kin hriat sikin chong suak ki ti.

Joba 10

1Khan, ki'rtha hin a hnông ta, ki hringna hi ki irsîr chi chian a ni ta, lungrîl natak pumin ki ichong ma ni?

2Pathian kuang hiang hin ti ki ti, theiloî nin changtir loiin ni ni demna nin entir sa roh.

3Ni hnuaisiaa, ni kut sintho hmusita, mi pualoihai inkung hi, en a hoi mo ni ti?

4Taksa mithai chu ni neia, mihriam ihmu angin.

5Ni sîn hmanghai chu mihriam sînhai angin. Ni kumhai khom mihriam kumhai angin.

6Ki dikloinahai ni sût maia, ki sualnahai khom ni zong mai ngaia,

7Mi pualoi ni ma ung ti lak nin hriata, ni kut ata ni sansuak thei tûte om mahai ti khom nin hriata.

8Ni kutin ni nin tûka, nangma isiam ki nia, nangma ngêtin ni ni inboi hrang ma ni?

9Nangin pilhlûm angin ni ni siam ti inhre maiin lân, Nêngpil ni ni inchangtir nôk hrang ma nih?



- ¹⁰Nangin irhnutui leh ni nin fâa, irhnu lum nêk angin ni ilôm loi ma nih?
- ¹¹Taksa le vunin a ni tuama, ru le irthahruin a ni khit indeta.
- ¹²Nangin hringna ni ni pêka, ni nin hlutira, Ni ni enkolna khan ki'rtha sînghualin lân;
- ¹³Khannisian hi hi ni lungrîla ni thupa, Hi hi nangma kuang a om ti kin hriat.
- ¹⁴Lei sual inlân, nangin ni ni sinsiaa, ki pualoina ata nin hnot no chi ni.
- ¹⁵Mi pualoi ni ta inlân, Ki vânsiat hrang dân chu! Mi fel ni khom inlân, irsong thei ual no ning. Mualinphoiin ki oma, ki ituang ngôi ngôi a ni.
- ¹⁶Lei irngaisâng inlân, nangin kâmkeibaknei ilôi angin ni lôl ni ta, ki chung a irkhêl takin ni nin entira.
- ¹⁷Ki chung a ni thu ni hon thartira, Ni ningmurna ki chung a nin pungtira. A pa pâlîn ni ni doia.
- ¹⁸Itho sika mo sul ata ni ni ikêlsua? Tûte hmu loiin lei thi ta inlân,
- ¹⁹om loi angin ki lei nia, sul ata tâna fe lei ni ta ki ta.
- ²⁰Ki dam lai sînhai hi a ihek vâng mo ni ma? Irngamin ni dâisanhrek sian, irnak hong song nôk ual inlân.
- ²¹Kîr ta loina rama ki kîr mân hin, inthim le thina dâihlîm rama hin,
- ²²A zîng irsâna ram, zân zîng chardongna hmun chu, Thina dâihlîm, lampui ite om loina vâk khom inthim a changna hmuna khan.

Joba 11

ZOFARA

- ¹Zofara, Naama mi'n hiang hin a hong tia;
- ²Hihai anga thu tamtak hi sâm thei loi a ini thei hrang mo? Mi chong tamhaiin an ifâk ruk thei hrang mo?
- ³Ni irsongnahai hin, mi milung a ichuk hrang mo? Huatirham taka ni chonga hin, tûte'n nang an inzaktir loi hrang mo?
- ⁴Ki iamna vai hi a dik ni tia, Pathian mithmua, "ki'rthiang," nir tia.



- ⁵Khannisian, Pathian zuang chong sianlân, ni chungthu hin a bâi hong phong sianlân,
- ⁶Khan a vârna thu'rthup nan hretir a ta, vârna dik, mihriamhai inhriat phâkloi chu. Inhre ta ro, ni dikloina insâpin chu ni dengtheina hi ite la ni mah.
- ⁷Pathian roiinpuina hi ni izong suak loi hrang mo? Itinrêngthothei hi hmu thei zôiin mo?
- ⁸Irvân nêka irsâng a nia, Inhre zoi no chi ni; Seol nêka inthûktak a nia, nangin ite hmu thei no chi ni.
- ⁹A'rzat lam chu rammual le tuikhanglian nêka irza a ni.
- ¹⁰A hro chita, a khâra a bukhaiin chu, tu mo danh thei hrang?
- ¹¹Mi chanlamboihai khom an hriata, dikloina khom a hmua, a zong no khomin.
- ¹²Rama sakuartungte mihriam angin a suak tena, mi pualoihaiin inhre thei an ti.
- ¹³Ni lungrîl irput dân a dika, Ama tiang ni kut ni pharin chu,
- ¹⁴Ni kuta dikloina a omin chu paiin lân, ni puan ina sual om phal no'n lân,
- ¹⁵Lungthi takin lêng thei ni ta, ni dinghmun det a ta, chi hrang nei no chi ni.
- ¹⁶Ni dengtheinahai irnghil ni ta, Tui luang angin inhre thei mai ta ni ti.
- ¹⁷Ni nunchan chu sîn vâv angin vâv a ta, an thima khom zîng khovâr ang ni a ti.
- ¹⁸Sabeina lian a om sikin nir tha irngam a ta, irhei vêl ni ta, lungngamin irngam ni ti.
- ¹⁹Zâlin in ni ta, tûte'n nan chitir no nihai. mi tamtakin nang chongpui thei no nihai.
- ²⁰Khannisian, mi pualoihai mit chu chanlamboiin, intân suakna lampui nei no nihai. An inghâkna tak khom thina vai a ni.



Joba 12

Joba

¹Khanchu Joba'n hiang hin a tia:

²A ni mivâr chu nin lei ni hi te, hmunkhatin nin vârnahai leh thi nin ti.

³Khannisian nangni angin inhriatna chu ki la nei, Nangni nêkin chîn ual ma ung, Tu'n mo hi thilhai hi an hriat loi hrang om?

⁴Pathian ki koia, a ni sâm ngai, khannisian ki rualhaiin an nin nuisana, mi fel le demnaboi ni khom inlân, nuizabûr ang ki ini ta hi.

⁵Mi a hoitaka omhaiin chu, vânduaihai hi hmusitom a nia, kalbi chîntea khom an irtet ngai.

⁶Khannisian inrûhai le Pathian nei loi mihai chu lungthi takin an om ngaia, an pathian chu an hrâtna vai hi lei ni khom sian.

⁷Ramsahai khom irdonin lân nang irchutir thei an ti. chunglêng vatehai khom irdonin lân, nan hril thei an ti. Tuipuia ngahai khomin ni kuang hril thei an ti.

⁸Irnêng khom chongpuiin lân, nang irchutir thei a ti.

⁹Hihai murdi laia hin, Rengpa kutin a itho a nih ti inhre loi tu mo om?

¹⁰Thilhiring tinrêng hringna le mihriamhai irtha hi a kuta om a ni.

¹¹Bâiin thil tuilam a inhriat ang hin, mikuar hin a sia le sa an hriat infel ngai ang hin,

¹²Ulianhai chu an vâr uala, Dam sôthaiin thil an inhriat intam ngai.

¹³Pathian chu a vârin a hrâta, irfûktir dân a theia, itinrêng an hriat ngai.

¹⁴A insiat tâk chu sin thei ni ta ngai ma, mihriam a ikhârkhum tâk chu tûte'n insua thei ngai mahai.

¹⁵Rotho a khapin chu, khua a kanga, An thotir nôk le, ram a chim insiat ngai.

¹⁶Amaa khan hrâtna le vârna irkip chu a oma, Ihuanga om le a huangtu khom ama ta a ni.



17Irfûktir theihai inhriatna la pai pehai a ta, roirêltuhai chu into angin an omtir thei.

18Rênghai irkhitna chu a sûtpaia, an konghai chu kong khitin a khit pehai,

19ochaihai chu korongin an fetirhaia, mi hrâthai khom a'rtettira.

20Mi iamom chonghai chu a sonpaia, Upahai inhriatthiamna kha a lâk irhmang ngai.

21Mi lianhai chungha hmusitna chu ibuakin a oma, mi hrâthai irkhitna a sût pehai ngai.

22A zînga thilirthupa a'rlangtira, inthim irsâtak khom an vârtir thei.

23Namhai an liantir theia, an chîntirhai nôk thei. Nam an tamtir khom a theia, irthek indartir khom a thei.

24Irnêng mipui hruaituhai lungrîl an hnêpaia, Ramchâr lampui om loina hmuna a chaninvâitir ngai.

25Inthim kêra an irmaia, zû'nruî angin an khêk ngai.

Joba 13

1Irngai ta hihai murdi hi ki mitin a hmu,

ki mikuarin an hriata,

a'rngaina lam khom ki thei ta,

2Nin inhriat ang kin hriat theia,

nangni nêkin irhnuai ual ma ung.

3Khannisian El-sadai kêla Itinrêngthothei khan thu hril ki nuama,

Pathian le hmunkhata ki chungchang hi hril ki irzuk a ni.

4Nangnihai hi minlak tho ngai nin nia,

hril insa ngai indamtir theiloî daktor ang hi nin ni.

5Dâihrek unglân chu!

nin hrangin vâr ualna chang nin ti.



6Ki ingaituana hi inhre unglân,

ki bâiin nangni a izongna hi irngaitua roi.

7Pathian ta hranga fel loi taka thuhrlin,

Ama ta hrangin hmusitin nin ichong hrang mo?

8Ama sanin theibîk nin inei hrang ma ni?

Pathian roirêl hin nin irêl hrang mo?

9Nangni hmu'nfel sianlân,

a sa mo nangni ti thei ni?

Nangni'n mi nin ihuang ang hin,

Pathian hi huang nin itum mo?

10Inrûka theibîk nin neiin chu nangni halirchu a ti.

11A roinpuina hin nangni a inchitir loi hrang mo?

A irchi omna chu nin chung a itâk loi hrang ma ni?

12Nin ulianhai Thuvârhai lak meirivâm ang dôr a nia,

nin irsêlnahai khom hi pilbêl anga om a ni.

13Dâihrek unglân, chongna zoro ni pe roi.

ki chung a tung hrang hi chu,

tung zel ri se.

14Ki taksa hi ki ha'n sê ki ta,

ki hringna hi ki kuta ki isia hrang mo?


15Ama khan ni thatpai khomsian,

Ama chu la sabei ki ta,

A makunga ki thiamna thu ki la hril hrang sikin.

16Hi hi ki saninhringna ni a ta,

Pathian ngaisak no mi chu a makunga hin hong om no nahaia.



17Ki thuhai hi a dik takin irngaitua unglân,

ki thuhiril hi nin mikuara lût ri se.

18Irngai roi ki dikna thuhiril hrangin ki irzoi diam a ni.

Thiamchang ngêt ki tih ki'rsabei.

19Tu mo ki سوالنا ni phorsuak thei hrang?

Khaanga hrang ni sian,

dâihrekin om ki ta, thi ki ti.

20Thil inhni vai ni tho pe'n lân,

Ni hmêl vâh hnuaiia ki hmâi thup no ning.

21Ki chungâ ni kuttum thâk hi mong tan lân,

ichiomnahai hi nin omtir pe ta no ro.

22Khanchu, ni koiin lân,

khanchu nang sâm ki ti.

A ni no'n chu keima changin lân,

nangma'n ni sâm roh.

23Ki dik loina le ki سوالناhai idôra tam mo a ini hrang?

ki sin insiatna le ki سوالناhai nin hriattir roh.

24Ithoa mo ni ni imâksana,

râl anga ni ni insâp hi?

25Phâivua'n sùlhna a isêm irlêng hi deng ni inthei hrang mo?

Fapôl châr hi ni irzûl mai hrang mo?

26Ki chungchâng saloi takin ni'rziaka,

ki thoibopa ki سوالنا man ni nin pêltira.

27 Ki kehai thîrkol ni nin buntira.

ki lampui tinrêng ni en irchika,



ki kezaphahaia khom irsinsiana ni siam zita.

**²⁸Kei chu thing hmon anga irhmang hrang le,
sil kai, leida ifâk anga ki om lai hin.**

Joba 14

¹Nupang inei mihriam hi, zoro sôtnote sâng dama, buainaa sip a ni.

²Pâr anga hong pâr suaka, a ichuai nôk ang hin a ni. Irhlîm angin an langa, om mai thei ni mah.

³Ama anga mi chung a khan ni mit ni menga, Roirêlnaa ni kuang ama kha ni ihruai hrang mo?

⁴Tu mo irthiang loi ata irthiang la suak ngai? Tukhomin la thei no nihai.

⁵A nikhuahai chu inkung sai a nia, a tha hrang dôr chu ni kuang a oma, A khêk thei loi hranga ramri kha nin kung hnungin,

⁶Irheisanin lân a'rngam theina hrangin, Irhlo fâk anga a nikhua an thikpai dênin.

⁷Thingkunghaiin chu sabei hrang an la nei, phûrhai khomsian, a hon cher nôk ngaia, irzîk thar a hong isuak mai ngai a ni.

⁸A'rzung tar hong ta khomsian, a kung hnuaihai chu irnêng irchim tena bûiin lei thi ta khomsian;

⁹A la thi zoi no sikin a hon cher nôk thei, thing ei iphun angin hon chôm a ti.

¹⁰Khannisian mihriam chu thi an ta, phûm an ti. A phûksân a'rngama, khôna om mo a ini tâk?

¹¹Tuihai chu tuipuaia a hong irhmanga, Ivadung chu a hong kanga, A hong ichâr rol rol angin;

¹²khang khan mihriam chu a zâla, thoi ta loiin, irvân a hek mâka chu har ta no ni, A zâl chu kaithoi ni ta no ni.



¹³O, Seol-ah khan ni thup thei tan lân ki tia; Ni ningmur a hek mâka chu ni thupin lân, khannisianlân zoro inkung bîk ni siam pe'n lân, ni nin hriat maina hrangin.

¹⁴Mi a thi hin a ihring nôk hrang ma ni? Keima'n chu zoro sa ual la nghâk ki ti, Ki buaina hi a hek mâka chu nghâk mai ki ti.

¹⁵Ni koiin lân, nang sâm ki ti, Ni kut sinthohai chu ni'rngaiirsâng ngai a ni.

¹⁶Khanchu ki fena tina ni en chak ta ni ta, ki sualnahai chu sui nuam ta no chi ni.

¹⁷Ki inchâinahai nangin ngaidamin, khâipai ni ta; Nangin ki sualna murdihai chu hmu'nfâi zit ni ti.

¹⁸Tânghai chu chimin irnôisiat chit a nia, Lungpui khom a hmun ata irson a nia;

¹⁹Tuipuiin lungtehai a tâna, tuilianin, irnêng an siat theia, khang khan mihriamhai sabeina nin siat thei.

²⁰Ama chu kumtuangin nin hnêa, a boi tâka. A hmêl chu nin danglama ni tîrpai ta.

²¹A nâihai chôindôm an ni khomin inhre mak chea. Siatna an tok khomin irngaisak ual mak che.

²²Ama taksa natna vai kha an hriata, A lungrîl chu a sînga khan an hrûma.

Joba 15

Chongna Voihnina

(15.1–21.34)

ELIFAZA

¹Khan Elifaza, Temana mi'n hiang hin a sâma:

²Mi vâi inhriatna tep loi mai mai ata sâmna siamin, Nisua tianga phâivua'n a pum a insip thei hrang ma ni?

³Chong mumalboi hmangin mani, Thuhiril satna nei loi hmangin a ihril hrang ma ni?



- ⁴Pathian chitna zel nei mak chea, a kôla khom irhlan nuam mak chea!
- ⁵Ni sualzia ni thuhri la an langa, ni vârna chonghai kha thup ni tuma.
- ⁶Keima ni loiin, ni chongbâiin thei loi ni changa, ni hmûrin nang a isêl a ni.
- ⁷A suak masatak ual mo ni ini? Tânghai om mân khan ni lei isuak tâk ma ni?
- ⁸Pathian thiltum irthup chu ni lei inhriat tâk ma ni? Mihriam vârna hi nangma ta vai mo a ini?
- ⁹Kin inhriatloi i ual mo ni inhriat bîk? kin inhriat thei loi imo ni inhriat thei bîk?
- ¹⁰Kin laia tar luchuak tâkhai le tar kûna om tâkhai, ni pa nêka ulian khom an om dua!
- ¹¹Pathianin irtharngam nang a sakna le, Indîn taka nang a ienkolnahai hi a irnêm hrai ma ni?
- ¹²Itho mo ni lungrîlin nang a ihruai irhmang? Itho mo ni imeng rak hi?
- ¹³Pathian chungang ningmur nir lâka, ni doia; Ni hmûrin ni ihnôl a ni hi.
- ¹⁴Mihriam rêng rêng hi a irthiang thei ma ni? Nupang inei hi Pathian kôla a idik thei ma ni?
- ¹⁵Pathianin chu a mi irthianghai khom iamzoi maka, a mithmua irvânhai khom irthiang ual ma.
- ¹⁶Mihriam sualna le porchena sip tui in anga sualna intuhai chu a iiam thei ngân hrang mo!
- ¹⁷Ni'rngai pe'n lân, nang hril ki ti, ki ihmu chu hril ki ti.
- ¹⁸Mi vârhâiin thudik an ihril ngai kha, An pi le puhai kuang ata an idonghai kha thup ngai mahai.
- ¹⁹Kha mihai kuanga khan ram chu pêk a nia, Anni laia râlhâi fe sa ngai mahai.
- ²⁰Mi sualin chu a dam sâng kha natna tuang a ta, mi nunchan saloiin a dam sâng tuang a ti.



- ²¹Ichiom irhâi chu a mikuarin an hriata, Khannisian lungthi taka a om laiin, Mi pualoihaiin an hong doia.
- ²²Inthim ata suak a irsabei mâka, A sùn maton chu khandai a ni.
- ²³Fâk hrang zongin irvâk a ta, “Kho tiang mo?” tiin. Ama hrangin sùn maton chu an thim a nih ti an hriata.
- ²⁴Intak le dengtheina'n a hong bôma, Rêng irsiam saiin irdoina a inhnê angin ama chu an hnêa.
- ²⁵Pathian chung a kut an lek leh, Itinrêngthothei chung a omlian taka a om sikin.
- ²⁶Tukullian takin Pathian chu doi a tuma, Pho irsa tak leh Ama chu doi a tuma.
- ²⁷A thâiin a hmâi a tuama, A kong vonhnala thâi ar buka.
- ²⁸Khannisian khopui ramna hmuna khan a oma, Tûte ilua lolina ina khan,
- ²⁹Irchong no nia, a sum le pâi irting pe no ni, An rahai khom hnuaia tâk hrang om no ni.
- ³⁰Inthim ata hong suak no nia, Meiri-alin a ônhai kâng irhmang a ta, A chongbâi suakin ama chu hruai a ti.
- ³¹A binga irhuangin, itea irnghatna nei loiin, A hmu hrang chu ite ni mah.
- ³²A zoro loaia hâlin om a ta, a ônhai khom incher ta no ni.
- ³³Grep ra irhmalpai angin Oliv pâr chil ang ni a ti.
- ³⁴Pathian ngaisak loi mihai chu irhmang an ta, dikloi taka puan in sinhai khom kâng irvôm pehai a ti.
- ³⁵Mi dikloi inchang hrang zonga, dik lolina an insuaka, An lungrîlin mi huang hrangin an irsiam ngai.

Joba 16

Joba

- ¹Joba'n hiang hin a sâma:



- ²Khahai ang thil kha chu tamtak kin hriat tâka, Nin rênga irtharngamtu tuang hnôngom nin ni.
- ³Thu phuachôphai ma mai nin ihril mai hrang ma ni? Aninole, sâm hrangin i'n mo nang a inthor?
- ⁴Keima ituang ang hi tuang unglân chu, nin ihril ang hi chu hril intam thei ki ti. Ki lu nang ni inthikkhum ki ta, nangni hrângkhum thei ki ti.
- ⁵Khannisian, ki bâiin nangni inhrâtir ki ta, Ki hmûra irtharngamna thu'n nangni inhnêmtir a ti.
- ⁶Hril ngot khom inlân ki natnahai dam ual no nia, ki dâihrek khomin boi ual no ni.
- ⁷O Pathian nangin ni nin sôltira, ki insûngkua pumpui ni nir hmangtir tâka.
- ⁸Nangin ni ni chelthunga, kha kha ki chung a inhriatpuitu a nia, Ki kôngna hin a ni hnôla, Kha kha ki hmâi makunga inhriattirtu a ni.
- ⁹Ni ningmurna'n ni nin potthêra, ni en nuam mak chea, Ni ha ni ni rial khuma, a ni doituhaiin ni en nuam mahaia.
- ¹⁰Mihaiin an nir kôka, irdîn loiin ki bianga an nin bên intheka, ni doi hrangin an irbuka.
- ¹¹Ama ngaisak loiin kuta Pathianin a nir hlana, mi sualhai kuta a ni pêka.
- ¹²Hoi takin ki oma, a ni inthekindartira, ki ringa a ni chela, a nin potthêra, entin hrangin a ni sia tâka.
- ¹³A thal kâptuhaiin ki'rhîlin an ni irhuala, thalhai chu ki panga lûtin popin a ni siama, Khan khomin inrenna zel nir hmutir maka.
- ¹⁴Siatna chung a siatna'n a nin siattira, mi huaisen angin ki chung a hong pûta.
- ¹⁵Bora puan ki sila, mualphoi takin nêngpila ki toia.
- ¹⁶Ki chapna hrai sikin ki hmâi a hong sena, ki mit kôlhai chu invûngin a hong duka.



¹⁷khannisian ki kuthai hin thilsual inthem maka, a diktakin ki chongchaina a'rthiang khomin.

¹⁸O irnêng ki thisen hi irkhu no'n lân, ki beidong chapnahai hi irngam hmun nei no ri se.

¹⁹ Atûna a nin hriatpuitu chu irvâna om a nia, a ni thoštu chu chung tianga om a ni.

²⁰Ki rualhaiin nin nuisanhai khomsian, mitrithi tâkpumin Pathian tiang irhei ki ti.

²¹Pathian kuang mihaiin mihriam hi san thei sianlân chu! mihriam Nâipa'n a rualhai a isan ang hin.

²²Kum sôtloite a hong hek tena, kêr ta lolina lampui ki hro hrang sikin.

Joba 17

¹Ki hringna mongna hrang chu anai tâka, phûksân khom intak ki tia; thân ti no chu hmabâk om ta mah.

²A nin nuisantuhai ki kuang an iom a ni, an ni imanêpna khom ki ihmu chian a ni.

³Nang keima tiang kopin lân, nang ti no chu irhnêl hrang tûte nei ma ung.

⁴Nangin an milung nin zîngtira, nangin inhnêna chu inchangtirhai no chi ni.

⁵Inlâpna zonga a rualhai hnôltu chu, A nâihai mit inchoirtu ni a ti.

⁶Atûn chu mihaiin hi thuvâr hmangin an ni hnôla, an hong a ki hmâia an inchila.

⁷Beidong sikin ki mit a zîng zoi ta, ki kut le kehai khom ru inzen a ni ta.

⁸Mi nunchan diktakhaiin chu ar khêl an tia, mi siat loihaiin chu Pathian ngaisak loituhai kha dem an ti.

⁹Mi dikin chu a om dân intha ngai ma, kut fâihai chu an idet ual ual ngai a ni.

¹⁰Nin rêngin hong kêr khom unglân, Nin laia mi vâv tûte hmu ma ung.



¹¹Ki zoro chu a hek ta, ki thiltumhai chu a hong siata, ki milunga irzukhai khom.

¹²Zân chu sîn an changtira, 'Vâr khan inthim an nâitir ta,' an tia.

¹³Seol chu ki in angin ki ena, inthima khan ki zâlmun ki do'n chu;

¹⁴Thân chu "Ka pa" ti ta ki ta, ki taksa irlunghai chu "Ka nu le ki farnu," tihai ta ki ti.

¹⁵Ki sabeina chu khô hmuna mo ni a ta? Sabei hrang dang mo la om ni?

¹⁶Seol mikot bulhaia khan fe pat a ta, nêngpila khan om suam ta kin ti.

Joba 18

BILDADA

¹Bildada, Sua mi'n hiang hin a hrila:

²"Idôr mo hril hrang ni la inei mai? Irngai tan lân, hong hril ta ki ti.

³Itina mo sehrât angin teh ni ni bêa, mi'nmôl tehai angin teh ni ni hmua?

⁴Ningmurna sikin ni bingin deng ni theia, nangma sikin irnêng hi mâksan a ini hrang mo?

⁵ A ni, mi sual vâr chu a chuaia, a meichok khom a thi zoi ta.

⁶A puan ina vâr chu an thima, A meiser khom thi pe a ti.

⁷Kalchôi hrâtna chu a'rzala, Ama ngaituana ngêt khan paithâk ni a ti.

⁸Lên sînga a lûta châng khita a oma.

⁹Chângin a ke tiang a khita, an ôk khaka.

¹⁰A val chu hnuaia thupin a oma, a lampui châng kha kam a ni.

¹¹Kil tina ichiomna'n a zuia, a fena hmun tina a zui a ni.

¹²Phîngchâmin a'rzala, siatna'n a irhual ving a ni.

¹³Natna ichiom takin a bôma, A kut a ke a hmon zoi ta,

¹⁴a'rngatna puan in ata kaisua ni a ta, ichiom rêng kuang khan hrui ni a ti.

¹⁵A puan ina mi danghai om an ta, a omna khan kât mei inthekindarh ni a ti.



¹⁶A hnuai tianga irzunghai chu hmon a ta, chung tianga a ônhai chu châr a ti.

¹⁷Irnênga ama inhriat maina irhmang a ta, Kholaiia a'rhming zel inlang ta no ni.

¹⁸Vâra irthokin inthima inhnot ni a ta, rammual ata inhnotsuak ni a ti.

¹⁹A mihai laia tû le nâi nei no nia, A lêngna hmuna khan tûte a lua hrang om no ni.

²⁰A itong hi nitâk tianga mihaiin chu ar khêl an tia, nisua tianga mihai khomin an chardong a ti.

²¹Mi fel loihai omna chu khang khan ni a ta, Kha kha Pathian inhre loituhai omna hmun chu a ni.

Joba 19

Joba

¹Joba'n hiang hin a sâma;

²Idôr ten mo ningmurin ni ni ichongpui hranga, deng ni ni intheitir hrang?

³Voisôm ni ni hal tâka, saloi taka ki chung a ni itho hi inzak viat mak chea.

⁴Ki lei idik loi a ni'n chu, ki sual man chu chôi ki ti.

⁵Keima nêka sa ual nin irtia, ki sual sika mualphoi irlâk nin nih ti maiin chu.

⁶Inhre ta roi, Pathianin a ni hnôla, a lêng leh a nir khu tâk hi.

⁷"A ni soisaka" tia ki khêk khomin tûte'n ni sâm mahai, ki khêk inring khomin a ni sâm thei tûte om mahai.

⁸Ki lampui ar bôn tâk sikin fe thei ta ma ung, ki lampuihai chu inthimin a irkhu a ni.

⁹Ki roiinpuina ar khu zoi ta, ki lua rênglukhum chu a ni lâkpai pea.

¹⁰Kil tina a nin siat zoia, ite ni ta ma ung, ki sabeina irzung chu a phôiipaia, chuai hrang le thi hrangin a ni mâksan rak ta.

¹¹Ki chung a ningmurna a chuma, a râlhai laia tep ki ni ta.



- ¹²A sipai rualhai an hongga, keima tiang lampui an hong siama, ki puan in kôla irpuk an khuara.
- ¹³Ki urênghai chu keima ata hlataka a siaa, ki hmêlhriathai ta hrang khomin mikhual ki lei ni ta.
- ¹⁴ki sîngsuakhaiin an ni rotsana, ki rual sahain an ni'rngil ta.
- ¹⁵Ki mikhualhai le ki siahlo dôngmatehaiin, mikhual angin an ni ena, an hmêl inhriat loi ram dang mi enin an ni en ta,
- ¹⁶ki siahlo chu ki koia, ni sâm maka, Ama chu chong hoitak hmanga ngên a nang ta.
- ¹⁷Ki dôngma'n ki bâi mirim an nam a tia, ki irzirpuihaiin an nin tir zoi ta.
- ¹⁸Nâipangtehai khomin an ni êsêla, ki hor thoi leh, ki chungga an ni hrilsiata.
- ¹⁹Ki rual sa murdihaiin an nin tira, ki rual lungthunghaiin an ni rotsan ta.
- ²⁰Ru le vun ituam vai hi ki ni ta, ki hâ mani vai kêng ki izôkpui tâk.
- ²¹Lung nin kham roi, ki rualhai lung nin kham roi, Pathian kutin a ni itôn a ni ta hi te.
- ²²Pathian angin te, nangni khomin deng nin nin theitira? Ki tuangnahai hi a ruk mo ni la tipui mak chêi?
- ²³O, ki thurchihai hi irziak ni thei sianlân, Lekhabua chuang thei ni sianlân chu o!
- ²⁴Irziakna thîr le irziakin, kumkhuaa hranga irziak ni thei sianlân chu o!
- ²⁵A ni'rtantu chu a hring a nih ti kin hriat, nakana chu nêngpila hin la ngîr a ti.
- ²⁶Ki vunhai hi a siat zoi le, ki taksa hin Pathian la hmu ki ti.
- ²⁷Keima hrang ngeiin la hmu ki ta, ki kut hin la thîr a ta, mi dang ni loiin, ki sîng lunggrîl a'rzal ta.
- ²⁸"Itin mo ama kha deng ei intheitir hrang, Amaa khan thil bul hmusuak chakin," nin ti'n chu.



²⁹Khandai chu chi unglân, khandaiia tuangna hi Pathian ningmur inlangna a ni, khanchu, roirêltu a om ti inhria nin ti.

Joba 20

ZOFARA

¹Khanchu, Naama mi Zofara'n hiang hin a sâma.

²“Ngûktaka irngaitua'n nang a san ki'rzuka, itika mo nang san ta ning ti ki nghâkhmoa.

³Ni ni halirchu dân hin a nin zaktira, Kin hriatthiamna lungrîl khan a ni isâm a ni.

⁴Irnênga mihriam om phut ata atûn ten hin ama thu hi inhre ngai mak che mo?

⁵mi sual râifân chu sôt ngai maka, Pathian inhre loi mi lômna chu mit khapkâr vai hrang ang a ni.

⁶A irngaiirsângna khan irvân phâk khomsian, A lu khomin sôm hong phâk khom sianlân.

⁷Ama mizun le êk angin kumkhua'n irhmang a ti. Ama hmu ngaihaiin chu, “Kho tiang mo a iom tâk?” ti an tih.

⁸Irmang angin hek a ta, hmu thei ta no nihai, zân inlârna angin boi nôk zel a ti.

⁹Mita hmu hai ngai khom khan hmu thei ta no nihai, a omna ngai hmuna khan hmu ta no nihai,

¹⁰A nâihaiin mi inrianghai ditsakna zong an ta, A kutin a sum le puanhai pe khîrhai nôk a ti.

¹¹A takpum kha vânglai hrâtna'n a sipa, Khannisianlân, ama chu inrang takin irnêng pil la chang a ti.

¹²Sualna hi a bâia thumin a milei hnuaia irthup khom sian.

¹³Inlem loiin hmuam chian khom sian,



- 14A thil fâkin a phîngpui sînga hong khâ a ta, a phîng sînga mirûl tûr a chang pe ta.
- 15Mi pualoiin irchon a inrûkhai kha an luak suakpaia, Pathianin a phîng sînga khom lapai pe a ti.
- 16Mi pualoiin a invol murdi chu tûr ang a nia, Rûlsok inchuk angin tûrin ama chu that a ti.
- 17Vadunga tui luang chu hmu ta no ni, khuaitui le dûttui luangna chu.
- 18A sinsôl rahai chu fa thei loiin om a ta, ar chon neihai chung a khom hoiinpârin om no ni.
- 19inrianghai kha opbe'n a'rheisanhaia, mi in sin sai kha ar chûpuihaia.
- 20A huatirhamna kha omchian thei maka, a lômna tak thil chu hmu ual no ni.
- 21Fâk loi zel hi ite nei ta maka, Khannisian, a sum le puan khomin daih ta mah.
- 22A'rchongna a'rsâng lai takin, a dinghmun siat pe a ta, vânduainain a chung a chum a ti.
- 23Fâk nêkin mar zap khom sian Pathian ningmurna irkhêltak a chung a tung a ti. A phîng sînga bit khakin om pe a ti.
- 24Thîr ufei chiin intân khomsian, Dâr thalin kâp irhlet a ti.
- 25Ufei kha a pum ata kaisuak a nia, ufei hmora khan a thisen a kopa, a lungrîl chu chitna'n a sipa.
- 26Inthim irkhêltak tong a ta, a'rchonhai chu mihriam isêm ni loi meiin kâng a ta; a puan ina la om sunhai khom kâng irhmang zit a ti.
- 27Irvânhaiin a sualna chu inlangtir an ta, irnêng khomin theiloi inchangtir an ti.
- 28Tuilianin a in tânpai pe a ta, Pathian ningmur ni tena ainei murdi hekpai pe ving a ti.



²⁹Hi hi Pathian ata mi sualhai dongtum chu a nia, Pathianin an irchon lua hranga a inkung pehai chu,” tiin.

Joba 21

Joba

¹Khanchu Joba’n hiang hin a sâma.

²“Ki thu hi ngûk takin irngai unglân, hi hi nin irtharngamna chu ni ri se.

³Ni le’rngai pe unglân, hong hril ki ti, ki hril zoi le nin nuam le ni lan nuisan ta roi.

⁴Mihriamhai laia ki ichiar mo nin ni isôn? Itho mo tuang thei loiin om ki ta?

⁵Ni en unglân, ar khêl ti unglân, nin kutin nin hmûr chu hîp roi.

⁶Ki chung a thil tung hi ki’rngaitua’n chu ki milung a zînga, chitna’n a ni sip ngai.

⁷Itho sika mo pualoihai hi an ihring mai ngai, tar kûna damin thuneina an inei ngai?

⁸An nâi le tûhai hlochuk takin an dampuihaia.

⁹An in le loihai khom chiom tamtak ata an zôkpuihai ngaia, Pathian tôkholm khom an chung a insum ual no ni.

¹⁰An sehrâtchahai chi kha a saa, An sehrâtpuihai kha tê an neia, siat ngai mah.

¹¹An nâihai chu belra rual angin an tîrsuaka, râifân takin an lêng ngai.

¹²Têngrep le perkhuang sukin hla an saka, an theihlehai irhâi leh râifân takin an lâma.

¹³An dam sîng chu hoitakin an oma, Irtha’rngam takin Seol-ah khan an fe irhmang tâka.

¹⁴Pathian kuanga, ‘Ni rotsan ro! ni lampui hro irzuk ma ung.

¹⁵Itinrêngthothei chu imo a ini, a sin kin itho pena hrang chu; a kuang kin chongchaiin imo inlâpna kin la ihmu hrang?’ an tia.



- ¹⁶En u ta, an sum le puan chu an kuta om ni maka, Mi sualhai ngaituana lampui chu pom thei ma ung.
- ¹⁷Mi sual meiser chu a thi kochoka, vânduaina a tung pehai mai ngaia, Pathian ningmurna hin siatna a intungtir mo ni ma?
- ¹⁸Fapôl pháivua isêm invuang ang a nia, pháivuapuiin bu'rsi a isêm invuang ang hi a ni.
- ¹⁹'Pathianin an nâihai ta hrangin siatna a bukkhôm,' nin tia. An inhriat theina hrangin an chung a khan intungtir ni ri se.
- ²⁰A mit ngêtin a chung a siatna hong tung chu hmu sianlân, Itinrêngthothei ningmurna chu tuang ri se.
- ²¹A dam lai sîn a hek tena chu, a imâksan a in mihai a la inhriat mai ngai mo nin isôn?
- ²²Chung tianga irvâna thil omhai chung a roirêltu Pathian chu tu mo ar chutir thei?
- ²³Mi senkhat chu raifân tak le hoitakin an oma.
- ²⁴An tak a hong saa, an mar tâka, an ru sînga irtin a hong bita.
- ²⁵Khan, senkhathai chu thil sa irtem loiin, intak takin an oma, an thia. Ite satna irtem viat loiin.
- ²⁶Nêngpila an zâla, irlungin an bômhai ngai.
- ²⁷Irngai ro, ni irngaituanahai kin hriat, Dik loitakin nin ni manêp ti khom kin hriat.
- ²⁸Kho tiang mo mi roiinpui in chu a om ta? Mi sualhai omna puan in khom khôn mo a om ta?" nin tia.
- ²⁹Khual inzinhai nin irdonhai ngai mo ni ma? An ihrilhai kha zôm mak chêi mo?
- ³⁰Mi sual chu vânduai nia hrangin a khêka ningmur nia hruaisuak a ni, ti thu hi.



31Tu mo a hmâi makunga sualna phorsuak hrang. A thil lei tho chu tu mo thuan thei ngam hrang?

32Thâna fepui ni a ta, a thân chu takirtâi takin hrung an ta,

33irhôra pil satak leh irkhu an ta, a matona mi tamtak an lei ife tâkhai angin mi tamtakin a hnung zui an ta.

34Itin ual takin mo nangma'n minlak thopumin lungngam ni irsak thei hrang? Nin ihril chu ite bê luan bê no ni.

Joba 22

Voithum Chongna

(22.1–27.23)

ELIFAZA

1Khanchu Temana mi Elifaza'n hiang hin a sâma.

2 Mihriam hin Pathian ta hrangin a inangna mo a oma? mi vârhaiin chu an inlâppui ngai?

3Mi fel ni ni'n chu Itinrêngthotheitu hrangin a hlu mo ni ma? Ni lampui hro irkiptirna hin imo an lâpna om?

4Ama ni chi sika nang a irchu mo, A roirêlna nang lûtpui a ti.

5Ni sual hrai tâk sik uala mo ni ma? Ni dik lolina hi mong nê zel a nei no sika a ni.

6Ite ual ni loa hin ni urênghai changpuina nin phûthaia, A sil le kaihaisutpaiin korongin ni siahaia.

7A'rzalhai in hrang tui pehai mak chea, Phîngchâmhai hrangin bu nin hnara.

8Nakhrâtsongin mi ram ni sutpaihaia, Ni inuamtak ni pêkhaia.

9Meithâihai kut korongin ni tîrhaia, Farahai ni hnuaisiahaia.

10Khasikin kêng chângin nang a irhual, Siatna irkhêltak le chiomna'n nang a irhual a ni.

11Khua a hon thima, hmu thei loiin, Tuilianin a ni inhlê tâk a ni.



- 12Pathian chu vân sânga khin a iom loi ma ni? Ârsihai irsâng dân khi en ro, Pathianin imo an hriat? Inthim irsa dân hi a rêl thei zit.
- 13Imo Pathianin a zuang inhriat ual hrang? Sûmin a zuar hlia, itin mo a ni irêl thei hrang?
- 14“A hmu thei lolina hrangin sôm irsakhakin ar khûa, Vânlaizôla, an lênga,” ni tia.
- 15Mi sualhaiin an ihro ngai lampui chu, Ni ihro hrang ma ni?
- 16A zoro ni loia sonpaiin a oma, An irngatna khom tuilianin a tânpai ta.
- 17Pathian kuanga khan, “Ni masan ro, Itinrêngthotheiin imo a ni ilo hrang?” tituhai chu.
- 18Kha ten khom khan an inhai thil sa’n an bit pehaia, khasikin mi sualhai irfûktir chu ki inhriat thiam loi a ni.
- 19Mi dikhaiin chu an hmu’n an lôma, Mi ite ti loihaiin chu an innuisana;
- 20kin râlhai chu inhnê an ni tâka, Meiin an irchongnahai a kâng zoi ta, tiin.
- 21Nangma ngêtin ama tûngin lân, irngeina siam ro, khanchu ni ta hrangin sin sa hong suak a ti.
- 22A chong suakhai chu pomin lân, Ni lungrîla vong insa mai roh.
- 23Itinrêngthothei kuanga ni kîr theiin chu, ngîr suak ni nôk ni ta, Ni puan in ata ni fel lolina ni khâipai thei photin chu.
- 24Ni’rchon chu nêngpil anga bêin, Ofir rângachakhai khom, Tuidunga lung mamai angin ni bê’n chu,
- 25Itinrêngthothei chu nir chon ni a ta, Tangkarua hlu takhai chu ni ta ni a ti.
- 26Khanchu, Itinrêngthoheitu khan lômna nei ni ta, Pathian tiang irbei ta ni ti.
- 27A kuang chongchai ni ta, Ama’n nang irngai pe a ti, Khanchu ni thu’nkunghai lôm takin sua ni ti.
- 28Ni thil irfûktirhai hlochuk a ta, Ni lampui khom vâi mai a ti.



²⁹Nang paihai khom sian, ngîrsuakna a om ti ni ti. Mi irngaiintômhai chu saninzôk ni an ti.

³⁰Mi ite ti loihai chu sansuak a ta, A ni, ni kut a'rthiangin chu, Nang khom nang sansuak sa a ti.

Joba 23

Joba

¹Khanchu Joba'n hiang hin a sâma:

²"Ki chardongna a sîn tin ar bôk maia, Kin hrûmna hin ki natna hi hril zoi thei ma.

³O, Ama hmu theina lampui inhre inlân, A toihmuna hong fe thei ki ta.

⁴Ki chungthu a kuang intung ki ta, ki bâia funga ni sunhai hi hril ving ki ti.

⁵A ni sâm dân inhre suak ki ta, A ihril hrang chu an hriat ki irzuk a ni.

⁶A sinthotheina roiinputak leh a ni idoi hrang ma ni? Doi no ni, keima tiang a mikuar sung ual a ti.

⁷Mi felhaiin ama ngên an ta, A ni ngaituatu kuang ata suak ki ti.

⁸Irngai ro, nisua tiang ki fea lei om maka, Nitâk tiang ki kîr nôk khomin hmu ma unga.

⁹Hmâr tiang a'rsang lai khan khom hmu ma unga, Sim tiang a fe khomin hmu thei ual ma ung.

¹⁰Ki lampui hro chu an hriata, A ni fia zoi le rângachak angin suak ki ta.

¹¹Ki kehai hin a kehnung zui ki ta, Rotsan loiin a lampui ki zui maia.

¹²A chongbâi suak thupêk chu masan loiin, a thu suakhai chu bu nêkin ki'rngai poimoa.

¹³Mi lungrîl det a ni, tu'n mo hruai inkôi thei hrang? A inuam ang a itho thei a ni.

¹⁴Ki rukbaka a irêl chu zui ki ta, Ama ang kha a la inei hluk a ni.

¹⁵Khasikin a kôla chipumin kin thinga, ki hor ngaitua hin ki chitna ar bôka.



¹⁶Pathianin ki milung an dôptira, Itinrêngin a ni inbuai a ni.

¹⁷Zîng irsa'n nir khu khomsian, chi ual ma ung. Itinrêngthotheipu chu a ni, a nin dôptirtu chu," a tia.

Joba 24

¹Itinrêngthotheitu hin itina mo roirêl zoro a indang loi? Ithoa mo a hmutuhaiin kha nikhua kha an inhriat loi?

²Mi senkhatin ramria lungphun sonpai ngai an oma, Mi sâhai an sutpaihaia, an ivâi ngai a ni.

³Farahai an sakuartung an lâk pehaia, An dik irti theina hrangin meithâi sehrâtchal an khita.

⁴Inrianghai an soisakhaia, Ram sûnga mi inrianghai an thuphai ngaia.

⁵Ramchâra sakuartunghai angin, sathnem irngaiin bu an la zong thei cho chôka, Ramchâra khan an nâihai fâk hrang an la hmu vi viata.

⁶Mi loia bu âtin an irhloa, Mi sualhai grep irhmal mihlia an irfuanga,

⁷Puan sil loiin zân khonvârin korongin an zâla, Phalbia puanlum ite nei mahaia.

⁸Tânga ropui tho'n a pha induihaia, Irbîkna zongin lungpui an irbêla.

⁹Pa nei loi irhnu nêk lai inpotpai an songa, Mi inrianghai irnêng man intong irthûlin an nâihai an lâk pehai.

¹⁰Silkai irsamin, korongin an invâia, phîngchâm pumin an bumûthai an pêla.

¹¹Oliv irhuana sahriak an epa, Uain khura grep ra an thuna, Tuihrâl dangchârin sin an zonga.

¹²Khopui lianpumin mi an khêka, mi sâbe tuang lungrîl na an khêk suaka; Pathian lakin thil dikloi kha ite bê'n bê maka.

¹³Mi senkhat vâ inhuat an oma, A lampui lak inhre mahaia. A lampui taka om nuam mahai sikin.



¹⁴Khuantîra mi thattu kha a thoia, Inriang le chaninvâihai a thata, Zâna khom inru angin a'rvâka.

¹⁵Inru'n chu zân inthim a nghâka, "Tûte'n ni hmu no nihai," tiin, A hmâi a thupa.

¹⁶Inthim kêra in an invera, Sûna chu an irkalkhuma, A vâra om nuam loiin.

¹⁷An rênga hrangin inthim chu thina dâihlîm ang a ni, Thina dâihlîm ichiom kha an irzuka,

ZOFARA

¹⁸Tuilianin hrât takin a tân irhmanghaia, Nêngpila an dongtum chu khosâlna vai a ni. A grep irhuan tiang tûte irhei ual ta mahai.

¹⁹Kholumin ivurtui a inzôitir angin, Seolin thil tho inchâihai chu irhmang an ti.

²⁰A nu sulin irnghil a ta, Irlunghai hrangin bu tuitak ni a ti, Mi sualhai chu inhriat mai ni ta no nihaia, Thingkung anga kiakin om an ti.

²¹A ching nâi nei thei loihai chu intak takin a hmanghaia, Meithâihai inren ngai maka.

²²Pathian sinthotheina le hrâtna'n mi hrâthai zoro a bôk pehaia, Dam an sabeï ta no khomin an hong dam nôk ngai.

²³Zôkna lampui ar hmuhaia, Khatak khan an irngam ngai. An lampui hro lai khom a ensui mai ngai.

²⁴Chôiindômin an oma, zâm zâmin an hek ngai; mi dang angin thêmin an oma, an chuai ngai. Buvûi anga ât inhekin an om ngai.

²⁵Khahai kha a dik loi a ni khomin tu mo, "Minlak" ni ti thei hrang? 'Ni thu hi ite lua ni mah,' tu mo a ti thei hrang?

Joba 25

BILDADA

¹Sua mi Bildada'n hiang hin a sâma;



²A kuang khan roirêlna leh dikna a oma; A hmun irsânga khan irngeina a oma.

³A sipai rualhai khom tep zoiloi an ni, A vâh hmu loi tu mo om hrang?

⁴Itin mo mihai hin Pathian makunga thiam an ichang thei hrang? Itin mo nupang inei nâi a irthiang thei hrang?

⁵Irngai ro, tha khom khin a bingin a vâh thei ual mo! Ârsihai khom Ama mithmua irthiang ual mahaia.

⁶Mihriamhai len vâng hi chu thil mamai a ni! Mihriam nâipa khom Pathian mithmua ite ual ni mah.

Joba 26

Joba

¹Khanchu Joba'n hiang hin a sâma:

²Hrâtna nei loi mi ni isan dân hi chu! Bân irnak boihai ni isan dân chu!

³Vârna nei loi ni irchutir dân hi chu! Thu inthûk tak ni hril pehaia!

⁴Tu kuang mo, ni hril suaka, Tu irtha mo ni kuang ata zuang suak hi?

BILDADA

⁵Mithi irthahai chu irnêng hnuaia inthingin, tui le a sînga omhai leh khan.

⁶Tiana khan chu Seol chu korong a nia, Abadona siatna hmun chu a'rhli theitu om mah.

⁷Hmun ôla khan hmâr thing an pârтира, Inzâng dapin irnêng chu an doma.

⁸Sûm irsa takin rotui a bukkhoma, A hnuaia sûm khom ite insiat thei maka.

⁹A rêngtoihmun chu sûmin ar khu pea, A kôlvêl chu inthimin a tuama.

¹⁰Tui ramri a siama, Inthim le vâh theithâknahai leh;

¹¹Irvân doina chopui an hnîngtira, A irchutirna chu ar khêl an tia.

¹²A'rnakhrâtna sikin tuikhanglian kha an hnêa, Thiam takin sâ ichiom Rahab kha a that tâka.



¹³A phûkin irvân a'rthiangtira, A kut le rûlpui intân a thata.

¹⁴Irngai ro, ama hi a sintho irnghil thei loi chu a ni, A thurchi ei inhriat hi! A sinthotheina irhâi chu tu mo inhre zoi thei hrang?

Joba 27

Joba

¹Joba'n a thuhiril a sunzoma, hiang hin a tia;

²Ki theithiamna thu lâkpaitu, ki'rtha beiindongtirtu, Itinrêngthotheitu Pathian irhmingin ki hril.

³Ki dam sângin Pathianin ki hnâra phûk a sia kêr ka chu,

⁴ki hmûrin thu chanlamboi hril no ni, ki milei khomin minlak tho no ni.

⁵Theiloï chang no ninga, ki dam sâng chu ki dikna hi ma viat no ning.

⁶Ki dikzia hi inhre mai ki ta, intha loiin ite inzak no ning, ki dam sâng chu ki thei loi changna inhre viat no ning.

⁷Ki râlhài chu mi sual nihai khom sian, A ni doitu chu mi sual angin soisak nihai sian.

⁸Pathian uksak loihai hrangin sabeï hrang imo a la om? Pathianin a hnôla, a hringna a lâkpai pe'n chu.

⁹Buaina'n a del laiin, Pathianin an khêkna mo irngai pehai ni?

¹⁰Itinrêngthotheitu chung a mo lôm ni? Pathian chu itiklai khomin koi thei ni mo?

¹¹Pathian irthiang lam nangni hril ki ti, Itinrêngthothei thu'nkung chu ite thup no ning.

¹²Irngai roi, Nangni'n annihai hi nin hmu thei ving, Ithoa mo a omzia boia nin la ichong mai?

ZOFARA

¹³Pathianin mi sualhai dongtum a inkung chu,



- ¹⁴Mi ihnôlhai dongtum chu Itinrêngthoheitu'n a nei. An nâi le te an pungin chu, An rîla rahaiin fâk khop hmu zoi no nihai.
- ¹⁵A'rchi la dam sunhai khom hrîin thi an ti. An dôngmahaiin sûnhai thei no nihai.
- ¹⁶Nêngpil nêka tam sumru buk khômin, silkai khom buk zuathai sian.
- ¹⁷A ibuk khômhai chu mi dikhaiin irbel an ti. A tangka sum khom mi ite ti loihaiin irsempai an ti.
- ¹⁸A in sin khom româi tebop anga irbômin sin khom sian, A hrungtu'n irpuk a isin mamai ang hi a ni.
- ¹⁹Irchong takin a oma, a in kârin a sum hek pe zoi a ta, A hong harin chu ite nei ta no ni.
- ²⁰Tuilianin a ide zut angin, Zâna phâivopui tho'n sêm inzuan a ti.
- ²¹Sim phâivua'n sêm inthek a ta, om thei ta no ni.
- ²²Khonzâna boiin sêm inzuan a ta, A sintho theina kôla khan sêm insiat zoi a ti.
- ²³Mihaiin an kut inbên khum an ta, vîkphiarin a omna rengata irzûlpai an ti.

Joba 28

A vârna an inpâk

- ¹Tangkarua laih suakna hmun a oma, Rângachak irthiangtirna hmun khom a om.
- ²Thîr chu irnêng ata lâksuak a nia, Dâr sen chu lung hâl inhmin ata suak a nia.
- ³Mihaiin inthimna hin an invârtir ngaia, khur inthûktak takhai hin an lûta, inthimna kâra lung omhai chu an lâk theina hrangin.
- ⁴Mi om lina hmuna khur an choia, A chung tiang an irlôi khomin inhre loiin. Mi inhriatpuihai loiin an irkhâia.



- ⁵A'rlangna tiang chu bu songna reng a anga. A sũngrĩl rêk chu mei ikâng reng a ang.
- ⁶Irnêng sũnga lung omhai chu Safir lungflu a nia, Rângachak di a kopa.
- ⁷Ama omna kha chu râikoso khomin inhre thei mahai, Irmu khomin hmu thei ngai mahai.
- ⁸Ram sahrâng danghai khomin sir thei mahaia, kâmkeibaknei khom fe ngai mahai.
- ⁹Mihaiin lung ngar chang chu an lâka, Tânghai chu a bul phutna ata an laia,
- ¹⁰Lungpui khom an inverhaia, thilflu ta tak an hmu doka.
- ¹¹Tui khom a fe hmu loiin thil irlang thei loihai, an inlangtira,
- ¹²Khannisian vârna kho tiang mo an ihmu hrang. Inhriat theina chu khôn mo a iom hrang?
- ¹³Mihriamin a hlu lam inhre mahai, Mi hringna rama hin hmu thei ni no ni.
- ¹⁴Tui inthũkhai khomin, “Kin kôla om mah,” an tia.
- ¹⁵Rângachak leh irchôk thei khom ni mah, A man hrangin tangkarua varh zoi zât khom ni mah.
- ¹⁶Ofir rângachakin phâk zât ni maka, Onik le safir lungflu khomin phâk zât ni mah.
- ¹⁷Rângachak le lung irfĩmin insiat thei ni maka, Rângachak enhoi ta tak leh thũl thei khom ni ual mah.
- ¹⁸Koral le Krustal lungflu leh irkhĩ thei khom ni mah. Vârna man chu lungflu manhai nêkin a itam a ni.
- ¹⁹Ethiopia rama lungflu topaz khomin pha maka, Rângachak irthiang nêkin a hlu ual.
- ²⁰A ni vârna chu khô tianga irthoka om mo a ini? Inhriat theina chu khôn mo a iom?



- ²¹Thilhring inkhat lua'n hmu theiloia irthup a ni, Chung lêng vatehai ten lua'n an ihmu thei loi a ni.
- ²²Irh mangna le thina'n, "A'rhâi chu kin mikuara kin inhriat ngai," an tia.
- ²³Pathian vaiin a lampui chu an hriat, Ama vai kêng a omna hmun inhriat thei.
- ²⁴Nêngpil hek dênin a thîra, vân hnuaiia thil tinrêng an lang vinga.
- ²⁵Phâivua le tui hrâtlamhai ar khi lai khoma khan,
- ²⁶Rotui tho hrang dân an sâp laiin, khonri le kôlirtêk lam a siam lai khan.
- ²⁷Vârna chu a hmua, an puanga, an dettira, a suisuaka.
- ²⁸ Mihriamhai laia, "Irngai ro, Rengpa chi hi vârna a ni, thil saloi mâksan hi inhriat theina chu a ni," a tia.

Joba 29

Joba'n thu hnungkhôn a hril

- ¹Joba'n hiang hin sunzomin thu a hril nôka.
- ²Tha lei fe tâkhaia khan, Pathianin a ni hruaia, Tianlai anga om ki'rzuk nôk ta!
- ³A meiser chu ki lu chung a vâra, A vârna tûngin inthim chu ki khêl ta.
- ⁴Ki vânglai sûnhai Pathianin ki puan inah a ni ompui lai khan,
- ⁵Itinrêngthotheiin a ni ompuia, ki nâihai ki kôla an om lai khan.
- ⁶Ki lampuia dûtui a luang zun zun lai khan, Lungpui sûnga sahriak kin sin lai hai khan
- ⁷Khopui fena lampuia ki fea, Mikot lian kôla roirêlna toihmun ki'rfûktir lai khan
- ⁸ruathartehaiin an ni hmua, an irbîka, Ulianhai an thoi huaka, an ni ena,
- ⁹ulianhai chong khom an irngama, An kut leh an bâi an hîpa.
- ¹⁰Milianhai khom an dâihreka, An milei khom an danga a kopa,



- ¹¹ki thuhiril inhriathaiin an nin pâka, A ni hmuhaiin an ni chôirsânga,
- ¹²Mi inriang changpui nang hai, le chaphai ki sanhaia, changpui hrang nei loi nâi farahai khom.
- ¹³Thi hrang anga om pumin, an lômna thu an hrila, Meithâihai khom râifân takin ki'rchuhaia.
- ¹⁴Diknahaiin ki ompuihaia, Roirêlna dik chu ki songkol le ki rênglukhum a ni.
- ¹⁵Mitchohai hrangin mit ki nia, ke'nbâihai hrangin ke ki ni.
- ¹⁶A'rsamhai hrangin an pa ki nia, ki hmêl hriatloihai thubuui khom ki'rngaitua pehai ngai.
- ¹⁷Mi sualhai pho chu kin siat pehaia, An thil fâk lai khom ki sutpaihai ngai.
- ¹⁸A sôt thei dôra dam sôt ki tuma, "Keima ina ngêt thi ki ti," ki tia.
- ¹⁹Ki'rzunghai chu tuia inchiain, ki ônyaia irdôtui duiin zân sôt a om ngai.
- ²⁰Roiinpui u ual ki ta, hong hrât si sit ki ti.
- ²¹Mihai sabeiin keima tiang an irhei ngaia, keima thurôn irngaiin an ni inghâk ngai a ni.
- ²²Ki hril zoiin chu ite hril hrang nei ta ngai mahai, ki thuhiril chu an ikhop a ni.
- ²³Ruatho masatak an inghâk angin, an ni inghâk a ni, Rua hnungkhôn an izong angin an inhriat nuam a ni.
- ²⁴Beidong an tuang laiin an rai kin fântira, ki râifân hmêlin an hartirhai ngai a ni,
- ²⁵An lampui hro hrang ki sinsiam pehaia, An hruaitu ki nia, Sipai pâl laia rêng angin ki oma, Anni hrangin chu beidong tuanghai inhnêmtu ki ni.

Joba 30

- ¹Atûn chu keima nêka nâipangtehaiin an nin nuisana, An pahai khom ki insûng sa enkol ngai an nia, Ui laia om hrang lua ki inuam loihai khan.



- ²Irtha ngûi tâk mihriam pâl an nia, I sin ni tho pe hrang khomin an irzal zoi a ni ta.
- ³Phîngchâm le irsam pumin thing irzung an khela, Ram hnuaiia, ite boina hmuna an irvâk ngai a ni.
- ⁴Ramchâra sûl an inpota an fâka, Juniperthing irzung bu'n an ngama,
- ⁵Mihai lai ata irzûl an nia, Inru angin an irzûlhaia.
- ⁶Irhôr le irhôr kêrhaia an oma, khurpadop le lungpui kêrhaia.
- ⁷Hnîmbuk hnuaihaia an om rem ruma, Mei ikâng sel laia an irbîka.
- ⁸Mi itep loi le irngai ta loi, Mihriama tep inruk ni ta mahaia.
- ⁹Atûn chu hla'n an nir khena, An irkam innôtna'n an ni hmang ta.
- ¹⁰An nin tira, ki kôl ata an irdîna, Ki hmâia nin chilthuan khom an ngam ta.
- ¹¹Pathianin ki hrâtna a ni lâkpai pea, Khasikin ki thu hi ite bêin bê ta mahai.
- ¹²Ki chang tiang mipualoihai an hor siama, ki ke an ni pheta, Ki siatna hrang an zonga.
- ¹³Kin tâna hranghai an insiata, ki vânduaina an ni bôk pea, Tûte'n khaphai mahai.
- ¹⁴Kulbang chimna laia an hong lûta, A chimhai khan a ni del phaa.
- ¹⁵Thil ichiom takin a ni bôma, Mi ni inzânahai chu phâivua angin a fe zoi ta. Ki râlvânsatna khom sûm angin a fe zoi ta.
- ¹⁶Atûn chu ki ithi hrang a ni ta, Tuangnahai lakin nin tha maka,
- ¹⁷Zân khovârin ki ruhai khom a na zoi ta; A nin rêthai hi boi thei ta mah.
- ¹⁸Ki natna hin ring zeng angin a nin rêta, Ki silkai khom a isiat zoi a ni ta.
- ¹⁹Pathianin tuichira a ni pai tâka, Irvut le nêngpil angin ki om rak ta.
- ²⁰O Pathian nang ki koia, ni sâm mak chea, ki ngîr khomin ni en mak chea.
- ²¹Keima iti ite bê'n ni bê ta mak chea, Irdîn viat loiin ni ni soisaka.
- ²²Nangin phâivua ni nin sêmtira. Ruapui inrik kêra ni ni siaa.



²³Nangin ni that ni ta, mihringhai omna hranga ni indangna khan, Ni hruai ni tih, ti kin hriat.

²⁴A siat thei dôr siat zoia hin imo ni ni ilo hrang, Ite tho thei ta loi, Lungkhamna zongtu chung a hin?

²⁵Buaina tonghai hrangin ki ichap moh ni ma? A'rsamhai lung ki inkhamhai loi ma ni?

²⁶Thil sa ki tûng laiin thil saloi ki chung a tunga, A vâ ki nghâka, inthim a changa,

²⁷ki ningmurna hi dâi thei ta maka; Intak tuangnahai hin a ni de ta.

²⁸Inthim kêra ki fea, misa vâ boiin, mipuihai laia ngîrin changpuina ki zonga.

²⁹Sihalhai sîngsuak kêng ki ang ta, Ostrich vâhai hranga rual sa ki ni.

³⁰Ki vunhai a duka, an lôngin ki taksa a ilum hut hut a ni ta.

³¹Ki perkhuang irhâi lei hoinahai kha, ki theihle irhâi khom chapna'n a sip zoi ta.

Joba 31

¹Taksa irzukna lungrîl nei pumin, Dôngmate en loi hrangin chong kin kung ta.

²Chung Pathian kuang khin imo dongtum le Itinrêngthothei anchungtak kuang ata ei dongtum imo a ini?

³Mi sualhai hranga siatna le thiltho insualhai hranga vânduaina a ini loi hrang mo?

⁴Ki lampuihai a hmu infela, ki kalphêt tin hi an inhriat zit mo ni ma?

⁵Minlak tho ki nuama, Irhuangna hmang nghâkhmo ki ni'n chu.

⁶Irvana diktak leh ni var sianlân, Ki dik lam hi Pathianin inhre ving a ti.

⁷Khan, lampui dik ata rot ki nia, ki mitin suala a ni hruaia, ki kutin thil saloi tho nuam ki lei ni.



⁸Ki isinna ra chu mihaiin fahai sian, ki chîmu songhai chu mi'n la ving ri sehai.

⁹Ki lungrîl hin nupang a'rzuka, Mi dang inkhâr kôla ki irdîp a ni'n chu.

¹⁰ki dôngma'n mi dang hrang bu er pe sianlân, Mi dangin zâlpui ri sehai.

¹¹Hianga thotu kha chu, Roirêltuhaiin thi raka an isoisak ngêt hrang a ni.

¹²Hianga sual kha chu kâng irhmang thei ving ang ni a ti. Ki inei murdi kâng zit a ti.

¹³Ki siahlo nu le pa khom, Keima ata an ichiarna thu, Dik takin ki'rngaitua pehai no'n chu,

¹⁴Pathian a hor thok tena chu itin mo tho ta ning? A hor zoi infel tena teh itin mo sâm ta ning?

¹⁵Phîng sînga ni sintu khan ama khom a isiam mo ni ma? Mi inkhat kutsuak kin ini loi ma ni?

¹⁶Inrianghai le tikhoihai changpui sêl ngai ma unga. Meithâihai beiindongtir ngai no ning.

¹⁷Bu khom ki bing vaia nêkin nâi farahai an nêk sa no'n chu,

¹⁸An chîn lai ata an pa angin ki enkolhaia, Nâitesen an ni lai ata ki idonsuihai an ni.

¹⁹Tukhom silkai boia irhmang mani, inriang inngâk hrang boi ki hmu'n chu,

²⁰Tukfam samul leh siam ki belrahai ata ki pêk ngai, Khanchu ama'n lungrîl takin a nin fâk ngai.

²¹Lampuia khan changpuitu ki hmu sikin, Farahai chungu kut ki lei thâkin chu,

²²ki dârmikhehai hi irkhoi sianlân, ki bân khom a bula hin irtan ri se.

²³Pathian ni isoisak ki chi hrai sikin, An lal hrai sikin kha thilhai kha ki itho ngamloi a ni.



- 24Rângachak chu ki irnghatna tak a nia, Rângachak irthiang kôla, “Ki zôkna ni nih,” ki ti’n chu,
- 25ki irchongna le ki sintho intam sika lôm ki niin chu,
- 26Misa khi a vâh hrai sika le tha khom a roiinpuina sika chubai lei mûk ngai ma ung.
- 27Anni chôirsâng hranga hruai invâiin om ngai ma unga, Annihai inzâ sikin ki kut khom irboptir no ning.
- 28Annihai khom kha roirêltuhaiin an isoisak ngai sual a ni. Ama Pathian philsan ngaitu an ni.
- 29A ni en nuam loitu siatna lômpui ki niin chu, Thil saloiin a ni hong de thut laia lôm ngai ki niin chu.
- 30“Thi ri se,” tia khua ki sâlna hrangin ki bâi khom phal ma ung.
- 31Ki sintho ngaihaiin, mikhual ki lei lômlût ngai ti khom an inhriat.
- 32Mikhualhai kholaidunga riak ngai mahai, khual inzinhai hrangin mikot kin hong mai ngai.
- 33Mihai tho dân anga sualna ip nuam ni ma ung, Sualna khom thup nuam ngai ma ung.
- 34Mipuihai inzâna le ki’rchipuihai chitna sika, dâihreka suak ngam loi ki niin chu;
- 35ki thu irngaitu mo la om thei nihai, ki ihril murdi chu a dik a nia, Itinrêng thotheitu’n ni sâm sianlân chu, keima tep thei hrangin an ni idoinahai hi irziak ni thei sianlân chu!
- 36Irsongpui hrangin ki dârsuama târ ki ta, Rênglukhum angin khum ki ti.
- 37Ki itho murdi Pathian inhril ki ta, Ngam pangin ama pan ki ti,
- 38Loia ki inei ngai kha, a neitu diktak kuanga ki ilâk a nia.
- 39A man pe loiin, a ra vai lei irhmal ngai ki nia, sinthotuhai dangchârin ki siahaia ni’n chu.



⁴⁰Bu bila sùl mông angin, Barli irthûlin hloi thar mông ri se. Joba thu chu a hek ta.

Joba 32

Elihua thuhiril

¹Khanchu Joba kha a fel a la'rti mai sikin a rual inthumhaiin ite ti pe nuam ta mahaia.

²Elihua, Baraka nâipa, Buz mi, Rama irchihai anga mi Joba chung a ning an mur pea, Pathian nêka sa ar ti sikin.

³Joba rual inthumhai chung a khom a ning an mur pea, Joba chu theiloi inchang pumin a sâмна lam an inhriat no sikin.

⁴Annihai nêka ulian a ni sikin Elihua'n Joba kuanga thuhiril hrang zoro a nghâk mai a ni.

⁵Khanchu hi mi inthumhai hin a sâm lam zel inhre mahai ti an hriatin chu Elihua ning an mur pe tâka.

⁶Baraka nâipa Elihua, Buz mi'n hiang hin a sâma: "Ki la nâipanga, nangni chu ulian nin nia, Khasikin nangni ki mahripa, ki inhriat khom nin kôla hril ngam ma ung.

⁷Ulianhai inhril hrangin an kum tamhaiin vârna irchutir ri sehai, ki tia.

⁸Khannisian, thil inhriat theitirtu chu mihringa irtha om, Itinrêngthotheitu phûk chu a ni.

⁹Mi kum tam murdi vâu ual mahaia, ulian pai a ni'n chu inhre zit mahai.

¹⁰Khasikin nir ngai pe unglân, ki'rngaidân la hong hril hi rong, ki iti a ni.

¹¹Irngai roi, nin thu ki nghâk maia, Hril hrang nin zong kârin, Nangni ki len hriat hlet nin isôn loi mo?

¹²Ngûk ngitin nin thu ki le'rngai maia, nin laia tukhomin Joba dikloina sêl thei mak chêia, Tûte'n ama sêl thei lak om mak chêia.



¹³“Irdîn roi; mi vârtak kêng ei itong a ni ta, Mihriam ni loia, Pathian vaiin kêng an hnê thei hrang,” ti pal nin tih.

¹⁴Ama thuin ite ni la dêng inhnê ma, Nin insâp dân angin chu nangni sâm ual no ning.

¹⁵An chongbâiin a idaih pehai zoi loi a ni ta, Ite nang a sâm lam zel inhre ta mahai.

¹⁶Atûn hin an dâihreka, hril hrang inhre loiin, an ngîr mai tâka, ki inghâk zoihai hrang mo?

¹⁷Keima'n hong sâmhai ki ta, Ki'rngaidân la hong hril hi rong.

¹⁸Hril hrang ki nei intama, ki lungrîla a ir-ût mai a ni.

¹⁹Irngai roi, ki lungrîl hi, Uain irhu suak thei loi ang a ni, Uain botol thar puak khi hrang va vâng ang ki ni ta.

²⁰Ki hril bak ta no'n chu ki sôl chan no ni. ki bâi hong phong ki ta, hong sâm ta ki ti.

²¹Tûte inzaktir no ninga, Tûte inpâk ual no ning.

²²Mi'n pâk hi thei ma unga, khano'nchu, A ni siamtu'n ni la pai lat a ti.

Joba 33

¹I khom nisian, Joba, ki thu hi irngai ro, ki ihril murdi hi dik takin ni mikuar sung roh.

²Irngai roh ki bâi phong ki ta, Hong hril hrang ki ni.

³Ki thuhrlin ki lungrîl felzia inlangtir a ta, ki bâiin a thil inhriat chu dik takin hril a ti.

⁴Pathian irtha'n a ni siama, Itinrêngthotheiin hringna a ni pêka.

⁵Ni theiin chu ni hong sâmîn lân, Hmun khuarin lân, ki kôla hin ni thuhai siam infel roh.

⁶Irngai ro, Pathian mithmua chu, nangma ang dên ki nia, pilpoka siam ngêt ki ni.



- ⁷Irngai ro, nangin chu ni chi ual no roh. A nor khom nang nor ual no ning.
- ⁸Ni ihril kha kin hriat, Ni thurchihai khom kin hriat infel ok ta.
- ⁹Ki irthiang a ni, sualna nei loiin; ki irdîn a ni, tho'nsualna nei loiin.
- ¹⁰Irngai roh keima ata irphilna a zonga, A râl a nin changtira,
- ¹¹ ki kea thîr leh a khita, ki om dânhai a ni'rsinsia," ni tia.
- ¹²Irngai ro, nang ki hril, hi thila hin tho indik ual mak chea, Pathian chu mihriamhai nêkin a roiinpui ual a ni.
- ¹³Bâi khat lua nang a sâm no sikin, Ithoa mo ama ni idoi?
- ¹⁴Pathianin lampui dang tamtakin thu a hrila, Mihriamhaiin inhre thei mahai.
- ¹⁵ Tui takin an in irnghila, zâlmuna an zâl laiin, irmang le inlânahaiin an kôla thu an sîr ngai.
- ¹⁶An mikuar an vâr pehaia, an inhriatna kha an dettir pehaia.
- ¹⁷Mihriamhai chu an sintho a'rngamtir theia, Mualphoina ata a thup thei ngai.
- ¹⁸Ama chu tâna phûm loiin, A hringna khom khandaiia thi loi hrangin a hrunga.
- ¹⁹Natna tuangin zâlmuna irchutir a nia, A ru na khom boi pe thei loiin;
- ²⁰Bu nêk irzukna rêng nei thei maka, Hmetuitak takhai khom irzukna nei ta mah.
- ²¹A taksa a hong kông hra hraia, en thei ni maka. A ru inzen a ni ta.
- ²²Mithi khua a inâi ok a ni ta, A hringna an lâkpai pe vâng ta.
- ²³Ama tianga kop hrang Vântirtôn sâng laia inkhat lua khom, Mihriamhai tho hrang dân hriltu omhai sianlân!
- ²⁴Khanchu kha mi khan, "Lungkham takin, Ama chu mithi khua lan fetir loiin saninzôk ro; Irtanna ki hmu ta," ti sian.



²⁵A taksa hi hong irmuam nôk sianlân, A vânglai sînhai hong kêr pe nôk ri seh ti sianlân.

²⁶Pathian kuanga chongchai a ta, lei pom pe a ti, Pathian hmêl chu râifân takin hmu a ti, Ama'n a kuang felna kha pe nôk a ti.

²⁷“Thil dik tho loiin thil dik loi ki lei tho ta hi te, Khannisian, ki irphu angin chu la tuang ma ung,” ti'n vântâng laia hla sak a ti.

²⁸Khanchu mithi khua fe ta hrang a la sansuaka, A hringna khovâr hmu thei a ti, a tia.

²⁹Pathianin hi thil murdihai hi, mihriamhai hrangin voihni, voithum an tuangtir ngai.

³⁰Thânkhur bâi ata a hringna a hruai kêra, Hringna râifânôm an neitir ngai.

³¹O Joba satakin irngai ro, Dâihrekin lân hong hril nôk ki ti.

³²Hril hrang ni neiin chu ni hong sâmin lân, Ite thup no ro, ni dikzia an hriat ki nuam.

³³Hril hrang ni nei no'n chu irngaiin lân, Irngai ro, vârna thu nang irchutir ki ti.

Joba 34

¹Khanchu Elihua'n a hril maia,

²Nangni mi vârhoio, ki thu irngai roi, Nangni a theithiamhaio, nin mikuar lei sung roi.

³Bâiin a tui lam an hriat ngaia, Mikuarin a sa le saloi a theithâka.

⁴Eini hranga a dik chu inthangin lân, Ei ta hranga a sa sa chu inthang ei ti.

⁵Joba'n, “Mi fel ki nia, khannisian Pathianin ki diknahai a ni hnôl pea.

⁶Ki dik maiin chu milak a ni tia, Insiatna boi, indam theiloi rakin ki popa,” a tia.

⁷Joba anga mi moh nin hmu ngai ta? Pathian mahrip tho lam inhre loiin.

⁸Thil saloi thohai leh irrualin, Mi sualhai leh lêng suamhai chu tu mo?



⁹“Pathian inlômtirtu’n hi mihriamhai hrangin chu ite ar fêna om loi a ni,” a la ti sa maia.

¹⁰Khasikin nangni mihriam lungrîl neihaio, irngai roi, Pathianin thil tho’nchâiin, Itinrêngthotheitu’n, Thil dikloi a itho thei loi hrang mo?

¹¹ Mi an sintho ang takin a thuan nôk ngai. Mi tin an omdân angin an chungan an tungtir ngai.

¹²Pathianin thilsual tho viat no nia, Itinrêngthotheiin dik loiin roirêl viat no ni.

¹³Tu mo irnêng chungan hin thu inneitir, Rammual pumpui inkoltirtu chu?

¹⁴A’rtha lâk kîrpai pe a ta, A phûk a lâkpai pe’n chu

¹⁵Mi murdi irhmang zoi an ta, Mihriam chu nêngpila kîr nôk a ti.

¹⁶Inhriattheina ni neiin chu hi hih irngaitua’n lân, Ki ihril hi irngai sabak roh.

¹⁷Thudik theimâktu hin roi moh a rêl ngai? Mi dik le sinthotheitu hi thei loi ni inchangtir hrang ma ni?

¹⁸Ama’n chu rêng kuang khom, “Chanlamboipa,” a tia, mi roiinpui khom, “Mi sualpa,” a iti ngam a ni.

¹⁹Hruaituhai khom indit bîkhai ual maka, Mi irchonghai khom inrianghai nêkin en irsâng hai mah. Ama kut suak ving an nia.

²⁰Mitkhapkârin an thia, zânlaia an inthinga, an irhmanga, Mi hrâthai khom irnak song nang loiin, an irhmang thei ngai.

²¹Mihriamhai om dân a en irchika, An châng dân a ihmu’nfel ving a ni.

²²Thil saloi thohai irbîkna hrang, Inthim irsa om maka, Thina dâihlîm khom om ual mah.

²³Pathian makunga roirêlna fe hrangin, mihriamhai hrangin zoro bîk om ual thei ma.

²⁴Mi roiinpuihai ar hnuaitirhaia, anni irthûl mi dang a siahai ngai, Ama hrangin an thurchi irdon ual nang pe mah.



²⁵Khaanga sinthohai an hriat mai sikin, zâna a paihaia a irhmangtirhai thei a ni.

²⁶An sual sikin, mihai mithmua a soisakhaia,

²⁷Ama an rotsan sikin le a dânhai an zôm pe no sikin.

²⁸Pathian inhriat thei rakin inrianghai an khêktir ngaia, Riangvâihai irhâi chu a len hriat thei ta.

²⁹Ama lei dâihrek sianlân, Tu mo thiam lan changtir thei hrang? A hmêl a thup khomin tu mo hmu thei hrang? Nam le mimal ta hrang khomin hmunkhat a ni.

³⁰Pathian inhreloi mi'n chu roi a rêl thei loina hrang le, mipuihai khom ite tho thei nei no nihai.

³¹Mihaiin, Pathian kuang hiang hin hrilhai sian, “Mi ite ki tihai no khomin, hremna ki tuanga.

³²ki ihmu thei loina chu nir chutirin lân, ki lei tho'nsual tâkin chu tho nôk ta ngai no ning,” ti sianlân.

³³Pathian thuan theina chu ni indit dân angin, ni hnôla! Keima ni loiin nangin ni inthang hrang a ni. Khasikin ni inhriat chu hril roh.

³⁴Inhriatna neihai le mi vârhaiin chu ki thuhiril hi an inhriatin chu ni pompui an ti.

³⁵Joba hi ite inhre loiin nuamningin a chonga, A thuhirilhai hin vârna om mah ni tipui roi.

³⁶Joba thuhiril hi ni'rngaipui sabak hi roi, Mi sualhai anga nuamninga a ihril a nih ti inhre thei nin ti.

³⁷A sual bôksa'n tehel a zonga, Ei rênga makunga hnuaisia takin Pathian kha a kut a inbênkhum a ni.

Joba 35

¹Elihua'n a hril nôka:



- ²“Pathian kôla mi dik ki ni,” ni tia, A dik mo ni irsôn?
- ³“Thilsual ki tho khoma tho no khomin, Nangma hrangin imo ar fêna. Ki ta hrangin imo an lâpna om hrang,” ni iti ma ni?
- ⁴Nang lei sâm rong, nangma le ni rualhai leh khom.
- ⁵Irvân tiang tangin lân, sêmhai khi thîr ro, Nangma nêkin an irsâng ual a ni.
- ⁶Thil ni tho'nchâi khomin Ama ta hrangin imo ar fêna om? Nin châina a tam khomin ama ta hrangin ite ar fêna om ma.
- ⁷Ni dik khomin imo a hmangna om? Ni kut ata imo ni idong?
- ⁸Ni سوالنا hin nangma anga mihriam vai kêng a itôn thei, Ni felna khom hi mihriamhai hrang vai kêng a ni.
- ⁹Dengtheina a tamin chu mi an inrûma, Mi sansuak theihai kôla sansuak hrangin an khêka
- ¹⁰Khannisian tûte'n, “A ni siamtu Pathian chu khôn mo om; zâna hla nin saktirtu chu.
- ¹¹Irnênga ramsahai nêka inhriatna inthûk ni pêktu chu, Chung lêng vatehai nêka vâ uala ni siamtu chu,” ti ngai mahai.
- ¹²Khatak khan an khêka, tûte a sêmhai boiin, Mi سوالhai mualinphoina sikin.
- ¹³Pathian nuama zongtuhai chu irngaitua ngai maka, Itinrêngthotheitu khomin irngaitua pe no ni.
- ¹⁴Nangma len vâng hin chu o, Ama hmu ma ung, nghâk za zâm roh, Ni chungthu chu ngaitua hrangin a kuang a om.
- ¹⁵Atûn ningmurin nang a soisak no sikin le سوالنا a zuang irngai poimo no sikin.
- ¹⁶Joba hin a bâi a âng mai maia, Ite inhreloia a ichong pa pai a ni hi.

Joba 36

- ¹Elihua'n a hril maia,



- ²zoro sôtloite nir ngai pe'n lân, nang la hril hi rong, Pathian irhmingin hril hrang ki la nei intam.
- ³Kin hriatnahai la hong irchunghôm nôk hi rong, A ni siamtu dik lam târinlang ki ti.
- ⁴Ki thuhiril hi minlak ni mah ti inhre ro, Inhriatna irkip neitu kuang ni om a nih ti inhre'n lân.
- ⁵Irngai ro, Pathian chu a hrâttak a nia, tûte hnuaisia ngai ma, Lungrîl inhriatna roiinpui tak a ni.
- ⁶Mi pualoihai chu hôihai ngai maka, Mi ihnuaisiahai laia diktakin roi a rêl pehai ngai.
- ⁷Mi felhai chu irnghil ngai maka, Rêngtoihmuna rênghai kuang kumtuangin an toitira, chôindômin an om ngai.
- ⁸Khannisian mihaiin kol an irbuntirhaiin chu, Hnuaisiana hrui leh khit an ni'n chu,
- ⁹An sintho le insiatnahai an hriattirhaia, An lei mualinphoinahai leh,
- ¹⁰Irchutirna tiang an mikuar a vâra, An sual irlet hrangin thu a pêka.
- ¹¹Thu zôm taka a sin an tho'n chu, An dam sêng chu lungthi takin om thei an ta, Hoitakin lêng an ti.
- ¹²An irngai no'n chu khandaia that ni an ti, Tûte hmêlhriat nei loiin thi an ti.
- ¹³Lungrîla Pathian inhre loi mihaiin chu, ningmur an irtika, A soisakhai khomin, changpuina zongin khêk nuam mahai.
- ¹⁴Mi porinchehai lai ata an vânglaiin thi an ti.
- ¹⁵Ama khan intak tuanghai chu intak tuangin a kêlsuahaia, Hnuaisiana hmangin an mikuar an vârtira.
- ¹⁶Ama'n chu chardongna hmun rengata a hrui suak ngaia, hmun irthôl taka, tûte inbui loiin an omtir thei. A bu dâi tang khom kha tuitak a chang thei.



- ¹⁷Khannisian nangma chu mi sualhai sêl ni tuanga, Sêlna le roirêl dikna'n nang a ichel a ni ta.
- ¹⁸Ningmurna sikin hnuaisiana lungrîl irput pal ni ti. Irtanna hlutna hin nang hruai no ri se.
- ¹⁹Chardonga ni om lolina hrangin, Ni hrâtna irthahruai kha a iruk mo ni ma?
- ²⁰Zân chu nghâkhmo no roh, Mihaiin an omna hmuna an irhmang zoro a ni ta.
- ²¹Irdînin lân, dik lolina lam masan roh. Hi hih intak tuang nêka ni inthang a nia.
- ²²Irngai roh, Pathian chu, sinthothei chungirchuan inhnê takin a izoi tâk a ni; Tu mo ama anga mi'rchupu om?
- ²³Tu mo a sintho hrang dân irfûktir pe? "Ni itho indik loi a ni," tu mo a ti thei?
- ²⁴A sintho roiinpuihai hi inhre maiin lân, Mihaiin inpâkna hla sakin an ichôiindôm ngai a ni.
- ²⁵Mi tinin ama kha an ena, Hlatak ata an ithâr mai a ni.
- ²⁶Irngai ro, Pathian chu roiinpuetak a ni, ei lei inhriat no khomin. A zoro sôt dân khom suisuak thei zât ni mah.
- ²⁷Rotui irmal tâkhai khom an hultir theia, Tui porche khom rotui irthiang an changtir theia.
- ²⁸Irvân ata a zuan thotir theia, Mihriamhai phâ hrangin a itho ngai a ni.
- ²⁹Sûm irlôi dânhai khi mihriamin an hriat thei ngai mo? A'rbukna hmun ata khua a inritir dânhai hi?
- ³⁰Irngai ro, chung tiang kôl a'rtêktir zor zora, Tuikhanglian chunghai chu an thimtira,
- ³¹Hiang hin mihai thu a rêl pea, fâk hrang tamtak a pêkhai ngai.
- ³²Michêk kha a kut leh an lêna, A ititak dêng hrangin an tâktir ngai.



³³Khopui irhâiin a chungchâng an puanga, Sâhai khomin a nâi lam chu an inhriat thei ngai.

Joba 37

¹Hi sika hin ki lungrîl an dûka, ki milung hlut hlut a ti ngai.

²Satakin irngaitua'n lân, a khêk irhâi le a bâi ata irhâi hong suakin,

³Irvân pumpui hnuaia chim angin, a michêk irtêk chu irnêng chung sipin.

⁴A hnung tiang kêng ar hâi a suaka, A roiinpuinatak chu a'rhâi inring dur dur hi a ni. A'rhâi an inhriat khomin irngamtir ual loiin.

⁵Pathianin irkhêl takin, khopui an ringtira, thil irkhêltak ei insâp phâk loi a itho a ni.

⁶Ivurhai khom "Hnuaia ta ro," a tia. Khaang dênin rua khom "Zuang tho ro," a tia.

⁷Mi tinrêng hai kut a chel inngar pehai zoia. Ama itho a nih ti mihaiin an inhriat theina hrangin.

⁸Khanchu ramsahaiin irbîkna hmun an zonga, An omna khura an om chian ngai.

⁹Sim tiang ata phâivopui saloi a hong thoa, Hmâr tiang ata phâivua dâi a hong thoa.

¹⁰Pathian phûkin vur a hon changtira, Tuipuilianhai khom an kangtir theia.

¹¹Sûm irsâhai khi tui an pêtira, sûm zîng laia kôl a'rtêktira.

¹²Ama thupêk ang takin a'rtêktir ngaia. Rammual pumpui hi Ama thu anga a inomtir ang hin.

¹³Mihriam soisakna hrang mo, irnêng insatir hrangin mo, annihai hi a inomtir ngai a ni.

¹⁴Joba, hi hih le'rngaitua sabak nôk roh, Mikuar sungin Pathian sintho irkhêlhai chu irngaitua ro,



- ¹⁵Khahai kha Pathianin thu a ipêk dân le, Sûmphâi ata kôl a irlektir dân hi nin hriat mo?
- ¹⁶Sûm a irhêk dânhai le inhriatna irkip neitu sintho irkhêl hi nin hriat mo?
- ¹⁷Sim tianga phâivua'n irrêng an lumtira, Ni songkol irthânin an dui zôia;
- ¹⁸Ama chu irvân khi ni kaipharpui thei moa? Thîrtang anga ngar chu!
- ¹⁹A kôla kin ihril hrang chu ni ti pe ta ro, Inthimin a ni tuama, ite hril hrang inhre thei ta ma ung.
- ²⁰Ki ihril hrang kêng ti hih ama mo hril ngam ning? Mi'n ama siatna hrang lampui mo a zong ngai?
- ²¹Atûn phâivua a hong thoa, a sêm inkianin, vânlazôla vâr roiinpui khi mihaiin en ngam mahai.
- ²²Hmâr tiang satakin rângachak a hong vâra, Pathian chu roiinpui takin a hong irvoa.
- ²³Itinrêngthothei chu hmu suak thei loiin sinthotheina le dikna khan a roiinpuitira. Felna a nei intama, phâk zoi zât ni mah.
- ²⁴Khasikin mihaiin an chia, A vâr irtihai khom tûte chi ngai mah.

Joba 38

Rengpa'n Joba a sâмна

- ¹Khanchu Rengpa'n phâivopui lai ata Joba kha hiang hin a ti pea;
- ²Inhriatna inmôl le thupui boi chonghaiin, ki vârna sêltu hi tu mo ni ini?
- ³Pasal hâitak angin ngîr indetin lân, thu nang ki irdon hi ni sâm roh.
- ⁴Irnênga ki sin lai khan khôn mo ni iom? Nin hriatin chu hong ti roh.
- ⁵A lian hrang dân tu irfûktir mo a ini? a chung inzôl dân hi tu mo an hlam thei.
- ⁶I chung a irngat mo a ini, Tu mo a kila lung phûmtu a ini?
- ⁷Irvâna ârsihai hla an saka, Pathian nâihai an khêk lai khan.



- 8 Tuipui khom a omna ata a hong lian zoro khan tu'n mo a lei danh thei?
- 9 A silkai hrangin sôm ki siama, Sôm irsa leh ki tuama.
- 10 A dîl theina hrangin rî kin dang pea, a danna hrang le a khâr theina hranghai leh,
- 11 “Hi ten vai hi hongin lân, khêl no roh, Hi ten hin tui irsôn hong irsokna khom irngam ri se,” ki tia.
- 12 Irnêng irkhûna irkiangtirin, Mi pualoihai inhnotsuak hrangin.
- 13 Irnêng chungâ khua invârin, ar bîkna rengata ni sualhai ni hril thei ngai mo?
- 14 Sôn khovâra chu tâng le mual omhai an lang infel theia, Puanchial anga chialin an lang ngai.
- 15 Mi sualhai hrangin chu khovâr hi a vâp pehai hraia, Ite tho ngam mahai.
- 16 Tuipui suakna hnâr mo ni hro ta ngai? Lizôl dênin ni lût ta ngai mo?
- 17 Thina mikothai kha ni kuang inlangtir mani ta? Thina dâihlîm mikot kha ni hmu ta mo?
- 18 Irnêng irzatzihai hi nin hriat phâk mo? Nin hriatin chu insîr roh.
- 19 An ramrî nin hriat theina hrang le, An in lampui nin hriat theina hrangin.
- 20 A vâp omna lampui chu khôn mo? A zîng omna ngân hi teh khôn mo a ini?
- 21 Inhria ni ti dua, nang chu ni lei suak daih tâk sikin, Ni nikhuahai khom a tam tâka!
- 22 Ivur siana hmuna ni lûtin, Irial siana hmuna khom ni lût ta mo?
- 23 Buaina zoro hrang le irdoi le irbei nikhua hranga ni ihôi kha a ni.
- 24 I ang lampuiin mo vâp hi ar chêk indara, Nisua tianga phâivua khom hi irnêng chungâ a irsen indara?
- 25 Tu mo tuilihôk luangna hmun siama, michêk fena lam siamtu hi tu mo a ini?



²⁶Mihriam om theiloina ram le ramchâr, Mi om loina hmuna tu mo rua inthotir thei?

²⁷Ramchâr le pil sùng inhnîngtira, sùlhring inmôngtir thei hi tu mo a ini?

²⁸Rua hin pa mo a nei? Irdo hi tu isiam ngân mo a ini?

²⁹Tu sul ata moh ivur a hong isuak? Irvân ata vur zuang tâk hi tu itho ma ni?

³⁰Tui irsokhai khom lung angin an ngara, Tui inthûktak sùng hai khom hi an ngartir zoi ta.

³¹ Sîruk hi khit khak theia, Sîkhovâr khi inkhoitir theiin moh?

³²Ârsihai khi a zoro taka mo insuaktir theiin, Zânkhua in a bômhai khi hrung theiin mo?

³³Chung tianga irvân om lamhai khi nin hriat thei mo? Irnênga hmang hrang dânhai hi ni bôk thei mo?

³⁴Rotui nang inphâ irzôtir hrangin, khêkin sùmhai khi itin mo pe theiin?

³⁵Kôl irtêk khom ni kôla hong hrangin thu pe ngânin lân, “Hitak hin kin om,” nang an iti pe thei hrang mo nang ti pe nihai?

³⁶Tui vaârngoiin itin mo tuilian hrang a inhriat thei? Ârkhong khomin kuantîr itin mo an hriat?

³⁷Tu mo sùm bukkhôm theia, tep thei hranga vârna nei?

³⁸Nêngpilhai irhlûmin, irnênga ar mantir nôk tâka.

³⁹Kâmkeibakneihai bu zongin, A têhai khop hrang dôr bu mo ni pêkhai thei?

⁴⁰An khura an kualala, sê hrang an zong laiin,

⁴¹vaâk bu zonga an vuang laiin, An têhai bu fâk hrang zonga Pathian kôla inhrâmhai hi bu moh ni pêkhai thei?

Joba 39

¹Tânga kêl inte zoro mo nin hriat? Sazuk inte lai mo ni hmu ta?

²An inrâi sùng a tha tep dân sûtin, An te hrang zoro mo nin hriat thei?



- ³An inboka, nâiha'n a sêhaia, An inte zel ngai a ni.
- ⁴An têhai chu an suak ata ramkâra seilianin an oma, An pui khom inhre ta loiin an om ngai.
- ⁵Ram sakuartung chu tu mo an nghiptir thei? A nuamlam angin tûte'n lo thei ngai mah!
- ⁶An omna hrang hmun kin dang pehaia, michi tamna rama an om nuama.
- ⁷Khopui irhu lumna ite innang ngai mahai. Tûte'n inthêmin hmang thei ni ngai mahai.
- ⁸An lêng nuamna chu tângsuilunghai hin a nia, sûlhring fâk hrang zongin an irvâk ngai.
- ⁹Selechal hi hmang theiin mo? Ni sâ vâi ina riak nuam ni mo?
- ¹⁰Âlkai hrangin hrui mo thung theiin? Ni hnunga nang zui nuam ni mo?
- ¹¹A hrât sikin, a hrâtna hmangin ni sin intak nang thopui le mo ni iam?
- ¹²Bu mo in-âttir theiin? Bu mo nang pêl pe nuam ni?
- ¹³Ostrich vâ'n chu a mitha a zâp theia, Khannisianlân khânghlâi angin uang thei ma.
- ¹⁴Irnênga a'rtui a phûma, nêngpilin a'rkhudela.
- ¹⁵Mihaiin an sirsiat theia, ramsahaiin insiat an tih iti ite insâp loiin.
- ¹⁶An hriatloi angin a oma, a isôlpuinahai om pe no khomsian a poi ti ual loiin.
- ¹⁷Pathianin vârna pe maka, Inhriattheina a pêk no sik ualin,
- ¹⁸Intân hrangin irnak a songin chu sakor le a chungu chuanghai chu ite ni ta mahai.
- ¹⁹Sakor hi nin hrâttir thei ngai mo? A ruangzâng hi ni isiam pe mo a ini?
- ²⁰Khâi anga fuan hrâtin ni isiam mo a ini? A hnâr tum tet tut hi ichiom tak a ni.



- ²¹Irhôra a ke inphîtin irnak a lâka, Irdoina hmuna a fe hrangin a suaka,
- ²²Ichi zel nei maka, irkhâi ngai maka, khandai laia khom rotna lungrîl nei mah.
- ²³A puma thalkok irhâi suakin, ufei le thal irtêk long longin a oma.
- ²⁴Ningmur hmêl irputin ar ling khaka, Bekul irhâi a zuana. Omchian thei ta mah.
- ²⁵Bekul irhâi an hriat paiin chu a hnâr a khônga, irdoina irhâi chu hlatak ata khom an hriat thei, Hruaituhai khêk le an hê chu.
- ²⁶Irvâna irmu vuanghai khi ni'rchutir thei mo? Sim tiang irheia an mitha zârhai khi?
- ²⁷Nangma thupêk sikin mo irmu vânlazôla an ivuang, Irsângtaka irbu an ikai thei?
- ²⁸Rôl kêra a om ngaia, lungpui kik kêrhaia a riak ngai.
- ²⁹Khatak ata kha fâk hrang a en irzûla, hlataka om khom a hmu theia.
- ³⁰ A têhai khomin thisen an indôp theia, Saruak omna hmuna an irbuk ngai a ni.

Joba 40

- ¹Rengpa'n Joba kuang,
- ²"A sêltu, Itinrêngthothei chu ni isêl ngam hrang mo? Pathian sêltu hin sâm ri se," tiin
- ³Khanchu Joba'n Rengpa kha a sâma:
- ⁴keima mi chanlamboi hin, itin mo nang ki isâm thei hrang? Ki bâi ki inhruk a ni.
- ⁵Voikhat ki hril tâka, nang sâm ta no ning, Hril nôk mai ta no ning.
- ⁶Rengpa'n phâivopui lai ata Joba kha a sâma:
- ⁷Pasal irti takin ni puan bomin lân, Thu nang ki irdonhai hi ni sâm roh.



⁸Ni tho indik loinahai hi thei ni chang theina hrangin, keima ni ni intum hrang ma ni?

⁹Pathian anga hrât mo ni ni? Ama hê anga mi izôm thei inring hê mo ni neia?

¹⁰Inlalna le inzaomna hong irbelin lân, chôiindômna le roiinpuina'n irbel roh.

¹¹Ni ninginmurna sip lêt kha bun suakin lân, Mi lâirpâk murdi kha entinin irhniamtir roh.

¹²Mi lâirpâkhai murdi chu entinin irhniamtirin lân, Mi siahai kha an ngêr hmuna sirbêhai roh.

¹³An rêngin irnênga phûmhaiin lân, hmun irthupa an hmêl thuphai roh.

¹⁴Khanchu ni kut chang tiang nir sansuak thei tih keima khomin inhre thei ki ti.

¹⁵En ro, Behemot hi nangma ang dêna, ki kut suak a ni hi. Sehrât angin hloisûl a ifâk ngai a ni.

¹⁶Irngai ro, a hrâtna chu a kong a om a nia, A'rthahruai chu a phîng taksahaia khan a iom a ni.

¹⁷A'rmei chu sidar thing angin an ngartira, A malpui khom irthahruaiin a ituam pe a ni.

¹⁸A ruhai chu thîr anga ngar a nia, A kehai khom thîrtuan anga om a ni.

¹⁹Pathian thilsiam laia ulian tak a nia, A siamtu vaiin khandai leh a inhnê thei a ni.

²⁰Tângsîpa a fâk hrang sûl a mônga, Kha khan ramsa sahrâng olehaiin an irngatna a ni.

²¹Lotus pâr ilhlingnei hnuaia a zâla, tuichir sûl kêra ar bîk ngai.

²²Lotus pârkung khan a'rhlia, Tui kôla tui ihnôknahai khan a'rdâia.

²³Irngai ro, tuilian irsokhai khom chi ual maka, A bân phâk rakin Jordan tuilian khom sian chi maka.



²⁴Râl leh an irdoi lai hin nin chel thei ngai mo? A hnâr khom tu mo an vit ngam hrang?

Joba 41

¹ Irkuai leh Leviathan ni inkhittir thei hrang mo? Hruihruai leh a milei mo khit pe theiin?

² A hnâra hrui leh mo invit theiin? Irkuai leh a hner kôla mo inthil theiin?

³ Ni kuang nghina tamtak mo siam thei ni? Hmâtâiin nang a ichongpui hrang mo ni isôn?

⁴ Dam sũaga ni siahlo chang hrangin thu mo nang thungpui ni?

⁵ Vâhai angin inthem thei le mo nir hoi? Ni nâinuhai sâi hrangin ni sia nuam mo?

⁶ Nga cheltuhaiin chongpui thei le moh nir hoitir? Bepâr thohaiin ircho hrangin nuam nihai mo?

⁷ A vun ngar kha ep khomin lân, invit theiin mo? A lua khom ufei leh mo inkhô theiin?

⁸ A chungga ni kut hen sum ngân ta! chi a om lam hrang dân irngaitua ro. A hmu khom nuam ta no chi ni.

⁹ Irngai ro, mihriamhai sabeina chu ite ni ual ma: A hmu ringot khom beidongom tak a ni.

¹⁰ Ama kaithoi ngam tûte mi huaisen om mahai, khang khan a ni'n teh tu mo ki kôla ngâr ngam hrang?

¹¹ Tu moh tuam nôk hranga thil ni pêk masa nuam? Irnênga thil tinrêng hi ki ta kêng a ni.

¹² Leviathan ke thurchi nang hril ki ti A'rtha nei le a taksa irhme dânhai hi.

¹³ Tu'n mo a vun hlâipai thei hrang? Tu'n mo a hnermul thuahni sũaga lût thei hrang?



14Tu'n mo a hmêl lampui ang hi inhong thei hrang? A ha irkual zêkzuaka om chu tu'n mo a chel ngam hrang?

15A hlip irthua chuka om hi a isong tak a nia. Irtôn nata omin lung anga ngar a ni.

16A'rtôn pe nat sikin a kêr ir-ông viat loiin.

17A'rtônin a idetkhak a ni sikin, phôi thei pai ni no ni.

18A ha a riala vâ an phû suaka, A mithai chu kôlirsal ang hi a ni.

19A bâi ata meiri-al a suaka, Meirisi a'rtêktir zur zura.

20A hnâr ata meikhu a zuang suaka, Sa suangna bêla ar hu a hong isuak ang hin a om.

21A phûkin meihol a sêm ir-altira; a bâi ata meiri-al a hong suaka.

22A ringa hrâtna a neia, Ama irtongpui murdi an inthing ngai.

23A vun irnêmna zel om maka, Thîr anga ngar a ni, invit thei zât zel ni mah.

24A lungrîl khom lung anga ngar a nia. Lungnôina hnuai tianga ang dêna ngar a ni.

25A hong irthoka zel hin mi hrâthai khom chipumin an inthing ngaia.

26Khandai leh tukhai khomsian, pêm lua pêm viat no ni, ufei thalhai leh sun thei ni mah.

27Thîrhai khom hi fapôl anga a ibe a nia, Ei inghi khom hi thing irmôi ang maia a ibe a ni.

28Thal chi hin rot ngai maka. Sâihli leh kêp khomin lân, favâi ibur ang dôr luan bê mah.

29That ni tum khomin fapôl angin a ibe a nia. Thal irhâi khom hi a innuisan ngai a ni.

30A phînga vunhai khom pilbêl irzum vâ ang a nia, Âlkaina hmor irzum angin pilpok kha an inrît ngai.



³¹Tui inthûkhai chu bêla tuisoi angin an phûltir buan buana, Tuipui khom bêla tui angin an phûltir thei.

³²A fena lampui chu a'rlang tur tura, Tuipui huan mani an sôna.

³³Irnênga hin ama ang zel hi om mahai. Ite chitna nei loi sahrâng a ni.

³⁴Ramsa hâitakhai khomin êng ngam mahaia; Ama chu ramsa tinhai Rêngpa a ni.

Joba 42

¹Khanchu Joba'n Rengpa kha a sâma:

²Itinrêng ni thothei ti kin hriat ta. Ni ititak chu sêl thei ni viat mah.

³Ite inhre loi hin itina mo ni lei irfûktirna hi ki lei isêl tâk hi! ki lei inhriat theiloihai ki lei ihril kêng a ni ta. Ki inhriat zoi loi, keima hranga irkhêl hrai hai chu.

⁴Irngai ro, thu nang irdon ki ti; nang irdon ki ta ni hril roh.

⁵Ki mikuar leh dên kin hriat tâka, Khannisian atûn chu ki mit ngêtin nang ki hmu ta.

⁶Khasikin ki irtir tâk a ni, nêngpila toin, Vâiphin irthu'n ki irsîr a ni ta, a tia.

Kaikhômna

⁷Khan Rengpa'n Joba kuang, hi thu hi a hril zoiin, Rengpa'n Elifaza, Teman mi kuanga khan, "Nang le ni rual inhnihai chung a ki ning an mura; ki siahlo Joba angin, ki chungchâng thu diktakin hril mak chêia.

⁸Khasikin, sehrâtchal sari le belrachal sari kai unglân, ki siahlo Joba kuang fe unglân, nangni hrang hâlrivôm thil var hlan roi. Khanchu ki siahlo Joba'n nangni chongchai pe a ta, a izonglam angin lei pom pe ki ta, nin into lam angin chu nangni thuan no ning, ki siahlo Joba angin ki chungchâng thu diktakin hril ngam mak chêi sikin," a tia.

⁹Khanchu Elifaza, Temana mihai, Bildada Sua mihai, Zofara, Naama mihai chu an va fea, Rengpa thupêk angin an tia; khanchu Rengpa'n Joba izongnahai chu a'rngaitua pea.



¹⁰Joba'n a rualhai a chongchai pehai zoiin chu Rengpa'n Joba chu a hon damtir insa nôka, matona ainei lêthniin a pêk nôka.

¹¹A urênghai le a farnuhai, le matona a hmêlhriat murdihai chu a kuang an hong a ina bu an nêkpuia. Rengpa'n a chung a thil saloi an tungtir sikin an milung hoiloina thu an hrila, irtharngam an saka. Mihaiin tangkarua le rângachak kutsabi an pêk chita.

¹²Rengpa'n Joba zoro hnungkhôn chu matona nêkin sat a vura. Belra sîng minli, saringsei sângruk, sehrât bop sângkhat, sakuartung a pui sângkhat a neia.

¹³Nâipasal sari le nâinupang inthum a neia.

¹⁴Khan, a matontak irhming chu Jemima a phuaa; inhnina irhminga khan Kezia; inthumna chu Keren-Hapuka a tia.

¹⁵Ram tin laia Joba nâinuhai anga dôngmate hmêlsa om mahai. An pa'n an nuchahai leh irchon a sem pehaia.

¹⁶Hi zoia hin chu Joba a la dam maia, kum irzakhat sômminli a idam a ni. A nâipahai, a tûhai irlo minli dênin a hmu phâka.

¹⁷Joba chu uliantaka tar kûna damin a thi ta.



Inpâkna Hlahai

Inpâkna Hlahai 1

BU KHATNA
(1-41)
Vânsatna Diktak

- ¹ Mi siahai roizêk anga om ngai loa, Mi sualhai lampui khom hro ngai loi le Pathian uksakloi mihai leh khom irthop ngailoi mihai chu an vân a sa.
- ² An lômna chu Rengpa dân zôma hin a ni uala, A Dân thu chu a sôn a zânin an ngaitua ngaia.
- ³ Anni chu vadung kôla thing phun, A zoro taka ra insua ngai, A hnâhai khom thêm ngailoi ang kha a ni, An sinna kipa hlochuk mai an ti.
- ⁴ Khannisian mi siahai chu kha angin ni viat mah; Anni chu farsi phâivua'n a isêm irhmang ngai ang hi an ni.
- ⁵ Khasikin mi siahai khom mi felhai laia khan chang thei nohai,
- ⁶ Mi felhai fena chu Rengpa khan an hriat mai ngaia; Mi siahai fena rêk chu irhmangna a ni.

Inpâkna Hlahai 2

Pathian rêng inthang

- ¹ Nam tinhai kha itho mo an inuar? Mi tinin ithoa mo chanlamboi an ingaitua?
- ² An rêng hai chu an irhela, An hruaituhai khom inrualin Rengpa le a rêng inthang kha doiin thu an ngaituaa;
- ³ Anni khan, “An inlalna hnuai ata zôkin, An irchamneina hi hlîkpai roi,” an tia.
- ⁴ Rengpa khan irvâna a rêngtoihmuna ata innui a ta; An chanlamboi ngaitua kha innuina'n hmang a ti.
- ⁵ Kha hnung chu ningmurin an kuang thu insîr a ta, Ninginthikin anni kha chaninvâtir a ti.



⁶Rengpa'n "Keima ngeiin ki tâng irthiang Zion-a khan, Ki rêng inthang chu ki intoitir a ni ta," a tia.

⁷Reng khan, "Rengpa thuphuang chu hril ki ti," a tia. Ama khan ki kuang, "Nang chu ki nâpa ni ni; A vuan hin nang ki inei tâk a ni.

⁸Ni nghi roh, khanchu nam tin tin nir chon hrangin nang pe ki ta; Rammual pumpui ni ta ni zit a ti.

⁹Anni kha thîr khianghrolin inkhoi ni ta, Pil bêl angin anni kha khoi irnôitir chit ni ti," a tia.

¹⁰Khasikin, O rênghai, vâ ta unglân; Irnênga roirêltuhai, irdîn takin om ta roi.

¹¹Chi pumin Rengpa sintho unglân;

¹²Irlô inthing pumin a makunga kûn roi, khano'nchu, a ninginmur a ta, voikhat rengin lam laia nin irhmang itinin. Ama chung a an iamna irnghattu murdi chu an vâ a sa.

Inpâkna Hlahai 3

Zînga changpui ngêna chongchaina

David a Inpâkna hla, a nâpa Absaloma kuang ata a rot laia

¹O Rengpa, ki râlhai hi an tam vang na! A ni doituhai hi tamtak an ni.

²Ki chungchâng thu an insîra, "Pathianin changpui no ni," an tia.

³Khannisianlân, O Rengpa, nang chu ki'rhîlin ki phô ni nia; Ki roiinpuina le ki lu indom irsângtu ni ni.

⁴Rengpa chu ni changpui hrangin kin sama, A tâng irthiang ata a ni sâm ngaia.

⁵Kei chu ki zâla ki in tâka; Zân sôtin Rengpa'n a ni enkol ngai.

⁶Ni doia, kil tina ni hual vêltu, Mi sângkhat khom chi no ning.

⁷O Rengpa, thoiin lân, O ki Pathian ni saninhring roh. Ni doituhai murdi chu an biang rua ni zêm ngaia, Mi siahai ha chu inthing pe roh.

⁸Saninhringna hi Rengpa ta a ni; Ni satvurna chu ni mihai chung a om ri se.



Inpâkna Hlahai 4

Khohloia changpui ngênna chongchai

Davidâ inpâkna hla

- ¹O ki felna Pathian, nang ki koi zoro'n ni sâm roh; Ki lunginzîng lai hin ni san roh. Lung nin khamin lân, ki chongchaina nir ngaitua pe roh.
- ²O mihriam nâihaio, ki roiinpuina hi i dôr ten mo mualphoinaa ni inchangtir hrang? I dôr ten mo thil ite ni loi hi ni irngaiinnat hrang, milak thu ni izui hrang?
- ³Rengpa khan Pathian uksak mi chu ama ta hrangin a tumin a siaa, ti inhre roi: Rengpa chu, ki koi rikipin lei irngai a ti.
- ⁴Chi no unglân, thilsual tho no roi: Nin zâlmuna khan nin milunga irngaitua unglân, dâiriam roi.
- ⁵Felna irbôlnahai kha inhlan unglân, Rengpa, chu iam roi.
- ⁶“Satna rêng rêng tu'n mo nin hmutir ta hrang?” tituhai chu tamtak an om. Rengpa, nangma ngeiin ni hmêl vâr khan ni zuan êl roh.
- ⁷An bu le an uain hong inlâp zoro'n an lômna irthûla, Lômna irkhêl ual ki milunga hin nin omtira.
- ⁸Irtharngam takin zâl ki ta, in sa ki ti: Rengpa, nangma ngei hi a ni, mâni ringot khoma izôka nin omtir ngai.

Inpâkna Hlahai 5

Sûnghual hranga chongchaina

Hla hruaitu hrangin; Nehiloth le sak chi Davidâ inpâkna hla

- ¹O Rengpa, ki chongchaia hin ni mikuar ni sung pe'n lân, Ki ngaituana hi ni ngaitua pe roh.
- ²Ki Reng le ki Pathian, ki khêkirhai hi le'rngaitua roh; Ni kuanga chongchai ki ni hi.
- ³O Rengpa, zînga chu ki'rhâi hi lei inhriat ni ta; Zînga chu ki chongchaina hi ni makunga rêl infel diam ki ta, lei irngaitua zui ki ti.



⁴Pualoinaa lôm ngai Pathian ni mak chea; Mi sual chu ni kuang tung no nihai.

⁵Mi lâirpâkhai chu ni mit hmua ngîr thei no nihaia. Thil tho'nsualtuhai murdi chu khôkmâk ngai ni ti.

⁶Milak ngaihai chu inboihai ni ta; Rengpa'n thisen insua hmang le mi huang hmang chu an tir ngai.

⁷Kei chu, ni lungkham irkhêl tak sikin, ni ina hong lût ki ta: Chi pumin ni biak in irthiang tiang irheiin chubai nang mûk ngai ki ti.

⁸O Rengpa, ki râlhài sika hin ni felna sika khan ni hruaiin lân; Ni lampui chu ki matona hin intûn thal roh.

⁹An bâia chu iamomna rêng rêng om maka; An phîng sùng chu pualoina inzen a ni: An hrok chu thân irhong ang a ni; An mileiin mi an inpâk pai pai ngai.

¹⁰O Pathian, annihai hi thiamno inchangtir roh; An inkungna ngei kha tûkpuina'n hmang ri sehai: An inchâina tam sika khan nam suak roh; Ni chungatehel an zonga.

¹¹Nangmaa an iamna irnghat murdihai chu nangmaa khan lômhai sianlân, Nin zôk ngai sikin raifânin khêk kumkhua ri sehai; Ni'rhming irngaiinnathai chu nangmaa khan lôm takin om ri sehai.

¹²Mi fel chu satvur hrang ni nia; O Rengpa, ama kha chu phô angin lungkhamna'n hual ni ti.

Inpâkna Hlahai 6

Lunginzîng laia changpui ngênna

Hla hruaitu hrangin; Serânda chi dang dang sak zât, Seminith sak hrang Davida inpâkna hla

¹O Rengpa, ningmurin ni halirchu no'n lân, Ninginmurin ni sep sa no roh.

²O Rengpa, lung nin kham roh; ki sôl zoi tâk kêng: O Rengpa, nin damtir roh; ki ruhai hi a na zit ta.



³Ki hringna khom a lunginzîng tak tak a ni: O Rengpa, nangin idôr ten mo ni ni inthâ ta hrang?

⁴O Rengpa, zuang kêr nôkin lân, ki hringna ni saninzôkin lân: Ni lungkhamna sikin ni saninhring roh.

⁵Thi hnung chu nangma inhriat maina om maka: Seol-ah tu'n mo lômthu nang hril hrang?

⁶Zâmirezalin ki'rzal tâka; Zân tin ki zâlna chu ki mit irthi'n a duia; Ki zâlna chu ki mit irthi'n kin duitir ngai.

⁷Hmu khom hmu thei ta ma ung: Râl sikin ki chapa, ki mit khom a zîng zoi ta.

⁸Nangni thil tho'nsual murdihaio, ni rotsan zit roi; Rengpa'n ki chap irhâi an hriat tâka,

⁹Rengpa'n lungkham ki ngênna chu a'rngaitua tâka; Rengpa'n ki chongchaina chu lôm a ti.

¹⁰A ni doituhai murdi chu mualinphoiin lunginzîng tak tak an ta; Kêr nôk an ta, voikhatin la mualinphoi thut an ti.

Inpâkna Hlahai 7

Dik taka roirêl pe hranga ngênna

David a Siggaiion hla Benjamin mi Kusa thu'nsir chungchânghaia ama dênin Rengpa chôiindôma a isak chu

¹O Rengpa ki Pathian, nangmaa ki iamna ki'rngkata: A ni irzûltuhai murdi ata ni saninhringin ni saninzôk roh:

²Khanchu, saninzôktu om loiin, kâmkeibaknei angin, Ki hringna hi inpot chitin, soisakna ti.

³O Rengpa ki Pathian, hianga lei ti ki nia, Ki kuta sualna lei om a nia,

⁴Ki rual chu sualnaa thuan ki lei ni'n chu, Dikloi taka ki râlhai inzôk mani ki ni'n chu.

⁵Ki râlhaiin ni'rzûlin ni pêkhai sianlân; Ki roiinpuina khom hi pil kêra phûm ri se.



⁶O Rengpa, ningmurin thoiin lân, Ki râlhai ningmurna doiin irthok roh; Nangma ngei irthokin lân, ni changpui roh! Dikna hi nangma'n ni zong ngai a ni.

⁷Khasikin mitin ni kôl vêla hong bûm nôkin lân; Chung tianga irthokin an chung a roirêl roh.

⁸Rengpa'n mitin roi a rêl ngai: O Rengpa, keimaa ki felna le ki lungrîl satna a om mai angin roi ni rêl roh:

⁹O, mi siahai pualoina chu hong mong ta sianlân, mi felhai chu indet roh: Pathian fel tak chu milunghai a fia ngaia.

¹⁰Ki phô chu Pathian kuang a om, Ama chu milung diktak irput saninhrintu a ni.

¹¹Pathian chu roirêltu fel tak a ni, a ni, a nitin mi sualhai chung a lung hoiloina nei Pathian a ni.

¹²Mi ar heikîr no'n chu ama chu a khandai intât inngaih a ta, A thal ngul chu kam chian a ti.

¹³Thina hriamhrehai chu ama thatna'n a siam diam sa tâka; A thalhai chu chok theiin a siam ta.

¹⁴En ta, mi sualhai thil saloi an ngaitua lam so! Buaina an phana, milak an hmang ngai.

¹⁵Khannisianlân, mi khitna hranga an châng kama khan, Anni dên an khit ta.

¹⁶An tho'nsualna kha an chung a dên a hong kîr nôka, An hnarsa siatna khom an chung a dên a ichum nôk a ni.

¹⁷Rengpa chu felna sikin a kuang lômthu insîr ki ta, Rengpa, Anchungtaka inpâkin zâi ki ti.

Inpâkna Hlahai 8

Pathian changpuina, mihriam roiinpuizia



Hla hruaitu hrangin; Gittitha sak hrang Davida inpâkna hla

- ¹O Rengpa, kin Rengpa, Rammual pumpuia hin ni roinpuizia chu anhang vang na! Nangma inpâknahai chu irvân irsâng tak a tung ta,
- ²Nâitesenhai le irhnu nêk laihai bâia suak khan, Nangma nang doituhai sikin zôkna kulpui nin dinga; Phuba latuhai murdi ni'rngamtir ta.
- ³Irvân, ni kut suakhai, Thâ le ârsi ni inkunghai khi, ki ngaitua zoro'n chu,
- ⁴"Mihriam hi imo a nia ni inhriat mai ngai? Mihriam nâipa khom hi imo a nia, ni ikan ngai?" ki ti ngai.
- ⁵Ama kha Pathian nêka irhnuai ual viatin ni siama, Roiinpuina le chôirsângna nin khumtira.
- ⁶Ni kut suakhai chung a hin ircham nin neitira; A ke hnuai itinrêng ni siaa:
- ⁷Belra le sehrât murdihai le, A ni, ram sâhai leh khom;
- ⁸Chunglêng vâhai le tuikhangliana ngahai, Tuikhanglian lampuia fe murdihai leh.
- ⁹O Rengpa, kin Rengpa, Irnêng chung pumpuia nir hming a sa bâka!

Inpâkna Hlahai 9

Pathian roirêlna dik sika Lômthu insîrna

Hla hruaitu hrangin; Muth-labbenasak hrang Davida inpâkna hla

- ¹Rengpa kuang khan ki milung murdi'n lômthu insîr ki ti; Ni sinirkhêl tho murdi chu hril ki ti.
- ²Nangmaa khan lômin ki râinfân ki ti: O, nang Anchungtak, nir hming inpâkin zâi ki ti.
- ³Nangma ni zuang inlârin chu ki râlhai khom lâizâm an tho ngaia; Ni makunga chu tûkin an irhmang ngai.
- ⁴Ki ta hranga irhoi le ki thua hin ni ni thop ngaia; Fel taka roirêlin rêngtoihmuna khan ni toia.
- ⁵Nam tin ni halirchua, mi siahai ni'rhmantira, An irhming chu kumkhontuanga hrangin ni kâtpai tâka.



⁶Kumkhontuanga hrangin kin râlhai chu an irhmang zoi tâka; An khopuihai kha nangma'n nin simpai tâka, Irnghil pharin an om tâk a ni.

⁷Rengpa chu kumkhua hrangin rênga a toia: A rêngtoihmun chu roirêlna hrangin a siam insa ta.

⁸Ama khan rammual hi fel takin roirêl pe a ta, Theibîk nei loiin mitin roirêl pe a ti.

⁹Khanchu Rengpa chu hnuaisiana tuangtuhai hrangin chu kulpui irsâng lei ni a ti, Lunginzîng zorohaia chu kulpui irsâng lei ni a ti,

¹⁰Khanchu nir hming inhretuhai chu nang iam an ti; Nangin chu, Rengpa, nang a zongtuhai chu rotsan ngai mak che.

¹¹Rengpa, Zion-a om chu, inpâkin zâi unglân; Mi tinhai laia a sinthohai kha hril roi.

¹²Pathianin dengthei tuanghai kha an hriat maia; An ichap irhâi irnghil ngai mah. Ama khan mi nunsiahai chu deng an theitir ngai.

¹³O Rengpa, lung nin khamin lân; Thina mikot ata ni kaisuak ngaitu, A ni khôkmâkhai sika ki denginthei tuang hi en ta;

¹⁴Nangma inpâkna murdi chu kin hriattir theina hrangin; Zion nâinu mikothaia chu, Ni ni saninhringna hin râiinfân ki ti.

¹⁵Nam tin chu an khurpadop siama khan tâk an ti: Inrûka an lên dâpa khan anni ke ngei an ôk tâka.

¹⁶Rengpa khan an hriattira, roi a rêl tâka. Mi sia chu ama kut suak ngeia khan an ôk ngaia.

¹⁷Mi siahai chu Seol-ah kîr nôk an ti, Nam tin Pathian irnghil ngai murdihai chu.

¹⁸Inriang invâihai chu irnghilin om mai no nihaia, Inrianghai sabeina chu kumkhua'n boi no ni.

¹⁹O Rengpa, thoi ta; mihriam ma maiin nang ngam no ri se. Nam tin chu ni mit hmua hin roirêl pe'n om ri se.



²⁰O Rengpa, anni chu inchitirin lân; Nam tinin mihriam mai an nih ti inhre ri sehai.

Inpâkna Hlahai 10

Dik taka roirêl hranga ngênna

¹O Rengpa, ithoa mo hla taka ni ingîr ngai? Ithoa mo lunginzînghai laiin ni irthup ngai?

²Mi siahai lâripâkna sikin mi inrianghai kha irzûl bitin an om ngai. An thil sual ngaitua suakhaia khan anni ngei in ôk ri sehai.

³Mi sia khan a milung nuamlam a song ngaia, Mi huatirham khan Rengpa'n chu hnung a songsana, a hmusit ngai.

⁴Mi sia chu lâripâk hmêl irputin, "Inphût no ni," a ti ngai. A ngaituana murdi chu, "Pathian zel om mah," ti inzen a ni.

⁵A om dân chu itiklai khomin a det maia, Ni roirêlna chu chung tiang hla taka, a hmu phâk loia, a om pata: Ama doituhai murdi khom an nuisan mai ngai.

⁶A lungrîla chu, "Inhnîng no ning: Irlo tin tin dênin lunginzîngin om no ning," a tia.

⁷A bâi chu khua sâlnahai, huangnahai, dengintheinahaiin a sipa: An milei hnuaia chu thil sualna le insiatna a om.

⁸Kho tina inrûka inruangna hmunhaia a toi ngaia: Hmun fianriala khan ite ti loi mihai a that ngai.

⁹Kâmkeibakneiin a pûka a inruang angin ama khan fianriala an ruanghai mai ngai: Mi inriang chel hrangin an ruang ngai: Mi inriang chu a chel ngeia, khanchu a lên khan a hnûk irhmang ngai.

¹⁰Mi ite tho thei loihai kha inrîlin an oma; Mi hrâthai sirpha'n an om ngai.

¹¹A lungrîla chu, "Pathianin a irnghil a ni: A hmâi chu a thupa; itika khom hmu no ni," a ti ngai.

¹²O Rengpa, thoiin lân; O Pathian, ni kut hong inlek ta: Mi'nrianghai chu irnghil no roh.

¹³Itho sikin mo mi sia chu Pathian a hmusita, An lungrîlin, "In phût no chi ni," a iti ngai?

¹⁴Hmu chu ni hmu chian tâka; ni kuta thuan hrangin thil tho'nsual le nuarna ni ien mai: Ite tho theiloi mi chu ni kuang an koltir ngaia: Pa nei loi changpuitu ni ni ngai.

¹⁵Mi sia bân chu inkhiakin lân; Mi sual chu, a pualoina zong suak roh, ni hmu lat mâka chu.

¹⁶Rengpa chu kumkhontuang hrangin Inlaltak a nia: Nam tin chu ama ram ata an irhmang ta.

17,

¹⁷⁻¹⁸Rengpa, irnênga mi chu ichiom taka om nôk ta loi hrangin, Pa nei loi opbêna tuanghai roirêl pena hrangin, Thuhnuairôlhai nuamlam chu ni ngaitua tâka: An milung kha sinsiam ni ta, ni mikuar chu irngaitir ni ti.

Inpâkna Hlahai 11

RENGPAA irnghat ngam

Hla hruaitu hrangin Davida inpâkna hla

¹RENGPAA khan ki iamna ki'rnghat ngai. Ithoa mo ki hringna kuang hin, "Nin tânga khan, va angin vuang pat roi,"

²En u ta, milung diktak irput izîng hnuai an kâp theina hrangin, Mi siahai chu thal ngul an dôna, An thal chu a hruia an inkhop chian so.

³Lungphûmhai kha insiata a omin chu, Mi felin imo a itho thei hrang? ni ti ngai.

⁴Rengpa kha a biak in irthianga a oma, Rengpa kha, a rêngtoihmun kha irvâna a om; Mihriam nâihai hi a mitin a ena, an sinthohai a hmu:

⁵Rengpa khan, mi felhai le mi siahai kha irangnatin a fia ngaia: Mi siahai rêk chu a lungrîl murdi'n a khôkmâk ngai.



⁶Mi siahai chung a mei le kât an thotir pea; Phâivua lumhaiin anni kha deng an theitir ngai.

⁷Rengpa kha a fela, felna hi a'rngaiinnat ngai; Mi diktakhai khan a hmêl la hmu an ti.

Inpâkna Hlahai 12

Changpui ngênna chongchaina

Hla hruaitu hrangin; Seminihsak hrang Davida inpâkna hla

¹Rengpa, ni changpui roh; Pathian ngaisak mi om ta mahaia; Mihriam nâihai ata hi mi iamom chu an boi tâka.

²Mi tinin an bômhai kuang thu ite ni loi mai mai an insîr ngai: Mi inpâk pai pai hmûr le huangna milung irputin thu an insîr ngai.

³Rengpa khan inpâk pa pai hmûr murdi chu âtpai a ta, Thu lâirpâk tak insîrna milei leh khan.

⁴Anni khan, “Ei milei hin inhnê ei ta, Ei hmûrhai hi eini ta ngêt kêng, tu mo ei chung a rêng om?” an ti ngai.

⁵Rengpa khan, “Inrianghai sirbea an om sik le, invâihai inrûm sikin thoi zôi ki ti.

⁶Rengpa thuhai hi thu irthiang tak a ni; Tangka, thîr hâl inzôina meia voisari irthiangtir tâk ang kha a ni.

⁷O Rengpa, nangin anni kha chu vong insa ni ta, Hi thoiintha hai ata hi kumkhua'n zôk an ti.

⁸Mihriam nâihai laia hin sualna chôindôma omin, Mi siahai chu an irvâk vêl ngai.

Inpâkna Hlahai 13

Changpui ngênna chongchaina

Hla hruaitu hrangin, Davida inpâkna hla

¹O Rengpa, idôr ten mo ni ni irnghil kumkhua hrang tâk? Idôr ten mo keima ata ni hmâi ni ithup hrang tâk?



²Sûn ni tungin ki milunga beidongna neiin, Idôr ten mo ki lungrîla beidongna sipin ki la iom hrang? Idôr ten sôtin mo ki râlhai hi ki chung a an la inlal hrang?

³O Rengpa, ki Pathian, ni enin lân, ni sâm roh. Hràtna ni pe nôkin lân, irhmang hrang ni phal no roh.

⁴Ki râlhaiin, “Ama ei inhnê tâk,” an iti hrang phal no’n lân, Anni chu kin rîlnaa an ilôm hrang phal no roh.

⁵Khannisianlân, kei chu ni lungkham lianna hin irnghata; Ni ni saninhringnaa hin ki lungrîl lôm a ti:

⁶Ki chung a sataka a tho sikin. Rengpa chôindômin hla sak ki ti.

Inpâkna Hlahai 14

Mihriamhai invêtna

Hla hruaitu hrangin, Davida inpâkna hla

¹Mi invêtin a lungrîlin, “Pathian om mah,” a ti ngaia, an siat zoia, thil intirom an thoa, tukhom thil sa tho rêng om mahai.

²Rengpa’n chu irvân ata mihriam nâihai hi, “Inhre thiama, Pathian zong rêng rêng an om mo,” ti’n a zu ena.

³A no lam tiang an pêt zit tâka; Porinche takin an om zoi tâka; Tûte thil sa tho zel om mahai, inkhat te lua om mahai.

⁴Thil tho’nsualtu murdihaiin chu inhriatna rêng rêng an inei loi ma ni? Bai fâk angin ki mihai an lei fâk zoi zit ngaia, Rengpa lak koi ngai mahai.

⁵Pathian chu mi fel irchihaia a om ngai sikin, Chi tak tak an ti.

⁶Mi inriang inkungna chu mualphoi an sak ngaia, Rengpa chu a irsûnghualna a ni sikin.

⁷Israelhai saninhringna chu Zion ata zuang chum sianlân chu o! Rengpa chu a mihai suaka an iom kha a hruai kîr tika, Kha tika chu Jakobahai kha an raifân ta a ta, Israelhai khom lôm ta an ti.

Inpâkna Hlahai 15



Pathian thil inphût
Dauida inpâkna hla

¹Rengpa ni puan ina khan tu mo zuang mikhual hrang? Ni tâng irthianga khan tu mo lei om hrang,

²Dik taka oma fel taka thoa, An lungrîla thutak insîr mi chu;

³A mileiin mi nuiso ngai loia, A rual chungâ khom thil sual tho ngai loia, A bômhai irhming khom insîrinsiat ngai loi mi chu.

⁴Mi sualtak chu a hmusitin a om ngaia; Rengpa chituhai rêk chu a chôindôm ngai. Mâni ta hranga siat hrang khom khomâksâma inkung tâk chu indanglam ngai loia,

⁵A pung irzûla a sum inpûktir ngai loia, Thiam chang ual thiamloi inchangtirna hranga fâk inrûk la ngai loi mi chu. Khaang thil thotuhai chu itika khom inhnîng no nihai.

Inpâkna Hlahai 16

Iamtu chongchaina
Dauida Miktam

¹O Pathian, ni sînghual roh: nangmaa khan ki iamna ki'rngat ngaia.

²Rengpa kuang chu, "Nang chu ki Rengpa ni nia: Nangma no chu satna rêng rêng nei ma ung.

³Irnênga mi irthiang omhai chu, Anni chu mi sa, ki lômna murdi omna chu an ni," ki iti a ni.

⁴Rengpa pathian dang irchihai chu, an beidongnahai la pung a ti: An thisen inhlanin mihai chu inhlan sa no ninga. Ki hmûrin an irhminghai irlam ual no ning.

⁵Rengpa chu ki'rchon lua hrang le ki khilât dong hrang chu a ni: Nangin ki dongtum chu ni nin det pe ngaia.

⁶Irkhîna hruihai chu hmunhoi takhaia keima hrangin a tâk lik tâk a ni; A ni, irchon satak ki ilua tâk a ni.



⁷Zoro inchum nin kung petu Rengpa chu inpâk ki ta, a ni, zânhaia chu ki lungrîlin a ni sep ngai.

⁸Rengpa chu ki makunga kin omtir ngaia, ki chang tiang a om sikin inhnîng no ning.

⁹Khasikin ki lungrîl a lôma, ki milei khom a lôma: ki taksa khom satakin om a ti.

¹⁰ki'rtha chu Seol kuang khan masan rak no chi nia; ni mi irthiang hmon hmu kha phal no chi ni.

¹¹Nangin hringna lampui kha nin hretir ni ta, ni makunga chu râifâna sip lêtin a oma; ni kut chang tiang chu kumkhuaa lômna hrang a om.

Inpâkna Hlahai 17

Sual nei loi chongchaina

Dauida chongchaina

¹O Rengpa, ki felna thu hi inhren lân, ki khêk irhâi hi irngaitua'n lân; Milak tho ngai loi hmûr ata suak ki chongchaina hi ni mikuar zuang dô roh.

²Ki chung a chum chu nangma ata suak ni sianlân, Ni mit kha theibîk nei loiin en ri se.

³Ki lungrîl hi ni fiaa, zâna ni ni hroa; Ni ni fia tâka, ite hmu mak chea; Ki bâiin insîrin sual no nih ki ti ngit a ni.

⁴Mihriam sinthoa chu, ni hmûra thu suak sikin. Mi nunrông lampuia fe loi hrangin ki irvong insa a ni.

⁵Ki ke pêthai hin ni lampui a zui ngita, Ki ke pêt hi châi ngai mah.

⁶O Pathian, nang ki koi zoro'n, ni ni isâm hrang a ni: Keima tiang hin ni mikuar zuang do'n lân, ki ihril hi irngai roh.

⁷O, nangmaa iamna irngat murdi anni beituhaia ata ni kut chang tiang saninhring ngaitu, Ni lungthungna irkhêl tak chu inlangtir roh.

⁸⁻⁹Mi sia nin siattheitu, Ni doi hena ni hual vêtuhai ata chu mitlailên angin vong insa'n lân, Ni mitha hnuaia ni thup roh.



¹⁰Mâni an irfâ inmara, lâripâk takin an bâiin an chong ngai.

¹¹Atûn hin chu kin ke pêtna tina an nir hual tâka, Irnênga nin rîltir hrangin an mîthai chu kin chung a an inkoptir mai.

¹²Anni chu Kâmkeibaknei sa sê hrang irzuk tak ang le, Kâmkeibaknei vânglai hmun fianrialhaia a inbok chian ang kha an ni.

¹³O Rengpa, thoiin lân, Ama kha ma songin lân, inkûntir khak roh: Ki hringna hi ni khandaiin saninzôkin lân,

¹⁴O Rengpa, ni kutin mihriamhai ata, Rammual mihriamhai ata hi saninzôk roh; Anni dongtum chu atûn hring sûnga an inei hi a nia, An phîng chu nir chon hrangin nin siptir pe ngaia, nâi le te lungchuk takin an neia, An sum hmang ban chu an nâitesenhai an thisan pe ngai.

¹⁵Keima'n chu felna neiin ni hmêl ki hmua: Nangma angna neia ki meng tika chu lunginchuk ta ki ti.

Inpâkna Hlahai 18

David a inhnêna hla

(2 Sam 22.1-51)

¹ O Rengpa, ki hrâtna lung nang ki thung.

²Rengpa chu ki lungpui le, ki kulpui le ni saninzôktu a ni; Ki Pathian, ki lungpui dettak a nia, amaa khan iamna irngat ki ti; ki phô le, ki saninhringna irki le, ki kulpui irsâng a ni.

³Inpâk ruk Rengpa chu koi ki ta, Khanchu a ni doituhai ata saninhringin om ki ti.

⁴Thina hruihualhaiin a ni zêla, Pathian ngaisak loina tui lianhai khan a nin chitira.

⁵Seol hruihualhai khan a ni khit phiara, thina chânghai khan a nin ôka.

⁶Ki lunginzîngin Rengpa chu ki koi ngaia, ki Pathian kin sam ngai. Ama'n chu a biak in ata ki'rhâi an hriat ngaia, A makunga ki khêk irhâi chu a mikuara a lût tâka.



- ⁷Kha zoro lai khan irnêng hi an hnînga, an thing tâka.
- ⁸A hnâr ata meikhu an ding ngut ngut tâka, A bâia suak mei khan a kâng zuak zuak tâka, Kha khan meihol khom a'raltir zur zur tâka.
- ⁹Ama khan irvânhai khom an kûntira, a chum tâka: A ke hnuaiia khan inthim irsa khak hi a oma.
- ¹⁰Cherub chung a chuanga, a vuang tâka. A ni, phâivua irthahaia khan a vuang mur tâka:
- ¹¹Inthim hi ama irbîkna hmunin, ama irthupna dângdi tân a sina; Sûm irsa tak tuia sip khan a hual vêla.
- ¹²Ama vârna sika khan a sûm irsâkhak kha ar kianga, Irialhai le mei irlinghai a tâk mur mura.
- ¹³Rengpa chu irvânhaia khin ar sê lul lula, Anchungtaka khan ar hâi a suaka, Irialhai le mei irlinghai a tâk sup sup tâka.
- ¹⁴Khan, a thalhai kha a kâp suaka, annihai kha an darhtirhaia; A ni, kôlhai a'rtêktir zor zor saa, an buaitirhai chit tâka.
- ¹⁵Kha tika chu, O Rengpa, ni halna sikin, Ni hnâra phûk suak khan a sêm rak sika khan, Tui luangnahai a hong inlanga, Irnêng irnghatnahai kha inlangin a om tâka.
- ¹⁶Ama khan chung tiang ata a zuang inbana, a ni chela: Tui tamtak ata a ni hnûk suaka.
- ¹⁷A ni doitu hrât tak ata a ni saninzôka, A ni khôkmâktuhai ata khom; keima hrangin chu an hrât ta hraia.
- ¹⁸Anni khan ki vânduai nî khan an ni beia, Khannisianlân Rengpa chu ki irnghatna tak a ni.
- ¹⁹Ama khan hmun irthôl taka a ni hruai suaka; Ki chung a lôm sikin a ni isaninzôk tâk a ni.
- ²⁰Rengpa khan ki fel lam ang takin ki chung a thoa, Ki kuthai a irthianginfâi lam ang takin a ni thuan a ni.



- ²¹Rengpa lampuihai kha ki zuia, Ki Pathian kuang ata soal takin rotsan ngai ma unga.
- ²²A roirêlna murdi ki makunga a om ngaia, A thu'nkunghai kha pai ngai ma unga.
- ²³Ama ata sêlnaboi ki ni saa, Ki porinchêna ata ki'rkhâipai ngaia.
- ²⁴Khasikin Rengpa khan ki felzia ang takin a ni thuan tâka, Ki kuthai a mithmua a irthiangzia ang dênin.
- ²⁵Mi lunginkham thei tak ata chu lungkham thei takin inlangtir ni ta; Mi sa famirkip ata khan sa famirkipin inlangtir a ta;
- ²⁶Mi irthianghai ata kha irthiangin inlangtir ni ta; Khan, mi tukullian ata chu tukullian inlangtir ni ti.
- ²⁷Intak tuang mihai chu ni isaninhring hrang a nia; Mi lârirpâkhai chu irhniamtir ni ti.
- ²⁸Nangin ki meiser hi ni hâl pe ni ta; Rengpa ki Pathian khan kin thimna hi nin vârtir a ti.
- ²⁹Nangma changpuiin râlhai kin boa; Ki Pathian changpuina dênin kul bang ki'rchôm khum a ni.
- ³⁰Pathian chu, a lampui kha a sa famirkipa; Rengpa thu kha chu a fia tâka; Amaa iamna irngat murdihai ta hrangin chu ama kha phô a ni.
- ³¹Rengpa ti no chu tu mo Pathian dang an iom? Ki Pathian ti no chu tu mo lungpui om?
- ³²Hrâtnaa ni'rthuamtu le, ki lampui nin sa irkiptu Pathian chu.
- ³³Ama khan ki ke hi sazukupui ke angin a siama; Ki hmun irsâng takhaia a nin omtir ngaia.
- ³⁴Ki kuthai hi râl kâp hrangin ar chutir ngaia. Khanchu ki bânhai hin dâr thal ngul an kûi zôi raka.



³⁵Nangin ni saninhringna phô ni ni pêk saa: Ni kut chang tiang ni ni kaia, Ni irngaiintômna'n a ni siam inlian ta.

³⁶Ki hnuaia ki ke pêtna kha ni'rzattira, Khanchu ki kehai hi tung mah.

³⁷A ni doitu irzûl ki ta, irzûl phâ ki ti: Irhmangtira an om mâka chu hong kîr ta no ning.

³⁸A thoinôk thei lina hrangin sât inbong ki ta; Ki ke hnuaia hin irtet intam an ti.

³⁹Nangin irbeina hrangin kha hrâtna'n ki kong a ni ni khita: A ni hong beituhaia kha ki hnuaia an inrîl zoi tâka.

⁴⁰A ni khôkmâktuhaia chu kin boitirhai theina hrangin. Nangin a ni doituhaia chu hnung songsanin nin omtir tâka.

⁴¹Annihai kha an khêka, khannisianlân, a san hrang tûte om mahai; Rengpa dên kha an insama, khannisianlân sâmhahi mah.

⁴²Kha tena chu bâli phâivua'n a isêm inlêng ang khan ki zêm irnôî chita: Kholaiia dialdôk ang dênin ki pai tâka.

⁴³Nangin mihai irsualna ata ni ni saninhringa; Nam tin lua ni ni siama: Ki inhriat ngai loi mihai khan ki sintho ta an ti.

⁴⁴Ki thurchi an inhriat zoi le ki thu zôm an ti: Mikhualhai kha ki kuang irpe lût an ti.

⁴⁵Mikhualhai kha lâizâm tho an ta, An kulpui ata kha inthing pumin hong suak an ti.

⁴⁶Rengpa kha a hring mai kêng; ki lungpui kha inpâkin om sianlân; A ni saninhringtu Pathian kha chôindômin om ri se:

⁴⁷Phuba ni lâk petu le, Mi tin ki hnuaia setu Pathian ngêt kha.

⁴⁸Ama khan a ni doituhaia ata a ni sansuaka: A ni, nangin a ni beituhaia chung tiang ni ni chôî irkânga: Mi nunrông ata kha ni ni saninzôk ngaia.



⁴⁹ Khasikin, O Rengpa, nam tin laia khan lômthu insîr ki ta, Ni'rhming inpâkin zâi ki ti.

⁵⁰ Ama khan chu saninhringna roiinpui tak rêng a isiam kuang a pêk ngaia; A sahriak poltu chung, Davida le ar chihai chung ngeia khan, kumkhua'n a lungkham lianzia inlangtir a ti.

Inpâkna Hlahai 19

Pathian roiinpuizia thil siama an lang

Hla hruaitu hrangin, Davida inpâkna hla

¹Irvân khin Pathian roiinpuizia an langtira, Boiruak irzat tak khin a kut suak chu an langtir ngai.

²Sûn hin sîn dang kuang thu an sîr nôk thiaia. Zân hin zân kuang inhriatna an langtir nôk ngai a ni.

³Thu insîr rêng rêng le chong rêng rêng om maka; An irhâi kha beng a inhriat thei ni mah.

⁴An irkhîna hruai kha irnêng murdia irzâm suakin a oma; An thu kha kôlkung dên rakin an thang suak tâka. Khahaia khan misa hranga khin puan in a zâra,

⁵Kha misa kha moineitu hrang a chontan ata suak ang kha a nia, Mi hrât tak angin a intâna lampuia intân hrang kha a rai a fân ngai.

⁶A suakna kha kôlkung ata a nia, An tân kualna chu a kiang tiang kôlkung dênin a nia, A lum inhre loa thup rêng rêng om mah.

⁷Rengpa dân kha a sa'rkîpa, hringna a siam insa ngai. Rengpa thu'nhriattir kha iam a oma, mi'nmôl an vârtir ngai;

⁸Rengpa isepna kha a dika, lungrîl an lômtir ngai; Rengpa thupêk kha a'rthianga, mihai an vârtir ngai.

⁹Rengpa chitna chu a fâia kumkhua hrangin a om ngai: Rengpa roirêlna chu a dika, a fel zit a ni.

¹⁰Kha kha rângachak irthiang tamtak nêk khomin: Khuaihlutui le khuaihâr nêkin a thum ual sa a ni.



¹¹Kha no khom, kha thuhaia khan ni siahlo hi ingo'n ki om ngaia: Khaanga zôm kha lômman irkhêl neina a ni ngai.

¹²Tu'n mo mani tho'nsualhai inhre thei hrang? Sual irthuphai ata hin ni'rkêmtir roh.

¹³Nakhrâta thil soal tholoi hrangin ni siahlo hi ni chel khak roh; Ki chung a ircham inneitir no roh; Khanchu sa'rkirpin om ki ta, Tho'nchâina irkhêl tak ata sêlna boiin om ki ti.

¹⁴O Rengpa, ki lungpui le a ni'rtantu, ki bâia thu suakhai le ki lungrîla ngaituanahai hi ni mithmua lôm inruk takin om ri se.

Inpâkna Hlahai 20

Inhnê theina hranga ngênna

Hla hrulaitu hrangin; Davida inpâkna hla

¹Chardong nikhuaa chu Rengpa'n nang sâm ri se; Jakoba Pathian irhmingin hmun irsânga nang bâng ri se;

²Hmun irthiang ata nang changpui hrang nang zuang tîr pe sianlân, Zion ata kha nang inhriattir ri se;

³Ni thil inhlan murdi kha inhre mai sianlân, Ni hâlivôm thilinhlan kha lôm ri se;

⁴Ni milung nuamlam kha nang pêk phal sianlân, Ni thiltum murdihai kha hlo nang inchuktir pe ri se.

⁵Ni saninhringnaa khan raifânin zâi ei ta, Ei Pathian irhmingin ei puan zârhai hi la zâr ei ti. Rengpa khan ni zongna murdi kha hlo nang inchuktir pe ri se.

⁶Rengpa'n a sahriak poltu hi a saninhring ti atûn hin kin hriat ta; A kut chang tiang saninhringna irnakin ar vân irthiang ata la zuang sâm a ti.

⁷Senkhatin tâlihai an iama, senkhatin sakorhai an iam. Eini rêkin chu Rengpa ei Pathian irhming kha irlam ual ei ti.

⁸Annihai kha an kûna, an tûk tâka: Eini rêk chu ei thoia, ei ingîr intuan tâk a ni.



⁹Rengpa, saninhring roh: Ei koi zoro'n chu Inlaltakin ni sâm ri se.

Inpâkna Hlahai 21

Inhnê tâk sika inpâkna

Hla hruaitu hrangin; Davida inpâkna hla

¹O Rengpa, rêng kha ni hrâtnaa hin raiinfân a ta, Ni saninhringnaa hin a raiinfân hrang bâka!

²A milung nuamlam chu ni pêka, A hmûra a thil zong phal mak che.

³Satna satvurnahaiin ni ni'rtongpuia; Rângachak irthiang rênglukhum nin khumtira.

⁴Ama'n chu hringna nang a ngêna, ni lei pêka; kumkhontuanga dam maina chu.

⁵Ni changpui sikin a roiinpui tak taka: Chôindômna le roiinpuina a chung a ni'rngat ngaia.

⁶Kumkhua hranga satvurna irkhêl tak dongin ni siama: Ni makunga raifâna'n nin lômtir ngai.

⁷Reng khan Rengpa chu a iama, Anchungtaka lungkhamna sikin inhnîng no ni.

⁸Ni kutin nangma doituhai murdi chu zong suak zit a ta: Ni kut chang tiangin nang a khôkmâktuhai zong suak a ti.

⁹Ni ninginmur tika chu anni kha hâl inzôina meichok luai luai angin siam ni ta, Rengpa khan anni kha ningmurin inlem zoi a ta, Mei khan kâng irhmang a ti.

¹⁰An rahai kha irnêng ata irhmangtir ni ta, An irchihai kha mihriam nâihai lai ata irhmangtir sa ni ti.

¹¹Ni chung a khan thilsual tho an tuma; Thil sual an ngaitua suaka, thangsua thei mahai.

¹²Nangin anni kha hnung insongtirhai ni ta, An hmâi irdîna ni thal sia ni ta, Lâizâm tho an ti.



¹³O Rengpa, ni hrâtnaa khan chôindômin lei omin lân: Khanchu ni sinthotheina inpâkin hla sak kin ti.

Inpâkna Hlahai 22

Chardong khêk le inpâkna hla

Hla hruaitu hrangin; Davida inpâkna hla

¹Ki Pathian, ki Pathian, ithoa mo ni ni irotsan? Ithoa mo ni changpui hrangin ni hla bâka? Kin hrûmna thuhai ata ni ihla hi?

²O ki Pathian, sûna nang kin sama, Khannisianlân ni sâm mak chea; Zâna khom nang kin sama, dâihrek ual ma ung.

³Khannisianlân, o nang Israelhai inpâknaa om ngai, Nang chu ni irthiang a ni.

⁴Kin irchibulhai khan nang an lei iama: An iama, khanchu nangin ni lei saninzôk ngai.

⁵Nang an insama, khanchu saninzôkin an lei om ngaia: Nang an iama, khanchu mualinphoiin om ngai mahai.

⁶Kei rêk chu mihriam rêng rêng ni ma ung, chokchonâl chian ki nia; Mihriamhai hrilinsiat le mihai ihmusit ki ni.

⁷A ni hmupu dôrin an nin nuisana: An hner an phena, an lu an nok ngaia,

⁸“Rengpa chung a irngat ro ba, ama khan ama hi saninzôk no ni mo: A chung a lôm sikin saninzôk no ni mo,” an tia.

⁹Nang chu sul ata ni lâksuaktu kha ni nia: Ka nu irnhuai chung a ki om lai khan nangin ni nin iamtira.

¹⁰Sula irthokin nangma chung a irngat ki ni, nang chu ka nu’n a ni vong lai ata ki Pathian ni ni.

¹¹Ni hla viat no roh: lunginzîngna hrang anai ta; changpuitu hrang rêng rêng om mahai.

¹²Sehrâtchal tamtakin an nir hual vêla: Basan rama sehrâtchal hrât takhaiin an nir hual vêla.

¹³Kâmkeibaknei hnuk hrôt inrûm hmang angin a bâiin an ni âng khuma.



- ¹⁴Tui anga bunpaiin ki oma. Ki ru murdihai khom irphêtin a oma: Ki milung hi khuaihlu angin a zôi zoi ta.
- ¹⁵Ki hnuk hi pil bêl angin a chârkhohroi zoi ta, “Ki milei khom ki danga a kop khak tâka; Nangin thina pila hin ni ni ihruai inlût tâk a ni.
- ¹⁶Uihaiin an ni’rhual vêla: Thil saloi thotu om khômhai khan an ni’rhual khaka; Ki kut le kehai hi an inphopa.
- ¹⁷Ki ru murdihai hi ki tep theia; Anni lakin ni enin anni êroa.
- ¹⁸ Ki puansilhai an irsema, Ki songkol hrangin tâ an sâna.
- ¹⁹Nangma’n chu O Rengpa, ni hla viat no’n lân: O, a nin hrâttu, ni changpui hrangin irhnot roh.
- ²⁰Ki hringna hi khandai ata saninzôkin lân; Ki hringna hi uihai sinthotheina ata kha saninzôk roh.
- ²¹Kâmkeibaknei bâia om chu ni saninzôk inlân; A ni, Sele irkia om chu ni sâm roh.
- ²² Ki urênghai kuang nir hming hril ki ta: Inkhômhai laia nang inpâk ki ti.
- ²³Rengpa chituhai, ama kha inpâk roi; Jakoba irchi murdihaio, ama kha chôiindôm roi; Israela irchi murdihaio, ama kha chi roi.
- ²⁴Ama khan intak tuangtu intakzia kha hmusit maka, intir ual mah; A hmâi kha ama ata thup ual mah; Ama kha a khêkin ar ngai ngai.
- ²⁵Inkhômna roiinpui taka nang ki inpâk ngaina hi nangma kuanga om a ni: Ama chituhai makunga khan ki thu’nkung sua tum ki ti.
- ²⁶Thuhnuairôlhai khan fâ an ta, khop an ti: Ama zongtuhai khan Rengpa kha inpâk an ti: Nin milung chu kumkhua’n hringin om ri se.
- ²⁷Kôlkunga mi murdi khomin inhre nôk an ti, Rengpa tiang irhei ta an ta: Nam tin chi tin ni makunga kûn an ti.
- ²⁸Ram chu Rengpa ta a nia: Nam tin chung a roirêltu a ni.



²⁹Irnênga mi nei intam murdihai khan fâkin chubai mûk an ti: pila chum hrang murdihai chu a makunga la kûn an ti. Mâni hringna inhring mai thei loi chu.

³⁰Thoiintharhaiin a sintho an ti; Thoiinthar hong om thiaihai kuang khan Rengpa thurchi kha hril an ti.

³¹'Rengpa'n a mihai a saninzôk,' tiin la'rzir hranghai hril an ti.

Inpâkna Hlahai 23

Rengpa ni enkoltu

David a inpâkna hla

¹Rengpa chu a ni enkoltu a nia; ite irsam no ning.

²Ama khan sûlhring hmunhaia a nin lêngtira, Irgamna tui kôlhaia a ni hruai ngai.

³Ki hringna hi a ni siaminsat ngai, Ama irhming sikin felna lampuihaia a ni hruai ngai.

⁴A ni, thina daihlîm inthûk tak hro khom inlân, Thil saloi rêng rêng chi no ning; Nang ki kuang ni om mai sikin. Ni hêmvuak le ni khianghrolin a ni hrung ngai a ni.

⁵A ni doituhai mit hmua ki makunga hin khalâi ni nir fûktir pe ngaia: Ki lu hi sahriak ni ni'rthutir tâka, ki khilâta hin a lêt mai.

⁶Irlêkloiin satna le lungkhamna'n ki dam sûng hin ni zui mai a ta: Khanchu Rengpa ina kumkhua'n om mai ki ti.

Inpâkna Hlahai 24

Reng roiinpui tak

David a inpâkna hla

¹Irnêng le a sûnga om murdi hi Rengpa ta a nia; Rammual le a sûnga lênghai leh hin.

²Tuikhanglian chunghai ama inding a nia. Tuipui chunghai khom an dettir saa.

³Rengpa tânga tu mo kâiin, A hmun irthianga tu mo ngîr hrang?



⁴ Kut fâi le milung irthiang neia, A lungrîl ite ni ngai loina tianga se ngai loia, Huang tuma khomâksâm ngailoi mi kha.

⁵ Ama kha Rengpa kuang ata satvurna dong a ta, A saninhringtu Pathian kuang ata felna dong sa a ti.

⁶ Pathian zongtuhai chu kha ang mi kha an ni, O Jakoba Pathian, ni hmêl zongtuhai chu.

⁷ O kul mikothaio, nin lu chunghai kha indom irsâng unglân; Khanchu roiinpuina Reng hi a zuang ilût hrang a ni.

⁸ Roiinpuina Reng chu tu mo a ini? Rengpa hrât tak le sinthothei tak, Rengpa, irdoinaa sinthothei tak kha a ni.

⁹ O kul mikothaio, nin lu chunghai kha indom irsâng unglân, A ni, tianlai mikothaio, indom irsâng roi: Khanchu roiinpuina Reng kha a zuang ilût hrang a ni.

¹⁰ Kha roiinpuina Reng kha tu mo a ini? Sipaihai Rengpa kha, Ama ngei kha roiinpuina Reng kha a ni.

Inpâkna Hlahai 25

Kaihruai le enkolna hranga ngênna

Dauida inpâkna hla

¹ O Rengpa, ki lungrîl hi ni kuang ki sia ngit ngai.

² O ki Pathian, nang ki iama, Mualinphoiin nin omtir no'n lân; A ni doituhai ni ingam hrang chu ni phal no roh.

³ A ni, nangma nghâktu rêng rêng chu tûte mualinphoiin om no nihai: Asan om loia vârirlet taka thotuhai chu mualinphoiin om an ti.

⁴ O Rengpa, ni lampuihai nin hriattirin lân; Ni lampui thurchihai nin hretir roh.

⁵ Ni thutaka khan ni hruaiin lân, nir chutir roh, Nang chu a ni saninhringtu Pathian ni nia; Sûn sôt nang ki nghâk mai tâk hi.



- ⁶O Rengpa, nin rennahai le ni lungkham lianzia kha inhre maiin lân; Tianlai ata lei om kumkhua tâk ni nia.
- ⁷Ki thoibop lai sualnahai le insiatnahai kha inhre mai no'n lân; O Rengpa ni satna sikin, Ni lungkhamna sikin nin hre mai roh.
- ⁸Rengpa chu a sain a idik a ni. Khasikin mi sualhai kha lampui inentir a ti.
- ⁹Thuhnuairôlhahi kha roirêlna fela hruai a ta: Thuhnuairôlhahi chu ama lampui thurchi irchutir a ti.
- ¹⁰A thu'nkung le a thu inhriattir zômtuhai ta hrangin chu, Rengpa lampui murdihai kha lungkhamna le thutak zit a ni.
- ¹¹O Rengpa, nir hming sikin ki sualhai ngaidamin lân; a natinsat tâk a ni.
- ¹²Rengpa chi mi chu tu mo a ini? Kha mi kha chu a lampui inthang hrang kha lan entir a ti.
- ¹³A hringna chu hoi takin om a ta; A'rchi hai khan ram kha la lua an ti.
- ¹⁴Rengpa thu'rthup chu ama chituhai kuang om a ta, A thu'nkung chu anni kha inhretir a ti.
- ¹⁵Ki mitin Rengpa tiang a en mai ngaia: Ama khan ki kehai hi lên ata a la ikaisuak hrang a ni.
- ¹⁶Keima tiang hin hong irheiin lân, ni lunginkham roh; Beidong le intak takin ki oma.
- ¹⁷Ki milung buainahai hi a na ok tâka; O, ki lunginzîngnahai ata hi ni hruai suak roh.
- ¹⁸Ki intakzia le ki lunginzîngzia hi ngaitua'n lân, Ki sualna murdi ngaidam roh.
- ¹⁹A ni doituhai kha lei ngaitua ta, tamtak an ni; a sate'n an ni ihnôl a ni.
- ²⁰O, ki hringna vong insa'n lân, ni saninzôk roh: Mualinphoiin nin omtir no roh, Nangmaa khan ki iamna ki'rngkata.
- ²¹Ki lungrîl satna le ki dikna'n ni saninzôk ri se. Nang ki inghâk mai a ni.



²²O Pathian, Israelhai hi An lunginzîngna murdi ata saninzôkhai roh.

Inpâkna Hlahai 26

Mi sa chongchaina

Davidâ inpâkna hla

¹O Rengpa, roi ni rêl pe roh, lungrîl satak irputin ki oma.

²O Rengpa, ni enfiain, ni fia'nlân; Lunghla loiin Rengpa kha ki iama. Ki lungrîl le ki milung hi irthiangtir roh.

³Ni lungkhamna kha ki makunga a oma, Ni thutaka ki om mai hen a ni.

⁴Mi ite ni loi mai maihai kuang toi ngai ma unga; Vârirlethai kuang khom lût hliak no ning.

⁵Thil saloi thotuhai inkhômhai kha ki khôkmâka, Mi siahai kuang toi no ning.

⁶Ki kuthai hi sêlnaboiin irsûk ki ta, Khasikin, O Rengpa, ni maichâm kha irhîl ki ti;

⁷Lômthu insîrna hnukirhâi kin neitir theia, ni thilirkhêl tho murdihai kha ki hril theina hrangin.

⁸Rengpa, ni omna in kha ki'rngaiinnata, Ni roiinpuina omna khom.

⁹Ki hringna hi mi sualhai laia irzêltir no'n lân, Ki hringna khom hi thisen insua ngaihai lai khan la sa no roh:

¹⁰An kut chang tiang chu fâk inrûkna'n a sipa.

¹¹Khannisianlân kei chu lungrîl sa irputin om ki ti: Lung nin khamin ni saninzôk roh.

¹²Ki ke hi hmun inzôl taka a ngîra; Inkhômnahaia khan Rengpa chu inpâk ki ti.

Inpâkna Hlahai 27

Inpâkna Chongchai

Davidâ inpâkna hla

¹Rengpa chu ki vârna le ni saninhringtu a ni; tu mo ki ichi hrang? Rengpa chu ki hringna kulpui a ni; tu mo ki ichi hrang?



²Thil saloi thohai, a ni doituhai le ki ikhômâkhai khan, Ki hmê fâk an tuma an ni bei lai khan, An irfûia, an tûk tâka.

³Sipai pâlhain ni bêi tumin ni hualhai khom sianlân, Ki lungrîl indôp no ni: Ki chung a irdoina hong tung khom sianlân, Khan khomin iam ngit ki ti.

⁴Rengpa kuang thil inkhat ki ngêna, Kha vai kha zong ki ti, Rengpa satzia hmu hrang le, a biak ina thu irdon hrangin. Ki hring sûngin Rengpa ina ki om mai theina hrangin.

⁵Lunginzîng nia chu a riakbuka nir bîktir a ta; A saninzôkna puan ina khan ni thup a ti: Lungpui chung a nin dom inkhâi a ti.

⁶Atûn chu a ni doitu, ni hual vêtuhai chung tiang ki lu hi chôiirsângin om a ti; Khanchu, a puan ina khan râifâna irbôlnahai inhlan ki ta; Zâi ki ti, a ni, Rengpa inpâkin zai ki ti.

⁷O Rengpa, ki khêka nang kin samin chu irngaitua roh. Lung nin khamin lân, ni sâm roh.

⁸“Ki hmêl zong roi,” tia ni ti lai khan; ki milungin chu ni kuang, “Rengpa, ni hmêl zong ki ti,” a tia.

⁹Keima ata hi ni hmâi thup no’n lân; Ni siahlo hi ningmurin inboi no roh. Nang chu ni changpui ngaitu ni ni ngaia; O ni saninhringtu Pathian, ni pai thâk no’n lân, ni rotsan viat no roh.

¹⁰Ka nu le ka pa khan an ni rotsan tâka, Khannisianlân Rengpa’n khan ni la donsui a ti.

¹¹O Rengpa, ni lampui kha nin entirin lân; Ki râlhai sika hin, Lampui inzôl taka ni hruai roh.

¹²A ni doituhaiin an nuam nuama ni lo hrangin ni pe viat no’n lân: Inhretu milakhaiin an ni beia, nunsia thu kaisua ngaihai khan.

¹³Mi hring rama hin Rengpa satna hmu hrangin ir-iam no inlân chu ki irzal hrang tâk a ni.



¹⁴Rengpa kha nghâk mai roh; Hrât takin omin lân, ni milung kha inhâtir ri se; A ni, Rengpa chu nghâk mai roh.

Inpâkna Hlahai 28

Changpui ngêna

Davidâ inpâkna hla

¹O Rengpa, nang ki ikoi hrang a ni; Ki lungpui, keima ata ni mikuar insêttir no roh: khano'nchu, nangin ni ni dâisanhrekin chu, Khurpadopa suakhai ang dênin lei omna lik ki ti.

²Nang kin sama ki kuthai hi ni biakna hmun irthiang tiang ki pharin chu, Lungkham ki ngêna irhâi hi ngaitua roh.

³Mi siahai laia le thil tho'nsualtuhai laia chu Ni hnûkpai sa no'n lân; Khahai khan chu an bômhai kuang irngeina thu an insîr ngaia, Khannisianlân a milunghaia khan thil tho'nsualna a om chian a ni.

⁴An sintho ang zêl le, an thilthohai a sualzia ang dênin thuanin lân; An kuta an itho ang dênin thuanin lân; An sualna man irhmutir roh.

⁵Rengpa sinthohai le A kuta a sintho kha an ngaisak no sikin. Ama khan annihai chu siam insa loiin insiat a ti.

⁶Lungkham ki ngêna irhâi hi ar ngaitua sikin. Rengpa chu inpâkin om ri se.

⁷Rengpa chu ki hrâtna le ki phô a nia; Ki milung hin ama kha a iama, Khanchu changpuiin ki oma; Khasikin ki lungrîl hi a lôm tak taka; Ki hla khan ama kin pâka.

⁸Rengpa chu an hrâtna a nia; A sahriak pol hrangin chu saninhringna kulpui a ni.

⁹Ni mihai saninhringin lân, nangma tahai kha satvur roh: Annihai kha infa'n lân, kumkhua'n pom roh.

Inpâkna Hlahai 29

Phâivopui laia Rengpa hnukirhai



Davida inpâkna hla

¹ O mi sinthothei tak nâihaio, Rengpa kuang pe unglân; Rengpa kuanga khan roinpuina le hrâtna pe roi.

² Rengpa kuang ar hming roinpuina chu pe unglân; Irthiang satna irbelin Rengpa chu chubai mûk roi.

³ Rengpa hnukirhâi kha tui chunghaia khan a hong oma, roinpui Pathian kha a hong irse mur mura, Rengpa ngei kha tui tamtak chunghaia ar hâi a hong oma.

⁴ Rengpa hnukirhâi chu sinthothei tak a nia; Rengpa hnukirhâi kha chu roinpui tak a ni.

⁵ Rengpa hnukirhâi khan sidar thinghai kha inkhiaktir a ta; A ni, Rengpa khan Lebanon tânga sidar thinghai kha an khiaktir sep sup ngai.

⁶ Sehrâtte tual chai angin a om ngaia; Lebanon le Sirion tânghai chu sele tê ang dênin.

⁷ Rengpa hnukirhâi khan kôl a'rtêktira.

⁸ Rengpa hnukirhâi khan ramchâr an tor inhnînga; Rengpa khan Kades ramchâr kha an hnîngtir ngai.

⁹ Rengpa hnukirhâi khan seso thing kha an hnîngtira, rampui thingnahai chu an chiltir ving ngaia: A biak ina khan thil itinrêngin, "A roinpui e," an ti seng ngai.

¹⁰ Rengpa chu tuisânglian lai khan rêngin a toia, A ni, Rengpa chu kumkhontuanga hrangin Rêngin a itoi a ni.

¹¹ Rengpa khan a mihai kuang hrâtna pehai a ta, Rengpa khan a mihai kha irtharngamna'n satvurhai a ti.

Inpâkna Hlahai 30

Lômthu insîr chongchaina

Inpâkna hla: Pathian kuanga Tempil an inhlan lai hla. Davida inpâkna hla

¹ O Rengpa, nang chôindôm ki ti: nangin ni nin dom irsâng tâka; A ni doituhai ni inriam kha ni phal no sikin.



- ²O Rengpa ki Pathian, Nang kin sama, nangin ni nin dam tâka.
- ³O Rengpa nangin ki hringna hi Seol ata chu ni hruai suaka: Khurpadopa ki chum loina hrangin nangin ki hringna ni saninzôk mai tâka.
- ⁴O, a mi irthianghaio, Rengpa inpâkin zâi unglân, A'rhming irthiang kha inpâk roi.
- ⁵A ninginmur kha mitkhap kê vai a nia; A indit bîknaa khan hringna a om ngai: Chapna hi riak hrangin khohloi tiang a hong lût theia, Zînga chu raifâna a zuang tung ngai.
- ⁶Kei chu ki hlochuk lai khan, "Itika khom inhnîng no ning," ki tia.
- ⁷Rengpa, nangin ni indit bîkna sikin ki tâng chu a hong indettir tâka: Khannisianlân ni hmâi ni thupa, ki char a lei idong tâk kha,
- ⁸O Rengpa, nang kin sama; Rengpa kuanga ngei khan lungkhamna ki ngên kha;
- ⁹Thi inlân, thân khura ni phûmhai sianlân, ni ta hrangin imo ar fêna om? vâiphinin nang a inpâk hrang ma ni? ni thutak hi a inhriattir thei hrang ma ni?
- ¹⁰O Rengpa, irngaitua'n lân, lung nin kham roh: Rengpa, a ni changpuitu ni roh.
- ¹¹Ki mithi irngaina chu ki hrangin lômna nin changtir tâka; ki bora puan chu ni hlîkpaia, raifâna'n ki kongga ni ni khit tâka;
- ¹²Ki roiinpuina hi, dâihrek loia, nangma inpâka a sakna hrangin. O Rengpa ki Pathian, kumkhua'n lômthu nang hril mai ki ti.

Inpâkna Hlahai 31

Pathiana irngatna chongchaina

Hla hruaitu hrangin, Davida inpâkna hla

- ¹O Rengpa, nangmaa khan ki iamna ki'rngat ngaia; Itika khom mualinphoiin nin omtir no'n lân: Ni felna sikin ni saninzôk roh.
- ²Keima tiang hin ni mikuar zuang do'n lân; ni saninzôk lat roh:



³Nang chu ki lungpui le ki kulpui ni nia; Khasika khan nir hming sikin ni hruaiin ni kai roh.

⁴Kin ôkna hranga inrûka lên an idâp ata hin ni hnûk suakin lân, Nang chu ki kulpui ni ni.

⁵Ni kuta ki'rtha kin koltir e: O Rengpa, thutak Pathian, nangin ni nir tan tâka.

⁶Thil ite ni loi millim uksakna chu ki khôkmâka; Keima rêkin chu Rengpa ki iam a ni.

⁷Ni lungkham lianna sika hin ki râi a fânin lôm ki ti: Ki lunginzîngna hi ni hmu ngaia; Ki hringna hi intakhai lai khomin nin hriat ngai.

⁸Khan, a ni doituhai kuta nangin ni khum mak chea; Ki ke hi hmun irthôl taka ni'rngat pe tâka.

⁹O Rengpa, lung nin khamin lân, Chardongin ki oma: Ki beidongna sikin ki mit dolde a suak tîr tîra, A ni, ki hringna le ki taksa dênin.

¹⁰Ki hring sînghai hi beidongin a hek tâka, Ki kumhai hi inrûmin a hek sa tâk a ni: Ki zâmirzalna sikin ki'rnak a chuaia, ki ruhai khom an rôp zoi ta.

¹¹A ni doituhai sikin ki'rhming hi a siat zoi tâka, A ni, ki bômhai ata hi a sate'n a siat tâk a ni, ki hmêl hriathai hrang khomin ichiomtak ki ni tâka: Kholaiia ni nghâkhai khomin an nin tânsan tâka.

¹²Mithi an irnghil ang takin irnghilin ki oma: Bêl koi ang chian ki ni ta.

¹³Mi tamtak ni hnôlna kin hriata, ki kôlvêla ichiom a om kha; ki siatna hranga an ngaitua lai khan, Ki hringna hi lâkpai an tuma.

¹⁴Khannisianlân, O Rengpa, nang ki iama: "Ki Pathian ni ni," ki tia.

¹⁵Ki zorohai kha ni kuta a oma: A ni doituhai kut ata le, deng nin theitirtuhai ata hi ni saninzôk roh.

¹⁶Ni hmêlin ni siahlo hi zuang in-êlin lân; Ni lungkham lianna sikin ni saninhring roh.



¹⁷O Rengpa, mualinphoiin nin omtir no'n lân; nang ki koia. Mi siahai kha mualinphoiin omhai sianlân, Seol-ah dâihrekin om ri sehai.

¹⁸Hmûr milaktheihai kha chongthei loiin om ri sehai; Khahai khan lâiripâk takin mi fel an hrilsiat ngai.

¹⁹O, ni satna, nangma chituhai hrangin ni ibukkhôm kha, a roiinpui bâka! Mihriam nâihai mithmua nangmaa iamna irnghathai hranga a itho pe kha.

²⁰Anni kha mihriam hnôlna ata khan ni saninzôkna mithmua thuppai ni a ti:

²¹Rengpa chu inpâkin om ri se: A lungkham lianzia irkhêl tak kha khopui det taka ni nin hmutira.

²²Keima lakin chu, ki lunginzîngin, “Ni mithmu ata pai irhmangin ki om ta,” Ki lei ti tâka, khannisianlân nang ki koia khan, ki inghina hnukirhâi kha ni lei inhriata.

²³O, a mi irthiang murdihaio, Rengpa chu lungthung roi: Rengpa'n chu mi iamom chu a saninzôka, Lâiripâk taka thotu chu a saterengin ni thuan ngai.

²⁴Rengpa sabei murdihaio, Hrât takin om unglân, nin milung chu inhâtir roi.

Inpâkna Hlahai 32

Sual inpuang hranga ngaidamna

Davidâ inpâkna hla Maskil

¹A tho'nchâina ngaidama oma, a سوالنا irhlîkhua omna chu, an vân a sa.

²Mi, Rengpa'n pualoina neia inkung loia, A hringnun dikloina rêng rêng om loi chu a vân a sa.

³Ki سوال ki thup chian laia khan, sîn sôta kin hrûmnaa khan ki takpum hi a irzal zoi tâk a ni.

⁴Rengpa, a sîn a zânin ni ni sepna kutin a ni dela; Kholum misa'n thinghna a inthêmtir chûl ngai ang khan ki hrâtna khom a hong irzal tâk a ni.

⁵Khanchu ki سوالna chu ni kuang kin puanga; Kin châina chu thup ta ma unga, “Ki tho'nsualna chu Rengpa kuang thûtpha chôi ki ti,” ki tia; Khanchu nangma'n ki سوال porinche chu ni ni ngaidam ta.



⁶Khasikin, Pathian ngaisak mi murdi'n hmu ola ni om laiin ni kuang chongchai ri se; buaina tuilian chu ngâm phâk no ni.

⁷Nang chu ki'rbîkna hmun ni nia; Nangma'n lungzîngna ata ni sansuak ni ta, Saninzôkna hlahaiin nir hualtir ni ti.

⁸"Ni fena hrang lampui chu nang irhmutirin, nang irchutir ki ti, Ki mitin nang en maiin nang changpui ki ti.

⁹Ngaituana neiloï sakor mani, Sakuartung mani ang khan om no roh; Khahai khan sepna'n lakam thîr an innanga, khano'nchu ni thu zôm thei no nihai," a tia.

¹⁰Mi sia ta hranga khan dengtheina tamtak a oma; Rengpa iamtu rêk chu lungkham lianna'n hual vêl a ti.

¹¹Mi felhaio, RENGPAА khan raifânin lôm unglân, Lungrîl diktak irputin raifânin khêk roi.

Inpâkna Hlahai 33

Inpâkna hla

¹O, mi felhaio, RENGPAА khan raifânin zâi roi: Mi dik ta hrangin chu Pathian inpâk hi a irhoi a ni.

²Serânda'n Rengpa kuanga khan lômthu insîr unglân: Perkuang hrui sôm nei leh ama inpâkin zâi roi.

³Ama chôindômin hla thar sak unglân; A satêna irhâihoi le thiam takin tum roi.

⁴Rengpa thu chu a dika; A sintho murdi chu iamom taka tho a ni ngai.

⁵Felna le roirêlna fel hi a'rngaiinhlu ngai. Irnêng hi Rengpa lungkham lianna'n a sipa.

⁶Rengpa irchamin irvânhai chu siam a nia; Khaanga omhai murdi khom kha a bâia phûk khan siam an ni sa.

⁷Ama khan tuikhanglian tuihai chu hmun khata a bukkhôma: Tui inthûk takhai chu siana hmun inhaia a siam sa ngai.



⁸Irnêng lua murdi'n Rengpa chu chi sianlân: Rammuala om murdi'n ama chiin om ri sehai.

⁹Ama khan chongin a tia, a hong om indet tâka; Thu a pêka a hong om indet tâka.

¹⁰Rengpa'n nam tinhai thiltum chu hmang hmunboi an chang pehaia; Mi tin ngaituanahai chu ite inlâpna boiin a siam pehai ngai.

¹¹Rengpa inkung chu kumkhua'n om indet a ta, A milunga a ingaituanahai chu irlo tin tin dênin om indet a ti.

¹²Rengpa Pathiana nei namhai chu an vên a sa e; Ama irchon hranga a inthang mihai chu.

¹³Rengpa'n chu irvâna irthokin a thîra, mihriam nâihai murdi hi a hmu ngai.

¹⁴Irnênga om murdi hi a omna hmun ata a zuang thîr ngai.

¹⁵An rênga milunghai siama, an sintho murdi ngaitua ngaitu khan.

¹⁶Reng tin tin hi a sipaihai tam sik ringota saninzôkin om ngai mahai; Mi hrât khom a hrât sik ringotin inzôk ni ual ngai mah.

¹⁷Zôkna hrangin sakor hi ite ni mah. A sân a hrât sikin tukhom saninzôk sa no ni.

¹⁸Irngai ta, Rengpa mit chu ama chituhai chung a chum mai ngaia, a lungkhamna sabeituhai chung a khan;

¹⁹An hringna kha thina ata saninzôk hrang le, châm tâk tika anni irdonsuina hrangin.

²⁰Ei hringna hin Rengpa a nghâk maia, ama kha ni changpuitu le ei phô a ni.

²¹Amaa khan ei milung hi raiinfân a ta, A'rhming irthiang ei iam sikin.

²²O Rengpa, ni lungkhamna kha kin chung a om ri se, Ei isabei ang takin.

Inpâkna Hlahai 34

Pathian satzia inpâkna



David a inpâkna hla; Abimeleka makunga a om dân a indanglamtira, ama'n a hong inhnot suaka, a fe laia

¹Itiklai khomin Rengpa chu inpâk ki ta: Ama inpâkna chu ki bâia suak mai a ti.

²Ki hringna hin Rengpa kha song a ta: Thuhnuairôlhain kha kha inhria an ta, lôm an ti.

³O, Rengpa chu nin pâkpui unglân, A'rhming kha chôindôm suam ei ti.

⁴Rengpa chu ki zonga, khan, ama khan ni sâm a ta, Ki ichiruahai murdi ata a ni saninzôk tâka.

⁵Ama an ena, khan, an hong vâr tâka: A hmêlhai chu itika khom inzak no ni.

⁶Hi mi inriang hi an insama, khan, Rengpa khan an hriata, A lunginzîngna murdihai khan a sansuak tâka.

⁷Ama chituhai chu, an kôla Rengpa vâvântirtôn khan a chêng inbuala a saninzôk ngai.

⁸O, Rengpa satzia chu hong irtem ngân u ta: Amaa iamna irngat mi chu a vâvân a sa e.

⁹O, a mi irthianghaio, Rengpa chu chi roi: Ama chituhai hranga khan irsamna rêng rêng om mah.

¹⁰Kâmkeibaknei vânglaihai kha an irsamin an phîng a châm ngaia. Rengpa zongtuhai chu thil sa rêng rêng irsam no nihai.

¹¹Hong roi, nâipanghaio, ki thu irngaitua roi: Rengpa chi lam dân nangni lei irchu rong.

¹²Satna a hmu theina hrangin, hringna nuama, dam sôt irngaiinhlu mi chu tu mo a ini?

¹³Ni milei kha sual ata vêng insa'n lân, Ni hmûr khom milakna thu insîr loi hrangin vêng insa roh.

¹⁴Sual rotsanin lân, thil sa tho roh; Irngeina zongin lân, a'rzûlin irzûl roh.

¹⁵Rengpa mit chu mi felhai tiang a en ngaia, A mikuar khan a khêkirhai inhre hrangin ar ngaitua mai ngai.



¹⁶Rengpa hmêl chu thil tho'nsualhai kha a doi ngai, Anni inhre maina chu irnêng ata inboipai hrangin.

¹⁷Mi felhai chu an khêka, khan Rengpa khan a lei inhriata, An lunginzîngna murdia khan a sansuak tâka.

¹⁸Rengpa khan milunga beiindonghai kha a nâi ngaia, Lungrîla irsîrhai murdi chu a saninhring ngai.

¹⁹Mi fel intaknahai chu a tama, Khannisianlân Rengpa'n khahai murdia khan a sansuak ngai.

²⁰A ru murdi a vong insaa, Inkhat lua inkhiak ni mah.

²¹Thil saloiin mi siahai chu that a ta: Mi fel khôkmâktuhai khan thiamno chang an ti.

²²Rengpa khan a siahlohai hringna kha ar tan ngaia: Ama iamna irnghathai kha inkhat lua thiamno chang om no nihai.

Inpâkna Hlahai 35

Changpui ngêna

Davidâ inpâkna hla

¹O Rengpa, a ni beituha chu nangin beiin lân: A ni doituha chu nangin doi roh.

²Pho chîn le pho lian chelin lân, Ni changpui hrangin ngîr roh:

³Ufei khom phôiin lân, a ni'rzûltuhai lampui lei khâlin lân: Ki hringna kuang hin, "Nang a saninhringtu ki ni kêng," ti roh.

⁴Ki hringna inboi tuma zongtuhai chu, mualinphoitira inzaktirin omhai sianlân: A nin siatna hrang irngaituatuhai chu, inrottirin chamai rakin om ri sehai.

⁵Rengpa vântirtônin chalai maiin, Farsi phâivua isêmpai angin om ri se.

⁶Rengpa vântirtôn irzûl maiin, An lampui chu inthim tak le irnâl tak ni ri se.

⁷A bi om loiin nin ôktirna hrangin an lênhai kha khurpadopa inrûkin an dâpa, A bi om loiin ki hringna tâkna hrangin khurpadop an choia.



⁸A'rtûng no kârin siatna a chung a tung sianlân; Inrûka a lên lei dâpa ngei khan ama ngei in-ôk sianlân: kha khan tâk siat ri se.

⁹Khanchu ki hringna hi RENGPAA khan raiinfân a ta: A saninhringnaa khan lôm a ti.

¹⁰Ki ru murdi hin, “Rengpa, mi'nriang, a doi inhnê loi ata saninzôktu, A ni, inriang le invâia, ama insiat ngaitu ata saninzôktu, nangma ang hi tu mo an om?” ti an ti.

¹¹Inhretu felloi takhai hong thoi an ta; Ki thil inhriat loi thuhaia khan khua an ni sâla.

¹²Ki hringna hin thil inchân hrang dôrin thil sa thil sualin a ni thuana.

¹³Keima'n chu an dam no'n bora ki sila: Bu ki ngheia, kûn chian chianin ki chongchaia.

¹⁴Urêng hrangin mani, rual hrangin mani anga ni irhoi takin: Lusûn ang dêna kûnin ki'rvêl, ki'rvêla, Mâni nu sîn ang dênin.

¹⁵Khannisianlân keima ki'rtetin chu an lôma, an inkhômpui rak a ni: Mi sual mai maihai chu ni bei hrangin an irbuka kha kha lei inhre ma unga; Bâng nuam loiin an ni soisak bita:

¹⁶Hruaithênaa nuiza tufiam insîrtuhai ma mai angin: An irkam an ni nôi khuma,

¹⁷Rengpa, nangin idôr ten mo en ni ta? Ki hringna hi insiat an tumnahaia khan sansuakin lân, Ki ineisun tak hi kâmkeibakneihai ata khan sansuak roh.

¹⁸Inkhômna roiinpui taka khan lômthu nang hril ki ta: Mi tamtak laia nang inpâk ki ti.

¹⁹ Ki râlhai khan dikloi takin nin riam no ri sehai: Ite ni loa ni khôkmâktuhai chu an mitin irbiak no ri sehai.

²⁰Irngeina thu zel hril mahaia: Hi rama om chi chianhai huangna thuhai an suangtua ngai a ni.

²¹A ni, an bâiin an nir kôk mura; “Kha! kha! kin mitin kin hmu ta,” an tia.



²²O, Rengpa, nangin ni hmua, dâisanhrekhai no roh: O, Rengpa, ni hla viat no roh.

²³Ki Pathian le ki Rengpa ki roirêl hrangin, A ni, ki thua ni thop hrangin, harin lân, meng roh.

²⁴O Rengpa ki Pathian, ni felna sikin roi ni rêlin lan; Anni khan nin riam ta no ri sehai.

²⁵An lungrîl khan, “Kha! khaang kha kêng kin inuam,” ti ta no ri se: “Ama kha ei inlem zoi ta,” ti ta no ri sehai.

²⁶Ki siatna chungâ lômhai chu mualinphoi tak le chamai takin om ri sehai.

²⁷Ki felna chungâ lômhai chu râifâna khêkin lôm takin omhai sianlân: A ni, “A siahlo vâneina chungâ lôm ngai Rengpa chu chôiindômin om ri se.

²⁸Khanchu, ki milei hin felna thu insîr a ta, Nang an pâkna thu khom sîn sôtin insîr sa a ti.

Inpâkna Hlahai 36

Mihriam siatzia

Hla hruaitu hrangin; Rengpa siahlo Davida inpâkna hla

¹ Mi sia tho'nsualna khan ki milung sînga hin thu an sîra, “A mithmua Pathian chitna rêng rêng om mah,” tiin.

² “Ki tho'nsualna hmusuak no nihai, ni khôkmâk ual no nihai,” tiin. Mâni mithmua ar pâk nôk ngaia.

³ A bâia thu suakhai chu سوالنا le huangna thu'n zen a ni ngaia: vârna le thil sa thônâ kha a mâk tâka.

⁴ A zâlmun ata thil سوال a ngaituana ngai; Lampui sa loia khan a fe li lia; سوالنا chu intir mah.

Pathian satzia

⁵ O, Rengpa, ni lungkhamna chu irvânhaia khin a oma; Ni iamomna khan irvân dukhai khi a iphâk a ni.



⁶Ni felna chu Pathian tânghai ang a nia; Ni roirêlna chu tui inthûk irzat tak ang a ni: O Rengpa, mihriam le sa ni sînghual ngai.

⁷O Pathian ni lungkhamna chu a hlu bâka! Mihriam nâihaiin ni mithâ hnuai an irchu ngai.

⁸Anni chu ni insûng thil sa'n inkhophai a ta; Ni lômna vadunga om kha in intir sahai ni ti.

⁹Hringna tuikhur chu ni kuanga om a nia: Ni vâra khan vâ la hmu kin ti.

¹⁰O, nangma inhretuhai chungu khan ni lungkhamna kha inlangtir maiin lân; Milung dik tak irputhai chungu khom ni felna kha inlangtir mai roh.

¹¹Lârirpâk ke chu ni bei hrangin keima tiang pêt no sianlân, Mi sia kut khomin ni'rzûlpai no ri se.

¹²So son thil sual thotuhai chu an tûk chiana: Nam irtet an nia, thoi thei ta no nihai.

Inpâkna Hlahai 37

Mi sual le mi sa mongna hrang

Davidâ inpâkna hla

¹Thil saloi thotuhai sikin beiindong no'n lân, Fel loitaka thohai chu irzuk no roh.

²Hloisûl anga tûkin om lat an ta, Sûlhring angin an ithêm hrang a ni.

³Rengpa chu iamin lân, thil sa tho roh, Hi rama hin omin lân, iamomna irzûl mai roh.

⁴Rengpa chungu khan lôm sa roh; Khanchu ni milung nuamlamhai kha nang pe a ti.

⁵Ni om lam hrang chu Rengpa chungu irnghatin lân; Ama chu iamin lân, ama'n tho zit a ti.

⁶Ni felzia chu vâ angin insuaktir a ta, Ni thiam changzia khom sîn lai ang dênin.



⁷RENGPAA khan irngamin lân, ama chu nghâk zâm zâm roh; Ni om lama vâneina dongtu sikin beiindong no roh. Ngaituana sualhai puinhlingtu sika khan.

⁸Ninginthik hi masanin lân, ningmur hi ma roh. Beiindong no'n lân thil suala a hong tungna ngai a ni.

⁹Thil saloi thotuhai chu irhmangtirin an iom hrang a ni: Rengpa nghâktuhai chu ram hi lua an ti.

¹⁰Sôtnotea mi sia chu om ta no nia: A ni, a omna hmun chu en en khomin lân, om ta no ni.

¹¹ Thuhnuairôlhain chu ram hi lua an ta: Irngeina hmangin irhniang an ti.

¹²Mi sia khan mi fel doi a ta, A'rkam nôikhum a ti.

¹³Rengpa khan ama kha innuisan a ti: A nikhua a hong itung hrang ti an hriat sikin.

¹⁴Inriang le invâihai intûktir hrang le om dân dikhai thatpai hrangin. Mi sia khan khandai an phôia, an thal ngul insim an ti.

¹⁵An khandai khan anni milung kha sun a ti, An thal ngulhai kha inkhiakpaiin om sa a ti.

¹⁶Mi fel thil tômte nei chu mi sia tamtak thil nei zel zulhai nêkin chu a sa ual a ni.

¹⁷Mi sia bânhai chu khiakpaiin a iom hrang a ni: Mi fel chu Rengpa'n a chel chian ngai.

¹⁸Rengpa'n mi sa famirkip nikhuahai an hriata: An irchon lua hrang chu kumkhuaa om mai hrang a ni.

¹⁹Zoro saloia mualinphoi no nihaia: Châm kumhaia khom khop an ti.

²⁰Mi siahai chu irhmang an ta, Rengpa doituhai khom hloisûl pâr chuai ang ni an ti.



- ²¹Mi sia'n chu pûk ata pe nôk ta ngai maka: Mi fel chu mi lung an khama a pêk lem ngai.
- ²²A satvurna dongtuhai chu ram hi an ilua hrang a ni, Khua sâlna dongtuhai chu irhmangtirin an iom hrang a ni.
- ²³Rengpa'n an fena hranga a hruai ngai a ni, A nuamlam thotuhai chu a enkol ngai.
- ²⁴Tûk khomhai sianlân, tûk thengthai no nihai: Rengpa'n a kutin a chel mai sikin.
- ²⁵Nâipang ki lei ni tâka, atûn chu ki hong tar tâka, Khannisianlân, mi fel chu rotsana a iom hmu ngai ma unga, A'rchi hai kutdoa om khom la hmu ngai ma ung.
- ²⁶Sûn ni tâkin lung mi a thunga, an pûktir ngaia; A'rchi hai khom an vân a sa ngai.
- ²⁷Sual rotsanin lân, thil sa tho roh; Khanchu kumkhua'n om mai ni ti.
- ²⁸Rengpa'n chu roirêlna fel a'rngaiinhlua, A mi irthianghai chu rotsan ngai mah; Kumkhua hrangin vong insa'n an oma: Mi sia irchi hai chu irhmangtirin om an ti.
- ²⁹Mi felhaiin chu ram hi lua an ta, A sînga hin kumkhua'n om an ti.
- ³⁰Mi fel bâiin chu vârna thu an sîr ngaia, A milei khan roirêl felna thu an sîr sa ngai.
- ³¹A Pathian dân chu a milunga a oma; Pêtsan ngai mah.
- ³²Mi sia kha mi fel kha a enirchika, Thatpai a tum ngai.
- ³³Rengpa'n ama kha a kuta rotsan no nia, A roi an rêl tika chu thiamno inchangtir phal viat no ni.
- ³⁴Rengpa chu nghâkin lân, a lampui chu hro roh, Khanchu ram hi lua hrangin nang chôiindôm a ti: Mi sia hai irhmangtira an om lai kha la hmu ni ti.



³⁵Mi sia chu a satêna ircham neia, A mongna hmuna thing incher mur anga a om lai ki hmua.

³⁶Khannisianlân ki va fe nôkin chu, irngai ta, ama chu lei om ta maka, a ni, ki zonga, khannisianlân, hmuthei ni ta mah.

³⁷Mi sêlnaboi irsinsia'n lân, mi dik tak chu en roh, Khaang mi mongna hrang kha chu irtharngamna a ini hrang a ni.

³⁸Tho'nchâituhai chu a pâla insiatin om an ta, Mi sia mongna chu irhmangna ni a ti.

³⁹Aniachu mi felhai saninhringna chu Rengpa kuang ata a nia: Ama chu lunginzîng laia an kulpui a ni ngai.

⁴⁰Rengpa'n anni kha a changpuiin a saninzôk ngaia, Ama kuanga an iamna an irngat sikin, Mi siahai ata kha a saninzôkin a saninhring ngai.

Inpâkna Hlahai 38

Tuanglai chongchaina

David a inpâkna hla, inhriat suaktir nôkna hrangin

¹O Rengpa, ninginthikin ni halirchu no'n lân: Ninginmurin ni sep sa no roh.

²Ni thalhai chu ki panga ar zep nguta; Ni kuttum chu ki chung a chum ta.

³Ni milung hoi loina sikin ki taksaa hin dam tik rêng om maka; Ki sualna sikin ki ruhai hi hrisêl tik rêng om sa ngai mah.

⁴Ki pualoinahai khan ki lu hi a ngîm paia, Puakrik tak, ki izoiloi hrang ang hi a ni.

⁵Kin vêtna sikin Ki sabêhai hi a thu'n a hmon zoi ta.

⁶Ki naa, ki kûn chian chiana; Sûn sôtin chardongin ki'rvêl ngai.

⁷Ki kong hi a lum rak rak maia; Ki taksaa khom hin dam tik rêng om mah.

⁸Ki'rzala, a ni zeng zuaka; Ki milung hoiloina sikin kin hrûm rak raka,

⁹Rengpa, ki nuamlam murdi hi ni makunga a om zita; Ki inrûm khom hi nangmaa thuppai ni mah.



¹⁰Ki milung hi dop dop a tia, irthahrui nei ta ma unga: Ki mit vârna lakin a ni rotsan tâka.

¹¹Lung ni thungtuhai le ki rualhai chu ki thil irveia hin an nir kêmsana; Ki sângsuakhai khom hlataka an ngîr ngai.

¹²Ki hringna inboi tuma zongtuhaiin chu nin ôktirna hrangin châng an kam ngaia; Ki siatna hrang zongtuhai khom khan thu saloi takhai an insîr ngaia, Sûn sôtin huangna thuhai an ngaitua ngai.

¹³Khannisianlân kei chu mi kuarsêt angin inhre loiin ki oma; Chongtheiloi mi bâi âng ngai loi angin ki om.

¹⁴A ni, mi chong inhre theiloi, A bâia halirchûna reng suak ngailoi angin ki om.

¹⁵O Rengpa, nang ki sabeia: O Rengpa ki Pathian, nangin ni sâm ni ti.

¹⁶“khano’nchu nin riam a ta, Ki kesir a châi le ki chung a lian irti an ti,” ki iti a ni.

¹⁷Ki’rtet vâng vânga, Ki beidongna khom ki makunga a iom mai a ni.

¹⁸Ki pualoina chu inpuang ki ta; Ki sualna sika beidongin ki iom hrang a ni.

¹⁹Khannisianlân a ni doituhai chu an zâi a sa’n, an hrâta: Dikloi taka ni khôkmâktuhai chu an pung mur tâka.

²⁰Thil sa thil suala thuan ngaihai hi thil sa ki’rzûl sikin ni doituhai an nia.

²¹O Rengpa, ni rotsan viatno roh: O ki Pathian, nir hlapui no roh.

²²O Rengpa ni saninhringtu, Ni changpui hrangin irhnot roh.

Inpâkna Hlahai 39

Tuang neia inpuang

Hla hruaitu hrangin, Jeduthunahrangin chu, Davida inpâkna hla

¹“Ki milei hin thil ki tho’nsual loina hrangin ki om lamhai hi enkol insa ki ta: Mi siahai ki makunga an om sângin ki bâi hi hmûr khitna’n khit ki ti,” ki tia.

²Khanchu dâihrekin chong loiin ki oma, A sa lam tiang khom ki dâihreka; Khannisianlân ki beiindongna chu kaithoiin a om ual ngaia,



³Ki phîng sînga hin ki milung a lum rak raka; Ki ngaitua ki ngaitua'n chu mei chu a hong chok suaka; Khanchu, ki milei hin thu an sîr tâka:

⁴“Rengpa ki mongna hrang le, ki idam hrang ten chu. Itin mo a ini nin hretirin lân; Ki iderindêpzia hi nin hretir roh.

⁵Irngai ta, ki dam sîng hi kutzaphate tiat angin ni siama; Ki kum hi ni mithmua chu ite khom ni maka; Mi tin hin an sat lai tak khomin an pumpuiin ite ni loi ang an ni.

⁶Mi tin hi raifân ang takin an lêng tâka: Mâkanaa buai an ni ngai: Irchon an bukkhôm ngaia, a'rhmutir hrang om mahai.

⁷Khan, Rengpa, atûn hin imo ki inghâk? Nangma kêng, ki sabeinaa a iom a ni.

⁸Ki tho'nchâina murdia ni sansuakin lân: Mi invêt hrilsiatin nin omtir no roh.

⁹Nangma itho a ni sikin, Chong ma unga, ki bâi khom âng ma ung.

¹⁰Ni ni izêmna hi ki kuang ata ni lâkpai pe'n lân: Ni kut thâknaa inboipai ki ni hi.

¹¹Mi a tho'nsualna sika halirchu'n ni isep hin, A satna hi irthî angin nin siat ngaia; Mi tin hi ite ni loi ang an ni.

¹²O Rengpa, ki chongchaina hi irngaiin lân, nang kin samna hin mikuar do'n lân; Ki mitrithi tâk hi dâisanhrek no roh. Ni mikhual ki nia, ki'rchibulhai ang khan khual inzin chian ki ni.

¹³O, hi hin ki suaka, ki om pat mân hin, Ki hong har nôkna hrangin ni hôi roh.

Inpâkna Hlahai 40

Inpâkna hla

Hla hruaitu hrangin, Davida inpâkna hla

¹Rengpa chu ki nghâk zâm zâma; Khanchu a mikuar a zuang sunga, ki ikoi kha ar ngai ta.



²Irh mangna khurpadop ata, dialdôk irkân tâk ata kha a ni kaisuak tâka; Khan, ki ke chu lungpui chung a a'rngkata, ki ke pêthai chu an dettira.

³Hla thar ki bâia a sia tâka, ei Pathian inpâkna chu: Mi tamtakin khahai kha hmu an ta, chi an ta, Rengpa chu iam ta an ti.

⁴Rengpa chu irngatna an neia, Lâirpâkhai le milakna tianga pêthai ngaisak loi mi chu, a vên a sa e.

⁵O Rengpa ki Pathian, nangin sinirkhêl ni ithohai leh, keini tiang ni ngaituanahai hi a tam tak taka, Khahai kha ni makunga inlangtir zoi zât ni maka; Inhriattirin hril hrang ni inlân, Tep zoi zât ni no ni.

⁶Irbôlna le thilinhlan chung a hin lômna zel nei mak chea; Ki mikuarhai hi ni nin vârtir pe tâka: Hâlrivôm thilinhlan le sual hranga thilinhlan chu inphût mak chea.

⁷Kha zoi le chu, keima'n, "Irngai ta ki hong a; Lekhabu irzuata khan ki thu a irziak a ni:

⁸O ki Pathian, ni nuamlam tho hi ki nuamlam tak a ni; A ni, ni dân thu chu ki milunga a om maia," ki tia.

⁹Inkhômna roiinpui tak kha felna thurchi sa ki tâng insampuia; O Rengpa, irngai ta, Ki bâi hi inhnar no ning ti nin hriat.

¹⁰Ni felna chu ki milung sênga thup ma unga; Ni iamomna le ni takna chu inkhômna roiinpui taka mihai ata chu thup ma ung.

¹¹O Rengpa, ni inrenhai chu ki kuang ata inhnar no'n lân: Ni lungkhamna le ni takna khan ni sêngual mai ri se.

Changpui ngênna

(Ipn 70)

¹²Thil saloi tep zoi loi khan a ni hual vêla, ki tho'nchâinahai khan a ni'rzûl phâka, Khanchu hmu thei ta ma unga; kha kha ki samzâihai nêk khomin a tam uala, ki milung hi a'rzal ta.

¹³ O Rengpa, lungkham takin ni saninzôkin lân: O Rengpa ni changpui hrangin irhnot roh.



¹⁴Ki hringna inboi tuma zongtuhai chu mualphoi tak le inzak takin omhai sianlân; Ki siatna chungga lômhai chu irhei kîrtirin inzakin om ri sehai.

¹⁵“O hoi! O hoi!” ni tituhai chu an mualinphoi sikin lunginzîng takin om ri sehai.

¹⁶Nang a zongtu murdihai chu nangmaa khan raifân tak le lôm takin omhai sianlân: Ni saninhringna irngaiinnattuhai khan, “Rengpa chu chôindômin om ri sehai,” ti mai ri se.

¹⁷Kei chu inriang le invâi tak ki nia, Khannisianlân Rengpa’n a ni ngaitua ngaia: Nang chu ni changpuitu le ni saninzôktu ni nia; O ki Pathian, ir-ial viat no roh.

Inpâkna Hlahai 41

Damloi chongchaina

Hla hrulaitu hrangin, Davida inpâkna hla

¹Inrianghai ngaitua mi chu a vâna sa e, lunginzîng nikhuuaa chu Rengpa’n ama kha saninzôk a ti.

²Rengpa’n ama kha sînghualin inhringtir a ta, irnênga hin satvurin om a ti: Ama doituhai nuam nuama tho hrangin pe no roh.

³Rengpa’n a’rzalna zâlmuna ata inhrettir a ta: Nangin a damloi laiin a zâlna ni siam pe zit ngai.

⁴Keima’n, “O Rengpa, lung nin khamin lân, ki hringna hi indamtir roh, Ni chungga thil ki tho’nsual tâka,” ki tia.

⁵A ni doituhai khan, “Itika mo thi a ta, ar hming a iboi hrang?” tiin. A nin sîrinsiat ngaia.

⁶Khan, an lai ata tu’n mani a ni hong kan lakin, ite ni loi mai mai thu an insîra; A milung khan sualna a lâk khôm ngaia: A fe suak le chu mi a hril ngai.

⁷A ni khôkmâktu murdi khan ni hnôlna thu an insîr irtuka: A nin siatna hrang an ngaitua ngai.



⁸“Natna saloi takin a de tâka: Atûna a izâl hi thoi nôk ta no ni,” an tia.

⁹A ni, ki rual lunginkham, ki iiam tak, ki bai fâkpui ngei khan a ke ârtui ki chung a an lek tâka.

¹⁰Khannisianlân, O Rengpa, nangin lung nin khamin lân, Annihai kha ki thuan theina hrangin ni kaithoi nôk roh.

¹¹Hitaka hin ki chung a ni lôm ti kin hriat, A ni doitu khan a ni ngam ngai no sikin.

¹²Kei chu lungrîl satak ki'rputnaa hin nangin ni ompui ni ta, A makunga khan kumkhua hrangin a ni siaa.

¹³Rengpa, Israel Pathian chu kumtuang ata kumtuang dênin inpâkin om ri se. Amen, Amen.

Inpâkna Hlahai 42

BU HNINA

(42-72)

Ram danga hruai chongchaina

Hla hruaitu hrangin: Kora nâihai Maskil

¹*Sakhi* vadung tuihai irzuka a irsam phût phût ang hin, O Pathian, ki hringna hi nangma irzugin a inphu huan huan a ni.

²Ki hringna hi Pathian irzugin, Pathian hring irzugin, a tui a inhrâl a ni: Itika mo Pathian makunga tungin, Ki inlang hrang o?

³Ki mitrithi hi a sîn a zânin ki bu a ni. “Khôn mo ni Pathian te,” a ni la tia.

⁴Hi thil hi kin hriat maia, ki hringna hi ki sînga a bunpaia, Mipui laia ki fea, raifâna le inpâkna irhâi le, mi tamtak hruaithe, Pathian biak in pana, an maton ki ihruai ngaiziahai kha.

⁵O ki hringna, ithoa mo ni ikûn chian? Ithoa mo ki sînga hin ni ibuai? Pathian sabei roh: a hmêla damna sikin. Ama kha ki la inpâk hrang sikin,

⁶O ki Pathian, ki hringna hi ki sînga hin a kûn chiana: Khasikin Jordan le Hermon ramhai ata, Mizar tânghai ata hi nang kin hriat mai a ni.



⁷Ni tui luang sup sup irhâi hin tui inthûk chu an irsama: Ni tui irsôn le ni tui irthûl murdihai khan a ni ngîm irhmangtir tâka.

⁸Khannisianlân Rengpa'n a lungkhamna chu sîna inlang sianlân, A hla khan zâna ni ompui a ta, ki hringna Pathian kuanga chongchaina khan.

⁹Pathian ki lungpui kuang khan, "Ithoa mo a ni irnghil? Ithoa mo doitu hnuaisiana sika beidonga intemin ki iom ngai," ti ki tih.

¹⁰Ki rua khandai om ang dênin a ni doituhan khan an nin sîrinsiat ngaia; "Khôn mo ni Pathian te?" an ni lei tia.

¹¹O ki hringna, ithoa mo ni ikûn chian? Ithoa mo ki sînga hin ni ibuai? Pathian sabei roh: ama chu ki la inpâk hrang a ni. Ki hmêl indamtirtu le ki Pathian chu.

Inpâkna Hlahai 43

Ram danga hruai chongchaina

(lpin 42 sui irzomna)

¹O Pathian, roi ni rêl pe'n lân, Pathian uksakloi nam chung a hin ki thu nin sîrpui ro: O, mi huanghmang mi dikloi ata hin ni saninzôk ro.

²Nang chu ki hrâtna Pathian ni nia; ithoa mo ni ni ikhômâm? Ithoa mo a ni doitu hnuaisiana sika beidonga irpeitema ki iom ngai?

³O ni vâ le ni thutak chu târsuakin lân, anni khan ni hruaihai sianlân: Ni tâng irthiang le ni omnaiaia nin tungtir ri se.

⁴Khanchu Pathian maichâm kôla fe ki ti, Pathian ki râinfâna kôla khan: O Pathian, ki Pathian, perkhuangin nang inpâk ki ti.

⁵O ki hringna, ithoa mo ni ikûn chian? Ithoa mo ki sînga hin ni ibuai hi? Pathian sabei ro: ama chu ki la inpâk hrang a nia, Ki hmêl indamtirtu le ki Pathian chu.

Inpâkna Hlahai 44

Saninzôk hranga ngênna



Hla hruaitu hrangin: Kora nâihai Inpâkna hla Maskil

- ¹O Pathian tianlai an damlaia ni sinthohai kha kin irchibulhaiin an ni hrila, kin mikuarin kin inhriat.
- ²Nangin ni kut ngeiin nam tin chu nin hnot suaka, anni kha ni phunhai tâka; Mi tin chu deng nin theitira, Nangma mihai chu vânsa'n ni siama.
- ³Ram hi lua hranga anni khandai an ilâk ni maka, Anni bâna irsaninhring ni ual mahai: An chung a ni lôm sikin, Ni kut chang tiang le ni bân le, ni hmêl vârin a ni uala.
- ⁴O Pathian, nang chu ki Reng ni ni: Jakoba saninzôkna hrangin thu pe ro.
- ⁵Nangma sikin a ni doituhai chu irtettir kin ta; Ni'rhming sikin a ni beituha chu chîl chit kin ti.
- ⁶Ki thal ngul hi tûng no ninga, Ki khandai hin ni saninhring ual no ni.
- ⁷A ni doituhai ata chu nangin ni ni saninhring ual tâka, A ni khôkmâktuhai chu mualphoi ni saka,
- ⁸Sûn ni tungin Pathian kha kin songa, Ni'rhming chu kumkhua'n inpâk sa kin ti.
- ⁹Atûn chu nangin ni ni theimâka, ni nin zaktira; Kin sipaihai kuang lak suak sa ta mak chea.
- ¹⁰A ni doituhai ata kha ni nin rottir ngaia. A ni khôkmâktuhaiin chu sum kha an inuam nuam an lâk ngai.
- ¹¹Belra that hrang angin ni ni siaa, Nam tin laia ni nin darhtir tâka.
- ¹²Ni mihai hi mâkana'n ni zuara, An man chu irchongpui ual mak che.
- ¹³Nangin kin kôla mihai insîrinsiatin ni nin omtira, Kin kôl vêla mihai hmusit le enkhûmin ni nin omtir saa.
- ¹⁴Nangin nam tin laia a siat tiang ni nin omtira. Ni hmumâkin an luhai ni nokkhummin ni nin omtir saa.
- ¹⁵Kin zakna hi sûn sôtin ki hmâia a om ngaia, Ki imualinphoina hin a nir khu zoi ta.



- ¹⁶Ni doituhai le ni hnôltuhai hmusit êsêlna chong inhriata irthokin.
- ¹⁷Hihai murdi hi kin chung a tunga, Khannisianlân nang irnghil ngai ma ung. Ni thuthunga hin tho pa pai ngai ma ung.
- ¹⁸Kin milung hi irhei kêr maka, kin ke pêthai hin ni lampui chu pêtsan ngai mah.
- ¹⁹Nangin sihalhai omnaa ni ni soisak chita, Thina daihlîma nir khûna hrangin.
- ²⁰Kin Pathian irhming kin irnghil mani, Ram dang pathian tiang kin kuthai kin phara a ni'n chu,
- ²¹Pathianin chu a izong suak loi hrang ma ni? Lungrîla thuphai hi an irhriat mai a ni.
- ²²A ni, nangma sikin sîn sôtin ithatin ki om ngai; Belra that hranghai anga irbe kin ni.
- ²³O Rengpa, har ro ba, ithoa mo ni inmusu? Mengin lân, kumkhua'n ni theimâk no ro.
- ²⁴Ithoa mo ni hmâi ni ithup, kin intakzia le hnuaisiatzia kin ituangzia hi ni irnghil ngai hi?
- ²⁵Kin hringna hi vâiphin sikin a kûna; kin phîng laka irnênga a kop khaka.
- ²⁶Ni changpui hrangin thoiin lân, Ni lungkhamna sikin nir tan ro.

Inpâkna Hlahai 45

Reng inneina hla

Hla hruaitu hrangin; Sosanimasak hrang Kora nâipahai Inpâkna hla, Maskil lungthungna hla

- ¹Ki milung hi thil sa'n a lêt don dona; Inlaltak chungchâng thua ki thil phua chu ki insîr hrang a ni: Ki milei hi lekha irziak thei tak pen a ni.
- ²Mihriam nâihai nêkin ni hmêl hi a sa uala; Lungkhamna hi ni hmûra buak a ni. Khasikin Pathianin kumkhua hrangin sat nang a ivur a ni.
- ³O, mi hrât, ni khandai kha ni kong a vong ro, Ni roiinpuina le ni satnahaiin.



⁴Thutak le thuhnuairôlna le felna sikin ni satna irbelin lungthi takin sakor chungu chuanguin fe mai ro! Khanchu ni kut chang tianguin thil irkhêl takhai nang a irchutir hrang a ni.

⁵Ni thal chu a'rzuma: Inlaltak doituhai milunga khan an inver inggaia. Mi tin chu ni hnuaia an tûk ngai.

⁶O Pathian ni rêngtoihmun chu kumtuanguin a iom hrang a ni: Theibîk nei loina rêng khianghrol chu ni ram rêng khianghrol chu a ni.

⁷Felna chu nir ngai inhlua, pualoina chu ni khôkmâk kha; Khasikin, Pathian, ni Pathian chu ni rualhai nêka irkhêl raifâna sahriak nang a'rthûtir tâka.

⁸Ni silkai murdi chu mura mirimhai, aloe mirim hai thingzungthum mirimhai an nam veng vunga; Saihâhaia siam rêng inhaia perkhuang chi dang dang irhâi hong suakhai khan nang a inlômthir a ni hi.

⁹Ni nupang sahai laia khan rêng nâinuhai an kop saa; Ni chang tiang chu Ofir rângachaka irvo'n rêngnu chu a ngîra.

¹⁰O, ki nâinu, irngaiin lân, irngaitua'n lân, ni mikuar sung ro; Ni mihai le ni pa ina mihai chu irnghil ro;

¹¹Khanchu inlaltakin ni hmêl satak hi a inuam hrang a nia; Ama chu ni Rengpa a nia; Khanchu ama chu chubai mûk ngai roh.

¹²Tura nâinu chu thilpêk chôiin kha khan om a ta; Mi laia irchonghai ngei khan ni lungkhamna ngên an ti.

¹³Reng in sînga Reng nâinu chu a roiinpui oka; A silkai chu rângachak ziaa siam a ni.

¹⁴Puan insui sa silin inlaltak kuang hruai an ta; Ama zuitu, a rual dôngmatehai chu, Ni kuang hruai an ti.

¹⁵Lôm tak le raifân takin hruai an ti: Inlaltak ina khan lût an ti.

¹⁶Ni pahai irthûla ni nâihai om an ta, Anni chu irnêng chung murdia hin inhre mai hranguin siam ki ti:

¹⁷Khasikin mi tinin kumkhontuanguin lômthuh nang hril an ti.



Inpâkna Hlahai 46

Pathian kuang a om

Hla hruaitu hrangin; Kora nâihai Inpâkna hla; Alamota sak hrang hla

- ¹Pathian chu ei zôkna le ei hrâtna, lunginzîng laia changpui lattu nâitak a ni.
- ²Khasikin irnêng hi hong danglamin, Tânghai hi tuikhanglian sûnga irson pat sian khom, chi no ning;
- ³A tuihai kha irse mur murin phûl but but khom sianlân, A'rsôn ta hrai sikin tânghai hi inhnîng dur dur khom sianlân, chi ual hliak no ning.
- ⁴Ivadung inkhat a oma, kha ônhai khan Pathian khopui an lômtir ngai, Anchungtaka omna hmun irthiang chu.
- ⁵Pathian chu a laitaka a oma; inhnîng no ni: Pathianin khovâr tena chu changpui a ti.
- ⁶Nam tin an irse mur mura, ramhai chu an hnînga: Ama chu ar hâi a suaka, irnêng hi a hong zôi tâka,
- ⁷Sipaihai Rengpa chu ei kuang a oma; Jakoba Pathian chu ei kulpui irsâng a ni.
- ⁸Thoi, Rengpa sinthohai hi en roi, Irnênga thilirkhêl tak tak a itho hi.
- ⁹Ama'n chu irdoinahai kôlkung dênin an boitir ngaia; Thal ngul chu a khiaka, ufei chu a sât inbong ngaia; Tâlihai chu meia a rô irhmang ngai.
- ¹⁰Dâihrek unglân, Pathian ki nih ti hi inhre roi: Nam tin laia chôindômin om ki ta, irnênga hin chôindômin om ki ti.
- ¹¹Sipaihai Rengpa chu ei kuang a oma; Jakoba Pathian chu ei kulpui irsâng a ni.

Inpâkna Hlahai 47

Roirêltu roiinpui tak

Hla hruaitu hrangin; Kora nâipahai Inpâkna hla

- ¹O mi tinrênghaio, nin kut inbên unglân: Raifâna irhaiin Pathian kuang khêk roi.



²Rengpa Anchungtak chu ichi a oma; Irnêng chung murdia Reng roiinpui tak a ni.

³Ama khan mi tin chu ei lu hnuaia sia a ta, Nam tin chu ei ke hnuaia se sa a ti.

⁴Ama khan ei irchon lua hrang chu nin thang pe a ti, A lungthung Jakoba isong tak ram chu.

⁵Pathian chu khêk irhaiin a kâia, Rengpa chu bekul irhai leh a kâi tâka.

⁶Pathian inpâkin zâi unglân, inpâkin zâi roi. Ei Reng inlaltak inpâkin zâi roi, inpâkin zâi roi.

⁷Pathian chu rammual murdi Reng a nia: Inhre thiama inpâkin zâi roi.

⁸Pathian chu nam tin chung a rêngin a toia: Pathian chu a rêngtoihmun irthianga khan a toia.

⁹Abrahama Pathian mihai ni hrangin, Mi tin laia mi lianhai chu an om khôma: Irnêng phôhai chu Pathian ta a nia; Ama chu a satêna chôindômin a om.

Inpâkna Hlahai 48

Zion Pathian khopui

Hla; Kora nâipahai Inpâkna hla

¹Rengpa chu a roiinpuia, a saterenga inpâk hrang a ni, Ei Pathian khopuia, a tâng irthianga khan.

² Zion, Pathian tâng irthiang chu ar sângin en a hoia; Reng inthangtak khopui khan rammual pumpui lômna a zuang intunga.

³A rêng inhaia khan Pathianin kulpui irsâng a nih an hriattira.

⁴Irngai ta, rênghai chu an irpan khôma, an hongga.

⁵An hmua, khanchu ar khêl an tia; An char a dongga, an fe irhmang lata.

⁶Khanchu inthingna'n a dea, Nupang nâihase natna angin a tong tâka.

⁷Nisua tianga phâivua'n Tarsis irkuang lianhai kha nin siattir ngaia.



- ⁸Sipaihai Rengpa khopuia, ei Pathian khopuia khan, Mikuara ei inhriat ang dênin ei hmu ta: Pathianin kha khopui kha kumkhua hrangin indettir a ti.
- ⁹O Pathian, ni biak in sîngrila khan, Ni lungkhamzia hi kin ngaitua ta.
- ¹⁰O Pathian, nir hming ang dênin ni kut chang tiang khan felna'n a isip a ni.
- ¹¹Ni roirêlna sikin Juda nâinuhai chu raifân takin om ri sehai.
- ¹²Zion kha a vêlin, irhual unglân: A râl irdîpna in irsânghai kha tep roi.
- ¹³A kulpuihai kha irsinsia unglân, A rêng inhai kha ngaitua roi; Thoiintha hong om nôkhai kuang nin hril theina hrangin.
- ¹⁴Hi Pathian hi kumkhontuanga ei Pathian a ini hrang a ni: Thi dên khoma a ni hruaitu ni a ti.

Inpâkna Hlahai 49

Sum tama irngat saloizia

Hla hruaitu hrangin; Kora nâipahai inpâkna hla

- ¹Mi tînrênghaio, hi hi irngaitua unglân; Rammuala om murdihaio, mikuar lei sung roi.
- ²Mi chîn le mi lian, Mi irchong le mi inrianghai khomin.
- ³Ki bâi hin vârna thu insîr a ta; Ki milung ngaitua chu inhriat thiamna thu ni a ti.
- ⁴Chongirkhek thua ki mikuar sung ki ta: Ki thu'nthûk insîr chu perkhuangin hrilfia ki ti.
- ⁵Nikho saloihai, ki ke ârtui kôla pualoina chu ni hual vêl khomsian, Ithoa mo ki ichi hrang?
- ⁶Mâni sum tûnga, mâni irchongna a satêna songtuhai chu;
- ⁷Tukhomin an urêng khom irtan thei viat no nihaia, Pathian kuang irtanna pêk pe thei ual hliak no nihai:
- ⁸An hringna irtanna chu hlu tak a nia, Itiklai khomin pêk inchuk thei no ni.
- ⁹A hring maia, mongna a hmu loina hrangin chu.



¹⁰Mi vârhai khom an thia, Mi'nvêt le mi môlhài khom an irhmang seng senga, An sum mi danghai an mâk pe ngaihai kha an inhriata.

¹¹An lungrîl ngaitua lam chu, An inhai kha kumkhuaa om hrang ang le, An omnahai chu irlo murdi dêna om hrang angin a ni; An ramhai chu anni irhming zit an irputtir ngai.

¹²Khannisianlân mihriam hi chôindômin om mai mahaia: Ramsa irhmang ngaihai ang dên hi an ni.

¹³Kha an om lam kha chu invêtna a ni: Khannisianlân, an hnunga chu mihaiin an thu insîrhài chu a sa an ti ngai.

¹⁴That hrang belra Seol-ah khiththunghai ang an ni, Thina chu a enkoltu ni a ta: Khua a vârin mi felhaiin an chungà roirêl an ta; an taksa hek a ta, Seol chu omna in hrang ni a ti.

¹⁵Ki hringna rêk chu Pathianin Seol kut ata irtansuak a ti; Ama'n chu a ni ilôm hrang a ni.

¹⁶Ni'rchongtira a hong oma, A sêngkua roiinpuina chu a hong irkhêl sit sit khomin, chi no ro:

¹⁷A thi tika chu ite chôithei no ni; A roiinpuina khan a izui hrang ni sa mah.

¹⁸A hring laiin a hoiin irbe khom sianlân,

(Hlo a chuk sikin mi'n inpâkhai sian khom),

¹⁹A'rchibulhai murdi kuang thinaa khan zom a ta, Itiklai khom vârhmu ngai loi rênghai kuang khan.

²⁰Mihriam chôindôma oma, inhriat thiamna nei ual loi chu, Ramsa irhmang ngaihai ang dên hi an ni.

Inpâkna Hlahai 50

Pathian chubai mûk dân diktak

Asafa inpâkna hla

¹Pathian, itinrêngthothei, Rengpa khan thu an sîra; Irnêng hi misa suakna ata a tâkna dênin a koia.



- ²Satirkipna, Zion ata chu, Pathian chu a vâs suak tâka,
- ³Ei Pathian chu zuang a ta, dâihrek no ni: A maton tiang chu mei chok zur zur a ta, A kôl vêla khan a sate'n phâivopui tho a ti.
- ⁴A mi hai roi a rêl theina hrangin Chung tiang irvân hai le irnêng hi inhriatpuitu hrangin koi a ti.
- ⁵“Ki mi irthiang hai ki kuang hong hruai bukhai roi, Sa thata ki kuang thu thunghai chu,” tiin.
- ⁶Khanchu, irvân hai khin a felna chu tâng insampui a ta, Ama Pathian ngei chu roirêltu a nia.
- ⁷“O ki mi haio, irngai roi, thu ki insîr hrang a ni; O Israel, irngai roh, nang inhriatfiatir ki ti: Kei hi Pathian, ni Pathian ngei kha ki ni hi.
- ⁸Ni irbôln hai sikin nang halirchu no ning; Ni hâlvôm thil irhlan hai chu ki makunga a om chiana.
- ⁹Ni in ata chu sehrât chalpa rêng rêng la suak no ninga, Ni sa hual vêl hai ata kêlchal hai khom la suak hliak no ning.
- ¹⁰Rammuala ramsa tinrêng hai hi ki ta a nia, Mual sâng tamtak chung a ramsa om hai khom kha.
- ¹¹Chunga vuang murdi khom ki ta an nia, Rama thilhring khom ki ta an ni.
- ¹²Ki phîngchâm khom sian nang hril no ning: Irnêng le a chung a thil om murdi hai hi ki ta a ni.
- ¹³Sehrâtchal hmê ki fâkin kêl thisen ki i-in hrang ma ni?
- ¹⁴Pathian kuang lômthu insîr irbôlna kha inhlanin lân; Ni thu'nkung khom Anchungtaka kuang intung roh.
- ¹⁵Khan, lungzîng nia chu ni koiin lân; Nang saninzôk ki ti, khanchu nangin ni ni ichôiindôm hrang a ni,” a tia.
- ¹⁶Mi siat kuang khan, Pathianin “Itho sika mo ki thu'nkung hi inhriattira, ki thuthung hi ithoa mo ni bâia ni sâm mai?



¹⁷Sepna hi ni khôkmâka, Ki thuhai hi hnung tiang ni pai maia.

¹⁸Inru ni hmu'n a sa ni tipuia, Uirepahai lak nir hloppui sa ngaia.

¹⁹Ni bâi hi soal ni pêka, ni milei hin huangna a siam sa ngai.

²⁰Toi pumin ni urêng ni hrilinsiata; Ni urêng hai ngei kha ni nuiso ngai.

²¹Khang thil kha ni thoa, Khannisianlân ki dâihreka; Khanchu nangma ang chianin ni ni bê ngai: khannisianlân nang halirchu ki ta, ni mithmua a dôte'n inlangtir ki ti.

²²Nangni Pathian irnghilhaio, hi hi irngaitua roi! khano'nchu nangni inpot chitna ki ti, nangni saninzôktu zel om no nihai.

²³Tukhom lônthu insâr irbôlna inhlan murdi chu an ni chôindôm ngai a nia; Khan, a omlam vong insatu kuang khan Pathian saninhringna nang inentir ki ti," a tia.

Inpâkna Hlahai 51

Ngaidam ngênna

Hla hruaitu hrangin; Davida inpâkna hla; Batsebi a pôl zoia deipu Nathana a kuang a hong laia

¹O Pathian a sân ni lungkham lianna sikin lung nin khamin lân: Nin renna irkhêl sikin ki porinchenahai hi kâtpai roh.

²Ki siatnahai hi ni'rsunfâi zitin lân, Ki soal hi nin fâi roh.

³Ki porinchenahai hi kin hriat tâka: Ki soal hi ki makunga a om mai ngai a ni.

⁴Ni chung a, ni chung vaia thil ki tho'nsuala, Ni mithmua thil ki lei tho'nsual tâka: Thu nin sîrin thiam ni chang theia, Roi ni rêlin sêlnaboi ni ni theina hrangin.

⁵Irgai ta, pualoinaa dên ki oma; Ka nu'n سوالin a ni vonga.

⁶Irgai ta, sîngrîl tianghai hin takna ni nuam ngaia: Khanchu inlang loina tiang hin vârna nin hretir ni ti.

⁷Husopin nin fâiin lân, khanchu fâi ki ti: Ni'rsûk infâiin lân, khanchu vur nêkin vâ ki ti.



⁸Raifâna le lômna chu mikuarin nin hretirin lân; Ni ru inkhiakhai hi a rai a fân theina hrangin.

⁹Ki sualnahai ata hi ni hmâi thupin lân, Ki siatna murdi hi kâtpai roh.

¹⁰O Pathian, keimaa hin milung irthiang tak siamin lân; Ki phîng sûnga hin irtha diktak siamthar nôk ro.

¹¹Ni kuang ata ni pai irhmang no'n lân; Ni'rtha irthiang hi ni lâkpai pe no ro.

¹²Râifâna ni ni saninhringna kha ni pe nôkin lân: Nangma thu zôm nuam hrangin ni siam roh.

¹³Khanchu tho'nsualtuhai chu lampui thurchihai irchutir ki ta; Khanchu, mi sualhai chu ni tiang irhei nôk an ti.

¹⁴O Pathian, nang ni saninhringtu Pathian, thisen suaknahai ata ni saninzôkin lân; Khanchu ki milei hin ni felna thu, raifân takin hla'n sak a ti.

¹⁵O Rengpa, nanging ki hmûr hi inhongin lân; Khanchu ki bâi hin nang inpâkna kha a inhriattir hrang a ni.

¹⁶Irbôlna chungâ lômna nei mak chea; Khaang kha ni no sianlân chu nang pe ki ti: Hâlvôm thilinhlan chungâ lungchukna zel nei mak che.

¹⁷Pathian nuamlam irbôlnahai chu irtha milung koi hi a ni. O Pathian milung insiat le irsâr ngôi ngôi hi hmusit ngai mak chea.

¹⁸Ni nuamlam takin Zion chungâ thil sa tho'n lân; Jerusalem kulhai chu inding nôk roh.

¹⁹Khanchu felna irbôlnahai chungâ lômna nei ta ni ta, hâlvôm thilinhlan le hâlvôm pumirhlan chungâ khan: Khanchu ni maichâm chungâ khan sehrâtchahai inhlan ta an ti.

Inpâkna Hlahai 52

Pathian roirêlna le lungkhamna

Hla hruaitu hrangin, Davida Maskil: Edom mi Doega khan Saula kuang, "Davida Ahimeleka ina a fe," tia, a hong hril laia

¹O, mi hrât, ithoa mo thil tho'nsual ni isong? Pathian lungkhamna chu a iom mai a ni.



²Sûn nitâkin mi dang insiat hrang ni ngaituaa; Ni milei chu luvoina chemte ngaihdak ang a nia, milak vai ni tho.

³Sat nêkin soal nir ngaipoimo uala; Felna thu'nsîr nêkin milak thu'nsîr nir ngaipoimo uala.

⁴O, nang milei huang hmang, Thu, mi lungrîl inna thei murdi chu nir ngaipoimo ngaia.

⁵Pathianin kumkhua hrangin nang insiat a ti, Nang chel a ta, ni omna ata nang hnûk suak a ta, Mihring ram ata hi nang inpot suak pat a ti.

⁶Mi felhai khomin nang hmu'n nang chi an ta, Nang innuisan an ti.

⁷"En u ta, hi mi hi kêng, zôkna hranga Pathiana irngat loa, A'rchongna irkhêltak tûng uala, A soalnaa hrât irti chu a ni tiin.

⁸Keima rêk chu, Pathian ina Oliv thing cher indônnut ang kha ki nia; Pathian lungkhamna chu kumkhontuanguin iam ki ti.

⁹Kha kha ni tho sikin, kumkhua'n lômthu insîr mai ki ti: Ni mi irthianghai mithmua khan nir hming chu nghâk mai ki ta, a sa sikin.

Inpâkna Hlahai 53

Mihriam soalzia

Hla hruaitu hrangin; Mahalathasak hrang Davida Maskil Ipn 14

¹Mi'nvêtin chu a lungrîlin, "Pathian reng om mah," a ti ngaia. An siat zoia, thil soal intirom tak an thoa; Tûte thil sa tho reng om mahai.

²Inhre thiama Pathian zong rêng rêng an om mo ti inhre hrangin Pathianin irvân ata mihriam nâihai hi a zu ena.

³An kîr nôk zita; porinche takin an hong om nôk zita; Tûte thil sa tho reng om mahai, inkhat lua om mahai.

⁴Thil tho'nsualtuhai khan inhriatna rêng rêng an inei loi ma ni? Bai an ifâk angin ki mihai an fâk zoi zit ngaia, Pathian laka irlam ngai mahai.



⁵Chitna rêng rêng om loinaa khan chi dor dorin an oma: Pathianin bei tuma pantu ruhai chu an thekindartir tâka; Pathianin anni chu a paithâk sikin ni mualinphoitir anni tâka.

⁶Israelhai saninhringna chu Zion ata zuang suak sianlân chu o! Pathian chu a mihai suaka an iom kha a hruai kîr nôk tika, Kha tika chu Jakoba-hai kha an raifân a ta, Israelhai lôm an ti.

Inpâkna Hlahai 54

Khôkmâkhai ata enkol hranga ngênna

Hla hruaitu hrangin; serânda chi dang danga sak chi, Davida Maskil: Zip-haiin Saula kuang, "Davida ei kuang a irbîk loi ma ni?" an hong ti laia

¹O Pathian, nir hmingin ni saninhringin lân, Ni hrâtna'n roi ni rêl pe roh.

²O Pathian ki chongchaina hi irngaiin lân; Ki bâia thu suakhai hin ni mikuar sung roh.

³Mikhualhaiin an ni bei tâka, Mi nunrônghaiin ki hringna hi inboi tumin an zong saa: Pathian chu an matona se mahai.

⁴Irngai ta, Pathian chu ni changpuitu a nia: Rengpa chu ki hringna cheltuhai laia mi a ni.

⁵Ama khan ki سوالنا chu ki khôkmâkhai chungâ thuan a ti: Nangin anni chu ni thu takna sika khan inboipai roh.

⁶Mâni nuama irchamin thilinhlânin ni kuang irbôl ki ti; O Rengpa, nir hming chu inpâk ki ti, a sa sikin.

⁷Ki lunginzîngna murdia khan ni ni sansuak tâka; A ni doituhai chungâ ki nuamlam chu ki mitin a hmu tâk a ni.

Inpâkna Hlahai 55

Rualhai hnôlin Pathian kuanga chongchai

Hla hruaitu hrangin; serânda chi dang danga sak chi Davida Maskil

¹O Pathian, ki chongchaina hin ni bêng zuang do'n lân; Lungkham ki ngênnaa hin irthup no roh.

²Irngaiin lân, ni sâm roh: Ki lunginzîngna sikin ki'rvêl ruaia, kin hrûm ngai;



- ³Ni doituhai irhai sikin, mi pualoihai nêpsiana sikin: Anni khan buaina ki chung a an intunga; Ningmurin deng an nin theitira.
- ⁴Ki sũaga hin ki lungrîl a na tak taka, Thina irkhêlnahai khan a ni dela.
- ⁵Chitna le irlo inthingna'n a ni dea, Irtha tâkna'n a nir khu zoi ta.
- ⁶Khanchu, “Vasu angin mitha nei inlân chu o! Khanchu uang pat ki ta, irtharngam takin om ta ki ti.
- ⁷Irngai ta, hlataka lêng ki ta, Ramchâra om ki ti.
- ⁸Khorthi le phâivopui hi, Irbîkna hmuna rotsan lat ki ta,” ki tia.
- ⁹O Rengpa, an milei chu insiatin intertir ro: Khopuia chu irnêpsiana le irhmumâkna ki hmua.
- ¹⁰A sũa a zânin khopui chu an vêl an vêla: A sũaga chu sualna le intakna a om sa.
- ¹¹Siatna a sũaga a oma: Huangna le milakna khan a kholâi kha suaksan ngai mah.
- ¹²Ni hrilsiattu chu râl ni maka; Ni sianlân chu, tuang thei ual ki ta: Ki chung a omliantu chu a ni khôkmâktu ni ual mah; Ni sianlân chu, ki irbîksan hrang pial te:
- ¹³Khannisianlân nang, ki mi ir-angpui, Ki rual, ki rual irnaipui ni nia.
- ¹⁴Bâi thum takin ei irbiak ngaia, Mipui laia Pathian biak ina ei lêng ngai kha.
- ¹⁵Thina an chung a zuang tung thut sianlân, Khurpadopa khan a hring pumin chum ri se: Siatnahai kha an omnaa le an sũaghaia a oma.
- ¹⁶Keima'n chu Pathian koi ki ta; Khanchu Rengpa'n ni saninhring a ti.
- ¹⁷Khohloi hai, zũaga hai, sũana hai, ki lunginzũaga thu kin sîrin inrûm ki ta: Khanchu, ama'n ki'rhâi irngai a ti.
- ¹⁸Ki chung a ni beina irthokin, Ki hringna hi irtharngam takin a saninzôk tâka: A ni beituhai an tam sikin.



¹⁹Pathian, tianlai ata om mai khan, Irngaitua a ta, sâmhai a ti, Danglamna nei ngai loi, Pathian chi ngai loihai chu.

²⁰Ama le irngeihai chung a khan a kut an leka: A thuthung chu an siat tâka.

²¹A bâi chu sahriak angin a tora, A milung chu irdoina a nia: A thuhai chu sahriak nêkin ar nâla, Khannisianlân khandai phôisaihai a ni.

²²Ni puakrik chu Rengpa chung a irnghatin lân, Khanchu ama'n nang inhrât a ti; Mi fel chu itiklai khom inhnîngtir phal no ni.

²³Khannisianlân, O Pathian, nangin anni chu irhmangna khurpadopa khan inchumtir ni ti: Thisen insua ngai mihai chu an hring sîng chimrip khom hring zoi no nihai. Keima'n chu nang iam ki ti.

Inpâkna Hlahai 56

Pathian iam chongchaina

*Hla hruaitu hrangin; Jonath-elemrehokima sak hrang, Davida inpâkna hla: Miktam: Filistia-haiin
Gath khuua an chel laia*

¹O Pathian, lung nin kham ro; mihriamin nin lem zoi an tuma: Sîn sôtin ni beiin an ni nêpsia ngai.

²Ki ikhômâmakhaiin sîn sôtin nin lem zoi an tuma: Lâripâk taka ni beitu hai hi an tama:

³Ki chi rikipin, nangma nang iam ki ti.

⁴Pathian ki iama, a thu inpâk ki ta: Pathian ki iama, chi no ning; Taksa'n imo a ni iti thei hrang?

⁵Sîn sôtin ki thuhai chu an lâk kôi ngaia; An ngaituana murdi chu ki satloina tiang inzen a ni.

⁶An inkhôma, an irbîka, ki hnunghai an irsinsia ngaia, Ki hringna inboi tuma an inghak ngai ang hin.

⁷An sual hremna an ilôi thei hrang ma ni? O Pathian, ninginmurin mi tin chu irhniamtir roh.

⁸Nangin chu kin vâinahai hi ni'rsinsia ngaia: Ki mitrithihai hi ni savun koka khan thun ro; Ni lekhabua a ichuang intam mo ni ma?



⁹Nang ki koi zoro ngeia khan a ni doituhai chu rot an ti: Hi hi kin hriat Pathian ni thop hi.

¹⁰Pathiana khan a thu inpâk ki ta: RENGPAА khan a thu inpâk ki ti.

¹¹Pathian ki iama, chi no ning; Mihriamin imo an ni iti thei hrang?

¹²O Pathian, ni kuang chong inkunghai ki neia: Lôm thu'nsîr irbôlnahaiin nang thuan ki ti.

¹³Ki hringna hi thina ata ni saninzôk tâka: Ki kehai hi tûk loi hrangin ni isaninzôk tâk mo ni ma? Mihring vâra hin Pathian makunga ki lêng theina hrangin.

Inpâkna Hlahai 57

Changpui ngênna

Hla hruaitu hrangin; Al-tashheth sak hrang, Davida inpâkna hla: Miktam: Saula ata khura a rot laiaa

¹O Pathian, lung nin kham ro, lung nin kham ro; Ki hringna hi nangmaa khan a tûk lûta: A ni, ni mitha hnuaiia khan lômna zong ki ti, vânduainahai hi ar kiang mâka chu.

²Pathian Anchungtak chu insam ki ti; Pathian itinrêng ni tho petu chu.

³Nin lem zoi tumtu chu a ni hrilinsiat tika, Ama khan irvân ata zuang tîr a ta, ni saninhring a ti. Pathianin a lungkhamna le thutak chu zuang tîr suak a ti.

⁴Ki hringna hi kâmkeibaknei kuang a oma; Mihriam nâihai fa'rh mangna laia khan ki oma. An hâhai chu ufei le thal ang a nia, An milei lak khandai ngaihtak a ang.

⁵O Pathian, nang chu irvân khêl tiang khin chôindômin omin lân,

⁶Ki ke in-ôkna hrangin lén an dâpa; Ki hringna hi a kûn chian chiana: ki matona khurpadop an choia; Anni ngei a laitaka an tâk tâka.

⁷Ki milung hi a idet a ni, O Pathian, Ki milung hi a idet a ni. Hla sak ki ta, a ni, inpâkna hla sak ki ti.

⁸Ki roiinpuina, har ro; perkhuang serândahaio, har roi: Kei chu zîng taka har ki ti.



⁹O Rengpa, mi tinhai laia lômthu nang hril ki ti: Nam tin laia nangma inpâkin zâi ki ti.

¹⁰Ni lungkhamna chu irvân phâk rak ang dôr a nia, Ni thutak chu irvân dum phâk rak ang dôr a ni.

¹¹O Pathian, nang chu irvân khêl raka khin chôindômin lei omin lân, Ni roiinpuina chu irnêng murdi chungâ hin lei om ri se.

Inpâkna Hlahai 58

Mi soal hrem hranga ngênna

Hla hruaitu hrangin; Al-tashhethsak hrang Davida inpâkna hla: Miktam

¹O, roirêltuhai, felna thu mo nin hril tak tak? O mihriam nâihaio, dik takin mo roi nin rêl?

²A ni, nin milungin chu thil soal tak nin tho ngaia; Irnênga nin kuta thil saloi taka tho kha nin var ngaia.

³Mi pualoihai chu an nu sâng rengata Pathian ata senin an oma: An suak zoi le milak thu insîrin an rot ngai.

⁴An tûr chu mirûl tûr ang a nia: Rûlriha kuarsêt, a mikuar hîp ngai ang chu an ni;

⁵Kha khan mirûl dôl sak theihai irhâi chu irngai ngai mah, I anga thei khomin indôi khom sianlân,

⁶O Pathian, an bâia khan an hâhai chu inthing pe'n lân: O Rengpa, kâmkeibaknei vânglaihai ha lian tak takhai chu kher suak ro.

⁷Anni chu tui hrât taka luang angin luangpaihai sianlân: Hloisûl angin sirsôpin chuai ri se.

⁸Ârterko, tuia a iboi ngai ang hi ni sianlân: A zoro loia nupang nâi nei, misa hmêl rêng rêng hmu loi ang hi ni ri se.

⁹An inhriat mân ngeiin, anni chu ilhling kung angin sâtin om an ta; An hring lai ngeiin Pathianin a ningmurna irkhêl takin, sêm irhmang a ti.



¹⁰Mi felin chu phuba lâkna a hmu'n lôm a ta: Mi pualoi thisena khan a ke chu irsûk a ti.

¹¹Khanchu mihaiin, “Mi fel hrangin chu lômman a lei om tak taka: Irnênga hin roirêltu Pathian a lei om tak tak a ni hi,” ti an ti.

Inpâkna Hlahai 59

Zôkna ngêna chongchai

Hla hruaitu hrangin; Al-tashhethsak hrang Davida inpâkna hla; Miktam: Saula'n mi a tîra, ama that hranga a ina an inruang laia

¹O ki Pathian, a ni doituhai ata ni saninzôkin lân: A ni beituhaia ata hmun irsânga ni bâng ro.

²Thil tho'nsualtuhai ata ni saninzôkin lân, Thisen insuak songhai ata ni saninhring roh.

³O Rengpa, ki porinchena sik ni loiin, Ki sual sika ni ual loiin, Irngai ta, ki hringna hi an inruang maia, Mi hrâthai chu ni bei hrangin an ipung khôm a ni.

⁴Ki sual no khomin an intâna, an irsinsiam: Ni changpui hrangin irkai inharin lân, en roh.

⁵O Rengpa, sipaihai Pathian, Israelhai Pathian, Nangma ngei chu nam tinrêng hro hrangin thoiin lân: Mi vârirlet sual takhai rêng rêng chu lunginkham no roh.

⁶Khohloi tiang an hong nôka, ui angin an inrung mura, Khopui chu an vêl an vêla.

⁷Irngai ta an bâiin an inmûk suaka; An hmûra khan khandaihai a oma: “Tu mo inhriat om?” an ti maia.

⁸Khannisianlân O Rengpa, nangin anni chu innuisan ual ni ta; Nam tinrêng chu innuisan a ti.

⁹O a nin hrâttu, nang nghâk mai ki ti, Pathian chu ki kulpui irsâng ni ni.

¹⁰Ki chungna lungkhamna Pathian khan ni nghâk a ta: Pathianin ki râlhai chungna ki thu nuamlam chu nin hmutir a ti.



- ¹¹Anni chu thatpai no ro, khano'nchu ki mihaiin nang irnghilna an ti: O Rengpa, kin pho tak, Ni sinthotheina'n indartirin lân, irhniamtir roh.
- ¹²An bâi سوالنا sik le an hmûra thu suak sikin an lâripâkna ngeia khan in-ôk ri sehai. An thu'nsîr ngai lak khua sâlna le milak thu sik khomin.
- ¹³Annihai chu ninginmurin inboipaiin lân, an om ta lolina hrangin inboipaiin lân: Pathian Jakoba-hai kuang roi a rêl ti inhre ri sehai, Kôlkung dênin.
- ¹⁴Khan, khohloi tiang hong nôk sianlân, Ui angin inrung sianlân, Khopui chu vêl vêl ri sehai.
- ¹⁵Anni chu fâk hrang zongin irvâk irvâk an ta, An khop no'n chu zân khosôtin om an ti.
- ¹⁶Khannisianlân kei chu ni hrâtna thu hi hlaa sak ki ti; A ni, zînga chu ni lungkhamna thu raifân takin hla'n sak ki ti: Nang chu ki kulpui irsâng, Ki lunginzîng nia ki saninzôkna ni ni ngai sikin.
- ¹⁷O a nin hrâttu, nangma inpâkin zâi ki ti: Pathian chu ki kulpui irsâng, ki chungga lungkhamna Pathian kha ni ni.

Inpâkna Hlahai 60

Sansuak ngênna

Hla hruaitu hrangin; Susa Edutha sak hrang: Davida Miktam, irchutir hrangin: ama chu Arama-naharaimhai le Zoba-hai le an irbeia, khan, Joaba a kîra, Edom-hai nuaikkhat le sâng hni Michi phâia a that laia

- ¹O, Pathian nangin ni nin thaa, ni nin siata; Ni ning ni lei inmur tâka; O, ni kaithoi inngîr nôk roh.
- ²Hi ram hi nin hnîngtira; nin kaktir tâka: A kakhai kha siam insa nôkin lân; an hnîng an hnînga.
- ³Ni mihai hi thil ngar tak nin tongtira: Lu'nhnâina uain chu ni nin intir tâka.
- ⁴Nangma chituhai kuang chu puanzâr ni pêk tâka, Thutak sika zâr a ni theina hrangin.
- ⁵Ni indit takhai hi saninzôka an om theina hrangin, Ni kut chang tiang saninhiringin lân, ni sâm roh.



⁶Pathianin a'rthiangnaa khan hiang hin an sîra, "Lôm ki ta: Sekem khua chu sem ki ta, Sukoth phâi chu semindarh sa ki ti.

⁷Gilead ram chu ki ta a nia, Manasea ram khom ki ta a ni; Efraima ram khom kha ki lu inzôkna a nia; Juda ram chu ki rêng khianghrol a ni.

⁸Moab ram chu ki irsilna bêl a nia; Edom rama khan ki kekok pai ki ti: Filistia ram, nang chu keima sika hin khêk ro ba," tiin.

⁹Khopui det taka khan tu'n mo a ni hruai inlût hrang? Edom rama khan tu'n mo a ni hruai hrang?

¹⁰O Pathian, nangma ngeiin ni ni inthâ mo ni ma? O Pathian, kin sipaihai kuang lak suak ta mak chea.

¹¹Doituhai bei hrangin ni changpuiin lân, Mihriam changpuina chu ite ni loi a nia.

¹²Pathian zâra hâitakin tho ei ti: Ama chu a ni doituhai sirbêtu hrang a nia.

Inpâkna Hlahai 61

Saninzôk ngênna

Hla hruaitu hrangin; serândaa sak zât, Davida inpâkna hla

¹O Pathian, ki khêkirhai hi lei inhria'n lân; Ki chongchaina hi irngai roh.

²Ki milung a sôl laiin kôlkung ata nang koi ki ti: Lungpui keima nêka irsâng uala khan ni hruaiin lân,

³Nang chu ki hrangin saninzôkna, Doituhai ata râl enna in irsâng dettak ni nia,

⁴Ni puan ina khan kumkhua'n om ki ta: Ni mitha hnuai irbîkna hmuna khan irpelût ki ti.

⁵O Pathian, nangma'n chu ki thu'nkunghai nir ngaituaa: Ni'rhming chituhai ram lua chu ni pêka.

⁶Reng hring sâng hi insei ni ta: A kumhai chu irlo tamtak dôr ni a ti.

⁷Pathian makunga kumkhua'n om mai a ti: O, ama sînghual theina hrangin lungkhamna le thutak sinsiam roh.



⁸Khanchu ki thu'nkunghai a nitin ki sua theina hrangin, Kumkhua'n nir hming inpâkin zâi ki ti.

Inpâkna Hlahai 62

Pathian ienkolna ningbeiom

Hla hruaitu hrangin; Jeduthuna dânin Davida inpâkna hla

¹Ki hringna hin Pathian vai a nghâka, Ama ata ki saninhringna a hong isuak hrang a ni.

²Ama vai kha ki lungpui le a ni saninhringtu a ni: Ki kulpui irsâng a nia; a saterengin chu inhnîng no ning.

³Nangnihai murdi'n, thatpai hrangin, Lung bang rô inbei ang le, irpal inrîl vâng vâng bei angin, I dôr ten mo mi inkhat hi nin ibei hrang?

⁴A roiinpuina ata namtha hrang ringotin an irtia; Milak tho hi an nuamlam tak a ni. An bâiin sat an vura, khannisianlân an lungrîlin khua an sâl ngai.

⁵Ki hringna, Pathian vai nghâk ro; Ki sabeina hi ama kuang ata suak a ni.

⁶Ama vai kha ki kulpui le ki saninhringna a ni: Ki kulpui irsâng a nia; inhnîng no ning.

⁷Pathian kuang ki saninhringna le ki roiinpuina a oma: Ki hrâtna lungpui le ki zôkna chu Pathiana a om.

⁸Nangni mipuihaio, itiklai khomin ama kha iam unglân; Nin milung kha a makunga bunpai roi; Pathian chu ei hrangin inzôkna a ni.

⁹Mi chîn tete hi ite ni mahai, mi lianhai khom hi milak chian an ni: Irtênaa khan indom pat an ta; Ite ni loi mai mai nêkin an izâng ual a ni.

¹⁰Irsualnaa hin irngat no'n lân; Inrûka hin sabeina se no roi. Irchongna a pung khomin kha khan irngat sa no roi.

¹¹Pathianin voikhat a hrila; E he! hi voihi kin hriat ta; Sinthotheina hi Pathian ta a nih ti hi:

¹²O Rengpa, lungkhamna hi ni ta ngêt a ni: Mi tin an sintho ang taka ni thuan ngai a ni.



Inpâkna Hlahai 63

Pathian irngai

Davida inpâkna hla, Judai ramchâra a om laia

¹O Pathian, nang chu ki Pathian ni nia; zîng taka nang zong ki ti: Ramchâr tak, tui om loinaa hin ki hringna hi nangma irzukin a dangchâra, ki taksa hin nang a irngai a ni.

²Khaang dênin hmun irthianga khan nang ki en mai kha, Ni sinthotheina le ni roiinpuina hmu hrangin.

³Ni lungkhamna hi hringna nêkin a sa ual sikin ki hmûr hin nang inpâk ki ti.

⁴Khaang dênin ki hring sûngin nang inpâk ki ti: Ni'rhmingin ki kuthai phar ki ti.

⁵Ki hringna hi irtin le sathâiin khop a ta, ki bâi hin raifân hmûr irputin nang inpâk sa ki ti.

⁶Ki zâlmuna nang kin hriat maia, zâna ni chungchâng thu ki'rngaitua laiin chu.

⁷Nang chu ni changpuitu ni nia, Ni mitha hnuaia raifânin ki izâi hrang a ni.

⁸Ki hringna hin nang a zui ngita: Ni kut chang tiangin a ni kai ngai.

⁹Ki hringna inboi tuma zongtuhai rêk chu irnêng hmun irhnuaiahaia khan lût an ti.

¹⁰Khandai sinthotheina kuang pêk ni an ta; Sihahai dongtum ni ta an ti.

¹¹Reng rêk chu Pathiana raiinfân a ta: Ama songa khomâkirsâm murdi khan chôirsâng an ta; Milak thu insîr hmanghai bâi chu hîpin a iom hrang a ni.

Inpâkna Hlahai 64

Saninzôk ngênna

Hla hruaitu hrangin, Davida inpâkna hla

¹O Pathian, ki chardongna thua hin ki'rhâi hi lei inhren lân: Ni doituhai ichiomna ata hi ki hringna inzôk roh.

²Thil saloi thotuhai irfiialkhômna ata ni thupin lân, Thil tho'nsualtuhai irdon irhlômnahai ata chu:



³Khahai khan khandai angin an milei an intât inngaia, Thal angin chong khâ takin an irzîka.

⁴Mi sêlnaboi chu hmun fianriala an kâp theina hrangin, Chi loiin irningloiin an kâp thut ngai.

⁵Thil sual thoa khan an irthora; Inrûka châng kam chungchânga khan an chong ngaia; “Tu’n mo khahai kha a hmu hrang?” an tia:

⁶Tho’nchâina an zong suak ngaia; “Sathnem irngai takin kin zong zoi ta,” an tia: An sâng tiang ngaituana le milung chu inthûk tak a ni senga.

⁷Khannisian Pathianin anni kha kâp a ta, Irningloiin thala popin om an ti.

⁸Khaang khan, anni milei ngei khan anni a doi sikin, irtettirin om an ta; anni hmu murdi’n an lu inthik an ti.

⁹Khanchu, mi murdi’n chi an ta; Pathian sintho chu hril an ti, A sintho chu vâ takin ngaitua an ti.

¹⁰Mi felhai chu RENGPAALôm an ta, amaa khan iamna irngat an ti; Milung dik tak irput murdihai khan chôiirsâng an ti.

Inpâkna Hlahai 65

David a hla Inpâkna le lônthu insîrna

Hla hruiatu hrangin, Inpâkna hla

¹O Pathian, Zion-a khan inpâkna’n nang a nghâk mai: Thu’nkung chu ni kuang sua ni a ti.

²O chongchaina irngaituatu, Ni kuang taksa murdi chu hong an ti.

³Tho’nchâinahai khan a nin hnê ngai nâkin: Kin porinchenahai murdi nanging ni’rsunfâi ni ta;

⁴Mi, ni biak in hual sâng kholaihaia om thei hranga, Ni thâna nangma tianga ni inpantir kha, a vâ a sa: Ni in satna khan khop kin ti, Ni biak in hmun irthiang satna khan.

⁵O a ni saninhringtu Pathian, Thil irkhêlhaiin fel takin ni sâmb ni ta; Nang chu kôlkunga mi murdihai le, Tuikhanglian chung hlataka omhai iamna chu ni ni:



- ⁶Sinthotheinaa konga khita, Mâni hrâtnaa tânghai indet ngaitu chu ni ni;
- ⁷Tuikhanglian inri dur dur, ar sôn inri dur durhai leh, Mipui irhel sup sup khom a'rngamtir ngaitu ni ni.
- ⁸Kôlkung monga omhai khom khan ni inhriatnahai kha an chi ngaia: Zîng le khohloi suaknahai kha raifânin an khêktir ngai.
- ⁹Irnêng hi ni kana, tuiin nin fâa; A saterengin nin satira; Pathian vadung chu tuiin a sipa: Irnêng hi khaanga ni sinsiam zoiin chu an ta hrangin bu ni siam pehai ngai.
- ¹⁰Loimânhai chu ruatui tamtakin nin fâa, Tuiin nin chiea; A tânghai kha nin zortira, Khanchu chîmu mônghai kha sat ni vur ngai.
- ¹¹Kum chu ni satna nin khumtira, Ni fena lampuihai kha thil sa'n a zung ngai.
- ¹²Ramchâra sa lêngna hmunhaia a zunga, Tânghai khom raifânna'n an sip ngai.
- ¹³Mual le tânghai chu belra rualin an dâpa; Phâihai chu buhaiin a'rkhu khaka, Tinrêng râifâna khêkin hla an sak ngai.

Inpâkna Hlahai 66

Inpâkna le lômthu'n sîrna hla
Hla hruaitu hrangin, hla, inpâkna hla

- ¹Irnêng lua murdihaio, Pathian chôiindômin raifân takin khêk unglân:
- ²A'rhming roiinpuizia chu hla'n sak suak unglân: An pâkna chu roiinpuiritir roi.
- ³Pathian kuang, “Ni sinthohai kha ar khêl bâka! Ni sinthotheina irkhêlzia sikin nang a doituhai chu ni kuang irpelût an ti.
- ⁴Irnêng lua murdihai hin chubai nang mûk an ta, Nang inpâkin zâi an ti. Ni'rhming inpâkin zâi an ti,” ti roi.
- ⁵Thoi, Pathian sinthohai hi en roi; Mihriam nâihai chung a sinthoa hin ichi a iom a ni.



- ⁶ Ama khan tuikhanglian chu irnêng châr an changtira; Mihriamhai khan tuipui kha ke'n an kâia, kha khan ama chung a ei râi a fâna.
- ⁷ A sinthotheina khan kumkhua'n roi a rêla; A mitin nam tin a en ngai: Tehel zonghai chu chôiindôm no ri sehai.
- ⁸ O, mi tinhaio, ei Pathian chu inpâk unglân, Ama inpâkna irhâi kha inhretir roi.
- ⁹ Ama khan ei hringna hi an hringtir maia, Ei kehai hi irphêt phal mah.
- ¹⁰ O Pathian, nangin ni ni fiaa: Tangkarua fia angin ni ni fiaa.
- ¹¹ Nangin lêna ni ni hruai lûta; Kin ruanga hin puakrik tak ni'rngkata.
- ¹² Mihriamhai, tâli chung a chuagin, kin lu chung a nin fetira; Mei le tui kin pala; Khannisianlân atûn chu nangin hmun inchuma ni ni hruai suak tâka.
- ¹³ Hâlrivôm thilinhlanhai leh ni ina lût ki ta, Ki chonginkunghai kha ni kuang hlen ki ti.
- ¹⁴ Ki hmûrin an sîra, chardonga ki om laia ki bâiin a insîrhai kha.
- ¹⁵ Sa mar tak hâlrivôm thilinhlanhai ni kuang inhlan ki ta, Belra chal hâl mirimhoi le; Sechalhai, kêlhai leh inhlan ki ti.
- ¹⁶ Thoi, Pathian chi murdihaio, irngai roi, Khanchu ki hringna hranga a sintho chu nangni inhretir ki ti.
- ¹⁷ Ama chu ki bâiin kin sama, Ki milei chôiindômin a oma.
- ¹⁸ Ki milung sualna ki'rngaisakin chu Rengpa'n nir ngaitua no ni.
- ¹⁹ Khannisianlân, Pathianin a nir ngaitua tak taka; Ki chongchaina irhâi chu a nir ngai pe ta.
- ²⁰ Pathian, ki chongchaina hlo insamtir loia, Keimaa a lungkhamna inmongtir loi chu inpâkin om ri se.

Inpâkna Hlahai 67

Lômthu insîrna hla



Hla hruaitu hrangin; serânda chi dang danga sak zat inpâkna hla

¹Pathianin lung nin kham sianlân, sat ni vur sianlân, A hmêl chu ei chung a zuang invârtir ri se;

²Ni lampui chu irrêng chung a mihai inhriat a ni theia, Ni saninhringna chu nam tinrêng laia inhriat a ni theina hrangin.

³O Pathian, mi tinin nang inpâk ri sehai; Mi tinrêng hai khan nang inpâk ri sehai.

⁴O, nam tin chu lô m taka omin, raifânin zâi ri sehai: Nangin mi tin chu theibîk nei loia roirêl pe'n, Irrêng chung a nam tin chu ni iop hrang a ni.

⁵O Pathian, mi tinin nang inpâk ri sehai. Mi tinrêng hai nang inpâk ri sehai.

⁶Irrêng hin a thil inmong kha nang a pêka: Pathian, ei Pathian ngei khan, sat ni vur a ti.

⁷Pathianin sat ni vur a ta, Kôlkunga mi murdi khomin ama chi an ti.

Inpâkna Hlahai 68

Râl inhnêa irsongna hla

Hla hruaitu hrangin, Davida inpâkna hla

¹Pathian chu thoi sianlân, a doihai chu indarin omhai sianlân; Ama khôkmâktuhai khom kha a makunga laizâm tho ri sehai.

²Meikhu inlêng irhmang angin, anni chu inlêng irhmangtir roh. Khuaihlu hi mei luma a izôi irhmang angin, Mi pualoihai chu Pathian makunga irhmang ri sehai.

³Mi felhai rêk chu lô m takin omhai sianlân; Pathian makunga raiinfân ri sehai.

⁴Pathian chôindômin hla sak unglân, a'rhming inpâkin zâi roi; Tâlia ramchârhai fe thengtu hrangin chu lamlian hrang sung insip unglân; A'rhming chu Rengpa a ni; a makunga khan raiinfân roi.

⁵Pathian a omna irthianga om kha, Pa nei loihai Pa le meithâihai ngaituatu a ni.



⁶Pathian khan mi malhai chu sêngkua laia an omtir ngaia: Mi intâng hai kha a hruai suaka, vâneinaa a hruai lût ngaia: Tehel hmang hai rêk chu ramchâra an omtir ngai.

⁷O Pathian, ni mi hai ma hruaia ni hong suaka, Ramchâra ni fe theng lai khan,

⁸Irnêng hi an hnêng dur dura, Irvân khom khin Pathian makunga khan rua an thotira: Sinai tâng lua khom Pathian makunga, Israel hai Pathian makunga khan, an hnêng dur dur kha,

⁹O Pathian, nangin rua tamtak nin thotira, Ni dongtum kha a'rzal lai khan nin dettira;

¹⁰Ni mi hai in kha khan om hmun an khuara. O Pathian, nang chu ni satna'n inriang hai hrang ni sinsiama.

¹¹Rengpa'n thu a pêka, Thurchi hriltu nupang tamtakin an hrilin dara,

¹²Sipai hai le rêng hai chu laizâm an thoa, laizâm an thoa: In nghâktunu khan râllâk sum kha a sema.

¹³Vasu mitha tangkarua tuama, A mitha hmor khom rângachak vâr taka tuam angin. Belra irkul kêrhaia ni izâl hrang ma ni?

¹⁴Itinrêngthohei khan khataka rêng hai an darhtir lai kha, Zalmon tânga ivur tâk lai ang a ni.

¹⁵Basan tâng chu Pathian tâng a nia; Basan tâng chu tâng irsâng tak a ni.

¹⁶Tâng irsâng takhaio, Pathianin a omna hranga a inthang nuam chu ithoa mo hnarsaa nin ien? A ni, Rengpa chu kha khan kumkhua'n a iom mai hrang kêng.

¹⁷Pathian tâli chu a sêng a sêng, a sâng a sâng tamtak a ni: Rengpa chu Sinai tânga a om ang khan, Khahai laia khan hmun irthianga a om ta.

¹⁸Nang chu chung tiang ni kêia; Ni ichel hai kha suakin ni hruaia; Mihriam hai ata thilpêk hai ni donga, A ni, tehel zong hai laia khom; Rengpa Pathian kha an kuang a om theina hrangin.



¹⁹Rengpa, kin puak a ni tina ni pêl petu, A ni saninhrintu Pathian chu inpâkin om ri se.

²⁰Pathian chu ei ta hrangin saninzôktu Pathian a ni; Thina ata suaknahai chu Rengpa Jehova ta a ni sa.

²¹Khannisianlân Pathianin ama doituhai lu chu sât irphalpat a ta, A thiamloinaa la fe thiaia lu vun sam irbuk tak a ni.

²²Rengpa'n, "Basan ram ata nang hruai nôk ki ta, Tuikhanglian mong inthûk tak ata chu nang hruai nôk ki ti.

²³Ni ke chu thisena ni phûm theia, Ni ui lâkhai khan ni idoihai ata dongtum a nei theina hrangin," a tia.

²⁴O Pathian, ni ife lai hai an hmua, Ki Pathian ki inlaltak hmun irthianga fe lai hai chu.

²⁵Dôngmate khuang suktuhai laia khan, Hla saktuhai an fe masaa, irhaihoi tumtuhai khan an zuia,

²⁶Inkhômna inhaia khan Pathian inpâk unglân, O Jakoba irchihai Rengpa chu inpâk roi.

²⁷Nâi mitum Benjamina-haiin ma hruaiin Juda irchia mi lianhai le an upahai, Jebuluna mi lianhai, Naftalia mi lianhaiin an zuia.

²⁸Ni Pathian khan ni sinthotheina chu thu a pêka: O Pathian, kin ta hranga thil ni itho chu inhrât ro.

²⁹Jerusalema ni biak in sikin rênghaiin lômmanhai nang la hong chôi pe an ti.

³⁰Sahrâng lâiluang kêra om chu hâlin lân, Nam dang sehrâtchal le sehrâtte, lômhai chu ngô roh. Kûna an tangkakai ni kuanga an inhlân mâka chu; Irsual vai nuamhai chu indartir roh.

³¹Aigupta ram ata milianhai hong suak an ta; Ethiopia-hai chu an kut Pathian tiang phar hrangin irhnot an ti.



³²Rammuala ram murdihaio, Pathian chôiindômin hla sak unglân; O, Rengpa inpâkin zâi roi;

³³Irvânhai irvân khorsiang ata omhai chung a chuanga khan; Irngai ta, ar hâi a suak e, irhâi irkhêl tak chu.

³⁴Pathian kuanga khan hrâtna pe roi: A roiinpuina chu Israelhai chung a oma, a hrâtna chu irvân dumhaia khin a om.

³⁵O Pathian ni hmun irthianghai ata khan ichi ni iom a ni; ama'n Israelhai Pathian ngei khan a mihai kuang hrâtna le sinthotheina a ipêk ngai a ni. Pathian chu inpâkin om ri se.

Inpâkna Hlahai 69

Changpui ngênna

Hla hruaitu hrangin; Sosanima sak hrang, Davida inpâkna hla

¹O Pathian, ni saninhring ro; Tuihai chu ki ring dênin a lût tâka.

²Tuichir inthûk tak, sirsan rêng rêng om loinaa, Ki tum tîr tîr hi; Tui inthûk tak, tui lian ni ngîmnhai, ki hong lût tâk hi.

³Ki khêkna'n ki sôl tâka; ki dang a châr zoi ta. Ki Pathian ki nghâknaa hin ki mit a chamai zoi ta.

⁴Chanlamboia ni hnôlhai lak hi ki samzâi nêkin an tama; Dikloi taka ni doia nir hmangtir tumhai chu, mi hrât tak an ni. Ki ilâk loi khom an nin tuamtira.

⁵O Pathian, nangma'n chu kin nitzia hi nin hriata; Ki thiamloinaihi khom hi nangmaa thup ni mah.

⁶O Rengpa, sipaihai Pathian nangma nghâktuhai chu keima sikin mualinphoi nohai sianlân: O Israelhai Pathian, nangma zongtuhai chu keima sikin inzaktirin om no ri se.

⁷Nangma sika insîrinsiat ki tuang sikin, Inzakna'n ki hmâi ar khu zoi ta.

⁸Ki urênghai ata mikhual ki hong ni tâka, Ki nu nâihai ata inhriat ngai loi mi ki hong ni ta.



⁹ Ni ina ki sathnem irngaina a ni fâk zoi ta; Nangma hrilsiattuhai hrilinsiatnahai chu ki chung a an chum tâka.

¹⁰ Ki chapa, bunghei puma ki hringna ki sep le, Ama kha mi hrilinsiatna a lei ni ngai.

¹¹ Ki puan sila bora ki hmang le, An ta hrangin siatna tiang irkhekna hong ni thiai ki ta.

¹² Kul mikota toihai khan ki chungchâng thu an insîra; zû'nruî hmanghai hla ki ni tâk hi.

¹³ Khannisianlân, O Rengpa, keima'n chu zoro lômoma ni kuanga kêng, ki chongchai ngai: O Pathian, ni lungkhamna irkhêl tak sikin ni saninhringna thu takin ni sâm roh.

¹⁴ Tuichir ata hi ni saninzôkin lân, nin ngîmtir viat no ro: Ni khôkmâktuhai ata le tui inthûk tak ata hi saninzôkin nin omtir roh.

¹⁵ Tui lianin ni ngîmpai no sianlân, Tui inthûk takin nin lem sa no ri se; khurpadop khomin a bâi nir chîp pe no ri se.

¹⁶ O Rengpa, ni sâm ro; ni lungkhamna chu a saa: Ni inrenna irkhêlzia ang dênin keima tiang hong irhei ro.

¹⁷ Ni tîrtôn ata hi ni hmâi khom thup no ro; Ki char a donga; ni sam lat roh.

¹⁸ Ki hringna hi hong nâiin, irtanin lân; A ni doituhai ata ni saninzôk roh.

¹⁹ Nangin mi ni ihrilsiatnahai, Ki mualinphoinahai, inzaknahai hi nin hriat: A ni doituhai chu ni makunga an om zit a ni.

²⁰ Mi ni hrilsiatna hin ki milung an siattira; a sate'n ki bei a donga: Khanchu lung nin khamtu hrang ki zonga, Khannisianlân tûte om mahai; Irtharngam ni sak hrang ki zonga, Khannisianlân tûte hmu ma ung.

²¹ Ki bu hrangin i i khâ an ni pêk saa; ki dang a châr lakin uain thûr in hrang an ni pêka.

²² An makunga an maichâm chu châng hong ni sianlân; Irtharngam taka an om laiin bil hong ni ri se.



²³An mithai chu, an hmu thei lolina hrangin, inzîngtirin hong om ri se. An konghai chu inthingtir mai roh.

²⁴Ni milung hoi lolina tak tak chu an chungu buakin lân, Ni ninginthik ningmurna khan anni chu chel ri se.

²⁵ An omna chu hong ram sianlân; An puan inhaia khan tûte om no ri sehai.

²⁶Ni izêm kha chu deng an intheia, Ni sabêhaia milung dûk chu an insîr ngaia.

²⁷An siatna chu siatna'n belsa'n lân: Anni chu ni felnaa khan lût no ri sehai,

²⁸ Anni chu hringna bu ata kâtpaiin omhai sianlân, mi felhai laia khan irziak sa no ri se.

²⁹Khannisianlân kei chu inriang tak le beidongom tak ki nia: O Pathian, ni saninhringna khan hmun irsânga ni sia ri se.

³⁰Pathian irhming chu hla'n inpâk ki ta, Lômthu insîrin ama chu chôindôm ki ti.

³¹Khaang khan chu sehrâtchal mani, irki le kemitin nei sehrâtchal mani nêkin chu, Rengpa inlômmtir ual a ti.

³²Thuhnuairôlhai chu kha kha an hmua, an lôma: Nangni Pathian zonghaio, nin milung chu hringin om ri se.

³³Rengpa'n inrianghai chu irngaitua'n, A mi intângchai chu hmusit ngai ma.

³⁴Irnêng le irvânin ama kha inpâk ri sehai, Tuikhanglianhai le a sînga thil chângthei murdihai leh.

³⁵Pathianin Zion chu sansuakin, Juda khuahai chu a inding hrang a nia; khanchu kha khan om an ta, nei zêl an ti.

³⁶A suakhai irchihai khom khan lua an ta; A'rhming irngaiinhlulai chu a sînga om an ti.

Inpâkna Hlahai 70

Chardong chongchaina



*Hla hruaitu hrangin, Davida inpâkna hla; Inhriat suaktir nôkna hrangin
(sam 40.13-17)*

- ¹ O Pathian ni saninzôk hrangin irhnotin lân; O Rengpa, ni changpui hrangin irhnot ro.
- ² Ki hringna inboi tuma zongtuhai chu, mualinphoi tak le inzak takin omhai sian; ki siatna chung a lômhahi chu irzûlpaiin inzakin om ri sehai.
- ³ A ni nuisotuhai kha an hmâimôk sikin laizâm tho'n mualinphoi ri sehai.
- ⁴ Nang a zongtu murdihai chu nangmaa khan raiinfân tak le lôm takin om ri sehai; Ni saninhringna irngai inhlutuhai chu "Pathian chu chôindômin om ri se," ti mai ri sehai.
- ⁵ Khannisianlân kei chu inriang le invâi tak ki nia: Nang chu ni changpuitu le ni saninzôktu ni nia; O Rengpa, ir-ial viat no roh.

Inpâkna Hlahai 71

Tar tak chongchaina

- ¹ O Rengpa, nangmaa khan ki iamna ki'rngat ngaia: Itika khom mualinphoiin nin om tir no ro.
- ² Ni felna sika ni saninzôkin, ni sansuakin lân: Keima tiang hin ni beng zuang do'n lân, ni saninhring roh.
- ³ Ki ta hrangin omna lungpui, ki fe mai theina hrang lei ni ro: Nangin ni saninhringna hrangin thu ni pêka; Ki kulpui le ki lampui ni nia,
- ⁴ O ki Pathian, mi pualoihai kut ata ni sansuak ro, Mi felloi le nunse tak kut ata chu.
- ⁵ O Rengpa Pathian, nang chu ki sabeina chu ni ni: Ki nâipangte ata ki iamna chu ni ni.
- ⁶ Ka nu sêng ata ki suak ni ata irthokin nang ki'rhnela; Ka nu sul ata ni lâk suaktu ni nia, Nang inpâk mai ki ti.
- ⁷ Mi tamtak irngaiin thilirkhêl ang ki nia, Khan khom ni sianlân nang chu ki irbîkna det tak ni ni.



- ⁸Ki bâi hi nang inpâkna'n sip a ta, Sûn sôtin ni chôindômna'n sip sa a ti.
- ⁹Ki tar tikin ni paithâk no'n lân; ki'rnak a chuai tikin ni rotsan no ro.
- ¹⁰A ni doituhai khan ki chungchâng thu an insîra; Ki hringna inruangtuhai an chong khôma.
- ¹¹“Pathianin a rotsan ta: Irzûl unglân, chel roi; saninzôktu hrang zel om mahai,” tiin.
- ¹²O Pathian, ni hla viat no'n lân: O ki Pathian, ni changpui hrangin irhnot roh.
- ¹³Ki hringna doituhai chu mualinphoi le irhmangin omhai sianlân; Ki siatna hrang zongtuhai chu hrilinsiatin le inzakna'n irkhuhai ri se.
- ¹⁴Khannisianlân keiin chu nang sabei mai ki ti, nang lan pâk sa ual ual ki ti.
- ¹⁵Ki bâi hin ni felna thu hril a ta, sùn sôtin ni saninhringna thu hril sa a ti; A tam hrang dôr chu inhre ma ung.
- ¹⁶O Rengpa, Pathian sintho roiinpui takhai leh ki hongga; Ni felna, nangma felna thu vai insîr ki ti.
- ¹⁷O Pathian, ki nâipangte ata nangin ni nir chutira; Atûn ten ni sintho irkhêlhai chu kin hriattir ngai.
- ¹⁸A ni, O Pathian, ki tara ki lu a chuak hnung khomin ni rotsan viat no ro; Ni hrâtna hi thoiinthar nôkhai kuang le, Ni sinthotheina hi la hong om hranghai murdi kuang kin hriattir mâka chu.
- ¹⁹O Pathian, ni felna khom ar sâng tak tak a ni; O Pathian, nang thil roiinpui takhai thotu, Nangma ang hi tu mo om?
- ²⁰Nang, charindongna tamtak le irkhêltak ni nin hmutirin chu, Nin hringtir nôk a ti, Irnêng inthûk ata ni hruai suak nôk a ti.
- ²¹Nangin ki roiinpuina nin pung pe'n lân, Zuang irhei nôkin irtharngamna ni pe ro.



²²Serânda'n nang inpâk sa ki ta, O ki Pathian, ni thutak ngei chu inpâk ki ti. O nang Israelhai mi irthiang, perkhuang leh nangma inpâkin zâi ki ti.

²³Nangma inpâka ki zâi tikin ki bâi hi lôm tak tak a ta; Ki hringna ni irtan khom hi lôm tak tak a ti.

²⁴Ki milei khom hin sîn sôtin ni felna thu insîr a ti: Ki siatna hrang zongtuhai chu mualinphoiin an inzak tâka.

Inpâkna Hlahai 72

Reng ta hranga ngên pena

Solomona inpâkna hla

¹O Pathian, ni roirêlnahai kha rêng pe'n lân, Ni felna chu rêng nâipa pe roh.

²Ni mihai chu felna'n roirêl pe a ta, Ni mi inrianghai chu roirêlna felin roirêl pe a ti.

³Tâng lian le tâng chînhai hin felna'n mihai kuang irtharngamna zuang intung an ti.

⁴Ama khan mi laia inrianghai chu roirêl pe a ta, Invâi nâihai chu saninhring a ti, Nêpsiatu rêk chu nôl a ti.

⁵Misa khi a om sêng chu nang chi an ti, Tha om sêng ten khomin, irlo om sêng murdia chu.

⁶Ama chu hloisûl irnoi chung a rua angin tâk a ta: Irnêng infâtu ruatui ang dênin.

⁷A hring lai khan mi felhai chu indôn nut nut an ta, Irtharngamna irkhêl tak chu indôn nut nut sa a ta, tha a boi mâka chu.

⁸Ama chu tuikhanglian ata tuikhanglian dang dên khomin ircham nei sa a ti, Tuipui ata kôlkung dên khomin.

⁹Ramchâra omhai chu a makunga kûn an ta; Ama doituhai khomin vâiphin inliak an ti.

¹⁰Tarsis ram le chômbung rênghaiin lômman hong inhlanhai sianlân, Arab rêng le Seba rênghai khomin thilpêkhai hong chôl ri sehai.



- ¹¹A ni, rêng murdi chu a makunga inbok an ta: Nam tinrêngin a sintho an ti.
- ¹²Invâiin a khêkin ama chu saninzôk a ta, Mi inriang, changpuitu nei loi khom kha saninzôk a ti.
- ¹³Mi inriang le invâihai chu lunginkham a ta, Invâihai hringna chu saninhring a ti.
- ¹⁴An hringna chu nêpsiana le nunrôngna ata irtan a ta, An thisen chu ama irngaia chu hlutak a ini hrang a ni.
- ¹⁵Khan, hring an ta; Seba ram rângachak chu ama pêk ni a ta; Mihaiin ama chu chongchai pe mai an ta; Sûn sôtin satvur an ti.
- ¹⁶Irnênga, tâng chunghaia hin, bu tamtak om a ta; A vûi chu Lebanon angin inhnîng siam siam a ta, Khuua mihai chu irnêng hloisûl angin indôn nut nut an ti.
- ¹⁷A'rhming chu kumkhua'n dâi no ni: A'rhming chu misa a om sùng chu dâi loiin om mai a ta: Mihai chu amaa khan satvurin om an ta; Nam tinrêngin ama chu vânei ti an ti.
- ¹⁸Rengpa Pathian, Israelhai Pathian chu, inpâkin om ri se, Ama vai hin sinirkhêl a tho ngaia:
- ¹⁹A'rhming roiinpui tak hi kumkhua'n inpâkin om sa sianlân; Irnêng pumpui khom hi a roiinpuinaa insipin om ri se. Amen, Amen.
- ²⁰Jesaia nâipa Davida chongchainahai chu a mong ta.

Inpâkna Hlahai 73

BU THUMNA
(73-89)
Pathian dikzia
Asafa inpâkna hla

- ¹Pathian chu Israelhai chung a sân a sa mai, Milunga irthianghai chung a khan.
- ²Khannisianlân keima'n chu ki sir inchâi vâng vânga; Ki ke pêthai hi ar pil vâng vâng a ni.



- ³Mi pualoihai vâneizia ki hmuin, Mi irsonghai chu ki'rzuka.
- ⁴An thi lai khan tuangna zel nei mahaia; An hrâtna chu a det uala.
- ⁵Mi dang anga intakin om mahaia; Mi dang anga soisakin om ual mahai.
- ⁶Khasikin lâirpâkna khan thîrhruî angin an ringa an zêla; Nunrôngna chu silkai angin a tuama.
- ⁷Mar sikin an mit a pônga: Milunga thu nuamlam nêka irkhêl an neia.
- ⁸An innuisana, sual takin nêpsiana thu an insîra: Lâirpâk takin an chong ngai.
- ⁹An bâi chu irvânhaia khin an siaa, An milei chu irnêng hi ar fang suam ngai.
- ¹⁰Khasikin a mihai chu khataka khan an kîr nôka, Tui khilâta sip chu an inpai ripa.
- ¹¹“Pathianin itin mo inhria a ta? Anchungtakin inhre suak hrang ma ni?” an tia.
- ¹²En ta, hihai hi mi pualoihai an ni hi; Nuamning taka om maiin an irchong tîr tîr ngai.
- ¹³A ni, mâkana zelin, ki milung hi an fâitira, Ki kuthai sêlna boinaa ki irsûk a ni.
- ¹⁴Sûn sôtin soisakin ki oma, A nitin halirchu'n ki oma.
- ¹⁵“Khaang khan insîr ki ti,” hong ti ta inlân; Irngai ta, ni nâihai irlo chungâ vârirlet taka tho hong ni ki ti.
- ¹⁶Kha kha kin hriat theina hrangzia ki ngaitua'n, ki hrangin a intak hrai a ni.
- ¹⁷Pathian hmun irthianga lût ki ta, An mongna hrang chu ki ngaitua mâka chu.
- ¹⁸Anni chu hmun irnâl takhaia ni siaa: Siatnahaia ni paithâk ngaia.
- ¹⁹Ithoa mo mitkhapkâra an iramchit tâk mani o! Thil irkhêl takhaia inboipaiin an iom ta a ni.



²⁰Zâna irmang khua a vâra a iboi ngai angin, O Rengpa, ni meng tikin anni chu irhmangtirhai ro.

²¹Ki milung hi a beiindonga, Ki lungrîla khom isun angin ki oma:

²²Mi'nmôl le ite inhre loi ki nia, Nangmaa khan ramsa ang chian ki ni ngai hi.

²³Khannisianlân ni kuanga ki om maia: ki kut chang tiang hi ni lei chel ngaia.

²⁴Nangin ni lei inkungna'n ni hruai ni ta, Kha zoi tika chu roiinpuinaa khin ni lôm a ti.

²⁵Irvâna khin nang no chu tu mo ki ini? Irnênga khom hin nang no chu ki inuam tûte om mahai.

²⁶Ki taksa le ki milung hi a'rzal tâka: Khannisianlân Pathian chu kumkhuaa ki milung hrâtna hrang le ki dongtum hrang a ni.

²⁷Irngai ta, nangma ata hlataka omhai chu an irhmang hrang a ni: A uiresantu murdi chu nir hmangtir ta.

²⁸Keima ta hrang rêkin chu Pathian nâi hi a isa a ni: Rengpa Pathian chu ki inzôknaa ki hmanga, Ni sintho murdi thu ki hril theina hrangin.

Inpâkna Hlahai 74

Nam san hranga ngênna

Asafa Maskil

¹O Pathian, ithoa mo kumkhua hrangin ni ni ipaithâk? Ithoa mo ni sa vâina hmuna belrahai chung a hin ni milung a ir-ût mai?

²Ni mihai inkhômhai, tianlaia ni irchôk, Nam irchon hrangin ni irtan kha, inhre mai ro; Ni omna ngai Zion tâng le.

³Siat chit tâk chu hong irfang ta, Doituhai hmun irthianga khan thil sual tinrêng an tho tâk hi.

⁴Nangma doituhai ni mihai inkhômhai laia an khêk mur mura; An irsinsianahai chu irsinsiana hrangin an târ tâka.

⁵Mi, rampuia thing Hreipuia phûrhai angin an inlang.



- ⁶Atûn chu a thil sin enhoihai murdi chu hreite le mârtûlhaiin an insiathai tâka.
- ⁷A hmun irthiang chu an hâla; Ni'rhming omna chu irnênga ngîm rak ang dôrin an ûm tâka.
- ⁸An lungrîla chu, "Insiat zithai ei ti," an tia. Hi rama Pathian inkhômna in murdi hi an hâl siat zoi tâka.
- ⁹Kin irsinsianahai chu hmu ta ma unga; Deipu rêng rêng kin laia om mahai.
- ¹⁰O Pathian, doitu'n chu i dôr ten mo nang a hril insiat hrang? Râlin chu kumkhua'n nang a insîr insiat hrang ma ni?
- ¹¹Ithoa mo ni kut, ni kut chang tiang kha mi ilâk mo an tia? Kêlsua nôkin lân, inboipaihai roh.
- ¹²Khannisianlân, Pathian chu tianlai ata ki Reng a ni, Irnêng inlâina taka saninhringna siam ngaitu chu.
- ¹³Nangma'n chu ni hrâtna'n tuikhanglian kha a'rsentira: Nangma'n chu tuia dragonhai lu kha nin khoitira.
- ¹⁴Nangma'n chu Levia thân luhai chu nin khoi chita, Ama chu ramchâra mi omhai kuang khan bu ngheiin ni pêka.
- ¹⁵Nangma'n chu tuihnârhai le tuipûthai nin pût suaktira; Nangma'n chu tuipuihai nin kangtira.
- ¹⁶Sûn hi ni ta a nia, zân khom hi ni ta a ni; Nangma'n misa le tha ni siama.
- ¹⁷Nangma'n irnêng ramri murdihai nin rêta; Nangin fûr le sâl nin omtira.
- ¹⁸O Rengpa, hi hi inhre mai ro, doitu hai khan nang an hrilsiat, Pathian ngaisak loi mihai khan nir hming an insîr insiat ngai.
- ¹⁹O, ni vasu hringna hi ram sahrâng kuang khan pe viat no ro: Ni mi inrianghai hringna hi kumkhua'n irnghil no ro.
- ²⁰Thuthung kha zuang ngaisak ro: Irnêng hmun inthim lai hai chu nunrôngna omna'n a sip tâka.



²¹O, nêpsiana tuanghai chu mualinphoiin inom no'n lân; Inrianghai le farahai khan nir hming inpâk ri sehai.

²²O Pathian, thoiin lân, nangma thu chu ni bingin insîrin lân. Mi'nvêtin chu sîn sôtin nang a insîr insiat kha inhre mai roh.

²³Nangma doituhai irhai chu irnghil no ro: Nang a doituhai irhai irse mer mur chu a hong intông mai ngai a ni.

Inpâkna Hlahai 75

Pathian roirêtu

Hla hruaitu hrangin, Al-tashheth sak hrang Asafa inpâkna hla

¹O Pathian lômthu nang kin hril; Lômthu nang kin hril, nir hming anai sikin: Mihaiin ni sintho irkhêl tho thuhai kha an hril ngai.

²A zoro ki inkunga khan Dik takin roirêl ni ti.

³Irnêng le a chung a om murdihai chu an zôi zoi ta: Keima'n a chopuihai kha ki iphun a ni.

⁴Mi irsorhai kuang khan, "Irsor takin om no roi," ki ti saa. Mi siahai kuang, "Irpâk no roi," ki ti saa.

⁵Mi siahai kuang khan, "Irsor ta no roi ki ti pea," a tia.

⁶Irsângna chu sak tiang ata ni ual ma, thang tiang ata ni ual ma, sim tiang ata ni ual sa mah.

⁷Pathian chu roirêtu a ni ual: Ama chu inkhat an lômtira, inkhat a'rsângtir ngai.

⁸Rengpa kuta chu khilât a oma, a uain chu a phûla: Thil dang leh inchok polin a sipa, khatak ata kha a bun suaka: A'rnôihai ten khom irnênga mi siahai murdi'n infâipai rip an ti.

⁹Khannisianlân kei chu kumkhua'n nang inhriattir ki ta, Jakoba Pathian inpâkin zâi ki ti.

¹⁰Mi siahai khom irsortir ki ti; Mi felhai rêk chu irsângtirin om an ti.

Inpâkna Hlahai 76



Inhnêtu Pathian

Hla hruaitu hrangin; serânda chi dang danga sak zat Asafa inpâkna hla

- ¹Judahai laia chu Pathian chu inhriatin a oma: Israelhai laia chu ar hming a roiinpui a ni.
- ²Salem-ah khan a kairênghai chu a oma, khan, ama omna chu Zion-a a oma.
- ³Kha khan thalhai chu an siata: phôhai, khandai hai, irdoina hai leh.
- ⁴Nang chu ni roiinpuiin nir khêl bâka, rállâk sum siakhômna tânga khan.
- ⁵Pasal sahai chu irokin an oma, An inmusu pat tâka; Mi hrâthai khomin tukhomin an kut irlek thei ta mahai.
- ⁶O Jakoba Pathian, ni halirchûna sikin tâli le sakor khom inmusutir patin an om ruai ruaia.
- ⁷Nang, nangma ngei khom, chi hrang ni nia: Ni ning an mur tâk le khom, tu mo ni mit hmua ngîr thei hranga?
- ⁸Ni roirêl thu chu irvân ata nin hriattira; Irnêng hin a chia, a dâihrek tâka,
- ⁹Irnênga mi thuhnuairôl murdihai saninhring hranga, Pathian chu roirêl hranga a thoi lai khan.
- ¹⁰Mihriam ninginmur khan nang a roiinpuitir uala, Ning nin murin a hmâihai chu irkhit a ti.
- ¹¹Thu inkung unglân, Rengpa nin Pathian ata sua roi: A kôla mi murdi chu chi hrangpu kha lômmanhai hong chôi pe ri sehai.
- ¹²Ama khan roirêltuhai hâina chu sât inbong a ti: Ama chu irnênga rênghai hrangin chi a iom a ni.

Inpâkna Hlahai 77

Chardong laia irtharngamna

Hla hruaitu hrangin; Jeduthuna dânin Asafa inpâkna hla

- ¹Ki'rhaiin Pathian chu insam ki ta, ki'rhaiin Pathian ngei kha insam ki ta, Ama khan keima tiang a beng zuang dô a ti.



- ²Ki chardong nî'n chu Rengpa ki zonga: Ki kut hi zâna khom inthâ loiin phar mai ki ti; Ki hringna hin irtharngam nuam maka,
- ³Pathian kin hriat maia, ki buai ngai: Ki'rngaituaa, ki'rtha hi a'rzal ngai.
- ⁴Zân sôtin a nin mengtir mai ngaia: Chong theiloi rakin ki char a dong ngai.
- ⁵Tianlai nikhuahai ki ngaituaa, Tianlai kumhai khom.
- ⁶Zâna ki'rngaitua ki'rngaituaa, Ki'rdon irhlôma, ki'rsam irhlôm ngai; Ki'rtha khomin sathnem irngai takin a zonga.
- ⁷Rengpa khan kumkhua'n a inthâ hrang mani o? Itika khom a ilôm ta loi hrang mani o?
- ⁸A lungkhamna chu kumkhua'n a iboi theng thai ta hrang mani o? A thu'nkung chu irlo tin tin dênin a iboi hrang mani o?
- ⁹Pathianin lungkhamna a irnghil mani o? Ninginmurin an rennahai chu a ikhâr ma ni tâk?
- ¹⁰Khan, "Kha kha ki hrât lolina sika a ni; Khannisianlân Anchungtaka kut chang tiang kumhai kha inhre mai ki ti.
- ¹¹Rengpa sintho thuhai kha insîr ki ta; Tianlaia ni sintho'rkhêl thohai kha inhre mai ki ti.
- ¹²Ni sintho murdihai kha ngaitua sa ki ta, Ni sinthohai khom kha sût ki ti," ki tia.
- ¹³O Pathian, ni lampui chu hmun irthianga a oma: Kin Pathian ang hi Pathian roiinpui tu mo om hrang?
- ¹⁴Nang chu sintho'rkhêl tho ngaitu ni nia: Mi tin laia ni hrâtzia nin hriattir ngaia.
- ¹⁵Ni bânin mihai ni sansuaka, Jakoba le Josefa nâihai chu.
- ¹⁶O Pathian, tuihaiin nang an hmua; Tuihai khan nang an hmua, nang an chia; Tui inthûk takhai an inthing sa a ni.



¹⁷Sûmhai khin tui an bunpaia; Irvânhai khin irhâi an insuaktira: Ni thalhai khom a'rtêk lo lopa,

¹⁸Ni khonri irhâi chu kêllaiherin a oma; Kôlirtêkhai khan rammual hi a êl dop dopa: Irnêng hi inthingin an hnîng dût dût a ni.

¹⁹Ni lampui chu tuikhangliana a oma, Ni lampuihai chu tui irzat taka a oma, Ni hnunghai khom hmu thei ni mah.

²⁰Mosia le Arona kutin ni mihai chu belra rual angin ni hruai ngai.

Inpâkna Hlahai 78

Pathian le a mihai

Asafa Maskil

¹O ki mihaio, ki dân thua hin beng hong dô unglân: Ki bâia thuhaia hin beng hong dô roi.

²Chongirkhek thu'n ki bâi âng ki ta; Tianlai thurîl insîrhai kha insîr suak ki ti.

³Khahai kha ei mikuarin ei inhriata, ei lungrîlin an hriat saa, Ei irchibulhai khomin an ni ihril kha.

⁴Khahai khan an nâi le tehai kuang hin thup no ia, Thoiintha la hong om hrang kuang Rengpa inpâkna thu le, A hrâtzia le a sintho'rkhêl tak thozihai kha hril ual ei ti.

⁵Jakobahai laia thu'n hriattir an dettira, Israelhai laia dân an kunga, Khahai kha irchibulhai kuang thupêkin a pêka. Anni chu kha thuhai kha an nâihai kuang inhriattir hrangin:

⁶Thoiintha la hong om hrang, nâipang la hong suak hranghai khan, an inhriat theina hrangin; Khahai kha an thoia, an nâihai an la hril irzôt maina hrangin:

⁷An sabeina chu Pathiana an irngat theia, Pathian sinthohai chu irnghil mahaia; A thupêkhai chu an zôm ualna hrangin.



- ⁸Le, an irchibulhai anga, Irlo tukullian le tehelzong; Irlo milung siam indik loi, Pathian ata lungrîl iamom hong irput an om loina hrangin.
- ⁹Efraima irchihai chu râlthuama irbela, thal ngul chôiin, Irbei nîa chu laizâm an thoa.
- ¹⁰Pathian thuthung chu zôm mahaia, A dâna om nuam sa mahaia,
- ¹¹A sinthohai chu an irnghila, A sintho'rkhêl tho a irhmutirhai leh khan.
- ¹²An irchibulhai mithmua sinirkhêl tak a tho ngai, Aigupta rama, Zoan phâia khan.
- ¹³Tuikhanglian chu a'rsentir phata, an fetirhaia; Tuihai chu i i ei isia rum angin an ngîrtira.
- ¹⁴Sûna chu sûmin a hruaia, Zân sôtin mei vârin a hruai sa ngai.
- ¹⁵Ramchâra khan lungpuihai an khoitira, Tui inthûk tak ang dênin, nuam dôra in hrang a pêka.
- ¹⁶Lungpui ata chu tuidunghai an suaktira, Tuihai chu tuidunghai angin an luang intâktira.
- ¹⁷Khaang dôr khomin a chungâ thil an la tho'nsuala, Ramchâra khan Anchungtaka chungâ khan tehel an zonga.
- ¹⁸An irzuk inboina hrangin fâkrua ngênin an milungin Pathian an fiaa.
- ¹⁹A ni, Pathian an hrilsiata, "Ramchâra hin Pathianin khahai ar fûktir thei moa?"
- ²⁰Irngai ta, lungpui kha a zêma, tuihai kha hong pût suakin, ivadunghai kha a hong lêt zun zun tâka; Bu khom a pêk thei zoi moa? A mihai ta hrangin hmê mo ar fûk theia?" an tia.
- ²¹Khanchu Rengpa'n a lei inhriata, a ning an mur tâka: Jakoba-hai chungâ mei a zuang chok suaka, Israelhai chungâ ningmurna a hong pung tâka;
- ²²Pathian iam mahaia, A saninhringna khom an iam no sikin.
- ²³Khannisianlân chung tiang irvân dumhai khi an hong pea;



- 24 An fâk hrangin mana an tâktira, Irvân bu a ipêk a ni.
- 25 Mihriamhaiin mi hrâthai bai kha an fâka: khopna hrang rakin bu a zuang pêka.
- 26 Nisua tianga phâivua chu irvâna an thotira: A sinthotheina'n sim phâivua kha a hruaia.
- 27 Vâ chu bâli ang dôrin an chung a tâktira, Vâ mitha nei chu tuikhangliana chiaî zât dôrin.
- 28 An riakhmun laia an tâktira, An omna kôl vêlhaia khan.
- 29 Khanchu an fâka an khopa, An irzuk tak kha a ipêk tâk a ni.
- 30 An irzuk la boi maka, An bu chu an bâia a la oma.
- 31 Kha laitaka khan Pathian ningmurna a zuang punga, An mi hrât hrâthai senkhat a thata, Israel ruathartehai chu a zêm polhaia.
- 32 Khaang dôra khom khan thil an la tho'suala, A sintho'rkhêl thohai kha iam ual hliak mahai.
- 33 Khasikin an dam sâng nikhuahai kha mâkana'n an boitira, An dam sâng kumhai chu chitna'n an boitira.
- 34 A thathai rikipin ama an zong ngaia. An kîr nôka, zîng taka Pathian an zong ngaia.
- 35 Pathian chu an lungpui a nih ti le Pathian Anchungtaka kha an irtantu a nih ti an inhriat suak ngaia.
- 36 Khannisianlân ama chu an bâiin an inpâk pa paia, An mileiin an kuang milak thu an insîr ngai.
- 37 An milung kha amaa khan dik maka, An milunga khan iamom sa mah.
- 38 Khannisianlân, ama chu inrennaa a sip sikin an pualoina kha a ngaidama, anni kha inboihai ma: A ni, voi tamtak a ningmurna kha a lâk kîra, A ninginmurna kha a rêngin insuak nuam ngai mah.



- ³⁹Taksa vai a nih ti an hriat chiana; phâivua, kîr nôk loi hranga tho thengthai ngai ang hi.
- ⁴⁰Ramchâra khan a chung a tehel an va zong intama. Ramchâra khan ama kha bei an indong intam bâka!
- ⁴¹An irhei kîr nôkin Pathian an fiaa, Israelhai Mi Irthiang chu an innuartir ngai.
- ⁴²A kut chu inhre mai mahaia, Doitu ata a saninzôk nî chu inhre mai ngai mahai.
- ⁴³Khaanga Aigupta rama a'rsinsianahai a siaa, Zoan rama a sinirkhêlhai a sia saa;
- ⁴⁴ An vadunghai chu thisena an changtir sa kha, khanchu in thei ta mahaia.
- ⁴⁵ An laia thoivâi tamtak a tîra, kha khan a fâkhaia; Uichokhai a tîr saa, kha khan an boitirhai tâka.
- ⁴⁶ An thil mônghai khom kha longak a pêka, An sinsôl ra chu khâihmimse a pêk saa.
- ⁴⁷ An grep hruihai chu irialin a thata, An theipui kunghai khom kha ivurin a that saa.
- ⁴⁸An sahai khom kha irial a pêka, An sa pâlhai kha michêk an dêngtir saa.
- ⁴⁹A satêna a ningmurna kha an chung a chum, Ningmurna hai, lunghoi tak tak hai, Lungzîngna hai hi, Thil saloi tak intungtu tîrtôn pâl kha.
- ⁵⁰A ninginmurna hrang khan lampui a siam pea; A hringna chu hrî a pêk lik tâka;
- ⁵¹ Aigupta rama nâilutîr om murdi a thata, Hama puan inhaia an hrâtna ra masa takhai chu:
- ⁵² Khannisianlân ama mi hai chu belra angin a hruai suakhaia, Belra pâl angin ramchâra khan a hruaia.



- ⁵³ Satakin a hruaia, khanchu ite chi ta mahai: Khannisianlân tuikhanglian khan an râlhai kha ar khû zoi tâka.
- ⁵⁴ Khan, a hmun irthiang ramri kha a hruai intunga, Hi tâng, a kut chang tiang a ilâk hi.
- ⁵⁵ Nam tin chu an makunga an hnot suaka, Anni kha hruia irkhi'n irchon hrangin a sema, An puan inhaia khan Israel namhai kha an omtir tâka.
- ⁵⁶ Khannisianlân, Pathian Anchungtaka kha an fiaa, a chung a tehel an zonga, A thu inhriattirhai kha zôm mahai;
- ⁵⁷ Irheikîrin, an irchihai angin vârirlet takin an tho lik tâka: Thal ngul iamom loi angin an fe kôia.
- ⁵⁸ An hmun irsânghaiin ama kha an ninginmurtira, An millim siamhaiin an inhnarsatira.
- ⁵⁹ Pathianin kha kha a lei inhriatin a ning an mura, Israelhai kha a sân an tirhai tâka:
- ⁶⁰ Khanchu Silo biak in, Mihriam laia a puan in sia kha a rotsana;
- ⁶¹ A hrâtna kha suaka an mantira, A roiinpuina chu doitu kuta an mantir saa.
- ⁶² A mihai kha khandai kuang a pêka; A'rchon chung a khan a ning an mur tâka.
- ⁶³ Meiin an ruathartehai kha a kâng irhmanga, An dôngmatehai khan inneina hla rêng rêng nei ta mahai.
- ⁶⁴ An Ochaihai kha kandaia intûktirin an oma; An meithâihai kha chap viat viat mahai.
- ⁶⁵ Kha zoro lai khan Rengpa chu, mi an ina an ihar angin, a har tâka, Mi hrât uain sika khêk angin.
- ⁶⁶ Ama doituhai chu a zêm inkîrtira, Kumkhuaa irhming siatna an hlotir tâka.
- ⁶⁷ Kha no khom kha Josefa puan in kha nuam maka, Efraima nam chu inthang sa maka;



⁶⁸Juda nam chu an thang lika, A lungthung Zion tâng chu.

⁶⁹A in irthiang chu irvân irsâng hai ang khin a sina, Kumkhuaa hrangin an dettir irnêng ang hin.

⁷⁰A siahlo Davida kha an thanga, Belra pâl laia irthokin a kaisuaka.

⁷¹Belrapui a tê hruai hai zuitu ata a hruai suaka, A mihai Jakoba-hai le ar chon Israel hai infâ hrangin.

⁷²Khanchu ama khan a milung satna ang zêlin annihai kha an fâa; A kut thiamna'n a hruai tâka.

Inpâkna Hlahai 79

Nam pumpui san hranga ngênna

Asafa inpâkna hla

¹O Pathian, iamloi namhai chu nir chona hin an lûta, ni biak in irthiang hi an porinchetira, Jerusalem hi an insiat tâka.

²Ni siahlohai ruak chu chunglêng vâhai bua an pêka, Ni mi irthiang hai hmê chu ramsahai an pêka.

³An thisen chu Jerusalem kôl vêla tui angin an bunpaia; Anni phûmtu hrang lak tûte om mahai.

⁴Ei kôl vêla mihai hrilsiatin ei lei oma, Ei kôl vêla mihai hmusit le innuisanin ei lei om tâka.

⁵O Rengpa, ni ningmur kumkhua hrang ma ni? Ni ihnarsâna kha mei angin a ichok hrang ma ni?

⁶Nangma inhre loi nam tin chung a hin ni ningmur chu insum roh, Ni'rhming irlam loi ram chunghaia khom.

⁷Jakoba-hai chu an fâk zoia, An omna chu an ramtir tâka.

⁸Ei irchibulhai pualoina kha ei chung a khan inhre mai no ro: Ni inrenna khan ni nghâk lat ri se: A satêna irhniamtirin ei om tâka.

⁹O ni saninhringtu Pathian, nir hming roinpuina hrangin ni changpuiin lân: Ni'rhming sikin ni saninhringin lân, Kin sualhai hi infâtir roh.



¹⁰Ithoa mo nam tinin, “Kho mo an Pathian kha te?” an iti. Ni siahlohai thisen suak phuba lâkna chu ei mithmua nam tin laia hin inhriat ni ri se.

¹¹Mi intâng inrûm chu ni makunga tung ri se; Ni sinthotheina irkhêl sikin thi hranga inkunghai chu inzôkin lân;

¹²O Rengpa, nang an ihrilinsiatna kha, Kin kôl vêla mihai an dârsuama a bâk sari’n thuan nôk roh.

¹³Khanchu, keini ni mihai, ni sa lêngna hmuna belrahai hin, Kumkhua’n, lômthu nang hril kin ti: Irlo tin tin dênin nangma inpâkna chu nang inhriattir mai kin ti.

Inpâkna Hlahai 80

Nam inding nôkna hranga ngênna

Hla hruaitu hrangin; Sosanim-Edutha sak hrang Asafa inpâkna hla

¹ O Israelhai vêngtu, Belra pâl anga Josefa-hai hruaitu, mikuar lei do roh; Nang cherubhai chung a toi kha, zuang vâv suak roh.

²Efraimhai le Benjamina-hai le Manasea-hai mithmua khan ni hrâtna kha insua’n lân, Ni saninhring hrangin zuang roh.

³O Pathian nir heikîrtir nôkin lân; Ni hmêl kha invârin lân, khanchu saninhringin om kin ti.

⁴O Rengpa, sipaihai Pathian, Idôr ten mo ni mihai chongchaina chung a hin ning ni inmurtir hrang?

⁵Anni kha mitrithi baiin nin fâa, Mitrithi hi in hrangin irtêna lian takin ni pêk ngai.

⁶Nangin kin kôl vêla mihai hrangin irsêlnaa ni ni siam ngaia, A ni doituhai chu an innui suam ngai.

⁷O sipaihai Pathian, nir heikîrtirin lân; Ni hmêl chu invârtir ro, khanchu saninhringin kin iom hrang a ni.

⁸Aigupta ram ata grep hrui ni hong lâka: Nam tin chu nin hnot suaka, ni phun tâka.



- ⁹A maton nin fâi thiaia, Inthûk takin irzung a kaia, ram chu a lua zit tâka.
- ¹⁰Tânghai chu a pop tuamin an oma, A ônhai chu Pathian sidar thinghai ang dên a ni.
- ¹¹A ônhai chu tuikhanglian dênin ar zâm suaktira, An chor irnoihai chu vadungpui dênin.
- ¹²Ithoa mo a pâlhai chu ni insiat? Lampuia fe murdi'n an inpot thâk tâk hi.
- ¹³Ramhnuai sangal chu an siata, Ramsahai khomin an fâk ngai.
- ¹⁴O sipaihai Pathian, lungkham takin irheikîr nôk roh,
- ¹⁵A kung ni kut chang tiangin a phun le, A ôn ni ta hrangin ni inngartir leh hin.
- ¹⁶Meia a kâng ta, irkitin a om ta: Ni hmêla halirchûna sikin an irhmang ngai.
- ¹⁷Ni kut chu ni chang tiang mi chung a om ri se, Mihriam nâipa ni hranga nin hrâtir chung a hin.
- ¹⁸Khanchu nang kîrsan no ni ung: Nin hartirin lân, khanchu nir hming irlam kin ti.
- ¹⁹O Rengpa, sipaihai Pathian, nir heikîrtir nôkin lân; Ni hmêl chu invârtir nôk ro, khanchu saninhringin om kin ti.

Inpâkna Hlahai 81

Kût nikhuaa hla

Hla hruaitu hrangin; Gititha sak hrang Asafa inpâkna hla

- ¹Pathian nin hrâtirtu chôiindômin râifân takin zâi unglân: Jakoba-hai Pathian chôiindômin raifân takin khêk roi.
- ²Inpâkna hla sak unglân, khuangte hai, serânda irhâihoi tak hai, perkhuang hai leh hong chôi roi.
- ³Tha thara chu bekul tum unglân, Tha rîlhai, ei kût nia khan.
- ⁴Israelhai ta hranga thu'nkung a nia, Jakoba-hai Pathian dân a ni.



⁵Kha kha Josefa-hai laia thu inhriattirna hranga a ni: Aigupta ram chung a fe suak lai khan: Ki chong inhriat loi mikuara kin hriatna kha.

⁶An dâr chu thil rik ata ki lâkpaia: Nin puakhai chu nangni ki'rnghattira.

⁷Lunginzîngin nin ni koia, nangni ki saninzôka; Khonri irbîkna hmuna khan nangni ki sâma; Meriba tuihaia khan nangni ki fia kha.

⁸O, ki mihaio, irngai unglân, nangni kin hriattir: O Israelhaio, ki thu irngai nuam unglân chu o!

⁹Ram dang pathian rêng rêng chu nin laia an iom hrang ni maka; Mi dang pathian rêng rêng chu nin ibiak viat hrang ni ma.

¹⁰Kei, Rengpa nin Pathian kha ki ni, Aigupta ram ata nangni hruai kâitu kha: Nin bâi âng irzat unglân, nangni insip pe hrang a ni.

¹¹Khannisianlân ki mihai khan ki'rhâi irngaitua mahaia; Israelhai khan ni nuam mahai.

¹²An lungrîl ngar sikin kin thâ tâka, an nuan lam taka om hrangin.

¹³O, ki mihai hin ki thu irngaiin, Israelhai hi ki lampuihaia hin fehaisianlân chu o!

¹⁴An râlhais chu kin lômtirhai latin, Anni doituhais chung a khan ki kut ki inlek hrang pial te,

¹⁵Rengpa khôkmâktuhais chu a makunga inthingin kûn an ta, Kumkhua'n hrem tuang an ti.

¹⁶Nangni chu bu tui takin nangni infa ki ta, Lungpuia khuaih lutuiin nangni inkhoptir ki ti.

Inpâkna Hlahai 82

Pathian roirêtu roiinpui tak

Asafa inpâkna hla

¹Pathian chu Pathian inkhômna siama khan a ngîra; Pathianhai laia roi a rêla.

²I dôr tena sôtin mo dikloi taka roi nin rêla, Mi siahai chu nin inditbîkhai hrang?



³Inrianghai le pa nei loihai roi kha rêl unglân: Intak tuanghai le invâihai chungha khan indit roi.

⁴Inrianghai le invâihai kha san unglân: Mi sia kut ata saninzôk roh.

⁵Inhre mahaia, inhriat thiamna nei ual mahai; inthima an irvâk an irvâka: Irnêng irngatna murdi chu an hnîng tâka.

⁶“Pathianhai nin nia, Nin rêngin Anchungtaka nâihai nin ni,” ki ti kha.

⁷Khannisianlân mihriamhai ang dênin la thi nin ta, Mi lian inkhatpa angin la tûk nin ti.

⁸O Pathian, thoiin lân, irnêng roi hi rêl ro: Nam tinrêng hi ni ta an ni.

Inpâkna Hlahai 83

Israel râlhai inhnêna hranga ngênna

Hla, Asafa inpâkna hla

¹O Pathian chong loiin om no ro: O Pathian, dâihrek no'n lân, om chian chian no roh.

²Irngai ta nang a doituhai chu an pût mur mura: Nang a khôkmâktuhai chu an tang vung vunga.

³Ni mihai hi vâirilet takin an irsiama, Ni mi thuphai chungha hin a siat lamin an irti irhlôma.

⁴“Thoi, an nam irhmang rakin inboihai ei ti! Israelhai irhming rêng rêng hi inhriat chiana a om ta lina hrangin,” an tia.

⁵Thu irrualin an irti irhlôma; Ni chungha a siat lama, tho hrangin chong an inkunga.

⁶Edom-hai le Israelhai puan in hai, Moabhai le Hagar-hai;

⁷Gibal-hai le Amon-hai le Amalek-hai; Filistia-hai Tura khuaa omhai leh:

⁸Assuria-hai khom anni tiang an kop saa; Lota irchihai an changpuia.

⁹Annihai chu Midian-hai chungha ni itho ang hai, Kison dunga Sisera chungha ni itho ang hai, Jabina chungha ni itho ang khan tho ro:



¹⁰Kha mihai kha Endor khuua an irhmanga; Irnêng hrangin hri ang dên an hong ni tâk kha.

¹¹An mi lianhai chu Oreba le Zeeba ang khan siamin lân, A ni, an rêng murdihai chu Zeba le Zalmuna ang khan siam roh.

¹²Kha mihai khan, “Pathian omnahai chu luapai pe ei ti,” an ti kha.

¹³O ki Pathian, annihai chu vâiphin irvêl but but ang hin siam ro; Bu’rsi phâivua’n a isêm invuang mur mur ang hin.

¹⁴Ram kângtu meidôn ang le, Tâng kângtu meidôn ang hin;

¹⁵Anni chu ni phâivopuiin irzûlin lân, Ni phâivua hrâttak angin inchitir roh.

¹⁶O Rengpa, nir hming an zong theina hrangin, An hmêl chu inzakna’n insip roh.

¹⁷Kumkhuua’n mualphoi le lungzîng takin om sianlân; A ni, inzaktira omin irhmang ri se:

¹⁸Nangma vai hi JEHOVA irhming irput, Irnêng murdi chung a Anchungtak ni nih ti an inhriat theina hrangin.

Inpâkna Hlahai 84

Pathian ina om irzukna

Hla hruaitu hrangin; Gititha sak hrang Kora nâihai inpâkna hla

¹O sipaihai Rengpa, Ni omnahai chu a hoi bâk ngaia!

²Ki hringna hin Rengpa biak in hualsûng kholaihai chu ar ngai tak taka, a ni; a sôl sa raka; Ki milung le ki taksa hi Pathian hring kuanga khan a khêk suaka.

³O Sipaihai Rengpa, ki rêng le ki Pathian, Ni maichâm bulhaia khan chongzonghaiin irbu an kaia, Pêlôihai khomin irbu an neia, an têhai siana hrangin.

⁴Ni ina omhai chu an vân a sa e: Nang chu nang inpâk mai an ti.

⁵Nangmaa hrâtna nei mi chu a vân a sa e; A milunga Zion panna lamlianhai om kha.



⁶Chapna varuam kha an hro'n tuihnâr omnahai an siam ngaia, A ni, rotui tâk masa khan satvurna'n ar khû ngai.

⁷Hrâtna ata hrât nôk ualnaa an fe ngaia, Zion-a Pathian makunga khan an inlang seng ngai.

⁸O Rengpa, sipaihai Pathian, ki chongchaina hi nir ngaitua pe'n lân: O Jakoba-hai Pathian, ni mikuar lei do roh.

⁹O Pathian kin phô tak, en ta, Ni sahriak poltu hmêl hi en ta.

¹⁰Ni biak in hualsûng kholâia sîn khat om hi, sîn sângkhat nêkin a sa uala. Pualoina puan inhaia om nêkin chu, Kin Pathian ina mikot enkoltu ni khom ki nuam ual a ni.

¹¹Rengpa Pathian kha misa le phô a ni: Rengpa khan lungkhamna le roiinpuina nang pe a ta: Diktaka omhai ata chu thil sa rêng rêng inhnar no ni.

¹²O sipaihai Rengpa, Nangma iam mi chu a vân a sa e.

Inpâkna Hlahai 85

Nam satna hranga chongchaina

Hla hruaitu hrangin, Kora nâipahai inpâkna hla

¹Rengpa, ni ram chung a hin ni lôma: Jakoba-hai, suaka an iom chu ni hruai kîr nôk tâka.

²Ni mihai pualoina ni ngaidama, An sual murdi nir khû zoi tâka.

³Ni ningmurna murdi chu ni lâkpaia; A satêna ni ningmurna kha nir heisan tâka.

⁴O ni saninhringtu Pathian, nir heikîrtirin lân, Kin chung a ni ninginmurna chu inmong roh.

⁵Kin chung a kumkhua'n ni ning ni inmurtir hrang ma ni? Ni ninginmurna chu irlo tin tin dênin ni inlangtir mai hrang ma ni?

⁶Nangmaa khan ni mihai an raifân theina hrangin ni inhartir nôk loi hrang ma ni?



⁷O Rengpa, ni lungkhamna chu nin hmutir nôkin lân, Ni saninhringna chu ni pe sa roh.

⁸Pathian Rengpa thu'nsîr hrang chu irngaitua ki ti: A mihai le a mi irthianghai kuang irtharngamna thu a insîr hrang a ni: Khannisianlân anni chu invêtna tiang irhei ta no ri sehai.

⁹A saninhringna chu ama chituhai nâia khan a om ngêt ngêt ngai a ni; Kin rama hin roiinpuina a om theina hrangin.

¹⁰Lungkhamna le thutak an irtonga; Felna le irngeina an irtuma.

¹¹Thutak chu milei ata a hong inchor suaka; Felna khan irvân ata a zuang vâ tâka.

¹²A ni, Rengpa khan thil sa pêk a ta; Kin ram hin a thil mông chu pe sa a ti.

¹³Felna chu a mâ hruai a ta, A hnunghai chu lampuia siam a ti.

Inpâkna Hlahai 86

Changpui ngênna *Davidâ chongchaina*

¹O Rengpa, keima tiang hin ni beng zuang do'n lân, ni sâm ro; Inriang le invâi tak ki ni hi.

²Ki hringna hi vong insa ro; Pathian uksak mi ki nia: O, nang ki Pathian, nangma iamtu, ni siahlo hi saninhring roh.

³O Rengpa, lung nin kham ro; Sîn nitungin nang kin sam ngaia,

⁴Ni siahlo hringna hi inlôm-tir ro; O Rengpa, ki lungrîl hi ni kuang ki siakhak ngaia.

⁵Rengpa, nang chu ni saa, ngaidam ni nuama, Nang a koitu murdi chungâ lungkhamna ni sip ngai a ni.

⁶O Rengpa ki chongchaina hin ni beng zuang do'n lân; Lungkham ki ngênna irhâi hi ngaitua roh.

⁷Ki lungzîng ni khan nang koi ki ta; Nangin ni ni isâm hrang a ni.

⁸O Rengpa, pathianhai laia nangma ang rêng rêng hi om mahai.



⁹ O Rengpa, ni isiam nam tinrênghai chu hong an ta, ni makunga hong kûn an ta; Ni'rhming chu hong chôindôm an ti.

¹⁰Nang chu ni roiinpuia, thilirkhêlhai ni tho sa ngaia: Nangma vai hi Pathian ni ni.

¹¹O Rengpa, ni lampui chu nin entir ro; ni thutaka om ki ti: Ni'rhming chi hrangin milung pumkhat ni'rputtir roh.

¹²O Rengpa ki Pathian, ki milung murdi'n nang inpâk ki ti; Ni'rhming hi kumkhua'n chôindôm ki ti.

¹³Ki chung a ni lungkhamna chu ar khêlin; Ki hringna hi khurpadop inthûk tak ata ni saninzôk tâka.

¹⁴O Pathian, mi lâripâkhaiin an ni beia, Mi nunsia omkhômhai khan ki hringna hi inboi tumin an zonga, Nang chu an makunga nang sia mahaia.

¹⁵Khannisianlân, O Rengpa, nang chu Pathian, inrennaa sip, lung nin kham theitak, milung ir-ial, lungkhamna le thutaka sip ni ni.

¹⁶O, keima tiang zuang irheiiin lân, lung nin kham ro; Ni siahlo hi ni hrâtna pe ro. Ni suaknu nâi hi saninhring ro.

¹⁷Ni ni ikan bîkna inlangtirin lân; A ni khôkmâktuhaiin kha kha hmu an ta, an mualinphoina hrangin, Rengpa, nangin ni ni changpuia, irtharngam ni ni sak sakin.

Inpâkna Hlahai 87

Jerusalem chôindômna

Kora nâipahai inpâkna hla

¹A lungphûm chu tâng irthianghaia khan a om.

²Rengpa khan Zion kul mikothai kha Jakoba-hai omna murdi nêkin a'rngaiinhlu ual a ni.

³O Pathian khopui, Ni chungchâng thu roiinpui takin an insîr ngai a ni.

⁴A nin hriattuhai laia an kop ti, Rahab le Babulon chungchâng thu insîr ki ti: Filistia le Tura hi, Ethiopia leh hin, en u ta; Hi mi hi khataka suak kha a ni.



⁵A ni, “Hi mi le so mi so amaa suak an nia; Anchungtaka ngei khan ama chu indettir a ti,” ti Zion chungchâng thu chu insîr an ti.

⁶Rengpa’n, mi tin irhming a’rziak tika chu, “Hi mi hi khataka suak chu a ni,” tiin tep a ti.

⁷Hla sak senkhathaiin, a lâmhai leh khan, “Ki ituina murdi chu nangmaa a ni, a iom a ni,” ti an ti.

Inpâkna Hlahai 88

Changpui ngênna

Hla, Kora nâipahai inpâkna hla Ezra mi Hemana hla phua

¹O Rengpa, ni saninhringtu Pathian, A sîn a zânin ni makunga nang kin sam ngaia:

²Ki chongchaina hi ni makunga lût sianlân; Nang kin samna irhâia hin ni mikuar zuang do ro:

³Ki hringna hi lunginzînghaiin a sipa, Ki hringna hin Seol chu a hong nâi tâka.

⁴Khurpadopa chumhai laia tep sa ki nia; Hrâtna rêng rêng nei loi mi ang ki ni:

⁵Râl thathai thâna irmuhai anga Mithi laia paithâk ki ni; Khahai kha chu inhre ta mak che, Ni kut ata irhmangtir an ni.

⁶Khurpadop irhnuai taka ni nin zâltir tâka; Hmun inthim tak, inthûk takhaia khan.

⁷Ni ninginmurna khan a ni del tâka, Nangin ni tui irsôn murdi’n a nin tâktir tâka.

⁸Ki hmêl hriathai chu ni hla vitin nin omtira; An ta hrangin intirom taka ni ni siam tâka: Khârkhakin ki oma, ki isuak thei ta loi a ni.

⁹Intakna sikin ki mit a siat tîr tîr tâka: O Rengpa, a nî tin nang ki koia, Nangma tiang ki kuthai ki phara.



¹⁰Mithihai hrangin sinirkhêl ni itho hrang ma ni? A thi tâkhai khan thoiin nang an inpâk hrang ma ni?

¹¹Ni lungkhamzia chu thâna inhriattirin, Ni iamomia chu irhmangna hmuna inhriattirin a iom hrang ma ni?

¹²Ni sintho'rkhêl thohai kha inthima inhriatin a iom hrang ma ni? Ni felna chu irnghilna rama inhriatin a iom sa hrang ma ni?

¹³O Rengpa, keima'n nang kin sama, Ki chongchaina khan zînga nang nghâk a ti.

¹⁴Rengpa, ithoa mo ki hringna hi ni ipaithâk mo? Ithoa mo keima tiang hin ni hmâi ni ithup?

¹⁵Ki nâipangte ata intak tuang le thi vâng vângin ki om ngai; Ni thil irkhêl takhai ki tuangin ki'rnaka a ni chel ngai.

¹⁶A satêna ni ningmurna khan a ni dea; Ni thil irkhêl takhai khan a nir hmangtir tâka.

¹⁷Kha khan sîn sôtin tui angin a ni vêla; A nir hual vêla.

¹⁸Lung ni thungtu le ki rual kha hlataka nin omtira, Ki hmêl hriathai chu inthima nin omtir sa tâka.

Inpâkna Hlahai 89

Ram buai laia hla
Ezra mi Ethana Maskil

¹Rengpa lungkhamna thuhai chu kumkhua'n hla'n sak ki ta: Ki bâiin ni iamomia chu irlo tin tin dênin inhriattir ki ti,

²"Lungkhamna chu kumkhua hrangin isinin om a ta; Ni iamomia chu irvânhaia ngei khin indettir ni ti," ki ti tâk a ni.

³Ki mi inthang kuanga khan thu ki thunga, Ki siahlo Davida kuanga khomâk ki sâm tâka;

⁴"Ni'rchi hai chu kumkhua hrangin indettir ki ta, Ni rêngtoihmun khom irlo tin tin dênin inding mai ki ti," tiin.



⁵O Rengpa, irvânhai khin ni sinirkhêl tho hi inpâk an ta; Mi irthianghai inkhômnaa khin ni iamomna hi inpâk sa an ti.

⁶Irvân dumhai khin Rengpa kuang chongirkhek thei tu mo om ni? Mi sinthoheitak nâihai laia khin Rengpa ang,

⁷Mi irthianghai chong irkhômnaa Pathian ichiom tak, A kôl vêla mi murdi nêka chi ual tak hrang chu, tu mo om hrang?

⁸O Rengpa sipaihai Pathian, O Rengpa nangma anga mi hrât tu mo an om? Ni iamomna chu ni kôl vêla a om.

⁹Nang chu tuikhanglian lâiripâkna chungaroi ni rêl ngaia: A tui irsôn irsok lai hai kha nin boitir ngai.

¹⁰Nangma'n chu Rahab chu râl ithat angin nin khoi chita; Nangma doituhai chu ni bân irnak hrâtin nin thekindarh tâka.

¹¹Irvânhai khi nangma ta a nia, irnêng khom hi nangma ta a ni: Rammual le a sênga thil om murdi hi nangma inding a ni.

¹²Sim le hmâr chu nangma isiam a nia: Tabor le Hermon chu nir hming sikin raifânin an zâi ngai.

¹³Nang chu bân sinthoheitak ni nia: Ni kut kha a hrâta, ni kut chang tiang chu chôiindômin a oma.

¹⁴Felna le roirêlna fel chu ni rêngtoihmun irnghatsan a nia: Lungkhamna le thutak chu ni makunga an fe ngai.

¹⁵Irhâi raifânôm inhre ngai nam chu an vâna sa e: O Rengpa, anni chu ni hmêl vâra an om ngaia: Ni felna sikin chôiindômin an om ngai.

¹⁶Nangma sikin sîn misa tâkin an om ngaia, Ni felna sikin nang an inpâk ngai.

¹⁷Nang chu an hrâtna roiinpuina ni nia: Ni ikanbîkna sikin chôiindômin kin om ngai.

¹⁸Kin phô hi Rengpa ta a nia; Kin rêng hi Israelhai Mi Irthiang ta a ni.



¹⁹Kha zoro lai khan ni mi irthianghai kuang inlârnaa thu nin sîra, “Mi inkhat hrât tak puma khan changpuina ki’rnghata; Mi inkhat, mihai laia inthang suak chu ki chôindôm tâka.

²⁰Ki siahlo Davida chu ki hrûta: Ki sahriak irthiang khan ama chu ki pol tâka:

²¹Ki kut hi a kuanga indetin om a ta; Ki bân hin ama kha inhrâtir a ti.

²²Râl khan ngam no nia; Mi sual khan irhniam viat no ni.

²³Ama doituhaia chu a makunga zêm inrîl ki ta, Ama khôkmâktuhaia kha soisak ki ti.

²⁴Ama kuanga khan ki iamomna le ki lungkhamna kha om ta a ta; Ki’rhming sikin chôindômin om a ti.

²⁵A kut chu tuikhangliana khan irnghat ki ta, A kut chang tiang tuidunghaia khan.

²⁶Ama khan, ‘Nang chu ka Pa, ki Pathian, ki saninhringna lungpui ni ni,” tiin nin sam a ti.

²⁷Khan, keiin ama kha nâilutîra siam ki ta, Irnêng rênghai laia anchungtaka siam ki ti.

²⁸Ki lungkhamna kha kumkhua’n ama hrangin vong insa ki ta, Ki thuthung chu a kuang om indet a ti.

²⁹A chi thâkhai kha kumkhua’n inomtir ki ta, A rêngtoihmun chu irvân om sâng ni dênin inomtir sa ki ti.

³⁰A nâihai khan ki dân hi an irheisana, Ki roirêlnahai angin om mahaia,

³¹Ki thu’nkung an porinchetira, Ki thupêkhai an vong insa no’n chu,

³²An tho’nchâinahai chu khianghrolin zuang kan ki ta, An pualoinahai kha zêmin zuang kan ki ti.

³³Khannisianlân, ki lungkhamna kha a kuang ata lapai pe zit no ninga, Ki iamomna kha milaka inchang phal viat no ning.



³⁴Ki thuthung chu porinchetir no ninga, Ki hmûra thu suak chu indanglamtir viat no ning.

³⁵Voikhat ki irthiangnaa sâlin khomâk ki sâma; Davida kuang milak insîr no ning.

³⁶A'rchi thâkhai kha kumkhua'n om an ta, A rêngtoihmun kha ki makunga misa angin om sa a ti.

³⁷Tha angin kumkhua hrangin indetin om a ta, Irvân duma inhretu iamom ang khin," ni tia.

³⁸Khannisianlân nangin chu hnôl nuam mak chea, Ni sahriak ipol chungga khan ni ning an mur tâka.

³⁹Ni siahlo thuthung chu nin tira: A rênglukhum chu irnênga paithâk rakin nir hniamtir tâka.

⁴⁰A dâi murdi chu nin siata; A kulpuihai chu nin siat tâka.

⁴¹Lampuia fe murdi'n a thil an lâkpai pe ngai: A kôl vêla mihai hrilsiatin a om tâka.

⁴²Ama doituhai kut chang tiang ni chôindôma; A râl murdi chu an râi nin fântir tâka.

⁴³A ni, a khandai bê chu nin môltira, Ama chu irbeinaa khan inding indettir ta mak chea.

⁴⁴A vârna kha nin boipai pea, A rêngtoihmun chu irnênga ni paithâk tâka.

⁴⁵A ruathar lai nikhuahai chu nin bong pea; Ama chu mualinphoina'n nir khû tâka.

⁴⁶O Rengpa, ni irbîk kumkhua hrang ma ni? Idôr ten mo ni ningmur chu mei angin a ichok hrang?

⁴⁷O, ki zoro hi a ibong hrang inhre maiin lân; Mihriam nâihai murdi hi ite ni loia ni isiam hi!



⁴⁸I ang mi mo thi nê hmêl hmu loia hring, Seol kut ata a hringna saninzôk hrang chu?

⁴⁹Rengpa, ni tianlai lungkhamna, ni iamomnaa Davida kuang khomâksâma ni inkunghai kha, Khôn mo a om tâk?

⁵⁰Rengpa, ni siahlohai an ihrilinsiatna inhre mai ro; Nam hrât takhai murdi hrilsiatna ki rôpsuama ki ituang ngaizia hi;

⁵¹O Rengpa, nangma doituhai hrilsiatna, Ni sahriak pol hnunghai hrilsiatna chu.

⁵²Rengpa chu kumkhua'n inpâkin om ri se. Amen, Amen.

Inpâkna Hlahai 90

BU MINLINA

(90-106)

Pathian itinrêng inkoltu

Pathian mi Mosia chongchaina

¹Rengpa, nang chu irlo tin tin dêna Kin omna ni ni ngai.

²Tânghai om mâna, Irnêng le rammual nin ding mân khom khan, Kumtuang ata kumtuang dên khomin nang chu Pathian ni ni.

³Nangma'n chu mihriam hi irhmangnaa nin fetir ngaia; "Mihriam nâihaio, kêr nôk roi," ni ti ngai.

⁴Nangma irngaiin chu kum sângkhat hi sîn khat ang a nia; Mizân theng tâk ang kha a nia, Zân dêrkâr tôite ang kha a ni.

⁵Anni chu tui lian angin nin tânpaia; Anni chu irmang ang an nia; Zînga chu hloisûl inchor suak ang an ni.

⁶Zînga chu a hong indônin a hong incher suaka; Khohloi tiang chu a hong thêmin, a hong chuai ngai.

⁷Ni ninginmurnaa inboipaiin kin oma, Ni ninginmurnaa lunginzîngtirin kin om saa.

⁸Kin pualoinahai chu ni makunga ni siaa, Kin sual thupinrûkhai chu ni hmêl vâra ni sia tâka.



⁹Kin dam sâng nikhua murdi hi ni ninginmurnaa a boi ngaia: Kin dam sâng kumhai hi lômthu angin kin inmong ngai.

¹⁰Kin dam sâng kumhai chu kum sômsari a nia, Hrâtna sikin kum sômriat khom a ni theia; Khannisianlân a sôtna chu sinsôlna le chardongna chian a ni; A boi lata, keini khom kin vuang irhmang ngai a ni.

¹¹Tu'n mo ni ninginmurna sinthotheizia inhriata, Nangma chi hrangzia anga ni ninginmurna kha inhriata?

¹²Kin dam sâng nikhuahai tep hrang lam nir chutir ro, Vârna milung kin nei sa theina hrangin.

¹³O Rengpa, zuang kîr nôk ro; idôr ten mo ni ning ni inmurtir hrang? Ni siahlohai chung thua khan ni lungrîl irlêkin lân.

¹⁴O, zînga chu ni lungkhamna'n nin siptir ro; Kin dam sângin kin râi a fânin kin lôm theina hrangin.

¹⁵Nangin deng ni nin theitir ni le, Thil saloi kin tong kum sâng zoro anghai khan nin lômtir roh.

¹⁶Ni sintho chu ni siahlohai kuang inlang sianlân, Ni roiinpuina chu an nâihai kuang inlang ri se.

¹⁷Khan, Rengpa kin Pathian satna chu kin chung a om ri se: Kin kut sintho hi kin chung a indettir sa ro; A ni, kin kut sintho hi indettir roh.

Inpâkna Hlahai 91

A ni vêngtu Pathian

¹Anchungtaka irbîkna hmuna omna chu Itinrêngthotheia irhlîma khan om mai a ti.

²Rengpa chungchânga chu, “Ama chu ki zôkna le ki kulpui; Ki Pathian, ki iiam kha a ni,” ti ki tih.

³Ama chu châng kamtu châng ata le Hri saloi tak ata khan nang saninzôk a ti.

⁴A mitha'n nang irkhû a ta, A mithâ hnuaiia tûk lût ni ti; A thutak chu pho chîn le pho lian a ni.



⁵Zâna thil ichiom chu chi no chi ni; Sûna thal hong inlêng ngai kha chi ual hliak no chi ni:

⁶Inthim hnuaia hri lêng ngai chu chi no chi nia, Sûn laia thil insiat ngai siatna chu chi ual hliak no chi ni.

⁷Ni sîra sâng inrîl an ta, Ni chang tiang nuai khat inrîl sa an ti; Khannisianlân nang chu nang nâi no ni.

⁸Ni mitin en ni ta, Mi siahai thuanna chu a hmu'n hmu ringot ni ti.

⁹O Rengpa, nang chu ki zôkna ni ni! Anchungtak chu ni omna'n ni hmanga;

¹⁰Thil saloi rêng rêngin nang tok no ni, Hri rêng rêng khomin ni puan in hong nâi viat no ni.

¹¹Ni lampui tinrênga nang inzôk hrangin, Ni chungchânga chu a vântirtônhai kha ircham a ipek hrang a ni.

¹²An kutin nang indom an ta, khano'nchu ni ke'n lung irfûina ni ti.

¹³Kâmkeibaknei le rûlpui chu sir ni ta: Kâmkeibaknei vânglai le rûlpui chu chîl chit ni ti.

¹⁴Ki chung a lungthungna a sip khak sikin saninzôk ki ta: Ki'rhming an hriat sikin hmun irsânga bâng ki ti.

¹⁵Ama khan ni koi a ta, khanchu sâm ki ti; Kei chu a lunginzîng lai khan a kuang om ki ta: Ama ki saninzôkin chôiindôm ki ti.

¹⁶Dam sôtna'n lung inchuktir ki ta, Ki saninhringna chu inhmudir sa ki ti.

Inpâkna Hlahai 92

Inpâkna hla

Inpâkna hla, Sabat ni hla

¹Rengpa kuang lômthu insîr le, O Anchungtak, nir hming inpâka zâi hi thil satak a nia:

²⁻³Thil tum thei hrui sôm neihai, perkhuang hai, serânda irhâi beiindong thei haia, Zînga ni lungkhamna inlangtir le, Zân tin ni iamomna inlangtir hi thil satak a ni.



⁴Rengpa, nang chu ni sintho'n a nin lômtira: Ni kut sinthohai sikin raifânin zâi ki ti.

⁵O Rengpa, ni sinthohai chu a roiinpui bâka! Ni ngaituanahai chu an thûk tak tak a ni.

⁶Mi môlin chu hi hi inhre maka; Mi'nvêtin inhre sa thei mah.

⁷Mi siahai hloisûl anga an hong inchora, Thil tho'nsualtuhai murdi an hong thoi hlut hluta hin, Kumkhua hranga irhmangtirin an iom hrang a lei ni hen, ti hi:

⁸O Rengpa, nang chu kumkhua hrangin irsâng taka om chian ni ni.

⁹O Rengpa, irngai ta, nangma doituhai hi, Irngai ta, nangma doituhai hi an irhmang hrang a ni; Thil tho'nsualtuhai murdi hi indarin om zit an ti.

¹⁰Khannisianlân ki'rkî hi selepa irkî angin ni chôindôma: Sahriak thara pol ki ni ta.

¹¹Ki mitin ki râlhai chung a ki inuamlam ten chu a hmu tâka, Ki bengin thil saloi thotu ni hong beituha chung a ki inuamlam tung irhâi chu an hriat ta.

¹²Mi fel chu tûm angin hong irsôn hlut hlut a ta: Lebanon tânga sidar thing angin irsôn duak duak a ti.

¹³Rengpa ina phunhai chu kin Pathian biak in hualsûng kholâia khan irsôn hlut hlut an ti.

¹⁴Tar hnunga khom la ra mai an ta; Tui pom ngitin hring mur an ti:

¹⁵Rengpa chu mi diktak a nih ti inlangtirna hrangin; Ama kha ki lungpui a nia, amaa khan felloina rêng rêng om mah.

Inpâkna Hlahai 93

Reng Pathian

¹RENG chu rênga a toia, a roiinpuina'n ar bela; Rengpa chu ar bela, hrâtna'n a kong a ar khit tâka: Rammual khom hi, an hnîng thei loina hrangin, indetin a oma.



²Ni rêngtoihmun chu tiana khan lei indet a ni ta: Nang chu kumtuanga lei om tâk ni ni.

³O Rengpa, tuidunghai khan an insuaka, Tuipuihai khan an irhâi kha an insuaka, Tuipuihai khan a sâna an irhâi chu an insuaka.

⁴Tui tamtak irhâi nêkin, Tuikhanglian irsôn hrât takhai nêk khomin, Chung tiang Rengpa chu a ihrât a ni.

⁵Ni thu inhriattirhai chu iam a om tak taka: O Rengpa, kumkhua'n Irthiangna hi ni in le a irhoi a ni.

Inpâkna Hlahai 94

Mi tin roirêltu Pathian

¹O Rengpa, nang phuba lâkna ircham neitu Pathian, Nang phuba lâkna ircham neitu Pathian vâ suak roh.

²Nang irnênga roirêltu, sinin lân: Lâripâkhai chu an sual man thuan roh.

³Rengpa, mi siahai khan i dôr ten mo, Mi siahai khan i dôr ten mo an ingam hrang?

⁴Anni chu an chong pai paia, hmâitâi takin thu an insîra: Thil tho'nsualtuhai murdi chu an irpâk irhlôm ngai.

⁵O Rengpa, ni mihai chu an irnôitira, Ni mihai chu deng an intheitir ngai.

⁶Meithâi le mikhual chu an thata, Pa nei loi chu an that ngai.

⁷"Rengpa'n hmu no nia, Jakoba-hai Pathianin irngaitua ual no ni," an iti ngai a ni.

⁸Mi laia mi môlhaio, irngaitua roi: Mi'nvêthaio, itika mo nin ivâr hrang tâk?

⁹Mikuar inkhoptu khan a inhriat loi hrang ma ni? Mit siamtu khan a ihmu loi hrang ma ni?

¹⁰Nam tin iseptu'n a ihalirchu loi hrang ma ni? Mihriam vârna irchutirtu khan?

¹¹Rengpa khan mihriam ngaituahai chu ite ni loi mai mai a nih ti an hriat.



¹²Rengpa ni sepna ni dân ni irchutirhai chu an vânei e!

¹³Mi sualhai tâkna hrang sirhup choi zoi mâka chu, Lungzîng nia sôl ni'rngamtir hrang a ni.

¹⁴Rengpa khan a mihai a ipaithâk hrang ni ma, A dongtum chu a irotsan hrang ni mah.

¹⁵Roirêlna chu felna tiang kîr nôk a ti: Milung diktak irput murdi khan kha kha zui an ti.

¹⁶Tu mo thil saloi thotuhai ni sabei pe hrangin thoi hrang? Tu mo thil tho'nsualtuhai ni sabei pe hrangin ngîr hrang?

¹⁷Rengpa chu ni changpuitu ni no sianlân chu, Ki hringna hi inrang takin hmun infiara a iom hrang a ni.

¹⁸“Ki kesir a châi,” ki ti'n, O Rengpa, ni lungkhamna khan ni ni kaia.

¹⁹Ki lungrîla ngaitua tamtak ki nei lai khan ni irtharngamnahai khan ki hringna hi an lômtir ngai.

²⁰Pualoina rêngtoihmun, dâna thil tho'nsualna siam ngaia khan, Iropolna nang a inei ma ni?

²¹Mi fel hringna bei tumin an pungkôm ngaia, Thisen sêlnaboi chu thiamno an changtir sa ngai.

²²Khannisianlân Rengpa chu ki kulpui irsâng a lei nia; Ki Pathian chu ki zôkna lungpui a lei ni.

²³Ama khan anni sualna ngei kha an chung a an chumtira, Anni satloina ngeia khan irhmangtir a ta; Rengpa ei Pathian khan irhmangtir a ti.

Inpâkna Hlahai 95

Inpâkna hla

¹O hong roi, Rengpa chôindômin raifân takin zâi ei ti. Ei saninhringna lungpui chôindômin raifân takin khêk ei ti.



²Lômthu insîrin a makunga fe ei ti, Inpâkna hla saka ama chôindômin raifân takin irhâi insua ei ti.

³Rengpa chu Pathian roiinpui tak a nia, Pathian murdi chung a Reng roiinpui tak a ni.

⁴Ama kuta khan irnêng hmun inthûk takhai chu a oma; Tâng sîp irsâng takhai chu a ta a ni sa.

⁵Tuikhanglian hi a ta a ni, ama isiam a nia; Mual khom hi a kut suak a ni.

⁶O hong unglân, chubai mûkin kûn ei ti; Rengpa ni Siamtu makunga khûksadel ei ti:

⁷ Ama chu ei Pathian a nia, Eini hi a sa vâina hmuna mi le, a kuta belrahai ei ni. A vuan hin ar hâi chu lei inhre ta unglân chu o!

⁸Meriba-ah an itho ang khan nin milung inngartir no roi, Ramchâra Masa nikhua ang khan:

⁹Kha zoro lai khan nin irchibulhai khan an nin thêma, Anni fiaa, ki sintho chu an hmua.

¹⁰Kum sômminli sùng dên kha mi irchihai chung a khan ki milung ni mah, “An milunga irngaiinsual hmang mi an nia, Ki lampuihai khom inhre mahai,” ki tia:

¹¹ Khasikin, “Ki irngamnia khan lût no nihai,” tiin. Ningmurin khomâk ki sâm tâka.

Inpâkna Hlahai 96

Pathian rêng roiinpui tak

(1 Tsn 16.23-33)

¹O, Rengpa chôindômin hla thar sak unglân: Irnêng lua murdihaio,

²Rengpa chôindôma hla sakin, ar hming inpâk unglân; A nitin a saninhringna thu chu inhriattir roi.

³Nam tin laia a roiinpuizia hril unglân, Mi tinrêng hai laia a sinirkhêl thohai kha hril roi.



⁴Rengpa kha a roiinpuia, a satêna inpâk hrang a ni: Pathian murdi nêka chi rua a ni.

⁵Mipuihai pathianhai chu millimhai an nia, Rengpa chu irvânhai khi a isiam a ni.

⁶Chôiindômna le roiinpuina a makunga an oma: Hrâtna le satna chu a hmun irthianga an om.

⁷ Mi tina chi tinrênghaio, Rengpa chu pe unglân, Rengpa chu roiinpuina le hrâtna pe roi.

⁸Rengpa chu ar hming roiinpuina chu pe unglân: Thil inhlan hrang chôiin a biak in hualsûng mikothaia khan hong roi.

⁹O, irthiang satna irbelin Rengpa chu chubai mûk unglân: Irnêng lua murdihaio, a makunga chi pumin kûn roi.

¹⁰Nam tin laia khan, “Rengpa chu rênga a toi,” ti roi: Rammual khom hi an hnîng theiloina hrangin, indettirin a oma: Ama chu theibîk nei loiin mi tin roi kha rêl a ti.

¹¹Irvânhai khi lôm takin om sianlân, irnêng khom hi raifân takin om ri se; Tuikhanglian le a sûnga thil om murdi hi inri dur dur ri se;

¹²Loi le a sûnga om murdi hi lôm takin om ri se: Kha tika chu ram hnuaiia thing murdi hi raifânin zâi an ti.

¹³Rengpa makunga khan: ama chu a izuang hrang a ni; Irnênga roirêl hrangin a izuang hrang a nia: Rammual hi fel takin roi rêl pe a ta, Mi tinhai chu a thu takin roi rêl pe sa a ti.

Inpâkna Hlahai 97

Pathian roirêltu roiinpu tak

¹Rengpa chu rênga a toia; irnêng hi raifân takin om sianlân; Chômbung tamtak takhai chu lôm takin om ri sehai.

²Sûmhai le inthim irsa khak chu a kôla a oma: Felna le roirêlna fel chu a rêngtoihmun irnghatsan a ni.



- ³A maton tiang chu mei a fea, A kôl vêla ama doituhai chu a kâng irhmang ngai.
- ⁴A kôlirtêkhai khan rammual hi an vârtir lop lopa: Irnêng hin a hmua an thinga.
- ⁵Tânghai chu khuaihlû angin Rengpa makunga a zor zoi tâka, Rammual pumpui Rengpa makunga khan.
- ⁶Irvânhai khin a felna chu tâng an sampuia, Mi tinrêng khan a roiinpuizia an hmu tâka.
- ⁷Millim siamhai sinthotu murdi chu mualinphoiin om ri se, Millimhai songtuhai chu: Nangni pathian murdihaio, ama chubai mûk roi.
- ⁸Zion tâng khan an hriata, lôm takin a oma, Juda nâinuhai chu raifân takin om an ta; O, Rengpa ni roirêlna sikin.
- ⁹Rengpa nang chu irnêng murdi chung a hin anchungtak ni nia: Nang chu pathian murdi chung taka chôindômin ni om.
- ¹⁰O Rengpa lungthungtuhaio, soal khôkmâk roi. Ama chu a mi irthianghai hringna chu a vong insa ngai; Anni chu mi siahai kut ata a saninzôk ngai.
- ¹¹Mi felhai hrangin khua a zuang vâra, Milung dikhai hrangin lômna a zuang tung ta.
- ¹²Mi felhaio, RENGPA lôm takin om unglân; A'rhming irthiang chu inpâk roi.

Inpâkna Hlahai 98

Rammual roirêltu Pathian

Inpâkna hla

- ¹O, Rengpa chôindômin hla thar sak roi; Sinirkhêl takhai a tho tâk sikin; A kut chang tiang le a bân irthianga khan ama ta hrangin saninhringna a siam pe tâka.
- ²Rengpa khan a saninhringna kha an hriattira: A felna kha nam tin mithmua khan fia takin an langtir tâka.



- ³Israela insûng mihai chung a lungkhamzia le a iamomia kha an hriat maia: Kôlkunga mi murdi khomin ei Pathian saninhringna kha an hmu tâka.
- ⁴Irnêng lua murdihaio, Rengpa chôindômin raifân takin khêk unglân: khêk suak unglân raifânin zâi roi, a ni, inpâkna hla sak roi.
- ⁵Serânda leh Rengpa inpâkin zâi roi; Serânda leh inpâkna hla irhâi leh.
- ⁶Bekulhai le bekul bi nei irhâi leh, Inlaltak, Rengpa makunga khan, raifân takin khêk roi.
- ⁷Tuikhanglian le a sûnga thil om murdi hi irse lul lul ri se; Rammual le a sûnga omhai leh hin;
- ⁸Tuipuihai khan an kut inbênhai sianlân; Tânghai kha raifânin zâi ri sehai,
- ⁹Rengpa makunga khan; irnêng roirêl hrangin a izuang hrang a nia: Rammual hi fel takin roi rêl pe a ta, Theibîk nei loiin mi tin roi chu rêl a ti.

Inpâkna Hlahai 99

Reng roiinpui tak Pathian

- ¹Rengpa chu rênga a toia; mi tin chu inthing ri sehai: Ama chu cherubhai chung a toia; irnêng hi inhnêng ri se.
- ²Rengpa chu Zion kho sûnga khan roiinpui tak a nia; Mi tinrênghai chung a khan an chungtak a ni.
- ³Anni khan nir hming roiinpui tak ichiom tak kha inpâk ri sehai; Ama chu a irthiang a ni.
- ⁴Inlaltak hrâtna khan roirêlna a'rngaiinhlua; Nang chu theibîknei loina nin det ngaia, Nang chu Jakoba-hai laia roi ni rêla, fel takin ni tho ngai.
- ⁵Rengpa ei Pathian chu chôindôm unglân, A ke irnghatsan bula khan chubai mûk roi: Ama chu a irthiang a ni.
- ⁶A ochaihai laia khan Mosia le Arona, A'rhming irlamtuhai laia khan Samuela; Anni khan Rengpa chu an koia, ama khan a sâm tâka:



⁷ Sûm indinga khan an kuang thu an sîra; A thu inhriattirhai le thu'nkung a pêk kha an zôma.

⁸ O Rengpa kin Pathian, nang chu anni kha ni sâma: Nang chu anni ngaidamtu Pathian ni ni, An sintho chunghaia phuba lâk ngai khomin lân.

⁹ Rengpa ei Pathian chu chôindôm unglân, A tâng irthianga khan chubai mûk roi; Rengpa ei Pathian kha a'rthianga.

Inpâkna Hlahai 100

Inpâkna hla

Lômthu insîra inpâkna hla

¹ Ram murdihaio, Rengpa chôindômin raifân takin khêk roi.

² Lôm pumin Rengpa sintho unglân: Hla sak pumin a makunga hong roi.

³ Rengpa chu Pathian a nih ti inhre unglân, A ni siamtu chu ama a nia; Ama ta ei ni. A mihai le a sa vâina hmuna belrahai ei ni.

⁴ Lômthu insîr pumin a mikotbâia khan lût unglân, Inpâk pumin a Biak In hualsûng tuala khan lût roi. A kuang lômthu insîr unglân, ama irhming chu inpâk roi.

⁵ Rengpa chu a saa; A lungkham lianna chu kumkhua'n om mai a ta, A iamomna chu irlo tin tin dênin om a ti.

Inpâkna Hlahai 101

Inlaltak chonginkung

David a inpâkna hla

¹ Lungkhamna le roirêlna thu kha hla'n sak ki ta: O Rengpa, nangma inpâkin zâi ki ti.

² Lampui sa irkipa khan vâr takin om ki ta: O itika mo ki kuang ni izuang hrang? Ki in sûnga milung sa famirkip irputin om ki ti:

³ Thil saloi rêng rêng ki mithmua khan se no ning: Fe'n sualhai sintho chu ki ikhômâk a ni; Keimaa kop no ni.

⁴ Milung tukullian khan ni rotsan a ta: Thil sual rêng rêng inhre no ning.



⁵Tukhom a bômhai inrûka der ka chu, Kha mi kha inboipai ki ti: Mit irsâng le milung lâirpâk irput mi chu irngai thei no ning.

⁶Hi rama mi iamomhai chung a hin ki mit a chuma, ki kuang an om theina hrangin: Lampui sa hrôtu chu, kha mi khan ki sin tho a ti.

⁷Mi huang hman mi chu ki in sînga om no ni: Milak tho intam mi chu ki mithmua indetin om no ni.

⁸A nitin hi rama mi siahai murdi hi inboipai ki ta; Rengpa khopui ata hi thil tho'nsualtuhai murdi inboipai hrangin. Intak tuangtu chongchaina a sôla, Rengpa makunga a lungzîng thu an sîr laia khan.

Inpâkna Hlahai 102

Ruatharte lungzîng chongchaina

¹O Rengpa, ki chongchaina hi irngaitua'n lân, Ki khêk irhâi hi ni kuang tung ri se.

²Ki lungzîng nia keimaa hin ni hmâi thup no'n lân: Ki tiang hin ni mikuar zuang do'n lân; Nang ki koi zoro'n ni sâm lat roh.

³Ki hring sîng nikhuahai hi meikhu angin ar zâm irhmanga, Ki ru hi thingthu angin a ikâng a ni.

⁴Ki milung hi hloisûl anga em thatin a oma, a thê m zoi ta; Bu nêk khom ki'rnhila.

⁵Kin ruhai hi ki taksaa a ikop khak a ni.

⁶Ramchâr simbu ang ki nia; Kho ram simbu ang chian ki lei ni ta.

⁷Ki meng chiana, Chongzong, in chung a ama vaia om ang ki lei ni ta.

⁸A ni doituhaiin chu sîn sôtin an ni hril insiat ngai; Ni hmumâkhai khan ki'rhmang chu khomâksâmna'n an hmanga.

⁹Irvut hi bu angin ki nêka, Ki i-in hrang chu mitrithi leh ki pol ta a ni,

¹⁰A sîn ni milung a hoi no le ni ninginmur sikin: Nangin ni nin doma, ni ni pai irhmang tâka.



- 11**Ki dam sâng nikhuahai hi khohloi irhlîm boi thiai ang kha a nia; Hloisûl angin ki thêm tâka.
- 12**O Rengpa, nangma chu kumkhua'n om ni ta; Nangma inhriat maina khom irlo murdi dênin om sa a ti.
- 13**Thoi ni ta, Zion tâng chu lunginkham ni ti: Ama chu lungkham zoro a ni tâka, a ni, zoro inkung chu a tung tâka.
- 14**Ni siahlohai khan a lunghai kha an irngaiinhlua, A vâiphin khom lung an inkhama.
- 15**Khanchu nam tinin Rengpa irhming kha chi sa an ti.
- 16**Rengpa khan Zion khua kha an ding nôk tâka, A roiinpuinaa irbelin an lang tâka;
- 17**Invâihai chongchaina chu a uksaka, An chongchaina kha hmusit ngai mah.
- 18**Kha kha thoiinthar la hong om hrang khan irziak ni a ta: Nam siama la hong om hrang khan Rengpa kha inpâk an ti.
- 19**Ama khan a hmun irthiang irsângtak ata a zu ena; Rengpa khan irvân ata irnêng hi a zuang hmua;
- 20**Mi intâng inrûm kha irngai hrang le, Thi hranga inkunghai kha khoi hrangin;
- 21-22**Rengpa sintho hranga mi tin le ram tin an inkhôm tika, Mihaiin Rengpa irhming chu Zion khuaa an hril theia, An pâkna thu chu Jerusalem khuaa an hril theina hrangin.
- 23**Ama khan lamlaia hin ki'rnak an chuaitira; Ki dam sâng hi an boitir ta.
- 24**“O ki Pathian, ki vânglai nikhuahai hin ni lapai no ro,” ki tia: Nangma kumhai chu irlo om sâng murdi'n om a ti.
- 25** Irnêng irnghatsan chu tianlaia ni phûm tâk a ni; Irvânhai khom ni kut suak a ni.



²⁶Khahai kha la boi irhmang a ta, nang chu om mai ni ti: A ni, khahai murdi kha silkai angin la milui a ta; Puan angin thûl ni ta, hong danglam ta ni ti:

²⁷Nang rêk chu ni pangai maia, Ni kumhai khan boi ni rêng nei no ni.

²⁸Ni siahlohai an nâihai kha om mai an ta, An irchihai kha ni makunga indetin om an ti.

Inpâkna Hlahai 103

Pathian lungthungna

Davidâ inpâkna hla

¹O ki hringna, Rengpa chu inpâkin lân; Ki phîng sînga om murdihaio, ar hming irthiang chu inpâk roi.

²O ki hringna, Rengpa chu inpâkin lân, A sintho insa murdihai chu irnghil no roh:

³Ama khan ni pualoina murdi nang a ngaidam hena; Ni natna murdi nang an dam ngaia;

⁴Irhmanagna ata ni hringna kha nang ar tan ngaia; Lungkhamna le inrennahai nang an khumtir hena;

⁵Ni bâi kha thil sa'n an khoptir ngaia; Khanchu ni thoibop kha irmupui anga siam tharin a om nôk ngai.

⁶Rengpa khan, nêpsiana tuang murdihai hrang, Thil fel tho pe'n, roi a rêl ngai.

⁷A lampuihai kha Mosia an hriattir ngaia, A sinthohai chu Israela irchihai an hriattira:

⁸Rengpa chu inrenaa sip, mi lunginkham thei tak, Milung ir-ial tak, lungkhamna nei intamtak a ni.

⁹Ama khan hal mai no nia; A ninginmur chu pai kumkhua ual no ni.

¹⁰Ei sualnahai angin ni thuan ual no ni.

¹¹Irvân khi irnêng chung irsâng taka a iom angin, Ama chituhai chung a lungkhamna kha ar khêl a ni.



- ¹²Sak le thang a irhla ang hin, Ei pualoinahai ei kuang ata ar sonpai pat tâka.
- ¹³Pa'n a nâihai lung a inkham angin, Rengpa khan ama chituhai kha lung an kham ngai.
- ¹⁴Ei takpum siam dân hi an hriata, Vâiphin mai ei nih ti an hriat mai sikin.
- ¹⁵Mihriam chu, a hring sâng nikhuahai hloisûl ang a nia; Pâr angin a chuai ngaia.
- ¹⁶Phâivua'n a sêma, a irhmang ngai a ni; A omna khan inhre nôk ta no ni.
- ¹⁷Rengpa lungkhamna rêk chu ama chituhai chung a khan kumtuang ata kumtuang dênin om a ta, A felna khom an tû le tê dênin om a ta,
- ¹⁸A thuthung zôm murdihai le, A thuhrilhai zôm tuma inhriat maihai kai chung a khan.
- ¹⁹Rengpa khan a rêngtoihmun kha irvânhai khin an dettira; A ram chu itinrêng chung a roi a rêla.
- ²⁰A vân tîrtônhaio, A thu irngaituaa a thu zôm ngai, hrâtnaa roiinpuinahaio, Rengpa chu inpâk roi:
- ²¹A sipaihaio, a nuamlam tho ngai, a sinthotuhaio, Rengpa chu inpâk roi.
- ²²A roirêlna hmun murdia a sintho murdihaio, Rengpa chu inpâk roi: O ki hringna, Rengpa chu inpâk roh.

Inpâkna Hlahai 104

Siamtu inpâkna hla

- ¹O ki hringna, Rengpa chu inpâk roh. O Rengpa ki Pathian, nang chu ni roiinpui tak taka; Chôindômna le roiinpuina'n nir bela.
- ²Nangma'n chu vâk kha puan angin nir bela; Irvânhai khi puan in chung angin ni kaiphara:
- ³Ni inhai chu tui chunghaia ni sina, Sûmhai khi ni tâli'n ni hmanga, Mithi irtha chung a ni vuanga.



- ⁴ Phâivuahai chu ni palaiin ni hmanga, Mei le meichok chu ni sinthotuhaiin ni hmang ngai.
- ⁵ Irnêng irnghatnahai chu ni phûma, Kumkhua'n an hnîng lolina hrangin.
- ⁶ Nangma'n irnêng chu puan angin tui inthûk takin nir khûa, Tuihai khan tânghai chu an simtir zita.
- ⁷ Tuihai chu ni hala, laizâm an tho ngai; Ni thupêk inring tak an inhriat le chu an rot zôi zel tâka.
- ⁸ Tânghaia a kâia, phâihaia a chuma, A ta hrangin hmun ni isinsiam tiang khan.
- ⁹ A khêl lolina hrangin rî ni siama; Irnêng chim hranga a kîr nôk ta lolina hrangin.
- ¹⁰ Ama khan phâihaia khan tuihnârhai ni siama; Tâng kârhaia khan a luanga.
- ¹¹ Khahai khan ramsa tinrênghai in hrang an pêk ngai; Ram sakuartunghai khan an tui inhrâl an inchantir ngai.
- ¹² A kôla thing kunghaia khan chung vûang vâhaiin omna'n an nei ngaia, A ônyaia khan an inhrâm ngai.
- ¹³ Nangma'n irvâna irthokin tânghai chu rotuiin nin fâa, Irnêng hi ni satvurnahaiin a khop ngai.
- ¹⁴ Ramsahai hrang hloisûl nin môngtir pea, Chîmuhai chu mihriamhai hrang nin mông pehai ngai.
- ¹⁵ Mihriam lungrîl inlômтира hrang sahriak le mihriam lungrîl inhrâtтира bai le.
- ¹⁶ Rengpa thinghai chu tuiin nin fa'n khop maia, Lebanon tânga sidar thing a iphunhai chu.
- ¹⁷ Ama khan vâhaiin irbu an kaia; vapual chu meisâr thinghaia irbu an siam ngai.



- 18**Tâng irsânghai chu sarzahai lêngna hrang a nia, Lungpuihai chu mizupuihai irbîkna a ni.
- 19**Nangma'n tha khi hunbi inhriatna hrangin ni siama; Misa khan a tâk hrang zoro chu an hriata.
- 20**Nangma'n inthim ni siama, zân a hong nia; Kha zoroa khan ramsa chi tinrêng an lêng suak ngai.
- 21**Kâmkeibaknei vânglaihai khan an sa sê hrang zongin an inhrâm ngai.
- 22**Misa a hong suaka, an kîr nôka, An omna pûk chita an kual ngai.
- 23**Mihriamhai chu sintho hrangin an suaka, khohloi dênin sin an thoa.
- 24**O Rengpa, ni sinthohai chu a tam bâka! Vârna'n ni ni isiam zit a ni: Irnêng hi ni mihriam siamhaiin an isip a ni.
- 25**So so tuikhanglian a oma, a lianin a'rzat oka, So son mihriam a lian le a chîn tep zoi loi an om.
- 26** Kha khan irkuanghai an lêng sup sup, Ni isiam Leviathan kha a lêng dôr dôra.
- 27**Khahai murdi khan nangma nang an nghâk senga, A zoro taka an bu ni pêk sengna hrangin.
- 28**Anni ni ipêk chu an hrût ngaia, Ni kut ni phara, satna'n an khop ngai.
- 29**Ni hmâi ni thupin chu an lunginzîng ngaia; An phûk chu ni lâk pea, an thia, An suakna vâiphin dêna an kîr nôk ngai.
- 30**Nangma phûk ni tîr suaka, siamin an oma; Irnêng chung khom hi ni siam inthar nôk ngai.
- 31**Rengpa roiinpuina chu kumkhua'n om sianlân; Rengpa chu a thilsiamhaia khan lôm roi!
- 32**Ama khan irnêng hi a ena, an inthing ngaia; tânghai chu a tôna, an inkhul suak ngai.



³³Ki dam sêng kêr ka Rengpa chôindômin hla sak ki ta; Ki hring kêr ka ki Pathian inpâkin zâi ki ti.

³⁴Ki ngaituana hi ama hrangin lôm inruk ni sianlân, RENGPAA khan ki lôm mai sikin.

³⁵Mi sualhai chu irnênga irthoka hin irhmangtirin omhai sianlân; Mi siahai chu om ta no ri sehai. O ki hringna, Rengpa chu inpâk ro! Rengpa chu inpâk roi!

Inpâkna Hlahai 105

Pathian le a mihai

(1 Tsn 16.8-22)

¹O, Rengpa kuang lômthu hril unglân, ar hming irlam roi; Mi tin laia khan a sinthohai kha inhriattir roi.

²Ama chôindômin hla sak unglân, ama inpâkin zâi roi, A sintho'rkhêl murdi thu kha insîr irhlôm roi.

³A'rhming irthiang kha song roi. Rengpa zongtuhai milung kha raiinfân ri se.

⁴Rengpa le a hrâtna kha zong unglân; A hmêl chu zong mai roi.

⁵⁻⁶O, a siahlo Abrahamama irchihaio, Jakoba irchi, a inthanghaio, A sintho'rkhêlhai inhre mai roi; A sinirkhêlhai le a bâia a roirêl suakhai kha.

⁷Ama chu Rengpa ei Pathian chu a ni: A roirêlhai chu irnêng chung murdia hin a om.

⁸A thuthung chu kumkhua'n an hriat ngaia, Irlo sângkhat dêna a thu lei pêk chu;

⁹Abrahama kuanga a thuthung le, Isaka kuanga a khomâksâm kha:

¹⁰Kha dên kha chong inkung hrangin Jakoba kuang an dettira, Israela kuang kumkhua thuthung hrangin:

¹¹“Kanaan ram hi nang pe ki ti, Ni'rchon dongtum hrang chu,” tiin.

¹²Mi tômtê vai an ni lai khan; A ni, tômtê vai, kha mi rama khan mikhual an ni zoia;



- ¹³Nam dang dang kuang an hong fe va fea. Ram dang dang ata ram danga an irthon an irthona.
- ¹⁴ Tûte'n an inêpsia hrang phal maka; Anni sikin rêng hai khom a hala:
- ¹⁵“Ki sahriak irthutihai chu tôn no unglân, Ki deipuhai poi rêng rêng khom tho no roi,” tiin.
- ¹⁶ Kha ram ata hrangin châm a koia; Fâk hrang rêng rêng inomtir ta maka.
- ¹⁷ An makunga mi a tîra; Josefa chu siahlo hrangin izuarin a oma:
- ¹⁸A kehai chu kolin an natira; Thîrhruî bunin a om tâka:
- ¹⁹A thu a tung ma senga chu; Rengpa thu'n ama chu a fia ngaia.
- ²⁰ Aigupta rêng khan mi a tîra, a sûta, An sua tâka, mi tin roirêltu hranga khan.
- ²¹ Ama khan a insûng mi hai chung a hruaitu le ar chon murdi chung a roirêltu'n a siama,
- ²²A mi lianhai chung a irchamneina le a ulianhai vârna irchutihai hrangin.
- ²³Khanchu, Jakoba Aigupta rama a fea; Hama rama khan a om tâka.
- ²⁴Rengpa khan a mi hai chu satakin an pungtira, Anni doituhai nêkin an hrâtîr ual tâka.
- ²⁵A mi hai khôkmâk hrangin an lungrîl an danglamtir pehaia, A siahlohai chung a vârirlet taka tho hrangin.
- ²⁶ A siahlo Mosia kha a tîra, A mi inthang Arona leh.
- ²⁷Anni khan an irsinsianahai kha an kuang an entira, Hama rama khan sinirkhêlhai an entira.
- ²⁸Ama khan inthim a tîra, ram pumpui kha an thim tâka, Khanchu a thuhai kha zôm nuam mah.
- ²⁹ An tuihai kha thisen an chang pea, An ngahai chu a that zita.
- ³⁰ An ram chu uichok an tâmtir pea, An rêng hai chontan ten khom uichok an siptir pea.



³¹Ama khan thu a pêka, khanchu an ram sînga khan thoivâi an tâmtira, Hrik khom an ram sîng murdia tamtak an hong om tâka.

³² Ama khan rua irthûlin irial an tho pea, An rama khan kôlirlek lop lop a pêka;

³³An grep hruihai le theipui kunghai an siat pea; An rama thinghai kha an khiak sa tâka.

³⁴ Ama khan thu an sîra, khanchu Khâihmimsehai an hongga, Longakhai leh, tep zoi loi rakin an hong om tâka;

³⁵Khahai khan an rama chîmu tinrênghai kha an fâk zoia; An irnêng rahai khom an fâk zoi zita.

³⁶An rama nâilutîr om murdi a thata, An hrât laia an inei masa tak chu.

³⁷ Khanchu, tangka le rângachak le Israelhai chu a hruai suak tâka, Ama namhai laia khan mi hrât loi inkhat khom om mahai.

³⁸An suak laia khan Aigupta-hai chu an lôma: Anni kha an lei chi tâk sikin.

³⁹ Ama khan irhlîtu hrangin sîm a'rzâmтира, Zâna vîr hrangin mei a pêk saa.

⁴⁰ An ngêna, khanchu varung a hong hruaia, Irvân bu'n an khoptirhai ta.

⁴¹Lungpui an hongga, khanchu tui a hong suak zun zun tâka. Ramchâra khan tuidung angin a luang tâka.

⁴²A thu irthiang kha an hriat maia, A siahlo Abrahama leh khan.

⁴³Khanchu, a mihai kha raifân takin a hruai suak tâka, A mi inthanghai chu hla sak pumin.

⁴⁴ Khan, nam tin ramhai chu a pêk tâka. Anni khan mi danghai sinsôl ra an lua tâka,

⁴⁵A thupêk chu an zôma, A dânhai chu an vong insa theina hrangin. Rengpa chu inpâk roi.

Inpâkna Hlahai 106

A mihai chungga Pathian satzia



- ¹Rengpa chu inpâk roi. O Rengpa kuang lômthu hril roi; ama chu a saa: A lungkhamna khom kumkhua'n a iom hrang a ni.
- ²Tu mo Rengpa sintho roiinpui takhai kha insîr theia, An pâkna murdi inhriattir zit thei?
- ³Roirêlna vong insahai chu an vên a sa e, Itiklai khoma fel taka thotu leh.
- ⁴O Rengpa, ni mihai ni indit bîkna'n nin hre maiin lân, O, ni saninhringna leh ni kan roh:
- ⁵Ni mi inthanghai hlochukna ki hmu theia, Ni'rchon donghai kuang ki song theina hrangin.
- ⁶Kin irchibulhai angin thil kin tho'nsual tâka; Thilsual kin sina, sual takin kin om tâka.
- ⁷ Kin irchibulhai khan Aigupta rama ni sinirkhêl sinhai kha inhre thiam mahaia, Ni lungkhamna irkhêl tak kha inhre mai ta mahai: Tuikhangliana tehel an zong tâka, Tuikhanglian Sena khan.
- ⁸Kha tena khom khan ama irhming sikin anni kha a saninhring tâka, A sinthotheina roiinpui tak kha an hriattir theina hrangin.
- ⁹ Tuikhanglian Sen kha a hala, Khanchu a kang ta: Khanchu anni kha muang inzena fe'n varâl an kêi ta.
- ¹⁰Anni khôkmâktuhai kut ata a sansuak tâka; An râlhai irchamneina ata a sansuakhai tâka.
- ¹¹Tuihai khan anni doituhai chu a khum zoi tâka; Inkhat lua dama suak om ta mahai.
- ¹²Khanchu a thuhai chu an iama; Ama inpâkna hla an saka.
- ¹³Khannisianlân a sinthohai kha an irnghil nôk zôi zela; A roizêk chu nghâk zôt mahaia:
- ¹⁴ Ramchâra khan a sân thil an irzuka, Ramchâra Pathian chu an fiaa;



- ¹⁵An thil ngên a pêkhaia, Khannisianlân, an chung a khan hri tamtak khom a tîr pehai saa.
- ¹⁶An riakbukhai khan Mosia chu an hnarsaa, Rengpa mi irthiang Arona leh khan.
- ¹⁷Irnêng chu a ânga Dathana chu an lema, Abirama pôlhài chu ar khû zoi tâka.
- ¹⁸An pôl laia khan mei inchokin a hong oma; Meichok khan mi siahai kha a kâng irhmang ta.
- ¹⁹Horeb tânga khan sehrâtte irlim an siama, Ama kha chubai an mûka;
- ²⁰Khang khan Pathian roiinpuina chu, Sehrât hloisûl fâk ngai sehrât irlim an paiin an inchantir tâka,
- ²¹Pathian an saninhringtu an irnghil tâka, Aigupta rama thil roiinpui tak tak le
- ²²(Hama rama sinirkhêl takhai, Tuikhanglian Sen kôla thil irkhêl takhai) thotu chu.
- ²³Khasikin, inboitirna ti, tia ninginmur inkîrtir hrangin, A mi inthang Mosia chu a lûtna hranga khan a makunga ngîr hong sianlân chu, Inboipai a tih ti an sîra.
- ²⁴A ni, ram inditom tak chu an ngainêpa, A thu kha iam nuam mahai;
- ²⁵An puan inhai khan an chiar lik tâka, Rengpa irhâi chu irngai nuam mahai.
- ²⁶Khasikin anni tiang chu a kut a phara, Annihai chu ramchâra an tûktirna hrang le,
- ²⁷ An irchi hranghai chu nam tin laia an tûktira, Ram tina an darhtirna hrangin.
- ²⁸ Baal Peor tânga khan an kopa, Mithi kuang thilinhlanhai chu an fâk sa tâka. Khanchu hri kha an chung a hong lêng tâka.



- ²⁹Khaang khan an sinthohaiin ama kha ning an inmurtira; Khanchu hri kha an chung a hong lêng tâka.
- ³⁰Kha zoro lai khan Finehasa chu a ngîra, roi a rêla: Khanchu hri kha inboiin a om tâka.
- ³¹Kha kha a felnaa inkung a ni, Kumkhua'n irlo murdi dênin.
- ³²Meriba tuihaia khom khan ama chu ning an inmurtira, Khanchu anni sikin Mosia chung a thil saloi a tung chian tâka:
- ³³A'rtha chung a tehel an zonga, A hmûrin saloi taka an sîr sikin.
- ³⁴Rengpa'n an kuang inboipai thu a ipêk angin, Mipuihai kha inboipai mahai.
- ³⁵Nam tinhai chu an irpôlpuia, An sinthohai chu an irchu lika.
- ³⁶An millim sinhai an thoa, Ama kha an hrangin châng a hong ni tâka.
- ³⁷ a ni, ramilhli kuanghai irbôlna'n an nâipahai an nâinuhai an inhlana.
- ³⁸ Thisen sêlnaboi, an nâipahai le an nâinuhai thisen ngei kha an insua tâka, Khahai kha Kanaana ram millimhai kuang an irbôla; Kha ram kha thisenin a hong porinche tâka.
- ³⁹Khaang khan an sinthohaia porinchetirin an oma, An sinthohai khan an hong uire tâka.
- ⁴⁰ Khasikin Rengpa ning kha a mihai chung a an mur tâka, an tirhai tâka.
- ⁴¹Khanchu anni kha nam tin kuta a pêk tâka; A khôkmâktuhai khan an chung a roi an rêl tâka.
- ⁴²Anni doituhaia an nêpsiaa, An kut hnuiaia khan inlôm-tirin an om tâka.
- ⁴³Voi tamtak a saninzôkhaia; Khannisianlân a inkungnaa khan tehel an zong ngaia, An pualoinaa khan irhniam-tirin an om tâka.
- ⁴⁴Khaang dôra khom khan, an khêkirhai an hriatin chu, An lungzîng kha a uksaka:
- ⁴⁵A thuthung kha anni an hriat pehai maia, A lungkhamna irkhêl sikin an lungrîl a'rlet tâka.



⁴⁶Suaka hruaitu murdihai chu lung an khamtirhaia.

⁴⁷O Rengpa kin Pathian, ni saninhringin lân, Nam tin lai ata ni hruai bôm nok roh. Ni'rhming irthiang chu inpâk hrang le Inpâkna song hrangin.

⁴⁸Rengpa, Israelhai Pathian chu, inpâkin om ri se, Kumtuang ata kumtuang khomin. Mi murdi khan, "Amen," ti ri se. Rengpa chu inpâk roi.

Inpâkna Hlahai 107

BU RINGANA

(107-150)

Pathian satzia inpâkna

¹ O, Rengpa kuang lônthu hril roi; ama kha a sa sikin: A lungkhamna khom kumkhua'n a iom hrang a ni.

²Rengpa mi inthanghai khan khaang kha insîr ri sehai, Doitu kut ata a irtan,

³Ram tin ata a hruai bôm, Sak le thang, sim le hmârhaia khan.

⁴Senkhat chu ramchâr irkhêla khan an invâia, Mihriam omna khua rêng rêng hmu mahaia.

⁵Phîngchâm le tuiinhrâlin an hringna kha an phîng sînga a'rzal tâka.

⁶Kha zoi le an buainaa khan Rengpa kha an insama, Ama khan an lunginzîngnahaia a saninzôka.

⁷Mihriam omna khuaa an fe theina hrangin Lam intûn taka a hruaihai tâka.

⁸O, mihriamhai hin Rengpa chu a lungkhamna sik le, Mihriam nâihai chung a sinirkhêl thohai sika hin inpâk sianlân O!

⁹Ama khan hringna thil irzuk tak tak kha inkhoptirin, Hringna phîngchâm kha satna'n an khoptir ngai.

¹⁰Inthim hnuai le thina daihlîma toia, Intakna le thîra khithai chu;

¹¹Pathian thu chunghaia tehel an zonga, Anchungtaka inkungna kha an ngainêp sikin:

¹²Ama khan an milung chu sinsôlna'n a hmin tâka; An tûka, changpuitu hrang rêng rêng om mahaia.



- ¹³Kha zoi le an buainaa khan Rengpa kha an insama, Ama khan an lungzîngnahai ata a saninhringa.
- ¹⁴Inthim hnuai ata le thina daihlîm ata kha a hruai suakhaia, An khitnahai kha an chattir tâka.
- ¹⁵O, mihriamhai hin Rengpa chu lungkhamna sik le, Mihriam nâihai chung a sinirkhêl thohai sikin inpâk sianlân chu o!
- ¹⁶Ama khan dâr mikothai kha an siattira, A fena thîr tuamhai kha a tan tâka.
- ¹⁷Mi invêthai kha an tho'nchâina sik le, An pualoinahai sikin deng an thei ngai.
- ¹⁸An hringna khan fâk hrang tinrêng hi an intira; Thina kul mikothai kha an nâi ngaia.
- ¹⁹Khanchu an buainaa khan Rengpa kha an insama, Ama khan an lungzîngnahai a saninhring ngai.
- ²⁰A thu kha a tîr suaka, anni chu an damtir ngaia, An irhmangna hranghaia a saninzôk ngai.
- ²¹O, mihriamhai hin Rengpa chu a lungkhamna sik le, Mihriam nâihai chung a sinirkhêl thohai sika hin inpâk sianlân chu o!
- ²²Anni khan lônthu'nsîr irbôlnahai kha inhlan sianlân, An sinthohai kha hla sakin hril ri se.
- ²³Tuikhangliana irkuang liana zu fea, Tui irzattak chunghaia sintho ngaihai khan;
- ²⁴Khahai khan Rengpa sinthohai le, Tui inthûk taka a sintho'rkhêlhai kha an hmu ngai.
- ²⁵Ama khan thu a pêka, phâivopui an thotira, Kha khan a tui irsônhai kha a'rsângtir ngai.
- ²⁶Irvâna an kêi tîr tîra: Lungzîngna sikin an hringna kha a zôi ngai.



- ²⁷Zû'nruî angin an hong pêm an va pêm an hong irhnor rem ruma, Om lam dân rêng rêng inhre ngai mahai.
- ²⁸Kha zoi le an buaina khan Rengpa kha an insama, Ama khan an lungzîngnahai ata a hruai suak ngai.
- ²⁹Phâivopui chu irhôra an mongtira, Khanchu a tui irsônhai a mong rup ngai.
- ³⁰Khan, a mong tâk sikin an lôm ngaia; Ama khan an irngaitak irkuang irngam hmuna khan a hong hruai ngai.
- ³¹O, mihriamhai hin Rengpa chu a lungkhamna sik le, Mihriam nâihai chung a sinirkhêl thohai sika hin inpâk sianlân O!
- ³²Anni khan mihai inkhômnaa ama chu inpâk sianlân, Upahai toinaa khan inpâk ri se.
- ³³Ama khan tuipuihai chu ramchâra an changtir ngaia, Tuihnârhai chu irnêng châra an changtir ngai.
- ³⁴Ram satakhai chu a mi omhai sual sikin, ram inponin an changtira.
- ³⁵Ramchâr chu dîl an changtir ngaia, Irnêng châr chu tuihnârhai an changtir ngai.
- ³⁶Ama khan phîngchâm tuanghai chu an om ngaia, Omna hrang khua an siama;
- ³⁷Loihai an neia, grep irhuanhai an siama, A ra hong punghai chu an hmu theina hrangin.
- ³⁸Anni chu sat a vur ngaia, khanchu a sate'n inpungtirin an oma; An sahai kha a iram phal ngai mah.
- ³⁹Khan, nêpsiana hai, intakna hai, beidongna hai sikin, An ram sit sita, an kûn tîr tîra.
- ⁴⁰Ama khan mi lianhai chung a hmusitna a bunpai ngaia, Ramchâr, lampui rêng rêng om loinaa khan a'rvâk a'rvâktira.



⁴¹Khannisianlân, inrianghai chu intakna ata hmun irsânga a bâng ngaia, Belra pâl angin insûng mihai a siam pe ngai.

⁴²Mi diktakhai khan kha kha hmu an ta, lôm an ti; pualoina murdi khan a bâi hîp a ti.

⁴³Tukhom vâr ka kaiin khahai kha vong insa an ta, Rengpa lungkhamnahai ngaitua an ti.

Inpâkna Hlahai 108

Râl ata changpui ngênna

Hla Davida inpâkna hla

¹ O Pathian, ki milung hi a idet a ni; Hla sak ki ta, a ni, inpâkna hla sak ki ti, ki roiinpuina ngeiin.

²Perkhuang le serândahaio, har roi: Kei chu zîng taka har ki ti.

³O Rengpa, mi tinhai laia lômthu nang hril ki ti: Nam tin laia nangma inpâkin zâi ki ti.

⁴Ni lungkhamna chu irvân phâk rakin ar khêla, Ni thutak khan irvân dumhai khi a phâk raka.

⁵O Pathian, nang chu irvân phâk rakin chôindômin omin lân: Ni roiinpuina chu irnêng murdi chungâ hin chôindômin om sa roh.

⁶ Ni lungthunghai hi saninzôka an om theina hrangin, Ni kut chang tiang saninzôkin lân, ni sâm roh.

⁷Pathianin a hmun irthianga khan hiang hin a tia, “Râifân ki ta: Sekem khua chu sem ki ta, Sukoth phâi chu semindarh sa ki ti.

⁸Gilead ram chu ki ta a nia; Manasea ram ki ta a nia; Efraima ram khom kha ki lu saninzôkna a ni.

⁹Moab ram chu ki tui irsilna bêl a nia; Edom rama khan ki kekok pai ki ta: Filistia ram chu khêkkhum ki ti.

¹⁰Khopui kul neia khan tu’n mo ni hruai inlût hrang? Edom rama khan tu’n mo ni hruai hrang?



¹¹O Pathian, nangin ni ni inthâ ta tak ma ni? O Pathian, kin sipaihai kuang lak suak ngai ta mak chea.

¹²Ni doituhai bei hrangin ni changpui roh: Mihriam changpuina kha chanlamboi a ni.

¹³Pathian zâra hâitakin tho kin ti: Ama kha ni doituhai sirbêtu hrang a ni.

Inpâkna Hlahai 109

Mi chardong chiar

Hla hruaitu hrangin, Davida inpâkna hla

¹O ki inpâk ngai Pathian, dâihrek no ro!

²Mi sia bâi le mi huang ngai chu ki chung a chiara: Anni khan irnêng milak theiin ki kuang thu an insîra.

³Khôkmâkna thu'n a ni huala, A bi boiin an ni doia.

⁴Ki lungthungna sikin ki râl an hong chang tâka, Khannisianlân kei chu an ta hranga chongchai hrangin ki'rpêk ngita.

⁵Anni khan thil sa chu thil sualin an ni thuana, ki lungthungna chu hnôlna'n an ni thuan sa tâka.

⁶Nangma'n an chung a roirêltu sual se pêkin lân; A chang tiang a hnôltu ngîr ri se.

⁷Roirêl pea a om tikin thiamno changin suak sianlân; A chongchaina chu sualnaa hong chang ri se.

⁸A hring sîng nikhuahai chu tôm sianlân; A hruaitu nina chu mi dangin chang ri se.

⁹A nâipahai chu pa boiin omhai sianlân, A dôngma chu meithâiin om ri se!

¹⁰A nâihai chu invâiin an kut dôhai sianlân; An fâk hrang chu an hmun ramhaia khan zong ri se!

¹¹a pung irzûla sum inpûktirtu chu a inei murdi kha lâk pe zit sianlân; Mikhualhai khan a sinsôl ra chu inmok pe ri se.



- ¹²A chungá lungkhamna inlangtir maitu hrang tûte om no sianlân; A nâi, pa nei loihai lunginkhamtu hrang tûte om viat no ri se.
- ¹³A'rchihai chu irhmangtirin om sianlân; Thoiinthar hong om nôka khan an irhming kha kâtpaiin om ri se.
- ¹⁴A'rchibulhai pualoina chu Rengpa kuang inhriat maiin om sianlân; A nu sualna chu kâtpaiin om no ri se.
- ¹⁵Khahai kha Rengpa makunga om mai ri se, Ama khan anni inhriat maina kha irnêng ata an boipai theina hrangin.
- ¹⁶Lungkhamna inlangtir nachâng inhre mahaia, Mi inriang invâi le irsamhai chu that tuma deng an theitir ual sikin.
- ¹⁷A ni, mi khosâl tong hi a nuamlam a nia, Khanchu ama chungá a zuang tunga; Mi satvur hi a lôm lam ni maka, Khanchu ama hla uala a oma.
- ¹⁸Songkol irfuala irbel angin khosâlin ar bela, Kha kha a phîng sûnghaia khan tui angin a lûta, An rûhaia khan sahriak angin a lût saa.
- ¹⁹Kha kha ama hrangin a irbel ngaina silkai angin om sianlân, An irkhit hena kongkhit ni sa ri se.
- ²⁰Kha kha mi doituhai le ki hringna hrilsiattuhai Rengpa a thuanna a ni.
- ²¹Khannisianlân, O Pathian, Rengpa, nangin nir hming sikin ni thopuiin lân: Ni lungkhamna a sa sikin ni saninzôk ro,
- ²²Inriang le invâitak ki nia, Ki milung hi ki phîng sûnga popin a om sa.
- ²³Khohloi irhlîm angin ki boi thiai tâka; Khâihmimse angin sêm invuangin ki om ta.
- ²⁴Ki'rkhûkhai hi bu nghei sikin a'rzal tâka; Ki takpum hi ru le vun vai a ni ta.
- ²⁵Ni doituhai nuiso ki hong ni tâka; Anni hmu le chu an lu an inthika.
- ²⁶O Rengpa ki Pathian, ni changpuiin lân; O ni lungkhamna sikin ni saninhring ro:



²⁷Kha kha ni kut a nih ti an inhriat theia, Rengpa, nangin ni itho a nih ti an inhriat theina hrangin.

²⁸Anni'n khoa sâl ri se, nangma'n chu satvur ual ro: An thoi le chu mualinphoi an ta, ni siahlo rêk chu raiinfân a ti.

²⁹A ni doituhai chu inzakna puan insiltirin omhai sianlân Songkola inngâk angin anni mualinphoiin irbel ri se.

³⁰Ki bâi hin Rengpa kuang lômthu irkhêl tak insîr ki ti: A ni, mipui laia ama kha inpâk ki ti.

³¹Ama kha invâi chang tiang ngîr a ta, A hringna roirêl petuhai ata saninhring hrangin.

Inpâkna Hlahai 110

Rengpa le a Reng inthang

Davidâ inpâkna hla

¹Rengpa khan ki rêngpa kuang, “Ni râlhai ni ke irngatnaa ni sia mâka chu ki chang tiang toi ro,” a tia.

²Rengpa khan ni hrâtna hnukirhâi chu Zion tânga irthokin tîr suak a ta; “Nangma'n nang doituhai chungâ roirêl ro,” tiin.

³Ni râlhai ni doi ni sîn chu Ni mihai chu mâni irchamin hong irpe an ta; Zîng irdo angin ni vânglaihai chu ni tâng irthianga khan ni kuang hong an ti.

⁴Rengpa'n chong an kunga, a lungrîl indanglam no ni: “Nang chu Melkisedeka ochai nina ata zuang suin kumtuang ochai ni nih ti,” tiin.

⁵Rengpa chu ni kut chang tiang a oma; A ninginmur tika chu rêng murdi sât chêl chûl a ti.

⁶Nam tin laia roirêl a ta, Irsual hmunhai chu ruakin sip a ta; Ram tina lu chu sât rem rum a ti.

⁷Rengpa khan lam laia tuihai chu in a ta, Khasikin hrâtna nei ualin a lu chu chôiirsâng a ti.

Inpâkna Hlahai 111



Rengpa inpâkna

¹Rengpa chu inpâk roi! Mi dik takhai inkhômnaa khan Ki lungrîl murdi'n Rengpa kuang lônthu hril ki ti.

²Rengpa sinthothei chu a roiinpuia, A chungu lônthu murdi'n inhre thiam an nuam ngai.

³A sintho chu mahrip a omin a roiinpuia; A felna chu kumtuanga om hrang a ni.

⁴Ama khan a sinirkhêl thohai chu an inhriat mai ngaia; Rengpa chu mi lunginkham thei tak, inrennaa sip a ni.

⁵Ama chituhai chu fâk rua a pêka; A lungthung chu itiklai khomin irnghil ngai ma.

⁶A sinthohai sinthotheizia chu a mihai kuang an langa, Nam tinhai dongtum chu anni pêkin.

⁷A kut sinthohai chu iam a omin a dika; A thupêkhai chu iam a iom a ni.

⁸Khahai kha kumkhontuanga hrangin indetin a oma; Thutak le dik taka tho a ni.

⁹Ama khan a mihai kuang irtanna a zu tîra, A thuthung chu kumkhua hrangin an kunga; A'rhmîng chu a'rthiangin a roiinpui a ni.

¹⁰Rengpa chi chu vârna bul a nia; A thupêk zômhai ka kuang inhriat thiamna sa a pêk ngai. Ama'n pâkna chu kumkhua'n om mai a ti.

Inpâkna Hlahai 112

Mi sa vânsatzia

¹Rengpa chu inpâk roi! Rengpa chi mi chu a vâna sa, A thupêkhaia sataka lôm mi chu.

²A chihai chu irnênga hin hrât takin om an ta; Mi dik takhai irchi chu satvurin om an ti.

³A ina khan irchon le sum puan om a ta, A felna chu kumkhua'n om a ti.



⁴Mi dikhai hrangin inthima khan vâa a hong suak ngaia, Rengpa chu mi lunginkham thei tak, inrennaa sip le fel tak a ni.

⁵Mi lunginkhama inpûktir ngai mi chu satna'n a vur ngaia; Ama chu fel takin om thei a ti.

⁶Itika khom inhnîng no nia; Mi fel chu kumkhua'n inhriat maiin om a ti.

⁷Thurchi saloi takhai chi no nia: Rengpa iamin a milung kha a idet a ni.

⁸A milung kha a deta, chi no ni, Ama doituhai chung a thu nuamlam ten a hmu mâka chu.

⁹A sem indara invâihai kuang a pêka; A felna chu kumkhua'n om a ta; Ama kha roiinpuinaa khan chôindômin om a ti.

¹⁰Mi sia khan ama kha hmu a ta, a ninginmur a ta; A ha rial a ta, irhmang a ti; Mi sualhai nuamlam chu irhmang a ti,

Inpâkna Hlahai 113

Rengpa satzia inpâkna

¹Rengpa chu inpâk roi! O Rengpa siahlohai inpâk unglân, Rengpa irhming chu inpâk roi!

²Rengpa irhming chu atûna irthokin kumkhua'n inpâkin om ri se.

³Misa suakna irthoka a tâkna dênin Rengpa irhming chu inpâk hrang a ni.

⁴Rengpa chu nam tinrênghai chung a khan anchungtak a nia; a roiinpuinaa khan irvânhai khi a khêl zit a ni.

⁵Rengpa ei Pathian Anchungtaka a toia;

⁶Irvâna thil omhai le irnênga thil omhai en hranga zuar kul ngai anga hi tu mo om?

⁷Ama khan inrianghai chu vâiphin ata a kaithoi ngaia, Invâihai chu an rennaa ata an dom irsâng ngai,

⁸Mi lianhai kuang an om theina hrangin; A mihai laia mi lianhai kuang ngeia khan.



⁹Ama khan nupang ching chu a chôirsânga; Nâi le te neinu, raifân takin a siam ngai. Rengpa chu inpâk roi!

Inpâkna Hlahai 114

Ferkân kût hla

¹ Israelhai chu Aigupta ram ata an suaka, Jakoba insûng mihai ngei kha nam irpol Oze mi lai ata an suak lai khan.

² Judahai kha hmun irthiang an hong ni tâka, Israelhai chu a roirêlna ram an hong ni sa tâka.

³ Tuikhanglian khan kha kha a hmua, a rota; Jordan dung kha inkîrtirin a om tâka.

⁴ Tâng irsânghai chu belra chalhai angin an irchôma,

⁵ O nang tuikhanglian ithoa mo laizâm ni itho? Nang Jordan, ithoa mo ni ikîr nôk tâk?

⁶ O nangni tânglianhaio, ithoa mo kêlchalhai angin nin irchôm tâk? Nangni tâng irhniamte tehaio, ithoa mo kêltehai angin nin irchôm tâk?

⁷ O nang irnêng, Rengpa makunga inthing ro, Jakobahai Pathian makunga khan.

⁸ Ama khan lungpui chu dîl an changtira, Lungthîr chu tuihnâr an changtira.

Inpâkna Hlahai 115

Pathian dik omsun

¹ Keini ni pe loiin, O Rengpa, Keini ni pe loiin, Ni'rhming chu roiinpuina pe ual ro, Ni lungkhamna le ni thutak sikin.

² Ithoa mo nam tinin, “Khôn mo an Pathian kha?” an ni iti.

³ Kin Pathian chu irvâna a oma; A inuam nuam a isin a ni.

⁴ An millimhai chu tangka le rângachak an ni, Mihriam kut suak an ni.

⁵ Bâi an neia, khan chong thei mahaia, Mit an neia, khan hmu thei mahai.



⁶Mikuar an neia, khan inhre thei mahaia, hnâr an neia, khan mirim inhre thei mahai.

⁷Kuthai an neia, khan ite tôn thei mahai, Ke an neia, khan fe thei mahaia;

⁸Kha siamtuhai kha chu anni ang khan omhai sianlân, A ni, kha iamtuhai khom kha.

⁹O Israelhai, Rengpa chu iam roi. Ama chu nangni changpuitu le nin phô a ni.

¹⁰O Arona in mihai, Rengpa chu iam roi. Ama chu nang changpuitu le nin phô a ni.

¹¹Rengpa khan a nin hriat maia, sat ni vur a ti; Israel mihai chu satvur a ta, Arona in mihai chu satvur a ti.

¹²Rengpa khan a nin hriatmaia, sat ni vur a ti. Israel mihai chu satvur a ta, Arona in mihai chu satvur a ti.

¹³Rengpa chituhai chu satvur a ti, A lian a chînin.

¹⁴Rengpa khan nangni inpungtir sit sit sianlân, Nangni le nin nâihai chu.

¹⁵Rengpa khan sat nangni vur ri se, Irnêng le irvân siamtu khan.

¹⁶Irvânhai khi Rengpa irvânhai a nia, Irnêng rêk hi chu mihriam nâihai a ipêk a ni.

¹⁷Mithihai khan Rengpa chu inpâk mahaia, Hmun inthim taka fehài rêng rêngin inpâk ual mahai.

¹⁸Eini rêkin chu Rengpa inpâk ei ti, Atûna irthoka kumkhontuanguin, Rengpa chu inpâk roi!

Inpâkna Hlahai 116

Thina ata saninhringin Pathian a chôindômna

¹Rengpa chu ki lungthung a ni, Lungkham ki ngênnahai hnukirhâi chu a nir ngai pe sikin.

²Keima tiang a mikuar a sung sikin, Ki hring sêng kêr ka ama chu koi ki ti.



³Thina hruihruhai khan a ni zêla; Seol natnahai khan a ni chela; Lungzîngna le beidongna ki tuang tâka.

⁴Khanchu Rengpa chu kin sama; “O Rengpa, irngaihoi takin ki hringna hi inzôk ro!” tiin ki ngêna.

⁵Rengpa chu mi lunginkham thei tak le fel tak a nia; A ni, ei Pathian chu mi lunginkham thei tak a ni.

⁶Rengpa khan mi farahai chu a donsui ngai; Irhniamin ki oma, ama khan a ni saninhring ta.

⁷O ki hringna, ni’rngamnaa khan kîr nôk roh, Rengpa khan ni chung a satakin a tho tâk sikin.

⁸Ki hringna hi thina ata, Ki mihai hi mitrithi ata, ki kehai hi tûkna ata nangma’n ni saninzôk tâka.

⁹Mihring rama hin Rengpa makunga lêng ki ti.

¹⁰“A sate’n dengitheiin ki oma,” ki ti lai khomin ki iam ngita.

¹¹Ki chardongin, “Mi tûte tûng rua om mahai,” ki lei ti rak tâka.

¹²Ki chung a sintho sat murdi sika hin Rengpa chu imo ki ipêk hrang tâk?

¹³Saninhringna khilât la ki ta, Rengpa irhming irlam ki ti.

¹⁴Ki chong inkunghai chu Rengpa kuang hlen ki ta, A ni, a mihai murdi makunga khan.

¹⁵Rengpa irngaia hlutak chu, A mi irthianghai thina hi a ni.

¹⁶O Rengpa, ni suak ki nia; Ni suak, ni suaknu nâipa chu ki nia; Ni khitnahai chu ni sût tâka.

¹⁷Lômthu hril irbôlnahai chu nang inhlan ki ta, Rengpa irhming chu irlam ki ti.

¹⁸Ki chong inkunghai chu Rengpa kuanga hlen ki ta, A ni, a mihai murdi makunga khan.



¹⁹Rengpa Biak In sâng tuallaia, O Jerusalem, nin lâina taka hlen ki ti.
Rengpa chu inpâk roi!

Inpâkna Hlahai 117

Rengpa inpâkna

¹ O, nam tinrênghaio, Rengpa chu inpâk unglân, Mi tinrênghaio, ama chu inpâk roi.

² A lungkhamna chu ei chung a ar khêlin, Rengpa thutak chu kumkhua'n a iom hrang a ni. Rengpa chu inpâk roi.

Inpâkna Hlahai 118

Râl inhne zoi sika inpâkna

¹ O, Rengpa kuanga khan lômthu hril roi, ama chu a saa; A lungkhamna lianna chu kumkhontuanguin om a ti.

² Israelhai khan “A lungkham lianna chu kumkhontuanguin om a ti,” ti ri sehai.

³ Arona in mihai khan, “A lungkham lianna chu kumkhontuanguin om a ti,” ti ri sehai.

⁴ Rengpa chituhai khan, “A lungkham lianna chu kumkhontuanguin om a ti,” ti ri se.

⁵ Ki lungzîngna irthokin Rengpa chu kin sama; Rengpa khan a ni sâma, a nin zôk tâka.

⁶ Rengpa chu keima tiang a changa, chi no ning; Mihriamin imo a ni ilo hrang?

⁷ Rengpa chu ni changpui hrangin keima tiang a changa, Khasikin ni hnôltuhai nuamlam chu hmu ki ti.

⁸ Mihriam iam nêkin chu RENGPAAM iamna irnghat hi a isa ual a ni.

⁹ Mi lianhai iam nêkin chu RENGPAAM iamna irnghat hi a sa ual.

¹⁰ Nam tinrêngin an ni hual vêla; Anni chu Rengpa irhmingin ki'rh mangtir zithai tâka.



- 11Anni khan an ni hual vêla; Anni chu Rengpa irhmingin ki'rhmantirhai zit ta.
- 12Khuai angin an ni hual vêla, Khannisianlân, ilhling kâng angin an ram tîra, Anni chu Rengpa irhmingin ki'rhmantirhai zita.
- 13Kin rîlna hrangin sun rak rakin ki oma, Khannisianlân, Rengpa khan a ni changpui zôi zela.
- 14Rengpa chu ki hrâtna le ki hla a nia; Ama chu ki saninhringna a ni ta.
- 15Irgai roi, mi felhai puan ina râl inhnê zoia lômna hla irhâi chu;
- 16“Rengpa kut chang tiang khan hâi takin a tho ngai,” an ti ngai.
- 17 Thi no ninga, hring ki ti; Rengpa khan satakin a ni sepa, Thina tak chu nin tungtir mah.
- 18Rengpa khan satakin a ni sepa; Thina tak chu nin tungtir mah.
- 19Biak In mikothai hi nin hong pe roi; Khahaia khan lût ki ta, Rengpa kuang lômthu hril ki ti.
- 20 Ama hi Rengpa mikot a nia; Mi felhai vai lût an ti.
- 21Nangma'n ni ni sâm tâk sikin ni kuang lômthu hril ki ti, Nang chu ki saninhringna ni ni tâka.
- 22 In sinhai lung indit loi kha a kila lung poimo tak a hong ni ta.
- 23Ama kha Rengpa itho a nia; Ei mithmua a irkhêl a ni!
- 24Ama hi Rengpa sîn inkung chu a nia; Amaa hin raifânin lôm ei ti!
- 25O Rengpa, lungkhamin ni saninhringin lân; O Rengpa, lungkhamin hlochukna ni pe ro!
- 26Rengpa irhminga zuang chu hoi pe ri se! Rengpa ina irthokin sat nangni kin ivur a ni.
- 27Rengpa chu Pathian a ni, ama khan vâa a ni pêka: Nin kuta thing ôn chu chôiin hruaithe chu phut unglân, Maichâm irkê irhîla khan.



²⁸Nang chu ki Pathian ni nia, lônthu nang hril ki ti; Ki Pathian ni nia, nang chôindôm ki ti.

²⁹O, Rengpa kuanga lônthu hril roi, ama chu a saa; A lungkham lianna chu kumtuangin om a ti.

Inpâkna Hlahai 119

Rengpa Dân

¹A hringnuna mi sa irkiphai chu an vân a sa, Rengpa dân zômtuhai chu.

²A thupêk zômhai chu an vân a sa, Lungrîl murdia ama zongtuhai chu.

³Anni khan sa no rêng rêng tho ngai mahaia; Rengpa lampuia khan an fe ngai.

⁴Nangma'n ni dânhai chu ni ni pêka; Sathnem irngai taka zôm hrangin ni ni bêa.

⁵O, ni roizêkhai chu zôm hrangin Ki om dânhai hi indetin om ta sianlân chu o!

⁶Khanchu mualinphoiin om no ninga, Ni thupêkhai murdi chu ki vong ngitin chu.

⁷Lungrîl diktak irputin nang inpâk ki ta, Ni roirêlna felhai chu ki'rchu tikin chu.

⁸Ni roi irfûkhai zôm ki ta; O ni mâk viat no roh.

Rengpa Dân zôm

⁹Vânglaiin itin mo a om dân a irthiangtir thei hrang? Ni thu ang taka a om dân veng insa'n,

¹⁰Ki lungrîl murdi'n nang ki zonga; O ni thupêkhai ki imâk hrang chu phal viat no ro.

¹¹Ni chung a ki sual lina hrangin, Ni dânhai chu ki lungrîla ki phûm khaka.

¹²O Rengpa, inpâkin om ro; Ni lampuihai chu nir chutir roh.

¹³Ni bâia roirêlna suak murdihai chu ki bâiin kin puanga.



¹⁴Ni thupêk zôma khan ki lôma, Irchongna murdia ki raifâna nêkin.

¹⁵Nangma irchutirna thuhai chu ngaitua ki ti. Ni lampuihai chu ngaisak ki ti.

¹⁶Ni roizêk chungâ khan lôm ki ta; Ni thuhai chu irnghil no ning.

Rengpa Dâna lômna

¹⁷Ki hring theina hrang le ni dân ki zôm theina hrangin, Ni suak chungâ hin satakin tho roh.

¹⁸Ni dâna irthokin thudik irkhêl tak ki hmu theina hrangin, Ki mithai nin meng pe roh.

¹⁹ Irnênga hin mikhual ki nia; Ni thupêkhai chu ki kuang ata thup no roh.

²⁰Itiklai khomin ni roirêlnahai irngai sikin, Ki hringna hi beiindongin a irzal a ni.

²¹Mi lâiripâk, khosâl tonghai chu ni hala; Ni thupêk zôm ngai loihai chu.

²²Hrilinsiatna le hmusitna hi ki kuang ata la pai ro, Ni dânhai chu ki zôm sikin.

²³Mi lianhai chu toi khomin mi sêl khom sianlân, Ni suak hin ni roizêk chu ngaitua mai ki ti.

²⁴Nangma irchutirna thuhai chu ki lômna a nia; Roi ni izêk petuhai khom an ni.

Rengpa Dân zôm tumna

²⁵Ki hringna hi vâiphin a kop khaka; Ni thu ang takin nin hartir roh.

²⁶Ki om dânhai chu ni kuang kin puanga, Nangma'n ni ni sâma; Ni lampuihai chu nir chutir roh.

²⁷Ni sepna lampui chu nin hriat thiamtirin lân, Khanchu ni sinirkhêl thuhai chu ngaitua ki ti.

²⁸Ki hringna hi beidongin a sip tâka; Ni thu ang takin nin hrâtir ro.

²⁹Lam dik loi hi ki kuang ata khâipaiin lân; Lungkham takin ni dân chu nir chutir ro.



³⁰Iamomna lampui kin thanga; Ni roirêlnahai chu ki makunga kin omtir maia.

³¹Ni'rchutirna thuhai ki vong ngita; O Rengpa, mualinphoiin nin omtir no roh.

³² Ni thupêkna lam tiang khan intân ki ta, Inhriat thiamna ni ni pêk hrang sikin.

Inhriat thiamna ngênna

³³O Rengpa, ni roizêk lampui chu nir chutirin lân, Khanchu a mong dênin zôm ki ti.

³⁴Ni dân ki vong insa theina hrangin inhriat thiamna ni pe ro; Khanchu ki lungrîl murdi'n zôm ki ti.

³⁵Ni thupêk lampuia ni hruaiin lân, Ama vai khan lômna ki hmu ngai sikin.

³⁶ Huatirhamna lama ni loiin ni dân zômna tiang khan ki milung hi irlêktir roh.

³⁷Thil chanlamboi papai en loi hrangin Ki mit hi ni la pe'n lân; Ni lampuihaia khan hringna ni pe roh.

³⁸Ni chonginkung chu ni suak kuang hin indetin lân, Ama kha nangma chituhai hrang vai a ni.

³⁹Mi hrilsiatna ki ichi hi lapai ro; Ni roirêlnahai chu a sa vang na!

⁴⁰Irngai ta, ni thupêkhai chu zôm ki nuam tak tak ngaia; Ni felnaa khan hringna thar ni pe roh.

Rengpa Dâna irngat

⁴¹O Rengpa, ni lungkham lianna chu Ki kuang zuanga inlangtirin lân, Ni chonginkung ang takin ni saninhring roh.

⁴²Khanchu, ni hrilsiatuhai sâмна hrang nei ki ti, Ni thu ki iam sikin.

⁴³Khan, thutak thu chu ki bâi ata hi la suak zit no ro, Ni roirêlnahai chu ki isabei a ni sikin.

⁴⁴Ni dân chu zôm mai ki ta, kumkhontuanguin;



⁴⁵Khanchu zalên takin lêng ki ta, Ni'rchutirna thuhai kha ki zong sikin.

⁴⁶ Ni thupêkhai chu rêng hai makunga hril ki ta, Inzak no ning.

⁴⁷Ni thupêkhaia khan ki lôm ngaia, Lung ki ithung a ni.

⁴⁸Ni thupêkhai chu kin hlu'n ki mahripa; Ni ni irchûna thuhai hi ngaitua ki ti.

Rengpa Dân iam ngamna

⁴⁹Ni suak kuang ni chonginkung chu inhre mai ro; Ama khan sabeina lian tak a ni ipêk a ni.

⁵⁰Ama kha ki dengtheinaa khan ki'rtharngamna a ni; Ni chonginkung khan hringna a ni pêk ngai.

⁵¹Mi lâripâkhai khan an ni nuišo maia, Khannisian ni dân chu ma viat ma ung.

⁵²O Rengpa, khorsianga ni roirêlnahai chu kin hriat maia, Irtharngam ki'rsak ngai.

⁵³Mi siat ni dân mâktuhai sikin, Lunghoiloina lian takin a ni de tâka.

⁵⁴Ki khual inzinna rama hin Ni thupêkhai chu ki hla a ni ngai.

⁵⁵O Rengpa, zâna khan nang kin hriat mai ngaia, Ni dân khom ki ngaitua ngai.

⁵⁶Ni thupêkhai chu ki vong insa sikin. Vânsatna ki chung a ichum a ni.

Rengpa Dân irngaiinhlutna

⁵⁷Rengpa chu ki dongtum a ni; Ni thu zôm hrangin chong kin kunga.

⁵⁸Ki lungrîl murdi'n ni lungkhamna ki ngêna; Ni thu ang takin lung nin kham roh.

⁵⁹ Ni om dân hai ki ngaituaa, Ni nir chûna tiang khan ki ke ki phêt tâka.

⁶⁰Ni thupêkhai zôm hrangin ki'rhnota, ir-ial ma ung.

⁶¹Mi siahai chângin nir kul khomsian, Ni dân chu irnghil ngai ma ung.

⁶² Zân laia nang inpâk hrangin ki thoia, Ni roirêl felhai sikin.

⁶³Nangma chitu murdihai le Ni dân zôm tuhai murdi rual ki ni.



⁶⁴O Rengpa, irnêng hi ni lungkham lianna'n a sipa; Ni thupêkhai chu nir chutir roh.

Rengpa Dân hlutna

⁶⁵O Rengpa, ni thu ang takin, Ni suak hi nin satir ngai.

⁶⁶Vârna le inhriatna nir chutir ro, Ni thupêkhai chu ki iam sikin.

⁶⁷Dengintheia ki om mân khan kin vâi irhmang ngaia, Atûn chu ni thu ki zôm ta.

⁶⁸Nang chu ni sa a, thil sa ni thoa; Ni thupêkhai chu nir chutir roh.

⁶⁹Mi lâiripâkhai khan ki chung a milak an phuaa; Khannisian ki lungrîl murdi'n ni nir chutirna thuhai chu vong insa ki ti.

⁷⁰Hi mihai hin inhriat thiamna zel nei mahaia, Keima rêk chu ni dân chung a ki lôm ngai.

⁷¹Ni thupêkhai chu ki'rchu theina hrangin, Dengtheia ki om kha ki ta hrangin a isa a ni.

⁷²Rângachak le tangka sâng tamtak nêkin Ni bâia dân suak chu ki hrangin a sa ual a ni.

Rengpa Dân dikzia

⁷³Ni kuta ni siamin, ni nin dingtira; Ni thupêkhai chu ki'rchu theina hrangin inhriat thiamna ni pe roh.

⁷⁴Nangma chitu murdihai khan ni hmu an ta, lôm an ti, Ni thuhaia ki'rngat ngai sikin.

⁷⁵O Rengpa, ni roirêlhai chu fel ti le, Nangma'n chu iamom takin a ni, ni ni sep a nih ti kin hriat tâka.

⁷⁶Ni suak kuang ni chonginkung ang takin, Ni lungkham lianna khan irtharngam ni sak ri se.

⁷⁷Ki hring theina hrangin ni satna chu ki kuang zuang ri se; Ni dân chu ki lômna a ni.



⁷⁸Pathian ngaisak loi mihai chu mualinphoiin om ri se. Dik loi takin an nir hniamtir sikin. Khannisianlân keima'n chu ni nir chutirna thuhai ngaitua ki ti.

⁷⁹Nangma chi mihai chu keima tiang mâ song sianlân, Khanchu ni thupêkhai chu inhria an ti.

⁸⁰Ki mualinphoi lolina hrangin ki lungrîl hi ki thupêka khan sat irkipin om ri se.

Sansua ngêna

⁸¹Ki hringna hi ni saninhringna irngaiin a'rzal tâka; Khannisianlân, ni thu chu ki inhlu a ni.

⁸²Ni thu thîrna'n ki mit a chamai zoi tâka; "Nangma'n itika mo irtharngam ni ni isak hrang?" ki ti, ki ti ngai.

⁸³Meikhu iur savun kok ang kha ki ni tâka, Khannisian, ni thupêkhai chu irnghil ma ung.

⁸⁴ Ni suak hin i dôra sôt mo a la inghâk hrang? Nuamning ni lôtu hai chung a hin itika mo roi ni irêl hrang?

⁸⁵Mi lâirpâk, ni dân zôm loihai khan, Ki tâkna hrang khur an choia.

⁸⁶Ni thupêkhai murdi chu iam a oma; Mihriamhai khan dikloi takin deng an ni intheitir hi, o ni changpui roh.

⁸⁷Anni khan irnênga hin an nir hmangtir vâng vânga, Khannisianlân, ni thupêkhai chu hnung songsan ma ung.

⁸⁸Ni lungkham lianna khan ki hringna hôi ro, Khanchu ni bâia dân suakhai kha zôm thei ki ti.

Rengpa Dân iamomzia

⁸⁹ O Rengpa, kumkhua hrangin Ni thu chu irvâna indetin a oma.

⁹⁰Ni iamomna chu suanpâr tin tin dênin om a ta; Irnêng hi nin dinga, det takin a om maia.



⁹¹Khahai kha nangma thupêkin atûn ten an om maia, Thil tinrêng chu ni suak an ni.

⁹²Ni dân chu ki lômna ni no sianlân chu, Ki dengtheinaa khan ki irhmang hrang tâk a ni.

⁹³Ni thupêkhai chu irnghil viat no ning, Nangma'n ama khan ni nin hring tâk sikin.

⁹⁴Ni ta ki ni hi, ni saninhring ro; Ni thupêkhai chu ki zong ngaia.

⁹⁵Mi siahai khan nir hmangtir tumin an nin ruang ngaia, Khannisianlân, ni dân chu ngaitua ki ti.

⁹⁶Thil tinrêng mongna ten a iom a nih ti kin hriat tâka; Khannisianlân, ni thupêk chu a sa irkip a ni.

Rengpa Dân irngaiihlutna

⁹⁷O, ni dân chu ki'rngaiinhlu bâka na! Sûn sôt ki ngaitua ngai a ni.

⁹⁸Ni thupêkhai khan ni doituhai nêka vâu ualin a ni siama, Kumkhua'n ki kuang a om mai sikin.

⁹⁹Ni'rchutirtu murdi nêkin inhriat thiamna ki nei ual a ni, Ni nir chûtirna ki ngaitua ngai sikin.

¹⁰⁰Tarhai nêkin ki vâu ual a ni, Ni thupêkhai ki zôm sikin.

¹⁰¹Ni thupêkhai ki zôm theina hrangin, Lamnoa rêng rêng ki kehài hi pêt hrang phal ma ung.

¹⁰²Ni roirêlnahai ata chu pêt ma ung, Nangma'n ni nir chûtir sikin.

¹⁰³Ni thuhai hi ki bâu hrangin a thum bâka! A ni, ki bâu hrangin chu khuaih lutui nêkin a thum ual.

¹⁰⁴Ni dânhai sikin vârna ki neia, Khasikin om dân dikloi tinrêng hi ki ihnôl a ni.

Rengpa Dân chu meiser a ni

¹⁰⁵Ni thu hi ki ke hrangin meiser a nia, Ki lampui hrangin vâu a ni.



- 106 Ni roirêl fel takhai chu zôm hrangin, Chong det tak kin kunga.
- 107 A sate'n intaktirin ki oma; O Rengpa, ni thu ang takin nin hring roh.
- 108 O Rengpa, nang ki chôindômna thilpêk hi pom ro, Ni thupêkhai chu nir chûtir roh.
- 109 Ki hringna hi ki kutin kin tûk maia, Khannisianlân, ni dân chu irnghil ma ung.
- 110 Mi siahai khan kin ôkna hrang châng an kama, Khannisianlân, ni thupêkhai chu hnung songsan ma ung.
- 111 Ni thupêkhai chu kumkhua'n ni dongtum a nia; A ni, ki lungrîl lômna tak a ni.
- 112 Kumkhua'n a mong dênin, Ni dânhai chu zôm hrangin ki milung ki'rlêktira.

Rengpa Dân chu zôkna a ni

- 113 Lungrîl mumal neilo mi hai chu ki hnôla, Ni dân rêk chu ki'rngaiinhlu a ni.
- 114 Nang chu ki'rbîkna hmun le ki phô ni nia; Ni thu chu ki tûngna a ni.
- 115 Ki Pathian thupêkhai ki zôm theina hrangin, Thil saloi thotuhai, ki kuang ata rotpai roi,
- 116 Ki hring theina hrangin ni chonginkung ang takin tho ro, Ki tûngna hin mualinphoiin nin omtir no roh.
- 117 Ni kaiin lân, khanchu zôk ki ti, Ni thupêkhai chu uksak mai ki ti.
- 118 Ni dân zôm loituhai murdi chu ni hnôla, An huangna thuhai chu chanlamboi a ni.
- 119 Irrênga mi siahai murdi chu sahrok angin ni bêa, Khasikin ni nir chûtirna chu ki inhlu a ni.
- 120 Ki takpum hi nangma chi sikin an thinga; Ni roirêlnahai chu ki ichi a ni.

Rengpa Dân zôm

- 121 Thil dik le thil sa ki tho ngaia; Ni nêpsiatuhai kuang nin thâ rak no roh.



122Ni suak chu changpui ni ti, ti inkungin lân; Mi lâirpâkhai khan ni nêpsia no ri sehai.

123Ni saninhringna hranga thîrna'n ki mit a chamai zoi tâka, Ni saninhring hranga ni chonginkung thîrna'n.

124Ni lungkham lianna ang takin ni suak chung a hin tho'n lân, Ni thupêkhai chu nir chûtir roh.

125Ni suak ki nia; inhriat thiamna ni pe ro, Ni'rchûtirna kin hriat theina hrangin.

126Rengpa, ni ichâng hrang zoro a ni ta, Ni dân hi chanlamboiin an siam tâk sikin.

127Ni dânhai chu rângachak nêkin kin hlua, A ni, rângachak irthiang nêkin khom.

128Khasikin ni thupêkhai tiang kal ki phêta, Om dân dikloi tinrêng ki hnôl a ni.

Rengpa Dân zôm nuamna

129Ni irchûtirna chu a irkhêl a ni; Khasikin ki lungrîl murdi'n ki zôm ngai.

130Ni thu hrilfiana hin mihai an vârtira, Mi'nmôlhài chu inhriat thiamna a pêk ngai.

131Ni thupêkhai irngai sikin ki bái ki ânga, Kin phu huan huan a ni.

132 Keima tiang hmâi irnghatin lân, lung nin kham ro, Nangma lungthunghai lung nin kham ngai ang khan.

133Ni chonginkung ang takin ki kalbîhai indetin lân, Sualna rêng rêng ki chung a thu inneitir no roh.

134 Mihai nêpsiana ata chu ni sansuakin lân, Khanchu ni thupêkhai hi zôm thei ki ti.

135Ni hmêlin ni suak chu êl invârin lân, Ni dânhai chu nir chûtir ro.

136Ki mitrithi hi tuidung angin a luang dût dût, Mihaiin ni dân an zôm no sikin.



Rengpa Dân dikzia

137 O Rengpa, nang chu ni fela, Ni roirêlna khom a idik a ni.

138 Ni dân pêkhai chu an dikin iam an iom a ni.

139 Ki sathnem irngaina hin a ni fâk zoi ta, A ni doituhaiin ni dân mahrip an tho no sikin.

140 Ni chonginkung hi a dik bâka na! Ni suak hin ki inhlu a ni.

141 Michîn le hmusitom ki nia, Khannisianlân, nir chûtirna thuhai chu irnghil ngai ma unga,

142 Ni felna chu kumkhua'n om mai a ta, Itiklai khomin ni dân chu a idik a ni.

143 Lungzîngna le irtha tâkna khan a ni dê tâka; Khannisianlân, ni thupêkhai chu ki lômna a ni.

144 Ni nir chûtirnahai chu kumkhua'n a ifel a ni; Inhriat thiamna ni pe ro, khanchu hring mai ki ti.

Sansuak ngênna

145 Ki lungrîl murdi'n nang kin sama; O Rengpa, ni sâm roh. Ni thupêkhai chu zôm ki ti.

146 Nang ki koi ngaia; ni sansuak ro, Khanchu ni dânhai chu zôm kin ti.

147 Kôlirsal mân ni changpui hrangin nang kin sama; Ni chonginkunga khan ki tûngna ki sia ngai.

148 Ni thu ki ngaitua theina hrangin, Zân khovârin ki meng ngai.

149 Ni lungkham lianna sikin ki hnukirhai hi irngaiin lân; O Rengpa, lungkhamin ki hringna hrung roh.

150 Mi nunsia, nuamninga ni lôthai khan an ni hong nâia, Anni chu ni dân zôm loi an ni.

151 O Rengpa, nang chu ni ni nâi maia, Ni thupêkhai chu thutak a ni.

152 Tian ata ni nir chûtirna irthokin khahai kha; Kumkhua hrangin ni indet an nih ti kin hriat ta.



Changpui ngêna

153Ki dengtheizia hi enin lân, ni saninzôk ro, Ni dân chu ki'rngil ngai no sikin.

154Ki thu nin sîrpuiin, ni'rtanin lân; Ni thu ang takin nin hring roh.

155Mi siahai chu saninhring ni no nia, Ni dân an zôm no sikin.

156O Rengpa, ni lungkhamna chu an thûk vang na! Lungkhamin ni saninzôk roh.

157Ni nêpsiatuhai le ni doituhai chu tamtak an nia, Khannisianlân, ni dân chu lôi ngai ma ung.

158Vâirlethai chu lunghoi loi takin ki ena, Ni thu an zôm no sikin.

159Ni nir chûtirna thuhai kin hlutzia hi irngaitua ta! O Rengpa, ni lungkham lianna sikin ki hringna hi hôi roh.

160Ni thu irchû khom kha thutak a nia; Ni roirêlna fel tinrêng khom hi kumkhua'n om mai a ti.

Rengpa dân irpêkna

161Mi lianhaiin a bi boiin nuamning an ni loa, Khannisianlân, ki lungrîl khan ni thuhai kha a ni, a ichi chu.

162Ni thua hin ki ilôm a ni, Irchon hmu ang khan.

163Milak hi ki hnôlin kin tira, Ni dân rêk chu ki inhlu a ni.

164Sûn khata voi sari nang kin pâk ngaia; Ni roirêl felhai sikin.

165Ni dân lungthunghaiin chu irtharngamna lian tak an nei ngaia; Ite'n inrîl thei ngai mah.

166O Rengpa, ni saninhringna ki tûnga, Ni thupêkhai angin ki sin ngai a ni.

167Ki hringna hin ni nir chûtirna chu a zôm ngaia; Ki inhlu tak tak a ni.

168Ni thupêkhai le ni nir chûtirna thuhai chu ki zôm ngai, Ki om dân murdi hi ni hmu zit a ni.

Changpui ngêna chongchaina



169O Rengpa, ki khêk irhâi hi ni kuang hong tung ri se; Ni thu ang takin inhriat thiamna ni pe roh.

170Ki ngênna hi ni makung tung sianlân; Ni thu ang takin ni saninzôk roh.

171Ki bâi hin ni thu inpâkin zâi ri se; Nangma'n ni dânhai ni nir chûtir ngai sikin.

172Ki milei hin ni thu inpâkin zâi ri se, Ni thupêk murdi chu a dik sikin.

173Ni kut chu ni changpui hrangin irfûk diamin om ri se, Ni thupêkhai chu kin thang sikin.

174O Rengpa, ni saninhringna chu ki'rngai bâka na! Ni dân chu ki lômna a ni.

175Ki hringna hi inhring ro, khanchu nang inpâk ki ti, Ni nir chûtirna khan ni changpui roh.

176Belra irhmang angin kin vâi irhmanga; Ni suak hi zong ro, Ni thupêkhai chu ki'rngil ngai no sikin.

Inpâkna Hlahai 120

Changpui ngênna

1 Ki lungzîng laia khan Rengpa chu kin sama, Khanchu a ni sâma.

2O Rengpa, mi minlakhai le mi huangsiahai ata kha, Ki hringna hi inzôk roh.

3Nang mi huangsia, Pathianin imo nang a lo? Dengtheina itin mo ni chung a itung lam?

4Râlpa khandai ngaih takhai, Thîr ilhlingnei ir-alhaia khan deng nang inthei a ti.

5Mesek-hai ram ki om le Kedarhai puan in laia ki om hi, Ki chung a rik vang na!

6Mi, irngeina hnôltuhai laia sôttak ki om tâka.

7Keima'n chu irngei ki nuama, Khannisianlân, ki chong le chu irsual an nuam ngai.

Inpâkna Hlahai 121



Rengpa ni hrungtu

- ¹Tâng tianghai khin ki mit inlêngtir ki ta; “Kho tianga mi mo ni changpuitu hrang zuang tung hrang?” tiin.
- ²Ni changpui hrang chu Rengpa, Irnêng le irvân siamtu kuanga irthokin zuang tung a ti.
- ³ Ama khan ni ke pêt hrang phal no nia, Nang a vêngtu chu inmusu no ni.
- ⁴Irngai ta, Israelhai nghâktu chu inmusu’n in irnghil no ni.
- ⁵Rengpa chu nang a vêngtu a nia; Ama chu ni chang tianga nang irhlîtu a ni.
- ⁶Sûna misa’n nang em no nia, Zâna tha’n nang em ual no ni.
- ⁷Rengpa khan sual tinrêng ata nang hrung a ta; Ni hringna chu hrung a ti.
- ⁸Rengpa khan ni suak le ni lût chu nang vêng a ta, Atûna irthoka kumkhua’n.

Inpâkna Hlahai 122

Jerusalem inpâkna

- ¹ “Rengpa ina fe ei ti,” Ki kuang an ti lai khan ki lôma.
- ²O Jerusalem, ni kul mikot sûnga kin kehai chu a ngîr tâka.
- ³Jerusalem, khopui inding thar, Det taka siama irfûk chu:
- ⁴Rengpa irhming inpâk hrangin ama khan a namhai, Israel namhai ngei chu, A thupêk ang taka Rengpa kuang lômthu insîr hrangin an fe ngai.
- ⁵Ama khan roirêlna rêngtoihmun intoi a ni, Davida in mihai rêngtoihmun ngei kha.
- ⁶Jerusalem irtharngamna hrang chu ngên roi: “Nang inhlulai chu hoi pehai a ti.
- ⁷Ni kul sûnghaia khan irngeina om sianlân, Ni rêng inhaia khan hoina om ri se,” tiin.
- ⁸Ki urêng hai le ki rualhai sikin, “Ni in sûnga khan irngeina om ri se,” ki tia.
- ⁹Rengpa ki Pathian in sikin, Ni satna hrang zong ki ti.



Inpâkna Hlahai 123

Lungkham ngênna

¹O, nang irvâna toi ngai, Nangma tiang ki mit kin lêng ngai hi.

²Irngai ta, siahlohai mitin an pu kut tiang an en ngai ang le, Siahlonu mitin a pi kut tiang a ien chian ngai angin, Keini mit khomin Rengpa kin Pathian tiang a ien chian a ni, Lung a nin kham mâka chu.

³O Rengpa, lung nin kham ro, O lung nin kham ro, Hmusitna'n kin sip hrai tâk.

⁴Mi hoihôkhai êsêlna le lâiripâkhai hmusitna'n Kin hringna hi a sip hrai ta.

Inpâkna Hlahai 124

Pathianin a mihai a donsui

Dauida iphua

¹"Eini tianga chang chu Rengpa ni no sianlân chu," Israelhai khan ti ri se.

²"Ei râlhaiin an ni doi laia khan ei tianga chang chu Rengpa ni no sianlân chu,

³Kha lai renga khan an ni khan ei hring pumin nin lem zoi ta an ti, Ei chung a an ningmur a suak lai khan;

⁴Kha lai renga khan tuihai kha ni tân zoi ta a ti.

⁵Kha lai renga khan suar tui khan ni ngâm ta a ti.

⁶Sa sê anga sê hranga an irkama ni pe loitu Rengpa chu inpâkin om ri se.

⁷Châng kamtuhai châng ata vâ a isuak pat angin ei hringna hi a suak tâka; Châng chu a siat tâka; eini hi ei isuak tâk a ni.

⁸Ni changpuina hrang chu Rengpa, Irnêng le irvân siamtua irthokin a ni," tiin.

Inpâkna Hlahai 125

Pathian mihai zôkzia

¹Rengpa iamtuhai chu Zion tâng, inhnîng ngai loi, Kumkhuaa om mai hrang ang kha a ni.



²Tânghai chu Jerusalem vêla a om mai ngai angin, Rengpa chu a mihai kôla a om mai ngai. Atûna irthoka kumtuangin.

³ Mi siahai chu mi felhai rama khan inlal no nihaia; Nakana mi felhai khan an kuthaiin siatna an inban itinin.

⁴O Rengpa, sataka omhai chung a khan satakin tho ro. An lungrîla dik taka omhai chung a khan.

⁵Mi siahai deng nin theitir tikin, Ni lampui hnung songhai khom hi denginthei sa roh. Israelhai chung a khan irtharngamna om ri se!

Inpâkna Hlahai 126

Sansua ngênna

¹Rengpa'n Jerusalema a ni hong hruai kîr nôk laia khan, Irmanga phan ang kha a ni.

²Kha laia khan ei bâi chu raifânna'n a sipa, Ei milei chu hla sakin; Kha laia khan nam tin khan, "Rengpa'n an hrang thil roiinpui takhai a itho pe a ni," an tia.

³Rengpa khan thil roiinpui takhai a ni tho pea; A sân ei ilôm a ni.

⁴O Rengpa, suaka kin intâng hi kin rama ni hruai kîr nôk ro, Sim rama vadunghai angin.

⁵Mitriti tâk puma tûhaiin chu raifân takin ât an ti.

⁶Chap pumin fachî suakpui khom sianlân, An bu mûthai chôiin, Râifân takin hong kîr nôk an ti.

Inpâkna Hlahai 127

Pathian satzia inpâkna

Solomona iphua

¹Rengpa'n in a sin no'n chu, A sintuhai chu an sinsôl chian a ni: Rengpa'n khopui a vêng insa no'n chu, A vêngtuhai chu môk meng chian an ni.



²Zîng taka nin thoia, khohloia nin irngama, Sin sôlna ra nin ifâk ngai hi, nin ta hrangin mâkana a ni: Rengpa'n lung a ithunghai chu an in kârin farua a pêk ngai.

³Irngai ta, nâi le têhai hi Rengpa ata ei irchon an nia: Rîla ra hi a lômman ni pêk a ni.

⁴Vânglai nâihai chu mi hrât kuta thal omhai ang hi a ni.

⁵Khaanga thal tamtaka nei chu a vâa sa. Kul mikota a râlhai a'rtongpui lai khomin mualinphoiin om no ni.

Inpâkna Hlahai 128

Rengpa Dân zôm lômman

¹Rengpa chihai ka chu an vâa sa, A lampui hrôtuhai chu.

²Ni kut sinsôl ra chu fa ni ta; Lôm takin om ni ta, irthiphiaiin om ni ti.

³Ni dôngma chu ni in sâng rîla khan grep hrui ra nuam tak angin om a ta, Ni nâi le têhai chu ni maichâm irhîlin oliv chiakhai angin om an ti.

⁴Irngai ta, Rengpa chi mi chu khaang khan satvurin om an ti.

⁵Rengpa khan Zion-a irthokin sat nang vur a ta; Khanchu, ni dam sâng kâr ka Jerusalem satna hmu ni ti.

⁶A ni, ni tûhai chu la hmu ni ti. Israelhai chungha khan irtharngamna om ri se!

Inpâkna Hlahai 129

Israel râlhai satna hrang chongchaina

¹"Ki nâipang lai ata mihaiin deng an nin theia," Israelhaiin ti ri sehai.

²"Ki nâipangte lai ata mihaiin deng an nin theia, Khannisianlân nin hnê mahai.

³Âl kaituhai âl kai irrîn angin ki hnungzânga hin inthûk takin an rîn inphopa.

⁴Khannisianlân, Rengpa chu mi fel a ni; Mi siahai hruihualhai chu a ât insat tâk," tiin.

⁵Zion hnôltu murdihai chu Mualinphoi le laizâm tho'n om ri se.



⁶A'rsôn lian mâna chuai nôk ngai, In chung a hloisûl angin om ri se.

⁷Tûte'n ama kha ât bûm no nia; Tûte'n irkit hrangin intêl no ni.

⁸"Rengpa satvurna nin chung a om ri se; Rengpa irhmingin sat nangni kin vur," Theng irlôihai khan ti no nihai.

Inpâkna Hlahai 130

Changpui ngêna

¹O Rengpa, ki buaina inthûk taka irthoka hin nang kin sam.

²Rengpa ki hnukirhai hi irngaiin lân; Changpui ki ngêna hnukirhaia hin ni mikuar ni sung pe roh.

³Rengpa, kin sualnahai ni'rsinsia hletin chu, O Rengpa, tu mo an ding thei hrang?

⁴Khannisianlân, ni ni ngaidama, Nang ki chi theina hrangin.

⁵Rengpa chu ki nghâk maia, ki hringna hin a nghâk maia, A thu chu ki iam nasan a ni.

⁶Vêngtuhaiin khovâr an ithîr nêka nghâkhmo'n, A ni, vêngtuhaiin khovâr an ithîr nêka nghâkhmo'n. Ki hringna hin Rengpa chu a ithîr mai a ni.

⁷O Israelhai, Rengpa chu tûng roi, Rengpa kuang khan lungkham lianna a oma, a kuanga khan irtanna a om.

⁸Khanchu ama khan Israelhai chu, an sualna murdi ata irtan a ti.

Inpâkna Hlahai 131

Irngaiintôm chongchaina

¹Rengpa, ki lungrîl hi irpâk maka, Ki mit en khom irsâng ual maka; Ki hranga thil roiinpui takhai le thil irkhêl takhaia changin uksak ngai ma unga.

²Ki hringna hi kin thêma, kin dâihrektira, Nâite a nu rôp chung a itâi orh orh ngai angin; Ki hringna hi a itâi riam a ni.

³O Israelhai, Rengpa chu tûng roi atûna irthoka kumkhua'n.

Inpâkna Hlahai 132



Tempil inpâkna hla

- ¹Rengpa, Davida chu a dengthei tuangna murdi inhrepui ro;
- ²Rengpa kuanga chong irkhâma, Jakoba Pathian roiinpui tak kuang chong an kungzia kha:
- ³“Ki omna ina lût viat no ning; Ki zâlmuna khom lût viat no ning;
- ⁴Irgam no ninga, Ki mit khom insîng viat no ning,
- ⁵Rengpa hrang hmun, Jakoba Pathian hrât hrang, In ki hmu pe mâka chu,” tiin.
- ⁶Irgai ta, Bethlehem-a a Thuthung Bôm thurchi ei inhriata, Jearim hmuna ei hmu tâka.
- ⁷“A omna khan fe ei ta, A ke bula chubai lei mûk rei,” kin tia.
- ⁸ O Rengpa, thoiin lân, Nangma le ni Thuthung Bôm leh khan ni Tempila hin lût ro. Ni hrâtna Bôm leh khatak khan kumkhua’n om ro.
- ⁹Ni ochaihai chu felna’n inthuum sianlân; Ni mi irthianghai chu raifânin khêk ri se.
- ¹⁰Ni siahlo Davida kuang chong nin kunga; Ni sahriak irthûtir hmêl chu irheikîrtir no ro.
- ¹¹Rengpa khan Davida kuang chonginkung det an kunga; Ama kha la nôk ta no nia; Nangma nâi ngei ni rêngtoihmuna khan intoitir ki ta,
- ¹²Ni nâihai khan ki thuthung le ki thupêkhai, Anni ki la’rchûtir hrang kha an zômin chu, An nâihai khom kumkhua’n ni rêngtoihmuna khan toi mai an ti,” tiin.
- ¹³Rengpa khan Zion chu an thanga; A omna hrangin a nuama.
- ¹⁴Hi hi kumkhuaa ki omna hrang hmun a nia; Hi hin om mai ki ta, ki nuam lam tak a ni.
- ¹⁵Zion chu a irsam murdia tamtakin satvur ki ta; A mi inrianghai chu bu’n inkhop ki ti.



¹⁶ A ochaihai chu saninhringna'n inthuum ki ta, A mi irthianghai chu raifâna hla sakin khêk an ti.

¹⁷ Kha khan Davida irchia mi inkhat rêng roiinpui takin siam ki ta; Ki rêng inthang ta hrangin meiser ki'rfûktir tâka.

¹⁸ Ama doituhai chu mualphoina'n irkhû ki ta, Ama chung a rêk chu a rênglukhum chu irtêk sup a ti," tiin.

Inpâkna Hlahai 133

Urêng lungirthung inpâkna

Davida iphua

¹ Irngai ta, urêng hai irngei dîl dîla omkhôm hi en a hoiin a sa bâka na!

² Lua sahriak hlu tak, Hnerkamula luang tâk, Arona hnerkamul ngeia luang tâka, A songkol hmora luang tâk ang kha a ni;

³ Hermon irdo'rfîm Zion tâng haia tâk ngai ang hi a ni: Kha khan Rengpa'n satvurna thu a pêka, Kumkhuaa hringna hrang chu.

Inpâkna Hlahai 134

Pathian inpâk hranga koina

¹ Irngai u ta, Rengpa siahlohai, Rengpa Ina zâna a sin tho ngai murdihai, Rengpa chu inpâk roi!

² Nin kuthai chu hmun irthianga khan phar unglân, Rengpa chu inpâk roi!

³ Rengpa'n Zion-a irthokin sat nangni vur ri se, Irnêng le irvân siamtu ngei khan.

Inpâkna Hlahai 135

Inpâkna hla

¹ Rengpa chu inpâk roi! Rengpa irhming chu inpâk unglân, O Rengpa siahlohaio inpâk roi.

² Rengpa ina sin tho unglân, ei Pathian Biak In hualsûnga omhaio, Rengpa kha inpâk roi.



- ³Rengpa chu inpâk roi, Rengpa chu a saa; A'rhming inpâkin zâi roi, ama chu lungkhamna a inei a ni.
- ⁴Rengpa khan Jakoba-hai hi ama ta hrangin an thanga, Israelhai hi a dongtum bîkin a inthang a ni.
- ⁵Rengpa chu roiinpui tak a ni ti le Ei Pathian chu pathian murdihai nêka anchungtak a nih ti kin hriat.
- ⁶Rengpa chu a nuamlam murdi chu a sin ngaia, Irvân hai, irnêng hai, tuikhanglian hai, tui inthûk tak sûmhai kôlkunga irthokhaia Khan an hong ngaia, Kôlirlekhai rua hrangin a siama, A fasiara irthokin phâivua a lâk suak ngai.
- ⁷Ama khan sûmhai kôlkunga irthokhaia khan an hong ngaia; A fasiara khan phâivua an suak ngai.
- ⁸Ama khan Aigupta ram nâilutîrhai chu a thata, Mihriam le sahai khom.
- ⁹O Aigupta ram, ama khan irsinsianahai le thil irkhêlhai ni sûnga a zuang tîra; Faroa chung a le a suak murdihai chung a khan.
- ¹⁰Ama khan nam tamtak a thata, Reng roiinpui tak takhai a thata;
- ¹¹Amor-hai rêng Sihona le Basan ram rêng Oga le Kanaana rama mi murdi chu:
- ¹²An ram chu a mihai dongtum hrangin a pêka, A mi Israelhai dongtum hrangin.
- ¹³O Rengpa, nangma irhming chu kumkhua'n om a ta, O Rengpa, nang an hriatmaina chu suanpâr murdia om a ti.
- ¹⁴Rengpa khan a mihai chu roirêl pe a ta, A suakhai chu lunginkham a ti.
- ¹⁵Nam danghai millimhai chu tangka le rângachak an nia; Mihriamhai kut suak an ni.
- ¹⁶Bâi an neia, khan chongthei mahai, Mit an neia, khan hmuthei mahai.



¹⁷Mikuar an neia, khan inhre thei mahaia, An bâia khan phûk rêng rêng om mah.

¹⁸Kha siamtuhai le a iamtuhai murdi chu, An millim siam ang khan om ri sehai!

¹⁹O Israel mihaio, Rengpa chu inpâk roi; O Arona in mihai, Rengpa chu inpâk roi!

²⁰O Levia in mihai, Rengpa chu inpâk roi; Rengpa chi murdihaio, Rengpa chu inpâk roi!

²¹Rengpa chu Zion-a irthokin inpâkin om ri se, Jerusalem, a ina a omna ngeia khan, Rengpa chu inpâk roi.

Inpâkna Hlahai 136

Lômthu insîrna hla

¹O Rengpa kuanga lômthu hril roi, ama chu a saa; A lungkham lianna chu kumkhua'n om a ti;

²O pathianhai Rengpa kuang lômthu hril roi; A lungkham lianna chu kumkhua'n om a ti.

³O rênghai Rengpa kuang lômthu hril roi; A lungkham lianna chu kumkhua'n om a ti.

⁴Ama vaiin thilirkhêl roiinpuihai a tho ngaia; a lungkham lianna chu kumkhua'n om a ti.

⁵A vârnaa khan irvânhai khi a siama; A lungkham lianna chu kumkhua'n om a ti;

⁶Irnêng hi tui chung a siam indinga; A lungkham lianna chu kumkhua'n om a ti.

⁷Ama khan misa le tha a siama; A lungkham lianna chu kumkhua'n om a ti.

⁸Misa, sîna vâ hrangin; a lungkham lianna chu kumkhua'n om a ti.

⁹Tha le ârsihai zâna vâ hrangin; A lungkham lianna chu kumkhua'n om a ti:



- ¹⁰Ama khan Aigupta nâilutîrhai a that tâka; A lungkham lianna chu kumkhua'n om a ti.
- ¹¹Israel mihai chu Aigupta ata a hruai suak tâka; A lungkham lianna chu kumkhua'n om a ti.
- ¹²Kut hrât le bân pharin a hruai suakhai tâka; A lungkham lianna chu kumkhua'n om a ti.
- ¹³Ama khan Tuipui Sen chu arsentir tâka; A lungkham lianna chu kumkhua'n om a ti;
- ¹⁴Israelhai chu a laitaka an kâitirhai tâka; A lungkham lianna chu kumkhua'n om a ti;
- ¹⁵Faroa le sipaihai chu Tuipui Sena khan an ngîm zoi ta; A lungkham lianna chu kumkhua'n om a ti.
- ¹⁶Ama khan a mihai chu ramchâra a hruai intunga; A lungkham lianna chu kumkhua'n om a ti.
- ¹⁷Ama khan rêng roiinpui takhai chu a thata; A lungkham lianna chu kumkhua'n om a ti.
- ¹⁸Ama khan rêng inthang takhai chu a thata; A lungkham lianna chu kumkhua'n om a ti;
- ¹⁹Amor-hai rêng Sihona chu a thata; A lungkham lianna chu kumkhua'n om a ti;
- ²⁰Basan ram rêng Oga khom a thata; A lungkham lianna chu kumkhua'n om a ti.
- ²¹An ram chu a mihai a pêka; A lungkham lianna chu kumkhua'n om a ti.
- ²²A suak Israelhai chu a pêka; A lungkham lianna chu kumkhua'n om a ti.
- ²³Ama khan ei nam intem laia khan a nin hriat maia; A lungkham lianna chu kumkhua'n om a ti;



²⁴Ama khan ni doituhai ata a ni saninzôka; A lungkham lianna chu kumkhua'n om a ti.

²⁵Ama khan mihring kuang fâkrua a pêka; A lungkham lianna chu kumkhua'n om a ti.

²⁶O irvân Pathian kuang khan lômthu hril roi; A lungkham lianna chu kumkhua'n om a ti.

Inpâkna Hlahai 137

Ram danga hruaitu chapna

¹Babulon vakamhaia kin toia; Kha khan kin chap ngaia, Zion kin ngaitua'n.

²Iva kôla phâihriam kunghaia kin serândahai kha kin bâng ngaia.

³"Zion hla inkhat ni sak pe roi," tiin. Khatak khan suaka ni hruaituhaiin hlasak an ni ngêna; Nuamning ni lôtuhaia kha inlôm-tir theina hrangin an ni ngên ngai.

⁴Mi ramhaia khan Rengpa hla itin mo kin isak thei hrang?

⁵O Jerusalem, nang ki'rngihilin chu, Ki kut chang tiang hin a thil thiam hi irnghil ri se.

⁶Nang kin hriatmai noa, Jerusalem chu ki lômna takin ki bê mai no'n chu, Ki milei hi ki danga kop khak ri se.

⁷O Rengpa, Jerusalem rûnin a om nia Edom-hai tho dân kha inhre maiin lân; "A lungphûm khom insim roi, insim roi," tia an ikhêk kha inhre mai roh.

⁸O Babulon nâinu, irhmangin om ni ti. Kin chungana ni tho lam anga nang thuan hrang chu lôm takin om a ti.

⁹O nâite têhai nang sutpaia, Lungpui irvêlna hranga hmangtu hrang chu lôm takin om a ti.

Inpâkna Hlahai 138

Inpâkna hla

¹O Rengpa, ni kuang ki lungrîl murdi'n lômthu hril ki ti; Pathianhai makungana khan nangma inpâkin zâi ki ti.



²Ni Biak In irthiang tiang irnghatin Chubai nang mûk ki ta, Ni lungkham lianna le hi thutak sikin nir hming inpâk ki ti. Ni thupêkhai le nir hming chu thil tinrêng nêkin nin lian tâka.

³Nang kin sam ni kha nangma'n ni ni sâma; Nangma hrâtna'n ni nin hrâta.

⁴O Rengpa, irnênga rênghai murdi khan nang inpâk ri sehai, Ni bâi thu suakhai chu an hriat tâka.

⁵A ni, Rengpa sinthohai chu hla'n sak sianlân; Rengpa roiinpuizia chu a sân a ilûminna a ni.

⁶Rengpa chu an chungtak ni khom sianlân, Mi irngaiintômhai kha ar ngaitua ngaia, Mi lâripâkhai chu an kuanga irthokin irbi thei ngai mah.

⁷Lungzîng laia om khom inlân, Nangma'n ki hringna ni hrunga. Ki râl ningmurhai doi hrangin ni bân ni phara, Ni kut chang tiang ni saninzôk ni ti.

⁸Rengpa khan ki kuanga a chonginkung chu hlen a ta; Kumkhua'n om a ti. Nangma kut sinthohai hi hlo inchuk roh.

Inpâkna Hlahai 139

Pathian itinrêng inhriatzia le a ensui mai dân

Hla hruaitu hrangin Davida inpâkna hla

¹O Rengpa, nangma'n satakin ni ni ena, Ni nin hriat tâk.

²Nangma'n ki toi le ki ngîr nin hriat ngaia; Ki ngaituana hi hlatak ata khom nin hriat thiam ngai.

³Ki ife le ki zâl hi ni ni hmu mai ngaia; Ki om lam murdi hi nin hriat zit ngai.

⁴Ki chong mân khomin, Ki iti hrang tum chu nin hriat zit ngaia.

⁵Nang chu ki'rhîlin ni oma; Ni sinthotheina'n ni ni hrung ngaia.

⁶Khaang taka inhriatna chu ki hrangin a irkhêl a ni; A'rsâng hraia, ki inhriat phâk loi a ni.

⁷Nangma irtha kuang ata hi kho tiang mo ki irot hrang? Ni makung ata kho tiang mo ki intân irhmang hrang?



- ⁸ Irvâna hong lui inlân, ama khan ni lei oma; Mithi khuua zu zâl khom inlân, kha khan khom ni lei oma.
- ⁹ Zîng mitha pharin, Tuikhanglian pêñ viata va om inlân,
- ¹⁰ Khatak khan khom ni kutin ni hruai a ta; Ni kut chang tiangin nin tûk a ti.
- ¹¹ “Inthimin nir khû irhmang sian, ki kôlvâr hi zân inthim ni ri se,” ti khom inlân,
- ¹² Inthim khomin nangma ata ite inhlî maka, Zân hi sîn angin a vâra, Ni hrangin chu inthim le vâ hi hmunkhat a ni.
- ¹³ Nangma ngeiin ki takpumpui hi ni siama; Ka nu phîng sûnga nangma’n ni ni’rkhûa.
- ¹⁴ Ni kuang lônthu hril ki ti; ichiom tak le irkhêl taka siam ki nia: Ni sinthohai hi a irkhêl a ni. Ama kha ki hringna hin an hriat infel zit a ni.
- ¹⁵ Inrûka siamin ki oma, Ka nu phîng sûnga sataka irkhûa ki omhai khan, Ki ru chu ni makunga thupin om maka,
- ¹⁶ Ki ruak la’rsiam loi chu ni mitin ni hmua. Ni lekhabua khan ki sînhai hi irziak zit a nia; Inkhat lua an la om mân.
- ¹⁷ O Pathian, ni ngaituanahai chu ki hrangin a hlu vang na! An tam bâk bâk ngaia!
- ¹⁸ Tep ngân inlân, tuipui chiaî nêkin tam ual a ti. Ki hong har tena khom ni kuang ki la iom dên a ni.
- ¹⁹ O Pathian, mi siahai chu that ngêtin lân; A ni, thisen insua ngai mihai khan ni ma ri sehai.
- ²⁰ Anni khan sa no takin nang an hrilsiata. Ni’rhming chu an hrilsiat ngai.
- ²¹ O Rengpa, nangma hnôltuhai chu hnôl ma ung mo? Nangma doituhai chungai khan ki milung hi a ihoilo mo ni ma?
- ²² Anni chu hnôl ta takin ki hnôla; Keima ni doituhai ang takin ki ibe a ni:



²³O Pathian, satakin ni ensuiin lân, Ki milung hi inhre ro; Ni fia'n lân, ki ngaituanahai hi inhre roh.

²⁴Khanchu, keimaa hin siatna lam rêng rêng a om mo, om ma mo enin lân, Kumtuang lama khan ni hruai roh.

Inpâkna Hlahai 140

Saninzôk hranga ngênna

¹O Rengpa, mi sualhai ata ni saninzôkin lân; Mi nunrônghai ata ni hrung roh.

²Anni khan an lungrîla thilsual an ngaituaa, Irsualna an siam ngai.

³An milei chu mirûl angin an intâta; An hner thuaia khan sokvom tûr a oma.

⁴O Rengpa, mi siahai kut ata chu ni hrungin lân, Mi nunrônghai kut ata khan ni hrung ro; Anni khan ki ke pêthai inrîlna hrang an tuma.

⁵Mi irsonghai khan kin ôkna hrang châng inrûkin an kama, sokvom leh; Lam sîra khan lên an dâpa, Kin ôkna hrang chânghai an kam ngaia.

⁶Rengpa kuang khan, “Nang chu ki Pathian ni nia; O Rengpa, changpui ki ngênna hnukirhai hi nir ngai pe ro!

⁷O Rengpa, ki Pathian, ki saninzôkna det, Nangma'n irdoi nia khan ki lu ni ni hôi pea.

⁸O Rengpa, mi siahai nuamlamhai chu pe no'n lân; An ngaituana'n sualhai chu hloinchuk pe no ro; khano'nchu an irpâkna itinin,” ki tia.

⁹A ni doituhai chu ki chung a inlal hrangin phal no'n lân; Anni hmûra chong sual ti khan irkhû ri se.

¹⁰Mei ir-alhai an chung a ta sianlân, meia paiin om sianlân; An thoinôk ta lolina hrangin khurpadop inthûk takhaia paiin om ri se.

¹¹Dikloi taka mi hnôl ngaihai chu irnênga hin hmanchang sua'n om no nia; Mi nunrônghai khom siatna'n inhre a ta, irhmangtir a ti.

¹²Rengpa khan dengtheina tuanghai chu an chungchânga thop a ti, ti kin hriata, Mi irsamhai hrangin roirêl dik inlang a ti.



¹³Irkhêl loiin mi felhai khan nangma irhming inpâk an ta; Mi dikhai chu ni makunga om mai an ti.

Inpâkna Hlahai 141

Khohloi tiang chongchaina

Davidâ inpâkna hla

¹Rengpa, nang ki koi hi, ki kuang zuang latin lân, Nang ki koi laia hin ki hnukirhai tiang ni mikuar zuang sung ro.

²Ki chongchaina hi mirimhoi angin lei pomin lân, Ki kut phar hi khohloi tiang irbôlna angin om ri se.

³O Rengpa, ki bâi kunga hin enkoltu intoitirin lân; Ki bâi mikot hi enkol roh.

⁴Pualoina thilhai thil tho'nsual mihai thopui hranga khan, Ki lungrîl hi thil saloi tiang rêng rêng inpêttir no'n lân; An fâk tui takhai kha nin fatir no roh.

⁵Mi fel khan lungkhamin ni hal sianlân, ni zêm ri se, Khannisianlân, mi siahai chôindômna rêng rêng pom no ning; An siat sin doi hi ki chongchai nasan tak a ni.

⁶An roirêltuhai chu inkhoia pai thâka an om tikin, Anni khan ki thuhai a idik a nih ti inhre ta an ti.

⁷Mi'n thing a hleka, a hlek hleka a irnôi chit ngai anga hin. An ruhâi chu thân bâia irthe kin a oma.

⁸Khannisianlân, O Rengpa ki Pathian, keima'n chu ki mitin ni tiang a en mai ngaia, Nangmaa khan ki iamna ki'rngat ngai; Ki hringna hi silkaiboiin ma viat no ro.

⁹Kin ôkna hranga an chângkam ata nin zôkin lân, Thil tho'nsualtuhai chânghai ata nin zôk ro.

¹⁰Keima'n ki khêl zoi tikin, Mi siahai chu anni chângkam ngeia khan in-ôk ri sehai.

Inpâkna Hlahai 142

Chongchaina changpui ngênna



David a hla phua, pûka a om laia

¹Ki hnukirhai nei dôrin Rengpa chu kin sama; Rengpa kuang lungkham ki ngêna.

²A kuang ki lungzîngna thu ki hrila; Kin takna thurchihai kin hriattir ngai.

³Ki'rtha ki sûnga a'rzal laia khan, Ama khan lampui chu an hriata. Ki fena lama kin ôkna hrangin, Ki râlhaiin châng inrûkin an kama.

⁴Ki kôl vêl ki ena, Tûte ni changpui hrang lak hmu ma ung, Ni saninzôk hrang om ta maka; Tûte rêng rêngin ki hringna hi ngaisak ta mahai.

⁵O Rengpa, nang kin sama; "Nang chu ki saninzôkna, Mi hring rama ki dongtum ni ni," ki tia.

⁶Ki khêk irhâi hi irngaiin lân; A saterenga irthuitirin ki om tâka. Deng nin theitirtuhai ata hi ni saninzôkin lân; Keima hrangin a sân an hrât oka.

⁷Nangma irhming kin pâk theina hrangin; Ki hringna hi intângna ina irthokin hruai suak roh. Khanchu nangma ki chungna ni sa sikin; Ni mi felhai irbûmnaa khan nang inpâk ki ti.

Inpâkna Hlahai 143

Changpui ngêna

David a inpâkna hla

¹O Rengpa, ki chongchaina hi irngaiin lân; Lungkham ki ngênnaa hin ni mikuar sung ro. Ni iamomna sik le ni felna sikin ni sâm ro.

²Ni suak chungna hin fiana sia no ro; Ni mithmua khan mi fel rêng rêng om mahai.

³Râlhai khan an ni'rzûla, Ki hringna hi irnênga an sirphaa; Mithi tâkhai angin hmun inthim taka an ni khuma.

⁴Khasikin ki'rtha hi ki sûnga a'rzala; Ki char a dong khak ta.

⁵Tianlai sûnhai chu ki sût ngaia.

⁶Ki kulhai hi ni tiang ki phar ngaia; Ki hringna hi ramchâr tak angin Nangmaa a inhrâl a ni.



⁷O Rengpa, ni sâm zôi zel ro! Ki'rtha a'rzal ta. Keima ata hi ni hmâi thup no ro, khano'nchu khurpadopa chumhai angin ki om duai itinin.

⁸Zînga khan ni lungkham lianna thu nin hretirin lân, Nangmaa ki iamna ki'rngkata. Ki fena hrang chu nin hretirin lân; Ki hringna hi ni kuta kin kol khaka.

⁹O Rengpa, ni doituhai ata chu ni sansuakin lân; Ni ni thup hrangin ni kuang ki hong intân a ni.

¹⁰Nang chu ki Pathian ni nia; Ni nuamlam sin nir chûtir roh. Nangma irtha dik tak khan, Lam hoia ni hruai ri se.

¹¹O Rengpa, nangma irhming sikin ki hringna hi hrungin lân; Ni fena sikin lungzîngna ata ni hruai suak ro.

¹²Ni lungkham lianna sikin ni doituhai chu irhmangtirin lân, Ni nêpsiatuhai murdi chu irhmangtir ro, Ni suak ki ni sikin.

Inpâkna Hlahai 144

Râl inhnê sika lômthu'n sîrna

Davidâ inpâkna hla

¹Rengpa ki lungpui chu inpâkin om ri se! Ama khan ki kuthai hi râlkâp lam an irchu ngaia; Ki kut pârhai hi irdoi lam an irchu ngai.

²Ama chu ki lungpui le ki saninzôkna, Ki kulpui irsâng le saninzôkna, Ki pô ki iamna irngatna, Mihai ki hnuaia kûn ngaitu chu a ni.

³O Rengpa, mihriam hi imo a nia ni inhriatmai ngai? Mihriam nâipa khom hi imo a nia ni ingaitua ngai?

⁴Mihriam hi chanlamboi chian ang kha a nia; A hring sûng sûnhai hi irhlîm intân ang hi a ni.

⁵O Rengpa, irvân inkûntirin zuang chumin lân; Tânghai chu tônin lân, khanchu a khû suak an ti.

⁶Kôlhai irlektirin lân, annihai chu indartir ro; Ni thalhai chu kâp suakin lân, annihai chu laizâm inthotir ro.



⁷Chung tianga irthokin ni kutin zun banin lân, Tuilianhai ata ni kaisua'n lân, ni sansuak ro; Ram dang mihai irchamneina ata hi ni saninzôk ro.

⁸An bâi khan milak an hrila, Khomâk irsâm pumin milak an tho ngai.

⁹O Pathian, nangma chôindômin hla thar sak ki ta; Perkhuang hrui sôm nei leh nangma inpâkin zâi ki ti.

¹⁰Ama chu a ni, rêng hai kuang zôkna pêka, Khandai mi'nsiat thei ata a suak Davida sansuaktu chu.

¹¹Ki râi ata chu ni sansuakin lân; Ram dang mihai kut ata ni saninzôk ro, An bâi khan milak an hrila, An kut chang tiang chu kut chang tiang dik loi a ni.

¹²Thing irsôna intuai duam angin kin nâi hai khom intuai duam hai sianlân; Kin nâinuhai khom lung isin enhoi tak, rêng in kil irvôtu ang kha ni ri sehai.

¹³Kin fasiarhai hong sipin Thil tinrêng om sep sup sian, Kin belrahai khomin a tê sâng tamtak nuai tamtak kin ramhaia hong pung ri sehai.

¹⁴Kin sialhai khom hong punghai sianlân; An rûktu le ar hmangtirtu om loiin, Kin mikot tuala lungzîng khêk hnukirhai om no ri se.

¹⁵A ni, khaanga satvurna donghai kha chu an vân a sa; Rengpa Pathiana nei mihai chu an vân a isa a ni.

Inpâkna Hlahai 145

Inpâkna hla

Inpâkna hla: Davida iphua

¹O Rengpa, ki Pathian, nang chôindôm ki ta, Nangma irhming hi kumkhontuanguin inpâk ki ti.

²A nitin nang inpâk ki ta, Ni'rhming hi kumkhontuanguin inpâk ki ti.

³Rengpa chu a roiinpuia, roiinpui taka inpâk hrang a ni; A roiinpuizia chu suisuak zât ni mah.

⁴Irlo khatin irlo dang kuang ni sinthohai chu inpâk thiai mai an ti. Ni sintho roiinpui takhai chu inhretir an ti.

⁵Nangma chôindômna roiinpui tak le, Ni sinirkhêl thohai chu ngaitua ki ti.



⁶Mihaiin ni sintho ichiom takhai irtha neizia chu insâr an ta, Kei khomin ni roiinpuizia inpuang ki ti.

⁷Ni satna roiinpui takhai chu hril an ta, Ni felna thu hi raifân takin hla'n sak an ti.

⁸Rengpa chu mi lunginkham thei, satnaa sip, Lung ir-ial, lungkham lianna nei a ni.

⁹Rengpa chu tinrêng chung a saa, A lungkhamna chu a thilsiam murdi chung a om.

¹⁰O Rengpa, ni thilsiam murdi khan ni kuang lômthu hril an ta, Ni mi irthianghai khomin nang inpâk an ti.

¹¹Ni ram roiinpuizia thu hril an ta, Ni sinthotheizia thu insâr an ti.

¹²Khanchu mi tinrêngin ni sintho roiinpui takhai le Ni ram enhoi roiinpuizia chu inhretir an ti.

¹³ Ni ram chu kumtuang ram hrang a ni ta, Ni'rhamneina chu irlo tin tin dênin om mai a ti.

¹⁴Rengpa khan an rîlhai murdi chu an tûk mai ngaia; Kûn riam riama omhai chu a kaithoi ngai.

¹⁵Ni thilsiam murdi mithai khan nang an thîr maia, Nangma'n a zoro taka an fâk hrang ni pêk ngai.

¹⁶Ni kut ni phara, Thilhring murdi irzukna chu nin boi ngai.

¹⁷Rengpa chu a om dân murdia a fela, A sintho murdia mi lunginkham thei tak a ni.

¹⁸Rengpa khan ama koitu murdihai chu anai ngaia, Koi tak taka koituhai kuang khan.

¹⁹Ama chituhai nuamlam chu hlo an chuk pe ngaia, An khêk irhâi chu an hriata, anni chu a saninzôk ngai.



²⁰Rengpa khan ama lungthungtu hai murdi chu satakin a donsui ngaia; Mi siahai rêk chu irhmangtir zit a ti.

²¹Ki bái hin Rengpa inpâkna thu insîr mai a ta, Khan, a thilsiam phûk nei murdi'n ar hming irthiang chu kumkhontuanguin inpâk ri se.

Inpâkna Hlahai 146

Saninhringtu Pathian inpâkna

¹Rengpa chu inpâk roi! O ki hringna, Rengpa chu inpâk ro!

²Ki hring sùng kâr ka Rengpa chu inpâk ki ta; Ki hringna murdi'n Pathian chu inpâkin zâi ki ti.

³Mi lianhai chung a irnghat no unglân, Mihriam rêng rêngin nangni saninhring thei no ni.

⁴An phûk a om no tena chu pila an kîr nôka; Kha nikhua zela khan an ngaituahai chu a irhmang ngai a ni.

⁵Jakoba Pathian a changpuitua nei mi chu a vân sa, Rengpa Pathiana irnghat mi chu.

⁶Ama chu irrêng le irvân, Tuikhanglian le a sùng a om murdi siamtu a nia; Ama chu kumkhua'n a chonginkunga a om ngai;

⁷Ama khan nêpsiana tuanghai hrangin roi a rêl ngaia; Phîngchâm tuanghai kuang fâkrua a pêk ngai. Rengpa'n chu mi intânghai an sua ngaia;

⁸Rengpa khan mitchohai mit an vâp pe ngai. Rengpa khan an rîlhai a kaithoi ngaia; Rengpa khan mi felhai chu lung a thung ngai.

⁹Rengpa khan mikhualhai chu a enkol ngaia, Pa nei loi le meithâihai chu a changpui ngaia; Mi siahai thiltum rêk chu an siat pe ngai.

¹⁰Rengpa chu kumkhua hrangin toi a ta, O Zion, ni Pathian chu irlo murdi dênin rêngin toi a ti. Rengpa chu inpâk roi!

Inpâkna Hlahai 147

Itinrêngthothei Pathian inpâkna



- ¹Rengpa chu inpâk roi! Ei Pathian inpâkin zâi hi a satak a ni; Ama chu a saa, inpâkrua tak a ni.
- ²Rengpa khan Jerusalem chu an ding nôka; Sala intâng Israelhai a hruaikhôm nôka.
- ³Milung koihai chu an damtira, An popnahai chu a tuam pe ngai.
- ⁴Ârsi tam hrang zon an kung pea; An irhming a phua senga.
- ⁵Ei Rengpa chu a roiinpuia, sinthothei tak a ni; A vârna khan mong ni nei mah.
- ⁶Rengpa khan irngaiintômhai chu a kaithoia, Mi siahai chu irnênga an temtir ngai.
- ⁷Lômthu insîra Rengpa chôindômin hla sak unglân; Serânda leh ei Pathian inpâkin zâi roi.
- ⁸Ama khan irvân khi sôm ar hlîtira; Tânghaia khan hloisûl an môngtir ngai.
- ⁹ Ama khan sahai kuang fe hrang a pêk ngaia, Vaâkte inhrâm inhrâmhai chu an fâ ngai.
- ¹⁰Ama chu sakor hrâtna chung a khan lôm maka, Râlpa chunghaia khom lômna rêng rêng nei ngai mah.
- ¹¹Khannisian Rengpa khan ama chituhai chung a khan lômna a nei ngaia, Ama lungkham lianna chung a irnghattuhai chung a khan a lôm ngai.
- ¹²O Jerusalem, Rengpa chu inpâk ro! O Zion, ni Pathian chu inpâk ro!
- ¹³Ama khan ni kul mikothai an dettira; Ni sînga ni nâi le tê omhai chu sat a vura.
- ¹⁴Ni ramri sînga irngeina an lêngtira, Bu chi satakin nang a insip ngai a ni.
- ¹⁵A thupêk chu irnênga hin a tîr suaka, A thu chu hrât takin an tân ngai.
- ¹⁶Ivur tâk chu belra mul angin a pêka, Ivur tâk chu irvut angin a r'sendarh ngai.



¹⁷Irial chu bai irnôî angin a pai suak ngaia; A dâi a itîra khan tu mo ngîr thei hrang?

¹⁸Kha hnung chu thu a pêka, vâi chu a zôia; A phâivua an thotira, khanchu tuihai chu a hong luang ngai.

¹⁹A thu chu Jakoba-hai kuang an langtira, A chonginkunghai le a dânhai chu Israelhai kuang an lêngtir ngai.

²⁰ Ama khan tu nam chung a khom ama ang khan tho ngai ma; A dân lak chu inhre ual ma. Rengpa chu inpâk roi!

Inpâkna Hlahai 148

Pathian inpâk hranga tinrêng fialna

¹Rengpa chu inpâk roi! Irvâna irthokhaia khin Rengpa chu inpâk unglân, Chung tianghaia khin ama chu inpâk roi.

²O vântirtôn mihaio, ama chu inpâk unglân, A sipai murdihaio, ama chu inpâk roi.

³Misa le thahaio, ama chu inpâk unglân; Ârsi vâi murdihaio, ama chu inpâk roi.

⁴ Irvân irsânghaio, ama chu inpâk unglân; Irvân chung a tui omhaio, ama chu inpâk roi.

⁵Khahai murdi khan Rengpa irhming chu inpâk roi; Ama khan thu a pêka, siamin an hong om tâka.

⁶Ama khan khahai kha kumkhontuanga hrangin an dettira, Thu, a boi thei taloi hrang chu an kunga.

⁷ Irnênga irthokin Rengpa chu inpâk unglân, Nangni dragonhai le tui inthûk murdihaio,

⁸Mei le irialhai, ivur le sêmhaio, A thu zôm ngai phâivopuihaio, Rengpa chu inpâk roi.

⁹Tâng lian le tâng chîn murdihaio, Thing ra nuamhai le sidar thing murdihaio, Ama chu inpâk unglân;



¹⁰Ramsahai le a insûng sa murdihaio, Thilhring le chung a vuang vâhaio, Ama chu inpâk roi.

¹¹Irnêng rênghai le mi tinrênghaio, Mi lianhai le irnênga roirêl murdihaio; Ama chu inpâk roi.

¹²Dôngmate le ruathartehaio, Tar le nâipanghaio; Ama chu inpâk roi.

¹³Khahai murdi khan Rengpa irhming chu inpâk ri sehai, Ama irhming vai hi chôindômin a oma; A roiinpuina khan irnêng le irvân a ikhêl zit a ni.

¹⁴A mihai chu an hrâttrhaia, Khanchu a mihai khan ama an inpâk theina hrangin, a mi Israelhai, a kôla mihai inpâkna chu. Rengpa chu inpâk roi!

Inpâkna Hlahai 149

Inpâkna hla

¹Rengpa chu inpâk roi! Rengpa chôindômin hla thar sak unglân, Mi irthianghai inkhômnaa khan ama chu inpâk roi.

²Israelhai chu anni siamtu chung a khan lômhai sianlân; Zion nâihai chu an rêng chung a khan lôm ri sehai.

³Ama irhming chu lâm pumin inpâk sianlân; Khuang le perkhuanghaiin ama inpâkin zâi ri sehai.

⁴Rengpa chu a mihai chung a lôm ngai, Irngaiintômhai chu saninhringna'n a'rvôtir ngaia.

⁵Mi irthianghai chu roiinpuinaa lôm takin omhai sianlân; An zâlmun sûngrîlhaia raifânin zâi ri sehai.

⁶Pathian chôindôma inpâkna chu an bâia om sianlân; Khandai benei hriamin an kuta om pumin inpâk ri sehai.

⁷Nam tin chung a phuba lâka, Mi tin chung a dengtheina intung hrang le,

⁸An rênghai chu thîrhruia khita, an mi felhai chu thîr kol inbun hrang le,

⁹Rengpa thupêk anga nam tin chu denginthei hrangin. Hihai hi a mihai hranga roiinpuina chu a ni. Rengpa chu inpâk roi!



Inpâkna Hlahai 150

Rengpa inpâk roi

- ¹Rengpa chu inpâk roi, Pathian chu a hmun irthianga khan inpâk unglân: a sinthotheina boiruak irzat taka khin ama chu inpâk roi.
- ²A sintho roiinpui takhai sikin ama chu inpâk unglân: A roiinpui irkhêl sikin ama chu inpâk roi.
- ³Bekul irhâiin ama chu inpâk unglân: Perkhuang leh serânda'n ama chu inpâk roi,
- ⁴Khuanghai leh lâmin ama chu inpâk unglân: Serânda chi dang dang leh theihle'n ama chu inpâk roi.
- ⁵Têngrep irhâi intôngin ama chu inpâk unglân: Têngrep irhâi intorin ama chu inpâk roi.
- ⁶Itinrêng, phûksân thei murdi'n Rengpa chu inpâk ri se. Rengpa chu inpâk roi.



Thuvârhai

Thuvârhai 1

Thuvârhai hlutna

- ¹ Israel rêng, Davida nâipa Solomona thuvârhai chu.
- ² Vârna le irchûtirna sa, inhriat theina hranghai le thu omzia inthûk taka inhriat theina hrang chu a ni.
- ³ Vâr taka omlam le felna hai, dikna hai le theibîk nei loinahai nang irchutir an ti.
- ⁴ Inmôlhai vâr takin a siam theia; ruathartehai inhriatna irzat nei lam ar chutirhai ngai.
- ⁵ Hi thuvârhai hin mi vârhai inhriatna ar bôktir theia; mi thiamhai lampui a'rhmutir thei ngai.
- ⁶ Khanchu, thuvârhai omzia irthup hrilfia theina hrang le mi vârhai thubuai phorsuaka inhriat thiamna hranghai chu an ni.

Ruathartehai kuanga chongbe

- ⁷ Rengpa chi chu inhriatna bul a ni. Khannisianlân, invêthaiin chu vârna le irchûtirna an hmusit ngai.
- ⁸ Ki nâipa, ni pa irchûtirna hi irngaiin lân, ni nu irchûtirna hi irheisan no roh.
- ⁹ An irchûtirna khan ni lua hrangin lukhum roiinpui tak le ringa irthei enhoi tak angin ni nunchan inlang a ti.
- ¹⁰ Ki nâipa, mi sualhaiin nang an inthêmin zôm no ro.
- ¹¹ “Tho ba, mi that hrang lei zong rei! A bi om loiin mi poi tholoihai len ruang hi rei!
- ¹² Ei irtong tiang a hringin irtongpui khom inlân, ei irsen tiang chu a thiin lei mahai rei!
- ¹³ Thil hlu tinrêng nei ei ta, râlîk sumin ei in lei insip rei!
- ¹⁴ Tho, kin laia kopin lân, ei iman murdi lei irkop rei” an tia.



¹⁵Ki nâipa, khaanga mihai laia kop no'n lân, anni ata irkêm ro.

¹⁶Anni chu thilsual tho hrangin an irhnota, thisen insua hrangin an irsiam chak a ni.

¹⁷Vahai mithmua châng kam ite ar fêna om mah;

¹⁸Khannisianlân, khaanga mihai khan anni ngei in ôkna hrang châng an kama, an thina hrang ngei châng an ikam a ni.

¹⁹Itiklai khomin inru thilin an rûktu hringna a lâk ngaia, khasikin, tukhom thisen insua mihai murdi fena lampui chu khaang kha a ni.

Vârna ikoihai

²⁰Iringai ta! vârna chu khopui mikotsua haia khan inring takin a khêka.

²¹Inring takin khopui mikotbâi irsenna hmuna a ikhêk a ni.

²²"Inmôlhaio! I dôr ten mo nin inmôlna nin ikan hrang? I dôr ten mo inhriatna hmusitna hin nin rai nin infân hrang? Ni irchû viat loi hrang mo?"

²³Nangni ki hrilna tiang hin nin mikuar sung roi; thu sa nangni irchûtir ki ta, kin hriatna nangni lei sem hi rong.

²⁴Nangni ki koi maia, hong hrangin nangni ki ifial a ni, khannisianlân, ite bê'n bê mak chêia, keima tiang khom nin mikuar sung nuam mak chêi.

²⁵Nangni ki'rchûtirna uksak nuam mak chêia, nangni ki hrilna murdi khom pom nuam mak chêi.

²⁶Khasikin, intak nin tong tikin nangni phengsan ki ti.

²⁷Nin chung a irlo inthingna phâivua angin a hong tunga, lungzîngna phâivuapui angin a hong hrânga, dengthei le irthanvâia nin om tikin.

²⁸Kha tenin chu ni koi nin ta, khannisianlân, nangni sâm thei no ning. Kil tina ni zong vêl nin ta, khannisian ni hmu ta no chin ni.

²⁹Inhriatna hmang nuam viat mak chêia, Rengpathu khom zôm nuam viat mak chêi.



³⁰Nangni ki irchûtirna hi dong nuam mak chêia, ki ihrilhai murdi nin ngainêpa.

³¹Khasikin nin irhoi lam ang takin hmu nin ta, nin sinthohai ngei khan nangni zêm a ti.

³²Mi'nmôlhai chu vârna an hmusit sikin an thi ngaia. Intohai khom an lungchukna kha an irhmangna a ni ngai.

³³Ki thu irngaihai rêk chu hoi takin om an ta, chitna zel om loiin, hoi riamin om ta an ti," tiin.

Thuvârhai 2

Vârna lômman

¹Ki nâipa, ki'rchûtirna thuhai ni poma, ki thupêkhai nir tika,

²kha vârna tiang ni mikuar ni sunga, ni lungrîl inhriat thiamna tiang ni pêkin chu;

³a ni, inhriatna chu ni zonga inhriat thiam theina khom ni ngêna,

⁴tangkarua angin ni zonga, irchon irthup angin ni zongin chu,

⁵Rengpa chi hi imo a ini hong inhren fel ta ni ta, Pathian inhriatnaa khan tuanintung ni ti.

⁶Rengpa kêng vârna mi pêk ngai, ama bâia irthokin inhriatna le inhriat thiamna a isuak ngai a ni.

⁷Mi nunhoi hrangin vârna dik a buk khôma, mi dikhai hrangin ama chu phô a ni.

⁸Theibîk neilo mi hai kha a donsua, a mi irthianghai chu a vong insa ngai.

⁹Ki thu tiang ni mikuar ni sungin chu, theibîk nei loinahai le lampui sa tinrêng hai khom hong inhre thiam thei ni ti;

¹⁰vârna chu ni lungrîla lût a ta, inhriatna khan ni hringna inlôm tir a ti.

¹¹Ni lungrîl neina khan nang hruai a ta, ni inhriat thiamna khan nang enkol a ti.



¹²Sual lampuia irthokin nang sansuak a ta, chanlamboi hrila buaina nang siampui ngai mihaia irthokin nang khâi irkiangtir a ti.

¹³Sual zîng kêra lêng hranga felna lampui hnungsongsan mihai,

¹⁴thil saloi sina raiinfân ngaihai, siatna porinchea lôm ngaihai,

¹⁵an lampuihai chu a kôia, tung thei zât ni mah.

¹⁶Nupang om papai, a chongbâi thiamna sika nang porinchetir tum ata chu nang saninzôk a ti,

¹⁷a vânglaiin pasal chung a iamom loa, Pathian makunga a chonginkung irnghil ngai mi rengata kha.

¹⁸A in khan thina lampui a'rngkata, a lampuihai chu mi thi lampui a ni.

¹⁹Tukhom a kuanga fe kai chu kêr nôk viat ngai maka, hringna lampui tiang irnghat nôk viat ngai mah.

²⁰Khasikin, mi dikhai lampui zuiin lân, nundân fel takin hring ta ro.

²¹Mi fel, mi nunhoihai khan hi ram hi lua an ta, mi dikhai chu khatak khan om mai an ti.

²²Mi siathai rêk chu hi ram ata Pathianin irzûlpaihai a ta, mi sualhai khom thingkung angin thatpaihai a ti.

Thuvârhai 3

Thuzôm hranga chongbe

¹Ki nâipa, nang ki irchûtirhai hi irnghil viat no'n lân, ni lungrîla ki thupêkhai hi vong mai ro;

²hring dam sôtna le tuanitungnahai nang pe a ti.

³Iamomna le lungkhamna kha inthâ viat no'n lân, ni ringa inhli maiin lân, ni lungrîl phêka irziak ro.

⁴Khanchu, Pathian le mihriam mit tungin hong om ni ti.

⁵Ni lungrîl murdi'n Rengpa iamin lân, nangma inhriatnaa irnghat no ro.



- ⁶Ni sintho murdia Rengpa inhre maiin lân, ama'n lampui dik nang irhmutir a ti.
- ⁷Nangma irngaiin ki vâ irti no'n lân, Rengpa thu vai zômin lân, sual hnung songsan ro.
- ⁸Khanchu, ni taksa hrangin hrisêlna ni a ta, ni ru hrangin irtin ni a ti.
- ⁹Ni sum le ni thil invâng a satakhaia khan Rengpa chu chôindôm roh.
- ¹⁰Khanchu, ni fasiar kha buhaiin hong sip a ta, ni isômna khurhai chu uain tharin luang liam a ti.
- ¹¹Ki nâipa, Rengpa'n nang a isepna kha ngainêp no'n lân, irdînna chongin bê ro.
- ¹²Rengpa'n lung a ithunghai chu a sep ngai, pa'n nâi a ilômhai a isep hai ngai anga hin.
- ¹³Mi vâ hong nia, inhriat thiamna nei irzat mi chu a râlvân a sa.
- ¹⁴Tangkarua inlâpna nêkin an lâpa; rângachak nêk khomin a hlu ual.
- ¹⁵Vârna chu lunghlu nêk khomin a hlu uala; thil ni inuam murdi inthang khomin irkhî thei ni no ni.
- ¹⁶Vârna khan dam sôtna nang pe a ta, khabana irchon le roiinpuina khom nang insiltir sa a ti.
- ¹⁷Vârna khan ni hringnun chu hring khonhoina siam a ta, irtharngamna'n nang hruai mai a ti.
- ¹⁸Mi vârhai chu an vâ a sa, vârna khan hringna pe a ti.
- ¹⁹RENGPAA khan vârnain irnêng a siama; inhriatna'n irvân khi a om hmuna a isia a ni.
- ²⁰Ama vârna'n tuidung an luangtira, sûmhaiin irnênga rotui inthotir hrangin.
- ²¹Ki nâipa, vârna le ngaitua thiamna kha vong maiin lân, ni kuanga irthokin irkiang hrangin phal viat no ro.
- ²²Hringna nang pe a ta, a ni, hoina le raifâna hringnun nang pe sa a ti.



- ²³Khanchu, ni lampuia dam zanin fe thei ni ta, tûk thei no chi ni.
- ²⁴Ni zâl tika khom chi no chi nia, a ni, zâl ni ta, zânkhovârin irhnik takin in ni ti.
- ²⁵Iringloia siatna hong omhaia khom ni milung dûk tuang no nia, mi siahai chung a phâivopui angin ramna a hong tung khomin chi no chi ni.
- ²⁶Rengpakhan nang sînghual mai a ta, ama khan châng a irkhit hrang nang phal no ni.
- ²⁷Itiklai khomin ni thei ngânin chu changpui innanghai chung a sin sa tho mai ro.
- ²⁸Ni tualbômhai kuang atûna changpui thei chakin an tûk nghâk ta no ro.
- ²⁹Ni tualbômhai chung a ite thil saloi tho phan no ro; ningbeiira ni kôla a iom kêng.
- ³⁰Chanlamboiin tûte irngopui no ro; ni chung a ite a tho'nchâi no'n chu.
- ³¹Mi nunrônghai irzukhai no'n lân, an om dân anga om khom tum no ro.
- ³²Rengpa khan sual sin mihai kha a hnôl ngaia, mi felhai chu rual angin a bêhai ngai.
- ³³Rengpakhan mi siathai ina chu khosâltongna a siaa, khannisianlân, mi felhai in chu sat a vur ngai.
- ³⁴Mi lâripâkhai chu a hmusit ngaia, irngaiintômhai chu ditsakna a pêkhai ngai.
- ³⁵Mi vârhai khan roiinpuina dong an ta, intohai chu mualphoina vai tong an ti.

Thuvârhai 4

Vârna inlâpzia

- ¹Ki nâipasalhai, nin pa nangni irchûtirna chu irngai roi. Nin mikuar sung unglân, inhriat thiamna hong nei nin ti.
- ²Irchûtirna diktak nangni ki ipêk a ni; khasikin an rêngin vong mai roi.



- ³Ka pa ta hranga pasal ki nia, ka nu mithmua chu nâikhât anga indot ki nia,
- ⁴ka pa'n a nir chutira, hiang hin a ti ngai, “Ki thuhai hi inhre maiin lân, irnghil viat no ro. Ki thupêkhai angin omin lân, khanchu hring ni ti.
- ⁵Vârna le inhriat thiamna nei inlân! Ki thupêkhai irnghilin, uksak loiin om no ro.
- ⁶Vârna hnungsongsan no ro, khanchu nang hrung mai a ti; lungthungin lân, nang sûnghual a ti.
- ⁷Vârna vai hi thupui taka niinei hrang a ni. Ni thil nei murdi inchân zit khomin inhriat thiamna nei mai ro.
- ⁸Vârna hi lungthung inlân, nang chôirsâng a ti. Inhlu'n lân, mânlianna nang inchang pe a ti.
- ⁹Nangma hrangin roiinpuina rênglukhum ni a ti”.
- ¹⁰Ki nâipa, keima tiang ni mikuar sung ro. Ki thupêkhai pomin lân, khanchu ni hring sôt a ti.
- ¹¹Vârna nang ki'rchutira, satna tiang nang ki ihruai a ni.
- ¹²Vâr takin ni fe'n chu ni lampuia ite'n nang khal thei no nia, nin tân khomin tûk no chi ni.
- ¹³Ni irchu murdi inhre maiin lân, ni thiamna kha ni hringna a nia, vong mai ro.
- ¹⁴Mi sualhai lampuia khan fe no'n lân, mi sualhai nunchan khom zui no ro.
- ¹⁵Tho no ro! Siatna ata irkêm ro! Hnung songsanin lân, ni lampuia fe chian ro.
- ¹⁶Mi siahai chu siat an sin no zelin chu in thei ngai mahai. Tuhai siatna hrang mani lua an intung pehai no'n chu an in khom mu thei ngai mah.
- ¹⁷Siatna le nunrôngna kha an ta hrangin chu bu le anh ang a ni.
- ¹⁸Mi felhai lampui chu zîng kôl misa suak, sîn laitak a ni mâka hong vâ tîr tîr ngai ang kha a ni.



¹⁹Mi siahai lampui rêk chu zân angin a zînga, an tûka, imo an irfûi hrang inhre ngai mahai.

²⁰Ki nâipa, ki chong irngaiin lân, ki thu'nsîra hin ni mikuar sung ro.

²¹Ni kuanga irthokin irkiang hrang phal viat no'n lân, ni lungrîla hrê maiin vong mai ro.

²²An hriat thiamhai hrangin hringna a nia, a taksa murdi hrang khomin hrisêlna a ni ngai.

²³Thil dang nêkin ni lungrîl vêng insa ro; hringna hong suakna kêng a ini.

²⁴Minlak tho viat no'n lân, chong chanlamboihai hril no ro.

²⁵Sabeina diktak neipumin mân tiang thîrin lân; mualinphoina tiang irngat no ro.

²⁶Ni sin hrang chu satakin ngaitua'n lân, khanchu ni sinna murdi hlochuk a ti.

²⁷Sualna hnung songsanin lân, intûn takin mân tiang fe ro. Lampui dika irthokin vei tiang mani, chang tiang mani pêt viat no roh.

Thuvârhai 5

Uirena ata irdîn hrang

¹Ki nâipa, irngaiin lân, ki vârna le ki inhriatna tiang ni mikuar sung ro.

²Khanchu, omlam sa hong inhriat ni ta, ni chongbâi suak khan inhriatna nei mi ni nih ti inlang a ti.

³Nupang soal hmûr kha khuaihlutui ang dôra thumin, a dang khom oliv hriak angin irnâl a ti,

⁴khannisian a hnungkhôn taka chu ngaisiatna le dengitheina tih no chu nang mâk pe no ni.

⁵Thina ram tiang nang hruai a ta; a lampui fena chu thina lampui a ni.

⁶Hringna lama khan fe maka; khannisian ite inhre loiin a invâi a ni.



⁷Khasikin ki nâipa, ki thu irngaiin lân, ki bâia thu suakhai hi irnghil viat no ro.

⁸Khaanga nupang kuang ata irkiangin lân! A in mikot kôl khom va nâi no ro.

⁹khano'nchu ni roiinpuina kha mi danghaiin nei an ta, ni vânglaiin mi nunsiahai kuta irhmang ni ti.

¹⁰A ni, ram dang mihai khan nir chon murdi lapai an ta, ni sinsôlna ra kha mi dangin dong an ti.

¹¹Ni sôn hnungkhôna chu ni zâlmuna chap ni ta, ni taksa le ni takpumhai fâk irhmang a ni tâk sikin,

¹²Khanchu “Itho mo ki lei irchutir loi? Itho mo mi danghai ni hrilna ki lei ipom loi?

¹³Ni'rchutirtuhai thu lak lei zôm ngai ma unga. An irchutirna tiang lak ki mikuar lei sung ngai ma unga.

¹⁴Khasikin voikhat rengin mipui laia mualinphoiin ki iom tâk a ni hi”, la ti ni ti.

¹⁵Ni dôngma chung a iamomin lân, ama kuang vai ni lungthungna pe ro.

¹⁶Nupang dang ata nâi ni inei khan ite satna nang insua pe no ni.

¹⁷Khual mihai hrang ni loiin, ni ta hrang vaiin ni nâihai kha an iseilian hrang a ni.

¹⁸Ni dôngmaa khan lômin lân, ni vânglai dôngma kuang vaia khan lômna zong ro,

¹⁹sazuk tuai le inditom tak angin. A inditomna khan nang inlôm-tir sian; a lungthungna khan nang hual mai ri se.

²⁰Ki nâipa, itho mo nupang dang kuang ni lungthungna ni ipêk hrang? Itho mo mi dang dôngmahai inditomna chu ni inthang ual hrang?

²¹Rengpa'n ni sintho tinrêng a hmu zita. Ni fena tina nang a ien chian ngai a ni.



²²Mi pualoi sualnahai kha châng a ni. Ama sualnahai ngeia khan a khít ngai.

²³Mâni irsep thei lolina sikin thi a ta; an vêtna hrai sikin irhmang a ti.

Thuvârhai 6

Irdîn nangna dang

¹Ki nâipa, mi dang lâkaihai chungga mophurtu hrangin chong nin kunga,

²ni chong ngeiin nang a khita; ni chonginkung ngeia nin ôkin chu,

³ki nâipa, kha mi irchamneina hnuaia ni om a nih ti inhre roh. Khannisianlân hiang hin suak hrang dân chu a ni: a kuang fe zôi zelin lân, nang insua hrangin ngên roh.

⁴Inmusu ta no'n lân, irngam chian ta no roh.

⁵Sa kâptu kuta irthokin sakhi a intân pe pat ngai angin, châng kamtu kut ata va a ivuang suak pe pat angin suak pat ro.

⁶Mi thaboihai khan phâivâng kuang fe'n lân, a lampui irchu roh.

⁷Anni khan rênghai, hruaituhai, roirêltuhai nei mahaia,

⁸khannisianlân, fûr laiin fâkrua an bukkhôma, sâl tika hrang an lei bûm ngai.

⁹O mi thaboi, i dôra sôt mo ni izâl chian hrang tâk?

¹⁰ “La hong insîng viat hi rong” a ti ngai.

¹¹Khannisianlân, a in kârin inriangna khan inru râlthuama irvo angin hong in-ôk a ti.

¹²Mi hmanghmunboi, mi siahai chu milak tho'n an irvâk mai ngai.

¹³Nang an huang theina hrangin an mit le an chonga, kut an veivâk ngai.

¹⁴A lungrîla tukullianna a oma, thil sual a ngaitua maia, irngeiloina a tû ngai.

¹⁵Khasikin, irningloiin siatna'n de thut a ta, anni chu a saterengin popliam an ti.

¹⁶⁻¹⁹Rengpa'n thil sari hnôl ta taka a ihnôl le a irngai thei viat loi a om: Lâripâkhai, milak milei hai, mi ningthik sin loi thisen insuana kut hai, thil



saloi ngaitua ngai lungrîl hai, sual sin hranga kal inhrâttir ngai ke hai, inhriatpuitu dol milak chungirchuan ngai hai, rual laia buaina siam ngai mi hai.

Uire loi hranga irdînna

²⁰Ki nâipa, ni pa thupêkhai zômin lân, ni nu nang irchutirna irnghil viat no ro.

²¹An chonghai irtik maiin lân, ni lungrîla vong roh.

²²An irchutirna khan nin zinnahaia nang hruai a ta, zâna nang enkol a ta, sûna roi nang zêkpui a ti.

²³An thupêkhai kha vâ irtêk ang kha a nia; an hrilna khan hringna lampui nang irhmutir a ti.

²⁴Nupang sual ata le mi dang dôngmahai chong thum taka irthokin nang inzôktir a ti.

²⁵An satnahai chu irzuk no'n lân; an mit meng ir-âi khan nang in-ôktir no ri se.

²⁶Pasalin, notizuar chu bai tiam khat man khomin ar chôk thei, khannisianlân, uirena'n chu a hringna ten zong a ti.

²⁷Mi'n a puan kâng loiin mei a ipom thei ma ni?

²⁸Mi a ke kâng loiin mei ir-al chung a ife thei ma ni?

²⁹Khaang khan, mi dang dôngma leh zâl ka chu tukhom tuang loiin suak no ni.

³⁰Mi'n a phîngchâm sika fâkrua a inrûk chu hmusit ngai ma,

³¹Khannisianlân, ichelin a omin chu a bâk sari'n a ituam nôk ngêt hrang a nia, a inei murdi a ipêk zit hrang a ni.

³²Mi dôngma irchûpuitu chu inhriatna nei ma. Ama le ama a insiat a nih ti inhre suak ngai mah.

³³Kuttum tuangin hmâimôkna tong a ta; mualinphoi takin om mai a ti.



³⁴Hnarsâna hi mihriam ninginmurna a nia; a phuba lâk niin chu ite hôi no ni.

³⁵Irtannahai hi pom no nia; thilpêk tamtak pe khomin lân, a milung chuk pe ual no ni.

Thuvârhai 7

Notizuar huangna

¹Ki nâipa, ki thuhai hi inhre maiin lân, ki thupêkhai hi irtik mai roh.

²Ki thupêkhai zômin lân, hring damin om ni ti. Ki dân chu ni mitlailên ni hrung dôra irdînin vong roh.

³Nang ki'rchûna chu zoro tina inkolin lân; ni lungrîl phêka irziak roh.

⁴Vârna chu ni farnu angin bê'n lân, inhriatna kha ni rual lungthungtak angin bê mai roh.

⁵Khanchu mi dang dôngmahai ata ni nupang sualhai inthêmnaa irthokin nang inzôk an ti.

Nupang sual

⁶Voikhat chu ki tukvera irthokin ki thîra,

⁷ruatharte inmôl tamtak laia ruatharte inhriatna irsam bîk hi ki hmua.

⁸Nupang inkhat omna kil tianga lampuia khan a fea. An in kôla a thenga,

⁹khohloi misa tâk hnung zân zîng bupa khan.

¹⁰Kha, notizuar irvoa irvo le vârirlet nupang khan a'rtongpuia.

¹¹Nupang inzakboi le tumna inthûk, kil tina chai vêl ngai,

¹²hmun kilkhôra ngîra, lampuihai le bazar hmunhaia mi irdîp vêl ngai a lei nia.

¹³Khanchu, ruatharte kha an kuaa, a tuma, ngam takin a ena, a kuang,

¹⁴“A vuan hin irngeina thilinhlan ki neia, irbôlna hmêhai ki fâka.

¹⁵Khasikin, nangma irtongpui hrangin ki ihong a ni. Nang hmu ki nuama, hin kêng ni lei iom na!

¹⁶Ki zâlhmun chu Aigupta ram patzâi irhmi ki'rkhua.



¹⁷Ki puantha khom bero hai, aloe hai le thingzungthum haiin a mirim kin hoitira.

¹⁸Tho hong ro! zânkhovârin lungthungna pâr lei khiak rei. Ei rôpsuama irpom irhlômin lei lôm rei.

¹⁹Ki pasal lak ina om maka, khual ram hlataka an zina.

²⁰Sum tamtak a chôia, hapta hni hnunga kêng la hong suak a ti” a tia.

²¹Khanu hmêl satna khan an thêm inhnêa, a inriamna chong thum khan a hruai irhmang tâka.

²²Voikhat rengin a zui zel tâka; sechal, an ithatna hmun tianga pan angin le sakhi thalin a milung a sunna hranga châng a irchôm ang khan.

²³Va’n a thina hrang a nih ti inhre loia châng a ipan ngai ang kha a ni.

²⁴Khasikin, ki nâipahai, atûn hin ki thuhai irngai unglân, ki bâia thu suakhai hi pom roi.

²⁵Khaanga nupang kha nin lungrîl inhnê hrangin phal no unglân; a lampuia khan fe irhmang no roi.

²⁶Pasal tamtak siatna a nia, tep zoiloi thina bi tak a ni.

²⁷A ina ni fe’n chu mithi khua pan ang kha ni ni. Thina lampui nâitak chu a ni.

Thuvârhai 8

Vârna inpâk

¹ Irngai ro! Vârna chu a kheka, inhriat thiamna khan ar hâi a insua mo ni ma?

² Lamlian kôla tâng irsânghaia le lamsuamhaia khan a ngîra.

³ Khopui dâimitzîng haia, kho lûtna mikot suahaia inring takin a khêka:

⁴ O nangni mihriamhaio, nangni ki ngên; irnênga mi tinrênghai ki ikoihai a ni.

⁵ Mi’nmôlhai, vârna irchû unglân, intôhai, inhriatna irchû roi.

⁶ Ki chong satak takhai hi irngai roi; ki thuhiril murdihai hi chu a idik a ni.



- ⁷Ki bâia thu suak hi thutak a nia; milak thu chu keima hrangin khôkmâk om tak a ni.
- ⁸Ki bâia thu tinrêng suak hi a idik zit a ni; thu dik loi le chanlamboi thu ite om mah.
- ⁹Inhriat thiamna nei mi hrangin chu a fia zita; inhriatna nei hrangin chu an tâiteng a ni.
- ¹⁰Tangka sum nêkin ki'rchutirna hi inthang unglân; rângachak hlu tak nêkin inhriatna hi inthang roi.
- ¹¹Lunghluhai nêkin vârna chu a sa ual; thil ni indit murdi leh hrilkhî thei zât om mah.
- ¹²Kei hi vârna chu ki nia, vârna hin omhmun ki khuara, inhriatna le irngaitheina ki hmu suaka.
- ¹³Rengpa chi chu soal hnôlpai hi a ni; irpâkna hai, irsongna hai, soal lampui hai le chong chanlamboi hai hi ki ihnôlpai a ni.
- ¹⁴Thil hi ki ngaituaa, ki ngaitua suak ngai. Inhriat thiamna ki neia, hrât tak chu ki ni.
- ¹⁵Renghaiin roi an rêlna hrangin le hruaituhai dân sa an siam theina hrangin ki changpuihai ngai.
- ¹⁶Keima hmangin hruaituhai murdi'n irnêng chung a roi an rêla, mi lian le mi roiinpuihai khomin.
- ¹⁷Lung ni thunghai ka chu lung ki thunga; Takirtâi taka ni zongtuhai khan ni hmu thei an ti.
- ¹⁸Pêk hrang irchon le roiinpuina chu ki nei, irhniangna le thangsuaana hai khom.
- ¹⁹Ki kuang ata nin ihmu chu rângachak satak nêkin a sa uala, sumtak irthât infâi liai nêk khomin a sa ual.
- ²⁰Felna lampui ki hroa, Dikna lampuihai ki zuia,



²¹lung ni thunghai chu irchon ki pêkhaia, an inhai chu irchon, sumpuanin kin sip ngai.

²²“Rengpa khan thilsiam bul takin a ni neia, tianlaia a thilsiam bul tak chu.

²³Kumtuang ata siam ki nia, irnêng irsiang mân ngeia khan.

²⁴Tuikhanglian la om mân le tuidunghai la om mâna khan ki suak ta.

²⁵Tânghai la om mân le mualhai la om mân ngeia khan ki suak tâka,

²⁶Pathianin irnêng le ramri a siam mân daiha, nêngpil a om mân daiha khan.

²⁷Irvânhai a siam laia khan ki om tâka, Tuipui chung a fe theina a siam laia khan.

²⁸Sûmhai irvâna a siahai laiin, Tuikhanglian hnâr ar hong laiin le

²⁹tuipuia tuihai a iti ban irsôn loi hranga ramri a khang pehai laia khan. Irnêng lungphûm a phûm laia khan ki iom tâk a ni.

³⁰Kha laia khan, kut theithiam mi angin a kôla ki oma, a nitin a lômna ki nia, A kôla raifân takin ki om mai ngai.

³¹Lêng theina a rammual siama raifân taka omin, ki lômna tak chu mihriam nâihai chung a ni.

³²“Thoi roi, ruathartehai, ki thu irngai roi, ki thupêk zôm unglân nin râlvân sa a ti.

³³Irchutirna nin idong kha irngai unglân; vâ unglân hmusit no roi.

³⁴Mi tukhom ki mikot bula oma, ki dâi mikot bula oma, ki dâi mikot bul nghâka, ki thu irngai chu a râlvân a sa e.

³⁵A ni hmu kai chu hringna an ihmu a nia, Rengpa inditna khom dong a ti.

³⁶Khannisianlân, ni hmu loi kai chu mânia dûk irtho ni an ta; tukhom ni hnôl kai chu thina lungthung an ni,” tiin.

Thuvârhai 9

Vârna le intona

¹Vârna khan in a sina, a chopui sari a phuna.



- ²Hruaithena hrangin a thil hringhai a thata, uain a pola, khalâi an irfûka.
- ³A tirtôn dôngmatehai a tîra, khopui hmun irsângna taka khêka:
- ⁴“Tho hong roi, inmôlhài!” ti hrangin. Khante, intohai kuanga khan,
- ⁵“Tho hongin lân, ki bai hong fa’n lân, ki uain irpol hong in roh.
- ⁶Nin môlna kha masanin lân, hring ro. Khante, inhriatna lampui kha zui ro,” tiin.
- ⁷Hmusit ngai mi ni hrilin chu nang phengsan a ta, mi pualoi ni ngo’n chu kuttum tuangna ni ti.
- ⁸Khasikin, mi hmusit ngai mi hril no ro; nang hmumâk a ti. Khannisianlân, mi vâi ni hrilin chu mahrip nang tho a ti.
- ⁹Mi vâi kuanga ni thu’nsîr murdi khan invârtir ual a ta; mi fel kuanga ni thuhiril murdi khan an hriatna irbôktir pe a ti.
- ¹⁰Rengpa chi hi inhriatna bul a ni. Mi irthiang inhriat hi inhriat thiamna dik a ni.
- ¹¹Vârna’n ni hring sâng kum irbôktir a ti.
- ¹²Ni vârin chu nangma inlâp ni ta, khan vârna ni hnôlin chu nangma vai tuang ni ti.
- ¹³Intona chu nupang zakboi, a om pai pai ang kha a ni.
- ¹⁴A mikot bula a toi ngaia, khua hmun irsânghaia a toia;
- ¹⁵mâni sintum chit ngaituaa theng irlôi murdihai a lei koia:
- ¹⁶Mi’nmôlhài, hi tiang hong roi!” tiin.
- ¹⁷Khan, inhriatna nei loi mihai kuang khan, “Inrûk tui chu a thum uala, inrûk bai khom ar hnik ual,” a tia.
- ¹⁸Khannisianlân, anni khan khanu ina fe kai chu an thia, a lei lût tâk kai chu thina ram rîla an om ngai ti inhre viat mah.

Thuvârhai 10

Solomona thuvârhai



- ¹Solomona thuvârhai: Nâipa vârin a pa lômna hrang a siama; nâipa intô rêkin chu a nu beidongna an tungtir ngai.
- ²Dik loitaka irchon ni ibûm khan nang siam insa no nia, dikna rêkin chu thina ata a hringna a sansuak ngai.
- ³Rengpa khan mi sahai chu phîngchâm an tuang hrang phal no nia, mi pualoihai chu an inuam inthang an hmu loina hrangin khâipaihai a ti.
- ⁴Thaboina khan inriangin nang siam a ta, takirtâina rêkin chu nang irchongtir a ti.
- ⁵Mi vâr khan bôlzoi laiin bu a buk khôm ngaia; bukkhôm zoroa zâlthangdâr tho chu mualinphoina a ni.
- ⁶Mi sain chu satvurna dong a ti. Mi pualoi chong chu nunrôngna a kop sa ngai.
- ⁷Mi sahai inhriat maina chu satvurna ni a ta, mi siahai irhming rêk chu irnghilin om zôi zel a ti.
- ⁸Inhriatna nei mihai khan irchutirna sa an dong ngai. Mi'nto chong tam rêk chu irhmang an ti.
- ⁹Mi dikhai chu an zôk diai ngaia, mi dikloihai chu ichelin om an ti.
- ¹⁰Tukhom thudik thuptuhaiin buaina an tungtira, tukhom irchong taka sêltu chu irngeina siam a ni.
- ¹¹Mi dik chongbâi sa chu hringna hnâr an nia, mi pualoi chongbâi chu nunrôngna isip a ni.
- ¹²Hnôlna khan buaina an suaktira, lungthungna chu tho'nsualna murdi a'rkhupai ngai.
- ¹³Mi vârhaiin omzia omin an chonga, mi'ntohai rêk chu hrem an inang a ni:
- ¹⁴Mi vârhai khan inhriatna an buk khôma, mi'nto a chongin chu buaina a kêlsua ngai a ni.



- ¹⁵Irchon hi irchonghai ngîrsuakna a nia, inrianghai irhmangna chu an inriangna hi a ni.
- ¹⁶Sin sa lômman chu hringna a nia, sualna rêkin chu sual ualna tiang a hruai ngai.
- ¹⁷Hrilna pomtuhai kai hring an ta, mâni sualna pom nuam loihai chu an tho'nchâi mai ngai.
- ¹⁸Mi a hmumâkna thuptu chu milak a nia; mi insîrinsiat ngaitu rêk chu mi'nto a ni.
- ¹⁹Mi a chong tam dôr a chong insual ngai. Mi vârin chu a dâihrek ngai.
- ²⁰Mi sa chonghai chu tangkarua satak ang kha a nia; mi pualoi ngaituana chu teproboi a ni.
- ²¹Mi sa chonghai khan mi tamtak a siam insatir ngaia, invêtna rêkin chu mâni thina an tungtir ngai.
- ²²Rengpa satvurna khan ar chongtir ngai. Sin hrâtna ringotin irchongtir thei ual no ni.
- ²³Thil sual sina raiinfân hi intô sin a ni. Mi bengvârhai lômna chu mi an lômtir ngai.
- ²⁴Mi felhai chu an thil nuam inthanghai an hmu ngaia, mi siahai rêk chu an ichi tak kha an chung a tung a ti.
- ²⁵Sim phâivua a hong thoa, mi siahai kha a sêm irhmangtira, mi dikhai chu an zôk thei ngai.
- ²⁶Hâ hranga uain thûr le mit hranga meikhu angin mi thaboi chu a târtu hrangin ni a ti.
- ²⁷Rengpa chitna khan hring sôt an ta; mi siahai rêk chu an zoro chuk mân an thi ngai.
- ²⁸Mi sahai tûngna chu lômna tiang a pana, mi siahai maton rêk chu irhmangna a ni.



²⁹Rengpa khan mi dikhai chu a hrung ngaia; thil sual sinhai chu ar hmangtir ngai.

³⁰Mi felhai chu indetin om mai an ta, mi siahai chu irnêng chung a hin hoitakin om no nihai.

³¹Mi felhai bâia khan vârna thu a hril suak ngaia; milei, siatna ngai chu tanpaiin om a ti.

³²Mi felhaiin chu ipom thei thu hril hrang an inhriata, mi siahaiin chu mi milung siatna hrang vai an hril ngai.

Thuvârhai 11

¹Irtêna dikloi hmanghai chu Rengpa'n a hnôla; irtêna dik hmanghai chu a lôm ngai.

²Mi lâiripâkhai chu mualinphoiin om zôi zel an ti. Irgaiintômhai kuang khan vârna a om.

³Mi fel chu a dikna khan hruai a ti. Mi vârirlethai chu dikloina'n irhmangtir a ti.

⁴Ningmurna nî sîn chu irchon sum puanin inlâpna nei ta no ni, dikna'n chu thina ata ni hringna inzôk a ti.

⁵Mi sa dikna khan a hringnun an hoitir ngaia, mi sia chu a sualna'n irhmangtir a ti.

⁶Mi diktak felna khan anni an zôktir ngaia, iamom loituhai chu an huatirhamnaa an in-ôk ngai.

⁷Mi sia a thi'n chu a tûngna khom a thi sa ngai. Irchona irngat chu chanlamboi a ni.

⁸Mi felhai chu lungzîngna ata hrungin an oma; mi siahai chung a chum ngai.

⁹Pathian ngaisak loi mihai chong khan a tualbômhai an siat ngaia, mi fel vârna chu mi dikhai a saninzôk ngai.



- 10**Mi dikhai an tuanitung kârka chu khua le tui a raiinfâna, mi siahai an thiin raifâna khêk mur mur a om ngai.
- 11**Mi felhai satvurna'n khua chôindômin a oma, mi siahai chongbâi rêk chu an siattir ngai.
- 12**Mi dang hmusit khan vârna nei maka. Inhriatna nei mi rêkin chu a dâihrek ngai.
- 13**Mi hmûr thiam chai chian chian ngai mi chu thu'rthup ip thei ngai maka, lungrîl dik nei mi rêk chu a ip thei ngai.
- 14**Irhruaina dik a om no'n chu nam ar hmang ngaia. Mi roizêk thiam tamna chu zôkna a om ngai.
- 15**Tukhom khual mi lâkai tuam pe hranga chonginkung chu irsîr a ti. A thubuai a kop loi khan lungirngam riamin om a ti.
- 16**Nupang sa'n chu mahrip a hloa, khannisianlân, nupang om pai paiin chu mualinphoina a ni. Mi thaboiin chu sum nei ngai maka, khannisian mi takirtâi mi chu irchong a ti.
- 17**Lungkham nei mi khan ama hringna hranga thil sa a isin a ni. Mi nunrông rêkin chu ama takpum dengtheina an tungtir ngai.
- 18**Mi siahai chu irhuangna hlo an man ngaia, felna inthektu rêkin chu lômman an dong ngêt ngai.
- 19**Tukhom sin sa sin tum ngit kai chu hring an ta, tukhom thil saloi sintu chu thi an ti.
- 20**Rengpa'n lungrîl soal mihai kha a hnôla, thil sa thohai chu lung a thung ngai.
- 21**Mi siahai chu dengitheitirin om an ta, mi felhai rêk chu zôk an ti.
- 22**Nupang hmêl sa, lunginchongnaboi chu vok hnâra rângachak irthei irhliang kha a ni.
- 23**Mi sain a inuam inthang chu satna inzen a nia, mi siahaiin an inuam inthang an hmu'n chu mi tinrêng ningmurna a ni ngai.



²⁴Mi tikhoi thil phalna'n ar chongtir sit sita; mi tiksia intikna chu inriangna a ni.

²⁵Mi tikhoi chu hong inchum pe ual mai a ta; mi changpui ngai kakaiin changpui an dong ngai.

²⁶A man tam hrang nghâka bu inhroitu chu mi'n khua sâl an ta, a zuartu chu inpâk an ti.

²⁷Takirtâi taka satna zongtu khan ngaisakna a izong a ni; buaina hrang zongtu rêk chu ama chungu buaina tung a ti.

²⁸Mâni irchon tûng ka chu sâla thingnahai angin chil an ta, mi fel rêk chu fûr thinghna angin hong indôn a ti.

²⁹Mâni in sûng inbuitu chu a hnungkhôna ite nei no ni. Intohai chu mi vârhai suak chang mai an ti.

³⁰Felna ra chu hringna a nia, nunrôngna rêkin chu hringna a lâkpai ngai.

³¹ Mi fel ka chu hi irnêng chung ngeia hin lômman pêk an ni ngaia, mi sia le thil tho'nsualtu khom dengtheina tong ngêt an ti.

Thuvârhai 12

¹Tukhom inhriatna lungthung murdi'n chu irchutirna a'rngaiinnata, khannisian halirchûna khôkmâktu chu intô a ni.

²Rengpa'n mi siahai chu a ngaisak ngaia, pualoina lungrîl nei mihai rêk chu thiam no an chang ngai.

³Pualoina'n mihai dikna pe ngai maka, khannisian mi felhai chu inhnîng viat no nihai.

⁴Nupang omlam sa chu a pasal hrangin lômna le rênglukhum a nia, nupang, a pasal hranga hmâimôk intungtu rêk chu a ru zêm inkhiaktu ang kha a ni.

⁵Mi dikhai ngaituana chu a fela; mi siahai roizêk chu huangna a ni.

⁶Mi siahai chong chu thisen insua hranga inruangna a nia, mi felhai chongbâi suak rêkin chu irlo inthinghai a sansuak ngai.



- ⁷Mi siahai chu irchi suanpâr boiin irhmang an ta, mi felhai in sêngkua chu om mai an ti.
- ⁸Mi bengvârin chu inpâk hlo a ta, mi'nvêt rêk chu mi'n hmusit an ti.
- ⁹Mi lian anga oma fa hrang nei loi nêkin chu, mi narân mânîa fâk hrang nei a sa ual.
- ¹⁰Mi sa khan a thilhringhai a donsui ngaia, mi pualoi rêkin chu thilhring chung a an ningmur an inlangtir ngai.
- ¹¹Takirtâia sintho mi khan fâk hrang a neia, chanlamboi sina zoro pai ka chu invêtna a ni.
- ¹²Mi siahai murdi'n thil sual tho hrang an zong ngaia, mi fel chu det takin an ngîr indet ngai a ni.
- ¹³Mi sia chu a chong ngeia an ôk ngaia, mi dik chu buaina a lôî ngai.
- ¹⁴Mi'n a ichong lam ang takin lômman hmu a ta; ama kuta a sintho ngei kha a kuang inhlan ni a ti.
- ¹⁵Intohai khan chu anni mita hmuin dik irti an inhriat ngai. Mi vârhai rêkin chu irchutirna an irngaitua ngai.
- ¹⁶Intô ninginmurna chu voikhat rengin an langa; mi vâr rêkin chu êsêlna hnung a songsan ngai.
- ¹⁷Thudik hril chu dikna sin a nia, milak rêkin chu roirêl dikloina tiang a kaihruai ngai.
- ¹⁸Intô chongin chu khandai isun nêkin a sun inna ngaia; mi vâr chong rêk chu damna a ni.
- ¹⁹Milak chu sôtnotea hrang vai a nia, thutak chu kumtuangin om mai a ti.
- ²⁰Thil sual ngaituatuhai ka chu thilirkhêl ichiom tak tong an ta, tukhom sin sa sinhai ka chu lômna hmu an ti.
- ²¹Mi felhai chung a chu chanlamboi siatna chum ngai maka, mi siahai chu buaina vaiin sip an ti.



- ²²Rengpa'n milak thohai a khôkmâka, an chong iamomhai chu a lôm ngai.
- ²³Inhriatna nei mihaiin chu an inhriatna an thupa, mi'nvêt rêkin chu an intona an inpuang ngai.
- ²⁴Takirtâina'n irchamneina a pêk ngaia; thaboina'n chu suakin a siam ngai.
- ²⁵Lunginkângna'n raifâna an boitir ngaia, lungkham chongin chu mi an lômtir ngai.
- ²⁶Mi fel chu a rual hrangin hruaitu a nia, mi pualoi lampui chu irhmangna tiang a hruai ngai.
- ²⁷Mi thaboiin chu a irzuk man thei ngai maka, mi takirtâi rêkin chu irchon tamtak nei a ti.
- ²⁸Felna hi hringna lampui a nia, siatna hi thina lampui a ni.

Thuvârhai 13

- ¹Nâipa vârin chu a pa irchutirna ar ngaitua ngaia, mi hmusit uar mi'n chu irchutirna irngaitua ngai mah.
- ²Mi sahai chu an chongbâi suakin lômman dong an ta, milak ngaihai chu nunsiatna inlêngtir vai an inuam a ni.
- ³A bâi vêng insa murdi'n a hringna a ivêng insa a ni. Chong irdîn loi chu a binga irhmangna ni a ti.
- ⁴Mi thaboiin thil tamtak irzuk khom sianlân, hmu viat no ni. Mi takirtâiin chu a izong murdi hmu a ti.
- ⁵Mi dikhai khan milak an khôkmâka, mi siahai chong chu inzakna le mualinphoina a ni.
- ⁶Felna khan dik taka omhai chu a vêng insa ngaia, Sualna chu mi sual irhmangna a ni.
- ⁷Mi senkhat chu ite nei loiin irchong om an thoa; senkhat nôk rêk chu irchong chaka inriang om tho an om.



- ⁸Mi irchongin a hringna irtanna chu ar chon a nia, mi'nriang rêk chu tûte'n irkôk ngai mahai.
- ⁹Mi felhai chu vâv irtêk tak ang kha an nia, mi siahai chu meiser thi chian ang kha an ni.
- ¹⁰Lârirpâkna khan chu irkhalna vai a kêlsua ngai. Irchutirna dong nuam mi kuang chu vârna a om.
- ¹¹Ol tenga irchon ni ibuk chu chiam zôi zel a ta; dengthei taka ni ibuk chu hong pung ual ual a ti.
- ¹²Sabeina a dongin chu lungrîl an natira, lunginchong a taka hong tung chu hringna thing a ni.
- ¹³Irchutirna sa hnung songsan ka chu buaina tong an ta; thupêk chi ka chu lômna pêk thei ni a ti.
- ¹⁴Mi vârhai irchutirna chu hringna hnâr a nia; hmun ichioma hringna inzôkna hrangin changpui a ti.
- ¹⁵Mi bengvârhaiin mahrip an hloa, tûng roboi mihai chu ramna lampuia an om ngai.
- ¹⁶Inhriatna nei mihai chu an sin mân an ngaitua bak ngaia, intôhai chu invêtna an thanginzar ngai.
- ¹⁷Palai pualoiin buaina an suaktir ngaia, palai iamom rêkin chu irngeina an tungtir ngai.
- ¹⁸Tukhom irchutirna dong nuam loi chu a chung a inriangna le mualphoina tung a ti. Irchutirna irngaitu chu chôiirsângin om a ti.
- ¹⁹Lungdo tak tuanintunga a hong omin chu, lungrîl hrangin a thum tak a ni. intohai hrangin chu sualna hnung songsan kha thil intirom tak a ni.
- ²⁰Mi vâv irpôlpuiin lân vâv ni ti. Intô irpôlpui chu dengthei tuangna a ni.
- ²¹Mi sualhai chu kho hmun khoma buaina'n a zui mai ngaia, mi felhai rêk chu thil sain thuan ni an ti.



²²Mi sahaiin chu a tuhai ten irchon mâk pe hrang a nei ngaia, mi siahai irchon rêk chu mi fel kuta pêk ni a ti.

²³Ram thara khan inrianghai hrang fâk tamtak insua pehai a ta, khannisianlân roirêl dikloi mihai khan an loi nei hrang phal pe ngai mah.

²⁴Mi, a nâi sep nuam loi chu lung a ithung loi a nia, lung a thungin chu a sep ngai a ni.

²⁵Mi felhai chu an rukdôr fâk an neia, khannisian mi siahai chu irsamin khop ni nei no nihai.

Thuvârhai 14

¹Nupang vârin in an sin ngaia, nupang into'n chu ama kut ngeiin in a set ngai.

²Dikna neiin chu Rengpa chi mi a nih ti an langa; dikna nei loi chu Rengpa chi mi ni mah ti an lang ngai.

³Mi'nvêt chongin chu lâripâkna khianghrol a oma, mi vâ chongin chu an zôk ngai.

⁴Sehrâtchal om lina sâ in chu a fâi ngaia, khannisianlân irlâpna tamtak pêktu chu sehrâtchal hrâtna sika a ni.

⁵Thu'nhriattu iamomna chu irkhêl ngai maka. thu'nhriat indik loiin chu minlak a hril ngai.

⁶Mi hmusit ngaihai chu itiklai khomin vârna hmu ngai maka, khannisian inhriat thiamna nei mihaiin chu vârna an hmu zôi zel ngai.

⁷Intô kuang ata irkêm ro; a kuang ata ite thil sa irchû hrang hmu no chi ni.

⁸Mi vârhai vârna bi chu an sintum an inhriatna hi a ni. Intohai into nasan chu inhriat an irtina hi a ni.

⁹Intohaiin chu an sual zoro'n poi ti mahaia, mi sahaiin chu ngaidam an zong ngai.



- 10**Ni lômna chu ni ta a nia, ni ngaisiatna khom ni ta a ni. Tûte'n nang irkoppui thei no ni.
- 11**Mi siahai in a chim tena khom mi sahai in chu lan ding mai a ti.
- 12** Mâni irngai ringota lam dik chu thina lam khom a ni lik thei ngai.
- 13**Innuinaa khom ngaisiatna a om thei. Raifâna a hek tena chu beidongna a om mai ngai.
- 14**Mi siahai chu an siat man hmu an ti. Mi sahai chu an sintho lam ang takin lômman ipêk ni an ti.
- 15**Into'n chu chong murdi a iama; mi vârin chu a ke sir hrang a en bak ngai.
- 16**Mi vârin chu buaina a lôina hrang a ngaitua ngaia, intohai rêk chu ngaitua loiin an pût zôi zel ngai.
- 17**Milung hrâthai chu inmôl takin sin an tho ngaia; mi vârhai rêk chu milung dairiamin an om ngai.
- 18**Intohai chu an into man an hmua, mi vârhai chu inhriatna inkhumtirin an om ngai.
- 19**Mi sualhai chu mi felhai makunga kûnin, mi dikloi chu mi felhai kotbâia kûn an ti.
- 20**Mi'nriang chu a urêng a sêngsuak ngei khomin an hnôl ngaia, mi irchong rêk chu urêng tamtak a nei ngai.
- 21**Vânsatna dong nuamin chu inriang lunginkham ri se; mi hmusit hi sualna a ni.
- 22**Sin sa sinin chu mi danghai mahrip le iamzoina a dong ngaia; thil sual sinin chu an tho'nchâi ngai.
- 23**Sin takirtâi hi inlâpna a nia; chanlamboi hrila toi chian chu inriangna a ni.
- 24**Mi vârhai lômna chu irchongna a nia, intohai rêk chu an intona vaia inhriat an ni.



²⁵Thu'nhrepuitu thudik insîrna'n mihai an zôk ngaia; milak a hrilin chu mihai a ihuang a ni.

²⁶Rengpa chitna khan tûngna lian tak a oma; a nâihai khan zôkna hmun an hmu ngai.

²⁷Rengpa chi chu hringna tuihnâr a nia; thina chânghai lôi theina a ni.

²⁸Mipui tamna khan chu rêng roiinpuina a oma; mipui tômna rêka chu rêng nâipa irhmangna a om.

²⁹Mi phûkdâi chu mi vâr tak a nia, milung hrât chu an tozia vai târinlang a ti.

³⁰Lungrîl damna chu taksa hrisêlna a nia, hnarsâna rêk hi chu ru hmon theina a ni.

³¹Mi'nriang sirphâna chu Pathian a siamtu êsêlna a nia; mi'nriang lunginkham rêk chu Pathian chôindômna a ni.

³²Mi sia chu a sintho insual khan ama irhmangna hrang an tungtir ngaia, mi fel chu a felna khan hrung mai a ti.

³³Vârna chu mi bengvârhai ngaituanaa khan a om maia; intohaiin chu vârna ite inhre mahai.

³⁴Felna'n nam a chôirsânga; sualna chu nam tin hrangin mualinphoina a ni.

³⁵Renghai ngaisakna chu tirtôn vârhai chung a oma; ama philtuhai chung a chu a ningmurna a chum ngai.

Thuvârhai 15

¹Sâmna irnêmin chu ningmurna ar kiangtir ngaia, henhrum rêkin chu ningmurna an pungtir ngai.

²Mi vârhai an chongin chu inhriatna nei irzuk a omzia an langtir ngaia, intohai rêkin chu chong chanlamboi an hril ngai.

³Rengpa mit chu hmun tina a oma; ei sin sa le saloi a thîr mai ngai.

⁴Lungskham chongin hringna a pêka, nunrôngna chong rêkin chu lungrîl an siattir ngai.



- ⁵Into'n chu a pa irchutirna zong ngai maka; mi vâh rêkin chu irchutirna a pom ngai.
- ⁶Mi felhai khan irchon tamtak an hrêa, mi pualoihai inlâpna chu buaina a om ngai.
- ⁷Mi vârhai khan inhriatna an sem indara, intohaiin chu khaang khan tho mahai.
- ⁸Mi pualoihai irbôlna chu, Rengpa ta hrangin intirom a nia, mi felhai chongchaina chu a ifel a ni.
- ⁹Rengpa khan mi siahai lampui chu a hnôla, felna lampui zuituhai rêk chu lung a thung ngai.
- ¹⁰Thil soal sintu chu a sate'n denginthei ni a ti. Irchutirna pom loi chu irhmangna a ni.
- ¹¹Mithi khua Rengpa'n a hmu zita, mihriam lungrîl len vâng chu hmu'n fel zit a ti na!
- ¹²Mi hmusit song ngaihai khan irchutirna nuam ngai mahaia; mi vârhai kuang khom ite irdon nuam ngai mahai.
- ¹³Lungrîl a lômin chu irtha an fântira; lungrîl beidongna'n chu hmêl an ngûitir ngai.
- ¹⁴Mi bengvârhaiin irchutirna an nuama, intohai rêk chu an intona khan an milung a chuk ngai.
- ¹⁵Dengthei tuangtu hrangin chu sîn murdi hi a saloi inzen a nia, mi lungrîl irthâhai chu a nitin raifânin an om mai ngai.
- ¹⁶Rengpa chia, inriang chu irchonga buaina nei nêkin a sa ual.
- ¹⁷Sechal hmê leh tuitaka bukhalâi ota, milung irhoi loi nêkin, anhring fâka inthurual taka bu nêk chu a sa ual.
- ¹⁸Milung hrâtin irkhalna an suaktira, lung ir-ialin chu irngeina an tungtir ngai.



¹⁹Mi thaboiin chu hmun tina intakna tong a ta, mi dik rêkin chu buaina nei no ni.

²⁰Nâipa vârin chu a pa an lômtir ngaia. Into vai kêng a nu a hmusit ngai.

²¹Intohaiin chu an intona kha an raifâna a nia, mi vârhai rêk chu thil sa an sin ngai.

²²Ngaitua bak loia sin tho chu tuanitung ngai maka; lungvâr sak thei tamna chu hmanchang suana a om ngai.

²³A zoro taka sâmna dik tak inhriat hi lôm an om vang na!

²⁴Mi vârhai chu hringna panna lampuia an fea; thina panna lampui chu an mâk ngai.

²⁵Rengpa'n mi irsonghai in chu inkarpai a ta, meithâi irchon rêk chu sînghualpui a ti.

²⁶Rengpa'n ngaituana sualhai chu a hnôla, mi irthiang chonghai chu a lôm ngai.

²⁷Mi huatirham khan ama in sîngkua an buai ngaia, fâk inrûk fa ngai loihai rêk chu irfûktir a ti.

²⁸Mi sahaiin chu mi an itih pe hrang lam an ngaitua bak ngaia. Mi saloihai rêkin chu mi an sâm zôi zela; buaina an insua ngai.

²⁹Mi sahai chongchaina chu Rengpa'n ar ngaitua ngaia, mi siahai rêk chu a hla pehai ngai.

³⁰Râifân hmêlin mi an lômtira, thurchi lômomin mi an hartir ngai.

³¹Hringnun siam indikna irngai theina neitu chu, mi vârhai laia om a ti.

³²Irchûna nuam loi chu mâni irhmusit a nia, irchutirna pom rêk chu hong vâ a ti.

³³Rengpa chi hi vârna irchutirna a ni zela. Irngaiintômna chu chôirsângna omna a ni.

Thuvârhai 16



- ¹Lungrîla lei ngaitua irfûk hi mihriam sintum a nia, sâмна rêk chu RENGPAА irthokin a ni.
- ²Mi, mâni irngaiin a itho murdi a dik a ti thei, khannisian Pathianin chu lungrîl tumna kêng a irkhî ngai.
- ³Ni ngaituanahai satvur hrangin Rengpa ngênin lân, khanchu ni ngaituanahai kha hlo chukin sin thei ni ti.
- ⁴Rengpa thilsiam murdi hi omzia nei inzen a nia; mi siahai khom sîn saloia hrang an ni.
- ⁵Lungrîla lâripâk murdi chu Rengpa hranga intirom an ni; dengtheina tuang loiin insua no ni.
- ⁶Dikna le iamomna nei chu Pathianin a ngaidam ngaia. Rengpa chitna'n mi'n sual a mâk ngai.
- ⁷Mi, a omlamin Rengpa an lômtirin chu a râlhai khom rual sa'n a siam thei ngai.
- ⁸Dikloi taka lâklût intam nêkin chu dik taka hlo suak, tômte nei a sa ual.
- ⁹Mi, a lungrîla a sin hrang a ngaitua theia, kalchôi hrang lam chu Rengpa'n a zêk pe ngai.
- ¹⁰Reng khan Pathian irchamneina chang a ta; a roirêl tinrêng a dik ngai.
- ¹¹Vârna le irkhîna dik hi Rengpa nuamlam a nia; a ni, vârna tinrêng a idik hrang a ni.
- ¹²Pualoina hi rêng hai hranga intirom a nia, felna hi rêngtoihmun detna a ni sikin.
- ¹³Thudik hi rêng lômna a nia; thudik hrilhai chu uksak a ti.
- ¹⁴Mi vâr khan rêng inlômtir tum a ta, rêng ningmurna chu thanginthei ang kha a ni.
- ¹⁵Reng hmêl vâr khan hringna a oma; a ngaisakna chu rua hnungkhôn thoa sôm ang kha a ni.



- ¹⁶Rângachak nêkin khom vârna nei hi a sa uala, a ni, tangka nêkin khom inhriat thiamna chu inthang ual hrang a ni.
- ¹⁷Mi sahai murdi'n sualna lampui hnung an songsan ngai; khasikin, a lampui fena vêng insa khan a hringna a inzôk a ni.
- ¹⁸Irpâkna'n chu irhmangna tiang a hruaia, irsongna'n irhmangna tiang a hruai ngai.
- ¹⁹Mi lâiripâkhai le râllâk thil irsem nêkin chu irngaiintôm taka inriang ni hi a sa ual.
- ²⁰Irchutirna irngai mi chu tuanitungna dong a ti. RENGPAА irngat mi chu mi vânei a ni.
- ²¹Mi vâp puihling chu a vârna'n mi'n inhria an ta; a chongbâi thum dôr mi an hnê ngai.
- ²²Mi vâp hrangin vârna kha hringna hnâr a nia; mi'nvêt irchutir tum chu chanlamboia zoro inhekna a ni.
- ²³Mi vârhâi khan an chong mân an ngaitua baka; an itihai murdi'n lungrîl an hnê ngai.
- ²⁴Chong sa chu khuaihlutui ang dôr a ni. Hringna hrangin a thuma; takpum hranga hrisêlna a ni.
- ²⁵Mâni irngaia lam dik ni le irhoia inlang, khannisian a mongna chu thina khom a om.
- ²⁶Sintho mi khan a fâk hrang sikin sin a thoa, a phîngchâm khopna hrangin sin a tho ual ual ngai.
- ²⁷Mi siahai chu mi dang ningthik sinna hrang lam an zonga; an chongbâi suak chu mei ang kha a ni.
- ²⁸Mi pualoihai khan chong chanlamboi an hril indarh ngaia; irkhîk za zata buaina insua'n rual irchangna a'rsentir ngai.
- ²⁹Mi nunsiahaiin an rualhai an huanga; siatna tiang a hruai ngai.



³⁰An irkamnôia, nang inmitkhum mihai ata irdîn ro, a hmûr phong loi mi khan thil saloi an tungtir ngai.

³¹Hring dam sôtna hi mi fel lômman a nia; lu chuak hi an roiinpuina a ni.

³²Mi lungrîl ir-uai hi mi hrâthai nêkin a sa ual. Mâni lungrîl sep zoi hi khopui inhnê zoi nêkin a sa ual.

³³Mihriamin Pathian nuamlam inhriatna hrangin tâ an sân ngaia, khannisian a mongna chu Rengpa ta a ni.

Thuvârhai 17

¹Buaina sip ina hruaithe fâk nêkin chu irngei diala bu dâi tang nêk a sa ual.

²Suak vârin a pu nâipa chung a khan irchamneina nei a ta, irchon khom dongtum nei a ti.

³Rângachak le sumtak chu meiin a'rthîta, mihriam lungrîl rêk chu Rengpa'n a fia ngai.

⁴Mi dik loihaiin chu saloi tiang an mikuar an sunga, mi minlakhai khom milak tiang an mikuar an sung ngai.

⁵Mi'nrianghai hmusittu chu Pathian a siamtu a iêsêl a ni. Mi vânduaina inriamtu chu vîk tong loiin om no ni.

⁶Nâipanghai roiinpuina chu pahai hi an nia, putarhai rênglukhum chu an tu le tehai an ni.

⁷Mi mahriphaiin milak hril ngai maka, intohai rêkin chu thu poimo insîr hrang nei ngai mahai.

⁸Mi senkhat irngai dânin chu fâk inrûk hi, dôi angin sin a thotheia; thil tinrêng a tho thei hrangin an iam ngai.

⁹Mi tho'nsualna ngaidamtu chu lungirthungna a izong a ni. Mi tho'nsual inhriat maina khan rual irchangna a sen ngai.

¹⁰Into'n voi irzakhat vîka a irchû nêkin mi vârin voikhat irchutirnaa a irchû a tam ual ngai.



- 11**Mi sia, buaina siam chian chian ngaihai chung a khan, thina kha palâi nunse tak tîr ni a ti.
- 12**Into, invêt irtongpui nêkin chu, savompui a têhai la pe zoia irtongpui nuam a om ual.
- 13**Satna, suala thuan nôk ngaitu chu thil saloiin a in mâksan no ni.
- 14**Irkhal irphutna chu tuitial chet ang kha a nia; khasikin irngo irzêm an tungtir mân irngamtir tum ro.
- 15**Mi sual thiam changtu le mi sa thiam no inchangtirtu chu an ruaiin Rengpahraga intirom an ni.
- 16**Intô thiamna neina hranga sum inthâm hi ite ar fêna om ma, mânia inhriatna a nei no sikin.
- 17**Rual sain chu itiklai khom lungthungna an langtir ngai. Irzirpui hi chardong nia hmang hranga suak a ni.
- 18**Inhriatna nei loi mi vai kêng mi dang lâkai chung a mophurtu hranga chonginkung ngai.
- 19**Sualna irngaiinna miin chu buaina a'rngaiinna a ni. A neina song zo zôi miin chu buaina a izong a ni.
- 20**Tukhom thil saloi ngaitua ngai le insîr ngaiin chu thil sa hmu ngai maka, siatna vai a ihmu a ni.
- 21**Nâipa invêtin chu a pa hrang lungdûkna a ni. Nâipa intô neitu pa chu lômna nei ngai ma.
- 22**Lungrîl irthafâna hi damna satak a nia; lungrîl ngûina'n chu ru an châtir ngai.
- 23**Roirêltu dik loiin dâihrekin fâk inrûk an lâka, khanchu roirêlna dik hmang nuam ngai ma.
- 24**Mi vârin chu vârna tiang a'rngat ngita, intô rêk chu kil tin an khîk têtui ngai.



²⁵Nâipa intô chu a pa beidongna intungtirtu a nia; a nu hrangin irsârna an tungtir ngai.

²⁶Mi felhai intuangtir sa ma; mi sahai tôkholmol fâk an omin chu rêl indikna a iom loi a ni.

²⁷Inhriatna nei miin chu a chong ar dîn ngai. Milung ir-ial taka om mi khan inhriat thiamna a nei.

²⁸Intô khom a dâihrekin chu mi vâra tep sa a nia; a chong intômin chu mi lunginchong neiin ibe thei a ni.

Thuvârhai 18

¹Mi, mâni ringota om nuam chu mâni hrang vaia sa an hriat ngaia; mi murdi'n thudik an iti kha pom ngai ma.

²Into'n chu inhriat thiamna a nei le nei loi ngaisak ngai maka; mi'n mi vâr ni ti ri sehai tia a lungrîla om insâr vai kêng a inuam ngai.

³Sualna a hongin chu hmusitna khom a hongna, inzakna chu mualinphoina le tongna a ni.

⁴Mi, a bâia thu chu tui inthûk tak ang kha, vârna tuihnâr luang ang kha a ni.

⁵Mi soal thop chu sa ma. Roirêlnaa mi fel hnôl khom sa ma.

⁶Into'n irkhalna a phutin chu tôkholmol a izong a ni.

⁷Intô a chongin chu ama irhmangna a nia; ama chongbâi suak chu ama irkhitna hranga châng a ni.

⁸Chong tufiam hi irngaihoi a oma, bu nêk irhnikin ei sâng a ibit mot mot ang hi a ni.

⁹A sin thoa mi thaboi chu mi irhmangtirtua irzirpuipa a ni.

¹⁰Rengpa chu kulpui det tak ang kha a nia, mi felhai an intân lûta an zôk ngai.

¹¹Irchonghaiin chu an irchongna khan khopui kulbang dettak angin a ihrung thei an sôn ngai.



¹²Tukhom a'rngaiintôm no'n chu chôirsângin om ngai maka; mi irchonghai chu irhmangna lampuia an hrô ngai.

¹³Ni sâm mân irngaitua bak roh. khano'nchu invêt hlôna le mualinphoina ni a ti.

¹⁴La hring nuamna khan dam loi laiin intûk indet a ta, khannisianlân lungrîl a popin chu sabeina boi a ti.

¹⁵Itiklai khomin mi vârhai chu irchû an nuam mai ngaia; mi bengvârhaiin inhriatna an zong ngai.

¹⁶Mi lian hmu nuamtuhai chu thil pêkin lampui an hong pe ngai.

¹⁷Ama thiamna thu'nsîr masatu chu a'rdoipuitu'n an sîr nôk mâka chu a dik angin an lang ngai.

¹⁸Mi hrâthai an irkhalin chu tasânin thubuai kha an infel thei ngai.

¹⁹Ni'rzirpui sanin lân, ama khan kulpui det angin nang hrung a ti. Nir khalpuiin chu a in nang khâr pe a ti.

²⁰Mi, a chongbâi suak ra khan hring a ti.

²¹Ni chong khan hringna a sûnghual theia; ni chong dên khan hringna an siat irhmangtir thei. Khasikin ni chongna ra kha fa ngêt ni ti.

²²Dôngma hmu chu thil sa a ihmu a ni; Rengpa'n a ingaisakna a inlang a ni.

²³Mi'nriang a chongin chu mahrip takin a ngên ngaia, irchong rêkin chu inhrum khakin a sâm ngai.

²⁴Rual senkhat chu rual pai pai a oma, khannisianlân, rual senkhat chu mâni irzirpuihai nêka iamom ual an om.

Thuvârhai 19

¹Mi, milak vai thoa lan to nôk nêkin chu, mi'nriang lungrîl satak irputa om a sa ual.

²Inhriatna boia nuamna ringot khom hi sa ma; milung inrang hrai mi chu buaina a tong ngai.



³Mi senkhatin an invêtna'n anni na nâk an siata, khanchu an lungrîlin Rengpa an nuar ngai.

⁴Irchonghaiin rual tamtak an neia, inrianghai rêkin chu an rual nei sunhai khomin an mâksanhai ngai.

⁵Inhriatpuitu dik loi chu tôkholmol tuang loiin om no nia, milak chong chungirchuan chu zôk no ni.

⁶Mi tamtakin mi lianhai ditsakna dong an tum ngaia; ditsaktu hrangin chu tinrêng rual sa an ni.

⁷Mi'nriang chu a'rzirpuihai lua khomin san nuam ngai mahaia; a rualhai len vângin chu tûte hmu no ni.

⁸Vârna nei khan ama hringna lung a ithung a ni; inhriatna neitu chu vânei a ti.

⁹Inhriatpuitu dik loi chu kuttum tuang loiin om no nia; milak tho ngai chu irhmang a ti.

¹⁰Intô chu hringnunhoiin om no sianlân, suak khom rêng nâihai chung a irchamnei no ri se.

¹¹Irngai thiamna nei mi'n chu, a ningmur an suai thei ngai. Mi tho'nsualna uksak loi hi roiinpuina a ni.

¹²Reng ningmurna chu kâmkeibaknei inrung ang kha a nia, a ditsakna rêk chu satvur rua ang kha a ni.

¹³Nâipa into'n chu a pa hrang vânduaina an tungtir ngai. Đôngma hrângsia chu itiklai khoma tui zung mai ang kha a ni.

¹⁴Mi'n a pa ata in le loi irchonghai a lua thei, khannisian Rengpa tak ata vaiin kêng đôngma vâ chu hmu thei a ini.

¹⁵Ni nuamin chu nir tha inboi mai ro; zâl mai ro, khannisian phîngchâmin om ni ti.

¹⁶Rengpa dân zôm indik murdi'n a hringna a ivong insa a ni; a omlama irdîn loi rêkin chu thi a ti.



¹⁷Inrianghai san chu Rengpa a intângtir ang kha a nia, a sintho sa chu Rengpa'n thuan a ti.

¹⁸Ni nâihai kha an la nâiinpang laiin sep ro. khano'nchu, an irhmangna hrang lampuia changpuitu ni ni ti.

¹⁹Milung hrâthai ina chu tôkholmol a tong ngai. Buaina ata ni kêlsua khomin, la kêlsua nôk mai la nang a ti.

²⁰Irchûna tiang ni mikuar ni sunga, irchû ni nuamin chu mi vâ la hong ni ni ti.

²¹Mihriam lungrîla thil tamtak ngaitua om khom sianlân, a hnungkhôna chu Rengpa lungdo sin ni a ti.

²²Huatirham hi mualinphoina a nia; mi minlakhai nêkin chu inrianghai an sa ual.

²³Rengpa thu zôm hin hringna an tungtira, a zôm murdi'n lungchuk takin an oma, thil saloi irkhum om ngai ma.

²⁴Mi senkhat chu an bâia bu hong thun lua khom an rin ngai.

²⁵Mi irsonghai tôkholmol tho a sa, khanchu mi'nmôlhai hong irchû thei an ti. Inhriat thiamna nei chu hrilin lân, hong vâ a ti.

²⁶A pa dengintheitira, a nu inhnotsuaktu chu, nâipa mualinphoina intungtirtu a ni.

²⁷Ki nâipa, irchutirna ni mâkin chu ni inhriat tâkhai khom kha irnghil thai ni ti.

²⁸Thu'nhretu dik loi chu roirêlna a ihmusit a ni. Mi siahai khan sualna lung an thung ngai.

²⁹Roirêlna chu mi irsonghai hranga siam a nia; tôkholmol chu intohai inruangna hrang a ni.

Thuvârhai 20

¹Zu in hi nuizabûr mi siamtu a nia; zû'nruai hi invêtna a ni.



- ²Reng ningmur kha chi ro, kâmkeibaknei inhrûm ang kha a nia; a ninginmurtir chu mâni hringna chung a thil tho'nsual a ni ngai.
- ³Intôhaiin chu irhal an phut ngaia; anni lai ata irkêm hi irhming satna a ni.
- ⁴Sin mi irthaboi, a zoro taka irnêng tuk loi chu, bu ât zoro'n a kut dô a ta, ite nei no ni.
- ⁵Mihriam lungrîl ngaituana chu tuikhanglian inthûk taka tui ang kha a nia, khannisianlân inhriat thiamna nei murdi'n thangsua a ti.
- ⁶Mi tamtak iamom irti inzen ni an ta, khannisianlân, mi iamom tak tak nangma'n hmu'nfel tum roh.
- ⁷Mi fel, dikna nei mi nâihai chu râlvân sa an ni.
- ⁸Roirêlnaa rêngtoihmun khan a mitin thil saloihai murdi a khâipai ngai.
- ⁹“Ki lungrîl ki'rthiangtira, ki sual ata ki'rthiang tâk,” tu mo a ti thei hrang?
- ¹⁰Rengpa'n vârna le irkhîna dik loi hmang mihai chu a hnôl ngai.
- ¹¹Nâipangte lua a sinthoa khan a nina an langtir ngai; nâipang sa a ni le ni loi a sintho ata inhre thei a ni.
- ¹²Inhriatna mikuarhai le hmu theina mithai hi Rengpa ni ipêk se seng a ni.
- ¹³Irtha inboia zâlthangdârin ni zoro ni hmangin chu hong inriang ni ti. Sin tho'n lân fâk nêk irkhopin nei ni ti.
- ¹⁴Thil irchotu khan a man a hlu hrai a ti ngaia; khan a kîr nôk tenin chu a man a irhniamtira khan ar pâk nôk ngai.
- ¹⁵Ni insîr kha nin hriat infelin chu rângachak le lunghlu nêka thil hlu ual ni inei a ni.
- ¹⁶Intô khualmi lâkai chung a mophurna la hranga chonginkungtu chu, ama irchon khom bânda intung a ti.
- ¹⁷Dikloi taka ni ilâklût chu mihriamhai ta hrangin irzuk a oma, khannisian inhnunga chu lungtehret bâr ang kha ni nih ti.



¹⁸Thil tum ni nei mân irhril irsakna zong ro, irdoina ni siamin chu nang a hruai thei hrang mihriam sa zong ro.

¹⁹Chong tam mi'n chu thil irthup ip thei ngai ma; khasikin mi chong tam hrai irpâlpui loi a sa.

²⁰A nu mani, a pa mani, khua sâltu chu inthim irsakhak hnuiaia meiser that rip angin a hringna mong a ti.

²¹Irchon hi a phuta ol tengin buk thei zel ni khom sianlân, inhnunga chu satvurna ni zit ual no ni.

²²“Sual chu lei thuan zôi zel rong” ti no ro. Rengpa nghâkin lân, ama'n indiktir ving a ti.

²³Inhriatna le vârna dik loi hi Rengpa mithmua intirom tak a ni.

²⁴Mihriam lampuihai chu Rengpa inkung a nia; itin mo mihriamin a hringna lampui a inhriat thei hrang?

²⁵Pathian kuang thil nin hlan mân ngaitua bak ro. Inhnunga nir sîr nôk itinin.

²⁶Reng vâr khan thil tho'nsualtu kha chel suak a ta, khonzâna boiin dengintheitir a ti.

²⁷Mihriam lungrîl ngaitua theina chu Rengpa meiser a nia, einia irthokin ite thup thei no ih.

²⁸Reng kha satna felna le dikna'n roi a rêl kârka inlal a ti.

²⁹Ruathartehai roipuina chu an hrâtna a nia, tarhai mahripomna chu an lu chuak hi a ni.

³⁰A kâra chu ei lampui fena indiktirna hrangin intakna tamtak irtem a nang ngai.

Thuvârhai 21

¹Reng lungrîl chu Rengpa'n a zêka; tui luangna iva korong a isiam angin a nuamna tiang tak an kôitir ngai.



²Mi tinin an omlam tinrêng hi anni mita chu a dikin an bê zit ngaia, Rengpa'n chu lungrîla tum dân kêng a ivarh ngai.

³Irbôlna nêkin dikna le felna sin hi Rengpa lôm lam a ni.

⁴Mi siahai chu an irpâkna le an irsongna khan an lungrîl a zêka, kha kha soal a ni.

⁵Mi takirtâi ngaituana khan neinungna tiang a pana; mi thaboi rêk chu irsamna tiang vai a pan ngai.

⁶Dikloi taka irchon buk chu irhmang zôi zel a ta, a zongtu hrangin thina a ni.

⁷Mi siahai chu an nunsiatna khan irhmang an ta; thil sa sin an nuam no sikin.

⁸Thiamloi changhai lampui chu a kôi ngaia; mi sahai lampui rêk chu a tânthai ngai.

⁹Dôngma hrângsia le hmun khata inhoi taka om nêkin chu, in sùng kilkhôra om a sa ual.

¹⁰Mi siahai lungrîl khan thil saloi a'rzuk mai ngaia; tûte chung a lungkhamna nei ngai ma.

¹¹Mi hmusit ngaihai dengintheitira an omin chu mi'nmôlhai an lei vâr ngai; khan, mi vârin chu irchutirna a idong kha an hriat mai ngai.

¹²Pathian, mi fel khan mi siahai in sùng thil om an hriata, khasikin mi siahai chu irhmangtir a ti.

¹³Inrianghai chapna nir ngai no'n chu, nang khom changpui innangin ni chapna irngaiin om no ni.

¹⁴Mi chung a ning an murin chu dâihreka thilpêkin a milung insuai a ti.

¹⁵Roirêl dikin chu mi felhai an lômtir ngaia, mi saloihai hrangin chu irhmangna a ni.

¹⁶Mi tukhom inhriatna dik ata invâi chu thina'n a nghâk chian ngai.

¹⁷Hringkhonhoi vai irzuk chu mi'nriang ni a ta; zu le sa irngaiinna mi chu irchong no ni.



¹⁸Mi siahai chu mi felhai dengintheina hrang an châng kama khan an irpal ngai.

¹⁹Dôngma hrângsia, chiar chian chian le hmunkhata om nêkin chu ramchâra om a sa ual.

²⁰Mi vâi chu irchong tak le hoi takin a oma, intô rêkin chu poisa a hmu le chu a hmang lat ngai.

²¹Dikna le lungkhamna neiin lân, ni hring sôt a ta; mihai mahrip le chôiirsângna dong ni ti.

²²Hruaitu vârin chu mi hrâthai khopui a lâka, an kulbang irnghatna khom an simtir ngai.

²³Buaina ata irken ni nuamin chu ni milei vêng insa ro.

²⁴Irpâk le irsong mi chu ar hming hmusittu a ni; mi liana irbein irpâk takin sin a tho ngai.

²⁵Mi thaboi, sin zong nuam loi chu ama vai a irthat a ni.

²⁶Mi thaboi khan sîn misa tâkin a inu nuamhai ngaituana vaiin kêng zoro a inhek ngai, mi fel rêkin chu a pêka, inhroi loi takin a pêk ngai.

²⁷Rengpa'n mi siahai irbôlna thilpêk chu a hnôla, a bîkin lungrîl sual irputa an hong inhlana ni'n chu a hnôl ual ngai.

²⁸Inhriatpuitu dik loihai thu'nsîr chu tûte'n iam no nia, khannisianlân inhriatpuitu dikhai chong chu pom ni a ti.

²⁹Mi pualoihai chu a sa anga inlang hi an theitôk a nia, mi felhai rêk chu an lampui an rêl infel ngai.

³⁰Mihriam vârnahai, inhriatnahai le thiamnahai hi Rengpa doina a niin chu chanlamboi a ni.

³¹Sakor chu râl buala hmang hrangin le irsiam chian thei a ni ngai, Khannisian inhnêna chu Rengpa ta a ni.

Thuvârhai 22



Thuvâr sômthum lâkkhômhai

- ¹Irchongna nêkin irhming satna hi a sa ual, irhming satna hi inthang ro.
- ²Irchong le inriang an om senga, Rengpa isiam ru ruai an ni.
- ³Mi bengvârin chu siatna hong tung hrang a lei hmua, a lôi ngaia; inmôl rêkin chu ar chôm дума, a tuangna kai a ni ngai.
- ⁴Rengpa china le irngaiintômna neiin lân, hring sôtna, chôirsângna, irchongnahai dong ni ti.
- ⁵Ni hringna lung ni thungin chu mi siahai in-ôkna ngai châng ata irkêm ro.
- ⁶Nâipang chu a fena hrang lam irhoia khan irchûtirin lân, a hring sângin inthâ no ni.
- ⁷Inrianghai chu irchonghai suak an ni. Lâkai ni lâkin chu nin tângnapu suak ni ni.
- ⁸Dikloina chi tûtu'n chu siatna ât a ta, a ningmurna hnukirhâi chu hlosam a ti.
- ⁹Mi tikhoi chu satvurin a om ngai, a fâk hrang inrianghai a sem ngai sikin.
- ¹⁰Mi hmusit ngai kha hêkpaian lân, khanchu irngo irkhal irkiang a ti; a ni, irsualnahai, irsêlnahai boi a ti.
- ¹¹Lungrîl irthiang le lungkhamna chong thum nin hlutin chu rêng khom ni rual ni thei a ti.
- ¹²Rengpa mit khan inhriatna nei mi chu a vong insa ngaia, vârirletnahai thu chu a pai zit ngai.
- ¹³Mi thaboian in sînga a om chiana; "Pên tiang ki fe'n chu kâmkeibakneiin ni sê that a ti," a ti ngai.
- ¹⁴Nupang sual hmûr porche chu châng a ni; ama khan Rengpa ihnôlhai chu in-ôk an ti.
- ¹⁵Nupanghai lungrîla khan intona a kop ngita, khannisian irchutirna hnukirhâi sa khan siam insa a ti.



¹⁶Irchonghai lunghoi tuma thilpêk pêk le irchong hrang nuama inrianghai hnuaisia chu mâni irsamna vai tung a ti.

Chongbe le irchutirnahai

¹⁷Ni mikuar sungin lân, mi vârhai thu irngai roh.

¹⁸Ni lungrîl chu ar chutirnahai dongna'n hmang ro. Ni lungrîla ni vonga, ni bâia ni hmang sa theiin chu lôm ni ti.

¹⁹Ni iamna kha Rengpa chung a ni'rngat theina hrangin; atûn hin ni kuang nang ki insîr pe hrang a ni.

²⁰Nangma hrangin thuvâr sômthum ki irziak a ni. Inhriatna le irchutirna sahai a oma,

²¹thutak imo a ini nang irchutir a ti. Khanchu thutak hmu suak hranga itîrin ni omin, sâмна dik tak hong kîrpui thei ni ti.

-1-

²²Inriang chu an riang sikin rot pe no'n lân, roirêl hmuna milung indonghai chu nêpsiahai sa no ro.

²³An chungchâng chu Rengpa'n a ithop hrang a ni, anni roktuhai hringna chu in-ôk a ti.

-2-

²⁴Ningmur ol mi chu rualin siam no'n lân, mi nunsia chu irpôlpui no ro.

²⁵Anni omdân irchû ni ta, ni nunchan thûl thei loiin châng nang chang pe a ti.

-3-

²⁶Mi dang lâkai chung a mophurtu hrangin chonginkung no ro.

²⁷Ni thuan thei no'n chu ni zâlmun ten khom nang lapai pe an ti.

-4-

²⁸Pi le puhaiin ramri an lei ikhang kha phêt no ro.

-5-



²⁹Takirtâia sin sa sin mi nir hmutirin lân, mi narân nêka sa, rênghai rual irnghatpui thei mi chuk nang irhmutir ki ti.

Thuvârhai 23

-6-

¹Mi lian le khalâi nin otin, ni lungrîla tu mo a inih ti inhre mai ro.

²Nin thang ok khomin irkai viat ro.

³Fâk nêk tui tak nang a idohaia khan inruak no'n lân; nang huang a itum khom a ni thei.

-7-

⁴Irchong ringot tuma sôlhai hrangin vâ ro.

⁵Sum chu mitha irsiama vuangpat angin mit khapkârin vuangpat a ti; irmu vânlazôla vuang ngai anga hin.

-8-

⁶Mi tiksia khalâi do ot no'n lân; a fâk itui dohai irzuk no ro.

⁷“Tho hong ro, hong fa ro” a tiin, a lungrîl taka ti mah. A ngaitua lam ang takin kêng a nina chu a ini.

⁸Ni fâk kha inluak nôkpai ni ta, ni thu thumhai chu chanlamboi ni a ti.

-9-

⁹Intô inhriata chong omze nei hril tum no ro; ni thuvârhai kha inhlutna lam inhre no ni.

-10-

¹⁰Tianlai ramri milui kha phêt viat no'n lân, farahai ram irchupuihai no ro.

¹¹Rengpa chu anni sînghualtu hrâttak a nia, nangma doiin an chungchâng thop a ti.

-11-

¹²Irchutirna tiang ni lungrîl pêkin lân, ni mikuar kha inhriatna thu tiang sung ro.

-12-



¹³Nâipang sep indîn no ro. Irchutirna khianghrolin zêm khomin lân, thi no ni.

¹⁴Khianghrolin nir chutirin chu thina ata a hringna inzôk thei ni ti.

-13-

¹⁵Ki nâipa, ni vârin chu ki lungrîl lôm tak tak a ti.

¹⁶A ni, ni bâi ata vârna thu kin hriatin lôm ki ti.

-14-

¹⁷Ni lungrîlin mi sualhai irzuk no ri se; Rengpa chitna hi ni hringnun thupui tak ni ri se.

¹⁸Khanchu ni sônmaton ir-âng a ta, ni sabeina chu inboipaiin om no ni.

-15-

¹⁹Ki nâipa, irngaiin lân, vârin lân, ni hringna lampui ngaitua inthûk ro.

²⁰Zu indu mihai le fâk indu mihai irpôlpui no ro.

²¹Zû'nruai mihai le rôluakhai chu hong inriang tîr tîr an ti. Fâk le nêk zâl vai ni tho'n chu puanchet sil zôi zel ni ti.

-16-

²²Ni pa, nang neitu thu irngaiin lân; ni nu kha a hong tarin hmusit no roh.

²³Thutak chu irchôkin lân, thiamnahai le inhriat thiamnahai leh khan ircho roh.

²⁴Mi fel pa chu satakin a raifân a ta; nâipa vâr neitu chu lômna nei a ti.

²⁵Ni nu le ni pa chu inlômntirin lân, nang a neitu, ni nu chu raifân takin inomtir roh.

-17-

²⁶Ki nâipa, ni lungrîl ni pe'n lân, ki hringnun hi ni enton ni ri se.

²⁷Notizuar le nupang nghal chu thina châng ang an ni.

²⁸Hrâtlâksonghai angin nang an irdîp chiana; mi tamtak irthiang loina an inthâk ngai.

-18-



29-30 Tuhai mo chungrik ngai, tuhai mo beidong ngaia, tuhai mo ar khal ngai? Tuhai mo thubuai nei ngai, tuhai mo a bi om loia sâbe tuang ngai? Tuhai mo an mit cho khak ngai kha? Zû buala om mai ngaihai, zû induhai kha an ni.

31 Zu'n nang a inthêm hrang phal no ro, a sen rak khomin, ar fi liai khomin, a ni no le a phûl but but khomin en no ro.

32 A hnungkhôna chu mirûl angin nang inchuk a ti.

33 Ni mitin thil irkhêltakhai hmu ni ta, ni lungrîla ngaituana fel nei thei no chi ni, fel tak khomin chong thei no chi ni.

34 Tuikhanglian chung a zâl angin mani, irkuang puanzâr ngul sîpa om mani angin ni nih ti.

35 “An ni zêma, khannisian ite lak inhre ta ma ung. Itho mo ki ihar thei viat loi? La in nôk mai ki inang kêng” ti nih ti.

Thuvârhai 24

-19-

1 Mi siahai irzuk no'n lân, anni leh rual irchang tum no ro.

2 An lungrîla buaina siam vai an ngaitua ngaia; an bâiin mi ningthikna thu vai kêng an insîr ngai.

-20-

3 In chu vârna le inhriat thiamna lungphûma sin indet a ni.

4 Inhriatna omna kipa in sûng tentan tinhai chu thil hlu le enhoi takhai irvôtir a ni ngai.

-21-

5 Inhriatna nêkin vârna a sa uala; a ni, hrâtna nêkin khom inhriatna a poimo ual.

6 Ni doi mân satakin lei irsiamirfôk bakin lân, lungvâr nang phua an tam dôr inhnêna chu chang ni ti.

-22-



⁷Intôhai hrangin thuvâr chu an hril zita; thu poimo insîr irhlôm zoro'n ite ti hrang tum nei ngai mah.

-23-

⁸Thil saloi ni phan maiin chu mihaiin buaina siam ngaitu nang ti an ti.

⁹Intô ngaituana chu sual a ni. Mi hmusit chu mi ihnuaisia an ni ngai.

-24-

¹⁰Lunginzîng nikhua'n ni'rzal chitin chu ni irzal ta tak a ni.

-25-

¹¹Dikloi taka that hrang tâkhai chu inzôk lat ro.

¹²“Kei chu ite inhre ma ung” ni ti thei, Pathianin chu ni lungrîl tumna an hriata, a ivarh mai kêng. Nang a thîr chiana; nang an hriat zit. Ni sintho lam ang takin nang thuan nôk a ti.

-26-

¹³Ki nâipa, khuaihlutui in ro; a isa a ni. Ni mileia khuaitâr ata khuai a ithum angin,

¹⁴Vârna chu hringna hranga sa a nih ti inhren fel ni ti, vârna ni neiin chu ni sûnmaton ir-âng a ti.

-27-

¹⁵Mi siahai, mi fel in roka, a in la pe hranga khâr pe ngai mihai angin om no ro.

¹⁶Mi fel chu voi tamtak inrîl khom sianlân, a thoinôk mai ngai; mi siahai rêk chu siatna'n an irhmang ngai.

-28-

¹⁷Ni râlin siatna a tongin lôm no'n lân, an rîlin ni raiinfânin ir-iam no ro.

¹⁸khano'nchu Rengpa'n nang hmu a ta, lôm no nia, a chung a tôkholm an inlek itinin.

-29-

¹⁹Thil saloi sintuhai sikin ni beiindong no'n lân, annihai kha irzuk no roh.



²⁰Mi siahai chu sūnmaton tūng hrang nei mahaia, an meiser chu thatpai ni a ti.

-30-

²¹Ki nâipa, Rengpa chin lân, rêng kha mahrip tho ro. Anni doia irhel mihai chu irthoppui no ro;

²²Khaanga mihai chu irningloiin irhmangin om an ti. Pathianin a ni no le rêngin an chung a siatna an intung pe thei nin hriat mo?

Thuvâr danghai

²³Hihai khom hi mi vârhai thu'nsîr a ni: Roirêltu hrangin theibîk nei hi sa mah.

²⁴Mi pualoi thiam changtu chu, mi tinin hnôl an ta, khua sâl an ti.

²⁵Roirêltu, mi dikloi intuangtirtu rêk chu mi'n lôm an ta, irhming satna hlo a ti.

²⁶Dik taka sâmtu chu rual sa a ni.

²⁷Loimân nir fûktir diama, ni bingin irsinsiam thei ta ki tih ti nin hriat infel mâka chu dong tum no ro.

²⁸Asan dik tak inhre loiin ni tualbôm chungchâng thu'nhretu ni no'n lân, ni bâu khomin huang no ro.

²⁹Ki chung a itho angin a chung a tho ki ti! a tho dân ang takin lei tho rong!" ti no ro.

³⁰Mi thaboi laia ki fea, inhriatna nei loi mi irhuana ki chai vêla.

³¹Irrngai ta, ilhling kungin a sip zita, hloi vai a oma. A'rhuan dâihai khom a chim rem ruma.

³²Khahai kha ki ena, satakin ni ngaituaa, irchûna satak a nir hmu suaktira, ki pom ta.

³³ Ni nuamin chu insîng viatin lân, in viat ta,

³⁴ni in kârin inriangna khan inru angin nang chel a ta, irsamna'n sipai angin nang hong de thut a ti.



Thuvârhai 25

Solomona thuvâr omdân sa irchutirna

- ¹Hi mihai khom hi Solomona thuvâr, Juda rêng Hezekia roirêlna hmuna mihai irziak nôk chu a ni.
- ²Thil irthup hi Pathian roiinpuina a nia; rêng hai roiinpuina rêk chu thil zong suak hi a ni.
- ³Reng khan imo a ingaitua inhre thei viat no chi ni; a ngaituanahai chu irvân irsâng angin a'rsânga, tuikhanglian inthûk tak angin a inthûk a ni.
- ⁴Sumtaka irthokin a êk la paiin lân, an luan ngaitu'n thil satak inluentir thei a ti.
- ⁵Reng makunga irthokin lungvâr saloi phua ngai mi kha khai paiin lân, a rêng ram chu dikna'n indet ni a ti.
- ⁶Reng makunga ni ngîrin nang inpâk hrangin phut no'n lân, mi lian khomin irbe no ro.
- ⁷Ni toihmun kha mi lianhai inkenhai roh an iti nêkin chu, "Toihmun sa uala hin hong intoitirhai ro" nang an iti chu a sa ual.
- ⁸Thil ni mita ni ihmuhai kha roirêl hmuna fepui zôi zel no ro. Nakana inhriatpuitu dangin ni dik lina an langtir itinin, tho hrang lam inhre no chi ni.
- ⁹Ni urêng le thubuai nin neiin chu nin ruaiin insîr infel unglân, ite thu irthuphai inlangtir no ro.
- ¹⁰khano'nchu mi tinin thu irthuphai ip thei mak che ti inhria an ta, nir hming siatna chu boi ta no ni.
- ¹¹Tum dân fel tak insîrin lân, hi sumtak bêla rângachak ang hi a ni.
- ¹²Thu zôm nuamtu hrangin chu mi inhriatna irzat nei mi'n irningna chong a ipêk kha rângachak kut sabi le rângachak irthai nêkin khom a hlu ual.
- ¹³Palai iamom chu a tîrtu hrangin bu ât laia ivurtui dâiriam ang kha a ni. A tîrtu hringna an hartir ngai.



- ¹⁴Thilpêk hrang inkunga pe viat ngai loi mihai chu rua tholoi sôm le phâivua ang an ni.
- ¹⁵Tuangdiar taka ngêna hin sêlna ngar tak a khiak ngai. Chong irnêmin roirêltuhai lua an kûk ngai.
- ¹⁶Khopinter rakin khuaihlutui in no ro; khano'nchu ni ningsia a ta, inluak nôk zit ni ti.
- ¹⁷Ni urêng ina chai intam hrai no ro; nang hnôngin nang khôkmâkna a ti.
- ¹⁸Hnôlna dikloi chu hêmvuakhai, khandaihai le thal ngaihai anga thi theina a ni.
- ¹⁹Milung inzîng laia mi iamom loi tûng chu, ha inhnîng zit puma thil insoi le ke kiak puma fe ang kha a ni.
- ²⁰Mi beiindong kuanga hla sak chu rammual dâi nikhuaa sîna a puansil lâkpai pe le a sâbea chang-altui buak pe ang kha a ni.
- ²¹ Ni râl a phîng a châmin chu fa hrang pe'n lân; a tui an hrâlin chu tui in hrang pe ro.
- ²²Ama chu inzakin a hmâi inmôk pe ni ta, khanchu Rengpa'n lômman nang pe a ti.
- ²³Hmâr phâivua'n rua a zuang intung ngai ang takin, irdemna'n ningmurna an tungtir ngai.
- ²⁴Dôngma hrângsia leh in hoi taka om nêkin chu bokrop hnuaia om a sa ual.
- ²⁵Ram hlatak ata thurchi sa inhriat chu tui inhrâl dangchâr lai taka tui dâizan in ang kha a ni.
- ²⁶Mi fel, mi saloi makunga irpelût chu tuikuang milui tâk le tuihnâr innimtir ang kha a ni.
- ²⁷Khuaihlutui in intam a isaloi ang khan mâni roiinpuina hrang ringot zong hi sa mah.



²⁸Mâni lungrîl sep zoi theiloi mi chu khopui chim kulpui nei ta loi, râlin an rûnna hrang ir-ông chiana beiindong om tak ang kha a ni.

Thuvârhai 26

¹Fûra ivur tâk le bu ât zoroa rotho a irhmê loi angin, intô chôirsâng hi a irhmê loi a ni.

²A bi boiin chu khua nang sâlhài khan nang insiat thei no nihai. Va vuangpat a chumna indang loi ang kha a ni.

³Zêmna hrui chu sakor ta hrang a nia, hnôlna hrui chu sakuartung ta hrang a nia, khianghrol chu intohai ruang hrang a ni.

⁴Chong irdon chanlamboi ni sâmin chu ar dontu angin intô ni ni ti.

⁵Chong irdon chanlamboi chu chanlamboiin sâmin lân, khanchu ar dontu khan vâ a irti dôr chu vâ mah ti hong inhriat ni ti.

⁶Intô chong bêtu chu mâni ke tan ang kha a nia; buaina tong a ti.

⁷Ke'nbâihai ke a irtûl chian ngai angin thuvâr khom hi intô bâia chu a ni ngai.

⁸Intô inpâk chu saihlia saihlûm khitkhak ang kha a ni.

⁹Intô, thuvâr hmang chu zû'nruai a kuta ilhling lâk tum ang kha a ni.

¹⁰Intôhai le invêthai hruaitu chu thal kâp thiam mi inphop ngaitu ang kha a ni.

¹¹Intô, an tozia inlang ngai chu ui a miluak fâk nôk ngai ang kha a ni.

¹²Vâr lo loaia vâ irtitu nêkin chu intô lopzuaka om a sa.

¹³Itho mo mi thaboi kha pên tiang a isuak viat ngai loi? Imo a ichi? Kâmkeibaknei mani?

¹⁴Kopzaa inkhâr a irhêl mai ngai angin, mi thaboi khom a zâlmuna ar hêl mai ngai.

¹⁵Mi thaboi khan khalâi an pûr chiana; a bâia bu hong thun ten lua a ngîk ngai.



¹⁶Mi sari thil sût thiamhai nêkin khom mi thaboi chu ama irngaiin vâ ar ualin ar bê ngai.

¹⁷A va irrolna hrang ni viat loia mi irkhalnaa va chang chu lampuia fea ui hong lôn a mikuara chel ang kha a ni.

¹⁸⁻¹⁹“Mi, a tualbômhai huanga,” inhnunga chu invêt, thingthu hringhai, thalhai, thi theina hmangruahaia irdâi ang kha a ni.

²⁰Thing a hekin chu mei khom a thia; khaangin insîr irhlôm a om loina chu irngo irkhal a mong ngai.

²¹Meiholin chu mei ar altir ngaia, thingin chu mei an choktir ngai; khaang khan buaina siamtuhaiin chu irsualna an inpungtir mai ngai.

²²Mi nuiso zazat ngaitu chong chu a thuma, takpum sîngrîla a lût ngai.

²³Lungrîl suala hmûr thiam chu pil bêl sumtak nâl irtêktir ang kha a ni.

²⁴Vârirletin chu mi a hnôlna kha chongbâi thumin a thup ngai.

²⁵Thu sa okin inlang khomsian iam no ro, a lungrîl chu hnôlna sip a ni.

²⁶A hnôlna chu huangna'n thup thei khom sianlân, a siatna chu vântâng inhriata inlang la ni a ti.

²⁷Tukhom mi dang in-ôkna hrang châng kamhai chu anni in-ôk an ti.

²⁸Milaka mi denginthei nuamtuhai chu ni ihnôl hrang a ni. Chong iamom loiin chu siatna vai an tungtir ngai.

Thuvârhai 27

¹Nangtûka thil hong om hrang song no roh. Kha nikhua khan imo a hong itung hrang inhre mak che.

²Ni bi bingin irpâk loiin mi'n nang inpâk ri sehai; a ni, khual mi'n nang inpâk ri sehai.

³Lung le bâli hi a rik oka, khannisianlân, into'n mi a inbuai leh hin irkhi'n chu ite ni ma.



⁴Ningmur chu a nunrôngin a siata, khannisian hnarsâna le irkhi'n chu ite ni ma.

⁵Ni iuksak viat loi anga a ibe hrang nêkin chu inlanga halirchûna a sa ual.

⁶Rualin chu nang an natir le khom a sa. khan, nir doipuiin nang an kua'n chu irdîn ta ro.

⁷Mi khophai hrangin chu khuaihlutui khom ningsia a iom a ni, mi phîngchâm hrang rêkin chu thil khâ tinrêng khom a tui ngai.

⁸Mi, a in sâng ata suak chu vate ar bu ata suak ang kha a ni.

⁹Hriak mirimhoi le mirimhoi dang danghaiin ni lungrîl inlôm-tir an ta, buaina rêkin chu ni lungrîl dam riam inkhoi a ti.

¹⁰Nangma rual sahai le ni pa rual sahai irnghil viat no ro. Ni vânduaiin nang changpui hrangin ni'rzirpuitu hmun danga om ina fe no ro; ram hla vita om ni'rzirpuitu nêkin chu ni kôla ni tualbômhaiin nang san thei ual an ti.

¹¹Ki nâipa, vârin lân, khanchu ki raifân a ta; ni hrilsiat ngaituhai sâмна hrang nei ki ti.

¹²Mi vârin chu buaina hong tung hrang chu thengthaiin a tonga, intak a tongpui ngai.

¹³Tukhom khual mi lâkai chungga mophur hranga chonginkungtu chu ama neinun ngei khom bândaa intung pe zit inruk a ni.

¹⁴Zînga thoia satvurna chong hring taka a rual kaithoi chu khuasâlna anga bê thei a ni.

¹⁵Dôngma hrângsia chu ro chîng nia ro tho hmer hmer ang kha a ni.

¹⁶Khaanga nu kha itin mo ni indâihrektir thei hrang? Phâivua tho irngam tum le sahriak kut zaphaa infûn tum ang kha a ni.

¹⁷Thîr inngaihtirna hrangin thîr ngêt a inang ang dên hin, mihai khom mi dang ata an irchutir irhlôm ngai.



¹⁸Theipui kung donsuiin lân, a ra fa hrang nei ni ti. Suak khom a pu donsui chu chôiirsângin om a ti.

¹⁹Tuia mâni hmêl a inlang angin mihriam lungrîl chu mihriama an lang ngai.

²⁰Mihriam irzukna chu thânbâi ang kha a nia, ruktôk zel nei mah.

²¹Meiin rângachak le sumtak a fiaa; mihriam khom mihai inpâk dâna irthokin fia thei a ni.

²²Intô chu thi vâng vângin zêm khomin lân, an tona chu zêm inboi pe thei no chi ni.

²³Ni belrahai le ni mihriamhai theidôra enkolin donsui ro,

²⁴irchon chu kumkhua'n dâi hrang ni maka, rênglukhum khom hi suanpâr murdi tena hrang ni ma.

²⁵Hloisûl chu âtin lân, hloi tharhai chu mông nôk a ta, tânga hloisûlhai chu ât ro.

²⁶Ni belra mulhaia irthokin puanhai siam ni ta, ni kêlhai man leh khan loihmun irchô ni ti.

²⁷Nin fâk khop hrang kêl dûthai om a ti, nin in sêngkua fâk hrang, nin siahlo dôngmatehai enkolna hrang le.

Thuvârhai 28

¹Mi siahai chu tûte'n irzûl loiin laizâm an tho ngaia, mi felhai rêk chu kâmkeibaknei angin an hâi ngai.

²Ramin a tho'nsualin chu hruaitu an irthûl zut zut ngai. Hruaitu, inhriatna nei le inhriat thiamna nei an omin chu ram an ding insôt ngai.

³Irchamnei mi, inrianghai dengintheitir ngai chu chîmu tinrêng insiat irhmang zit ngai ro pheikôi hrât ang a ni.

⁴Dân ngaisak loihaiin chu mi siahai an inzôk ngaia; dân zômhai rêkin chu an indôp ngai.



- ⁵Mi saloihai khan dikna inhre thiam ngai mahaia, Rengpa chubai mûktuhai vaiin an inhriat thiam ngai.
- ⁶Irchong, omlam dik loia om nêkin chu inriang omlam dik taka om chu a sa ual.
- ⁷Ruatharte, dân zômту chu mi vâr a nia; tukhom nuamninga om ngaihai ruala siam chu a mualinphoina an tung pe ngai.
- ⁸A pung irzûl le a sum inpungtu chu, mi inriang inrentu hrangin a irtik pe a ni.
- ⁹Dân zôm nuam loi chu a chongchaina khom intirom a ni.
- ¹⁰Mi sa sual sin hranga lam dikloia hruai irhmangtu chu mâni châng kamna nâka khit a ti. Mi satirkiphai rêk chu lômman satak dong a ti.
- ¹¹Irchonghai chu vârin an irbe ngaia, khannisian inriang inhriatna inthûk nei rêkin chu a'rthît hlet ngai.
- ¹²Mi sahai ircham an hong neiin chu mi tinrêng an lôm ngaia, mi siahai an inlal rêkin chu mihai an irbîk khak ngai.
- ¹³An siatna irthuphai chu tuanitung ngai mahai. Ip loia inpuanga irlettuhai chu Pathian lungkhamna dong an ti.
- ¹⁴Rengpa thu zôm mai mi chu an râlvân a sa. a tukullian ngaitu chu irhmang a ti.
- ¹⁵Hruaitu siathai kuta chu inrianghai hi mi'nvâi tak tak an ni ngai; ama kha kâmkeibaknei inrung le savom inhuk irvâk rêi ruai anga ichiom a ni.
- ¹⁶Hruaitu, inhriatna nei loi chu hruaitu nunter ni a ti. Dik loina hnôltu chu inlal sôt a ti.
- ¹⁷Mi thisen chung a mophurtu chu ama thân an rang thei dôra a ichoi a ni. Tûte'n san no ri sehai.
- ¹⁸Dikin lân, sansuakin om ni ti. Ni dik no'n chu inrîl zôi ni ti.



¹⁹Takirtâi taka sintho mi khan fa hrang nei intam a ta, chanlamboia zoro'n hek ngai mihai chu inriang mai an ti.

²⁰Mi dikhai chu raifân le irngum takin hring an ta, irchong ringot tuma irhnothai chu tôkholmol faloiin suak no ni.

²¹Theibîk nei hi dik mah. Roirêltu senkhat chu a chînte thilpêk inrûk hmûna hrang sikin tho'nsual an ti.

²²Mi tiksiahaiin chu irchon an irzûla, an chung a irsamna a hong tung hrang inhre phâk ngai mahai.

²³Bâi ringota mi'npâk ngaitu nêkin chu mi ngotu chu inhnunga inpâk a hlo tam ual ngai.

²⁴Tukhom a nu mani a pa mani, neinun inrua, "Ite a siatna om ma, tihtu chu inru leh a danglamna om mah.

²⁵Huatirham khan buaina vai an kêlsua ngaia; Rengpa iamna irnghattu chu satvurin om a ti.

²⁶Mâni irngaidân vai zuitu chu intô a nia; mi vârhai irchutirna zuitu rêk chu zôk riamin om a ti.

²⁷Inrianghai changpuitu chu irsam viat no nia. Inrianghai tianga mit insîng petu rêk chu mi tin khuasâl tong a ti.

²⁸Mi siahai an inlalin chu mihai an irbîk ngai. An inrîl tena chu mi felhai an inlal nôk ngai.

Thuvârhai 29

¹Mi'n an hril intam dôr a tukullian chu voikhat rengin lan rîl a ta, thoi nôk thei viat ta no ni.

²Hruaitu fel an omin chu mihai an lôm ngaia, hruaitu sia omna rêk chu mihai chap inrugin an om ngai.

³Vârna irngaiinhlu chu a pa inlôm-tir a ti. Notizuar chung a poisa hmang inhek chu inriang a ti.



- ⁴Dik takin rêngin roi a rêlin chu ram an ding indet ngaia, fâk inrûk a lâkin chu ram a siat ngai.
- ⁵A rualhai inpâk pai pai tum chu ama in-ôkna hranga châng kam a ni.
- ⁶Mi felhai zalên le raifân taka om laiin mi saloihai chu an siatna ngeia an irpal ngai.
- ⁷Mi fel khan inrianghai chungchâng thu an hriatpuia, mi siahai rêkin chu kha thilhai inhriat thiamna nei ngai mahai.
- ⁸Mi dang mahripna nei loi mihaiin chu khopui an inbui chit ngaia, mi vârhai rêkin chu ningmurna an irkiangtir ngai.
- ⁹Mi vârin intô ar khalpuiin chu intô kha an nuia, a mi êsêl an satir ual ngaia; irngeina rêng rêng om thei ngai mah.
- ¹⁰Thisen insuaa inhrâl mihai khan mi dikhai an hnôl ngaia, mi felhai rêkin chu mi dikhai hringna an inpâk ngai.
- ¹¹Into'n chu a ningmur an lang suaktir ngaia, mi vârhai rêkin chu an milung an suai zâma, an dâihrek ngai.
- ¹²Ram hruaitu'n milak thu a'rngaiinna'n chu a sinthotuhai murdi an sual ngai.
- ¹³Inriang le mi hnuaisiatu irangna tak chu, Rengpa'n an mit a invâr pe ru ruai a ni.
- ¹⁴Inrianghai dik taka roirêl petu rêng chu kumkhua'n inlal a ti.
- ¹⁵Sepna le irchutirna hi nâipanghai hrangin a sa. Ama nuamlamin a omin chu a nu inzak irhmutir a ti.
- ¹⁶Mi siahai an inlalin chu siatna a pung ngai. Mi fel rêkin chu khaang khan mihai inrîlna kha hmu a ti.
- ¹⁷Ni nâipa sepin lân, lungirngamna nang pe a ti. a ni, ni lungrîl lômna intung pe a ti.



¹⁸Lei hmu bakna a om no'n chu, mihai an irhmang ngaia, dân vong insatu rêk chu raiinfân a ti.

¹⁹Suak chu chongbâi vaia sep thei ni mah. Inhre khom sianlân ngaisak no ni.

²⁰Mi ngaitua loia chong sêt suat ngai nêkin chu intokhak chu sabei hrang a om ual.

²¹A nâipangtea irthokin ni suak kha nin dotin chu a hnungkhôna chu nir chon khom nang la'rchûpui a ti.

²²Ninginmur zel zel ngai mihaiin irkhalna le buaina tamtak an kêlsua ngai.

²³Mi a lâirpâkna irhniamna ata, mi lungrîl irngaiintôm rêk chu chôirsângin om a ti.

²⁴Inru irthoppuitu chu ama hringna a ihnôl a ni. Roirêlna hmuna thudik an sîrin chu izêm tong a ta, thudik an sîr no'n chu Pathianin khua sâl a ti.

²⁵Mi dang irngaidân uksak hrai hi ichi a oma, Rengpa irngat rêk chu zôk a ti.

²⁶Mi tamtakin roirêltuhai ngaipoimo dongna an zong ngaia, mihriam chung a roirêlna dik chu Rengpa kuang ata suak a ni.

²⁷Mi siahai chu mi felhai hrangin intirom an nia, mi felhai khom mi siahai hrangin intirom an ni.

Thuvârhai 30

Agura thuvâr

¹Jakea nâipa Agura chongchai: Thuvâr chu “Pathian ki kuang om ta ma, Pathian ki kuang om ta ma, Pathian ki kuang om ta ma, changpui innang ki ni”.

²A mihriam laia sa ang kha ki nia; mihriamin inhriat thiamna aninei hi nei ma ung.

³Vârna lei irchû ma unga, Pathian inhriatna khom ite nei ma ung.



⁴Tu mo irvâna luia zuang chum nôk tâk? Tu mo a kuta phâivua chel thei? Tu mo puan hlektea tui infûn thei? Tu mo kôlkung murdi indettir? Tu mo a ini? Tu mo a nâipa kha nin hriat mo?

⁵Rengpa thu chu thudik a nih ti fia a ni tâk. ama zongtu murdihai hrangin ama chu pho a ni.

⁶A chonghai chu bôk sa no ro, khano'nchu nang hal a ta, milak ni itho inlang a ti.

Thuvâr danghai

⁷O Pathian, thil inhni nang ki ngên, ki thi mân nin neitir ngêt ro:

⁸milaknaa irthokin ni sînghualin lân, irchongna mani inriangna mani ni pe no ro. Ki rukbakin fâk ni pe roh.

⁹khano'nchu ki nei hraiin nang ki phil itinin. A ninole kin riang hrai khomin mi ta kin rûkin ki Pathian mualphoi ki sak itinin.

¹⁰Suak kha a pu makunga dem no roh. Khua nang sâl a ta, ni tuang itinin.

¹¹Mi senkhat an pahai khua sâla an nuhai ngaisak loi an om.

¹²Mi senkhat anni irngaiin irthiang an irtia, an porinche thei dôra porinche an om.

¹³Mi senkhat anni irngaia sa oka irbe an oma, o, i dôra sa'n mo an irbe tâkna!

¹⁴Mi senkhat chu an hahai khandai ang le an haphoihai chemte anga ngaih an oma; irnêng ata inrianghai le mihriam lai ata irsamhai invol irhmang hrangin.

¹⁵“Ni pe ro, ni pe ro” tia khêk nâinupang tuirivot nei a oma. Thil minli ‘khop tik’ zel nei loi an om:

¹⁶thân bâi inruak nupang ching, tui hmu loi irnêng châr le, mei chok vung vung an ni.

¹⁷A pa hmusittu le a nu êrotu mit chu phâi vaâkin kêlsua an ta, raikosohaiin fa an ti.

¹⁸Ki inhriat thei loi thil minli an om:



- ¹⁹Vânlaizôla irmupui lampui, lungpherpha chung a mirûl lampui, tuikhangliana irkuang lampui le pasal le nupang lungirthung lampuihai.
- ²⁰Khaang khan a ni, nupang uire ngai lampui khom kha: a fâka, a hmûr a hui vinga, “Thil sual ite tho ma ung,” a ti ngai.
- ²¹Thil minli irnêng khomin a ituang zoi thei loi a om:
- ²²suak kha rêng a hong niin, into a hong irchongin,
- ²³nupang nunsia pasal a hong neiin le suak nupang a pi hmun a hong thûlin.
- ²⁴Thilhiring chînte te minli irnêng chung a hin an oma, khannisianlân, vâ ta taka vâ an ni:
- ²⁵Siknghîrhai hi hrât loi tak an nia, khannisian an fâk hrang kholum lain an bûm zit ngai.
- ²⁶Mizupuihai khom hi hrât loi tak an nia, khannisian lungpuihaia an omna an siam ngai.
- ²⁷Khâihai hin rêng nei mahaia, khannisian a hlopin an fe ngai.
- ²⁸Innghâktehai hi kutpâra chel rip thei an nia, khannisian rêng ina an om ngai.
- ²⁹Thil minli an lôn dân le an omdâna roiinpui enhoi an om:
- ³⁰kâmkeibaknei, ramsa laia a hrât tak le ite'n laizâm an inthotir thei loi;
- ³¹Kêlchal, ui sathei le rênghai an mipuihai makunga lôn hi a ni.
- ³²Intô taka ni lei irpâk tâk mani, a ninole thil saloi ni lei ngaitua tâk mani a ni'n chu ni bâi hîpin lân, dâihrek roh.
- ³³Dût in-ôtin makhon an changtira, hnârdôn irchûmin hnâr thi a insua ngai ang khan, ningmur insuaktirin chu irsualna an suaktir ngai.

Thuvârhai 31

Reng kuanga irchutirna

- ¹Reng Lemuela kuang a nu irchutirna chong, thuvârhai kha an ni:
- ²ki nâipa, o ki rîla ra, ki chonginkung nâi, irngai ro.



³Ni hrâtna hi nupang kuang pe no'n lân; ni hringna khom rêng insiat ngaituhai kuang pe no ro.

⁴O Lemuel, irngai roh. Rengin zu a in hrang ni ma.

⁵An inin chu dân irnghil an ta, dengtheihai chung roirêlna dik hmang thei no ni.

⁶Zu chu mi beiindonghai le a'rh mang chianhai hrang a ni.

⁷In sianlân, an inriangna le an beidongna irnghil ri se.

⁸"Mi, mâni ta hranga hmûrbâi nei thei loihai hrangin chongin lân, changpui innanghai chungchâng thuhaia khan.

⁹An ta hrangin chongin lân, fel takin roirêl ro. Inriang le irsamhai chung dik takin roirêl roh.

Dôngma fel

¹⁰Nupang fel tu mo hmu thei hrang? Lunghlu tamtak nêk khomin a hlu ual.

¹¹A pasal lungrîl khan a iam zoia, irsamna rêng rêng nei no ni.

¹²A hring sêngin a pasal hrangin siatna tiang ni loiin satna tiang inzen sin a tho pe ngai.

¹³Samul le pathai a zonga, irthafân takin a kutin a sin ngai.

¹⁴Bepâr mi irkuang ang kha a nia, ram hlatak ata fâkrua a hong chôi ngai.

¹⁵Âr a khuangin a thoia, a in sêng mihai hrang bu anh a thoa; a siahlo nupanghai kuang an sin hrang a hril ngai.

¹⁶Loimân hrang a ngaituaa, ar chôka; khanchu a kut ngeia a sum insuaka khan grep irhuan a siam ngai.

¹⁷Takirtâi takin sin a thoa, a kuthai an hrâttir ngai.

¹⁸Ama thilsiamhai hlutzia an hriata, zân insang ra rakin sin a tho ngai.

¹⁹A kutin pathai a khera, puanhai a không ngai.

²⁰Inrianghai tiang a tik an hoitira, a ni, changpui innanghai tiang a kut an zar ngai.



- ²¹A in mihai murdi puan lum an siltirhai ngai.
- ²²Puantha irkhu enhoi tak a siama, a silkai chu patzâi irhmi le puan senduk a ni.
- ²³a pasal chu mipui kêra ram dang ulianhai leh an toi lai khomin mi imahrip tak a ni ngai.
- ²⁴Puan sahaiin silkai le kongkhithai a siama, bepâr mihai kuang a zuar ngai.
- ²⁵A silkai chu hrâtna le roiinpuina a nia, sônmaton tiang la hong tung hrang khom chi ngai ma.
- ²⁶Lungrîl ir-ial takin vârna'n a chong suak ngai.
- ²⁷An in sâng lêng dân en a hoia, ar tha rêng rêng inboi ngai ma.
- ²⁸A nâihaiin an irngaiinnatzia an inlangtira, a pasal khomin an pâk ngai.
- ²⁹“Nupang tamtak dôngma sa an oma, khannisian nangma dôra sa chu om mah,” a ti ngai.
- ³⁰Inditomna hi huangna a nia, hmêl satna khom hi chanlamboi a ni; Rengpa chitu nupang rêk chu inpâkin om a ti.
- ³¹A kut sin ra chu pe'n lân, a sintho sika khan mi tin tinin inpâk ri sehai.



Thuhriltu

Thuhriltu 1

Hring hi chanlamboi a ni

- ¹Hihai hi Davida nâipa, Jerusalema rêng thuhriltu thuhrihai chu a ni.
- ²Chanlamboi, chanlamboi, thil tinrêng hi chanlamboi inzen a ni, thuhripu'n a ti.
- ³Sintho hranga hringnun hmanga hin imo an lâpna ni hmu?
- ⁴Irlo khat chu a liama, irlo dang a hong om nôka, khannisian rammual hi chu a om balamin kumtuangin a oma.
- ⁵Misa khom hi a suaka, a tâk nôka, a suakna hmun ngêta suak nôk hrangin a kîr nôka.
- ⁶Phâivua khom sim tiang a hrânga, hmâr tiang irvêlin a hong hrâng nôka, a'rvêl a'rvêla, khan, a fena pangaia a kîr nôk ngai.
- ⁷Tuidung murdihai khom chu tuipuia an luang lûta, khannisian tuipui chu sip ual hliak maka, tuidunghai chu an luangna dêna khan an luang maia.
- ⁸Thil tinrêng hi hril thei bana sôlna vai kêng a ini, mit hin a thil hmua hin ruk pe maka, mikuar khom hi inhriatnaa hin sip tik nei ngai no ni.
- ⁹Thil lei om tâk kha, thil la hong om hrang chu a nia, thil thoa om tâk kha, thil thoa la om hrang chu a nia, misa hnuaiia hin thil thar ti rêng rêng hi om mah.
- ¹⁰Mi'n, "En ta, hi hi thil thar chu a ni," an iti thei hrang ngân mo a oma? Ei suak mân khan khahai kha chu a lei om sai vîng kha a lei ni tâka.
- ¹¹Atûn lai thil hi tûte'n inhre mahaia. Nakana khom atûn lai thil hi inhre no nihai.

Thuhriltu thil tonghai

- ¹²Kei, thuhripu hi Jerusalema Israelhai rêng ki lei ni tâka.



¹³Khan, vâh hnuaiia thil thoa lei om tâk murdi chu vârnaa zong suak hrangin ki milung ki lei hmang tâka; Pathianin mihriam nâihai kuanga buaipui hranga a ipêk hi sin intak tak a ni.

¹⁴Misa hnuaiia sin thoa lei om tâk murdi chu ki lei hmu tâka; khanchu irngai ta, thil murdi chu chanlamboi le a korong irzûl ang chu a ni.

¹⁵A lei kôi sai tâk chu intûn thei ni ta maka, khan a om loi chu tep thei ni ta ma.

¹⁶ “Keima mâna Jerusalema roi lei rêltuhai nêkin kei chu ki vâh uala, ki milung khomin vârna le inhriatna a nei intam a ni,” ki’rtia.

¹⁷Khan, inhriatna le intona, vârna le invêtna danglamnahai khom chu inhriat ki lei tuma, khannisian hi khom hi chanlamboi chian a nih ti kin hriat tâka.

¹⁸Vârna tamtak a omin buaina a tama, inhriatna a pung le chardongna khom a pung ngai a ni.

Thuhriltu 2

¹Khan ki lungrîlin nunkhonhoia om hi lei hmang rong ki tia, a hoi ngân mo ki tia, khannisian hi khom hi chanlamboi dên a nih ti ki hmusuak tâka.

²Innuina khom hi intona a nih ti ki hmusuaka, lômna khom hi ite a satna om mah.

³Ki lungrîl taksa chu uain leh raifân taka dam sûng sôtnote hmang hrangin ki tuma, khannisian ki milungin vârna chu a zongin, ki ngaidânin kha kha mihaiin irnêng an ihmang lam hranga satak angin ki bêa.

⁴ Sin roiinpui tak ki thoa, inhai ki sina, grep irhuanhai ki thoa.

⁵Irhuanhai le lêngna hmunhai ki siama, khataka khan theikung chi tinrêng ki phuna.

⁶Ki thing phunhai buakna hrangin dîlhai ki choia.

⁷ Siahlopahai, siahlonuhai ki’rchôka, khabana ki ina irzir suakhai khom ki nei saa; keima mâna Jerusalema lei om murdihai nêk khomin belra pâlhai le se pâlhai khom ki nei uala.



⁸Rângachak le tangka le rênghai irchon le ram sa bîkhai ki bukkhôma. Pasal hlasakpu le nupang hlasaktuhai, pasal nâihai irzuk, meithâi khom tamtak ki neia.

⁹ Khasikin, ki roiinpuia, keima mâna Jerusalema om murdihai nêk khan ki roiinpui uala; ki vârna khomin ni maka.

¹⁰Khan, ki mit irzuk murdihai, kha thilhai ata kha inthâ ma unga, raifâna chi tinrêng ata ki milung chu insumtir viat sa ngai ma unga, ki sin thôna murdia khan ki milung chu a sân a rai a fâna; kha kha ki sin sôlnahai rengata lômman a ni.

¹¹Khan, ki kutin sin a lei itho murdihai chu ki ena, kha thilhai thoa ki lei isôlnahai kha, irngai ta, khahai murdi kha chanlamboi le, milung sôlna vai a lei nia, misa hnuaiia hin ite inlâpna rêng om ma.

¹²Khanchu rêng khom hin matona rênghaiin an lei ithohai bana khan chu ite tho thei hi om ual maka, khasikin vâra om mani, intoa om mani, invêta om mani khom hi imo a inih ti ki ngaitua nôka.

¹³Khanchu, vâ hi inthim nêkin a sa ual angin, into nêkin vâ a sa ual tih kin hriat tâka.

¹⁴Mi vârin chu a fena hrang an hriata, mi into'n chu inhre ma, khannisian mi'ntohai le mi vârhai mongna chu hmunkhat a ni.

¹⁵Khan ki milungin, "Mi'ntô chung a thil tung ang dênin ki chung a khom hin a la itung hrang a nia, khasikin i sika mo ki lei ivâr bîk ki'rtia. Khan ki bingin ki lungrîl khom hin ite ni mah ki tia.

¹⁶Mi vâ le mi'nto khom chu mihaiin mi vâ khom kha inhre mai ta no nihaia, into khom kha inhre mai ual ta no nihai, mihaiin an sintho murdi chu irnghil ta an ta. Khasikin, mi vâ le into khom hmunkhat an ni.

¹⁷Khasikin keima ta hrangin chu hringnun hi ite ni loia lunginzîngna vai a ni, khasikin thil tinrêng hi chanlamboi a lei nia.



¹⁸Khan, ki hnunga mi la hong om hranghai kuang ki imâksan hrang a nih ti ki hmu sikin, misa hnuaia dengthei taka ki sintho murdihai hi ki ikhômâmâk a ni.

¹⁹Ama chu mi vâ manî, into manî ti tu'n mo inhre thei hrang? Khannisian hi rammuala ki vârna hmanga ki lei itho, thil tinrêng chu ama'n a la hong ichang hrang a nia, khasikin chanlamboi ving a ni.

²⁰Khanchu, ki thîrvêla misa hnuaia ki sintho sikin a sân ki lungrîl a bei a dong tâka.

²¹Mi, vârna le inhriatna le theithiamnahai murdi leh sin a lei thoa, mi sintho viat loi kuanga ar chon hrangin a imâk pe hrang a ni. Hi khom hi chanlamboi le thil saloi tak a ni.

²²Misa hnuaia ni sin thôna murdia hin le hi hringnuna ni dengtheina murdia hin i tak mo ni hmua?

²³Ni hring sûnga ni sintho murdihai kha tuangna vai a nia, a sin thôna chu lungkângna vai kêng a ni. A ni, zâna khom a milung chu irngam ual hliak maka, hi khom hi chanlamboi chian a ni.

²⁴Mihriam ta hranga satak chu fâk le nêka raifân taka a ihmang hi a ni. Khannisian hi khom hi Pathian ata a nih ti kin hriat suaka.

²⁵Ama boiin tu'n mo fa theiin, raifâna hmu thei a ta?

²⁶Ama lunginchuktu kuanga Pathian vârna, inhriatna chu a pêk ngaia. Khannisian mi sualhai chu Pathian lungdo sintuhai ta hrangin irchon an buk khômতিরhai ngai. Hi khom hi chanlamboi chian a nia, thil korongboi chian a ni.

Thuhriltu 3

Thil tinrêng zoro

¹Thil tinrêng ta hrangin zoro a oma, vâ hnuaia thil tinrêng ta hrangin zoro irfûk a om.

²Irzir zoro a oma, thi zoro a oma; phun zoro a oma, phôi zoro a om;

³that zoro a oma, indam zoro a oma; set zoro a oma, siam zoro a om,



- ⁴chap zoro a oma, innui zoro a oma, sînna zoro a oma, lâm zoro a om.
- ⁵Irdit zoro a oma, irhmumâk zoro a oma, irpom zoro a oma, irpomloi zoro a om.
- ⁶Hmu zoro a oma, irhmang zoro a oma, hrê zoro a oma, pai zoro a om.
- ⁷Kaithêr zoro a oma, insui zoro a oma, dâihrek zoro a oma, chong zoro a om.
- ⁸Lungirkham zoro a oma, irtheimâk zoro a oma, irdoi zoro a oma, irngei zoro a om.
- ⁹Sinthotu hin a sinsôlna ata hi imo inlâpna a hmu?
- ¹⁰Pathianin ei chungâ hin puakrik a'rngat ti hi kin hriata.
- ¹¹Thil tinrêng hi an zoro senga satakin a siama; mihriamhai milunga khom a siaa; khannisian Pathian, a phut ata a mong dêna a sinthohai chu inhre thei mahaia.
- ¹²Mihriam ta hrangin an hring sînga raifân taka oma, sin sa tho bana sa hi chu om mah ti kin hriat tâka.
- ¹³Khanchu, mi tinin fâk le nêka an sin sôlna murdihai lômtaka an iom chu Pathian thilpêk a ni.
- ¹⁴Pathian sintho murdihai hi kumkhontuangin om a tih ti kin hriata, khataka khan nangin ite bôk sa thei no chi nia, khatak ata kha ite lâka sen thei khom ni no ni, mihriamin ama an chi theina hranga Pathianin khang khan a itho a ni.
- ¹⁵Thil omhai hi a lei om ta sai a nia, thil la hong om hranghai hi a lei om sai tâk kha a ni. Pathian chu a lei irhmang sai tâkhai kha a hong lâkkîr nôk thiai a ni

Rammuala thiarthâkna tamzia

- ¹⁶Khabana misa hnuaia hin roirêl felna le dikna omna hrang hmuna, pualoina chu ki hmu saa.



¹⁷Khan, ki milungin, “Pathianin mi felhai le mi pualoihai chung a roi la rêl a ti, sin tinrêng ta hrang le sintho tinrêng ta hrang khomin zoro bi seng a om sikin,” ki tia.

¹⁸Khan, ki milung dênin, “Mihriamhai chungthua khom, ramsa ang an nih ti an inhriat theina hrangin Pathianin anni chu a ifia a ni,” ki tia.

¹⁹Mihriamin a itong hrang le ramsahaiin an itong hrang hi hmunkhat a nia, an ruaiin kha thil khan a nghâkhaia; inkhat a ithi ang dênin, inkhat khom chu thi a ti. Phûksân hmunkhat nei seng an nia, mihriamin ramsahai chung a inchung ualna nei maka, an ruaia ta hrangin hringnun hi chanlamboi a ni sikin.

²⁰An rêngin hmunkhata an fea, an rêngin vâiphina mi an nia, an rêngin vâiphin an chang nôk vinga.

²¹Tu’n mo mihriamhai irtha chu chung tiang a fea, ramsahai irtha chu hnuai tiang a fe ti inhriat infel?

²²Khasikin, mi’n a sin thônahaia a rai a infân nêka sa hi ite dang om mah ti kin hriat tâka, khabana khan chu ite a itho thei om ma, ama hnunga thil la hong om hranghai chu en hrangin tu’n mo ama chu hong hruai kêr thei a ta?

Thuhriltu 4

¹Khanchu, ki hei thîra, misa hnuaia dengtheina murdi chu ki hmua; khanchu irngai ta, dengtheia omhai mitrithi khom chu ki hmu saa; lungngam saktu hrang rêng rêng nei mahaia. Dengintheitirtuhai tiang khan sinthotheina chu a om sikin, anni chu tukhomin changpui mahaia.

²Khasikin, mi hring la damhai nêkin lei thi tâkhai hi a hoi pehai ual hrangin ki bêa.

³Khannisian khahai nêka vânsa ual chu, la irzir loihai, rammuala pualoina la hmu viat loihai hi an ni.



⁴Khanchu, itho sika mihai hin hlochukna hrangin a sâna sin an itho; hi khom hi tualbômhai hnarsâna sika a nih ti kin hriat tâka; khannisian hi khom hi chanlamboi le a korong a ni.

⁵Mi senkhatin, “Mi’nvêtin chu a kut a thepa, ama taksa chu a fâka,” an tia.

⁶A dik khom a ni theia, khannisian itiklai khom lêt raraka kut inhni insêp le chanlamboi irzûl mai nêkin chu, lungchuk taka a tômte nei chu a sa ual.

⁷Khanchu, ki thîr nôka, misa hnuaia hin chanlamboi chu ki hmu nôka.

⁸Mi inkhat a bing doka om hi a oma, nâi le te khom nei maka, urêng khom nei sa maka, khannisian sin tho maiin a oma, irchon a ineia khan a mit irzukna chu hek thei maka; khante tu ta hrangin mo kha dôra sôla, nunkhonhoina tinrêng a inchân? Hi khom hi chanlamboi a nia, dengthei taka hringnun hmang hi a ni.

⁹Mi inkhat nêkin inhni chu a sa ual, sin an tho suam theina sikin.

¹⁰Inkhat a’rtet khomin, inkhat khan a rual chu kaithoi a ta; a bing doka om mi kha chu a chung a rik, a’rtet khomin kaithoitu hrang a nei no sikin.

¹¹Khabana, a dâi khomin, mi inhni an zâl suama ni’n chu lum takin an om theia, khannisian mi inkhat chu a bingin itin mo lum thei a ta?

¹²Mi inkhat chu inhnê khomin a om thei, khannisian mi inhniin chu an irsansuak thei. Hrui inthum a inhrual chu oltenga irtantir thei ni ma.

¹³⁻¹⁴Mi inriangtak khom a rama rêng a chang theia, intângna in ata rêngtoihmuna khom a kâi lik thei, khannisian a tar hnunga lungvârsaknahai pomna châng khom inhre loia an toa ni’n chu, ama chu ruatharte inriang vârna nei nêka a sa ualna ite om hliak ual mah.

¹⁵Hi rammuala mi murdihai chungchâng thu hi ki ngaituaa, khanchu an laia kho hmuna mani chu ruatharte inkhat hi rêng irthûla toi hrang hi a om ti kin hriat suak tâka.



¹⁶Rêngin roirêlna sînga mi om zât hrang chu tenthei ni ngai maka; khan ama chu a fe tika, a sinthohai sikin tukhom raifân om ual no nihai. Hi khom hi chanlamboi, a korong irzûl ang chu a ni.

Thuhriltu 5

Chonginkung saloi lam

¹Pathian ina ni fe laiin a sîn irdîn ro, mi'ntohai irbôlna nêkin chu irchû hranga va fe hi a sa ual: anni chu thil saloi an tho ti inhre mahai.

²Ni hril mânin ngaitua bak ro, irhnotpasotin Pathian kuang chonginkung no ro; ama chu irvâna om a nia. Nangma chu irnênga om ni ni sikin, khasikin ni hril hrang ban chu hril viat no roh.

³Ni char nin dong dôr, irmang saloi ni nei intam dôr, ni chong intam dôr, chong insual ni nei intam dôr.

⁴Khasikin, Pathian kuang thu nin kunga ni'n chu, inrang takin sua tum ro; mi invêt chu lômna rêng rêng nei ngai ma, ni chonginkung chu irkiptir lat roh.

⁵Chonginkungna neia sua loi nêkin chu, inkungna nei loi lolo hi ni ta hrangin a sa ual.

⁶Ni bâiin suala nang hruai inlût no sianlân, Pathian ochai kuang, “Ki ihril kha, kha lua kha ki ihrilna ni mah kha te,” ti no roh. Itho mo Pathian chu a ninginmurtirin, ni sintho murdi chu inboipaitir ni ta?

⁷Irmang tamtak phan le thu tamtakhai hril khom hi chanlamboi dên a nia, khasikin nangin chu Pathian chu chi roh.

Mihriam hringna hi chanlamboi a nizia

⁸Inrianghai chu sorkârin dengintheitirhaiin felna le dikna chu an chung a tho pehai loia an iom ni hmu khomin, ni charindong no roh. Ram hruaitu murdihai chu anni nêka irsâng ualhaiin an en zuihai maia, khan anni nêka irsâng ualhai khom chu an la oma.

⁹Khan, irnêng inpâkna kha mi murdi hrang a nia, rêng khom chu loimâna irngat a ni.



¹⁰Tangka sum irngaiinnattu'n chu a milung chuk no nia, irchong irngaiinnattu khomin a milung chuk ual no ni: hi khom hi chanlamboi dên a ni.

¹¹Ni'rchonga ni'n chu fâk hrang mi an tama, a neitu ta hrangin a mithai leh a hmu ti bana chu imo a'rfêna a oma?

¹²Sinthotu chu a fâk intôm khomin, a fâk intam khomin a inmu ar dêna, khannisian irchong chu ar chongna khan in intir thei no ni.

¹³Misa hnuaia hin thil saloi tak ki hmua; kha kha mi'n irchon a binga dengtheina hrang ngota ainei hi a ni.

¹⁴Kha irchonhai kha vânduai nikhuahai a hong tunga, an hek vinga; khanchu nâipasal a hong neia, khannisian a ta hrangin a kuta ite ma pe hrang om ta maka.

¹⁵ A nu phîng sâng ata a zuang isuak ang khan, korong ngêtin a fe nôk tâka; a sin sôlna ra khom chu a kuta a ichôi thei ite om mah.

¹⁶Khan hi khom hi thil saloi tak chu a ni, mihriam chu a zuang isuak lam ang takin, a kîr nôka, a korongboi ta hrang ngota lei sôl a ni sikin imo an lâpna?

¹⁷A dam sâng murdia khan inthim hnuaia a fâka, lungni loi takin, natna tuang le ningmur takin a oma.

¹⁸Irngai ta, mihriamhai ta hranga satak ki ihmu chu, Pathianin an hring sâng sôtnote a ipêk sînga an sintho suakhai fâk le nêka, nunkhonhoi taka an ihmang hi a ni; kha kha mihriamhai tong hranga om chu a ni.

¹⁹Khan, Pathianin mi tin irchongna le neinungna a pêka, a sinsôlnaa khan raifâna khom a pêk saa, hi hi Pathian ata thilpêk chu a ni.

²⁰Khan, Pathianin lôm taka om hrang a phal pe sikin, a hringnun bongzia ngaitua'n a charindong ta no ni.

Thuhriltu 6

¹Misa hnuaia thil saloi tak ki ihmu a oma, mihriam hranga rik tak a ni:



²Pathianin mi irchon le neinunghai le mahripomnahai a pêka, a milunga a irzuk murdi chu irsam rêng rêng nei maka; khannisian Pathianin ama chu khahai kha a fâk hrang phal pe maka, khannisian mikhual chu hongin a fâkpai pe tâka. Hi khom hi chanlamboi a ni.

³Mi'n nâi irzakhat neiin, kum tamtak hring sianlân, khannisian a milung chu thil sahain inlôm-tir thei loiin, sa ving khomin thânmual a liam thei noa ni'n chu, kha mi nêk khan nâite a thi saia suak chu a sa ual keiin chu ki iti a ni.

⁴Kha nâite kha a'rfêna boiin a zuang suaka, inthima ar hmangpui tâka.

⁵Misa chu hmu loiin, ite inhre no khom sianlân, kha mi nêk khan chu irngamna hoi ual chu a ihmu a ni.

⁶A ni, kum sâng-hni hring khom sianlân, hringnun hi hoi taka a hmang thei noa ni'n chu, mi murdi chu hmunkhata an ife ving mo ni mah?

⁷Mihriam sin sôlna murdi chu a bâi ta hrang a nia, khannisian a phîngchâmna chu itiklai khom inkhoptirin om ngai ma.

⁸Mi vârin mi invêt nêkin imo inlâpna a hmu uala? Inriangin hringnun hmang dân an hriat ualna hin a ta hrangin imo a'rfêna a oma?

⁹Irzukna nêkin chu mita hmu hi a sa ual: hi khom hi chanlamboi le a korong a ni.

¹⁰Thil hong om murdi hi irhming phua tâk an nia, mihriam nitna khom hi inhriat sai a ni; ama nêka roiinpui ual chu doi thei mah.

¹¹Irsêlna sei tak khom hi, chanlamboi a nia, thudik kha indangtir thei no chi ni.

¹²Khan tu'n mo irnênga hring sâng sôtloite kêra mihriam ta hranga satak hrang chu an hriat theia? A hring sâng nikhuahai chu irhlîm angin ar hmanga, ama chu a fe zoi hnunga misa hnuaia hin imo hong tung a tah ti tu'n mo ama chu inhril thei hrang?

Thuhriltu 7

Hringnun chungchâng suina



- ¹ Irhming sa chu sahriak hlutak nêkin a sa uala; suak nî nêkin thi nî hi a sa ual.
- ² Hruaithena ina fe nêkin chu lusûnna ina fe chu a sa ual; kha kha mi tin itong hrang chu a ni sikin, mi hringin a milunga kha kha inhre mai ri se.
- ³ Innui nêkin chardong khom chu a sa ual, chardong hmêl hin milung a siam insa ngai sikin.
- ⁴ Mi vâri milung chu lusûn ina a om ngaia, khannisian invêt milung chu raifâna ina a om ngai.
- ⁵ Intohai hla sak irngai nêkin chu, mi vâri irchûna inhriat chu a sa ual.
- ⁶ Invêt innui chu, ilhling meia ei hâla a'rhâi phet phet ti ang hi a ni; ite omzia nei ma.
- ⁷ Mi vârin mi senkhat a huang tena chu, ama chu invêt anga om chu a nia. Khaangin fâkinrûkna hin lungrîl an siat.
- ⁸ Thil chu a'rphutna nêkin a mongna chu a sa uala; milunga za'rngaithei mi chu, milunga lâirpâk nêkin a sa ual.
- ⁹ Ni ningmur chu indâipai ro, ningmurna hi invêthai rôpsuama kêng a om ngai.
- ¹⁰ "Tûnlai zoro nêk hin tianlai zorohai kha itho sika sa ual ma ni?" ti no ro, kha irdonna kha vârna irthoka ni mah.
- ¹¹ Vârna hi irchon anga sa a nia, a ni, mi vârhain chu irchon tamtak nei an ti.
- ¹² Tangka chu irhrungna a ini angin, vârna khom hi irhrungna a nia; inhriatna satna chu vârna neitu hringna chu a sansuak pe a ni.
- ¹³ Pathian sintho hi ngaitua ta; a kôia a isiam tâk chu tu'n mo intûn thei hrang?
- ¹⁴ Zoro sahaia chu raifânin omin lân, zoro saloihai chu ngaitua ro; Pathianin raifânahai le chardongnahai a zuang tîr ngaia, khasikin mi'n a sûnmaton tianga thil chu ite inhre ngai mah.



¹⁵Hi ki hring sâng chanlamboi nikhuahai hin; mi fel thi lat le, mi pualoi a pualoinaa sôttak hring hi ki hmua.

¹⁶Khasikin, fel hraiin om no'n lân, vâ hrai khomin om sa no ro; itho mo ni bingin te irthat ni ta?

¹⁷Pualoi hrai khomin om no'n lân, invêt hrai khomin om sa no ro, itho mo ni zoro a tung mânin te thi ni ta?

¹⁸Hi ni ichel khak hi a sa a ni, khataka irthok khan ni kut khom la kîr no ro; Pathian chituhaiin nang la hong suaksan ving an ta.

¹⁹Khopui sâng roirêltu sômhai nêk khomin vârnain mi vâ chu an hrâtir ual ngai.

²⁰Irnêng chung a hin diktaka sin sa thoa, inchâi ngailoi hi om mahai.

²¹Khanchu, mi thuhiril murdi hi ngaisak ngai no ro, khano'nchu ni siahlo'n kua nang sâl an ti,

²²nang ngei khomin khang tak khan mi danghai kua ni lei sâlhai ti ni milungin nin hriat sikin.

²³Hihai murdi hi ki vârna chu hmangin ki lei fia tâka, "Vâr ta ki ti," ki tia; khannisian, keimaa irthokin hlatak a ni.

²⁴Hringnun omzia hi tu'n mo hmu suak thei a ta? Eini ta hrangin chu a sân an thûka, inhriatthiam intak tak khom chu a ni.

²⁵Khanchu vârna dik chu imo a ini, ti hmu suak hrangin a sân ki sua, thil tinrêng a omna sanhai khom chu hmu suak ki tuma. Khante, imo ki hmu suaka? Ki ihmu suak chu, hi hi a ni: pualoia om hi sa maka; lusiat anga om khom hi invêtna a ni tihai hi a ni.

²⁶Khanchu, thil inkhat thina nêka kha ual chu ki hmua, kha kha nupang, a milung chu châng anga om le lênhai anga, a kuthai khom chu minâng anga om mi chu a ni. Mihriam, Pathian lungdo anga omtu chu zôk thei a ta, khannisian, kha nu khan mi sualhai chu chelhai a ti.

²⁷Thuhrilu khan, "Irngai ta, hi hi ki sui za zâma ama chu ki hmu suak ta.



²⁸A dang khom hmusuak ki tuma, khannisian hmu thei ma unga, khanchu pasal sângkhat laia pasal inkhat chu a dik hi ki hmua, khannisian nupanga chu inkhat lua hmu ma ung.

²⁹Khanchu hi vai hi ki hmusuaka, Pathianin chu mihriam hi dik hrangin a siama, khannisian mihriamhai chu lampui kôï tamtaka an pêt tâka,” a tia.

Thuhriltu 8

¹Mi vâi vaiin kêng thil omzia takhai chu an hriat thei ngai, vârna'n a hmêl an vârtira, a hmêl inhripna khom an dang ta.

Reng thu zôm hrang a ni

²Pathian makunga chong ni inkung tâk ang khan, rêng thupêk chu zôm roh.

³A makung ata fe suak hrangin irhnot no'n lân, thilsual chu ngîrpui ngai no ro; ama'n chu a nuam nuam a tho thei sikin.

⁴Reng thu chu a'rsângtak sikin, tu'n mo a kuang, “Imo ni itho tâk hi?” ti thei hrang?

⁵A thupêkhai ni zôm sùng chu lungthi takin om ni ta, khan milung vârin thil tinrênga a zoro diktak le a dânhai chu an hriat ngai.

⁶Thil tinrêng hin zoro le dân diktakhai an nei senga, khannisian eini'n chu a chînte kêng ei inhriat!

⁷Thil la hong tung hrang chu inhre maka, a hong ni hrang lam chu tu'n mo hril thei a ta?

⁸Irtha chel theina le thi nî chung a ircham nei tûte om mahai; irdoi sùngin irngam om maka, pualoina'n ama chu sansuak no ni.

Mi fel le sual

⁹Kha thil murdihai kha ki hmu tâka, khanchu misa hnuaia thil tung murdihai hi a sân ki ngaituaa; khanchu mi inkhatin mi dang chung a ama le ama dengtheina hrang pialin irchamneina a nei zoro hi a oma.



¹⁰Khan, mi pualoi an iphûm lai tak ki hmua, khannisian thân ata an kîrin chu mipuihai khan sual an ithôna khopuihai kha an inpâka, hi khom hi chanlamboi a ni.

¹¹Sin siat chung a hremna intung zôi loi a ni ngai sikin, mihriamhai milunga chu thilsual tho hrangin a ingam tâk a ni.

¹²Mi sualin sinsiat voi irzakhat thoin, a hring sêng nikhuahai chu lei sôt khom sianlân, Pathian mahrip thoa zôm ngêt hi a sa ual ti hi ki inhriat a ni:

¹³khannisian mi pualoi ta hrangin chu sa no nia, an dam sêng nikhuahai khom kha misa a tâka irhlîm ang a nia, Pathian chitna an nei no sikin.

¹⁴Khanchu irnêng chung a hin thil fel nia inlang loi hi a tung saa, a kâra chu mi sualhai chung a hremna chu mi felhai chung a tung ngaia, mi felhai lômman khom chu mi sualhaiin an dong ngaia; hi khom hi keiin chu chanlamboi a nih ki iti a ni.

¹⁵Khasikin nunkhonhoi taka hringnun hmang hi a poimo a nih ti kin hriata, i sika mo ei tia ni'n chu mihriamin hi hring sênga, a ta hranga satak le a itho theisun chu fâk le nêka nunkhonhoi hmang hi a ni sikin. Kha kha irnêng chung a Pathianin an sin hrang a ipêkhaia khan raifâna'n zuihai ta a ti.

¹⁶Vârna inhre hrang le hnuai chung a sintho tâk murdi inhre hrangin, sên le zân meng khom inlân, Pathian sinthotheihai chu itiklai khom inhriat suak thei ni mah ti kin hriat suak tâka,

¹⁷Pathian sintho chu inhresuak thei viat ni ma, ni thei dôr khomin tumin lân, hmusuak viat no chi ni. Mi vârhaiin chu inhriatin an irti theia, khannisian inhre mahai.

Thuhriltu 9

Hringna tamtak irang loizia

¹Hihai murdi hi hmusuak hrangin a sên ki milungin ki'rveia, mi felhai le mi vârhai le, an sinthohai chu Pathian kuta om a nia, khannisian lungthungna a ni le irkhômâmka a nih ti mihriamin inhre mahai, an maton a ni vinga.



²Thil tinrêng mongna chu hmunkhat a ni, mi felhai le mi pualoihai, mi sahai le mi saloihai, mi irthianghai le mi irthiangloihai, thilinhlan ngaituhai le inhlan ngailoituhai mongna chu hmunkhat a ni. Mi sahai chung a itung ang dê n chu mi sual chung a khom a tunga, khomâk irsâmtuhai chung a tung ang dê nin irsâm loituhai chung a khom a tunga.

³Hi hi a ni, misa hnuai sintho murdi laia sin saloi chu, mi murdi chung a mongna hmunkhata tung hi, mihriam nâihai lungrîl chu sin saloia sip a nia, an hring sângin an milunga invêtna a oma, kha hnunga mithi kuang an fe tâka.

⁴Khan, mi tukhom mihriamhai kêra la lêngtu ta hrangin chu sabeina a la oma, kâmkeibaknei thi sai nêkin chu ui hring chu a sa ual.

⁵Mihringin chu la thi hrang an nih ti an inhriata, khannisian mithihaiin chu ite inhre ta ngai mahaia, lômman khom nei ta ngai mahai; an irnghilpai ving tâk a ni.

⁶An lungkhamnahai, an hmumâknahai, an hnarsânahai khom chu a boi ving tâka; misa hnuai sin thoa omhai hin dongtum tinrêng nei ta mahai.

⁷Fe'n lân, lôm takin ni bai fa ro, ni uain chu milung raifân takin in ro; ni sinthohai chu Pathianin a pom tâk sikin.

⁸Ni tukrivohai chu fâi mai sianlân, ni lu khom inthir ngai no ri se.

⁹Misa hnuai Pathianin nang a ipêk hringnun chanlamboi ni hmang sâng hin ni dôngma ni lunginkham leh khan raifân takin om roh. Kha kha misa hnuai ni sinsôlna ra le ni hring sâng a ni ta hranga inkunga om chu a ni.

¹⁰Ni kutin sintho a ihmu kai chu ni thei dôrin tho'n lân, ni fena hrang tâna khan chu vârna mani, inhriatna mani, sin thôna mani le ngaituana mani khom a om ta no hrang sikin.

¹¹Khan, ki thîr nôka, misa hnuai intânirsiatna chu chaninranghai hrang vai ni maka, irdoina khom chu a hrâthai ta hrang vai ni ual ma; bâu khom chu mi vârhai ta hrang vai ni maka, irchongna khom hi inhriatthiamna nei mihai ta



hrang vai ni ma, inditna khom hi mi thiamhai ta hrang vai ni mah ti ki hmua, khannisian zoro'nchum chu an rênga kuanga a itung hi kêng a ini.

¹²Khan, mihriamin zoro chu itika mo a hong tung hrang ti inhre viat mah. Ngahai chu lêna khum le, vahai chu châng a khit angin, mihriamhai khom zoro saloiin irningloiin a khumhai ngai.

Hrâtna nêkin vârna a sa ual

¹³Misa hnuaia khan hianga vârna hi ki hmua, keima hrangin a sân roiinpuiin an lang.

¹⁴Khopui chînte, a sũaga mipui tômte om hi a oma; rêng roiinpui tak hin a hong doia, ar huala, kul roiinpui tak a siam tâka.

¹⁵Khan, a sũaga khan nâi vâri inriangtak hi a oma, a vârna'n khopui kha a saninzôk tâka; khannisian kha inriang kha tukhomin inhre ta mahaia.

¹⁶Mi inriang vârna chu hmumâka omin, a chonghai irngaisak ni no khom sianlân, keiin chu "Hrâtna nêkin vârna hi a sa ual," ki iti tâk a ni.

¹⁷Invêthai roirêlna hmuna roirêltu inringtaka khêk nêkin chu, mi vârin dâizana a ihrilhai irngai chu a sa ual.

¹⁸Vârna chu irdoina râltukfam nêkin a sa uala; khannisian, mi sual inkhatin thil sa tamtak an siattir thei.

Thuhriltu 10

Dik loina sũnhnũnghai chu

¹Thoivâi thi sai khomin mirimhoi satak khom a mirim an siat ngai, khang dênin, invêtna chînte hin vârna le mahripomna irsângtak an siat ngai.

²Mi vâri chu a ngaituanahaiin lampui dika a hruai ngaia, khannisian invêt chu a ngaituanahaiin lampui dik loa a hruai ngai.

³Invêt chu lampuia a fe lai khomin an vêtna chu an langtir ngaia, khasikin mi tinin invêt a nih ti an inhriat ngai.

⁴Roirêltu chu ni chung a ning an murin, ni sin kha irpai zel no ro, ni dâihrekin chu ni inchâina liantak khom ngaidam ni thei a ti.



- ⁵Khan, misa hnuai hin thil saloi ki ihmu chu a oma, roirêltuhaiin dikloi taka roi an rêl sika a ni.
- ⁶Intohai chu hmun poimo takhai pêkin an oma, irchonghai chu irhnuai takin an toia.
- ⁷Siahlohai chu sakor chung a chuanga, rêng hai chu hnuai siahlo anga kea kalchôiin ki hmua.
- ⁸Khur ni choia ni'n chu nang chu tâ ni ta; dâi ni seta ni'n chu, mirûlin nan chuk a ti.
- ⁹Lung lâkna hmuna sin ni thoa ni'n chu, lungin pop ni ta, thing ni phûra ni'n chu chitna'n sip ni ti.
- ¹⁰Ni hrei chu a môla, a bêhai intâta a om noa ni'n chu, irnak tamtak song a nanga. Khannisian, vârna'n chu hlochukna an tungtir ngai.
- ¹¹Mirûlin an chuk baka ni'n chu, mirûl indôi theina kha ite a'rfêna om no ni.
- ¹²Mi vâru chu a thuhri nahaiin chôiindômna an tungtir pe ngaia. Khannisian invêt chu ama ngei thuhri nahaiin insiatpai a ni ngai.
- ¹³A phuta a thuhri hai chu intona a nia, a thuhri mongnahai chu invêtna a ni.
- ¹⁴Invêtin chu thuhai an pungtira, tukhomin imo a hong itung hrang ti inhre mahai, ama hnunga imo a hong itung hrang ti, tu'n mo ama chu hri thei hrang?
- ¹⁵Invêt chu a in lampui ten lua an hriat no sikin, a hring sêngin a sân sintho'n om ri se.
- ¹⁶Reng chu ruatharte a nia, hruaituhai chu zân sôt hruaitheana an omin chu, ram chu a buai ngai.
- ¹⁷khannisian, rêngin a bingin thutûknahai a siama, roirêltuhai khoma a zoro taka fâk nêk an zonga ni'n chu, ram chu vânei tak a ni.
- ¹⁸Mi thaboi sin tho nuamloi chu, a in chung hai zung a ta, a in chung chu chim a ti.



¹⁹Hruaithena hi raifâna hranga a nia, uainin nunchan chu irthafân takin a siama. Khannisian sum le puan boiin chu an ruai khan nei thei ni mah.

²⁰Reng chu ni lunginchong khomin sêl no ro, khan mi irchong khom ni zâlmun tentan sûnga khom sêl no ro; chunglêng vahaiin ni thuhai chu chôi an ta, va mitha neihaiin ni thuhrilhai chu van tungna an ti.

Thuhriltu 11

Mi vâ tho dân

¹Ni sum chu ram danga semin lân, sùn tamtak hnunga chu a lập siam ni ti.

²Ni inpunghai hrang chu hmun dang danga le hmun tamtaka semin lân, hnuai chung a hin i ang siatna mo a hong itung hrang ti nin hriat no sikin.

³Sûmhai chu rotui a sip tena, irnêng chung a rotui an bunthâk ngaia, thing chu sim tiang mani hmâr tiang mani a kiakin chu, a kiakna hmuna khan thing chu om a ti.

⁴Phâivua nghâktu'n chu chîmu tû no nia, sûmhai thîrtu khomin ât ngai no ni.

⁵Phâivua lampui ni inhriat loi angin le, nupang nâi vongtu sula hin itin mo ruhai chu an irfûk ti ni inhriat loi, Pathian itinrêng siampu, sinthohai chu inhre no chi ni.

⁶Chîmu chu zîng tiang tû'n lân, khohloi tiang khom ni kut chu ôl no ri se; a kho nia ni itu kha mo mông insa ual hrang, ti nin hriat no sikin.

⁷Sùn khovâr hoitak hmang theia om hi a isa a ni.

⁸A sôt le a bong thu chu, thu dang ni sianlân, ni hring sùng chu raifân takin hmang ro; khannisian la thi hrang ni nih ti hi inhre mai ro, ni hring sùng kumhai nêkin thinaa om chu sôtak la ni a ta; ni thi hnung lakin ite tho thei ta no chi ni.

Vânglai kuanga irdon

⁹O vânglai, ni vânglai nikhuahai hin raifân takin hmang ro, ni vânglai nikhuahaia khan ni milung chu raifânin om sianlân, ni itho nuamhai chu



tho'n lân, ni milung irzukhai chu tho ro, khannisian, ni sintho murdihai chung Pathianin roi la rêl a ti, ti inhre mai roh.

¹⁰Khan, ni milunga chardongna chu khâipaiin lân, ni taksa irthoka thil saloi khom khâipai sa ro, vânglaiin sôttak ni om no hrang sikin.

Thuhriltu 12

¹Ni vânglai hin nang a siamtu chu inhre mai ro, nikhua saloihai a hong tung mân le, 'Lômna rêng rêng nei ma ung e,' ni tihna hrang kumhai a hong nâi mânin;

²Kha kha misa vâr le tha vâr le ârsi vârhai khi nangma ta hranga an inthim mân le rotho zoia sôm a hong kîr mân hin.

³Khanchu ni kut, nang a hrungtu chu inthing tah a ti, ni ke, atûna hrâthai hi hong duai ta a ta, bu nêkna hrang khomin ni ha chu a tômte vai hong ni ta a ta; ni mithai khom inthimin ite fel takin hmu thei ta no ni.

⁴Ni mikuarhai chu kholaiia irhâi le irhâihoi irfûk irhâihai chu inhre thei ta no chi nia, khannisian vate inhrâm khomin ni zâlmun ata chu nang la kaithoi a ti.

⁵Hmun irsânghai chu chi ni ta, ni lampuia thil chînte khom irfûi hrangin chi ni ta, ni samhai chu almond thing pârhai angin hong ngoi ta a ta, kal ni chôi tika khom khâisor angin lôn ni ta, hring ni irzukna murdihai chu irhmang ving ta a ti, khanchu ni kumtuang ina fe ta ni ta, ni ruak chu thâna an chôi laiin, nang a sântuhai chu kotsuahaia irbuk an ti.

⁶Sumru hrui chu a chata, rângachak khuri chu a koia, pilbêl chu tuikuanga a koia, sakor tâli chu rungtuia a tâk mân hin.

⁷Ni taksa chu irnêng pila suak a nia, ni thi tika khom ni taksa chu irnêng pila ngêt kîr nôk a ta, nir tha chu Pathian kuang kîr nôk a ti.

⁸Thuhriltu'n chu, "Chanlamboi, chanlamboi, thil tinrêng hi chanlamboi ving a ni," a ti.

Thu kaikhômna



- ⁹Thuhriltu chu a sân a vâra, a vârna chu mihai irchûtirna'n a hmanga. Thuhriltu hin irdîn takin a suaia, thuvâr tamtakhai a sinsiama.
- ¹⁰Thuhriltu'n chu thudikhai hmusuak hrangin a sân a tuma, khanchu irchutirna le irngatna thuhai chu a'zriak suaka.
- ¹¹Mi vâr thuhai chu khianghrol irzum mihaiin an ramhai lam dika an ifepui ngai ang hi a ni. Kha irchutirnahai kha hêmvuak det takhai ang an nia, khahai kha irhnêlin lân, sataka hringnun hmang dân lampui dik chu nang irhmutir thei a ti. kha irchutirna vâr murdihai kha Pathian, ei rênga Belrapu ata suak ving a ni.
- ¹²Khasikin ki nâipa, kha irchutirnahai kha irchu'n lân, khannisian lekhabu danghai ata chu irdîn ro, lekhabu tamtak siam hin hek nê nei maka; irchu tam khom hi taksa sôlna vai a ni.
- ¹³Hihai murdi zoia hin chu, thil inkhat vai hi hril hrang a om tâka; Pathian chin lân a thupêkhai zôm ro, kha hrang piala mihriam hi siam ei ni sikin.
- ¹⁴Pathianin sintho murdihai chungu roi a la rêl hrang a nia, thil irthup tinrêng, a siat mani, a sa mani tihai khom hi.



Hlahai Hla

Hlahai Hla 1

¹ Hlahai hla Solomona iphua chu.

Hla inkhatna

Dôngmate

² Ni hmûr leh khan ni tumin lân, Ni lungkhamna chu uain nêkin a sa ual sikin,

³ Ni rirtui nang pol ngaitu hin mirim hoitak a nei; Ni'rhming chu mirimhoi irpai angin a vuang; Khasikin dôngmatehaiin lung nang an inkham a ni hi.

⁴ Ni kuang ni hruaiin lân, rot zel ei ti; ki ta hrangin rêng nin lân, ni tentana ni hruai lût ro, Ei raiinfân suam ei ta, lungirthungna uain irhnik takin insuam ei ti, dôngmate murdi'n lung nang inkhamhai khom sian.

⁵ O, Jerusalem nâinuhai, ki duk nâkin ki hmêl chu a sa, ramchâra Kedara puan in le Solomona puanzârhai angin ki isa a ni.

⁶ Ki duk sika hin nin sit ual no'n lân, misa'n a ni em induk sika a ni. Ki nuchahaiin ki chung a an ningmur an insuma, grep irhuana sintho hrangin an ni tîra; ki taksa ir-enkolna hrang zoro nei ma ung.

⁷ Nin hril ro, ni lungkhamna hi, Kho tiang mo ni belrahai hôlin, sîn laia kho tiang mo ni irngamtirhai hrang? Nangma zongin belrapu danghai kuang ki ichai vêl hrang ma ni?

Ruatharte

⁸ O, nang nupang laia hmêl satak, nin hriat no'n chu belra rualhai hnung kha suiin lân, ni kêlhai chu belrapuhai puan in kôla lêng ri sehai.

⁹ O, nang ki lungdi, Faroa tâli kai ngaitu Sakorchal le sakor irla raifân angin, pasalhai râi nin fântir a ni.

¹⁰ Ni bianga sam kâia khan en an hoitira, ni ringa lunglhu irtheihai leh khan.

¹¹ Khannisian nangma ta hrangin rângachak irthei le sumtak tukrivo nang siam pe kin ti.

Dôngmate



¹²Ki rêng chu a zâlmuna a zâla, Ki nard mirimhoi vuangin a kôl a kiang a sip zoi tâka.

¹³Ki lungdi chu ki rôpsuama a zâla, ama chu Mura mirimhoi tak ang a ni.

¹⁴Ki lungdi chu irhuana pâr irbom lai angin, Engedi grep irhuana pâr lai tak ang a ni.

Ruatharte

¹⁵O, lungdi ni hmêl sa lam dân hi chu o! Ni mit khom vasu mit ang a nia;

Nupang

¹⁶O, ki irngâitak, ni hmêl sa lam dân hi chu o! A sân ki rai nin fântir, ei zâlmun chu durba hring ang ni a ti.

¹⁷Sidar thinghai chu ei miliang ni sian, ei tukrophai chu meisâr thing ni an ti.

Hlahai Hla 2

¹Saron rama rose pâr le phâizôla lili pâr chu ki ni.

Ruatharte

²Ki lungdi chu nupang murdi laia, ilhling kêra lili pâr ang a ni.

Dôngmate

³Ram hnuaiia thing tin laia apple thing angin, ki lungdi chu ruathartehai laia a ni; a dâihlîm hnuaiia ki toi nuama, a rahai khom ki bâu ta hrangin thum tak a ni.

⁴Khanchu a hruaitheha hmuna a ni hruaiia, Ki chungu lungkhamna puanzâr chu a târa.

⁵Ki hrâtna chu grep em inchârhai leh khan siam intharin lân, apple rahai leh nin hartir ro, Lungkhamna chu donsûl angin ki thêm tâk sikin.

⁶Ki lungdi vei kut chu ki lu hnuaiia a oma, a chang kutin a nin kuaa.

⁷O, Jerusalem nâinuhai nangni ki ngên, Sarza le sazuktuaihai irhmingin chong inkung roi; kin irditna nin buai loi hrangin.

Hla inhnina

Dôngmate



⁸Ki lungdi hla inhnina irhâi ki inhriata, keima tianga hongin, mualpui lianpapai khom paltanin a ni hong pana.

⁹Ki lungdi chu sarza le sazuktuai ang a nia, irngai roh, bang kôla khan a ngîr chiana, tukver rengata a hong thîra, Khuangpuiirhuan bang kêr ata a ni hong vênga.

¹⁰Ki indit takin hiang hin a tia. Hong roh ki indittak ki lungthung, ki kuang hong roh.

Ruatharte

¹¹En ta, phalbi chu a hong hek ta, rotho khom a hong mong tâka.

¹²Rama pârhai an hong irmuam tâka, hla sak zoro a hong tung ta, vasuhai inkur irhâi rama inhriat thei a ni ta.

¹³Theipuihai khom a hong hmin irphut thiai tâka, phâivua chu grep pârvang mirimin a sipa, Khasikin o, ki indit tak ki lungdi, hong roh ki kuang hong roh.

¹⁴Nang chu lungpui kêra vasu irbîk ni anga, ni hmêl inditom tak ni'rhmutirin lân, ni hnuk hoitak nin hretir ta roh.

¹⁵Sihalhai, sihal chînhai chelpaihai roh, ei grep irhuan pâr vang lai tak hi an insiat mân hin.

Dôngmate

¹⁶Ki lungdi chu ki ta a nia, kei khom ama ta ki ni, a belra pâlhai chu lili pâr bila an lêngtirhai ngai.

¹⁷Zîng khorthi dâi a hong thoa, zân a hong inthim nôk mâka chu, Ki lungdi chu sarza le sazuktuai ang dênin Bether tâng chung a khan kêr nôk roh.

Hlahai Hla 3

Dôngmate

¹Zân sôt ki zâlmun chung a, ki lunginkham tak chu ki zonga, a ni ki zong ngota, Khannisianlân hmu ma unga.



²“Atûn thoi ki ta, khopui irfang ki ti, kotsua le lamlian hmun tina ki lungdi chu zong ki ti,” ki tia. Khannisianlân ama chu hmu ma ung.

³Khopui hrungtuhaiin an ni hmua, an kuang, “Ki’rtha’n a ilunginkham kha nin lei hmu mo? tiin ki’rdonhaia.

⁴Khan ki khêlhai zoi, chomkhat hnunga chu ki’rtha’n a ilunginkham kha ki hmua, ama chu ki chelkhaka; infetir nuam ta ma unga; Ka nu in tiang, sûnga ni vongtu tentana ki hon tungtir mâka chu.

⁵O, Jerusalem nâinuhai, nangni ki ngên, Sazukupuihai le sakhihai irhmingin chonginkung roi, kin irditna hi nin buai loi hrangin.

Hla inthumna

Dôngmate

⁶Tu mo bepârthohai lai ata bero le mura lâka mirimhoi innam chot chota, ramchâr ata meikhu inding hlot hlota hong tâk so?

⁷En ro, Solomona tâli a ni so, Israel mi hrâthai laia irdoi mi sômrukin an hong izui a ni soh.

⁸Khandai an chôi chita, irdoi thei mi inzen an ni; mi murdi’n an khandaihai an kong a an vong vinga, zâna thil ichiomna sikin.

⁹Rêng Solomona khan a ta hrangin tâli a siama, Lebanon tânga thing leh siam a ni.

¹⁰Khataka a chopuihai chu sumtaka siam a ni, a dâp chu rângachak, a toihmun dâp chu a dum inpôl leh siam a ni, Jerusalem nâinuhaiin sataka an ikhông a ni.

¹¹O, nangni Zion nâinuhai, hong unglân, Rêng Solomona hi hong en roi, ama chu dôngma a nei nî, a lôm nia le a raifân nia, a nu’n rênglukhum a inkhumtir kha a khuma.

Hlahai Hla 4

Ruatharte



¹O, ki lungdi, ni hmêl satzia hi chu o! ni puan lukhum hnuaia ni mit menghai hi lungkhamna an lang dânhai hi! ni sam chu Gilead tâng panga kêl rual lênghai ang chu a ni.

²Ni hahai khom belrapu mul ep zoia tuiirsila hong suak ang a ni, a bo bopin an hong suak vinga inkhat lua a binga om zel om mahai.

³Ni hnerhai chu samkhit hrui senhai angin an langa, ni chong zoro khomin en a ihoi dân hi chu o! Ni biangbokhai chu ni puan lukhum hnuaia a chok nor nor ngai.

⁴Ni ring khom Davida in irsâng angin irsâng kôkin a oma, kha in irsâng kha sipai hrât takhai sângkhathai leh a bang kha irvôtir a nia.

⁵Ni'rhnu inhnihai khom sakhite inphîr ang a nia, lili pâr bila fâk zong ang a ni.

⁶Zîng khorthi dâi a hong thoa, zân inthim a hong vâr mâka chu, mura le bero tâng chung a om mai ki ti.

⁷Ki lungdi ni savinga, ite zel hi demna hrang zel om mak che.

⁸O ki lungdi, Lebanon tâng ata kha ni zuiin lân, a ni, Lebanon tâng chung ata kha ni zui ro, A mâna tâng sîp ata zuang chumin lân, Kâmkeibaknei le keiârsihai omna Senir le Hermon tâng hai ata zuang chum roh.

⁹O lungdi le ki rualnu, ni mitsîr leh ni ni ikâp le ni hner chokhai khan ki lungrîl chu ni lâkpai ving ta.

¹⁰O ki lungdi le ki rualnu, ni lungkhamna khan ki rai nin fântira, ni lungkhamna chu uain nêkin a thum uala, mirim dang tin nêkin a hoitak chu a ni.

¹¹O ki lungdi, ni hnerhai khan khuaihnîng om ang dôrin, ni milei chu keima ta hrangin dûtui le khuaihlutui ang a nia, ni sil le kaihaia khom Lebanon mirimhoi dôr chu a om.

¹²O ki lungdi le ki rualnu, nang chu irhuan sînga irkhum ang ni nia, Irhuan sînga tuihnâr le irhuan sînga tuiîlpût suak ang chu ni ni.



¹³Kha hmuna khan theikunghai a mônga, Irhuana dalim kunghai anga omin, ra satak neia ra suakin, Hena le Spiknard thingkunghai leh.

¹⁴Spiknard le pâr mirimhoi dipar le thingzungthum thing mirimhoi tinrêng le; mura le Aloe rimhoi chi tinrêng hai leh.

¹⁵Nang chu irhuana tuirîlpût, rungtui hring, Lebanon ivatedung luang suak chu ni ni.

Dôngmate

¹⁶Tho'n lân, o hmâr tianga khorthi, nang sim tianga khorthi hong sa ro; Ki'rhuana hi hong sêmin lân, a mirimhoi hai a vuang indarh ual theina hrangin. Ki lungdi chu hong sianlân, irhuana thei tinrêng rahai hi hong fa ri se.

Hlahai Hla 5

Ruatharte

¹O ki lungdi le ki rualnu, ki'rhuana sînga ki lûta, rimhoi le mura-hai chu ki'rkhôma; Ki uain tui le ki sehrât irhnutui chu ki ina.

Dôngmatehai

Rual lungthung takhaio! fa unglân, in unglân, lungkhamna nin inrui mäsenga chu.

Hla minlina

Dôngmate

²Ki zâl lai khomin, ki milung chu a harkanga, Ki lungthung tak khan a hong intôk e!

Ruatharte

Ni hon hong pe ro, ki irngaiinnat ki lungthung, ki vasu sêlna boi, Ki lu irdo'n an duia, ki samhai chu zân irzilin a'rdap zoi ta, tiin.

Dôngmate

³Ki sil le kai ki khek tâka, itin mo ki inngâk nôk ta hrang? Ki ke khom ki sôp tâk sikin, Itho mo inbaltir nôk ki ta?

⁴Ki lungdi khan inkhâr ir-ônga a kut a hong rola, a ni hong nâi tâk sikin, ki lungrîl a châng tâka.



⁵Khanchu, ki lungdi inhong pe hrangin ki thoia, ki kuthai chu mura tuiin a zunga, Inkhâr kalna chunghaia khan, ki kutpâr ata mura rimhoihai a zunga.

⁶Khanchu ki lungdi ta hrangin, inkhâr chu kin hong pea; Khannisianlân a lei fe tâka; O, a'rhâi ki irngai nuam lam dân chu o! Ama ki zonga, hmu ta ma unga, Khanchu kin sama, khannisianlân ite ni don ta maka.

⁷Khanchu khopui hrungtuhaiin an ni hmua, an ni vîka, an nin phoptira, khopui hrungtuhaiin ki puanhai an ni lâkpai pea.

⁸O Jerusalem nâinuhai, nangni ki ngên, chonginkungna nei roi, ki lungdi kha nin hmu'n chu lungkhamnain a na a ni, ti hi ama kha ni hril pe roi.

Dôngmatehai

⁹O nupanghai laia hmêl satak, ni lungdi kha mi danghai nêka imo a danglamna a om uala? Imo ama khan kha do dôra irkhêl a iom, ni kuang chong kin inkungtir hrang?

Dôngmate

¹⁰Ki lungdi chu a hmêl a sain a sen iai iaia, sîngkhat laia khan a satak a ni.

¹¹A lu chu rângachak irthiangtak ang a nia, a sam khom vaâk anga duk zon zon a ni.

¹²A mithai khom ivatedung kôla vasutehai anga omin, irhnutuia sôp infâi taka om a ni.

¹³A bianghai chu mirimhoi bil, rimhoi vuang ang a ni, a hnerhai chu lili pârhai mura tui leh indui ang chu a ni.

¹⁴A kutpâr chu rângachak intuan, topaz lunglua siam kutsabi a irbuna; a takpum chu sâihaa siam, Safir lunga tuam ang a ni.

¹⁵A kehai chu sâilungvâr chopuihai ang, rângachak irthianga phun ang a ni, a mal lâng dân chu Lebanon tânghaia Sidar thing irsâng tak ang chu a ni.

¹⁶A ni, O Jerusalem nâinuhai, ki lungdi chu inditom tak a nia, chong tin laia ama chongbâi vai hi a thum tak a nia, ama hi ki lungdi omdânhai chu a ni.

Hlahai Hla 6



Dôngmatehaiin

¹O nupanghai laia hmêl satak, kho tiang mo ni lungdi kha a fe ta? Nang kin zongpui theina hrangin, Kho lampuia hin mo ni lungdi a ife nin hril ro.

Dôngmate

²Ki lungdi chu a'rhuana pâr mirimhoihai laia a fe, irhuana va chum hrang le lili pârhai irkhôm hrangin.

³Ki lungdi chu ki ta a nia, kei chu ama ta ki ni; a sâhai chu lili pâr bila an fâhaia.

Hla ringana***Ruatharte***

⁴O ki lungdi nang chu Jerusalem angin en ni hoia, Tirza khopui angin en hnông zât ni mak chea, sipai puanzâr le irvoa roiinpui takhai ang ni ni.

⁵Ni mithai leh khan ni en no ro, Suak anga omin a ni'rhmutir ngai sikin, ni samhai chu Gilead tâng panga kêl rual chum angin an châng.

⁶Ni hahai chu belra pâl tuiirsil zoi chakhai angin an ngoia, a bo bopin an oma, inkhat lua a fanga om om mahai.

⁷Ni bianghai chu ni puan lukhum hnuaia dalim khoi saihai ang a ni.

⁸Rêngnu sômruk le, lâksîr sômriat le dôngmate tep zoiloi chu an oma.

⁹Khannisianlân inkhat vai ki lunginkhama, ama chu vasute ang dôra sa a ni, nupang murdi'n ama chu an inpâk ngaia, Rêngnuhai le lâksîrnuhai khomin, ama chu an inpâk ngai.

¹⁰Tu ngân mo a ini kôlirsal anga hong inlanga, sortha anga vâra, misa anga irtêka, ârsi de anga roiinpuitak khi?

¹¹Almond thing irhuana ki zu fea, Irhôra thing chiakhai en hrang le, grep rânghai mo an cher nôk ta ti leh, dalim kunghai pârvingin mo an fîm tah ti en hrangin.

¹²Khanchu ki'rtûng no lai takin, Ki'rtha'n ki rêng tâlia khan a nin toitir tâka.

Dôngmatehaiin

¹³Kîr ro, kîr ro, o Sulam mi, Kîr roh kîr roh nang kin en theina hrangin;



Dôngmate

Mahanaim lâm en ang rengin, Itin mo Sulam mi kha en thei ni ta?

Hlahai Hla 7***Ruatharte***

¹O rêng nâinu, ni ke chu ni sendel leh khan a'rhme bâka, kuttheithiam takhai isin angin, ni teêlhai chu lungflu ang a nia.

²Ni milâi irbu chu, khuri uain tui irsam loi ang a ni, ni phîng chu lili pârhai laia bumût ang a ni.

³Ni'rhnuhai chu sakhite inhni, sakhipuiin te inphîr an ineihai ang a ni.

⁴Ni ring chu sâiha irsâng ang a nia. Ni mithai chu Bath-rabbim dâi mikot kôla Hesbon dîlhai ang a ni. Ni hnâr chu Lebanon in irsâng, Damaska tianga ngha ang chu a ni.

⁵Ni lu chu Karmel tâng angin a'rsânga, ni lua samhai chu patzâi irhmi ang a ni; ni sam tâk bon bona om hi rêngin a hmu'n chu tuang zoi ngai mah.

⁶O lungdi, raifân ni omin, ni hmêl khom a saa, milung nin tâitir hen hi te na!

⁷Ni dung khom tûm thing angin a'rsânga, ni'rhnuhai chu grep ra bôr angin a'rbôra.

⁸Kha tûm thing kha luiin, a rahai irhmal ki nuama, keima ta hrangin chu ni'rhnuhai kha grep ra irbôr ang a nia, ni mirim khom apple thei mirimhai ang a ni.

Dôngmate

⁹Ni bâi chu uain satak ang a ni. Khaang kha a lei nia ni'n chu, Uain kha ki lungdi kuang luang sianlân, a hmûr le a kehaia va luang pe ri se.

¹⁰Ki lungdi chu ki ta a nia, keima hi a irngai tak chu ki ni.

¹¹O ki lungdi, hongin lân, so rama son va fe ei ti, thingtâng khuahaia lei riak rei.



¹²Zînga thoiin grep irhuana son va chai ei ta, grep rânghai so a pâr ta mo ti le dalim kunghai pârvingin mo an fîm ta tihai va en ei ti; Khataka khan ki lung nang inkham dân hi nang pe ki ti.

¹³Zôlaidi'n mirimhai chu an sua, thei sa chi tinrênghai chu ei mikot kôla hin an oma, O ki lungdi, nangma ta hrangin a milui le a thar an rêngin ki sia ving.

Hlahai Hla 8

¹Nangma hi chu ka nu irhnûk lai, ki sangpa lei nin lân chu, kholaidunga nang ki hmu khomin nang tum ngai ki ta, tûte'n nin zakpui no nihai.

²Ka nu ina nang hruai ki ta, khataka khan lungkhamna chu ni'rchûtir ni ta; uain mirimhoitak nan intir ki ta, ki dalim tuia uain tui chu.

³A vei kut chu ki lu hnuaia a hong siaa, a chang kut leh a nin kuaa.

⁴O nangni Jerusalem nâinuhai, nangni ki ngên a ni, Lungthungna kha kaitioia inhartir loi hrangin, ama khan a nuam mâka chu.

Hla kirukna

Dôngmatehai

⁵Ramchâr rengata lungdi irhnêlmata hong so tu mo a ini?

Dôngmate

Apple theikung hnuaia khan nang ki kai thoia, ni'rzirna hmun ngeia khan.

⁶Ni milung sûnga irsinsiana angin le ni bân chung a khan irsinsiana angin ni siain lân; lungkhamna chu thina ang dôra a ihrât a ni; a hnarsânahai kha thina angin a nun a siaa, meichok angin a kânga, meidôn hrât takhai ang a ni.

⁷Tui tamtakin lungkhamna chu inboi thei no nia, tuilian khomin tânpai thei no ni; Mi'n a irchon murdi leh lungkhamna chu irchôk a tumin chu, hmâimôkna ti no chu ite a dang hmu no ni.

Dôngmate nuchahain

⁸Farnu chînte kin neia, a'rhnuhai khom la fuan maka, ei farnu ta hrangin imo ei itho hrang? Mi an hong, ama lua hrang tia an hong biak tena te.



⁹Ama hi kul lei ni sianlân te, sumtak le in irsângin lei sin ei ta, Khan ama hi inkhâr lei ni ta khomsian, Sidar thing phêkhai leh siam ei ta.

Dôngmate

¹⁰Kei chu kul anga om ki nia, ki'rhnuhai khom hi in irsânghai ang an ni; Ki lungdi'n an hriata, kei chu ama lungchuktak le lungthi takin ki om ti an hriat.

Ruatharte

¹¹Solomona'n Baal Hamon hmuna grep irhuan a neia; grep irhuan kha a enkolpu kuang a man omin an enkoltirhaia, a enpuhai kha tangka sângkhat a pêkhai ngaia.

¹²Solomona, tangka sângkhat chu lâkin tangka irzahni chu grep hong pêltuhai ni pêk kêr nôk thei; Khannisian keima chu ki grep irhuan chu ki bingin donsui ki ti.

¹³O ki lungdi, irhuan ata kha ni hnuk irhâi ni'rngaitir ro, ki rualhaiin ni hnuk irhâi irngai hrangin nang an nghâk.

Dôngmate

¹⁴O ki lungdi, irhnot ro; sakhipui mani, Sazuktuai angin mani om ro; mirimhoi tânghai chungâ khan.



Isaia

Isaia 1

¹ Uzia hai, Jothama-hai, Ahaza hai, le Hezekia-hai Judai rama an inlal laia Amoza nâipa Isaia'n Judai ram le Jerusalem khuaa inlârna a ihmu thurchi chu;

Pathianin a mi a irchuhai

²Rengpa'n thu a hril hi, "Irvânhaio, irngai unglân, irnêng khom ni mikuar lei sung roh. Nâi le te kin fâhaia, kin liantirhaia, khannisian, an ni tehel pe zoi ta.

³Sehrâtin a chongpu an hriata, Sakuartungin a pu bu pêkna irkuang a inhriat angin, Israelhaiin chu inhre mahai, ki mihai hin inhre thei mahai.

⁴O! nam tukullian, sualna sip, irchi saloihai, mi helâk loihaio! Rengpa nin mâksana. Israel mi irthianghai nin hnôlhaia, nin mâksanhai tâka.

⁵Itina mo nin la inuar pe mai? vîk nin la izong mai ma ni?

⁶Nin kezapha ata hôi loiin la na irsua ving nin ti, a pop a liam, vîk irdul insip nin ti: An sui khom insui loiin, a tuam khom tuam loiin, hloi khom pol loiin.

⁷Nin ramhai khom ar hmang zoi ta, nin khua khom a kâng irhmang ta, nin mithmua nam danghaiin nin ram an lua zoi ta, nin râlhaiin an insiat zoi a ni ta.

⁸Jerusalem khua vai a la zôka, an irhual hrai sikin, kul nei loia, grep irhuan a irpuk angin, fanghma irhuana a'rzâmtirna ang ma maiin.

⁹Itinrêng Rengpa'n a dam sun tômtê hi chu nihai no sianlân, Sodom khua ang khan irhmang zoi ei ti, Gomora khua angin om ei ti.

¹⁰Roirêltu Sodom khuaa mi anga omhaio! Rengpa thuhiril hi irngai unglân, nangni Gomora khua mi anga omhaio, kin Pathian thu hi nin mikuar lei sung roi.



11 Rengpa'n hiang hin a ti: "Nin irbôlnahai hi keima hrangin i ma nia? Nin belra pum hâlhahi hi kin hnê theia, Sâ a mar nin irhlanhai hi nuam ma unga Sehrât, belra, le kêlchal thisenhai hi, lôm ual ma ung.

12Ki kuanga nin hor hlanhai hi, tu mo nangni an phût, ki tual nin hong idênpui ngai hi?

13Thil hor hlan kochok ta no roi, ite ar fêna om ma, rimhoi nin ihâlhahi hi kin tir ta, tha tharhai, sabat hai, Inkhômpui nin itho ngaihai leh hin, Inkhômpui nin iuarhai khom hi, ki hnông zoi ta, sualin a sip tâk sikin.

14Ni tha thar kût hmang ngai le nikhua poimo danghai hi a sate'n nangni ki hnôngpui! keima hrangin porche a nia, tuang zoi ta no ning.

15Ni ngênin nin bân phar khom unglân, ki mit nangni insîngsan ki ti, chongchai sabak khom unglân, ki mikuar sung no ning.

16Irsil unglân, fâi ta roi, thilsual nin itho ngai hi ma ta unglân, thilsual tho ta ngai no roi.

17Sin sa sin irchu unglân, a dik hi irzûl roi. A boihai sanhai unglân, farahai roirêl indikpuihai roi, meithâihai sanhai roi.

18Rengpa khan, "Thoi hong roi lei ngaitua irhlôm rei! Nin sualhai kha seninlâr angin om ta khomsian, ivur angin la vâ a ta; senduk angin sen ta khom sianlân, belra mul angin om ta a ti.

19Ki thu nin zômin chu, nin rama thil sahai fa nin ti.

20Khannisian, nin nuam noa, tehel nin zongin chu, khandaiin nangni fa zoi a ti:Rengpa bâi khan kha kha a insîr tâk a ni," a tia.

Khopui sualna

21I thoa khopui iamom tak chu Notizuar angin teh a om tâka? Dik taka, roirêlna, mi dikhai omna chu, mi thathai omna teh a hong ni tâka!

22Nang tangkarua chu a êkin a iman zoi ni ni ta.



²³Nin hruaituhai chu nakhrâtsong an nia, Inruhai rualsa an ni; mi huang hrang an zonga sum irzûlin an om zoi ta, Farahai diktakin roirêl pehai loiin, meithâihai enkolna khom nin irsama.

²⁴Khanchu, Rengpa tinrêngRengpa'n Israelhai mi hrât thu suakin hiang hin a ti: kho mo, ki râlhai chung a lei irsiam sabak hi rong, a ni doihai chung a phuba lei la hi rong.

²⁵Ni chung a ki kut inlek ki ta, tangka ru angin lei hâl infâi rong, a êk siathai chu hâl infâi ki ti.

²⁶Tiana nin roirêltuhai ang a kha, sia nôk ta ki ti, nangni irfûktirpuhai ang kha nangni pe nôk ki ti; khanchu, "Khopui iamom le dik," nangni ti nôk an ti.

²⁷Zion khua chu diknain sansuak ni a ta, a sînga sual irlethai khom felna khan inzôk ni an ti.

²⁸Ama makunga tehel le mi sualhai chu vîk indarhai a ta, Rengpa irheisanhai chu irhmang zoi an ti.

²⁹Sesua thing a siam Biak In khârnhai kha lan zak nin ti, Irhuan ser nin isiamhai khom inzakpui nin ta,

³⁰sesua thing thi ta hrang angin thê m nin ta, tui hmu ngai loi irhuan angin châr nin ti.

³¹Mi sinthothei tak chu, mei irbu ang hi a ni, a sintho khom meirisi ang hi a ni, kâng ir-ût a ta, tûte'n that thei no nihai.

Isaia 2

Kumkhuaa irngeina

(Mik 4.1-3)

¹Judai ram le Jerusalem chungchânga Amoza nâipa Isaia'n Rengpa Thu a idong chu:

²Zoro hnungkhôna chu Rengpa in omna tâng chu, tâng roiinpui tak ni a ta, tâng tinrêng hai khêl a ta, Nam tinrêng hong nuam an ti.



³Mi tamtak hong an ta, hiang hin ti an ti, “Tho Rengpa tânga son fe ei ti, Jakoba Pathian in omna son, a lam ni le’rhmua an ta, a lampuia khan fe ei ti,” Zion ata dân hong suak a ta, Jerusalem ata hi, Rengpa’n thu a ihril ngai a ni.

⁴Nam tin chung a roirêl a ta, Irngeitirhai a ti, an khandaihai bu tâna hrangin incher an ta, an ufeihai khom theipui ôn tanna hrangin sin an ti. Nam dang chung a nam danghaiin chem hrei inlek ta no nihaia, irdoi dân khom irchu ta no nihai.

⁵Jakoba irchihaio, Rengpavâra om ta ei ti.

Mi lâirpâkhai chung a Rengpa roirêlna

⁶Ni mi Jakoba nâihai hih ni mâkhaia, nisua tianga mihai le, Filistia mihai dôl an hmanga, nam danghai an kop tâk sikin.

⁷Annihai ram chu tangka le rângachakin a sipa, an sum nei dân khom inhre phâk zoi loi a ni. An ram sũaga sakor in an bita, an tâli nei dân khom tep zoi zât ni maka.

⁸An rama khan millim a bita, An kuta an isinhai chubai an mûka.

⁹Mi tinin an ibiak hrang a nia, ite tũang hrang dang nei loiin.

¹⁰Rengpa inzôkna roiinpui le ichiomna khêl loi hrangin, lung ir-ônga lût unglân, pilvũaga irbi roi.

¹¹Mihriamhai mualphoina hong dâi a ta, an irngaiirsângnahai hor hnuai a ti. Kha ni tena chu Rengpa vai hi chôiindôm ni a ti.

¹²Kha ni tena chu itinrêng Rengpa’n, lâirpâkhai, irngaiirsânghai, le mi huang hmang murdihai, irhnuaitirhai a ti.

¹³Lebanon tânga sidar thing irsâng murdihai, Basan rama sesua thinghai tanpaihai a ti.

¹⁴Tâng tin le mual tin, a’rsângnahai irhniamtir a ta,

¹⁵Râl hrungna irsâng le kulbanghai inchimtir a ti;

¹⁶Tarsis-a irkuang, a lian le a sa murdi, a rêngin ngâm zoi a ti.

¹⁷Mihriam irpâkna om ta no nia, An irngaiirsângna khom irhniamtir ni a ti.



¹⁸Kha ni tena chu Rengpa vai hi chôindôm ni a ti. Millimhai chu om ta no nih.

¹⁹Irnêng nok inhnêng hranga a zuang tena chu, Rengpa inzak omna roiinpui le chiomna khêl hrangin, rôl ir-ônghaia lût an ta, khurpadopa irbi zoi an ti.

²⁰Kha nikhua kha a hong tungin chu, an ibiak tangkaruaa siam millim le rângachak millim, an isiamhai chu a bong a bûiin pai suakhai an ti.

²¹Irnêng nok inhnêng hranga a zuang tena chu, Rengpa inzakna roiinpui le ichiomna khêl hrangin rôl le lung ir-ônga irbi zoi an ti.

²²A thi thei mihriamhai chung a irngat no roi. Ite lua ni mahai.

Isaia 3

Jerusalem buaina

¹Rengpa, itinrêng Rengpa'n Jerusalem le Judai ram ata, an irngatna tinrêng a lâk thiai a ni ta, An itûng bu le tuihai khom,

²An pasal sahai le an mi hrâthai khom, roirêltuhai, deipuhai, kutzia entheihai le sipaihai,

³sômringa hruaituhai le an isong ualhai khom, ni ihmanghai le dôl theihai, tasân theihai a lâkhai thiai ta,

⁴An hruaitu hrangin nâipang sia ki ta, an chung a nâipanghaiin roirêl an ti.

⁵Mipui ir-ep sup sup an ta, pasal le pasal irsual an ta, rual le rual irdoi an ti. Ruatharhaiin an ulianhai chitna nei no nihaia, mi chîntehaiin mi inzakomhai ite bêin bê no nihai.

⁶Mihaiin an urêng an pa ina om chu chel an ta, “Nang chu sil le kai chu ni neia, kin hruaitu ni chang pe'n lân, hihai ang hi, ni kuta om ri se,” la ti an ti.

⁷Kha ni tena chu ama'n sêlhai a ta, “Hihai hi ensuihai thei no ning, bu le sil le kai nei ual ma ung, mipuihai hruaitua chu ni siam no roi,” la ti a ti.

⁸Jerusalem chu a ichim a ni ta hi, Judai ram khom a isiat zoi a ni ta. Rengpa doiin an chonga, sin an tho ngai a ni, a roiinpuina an êsêl sikin.



⁹A nuama omin, an thei lolina an langa, Sodom mihai angin an sualna mualinphoitirin, irthup thei ta mahai. An chung a rikin, a binga siatna an intungtir a ni.

¹⁰Mi sahai laia chu, “Nin tho insa, nin sinthôna ra ât nin ti,” ti unglân;

¹¹Mi sualhai chung chu a rik, an siat hrang sikin. An itho angin an chung khom tho ni a ti.

¹²Ki mihai hrungtu chu nâipang an nia, nupanghaiin an chung roi an rêla; an ihruai irhmangtir a ni, fena hrang lampui inhre loiin, nin ibuai a ni ta.

Rengpa'n a mihai roi a rêl

¹³A mihai sual târinlang hrangin Rengpa ar siam ta, an chung thu rêl hrangin a ngîr ta.

¹⁴Rengpa'n an ulianhai le an hruaituhai chung thu a hong rêla. Nangnihai hi grep irhuan inram zoitu nin ni, mi inrianghai thil nin lâka, nin ina nin bukkhôma.

¹⁵Ithoa mo hianga ki mihai nin isoisakhai, mi inriang an ineisun nin lâk pehaia? Rengpa, tinrêng Rengpa thu suakin a ti.

Jerusalem nupanghai irchûna

¹⁶Rengpa'n hiang hin a ti: Jerusalem nupanghai chu an irpâk bâka na! ir-ân otin an fea, an mit leh mi an kâp thiaia, silniang irhâi sirim sirim tiin an ke an thîna.

¹⁷Rengpa'n Zion nupanghai lu inpântir a ta, Rengpa'n korongin inomtirhai a ti.

¹⁸Kha ni tena chu Rengpa'n an tukfam sahai kha la pai pehai a ta; an irtheihai, an samkhithai, an samkilhai,

¹⁹an kuarkâihai, an hmâi huinahai

²⁰samkhit, bânhrîal, kongkhitnahai rimhoi sianahai, an tâbithai,

²¹kutsabihai, hnâr irvônahai,

²²songkol irfualhai, puanhai, songkolphal le kuta chôî zât,



²³hlîmenhai, puan irphânhai, diarkai zât hai, le irvôna danghai sutpaihai a ti.

²⁴Mirimhoi irthûlin mirimsia, kongkhit irthûlin hruihrual, sam tam irthûlin sam kol, tukrivo sa irthûlin bora puan, hmêlsa irthûlin hmêlsia an dongtum ni a ti.

²⁵Ni mihai chu khandai tuk that ni an ti, ni mi hrât inthanghai khom irdoina hmuna thi an ti.

²⁶Kho sînga hruihai khom chap khêka inrûmin om an ta, kho sînga mihai khom korongin toi ta an ti.

Isaia 4

¹Kha zoro tena chu nupang sariin pasal inkhat chel an ta, “Fâk nêk le silkaihai tum ving kin ta, kin irhming siat loina hrangin, dôngma’n ni lua ro,” la ti an ti.

Jerusalem inding nôkna

²Kha ni khan chu Rengpa ata a dôn thar hong suakhai chu intuai duamin om a ta, Israel rama la omhai ta hrangin satak le tuitakin la ra a ti.

³Zion-a a thi zoi loi le Jerusalema irhming irziakhai chu, “Mi irthiang,” ti an ti.

⁴Rengpa irtha’n Zion mihai chungchâng rêl infelin an porchenahai infâi a ta, mei ikâng angin irtha khan Jerusalema thisenhai chu infâi a ti.

⁵ Rengpa’n Zion tâng pumpui chung le khataka omhai chung khan sîna meikhu le sûmin irhlîhai a ta, zâna meivâr sia a ta: Pathian roiinpuina’n sip an ti.

⁶Khahai kha misa lum lai ata a’rhlîtu, phâivua le ropui lai ata inhultu, le doipuitu ni a ti.

Isaia 5

Grep irhuana hla

¹ Ki inuamtak ta hrangin hla hong sak ki ti, Ki inhroi tak grep irhuan hla chu. Ki indit takin grep irhuan a nei ta, Mual chung le irnêng sana taka khan.



²Khur a choia, lung irkhamin, grep sa zât chi a phuna, A laia a enna hrang irpuk a siama, Grep tui sômna hrang khur a choia; A ra irchang a nghâkhmoa, a hong ra'n chu a dol an ni vinga.

³Jerusalem le Judai rama mihaio, Grep irhuan le ei irhla lam dân hi, hong ngaitua ta hi roi.

⁴Ki insâp nêka tam ki grep irhuana, Imo ki la insâp mai hranga? Grep ra sa hmu ngêt hrangin ki tuma, a dol inzenin a ni ra pea;

⁵Itin ual takin mo ki la isoisakhai hrang? Nang hong hril nôk ki ti, a dôn chin ki ta, inramtir ki ti, a dôn irdoi hai insiatpai ki ta, ramsahaiin sirpha an ti.

⁶Mapai ki ta, a ôn sât ta no ning. A hmun khom chuan infâi ta no ning, hloi ilhling neiin sip zoi a ta, sômhai thu pe ki ta, rua inthotir ta no ning.

⁷Itinrêng Rengpa irhuan chu Israel in sâng mihai hi an nia, Judai rama mihai hi a inhroi hai tak chu an ni. Diktaka roirêl sakeiin, mi that an nuam ngaia, khannisian chardonga an khêk irhâi a hmu intamhai ta.

Mi sintho saloi

⁸Mi danghai nêka, tam ualin, irhuan hmun lian thohaio, nangni intak pe a ti. Tûte irleng ta no nihaia, beidong tuangin nin bingin la om nin ti.

⁹Itinrêng Rengpa'n ki mikuar inhriata hin, "Hi in lian le satak takhai hi, ram zoi a ta, a lua hrang mi om no nihai.

¹⁰Grep irhuana a ra tân sôm suakna hmuna, tân hni vai a ra hmu ni ti, phur sôm suakna hmuna, phur khat vai ra suak a ti," a ti.

¹¹Zînga zu hrût phutin, zân sôta inrui ngaihai chu, intak pehai a ti.

¹²Zu hmuna serânda le perkhuang hmanga, têngrep le belemhai hmanga, zu inruia omhai chu, Rengpasintho en nuam loiin. A kut sintho khom en nuam loiin.

¹³Ki mihaiin an inhriat nuam no sikin, sala intâng ngêt an ti. An milianhai phîngchâmin thi an ta, mipui vântânghai khom tui inhrâlin thi an ti.



- 14Mi thi khuahaiin an lei nghâka, an bâi an lei âng khum mai. Jerusalem songa milian le michînhai raifân taka omhai chu an ngûi zoi ta,
- 15Mi lian le mi chîn irhnuai ving an ta, tukullianhai dok an ti.
- 16Dik takin roi a rêl sikin tinrêng Rengpa chu chôindômin om a ti, thil diktaka Pathian irthiangin, a'rthiangzia inlangtir a ti.
- 17Khanchu an lêngna hmuna belrahai an irhmang ngai angin, hmun ramna hmuna sûlhai chu kêlin fa an ti.
- 18Sual ata irdînthei loihai, suala irlet nuam loihai chung chu rik pehai a ti.
- 19Hor hnothai sian kin hmu theina hrangin, hong tho lat ta ri sehai, Israelhai mi irthiangin a thiltum chu, ei inhriat theina hrangin, zuan tungtir ta ri se, tituhai chu.
- 20Thil sual le thil sa thoa, thil sa le saloi thoa, a vâi chu a zîng anga bêin, a zîng chu a vâi anga irngaiin, thil thum chu a khâ a tia, thil khâhai a thum tituhai chu,
- 21An binga ki vâi irtia, fel irtihai ngai chu an chung rik pehai a ti.
- 22Zu ina pasal sa! zu sangol irveia hrânghai chu, an chung rik pehai a ti.
- 23Fâkinrûk lâkin mi sual a sa inchangtir nuamhai ngai, mi sahai chu saloi an inchangtir ngai.
- 24Annihai sika hin meiin fapôl a ikâng angin, ilhling a ikâng inhek angin, an irzunghai kâng inhekin, an sa lai takin hek zoi a ti; itinrêng Rengpa dân chu zôm loiin. Israelhai mi irthiang an hnôl sikin.
- 25Khasika khan a nih Rengpa ningmurna chu mihai chung a zuang itung a ni. A kut irlekin a vîkhaia. Khanchu tânghai hi inhnîng a ta, mithi ruak chu sahrok angin, kholaidunga irthek rumin, kha dôr khom khan a ningmurna hek ual maka, a kut a la thâk maia.
- 26Rengpa'n ram hlataka omhai hrang, irsinsiana a târ suaka, kôlkil dêna mi ikoi irhâiin a koia, irhnôt takin a hong ta so.



²⁷Sôl reng inhre loiin, irtet khom irtet loiin, a inuam khom om loiin, a in khom mu pe ngai mah, kongkhit sût khom om loiin, kekok hrui sût khom om mahai.

²⁸An thalhai chu a'rzum insa pehai, an thal ngul khom irfûk saiin an chôia; an sakor ke mitinhai khom ngaih tak a ni, an tâli kehai khom kèllaiher angin a'rhêl dût dûta.

²⁹An khêk irhâi khom kâmkeibaknei inrûm ang a ni, an sa sê lai chu inrûm pumin an irputpaia; tûte sut thei zât ni mah.

³⁰Kha zoro kha a hong tungin chu, tuikhanglian irhâi nêka siatin Israel ram sûnga la hong irsok siat a ti. Ramhai chu chardong le lungzîngna'n a sipa, vâr chu zîngin a'rkhu zoi tâka.

Isaia 6

Deipu ni hranga Pathianin Isaia a koina

¹ Reng Uzia thi kum khan Rengpa ki hmua, a rêngtoihmun irsâng tak chôiiirsângin a toia, a songkol hmorin Tempil chu a sip vinga.

² A kôla khan Serafhai an oma, an rêngin mitha kiruk an nei chita, inhnihaiin an hmâi an hîpa, inhnihaiin an ke an tuama, inhni chu an vuanga:

³ “Itinrêng Rengpa chu a'rthiang e, a'rthiang e, a'rthiangliai, irnêng pumpuia a roiinpuina'n a sip,” tiin an irsam irhlôm, an irsam irhlôma.

⁴ An khêk irhâi khan Tempil irnghatna bul an hnîng dur dura, tempil chu meikhu a sip zoi ta.

⁵ Keima'n chu, “E hei! ki ithi a ni ta! hmûr saloia sip, hmûr porinchea siphai laia om, Anchungtak itinrêng Rengpa chu ki mitin ki hmu ta,” ki tia.

⁶ Seraf inkhat a zuang vuanga, meichep leh maichâma mei chu a zuan chepa,

⁷ ki hmûr a hon tôna, “Hi hin ni hmûr a tôn tâka, ni sualna lâkpai a ni ta, ni porinchena infâi a ni zoi ta,” a tia.

⁸ Khan, “Tu mo ki itûr hrang, tu mo keini hranga fe hrang?” tiin Rengpa irhâi kin hriata. Keima'n, “Keima fe ki ti! ni tîr ro,” ki tia.



⁹ Ki kuanga khan, “Fe’n lân, hi namhai hi va hrilhai ro: Irngai ngot khom unglân, inhre thei no chin ni, en mai khom unglân hmu ual no chin ni,” tiin.

¹⁰ Hi mihai lungrîl hi inchothir pehaiin lân, an beng sêt sianlân, an mit inthim pehai sian. Anino’nchu, an mitin hmu an ta, an mikuarin inhrena an ti, an lungrîla inhre mai an ta, irletin indam nina an ti, a tia.

¹¹ Keima’n chu “Rengpa i dôr ten mo khang khan an iom hrang?” ki tia. Ama’n chu, “Khopuihai chu a luatu om loiin a ram zoia, inhai khom an lumtu om loiin a ram zoi mâka chu!

¹² Rengpa’n mihai chu hlataka thon paihai a ta, ram pumpui insiat zoi ni a ti.

¹³ Sôma inkhat irang maiin pe khom sian ite a’rfêna om no nia, Sesua le thing irkit zoia a bula a’rzung la om ang hi ni a ta. Ama kha irchi irthiang bul chu a ni,” a tia.

Isaia 7

Reng Ahaza kuanga thu intung

¹ Uzia nâi Jothama nâipa Ahaza, Judai rama an lal laiin Suria rêng Rezina le Israel rêng Remalia nâipa Pekahia chu Jerusalem rûn hrangin a’rthoka, khannisian la thei mahaia.

² Suria sipaihaiin Israel ram an hong tung tah ti Davida in mihai an hong hrilhaiin chu an chi tak taka, rampuia thing phâivua isêm ang hin an inthing nat tâka.

³ Rengpa’n Isaia kuang, “Ni nâipa Shear-jasuba hruaiin lân, Ahaza va hmu roi, dîl sak inta taka tui lam mongna tianga puanirsûkhai omna lampuia a om.

⁴ A kuang khan hiang hin va ti ro: ‘Irtûngin lân, chi no ro, Suria rêng Rezina le Remalia nâipa ningmur hi chu thingthubong khulût ang ma mai hi a ni.

⁵ Suria le Israel rêng Remalia nâipa nin chung a thil saloi an itho a ni.

⁶ Judai rama hong fe unglân, insihai nin ta, irsenin om an ta, an rêng hrangin, Tabeela nâipa hih siam ei ti,’ an tia.



⁷RENGPA PATHIANIN hiang hin a ti: ‘Khaang khan chu ni viat no nia, hlochuk viat no nihai.

⁸Suria lu chu Damaska a nia, Damaska lu chu Rezina hi a ni. Kum sômruk ringa sâng chu, Efraima namhai chu hek ving an ta.

⁹Efraima lu chu Samari a nia, Samari lu chu Remalia nâipa hi a nia. Nin ni iam no’n chu inding suak no chin ni tiin,’ a tia.

Irsinsiana hrangin Immanuel

¹⁰Rengpa’n Ahaza kuang thu a hrila,

¹¹“Irnêng rîl ata mani, irvân ata mani irsinsiana irhmutir hrangin Rengpa ni Pathian kuang zong roh,” a tia.

¹²Ahaza’n, “Zong no ning, Rengpa chu fia nuam ma ung,” a tia.

¹³Isaia’n, “Davida irchihaio, irngai roi, mi danghai insôltir a ruk la ti loiin, kin Pathian a le tianga nin insôltir nuam ma ni?”

¹⁴Rengpa ngêtin irsinsiana nang irhmutir a ti: Irngai ro, dôngmate’n nâi vong a ta, nâipasal nei a ta, a’rhming hrangin ‘Immanuel’ phua a ti.

¹⁵A siat le a sa a infel mân khomin, mihaiin dûttui le khuaituiin ngam an ta,

¹⁶kha nâi khan a siat chu hnôl a ta, a sa a inthang thei mân khomin, mi ichitakna ram chu inkhêktir a ti.

¹⁷ Rengpa’n nang le ni mihriamhai le ni pa in mihai chung, Efraimahi chu Judai ram ata an infelhai zoiin chu, la om ngai loi intakna intungtir hrang a ni; Assuria rêng chu hong hruai a ta.

¹⁸Kha nikhuaa khan chu Rengpa’n Aigupta rama tui, Nail vadung hnâr ata irrualin luang suak a ta, Assuria ram ata khom khuaipâl koihai a ti.

¹⁹Zuang vuang an ta, tuidung irhelna rôl panghaia, tâng ram rôl kêra khom, ilhling le sa lêngna hmunhaia kêi sup an ti.

²⁰Kha ni khan chu Eufates tui kêla om, mi lu ep nuam ngaihai, Assuria rêng chu, Rengpa’n hmang a ta, nin sam le nin mul murdi, ni hnermulhai le nang voi pe ving a ti.



²¹Kha nikhua kha a hong tungin chu, sehrâtpui le kêlpui inhnina nei thei an ti.

²²Dûttui nei intam an ta, khuaitui leh ngam an ti.

²³Kha nikhua a hong tungin chu tangka varh sângkhat man, grep kung sângkhat omna murdihai khom hloitharpa le hloi ilhlingneiin inbôk khum a ti.

²⁴Khataka khan chu thal ngul nei chôiin ram chai an ta, a ram hloisûl le ilhlingneihai thatpai zoi a ti.

²⁵Tutho leh an ichuan infâi ngai, mual tin tâng tinhai chu, hloitharpa le ilhlingneia bit tûte lût ngam loina khan, sehrât pâi insua a ta, belrahai hranga satna ni a ti.

Isaia 8

Isaia nâipa mipuihai hranga irsinsiana

¹Rengpa'n ki kuang, "Irziakna hrang a phêk liantaka lan lân, mihai tep thei hrangin 'Maher-salal-Khas-Baza hrang', ti thîr irzum leh irziak ro," a tia.

²An hriatpui hrangin mi iamom inhni ochai Uria le Jeberakia nâipa Zakaria ki koia.

³Khan, deipunu kuang ki fea, khanchu, nâi a vonga, nâipasal a neia, Rengpa'na'rhming hrangin, "Maher-salal-khas-Baza" ti roh.

⁴Nâisen khan, "Ka nu, ka pa a ti thei mân Damaska irchongna le Samari khua ata râllâk sum an lâk hrang chu Assuria rêng kuanga tung a ti," a tia.

Assuria rêng hong a ti

⁵Rengpa'n a ni hril nôka,

⁶Hi mihai hin Silo tui, dam tui in nuam loiin, Rezina le Remalia nâipa an lei lôma,

⁷Keima Rengpa hin Assuria rêng le a sipaihai chu, tuilian angin inpunghai ki ti.



⁸A kuang bit a ta, liam irhlei ni a ti. Judai ram tiang panin, dîlhai a ti. An ring phâkin a ram pumpui dîlhai a ti. Ni ram chung a mitha phar duai a ti. O! Immanuel ni ram irzat rêng rêng chu boi ving a ti.

⁹Mihaio, inhre roi, irzal nin ti, ram hlataka omhaio, nin mikuar sung roi, a ni irsiam unglân, a sân chi roi.

¹⁰Rot zoi tum unglân, hlochuk ual no ni. Nin nuam dôr ti khom unglân, ite ar fêna om no ni, kin Pathian kin kuanga a om sikin.

Rengpa'n tho loi hrang deipu a hril

¹¹Hi mihai lampui hro hi, hro ta loi hrangin Rengpa'n ngar takin a ni hrila.

¹²“Hi mihai leh hin inrualpuihai no ro, an ichi ang khomin chipuihai no roh.

¹³Itinrêng Rengpa hi a nih nin inza hrang chu. Ama vai hi a nih nin chia nin itho pe hrang chu.

¹⁴A'rthiang hrai sikin Israel in sêng mi inhnihai hrangin irfûina hrang lung, irfûia irtetna hrang chu a ni. Jerusalema omhai hranga tâkna hrang khur an khitna hranga châng a ni.

¹⁵Mi tamtakin irfûi an ta, khit an ta, inôk mai an ti,” a tia.

Mithihai chongpui loi hrang

¹⁶Ki irchutirhaio, thu nangni ki irchuhai kha, inhre maiin, vong insa roi.

¹⁷Keima'n chu Rengpa hi ki nghâk maia, Jakoba irchihai laia a ni la irbîk pe viat a ni hi; keima'n chu ki sabeina hi ama vai hin ki'rngat maia.

¹⁸En ro, keima leRengpa ni ipêk nâipanghai hi, Zion tânga om tinrêng Rengpa'n Jerusalem mihai hranga irsinsiana thil irkhêl tak ni hrangin a ni ti a ni.

¹⁹Mithi chongpui theihai, dôl theihai, itin anga irkhek hranga a theihai irdon hrangin nang ti a ti. Ama'n chu, “Irthahai hi irdon hrang a nia, a thihai khom hi a la damhaiin irdon hrang an ni,” lei ti an ti.

²⁰Irchutirna thu nangni ki ihrilhai kha irngaitua sabak roi, anni thuhiril chu omzia nei mah.



Chardongna zoro

²¹Chardong le phîngchâmin ram chu irfang an ta, an phîngchâm ningmurin irvân enin an rêng le an Pathian chu khuasâl an ta.

²²Hnuai tiang an enin chu chardongna le inthim irkhêl tak, an itong ngêt hrang inthim chu hmu an ti.

Isaia 9

Reng hong om hrang

¹ Chardong taka omhai hrangin chu ngûina rêng rêng om ta no nia. Tianlai khan Zebulun le Naftali ram chu, hnuaisia om tak a nia, zoro hnungkhôna chu la roiinputir a ti, tuipei kôl ata Jordan varâl Galili ram, Jentailhai omna ram chu.

²Inthim hnuaia omhai namin chu, vâ roiinputi tak an hmu tâka, raminthim taka omhai hrangin kua a hong vâ ta.

³Kha namhai kha nin punghaia, an raifâna khom nin pung pehaia, bu ât le râllâk sum sem laia an raifâna angin, ni makunga hin an râi a ifân a ni.

⁴An puak pêlna ringkolhai le an thil inkhônga funghai chu, irdô tuanga vîkna hmolhai leh khan, Midian-hai an inhnê nikhua ang khan, ni tho pehaia.

⁵Sipai hongna rup rupa kekokhai chu, an tukfam thisen kâi neng nungin hâl a nia, a kâng zoi ta.

⁶Ei ta hrangin nâi a zuang suaka, nâipa pêkin ei oma, a dârsuama roirêlna irngatin, A'rhming khom Irkhêl, Irfûktirtu, Pathian Hrât, Kumtuang Pa, Irngeina Rêng ti an ti.

⁷ A ram irzat thiai a ta, a ram sûnga irngeina'n hek nî nei no ni. Thudik hmanga fel taka roirêlin Davida Rêngtoihmuna toi a ta, indettir a tih, atûn ata kumkhontuangin. Rengpa sathnem irngaina khan, kha kha a itho hrang a ni.

Rengpa'n Israelhai hremhai a ti

⁸Rengpa'n Jakoba irchihai demin thu a hrila, Israel mihai khom a huap sa a ni.



⁹“Efraïma le Samari mihai khomin, hi hi a itho a nih ti lan hria an ti. Lâiripâkin an irsong khak ngaia.

¹⁰Pilrôngar bang chim khom sianlân, lung ngar sinsiamin irchuanhai ei ti, theipui thinghai kha sâtpaiin om khomsian, Sidar thinghaiin thûlpai ei ti,” tipuhai khan lan hriat an ti.

¹¹Rengpa’n râl an phûthaia, anni irhual hranghai khom.

¹²Nisua tianga Suria, nitâk tianga Filistia Israelhai doi hrangin an bâi an âng khumhaia. Kha dôr khom khan Rengpa ningmurna hek maka, a kut a la irlek mai a ni.

¹³Israel namhai chu anni soisaktuhai tiang kîr nuam loiin, itinrêng Rengpa kuang tiang fe nuam mahai.

¹⁴Khasikin kêng Israelhai lu le irmei chu sôn khat sûngin Rengpa’n a itanpai pehai a ni. An tûm ôn le hnâhai khom a lâkpai pehai,

¹⁵an luhai chu an ulian songhai an nia, an irmei chu deipu minlak tho ngaihai hi an ni.

¹⁶An nam hruaituhai hin an hruai insualhaia, an ihruaihai khom an irhmang zoi tâk a ni.

¹⁷Pathian inhre loiin, thil sual an thoa, an thu phorsuakhai lak, a nikhua ni pehai maka; khasikin an ruathartehai khom a ihôi hai loi, farahai le meithâihai khom inrenhai loiin, kha dôra ni khomin Rengpa ningmur chum maka, a kut a la inlek mai a ni.

¹⁸Sual hi hloitharpa le ilhlingnei kâng theitu mei ang a ni. Rampui hnuaia sûlhai khom a kâng theia, a ikhu hlut hlut ngai a ni.

¹⁹Itinrêng Rengpa ningmurna khan, ram chu an kângtira, mihriamhai chu hâl hranga irtikkhôm mai mai an ni. Tûte mâni urêng hai khom san thei loiin;

²⁰an chang tianga mihai huangin fâk an zonga, an phîng a la châm pehai mai ngai. An vei tianga mi khom an fâka, khop inhre ual mahai, an nâihai khom an fâka.



²¹Manasea le Efraima mi an irdoia, Juda irchihaiin an tuang uala, khaang dôr a ni tâk khomin Rengpa ningmurna chum loiin, a kut a la inlek mai a ni.

Isaia 10

¹Dân ihnôngom tak siamin, thupêk ngar tak insuaktuhai nin lu chung la rik a ti.

²Inrianghai lampui nin danhaia, diktaka roirêl pe ni ngai mahai; meithâihai huangin, farahai nin inrûk pehai ngai.

³Ram hlatak ata siatna a hong tung zoro, thuan nôkna nikhuaa khan itin mo nin itho ta hrang? Tu kuang mo changpuina nin la izong hrang, khôn mo nin irchon nin isia ta hrang?

⁴Sala om hranga an ichelhai laia om nin ta, an ithathai laia om nin ta, kha dôr khom khan Rengpa ningmur chum pe maka, a kut a la'rlek maia.

Pathian hmangrua Assuria rêng

⁵ Assuria rêng chung a ningmurin that ki itum mai a ni, ki ningthik insumna'n ki hmanga.

⁶Pathian inhre loihai nam doi hrangin ki târa, ki ninginmurtirhai thatpaihai hrangin, va huanga van ru pe hrangin, kholâi dialdôk anga sirpol hrangin.

⁷Kha vai khan a ruk ti loiin, nam dang omhai irhmangtir a tuma, hôi viat loa thathai ving a inuam a ni.

⁸"Ki milian neihai hi rêng hmangrua an nia.

⁹Karkhemis khua angin Kalno khuahai khom ki inhnê mo ni ma? Hamath khua angin Arpad khua khom? Samari khua chu Damaska khua angin ki soisakhai kha.

¹⁰Millim biakna rama chu ki kut kin lek maia, Samari le Jerusalem khua nêka millim tamnahai khan,

¹¹Samari khua le an millim biakhai kha chu, kin siat zoi tâka, Jerusalem le an millim biakhai khom, ki isoisakhai loi hrang mo?" a la ti maia.



¹²Rengpa'n hiang hin a ti, "Zion tâng le Jerusalem khua chung a ki itho nuam ki tho zoi tika chu, Assuria chu a lâirpâkna le a'rsongna sikin soisak ki ti," a tia. Assuria rêngin:

¹³"Ki hrât le ki vâ sikin, keima itho a ni. Nam tin an ramri ki thon pehai ngaia, an irchon thuphai ki suthaia, sehrât bu chîl angin an rêng hai ki chîlhaia,

¹⁴Vâ a om no zoro'n artui an ilâkpai pe angin, ram tinrênga irfangin an irbuhai chu, kin pûr pehaia, an irchonhai ki lâk pehaia, an mitha ni không khum ngam om mahaia, a ni khorâi thei zel om mahai," a tia.

¹⁵Hrei hi a hlektu nêkin mo roiinpui ual ni? thing âtna khom hi a âttu nêkin mo poimo ual ni? Mi that tumna ringot hin irlektu hi mo nang ual ma? Hmol khom hin a chôitu mo vîk theina ni.

¹⁶Khasikin, itinrêng Rengpa ngêtin mi mar takhai khom kôngna hri irveitirhai a ta, mei angin an phîng inlumtir pehai a ti.

¹⁷Israelhai invârtu chu mei chang pehai a ta, an mi irthiang chu meiri-al chang a ti. Sûn khat khomin tinrêng kâng zoi thei a ni. Hloitharpa le ilhlingnei sûl khom kâng zoi a ti.

¹⁸A rampui le sa hlutna neihai chu siat ving a ta, Irtha le taksa tenin hmu hrang om no ni.

¹⁹Rampuia thing la om sunhai khom, nâipang hai itep thei ni ta a ti.

Mi tômte hong kîr na thu

²⁰Kha ni tena Israel la dam sunhai le Jakoba irchi a thi zoi loi la omhaiin, anni soisaktuhai iam ngam zoi ta no nihaia, Rengpa Israel mi irthiang chu iam mai thei ta an ti.

²¹Jakoba irchi a thi zoi loi, la omhaiin, an Pathian hrât tak kuanga hong kîr an ta.

²²Israel mihai chu tuikhanglian kôla chia nêkin tam khomhai sian, tômte hong kîr an ti. Irhmang hranga inkung an nia, an irhoipui.



²³Itinrêng RengpaPathianin a lei iti tâk angin a ram pumpuiin siatna tung a ti.

Rengpa'n Assuria hrem a ti

²⁴Khasikin, itinrêng Rengpa Pathianin hiang hin a ti: "Zion-a om ki mihai, Aigupta mihai itho angin, Assuria'n khianghrol leh nangni vîk khom sianlân, chi no roi.

²⁵Zoro sônotea chu ki ningmurna hek a ta, an chung a thuanhai ki ti.

²⁶Itinrêng Rengpa'n Horeb lungpui kôla Midian mihai laia a itho ang khan nin chung a ivîkna hmol leh tônhai a ta, tui puia Aigupta mihai a itho pehai ang khan Assuria mihai chu vîk phiarhai a ti.

²⁷Kha ni tena chu Assuria thuhnuaia nin omna chu nangni insua ki ti, nin ringa a ringkol chu inkhiak ki ti," a ti.

A rûntuhai idoina

²⁸Aiath khua an hong tunga, Migron khua an hong khêla, Mikmas khua an hong incheltir ta.

²⁹Lamchum an hong khêla, Geba khua an riak ta, Rama khuaa mihai chu chipumin an inthinga. Reng Saula khua Geba mihai an rot zoia,

³⁰Galim khua mihaio, chipumin khêk unglân, Laisa khua mihaio, irngai roi, Anathot mihaio, lei hor son roi,

³¹Madmen mihai chu an rot zoia, Gebin khua mihai chu irbîkna hmun zongin an intân.

³²A vuan hin Nob khua vai hi a la inding a ni, Zion tâng Jerusalem khua chu, kuttum ar hmutira.

³³Irngai ro, Rengpa itinrêng Rengpa'nthing ôn tuk thâk angin ta duai a ta, a la'rsâng ualhai chu tan irkitin irhmang an ti.

³⁴Hrei leh rampui an seta, Lebanon tânga thing lianpapai an itan angin, Assuria chu irkittir a ti.

Isaia 11

Irngeina ram



¹ Thing phurna bul a hong incher nôk ang hin, Jesaia irchi ata rêng thar hong suak a ti:

²Rengpa irtha'n ompui a ta, vârna le inhriattheina hai, irfûktir theina le hâina hai, Rengpa chitna le inhriattheina irtha inneitir a ti.

³Rengpa chi hi a lôm lamtak a nia, an lang dân ang hin roirêl no nia, mikuara a inhriat mai maihai hin thurêl insat ual no ni.

⁴Inrianghai chu diktakin rêl pehai a ta, a ram sũa mi irngaiin tômtehai khom chôiirsâng hai a ti. Ama thua om nuamhai chu irnêng hi vîkhaina a ta, mi suanghai chu sêm thathai a ti.

⁵Dikna chu kongkhitin hmang a ta, iamomna chu a kongka khít a ti:

⁶Inehai chu kêlbelrahai leh omsuam an ta, kâmkei le kêl khom kual suam an ti. Sehrât te le kâmkeibaknei têhai chu, satêhai leh omsuam an ta, Nâipangtein hruaihai hluk a ti.

⁷Sehrâtpui le savom khom omsuam an ta, an têhai khom kual suam an ti. Kâmkeibakneihai khomin sehrât angin fapôl fa ta an ti.

⁸Irhnu nêk lai hai khom soksapho kôla lêng suam an ta, irhnu mâk chakhaiin sokngân kuaa an kut sia an ti.

⁹Ki tâng irthiangna tinrênga chu, tûte a na tuang ta no nihaia, an siat khom insiat no nihai; tuikhanglian tui a ibit angin Rengpa an inhriatna hin ram hi bit ta a ti.

Sala intâng hai kîrna

¹⁰Kha ni tena khan chu Jesaia irchia rêng hong suak kha nam tin hai hranga irsinsiana ni a ta, a omna hong pan an ta, chôiindôm an ti.

¹¹Kha ni khan chu Rengpa'n a bân phar nôk a ta, a mi la thi loihai. Assuria le Aigupta ram hai, Pathros ram hai, Sudan ram hai, Elam ram hai, Babulon ram hai, Hamath ram hai, tuikhanglian kôla tui le tui kêra om hai hruai kêr hai a ti.



¹²Nam tinrêng hai mithmua irsinsiana târsuak a ta, Israel an inhnotsuak hai le Juda a rothai khom kôlkil minli ata hruai suak hai a ti.

¹³Efraima hnarsa siatna om ta no nia, Juda doihai ngai khom om ta no nihai. Efraima'n Juda chu hnarsa ta no ni. Juda rêngin Efraima chu inbuai ta no ni.

¹⁴Nitâk tianga om Filistia chu doi intam nôk an ta, nisua tianga om hai khom rok pehai an ti.

¹⁵ Rengpa'n Suez-ah irkuang irngamna khom inkangtir a ta, Eufrates tui pui khom phâivua lum hmangin inkangtir a ta, an kezapha lua dui loiin irkân thei an ti.

¹⁶Aigupta ram rengata Israel hai an suak theina hrangin, lamlian a iom ang khan, a mi la om hai hrang Assuria ram ata khom, lamlian om rum thei ta a ti.

Isaia 12

Lômthu hrilna hla

¹Kha ni tena chu hiang hin ti ni ti: “O Rengpa, nang kin pâk, ki chung a hin ni ning an mura, Khannisian ni ningmur insum mak chea, Irtharngam ni ni saka.

² Pathian chu a ni saninhringtu a ni, Ama iam ki ta, chi ta no ning. Rengpa ki Pathian chu, a nin hrâttu, ki hla a ni. A ni saninhringtu a ni.

³Saninhringna tuikuang ata, râifân takin tui chôi roi,

⁴Kha ni khan chu hiang hin ti ta nin ti: Rengpa inpâk unglân, ar hming chôiindôm roi, A sintho chu a mi hai hril unglân, A'rhming inthang lam hi inpuang roi.

⁵A sintho roiinpui tak sika hin, Rengpa chu inpâk unglân, Rammual pumpui hi inhril roi.

⁶Zion tânga omhmun khuarhaio, Râifân takin zâi unglân, khêk suak roi; Nin laia om, Israel mi irthiang chu a roiinpui ok a ni.

Isaia 13

Pathianin Babulon hrem a ti

¹ Babulon chungchâng chu, Amoza nâipa Isaia ihmu chu:



- ²Tâng irsângna hmuna irsinsiana târ unglân, sipaihai koisamhai unglân, kho lâripâk tak kul mikot chu doi hrangin nin kut leh inthem roi.
- ³Keima ngêtin ki mi indanghai thu ki pêka, ki mihriam songhai, a hrâthai chu, ki ningmur insumna hrangin ki ikoi a ni.
- ⁴Tânga irhâi omhai khi irngai roi, ram tin ata nam tinrêng honghai, irhâi a ni duah; itinrêng Rengpa'n a sipai râl doi hranga a ibukhai a ni.
- ⁵Kôlkil ata hong an nia, irvân irsângna ata zuang chum an ni, Rengpa'n a ningmurna hriamhreiiin ram pumpui insiat a ti.
- ⁶Khêk sup sup unglân, Rengpa nikhua chu anai ta, itinrêng thotheiin siatna intungtir a ti.
- ⁷Khasikin, mi tinrênghai hrâtna tôm a ta, an phûk inthing a ti.
- ⁸Irtha'nvâiin intakna tuang an ti, nâiha ise angin inhrôm an ti; an ichina an hmuin chu irzakpui irhlôm an ti.
- ⁹Rengpa nikhua hong tung a ta, a ningmurna an lang tena chu, ramhai chu inthim a ta, a sûnga om mi sualhai chu irhmang an ti.
- ¹⁰Irvâna ârsi le sikhovârhai khi, an vârna tôm a ta, misa suak khom inthim a ta, tha khom vâ ta no ni.
- ¹¹Hnuai hi a sual sikin hrem ki ta, mi sualhai khom an sual sikin hremhai ki ti; mi lâripâkhai irsongna chu inboi ki ta. Mi nunsia le irpâkhai chu irhnuai an ta.
- ¹²Rângachak hlutak a ivâng angin a thi khom tôm an ta, Ofir rângachak a itôm angin, mihriam irhniamtir ki ti.
- ¹³A ningmur a hong tung tena chu Itinrêng Rengpa'n irvân khi inhnîngtir a ta, irnêng khom nok a ta, a omna hmun ata nok a ti.
- ¹⁴Sakhi intân le belra ensui loi an indarh ang hin, mâni mi omna hmuna panin an rama fe zit an ti.
- ¹⁵An ihmu murdi invithai an ta, an ichel theihai chu khandai leh thathai an ti.



¹⁶An nâitesenhai an mithmuin vîk that pehai an ta, an inhai khom ram zoi a ta, an dôngmahai siatpui pehai an ti.

¹⁷Babulon doi hrangin Media mihai kin phûthaia, sum irzuk loiin, rângachak khom lôm no nihai.

¹⁸An thal chôihai leh ruathartehai kâp thathai an ta, nâitesen inrenna nei no nihai, nâipang inrenna hlek khat khom nei mahai.

¹⁹ Reng ram khua roiinpui tak, Babulon kho hoitak, Kaldaihai irsorpui ngai chu Rengpa'nirhniamtir a ta, Sodom le Gomora khua ang khan!

²⁰Tûte om ta no nahaia, sat lam hong panhai khomsian, tûte lût ngam no nihai. Arab mikhual inzinhai khomin puan in sung no nihai. Belra entuhai khomin an belrahai irngampui ta no nihai.

²¹Ramchâra ramsahai om an ta, chînribukin sip zoi a ti, suitililhai om an ta, ram kêlhai irdâina hmun ni a ti.

²²Kul binga khan sihal inrung an ta, rêng in hoitak sûnga khan ine inhrâm an ti. Babulon siatna zoro a hong nâi ta, a sùn a hong tung vâng ta.

Isaia 14

Sala intâng hong kîrna

¹Rengpa'n Jakoba-hai chu inrenhai a ta, Israelhai inthanghaiin an rama inomtirhai a ti; khan ram dang mihaiin hong thop hai an ta, Jakoba in mihai chu thop hai an ti.

²Khan mihaiin hruaihai an ta, an omna hmun intunghai an ti, khanchu Israel in sêng mihaiin Rengpa rama khan nupang le pasalhai la nei an ti; suaka infetirtuhai kha suaka om an ta, anni dengintheitirtuhai chung a roi la rêl an ti.

Babulon rêng mithi khuaa

³Khanchu, ni beidongna irthokin, sin intak inthotirnahai ata, Rengpa'na'rngamtirhai nikhuaa chu hiang hih la ni a ti.



⁴Hi êsêlna hla hin Babulon rêng la khêkkhum ni a ti, “Itina mani ta, a ni soisaktu chu an thim val tâka! rângachak khopui khom ite ar hâi om ta maka!

⁵Rengpa’n mi pualoihai khianghrol chu an khiakpai ta; roirêltuhai khianghrol chu;

⁶mi tin ningmur pumin an vîkhaia, nam tin ningmur puma tûte ikhap nang loa dengtheina roirêlnahai chu.

⁷Irnêng chung hi a’rngama, an thim vol vola; hla an hong sak suaka.

⁸A ni nangma thu sikin meisâr thinghai chu an loma, Lebanon tânga sidar thinghai khom irhniamtira ni om ata chu, a phûr hrangin tûte hong ta mahai, tiin.

⁹“Hnuai tiang ata Seol chu ni hong tungna nghâkin, a ibuai a ni ta; mithi hnuai hruaituhai murdi chu nangma zârin an phut nôka, nam tina rênghai chu an rêngtoihmun ata a hong kaithoihai ta.

¹⁰Annihai khan nang chongpuiin, hiang hin hril an ti. ‘Nangma khom keini anga hrât loi mo ni inih tâk? Keini om angin ni iom ma ni ta?’

¹¹Ni inlalnahai chu Seol-a hruai irhmangin a oma, ni perkhuang irhâi le: chokchonâl chu ni hnuai omin, thil irngêhaiin nang an ikhel a ni ta,’ ” tiin.

¹²O sikhovâr, zîng tianga nâipa, itho mo irvân ata ni itâk? Nam tin inrîltir thei, itina mo hnuai teh ni tâk tâka?

¹³Ni lungrîla chu, Irvâna hong fe ki ta, Pathian ârsihai khêla khin, ki rêngtoihmun indomirsâng ki ti; an inkhômna tâng, hmâr tianga omna khan toi ki ta; sûm nêka irsângin om ki ta.

¹⁴Anchungtakin om ki ti, ni ti ngaia.

¹⁵Khan, nikhomsian seol irvân irsâng kôla om khan hruaiin om ni ti.

¹⁶Nang a hmu murdi’n nang en irdîp an ta,

¹⁷“Ama hi kêng hnuai inhnîngtira, ram tin inhnîngtirin, rammual hi an chârîn, kua omhai irhmangin sala omhai an mâni in sîng tianga tîrhai ngai loi,” tiin ni thurchi la hril an ti.



¹⁸Nam tina rênghaiin a tam dôrin, an in tianga lungthia zâlin,

¹⁹nang chu a'rzung hong mông thar intirom takin, râlin an thata, khandaiia sunin, khur sînga lunghai tukrivo angin ni thâna irthokin hlataka pai suakin ni oma. Ruak hnuaia sirpha angin.

²⁰Ni ram nin siattira, nikhua le tui ni thathai sikin anni laia phûmin om no chi ni. Thil saloi thotuhai irhming chu kumtuangin sâm ni no ni.

²¹An hong thoi khomin, hnuai chung a hin khua a sip lolina hrangin an puhai sualna sikin an nâihai that hrangin tumin lân, iti'n.

²²Khanchu, annihai doi hrangin irsiam ki ta, sipaihai Rengpa'n a ti.

²³“Phît insiat ving ki ta, sarku omna hmun le dialdôkin siam ki ti,” ItinrêngRengpa thu suakin a ti.

Pathianin Assuria insiat a ti

²⁴ Itinrêng Rengpa irhmingin hiang hin a ti, “Tho ki itum chu tho ki ta, a sa ki iti chu hlochuk a ti.

²⁵Assuria chu ki ram sînga intem a ta, ki tânghaia sirpha ki ti, a ringkol khom ki mihai ring ata pai pehai ki ta, thil rika inpêlhai chu la pai pehai ki ti.

²⁶Rammual pumpui ta hrangin hi hi ki itho tum chu a ni. Nam tinrêng hai laia ki kut ki'rlek a ni ta hi,”

²⁷Itinrêng Rengpa'n tho a nuam ta. Tu mo a sût ngam hrang? soisak hrangin a kut a lâng ta, tu mo la dan thei hranga?

Filistia mihai Pathianin insiat a ti

²⁸ Reng Ahaza thi kumin hi thu hi a zuang tunga,

²⁹ Filistia mihaio, nangni an ivîkna hmol a kiak ta, râiinfân mai no roi, mirûl chu thi khomsian, a tûr la hong hring thei a ta, a irtui ata rûl vânvuang la hong chang a ti.

³⁰Rengpa'n a mi inriang chaninvâihai infâhai a ta, chardonghai chu irtharngam takin irngam ta an ti. Nangnihai chu nin nâihai le châmin thi nin ti, a la thi thei loihai chu tuk thathai ki ti.



³¹Filistia kho tina mihaio, khêk unglân, nin rêngin chi ta roi; hmâr tiang ata kêllaiher a hong khû so, sôl inhre loi sipaihai so,

³²Filistia ram palaihai chu, itin mo ki isanhai hrang? Zion chu Rengpa inding a nia, amaa khan intakna tong, a mihai tûk lût an ta, tiin hong ni ta a ti.

Isaia 15

Pathianin Moab insiat a ti

¹ Moab chungthu chu zân khat sângin Ar khua soisakin a oma, Moab chu a dok taa, zân khat sângin Kir khua khom soisak a nia, Moab chu a dok nôk ta.

² Dibon mihai chu Pathian biakna hmun irsânga chap hrangin an fea, Moab mihai chu an lu an ep inkola, hnermul an voipaia, Nebo le Medeba khua an irzuk nôk tâk a ni.

³ Kholâi dunghaia bora puan silin in sûnga le kholâi dunghaia khom milung hoiloi takin an chapa.

⁴ Hesbon le Elealeh mihai irtha'nvâiin an khêka, Jahaz ata an hong inhriat thei a ni. Moab sipaihai khom, phûkinthingin an khêka, an zâm a'rzal ta.

⁵ Moab hai sikin ki milung a na tâka, Zoar le Eglath-Selesia hai tenin, râl chiin an intâna, senkhathai chu Luhit tunga khan chap pumin an fea, senkhat chu Horonaim tiang an fea, chardong takin an chapa.

⁶ Nimrim tui a kang tâka, pârhai chu a chuaia, a cher tharhai khom ite thil hring om thei ta maka.

⁷ Khasikin an sum la neisun sunhai leh Phoram vadung râla fe ta an ti.

⁸ Khêk irhâi Moab le ramrihai khan a oma, an ikhêk irhâi inring chu Eglaim khuahai inhriat thei a ni; an irhâi inringhai chu Berelim khua dênin inhriat thei a ni.

⁹ Dibon vadung tui khom thisen angin a oma; Dibon vadung chungga, hi nêka thil irkhêl ual intungtir nôk ki ti, Moabhai lai ata rothai chungga le, kha rama la om sunhai laia kâmkeibaknei inlêngtir ki ti.

Isaia 16



Moabhai hrang lungzîngna

- ¹Ram roirêltuhai hrangin kêlbelrahai chu Sela kua ramchârna hmun ata Zion nâinu tâng tiang khan chôi unglân.
- ²Khanchu, Moab nâinuhai chu vate irbu ata râiphîta vuanhai angin Arnon vadunga khan om an ti.
- ³A'rfûk ni ti pe'n lân, roi ni rêl pe ro, ni râifân chu sîn lai taka inthim angin om sianlân, irzûlpaia omhai chu irbîk ta ri sehai; a rothai chu chel ta loiin.
- ⁴Moab-hai ata irzûla omhai chu, ni kôla om ri sehai, an ta hrangin an siattirtu kôl ata irbîk theina ni ri se; mi huang ngaitu khom ite ni loiin a om thei tâk sikin, insiatnahai om ta maka, a êsêltuhai chu hi ram ata hi om ta no nihai.
- ⁵Khanchu rêngtoihmun kha chu, inren irhlômna pungin om a ta, kha ina Davida puan ina khan, mi inkhat roirêlin, roirêlna fel zongin, thil fel inrangtaka thoin, toi a ti.
- ⁶Moabhai chu an lâirpâkna thu ei inhriat angin, an chong irpâkna le, an irsor le an ningmurna thuhai le an irsongnahai chu ite bêin bê ni maka.
- ⁷Khasikin Moabhai chu Moab mihai chung a khêk an ta; Kir-hareseth grep inhrolhai chu milung hoi loi pumin la an ti.
- ⁸Hesbon loihai a chuai zoia, Sibma grep hruihai le, nam tina an rênghaiin a kung sa la omhai khom inkhiakhai rem rum an ti. Jazer kua dênin an chia, ramchâra an omsuama, a ônhai zârin, tuipei an irzâm kâi ta.
- ⁹Khasikin Sibma grep râng chu Jazer châin châ ki ta; O Hesbon le Elealeh, ki mitrithi leh hin buak ki ta. Ni bu âtna le sîn lumhai hin irdoina thu an tungtir ta.
- ¹⁰Irhuanhaia khan a lôma raifân hmêl om ta maka, grep irhuan raifânnahai chu om thei ta maka, grep ra sôm hrang khom om ta mah. A lôma khêk irhâi inlang thei zoi ta mah.
- ¹¹Khasikin ki sûnga rîlhai khom Moabhai inrenna sikin perkhuang irhâi angin ar hâi a oma, ki phîng khom Kir-heres inrenna sikin perkhuang irhâi angin a om zoi ta.



¹²Khanchu hiang hin ni a ti, Moab a hor lang tena chu bozôla nuama sôlin chongchai hranga a hmun irthianga a hong tena khom hlochuk no ni.

¹³Hi hi Moab chungchâng Rengpa'n ki kuanga a insâr chu a ni.

¹⁴Atûn hin chu Rengpa'n, "Irhloa a kum inkung kum thum sângin Moab roiinpuina chu om ta no nia. Mi tam zaphai khom sian a thi zoi loi mi tômte an la oma, a la omhai khom ite tho thei ta no nihai," tiin a hrila.

Isaia 17

Pathianin Suria le Israel hrem a ti

¹Damaska chungchâng chu: Damaska chu kho sûnga tep khom ni ta no nia, thil saloi omna ang mai ni a ti.

²Aroer khua khom rotsanin om a ta, kêlbelra omna khua ni ta a ti. Irtharngam takin sâhai om an ta, tûte'n inhnotpai thei ta no nihai.

³Efraima rama ite kul om ta no ni, Damaska ram khom om thei ta no nia, Suria rama a dama la omhai khom Israel roiinpuina chuai ta angin om a ti, itinrêng Rengpa thusuakin a ti.

⁴Kha ni tena chu Jakoba roiinpuina irhmang a ta, ar chonga, khannisian hon riang ok nôk ta a ti.

⁵Bu âttuhaiin Refaim-ah thôl bu an ât zoia, ât sel la om pherphur ang hi la ni an ti.

⁶Oliv ra tâk zoi sai, a rêla la om ta thei loi, a vîk irsânga minli ringa la om ang hi la ni an ta, Israelhai Pathian Rengpa thusuakin a ti.

⁷Kha ni tena chu mihaiin a siamtu hon hria an ta, Israel mi irthiang chu thâr an ti.

⁸Kut le an isin maichâmhai chu uksak ta no nihaia, anni isin Aseri le mirimhoi hâlna maichâmhai chu a en khom en nuam ta no nihai.

⁹Israelhai makunga Hiv mi le Amor mihai khopui mâksanhai ang khan an khopui satakhai chu rotsan an ta, a ram zoro tung a ti.



¹⁰Nangni saninhringtu Pathian nin irnghila, nin zôkna lungpui chu inhre nuam loiin. Enhoi takin irhuan nin sinhaia, nam dang pathian biak nin uara,

¹¹Nin iphun thei dôrhai phunin hong pâr khomsian, a ra irhmal hrang om no ni, buaina le a na hek ta loi nikhua a hong tung ni tena chu.

Hmumâk ngai namhai insiat an ni

¹²A mipui tamtak irhâi, tuikhanglian irhâi anga om le nam tina an khêk irhâihai chu tuilian irhâi anga omhai chu na!

¹³Nam tinhai chu tui irhâi inring angin khêk an ti. Rengpa'n hâlhai a ta, irngam an ti, tânga bu'rsi phâivua'n a isêm inlênga nêngpila a isêm inthek ang hin.

¹⁴Khohloi tiang chu ichi an iom angin, zîng tiang chu chi hrang om ta mahai, hi hi a nin rûk pe nuamtuhai dongtum chu a ni.

Isaia 18

Pathianin Ethiopia hrem ni a ti

¹ Ethiopia varâla vuang irhâi anga omna rama om,

²kha mihai khan Nail vadung hong zuiin irkuang chînte hong chôiin palai an hong tîra, Nin rama kîr roi, palai hrâthaio, nam hrâthai le sinthotheihai, mi irnak nei le inrual, tianlai ata mi ichiom mihai omna, vadung tamtak irkân theina rama khan;

³rammuala om murdi irnêng chungga siphaio, tâng sîpa irsinsiana an itâr lei thîr mai unglân, bekul irhâi le'ngai roi.

⁴Rengpa'n hiang hin ki kuang a ti, “Om chian unglân, ki omna hin thîr mai ki ti; kholum laia sûm a irthiang ang hin, bu ât zoroa irdo sûmmizun ang hin”, tiin.

⁵Grep pâr a hong chila, a ra tâka, khannisian a ra a hmin mâna chil angin Ethiopia mihai chu an râlhaiin soisakhai an ti.

⁶An ruakhai chu ramkâra, irmu le ramsahai fâk hrangin masan an ti; kholum laiin irmuhaiin fahai an ta, phalbi tiang chu ramsahaiin fahai an ti.



⁷Nam hrât le sinthothei hai, mi isora, hmêlsahai chu, tianlai ata mi lei ichihai ngai chu tui tamtak luangna hmun ata kha, Itinrêng Rengpa irhminga phua, a omna hmun Zion-a khan, thilpêk chôiin hong an ti.

Isaia 19

Pathianin Aigupta hrem a ti

¹Aigupta ram chungchâng thu: sôm irsâtak laia chuangin Rengpa chu Aigupta ram a pana. A makunga khan Aigupta rama millimhai inthing an ta, Aigupta mihai rot an ti.

²Aigupta mihai chu, Aigupta mihai ngêtin indoitirhai ki ta, ulenâi irhuang an ta, urênghai irdoi an ti. Khua le khua bial le bial irdoi an ti.

³Aigupta mihai chu irzûlhai ki ta, an irfûktirhai chu insiat pehai ki ti, millimhai, dôitheihai, mithi châ theihai, tasân theihai inpathai an ti.

⁴Aigupta-hai chu hruaitu pualoi tak kuta pehai ki ta, rêng sual takin an chung roirêl a ti, Rengpa itinrêng Rengpathusuakin a ti.

⁵Nail vadung chu kang a ta, lizôlhai khom inlang ving a ti.

⁶Vadungtehai le a lampuihai khom kang a ta, a mirim innam lul a ta, phâiruang le changpân khom chuai a ti.

⁷Ivapanghai chu châr rulin om a ta, an thil phunhai khom phâivua'n sêm inchâr a ti.

⁸Nga cheltuhai khêkin chap an ta, Nail vadunga irkuai pai le lên vôrhai chu, hlochuk thei no nihai.

⁹Puan pat thohai ngai khom, buai an ta, puan zerhmi không theihai khom an chardong a ti.

¹⁰Puan không theihai irzal an ta, irhlohai ngai beidong a ti.

¹¹Zoan khua hruaituhai into lam chu! Faroa mi vârhai khom into angin an irfûktir pehaia; tianlaia mi vârhai le rênghai thu inhriattu kin ni, irti pumin. Itin mo Faroa kuang an ihril thei hrang?



¹²Kho tiang mo mi vârhai an om? Aigupta-hai hrangin itinrêng Rengpa sintho hrang hih hril infelin, irchutihai ta ri se.

¹³Zoan khua hruaituhai chu into an ni, Nof khua hruaituhai khom mi huang hmang an ni. An hruaituhaiin an hruai insualhai ta.

¹⁴Rengpa'n an lungrîl inchong an siat pehaia, Aigupta mihaiin ite tho theina nei mahai; ikhêkin an khêk mai ta, zu'nruia miluaka irpol ang hi an ni.

¹⁵Milian le mi chîn, irchong le inriang, tûte Aigupta ram ta hrangin tho thei nei ta mahai.

Aigupta mihaiin Rengpa biak an ti

¹⁶Kha ni tena chu Aigupta mihai chu nupang angin an thâiindôp a ta; ItinrêngRengpa'n anni soisak hrangin a kut thâk chi pumin inthing pumin om zoi an ti.

¹⁷Itinrêng Rengpa'n Aigupta a isoisak hrang dân, ar hâi an inhriat viat khomin Judai ramhaiin lei chi an ti.

¹⁸Kha ni tena chu Aigupta ram kho ringa sũaga Hebrai chong hmang an ta, itinrêng Rengpa irhming sâmin chonginkung an ti. Anni laia khua inkhat chu, "Haheres" ti an ti.

¹⁹Kha ni tena chu Aigupta ram sũaga Rengpa hrang maichâm siam an ta, Aigupta ramria lung phun an ti.

²⁰Kha kha Aigupta rama, sipaihai Rengpa hrangin, irsinsiana le inhriatna ni a ta; dengintheitirtuhai sikin Rengpa la hong koi an ta, khanchu ama'n saninhringtu le inzôktu tîr a ta, ama khan annihai chu sansuak a ti.

²¹Rengpa chu Aigupta mihai kuanga inlang a ta, hâlirvôm thil inhlan le irbôlnahai inhlanin chubai mûk an ta, Rengpa makunga chonginkung an ti.

²²Rengpa'nAigupta mihai chu soisak a ta, khannisian indamtirhai nôk a ti. Rengpa tiang kîr an ta, an chongchainahai irngaiin, indamtirhai a ti.



²³Kha ni sîn tena chu Aigupta ram ata Assuria ram dênin lamlian fe thei ta a ti, Aigupta le Assuria mihai chu irpan thei mai an ta, Pathian chubai mûk suam ta an ti.

²⁴Kha zoro tena chu Israelhai chu Assuria le Aigupta irangpui ni a ti, kha nam inthumhai kha rammual ta hrangin satvurna ni a ti.

²⁵ Itinrêng Rengpa khan sat a vur ata, “Ki mi Aigupta mihaio, ki kut suak, nangni Assuria mihai, nangni ki irtan, nangni Israel mihaio, bor nangni pe ki ti,” la ti a ti.

Isaia 20

Irsiansiana neiin deipu korongin a om

¹Assuria rêng Sargona thupêk angin sipai uliantakin Filistia khua mi Asdod chu a doia, an lâk pea.

²Kum thum lei fe tâka khan Amoza nâipa Isaia chu kekok bun loiin, bora puan sil ta loi hrangin Rengpa'n thu a pêka, a iti angin a thoa; korongin kekok bun loiin a oma.

³Asdod khua an lâk kumin Rengpa'n, “Ki siahlo Isaia chu kum thum sêng kekok bun loiin korongin a oma, ama hi Aigupta le Ethiopia chungchânga irsinsiana le thilirkhêl ni a ti.

⁴Hiang hin Assuria rêngin Aigupta mi an ichelhai le Ethiopia mi sala hranga an ihruaihai, nâipang khom ulian khom, koronga kekok lua bun loiin an pin irlangin sehai a ti. Aigupta ram chu mualinphoi ok hrang a ni.

⁵Ethiopia lei tûng hraia, Aigupta lei song ngaihai chu, beidong rakin an chardong ok a ti.

⁶Kha zoro a hong dênin chu, hi tui kôla omhai hin, ‘Ei lei tûnghai hraia, Assuria rêng kôl ata ni san le nin zôktir hranga ei lei irhnêlhai hi chanlamboi an ni hi! Einihai hi itin mo kin bingin kin irsûnghual thei hrang?’ ” ti an ti.

Isaia 21

Babulon siat hrang hmu chungchâng



¹Babulon chung thu chu: kèllaiherin ramchârna a inher angin ram chiom tak ata siatna hong tung a ti.

²Intângna in ichiom tak a ni'rhmutira, kâng inzôina tui a'rsok but buta, inrûk ngaituhaiin an inrûka, Elam sipaihai, imo nin la ien mai, Media sipaihaio, kulhai kha doi ta roi ba, mi dang charindongtirtuhai chu inhek paihai ki ti.

³Khasikin kin thinga nâiha isê angin ki konghai hi a na zoi ta, kûn pumin ki oma, ite inhre ta ma ung. A ni sirpha saa ite inhre thei ta ma ung.

⁴Ki lu a inhnâi zoi ta, ki ibuai ok a ni ta, ki nghâkhmo lungdâi ni sîn chu, keima hrangin ichiom zoro a ni.

⁵Khalâi an lei irfûka, toina hrangin zâmpher an lei dâpa, fâkin an in tâka, nin phûk insum unglân, hruaituhaio, nin phohai siam irfûk roi.

⁶Rengpa'n ki kuang hiang hin a ti: "Fe'n lân, râl hrung hrang mi sehai ro, ni ihmu murdi hril pehai roh.

⁷Sakor chungchuang a bopa honghai chu, sakuartunga chuanghai, satakin enhai roh."

⁸Râl hrungtu a khêka "Ka pu irpuk irsânga ki ngîra, a sîn a zân zâl loiin ki hrung mai," tiin.

⁹ Sakor chungchuang a bopa honghai, an hong tung thuta! "Babulon khua a siat ta, a siat ta. An millim pathianhai an irtantir pehai rem rum ta," râl hrungtu'n a ti.

¹⁰Ki mi Israel hruaia khit thunghaio, Israelhai Pathian Itinrêng Rengpa'n Thurchi a nin hriattir ta, nin kuanga khom ki inpuang a ni ta.

Edom chungchâng

¹¹Duma chung thu: Edom ram ata an ni hon sama, "Râl hrungtu, zân mo an sang ta? Râl hrungtu zân mo an sang ta? iti'n.

¹²Râl hrungtuin, "Khua a vâ hrang a ni ta, zân hong thûl hrang a ni ta, an hriat ni nuamin chu hong nôkin lân, ni hor don nôk ro," a lei tia.



Arabia chungchâng

- ¹³Arabia chung thu: Dedana mi, sahai le Arabia rama riakhai chu,
- ¹⁴Tema khuaa mihaio, tuiinhrâlhài hrang tui dâi hong la unglân, râi irzûlhài hi bu leh lei donhai roi.
- ¹⁵Khandaihài le khandai kêlsua sai pumin, thal ngul sia raka irdoina ichiom tak ata hong an ni.
- ¹⁶Rengpa'n ki kuang hiang hin a ti: "Irhlo ngai mi a sùn tepa kum khat a kâi tena Kedara inlalna chu hek a ti.
- ¹⁷Kedara mi huaisen thalkâp mihài chu, tômte vai a thi zoi loi om an ti," Rengpa, Israelhài Pathianin a ti.

Isaia 22

Jerusalem chungchâng

- ¹Inlârna irhôr chung thu chu: Imo nin ithôna inchung sîpa teh nin lui vinga?
- ²Khopui lu chung a rika, an khêkin an chîar lul ta, nin mithihài khom khandaia that chu ni mahaia, irkâpnâa thi khom ni mahaia.
- ³Nin hruaituhài an rota, thal inkhat khom kâpnahài loiin an chelhaia, nangni an ihmu dôr nangni an chela, ram hlataka intân ta khom unglân.
- ⁴Ni rotsan ving roi, ki mithihài hi, châhài hrang ki ni, tûte'n nin thâi no roi.
- ⁵Inlârna irhôra hin chardongna nî mi hruaia omin, Rengpa itinrêng Rengpa'n a hong intungtir ta hi te. Khua kul banghài chu an suk siata, chardong irhâiin tâng tin an tor zoi ta.
- ⁶Elam sipaihài chu thal kok chôiin sakor tâlia an chuanga, Kir mihaiin an pho an kêlsuaa.
- ⁷Nin ram phâizôl inchamna hmuna, an tâlihài an irngamtira, sakor chungchuang mihài khom kul mikot kôla an ngîra.
- ⁸Judai ram saninzôkna an insiat zoi ta. Kha zoro khan neinun sianaa râltukfam nin lâksuaka,



⁹Davida kho kulbang a chim lai kha nin hmu vinga, dîl thanginta tui kha nin chôia.

¹⁰Jerusalem khuaa inhai khom nin en vinga, senkhat chu kul bang siathai phôna hrangin nin seta.

¹¹Khokul chung a tuipang nin siama; dîl milui ata tui zuang zôk nin sianaa. Tian ata hi thu tung hrang lei hriltu hi taksôn mak chêia.

¹²Kha ni khan chu, Rengpa itinrêng Rengpa chapa khêk hrang le lu ep inkola, bora puan sil hranga titu khan;

¹³khannisian innuipumin nin rai a fana, sehrât le belra thatin bu khalai nin doa, zu buala nin oma, “Fâkin in ei ti, nangtûk chu thi hrang ei ni,” nin tia.

¹⁴Itinrêng Rengpa'n ki kuang a ihril, “An dam sîng chu, hi thil soal thona sika hin ngaidamhai no ning, kei Rengpa itinrêng Rengpa'n ki ihril tâk hi chu,” tiin.

Sum enkoltu Sebna kuanga thu tung

¹⁵Rengpa itinrêng Rengpa'n hiang hin ki kuang a ti: Tho rêng sum enkoltu Sebna kuanga va fe'n lân, hiang hin va ti roh:

¹⁶“Tu ngân mo ni ini, ni irtan hrang ni izong mai? tâng sîpa lunga ni zâlna hrang ni izong,

¹⁷Irngai ro, mi poimo tak ni khomin lân, Rengpa'n nang hrût lik a ta, nang dêngzuan a ti.

¹⁸Bôl angin nang hrût a ta, ram lianna taka nang dêngzuan a ti; kha khan ni isongtak ni tâli kôla thi ni ta, ni puhai inzak an irhmu ok hrang a ni.

¹⁹Ni sinna masan ni ta, hruaitu ni nitna ata tâ ni ti.

²⁰“Kha ni chu ki siahlo, Eliakima, Hilkia nâipa chu koi ki ta,

²¹ni songkol irfual chu ama inngâktir ki ta, ni kongkhit khom inkhittir ki ti. Ni thuneina murdi ama pe ki ta, Jerusalem-a omhai le Judai ram mihai hrangin pa ni a ti.



²² Davida in sâng mihai châbi chu a kuta bâng ki ta, a inhong sai chu tûte'n khâr thei no nihai, a ikhâr tâk chu tûte'n inhong thei ta no nihai.

²³ Irnêng châra chopui angin det takin phun ki ta, a in mihai hrangin songinruk tak ni a ti.

²⁴ “A urêng le ar chi suanpârhaiin song mai an ta, an innang murdi bêl bûrhai khom an irngat ving a ni.

²⁵ Itinrêng Rengpa thusuakin hiang hin a ti: Kha ni tena chu irnêng inthûk taka phun chu inhnîng a ta, irthôl a ti. Ama irngattuhai hekna ni a ti,” Rengpa'n a ti.

Isaia 23

Foiniki-hai chungchâng

¹ Tura khua chung thu chu: Tarsis irkuang neituhai chu, khêk an ta, inhai chu irkuang irngamna ten khom a siat zoi ta, Kupra chiaiphoi nin dên tena kêng kha kha nin inhriat.

² Tuikhanglian kôla omhaio, dâihrekin om roi, Sidon khua bepâr thohaio, tuipuilian tak irkânin bepâr nin thoa;

³ Sihor phâia bu, Nail vadung kôla vâng chu nin zu'rchôka, ram dang tiang nin zuar nôka,

⁴ O, Sidon khopui mual ni inphoi a ni ta, tuikhanglian inthûk taka khan, “Nâihâ irvei loiin, nei khom nei ngai ma ung, nâinupang le pasal infa inlianhai ngai ma ung,” nang a iti pe a ni ta.

⁵ Tura siatnahai hih Aigupta-haiin an inhriata, ar khêl an ti,

⁶ Tuikhanglian kôla mihaio, chiarpumin Tarsis tiang irkân ta roi.

⁷ Hi hi tianlai ata kho det, nin irsongpui ngai chu! Tuipui râla kho thar sât hrang, hi khua ata hi mo a isuak ngai?

⁸ Renglukhum mihaiin an inkhumtira, an bepâr thohai ngai chu mi roiinpuihai an ni, an dukan thotuhai ngai khom mi irngaiirsâng ngai an ni. Tura chung a thil hong tung chu tu itho ma ni?



⁹Itinrêng Rengpa'n a ti a ni, an irsongpui ngai roiinpuina a heka, an mi inzakomhai chu mualinphoiin an om ta.

¹⁰Nail vadung kôl angin nin ramhai tukirlet unglân, Tarsis mihaio, irkuang irngamna nei ta mak chêi.

¹¹Rengpa'n Tuikhanglian chung a khom a kut a thâk, Reng ram tamtak a hril insiata, Kanaan mihai hmunpui, insiatpai hrangin Rengpa'nthu a pêka.

¹²Sidon dôngmate irthiang, mi inêpsia zoinu, irsor ta ngai no chi ni, Kupra chiaiphoi tiang intân khomin lân, zôk ual thei no chi ni.

¹³Tura khuaa ram sahrâng lêngna hmuna siamtu, Assuria ni loiin, Babulon hi a ni; kho sêng irhualna'n kul irsâng an sina, a kulhai an seta, kho sêng chu a chim zoi ta.

¹⁴Tarsis irkuang chalaituhai khêk unglân, nin hmunpui a siat zoi ta.

¹⁵Kha tena chu rêng inkhat inlal hun sênga chu, kum sômsari sêng chu Tura khua hi tûte'n inhre no nihai; Kum sômsari a hek zoi le chu Notizuar hla, hiang hi ni a ti.

¹⁶Tûte'n nan hre ta loi nangma notizuar, perkhuang irva'n kho sêng irfangin lân, irhâihoi tumin hla hoitakhai sak ro, nang an inhriat thei nôkna hrangin.

¹⁷Kum sômsari a hek zoi le chu Rengpa'n Tura khua chu en nôk a ta, a itho ngai dên tho nôk a ti, rammual hmun tina irzuar nôk a ti

¹⁸A imanhai chu Rengpa hrangin inhlân a ta, thup ta no nia, se chian thei no ni. Rengpa makunga omhaiin a tui a thâi fâkna hrang le sil le kai sa irchôkna hrangin hmang an ti.

Isaia 24

Rengpa'n rammual hrem a ti

¹Rengpa'n Irnêng hi inlet a ta, irhmangtir a ti. Kai illettir a ti.

²A sênga omhai hi kai thekpai ving a ti. Mi papai le deipu, siahlo le a pu, siahlonu le a pi, ar chôktu le a zuartu, an pûktirtu le a pûktu, an tângtirtu le an tângtu, an tuang tum chu irang ving a ti.



- ³Irnêng chu bun inrong ni a ta, insiat vingin om a ti, kha thu khaRengpa'n a lei hril sai tâk a ni.
- ⁴Irnêng hi châra ngûi ruaiin om a ta, rammual chu beidongin om a ta, irnêng irvân khom ngûi a ti.
- ⁵A sûnga omhaiin irnêng hi an porinchetira, dân zôm loiin thupêk khom pom nuam mahai, kumkhua Thuthung ite bêa bê loiin.
- ⁶Khasikin irnêng hi khosâl a ni tâka. A sûnga omhaiin an sualna ra an fâka, mihriamhai kângin an oma, a thi zoi loi chu tômte an ni.
- ⁷Grep râng a chuaia, Uain khom a itôm si sit a ni ta, raifân ngaihai an ngûi zoi ta.
- ⁸Mikuar inchoka khêka lâmhai ngai, irhu a dâi zoi tâka. Perkuang inper irhâi inhriat hrang lua om zoi ta mah.
- ⁹Uain inin hla khom sak ta mahai. Zu thum an in khomin a khâ in angin an inhriata,
- ¹⁰Khopuihai khom a siatin a ngûi zoi ta, an inhai an kala, lût thei ni ta mah.
- ¹¹Beidongin kholaidunga an khêka, Uain in hrang an nei ta no sikin, a râiinfân hmêl tûte om ta mahaia, irnênga lômna rêng om ta mah.
- ¹²An khopuihai a siat zoi tâka, kul mikothai khom an suk siat zoi ta.
- ¹³A ra an inok thâk Oliv kunghai khom, Grep râng an inot phiar sai tâk ang hin rammuala nam tin la hong ni an ti.
- ¹⁴A la damhai chu lômin khêk an ta, khotâng nun ata Rengpa roiinpuizia chu khêk suakpui an ti.
- ¹⁵Nisua tianga mihai khomin Rengpa chôindôm an ta, Israelhai Pathian Rengpa irhming chu tuipui kôla omhai khomin inpâk an ti.
- ¹⁶“Kôlkil ata, mi dikhai chu chôindômhai roi,” tia hlasak irhâi inhria ei ti. Ki'rzal ta, ki'rzal ta, ki lu chung a rik! a ni hnôltu'n a ni hnôl maia, a ni ihnôl dân khom a irkhêl a ni.



¹⁷Hnuai mihaio, thilirkhêl tak hong tung hrang a ni, irnêng chima delpha hi nin maton a ni ta.

¹⁸Thil ichiom hmua intânhai chu, irnêng chim siatnaa tâ an ta, khatak ata la hong suakhai chu, an omna hmun hmîmin kai pehai mai a ti. Irvân tukver irhongin ruapui hong tho zut zut a ta, irnêng pumpui inhnîng a ti.

¹⁹Irnêng hi a koi chita, irnêng hi irhmangin a om vinga, irnêng hi a saterengin an hnînga.

²⁰Zu'nruai angin hon hnîng van hnîng a ta, irnak irvun boi angin om a ti. Sualnahai hi irkhêl takin irtetpui a ta, thoi ta no ni.

²¹Kha tena chu chung tianga sinthotheinahi le irnênga rênghai Rengpa'nhremhai a ti.

²²Suaka intâng khurpadopa siakhômhai angin rênghai chu khumhai a ti, inhnunga soisakhai hrangin sehai hluk a ti.

²³Tha le misahai khom inzak an ta, Zion tânga Jerusalem, Tinrêng Rengpa chu rêngtoihmuna toi a ta, ulianhaiin a roiinpuina hmu ngai an ti.

Isaia 25

Inpâkna hla

¹O, Rengpa, ki Pathian ni ni, nir hming chôindômin nan pâk ki ti, Thilirkhêl tamtak ni thoa, Tianlai ata ni lei irfûktir chu, Iamom takin hlo a chuk ngaia.

²Khopuihai chu nin siattir theia, A kulhai khom nin chimtira, Nam dang khopuihai ram zoiin, siam insa ni ta no ni.

³Khanchu nam hrâthaiin, nan pâk an ta, Nam sualhai omna khua tinin nang chi an ti.

⁴Inriang le changpui innanghai hranga kul ni nia, An char a dongin chu an hor bîk ngaia, Sûn misa luma dâihlîm ni chang pehaia.



⁵Phâivopuiin bang a inam ngai ang hin, Mi sualhaiin an lohai ngai. Ram inrôpna hmuna meichok ang hi a ni. Khannisian nangin nam danghai tia le'rsonghai nin dâihaia, Sûm inthimin misa lum a indâitir ang hin.

Pathian hruai roiinpui a sinsiam

⁶Hi tânga hin Itinrêng Rengpa'n mi murdihai hrangin hruai inthe a ta, Uain thum a sa chi le a hnînghai le, sâ khom a tui zât inzenin sinsiam a ti.

⁷Ki tânga hin mi murdi, nam tin irkhu theitu beidongnahai irkhu indâi a ti.

⁸Rengpa Pathianin thinahai chu invol a ta, a mihai mitrithi hui infâi a ti; rammual pumpuia a mihai inhnêa omhai khom om ta no ni, Rengpa'n kha kha a insîr tâk a ni.

⁹Kha zoro tena chu, "En ro, ama hi kin Pathian chu a ni. Ama kin iama, a ni zuang isan a ni ta. Ama hi Rengpa chu a nia, ama kin iama, a ni saninhring sikin lôm ei ti," la ti an ti.

Pathianin Moab hrem a ti

¹⁰Rengpa'n Zion tâng hi saninzôk a ta, Moab chu fapon êk khura an ipai ang hin chîlin pai a ti.

¹¹Tui irhliaituhaiin tui irhliai hranga an bân an iphar angin phar an ta, khannisian Rengpa'n an mualphoina chu irhnuaitir a ta, an kut theithiamhai khom inboi pehai a ti.

¹²An kul bang irsânghai khom inchimtir pehai a ta, nêngpila chim rumin om a ti.

Isaia 26

Pathianin a mihai inhnêtirhai a ti

¹Kha zoiin chu hi hla hih Judai rama sak an ti: "Khopui iamom taka ei lênga, ei zôkna hrangin kul bang a ni siam pea.

²Kul mikothai inhong unglân, nam iamomhai hong lût ri sehai. Thil dik tho ngai namhai chu.

³Dettaka nangma kuanga irnghathai chu irtharngam takin nin omtira.



- ⁴Rengpa chu kumtuangin iam mai roi, Rengpa chu kumtuanga zôkna lungpui a ni,
- ⁵irsâng taka omhai khom a kai irhniamtir theia, an omna kho iamomhai an siata, an kul bang vâiphin an changtir ngai.
- ⁶Ama khan ke'nbâihai an irvâka, an inuamna tiang an pan ngai.
- ⁷Mi dikhai lampui ni siam nuama, an fena hrang nin tûn pehai ngai.
- ⁸Rengpa khasikin ni nuam lam anga fe hrangin lampui zongin nang ki nghâk. Ni'rhming inhriat mai hi ki inuamtak a ni.
- ⁹Zân a hong ni'n, nang kin nang ual uala, a ni ki'rtha hin nang a irzuk a ni, irnêng chung a ni roirêl hrang hi, a sûnga omhaiin roirêlna dik inhre ta an ti.
- ¹⁰Mi sualhaiin inren hlo ngai khom sianlân, thil dik tho irchu nuam ual mahai, dikna rama khom hin thil sual an tho maia, Rengpa roiinpuina chu hmu nuam mahai.
- ¹¹Ni kut nir lek khomin hmu nuam ngai mahai, ni mihai ni inren lam hi irhmutirhai roh. Hmuhai sian mualphoi irla ri sehai, ni râlhai hranga meiri-al laia khan, kâng irhmang ri sehai.
- ¹²Rengpa'n lungirngamna a ni pêka, kin sinthohai khom hi, nangma ni itho pe ving a ni,
- ¹³O, Rengpa kin Pathian, rêng dang kin chung a hin an inlal ngaia, khannisian nang vai hi kin rêng chu ni nih.
- ¹⁴An thia, hring thei nôk ta ngai mahai, an irtha khom thoi nôk ta no ni. Anni chu ni hremhaiin inhriat theiin om ta mahai,
- ¹⁵Rengpa'n ei nam a nin pungtira, a nin liantira, ei omna ramri a ni'rzatir pea, nangma chôindômin ni iom a ni ta.
- ¹⁶Rengpa hi an chardong zoro'n nang an pana, anni chu ni hrema, khannisian anni'n nang an koi mai ngaia.
- ¹⁷Nupang nâihâ isê anga tuangin, Rengpa ni makunga kin om.



¹⁸Nâi vong angin kin oma, nei thei ual loiin. Kin ram khom sînghual thei ma unga, ite tho thei nei ma ung.

¹⁹Ni mi lei thihai chu thoi nôk an ta, an takpumhai thoi nôk a ti. Nêngpila zâl tâkhai har nôk an ta, râifân takin zâi an ti. Hnâ chuai tâk, irdo'n a inhartir nôk ngai ang hin, a thi tâkhai khom Rengpa'nzuan harhai nôk a ti.

Hremna le indingthar nôkna

²⁰Ki mihaio, in sînga lûtin, in irkhâr khum unglân, Pathian ningmur a chum mâka chu lei irbi viat hi roi.

²¹A omna irvân ata Rengpa chu zuang a ta. an sual sikin hnuai mihriamhai hremhai a ti. Inrûka mi thathai irphuang an ta, an ruakhai khom pil irkhu zoi ta no nihai.

Isaia 27

¹Kha ni tena chu, Rengpa'n a khandai lianpa, ngaih tak chu Leviathan, tuiarûlpui intân Dragon irchok soisakna hrangin irlek a ta, that a ti.

²Kha ni khan chu Rengpa'n Grep irhuan inditom tak thu chu hiang hin hril a ti:

³Kei Rengpa hi a hrungtu ki nia, tiklai khomin tui ki buaka, tûte'n an tôn loina hrangin a sîn a zân ki hrunga.

⁴A chungga khan nuar ma unga, chuan infâi hrang hloi tam khom sianlân, infâiin hâl irhmangtir zoi ki ti.

⁵An râlhaiin keima ihrung an nuamin chu, keima hi ni hong irngeipuihai sian.

⁶Itika mani chu, Jakoba irchihai hin irzung la tha nôk ngêt an ti, Israel chu incherin hong pâr nôk a tih. Irnêng chung hi an ra la sip a ti.

⁷Israel chu anni vîk theitu'n, vîk zoi no nia, anni thata omhai rêkin that intam ual a ti.

⁸Sala om hrangin a tîr suakhaia, nisua phâivua saloi a'rngamtir ta.

⁹Nam dang maichâm lunghai chu, chinai lung angin an suk khoia, Aseri irlim le lung danghai an pai ving zoi hnunga, Israelhai sualna chu ngaidam ni a ti.



¹⁰Khopui kul neihai chu a chim zoi ta, kho ram a ni tâka, ramchâr hmun a chang ta. Khatak khan sâhai an lênga, an riakbuk, an lêngna a chang zoi ta.

¹¹Thing ônhai khom chârîn a tâka, Thingtua hrangin nupanghaiin an irkhôm a ni ta. Ite inhre thei loi nam an ni hih, a siamtuin lungthunghai loi angin, anni inren ngaitu hin lungthunghai mai ta no nih.

¹²Kha ni tena chu Rengpa'n Eufates vadung ata Aigupta tui dênin, bu ât angin, a mi Israelhai chu inkha khatin irfuanghai a tih.

¹³Kha tena chu bekul liantak tum an ta, Assuria rama irhmang tâkhai le Aigupta an imâkhai chu hong kîr an ta, Jerusalem tâng irthianga khan Rengpa chubai mûk an ti.

Isaia 28

Hmâr tiang ram halirchûna

¹Phâi hoitak kôla om, Efraima inrui thal âka om chu an tak pe. Zû'nruî pâr beta a ichuai angin an ichuan khopui, rênglukhum sa chu, chuai a ti.

²Anni doi hrangin mi hrât le hâi Rengpa indang chu, phâivua hor thok, irial zuang tâk, ropui vânsâng laia tâk anga tuilian irsok angin, an ram zuan nôr a ti.

³Efraima hruaitu inrui buaia mualphoi irsakhai chu, zuang sirchîlhai a ti.

⁴Ram hmun hoitaka om roiinpuinahai chu chûl an ta, fûrpui misa hong luma theipui ra irhmal anga, a hmin masataka irlem ang hih ni a ti.

⁵Kha ni tena chu Itinrêng Rengpa'n, a thi zoi loi la om, a mihai hranga rênglukhum roiinpui sil le kai satak ang ni a ti.

⁶Roirêltu chu roirêl theina pe a ta, kho hrungtu chu râl doi ngamna hâitak inneitir a ti.

Isaia le Judai rama deipu inruihai

⁷Deipu le ochaihai khomin, uain inruiin an khêka, uain le rakzu an in intama, an inrui buaia, an hong irtet an va irtet zoi ta. Deipuhaiin inlârna an ihmu ite donsui thei loi rakin an inruia, ochaihai khom ite rêl thei loiin an inruia.



⁸Bu nêkna hmuna khom an miluak an zama, porche takin an oma.

⁹An inhriat theina hrang tu'n mo ar chutirhai tum. An thu chu tu ngânin moh ar ngai nuam la om hrang? Irhnu nghei phinga nâipanghai hranga ma nih?

¹⁰Thupêkhai chu a horop malin, a bi bingin, iti tin ma nih, an ihril nuam! an tia.

¹¹Nam dang chong hmang intak tak hmangin, ki mihai hih Rengpa'n thu hril a ti.

¹²Lungngam taka irngam hrangin a fialhaia, khannisian irngai nuam mahai.

¹³Khasikin Rengpa thu chu an hrangin, a horop malte tein, zuang tung a ti. Khanchu, an lampuia irtet an ta, sâbe tuangin chel ni an ta, nangni hruaipai zoi an ti.

Zion ta hranga lung phûm

¹⁴Jerusalema ki mihai chung a roirêltu lâirpâkhaio, Rengpa thu hih irngai roi:

¹⁵“Thinahai le thu ei thung tâka, mithi khuahai leh chong ei irkhâm ta, soisakna tuipei hong lian khomsian, ni ngîm viat no ni. Irbuk theina hrangin ei irhuanga, zôkna hrangin minlak ei thoa,” nin irtia.

¹⁶ Khasikin, Rengpa Pathianin hiang hin a ti: “Irngai ro, Zion-a lung ki phûm ta, zôkna lung iamom tak chu, a kila lung poimo le hlutak chu ki phûm ta, a iam zoihai chu inhnîng no nihai.

¹⁷A ngîr indet theina hrang hrui chu roirêlna dik le, a kai indetna hrangin dikna ki ihmang a ni. Minlak thoa an irsûnghualna in chu irialin a dêng siata, an irbukna hmun chu tuilianin suat a ti.

¹⁸Thina le nin thuthung chu sût ni a ta, mithi kua leh nin chonginkung khom insiat ni a ti. Hremna tui hong lian khan nin rêngin nangni ngîm zoi a tih.



¹⁹A hong tungin chu nangni tân zoi a ta, a nê tin nangni tân intam mai a ti. Sûn zân om loiin lian mai a ti. A thu omzia hi inhre unglân chu, nin chardong ok a ti!

²⁰Inthuangna hrang om loaia zâlmun bong angin, silkai le puan bong hrai angin ni a ti.

²¹Perazim tâng chung a le Gibeon phâi ram a isiat ang khan, a thil tho hrang irkhêl ta tak le a itho hrang irkhêl ta takhai chu Rengpa'n zuang tho a ti.

²²Nin nuisan ual no roi, anino'nchu nin dongtum om no ni. Rengpa Itinrêng Rengpa'nram pumpui a insiat hrang a ni, Itinrêng ar fûktir zoi tah ti kin hriat.

Pathian vâi lam

²³Ki'rhâi hih inhre unglân, nin mikuar sung roi, ki thu hi irngai unglân.

²⁴Loi neitu'n chimu songna hrangin irnêng a ituk angin, an inrît ngot ni loiin,

²⁵irnêng an hong sinsiama, zira chi an hon theka, Gohu an hong songa, a songna hrang hmun chita an songa, hmun irhelnaa vâihmim an songa,

²⁶Pathianin an sin hrang a hrilhaia, ar chutirhai ngai.

²⁷Martûl lianpapai leh an vîk chîlhai ngaia, tâli leh khom bu chîl ngai mahai, hmol leh an vîk inchiltira, hmol leh a rahai an không ngai.

²⁸Gohu khom indi chitin nôl ual ngai mahai, a indi zoi lona hrangin sakor tâli leh chîl dân an thei.

²⁹Hianga vânahai hi Itinrêng Rengpa ipêk an ni. Pathian thil rêl hi chu a vârin a ifel a ni, hlo khom a ichuk ngêt ngai a ni.

Isaia 29

Jerusalem chungchâng thu

¹O Jerusalem, Jerusalem, Davida omhmun khuarna khopui! inren teh nin om bâk tâka! kum hni vêl hong ni sian, kûthai hmang nôk unglân;

²khanchu Jerusalem chu hor hual ki ta, chapin khêk an ti. Kho sînga thisen luang a ta, Pathian maichâm angin, sen huang a ti.



³Doi hranga irvo angin nangni hnôl ki ta, pil nang burkhummin dâi nang sung del ki ti.

⁴Irtetin zâl ngul ni ta, nêngpilin nang irkhu a ta, tasân theihai irsîr an ti, nêngpil ata hor chok ni ta,

⁵Ram doihai ngai, nam dang irruaihai chu, vâiphin indi angin indarh an ta, mi nungsiathai khom bu'rsi vuang angin irthekindarh an ti.

⁶Phâivuapui le hnîngnu le irhâi siat tak takhai le kêllaiher-hai le, kâng irhmang thei mei ir-al zun zunhai le, Itinrêng Rengpa chu zuar thok a ti.

⁷Jerusalem doi hranga nam dang sipaihai chu, a kul irhuala dengintehituhai chu, zâna irmanga thil ei ihmu angin hek nôk an ti.

⁸Phîngchâmin an irmang tianga bu nêk angin, a hong hara khop loi angin le tui inhrâla a'rmang tianga tui ina, a hong hara a tui a lan hrâl pe mai ngai angin, Zion tâng irhualtu nam dang sipaihai chu ni an ti.

Lei hriina taksôn loi

⁹A'rngai lam inhre loiin chaninvâi unglân, nin mit inchothir chian ta roi, Uain in loiin inrui unglân, rakzû irtem viat loiin khêk mai roi.

¹⁰Rengpa'n inmusuna phâivua nangni insêmtir a ta, deipuhai mit a tuam pehaia, a hmutuhai lu a irkhuhai a ni ta.

¹¹Nangni hrangin chu hi inlârna thu hih lekhabu irmanna sînga kop ang a ni. Lekha tep theihai kuanga, "Hong tep ro," tia pêk an nih. "Inkhop khak a ni sikin tep thei ma ung," a lei tia.

¹²Lekha tep thei loi kuanga, hong tep zâm hi ro, an hong ti lakin, lekha tep thei ngai ma ung, a lei ti ngaia.

¹³Rengpa'n hiang hin a ti: "Hi mihai hin an bâi vaiin an ni nâia, an hmûr vaiin an ni chôiindôma, an lungrîl chu hlatak a ni. Mihriamhai thupêk ang ringota an ni insâp a ni.

¹⁴Hi mihai hin ki itûng loi lam takin, thilirkhêl danglam tak tho ki ta, an mi vârhai vârna hek a ta, an mi theithiamhai theina om ta no ni," a tia.



Sabei hrang la om

¹⁵Rengpa ata an thiltum thuphai chu la'rfûk nôk an ti: Inrûkin thil an tho khomin, Tu moh hmua, tu moh an hriat hrang? an ti.

¹⁶A le tiang inzen thu an irngaitua ngai a ni. Bêlpilhai hin a vuaktu tiklai khom pha no ni? Thil siamhai hin a siamtu kuang, “Ni isiam ni ma ung,” a iti thei hrang ma ni? Thil indinghai khom hin, an dingtirtu chu, “Nin to bâka,” a iti thei hrang ma ni?

¹⁷Zoro sôtnotea Lebanon ram chu loi hmun sa ni a ta, loi hmun hoihai khom rampui chang zoi a ti.

¹⁸Kha ni tena chu kuarsêthaiin lekha an itep irhâi inhria an ta, a zîng laia om mitchohai chu, an mit meng an ta, hmu thei an ti.

¹⁹Inrianghai RENGPAА khan lôm an ta, invâihai khom Israel mi irthianghai kôla lâm an ti.

²⁰Mi pualoihai irhmang an ta, Pathian en nuam loihai irhmang zoi an ti. Thil sual tho murdihai irhmang an ti.

²¹Mi dang suala intuma, roirêltuhai rêl insualtira, thu chanlamboia mi dik intuangtirhai chu, irhmang ving an ti.

²²Abrahama santuhai chu, Jakoba irchihai thu hiang hin a hril: Jakoba chu mualinphoi ta no nia; a hmêl khom danglam ta no ni.

²³Ki ipêk an nâihai chu, an laia om an hmu tena chu, ki'rhming chôindôm an ta, Jakoba mi irthiang chu inzak an ti. Israelhai Pathian chu mahrip tho an ti.

²⁴Irtha tiang irhmanghaiin inhre thei an ta, a chiar nuamhai khomin ar chu nuam ta an ti.

Isaia 30

Aigupta leh thuthung ar fêna boi

¹Rengpa thusuakin hiang hin a ti: “Tehelzong nuam nâihai hi chu na! ki inuam loi lamin sin an thoa, keima thu ni loiin an chonga an sual chung a sualna an irbel zoi ta.



²Ni'rdon loiin Aigupta rama an fea, Faraa chu an zôkna hrangin an delnghaa, Aigupta lômna irfûkin an fea, mualphoi irla an ti.

³Khasikin, Faraa hrâtna chu nin mualinphoina ni ta a ta, Aigupta raifân nin itûng hih nin inzakna ni ta a ti.

⁴An hruaituhai chu Zoan an tunga, an palaihaiin Hanes khua an tung tâka.

⁵An irrualpui thei loihai nam sikin inzak tuang an ta, changpui thei loi, irzukrom loihai sikin inzakin mualinphoi an ti," a tia.

⁶Sim tianga ramsa chungchâng chu: Ram intak le ichiom, kâmkeibaknei nu le pa omna ram, rûlngannei le rûlvânkâi tamna rama, an irchômhai chu sakuartung an inpêltirhaia, a sumhai chu saringsei vuna an thuna. An irngeipui thei loihai nam an pêk hrang a ni.

⁷Aigupta chu ite ni ual maka, changpui thei ite nei no ni, khasikin, "Rûlpui omchian," nang ki iti a ni.

Nam tukullian

⁸Fe'n lân, an mit hmu ngêta irziakna khan irziak ro: kumtuanga inhriat maina hrangin lekha bua irziak lût roh.

⁹Tehelzong ngai nam an nia, nâi milak thei tak an ni, Rengpa thupêk irngai nuam loi nâihai an ni.

¹⁰A hmutuhai kuang, "Hmu no roi," deipuhai kuang, "Nin ihmu angin nin hril no roi, irngaihoihai kai nin hril ngai roi. Kin irtharngamna hrang vai nin hril hen roi.

¹¹Ni kiang pe unglân, kin kôla om ta no roi, Israel mi irthianghai thu hih hril mai ta no roi," an tia.

¹²Khasikin, Israel mi irthianghaiin hiang hin an ti: "Ki thu hih nin hnôla, nghaltôk songa vâi taka tho nin inthanga, nin irsongpui tak a ni ta.

¹³Hi thil sual hi nin tho tâk sikin lung bang irsâng tak, a chim va vâng tâk, hong puara chim ta hrang ang nin ni ta.



¹⁴Irdîn viat loia pilbêl vuak inkhoi, mei irling thun theia indom ngai angin, tui thâlna hrang khom om loi raka, vîk indi ni hrang nin ni ta,” a tia.

¹⁵Itinrêng Rengpa'n Israel mi irthiangin hiang hin a ti: “Hong kêr unglân, omchian ta roi, khanchu saninhring ni nin ti, chardong loiin iam unglân, kha kha nin hrâtna hrang a ni. Khannisian nuam mak chêia.

¹⁶Nuam ma ung, sakor chungu chuang kin ti,” nin tia, chuang ta unglân rot ta roi, Sakor intân hrât chungu chuang kin ti, nin tia. Kha nêka hrâtin nangni irzûl an ti.

¹⁷Inkhat hroka hruihrual thungin, âibanga nangni innôt pol an ti. Tâng sîp irsinsiana puan nin itârhai kha masan ving nin ti.

¹⁸Rengpa inrenna'n nangni a la nghâka, a khonzâna'n nangni a la hrung lai hin, Rengpa'n diktakin roirêl a ti. Ama nghâktuhai chu hoi pehai a ti.

Pathianin a mihai satvur a ti

¹⁹Nangni Zion tânga mi Jerusalem khuua omhaio, chap nôk ta no chin ni; changpui innanga nin khêk irhâi an hriatin chu nangni inren a ta, nangni donsui a ti.

²⁰Rengpa'n intakna le chardongna nangni intuangtir khom sianlân, nangni irchutu chu hla ual no nia, hmu thei zel nin ti.

²¹Chang tiang mo, vei tiang mo nin fe hrangin chu, “Ama hi lampui dik chu a ni, hi hin fe roi,” nin hnunga hong thiai thiai a ti.

²²Nin tangkarua tuamna le rângachak inluan millimhai chu intirom ti nin ta, pai nin ti, pai zoi a ni tah la ti nin ti.

²³Loia nin chimûhai chu rua inphâtir a ta, a ra satakin hong tam a ti.

²⁴Kha ni tena chu nin sa vâihaiin sûlhring tamna hmuna om an ta, sehrâtchal le sakuartung, sin zonga nin ihmanghai chu, fapôl izen infâi, michi-al angin inliak an ta,

²⁵Nin râlhai isem an nia, an kulhai a chim zoiin chu, tâng irsâng le mual pônga tui luang lona hmuna luang a ta.



²⁶A mihai sâbe tuam pehai a ta, an popnahai a dam zoi tena chu, tha khi misa nêkin vâ a ta, misa khom vâ irkhêlin hapta khat vâ irthûl sîn khatin vâ hrât a ti.

Pathianin Assuria hrem a ti

²⁷Hlatak atakhom nangni a en thei, en mai roi, Rengpa sinthotheina a hong inlang ta so, a ningmur meikhu angin ar zâm, milung chuk loiin a nuar so. A thu suak chu meiri-al kâng irhmang thei hrang angin a om.

²⁸A phûk irhâi chu tuilian lêt angin, ring tena tuia lût ang hi a ni. Nam tin theithâkin insiattir a ta, an bâia sakor thîrkam sê an ta, hruaihai a ti.

²⁹Nangni chu kût irthiang hmang phut tâk angin lômin zâi nin ta, Israelhai lungpui, Rengpa tâng panna, irhâihoi tuma an ife ang hin om nin ti.

³⁰Rengpa'n ar hâihoitak chu insuak a ta, a kut thâk chu mi tinin hmu an ti. A ningmur meiri-al chu kâng irhmang hrang anga irthokin phâivua rua hor soia irial tâk ang hin zuang tung a ti.

³¹Assuria-haiin Rengpa irhâi an inhriatin chu chipumin inthing an ta, a ningmur chu tuang an ti.

³²Irgam viat loiin Rengpa'nhruaihai a ta, Assuria vîk murdihai chu a mihai irbukin perkhuang le'rfûktir an ti. Assuria chung a kut thâk hrang a ni.

³³Assuria rêng hâlna hrang meipui irsiam sai a ni tâka, thing tamtak an thîn sa maia, a kâng hrangin Rengpa'n mei le kât ir-al tui angin zuan luangtir a ti.

Isaia 31

Pathianin Jerusalem hrung a ti

¹Changpui hrang zonga Aigupta rama fe sakor hrâtna irnghattuhai! sakor tâlia irnghat, an sakor chungchuanghai dârsuam a ngar sika ir-iam an ni. Israel mi irthianghai tiang irnghat nuam loiin, Rengpa lak irdon nuam mahaia.

²Ama'n chu a tho dân an hriata, thil saloi khom a tho dân an hriata, a thu sût ual no ni. Thil sual thohai chung a kut insum an ta, anni santuhai laia khom an kut insum sa an ti.



³Aigupta mihai hi chu mihriam pai pai an ni, Pathian ni mahai. An sakorhai khom hi sâ mai mai an ni, irtha ni mahai, Rengpa'n a kut an sumin chu changpuitu nei no nihai, an ichangpui khom irtet sa ta a ti. An ruaiin irtet that an ti.

⁴Rengpa'n ki kuang hiang hin a ti: kâmkeibaknei hâitaka inhrûm chu belrapuhai irhâi inhriatin, a phûkinthing loa chi viat loi angin, Itinrêng Rengpa Zion tânga hong suak khan chu, a tânghai zuang hâlhai a ta,

⁵vatehai an irbu hranga an ivuang ang hin Itinrêng Rengpa'n Jerusalem chu hrung mai a ta, hrung inhnêin sansuak mai a ti.

⁶O Israel mihaio, "A sân tehel pe khom unglân hong kîr nôk ta roi.

⁷Kha lai khan chu tukhom an sual ngai, tangkarua le rângachak millim an kut suakhai chu pai an ti.

⁸Assuria chu mihriam khandai ni loiin tuk that ni a ta, mihriam irlek loi khandaiin thi a ti. Rot sianlân khom ruathartehaiin sala chelthung an ti.

⁹Beidong takin an rêng thi a ta, a zîngbupa sipai hruaituhaiin an puan irsinsiana intânsan an ti. Rengpa thusuakin hiang hin a ti. Zion tânga a mei ir-al mai a ta, Jerusalema a lungthu khom hring mai a ti.

Isaia 32

Reng sa le dik

¹Irngai roh rêng dik inkhat hon lal hrang a ni. A ulianhai khomin diktakin roirêl an ti.

²Phâivuapui a tho khoma an irbîkna hrang, ruapui lai ata an hul theina hrang, ramchâra tui luang le tângchâra lungpui raifân angin om an ti.

³Ngûk takin thil thîr an ta, ngûk takin an mikuar sung an ti.

⁴Irhnôt loiin rêl an ta, itinrêng eninfel zoiin, chong nang loiin thu hril infel an ti.

⁵Mi sualhai chu tûte inza hlo no nihaia, mi huatirham chu irngaiirsâng hlo ngai no ni.



⁶Mi sualin chu thu siat a ngaituaa, thil saloi tho hrang ar ngaitua ngai. A sintho le a bâi suak chu Rengpaêsêl lam a ni; phîngchâmhai fâk hrang a lâkpaia, tuinhrâlhai in hrang a bunpai ngai.

⁷Mi huatirhamhai huatirhamna chu an thûk bâka! Thil sual tho an tum maia, minlakin inrianghai insiathaia, invâihai dika omhai khom insiat an tum ngai.

⁸Mi dikhaiin chu sin sa an ngaitua ngaia, Ama kha an isong ngam a ni.

Hremna le inding nôkna

⁹Khonupui om chianhaio. thoi unglân ki thu hih irngaitua roi. Nangni dôngmate, irtharngama omhaio, ki ihril hi irngaitua sabak roi.

¹⁰Zoro sôtnote zoia chu, nangni lêng irngam taka omhaio lan thing nin ti. Grep ra irhmal hrang nei no chin ni, thei ra irhmal hrang ite nei no chin nih.

¹¹Nuama lômhaio, chi ta roi, lungirngam taka zâlhaio, inthing ta nin ti, irkhek unglân korongin om roi, nin kongka khan bora puan bom roi.

¹²Nin irhuan irzukom, chîmu sana ngaihai kha, a siat tâk sikin nin rôp irchûmin chap ta roi.

¹³Ki mihai loi le an sahai chu hruirâng le hloitharin a sip zoi ta. Khopui hoitaka an omna ngai inhai khom, a siat zoi tâk sikin chap chian ta roi.

¹⁴Reng in an inronga, khua inlaltak chu a ram zoi ta. A mualhai le a irhrungna ngai in irsânghai chu rama sakuartunghai lêngna a chang zoi ta sikin ramsâ lêng ta an ti.

¹⁵Chung tiang ata irtha kin sip tena chu ramchârna hmunhai chu ram hring chang ta a ti, theikung irnoi nutin om a ti.

¹⁶Ramchârna hmuna diktakin roirêl an ta, ram satnahai khan diktakin sintho an ti.

¹⁷Diktaka thil an tho sikin, râl irvei loiin om thei ta an ti. Irtharngam takin kumtuangin om an ti.

¹⁸An in le loa ki mihai chu irtharngam takin, omna iamom lungngam takin om mai thei ta an ti.



¹⁹Kha tena chu rampuihai kha dâiruamin om a ta, khopui khom hmun hoitaka om thei ta a ti.

²⁰Tui hnâra thil phun ngai angin, sehrât le sakuartung inlêngtirhai chu hoi pehai a ti.

Isaia 33

Changpui zongna

¹Thil la'rh mang ngai loi, mi ta rok pehai ngaio! Mi ihuang ngai loi, mi huanghai ngai hin, nin rok zoiin chu inrûkna tong nin ti, nin huanghai zoiin huangin om nin ti.

²Rengpa kin chung a ni khonzâna insumin lân, nang kin nghâk mai, a ni tin kin hrâtna ni pe'n lân, beidong nia ni san inzôk ngai roh.

³Ni'rhâi inhriatin mihai an rota, ni zuang pûtin chu nam danghai an indarh zoi ta.

⁴Khâi intâm angin râl sum chu an irchua, a hrût hrangin an irvâk soi a ni ta.

⁵Chung tiang Rengpa chu a oma, a roiinpui vang na! Zion-a diktak le feltakin roi a rêl ta.

⁶Nin zoro vongtu a ni, a mihai chu a hrunghaia, vârna le inhriattheina a pêka, Rengpa chi hih an irchon hlutak a ni.

⁷En roh, an pasal sahai chu pên tiang an chiara, irngeina zongin an palaihai chu an ichap mur mur a ni ta.

⁸Lampui liannahaia irhu a dâia, lampuia fe ngam zel om ta mahai. Thuthung tuang zoi loiin an oma, irngeina thu zôm loiin, tûte inzak loiin.

⁹Ram chu a'rzalin a iram zoi a ni ta. Lebanon rampui a ngûi zoi tâka, Saron phâi khan ramchâr angin a om ta, Basan le Karmel tânga thing hnâ a chil zoi ta.

Rengpa'n râlhai a ngo

¹⁰Rengpa'n hiang hin a ti: "La hong pût ta hi rong, chôirsâng ki ta, ki roiinpuinaihai târinlang ta ki ti.



¹¹Thil chanlamboi nin ngaituaa, ite thodok nei loiin, nin thusuak chu mei angin, nangni kâng irhmangtir a ti.

¹²Chinailung hâla a ipuak ngai angin le chînribuk a ikângirvôm ngai ang hin, irhmang zoi nin ti.

¹³Hlataka omhai khomin ki sintho hih inhre ving roi, nâitenga omhai khomin ki sinthotheizia hi inhre ving roi,” a tia.

¹⁴Zion-a om mi sualhaiin an chia, sakhua ngaipoimo loihai chu inthing an ti. “Ei laia tuhai hin mo a ningmurna mei tuang thei hrang? Kumtuanga chok mai hrang hih tu mo tuang zoi hrang?” ti an ti.

¹⁵Diktaka sinthoa, thil sa hril ngai chu, irhuangna saloi nuam ngai loi chu, fâkinrûkna hmuna kut irdînthei thisen insuak hranga insâp nuam loi thil sual tho hranga kop nuam ngai loi mi chu.

¹⁶Hmun irsângtaka om a ta, kul bing chungga omhai angin zôk a tih, fâk hrang nghâkin tui irsam no ni.

Zoro inthang hong tung hrang

¹⁷Reng inditom tak hong hrang, nin mitin hmu nin ta, ram irzattak chungga roirêl a ti.

¹⁸Râl ni chi lai hai kha inhresuak nin tih, irhming koi ngaitu kha khôn moh a om ta? kua lei sâla, nangni lei tep theitu kha? la ti nin ti.

¹⁹Irtet kha hmu ta no chin nia. Irhâi inringtak, a chong fel loi, chong irhlôm an ihril inhre thei loi hmu ta no chin ni.

²⁰Kut ei hmangna hrang Zion kua hi thîr roi, Jerusalem kua hih en irkhi ual no roi, puan in hoitak, thon nang loi, a ngul phôi nang ta loi, a kai inrînna hrui chat ngai loi ang hi a ni.

²¹Khatak khan chu, Rengpa roiinpuina nin entir a ta, tui tamna rama, tui lam hoitak hmuna om ei ta, râlhâiin irkuang hong chôi thei loina hmuna, irkuang lian hong lût thei ta no ni.



²²Rengpa chu roi ni rêl pe hrang ni a ta, Rengpa chu ei hruaitu a nia, Rengpa chu ei rêng a ni, Ama'n ni hrung mai a ti.

²³An irkuang khitna hruihai a'rzûk pehaia, a ngul khit indet thei ta mahai. Puanzâr khom kai inrîntir thei ta mahai. An sumhai man pehai ei ta, a tam hrai sikin ke'nbâihai khomin irchu thei an ti.

²⁴Kho sûnga omhai khomin, "Dam ma unga" ti ngai no nihai, an sualhai ngaidam ni an ti.

Isaia 34

Pathianin a hmumâkhai hremhai a ti

¹Nam tinrêng hai hong nâi unglân, irngai hrangin hong roi. Irnêng le a sûnga omhai hong unglân, nin rêngin irngai roi.

²Nam tin chung a Rengpa ning an mura, an sipaihai laia a ning an mur pe a ni. Thathai ving hrangin a siahai ta, that hrangin ar fûktir zoi ta.

³An ruakhai chu pai hrang a nia, phûm hrang ni mah, thululin om a ta, tânghaia an thisen chu luang zuakin om a ti.

⁴Irvâna omhai khom khi râl angin, lekha angin irvân khi inzuatin om a ta, irvâna om murdi khi tâ an ti. Grep le theipui hnâ a ichil ang hin.

⁵Irvâna ki khandai chu ar siam zoi ta, that hranga inkung sai Edom mihai chung a zuang tunga,

⁶An thisenin Rengpa khandai chu irbual a ti, an thi kâi nuangin om a tih. Belra le kêl thisenhai, kêlchal thâi leh irbôl angin Bozra khuaa Rengpa irbôl a ti. Edom mihai thathai hluk a ta,

⁷anni pâla khan Sele-hai khom that sa ni a ti, sehrâtchal le a'rlâhai khom that sa ni a ti. An ram chu thisenin sip a ta, nêngpilhai khom a thâiin zô a ti.

⁸Rengpa'n phuba a lâk zoro a chuk ta, Zion ta hranga thuan nôkna zoro a phâk ta.

⁹Edom rama tuihai chu âlkatara chang zoi a ta, nêngpil khom kât mei chang a ti. A ram pumpui âlkatara kâng angin kâng a ta,



- ¹⁰ sîn zân that thei ni no ni, khu hlut hlutin om a ti. Thoithar om thei loi rakin ram zoi a ta, tûte'n va hro nuam ta no nihai.
- ¹¹ Tuivaârngoi le sarku om an ta, simbu le vaâkhai om an tih. Irnêng siam man a ta, Rengpa'n insiathai ta a ti.
- ¹² Reng chang nuam om no nihaia, hruaitu chang nuam khom om ta no nihai.
- ¹³ Reng inhai chu ilhlingin bôm a ta, irkul sêng khom hloi hruirâng bit zoi ta a ti, sialhai omna ni a ta, fapitenu bu bukkhômna hmun ni a ti.
- ¹⁴ Sanghar le Ine irsual mai an ta, sangharin a rualhai koihai a ta, kha khan sa'rkhêlnu lût a ta, irngamna hmu a ti.
- ¹⁵ Mirûl vuang theiin irbu nei a ta, irtui a ta, op inkêi a ti. A têhai op inlumhai a ta, râikosohai khom an chanpuinuhai leh omsuam an ti.
- ¹⁶ Rengpa lekha bu zongin lân tep ro, inkhat khom irhmang no ni, chanpui an inei ving hrang a ni. Rengpa'n thu a pêk tâka, a'rtha'n hruai khôm a ti.
- ¹⁷ An hrangin tasân an fel zoi tâka, ram indang infelin a om ta, kha kha an kumtuang hmun hrang chu a ni, an irchihai khomin lua mai an ti.

Isaia 35

Lampui irthiang

- ¹ Ramchâr le tângchai chu lôm an ta, Ram kol têt tût chu raifânin om a ti.
- ² Rama pâr sahai angin pâr suak an ta, râifân takin zâi an ti, Lebanon tâng angin roiinpui a ti. Karmel le Saron phâi angin enhoi a ti. Rengpa roiinpuina chu hmu an ta, kin Pathian satnahai le.
- ³ Bân hrât loihai chu inhrât nôk unglân, Irkhûk zenghai khom inhrâtir nôk roi.
- ⁴ Lungrîl sôlhai chu, "Ei Pathianin phuba la a ti, Nin milung inngar unglân, chi viat no roi, nangni thuan a ta, nangni saninhiring ngêt a ti," ti roi.
- ⁵ Mitcho tak mit chu invâr a ta, Kuarsêt mikuar invârtir pe a ti.



⁶Ke'nbâihai khom sakhi angin intân thei an ta, Chong theiloi khom raifânin zâi thei an ti. Ramchârna hmuna tui suak a ta, Tâng chârna hmuna khom tui luang suak a ti.

⁷Ramchârna taka dîl tui om a ta, ram ngûitak hong har suak a ti. Sihal tamna a lêngna hmuna chu phâiruang le sûl zîng dulin om a ti.

⁸Khatak khan lamlian om rum a ta, “Lampui irthiang,” ti an ti. Mi porinchehai fe no nihaia, hi hi a nih anni fena hrang lampui chu, a fe murdi, ni'ntohai khom hruai irhmang no nihai.

⁹Khatak khan chu kâmkeibaknei om maka, ram sahrâng khom hong ngam no ni. Hmu hrang khom om no ni. Irtan saihai fena lampui a nia.

¹⁰Rengpa irtanhai hong kîr an ta, zâipumin Zion pan an ta kumtuang lômna changin om an ti. Râifân lômin sip an ta, beidong le chapna om ta no ni.

Isaia 36

Assuria'n Jerusalem a insî

(2 Rng 18.13-27; 2 Tsn 32.1-19)

¹Hezekia kum sômhleiminli an lal kumin, Assuria rêng Senakeriba'n Judai ram khua, kul neihai murdi a doihai, a lâkpai ta.

²Assuria rêngin Lakis khua ata Jerusalem rêng Hazekia kuang, sipai tamtak le Rab-sakea tiang a tîra; dîl sakinta ual ata tui lampui kôla puan irsûkna hmuna lamlian kôla a ngîra.

³Reng sêngkua enkoltu Hilkia nâipa Eliakima irziaktu Sebna thurchi inhriattu Asapa nâipa Joa hai an va suaka.

⁴Rab-sakea khan, Hezekia hong hril roi; rêng roiinpui Assuria rêngin hiang hin a ti, “Imo ni irngatna bul ni inei, hiang dôra ni irsût nuam loi!

⁵Nang ki hril hmûrthiam ngot hin râltukfam le sipai hrâtna inlang thei ngai mah. Tu ngân mo ni la inghâk, hiang dôr ni ni tehel pe tâk?

⁶Hi lailuang khianghrol hi, a sintu kut sun hrangin Aigupta rêng Faroa chu a iamtuhai hranga khianghrol intung ang hi a ni.



⁷Rengpa kin Pathian kêng kin irnghat, ni itih mah ni? Ama biakna hmun irsâng le maichâmhai hih Hezekia nuam lam takin a son thi thiaia, Jerusalem le Judai ram mihai laia, hi maichâm vai hin ama ni ibiak hrang a ni, a iti Pathian kha moh nin la iiam mai?

⁸Ka pu Assuria rêng kuang chonginkung roh, atûn khom hin keima'n chu a chuang hrang mi ni hmu photin chu sakor sângni nang pe ki ti;

⁹Aigupta sakor tâli leh sakora irnghat ni ni'n chu itin mo ka pu sipai hrât loihai ni idoi thei hrang?

¹⁰Hi ram insiat hrangin Rengpa thu ni loa a zuar thon mo ni ni isôn? Rengpa'n chu hi ram hi hong beia insiatpai ving hrangin thu a ni ipêk a ni, tiin hril roi," a tia.

¹¹Eliakima hai, Sebna hai, Joa haiin Rab-sakea kuanga, "Lungkham takin Aramaik chongin ni siahlohai laia hin thu hril roh, kin inhriat thei ving kul kôla Juda omhai inhriat thei loi hrangin," a tia.

¹²Rab-sakea rêkin chu, "Ka pu'n hi thu hi nin rêng le nangni laia hril hrang vaiin ni hong tîr mah. Nangni ang dêna mâni êk fâka, an mizun in hrangin kul kôla omhai inhriat hranga a ni hong itîr a ni," a tia.

¹³Rab-sakea chu a ngîra Juda chongin inring takin a khêka, "Reng roiinpui Assuria rêng thu hi irngai roi.

¹⁴Rengin hiang hin a ti: Hezekia hin nangni huang sianlân, nangni san thei no ni.

¹⁵Rengpa'n ni hong san ngêt a ti, Assuria'n rêng khua hi zuang la viat thei no nih tiin Hezekia'n Rengpa hi iam hrangin nangni a ngên khomin iam no roi.

¹⁶Hezekia thu hi irngai no roi. Assuria rêngin hiang hin a ti:

¹⁷Hong suak unglân irngei ei ti; mi tinin mâni grep fa nin ta, mâni theipui man nôk nin ti, mâni tuipanga tui in ni ti. Zuang ki ta, nin ram anga ram sa bu le uain tamna ram, bu le grep hmun sana tiang nangni hruai ki ti.



¹⁸Rengpa'n ni san a ta tiin Hezekia hin nangni huang no ri se. Nam danghai hi enhai roi; an pathianhai hin Assuria kuang ata hi an san theihai mo?

¹⁹Hamath le Arpad pathianhai chu khôn mo an om zoi ta? Sefarvaim pathian khom khôn mo a om ta? Samari kua lua keima ata a sansuak thei mo?

²⁰Anni pathianhai khan hi ramhai hih an san thei no'n teh Rengpa nin itih khom hin Jerusalem kua hi inzôk thei ni mo?" tiin a tia.

²¹Rengin ite sâm no roi a ti sikin an dâihreka, ite ti pe mahai.

²²Khanchu, rêng sêngkua enkoltu Eliakima, Hilkia nâipa ziaktuhai, Sebna hai, thurchi inlêntu Asafa nâipa Joa hai chu puan thêr silin Hezekia kuang an fea, Rab-sakea thu chu an hrila.

Isaia 37

Rengin Isaia ar donna

(2 Rng 19.1-7)

¹Reng Hezekia'n kha thu kha an hriatin chu, a puan an potthêra, bora puan a sila, Rengpa ina a lûta;

²rêng sêngkua enkoltu Eliakima hai ziaktu Sebna hai le Ochaihai laia ulianhai chu bora puan silin Amoza nâipa deipu Isaia kuang a tîra.

³Reng Hezekia'n hiang hin a ti: "A vuan hin kin ta hrangin chardongna nikhua a tung ta, an ni hnuaisiaa, ite bê'n ni bê ta mahai! Nâi nei zoroa nu irzal taka om kin ang ta.

⁴Pathian hring hrilinsiat hranga Assuria mi tîr Rab-sakea thuhril khaRengpa ni Pathianin a len hriatsuak ta. Rengpa ni Pathianin an sîrtuhai kha soisak sian chu. Kin mihriam a dama la omhai hrangin chongchai ro, nang a ti," an va tia.

⁵Reng Hezekia mi tîrhai chu Isaia kuanga an va tunga,

⁶Isaia'n an kuang khan,Rengpa'n hiang hin a ti: "Assuria rêng siahlohain an ni manêp dân hi chi no roh.

⁷Irgai ro, thâidôpna lungrîl pe ki ta, thuthang hril ki ta, a rama kîr a ta, a ram sînga khandaiin that an ti, tiin nin pu kuang va hril roi," a tia.



Assuria rêngin insîna chong a tho nôk

(2 Rng 19.8-19)

- ⁸Rab-sakea chu a'rdîpa, Lakis ata Assuria rêng chu a'rsona, Libna khua a doi ti an hriatin chu kha lam kha a pana, a va hmu ta.
- ⁹Ethiopia rêng Tirhaka thurchi chu Assuria an hrila, Ama doi hrangin a hor siam ti an hriatin, Hezekia kuanga palai a tîra.
- ¹⁰Judai rama rêng Hezekia kuang, “Ni irngat Pathianin Assuria kuta Jerusalem chu pe no ni, iti'n nang huang no ri se.
- ¹¹Assuria rênghaiin an ram lua murdia an sintho, an ram a siatpui ti thu nin hriata; nangma te hi zôk thei ual no chi ni?
- ¹²Ka pahaiin an insiathai nam Gozan hai, Haran hai, Rezep hai, Telesar-ah om Eden hai kha an pathianhaiin an sanhai thei mo?
- ¹³ Kho tiang moh an om Hamath rêng hai, Arpad rêng hai, Sefarvaim khuaa om rêng hai, Hena rêng hai, Iva rêng hai kha an om zoi ta? zu ti ro,” a tia.
- ¹⁴Palai lekha zuang chôitu chu Hezekia'n a lei hmu'n chu a tepa, Rengpa ina a lûta, Hezekia'n Rengpa makunga a phara,
- ¹⁵Hezekia chu Rengpa kuang a chongchaia.
- ¹⁶“Itinrêng Rengpa, Israelhai Pathian, cherub chung a toi, nang vai hi Pathian chu ni nih, ram roirêltu ni nia, irnêng irvân khom hi nangma isiam a ni.
- ¹⁷O Rengpa ni mikuar lei sungin lân, irngai ro: Rengpa mengin lân, en ro; Pathian hring sôt hrang soh Senakeriba'n thu a hong ihrilhai hi irngaitua roh.
- ¹⁸O Rengpa, Assuria rêng hai hin nam tin an doia, an ram an insiat zoi ta.
- ¹⁹An pathianhai meia an hâl pehaia, annihai kha pathian ni ual mahai, mihriamhaiin thing le lunga an isiam pa pai an ni, khasikin a siat thei chu an ni ving.
- ²⁰Rengpa atûn hin a kut ata ni sansuakin lân, khanchu rammual murdia mihaiin nang vai hih Rengpa chu ni nih ti nan hre ving an ti,” a tia.



- ²¹Amoza nâipa Isaia'n Hezekia kuang mi a tîra: "A kuanga khan ni chongchaina chung irchuan le Assuria rêng Senakeriba chungthua,
- ²²Rengpa Israelhai Pathian thu hril chu hi hih a ni: Zion nâinu'n nang a en irhnuaiia, nang a innuisana, Jerusalem nâinu'n chu ni irot hi a lu nang an thikkhuma.
- ²³Tu mo ni innuisan, imo nang ar fê pe na? Tu chung a mo ni ikhêk? Tu chung a moh mualphoi ni irlâk? Israel mi irthiang chung a moh ni mah.
- ²⁴Ni siahlohai hmangin Rengpa a irfê pena chu, tâli chung a tâng irsâng takhai chung a ki fea, Lebanon tâng hai ki'rfanga, Sidar thing irsâng hai ki phûra, meisâr thing sa zâthai ki phûra; tâng irsâng rampui rîlhai khom ki'rfang zoi ta.
- ²⁵Tui ki sunsuaka, ki ina, Aigupta tuihai chu ki ke'n ki sira, kin kangtir zôia," ni ti ngaia.
- ²⁶Tian ata ki lei itumtak a nih ni tia, lan hre mak che mo? Atûna thil hong tung hi tiana ki lei irêl sai a ni. Kul nei khuahai nin siatpaia,
- ²⁷a sûnga omhai an chia, irtha'nvâiin mualphoi an irlâka muala hloisûl sipin, in chung sîpa ilhling chiak sipin, phâivua lum isêm inthêmhai khom, ki lei irêl sai a ni.
- ²⁸Keima chung a ni om dânhai, ni lût le ni suak khom kin hriat ving.
- ²⁹Ki chung a hin ni chiara, ni mualphoi dân ki len hriat zoi ta, ni hnâra hnâr kol irbun ki ta, patritui invol ki ta, ni fena hrang lama lei zam ki ta.
- ³⁰Reng Hezekia kuang, hi hi nangma hranga irsinsiana ni a ti: kumin chu farhli tûng nin ta, nakum khom hi farhli ngêt kha la tûng nin ti. A kum thumna tena chu chîmu thar song unglân, a ra fa ta nin ti. Irhuana grep phun unglân, a ra fa nin ti.
- ³¹Judai rama mi la damhai chu theikung irzung inthûk tak nei, ra tamtak ang hin la om an ti.



³²Jerusalem ata khom la dam suak hrang an oma, Zion tânga a thi zoi loi la om ngêt an ti. ItinrêngRengpa satirngaina khan hloinchuktur a ti.

³³Khasikin Assuria rêng chungchâng Rengpa'n hiang hin a ti: "Hi khopuia hin hong lût a ta, ite ma viat no ni;

³⁴phô leh hong doi no nia, irbîkna hrang pil khom choi no ni, Rengpa thusuakin a ti.

³⁵Hi khua hih keima le Davida zârin san ki ta, inzôk ki ti," a tia.

³⁶Rengpa itîr vântîrtôn chu Assuria-hai tuala fe a ta, mi nuai khat sîngriat le sâng ringa a thata, zîng an hong thoiin chu hnuai chu mithi ruakin a sip tâka.

³⁷Assuria rêng Senakeriba chu entinin a neia, en nuam loiin, Ninevi khuaa a om tâka.

³⁸An pathian Nisroka ina pathian biaka a kûn laiin a nâi Adrammeleka le Sarezera khan khandaiin an tuk thata, Ararat rama an rota. A nâipa Esarhaddona chu ama irthûlin an lal ta.

Isaia 38

Hezekia dam nôkna

(2 Rng 20.1-11; 2 Tsn 32.24-26)

¹Kha lai khan rêng Hezekia chu thi vângin a naa, Amoza nâipa Isaia'n a hong pana, a kuang khan, Rengpa'n hiang hin a ti, "Ni in sîngkua thu rêlinfel roh, thi hrang ni nih sikin, dam suak ta no chi ni," a tia.

²Hezekia chu bang tiang a'rheia,Rengpa kuanga a chongchaia,

³"O Rengpa ni makunga diktakin ki om ngaia, lungrîl irthiang irputin ni mithmua thil sa ki tho ngaia, khasikin lungkham takin nin hre maiin lân," tiin a chapa.

⁴Rengpa'n Isaia a hong chongpuia:

⁵"Thoiin lân Hezekia va hril ro, Rengpa'nhiang hin a ti: ni chongchaina ki len hriata, ni mitrithi khom ki hmu, irngai ro, kum sômhleiringa nang lan damtir nôk ki ti.



- ⁶Assuria rênga irthokin hi khua hih san ki ta, a khopui hi hrung khak ki ti.
- ⁷Rengpa'n a thuhiril hi tho ngêt a tih itiRengpa kuang ata nangma hranga irsinsiamna hrang chu hi hih a ni.
- ⁸Reng Ahaza dâr tena irkhîna chu danh sômin intôm-tir ki ti," a tia. Khan chu sîn dâihlîm chu sîn sômin an kîrtir nôka.
- ⁹Judai rama rêng Hezekia dam loi hong damtu khan hiang hin a'rziak:
- ¹⁰Tar kûna dam suak loiin, ki vânglai sîn mithi khua ki ihmang hrang ma ni ta, ki tia.
- ¹¹Mihring rama Rengpa hmu loiin, rammuala omhai hi irsabei ta ma unga.
- ¹²Belrapuhaiin an puan in an isetpai ang hin, ki omna in an ni setpai pea. Puan không an phoi zoia an inzuat nôk angin ki hringna hi an nin zuatpai pea, a ni tin ki irzal si sit hrang ma nih ki tia.
- ¹³Kôlvâr sûng chu changpui zongin ki khêka. Ki ruhai khom hi kâmkeibaknei isê khiak ang hin a oma. A ni tin irzalin ki'rzal si sita.
- ¹⁴Vangalsâng angin kin hrâm ngaia, vasu angin kin kur long long ngaia. Chung tianga thîrin ki mit an vûng zoi ta. Rengpa imanêpa ki om hi, a bul zuang tum ta roh.
- ¹⁵Imo ki itho ta hrang? ni ihril angin a hong tung ta, Ki tuangna sikin, ki dam sûng chu irlôi de det ki ti.
- ¹⁶Rengpa ni hrangin hring ki ta, Nangma hrang vaiin hring ta ki ti. Nin hrâtîrin lân, nin damtir ta roh.
- ¹⁷Ki ituangnahai hih ki satna hrang a lei ni, A nin rena, siatna khur ata a ni kêlsuaa, ki sual murdi a ni ngaidam ta.
- ¹⁸Mithi khua ata lômthu hril thei ni ma, A thi tâkhaiin chu inpâk thei ngai mahai, nêngpil inthûka tâk chu nang iam thei mahai.
- ¹⁹A hring a dama la omhai vai hin nang an inpâk thei. Keima atûna nang ki inpâk ang hin, pahaiin an nâihai thudik an inhrilhai angin.



²⁰Rengpa'n a nin dam ta, perkhuang sukin ama inpâkna hla sak ki ta, ki dam sâng chu Rengpa ina Ama inpâkna hla sak ki ti.

²¹Isaia'n, "Theipui ra inhmet indi unglân a sakhuai bêa khuap roi, dam zôi a ti," a ti kha.

²²Hezekia'n, "Rengpa ina fe thei ki ta, ti irsinsiana imo a inei hrang?" a tia.

Isaia 39

Babulon ata palai

(2 Rng 20.12-19)

¹Kha lai khan Balada'n nâipa Merodak-baladana, Babulon rêngin Hezekia damloi a dam nôk tah ti thu an hriatin chu thilpêk le lekha a hong thona,

²an chung a khan Hezekia chu a lôma, khanchu a sum siana in an entira, tangkarua, rângachak, mosola, sahriak mantam, a râltukfam murdi le ar chon laia hmu thei om ka chu an en zita. A rêng ina om a rêng ram sênga thil, Hezekia'n a inen loi om mahai.

³Deipu Isaia chu Hezekia kuang a hong a, "Kha mi hai khan imo an hong itho hrang? kho tiang ata hong moh an ini?" a tia. Hezekia'n, "Ram hlatak ata hong an nia, Babulon khua ata hong an ni," a tia.

⁴Ni in sênga i zât mi moh an hmuhai? a tia. Hezekia'n "Ki ina thil om murdi kin entirhai vinga, ki sum siana in khom an ien loi ite om ma," a tia.

⁵Isaia'n, Hezekia kuang khan, "Itinrêng Rengpa thu hi irngai ro:

⁶Irngai ro, ni ina thil om murdi, ni pahaiin a vuan sên tena an isiahai le, Babulon an lâk zoro hong tung a ta, ite an imâksan om no ni," Rengpa'n a ti.

⁷"Nangma inei ngêt, ni nâipasal laia senkhat chelhai an ta, an til la pehai an ta, Babulon rêng ina om an ti," a tia.

⁸Hezekia'n a dam sêng chu râlrvei loiin zôkin om hrang angin a le'rngai, Isaia kuang, "Rengpani thu hril chu a sa," a tia.

Isaia 40

Irtharngamna thu



- ¹Ki mihai hi lungngam sakhai roi, lungngam sakhai mai roi, nin Pathianin a ti:
- ²Jerusalem kuang irtharngamna thu hril lat roi, an ituang hrang chu insum hrang a ni ta, Rengpa kut chu a bâk inhniin an tuang ta.
- ³Irhâiin, “Ramchâra Rengpa lampui siam unglân, kin Pathian hrang ramchâra lampui intuantir roi.
- ⁴A phâinahai nelinbit unglân, tâng le mual omhai tuk irhnuaihai roi, a kôinahai intûntir unglân ar ang loihai ir-angtir roi.
- ⁵Rengpa roinpuina chu inlang hrang a ni ta, mi murdi’n hmu zit an ti,” Rengpa’n a ti.
- ⁶Irhâiin, “Khêk ro,” a tia. Ama’n chu, “Imo ki iti hrang?” a tia. Mihriamhai hi sûlhring an nia, an roinpuinahai khom sûl pârhai ang hi a ni.
- ⁷Rengpa phâivua’n a zuang zâpa, sûlhring a thêma, pârhai a chuai ngai. A ni, mihriam hi chu sûlhring anga om an ni.
- ⁸Sûlhring a châra, pârhai a chuai ngai, ei Pathian thu hi chu kumtuangin om mai a ti.
- ⁹Tâng irsânghaia lui maiin lân, Zion kuanga thu lômom chu inring takin hril ro, Jerusalem kuanga thu lômom chu inpuang ro, indîn loiin Judai ram khopuihai chu hrilhaiin lân, “Nin Pathian chu a hong tung ta,” ti roh.
- ¹⁰En ro, Rengpa Pathian chu mi hrât hongin a hong, a kut hrâtna hmangin roirêl a ta, a isansuakhai hruai a ta, a irtanhai infâhai a ti.
- ¹¹Belra hrungtu angin Belrahai infâhai a ta, a têhai chu pomhaiin, a puihai hruaihai a ti.

Hrilirkhi thei loi Israel Pathian

- ¹²Tu mo voikhatin tuikhanglian kha a kut zapha’n mo ar khî thei? Tu moh irvân khi a kuta inkhâpin irvân khi ar khî zoi thei hrang? Tu moh irnêng pil hi khilâtin a irtê zoi thei hrang? Tâng le mualhai hih tu mo phalla leh varh thei hrang?



¹³Rengpa irtha chu tu mo thunei thei hranga, Tu'n mo irfûktirin a kai hruai thei hrang?

¹⁴A bengvârna hrangin tu mo ar don ngai. Tu mo lamdik irhmutir thei? Tu mo inhriat theina irchutirhai thei? Thil tho hrang dân irhmutir thei hrang?

¹⁵Rengpa hrangin chu nam murdihai hi, baltizera tui mal tâk angin, tuala kebop kop ang hi a ni; Tuikhanglian kôla phâihai khom lung anga omin hrûtpai thei an ni.

¹⁶Lebanon tânga ramsahai chu Rengpa ta hranga irbôlna ruk no nia. Thing omhai khom tua ruk no ni.

¹⁷Nam murdi hi ama hrangin ite ni ual maka, Ite bêin bê no ni.

¹⁸Pathian chu tu leh moh nin itetûk hrang? I hai leh mo nin hrilirkhi ta hrang?

¹⁹Thil suk theihaiin millim an suka, Thil inluan theiin rângachakin an luana, tangkaruain ilhli hrang zîngziri an suktira,

²⁰Khaanga nei zoi loihaiin, thingtum an sintirhaia, a chat thei lolina hrang ang dôra theihai a pêkhai ngai. Annihai millimhai leh hin tetûk mo nin itum ma ni?

²¹Inhre mak chêi mo? nin irngai loi ma ni? A phut ata nangni an ihril mo ni ma! Irnêng irsiam dân hi inhre mak chêi mo?

²²Hi hih chu kôlkil irhual sûnga om a ni. A sûnga omhai hi chu ama ta hrangin chu kutpâr sûnga om ang a ni. Puanzâr angin irvân khi an phara, omna hrang puan in a isung ang hin.

²³Rêng roiinpuihai an lômtira, irnênga roirêltuhai ite innitirhai maka,

²⁴thing ei iphun hon cher thar, chîmu irzungthâk chak ang hi an ni. Phâivua'n a hong sêma a chuaia, phâivuapui a hong thoa, fapôl angin a rama.

²⁵Khanchu tuhai leh hin mo a ni itetûk hrang, tuhai ang dôr hi mo ei ini? Mi irthiang khan a ti.



²⁶Irvân tiang khin nin mit inlêngtir unglân, nin ihmuhai khi tu isiam mo an ini? Sipai rualhai anga hruaisuak ngaitu, ar hminga koi thei vingtu isiam ving an ni; thil a thothei hraia, ite irhmang ngai mah.

²⁷Israel irchihaio, ithoa mo, “Rengpa’n ei omdân a ihmu loi, ei Pathianin ite bêin ni bê ta ma,” nin iti?

²⁸Inhre mak chêi mo? Rengpa vai hi kumtuanga Pathian chu a nia, kôlkil minli sûnga om murdi hi, Ama isiam ving a ni.

²⁹A sôlhai an hrâtir theia, a’rzalhai an hrâtirhai thei ngai.

³⁰Thoitharhai sôlin an dang a châra, ruathartehai khom sôl hraiin an thal rak ngai.

³¹Rengpa nghâktuhai rêk chu, hrât inthar nôk an ta, Irmupui angin mitha leh uang kê an ta, Intân an ta, sôl no nihai, fe an ta, sôl inhre viat no nihai.

Isaia 41

Pathianin Israelhai lungngam sakna

¹Chômbunga omhai irngai roi, Nin mihai le’rsiam ri sehai, hong unglân hril sa roi, ni roirêl sai angin.

²A fena hmun tina a hrât maia, Nisua tianga nang a koitu hi tu moh a ini? rênghai, namhai a inhnêhaia, khandaiin nêngpil an changhaia, Phâivua’n bu’rsi a isêm invuang angin, a thal hmangin a’rzûl indarhai ngai.

³A’rzûlhai maia, ite pop viat loiin a’rzûl zoia, irnêng sir dop loi ang dôra hrât a ni.

⁴Hi hi tu moh a phut ata lei rêl, Thoitharhai chung a thil hon tungtirtu hi? Kei Rengpa hi a bul tumtu ki ni, a mongna khom keima ngêt ki ni.

⁵Chômbunghaiin ki sintho hmu an ta chi an ti, Kôlkunga omhai chu chi an ta inthing an ti. An irbuka, an hong irthok ta.

⁶An rual sahai chu an irchutirhaia, Mâni urênghai khom, “Chi no roi,” an ti.



⁷Thil incher mihaiin rângachak chung a buak inpuarin, an millim siam innâmtirhai khan, “A siam insa,” tiin a siamtu khan ar chutira, an hnîng loina hrangin thîr kalna leh an kal khaka.

⁸O Israel nang chu ki siahlo ni nia, O Jakoba ki irtan ni ni, ki rualpa Abrahamama inei ni nih.

⁹Kôlkung ata ki ilâksuak ni nia, A kil hlatak ata nang ki ikoisuak a ni. “Ki siahlo ni nih,” nang ki ti mai kha, Nang kin thanga nang hnôl viat no ning.

¹⁰Chi no ro, nang ompui mai ki ti, Ni charindong viat no ro, ni Pathian kêng ki ni, hrâtna nang pe ki tia, nang san ki ti. Ki kut chang tianga hrât tak leh hin nang chel ki ti.

¹¹Ni chung a ningmur inlâkhai ngai inzak an ta, mualphoi inla an ti. Nang a doitu khom ite ni ual no nia, irhmang ving an ti.

¹²Nang a doitu hai chu zong mai ni ta hmu ual no chi ni, nang a doitu hai chu an irhmang zoi hrang a ni.

¹³Rengpa ni Pathian hin nang chel mai ki ta, “Chi no ro, nang san ki ti,” Keima’n ki iti a ni.

¹⁴Israel mi, O Jakoba mi chînte ni khomin lân, “Chi no ro, nang san ki ti,” Rengpa thusuakin a ti. Israel mi irthianghai, irtan hrangtu ki ni.

¹⁵Irngai ro, bu chîlna khôl thar a ha ngaih tak nei angin, nan changtir ki ti. Tâng hai chîl ni ta, indi chit a ta, mual hai khom vâiphin chang zoi a ti.

¹⁶Zâp ni ta vuang inlêng a ta, kêllaiherin sêm irhmang zoi a ti. RENGPAA khan lôm ni ta, Israel mi irthianghai chu chôiindômin om an ti.

¹⁷Inrianghai le invâihaiin tui in hrang zong an ta, An hmu no khomin an dangchâr chu kei Rengpa hin sâmhai ki ta, Israelhai Pathian hin masan no ning.

¹⁸Mual le tângdunghaia tui inluangtir ki ta, irhôra tuihnâr inomtir ki ti, tâng chârna hmuna dîl siam ki ta, ramchârna khom tui luang a ti.



¹⁹Tâng chârna Sidar thing hai, thingri le irhmûi, oliv thinghai phun ki ta, ramchârna khan meisâr thinghai, khiangzâihai phun ki ti.

²⁰Kha kha mihaiin hmu an ta, kei Rengpa hin ki iti a nih ti inhria an ti, Rengpa Israel mi irthiang kutsuak a nih ti inhre ving an ti.

Pathianin millimhai a ot

²¹Nangni, nam tinhai pathian, thiamthu hril hrang nininei chu hril roi, Rengpa Israelhai rêngin a ti.

²²Hong hril unglân, thil hong tung hrang nin hril roi, a hong tung hrang kin len hriat theina hrangin, thil lei fe sai khom itina mo, hril infelin, lei ngaitua kin ti.

²³Thil hong tung hrang lei hrilna ni sian, Pathianin sîn maton nih ti len hriat kin ta, A siat moh a sa moh tho phot unglân, chi kin ta, nangni chi thei kin ti.

²⁴Ite ual chu ni mak chêi duah, ite thothei khom nei loiin, nangni chubai mûkhai khom intirom an ni.

²⁵Nisua tiang ata mi kin pungtira, Ki'rhming sâmin, hmâr tiang ata khom mi hong an ti. Bêl vuaktu'n pil a isir chîl angin roirêltuhai chu dialdôka sirchîlin.

²⁶Hi thil hong tunghai hi, "Ni tho'n dik," kin ti theina hrangin, tu tak hin moh nangni lei hril? Tûte lakin hril mak chêia, tûte hril loi zelin. Tûte'n nin thurchi lak inhre mahaia.

²⁷Zion mihai hril masataktu chu keima ki ni, "En roi nin mihriamhai hong so," tiin, thu lômom Jerusalem hriltu ki ni.

²⁸Millimhai chu ki hong enhaia, Thu ni hrilpui thei hrang ite hmu ma unga, ki irdonhai khom ite ni sâm thei mahaia.

²⁹An rêngin ite hmang zât om mahai, Ite tho thei khom nei mahaia, an millim sorhai hi ite an ini loi a ni.

Isaia 42

Rengpa siahlo



¹En ro, ki siahlo nang ki chel mai, ki indittak kin thang a ni; a chung a ki'rtha kin sipa, nam tinrênghai chung a diktakin roirêl a ta,

²khêksuak no nia, a hnuk inring no ni. Kholaidunga ar hâi inhre no nihai.

³Lâiluang châng no nia, meiser chok vi viat khom sêmthat ual no ni, diktakin roirêl a ti.

⁴Rammuala hin roirêlna diktak a om mân hin, sôl no nia, a bei khom indongtir no ni. Ram ronghai hin a thu an inghâk mai a ni.

⁵Pathian, irvân siamtu le kaiinphartu hin, Irnêng le a sûnga om indingtirtu, hringna phûk le irtha pe theitu, Rengpa'n hiang hin a ti:

⁶“Kei hi Rengpa chu ki ni, diktaka rêl hrangin nangni ki koisuak, ni bân irnak hrâtin nang ki san. Nangma hmangin mi tinhai laia thu ki thung ta. Nam tin invâr hrangin nang ki sia ta.

⁷Mitchôhai mit invâr hrang le, rôl sûnga om insuak hrangin, inthim laia om sansuak hrangin.

⁸Kei hi, Rengpa nin Pathian chu ki ni. Tûte'n ki roiinpuina nir koppui thei no nihaia, an nin pâkna khom millim irkoppui phal ma ung.

⁹Irgai roh thu lei hril ngaitu a hong tung ta, Thu thar inpuang ki ta, a hong tung mân nang ki lei ihril a ni.”

Inpâkna hla

¹⁰Rengpa inpâkin hla thar ngêt sak unglân, rammual pumpui hin inpâk ri sehai; Tuikhangliana fehâi le a sûnga omhaiin, chômbunga omhai le a sûnga omhai khomin inpâk ving ri sehai.

¹¹Ramchâra omhai le a sûnga kho omhaiin inpâk ri sehai, Kedara hai omna khuahaiin, ama chu inpâkhai sian, tâng sîpa irvâkin khêk ri sehai.

¹²Chômbunga omhaiin Rengpa chu inpâkhai sian, chôiindôm ri sehai.

¹³Irdoi hranga mi hrâthai irdoipui thei dôrin Rengpa chu a hor thokin a hong khêka, a hnuk a suaka, a râlhai lai ata a hrât lam chu an langtir ta.

Pathianin a mihai changpui a tum



¹⁴Sôttak sâng ti ual loiin, ki mihai ki dâisanhai hreka, atûn chu nâihâ irveiin kin hrûma, kin milung a na ta.

¹⁵Tâng le mualhai insiathai ki ta, sûlhring inchâr ki ta, lungpuihai chu insimhai ki ta, dîlhai khom inkangtir ki ti.

¹⁶Mitchohai chu inhre ngai loi lampuia hruaihai ki ta, an fe lolina hmuna fepuihai ki ti. Inthim chu sensâi ki ta, lampui irrual loihai irrualtir ki ta, annihai kha ki itho hranghai chu a ni, insel viat no ning.

¹⁷Millim iama, “Kin Pathian ni nia,” tituhai chu, duai an ta, mualphoi irsak an ti.

Israelhai inhriat thei loi

¹⁸Kuarsêthaio irngai roi, mitchohaio irhei unglân, en roi!

¹⁹Ki siahlo anga mitchô hi tu moh om, ki mi tîr anga kuarsê hi tu moh om hrang? Rengpa siahlo le a mi indang anga mitcho tu moh om?

²⁰Thil tamtak a hmua, khannisian zôm loiin a oma, mikuar a doa, khannisian inhre thei mah.

²¹Rengpa'n a dikzia inlangna hrangin A dân chôindôma roiinpui a inuam a ni.

²²(Khannisian hi mihaiin rokna le longhai an tonga, Sirhupa an tâka, intângna ina an intâng zoia; Sala hrangin chel an nia, a san hrangtu tûte om mahai.

²³Nin laia tu'n moh ama hi inhre nuam? Ngûktaka irngaitua hrang tu moh om?

²⁴Jakoba chu tu mo hrâtlâksonghai kuanga pêk, Israel chu tu mo hrâtlâksonghai kuanga pêk? Rengpa mo ni ma? A chungu khan thil sual an thoa, a lampui zui loiin a dânhai khom zôm loiin an oma.

²⁵A ningmurna chu a chungu an sum pehaia, Irdoina irkhêltak an tuang ta. Israel chungu ningmurna chu ar al tâka, an kâng innahaia, inhre mahaia, ite uksak nuam viat loiin an oma.

Isaia 43



Pathianin a mihai san hrang a inkung

¹Atûn chu, Rengpa'n hiang hin a ti: "Jakoba nang ki siam, Israel nang ki inding a ni, chi no ro, nang a'rtantu ki ni, Ni'rhming irlamin nang ki koi, ki ta ni nih.

²Tui inthûk ni pal lai khomin nang ompui ki ta, Tuilian khomin nang ngîm thei no ni, meipui laia fe khomin lân nang kâng no ni, Meidôn khomin nang hliai innatir thei no ni.

³Kei Rengpa hi ni Pathian chu ki ni, Israel mi irthiang ni saninhringtu chu, nangma irtanna'n Aigupta ki pêka, nangma le irthûlin Ethiopia le Seba ki pêka.

⁴Nang ki'rngaiinhlu ngôi ngôia, nang irngaiirsângin lung nang ki thunga, Nangma sikin mi dang ki hnôlhaia, Mi tamtak ki ihnôlhai a ni.

⁵Chi no ro, nang ompui ki ti, Nisua tianga nir chi omhai hong hruaihai ki ta, Nitâk tianga omhai bukkhômhai ki ti.

⁶Suak ving hrangin hmâr tiang hrilhai ki ta, kalkhumhai hrai loi hrangin sim tianga omhai hrilhai ki ti, ki nâipasalhai ram hlatak ata hong hruai unglân, ki nâinuhai kôlkung ata hong hruaihai roi.

⁷An rêngin ki'rhming irput an ni, ki roiinpuina inlangtir hranga ki isiam an nia, Ki kut suak zit an ni.

Israel chu Rengpa inhriatpuitu an ni

⁸Mit nei chaka mitchô le, mikuar nei chaka, kuarsêthai chu hong bukhai roi.

⁹Nam tinrêng irbukhai sianlân, chi tinrêng hong ri sehai. An laia hi hih tu mo a hril, tianlai ata lei insîr ta sai, an hril indik inhriatpuitu hong hruaihai sian, mihai inhriatin "A dik," hong ti ri se.

¹⁰Ki thu inhriattu ni nih Rengpa thusuakin a ti. Ki siahlo nang ki inthang ni ni, nin hre hrang le ni iam hrangin keima hi Pathian omsun ki nih ti inhriatpui hrangin. Ki om mâna om Pathian dang om mahaia, ki hnunga khom om ta no nihai.

¹¹Keima vai hi Rengpa chu ki ni, saninhringtu dang tûte om ta no nihai.



¹²Thil hong om hrang lam ki len sîr ngaia, Saninhringtu chu keima hi ki ni, keima vaiin nangni ki hril pe ngai a ni, hihai hi nam dang pathianhaiin tho thei mahai. Ki thu inhriattu ni nih Rengpa thusuakin a ti: Keima vai hi Pathian chu ki ni.

¹³Irnêng irsiang mân ata Pathian ki ni, ki kut ata tûte'n ni la pe thei no nahaia, ki iti tâk chu tûte a sût thei hrang om mahai.

Babulon ata suakna hrang thu

¹⁴Nangma irtantu Israel mi irthiang, Rengpa'n hiang hin a ti: "Nangnihai sikin Babulon doi hrang mi tîr ki ta, an kul kalnahai chu suk insiat pehai ki ta, Kaldaihai chu chap khub khub an ti.

¹⁵Keima hi, mi irthiang Rengpa ki ni, Israelhai siamtu nin rêng ki ni.

¹⁶Tuipui irkân theina lampui ki siama, tui irsok but but laia fena lampui ki siam a ni.

¹⁷Sakor le tâli ki hruaihaia, sipai rual hrâttak ki ikoihai kha. An thal zoia, a thoi thei nôk om loiin, meiser thatpai rip angin an inthim zoi ta.

¹⁸Tianlai thilhaia irnghat ta no roi, A fe tâk thil ngaitua ta no roi;

¹⁹Thil thar ki itho hrang hi thîr ual ta roi, A hong tung vâng ta, nin ihmu loi ma ni? Ramchâr hmuna lampui siam ki ta, ramchârna hmuna tuipui inluangtir ki ti.

²⁰Ram sâhaiin ni chôindôm an ta, Sihanghai le Ostrich vâhaiin nin pâk an ti. Ki mi irtanhai in hrang ramchârna hmuna tui irtingtir ki ta, ramchâra tui kin luangtir tena chu,

²¹Keima hranga ki isiam an ni. Ni lan pâk ngêt an ti.

Israelhai suaIna

²²Jakoba, nangma'n chu ni koi mak chea, O Israel ni ni hnông ta.

²³Hâlrivômna hrangin kêlbelra ni pe mak chea, irbôlnahaiin ite ni chôindôm mak che. Nin laia thil inhlân chu nangni inphût ma unga, mirimhoi khom nangni insôltir ma ung.



²⁴Thil mirimhoihai ni pe ngai mak chêia, Irbôlna hrangin nin sial sahai leh nin thâi mak chêi. Nin sualna sikin nin ni hnônga, nin sinsiatnahai hi ki hnông zoi ta.

²⁵Keima hi ki nih nin sual ngaidam theitu chu, keima sikin kêng nangni ki ingaidam, Nin sualnahai inhre mai loa ki iom a ni.

²⁶Ni doi hrangin hong unglân, nin thiam thu hong hril roi.

²⁷Nin pa matontakpu khan thilsual a thoa, nin hruaituhai lak tehel an ni zong pea.

²⁸Khanchu, ki hmun irthianga hruaituhai porinchetirin, Jakoba chu khosâltongin siam ki ta, Israelhai chu irsêlna bûra siam ki ti.

Isaia 44

Rengpa vai hi Pathian a ni

¹Atûn hin chu, nang ki siahlo Jakoba, ki mi inthang, O Israel irngai roh.

²Rengpa'n hiang hin a ti: Nangni siamtu ki nia, sul sûnga nangni inngîrtirtu ki ni, Ki siahlo Jakoba nang ki changpui maia, ki inthang sai, Jesurun chi no roh.

³Ramchârhai tui buak ki ta, ramna hmuna tui inluangtir ki ti. Ni'rchi hai chung a ki'rtha sem ki ta, ni tû le ni nâihai satvur ki ti.

⁴Tui tamna hmuna phâiram a ihring nuam ang hin le tui pui kôla sûl hringhai ang hin.

⁵"Rengpa ta kin ni," mihaiin ni hong ti thei an ta, Jakoba irhming hong irphua sa an tia; senkhathaiin chu an bâna, "Rengpa ta," ti irziak an ta, senkhathaiin Israel irhming irput an ti.

⁶Itinrêng Rengpa, Israelhai rêng, anni irtanpu Rengpa'n hiang hin a ti: 'Kei hi a bul le a mong ki ni,' Keima ti no hi Pathian dang om mahai.

⁷Keima ang hi tu mo la om? hong hrilhai sian, hong târinlang infel ri sehai. Tianlai mihai ki indinghai moh ni ma, thil hong tung hrang le, thil hong om hrang chu hon puang ri sehai ba.



⁸Inlâi no unglân chi viat no roi, tianlai ata nangni ki lei insîr pe sai mo ni ma? Ki thu inhriattu nin ni, keima ta no hi Pathian dang moh an la om? Ki inhriat zoi loi Pathian roiinpui an la iom ma ni?

Millim biak demna

⁹Millim siamtuhai hi ite ual ni mahaia, an thil siam an inlului laka ite hmangna boi. Ama biaktuhai hin ite inhre infel thei loiin lan zak an ti.

¹⁰Pathian irlim siamin, millim songhai ngai hin ar fêna om loiin an ibiak hrang ma ni?

¹¹Ama biaktu murdihai chu mualphoiin la om ving an ti. Mi theithiamhai khom hi mihriam ma mai an nia, honghai sianlân ki makunga hong ngîr ri sehai, inthing an ta, mualinphoi ok an ti.

¹²Thîrsu'n meir-ala hâlin hrei a suka, sekchôi le thei dôrin a suka. A phîngchâmin a sôla, tuiinhrâlin a isôl ngai a ni.

¹³Thing mistiri'n bakot siam hrangin a'rkhia, pensil leh an danga, mihriam dûr a hong changa; a in sînga se hrangin mihriam dûr satak a ni tâka.

¹⁴Sidar thing ama hrangin a phûra, Ise thing le sesua thinghai phûrin, ram hnuaia thing sa chi ama hrang bîka an danga,

¹⁵Kha hnunga chu mi hrangin meia tua ni ta a ta; khataka kha lâk a ta, a iuat ngai; a ni, meia a sêma, bai a siam ngai a ni, pathian a siama, a biak ngai; kha thing kha millim siamchopa a siama, kha kha khûksadelin chubai a mûk ngai.

¹⁶senkhat chu thingin a tuaa, a uata, ar al leh bu a phoia, senkhat chu millim siamna hrangin a hmanga, sa a roa, a fâk khopa, meilum uat pumin, "A lum hrai ta, a chok nuam zap," a tia.

¹⁷A zôkhai leh khan pathian dûr a siama, chubai a mûk ta. A chongchaia, "Ki pathian ni nih ni saninhiring ro," a tia.

¹⁸Annihai anga mihai kha chu an inmôl hrai ta, ite inhre loi an ni; an ihmuhai an chia, an mit an insîng ngaia, an inhriat thei lolina hrangin lungrîl pe ngai mahai.



¹⁹Senkhat chu thingtuain ki hmanga, bu ki phoinaa, sa ki roa, ki fâka, senkhat chu millim ki siamnaa, thingtum bong kôla kûnin chubai ki imûk a ni hi, ti inhriat zel om mahaia, a hmu thei khom om mahai.

²⁰Nêngpil fâk anga ite nangloi a nia, an sâpna saloi khan a hruai insuala, sansuak thei ni ta ma, “Ki millim chôî hin ite tho thei mah,” tihna châng zel inhre thei mah.

A siamtu le saninhrintu Rengpa

²¹Jakoba, hi hi inhre mai ro, Israel, nangma hi chu ki siahlo ni ni, ki siahlo ni hrangin nang ki siama, O Israel, nang irnghil ngai ma ung.

²²Phâivua’n sôm a isêmpai angin ni sin insiatna ki’rngihla, phâivua’n sôm a isêm irhmang angin nin sualnahai ki sêm irhmangtir ta, khasikin ki kuang hong kîr ta roi, nang a’rtantu ki ni.

²³Irvânhaio, lômin zâi roi, Rengpa’n sin a itho a ni ta, irnêng rîlhai khom khêksuak unglân, Ram le thing om murdihaio, khêk murin om ta roi. Jakoba chu Rengpa’n a’rtansuaka, Israelhai laia nin chôîindôm sa tâk.

²⁴Sul ata nangni siamtu, nang a’rtantu Rengpa’n hiang hin a ti: “Itinrêng siamtu, keima hi Rengpa chu ki nia, ki binga irvân kaiphar theitu ki ni, irnêng ki siam lai khan tu moh om sa?”

²⁵Deipu dolhai thu hlochuk loiin tasân theihai mualinphoitirin, mi vârhai thu ki thuan paihaia, an inhriatna chanlamboi kin hriattirhaia,

²⁶ki siahlohai thu kin detpuihaia, ki tîrtônhai iti hlo kin chuk pehai ngai. Jerusalem kua chu lua nôk an ta, Judai rama khuahai khom inding nôk an ti, a siathai khom siaminsa nôk ki ta,” ki tia.

²⁷Tuikhanglian khom kangchat hrangin thu ki pêka, a tuihai a kang ta.

²⁸Kura kuanga khan, “Ki belra enkoltu ni ni, ki thiltum chu hlo nin chuk pe ro, Jerusalem siaminsa nôk sianlân, Tempil sinna hrang lung inphûmtir ro,” ki ti saa.

Isaia 45

Kura, Rengpa mi inkung



¹Kura chu Rengpa'n rêng hrangin sahriak a pol tâka, nam tinrêng hai rûn hrangin a inkung tâk a ni; rêng hai an sinthotheina hlîk pe hrangin a tîra; a ta hrangin khopui dâi mikothai Rengpa'n inhong pe a ti. Kura kuang Rengpa'n hiang hin a ti:

²Ni kuang hruai ki ta, tâng hai irhnuaitir ki ta. Dâra siam kul mikothai suk insiat ki ti. Kul mikot khârna thîr kalna khom inkhiakpai ki ti.

³Irchon inthimna laia an ihrê hai khom, Hmun irthupa sum an ihrê hai nang pepai ki ti. Ni'rhminga nang koitu hin, Rengpa, Israelhai Pathian ki nih ti inhre thei ta ni ti.

⁴Ki siahlo Jakoba, ki inthang Israel sikin, nir hmingin nang ki ikoi a ni ta. Ni nin hriat no nâkin, nir hming ki phua ta.

⁵Kei hi Rengpa chu ki ni, tûte dang om mahai, Keima ti no chu Pathian dang om mahai. Ni nin hriat no nâkin, nang ki irvôtir a ni ta,

⁶nisua tiang ata nitâk tiang dênin, Keima ti no chu Pathian dang zel om mahai ti mihaiin inhre thei an ti, Keima ti no chu Pathian dang rêng om mahai.

⁷A vâ ki siama, inthim khom kin omtira, Sat ki vura, vânduainahai khom kin tungtir ngai. Hihai murdi hi keima Rengpa itho a ni.

⁸Irvân irsâng ata zoina rua zuang tho sianlân, ra insua ri se. Keima Rengpa hin annihai kha intungtir ki ti.

Rengpa tinrêng chungha thuneitu

⁹ Pil bêl an ivuak hin a vuaktu hrilsiat thei ni mo? Pilin a vuaktu chu, "Imo ni isiam thei om mak chea," a iti thei hrang ma ni?

¹⁰Mâni nu le pahai kuang, "Itina mo hianga nin ni inei hi?" tu ngân mo ti thei hrang?

¹¹Israelhai siamtu mi irthiang Rengpa'n hiang hin a ti: "Ki nâihai chungchânga hin nin nir chutira, ki itho hrang hi nangni ni irêl pe moh ki nang nin isôn?"



¹²Keima hih ki ni, irnêng siamtu chu, A sînga om mihriamhai hi ki isiam an ni. Keima kutin irvân khom khi ki kaiphara, Thil om murdihai khi, keima ircham taka om an ni.

¹³Râl a hong lianin chu Kura chu ki tumna lam tinrênga changpui ki ta, ki khopuihai indingtir nôk a ta, lômman pe ual nuam loiin irtanna man pêk khom nuam no ni. Ki mi, sala omhai insuahai a ti,” tiin Itinrêng Rengpa’n a ti.

¹⁴Rengpa’n hiang hin a ti: “Aigupta mihai ihlosuak chu, Ethiopia rama zuarsumhai nin ilâk hrang a ni, nangni hong chôî pe an ti, Seba rama mi dungsei ta takhai chu, nin suaka om hrangin hong an ti. An kuta thîrhruî bun pumin nangni zui an ta, nin kuang khûksadelin, 'Pathian iompuihai chu nin lei ni hi te, Ama vai hi Pathian hrât chu a lei ni hi,' tiin chubai nangni mûk an ti.

¹⁵Israelhai Pathian, anni saninhringtu chu Pathian irthup ni lei ini a ni.

¹⁶Millim siamtuhai chu inzak irla tak tak an ta, an rêngin mualphoi irla an ti.

¹⁷Rengpa’n Israelhai chu kumtuanga hrangin saninhringhai a ta, itiklai khomin mualinphoi no nihai,” a ti.

¹⁸Irvân siamtu chu Pathian a ni, Irnêng khom a siama, dettakin an ngîrtira. Siat remrum khomin siam maka, om hmun satakin a isiam a ni. Ama thotu Rengpa’n hiang hin a ti: “Kei hi Rengpa chu ki ni, tûte a dang om mahai,”

¹⁹Irnêng chung inthim lai ata inrûkin thu hril ma unga, hmun tina ni zong hrangin Israel irchihai khom tîrhai ma ung. Kei hi, Rengpa thudik hriltu ki nia, thil dik kin puangsuak ngai.

Rengpa le Babulon millimhai

²⁰Siatna ata zôkhai, nam tinrêngaio, Hong unglân, hong irbuk roi, tûte châng thei ngai loi thingtum millim, pathiana biakhai hin ite thil inhriatna nei mahai.



²¹Hong unglân nin thu hong hril roi, hong irdon irhlôm ving roi. Hi thilhai hi ni ma ung mo? Mâni mihai saninhrintu Pathian keima vai hi ki ni, tûte dang om mahai.

²²Rammuala mi murdihaio, keima tiang hor hei unglân, keima vai hi Pathian ki ni, tûte a dang om mahai.

²³ Mâni irhming sâmin khomâk ki'rsâma, Ki chonginkung chu iamom tak a ni. Ki thu hril sai tâk chu irlêk ta ngai ma ung; Ki makunga mitin khûksadelin ki'rhming sâm an ti.

²⁴“Rengpa, nangma leh vai a ni, dikna le hrâtna chu a om,” ni la ti an ti. Keima tiang hong an ta, a ni hnôltu murdi chu mualphoi irla an ti.

²⁵Keima Rengpa hin Jakoba irchihai chu saninhringhai ki ta, anni'n ni chôindôm an ti.

Isaia 46

¹Babulon-hai ibiak pathian Bela le Nebo chu, an sôlin ite châng thei ta mahai: Sakuartunghai an inpêltirhaia, sa sôl tâkhai hrang khomin rik tak an ni.

²Millim hrât loihai hrang khomin, a'rzôntuhai san thei mahaia, mâni khomin irsansuak thei mahai. Sala om hrangin an hruaihai ta.

³Jakoba le Israel in mi la dam murdihaio, Ki thu hi irngai roi, nin suak ata nangni ki ipuak inlian nin ni.

⁴Tar kûna lu chuak rak dênin keima hi ki ni, nangni hruaipu chu, ki kut suak nin nia, nangni hrung mai ki ta, nangni chôindôm tu ki ni, nangni san mai ki ti.

⁵Tuhai leh moh a ni irkhek hranga, tu leh moh a ni itetûk hrang?

⁶An hmarsa ata rângachakhai kêlsua an ta, tangkaruahai varh an ta, kut theithiamhaiin pathian illim siam an ta, kûnin chubai an mûk tâka.

⁷An dârsuama an chuanga, an ir-iampaia, An omna hrang hmuna an va siahaia, an isia lam takin a omchian ngai. Irthîn thei ni maka, an chongpuihai khomin sâm thei mahaia, chardong irlahai khom sian sanhai thei mahaia.



- ⁸Khahai kha inhre mai unglân, irngaitua ta roi, Mi sualhaio, irngaitua roi.
- ⁹Tianlai rengata thil omzia kha inhre ta roi, keima hih Pathian omsun ki ni, mi dang om mahai, keima vai hi ki ni, Pathian omsun chu.
- ¹⁰A phut ata a mong dêna thil ki hril ngaia, thil hong tung hrang tianlai ata ki lei hril ngaia, “Ki iti chu det mai a ti, ki iti tâk chu tho ngêt ki ti,” tiin.
- ¹¹Nisua tiang ata irmupui hong koi ki ta, ram hlatak ni khom sian ki mi inkung chu ki ipan a ni; a ni, ki lei iti tâk angin, hong tung a ti, ki tum tâk sikin tho ngêt ki ti.
- ¹²Milung lianhaio, ki thu hih irngai roi, Zoina nî sîn chu hla loiin nin bêa,
- ¹³ki felna sîn chu a hong nâi ta, hla ta mah sôtnote sângin nangni saninhring ki ta. Zion chu saninhring ki ta, Israel chu roiinputir ta ki ti.

Isaia 47

Babulon chungu roirêlna

- ¹O nang dôngmate Babulon kha nâinu, Zuang suakin lân, nêngpila hin toi roh. Rêngtoihmun ata kha Kaldai nâinu irnênga hin toi ro, a’rnoi nêngnuang nang ti ual no nihai.
- ²Bu sukna khôl intûkin lân, bu chu suk ro, Ni hmâi irkhuna hlîkpaiin lân, ni puanbom kha irfîng ualin lân, ni mal ten lîmin lân tui kha irkân ta roh.
- ³Korongin omin lân, ni ser khom inlang ri se. Phubâ la ki ta, tûte irkhol no ning.
- ⁴Israel mi irthiang a ni’rtantu a nia, A’rhming chu itinrêng Rengpa a ni.
- ⁵Nangni Kaldai nâinuhaio, dâihrekin inthim laia khan toi hluk ta roi. Nam tin nâinu nang vîk ta no nihai.
- ⁶Ki mihai chungu hin ki ning an mura, ki mi inthanghai ki soisakhaia, ni kuta ki hong pêk tâka, lung len kham mak chea. Putarhai khom irdîn viat loiin ni hmanghai maia.
- ⁷Rêngnu, ni kumtuang in hrang irngaiin thil hong tung hrang thîr loiin, Ni mongna hrang khom inhre loiin.



⁸ Nuamninga om nuam ngainu; irngaitua ro, Lungirngam takin ni om ngaia, “Keima ti no hi tu dang moh a la om? ni ti ngaia. Meithâi ni no ning, lusûn tuang viat no ning,” ni ti ngaia.

⁹Voikhat rengin, sîn khat sîng zelin, hi thilhai hi tuang ni ti. Minlak tho thei zap khomin lân, lusûn tuang ni ta, meithâiin om ni ti.

¹⁰Ite bêa bê loiin thil sual ni tho ngaia, Tûte’n nang hmu no nihai tiin, ni vârna khan nang a hruai insual zoi ta, “Keima ti no chu tu dang mo om?” ni lei irti ngai kha.

¹¹Minlak thoa zôk thei loina, sin saloiin nang de hrang a ni ta. Tuang zoi zât loi vânduainahai ni chung a hin hong tung hrang a ni. Ni lei inhriat thei loi siatna hong tung thut ta a ti.

¹²Ni dôl theina hai, ni dôl bûrhai, Ni nâipang lai ata ni ihmang ngai kha masan no ro, tuhai lai ata mani chu sin sain lan lâppui thei ni ti.

¹³Nang ar don an itam ngai tia le teh, ite tho thei loiin irvân tung mâna, ârsi sui hai ngai le a tha tin thil hril ngai hai hong tuanghaiin lân, vânduai irti an ti.

¹⁴Mei ikâng irhmang thei fapôl ang ma mai ni an ti, meichok lai ata irsansuak thei loiin, anni hrangin lum pehai a ta, mei irvâm uat hrang om loi angin om a ti.

¹⁵Ni nâipang lai ata ni irthoppuihai le ni ihmang hai ngai, khaanga omchian an lei ni tâka, an nuam tika nang rotsan an ta. Tûte’n nang san thei no nihai.

Isaia 48

Pathian thil hong tung hranga RENG

¹Jakoba in mihaio, irngai roi, Israel Pathian irhming chu nin irlama, chi ta tak loiin ni itho mai mai a ni.

²Khopui irthiang mi kin nih nin irtia, Israelhai Pathian iamtu nin irtia, ama irhming chu itinrêng Rengpa a ni.



³A phut ata tianlaia thil nangni ki hril pea, Ki hrilin kin sîrsuaka, ki iti chu ki itho ngai a ni.

⁴Nin tukul a liana, nin ring chu thîr anga ngar a ni. Nin michal laka thîr irbun anga ngar a ni.

⁵Nin chungchâng thuhai ki len sîr tâka, a hong tung mân nangni ki len hril ngaia. khano'nchu, "Kin millim siam, ki innâm le suang millimhai thu thua om a ni; la ti pal nin ti.

⁶Ama hi nin hmua, nin inhriat ta, A dik ti mak chêi mo? Atûn ata thil thar nangni inhril ta ki ti, nin inhriat loi thilhai chu.

⁷Atûn khan kin omtira, matona khan chu inhre ngai mai chêi, om tâk lei ni sian chu, "Kin inhriat sai kêng," ti nin ti.

⁸Nin la inhriat ngai loi, nin la ihmu ngai loi, matona khan mikuar khoma nin inhriat thei loi, mi huang ngai ni nih ti kin hriat, nin suak ata tehel lei zong ngai mi nin nia.

⁹Ki'rhming sikin ki ningmurna chu insum ki tuma, an nin pâk theina hrangin ki insum ngai a ni, lan hektir ual no ning.

¹⁰Tangkaruahai chu irtapa an hâl irthiang ngaia, Nangnihai khom hi intakna ata nangni fia ki ti.

¹¹Keima sik ringota tho ki ni, ki'rhming insiat khom nuam ma unga, ki roinpuina chu tûte ni irkoppui nuam ma ung.

Kura Rengpa mi inthang

¹² O ki ikoi ngai Israel, O Jakoba ki thu hi irngai ro, kei hi a bul le a mongna ki ni.

¹³Irnêng irnghatna, ki kuta ki isiam a ni, Ki kut chang tiang irvân khi ki kaiphara, ki hong koia, an lei iom ngai a ni.

¹⁴Hor buk ving unglân, irngai roi, tu takin moh hi thil hi lei hril ngai? Rengpa lungthungpu'n Babulon mi'n a nuam lam tak zuang tho a ti, Kaldai mihai chung a kut thâk a ti.



¹⁵Keima'n ki lei ihril sai a ni, ki ikoi a ni, ki hong hruaia, a itho hrang chu irnghil ki ti.

¹⁶Hong nâi unglân, ama hi inhre roi, a phut ata a rûkin thu ki hrila, thil hong tung hranga hin om mai ki ti. Rengpa Pathianin a ni tîra, Irtha khom a ni ipêk a ni.

A mihai hranga Pathian thiltum

¹⁷Nangma inthangtu, Israel mi irthiang, Rengpa'n hiang hin a ti: 'Keima hi Rengpa ni Pathian chu ki ni. Ni hranga sin sa nang ki'rchutira, ni fena hranga lampui chu nang irhmutir ki ti.

¹⁸Ki thupêkhai inhre mai ngai unglân chu o! Tuipui kang ngai loi angin satvurna zuang luang a ta, Tuiirsokhaiin muang a hong itôn ngai angin, hlochukna khom ni ta hrangin zuang tung a ti.

¹⁹Ni'rchihai chu hnuaia vâiphin anga tam ni a ti, ni tû le nâihai chu tep zoi loi ni an ti. Ki makunga chu hek ual no nihai.

²⁰Babulon khua ata fesuak unglân, Kaldai ram hi rotsan roh. Râifân taka khêkin ki thu hi inpuang unglân, hmun tinrênga hril mai roi, Rengpa'n a siahlo Jakoba chu ar tansuak ta,' tiin khêk roi.

²¹Ramchârna hmuna a hruai khomin a tuiinhrâl loiin, lungpui sîng ata an hrangin tui a luang suaka, Lungpui rîl ata tuiphûl a hong suaka.

²² Mi sualhai hrangin irtharngamna rêng om no ni," Rengpa'n a ti.

Isaia 49

Israel nam danghai enton hrang

¹ Chômbunghaio, ki thu hi irngai roi, ram hlataka omhai khom irngaitua roi. Sînga ki om lai ata Rengpa'n a ni koia, Nu pum sînga ki om lai ata ki'rhming a phuaa.

² Ki thu khom khandai ngaih tak an changtira, A kut zapha kâra a ni siaa, thal irzumtak angin a ni hmanga, a thal siana koka a ni thup ta.

³Ki siahlo chu ni ni, O Israel nangin ni chôindôm ni ta, an ni tia.



⁴Ki sinthôna chu maimang a changa, thil chanlamboiin irtha ki paia, thosuak ite nei ma ung ki irti a ni; khannisian ki chungthu hi Rengpa irêl hrang a ni, Ki sintho ang taka ni pêktu chu Pathian a ni.

⁵Ki suak mân khan, siahlo hrangin Rengpa'n a ni lei inkung ta; Jakoba chu hruai kîr hrang le Israelhai chu hruaikhôm hrangin Rengpa'n a ni chôindôma, ki Pathian chu ki hrâtna hnâr a ni.

⁶Rengpa'n hiang hin a ti: Jakoba irchi inhartir nôka, Israel la damhai hruai kîr hranga ki siahlo ni hi ite ual ni mah. Hi nêka sintho hrang roiinpui ual ni nei. Rammual pumpui hi inzôk a ni theina hrang le nam tin ta hranga vâr ni ngêt ni ti.

⁷Israelhai irtantu mi irthiang, Rengpa'n hiang hin a ti: "Nangma, mi ihnuaisia, nam tin ien indong, roirêltuhai siahlo, rênghaiin suak ata ni izôk nang hmu an ta, mi lianhai khom ni makunga kûn an ta; Rengpa'n a thu an kung sikin Israel mi irthiangin nang an thang ta."

Jerusalem inding nôkna

⁸Rengpa'n hiang hin a ti: "A zorotaka nang don ki ti, a zorotaka nang sansuak ki ti, nang ki hrunga, nangma sikin nam danghai leh thu kin thunga, Ni ram indingtir nôkin, nin irchon ram chuai sai nin lua thei ving nôkna hrangin.

⁹Intângna ina omhai chu, 'Suak roi,' ti ki ta. Inthima omhai chu, 'A vâra hong suak roi,' ti sa ki ti. Kêlbelra angin lampuia irtet an ta, mual sûl tam loina hmuna khom sûlhring hmu mai an ti.

¹⁰ An phîngchâmin tuiinhrâl ta ngai no nihai, phâivua lum le sûn misa lum khom chi ual no nihai. An hruaitu'n an renhaia, tui tamna hmuna a hruaihai ngai.

¹¹Tâng tianghai lamlian siam ki ta, an fena hrang lampui siam pehai ki ti.

¹²En ro, ki mi, ram hlataka honghai so, Hmâr tiang ata hong an nia, sim tianga panin Sinim ram hlataka hong an ni so.



13Irvânhaio, râifân takin khêk unglân, irnêng chung khom hi lômin khêk sa ri se. Tânghai khom lômin khêksuakhai sian, Rengpa'n a mihai chu irtharngam a saka; dengthei hranghai chu an renhai ngai.

14Zionin, 'Kin Reng PATHIANIN ite bê'n ni bê maka, Rengpa'n a ni'rnghil ta a ni,' a ti raka.

15Nu'n a nâi irhnûk lai moh irnghil thei ni? A rîla ra mo irnghil thei ni? nuhaiin an nâihai an irnghil ngai khomin, keima'n chu nangni irnghil viat no ning.

16Irngai ro, ki kut zaphaa nir hming ki'rziak ta, ni kul banghai ki hrung mai ngai a ni.

17An siat nuamtu nêkin a sin insa nuamtuhai chu, an irhnot ngai a ni. An siattirtuhai chu nangni rotsan lat an ti.

18Tangin lân, thîr hi ro, ni mihai irthoka irhâi hi, an hong irthok chak a ni ta. "Keima ki om," Rengpa thusuakin a ti: Moiin a'rvôna a irsongpui angin, a mihai chu songhai ni ti.

19Nin ramhai a siat zoiin a iram chit a ni kha te, A lua hranghai an hong tungin chu, chîn pehai hrai a ta, nangni inramtirtuhai chu irhmang zoi an ti.

20Ni tû le nâihai sala intânghai an hongin chu, Ni mikuar hriata, "Ram hi a chîn hrai ta, omna hrang ram lian ual kin innang ta," la ti an ti.

21Hi mihai hi tu mo nin neitira? Ki nâi neihai ki sûnhai zoi tâka, sala intângin kin vâia, hihai hih tu mo a nin liantir pe a ini tâk? Ki bing vaiin an ni mâka, hihai hi kho tianga mi mo an ini? la ti ni ti.

22Rengpa PATHIANIN hiang hin a ti: "Nam tin mithmua ki bân phar ki ta, irsinsiain, ni nâihai pomhai an ta, ni nâinuhai pohai an ti.

23Renghai chu ni pahai ni an ta, rêngnuhai dônhai an ti. Irnênga khûksadelin chubai nang mûk an ta, ni kea vâiphin kop chu inliak an ti. Keima hi Rengpa ki nih ti nin hriat theina hrangin, a ni nghâktuhai tûte mualphoi irla no nihai.



²⁴Mi hâitak râl doi mo sût ngamin? Mi hrâthai lai ata hruaisuakin.

²⁵Rengpa'n hiang hin a ti: "Mihai râl doi chu sutpai ki ta, mi hrât kuta om khom hnûkdok ki ti. Nang a doituhai chu doihai ki ta. Ni nâihai chu keima'n saninhringhai ki ti.

²⁶Deng nang intheitirtu chu an bingin an hmê infatirhai ki ta, Uain inrui angin an thisen inrui nôk an ti, Rengpa saninhringtu ki ni, nangma irtantu, Jakoba mi hrât ki ni, Mi murdi'n inhre ving an ti," tiin.

Isaia 50

¹Rengpa'n hiang hin a ti: "Nin nu Israel chu ki tîrpaia, irmâkna lekha mo ki pêk uala? Lâkai intâng nêkin an nâihai zuar angin, tuhai kuang moh nangni ki izuar? Nin sual sika zuar nin nia, nin sininsiatna sika a ni, nin nu ki itîrpai.

²Ki hong lai khan tûte'n ni uksak mak chêia, Nangni ki koi lai khan tûte'n ni sâm mak chêi; sansuakna hrangin ki kut a ibong mo nin isôn? Sansuak hrangin ki ihrât loi mo nin isôn? tuipui khom ki hala, a kang theia, Tuipuihai khom kin châtir thei, tui a om no sikin nga an thia, an thu zoi ta.

³Irvân khom kin thimtira, lusûn puanduk sil ang hi a ni.

Rengpa siahlo thuzôm

⁴Rengpa ki Pathianin thuhiril theina a ni pêka, Mi irzal takhai inthor theina kin hriat theina hrangin a ni tin a ni kai inhara, a sîn a zânin mi irchutir theina ki neiin kin hriata.

⁵Rengpa ki PATHIANIN ki mikuar a nin vârtir pea, kei khomin tukullian song ma unga, Ki'rhei kêr lina hrangin.

⁶Vîk hrangin ki hnung zâng ki doa, ki hnerkamulhai khom an phôia, an nin chilthuana; khannisian inzakin ki hmâi thup ma ung.

⁷Rengpa ki PATHIANIN a ni changpuia, khasika mualphoi ki irlâk loi a ni; lungngar ki lei irsaka, inzak viat loiin.

⁸A ni changpuitu chu a hong nâia, Tu mo ni doi ngam hrang? thiamthu hril hong ngîr an ta, a ni doitu chu hong nâi ri se.



⁹Rengpa ki PATHIAN hi a ni santu chu a ni, tu mo theiloi nin changtir thei hrang? Puan angin irthep an ta, irthiin fa zoi a ti.

¹⁰Nangni laia Rengpa chi ngai mi, A siahlo a thu irngaituahai ngai, vâr nei loiin inthima om ngai khom unglân, Rengpa irhming iam mai unglân, Pathiana khan irngat roi.

¹¹Khannisian, mâni meiser inchoka, ir-al thei chôihai, nin thal irling thei vâra khan fe ngân roi ba, Rengpa kut ata nin idong hrang chu, intak tuanga nin ithal dôr dôr hrang a ni.

Isaia 51

Jerusalem irtharngam sakna

¹Sansuak nuama Rengpa zongtuhaio, ki thu hi irngai roi. Nin suakna lungpui hi en unglân, nin hong isuakna lungpui hi en roi.

²Nin irchi bul Abrahama kha irngaitua roi, Sari, nangni neitu kha inhre mai roi. Ki koi lai khan chu nâi nei mahaia, Sat ki vura, an ipung ok a ni ta.

³Rengpa'n Zion kua chu lung a thunga, A kua chîn sûnga omhai irtharngam a sakhaia; a ram ite sa thei ta loihai khom, Eden irhuan angin siam a ta, a ram siat tâk chu Rengpa'n irhuan inchangtir a ti. Kha khan râifâna le lômna om a ta, lômthu hrilin inpâkna hla sak an ti.

⁴Ki mihaio, ki thu hi irngai unglân, ki nam chanpuihai hi an mikuar sung ri sehai, dân thu ki kuang ata a hong suaka, ki mihai vârna hrangin roirêlna dik siam pehai ki ti.

⁵Kin hnêna hrang zoro anai ta, keima ngêtin ki mihai chung a roirêl ki ta, ramhaiin ni thîr an ta, ki kut nghâk an ti.

⁶Irvân tiang nin mit inlêngtir unglân, Hnuai tiang irnêng hi en unglân, irvân khi meikhu angin irzâm zoi a ti, puan angin irnêng hi milui a ta, a sûnga omhai khom thoivâi angin, thi pher phurin om an ti. Ki saninhringna hi chu, kumtuanga hrang a ni, ki inhnêna khom hek thei no ni.

⁷Thudik inhriattu, lungrîla ki dân vonghaio, ki thu hi irngai roi, Mihriamhai demna irngai no unglân, nangni an manêpnahai chardong irlapui ual no roi.



⁸Puan irthiin a ifâk insiat angin, irnge'n samul puanhai a ifâk thei angin annihai khom la fa an ta, keima kuang chu kumtuanga hrang a ni, ki saninhringna khom kumtuanga hrang a ni.

⁹Rengpa, harin lân, harin lân, thoi ro, tianlai mihai kuanga ni hrâtzia ni inlangtir angin, hong inlangtir nôk ta roh. Nang hi ni mak che moh Rahab tuk india, tui puia dragon sun that theitu kha?

¹⁰Tuipui inkanga, ni mi inthang saihai irkâna hrang, tuikhangliana lampui siamtu kha ni mak che mo?

¹¹Rengpa irtanhai chu hong an ta, Hla sakpumin Zion tâng hong tung an ta, Kumtuanga lômna khum an ta, raifân le lômna'n sip an ta, beidong irtha'nvâi om ta no ni.

¹²Keima hi ki nih irtharngamna intungtu, a thi thei mihriam, pârhai anga mihring nâihai hi, ithoa mo nin la ichihai mai?

¹³Irvân kaiphar theia, irnêng irnghatna phûm theitu, nangni siamtu PATHIAN hi nin irnghil ma ni ta? Dengintheitirtu ningmurna le an siat tumtuhai chi di dâpa nin iom mai hi? An ningmurna chu tuang zoi no chin ni.

¹⁴A kûn tôk tôka om tâkhai khom hong ngîrsuak ta an ta, thi no nihaia, phûm khom ni no nihaia, fâk hrang khom irsam ngai no nihaia.

¹⁵Kei hi Rengpa nin Pathian chu ki ni, Tuikhanglianhai ki'rsôntira, tui a irsok but but ngai a ni, ki'rhming chu itinrêng Rengpa a ni.

¹⁶Irvân khi ki kaiphara, irnêng irnghatna ki phûma, Zion mihai kuang, "Ki mihai nin ni, nin hmûra ki thu ki sia ta, ki kut zapha laia ki sia insa ta," ki iti kha.

Jerusalem tuangna hnungkhôn

¹⁷Harin lân, harin lân, Jerusalem thoi ro, Rengpa ningmurna uain chu ni in ta, inrui thei dôrin ni iin a ni ta.

¹⁸Nang a hruai hrangin nâi tûte nâi mak chea, nang a kai hrang khom tûte mihriam hmu ual mak che.



¹⁹Siatna thua voihni ni tuang ta, tu mo nang a châ ta hrang? Ni ramhai chu insiat a nia, a chuai zoi ta; ni mihaiin châm an tonga, khandai an ituang a ni ta, Itin mo irtharngam nang ki la isak thei ta hrang?

²⁰Ni nâihai chu kholaidung hmun tina irzalin an irtet phura, Lên leh sa ai khum angin, Rengpa ningmurna an tuang ta, an Pathianin a ihnôl a ni.

²¹Nangni soisakna tuanghai, zû in loia, an ruia khêkhaio, hi hi lei irngaitua roi:

²²Rengpa PATHIAN a mihai sanpu; nin Pathianin hiang hin a ti: “Inrui nghek hnunga khilât dêngzuan, Rengpa ningmurna khilât chu, nangni in intir ta ngai no ninga, la pai ta ki ti.

²³Dengingtheia, kholaidunghaia, inbok ro, kin râkphâ theina, tia ni hnung zâng tianga inrâk vêlhai kuang pehai nôk ki ti.

Isaia 52

Pathianin Jerusalem san a ti

¹ O! Jerusalem, har ro, har ro, O Jerusalem, hong thoi inhar ta ro, khopui irthiang Jerusalem, roiinpui takin hor sinsiam ro, sertan loihai le porinche hai, hong lût ta no nihai.

²Jerusalem, nêngpil ata thoiin lân irbên infâiin lân, Rêngtoihmuna toi roh. Zion khopui nâi le te sala intânghaio, nin ringa hruai kha sûtpei roi.

³Rengpa'n hiang hin a ti: “Man pe loia suaka izuar nin nih, tangka sum boiin irtan ni nin ti.

⁴Rengpa PATHIANIN hiang hin a ti: Tiana ki mihai chu an bingin Aigupta rama an irthona. Assuria haiin ite ual ni loiin an soisakhai nôka.

⁵ Atûn hin imo ki iti ta hrang? Rengpa thusuakin a ti. Ki mihai chu Babulon-a man boiin suaka an hruaia, an chungga roirêltuhaiin en nuam loiin, ti hi Rengpa thusuak a ni. Sûn so sôt ki'rhming an insiat ngai a ni.

⁶Khasikin ki mihaiin ki'rhming inhriat thei an ta, kha tena chu keima ihril a nih ti inhre thei ta an ti,” ti hi ki ihril a ni.



⁷ Zion kuang, “Ni Pathianin roi a rêl ta,” a tia. Suaka zôkna thu lômom hmun tina inpuanga, irngeina Thurchi Sa intungtuhai ke chu en a hoi vang na!

⁸Zion khuua Rengpa hong an mit ngêtin an hmu chit sikin, ni râl hrungtuhai chu raifânin an khêk sup sup.

⁹Jerusalem kho chîntea omhaio, raifân takin khêk unglân; Rengpa’n a mihai chu lungngam sakin, Jerusalem chu ar tan ta.

¹⁰Mi tin mithmua Rengpa’n a bân irthianga khan a râl an fân ta, rammual pumpui khom hin, Pathian saninhringna chu hmu thei an ti.

¹¹Suak roi, suak roi, Babulon hi suaksan roi; thil porinchehai hi inthem viat no roi, Rengpa timmatua pêlhaio, irthial irthiang unglân, suaksan roi.

¹²A rothai anga fe hrang ni mak chêia, Râl irzûl anga irhnot zât khom ni mak chêi; Rengpa’n nangni hruai a ta, Israelhai Pathian chu nin hnunga hrungtu ni a ti.

Siahlohai natna tuang

¹³Irgai ro, ki siahlo chu a sinthoa ir-iampui a ta, mihaiin chôiindôm an ti.

¹⁴Ama an hmu tena chu mi tamtakhain, ar khêl ti tak tak an ti. A hmêl an insîr insiat tak taka, mihriam hmêl lua irput mah.

¹⁵Nam tamtak chu a thisenin a’rsûkinfâia, Renghai khomin ar khêl ti pumin an bâi phong ngam no nihai; an la ihril ngai loi thil hmu an ta, an la inhriat ngai loi thil lan hre thei an ti.

Isaia 53

¹Tu mo kin thu inhriathai hi zôm hrang? tu mo Rengpa kut inlang hi hmu infel hrang?

²A makunga zuang inchersuak a ta, Ramchâra chîmu irzung thâk angin, irsôn loiin, hmêl satna khom nei loiin. Ei ta hranga ennuam ual om thei no ni.

³Ennuam om loitak, mihai ihnôl, mihriam chuk loi, natna tuang chuan chuan, dam nî nei loi, Mi tin imâksan, ennuam loitak, ite bêa ei ibe loi chu a ni.



- ⁴ Ei natnahai a nir zângtira, ei ituang hranghai chu a lei ituang zoi a ni; Eini lakin an ihrem angin ei bêa, Pathian irngaiinhluna'n a ivîk ni a tih ei tia.
- ⁵ Khannisian, ama'n kin sin insiatnahai sikin sâbe a tuanga, ei سوالنا sika soisak a ni, Irngeina ei nei theina hranga hremna tong a ni, a vîk tuangna chu ei damna hranga a lei ni.
- ⁶ Belra angin ei irthek indarh zoia, mâni nuamna tiang ei pan zoia, Rengpa'n ei rênga dik loinahai chu, a dârsuama a hong irngat tâk a ni.
- ⁷ An soisaka, irngaiintôm takin a tuang maia, thuanhai loiin. Belra that hrang an kai lai khomin irchok loa a mul ep hrang khoma ite a hmûr phong viat mah.
- ⁸ An hong chela, a chungthu an rêla, A chardong hrang tûte'n donsui loiin, a hringna chu rammual ata an lâkpai pea, ki mihai سوالنا sika that a ni.
- ⁹ Mi nunsiat ni viat loi, minlak tho ngai loi chu, mi سوالhai irtan hranga inkung a ni, a hong thia, mi irchonghai thâna an phûma.
- ¹⁰ Rengpa'n, 'Vîk intuangtir hrang a sa,' a tia. Na a ituang tâk a ni. A hringna chu سوال irbôlna'n ni pom tena, ar chihaiin hmu mai an ti, a dam lai sîn bôk pe ni a ta, a kuta Rengpa indit lam chu hlochuk a ti.
- ¹¹ A sinthôna ra a hmu tena chu, a tuangna chu man boi ni mah ti inhria a ti. Ki siahlo feltakin, mi tamtak saninzôkhai a ta, an سوالnahai pêl pehai a ti.
- ¹² Mi lianhai laia a dongtum hrang ki hrê pea, mi hrâthai laia râllâk sum sem ta ki ti: Thi hranga ar pêkna sikin, mi سوالhai laia tep sa a ni. Ama'n chu mi tamtak siatna irthûlin, mi سوالhai hrangin a izong pehai ngai a ni.

Isaia 54

Rengpa'n Israelhai lung a thung

- ¹ O nang a ching nâi nei ngai loi, raifân takin khêk ro, nâihâ irvei ngai loi, lômin khêksuak ta ro; pasal neihai nêkin chu, beidong tuangnu'n nâi le te nei intam ual a tih Rengpa'n a ti.



²Ni puan in hmun chu irzatirin lân, ar khûna khom inzarin lan, indîn no ro, inhroi loiin, a thungna hruihai khom inseitirin lân, a khitnahai khom indet khak roh.

³Ni ramri khom chang tiang le vei tiang irzat mai a ta, nam dang ilua ramhai khom, ni nâihaiin lua an ti. Khopui ram sai tâk khom inlum inthar nôk an ti.

⁴Chi no ro, inzak ta no chi ni, mualinphoi ta no chi nia, intem ual ta no chi ni, Ni vânglaia mualinphoinahai chu ni'rnhila, meithâi intirom anga ni omnahai ni'rnhilpaia.

⁵Nang a siamtu chu ni pasal ni a ta, A'rhming chu itinrêng Rengpa a ni. Israelhai irtantu, mi irthiang, irnêng pumpui Pathian iti a ni.

⁶A thoibopa pasal neia, a pasal indit nôk ta loi, lungrîl na tuang ang hi ni ni; khannisian Rengpa'n nang koi nôk a ti.

⁷Zoro sôtnote nang ki mâksana, lung nang kin kham hrai sikin, nang koi nôk lat ki ti.

⁸Ki ning an mur hrai sika nang ki irotsan viat a ni, lungthungin kumtuangin nan ren mai ki ti, nangma irtantu Rengpa'n a ti.

⁹Nova dam lai khan irnênga tui sip ta loi hrangin thu kin kunga, ningmur taka irchu ta loi hrang atûna ki inkung hi, nang an rentu Rengpa'n a ti.

¹⁰Tânghai irhmangin mual irson zoi khomsian, Nang kin renna chu hek no nia, irngeina thuthung ki isiam chu sûtpei no ning, Rengpa lungthungtu'n a ti.

Jerusalem thar

¹¹O Jerusalem, soisakna tong, tuiirsoka irsok invuang, lungkham hlo ngai loi, lung a sa chi hmangin nang siam inding nôk ki ti, ni'rnhatna hrang Safir lung phûm ki ta,

¹²ni tuala rubi lung hmang ki ta, ni kul mikota khan lung irtêk hmang ki ti, ni kul banga lung mantam hlutak hmang ki ti.

¹³Ni nâihai murdi Rengpa'n irchutirhai a ta, râl irvei loiin om mai ta an ti.



¹⁴Dikna sikin det ni ta, dengintheitirtuhai rot an ta, chi hrang nei no chi ni, chi omna lakin nang nâi ta no ni.

¹⁵Nang a doitu an la omin chu keima thu ni loia ni a ti, nang a doituhai chu hrât thei ngai no nihai.

¹⁶Irngai ro, meihol sêma thîr suktuhai hi ki isiam an ni pumin, kha hriamhrei thil insiatna hranga hmangtuhai khom ki isiam an ni.

¹⁷Nangma doina hrangin an hriamhrei siamhai chu inhroi loiin. Nangma doituhai chu thei loi changin om an ti. Hi hi Rengpa siahlohai dong hrang chu a ni, zoina pe a ti, Rengpa thusuakin a ti.

Isaia 55

Pathian lungkhamna

¹ Hong roi, tuiinhrâl murdihaio, tui hi hong pan roi. Tangka sum nei loihai khom hong unglân, nin nêk hrangin bu hi tangka sum ni loiin hor chôk unglân, uain le dûttui hi hor cho roi, a man boiin.

²Khop liama om loi hrangin, nin sum nin inchêk ngaia! khopna ni loi hrangin nin irnak nin paia, ki thu hi irngai roi, thil sa tui zât murdi nin inuam tak nin fâk theina hrangin.

³ Nin mikuar doin ki kuanga hong roi, Irngai unglân, hring nin ti. Kumtuanga hrangin thu thung ei ta, rêng Davida kuang lungthungna thu kin kung tâk ang khan.

⁴Mihaiin ki roiinpuizia an inhriat theina hrangin, Ama chu nam hruaitu hrangin kin kung ta.

⁵Ni inhriat ngai loi nam chu ni nuam lam takin koi ni ta, nang a lan hriat ngai loihaiin chu nang hor bel nuam mai an ti. Israel mi irthiangin kha kha tho a ta, nang chôindôm a ti.

⁶Hmu ola a om lai hin, Rengpa chu zong unglan. Anâi lai hin ama chu koi roi.



⁷Mi sualhaiin an omdân chu masanhai sian, mi tukhomin an ngaituana sual mâksanin, Rengpa tiang hong kêrhai sian, len renhai mai a ti; ei Pathian hi mi ngaidam nuam tak a ni.

⁸Ki lungrîl le nin lungrîl chu ir-ang thei ma, ki om dân le nin om dân khom irmîl thei ngai ma, Rengpa thusuakin a ti.

⁹Irvân khi irnêng nêka irsâng a ini ang hin, ki om dân hi nangni om dân nêkin a irsâng a ni, ki lungrîl khom nangni nêka inthûk a ni.

¹⁰Rua le ivur chu irvân ata zuang tâk a nia, kêr ta loiin hnuai chung a hin a irhmang zoi a ni, Chîmu ru chu a hong incher suaka, an thektu'n ra tamtak lakhôm theina a ni.

¹¹Ki bâia thusuak khom, chanlamboiin kêr nôk thei ni ma, ki nuam lam chu a tho mai ngai, ki itîrna kipa hlochuk mai a ti.

¹²Râifân takin Babulon chu suaksan nin ta, Râl irvei loiin nangni hruaisuak an ti, nin matona tâng le mualhai, lômin khêksuak an ti. Rampuia thinghai khom lômin an kut inbên an ti.

¹³Ilhling bila meisâr thing hong mông a ta, Hloitharpa bila hruirâng mông sa a ti. Rengpa sintho inhriat maina hrangin kêr ta loi hrang, kumtuanga irsinsiana ni a ti.

Isaia 56

Nam tin Pathian mihai laia om an ti

¹Rengpa'n hiang hin a ti: Diktakin roirêl unglân, diktakin sintho roi, nangni sansuak lat hrang ki ni ta, ki fel lam chu hong inlang ta a ti.

²Sabat insiat loa serhai ngai, thil saloi tho nuam ngai loi, hihai hi tia, thohai ngai mihriamhai vâneizia

³Rengpa mihai hor bêl ngai nam danghaiin, "Rengpa'n a mihai le ni en indang lamin," ti viat no roi, thainuzel mi khomin "Thingcher pa pai ki ni," ti no ri se.



⁴Thainuzel kuang Rengpa'n hiang hin a ti: Sabat sera, ki nuam thoa, ki thuthung chel indettu chu;

⁵Ki Tempil, ki in sâng ngêta hin, ama inhriat maina siam pe ki ta, nâinupang le pasal neituhai laia irhming sa infelhai ki ti. A'rhming dâi ngai ta no ni.

⁶Nam dang, Rengpa irbêla a sinthohai, Rengpa irhming irngai irsânga, a siahloa irpêk, Sabat insiat loia serhai ngai, ki thuthung vong maihai ngai chu.

⁷Ki tâng irthianga hruaihai ki ta, chongchaina hmun, ki ina chu raifân takin inomtirhai ki ti. Hâlirvôm thil irbôlnahai, ki maichâma an hong ichôi chu lei lômhai ki ti. Ki tempil hi mi tinrêng ta hrangin chongchaina hmun ti ni a ti.

⁸Irthekindarih Israelhai hruai khôm nôktu RENGPA PATHIAN thusuakin hiang hin a ti: a danghai khom la hruai khômhai mai ki ti.

Israel hruaituhai a dem

⁹Ram hnuaia om, rampuia chum, sahrânghai, hong unglân, hong sê roi,

¹⁰Râl vêngtuhai mit chu an chotira, ite hmu thei loiin. A hrungtua sîa ui inmûk nuam loi ang hi a ni. Irmang nei raka inmurhnik vai nuam, zâl phâmhmohai:

¹¹Ui huatirham ang hin khop thei loia, belra enpu chu ni pumin, a siat le a sa theitha thei loi; mâni nuam lam anga omin, an hranga inlâpna vai zong maiin.

¹²“Tho zu zong ei ti; rakzu tui thum in telin om ei ti, nangtûk len vâng chu a vuana nêkin la thum ual a ti,” an ti.

Isaia 57

Israel millim biak demna

¹Pathian chi mi, mi dik an thia hin an hriatthiam zel om mahai, anni a thihai khan hnuai chung intaknahai an mâksan ta, ti ngaitua thei tûte zel om mahai.

²Irtharngam takin an om tâka, nuam taka omhai ngai chu, an zâlmun an irngam thei ta.



³Nangni, dôi hmanghaio, hong inrang ta hi roi, uire nâi le mi hur irchi nin nia.

⁴Tu mo nin innuisan, tu mo nin ichiarkhum, nin milei nin inter khum? khosâlna suak le irhuang hnuaia nâi nin inih loi mo?

⁵Sesua thing hnuaia Pathian irhmingin nin inhoia, thing dâihlîm hnuaia nin pana, nin nâitesuihai irbôlna'n nin thathaia, tui kôla rôl panghai laia nin inhlanhaia.

⁶Tui kôla lung inhlûm nin zonga, khahai kha Pathian in nin neihaia, uain buakin irbôlna'n nin inhlan ngaia, lôm thei hrangin nin ni isôn ma ni?

⁷Tâng irsângna haia zâlsuam theina, zâlmun nin doa, kha khan nin irbôl ngaia.

⁸Nin lampui kôla, nin millimhai nin irkul indeta. Zâlmuna puan nin thâ insaa, nin izâlsuam ngai a ni; nin izâlpui nuamhai leh chonginkungna neiin, zoro'nchum nin izong ngai a ni.

⁹A biak hrang zongin ram tina palai nin irtîra, mithi khua dênin nin infetir ngai a ni.

¹⁰A biak hrang zongin nin sôla, 'Beidong a om ta,' khom ti ual mak chêi. Sabeina thar nin nei maia, sôl ual loiin.

¹¹Tu mo nin ichi, tu mithmua mo nin irhrung? minlak nin thoa, nin ni irnghilsan tâk hi? zoro sôtak ki dâihrek sika, nin ni inzakna a boia, nin ni ichi ta loi?

¹²a dik a nih tia nin hriata, nin itho ngai a ni. Khannisian ar fêna om mah. Mualinphoitir ki ti.

¹³Kamang takin ni khêk tena ni ilâk hluk millimhai khan nang don ri sehai, pháivua'n sêm a ta, sêm inzuanhai zoi a ti. Keima nir bêltuhaiin chu ram hi roiinpuiin lua an ti, ki tâng irthiang khom chang sa an ti.

Pathianin a mihai changpui an kung



14Hiang hin a ti: Buk inpông roi, lamlian siamin irnêng inpôngtir roi, ki mihai fena hrang sât infâi roi.

15Hmun irsânga om, kumtuanga hring, mi irthiangin hiang hin a ti: Hmun irthiang irsângtaka om khom inlân, mi thuhnuairôl le irsîrhai kuang chu, chôirsâng le nin har nôk hrangin ki om mai ngai.

16Ki mihai chu demhai mai ta no ninga, ki ning khom inmur mai ta no ni. Ki kuang chu sôlhraiin om an ti, keima isiam an ni sikin.

17An سوالنا le huatirham hrai sikin, an chung a ki ning an mura, ki hremhaia, ningmurin ki mâksanhai ta. Khanchu, anni nuam lam ngot tho pumin, an iom a ni ta.

18An omdân chu kin hriat vinga, khannisian an natnahai indam pehai ki ta, hruaihai ki ta, sanhai mai ki ti, lusûn tuanghai irtharngam sakhai ki ti.

19Ram tin tâng tin hrangin irngeina, irngeina, ki mihai chu indamtirhai ki ti. Rengpa bâiin a ti.

20Mi سوالhai zonga tuipei irsok lai, irngai loi ang hi a ni, tui irsokin sahrok sahrâi a ikêlsua ngai angin.

21 Mi سوالhai hrangin irtharngamna zel om no ni, kin Pathianin a ti.

Isaia 58

Bu nghei dân dik

1Rengpa khan hiang hin a ti: “Khêk ra rakin lân, irdîn viat no ro, bekul irhâi angin ni hnuk insuak ro, ki mihai thil tho’nsual, Jakoba irchihai chu hrilhai roh.

2A ni tin irzôm natin an ni zonga, ki inuam lam chu inhriat an nuama, diktaka sintho ngai nam ni irhoi an tuma, Pathian thilpêk zôm irkip chu tum ual loiin, diktakin roirêl lam an nir dona, Pathian nâi nuam tak anga inlang pumin.



³Bu kin ngheia, itina moh ni ihmu loi? Ni ni'rngaitua pe no hrangin chu, itho moh phîngchâm tuang kin ta?' nin tia. Nin bu nghei hi a hoihôkin nin hmanga, nin sinthotuhai chu nin rai phiarhai ngai.

⁴Bu nin ngheiin, nin ning an mura, nin inbuaiahaia, irsual nuamin, kuttum nin thâk ngai. Hi nikhua nia nin chongchaina chu chung a mi'n inhre ri se, nin iti ma ni?

⁵Khaanga bu nghei kha ki nuam lam nin isôn ma ni? Denginthei nikhua nia nin irsiampuihaia, sùlhna a ichuai angin nin kûn chiana, nêngpil laia bora dâpin nin zâl ngai. Khahai ang khan kêng bu nghei hi nin itho? keima hrangin lômomna moh ni ni pe ni?

⁶"Bu nghei hrang dân ki inuam lam chu, dik loitaka mi dang nin intumnahai mâksana, an ringkol hrui insatpaia, mi dengintheitirhai ngai irletna le, an puak rik murdi inzângtirna hi kêng a ini.

⁷Phîngchâmhai chu nin bu semhai unglân, a chai inlênghai chu nin in sûnga hruai inlûthai roi; korongboia nin ihmuhai chu sil le bom pehai unglân, nin urênghai masanhai no roi.

⁸"Khanchu, zîng vâi angin vâi nin ta, nin natnahai chu dam lat a ti. Rengpa, mi dikin nangni hruai a ta, a roiinpuina khan nin hnung tiang ilhli a ti.

⁹Rengpa koi nin ta, nangni lei don a tih koi nin ta, nangni lei sâm a ti, nin laia irnuisônahai mâksana, chong saloia nin irkoinahai nin mâksana.

¹⁰Phîngchâmhai hrangin nin irpêka, inrianghai nin vâi inkhophaiin chu, inthim laia a vâi angin vâi nin ta, nin ngûinahai khom sùn vâi angin har ta nin ti.

¹¹Rengpa'n nangni hruai mai a ta, misa lum hnuaia nin dangchâr chu hek a ti. Nin irzuk murdi nangni pe sa a ti. Nin taksahai nangni inhrâtir a ta, tui tamna hmuna irhuan angin le tuikuang kang ngai loi angin ni nin ti.

¹²Zoro sôtaka lei siat zoi tâk nin khuahai chu, nin mihaiin lungphûm saina hmuna inding thar nôk an ta, "Kul bang le a sûnga in siam insa nôktu," nangni ti an ti.



Sabat ser lômman

¹³Ki sôn irthiang sabat nin ser nôka, nin inhoina hai, nin mâksana, Rengpa sôn sabat hi nin inhlua, sintho hrangin fe mak chêia, mâni nuam lam irzûla nin tho mai mainahai, hmang viat loia nin chôiindômin chu,

¹⁴RENGPAA khan lômna hmu nin ta, rammuala hin chôiindôm ni nin ta, nin pu Jakoba irchon nangni pe ki ti, Rengpa bâiin a ti.

Isaia 59

Deipu'n mihai سوالنا a dem

¹Irngai roi, Rengpa kut chu saninhring thei loi hrangin inbong ni ual mah, inhre loi hrang rakin a mikuar khom sêt ual mah.

²Nin châinahai sikin a ni, nin Pathian leh nin kêr a irhla. Nin سوالناhaiin a hmêl ar hli zoia, nin irhâi a inhriat thei loi a ni.

³Nin kuta thisen a kêi neng nunga, nin kut zaphaa dik loina a sipa, nin hmûr le minlak nin thoa, nin mileiin thu saloi nin hrila.

⁴Tûte'n dikna san nuam loiin, thudik hmanga doi ngam om mak chêi. Thil chanlamboia nin irnghata, minlak ngot nin thoa. Thu buai om thei hrang nin zonga, thu saloi nin inchangtir ngai.

⁵Mirûl irtui angin thil سوال nin op ngaia, Âiom angin râng saloi an kêlsuaa, an irtui fâk hranga hongtuhai chu an thi ngai. An khoi theiin chu rûlhrêng hong suak a ti.

⁶An râng phan chu sil thei ni ngai maka, lumna khom ite nei thei mah. An sintho chu سوالنا vai a ni. An kuthaiin سوال sin an thoa;

⁷ Soal sin hrangin a sân an hrât ngaia, mi dik thisen insuak hrangin an irhnot ngai. An thil irngaituana a koi zoia, an fena hmun tina thil a siat zoi ngai.

⁸Irngaina lampui inhre loiin, diktaka roirêl lam inhre viat loiin. An lampuihai a kôia, a fetuhaiin râl irvei loiin om ngai mahai.

Mipuihai سوالنا inpuang

⁹Khanchu roirêlna dikin a nin hlatira, diktaka sinthôna'n ni pha thei maka, vâ ei nuama chu, inthim a chang ta, a vâ zongin a inthima kin irlôi.



¹⁰Mitcho angin bang kin inmaia, mit nei loi angin kin irvâk ta. Zân lai angin sîn laia khom kin irtet ngai, mi hrâthai laia, mithi angin kin oma.

¹¹Savom angin kin khêka, chardong takin vasu angin kin inkur ngai a ni. Roirêlna dik kin tûnga, om thei ta ma, sansuak kin nghâkhmoa, a ni san thei om ta mahai.

¹²Ni makunga chu kin pualoinahai hi irthup thei ni mah: Kin sualnahaiin mual an phoia, kin pualoina chu kin inhriat maia, kin inchâinahai khom irnghil ma ung.

¹³Rengpa hnôlin kin nuarsana, kin Pathian irnghilin, thu chanlamboiin tehel kin zong pea, irphialna zongin minlak kin thoa.

¹⁴Diktaka roirêlna om ta ma, diktaka sintho rêng om ma ung. Iamna chu tui laia a om chiana, dikna khom hong lût thei mah.

¹⁵Iamomna rêng om ta maka, sualna khan an hnê zoi ta, Rengpa'n a hong hmua a milung chuk pe ta ma, roirêlna dik hmu hrang zel nei ta mah.

Rengpa'n a mihai san a tum

¹⁶ Dengtheina tuang zoi hrang tûte om mahai, Rengpa'n ar khêl a ti hrai tâka, ama kut ngêtin san nôk a ti, dikna chu a iti mai a ni.

¹⁷ Rôppho hrangin dikna an nghâk tâka, saninhring theina lukhum a khuma, phuba lâkna puan leh ar tuama, ningmurna puan a sil ta.

¹⁸An sintho ang takin thuanhai a ta, ama doituhai chu ningmurna'n thuanhai a ta, a râlhai chungu chu phuba la a ti, chômbung hmuna omhai khom thuanhai ving a ti.

¹⁹Rengpa irhming roinpui chu sak le thanga mi'n chi an ti. Rengpa phûkin, tuilian a isêm angin, chardongna chu hong tung a ti.

²⁰ Jakoba irchi, sual mâksantuhai laia, Zion-a khan, mi irtantu hong hrang a ni, Rengpa'n a ti.

²¹“Keima'n nin laia thu ki ithung chu hi hih a ni,” Rengpa'n a ti. “Ki'rtha nin kuanga om le ki thu nin bâia ki isia khan atûn ata kumtuangin nangni



suaksan ta ngai no ni; nin nâihai le nin tuhai nâihai ten khomin mâksan ngai no ni,” ti hi Rengpa thusuak a ni.

Isaia 60

Jerusalem roiinpui hrang dân

¹Thoiin lân, vâi suak ta ro, ni vâi a hong tung ta, Rengpa roiinpuina khan nang an vâi pe ta.

²Inthimin rammual a tuam khaka, Nam danghai chung chu an thim zoi ta, nangma hrangin Rengpa vâi a suak ta. A roiinpuina ni chung a chum hmu vîng an ti.

³Ni vâina hnuaiia nam tin lêng an ta, Rênghai khomin ni vâina kha innang mai an ti.

⁴Ni mit hong inlêngtirin lân, ram hlatak ata ni nâihai chu an hong ta, ni nâinuhai an hong puakhai.

⁵Ni hmu tena chu râifân hmêl irput ni ta, râifân hraiin a omna lam inhre no chi ni. Nam tin sum le pâi chu tuipei chung a hong chôi an ti.

⁶Saringsei pâi khom an hor kôi dül dül so, Midian-hai le Efa saringsei hmang lai hai chu, Seba ram hlatak ata an hong mai, rângachak le berô an hong pêla, Rengpa inpâkna hla an hong sak.

⁷Kedar-hai kêlbelra rual an hong hôlhaia, Nebaiot kêlbelrachal an hong tuang sa. Ki maichâma Rengpa lômna hrang hong inhlan an ta, ki tempil chu chôiirsâng ki ti.

⁸Sûm irlôi angin le phervali vuang sup angin irkuang hor kôihai so, kho tianga mi mo an ini?

⁹Ramchârna hmun hlatak ata hong an nia, Tarsis-a irkuanghaiin an hong hruaihaia, ram hlatak ata ni nâihaiin rângachakhai an hong chôiia, Rengpa ni Pathian irhming chôiindôm hrang le Israel mi irthiang chôiindôm hrangin, ni mi hai chu nam tin mithmuin Rengpa'n a chôiindôm ta.



¹⁰Nam danghaiin ni kul banghai hong sin nôk an ta, rêng hai khomin ni sin tho an ti. Ki ningmur hraiin nang ki vîk nâkin, irsîrin lung nang kin kham nôk ta.

¹¹Ni kul mikothai chu irhong mai a ta, a sùn a zânin tûte'n khâr ta no nihai. Nam tina rêng haiin an irchon hluhai hong chôi an ti.

¹²Ni sintho nuam loi nam le ramhai chu siat an ta, irhmang ving an ti.

¹³Lebanon tâng roiinputirtu thing sahai chu meisâr ônpar le thing ngoitehai, ki hmun irthiang irkulna'n hmang an ti. Ki ke siana hmunhai chu chôiindômin om an ti.

¹⁴Deng nan theitirtu irchihai chu kûnin ni kuang hong an ti. Nang a hnuaisiahai ngai chu, ni ke bula khûksadelin om an ti. "Rengpa khopui, Israel mi irthiang Zion," nang ti an ti.

¹⁵Nang en nuam loiin, nang an rotsana, Tûte'n nang pan nuam ta mahai. Keima hin kho hoitak nan changtir ki ti. Kumtuanga râifâna hmunin nang siam ki ti.

¹⁶Nam danghai le an rêng haiin, nang inpâm an ta, an irhnuhai nan netir an ti, mi inzôktu chu, kei Rengpa hi ki ni, Jakoba mi hrât, a'rtantu chu ki nih ti inhre ta ni ti.

¹⁷Dâr irthûlin rângachak hong chôi an ta, thîr irthûlin tangkarua, thing irthûlin dâr, lung nêkin thîr nang hong chôi pe ki ti. Ni chung a thuneitu hrangin irngeina sia ki ti, sin zêktu hrangin, 'Dikna' sia sa ki ti.

¹⁸Ni rama khan nghaltôk songnahai tôm a ta, Ni ram chu siatin hek ual no ni. Ni banghai chu 'Saninhringna' ti ni ta, ni mikot chu, 'Inpâkna' ti ni ti.

¹⁹Sûna misa chu ni vârna ni ta no nia, Zâna tha khom ni meiser ni no nia, Rengpa kha kumtuanga vâ nang ni pe ta a ti, Pathian roiinpuina khan nan vârtir pe ta a ti.

²⁰Nangma hrangin chu misa tâk ta ngai no nia, tha khom inlang loi nî om ual no ni. Rengpa kha ni kumtuang vâ ni a ta, lusûnna nei ta no chi ni.



²¹Ni mihai chu mi dik ni ving an ta, ram chu lua mai ta nin ti. Keima iphun ki kut suak a ni sikin, ki roiinpuina mi tin mithmua kin langtirna a ni.

²²An nam laia a chîn le tômtak chu nam roiinpui tak la ni an ti. Keima Rengpa hin a zoro taka tho lat ki ti.

Isaia 61

Sansuakna Thurchi Sa

¹ RENGPA PATHIAN irtha chu ki chung a oma, Hriak a ni'rthûtira, Rengpa'n a ni itîr a ni. Invâihai laia Thurchi Sa hrila, nun beidong takhai inhar nôk hrangin, suaka intâng suak nôkna hrang thuhai, intângna ina omhai zalênna pe hranga inkung ki ni.

²Rengpa'n a mihai an zôk hrang zoro le a râlhai; a ni pêk hrang zoro a tung tâk ti inpuang hranga a ni itîr ki ni. Lusûnhai kha irtharngam sakhai hranga a ni itîr ki ni.

³Zion khua beidonghai inthâi hrang le an beidongnahai ata inhartirhai hrangin, porche taka om inhartirhai nôkna hrangin, a lei ngûi tâkhai inpâkna hla insaktirhai nôk hrangin tîr ki ni. Rengpa'n ama chôindôm hranga a iphun thing inditom taka an nih ti thu hril hranga ki ni.

⁴Matona khua lei ramhai chu inding thar nôk ki ta, a lei chim siat zoihai khom sinsiam nôk ki ta, zoro sôtaka khopui lei ram tâk khom siam insa nôk an ti.

⁵Nam danghai chu hmanghai nin ta, nin sa vâihai enkol an ti, ram dang mihaiin nin loi phol an ta, nin grep irhuanhai chuan an ti.

⁶Nangni hi chu 'Rengpa Ochai' tih ni nin ti. Pathian sinthotuhai nangni ti an ti. Nam tinhai irchongna chu fa nin ta, an roiinpuinai leh irvô nin ti.

⁷Nin inzakna le mualinphoina om ta no nia, nangni ram ngêta om nin ta, lêt hniin nin irchonhai pung a ta, kumtuanga lômna chang nin ti.

⁸Kei Rengpa hi diktaka roirêltu chu ki ni, Hâlirovôm hranga inhlan sa inrûk hi chu ki itheimâk a ni. Diktakin an sinthôna lômman chu pehai ki ta, kumtuanga thuthung siampuihai ki ti.



⁹Nin irchihai chu nam tin laia inlâr an ta, an laia nin nâi omhai an hmu'n chu Rengpa indit bîk nam nin nih iti inhre thei an ti.

¹⁰RENGPAA khan lôm tak tak ki ta, ki Pathian chung a hin lôm ok ki ti. Moineitu ochai anga irvô le moi a irvô ang hin, Jerusalem khua chu saninhringna le inhnêna puanin a hong ituam tâk a ni.

¹¹Irnênga chîmu a hong ikêi ang hin, Irhuana thil phun a hong incher ngai ang hin Rengpa kin PATHIANINinhnêna intungtir a ta, Nam tinrêngin inpâk an ti.

Isaia 62

¹Zion sikin dâihrek thei ta no ninga, Jerusalem sikin omchian thei ta no ning. A dik lam chu an lang infela, saninhringna a nina meivâra a vâ inlang infel no'n chu.

²Nam tinrêngin nin dikzia chu hmu'nfel an ta, Rengpa iphua irhming thar irput ni ti.

³Rengpa hranga chôindômna lukhum enhoi ni sa ni ti.

⁴"A'rkhêl," nang ti no nihaia, "A'rhmangnu," nang ti ual no nihai. 'Indiknu' nang ti ta an ti. Rengpa ni chung a lôma, ni ram ta hrangin pasal angna nei a ti.

⁵Dôngmate irthiang ruathar inlâr takin a ilua ang hin, a siamtu khan nang pom a ti. Moineitu'n a moi a ilôm ang hin, ni Pathianin nang lôm a ti.

⁶Jerusalem nir kul banghai a hrungtu sia ki ta, a sîn a zân om mai thei no nihai. A chonginkung kin hriat mai theina hrangin Rengpa hril mai an ti.

⁷Jerusalem an hong indet nôka, nam tinhai inpâk ruk hrang a ni mâka chu, Rengpa chu omchian phal no nihai.

⁸Rengpa'n a kut chang tiang kher pharin thu an kunga, A bân irnak hrâtin tho ngêt a ti. Ni buhai chu nin râlhai nêk phal no ninga. Nin isinna ra uainhai khom, nam danghai in zoi hrang phal ta no ning.



⁹A âttuhai ngêtin bu chu nêk ta an ta, Rengpa inpâk pumin, grep ra irhmaltuhaiin, kin irthiang tiin kholâia in an ti.

¹⁰Kho sâng ata hi fesuak unglân, ki mihai hongna hrang lampui siam hrangin, irthok ta roi. Nel inbit unglân, lamlian siamna hrangin nel inbit roi. Lunghai irthiang infâi unglân, mi tin mithmua irsinsiana puan târ roi.

¹¹Nam tin inhriatin Rengpa'n an puang ta. Zion nâihai chu hril ro, "Rengpa'n nangni a hong san ta, a isansuakhai a hong hruaihaia. A irtan saihai an fâhai ta," tiin.

¹²Rengpa irtanhai chu, "Nam irthiang," ti an ta. Nang khom, "Rengpa zong suak, khopui mâksan thei loi," nang ti an ti.

Isaia 63

Nam dang Rengpa inhnê

¹Tu moh Edom khopui, Bozra khua ata puan sen vung sil a hong so? roiinpui takin a'rvoa, a hong vut vut so. "Keima ki ni, saninhringtu roiinpui, ki inhnê tâk thu ki inpuang a ni".

²Itina mo ni puan sil teh a sen vunga, grep ra tui sômtu tukrivo teh a anga?

³Keima khomin nam danghai chu grep ra angin ki sirchîl chit a ni. Tûte'n ni changpui mahai, ki ninginmurna, ki sirchîl chita, ki ning an mura ki sirbe chita. An thisenin ki tukfamhai a ni khian nenga, ki tukfamhai a porinchetir zoi ta.

⁴Phuba lâk chu a ruk ta ki tia, ki mihai chu irtan zoro a hong tung ta a ni.

⁵Ni changpui hrang tûte hmu ta ma unga, a ni thop hrang tûte om mahai ti hril hnông loiin, ki bingin kin hnêpaia, ki ningmurna khan a ni inhâitir a ni.

⁶Kha mihai kha ningmur pumin ki sir chîlhaia, ki ningmurin an inruia, an thisen chu hnuai chung a iluang zoi a ni ta.

Israelhai chung a Rengpa satna



⁷Rengpa khonzazia dân hi hong hril nôk ki ti. Keima hranga a sin tho murdihai hi, Israel in sâng mihai hranga a isa lam hi lungkhamna ni vur mai ngai sikin, Ama inpâkin hla sak ki ti.

⁸“Ki mihai an nia, ni huang viat no nihai,” Rengpa’n a ti. “An hrangin mi’ndamtu a chang tâka.

⁹An chardongna tinrêng a tuangpuihaia, vântîrtôn ni loiin, ama ngêtin a sanhai ta, lungthungin, an renhai hrai sikin a’rtanhai ta.

¹⁰Khannisian ama kuang ata an tehel pe nôka, a’rtha irthiang lungrîl chu an natir pea, an râlin a om pehaia, a idoihai nôk a ni ta.

¹¹A mihaiin chu Mosia dam lai, tianlai sîn a ngaitua suaka, an sa vâihai a enkola, tuipui ata la suaktu kha khôn moh a om ta? Mosia kuanga irtha pêk theitu kha khôn moh a om ta?

¹² Mosia chang tianga om, thil roiinpui tak thoa, an makunga tuikhanglian irsentira, kumkhuaa a’rhming chôiindômtu kha khôn moh a om ta?

¹³Hmun irfûknaa sakor intân angin, intân loia tui dop tianga chalaitu kha khôn moh a om ta?” an ti.

¹⁴Ram satakna hmuna sa pâl an insuahai angin Rengpa’nirtha le lungngam saka, a mihai hruaia, irhming sa an pêlhai ta.

Changpui le lungkham zongna

¹⁵Ni omna hmun irthiang le hoi, irvân irsâng lai ata khan, zuang thîrin lân, ni zuang en ro, ni sathnem irngaina le hrâtna, ni khonzana le inrenna kha a idâi zoi ma ni ta?

¹⁶Nang chu kin pa ni nia, Abrahama’n nin hre pha mah. Nang chu, Rengpa, kin pa ni nih. Itiklai khoma ni sînghualtu ni nih.

¹⁷Rengpa, itina moh ni lampui ata kin irot ni inuam, nang kin chi loina hrangin kin milung ni inliantira. Ni irchon lua hrang nam, ni siahlohai sika hin, keini tiang hor hei nôk ta roh.



¹⁸Ni mi irthianghai hin ni Tempil chu, zoro sôtnote sùng an luaa, kin râlhaiin an del siat zoi ta.

¹⁹Kin Reng hi ni ngai loi angin nangin ni ni ena, ni mi lei ni ngai loi angin kin om zoi ta.

Isaia 64

¹Irvân insetin zuang chum theiin lân, ni kuang chu tânghai inthingin om thei an ti.

²Meiin thing châr a ikâng angin, tui a irtoktir ang hin, nam tinrêng hi ni makunga inthinghai sian, ni râlhai nir hming inhretirhai roh.

³Kin isabei loi thil ichiomhai ni thoa, ni zuang chum lai khan tânglianpahai khom inhnîngin.

⁴Nangma nang innanghai ta hrangin mita hmu ngai loi le mikuara inhriat ngai loi, sintho ngaitu Pathian chu nangma vai ni nih.

⁵Thildik tho nuam, ni nuam lama omdân theihai, ni lei lôm ngai. Kin chungu chu ni ning an mura, kin sual nuam hrai sikin, zoro sôtaka sual tâkhai hi saninhing kin la ini thei hrang mo?

⁶Kin rêngin kin porinche zoi ta, kin satna murdihai khom puanbom porche tak ang a ni ta, thinghna chuai tâk angin kin om ta, kin inchâinahai hin a ni ihruai irhmang a ni ta.

⁷Ni'rhming zong zel om ta ma unga, changpui zong hranga thoi nuam zel om ma ung, keini ata hi ni hmêl ni thupa, kin sualnahai hin a ni idelpha khak a ni.

⁸Nang chu, Rengpa kin Pa ni nih, keini hi, pilbêl kin nia, nangma hi a vuaktu ni nih; kin rêng hin ni kut suak kin ni.

⁹Rengpa kin chungu hin ni ninginmurtir ta no'n lan, kin tho insualnahai inhre mai ta no ro; ni en mai ta no'n lân, ni mihriam inzen kin ni.

¹⁰Ni kho irthianghai chu ramchâr a chang zoi ta, Zion khua chu ramchârna hmun a chang zoi ta, Jerusalem khua chu a ram zoi ta.



¹¹Kin in irthiang le hoi, kin pi le puhai nang inpâkna hmunhai, meiin a kâng zoia, kin omhmun sahai khom a chim siat zoi ta.

¹²Rengpa hi hih a poi moh ni tipui mak che? Dâihrekin, deng ni ni intheitir mai hrang ma ni?

Isaia 65

Tehelzonghai Pathianin a hrem hrang dân

¹Rengpa khan hiang hin a ti: “Kin irsiam diama, nin dit ta mak chea, a hmu mai thei kin nia, ni zong nuam mak chea, ki mi, ki’rhming koi nuam loihai kuang khan, ‘Hin ki omchian hi te,’ ki tia.

²Sûn sôtin anni hrangin ki bân ki phara, tehel nuamtuhai hin an inuam lam vai an zonga, an omdân hi dik mah.

³Hi mihai hin ki inuam loi thil an tho nuama, irhuan serhaia irbôlna thil an inhlana, nam dang pathian maichâma mirimhoihai an hâla.

⁴Mithi irtha chongpui hrangin rôla le thânyaia zân sôt an toi ngaia. Vok hme an fâka, sa chi tinrêng a’rthiang loihai an fâka, an irbual ngai.

⁵Ni hong pan no roi, nin themna nin ti, nangni nin them zât ni ma ung, an ti ngai. Hi mihai hi meikhû, sùn sôta ni ur ngaihai an ni.

⁶Dâisanhrekhai ta no ning, ki ihrem hrang dân irziak infel a ni zoi ta. An mal chung a buak khumhai ki ti.

⁷An sualna chu, an irchihai sualna le a rêngin anni chung a thuanhai ki ti. Rengpa’n a ti. Tânghaia mirimhoi an hâl ngaia, mualhaia an ni hmusitna an inlangtir ngai; an sintho nuam ngai sikin hremna an chung a chum hrang chu ki zêk zoi ta,” tiin.

⁸Rengpa’n hiang hin a ti: “Grep dôn tûte’n pai ngai mahai, uainin kêng an siam ngai. Ki siahlohai khom hi an rêngin, thathai ving no ning.

⁹Jakoba le Juda irchia irthokin ki tâng irthiang lua hrang mi inkunghai ki ta, ki tâng hai chu lua an ti. Khatak khan ki siahlohai om mai ta an ti.



10 Ki mihriam, ni zongtuhai ta hrangin saron phâizôl chu an sa vâina hmun chang a ta, a phâizôla an sahai chu lêng an ti.

11 Rengpa chu mâksana, ki tâng irthiang irnghiltuhai chu Gad-a chubai irmûkna hmun sinsiama, an bingin uain in irhlômin om an ti.

12 Nin ituang hrang rammual hi chu khandaiia thi a ni, that hrangtu kuang la kûn nin ti. Hihai hi ki koihai lai khan chu ni sâm mahaia, ki inuam loi sualna an thoa, ki hril laiin irngai nuam mahai, ki inuam loi lam tho an nuam ngai.

13 Rengpa PATHIANIN hiang hin a ti: “Ki siahlohain fâk hrang nei an ta, nangni chu nin phîngchâm a ti. Ki siahlohain in hrang nei intam an ta, nangni’n nin tuiinhrâl a ti.

14 Ki siahlohai lungrîl lôm a ta, nangni chu lungrîlnain chiar mai nin ta, milungdûk tongin khêk nin ti.

15 Ki inthang ki mihriamhaiin nin irhminghai kha khosâlna’n hmang an ta, RengpaPATHIANIN nangni thatpai a ti, ki siahlohai chu irhming thar phuahai ki ta.

16 Ram sûnga mi satvurna zongtuhaiin, Pathian iamom irhming sâmîn khuasâl an ti. Matona buainahai a hek zoi tâka, ki ihmu lolina rama an om zoi ta.

Irvân le irnêng thar

17 Irngai ro, irvân thar le irnêng thar ki siam ta, matona thilhai a hek zoi ta, inhriat mai ni ta no ni.

18 Ki thilsiam thara chu, lômin râifân kumkhua ta nin ti. Lômna’n Jerusalem ki siam inthara, a mihai khom lôm mai an ti.

19 Jerusalem chungâ lôm mai ki ta, ki mihaiin nin lômtir an ti. Chap irhâi inhriat hrang om ta no nia, chardonga khêk irhâi khom om ta no ni.

20 An dam sûng kumhai sôt a ta, tar kûna boka fein dam an ta; kum irza dam loi chu, vânglaia thi, ti an ti. Mi sual kum irza damloia thi chu, “Khosâlna a itong a ni,” ti an ti.

21 Inhai sin an ta, lua an ti, grephai phun an ta, a ra fa an ti.



²²An in sin chu mi danghai lua hrang ni no nia, an grep phun khom mi danghai hrang ni no ni, ki mihai chu thingkung angin dam insôt an ta, ki inthanghaiin an sinthôna ra chu, tar kûn dênin fa mai an ti.

²³An sin sôlnahai chu chanlamboiin om no nia, an ineihai khom vânduaina tong hrang om no nihai, an tû le nâihai dênin Rengpa'n satvur a ti.

²⁴An ni koi mân, sâmhài ki ta, an hril zoi mân len hre ving ki ti.

²⁵Inê le kêlbelra hmunkhatin om an ta, kâmkeibaknei khomin sehrât angin fapôl fa a ti. Mirûlhai khomin nêngpil hi bu'n ngam an ti. Ki tâng irthianga khan, thil saloi le natnahai om ta no ni, Rengpa'n a ti.

Isaia 66

Rengpa'n nam tin chung a roi a rêl

¹Rengpa'n hiang hin a ti: "Irvân ki rêngtoihmun a nia, irnêng hi ki ke irnghatna a ni; i anga in moh nin ni isin pe hrang, khôn mo ki iom hrang?"

²Thil tinrêng hi keima kut ngêia ki isiam an nia, khanchu an hong oma, Rengpa thusuakin a ti. Ki ihmu nuamhai hi tuhai moh an ini? Lungrîla irngaiintôm le irsîra ki hê lâkhai hi kêng an ini.

³Khannisian, hi mihai ta hrang hin chu sehrât thata inhlân mani, mihriam thata irbôl mani danglam ual mah. Belra inhlân mani, ui thata inhlân mani baidi irhlân mani, vok thisen inhlân mani, mirimhoi an hâl khoma, millim an biak khomin, anni hrangin danglam ual ma. An nuam lam takin sin an zonga thil intirom biak an nuam ngaia.

⁴Keima'n anni hranga thilirkhêl tak tho pehai ki ta, an ichtak thil intungtir pehai ki ti; ki khêk lai khan ni lei sâm mahaia, ki hrilhai lai khan irngai mahaia, ki mithmua ki inuam loi thil an thoa. Ki ilôm loi hrang thil tho an inthanga.

⁵Rengpa chia, a thu lâkhaiin chu, a thuhiril hi irngai roi, nin u le sanghaiin nangni en nuam mahaia, Rengpa roiinpuina chu hor lang ri se, nin lôm ngân moh inhre thei kin ti! an la ti mai mualphoi irla an ti.



⁶Khopui sũaga irhâi om chu, Tempil sũaga irhâi chu imo a inih ta? Rengpa phuba lâk irhâi a ni, a râlhai a ithuanna a ni.

⁷Nâiha irvei loia nâi nei ang hin, kha khopui khom khan lei irvei loi rengin nâipasal a nei tâka!

⁸Khaanga thil kha tu moh inhriat ngai? Tu moh a lei hmu om tâk? ramhai hi sũa khat kêra a iom thei ma ni? Nam khom hi a hong isuak thut thei moh nin isôn? Zion khua hin chu a hor vei phut chak a nia, nâipasal a nei zôia.

⁹Suak zoro ni loiin ki insuaktir thei loi hrang mo? Rengpa'n a ti. A nei vâng tâk hi chu ki inkîrtir hrang ma ni? Nin Pathianin a ti.

¹⁰Jerusalem tuangpuituhaio, lômpui unglân, hi khopui indittuhaio, lôm ving roi.

¹¹Nâiin irhnu bit a inêk ang hin, a roinpuinahai hi nin nuam dôrin hmang roi.

¹²Rengpa'n hiang hin a ti: Tui kang loi angin irngeina pe ki ti, nam dang irchongna murdihai hi, tuilian angin zuan lûttrir ki ti. Nu'n a nâi irhnu pêkin a ipom ang hin, a mal chungga inper ot ot a ti.

¹³Nâi a in-ôi ang hin keima'n nangni in-ôi ki ti, irtharngam takin Jerusalema khan om ta nin ti.

¹⁴Ama kha nin hmu tena chu lômin hong har thei nin ta, ilhling incher thar angin irnoi nutin om nin ti. KeiRengpa hin ki siahlohai ki changpuihai ngaia, ki râlhai chungga ki ning an mur ngai ti inhre ta nin ti.

¹⁵Irngai ro, mei leh Rengpa chu zuar thok a ti, kêllaiher tâlia hong chuangin a ningmur chu meichok angin kângin innatirhai a ti.

¹⁶Rengpa'n mei hmangin roirêl a ta, mi tin chungga a khandai irlek a ta, Rengpa'n thathai rem rum a ti.

¹⁷Irthiang infâi hranga tui irsila, nam dang pathian biak hranga honghai vok le châichek hmê fâka, intirom fâkhai ngai chu, an irhmang zoi vâng a ni; Rengpa thusuakin a ti.



¹⁸An sinthohai le an irngaituanahai kin hriat; nam tinrêng le chong chi tinrêng hmanghai chu hruai khômhai ki ta, hong an ta, ki roiinpuina hmu an ti.

¹⁹Annihai kha irsinsiana inentirhai ki ta, an laia senkhat chu hôihai ki ti, nam dang laia, Tarsis, Pul,. Luda haia tîrhai ki ta, thal kâp theihai chu Tubala, Javan-hai chômbug hlataka ki'rhming lan hre ngai loihai laia le ki roiinpuina la hmu loihai laia tîrhai ki ta, nam tinrêng laia ki roiinpuizia lan puang an ti.

²⁰Rengpa hranga thil inhlan hrang an hong ichôi ang hin nam tinhai laia urênghai chu hong hruaihai an ti. Sakor chunghaia chuang an ta, tâli chung a toi an ta, a'rzônna fonga toi an ta, sakuartung le saringsei chung a chuangin. Israelhaiin khêng irthianga thil inhlan hrang an hong ichôi ang hin, ki tâng irthiang Jerusalema hong an ti, Rengpa'n a ti.

²¹An laia mi senkhat chu ochai, Levi irchiin siamhai ki ta, Rengpa'n a ti.

²²“Irvân thar le irnêng thar ki isiam hrang chu, ki kuanga om mai a ta, khang ngêt khan nin irchihai le nin irhminghai om mai a ti.

²³Tha thar le Sabat nê rikipin, chubai ni mûk hrangin mi tin ni hong pan an ti,” Rengpa'n a ti.

²⁴ An suak tiang chu keima ni doia tehelzong ngaihai ruak kha hmu an ta, a thua irlung omhai chu thi zoi zât ni no ni, a kâng hrang mei khom chuai no ni, mi murdi'n intirom ti ok an ti.



Jeremia

Jeremia 1

¹Hi lekhabu hi Benjamina ram sũaga Anathot khuaa ochaihai laia inkhat Hilkia nũapa Jeremia thu'nsır chuangna a ni.

²Judai rama rêng Amona nũapa Josia an lal lai kum sômhleithumna khan Rengpa'n Jeremia a chongpuia.

³Josia nũapa Jehoiakima rêng chang lai khomin a chongpui nôka, kha hnung khomin Rengpa'nzoro tamtak chu, Josia nũapa Zedekia kum sômhleikhat an lal kum, a tha ringana khan Jerusalema mihai chu sala hruaiin an iom tâk a ni.

Jeremia koia omna

⁴Rengpa'n hiang hin a tia,

⁵“Phing sũaga nang ki siam mân rengin, nang kin hriata, sul ata ni suak mân rengin nang ki lei inthang sai a ni, nam danghai laia deipu hrangin nang ki lei inkung tâk a ni,” tiin.

⁶Keima'n, “O Rengpa Pathian, nũapangte kêng ki la nia, thu hril khom thei ma ung,” ki tia.

⁷Khannisian Rengpa'n ki kuang, “Nũapangte ki ni irti ual no ro, nang ki itırna mipuihai kuang fe'n lân, hril hranga ki thu nang pêkhai chu hrilhai roh.

⁸Annihai khom chihai no ro, ni kuang om ki ta, nang hrung mai ki ti, keima, Rengpa'n ki iti tâk a ni,” a tia.

⁹Khanchu Rengpa'n ki kut a hon tũaka, ki hmır a hon thema, ki kuang, “Irngai ro, thu ni inpuang ngêt hrang nang ki ipêk a ni.

¹⁰A vuan hin namhai le rêng ram chungga hin ircham ni inei tâk a ni, phai hrang le insimpai hrangin, insiatchit le indok hrangin, sin inding hrang le phun nôk hrangin,” a tia.

Inlarna voihnina



¹¹Rengpa'n ki kuang, "Jeremia imo ni hmu?" tiin a nir dona. Khan keiin, "Almond thingchâr ki hmu," tiin ki sâma.

¹²Rengpa khan ki kuang, "Ni sâm indik thap, ki thuhai an zôm theina hrangin ki ien mai kêng," a tia.

¹³Rengpa'n a ni chongpui nôka, "Imo ni la ihmu sa?," tiin a nir dona. Keiin, "Hmâr tianga bêl irchuan rum ki hmua, hi tiang an zuar let vâng," tiin ki sâma.

¹⁴Ama'n, "Hi ram sũaga om murdi chungga hmâr tianga irthokin siatchit theina hor soi buan buan a ta;

¹⁵hmâr tianga nam tinhaiin hitaka hong hrangin ki koi sikin. An rênghai hong an ta, Jerusalem kotbâihai le kul bang irhualin an rêngtoihmunhai dong an ta, Judai ram khopui danghai khom hual sa an ti.

¹⁶Ki mihai chu pathian danghai kuang irbôlna inhlanin an ni huanga, millim an isiamhai chubai an mûka, thil sual an tho tâk sikin, anni chu dûk ki inthotirhai hrang a ni.

¹⁷Irsiam ro, Jeremia; fe'n lân, hril hranga nang ki itihai kha hrilhai roh. Atûn hin anni chu chihai no ro, khano'nchu an makunga thâidôpin nang ki isiam hrang kêng.

¹⁸⁻¹⁹Irngai ro, Jeremia, hi rama mi tukhom, Judai rama rênghai, hruaituhai, ochaihai a rama mipuihaiin nang an idoi hrang a ni. Khan, a vuan hin keima'n anni dan theina hrangin hrâtna nang ki ipêk a ni; khopui kul det tak, thîr chopui, dârsen bang nei ang ni an ti. Nang inhnê thei no nihai, ni kuanga omin nang ki ihrung hrang a ni sikin," ti hi keima Rengpa thu suak a ni.

Jeremia 2

Israel, Pathian inhroina

¹Rengpa chong chu hiang hin ki kuang a zuang tunga,

²"Fe'n lân, Jerusalem mihai inhriat hrangin thu insîr roh. Đôngmate ni chang laia ni iamomzia, ei irnei zoia lung ni ni thungzia, chîmu ite song loina hmun ramchâra ni ni izui dânhai kha ki inhriat mai a ni.



³Israel keima ta vai ni nia; ki thil nei irthiang ni lei hong nia, nang innatirtu, tu chung a khom tuangna le siat irkipna kin tungtir ngai. Keima Rengpa'n ki iti a ni," tiin.

Israel irchihai سوالنا

⁴O Jakoba in sâng mihai le Israel nam tinhaio, Rengpa thu hi irngai roi.

⁵Rengpa'n a ti, "Nin irchibulhaiin keimaa hin imo thil dikloi an ihmua an ni irhlapuiin, an irot? Chanlamboi millimhai chubai mûkin hmanghmunboi an ichang tâk a ni.

⁶Aigupta ram ata ni hruai suaktu, ramchâr khur inthûkhai, tûte om zoi lina ramsêt, Tûte fe ngai lina, om ngai loi hruai inkhêltirtu, Rengpa chu kho tiang mo a iom?" tiin ni ngaitua mo.

⁷Ram sataka a ra fâka, a satnahai hmanginhôi hrangin, ki ihruai intunghai a ni. Khan ki ram kha chanlamboiin an siama, anni ki ipêkhai ram kha an iporinchetir a ni.

⁸Ochaihain Rengpa kha kho tiang mo a iom? Chong irdon siam loiin, ki ochaihain an ni inhriat loi a ni. Roirêltuhai ki chung a tehel an zonga; deipuhain Baal irhmingin thu an inpuanga, Hlutna nei loi millim chubai an imûk a ni.

Rengpa'n a mihai ar doipui

⁹Khaangin, keima Rengpa'n ki mihai ki irdoipuina thu inlang nôk ki ta, an irchi suanpârhai thiam no inchang ki ti.

¹⁰Nitâk tiang Kupra tuipanga fe unglân, sak tiang panin Kidron rama mi tîr unglân, sak tianga Kedar rama mi tîr unglân, hianga thil rêng rêng lei tung ngai mah ti hmu nin ti.

¹¹Ama chu a tak lei ni khomsian, nam dangin chu an pathianhai thûl ngai mahai, ki mihain chu anni roinpua inomtirtu Pathian chu, anni ta hrang ite tho theloi pathianhai khan an ithûl ngai a ni.

¹²Khasikin irngai irkhêl le lungzînga an omna hrangin, irvân ichiom taka inthing hrangin thu ki ipêk a ni.



¹³Ki mihaiin sual inhni an sin tâka; keima hringna tuihnâr hi an ni mâk raka, tuikuang an choia, tuikuang tui reng irting thei ngai loi chu.

Israel iamom loina râlhai

¹⁴Israel chu suak ni maka; suala irzir khom ni mah. Anino'nte itho mo râlhai kuttum a ituang tâk?

¹⁵Kâmkeibaknei angin an inhrâm khuma; A ram chu ramchârin an siama, a khopui khom a lua hrang boiin a ram zoi tâk.

¹⁶A ni Nof mihai le Tahfanes mihai khan, a lu an vîk khoi pea;

¹⁷Israel, Rengpa ni Pathianin lampuia nang ki hruai lai khan, ni ni mâksan sika khan, hi thil hi ni bingin ni lu chung a ni intungtir tâk a ni.

¹⁸Aigupta rama fein imo ni isapuina hrang ni ihmua, ni isabei tui in hrangin ma ni? Assuria fe'n imo ni isapui ual hranga ni irtûng, Eufrates-a irthoka tui in hrangin mo?

¹⁹Ni sualna khan dûk nang tho a ta, hnung ni ni isongna khan thiam no changin om ni ta, Rengpa ni Pathian ni mâk raka, ki ta hranga iamom ni ini loi hrang hi, sual a ini lam le a satloina lan hre suak ni ti. Keima, Rengpa Pathian Itinrêng thothei hin ki iti tâk a ni.

Israelhaiin Rengpa chubai mûk nuam loina

²⁰Rengpa Pathianin a ti, "Tiana khan Israel, ki thuneina ni hnôla, ki thu zôma chubai ni mûk hrang khom nuam mak chea; Tâng irsâng chung a hai, thingkung dâihlîm hnuai a chîmu insatir ngai pathian ni chongpuia.

²¹A chi diktak, grep ra sa zât angin nang ki phuna, khan en ro, imo ni hong ichang tâk? A thua hmanghmunboi grep hruai angin kêng ni om ta.

²²Chang-al le sabonin irsu khomin lân, ni sualna hnung chu la hmu thei mai ki ti.

²³Porinchein om ma unga, Baal khom chubai mûk viat ma ung, itin mo ni la iti mai hi? Irhôra ni sual dânhai kha enin lân, ni thil thohai kha hmu roh. Rama saringseipui ihura om hrang dân inhre loia an tâna.



²⁴Ramchâra intân lût ang kha ni ni. A'rzukna chu tu mo a dan zoi thei hrang? A chal zongtuhaiin ama zonga sôl ual nang ma, irzui zoro a phâkin chu hmu theiin a om ngai.

²⁵Israel Pathian danghai irzûlin, ni ke insôltir no'n lân, Ni dang khom châr no ri se. Khanchu nangma'n, 'O ho, kîr thei ta no ning.' Ram dang pathianhai ki'rngaiinhluhai tâka. Anni ki izuihai hrang a ni," ni tia.

Israelhai chu tuang inruk an ni

²⁶Rengpa'n a ti, "Inru khan chel a fâka, hmâimôk a irlâk ngai angin nin rêng hai le nin mi lianhai, nin ochaihai le nin deipuhai, Israel mipui nin rêngin nin hmâimôk a ti.

²⁷Thing chu nin pa a nia, lung chu nin nu a ni, nangni a tituhai nin rêngin nin hmâimôk a ti.

²⁸Nin isiam pathianhai kha khôn mo an om? Intakna nin phâk zoroa, an thei ngânin teh nangni san ri sehai. O Juda, ni khopui nei dôr chu pathianhai khom ni inei a ni ta hi te.

²⁹Nin milung chuk lolina imo a ini? I lo hranga tehel nin ni izong pe mo?

³⁰Nangni ki sepa, ar fêna reng om maka, nangni siam insa khom phal mak chêia. Kâmkeibaknei ningmur angin nin deipuhai khandai leh nin thathaia.

³¹Israel mihai, ki thu'nsîr nin mikuar lei sung sabak roi. Nangni hrangin ramchâr angin, ramzîng ichiom tak ki lei ini ma ni? Khaang khan a ni'n te, itho mo nin inuamtak nin thoa keima kuang hong kîr tum ta loia nin iom?

³²Dôngmate'n a'rvônahai irnghilin, moiin mo, a'rneina tukrivo a irnghil thei hrang ma ni? Ki mihai rêkin chu tep zoi thei nêka sîn, a tam ual an irnghila.

³³Irdithai irzui dân hi chu ni inhriat infel chu a ni hi. Nupang sual takhai khomin irchûna chu hmu an ti.

³⁴Ni puanhai chu mi inmokhai thisen ni loiin, mi'nriang le sual sin loihai thisen a kop uala. Khannisian hi thilhai tho pumin,



³⁵ite tho'nchâi ma unga; 'Rengpa chu ki chung a ning a inmur pe ta loi a ni,' ni tia. Aniachu, keimaRengpa'n sual sin loi anga nir huang sikin, dûk nang tho ki ti.

³⁶Nam dang pathianhai tiang ni'rngat tâk sikin, ni hlutna ni inboitir ok a ni ta. Assuria ni'rhnela nin imualinphoi ang khan. Aigupta chung a ni'rngat khomin mualinphoi nôk ni ti.

³⁷Inzaka kûnin, Aigupta-a irthokin kîr nôk ni ti. Keima Rengpa'nni'rngatnahai ki lei hnôl tâka, annihai ata irthokin ite ar fêpuina hmu no chi ni," tiin.

Jeremia 3

Israelhai iamomloina

¹Rengpa'n a ti, "Mi'n a dôngma leh teihai sianlân, a dôngma khan mâkin pasal dang nei sianlân, kha nupang kha hruai kîr nôk thei ni no ni. A ram pumpui a iporinchetir zoi hrang a ni. Khan Israel nang chu indit tamtak ni neia, atûn keima kuang hong kîr ni nuama!

²Tâng sîphai khi hong thîr ngân ta, notizuar anga ni om loina mo a om? Arab-haiin ramchâra mi an inruang ngai ang khan, ni indithai chu lampui tuana ni inghâk ngai angin, ni notizuarna le ni pualoinahaiin ram chu ni iporinchetir zoi a ni ta.

³Annihai tak sika hin kêng rua tho maka, rotui hnungkhôn khom a itho ta loi a ni. Kha tena khom khan notizuar ni la hman maia. Inzakin ni biang sen zel suak maka.

⁴Nang chu ka pa, nâipangte ki ni lai ata lung ni ni thunga.

⁵Ni ning chu inmur mai no nia, ni ningmur chu ki chung a kumtuangin om no nia, tiin Israel hiang hin ni iti a nia. Khanchu sual tinrêng ni tho thei dôr ni la itho mai a ni," tiin.

Israelhai le Judahaiin an sual irlet ngêt a nang



⁶Josia rêng chang laiin Rengpa'n ki kuang, "Nupang iamom loi Israel sintho kha ni lei hmu mo? Ki kuang ata tâng irsâng tui chung a le thing hring kung hnuaihai khan notizuar sin ni itho ngai a ni.

⁷Hihai murdi hi a tho zoi tena ki kuang hong kîr nôk ngêt a ti, ki lei tûnga. Khannisian hong kîr maka. A zuarpuinu Juda, mi iamom loi khomin thil omdânhai a lei hmu vinga.

⁸Kha Juda khom khan notizuar a chang tâk sika khan Israel kha ki mâka, ki irzûl dân kha a hmua. Khan, Israel zuarpuinu iamom loi Juda khan ki zui ngai chu ti maka. Ama kha notizuarin ar siama,

⁹a inzak viat loi a ni. Ram chu a porinchetira, lunghai le thingkung hai chubai mûkin a isiatpuihai a ni.

¹⁰Hihai zoia hin Israel zuarpuinu, iamom loi Juda chu tumna diktakin ki kuang hong kîr tum loiin tumna milak thoa hong kîr tumin," keima Rengpa'n ki iti a ni ta.

¹¹Rengpa'n a hrila, "Israela'n ama hnung song ta sian khom, iamom loi Juda nêkin chu a sa ual iti a inlangtir a ni," tiin.

¹²Israel kuang fe hrangin a nin hrila, keima kuang, "Iamom loi Israel ki kuang hong kîr nôk roh. Kei chu khonzâna sip ki nia, ki ninginmur no ni, kumtuangin ninginmurtir mai no ning.

¹³Ni itho insual a nih ti le Rengpa ni Pathian chung a ni tehel a nih ti inlang roh. Thingkung hring hai hnuaiha nam dang pathian hai lung ni la thung maia, ki thupêk ni izôm loi dân hai irphuang suak ta ro, Keima Rengpa'n ki iti a ni.

¹⁴Iamom loi mi hai hong kîr roi, ki nuchahai kêng nin ni, khopui tina irthokin inkhat lua, nam tina irthokin inhni lua nangni inthang suak ki ta, Zion tânga nangni hruai intung ki ti.

¹⁵Ki thu zôm roirêltuhai nangni pe ki ta, anni khan vârna le inhriatthiamna nangni rêl an ti.



¹⁶Kha rama khan nin hong pung tena chu, mihaiin ki Thuthung Bôm chungchâng thu sâm ta no nihaia, ngaitua lua ngaitua ta no nihai, an hriat lua inhre ta no nihai; a nang khom nang ta loi, a dang khom siam ual ta no nihai.

¹⁷Kha zoro kha a tung tena chu, Jerusalem chu ‘Rengpa rêngtoihmuna’ bê ni a ta, nam tinrêngin kha khan chubai ni mûk an ti. An lungrîl sual le sêtin tho hranga a ihril kha tho ta no nihai.

¹⁸Kha nî khan chu Israel le Juda irzomna ata hmâr tianga sal intângna ram ata hongin an idongtum dettak ni hrangin nin irchibulhai ki ipêkna rama hong kîr an ti,” tiin.

Pathian mihaiin millim chubai an mûk

¹⁹Rengpa’n a tia, “Israel ram milung chuk om, rammual pumpui sûnga ram hoitak nang pe hrangin, ki nâi hrangin nang ki inuam a nia, ‘Ka pa,’ tiin a ni koia. Ki kuanga irthokin a dang tiang tehelzong ta loi hrangin, Nang ki inuam a ni.

²⁰Khan iamom loi dôngma ang taka, ki ta hrangin iamomin lei om ngai mak chea,” ti hi keima Rengpa’n ki iti a ni.

²¹Tâng sîp ata irhâi inhriat a nia, Israelhai chap irhâi le an ni ingênna irhâi, sualnaa sip hringnun an hmanga, Rengpa an Pathian an irnghil tâk sika a ni.

²²Rengpa hnung song sanhai murdi, nin rêngin hong kîr nôk ving roi; nangni len damtir a ta, iamomin nangni siam a ti. Nangni’n, “A dik Rengpa tianga kin ihong hi, Ama kha kin Pathian a ni sikin.

²³Tâng sîpa kin millim chubai mûkhai khan ni sâm thei viat mahai. Israelhai hranga changpuina chu Rengpa kin Pathian kuanga irthokin a izuang hrang a ni.

²⁴Khannisian kin chîn lai ata kin pahai sin sôlna ra, kêlbelra pâl, sehrât pâl, nâipasalhai le nâinupanghai lua khom hi Baal inzakpui om pathian chubai mûk sikin kin inchânhai zoi tâka.



²⁵Inzakin zâl kin ta, kin mualinphoina hin nir khû ri se. Keini le kin irchibulhai hin Rengpa kin Pathian chung a kin len sual ta ngai sikin, a thupêkhai zôm pe ngai ma ung,” nin tia.

Jeremia 4

Irlet hranga fialna

¹Rengpa'n, “Israel mihaio, a kîr nôk nin nuama ni'n chu, keima kuang hong kîr roi. Millim ki ihnôlhai nin khâipaia, keima hrangin iamomin nin oma ni'n chu,

²ki'rhming chonginkungna nin inei hrang kha, thil dik ni a ti. Khaang khan a ni'n chu nam tinrênghaiin satvur hrangin ni ngên an ta, ni chôirsâng an ti,” a tia.

³Rengpa'n Judai ram mihai le Jerusalema mihai laia a iti pehai chu, “Nin irnêng âlkai loinahai kha kai unglân; nin chîmu ruhai khom ilhling bila inthek no roi.

⁴Nangni Judai rama mihai le Jerusalem mihai, keima nin Rengpa leh nin Thuthung kha vong indet roi, ki kuang inhlan roi. Nin inhlan no'n chu thil saloi nin ithohai sika khan ki ninginmur chu mei angin a ichok hrang a ni. Chok a ta, a that thei tûte om no nihai,” a tia.

Judai ram chu rûn hranga insî a ni

⁵Bekul chu ram pumpuia tum unglân, inring tak le fel takin inpuang roi! Judai rama mihai le Jerusalem mihai chu kul nei khopuihaia intâna lût hrangin hrilhai roi.

⁶Zion enin irsinsiana târ roi! Zôk hrangin intân unglân, ir-ial ta no roi! Rengpa'n vânduaina irkhêl tak hmâr tiang ata irhmang vingna irkhêl tak a hong itung hrang kêng!

⁷Kâmkeibaknei a khur ata a hong isuak angin, nam tinhai insiatchit hrang chu a hong irthok a ni ta. Judai ram insiat hrang le a hong tâk Judai ram khopuihai chu irfangin om an ta, an laia tûte irleng no nihai.



⁸Khasikin bora puan sil unglân, chapin inrung ta roi, Rengpa ningmur ichiom tak khan; Judai ram chu hnung a la isongsan loi a ni sikin.

⁹Rengpa khan, “Kha ni khan rêng hai le mi lian hai chu an thâi indôp a ta, ochai hai buai an ta, deipuhai milung zîng a ti,” a tia.

¹⁰Khanchu keima’n, “Rengpa Pathian, Jerusalem mihai hi ni ihuang hai kêng a ni hi te! Lungirngamna om a ti, ni lei tia. Khannisian khandaiin kêng an ring a isun pehai chian a ni ta,” ki tia.

¹¹Ramchâra irthokin phâivua saloi a hong ilût a ni, itia Jerusalem mihai ihril kha an om hrang zoro chu a hong inâi thiai a ni. Thil chînte’n a sêm invuanga om ngai ang kha a ni.

¹²Rengpa thupêka hong phâivua chu kha nêka hrât ual ni a ti. A mihai chungthu rêltu chu ama Rengpa ngêt a ni.

Judai ram Israelhai irhual

¹³En ta, sumpâi angin râl an hong so. Irdoina tâlihai chu phâivua angin mipuihai nêkin sakorhai so intân an hrât ual. Ei hrangin intak a ti! ei isiat zoi a ni ta.

¹⁴Jerusalem ni lungrîla irthokin sual infâi ro, khanchu saninzôkin om ni ti. Idôr mo ni ngaituana sual hi a la iom hrang?

¹⁵Dan khopui ata le Efraima tâng ata irthokin thurchi hong chôituhaiin thurchi saloi an inpuang mai. Namhai le Jerusalem kuanga ram hlataka irthokin râlhai an ihong a nih ti hril hranga hong an ni. Hi râlhai hin Judai ram khopuihai doi tumin khêk an ta,

¹⁶Namhai inhrilhai unglân, Jerusalema inpuang roi. Ram hlatak ata irhual hrangin an hong, Juda ram khopuihai rûn hrangin an ikhêk a ni.

¹⁷Jerusalem chu mi’n loi an ihrung ngai angin, hrung an ta, a mihaiin Rengpa chung a tehel sikin Rengpa’n a iti a ni.

¹⁸Judai rama ni omdân le ni thil thohaiin ni chung a ichum a ni ta. Ni sualna’n ni tuanga; ni milung taka nang a isun a ni ta.

A mihai ta hranga Jeremia lungnatna



¹⁹A na! tuang zoi ta ma ung, a na! Ki milung a na hraia a nin buai zoi ta! ki idâihrek thei ta loi a ni hi; bekul tum irhâi le irdoina khêk irhâi kin hriat tâk sikin.

²⁰Vânduaina irkhêl tak an tungtir baka; Ram pumpui a isiat zoi a ni ta. Mitkhap kârin kin puan inhai a siat zoia; an puanzârhai ite om zoi ta mah.

²¹Idôra sôt mo irdoi hi ki la ihmu maiin, Bekul tum irhâi ki la inhriat hrang?

²²Rengpa'n a tia, "Ki mihai chu an into ba bâka, An ni inhriat loi a ni. Nâipang into angin an oma; Inhriatthiamna nei mahai. Thil saloi tho chu an thei zapa, thil sa tho hrangin chu an hlosamna korong a ni," tiin.

Irh mangna hong tung hrang Jeremia ihmu

²³Irnêng ki thîr vêla, a rongkunga; Irvân tiang khom a vâz zel om maka.

²⁴Mual ki en khomin an inhnîng supa, Tânghai khom an inthing sup supa.

²⁵Kha hmunhai khan mi, an om zelin hmu ma unga; Vatehai lua vuangin om thei mahaia.

²⁶Ram hoi le satak khom a châr zoi tâka; A khopuihai chu Rengpa ningmur irkhêl tak sika khan a ram zoi tâka.

²⁷Rengpa khan, A ram pumpui chu rotsan ni a ta, Khannisian, a mongna chu intungtir no ning.

²⁸Khasika khan irnêng chu ngûi ruaiin om a ta, irvân khom a inthim khap hrang a ni. Rengpa iti lam tak ni ta a ti, a milung inchong thûl ta no nia, thu mongna chu a siam zoi tâka, irlêktir ta no ni.

²⁹Sakor chung chuang mihai le thal chôi ngaihai irhû khan, mi tin laizâm tho an ta, A sen chu rampui hnuaiia intân an ti, a danghai lungpui kâra irbî an ta, kho tin a rongin masan an ta, Khatak khan tûte lêng thei ta no nihai.

³⁰Jerusalem a siatchit ni ni ta! i lo hrang mo puan seninlâr leh ni la irvo mai? I lo hrang mo lunghlu angin ni mit ni la induktir mai kha? A'rfêna boia enhoia ni irsiampai kêng a ni! Ni indithai khan nang an hnôla, Nang that kêng an itum tâk.



³¹Khêk irhâi, nupang nâiha isêa khêk irhâi angin kin hriata, Nupang nâi nei masa taka khêk irhâi ang khan, Kha kha Jerusalem phûk irsam khêk irhâi a nia, A kut pharin, “Ki isiatchit tâk a ni! Ni that hrangin an hong tâk!” a tia.

Jeremia 5

Jerusalem suaIna

¹Jerusalem mihai, in kongkâr tina intân unglân, Thîr unglân, nin bingin en roi! Bazârhaia zong unglân, thil diktak thoa, Pathian ta hranga iamom tum inkhat lua nin hmu thei ngân mo? Nin hmu theia ni’n chu, Rengpa’n Jerusalem hi lan zôk a ti.

²Rengpa chubai mûkin irbê ngai khom unglân, Nin iti kai kha a nia, nin itum tatak chu ni mah.

³A dik takin Rengpa’n iamomna hi a izong a ni. Nangni a vîka, khannisian ite bêin bê mak chêia. Tukullian nin nia, nin soal ata irlet nuam mak chêi.

⁴Khanchu keima’n, “Hi mihai hi inmôl le inriang an nia, Into changin sin an thoa; an pathianin a iphâkhai, Rengpa’n imo an itho hranga a inuam ti an inhriat loi a ni.

⁵Mi lianhai kuang fe ki ta, anni chu va chongpuihai ki ti. An Pathianin a innang chu imo a ini. Rengpa’n imo an itho hranga a inuam chu inhre ngêt a ti,” tiin ki ngaituaa. Khannisian an rêngin Rengpa thuneina an hnôla, a thupêk zôm hrangin an inuam loi a ni.

⁶Khasika khan kêng rampui kêra kâmkeibakneiin thathai a ta, ramchâra irthoka inêhaiin sânphorhai neng an ti. Keiârsihai khom an kho sûnga lût an ta, Tual an suaka niin chu, sânphor ni an ti. An sualhai a tam hrai sikin, zoro tina Pathian hnung an songsan ngai sikin.

⁷Rengpa’n irdoina a siama, “I lo hrangin mo ki mihai suaIna kin inzâhai hrang? Anni mâk raka pathian dang dik loihai chubai an mûk tâk sikin, ki mihai chu an khop mâka kin fâhaia, Khannisian an uire zoi tâka. Notizuarin an zoro an hmang inhek ta.



⁸Sakorchal infâ inkhop hrai irzukna sip angin, Mâni in kôla mi dôngmahai an irzuk ngai.

⁹Hi thilhai sika hin anni chu dûk ki ithohai loi hrang mo? Hianga namhai chung a hin phuba ki ilâkhai hrang mo?

¹⁰Ki mihai grep irhuan sât infâi hrangin ki râlhai târ ki ta, insiat hrang chu ni loiin. A ônhai sâtpai hrangin hrilhai ki ti. Kha a ônhai kha ki ta an ni no sikin.

¹¹Israel le Juda mihai khan an ni idoi a ni,” Keima Rengpa hin ki itih a ni ta.

Rengpa'n Israelhai a hnôl

¹²Rengpa mihaiin an ni hnôla, “Ite tho tatak no ni, intak zoro khom tong ual no ia; irdoi mo, châm mo khom tong ual no ih,” an tia.

¹³⁻¹⁴Deipuhai khom Rengpakuanga irthokin chongbe nei loi, thurchi hlutna boi kêlsua ngai an ni, an tia. Rengpa Pathian itinrêng thothei khan ki kuang, “Jeremia, hi mihai hin hiang hin an ti sikin, nin bâia khan ki thuhai hi mei angin siam ki ti, mipuihai chu thingkung angin om an ta, mei khan kânghai a ti,” a tia.

¹⁵Israel mihaio, nangni doi hrangin ram hlatak ata irthokin Rengpa'n, nam a hong ihruaihai hrang a ni. Tianlai ata nam inthang bîk a hrât, an chong nin inhriat ngai loi chu.

¹⁶An thal kâp thei mihai chu mi hrât le khonzâna nei loa mi that ngai an ni.

¹⁷Nin chîmuhai le nin buhai fâkin ne ving an ti, nin nâipasalhai le nupanghai that an ti. Nin kêlbelra le sehrâthai khom thathai an ta, nin grep kung le theipui kunghai insiat zoi an ti. Nin irnghatna kul nei khopuihai chu an sipaihaiin insiat an ti.

¹⁸Rengpa'n a ti, “Kha nikhuahai khan ki mihai irhmangtirhai no ning,

¹⁹Jeremia, i lo hranga hihai hi ki itho mo a inih tiin nang an irdonin chu, hnung an ni songsana, ram dang pathianhai an ram sâng ngêta an itho ang khan an ram ni loa khan ram dang mihai sin an itho hrang a ni,” tiin anni chu hrilhai roh.



Pathianin a mihai a ngona

²⁰Rengpa'n a ti, "Jakoba irchihai chu hrilhai unglân, Juda mipuihai chu hrilhai roi.

²¹Nangni mi'ntohai le inhriatthiamna nei loihai, hi hi irngai roi, mit neia hmu thei loi, mikuar nei chaka inhre thei loihai.

²²Keima hi Rengpa chu ki ni, itho mo nin ni ichi loi? Ki makunga hin nin inthing loi hrang mo? Tuipui idîl phâk ten indangna hrangin chiaiphoi ki siama, a ikhêl thei loi hrang ramri det chu. Tuipui irsok khomsian, khêl thei no nia, tuiirsok khomin pha thei no ni.

²³Khannisian nangni'n mipuihai chu! tukullian le tehelzongin nin kal nin pêtin nin ni imâk a ni.

²⁴Ni chôirsâng hrangin ngaitua ngai mak chêia, rua masa le rua hnungkhônhai nangni ki pêka, a kum tin chîmu tharhai nangni ki pêk ngai khomin.

²⁵Khasikin nin sual sinthôna sikin hi thilhai hi a boi zoia, nin sualna sikin thil sa nin idok a ni ta.

²⁶Ki mihai laia mi sual an om; vatehai chel hranga lên pharhai angin ki mihai irdîpin an enhai ngai, an chângkama khit theina hrangin.

²⁷Sekâr thotuhaiin kok sûnga vatehai an ithun insip angin, an inhai chu inru thilin an insip a ni. Khasika khan kêng sin tho thei le irchong an nia,

²⁸an marin an isa a ni ta. Thil saloi an itho khan a ruk tah ti nei loiin, farahai dongtum pehai loiin, mi sirdea omhai khom irhruaina dik hmu mahai.

²⁹Khaangin hi thilhai sika hin anni chu intuangtirhai ki ta, hi nam chung a hin phuba ki ilâk hrang a ni.

³⁰Hi rama hin thilirkhêl le pangza omhai a tung tâka:

³¹deipuhai khan thu milak bana chu hril suak mahaia; ochaihai chu deipuhai thupêkin roi an rêla, ki mipuihai khomin an lôm lamtak a ni. Nikhua a hek tika chu itin mo an itho hrang tâk?" a tia.



Jeremia 6

Râlhain Jerusalem an irhual

¹Benjamina mihaio, zôkna zongin intân ta roi; Jerusalem ata rot ta roi! Tekoa khuaa bekul tum unglân, Beth Hakerem-a irthokin inhriat theina mei inchok roi. Hmâr tianga irthokin intakna le siatchit theina a hong itung hrang a ni.

²Zion khopui chu enhoi tak a nia, khannisian insiat la ni a ti;

³rênghai chu an sipai pâlhai leh kha khan la riak an ta, khopui irkulin an puan inhai zâr an ta, an laia mi tukhom an nuamna taka la riak an ti.

⁴Jerusalem doi hrangin irsiam roi! irtûng unglân, sîn laitaka ei idoi hrang a ni! la ti an ti. Khannisian, “An hnung hrai tâk, sîn a hek hrang tâk kêng, khohloia irhlîm a hong isei tâk kêng.

⁵Zâna doi ei ta; khopui kulhai insiatchit ei ti,” ti sa an ti.

⁶Rengpa itinrêng thotheiin, “Ki rênghai chu Jerusalem an lâk theina hrangin, thing phûra a lût theina hrang leidâk do hrangin thu a pêk tâka. Irhnuaisiana sip a ni sikin, hi khopui hi dûk ki itho hrang a ni.

⁷Tuikuangin tui thar a irting mai ngai angin, Jerusalem khomin a thil saloi a lan thartir maia. Nakhrât sintho le pop iliam vai ki ihmu a ni.

⁸Jerusalem mihaio, hi buaina hi nin irdînna hrangin irningna thil tung ri se, khano'nchu nangni ki imâksan hrang kêng. Nin khopui hi ramchârin siam ki ta; tûte zel om thei no ih,” a tia.

Israelhai tehel an zong

⁹Rengpa itinrêng thotheiin ki kuang, “Grep irhuan chu a thei rahai irhmal zoi hnunga a rong a iom ngai ang khan, Israel chu a korongin sia ni a ti. Khasikin zoro a la om sînga hin nin thei dôrin tukhom nin isansuakhai ngêt hrang a ni,” a tia.

¹⁰Keima'n, “An kuang ti pehai khom inlân, tu mo a ni irngai pe rêk hranga? Tukullian le ni thu chu irngai nuam loi an nia, hril pehai hranga ni nih iti hi an minui vai a inza pehai a ni.



¹¹Rengpa'n an chung a ni ninginmurna chu keima khom a ni kâng saa, ki ituang zoi loi a ni ta. Khanchu, Rengpa'n ki kuang, Ki ninginmurna chu nâipang kholâi chahai laia le ruatharte irbukkhômhai laia insum ki ta, pasal le nupanghai hruaiin om an ta, a tarhai khom lêkhai no ni.

¹²An inhai khom mi dang pe ni a ta, an loi le an dôngmahai khom khang dên khan hi rama mihai hi dūk ki ithohai hrang a ni.

¹³Mi tukhom a chîn a lian dik loitaka sum hlo suak an itum a nia; deipuhai le ochaihai khomin mipui an huanghaia.

¹⁴Ki mihai sâbe tuang uksakhai loiin, 'A dam ta,' an tia, la dam loihai khom kha,

¹⁵hi thil intiromhai an tho sika khan an inzak ma ni? Inzak mahai; an zak dân lua an inhriat loi a ni. Khasik taka khan mi dang an rîl tâkhai angin inrîl an ta, dūk ki thohai ni taka chu an mongna ni a ti," keima Rengpa'n ki iti a ni.

Israelhaiin Pathian nuamlam an hnôl

¹⁶Rengpa'n a mihai kuang, "Lamsuamhaia ngîr unglân, hei thîr hi roi, tianlaia lampui dik omna irdonhai roi. Kha khan fe unglân, irtharngam takin lêng roi," a tia.

¹⁷Khanchu Rengpa'n irningna hrang bekul irhâi irngai hrangin râl hrungtu a siahaia. Khannisian anni khan, "Irngai no ni ung," an tia.

¹⁸Khasika khan Rengpa'n a iti a ni, "Namhaio, irngaitua roi, ki mihai chung a thil zuang tung hrang hi len hre roi.

¹⁹O irnêng irngai ro, hi mihai chung a hin siatna ki intung hrang a ni. Ki thu irngai mahaia, ki dânhai khom an hnôl sikin le an irngaituana sual sikin.

²⁰Seba ram ata irthokin bero mirimhoihai mo, ram hlataka thil namhoitak an ni hong ichôi pehai hi, keima hrangin imo a hlutna om? An thilinhlanhai pom pehai no ninga, an irbôlnahai khom lôm ual no ning.

²¹Khasikin hi mihai hi masanhai ki ta, inrîl an ti. Pahai le nâipasalhai thi an ta, khang ngêt khan sa pâl sahai le an tualbômhai khom," tiin.

Hmâr tianga irthoka a doihai



²²Rengpa'n a ti, "Hmâr tiang ata mi an zuanga, ram hlataka nam roiinpui chu râl doi hrangin an irsiam mai ta a ni.

²³An phohai le khandaihai a inlang thiai a ni tâka, mi nunter le khonza nei loi an ni. Tuipui irhâi angin sakora an chuanga, an intân irhâi chu a ni. Jerusalem doi hrangin an irsiam diam a ni ta," a tia.

²⁴Jerusalem mihaiin, "Thuthang kha kin len hriatin chu kin kuthai a kima, nupang nâiha isê angin lungzîngna le natna'n a ni idê tâk a ni.

²⁵Ram hla khom fe ngam ta mak me, lampuihai khom fe ngam ta ma ung, kin râlhâi chu râltukfama irvo sai an nia, chitna irkhêlin an ni irhual a ni," an tia.

²⁶Rengpa'n a mihai kuang, "Bora puan sil unglân, irvut kêra inhlum roi. Nâipasal nei sîn ang takin mitrithi sômin chap roi, nangni doi hranga hong khan nangni an siat zêl hrang tâk sikin.

²⁷Chalnia irthît infâi hrang angin, ki mihai fiahaiin lân, imo an iang hmu suak roh.

²⁸An rêngin tukullian tehelzong hrât an ni, dârsen le thîr anga ngar an ni. An rêngin dik loi thu chanlamboia irthekindarhai an ni.

²⁹Rêng mei chu ar al insa bâka. Khan, thîr êk chu zôi thei loiin a chai dial ngai. Ki mihai irthît infâi tum mai hi ar fêna boi a ni, mi saloihai chu thon pai an ni sikin.

³⁰Anni chu lûtna nei loi, thîr êk tia bê ni an ti. Keima Rengpa ngêtin anni chu ki ihnôlhai tâk a ni sikin," a tia.

Jeremia 7

Jeremia'n tempila thu a hril

¹⁻³Rengpa'n tempil mikot, Judahaiin chubai mûkna hranga an lûtna ngai khan a ni tîra. Kha khan ngîra Rengpa itinrêng thotheitu Israel Pathianin a kuanga ti hrang a inei kha inpuang hrangin a ni hrila, "Nin innun dân danglamin nin sinthohai indanglamtir unglân, khanchu hi hmuna hin nangni inomtir mai ki ti.



⁴‘Ei zôkna! hi hi Rengpa Tempil a ni, hi hi Rengpa tempil kêng a ini, hi hi Rengpa tempil a ni!’ tia irhuangna tonghai iamhai mai ta no roi.

⁵Nin innun dân indanglamin nin sinthohai masan ta roi. Nin ir-enkol dân satakin irngîk roi.

⁶Ram dang mihai, farahai le meithâihai hnuaisia ma unglân, hi rama thilsual tho loihai that ma ta roi. Nangni an siat hrang sikin pathian danghai chubai mûk kha ma ta roi.

⁷Nin innun dân nin thûlin chu, nin ilua mai hrang nin irchibulhai kuanga ki ipêk ram hin nangni inlêngtir ki ti.

⁸En ta roi irhmangna thu hin nin irnghata.

⁹Inrû nin thoa, tual nin thata, nin uirea, khomâkirsâmin minlak nin thoa, Baal kuang irbôlna nin inhlana, nin laia inhriat ngai loi pathianhai chubai nin mûk ngai.

¹⁰Hi hi ki thil thohai nin hnôla, khanchu ki makunga ki biak ina hong ngîrin, ‘Ei zôk ta,’ nin ti ngai.

¹¹Ki in hi inrûhai irbîkna hmun nin isôn ma ni? Nin thil tho ki lei ihmu a ni.

¹²Ki’rhming irlamna hrang hmun ki inthang masatak Silo khuaa fe unglân, ki mi Israelhai سوالنا sikin an chungha ki sintho va en roi.

¹³Hi سوالناhai murdi hi nin itho a nia, vêl tamtak nangni ki hril khomin irngai nuam mak chêi. Nangni ki koi zoro’n nin ni isâm ngai loi a ni.

¹⁴Khasikin Silo chungha ki itho ang khan, hi ki tempil nin iiam chungha hin ki itho hrang a ni. Hi hmun hi nin irchibulhai le nangni ki ipêk chungha; Silo chungha ki itho ang takin tho ki ti.

¹⁵Nin sêngsuak Israelhai ki inhnotsuak ang takin ki mithmu ata nangni inhnotsuak ki ti,” keima Rengpa’n ki iti a ni.

Mipui thuzôm loina



¹⁶Rengpa'n "Jeremia, hi mihai ta hrangin chongchai pehai no ro, chap no ro, an irthûlin chongchai no ro, nang an irngai pe ual loi hrang sikin, ni ngên no roh.

¹⁷Juda khopui le Jerusalem kotsuahaia an sin thohai ni ihmu loi mo?

¹⁸Nâipanghaiin thing an bûma, pasalhàiin mei an sêma, nupanghaiin irvân rêngnu ta hranga bai siam hrangin baidi an inhmet a ni. Nin natir hrangin uain thilpêkhai pathian danghai ta hrangin an ibunthuan ngai a ni.

¹⁹Khannisian an bingîn an irsiat irhlôm sikin, mualphoina an chung a itung a ni.

²⁰Hi sika hin keima RengpaPathian hin ki ningmurna tak hi tempil chung a hin bun ki ti. Mihriamhai le sahai chung a ir-angnatin bun ki ta, thing le chîmu hai chung a khom; ki ningmur chu tûte'n an ithat thei loi, mei ang ni a ti.

²¹"Ki mihaio, irbôlna senkhat chu maichâma a pumin nin hâlpai ngaia, senkhat chu fa hrangin iphal nin ni. Khan keima Rengpa'n ki iti chu an rêngin fa ving ta roi.

²²Nin irchibulhai Aigupta ata ki hruaisuak lai khan hâlrivôm irbôlna mo, an irbôlnahai inhlan hrangin thu pehai ma ung.

²³Khan, an Pathian ki nia, ki mihai an ni theina hrangin le ki thu zôm thei hrangin chu, thu ki ipêk an ni. Khante an ta hranga thil a fe insa mai theina hrangin ki thupêk ang taka, innun hrangin ki ihrilhai an ni.

²⁴Khannisianlân zôm nuam loiin uksak ta maka. Kha nêkin an lungrîl insêtin tho loi hrang ti an tho nuam ual tâka, sa ual nêkin an isiat ual tâk a ni.

²⁵Nin irchibulhai Aigupta ata an suak nia irthokin hi nikhua dên dapin, a ni zui deipuhai nin laia ki tîrhai ngai.

²⁶Aniachu, tukhomin irngaiin uksak nuam ngai mahaia. Kha nêkin nin tukul nin inliantir ual ngai, nin irchibulhai nêkin tehel nin ihrât ual a ni.



²⁷Khasikin, Jeremia hi thuhai hi ki mihai kuang hril ni ta, khan nang irngai pe no nihaia, koi ni ta, khan nang sâm no ni.

²⁸An kuang, “Hi nam hiRengpa an Pathian irhâi irngaitua laia, sepna dong loi nam an ni hi,” ti ni ta, thudik ar hmang ta, an bâi ata paiirhmang a ni ta. Iamomna chu a boi tâka, sâmîn om ta ngai mah.

Hinom irhôra thilsual thohai

²⁹“Châ roi, O Jerusalem mipuihai, Nin sam ep inkol unglân pâi roi; Tâng sîphaia mithi chûl hla sak roi. Keima Rengpa chu ki ning an mura, ki mihai ki hnôl tâk sikin.

³⁰“Juda mipuihaiin thil saloi an itho tâk a ni.

³¹Hinom irhôra an nâipasalhai le nupanghaiin mei leh hâlin an irbôl theina hrangin maichâm ‘Tofet,’ iti an siama. Hi tho hranga hin thu pe ma unga, ki irngaituana lua a ilût phâk loi a ni.

³²Khasika khan, Tofet mo, Hinom irhôr tia koi ta loia, ‘Irthatna irhôr,’ tia koi ni ta a ti. Hmun dang irphûmna hrang a om no sikin mithihai kha khan an iphûm ni a ti.

³³Mithi ruakhai chu vatehai le sahai hrangin bu chang a ta, tûte annihai irzûl hrang om no ni.

³⁴Ram chu ramchâr inchang a ta, Juda khopuihai le Jerusalem kholâihaia raifân le lômin hri inboitir ki ta, irneina hruaithe irhâi hoihai ten lua inmongtir ki ti,” a tia.

Jeremia 8

¹“Kha tena chu, Judai rama rênghai ru, mi lianhai ru, deipuhai ru, mi dang Jerusalema omhai ru khom an thâna irthokin lasuak ni a ti.

²Khataka a sin an itho, an zonga, an zuia, chubai an imûk ngai misa, tha, le irvâna ârsi murdi kôla phoi inlang ni an ti. Lâkkhôma omin phûm khom ni no nia, irnêng insatir ngai sahrok irnênga om angin an ruhai chu om a ti.



³Khante hi nam sual tâk mi a la damhai hmun tina ki irthekindartirhai chu dam mai nêkin chu a thi inthang ual an ti,” Keima Rengpa Pathianin ki iti a ni.

Sual le hremna

⁴Rengpa'n a mihai kuanga insîr hrangin a ni tîra, “Mi an irtetin an thoi nôk ngai mo ni ma? Mi'n lampui chaninvâi sianlân, a ikîr nôk ngai mo ni ma?

⁵Khaang khan a ni ngânin te, o ki mihai itho mo hong kîr ta loiin hnung nin ni isongsan mai tâk hi? Nin millim nin intûk mai tâka, keima tiang hong kîr nuam ta mak chêia.

⁶Nangni ki irngai chiana, tûte thu dik hril zel om mak chêi. Tu mi khom ni unglân, a thil tho'nsual sikin a poi ti maka, tu mi khomin, thil dik loi ki isin ma nih ta o! tiin irdonna siam ma, sakor irdoina hmun pana intân angin mi tin mâni lampui nin ipan chit a ni ta.

⁷Tuichir le ivahai khomin kîr zoro an inhriata, vasuhai, pelôihai, le sâlvahaiin irthon zoro an inhriata. Khannisian ki mihaiin chu nangni rêlna hranga ki dânhai nin irnghil a ni.

⁸Itin mo vâr nin irtia, ki dânhai kin inhriata, tiin nin irbe thei? En roi, dânhai chu lekha irziaktu iamom loihai indanglama om an ni ta.

⁹Nin mi vârhai chu hmâimôk irsak an ni ta, lungzîngin an ir-ôk a ni ta, ki thuhai an hnôla, vârna nei ual an irtia.

¹⁰ Khasikin an loihai chu a chongpu thar kuang pe ki ta, an dôngmahai chu pasal danghai pehai ki ti. Mi tukhom, a chîn, a lianin dik loi taka sum lâklût an itum a ni. Deipuhai le ochaihai ten luan mipui an ihuanghai a ni.

¹¹ Ki mihai sâbe tuang khom ngaituuhai ok loiin, ‘A thathaia,’ an tia, an dam zoi no khomin.

¹²Ki mihaio, hi thil porinchehai nin tho sikin nin inzak mo? a ni, ite inzak viat mak chêi; nin hmâi ten lua sen thei mah! Khasika khan mi dang an rîl tâkhai angin inrîl nin ta, dûk nangni ki tho ni tâka chu, nin mongna ni a ti, keima Rengpa'n ki iti a ni.



¹³“Mi’n chîmu a ibukkhôm angin, ki mihai khom ki buk nuama; khan grep hruï ra boi angin, theipui ra boi, a hnâ khom thê m tâk angin nin oma, khasikin ram dang mihaiin ram hi an ilâk ki iphal a ni.

¹⁴Itho sika ei itoi mai ma ni? Hong roi, khopui kul neihaia rot ei ta, so taka son va thi ei ti. A chung a ei tho’nsual sika khan Rengpa ei Pathianin thi hrangin thiamloi a nin chang tâk sikin, ei in hrangin tûr a ni ipêk tâk a ni.

¹⁵Irtharngamna le indamna zoro ei tûnga, khan khom ite ar fêna om ma, hi nêkin chitna irkhêl kêng a zuang intung ual a ni.

¹⁶Ei râlhai chu Dan khopuia an oma, an sakorhai hnârkhông irhâi khom ei inhriat a ni. A ram pumpui chu sakor inhrâm chiin an inthing a ni. Ei râlhaiin ei ram le a sûnga thil tinrêng ei khopuihai le a mihriamhai siatna hrangin an ihong a ni.

¹⁷Khasikin irning roi, nin laia mirûl ki hong itûr hrang a ni, mirûl tûr hrâthaiin, nangni inchuk an ti,”Rengpa’n a ti.

A mihai ta hranga Jeremia milung natna

¹⁸Ki milung natna hi indam thei ni ma, lunggrîla na ki ni.

¹⁹Ram dang le kha ki mihai chapna ki inhriat hi irngai roi. “Zion- a Rengpa chu a iom ta loi ma ni? Khatak khan Zion rêng chu a iom ta loi ma ni?” Rengpa an rêng khan a sâma. Ni millimhai chubai mûkin; nin ram dang pathian hmanghmunboihai makunga lu kûnin, “I lo hrang mo ki ning nin inmurtir,” a tia.

²⁰Mipuihai khêk suaka, “Kholum a heka, favâng ar zoi tâka, khan khomin saninhringin la om mak me,” tiin.

²¹Ki mihai lungnatna’n ki khêkpuia, ki chapa, lungzîngin ki om tâka;

²²Gilead thinghnâi hloi a iom ta loi ma ni? Kha khan nin damtir thei an iom loi mo? Khaang khan a ni’n teh itho mo ki mihai indamin an iom loi?

Jeremia 9



- ¹Ki lu hi tuikuang ni sian, ki mitrithi hi tuipût ni ri se, ti ki inuam chu! Ki mi thata omhai hrangin, a sîn a zân ki ichap hrang a ni.
- ²Khual inzinhai hrang ramchâra tungna hrang tûngin om sianlân, ki mihai marakin kha khan om ki ta. An rêngin uire an nia, iamom loi pâl an ni.
- ³Minlak tho hrangin an irfôk mai ngaia; Ram sûnga dikna nêkin irhuangna an lal tâka. Rengpa'n a ti, "Ki mihaiin thil saloi ata saloi thil dang an thoa, an Pathian an ni inhriat viat ta loi a ni," a tia.
- ⁴A tu mi khomin rualsa ata a irvêng ngêt hrang a ni. Tu mi khomin a urêngpa iam zoi no ni; a san chu tu urêngpa khom ni sian, Jakoba anga minlak a nia, tu mi khomin rualsa a hril insiat ngai.
- ⁵Rual le rual an irhuanga, thudik insîr zel om mahai; Minlak tho an irchu irhlôma, sual sin thônâ'n zoro an inhek ngai.
- ⁶Tho'nchâina chu tho'nchâinain a zuia, irhuangna chu irhuangnain a zui ngai, a san chu nin hriat zel an tum no sika a ni, Rengpa'n a ti.
- ⁷Hi sika hin Rengpa Pathianin a ti, "Thîr angin ki mihai irthît ki ta, anni ki ifiahai hrang a ni. Ki mihaiin sual an isin a nia. Imo ki la itho pehai thei hrang?"
- ⁸An mileihai chu thal tûr nei hrât tak ang a nia; Itiklai khomin thudik loi an hril ngai. Tu mi khomin a tualbômhai kuang chu chonghoi a thoa, an rîl tâk khomin, ama ta hrangin chong a ikam pe a ni.
- ⁹Hi thilhai sika hin anni chu dûk ki itho loi hrang mo? Hianga nam chungâ hin phuba ki ilâk loi hrang mo? Keima Rengpa'n ki iti a ni.
- ¹⁰Keima'n, "Mual tin ta hrangin chûlpui angin ki om ta, sûlhring hmunhai hrangin chap ki ti, an châr zoi tâk sikin, Tûte khatak khan an zin nuam om ta mahai. Sa pâl irhâi inhriat hrang khom om ta ma, vâ le sahai khomin laizâm tho'n an rot zoi tâka," ki tia.



¹¹Rengpa'n a tia, "Jerusalem chu inram chim angin insiamtir ki ta, sihalhai fena hmun chang ta a ti. Judai ram khopui chu ramchâr chang a ta, tûte'n lua ta no nihai," a tia.

¹²Keiin ki'rdona, "Rengpa i lo hranga ram insiatin, ramchâr anga ni inchâr, tûte inzin ta loi hranga siam a ini? A tu hi mo a vâr uala an hriatthiam hrang? Mi dang hril hrangin tu hi mo hi thilhai hrilinfel pehai hrang ni ipêk?," ki tia.

¹³Rengpa'n a ni sâma, "Ki mihai ki irchutirna pêk an mâksan sika hin, hi thil hi a itung a ni. Ki thuzômin ki inhrilhai, tho nuam mahaia.

¹⁴An tukullianna sikin, an pahaiin an lei irchutirhai angin, Baal millimhai chubai an mûk a ni.

¹⁵Khasikin keima Rengpa itinrêng thothei Israel Pathianin ki tho hrang hi irngai ro: ki mihai hloisûl kha fâk zât le tûr in hrang, ki ipêkhai hrang a ni.

¹⁶Anni'n mo, an irchibulhaiin mo an inhriat loi namhai laia, anni chu irthekindartir ki ta, anni ki'rhmangtirhai zoi mâka chu doiin sipai pâl ki itûr hrang a ni," a tia.

Jerusalem mihai changpui zongin an khêk

¹⁷Rengpa Itinrêngthotheiin a iti a ni, "Imo thil a itung hi irngaitua ta roi! Mi châ theihai koi unglân, mithi chûlpuia hla sak thei nupang koihai roi," a tia.

¹⁸Mipuihaiin an iti chu, "I lo hranga mithi chûl hla sak pehai hranga ni ihril, kin mithai mitrithi'n a sip zoi mâka, kin mit vunhai chapna sikin mitrithi'n an duitir zoi mâka chu," tiin.

¹⁹Zion-a chap irhâi so irngai hi roi, "Ei insiat zoi tâk! Mual ei inphoi a ni ta! Ei ram hi ei imâk ngêt hrang a ni. Ei inhai lak chu a chim zoi tâka," tiin.

²⁰Ki iti chu, "Nupanghaio, Rengpa chong hi irngai unglân, a thuhai hi nin inhriat theina hrangin. Nin nâinupanghai chap dân irchuhai roi, nin rualhai mithi chûl hlasak dân irchutirhai roi.



²¹Thinahai chu ei inkhâra a hong lûta, ei in roiinpui tak sûnga a hong lûta; Nâipanghai chu kotbâia a tuk inrîlhaia, kholaiia ruatharhai khom a tuk inrîlhai ta.

²²Loi laia seêk pông angin, mithi ruakhai chu hmun tina a irthek zen zun a ni ta, Bu ât sai, a âttuhaiin an imâk, bu tukhomin an irtik bûm loi ang hin, hi hi Rengpa'n inpuang hranga a ni iti chu a ni.

²³Rengpa'n a ti, "Mi vârhaiin an vârna, mi hrâthai khomin an hrâtna, irchonghai khomin an irchongna irpâkpui no ri sehai.

²⁴ Mi tukhom irpâk a nuamin chu, mi'n hrilin nin hril infelin inpâk ri se, ki lungthungna chu a det a ni sikin, thildik le thil fel tho ngaitu ki ni. Hi thilhai hin a nin lômtir ngai a ni," ti hi keima Rengpa hin ki iti a ni.

²⁵⁻²⁶Rengpa'n a ti, "Aigupta mihai, Edom mihai, Amon mihai, Moab mihai le ramchâra om mihai, an sam ep inkolhai dûk tho hrang nî chu a hong inâi a ni ta. Hi mihai hi sertan chu an ni vinga, khan a inentir thuthung kha vong indik ngai mahai. Hihai laia tukhomin ki mi Israelhai tep sain ki thuthung an ivong indik loi a ni," a tia.

Jeremia 10

Millim biak le Pathian biak dân dik

¹Israel mihaio, Rengpa'n nin ta hranga chongbe hrang ainei hi irngai hi roi;

²Rengpa'n hiang hin a ti, "Nam danghai omdân la no unglân, irvâna thil danglam nin ihmuhai chi no roi. Nam danghaiin an chi hrang khomin.

³Hi mihai sakhua hi hmanghmunboi a ni. Rampuia thing an ilâk chu, kut sintheihaiin a hmangrua an sina,

⁴tangka le rângachakin an irvôtir ngai. Kha kha a tâk loina hrangin perek leh an vîkbê ngai.

⁵Khaanga millimhai chu fanghma bila mamîm ang an nia chong thei mahai. An fe thei no sikin thon an inang ngai a ni. Annihai kha chihai no roi: ite nangni lo no nihai, thil sa khom nangni tho pe thei no nihai," a tia.



⁶Rengpa nangma ang hi tûte om mahai; Itinrêng ni tho theia, Ni'rhming khom a roiinpuia, sin a itho thei a ni.

⁷Nam tinhai rêng chu tu'n mo nang chôirsâng loi hrang? Chôirsângna hmu inruk ni ni. Nam tina mi vârhai laia le rênghai laia khan nangma ang zel hi om mahai.

⁸An rêngin an invêtin an into a ni, thing millima irthokin imo an irchu thei hrang?

⁹An millimhai chu Spain rama irthokin tangka le Ofir rama irthokin rângachaka inluan kut sintheihai kutsuak a ni. Puan không theihai ikhông puan dum le senduk sil an nia.

¹⁰Khan Rengpa chu Pathian dik ni nia, Pathian hring le kumtuang rêng ni ni. Ni ningmurna'n rammual hi an thinga; namhaiin ni ningmurna tuang zoi mahai.

¹¹Nangma'n anni chu hiang hin ni inhril ngêt hrang a ni; irnêng le irvân siamtu ni loi, pathianhai chu insiat ni an ta, hi irnêng chung a hin kho hmuna khom hmu ni ta no ni.

Pathian inpâkna hla

¹²Rengpa'n a sinthotheina'n irnêng a siama; a vârna'n rammual an dinga, irvân khom a ikai inphar a ni.

¹³A thupêkin irvâna tuihai chu irsok dûm dûmin; Kôlkung ata sôm a hong ichôi ngai a ni. Rotho kêra kôlirtêk a oma, a siana hmuna phâivua a tho ngai.

¹⁴Hi hi an hmu'n chu mihriamhai chu inmôl le inhriatna nei loiin an irbe ngai; millim siamhai chu an inzak tâka, an pathianhai kha a dol le hringna nei loi an ni sikin.

¹⁵Hlutna nei loi hmûsit zât an nia, anni ngaitua hrangin Rengpa a zuang nî chu insiatin om ving an ti.

¹⁶Jakoba Pathian chu anni ang kha ni ma; Ama chu itinrêng siamtu a nia, a mihai ni hrangin Israel chu a inthang a ni. A'rhming chu Rengpa Pathian a ni.

Sala intângna hrang thu



- ¹⁷Jerusalem mihaio, irhualin nin om ta, nin thil neihai rêlinfel ta roi.
- ¹⁸Hi ram sâng ata Rengpa'n nangni inhnotsuak hrang a nia, nin suak ving mâka chu nangni a inhnotsuak hrang a ni. Rengpa'n a iti a ni.
- ¹⁹Jerusalem mihai chu an khêk suaka, “Ei na vang na! ei sâbe laka chu indam thei zât ni maka. Ei ituang zoi hrang ma nih ei lei sôn ngaia.
- ²⁰Ei puan inhai chu an siata, a detna hranga hrui khom a chat zoi ta. Ei mihai an rot zoi tâka, ei puan inhai inding hrang le a puanhai kaiphar hrangin tûte om ta mahai,” an tia.
- ²¹Keima'n chu, “Ei hruaituhai an intoa; hruaihai hrangin Rengpa lei ngên mahai. Hi siktak hin kêng hlo an isam, ei mihai an irthekindarh zoi ta.
- ²²Irngai ta roi, thuthang a hong tung ta! Hmâr tianga mihai irchunghôm nî chu; Judai ram khopui inram chita, sihalhai lêngna hmun siam hrangtuhai chu,” ki tia.
- ²³O Rengpa tûte mâni hringna chung a thunei om mahai ti kin hriat ta. Tûte'n an om hrang dân inhre thei mahai.
- ²⁴O Rengpa ni mihai irchuhai ro; khan kin chung a ni chong inhrumtir no'n lân, ningmurin dûk ni tho no roh. Kha kha kin mongna hrang a ni sikin.
- ²⁵Ram dang chubai nang mûk ngai loihai chung a khan le nang hnôltu mihai chung a khan ni ningmur chu insum roh. Ni mihai an thata, an ni insiat chita, kin ram khom an ni inramtir zoi tâk a ni.

Jeremia 11

Jeremia le thuthung

- ¹Rengpa'n ki kuang hiang hin a ti,
- ²“Hi thuthung thiltumhai chu irngai roi, Juda mihai le Jerusalema omhai inhrihai roh.
- ³Keima Rengpa Israelhai Pathianin hi thuthung thiltum zôm loi mihai chung a khomâksâm ki intungtir hrang a ni.



⁴Hi thuthung hi an irchibulhai Aigupta rama thîr hâl inzôitu kuang ata ki hruaisuak nia ki isiamhai an ni. Ki thu zôm hrang le sin hranga thu ki ipêk murdi tho hrangin kin hrila. An zôma ni'n chu ki mihai ni an ta, keima an Pathian ni ki tih ti ki ihril a ni.

⁵Khaangin ram irchong le ram sa atûna an ilua hi; an irchibulhai kuanga ki chonginkung thangsua'n ki ipêkhai hrang a ni," tiin. Keima'n, "Amen Rengpa," tiin ki sâma.

⁶Khanchu Rengpa'n ki kuang, "Judai ram khopuihai le Jerusalem kongkâr lamliahaia fe roh. Kha khan ki chongbe inpuangin lân, mipuihai chu thuthung thiltumhai irngaia zôm hrangin hrilhai roh.

⁷An irchibulhai Aigupta ata ki hruaisuak nî ata a vuan tena hin, ki thu zôm hrangin ki lei hong ihrilhai an ni.

⁸Khannisian irngai nuam mahaia, a zôm khom nuam mahai. Tukullianin a nitin sual sin an la itho mai ngai a ni. Thuthung zôm hrangin anni kha thu ki pêka, an inuam loi a ni. Khasikin hi thuthunga chuang, tuangna murdihai an chung a ki insum a ni ta," a tia.

⁹Khan, Rengpa'n a ti nôka, "Juda mihai le Jerusalema omhai chu ni doi hrangin an irrual a ni.

¹⁰An irchibul ki thu irngai nuam loihai sualna khan an kîra, pathian danghai zuiin an sinhai an thoa, Israel le Juda, an irchibulhai leh thuthung ki isiam an insiat tâk a ni.

¹¹Khasika khan keima Rengpa'n an chung a siatna zuan sum ki ta, zôk thei no nihai ti hi ki inhriattirhai a ni. Changpui hrangin an ni koi khomin irngai pehai no ning.

¹²Judai ram khopuia mihai le Jerusalema lêng hai khan, an pathian mirimhoi an inhlan pehai ngai irphuin changpuina zong an ta, khan an chung a siatna a zuan tung nî changpui thei no ni.



¹³Juda mihaiin khopuihai an inei dôr pathian khom an nei intama, Jerusalema omhai khomin intirom Baal pathian hranga irbôlna hrang maichâm, khopui kongkâr lamlian tam dôrin an isiam a ni.

¹⁴Jeremia, hi mihai hi chongchai pehai no ro, an ta hrangin ngên pehai no'n lân, an chungâ vânduaina a zuang tung tika ni koihai khom sian, irngai pehai no ning," a tia.

¹⁵Rengpa'n a ti, "Lung ki ithunghaiin thil saloi an thoa, ki tempila om mai hrangin i zât thuneina mo an la inei? chonginkungnahai siamin sa irbôlnahai inhlanin, siat rip theina zuang tung hrang chu khap thei hrangin an irbe ma ni? Kha khan a inlômthirhai thei hrang ma ni?"

¹⁶Zoro khat chu a hnâ irbom le a ra sip oliv thing tin ki lei koihai ngai, khan atûn chu, khonri angin ar hâi neiin a hnâhai chu hâlhai ki ta, a ônhai khom ngôtpai ki ti.

¹⁷Keima Rengpa itinrêng thothei hin Israel le Juda chu ki phuna; atûn chu vânduaina thilin ki iti a ni ta. Anni ngêtin an chungâ an intungtir ta a ni, sual an sina, Baal kuang irbôlna inhlanin ki ning an inmurtir sikin," a tia.

Jeremia that hranga a bi an zong

¹⁸Rengpa'n kha kha a nin hriattira, kin hriat ta; khanchu nang ngêtin an sinthohai ni nir hmutir ta.

¹⁹kei chu kêlbelrate that hranga an ihruai, lungirngam taka fe angin, keima siatna hrang thil saloi an iphan a nih ti ki inhriat loi a ni. "Thing chu a hrisêl lai takin lei phûr rei, tûte inhriat mai ta loi hrangin lei thatpai rei," an tia.

²⁰Khanchu ki chongchaia, "Itinrêng thothei Rengpa'n nang chu roirêltu fel ni nia, mihai irngaituana le nuamnahai ni fia ngaia. Ki chungchâng thu hi ni kuta ki bâng, khaangin ki mihai chungâ phuba ni lâkin chu nir hmu ro," ki tia.

²¹Anathot mihaiin ni that an nuama, Rengpa chongbe kin puang maiin chu an ni ithat hrang a nih ti khom an nin hrila.



²²Hi sika hin Rengpa itinrêng thotheiin a iti a ni, “Anni chu dûk thohai ki ta, an ruathartehai irdoina hmuna thi an ta, an nâihai fâk hrang boiin an ithi hrang a ni.

²³Anathot mihai chung a vânduaina intungtir hrang zoro ki rêl diam ta, a zuang tung tena chu tûte a dam suak om no nihai,” a tia.

Jeremia 12

Rengpa chung a Jeremia nuarna thu

¹Rengpa ni chung a hin chiar mai khom inlân, nang chu ni dik mai ngai a ni. Khan ni roirêlna dân hi nang ki irdon a ni. I lo hrangin mo, mi pualoihai chung an tuar bâka; mi dik loihai hlo an ichuk ngai.

²Anni chu ni phuna, irzung an thâka; an hor sôna, ra an hong neia. An chongbâiin nang an inpâka, an lungrîl rêkin chu nang an ihla vit a ni.

³Rengpa nangma’n kei chu ni nin hriata, ki sin ni hmua, lung nang ki thungzia ngei khom hi mi pualoihai hi belra that hrang angin hruaipaiin lân. A that hrang zoro a phâk mân ama chu hrungin lân.

⁴Idôra sôt mo kin ram hi a ichâr hrang, hmun tina hloisûlhai hi an ichâr hrang? Kin mihai سوالنا sikin ramsahai le vâhai chu an thi tâk sikin, mipuihaiin, “Pathianin ei omdân hi hmu viat maka,” an ti ngai.

⁵Rengpa’n a ni tia, “Jeremia, mihriamhai lua’n nang an irzûl insôltir theiin te, sakor vângin teh idôr mo ni irsiatpui thei ta hrang? Hmun kolnahaia lua ni ngîr indet thei no’n te, Jordan kôla rampuia len vâng teh itin mo ni itho ta hrang?

⁶Ni irzirpui ni in mihaiin nang an phiara, nang doi hrangin an irrual a ni. Satakin nang an chongpui khomin, anni chu iamhai no ro,” a tia.

A mihai sika Rengpa beidongna

⁷Rengpa’n a ti, “Israel ki mâksan rak tâka, ki nam inthang ki imâk tâk a ni. Lung ki ithunghai chu an râlhai kuta ki ipêk tâk a ni.

⁸Ki mi inthanghaiin an ni doia; rama kâmkeibaknei ang takin an ni khêkkhuma, khasikin anni chu ki ihnôlhai an ni.



⁹Ivadung inthim laia muhâite an ichi ngai angin, ki mi inthanghai chu an ni. Hong saa hruaithênaa om sa hrangin, ramsahai chu koibûmhai roi.

¹⁰Ram dang roirêltu tamtakin ki grep irhuan an insiata, Ki loihai chu an chîlpol neng tâka. Ki ram enhoi tak chu ramchârin an siam zoi ta.

¹¹Ramchârin an siam tâka, ki makunga rong luaiin a om ta. Ram pumpui chu ramchâr a chang zoi ta sikin tûte'n donsui ta mahai.

¹²Ramchâr tâng rama irthokin longhai hrangin mi an ihong a ni ta. Ram pumpui insiatchit hrangin irdoina ki itîr a ni ta; mi tukhom irtharngamin om ta mahai.

¹³Ki mihai chu bu an inrîtin, hloisûl an irtika; an sinsôl bâk ngaia, khannisian ite an ra om ngai mah. Ki ningmur irkhêl tak sika khan, an chîmuhaiin ra an insua thei loi a ni," a tia.

Israel kôlvêla omhai chungna Rengpa chonginkungna

¹⁴Rengpa'n a ti, "Israel kôlvêla om, ki mi Israelhai ram ki ipêk insiattuhai chungchângna hin ti nuam ki inei a ni. Kha mi sualhai kha thing ar zunga phâipai angin, an rama irthokin thonpaihai ki ta, an kuta irthokin Juda in sîngkuahai chu saninsuahai ki ti.

¹⁵Khan, ki thonpai hrangin, an chungna khonzâna nei nôk ki ta; nam tin mâni hmun le mâni ram chita hruai kîr nôkhai ki ti.

¹⁶Ki mihai chu Baal irhming songin chonginkung an lei irchutir ngaia, khaang takin, 'Rengpa mihring' irhming songin chonginkung an irchu tika ki mihai omdân lan lang a ta, an laia kop sa an ti.

¹⁷Nikhomsianlân, a zôm nuam loi nuam kai chu pai ving ki ta, inboihai ki ti," ti hi keima Rengpa hin ki iti tâk a ni.

Jeremia 13

Diar irphân

¹Rengpa khan a va fea, ki ta hrangin diar irphân irchôka kai hrangin tuia khom phûm loi hrangin a ni hrila.



- ²Khaang khan puan chu ki'rchôka, ki kai tâka.
- ³Khan,Rengpa'n a ni chongpuia hiang hin a tia,
- ⁴"Eufrates vadunga fe'n lân, lung ir-ônga ni diar kha thup ro," a tia.
- ⁵Khanchu ki fea, ki thup tâka.
- ⁶Zoro sôtzan hnunga chu, Rengpa'n Eufrates-a fea diar kha la nôk hrangin a nin hrila.
- ⁷Ki fe nôkin chu ki thupna kha ki hmu nôk tena chu a lei hmon vinga, a hmangna zel om ta maka.
- ⁸Rengpa'n a ni chongpui nôkin chu, hiang hin a tia,
- ⁹"Hiang tak hin Judahai irpâkna hi Jerusalem irsongna chu ki inboitir hrang a ni.
- ¹⁰Hi mi pualoihai ki thu irngai nuam loia, tukulliana om ngai pathian dang sinthoa chubai mûk ngaihai hi diar hmanghmunboi ang hin ni an ti.
- ¹¹Mi'n diar an ikai mai ngai ang khan, Israel in sêngkua le Juda in sêngkua murdi ki kuanga om mai hrangin le, nin pâka ni chôirsâng hrangin ki'rfûktira, khan ki thu zôm nuam mahai," a tia.

Uain kok

- ¹²Rengpa Pathianin a nin hrila, "Jeremia, Israel mi tinin uain bêla uain sung insip hrangin inhrihai roh. Anni'n ni kuang, bêl murdi uain thun insip hrang ti ki inhriat loi ma ni? an tia ni'n chu,
- ¹³hiang hin hrilhai ro, hi hi Rengpa iti chu a ni. Hi rama rêng Davida rêngtoihmun luatu rênghai, ochaihai, deipuhai le Jerusalema om murdihai an inrui mâka uain ki in intirhai hrang a ni.
- ¹⁴A tar le a vângin bêl a binga irtoka koi ngai ang hin an michal indang pehai ki ta, lungkhamna, kanna le khonzâna boi vingin ki irhmangtirhai hrang a ni," a tia.

Irpâk loi hrangin Jeremia hrilna

- ¹⁵Israel mihaio, Rengpa'n a itong tâk kêng! Irngaiintôm takin irngai pe roi.



¹⁶Rengpa nin Pathian chôirsâng roi, inthim a zuan tunga, tâng tiang nin irthon mân hin; nin itûng ngai vâk kha inthim le a vâro lai takin a hong ni mân hin.

¹⁷Nin mikuar nin sung nuam noa ni'n chu, nin irsongna sikin dâihrekin chap ki ti: chap ngûi ngûi ki ta, ki mitrithi luang zun zun a ti. Rengpa mihai chu intângna ina intâng hranga hruai an ni tâk sikin.

¹⁸Rengpa'n a ni tia, "Rêng le a nu chu an rêngtoihmun ata zuang chum hrangin hrilhai ro, an rênglukhum enhoi takhai an lua irthokin a tâk pehai ta sikin.

¹⁹Sim tianga Judai ram khopuihai chu irhual zoiin an om tâka, tûte a fe suak thei zât ni ta mah. Juda mi murdi sala hruai an ni zoi ta," a tia.

²⁰Jerusalem en ro, ni râlhai chu hmâr tiang ata an zuang chuma, Ni ienkol hranga ni kuta om ni irsongpui ngai ni mihai chu, khôn mo an om zoi ta?

²¹Rual sa ni inei ngaihai khan nang an rûna ni chung a roirêl sianlân, imo ni iti ta hrang? Nupang nâi nei ang takin a nâ ni ituang hrang a ni.

²²I lo hranga hihai hi ki ituang mo a ini, ni lungrîlin ni ti'n chu, ni sual hrai sika a ni. Ni puanvêl nang an lîm pea, nuamningin nang an iloh a ni tâk.

²³Ethiopia mi dukin a vun rông indanglamtirin, keiârsi'n a zia a ithûl thei ma ni? An theiin chu, nangni sualna ti loiin thil dang tho ngai loihaiin thil dik sin irchu thei nin ti.

²⁴Ramchâra phâivua'n bu'rsi a isêm invuang ngai angin, Rengpa'n nangni inthekdartir a ti.

²⁵Hi hi ni dongtum ni hrangin a lei iti ving a ni ta. Ama nin irnghila, pathian dolhai nin irngat tâk sikin, nin chung a intungtir hranga rêlinfel a ni ta.

²⁶Ama ngêtin Rengpa'n ni puanhai hlîk ving a ta, inzak nang irhmutir a ti.

²⁷Thil a inuam loi ni tho ngaihai kha nang a hmu ving, mi'n a tualbôm dôngma a irzuk ngai le sakorchalin a pui a izui ngai angin, sonong pathianhai



tânga le pêia ni izui ngai nang a ihmu a ni. Jerusalem mihaio, nin chungthu an tak a ni ta! Itik tena irthiang ngai zât mo nin ini tâk?

Jeremia 14

Khokang irkhêl

¹Rengpa'n khokang chungchânga a ni iti pe chu,

²"Judai ramin a tuanga, a khopuihai chu a iram thiai a ni ta, a mihai chu beidongin irnênga an zâla, Jerusalem chu a san hrang zongin a khêka.

³Mi irchonghaiin an suakhai tui chôi hrangin an tîra, Tuikuang tiang an fea, khannisian tui hmu mahai, an tuibêlhai a rongin an hong ichôi nôk a ni. Inzak le beidongin an hmâi an thupa.

⁴Rua a tho no sikin irnêng a châr zoi tâka, loi thotuhai lungzîngin an hmâi en sa ta maka.

⁵Sazukpuiin a lêngna muala sûlhring a om pe no sikin, a tê a ineiphing a mâk rak tâka.

⁶Tâng chârna rama sakuartunghai an ngîra, Sihal angin an inrunga; sûlhring fa hrang an hmu ta no sikin, an mit a inthim zoi a ni ta.

⁷Ki mihai keima tiang an khêka, 'Kin sualna'n mualphoi ni sak khomsian, Rengpa ni chonginkung angin ni changpui ro, voi tamtak ni kuang ata kin rot tâka. Ni chung a kin isual a ni ta.

⁸Nangma vai hi Israelhai itûng ni nia, vânduaina ata nin zôktu chu nangma vai hi ni ni. I lo hrang mo kin rama hin mikhual angin zân khat riak hrang anga mikhualin ni iom?

⁹Itho mo hi dôra ni ichaninvâi, changpui theina nei sipai teh ni ang tâka? A dik takin, Rengpa kin kuang ni oma! ni mihai kin nia, ni ma viat no ro," a tia.

¹⁰Hi mihai chungthu hin Rengpa'n a ti, "Keima kuang ata rot hi an inuam a nia, khang khan an bingin dan thei no ni. Khasikin an chung a ki milung a ichuk loi a ni. An thil tho'sualhai chu inhre mai ki ta, an sual sikin anni chu dûk thohai ki ti," a tia.



- 11**Rengpa'n ki kuang, "Hi mihai changpui hrangin ni ngên ta no roh.
- 12**Bu ngheihai khomsian changpui hranga an khêkna kha irngai pehai no ning, an hâlrivôm le an chîmu irbôlna inhlan sika khan, an chung a lôm ual no ning. Irdoina hai, châmna le hri le hraihaian anni chu ki ithathai hrang a ni," a tia.
- 13**Khan keima'n, "O itinrêng thothei Rengpa deipuhaiin mipuihai kuang irdoina mo, châmna mo khom om no ni, tia an inpuang khom nin hriata. Ni chonginkung sikin irtharngamna vai hi ei rama om hrang a nih an ti ngai," a tia.
- 14**Khan Rengpa'n a iti chu, "Deipu khan ki'rhmingin minlak a tho a ni, anni chu tîrhai ma unga, thupêkin an laia chongbâi khat lua ki iti loi a ni. Inlârna thu an ihrilhai kha keima ata suak ni maka; an thu inpuanghai chu hlutna nei loi, an lungrîla an ingaitua lik a ni.
- 15**Keima Rengpa hin ki tîr sika ni loiin ki'rhmingin thu an hrila, hi rama hin irdoina le châm om no ni, tia thuhiril ngai deipuhai chung a ki itho hrang nang ki inhril a ni. Anni chu irdoina le châmin thathai ki ti.
- 16**Hi thilhai hi an ihril pe mipuihai khom khang ngêtin ki ithathai hrang a ni. An hnâchangrôp chu Jerusalem inkhâr lamlianhaia pai ni an ta, tûte a phûm hrang om no nihai. Hi hi an dôngmahai, an nâipasalhai le nâinuhai an rênga chung a tung a ti, an tho'nchâina man ki ithuanhai hrang a ni," a tia.
- 17**Khanchu Rengpa'n ki chardongna chu mipuihai kuanga hianga hril hrang hin a ni hrila: "A sîn a zânin ki mitrithi luang mai sianlân, ki chap hi mong no inlân, ki mihaiin intakna popliam an tong tâka an na hrai tâk sikin.
- 18**Dâi pên tiang ki fe lakin, irdoina hmuna thi miruak tamtak ki hmua; Kho sûnga ki lûtin, phîngchâma thi mipui ki hmuaia. Deipuhai le ochaihai chu an inhriat loina ram an pan tâka," tiin.

Mipuihaiin Rengpa an koi



¹⁹Rengpa Judahai chu ni ihnôl phar ma ni ta? Zion-a mipuihai chu ni ipaihai rak ma ni? I lo hrang mo irtharngamna kin zonga, khannisian ite thil sa tung maka; dam hrangin kin sabeia, lungkângna kêng a itung.

²⁰Rengpa ni chung a kin isual a ni ta; kin sualnahai le kin irchibulhai sualna kin inpuang a ni.

²¹Ni chonginkung kha inhre maiin ni hmûsit no'n lân; Jerusalem chung a hin mualphoina intungtir no'n lân. Ni rêngtoihmun roiinpui tak omna hmun chu keini leh thuthung ni isiam kha insiat no roh.

²²Nam danghai millimhai khan rua inthotir thei mahaia; Irvâna a bingîn rua inthotir thei mah. O Rengpa, kin Pathian, kin sabeina chu ni chung a kin irngat a ni, hi thil tinrêng tho ngaitu ni ni sikin.

Jeremia 15

Juda mihai tuang hrang

¹Khanchu Rengpa'n ki kuang, "Mosia le Samuela khom ki makunga, hi mihai hrang hin hong ngîrpuihai khomsian, irngai pehai ual no ning. Anni chu irzûlhai unglân, ki mithmu ata hi om ta no ri sehai.

²Kho tiang mo an ipan hrang tia nang an irdonin chu, ki iti kha hril roh: Senkhat chu hripuia thi hrang an nia, khatak khan an ipan hrang chu a ni. Senkhat chu irdoinaa thi hrang an nia, kha kha an panna hrang chu a ni. Senkhat chu châma thi hrang an nia, kha kha an panna hrang chu a ni. Senkhat chu sala hruai hrang an ni.

³Kha kha an panna hrang chu a ni. Keima Rengpa hin an chung a thilirkhêl minli intungtir hrangin ki lei irêl infel tâk a ni. Irdoina hmuna that ni an ti; an ruakhai chu uihaiin kaizamhai an ta, vâhaiin fa an ta, an fâk banhai chu ramsahaiin fa an ti.

⁴Jerusalema Juda rêng Hezekia nâipa Manasea Juda rêng a ni laia a sin tho sika khan rammuala mihaiin an china hrangin dûk ki itho hrang a ni," a tia.



⁵Rengpa'n hiang hin a ti, "Jerusalem mihai, tu'n mo lung nangni inkhama, tu mo nangni châ hrang tâk? Tu mo zoro sôttak hnunga imo nin thurchi ti nangni irdon hrang tâk?

⁶Nangni'n nin ni hnôla, hnung nin ni isongsan a ni ta. Khasika khan ki bân ki'rzanga, ki kut ki insum a ni, Ki ningmur insua ki sôl tâk sikin.

⁷Ram sûnga kho tina khan fapôl angin nangni ki insâp a ni. Ki mihai nangni ki that irhmanga, nin sual lampuihai kha nin mâk no sikin, nin mihai chu ki ithathai a ni.

⁸Tuipui kôla chiaï nêka tamin nin ram sûnga meithâi an itam tâk a ni. An vâng sa laitakin ruathartehai ki thathaia, an nuhaiin an ituang a ni. Voikhat rengin beidongna le chitnain anni chu kuttum ki ithohai a ni.

⁹Nâi sari inthinu kha chu a'rzal tâka, intak takin a iom tâk a ni. Sûn vâ chu zân angin a om pea, mualinphoiin a bei an dongtir ok ta. A la dam sunhai khom nin râlhain nangni inthattirhai ki ti," ti hi keima Rengpa iti a ni.

Rengpa kuanga Jeremia a chiarna

¹⁰Itina inren om mo ki ini tâk hi! I lo hrangin mo rammuala ki zuang irzir hi? Ram sûnga mi tin le irngoa irkhal a nang tâka. Intângtirhaiin mani, intângtirhai loi khomin, mi tinin khomâk an ni sâma.

¹¹Rengpa ni sin sataka ki tho no'n chu ki râlhain buaina le lungzîngna an tuang zoroa anni irthûlin nangma kuang ki ingên pehai loi a ni'n chu, an khomâksâm chu hong tung ri se.

¹²(Mi tukhomin thîr chu khiak thei no nihai, a bîk takin hmâr tianga thîr, dârsen leh irzêl chu.)

¹³Rengpa'n ki kuang, "Ki mihai khan an ram puma an sualna sikin, an irchongna le an thilhluhai chu râlhai tîrin ki irthakpai pehai ving hrang a ni.

¹⁴An la inhriat viat ngai lolina rama an râlhai sin inthotirhai ki ti. Ki ningmur chu mei anga a nia, a ichok mai hrang a ni sikin," a tia.

¹⁵Khanchu keima'n, "Rengpa ni inhriat infel ving a ni. Nin hre maiin lân, ni changpui roh. A nin tuangtirhai chungu phuba ni la no'n lân; anni that theina



hrangin an chung a ni milung pehai no roh. Nangma irhminga hal fâk ki nih ti inhre mai roh.

¹⁶Ni ni chongpuia, ki kuanga ni iti thuhai ki lei irngai mai a ni. Ni thupêkhai chu ki lungrîla lôm leh râifânin a isip a ni.

¹⁷Innui irdâiin ki zoro sahai chu mi danghai leh hmang ngai ma unga. Ni thupêkhai zômin ki binga omin ni ningmurna ki isip a ni.

¹⁸I lo hrang mo ki la ituang mai hrang? Itho mo ki sâbehai ni indamtir thei loi? Itho mo an idam loi hrang? Fûrpui laia ivatedung châr angin lungzîngna ni ni inomtir ma ni?," ki tia.

¹⁹Hiang hin Rengpa'n a tia, "Ni hong kîrin chu nang lei pom nôk ki ta, a ni zui chang nôk ni ti. Thu chanlamboi hril loa chongbe a hmangna om nin puangin chu, ki deipu ni nôk ni ti. Mihai kuanga fe nang no nia, anni'n nang hong pan ual an ti.

²⁰Hi mihai makunga hin dârsen bang det khakin nang siam ki ta, nang irdoipui an ta chu, nang inhnê thei no nihai. Ni kuanga om ki ta, nang hrung hrangin nang inzôktirin om ni ti.

²¹Mi sualhai le nunterhai kut ata nang saninsua ki ti, keimaRengpa hin ki iti a ni," tiin.

Jeremia 16

Rengpa'n Jeremia om hrang dân hrilna

¹Rengpa'n a ni chongpuia a iti chu,

²"Hiang hmuna hin dôngma le nâi le tê nei tum no roh.

³Hi hmuna nâi suakhai le nu le pahai chung a thil hong om hrang nan hril ki ti.

⁴Insîna ichiom tak sikin thi an ta, mi tukhomin châhai no nihai, tukhomin a phûm hrang om no nihai. An ruakhai chu sahrok angin irnênga om rak a ti. Irdoina hmuna a ni no le châmna sikin thi an ta, an ruakhai chu vâhai le ramsahai bu ni a ti.



⁵“Lusûn omna ina ni ilêng viat hrang ni mah. Mi tûte ta hrang khomin chap no roh. Ki mihai chu irtharngamnain satvurhai mai no ninga, lungkhamna le khonzâna khom hmu ta no nihai.

⁶Irchong le inriang, hi rama hin thi an ta, tûte’n phûmin châ no nihai. Mi tukhomin a ichâ a nih ti irdangna’n a taksa inhopin a lu khom ep inkol no nihai.

⁷Mânia lungirthunghai an thi zoro khomin tûte’n lungngam sakin hmunkhatin fâkin in no nihai. Nu le pahai inthi tâkhai chung a lua tûte’n an ituangpuina inlangtir no nihai.

⁸“Mihaiin bu an ingheina hmuna khan lût no’n lân, annihai fâk hrang le in hrangin hmunkhat khomin toipuihai no roh.

⁹ Keima Rengpa itinrêng thothei Israelhai Pathianin ti hrang ki inei hi irngai roh. Nin dam sûng ngêtin nin mithmua raifân le lôm irhâi, irneina hruaithe lôm irhâi hi, ki indâipai hrang a ni.

¹⁰Hi thil murdi hi anni nin hrilhai zoi le, i lo hrang mo hiang dôra siatna irkhêl Rengpa’nkin chung a intungtir hi? Thil dik loi imo kin itho, kin Pathian chung a kin itho insualna? an ti’n chu,

¹¹hiang hin hrilhai ro, ‘Rengpa’n a ti, nin pahaiin hnung an ni songsana, pathian danghai leh chongin an sin an tho pehaia, an ni’rnhila, ki dânhai an izôm loi a ni.

¹²Nangni len vângin chu, nin pahai nêkin nin sual uala, tûte’n ki thu zôm mak chêia, tukullian songin nin thu ang takin nin iom a ni.

¹³Khasikin nangni le nin pahai inhriat loina rama nangni irzûl inlût ki ta; kha khan a sûn a zânin pathian danghai sin tho nin ti, khonzâna zel nin chung a inlangtir ta no ning, ’ ” tiin.

Sal intângna ata kîr nôkna

¹⁴Khan Rengpa’n, “Mihaiin keima Pathian hring Israel mihai Aigupta ram ata hong hruaisuaktu irhming sâma chonginkungna an nei thei loina zoro a hong itung thiai a ni.



¹⁵Kha nêkin chu keima Pathian hring Israel mihai hmâr tiang rama le anni irthekindarh ram dang tamtak ata hong hruai suaktu, keima irhming sâmin chonginkungna nei ta an ti. Anni chu an ram ngêta an irchibulhai ki ipêkna rama zuang hruaihai nôk ki ti, keima Rengpa hin ki iti a ni,” a tia.

Dûk thôna hong tung hrang

¹⁶Khan Rengpa’n, “Nga chel ngaihai tamtak hong hi mihriam chel hranga ki ikoihai an ni. Kha hnung chu sa kâp ngaihai tamtak mual le tânghai le rôl le lungpui kârhaia annihai irdîp hrangin koihai ki ti.

¹⁷Keimaa irthokin ite ar thup thei om maka, an sualnahai chu ki mithmua an lang loi zel om mah.

¹⁸Ki ram chu millim pathian hringna boi le pathian dik loi porchein an siam sikin, an sualnahai le pualoinahai sika khan a bâk inhniin thuanhai ki ti,” a tia.

Rengpa chungâ Jeremia chongchaina

¹⁹Rengpa, nang chu ni sînghualtu le hrâtna ni petu ni nia, buaina ki tong zoro khomin ni ni changpui ngaia. Namhai chu kôlkila irthokin ni kuang an hongâ, an iti chu, “Kin irchibulhaiin pathian dik ni loihai ti no chu a dang ite nei mahai, hmanghmunboi millim ti no chu ite nei mahai.

²⁰Mihriamin Pathian a isiam thei hrang ma ni? Thei no ni, a theia ni’n chu, Pathian diktak an ini loi hrang a ni,” ti an ti.

²¹Rengpa’n, “Khasikin atûn lai tak hin namhai chu voikhat zelin le zoro danga hrang khomin ki sintho theizia le ki hrâtzia inhria an ta, Rengpa ki nih ti inhre suak an ti,” a tia.

Jeremia 17

Juda سوالنا le dûk thôna

¹Khan Rengpa’n, “Juda mihaio, nin سوالنا chu thîr kolom leh lunglhu hmor irzumin nin lungrîl irziak a nia, nin maichâm irkihaia khom irziak a ni.

²Nin mihaiin maichâmhaia le tâng sîphaia thinghring kung tin hnuaia pathiannu Aseri millim chubai an mûka,



³hmun tongna tâng sîphaia khom khan, a ram pumpui huapin ni sual sinthotheina sikin ni râlhaiin nir chongna le nir chonhluhai kin ilâk ving hrang a ni.

⁴Ki ram nang pêk chu masan ni ta, ram ni la inhriat ngai loi hmuna ni râlhai sin thoin nangni siam ki ti. Ki ningmur chu mei ang a nia, a ikângpai hrang a ni,” a tia.

Thu dang dang

⁵Khan Rengpa'n, “Mi'n hnung ni songsana, mihriam chung a irngat chu, a fam thei mihriam hrâtna irngattu chu thiam loi ki inchangtir hrang a ni.

⁶Anni chu ramchâra sûlribuk ang an nia, hmun inthim ramchâra a mônga, irnêng ôl ite om lina kha, thil sa zel, kha khan om ngai mah.

⁷Khannisian a iamna ki chung a irngattu chu satvur ki ti.

⁸ Anni chu tuidung kôla thing mông, a'rzung tui nâi tianga om ang kha a ni. Boiruak lum a om khomin thi ngai ma, a hnâhai chu a hring maia; rotui a om no zero khomin a milung kâng pe ngai maka, a ira mai ngai a ni.

⁹Mihriam lungrîl hi thil dang nêka porinche tak a nia, siam insa tak tak a ni, Tu mo an hriat thei hrang?

¹⁰ Keima Rengpa hin nin irngaituanahai ki suaia, Mihriamhai lungrîl ki ifia ngai a ni. Mi tin an innun dân dungzuiin an sintho dungzuiin lômman ki pêk ngai,” a tia.

¹¹Dik loi taka sum hlo suaktu chu varungte ama irtui ni loi, op inkhêitu ang a ni. A la vânglai takin ar chongnahai dok a ta, A mongna chu invêt ti no chu a ihlo hrang dang om mah.

¹²Ei hmun irthiang chu rêngtoihmun roiinpui tak ang kha a nia, a phut ata tâng sîpa om chian ang a ni.

¹³Rengpa, nangma chu Israelhai isabei tak ni nia; Nangma nang mâktuhai chu mualinphoi an ti. Rengpa hringna tuihnâr thar tak chu nang an mâk sikin. Pil kâra irhming irziak angin irhmang an ti.

Jeremia'n Rengpa chongpuina a zong



¹⁴Rengpa, nin damtirin lân chu dam ving ki ti, ni sanin lân, zôk ving ta ki ti. Nangma vai nang ki inpâk ngai ni ni.

¹⁵Mipuihaiin ki kuang, “Rengpa’n irningna chong a ni ipêkhai kha khôn mo a iom tâk? atûn hin tung ta ri se!” an ti ngaia.

¹⁶Khan khomin Rengpa an chung a vânduaina irkhêl intung hrangin nang lei ngên ngai ma unga, an ta hranga vânduaina zoro a iom hi ki inuam ni mah. Rengpa, hi hi nin hriata, ki iti kha ni inhriat a ni.

¹⁷Ki ta hrangin chu ichiom ni no ni; nang chu buaina tung zoroa ki zôkna ni ni.

¹⁸Deng nin theitirtuhai chung a mualphoina insumin lân, Rengpa keima chu ni la hôi roh. Chitna irkhêlin anni chu insipin lân, keima chu ichiomin ni siam no roh. An chung a vânduaina irkhêl intungin lân, thatpaihai ving roh.

Sabat hmang dân

¹⁹Khan Rengpa’n, “Jeremia, fe’n lân kul dâi mikot dettak chu, Juda rêng hai lûtna le an suakna ngaia khan va ngîrin lân, Jerusalem lûtna mikot dang hai khom khan ngîr thiaiin lân, ki mihai kuang ki chongbe inpuang roh.

²⁰Rêng hai le Juda mipuihai Jerusalema om murdihai le dâi mikota lûthai, ki itih irngai hrangin hrilhai roh.

²¹ An hringna an inlût ngânin chu, Sabat nia ite pêl loi hrangin hril ro, ite Jerusalem mikot khêlin an ilûtpui hrang ni ma;

²² an in sêngkua ata mo, Sabat ni chu thil an ichôi hrang ni ma, nikhua irthiangin an iser hrang a ni, an irchibulhai kuanga ki thupêk angin.

²³An irchibulhai khan ki thu le’rngai mahaia, an lei irngaisak loi a ni. An tukul an inliantira; ki thupêk zômin mo, keima kuang irchu nuam mahai.

²⁴“Hi mihai hin ki thupêkhai chu an izôm ngêt hrang a nih ti hril roh. Sabat nî chu dâi mikot palin puak ite a sêng tiang an hong ichôi inlût hrang ni mah. Sabat nî chu sîn irthiangin ser an ta, sin ite an izong hrang ni ma.



²⁵Khanchu an rêng hai le an hruaituhai kha Jerusalem dâi mikot hong lûtin, Davida'n rêng thuneina a inei ang khan nei an ti. Juda mi hai le Jerusalema omhai leh khan hmunkhatin tâli chung a le sakor chung a chu angin Jerusalem khopui chu mi sip mai ta an ti.

²⁶Judahai ram kho sêng ata le Jerusalem vêla khua chîn hai ata hong an ta, Benjamina ram hual ata, tâng hnuai ata, tâng sîphai ata, sim tiang Judai rama irthokin mi hong an ti. Ki tempila hâlrivôm thilpêk le irbôlnahai, buvûi thilpêk le mirimhoi hai, khakhêla, lômthu hrilna thilpêk khom hong chôi sa an ti.

²⁷Hianga ki thu zômin Sabat nî chu sîn irthiangin an iser ngêt hrang a ni. Kha ni khan Jerusalema dâi mikothai khêlin ite an ichôi hrang ni maka. An chôi duaia ni'n chu, Jerusalem dâi mikothai chu mei leh hâl ki ta, kha mei khan Jerusalema rêng in hai le a rêngin kâng ving a ta, tukhomin that thei no nihai," a tia.

Jeremia 18

Bêl vuaktu kuanga Jeremia fena

¹Khan Rengpa'n ki kuang,

²"Bêl vuaktu ina zu fe'n lân, ama khan ki chongbe nang len hril a ti." a tia.

³Khaangin ki zu fea, bêl vuaktu'n khôl leh sintho ki hmua.

⁴A bêl siam kha a sa a ti no'n chu bêl dang a sin nôk zel ngaia.

⁵Khanchu Rengpakhan ki kuang,

⁶"Hi bêl vuaktu hin a itho lam taka hin, nangni mi Israelhai chung a tho theina ki inei loi ma ni? Bêl vuaktu kuta pilpok ang takin ki kut a iom a ni.

⁷I ang zoroa khom namin mo, rêng ramin mo, phâipai ki ta, setchit ki ta, irhmangtir ki ti, lei ti ngai khom inlân,

⁸kha namhai khan an sualna an irletin chu, an chung a thil saloi tho ki itum kha irlêk nôk ki ti.



⁹Khan, i zoroa khom, namin mo, rêng ramin mo, phunhai ki ta, indingtir nôk ki ti, lei ti khom inlân,

¹⁰ki mithmua thil sual an thoa, ki thu an zôm noa ni'n chu thil sa tho pehai hranga ki itum kha irlêktir nôk ki ti.

¹¹Khasikin atûn hin Juda mihai le Jerusalema omhai kuang, anni doi hrangin thil ki'rsiama, dûk thohai hrangin ki irzoi diam ta a nih ti hril roh. Anni chu sual sintho hringnun hmang inhek hrangin hril ro, an lampuihai thûla an sinthohai mâkin.

¹²Anni'n, i lo hrang mo kin imâk hrang? Kin rêngin kin nuam dôr tukullianin sual sintho kin ti, imo ar helna om?," tiin nang sâm an ti.

Mipuihaiin Rengpa an hnôi

¹³Khan Rengpa'n, "Nam danghai kha irdonhai ngân roi ba; hianga thil hi a lei tung ta ngai mo? Israel mihaiin, thil intak tak an lei itho a ni ta.

¹⁴Lebanon lungpui irsânghai ivur boiin mo an om ngai?

¹⁵Ki mihaiin chu an ni'rnhila, millimhai kuang mirimhoi an ihâl a ni. An lampui fena hrang ata an pêta, lampui milui kha zui ta mahaia; lampui irdang loi an izui tâk a ni.

¹⁶Hi ram hi thil ichiomin an siama, irngaiinhlu loa om mai hrang angin. A theng irlôihaiin an thil hmu kha ar khêl ti an ti. Irngai irkhêlin an luhai khom notpol an ti.

¹⁷Sak tianga phâivua'n bâli a isêm inlêng ngai angin, ki mihai chu an râlhai makunga irthekindartirhai ki ti. Anni kha hnung songsanhai ki ta; vânduaina irkhêl a tung zoro khomin anni kha changpuihai no ning," a tia.

Jeremia chungu inrûka thuphana omna

¹⁸Khanchu mipuihai khan, "Jeremia chungthua hin i mani chu tho ei ti. Itiklai khomin ochaihai le irchu hrang, mi vârhai lungvâr ni sak hrang le deipuhai Pathian chongbe inpuang chu, an iom mai hrang a ni. Khasikin ama chu hrilinsiat ei ta, a thuhrilhai khom hi irngai pe no ih," an tia.



¹⁹Khasikin ki chongchai tâka, “Rengpa ki iti hi len hriatin lân, ki râlhaiin ki chungthua an iti hi le’rngai roh.

²⁰Sual hi thil sa thuanna’n mo a ini? ki tâkna hrang khur an isin a ni. Ningmurna’n ama chu a nin sipa, ni kuang hongin an irthûla ki izong kha inhre mai roh.

²¹Khan atûn chu, Rengpa an nâihai chu phîngchâmin thihai sian, irdoi zoro’n that ni ri sehai. An dôngmahaiin an pasalhai leh an nâihai inchânhai sian; pasalhai chu hripuia thiin, an ruathartehai chu irtukna buala thi ri sehai.

²²Ki tâkna hrang khur an choia, ki’rkhitna hrang châng an kam sikin, râlhai chu hong tîr thutin lân, an inhai inmokin lân, anni chu khêkin tîrhai roh.

²³A ni, Rengpa an ni inrûka thuphan dân hi nin hriat vinga. An tho’nchâina mo, an سوالنا chu ngaidam no roh. Ni ningmur lai takin anni chu intem takin paihai ta ro,” tiin.

Jeremia 19

Bêl koi

¹Rengpa khan hiang hin a ti: “Fe’n lân, bêl suctu pil bêl va’rchôkin lân, mipui laia hruaituhai, ochai laia hruaituhai hruai roh.

²Harsit mikota suakin Ben-Hinom irhôra khan fe’n lân; kha khan, thu nang ki ihril hrang kha inpuang roh.

³Hiang hin insîr ro: ‘Juda rama rêng hai le Jerusalem mipuihai, keima itinrêng thotheituRengpa Israelhai Pathianin hril hrang ki inei hi irngai roi. Hi hmuna hin vânduaina irkhêl tak ki hong intungtir hrang a ni, a thurchi len hriathaiin chu inlâi rak an ti.

⁴Mihaiin an mâksana, hi hmuna ram dang pathian chongpuina’n an hmanng tâka, anni le an irchibulhai Judai rama rêng hai khomin, an inhriat ngai loi pathianhai kuang mirimhoi an hâla, mi siat sin loihai thisenin ki hmun hi an insip zoi ta.



⁵An nâihai mei leh irbôlna hranga an inhlan theina hrangin, Baal ta hrangin maichâmhai an isiam a ni. Khahai tho hrangin thu ite pehai ma unga; ki lungrîla lua ki insâp phâk loi a ni.

⁶Khasikin hi hmun hi Tofet a ni no le Hinom phâi tia koi loina zoro a la hong itung hrang a ni. Kha nêkin chu irthatna phâi tia inhriat ni a ti.

⁷Hi hmuna hin Judai ram le Jerusalema mihai thiltum chu chanlamboi inchang pehai ki ta, an râlhai chu zoina pêkin irdoina hmuna ithat ni an ti.

⁸Hi khopui chung a hin siatna irkhêl tak intungtir ki ta, a theng irlôihaiin ar khêl ti an ti.

⁹Râlhaiin khopui chu irhual khap an ta, a sûnga mihai that tum an ti. Hi irhual khapna irkhêl hrang dân chu khopui sûnga mihai kha irfâk irhlôm an ta, an nâihai ten lua fapai pehai an ti,” tiin.

¹⁰Khanchu Rengpa'n ki ifepuihai mithmua bêl kha inkhoi hrangin a ni hrila,

¹¹khante, an kuang, “Rengpa itinrêng thotheiin mipuihai le khopui hi insiat ki ta, hi bêl koi irbun thei ta loi ang hin ni a ti. Mihai khan, an mithihai phûmna hrang ram dang a om ta no sikin Tofet-a an iphûm hrang a ni.

¹²Hi khopui sûnga mi omhai hi Tofet ang taka om hrangin chong ki inkung a ni.

¹³Jerusalema inhai, Judai rama rêng inhai le irvâna ârsihai kuang mirimhoi hâla pathian danghai kuang uain an bun thuanna ngaihai kha Tofet hmun ang taka porinchetir ni a ti,” tia anni chu hril hrangin.

¹⁴Rengpa'n a chongbe inpuang hranga a ni itîrna hmun Tofet chu ki mâk tâka. Biak in kholoia fea ngîrin mipuihai ki hrilhaia.

¹⁵Itinrêng thothei Rengpa Israelhai Pathianin a iti a ni, “Hi khopui le a kôlvêla khuahai chung a dûk tuangna insum ki ta, ki ti kha a itung hrang a ni ta, nin tukul nin inliantira, ki itihai nin irngai no sikin,” tiin.

Jeremia 20

Jeremia le ochai Pasura irsualna



¹Ochai Pasura, Imera nâipa tempil hruaitutak khan ki thu inpuanghai hi an hriatin chu,

²khanchu, Pasura khan dêipu Jeremia kha a vîka, thîrhruai an buntira, Rengpa in, Benjamina inkhâr sakinta ual kôla khan an tângtira.

³Pasura khan zînga chu, thîrhruai ata a nin sua'n chu a kuang, “Rengpa nir hming chu Pasura ti ta no nihai, ‘Hmun tina ichiom’ nang a iti tâk a ni.

⁴Rengpa ngêtin a iti a ni, ‘Nangma le ni rual danghai hrangin ichiomin nang siam ki ta, an râlhai khandai leh an rêngin thata an iom kha hmu ni ti. Juda mi murdi chu Babulon rêng thuhnuai ki isia hrang a nia, senkhat chu intângna ina om hrangin a rama hruaipaihai a ta, senkhat chu thathai a ti.

⁵Hi khopui irchongnahai hi, a isua irchon hluhai hi Juda rênghai sum le pâihai khom an râlhai kuta pehai ki ti. Anni'n inmok an ta, la pehai an ta, Babulon tiang tinrêng chôi ving an ti.

⁶Nangma khom Pasur, ni ina om murdi leh suak hrangin nangni hruai an ta, Babulon tiang nangni hruai an ti. Kha khan thi nin ta, phûm ni nin ti,’ nin rualhai minlak thu ni lei ihrilpuihai leh khan,” a tia.

Rengpa kuanga Jeremia irphunna

⁷Rengpa, nangin ni ni huanga, ihuang ki ini tâk a ni. Nang chu keima nêkin ni hrâta, ni ni inhnê a ni tâk. Mi tinin an ni phengsana, sîn sôtin an ni inuiso a ni.

⁸Thu ki hril richamin nakhrât thôna le irsiatna irkhêl tak ki khêkpui a nang ngai. Rengpa ni chongbe kin puang sikin zoro tina nuiso le hmûsit ki ni.

⁹Rengpa chu irnghil ki ta, ar hmingin thu hril ta no ning, ki ti lakin ni chongbe chu mei ang rengin ki sîngrîl ata a kâng ngaia, ki sînga om chian hrangin ki tuma, khannisian ki idan thei loi a ni.

¹⁰Mihai chong set sat kin hriata, “Hmun tina ichi zât irkhêla om ngai! Tho thuneituhai kuang la va hnôl ta rei,” tiin ki rual sahai lua'n kin rîl zoro an inghâk chian a ni; “huang thei duai an ni itin, khanchu chel ei ta, phuba la ei ta,” an tia.



¹¹Khannisian Rengpa, nangma hrâtna le sinthotheina chu keima tiang ni kopa, deng nin theitirtuhai chu inrîl an ti. Hlo an chuk thei no sikin mualinphoiin om thal an ti. An mualinphoina chu irnghil ni ta no ni.

¹²A ni, itinrêng sinthei Rengpa nangin dik takin nin hriat ngaia, an lungrîl le ngaituanahai om chu nin hriat hleta. Khaangin ki râlhai chung a phuba ni ilâk chu nir hmutir ro, ki chungthu ni kuta om hlet a ni tâk sikin.

¹³Rengpa hrangin hla sak unglân, Rengpa chu inpâk roi! Mi sualhai kuta irthokin sirphûma omhai chu sansuak an ni tâka.

¹⁴Ki suak ni sîn chu khomâksâmin om ri se, ka nu'n a ni nei nî kha satvur ni no ri se!

¹⁵Ka pa kuang, “Nâipasal ni nei tâk,” ti thu khom kha khosâlin om ri se.

¹⁶Rengpa'n khonzâna nei viat loaia khopui a insiat ang khan anni chu om ri sehai. Zînga in sînga chapa khêk inhre sianlân, sîn laitaka irdoina khêk irhâi inhre ri se.

¹⁷Ki'rzir mân a ni lei that no sikin, ni lei that sian chu, ka nu sul kha ki thân lei ni a ta.

¹⁸Itho sika ki irzir ma ni o? Buaina le beidongna le hmâimôkna tuanga hringnun hmang hrang hin ma ni?

Jeremia 21

Jerusalem intem hrang leihrilna

¹Reng Zedekia'n Malkia nâipa Pasura le Maaseia nâipa ochai Zefania hai chu, hi ngênna leh hin ki kuang a hong tîrhaia:

²“Rengpa chu ngaihoi takin ni chongpui pe ro, Babulon rêng Nebukadnezara le a sipai pâlhaiin khopui an irhual khap tâk sikin, Rengpa'n a sinirkhêl senkhathai tho'n Nebukadnezara chu an hnotsuak khom a ni thei,” tiin.

³Khanchu Rengpa'n a ni chongpuia; khanchu ki kuang hong tîra om mihai kha Zedekia kuanga hril hrangin ki tia,



⁴Rengpa Israelhai Pathianin a iti a ni, “Zedekia, ni sipai pâl Babulon rêng le a sipai pâl doituhai kha, ki indoktirhai hrang a ni. Khopui inlaina taka ni sipaihai râltukfamhai chu ki ibuk hrang a ni.

⁵Keima ngeiin ki bân hrât tak pharin ki ningmurna insua’n nang doi ki ti.

⁶Hi khopuia om mihriam le thilhring le sahai khom thathai ki ta, hripui irkhêl takin thi an ti.

⁷Khan nang chu ni mi lianhai le ni mipui irdoina hmun ata, châm le hripui ata dam suaka la omhai, nin rênga nangni that nuam rêng Nebukadnezara’n nangni that a ti. Mi tukhom khonzâna mo, lungkhamna mo, nin chungang inlangtirin nangni hôi viat no ni. Keima Rengpa hin ki iti a ni,” a tia.

⁸Rengpa’n mipuihai ti pehai hrangin a ni hrila, “Irngai roi, keima Rengpa hin lampui thina intungtir thei le lampui hringna intungtir thei inthang hrang, nangni ki ipêk a ni.

⁹Mi tukhom khopuia om mai chu irdoina mo, châmna’n mo, hri le hrâiin thi an ti. Khan tukhom fe suaka atûna khopui doi maia om Babulon mihai kuanga irpêkhai chu that ni no nihaia, hringna chu inzôk ni a ti.

¹⁰Hi khopui hi hôi loi hrangin lungrîla ki lei iti sai a ni, insiat chit ki lei itum a ni. Babulon rêng kuanga pêk nih a ta, ama’n mei leh a ihâlpai hrang a ni, keima Rengpa hin ki iti tâk a ni,” tiin.

Juda rêng in sêngkua chungang roirêlna hong tung hrang

¹¹⁻¹²Juda rêng in sêngkua, Davida irchihai kuang Rengpa’n hi chongbe hi pe hrangin a ni tia, “Keima Rengpa’n ki iti hi irngai roi. A sîn tin diktakin roirêl unglân, mi huanga omtu kha soisak unglân, khano’nchu nin thil tho’nsual kha ki ningmur chu mei that thei loi angin kâng hrang a ni.

¹³Nangma Jerusalem chu phâi laia lungpui irsâng ang hin, phâi irhôr laia irsâng taka om a ni. Nang irdoipui ki ta, tûte’n nang doi thei no nia, nir hrungna hmunhai khêl thei ni no ni, ni tia.



¹⁴Khan ni thil thohai sika khan dūk nang ki itho hrang a ni. Nin rêng in chu mei leh hâl ki ta, a kôla om murdihai khom mei khan kânghai a ti,” ti hi keimaRengpa’n kin iti tâk a ni.

Jeremia 22

Juda rêng in sūngkuahai kuanga Jeremia chongbe

¹Rengpa’n hiang hin a ti: “Juda rêng ina zu fe’n lân; kha khan hi thu hi hril roh.

²O nang, Juda rêng, Davida toihmun luatu, ni ihruaihai, hi inkhâra lût ngaihai le ni mihai leh Rengpa thu hi irngai roi.

³Keima Rengpa hin diktak le fel taka roirêl hrangin thu nangni ki ipêk a ni. Mi huanga omtu chu a huangtua irthokin soisak roi. Ram dang mihai, meithâihai, farahai, dengintheetirin mani, sirphûmhai no unglân, tho’nchâina nei loi mihai hmun irthianga thathai no roi.

⁴Thu nangni ki ipêk ang tak hin nin thoa ni’n chu, Davida irchihai chu rêng ni thei mai an ti. An mi lianhai, an mipuihai leh khan tâli chung a le sakor chung a chuangin, hi rêng in dâi mikota lûtin an isuak mai hrang a ni.

⁵Khan ki thupêkhai nin zôm noa ni’n chu, nin kuang chong ki irkhâm a nia, hi rêng in hi la ram chit a ti. KeimaRengpa’n ki iti a ni.

⁶“Ki ta hrangin Juda rêng in chu Gilead ram le Lebanon tâng ang a enhoi tak a nia; khan mi tûte om lona hmun inthimin siam ki ti.

⁷An siat hrangin mi tîr ki ta, meia pai an ti.

⁸“Kha hnung chu ram dang mi a fehâi tamtakin, hi khopui roiinpui chung a hin keima Rengpa’n itho sika hianga ki itho moh tiin irdon irhlôm an ti.

⁹Khanchu nangni’n thuthung keima le nin inei nin mâk raka, pathian danghai chubai nin mûka, a sin nin tho tâk sika a ni,” ti hril an ti.

Jeremia’n Joahaza chungchâng hrilna



¹⁰Juda mihaio, rêng Josia kha châ no unglân, a thina hi chûlpui no roi. A nâipa Joahaza ta hrangin chap pe ual roi; Hong kêr thei ta loi hrangin an ihruaipai a ni ta, a'rzirna ram kha hmu thei ta loi hrangin.

¹¹Josia nâipa chu a pa irthûla Judai rama rêng chang chungchânga Rengpa'n a iti: "Hong kêr thei ta loi hrangin hitak ata irthokin ram hlataka a ife a ni ta.

¹²An ihruaina khan thi a ta, hi ram hi hmu thei ta no ni," tiin.

Jehoiakima chungchânga Jeremia thuhril

¹³Mi dik loi taka in sintu, irhuangna sika lian; mihai sinthoa, an tha hlo pe nuam loitu chu, a chung irhel pe a ti.

¹⁴In roiinpui tak ki ta hranga chungirchuan irsâng takin sin ki tih tituhai chu irhel pe a ti. Khaang khan tukverhai a siama, sidar thing leh a thopa, rông sen a pola.

¹⁵Sidar thing leh in sin thei sikin, rêng sa ualin nang a isiam ma ni? Ni pa khan diktak le fel takin sin a thoa, a inuam murdi a fâkin a ina, a itho tinrêng chung a tuar pe ngai a ni.

¹⁶Inrianghai le irsamhai a uksaka, khanchu itinrêng ama hrangin chu a sa inzen a chang pe tâka. Khatak kha kêng Rengpa inhriat tihna chu a ini.

¹⁷Khan dik loi taka inlâp tumin ni mit nin lêngtira, Thil poi tho loihai ni thata, nakhrât insua'n ni mihai ni sirbehaia. Rengpa'n a iti tâk a ni.

¹⁸Khasika khan Rengpa'n Juda rêng Jehoiakima, Josia nâipa chungthua hiang hin a iti a ni. "A thina chu mi tukhomin, a poi bâka ki rual, a poi bâka ti no nihai! A ta hrangin tukhomin mitrithi sômin, khêk ni no nihai, 'Ka pu, ki rêng!' tiin.

¹⁹Sakuartung ruak hrê hrang ang taka hin, Ama chu kaitôlin om a ta, Jerusalem kul pên tianga paiin om a ti," a tia.

Jerusalem siat hrang thu Jeremia ihril



²⁰Jerusalem mihai Lebanon tânga lui unglân, pâi unglân, Basan rama fe unglân khêk rak ta roi; Abarim ata chap suak roi. Nin irrualpuihai chu an dok tâk sikin.

²¹Nin sat lai takin Rengpa'n nangni a chongpuia, nikhomsianlân irngai nuam mak chêi! Kha kha nin dam sînga nin itho ngai a nia; Rengpa thu ni izôm viat loi hrang tihna a ni.

²²Nin hruaituhai chu phâivua isêm irhmang angin an om tâka. Nin irrualpuihai chu irdoina hmuna chelhai an ti, nin khopui chu mualphoia inzak taka siam ni a ti. Sual sin nin ithohai sika hin.

²³Lebanon ata nin zuang ichôi sidar ina hoi riamin nin oma; nâiha isê anga natna nin chung a hong tung tena chu nin inrunga, natinsat hrang tâk chu na!

Jehoiakina chung a Pathian roirêlna

²⁴Rengpa'n Jehoiakima nâipa Jehoiakina kuang hiang hin a tia, "Pathian hring ki nia, irkhêl ngai loi ang hin nangma Juda rêng Konia, Jehoiakima nâipa ki kut chang tianga namindetna kutsabi ni khomin lân, nang la sutpai ki ti.

²⁵Nangma that tumtu ni ichi ngai mihai kuang nang ki ipêk hrang a ni. Babulon rêng Nebukadnezara le a sipaihai kuang nang inhlan ki ta,

²⁶nangma le ni nu chu sala intâng hrangin nangni irzûl ki ti. Tukhomin nin irzirna hmun ni lolina khan nin ife hrang a nia, kha hmuna khan thi nin ti.

²⁷Hi ram hi hmu nôk hrangin irzuk bâk nin ta chu, nin hong ikîr thei ta loi hrang a ni," a tia.

²⁸Khan keiin, "Reng Jehoiakina hi bêl koi, dêngzuanpaia om, mihai indit ta loi ang hi a ini tâk ma ni? Hi sik taka hin ram an la inhriat ngai lolina hmuna ama le a nâihai chu salin an intâng a ni ta," ki tia.

²⁹O ram, o ram, o ram, Rengpa iti hi irngai ro:



³⁰“Hi mi hi nâi le te nei loi hranga thei loi inchangtir a nia, hlochukna zel nei loi mi ni hrangin. Davida hnung thûl hrang Judai ram roirêl hranga irchi suanpâr nei loi a ni. Keima Rengpa’n ki iti a ni,” a tia.

Jeremia 23

Zoro la hong tung hranga tûngna

¹A mihai insiata, irthekindara roirêltuhai kha an chung a Rengpa roirêlna chu idôra ichiom hrang mo a ini tâk?

²Hi hi Rengpa Israelhai Pathianin a mihai a ienkol hranga hruaituhai chungthua a iti chu a ni: “Ki mihai enkol mak chea, irthekindarin nin irzûlpaihai a ni. Nin thil soal thôna sikin, atûn hin dûk nangni tho ki ti.

³A la om sunhai ki inthekindartirna ram ata bûmhai nôk ki ta, an ram ngêta hong hruaihai nôk ki ti. Nâi le tê tamtak hong nei an ta, an ipung hrang a ni.

⁴Annhai enkoltu hrangin hruaituhai phun pehai ki ti. Ki mihai chu chitna sikin mo, kamangin mo, om ta no nihaia, anni chu dûk thohai ta no ning. Keima Rengpa’n ki iti tâk a ni,” a tia.

⁵Khan Rengpa’n, “Davida irchia mi fel, rêng chang hranga kin thang zoro a hong itung thiai a ni. Rengin vâr takin sintho a ta.

⁶Rengin a toi tena chu, Juda mihai chu zôk riam ta an ta, Israel mihai chu irtharngamin om ta an ti. Ama chu, ‘RENGPA EI SANINHRINGNA’ tia koi ni a ti.

⁷“Nikhua chu a hong itung thiai a ni,” Rengpa’n a ti. “Mihaiin Pathian hring Israel mihai Aigupta ram ata hong hruai suaktu ki’rhming sâmin chonginkungna det an nei nôk hrang zoro a hong inai thiai a ni.

⁸Kha nêkin chu Pathian hring Israel mihai hmâr tiang rama le anni ki inthekindarna ram tamtak ata a hong hruai suaktu, ki’rhming sâmin chonginkungna det nei an ti. Khanchu an rama khan om ta an ti,” a tia.

Deipuhai thua Jeremia thuhril



⁹Ki milung a na bâka, ki súngrîl tiang a inthing a ni. Rengpa sika khan a thu irthianghai sika khan, mi inrui ki hong ang tâk a ni, mi uain in intam oktu anga hin.

¹⁰Ram chu Rengpa ta hranga iamom loi mihaiin an sipa; pualoi hringnunhai hmangin an irchamneina an ihmang insual a ni. Rengpa khosâlna sikin ram chu a ngûia, sûl hringna hmunhai a châr zoi tâk.

¹¹Khan Rengpa'n, "Deipuhai le ochaihai chu Pathian nei loi an nia, ki biak in sûng ngeia thil saloi tho'n ki ihmuhai a ni.

¹²An lampui hro chu ar nâl le inthim ni a ta, anni chu irtetin an inrîl hrang a ni. An chungâ vânduaina irkhêl insum ki ta; dûk an tong hrang nî chu a itung thiai a ni ta. Keima Rengpa'n ki iti a ni ta.

¹³Samari khan deipuhai سوالنا chu ki hmua; Baal irhmingin thu an inpuanga, ki mihai an ihruai insualhai tâk a ni.

¹⁴Kha nêka سوال ual Jerusalema deipuhaiin سوال an isin ki ihmu a ni. An uirea, chong minlak an hrila; thil saloi tho hrangin mihai an changpuia, tukhomin thil saloi sin an mâk no hrang sikin. Ki ta hrangin chu an rêngin Sodom le Gomora mihai anga taksa سوال an ni.

¹⁵Khasika khan, itinrêng sinthei Rengpa, keima'n Jerusalem deipuhai chungthu chu hiang hin ki iti a ni. Anni chu thil khâ fâk hrang le tûr in hrang pe ki ti. Ram pumpuia Pathian chit loina an inthekindartir tâk sikin," a tia.

¹⁶Rengpa itinrêng sinthei khan Jerusalem mihai kuang a ti pea, "Deipuhai chong irngai no ro; tûngna dik loihaiin nangni an infâ a ni. Keima iti ni loiin an lungrîla an ingaitua kha nangni an ihril ngai a ni.

¹⁷Ki thu'nsîr irngai nuam loi mihai kuang khan an ta hrangin itinrêng a sat lam chu ni a ti, an ti pehai ngaia. Mi tukullianhai kuang khan, 'vânduaina hri tin khomin tôn viat no ni,' tiin an hril ngai a ni," a tia.

¹⁸Ki iti tâk chu, "A tu deipu khomin Rengpa ngaituana irthuphai chu inhre ngai mahai. A tu khomin a chongbe inhriata ar ngaidân inhre loia, a iti irngaiin mo, uksak ngai mahai.



- ¹⁹A ningmur chu rua le phâivopui hrât tak mi sualhai insiat hrang chu a nia,
- ²⁰itho mo a itumhai a zoi mâka chu mong no ni. Zoro la hong nikhua tamtak hnunga chu a mihai khan fel takin inhrenfel ta an ti,” ki tia.
- ²¹Khan Rengpa’n, “Hi deipuhai hi ki itîr ni mahaia, ki tîrhai no khomin an ife a ni. chongbe ite pehai ma unga, khannisian ki’rhmingin thu an insîr ngai a ni.
- ²²Ki ngaituana irthuphai an inhriat ni sianlân chu, ki mihai kuang ki chongbe inpuang suak an ta, an sual hringnunhai le an sual sinthohai an imâksan thei hrang a ni.
- ²³Keima hi hmunkhat ata vai ni loiin hmun tina om ngai Pathian chu ki ni.
- ²⁴Ki ihmu thei lolina hrang hmuna tûte irbi thei no nihai. Irvân le irnêng hmun tina ki om ti hi nin inhriat loi ma ni?
- ²⁵An irmang tianghai ki chongbehai ki ipêk a nih ti ki’rhmingin minlak tho ngai deipuhai iti chu ki inhriat ngai a ni.
- ²⁶Kha deipuhai khan mipuihai chu idôra sôt mo an thu phuachôp mipuihai laia an ihruai insual mai hrang hi?
- ²⁷An pahaiin hnung an ni songsana Baal tiang an irngat tâk ang kha, irmang an ihrilfiana khan ki mihai chu ki mihai irnghiltir thei hrangin an ni iiam a ni.
- ²⁸Irmang nei deipu khan irmang papai a nih ti inhre ri se, khan deipu, ki chongbe inhriattu khan dik takin a inpuang hrang a ni. Fapôl le bu’rmal hin imo irangna a nei.
- ²⁹Ki chongbe chu mei ang a nia, sekchôia lung inkhoktir ang a ni.
- ³⁰Deipu mi dang thu’nsîr lâka, ki chongbe anga inpuang ngaihai chu ki hnôla.
- ³¹Deipu mâni chongbâi ngeia inpuanga, khan keima kuanga irthokin inlang a nih tituhai khom ki ihnôlhai sa a ni.
- ³²Rengpa’n ki iti hi irngai roh. An irmang thu minlaka sip inpuang ngai deipuhai chu ki ihnôlhai an ni. An irmang hrilin minlakna le irpâknahaiin ki



mihai an hruai insual ngai. Anni chu tîrpaihaia, fe hrangin thu khom pe ma unga, mihai hrangin ite hmangna boi an ni, keimaRengpa'n ki iti a ni," a tia.

Rengpa hranga puakrik

³³Khan Rengpa'n ki kuang, "Jeremia, 'Rengpa chongbe chu imo a ini?' ti hi tukhomin, deipu'n mo, ochaiin mo nang ar donin chu, 'Rengpa hrangin puakrik ni nia, nang a ihnôl hrang a ni,' ti anni chu hrilhai roh.

³⁴Ki ihmu tu khôkin mani, deipu'n mo, ochaiin mo, 'Rengpa puakrik' ti chongbâi a hmangin chu, ama le a in sêngkuahai dûk thohai ki ti.

³⁵Mi tinin mâni in sêngkua mihai le rual le chimhai kuang, 'Rengpa'n a idonhai nam a ipêk, Rengpa'n imo a iti?' an iti hrang a ni.

³⁶Khaangin Rengpa puakrik ti chongbâi an ihmang viat hrang ni ma, a san chu mi'n an hmangin chu, ki chongbe chu a ta hrangin puakrik takin siam pe ki ti. Mipuihaiin an Pathian, Pathian hring itinrêng sinthei Pathian thuhai chu dik loitakin an hmang tâka.

³⁷Jeremia, deipuhai kuang khan, 'Rengpa'n imo nang a iti pe? Rengpa'n imo a iti?' tiin irdonhai roh.

³⁸Ki thupêk zôm loa, 'Rengpa puakrik' iti chongbâihai an hmangin chu,

³⁹anni chu lahai ki ta, a ni, anni le an irchibulhai ki ipêk khopui chu hlataka dêngzuan ki ta, ti hi hrilhai roh.

⁴⁰An chungu kumtuangin irnghil thei loi hrang inzakna le mualphoina intungtir ki ti," tiin.

Jeremia 24

Theipui ra bêmpui hni

¹Rengpa'n theipui ra bêmpui hni tempil kholoia sia a nir hmua. (Hihai hi Juda rêng Jehoiakima nâipa, rêng Jehoiakina le Juda hruaituhai kut sintheihai, thîrsukhai ngai Babulon rêng Nebukadnezara khan Jerusalema irthokin Babulon sala a hruaihai zoia a ni.)



²Matona bêma khan theipui ra sa hmin masahai an oma; a danga khan theipui ra saloi fâk thei ni ta loi a oma.

³Khanchu Rengpa'n, "Jeremia imo ni hmu?," a ni tia. Khanchu, "Theipui rahai ki hmu, a sahai chu a satak taka, a siathai chu a siat ta tak a ni," tiin ki sâmhaia.

⁴Rengpa'n ki kuang,

⁵"KeimaRengpa, Israelhai Pathianin Babulon tianga hruaia om tâkhai kha hi theipui ra sahai angin ki bê a nia, an chung a lungkhamin chang ki ti.

⁶Anni chu vêng mai ki ta, hi rama hin hong hruai kîr nôkhai ki ti. Anni chu siam indinghai ki ta, kaiintheikai ta no ninga; anni chu phun ki ta, phâihai ta no ning.

⁷Keima hiRengpa ki nih ti inhriat theina hrangin, anni chu irzukna pehai ki ta; an lungrîl murdi le ki kuang an hong ikîr hrang a ni sikin.

⁸"Juda rêng Zedekia, a roirêltuhai, Jerusalema mipuihai, hi rama la omhai mo, Aigupta rama rothai mo chu, hi theipui ra fa hrangin sa ta loihai ang hin an chung a sin tho ki ti.

⁹An chung a vânduaina irkhêl tak intung ki ta, rammuala nam tinhai chu chi ta tak an ti. Mihaiin nuisohai an ta, tufiam thôna'n hmanghai an ta, êsêlhai an ta, ki inthekindarna hmun tina an irhming chu khosâlna'n hmang an ti.

¹⁰Anni le an irchibulhai ki pêkna rama an hek ving mâka chu, an chung a irdoina, châmna, le hri le hrâi ki inlêngtir hrang a ni," a tia.

Jeremia 25

Hmâr tianga râlhai

¹ Josia nâipa Jehoiakima kum minli an lal kuma khan, Juda mi murdihai chungthua chongbe Rengpa kuanga irthokin ki donga. (Kha kha Babulon rêng Nebukadnezara kum khat inlal kum khatna a ni.)

²Juda mi murdi le Jerusalema omhai kuang khan ki ti pehaia,



³“Kum sômhni inthum sâng, Amona nâipa Josia, Judai rama an lal kum sômhleithumna irthokin a vuan sîn ten hin, Rengpa’n ki kuang thu an sîra, kha a iti kha nangni hril loiin om ngai ma ung. Kha kha nin iuksak loi ngai a ni.

⁴Rengpa’n a deipuhai a zuituhai a zuang tîrhai mai ngai khoma chu, irngaiin mo, nin iuksak nuam loi a ni.

⁵Rengpa’n nangni le nin irchibulhaiin nin nei mai hranga nangni a ipêk rama nin om thei maina hrangin, nin sual hringnun le nin thil saloi thohai masan hrangin nangni a ihril ngai a ni.

⁶pathian danghai le nin isiam millimhai chubai mûk loiin, Rengpa ningmur loi hrangin nangni an inhril ngaia. Rengpa thu nin lei izôm ni sianlân chu dûk nangni tho no ni.

⁷Khannisian Rengpa hê irngai mak chêi a tia. Nin millimhai sika khan a ning nin inmurtir pea, a dûk thôna chu nangni ngeiin nin chung a nin intungtir ngai a ni.

⁸“Khasikin a thu irngai nuam mak chêia, Rengpa itinrêng thotheiin a ti.

⁹Hmâr tianga mi tinhaiin le a ni zui rêng Nebukadneza, ki ikoi hrang a ni. Judai ram le a luatuhai le a kôlvêla nam danghai doi hrangin ki hong ihruai hrang a ni. Hi nam le a kôlvêla nam danghai chu insiat chit ki ta, mihai khan ar khêl ti an ta, ar khêl ti ok an ti, kumtuangin an insiat hrang a ni. Keima Rengpa’n ki iti a ni.

¹⁰ An raifân le lômnahai le irneina hruaithe inhoihaia irngam ki ta, an meiser a thun hrang a tui nei ta no nihaia, bu suk khôl irhâi khom om ta no ni.

¹¹ An ram pumpui chu ramin masan ni a ta, mita hmua inlâi thei ni a ti. A kôlvêla nam tinin Babulon ram rêng sin kum sôm sari sâng chu tho an ti.

¹²Khahai kha a hek tika chu, Babulon ram le a rêng chu an sual sikin dûk tho ki ti. Kha ram kha insiat ki ta, kumtuanga hrangin ramin siat ta a ti.



¹³Nam tinhai chu vânduaina irkhêl insum hranga irningna chong, Jeremia hmangin ki lei iti, hi lekhabua inchuanga om vânduaina irkhêlhai chu Babulon ram chung a dûk thôn a'n nang hmang ki ti.

¹⁴Babulon rama mihai chu an sin thôn a ra leh thuanhai ki ta, nam tamtakhai le rêng roiinpuihaiin anni chu suakin siamhai an ti,' ” a tia.

Namhai chung a Pathian roirêlna

¹⁵Rengpa Israelhai Pathianin a iti chu, “Hin uain khilât ki ningmurna sip chu a iom a ni. Nang ki itîrna nam tinhai kuang fe'n lân, hi khilât ata hi anni chu in intirhai roh.

¹⁶An ina a ni'n chu pê m an ta; lungrîl bulbâl nei no nihai, an kuang khandai ki tîr hrang sikin,” a tia.

¹⁷Khaang khan khilât kha chu Rengpa kut ata ki lâka, Rengpa'n a ni itîrna namhai kuang khan ki pêka, anni chu ki in intir a ni ta.

¹⁸Jerusalem le Judai ram khopuihai chu, an rêng hai le an hruaituhai leh khan ramchâr thil irkhêl inlaina an ni theina hrangin le mihaiin an irhming kha khomâksâmna hranga na hmang theina hrangin, atûn tena an la ihmang ngai ang hin annihai chu hi khilât ata lei in intirhai hi a ni.

¹⁹⁻²⁶Hiang hin a ni, khilât rengata a dang la in hrang hai irhming chu: Aigupta rêng, a mi lianhai le hruaituhai Aigupta mi murdi le Aigupta ram dang mi murdihai, Uz rama rêng murdihai; Filistia khopuihai, Askelon, Gaza Ekron le zôka la om Asdod-a rêng hai an rêngin; Ekron Moab le Amon mi murdihai; Tura le Sidon-ah rêng hai an rêngin; Mediteranean tuipei kôla ramhaia rêng hai an rêngin; Dedana, Tema le Buza khopuihai; lu ep inkolhai murdi; Arabia rêng hai an rêngin; ramchâra om nam irpol rêng hai an rêngin; Zimria, Elama le Media rêng hai a dônte'n an i-in hrang a ni. Irnêng chung a tu nam khomin hi khilâta irthokin an i-in hrang a ni. A hnungkhôn taka Babulon rama rêng khomin in sa a ti.

²⁷Kha hnung chu Rengpa'n ki kuang, “Keima hi Rengpa itinrêng thothei Israelhai Pathianin mipuihai chu in hrangin thu ki pêk a nih ti inhre roh. An



inruia, an inluak mâka le an inrîla, an thoi thei ta no mâka chu in hrangin annihai kuang khandai ki itîr hrang sikin.

28Ni kut ata khilât lâka in hrangin an nuam noa ni'n chu, Rengpaitinrêng thothei khan kha khilât ata kha la in ngêt an tih ti hril roh.

29Ki khopui sâng ngêta hin insiat theina sin chu ki iphut hrang a ni. Dûk tuanga loia zôk hrangin an irtûng ma ni? Zôk no nihai, dengthei ngêt an ti, irnêng chung a mi tin laia irdoina ki tîr hrang sika khan, keima Rengpa itinrêng thotheiin ki iti a ni.

30“Nangma Jeremia hin ki itihai chu ni inpuang hrang a ni, hihai hi mipuihai ni ihrilhai ngêt hrang chu a ni, 'Rengpa chu irvân ata khêk a ta, irvân hmun irsângna ata irthokin a hnuk insua a ta. A mihai doiin khêk a ta, mi grep ra chîltu angin khêk suak a ti. Irnênga mi tinin inhria an ta,

31an irhâi intông kha kôlkil dên chit a ti. Rengpa namhai doiin thubuai a neia, mi tinhai rêl infelhai hrangin hong hruaihai a ta, mi pualoihai chu thi hrangin rêl ni a ti,' ti hi Rengpa'n a iti a ni,” a tia.

32Rengpa'n a iti chu ram inkhat chung ata nam dang chung a vânduaina irkhêl a hong tung thiaia, rua le phâivua kôlkil ata a hong irthok mai a ni.

33Kha nikhuuaa khan chu Rengpa'n a ithathai ruak chu irnêng kil khat tianga irthokin kil dang tiang dênin irthek chit an ti. Tukhomin annihai kha a châ hrang om no nahaia; phûm hrang khomin chôi ni no nihai. Irnêng chung a khan sahrak sahrâi angin om rak an ti.

34Khasikin hruaituhai chap roi, nangni ki mi belrapuhai, chap inring roi! Beidongin pil kêra inhlum roi. Thata nin om hrang zoro chu a hong nâi ta, kêlbelrachalhai angin irchan ni ta nin ti.

35-36Nin ta hrangin zôkna lampui om no ni.

37A ningmurin Rengpa'n ni nam le ram hoitaka omhai kha inramin insiat an ni sikin, lungzîngin khêk suak ta roi.



³⁸Rengpa'n a mihai chu kâmkeibaknei, a khur mâk angin, masan a ta; irdoina sikin ichiomnahai le Rengpa ningmur irkhêl khan ram sa kha ramchâr an changtir ta.

Jeremia 26

Jeremia roirêlna

- ¹ Josia nâipa Jehoiakima Judai rama rêng a chang phut tiang khan,
- ²Rengpa'n ki kuanga a iti chu, “Tempil kholoia ngîrin lân, hril hranga ki thu nang pêkhai, hi hmuna chubai mûkna inhlan hranga Judai ram khopuihai ata hong mipuihai kuang inpuang roh. Ite ip no roh.
- ³Mipuihaiin an irngaia an omdân saloihai an mâk theina hrangin, an mâksan theiin chu an thil sual thohai sika khan an chung a vânduaina intung hranga ki irêl sai kha irlêktir pehai ki ti,” a tia.
- ⁴Rengpa khan mipuihai kuang hril pehai hrangin a ni hrila, “Keima Rengpa'n nin laia irchutirna nangni ki ipêkhai khom lei ngaipoimo hrangin, kha dungzuiin ki thu hi nin izôm ngêt hrang a ni, ki tia.
- ⁵A ni zuihai, ki deipuhai nin laia ki zuang itîr maihai ngai chonghai khom lei ngaipoimo hrangin. an ihrilhai nin lei izôm ngai loi a ni.
- ⁶Thuzôm loia nin la om maiin chu hi tempil chung a hin, Silo chung a ki itho ang khan ki itho hrang a nia, khanchu rammuala nam tinin hi khopui irhming hi khomâk irsâmna'n hmang an ti,” tiin.
- ⁷Ochahai, deipuhai le mipuihai an rêngin tempil sûnga, hi thuhai ki inpuang hi an inhriat a ni.
- ⁸Khaangin Rengpa'n hril hranga thu a ni ipêkhai ki tho zoiin chu an ni chela an khêka, “Hi sika hin that inruk ni ni!
- ⁹I lo hrang mo Rengpa irhmingin hi tempil hi Silo angin om a ta, hi khopui hi siat chitin a sûnga tûte om ta no nihai ni iti?” an tia. Khanchu mipuihaiin an ni irhual tâka.



10Hi thuhai hi Juda roirêltuhaiin an inhriatin chu, rêng ina irthokin tempil tiang an fe zela, mikot thar lûtna khan an toi tâka.

11Khanchu ochaihai le deipuhai khan roirêltuhai le mipuihai kuang khan, “Hi mi hi thi inruk a ni, nin mikuara nin inhriat angin, hi khopui hi a isiat hrang a ni, tiin a inpuang a ni,” an tia.

12Khanchu keima’n, “Hi tempil le khopui siat hrang thu ki insîr nin inhriathai kha, Rengpa’n inpuang hranga a ni itîr a ni.

13Nin omdân saloihai khan nin thûl ngêt hrang le nin thil thohai khom nin imâksan ngêt hrang a nanga, Rengpa nin Pathian thu nin izôm ngêt hrang a ni. Nin zômin chu hi khopui chung a vânduaina irkhêl tung hranga lunginchongna ainei kha indanglamtir nôk a ti.

14Khan keima chu nin kuta om ki nia, a dik le a sa nin iti kai chu keima chung a khom tho roi.

15Khannisian hi hi chu inhre roi; nin ni thata ni’n chu, nangni le hi khopui sûnga mipuihai chu tho’nchâina nei loi, a thattu mophurna nin ipêl hrang a ni, hi irningna chong nangni pe hranga a ni tîrtu chu Rengpa a ni sika hin,” ki tia.

16Khanchu hruaituhai le mipuihai khan ochaihai le deipuhai kuang khan, “Hi mi hin Rengpa ei Pathian irhmingin ei laia thu an sîr sikin, thatin a iom hrang ni ma,” an tia.

17Kha irzoiin chu upahai le senkhat ngîrin khataka mipui irbûmhai kuang khan a ti pehaia,

18 “Hezekia kha Judai ram rêng a ni laiin, Moreset mi deipu Mika khan Rengpa itinrêng thothei iti kha mipuihai kha a hrila, 'Zion chu loi anga inrît inphit chit ni a ta, Jerusalem chu thil saloi bukkhômna ang ni a ta, Tempila ruathartehai chu rampui chang an ti,’ tiin a hrila.

19Khan rêng Hezekia le Judai ram mipuihai khan Mika kha that mahaia, Rengpakha Hezekia a tih sikin, a nuam lam tho hrangin irnak a isong a ni. An chung a vânduaina irkhêl tak tung hranga lunginchong



kha Rengpa'n a ithûlpai a ni. Atûn hin eini khomin ei chung a hin vânduaina ichiom tak ei intungtir hrang a ni ta," an tia.

²⁰(Mi dang inkhat, Semaia nâipa Uria, Kiriath-jearim mi, Jeremia anga hi khopui le nam danghai dema Rengpa irhminga thu inpuang ngai a oma.

²¹Reng Jehoiakima le a sipaihai le a mi lianhaiin Uria thu'nsîr kha an inhriatin chu, rêng khan that a tuma. Khanchu Uria'n a len hriata, ichia inthing pumin Aigupta ram tiang laizâm a tho tâka.

²²Khan khomin rêng Jehoiakima'n Akbora nâipa Elnathana le mi senkhathaiin, Uria chel hrangin Aigupta ram tiang a tîra.

²³Reng Jehoiakima kuang an hong hruaia, kha khan thatin, a ruak kha khotâng irphûmna hmuna pai a ni.)

²⁴Khannisian Sefama nâipa Ahikama'n a ni thopkhak sikin, mipuihai kuta inhlana thatin ki la iom loi a ni.

Jeremia 27

Sehrât ringkol Jeremia'n ar bun

¹ Josia nâipa Zedekia, Judai rama rêng a chang phut tiang khan,

²Rengpa'nkeima kuang savun hruai le thingbong lâkin, keima hranga lêngkol sina ki ring inkoltir hrangin a ni hrila.

³Khanchu Rengpa'n, Edom, Moab, Tura le Sidon rêng hai kuang an palai Jerusalema rêng Zedekia irhmupui hranga hong hai kha hmangin chongbe thonhai hrangin a nin hrila.

⁴Rengpa itinrêng thothei, Israelhai Pathianin an rêng hai Rengpa'n a iti kha hril hrangin annihai kha thu pehai hrangin a ni tia:

⁵"Ki sin thotheina irkhêl tak le ki'rtha hrâtna'n rammual mihriam le irnênga mihriam murdi ki siama; ki mi inthang kuang ki pêk ngai.

⁶Keima hi ki ni, nam tin hai, a ni zui Babulon rêng Nebukadnezara kut hnuai sia theitu chu, ramsahai ten lua a sin ki inthotirhai a ni.



⁷Nam tinrênghaiin a sin tho an ta, a nâi le a tûhai dênin, an naminrîl zoro a tung mâka chu, a sin tho pe an ti: kha zoiin chu nam tamtak le rêng tamtak sin an panam pumpuiin tho ta an ti.

⁸Babulon rêng Nebukadnezara thuhnuaiia om nuam loihai chu a tu rêng ram le a tu panamhai khom khandaiin, châmin, hri le hrâiin dûk thohai ki ti. Nebukadnezara'n insiat chita an om mâka chu.

⁹Nin deipuhaiin mo, nin tasân thiamhaiin mo, mithi irtha chongpuiin mo, nin dôithiamhai hmanga zoro la hong hrang lei inpuang theina ki neih ti irbêhai chong irngai no roi. An rêngin Babulon rêng kuanga irpe loi hrangin nangni an ihril a ni.

¹⁰Nangni an huanga, nin ram ata ram hlataka hruaipaiin nangni an isia hrang a ni. Nangni inhnotsuak ki ta, that irhmangin nin iom hrang a ni.

¹¹A tu nam khom Babulon rêng thuhnuaiia omin, a sin thohai chu, an ram ngêta om hrangin phal pehai ki ti, khatak khan oma loimân tho hrangin. Keima Rengpa'nki iti a ni," a tia.

¹²Kha thu ngêt kha Judahai rêng Zedekia kuang ki tia, "Babulon rêng thuhnuaiia omin lân, ama le a mihai sin tho'n lân, khanchu hring ni ti.

¹³Itho ngâna mo ni mihai kandai mo, châmin mo, hri le hrâiin nin ithi hrang? Kha kha kêng tu nam khomin Babulon rêng thuhnuaiia om nuam loa om hrangin Rengpa'n a iti chu a ni.

¹⁴A kuanga irpe lût loi hranga nang a hriltu deipuhai hê irngai no ro, nang an ihuang a ni.

¹⁵Rengpa'n annihai kha a itîr ni ma, ar hming sâmin nangma kuang minlak an itho a ni, a iti a ni. Khasikin nangni inhnotsuak a ta, thatin om nin ti, nangma le ni deipu thu dik loi nang hriltuhai leh hin," a tia.

¹⁶Kha hnung chu ochaihai le mipuihai chu Rengpa ihril kha ki ti pehaia, "Tempila neinunhai chu Babulon ata hong lâk kîr nôk ni a ti, tihtu deipuhai thu'nsîr zôm no roi, nangni an ihuang a ni.



¹⁷An chong khom irngai pehai no roi! Babulon thuhnuaia irpe unglân, hring nin ti! I lo hrang ngân mo hi khopui hi sahrok sahrâi a ichang hrang?

¹⁸Deipu an ni tataka, ki thu an idong a ni'n te, tempila neinun la omhai hi, Babulon rama chôia a om loina hrangin keima Rengpa itinrêng thothei hi ni ngên ri sehai," tiin.

¹⁹⁻²⁰(Reng Nebukadneza'n Babulon ram tiang Judai rama rêng Jehoiakina, Jehoiakima nâipa le Judai ram le Jerusalema mi inlârhai a hruai lai khan, dâr chopui irsânghai, dâr tuipang le a'rngatna le tempil neinun senkhat a imâksan a ni.)

²¹"Keima Rengpa Itinrêng thothei Israelhai Pathianin tempila le rêng ina neinun la omhai chungchânga ki thu'nsîr hi irngai roh:

²²Babulon tiang chôî ving ni a ta, ki ngaisak nôk mâka chu, kha khan om a ti. Kha hnung chu chôipai nôk ki ta, hi hmuna hin se nôk ki ti. Keima Rengpa'n ki iti a ni," a tia.

Jeremia 28

Jeremia le deipu Hanania

¹ Kha kum ngêta khan Judai rama rêng Zedekia an lal kum minli tha ringana khan, Hanania, Azura nâipa Gibeona kua ata deipu khan tempila a ni chongpuia. Ochaihai le mipuihai inhriatin,

²Rengpa Itinrêng thothei, Israelhai Pathianin a ti a ni: "Babulon rêng thuneina chu kin tômtira,

³Babulon rêng Nebukadneza'n tempil neinun a ichôi murdihai chu kum hni sâng, hi hmuna hin hong chôî zoi nôk ki ti.

⁴Judahai rêng Jehoiakina, Jehoiakima nâipa le Juda mipui sala intâng Babulon-a fe murdihai khom, hi hmuna hin hruai kêrhai nôk ving ki ti. A ni, Babulon rêng thuneina chu ki intôm-tir hrang a ni. Keima Rengpa hin ki iti a ni," tiin.

⁵Ochaihai le tempila mipui omhai laia Hanania kuang hiang hin ki hrila,



⁶“Inhre mai hranga sa chu a ni. Rengpa’n tho a tih ti ki iam. Ni leihrilna chu a tak changin Babulon rama neinunhai chôia omhai le mipui sala hruaia omhai khom hong chôiin, hong hruai kîrhai a ti, ki iiam ngit a ni.

⁷Khan nangma le mipuihai kuanga ki itih hi irngai roh.

⁸Tianlai ata nangma le keima suak nama irthokin deipuhaiin irdoina, châmna le hri le hrâi, nam tamtak le rêng ram roiinpui takhai chung a itung hrang a ni, an ti ngaia.

⁹Khan, deipu râl irngamna irthoktu khan a thu insîr tung hrang vai kêng, Rengpa itîr ngêt deipua ipom a ni ngai,” tiin ki hrila.

¹⁰Khanchu Hanania’n ki ringa ringkol kha a lâka, an khiakpaia,

¹¹mipuihai inhriatin a tia, “Rengpa’n hiang tak hin rêng Nebukadneza’n nam tinhai ringa ringkol a inpêltirhai chu inkhiak ving ni a ti, ti a ni. Hi hi kum hni sûnga a itho hrang chu a ni,” a tia. Khanchu ki rota.

¹²Zoro sôt loite hnunga chu Rengpa’n ki kuang,

¹³Hanania kuanga fea ti pe hrangin a ni hrila, “Thinga sin ringkol chu nin siat khom a ni thei, khan khomin thîr ringkolin thûl nôk a ti, a iti a ni.

¹⁴Rengpa’ltinrêng thothei, Israelhai Pathianin a iti a ni, ‘Hi nam tinhai chung a hin thîr ringkol ama’n inpêltirhai a ta, anni khan Babulon rama rêng Nebukadneza sin tho an ti. Ramsahai ten khomin Nebukadneza sin tho an ti,’ tiin Rengpa’n a iti a ni,” a tia.

¹⁵Khanchu kha thu kha Hanania kin hrila, a kuanga a iti pe nasan, “Hanania inhre ro, Rengpa’n nang a itîr ni maka, hi mipuihai hi thudik loi ni in-iamtirhai a ni.

¹⁶Khasikin Rengpa khan nang a ithat hrang a ni. Rengpa doia mipuihai tehel nin zongtirhai sikin, hi kum sûnga ngêt hin thi ni ti,” tiin.

¹⁷Hanania chu kha kum ngêta khan a tha sarina khan chu a thi tâka.

Jeremia 29

Babulon rama Judahai kuanga Jeremia lekha thon



¹ Babulon rêng Nebukadnezara'n Jerusalema irthokin Babulon rama mi intâng hai hruaitu ochaihai, deipuhai, mipui hruaituhai le mi dang hai kuanga lekha ki thona.

² Kha kha Juda rêng Jehoakina le a nu, rêngin a mi lian hai, Judai ram le Jerusalema hruaituhai, kutsin thei hai le thîrsuk thei hai intâng na ata hruaisuaka an om zoia a ni.

³ Juda rêng Zedekia'n Babulon rêng Nebukadnezara kuang mi a tîra, Safana nâipa Elasa le Hilkia nâipa Gemaria hai kuta khan kha lekha kha ki ithon a ni. Hiang hin,

⁴ “Rengpa Itinrêng thothei, Israel hai Pathianin, mi tin Jerusalema irthoka Babulon rama mi intâng in hni hranga Nebukadnezara ihruai hranga a iphal hai kuanga iti a ni.

⁵ In sin unglân, nin omhmun indet roi. Irhuan hai sin unglân, khataka nin invâng hai kha fa roi.

⁶ Nin nâipasal hai hrang dôngma zong pehai unglân, nin nâinuhai hrang khom pasal inneitir hai roi, khan kêng anni khomin nâipasal hai le nâinupang hai an inei thei hrang. A tøm tiang ni loiin nin inpung ngêt hrang a ni.

⁷ Sala nangni ki inomtirna khopui hai satna hrang sin tho roi. An ta hrangin chongchai pehai sa roi, an vângsak theina chu nangni vângsak theina ni sa a ti.

⁸ Keima Rengpa Israel hai Pathian ngei hin nin laia om deipuhai mo, mi dang zoro la hong hranga leihril theina neia irbê hai huangin om no roi, ti nangni ki ihril a ni. Irmang an iphan hai kha ngaisak pehai no roi.

⁹ Ki'rhmingin thu dik loi nangni an ihril a ni, anni chu tîr hai ma ung. Keima Rengpa Pathianin, ki iti a ni ta,' tiin.

¹⁰ “Khan Rengpa'n, ‘Babulon rama kum sôm sari a hekin chu, nangni ngaisaka, in tianga nangni hruai kîr nôk hranga ki chonginkung thangsua ki ti.



¹¹Keima vaiin nin ta hranga thil tum kin hriata, vânduaina irkhêl ni loia vângsak theina nangni intungtir pe hranga thil tumhai, nin itûng tak nin matona a la zuang hranga nin thiltumhai chu.

¹²Khanchu ki'rhming irlam nin ta, ki kuanga hongin chongchai nin ta, nangni sâm ki ti.

¹³Ni zong nin ta, nin ni zong tatak sikin ni hmu nin ta,

¹⁴a dik ki iti a ni, ni hmu nin ta, nin rama khan nangni inomtir nôk ki ti. Ram tina irthokin le nangni kin thekindarna hmun tina irthokin nangni bûm nôk ki ta, sala intâng hranga nangni ki lei inhnotsuakna rama ngêt khan nangni hruai kêr nôk ki ti. Keima Rengpa'n ki iti a ni,' tiin.

¹⁵“Nangni'n Rengpa'n Babulon rama khom deipuhaiin an ni ipêk nin ti ngaia.

¹⁶Rengpa'n rêng ram Davida lei inlalna ngai, rêng le hi khopuia nin urênga nangni le hmunkhata om hrangin hruaia om loihai chungthu a insîr hi irngai roi.

¹⁷Rengpa Itinrêng thotheiin a ti, 'Khandaiin, châmin, hri le hrâi an chung a ki insum hrang a ni, theipui ra fa hranga a thûr angin siam ki ta,

¹⁸anni chu khandai, châm le hri le hrâihai leh irzûlhai ki ta, rammual nam tin chu an thil hmu chu an ichi sabak hrang a ni. Anni kin thekindarna hmun tina, an chung a thil tung sika khan, mihriamhai inlâiin chi sabak an ti. Mihaiin anni chu hnung songsanhai an ta, an irhming kha khomâksâmna'n hmang an ti.

¹⁹A ni zui ki deipuhai hmanga an kuanga chongbe ki ithon ngai, an zôm no sika khan, hi hi an chung a itung hrang a ni, an irngai nuam no sikin.

²⁰Babulon rama intâng hranga nangni ki itîrhai, nin rêngin keima Rengpa'n ki insîr hi irngai roi,' a tia.

²¹Rengpa Itinrêng thothei, Israelhai Pathianin, Kolaia nâipa Ahaba le Maaseia nâipa Zedekia, a'rhminga milak chong inpuang ngaihai chungthu an sîra.



Anni chu Babulon rama rêng Nebukadnezara thuneina inhlan an ta, an mithmu chung a ngêt that an ti, a iti a ni.

²²Khanchu Jerusalema irthokin Babulon ram tianga kop hranga hruaia omhai khan mi khomâksâm an nuamin chu, ‘Zedekia le Ahaba, Babulon rêngin a hring puma mei leh a ihâl ang khan, Rengpa’n ni chung a tho sa ri se,’ ti ngai an ti.

²³Kha kha an ihlo hrang chu a ni. Sual irkhêlhai an tho’n chu, an tualbômhai dôngma an uirepuihaiin chu, Rengpa irhmingin thudik loi an hril sikin, kha kha Rengpa nuam loi lam a nia; an sintho kha an hriata, annihai hnôla thu inhretu a ni. Rengpa’n a iti a ni,” tiin.

Simeia lekhathon

²⁴Nehelam mi, Semaia kuang hiang hin thu hril roh:

²⁵Israelhai Pathian Itinrêng thotheitu Rengpa’n hiang hin a ti, “Jerusalem mipui murdihai kuang, Maaseia nâipa Zefania, ochai kuang, ochai danghai kuang khom nangma irhmingin lekha ni thona, hiang hin ni tia.

²⁶Nang Zefania Rengpa’n ochai Jehoiada irthûlin nang an kung, Rengpa ina a tataka thu inpuanghai kha sâm ro, thîr khitna leh khit hranga inkung ni nia,

²⁷atûn hin Jeremia, Anathot kho mi nin kuang thu inpuangtu hi ithoa mo ni irchutir loi?

²⁸Babulon-a omhai chu, sal intângna a isôt hrang kêng, in le loihai sinsiam unglân, irhuanhai khom siam unglân, nin chîmuhai fa roi, tia thu a bêhai hi,” tiin.

²⁹Ochai Zefania’n hi lekha hi deipu Jeremia inhriat hrangin a tepa.

³⁰Rengpa thu chu Jeremia kuang hiang hin a hong tunga:

³¹“Hi hi sal intânghai hrilhai ro: Rengpa’n Nehelam mi Zefania chungchâng hiang hin a hril; Semaia hin nin kuang thu a hrila, ama chu ki itîr ni ma, minlak nangni a in-iamtir a ni.



³²Khasikin Rengpa'n hiang hin a ti, Nehelam mi Semaia le ar chihai chu hremhai ki ti, nin laia irchi inkhat lua nei no ni, ki mihai hranga thil sa ki itho hrang khom chang sa thei no ni, Rengpa ata tehelna thu an puang sikin, ti hiRengpa thu suak a ni," a tia.

Jeremia 30

A mihai kuanga Rengpa chonginkung

¹Jeremia kuanga Rengpa thu zuang tung chu:

²"Rengpa Israelhai Pathianin hiang hin a ti: Ni kuanga ki thuhiril murdi kha lekhabua irziak roh.

³Irngai ro, sũnhai a hong nâi ta, ti hi Rengpa thu suak a ni. Ki mi Israelhai le Judahai chu an sal intângna ata insuaktirhai ki ta, an puhai kuanga ki ipêkna rama khan hruaihai nôk ki ti, khanchu ram kha lua an ta," tiin.

⁴Hi hi Juda le Israel chungchânga Rengpa thuhiril chu a ni,

⁵Rengpa'n hiang hin a ti, "Chitna le chardong irhâi kin hriat, irtharngamna zel om mah.

⁶Thîrin irdonhai hi roi, pasalin nâiha an irvei ngai mo? Itina mo nupang nâiha isê angin, pasal ni pumin a pum ar dom lika, a hmêl a idang zoi tâk hi?

⁷Kha ni sũn kha irkhêl tak ni a ti! Khaang kha om thei no ni, Jakoba chardong zoro hrang chu a ni, khannisian sansuak ni a ti," tiin.

⁸Kha ni khan chu a ringkol pêl inkhiaktir pe ki ta, an khitna hrui sũtpai pe ki ta, ram dang mihai siahlo ni ta no nihai,

⁹an Pathian Rengpa le an rêng hrangin indingtir ki ti, Davida irchi laia mihai sin chu tho ta an ti.

¹⁰O ki siahlo Jakoba, chi no ro, o Israel chi viat no roh ti hi Rengpa thu suak a ni. Ni'rchi, ram hlataka sala intânghai chu sansuakhai ki ti, Jakoba chu irtharngam tak le zôkriamin om a ti. Tûte'n râl changin insî ta no nihai.

¹¹A sansuak hrangin ni kuang ki om mai ngai, ti hi Rengpa thu suak a ni. Nangni ki inhnotsuakna rama nam tinhai chu insiatpaihai hlet ki ta, nangma



chu nan siatpai chit no ning. A ruk bakin nang irchu ki ta, hrem loiin chu suak ual no chi ni.

¹²Rengpa'n hiang hin a ti, "Ni popna chu indam lik zât ni no ni, ni ituang hi a ina ta hrai a ni.

¹³Nang changpui hrang om mahaia, ni damna hrangin hloi om ual mah.

¹⁴Nangma tianga om ngaihaiin nang an irnghil tâka. Nang insâp ta mahai. Râl angin ni pop zoi tâka, inren viat loiin nang ki ihrem a ni. Ni sualna le nin sininsiatna a na hrai sikin.

¹⁵Ni popna hin imo ni ichiar? Ni natna hi indam lik zât ni ma; ni dik lina a tama, thil tamtak ni tho insual sikin. Hi thil hi ni chung a ki itho a ni.

¹⁶Nang a fâk inhektuhai chu fâk inhek ni an ti. Ni râlhai murdi sala hruai an ta, mi longtuhai chu longin om an ti. Nin ramtirtuhai chu inramtirhai ki ti.

¹⁷Nang indamtir nôk ki ta, ni sâbehai khom indamtir ki tah ti hi Rengpa thu suak a ni. 'Mâksan tûte irngaipoimo loi Zion,' nang an ti sikin," a tia.

¹⁸Rengpa'n hiang hin a ti, "Irgai ro, Jakoba-hai ram chu inding inthar nôk ki ta, a omna hmun chu irngaiirsâng ki ta, khopui lei ram tâk kha siam insa nôk ki ti. Reng inhai khom a hmun ngêta inding nôk a ti.

¹⁹Kha hmun ata kha lômthu hrilna le raifâna irhâi hong suak a ta, ama chu inpungtir ki ta, hek thei ual ta no nia, roiinputir ki ta, nâiin pang no nihai.

²⁰An nâihai chu matona angin om nôk an ta, keima kuang ngam takin om an ti. Anni zoi theituhai chu hremhai ki ti.

²¹A mi laia mi ngêt hruaitu'n nei an ta, an lai ata roirêtu hong suak an ta, anni chu ni hong nâi hrangin koihai ki ti. Khanchu ni hong nâi an ta, koi loiin tu mo ni hong nâi ngam hrang? ti hi Rengpa thu suak a ni.

²²Ki mihai ni nin ta, nin Pathian ni ki ti, kei Rengpa hin ki iti a ni," a tia.

²³Irgai ro, Rengpa ningmurna phâivua chu na takin a'rtêka, mi pualoihai lu chu a sêm phîthai nenga,



²⁴a thiltumhai a tunga, a tho zoi mâka chu Rengpa ningmur irkhêl tak chu hek no ni, zoro hnunga chu hihai hi la hong inhre suak nin ti.

Jeremia 31

Israelhai kîr nôkna

¹Kha zoiin chu keima hi Israel in sêngkua murdihai Pathian ni ki ta, anni khom ki mihai ni an ti, Rengpa thu suakin a ti.

²Rengpa'n hiang hin a ti: khandai la thi zoi loihaiin ramchâra inrenna hlo an ta, Israelhaiin irngamna ram an pan lai khan,

³tiana ki kuanga zuang inlang Rengpa khan, "Lungthung hek ngai loiin lung nang ki thunga, phûkdâi takin nang hruai mai ki ti," a tia.

⁴O dôngmate Israel, nan ding inthartir nôk ki ti. Nin khuanghai lâkin raifân taka lâm hrangin suak nin ti.

⁵Samari tâng dunga grep irhuan siam nôk nin ta, a phuntuhaiin a ra kha la an ti.

⁶Râl hrungtuhaiin Efraima tânga mi an koisam nî tung a ti, "Tho Rengpa ei Pathian kuang, Zion-a fe ta ei ti," tiin.

⁷Rengpa'n hiang hin a ti. "Jakoba ta hrangin raifân takin hla sak unglân, nam tinin roiinpui tak ta hrangin khêk suak roi. Hril unglân, chôiindôm roi, 'O Rengpa, Israel la damhai chu sansuakhai ro,' tiin.

⁸Irngai ro, anni chu hmâr tiang ata hruaihai ki ta, irnêng hmun tin ata hi, bukkhômhai ki ta. Mitcho le ke'nbâihai khom om sa an ti, nâi vonghai le nâiha isêhai khom nam roiinpui tak chu hi hmuna hin hong kîr nôk an ti.

⁹Chap puma hong nihai khomsian, irtharngam sak in hruaihai ki ti. Tui kôla le lampui tuanin an irtet thei lona hrangin hruaihai ki ta, Israelhai ta hrangin pa ni ki ta. Efraima chu ki nâilutîr a ni," a tia.

¹⁰O namhaio, Rengpa thu hi irngai roi, tuikhanglian kôla ram hlatakhai khom hrilhai roi, Israel indartirtu khan hruaikhômhai nôk a ta, belrapu angin anni chu enkolhai a ti, tiin.



- ¹¹Rengpa'n Jakoba chu irtansuak a ta, ama nêka hrâthai kut ata sansuak a ti.
- ¹²Râifân taka khêkin Zion tâng sîpa hong an ta, Rengpa satna sikin an hmêl raifân takin om a ti. Buhai, uainhai, hriakhai, belra le sahai sikin lôm an ta. Anni chu inhnê taka tui leh buak ngai irhuan ang ni an ta, an chardong ta no ni.
- ¹³Dôngmate chu raifânin lâm a ta, ruatharte le tarhai khom lôm an ta, an chardongna lômna inchangtir pehai ki ta, an beidongna irtharngam sakhai ki ti.
- ¹⁴Ochahai chu bu tui tak leh vâihai ki ta, ki mihai chu ki satna khan khop sa an tih ti hi Rengpa thu suak a ni.

Rengpa'n Israelhai lungkhamna

- ¹⁵Rengpa'n hiang hin a ti, "Ramah khuuaa irhâi an inhriata, milung na taka chap ngui ngui irhâi chu, Rakili khan a nâihai a châa, an om ta no sikin, inthêm inthâi thei ni ta maka.
- ¹⁶Ni chap kha mongin lân, ni mitrithi hul ta ri se, ni sinna ra ât ni tih ti hi Rengpa thu suak a ni, anni chu râl ram ata la hong an ti.
- ¹⁷Ni sônmatona chu ni dongtum la sa a ti, nin rama ngêt ni nâihai chu la hong kîr an tih ti hi Rengpa thu suak a ni.
- ¹⁸Efraima inhrûm irhâi chu kin hriat maia, 'Nangin sehrâtilla la sep ngai loi angin ni ni sepa, ni ni irchutir tâk hi. Ni'rheikîrtirin lân, hong kîr ki ta ni hruai roh. Nang chu ki Pathian Rengpa chu ni nia.
- ¹⁹Ni nir heikîrtir zoiin chu ki'rsîra, kin hriatthiam zoi tena chu ki'rlet tâka. Ki vânglaia ki'rhming siatna pêlin mualphoi le inzakin ki iom a ni,' tiin.
- ²⁰Efraima chu ki nâipa indit tak, ki inhlu ngôi ngôi a ini loi ma ni? Hnôl ki tum khomin ki milunga a om maia, ama chu kin hriat maia lung ki inkham sabak a ni.
- ²¹Lampui irsinsiana sen lân, lampui inhriat theina hrangin chopui phun ro, ni lampui hro chu irsinsia infel roh. Dôngmate Israel hong kîrin lân, ni khopuia hin hong kîr ta roh.



²²O nang, nâinupang pûtsôt iamom loi mihai, idôr mo nang ki inghâk hrang? Rengpa'n irnênga thil a siam inthar tâk mani, nupangin pasal an ivêl tâk hi!" a tia.

Pathian mihai vânsatna hrang

²³Itinrêng thothei Rengpa Israelhai Pathianin hiang hin a ti, "An sal intângna ata ki hruai kêrhai nôk tena chu Judai ram le a khopuihai ata chu hianga chongbâi hi hmang an ti, 'O mi dikhai omna hmun, o tâng irthiang, Rengpa'n sat nang vur ri se,' tiin.

²⁴Judai ram le a khopuihai khan loi neituhai le belra entuhai lêngsuam an ti.

²⁵Mi hrât loihai inhrâtirhai ki ta, châmsôl irveihai chu infatirhai ki ti.

²⁶Ki lei in kha ki hong harin chu, ki thîr vêla ni'n chu, ki lei iin ok a lei nia.

²⁷Irngai ro, sîn a hong itung hrang tâk kêng, Israel in sîngkuahai le Juda in sîngkuahai laia mihriam le sa inpungtirhai ki tah ti hi Rengpa thu suak a ni.

²⁸Annihai inpotsuaka insiathai hrang, irtettira inhekhai hrang le inkamangtirhai hrangin ki lei tuma; khannisian, indingtir le indettirhai hrangin ki lei ihrung a nih ti hi Rengpa thu suak a ni.

²⁹Kha ni khan chu mihaiin, 'Pahaiin grep thûr an fâk sikin, an nâihai ha a kima,' ti nôk ta ngai no nihai.

³⁰Mi tinin mâni سوالنا thipui an ta, tukhom grep thûr fâkhai kai chu an ha kim a ti," a tia.

³¹Khan Rengpa'n, "Irngai ro, sînhai a hong nâi ta, ti hi Rengpa thu suak a ni. Israel in sîngkuahai le Juda in sîngkuahai le thuthung thar siam ki tah ti hiRengpa thu suak a ni.

³²An irchibulhai Aigupta ram ata hruaisuak hranga an kuta ki chelhai laia ki thuthung ang kha ni ta no ni. Anni hrangin hruaitu ki ni sîng chu ki thuthung kha zui nuam loiin ti hi Rengpa thu suak a ni.



³³ Kha ni tena Israel in sêngkuahai le ki thuthung hrang chu hi hi a ni. An lungrîla ki dân sia ki ta, an milunga irziak sa ki ti. Kei an Pathian ni ki ta, anni chu ki mihai ni an ti.

³⁴Rengpa chu inhre mai roi, ti'n tûte'n an rualhai le an urêng hai irchutir no nihai. A chîn ata a lian dênin nin hre mai an tah ti hi Rengpa thu suak a ni. Khanchu an sin insiatnahai ngaidam ki ta, an sualnahai inhre ta no ning," a tia.

³⁵Rengpa'n hiang hin a ti, sôn invârtir hrangin misa a sina, zân invârtir hrangin tha le ârsihai ar fûktira, irhâi tam hrangin tuikhanglian chu an ri dur dura, ar hming chu itinrêng thothei Rengpa a ni.

³⁶Hi dânhai hi ki makung ata a boi vaiin Israel irchihai chu hek no nihai ti hiRengpa thu suak a ni.

³⁷Rengpa'n hiang hin a ti; chung tianga irvân khi irkhî thei a nia, hnuai tianga irnêng irnghatnahai hi zong suak a ni thei tena, Israel irchihai chu an sin lei thohai murdi sikin paihai ki tih ti hi Rengpa thu suak a ni.

³⁸Khan Rengpa'n, "Irngai ro, sûnhai a hong nâi ta, Hananela in irsâng ata kul kil lampui kôl dênin khopui chu Rengpa ta hrangin indingthar ni a ta, ti hi Rengpa thu suak a ni.

³⁹A ramri chu Gareb tâng dênin tûnthaiin om a ta, Goa lama kôi a ti.

⁴⁰Mithi phûmna le sahrok paina phâi pumpui le a kôlvêla ram pumpui Kidron vadung dênin, nisua tianga sakor lampui kil dênin Rengpa hranga indang a ni. Kha khopui kha chu itiklai khomin indarh le insiat ni ta no ni," a tia.

Jeremia 32

Jeremia'n mi ram a irchôk

¹ Judahai rêng Zedekia an lal kum sômna khan Rengpa'n a ni chongpuia, kha kha Nebukadnezara khomin Babulon rama an lal kum sômhleiriatna a ni.

²Kha zoro taka khan Babulon rama rêngin Jerusalem a hong doia, kei chu rêng in hrungtuhai omna hmuna intâng ki ni.



³Kha hmuna khan rêng Zedekia'n a ni intângtir a nia, Rengpa'n a iti a ni, "Hi khopui hi Babulon ram rêng ki ipêk hrang a ni,

⁴rêng Zedekia chu a izôk loi hrang a ni. Ama chu Babulon rama rêng kuta pêk ni a ta; ama chu hmâirsongin chongpui a ti.

⁵Zedekia chu Babulon rama hruaiin om a ta, ki ngaitua nôk mâka chu khatak khan om a ti. Babulon rama mihai chu irsualpuiin om tahai sian khom, hlohchuk no nihai. Rengpa thu suakin a ti," a tia.

⁶Rengpa'n hiang hin a ti, Rengpa thu chu ki kuang a hong tunga;

⁷Hananela ka pa nâipangpa Saluma nâipa chu Anathot loa, Benjamina ramria om chu ircho pe hrangin a ni ngêna, ki kuanga hong hrang a nia, urêng laia a irnaipui tak ki ni sikin ircho hrangin ircham ki inei a ni.

⁸Khaangin, Rengpa iti lam tak khan, Hananela chu irhuan hrungtu sînga keima kuang a hong, a loi kha ircho pe hrang a ni tia. Khanchu Rengpa'n a ni iti pe ngêt a nih ti kin hriat tâka.

⁹Hananela kuang ata loi kha ki'rchôka, a man hrangin sum ki vara, tangka sekel sômhleiriat a nia,

¹⁰irchôkna ngai lekhaa khan ki'rhming ki'rziaka, ki'rmantira, an hriatpuitu ki zonga, khanchu sum kha a varna leh ki vara.

¹¹Khanchu irchôkna lekha poimo keima ta inhni ki lâka, ram irpêkna dân chuangna a nia, inkhat irmantir a nia, a dang chu irman loi a ni.

¹²Neria nâipa Baruka, Maaseia tupa kut chung a ki pêka. Kha lekhaa kha Hananela mithmua le an hriatpuitu irchôkna lekha poimoa irhming irziaktuhai le irhuan hrungtu, Juda a toihai mithmua khan ki ipêk a ni.

¹³An rênga makunga khan Baruka kha ki ti pea,

¹⁴"Rengpa Itinrêng thothei, Pathianin hi ram hi ircho hrang dân irsinsiana irmantir le irman loi hi lâka, kum sôt tak la hong om hranga khom hin sataka a om mai theina hrangin pil bêla hrê hrangin thu nang a ipêk a ni.



¹⁵Rengpa, itinrêng thothei, Israelhai Pathianin a iti chu, inhai, loihai le grep irhuanhai chu hi rama hin irchôk la ni nôk a ti,” a tia.

Jeremia chongchaina

¹⁶Ram irchôkna lekha poimo Baruka ki pêk zoia khan ki chongchai tâka,

¹⁷“RENGPA PATHIAN, ni thuneina lian tak le ni hrâtna'n irnêng le irvân ni isiam a nia; nangma hrangin chu thil intak zel om maka.

¹⁸Sâng tamtakhaia det lungkhamna nin neitirhaia, khan an pahai sualna sikin, mihai dûk ni tho sa ngai. Nang chu roiinpui le sin thothei tak Pathian ni nia; nang chu Rengpa Itinrêng thothei ni ni.

¹⁹Nang chu roirêlna satakhai nir fûkin thil roiinpuihai ni tho ngaia, mihai sintho hi ni hmu vinga, an sintho lam takin lômman ni pêk ngai.

²⁰Zoro fe tâk, tiana khan Aigupta rama sinirkhêl le irsinsiana thilhai ni thoa, a vuan sîn ten hin Israel rama le nam danghai laia ni la tho maia, khaangin atûn hmun tina inhriatin ni iom a ni ta.

²¹Sinirkhêlhai le irsinsiana thilhai hmangin kin râlhai nin thotira, ni mihai Aigupta rama irthokin hruaisuak hrangin ni sintho theina le ni'rnak ni ihmang a ni.

²²An irchibulhai kuang chong ni lei inkung ang lam takin hi ram irchong le sa hi anni ni pêka.

²³Khannisian hi rama hin hongga an lua tena chu, ni thupêkhai zômin mo, ni irchutirnahai ite an izôm loi a ni. Khasika khan an chungga hi vânduaina tin hi ni insum a ni ta.

²⁴“Babulon khopui la hrangin a vêla khan irnêng an vur irsânga, an irûn a ni ta. Khandai, châm le hri le hrâiin khopui chu an kuta a iom hrang a ni ta. Ni lei iti murdihai a idik a nih ti hmu thei ta an ti.

²⁵Khan khoma Rengpa Pathian khopui chu Babulon-hai kuta chelin om ta khom sian, an hriatpuituhai mithmua ram ircho hranga thu ni pêktu kha nangma hi ni nia,” tiin.



²⁶Rengpa thu chu Jeremia kuang hiang hin a zuang tunga,

²⁷“Irngai ro, keima hiRengpa mi murdihai Pathian ki ni, keima hrangin chu thil ite an tak bâk om mah.

²⁸ Hi khopui hi rêng Nebukadnezara le a sipaihai kuta ki ipêk hrang a nia,

²⁹an ihâl hrang a ni, in chung sîpa mihaiin Baal hranga rimhoi hâlin le pathian danghai kuang uain thilinhlan dêngzuana ki ning an inmurtir ngai rêng kha.

³⁰Israel mihai le Juda mihai chu an thurchi hor phutna ata an sintho khan ki milung hoi loiin ki ning an inmurtir ngai a ni.

³¹Hi khopuia mihai hin, an ding nê a ta ki ning an inmurtir a ni. Hi khopui hi insiat chit hrangin ki rêl tâka,

³²thil saloihai Judai ram le Jerusalem mihai, an rêng hai, hruaituhai, an ochaihai le deipuhai an rênga thôna sikin.

³³Hnung an ni songsan ving tâka; anni chu ki irchuhai mai khomin, irngaiin, pom nuam mahai.

³⁴ An millim intirom tak lua keima ni chongpuina hranga isin, ki tempil sûnga an siaa, an iporinchetir a ni ta.

³⁵ Hinom phâia an nâipasalhai le nâinupanghai Moleka pathian kuang irbôlnaa inhlan hrangin Baal maichâmhai an siama, hianga tho hrangin thu khom pehai ma unga, khaanga thil tho an ta, Juda mipuihai sualin siam an tih ti khom ki irngaitua loi a ni,” a tia.

Tûngna chonginkung

³⁶Rengpa, Israelhai Pathianin hiang hin a ti, “Jeremia mihaiin khandai, châm le hri le hrâihai sikin hi khopui hi Babulon rama rêng kuta ipêk a ini hrang a ni, a tia.

³⁷Ki ningmur hrai sika ki inthekindartirna rama irthokin mihai chu ki ibûmhai nôk hrang a nia, anni chu hong hruaihai nôk ki ta, hi hmuna hin zôkriamin inlêngtirhai ki ti.



- ³⁸Khanchu ki mihai ni an ta, keima an Pathian ni ki ti.
- ³⁹An dam sũaga hrang sintum inkhat pehai ki ti: an ta hranga sa hrang le an irchi suanpârhai ta hranga sa, zoro tina ni chôirsâng hrangin.
- ⁴⁰Kumtuanga thuthung siampuihai ki ti. Itiklai khoma anni ta hranga thil sa tho irngam pehai no ninga, lungrîl taka ni ngîk hrangin siamhai ki ta, khanchu hnung ni songsan ngai no nihai.
- ⁴¹Thil sa an ta hranga tho chu raifân om sinin nei ki ta, hi rama hin det mai hrangin indinghai ki ti.
- ⁴²“Hi mihai chungga vânduaina irkhêl ki lei insum tâk angin, thil sa ki inkunghai chu ki ipêkhai hrang a ni.
- ⁴³Mihaiin, hi ram hi ramchâra mihriam mo, ramsahai mo om loina hmun anga ni hrangin, Babulon-hai kuta pêkin la om a ti, an tia. Khan loi hmunhai chu hi rama hin irchôkin an la iom nôk hrang a ni.
- ⁴⁴Mi’n ircho an ta, irchôkna lekhaihahai siam an ta; irmantir an ta, an hriatpuitu om an ti. Benjamina ram huala Jerusalem kôlvêla khuahai, Judai ram khopuihaia, tâng kôlhaia le Judai ram sim tiang, hi hi a itung hrang chu a ni. Mihai chu an rama siam insa pehai nôk ki ti. Keima Rengpa’n ki iti a ni,” a tia.

Jeremia 33

Tûngna chonginkung dang

- ¹Rengpa chongbe chu hrungtu hai irhuan sũaga mi intâng ki ni lai khan a zuang tunga.
- ²Rengpa’n irnêng siama, Rengpa, an ngîrtirtu le an dettirtu Rengpa ar hming Rengpa khan hiang hin a ti.
- ³“Ni koiin lân, nang sâm ki ti; ni inhriat ngai loi thil roiinpui le irthup tak nang inhril ki ti.
- ⁴⁻⁵Keima, Rengpa Israelhai Pathianin ki iti a ni, Jerusalema inhai le Juda rêng inhai chu isetpai ni a ti. Fesuaka Babulon-haiin khopui irkulna hranga irnêng



an ibuk va sia kha chu itea hmangna boi a ni. Kha sin khan ki ningmura ki ithathai hrang rêng ruakhai vai kha khopui a isip hrang a ni. Hi khopui hi a sũa mi hai sual sinthohai sika khan hnung ki isongsan a ni tâka.

⁶Khannisian hi khopui le a mi hai chu indam nôk ki ti, hrisêl takin sehai nôk ki ta, khanchu an kuang thudik le irtharngamna tamtak chu inlangtir sa ki ti.

⁷Juda le Israel chu tuanitungin siamhai ki ta, matona an iom ang khan indinghai nôk ki ti.

⁸Ki chung a lei insualna ata kha thârhai ki ta, an sualhai le an tehelzong ngai kha inzâhai ta ki ti.

⁹Jerusalem chu keima hrangin raifâna, chôirsângna le songinruk ni a ta; Jerusalem mi hai ta hrangin thil sa ki ithohai le khopui chung a vângsakna ki insum thu an lei inhriat tena chu, rammuala nam tinin chipumin an inthing hrang a ni,” a tia.

¹⁰Khan Rengpa’n, “Mipuihaiin hi hmun hi mihriam le ramsahai om lina ramchâr hmun ang chu a ni, an tia; a ni, an ihril indik kêng, a rong ving tâka, khataka khan mihriamhai le ramsahai khom om mahai. Khannisianlân hi hmunhaia hin inhre nôk ni ti,

¹¹ raifâna le lômna khêk irhâihai le irneina hruaithe lômna irhâihai chu lan hre nôk nin ti. Mipuihai chu lômthu hrilna irbôlnahai ki biakbuka hong chôia, hi hla hi an sak lan hria nin ti. ‘Sipaihai Rengpa kuang lômthu hril roi, ama chu a saa, a lungkhamna chu kumkhontuangin a om hrang a ni sikin,’ ti hi. Hi ram hi matona tuanitung taka a iom ang khan siam nôk ki ti, kei Rengpa hin ki iti a ni,” a tia.

¹²Khan Rengpa Itinrêngthothei khan, “Ramchâr ang a mihriam mo, sahai om lina, hi rama hin belrapuhaiin an belrahai vâina hrang sũlhring hong mông nôk a ti.

¹³Tâng ram kua lianhai tâng kôlhaia le sim tianga Judai rama, Benjamina ram irkul sũa, Jerusalem kôlvêla kua chînhai, Judai rama kua lianhai belrapuhaiin an belrahai la tep nôk an ti. Keima Rengpa’n ki iti a ni,” a tia.



¹⁴ Khan Rengpa'n, "Israel in sângkua le Juda in sângkuahai laia ki chonginkung kin tungna hrang nikhua chu a hong nâi thiai ta a ni.

¹⁵ Kha tena chu Davida irchi fel tak kha rêng hrangin inthang ki ta, kha rêng khan a ram pumpui huapin a dikna le felna chu insua a ti.

¹⁶ Juda mihai le Jerusalem mihai chu sansuak ni an ta, zôkriamin om ta an ti. Khopui chu 'RENGPA EI SANINHRINGNA' tia koi ni a ti.

¹⁷ Keima, Rengpa ngêtin chonginkungin Davida irchia mi Israelhai rêng hrangin om mai a ta,

¹⁸ khante ki sintho hrang le hâlvôm thilpêkhai, chîmu thilpêkhai le irbôlnahai inhlan hrangin, Levi irchi ata ochaihai om mai an ti," a tia.

¹⁹ Khan Rengpa khan ki kuang,

²⁰ "Sûn le zânhai kuang thuthung ki isiam a nia, a zoro taka a om theina hranga a nia, kha thuthung kha indanglamtir thei loi a ni.

²¹ Khaangin, rêng chang hrang irchi nei mai a ti, tia Davida kuanga ki thuthung le Levi irchi ochaihai laia ki sin an itho mai hrang a nih ti thuthung ki isiampui; kha thuthunghai kha indanglam ni thei no ni.

²² A ni zui Davida irchihai le Levi nam ata ochaihai chu ki inpunghai hrang a ni. Irvâna ârsihai mo, tuipui kôla chiahai khom tep zoi loi an ini angin, anni khom an ni theina hrangin," a tia.

²³ Khan Rengpa'n ki kuang,

²⁴ "Mihaiin ki inthang, in sângkua inhnihai Israel le Juda ki ihnôlhai ang khan an lei insîr hi nin hriat ngai mo? Khasikin ki mihai chu hmûsit takin an ni ena, nam ang khomin an ni ibe loi a ni.

²⁵ Khannisian keima Rengpa hin sîn le zân kuang thuthung ki siama, irnêng le irvân fena hrang dânhai ki irfûktir a ni.

²⁶ Hihai hi ki sin a ini angin Jakoba irchihai le a ni zui Davida le ki thuthung chu hlo ki inchuktir hrang a ni. Abrahama, Isaka le Jakoba irchihai chungaroirêl hrangin, Davida irchihai laia irthokin inkhat khôk inthang ki ti. Ki



mihai chungã khonzãna nei ki ta, anni chu vângsakna siamhai nôk ki ti,” a tia.

Jeremia 34

Zedekia hranga chongbe

¹ Babulon rama rêng Nebukadnezara le sipai pâl, a ihruaina ram rêng ram sũaga nam tin chi tinhaiin, Jerusalem le a kôlvêla khua an doi lai khan Rengpa'n a ni chongpuia,

² Rengpa, Israelhai Pathianin rêng Zedekia kuanga fea, a kuang hril pe hrangin a ni tîra, “Keima, Rengpa'n hi khopui hi Babulon ram rêng kuta inhlan ki ta, ama'n a ihâl ving hrang a ni.

³ Zôk thei no chi nia; chelin om ni ti, ama kuang pêkin om ni ti. Ama chu hmâirtongin hmu ni ta, hmêl irhmuin chong nin ti; kha hnung chu Babulon rama fe ni ti.

⁴ Zedekia, ni chungchâng thu ki insîr hi irngai roh. Irdoina hmuna that ni no chi ni.

⁵ Irtharngam takin thi ni ta, nir chibulhaiin ni matona rêng lei changhai an iphûm zoroa mipuihaiin mirimhoi an ihâl ang khan nangma ta hrangin hâl an ti. Nang châ an ta, ‘Ei rêng chu a thi ta na!’ ti an ti. Keima Rengpa'n ki iti a ni,” a tia.

⁶ Khanchu hi thurchi hi rêng Zedekia kuang Jerusalema khan ki pêka;

⁷ Babulon ram rêng sipai pâl in khopui an doi lai taka khan, Judai rama khopui kul nei a la omsun Lakis le Azeka khom kha sipai pâlhai khan an doi saa.

Suak enkol thua irhuangna

⁸ Reng Zedekia le Jerusalema mihai khan,

⁹ an Hebrai suak pasal le nupang suak ata insua hrangin thuthungna an neia, mi tukhomin an irchihai Israel mi suaka siam loi hrangin.



¹⁰Mipuihai le an hruaituhai leh khan an suakhai insuaa suak inchangtirhai ta loi hrangin, a sa an tia. Khanchu an insuahai tâka.

¹¹Kha hnung chu an lungrîlhai indanglamin an hruai kêrhai nôka, nakhrâtin suak an inchanghai nôk tâka.

¹²Khanchu Rengpa,

¹³Israelhai Pathian khan a mihai kuang ti pehai hrangin a nin hrila, “Aigupta rama irthoka sansuaka, suak nina ata kin zalêntir lai khan nin irchibulhai leh thuthung ki isiam a ni. Anni chu kum sari a hong dên rikipin,

¹⁴ tu Hebrai suak khom an sin kum ruk a lei hong tho tâk kha, an insua hrang a nih tiin kin hrila. Khannisian nin irchibulhaiin an irngaisak loi a ni.

¹⁵Zoro sôtloite sûnga hin nin lungrîl indanglamin ki thil nuam lam nin thoa. Nin rêngin nin urêng Israelhai inzalêntir hrangin nin irruala, keima inhriatin chubai mûka ki omna ngai, ki tempila thuthungna nin nei a ni.

¹⁶Kha hnungin nin lungrîl theng nôkin mahrip ni tho mak chêia. Zalên taka nin inomtirhai kha nin hruai kêrhai nôka, suak changna khan nakhrâtin nin thunlûthai nôk a ni.

¹⁷Khasikin atûn hin ki thu zôm mak chêi, keima Rengpa’n ki iti a ni; nin irchi Israelhai zalênna nin ipêk loi a ni. A sa hiang hin zalênna nangni pe ki ti. Khandai, hri le hrâi, châma thi hrang zalênna chu, nin chung a ki sinthôna khan rammuala nam tin hai ichiin om ki ti.

¹⁸⁻¹⁹Juda mi lianhai le Jerusalema mi lianhai le rêng ina thainuzelhai, ochaihai, hruaitu murdi, an rêngin sehrâtchal bong hnia an itan kêra irlôiin keima leh thuthung an isiam a ni. Khannisian an thuthung angin an itho loi a ni. Khasikin sehrâtchal chung a an isin tak kha ki mi hai chung a hin tho ki ti.

²⁰Anni chu a lei that nuam an râlhai kuta pe ki ta, an ruakhai chu vâhai le ramsahaiin fa an ti.

²¹Juda rêng Zedekia le a mi lianhai khom a that nuamhai kuta pehai sa ki ti. Nangni doi ngam tak, Babulon sipai pâl kuta inhlanhai hrang a ni.



²²Thu pe ki ta, hi khopuia hin hong kîr nôk an ti. Judai ram khopuihai chu ramchâr, tûte om thei lina hmunin siam ki ti. Keima, Rengpa'n ki iti a ni," a tia.

Jeremia 35

Jeremia le Rekaba irchihai

- ¹ Josia nâipa Jehoiakima, Judai rama rêng a ni laiin Rengpa'n a ni tia,
- ²"Rekaba in sîng mihai laia fe'n lân, chongpuihai ro, khanchu tempil tentanhai laia inkhat khôk hruai inlûthaiin lân, anni chu uain in hrang pehai ro," a tia.
- ³Khaangin Habazinia nâipa Jeremia dang nâi Jaazania le a urêng hai le a nâi an rêngin le Rekaba in sîngkuahai ki hruaihaia,
- ⁴Rengpa tempila anni chu ki hruaia. Igdalia nâipa deipu Hanana tentana ki lûtpuia. Kha khan mi lianhai tentan kôl, mikot nghâktu Saluma nâipa Maaseia tentan sînga om a ni.
- ⁵Khanchu khilât le khêng ûm uaina sip chu Rekaba in sîng mihai kuang lâkin an kuang, "Uain hi in roi," ki ti pehaia.
- ⁶Anni khan an ni sâma, "Uain in ngai ma ung, kin irchibul Jonadaba, Rekaba nâipa khan keini le kin nâihaiin uain in viat loi hrangin a ni ihril a ni.
- ⁷Kha vai kha ni loiin, sin zong le loi tho loi hrangin a ni tia, grep irhuan khom sin loi hrangin le ircho loi hrangin a ni ihril a ni. Hi ram mikhual anga kin omna ram hin kin om mai theina hrangin itiklai khomin puan ina om mai hrangin thu a ni ipêk a ni.
- ⁸Khaang khan Jonadaba'n irchutirna a ni ipêk murdi chu kin hong zôm ngaia, keini le kin dôngmahai, kin nâipasalhai le nâinupanghai khomin tûte'n uain in ngai ma unga.
- ⁹⁻¹⁰Kin omna hrang khom in sin ngai ma unga, puan inhaia kin oma, grep irhuan khom sin ngai ma unga, loi khom nei ma unga, fâk nêk khom nei ma ung.



¹¹Khan rêng Nebukadnezara'n hi ram hi a hong rûna khan, Babulon ram le Suria sipaihai ata zôk hrangin Jerusalema hongin thu kin rêla. Khasika khan atûn hin Jerusalema kin iom tâk a ni," an tia.

¹²⁻¹³Khanchu Rengpa, Itinrêngthothei Israelhai Pathian khan, Juda mihai le Jerusalema omhai kuang fea an kuang ti pehai hrang a ni hrila, "Keima Rengpa'nki thu mikuar sung loa ki irchutirna zôm hranga zôm nuam loi nin om moh ti nangni ki irdon a ni.

¹⁴Jonadaba irchihaiin chu uain in loi hranga thupêk kha an zôma, a vuan sîn ten hin nin laia inkhat khom uain in la om mahai. Khan keima'n chu nin kuang thu kin sîr khomin ki thu zôm nuam ngai mak chêia.

¹⁵Nin laia a ni zui deipuhai ki tîrhai maia, nin omdân sualhai masana, thil sa tho hrangin nangni an lei hril ngaia. Nangni le nin irchibulhai ki ipêkna ram hin om kumkhua thei hranga pathian danghai chubai mûka an sin tho loi hrangin nangni an hril ngaia. Khan khomin ki chong irngai nuam mak chêia, nin ni uksak nuam loi a ni.

¹⁶Jonadaba irchihaiin chu an irchibul thupêk an zôma, nangni rêkin chu zôm nuam mak chêi.

¹⁷Khasikin atûn keima, Rengpa Israelhai Pathianin vânduaina irkhêl ki inkung kha nangni Judai ram le Jerusalema mihai chung a ki insum hrang a ni. Nin kuang thu ki hril lai khan irngai nuam mak chêia, nangni ki koi lai khan nin ni sâm nuam no sikin, hi hi ki itho hrang a ni," a tia.

¹⁸Khanchu, Rekaba irchihai kha kin hrila, an kuang, Rengpa Itinrêngthothei Israelhai Pathianin a ti, "Nin irchibul Jonadaba thupêk nin zôma, a irchutirna nin zuia, a thupêk murdi nin tho ving a ni.

¹⁹Khasikin, keima Rengpa Itinrêngthothei Israelhai Pathianin ki sintho hrangin Rekaba nâipa Jonadaba irchia nâipasal irsam ngai no nihai ti chong ki inkung a ni," a tia.

Jeremia 36

Baruka'n lekha irzuat tempila a tep



- ¹ Josia nâipa Jehoiakima Juda rêng kum minli an lal kuma khan Rengpa thu chu Jeremia kuang a zuang tunga.
- ²“Lekhabu inzuat kha lan lân, Israelhai le Judahai le nam danghai chungthu nang ki ihrilhai kha irziak roh. Josia inlal phut laia ni kuanga ki thu insîr le a vuan sîn tena ki thu’nsîrhai a rêngin irziak ving roh.
- ³Juda mihaiin an chung a vânduaina irkhêl intungtir hranga ki thiltumhai inhriat pumin, an omdân saloihai an irlet thei duaiin; an irletin chu an tho’nchâina le an sualnahai inzahai ki ti,” a tia.
- ⁴Khaang khan Neria nâipa Baruka chu ki koia, ki kuang Rengpa thu’nsîr a rêngin kin sîr pea, khahai kha Baruka’n lekhabu irzuata a lei irziaka.
- ⁵Khanchu Baruka chu hiang hin hê ki bêa, “keima chu tempila lût hrangin phal ni ma unga,
- ⁶khasikin zoro danga mipuihai bu an nghei zoroa tempila ni ife hi nang ki inuampui a ni. Rengpa ni iti pe ni kuanga ki itihai kha, an inhriat theina hrangin kutziak kha inring takin ni itep hrang a ni. Kha kha mi tin, Juda mihai khopuia honghai inhriat theina hrang hmuna tep suak roh.
- ⁷Rengpa’n a ningmur ichiom tak leh an sîhai sikin, an omdân saloihai ata irletin Rengpa kuang ngaidamna an zong duai khom a ni thei,” tiin.
- ⁸Khaang khan Baruka’n Rengpa thuhai chu ki inhril lam takin a tep suak tâka.
- ⁹Juda rêng Jehoiakima an lal kum ringana, a tha kuakna khan, Rengpa lunghoina hrangin mihaiin bu an ngheia. Jerusalema om murdihai le Judai ram khopuihaia irthoka mi honghai khan bu nghei nikhua an ichâm a ni.
- ¹⁰Khanchu mipuihaiin an irngaihai lai taka khan, lekha bu inzuata ki iti murdi kha tempila ziaktu Safana nâipa Gemaria tentana irthoka khan mi tin inhriatin a tepa. A tentan chu chontan chunginta lûtna tempil mikot thar kôla om a ni.

Mi lianhai makunga lekhabu inzuat tep



¹¹Gemaria nâipa Mikaia, Safana tupa khan lekhabu inzuat Rengpa iti Baruka itep kha an hriata.

¹²Reng ina a fea, roirêlhai irziaktu tentana a lûta, kha khan mi lianhai an rêngin roi an rêla. Kha mihai kha ziaktu Elisama, Semaia nâipa Delaia, Akbora nâipa Elnathana, Sefama nâipa Gemaria, Hanania nâipa Zedekia le ulian danghai an ni.

¹³Baruka'n mipuihai kuang lekhabu inzuat a tepna irthoka inhriathai kha Mikaia khan anni chu a hrila.

¹⁴Mi lianhai khan Nethania nâipa Jehudia chu Baruka kuang an tîra, lekhabu inzuat mipuihai inhriata tep kha hong chôi hranga inhril hrangin, Baruka'n lekhabu inzuat a hong chôi pehaia.

¹⁵Anni khan, "Toiin lân lekhabu inzuat chu ni tep pe ro," an tia. An iti lam takin Baruka'n a tho tâka.

¹⁶A tep zoiin chu chipumin an ir-ena, Baruka kuang khan, "Hi thu hi rêng kuang hril ngêt kin ti," an tia.

¹⁷Khanchu an irdona, "Hi thuhai hi itina ni irziak mo nin hril ro, Jeremia'n nang a iti pe ma ni?," an tia.

¹⁸Baruka'n a sâmhaia, "Jeremia'n chongbâi tin hi ki kuang a ni ti pea, khan keiin lekhabu inzuat hi kolom tui leh ki lei irziak a ni," tiin a sâmhaia.

¹⁹Khanchu a kuang khan, "Jeremia le nin irbîk ngêt hrang a nia, nin omna kha tûte nin inhriattirhai hrang ni ma," an ti pea.

Rengin lekhabu inzuat a hâl

²⁰Khan, ulianhai khan ziaktu Elisama tentana khan lekhabu inzuat kha an siaa, rêng roirêlna hmuna an fea, kha khan an thu inhriathai kha rêng an inhrila.

²¹Reng khan Jehudia chu lekhabu inzuat va la hrangin a tîra. Elisama tentana va lâkin rêng le a milian, ama irhualkhaka ngîrhai kuang khan a tep tâka.

²²Phalbi zoro a nia, a phalbi ina khan rêng chu mei kôla a itoi a ni.



²³Jehudia khan tuan thum tuan minli vêl a tep zoiin chu, rêng khan chemte leh a ât thêra, meia a pai tâka. Lekhabu inzuat kha a kâng zoi mâka chu khang khan a itho a ni.

²⁴Khan rêng mo, a ulianhai khom kha a thu inhriat a chi mo, beiindongin tûte om mahai.

²⁵Elnathana, Delaia, Gemaria haiin lekhabu inzuat hâl loi hrangin rêng an ngên mai khomin, ama'n ite irngai pehai maka.

²⁶Khanchu rêng nâipa Jerahmeela, Azriela nâipa Seraia, Abdeela nâipa Selemia hai chu keima le ki ziaktu Baruka chel hrangin thu a pêk tâka. Khannisian Rengpa'n kin ruaiin a ni thup tâka.

Jeremia'n lekhabu inzuat dang a'ziak nôk

²⁷Reng Jehoiakima'n Baruka kuang a sâm pea, irziak lekhabu inzuat a hâl zoi hnunga khan,

²⁸Rengpa'n lekhabu inzuat dang a lâk nôka lekhabu inzuat matona lei chuanghai kha irziak nôk hrangin a ni hrila.

²⁹Rengpa'n rêng kuanga ti pe hrangin a nin hrila, "Lekhabu inzuat chu ni hâla, Babulon rêng hongin, hi ram hi insiat chit a ta, a mihai le a sahai thatpai a ti. Itho sika ni irziak moh ti Jeremia chu nir dona.

³⁰Khasikin atûn nang rêng Jehoiakima kuang, keima Rengpa'n ki iti a ni: ni irchi ata khom Davida rêng rama hin roirêl no ni. Ni ruak chu sîn misa le zân dâi tuangna hrang hmuna ipai ni a ti.

³¹Nin sual sikin nangma le nir chihai, ni milianhai dûk nangni tho ki ti. Nangin mo, Jerusalem le Judai ram mihaiin nangni ki ihril uksak mak chêia, khasika khan nangni ki lei insîna ngai vânduaina irkhêl murdi nin chungu insum ki ti.

³²Khanchu lekhabu inzuat dang ki lâk nôka, ki ziaktu Baruka chu ki pêka, ki iti pe kai a lei irziaka. Lekhabu inzuat matona chuang murdi ki lei isâm pe tâk le chongbe ir-anghai a'ziak tâka.

Jeremia 37



Jeremia kuanga Zedekia ngêna

¹ Babulon rama rêng, Nebukadnezara'n Josia nâipa Zedekia chu Jehoiakima nâipa Konia irthûlin Judai rama rêngin a siama.

² Khan Zedekia'n mo, a mi lianhaiin mo, mipuihai khomin Rengpa chongbe ni pêk kha an izôm loi a ni.

³ Reng Zedekia Selemia nâipa Jehukala le Maaseia nâipa ochai Zefania chu a nam pumpui irthûlin Rengpa'n kin Pathian kuang chongchai hranga ngênin a hong tîra.

⁴ Intângna ina khum la ni ma unga, mipui laia zalên takin ki la om thei lai tak a ni.

⁵ Babulon sipai pâlhai khan Jerusalem chu an ihualkhak a nia, khan Aigupta sipai pâl Aigupta ramri an hong khêl tah ti an inhriatin chu, an hnung tiang an kîr nôk tâka.

⁶ Khanchu Rengpa Israelhai Pathianin Zedekia kuang ti pe hrangin,

⁷ a nin hrila, "Aigupta ram sipai pâl nang san hrangin an ihong mai a nia, khanchu in tiang kîr nôk a ti.

⁸ Khanchu Babulon-hai hong kîr nôk an ta, khopui doi an ta, la an ta, an ihâl insiat hrang a ni.

⁹ Babulon-hai hong kîr no nih tia nin binga irhuang loi hrangin keima Rengpa'n irningna chong nangni ki ipêk a ni, a san chu an hong kîr nôk hrang sikin.

¹⁰ Babulon sipai pâl inhnê ving khom unglân, a pophai vai mâkin, an puan in sînga zâl khomhai sian, kha mihai kha la thoi an ta, hi khopui hi a ihâl insiat ving hrang a ni," a tia.

Jeremia chu chel a nia khumpai a ni

¹¹ Aigupta rama sipai pâl an hong nâi sikin Babulon ram sipai pâl khan Jerusalem an imâk a ni.



¹²Khaangin in sângkua irchon ata ki dongtum la hrangin, Jerusalem mâkin, Benjamina ram huala ki fea.

¹³Khan Benjamina kotsua ki tungin chu, khataka hrungtu sipai ulianpu ar hming Irija, Selemia nâipa Hanania tupa khan a ni lei dana, “Babulon-hai kuanga rot ni itum a ni,” a tia.

¹⁴Khan keima’n, “Khaang khan ni ma, rot tum ma ung,” ki tia. Khan Irija khan ki thu insîr kha pom nuam maka, a ni chela ulianhai kuang a ni hruaia.

¹⁵Ki chung a ningmur an lâka, ni vîk hrangin le a intângna ina an ihmang pe roirêl ziaktu Jonathana ina ni khum hrangin thupêk an insuaa.

¹⁶Irnêng rîl tentana thun ki nia, kha khan sîn tamtak siain ki iom a ni.

¹⁷Inhning tiang chu rêng Zedekia’n a ni koia, dâihrekin rêng ina khan, “RENGPAA irthokin chongbe mo a nei?” tiin a nir dona. “A om,” tiin ki sâma. Khan, nang hi “Babulon rama rêng kuang pêkin om ni ti,” ki ti pe saa.

¹⁸Khanchu keima’n, “I mani, ni chung a mo, ni mi lianhai chung a mo, aninole ni mihai chung a tho’nchâina ki nei mo, intângna ina khum ki ichukna hi?”

¹⁹Babulon rama rêngin, nangma mo, ni ram doi no nih tia nang hril ngai, ni deipuhai imo an ichang zoi ta?

²⁰Khasikin atûn ka pu inlal tak, ki chong irngaia ki ititak tho hrangin nang ki ingên a ni. Ngaihoi takin Jonathana ina intângna ina khan chu ni tîr no ro, ni ni tîr nôkin chu, khatak khan ki ithi ngêt hrang a ni,” ki tia.

²¹Khanchu rêng Zedekia hrungtu hualsûnga ni khum hrangin thu a pêka. Kha khan ki om maia, a sîn tin baitiam khopuia baihai a hek mâka chu bai siamna hmuna irthokin pêkin ki oma.

Jeremia 38

Jeremia tuikuang châr sûnga

¹Matana nâipa Sefatia, Pasura nâipa Gedalia, Selemia nâipa Jahukala Malakia nâipa Pasura hai khan mipuihai kuanga ki ihril kha an inhriata,



²Rengpa'n a iti, "Khopuia tukhom a omhai chu, khandaiin mo, châmin mo, aninole hri le hrâiin thi an ti. Babulon-hai kuanga fe chu that ni no nihaia; an hringna chu inzôktirhai hrâm a ti," ti hi Rengpa'n a iti a ni.

³Khanchu an kuang Rengpa'n hiang hin a ti, "Babulon rama sipai pâlhai kuta pe ki ta, an ilâkpai hrang a ni," tiin kin hrilhai saa.

⁴Khanchu mi lianhai kha rêng kuanga fe'n an ti pea, "Hi mi hi that ngêt hrang a ni. Hianga tong lai hin khopui sûnga sipaihai thâiindôpin an oma, khopuia la om, a tu chung a khom khang khan a tho chita, mipuihai san tum loiin; anni that vai a ingaitua a ni," an tia.

⁵Khanchu rêng Zedekia'n, "Khang khan a ni'n teh a sa, a chung a hin nin nuam lam takin tho roi; nangni khap thei no ning," a tia.

⁶Khanchu a ni hruaia, rêng nâipa tuikuanga khan hrui leh a nin thâka, kha kha hrungtu irkul sûnga om a nia. Tuikuanga khan tui om maka, dialdôk vai a oma, kha khan ki itâk tâk a ni.

⁷Khannisian, Ethiopia mi thainuzel rêng ina om ngai Ebedmeleka khan tuikuanga an ni sia ti kha an hriata, kha lai taka khan rêng chu Benjamina kotsuaa roi a rêla.

⁸Khang khan, Ebedmeleka chu kha khan a fea, rêng kuang a ti pea,

⁹"Ka pu inlal tak, hi mi hai sintho hi a idik loi a ni. Jeremia chu tuikuanga an siaa, khopuia bu a om ta no sikin, kha khan phîngchâmin a iom a ni," a tia.

¹⁰Khanchu rêng kha Ebedmeleka chu mi dang inthum tuanghai sain, ki thi mâna ni kêlsua hrangin thu a pêka.

¹¹Khangin Ebedmeleka chu mi hai leh khan rêngin a neinun siana hmuna fe'n puanchet diar hi a va hmua, hruihrual a zuan thâka.

¹²Hruihruala khan a nin nât lona hrangin puanchet kha ki zakolek hnuaia inchep hrangin a ni hrila. Khang khan ki thoa.

¹³Khanchu tuikuang ata a ni kêlsuaa, kha zoiin chu hrungtu irkul sûnga khan a ni sia ta.



Zedekia'n Jeremia thurôn a zong

¹⁴Zoro danga Zedekia'n a kuang, tempil mikot inthumna khan a ni hruai nôkin chu ki kuang, "Chong nang irdon ki nuama, thudik ni nin hril ki nuam a ni," a tia.

¹⁵Khan, keima'n, "Thudik nang ki ihril a ni'n te, ni that ni ta, thurôn nang ki pêk khomin uksak no chi nia," ki tia.

¹⁶Khanchu Zedekia'n dâihrekin chonginkungna a neia, "Pathian hring, hringna ni pêktu irhmingin chong kin kung, nang that no ning, nang that nuam mihai kuang khom nang pe no ning," a tia.

¹⁷Khanchu Zedekia kin hrila, Rengpa Itinrêngthohei, Israelhai Pathianin a ti, "Babulon sipai ulianhai kuta nir pêka ni'n chu, ni hringna chu inzôkin om a ta, hi khopui khom hi hâlin om no ni. Nangma le ni in sêngkua inzôkin om a ti.

¹⁸Khannisian nir pêk nuam no'n chu hi khopui hi Babulon-hai kuta pe ni a ta, hâl ving an ta, anni ata chu zôk thei no chi ni," tiin ki hrila.

¹⁹Reng khan a ni sâma, "Ei ram mi ngêt Babulon-hai kuanga rothai hi ki ichi a ni. Anni kuta ni pe an ta, nin tuangtir hrai an ti," a tia.

²⁰Khan, keima'n, "Anni kuta pêkin om no chi ni, Rengpa chongbe hi zôm hrangin nang ki ingên a ni; khanchu itinrêng fel a ta, ni hringna inzôkin om a ti.

²¹Khan irpe hranga ni nuam no'n chu thil hong tung hrang chu Rengpa inlârna'n a ni irhmutir a ni tâk.

²²Kha inlârna khan Babulon ram sipai ulianhai kuang nupanghai an rêngin, rêng in ata an hruaihai lai ki ihmu a ni. An suak lai taka an iti chu irngai roh: 'Reng a rual satakhain ama kha an hruai insuala, an thuhnuaia an sia tâka. Atûn dialdôka a ke an ôk pe tena chu, a rualhaiin an mâk tâka,' an tih" tiin.

²³Khanchu ki ti pe nôka, "Ni nupanghai le ni nâihai ngei khom an kuta irthokin zôk thei no chi ni. Babulon ram rêngin intângnaa nang hruai a ta, hi khopui hi ihâlpai zit ni a ti," ki tia.



²⁴Zedekia'n a ni sâma, "Hi ei chongna hi tûte inhriat ni no ri se, khanchu ni hringna hi ichiom no ni.

²⁵Mi lianhai nang ki chongpui pe ti an inhriatin chu, hong an ta, imo nin insîr tiin nang irdonna an ti. Thil tinrêng nin hril vingin chu nang that loi hrangin chonginkung an ti.

²⁶Intângna ina thi hrangin chu nang tîr nôk ta loi hrangin an ni ingên a nih an ti vaiin hrilhai ro," a tia.

²⁷Khaang khan mi lianhai chu hongin chong an ni irdona; keima'n rêng hê ni bê lam takin anni chu kin hrilhaia, tukhomin chongna thuhai kha an inhriat no sikin ite tho thei an inei loi a ni.

²⁸ Jerusalem lâk a ni mâka chu, hrungtu irkula khan siain ki iom tâk a ni.

Jeremia 39

Jerusalem tûkna thu

¹Juda rêng Zedekia inlal kum kuak le tha sômna khan, Babulon rama rêng Nebukadnezara chu sipai pâl tamtak leh hongin, Jerusalem an doia.

²Zedekia inlal kum sômhleikhatna a tha minli le sîn kuakna khan khopui banghai kha insimtir a nia.

³Jerusalem kha an lâka ni'n chu, Babulon ram rêng le a milianhai hongin kotbâi inlaina taka khan omhmun an khuara. Nergalserezera, Samgarneboa, Thainuzel hai hruaitu Sarsekima, hruaitu sipaihai Nergal-serezera hai khom an om saa.

⁴Reng Zedekia le a sipai murdihaiin anni kha an hmuhaiin chu, zâna khopui ata zôkna an zonga. Reng irkul ata fesuakin kul bang inhnina kêra relpatin, Jordan phâi tiang panin an rot tâka.

⁵Khan Babulon sipai pâlhai khan anni chu irzûlin Jeriko kôl phâia khan Zedekia chu an chel tâka. Reng Nebukadnezara chu kha zoro taka Hamath ram hual Ribla khuaa omhai kuang an hruaia, kha khan Nebukadnezara chungthu an rêl pea.



⁶Ribla khuaa khan Zedekia nâipasalhai chu hmuchakin a thathaia, Juda mi lianhai khom a that sahaia.

⁷Kha irzoiin chu Zedekia mitru a kêlsuapai pea, Babulon rama hruai hrangin hruihruai leh a khit tâka.

⁸Kha zoro taka khan, Babulon-hai khan rêng in le mi inhai chu an hâl insiata, banghai an insima.

⁹A hnungkhôn taka chu sipai hruaitu Nebukadnezara'n khopuia mipui la omhai kuanga irpêkhai leh khan an rêngin Babulon tiang intângna ina a hruaihai tâka.

¹⁰Judai rama khan mi inrianghai senkhat, ite nei loihai a mâka, anni kha grep irhuan le loihai a pêkhai sa tâka.

Jeremia insuaa omna thu

¹¹Khanchu rêng Nebukadnezara'n sipai hruaitu Nebuzaradana chu hiang hin thu a pêka:

¹²"Fe'n lân, Jeremia zong suakin satakin enkol roh. Ama chu dengingtheitir no'n lân, a inuam murdi tho pe ro," a tia.

¹³Khaang khan Nebuzaradana le Babulon rama hruaituhai, Nebusazbana le Nergal-serezera le mi lian danghai le,

¹⁴hrungtu hual sûnga irthokin a ni hruai suaka, Ahikama nâipa Gedalia, Safana tupa enkolna hnuai a ni siaa, ama'n ki in damtaka ki tung theina hrangin a ingaitua hrang a ni. Khaang khan mi danghai kuang ki iom a ni.

Ebedmeleka tûngna

¹⁵Hrungtu irhuan sûnga ki la om mai laiin, Rengpa'n a nin hrila,

¹⁶Ethiopia mi Ebedmeleka inhrilin Rengpa Itinrêngthothei, Israelhai Pathianin a ni ti, "Tho hranga ki iti angin hi khopui chung a hin vângsakna ni loiin siat theina ki intungtir hrang a ni. A hong tung tena chu kha kha hmu hrangin, kha khan om a ti.



¹⁷Khan keima, Rengpa hin nang hrung inzôk ki ta, mi a ni chihai kuta pêk ni no chi ni.

¹⁸Nang inzôktir ki ta, thatin om no chi ni. Ni ni iam ngit sikin ni hringna inzôk ni ti. Keima Rengpa'n ki iti a ni," tiin.

Jeremia 40

Gedalia kuanga Jeremia omna

¹Sipai hruaitu Nebuzaradana'n Ramah khuaa irthokin a nin sua zoi hnunginRengpa'n a ni chongpuia. Kha hmuna khan Judai ram le Jerusalema irthokin Babulon rama mi dang intângna ina om hranga hruaia omhai laia khan thîrhruia irkhitin ki iom sa a ni.

²Sipai hruaitu khan a hruai irkêma ki kuang, "Rengpa ni Pathianin hi hmuna vânduaina tung hrang hi a lei inpuang tâka.

³Tho hranga a iti kha a itho a ni tâk. Rengpa chung a thil nin tho'nchâia, a thupêkhai nin zôm no sikin, hihai hi a itung a ni.

⁴Atûn hin nang chu thîrhruia leh ni kuta irthokin ki sûta, nang ki insua a ni ta, Babulon rama keima leh hmunkhatin ni fe nuam noa ni'n chu, fe loiin ni om thei, ni nuamna tiang taka fe thei ni ti," a ni tia.

⁵Ki sâm no tena chu, Nebuzaradana'n, "Babulon ram rêngin Juda khuahai op hranga bêin, Ahikama nâipa Gedalia, Safana tupa kuang kîr nôkin lân, a kuanga omin a mihai laia om ro, aninole, fe hranga ni itihna taka khan fe ro," a tia. Khanchu thilpêk senkhat le bu ki chôi hrang a ni pêka, a nin fetira.

⁶Gedalia kuang Mizpa khuaa ki fea, ram sînga mâksana omhai laia ki oma.

Gedalia Juda ram optu

(2 Rng 25.22-24)

⁷ Sipai hruaituhai le mi dang ar pêk loihai khan Babulon rama rêng Ahikama nâipa Gedalia chu ram optu, kha ram sînga inriang tak, Babulon rama hruaia om loihai enkoltu hrangin bê a nih ti an len hriata.



⁸Mizpa khuaa Gedalia irhmupui hrangin hi mihai Nethania nâipa Ismaela, Korea nâipa Johanana, Tanhumeta nâipa Seraia, Netofa mi Efaia nâipasalhai, Makath mi Jezania le mi danghai an hong.

⁹Gedalia'n a ti pehaia, "Babulon-hai kuta irpe hrangin ite chi hrang zel om mah ti hi chong ki inkung a ni. Hi rama hin omhmun indet unglân, Babulon rama rêng sintho unglân, nin ta hrangin thil tinrêng fel ving a ti.

¹⁰Keima ngei Mizpa hin om ki ta, Babulon-hai hi an hongin chu nin irthûlin ngîr ki ti. A ni, uain, thei le oliv hriakhai la nin ta, bûm thei ta nin ta, nin inuamna tak khuaa om thei nin ti," a tia.

¹¹Khang khan, Israel mi tin Moab, Edom le ram danga omhai khan Babulon rama rêng mi tônte Judai rama a mâk thu le Ahikama nâipa Gedalia, Safana tupa chu khahai optu hrangin an inkung a nih ti a lei inhriata.

¹²Khanchu an hong irthokna ram danghai mâkin, Judai rama an hong kîra. Mizpa khuaa om Gedalia kuang an hong tunga, uain le kholum thei tamtak an hong chôi pea.

Gedalia thata omna

(2 Rng 25.25-26)

¹³Hi zoia hin Johanana le sipai hruaitu, ar pêk loihai kha Mizpa khuaa Gedalia kuang an hong,

¹⁴a kuang an ti pea, "Amon mihai rêng Baalisa'n Nethania nâipa Ismaela chu nang that hrangin a itîr a nih ti hi ni inhriat loi ma ni?," an tia. Khannisian Gedalia khan iam maka.

¹⁵Khanchu Johanana khom Gedalia kuang, "Ismaela chu lei va that rong, tûte'n tu ithat mo a inih ti inhre no nihai. Itho ngân mo nang that hrangin phal a ini thei hrang? Kha thil khan Juda mi murdi nang irhuala irbûmhai irthekindarh a ta, Judai rama imâka la omhai hrangin vânduaina irkhêl intungtir a ti," a tia.

¹⁶Khannisian Gedalia'n, "Kha thil kha tho no ro, Ismaela chungthu ni insîr hi thudik ni ma!" tiin a sâma.



Jeremia 41

¹ Kha kum a tha sarina khan Nethania nâipa Ismaela, Elisama tupa rêng irchia rêng mi lianhai laia inkhat chu mi sômkhath le Mizpa khuaa Gedalia hmu hrangin a fea. An rêngin hmunkhathin bu an nêk laiin,

²Ismaela le a kuanga mi sômkhathai khan an khandaihai kêlsuain Gedalia chu an that tâka.

³Ismaela khan Israelhai an rêngin Gedalia kuanga om murdi le Babulon ram sipai, khataka omhai kha a thathai vinga.

⁴Zîng nôka tûte'n Gedalia thi an inhriat mân,

⁵mi sômriat Sekem, Silo le Samaria irthokin an hong. An hnerkamulhai an voi vinga, an puanhai inpotthêrin an taksahai an ât inphopa. Tempila inhlan hrangin bai le mirimhoi an hong chôia.

⁶Khaang khan Ismaela chu chap pumin anni donhai hrangin Mizpa khuaa irthokin a fea, anni a va phâkhaiin chu, “Ngaihoi takin Gedalia hmu hrangin hong roi,” a tia.

⁷Khopui sûnga an lûtin chu Ismaela le a mihai khan anni chu an thathaia, an ruakhai kha tui laia an inthâkhaia.

⁸Khan an laia mi senkhat la omin, Ismaela kuang khan, “Ngaihoi takin ni that no ro! Buhai, barlihai, hriakhai le khuaihlutui, loia kin ithup a om ti ni isôn loi ma ni?” an tia. Khanchu anni kha a lan zôkhaia, an rualhai kêra khan a ithathai loi a ni.

⁹Ismaela'n a ithathai ruak a ipaina tuikuang kha a liana, Israel rêng Baasa a doi laia rêng Asa ichoi a ni. Ismaela'n tuikuang kha mi ruakin an siptira.

¹⁰Khan, rêng nâinuhai le mi dang Mizpa-a om, sipai hruaitu Nebuzaradana'n Gedalia enkolna hnuaia a isiahai, an rêngin intângna ina intângin a siamhai tâka. Ismaela'n anni chu mi intângna hruaiin Amon ram hualna tiang a fe tâka.

¹¹Johanana le sipai hruaituhai a kuanga omhai an rêngin Ismaela'n thil a itho insual kha an inhriat tâka.



¹²Khaangin a hnunga a mihai leh an irzûla, Gibeon dîl kôla an va phâka.

¹³Ismaela mi intânghai khan Johanana le a kuanga sipai hruaituhai kha an hmu'n chu an lôma,

¹⁴an kîra anni tiang an intâna.

¹⁵Khan Ismaela le a mi kiriathai chu Johanana kuta irthokin zôkin Amon ram tiang an intân ta.

¹⁶Johanana le sipai hruaituhai khan, Ismaela'n Gedalia sipaihai, nupanghai le Thainuzelhai a that zoia, Mizpa khuaa irthokin mi intâng a ihruai mipuihai kha an hruai kîrhai vinga.

¹⁷⁻¹⁸Babulon ram rêngin ram optu hranga a isiam Gedalia kha Ismaela'n a that sika khan, Babulonhai chu an ichi a ni. Khasikin Babulon-haia irthokin zôk hrangin Aigupta tianga panin an fe suak tâka. Lam laia khan Bethlehem kôla Chimham irngam hmuna khan an irngam tâk a ni.

Jeremia 42

Anni ta hranga chongchai pehai hrangin mipuihaiin Jeremia an ngên

¹Khanchu, sipai hruaituhai Karea nâipa Johanana, Hesaia nâipa Azaria le mipui a chîn a lian an hongga,

²“Rengpa ni Pathian kuang, keini ta hrang le hitaka hôia la omhai ta hrangin ni chongchai pe sa roh. Zoro lei fe tâka khan chu tamtak kin ni ngaia, khan atûn hin chu ni ihmu anga hin mi tômta vai imâkin kin iom a ni.

³Kho tiang mo kin ipan hrang le imo kin itho hrang Rengpa ni Pathianin a ni hril theina hrangin chongchai ro,” an ni tia.

⁴Khan keima'n, “A sa, Rengpa nin Pathian kuanga nin ingên angin chongchai ki ti. Khan a iti kai chu nangni inhril ki ti. Ite nangni thup no ning,” tiin ki sâmhaia.

⁵Khanchu anni'n ki kuang, “Rengpa ni Pathianin kin tah hranga thu nang a inhril angin kin tho no'n chu, Rengpa chu thu inhriattu dik, iamom mi ni ri se.



⁶Chongchai hranga nang kin itîrna Rengpa kin Pathian thu kin zôm hrang sikin thil tinrêng kin ta hrangin a ifel hrang a ni,” an tia.

Rengpa'n Jeremia chongchaina a sâm

⁷Sûn sôm zoia Rengpa'n a ni chongpuia,

⁸khaangin Johanana, a kuanga om sipai hruaituhai le mi danghai an rêngin ki bukkhômhaia.

⁹An kuang, “Rengpa Israelhai Pathian, a kuanga chongchai hranga nin ni itîr khan hiang hin a ti,

¹⁰Hi rama om mai nin nuamin chu, khaangin nangni siam loiin nangni san inding ki ta; nangni phôi loiin phunindet ki ti. Nin chung a siat ripna kin tungtir sikin, ki milung a ina a ni.

¹¹Nin ichi Babulon rama rêng hi chi ta no roi. Nin kuang ki oma; a thuneina irthokin nangni sansuak ki ti.

¹²Kei chu khonzâna nei ki ta, nin chung a khonzâna nei hrangin siam ki ta, nin rama nangni inomtir mai ki ti,' tiin

¹³⁻¹⁵“Khannisianlân nangni Judai rama mâksana omhai, hi rama hin om nuam loiin Rengpa nin Pathian thuzôm loiin nin iom hrang ni viat mah. Ni ma, Aigupta rama, irdoina irhâi, bekul irhâi le châm inhriat loina hmuna fe kin ta, om kin ti, nin iti viat hrang ni mah. Nin tia ni'n chu, Rengpa Itinrêngthothei Israelhai Pathianin a ti, 'Aigupta rama fe nin tum ngitin chu,

¹⁶khandai nin ichi ngêt khan nangni irzûl a ta, châm nin ichi ngôi ngôi khan nangni zui a ta, Aigupta rama khan thi nin ti.

¹⁷Aigupta rama fe hrang tum ngit mihai chu an rêngin khandaiin mo, châmin mo, aninole hri le hrâihaiin an ithi hrang a ni. An laia inkhat lua dam suak no nihaia, vânduaina irkhêl an chung a ki zuang intungtir hrang chu an laia inkhat lua intân suak thei no nihai,' tiin.

¹⁸Rengpa, Israelhai Pathianin, 'Ki ningmurna khan Jerusalema mihai chung a insuma a iom angin, ki ningmurna chu nin chung a, Aigupta nin fe'n chu



insumin om a ti. En intak takin om nin ta; mihai ihmusit tuang nin ta, nin irhming khomâksâmna'n hmang an ta, hi ram hi hmu nôk ta no chin ni,' tiin" ki tia.

¹⁹Khanchu ki lan sîr nôka, "Rengpa'n nangni Judai rama mâksana la omhai, Aigupta rama fe loi hrangin nangni a inhril a ni. Khasikin atûn nangni ki iti a ni.

²⁰Thipui thei rak hranga sualna lian nin itho a ni ta. Nin ta hrangin Rengpa ei Pathian kuang chongchai hrangin chong nin inkung a ni.

²¹Khan Rengpa ei Pathianin nangni inhril hranga a ni iti murdi nin izôm loi a nih ti hi atûn hin nangni ki inhril a ni.

²²Khasikin hi hi inhre roi: nin ife nuamna le nin iom nuamna rama khan irdoina'n mani, châmin mani, hriin mani thi nin ti," tiin.

Jeremia 43

Aigupta rama Jeremia hruaina

¹Rengpa an Pathianin mi tin laia insîr hranga a ni itîrna chu anni chu ki hril pehai zoi tâka.

²Khanchu Hosaia nâipa Azaria le Karea nâipa Johanana le mi irsong danghai khan an ni tia, "Milak ni itho a ni. Rengpa ei Pathianin Aigupta rama fe loi hrangin le khatak khan om loi hranga nin hril hrangin nang tîr mah.

³Kaldai mihaiin ni chela ni that hrangin mo, Babulon rama sala ni hruai theina hrang tia Neria nâipa Baruka'n nang a inthor a ni hi," tiin.

⁴Khaangin Karea nâipa Johanana mo, sipai hruaituhai le mipuihaiin Judai rama om mai hranga Rengpathupêk kha zôm nuam maka.

⁵ Khanchu Karea nâipa Johanana le sipai hruaitu tin hai khan Juda mi la dam sunhai le nam tin laia irthekindarh an nina irthokin Judai rama om hranga hong kîrhai chu an hruaia.



⁶Khahai kha pasalhai, nupanghai, nâipanghai, rêng nâinuhai an ni. Sipai hruaitu Nebuzaradana Gedalia enkol hranga a imâk mipui an rêngin Baruka le keima tep sain an ni hruai vinga.

⁷Rengpa thupêk zôm loiin Aigupta rama lûtin Tahfanes khua dênin an fea.

⁸Kha hmuna khan Rengpa'n ki kuang hiang hin thu a hrila,

⁹“Juda mihai hmu pumin lunglianpa hrûtin lân, Tahfanes hmuna Faroa in panna lam siamna sîr ata lung lampui kôla khan phun roh.

¹⁰Khanchu an kuang hiang hin ti ro, RengpaItinrêngthothei Israelhai Pathianin hiang hin a ti. A ni zui Babulon rama rêng Nebukadnezara chu hi hmuna hin hong hruai ki ta, hi lung nin iphunhai chung a hin a rêngtoihmun do a ta, a rêng puan in chu an chung a zâr a ti.

¹¹Nebukadnezara chu hong a ta, Aigupta hi a inhnê hrang a ni. Khanchu hri le hrâia thi hranghai chu hri le hrâiin thi an ta, mi intâng hranga hruai suak hranga inkunghai chu mi intânghaiin hruai suak ni an ta, khandaiia thi hranga inkunghai chu khandaiin thi an ti.

¹²Aigupta pathian biak inhai chu hâl ki ta, Babulon rama rêngin an pathianhai chu a nuamin chu hâl a ta, a nuamin chu chôi ving a ti. Belrapu'n a songkola pahrik a izen angin, Aigupta ram chu Babulon rama rêngin zen infâihai ving a ta, inhnêna changin rot a ti.

¹³Aigupta ram Heliopolis khopuia inhriat maina lungphun irthianghai chu insiat chit a ta, Aigupta pathian biak inhai chu hâlpai ving a ti.

Jeremia 44

Aigupta rama Israel omhai kuanga Pathian chongbe

¹Rengpa'n Israel mi murdi Aigupta rama khopui Migdol, Tahfanes le Nof le sim tianga omhai chungchânga a ni chongpuia.

²Rengpa Itinrêngthothei, Israelhai Pathianin a iti a ni, “Nangni ngêtin Jerusalem le Judai ram khopui danghai siat chitna ki intungtir kha nin ihmu a ni. Atûn ten khom hin an la iram mai a nia, tûte a sûnga la om mahai.



³A sũaga mihaiin thil saloi an thoa, ki ning an inmurtir sikin, anni mo, nangni le nin irchibulhaiin chubai an imûk ngai loi pathianhai kuang irbôlnahai inhlanin pathian danghai sin an itho pehai a ni.

⁴Zoro sôt ok loiin a ni zui, ki deipuhai nin kuang ki hong tîra, hi thil porinche ki ihnôl tho loi hranga nangni ki inhril a ni.

⁵Khan irngai loiin, uksak nuam loiin nin oma. Nin sual sintho pathian danghai kuang irbôlna masan nuam mak chêia.

⁶Khasika khan ki ningmurna chu Judai ram khuahaia le Jerusalem kotsuahaia ki bukhai ta, mei leh ki ihâl a ni ta. Anni chu ramin le en intak takin a vuana an iom ang hin ki imâksanhai a ni ta.

⁷“Khaangin atûn hin keima Rengpa Itinrêngthothei, Israelhai Pathianin nin ta hrangin, i lo hranga khaanga thil saloi kha nin itho ti hi nangni ki irdon a ni. Pasalhai, nupanghai, nâipanghai le nâitehai chungga siat chitna intung nin ni, tûte hôi loa an iom hrang hi nin inuam ma ni?

⁸I lo hranga millimhai chubai mûkin le pathian danghai kuanga irbôla om hrangin nin izuangna Aigupta hin ningmur nin ni irlâktir? Rammuala nam tinin nangni hmusita nin irhming khomâksâma om hranga nin binga siat chitna nin itho mai?

⁹Judai ram le Jerusalem kotsuahaia nin irchibulhai, Juda rênghai le an khopuihai an dôngmahai, nangni le nin dôngmahai, thilsual nin ithohai kha nin irnghil mo a ini tâk?

¹⁰A vuan sũa ten hin nin la irhnuai nuam loi hi. Ni chôiirsâng nuam mak chêia, nangni le nin irchibulhai dân ki ipêk murdi zôm mak chêia.

¹¹“Khasika khan keima Rengpa Itinrêngthothei, Israelhai Pathianin nin ta hranga saloi thil, Judahai irhmangna hrang ki intungtir hrang a ni.

¹²Juda mi a la dam sunhai Aigupta rama fea om tumhai kai chu, an irhmang ving ti ki ieninfel hrang a ni. An rêngin a chîn a lian Aigupta rama, khandaiin aninole châmin mani thi an ti. Enintak tak ni an ta, mihaiin hmusithaiin intuangtirhai an ta, an irhminghai khomâksâmna'n hmang an ti.



13Jerusalema omhai dūk ki ithohai lam takin Aigupta rama omhai khom khandai hai, chām hai, hri le hrâiin dūk ki ithohai hrang a ni.

14Tukhom Juda mi a la dam sunhai Aigupta rama om hranga zuang chu, zôkin dam suak thei no nihai. Inkhat lua khomin om nôk hranga an inuam Judai rama khan kîr nôk thei no ni. Mi tômte irtansuakhai ti no chu tûte kîr no nihai,” a tia.

15Aigupta rama Pathros hmuna Juda om murdi, an dôngmahaiin pathian danghai kuang mirimhoi an inhlan ngai ti inhriata pasalhai le an laia nupang omhai murdi’n, mipui tamtaka irbûmhai khan ki kuang,

16“Rengpa irhminga kin kuanga thu nin insîr kha, irngai no ni ung.

17Tho hranga kin iti kai chu tho hrang a ni. Irvân rêngnu kin pathiannu kuang irbôlna inhlan kin ta, uain thilinhlan a ta hrangin bunthuan kin ti, keini le kin irchibulhai kin rênghai le kin hruaituhaiin Judai ram khopuihai le Jerusalem kotsuahaia kin itho ngai ang khan. Kha laia khan bu nêk hrang kin nei hluka, vâng kin saka, ite buaina tong ngai ma ung.

18Khan irvân rêngnu kuang irbôl le a ta hranga uain thilinhlan kin mâk nia irthokin, ite zel nei ta ma unga, kin mihai chu khandai le châmin an ithi a ni ta,” an tia.

19Khanchu nupanghaiin, “Irvân rêngnu irlim baiin kin siama, irbôlnahai a kuang kin inhlana, uain thilinhlanhai a makunga kinibunthuan khan, kin ithohai kha kin pasalhaiin a sa an iti a ni,” an tia.

20Khan keiin hianga ni dontu pasal le nupanghai laia hiang hin an kuang,

21“Rengpa’n Judai ram khopuihaia, Jerusalem kotsuahaia, nangni le nin irchibulhai nin rênghai le nin hruaituhai ram sûnga mi tinin irbôlna nin inhlan kha inhre loiin mo, a irnghil tâk nin isôn ma ni?

22A vuan sûn ten hin ni ram chu inramin a la oma, a sûnga tûte la om mahai. En intak tak a hong nia, mihaiin a’rhming chu khomâksâmnaian hmanga, Rengpa’n nin pualoina le tho’nsualnahai kha a tuangdiar ta no sikin.



²³Atûn vânduaina irkhêl nin chung a zuang itung nasan chu, pathian danghai kuang irbôlna nin inhlana, a thupêkhai zôm loiaRengpa chung a sualna nin sin sika a ni,” ki tia.

²⁴⁻²⁵Rengpa Itinrêngthothei Israelhai Pathianin Aigupta rama Juda mi omhai kuang, a bîk takin nupanghai kuanga hril hranga a ni itihai chu hiang hin ki hrila, “Nangni le nin dôngmahai irrualin irvân rêngnu kuang chonginkungna det tak nin siam tâka. Ama kuang irbôlnahai inhlana, a ta hrangin uain thilinhlanhai inhlan suak hrangin chong nin inkung tâka. Khaangin nin chonginkung chu nin indet mai a nia, nin sintho khomin nin inlangtira ni’n te, a sa! Nin chonginkung chu indet roi! nin chong irkhâmna chu la suak roi!

²⁶Khan atûn hin Judai rama irthokin Aigupta rama omhmun det takhai Rengpa iti hi irngai roi. Chong irkhâmna neia, ‘PATHIANhring irhmingin ki irkhâm a ni,’ tia ki’rhming nin ihmang hrang chu itiklai khomin phal ta ngai no ning.

²⁷Vângsak loia nin tei chitna ni hrangin ki irngaitua hrang a ni. Inkhatte lua hôi loiin nin om mâka chu, khandaiin aninole hri le hrâiin nin ithi ving hrang a ni.

²⁸Khan a tômte chu thina ata zôk nin ta, Aigupta rama irthokin Judai rama kîr nôk nin ti. Khanchu a la dam suakhai khan, ki chong mo a dik, anni chong mo a dik ti inhre thei ta an ti.

²⁹Keima Rengpa, hi hmuna dûk nangni ki lei itho hrang le nangni insiat chit hranga ki chonginkung hong tung indik a tih ti inhriat theina hrang, nangni pe ki ti.

³⁰ Aigupta rêng Hofra Faroa chu ama that tumtu, a râlhai kuta pe ki ti. Juda rêng Zedekia that tumtu Babulon rama rêng Nebukadnezara kuta ki ipêk ang tak khan,” tiin.

Jeremia 45

Baruka kuanga Pathian chonginkungna



¹ Josia nâipa Jehoiakima, Judai rama an lal kum minlina khan, Neria nâipa Baruka'n Jeremia kuanga thu zuang tung kha, lekhabua a'rziak suaka, kha lai taka khan Jeremia'n a kuang hiang hin a tia:

²Rengpa Israelhai Pathianin a ti, "Baruka,

³nangma'n 'Ki chung a rik vang na! fiana ki itonghai chung Rengpa'n beidongna a ni zuang bôk pe nôka. Lungzîng takin kin runga, sôl irngamna zel hmu thei ta ma ung!' ni tia.

⁴"Khanchu irngai ro, irnêng pumpuia ki lei isiam inding tâk kha insimtir nôk ki ta, ki lei iphun tâk kha ki iphâipai hrang a ni.

⁵Ni ta hrang bîka enkol insatna hrang ni ingaitua ma ni? Ngaitua no roh. Mi tin chung siat chitna intungtir ki ti, khan khom nangma'n chu ni hringna kai chu kho hmuna ni fe khomin, inzôk ni ti. Keima Rengpa'n ki iti a ni," tiin.

Jeremia 46

Karkhemis-ah Aigupta inhnêin a om

¹Nam danghai chungchânga Jeremia kuanga Rengpa thu zuang tung chu:

²Aigupta chungthu: Juda rêng Jehoiakima an lal kum minlina Babulon rama rêng Nebukadnezara'n Eufrates dung kôla Karkhemis hmuna a inhnê tâk, Aigupta rêng Neko Faroa sipai pâl chungchâng thu chu:

³"Aigupta sipai hruaituhai chu an khêka, nin phôhai siam infel unglân, irdoi hrangin maton tiang kalphêt roi!

⁴Nin sakorhai irvôtir unglân, an chung chuang roi! thîr lukhum khum pumin irzôt roi! Nin ufeihai intât roi! Nin thîr songkolhai innghâk roi!

⁵"Itho tâk ma ni? tiin Rengpa'n chongirdon a siama. Laizâm tho'n hnung tiang an irtôla, an sipaihai hnunga nor an nia; chitna sipin an hrât thei dôr an intâna, an hnung en viat ta loiin.

⁶Mi taksa inzânghai khom intân lat thei mahaia, mi hâitakhai khom zôk thei mahai. Hmâr tiang Eufrates dung panga khan irtolin an inrîla.



⁷Nail dung anga hong lian tâk hi tu mo a ini? Vadunga ivakuanghai dîla irsok but but ang tak hi?

⁸Aigupta chu a ni, Nail dung angin ar sôna, Ivadunga ivapanghai dîl angin. Aigupta khan irsôn ki ta, rammual irkhu ki ti; khopui le a sûnga mi omhai chu that ving ki ti.

⁹Sakorhai fe hrangin thu pe ki ta, sakor tâlia fe hrangin. Sipaihai tîr suak ki ta; Sudan le Libia rama irthokin mihai pho chôiin, Libia rama irthokin thal kâp theihai chu,” a tia.

¹⁰Hi hi Rengpa Pathian itinrêngthoheitu nikhua chu a ni: A vuan hin phuba la ki ta; a vuan hin a râlhai chu dûk tho ki ti. A khandai khan anni kha a nuam dôr fa a ta, an thisen chu a milung chuk mâka in mai a ti. A vuan hin itinrêngthohei irbôlna’n mi tamtak, hmâr tianga Eufates dung kôla a ithat a ni.

¹¹Aigupta nâi dôngmate irthiang, Gileada fe’n lân, thinghnâi hloi la ro! Hloi tamtak ni ithohai khan sinthohei maka, ite khomin nang indamtir thei no ni.

¹²Nam tinhaiin ni mualinphoina an inhriata, mi tinin ni chap irhâi an inhriat a ni. Sipai inkhatin a dang kha ar pal raka, an ruaiin hnuaia an inrîl tâka.

Nebukadnezara hongna thu

¹³Babulon rama rêng Nebukadnezara Aigupta doi hranga a hong lai khanRengpa’n a nin sama, a iti chu:

¹⁴“Aigupta ram khopuihai Migdol, Nof, Tahfanes-ah inpuang ro: mâni irhrung hrangin irtûng chian ta roi; nininei murdi irdoina khan insiatchit ni a ti.

¹⁵Itho sika nin pathian hrât Afis kha a inrîl tâk ma ni? Rengpa’n ama kha a naminrîl tâk sika a ni.

¹⁶Nin sipaihai chu irtôlin an inrîl zoi tâka; mi tinin mi danghai kuang, 'Irhnot ro! ei mihai kuang in tiang fe ei ta, râlhai khandai ata hi lei zôk rei,’ an irtia.

¹⁷“Aigupta rêng chu irhming thar, rêng irpâk nuam, a zoro inchum nghâktu tiin hlasak pe roh.



¹⁸Keima Rengpa Itinrêngthothei rêng chu ki nia, keima hi Pathian hring chu ki ni. Tâng chung a tâbor tânga irchuan luai angin, Karmel tâng chu tuipui chung a ingîr ngut angin, nang a doitu irnak neizia chu khang kha ni a ti.

¹⁹Nangni Aigupta mihaio, mi intânghai hruai hrangin irsiam diam ta roi. Nof chu ramchârin siam ni a ta, tûte a luatu om loiin ram a ti.

²⁰Aigupta chu sial illa nâmzan enhoi tak ang a nia, khannisian hmâr tianga mitip hong vuangin a indôp a ni.

²¹Sipai a irhlotirhai lua khom sete anga ite tho thei loi an ni. Sirsan lâkin doi maka, hnung kîrin laizâm an tho vinga. An chung a intak nî a hong ni tâka, an siatchitna hrang zoro chu.

²²Râlhai an hong nâi thiaia ni'n chu, mirûl anga inhrâmin Aigupta chu laizâm an tho tâk. ama chu hripui leh an doia, mi'n thing an iphûr angin.

²³Rampui an invât insiat ngai ang hin, an mihriam chu tep hrangin an tam hrai sikin, an sipaihai chu khâi fapôl inpung nêkin an tam uala.

²⁴Aigupta mihai chu mualphoia sia an ni tâka, hmâr tianga mihaian an inhnêhai tâka. Keima Rengpa'n ki iti a ni ta," tiin.

²⁵Rengpa Itinrêngthothei Israelhai Pathianin, "Thebes khuaa pathian, Amona, Faroa, Aigupta le a pathianhai an rêng le Faroa chung a irnghattuhai chu dûk ki ithohai hrang a ni.

²⁶Anni that tumtu Babulon rama rêng Nebukadnezara le a sipaihai kuta pe ki ti. Khan zoro la hong hranga chu, zoro fe tâka an lei itho anga khan, mihai Aigupta rama om nôk an ti. Keima Rengpa'n ki iti a ni," a tia.

Rengpa'n a mihai inzôk a ti

²⁷Ki mihai chi viat roi, Israel mihai nin thâiindôptir no roi. Ram hlataka irthokin, mi intânghai nin inina rama irthokin nangni sansua ki ti. In tiang hong nôk nin ta, irtharngam takin om nin ta; zôkriam nin ta, tûte'n irtha'nvâiin nangni sia ta no nihai.

²⁸Nin kuang zuang ki ta, nangni inzôk ki ti. Nangni kin thekindarna hmun nam tinhai that irhmanghai ki ta, khan nangni chu nangni that irhmang zoi



no ning. Dûk tho loiin chu nangni inomtir no ning, nangni kin tuangtir khomin, diktakin nangni intuangtir ki ti.

Jeremia 47

Filistia chungchânga Rengpa chongbe

¹ Faroa'n Gaza a rûn mâna khan, Filistia chungthua Rengpa'n a ni chongpuia a iti chu:

²“En roh hmâr tiang tui ar sôna, ivadung tuilian angin a hong iluang zut hrang a ni. Irnêng le a sûnga thil om murdi irkhu zit a ta; khopuihai le a sûnga mi a om murdi ngîmhai a ta; khopui le a sûnga mi omhai an rêngin. Lungzîngin mihai khêksoi an ta. Irnêng chung a mi tin inrung tatak an ti.

³Sakorhai inper irhâi le sakor tâli irhâi rum tiin le an ke irhâi inringin inhria an ti. Pasalhai kut irzal pehai a ta; an nâihai khom donsui zoi thei ta no nihai.

⁴Filistia insiatchit hrang nikhua chu a hong tung ta, Tura le Sidon changpui theia a la omsun, a la damhai that irhmangtir zoro chu, keima Rengpa'n Filistia chu insiatchit ki ti; Kret tui kôlhaia irthokin mi honghai an rêngin.

⁵Gaza mihai hrangin ngaisiatna irkhêl a hong tunga, Askelon mihai chu an inthim ngeng tâk. Phâizôla a la dam sunhaio, idôr ten mo nin la ichûl hrang?

⁶Nin khêka, ‘O Rengpa khandai! idôr ten mo ni la isâthai mai hrang hi? Ni koka kîr nôk inlân khatak khan irngam ta ro,’ ti roi.

⁷Hi sintho hrang ki pêk laiin, ama chu itin mo irngam thei a ta? Ama chu Askelon doi hrangin thu ki pêka, tuipui kôla mi a omhai khom kha,” a tia.

Jeremia 48

Moab khopui siatna

¹ Hi hi Moab chungthua Rengpa Itinrêngthothei iti chu a ni: “Nebo mihai lungkham an om e, an khopui chu a isiat tâk a ni! Kiriathaim chu lâkpai a ni tâka, a kul roiinpuihai khom insimtir a ni tâka. A mihai chu mualphoiin an oma;



²Moab roiinpuina chu a boi tâk, Israelhaiin Hesbon khua an lâka, Moab namhai thatpaihai hrangin an rêla. Madmen khua chu inthim dapa siam ni a ti; ama doiin sipai pâlhài kalchôi an ti.

³Horonaim mihai an khêk suaka, 'Nakhrâta irhnuaaisiana siatchitna!' tiin khêk roi.

⁴“Moab chu a siatchit tâka; nâipanghai chap irhâi so irngai roi ba.

⁵Luhit lampui tuanin an chapa, Horonaim lam suka an lungzîng chap irhâi inhriat a ni.

⁶‘Irhnot unglân, nin hringna inzôk hrangin intân roi! Rama sakuartung angin intân roi!’ an tia.

⁷“Moab, ni’rnak le ni’rchona ni’rnhata, khan atûn chu nangma khom rûnin om ni ta; ni pathian Khemosa chu a hruaituhai le ochaihai leh khan, sala intâng hrangin hruai ni an ti.

⁸Khua inkhat khomin siatchitna kha lôi thei no nia, hmun incham le phâizôl khom insiatchit an ti. Keima Rengpa’n ki iti a ni.

⁹Moab ta hrangin thân lung sinsiam ta roi; zoro sôtnotea chu siatchit ta a ti. A khopuihai chu rûnin masan an ta, kha khan tûte om nôk ta no nihai,” tiin.

¹⁰Lungrîl murdi neia, Rengpa sintho loi mi chu khomâksâmin om ri se. A khandai irlek loia that loi mi chu khomâksâmin om ri se.

Moab khopui siat tâk

¹¹Khan Rengpa’n hiang hin a hrila, “Moab chu inzôka lei hong om mai ngai angin sala intâng ngai maka. Moab chu uain, tui kha bêl tam dôrin sungirthâk ngai maka, inchâng loia omchian ngai a ni. A mirimhoinahai hek thei maka, ar hniknahai khom a pangai a ni mai ngai.

¹²“Mihai intir uain tui angin Moab ki bunthuanna hrang nî a hong inai a ni ta. A uain bêlhai bunpaiin rong a ta, vîkkhoi chit an ti.

¹³Kha tena chu Moab mihaiin an pathian Khemosa chu iamzoi ta no nihai, an irngatna pathian chu, Israelhaiin Bethel chung a an irngat zoi loi ang khan.



14“Moab mihaio, itho mo pasal sa, irdoina hmuna sipai mi hâitak nin irti tâk ma ni?

15Moab le a khopuihai chu insiatchit an ni tâka, an isong tak an ruathartehai khom thatin an om tâk. Keima hi Rengpa Itinrêngthothei ki nia, khasikin ki iti a ni.

16Moab lu chung rikna chu a hong irthoka, a ram khom hong tung zel a ti.

17Nam a kôlvêla omhai ta hrangin châ unglân, nangni ar hming inthangzia an hriattuhai khan, 'A sinthotheina inlalna chu inmongin a om tâka, a'rnakhrâtna a boi tâk,' ti roi.

18Nangni Dibona omhai, nin hmun roiinpui tak ata zuang chum unglân, irnênga pil chung a hin toi rak ta roi. Moab insiatchittu chu hin a om tâka, a kul tamtakhai a ram zoi tâka.

19Nangni Aroer khuua omhai, lam sîra ngîr unglân nghâk roi; laizâm hong thohai kha chongpuihai unglân, a kuang i zât thil mo a tung inhre suak roi.

20“Moab chu an rîl tâka,” tiin nangni sâm an ti. A ta hrangin chap roi, mualinphoina a ni, hi Arnon ivadung tuanin Moab siatchitna thu inpuang roi.

21“Tâng inchama om Holon, Jahza, Mefaat,

22Dibon, Nebo, Beth-diblathaim,

23Kiriathaim, Bethgamul, Bethmeon,

24Kerioth, Bozra, khuahai chung a roirêlna a zuang tung tâk. Moab khopuihai a hla le nâi hmun tina roirêlna a tung tâk a ni.

25Moab irki chu tan inbûi pe a ni tâka, a bân khom khiak a ni ta. Keima Rengpa'nki iti a ni,” a tia.

Moab chu indok ni a ti

26Khan Rengpa'n, “Ki chung a tehel sika khan Moab chu inruitir roi, Moab chu a miluaka khan inhlum a ta, mi'n innuisan an ti.

27Moab, Israel mihai ni inuiso dân kha inhre mai ro? Inru kêra chang mo an nia, an thurchi ni hril rikipin ni lu ni inthik ngai hi?



²⁸Nangin Moab khuua om mihai nin khopui hi ma ta roi; rôl lunghai laia va om roi. Pûk bâi kôla irbu kaitu vasu ang chu ni roi.

²⁹Moab chu a irpâk tatak a ni. Mihai irpâk dân, irlek dân, mâni thu an iuar dân, an binga an irngaiirsâng dânhai ki inhriat ving a ni.

³⁰Keima Rengpa'n an irlek dân ki inhriat a ni. An irsongnahai chu chanlamboi hrang a nia, an thil thohai khan tuanitung no nihai.

³¹Khasika khan Moab khuua omhai ta hrangin le Kir Heres khuua omhai ta hrangin mitrithi sôm ki ti.

³²Sibma khopui, nang chu grep ônhai tuipui thi khêla Jazer dên raka irzâm ang kha ni ni. Khan atûn chu kholum zoroa thei le grep rahai chu insiatin an om tâka.

³³Lômna le raifâna chu Moab ram irnêng sana hmuna irthokin khâipaiin an om tâka. Grep sômna khurhai ata uain luang suak ki'rngamtira; uain siama raifân hrang tûte om ta mahai.

³⁴“Hesbon le Elealeh mihai an khêk suaka, kha an khêk irhâi kha Jahaz dêna inhriat thei a ni. Zoar mihai khomin an len hriat theia, Horonaim le Eglat-Selisia dênin an lei inhriat sa a ni. Nimrim ivadungte khom a kang tâka.

³⁵Moab mihai chu an hmun irsânghaia hâlvôm thilinhlan le an pathianhai kuang irbôlna an inhlanhai, ki irngamtirhai hrang a ni. Keima Rengpa'n ki iti a ni.

³⁶“Mi an inei murdi an inchân zoi hrangin, theihle tuma a chûlpuina hla an isak ngai ang hin, ki lungrîl chu Moab le Kir Heres ta hrangin a ichap a ni.

³⁷An rêngin an lu an ep inkola, an hnerkamulhai an paia, an rêngin an kut an âta, mi tinin bora puan an sil tâka.

³⁸Moab mihai in chung a le vântâng mihai irbukkhômna hmuna chap inrung ti no chu ite a dang om ma, a san chu mi'n bêl an inpâm ta loi angin Moab chu kin khi tâk sikin.



³⁹Khêk suak roi! Moab chu mualphoina siam a ni tâka, a ram tâka, a kôlvêla nam tinin an nuiso a ni ta. Keima Rengpa'n ki iti a ni," a tia.

Moab hranga zôkna boi

⁴⁰Rengpa'n chong an kunga, irmu'n a mitha phar dūr angin hi Moab chu nam inkhatin a inbo hrang a nia,

⁴¹khopuihai le kulhai chu lâk ni a ta, kha nikhuuaa khan chu Moab sipaihai chu nupang nâiha isea chardong angin om an ti.

⁴²Moab chu ki chung a tehelzong sika khan insiatin om a ta, nam tia inding thei ni ta no ni.

⁴³Ichiom, khurpadop le chângin Moab mihai chu a lei inghâkhai chian a ni. Rengpa'n a iti a ni.

⁴⁴Ichiom ata laizâm thotuhai kha khurpadopa tâk an ta, khurpadop rengata la hong suak nôkhai kha châng a khit an ta, Rengpa'n Moab siatchitna zoro ar fûktir sika khan.

⁴⁵Changpui hrang zonga intânhai khan Hesbon-a irbîkna an zonga, rêng Sihona lei inlalna hmuna khan, meiin a ikâng a ni. Moab mihai michala sam a kânga, irsual nuamhai lusîphai chu.

⁴⁶Moab mihai chu lunginkhamhai roi! Khemosa chubai mûkhai ngai chu mi intânga hruaiin an om ta.

⁴⁷Khan zoro la hong hranga chu Rengpa'n Moab ngîrhmun siam insa nôk a ti. Hihai hi Rengpa'n Moab chung a tung hranga a iti chu a ni.

Jeremia 49

Amon chung a Rengpa roirêlna

¹Rengpa'n Amon chungthu a iti chu hi hi a ni, "Israel mihai khôn mo an iom zoi tâk? A ram inzôk hrangin tûte an iom ta loi ma ni? Itho hranga mo Gada namhai chu Milkoma chubai mûkhai ngai an ram lâkin an ilua?

²Nikhua chu a hong itung thiai a ni, kha ni khan chu Raba khopuia mi omhai chu irdoina irhâi inhretirhai ki ta, mâkin om an ta, a khuahai chu hâlpai ni



an ti. Khanchu Israelhai khan an kuang ata a lâk pehaia irthokin an ram chu lapai nôk an ti.

³Hesbon mihaio, khêk suak roi! Ai khua chu a siatchit ta! Reba nupanghaio, chap hrangin irsiam ta roi. Bora puan sil unglân, chap ta roi. Lungzîngin chai sup ta roi. Nin pathian Milkoma chu a ochaihai le hruaituhai leh khan sala intâng hrangin an ihruaihai hrang a ni.

⁴Mi iamom loihai i lo hranga nin irpâk ngai ma ni? Nin hrâtna chu a iduai a ni ta. I lo hranga nin sinthotheina songin tûte'n ni doi ngam no ni, nin iti ngai ma ni?

⁵kil tina irthokin nin ta hrangin ichiom a hong itung hrang a ni. Nin rêngin laizâm tho ving nin ta, nin urênghai bukkhôm hrangin tûte om ta no nihai.

⁶“Khan zoro la hong hranga chu Amon ngîrhmun siaminsa nôk ki ti. KeimaRengpa'n ki iti a ni,” a tia.

Edom chungga Rengpa roirêlna

⁷ Khan Rengpa Itinrêngthothei, Edom chungthua a iti chu hi hi a ni: “Edom mihaiin an thil sût theina kha an inchân tâk ma ni? Lungvâr sakhai ngai khan imo an itho hrang an ihril pehai thei loi ma ni ta? An vârna a ihek zoi ma ni ta?

⁸Dedana mihai, kîr unglân laizâm tho ta roi! irbi ta roi! Anni dûk tho hrang zoro a tung tâk sika hin Esaua irchihai chu ki irhmangtirhai hrang a ni.

⁹Mi'n grep an irhmala, a rângâ tômte chu an la hôi ngaia, inrûhai zâna an hongin an inuam kai an lâk ngai.

¹⁰Khan, Esaua irchihai rêk chu ki khêlhai vinga, an irbîknahai ki'rlangtir pehaia, khasikin irbîkna zel nei ta mahai. Edom mihai chu an irhmang zoi tâka, inkhat lua hôi ni mahai.

¹¹Nin nâi farahai chu ki kuta siahaiin lân, anni chu enkolhai ki ti. Nin meithâihai khomin keimaa hin irngat thei an ti.



¹²“Dûk tongna khilâta irthokin kop sa lina nei loihaiin an in a nangin te, tuang loa zôk hranga ni irsabei ma ni? Lôi thei no chi ni, khilâta irthokin ni iin ngêt hrang a ni.

¹³Keima ngeiin chong khomâk ki’rsâm tâk, Bozra khopui chu ena ichiom le ramchâr chang a ta, mihaiin nuiso an ta, ar hming chu khomâksâmna’n hming an ti. Keima Rengpa’n ki iti a ni,” a tia.

¹⁴Khan keiin, “Edom, chongbe Rengpa kuanga irthokin ki ihmu a ni. Nam tinhaiin an sipaihai bûma, nang doi hrangin palai an itîr a ni.

¹⁵Rengpa’n namhai laia a chîn tak, mihai laia hmusitom takin nang siam a ti.

¹⁶Ni’rpâkna hin nang a ihuang a ni. Nang an chiin nir bê dôr kha tûte’n nang an ichi loi a ni. Tâng chung irsâng tak, lungpui rôl chung om ni nia; khan irmupui ang taka irsângin omin lân khom, Rengpa’n nan sum a ti. Rengpa’n a iti a ni,” ki tia.

¹⁷Khan Rengpa’n, “Edom chung siatchitna a zuang itung hrang irkhêl hrang dân chu mi a theng irlôihai chu inlâi rakin an ichi tatak hrang a ni.

¹⁸Sodom le Gomora le a kôlvêla khuahai le insiat an ini ang khan, Edom chung khom tung a ti. A sûnga tûte zel om thei no nihai. Keima Rengpa’n ki iti a ni.

¹⁹Kâmkeibaknei rampui sêt tak ata Jordan dung hong zui sûlhringna hmuna hong angin hong a ta, Edom mihai chu an ram ata inrang takin irzûlpaihai ki ti. Khanchu hruaitu ki inthang khan nam chung khan roirêl a ti. Keima le irkhi thei tu mo om? Tu mo ni doi ngam hrang? Tu roirêltu mo ni doi thei hrang?

²⁰Khasikin o Edom mihai doi hi ki thiltum, Temana khopuia mihai chung tho hranga ki itum hi, irngai roi. An nâihai ten lua kaizam phît ni an ta, mi tinin chi tatak an ti.

²¹An irtet irhâi khan irnêng inhnêng a ta, an chap irhâi khom kha tuipuisen tenin inhria an ti.



²²Bozra chu râlhaiin irmu a mitha phar puma a inbôhai angin, an idoi hrang a ni. Kha nikhuaa khan Edom sipaihai chu nupang nâiha isê irtha'nvâi ang hin om a ti," a tia.

Damaska chungsa Rengpa roirêlna

²³Rengpa'n Damaska chungthua a iti chu hi hi a ni: "Hamath le Arpad kho mihai chu thurchi saloi an len hriat sikin, an lungrîl inhnângin an ibuai a ni. Lungkângna chu tuipei angin an chungsa luangin an iom chian thei loi a ni.

²⁴Damaska mipuihai chu irzalin chiin laizâm an tho tâka. Nupang nâiha isê angin na tuang le lungrîl buaiin an iom a ni.

²⁵Khopui irhming inthang lôm taka om ngai kha, dâisanhreka mâk a ni tâka.

²⁶Kha nikhua kha chu ruathartehaiin khopui kotsuahaia thatin om an ta, an sipaihai thatpai ni an ti.

²⁷Damaska kulbanghai mei leh hâl ki ta, rêng Benhadada inhai hâlpai ving ki ti. Keima Rengpa Itinrêngthotheiin ki iti a ni," a tia.

Kedara nam le Hazor khopui chungsa roirêlna

²⁸Khan Kedara nam le Hazor thuhnuaia om ram bung hai, Babulon rama rêng Nebukadnezara'n a ilâkhai chungthua Rengpa'n a iti chu hi hi a ni: "Kedar mihai chu doi unglân, nisua tianga mihai nam kha insiat roi!

²⁹An puan inhai, an belrahai, an puan inzarhai le puan in sûnga thil omhai la pehai roi. An saringseihai lapai pein mipuihai kuang, ichiom zât nin kôlvêla khan a iom a nih tiin hrilhai roi.

³⁰"Hazor mihai rota irbîkna hrangin keima Rengpa'n nangni ki inhril a ni. Babulon rama rêng Nebukadnezara'n nangni a phiara, hi hi a iti a ni.

³¹'Hong roi, lungirhnik tak le zôkriama omhai so la va doihai rei! An khopuihaiin dâi mikota kalna khom nei loiin hrung viat loia om kêng,' tiin.

³²"An saringsei le sehrâtchal la pehai ving roi! An sam epinbonghai chu irthekindartirin, kil tina irthokin vânduaina irkhêl intungtir ki ti.



³³Hazor chu ramchârin sia mai ta ki ti. Sihalhai omna hrangin, a sũaga tũte zel om ta no nihai. Keima Rengpa'n ki iti a ni," a tia.

Elama chungã Rengpa'n roirêlna

³⁴Zedekia Juda rêng a chang zoiin chu, Elam ram chungthua Rengpa'n a ni chongpuia.

³⁵A iti chu, "Elam sinthothei taka siamtu, thal kâp mihai chu ki ithat hrang a ni.

³⁶Kil tina irthokin Elam chu phâivuahaiin sêm ki ta, ram inkhat lua an invâi lolina a om mâka chu, a mihai kil tina in thekindartirhai ki ti.

³⁷Elam mihai chu anni that nuam, râlhai, chi hrangin siam ki ti. Ki ningmurin Elam mihai chu insiat ki ta, anni ke hnuaia an hek mâka chu, an râlhai doi hrangin tîrsuak ki ti.

³⁸An rênghai le hruaituhai that irhmanghai ki ta, Elama khan ki rêngtoihmun intoitir ki ti.

³⁹Khan, zoro la hong hranga chu Elama ngîrhmun siam insa nôk ki ti. Keima Rengpa'n ki iti a ni," a tia.

Jeremia 50

Babulon chela om hrang thu

¹ Babulon khopui le a mihai chungthua Rengpa chongbe a ni ipêk chu hi hi a ni:

²"Namhai kuang thurchihai chu hril roi! inpuang roi! Puanzâr târ unglân, thurchihai chu hril roi! Thilirthup sia no roi! Babulon chu an rîl tâka! A pathian Marduka chu a milung an hnâng pe ta, Babulon millim chu mualphoi an irlâk tâka. An pathian dik loihai chu an milung an hnâng pehai ta!

³"Babulon doi hrangin hmâr tianga nam inkhat a hon ding tâka, ramchârin a isiam hrang a ni. Mihriamhai le sahai rot ving an ta, tũte kha khan om ta no nihai," tiin.

Israelhai hong kîr nôk hrang thu



⁴Khan Rengpa'n, "Kha nikhua kha a hong tungin chu, an ruaiin Israel le Juda chu chap pumin hong an ta, an pathian ni zong an ti.

⁵Zion panna lampui irdon an ta, kha tiang pan an ti. Keima leh kumtuang thuthung siam an ta, siat ta no ni.

⁶"Ki mihai chu belra enkoltuhaiin a binga an insuaa chaninvâi ang a ni. Belrahai angin tâng inkhat ata tâng danga irthonin, an in omna an irnghil ngai a ni.

⁷An rêngin anni chu an idoihai a ni. An râlhaiin, Rengpa chung a an tho'nchâia, ei thil tho hin ite a sualna om mah. An irchibulhaiin Rengpa chung a an irngat ngita, anni khomin, 'ama ta hrangin iamomin an iom hrang kêng a ini,' an tia.

⁸ "Israel mihaio, Babulon ram ata rot roi! ram kha masan ta roi! A mâk masa tiang chang roi!

⁹Hmâr tianga nam hrâthai senkhat inthorhai ki ta, anni chu Babulon ram ki indoitir hrang a ni. A doi hrangin irtâng an ta, an irûn hrang a ni. Râl doi thei tak an nia, an thal kêphai khan tok loiin om ngai mah.

¹⁰Babulon ram chu inmokin om a ta, an maktuhaiin an inunuam la an ti. Keima Rengpa'n ki iti a ni," a tia.

Babulon dokna thu

¹¹Khan Rengpa'n, "Babulon rama mihai, ki nam nin insiata, lômna le râifâna'n nin sipa, sepui buchîl angin le sakor inhrâm angin nin irvêl thût thûta.

¹²Khanchu nin khopui roiinpui ngêt kha mualphoi le hmâimôkin om a ti. Babulon ram chu nam tin laia a poimo tak ni a ta; ramchâr chang ta a ti.

¹³Ki ningmurna sikin Babulon-a tûte om ta no nihaia; inramin masan ni a ta, a theng inlôihaiin inlâiin an irngai irkhêl a ti.

¹⁴"Thal kêp mihai, Babulon doi hrangin irtâng unglân irhual roi. Rengpa'n keima chung a a tho'nsual sikin nin thalhai leh khan Babulon kêp roi.



¹⁵Khopui irhualin irdoi hrangin tânginsam roi. Babulon chu ar pêk tâka, a kulbang chu a koi tâka, a ichim a ni ta. Babulon-hai chung a phuba ki ilâk a ni. Khaangin an chung a hin phuba la unglân, mi danghai an isoisak lam ang takin anni khom soisakhai roi.

¹⁶Kha rama khan chichôi khom phal pehai no roi. Kha hmuna ram dang mi a omhaiin a hong doi sipai pâlhai kha chihai an ta, an in tiang kîr nôk an ti,” a tia.

Israelhai kîr nôkna

¹⁷Khan Rengpa’n, “Israel mihai chu belra pâl, kâmkeibakneihaiin an irzûla an irtekchit ang hi an ni. A phut taka Assuria rêngin a doia, kha hnung Babulon rama rêng Nebukadnezara’n an ruhai an rêt pehai nôka.

¹⁸Hi sika hin keima RengpaItinrêngthohei, Israelhai Pathianin rêng Nebukadnezara le a ram chu dûk ki itho hrang a nia, Assuria rêng dûk ki itho anga khan,

¹⁹Israel mihai chu an ram ngêta inomtirhai ki ta, Karmel tâng le Basan vêla an fâk invânghai nêk an ti.

²⁰Kha zoro kha a hong tungin chu, Israel rama sual sin hmu ni ta no nia, Judai rama tho’nchâina hmu ni ta no ni, an hringna ki inzôk pehai kha ki ngaidam hrang tâk sikin, keima Rengpa’n ki iti a ni,” a tia.

Babulon rama Pathian roirêlna

²¹Khan Rengpa’n, “Merathaim ram le a mihai le Pekod-ah omhai chu doi roi. Thathai unglân, irhmangtirhai roi. Thu nangni ki ipêk ang tak hin tho roi. KeimaRengpa’n ki iti tâk a ni.

²²Irdoina irhâi chu ram sînga a’rhâi inhriat a nia, siatna irkhêl kha a iom a ni.

²³Babulon ramin rammual pumpui hi sekchôi leh a suk chita, atûn chu kha sekchôi kha a siat tâk! Kha ram chung a thil tung kha nam tinin an ilôi a ni.

²⁴Babulon ram, ni ni doia, ni inhriat loina khan châng nang ki kam pea, ni ikhit tâk a ni hi.



²⁵Ki rântukfam siana hmun chu ki inhong a nia, ki ningmur hraiin ki rântukfam ki ilâksuak a ni. Keima Rengpa Itinrêngthothei ngei hin, Babulon ram sũa sintho hrang ki nei sikin.

²⁶Kil tina irthokin doi unglân, a bu siana hmunhai kha inhong unglân! Râllâk thilhai chu bupông angin inpông unglân; ram kha insiatchit roi, ite zel hôi no roi!

²⁷Sipaihai chu that ving unglân, irchan paihai roi! Babulon ram mihai chung chu intak pehai a ti, anni dũk tho zoro a hong tung tâk sikin,” a tia.

²⁸(Babulon rama irthokin râl chia intâna zôkin Jerusalema an hong, tempil chung a thiltho sikin Rengpa kin Pathianin Babulon-hai chung a phuba a lâk dânhai an sũa.)

²⁹ Khan Rengpa'n, “Babulon doi hrangin inhril roi. Mi tukhom thal hmang dân inhriat tâk kai chu tĩrsuak roi. Khopui kha irhual khak unglân, tũte inzôk no roi. A thil thohai kha thuan nôk unglân, mi a ilôhai lam takin thohai roi, Israel mi irthiang ki chung a irpâkna'n a tho sikin.

³⁰Khasikin a ruathartehai chu khopui kotsuahaia that ni an ta, a sipaihai khom that ni an ti. Keima Rengpa'n ki iti a ni.

³¹“Babulon ram, nang chu irpâkna sip ni nia, khasika khan keima RengpaItinrêngthothei, Pathianin nang ki idoi a ni. Dũk nang tho zoro a hong itung a ni ta.

³²Ni nam irpâkna chu irthĩn a ta, inrĩl a ti, tũte an dingtir nôk hrangin nang san no nihai. Ni khopui chu hâl ki ta, a kôlvêla om murdi kânghai ving a ti,” a tia.

³³Khan Rengpa Itinrêngthotheiin hiang hin a ti, “Israel mihai le Juda mihai chu sirbea om an nia, a cheltuhaiin satakin an hrunga, insua nuam ta mahai.

³⁴Anni inzôktir hrang chu mi hrât a nia, ar hming chu Rengpa Itinrêngthothei a ni. Anni chu thop hai mai a ta, irnênga irngeina inlêng a ta, Babulon ram mihai chung a rêk chu buaina intungtir a ti,” a tia.



³⁵Khan Rengpa'n, "Khandai chu Kaldaihai chungá, Babulon mihai chungá, a roirêltu vârhai chungá a inlang chian a ni.

³⁶Khandai chu deipu pâlhái chungá an lang chian a nia, a len tohai rêk chu! Khandai chu sipaihai chungá an lang chian a ni, an milung a zîng dân chu!

³⁷A sakorhai chu tâlihai chungá khandai a oma, nam dang sipai a hruaihai chungá khom an irzal zoi tâka! A'rchonhai insiat unglân, inru unglân, rállâk thilhai la roi.

³⁸A ram chungá khua hâl pe unglân, a ivadunghai inchâr pehai roi. Babulon ram chu millim irkhêl tamna a nia, khahai khan mihai invêtin a isiamhai a ni.

³⁹ "Khasikin Babulon chu khohrihai le irtha saloihai irfangin le ramchâra simbu omna ni a ti. Kha khan mi om nôk ta ngai no nihai, zoro la hong om hranga khom tûte lêng thei no nihai.

⁴⁰ Sodom le Gomora le a kôlvêla khuahai kin siat lai ang khan thil a itung nôk hrang a ni. Khatak khan mi om nôk thei no nihai. KeimaRengpa'n ki iti a ni.

⁴¹Mi hmâr tiang rama irthokin an zuanga, nam hrât tak ram hlataka irthokin; rêng tamtak irdoina hmuna fe hrangin an irsiam ta.

⁴²An thalhai le khandaihai chôia; nunter le khonzâna nei loi an ni. An irhâi chu tuipui irsok irhâi inring ang kha a nia, an sakorhai chungá an hong chuang lai khan Babulon ram doi hrangin an irsiam diam tâk a ni.

⁴³Babulon rama rêngin an thurchi a len hriata, a kuthai chu a'rzal zoi tâka. Lungzîngna'n a dea, nupang nâiha isê angin natna khan a chela.

⁴⁴"Kâmkeibaknei rampui sêt ata Jordan dung hong zuia sûlhring hmun dêna hong angin, keima Rengpa hi hong ki ta, Babulon-hai chu inrang takin an khopui ata inhnotsuakhai ki ti. Khanchu hruaitu ki inthang khan nam chungá roirêl a ti. Keima le ni hrilirkhi thei tu mo om? Tu mo a ni sêl ngam hrang? Tu roirêltu'n mo ni sêl ngam hrang?



⁴⁵Khasikin Babulon khopui doia ki thiltum le a mihai chung a ki itho hrang hi irngai roi. An nâihai tena lua kaiphâithaiin, mi tinin an ichi hrang a ni.

⁴⁶Babulon an rîl tika chu, irhâi irkhêl tak om a ta, irnêng pumpui inhnîng a ta, chitnain khêk irhâi chu nam danghaiin inhria an ti,” a tia.

Jeremia 51

Babulon chung a roirêlna la fe mai

¹ Khan Rengpa'n, “Babulon rama mihai doi hrangin phâivua saloi ki hong inthotir hrang a ni.

²Phâivua'n fapôl a isêm inlêng anga khan, Babulon ram insiatchit hrang ram dang mihai tîr ki ti. Kha irhmang ni sîn kha a phâkin chu, kil tina irthokin doi an ta, ram chu a korongin om a ti.

³A sipaihai kha an thal kâpna zoro pehai no roi, an thîr songkol khom inngâk irman no ri sehai. Ruathartehai khom hôihai no unglân, sipai pâl thatpaihai ving roi!

⁴An khopui kotsuahaia, popin thi an ti.

⁵Israel le Juda chu, Israel mi irthiang, ki chung a hin sual khomsian, keima Rengpa Pathian Itinrêngthotheiin ki intha loi a ni.

⁶Babulon ram ata rot ta roi! Nin hringna inzôk hrangin intân ta roi! Babulon ram sualna sikin thatin om no roi. Ki phuba ki lâkin ar hoi lam takin dûk tho ki ti.

⁷Babulon ram chu ki kuta rângachak khilât ang a nia, rammual pumpui ki in intir hrang a ni. Nam tinin uain an ina, an invêt zoi ta.

⁸Babulon ram chu irhnot takin an rîla, a isiat tâk a ni. Ama chu châ ta roi! A sâbehai hrangin hloi zong pe unglân, a la dam khom a ni thei.

⁹Ram dang mi khataka omhaiin, ‘Babulon ram chu changpui hrang ei nuama, khannisian an hnung hrai tâk. Tho ama chu masan ei ta, in sîng tiang lei fe ta rei. Pathianin ar nakhrât murdi'n Babulon chu a insiatchit a ni tâk hi,’ ti an ti,” a tia.



¹⁰Khan Rengpa'n, "Hi mihai an khêkin, 'Rengpa'n ei dikzia a târinlang tâk. Tho! Jerusalema fe ei ta, Rengpa ei Pathian sintho hi mihai inhrilhai ei ti,' an tia," a tia.

¹¹Rengpa'n Babulon ram chu insiatchit a tum sikin, Media rênghai a intorhai dîm a ni ta, hiang hin a nia, tempil siatna kha phuba a lâk hrang dân chu. A doitu sipai ulianhai khan thu an pêka, "Nin thalhai intât inngaih unglân, nin phohai siam diam ta roi.

¹²Babulon kulbang inset hrangin inhriatna pe suak ta roi. A hrungtu intamtirhai ualin lân, enirchiktu sehai ro! a len ruang hrang mi se roi!" an tia. Rengpa'n Babulon ram mihai chung a tho hrang a iti chu a itho zoi hrang a ni.

¹³Kha rama khan ivadung tamtak le sum le puan a inei ok a nia, a zoro a hekin, a hringna hruai chu insatin a om tâk.

¹⁴Rengpa Itinrêngthotheiin, ama hringna sâmin, khâi fapôl puang angin mi tamtak Babulon ram doi hrangin hong hruai hrangin chong ar khâma, anni khan zoina tâng an insam hrang a ni.

Pathian inpâkna hla

¹⁵Rengpa'n a sinthotheina leh irnêng a siama, a vârna'n rammual an ngîrtira, an hriatna leh irvân a kaiinphar a ni.

¹⁶A thupêkin irvân chung a tuihai an irhâi inringin, kôlkunga irthokin sûmhai a hong zînga, rotho kâra kôl a'rtêka, a bukkhômna hmun ata phâivua a tîrsuak ngai.

¹⁷Hi hi mi tinin an hmu'n chu, mihriamhai invêtin inhriatna nei loiin an oma, millim siamtuhai chu an inzaka, an isin pathianhai kha a dūr, hringna nei loi an ni sikin.

¹⁸Hlutna nei loi an nia, hmusit zât an ni. Anni ngaitua hranga Rengpa a zuang tika chu, anni chu insiatchit ni an ti.



¹⁹Jakoba Pathian chu anni ang kha ni maka; anni chu chi tinrênga siamtu kha a ni, ama mihai ni hrangin Israelhai a inthanghai a ni. Rengpa Itinrêngthothei chu ar hming a ni.

Rengpa sekchôi

²⁰Khan Rengpa'n, "Babulon ram, nangma chu ki sekchôi ki'rdoina râltukfam ni ni. Namhai le rêng ramhai ki isuk irnôina ram ni nia,

²¹sakorhai le a chung a chuanghai nôi hrangin, sakor tâli le a chalaituhai nôi hrangin,

²²pasalhai le nupanghai that hrangin, tarhai le vânglaihai nôi hrangin, ruathartehai le dôngmatehai that hrangin,

²³belrapuhai le belrahai that zuak hrangin, âlkaituhai le hruaituhai nôi hrangin," a tia.

Babulon ram dûk thôna

²⁴Khan Rengpa'n, "Jerusalem chung a thil a itho insualhai sika khan Babulon ram le a mihaiin ki toi lai ni hmu an ti.

²⁵Babulon ram, nang chu rammual pumpui insiattu mual ang kha ni nia, khan keima Rengpa hi ni râi ki ni. Ki kut leh nang indom ki ta, hnuaiia nan zâltir ki ta, irvâmchit ni ti.

²⁶Ni hmun ram ata lung intângna in sinna hmang hrangin lâk thei ni no nia. Ramchâr angin om mai ta ni ti. Keima Rengpa'n ki iti a ni.

²⁷"Irdoi hrangin inhriattirna pe roi! Namhaiin an inhriat theina hrangin bekul tum roi! Babulon ram ta hrangin namhai chu irvôtir unglân, Ararat, Mini le Askenaza ramhai, ama doi hrangin inhrilhai roi. A doi hranga hruaitu'n mi bê unglân, khâi puang anga tamin sakor bûmhai roi.

²⁸Babulon ram doi hrangin namhai chu irvôhai unglân, Media rêng hai, ram optuhai, an hruaituhai le an ram ophai sûnga sipai pâl murdi koibûmhai roi.

²⁹Babulon chu ramchâr, mi tûte om lina hmun sin hranga Rengpa'n a thiltum a chuk tâk sikin, irnêng chu an thingin a irnok a ni.



³⁰Babulon rama sipaihai chu irsual an monga, an kulpui sũaga an om chian tâk, thâiindôpin nupang angin an om tâk. Khopui dâi mikothai chu a siata, inhai chu a kâng tâk.

³¹A khopui chu kil tina a chim tâk ti Babulon rama rêng hril hrangin thurchi chôitu an fe mai tâka.

³²Râlhaiin ivadung irkâna chu an lâka, khopuihai chu an hâl tâk. Babulon hmun chu an lâka, kulpuihai chu an hâl tâk. Babulon ram sipaihai chu an chi ta taka.

³³Zoro sôtnote sũngin râlhaiin anni chu sâtpaihai an ta, buchîl ang hin an isirpolhai hrang a ni. Keima RengpaItinrêngthothei, Israelhai Pathianin ki iti a ni,” a tia.

³⁴Babulon ram rêngin Jerusalem ar chan india, a ifâk a ni. Khopui chu bêl angin a rongin an omtira, rûlpui angin a invol a ni. A inuam murdi a chôia, a danghai chu a ipai a ni.

³⁵Zion mihaiin, “Ei chung a nuamninga lôn a itung hi Babulon ram chu mô inpêltir ni ri se!” ti ri sehai. Jerusalem mihaiin, “Ei ituang hi Babulon ram chu a mophurtu ni ri se!” ti ri sehai.

Rengpa'n Israelhai changpui a ti

³⁶Khaangin Rengpa'n Jerusalem mihai kuang a iti a ni, “Nin thubuai hi ngaitua ki ta, nin râlhai chu nin chung a an sintho kha intuamtirhai ki ti. Babulon rama tuihnârhai inchâr ki ta, ivadunghai inkangtir pehai ki ti.

³⁷Kha ram kha hmun ram, rama sahai lêngna chang a ti. En irkhêl tak chang a ta; kha khan tûte om no nahaia; mi tin a hmuhaiin a sate'n chi an ti.

³⁸Babulon-hai chu an rêngin kâmkeibaknei angin an inhrâma, kâmkeibaknei tehai angin ngor ngor zel ti an ti.

³⁹an ihuatirham mo a ini? Hruaithe, anni hrang irfûk pehai ki ta, inrui le raifânin siamhai ki ti. In hrangin fe an ta, har thei ta no nihai.

⁴⁰Belratehai, kêlhai le belrachalhai angin that hrangin anni chu hruaihai ki ta, keima Rengpa'n ki iti a ni,” a tia.



Babulon la tong hrang

⁴¹Rengpa'n Babulon chungthu a hrila, "Khopui rammual pumpui inpâk ngai chu chelin a om tâka! Namhai ta hrangin Babulon chu i dôra enirkhêl mo a hong ichang tâk!

⁴²Tuipui chu Babulon chung a hong luanga, a'rsok khan a hor khu zoi tâk.

⁴³A khuahai chu en intak, tui boina, ramchâr, mi tûte om loi inzin loina hmun ang kha a ni.

⁴⁴Babulon rama pathian bêl chu dûk tho ki ta, a inlem tâk kha inluak suak nôk ki ta, namhaiin chubai mûk ta no nihai. "Babulon kulbanghai chu a chim tâka.

⁴⁵Israel mihai khataka irthokin rot ta roi! Nin hringna inzôk hrangin ki ningmur irkhêl tak ata hi rot roi.

⁴⁶Chong papai nin iam sika hin thâiindôpin om no roi. A kum tin ram buaina in mani, aninole rêng dang idoi tia chong uang inthang a indarh ngai.

⁴⁷Khaangin Babulon ram millim dûk ki itho hrang zoro a hong itung thiai a ni. A ram pumpui hmâimôkna sin ni a ta, a mihai chu that ni ving an ti.

⁴⁸Hmâr tianga irthokin mi a se hranga honghai kuta Babulon ram a dok tena chu, irnêng le irvâna thil tinrêng raifânin pâi an ti.

⁴⁹Babulon ram chu a rammual pumpuia mi tamtak thina intungtirtu a nia, atûn hin Israel mihai tamtak thina sikin Babulon ram chu a idok hrang a ni ta. KeimaRengpa'n ki iti a ni," a tia.

Babulon rama Israelhai kuanga Pathian thu tung

⁵⁰Rengpa'n Babulon rama a mihai kuanga a iti pehai chu, "Thina nin zôk tâka, atûn fe unglân nghâk ta no roi. In sùng ata hlataka om mai unglân, nin Rengpa hi nin sâp mai ngai unglân, Jerusalem khom inhre mai roi.

⁵¹Nangni'n, 'Mualphoi irsak le inzak nir hmutir kin nia; ram dang mihaiin tempila hmun irthianghai an lua zoi tâk sikin, changpui irngaiin kin inhriat suak a ni ta,' nin tia.



⁵²Khasikin ki iti a ni, Babulon millimhai dūk ki itho hrang zoro chu a hong itung thiai a ni ta. A ram pumpuiin a pophai chu inrung vung an ta;

⁵³Babulon chu irvâna luiin, kha khan kulpui det hong sinhai khom sian, an siat hrangin mi la tîr pehai ki ti. Keima Rengpa'n ki iti a ni," a tia.

Babulon siatna thu la fe mai

⁵⁴Khan Rengpa'n a hrila, "Babulon sūnga chap irhâi le siatchitna sika a ram sūnga inrung irhâi chu irngai roi.

⁵⁵Babulon chu insiatchitin inthimvalin ki isia hrang a ni. Sipaihai chu tuiirsôn irkhêl tak angin hong lûtin khêk vungin an idoi a ni.

⁵⁶Babulon insiatchit hranga hong an nia; a sipaihai chu chelin an om tâka. An sâihlihai inkhiak pehai an ta, kei chu soal dūk intho ngai Pathian ki nia, Babulon chu ar hoipui lam takin intuangtir ki ti.

⁵⁷A roirêltuhai, vârna nei mihai, hruaituhai le sipai inruitirhai ki ta, in an ta, har thei ta no nihai. Keima, rêngin ki iti a ni tâka, keima hi Rengpa itinrêngthothei.

⁵⁸Babulon kulbang irsa tak chu irnênga ipai ni a ta, a dâi mikot irsânghai chu hâlirvôm ni a ti. Namhai sintho chu a korong a nia, an sinsôlnahai chu meichok a ichang hrang a ni. Keima Rengpa Itinrêngthotheiin ki iti a ni," a tia.

Jeremia chongbe chu Babulon rama thon a ni

⁵⁹Reng Zedekia'n a ihmang ngai chu Seraia Neria nâi Maaseia tupa a ni. Juda rêng Zedekia an lal kum minlina Babulon-a a fe laiin Seraia chu a kuang a fe saa, ama kha thudik ki pêka.

⁶⁰Babulon ram chung a siatchitna a tung hranghai le Babulon ram chungchâng thu lekhabua ki'rziaka.

⁶¹Seraia chu kin hrila, "Babulon ni tung tika, hi irziaka om murdi hi mihai kuang inring takin ni tep ngêt a nih ti inhrenfel roh.



⁶²Khanchu chongchaiin lân, ‘Rengpa, hi hmun hi insiatchit ni itum thu ni len sîr tâka, khasikin thilhring ite mihriam mo, ramsa mo, om no nihaia, ramchâr angin ni mai ta a ti,’ ti roh.

⁶³Seraia, “Hi lekhabu hi mipuihai inhriata ni tep zoiin chu, lung leh khit irbopin lân, Eufrates ivadunga paiin lân,

⁶⁴Babulon chu hiang hin ngîm a ta, thoi ta no ni. A chungpa Rengpa’n siatchitna an tungtir hrang sikin,” tiin insîr roh. Jeremia thu’nsîrhai chu hi hin a imong a ni ta.

Jeremia 52

Jerusalem siatna thu

(2 Rng 24.18–25.7)

¹Kum sômhni inkhat a ni le Zedekia chu an lala, Jerusalema kum sômhleikhat roi a rêla. A nu irhming chu Hamutali a ni, Libna khuaa om Jeremia nâinu a ni.

²Jehoiakima angin Zedekia chu Rengpa mithmua thilsual a tho ngaia,

³Rengpachu Jerusalem le Judai rama mihai chungpa a ning an mur hrai sikin, a mithmu ngêtin a itîrsuak a ni. Zedekia chu Babulon rama rêng chungpa tehel a zong pea,

⁴Zedekia an lal kum kuak tha sôm le sîn sôm nî chu, Babulon rama rêng Nebukadnezara chu sipai murdi leh Jerusalem doi hrangin a hong irthoka, khopui pên tiang riak hmun an sina, an omna irhualin bang an sunga,

⁵Zedekia inlal kum sômhleikhatna dênin an irhual mai a ni.

⁶Châmpui intak tak a oma, tha minli le sîn kuak nî tena chu ite fa hrang nei ta mahaia.

⁷Khopui kulbanghai kha an inseta, sipai pâlhai chu zâna an rot zoi tâka. Babulon-hai khan, khopui irhual zoi hnungin rêng irhuan kôl bang inhni kêr lampuia khan an fea, Jordan phâi tiang panin an intâna.

⁸Khan, Babulon sipai pâlhai khan an irzûla, Zedekia chu Jeriko kôl phâia an phâka, a sipaihai khan an imâksan ving a ni.



⁹Khanchu Zedekia chu Hamath ram huala om Ribla khan rêng Nebukadnezara omna khan an hruaia, kha khan Nebukadnezara'n a chungthu a rêla.

¹⁰Ribla khan Zedekia hmu pumin a nâipasalhai a that pea, Juda milianhai leh khan.

¹¹Kha irzoiin Zedekia khom a mitru an kêlter pea, thîrhruai leh an khita, Babulon tiang an hruai tâka. A thi nî dênin Zedekia chu intângna ina a om mai ta a ni.

Tempil siat thu

(2 Rng 25.8-17)

¹²Babulon rama rêng Nebukadnezara inlal kum sômhleikuak tha ringa le sîn sôm nî'n Nebukadnezara rêng lungvâr sak ngaitu le sipai hruaitu lian tak chu Jerusalema an hong lûta.

¹³ Rengpa in le rêng in a hâla; Jerusalema in murdi le in poimohai a hâl insiat pe vinga;

¹⁴a sipaihai khan khopui kulbanghai an insima.

¹⁵Khanchu Nebuzaradana khan mipui khopuia la omhai, mi kut sintheihai a la omhai, Babulon ram rêng kuta irpêkhai kha suak hrangin a hruaihaia.

¹⁶Khan Judai rama inriang hai, ite zel nei loihai kha a mâksana, grep irhuan le loia sin an inthotirhai a ni.

¹⁷ Babulon-hai khan tempila dâr chopuihai, tôlna rêlhai le dâr tuipanghai an inkhoi chita, dârsenhai khom Babulon-a an chôi vinga.

¹⁸Belcha hai, maichâm infâina irvut luakna hai, meiser that hmun hai, irbôlna sa thisen siana khêng inthûk hai, mirimhoi hâlna khuri hai, a dang dârsen biakbuka irhmang zoroa hmang ngaihai kha an lâk saa.

¹⁹Rângachaka siam chu i zât thil khom an lâkpaia. Khuri, chemte hai, meiri-al chôina hmun khêng a chelna om hai, irbôlna sa thisen siana khêng inthûk hai, irvut siana hai, meiser siana hmun hai, mirimhoi inhlanna khêngte hai, uain thilinhlanhai bunthuanna hranga ihmang ngai.



²⁰Tempila hranga Solomona isin dârsen chopui inhni, tôlna rêlhai, tui pang lian le a toina sehrâtchal sômhleihnihai chu a rik hraia varh zoi zât ni maka.

²¹Chopui inhnihai chu an irsâng dân mûk sômhleiriat an nia, a lian lam chu mûk sômhleihnua irkual a ni. A sâng ir-ôngin ar sa dân chu bel minli vêl a ni.

²²A chopui sîp tina khan an bôk mûk ringa irsâng dârsena sin a oma, ar hîlin dârsena siam dalim dûra irvôtir a ni.

²³A chopui panga khan khom dalim irzakhat a om sa chita, an laia sômkuak le kirukhai chu hnuai irthoka hmu thei ving an ni.

Juda mihai Babulon rama hruai an ni

(2 Rng 25.18-21,27-30)

²⁴Sipai hruaitu lian tak Nebuzaradana khan ochai inlal tak Seraia, a hnuai zela mi ochai Zefania le a dang biak ina milianhai inthum khom mi intângna khan a hruai saa.

²⁵Khopuia la om sipaihai hruaitu, rêng lungvâr sakhai ngai mi sarilai, sipai hruaitu hnuai zela mi sipai thurchi irziakna vongtu le mi dang sômruk mi poimohai khom a hruai saa.

²⁶Nebuzaradana khan Babulon rama rêng kuang,

²⁷Hamath ram hual sênga om Ribla khuaa khan a fepuia, kha khan rêngin anni chu dûk a thoa, a that tâka. Khaangin Juda mihai chu sala intâng hranga hruaiin an om tâka.

²⁸Hi hi Nebukadnezara'n mipui sala a ihruai intamhai chu an ni. A rêng chang kum sarina khan mi sângthum sômhni inthum a hruaia.

²⁹A kum sômhleiriatna an lal kumin Jerusalema irthokin mi irzariat sômthum inhni a hruaia.

³⁰An lal kum sômhni inthumna khan mi irzasari sômminli ringa, Nebuzaradana'n a ihruai a ni. A rêngin mi sângminli irzaruk sala hruaiin an oma.



³¹Juda rêng Jehoiakina chu kum sômthum sari, tha sômhleihni, kha tha sôn sôminhni sôn ringa nê taka khan Evil-merodaka chu Babulon rama inlal ar phuta. Juda rêng Jehoakina chu intângna ina irthokin an sua tâka.

³²Evil-merodaka chu a chungsa sain Babulon rama sala a intângpui rêng danghai nêkin chôiindômin lian ualna a pêka.

³³Khaang khan Jehoiakina chu a intângna in irvônahai thûl hrang le a hring kongkâra rêng dokânga khalâi irhîl hrangin phal a nia.

³⁴A sôn tina thil nanghai chu Babulon rêng khan a pêk ngaia, khaangin a hring kârka chu a thi nê dênin satakin a ienkol a ni.



Chap Hla

Chap Hla 1

Jerusalem beiindongna

¹E he! Jerusalem khua irhming satak ni ngai kha te, a lei siat rem rum ta ngaia! Nam tinhai irngaiirsâng lei ni ngai kha meithâi angin te a om tâka. Khua roiinpui tak lei ni kha, siatin te a om tâka.

²Zâna khom chap khovârin, A bianga mitrithi irte don don a luanga. Ama irngaiirsânga lungkhamtu dang nei loiin a rualhai huangin, a râl an chang zoi ta.

³Judai rama mihai chu intak tuangin sala om pumin, Nam dang laia irzerepa omin phûkdâia omna hmun hmu zoi loiin, a'rzûltuhai ihmosonghaiin an lampui a iping a ni.

⁴Zion panna lampui chu a ping khaka, Kût hmang hrang khom tûte om ta mahai, An khopui mikothai khom a siat zoi tâka, Changpân a ap zoi ta. Hla sak thei dôngmatehai khom an irzal zoi ta, An deipuhai khom khêkin an inrûm a ni ta.

⁵An râlhai kha hruaitu nitna an changa, An ir-iam a ni ta, A sual hrai sikin Rengpa'n deng a intheihai a ni. An râlhaiin a nâinuhai suaka an hruaihaia.

⁶Jerusalem roiinpuina chu a chuai zoi ta, hruaituhai khom sazuk phîngchâma irnak boi angin, A'rzûltuhai kôla irnak nei ta loiin, châmsôl irveiin an om ta.

⁷Jerusalem in intak lungzîng a tuang zoiin, Tianlaia a roiinpuina an hriat suaka, a râlhaiin an hong sutpai laia khan, Tûte a san hrang nei maka. A dingmun siat kha an hnêtuhaiin an innuisana.

⁸Jerusalem hin thil saloi a tho intam hrai sikin, a innim a ni ta. A'rngaiinhluhai khan an en irhniama, a silkai boi kha an hmusuak tâk sikin, Inzakin a khêka, hnung songsanin a om.



- ⁹A porinchena a silkaia kopin, thup thei ta loiin a om. A zoro hek hrang ngaitua ta loiin a oma, a siatna irkhêl hrai sikin, Irtharngam pêktu tûte nei ta loiin; En ro, Rengpa kin ngîrhmun siat lam hi, râlhai an ihrât a ni ta,
- ¹⁰A neinun sa neihai râlhaiin an suta, Nam dang fe phal loina hmuna, Tempila an inlûthai hmuin a om chiana,
- ¹¹Fâk hrang zongin an khêka, An hringna hrangin an neinun sahai zuarin fâk nêk an zonga, “Rengpa, ni en ro, kin intem lam hi,” tiin khopui chu a khêka.
- ¹²Khualinzin chaiirvâkhai kuang khan, Ni en roi, tukhom keima anga tuang hi la om ngai mahai. Rengpa ningmurna nikhua a tunga, ki itong a ni ta hi:
- ¹³Irvân ata mei a zuang tîra, ki ru sûnga an lûtira, Ki ke ta hrangin lên a dâpa, hnungkîr a nin thotira lungrîl mumalboiin a ni siama.
- ¹⁴Ki سوالنا murdihai kha, irsinsiain a irchunghôma, ama'n ki ringa a nin hlitira, A rik hraina sikin ki'rzal zoi tâk, Rengpa'n ki râlhai kuta a ni pêka, an makunga ite tho loiin ki om tâk.
- ¹⁵Rengpa'n ki sipai hrât murdihai chu an nuisanhaia, ki ruathartehai thathai hrangin. Ama'n sipai a zuang tîra, Grep sômna khura grep sôm angin ki mipuihai a sômhaia.
- ¹⁶Khasikin kêng hiang dôra ki ichap, Ki mitrithi khom a irte don don a ni. Lungngam saktuhai an irthekindarh zoia, A nin hartir thei tûte om ta mahai, Râlhai an hrât tâk sikin, Ki nâi le tehai khom an chaninvâi zoi ta.
- ¹⁷Zion khom a kut a phara chu, Irtharngam pêk theitu hmu zoi ta mah. Jakoba khom a kôla mihai Rengpa'n an hmumâktirhai vinga, Jerusalem chu porche tak angin an intir tâk a ni.
- ¹⁸Rengpa hi chu a dik a nia, a thu ki zôm no sikin, mi murdi'n ki thurchi hi irngai ta roi, Ki ituang natinsat lam hi nin hmu ving, Kin ruatharte le dôngmatehai sala an in-ôk zoi tâk.



¹⁹Lung ni lei thunghai ngai ki koihai lakin, An ni lei ihuang chian kêng a ni duah, Ki kôla fâk hrang an zong lai khan chu, Ochaihai le ulianhai fâk hmu loiin an ithi zoi hrang kêng tiin.

²⁰Rengpa ki ituang lam hi ni en ro, Ki lum hlut hluta ite invol thei ma ung, Ki sual hrai sika a ni; Ki'rsâr tatak ta, Khandai ni that hrang lak ki kôla hin an pung maia, In sêng tiang lak hripuiin a ni bôm.

²¹Ki khêk irhâi hi nir ngai pe ro ba, Lungngam sakteitu tûte om mahai, A ni intuangtir a nih ti ki râlhaiin an inhriatin chu ki râlhai a sân an rai a fân, ni zoro ten chu hong tung ta sian, Keima ang hin tuang ri sehai.

²²An thil saloi thohai khom hmu pehaiin lân, Ki sual sika an ni iloh lam ang hin lôhai ro, Intak tuangin ki irzal ngôi ngôi a ni ta.

Chap Hla 2

Rengpa'n Jerusalem a hremna

¹Rengpa ningmurnain, Zion khua chu inthimin a irkhu tâka. Israelhai roiinpuina chu irvân ata hnuai an thâkpai zoi ta. A ningmurna nî tena chu, a ke irngatna hnuai a irnghil tâk a ni.

²Rengpa'n ite indîn loiin, Judai ram khuahai chu an siatpaia, A ningmurin an irkulna banghai khom chim zoiin a om ta. An ram le an ulianhai khom a'rzaltirhai zoi ta.

³A ningmur hmêl irsângin Israelhai hrâtna khom a siat zoi ta. Râlhai an hongin san nuam ta maka, A kôl a kiang kâng irhmang ving anga meipui ir-alin, Jakoba chung a hin a ningmurna a ir-al a ni ta.

⁴Râl angin a thal irchuan nei a kâpa, A ihmu hnông ngailoi nâi le tehai a that zoi ta. Zion khua in sênghaia khom, a ningmurna meipua lûtin ar al ta.

⁵Rengpa chu râl angin kêng a om ta, Israelhai an lempaihai tâka, an kulhai le an in roiinpuihai a siat zoi ta. Judai ram sênga beidong irkhêl tak a tung ta.

⁶Irhuana neinun chu ram angin, an inkhômna in a ram zoi tâka, Zion-a khan inkhômpei le Sabat serna nihai khom a hek ving tâka, a ningmur hrai sikin, an rêng le ochaihai hnôlin an om ta.



⁷A maichâm chu Rengpa'n a hnôla, a hmun irthiang a mâksana, a banghai khom râlhain an insiatpai ta. Râifân taka kût lian an hmang lai ang khan, An râlhai an hong irbuk pehai hut huta.

⁸Rengpa'n Zion kul lak an siat tum maia, a siat hrang dôr indangin a oma, a kut thâk chu a sân a ina a ni. In irsâng le ar kulna banghai chim zoiin a oma.

⁹A mikothai khom a bong a bûiin a siata, a inkhâr thîra siamhai khom artan zita, rêng hai le an mi lianhai chu sala an intânga, dân irchutir thei khom ni ta mahai, Deipuhai khomin Rengpa inlârnahai ite dong ta mahai.

¹⁰Zion-a ulianhai chu hnuaia dâihrekin an toia, an lu vâiphin polin bora puan an sila, Jerusalem-a dôngmatehai khom hnuai enin an kûna.

¹¹Ki mitrithi suak hraina sikin, ite infel ma ung, Ki mihai dongtum kin sâpin kin renhai sabaka. Ki milung a siat sabak a ni. Nâipang le nâitesenhai khom kholaidunga ruak irtet dûlin an oma.

¹²Phîngchâm le tuihrâlin an nuhai kôla an chapa; natna tuang angin an irleta, an nuhai mal chung a an thia.

¹³O, Jerusalem imo ki itih ta hrang? Nangma ang hi tu mo om? O, Zion dôngmate, itin mo lungngam nang ki la isak hrang? a natna tong chu tuipei lian anga irzatak a ni sikin, tu mo a lan dam thei hrang?

¹⁴Deipuhaiin chu thil chanlamboi le minlak an hmu suaka. Ni'rlet theina hrangin ni sual irlang ngai mak chea. Inlârna an ihmuhai khom chanlamboi irhuangna a ni.

¹⁵O, Jerusalem ni kôla fehain chu, kut inbênin nang an êsêla; an luheiin, hi hi mo khua hoitak an iti, rammualin a isong kha! an tia.

¹⁶Ni râlhain nang an innuisana, Irfûiin an ha nang an irialkhum a ni. "Kin hong hmu ta kin itum nikhua, kin hmu tâk," an tia.

¹⁷Rengpa'n a thil tum chu a tho ta, tiana a thupêk sai chu a tung ta. Indîn viat loiin an siata, a râlhai chu raifânin in sûnga an lâma.



¹⁸O, Jerusalem ni banghai khan Rengpa koi ta ri sehai, a sùn a zânin ni mitrithi chu tuipei angin luang ri se. Mong viat loiin chap mai ta roh.

¹⁹Thoiin lân, zân khovârin Rengpa koi ro, Rengpa makunga ni lungrîl chu tui angin bunthuanin lân, Kholaidunga ni nâihai phîngchâm tuanghai hringna hrangin, bân phar pumin zong roh. Nâipang kotsua kil tina phîngchâm dangchârhai hringna hranga khan.

²⁰Rengpa hiang dôra ni isoisak tâk hi en ro, an nâi pom lai taka, an hmêhai hi an nuhai fâk ni iphal hrang ma ni? Deipuhai le ochaihai khom hi Rengpa hmun irthianga sâra thi ni iphal hrang ma ni?

²¹Kholaidunga nâipang le tarhai thi omhai, ruathar dôngma khandaia thi, lungkhamna nei viat loi hi a irsam loi moh.

²²Inkhômpei uara fe intam angin ni ningmur nia chu, hmun tina ni râlhai ni bukkhôma. Rengpa ningmurna sùn khêla zôk om loiin, kin nâi pom lai hai, kin indit ngôî ngôî, râlhai ithat zoi.

Chap Hla 3

Hremna, irletna le sabeina

¹A ningmurna khianghrola vîk tuangtu ki ni.

²A vârna fe loiin inthimna tiang a ni hruaia.

³A ni tin a kut vîk ki tuang mai ngai.

⁴A nin kôngtira, ki'rzal ki thêma ta, ki ruhai khom a irtan ok tâka.

⁵Lungrîl natna le intaknahaiin a ni bôma.

⁶A lei thi tâkhai angin inthima a nin omtira.

⁷Hruin a ni khithunga, suak thei loiin a ni sia ta.

⁸changpui zongin ki khêka, khannisian inhre loi omin a om.

⁹Ki fena hrang lampuia lung a'rkhama, an hrukpai zoi ta.

¹⁰Savom angin a nin ruanga, kâmkeibaknei irdîp angin.

¹¹Ki lampuihai chu ilhlingin a bit zoia, a ni invit phet phut zoi a ni ta.



- ¹²A thal ngul leh a ni irzîk mai a ni.
- ¹³A thal chu ki milung irbua a sun inlûta.
- ¹⁴Mi murdi'n an nin nuisana, kei chu mihai ta hranga tufiam thôna chu ki lei ni tâka.
- ¹⁵Ki hnông tâk khomin thil khazât a nin intira, thil irkhêl tak a ni intuangtir a ni.
- ¹⁶Ki hmâi irnênga a nin tât pea, lungtâtin ki hâhai an thingtira;
- ¹⁷Phûkdâia om ni rêng nei ma unga, a hoi ti thei ta ma ung.
- ¹⁸A tuang lam zel inhre ta ma ung, RENGPAA khan ki sabeina a boi ta.
- ¹⁹Ki tuangna le kin vâinahai, inhresuak hi antak ki iti a ni ta.
- ²⁰Ki hong insâp sabakin chu, Ki irzal ual ual ngai a ni.
- ²¹Hi hi kin hriat suakin chu ki sabeina a irhmang hlet ngai a ni.
- ²²Rengpa nunhoi le inrenna hi chu chuai ngai maka.
- ²³A sîn tin a thar mai ngai, iamom tak a lei ni.
- ²⁴Rengpa vai hi ki ineisun a ni, Ama kuanga hin irnghat mai ki ti.
- ²⁵Ama nghâka zongtuhai ta hrangin, Rengpa hi zong mai a nang.
- ²⁶Rengpa'n a ni saninzôk hrang zoro chu nghâk hi a satak a ni.
- ²⁷Nâipang lai irchu hi a satak a lei ni.
- ²⁸Intak zap khomsian, dâihreka tuang insôt hi a satak chu a ni.
- ²⁹Kûn chiana irdô rak hrang a nia, beiindong loi hrang a ni.
- ³⁰Ki bianga a nin bên hin, inchêng zap khomsian, dô pe mai hrang hi thil sa a ni.
- ³¹Rengpa hin chu ni hnôl mai ngai no ni.
- ³²A nin renin lung a ni ithung ngêt hrang a ni.
- ³³Mihriamhai beiindongtir le sôlhai hi a nuamlam ni mah.



- 34Irnênga lung in intânghai murdi sirbêa an omin;
- 35Anchungtak mit hmua mi a dikna hnôl pea a omin;
- 36Mi chaninvâi donsui ngai loihai hi Rengpa inuam loi tak a ni.
- 37Rengpa'n thu a pêk no'n chu, tu thu mo hlochuk ngai?
- 38Anchungtakpu bâi ata ti no'n, thu sia le sa ite suak ngai loi mo ni mah?
- 39Ei dam sâng hin ei sual sika tuangin, ei ichiar hrang ma ni?
- 40Ei omdân hi sûtin ir-enfel ei ta, Rengpa tiang kîr ei ti.
- 41Irvâna Pathian tianga lungrîl irhongin chongchai ual ei ti.
- 42“Thil saloi thoin ei rotsana, nangin ni ngaidam mak che.
- 43Ningmur pumin ni ni'rzûla, Irdîn viat loiin ni ni thata.
- 44Sûm irsatak sûnga ni'rkhum chiana, kin chongchaina ni kuang hong tung thei mah.
- 45Nam tin laia sahrok pai khômna'n ni ni isiam a ni ta hi te.
- 46Kin râlhain êsêl takin an ni ikhêksan a ni ta.
- 47Thil irkhêl tak le tuang theiloi rakin kin iom a ni ta.
- 48A siat thei dôra siat kin tonga, ki mitrithi a iluang zul zul a ni.
- 49Ki mit chu mong loiin chap mai ta ki ti.
- 50Irvân ata Rengpa'n a zuang ena a ni zuang don mâka chu,
- 51Khopui sûnga nupanghai tuang lam ki hmu ualin, ki milung a na u ual ngai a ni.
- 52Râlhain lakin ite a bi boiin, vatehai angin an ni inhnota.
- 53Hring uamin khura an nin thâka, lung leh an ni dênga.
- 54Tuiin ki lu a ni buak pe khan chu, “ki ithi ta hrang ni a ti,” ki tia.
- 55Khur sâng ata irthokin O Rengpa nir hming ki hong koia,
- 56Ki khêk irhâi ni len hriata, mikuar hîp loi takin.



- ⁵⁷Ki hong khêk tak takin chu a ni zuang nâia, 'Chi no ro,' a ni tia.
- ⁵⁸Rengpa'n a ni dona, ki hringna a zôk ta.
- ⁵⁹Rengpa ki tuangnahai ni hmu ta, ki chungthuhai hi ni rêl infel pe ta roh.
- ⁶⁰Phuba lâk hrangin an irsiam chak lai khom ni hmu mai a ni.
- ⁶¹Rengpa an ni ilô lamhai hi ni hmu maia, an ni ikhitphiar dânhai khom hi.
- ⁶²A ni doituhai chu sîn misa tâk dênin keima thurchi hrilin an ichiar mur mur ngai a ni.
- ⁶³An toi lai le an ngîr lai khomin, êsekara'n hla an ni isak khum a ni.
- ⁶⁴Rengpa an sintho ang takin, anni khom intongtirhai roh.
- ⁶⁵Khomâk sâmhain lân, an beidong ri se.
- ⁶⁶Ningmurin irzûlhaiin lân, Rengpa, hnuai chung a hin thatpaihai ving roh.

Chap Hla 4

Jerusalem siat zoina

- ¹Rângachak chu a zîng khak tâk e, rângachak irthiang khom chu a danglam bâk tâka! Hmun irthiang sinna lunghai khom, Kholaidunga an dêngzuanhaia,
- ²Zion ruathartehai chu rângachak irthiang ang an nia, bêl vuaktu pil bêl ang mai an ni zoi ta.
- ³Ine khomin a tê irhnu a ipêk angin, ki mihai rêk hi chu ramchâra vakhohri a tê ifâkhai angin an oma.
- ⁴An ipomhai tuihrâl dangchârin an oma, an nâihaiin fâk hrang an zonga, pe phal loiin;
- ⁵Fâk nêk sa fâkhai ngaiin, kholaidunga phîngchâmin an oma. Puan senduk silhai ngaiin porinche pai khôm hmu zoi loiin.
- ⁶Tûte tôn irman loiin Sodom khua a isiat ang khan, a mihai tuang nêkin ki mihai tuangna hi a natinsat ual.
- ⁷Kin ulianhai chu vur nêkin an vâra dûttui angin an taksahai khom a pôla, an ibit momot a ni, Safir lung sinsiam sai anga sahai kha.



⁸An hmêlhai chu meihol nêkin a duk zoi ta. Tuala an om le om loi inhriat thei ni ta mahai, a hong incher tharhai khom, an em inremin thingkung châr angin an om zoi ta.

⁹Fâk hrang hmu zoi loi, irzuk ngôî ngôîin phîngchâma thi nêkin chu, khandaia that hoi ual a ti.

¹⁰Ki mihaiin siatna irkhêl an tongin chu, nu phûkdâi takhai khomin; an nâihai bu anga erin an ifâkhai a ni ta.

¹¹Rengpa'n a ningmur chu insum zoi loiin Zion khan a ningmurna mei an suaa; a lung phûmhai dênin a siat zoi ta.

¹²Irnênga rêng hai le mi murdi'n doitu râlhai Jerusalem khua lût thei hranga an iiamhai ngailoi.

¹³Deipuhai sual sikin le ochaihai dik lolina sika a ni, kho sûnga khan mi dikhai thisen an insuak sika a ni.

¹⁴Mitchohai angin kholaidunga an irmaia, an songkolhaia khom thisen a kop neng nungin. Tûte itôn a'rthiang ti loiin.

¹⁵Mihaiin nin porinche fe roi, rot inrang roi, ni tôn nin ti, an tia. Nam tin laia an chaninvâia, hitaka an om hi a sa ti ma ung, an lei ti pehai thiaia.

¹⁶Rengpa ningmurna an inpung u ual a ni, ite bê'n bê ta maka, deipu khom en nuam ual ta loiin. Kin ulianhai khom don ta loiin;

¹⁷Ni changpui theiloi sabeina'n mitrithi suakin kin tûng, a ni san theiloi hrang nam, nuama nghâk kin ni.

¹⁸Râlhai lakin kin hnung an ni'rzûl maia kholaidunga khom chai ngam ma ung, kin irhmang zoi hrang a ni, kin zoro a hek tâka, kin ithi zoi hrang ni a ti.

¹⁹Irvân ata irmu hrât tak nêkin a ni'rzûltuhai hi an ihrât ual a ni. Tângsîpa khom an ni'rzûla, ramchârna hmuna khom an ni lei khêl ngai.

²⁰Rengpa sahriak pol kin isong tak khom an chângkama a khita, ama le irrualin nam dang laia khom, om kin ti chu kin tia.



²¹Uz rama omhai le Edom mi le sahaio, nin thei lai hin raiinfân unglân lôm roi, nin chung a khom siatna nikhua la tung a ti. Inrui nin ta, silkai boiin om nin ti.

²²Zion nâi le tehain nin tuang tum tuangin sala intâng ta no chin ni, nangni Edom mihain tuang nin ti. Nin sual dânhai khom inlang ving a ti.

Chap Hla 5

Lungkhamna chongchai

¹Rengpa kin chung a thil tung hi inhre mai ro, ni hong enin lân, mualphoi kin irlâk ta hi te!

²Kin irchonhai khom nam danghai laia pêk a ni zoi ta. Kin inhai khom hmêl hriatloi kuta omin.

³Fara nu le pa boi kin ni ta. Kin nuhai khom meithâi anga omin,

⁴Tuidâi khilât khat khom irchôk vaiin kin in thei ta. Kin thingtua ngai khom irchôk a nang tâk.

⁵Kin ringa chelin kin oma; kin ngûiin, irngam thei ta ma ung.

⁶Aigupta le Assuria-hai kuanga kin kut kin do tâka, kin khop theina hrang zongin

⁷kin pahai khom an suala, om zoi ta mahai, an dik loinai kin ipêl a ni ta.

⁸Suakhain kin chung a an inlala; an kut ata ni sansuak thei tûte om mahai

⁹Parân fe pat thei ang dôrin fâk kin zonga, ramchâra khandai tuang hrang sikin,

¹⁰Kin vunhai khom irtap mei angin a luma.

¹¹Zion nupanghai chu an siatpuihaia; dôngmatehai khom Juda khopui laia khan.

¹²Reng nâihai khom an kut leh an kaiphiahaia, upahai inzak loiin,

¹³ruathartehain bu sukna khôla an insuktirhaia; nâipanghai chu thingsâi hnuaia an dêngzuanhaia;



- ¹⁴Upahaiin mikot kul kôla an rotsanhaia, ruatharhai mâksanin.
- ¹⁵Kin lungrîl lômna a heka; kin lampui a ping ta.
- ¹⁶Ki lu ata rênglukhum a tâka; kin chung a rik, kin lei tho insual tâka.
- ¹⁷Hi sika hin kin irzal ta. Kin mit khom a zîng ta.
- ¹⁸Zion tâng chu a chuai tâk sikin, sihalhaiin a sînga an lênga.
- ¹⁹Nang chu Rengpa kumkhuain nin lala; ni rêngtoihmun chu irlo tin dênin,
- ²⁰Itho sika mo kumtuanga ni ni irnghil, hi ten sîn ni ni irotsan?
- ²¹O, Rengpa nangma tiang nir heitir nôkin lân, hong kêr thei kin ti; tiana angin kin mihai inhar nôkin lân.
- ²²Aninole, nangin ni ni ihnôl sabak mani tâk? Kin chung a ni ning a inmur sabak ma ni ta?



Ezekiela

Ezekiela 1

EZEKIELA INLÂRNA A HMU MASA TAK

(1.1–7.27)

Pathian rêngtoihmun

¹ Kum sômthum kuma, tha minlina, tarik ringa nî'n Babulon rama Kebar dung kôla Judahai sal intâng laia ki om sa laiin irvân ar hong, Pathian inlârna ki hmua.

² Kha tha tarik ringa nî, rêng Jehoiakina an chel kum ringa kuma khan,

³kei, ochai Ezekiel, Buzia nâipa kuanga Babulon rama Kebar vadung kôla khan Rengpa thu chu a zuang tung tâka, Rengpa kut chu ki chung a chum tâka.

⁴Ki hong ena, hmâr tiang ata phâivuapui a sate'n a hong thoa; sôm irsa tak kêra khan kôl a'rtêk sor sora, a kôlvêl chu a vâ sur sura, a'rtêknaa khan dârsen anga irtêk zur zur a oma.

⁵ Kha vâ hong suaka khan thilhring ang, mihriam ang hi minli an hong suaka.

⁶Hmâi minli le mitha minli an nei chita,

⁷an kehai chu ke intuanphit an nia, an kechumhai chu sehrâtchal kechum ang an nia, dârsen irtêk ang a ni.

⁸Hmâi minli le mitha minli an nei baka, an panga mitha hnuaia khan kut mihring kut ang hi, an nei senga.

⁹An mithahai chu an irzom senga, an fe khomin irhêl kual ngai mahai, an rêngin mân tiang ringot an fe zit ngai a ni.

¹⁰ An hmêl inlang dân chu hiang hin a ni. Maton tiang mihriam hmêl an irputa, chang tiang kâmkeibaknei hmêl, vei tianga sehrât chal hmêl, hnung tianga irmupui hmêl ang a ni.

¹¹An hmêl chu khang khan a ni, an mitha inhni chu irtôn chiain an phar irzoma, an mitha inhni khan an takpum ar khua.



- ¹²Khan, an rêngin mân tiang irhei ringotin an fea, an nuamna tiang tiang an fea; an fe laiin sîr tiang irhei ngai mahai.
- ¹³Thilhringhai laia khan inkhat chu meiser ang, meiri-al vâr tak ang hi, thilhringhai laia a suk a tunga fe a oma, mei chu a vâr tak taka, mei ata kôlirtêk a hong suaka.
- ¹⁴Thilhring minlihai chu kôlirtêk anga inrang takin an va intân an hong intâna.
- ¹⁵Thilhring minlihai chu ki en mai laiin, an sîr tiang seng, tâli ke minli nei, irnênga ngîr ki hmua.
- ¹⁶Khan, tâli ke inlang dân chu lung hlu anga om, irang zit a ni; a ke irkual sûnga ke irkual dang om ang hi a ni.
- ¹⁷An fe zoro'n, an sîr minliin an fea, irhêl ngai mahai.
- ¹⁸An ke kualhai chu, an minliin ke kual mita siphai chu an nei senga.
- ¹⁹Thilhringhai fena tina, tâli, ke kualhai khom an sîra khan an fe sa zêla, an thoi le an thoi sa ngai a ni.
- ²⁰Thilhringhai fe nuamna tina an tâlihai khom an fe sa ngai, an thoi le an thoia, thilhringhai thu thua om an ni.
- ²¹An fena lam tinrênga an fe khomin an zui sa zêla, an ngîr le khom an ngîra, irnêng ata an thoi le khom tâli kehai khom khan an thoi saa, thilhringhai thu thuin an om a ni.
- ²²Thilhringhai lu chungga khan irvân anga êl krustal lung ang hi a oma, vur anga vâr a ni, an lu chungga khan ar zâma.
- ²³Kha thil om kul hnuaia khan, thilhringhai chu an ngîra, an mitha inhni an phara, an mitha inhni dangin an taksa an irkhûa.
- ²⁴Khan, an vuangin chu an mitha irhâi kha tuipui irhâi anga inring, sipai pâl irhâi anga om mur mur le Itinrêngthotheia irhâi anga om kin hriata, an ngîrin chu an mitha kha an thepin an irtumtir nôka,



²⁵an ngîra an mithahai an thep khomin, an lu chung irdîna irhâi a la om mur mura.

²⁶An lu chung a vân dum chung a khan rêngtoihmun ang tak, safir lung ang maia inlang hi a oma, khan, rêngtoihmun chung a khan mihriam ang tak hi a toia.

²⁷A kong chung tiang chu dâr thîr rô inlinga irtêk a nia, a hnuai tiang khom khan mei ang a vâ a ni, a kôlvêl chu a êl invâr uama.

²⁸A kôlvêl vâ chu rotho nia sumrisâng rông ang hi a ni. Hi hi Rengpa roiinpuina inlang dân chu a ni. Kha kha ki hmu'n chu inbok rakin hnuai ki'rteta, ni chongpuitu irhâi chu kin hriat tâka.

Ezekiela 2

Deipu ni hranga Pathianin Ezekiel a koi

¹Khan ki kuang, “Mihriam nâipa, ngîr ro, ni kuang thu ki ihril nuam kêng,” a ni tia.

²Ki kuang thu a hrilin chu, ki chung a Pathian irtha a zuang lûta, a nin ngîrtira, a thuhiril chu ki'rngai tâka.

³Khan ki kuang, “Mihriam nâipa, kôkirhel Israel nâihai chu ki chung a sân an suala, an kuang nang ki itîr hrang a ni. An irchibul pi le puhai rengata atûn ten hin ki chung a thilsual an itho a ni.

⁴An nâihai khom inmôl tak le tukullian an ni. An kuang nang ki itîr a ni. RENGPA PATHIANIN hiang hin a ti, ni va iti hrang a ni.

⁵Khanchu nam tehel, sual tak nihai khomsian, an irngai mo irngai mahai mo, an laia deipu a om ti inhriat an ti.

⁶“Mihriam nâipa, nangin anni chu chi no ro, an chongbâihai sikin rot ual no roh. Ni thu zôm no nihaia, nang doi an ti, âinuvêt laia om ang ni ni ti. Tehelzong tak an ni, chihai viat no ro, an hmêl inlang dân khom chi viat no roh.



⁷Tehelzong tak nihai khomsian, an irngai mo irngai mahai mo, ki thu hi hril mai roh.

⁸“Khan, mihriam nâipa, nang khom annihai angin tehel no ro, ki thuhiril hi irngai ro, ni bâi ângin lân, ki thilpêk hi fa ro,” a ni tia.

⁹ Kut bongin a nin bana, lekhabu irzuat an tûka,

¹⁰Kut bongin lekhabu irzuat chu a sûta, a pên tiang le a sûng tiang chu irziakin a sip zita. Thu om chu chapna thuhai, sûnna thuhai le inrûmna thuhai a ni.

Ezekiela 3

¹ Pathianin, “Mihriam nâipa, hi lekhabu irzuat ni ihmu hi fa’n lân, khanchu fe’n lân, Israel in sûngkuahai laia thu va hril ro,” a ni tia.

²Khanchu, ki bâi ki ânga, lekhabu irzuat chu a nin fâktir tâka.

³“Mihriam nâipa, lekhabu irzuat nang ki ipêk hi fâkin lân, khop takin fa ro,” a ni tia. Khanchu, ki fâk tâka, khuaihlutui ang takin a thuma.

⁴Khan Pathianin, “Mihriam nâipa, Israel in sûngkua laia fe’n lân, nang ki ihril murdi hi va hril roh.

⁵Chong hmang intak le ni inhriat loi chong hmang namhai kuang nang tîr ma unga, Israelhai kuanga nang ki itîr a ni.

⁶Chong hmang intak le ni inhriat loi chong hmang namhai kuang nang ki itîr ni sianlân, ni thu irngai no nihai.

⁷Israel mihaiin ni thu irngai no nihai, ki thu lua khom irngai nuam ngai mahai. Israel namhai hi lungrîl ngar tak le irkôk irhel mi tak an ni.

⁸Irngai ta, nang khom anni ang takin mi lungrîl ngar tak le irkôk irhel takin nang siam ki ti.

⁹Lung ngartak nêka ngarin nang siam ki ti, tehelzong tâk nihai sian khom chi no’n lân, rot viat no ro,” a ni tia.



10Ki kuang thu a hril zêla, “Mihriam nâipa, nang ki ihril hrang murdi hi takirtâi takin irngaiin lân, intûk ngit roh.

11Thoiin lân, nir chi chanpui, sala intânghai kuanga fe’n lân, an irngai nuam mo an irngai nuam no mo, an kuanga, Rengpa’nhiang hin a ti van hril ro,” a ni tia.

12Khanchu, Pathian Irtha’n a nin domirsânga, ki hnung tiang irhâi inring tak chu kin hriata, “Ama hmuna ta irthoka suak Rengpa roiinpuina chu inpâkin om ri se,” tiin.

13Thilhringhai an mitha irtôka an ivuang irhâi le thîr tâli ke fe irhâi chu hnîngnu irhâi ang dôrin kin hriata.

14Khanchu, Irtha khan a nin domirsânga, a ni hruai tâka, lungchuk loi tak le ningmur takin ki fe tâka; khannisian Rengpahrâtna’n a ni hruai inlût ngita.

15Kebar vadung kôl, Telabib hmuna om sala intânghai kuang khan a ni hruaia. An toinaa khan ki toi saa, sîn sari sîng chu omchianin ki oma.

Israel enkoltua Ezekiela inkung a ni

(Ezek 33.1-9)

16Sîn sari a hek zoi hnunga chu Rengpa thu chu ki kuang a zuang tunga.

17“Mihriam nâipa,” Israel in sîngkua enkoltu hrangin nang ki siam tâk. Thu nang ki inhril hi Israelhai chu hrilhai roh.

18Mi soal kuanga, thu ki hrila, “Nang chu ni ithi ngêt hrang a ni,” ki tia, ama chu irhril irhlômna khom ni lei pêk noa, a hringna chu saninzôkna hranga mi soal chu irlet hranga ni lei hril no’n chu, kha mi soal kha a سوالنا sik ngeia khan thi a ta; khannisianlân a thina mô chu ni chung a irngat ki ti.

19Aniachu, kha mi soal kha ni lei inhrila, a سوالنا ar let nuam noa, a سوال maiin chu a سوالنا sikin thi a ta, nangma chu a thina mô ata saninzôk ni ni ti.

20Mi dik khom, hnung kîrin thil soal a tho’n chu, a matona irletna lung sia ki ta, thi ngêt a ti, ama chu leiirhrilna ni lei pêk no sikin, a سوالناa khan thi a ti,



khan a thil sa thohai chu inhriat mai ni ta no ni; aniachu a thisen mô chu nangma'n pêl ni ti.

²¹Nangin mi sa chu sual tho loi hrangin nir chua, thil sual a tho no'n chu ni irchu a pom sika hring ngêt a ti, ni irchûna ar ngaia, nang khomin tuang no chi ni.

Ezekiela chong thei loia om hrang thu

²²Rengpa'n a ni zuang chel ngita, ki kuang, "Thoiin lân, vadung phâizôla son va fe ta, kha khan thu nang inhril ki ti," a tia.

²³Khanchu, ki thoia, vadung phâizôla khan ki fe tâka, Rengpa roiinpuina, Kebar vadung sîra ki ihmu ang ngêt kha a lei oma, inbok rakin ki'rtet tâka.

²⁴Khan, Pathian Irtha chu ki sînga a hong lûta, a nin ngîrtira; Rengpa'n, ki kuang, "Fe'n lân, ni ina inkhâr irkhum roh.

²⁵Nang, mihriam nâipa, irngai ro, nang khitphiar khak an ta, a laia fesuak thei no chi ni.

²⁶Khan, ni milei chu ni danga inkoptir khak ki ta, anni chu irchu theihai no chi ni, kôkirhel mihriam an ni sikin.

²⁷Khannisianlân, ni kuang thu ki hong hril tika chu, ni bâi inhong ki ta, 'RENGPA PATHIANIN hiang hin a ti,' an kuang la ti ni ti. A nuam nuam irngai an ta, nuam loihaiin irngai ri sehai, mi kôkirhel mihriam an ni," a tia.

Ezekiela 4

Ezekiela'n Jerusalem ihuala om kha sintho'n an langtir

¹Khan Pathianin, "Nang, mihriam nâipa, irnêngpila siam lung phêk lan lân, ni hmâi makunga sia'n lân; Jerusalem khopui illim irziak roh.

²A vêla irhualin kul siamin lân, mual inpôngin lân, sipai riakbukhai siam sa'n lân, ar hîlin kulhai sin roh.

³Khan, thîrphêk lan lân, nang le khopui kâra khan bang angin intung ro. Ni hmâi chu khopui tiang irheiin lân, ni irhual angin siam ro, hi hi Israel in sîngkuahai irsinsiana ni a ti.



⁴“Khatak khan ni vei tiang delin zâlin lân, Israelhai سوالنا mô nang inpêltir hrang ki ni. Ni zâla ni in sângin Israelhai سوال hremna tuang ni ti.

⁵An kum khat سوال sik kha sîn khat nang intuangtir ki ti, sîn sôm irzathum le sîn sômkuak sâng Israelhai سوال chu tuang ni ti.

⁶Kha zoia khan ni chang tiang delin zâl nôk ni ta, sîn sômminli sâng Judahai سوال tuang nôk ni ti, an kum khat سوال sik kha sîn khat ni ituang hrang a ni.

⁷Jerusalem omna tiang khan ni hmâi irnghatin lân, ni bânhai lîmin lân, a siat hrang chungthua hrilsuak roh.

⁸Khan, irngai ta, hruihrualin khitphiar ni ni ta, rûn hranga ki iti sâng a chuk mâka chu khôte tiang nir son thei loina hrangin.

⁹Gohu le barli hai, bê le dâl hai, changpêr hai lâkin lân, bêla siakhôm ro; khatak ata kha bai siamin lân, ni vei tiang dela ni zâl sâng, sîn irzathum le sîn sômkuak sâng chu, kha kha ni ifâk hrang a ni.

¹⁰Ni bu nêk hrang chu ni irtê zit hrang a ni, a sîn tin sekel sômhni; a hunbi nei takin ni ifâk mai hrang a ni.

¹¹Khan tui khom irtê ngêtin in ni ta, sîn khat sângin khilât hni hunbi nei takin in ni ti.

¹²Khan, ni mithmu ngeia mihriam êk leh meia em ni ta, changpêr angin fa ni ti,” a tia.

¹³Khan, Rengpa’n, “Hianga bu porinche hi Israel nâihai khan nam dang ki inhnotsuak hrang namhai laia khan fâk an ti,” a tia.

¹⁴Khan, Keima’n, “O! RENGPA PATHIAN, irngai ta, ki hringnun hi porinche’n la om ngai maka, ki thoibop ata atûn ten hin sa a binga thi mani, ram sahai isê mani la fa viat ngai ma ung,” ki tia.

¹⁵Khanchu ki kuang, “En ro, mihriam êk nêka sehrât êk nang pe ki ta, ni fâk hrang chu hiang hin ni isiam hrang a ni,” a tia.



¹⁶Ki kuang a hril zêla, “Mihriam nâipa, irngai ta, Jerusalema bu, hringna bul chu insiat ki ta, an bu chu irtê kher kherin chardong takin fâk an ta, tui khom insit takin in an ti.

¹⁷Bu le tui chu an irsama, anni le anni chu intak an irti senga, an suauna chu lâkirhmang a ni theina hrangin,” a tia.

Ezekiela 5

Ezekiela'n a sam a voipai

¹Khan Rengpa'n, “Mihriam nâipa, sam voina bavo ngaihtak lan lân, ni lu le ni biang mul voipai zit ro, khan ni ivoina mul kha phalla leh varin lân, hmun thumin sem roh.

²Hmun thuma sena hmun khat chu khopui rûna a om sâng nîhai a hek tika khan khopui laia meia ni ihâl hrang a ni, hmun thuma sena hmun khat dang chu la ni ta, khopui pên tiang a rêngin khandaiin sât irnôi ni ta; khan, hmun thuma sena hmun khat dang chu phâivua'n insêm indartir hrangin pai ni ta, keiin khandaiin doi ki ti.

³Khan, khatak ata a tômte la ni ta, ni puan hmora infûn roh.

⁴Khatak ata kha a tômte la nôk ni ta, meia khan pai ni ta, kâng a ti; kha rengata kha Israel nam pumpuia mei hong suak a ti,” a tia.

⁵RENGPA PATHIANIN hiang hin a ti, “Hi hi Jerusalem chu a ni, namhai laia khan ki siaa, a vêla ramhai a oma.

⁶Ki thurêlhai chung a nuara, ki dânhai chu a hnôla, a vêla nam dang omhai nêkin a sate'n thilsual an thoa. Ki thurêlhai chu an paia, ki dân siamhai ang khomin om ual mahai.

⁷Khasikin, RENGPA PATHIANINhiang hin a ti a ni, ‘Nin vêla nam dang omhai nêkin nin buai oka, ki dân siam angin om mak chêia, ki thurêlhai chu pom loiin nin vêla om nam danghai dân nin lâk ual sikin.

⁸Khasikin, RENGPA PATHIAN khan hiang hin a ti. Irngai ro, kei ngei khom hin nang doi hrang ki ni. Nam danghai mithmua nangni ki ihrem hrang a ni.



⁹Nin sintho porinche tak takhai sikin ki la iti ngai loi, tho khom ki la itho ngai loi chu ni chung a tho ki ti.

¹⁰ Nin laia pahaiin an nâihai taksa la fâk an ta, nâihaiin an pahai taksa la fâk an ti, ki ihrem hrang a ni, a la om sunhai khom irthekindarin om zit an ti.

¹¹Khasikin, ki hring mai angin intir ni iomna murdi le ni iporinchenahai murdi khan ki hmun irthiang chu a porinchetir tâk sikin hong inboipai ngêt ki ti, ki mitin irhmâi viat no ning, lungthung viat no ning.

¹²Hmun thuma sena hmun khat chu hriin mani, châmin mani, nin laia mi thi an ta; hmun thuma sena hmun khat chu ni vêla khandaiin thi an ti; hmun thuma sena hmun khat dang chu thekindarhai zit ki ti, khandaiin irzûlhai thiai ki ti.

¹³Khanchu, ki ninginmurna chu intungtir ki ta, an chung a ki ninginthikna kha indâi ta ki ta, a hoi ti ta ki ti. Kha zoia chu, kei RENGPA PATHIAN hin sathnem irngaina sikin kha kha ki itho a nih ti inhre ta an ti.

¹⁴Nin vêla nam omhai le nangma tianga irvâkvêlhai hmusitom le khoramin nangni siam ki ti.

¹⁵“Ningmur le ningthik takin, lungchuk loi takin nin chung a roi ki rêl zoi hnunga; mi ihmusit, innuisanna le enirkhêl la ni nin ti; kei Rengpa hin ki ihril tâk a ni.

¹⁶Nin fâk le nêk hmûna hnârhai kha insiat ki ta, châm ki intungtir hrang a ni. Nin thipuina hrang thal nangni irhlenpat anga natna kha châm sikin nin ituang hrang a ni.

¹⁷ Nin nâihai that hrangin phîngchâmna le ramsahai tîrhai ki ta, hripui thisen insuakna le khandaihai nin thipuina hrangin tîr ki ti. Kei Rengpa'n ki iti a ni,” a ti.

Ezekiela 6

Rengpa'n millim biak a sêl

¹Khan, Rengpa thu chu ki kuang a zuang tunga:



- ²“Mihriam nâipa, Israel rama tâng hai chu thîrin lân, an kuang thu hril roh.
- ³Israel rama tâng hai, RENGPA PATHIAN thu hi irngai roi. RENGPA PATHIANIN tâng hai le mual hai kuanga le irhôr hai le phâi irhôr hai kuang hiang hin a ti. Irngai roi, kei, keima ngei hin nin chung a khandai zuang inlek ki ta, millim biak irbôlna hmun hai chu insiat zit ki ti.
- ⁴Nin maichâm hai insiat ki ta, nin pathian millim inding hai chu inthe kindarh zit ki ta; nin laia thihai ruak chu nin millim makunga pai ki ti.
- ⁵Israel nâi hai ruak chu an millim bul hai khan siakhôm ki ta, an ru hai chu nin maichâm irhîla khan inthe kindarh ki ti.
- ⁶Nin omna hmun murdia khan khopui hai chu insiat ni a ta, millim irbôlna hmun hai chu ramchit a ta; nin maichâm hai insiat le inram a ni theina hrang le nin millim hai inkhoia, a boi theina'n le nin pathian illim hai chu irkitpaia a om theia, nin sintho hai chu a hek theina hrangin.
- ⁷Nin laia mithi ruak chu irthe k pher phur a ta, a la dam hai khan Rengpa ki nih ti inhriat an ti.
- ⁸“Senkhat chu thina lôi an ta, nam dang hai laia, ram tina indarh ki ti.
- ⁹Nin laia khaanga thi loihai chu sala man ni an ta, ram tina hruai indarh zit an ti. Nam dang laia an irthe kindarh hnunga chu nin hresuak an ti, an millim tianga a ni irheisanna ki insiat penahai kha inhriat an ti, khan an thil porinche tho insual murdi, an mâni mithmu ngêta an lei itho tâk thua khan intirom an ti.
- ¹⁰Khan, Rengpa ki nih ti inhriat an ti; an kuanga hi thil saloi ki tho hrang a nih ki ti hi, ti pai paia hril ki ni loizia inhresuak an ti,” tiin.
- ¹¹RENGPA PATHIANIN hiang hin a ti, “Ni kut inbênin lân, ni ke intet ro! Israel in sêngkuahaiin thilsual porinche an tho ngai hi a poi tak tak! khandaiin, châmin le hripui tuangin thi an ti, ti roh.



¹²Ram hlataka omhai chu hripuiin thi an ta, anai uala omhai chu khandaiin that ni an ti. Hitaka la omsun, hual sînga omhai hi phîngchâmin thi an ti, khang khan ki ninginmurna chu an chung a buak ki ti.

¹³Khan, tâng irsânghai, tâng sîp murdia hai le thing hring tin hnuaia le seso thing buk tin hnuaia an millimhai kuanga mirimhoi an inhlanna hmuna, an maichâm vêla an millimhai bula an mithi ruakhai a om tika chu kei hi Rengpa ki nih ti inhriat an ti.

¹⁴Israelhai chung a ki kut irlek ki ta, ramchâr ata Ribla, tianga an omna hmun murdia ram chu inramin insiat zit ki ti, khanchu kei hi Rengpa ki nih ti inhriat an ti,” tiin.

Ezekiela 7

Israelhai hranga mongna anai ta

¹Rengpa thu chu ki kuang a zuang tunga,

²“Nang mihriam nâipa,” RENGPA PATHIANIN Israel ram kuanga hiang hin a ti a ni; “Mongna, mongna chu ram kil minlia a hong tung tâk e.

³Atûn hin ni hrangin mongna a ni, ni chung a ki ninginmurna chu zuan tung ki ta, ni omdân ang takin roirêl ki ti, thil porinche tak tak ni itho sika khan nang hrem ki ti.

⁴Ki mitin nang irhmâi no ning, nang inren ual no ning; ni lei itho ngai ang tak khan ni chung a hong tho ki ta, thil porinche ni itho sikin nang hrem ki ti, khanchu, Rengpa chu ki nih ti inhriat nin ti,” a tia.

⁵RENGPA PATHIAN khan hiang hin a ti, “Siatna ngot, siatna ngot hong tung a ti.

⁶Mongna a hong tung tâk, mongna a hong tung tâk e, ni chung a a hong tho tâk, irngai ro, a hong nâi tâk.

⁷O ram luatu, ni siatna hrang ni chung a a hong tung e, zoro chu a hong tunga, a nikhua chu a hong nâi tâk; tâng chunghaia raifânna khêk irhâi ang ni loiin buaina zoro kha a ni.



⁸Atûn hin ki ninginthikna chu ni chung a zuang buak ki ta, ni chung a ki ninginmurna chu tuang nin ti, ni omdân ang zêlin roirêl ki ti; thil porinchehai murdi kha ni chung a zuan tung ki ti.

⁹Khan, ki mitin nang irhmâi no ning, nang inren no ning, ni omdân ang zêlin ni chung a zuan tung ki ta; thil porinchehai ni itho chu ni chung a nang thuan ki ta; khanchu kei Rengpahi hrem thei ki nih ti inhria nin ti,” a tia.

¹⁰Irgai ro, Israel ta hrangin nikhua chu a hong tung e, ni siatna hrang chu a hong suak ta, tuangna chu a hong punga, omlianna chu a hong irsâng tâk.

¹¹Hur le nghalna khan thil saloi an pungtira, an neina ite lak om loiin, an sum le puanhai, an sin sôlna rahai, an inhoina tinrêng boi zit a ti.

¹²Zoro chu a hong tung ta, nikhua chu a hong nâi tîr tîr ta; irchôktu chu raiinfân no sianlân, a zuartu chu beiindong ual no ri se; ningmurna chu an rênga chung a itung hrang a ni sikin.

¹³Thil zuartu chu, la dam khom sianlân, a thil zuar chu hmu nôk ta no nia; inlârna chu an rênga chung a chum a ta, tûte a kîr om no nihai.

¹⁴Bekul chu an tuma, tinrêng siam irfûk a ni tâka; khannisian irdoinaa khan tûte fe mahai; ki ninginmurna chu mipui murdi chung a oma.

Israel sual hremna

¹⁵Khandai chu pên tiang a oma, châm le hripui chu kul sîng tianga khan a lênga; loa om chu khandaiin thi an ta, khopui sînga om chu hripui le châmin thi an ti.

¹⁶Khannisianlân, khataka hong suak theihai chu, tânga om an ta, an rênga sualna chung a irtha'nvâi takin sîn an ti.

¹⁷An kuthai chu hrât loiin om a ta, an irkhûkhai chu irzalin om an ti.

¹⁸Bora puanhai sil an ta, chitnain anni chu inkhum a ta; an hmêlhai chu inzakna'n inlang a ta, an lua samhai kol zit a ti.

¹⁹An sumruhahi chu kholaiia khan dêng inthek an ta, an rângachakhai khom chu thil irthiang no ang hong ni ta a ti; an sum le rângachak



khan Rengpa ningmurna nikhuua chu anni chu saninzôk no nia, an hringnun inkhop no nia, an phîng khom khop ual no ni, anni irtettirtu suauna a ni tâk sikin.

²⁰An irvôna satak tak kha an inlalna'n an hmanga; khannisianlân, intiromin an millimhai siamna'n an hmanga, khasikin thil porinchea ki inchangtir tâk a ni.

²¹“Nam dang kuta inmantirin nangni sia ki ta, rammuala mi suaunhai kuanga râllâk suma chang nin ta, porinchein om nin ti.

²²Nangni irheisan ki ta, ki hmun irthiang chu porinche an ti; inrûhai chu a sûnga lût an ta, porinche zit an ti.

²³“Thîrhruai chu siam roi, ram chu thisen insuak hmang roirêlnain a sipa, khopui sûng chu nakhrâtsonga porinchenan'a sipa.

²⁴Khasikin, nam dang suaun tak takhai hong hruai lût ki ta; an in le loihai la pehai an ta; an hrâtna an irsongpui chu inboipai ki ta, an hmun irthianghai chu porinchein om a ti.

²⁵Chardongna a zuang tunga, hoina chu an zonga; aniachu hmu viat mahai.

²⁶Siatna chung a siat nôk ualna hong tung a ta, thu ichiom chung a khan thu thangintheina om a ta, deipu ata inlârna zong an ta, ochaihaiin irchutir hrang inhre no nihai, upahai khomin thupêk hrang inhre no nihai.

²⁷Reng chu beiindongin om a ta, milianhai chu an sabeidong a ta, ram sûnga mihai chu chitnain om zit an ti. An sintho ang zêlin thuanhai ki ti, an irphu ang zêlin hremhai ki ti; khanchu Rengpa chu ki nih ti inhria an ti,” a tia.

Ezekiela 8

EZEKIELA INLARNA HMU VOIHNINA

(8.1–10.22)

Jerusalema millim biakna

¹Sala intâng kum ruk kum, tha rukna tarik ringa nî khan ki in sûnga ki toia, Juda upahai ki makunga an toi lai khan RENGPA PATHIAN kut chu ki chung a khan a om tâka.



² Ki hei enin, mi mei anga inlang hi a oma, a kong hnuai tiang chu mei anga vâ a nia, a kong chung tiang chu dâr irtêk anga irtêk a ni.

³ Khan, kut ni ômtak hin ki michal sîp sama a ni zuang chela, irnêng le irvân kêra Irtha'n a nin dom irsânga. Pathian inlârnaa khan Jerusalema a ni hruaia, tualsûng sûngrîl ual hmâr tianga mikota khan a ni siaa; khatak khan Pathian ningmurtirtu millim chu a oma.

⁴ Khan, irngai ta, Israelhai Pathian roiinpuina kha, vadung phâizôla ki ihmu ang kha ki hmua.

⁵ Khan PATHIANIN ki kuang, “Mihriam nâipa, hmâr tiang so en ro,” a ni tia. Khanchu hmâr tiang chu ki ena, maichâm omna hmâr tiang mikot bula khan Pathian ninginmurtirtu millim chu ki hmua.

⁶ Ama'n ki kuang, “Mihriam nâipa, an sintho hi ni hmu mo? Israel in sûngkuahaiin thil porinche liantak tak an itho hi ni hmu mo? ki hmun irthiang rengata hlataka ki fe irhmang pat theina hrangin. Hi nêka thil porinche ual la hmu nôk zêl ni ti,” a tia.

⁷ Khan, tualsûng tuallai mikota khan a ni hruaia; ki hei ena, banga khan ar ông ki hmu tâka.

⁸ Khan, ama'n ki kuang, “Mihriam nâipa, bang ir-ông hi irzatir ro,” a ni tia. Ki hong irzatirin chu, inkhâr hi a lei oma.

⁹ Ama'n ki kuang, “Lûtin lân, hitaka thilsual porinche an itho hi va en ro,” a ni tia.

¹⁰ Khanchu, ki va lûta, thil intirom tak tak, mirûl illim hai, ramsa illimhai, Israel ibiak millim tinrêng chu banga khan irhîlin a lei chuanga.

¹¹ Khan, an kôla khan Israel in sûngkuuaa upahai laia mi sômsarihai chu an indinga, an laia khan Safana nâipa Jaazania an dinga, mi tinin mirimhoi hâlna an chôi chita, khan mirimhoi hâlna khû chu a suak hut huta.



¹²Khanchu ki kuang, “Mihriam nâipa, Israel in sângkuua upahaiin inrûka thil an itho hi ni hmu mo? Mi tinin mâni chontan chita millim an biak hi, Rengpa’n ni hmu ma, Rengpa’n ram hi a suaksan tâk kêng an ti,” tiin.

¹³“An thil tho intirom nôk ual dang la hmu nôk ni ti,” ki kuang a ti nôka.

¹⁴Hmâr tianga Rengpa in mikota khan a ni hruai nôka, kha khan nuhai an lei chapa, pathiannu Tamuz an lei châa.

¹⁵Ama’n ki kuang, “Mihriam nâipa, hi hi ni hmu mo? Hi nêka intirom ual an itho la hmu ni ti,” a tia.

¹⁶Rengpa khan in sânggrîl uala khan a ni hruaia, irngai ta, Rengpa in irthiang mikota khan tualbuk le maichâm kongkâra khan mi sômhni ringa vêl hi an lei oma. Rengpa in irthiang chu an hnung tiang irnghatin, an hmâihai chu nisua tiang an irheia, nisua tianga misa hong suak chu chubai an lei mûka!

¹⁷Ama’n ki kuang, “O mihriam nâipa, hi hi ni hmu mo? thil porinche an tho tâk hi? Juda in sângkuua ta hrangin thil intirom mo ni ma? ram chu thilsual porinchenan a sipa, ki ninginmurtir hrangin an itho nôk a ni, en ro, an hnâra sûlhna an siaa.

¹⁸Khasikin, kei khomin ningmur takin ki itho hrang a ni; ki mitin irhmâi no ninga, inrenhai viat no ning; inring takin nin samhai khom sian irngai viat no ning,” a tia.

Ezekiela 9

Jerusalem chu hrem a ni

¹Khan, irhâi inring takin ki mikuara a hong khêka, “Khopui enkoltuhai chu koi khôm ro, mi thatna hrang hriamhrei hong chôî ri sehai,” a tia.

²Khan, irngai ta, hmâr tianga om, dâi mikot inchung tak ata mi kiruk an hong, mi tinin mi thatna hriamhrei chu an chôî chita; khan, an laia mi inkhat puan irnêm sil khan, a konga lekha irziakna pentui a chôia. Khan, anni chu an va lûta, dârsen maichâm bula khan an ngîr tâka.



³Khan, Israel Pathian roiinpuina chu, a omna hmuna irthok khan mikot inkhâr kôla khan a hong fea; khatak khan mi puan irnêm sil, a kongka lekha irziakna pentui neitu chu a koi tâka.

⁴Khan, Rengpa'n a kuang, "Khopui chu irfangin lân, Jerusalem chu irfangsuak ro; a sênga thil porinche an thoa poi tia chap tâkhai chu an michala irsinsiana sia ro," a tia.

⁵Ki mikuar inhriata, mi dang kuanga khom, "Ama hnung khan khopui chu irfangin lân, va thathai ro; irhmâi viat loiin, inrenna khom nei loiin.

⁶Putarhai, ruatharhai, dôngmatehai, nâipangtehai, nupanghai chu that fâi zit ro; aniachu mi a michala irsinsiana om chu inzôk unglân; ki tempil rengata mi thatna irphût roi," tiin. Khanchu biak in sênga om upahai chu an that irphut tâka.

⁷Khan an kuang, "In chu porinchetir unglân tuallaihai chu mithi ruak insip ro; fe ta ro," a tia, khan an fea, khopuia khan an that tâka.

⁸Khan, mi an that lai khan, keima chu ki binga mâksanin ki oma, ki hmâi hnuai sikin kin bokhrupa, ki khêka, "O, RENGPA PATHIAN! Jerusalem chungga ni ninginmurna ni insuma hin Israel la om sunhai murdi hi ni ithathai zit hrang ma ni?" ki tia.

⁹Khanchu ama'n ki kuang, "Israel le Juda in sêngkuahai sualna chu a sân a lûminna tak taka, ram chu thisenin a sipa, khopui sêng chu roirêlna uksak loina'n a sipa, Rengpa'n ram chu a mâksan ta, Rengpa'n ite hmu ta ma, an tia.

¹⁰Kei khomin irhmâi no ning, inrenhai viat no ning; an sintho ang takin thuanhai ki ti," a tia.

¹¹Khan, irngai ta, puan irnêm sila lekha irziakna pentui chôitu khan thu chu a hong hrila, "Thu ni ni ipêk angin ki tho zoi tâk," a tia.

Ezekiela 10

Rengpa roiinpuina'n tempil a suaksan



- ¹ Khan, ki hei ena, irngai ta, cherubhai lu chung a vân дума khin safir lung ni ômtak, rêngtoihmun ang hi a hong inlanga.
- ² Mi puan irnêm silpu kuanga khan thu a hrila, “Cherubhai hnuaia thîr sakor ke irhêlhai kongkâra khan fe’n lân, cherubhai kongkâra meihol chu ni kut kianghni’n insip sa ro; khan khopui chung a khan inthekindarh ro,” tiin. Khan, ki mit ngeia khan a va lût tâka.
- ³ Khan, kha mi kha a lût lai khan, cherubhai chu tempil sûnga sim tiang an indinga, insûng chu sûmin a sipa.
- ⁴ Khan, cherubhai rengata Rengpa roiinpuina chu a hong suaka; biak in mikot bula khan a ngîr tâka, in chu sûmin a sipa, tuallai chu Rengpa roiinpuina vâr khan a hong sip tâka.
- ⁵ Cherubhai mitha zâp irhâihai chu Pathian Itinrêng thotheiin thu a hril laia a hnukirhâi angin, tual pên tiang ata khom inhriat thei a nia.
- ⁶ Khan, mi puan irnêm sil kuanga, “Cherubhai hnuaia thîrsakor ke kâra mei so va la ro,” tia thu a pêkin, puan irnêm sil mi chu a va fea, thîrsakor ke bula khan a va ngîr tâka.
- ⁷ Cherub inkhatin, cherubhai hnuaia mei chu a lâka, puan irnêm sil mi kuta a pêka, khanchu a lâka, a suakpui tâka.
- ⁸ Khan, cherubhai chu a mitha hnuaia mihriam kut ang mai hi a hong inlanga.
- ⁹ Khan, ki hei ena, irngai ta, cherubhai inkhat kôla, thîrsakor ke inkhat, cherub dang sîra thîrsakor ke dang inkhat ki hmua.
- ¹⁰ Khan an inlang dâna, an minli khan ir-angna an nei senga, thîrsakor ke inkhat sûnga thîrsakor ke dang om ang mai hi a nia.
- ¹¹ An lônin chu, sîr minlia an fe theia, an fe khomin irhêl ngai mahai; aniachu a maton tak fena na an zuia, an fe’n irhêl nôk ual ngai mahai.
- ¹² An takpuma, an ruangzânga, an kuthaia, an mithahaia, an thîrsakor kea khom mit a sip zita.



¹³Thîrsakor kehai kha chu ki mikuar inhriat ngeia, “Thîrsakor ke irhêl” ti a ni.

¹⁴Khan cherub tin chu hmâi minli an nei senga, hmâi inkhatna chu cherub hmêl a nia, hmâi inhnina chu mihriam hmêl a nia, hmâi inthumna chu kâmkeibaknei hmêl a nia, hmâi minlina chu irmupui hmêl a ni.

¹⁵Khan, cherubhai chu an vuanga, hi hi a ni, Kebar vadung kôla thilhring ki ihmu chu a ni.

¹⁶Cherubhai an fe'n chu thîrsakor kehai chu an sîra an fe saa; khan, cherubhai kha irnêng ata vuang hranga an mithahai an inzarin thîrsakor kehai leh a pâlin an fe sa ngai.

¹⁷Cherubhai an irngamin anni khom an ngîr saa, an vuang le chu an vuang sa ngai, cherubhai thu thuin an iom a ni.

¹⁸Khan, Rengpa roiinpuina chu in inkhâr bul rengata a fesuaka, cherubhai chung a khan a ngîr tâka.

¹⁹Khan, cherubhai khan an mithahai chu an phara, an fesuak lai khan ki mithmu ngêta khan hnuai ata chung tiang an vuanga; an thîrsakor kehai khom chu an sîrhaia khan a om saa; khanRengpa in dâi inkhâr nisua tianga khan an ngîra; khan an chung a Israel PATHIANroiinpuina chu a oma.

²⁰Hi hi Kebar vadunga Israel Pathian hnuai thilhring hmu chu a ni; cherubhai an nih ti kin hriat.

²¹Cherub tinin hmâi minli seng an neia, mitha minli seng an neia; an mithahai hnuai khan mihriam kut ang an nei sa senga.

²²Khan, an hmêl khom Kebar vadung panga ki hmu ang chie kha a ni, an inlang dân le annihai ngêt kha an ni; anni chu intûn takin maton tiang an fea.

Ezekiela 11

Jerusalem thei loi changna

¹Irtha khan a ni hong indomirsânga, nisua tiang panga Rengpa in mikota khan a ni hruaia, mikot bula khan mi sômhni ringa an oma, an laia khan



mipui hruaitu, Azura nâipa Jaazania hai, Benaia nâipa Pelatia hai chu ki hmua.

²Pathianin ki kuang, “Mihriam nâipa, hi mihai hi an ni, thilsual ngaitua suaka, khopuia hin mihai inphûttu an ni.

³Anni’n, ‘Inhai sinna hrang zoro anâi teng tâk hi te, hi khopui hi sa suangna bêl a nia, eini hi a sahai chu ei ni,’ an tia.

⁴Khasikin, thu hrilin lân, o mihriam nâipa, an chungu thu hril ro,” a tia.

⁵Khan, Rengpa irtha chu ki chungu a hong tunga, ki kuang, “Rengpa’n hiang hin a tih ti hril roh. Israel in sêngkuahai, khang khan ni lei ihril ma ni, nin lungrîla thil hong lûthai chu kin hriat.

⁶Hi khopuia hin mi nin ithat intamhai zêla, khataka tuallaihai chu mithi ruakin a sipa.

⁷“Khasikin, RENGPA PATHIANIN hiang hin a ti, mi nin ithathai a sêngu nin inzâltirhai hi, sa chu an ni; khopui chu sa suangna bêl a ni; khannisianlân, a sêng ata lâksuakin om nin ti.

⁸Nin ichi tak, khandai chu nin chungu hong intungtir ki ti, RENGPA PATHIANIN a ti.

⁹Khopui ata nangni lasuak ki ta, nam danghai kuta manin om nin ti, nin chungthu rêl an ti.

¹⁰Khandaiin thi ni nin ta, Israel ramri ngeia khan nin chungthu rêl ki ti; khanchu kei hi Rengpa chu ki nih ti inhriat ta nin ti.

¹¹Sa suangna bêla sa a ihôi loi anga hin, khopuiin nang saninzôk no ni,

¹²Rengpa chu ki nih ti inhre ta nin ti; ki dân siama kalchôi mak chêia, ki thusuak khom zôm ual mak chêi; nin vêla namhai tho dân chu nin zôm ual tâka,” a tia.

¹³Khan, thu ki hril lai khan Benaia nâipa Pelatia chu a thi tâka. Khan ki hmâi hnuai sikin kin bokhrupa, hnukirhâi inringtakin ki khêka, “O RENGPA PATHIAN! Israel la om sunhai hi ni inboipai zit hrang ma ni?” tiin.



Sala intâng hai kuanga Pathian thu'nkung

¹⁴Rengpa thu chu ki kuang a zuang tunga,

¹⁵“Mihriam nâipa,” ni urêng hai, nir chi le ni irkaipui hai ngei le Israel in sêng hai murdi, an rêng in, Jerusalem luahai in, “Rengpa ata fesuk roi, hi ram hi kin ta hranga pêk a ni tâk e,” an tihai kha an ni.

¹⁶Khasikin, RENGPA PATHIANIN hiang hin a ti, “Hlataka nam hai laia nangni ki thonpaia, ram tamtaka nangni ki inthe kindarh nâkin, zoro sôtloite sêng in an hong tungna rama khan an ta hrang in hmun irthiang ni ki ti,” a tia.

¹⁷Khasikin Rengpa'nhang hin a tia, “Nam dang hai ata chu nangni hruaikhôm nôk ki ta, inthe kindara nin omna ram hai ata nangni koikhôm nôk ki ti, Israel ram chu nangni pêk ki ti.

¹⁸Khatak ata hong an ta, thil intirom hai murdi le thil porinche hai murdi chu lâkpai an ti.

¹⁹Anni chu lungrîl hmunkhatin siam ki ta, lungrîl thar pêk ki ti; khan an taksa ata lungrîl lung anga ngar chu la ki ta, an kuanga khan taksa lungrîl irnêm pe ki ti.

²⁰Ki thu inkunga an fe theina hrang le, ki dân hai chu an inkola, an tho theina hrang in; khanchu, ki mihai hong ni an ta, kei khom an Pathian ni ki ti.

²¹Khannisianlân, an innimna le an porinchen a kha lungrîla la zôm hai rêk chu an sual mô chu an chung a inkhumtir ni a ti, RENGPA PATHIANIN a ti,” tiin.

Pathian roiinpuina'n Jerusalem a mâksan

²²Khanchu, cherubhai in an mitha hai chu an inzara, an sîra khan thîrsakor ke hai chu a oma; Israel hai Pathian roiinpuina chu an chung a oma.

²³Khan, Rengparoiinpuina chu khopui lai rengata a hong suaka, khopui nisua tiang sîra om, tâng chung a khan a hong ngîr tâka.

²⁴Irtha khan a nin domirsânga, inlârnaa khan Pathian irtha'n Babulon rama sala intâng hai kuanga khan a nin tunga. Khanchu inlârna ki ihmu khan chung tiang a ni fesun tâka.



²⁵Khan, sala intâng hai kuanga Rengpa'n ki kuanga a nin entir tâk thil hai murdi chu ki hril tâka.

Ezekiela 12

Ezekiela sala intâng hrang angin a suak

¹Rengpa thu chu ki kuang a zuang tung nôka,

²“Mihriam nâipa, mi tehelzong insûngkua, hmûna hranga mit neia hmu loihai, inhriatna hranga mikuar neia inhriat loihai laia om ni ni, mi tehelzong in sûngkua an lei ni ngaia.

³Khasikin, nang mihriam nâipa, sala intâng naa fe hrang angin ni neinun hai intêl infelin lân, khan sîn khovâra an mithmu ngêta sala intâng hrang in fesuak ro, an mithmu ngêta hi hmun ata hmun danga irson ro, tehelzong insûngkua an nina kha, an ngaitua thei nâk mo.

⁴Khan, ni neinun chu sîn khovâra an mithmu ngeia sala intâng fe hranga a neinun a lâksuak angin lâksuak ni ta; khan, sala intâng fe hrang hai tho angin khohloi tiang zoroa an mithmua nang ngei chu fesuak roh.

⁵An mithmua bang chu inverin lân, khataka khan ni neinun chu lasuak roh.

⁶An mithmu ngeia khan ni puak chu ni dârsuama irput ni ta, inthim kêra ni isuakpui hrang a ni. Irnênga lampui ni hmu thei lina hrang in ni mit kha puan leh tuam ro; Israel hai ta hrang in irsinsianaa nang ki isiam hrang a ni,” a tia.

⁷Khan, thu ni ni ipêk angin ki tho tâka; ki neinun chu sala intâng hrang neinun angin sîn khovâra ki lâksuaka, ki kutin bang chu khohloia ki'r-ônga, inthim kêra ki hong lâksuaka, an mithmu ngeia ki dâra ki'rput tâka.

⁸Khan, a tûk zînga chu Rengpa thu chu ki kuang a zuang tunga,

⁹“Mihriam nâipa, Israel insûng, tehelzong insûngkuahai khan ni kuang, Imo ni itho tâk? an itih a ini loi mo?



¹⁰A kuanga khan RENGPA PATHIAN khan hiang hin a ti. Hi thu inpuang hi Jerusalem hruaituhai le Israel insûngkua pumpui, an omna mihai chungthu hrang a ni.

¹¹Nin ta hrangin lei entîrna ki ni hi, ki iti ang hin an chung a tih ni a ti; thonpaiin, sala intâng hrangin, la fe an ti, ti roh.

¹²Khan, an laia hruaitu om khan inthim hnuaia koiin irput a ta, fesuak a ti. Khataka pêlsuakna hrangin bang chu inver ir-ông an ti, a mitin ram chu a hmu lolina hrangin a hmâi chu tuam khak an ti.

¹³Ama chu ki lênin khum ki ta, ki châng a khit a ti: Kaldai rama Babulon-a khan hong hruai ki ta, kha khan thi hrang ni khom sianlân, hmu chu hmu no ni.

¹⁴Ama changpui hranga a kôla om ngaihai le a changpui hranga a hrungtuhai murdi ram tina irthekindarh an ta, khandai irlekin om ki ti.

¹⁵Khan, namhai laia inhnotsuak ki ta, ram tina ki inthekindarhai tika khan Rengpa chu ki nih ti inhriat an ti.

¹⁶Aniachu, khandai hai, châm hai, hripui hai inlêngtir ki ta, kha laia khan mi tômte zôk an ti; khahai khan an lei hongna rama namhai kuanga khan an porinchena murdi chu an inpuangna'n; khan kei hi Rengpa chu ki nih ti inhriat an ti," a tia.

Ezekiela khur irsinsiana a ni

¹⁷Khan, Rengpa thu chu ki kuang a hong tung nôka,

¹⁸"Mihriam nâipa, ni bu kha inthing pumin fa ro, ni tui chu kamanga inthing pumin in ro;

¹⁹khan, kha rama mipuihai kuanga khan, RENGPA PATHIAN khan, Jerusalema omhai chungchâng a le Israel ram chungchâng a hin hiang hin a ti: 'An buhai chu inret takin fâk an ta, an tui chu kamang takin in an ti, a ram chu a sûnga omhai sual porinchena sikin a sûnga thil om murdi ata ramchitin om a ti.



²⁰Khan, mi lêngna khopuihai chu siat chit a ta, a ram chu ramchitin om a ti. Khanchu Rengpa chu ki nih ti inhriat an ti,' tiin hril ro," a tia.

Thu pomrua le thu lômom loi

²¹Khan, Rengpa thu chu ki kuang a zuang tunga,

²²"Mihriam nâipa, Israel rama hin thuvâr tôi nin inei hi itina ma ni? 'Nikhua a hong sôtin inlârna tina a rongin a om mai ngai,' nin iti hi.

²³Khasikin RENGPA PATHIAN khan hiang hin a ti: Hi thuvâr tôi hi kin boipaia, Israel rama thuvâr tôia hmang ta ngai mahai; sùn chu anai tâka, inlârna tinrêng tung indik nî hrang chu, tiin an kuanga hril lem roh.

²⁴Israel insûngkua laia inlârna zuang tung rêng rêng le tasân sa lama hrilinsiatna rêng rêng om ta no ni.

²⁵Rengpa chu ki nia, hril ki ta, ki thu hril chu tung zôi zel a ti, khêkin hril ni no ning. O tehelzong insûngkuahaio, nin dam lai ngêt hin thu hril ki ta, ti hi RENGPA PATHIAN thusuak a ni," a tia.

²⁶Rengpa thu chu ki kuang a zuang tung nôka,

²⁷"Mihriam nâipa, irngai ro, Israel insûngkuahaia mi khan, 'Inlârna a hmuhai chu nakana mi hrang an nia, a lei hril diamnahai khom hlataka mi hrang a ni,' an iti a ni.

²⁸Khasikin an kuang, RENGPA PATHIAN khan hiang hin a tia: 'Ki thu rêng rêng hi khêkin hril ni no nia, ki thu hril murdi chu tung irkipin om zêl a ti,' ti hi RENGPA PATHIAN thusuak a ni, tiin hril ro," a tia.

Ezekiela 13

Deipu dol chungchânga thu hril

¹Khan, Rengpa'n thu chu ki kuang a zuang tung nôka,

²"Mihriam nâipa, Israel deipu, mâni lungrîl suak ata thu hril hmanghai chungha khan thu hrilin lân, Rengpathu chu irngai roi,

³RENGPA PATHIAN khan hiang hin a tia: Deipu invêt, mâni ngaidân zuia, ite hmu loihai chu an chung a rik e!



- ⁴O Israel, ni deipuhai chu rama sihal ang dên an ni ta.
- ⁵Rengpa sîna irdoinaa inding ngam hrangin a râl chi lai irtong ngam loiin, Israel insûngkuahai hrung le rakhâl hrangin kâmnang mak chêi.
- ⁶Rengpa thusuak a ni titu khan ite ni loi le lei hrilna milak an changa, Rengpa itîr an ini loi rêng rêng a ni; an thu chu a ini ngêt hrang angin mihai an in-iamtirhaia.
- ⁷Inlârna zuang chum mai nin hmu'n thu leihrilna dik loi nin ihril mo ni ma?Rengpa thusuak a ni, nin la ti nôk maia, keiin khaang khan ite lak hril ma unga.
- ⁸Khasikin RENGPA PATHIANIN hiang hin a ti: Ite ni lo loi nin hrila, milak ma mai nin hmu sikin, irngai roi nangni doi hrang ki ni, ti hi Rengpa thusuak a ni.
- ⁹Khan, ki kut hin thu dikloi hriltuhai le deipu tep loi ma mai hmutuhai chu doi ki ta, ki mihai inkhômnaa khan om sa thei no nihaia, Israel insûngkuahai irhming irziakna bua khan irziakin om no nihai; Khanchu RENGPA PATHIAN chu ki nih ti inhriat nin ti.
- ¹⁰ Irtharngamna om loa, 'irtharngamna a ni e,' tia ki mihai an hruai insuala, irngeina om maka, mi banghai an siana, khan deipuhai chu hongin a chung kha an hong nâl inngoi zuaka.
- ¹¹An banghai kha chim hrang a ni ta tiin deipuhai kha inhrihai roh. Rotui zuan thotir ki ta. Irialhai indêngtir ki ta, kèllaiherin sêm inzuan ki ti.
- ¹²Khan, irngai ro, bang chu chim zoiin, an iti loi hrang ma ni?
- ¹³Khasikin RENGPA PATHIAN khan hiang hin a ti; ki ninginmur phâivuapui irkhêl takin insiat zit ki ta, ki ninginmurin ropuivânsâng zuang tho a ta, ki ninginmurin irial irkhêl takin bang zuang insiat zit a ti.
- ¹⁴Khanchu, bang an inâl inngoi kha insim ki ti, irnêng dênin zuan thâk ki ti, khanchu a lungphunhai khom inlang zit a ti. Khan, a bang chim a ta, a bang chima khan irhmang chitin om nin ta; khanchu Rengpa ki nih ti inhriat nin ti.



¹⁵Hiang hin bang chung a le a nâl inngoihai chung a ki ninginmurna insum ki ta; khan, ‘Bang chu om ta no ni, a’rbeltuhai khom om viat ta no nihai.

¹⁶Kha kha Israel deipu Jerusalem chungthu hrila, irtharngamna om loa, irtharngamna irhmutirtuhai ngei kha, om ta no nihai, ti hi RENGPA PATHIAN thusuak a ni.

Nupang dol chungchâng leihrilna

¹⁷Khan, nang mihriam nâipa, ni mihriam nâinuhai, an lungrîla irthoka thuhrituhai, ni mihai nâinuhai tiang irngatin lân, anni doi lamin thu hril roh.

¹⁸RENGPA PATHIAN khan hiang hin a ti: Nupang, mihai bâna thil inbuntir le mi hringnahai chel bêna hranga mi lian mi chîn lu irkhûna insuituhai kha an chung a rik e! Mâni hringna hrangin ki mihai hringna nin ichel hrang mo?

¹⁹Barli tômtê le bai tiam hmu hranga thi loi hrang inthotir hrang le hring loi hrang inhringtir hrangin nin milak insîr hi mihaiin an iam sikin ki mihai laia ki’rhming nin porinchetir a ni.

²⁰Khasikin, RENGPA PATHIAN khan hiang hin a ti a ni: “Irngai ta roi, mi hringna, vâ anga man hranga nin thil inbuntirhai chu phôipai zit ki ta, mi nin imanhai hringna chu insua zit ki ti; vâhai anga nin man hranghai hringna ngei chu.

²¹Nin lu irkhûnahai khom chu inpotthêr ki ta, ki mihai chu nin kut ata insua ki ta, nin man thei hrangin nin kuta om ta mahai; khanchu Rengpa chu ki nih ti inhriat nin ti.

²²Keima beiindongtir ni maka, mi felhai lungrîl sunin nin innatir sik le mi sualhai chu hring dama la omna hranga an sualna lam ata irlet loina hrangin mi sual kuthai chu nin inhrâta.

²³Khasikin, ite ni loa, thu leihrilna dik loi mani chu hmu viat ta no chin ni; khan, ki mihai chu nin kut ata sansuak ki ta, Rengpa chu ki nih ti inhriat an ti, a ti ti’n hril ro,” a tia.

Ezekiela 14



Pathianin millim biak a dem

- ¹Khanchu Israel upa senkhathai chu ki kuanga an hong, ki kôla an toia.
- ²Khan,Rengpa thu chu ki kuang a zuang tung tâka,
- ³“Mihriam nâipa, hi mihai hin an millimhai makunga an سوالنا irtetna chu an sia a ni; keima'n sâмна ki la ipêk hrang an la isôn ma ni?”
- ⁴Khasikin, an kuang thu hril inlân, RENGPA PATHIANkhan hiang hin a ti a ni: ‘Israel insûngkuaa mi tinin an lungrîla an millimhai an lâk lûta, an millimhai makunga an سوالنا irtetna an siaa, deipu kuanga hong murdi chu kei Rengpa hin an millim tamzia ang zêlin sâmhai ki ti;
- ⁵Israel insûngkuahai chu an millim sika an ni irheisan tâk sikin an lungrîl tak ki man theina hrangin zuang sâmhai ki ti.
- ⁶“Khasikin Israel insûngkuahai kuanga, RENGPA PATHIAN khan hiang hin a ti: Hong kêr unglân, nin سوال porinchena murdi chu hong irheisan ta roi.
- ⁷Israel insûngkua laia mi tukhom ni sian, mikhual Israel rama omhai mani, keima nir heisan, an lungrîla an سوال irtetna kha sia sûngin, an chungchânga nir don hranga deipu kuanga hong chu kei Rengpa ngêt hin sâmhai ki ti.
- ⁸Kha mi kha chu doihai ki ta, ki mihaiin enbîka an hril insiathai theina hrangin ki mihai lai ata inboipaihai ki ta; khanchu kei hi Rengpa chu ki nih ti nin hriat an ti.
- ⁹Khan, deipu'n inthêma omin thu hril sianlân, kei Rengpa hin deipu chu ki ihuang a nia, a chungka khan ki kut irlek ki ta, ki mi Israelhai lai ata inboipaihai zit ki ti.
- ¹⁰Khan, an سوالنا man chu anni ngêtin pêl an ta; deipu سوالنا chu ama kuanga zongtu سوالنا ang ngêt chu ni a ti.
- ¹¹Israel insûngkuahai chu keima rengata an pêt ta loina hranga, an insiatnahai murdia an porinche ta loina hrangin, ki mihai an ni theia an Pathian ki ni theina hrangin RENGPA PATHIANIN a ti,” a tia.

Nova, Daniela le Joba



¹²Khan, Rengpa thu chu ki kuanga a zuang tunga,

¹³“Mihriam nâipa, a ram mihaiin insiatna thil thoa, ki chung a thil insuala, keiin ki kut inlekin, an bu, hringna bul chu kin siata, an chung a châm intungtira, mi le sahai ki zuang inboihaiin,

¹⁴hi mi pasal thum Nova, Daniela le Joba-hai ngei khom hi hong om sahai sianlân, an felna'n anni hringna vai an inzôk hrang a ni, ti hi Rengpa Pathian thusuak a ni.

¹⁵“Ram sahrânghai an ram kin fe suaktira, ram chu an inpon chitin, lei sêhaiin, ramsa sika mi tûte fe ngam loiin omhai sian;

¹⁶hi mi inthumhai hi omhai sian khom, RENGPA PATHIAN khan, ‘Kei hi ki hring sâng an nâinuhai, an nâipahai chu sansuak no nihai; anni vai saninzôkin om an ti, ram chu inthim valin mâkpai ni a ti,’ a tia.

¹⁷“Aninole, kha rama khan, khandai zuang irlek ro, ki ti'n chu mi le sa murdi chu that zit ni a ti,

¹⁸hi mi pasal inthumhai hi omhai khom sian, a hringa ki hring sâng chu, ti hi RENGPA PATHIAN thusuak a nia, an nâinuhai an nâipahai sansuak thei no nihai, anni hringna vai inzôkin om an ti.

¹⁹“A ni no le, kha rama khan, hripui inlêngtir ki ta, mihriam le ramsa inboi hranga, thisen insuaa ki ninginmurna chu ram chung a ki zuang buakin,

²⁰Nova, Daniela le Joba hai lua khom hi lei om nohai sianlân, kei Rengpa Pathian hring ki ni, ti hi RENGPA PATHIAN thusuak a ni, an nâinu mani, an nâipa mani sansuak no nihaia, an felna'n anni hringna vai sansuak thei chak an ti.

²¹ RENGPA PATHIANkhan hiang hin a tia: Jerusalem chung a ki roirêlna natak tak minlikhandai hai, châm hai, ram sahrâng hai, hripui hai, mihriam le ramsa hai inboipaihai zit hranga ki zuang tîr irkip tika chu itin takin mo a iom hrang na!



²²Aniachu, irngai ta, khataka omsun hruaisuak hranghai chu mâkin om an ta, an nâinuhai le nâipahai khom; irngai ta, nin kuanga hong suak an ta, an omdân le an sinthohai hmu nin ta, khan, Jerusalem chung a thil saloi ki zuang intung thua khan irtharngamin om nin ta, a chung a ki zuang intung tâk murdi thua khom.

²³An omdân le an sinthohai nin hmu tika khan irtharngamin om an ta; a chung a ki sintho tâk murdi chu a san tak nei loiin ki itho loi ti inhriat nin ti, ti hi RENGPA PATHIAN thusuak a ni,” tiin.

Ezekiela 15

Grep hroi chongirkhek thu

¹Khan, Rengpa thu chu ki kuang a zuang tunga,

²“Mihriam nâipa, rampui hnuaia thing laia grep hroi chu thing danghai nêkin imo a nia?

³A kung thil siam hranga hmang a ini ngai ma ni? Bêlbûr târna’n khom tu’n mo a hmang ngaia.

⁴Irngai ro, meia an tuaa, A hmor taka ar ala. A lai chu a kâng lûta, Kâmnangna a la inei hrang ma ni?

⁵Irngai ta, a kâng mân khom khan i siamna’n khom kâmnang ma, A kâng hnunga len vâng chu kâmnangna a la iom hrang ma ni?” a tia.

⁶Khasikin, RENGPA PATHIAN khan hiang hin a ti: “Ramhnuai thing laia grep hroi hai hranga meia ki itua mai ang khan, Jerusalem luatuhai chu siam ki ti.

⁷Anni chung a ki hmâi irngat ki ta; mei ata fesuakhai khom sian mei ngêtin anni chu kâng irhmang ngê a ti. Meia khan anni tiang ki hmâi ki’rngat tikin Rengpa chu ki nih ti nin hre ta an ti.

⁸Khan, pualoina thil chu an tho sikin, ram chu insiat zit ki tih ti hi Rengpa thusuak a ni e,” tiin.

Ezekiela 16

Jerusalem iamom loina



- ¹Rengpa thu chu ki kuang a zuang tung nôka,
- ²“Mihriam nâipa, Jerusalem chu intiromnahai inhriat suaktirin lân, a kuang,
- ³RENGPA PATHIAN khan Jerusalem kuanga khan hiang hin a ti, ti ro: Ni suakna ram le ni’rzirna ram chu Kanaan mihai ram a nia, ni pa chu Amor mi a nia, ni nu chu Hit mi a ni.
- ⁴Khan ni suakna thua khan ni suak laiin ni milâi hrui ât ni maka, tuia infâi hrangin tuia irsiltir khom ni mak che; michi leh innôt khom ni mak che, puan luma tuam khom ni mak che.
- ⁵Ni chungang nang inren hrangin le hiang thilhai nang tho pe hrangin, mi tukhomin nang lunginkham mahaia; sahrok kêra inhnotsuak ni nia; khang khan ni suak nî khan ni mi nitna chu porinche’n a hong om tâk.
- ⁶Khan, ni kuanga ki hongin thisen irpol zuakin nang ki hmua, khangang thisen kêra ni iom kha, ni kuang, thisena om khomin lân “Hring ro, dam suak hrang ni ni” ki tia.
- ⁷Ramhnuai hloisûl hloi hnâ angin nang ki don inliana, ni hong irsôn hlut hluta, ni hmêl khom a hong sa tiaia, ni’rhnutehai a hong oma, ni samhai khom a hong saa, khannisian korongboi ang mai ni la ni.
- ⁸Khan, ni kuanga ki hongang nang ki ena, irngai ta, inditom ni ni tâka, ki puan ki lâka, ni korongboi chu ki’rkhû tâka: khanchu ni kuang irkhâmna ki siama, thuthunga ki lûtpui tâka, ki ta tak ni ni tâka, ti hi RENGPA PATHIANthusuak a ni.
- ⁹“Khanchu, tuiin nang ki’rsiltir tâka, a ni, ni thisen chu ki’rsunfâi invâra, sahriak nang ki’rpoltir tâka.
- ¹⁰Irvôna puanin nang ki tuama, savun kekok satak nang kin buntira, puan irnêm leh nang ki tuama, puanirlung nang kin khumtir tâk a ni.
- ¹¹Irvôna thilin nang ki’rvôtira, ni kuta bânhril hai, ni hroka rângachak zîngziri irthei hai,



¹²ni hnâra hnârbet hai, ni mikuara bômzoi hai, ni lua rênglukhum satak tak haiin nang ki'rvôtir tâka.

¹³Khanchu rângachak le sumrua irvôtir ni ni tâka, ni puan diarhai chu puan irnêm tak le puanirlung le puan insui satak a nia; ni bu nêk chu bai tiam indi le khuaihlutui le sahriak a ni, ni hmêl a hong satak taka, rêngnu ang khom ni hong chuk a ni ta.

¹⁴Ni sa tâk sikin, nir hming chu nam tin laia an thangsuak tâka; ki roiinpuina tuamin ni hong irkip ta, ti hi RENGPA PATHIANthusuak a ni.

¹⁵“Khannisian ni hmêl satna chu ni'riampui hraia, ni'rhming inthangna sika khan ni hura, notizuara ni hong om tâka, mi tukhom ni kuanga hong tâk murdihai chungha khan ni hrâtna chu ni phala; ama ta ni inih tâk a ni.

¹⁶Ni puan silhai chu ni khekin, irbôl hmunhai chu ze dang dangin ni'rvôtira; a chungha khan notizuarna thil chu ni tho tâka, khang rêng rêng kha la ni ngai mah.

¹⁷Ki rângachak le ki sumru bêlbûr satak tak nang ki ipêk kha ni lâka, mihriam illim siamna'n ni hmanga, ni hurpui tâka.

¹⁸Ni puan sil insui satak takhai chu ni lâka, anni ni tuama, ki sahriakhai le mirimhoi chu millim makunga ni dara.

¹⁹Bai tiam nang ki ipêk tâk khom kha bai phit indi satak le sahriak le khuaihlutui leh nang ki infâ ngaihai kha an makunga mirimhoia hâl hrangin ni siaa; hi hi a hong ni tâk, ti hi RENGPA PATHIAN thusuak a ni.

²⁰Khakhêla khom, ni nâinu ni nâipa, ni inei pehai chu an kuanga irbôl hranga hmang zit hrangin ni pêka; ni hurna hi thil irnêp a ini ma ni?

²¹Ki nâihai ni thata, meipua pai lûtin an kuang ni inhlanhai hi?

²²Intirom ni nina le ni hurna murdia khan nâipang ni ni laia, korongboia ni iom le ni thisena porinchea ni om lai kha ni inhriat ta loi a ni,” a tia.

Jerusalem notizuar



²³Khan, hi ni sualna murdi hnunga khom, hi hi a hong nia, (ni chung a rik e! a rik e! RENGPA PATHIAN khan a ti).

²⁴Hmun inlârhai millim biakna le irzuarna hrang ni siama.

²⁵Lampui lian tina hmun inlârhai chu ni siama, ni satna chu intiromnaa ni siama, mi a hong murdi kuanga ni râi a fâna, ni hurna chu nin langtir ual tâka.

²⁶Ni tualbôm, Aigupta mi leh khan uire nin lei ni tâka; ni ninginmurtir hrangin ni hurna chu nin liantir ual a ni.

²⁷Khasikin, irngai ro, ni chung a ki kut irlek ki ta, ni bu nêk ngai pangai chu irkômmtir ki ta, nangma nang hnôltu Filistia nâinu, ni hur dân inzakupui tak tak ngaitu kuanga khan pesuak ki ti.

²⁸Mumalboia, Assuria mihai kuanga khom notizuara ni lei irsiam tâka; a ni, an kuang notizuar thil chu ni lei tho khomin ni milung la chuk mah.

²⁹Kanaan rama, Kaldai mihai kuanga ni hurna ni la insua zêla, la khop ual mak che.

³⁰Ni lungrîla inzakna nei viat mak chea, ni nunzia chu nupang tukullian soal tak thil ni thoa, ti hi RENGPA PATHIAN thusuak a ni.

³¹Tuangpui lam rengata inlangna takhaia millim biakna hmunhai ni siama, lampui lianhai khan ni hmun irsânghai chu irzuarna hmun ni neia, khannisian, notizuar poisa innang hi ni mak che.

³²Mâni pasal lungthung loa uiresana, mi dang daih pom tâk ang hi ni ni.

³³Notizuarhai murdi kuanga khan mi'n thilpêkhai an pêk ngaia, nang rêk chu ni lungthunghai murdi chu thilpêkhai ni pêk ngaia, a nuampuhai kuanga ram tin ata hong an ta, nang an zâlpui theina hrangin ni hrilhaia.

³⁴Khan, nang chu notizuar danglam tak chu ni ni, tukhomin notizuara om hrangin nang siam mahai. Nangma'n a man ni pêka, mi tûte'n a man an ipêk loi hi ni danglamna chu a ni.

Jerusalem chung a Pathian roirêl



³⁵Khasikin, o mi hurnu, Rengpa thu chu irngai roh.

³⁶RENGPA PATHIANINhiang hin a ti: “Ni lungthungtuhai kuanga ni irzukna zâra khan ni korongna chu hmusuak a ni, intir ni omna chu bunsuak a ni sik le; ni porinchena millim murdihai le an kuanga ni ipêk tâk ni nâihai thisen sikin,

³⁷irngai ro, ni irditpuihai murdi chu koikhômhai ki ta, inhoitaka ni lei ilêngpuihai murdi le, ni lei irditpui tâkhai murdi le, ni ihmumâkhai murdi le kil tina mi, ni kuang hong hruaikhôm ki ta, ni korongna murdi an hmu theina hrangin ni korongna chu inlangtir ki ti.

³⁸Khan, nupang pasal irsena, mâni nâi thisen insuak chungthu an rêl angin ni chungthu rêl ki ti; ninginmurna le ninginthikna chu ni chungga zuang intungtir ki ti.

³⁹Khan, anni kuta pêk ni ni ta, ni hmun inlârhai chu insiat an ta; ni hmun irsânghai insimpai an ta; ni puan silhai hlîkpai an ta, an irvôna thil hlulai chu lâkpai zit an ta; khanchu, korongboi le rongralin om rak ta ni ti.

⁴⁰Nangma chungga inkhômpuina nei an ta, lungin nang dêng an ta, khandaiin nang irchan chit an ti.

⁴¹Ni inhai chu meiin hâl an ta, nupang tamtak mithmua ni chungga roirêlna intung an ta, ni ihur hi inboi ki ta; ni irditpuihai chu thilpêk pe nôk thei ta no chi ni.

⁴²Khanchu ki ninginmurna ni chungga tâk a ta, ki ninginthikna chu boi ta a ti, dâihrekin om ta ki ta, ki ninginmur ngai ta no ni.

⁴³Thoibop ni chang lai zorohai kha inhriat mai ta mak chea, aniachu hiang thilhaia hin ki ning nin murtir tâk sikin, irngai ro, ni nunzia ang takin, ni chungga intungtir ki ti, ti hi RENGPA PATHIAN thusuak a ni: Khan, ni porinchena tinrêng belsa'n hi ni hurna hi tho ta no chi ni,” a tia.

Nu ang takin, nâinu ang takin

⁴⁴“Irngai ro, hi thuvâr tôi hmang murdi hin hi thuvâr tôi hi hmang an ti, ‘A nâinu khomin a nu angin a om,’ ti hi.



⁴⁵Nang chu ni nu, mâni pasal le nâihai donsui loitu nâinu kha ni nia, nang chu ni zuarpuihai tiang khan, mâni pasal le nâihai donsui loitu zuarpui ni ni: ni nu lak Hit mi a nia, ni pa lak Amor mi a ni.

⁴⁶Khan, ni zuarpui ulian ual chu Samaria, ni vei tianga om ngai kha ama le a nâinuhai leh an ni; ni zuarpui nâipang ual lak chu, ni chang tianga om ngai kha Sodom le a nâinuhai an ni.

⁴⁷Khannisian, an omdânhai chu zui mak chea, an porinchenahaia khan ni milung chu chuk maka, aniachu zoro sôtloite sângin ni omdân tinrênga anni nêkin ni siat uala.

⁴⁸RENGPA PATHIAN thusuakin hiang hin a ti: ‘Pathian hring ki ni,’ ni zuarpuinu Sodom le a nâihai khomin an itho ngai loi, nang le ni nâihaiin an itho tâk hi.

⁴⁹Khan, ni zuarpui Sodom sualna chu hi hi a ni: omlianna hai, fâk nêk khop hrai hai, ama le a nâinuhai inhoihôkna mai mai thohai an nia, mi inriang hai le fâk nêk irsamhai chu changpuihai mah.

⁵⁰Khan, mi omlian tak an nia, ki makunga thil porinche thohai an ni; khanchu sa ki iti ang takin anni chu kin boipaihai zita.

⁵¹Samaria khomin nangma soal ni tho chimrip khom tho ma, anni nêka soal porinche lian ual ni thoa, khasikin intiromna ni itho murdi khan ni zuarpuihai chu a felin ni inlangtir tâk a ni.

⁵²Ni zuarpuihai dik uala ni inlangtir sikin nang ngêtin ni mualinphoina soal chu ni ipêl hrang a ni, anni nêkin thil porinche lian ual ni thoa, ni sualnahai sikin anni chu nangma nêkin an ifel ual a ni; ni zuarpuihai fel uala nin langtirnaa hin nang chu inzak le mualinphoi tuangin om ro,” a tia.

Sodom le Samari indingsuak

⁵³Khan, “Sodom le a nâihai chu indingsuak ki ti; Samari le a nâihai khom indingsuaktir nôk ki ti; anni pâl chanpui, nang khom nang indingsuaktir ki ti.

⁵⁴An ta hranga irtharngamtu ni lei nia, ni thil lei tho tâkhai murdia khan inzaka, ni mualinphoina chu ni pêl theina hrangin.



⁵⁵Ni zuarpui Sodom le a nâinuhai, Samari le a nâinuhai chu an omdân matona angin om nôk an ti; nang le ni nâinuhai khom matona nin omdân angin om nôk nin ti.

⁵⁶Ni sualna hmusuak a ni mâna, ni omlian ni tho laia khan ni zuarpui Sodom chu khosâl hnôkna ni itho mo ni ma?

⁵⁷Atûn chu Suria nâinu le a vêla mi murdi, Filistia nâinuhai ni vêla nang hmusittuhai hrilsiattu hong ni tâk hi.

⁵⁸Ni hurna le ni porinchena hrema ni'rput zêla," ti hi Rengpa thusuak a ni.

Kumkhua thuthung

⁵⁹Khanchu RENGPA PATHIAN khan hiang hin a ti: "Thuthung insiatin, chonginkung nir ngaisak loizia ang zêlin ni chung a ki itho hrang a ni.

⁶⁰Khannisianlân, ni nâiin pang laia ni kuanga ki thuthung chu kin hriat maia, ni kuanga kumkhua thuthung siam ki ti.

⁶¹Khanchu ni zuarpuihai, ni u le ni sanghai ni pom hnunga ni omdân hai hong inhriatsuak ni ta, lan zak ni ti: anni chu ni nâinu ta hrangin pêk ki ti, ni thuthung sika khan chu ni loiin.

⁶²Ni kuanga ki thuthung kin dettir tâka, Rengpa ki nih ti inhriat ta an ti.

⁶³Ni sintho murdihai ki ngaidam zit tika inhriat ni ta, ni hmâimôk rup a ta, inzak sikin ni bâi a kak thei ta lina hrangin," ti hi RENGPA PATHIAN thusuak a ni.

Ezekiela 17

Irmupui le grep hrui chongirkhek thu

¹Khan, Rengpa thu chu ki kuang a zuang tunga,

²"Mihriam nâipa, Israelhai kuanga thukhir le chongirkhek thu hril ro,

³RENGPA PATHIAN khan hiang hin a ti: Irmupui roiinpui tak, mitha roiinpuitak le irmei sei takhai nei, mula sip, ze dang dang nei chu Lebanon-ah khan a hong a, sidar thing rêla khan a chuanga;



⁴a rêl vîktak chu an khiaka, bepâr thôna rama a vuangpuia, bepâr thôna khopuia a phun tâka.

⁵Khan, kha rama thing chiak chu a lâka, irnêng satna hmuna a phuna, tui tamtak kôla khan a phun tâka, a laia a'rsôntir hrangtu tui khom a om maia.

⁶Khan, a hong irsôna, grep hrui irhnuai taka irzâm a hong ni tâka, a ônhai chu irmupui tiang a'rzâma, a'rzunghai chu irnêng inthûk taka khan a lûta, khanchu grep kung a hong nia, a ônhai a hong inchera, a hnâ chu a hong suak tâka.

⁷Irmupui lian tak dang a om saa, mitha roiinpui tak le mul tamtak nei a oma; khan irngai ro, hi grep kung hi ama tiang a zu irzâma; a phunna hmun rengata khan ama tiang a ônhai an cher suak tâka, ama chu tuiin a buak mai theina hrangin.

⁸A ônhai a hong suaka, grep satak a ni theina hrangin tui tamtak kôla irnêng satnaa phun a ni.

⁹“RENGPA PATHIAN khan hiang hin a tia: A ihong lian thei hrang ma ni? A hnâ incher tharhai murdi chu a thêh theina hrangin a'rzunghai chu phôi dokin, a rahai chu sâtthâk loi hrang ma ni? a'rzunghaia phôidoktu hrang mi tamtak le sinthotheina nei lian tak khom nang ual no ni.

¹⁰A ni, irngai ta, phunin om sian khom a hong ilian thei hrang ma ni? nisua tianga phâivua'n a hong sêm tika chu, a ithêm zit loi hrang mo? A môngna hmuna irthok ngêta khan thêh a ti,” tiin.

Chongirkhek thu hrilfiana

¹¹Khan Rengpa thu chu ki kuang a zuang tung nôka,

¹² “Tehelzong insûngkuahai kuanga khan hril ro, hi thil omzia hi an inhriat loi ma ni? Hril ro, irngai roi, Babulon rêng chu Jerusalem-a a hongga, an rêng le hruaituhai chu a manhaia, ama kuanga Babulon-a a hruaia,

¹³rêng sûngkua laia mi inkhat a hruaia, ama leh thuthung a siampuia, iamom taka om hrangin khomâk a'rsâmтира, a rama mi lianhai chu a hruai paihai zita;



¹⁴an lalna ram kha a hong irhnuai, a bingin an dingsuak thei lolina hrangin, le a thuthung kha an vong nôk mai theina hrangin.

¹⁵Khannisian, Judai ram rêng chu tehelin, sakorhai le sipai tamtakhai a hong tîr theina hrangin Aigupta rama palai a tîra. Hlochukin mo om ni! khaanga thotu khan a irsaninzôk thei hrang ma ni?

¹⁶“Pathian hring ki ni,” ti hi RENGPA PATHIAN thusuak a ni. “Inlaltak, rênga siamtu, a chonginkungna hai hmusit le a thuthunghai an siat sikin kha rêng kha Babulon ngêta thi a ti.

¹⁷Irdoinaa mi tamtak thatna hrangin pil bun inpônghai le kul bang an siam tena chu Faroa sipai hâitakhai le a pôl roiinpui tak khomin ite san thei ta no nihai.

¹⁸A thuthungna le a chonginkungna chu an siat tâka; chong an kung hnungin hi thil murdi hi a la tho nôk sikin, zôk ta no ni,” a tia.

¹⁹Khasikin RENGPA PATHIANIN hiang hin a ti: “Pathian hring ki ni, ki chonginkungna hmusita, ki thuthung vong indik hranga ki iti kha an siat sikin ama chu hrem ki ti.

²⁰Lên dâp ki ta, ki chângâ khan khit a ta, Babulon-a hruai ki ti. Khanchu ki chungâ siat a ithôna sikin ama chu hrem ki ti.

²¹Khan, a sipai hrâttak takhai chu irdoinaa chem leh that zit ni an ta, a hringa la zôkhai chu ram kil tina inthekindarh zit an ti. Khanchu kha hriltu kha kei, Rengpa ki nih ti nin hriat an ti,” a tia.

Pathian chonginkung sabei roh

²²RENGPA PATHIANIN hiang hin a ti: “Sidar thing irsâng tak rêlvîk chu la ki ta, a dôn irzîk kha khiak ki ta, Keima ngêtin tâng irsâng chungâ khan phun ki ti.

²³Israel tâng irsâng khan phun ki ti, a ônhai hong zap a ta, hong ra a ti. Sidar thing roiinpui tak la ni a ti. a hnuai khan chunglêng va chi tinrênghai chu om an ta, a ôn hnuai dâihlîmhaia khan om an ti.



²⁴Khanchu, kha rama thing murdihaiin, kei RENGPA PATHIAN hin thing irsânghai chu irhnuaitira, thing irhnuaihai chu irsângtira, thing hringhai chu inchârtira, Thing chârhai chu inhringtir ki ti, ti inhriat an ti. Kei Rengpa hin ki hril tâk chu, ki tho ngêt ngai a ni,” a tia.

Ezekiela 18

Mimal mophurna

¹Rengpa'n a ni chongpui nôka:

²“Israel ram chungchânga hi thuvâr tôi an ihmang, pahaiin grep thûr an fâka, an nâihai ha a kim, ti hi itina mo a ini?

³“Kei hi Pathian hring ki ni, Israel-a, hi thuvâr tôi hi hmang nôk le hril nôk ta no nihai,’ ti hi RENGPA PATHIAN thusuak a ni.

⁴Irngai roi, hringna murdi hi ki ta zit a ni, pa hringna ki tah a ini angin, nâipa hringna khom ki ta a ni; thil tho insualtu murdi thi an ti.

⁵Khannisian, mi'n sin sa a thoa, irthiang le dik vai a thoa,

⁶irbôlna hmuna hruaithêna bu fâk loia, Israel insûngkuahai millim chu biak loia, a tualbôm dôngma chungma khom thilsual tho loia, nupang fel loi lai khom tôn loia,

⁷tûte chungma thilsual tho loia, thil pûktu'n a neinun bândaa a isia khom pe kîr nôkin, phîngchâmhai kuang fâk hrang pêkin, puan sil diarkai boihai chu silkai pehaia,

⁸a pung omin sum le puan khom inpûktir loiin, a pung khom la ual loia, thil saloi tho hranga a kut insum thei mi, mi le mi kêra roirêlna dik tho ngaia,

⁹ki thupêkhai zôma, ki dânhai vong insa chu mi diktak a ni, hring ngêt a ti,” ti hi RENGPA PATHIAN thusuak a ni.

¹⁰Khannisian kha mi khan, inrûk tho ngai mi le mi that ngai mi nâipasal nei sianlân,

¹¹kha nâipasal khan a pa itho ang tho nuam loiin, irbôlna hmun, hruaithênahaia khan a kopa, a tualbômhai dôngma khom siatpuiin,



12inriang le mi irsamna neihai deng an theihaia, a huanghaia, mi'n neinun bândaa an isia khom pe kîr loiin, millim biakin, thil porinchehai a thoa,

13a pung irzûla sum mi inpûktirin, a ihring hrang ma ni? Hring viat no ni; hi thil porinche murdi hi a tho sikin, a ithi ngêt hrang a ni, ama thisen moh chu ama chung a ngêt tung a ti.

14Khan, irngai ro, kha mi khan nâipa hong nei sianlân, a pa thilsual tho tâk murdi kha a hmua, a chia, kha thilhai kha tho nuam loiin a oma.

15Irbôlna hmuna hruaithênaa khom fâk nêk fa sa loia, Israel mihai millim tiang irhei loia, a tualbômhai dôngma khom siatpui loia,

16tûte chung a thilsual tho loia, neinun inpûk bânda thil khom la loia, tûte huang loia, phîngchâmhai fâk nêk pêka, korongboihai puandiar silkai pêka,

17sual chu tho nuam loia, tangka sum khom a pung omin mi inpûktir loiin, diktaka thil thoa, ki thupêkhai zômtu a ni'n chu, a pa sualnahai sikin ama chu thi no nia, hring ngêt a ti.

18Khannisian, a pa khan chu mihai a huanga, deng an theihaia, mi tin chung a sinsiat a tho mai ngaia, khasikin, kha pa kha chu a sin sualnahai sikin a ithi ngêt hrang a ni.

19Khannisian, itho mo a nâipa'n a pa سوالنا mô a iphur loi hrang? nin ti ngai. Nâipa khan dân chu a zôma thil fel a thoa, ki dân siam murdihai chu zômin a pom zita ni'n chu hring ngêt a ti.

20 Thil سوال thotu chu thi ngêt a ti, nâipa khan a pa سوالنا mô pêl no nia, pa khomin a nâipa سوالنا chu pêl no ni; mi dikin a dikna man hmu a ta, mi سوالin a سوالنا man hmu a ti.

21Khannisianlân, "Mi سوالin a thil tho insual murdihai a mâksana, ki dân siamhai a poma, dân chu a zôma thil dik le sin sa a tho'n chu, hring ngêt a ti, thi no ni.

22A sin سوال tho tâkhai chu inhriat mai ni ta no nia, sin sa a ithônaa khan hring a ti.



²³Mi sual an thia hin ki ilôm hrang ma ni? an nun hong irleta, nun thara an iom hi ki ilôm ual loi hrang mo?” ti hi RENGPA PATHIAN thusuak a ni.

²⁴Mi sa khomin thil sa mâksanin thil sual a thoa, mi sualhai itho anga thil porinche tinrêng a tho hin a ikring hrang ma ni? A sin sa thohai chu inhriat mai ni ta no nia, a thilsual thôna le a inchâina sika khan thi zel a ti.

²⁵Khannisian, Rengpa sintho dân hi dik ma, nin ti ngaia. Israel insûngkuahaio, irngai roi, ki tho dân a idik loi mo? nin sintho dân hi a idik loi mo ni ma?

²⁶Mi dikin a diknahai a mâksana, thilsual a tho'n chu thi a ti, thil sual a itho ngêta khan thi a ti.

²⁷Mi sual khomin a sin sual thohai a mâksana, dân chu a zôma, thil dik le sa a tho'n chu a hringna inzôk a ti.

²⁸A milunga ar ngaituua, a lei tho insualna murdihai a mâksanin chu hring a ti, thi viat no ni.

²⁹Khannisian, Israel mihai khan, “Rengpa hin mumal neiin sin tho ma,” an tia. Israel mihaio, mumal nei loiin sin tho ma unga, nangni omdân hi a idik loi mo ni ma?

³⁰Khasikin, O Israel mihaio, mi tin an omdân ang zêlin roirêl ki ti, ti hi RENGPA PATHIAN thusuak a ni. Irlet unglân, nin sualna murdihai chu masan zit roi; khanchu, nin sualnaa khan siatna tok ta no chin ni.

³¹Nin sintho insualnahai chu pai unglân, ngaituana thar le milung thar irput roi. Israel mihaio, itho mo thi nin ta?

³²Mi an thi hin lômna nei viat ma ung, ti hi RENGPA PATHIAN thusuak a ni, khasikin, “Nin sual ata irletin om roi,” a tia.

Ezekiela 19

Sûnna hla

¹Rengpa'n Israel rênghai ta hrangin sûnna hla phua inlân, hiang hin ti roh.



²Ni nu hi i mani? Kâmkeibaknei pui a ni; kâmkeibaknei vânglaihai laia inbokin a nâi an fâa.

³A tehai laia inkhat chu an fâ inliana, kâmkeibaknei tuai a hong nia, Sa chel dân ar chua, mihriam khom a sê tâka.

⁴Nam danghaiin an inhriatin, châng khur an choia, a tâk tâka; Thîr hrui an inbuntira, Aigupta rama an hruai tâka.

⁵A nu'n a nghâk maia, a sabeina tak a boi tah ti an hriatin, A te dang an fâ inlian nôka, kâmkeibaknei tuaia a siam nôka.

⁶Kâmkeibaknei danghai laia a suk a tungin a'rlonga, Kâmkeibaknei tuai a hong nia, sa chel dân ar chua, Mihriam sêtu a hong ni tâka.

⁷An kulhai chu an siata, an khopuihai an siatpaia, An hrûm irhâi chitna khan tûte suak ngam zel om mahai.

⁸Nam danghai khan an hong doia, Ram kil tin ata an hong, Lên châng an hong kaizara, an khuma, an chel tâka.

⁹Thîr hrui an inbuntira, koka an khuma, Babulon rêng kuang an hruaia, Israel tâng rama an hrâm irhâi an inhriat ta lina hrangin.

¹⁰Ni nu chu grep kung ivadung kôla irhuana phun ang hi a ni. Tui a tam sikin ra nuam tak le a ôna hnâ sipin a hong om ta.

¹¹A ôn ngartakhai chu rêng roirêltu hmola hmang a hong nia, A kung chu sôm phâk rak dôrin a'rsânga, ôn tamtakhai laia ar sâng bîk sikin an en sup sup tâk a ni.

¹²Khannisian, ningmurna sikin phôiipaiin a oma, Irnênga an pai raka, nisua tianga phâivua'n a sêm inchâra, A ra a chil zoi tâka. A ôn liantak takhai khom chu kiakpai a hong nia, a châr tâka, meiin a kâng irhmang zit tâka.

¹³Khan, atûn chu ramkâra, ramchâr le tui boina hmuna phun sonpai a ni ta.

¹⁴A ônhai rengata mei a hong suaka, a rahai a kâng irhmang zita, Khasikin, ôn ngartak khom roirêlnaa rêng hmola hmang thei khom om ta mah. Hi hi beidongna hla a nia, sak mai hrang a ni.



Ezekiela 20

Pathian thiltum mihriamin a khâlna

¹Hiang hin a nia, kum sari kum tha ringana, tarik sômhni nî khan Israel upahai chu Rengpa irdon hrangin an hong, ki hmâi makunga an toia.

²Khan, Rengpa'nhiang hin a nin hrila,

³“Mihriam nâipa, Israel upahai kuang khan hiang hin ti ro, RENGPA PATHIAN khan hiang hin a ti: thu nir don hranga hong mo nin ini? Pathian hring kêng ki ini, nangni thu nir donin om ning, ti hi RENGPA PATHIANthusuak a ni.

⁴“Mihriam nâipa, annihai hi an chung, roi ni irêl loi hrang mo? An pahaiin thil porinche an itho kha hril ro;

⁵ khan, ki mi inthang, Jakoba irchihai chung, ki bân ki phara, kut phar maiin, kei hi nin Pathian ‘Rengpa chu ki ni, tiin Aigupta rama khan kin hriattira.

⁶Kha nî khan, Aigupta ram ata, ki ram zong suak, khuaihlutui le dûttui luangna ram, ram murdi laia ram sataka hruai inlût hrangin chong kin kunga.

⁷An kuang, nin indit thil porinchehai chu pai unglân, Aigupta rama millimhai leh khan porinchein om no roi, kei hi Rengpa nin Pathian chu ki ni,’ ki tia.

⁸Khannisian, ki chung, tehel an zonga, ki thu tûte'n irngai nuam mahaia, an inuam thil porinchehai chu pai nuam mahaia, Aigupta rama millim pathianhai la pai ual mahai, khanchu Aigupta rama ngêt an chung, ki ninginmurna insum ning mo, ki tia.

⁹Khannisian, an omna namhai mithmua ki'rhming a siat lona hrangin an chung, ite tho ta ma unga, Aigupta ram rengata hruaisuakin an kuang ki inhriattir zêl a ni ta.

¹⁰“Khan, Aigupta ram rengata hruaiin ramchâr dênin ki hruaisuak intunghaia.

¹¹Mihaiin an zôma an hring theina hrangin, ki thupêkhai chu kin hrila, ki dân chu ki'rchutira.



¹² Kei le anni kongkâra irsinsiana hrangin Sabat nî khom ki siama, kei hi Rengpa an ni ser bîkpu ki nih ti an inhriat theina hrangin.

¹³Khannisian, Israel mihaiin ramchâra khan ki chung a tehel an zonga, mi'n an zôma an hring theina hranga ki thupêkhai chu zôm nuam mahaia, ki dânhai an irheisana, ki Sabat nîhai lak an insiat zêla, khasika khan anni inboipai hrangin ki ninginmurna chu an chung a insum ning mo, ki tia.

¹⁴Khannisian, Aigupta ata ki hruaisuak laia hmutu nam danghai mithmua ki'rhming a siat lona hrangin ki itho ta loi a ni.

¹⁵Ramchâra khan ki pêk hrang ram, khuaihlutui lei dûttui luangna ram, ram murdi laia ram sataka khan hruai inlût no ning tiin chonginkungna ki lei siam tâk.

¹⁶An pathian irlimhai irngaina ualin ki dânhai an hnôla, ki thupêkhai zôm nuam loiin; ki Sabat sînhai an insiat tâk a ni.

¹⁷Khannisian, ramchâra thatpaihai hrangin chu, kin renhaia, ki ithathai zit ta loi a ni.

¹⁸Ramchâra khan an nâihai kuanga, 'Nin pahai thupêk zôm no unglân, an dânhai uksak ual loiin, an millimhai leh khan nangni le nangni porinchen a no roi.

¹⁹Kei hi nin Pathian, Rengpa chu ki ni, ki thupêkhai zôm unglân, ki dânhai pomin zôm roi.

²⁰Ki Sabat nîhai irthiang takin ser unglân, khanchu, kei le nangni kongkâra irsinsiana ni a ta, nin Pathian, Rengpa chu ki nih ti inhresuak ta nin ti,' ki tia.

²¹"Khannisian, an nâihai khomin ki chung a tehel an zonga, mi'n a zôma a hring theina hrangin ki thupêkhai chu zôm nuam mahaia, ki dânhai chu zôm ual mahai; ki Sabat nîhai chu an insiata, ramchâra khan ki ninginmurna an chung a insumin thatpaihai ril hrang ma ni, ki tia.

²²Khannisian, Israelhai Aigupta ram ata ki hruaisuak laia hmutu nam danghai mithmua ki'rhming a siat lona hrangin ki insum hrâm a ni.



²³ Ramchâra khan, ‘Nam danghai laia thon darhai ki ta, ram tina indartir zit ki ti,’ tiin chong kin kung tâka.

²⁴Ki dânhai zôm nuam loia, ki thupêkhai zôm mahaia, ki Sabat sûnhai insiatin an pahai millimhai ngêt kha an biak tâk sikin.

²⁵Khasikin an satna hrang ni loi dân ki siama, an hring thei loina hrangin thu ki pêk saa.

²⁶An thilinhlanhai leh khan anni inporinchetirhai ki ta, an nâilutîrhai khom irbôlna hrangin hmang an ta; thei loi chang an ta, khanchu kei hiRengpa chu ki nih ti an inhriat theina hrangin.

²⁷“Khasikin, Mihriam nâipa, Israelhai kuanga hiang hin hrilin lân, RENGPA PATHIAN khan hiang hin a ti: ‘Nin pahaiin an ni philsan sikin ki’rhming an ni insiat ok tâk a ni.

²⁸Pêk ki itum ram ki hruai intungin tâng irsânghai le thing hringhai an hong hmua; kha khan, an irbôlnahai an inhlân tâka, ki ninginmurtirna thilpêkhai an inhlana, an mirimhoihai an hâla, an thilinhlan uainhai an bunsuaka.

²⁹Hi hmun irsânghaia hin itho sika mo nin ife ngai? ki tia; kha kha atûn ten hin hmun irsâng, ti a la ni.

³⁰Khasikin, Israel insûngkuahai hril ro, RENGPA PATHIANkhan hiang hin a ti: Nin pahai hnung zuiin porinchein nin oma, an millim biak intirom takhai tiang nin zui zêla.

³¹Millim kuanga thilinhlan le irbôlna hrangin nin nâihai hâl hrangin a vuan nî ten hin porinche’n nin la oma, Israel insûnghaio, ni chongpui hranga hong mo nin ni? Mi hring ki ni hi, RENGPA PATHIAN thusuakin a ti. Nangni ni chongpui zât ni ma ung.

³²Nam dang, hi rama chi dang dang omhai tho dân angin thing le lung biak nin tum ngit tâka; khannisian, kha kha ni thei viat no ni.

Pathian hremna le ngaidamna

³³“Pathian hring ki ni, RENGPA PATHIAN thusuakin a ti, kut hrâtak le, bân pharpum le ningmur insuakin nin chungâ inlal ngêt ngêt ki ti.



³⁴Nam danghai lai ata nangni hruaisuak ki ta, inthekindara nin omna ram ata chu kut hrâttak le bân phar le ninginthik sângin nangni hruaikhôm ki ti.

³⁵Nam dang rama, ramchâra khan nangni hruai ki ta, nin hmâi makunga nin chungthu rêl ki ti.

³⁶Aigupta ram ramchâra nin pahai chungthu ki irêl ang khan nin chungthu rêl ki ti,” RENGPA PATHIAN thusuak khan a ti.

³⁷“Khan, vîkna fung hnuai nangni infetir ki ti, thuthung hnuai nangni inlûttir ki ti.

³⁸Nin laia tehelhai le ki chung thilsual thotuhai chu infâi zit ki ta, an omna ram ata hruaisuak ki ta, khannisian Israel rama khan lût viat no nihai; khanchu, kei hi Rengpa chu ki nih ti inhriat an ti,” a tia.

³⁹Nangni Israel insâng mihaio, RENGPA PATHIANIN hiang hin a ti: “Mâni millim chu pan zêl unglân, chubai mûk roi, ki chong irngai nuam ngai mak chêi! ki’rhming irthiang hi nin thilinhlan le nin millimhai khan porinchetir ta no roi.

⁴⁰“Israel ram, ki tâng irthianga khan, Israel insâng tin, nin rêngin, kha rama khan ki sin tho nin ta, kha khan lei lôm ki ta, nin thilinhlanhai, ra masatak nin inhlanhai, nin thil irthiang inhlanhai lei dong ta ki ti.

⁴¹“Nam dang lai ata nangni hruaisuak ki ta, nin irthekindarna ram ata nangni ki hruaikhôm tika chu nin thil mirimhoi inhlanhai leh lei lôm ki ti, nam danghaiin ki irthiangzia hmu an ti.

⁴²“Khan Israel rama kut pharin nin pahai kuanga ram pêk ki inkung sai rama nangni kin tung tika chu, kei hi Rengpa chu ki nih ti inhria nin ti.

⁴³Khataka khan nin omdânhai le nin sinthohai, nin thil tho porinchena murdihai chu inhresuak ta nin ti; khanchu nin thil tho insual murdihai sikin nangni mithmu ngeia nangni le nangni chu irtheimâk irhlôm ta nin ti.



⁴⁴O Israel insûng mihaio, ki'rhming sikin, nin omdân sual le porinche taka thil nin ithohai ang ni loia, nin chung a thil ki tho tika chu Rengpa chu ki nih ti inhre ta nin ti," RENGPA PATHIAN thusuakin a ti.

Sim tianga mei suak

⁴⁵Khan, Rengpa thu chu ki kuang a zuang tunga,

⁴⁶"Mihriam nâipa, ni hmâi kha sim tiang irngatin lân, sim tiang demin thu hrilin lân sim tianga ram chungthu inpuang roh.

⁴⁷Sim tianga rampui kuanga khan, 'Rengpa thu irngai ro, RENGPA PATHIANIN hiang hin a ti a ni. Irngai ro, ni sûnga hin mei sêm ki ta, ni sûnga thing hring tinrênghai chu kâng irhmang zit a ti, thing châr tinrêng khom, meichok vung vung chu chuai no nia, sim tiang ata hmâr dênin, mi tinrêng em irûthai zit a ti.

⁴⁸Khan, mi murdihaiin, kei Rengpa hi mei insuaktu ki nih ti hmu an ta, thi no ni,' ti ro" tiin.

⁴⁹Khan, keiin chu, "Ni mak e, Rengpa Pathian, kha kha chu nin thotir no ro; kei hi chu mi tinin thukhir ringot hril ngai kêng an ni ibe," ki tia.

Ezekiela 21

Rengpa khandai

¹Khan, Rengpa khan hiang hin a ni tia,

²"Mihriam nâipa, Jerusalem tiang irheiin lân, hmun irthiang demin thu hrilin lân, Israel ram chungchâng thu inpuang ro;

³Israel ram kuang khan hiang hin thu hril ro: Rengpa khan hiang hin a ti: Irngai ro, ni chung a ki ningmur insum ki ta, ki khandai chu irlek ki ta, nin laia mi sa khom, mi sual khom that zit ki ti.

⁴Mi sa le mi sual ki that zit hrang sikin sim le hmâra mi murdi chung a ki khandai irlek ki ti.

⁵Khan, mi murdi'n, kei Rengpa hin ki khandai ki iphôi a nia, lâk kîr ta no ning ti inhriat an ti.



⁶“Nang mihriam nâipa, lungni takin inrûm vong vong ro, an mit hmu ngeia lung insiat takin chap roh.

⁷Khan, ‘Ithoa mo ni inrûm?’ an ti’n chu, ‘A thurchi chu a hong tung tâk sikin ki irzal a ni. Mi murdi lungrîl zâm irzal a ta, an kut sahai kim a ta, thâiindôpin om an ta, irlo’nthingin om an ti,’ ti roh. Irngai ro, a zoro a hong tung tâk a ni,” RENGPA PATHIAN thusuakin a ti.

⁸Rengpa khan hiang hin a ni tia;

⁹“Mihriam nâipa hiang hin inpuang ro: Rengpakhan hiang hin a ti. Khandai chu intât inngaih a nia, Khandai chu innôt irtêk a ni ta.

¹⁰Mi sâtna’n intât inngaih a nia, Vâr anga irtêk lop lop hranga innôt infâi a nia, Raifâna zel om thei mah. Ki mihai hin irchûna rêng rêng uksak viat mahai.

¹¹Hmang thei ta hrangin khandai chu intât a ni ta, A ni, thîr ngaiha innôt infâi a ni ta, thattu kuta chuang hrangin.

¹²Mihriam nâipa, chapin lân, inrûm vong vong ro, Ki mihai tuang hrang an nia, ki mihai chu Israel mi lianhai leh khandai that an ini hrang a ni. Khasikin beidongin ni rôp irchûm roh.

¹³Ki mihai hi fia an nia, An irtet no’n chu thi zit an ti, RENGPA PATHIAN thusuak a ni.

¹⁴“Atûn, o nang mihriam nâipa, ni kut inbên pumin thu hril ro, khandai khan voihi voithum sât sianlân, sât sât ri se. Khandai hrât tak a nia, khandai liantak le ichiom tak a ni. An vêla mihai thatna hrang chu.

¹⁵Ki mihai chu a’rzaltirhaia an irtet zoi tâk, irthatna khandai kôlirtêk anga irtêk lop lop hrang, kul mikot tina ki sia ta, mi thatna hranga irsiam diam a ni tâk.

¹⁶A suk a letin, chang tiang le vei tianga sât zêlin lân, ni maton le nir heina tiang tiang khom sât zêl roh.



¹⁷Kei khomin ki kut inbên ki ta, Khanchu, ki ninginmurna dâi a ti, kei Rengpa hin ki ihril tâk a ni hi,” a tia.

Babulon khandai

¹⁸Rengpa khan hiang hin a ni ti nôka:

¹⁹“Nang mihriam nâipa, Babulon rêng khandai chu a hong tung theina hrangin lampui inhni lei siam ro; kha lampui inhnihai kha ram inkhat ata hong suak hrang a ni, lampui irhmûna hrang siamin lân, khopui lûtna kotsua chu irsinsiana târ roh.

²⁰A lampui irsenna laia khan irsinsiana târin lân, inkhat khan Amon khua Raba lampui irkôk sianlân, inkhat khan Jerusalem kul lampui irkôk ri se.

²¹Babulon rêng chu lampui irsenna lai, lampui inhnihai irchunna taka khan, a fena lampui inhriatna'n dôi hmangin tâ a sâna, hnung tiang mân tiang thalhai chu a pêla, millim chu chong ar dona, irbôlna sa mithin chu a en vong vonga.

²²Jerusalem tiang irnghain, tasâna thal chu a kut chang tiangin a chela; irkâpna hmunhai siamna hrang le, thattuhai ta hranga bâi kak hrang le, khêka rôl insua hrang le, dâi mikothai epa irkâp hmunhai siam hrang le, irnêng inpônghai siama, kulhai siam hrang chungchâng thu tasâna khan an langa.

²³Jerusalem mihai khan Babulon leh an thuthungna a lei om sikin tasâna dik loia an irngaia, khannisian, an sualzia inhriat suaktir hrang a nia, chel an ini ngêt hrang a ni.

²⁴“Khasikin, RENGPA PATHIAN khan hiang hin a ti: Nin sin siatna chu inhriat mai a nia, nin sualhai chu inpuang a nia, nin sinthôna rikipa nin sin siatzia an lang tâka, inhriat suak nin hong ni tâk sikin, kuta man ni ngêt nin ta.

²⁵O nang, Israel hruaitu mi sual, thi hrang ni ni, ni sualna hremna hnungkhôn tak zoro a hong tung ta.

²⁶RENGPA PATHIAN khan hiang hin a ti. Ni rênglukhum le ni tupi khum chu khekpai ro, hi hi a pangai ni ta no ni; mi irhnuaihai chu chôirsângin om an ta, mi irsânghai chu irhnuaiin om an ti.



²⁷Inletpai ki ta, inletpai ki ti, khopui chu inletpai chitin siam ki ti; khannisian, a neitu diktak hrang a hong tung mâka chu tho no ning; khan ama kuanga khan pêk ki ti.

Amon mihai le khandai

²⁸“Nang mihring nâipa, thu inpuangin lân, hiang hin ti ro: RENGPA PATHIANIN Amon nâihai chungchânga le an hrilsiatna thua hiang hin a ti: khandai, khandai irlek a ni ta, mi sât thatna'n le mi inboipaina'n kôlirtêk anga irtêk khandai chu irlek a ni ta.

²⁹Inlârna dik loi nang an irhmua, tasâna dik loiin nang an inentir a ni, ni ringa khandai irbuntirin om ni ta, ni sualna intirom tak sikin ni zoro a hong tung ta, hremna hnungkhôn tak sîn kha.

³⁰Khandai chu a koka thun ro, ni'rzirna le ni suakna rama ni chungthu rêl ki ti.

³¹Ni chung a ki ninginmurna insum ki ta, ki ninginthikna mei chu ni chung a sêm inchok ki ta, mi nunsiat tak, mi that thei tak kuta nang inmantir ki ti.

³²Meiin nang kâng irhmang a ta, nangma ram ngeia ni thisen suak a ti; mi tukhomin nang inhriat ta no nihai, kei RENGPA PATHIAN hin ki ihril a ni,” a tia.

Ezekiela 22

Jerusalem sualnahai

¹Khan Rengpa'n a ni zuang chongpuia,

²“Mihriam nâipa, thisen insuaktuhaia isip khopui chungthu hi rêl hrangin ni irsiam ma ni? Thil porinche a itho murdi hi fel takin inhretir roh.

³Khopui kuang khan Rengpa Pathianin hiang hin a ti, tiin hril ro: Ni mihai nanâk tamtak thathaiin le millim biakin ni bing bing ni porinche tâk sikin, ni zoro chu a hong itung a ni ta.

⁴Ni thisen insuaknahai sika hin thiam no chang ni lei ni tâka, ni millim siamhai sika khan ni porinche tâk sikin, ni zorohai hekin, a nikhua a hong



itung a ni ta. Khasikin nam tinhai nuiso hrang le, ram tinhai tufiam thôna hrangin nang ki isiam tâk a ni hi.

⁵Ni kôla ram le ram hlataka khom, nangmaa hin dân a om ta no sikin, nang an innuisan tâk a ni.

⁶Israel hruaituhai lak chu, an hrâtna irnghatin, mi an thata.

⁷ Khopui mihai kha tukhom mâni nu le pa mahrip tho om ta mahaia, ram dang mihai hrangin, meithâi le farahai nuamningin an lohaia.

⁸ Hmun irthianghai mahrip tho mak chêia, Sabat sôn khom vong indik mak chêi.

⁹Ni mi senkhathaiin mi an that theina hrangin minlak an thoa, senkhatin millim kuanga thilinhlanhai an fâka, senkhat lakin mâni taksa irzuknahai ngot an ngaituaa.

¹⁰ Senkhat an pahai dôngma leh zâlsuam khom an oma, senkhatin nupang hulloi lai taka zâlpui khom an oma.

¹¹Senkhat uire an oma, senkhat an moi siatpui an oma, senkhat an far inchanghai chung a sinsiat tho khom an oma.

¹²Ni mi senkhathai khan mi thatna hrangin tangka sumhai an lâka, senkhatin an Israel chanpuihai kuang a pung omin sum an inpûktirhaia, nuamninga lohain irchon an bûma. Keima an ni'rngil tâka," Rengpa Pathianin a ti.

¹³"Inru ni ithônahai le ni thisen insuaknahai sikin ki kuttum ni chung a chum a ti.

¹⁴Ngam takin mo om theiin? Nang hrem hranga ki zuang tena ni'rnak nei mo lan hre theiin? Kei Rengpa hin ki iti a ni, ki iti tâk chu ki itho ngêt hrang a ni.

¹⁵Ni mipuihai chu ram tina le hmun tinhaia irthekindarin sia ki ta, ni sin saloihai hi inhektir ta ki ti.

¹⁶Khanchu nam danghaiin nang irngaiirhnuaitir an ta, kha tena chu Rengpa ki nih ti inhre ta ni ti," tiin.

Pathian thil hâlinfâina



¹⁷Khan, Rengpa'n hiang hin thu a hril nôka,

¹⁸“Mihriam nâipa, Israelhai hi keima ta hranga hin chu ite ar fêna om mahai. Anni chu sum tamtak hâlinfâia a om zoiin a êk, sumpen thîra suang ang hi an ni.

¹⁹Khasikin atûn, kei Rengpa Pathian hin ki itihai hi, hmanghmunboi kha an lei ni tâk sikin Jerusalema an rêngin hruaibukhai ki ta,

²⁰sum tamtak, sumpen thîr, le suang inzôia a iom angin, ki ningmurna le ki taksena'n anni chu hâlinzôihai ki ti.

²¹A ni, anni chu Jerusalema hruaibukhai ki ta, an hnuai tiang mei tho ki ta, ki ningmur hraiin hâlih mangtirhai ki ti.

²²Anni chu tangkarua hâlinzôina meisûmpuia inzôia angin Jerusalema khan hâlinzôiin om an ti. Kha tena chu Rengpa ningmurna chu bunthuanin a iom a nih ti inhresuak ta an ti,” a tia.

Israel hruaituhai sualna

²³Khanchu Rengpa'n a ni zuang chongpui nôka.

²⁴“Mihriam nâipa, Israelhai kha ti pehai ro, an ram a'rthiang ta no sikin, ki ningmurna'n ki zuang ihrem a ni.

²⁵Kâmkeibakneiin sa a ithathai chung a inrûm ngai angin, hruaituhai chu an inrûm sa ngai. Mihai an thata, tangka sum le neinun an ilâk thei dôr an lâka, mi tamtak meithâiin an siahai ngai.

²⁶Ochahai khomin ki dânhai an inchâia, thil irthiang uksak loiin, thil irthiang le porinche thua irchutirna nei mahaia; sabbat sîn khom uksak loiin. Khasikin, Israel mihai hin mahrip ni tho loiin an iom zoi a ni ta.

²⁷Sorkâr roirêltuhai khom chu inê, an sa fâk irchu irthêr ang an ni. Irchongna irzûlin mi an thathai ngai.

²⁸Deipuhaiin hi sualnahai hi an in banga an nâl inngoia, a sâng an irhlîpai angin an irthuppui ngaia. Inlârna dol an hmua, leihrilna dik loi an



hrila, Rengpa Pathian thu hrilin an irhril ngaia, khannisian kei Rengpa hin chu annihai kha chongpuihai viat ma ung.

²⁹Mi lianhaiin mi huangin an lâkpai pehai ngaia, ram dang mihai chungu nuamningin an om ngai.

³⁰Khan, bang chînna hmunhai kôla an ngîra, ki ningmurna ram chu ki zuang inboipai hrang tika lei hrung hrangin mi ki zonga, khannisian inkhat lua hmu ma ung.

³¹Khasikin ki ningmurna chu an chungu insum ki ta, an sinthôna sika khan mei angin inboipaihai ki ti,” Rengpa Pathianin a tia.

Ezekiela 23

Zuarpui soal inhnihai

¹Khan Rengpa'n a ni zuang chongpuia.

²“Mihriam nâipa, tiana khan zuarpui inhni an oma.

³Dôngmate an ni lai khan Aigupta rama an oma, khan an dôngmate irthiang nina kha irhmangin, notizuarin an om tâka.

⁴Ulian ualnu irhming chu Oholai a nia, (khanu khan Samari an entira) a sangnu irhming chu Oholiba a ni, (khanu khan Jerusalem chu an entira). Khan, an ruaiin ki luahaia, nâi le tehai an ni nei pea.

⁵Oholai chu ki ta lei ni khom sian, notizuarin a oma, Assuria rama ar ditpuihai kha a sân a'rzukhaia.

⁶Khahai kha sipai silkai duma irvo, mi lianhai, roirêltu irsâng takhai an nia, an rêngin hmêlsa le sakor chungchuang mi an ni.

⁷Ama chu Assuria hruaituhai ta hranga notizuar a nia, a taksa irzukna khan ama chu hruaiin Assuria mihai millim kha biakin, ama le ama chu a porinche tâka.

⁸Aigupta rama a om laia a dôngmate irthiang nina irhmangtira, a notizuar thohai kha mong loiin a la tho maia, a thoibop ata kha ama chu pasalhain notizuar zâlpuiin an lei iompui ngai a ni.



- ⁹Khasikin ama chu a irditpui Assuria mihai kuta ki pêksuak tâka.
- ¹⁰Ama chu bomboiin an siaa, a nâipasalhai le nâinupanghai an sutpaia; kha hnung chu khandai leh an thata. Nupanghaiin hmun tina a thurchi an hril vêl tâka.
- ¹¹“Kha thilhai kha a sangnu Oholiba khan a hmu mai khomin, ama khom Oholai nêka irkhêl uala notizuarin a oma.
- ¹²Ama khomin Assuria mi lianhai, roirêltu irsâng takhai, sipai silkai cheka irvôhai sakor chungchuang mihai, ruatharte hmêlsa murdihai irzugin an dithaia.
- ¹³Ama khom chu porche takin a oma, a unu ang dênin a sangnu khom hi omin ki hmua.
- ¹⁴Khan ama chu a porinchena khan a lût inthûk ualin a oma,
- ¹⁵Babulon hruaitu ulianhai irlim banga an itâr, seninlâr leh irvôtir, an kongkongkhit leh khita, an lua lukôma irvo irzugin a oma.
- ¹⁶Khanchu khahai kha a hmu tena chu, taksa irzukna'n a sipa, Babulon-a khan mi a tîrhaia.
- ¹⁷Babulon mihai chu zuangin an zuang zâlpui ngaia, ama chu an nuam takin an lo pola, an porinchetir ta hrai sikin, a hnungkhôn taka chu a hmumâkhaia.
- ¹⁸Vântâng laia phoileng irtârin, mi tinin notizuar a nih ti an inhriata. A unu ki intir ang khan ama khom kin tir tâka.
- ¹⁹Aigupta rama dôngmate ni ni laia notizuar ni iom ang khan, ni notizuarina chu a luakinter uala.
- ²⁰Khan an neinun khom sakuartung neinun anga, an thilsuak khom sakor thilsuak anga suakhai chu a'rsâipuihai ngai.
- ²¹(Oholiba, Aigupta rama dôngmate ni ni laia pasalhaiin nir hnu irdâipuia, ni dôngmate irthiang nina irhmangtira, ni porinchena sika thei loi ni ichangna thilhai kha tho nôk ni tuma.)

Zuarpui nâipang ualnu chungga Pathian roirêlna



²²“Khasikin Oholiba, kei Rengpa Pathianin hiang hin nang ki ti. Kha ni irditpuihai kha ni hnônghai tâka, khannisian ni chung a ngingmurtirhai ki ta, nang irhual hrangin zuang tuanghai ki ti.

²³Babulon mi murdihai le Kaldai mi murdihai, Pekod mihai, Shoa le Koa mihai le Assuria mi murdihai chu zuang tuanghai ki ti. Kha ruatharte milianhai le, hruaitu hmêlsahai hruaitu poimohai le sakor chungchuang hruaitu ulianhai kha bûmhai ki ti.

²⁴Hmâr tiang ata nang doi an ta, sipai tamtak leh zuang an ta, an pho le lukhumin nang irhual khum an ti. An kuta nang inhlan ki ti, an dân angin ni chung a roirêl an ti.

²⁵Ni chung a ki ning an mur sikin, ningmurin ni chung a roi inrêltirhai ki ti. Ni hnâr le ni mikuar âtpai an ta, ni nâihai thathai an ti. A ni, ni pasalhai le ni nâinupanghai nang hruaipai pe an ta, a hring pumin hâlkhumhai an ti.

²⁶Ni silkaihai inpotthêr an ta, ni tukrivohai chôipai an ti.

²⁷Khanchu Aigupta ram ni om ata ni thil porinche thohai le ni taksa irzuknahai kha inboitir ki ta, millim zel en ta no chi nia, Aigupta ram khom ngaitua ta ngai no chi ni,” a tia.

²⁸Hiang hin Rengpa Pathianin a ti, “Mi nin ihmumâkhai le nin ihnônghai kuta pêk ni nin ti.

²⁹Ni sintho murdihai kha chôipai an ta, kut korongin nangni masan an ta, notizuar angin phoileng nang ni târ an ti. Hi thil hi ni taksa irzukna le ni notizuarnahai khan a intungtir a ni.

³⁰Nam tinhai ta hranga notizuar ni nia, an millimhaiin nang a porinchetira.

³¹Ni unu lampuihai ni hro sikin, hremna khilât ir-ang mai kha nang pe ki ti,” a tia.

³²Khan Rengpa Pathianin hiang hin a hrila, “Ni unu khilât, liantak le inthûk taka khan nang khomin ni in saa, Mi tinin nang hmumâk an ta, nang nuiso an ti, khilât kha a sip hrai sikin.



³³Ni unu Samari khilât, chitna khilât le siatna khilât khan dengtheina le inruuin nang siam an ti.

³⁴In ni ta, pai ving ni ti, a koina hâr leh khan nir hnuhai kha invitphop hai ni ta. Kei Rengpa Pathianin ki iti a ni,” a tia.

³⁵Atûn chu Rengpa Pathianin hiang hin a ti, “Keima chu ni’rnghilin, hnung ni ni songsan sikin ni taksa irzukna le ni notizuarna sika khan dengthei tuang ni ti,” a tia.

Zuarpui inhnihai chungu Pathian roirêlna

³⁶Khan Rengpa’n a ni zuang chongpuia, “Mihriam nâipa, Oholai le Oholabai chungu hin roirêl ni itum ma ni? An sintho porinchehai sika khan theiloi inchangtirhai roh.

³⁷Uire le thisen insuakin an oma, millim le uirehaiin an sipa, nâi an inei pehai kha an thata, ki nâihai chu millimhai kuang an inhlanhaia.

³⁸Kha vai kha ni loiin ki biakbuk porinchetirin, Sabat sîn khom uksak ta loiin an oma.

³⁹Ki nâihai millimhai kuang an inhlan nîhai khan, ki biakbuk sîng lûtin an porinchetira.

⁴⁰Khan, ram hlataka mi hai fial hrangin tirtônhai voi iza an tîrhaia, mi hai khom an zuang ngaia, zuarpui inhnihai kha tui irsilin, an mithai irnâlin tukrivo sa irbelin an om ngai.

⁴¹Khan, zâlmun hoitaka toiin, an makunga thil sahai le dokâng an siaa, mirimhoi le oliv hriak ki ipêkhai khom kha an sia saa.

⁴²Khan, mipui raifân taka omhai irhâi inhriatin an oma, ramchâr ata mi hai khom irpâlin hruai inlûtin an oma. Nupanghai kuta khan bânhrilhai inbuntirin le, an lua rênglukhum enhoi takhai an inkhumtirhaia.

⁴³Khanchu ki bingin uirena sika ngûi taka omnu chungthu chu hiang hin ki hrila, ‘ama chu notizuar angin an nuam nuamin lo pol ri sehai, kha vai kha a ithei sun a ni sikin,’ ki tia.



⁴⁴Hi notizuarhai kuang hin voi tamtak an fe ngaia, Oholai le Oholabai, nupang porinchehai kuang hin.

⁴⁵Mi felhaiin chu an uirena le an thisen insuaknahai sika hin theiloi inchangtirhai an ti, uirea omin an kuthai chu thisen a kop sikin,” a tia.

⁴⁶Khan hiang hin, Rengpa Pathianin a ti, “Anni insîna hrang le an longindarna hrangin mipui hong hruaihai ki ti.

⁴⁷Mipuihai khan lung leh dêngin, khandai leh doihaiin, an nâi le tehai thatpaiin, an inhai hâlpai ri sehai.

⁴⁸Kha ram murdia khan porinchena thilhai chu inboipai ki ta, kha kha nupang ta hranga an uirena anga uire ta loi hrang ti inhriattirna ngar tak chu ni a ti.

⁴⁹Khan, nangni zuarpui inhnihai hi nin porinchenahai le millim nin biakna sika nin sualnahai sikin nangni hrem ki ti. Kha tena chu Rengpa Pathian chu ki nih ti inhre ta nin ti,” a tia.

Ezekiela 24

Bêl tuiêk iman

¹Khan, kin sal intângna kum kuakna, tha sômna le sôn sômna nî sôn khan,Rengpa'n a ni zuang chongpuia.

²“Mihriam nâipa, a vuana tarik hi irziak ro, Babulon rêngin a vuan hin Jerusalem a irûn nî sôn a ni sikin.

³“Khan mi tehel ngaihai kuanga khan chongirkhekin thu hrilin lân, an kuang,Rengpa Pathianin hiang hin a ti, ti ro: Sumsen bêl kha inchuan unglân, a sûnga khan tui insip roi.

⁴A sûnga khan hme irchan satakhai thun unglân, a dâr le a kehai le a ru irnoi hai khom kha thun ving roi.

⁵Kêlbelra martak hme kha thun unglân, bêl hnuaia khan thing tua unglân, tui kha irtoktir unglân, a ruhai kha but roi,” a tia.



⁶Khan, Rengpa'n hiang hin a tia, "Thisen insuak ngai khopui lu chung chu a rik e! Tuiêka sip itiklaia khom infâi ngai loi ang kha a ni, a sâng rengata hme kha a tin tinin a oma, inkhat lua mâksanin om mah.

⁷Khopui sâng khan thisen insuanahai a oma, khannisian thisen kha vâiphin irkhû theina hmun irnêng chung bunthuanin om maka, lungpui chung kêng bunthuanin a om ngai.

⁸Ningmur le phuba lâkna an tungtir theina hrangin a thisen chu irkhu loiin lungpui chung ki sîaa," tiin.

⁹Khan, Rengpa Pathianin hiang hin a tia, "Thisen insuak ngai khopui chu intak pe a ti! keima ngei khomin thingtua hranghai buk irsâng sa ki ti.

¹⁰Thingtua hranghai hong chôî sa unglân, mei kha sêm inchok unglân, hme kha but unglân, a tui kang karin, a ruhai khom kâng rak ri se.

¹¹Atûn chu sumpen bêlrong kha meichok chung khan inchuan unglân, inhong rakin om ri se. Kha bêla êk imanhai kha a kâng zoi tena chu dân angin irthiang nôk ta a ti.

¹²A tuiêk imanna murdihai kha meidônin ar hmantir zoi no khomin.

¹³O Jerusalem ni sintho porinchehai khan irthiang loa nang a isia a ni hi. Nang irthiangtir ki lei tum nâka chu, irthiang loiin ni la om maia. Khasikin, ki ningmurna hi ni tuang mâka chu irthiangin om nôk ta no chi ni.

¹⁴Kei Rengpa Pathian hin ki iti a ni, ki chângna hrang zoro chu a hong tung thiai ta. Ni sualnahai chu hnôlpai no ninga, inrenna mani, khoza'rngaina mani ni chung inlangtir no ning, ni sinthohai sika khan hremîn om ngêt ni ti,"Rengpa Pathianin a ti.

Deipu dôngma a thina thu

¹⁵Khan Rengpa'n a ni zuang chongpuia,

¹⁶"Mihriam nâipa, ni lunginkham taknu kha voikhat zelin ni kuang ata lapai hrang ki ni. Khannisian chûlpui ual no'n lân ni mitrithi khom intha viat no roh.



¹⁷Ni irhniak irhâi khom inhriat hrang om no ri se, ni ichûlpuina lukhum loiin mani, ni ke rong khomin fe no roh. Ni hmâi hîp no'n lân, khanchu a chûlpuihaiin thil an ifâkhai khom fa sa no ro," a tia.

¹⁸Khanchu zîng tiang inrang takin mipuihai kuang khan kha thu kha ki hrila, kha nî khohloi zela khan ki dôngma chu a thia; khanchu zîng nôka chu thupêk ki ini ang takin ki tho tâka.

¹⁹Khanchu, mipuihaiin ki kuang, "Itho sika hianga ni iom ma ni?" tiin an nir dona.

²⁰Khanchu an kuang, "Rengpa'n a ni zuang chongpuia,

²¹Hi thu hi nangni Israel mihai kuang hril hrangin a ni zuang hrila, biakbuk hrâtna chu nin irsorpuoi oka, a en nin nuama, kha khan nin fe nuam ngai. Khannisian Rengpa'n porinchetir hrang a ni ta. Khanchu nin nâipasalhai le nupanghai Jerusalema mâksana omhai kha khandaiin thi an ti.

²²Khanchu ki lei itho ngai ang khan tho ta nin ta, nin hmâihai hîp loiin, a chûlpuihai thil fâk ngai khom fa ta no chin ni.

²³Lukôm loiin mani, ke rongin mani, chûlpuiin mani, chapin mani om ta no chin ni. Nin sualnahai sikin irhmang nin ta, chûlpui irhlômin om nin ti.

²⁴Khan kei chu nin ta hranga irsinsiana ni ki ta, keima'n thil ki lei itho tâk ang khan nangni khomin thil tinrêng chu tho nin ti. Khanchu kha thilhai kha a tung tena chu Rengpa'n ama chu Rengpa Pathian chu a nih ti inhre ta nin ti," a tia.

²⁵Khan Rengpa'n, "Atûn chu mihriam nâipa, biakbuk dettak nin irsorpuoi ngai le an raiinfânpuina ngai kha anni rengata lâkpai ni a ta, khan an nâipasalhai le nupanghai khom lapaihai sa ki ti.

²⁶Khanchu hi thilhai hi kin tungtir tika chu kha nî khan siatna ata zôk, mi senkhathai hongin nang la hong hril an ti.



²⁷Kha nî ngêt khan khahai kuang khan thu hril thei ta nin ta, khanchu an ta hrangin irsinsiana ni ta a ta, khanchu Rengpa Pathian chu ki nih ti inhre ta an ti,” a tia.

Ezekiela 25

Amon mihai chungthu leihirilna

¹ Khanchu Rengpa'n hiang hin ki kuang thu a zuang hrila,

²“Mihriam nâipa, Amon mihai ram chu theiloi inchang roh.

³Khanchu kei Rengpa Pathianin hiang hin ki hril ti inhretirhai ro: ki biakbuk porinchea om hi a hmu nin nuama, Israel ram siata om le Juda mipuihai sala an intâng hai hi, a hmu nin nuama.

⁴Ni rai ni lei infân tâk sikin, nisua tiang ramchâra nam omhai kuta nang pe ki ti, ni ram sînga om pumin, riakbukhai inding an ta, ni thei rahai fâk pumin, ni sehrât irhnutuihai in ta an ti.

⁵Raba khopui chu saringseihai omna inchangtir ki ta, Amon mihai ram chu kêlbelra omna hmun inchangtir ki ti; khanchu Rengpa ki nih ti inhre ta an ti.

⁶“Khan Rengpa Pathianin hiang hin a tia: Israel ram hmusitin, ni kut nin bêna râifânin ni le'rchôm tâka.

⁷Khaanga ni lei omna sikin nam dang hai kuta nang pe ki ta, anni khan nang longchit an ta. Nang inboipai ki ti, itiklai khom nam tiin koi ni ta ngai no chi ni. Ni bingin ram khom nei ta no chi ni, khanchu Rengpa ki nih ti inhresuak ta ni ti,” a tia.

Moab chungthu leihirilna

⁸ Khan Rengpa Pathianin hiang hin a tia, “Juda namhai khom hi nam dang ang dên an nia tiin Moab-in a lei hrila.

⁹Khasikin Moab ramria khopui omhai chu intemtirhai ki ta, Beth-jesimoth, Baal-meon Kiriathaim khopui satakhai khom kha intemtirhai ki ti.

¹⁰Khanchu nisua tianga ramchâra nam omhai chu Moab le Amon chu intemtirhai ki ta, khanchu Moab chu nam tia tep ni ta no ni.



¹¹Khan Moab chu hrem ki ta, khanchu Rengpa ki nih ti inhre ta an ti,” a tia.

Edom chungthu leihrilna

¹²Rengpa Pathianin hiang hin a ti: “Edom mihai chu Juda mihai chunganunse takin phuba an lâkna khan Edom chu kumkhontuangin thei loi changin a om tâka.

¹³Khasikin atûn Edom chu hrung ki ta, khataka mihriam murdihai le ramsa murdihai khom kha thatpaihai ving ki ti, iti ki inpuang a ni. Temana khopui ata Dedan khopui dênin insiat ki ta, mipuihai khom irdoina khan thatin om an ti.

¹⁴Ki mi Israelhaiin ki phuba lâk chu Edom-hai chunganitungtir an ti. Khan Edom-haiin ki phuba lâk hi itin mo a ini ngai ti inhresuak thei an ti,” Rengpa Pathianin a ti.

Filistia chungthu leihrilna

¹⁵Rengpa Pathianin hiang hin a tia, “Filistia mihaiin an râlhai chunganunsiat taka phuba lâkin an lei inboipaihai tâka.

¹⁶Khasikin Filistia mihai chu doiin inmuaipaihai chit ki ti, tiin ki inpuang a ni. Filistia phâizôla mâksana omhai khom kha inboipaihai ving ki ti.

¹⁷Anni chu a sân hremhai ki ta, an chungan phuba lâk hrang om dôr chu la ki ta, ki ningmurna chu an chungan chum a ti. Khanchu keima hi Rengpa ki nih ti inhresuak ta an ti,” a tia.

Ezekiela 26

Tura chungchâng lei hrilna

¹ Khan, kin sal intângna kum sôm hleikhatna, kha tha a sân khatna nî sân khanRengpa'n a ni chongpuia.

²“Mihriam nâipa, Tura khopuia omhai khan hiang hin Jerusalem kha an nuisoa, ‘Jerusalem chu irnôitirin a om tâka, a sum bepâr thônahai chu inboipaiin a om tâka, ama chu itiklai khom a ni doitu ni thei ta ngai no ni,’ tiin an khêka.



³Khasikin atûn, kei Rengpa Pathian hin hiang hin ki iti a ni. O Tura khopui kei chu ni râl ki nia, nang a doi hrangin nam tamtakhai tuanghai ki ta, anni chu tuipui irsok angin hong suak an ti.

⁴Ni khopui banghai insiatpai an ta, ni in irsâng hai insiatpai an ti. Khanchu keima'n vâiphin murdi chu phâtinfâi ving ki ta, lungpui inchangtir ki ti.

⁵Khataka omna tuipui kôla khan Tura chu nga cheltuhai lên phoina hmun chang a ti, keima Rengpa Pathianin ki iti a ni. Nam tinhaiin Tura chu mualphoi sak an ti.

⁶An khandaihai leh a khopui tânga omhai, a sûnga mihriam omhai chu that an ta, khanchu Tura'n Rengpa ki nih ti inhre thei ta a ti," a tia.

⁷Khan, Rengpa Pathianin hiang hin a tia, "Tura doi hrangin rêng hai laia a roiinpui tak Babulon rêng Nebukadnezara chu zuang tuang ki ta, ama chu hmâr tiang ata sipai tamtakhai leh sakorhai tâli le sakor chung chuang mihai leh zuang an ti.

⁸Tangka khopuia om murdihai chu irdoina khan thatin om an ta, an râlhaiin khur choi an ta, pil bun inpôngtir an ta, nang doina hrangin bang siam an ti.

⁹Khanchu ni banghai kâp insiatna hrangin a kâp irdîpna siam an ta, ni in irsâng hai khom thîr tuanghai leh insimpai an ti.

¹⁰An sakorhai vâiphin inkhû khan nang bôm a ta, khopui siat dâi mikothaia an lût tena chu, an sakor thilkai irhâi le an tâlihai leh khan ni banghai chu inhnîngtir an ti.

¹¹An sakor chung chuang mihai chu ni mikot bulhaia lûtin an khandaihai leh ni mipuihai chu thathai an ti. Ni omna khopuia chopui dethai chu hnuai inrîltir an ti.

¹²Khanchu nir chonhai chu râlâk sum inchang an ta, ni sum inpungtirna thilhai khom lapai an ti. Ni banghai insumpaiin ni in hoitakhai khom insiatpai an ta, ni lung le thinghai khom itinrêng tuipuia pai an ti.



13 Ni hlasak irhâi murdihai inboipai ki ta, ni serânda lian irhâi khom inhriat ni ta ngai no ni.

14Khanchu lungpuiin nang siam ki ta, nang chu tuipui kôla nga cheltuhai lèn phoina hmun chang ta ni ti. Khopui kha siam inding ni nôk ta no ni, kei Rengpa Pathian hin ki iti a ni,” a tia.

15Khan, Rengpa Pathianin Tura khopui chungthua hiang hin a hrila: “Ni sûnga irthatnahai a oma, a pop a liamhai an inrûm tena chu tuipui kôla omhai kha irthatâk irlâkin la om an ti.

16 Khanchu tuipui kôla rama khan rêng murdihai chu an rêngtoihmun ata chum an ta, an songkol irfualhai le an puan mirimhoihai khekpai an ta, inthingpumin hnuai chungta toi an ti.

17Khan, mithi chûlpuina hla hi ni ta hrangin sak an ti: Khopui roiinpui tak chu inboipaiin a om tâka, a irkuanghai khom tuipui ata irhmang zoiin a om tâka, hi khopuia mihaiin tuipui chungta ircham lei neiin, tuipui kôla om mi tinhai chu an lei insîhai ngaia.

18Atûn chu a siat ni a ta, chômbunghai irnokin khaanga siatna irkhêl sika khan mipuihai an kamang zoi ta,” tiin.

19Khan, Rengpa Pathianin hiang hin a hrila: “Mihai om ta loina khopui ram tâk angin nang siam ki ta, tuikhanglian inthûk taka tuihai leh nang ngîm del ki ti.

20Tiana lei thi tâkhai leh omsuam hrangin mithi khuaa nang tîr ki ta, kha hnuai rama khan kumtuang dâna siathai kuanga mithihai leh omsuam hrangin nang siam ki ti. Kha tena chu mihringhai rama omin ni hmunhai lua thei ta no chi ni.

21 Nang chu inentirna ichiom takin nang siam ki ta, kha kha ni hekna chu ni ta a ti. Mihaiin nang zong an ta, khannisian nang hmu ta ngai no nihai,” Rengpa Pathianin a tia.

Ezekiela 27

Tura chûlpuina hla



- ¹Khan, Rengpa'n a ni zuang chongpuia,
- ²"Mihriam nâipa, Tura ta hrangin chûlpuina hla sak ro,
- ³kha khopui kha tuipui kôla omin, tuipui kôla om murdihai le sum bepâr tho puma omhai kha, Rengpa Pathianin hiang hin a tih ti pe ro: O, Tura enhoi irkip taka ni iom kha ni'rsorpuia.
- ⁴Ni in chu tuipui a nia, nang a sintuhaiin irkuang angin a sate'n nang an sina.
- ⁵Ni thing phêkhai chu Hermon tânga meisâr thinghai leh isiam a nia, nir kuang ngul hrangin Lebanon-ah sidar thinghai hmang a nia.
- ⁶Ni'rkuang zâpnahai chu Basan rama Seso thinghai leh siam a nia; ni'rkuang hnuai dâphai chu Kitim-ah thing a sôî zât leh siamin, sâiha leh inluan del a ni.
- ⁷Ni puanzârhai chu puan zâirhmi Aigupta rama puan mirimhoi leh siam a nia, hlatak ata inhriat thei zôi a ni ngai. Ni'rkuang pang chu Elisa chômbuga puan satak, a duminpôl leh siam a ni.
- ⁸Ni'rkuang chalaituhai chu Sidon le Arvad khopuia mi an nia. Ni mi kut theithiamhai ngêt kha nir kuang chalaituhai chu an ni.
- ⁹Ni'rkuang siamtuhai chu Biblos rama thing kut theithiamhai an ni. Tuipuia irkuang murdihai chu nangma anga sum bepâr thohai ngai an ni.
- ¹⁰"Persia, Ludia le Libna rama mihai chu sipai sintho'n an oma, an phôhai le an thîr lukhumhai chu ni sipaihai riakbuka an sia ngai. Kha mihai kha nangma ta hranga roiinpuina sintuhai chu an ni.
- ¹¹Arvad ram ata sipaihai khan ni kul banghai an hrunga, Gamad ram ata mihai khan ni in irsânghai chu an hrung ngaia. An phôhai chu ni kul banga khan an inkhâi ngaia; annihai khan enhoitaka nang inomtirtuhai chu an ni.
- ¹²"Tarsis-a sum bepâr thoin, tangkaruahai le thîrhai, tîn le irchonhai chu ni neinun inchangin ni lâk ngai.
- ¹³Grik, Tubala le Mesek suakhai le sunsen neinunhai sikin sum bepâr thoin ni om ngai.



- ¹⁴Sakor puak pêl ngaihai le irdoina sakorhai le sakuartung puihai chu Beth-Togarma rengata ni neinunhai zuarin ni lâk ngai.
- ¹⁵Rodes mihai chu nangma le sum bepâr tho'n ni hmang ngai, tuipui kôla om mi tamtakhaiin ni neinunhai chu sâiha le pervom thinghai le an hong thûlpai ngaia.
- ¹⁶Suria mihaiin ni sum bepâr thôna sumhai le ni rama neinun tamtakhai an irchôk ngai. Lunghluhai, puan duminpôl hai, puan âmnei hai, puan zâiirnêm hai le lungmantam hai chu ni neinun irchôkna'n an hmang ngai.
- ¹⁷Juda le Israel ramhai rêkin chu fasen le khuaihlutui le oliv hriakhai le thil mirimhoihaiin ni neinunhai chu an thûl ngai.
- ¹⁸Damaska mihaiin ni sum inpârna le ni thil siamhai kha an hong lâk sup sup, Helbon uain le Sahar samulin nang an hong dota.
- ¹⁹Uzal vêla Vedan le Javan mihai khan nang an hong dota, thîr hlûm hai, mosola hai, thingzungthum hai, thing mirimhoihai an hong chôî.
- ²⁰Dedan mihaiin ni neinunhai chu tâlia dâp zât puan an irchôk ngai.
- ²¹Arabia le Kedar rama roirêltuhaiin belratehai le belrahai le kêlhai le ni neinunhai an irchôk ngai.
- ²²Seba le Raama suminpâr mihaiin rângachakhai, lunghluhai le rimhoi satakhai leh ni neinunhai an irchôk ngai.
- ²³Khan Haran, Kanne le Eden khopuihai le Seba sum bepâr thôhai le Assur le Kilmad khopuihai chu nangma leh sum bepâr tho'n an om ngai.
- ²⁴Ni kuanga puan satakhai, puan duminpôlhai, puan âm neihai, zâmpher a chial le hrui hrual sahai an zuar ngai.
- ²⁵Ni suminpârna thilhai chu neinun pêlna irkuang lian takhai chôîin an om ngai, nang chu tuipui laia irkuang, neinun tinrênga sip ang kha ni ni.
- ²⁶Ni irkuang vaituhaiin tuipui chungâ hlataka nang an fepui laiin, nisua tianga phâivua'n tuipui laia khan an siat tâka.



²⁷Ni sum bepâr thôna irchon murdihai, nir kuang chalaituhai, nir kuang sintuhai, ni sum bepâr thôhai le irkuang chung a sipai murdihai chu an rêngin, a om murdihai chu tuipuaia khan nir kuang a siat tika hmunkhatin thi sa ving an ti.

²⁸Irkuang chalaituhai khêk irhâi chu tuipui panghai khan an tônga.

²⁹Irkuang murdi chu mâksanin irkuang chalaituhai murdi chu tuipui panga la fe ving an ti.

³⁰A sate'n nang chûlpui an ta, an luhaiia vâiphin irthupumin, irvuta la'rbual an ti.

³¹Nangma ta hrangin an sam ep an ta, bora puanin irvo an ta; an chap lia an milung la na pehai liain om an ti.

³²Nangma ta hrangin chûlpuina hla sak an ta. "Tura ang hi tûte dang om mahai, Tura chu tuipui laia inboipaiin a om ta.

³³Ni sum bepâr tho mihai chu tuipui râl tiang an fe ngaia, mi tamtak chu nir chon roiinpui tak le ni thil zuarhai khan an milung nin hoitir pehai ngaia. Irnênga rênghai chu nir chongtirhai ngai.

³⁴Khan, atûn chu tuipui laia ni siat tâka, tuikhanglian inthûkna laia ni tâk a ni ta, ni neinunhai le ni sinthotuhai murdi chu nin rêngin tuipui laia nin tâkin nin irhmang zoi a ni ta,' tiin.

³⁵"Khanchu tuipui kôla om murdihai chu ni thil tongna sika khan an kamanga, an rênghai ten lua an irthat zoi tâka.

³⁶Nang chu nir hmang tâka, kumkhontuanga irhmang chu ni ni ta; khanchu rammual pumpuaia sum bepâr thohaiin ni itong ang kha tong kin ti, tiin a satêrenga chi le inthingin an om zoi tâka," a tia.

Ezekiela 28

Tura rêng chungthua leihirilna

¹Khan, Rengpa'n a ni zuang chongpuia,



²“Mihriam nâipa, Tura rêng kuang khanRengpa Pathianin hiang hin a ti, ti ro: A sân ni om nin liantira, pathian angin ni oma, pathian angin rêngtoihmuna ki toia, kil tina tuipuiin a nir huala, ni tia. pathian angin ni oma, khannisian pathian ni mak chea, mihriam kêng ni ni.

³Daniela nêka vâr angin nir bêa, thil irthup ite nangma ata hi thup thei ni mah.

⁴Ni vârna le ni theina'n nang ar chongtira, rângachak le tangka ni neia.

⁵Vâr takin sum bepârhai tho pumin, irchon tamtak ni bûma, nir chonhai sika khan ni milung chu omlianna'n a sip zoi ta.

⁶“Khasikin, atûn kei Rengpa Pathian hin hiang hin ki ti: pathian anga vârin ni lei irbe tâk sikin.

⁷Ni râl soal takhai chu nang doi hrangin zuang hruaihai ki ta, anni khan ni theina le ni vârna hmanga thil sa ni ibûmhai kha insiatpai ving an ti.

⁸Annihai khan nang that an ta, tuipui laia thata lei om tâkhai angin thi sa ni ti.

⁹Nang that hrangin an zuang tena khom pathian angin ni la irbe mai hrang ma ni? Nang a that hrangtuhai kuta chu Pathian ni loiin mihriam kêng ni ini kha.

¹⁰Pathian nei loi ram dang mihai kuta ui thi angin thi ni ti. Kei Rengpa Pathian hin thu ki ipêk a ni,” a tia.

Tura rêng tûkna

¹¹Khan Rengpa'n a ni zuang chongpui nôka.

¹²“Mihriam nâipa, Tura rêng chungga thil tung hranghai sikin ni charindongin lân, a kuang Rengpa Pathianin hiang hin a ti,” ti roh. Matona khan chu satirkip irkhînahai ni lei nei ngaia, ni vârin ni hmêl khom a sân a saa.

¹³Pathian irhuan Eden-a khan ni lei oma, lunghlu chi tinrêng hai leh ni'rvoa; rubi, topaz, barli, karnelian, jasper, safir, emeral, garnet le lunghlu danghai



leh khan. Rângachak tukrivohai khom ni neia, khaanga siama ni om nî khan, nangma ta hranga siamin an iom a ni.

¹⁴Khatak khan nang a hrungtu hrangin irvântirtôn ichiom tak ki siaa; ki tâng irthianga omin, lunghlu irtêkhai chung a khan ni chai ngaia.

¹⁵Fel lina sin ni tho mân khan chu, ni omdânhai chu isama ni om ata kha satirkipin a oma.

¹⁶Thil zuar le irchonin ni buaia, kha khan sualna le thisen insuakna'n nang a hruai inlûta. Khasikin ki tâng irthiang chu masan hrangin nang ki tia, nang a hrungtu irvântirtôn khan lunghlu irtêkhai lai ata kha nang a'rzûlpai ta.

¹⁷Ni hmêl satna khan omlinan nang a siama, nir hming inthangna khan invêt angin nang an omtira. Khahai sika khan hnuai changa nang ki pai raka, khan rêng danghai irsinsiana hrangin nang ki imâksan tâk a ni.

¹⁸Ni sualna tamtakhai sika hin le iamom loi taka ni sum bepâr thônahai sika hin hmun irthianghai chu ni porinchetira. Khasikin khopui chu ki hâlvôm-tir chit a ni ta. Nang a entuhai vaiin irvut ni chang lam hi nang an hmua.

¹⁹Nam tin nang an hriattuhaiin chu ar khêl ti an ti, irhmangna ichiom tak chu ni tung tâka, om khom om nôk ta ngai no chi ni," tiin.

Sidon chungthu leihirilna

²⁰ Khan Rengpa'n ki kuang hiang hin a tia,

²¹“Mihriam nâipa, Sidon khopui chu theilo inchangtir roh.

²²Khataka mihai kuanga khan kei Rengpa Pathian ngêt hin an chungthu hiang hin ki ihril a ni, tiin inhrilhai roh. Kei chu ni râl ki nia, o Sidon ni chung a ki sinthohai sika hin mihaiin nin pâk an ti. Ni sûnga omhai hi ki hremhai tena chu, ki'rthiangzia le Rengpa ki inzia hi anni khan inhresuak ta an ti.

²³Hripui ni chung a zuang tîr ki ta, ni kotsuahai thisen inluangtir ki ti. Nang chu kil tin ata doiin om ni ta, ni mipuihai chu thatin om an ti. Kha tena chu Rengpa ki nih ti inhresuak ta an ti," a tia.

Israel chu satvurin la om a ti



²⁴Khan Rengpa'n, "Israel lei hmumâktuhai a kôlvêla namhai chu itiklai khomin Israelhai ta hrangin ilhling le buar-hai angin om nôk thei ta no nihai, khanchu Rengpa Pathian ki nih ti inhre thei ta an ti," a tia.

²⁵Khan, Rengpa Pathianin hiang hin a tia, "Israelhai chu ki inthe kindartirhaina ram ata kha bukkhômhai nôk ki ta, khanchu nam tinin ki'rthiangzia inhresuak an ti. Israelhai chu ki sinthotu Jakoba kuanga ki ipêk, anni ram ngêta om an ti.

²⁶Khataka khan milung irngam takin om an ta, inhai sinin, grep irhuanhai tho an ti. Lei hmumâkhaia anni lei lôtuhai, an kôlvêla nam murdihai chu keima'n hremhai ki ta, khan Israelhai chu zôkin om an ti. Khanchu Rengpa an Pathian ngei chu ki nih ti inhre ta an ti," a tia.

Ezekiela 29

Aigupta chungthua leihrlina

¹ Khan kin sal intângna kum sômna, tha sômna sôn sôm hleihnina nî sôn khan Rengpa'n a ni zuang chongpuia.

² "Mihriam nâipa, Aigupta rêng kha theiloi inchangtirin lân, ama le Aigupta ram murdi hrema a omna hrang thu hril pe roh.

³ Hi hi Rengpa Pathianin Aigupta rêng chungthua a ihril chu a ni ti roh. O, Faraa Aigupta rêng, Nail ivadung kôla rûlpui ang ni nia, Nail dung chu ki isiam a nia. Keima ta a nih ti ngaitu, keiin nang ki idoi a ni hi.

⁴⁻⁵ Khan ni bâi sûnga irkuai inlatir rap ki ta, Nail vadunga ngahai chu ni hlipa khan inkhophai ki ta, nang le ni tuidunga ngahai kha tâng châra nangni kêlsua ki ti; khanchu tukhomin nang la nuam ta no nihai, phûm khom nang phûm no nihai. Ramsa le chunglêng vatehai bu hrangin nang pe ki ti.

⁶ Khanchu, Aigupta rama mi murdihaiin Rengpa chu ki nih ti inhre ta an ti," a tia. Khan Rengpa'n, "Israel mihaiin Aigupta mihai chu an irhnêlhaia, khannisian nangma chu khianghrol irnêm tak ang kha ni nih.

⁷ Khan nang an irhnêl lai khan, nang chu ni kiaka, an dâr ruhail le an konghai nin khiak pehai ta.



⁸Khasikin atûn kei Rengpa Pathian hin nang ki hril, khandai le nang a doi hrangin mi zuang tuanghai ki ta, ni mipuihai le ni sahai thatpai ving an ti.

⁹Khanchu Aigupta ram chu ram inpon le kho ram chang ta a ti. Khanchu Rengpa ki nih ti inhre ta an ti. Nail vadung chu ki ta leh ki isiam a nih ni ti sikin.

¹⁰Khasikin irngai ro, kei chu nang le ni Nail dung râlhai ki nia, Aigupta ram murdi chu hmâr tiang Migdol khopui ata sim tiang Aswan khopui ten le Ethiopia ramri fena lamhai dênin ram inponin siam ki ti.

¹¹Mihriam mani, ramsa mani khom, kha khan inlôi thei ni no nihai, kum sômminli sâng chu tûte lua thei ni no ni.

¹²Aigupta ram chu rammual pumpui sênga ram inpon takin siam ki ta, kum sômminli sâng chu Aigupta rama khopuihai chu omin siat chian a ti. Khopui danghai nêkin siat ual a ti. Aigupta mihai chu invâtirhai ki ta, ram tina rotin, nam tinhai laia inomtirhai ki ti,” a tia.

¹³Khan Rengpa Pathianin hiang hin a ti, “Kum sômminli zoia Aigupta mihai chu ki inthekindartirhaina ram ata hong bukhai nôk ki ti.

¹⁴An irzirna hmun Aigupta ram sim tiang khan inomtirhai nôk ki ti. Khataka khan inriang takin om an ti.

¹⁵Itiklai khom ram danghai chungâ roirêl ta no nihaia, ircham boi dapin siamhai ki ta, tu ram khom an ircham hnuaia inomtir thei ni ta no ni.

¹⁶Israel khom changpuina zongin irhnêl ta ngai no nihai, Aigupta ngêrhmun siatzia khan Israelhaiin anni lei irhnêl kha a dik loizia inhriattir ni tah a ti. Khanchu Israela'nRengpa Pathian chu ki nih ti inhre ta an ti,” a tia.

Reng Nebukadnezara'n Aigupta a lâkna thu

¹⁷Khan kin sal intângna kum sômhni kum hnina, a tha khatna sôn khatna nî khan, Rengpa'n a ni zuang chongpuia.

¹⁸“Mihriam nâipa, Babulon rêng Nebukadnezara chu Tura doi hrangin ar siam tâka. A sipaihai chu puakrik inpêltirhaiin, an lu kol rakin le an dêrhai



inlông rakin an oma. Khannisian rêng le sipaihai khan Tura rengata ite an sôlna man hmu mahai.

¹⁹Khasikin atûn, keiRengpa Pathian hin hiang hin ki ihril a ni: Aigupta ram chu rêng Nebukadnezara kuta pe ki ta, ama'n mualphoi sak a ta, Aigupta irchon murdi chu chôiin a sipaihai hlo hrangin pehai a ti.

²⁰Keima ta hranga sin a lei thôna sikin, Aigupta ram chu pe ki ti. Kei Rengpa Pathian hin ki iti a ni.

²¹“Kha thilhai kha a tung tena chu, Israel mihai chu inhrâtirhai ki ta, khanchu nang Ezekielia mi tinin nang an inhriat theina hrangin thu nang inhril ki ta, khanchu Rengpa ki nih ti inhresuak ta an ti,” a tia.

Ezekiela 30

Rengpa'n Aigupta ram a hrem hrang thu

¹Khan Rengpa'n a ni zuang chongpui nôka,

²“Mihriam nâipa, Rengpa Pathianin hiang hin a tih tiin hrilin lân, inpuang ro; hi thuhai hi khêkin hril roh. Sûn ichiom tak a tung ta!

³Nikhua chu anai ta, Rengpa chângna hrang sîn chu, nam tin ta hranga sumpui zîngna nikhua le buaina nikhua chu.

⁴Aigupta rama irdoi om a ta, ram chu longindarin om a ta, insiat chita mâksanin om a ti.

⁵“Kha irdoina khan Ethiopia ram, Ludia ram, Libna ram, Arabia ram le Kub ram ata sipai hmang lai hai le, ki mihai lai ata khom thi sa an ti,” a tia.

⁶Khan, Rengpa Pathianin hiang hin a hrila, “Hmâr tianga Migdol ata le sim tiang Aswan ata Aigupta hrungtuhai chu thatpai ving ni an ta, khanchu Aigupta ram ata sipai omlianhai chu inboipai ni an ti. Kei Rengpa Pathian hin ki iti a ni.

⁷Khan, kha ram kha rammual pumpui laia ram inpon tak ni a ta, khopuihai chu insiata masan ni a ti.



- ⁸Khan, Aigupta ram chu ki hâla, a hrungtuhai ki thathai tena chu, Rengpaki nih ti inhre ta an ti.
- ⁹Kha nikhua kha a hong tunga, Aigupta ram insiatpaim a om tena chu, mihai chu irkuanga tîrhain, Ethiopia rama lungthitaka omhai kuang khan thurchi saloi chu inhretirhai ki ta, irthatâk vîkin om an ti, kha nikhua kha hong tung hrang a ni ta,” a tia.
- ¹⁰Khan, Rengpa Pathianin hiang hin a hrila, “Babulon rêng Nebukadneza chu Aigupta irchon murdi insiatpai hrangin hmang ki ti.
- ¹¹Ama le a sipai nunsithai chu zuang an ta, ram chu insiatpai chit an ta, Aigupta chu khandai leh doi an ta, mithi ruakin a ram chu sip zoi a ti.
- ¹²Nail vadung chu inkangtir ki ta, mi pualoihai kuta Aigupta chu sia ki ti. Khan, ram dang mihain a ram murdi chu insiatpai chit an ti. Kei Rengpa Pathian hin ki iti a ni,” a tia.
- ¹³Khan Rengpa Pathianin hiang hin a hrila, “Nof millimhai le pathian dolhai chu insiatpai ki ta, khan Aigupta ram chung a roirêltu hrang tukhom om ta no nihai, mipui murdi chu irthatâkin sehai ki ti.
- ¹⁴Sim tianga Aigupta ram chu ramchitin siam ki ta, hmâr tianga Zoan khopui chu meiin hâlpai ki ti. Khan, Thebes khopui chu hrem sa ki ti.
- ¹⁵Khan ki ningmurna chu Aigupta rama khopui kul nei Pelusium chung a bunthuan ki ta, Thebes irchonhai chu insiatpai ki ti.
- ¹⁶Aigupta ram chu hâl ki ta, Pelusium chu dengthei takin om an ti. Thebes banghai chu insimpai ni a ta, khopui chu tuiin sip a ti.
- ¹⁷Heleopolis le Bubastis khopuia ruathartehai chu irdoinaa thi an ta, khan mi danghai chu sala hruaiin om an ti.
- ¹⁸Aigupta sinthotheina le a hrâtna an irsorpui ngai kha kin boipai tena chu Tahfanes chu inthimin bôm ta a ti. Aigupta chu sûmin bôm a ta, khopuia mi murdihai chu sala hruaiin om an ti.



¹⁹Khan Aigupta chu hiang hin ki hrem tena chu, Rengpa ki nih ti inhresuak ta an ti,” a tia.

Aigupta rêng irchamneina inboina

²⁰Khan kin sal intângna, a kum sômhleikhatna tha khat le sôn sari nî khanRengpa'n a ni zuang chongpuia.

²¹“Mihriam nâipa, Aigupta rêng kut chu kin khiakpai tâka, a dam nôka khandaihai ar lên thei nôkna hrangin tukhomin thil a ngar zât leh tuam pe mahai.

²²Khasikin atûn Rengpa Pathian hin hiang hin ki iti a ni: Aigupta rama ki râl ni nia, a kut inhni chu inkhiakpai ki ta, kiaka lei om le la kiak ngai loi kha. Khan a khandai chu a kut ata inthapaitir ki ti.

²³Aigupta mihai chu rammual pumpuia hin irthekindartirhai ki ti.

²⁴Khanchu Babulon rêng kuthai chu inhrâtir ki ta, ki khandai chu a kuta sia ki ti. Khannisian Aigupta rêng bânhai chu inkhiakpai pe ki ti, a râlhai makunga khêkin thi a ti.

²⁵A ni, ama chu indoktir ki ta, Babulon rêng chu inhrâtir ki ti. Ki khandai chu ama ki pêka, Aigupta ram tiang an lek tena chu mi tinin Rengpa ki nih ti inhresuak ta an ti.

²⁶Aigupta mihai chu rammual pumpuia hin irthekindartirhai ki ta, khanchu Rengpa ki nih ti inhresuak thei ta an ti,” a tia.

Ezekiela 31

Aigupta Sidar thing leh hrilkhia omna thu

¹Khan kin sal intângna kum sômhleikhatna, a tha thumna a sôn khat nî sôn khan,Rengpa'n a ni zuang chongpuia.

²“Mihriam nâipa, Aigupta rêng le a mipuihai kuang khan hiang hin hril ro: Ni sintho theizia hi ar sâng zâp na! I leh mo nang ki ihrilkhî ta hrang?

³Lebanon Sidar thing ang ni nia, ôn irbuk le enhoi tak nei, sôm tôn phâk raka thingkung ang chu ni ni.



⁴A'rsôna hrangin tui a tama, ama infâna hrangin tuirîlpût a tama, thing môngna hmun kha tui leh an inzotir maia. Khan rampui sînga thing murdihai ta hrang khan tuidunghai a om saa.

⁵Ama chu sataka tui hmu'n a oma, thingkung danghai nêkin ar sâng uala, a ônhai khom sei le liantak tak a ni.

⁶Chunglêng va chi tinrêngin a ôna khan irbu an kai ngaia, ramsahai chu a ôn hnuaihai khan an têhai an lêng ngai; rammuala nam tinhai chu a dâihlîm hnuaihai khan an irngam ngai.

⁷Kha thing kha en a hoiiin, ôn sei takhai lâkin, irsâng tak a nia; a'rzunghai chu irnêng rîla tui luanghai dênin a phâka.

⁸Pathian irhuana Sidar kung danghai leh hrilirkhî thei ni maka, meisâr kung rêng rêngin khaanga ônhai kha la nei ngai mahai, Tângêm kunghai khomin a ônhai lua pha mahai. pathian irhuan thingkunghai lua'n a satna kha pha mahai.

⁹Keiin enhoitak le ôn irzat takhai neiin ki siana. Pathian irhuan Edena thingkung murdihaiin ama chu an hnarsa ngaia.

¹⁰“Khasikin atûn, kha thingkungin sîmhai a phâk mân tena irsôna a om chungha khan i zât thil mo a tung hrang ti hi kei Rengpa Pathian hin nan hril ki ti. A'rsâng lia a ôn a lian liaa.

¹¹Khasikin ki hnôlpai tâka, ram dang mi roirêltu kuta pe ki ti. Ama'n kha thingkung kha a pualoina dungzuiin a chungha thil tho a ti.

¹²Ram dang mi lungkham boihaiin phûrin masan rak an ta, a ônhai le a suamhai chu tâng tin le phâizôl tin chungha khan tâkin om a ti; a dâihlîm hnuaihai nam tin omhai chu rot ta an ti.

¹³Vatehai chu hongin thing kiak sai chungha khan hong chuang an ta, ramsahai khom a ônhai khan inlôi an ti.

¹⁴Khasikin atûn ata chu thingkung murdi, savinga tui leh donsui khom ni sian, kha tânga khan sei thei ta no nia, a'rzîk khomin sîm dênin sei ta no ni.



An rêngin anni chu mihriamhai anga thi hrang an nia, mithi khua lei fe tâkhai zu zompuihai an ti,” a tia.

¹⁵Khan, Rengpa Pathianin hiang hin a tia, “Thing kha mithi khua a fe tena chu a chûlpuina entîrna hrangin irnêng rîla tui leh inkhumpai ki ti. Tuidunghai chu khaphai ki ta, ivadung tam takhai khom inluangtir no ning, thing kha a thi tâk sikin, Lebanon tâng chunghaia inthimin sia ki ta, khan rama thing murdihai chu inthêmtirhai ki ti.

¹⁶Mithi khuaa ki tîr tena chu, a’rtetna irhâi khan nam tinhai chu inthingtir a ti. Khan Edena thingkung murdihai le, Lebanon-ah thing sa, tui leh donsui inliana omhai, irnêng hnuai tianga fe tâkhai kha a’rtetna sika khan an râiinfântir an ti.

¹⁷Ama le anni chu mithi khuaa irteta lei om tâkhai zompui hrangin fe an ta, an irhlîm hnuai om murdihai chu, nam tinhai laia irthekindarin om a ti.

¹⁸“Thingkung kha Aigupta rêng le a mipuihai chu an nia, Edena thinghai lua khaanga irsâng le milung lâk kha om mahai; khannisian atûn chu, Eden irhuana thinghai ang khan, Pathian nei loihai le irdoina khan ithata lei om tâkhai zom hrangin mithi khuaa fe ta a ti, keiin ki iti a ni,” Rengpa Pathianin a tia.

Ezekiela 32

Aigupta rêng Ole leh hrilkhîna

¹Khan kin sal intângna a kum sômhleihnina tha sôm tha hnina sùn khat nî khan Rengpa’n a ni zuang chongpuia.

²“Mihriam nâipa, Aigupta rêng kha irningchaka om hrangin hrilin lân, hi thu hi a kuang inhretir roh. Namhai laia kâmkeibaknei angin ni oma, khannisian tuidunga tui irsoktir ngai Ole kêng ni ipua ual. Ni kehai leh khan tui innimtirin tuidung ni porinchetira.

³Khanchu nam tamtakhai an irbûm tika, ki lên leh nang khum ki ta, anni’n muanga nang kêlsua an ti.



⁴Khanchu tânga nang dêngzuan rak ki ta, rammuala chunglêng vahai le ramsa murdihai chu nangma nang fa hrangin hong tuanghai ki ti.

⁵Tâng sîpa khan ni hme sia ki ta, irhôrhai ni'rngê'n sip zit a ti.

⁶Ni thisen chu tâng chunghaia irthekindarin a om mân ten le tuidunghai a luang sip mâka chu bunthuan ki ti.

⁷Khan, nang kin boipai tena chu, irvân chu inkhumpai ki ta, ârsihai khom inthimtir ki ti. Misa chu sûmin irkhum a ta, tha khomin a vâ insua thei no ni.

⁸Irvâna vâ murdihai inthimtir ki ta, hi rammual chung a hin inthim inlêngtir ki ti. Kei Rengpa Pathian hin ki iti a ni.

⁹Ni la inhriat viat ngai loi ramhai laia ni siatna thu hi ki hril indarh tena chu, a sân a poi ti an ti.

¹⁰Ni chung a ki sintho hranghai hin nam tam takhai khom la kamang zoi an ta, ki khandai kin lek tika chu rêng hai chu chipumin inthing an ti. Ni tûk nî tena chu, an rêngin mâni hringna chung a chitirînmin lan thing an ti," a tia.

¹¹Khan Rengpa Pathianin Aigupta rêng kuang hiang hin a hrila, "Babulon rêng khandai chu irtongpui ni ta.

¹²Nam pualoi sipaihai chu an khandai inkêlsuatirhai ki ta, ni mipui murdihai inthattirhai ki ti. Ni mipuihai le ni omlianpui danghai le insiat ving ni a ti.

¹³Tui kôla ni sa murdihai chu invât tôlhai ki ta, mihriam mani, sa mani khom tui innimtir hrangin om ta no nihai.

¹⁴Ni tuihai chu invârtirin, ni tuidunghai chu damzanin inluangtirhai ki ti, kei Rengpa Pathianin ki iti a ni.

¹⁵Aigupta ram chu inpôntir chit ki ta, khataka omtuhai kha kin boipaihai tena chu, Rengpa ki nih ti inhre ta an ti.

¹⁶Hi irdînna thu hi chûlpuina hla chang a ta, nam tina nupanghaiin Aigupta le a mipuihai chûlpuina'n la sak an ti, kei Rengpa Pathian hin ki iti a ni," a tia.



Mithi khua

¹⁷Khan kin sal intângna kum sômhleihnina tha khatna sîn sôm hleiringana nî khan Rengpa'n a ni zuang chongpuia.

¹⁸“Mihriam nâipa, Aigupta rama, mi murdihai hi chûlpuihai ro, nam sinthotheihai le anni chu mithi khuaa tîrpaihai roh.

¹⁹An kuang hiang hin hril ro: Mi danghai nêka a sa ualin ni irbe ma ni? Mithi khuaa fe ni ta, khataka khan Pathian boihai leh zâlsuam nin ti.

²⁰“Aigupta mihai chu irdoia thata omhai leh khan tûk suam an ti, anni thatpaina hrangin khandai chu irfûk diam a ni ta.

²¹Aigupta mihai chu, mi hrât takhai le Aigupta mihai lei san ngaitu khan mithi khuaa an lei lôm inlûthaia, Pathian inhriat ngai loi irdoinaa thata omhai chu hitaka hin an zuang chum tâka. A ni ‘hitaka hin an zâl ta,’ tiin an khêka.

²²“Assuria chu a kôlvêla sipaihai thân le hlataka khan a oma, an rêngin irdoina khan that an ni.

²³Khan an thânhai chu mithi khua kilkhôr taka khan a oma, a sipaihai chu irdoina khan thatin an oma, a thân lung chu an thân lunghaiin ar hual khaka, khannisian tiana khan chu mihriamhai rama chitna lei inomtirtu chu a ni.

²⁴Elama chu a kôla a sipaihai thân leh khan a oma, an rêngin irdoina khan that an nia, sertan loi lei fe tâkhai mithi khuaa khan an fe tâka. An hring lai khan chitna chu an intungtir ngaia, khannisian atûn chu hmâimôkna thiin an zâl tâka, irdoina thata omhai itong ang kha an tong tâk.

²⁵Elama chu irdoinaa thata lei omhai kêra khan a zâl tâka, a kôlvêla khan a sipaihai thân khom kha a oma. An rêngin sertan loi an nia, an rêngin irdoinaa thata om an ni. An hring lai khan chitna chu an inzaptira, khannisian atûn chu hmâimôk taka thiin an zâl tâka, irdoinaa thata omhai itong ang kha an tong ta.



²⁶“Khan Meseka le Tubala khom an kôlvêla sipaihai thân le, khataka khan an oma, an rêngin sertan loi an nia, irdoina hmuna ithata om an ni. Khannisian matona khan chu mihriamhai rama chitna lei inomtirtu an ni.

²⁷Anni chu tiana mi hrâthai, an luthun hnuaiia khandai siaa, an rôp chung a an phohai siain, râltukfam irkip le mithi khuua lei fe tâkhai ang khan chôiindômna pêka thâna phûmin om mahai. Hi mi hrâthai hi tiana chu mihriamhai rama chitna inlêngtir thei khopin sinthotheina an lei nei ngai a ni.

²⁸Khaang khan Aigupta mihai chu sertan loi irdoinaa thata lei om tâkhai laia khan zâlin om an ti.

²⁹“Edom chu khataka khan rêng le roirêltuhai leh an oma. Anni chu sipai hrât takhai an nia, khannisian atûn chu irdoinaa thata omhai, sertan loihai le mithi khuua zâlin an om ta.

³⁰Khanchu hmâr tianga roirêltu murdihai le, Sidon mihai khom chu khataka khan an oma, tiana khan chu an sinthotheina khan chitna an lêngtir ngaia, khannisian atûn chu hmâmôka omin irdoina thata omhai leh khan sertan loiin an zâl tâka. Mithi khuua hmâmôk tuanga omtuhai hmâmôkna chu anni khomin an tong sa tâka.

³¹“Hi thil murdihai hin, irdoina thata omhai kha Aigupta rêng le a sipaihai ta hrangin lungngam chu ni ta a ti,” Rengpa Pathianin a ti.

³²Khan Rengpa'n, “Aigupta rêng chu mihriamhai rama chitna inlêngtir hrangin ki siama, khannisian ama le a sipai murdihai chu thatpai ving ni an ta, irdoinaa thata lei om tâkhai le, sertan loihai leh khan zâlsuam ta an ti,” Rengpa Pathianin a ti.

Ezekiela 33

Pathianin Ezekielia chu enkoltu ni hranga inkung

(Ezek 3.16-21)

¹Khan Rengpa'n a ni zuang changpuia,



²“Mihriam nâipa, ni mipuihai kuang khan, ‘Hi ram doi hrang hin râlhai sipai ki hong tuanghai tena chu, kha rama mihai khan an laia mi inkhat chu enkoltu ni hrangin inthangsuak ri sehai.

³Khan, râl honghai a hmu tena chu bekul tum sianlân, mi tin irningchakin om ri sehai.

⁴Khan mi’n an hriata, khannisian uksak loiin a oma, râlhai chu hongin ama an thata ni’n chu a thina chungthua ama’n mophur a ti.

⁵A thina chu a binga an châina sika a ni, irning hranga hrila a omna kha a uksak no sikin. Lei uksak sianlân chu a izôk thei hrang a nia.

⁶A hrungtu khan râl honghai chu a hmua, khannisian bekul kha tum loiin râlhai kha hongin mi sualhai kha lei that tahai sian, an thina chungthua a hrungtu kha theiloi inchangtir ki ti.

⁷“Khasikin mihriam nâipa Israel nam ta hrangin a hrungtu’n nang ki isiam a ni. Ni kuanga irning hranga thu ki ihrilhai kha anni chu inhrilhai ngêt roh.

⁸Khan mi pualoi chu thi hrangin kin puanga, khannisian nangma’n a hringna saninzôka a om theina hrangin a lampuihai masan hrangin nin hril noa ni’n chu ama sualna khan thi a ta, khannisian a thisen mô chu nangma kuang zong ki ti.

⁹Khan mi pualoi chu nir kôka, khannisian a sual thohai chu a mong noa ni’n chu, a sualna khan thi a ta, khannisian nangma hringna chu inzôkin om a ti,” a tia.

Mâni senga mophurna

¹⁰Khan Rengpa’n a ni zuang chongpuia, “Mihriam nâipa, Israelhai kuang khan, ‘Ei sualnahai le ei inchâinahai chu ei chung a oma, ei irhmang zoi a ni ta hi; itin mo ei ihring thei ta hrang?’ nin ti ngaia tiin hril pehai roh.

¹¹Khan an kuang khanRengpa Pathian hring ki ini ang hin hiang hin ki iti a nih ti pehai roh. Mi sual thina hin lômna zel nei ma unga, kha nêkin chu a sual sinhai mâka, a ihring hi ki ilôm ual a ni. O Israel ni thilsual thohai kha ma ta ro: Itho sika thi ni inuam mai ma ni?



¹²Khasikin atûn, o mihriam nâipa, Israel mihai kuang khan hiang hin hril ro: Mi fel kha soal a sina niin chu, a thil lei tho insahai khan saninzôk hliak ual no ni. Khan mi pualoiin a sintho pualoihai a mâksana ni'n chu, ama chu hremi om no nia, khan mi felin soal a sina ni'n chu, a hringna chu inzôk ni no ni.

¹³Khan mi fel kuang hringna pe hrangin chonginkungna chu ki nei theia, khannisian tiana a sin sa lei thohai kha a ruk tôka inhriatin, soal a thoa ni'n chu, a sintho insahai kha inhre mai ta no ning, ama chu a soalna khan thi a ti.

¹⁴Mi pualoi chu thi hrangin ki'rkôk theia, khannisian a soal sinhai mongin a dik le a fel a thoa ni'n chu,

¹⁵entîrna hrangin, lakâi lâkna hranga bândaa thil a ilâkhai kha inkhîr nôkin, neinun a inrûkhai kha pêkkîr nôkin, a thil soal thohai chu mongin, hringna hmuna dânhai a zômin chu, ama chu thi no nia, hrangin om mai a ti.

¹⁶A soal thohai chu ngaidam ki ta, ama chu thil sa le thildik a thôna sikin hring a ti.

¹⁷“Khan ni mipuihaiin, ki thil thohai hi dik mah an ti ngaia, khannisian anni lampui hro kha kêng a idik loi chu a ni.

¹⁸Mi felin sin sa sin a monga, sin siat a thoa ni'n chu, ama chu a soalna sika khan thi a ti.

¹⁹Khan mi soaln a sin siat thohai a monga, thil sa le thil dik a thoa ni'n chu, a hringna chu inzôk a ti.

²⁰Khannisian o Israel ki thil thohai hi dik mah nin ti ngaia, nin sintho angin nin chung a roirêl hrang ki ni,” a tia.

Jerusalem lâka a om thu

²¹ Khan, kin sal intângna kum sômhleihnina tha sômna, sîn ringa nî khan Jerusalem ata zôk, mi inkhat chu ki kuang a hongin, khopui chu a tûk ta tiin a ni hong hrila.



²²Khan a hong mân nia khohloi tiang khan Rengpa sinthotheina chu ki chung a chuma. Zîngkhua a vâra kha mi kha a hong tung tena chu Rengpa'nchong theina a ni pêk nôk tâka.

Mipuihai سوالنا

²³Khan Rengpa'n a ni zuang chongpuia,

²⁴“Mihriam nâipa, Israel rama khopui siata om mihai khan hiang hin an tia. ‘Abrahama kha mi inkhat dok a nia, ram murdi hi ama chu pêkin a oma, atûn chu tamtak ei ni tâka, khasikin ram hi ei ta a ni tâka,’ an tia.

²⁵Khan, kei Rengpa Pathian hin hiang hin ki iti a nih ti an kuang hril pehai ro: Hmê a thi om pumin nin fâka, millimhai nin biaka, mi nin thata, i zât thil ngânin mo hi ram hi nin ta anga nangni a inngaituatir a ini tâk?

²⁶Nin khandaihai nin songa, nin sinthohai hi a porinchea mi tin le nin uirea, i zât thil ngânin mo ram hi nin ta a nih tia nangni a inngaituatir?

²⁷“Khan an kuang hiang hin ti pehai ro, kei Rengpa Pathian hi Pathian hring ki ini ang hin ki iti a ni, khopui siata mi om murdihai kha that ni an ta; rama om murdihai chu ramsahaiin fahai an ti. Tânga le pûka irbîkhai khom hripuiin thi an ti.

²⁸Ram chu inpon chitin siam ki ta, an irsorpuai ngai sinthotheinaihai khom kha hek ta a ti, Israel rama tânghai chu ramsêt inchangtir ki ta, khataka khan mi tukhom inlôi thei no nihai.

²⁹An سوالناhai sikin, mipuihai ki hrema, ram chu kin pontir chit tena chu, Rengpa ki nih ti inhre ta an ti,” a tia.

Deipu thuhai hong tungna

³⁰Khan Rengpa'n, “Mihriam nâipa, ni mipuihai khan khopui bang kôlhaia an irhmukhôm zoroa le an mikothai khan ni chungthu hi an hril ngai. ‘Tho fe ei ta, Rengpa kuang ata i thu mo a izuang ti la va irngai rei,’ an ti irhlôm chita.

³¹Khasikin ki mipuihai chu i thu mo ni ihril hrang tih irngai hrangin an irbûm ngai, khannisian tho hranga ni ihrilhai chu tho ngai mahai. Ni thuhai chu hla



papai angin an bêa, khannisian an huatirhamna lampuihaia khan an fe mai ngai.

³²Anni ta hrangin nang chu irdit hla saktu, serânda âttu, tufiam thotu ang ni nia, ni thuhai chu an irngaia, khannisian inkhat lua zôm ngai mahai.

³³Khannisian ni thuhai kha a tung irkip ving tena chu an laia deipu chu a om ti inhre suak ta an ti,” a tia.

Ezekiela 34

Israel belrapuhai chung a leihriina

¹Khan Rengpa'n a ni zuang chongpuia,

²“Mihriam nâipa, Israel roirêltuhai kha theiloi inchangtirhai roh. An kuang thu hrilin lân, kei Rengpa Pathian hin hiang hin ki iti a ni, ti pehai roh. Nangni Israel belrapuhai nin chung a rik e! Nin bingin, nin irdonsuia, khannisian belrahai chu itiklai khom donsuihai ngai mak chêi.

³Nangni'n chu irhnutui nin ina, samul silkaihai nin irbela, belra satakhai chu thatin nin fâk ngai, khannisian belrahai chu donsuihai ngai mak chêi.

⁴A'rzalhai donsui ngai loiin, dam loihai khom indamtir tum ngai mak chêia, a pop a liamhai khom tuam pehai loiin, ar hmanghai khom zonghai ngai mak chêi, a rothai khom hruai kêrhai loiin. Nunsia takin kêng nin ilohai ngai.

⁵ Belrahai khan belrapu an nei no sikin an irthekindara, ramsahaiin thatin an fâkhai ngai.

⁶Khasikin belrahai chu tâng irsânghai le mualhaia an lêng indara, irnêng chung murdia hin irthekindarin an oma, tukhomin anni chu enin zongsuak khom tum mahai.

⁷“Khasikin, atûn, o nangni belrapuhai, kei Rengpa hin nangni ki ihril hi irngai roi.

⁸Pathian hring ki ini ang hin nangni ki ti, ki chong hi irngai unglân, khanchu nin ta hrangin sa a ti. Ki belrahai chu belrapu an nei no sikin, ramsahaiin



thatin an fâkhai ta a ni. Ki belrapuhai lakin zongsuak tum mahaia. Anni vai an irdonsuia, belrahai chu uksak viat mahai.

⁹Khasikin, o nangni belrapuhai, ki thu hi irngai roi.

¹⁰Kei Rengpa Pathian hin ki ti, kei chu nin râl ki nia, ki belrahai chu nangni ata lapaihai ki ta, khanchu itiklai khomin nangni chu belrapu'n nangni se ta ngai no ning, nin bing vaia irdonsui hrang khomin nangni siam ta no ning. Nangni rengata ki belrahai chu saninzôkhai ki ta, nangni infatir ta ngai no ning.

Belrapu sa

¹¹“Kei Rengpa Pathian hin nangni ki hril, keima ngêtin ki belrahai chu enkolin donsuihai ki ti.

¹²Belrapu'n a belra irthekindarhai bukkhôma a idonsui nôkhai angin donsuihai ta ki ti. Kha inthim le sôm zîng nia an inthekindarna hmunhai ata kha hruai kîrhai nôk ki ti.

¹³Ram dang ata kha hruaisuakhaiin bukhai ki ta, an rama ngêt hruai kîrhai ki ti. Tâng hai le Israel rama ivadunga hruaihai ki ta, hloi hring hmun hoitaka hruaihaiin infâhai ki ti.

¹⁴Tâng chung a durba omna hmuna le irhôrhai le Israel ram murdia hloi hring hmunhaia lungthi takin fâk nêk inzongtirhai ki ti.

¹⁵Keima ngêt hi belrahai belrapu chu ki ni, an ta hrangin irngam hmun zong pehai ki ti, kei Rengpa Pathian hin ki iti a ni.

¹⁶A lei irhmang tâkhai chu zonghai ki ta, a rothai khom hruai kîrhai ki ta, a pop a liamhai khom tuam pehai ki ta, dam loa omhai chu indamtirhai ki ti. Khannisian a dam le a marhai chu inboipaihai ki ti, thil dik tho ngai belrapu chu ki ni sikin.

¹⁷“Khasikin atûn chu, o ki belrahai kei Rengpa Pathian hin ki ti, inkhat khatin nin chungthu râl ki ta, a sahai chu a siathai le a bingin khâipaihai ki ta, belrahai chu kêtakhai leh a bingin sepaihai ki ti.



¹⁸Khan nin laia senkhathai chu durba satakhai nin fâk khomin, nin milung chuk hliak maka, nin ifâk loihai ten khom kha nin chîl insiatpai ngai, tui irthianghai nin in ngaia, nin iin loi ten khom kha nin innimtir ngai.

¹⁹Ki belra danghai khan durba nin ichîl insiathai le tui nin innimtirhai kha an fâkin an in a ni hi.

²⁰“Khasikin atûn, kei Rengpa Pathian ngêt hin nangni ki hril, nangni belra hrâthai le irzanghai kêr hi rêl hrang ki ni.

²¹A dam loihai chu nin naminzuanhai ngaia, a pâl lai ata a bingin nin siahai ngai.

²²Khannisian ki belrahai chu saninzôkhai ki ta, nuamninga loin inomtirhai ta no ning. Ki belrahai chu inkha khatin an chungthu rêl ki ta, a sahai chu a siathai lai ata a bingin sehai ki ti.

²³Khanchu ki sinthotu Davida anga rêng inkhat an belrapu hrangin pehai ki ta, ama'n anni chu donsuihai a ti.

²⁴ Kei Rengpa hi an Pathian ni ki ta, ki sinthotu Davida anga rêng kha an chung roirêltu ni a ti, keiin ki iti a ni.

²⁵Lungthi taka an omna hrangin an kuang thuthung siam ki ta, ki belrahai chu zôka an om theina hrangin le ram hnuaihaia an riak theina hrangin, ram sûnga ramsa murdihai chu irzûlpaihai ki ti.

²⁶“Satvurhai ki ta, ki tâng irthiang kôla inomtirhai ki ta, khataka khan an innang rikipa satvur rua pehai ki ti.

²⁷Thingkunghaiin ra insua an ta, loimânin bu le bâl insua a ti, mi tin chu mâni ram sûnga lungthi takin om an ti. Khan ki mipuihai khitna hrui sût ki ta, suaka siamtuhai ata kin sua zalêntirhai tena chu, Rengpa ki nih ti chu inhre thei ta an ti.

²⁸Pathian nei loi namhaiin longindarh ta no nihaia, ramsahai khomin anni chu thatin fa ta ngai no nihai. Anni chu lungthi takin om an ta, tukhomin insî thei ta no nihai.



²⁹Ram satakhai pehai ki ta, kha ram ata kha châm khom inboipai ta ki ta, nam danghaiin hmusit ta no nihai.

³⁰Mi tinin Israelhai ki hrunghaia, anni chu ki mihai an nih ti inhre ta an ti, kei RengpaPathianin ki iti a ni.

³¹Khan nangni ki belrahai, hloi hring hmuna belrahai, ki mihai chu nin nia, kei hi nin Pathian chu ki ni,” Rengpa Pathianin a tia.

Ezekiela 35

Pathianin Edom a hremna

¹ Khan Rengpa'n a ni zuang chongpuia,

²“Mihriam nâipa, Edom ram chu theiloi inchantir roh.

³Mipuihai kuang khan Rengpa Pathianin hiang hin a tih tiin hril ro: O Edom tânghai kei chu nin râlhai ki nia, ram inponin nangni siam ki ti.

⁴Nin khopui chu kho ramin siam ki ta, nin ram chu ram inpon inchantir ki ti. Khanchu Rengpa ki nih ti inhre ta nin ti.

⁵“Nang chu Israel râlin ni om maia, a sualna sika hremna a om laiin, zoro saloitak a tong laiin, a mipuihai chu khandai sinthotheina, an kuang ni pêkhaia.

⁶KhasikinRengpa Pathian hring ki ini ang hin nangni ki ti, thina chu ni ta ni a ta, zôk viat ta no chi ni. Thisen insuana sikin theiloi chang ni lei ni tâk sikin, thisen insuana'n nang zui ta a ti.

⁷Edom tâng ramhai chu ram inponin siam ki ta, khataka inlôituhai chu thatpaihai ki ti.

⁸Mualhai chu mithi ruakin insiptir ki ta, irdoina hmuna thata omhai khan, tâng le irhôrhai chu sip zoi a ti.

⁹Kumkhontuanga hrangin ni ram chu inpon ta a ta, ni khopuihai khan tukhom om nôk ta ngai no ni. Khanchu Rengpa ki nih ti inhre ta ni ti.

¹⁰“Khan, kei chu an Rengpa le an Pathian lei ni khom inlân, nam inhni Juda le Israel namhai chu, ‘An ramhai chu an ta a nia, la luapai ki ti,’ ni tia.



¹¹Khasikin Rengpa Pathian hring ki ini ang hin nang ki ti, ki mipuihai chungani ninginmurna, ni hnarsânahai chu nang zuang thuan ngêt ki ti, khanchu anni'n an chungani sinthohai sika nang ki ihrem a nih ti inhre ta an ti.

¹²Khanchu insiatin an om tâka, ei involpaihai theina hrangin ei kuang pêkin an iom tâk a ni hi, tia Israel tâng chunghaia thu lei hrila, anni lei idemna murdihai kha kei Rengpa hin ki inhriat ving a nih ti inhre ta ni ti.

¹³Keima ni doia, lâripâk taka ni chongchai khom kha kin hriat sa a ni," a tia.

¹⁴Khan Rengpa Pathianin hiang hin a hrila, "A sân ni ram inpontir ki ta, rammual pumpui chu ni itûkna sika khan lôm an ti, ki'rchon Israelhai an siat laia ni ilôm ang khan.

¹⁵Seir tânghai a nia, Edom ram murdi chu ram inpona siamin a om tena chu, mi tinin Rengpa ki nih ti inhre ta an ti," a tia.

Ezekiela 36

Israel chungani Pathian satvurna

¹Khan Rengpa'n, "Mihriam nâipa, Israel tânghai kuang khan thu hrilin lân, Rengpa Pathianin hiang hin a tih tiin hril ro:

²Israel râlhai chu tekirtoi takin hiang hin an hrila, 'Atûn chu so tâng miluihai so ei ta a ni ta,' an tia.

³"Khasikin thu leihrlin lân, kei Rengpa Pathian hin hiang hin ki tih iti hi inpuang roh. Khan Israel tânghai chu a kôlvêla namhaiin lâkin an longindartira, Israel an hmusit tena chu,

⁴kei Rengpa Pathian hin nangni mual le tânghai, ivadung le irhôrhai nangni khoram mâksana omhai le khopui longindara mâksana omhai, a kôlvêla nam murdihai hmusita omhai hi nangni ki hril.

⁵Kei Rengpa Pathian hin ningmurin a kôlvêla namhai le a bîktakin Edom chu irkôkhai ki ti. Râifân le hmusit takin ki ram chu an lâka, hloi hring hmunhai chu an lei lua tâka.



⁶“Khasikin Israel ram chungthua leihrlin lân, tânghai, mualhai, ivadunghai le irhôrhai kuang khan nam danghaiin hmusit tak le hmâimôk taka an lei ilonahai sika khan kei Rengpa Pathian hin hianga ningmura ki ihril a nih ti hril pehai roh.

⁷Kei Rengpa Pathian ngêt hin chong kin kung, a kôlvêla namhai kha hmâimôk lahai ngêt ki ti.

⁸Khannisian Israel tânghai chungha khan chu thingkunghaiin hna la nôk an ta, nangni ki mi Israelhai ta hranga hin ra insua nôk an ti. In tiang kîr nôk lat thei ta nin ti.

⁹Kei chu nangni tianga mi ki nia, nin loihai chu tho nôk nin ta, chîmu nangni insongtir nôk ngêt ki ti.

¹⁰Nangni inpungtir ki ta, khopuihaia khan om nôk nin ta, a siat a koihai chu indingtir nôk nin ti.

¹¹Mihriam le sahai nangni inpungtir ki ta, tiana nêkin tamtak hong ni ta nin ti; nâi le tehai khom tamtak nei sa nin ti. Tiana nin lei iom ngai ang khan, nangni inomtir nôk ki ta, matona nêkin tuanintungin nangni siam ki ti. Khanchu Rengpa chu ki nih ti inhre ta nin ti.

¹²O, Israel ki mipuihai, nin rama om nôk hrangin nangni hong hruai nôk ki ti. Kha kha nin ram ni a ta, khataka khan nin nâi le tehai châmin om ta ngai no nihai.

¹³“Kei, Rengpa Pathian hin hiang hin nangni ki hril. Mihaiin ram kha mihriam fâktu le namhai longindartirtu an ti ngaia.

¹⁴Khannisian atûn ata chu mihriam fâktu le nin nâi le tehai longindartirtu ni ta no ni, kei Rengpa Pathian hin ki iti a ni.

¹⁵Ram khan nam danghai nuisona thu inhre ta ngai no nia, mihai innuisan tong ta ngai no ni. Ram khan a nâi le tehai chu longindarh ta ngai no ni, RengpaPathianin a ti,” tiin.

Israel hringna thar

¹⁶Khan Rengpa'n a ni zuang chongpuia,



¹⁷“Mihriam nâipa, Israelhai kha an rama an om lai khan, an omdânhai le an sinthôna khan ram kha an porinchetira, an omdânhai kha keima ta hrangin chu nupang a tha tina an hmu zoroa Pathian dâna irthiang loia an om ang dôra porinche chu a ni.

¹⁸Khan ram sũaga thisen an insuanahai le, millimhai sika khan ram an porinchetirna sikin, ki ningmurna chu an chungga kin sum tâka.

¹⁹An omdân le an lêng dân sika khan theiloi kin changtirhaia, khasikin ram danga kin thekindartirhai ta.

²⁰An fena hmun tina, ki’rhming irthiang chu an porinchetira, a san chu mihaiin, ‘Hihai hi Rengpa mihai chu an nia, a ram ata rothai chu an ni,’ an ti ngai sika hin.

²¹Kha thil khan ki’rhming irthiang chu a sân a nin ngaituatira, Israelhaiin an fena hmun tina an porinchetir ngai sikin.

²²“Khasikin atûn, Israelhai kuang khan Rengpa Pathianin hiang hin a tih tiin hril pehai roh. Ki sintho hranghai hi nangni Israelhai sika ni maka, khannisian ki’rhming irthiang, ram tina nin fena hmun tina nin porinchetir ngai sika khan kêng ki itho hrang.

²³Khan ki’rhming roiinpui tak irthiangzia nam tinhai laia nin lei porinchetir tâk kha ki târinlang tena chu Rengpa ki nih ti inhre ta an ti, keiRengpa Pathianin ki iti a ni. Nangma chu nam tinhai laia ki’rthiangzia inlangtirtu ni hrangin nang hmang ki ti.

²⁴Nam tin le ram tin ata nangni hruai ki ta, nin omna rama ngêt nangni hruai kêr nôk ki ti.

²⁵Tui kathâr nangni inthikkhum ki ta, nin millim murdihai ata le nangni a porinchetirtu thil tinrênghai ata kha nangni thâr irthiang ki ti.

²⁶ Milung thar le ngaituana thar nangni pe ki ta, nin milung, lung anga ngar kha lapai ki ta, thuzôm theina milung nangni pe ki ti.



²⁷Khanchu nangnia khan ki'rtha sia ki ta, ki dânhai chu zômin, ki thupêk murdihai chu vongindik ta nin ti.

²⁸Khanchu nin irchi bulhai kuanga ram ki ipêka khan om ta nin ta, nangni chu ki mihai ni ta nin ta, kei nin Pathian ni ki ti.

²⁹Thil tinrêng nangni porinchetirtu rengata kha nangni inzôk ki ta, khan bu khom pung hrangin thu pe ki ta, khanchu châm rêng rêng inhre ta ngai no chin ni.

³⁰Nin theikunghai le nin loihai chu ra tamtak insuatirhai ki ta, khanchu châm rêng rêng om ta ngai no nia, nam tinhai laia hmâimôkin nangni inomtir ta no ning.

³¹Nin omdân pualoihai le nin sin siat thohai kha inhre suak nin ta, khanchu nin porinchenahai le nin sualnahai sikin nin mithmu ngêta khan nin bingin irtir irhlôm nin ti.

³²O, Israel hi thil murdihai hi nangma sika ki itho ni ma, ti hi nin hriat ki nuam. Nin sinthohai sika khan inzôk le hmâimôka nin iom ki nuam, kei Rengpa Pathian hin ki iti a ni," a tia.

³³Khan Rengpa Pathianin hiang hin a tia, "Nin soal murdihai ata nangni ki'rthiangtir tena chu nin khopuihaia khan, nangni inomtir nôk ki ta, nin kho ram lei chang tâkhai kha indingtir nôk ki ti.

³⁴Khan nin loihaia inlôituhai khan insûl zuakin hmu an ta, khannisian keiin loi nangni inneitir nôk ki ti.

³⁵Khanchu mi tinin, 'Hi ram hi matona khan chu ramchâr a nia, khannisian itina mo Eden irhuan anga omin, hi khopui insimpaia, longindara, siata mâksana omhai khom kha lua nôkin kulhai indinga a iom nôk tâk ma ni?' tiin la hril an ti.

³⁶Khanchu a kôlvêla nam inzôka omhai khan kei Rengpa hin khopui siathai chu inding nôkin ram inpon tâkhai chu ram hringin ki siam nôk ti inhre ta an ti. Kei Rengpa ngêt hin tho hranga chong kin kung tâk sikin tho ngêt ki ti," a tia.



³⁷Khan Rengpa Pathianin hiang hin a hrila, “Israelhai chu ki kuanga changpuina zong hrangin voikhat chu siamhai nôk ki ta, khanchu belra pâlhài angin inpungtirhai ki ti.

³⁸Khan atûna khopui siata omhai hi, kha tena chu mihriam insiptirhai ki ta, tiana Jerusalema hruaithe zoroa an inhlan ngai belra sip nguta an iom ngai ang khan. Khanchu Rengpa chu ki nih ti inhre suak ta an ti,” a tia.

Ezekiela 37

Ru chârhai irbukna

¹Khanchu Rengpa sinthotheina liantak chu ki chung a oma, khanchu ar tha’n a ni hruaia, irhôrpa hin a ni sia tâka, kha irhôrpa kha ru hi a sip khaka.

²Kha irhôrpa kha a nin hîltir chita, khataka khan ru châr tamtak hi ki hmua.

³Khan ki kuang, “Mihriam nâipa, hi ru chârhai hi hong hring thei nôk nihai mo?” tiin a nir dona. Khan keiin a kuang, “Rengpa Pathian nangma vaiin kêng ni inhriat,” tiin ki sâma.

⁴Khanchu ama’n, “Ruhai kuang hin thu hrilin lân, hi ru chârhai kuang hin Rengpa thu chu irngai roi tiin hril roh.

⁵Khan an kuang, Rengpa Pathianin hiang hin a iti a nih tiin hrilhai ro: phûk nangnia khan thun lût ki ta, nangni inhringtir nôk ki ti.

⁶Khanchu irthahrui le taksahai nangni pe ki ta, vun leh nangni tuam ki ta. Nin sînga phûk thun lût ki ta, nangni inhringtir nôk ki ti. Khanchu Rengpa ki ni tih inhre ta nin ti,” a tia.

⁷Khanchu thupêka ki iom ang khan thu chu ki hril tâka, thu ki hril mai laiin, thil irnok irhâi hi kin hriata, khanchu ruhài kha an hong irzomkhôm tâka.

⁸Khan ki en mai laiin, ruhài kha irthahrui le taksain a tuama, kha hnung chu vunin a hong tuamhaia, khannisian an puma khan phûk chu om maka.

⁹Khan Pathianin ki kuang, “Mihriam nâipa, phâivuahai kuang thu hrilin lân, an kuang khan Rengpa Pathianin kil tin ata hong, hi mithihai sînga hin



phûk pehaia, inhringtirhai nôk hrangin thu nangni a pêk ti hrilhai ro,” tiin a hrila.

¹⁰ Khanchu thupêka ki iom ang khan thu chu ki hril tâka, khanchu phûk kha an taksa sênga khan a lûta, khanchu hong hringin an ngêr tâka.

¹¹ Khan Pathianin ki kuang, “Mihriam nâipa, Israelhai chu ki ruhai ang hi an ni. ‘Ei ruhai lak a châr zoi tâka, ei isabeina lak a boi tâka, sùn maton ite nei ta mak me,’ an tia.

¹² Khasikin ki mi Israelhai kuang khan thu hrilin lân, kei RengpaPathian ngêr hin an thânhai chu inhongtir ki ta, kêlsuahai ki ta, Israel rama hong hruaihai nôk ki ti, tiin hrilhai roh.

¹³ Khan ki mihai phûmna thânhai chu kin hongga ki kêlsuahai tena chu Rengpa Pathian chu ki nih ti inhre ta an ti.

¹⁴ Annia khan ki phûk thunlût ki ta, inhringtirhai nôk ki ta, an rama ngêr inomtirhai nôk ki ti. Khanchu Rengpa ki nih ti inhre ta an ti. Hi thil hi tho hrangin chong kin kung tâk sikin tho ngêr ki ti, kei Rengpa hin ki iti a ni,” a tia.

Juda le Israel ram khata omna

¹⁵ Khan Rengpa’n a ni zuang chongpui nôka.

¹⁶ “Mihriam nâipa, thing khianghrol inkhat hi lan lân, a chungga hi thu hi irziak ro, ‘Juda rêng ram’ ti hi. Khanchu khianghrol dang la nôkin lân, a chungga ‘Israel rêng ram,’ ti hi irziak nôk roh.

¹⁷ Khanchu khianghrol inkhat anga an inlang theina hrangin a hmor le a hmor kha zomhai roh.

¹⁸ Khanchu ni mipuihaiin, kha thil kha i thôna ma nih tia nang an irdon tena chu,

¹⁹ an kuang Rengpa Pathianin hiang hin a ti, tiin hrilhai roh. ‘Israel inentirna khianghrol kha Juda inentirna khianghrol leh khan hmunkhata sehai suamin lân, khianghrol inkhat inchangtir ki ta, ki kutin chel ki ti,’ a tih tiin.



²⁰“Khan khianghrol inhnihai kha ni kutin chelhaiin lân, mipuihai irhmutirhai roh.

²¹Khanchu Rengpa Pathianin hiang hin a ti, tiin hrilhai roh. Ki mipuihai chu, nam tinhai laia an lei fena hmunhai ata kha hruaisuakhai ki ta, bukhai ki ta, anni rama ngêt hong hruaihai ki ti.

²²Anni chu an ram sũaga le Israel tânghaia khan hmunkhatin siamhai ki ta; an chungga roirêltu hrangin rêng inkhat nei an ta, anni chu nam hniin om ta no nihai.

²³Anni chu millim leh ite porinche ta no nihaia, sualhai tho’n mani le mâni porinchein om ta no nihai. An lei sualna lampui murdihai ata le an lei ihnôlnahai ata kha insuahai ki ta, anni chu ki mihai ni an ta, kei chu an Pathian ni ki ti.

²⁴ Reng ki sinthotu Davida ang khan an rêngin om an ta, an rêngin roirêltu inkhat hnuaiia inthurual takin om an ta, khanchu iamom takin ki dânhai chu zôm an ti.

²⁵Khanchu an irchibulhai omna ram, ki sinthotu Jakoba kuanga ki lei ipêk rama khan om ta an ta, khataka khan kumkhontuanguin anni le an nâi le tehai le an irchi suanpârhai chu om ta an ti. Ki sinthotu rêng Davida angin an chungga kumtuanguin roirêl ta a ti.

²⁶Kumtuanga lungthi taka an om theina hrangin anni leh thuthung siam ki ta, khataka khan phunhai ki ta, inpunghai ki ta, ki biakbuk chu an rama sia ki ta, khataka khan kumtuanguin om ta a ti.

²⁷ Khataka khan kei chu anni leh omsuam ki ta, kei chu an Pathian ni ki ta, anni chu ki mihai ni an ti.

²⁸Khan, khataka khan ki biakbuk chu kumtuanga hrangin ki sia tena chu, nam tinhaiin kei Rengpa ngêt hin Israel chu ki mihai ni hrangin kin thang suakhai a nih ti inhre ta an ti,” a tia.

Ezekiela 38

Gog siatna hrang thu leihriIna



- ¹Khan Rengpa'n a ni zuang chongpuia,
- ²“Mihriam nâipa, Magoga rama Meseka le Tubala namhai chung a roirêltu roiinpuetak, Gog chu theiloi inchantir roh.
- ³Theiloi inchantirin lân, khanchu kei Rengpa Pathian ngêt hi a râl ki nih ti hril roh.
- ⁴Ama chu irvêltir ki ta, a bâia irkuai infatir ki ta, a sipai murdihai leh kaitôlhài ki ti. A sipaihài le a sakorhài le a sakor chung chuang mihài chu tamtak an nia, sipai tam dôrin pho le khandai an chôit chita.
- ⁵Persia ata Ethiopia, Libia ata a mihài chu a kuang an om saa, an rêngin pho le lukhum an nei senga.
- ⁶Hmâr tianga Gomera le Beth-Togarma irdoi mi murdihài chu ama leh an omsuama, kha bana ram dang danghài ata khom tamtak an om sa.
- ⁷Irsiam diama om hrangin inhrilin lân, a sipaihài chu thupêkna hnuaia irsiam diam ta ri sehài.
- ⁸Kum tamtak zoia ama chu ram inkhat, kha rama omhài kha nam tamtakhài lai ata hruaisuak an nia, irdoina rêng rêng chi ngai loia om an ni, khahài kha irdoitir ki ta. Khanchu Israel tânghài, kha ten sînga mâksana lei ramchita omhài, khannisian atûn chu lungthi taka mihài omna so doi sa an ti.
- ⁹Ama le a sipaihài a kuanga nam tamtakhài khan phâivopui angin doi an ta, ram kha sîmphâi angin bôm a ti,” a tia.
- ¹⁰Rengpa Pathianin Gog chungthu chu hiang hin a hrila, “Kha zoro kha a tung tena chu thil saloi ngaitua chu phut ta ni ti.
- ¹¹Ram inriang, khopui kul nei loihài le irhrungna boia lungthi taka mipui omhài chu doi hrangin ngaitua ni ta.
- ¹²Khanchu matona khopui siat hai, khataka om mihài chu longindarin, râlîlak sumhài la ni ti. Khahài kha nam tinhài lai ata hruaikhôm an nia, atûn chu sahai le irchonhài neia, rammual laitaka om chu a ni.



¹³Khanchu Seba le Dedan mihai le Tarsis khopuihai ata sum bepâr thotuhaiin, “Thil hluhai la hranga ni ihong mo? sumtakhai, rângachak hai, sahai le irchonhai la hrangin ni sipaihai hi ni hong ituanghai mo? kha thil hlu murdihai kha la hranga hong mo ni ini?” tiin nang sâm an ti,” a tia.

¹⁴Khasikin Rengpa Pathianin Gog chu hi thu hi hril hrangin a ni târa, “Ki mipuihai chu lungthi tak le hoitaka an om laia doihai hrangin nang chu hong ni ta.

¹⁵Ni omna hmâr ram hlatak ata kha zuang ni ta, mi tamtak zuang tuanghai ni ta, an rêngin sakor chungu chuang ving an ta, nang chu sipai tamtak le hrât tak chu ni ni.

¹⁶Phâivopuiin ram a isêm phît angin, ki mi Israelhai chu doihai ni ta, a zoro a hong tung tena chu, ki ram chu doi hrangin, nang târ ki ti; tu mo ki inih ti hi nam tinhai irhmutirhaina hrang le nangma hmanga ki sinthôna hin ki'rthiangzia inlangtirna hrangin.

¹⁷Nangma chungthu ngêt hi matona khan ki lei hrila, ki sinthotu Israel deipuhai hmangin ki lei inpuang lai khan Israel doitu hrang mi inkhat hong hruai ki ti, ki lei tia,” Rengpa Pathianin a ti.

Pathianin Gog a hremna

¹⁸Khan Rengpa Pathianin hiang hin a tia, “Goga'n Israel a doi nî sîna chu kei chu a sân ki ninginmur a ti.

¹⁹Ki ninginmurna sikin ki lei hril tâka, kha nî sîn khan Israel rama hnîngnupui tho a ti.

²⁰Khanchu tuipua nga murdihai, ramsa murdihai le mihriam murdihai, irnêng chungu omhai kai chu keima ni chipumin inthing an ta, tângchai chim a ta, bang murdihai khom chim ving a ti.

²¹Gog chu siatna chi tinrêng leh insîtir ki ti, kei Rengpa Pathian hin ki iti a ni. A mihai chu an khandaihai leh irthat irhlôm an ti.



²²Ama chu hripui le thisen insuana'n hrem ki ta, khanchu ama le a sipaihai le nam tamtak ama tianga kophai chungu khan ropuivânsâng le, irial le, mei le kât chu zuang bunthuan ki ti.

²³Khaang khan nam tinhai kuang ki sinthotheina le ki'rthiangna chu inlangtir ki ti. Kha tena chu Rengpa ki nih ti inhre thei ta an ti," a tia.

Ezekiela 39

Gog inhnea om thu

¹Khan Rengpa Pathianin hiang hin a tia, "Mihriam nâipa, Meseka le Tubala namhai chungu roirêltu roiinputak Gog chu theiloi inchangtirin lân, khanchu keima hi a râl ki nih ti hi hril roh.

²Ama chu hmun thar tiang irheitir ki ta, Israel tânghai a zuang tung mâna chu, hmâr tiang hlatak ata kha zuang hruai ki ti.

³Khanchu a vei kut tianga sâihli le a chang kuta thal kha inthatir ki ti.

⁴Gog le a sipai le a rual murdihai chu Israel tânghai chungu khan thi an ta, an ruakhai chu chunglêng vahai le ramsahai bu hrangin pe ki ti.

⁵Anni chu kholaidunga thi an ti, kei Rengpa Pathianin ki iti a ni.

⁶Khanchu Magoga le chômbunga omtuhai chungu khan mei insua ki ta; khanchu Rengpa ki nih ti inhre suak an ti.

⁷Khanchu ki'rhming irthiang kha ki mi Israelhai laia inlâtir ki ta, ki'rhming irthiang porinchetira om hrang chu irngai thei no ning. Khanchu nam tinhaiin, Rengpa, Israel mi irthiang chu ki nih ti inhre ta an ti," a tia.

⁸Khan Rengpa Pathianin hiang hin a hrila, "Kha nikhua ki ihril kha hong tung ngêt a ti.

⁹Israel ram khopuihaia om mihai kha fesuk an ta, râltukfam mâksana omhai kha thingtua hrangin irkhôm an ti. Phôhai le sâihlihai thalhai, ufeihai le hmolhai kha mei thôna hrangin hmang an ta, khahai kha kum sari ten tua an ti.



¹⁰Ram kêra thing tua hrang an irkhôm nang no nia, ite rampui hnuaia irkhôm nang viat no ni. Râltukfam mâksana omhai kha an itua hrang a ni sikin. Anni longindartirtuhai le an neinun sampâr inrûktuhai chu, anni longindarhaiin an neinunhai leh pehai an ti,” Rengpa Pathianin a ti.

Gog phûma om thu

¹¹Khan Rengpa'n, “Kha thilhai kha a tung tena chu Gog chu Israel rama tuipei thi nisua tianga khualinzinhai irhôr an itihna hmun kha thân hmunin pehai ki ta, khataka khan Gog le a sipai murdihai chu phûm ni an ta, khanchu irhôr kha Gog sipaihai irhôr ti ni ta a ti.

¹²Ram kha irthiangtir nôkna hrangin, Israelhaiin an ruakhai phûmna hrang khan tha sari nang an ti.

¹³Khanchu a ram sênga mi tinin, anni chu phûmhai an ta, khanchu inhnêna ki chang nê sên chu chôiindômin om an ti. Kei Rengpa Pathian hin ki iti a ni.

¹⁴Khanchu ram kha an irthiangtir theina hrangin, tha sari zoi tena chu, mithi ruak a la om moh tia zongsuaka phûm hrangin a ram sêng murdi irfangsuak hrangin mi inthang suakin om an ti.

¹⁵Kha ram kha a suk a tungin irfang an ta, thânkur choituhaiin Gog sipaihai irhôra khan an phûmhai theina hrangin mihriam ru an hmûna dôra irsinsiana nei an ti.

¹⁶Kha mithihai khopui kha Hamon tiin ar hming phua an ti. Khaang khan ram chu irthiangtir nôk ta an ti,” a tia.

¹⁷ Khan Rengpa Pathianin ki kuang hiang hin a ti, “Mihriam nâipa, chunglêng vahaiin le ramsa murdihai chu an ta hranga thilinhlan ki isiamhai hi fa hrangin hmun tin ata koibukhaiin lân, Israel tânghai chung a hruai theina roiinputak ni a ta, khataka khan hme chu fâkin thisen chu in an ti.

¹⁸Sipaihai hme chu fa an ta, irnêng chung roirêltuhai thisen chu in an ti. Khahai kha an rêngin belrachalhai, belratehai, kêlhai le sehrât mar satakhai anga that ving ni an ti.



¹⁹Khan, kha mipuihai kha thilinhlanhai anga ki thathai tena chu, chunglêng vahai le ramsahaiin an thâihai chu fa an ta, an inrui mâka chu an thisen kha in an ti.

²⁰Khan ki dokânga khahai khan sakorhai, sakor chung chuang mihai, sipaihai le irdoi mihai hme chu an khop dôrin fahai an ti, kei Rengpa Pathianin ki iti a ni,” a tia.

Israel inding thar nôkin a om

²¹Khan Rengpa'n hiang hin a tia, “Nam tinhai kuang ki roiinpuina le ki roirêlna dik chu ki sinthotheina hmangin itin mo ki intungtir ti inlangtir ki ti.

²²Khanchu kha rengata kha Israelhaiin kei chu Rengpa an Pathian ki nih ti inhre suak ta an ti.

²³Khanchu nam tinhaiin Israelhai chu ki chung a an sualna sikin sala intângin an om ti inhre ta an ti. Kei chu anni ata a dang tianga irheiin, an râlhai indoitirin irdoina khan thathai ki ti.

²⁴An porinchena le an pualoinahai sikin an idongtumhai chu dong an ta, anni ata a dang tiang irheisanhai ki ti,” a tia.

²⁵Khan Rengpa Pathianin hiang hin a hrila, “Khannisian atûn chu Jakoba irchi suanpârhai tuanintungin khoza'rngâiin om ki ta, tuanintungin inomtirhai nôk ta ki ti, ki'rhming irthiang khom hi savingin hrung ki ti.

²⁶Khan anni inchitir hrang boiin, lungthi taka an rama ngêt an om tena chu, ki chung a an inchâinahai sikin an inzaknahai irnghil ta an ti.

²⁷Khanchu nam tamtak mithmua ki irthiang a nih ti inentirna hrangin, ki mipuihai chu an râlhai ram ata hong hruai kîrhai ki ti.

²⁸Anni chu sala intâng hrangin kin fetirhaia, khannisian atûn chu bukkhômhaiin inkhat lua masanhai loiin, an omna rama ki hong ihruai nôkna hin, mihaiin keima chu Rengpa an Pathian ngêt chu ki nih ti inhre suak ta an ti.

²⁹Israel mihai chung a ki'rtha chu buak ki ta, anni lai ata itiklai khom a dang tiang irheisanhai ta no ning, kei Rengpa Pathian hin ki iti a ni,” a tia.



Ezekiela 40

TEMPIL LA HONG OM HRANG INLARNA HMU

(40.1–48.35)

Ezekiela Jerusalema hruai a ni

¹Kin sal intângna kum sômhni ringana, tha bul sôn sôm nê chu khopui insiata a om zoi kum sôm hleiminli zoia khan, kha nê sôn ngêta khan Rengpa kut chu roiinpui takin ki chung a zuang chumin, chung tiang a ni hruai pata.

²Pathian thil lei hmûna sikin Israel rama a ni hruaia, tâng irsângtak sim tianga khopui hoitak ki hmua, kha khan a nin sum tâka.

³Khan, a ni hruai innaitir uala, khan mihriam inkhat sumsên irtêk anga irtêk hi ki hmua; a kuta irkhîna pat zâirhmi hrui le irkhîna khianghrol hi chôiin ama chu mikota ngîrin.

⁴Kha mi khan keima kuang, “En ro, mihriam nâipa thil tinrêng nang ki irhmu murdi hi savingin irngaiin lân, milung pe takin ngaitua ro; khasikin hitaka hin nang ki hong ihruai a ni, ni thil hmu dôr chu Israel mihai inhrilhai ving ro,” a ni tia.

Nisua tianga dâi mikot

⁵Khan, ki thil hmu chu biakbuk a nia, a’rhîlin banghai a oma, khan mihriam khan irkhîna khianghrol a lâka, a sei lam chu mûk ruk a nia, bang kha a’rkhi tâka; a’rsâng lam chu irkhîna khianghrol tuankhat a nia, a’rsa lam khom khianghrol inkhat ang dôr a ni.

⁶Khanchu nisua tianga ngha dâi mikot tiang khan a fea, leidâka khan a kâia, khanchu a chung a khan a lûtna kha a’rkhia; kha kha mûk ruka inthûk a ni.

⁷Khakhêla khan lam a om nôka, a sîr inhnia khan irhrungna tentan inthum hi a oma. Tentan tin kha irki minli nei a ni chita, a’rki minli khan mûk ruka sei a ni vinga, a banglâi chu mûk minli vêla irsa a ni. Khan irhrungna tentan khêla khan lampui mûk ruka sei hi a oma, biakbuk tianga ngha tentan liantak dênin a oma.

⁸Khanchu kha tentan kha a’rkhia, mûk riat a nia,



⁹khan dâi mikot tual kha a'rkhia, mûk riat a ni. Khanchu a mikot chu mûk hni a ni, khan a dâi mikot chu insûng tiang khan a oma.

¹⁰(Lampui sîr hnia tentanhai kha a lian dân chu a ir-ang vinga, a kâra banghai khom a'rsa lam chu a ir-ang chit a ni.)

¹¹Khanchu mihriam khan dâi mikot khang lian lam kha a'rkhia, an rêngin mûk sôm hleithum a ni, a dâi mikot khang lian lam chu mûk sôm a ni.

¹²Khanchu a hrungna tentan maton tiang khan bang irhnuai ual hi a oma, a'rsâng dân chu mûk khat a chimrip a nia, a'rsa dân khom mûk khat a chimrip dên a ni. (A tentan chu irki minli neiin mûk ruka lian an ni.)

¹³Khanchu hrungna tentan hnung tianga bang inkhat kha lampui khêla a hrungna tentan bang kha ar khi nôka, kha kha mûk sôm inhnia sei a ni.

¹⁴Khanchu tentan pên taka om kha tual a va dên raka, kha tentan kha a'rkhia mûk sôma sei a nia.

¹⁵Dâi mikot bang pên tiang ata tentan a hlataka bang kêr lampui kha mûk sômringaa sei a ni.

¹⁶Khan tentan pên tianga banghai khan tukver a oma, khanchu tentan le tentan kâra bang khom kha a om saa, khanchu lampui dep tianga banga khan tûm thingkung illim a kera kerin an sina.

Pên tianga tualzôl

¹⁷Khanchu mihriam khan dâi mikota a ni lûtpuia, khanchu pên tianga banga khan tentan sômthum a oma, kholaidung chu lungphêka dâp ving a nia, a tualzôl dên raka dâp a ni.

¹⁸Khan hi pên tianga tualzôl hi sûng tianga nêkin chu a'rhnuai uala.

¹⁹Khanchu dâi mikot chu hmun irsâng uala khan a oma, khataka ta kho sûng tianga tualzôl khan fe theina a oma, kha mihriam khan a kêr kha a'rkhia, a kêr chu mûk sômringa a ni.

Hmâr tianga dâi mikot



²⁰Khanchu mihriam khan hmâr tianga dâi mikot pên tianga tualzôl lûtna kha a'rkhia.

²¹A hrungna tentan inthumhai lampui sîr hnia omhai le, a kêra a banghai le tentan lianhai kha, nisua tianga dâi mikot nei le lian ang dôr hi a nia, dâi mikot sei lam kha mûk sômringa a nia, a khang chu mûk sôminhni mûk ringa a ni.

²²Tentan lian le, tukverhai le a kera an iker tûm thingkung nisua tianga omhai le hmunkhat a ni. Khanchu leidâk sirbi sari dênin a om saa, khanchu tentan lian chu a mong taka khan a oma, a tualzôl tianga hmâi nghain a oma.

²³Khanchu a tualzôl khêla khan hi hmâr tianga dâi mikot ata hi mikot dang a om nôka, kha kha tualzôl sênginta ual fena chu a ni, nisua tianga ang khan a oma. Khan mihriam khan kha dâikot inhnihai kha a'rkhia, a sei lam le a lian lam chu mûk irzakhat a ni.

Sim tianga dâi mikot

²⁴Khanchu mihriam khan sim tiang a ni hruaia, khataka khan dâi mikot dang chu kin hmua; khanchu a'rkhia, dâikot danghai ang dên kha a ni.

²⁵Khanchu dâi mikot danghai ang khan tentanhai khan tukver a oma, dâi mikot sei lam chu mûk sômringa a ni, a khang chu mûk sômhni ringa a ni.

²⁶Khan kalbi sari ata kha a tung tiang a kêia, a tentan liantak kha a mong taka a oma, a tualzôl tiang hmâi nghain a oma. Khanchu lampui tianga bang sêng tiang khan tûm thingkung illim an iker hi a oma.

²⁷Hitaka khom hin tualzôl sênginta ual lûtna lampui a oma, khan mihriam khan hi dâi mikot inhni hi a'rkhia mûk sômringa a ni.

Tualzôl sênginta sim tianga dâikot

²⁸Khanchu mihriam khan sim tianga dâi mikot ata kha tualzôl sênginta uala khan a ni hruaia. Khanchu dâi mikot kha a'rkhia, dâikot pên tianga banghai kha an rêngin ar ang zita.



²⁹A hrungna tentanhai, a bang danghai, sum hrênahai kha irkhîna leh khan a'rkhia, kha khan tukverhai a oma. A sei lam mûk sômringa a nia, a lian lam chu mûk sômhni a ni.

³⁰Khan a kôla khan toina a oma, a sei lam mûk sômhni ringa, a khang mûk ringa a ni.

³¹A tentan lian uala khan tualzôl dang tiang a nghaa, khanchu lampui tuana banghai khan tûm thingkung an iker hi a oma. Hi dâi mikot hi kalbi kiriata irsâng a iom a ni.

Tualzôl sânginta ual: nisua tianga om

³²Khanchu mihriam khan nisua tianga dâi mikot ata kha tualzôl sânginta uala khan a ni hruaia, kha dâi mikot kha a'rkhia, a danghai ang dêna sei le lian a ni.

³³Khanchu a hrungna tentan hai, a tentan lianhai le a sâng tianga banghai kha dâikot danghai anga lian le sei hi a nia. Khanchu a'rhîlin tukverhai a oma, tentan lian kôla khom khan a om sa. A dung tiang chu mûk sômringa a nia, a khang tiang chu mûk sômihni mûk ringa a ni.

³⁴Tentan lian kha tualzôl pên tiang khan a nghaa, a banghai khan lampui tuain, tûm thingkung illim a kera an iker hi a oma. Hi dâi mikot hi kalbi kariatnaa om a ni.

Hmâr tianga dâi mikot tualzôl

³⁵Khanchu mihriam khan hmâr tianga dâi mikot khan a ni hruaia, khanchu a'rkhia, a sei le a lian lamhai chu a danghai ang dên kha a ni.

³⁶Khahai ang dên khan a hrungna tentanhai a neia, a insâng tiang a bang irvôna a neia, tentan lian khom a neia, tukver khom a'rhîlin a oma, a sei lam chu mûk sômringa a nia.

³⁷Khan tentan lian kha tualzôl pêninta tiang a ena, tûm thingkung a kera an iker banghai khan a oma. Hi dâikot hi kalbi kiriata irsânga om a ni.

Hmâr tiang dâi mikot kôla in omhai



³⁸Khanchu tualzôl pêninta rengata kha hmâr tianga dâikot sênginta le irzomin tentan le lampuihai hi a oma. Khanchu tualzôl tianga ngha tentan lianna tiang a suaka, khataka khan pum hâlvôm thilinhlanhai an sôpinfâi ngai.

³⁹Hi tentan liana hin dokâng minli hi a oma, a sîr tianghai khan inhni hniin an siaa, hitaka dokâng hai hin pum hâlvôm thilinhlanha hmang hranghai, sâhai, sual irbôlna thilinhlanha hmang hrang, sahai, ngaidam irzongna thilinhlanha hmang hrang sahai, an thatna ngaia.

⁴⁰Khanchu tentan pên tiang khan dokâng ir-angsar minli a oma, hmâr tianga dâikot lûtna khan sîrkhat tiang inhni, a dang tiang inhni siain a oma.

⁴¹An rêngin dokâng kiriat a nia, khahai chung a khan sa inhlana om hranghai chu thatin an om ngaia; tentan sênga khan minli, pên tiang tualzôla khan minli.

⁴²Khanchu pum hâlvôm thilinhlanha hrangin lung isuka suk, mûk khat le a chimripa sei, mûk khat le a chimripa lian, mûk khata irsâng dokâng minli a oma; khahai chung a khan irbôlna le pum hâlvôm thilinhlan hranghai thatna hrang hriamhrehai an siaa.

⁴³Khanchu dokâng chunghaia khan kutzapha dôra lian a kôla an siaa, khanchu irbôlna hme murdihai chu kha dokâng chung a khan an sia ngai.

⁴⁴Khanchu kha mi khan tualzôl sênginta uala khan a ni hruaia, a sênginta uala khan tentan inhni hi a oma, inkhat chu hmâr tiang dâi mikot kôl ata kha sim tiang nghain a oma, inkhat dang chu sim tiang dâikot kôl ata kha hmâr tianga nghain a oma.

⁴⁵Khanchu mihriam khan ki kuang hiang hin a hrila, tentan sim tianga ngha kha biakbuka sinhotu ochaihai ta hranga a nia,

⁴⁶Khanchu tentan hmâr tianga ngha kha maichâma sinhotu ochaihai ta hranga chu a ni. Khahai vai kha Levi irchi ata Rengpa makunga sintho hranga lût phala omhai chu an ni.

Tualzôl sênginta le biakbuk



⁴⁷Khanchu mihriam khan tualzôl sênginta kha a'rkhia, mûk irzakhata sei le mûk irzakhata irza a ni. Khan biakbuk chu nisua tiang a oma, a mân tiang khan maichâm chu a oma.

⁴⁸Khanchu biakbuk lûtna tentan khan a ni hruai inlûta, kha kha mûk ringa inthûk a nia, mûk sôm hleiminlia irzat le a banghai chu mûk thuma irsa, a sîr inhnia khan a oma.

⁴⁹Khan kalbi a lûtna tentan tena hong sun kha, a khang mûk sôminhni a nia, mûk sôm hleihnia inthûk a ni. Khanchu chopui inhni, a lûtna mikot kiangkhat tiang khan inkhat a ngîra, a dang tiang khan inkhat a ngîr saa.

Ezekiela 41

¹Kha hnung chu mihriam khan tentan inlaina taka om, Hmun Irthiang khan a ni hruaia, khataka lûtna lampui kha ar khia.

²Mûk ruka inthûk le mûk sôma irza a nia, khanchu a sîr hni tianga banghai kha mûk ringaa irsa a ni. A sûnga tentan kha ar khia, a dung mûk sôm minli a nia, a khang chu mûk sômhni a ni.

³Khanchu tentan sêngrîla khan a lûta, khataka fena lampui khom kha ar khia mûk hnia inthûk le mûk ruka irza a ni. A banghai chu mûk saria irsa a ni.

⁴Khanchu kha tentan kha ar khia a dung tiang mûk sômhni, a khang khom mûk sômhni a ni. Khanchu ki kuang, "Hi hi Hmun Irthiang tak chu a ni," a tia.

Biakbuk pên tianga tentanhai

⁵Khanchu mihriam khan biakbuk sêng tianga bang irsa dânhai kha ar khia, mûk ruk a nia. Khanchu hi bang pên tianga hin tentanhai mûk minlia irzat hi biakbuk irhîla khan a oma.

⁶Hi chontanhai hi irchuan thuma siam a nia, tentan chîn sômthum a sûnga khan a oma. Khanchu irchuan tin irdîna biakbuk pên tiang bang kha a hnuai tianga irchuanhai nêkin a'rphân uala, tentan kha biakbuk leh khan irzomna boia bang chung a'rngat theina hrangin.



⁷Khaang khan biakbuk banghai khom kha pên tiang ata enin chu, a chung dên thaiin ar sa dân kha hmunkhat angin an langa. Khanchu biakbuk pên tianga banga khan tentan pên tiang khan a luina irzatôk tak inhni siam a nia, irchuan hnuai ten kha fe thei a nina hrangin.

⁸Khanchu hi tentanhai pên tiang bang irsa dân chu mûk ringa a nia, khanchu biakbuk hmâr tianga tentanhaia khan mikot inkhat hi a oma.

⁹Khaang dênin sim tianga tentanhai khom khan inkhat a oma. Khanchu biakbuk irhîla khan mûk ringaa irzat hmun rong hi ki hmua;

¹⁰Biakbuk bang kôla tentanhai lungphun leh khan a'rtên maia, irnêng ata mûk ruka irsâng hi a ni.

¹¹Khanchu hmun rong le ochaihai omna inkârhaia khan hmun rong a khang tianga mûk sômhnia irzat hi biakbuk zuia khan a om sa.

Nitâk tianga in om chu

¹²Khanchu biakbuk nitâk tianga hmun ôla a mong taka khan in inkhat a dung mûk sômkuaka sei le a khang mûk sômsari hi a oma; a banghai chu mûk ringaa irsa a ni.

Biakbuk lian lam

¹³Khan mihriam khan, biakbuk pên tiang kha a'rkhia, a dung mûk irzakhat a nia, khanchu a hnung tiang ata hmun ôl lâksa'n nitâk tianga biakbuk hmun tena khan mûk irzakhat ngêt a ni.

¹⁴Khanchu biakbuk mân tianga a sîr hmun ôl kha lâksa'n, mûk irzakhat ngêt a ni.

¹⁵Khanchu biakbuk nitâk tiang khan a'rkhia, a sîr inhnia lampuihai lûtna ten kha lâkin, mûk irzakhat ngêt a nia.

Tempil om lam

¹⁶Khanchu biakbuk lûtna tentan le Hmun Irthiang le Hmun Irthiang tak kha a hnuai ata tukver omna ten kha thingphêk inkhop ving hi a nia, kha tukverhai kha inhong thei ving a ni.



¹⁷Khanchu biakbuk sâng tianga banghai kha mikot chung tena irsâng hi a nia, an rêng khan tûm thinghai le cherubhai irlim, a kera an iker insip ving a nia.

¹⁸Tûm thingkunghai chu cherub le cherubhai kêra khan a bang tuan khan a oma. Cherubhai khan hmâi inhni seng hi an neia.

¹⁹Mihriam hmâi angin an hmâi kha tûm thingkung tianga a nghaa, kâmkeibaknei hmâi kiangkhat tianga tûm kung tiang khan a oma. Khaang khan bang murdi,

²⁰a hnuai ata mikot chunghai kha a sip zita.

²¹Khanchu Hmun Irthiang mikot chopuihai chu irki minli nei an ni.

Thing maichâm

²²Khanchu Hmun Irthiang tak lûtna mân tiang khan, thil inkhat thing maichâm ni ômtak hi a oma, a'rsâng lam chu mûk thum a nia, a khang chu mûk hni a ni. Khanchu a'rkia chopuihai le a toinahai le a kôlhài kha thinga siam ving a nia. Khanchu mihriam khan ki kuang, "Hi hi Rengpa makunga dokâng chu a ni," a tia.

Mikot omhai chu

²³Khanchu Hmun Irthiang fena lampui mong taka khan mikot inkhat hi a oma, khanchu Hmun Irthiang tak fena lampui monga khan inkhat dang hi a oma.

²⁴Kha mikothai khan inkhâr inhni seng an neia, a laia irhong thei a ni.

²⁵Khanchu Hmun Irthiang inkhârhai khan, banga om ang ngêt tûm thingkunghai le cherub illima oma. Khanchu a lûtna mikot tentan chung a khan miliang lian tak hi a oma.

²⁶Khanchu hi tentanhài hin tukverhai a neia, khan a banghai chu tûm thingkunghai leh irvôtir a ni.

Ezekiela 42

Biakbuk kôla in inhni omhai



¹Khanchu mihriam khan pên tianga tualzôla khan a ni hruaia, khanchu biakbuk hmâr tianga in, biakbuk nitâk tianga in om hla rak loina khan a ni hruaia.

²Hi in hi a dung chu mûk irzakhat a nia, a khang kha chu mûk sômringa a ni.

³Khanchu sîr khat tiang khan biakbuk kôla om hmun ôl, mûk sôm inhnia irzat hi a nghaa; sîr khat dang khan pên tianga tualzôl lung dâp tiang kha a nghaa, chadan thum neia siam a nia, a hnuai tak nêka têt uala siam zit a ni.

⁴Khanchu hi in zui hmâr tiang khan lampui mûk sôma irzat le mûk irzakhata sei, a lûtnahai leh hin a oma.

⁵Khanchu tentan in chung tianga omhai kha a laia le a hnuai tentanhai nêk khan ar têt uala, khahai kha a hnung tiang uala siam a ni sikin.

⁶Khanchu chadan thuma tentanhai kha an rêngin hmun ôla om an nia, tualzôla in danghai anga chopuia irngat ni mahai.

⁷Khanchu tentanhai leh irdîn mai khan bang a oma, pên tianga tualzôl zuia khan a fea, mûk sômringa sei hi a ni.

⁸Khanchu pên tianga tualzôl zuia khan tentan irtânga omhai kha mûk sômringa sei an ni, biakbuk tianga in sei dân kha mûk irzakhat a ni.

⁹Khanchu nisua tianga in mongna khan bang irphutna hmuna tentan inhnihai hnuai hin pên tianga tualzôl lûtna hi a oma.

¹⁰Khanchu biakbuk sim tiang, nitâk tianga biakbuk mongna rengata hla rak loia hin, kha in ang kha inkhat a om nôka.

¹¹Khanchu tentanhai maton tiang khan hmâr tianga lampui om ang dên khan lampui dang inkhat a oma. A lian dânhai, a sei dânhai, a'rvo dânhai le a lûtnahai khom ar ang vinga.

¹²Khanchu kha in sim lam pang tiang, nisua tianga a mongna taka bang irphutna tentanhai hnuai khan mikot hi a oma.

¹³Khanchu mihriam khan ki kuang, “Hi in inhnihai hi in irthiang a ni, khahai sûnga khan Rengpa nâitu ochaiin thilinhlan irthiang takhai chu an fâk ngaia,



a tentanhai kha a'rthiang sikin, ochaihai khomin khataka khan thilinhlan irthiang takhai chu an sia ngai, bu thil inhlanhai, sual irbôlnahai, sual ngaidamnahai chu.

¹⁴Khan ochaihai chu biakbuk sâng ata pên tianga tualzôla khan an fe nuama ni'n chu hi tentanhai hin Rengpa sin an ithôna silkai irthianghai chu an imâksan hrang a ni. Khanchu mipuihai irbûmna an fe mân silkai danghai leh an irbel ngêt hrang a ni," a tia.

Biakbuk hmun irkhîna

¹⁵Khan mihriam khan biakbuk sâng tiang a'rkhi zoi tena chu nisua tianga dâikot tiang khan a ni hruai suaka, khanchu a pên tiang kha a'rkhi tâka.

¹⁶Khanchu irkhîna hmol kha a lâka, nisua tiang kha ar khia, mûk irzaringa a ni.

¹⁷Khan hmâr tianga khom kha ar hîlin ar khîna hmol leh irkhiin mûk irzaringa a ni.

¹⁸Irkhîna hmol khan sim tiang khom mûk irzaringa a nia,

¹⁹khan nitâk tiang kha a'rkhi nôka, mûk irzaringa dên a ni.

²⁰A sîr minli khan a'rkhia, a sei lam irzaringa, a khang khom irzaringa a nia, a irhîlin bang a neia, hmun papai le hmun irthiang theithâkna hrangin.

Ezekiela 43

Rengpa roiinpuina'n biakbuk a sip

¹Kha zoiin chu dâi mikot nisua tianga ngha dâi mikota khan a ni hruaia,

² khan, irngai ro, nisua tianga irthokin Israel Pathian roiinpuina chu a hong tung ta, khan arhâi khom tui tamtak ang a ni. Khanchu a roiinpuina khan hnuai kha an vârtira.

³Khanchu thil ki lei ihmuhai kha, khopui insiat hranga a hong laia ki lei ihmu kha Kebar vadunga ki lei ihmu ang kha a ni; khanchu ki hmâi leh hnuai ki sika.



⁴Khan dâi mikot nisua tianga ngha irthokin Rengpa roiinpuina chu a hong lûta.

⁵Irtha khan a nin dom irsângtira, irhuan sâng tualzôla khan a ni hruai inlûta, khan irngai ro, Rengpa roiinpuina khan in an siptira.

⁶Mi inkhat ki kôla a ngîr laitakin, in sâng ata mi inkhat hin ki kuang thu a hrilin kin hriata,

⁷keima kuang, “Mihriam nâipa, hi hi ki rêngtoihmun le ki ke irngatna a ni, Israel irchihai laia kumkhontuanga ki omna hrang chu a ni. Israel insâng mihaiin ki’rhming irthiang chu porinchetir ta no nihaia, anni khomin an rênghai khom an hurna’n mani, an irbôlna haia, an rênghai mâk khomin porinchetir ta no nihai.

⁸An tualzôlhai chu ki tualzôla siain, an mikot khârhai chu ki mikot bula, anni le kin kêr chu bang vai a oma. Khan an intir omna an lei itho tâkhai khan ki’rhming irthiang an lei porinchetir tâka, khasikin ki milung hoi lina khan anni chu ki hâlvôm paihaia.

⁹Atûn hin an hurna le an rênghai ruak chu keima irthokin hlataka sepaihai sianlân, anni laia kumtuangin om mai ta ki ti,” a tia.

¹⁰“Nang mihriam nâipa, Israel insângkuahai laia khan in kha inentir ro, an sualnahai ata an inzak theina hrangin; khanchu an itûng kha irkhîtir roh.

¹¹Khan an sintho murdihai kha an inzakpuia ni’n chu a itum le a hmêl irput dâna, a fena le a lûtna, a hmêl omziahai murdi khan khataka dânhai kha hrilin lân, an mithmu ngêta khan irziakin lân, kha an hmêl irput dân kha a om maia, a dânhai an zôm thei maina hrangin.

¹²Hi hi nin dân hrang chu ni a ti, tâng sîp chung a ihuap za chu hmun Irthiang tak ni a ta; irngai ro, hihai hi nin dân chu ni a ti,” a tia.

Maichâm chu

¹³ Khan, hi hi mûka irkhi maichâm lian lam chu a ni, a zer chu mûk khat ni a ta, a khang khom mûk khat ngêt, a kôl chu ar hîla khâp khat ni a ti. Hi hi maichâm zer chu a ni.



¹⁴Khan hnuai a toina ata a kôl hnuaiinta ata kha mûk hni ni a ta, a khang tiang chu mûk khat, khan a kôl chîn ual ata a kôl lian ual ten kha mûk minli nih a ti, khan a khang tiang chu mûk khat.

¹⁵Maichâm an chung ual chu mûk minli ni a ta, maichâm inthûk le a chung tiang khan irki minli om a ta.

¹⁶Maichâm omna chu mûk sôm hleihnia sei mûk sôm hleihni nêka lian ni a ti, a sîr minlia khan irtiati nat a ti.

¹⁷A sîrhai minlia khan a ring chu mûk sôm hleiminlia sei, mûk sôm hleiminli nêka lian ni a ti; ar kual chu a rêngin mûk chimrip ni a ti; a zer tiang chu mûk khat ni a ta, a sirna kalbihai chu nisua tiang ngha a ti.

Maichâm thâr irthiang a ni thu

¹⁸ Khan, ki kuang a hrila, “Mihriam nâipa, Rengpa Pathianin hiang hin a ti: a chungâ hâlirvôm thilinhlan an inhlanna thisen an in thei nî chu, hihai hi maichâm thuthung chu ni a ti.

¹⁹Levi mi ochaihai, Zadoka irchia mi ngêt kha, keima sintho hranga keima ni nâihai kuang khan sual thilinhlan hrangin sehrâtchal tuai pe ni ti, Rengpa Pathianin a ti.

²⁰Khan kha thisen kha la ni ta, ar ki minli khan pol ni ta, a kôl irki minlia khom khan, a zera a sîrhai khom khan; khanchu irthiangtir ni ta, ama ta hrangin inhlanna siam ni ti.

²¹Sual thilinhlan hrangin sehrâtchal la ni ta, kha hmun inthang sai irthiang tuala khan hâl ni ti.

²²Khan sîn hnina nî khan sual thilinhlan hranga khan kêlchal demnaboi inhlan ni ti.

²³Khan irthiangtirna sin ni tho zoiin chu sehrâtchal demnaboi le a pâl laia belrachel demnaboi kha inhlan ni ti.

²⁴Khan nangma'n Rengpa kuang hong hruai ni ta, ochaihaiin an lu chungâ michi len thek an ta, khanchu Rengpa kuang pum hâlirvôm thilinhlan hrangin inhlan an ti.



²⁵Sûn sari sêng chu a ni tin, sual thilinhlan hrangin kêl ngaitua ni ta, khan sehrâtchal tuai le kêlbelrachal a pâl laia demnaboi zong sa ni ti.

²⁶Sûn sari sêng chu maichâm tah hrang khan irhlanna siam pe an ta, irthiangtir an ti, khanchu inhlan irthiang ta an ti.

²⁷Khan sûnhai a hong hek tena chu, sûn riat nia irthokin ochaihai khan hâlirvôm thilinhlanhai chu maichâma khan tho an ta, irngeina thilinhlanhai leh khan; khanchu lei lôm ta ki ta, Rengpa Pathianin a ti,” tiin.

Ezekiela 44

Biakbuka ir-enkolna

¹Khan hmun irthiang dâi mikot nâi uala khan, nisua tianga nghaa khan a ni hruai lût nôka, a lei irkhâr maia.

²Khan Rengpa'n ki kuang, “Hi dâi mikot hi nin ikhâr mai hrang a ni, nin inhong hrang ni mah. Mi tûte lût thei no nihai, RengpaIsraelhai Pathian kha a hong lûta; khasikin khâr a ini mai hrang a ni.

³Khan rêng chungthu chu Rengpa kuang bai fa hrangin kha khan rêng angin toi a ta, dâi mikot tuala lampuia khan lût a ta, kha ngêt khan a isuak nôk hrang a ni,” a tia.

⁴Khan nin hmâia hmâr tianga dâi mikot khan a ni hruaia; khan ki hei thîr vêla, irngai ro, Rengpa roiinpuina khan Rengpa in kha a sipa; khanchu khûksadelin ki'rteta.

⁵Khan Rengpa khan ki kuang thu a hrila, “Mihriam nâipa, irngaitua sabakin lân, ni mithai kha en roh. Rengpa ina thupêkhai murdi chungthu le, khataka dânhai murdi chungthua ki thuhiril chu ni mikuarhai khan le'rngaiin lân, in a va lûtna le hmun irthiang irthoka suaknahai kha eninfel sabak roh.

⁶Khan mi pualoihai, Israel insûngkuahai laia khan hiang hin hrilin lân, Rengpa Pathianin hiang hin a ti. O nangni Israel insûngkua, nin intir omnahai chu ruk ta ri se;

⁷lungrîla sertan loi le taksa tianga sertan loi, râlhai ki hmun irthianga om hrang le porinchetir hranga ki in ngêta nin hong chôî sika nin intir omnahai



hi ruk ta ri se; bai mani, sathâi mani, thisen mani nin inhlân lai khan ki thuthunghai chu nin insiata, nin intir omnahai bôk sana hrang vaiin.

⁸Khan ki thil irthianghai enkolna sin chu nei mak chêia, khannisian ki hmun irthianga khan nin irthûla ki sintho hrangin mi nin inthanghaia.

⁹Rengpa Pathianin hiang hin a ti a ni: Mi râlhai lungrîla sertan loi, taksa khoma sertan loi mi râlhai i ang khom Israel irchihai laia lei om tâkhai khom chu, ki hmun irthianga khan an ilût hrang ni ma,” a tia.

Levi irchihai chu deipua bê ni mahai

¹⁰Khan, “Israelhai, an millim irzûla an irhmang laiin keima irthoka hlataka fe tâkhai, Levi mihai khan anni سوالنا kha pêl an ti.

¹¹In sûnga sin zongin, in dâi mikothaia khan enkolin, ki hmun irthianghai khan sinthotu ni an ti; mipuihai ta hranga irbôlna le pum hâlrivôm thil inhlanna hrang kha that an ta, anni sintho pe hrangin an makunga khan ngîr ki ti.

¹²An millimhai kôla khan a sin an lei tho pe tâk sika khan, Israel sûngkuahai ta hrangin سوالا irtetna kêng an lei chang ta, khasikin an chungâ khan ki kut irlek ki ta, an سوالنا chu anni ngêtin pêl an ti. Rengpa Pathianin a ti.

¹³Keima ta hrangin ochai sin chu tho hrangin, keima kôla chu an ihong nâi hrang ni mah. Ki thil irthianga i ang khom, le thil irthiang takhai chu an hong inai hrang ni mah. Khannisian an lei tho tâka, an intir omnahai le an inzakna chu anni ngêtin pêl an ti.

¹⁴Khannisianlân annihai chu in sintuhai enkol hrangin siamhai ki ta, khataka sinthônahai murdi le, khataka tho hrang murdihai leh khan,” a tia.

Ochahai

¹⁵ Khan, “Ochai Levi irchihai, Zadoka nâipasalhai, keima irthoka Israelhai an rot lai khoma ki hmun irthiang enkolna sin neituhai kha. Keima sintho hrangin ni hong pe an ta; sathâi le thisen kha inhlân hrangin ki kôla khan ngîr an ti, Rengpa Pathianin a ti.



16Ki hmun irthianga khan lût an ta, ki sintho hrangin ki dokâng hong nâi an ta, ki sin chu tho an ti.

17Khan, irhuan sâng lai taka khan dâi mikota an lût tena chu hiang hin ni a ti. Puan zâirhmi puan leh irvo an ta, irhuan sâng tianga le dâi mikot sânga sin an tho laiin, an chungga samul puan an irbel hrang ni maka.

18An lua khan puan zâirhmi lukômhai kôm an ta, an kongga khan puan zâirhmi kekok bun an ta, kongkhit an ihmang hrang ni mah.

19 Khanchu mipuihai omna tualzôl pêninta uala khan an fe mânin, biakbuka an sinthôna silkai kha khekpai an ta, tentan irthianga khan an imâksan hrang a ni. Silkai danghai leh irvo an ta, an silkai irthianghai leh khan mipuihai dengtheina an intungtir loina hrangin.

20 “Ochaihain an lu an ivoi inkol hrang ni maka, an sam khom an inseitir hrang ni ual ma, a ruk bakin kêng an ihôi hrang.

21 Khanchu ochaihai khan tualzôl sânginta uala an lût mânin uain an iin hrang ni mah.

22 Ochai tukhomin nupang mâka om rêng rêng an ilua hrang ni ma, Israel dôngmate irthiang mani, aninole, ochai dangin a ithisan, meithâi vai kêng an ilua hrang.

23 Ochaihai khan ki mipuihai chu thil irthiang le irthiang loi danglam dânhai le Pathian dâna irthianghai le irthiang loihai chu irchutir an ti.

24Khanchu thubuaihai a oma niin chu, ochaihai khan ki dân ang takin roirêl an ti. Khanchu, ki kûthai chu ki dânhai le ki thu angin hmang an ti. Ki sabat nî khom chu an ivong irthiang hrang a ni.

25 “Khan, ochai chu a pa mani, a nâi mani, a urêngpa mani, aninole a farnu pasal la nei loi mani a ni noa ni'n chu mithi ruak tônin a iporinche hrang ni mah.

26Khanchu a'rthiang nôk hnung tena chu sîn sari sâng nghâk a ta.



²⁷Khanchu biakbuk tualzôl sânginta uala khan lût a ta, ar thâr irthiangna hrangin thil inhlan a ti. Biakbuka sin a tho nôk theina hrangin, kei Rengpa Pathian hin ki iti a ni.

²⁸Khanchu ochaihai khan irchon nei an ta, kei hi an irchon chu ki nia, Israel ram sînga rênghaiin irchon nei no nihai, kei hi an thil nei tinrêng chu ki ni.

²⁹Bu thilinhlanhai, sual ta hranga thilinhlanhai tho'nsualna thilinhlanhai kha ochaihaiin fa an ta, khanchu Israel rama thilinhlan tinrêng hai chu an ta ni a ti.

³⁰Ochaihai khan a ra maton tak laia a satak le thil dang ki kuanga an inhlan murdihai kha dong an ta, khanchu mipuihaiin bai an sin rikipa, bai sin maton tak kha ochaihai kuang thilinhlanha hrangin pe an ta, khanchu ki satvurna chu an insînga khan tung a ti.

³¹Khanchu ochaihai khan va mani, ramsa mani, a binga thi mani, aninole ramsa dang hai ithat mani chu an ifâk hrang ni ma," a tia.

Ezekiela 45

Rengpa dongtum ram irkhîna dik

¹Khan ram kha ni zêka, nam tin hai dongtum chit chu ni pêkhai tena, hmun irthiang tak hmunkhat chu Rengpa ta hrangin inhlan ni ta; a dung tiang mêl khat le a chimrip ni a ta, a khang tiang mêl sôm ni a ti.

²Khanchu hi hmun sînga hin biakbuk hmun hrangin a sei lam chu mûk irzaringaa sei, a khang khom irzaringaa lian a ini hrang a ni, hmun ôl mûk sômringaa sei hi ar hîlin om sa a ti.

³Khanchu hi hmun a chimrip, a dung tiang mêl sôm hleihni le a chimrip, a khang tiang mêl ringa chu irkhi ni ta, khataka khan biakbuk le hmun irthiang tak chu om a ti.

⁴Kha kha a rama Hmun Irthiang chu ni a ta, biakbuka Rengpa sinthotu ochaihai ta hrang chu ni a ti, khataka khan an in le biakbuk chu om a ti.

⁵Khan a dung mûk sîngnia irsâng le a khang sîngkhat chu Levi mihai, kha ina sinthotuhai omna khopui hrangin, an dongtum chu ni a ti.



⁶Khanchu hmun irthiang khêl zel kha, a dung tiang mêl hni le a chimrip chu khopui hmun hranga sia ni a ta, khataka khan Israel mi tukhom om thei an ti.

Reng ta hranga ram chu

⁷Khanchu roirêltu rêng ta hrang khomin ram chu sia ni a ta, nitâk tianga hmun irthiang ramri ata kha Mediteranean Tuipui nitâk tiang ten ni a ta; khanchu nisua tianga hmun Irthiang ramri ata kha nisua tianga ram ten kha ni a ti. Israel panamhai kuanga ram pêka om le khan a dung sei lam chu ir-ang mai a ti.

⁸Hi hmun hi roirêltu rêngin Israel rama a hmun dongtum ni a ta, khanchu mipuihai chu dengitheitir ni ta no nihai, hmun dang murdi chu Israelhai ta ni ta a ti.

Renghai hranga dânhai

⁹Khanchu Rengpa Pathianin hiang hin a ti, “O, nangni Israel roirêltuhai, zoro sôttak sual sin thoin nin om tâka, khasikin thisen insuana le nuamninga lônahai hi ma ta unglân, thudik le thil fel chu tho roi. Ki mihai chu an ram ata irzûlpaihai ta no ning, kei Rengpa Pathian ngêt hin nangni ki ihril a ni.

¹⁰ Mi tinin irkhîna le neinun varna diktak chu an ihmang ngêt hrang a ni.

¹¹Khanchu neinun tâng irkhîna epha chu neinun zôi irkhîna bath leh khan a keng dân ir-ang mai a ta. Epha khomin homer hmun sôma senin hmunkhat keng a ti. An ruaiin irtênahai kha homer dungzui ang takin ni a ti.

¹²Nin irkhi hrang dân chu hiang hin ni a ti, Gera sômhni chu sekel khat ni a ta, sekel sômruk chu mina khat ni a ti.

¹³Khanchu hiang hin thil nin inhlan hrang lam chu a ni. Bupui homer khat, khan epha hmun ruka senin hmunkhat, fatun homer khatin epha hmun ruka senin hmunkhat pe nin ti.

¹⁴Khanchu oliv hriak chu kor khata bath hmun sôma sena hmun khat ni a ti; kha kha bath sôm tihna a nia, homer khat a ni.



¹⁵Khanchu belra pâl irzahni laia belra inkhat ni a ti; hâlvôm thilinhlan, bu thilinhlan le irngeina thilinhlanhai hong chôi nin ta, khanchu nin sualhai ngaidam ni a ti, kei Rengpa Pathian thupêk ngei chu a ni.

¹⁶“A ram mi murdihai khan Israel roirêltu rêng kuang hi thilinhlanhai hi an ichôi ngêt hrang a ni.

¹⁷Khanchu kûtna haia, tha thar nikhuahaia sabat nikhuahai le, Israel sêngkua kûtna zoro bi neihai khan hâlvôm thilinhlan hai, bu thilinhlanhai, Israel sêngkuahai ta hrangin irtanna siamna hrangin, sual ta hranga thilinhlan hai, bu thilinhlan hai, hâlvôm thilinhlan hai, irngeina thilinhlan hai chu ama'n irbuktir a ti,” a tia.

Kût hmang hranghai
(Fes 12.1-20; Lev 23.33-43)

¹⁸Khanchu Rengpa Pathianin hiang hin a tia, “Tha maton tak le sîn masa tak nê khan sehrâtchal tuai demnaboi la ni ta, hmun irthiang chu thâr irthiang ni ti.

¹⁹Ochaiin sual ta hranga thilinhlan thisen kha la a ta, biakbuk chopui mikothai le maichâm irki kil minlihai khan sênginta ual tualzôl dâi mikot chopuihai khan pol a ti.

²⁰Khanchu kha tha, a sîn sari nê khom khan kutkechâi le inhriat loina sika sualna thotuhai ta hrangin khaang dên khan tho ni a ti. Khaang khan biakbuk ta hrangin irtanna chu siam ni a ti.

²¹ “Khanchu tha masa tak sîn sôm hleiminli nê khan Ferkân kût chu hmang nin ti, sîn sari sênga kût chu; khanchu sîn sari sêng chu bai chol pol loi fa ni ti.

²²Khanchu kha nê khan rêngin ama ta hrangin le kha rama mipuihai ta hrang khan sual ta hranga thilinhlanhai hrangin sehrâtchal pe a ti.

²³Khanchu kût sêng, sîn sari sêng kha a nê tin sehrâtchal sari le belrachel sari demnaboi chu Rengpa kuang hâlvôm thilinhlanhai hrangin pe a ta, kêlchal inkhat sual irbôlna hrangin pe sa a ti.



²⁴Khanchu bu thilinhlan hrangin, sehrâtchal inkhat epha khat, khanchu epha khat senga khan hriak inkhat seng pe sa a ti.

²⁵ Khanchu tha sarina sîn sôm sîn ringaa irphut, kût sîng, sîn sari sîng kha sual thilinhlan hranghai, hâlivôm thilinhlan hranghai chu ir-ang natin tho a ti,” a tia.

Ezekiela 46

Roirêtu le kûthai

¹Khanchu Rengpa Pathianin hiang hin a tia, “Tualzôl sînginta ual dâikot nisua tianga ngha kha a sinthôna nikhua sîn ruk sîng chu khâr ni a ta, khannisian sabat nî le tha thar nî chu inhong ni a ti.

²Khan rêng chu dâi mikot bokrop lampuia khan lût a ta, dâi mikot chopui kôla khan ngîr a ti. Khanchu ochaihai khan hâlivôm thilinhlan le irngeina thilinhlan chu inhlan an ti. Dâi mikot bokropa khan Pathian biak a ta, khanchu fesuak nôk a ta, khannisian khohloi tena chu dâi mikot kha khâr ni no ni.

³Khanchu, sabat nikhuahai le tha thar de nîhai chu, kha rama mipuihai khom khan Rengpa chu dâikot lûtna khan chubai an imûk hrang a ni.

⁴Khanchu sabat nî chu rêngin Rengpa makunga hâlivôm thilinhlan hrangin belrate kiruk le belrachel inkhat chôi a ta, an rêng khan demnaboi an ini hrang a ni.

⁵Khanchu bu thilinhlan belrachel le pêk hranga khan epha khat ni a ta, khanchu belratehai le bu thilinhlan pêk hranga om chu a nuam dôr ni a ta, khanchu epha khat sahriak inkhat seng chôi sa ni a ti.

⁶Khanchu tha thar kût zoroa, sehrâtchal tuai inkhat, belrate kiruk le belrachel inkhat inhlan an ta, an rêngin demnaboi ni a ti.

⁷Khanchu sehrâtchal tuai leh khan epha khat pe sa a ti. Belratehai leh khan a nuam dôr pe a ta, khanchu epha khata sahriak inkhat seng pe sa a ti.

⁸Khan rêng kha a va lût tena chu dâikot bokropa khan fe a ta, khataka ngêt khan suak nôk a ti.



⁹“Khan kût zoroaia, Rengpa biak hranga mipui hongtuhai chu, hmâr tiang dâikota an lûtin chu an biak zoi le sim tiang dâi mikota khan suak an ta, sim tiang dâi mikota lûtuhai chu hmâr tianga dâi mikota khan suak an ti. Tukhom a lûtina tiang dâikota khan suak thei ni no ni, a maton tianga fe pat hrang a ni.

¹⁰Khan, rêng chu mipuihai an lût zoroa hong lût ngai a ta, an suak tena suak nôk ngai a ti.

¹¹Khanchu kûtnahaia le zoro bîk nei kûtnahaia khan bu thilinhlan chu sehrâtchal inkhata khan epha inkhata, belratchal tuai inkhata epha inkhat, belrate pe thei a ta, epha khata hriak litar inthum zêl a ini hrang a ni.

¹²Khanchu roirêltu rêng khan Rengpa kuang mani, nuam thua hâlivôm thilinhlan mani, irngeina thilinhlan mani a pêk nuama ni'n chu, a ta hrangin nisua tianga tualzôl sênginta ual dâikot kha inhong ni a ti. Khanchu sabat nikhuua a itho dân ang khan inhlan a ta, khanchu dâikot kha a suak zoi tena khâr nôk ni a ti,” a tia.

A nî tina thilinhlan

¹³Khan Rengpa'n, “A zîng tin Rengpa kuang hâlivôm thilinhlan a hrangin belrate kum khata mi demnaboî chu pêk ni a ta, hi thilinhlan hi a nî tina tho ngêt hranga om chu a ni.

¹⁴Khanchu a zîng tin baidi thilinhlan khom pe sa ni ta, epha hmun ruka zêkin hmun khat le, sahriakin hmun thuma zêkin hmun khat baidi leh irzêl hranga khan. Khanchu kumkhontuanguin Rengpa kuanga baidi thilinhlan hi dânin om mai ta a ti.

¹⁵Khanchu belrate, baidi le sahriakhai hi kumkhontuanguin Rengpa kuang a zîng tin inhlan ni mai ta a ti,” a tia.

Reng le ramhai

¹⁶Khan, Rengpa Pathianin hiang hin thu a pêka, “Roirêltu rêngin a ram chu nâipasal a tu kuang khom thilpêk a pêka ni'n chu, khahai kha a nâipa in mihai irchon chu ni ta a ti.



¹⁷ Khannisian, roirêltu rêng khan a ram chu a sinthotuhai laia a tu khôk mani kuang a pêka ni'n chu, kha ram kha zalênna kum a hong tung nôk tena chu an rêng ngêtin hong om nôk a ti. Ama ta a nia, ama le a nâipasalhai vaiin dong ta tak thei an ti.

¹⁸ Khan roirêltu rêng khan mipuihai irchon rêng rêng anni ata a ilâkpai viat hrang ni maka, a nâipasalhai kuang ram a ipêkhai chu ama ta hranga ram inkunga omhai ta kha a ipêk hrang a ni; ki mipuihai chu an ramhai sutpaia deng an theitirhai loina hrangin,” a tia.

Biakbuk buhmun in

¹⁹ Khanchu, mihriam khan hmâr tianga ngha tentan lûtna tualzôl sênginta ual sim tianga dâikot kôla khan a ni hruaia. Hihai hi ochaihai ta hranga tentan irthianghai chu an nia, khanchu tentanhai nitâk tianga om hmun chu a nir hmua.

²⁰ Khanchu ki kuang, “Hi hi a ni ochaihaiin sual ta hranga thilinhlan le tho'nsualna thilinhlan hmehai an suangna hrang le baidi thilinhlanhai an ir-emna hrang chu, thil irthiang rêng rêng tualzôl pêninta uala khan a hong chôl loina hrangin,” a tia.

²¹ Khan tualzôl sênginta uala khan a ni hruaia, tualzôl minlia khan a nin fetira, khan irngai ro, kha irhuan irki tina khan tualzôlhai a oma.

²² Irhuan sêng tualzôl irki minliai khan irkul khom mûk sômminlia sei, mûk sômthuma lian hi a oma; hi a'rki minli hin irtiat nat an ni.

²³ Khanchu tualzôl tin khan ar hîlin lung bang hi a oma, bang depa khan mei thôna hmunhai hi siamin a oma.

²⁴ Khanchu mihriam khan ki kuang, “Hihai hi buhmun inhai chu an nia, mipuihaiin thilinhlan an ipêkhai kha biakbuka sinthotuhaiin an isuangna hrang hmun chu a ni,” a tia.

Ezekiela 47

Biakbuk ata tuihring luangsuak



¹ Khanchu, mihriam khan biakbuk lûtna khan a ni hruai nôka, khanchu irngai ro, tui chu a lûtna hnuai ata kha suakin biakbuk nghana tiang nisua tiang khan a luanga. Khan tuihai chu sim tiang panga biakbuk hnuai tiang ata kha sim tiang panga maichâm omna tiang khan a luanga.

²Khanchu mihriam khan biakbuk hmun ata kha hmâr tianga dâi mikota khan a ni hruaisuaka, khanchu nisua tianga ngha dâi mikot vêla khan a ni chaipuia, khanchu ivadungte hi dâi mikot sim tiang pang ata hi a luanga.

³Khanchu ar khîna hmol leh khan mihriam khan ivadungte kha mûk sângkhat nisua tianga khan ar khia, khanchu khataka khan, kha ivadungte kha pal hrangin a ni hrila; tui kha ki kechum tena inthûk a nia.

⁴Khanchu mûk sângkhat ar khi nôka, khataka tui kha chu ki'rkhûk ten a nia, khanchu mûk sângkhat dang a'rkhî nôka, kha tui kha chu ki kong ten a nia.

⁵Kha hnung chu mûk sângkhat dang ar khi nôka, kha tui kha chu an thûk sabak tâk sikin pal thei ta ma unga, irhliai ti no'n chu irkân lam om thei ta maka.

⁶Khanchu ki kuang, "Mihriam nâipa, hihai hi savingin ngaitua ro," a tia. Khanchu mihriam khan tuidung panga a ni hruai nôka.

⁷Kha hmun kha ki tung tena chu, ivakam inhnia khan thing tamtak hi ki hmua.

⁸Khanchu ki kuang, "Hi tuihai hi nisua tiang ata ram hi hroin Jordan phâizôla a lûta, khatak ata kha tuipui thia a luang lûta. Khan tuipui thia a luang lût tena chu kha tuipuia tui al kha tui irthiangin an changtir ngai.

⁹Khanchu tui luangna hmun tina khan ramsa chi tinrêng le ngahai om an ta, tui khan tuipui thia tuihai kha irthiangtir a ta, a luangna hmun tina hringna intungtir a ti.

¹⁰Khanchu Engedi tuihnâr ata Eneglaim tuihnârhai tena khan nga cheltuhai chu tuipui kôla khan om an ta, khataka khan an lênhai chu kaizarin phoi an ti. Khataka khan Mediteranean tuipuia nga chi tinrêng an iom angin nga chi tinrêng hai chu om an ti.



¹¹Khannisian khataka tuichir hmunhai le dialdôk hmunhai kha chu irthiangtir ni no ni, michi khurin om mai a ti.

¹²Khanchu tuidung hi tiang le so tianga ivakamhai khan bua ngam hrangin thingkung chi tinrênghai mông a ta, a hnâhai chu itiklai khom thêh no nia, ra insua loiin om no nihai. A tha tin ra thar nei mai an ti. Biakbuk ata tui zuang luangsuak khan an fâhai sikin. Thingkunghai khan fâk hrang insua an ta, an hnâhai chu mihai damna hrangin hmang ni a ti,” a tia.

Ramri irzêk dân

¹³Rengpa Pathianin hiang hin a ti, “Israel nam sôm hleihnihai kuang irchon hranga ram ni izêk hrang dân chu hiang hin ni a ti. Josefa namhaiin tum hni an idong hranghai leh khan.

¹⁴Nin irchibulhai kuang khan hi ram hi inluatirhai hrangin chong ki len kung tâk sikin, atûn chu ir-angсарin nin rênghin irsem ta roi.

¹⁵Hmâr tianga ramri chu Mediteranean tuipui ata kha nisua tiang panin Hethlon khopui le Hamath panna lampui tianga fe, Zedad khopuia a suaka.

¹⁶Hamat le Berotha-ah fe zêl a ta, Hamat le Damaska irdîna Sibraim fe thengin Hauran ramria Hazerhatikon dênin fe a ti.

¹⁷Hmâr tianga ramri chu Mediteranean tuipui ata kha Enon khopui nisua tiang a fea, Damaska le Hamath ramri hmâr tiang khan a suaka.

¹⁸“Khan nisua tianga ramri chu Damaska le Hauran ramkâr ata kha sim tiang panin a fea, Jordan dung kha Israel le Gilead ramria omin Israel chu nitâk tiang a oma, Gilead chu nisua tiang a oma; khanchu tuipui thia Tamar hmun a va suna.

¹⁹Khanchu sim tianga ramri kha sim tianga nitâk dep tiang irkhô riain Tamar ata kha Meribath-kadesh tui omna hmun ten kha a nia. Khanchu hmâr tianga nitâk dep riain a fe nôka, Aigupta ramri zuiin Mediteranean tuipui ten kha a ni.

²⁰Khanchu nitâk tianga ramri chu Mediteranean tuipui zel kha a ni, hmâr tianga Hamath fena lampui nitâk tiang dep ten kha a ni.



²¹Hi ram hi nir chihai kuang khan sem ro;

²²hihai hi kumkhua irchon hrang chu ni a ta, khanchu ram dang mi nin laia om nâi le tehai lei nei tâkhai khom khan ram kha nin irsem tena anni khomin dongtum nei an ti. Anni chu Israel mihai anga tep sa ni an ta, Israel mihai laia khan tasân pumin ram kha anni'n dong an ti.

²³Ram dang mihai khan an omna hmuna mihai leh khan an dongtum chu hmu seng an ti. Kei Rengpa Pathian hin ki ihril a ni hi," a tia.

Ezekiela 48

Ram irsemna thu

¹Khan hmâr tianga ramri chu Mediteranean tuipui ata kha nisua tiang a pana.

²Hethlon khopui ata kha Hamath panna lampuia khan a theng thaia. Khatak ata kha Enon khopui tiang fe maiin Damaska le Hamath ramri kha a va suna.

³Nam tinhai khan nisua tiang ata hi nitâk dênin del an ta,

⁴khanchu hmâr tiang ata sim tianga delpu

⁵hranghai chu hihai hi an ni.

⁶Dana, Asera, Naftalia, Manasea, Efraima,

⁷Reubena le Judahai hi an ni.

Ram inlaina tak chu

⁸Khanchu Juda ram sim tiang pang kha ram irthiang ni a ta, a khang chu hmâr tiang ata sim tianga dênin mêl sôm hleihni le a chimrip ni a ta, a dung tiang khom nisua tiang ata khang dên khan nih a ta, nam tinhai kuanga ram zêka om ang khan, khanchu biakbuk chu khataka khan om a ti.

⁹Khanchu hi ram laitaka hin mêl sôm hleihni le a chimrip, a khang tiang mêl sôm chu Rengpa ta hrangin inhlân ni a ti.

¹⁰Ochahai khom khan hi ram irthiang hi dong sa an ta, nisua tiang ata nitâk tiang kha mêl sôm hleihni le a chimrip ni a ta, hmâr tiang ata sim tiang kha mêl ringa ni a ti. Rengpa biakbuk chu hi hmun lai taka hin om a ti.



¹¹Khanchu hi hmun hi Zadoka irchi suanpâra ochaihai ta hrang ni a ti. Anni hin chu iamom takin ki sin an thoa, Levi mihai ang khan Israelhai soal sinna khan kop sa mahai.

¹²Khasikin anni chu Levi mihai hmun kôla khan hmun nei an ta, kha kha hmun irthiang tak chu ni a ti.

¹³Khanchu ochaihai ram sim tiang panga khan, Levi mihai khom khan kha rama khan hmun nei an ta, nisua tiang ata nitâk tiang chu mêl sômhleihni le a chimrip ni a ta, hmâr tiang ata sim tiang chu mêl ringa ni a ti.

¹⁴Khanchu Rengpa ta hranga ram inhlana om kha ram a sanalaitak ni a ta, kha hmun kha zuar phal ni ngai no ni, mi leh irthûl thei khom ni no nia, mi dang kuanga pêk khom ni no ni, hmun Irthiang a nia, Rengpa ta a ni sikin.

¹⁵Khanchu ram irthiang a la zôk, a dung tiang mêl sômhleihni le a chimrip le a khang tiang mêl hni le a chimrip kha chu hmun Irthiang ni maka, kha kha chu vântâng ihmang hrang ni a ti. Khataka khan om thei an ta, ram kha hmang thei an ti. Khopui chu a ram inlaina taka khan om a ti.

¹⁶Kil minli nei ni a ta, irki tin kha mûk sângminli le mûk irzaringa ni chit a ti.

¹⁷Khanchu khopui irhîl irki tina khan hmun ôl, a khang mûk irzahni sômringa hi om a ti.

¹⁸Khanchu khopui sin zoia a om tena la zôk, hmun irthiang sim tiang kha a dung tiang mêl ringa le a khang tiang mêl hni le a chimrip, nisua tiang khan chu a dung tiang mêl ringa le a khang tiang mêl hni le a chimrip, nitâk tianga kha, khopuia omhai loi thôna hrang ni a ti.

¹⁹Khopuia om, a tu tukhomin, a tu namhai khomin kha hmun kha loiin nei thei an ti.

²⁰Khanchu hi ram irthiang hi irki minli nei ni a ta, irki tin kha mêl sômhleihni ni zit a ti; kha khan khopui omna hmun khom kha huam sa ta a ti.



²¹Khanchu hi hmun biakbuk le ochaihai ram le, Levi mihai ram le khopui omna khêl nisua tiang le nitâk tianga ram zôkhai chu roirêltu rêng ta hrang ni a ti.

²²Roirêltu khan Benjamina-hai ram le Judahai ram kârhai chu dong a ti.

Nam danghai ta hranga ram

²³Khanchu hi hmun irthiang sim tiang pang murdi hi Jordan dung nisua tianga sêngkua omhai khan del an ta,

²⁴sêngkua tin khan nisua ramri tiang ata, Mediteranean tuipui ten khan ram dong chit an ti.

²⁵Hmâr tiang ata sim tiang tena dongtu hranghai

²⁶chu Benjamina hai,

²⁷Simeona hai, Isakara hai, Zebulunhai le Gad-hai ni an ti.

²⁸Khan sim tianga Gad-hai ramri chu Tamar ata Meribath-kadesh tui omna hmun ten kha ni a ta, khatak ata kha Aigupta tuidung zuiin Mediteranean tuipui ten kha ni a ti.

²⁹Khanchu Rengpa Pathianin, “Kha kha Israel namhai kuanga tasâna irchon hranga ni isem hrang ram chu ni a ti. Khahai kha pôl tinhai idong hrang dân chu a ni,” a tia.

Jerusalem dâi mikot

³⁰ Khan hihai hi khopuia irthoka suakhai chu an ni, hmâr tiang khan, irkhîn mûk sângminli irzaringa;

³¹khan khopui dâi mikot chu Israel namhai irhming omdân angin ni a ta, hmâr tiang khan chu dâi mikot inthum; Reubena dâi mikot inkhat, Juda dâi mikot inkhat le Levi dâi mikot inkhat;

³²khan, nisua tiang khom khan mûk sângminli irzaringa ni a ta, khan dâi mikot inthum, Josefa dâi mikot inkhat, Benjamina dâi mikot inkhat le Dan dâi mikot inkhat;



³³sim tianga khan irkhîna mûk sângminli irzaringa ni a ta, dâi mikot inthum; Simeona dâi mikot inkhat, Isakara dâi mikot inkhat, Zebulun dâi mikot inkhat;

³⁴nitâk tiang khom khan mûk sângminli irzaringa ngêt nih a ta, dâi mikot inthum le Gad dâi mikot inkhat, Asera dâi mikot inkhat; Naftalia dâi mikot inkhat.

³⁵A'rhîlin mûk sîngkhat sângriat ni a ta; kha khopui irhming kha, kha nî rengata chu, "Jehova Sammah ni a ti," tiin.



Daniela

Daniela 1

DANIELA LE A RUALHAI THURCHI

(1.1–6.28)

Rêng Nebukadnezara ina ruatharte inthum

1 Juda rêng Jehoiakima roirêl kum thumna khan Babulon rêng Nebukadnezara'n Jerusalem a hong irhuala.

2 Khan Rengpa'n Juda rêng Jehoiakima chu a kuta a pêka; Pathian ina bungrua senkhathai le; khanchu ama khan Sinar rama Pathian ina a fepuia; bungruahai chu Pathian ina a hong siaa.

3-4 Khan rêngin Israel nâihai laia mi, rêng irchihai le mi sa irchihai, thoibop demnaboi, hmêl satak, vârna tinrêng nei, inhriatna tianga bengvâr, thil irphut dân khom sûtthei ngai, rêng ina omdân thei ngai hong hruai lût hrang le Kaldai chong le thilsiam irchu hrangin thainuzelhai hruaitu Aspenaza chu a hrila.

5 Rêng khan rêng bunêk anga nêka, a uain in anga in thei hrang a ngaituaa, khaanga kum thum infâ hrang, kha zoiin rêng makunga an ngîr theina hrangin.

6 Hihai lai ata hi Juda nâihai laia mi Daniela, Hanania, Misaela, le Azariahai an oma.

7 Khanchu thainuzelhai hruaitupa'n an irhming a phuahaia; Daniela chu Beltesazzara a tia, Hanania chu Sadraka, Misaela chu Mesak, Azaria chu Abednego a tia.

8 Khannisian Daniela lungrîlin rêng bu le uain fâk le nêkna khan porche nuam maka; khanchu a porinche loina hrangin thainuzel hruaitupa kuang a ngêna.

9 Khanchu Pathianin Daniela chu thainuzel hruaitu ata kha inditna le lungthungna an dongtira.

10 Khan, thainuzel hruaitu khan Daniela kuang, "Nin fâk le nêk ngaituatu, ki rêngpa ki chi ta; ni kum ir-angpui thoibop danghai nêka siat ualin ni hmêl



kha a ihmu loi hrang ma ni? Khaang khan a ni'n chu, rêng kuanga ki lu hi ichiom kêng nin ni inchangpui hrang," a tia.

¹¹Thainuzelhai hruaitupa'n, Daniela, Hanania, Misaela le Azaria enkol hranga a isiapa kuang khan Daniela'n,

¹²"Nang ki ngên, ni siahlohai hi sîn sôm ni fia ro, fâk hrang le in hrang vai ni pe maiin lân,

¹³Ni kôla kin inlang dânhai le rêng bu nêk tui entuhai ei ruatharhai inlang dân tetûkin lân, ni ihmulam ang takin, ni siahlohai chung a hin tho ro," a tia.

¹⁴Khanchu hi thu hi ar fûk a tipuihaia, sîn sôm a fiahai ta.

¹⁵Sîn sôm a hek ni chu, rêng bunêk tui entu ruathartehai nêkin an hmêl a sa'n an la mar maia.

¹⁶Khanchu enkoltu khan an fâk hrang le uain in hrang a lâkpai pehaia, khohloia a pêkhai ta.

¹⁷Khanchu hi ruatharte minlihai hin theina le vârna murdi le inhriatna le bengvârna, Pathianin a pêkhaia. Daniela'n inlârna le irmang murdi omzia an hriat thei tâka.

¹⁸Khanchu rêng ina hong hruai lûtna hrang nikhua a hek ni chu thainuzel hruaitu'n annihai kha Nebukadnezara kuang a hon lûthaia.

¹⁹Khanchu rêng khan a lei chongpuihaia, anni laia Daniela, Hanania, Misaela le Azaria-hai ang kha tûte om mahaia, khasikin rêng makunga an ngîra.

²⁰Khanchu, vârna le inhriat thiamna thu tinrêng, rêngin a hor donhaiin, a ram pumpuia dôî tin theihai le tasân theihai nêkin a lêt sômin a dik le a sa ti an hriat suak tâka.

²¹Khanchu Daniela'n rêng Kura kum khatna dênin a sin mai ta.

Daniela 2

Reng Nebukadnezara irmang

¹Nebukadnezara roirêl kum hninaa khan, Nebukadnezara'n irmang a neia; a lungrîl a buai pea, in thei loiin a oma.



²Khan rêngin a'rmang hrilfia hrangin dôitheihai, mitphil le tasân theihai Kaldai mihai koi hrangin thu a pêka. An hongá, rêng kôla an ngîra.

³Rêngin an kuang khan, "Irmang ki neia, kha irmang inhria'nfel hrangin ki lungrîl a sôl zoi ta," a tia.

⁴Khan, Kaldai mihaiin Aramaik chongin rêng kuang khan, "O rêngpa kumtuangin dam ro: ni'rmang chu ni siahlohai hi hrilin lân, a hrilfiana chu hrilhai kin ti," an tia.

⁵Rêngin Kaldai mihai kha a donhaia, "Ki kuang ata thusuak sai a ni ta, irmang le a hrilfiana chu ki makunga nin inlangtir thei no'n chu sâtpai ni nin ta, nin inhai khom nimnok siana ni a ti.

⁶Irmang le a hrilfiana nin inlangin chu, keima ata thilpêk le lômman chôirsângna roiinpui hmu nin ti. Khasikin irmang le a hrilfiana chu nin hril roi," a tia.

⁷Anni'n hiang hin an sâma, "Rêngin kha irmang kha chu a siahlohaiin nin hrilhai sian, an entirna chu hrilhai kin ti," an tia.

⁸Rêngin a sâma, "Zoro sôt lam vai kêng nin ingaitua ti kin hriat;

⁹keima ata chu thu a suak tâk khom nin inhriat, keima ata irmang khan nin inlang lolina hrang dân inkhat vai a om; minlak hrila, ki kuanga hril hrang minlak le thu chanlamboi nin isin a ni; khasikin irmang kha ni hril roi, khanchu a hrilfiana khom nin entir thei nin tih ti inhria ki ti," a tia.

¹⁰Khanchu Kaldai mihai khan rêng kuang, "Rêng ni inphûta entîrthei mi inkhat khom irnêng chungá hin om mahai: rêng hai, ulianhai, roirêltu tûte'n hi thil hi dôit theihai, tasân theihai, Kaldai mihai la'rdon ngai mahai.

¹¹Khanchu rêng inphût hi thil intak a nia, taksa inlang theiloi mi pathianhai ti no'n chu a entir thei hrang tûte om mahai," an tia.

¹²Khasikin rêng kha a ning an mur pea, a thang a tôm pe tâka; Babulon mi vâ murdi thatpai ving hrangin thu a pêka.



¹³Khanchu thupêk kha an sua tâka, mi vârhai chu that ni hrang an ni tâka; khan Daniela le a rualhai khom that hrangin an zonghaia.

Pathianin Daniela kuang irmang omzia a hril

¹⁴Khan Daniela'n Babulon mi vârhai that hranga hong suak, Arioka rêng hrungtu chu vâh takin hiang hin a sâma;

¹⁵Rêng hrungtu pâla hruaitu Arioka kuang khan, "Ithoa mo rêng thupêk chu kha dôra a irhnot?" tiin a va sâma. Arioka'n Daniela kha a hrila.

¹⁶Khanchu Daniela kha a lûta, rêng kha hrilfiana inentir hrangin hun inkian roi tih a ngêna.

¹⁷Khanchu Daniela chu in tiang a fea, a rualhai Hanania, Misaela le Azaria a hrilhaia.

¹⁸Babulon mi vâh danghai laia Daniela le a rualhai an irhmang lina hrangin hi thu'rthup chungchânga hin irvân Pathian kuang lungkhamna an zonga.

¹⁹Khanchu kha thu'rthup kha zân inlârnaa Daniela kuang a hor lang pea, Daniela'n irvân Pathian an pâk ta.

²⁰Daniela'n, Pathian irhming chu kumtuang dênin inpâkin om ri se: Vârna le sinthotheina khom a ta a ni sikin.

²¹Hunbihai le zorohai an danglam theia: rênghai a sonpai theia, rênghai an dettir thei: Mi vârhai kuang vârna a pêka; an hretheitu kuang inhriat theina a pêka.

²²Thil inthûk le thil irthuphai an langa: inthima om inhriatin, a kuanga vâh a pêk ngai.

²³O, ki'rchihai Pathian, vârna le theina ni petu, ni kuanga kin izong nin hriattirtu chu, Lômthu hril pumin nang kin pâk: Rêng thil chu ni nin hriattir tâk sikin ti a hrila.

Daniela'n irmang chu a hrila, hrilfiana



²⁴Khanchu Daniela'n Babulon mi vârhai irhmangtir hranga rêngin a inkung Arioka kuang a fea, a kuang, "Babulon mi vârhai chu irhmangtirhai no ro: rêng kuang ni hruaiin lân, rêng kuang a hrilfiana inentir ki ti," a va tia.

²⁵Khanchu Arioka'n Daniela kha irhnot takin rêng kuang a hruaia, "Juda sala om nâihai laia rêng kuanga a hrilfiana inhriattu mi inkhat ki hmu ta," a tia.

²⁶Rêngin Daniela, ar hming Beltesazzara kuang khan, "Irmang ki nei nôka a omzia mo ni hril theiin?" a lei ti pea.

²⁷Daniela'n rêng kuang khan, "Thil irthup, rêng inhriat nuam tak chu, mi vârhai, kutzia en theihai, dôl theihai le tasân theihaiin rêng an ihrilfia pe theiloj;

²⁸khannisian thil irthup inpuangtu Pathian chu irvâna a oma, rêng Nebukadnezara hi thil la hong om hrang a inhriattir nuam a ni hi te. Ni'rmang le ni zâlmuna inlârna omzia chu hiang hin a ni.

²⁹O, inlaltak, ni zâlmuna thil la hong om hranghai ni'rngaituaa, thil irthup inpuang ngaitu'n thil la om hranghai nang a inhriattir a ni.

³⁰Keima hin mi danghai nêka fingna ki nei sika, hi thil irthup hi ki kuanga inpuang ni maka, rêng kuanga a hrilfiana inhriattir hrang vai a ni, ni lungrîla ni ingaituahai nin hriat theina hrang vaia a ni.

³¹O, inlaltak, ni hong tanga, irngai ro, millim roiinputak a oma. Kha millim lianpa, irtêk dûra om kha, ni kôla a ngîra; an lang dân khom phûkinthing om tak a ni.

³²Kha millim kha a lu rângachak irthiang tak a nia, a rôp le a bânhai chu sumru, a pum le a malpuihai chu dâr thîr,

³³a kehai chu thîr, a kezapha chu thîr le pil irzêl a nia.

³⁴Nangma'n chu lung, kuta sin suakna lâk hrang dân ni en laiin, millim khan a ke thîr le pila siam khan a hong dela, an khoi chita.

³⁵Khanchu, thîrhai le pil, dâr, sumru le rângachakhai a rêngin a koidara, misa lum laia hruizôla bu'rsi angin an om tâka: phâivua'n a sêm indarhaia, an



omna hmun inhriat thei ni ta ma: millim deltu lung chu tâng liantak a chang tâka, irnêng a sip zita.

³⁶“Hi hi a ni, ni’rmang chu, a hrilfiana khom rêng kuang hin hril kin ti.

³⁷O inlaltak, nang chu rênghai rêng, irvân Pathianin ramhai, sinthotheinahai, hrâtnahai, roiinpuinahai a ipêk chu ni ni;

³⁸khasikin kho hmuna khom mihriam nâihai omna murdia, ramsa le vatêhai ten khom ni kuta a pêka, an rênga laia roirêl hrangin a pêk chu ni nia: rângachak lu chu nangma hi ni ni.

³⁹Khan ni hnunga hin ram dang mi nangma nêka chîn ual hong lian a ta; khan, dâr, ram inthumna irnêng murdia roirêl hrang chu om nôk a ta.

⁴⁰Khan, ram minlina chu thîr anga ngar om a ta; thîrin chu thil tinrêng a insiat thei angin, ama khom insiatin a idel indi hrang a ni.

⁴¹A kezapha le a’rzunghai chu bêl siamtu saihlûm, a sen a zâr thîr anga ni ihmu ang taka khan, ram irsen ni a ta, khannisian amaa khan an ngarna chu om mai a ti, thîr le pilhlûm irpol ni ihmu ang khan.

⁴²A kezapha tianga thîr le pilpok ni ihmu ang khan ram senkhat tiang a siat ol a ta, senkhat tiang siat loiin om a ti.

⁴³Thîr le pil irzêl ni ihmu khan, anni khom mihriam irchi irpol ni a ti. Khannisian thîr le pila irzêl tatak thei loi ang khan, irzêl thei lik no nihai.

⁴⁴Kha nia rênghai khan irvâna Pathianin ram zuan ding a ta, kha ram kha chu siat ta ngai no ni; an lalna khom mi danghai hrangin mâksan ni ta no ni; hi ram murdihai hi insiatin inhek zoi a ti, a ram chu kumtuangin inding mai ta a ti.

⁴⁵Tâng tianga lung, kut ni loa tuk suakin, thîr, dâr, saihlûm, sumru, le rângachakhai a siata ni ihmu ang khan, Pathian roiinputak khan rêng makunga hin nakana thil hong om hrang chu inpuang a ni: khanchu irmang kha a tak ngêta, a hrilfiana khom a diktak a ni,” a tia.

Rengin Daniela lômman a pêk



⁴⁶Khanchu, rêng Nebukadnezara chu a khûksadelin Daniela kha chubai a mûka, a kuanga thilinhlan le mirimhoihai inhlan hrangin thu a pêka.

⁴⁷Rêngin Daniela kuang khan, “Hi thilirthup ni inpuang theinaa hin, nin Pathian chu pathiante-hai Pathian, rêng hai RENG, thilirthup inpuangtu a lei ini pial kêng a ini,” a tia.

⁴⁸Khanchu rêng khan Daniela kha a donsuaia; thilpêk roiinpui tamtak a pêka, Babulon ram bial pumpuia roirêl hrang le Babulon mi vârhai murdi chung a hruaitutak ni hrangin a sia tâka.

⁴⁹Khan Daniela izong angin rêng khan, Sadraka, Mesaka le Abednego-hai chu Babulon bial chungchânga hruaituin a siahaia, Daniela rêk chu inlaltak roirêlna khan a om ta.

Daniela 3

Rêngin mi tukhom rângachak irlim biak hrangin thu a pêk

¹Rêng Nebukadnezara'n rângachak millim, a'rsânglam mûk sômruk, a khang lian mûkruk a isiam, Babulon biala Dura phâizôla a siaa.

²Rêng Nebukadnezara'n Thuneituhai, a thûl theihaia, optuhai, roirêltuhai, sum enkoltuhai, le ar fûktirtuhai, le dân inhriat le a rama roirêltuhai murdi chu rêng Nebukadnezara millim siam ser hrang dân ngaituain an irbuka.

³Thuneituhai, aiôtuhai, optuhai, roirêltuhai, sum enkoltuhai, irfûktuhai, dân inhre mihai le ram bial hruaituhai murdi chu rêng Nebukadnezara millim siam sernaa khan an hong inkhôma, a millim siamna kôla an ngîra.

⁴Khan inring takin tâng an sama, “O, mi murdihaio, nam tin le chong tin hmanghaio.

⁵bekul hai, theihle hai, têngrep hai, serânda le rosem lianhai, irhâinei murdi'n ar hâi nin inhriatin chu rêng Nebukadnezara rângachak millim siam kha khûksadela chubai mûk hranga thupêk nin ni:

⁶mi tukhom khûksadela chubai mûk loi chu, kha zoroa zel khan kângirhmangna meipuaia pai ni nin ti,” tiin.



⁷Khasikin mipui om murdi'n, bekul, theihle, têngrep, rosem le serânda le a dang irhâinei murdi irhâi an inhriatin, mi tin, nam tin, chong tinhaiin rêng Nebukadnezara millim siam chu khûksadelin chubai an mûk tâka.

Daniela-hai pâl he lâkloi intumna

⁸Kha zoro lai takin Kaldai mi senkhathai an hong nâia, Juda mihai an sêlhaia.

⁹Rêng Nebukadnezara kuang khan, “O inlaltak, kumtuangin dam sôt ro,

¹⁰Nangma'n, o inlaltak, mi tukhom bekul, theihle, perkhuang, rosem, têngrep le serânda irhâinei murdi'n khûksadelin millim chubai nin imûk hrang a ni:

¹¹tia tukhom khûksadela chubai mûk loi murdi hâlrivômna meipuaia pai ni an tih tia thupêk nin suaa.

¹²Juda mi senkhat Babulon ram bial chungchânga hruaitua ni isiahai, Sadraka, Mesaka le Abednego hai kha an oma, hi mihai hin, o inlaltak ite bê'n nang an ibe pe loi a ni; ni pathianhai sintho loiin, ni rângachak millim siam chubai mûk nuam loiin,” tiin an hrila.

¹³Khanchu Nebukadnezara ningmur takin Sadraka, Mesaka le Abednego hai chu hong hruaihai hrangin thu a pêkhaia; khanchu hi mihai hi rêng kuanga khan an hong hruaihaia.

¹⁴Nebukadnezara'n an kuang, “O Sadraka, Mesaka le Abednego, ki pathian sintho loia, ki rângachak millim siam hi chubai mûk loi nin itum ma ni?

¹⁵Atûn hin bekul, theihle, perkhuang, rosem, têngrep le serânda irhâinei murdi an ringa khûksadela ki millim siam chubai nin la mûk hrangin chu la sa a ta; nin mûk nuam noa ni'n chu, kha zoro zel khan hâlrivômna meipuaia lût nin ti; ki kut ata sansuak theitu pathian chu tu mo a ini hrang?” a tia.

¹⁶Sadraka, Mesaka le Abednego haiin hiang hin an sâma, “O Nebukadnezara, hi thu hin nang kin i sâma nang khomin ite inhre ma unga.

¹⁷Kin Pathian a sin kin itho pe khan hâlrivômna meipui ata ni sansuak thei a ni, ni kut ata, o inlaltak ni sansuak ngêt a ti, an tia.



¹⁸Khan ni no khomsian, o inlaltak ni pathianhai sin chu tho no ni ung, ni rângachak irlim siam khom chubai mûk no ni ung, ti hi inhre ro,” an tia.

An rual inthuma thi hrang ti an ni

¹⁹Khanchu Nebukadneza chu a sân a ning an mur tâka, Sadraka, Mesaka le Abednego-hai ata kha a hmêl a danglam tâka; hâlvômna meipui lak a tik danga nêka bâk saria hrâtin tho roi ti thu a pêkhaia.

²⁰Khanchu a sipaihai laia mi hrât inthanghai chu Sadraka, Mesaka le Abednego hai chu khitphiara hâlvômna meipuia pai hrangin thu a pêka.

²¹Khanchu hi mihai hi an silkai puma khit phiarhaiin hâlvômna meipuia an paihai tâka.

²²Khanchu rêng thupêk ar hnot sikin le hâlvômna mei lak a hrât hrai sikin Sadraka, Mesaka le Abednego indomtuhai chu meidôn khan a kâng thathaia.

²³Hi mi inthum Sadraka, Mesaka le Abednego-hai hi khit pumin meipui laia khan an om raka.

²⁴Khanchu rêng Nebukadneza'n a'rkhêl a ti tak taka, irhnot takin a thoia, ar fûkputuhai kuang khan, “Mi inthumhai kha khitphiara meipui laia ei ipaihai mo ni ma?” a tia. Anni'n, “O inlaltak, ei ipai lûthai an ni,” an tia.

²⁵Ama'n, “Irgai roi, mi minli anga meipui laia irvêlin na tuang viat loiin ki hmu, minlina inlang lam len vâng chu vântîrtôn hmêl irput angin a om,” a tia.

Mi inthumhai insuakin kâirsângtir an ni

²⁶Khanchu, Nebukadneza chu hâlvômna meipui mikot bula a hong nâia, “Sadraka, Mesaka le Abednego, nangni anchungtak Pathian suakhaio, hong suak unglân, hin hong roi,” tiin a chongpuihaia. Khanchu Sadraka, Mesaka le Abednego chu meipui lai ata an hong suaka.

²⁷Khanchu thuneituhai, ramoptuhai, ar fûkputuhai le ar bukhai khan, hi mihai chung a hin mei sintho theina lua irdang loa, an sam mal lua kâng irkin loa, songkolhai khom a om balama om, mei mirim lua innam loiin an hmua.



²⁸Rêng Nebukadnezara'n thu a hrila "Sadraka, Mesaka le Abednego hai Pathian chu inpâkin om ri se; ama'n irvân tirtônhai a zuang tîra; a siahlo a sinthotuhai chu a sansuaka, kha mihai khan an Pathian ti no chu pathian dang sintho loiin, chubai khom mûk loiin, an taksa an inhlan ngama.

²⁹"Khasikin mi tin, nam tin, chong tinhaiin Sadraka, Mesaka le Abednego-hai Pathian chung a thil saloi hril murdi chu sâtpai ni an ta, an inhai khom insiat ni an tih ti thupêk ki siam nôk ta. Ama ang dôra sansuak theitu pathian dang rêng rêng om ta mahai," a tia.

³⁰Khanchu rêng khan, Sadraka, Mesaka le Abednego-hai chu Babulon biala khan an liantirhai ta.

Daniela 4

Reng Nebukadnezara irmang voihnina

¹Rêng Nebukadnezara'n, mi tin, chong tin hmanghai laia, irnêng pumpui chung a omhai laia, irngeina inpungin om ri se.

²Anchungtak Pathianin thil inentirnahai, thil irkhêl a ithohai hi an langtir ki nuam.

³A thil inentirnahai chu a roiinpuuin, a thil irkhêl tho khom a irkhêl ok a ni. A ram chu ramhlu a nia, a roirêlna chu irlo tin tina rêl a ti.

⁴Khan kei Nebukadnezara hi ki ina hoitak le in hoitak sûnga ki fâkin ki nêka.

⁵Irmang ki ichitak ki phana; ki zâlmuna ki ngaituana le ki lua inlârna khan a nin buaia.

⁶Khasikin Babulon mi vâ murdihai ni hrilfia pe hrangin thu ki pêkhaia.

⁷Khanchu dô theihai, tasân theihai, Kaldai mi tasân theihai an hong a, ki'rmang chu ki hrilhaia, khannisian a hrilfia thei om mahai.

⁸A hnungkhôna chu Daniela, ki Pathian irhming ang irput, ar hming Beltesazzara Pathian irthiang irtha omna chu ki kuang a hong a; ki'rmang chu a hrila,



⁹o, Beltesazzara mitvai dôitheihai hruaitu, nangma hin Pathian irthiang irtha a om ti le thu'rthup murdi'n nan buai ngai mah ti kin hriat sikin: ki'rmanga ki ihmu inlârna le hrilfiana nin hril roh.

¹⁰Ki zâlmuna ki lua inlârna chu hi hi a ni: ki hong tanga, irnêng lai taka hin thing a oma; a'rsâng lam chu hril zoi loi a ni.

¹¹Thing chu a'rsôna, a'rsânglam chu irvân phâk ang dôr a nia, kôlkil ata an lang thei vinga.

¹²A hnâ en hoiin, a ra khom a tama, thilhring murdihai fâk hrang a oma; ramsahaiin dâihlîmin an hmanga, chunglêng vatehaiin a ôna an riaka, taksa nei murdihai chu ama infâ ang an ni.

¹³Ki zâlna rengata inlârna khan a hong ena, irngai ro, irvân ata enkoltu, mi irthiang a zuang suaka,

¹⁴inring takin, "Thing chu tukin lân, a ônhai irhlei ro, a hna insil haiin lân, a rahai dêng zuan ro: a hnuaiia ramsahai khom irzûlhaiin lân; a ônhaia vatehai khom vuanghai sian.

¹⁵Khannisianlân rama hloisûlhai laia mông, irnêng thingkung bul chu, thîr le dârsen hruia khitin irnênga khan ma roi. Khanchu, irvân irdo'n buak sian, a dongtum chu irnênga hloisûl le ramsa leh omsuam ni sian.

¹⁶A lungrîl chu mihriam lungrîl ang ni loiin danglam ni ri se; ramsa ngaitua ang ni sian, a chung a hunbi sari hek ni ri se.

¹⁷Hi thu hlu hi a entuhai thu a nia, thil inphût hi mi irthianghai thua tho a nia, anchungtakpu'n mihriamhai inlalna rama hin thu a neia, a inuam takhai a pêka, mi irhnuai takhai khom an luatirhai ngai a nih ti mihriamin an inhriatna hrangin," tia khêkin.

¹⁸Khan, Nebukadneza'n, "Hi irmang hi keima rêng Nebukadneza'n ki iphan a ni," a tia. "Nang o Beltesazzara, a hrilfiana chu inpuang ro, ki rama mi vâr murdihaiin chu a hrilfiana ni hril thei mahai; nangma'n chu thei ni ti, nangmaa hin chu Pathian irthiang irtha a om sikin," tiin.

Daniela'n a hrilfia



¹⁹Khanchu, Daniela, ar hming Beltesazzara chu chidêk dôkin, ar ngaituana a buaia; Rêngin a kuang, “Beltesazzara, irmang a hrilfiana’n mo nang a inbuai,” tiin a hrila. Beltesazzara’n, “Ki rêngpa irmang chu a en nuam loituhai hrang ni sian, a hrilfiana khom ni râlhai hrang ni sian.

²⁰Thing ni ihmu irsôn insa, irvân dêna kha, kôlkil ata inlang ving le

²¹a hnâhai satak le ra tamtak, thilhring murdi fâk hrang om le ramsahai oma, a ôna vatehai riakbuk lei ni ngai chu,

²²o inlaltak, nangma ni nia; nir sôna, ni hrâta, ni roiinpuina chu a’rzata, irvân dênin, ni roirêlna chu kôlkil dên a nia.

²³Khan irvân ata enkoltu mi irthiang a hong suaka, thing chu phûrin lân, irhmang ri se: khannisian rama hloisûl laia môngin irnêng rîla chu thîr le dâr irzêl chu hôiin lân, irvân irdo’n buak sian, a om hrang dân chu ramsahai angin, a chung a zoro sari a tung khomin a hon lalin a hmua;

²⁴a hrilfiana chu hi hi a ni, o inlaltak, a’rsângtakpu thupêk, an lal tak ki rêngpa chung a hong tung chu a ni:

²⁵Mihriam lai ata inhnotsuak ni ni ta, ni omna hrang chu ramsahai laia ni a ti, sehrât angin hloisûl fa ni ta, irvân irdo’n nang buak a ta, ni chung a zoro sari hek a ti; anchungtakpu’n mihriamhai inlalna ram chung a thu a neia, a inuam tak a pêk ngai a nih ti nin hriat mân chu.

²⁶Khanchu a sûngril hoi hranga thu a ipêk ang khan irvâna thu a nei ti nin hriat hnung le chu ni ram chu ni ta ni mai a ti.

²⁷Khasikin o inlaltak, ki thu nang tihai hi pomin lân, ni sualna chu felna’n thûlin lân, nin châinahai chu, mi inrianghai nin renhaiin chu, ni khonhoinahai hi a la sei khom a ol,” tiin a sâma.

²⁸Hihai murdi hi rêng Nebukadnezara chung a thil hong tung chu a ni.

²⁹Tha sôm tha hni hek tiang chu Babulon rêng in sûnga a lêng vêl laiin,

³⁰rêngin, “Hi Babulon inlalna hi keima hrâtna ngêtin rêng omna hmun hrang le ki roiinpui satna hranga ki isiam mo ni ma?” tiin a hrila.



³¹Kha thu kha rêng hmûra a suak lai takin, irvân ata irhâi a hong suaka, “O rêng Nebukadnezara ni kuang thu a hong tung: inlalna ram khan nang a mâksan ta.

³²Mihriam lai ata inhnotsuak ni ni ta, ni omna hrang chu ramsahai laia nih a ti: sehrât angin hloisûl fa ta ni ta, ni chung a zoro sari hek a ti; anchungtak khan mihriamhai inlalna ram chung a thu a neia, a inuam takhai a pêk ngai a nih ti nin hriat mân chu” tiin.

³³Kha zoro lai takin kha thil kha Nebukadnezara chung a hong tung zela; mihriam lai ata inhnotsuakin a om ta. Sehrât angin hloisûl a fâka, a taksa chu irvân irdo irsilin a oma, a sam khom irmu mul ang le a mitinhai khom va mitin anga omin a iom a ni ta.

Nebukadnezara'n Pathian a inpâk

³⁴Khan zoro hek tiang chu kei Nebukadnezara hin irvân tiang ki tanga, ki hor hriat suaka, anchungtakpu sat ki vura, a hring mai chu kin pâka, kin zaa. A roirêlna khom kumtuanga roirêl a nia: a ram khom rammuala irlo tamtaka om a ni sikin.

³⁵Khan irnêng luatu murdihai hi ite bêa bê loi a ni. Irvân sipai rualhai laia chu ama thutak a nia, tûte'n ama kut chu irngamtir thei ni ma, nangin te itin mo ni ti? ti lua irdon ngam mahai.

³⁶Kha lai taka khan inhriatna ki nei nôka; ki ram sûnga kin lalnahai le ki satnahai chu ki nei nôkin ki'rhriata; khan a nir fûkpuithai khan an ni hong pana, ki ram indetin a oma, roiinpui tamtak pêk belsa ki nia.

³⁷Khanchu kei Nebukadnezara'n irvân Rêng chu kin pâka, ki ichôiirsângin ki inzâ a ni, a sintho a fel sikin; mualinphoia omhai khom a irhnuaitir thei a ni.

Daniela 5

Belsazzara hruaithe

¹Khan zân khat chu rêng Belsazzara'n hruaithe mi sângkhathai hrang lian takin an thea; an kôla khan uain a ina.



²Belsazara'n uain a hon rui phol tena chu rângachak le sumrua bêl le bûrhai, a pa Nebukadnezara'n Jerusalem biak in ata a ilâksuak kha ama le a milianhai le a dôngmahai le a lâksîrhain uain inna hranga hong lâk hrangin thu a pêka.

³Khanchu rângachaka siam bêl le bûrhai, Jerusalema Pathian biak in ata lâksuak kha an hong chôia. Rêng le a milianhai, a dôngmahai le a lâksîrhain khan uain inna'n an hmang tâka.

⁴Uain inna in, rângachak, sumru, thîr, dâr, lunghaia siam pathianhai an chôirsânghai dup dupa.

⁵Kha lai taka khan mihriam kutpâr hi a hong inlanga, rêng inbang chung meiser inkhâina kôla khan a'ziaka, rêng khan a'ziaktu kuttum kha a hmua.

⁶Rêng kha a hmêl a hong danglama, a lungrîl a buai pea, a ke kut irnak boiin a oma, a'rzalpuî tâka.

⁷Rêng chu Mitvai dôitheî Kaldai mi tasân theihai hruai hrangin a khêka. Rêng khan Babulon mi vârhai kuang; "Mi tukhom hi irziak hi tepa a hrilfiana ni hril thei chu puan senduk insiltir ni a ti, a ringa rângachak zîngziri inhlitir ni a ta, a ram sînga roirêltu inthumhai laia thuneitu tak ni a ti," tiin a hrila.

⁸Khan a mi vâr om dôrhain an hong lûta; khannisian a'ziak kha tep thei mahaia, a hrilfiana khom inhre loiin an oma.

⁹Rêng Belsazzara chu a sate'n chardongin a bôm nôka, a hmêl danglamin a oma, a mi lianhain khom an lung a zîng pehai u uala.

¹⁰Khan rêng le a mihain khêk irhain khan rêngnu kha hruaitheina ina a hong lûta; rêngnu khan, "O inlaltak kumtuangin dam ro; ni lungrîl inbuai no ro, ni hmêl khom danglam no ri se;

¹¹ni rama hin mi inkhat Pathian irtha irthiang nei mi a om; ni pa zoro lai ata, en theina, inhriat theina, vârna, Pathian vârna nei anga mi a om ti len hriat a ni tâka; o inlaltak ni pa rêng Nebukadnezara'n dôit theihain, kutzia en theihain, Kaldai mihain tasân theihain chung hruaitua a lei isia a ni tâka;



¹²lungrîl feltak irput inhriatna, inhriat theina le irmang hrilfiana, thu intak inhriat theina, dôî sût theinahi chu Daniela rêngin Beltesazzara a itihna hmuna a om ti inhriat a lei ni tâka. Atûn hin Daniela chu koi ni sianlân, a hrilfiana chu ni hril pe thei a ti,” tiin a hrila.

Daniela'n irziak kha a hrilfia

¹³Khanchu Daniela kha rêng ina an hong hruaia, rêngin Daniela kha, “Daniela, Juda sala intâng hai laia mi, ka pa inlaltakin Judai ram ata nang a hong ihruai kha mo ni ni?

¹⁴Nangmaa hin Pathian irtha a oma, en theinahi, inhriat theinahi, vârna sabîk ni nei ti inhriat a nia, ni thu ki len hriata.

¹⁵Atûn hi irziak hi tep le a hrilfiana nin hril hrangin tasân thei le mi vârhai an hong hruaihaia, khannisian a hrilfia thei om mahai.

¹⁶Nangma'n chu hrilfia thei ni ta, dôî khom ni sût thei ti ki len hriata; atûn hin ni theiin chu a'rziak hi tepin lân, a hrilfiana khom ni hril ro, khanchu puansenduk insiltir ni ni ta, ni ringa rângachak zîngziri inhlitirin om ni ta, hi rama roirêltu inthumhai laia thuneitu tak ni ni ti,” a tia.

¹⁷Khan Daniela'n, rêng kuang khan, “Ni thupêk chu nangma ta hrang ni sianlân, ni lômman chu mihai kuang pe ro; khannisian a'rziak hi chu rêng, nang tep pe ki ta, a hrilfiana khom a tia.

¹⁸O inlaltak, ni pa Nebukadnezzara chu inchungtak Pathian khan an laltira, an liantirin a sân a iroiinputir tak tak a ni;

¹⁹liannatak a pêk sikin mi tin, nam tin, le chong tinhaiin an chia, a makunga an inthing ngaia; a inuam angin a thathaia, an hring theia, a inuamhai chôirsângin, ar hnuaitirhai theia.

²⁰Khannisian a lungrîl irsongin, a milung a ngara, mualinphoiin a oma, a roiinpuina chu a lâkpai pea;

²¹mihriam nâihai lai ata inhnotsuakin a oma, a lungrîl khom ramsahai angin, a omna khom rama sakuartunghai laia a nia; sehrât angin hloisûl fâkin, a



taksa chu irdo irsilin a oma: Pathian inchungtakin mihriamhai inlalna rama thu a neia, a inuam tak an luatir thei ti ar hriatsuak mâka chu.

²²Khan nang a nâipa, o Belsazzara hihai hi nin hriat khoma, ni lungrîl irhnuaitir loiin,

²³irvân Rêngpa nêkin ni lian uala, a ina bûr bêlhai ni lâka, nang le ni mi lianhai ni dôngma le ni lâksîrhain uain inna'n nin hmanga; sumruhai, rângachakhai, dâr le thîr, thinghaiin lunga isiam pathianhai hmu theiloi, irngai theiloi, inhre theiloi kha nin chôindôma; khan Pathian ni hringna murdi a kuta omtu khom inzak loiin.

²⁴Khanchu ama ata kut irbu chu a hong tîra, hi hi a hong irziak a ni ta.

²⁵“Hi hi a thu irziak chu a ni: MENE, MENE, TEKEL ti le PARSIN ti a ni.

²⁶Khan a hrilfiana khom hi hi a ni; Mene ti chu nin lal zoro hrang ten a'rsinsiaa, a inmongtir hrang tihna a ni;

²⁷Tekel ti chu ivarh ni nia, chuk ta mak che tihna a ni.

²⁸Parsin ti chu ni ram hi sem darh a nia, Media le Persia kuanga pêk a nih tihna a ni,” a tia.

²⁹Khanchu Belsazara'n thu a pêka, Daniela chu puan senduk an siltira, a rama khan roirêltu inthum laia inkhat ni hrangin an puang tâka.

³⁰Kha ni zân khan Kaldai rêng Belsazzara chu that a ni ta.

³¹Khan Daria Midian mi khan ram chu a ilua a ni ta. Ama chu kum sômruk le kum hnia mi a ni.

Daniela 6

Daniela kâmkeibaknei khura an inthâk

¹Daria ram optu khan thunei hrang mi irzakhat sômhni, ram pumpuia siahai, a sa a tia.

²Anni laia mi inthum an kunghai nôka, an laia inkhat chu Daniela a ni, hi thuneituhai hin an thurchi inhriat an irhlet maiin, Daria'n ite siatna a nei loina hrang sikin.



³Daniela hi lungrîl diktak irput a ni sikin hruaitu le thuneituhai nêkin an lâ uala; rêng khomin ram pumpuia hruaitu ni hrangin an sâpa.

⁴Khanchu hruaitu le thuneituhaiin an inhriatin chu zoro'nchum an zonga, khannisian zoro inchum hmu thei loiin, a dik loina lak hmu loiin; a iamomzoi sikin, dik loina le sualna mi ni loi a nia.

⁵Kha tena chu hi mihai hin, "An Pathian dân thua hin ei hmu ta no'n chu, hi Daniela chungu hin zoro inchum hmu ta no ih," an irtia.

⁶Khanchu hruaitu le thuneituhaiin rêng kuanga irbukin hiang hin an hrila. "Rêng Daria, kumkhua'n damin lân.

⁷Ram hruaituhai, thuneitu, ar fûktirtu le optu murdihai chu sîn sômthum sînga, o inlaltak nang ti no'n chu pathian mo, mihriamhai kuanga zongna nei murdi chu kâmkeibaknei khura pai hrang, tiin rêng hin dân siamin khap sianlân, an irtia.

⁸Atûn hin, o inlaltak, khapna indetin lân, Media le Persia dân danglam loi ang khan irhming irziakin lân," tiin.

⁹Khanchu rêng Daria khan a lekha irziaka khan ar hming a'rziak tâka.

¹⁰Daniela'n a thu irziak kha irhming irziak a ni tah ti an hriatin in sînga a lûta, a itho ngai angin sîn khata voithum a khûksadela, a chongchaia, a Pathian kuang lômthu a hrila.

¹¹Khanchu hi mihai hi an inkhôma, Daniela'n a Pathian kuang zongna le ngênna a nei ngai ti an hmusuak tâka.

¹²Rêng kuang khan, rêng dân a ikhapna thu kha an hrila; "Sîn sômthum sînga, o inlaltak, nangma kuang ti no'n chu pathian mo mihriam laia ite zongna nei loi hrang, a neitu chu kâmkeibaknei khura pai hrang tia dânu khan nir hming ni'rziak mo ni ma?" an tia. Rengin "Kha thil kha chu a det a ni, Media le Persia dân danglam ngai loi angin," tiin a sâmhaia.



¹³Kha tena chu rêng kuanga khan, an tia. “Daniela Juda sala om nâihai laia mi khan, ni dân hi ite bêin bê maka, nir hming irziaknahai kha, a sũa voithum khûksadelin a chongchaia, a Pathian kuang,” an tia.

¹⁴Hi thu hi, rêngin an hriatin chu a poi a ti tak taka, Daniela chu sansuak hrangin sũa sôt a tuma.

¹⁵Hi mihai hin an hong irbuk nôka, rêng kuang khan, o inlaltak Media le Persia dânin khapna indanglam thei ni mah ti nin hriat, an tia.

¹⁶Khanchu rêng khan thu a pêkhaia, Daniela chu an hong hruaia, kâmkeibaknei khura an paia. Rêngin Daniela kuang, “Ni Pathian a sin ni itho pe maipu khan nang saninzôk a ti,” a tia.

¹⁷Khanchu lung an hong lâka, khur kotbâi kha an khâra; rêngin Daniela chungchâng hi a danglam lolina hrangin ama kutsabi, a mi lianhai kutsabi leh irsin a pêka.

¹⁸Rêng kha a ina a fea, bu ngheiin zânkhua an vâra, thil irhâi nei om loiin, zâlna khom do loiin.

¹⁹Zînga chu rêng kha a thoia irhnot takin kâmkeibaknei khur tiang khan a fea.

²⁰Daniela omna khur a hong nâiin chu chap irhâiin an hriata, rêngin Daniela kuang khan, “O Daniela Pathian hring siahlo, ni Pathian a sin ni itho ngai khan kâmkeibaknei khur ata nang a inzôk thei mo?” a tia.

²¹Daniela'n rêng kuang khan, “O inlaltak, kumtuangin dam ro;

²²ki Pathianin a vântirtôn a zuang tîra, kâmkeibaknei hmûr ar chîptira, ite ni ti mahai, a mithmua hrilsiatna boiin ki oma, ni chung a khom ite insiat ual ma unga,” a tia.

²³Khanchu rêng kha a lôm tak taka, Daniela kha khur ata kêlsua hrangin thu a pêka, khanchu an lâksuaka, natna tuang viat loiin, Pathian a iamzoi sikin.

²⁴Khanchu rêngin thu a pêka, Daniela sêlhai kha an hong hruaihaia. Kâmkeibaknei khura khan an paihaia; an nâi le dôngmahai le



kâmkeibakneihai khan an inthikhaia, inpet inpetin khur mong pha loiin an inhekpaihai ta.

²⁵Khanchu reng Daria'n, mi tin, nam tin, chong tin hmanga irnênga omhai laia khan lekha a'rziaka, "Nin chung a irngeina inpungin om ri se.

²⁶Ki ram op sînga hin Daniela Pathian hi biakhai sian chi ri sehai, tiin thupêk ki siam. Ama chu Pathian hring a nia, a det kumkhuaa, a ram chu insiat thei ni no nia, a op khom a hek tenin op a ti.

²⁷Ama'n a saninzôka, a saninhringa, irnêng le irvâna irsinsiana le thil irkhêl a tho theia; ama hi kâmkeibaknei sinthotheina ata Daniela sansuaktu chu a ni,' tiin.

²⁸Kha tena chu Daniela hi Daria roirêl lai le Persia mi Kura roirêl lai chu lam tinrênga a inchumtir tâk a ni.

Daniela 7

Daniela KHAN A'RMANG A HRILFIA

(7.1–12.13)

Inlârna sahrâng minli Daniela ihmu

¹Babulon rêng Belsazzara kum khatna khan Daniela'n irmang a neia, a zâlmuna a ihmu chu, khan a'rmang chu a'rziaka, a tângpuiin an sîra.

²Daniela'n zân inlârna khan hmu ki neia, irngai ro, kôlkung minlia phâivua hi tuipui lian taka ang khan a hong hrânga.

³ Khan tuipuia khan sa irkhêltak tak chi minli an hong suaka.

⁴Inkhatna kha chu kâmkeibaknei ang a nia, irmu mitha a neia, a mitha pharin, irnêng ata a phara, mihriam anga ke inhnia ngîr theiin siam a nia, mihriam lungrîl irput angin ki en chiana.

⁵Sa dang inhnina chu savom anga omin, hi tiang a kehai leh a ngîra, a bâia hin kângru inthum a oma, a sê khokhaia, thoiin lân taksa nei fa'n tam ro, tiin an hrila.



⁶Kha irzoiin chu ki ena, irngai ro, a dang kâmkeite anga om a hnung tiang va mitha nei minli angin a oma, ama hin lu khom minli a neia, a kuanga khan roirêlna pêk a nia.

⁷ Kha zoia inlârna khan, irngai ro, sa minlina chu sa irkhêltak le ichiom tak ki hmu nôka; thîr ha roiinpuitak neia, a ei chut chuta, an pot thêrhaia, a ifâk mihliahai chu a sirphahaia: matona sa danghai nêkin chu danglam tak a nia, irki sômkhath nei a nia.

⁸ A'rki omdân ki ngaituaa, irngai ro, an laia hin irki chînte a hong mônga, matona irki inthumhai chu a bulrêta rênin, ama irkia hin a mit, mihring mit ang hi a oma, bâi khom a neia, thil tamtak a hrila.

Inlârnaa kumkhontuanga om mai

⁹ Khan, ki thîr mai laiin, rêngtoihmun lei irdo diam hi a oma; kha rêngtoihmun inkhat chung a khan kumkhontuanga om maipu kha a hong toia. A tukrivo chu vur anga vâ a nia, a sam chu samul irthiang ang a nia: a rêngtoihmun chu meichok ang a nia, a tâli chu mei ikâng hrang ang a nia.

¹⁰ Khatak ata kha mei a hong chok suaka, a sânga sângin a sin an thoa, a makunga khan a sîng a sîng têlin an ngîra, roirêlna kha a phut tâka, lekhabuhai a phên tâka.

¹¹ Kha lai khan irki khan thu tamtak a hril sikin, ki hong ena, sa kha thatpaia, a taksa insiatin, meia hâl hrang dênin ki ena.

¹² Khan sa danghai thu kha chu, an roirêlna lâkpaï pein an oma, an hringnahai chu irlokhat ten chu la hôi pe an nia.

¹³ Zân inlârnaa khan irngai ro, vâ sùmlâia zuang mi inkhat mihriam nâipa anga om ki hmua, kumtuanga om pa kuanga khan an hong hruaia.

¹⁴ Roirêlna hai, roiinpuina hai, le ram hai a kuang pêk a nia, mi tin, nam tin le chong tinhaiin a sin an thôna hrangin; a roirêlna chu roirêlna det hek nî nei loa, a ram khom irhmang loi hrang a nia.

Inlârna hrilfiana



- 15** Khan kei Daniela hi ki taksa chung a hin ki lungrîl a sôla, ki lua inlârna ki ihmuhai hin a nin buaia.
- 16** A ngîrhai laia inkhat ki hong nâiin chu, an nihai laia thudik chu ki'rdona. khanchu a ni hrila, a thil hrilfiana khom kha a nin hriattira.
- 17** Hi sahrâng roiinpui minlihai hi rêng minli irnênga hong suak hranghai chu an nia.
- 18** Khannisian inchungtaka mi irthianghaiin ram chu chang an ta, kumtuangin kumkhontuanga ta hrangin.
- 19** Khanchu sahrâng minlina, a danghai nêka danglam tak chu ichiom tak, a hahai khom thîr, a mitinhai chu dâr, fâk chût chûta inpotthêra, a ifâk ban chu sirphatu ata kha thutak inhriat ki nuama;
- 20** a lua irki sômkhath le irki dang hong suak, a matona inthum irtethai chungchâng le, kha irki mit nei thil tamtak hriltu, bâi neia an langdân khom a rual danghai nêka roiinpui ualhai leh khan.
- 21** Ki en maia, ama irki khan mi irthianghai a doia, an hnêa;
- 22** kumkhontuang pa a hong a, roirêlna chu inchungtaka mi irthianghai kuanga pêk a ni ta, mi irthianghaiin ram an dongtum zoro a hong phâk mân an hnêa.
- 23** Khan, hiang hin a tia: Sahrâng minlina chu irnêng chung a ram minlina ram danghai nêka danglam ual, irnêng pumpui fâk bu buana, chîla inpot hrang ni a ti.
- 24** Khan irki sômhai thu chu, hi ram ata hi rêng sômkhath la hong suak an ta; an hnunga inkhat hong suak a ta, matonahai nêkin danglam a ta, rêng inthumhai chu inhnêhai a ti.
- 25** Inchungtakpu doiin thu hril a ta, inchungtaka mi irthiang irzaltir a ta, hun le dânhai indanglam tum a ti, kum thum le a chimrip chu a kuta pêk ni a ti.
- 26** Khannisian roirêlna om a ta, a thuneina inboia insiat ving hrangin hruaipai ni a ti.



²⁷ Khan ram le roirêlna, irvân pumpui hnuaiia ram roiinpuina chu inchungtak mi irthianghai kuanga pêk ni a ti: a ram chu ramhlu a ni sikin, a iop ram murdi'n a sintho an ta, ama iam an ti.

²⁸Hi hi thil tin hekna nê chu a ni. Kei Daniela hi ki'rngaituanahai hin a nin buaia, ki hmêl ar paia, khannisian ki lungrîlin thil tinrêng ki vong mai ngai a ni.

Daniela 8

Belrachal le kêl

¹Khan rêng Belsazzara roirêl kum thumnaa khan inlârna a voihnina chu ki hmua.

²kha inlârnaa hmu ki inei chu hiang hi a nia, ki hmu lai khan Elam biala Susan khopuia rêng ina ki oma; Ulai tui kôla ki oma,

³ki mit ki hong inlêngtira, ki hong ena, irngai ro, tui kôla khan kêlbelrachal irki inhni nei a ngîra; ar ki inhnihai chu an seia; inkhat kha a sei ual bîka, ar sâng ual kha a mông inhnung ual a nia.

⁴Belrachal khan hmâr le sim, nisua le nitâk irheiin ki hmua; a kôla sa dang om thei viat mahaia; a nuam ang takin a lênga, a liantak ki ni irtiin.

⁵Ki'rngaitua lai takin, irngai ro, nitâk tiang ata irthokin irnêng pumpui chung a hin kêlchal a hong pûta, irnêng khom tôn loiin; kha kêl khan a mit le mit kêl taka hin irki a neia.

⁶Belrachal irki inhni nei, irnênga ngîr ki ihmu kha a hong pana, a hrât thei dôra hrâtin a hong irzuana.

⁷Belrachal kha a'rtet rakin ki hmua, a ning an mur pe oka, belrachal kha a tâia, a'rki inhni kha an khiakpai pea, ama doi hrangin belrachal kha ite a hrâtna om pe ta maka; irnênga irtettirin a sirpha tâka, belrachal kha a sansuak thei tûte om mahaia.

⁸Kêlchalpa kha lian le hrât ar ti lai takin, a'rki roiinpuetak kha a kiak pea; ama irthûla khan irki dang inlâr ual minli, kôlkung minli irhîlin a hong suak nôka.



⁹Anni laia inkhat khan ar ki an cher pe nôka, sim le nisua tianga irkiin, ram roinpui tiang a sate'n a'rzata.

¹⁰Irvâna omhai phâk rakin a liana, ârsihai khom hnuaia an thâkpaihai theia, a sirphahaia.

¹¹Kha hmuna omhai rêng angin a liana, hâlirvôm thilinhlan omhai chu a lâkpai pea, a hmun irthiang omna chu inramin a oma.

¹²Khahai omna hâlirvôm thilinhlan hong om ngai siatna sikin, a kuanga pêk a ni ta; thutak chu irnênga a paia, khaanga tho'n, hlo a chuk pea.

¹³Khanchu, vântirtôn inkhat hin vântirtôn dang kuang hianga ar don hi kin hriata, "I dôr ten mo hi inlârnaa thil hmua omhai hi a iom hrang? I dôr ten mo sualna hin a ni tina thilinhlanhai hmun hi a ilâk mai hrang? I dôr ten mo irvân sipaihai leh hi tempil hi sirbea a iom hrang?" tiin.

¹⁴Khan vântirtôn dang iti hi kin hriata, "Sûn sângni irzathum sâng chu om mai a ta, kha sâng rêng rênga chu zîng tiang le khohloi tiang thilinhlan inhlan ni no ni. Khanchu tempil chu irthiangtir ni nôk a ti," tiin.

Vântirtôn Gabriela'n inlârna a hrilfia

¹⁵Khanchu hiang hi a nia, kei Daniela hin inlârna hmuin a omzia inhriat ki tuma; irngai ro, ki kôla hin mihriam anga ngîr ki hmua.

¹⁶Ulai tui kama mihriam irhâi, "Gabriela inlârna chu ama mi hi inhre thiamtir ro," tia a hong insam kin hriata.

¹⁷Khanchu ki ngîrna tiang a zuang nâia; a sân ki lei chia, ki'rtet raka; khannisian ama'n "O mihriam nâipa, inhre thiam ro, inlârna chu zoro hekna hrang a nia," a tia.

¹⁸A ni chongpui lai hin ki lei izâl pial a nia, a ni hon thema, a nin ngîrtira.

¹⁹Ama'n, "Irngai ro, ningmurna hnungkhôna thil hong om hranghai chu nan hril ki ta; zoro hekna lei inkung a ni tâk sikin.

²⁰"Belrachal irki inhni nei ni ihmu kha Media le Persia rêng an nia,



²¹kêlchal irmulpa kha chu Grik rêng a ni; a mit kêra irki kha chu rêng masatak a nia,

²²khan irki kiakna hmuna minli hong suak kha chu, kha nam ata kha ram minli la hong ngêr suak a tih tihna a ni, a sinthotheinahai leh ni loiin.

²³“Khan an inlalna zoro hnungkhôn tianga insiatna irkhêl an phâk tena chu, rêng hmêl ichiom tak thu intak hril thei mi la suak a ti.

²⁴A thuneina hrât tak ni a ta, ama sinthotheina ringot ni loiin; irkhêl takin insiat a ta, hlochuk a ta, mi hrâthai le irthianghai chu insiat a ti.

²⁵Khan a sintho dân sikin vâ irletna a kuta hlochuk a ta, a lungrîla irsong a ta, lungthia an om laiin tamtak insiat a ti: Rênghai rêng doi a ta, khannisian kut leh ni loiin inkhiakin om a ti.

²⁶Khan zîng le khohloia inlârna ihrilhai kha a dik a ni; khannisian inlârna chu zoro hnungkhôna hrang a nih ti inhren lân,” a tia.

²⁷Kei Daniela hi ki’rzal tâka, idôr sîn mani dam loiin ki oma, ki thoia, rêng sin ki tho ta, inlârna chu a’rkhêl ki tia, khannisian tûte’n inhrethiam mahai.

Daniela 9

A mihai hranga Daniela chongchaina

¹Ahasuera nâipa Daria, Media irchia mi, Kaldai rama rêng kum khatna,

²a roirêl kum khatna khan, keima Daniela’n lekhabua chuang deipu Jeremia kuanga Rengpathu zuang tung, Jerusalem siatna tung hrang a inkung kumhai chu kin hriat thei tâka, kum sômsarina chu.

³Bu ngheiin, bora puan hai, vâiphin irthua chongchaina le zongin, Rengpa Pathian tiang ki hor heia.

⁴Rengpa ki Pathian kuang khan ki chongchaia, ki’rphuanga, “O Rengpa Pathian roiinpui tak le ichiom tak, ama lungthunga; a thupêk zôm ngai kuanga khan, thuthung le za’rngaithei nei ngaitu.

⁵Ni thupêk le roirêlnahai ata rotsanin kin suala, dikloi le felloi takin kin tho tâka;

⁶ni siahlo kin rêng hai, hruaituhai, pa le a rama mipuihai murdi kuang nir hminga thuhiril ngai deipuhai thu irngai nuam loiin.

⁷O Rengpa felna chu ni ta a nia; keinihai chu inzakna vai a ni, atûn lai ang hin; Judai mihai, Jerusalema omhai, Israelhai murdi, ramhla le anaia mi, ni chung a an sin insiatnahai sikin le ram tina ni irzûl indarhai khom danglam loiin.

⁸O Rengpa ni chung a kin lei sual tâk sikin keini dongtum chu inzakna vai a ni ta, kin rêng hai, kin hruaituhai le kin pahai khom.

⁹Za'rngaina le ngaidamna chu Rengpa kin Pathianin a nei, a chung a irhel pe khom inlân;

¹⁰a siahlo deipuhai hmangin kin mân tiang a oma, a dânhai zômin Rengpa kin Pathian thu khom zôm nuam loiin.

¹¹A ni, Israelhai khomin ni he la loia fe'n sualin kin om tâka. Khasikin khosâl na chu kin chung a a itung a ni ta. Pathian siahlo Mosia dâna irziak thuhai le a chung a ei sual tâk sikin.

¹²A thu kin chung a ihril le kin roirêltu, kin chung a roirêltuhai in thil saloi tamtak a hong tung irkip ta. Jerusalem chung a tho ang khan vân hnuai pumpuia tho thei ni maka.

¹³Mosia dâna irziak angin hi thil saloi murdihai hi kin chung a a hong itung a ni; khannisian kin dik loinahai mâksanin, ni thudik inhriat theina kin nei theina hrangin Rengpa kin Pathian milung chukna zong loiin.

¹⁴Khasikin, Rengpa'n thil saloi chu a en maia, kin chung a a itung a ni ta: Rengpa kin Pathian chu a sin thônahai hin a fela, a hê kin ilâk loi vai hi a ni.

¹⁵“Atûn hin o Rengpa kin Pathian Aigupta ram ata kut hrât taka a mihai hruai suaktu le irhming inthanga atûn tena irhming insatu, kin suala, a sate'n kin isual zoi tâk a ni.



¹⁶O Rengpa nang ki ngên, ni felnagai sikin ni ningmurna le nuarna chu ni khopui Jerusalem tâng irthiang ata kêr sianlân; kin sualhai le kin pahai dik lolina sikin Jerusalem le ni mihai hi kin kôla om murdihai hi insîrinsiat kin ni ta.

¹⁷Khasikin o kin Pathian atûn hin ni siahlo chongchaina le zongnahai hi irngaiin lân, Rengpa zârin ni hmun irthiang lei ram tâk chungâ hin ni hmêl invâr nôk roh.

¹⁸O ki Pathian, ni mikuar do'n lân, irngai ro, ni mit mengin lân, kin chiarna le ni khopui irhming phuaa om hi en ro, nang kin izongnahai hi kin fel sika ni kuanga kin hong intung ni ual ta maka, ni za'rngai theina sika a ni ual.

¹⁹O Rengpa irngai ro, o Rengpa ngaidam ro; O Rengpa irngaiin lân tho ta ro; ir-ial no ro; o ki Pathian, nangma sikin ni khopui le ni mihai nir hming pêla an om sikin," tiin.

Gabriela'n lei hrilna a hrilfia

²⁰Keima le ni mi Israelhai sualna sikin thuphachôia, chongchaia, thuhriila, Rengpa ki Pathian kuanga Pathian tâng irthiang hranga ki zong lai takin,

²¹a ni, chongchaia ki zong lai takin, mi Gabriela, a phuta ki ihmu inlârna khan, khohloia thil inhlan zoro lai angin hrât takin a ni hong pana.

²²Inhriat thiamna a nin neitira, a ni chongpuia, "O Daniela inhriat theina vârtak inneitir hranga zuang ki ni.

²³Ni zong phut lai khan thupêk a suak tâka, hril hranga zuang kêng ki ni; inditom tak ni nia; khasikin thil chu irngaitua'n lân, inlârna chu inhre thei roh.

²⁴"An insiatnahai irhîptir le, sualna inhek hrang le, dik lolina inboi hrang le, kumtuanga felna hrang le, inlârna le lei hrilna irsinsia hrang, hmun irthiangtak chu sahriak inthek hranghaiin, ni mi le khopui irthiang hrang, hapta sômsari inkung a ni.



²⁵Khasikin Jerusalem inding nôkna siam insat nôkna hranga thupêk a suak ata hriak inthek rêng a om nî tena hapta sari ni a ta, ti inhre thei ro; khan hapta sômruk le hapta hni, kholâi le irnêng hai siam ni a ta, zoro buai lai taka khom.

²⁶Khan hapta sômruk inhni zoia hriak inthek chu inboi ni a ta, ite nei ta no ni: khan rêng la hong hrang mihaiin khopui le a hmun irthiang chu insiat an ta; khanchu a mongna chu tuilian leh ni a ta, a mong dênin irdoina om a ta, siatnahai chu inkung sai a ni.

²⁷ Khan hapta khat hrangin mi tamtak kuang thuthung det siam a ta; khan hapta chimrip hrangin irbôlna le thilinhlan bâng a ta, a chiartu chu intirom tha chung a chuangin zuang a ta; khan a mongna, zuang tung ngêt hranga inkung khan ningmurna chu chiartuhai chung a khan buak khumhai ni an ti,” a tia.

Daniela 10

Tigris tui kôla Daniela'n inlârna a hmu

¹Persia rêng Kura kum thumna khan, Daniela, ar hming Beltesazzara an iti kuang khan thil a hon langa; kha thil kha a dik a ni, irdoina roiinputak a ni: khanchu thil kha an hriat theia, inlârna inhriat theina a neia.

²Kha nikhuuaa khan, kei Daniela chu hapta thum a luzôl hîpin irthanvâiin ki oma.

³Bu zel ne ma unga, sa mani uain mani ki bâia thun viat loiin, hapta thum a luzôl a hîp zoi mâka chu sahriak khom irthu loiin.

⁴Khan tha khatna, sîn sômihni le minli nia tui roiinpui tak Tigris kôla ki om laiin,

⁵ ki mit ki hor heia; irngai ro, mi puanze irhmia irvo, a kong a Upaz rângachak irthianga irkhit hi a oma:

⁶a taksa khom Berul lung anga om a nia, a hmêl chu kôlirtêk anga om, a mit khom meiser anga, a bân le a kehai chu dâr irtêk anga, a chong irhâi khom mipui irhâi ang a ni.



⁷Kha inlârna kha keima Daniela vai hin ki hmua, ki kôla omhai khan inlârna chu hmu mahaia, khannisian a sate zelin an inthinga, an irbîk zoi ta.

⁸Kha tena chu keima vai ki om tâka, inlârna roiinpui chu ki hmua, hrâtna irthahrui boiin ki oma, ki hmêl satna khom a chuaia.

⁹Khannisian a chong irhâi chu kin hriata; a ni, a chong irhâi kin hriatin chu, inbokin ki hmâi hnuaia siain ki in irnghil tâka.

¹⁰Irngai ro, kutin a ni hon thema, ki hong har zoka,

¹¹ki kuang, “O Daniela nang inditom tak, ni kuanga ki thuhiril hi inhre theiin lân, ngîr ta ro; ni kuang a ni hong itîr a ni,” a tia. Hi thu hi a hril zoiin chu inthing pumin ki ngîra.

¹²Ki kuang khan, “Chi no ro Daniela, ni Pathian kuang ni’rngaiintôm hrang le inhrethei hranga nir pêk ni ata ni thuhai chu irngaitua a nia, ni thu sika zuang ki ni.

¹³Khannisian Persia ram hruaituin sîn sômhni sîn khat a nir doipuia; khannisianlân irngai ro, Mikaela hruaitu lian chu ni san hrangin a hong; Persia rêng kuanga khan ki hong oma.

¹⁴Sûnmaton tianga ni mihai chung a thil hong tung hrang inhriat theina nei hranga zuang ki ni: inlârna chu sûnmaton tiang a la ini hrang a ni,” a tia.

¹⁵Hi thu ang taka ki kuang a hril laiin, kei chu ki kûna, chong thei loiin ki oma.

¹⁶Irngai ro, mi inkhat, mihriam nâipa anga inlang hin ki hmûr a zuan thema; khanchu ki bâi ki hong ânga, ki kôla ngîrpa kuang khan, “O Rengpa, inlârna sikin ki char kin donga, a ni delin kin hriata, irthahrui boi angin ki oma,

¹⁷hi ki rêngpa siahlo hin, hi ki rêngpa hi itin mo a ichongpui thei hrang? kei lakin irnak boi angin ki oma, thoi khom thoi thei loiin ki oma,” ki tia.

¹⁸Khanchu mihriam anga inlang khan a ni hon them nôka, ki hong hrât suak tâka.



¹⁹Khanchu ki kuang, “O mi inditom tak, chi no’n lân, irtharngam takin om ro, a ni, hong hrât ta ro,” a tia. Ki kuang thu a hril lai takin ki hong hrât thei tâka. “Ki rêngpa’n thu hril ri se, nangin ni nin hrâtîr tâka,” ki tia.

²⁰Khanchu, ni kuanga ki izuang nasan hi nin hriat mo? Atûn chu Persia ram hruaitu doi hrangin ki ikîr nôk hrang a ni; ki phut tena chu, irngai ro, Grik ram hruaitu hong a ta.

²¹Khannisian thudik irziaknaa irziak chu hril ki ta: hitaka hin, nin hruaitu Mikaela ti no chu, tûte ni san hrang om no nihai.

Daniela 11

¹Khan keima chu Media mi Daria kum khatnaa khan, ama indet hrang le inhrât hrangin ngîr ngit ki ti.

Aigupta le Suria ram

²Atûn hin thudik nan entir ki ti. Irngai ro, Persia rama khan, rêng inthum hong suak an ta, a minlinapu tena chu a danghai nêkin irchong a ta; ar chongna sikin irsong a ta, Grik rama mihai inphûthai a ti.

³Khan rêng hrâtîk, thu neina roiinputak roirêl hrangin hong suak a ta, a thu thuin tho a ti.

⁴A hong suak ata chu a ram chu irsem ni a ta, kôlkil minlia hin irsem ni a ti, ar chihai hrang ni loiin, a thunei laia a irêl ang ni loiin; a ram chu a mihai hrang ni loiin, mi danghai hrang sutpai ni a ti.

⁵Khanchu sim tianga rêng kha hrât a ta; a hruaituhai laia mi inkhat chu ama nêkin hrât a ta, irchamnei tak ni a ti.

⁶Kum hek tiang chu irzom nôk an ta, sim tianga rêng nâinu chu hmâr tianga rêng kuang irngeina siam hrangin zuang a ti, khannisian hrâtna chu nei insôt no ni; a hnông khom hnông ual no nia, a hrâtna khom rêng nâinu pêk ni a ta, a hong hruaihai le ama inhrâtîrtu le.

⁷Khannisian a’rzung ata hon cher thar chu, mi dang inkhat ama hmuna hong om nôk a ta, ama kha chu sipai rualhai le zuang a ta, hmâr tianga rêng irkula khan lût a ta, doihai a ta, inhnê a ti.



⁸Khan an pathianhai, an irlim siamhai le an sumru le rângachak bêlbûr sahai leh khan Aigupta rama chôipai ving a ta, kum idôr vêl mani chu hmâr tianga rêng ata lei irngam ni a ti.

⁹Sim tianga rêng rama khan, hmâr tianga rêng kha hong lût a ta, khannisian a rama la kîr nôk a ti.

¹⁰A nâihaiin doi an ta, sipai pâl tamtak irchunin hong an ta, inhnea paltanhaiin, kîr nôk an ta, doihai an ti, a kuldet khom.

¹¹Sim tianga rêng chu ningmurin suak a ta doi a ti, hmâr tianga rêng kha, mipui tamtak leh suak an ta, mi tamtak a kuta pêk ni a ti.

¹²Mi tamtak chu hruai irhmang ni an ta, a lungrîl inrangin, sîngkhat vêl chu naminrîlhai a ti, khannisian zoro sôt ual ni no ni.

¹³Hmâr tianga rêng kha hong pût nôk a ta, mipui matona nêka tam hong hruaihai nôkin, zoro hnungkhôn kum hek tiang chu sipai râltukfam leh tamtakin hong pan an ti.

¹⁴Kha tika khan chu, mi tamtak, sim tianga rêng doi hrangin irsiam an ta; nir chia mi nakhrâtsong mihai le inlârna chu natakin irlek an ta, khannisian irtet no nihai.

¹⁵Kha tena chu hmâr tianga rêng hong a ta, khopui kul dettak nei khom luapai a ti: khanchu sim tianga hrâtnahai khan danh zoi no nia, a mi inthanghai khomin, danh zoina hrang hrâtna nei ta no nihai.

¹⁶Khanchu a doitu khan a nuamlam takin doi a ta, a kôla tûte ngîr ngam no nihai, ama chu ram roiinpua khan om a ta, a kuta siatna om a ti.

¹⁷Khanchu a ram pumpui hrâtna songin zuang tum a ta, irngeina siam a ti, khan chanlamboi inchangtir hrangin a nâinu kha dôngma'n pe a ta, hlochuk no nia, an lâp khom inlâp no ni.

¹⁸Hi zoia hin chu ramchârna tiang irhei a ta, tamtak lâk a ta; khannisian hruaitu inkhatin insîrsiatna sapsuakna chu mong a ta, an sîrinsiatna chu ama chung a irlet a ti.



¹⁹Khanchu an rama kul omna tiang irhei a ta, khannisian kal khatin irlet a ta, hmu thei ni ta no ni.

²⁰Khanchu ama omna hmun khan mi inkhat ram roiinpuina sia irfuangtu khêlpai hrangin hong ngîr suak nôk a ta; khannisian sîn sôtnotea, ningmurna sika ni loiin, irdoina sika khom ni loiin, irhmangtirin om a ti.

Suria rêng sual

²¹Khanchu a hmuna khan mi ien nuamloi, ram chôindômna a ipêk loi chu hong suak a ta; ram a hoi lai takin hong a ta, chongbâi hoitak hmangin ram chu nei a ti.

²²Matona mi kha chu tuilian itânin om a ta, koichitin om a ti; a ni, thuthung hruaituhai khom.

²³Khanchu a kuang thuthung a siam zoiin chu a sate'n siat zôi a ta; hong ngîr suak nôk hrangin, mipui tômte khomin an hong ihrât thei hrang a ni.

²⁴Irngei zoro laiin ram bial hoina laia hor siam nôk a ta, a pa le a puhai tho ngailoi la tho a ti; mihai laia râllâk le râllâk thilhaia sum kha sem a ta, a ni kuldet chung a khan, khit thunghai chu la khithai an ta,

²⁵a sinthotheina le a hâina chu, sipai pâl tamtak le, sim tianga rêng chung a inphût a ta; sim tiang rêng khan sipai pâl tamtak leh hong doi a ta, khannisian ngîr zoi no nia, a chung a irkhitin a la irkhit mai hrang a ni.

²⁶A ni, a bu tuitak nêkhai ngêt khan ama irhmangtir an ta, a sipai pâlhai khom ihnôlin om an ta, tamtak chu thatin om an ti.

²⁷Hi rênghai hi chu an lungrîla sat lolina irput ni an ta, Dokâng hmun khata minlak tho an ta; hlo chu chuk pe ual no ni, a mongna chu zoro inkung saia ni a ti.

²⁸Khanchu sum tamtak chôiin ama rama ngêt kîr nôk a ta, a lungrîla thuthung irthiang doiin om a ta; khaanga thoin, a rama ngêt kîr a ti.

²⁹Zoro indang nî khan hong kîr nôk a ta, sim tiang fe a ti, khannisian an hnung ual hin chu matona ang kha chu ni no ni.



30Kil tina irhualhaiin ama hong doi an ta; khanchu a milung chuk no nia, kîr nôk a ti, thuthung irthiang chung a khan ningmur irlâk a ta, khaanga tho'n kîr nôk a ti, thuthung irthiang hnung songsanhai chu lôm a ti.

31Sipaihai khan doipui an ta, hmun irthianghai porinchetir an ta; a kulhai khom khan hâlrivôm thilinhlan omhai chu pai an ta, irsîna intirom chu inding nôk an ti.

32Khan thuthung chung a dik lina soal thotuhai chongbâi hoina khan insiat ni an ta, khannisian mi an Pathian inhretuhai chu det an ta, thil tamtak tho thei an ti.

33Khan mihai laia a vârhai chu, mi tamtak irchutihai an ta, khannisian, khandai hai, meichok hai, sal intângna le inrûk irhmangna'n mi tamtak irlet an ti.

34An irlet khomin changpuina chîntea indomin om an ta, mi tamtak êsêlin, êrôhai an ti.

35Khan a vârhai laia senkhatin, anni infâi le irthiang hrang le invâr hrangin irtetpui an ta, a mongna ni dênin; zoro inkung a la ni mai sikin.

36Reng khan a nuamlam takin tho a ta; ama chôirsângin, Pathian tinrêng chung a lian irti a ta, pathianhai Pathian sêlin thil irkhêl hril a ti: khan a ningmurna a hek pe ving mâka chu hlochuk a ta, a iti chu tho ngêt hrang a nia.

37A'rchihai Pathian khom ite bê'n bê no nia, nupanghai irngainat pathianhai le pathian danghai khom ngaisak viat loiin: mi murdi chung a lian irti a ti.

38Khannisian khahai nêkin kulhai pathian chu chôindôm a ta, pathian, a pahai inhriat ngailoi khan, rângachak le sumru le, lunghluhai le thil indit omhai le chôindôm a ti.

39Khan pathian dang changpuina'n kuldet taktak chu doi a ta, mi tukhom a pom murdi chu roiinpuitir a ta; tamtak chung a roi inrêltir a ta, a ram chu man neiin sem a ti.



⁴⁰Khan mongna nê chu sim tianga rêngin ama hong nor a ta; hmâr tianga rêngin tâli le sakor chung chuang mi le irhuang tamtakhai le kêllaiher angin ama doi an ta, ramhai lûtin, chin zoi a ta, palthuanhai a ti.

⁴¹Ram roiinpui khom lûtikum a ta, tamtak that ni a ti: khannisian a kut ata hihai hi sansuak ni an ti: Edom, Moab, le Amon mihriam sahai chu.

⁴²Ram chung a kut thâk a ta, Aigupta ram khom inzôk ual no ni.

⁴³Khanchu rângachak le sumru siakhômhai chung a le Aigupta rama thil hlulai chung a thu nei a ti. Khan, Libna le Ethiopia mihai chu ama hrungtu ni an ta,

⁴⁴khannisian nisua le hmâr tianga thu saloiin buai a ta; khanchu mi tamtak irhmangna le lungkânga ningmurin suak a ti.

⁴⁵Khan Tuipei le tâng irthiang roiinpui tak kêra khan a rêng puan in chu sung a ta, khannisian a mongna tung a ta, tûte'n san thei ni no ni.

Daniela 12

Zoro hekna

¹ “Kha irzoi tena chu ni mipui nâihai san ngaitu, hruaitu roiinpuitak Mikaela kha ngêr a ta; buaina zoro, nam om phut ata, kha ni tena la om ngai loi kha, hong om a ta: kha nê tena chu ni mihai kha sansuakin om an ta, mi tin lekhabua irhming chuang murdihai chu.

² Khan an laia tamtak irnêng vâiphina zâlhai chu hong har nôk an ta, senkhat inzâna le senkhat chu kumtuanga hmumâkin.

³Hruaitu vârhai chu irvân vârh angin vârh an ta, mi tamtak felna tianga hong kêrhai chu ârsi angin kum kumtuangin vârh an ti.

⁴Khannisian nang o Daniela, thu kha thupin lân, lekhabu kha intukhak ro, a mong dênin; mi tamtak intânin, inhriatnahai hong pung a ti,” a tia.

⁵Keima Daniela hin ki hong ena, irngai ro, mi dang inhni an hong ngêra, inkhat chu tui kôina laia, a dang chu tui kôi lina tiang.



⁶khan mi tu'n mani, mi puan zerhmi sila irvo tuipui chung a om kuang khan, "Hi thil irkhêl mongna hrang hi, itika mo a ini hrang?" a tia.

⁷ Khan mi puan zerhmi sila irvo tuipui chung a om khan, a kut chang tiang le vei tiang irvân tianga phar suakin, "Hunbi khat le a chînte, a chimrip sînga hrang nih a ti; mi irthianghai sinthotheina chu an inkhoi zoi tena hi thil murdi hi irkip a ta; tia hring kumkhua sâmin khomâk a sâm tih kin hriata".

⁸An hriat chu kin hriata, a'rngailam chu inhre ma ung: khanchu keima'n, "O Rengpa hi thilhai mongna chu itika mo a ini hrang?," ki tia.

⁹Ama'n, "Daniela, fe'n lân, thu chu thup le chelkhak a ni ta, a mong dênin,

¹⁰mi tamtak chu an irthiangin an ivâr nôk a nia, an isa a ni; khannisian mi siathaiin chu sualin an la om mai, mi siathaiin ar ngai dân inhre no nihai; mi vârhaiin chu a'rngailam inhria an ti.

¹¹"Khan hâlrivôm thilinhlan omhai lâkpai a nia, chitna intirom inding nôk a nia irthokin, sîn sângkhat irzahni le sômkuak nih a ti.

¹²Nghâk za zâma sîn sângkhat irzathum sômthum ringa phâkhai chu la hoi pehai a ti.

¹³Khannisian nang chu mongna nî dênin fe'n lân; sînhai hekna chu irngam a ta, ni man hrang dôra om ni ti," a tia.



Hosea

Hosea 1

Hosea dôngma le a nâihai

¹ Juda rêng hai Uzia, Jothama, Ahaza Hezekia hai inlal lai le Israelhai rêng Jeroboama, Joasa nâipa rêng laia Beeria nâipa Hosea kuanga Rengpa thu zuang tung kha.

² Rengpa'n Hosea irhminga Israelhai kuang thu an sîr irphut lai khan hiang hin Hosea kuang an sîr: "Fe'n lân, dôngma'n notizuar neiin lân; notizuar ata nâi nei ro: hiang hin ki mihai khan ni rotsana, an ni iuiresan tâk a ni,"

³ Khanchu a fea, Diblaima nâinu Gomeri kha a nei tâka; khan, nâi a vonga, nâipasal a nei pe ta.

⁴ Khan, Rengpa khan a kuang, "A'rhmingin 'Jezreela' phua ro; ir-ial loiin Jezreel thisen phuba kha Jehua sîngkuahai chung a la ki ta, Israel sîngkuahai ram kha inkingtir ki ti.

⁵ Khan, kha nikhua khan hiang hin ni a ta, Jezreel irhôngra Israelhai thal ngul kha inkhiak ki ta," a tia.

⁶ Khan, nâi a vong nôka, nâinupang a neia. Khan, Rengpa khan a kuang, A'rhminga Lo-ruhamai phua ro: Israel sîngkuahai kha inrenhai ngai ta no ning, ki ingaidamhai ta loi hrang a ni.

⁷ Juda sîngkuahai rêk chu inren ki ta, thal ngul mani, khandai mani, irdoina mani sakor mani, sakor chung chuang mi mani anni saninhring loiin, Rengpa an Pathian khan saninhring ki ti, a tia.

⁸ Khan, Loruhamai kha irhnu nêk an mongtira, khan nâi a vong nôka, nâipasal a nei.

⁹ Khan, Rengpa khan hiang hin a tia, "A'rhminga Lo-ammia phua ro: nangni hi ki mihai ni mak chêia, khan, kei nin Pathian ni no ning.

Israel inding nôk hrang thu



¹⁰Aniachu, Israel nâihai kha tuikhanglian chiaï vâiphin, varh theiloi le tep sêng loi zât ni an ta, khan, hiang hin ni a ta, an kuang, ki mihai ni mak chêi, tihna hmuna khan, Pathian hring nâihai nin ni e, ti ni a ti.

¹¹ Khan, Juda nâihai le Israel nâihai kha pung khôm an ta, an lu hrang inkung an ta, kha rama irthokin hong fe an ta, kha rama irthokin hong fe an ta, Jezreel nikhua kha a iroiinpui hrang a ni.

Hosea 2

¹Nin urêngpahai kuanga khan, Ammia, ti unglân, nin farnuhai kuanga khan, Ruhamai, ti roi.

Uirenu Gomeri-uirenu Israel

²Nin nu hi bei roi, bei roi; Ama hi ki dôngma ni maka, kei khom a pasal ni ma ung, A hmel ata a notizuar uar hi pai thâk sianlân, A rôp ata a uire uar hi pai thâk ri se;

³khano'nchu, bomboiin inomtir ki ta, A suak nikhuaa a om ang khan inomtir ki ta, Ramchâr angin siam ki ta, ramchâr khohroi angin inomtir ki ta, tui inhrâlin that ki ti.

⁴A nâihai khom inren no ning, notizuar nâi an ni sikin.

⁵An nu khan noti a zuar ngaia, anni invongtu kha inzakom takin a om: ki bu hai, ki tui hai, ki samul hai, ki pat hai, ki sahriakhai le ki in hranghai ni pêktu, ki irditpuihai irzûl ki ti, a iti a ni.

⁶Khasikin, irngai ta, ni lampui kha ilhlingin inpingtir ki ta, ama khâlin dâi khit ki ta, a lampuihai hmu no ni;

⁷Khan, a'rditpui irzûl a ta, irzûl pha no ni; annihai kha zong a ta, hmu hai no ni; khanchu, ki pasal masa kuang kîr nôk ki ta, atûnlai nêkin tianlai kha ki ta hrangin a sa ual ti a ti.

⁸Bu, uain, sahriakhai hi, tangka ki inpung pehai hi, rângachak, Baal hranga an ihmanghai le, keima ipêk a nih ti hi inhre mahai.



⁹Khasikin, ki bu kha a ât zoroa, ki uain khom kha a sôm zoroa la kîr nôk ki ti. ki samul le ki pat, a bomboina irkhûna hrang kha, lapai pe ki ti.

¹⁰Khanchu, a'rditpuihai mit hmua, a bomboina ser inlangtir ki ti, ki kut ata tûte'n sansuak no nihai.

¹¹A raiinfâna murdi, a kût hai, a tha thar hai, a irngam nikhua hai le mi pung khômna zoro murdihai, inboipai sa ki ti.

¹²A grep hrui le a theipui kung, hi hi ki irditpuihai ni ipêk ki ihlo kha a ni, A ichtna ngai kha inramtir ki ti: Ram hnuaiia siam ki ta, ram sahain fa an ti.

¹³Mirimhoi a hâl pe ngai Baal nikhuahai kha a chungu thuan ki ti, kha lai khan a bômzoihai le a irvônahai ar bela, ar ditpuihai a pana, keima a ni irnghil a nih ti hi Rengpa thu suak a ni.

A mihai Rengpa'n lung a thung

¹⁴Khasikin, irngai ta, inthêm ki ta, ramchâra hruai ki ta, irngai om ang takin ama kha chongpui ki ti.

¹⁵ Khan, kha tena khan chu, a grep irhuanhai kha a kuang pe ki ti, Akor irhôr khom sabeina mikot hrangin: khataka khan a thoibop lai nikhuahai le Aigupta ram ata a zuang suak nikhua ang khan, sâm a ti.

¹⁶Khan, Rengpa thu suak khan hiang hin a ti: Kha nikhuaa khan hiang hin ni a ti, ki pasal ni ti a ta, Baal ni ti ta no ni.

¹⁷A bâia irthokin Baal irhminghai hi ki'rh mangtir pe hrang a nia: an irhming hi sâm viat viat ta no ni.

¹⁸Kha nikhua khan ramsahai, chunglêng vatehai, irnênga thilhringhai leh an ta hrangin thuthung siam ki ta; thal ngulhai khandai mani le irdoinahai hi irnênga irthokin irh mangtir ki ta, hoi takin inom hmunkhattir ki ti.

¹⁹Kumkhuain, ki ta hrangin nang hual khak ki ta, felna mani, roirêlna mani, lunginkhamna mani, inrenna mani ki ta hrangin hual ki ti.

²⁰Iamomna'n ki ta hrangin hual ki ta, khanchu Rengpa kha inhria ni ti.



²¹Kha nikhua khan hiang hin ni a ta, changpui ki ta Rengpa thu suak khan a ti. irvânhai chongpui ki ta, khan anni'n irnêng chongpui an ti.

²²Khan, irnêng khan bu mani, uain mani, hriak mani chongpui an ta; khan, anni khan Jezreel chongpui an ti.

²³ Khan, kha kha ki ta hrangin irnênga hin song ki ta, inren loinu kha inren ki ta, ki mi ni loi kha ki mi ni nih ti ki ti," khan, ama khan, "Ki Pathian ni nih," ti a ti.

Hosea 3

Hosea le uirenu

¹Khan, Rengpa khan ki kuang, "Fe nôk tan lân, nupang, mi dang indit lai, uirenu kha lung va thung roh, Israel irchihai khan Pathian dang kuang tiang irheiin grephai irngaiinhlu khomsian, Rengpa'n lung nangni a ithung mai ang hin," a tia.

²Khanchu, tangka sômhleï ringa, le barli homer khat le homer a chimripin ama kha ki'rchôka:

³Khan, a kuang, nikho tamtak sâng kha ki ta hrangin ni iom hrang a ni; noti ni izuar hrang ni ma, tûte dôngma ni ini hrang ni mah: khaang dên khan kei khom nangmaa om ki ti, ki tia.

⁴Israel, irchihai kha nikho tamtak inlaltak le milian le lungphun ser le ochai songkol mani, millimhai mani nei loiin an iom hrang a ni.

⁵Kha tena chu Israel irchihai kha irlet an ta, Rengpa an Pathian le an inlaltak Davida kha zong an ta; zoro hnungkhônhaia chu Rengpa le a satna kha inthing pumin pan an ti.

Hosea 4

Israelhai chungã Rengpa chiarna

¹Israel irchihaio, Rengpa thu kha irngaitua u ta; hi rama hin thutak le lungkhamna le Pathian inhriatna a om no sikin, Rengpa khan ram luatuhai beina hrang a nei.



²Khomâksâm, irhuang, irthat, inrûk, uire uarhai a punga, thisen kha thisenin a zui mai.

³Khasikin ram khan sîn a ta, a sînga lêng tinrêng sôl an ti, ramsahai chunglêng vahai le; a ni, tui khangliana ngahai dênin lâkpai ni an ti.

Ochahai a sêlhai

⁴Aniachu, tûte irbei irhlôm no ri sehai. Tûte halirchu no ri sehai; ni mihai kha ochai beituha ang an nia.

⁵Sûna tûk ni ta, nangma le deipuhai khom zâna tuk a ta, ni nu khom inboipai ki ti.

⁶Ki mihai kha inhriatna an irsam sikin inboipai an nia, inhriatna ni hnôl sikin kei khomin ki ochai ni nina ata nang hnôl ta ki ti. Ni Pathian dân ni'rngilpaia, kei khomin ni nâihai irngil pai ki ti.

⁷An hong rikip le ki chung a an sual sit sit saa, an roiinpuina kha mualinphoinaa inchangtir ki ti.

⁸Ki mihai sualna zâra irchong an irtia, an pualoinaa khan an lungrîl an irnghata,

⁹a mipui a ochaiin hmunkhata hrem ni an ta, an lampuihai sika khan anni kha hremhai ki ta, an thil thohai thuan ki ti.

¹⁰Fâk an ta chu khop no nihai, notizuar uar an ta chu pung no nihai, Rengpa ngaisakna an nei no sikin.

Nam dang pathian biak a hrilsiat

¹¹Notizuarhai, uainhai, uain tharhai khan, milung a lâkpai ngai.

¹²Ki mihai khan thing millim an irdona, an khianghrolin a hril ngai; notizuarna lungrîl khan a hruai irhmanga, an pathian ata an hur irhmang tâka.

¹³Tâng sîphaia khan an irbôla, mualhaia khan mirimhoi an hâla, thing sesua le bero le tarpin thing hnuaihai khan a raifân a hoi sikin. Khasikin nin nâinuhai khan notizuar an uara, nin moihaiin uire an iuar a ni.



¹⁴Nin nâinuhaiin noti an zuara, nin moihai an uire'n hrem no ning: anni ngei khom notizuarhai le an bingin an fe sikin. Notizuarhai leh hmunkhatin irbôl suama; inhre thiam loi mipuihai kha tûk siat an ti.

¹⁵Israel, nang chu notizuar uar khomin lân, Juda kha chu tûk sa no ri se. Gilgal-a khan hong no unglân, Bethaven-a khom hong fe no ro; “Rengpa a hring mai angin,” tiin chong irkhâm no roh.

¹⁶Sehrât irla tukullian ang dênin Israelhai chu an tukul a liana; atûn chu Rengpa'n belrate angin sûla infa thei ning mo?

¹⁷Efraima khan millim a zompui tâka, a om omin om ri se.

¹⁸An zu in kha an chîna, nôtizuara an irsiama, an roiinpuina nêkin inzakupuiom kha an irngaiinhlu uala.

¹⁹Phâivua isêm angin sêm invuanguin la om an ta, an sonong irbôlnaa khan lan zak ngêt an ti.

Hosea 5

¹O nangni, ochaihaio, hi hi inhre unglân, nangni Israel sêngkuahaio, irngai unglân, o inlaltak sêngkuahaio, mikuar sung roi, roirêlna kha nin ta hrangin a nia; Mizpa châng le Tabor tânga lên inzar nin ni sikin.

²Mi tehelhai khan thatpai an uar tak taka, kei rêkin chu an rênga halirchutu ki ni.

³Efraima kin hriat, Israel kha keima ata thup ni mah; atûn hin o Efraim, notizuar ni uar sikin Israel kha porinchetir a ni.

Millim biak loi hranga irdîn

⁴An Pathian tiang irheitir hrangin, an thilthohai kha masan mahaia, notizuar lungrîl an laia a iom a ni, Rengpa kha an inhriat thei loi a ni.

⁵Israel kôkpoploihai khan a makunga an inhriattira, khanchu Israel le Efraima kha an pualoinaa tûk an ta, Juda khom an kuang tûk sa a ti.

⁶An belra pâlhai le an sehrât pâlhai le Rengpazong hrangin fe an ta, khannisianlân ama kha chu hmu no nihai, anni ata a irkiang tâk a ni.



⁷Rengpa chungã vâi irlet takin an ichai a ni, nam dang nâihai an neia; tha thar khan an loihai le ileh irhmangna tung a ti.

Juda le Israel irdoina

⁸Gibia khuaa bekul tum unglân, Rama khuaa bekul mût roi; Bethaven-a khêk mur mur roi, o, Benamina, ni hnung tiang kha, tiin.

⁹Efraima kha hremna nikhuaa khan inram ni a ta: thil hong ni ngêt hrang kha Israel irchihai laia kin hriattir tâk a ni.

¹⁰Juda milianhai kha ramri sontuhai ang an nia; an chungã ki ninginmurna kha tui angin bunthuan ki ti.

¹¹Efraima khan sirbe a uara, dikna a paltana, ite ni loi a'rzûla.

¹²Khasikin Efraima hrangin irthi ang ki nia, Juda sêngkua ta hrangin hmonna ang ki ni.

¹³Efraima khan a natna a hmua, Juda khan a pop a hmua. Kha khan Efraima kha Assuria kuang a fea, inlaltak Jareba kuanga khan mi a tîra: khannisianlân ama khan nangni indamtir thei maka, nin ipop kha nangni a indamtir thei sa loi a ni.

¹⁴Efraima hrangin chu kâmkeibaknei ang, Juda hrangin chu kâmkeibaknei vânglai ang ki ini hrang a nia; keima, keima ngeiin kaithêr ki ta, fe ki ta, rotpui ki ta, sansuaktu tûte om no nihai.

¹⁵An thiam lina an irhriata, ki hmêl an zong mâka chu, fe ki ta, ki hmun tiang kîr ki ta, an tuangna khan ni zong an ta, hiang hin ti an ti.

Hosea 6

Irletna tak ni loia mihaiin an irlet thu

¹Thoi, Rengpa kuanga khan kîr ta ei ti; a ni lei inpopchit tâk nâkin, a ni indamtir nôk hrang a ni, a ni lei zêm tâka chu, a ni ituam nôk hrang a ni.

²Sûn hni tena nin hringtir a ta; sûn thum nia ni kaithoi a ta, a makunga om ei ti.



³Rengpa inhriatna kha irzûl mai ei ti duah, inhria ei ti. Zîng anga irkhêl loiin a hong pûtsuak ngêt ngai a ni; ei kuang rua angin, rua hnungkhôn, irnêng induitu ang dênin zuang tung a ti.

⁴O Efraima, itin mo nang ki ilô hrang? O Juda, itin mo nang ki ilô hrang? ni lungthungna kha zîng sumpêl angin, inrang taka irdo irhmang nôk angin a ni.

⁵Khasikin, deipuhai hmangin anni kha nôia; ki bâia thuhaiin anni kha ki ithat a ni. Ni chung a roirêlnahai kha vâ fe suak zut zut ang a ni.

⁶Irbôlna nuam loiin lungkhamna ki nuam a ni; hâlrivôm thil inhlanhai nêkin Pathian inhriatna ki nuam ual a ni.

⁷Khannisianlân, Adama angin thuthung kha an tho'nsuala, khataka khan vâ irlet takin ki chung a an itho a ni.

⁸Gilead kha tho'nsualna tho tuhai khopui a nia, thisen a kop mer mur a ni.

⁹Hrâtlâksong pâlin mi an irdîp ngai angin ochai pôlhai khan Sekem lampuia mi an that ngai a ni, thil sual an tho tâk a ni.

¹⁰Israel sêngkuua khan thil irkhêl tak ki hmu, Efraima khan nôtizuarua a oma, Israel kha porinchetirin a iom a ni.

¹¹Ki mihai sal intângnaa irthokin ki hruai kîrhai tika chu, o Juda, ni ta hrang khoma ra ât hrang inkung a ni.

Hosea 7

Israel sualna le tehel zongna

¹Israel indam ki tumin Efraima sualna a hong inlanga, Samari sualna le huang an uara, sêng tiang inru a hong lûta, pên tiang hrâtlâksong pâlin an roka.

²An sualna murdi kin hrât mai ti an milungin ngaitua mahai: atûn chu an thilthohai ngeiin a ngîm khak tâka. ki hmâi makunga an iom a ni.

³An sualna'n inlaltak an lômtira, an milak thu khan mi lianhai an lômtira.

⁴An rêngin uire an nia, bai siamtu'n irtap a ur inluma, baidi a inhmet inpok a thoi inranga, meisom a lei irngamsan ang hi an ni.



⁵Ei inlaltak nikhuaa khan mi lianhai kha uain irhâi takin an inruitira; ama khan hmusittuhai pâlin a kut a phara.

⁶Inrûka an irdîp laiin an milung kha irtap ang dênin an isiam tâk a ni: an ningmur kha zân sôtin a dâia, zînga chu mei ir-al angin ar ala.

⁷Irtap ang dênin an lum zita, an roirêltuhai an hong irhmang tâka, an inlaltak murdi an tûka, an laia tûte mi khêk om mahai.

Israel le nam danghai

⁸Efraima lak kha, nam danghai laia ar zêl saa, Efraima kha bai irlet loi a ni.

⁹Mikhualhai khan a hrâtna an fâk zoi pea, ama khan inhre ma: mul chuakin a bôm tuai tâka, ama khan inhre mah.

¹⁰Israel roiinpuina khan a hmâi makunga an hriattir ngaia, khannisianlân, hihai murdi khom hin, Rengpa an Pathian tiang khan irhei mahai, ama kha zong ual mahai.

¹¹Efraima kha vasu milung chô, inhriat thiamna nei loi ang a lei nia; Aigupta tiang an khêk mura, Assuria tiang an fe mura,

¹²an fe laiin an chung a ki lèn vôr ki ta, chunglêng vate chelin chel ki ta, an thilsual tho ang irphu'n hremhai ki ti.

¹³An chung a rik e! ki kuanga irthokin an fe irhmang tâka, irhmangna an chung a tung e! ki chung a tehel an zong tâka, keima'n chu ki saninhring nuama, anni rêkin chu milak an ni tho khuma.

¹⁴An lungrîl takin ni koi mahai, an zâlmuna an ichiar hnem hnum a ni: bu le uain hrangin an inkhôma, ki chung a lak tehel an zonga.

¹⁵Keima'n chu ki hruai suaka, kin hrâtira, khannisian ki chung a thil saloi an ingaitua a ni.

¹⁶An irheikîra, an chung a taka kuang ni loiin; thal ngul mirûl ang an ni, an milianhai kha an chong per pur sikin, khandaiin tûk an ti. Hi hi Aigupta rama innuisan an inina ni a ti.

Hosea 8



Rengpa'n Israelhai millim an biak sikin thiam inchang mah

- ¹Bekul kha ni hmûra irsuntir ro, Rengpa sêngkuahai chung a irmupui angin a zuang e, ki thuthung an tho'nchâia, ki dân an lôipai sikin.
- ²Ki Pathian keini Israelhaiin chu nang kin inhriat, tiin ki kuang khêk an ti.
- ³Israelhai khan thil sa an hnôla, râlhaiin irzûl an ti.
- ⁴Ki itho ni loiin anni khan rêng an siama; kin hriat loiin hruaituhai an siama, an irhmangna hrangin an tangkarua le rângachakin millim an irsiama.
- ⁵O Samari, ni sehrâtte irlim kha a hnôl e; an chung a ki ning an mur tak tak a ni. Itik tena mo a irthiang nôk hrang?
- ⁶Israel kut theithiamhai millim siam kha, Pathian ni ma. A ni, Samaria sehrâtte irlim kha inkhoipai zit ni a ti;
- ⁷phâivua an songa, phâivua saloi an i-ât hrang a ni: a kung inding nei maka, a'rzîk khan ra insua no ni; a ra insuak khom sianlân, mikhualhaiin fa zoi an ti.
- ⁸Israelhai kha irlim zoiin an iom a ni: bêl, a sênga lômna om loi angin atûn hin nam dang laia an iom a ni.
- ⁹Ram sakuartung inkhât tak angin Assuria rama an kâia, Efraima khan arditpuihai ar hloppui e.
- ¹⁰A ni, nam danghai irhloppui khomsian, irkhôm ki ta, rêng le hruaitu hriak an ipol ngai kha inmongtir bak ki ti.
- ¹¹Efraima khan maichâm a inpungtir hi an thil tho sualna sika a nia, an ta hranga sualna rêng rêng kha sualna mai mai a ni.
- ¹²Ki dân chu ki'rziak pe tu tuaia, khannisian thil dangin an ibe a ni.
- ¹³Ki ta hranga thil inhlân irbôlnahai chu hmê an inhlana, an fâka; khahai kha Rengpa'n pom mah: khanchu an pualoina an hriat maia, an sual a hrema, anni kha Aigupta rama kîr nôk an ti.



¹⁴Israel khan a siamtu a'rngihl paia, in roiinpuihai a sina; Juda khan khopui kulhai an pungtira, khannisian a khopuihaia khan mei târ ki ta, a in roiinpuihai kâng zoi a ti.

Hosea 9

Israel hremna hrang Hosea'n an puang

¹O Israel, nam danghai angin raiinfân lûk lûk dôrin lôm no ro, ni Pathian kha nôti ni zuarsana, hruizôl tina a man kha nir ngai inhlua.

²Hrui le grep sômna khurhai khan an milung inchuk no nihaia, uain thar hlosam a ti.

³Rengpa rama khan lêng no nihaia, Efraima kha Aigupta tiang kîr lik a ta, Assuria rama bu irthiang loi nêk an ti.

⁴Rengpa kuang Uain kha bun suak no nihaia, an thil irhlanhai kha a ta hrangin lôm om ni ual no ni; an bai kha lusûnhai bu ang ni a ta, a nêk murdi porinche an ti; an bai kha an hringna hrang vai ni a ta, Rengpa ina hong lût no ni.

⁵Inkhôm pui ir-up nikhua le Rengpa kût nikhuaa khan imo nin itho hrang tâk?

⁶Irngai roi, siatna zuang tung a ta, indarh an ta, Aigupta khan anni kha hong irkhôm ual a ta, Memfis khan lei phûm a ti; an tangkarua thil inditomhai kha kâng irkholin bôm a ta. An puan inhai khan hloi ilhlingnei om a ti.

⁷Raifâna nikhuahai kha a zuang tunga, thuanna nikhuahai kha a zuang tung e; Israel khan kha kha inhria a ti. Ni tho'nchâina kha a tamin an roi irsâi loina an ipêtsanna kha a'rkhêl sikin, Deipu kha an vêta, irtha nei mi kha a invêt a ni.

⁸Efraima râl enkoltu kha hi Pathian kuanga om a ni, deipu lak kha lamtuanin chângkamtu chânga a oma, a Pathian ina khom roi irbuloina a om.

⁹Gibea khuaa om lai nikhuahai ang khan a sate'n anni kha an tho'suala. An pualoina kha inhre mai a ta, an sualnahai kha thuan a ti.

Israel sualna le a ra



¹⁰ Israel kha ramchâra grep ra ang maiin ki hmua. Nin pahai kha theipui, zoro masaa a ihmin masa angin ki hmu; khannisian anni kha peor tânga Baal chu an pana, thil inzakom taka khan an irpumpêk tâka, an irngaiinhlu tak millimhai ang dên khan an iporinche a ni.

¹¹Efraima lak kha, a roiinpuina kha vâ angin vuangpat a ta. Nâi neihai, nâi vonghai, inrâihai om no nihai.

¹²An nâihai puihling khomhai sian pasal reng om loi hrangin insûntir ngêt ki ti. A ni, anni kha ki'rheisan tika chu, an chung kha rik ual a ti.

¹³Tura ki ihmu ang dênin Efraima kha hmunhoi taka sia'n om a ti: khannisian, Efraima khan a nâihai kha thattu kuang la hruai suak a ti.

¹⁴O Rengpa, inneitir ro; imo ni inneitir hrang? sul nâi siat ngai le irhnu zûrhai kha inneitir roh.

Israel chung a Rengpa roirêl

¹⁵An sualna murdi kha Gilgal-a an tho irphuta, kha khan anni kha ki khôkmâka. An thiltho sual sika khan ki in ata inhnot suak ki ti. Annihai hi lungthung ta no ning; an hruaitu murdihai kha tehel zong an ni.

¹⁶Efraima kha zêmin a oma, an irzung kha a châr zoia, ra insua maka. A ni, suak khom sianlân, an sul ra inditom tak kha that lele ki ti.

¹⁷Ki Pathian khan anni kha pai irhmang a ti, ama an uksak no sikin. Khanchu, nam danghai laia chaninvâiin om an ti.

Hosea 10

Israelhai thurchi an sîr

¹Israel chu grep hrui hong indôn satak, ra nuam tak ang a nia; a ra a itam ang dênin a maichâmhai an pungtira; a ram satzia ang dênin lung incher (millim) phun satak tak a siama.

²A sîngril kha irsentirin a oma, atûn chu thiamloi changin om ta an ti. An maichâmhai kha Rengpa'n zêm insim a ta, an lung incher phunhai kha insiat a ti.



³“Reng taktak chu nei mak me, Rengpa chu chi mak mea; kha rêng khan imo a ni itho pe thei hrang?” tiin, atûn hin chu hril ngêt ta an ti.

⁴Thuthung an siamna tianga khan milaka khomâksâmin thu chanlamboi an hrila; khasikin, irnêng tukirletna (kodâl) sûlhring tûr nei a imông angin, roirêlna a ipung a ni.

⁵Samari rama lênghai kha Bethaven sehrätte sika khan chardongin om an ta. Ama ata a irhmang tâk angin khataka mihai kha an chardong a ta, khataka ochaihai a roiinpuina chung a la lôm ngaihai khom.

⁶Ama ngêt khom kha inlaltak Jareba kuanga pêk hrangin Assuria rama rotpui ni a ti. Efraima khan inzakna hmu a ta, Israel khan ama thu'nkung ngêt kha inzakpui a ti.

⁷Samari ram lak kha, tui chung a thing ôn a itân ang dênin an rêng kha inboipai a nia.

⁸ Israel sualna Aven hmun irsânghai khom kha insiat ni a ta. An maichâmhai khan sûl le hloi ilhlingnei hong mông a ta; tâng kuanga khan, nir khû roh, ti an ta, mual kuanga khan, ni del roh ti an ti.

Israel chung a Rengpa'n roirêlna an puang

⁹ O Israel, Gibe a nikhua ata kha ni isual ni isual a ni: khataka khan nin la sunzoma; tho'nsualna nâihai chung a doina khan Gibe a ngêta khan nang a irzûl phâk loi hrang mo?

¹⁰Ki nuam tika chu anni kha hrem ki ta; khan, an tho'nsualna irthuahni sika hrem an ni tika chu an chung a mipuihai kha pungkhôm an ti.

¹¹Khan, Efraima kha sehrât irla irchûtir tâk, bu chîl irzuk tâk a nia; khannisian keima ngêtin a ring enhoi taka khan ringkol irbuntir ta ki ta, Efraima chung a mi inchuangtir ki ta, Juda khom khan irnêng choiirlet a ta, Jakoba khan a'rnêng tanghai kha indartir zit a ti.

¹² Mâni ta hrangin felna tû unglân, lungkhamna ât roi; nin irnêng hoihai choiirlet unglân, Rengpa zong zoro a nia, a hong a satvurna nangni a vur mâka chu.



¹³Khannisian sualna nin tua, tho'nsualna nin âta; nin milak ra nin idong a ni.

¹⁴Khasika khan ni mihai laia buai mur murna hong suak a ta, Salmona khan irdoi nikhuaa Beth-arbel a insiattir ang khan, ni kul murdihai kha insiat ni a ta; nu chu a nâihai le pai inthekin an iom a ni.

¹⁵Nangni Bethel mihaio, nin sual irkhêl tak sikin kha thil kha nin chungu zuang tung hrang a ni. Israel rêng khom kôlirsal mân thi a ti.

Hosea 11

A mipui pêt irhmang sika Pathian poi tihna

¹ Israel nam kha a nâiinpang lai ata lung ki thunga, Aigupta ram ata ki nâipa hrangin ki ikoisuak a ni.

²Ki koi lia an ni hla liaa, Baalhai kuang an irbôl uala, Millim siam chophai kuang mirimhoi an ihâl a ni.

³Keima rêkin chu Efraima kha ki kuta kalchôi dân ki'rchûtira, anni kha ki inthotir a nih ti rêk chu inhre mahai.

⁴Mihriam hruihrual, lungkhamna hruihai khan anni kha ki kaia; an ta hrang khan an irkama kol inhlitirtuhai ang kha ki nia, indot takin an makunga fâk hrang ki dônyaia.

⁵Khannisian an irlet nuam no sikin, Aigupta rama tîr nôk ki ti, Assuria kha an rêng ni a ti.

⁶A khopuihai khan khandai irlektir a ta, a kulhai kha ar hmangtira, inboipai a ta, anni thu lei irdon sik ngêtin.

⁷Ki mihai khan nir heisan an tum maia, an ringkol riktak sikin, anchungtaka insam an ta, khannisian tûte'n indom irsâng pe no nihai.

⁸ O Efraima itin mo nang ki inthapai thei hrang? O Israel, itin mo nang ki intha thei hrang? Itin mo Adama angin nang ki isiam thei hrang? Itin mo Zeboim angin nang ki inomtir thei hrang? Ki sûnga ki milung a'rleta! ki lungkhamnahai kha a sêm irvâm lik tâka?



⁹Ki ningmurna irkhêltak kha sua no ninga, Efraima kha irhmangtir tum nôk ta no ning. Keima chu mihriam ni loiin, Pathian ki nia, Nangmaa om mi irthiang kha, khopui kha hong lût khum no ning.

¹⁰Rengpa kha zui an ta, kâmkeibaknei anga inrûm hrang chu: a ni, inrûm ngêt a ta, nitâk tianga irthokin a nâihai chu keima tiang inrang takin hong an ti.

¹¹Aigupta irthokin chongzong angin, Assuria irthok khan vasu angin mitha zâp lop lopin hong an ti: khan, an in lum inluatir ki ta, ti hi Rengpa thusuak a ni.

¹²Efraima khan milak thu'n a nir hual vêla, Israel sînghai khan huangna'n; Juda khomin Pathian tiang ngaisak maka, mi irthiang chung a iom a ni.

Hosea 12

Israel le Juda thiamno an chang

¹Efraima khan phâivua a iama, nisua phâivua khan a zui ngaia; milak thu le irsen indarna thu an pungtir sit sita, Assuria leh thu an inkunga, Aigupta tiang khan hriak a pêl lûta.

²Rengpa khan Juda chung a khom hnôlna hrang a nei saa, Jakoba chu a omdân zia ang dênin hrem a ti; a thiltho ang zia dênin thuanin.

³Sula khom khan a urêngpa kha a ke ârtui a hong chela, a hong puihling khan Pathian kha a beia.

⁴A ni, vântirtôn a beia, an hnê tâka; a chapa, ditsakna a ngêna; Bethel hmuna khan ama a hmu tâka, kha khan ki kuang thu an sîra.

⁵Rengpa ngei, sipaihai Pathian kha, Rengpa ti kha a irsinsia a ni.

⁶Khanchu, nangin chu ni Pathian kuang tiang irheiin lân, lungkhamna le roirêlna hmangin lân, ni Pathiana khan irngat mai roh.

An sual sika hrem hrang



⁷Kanaan-hai angin Israel khan vârna dik loi an leka, ihuang ringot a irzuk ngai a ni.

⁸Efraima khan, ki'rchong ok ta, hlo ki chuk ta a ni: ki sintho murdihaia lak chu keimaa siatna thil sual an ihmu hrang om viat ta mah, a tia.

⁹Khannisian, kei hi Aigupta ram ata kha Rengpa ni Pathian ki nia, kût zoro lai ang khan puan ina nang ki la inomtir hrang a ni.

¹⁰Deipuhai kuanga khom thu kin sîr ngaia, inlârnahai kin pungtira; Deipuhai hmangin ki lei hala.

¹¹Gilead kha pualoina a ini loi ma ni? ite ni loi chian an ini kêng; Gilgal-a khan sehrâtchal an inhlan ngaia; a ni, an maichâmhai kha irnêng tuk irlet châng kuanga lung dêng khôm ang chian an ni.

¹²Jakoba kha Arama rama khan an tân pata, Israel khan dôngma man a tuam tâka; dôngma man hrang khan belra a ienkol a ni.

¹³Deipu hmangin Israel kha Aigupta irthokin Rengpa'n a hruaisuaka; deipu dên hmang khan a sûnghual saa.

¹⁴Efraima lak khan a ninginmur tak taka, khasikin a thisen insua kha ama chung a chum tâka. A hrilsiatna kha ama chung a Rengpa'n inchumtir a ti.

Hosea 13

Israelhai siatna

¹Efraima'n thu a hrilin chu inthingna hrang dôr a dên rak ngai, Israel mihai laia chu irngai roiinpui tak a lei ni ngai. Baal kuanga a tûk tena hin chu a ithi tâk a ni.

²Atûn khom hin an sualtir ual ual tâka, an tangkarua'n millim sûnna'n an irsiam chop a, anni ngaidân angzia zêla millim kha; khahai murdi kha kut theithiamhai kut suak a ni pumin, irbôlna inhlantu murdihai khan sehrât têhai kha tum ri se, an ti ngai.



³Khasikin, zînga sumpui ang le irdo inrang taka boi nôk ngai anghai, hruizôla bu'rsi, kèllaiherin a isêm irhmang ang hai, meikhu suakna meikhu anghai ni an ti.

⁴Kei rêk hi chu Aigupta ram ata kha, Rengpa ni Pathian kha ki nia, kei ti no chu Pathian dang inhre ngai mak chea, keima ti no hi chu saninhringtu dang om mahai.

⁵Ramchâr irkhêl tak ramchâra nang chongpui ngaitu kha ki nia.

⁶An fâk hrang tena chu an khopa, an ikhop kha an milungin a lâlirpâk puia, khanchu a ni irnghil tâk a ni.

⁷Khasikin an ta hrangin kâmkeibaknei ang ki ni, kâmkeite angin lam laia anni kha inruang ki ti.

⁸Savomte inchân angin anni kha bei ki ta, an milung tuamtuhai kha kai thêr zit ki ta, kha hmuna khan kâmkeibaknei angin anni kha fa zoi ki ti; ramsahai khan an ikai darh zoi hrang a ni.

⁹O Israel, nangma changpuitu ni doi hi ni siatna a ni e.

¹⁰Ni khopui murdia saninzôk theitu hrang kha, ni rêng kha atûn hin khôn mo a iom? Reng le hruaituhai ni pe ro, ni iti hai, ni roirêltuhai kha khôn mo?

¹¹Ki ninginmurna rêng nang ki pêk, ki ninginmur ki lâkpai nôk tâk a ni.

¹²Efraima pualoina kha bukkhôm a ni, a sualna kha siakhôm a ni.

¹³Nupang nâiha irvei chardongna ang kha a chung a zuang tung a ti: ama kha nâipa vâ loitak a nia, a zoro taka nâi hong suakna hmuna om mah.

¹⁴Seol kut ata anni kha ki irtan hrang ma ni? Thina ata ki isansuak hrang ma ni? O thina, ni hripuihai kha khôn mo a iom? O sual, ni thân kha khôn mo om? lung nang inkham viat no ning, irlet khomsian uksak no ning.

¹⁵A urêng hai laia irhniang tak ni khomsian, nisua tianga phâivua hong pût a ta, ramchâr ata Rengpa itho ngêt kha a zuang lai tak a ni; a tuihnârhai kha kang a ta, a tuikuanghai kha châr zoi a ti. Bêlbûr sa murdi, a châr kha insiat zit a ta.



¹⁶Samaria ram ata a Pathian chung a tehel a zonga, khandai intûktirin om an ta, an nâitesenhai kha pai inthez zit ni an ta, an nupang, nâivong lai hai kha kaithêr ni an ti.

Hosea 14

Hosea'n Israel ta hrangin a ngên pe

¹O Israel, Rengpa ni Pathian tiang khan kîr nôk ro, ni pualoina sika ngei ni itûk tâk a ni.

²Rengpa kuanga khan kîr nôk unglân, a kuanga khan hiang hin insîr ro: a tho'nsualna murdi kha la paiin lan a sa ka kai kha pom ro; khanchu ei hmûr rahai kha sehrât chalpa irthûlin ki hong inhlan e.

³Assuria khan ni saninhring no nia, sakor chuangaia chuanga no ning; kin kut suakhai kuanga khan, kin Pathian nin ni e, ti ual ta no ni ung. Farahai khan nangmaa hin lungkhamna an hong ihmu ngai a nia.

Israel hrangin nun thar Rengpa'n an kung

⁴An hnungtôlna hi indam ki ta, Anni ata ki ninginmurna kha ar kiang tâk sikin, anni kha lung ki ithung hrang rêng rêng a ni.

⁵Israel hrang khan irdorfîm ang ni ki ta, ama kha lili angin sa a ta, Lebanon tâng thing irzung angin a'rzung thâk irzar a ta.

⁶A zarhai kha inbûk ngêt an ta, a satzia kha Oliv thing ang dên ni a ta, Lebanon tâng angin a mirim hoi a ti.

⁷A'rhîma lêng hai kha hong kîr an ta, bu angin hong hring thar an ta, grep hrui angin hong irnoi a ta. Lebanon Uain angin an irhming inthang a ti.

⁸Efraima khan millimhai le irnâina imo a inei ta hrang? kei hi a chongchaina sâmtu ki nia, a indingtir hrangtu khom ki ni. Kei meisâr thing hring mur ang ki nia, Ni ra sahai kha keima ata a ni.

Thukhârna

⁹Tu mo vâra hihai hi inhre thiam thei hrang; tu mo fing vâra inhre thei hrang? Rengpa lampuihai kha a dika, mi dikhai khan an izui hrang a nia; tho'nchâituhai rêk chu kha khan an irfûiin an itûk hrang a ni.



Joela

Joela 1

Chîmu khâi ifâk zoi, mihaiin poi an iti

- ¹Pethuela nâipa Joela kuang Rengpa thu zuang tung kha.
- ²Putarhaio, hi hi inhre roi, hi rama om murdihaio, nin mikuar sung roi. Hi hi, nin zoro lai le nin puhai zoro lai khomin a om ta ngai mo?
- ³Kha kha nin nâihai hrilhai unglân, nin nâihai khan an nâihai hril sianlân, an nâi nôkhai khan irlo dang hril nôk thiai ri sehai.
- ⁴Thing irnge irlungin a ifâk mihlia murdi chu khâihmimsein a fâka; khaihmmimse'n a ifâk mihlia murdi chu irlungin a fâk zoi, thing irnge'n a ifâk ban ka kai kha irlungin a fâk zoi.
- ⁵Inruihaio, har unglân, chap roi; uain in murdihaio, a uain thum sika khan khêk rak rak roi; nin bâi ata lapai a ni tâk sikin.
- ⁶Nam hrât tak, tep zoiloi, ki rama a zuang suak tâka, a hâ chu kâmkeibaknei hâ ang a nia, kâmkeibaknei lian tak hapui ang a inei sa a ni.
- ⁷Ki grep hrui an siattira, ki theipui thing hôk a khêt infâi zita, a pai irhmanga; a ônhai khom a khêt invâr zoi ta.
- ⁸Dôngmate'n, bora puan boma, a sat lai pasal a isûn angin chap rak rak roi.
- ⁹Baidi inhlanhai, in hranga inhlanhai kha Rengpa in ata inboi a nia; ochai, Rengpasinthotuhai kha an char a donga.
- ¹⁰Loi kha insiat a nia, ram khan a charindonga; bu kha insiat a nia, uain thar kha a kanga, hriak kha a châra.
- ¹¹O nangni, loi neituhaio, inzak unglân; o nangni, grep hrui enkoltuhaio, bu le faôi sikin khêk rak rak roi; loia bu ât hrang kha ar hmang tâk sikin.
- ¹²Grep hrui kha a thêma, theipui kung kha a châra; dalim thei kunghai, tûmhai le apple thei kunghai, loia thing murdihai khom kha a chuai tâka; mihriam nâihai laia lômna kha a chuai irhmang tâka.



¹³Nangni ochaihaio, bora puan sil unglân, chap roi; nangni, maichâm sinthotuhaio, khêk rak rak roi; nangni ki Pathian sinthotuhaio, hong unglân, bora puan silin zân sôtin zâl roi: nin Pathian in ata kha baidi inhlan le in hranga inhlan kha khap a nia.

¹⁴Bu nghei zoro ser irthiang unglân, inkhômputi ir-up siam unglân, Rengpa nin Pathian ina khan putarhai le hi rama lêng murdihai kha hruaikhôm unglân, Rengpa kha insam roi.

¹⁵ Kha nikhua kha a chung a rike! Rengpa nikhua kha anai tâka, Itinrêng thotheitu ata irhmangna ang zuang tung a ti.

¹⁶Ei mithmua fâk hrang inboi a ini loi ma ni, a ni, ei lômna le ei lômna kha ei Pathian in ata inboipai a ini loi ma ni?

¹⁷Chîmuhai kha irnêng châr hnuaihaia khan a hmona; panghai kha a rama, fasiarhai kha insiatin a oma; a bu kha a thêm tâk sikin.

¹⁸Sial le lôihai kha an inrûm bâka na! sehrât pâlhai kha an char a donga, sülhring hmun an nei no sikin; a ni, belra rualhai kha an chapa.

¹⁹O, Rengpa, nang kin sama: mei khan ramchâr ram hloisûl hmun kha a kâng zit tâka, mei dôn khan rama thing murdi kha a kâng fâi zit tâka.

²⁰A ni, ramsahai kha nangma irngaiin an inphu huan huan a ni: vadungtehai kha a kang zoi tâka, mei khan ramchâr ram hloisûl hmun kha a kâng fâi zit tâk a ni.

Joela 2

Khâi pâl kha Rengpa nikhua irkhekna

¹Zion-a khan bekul tum unglân, ki tâng irthianga khan râl irdîpna inpuang roi; hi ram sûnga mi murdihai kha inthing ri sehai: Rengpa nikhua kha a zuang tung thiaia, a inâi tâk a ni;

²inthimna le khor-uina nikhua, inthimna le khor-ui, sûm zîng le izîng irsa khak angin mi huaisen tamtak pâl la hmu ngai loi, itiklai khoma hmu nôk ta loi hrang hong pût an ta, tâng kha kôlirsal ituam angin hong tuam an ti.



³An maton tiang le hnung tiang kha a kâng fâi thiaia; an hmabâk ram kha Eden irhuan ang ni khomsian, an khêl hnung chu ramchâr ram chârkhohroi a ni thiaia, ite hôi nei mahai.

⁴ An inlang dân chu sakor inlang lam dân ang a nia; sakora chuang mi angin an intân a ni.

⁵Irdoina tâli irhâi angin tâng chung a an irchôm mer mura, fapôl kâng chok luai luai ang le irdoinaa mipui hrât tak irsiam diam angin.

⁶An matona mipuihai kha an kamanga: an hmêlhai kha a hong dông zita.

⁷Mi hrât tak angin an intâna; irdoi mi angin banga an lônâ; mâni irdîn senga an fea, an irtâng dân buai mahai.

⁸Irhngeng ual loiin; mâni lampuia fe senga: hriamhrehai an paltana, lôl mahai.

⁹Khopui chung a an irchôma; kul chung a an intâna; in sînghaia an lôn kâia; inru angin tukverhaia an lûta.

¹⁰ An makunga irnêng an thinga; irvânhai an hnînga; misa le tha an thima, ârsihaiin an vâ an thupa:

¹¹ Khan,Rengpa khan a sipai rualhai makunga ar hâi an sua; a riakbukhai kha a sân a roiinpuia; a thu zômthuai chu sinthothei tak an ni; Rengpa nikhua kha a roiinpuiin ar khêl tak taka; tu'n mo tuang thei hrang?

Irlet hranga ngêna

¹²Rengpa khan, “Khaang ten khomin atûn nin milung murdi'n, bu ngheiin, chapin, chardongin ki tiang hong irhei unglân:

¹³nin puan ni loiin nin milung thêr unglân, Rengpa nin Pathian tiang khan irhei roi: ama kha lunginkham thei tak le inrennaa sip, milung irnêm le khonzâna nei intam, thil saloi ata hong kîr ngai a ni,” a tia.

¹⁴Rengpa nin Pathian kuang baidi inhlan le in hranga inhlanhai khom khan, kîrin, lungrîl irhei kîrin, satvurna mâksanin om no nih ti tu'n mo an hriat?



¹⁵Zion-a khan bekul tum unglân, bu nghei zoro ser irthiang unglân, inkhômpui ir-up tak siam unglân:

¹⁶mipuihai buk unglân, inkhômhai kha irthiangtir unglân, putarhai, nâipanghai, irhnu nêk lai hai buk unglân: moi neitu khom a chontan ata hong suak sianlân, moi khom a chontan sîngrîl ata hong suak ri se.

¹⁷Ochai, Rengpa sinthotuhai kha, bokrop le maichâm kêra khan chap hai sianlân; “ORengpa, ni mi hai hôiin lân, nir chonhai hi hrilsiata oma namhaiin an chung a roirêl pehai hrangin pe no roh: ‘An pathian kha khôn mo a om tâk’, tiin mipuihai laia khan ithoa mo an iti hrang?’ ti ri se.

¹⁸Rengpa khan a ram kha a uksaka, a mi hai lung a inkham a ni.

¹⁹Rengpa khan a mi hai kuang, “Irngai unglân, nin kuang bu hai, uain hai, hriak hai zuang intung ki ta, kha khan, khop nin ta: namhai laia khan hrilsiatin nangni inomtir viat no ning:

²⁰aniachu, nin kuang ata hmâr tiang ata zuang mi huaisenhai pâl kha irzûlpai zit ki ta; ramchâr le chiaia infetir ki ti, a masa pâl nitâk tianga tuipuia, inhnung inta pâl thang tianga tuikhangliana; hong innam suak a ta, mirim se takin hong innam a ti, thil irkhêltak a tho tâk sikin, tiin a sâma.

²¹O ram, chi no’n lân, raifânin lôm ro; Rengpa khan thil roiinpui takhai a tho tâk a ni.

²²Sahaio, chi no roi; ramchâr hloisûl hmun a hong inchera, thing kha a hong raa, theipui kung le Grep hruihai kha an hong indôn a ni.

²³Nangni, Zion nâihaio, lôm roi, Rengpa nin Pathiana khan raiinfân roi: rotui masa kha a ruk bakin nangni a pêka, nin ta hrangin rua an thotira, tha khatnaa rua masa le rua hnungkhôn kha.

²⁴Hruizôlhai kha buin sip a ta, uain le hriak khurhai kha sip lêt a ti.

²⁵Nin laia ki sipai rual tamtak ki tîr, khâihmimse hai, thing irnge hai, longak hai, thing irnge longakhaiin an ifâk zoi kumhai kha nangni thuan nôk ki ti.



²⁶Tam tak fa nin ta, khop nin ti, irkhêl taka nangni ngaitua ngaitu Rengpa nin Pathian irhming kha inpâk nin ta: ki mihai chu mualinphoi viat viat no nihai.

²⁷Khan, Israelhai laia ki om ti le Rengpa nin Pathian ki nia, tûte dang om mahai ti inhria nin ti: ki mihai chu mualinphoi viat ta no nihai.

Rengpa nikhua

²⁸ Kha zoi tika chu hiang hin ni a ta, mi murdi chung a ki'rtha buak ki ta; khanchu nin nâipahai, nin nâinuhaiin ki thu hril an ta, nin putarhaiin irmanga phan an ta, nin ruathartehaiin inlârnhai hmu an ta:

²⁹kha nikhuahaia khan ki suakpahai, ki suaknuhai chung a khom ki'rtha buak ki ti.

³⁰Irvâna le irnênga thilirkhêlhai irhmutir ki ta, thisen hai, mei hai, meikhu inding hai leh.

³¹ Misa inthim a ta, tha thisena chang a ta, Rengpa nikhua roiinpui tak le irkhêltak kha a zuang tung mân.

³² Khan, hiang hin ni a ta, tukhom Rengpa irhming irlam murdi chu saninzôk ni an ta: Rengpa'n a insîr angin intân suakhai kha Zion tânga le Jerusalem khuaa om an ta, a la om sunhai laia khan Rengpa'n a ikoihai chu om an ti.

Joela 3

Namhai chung a Pathianin roirêl a ti

¹"Irngai u ta, kha nikhuahai le kha zoi tika chu Juda le Jerusalem inding nôk hrang tika chu,

²nam murdi buk khôm ki ta, Jehosafata irhôra hruai ki ti. Ki mi, ki'rchon dongtum Israel chung a an thiltho sikin an chungthu rêl ki ta; ram danga ki mihai an indartira.

³Tasânin ki mihai an irsema; nâipanghai kha nupang pasalin notizuar le uain lâkna hrangin an zuara.



⁴ Nangni Tura le Sidon, nangni Filistia ramhaio, ki chung a phubâ lâk nin itum ma ni? Ki chung a phubâ lâk nin itum a niin chu inrang takin nin chung a phubâ la kîr nôk ki ti.

⁵ Ki tangkarua le rângachak nin lâka, ki thil satak inditomhai nin biak in sînghaia nin chôi lût sa tâka,

⁶ Juda nâihai le Jerusalem nâihai khom an ramri ata hlataka nin sonpai theina hrangin, Grik nâipahai kuang nin zuar lik tâka.

⁷ Irngai u ta, nin zuarna hmun ata kha kaiharin insuaktir ki ta, nin thuanna kha nin lu chung ngeia thuanna ki ti;

⁸ nin nâipahai, nin nâinuhai kha Juda nâihai kuta zuar ki ti, anni khan hlataka Seba mihai kuang, anni kha zuar an ta”: Rengpa khan a iti tâk a ni.

⁹ Hi hi namhai laia inpuang unglân; irdoina sinsiam unglân: mi hrâthai inphût unglân; irdoi mi murdihai hong nâiin hong kê ri sehai.

¹⁰ Nin irnêng âlkaina hmor irzumhai khandaiin incher unglân, nin thei kung tanpaina chemtehai kha ufeiin incher roi: mi hrât loi khomin, “Ki hrât a ni,” ti ri se.

¹¹ A kôla nam murdihaio, hong irhnot unglân, pung khôm roi: O, Rengpa, kha khan ni mi hrât takhai kha infetirhai roh.

¹² Namhai kha irphût irhlômhai sian, Jehosafata khurpadopa khan hong kê ri sehai: kha khan a vêla nam murdi chung a roirêl hrangin ki itoi hrang a ni.

¹³ Nin kôite kai dok unglân, bu ât zoro a ni tâka: hong unglân, hong sirpha roi; grep sômna khur kha a sipa, bêlhai kha a sip lêta, a sân an sual sikin.

¹⁴ Mi sâng tamtakhai kha Jehosafata irhôra an om khôm ta; kha khan a ni, Rengpa nikhua zuang tung hrang a ni.

¹⁵ Misa le thahai an inthima, ârsihaiin an vârna an thupa.

Pathianin a mihai satvur a ti

¹⁶ Pathianin a mihai satvur a ti. Khan, Rengpa kha Zion tâng ata inrûm dur dur a ta, Jerusalem kha ata ar hâi insua a ta; irvân le irnêng inhnîng a ta:



khannisianlânRengpa kha a mihai ta hrangin irsûnghualna ni a ta, Israel irchihai hrangin kulbang ni a ti.

¹⁷Khanchu Rengpa nin Pathianin ki tâng irthiang Zion-a lêng ki nih ti inhria nin ti: khanchu Jerusalem khua kha irthiang a ta, nam dang mi'n inhnê viat ta no nihai.

¹⁸Kha nikhuuaa khan hiang hin hong ni a ta, tâng irsânghai khan uain thum inzungtir a ta, tânghai kha irhnutuiin luang a ta, Judai ram vadungte murdihai kha tuiin luang a ta: Rengpa in ata tuihnâr zuang pût suak a ta, Sitim irhôr irziltir a ti.

¹⁹Juda nâihai chungsa saloi taka thoa an rama mi thiam thisen an insua sikin, Aigupta ram kha hong ram a ta, Edom ram kha ramchâr ram chârkhohroi nih a ti.

²⁰Judai ram rêk chu kumkhua'n om mai a ta, Jerusalem khua kha irlo tin tin dênin.

²¹Khan, an thisen ki infâiloi kha infâi ki ta: Rengpa kha Zion-a a om mai sikin.



Amosa

Amosa 1

¹ Juda rêng Uzia inlal lai le Israel rêng Joasa nâipa Jeroboama inlal laia, hnîngnu mâna kum hnina khan, Tekoa sâ rual enkoltu laia om Amosa'n thu Israel chungchânga a ihmu chu.

² Khan, ama khan “Rengpa kha Zion tâng ata inrûm dur dur a ta, Jerusalem kha ata ar hâi suak a ta; belra enkoltuhai sâ lêngna hmunhai kha an char a idong a ni, Karmel tâng sîp kha châr a ta,” a tia.

Suria

³Rengpa'n hiang hin a ti: Damaska kha tho'nchâina inthum sikin a ni, minli sikin, a hremna kha inboi no ning. Gilead ram kha bu nôina thîrhai khan an nôi sikin;

⁴Khannisianlân Hazaela ina mei tîr ki ta, Benhadada rêng inhai kâng zoi a ti.

⁵Damaska khuaa mikot thîr kha inkhiak ki ta, Aven irhôr ata a luatuhai le Eden in ata rêng khianghrol chôitu kha inboi ki ta; khan Suria ram mihai kha Kir rama suaka om an ti, Rengpa'n a ti.

Filistia

⁶Rengpa khan hiang hin a ti: Gaza kha tho'nchâina inthum sikin, a ni minli sikin, a hremna kha inboi no ning; Edom kuanga pêk hrangin mi murdi suaka an hruai sikin:

⁷Khannisianlân Gaza kha kul chung a mei tîr ki ta, a rêng inhai kha kâng zoi a ti:

⁸Khan, Asdod kha ata a luatu le Askelon kha ata rêng khianghrol chôitu inboipai ki ti; khan, Ekron kha chung a ki kut irlek ki ta, Khan, Filistia mi la omhai kha inboi ki ta, RENGPA PATHIAN khan a ti.

Tura

⁹Rengpa'n hiang hin a ti: “Tura kha tho'nchâina inthum sikin a ni, minli sikin, a hremna kha inboi no ning; Edom kuang mi murdi kha an pêka, irurêngna thu an intung kha an inhriat mai no sikin:



¹⁰Khannisianlân Tura kho kul chung a mei tîr ki ta, a rêng inhai kha kâng zoi a ti,” a tia.

Edom

¹¹Rengpa'n hiang hin a ti, “Edom mihai tho'nchâina inthum sikin, a ni, minli sikin, a hremna kha inboi no ning; a urêng kha khandaiin a'rzûla, a lungkhamna murdi a pai irhmanga, a ninginmurna khan an potthêr mai hena, kumkhuaa a ninginmurna kha a vong chian sikin;

¹²Khannisianlân Temana hmun chung a mei tîr ki ta, Bozra kua rêng inhai kha kâng zoi a ti,” a tia.

Amon

¹³Rengpa'n hiang hin a ti, “Amon nâihai tho'nchâina inthum sikin, a ni, minli sikin, a hremna kha inboi no ning: an ram an irzat theina hrangin, Gilead khuaa nupang nâi vonghai an ât phorhai sikin:

¹⁴Khannisianlân Raba kua kul chung a mei sêm inchok a ta, khan irdoi nikhua khêk leh, kêllaiher nikhuaa phâivopui le, a rêng inhai kha kâng zoi a ta; an rêng kha sala chel an ta, an mi lianhai leh a pâlin, Rengpa khan a ti.

¹⁵An rêng chu a mi lianhai leh sala hruai an ti,” Rengpa khan a ti.

Amosa 2

Moab

¹Rengpa'n hiang hin a ti; “Moab tho'nchâina inthum sikin, a ni, minli sikin, a hremna kha inboi no ning; Edom rêng ruhai kha chinai ang dênin a hâl sikin:

²Khannisianlân Moab chung a mei tîr ki ta, Keriot khuaa rêng inhai kâng zoi a ta; khan Moab kha buaina le khêk le bekul irhâiin thi a ta;

³khatak ata roirêltu kha inboi ki ta, a mi lianhai murdi kha, ama leh that ki ti, Rengpa khan a ti. Moab rêng roirêltuhai chu that ki ta, an mi lian murdihai khom that ving ki ti,” Rengpa khan a ti.

Juda



⁴Rengpa khan hiang hin a ti: “Juda tho’nchâina inthum sikin, a ni, minli sikin, a hremna kha inboi no ning; Rengpa dân kha a hnôla, a thupêkhai vong mahaia, an pahai ibiak ngai pathian irlimhai khan a hruai irhmang sikin.

⁵Khannisianlân Juda chung a mei tîr ki ta, Jerusalem kua rêng inhai kha kâng zoi a ti,” a tia.

Israel chung a Pathian roirêl.

⁶Rengpa khan hiang hin a ti: “Israel tho’nchâina inthum sikin, a ni, minli sikin, a hremna kha inboi no ning; tangkarua mi fel an zuar sik le kekok bun khata mi irsam an zuar sikin:

⁷mi inrianghai lu chung a pildi ten khom an hnarsaa, inrianghai an inrûkpaï pea, pa le nâipa’n dôngmate inkhat an inmai irhlôma, ki’rhming irthiang an porinchetir a ni.

⁸Maichâm omna kipa puan siakhôm chung a an zâl ngaia, an pathian ina khan mi an inchôitir manhai khan uain an in ngai a ni.

⁹ “Khannisianlân anni makunga Amor-hai, Sidar thing anga irsâng le thing sesua anga hrât khom kha ki’rh mangtira; a chung tiang ata a ra le a hnuai tiang ata a’rzung khom kin boitira.

¹⁰Khan, Amor-hai ram nei hrangin Aigupta ram ata nangni ki hruai suaka, ramchâra kum sômminli sângin nangni ki hruaia.

¹¹ Khan, deipu ni hrangin nin nâipahai laia mi le Nazarit ni hrangin nin ruathartehai laia mi ki siama. O, Israel nâihaio, khangin a ini loi ma ni? Rengpa thu suak khan a ti.

¹²Khannisianlân Nazarit mihai kuang uain in hrang nin pêka, deipuhai kuang, thu hril no roi, tiin thu nin pêka.

¹³Irngai u ta, bumûta sip, tâli ichîl angin, nin hmuna nangni nam ki ti.

¹⁴Khan, mi’ntân hrâthai hrâtna boi a ta, mi hrâthai hrâtna boi a ta, mi hrâtin irtha sêng thei ual no ni, mi hrât tak khom irzôk thei ual no ni,



¹⁵thal ngul hmanngu khom inding thei ual no ni: fe hrât thei mi khom irzôk thei no nia, sakor chung chuang mi khan irzôk thei ual hliak no ni:

¹⁶Kha nikhua khan mi thilthothei tak laia mi huaisen khom kha silkai boiin intân no ni,” Rengpa thu suak khan a ti.

Amosa 3

¹O, Israel nâihaio, Aigupta ram ata ki ihruai suak in sêngkuahaio, Rengpa'nhianga nangni a ihrilsiatna thu hi irngaitua roi,

²“Nangni vai hi rammuala sêngkua murdihai laia nangni ki inhriat nin nia; khasikin nin itho'nsualna murdihaia khan nangni hrem ki ti,” tiin.

³An irngei no'n chu mi inhni an ife suam thei hrang ma ni?

⁴Kâmkeibakneiin ram hnuai sa a man no'n chu an hrûm ngai ma ni? Kâmkeibaknei vânglaiin ite a man no'n chu pûka irthokin an hrûm ngai ma ni?

⁵A ta hrangin châng a om no'n chu vate kha irnêng châng khan an ôk ngai mo? châng kha ite in-ôk loiin irnênga irthok khan chim ni mo?

⁶Khopuia mi chi loi hrangin bekul an tum thei ma ni? Rengpa itho ni no'n chu khopuia khan siatna a iom thei ma ni?

⁷Dik takin RENGPA PATHIAN khan a sinthotu, a deipuhai kuang a thu'rthup hril loiin ite tho no ni.

⁸Kâmkeibaknei an hrûmin tu mo chi loi hrang? RENGPA PATHIAN khan thu a hrila, tu mo hril loi theiloi hrang? tiin.

Samari siat hrang thu

⁹Asdod khua rêng inhai le Aigupta ram rêng inhaia khan hril unglân, Samari tâng chunghaia irbuk unglân, kha khan buaina lian tak omhai leh kha laia opbea omhai kha enhai roi, tiin.

¹⁰Opbena le nakhrâta an irchipuihai kha an rêng inhaia an siakhôma, dik taka tho tum viat mahai, Rengpa thu suak khan a ti.



¹¹Khasikin RENGPA PATHIAN khan, “An râlhaiin an ram kha hong irhual an ta, an kulhai inchimtir an ta, an rêng inhai khom insiat an ti.

¹²Rengpa khan hiang hin a tia: Belrapu’n kâmkeibaknei bâi ata a belra ke inhni mani, mikuar hlek mani, a isan suak angin, khaang Samari khuaa zâlmun kila le zâlmun irlung êk puan irphân lukham chungga Israel nâi omhai kha sansuak a ti.

¹³Irngai unglân, Jakoba in sâng mihai chungga khan inhriattir ro, Sipaihai Pathian RENGPA PATHIAN khan a ti.

¹⁴Israel tho’nsualna kha ama chungga ki hrem in chu, kha nikhua khan Bethel khuaa maichâmhai khom hrem seng ki ti; khan, maichâm irkhai kha koi a ta, irnênga tâk a ti.

¹⁵Khan, phalbi in le kholum in vîksiat ki ta, sâihaa irvô inhai kha irhmang a ti, in roiinpuihai khan mongna nei an ti,” Rengpa khan a ti.

Amosa 4

¹Nangni Samari tânga lêng nuhai, Basan sehrât infa’n mar anghaio, inrianghai manêpa, irsamhai hnenga, pasalhai kuang, “Hong la unglân, in ei ti,” tituhaio, hi thu hi inhre roi.

²RENGPA PATHIAN khan ama irthiangna sâlin khua a sâla: “Irngai u ta, thîrkuaiin nangni a lâk irhmanga, nin laia a la omsunhai nga irkuaia nangni lâk irhmang nikhua a hong itung hrang a ni.

³Khan, bang ir-ônghaia fe suak nin ta, mi tin kha intûn takin fe an ti, Hermon hmuna khan irpai nin ti”,Rengpa’n a ti.

Israelhaiin inhre thei mahai

⁴Bethel-a khan hong unglân, tho’nchâi roi; Gilgal-a khan hong unglân, tho’nchâina kha inpungtir roi, khan nin irbôlna kha nîtin hong la unglân, nin sôma inkhathai kha sîn thum danh zêla hong chôî roi.

⁵Khan, chol kop loi lômthu hril irbôlna kha inhlan unglân, mâni nuamlama inhlanhai kha hril unglân, inpuang roi: O Israel nâihaio, hi hi nin nuamlam tak a ni, RENGPA PATHIANIN a tia.



⁶Khan, kei khomin nin khopui murdihai châmna le nin hmun murdihaia irsamna nangni ki pêka; kha tena khom ki kuang hong kêr mak chêia, Rengpa thu suak khan a ti.

⁷Khan, bu ât hrang zoro tha thum a la ni laiin nin chung a rotho hrang khom ki khapa; khopui inkhat chung a kin thotirin, khopui dang chung a inthotir ma ung: hmun khat chung a kin thotir ngaia, a tho no hmun kha a châr ngaia.

⁸Khanchu, khopui inhni mani, inthum mani kha khopui inkhata tui in hrangin an irvâka, khop mahaia: kha khom khan ki kuang hong kêr mak chêi, Rengpa thu suak khan a ti.

⁹Chârkhoirina le duichûtna'n nangni ki hrema: nin irhuanhai, nin grep irhuan hai, nin theipui kung hai, nin oliv thinghai murdi kha thing irnge irlungin a fâk zit tâk a ni: kha khom khan ki kuang hong kêr mak chêi, Rengpa thu suak khan a ti.

¹⁰Aigupta ram angin nangni laia hripui ki tîra: Khandaiin nin ruathartehai kha ki that tâka, nin sakorhai ki hruai irhmang tâk a ni; khan, nin sipai hmun mirimsia kha nin hnâra innam rak dôrin nangni kin omtira: kha tena khom khan ki kuang hong kêr mak chêi, Rengpa thu suak khan a ti.

¹¹Sodom le Gomora kha Pathianin an chimtir lai angin, nin laia mi senkhat kin chimtira, thing kâng sabak loi lâksuak ang nin ni: kha tena khom khan ki kuang hong kêr mak chêi, Rengpathu suak khan a ti.

¹²Khasikin, o Israel, ni chung a hiang hin ki tho hrang sikin, o Israel ni Pathian irtongpui hrangin irsiam roh.

¹³Irgai ta, tâng hai inding suaka, phâivua siama mihriam kuanga khan a ngaituana imo a ni hril suak pea, zîng kha inthimtira, irnêng hmun irsâng hai chîltu kha ar hming Rengpa, Sipaihai Pathian kha a ni.

Amosa 5

Irlet hranga ngêna

¹O, Israel irchihaio, hi thu hi nangni sîna hranga ki insîr hi inhre roi.



²Dôngmate irthiang Israel kha a tûk tâka; inding nôk ta no ni; a ram chung a pai thâk a ni ta; ama inngîrtir hrangin tûte om mahai.

³RENGPA PATHIAN khan hiang hin a iti a ni: Israel irchihai kuanga khan, khopui irsâng suakna khan, irzakhat mâksan a ta, khopui irzakhat suakna khan, sômkhath mâksan a ti.

⁴Rengpa khan Israel irchihai kuanga khan hiang hin a ti, ni zong unglân, hring nin ti:

⁵Khannisianlân Bethel khua zong no unglân, Gilgala lût viat no unglân, Beerseba khuaa kâi no roi: Gilgal khua kha irningloiin sala an iman hrang a nia, Bethel khua kha chanlamboi hong ni a ti.

⁶Rengpa kha zong unglân, hring nin ti; khano'nchu, Josefa ina mei angin suak a ta, kâng zoi a ta, Bethel khuaa thatpai hrang tûte om no nihai:

⁷roirêlna sâipui thinga inchangtira, felna kha irnênga pai thâkhaio;

⁸Sîruk le sîvazûn siamtu le thina dâihlîm zînga inchangtirtu le sîn kha zân inthima siamtu, tuikhanglian tuihai koia, irnêng chung a inluangtirtu kha, ama kha zong unglân, ar hming chu Rengpa a ni,

⁹kul chung a irhmangna hong tung dôra, mi hrâthai chung a irhmangna intungtu kha.

¹⁰Kul mikota dik taka roirêltu kha a khôkmâka, thu diktak hriltu kha.

¹¹Khasikin mi'nrianghai sirpha'n nakhrâtin bu nin lâkpai pea: lung irchuan inhai nin sina, khannisianlân a sînga lêng no chin ni; grep irhuan hoihai nin siama, khannisianlân a uain in no chin ni.

¹²Nin sualnahai a tamzia le nin sualnahai a'rkhêlzia kin hriata; mi felhai dengintheitira, fâkinrûkna lâka, kul mikota mi irsamhai dongtum ngei khom pêk phal loihai.

¹³Khanchu mi vâk kha, khang zoroa chu a dâihreka zoro saloi a ni sikin.

¹⁴Nin hring theina hrangin sat loina zong loiin, satna zong unglân; khan, nin insîr angin Rengpa sipaihai Pathian kha nin kuang om mai a ti.



¹⁵Sualna kha khôkmâk unglân, satna irngaiinhlu unglân, mikota roirêlna kha inding indet roi: Josefa-hai mi la omsunhai chung a khan Rengpa, sipaihai Pathian khan lungkhamna a inei loi ma ni.

¹⁶Khasikin Rengpa, sipaihai Pathian, Rengpakhan hiang hin a ti: kholaidung irzat murdia chap rak rakna om a ta; kholai murdia, a poi bâka! ti an ta; chardong hrangin loi neituhai leh chap rak rak hrangin a sîn thiamhai koi an ti.

¹⁷Khan, grep irhuan murdia chap rak rak an ta; nin laia ki ife theng hrang a nia, Rengpa'n a ti.

¹⁸Rengpa nikhua nuamhaio, nin chung a zîng e! Ithoa mo Rengpa nikhua kha nin inuam? vâr ni loiin inthim a ni ual.

¹⁹Kâmkeibaknei rotsana, savom tong mi ang le ina lûta, bang chung a kut irnghata, mirûlin a inchuk ang a ni.

²⁰Rengpa nikhua kha vâr ni loiin inthim a ini loi hrang ma ni? Inthim irsa le vâr rêng rêng khom nei loiin?

²¹Nin kûthai ki khôkmâkin ki hnuaisiaa, inkhômpui ir-uphai khan lôm ual no ning.

²²A ni, nin hâlrivôm thilinhlan le nin bu inhlan, nin hlan khom unglân, pom no ning, nin sâ mar irngeina inhlanhai khom uksak ual no ning.

²³Nin perkhuang irhâi hoi kha irngai no ning: Khasikin keimaa ni hla nin chok kha lapai roh.

²⁴Khannisianlân, roirêlna dik kha vadung angin luang sianlân, felna kha ivapui kang ngailoi angin luang ri se.

²⁵O, Israel in sîngkuahaio, kum sômminli sîngin ramchâra khan irbôlnahai le thilinhlanhai ki kuang nin hong ichôi ma ni?

²⁶A ni, nin rêng Sakut le nin Molok puan inhai le, nin Kaiuan millimhai, nin ârsi pathian, mâni hranga nin isiam kha, nin pêla.



²⁷Khanchu Damaska khua khêl tiang sala nangni infetir ki ta, Sipaihai RENGPA PATHIAN khan a ti.

Amosa 6

Israel siat hrang thu

¹Zion tânga hoi ta hraia omhai le Samari tânga raifân taka omhai le nam lian tak mi roiinpuihai, an kuanga Israela sêngkuahai an fenahai chung kha a zîng e!

²Kalne khuaa fe unglân en roi; khan, khataka Hamath kho roiinpua khan fe unglân: khan, Filistia ram Gath khuaa khan chum unglân. Hi ramhai nêk hin an isa ual ma ni? Nin ram nêkin an ram a irzat ual ma ni?

³Nangni nikho saloi hlataka sia le nunrông toina innâitirtuhaio,

⁴Sâiha zâlmuna zâla, an toina sei chunghaia inthuanga, belra pâl laia belrate le sehrât omna lai ata sehrât tuaihai fâka;

⁵perkuanga thaboina hlahai saka Davida anga mâni hranga hla tûk hmang ruahai siama;

⁶berbu liana uain ina, hriak sataka irpolhai kha; khannisianlân Josefa-hai intakna sikin charindong mahai.

⁷Khanchu atûn sala fe masahai leh sala fe an ta, inthuanghai raifânna lômna kha boi a ti.

⁸Rengpa, sipaihai Pathian khan, RENGPA PATHIAN khan ama le ama irsâlin khomâk a sâma: Jakoba lâirpâkna kha kin tira, a rêng inhai ki khôkmâka: khasikin khua le a sûnga om murdihai kha ki incheltir hrang a ni.

⁹Khan, hiang hin lei ni a ta, in inkhata mi sômkhata an la omin chu thi an ta.

¹⁰Khan, mi inkhat pasal tianga a hâltu ngei khomin la a ta, in sûng ata a ru la suak hrangin, in sûngrîl taka om kuang, “Ni kuang tukhom an la om mo,” a tia. Ama khan, “om ma,” a tiin chu, ama khan, “dâihrek ro, Rengpa irhming kha ei isâm hrang ni maka” ti a ti.



¹¹Irngai u ta, Rengpa khan thu a pêka; khan, in lian kha chim rem rum a ta, in chîn khom kha kak phet phut a ti.

¹²Sakorhai kha lungpui chung a an intân hrang ma ni? Khataka khan mi'n sehrâtin irnêng an ituk irlet hrang ma ni? nangni'n roirêlna kha thina hloia le, felna kha sâipui ram thinga nin inchangtir hi.

¹³nangni thil mâkana chung a lôma, eini hrâtna'n a ini loi ma ni, irkihai ei ilâk? tihao.

¹⁴En u ta, o Israel in sîng mihaio, nangni doi hrangin nam inding suaktir ki ta; khan, Hamath kho mikot sua ata Araba dung dênin deng nangni intheitir an ta; Rengpa, sipaihai Pathian thu suak khan a ti.

Amosa 7

Inlârnaa khâi pâl

¹Rengpa Pathianin inlârna a nir hmutira, kha khan khâihmimse pâl tamtak a isiamhai kha ki hmua, irngai u ta, hi hi dongtu'n fapui an ât zoia, hloisûl hong mông irphut nôk ang a ni.

²Khan, kha rama sûlhna an fâk zit hnungin, “O RengpaPathian, ngaidam ro, hi nang ki ngên; Jakoba chu itin mo a ingîr thei hrang, ama kha a chîna?” ki tia.

³Hi thu tiang hin Rengpa kha ar hei kîra Rengpa khan, “Ni nôk ta no ni”, a tia.

Mei hmu thu

⁴Rengpa khan inlârna a nir hmutir nôka, a mihai hremna hrangin mei a ikoi lai ki hmua, mei khan tui inthûk tak kha a kâng zita, ram khom kâng hrang a nia.

⁵Khan, keima'n, “O Rengpa Pathian mong ro, nang ki ngên: Jakoba kha itin mo a inding thei hrang? Ama kha a chîna,” ki tia.

⁶Hi thu tiang hin Rengpa kha ar heikîra; Rengpa khan, “Hihai khom hi zuang tung no ni” a tia.

Enirmîlna hmu



⁷Hiang hin a nin entir nôka; khataka khan, Rengpa kha bang irdîn taka irfûktir kôla a ngîr ki hmua, a kuta enirmîlna a oma.

⁸Khan, ki kuang Rengpa khan, “Amosa, imo ni ihmu?” a tia. Khan, keiin, “Enirmîlna,” ki tia. Khan, Rengpa khan, “Irngai ta, ki mi Israelhai laia enirmîlna sia ki ta; anni khêlhai ta no ninga.

⁹Khan, Isaka hmun irsânghai kha hong ram an ta, Israel hmun irthianghai kha insiat ni a ta; khan, Jeroboama sêngkuahai khandaiin doi ki ti,” a tia.

Amosa le Amazia

¹⁰Khan, Bethel khuua ochai Amazia khan Israel rêng Jeroboama kuang, “Amosa khan Israela sêngkuahai laia inrûkin nang a doia: ram khan a thu murdi kha tuang thei mah.

¹¹Amosa khan hiang hin a tia, ‘Jeroboama kha khandaiin thi a ta, irlêkloiin a ram ata Israel kha sala hruai suak a ta,’ tiin thu a thona,” a tia.

¹²Khan, Amosa kuang Amazia khan, “O nang deipu! fe’n lân, Judai rama rotin lân, kha khan bu nêkin lân, thu hril roh:

¹³Khannisianlân Bethel khuua thu hril nôk ta no ro; rêng hmun irthiang le rêng in a ni sikin,” a ti saa.

¹⁴Khan, Amazia kuang Amosa khan, “Deipu ni ma unga, deipu nâipa khom ni ual ma ung; sâ pâl enkoltu le theipui thing enkoltu ki ni ual a ni.

¹⁵Khannisian, Rengpakhan belra pâl enkolna ata kha a ni lâka, Rengpa khan ki kuang, ‘fe’n lân, ki mi Israelhai kuang thu hril ro,’ a ni tia.

¹⁶Khanchu atûn Rengpa thu kha inhre ro: nangin Israel doiin thu hril no’n lân, ni tia; Isaka sêngkuahai doiin ni thu inthâ no roh, ni tia.

¹⁷Khasikin Rengpa khan hiang hin, ‘Ni dôngma kha khopuia notizuar ni a ta, ni nâipahai, ni nâinuhai kha khandaiin tûk an ta, ni ram kha irkhîna hruiin sem an ta; khan, nangma ngei kha ram irthiang loi sênga khan thi ni ta, irlêkloiin Israel kha a ram ata sala hruai irhmang a ta,’ a ti,” tiin a sâma.

Amosa 8



Inlârnaa thei koka om a hmu thu

¹Rengpa Pathian khan inlârna a nir hmutir nôka, kholum thei kok ki hmua.

²Khan, ama'n, "Amosa, imo ni ihmu?" a tia. Keima'n "Kholum thei kok," ki tia. Khan, Rengpa khan ki kuang, "Ki mi Israelhai mongna hrang a zuang tung ta; tehel zong ta no ning," a tia.

³Rengpa Pathian thu suak khan, "Kha nikhuaa khan biak in hlahai kha lusûn hlaa chang a ta; mithi ruak tam a ta, hmun tina dâihrekin pai suak an ti," a tia.

Israelhai chungã thil saloi tung hrang thu

⁴Hi hi irngaitua roi, O! mi'rsamhai fâk zoi nuama, ram mi'nriang inboi nuamhaio.

⁵Bu kin zuar theina hrangin tha thar kha itika mo a ihek hranga, baidi bu ei zuar theina hrangin irngam nî kha itika mo a ihek hrang, titu; epha inchîntir kin ta, sekel inriktira, dikloi taka huangna irtêna hmanga;

⁶tangkaruaa mi'nriang irchôka, mi'rsamhai kha kekok bun khata irchôka, bu'rsi hâl irhmang theina hrangin, tituhaio.

⁷Rengpa khan, Jakoba roiinpuina sâlin khomâk a'rsâma, irlêkloiin an sintho rêng rêng irnghil viat no ning, tiin.

⁸Hi mi sika hin ram kha an thingin a sûnga om murdihai kha an char a idong hrang mo ni ma? A ni, vadung ang khan hong lian zit a ta; Aigupta ram vadung angin a hong buaiin hong kang a ti.

⁹Khan, RENGPA PATHIAN thu suak khan, kha nikhua khan, hiang hin hong ni a ta, sûn laia misa intâktir ki ta, misa lum lai khan irnêng kha inthimtir ki ti.

¹⁰Nin kût nikhuahai kha chardongnaa le nin hlahai murdi kha chapnaa inchangtir ki ti; nin kong murdi kha bora puan diar inkaitir ki ta, lu sîp tina khan inkolna hong intungtir ki ta; mi'n a nâipa neisun a isûn angin om nin ti. Kha nikhua kha chu a mong dênin dengtheina, intakna nikhua ni a ti.



¹¹Rengpa Pathian thusuak khan, irngai u ta, nikhuahai kha a zuang itung thiai a ni. Kha nikhuahaia khan rama khan châm zuang tîr ki ta, bua châmna ni loiin, tuia châmna ni loiin, Rengpa thu inhriatnaa châmna kha.

¹²Rengpa thu kha irzugin nisua le nitâk, sim le hmâra irfang an ta, hmu ual hliak no ni hai.

¹³Kha nikhuuaa khan dôngmate le ruathartehai satlaihai ten khom kha dangchârin chingirîl an ti.

¹⁴Pathian irlim sâla khomâksâma, ‘O Dan, ni Pathian a hring angin,’ le Beerseba fena lampui a ihring mai angin, tihai kha, khaang mihai khom kha chu irtet an ti, thoi nôk viat no nihai, tiin.

Amosa 9

Lôi thei viatloi Rengpa roirêlnahai kha

¹Maichâm kôla ngîrin Rengpa kha ki hmua, khan, ama khan, “Mikot kôlhài an hnîng theina hrangin a sîp michalhai kha zêmin lân, an rênga lu chung a zêmirnôi zit roh. Khan, a thi banhai kha chu khandaiin that ki ta, inkhat khom intân irhmang no nihaia, inkhat khomin lôi sa no nihai a ti.

²Mithi khua dênin an lampui kha choi theng thaihai khom sianlân, khatak ata kha ki kutin la suak ki ta; irvâna kâihai khom sianlân, khatak ata kha kai thâk ki ti.

³Karmel tâng sîpa irbîkhai khom sianlân, zong ki ta. Khataka khan anni kha kaisum ki ta, khan, tuikhanglian monga ki mit hmu loia irbîkhai khom sianlân, khataka mirûl kha irchamneina pe ki ta, inchukhai a ti.

⁴An râlhaiin sala an ihruai kha thu pe ki ta, khandaiin sât thâk a ti, changpui nêkin annihai kha thatpai ki itum a ni.

⁵Ram kha a tona, inzôitirtu kha Rengpa sipaihai Pathian kha a nia. Khan, khataka om murdihai kha an chardong a ta; khan, ivadung angin zuang lian a ta, Aigupta vadung angin zuang irkai nôk a ta;



⁶irvâna a tentanhai siama, tuikhanglianhai siama, irnêng chung a tentan irkual siama, tuikhanglian tuihai koia, irnêng chung a bunpaitu, ar hming chu Rengpa a ni.

⁷Rengpa thu suak khan, “O Israel nâihaio, ki chung a Ethiopia nâihai angin nin iom loi ma ni? Aigupta ram ata Israel le Kaftor ram ata Filistia mihai le Kir ram ata Suria mihai nangni hruai suakhai ma ung mo?”

⁸Rengpa thu suak khan, ‘Irngai u ta, Rengpa Pathian mit kha hi Israel ram sualhai chung a hin a chum tâka, irnêng chung ata ki inboipaihai ving hrang a ni. Aniachu, Jakoba insûng mihai kha inboipaihai zit no ning,’ a tia.

⁹“Irngai u ta, thu nangni ki ipêk hrang a nia, khan, mâikachaia bu an insolpai angin, Israel sêngkuahai kha nam tin tin laia khan insol thapai ki ta; khannisianlân, ar mal chîntak khom irnêng chung a ta no ni.

¹⁰Ki mihai mi sual murdihai, ‘sat lina khan ni’rzûl pha no nia, ni phâk sa no ni,’ tihai kha khandaiin thi an ti,” a tia.

Israel indingtir nôkna

¹¹Hi thil thotu Rengpa thu suak khan hiang hin a ti, “Kha nikhuuaa khan Davida kairêng chim kha indingtir ki ta, a pophai kha tuam ki ta; a siathai kha irfûktir nôk ki ta, tianlaia a iom angin sin nôk ki ti.

¹²Edom hmuna la omhai le ki’rhminga koi nam murdihai kha an nei theina hrangin,” a tia.

¹³Rengpa thu suak khan, “Irngai u ta, nikhuahai a zuang tung thiai a ni,” kha nikhuahaia khan irnêng tukirlettu khan bu âttu le grep chîltu khan chi inthektu kha irzûl phâk a ta; khan, tâng irsâng khan uain thum inzungtir a ta, tâng murdi zôi irhmang a ti.

¹⁴Khan, ki mi Israelhai kha sal ata hruai kîr nôk ki ta; khan, kho ram tâkhai kha siam nôk an ta, lua an ta. Khan, grep irhuanhai siam an ta, a uain kha in an ta: irhuanhai khom siam an ta, a ra kha fa an ti.

¹⁵Khan, an rama anni kha phunhai ki ta, an kuanga ki ipêk ram ata kha inpot suakin om nôk ta no nihai, Rengpa ni Pathian khan a ti.



Obadia

Obadia 1

Rengpa'n Edom hrem a ti

¹Obadia inlârna kha Rengpa Pathian khan Edom chungchânga hiang hin a ti. Rengpa kuanga irthokin thu kin inhriata, namhai laia khan palai tîr a ni: “Thoi unglân! irdoinaa Edom doi hrangin irthok ei ti,” tiin.

²Irngai ta, namhai laia khan nang kin chîntir tâk a ni; mi tinin a saterengin nang hmusit ta an ti.

³O nang, lung kul sîng kêra oma, hmun irsâng luatu, 'Tu'n mo hnuaia ni sukthâk hrang?' ti lungrîltu, ni lungrîl lâiripâkna hin nang a ihuang tâk a ni.

⁴Irmu angin irsâng taka vuang khomin lân, nir bu kha ârsi laia zep ni khom sianlân, khatak ata nang kai thapai ki ti, Rengpa'n a ti.

⁵Ni kuanga inrûhai, mi phil hmanghai zâna honghai sianlân,

(irhmangtir ni ini hrang kêng!) an indit dôrin an inrûk loi hrang ma ni? Ni kuanga Grep irhmaltuhai honghai sianlân, Grep irhmal hrang senkhat an imâksan loi hrang ma ni?

⁶Esaua thilhai zong suak a ini tâk kêng! A'rchon kok thuphai kêlsuak a ni ta!

⁷Nangma tianga kophai murdi'n ramri dênin nang an hong intunga; mi irngei taka ni iompuihai khan nang an hmanga, nang an inhnê tâk a ni! ni bai fâktuhai khan ni hnuaia châng an kama; amaa khan inhriat thiamna zel a iom loi a ni.

⁸Kha nikhuuaa khan Edom ata mi vârhai inboipai ki ti, Esaua tâng ata inhriat thiamna ki inboipai loi hrang ma ni? Rengpa'n a ti.

⁹O Temana, Esaua tânga irthoka mi tin irhmangtira an om zitna hrangin, ni mi hrâthai kha a saterengin chi an ti.

Edom hrem nasan



¹⁰“Ni urêngpa Jakoba irchihai ni thata, ni rok sikin, kumkhua’n mualinphoi le irhmangtirin om ni ti.

¹¹Kiangtiang ni ngêr nia, mikhualhaiin a sum an lâkpai nia, nam dang mihai an kul mikota an lûta, Jerusalem chungga tâ an sân lai khan, nang khom anni laia kop angin ni om kha.

¹²Aniachu ni urêngpa siatna a tong nê khan thêr no’n lân, Juda nêihai chungga an irhmang ni khan râiinfân no’n lân; intak an tong ni’n lâripâk takin chong ual no roh.

¹³Ki mihai an vânduai nê khan an kul mikota lût no’n lân; an vânduai niin an tuangnahai kha thêr no’n lân, an vânduai ni’n an sum le puanhai chungga ni kutin inban ual no ro.

¹⁴ A mi senkhat irtan suakhai that hrangin lam suama lei ngêr no’n lân; intak nia a mi la omsunhai kha incheltirhai no roh.

Pathianin nam tinhai chungga roirêl a ti

¹⁵“Nam murdi chungga Rengpa nikhua kha anai tâka: ni lei itho tâk ang dênin ni chungga itho nih a ta; ni itho lam ang ngeiin ni chungga a hong irlet hrang a ni.

¹⁶Ki tâng irthianga siatna khilât, ki mihai iin tâk ang khan, nam murdihai khan an in mai hen hrang a nia, in paiin irlem zit an ta, irzir loi ang dênin om an ti.

¹⁷Zion tânga rêk chu, irtansuakhai kha om an ta, irthiang a ti. Khan, Jakoba insûng mihai khan an irchon donghai kha chang an ti.

¹⁸Jakoba insûng mihai kha mei ang ni an ta, Josefa insûng mihai chu meiri-al ni an ta, Esaua insûng mihai kha fapôl ni an ta, anni laia chok suak an ta, kâng irhmanghai zit an ti. Esaua insûng mihai kha damsuk zel om no nihai; Rengpa khan a ti tâka.

¹⁹Sim tianga mihai khan Esaua tâng kha dong an ta; phâiram tianga mihai khan Filistia ram kha dong an ta: Efraima loi le Samari loi kha dong an ti. Benjamina-hai khan Gilead ram kha dong an ti.



²⁰Kanaan mihai laia hi Israela irchi sal intâng mipuihai hin Zarefat ram dênin dong an ta; Sefarada rama Jerusalem kho mihai sal intâng khan sim tiang khopuihai kha dong an ti.

²¹Zion tânga khan Esaua tâng rêl pe hranga sansuaktuhai hong kêi an ta; Khan, ram kha Rengpa ta ni a ti.



Jona

Jona 1

Rengpa kuang ata Jona a rot

- ¹ Amitaia nâipa Jona kuang Rengpa thu a zuang tunga,
- ²“Thoiin lân, Ninevi khua, khopui roinpui taka khan fe'n lân, a chungchâng thu tâng insampui roh; an sualnahai kha ki kuang a hong tung tâk,” a tia.
- ³Khannisianlân, Jona kha Rengpamakung ata Tarsis-a a rot hrangin a thoi tâka; khan, Jopa khuaa a zu fea, Tarsis pan hrang irkuang a hmua: khanchu, a fena man a pêka, Rengpa makung ata kha Tarsis pan hranghai leh fe hrangin irkuanga khan a lût tâka.
- ⁴Khannisianlân, Rengpa khan phâivua kha a satêrengin tuikhangliana khan an thotira, tuikhangliana khan a satêrengin phâivopui a thoa, khanchu, irkuang kha koi hrang angin a om tâka.
- ⁵Khan, irkuanga mihai khan an chi tâka, mâni Pathian an koi senga; irkuang kha an ta hrangin a zâng theina hrangin irkuang sûnga timmatuahai kha tuikhangliana khan an pai suak tâka. Jona rêk chu irkuang sûngrîl taka a lei lût tâka; a lei zâla, a lei in irnghila.
- ⁶Khanchu irkuang hruaitu kha a kuang a hong, “O nang a in, itho mo ni ini? thoiin lân, ni Pathian koi ro, Pathianin ei irhmang loina hrangin, ni ngaitua no ni mo”, a tia.
- ⁷Khan, “Tho, hi thil saloi ei chung a hong om hi tu sika mani, ti ei inhriat theina hrangin, tasân ei ti,” tiin an irti irhlôma. Khanchu, tâ an sâna, an tasân kha Jona chung a chuma.
- ⁸Khanchu, a kuang khan, “Hi thil saloi ei chung a ichum hi tu sika ma ni, nin hril ro, nang kin ngên; imo ni sintho? khôtaka hong mo ni ini? Kho rama om mo ni ini? i nam mo ni ini”? an tia.
- ⁹Ama khan an kuang, “Hebrai mi ki nia; tuikhanglian le rammual siamtu Rengpa, irvân Pathian kha ki chi”, a tia.



¹⁰Khan, mihai khan an chi tak taka, a kuanga khan, “Khante, imo ni itho tâk”? an tia; a hril tâk sikin, mihai khan Rengpa makung ata a irot irhmang a nih ti an inhriat tâka.

¹¹Khanchu, a kuang khan, “Ei ta hrangin tuikhanglian hi a’rsok loina hrangin, ni chung a imo kin itho hrang”? an tia, tuikhanglian kha a’rsok tîr tîra.

¹²Khan, ama khan an kuang, “Nin dom unglân, tuikhangliana hin nin zuanpai roi; khanchu tuikhanglian hi nin ta hrangin irsok ta no ni: keima sika nin chung a hi phâivopui irkhêltak hi a itho a nih ti kin hriat tâk a ni”, a tia.

¹³Khannisianlân, mihai khan muanga kîr hrangin an ngên ngut nguta; aniachu thei mahaia: tuikhanglian lak kha an chung a a’rsok si sita.

¹⁴Khasika khan Rengpa kha an insama, “O Rengpa, hi mi hringna sika hin nir hmangtir no’n lân, mi thiam thisen mô kin chung a irngat thut loi hrangin nang kin ngên, O Rengpa, nang kin ngên, nangin ni nuamlam anga ni itho a ni”, an tia.

¹⁵Khanchu Jona kha an indoma, tuikhangliana khan an inzuanpai tâka; khan, tuikhanglian irsok but but kha a hong boi tâka.

¹⁶Khanchu, mihai khan Rengpakha a satêrengin an chi tâka; Rengpa kuanga khan irbôlna an inhlana, chong an inkung tâka.

¹⁷ Khan, Rengpa khan Jona inlem hrangin nga lian tak a lei inkung tâka; kha nga sînga khan Jona kha sîn thum le zân thum a oma.

Jona 2

Jona lômthu hril chongchaina

¹Khan, Jona kha nga phîng sîng ata kha, Rengpa a Pathian kuanga a chongchaia.

²Hiang hin a ti: “Kin takna sikin Rengpa kha ki koia, Ama’n a ni sâma; Seol phîng sîng ata kin sama, Nangin ki’rhâi nin hriata.

³Inthûk taka, tuikhanglian sîngrîla khan nangin ni ni pai lûta, Tui irsok le ni tui irsônhai murdi khan a ni vur thiaia.



⁴Khan, ‘Ni mithmu ata pai suak ki nia; Khannisianlân, ni biak in irthiang tiang irhei nôk ki ta,’ ki tia.

⁵Tuihai khan ki hringna dênin a ni hual vêla; Tui inthûk kha ki vêlin a oma; Sûlhai khan ki lu a ituam vêl a ni.

⁶Tâng bul tôp rêthaia khan ki chuma; Irnêng khan kumkhua hrangin a fenahai khan a ni khâr khuma; Aniachu nangin, O Rengpa ki Pathian, khurpadop ata kha ki hringna ni ilâk suak a ni.

⁷Ki hringna ki sûnga a’rzal lai khan, Rengpa kha kin hriat maia: Ki chongchaina kha ni biak in irthianga ni kuang a zuang itung a ni.

⁸Thil chanlamboi milak mai mai ngaisaktuhai khan anni iamomna kha an irheisan a ni.

⁹Kei rêkin chu lômthu insîrna irhâi leh ni kuang irbôlna inhlân ki ta; Thu ki inkung tak kha hlensua ki ti. Saninhringna kha Rengpa ta a ni,” tiin.

¹⁰Khan, Rengpa khan nga kha thu a pêka, Jona kha muanga a hong insuak tâka.

Jona 3

Jona’n Rengpa thu a zôm

¹Khan, Rengpa thu kha Jona kuang a zuang tung nôka,

²“Thoiin lân, Ninevi khua, khopui roiinpui taka khan fe’n lân, thuhiril hrang nang ki iti kha tânginsampui ro,” tiin.

³Khanchu, Jona kha a thoiã, Rengpa thu ang khan Ninevi khuaa a fe tâka. Ninevi kha khopui roiinpui tak, a lian lam chu sîn thum fena a nia.

⁴ Jona kha sîn khat fe dôr khopui sûnga khan a hong lût irphut phota, “Atûn ata sîn sômminlia, Ninevi hi irhmangtir nih a ti,” tiin a khêka.

⁵Ninevi mihai khan Pathian an iam tâka; bu nghei hrang tiin an inpuanga, an laia a lian tak ata a chîn tak dênin bora puan an sil tâka.



⁶Kha thu kha, Ninevi khuaa inlaltak mikuara inhriat a ni tâka, a rêngtoihmun ata kha a thoia, a rêng puan kha a hlîkpaia, bora puan a sila, irvuta a toi tâka.

⁷Inlaltak le a milianhai thupêkin inlaltak khan Ninevi kho sûnga thu inpuangin a suaka, “Mihriam mani, sa mani, sehrât rual mani, belra rual mani hai khan ite irtem no ri se: fâkin tui khom in no ri sehai:

⁸Mihriam le sahai khan bora puan sil ualhai sianlân, a satêrengin Pathian insam ri se: a ni, mi tinin mâni lam saloi le an kuta sin sualna kha irheisan ri sehai.

⁹Kin irhmang lina hrangin, Pathian kha kîrin, lungrîl irheitirin, a ninginmurna irkhêltak ata kha zuang irheikîr no nih ti tu’n mo an hriat?” tiin.

¹⁰Khanchu, Pathianin an thilthohai kha enin, a lampui saloi kha an irheisan tih a hmua; an kuang a lei insîr tâk angin, tho a itum thil saloi kha Pathian khan ar hei kîra; a itho ta loi a ni.

Jona 4

Jona lungchuk lina le Pathian za’rngaina

¹Aniachu, khataka khan Jona a milunghoi tak tak maka, a ning an mur tâka.

²Rengpa kuanga khan a chongchaia, “O Rengpa nang ki ngên, hi hi kin rama ki om laia ki insîr kha mo ni ma? Hi sika hin Tarsis tiang ki intânpat a ni kha te: nang chu lungkhamna sip, thil saloi tiang ata irheikîr ngai ni nih ti kin hriat.

³Khasika khan, O Rengpa, atûn ki hringna hi ni lapai pe hrangin nang ki ingên a ni; keima hranga hin dam nêkin thi a isa ual a ni,” a tia.

⁴Khan, Rengpa khan, “Ni ninginmurna hi ni itho indik ma ni?” a tia.

⁵Khanchu, Jona kha khopui ata kha a fe suaka, khopui sak tiang khan a toia, khataka khan omhmun a khuara, khopuia thil hong tung hrang kha hmu tumin a hnuai irhlîma khan a toi chian tâka.



⁶Khan, Rengpa Pathian khan ûm a lei inkunga, kha kha Jona chung a'rzâmtira, an takna ata sansuak hranga a lu zâr irhlîtu hrangin. Khanchu, Jona kha ûm sika khan a sân a lôm tak tak ta.

⁷Aniachu Pathianin, zîng nôk kôl a hong irsalin, irnge'n ûm râng kha a fâka, an thêmtira.

⁸Khan, hi hi a nia, misa a hong suakin chu Pathianin nisua tianga phâivua lum a lei inkunga; khan, misa khan Jona lu kha a ema, a chinginrîla, a ta hrang khan thi a ngên tâka, “Keima hrang hin hring nêkin thi a sa ual,” a tia.

⁹Khan, Pathian khan Jona kuang, “Ûm chungchâng thua ni ninginmur hi ni tho indik ma ni?” a tia. Ama khan, “Thipui hrang dôra ki ninginmur hi, ki iti indik a ni,” a tia.

¹⁰Khan, Rengpa khan, “Ni isôlpui loi, ni irsôntir khom ni ual loi, zân khat thila a hong oma, zân khat thila irhmang le ûm hi nin rena:

¹¹Ninevi khua, khopui roiinpui tak, a sînga mi nuai khat le sînghni nêka tam, an chang tiang le vei tiang khom sen thei loihai le sa pâl tamtak omna hi, ki ilunginkham loi hrang ma ni?” a tia.



Mika

Mika 1

¹ Juda rêng Jothama, Ahaza, Hezekia hai inlal laia Moreset mi Mika kuangRengpa thu zuang tung, Samari khua le Jerusalem khua chungchâng thu a ihmu chu.

²Nangni nam murdihaio, nin rêngin inhre unglân; O irnêng le a sũaga om murdihaio, irngai roi: RENGPA PATHIAN, Rengpa kha a biak in irthiang ata nangni doiin nin chungthu inhretu ni ri se.

³Irngai u ta, Rengpa kha a hmun ata zuang suakin zuang chum a ta, irnêng hmun irsânghai kha a ichîl hrang a ni.

⁴Mei kôla khuaihlu ang le rôla chêntâk ang dênin, tânghai kha a hnuaiia khan zôi an ta, irhônghai kha hong kik chat a ti.

⁵Hihai murdi hi Jakoba-hai tho'nsualna sika le Israel in sũang mihai sualna sika a ni. Jakoba-hai tho'nsualna kha imo a ini? Samari a ini loi ma ni? Juda hmun irsânghai kha i ma ni? Jerusalem a ini loi ma ni?

⁶Khasikin, Samari kha sũala thil siat om khôm angin siam ki ta, grep irhuan hmun ang dênin: khan, kha hmuna lunghai kha ivadung rôl tiang inhlumpai ki ta, a lungphûmhai kha inlang ki ti.

⁷A millim siam chop murdihai kha inkhoi irnôi chit ni a ta, a notizuar hlohài kha meia hâlpai zit ni a ta, notizuar mana a ilâk khôm a nia, a notizuar mana pe nôk an ti.

⁸Hi sika hin chap ki ta, khêk rak rak ki ta, irkhek le silkai boiin om ki ti; sihalhai angin inrung ki ta, va ringseihai angin inhrâm ki ti.

⁹A sâbêhai kha indam thei ni ma: Judai ram a tung rak tâka; ki mihai, Jerusalem ten khom a itung a ni.

Râlhai Jerusalem an hong tung

¹⁰Gath khuaa hril no unglân, chap viat no roi: Beth-le-Afra khuaa khan vâiphina irbual roi.



¹¹O Safir hmuna omhaio, silkaiboi le inzak takin fe irhmang roi: Zanan hmuna omhai chu hong suak ngam no nihaia, Beth-ezel mihai chu kamangin an inhrûma, kha kha nin inhriatin chu zôk thei ual bîk chi ni mah ti inhria nin ti.

¹²Maroth mi khan dongtum sa chang a nghâkhmo tak tak a ni, Rengpa kuang ata thil saloi kha Jerusalem mikot kôl dênin a zuang chum thâk sikin.

¹³O Lakis mi, tâli kha sakor hrâta khan kop ro; hi hi Zion nâinu سوالنا bulpui a ni, Israelhai tho'nsوالنا kha nangmaa hin a lei iom a ni.

¹⁴Khasikin Moreset-gath kuanga khan inthâna thilpêk ni ipêk hrang a ni; Akzib inhai kha Israel ram inlhai ta hrangin huangna ni a ti.

¹⁵O Maresa mi, nangma neitu hrang ni kuang la hong hruai ki ti: Israel roiinpuina khan Adulam va tung a ti.

¹⁶Irziat inkolin lân, ni nâi inditom takhai sikin ep inkol ro: râikoso angin irvoi inkol intam ual ro; ni kuang ata sala hruaiin an om tâka.

Mika 2

Inriang dengitheitirtuhai dongtum

¹An zâlmuna pualoina ngaituatuhai le thil saloi ngaitua suaktuhai kha an chung a rik e! Zînga khua a hong vârin an itum ang ngei khan an tho tâka.

²Mi dang loihai an irzuka, an lâkpai pehaia; inhai an irzuka an lâk tâka; mi le an in sîng mihai, mi le an irchonhai dênin an ihnuaisia a ni.

³Khasikin Rengpa'n hiang hin a ti: irngai ta hi in sîngkua chung a hin thil saloi ki ingaitua a ni, khatak ata khan nin ring la sonpai mak chêia, lâripâk takin fe ta no chin ni: zoro saloi a ini hrang a ni.

⁴Kha nikhuaa khan nangni demin chongirkhekna thu siam an ta, chap hla beidong om insamin, ilong zitin kin iom tâk a ni hi te: ki mihai dongtum an danglamtira: ki kuang ata a isonpai tâk a ni hi! Tehel hmanghai kuang kin lei sem indarh tâk a nih ti an ti.



⁵Khasikin Rengpa mihai inkhômhai laia khan, tasâna hruia irkhit petu tûte nei no chi ni.

⁶Thu hril no ro, tiin an insîr ngai. Hi mihai kuanga hin thu hril no nihai: hrilinsiatna kha irkiang no ni.

⁷O Jakoba in sâng mihaio, Rengpa irtha kha tuangdiarna a irsam ma ni? Hi hi a sintho mani ti hrang ma ni? Dik taka om ngai chung a khan ki thuhai hin thil sa a itho loi ma ni?

⁸Khannisianlân, ki mihai kha atûn laia, râl angin an hong inding suak a ni: irdoi nuam loa lungthi taka chai irvâkhai ata an silkai songkol irfualhai an hlîk pea.

⁹Ki mi nupanghai kha an in hoitak ata nin inhnót suaka; an nâipangtehai ata ki roinpuina kha nin lâkpai ving tâk a ni.

¹⁰Thoi unglân, fe irhmang roi; hi hin zôkna om ma; nin pualoina sikin insiat zit ni a ti.

¹¹“Uain le zu luang a ti,” tia milak hril deipu irvâk vêlhai kha, hi mihai deipu ni le irhoi an ni.

¹²O Jakoba-hai, nin rêngin nangni koi buk ngêt ki ta; Israel mi la omsunhai kha hruai khôm ngêt ki ta; Bozra khuaa belra angin siakhôm ki ta: sa pâl an hloisûl hmuna om ang maiin, mipui an ni sikin irse mur mur an ti.

¹³Suk thengtu kha an matona hong a fea; an suk thenga, mikot dênin an fe thiaia, khataka khan an ife suak a ni; khan, an rêng kha an maton tiang a fea, Rengpa khan an maton a hruaia.

Mika 3

Mika'n Israel hruaituhai a hril mualinphoi

¹O nangni, Jakoba-hai hruaituhai le Israel sângkuua roirêltuhaio, irngai unglân, nangni ki ngên a ni: roirêl dân kha nin inhriat hrang ni no ni mo?

²Thil sa nin khôkmâka, thil saloi nin irngai poimoa, an vun nin hlîkpaia, an ru ata taksa nin khok thâka;



³Ki mihai hme nin fâk saa; an vun an hlâipaia, an ru an inkhiakpaia: a ni, bêla suang hrang angin an irchan chita, hmê irtok bêl sûnga hme irchan chit ang dênin.

⁴Kha tika chu Rengpa insam an ti, khannisianlân anni kha sâm no ni: a ni, kha tika chu an thil thoa an itho insa loizia ang takin, annihai ata a hmâi thup a ti.

⁵Pêk hrang neihai kuang, irtharngamna tia khêka, pêk hrang nei loihai irdoina om a ti, tia insîrtu deipuhai khan ki mihai an huanga, an chungchâng thu Rengpa'n hiang hin an sîr:

⁶Inlârna nin hmu loina hrangin nin kuang zân hong tung a ta; pânzia nin en thei loina dôrin nin kuang inthimna zuang om a ta; deipuhai hranga khan nikhua liam a ta, sîn khom an chung a khan nikhua'n thim ni a ti.

⁷Hmutheituhai kha inzak an ta, pânzia entheihai kha mualinphoi an ti; a ni, an rêngin an bâi hîp an ta, Pathian sâmna om maka.

⁸Khannisianlân Jakoba-hai kuang an tho'nsualna inhriattir hrang le Israelhai kuang an sualna inhriattir hrangin Rengpa irtha sika thilthotheidahai roirêlnahai le hrâtnahai khan ki isip tâk a ni.

⁹Nangni Jakoba-hai sûngkua hruaituhai le Israel sûngkua roirêltu, roirêlna dik intira, dikna tinrêng irlettir paituhaio, hi hi irngai unglân nangni ki ngên a ni.

¹⁰Zion kha thisenin an sina, Jerusalem kha siat zoina'n.

¹¹Khataka hruaituhai khan fâkinrûkna sabeiin roi an rêla, khataka ochaihai khan hlo sabeiin an irchûtira, khataka deipuhai khan sum sabeiin pânzia an ena: khaang dôr khom khan Rengpa kha ei laia a iom loi ma ni? Thil saloi ei chung a zuang tung no ni tiin Rengpa chung a nin irngat a ni.

¹²Khasikin Zion kha nangni sika khan, loi anga lâk nôk ni a ta, Jerusalem kha thil siat om khôm ni a ta, biak in omna tâng kha ramhnuai hmun irsâng ang ni a ti.



Mika 4

Rengpa roirêl zoro irngeina

(Isa 2.1-4)

¹Khannisianlân, nikhua hnungkhônhaia chu hiang hin ni a ta, Rengpa nin omna tâng kha tâng lian chunghaia khan indetin om a ta, tâng tehai chunghaia khan chôiirsângin om sa ti; kha khan chi tinrênghai kha fe mur mur an ti.

²Khan, nam tamtakhai kha fe an ta, zuang kîr unglân, Rengpa tânga, Jakoba Pathian ina khin hong fe ei ti; khanchu ama'n a lampui thurchihai kha nir chûtir a ta, a fena lampuihaia khan fe kin tih ti an ta: Zion ata kha dân thu a zuang isuak hrang a nia, Rengpa thu kha Jerusalem ata a zuang isuak hrang a ni.

³Khan, ama khan chi tamtak kêra roirêl a ta, hlataka nam hrât tak khom halirchu a ti; khan, an khandaihai kha âlkaina hmor irzumhai incher an ta, an ufeihai kha thei kunga tanna chem kolhaia incher an ti: nam dangin nam dang chunghaia khandai irlek ta no nihai, irdoi dân khom irchu ual ta no nihai.

⁴Mi tinhai kha an grep kung hnuaia le an theipui kung hnuaia toi ual an ta; tukhomin chi no nihai: Sipaihai Rengpa bâia khan an sîr tâka.

⁵Nam tinin mâni pathian seng biak an ta, eini khom Rengpa ei Pathian kha kumkhua'n biak ei ti.

Sal intângna ata Israelhai kîr nôk hrang thu

⁶Rengpa'n hiang hin a ti, "Kha nikhuaa khan ke'nbâi bukkhôm ki ta, irzûlpaia om le ki intaktira om kha buk ki ta;

⁷Ke'nbâi chu a thi ban siam ki ta, hlataka inhnotpai kha nam hrât taka siam ki ti: atûn ata chu Zion tânga kumkhua'n Rengpa khan an chunghaia roirêl a ti.

⁸O nang, sa rual kul, Zion nâinu omna tâng ni kuanga zuang tung a ta; a ni, inlalna masa kha zuang tung a ta, Jerusalem nâinu inlalna kha.

⁹Itho sika mo ni ichap rak rak? Ni sûnga inlaltak a iom loi ma ni, nang an kung petu a ithi mani ta, nupang nâiha anga natna'n nang a ikop tâk ma ni?



¹⁰O Zion nâinu nupang nâiha ise nâi nei hrang angin a na tuangin lân, irvei ro atûn khopui ata fe suak ni ta, rama om ni ta, Babulon ten khomin a ife hrang a nia; kha khan sansuakin om ni ta, kha khan ni râlhai kut ata Rengpa khan nang sansuak a ti.

¹¹Atûn nam tamtak nangma doiin an irbuka, porinchetirin om sianlân, ei mit hin Zion chung a irzuk lam kha hmu ri se, an tia.

¹²Khannisian Rengpa ngaituanahai kha inhre mahaia, ar fûktir kha inhre thiam mahai: hruizôla bumût siakhôm angin anni kha a bukkhôma.

¹³O Zion nâinu, thoiin lân chîl roh: ni ke kha thîr angin siam ki ta, ni ke zapha hmorhai kha dâr angin ki isiam hrang a ni: khan, chi tamtakhai kha zêm phiar ni ti; an thil hlep Rengpa ta hrangin ser indang bîk ni ta, an sum kha irnêng pumpuia Rengpa ta hrangin ser indang ni ti.

Mika 5

Bethlehem ata roirêltu Pathianin pêk an kung

¹Sipai pâlhaio, irpan irhlôm roi, a nir huala, Israelhai hruaitu kha a bianga khianghrolin an izêm a ni.

²Khannisian nang Bethlehem Efrata, Juda rama sâng tamtakhai laia kopa a sân chîn khomin lân, nangma ata hi Israelhai roirêltu hrang kha ki ta hrangin zuang suak a ta; a zuang suakna kha tianlai ata le kumtuang ata a ni.

³Khasikin nâiha irveitu khan a nei mâka chu anni kha irheisan a ti; khanchu a nâi la omsunhai kha Israela irchihai kuang kîr nôk an ti.

⁴Ama kha chu ngîr a ta, Rengpa hrâtna'n a sâ rual kha infâ a ta, Rengpa a Pathian irhming roiinpuina ngei khan: khan, anni kha zôkin om mai an ta; ama kha irnêng mong dênin a iroiinpui hrang a ni.

⁵Khan, hi mi hi ei irngeina ni a ta; Assuria mi kha ei rama hong a ta, ei rêng inhai a hong sir tika chu, ama doi hrangin belrapu sari le mi roiinpui kiriat inthang suak ei ti.



⁶ Assuria ram kha khandaiin insiattir an ta, Nimroda ram kha a lûtnaa khan insiattir sa a ti: khan, ama khan, ei rama Assuria mi a hongga, ei ram ten a hong sir tika, ama ata khan ni sansuak a ti.

⁷Jakoba-hai mi la omsunhai kha chi tamtakhai laia Rengpa ata irdo tâk ang le hloisûl chungga rotho angin om an ta; kha khan mihriam nghâk maka, mihriam nâipasalhai ngaisak ual ma.

⁸Jakoba-hai mi la omsunhai kha namhai laia le chi tamtakhai laia khan ramhnuai sahai laia kâmkeibaknei ang le belra pâl laia kâmkeibaknei vânglai angin om a ta; kha khan a fe theng photin chu, a sirphaa, an pot thêra, a santu hrang khom tûte om mahai.

⁹Ni kut kha nangma doituhai chungga irlek sianlân, ni râl murdihai kha inboipaiin om ri se.

¹⁰Kha nikhuuaa khan hiang hin ni a ti, Rengpa'n a ti, nangma ata ni sakorhai inboipai ki ta, ni tâlihai insiat ki ti:

¹¹ni ram khopuihai kha inboipai ki ta, ni kulpui murdihai kha insum ki ti.

¹²Ni kut ata dôitheihai inboipai ki ta; pânzia entheihai nei ta no chi ni.

¹³Nangma ata ni millim siam chophai le ni lungphunhai kha inboipai ki ta; ni kut suak thil kha biak ta no chi ni.

¹⁴Nangma ata mi Asera-hai kha inpot suak ki ta: ni khopuihai kha insiat ki ti.

¹⁵Khan, thu irngailoi namhai chungga khan ninginmurna le milung kângna'n phuba lâkna puiinhlingtir ki ti.

Mika 6

Israel ata Rengpa thu poi nei

¹Rengpa thu'nsîr kha atûn hin irngai roi: thoiin lân, tâng lian makunghaia khan irsêlpuiin lân, tâng tehai khan nir hâi irngai ri sehai.

²O tâng lianhaio, Rengpa sêlna kha irngai unglân, nangni irrêng irnghatsan dethaio, irngaitua roi. Rengpa kha a mihai leh an irsêla, Israelhai kha dem a ti.



³Ki mihaio, nin chung a imo ki ti tak? I ang lamin mo nangni ki insôltir? Ni hong sêl u ta.

⁴Aigupta ram ata kha nangni ki hruai suaka, suak ata nangni ki'rtansuaka; nin mân tiang Mosia, Arona-hai le Miriami hai ki zuang itûr kha.

⁵O ki mihaio, Rengpa thil tho fel kha nin inhriat theina hrangin, Moab rêng Balaka thu'nkung le Beora nâipa Balaama'n a sâm dân, Sitim ata Gilgal dêna thil omziahai kha, atûn hin inhre mai roi.

⁶I leh mo Rengpa makunga khan zuang ki ta, Pathian inchungtak makunga ki ikûn hrang? Hâlivôm thilinhlanhai, sehrâtte kum khat mihai le a makunga khan ki ihong hrang ma ni?

⁷Rengpa kha ki belra chal sâng tamtak mani, sahriak dung sîngkhathai manin milung a inchuk hrang ma ni? ki tho'nchâina sikin ki nâilutûr kha ki pêkin, ki'rtha sualna sikin ki taksa ra kha ki ipêk hrang ma ni?

⁸O mihriam, satna kha a inentir tâk a ni; Rengpa'n nangni a inphût kha i ma ni? Dik taka tho le lungkhamna irngaiinna le ni Pathian leh thuhnuairôl taka lêngsuam a ini loi ma ni?

⁹Rengpa khan khopui kha a insam a ni, vârna nei mi khan nir hming kha chi a ti: hêmvuak leh a sinsiamtu kha inhre mai roi.

¹⁰Mi sia ina khan sualna irchon kokhai kha a la omin, irkhîna dikloi intirom tak kha a iom ma ni?

¹¹Irtêna dikloihai le hmarsa rik dân dôhai leh khan irthiang ki ini hrang ma ni?

¹²khataka mi irchonghai kha manêpnain an sipa, khataka omhai khan milak an thoa, an bân sînga an milei kha huangna'n an ihmang a ni.

¹³Khasikin kei khomin nataka popin nangni ki izêm tâk a ni; ni sualnahai sikin nangni ki insiat chit tâk a ni.

¹⁴Fâk kha fa ni ta, khannisian khop no chi ni, ni phîng hong châm mai a ti, thilsia insa ni ta, inzôk ual thei no chi ni, ni inzôk sun khom irdoinaa siat a ti.



¹⁵Song ni ta, khannisian ât no chi ni: oliv rahai kha sir inzôî ni ta, khannisian a hriak kha irthu no chi ni; grep sôminzung khomin lân, a uain kha in no chi ni.

¹⁶ Omria thu'nkunghai kha vong mai a nia, Ahaba sêngkua thiltho murdihai leh an inkungnahai khan nin ife a ni: khanchu hmun irama nangni ki isiam hrang a ni, a sênga omhai hi nuiza siamna'n om an ta, khan, ki mihai irhming siatna kha pêl ni ti.

Mika 7

Israel tho'nsualna

¹Ki chung a zîng bâka! fûrpui thei an irhmal khôm zoro laia om ang le grep lâk zoro laia grep irhmal la hrang ang ki nia: a ra irku fâk hrang om ma; ki hringna'n theipui hmin masa a irzuk a ni.

²Pathian uksak mi chu irnêng ata ar hmanga, mihriam laia mi diktak zel om mahai: thisen insua hrangin an inchân zita; mi tinin mâni urêng kha lêngin an ivôr a ni.

³thil saloi thôna hrangin an kut kha a theithiama, hruaituhaiin inphût an neia, roirêltuhaiin fâkinrûkna an ngêna, mi lianhaiin an inuam tak soal an hrila, an inthurual irhlôm a ni.

⁴An laia mi satak kha buar ang a nia: mi dik tak kha sûl ilhling nei nêkin a siat ual: ni ivêngtuhai nikhua a fanga ni om nia ngei kha a hong tung ta, kha kha an lunginzîngna nikhua ni a ti.

⁵Rual kha iam no'n lân, hruaituhaia iamna irngat no roh: Ni rôpsuama om nu ata kha ni bâi mikothai kha vêng insa roh.

⁶Nâipa'n pa irhming an siattira, nâinu'n a nu a doia, moiin a pi a doia; mihriam râlhai kha ama in sêng mihai dên an ni.

Rengpa'n saninhringna a zuan tung

⁷Keima rêkin chu Rengpa tiang en ki ta; ki saninhringna Pathian kha nghâk ki ta; ki Pathian khan a ni irngaitua hrang a ni.



⁸O ki râl, ni manêp mai no ro: ki tûk tika khom thoi nôk ki ti: inthima ki toi khomin Rengpa kha ki ta hrangin vâ ni a ti.

⁹Rengpa chungã thil ki tho'nsual tâk sikin, a milung hoi loina tak tak kha pêl ki ti, ki chungchâng nin sîrpuia, ki ta hrangin roirêlna kha a tung mâka chu: vâra ni hruaisuak a ta, khan, a felna kha hmu ki ti.

¹⁰Khanchu ki râl kuang, khôn mo Rengpa ni Pathian, titu khan kha kha hmu a ta, mualinphoina'n ama kha irkhu a ti. Ki mithai hin ama kha en a ta; atûn chu kholai dialdôk anga sirbe ni ta a ti.

¹¹Ni kul banghai siamna nikhua hranga chu! kha nikhuaa khan thu'nkung kha hlatak dêna irzattir ni a ti.

¹²Kha nikhuaa khan Assuria ram le Aigupta khopui ata, Aigupta le vadung dên rakin, tuikhanglian le tuikhanglian kêr ata le tâng le tâng kêr ata kha ni kuang hong an ti.

¹³Khaang dôra khom khan ram kha, a sînga lênghai sik le an thiltho ra sika khan inramtir ni an ti.

Israel hrangin Rengpa khonzâna

¹⁴Karmel tâng kêra ramhnuiaia beidong taka om, nir chon dong belra pâl, ni mihai kha ni hêmvuak hmangin infa'n lân: tianlai ang khan Basan le Gilead infa'n om ri sehai.

¹⁵Aigupta ram ata ni fe suak lai ang khan, a kuang thil irkhêl takhai inentir ki ti.

¹⁶Nam tinin kha kha hmu an ta, an thilthotheina murdi kha inzakupui an ti: an hmûr hîp an ta, an mikuar sêt a ti.

¹⁷Mirûl angin pil inliak an ta; irnênga inboka irvâka fehãi angin an omna khur ata khan inthing pumin hong an ta: Rengpa ei Pathian kuanga khan chi pumin hong an ta, nangma sikin chi an ti.

¹⁸Nang angã pualoina ngaidamtu le irchon dongtum la omsun, tho'nsualna lôipaitu Pathian tu mo om? A ninginmurna kha vong mai ma, lungkhamnaa a lôm tak tak ngai sikin.



¹⁹Irhei kêr nôk a ta, ei chungá lungkhamna nei a ti; ei pualoinahai kha a ke hnuaia sirpha a ti: nangin an sualna murdihai kha tuikhanglian mong inthûk takhaia khan pai lût ni ti.

²⁰Tianlaia ei puhai kuang chong nin kung tâka, Jakoba kuang thutak le Abrahama kuang lungkhamna kha hlensua ni ti.



Nahuma

Nahuma 1

Ninevi chungá Rengpa ninginmurna

- ¹ Ninevi kua puakrik kha, Elkos mi Nahuma'n inlârna a ihmu thu chu,
- ² Rengpa kha nunse Pathian le phuba lâk hmang mi a ni; Rengpa khan phuba a lâka, ninginmurna'n a isip a nih; Rengpa khan a doituhai chungá phuba a lâka, a râlhái ta hrangin ningmurna a irtingtir a ni.
- ³ Rengpa chu a milung ar uaia, a satêrenga thil thothei a nia, mi sual chu thiam inchantir zel no ni; Rengpa khan kêllaiher le phâivopuia lampui a nei, sũmhai chu a ke vâiphin a ni.
- ⁴ Tuikhanglian kha a halirchua, an kang inchârtira, tuidung tinrêng hai khom an kangtir zoia: Basan ram le Karmel tâng kha a châr zoia, Lebanon tâng pârhai kha a ichuai a ni.
- ⁵ Tâng lianhai kha ama sikin an inhnînga, tâng chînte tehai kha a hong zora; a makunga khan irnêng hi an thinga, rammual le a sũnga om murdihai leh khan,
- ⁶ A milung hoiloina makunga khan tu mo ngîr thei hranga, a ninginmurna irkhêl tak khan tu mo om thei hrang? A ninginmurna kha mei anga bunpai a nia, lungpuihai kha a irnôitir chit a ni.
- ⁷ Rengpa kha a saa, chardong nia kul det a ni; amaa an iamna irnghattuhai kha an hriat.
- ⁸ Ama doituhai rêk chu tuilian irkhêl tak hmangin inboitir zit a ta, a râlhái kha kua inthima irzûl lût a ti.
- ⁹ Rengpa doiin imo nin ingaitua? Irhmang ripna nangni a intungtir hrang a ni; phuba la nôk nang ta no ni.
- ¹⁰ Ilhling râng anga omin, An uain in khan inchie indui ual angin om khom sian, ilhlingbuk angin le fapôl châr anga irhmangtir zit la ni an ti.



¹¹Nangmaa suak mi inkhat Rengpa irdoipuia thil sual ngaituatu, pualoina chong irbepuitu a om,

¹²Rengpa khan hiang hin a ti: “An hrât thei dôrin hrâthai khomsian, tam khom tamtak nihai khom sian, kha tena khom khan sâtpaiin om an ta, irhmang an ti. Nang lei intaktir ta khom inlân, nang intaktir ta no ning.

¹³Atûn chu ni kuang ata a ringkol kha inkhiakpai ki ta, nangma khitna hruihai kha insatpai zit ki ti.

¹⁴Rengpa khan ni chungchânga thu a pêka, nir hming irput hrang irchi nei no chi ni. ni pathianhai in ata millim siam chop le millim sûnhai kha inboipai ki ta; ni thân siam ki ta; ni sual sikin,” tiin.

¹⁵Tânghaia thurchi Sa intunga, irngeina thu tânginsampuitu ke kha en ta! O Juda, ni kûthai kha serin lân, ni thu’nkunghai kha sua ro: mi pualoi khan nang paltan nôk ta no ni; irhmangtir chit a ni tâka.

Nahuma 2

Ninevi siat thu

¹Sukkhoi irnôitu kha ni makunga a zuang chum e: kulpui kha enkolin lân, lampui kha enkol ro; ni kong inngartirin lân, ni sinthotheina kha hrât takin siam insa ro.

²Israelhai roiinpuina angin Jakoba-hai roiinpuina kha Rengpa khan an dingtir nôka: inrongtuhai khan anni kha an inrong zoi tâka, an Grep ônhai kha an insiat zoi tâk a ni.

³A mi hrâthai pho kha thisen a nia, mi huaisenhai kha sen inlârin an irbela; an irsinsiamna nâa khan tâlihai kha kâpa thîr irtêkin a’rtêk zor zora, ufeihai kha irkhêl takin a’rtêk zor zor a ni.

⁴Tâlihai kha kholoia an intân mur mura, lamlian irzathai khan an irsuk mer mura: meiser angin an inlanga, kôlirlek angin an intân zut zut a ni.

⁵A mi lianhai kha a koi suaka: an fe’n rual kha an tûka; kul bang tianga pan kha an irhnota, thil irdîpna hrang an siama.



- ⁶Vadung mikothai kha inhong a nia; rêng in kha inboipaiin a oma.
- ⁷Khan, rêngnu Huzzabi kha korongboiin an rotpuia; a suaknuhai khan an rôp irchûmin vasu inkur ang dênin an chapa.
- ⁸Tianlai ata kha Ninevi khua hi chu dîl ang a nia: khannisianlân an intân irhmanga; ngîr roi, ngîr roi, tiin an khêka; khannisian tûte irheikîr mahai.
- ⁹Sumru sumhai kha lapai unglân, rângachak sumhai chu lapai pehai roi. Thil irtikkhôm le bungrua sa murdi roiinpuizia khan mong nî nei mah.
- ¹⁰Inrongtirin a oma, a rong chiana, a iram a ni: an milung kha a zôi tâka, an irkhûkhai kha a ngara, An konghai khom a na zit tâka, an hmêlhai khom a dông zoi zit tâka.
- ¹¹Tûte inchitir loia an oma, kâmkeibaknei chahai, kâmkeibaknei puihai, kâmkeibaknei têhai an ichai vêlna, kâmkeibaknei irbu zôl le kâmkeibaknei têhaiin an fâkna hmun kha khôn mo a ini?
- ¹²Kâmkeibaknei chal khan a têhai ruk dôr an pot irnôia, kâmkeibaknei puihai hrang a sê thata, a khurhai kha saruakin an siptira, a'rbu zôlhai kha saruak inpot irnôiin.
- ¹³Sipaihai Rengpa khan, “Irngai ta, nang ki doi a ni, a tâlihai kha hâl khu ûl ûl ki ta, ni kâmkeibaknei têhai kha khandaiin irhmangtir a ta: khan, irnênga ni sa sê hi inmongtir ki ta, ni palaihai irhâi kha inhriat ni ta no ni,” a tia.

Nahuma 3

- ¹Thisen insua hmang khopui chu a chung a rike! milak le milongna'n a sip zita; an sa sê kha mong ni nei ma.
- ²Irzêmna irhâi hai, tâli intân mur murhai, sakor irchômhai, tâli intân mur murhai leh;
- ³Sakor chung chuang mi, sakora chuang mani, khandai irtêk zor zor mani, ufei irtêk zor zor mani, le mi that irzûl mer mur mani, miruak om mer mur mani le miruak chu mong nî zel nei ma, an ruakhai kha an sirpola;



⁴Khahai kha, notizuar hmêl sa, dôitheinu, a uirena sika nam zuara, a dôiuarna sika sêngkua zuartu uirena irkhêltak sika hong om a ni.

⁵SipaihaiRengpa khan hiang hin a ti: Irngai ta, nang ki idoi a ni; ni hmâitiang ni puan lîm ki ta; ni bomboina namhai kuang le mualinphoina rêng ramhai kuang nang inentir ki ti.

⁶Porinche intirom takin nang inthek ki ta, inzakom takin nang siam ki ta, mitin en hrangin nang sia ki ti.

⁷Khan, hiang hin ni a ta, nang a hmupu dôrin nangma sikin intân irhmang an ta, Ninevi kha kha a ihong ram tâk a ni: tu mo sîn hrang? kho tak ata mo ni ta hrangin irtharngamtuhai kin izong ta hrang? ti an ti.

⁸Nail vadung luang ihual Noamon, a kul hrangin tuipui hmang, a irkulna hrang tui dîl hmang nêkin ni ihrât ual ma ni?

⁹Ethiopia le Aigupta kha a hrâtna a nia, kha kha mong nî ten a inei loi a ni; Put le Lubim kha nangma changpuituhai an ni.

¹⁰Khaang dôr khom khan lâkpaiin a oma, sala an tânga: kholai tin monga a nâipang tehai kha an pai inthekpai pehai: a mihriam sahai hrangin tâ an sâna, a milian murdihai kha thîr hruia khitphiar an ni.

¹¹Nang khom inrui sa ni ta, irthupin om ni ta; râl sikin kul det song sa ni ti.

¹²Ni kul murdihai kha theipui kung, ra hmin masapu ang ni an ta: an hnîng photin chu a ra tâk chu a fâktu bâia a lût ngai.

¹³Irngai ta, ni sênga ni mipuihai kha nupang an nia; ni râlhai ta hrangin ni ram mikot kha an inhong hlunga: ni in kalna thîr tuanhai kha meiin a ikâng irhmang a ni.

¹⁴Hi hual vêla ni om sêng hrangin tui chôiin lân, ni kulhai indet ro: irtung omnaa khan fe'n lân, lung inchârna kha chîlin inhminin lân, pilrôngarna lungthu kha indettir roh.

¹⁵Kha khan meiin nang kâng irhmang a ta, khandaiin nang sât that a ta, khâiin chîmu an ifâk irhmang ngai angin fâk irhmangin om ni ti.



¹⁶Ni bepârhai kha irvân ârsi nêka tamin nin pungtira: thing irngê khan a mitha a phara, a vuangpai ang hin an boi zoi ta.

¹⁷Ni mi rênglukhum khumhai kha khâihmimse ang an nia, ni sipai hruaituhai kha phalbi laia khâi rual irchunghôm ang an nia. Aniachu misa a hong suaka, an vuang irhmanga, an omna hmun zel inhriat ni ma.

¹⁸O Assuria rêng, ni belra enkoltuhai kha an inmusu e: ni milianhai kha an irngama: ni mipuihai kha tânghaia an indarh zoia, hruai khômту tûte om mahai.

¹⁹Ni natna kha damna hrang om maka; a sân ni ipop liam a ni: nir hâi an hriatpu dôrin raifânin kut nang an inbên khuma; ni pualoina ata hi tu mo zôk thei hrang?



Habakuka

Habakuka 1

Habakuka'n dik loina a sêl

¹Deipu Habakuka'n puakrik a ihmu chu;

²O RENGPA, idôr ten mo nang insam ki ta, nir ngaitua loia ni iom hrang? Irmanêpna tiin nang ki koia, nangin saninzôk ual mak chea.

³Ithoa mo pualoinahai ni nin entira, thil dik loi takhai hi ni ien mai? irrokna le irmanêpna hai, ki makunga an om maia: Irkhalna le irngônahai a hong isuak a ni.

⁴Khasikin, dân thu khan ar fêna om thei maka, Roirêlna thu suak ual ngai ma: Mi felhai kha mi siahai khan an irhual vêla. Khasikin roirêlna kha dikloi takin a suak ngai a ni.

RENGPA sâмна

⁵ Nin vêla namhai kha en unglân, thîr mai roi, a sate'n ar khêl ti roi; Nin dam sângin thil lamkhat ki itho hi, Kha thiltho kha mi'n nangni hril khomhai sianlân, Taksôn viat no chin ni.

⁶ Irngai roi, Kaldai mi, Nam pualoi tak le milung inrem tak, lêngna hmun, an ta ni loi khom nei tuma hmun tina irvâk vêl ngaihai kha! ki ikaithoihai an ni.

⁷Anni kha ichiom tak le pangzaom tak an ni, An roirêlna le an roiinpuina kha, anni ata suak sa a ni.

⁸An sakorhai khom kâmkeite nêkin an chaninrang uala, khohloi tianga inêhai nêk khomin ichi an om ual; An sakor chung chuanghai kha an hong chum thiar thiara: A ni, an sakor chung chuanghai kha hlatak ata hong an ni; Irmupui âr chel hrang angin an zuang hrâta.

⁹Mi va rûnhai tumin an hong, irzuk takin mân tiang an irhei ngit a ni; bâli ang dôra tam salhai an chelhai ngai,

¹⁰A ni, rênhai khom an innuisana, Mi lianhai kha an ta hrang khan hmusitom an nia, kul det tinrênhai kha an innuisana, irnêng an inpônga, an lâkpai ngaia.



¹¹Phâivua ang dênin an hong inmuai, An fe theng zut zuta, Aniachu, an hrâtna kha pathianin an nei sikin, thiamno an ichang a ni.

Habakuka'n Rengpa a sêl nôkna

¹²O Rengpa ki Pathian, ki mi Irthiang, kumtuang mi ni ini loi ma ni? Thi ngai mak che. O Rengpa, nangin anni kha roirêlna hrangin nin thang tâka, O Lungpui, nangin anni kha ni sep hrangin ni inkunghai an ni.

¹³Nang chu sualna hmûna ngai nêpa mit irthiang ual nei ni ni, irtheimâkna kha ni ien theiloi a ni, Khasikin, pualoi taka thotuhai kha hmu chianin, Mi siain ama nêka fel ual a inlem zoi lai khomin, itho sika ni idâisan hrek ngai mo?

¹⁴Mihriam hi tuikhangliana ngahai le thilhring boka irvâk, An chung a roirêltu nei ual loihai anga ni isiam a ini loi ma ni?

¹⁵Ama khan irkuai leh an kai suakhai zita, A lênin a chelhaia, A lênkhang leh khan an tomhaia, khasikin raifânin a ilôm a ni.

¹⁶Khasika khan lên kuanga khan irbôlna an hlana, A lênkhang kuang mirimhoi a hâla, Anni sika a dongtum a hong liana, Fâk hrang a nei intam tâk sikin.

¹⁷Khasikin a lên kha inrong nôkin, Namhai that mai hrang chu a imâk loi hrang ma ni?

Habakuka 2

Habakuka kuanga Rengpa sâмна

¹Khan, ki'rdîpnaa ngîr ki ta, kul chung a chuang ki ta, ki sêlna thua khan ki kuang imo a iti hranga, Keiin mo ki isâm hrang ti hmu hrangin thîr ki ti.

²Khan, Rengpa khan hiang hin a ni sâma: "Inlârna kha irziakin lân, a teptu'n intân puma a tep thei dôra felin lung phêk chung a irziak roh.

³Inlârna hi zoro inkung sùng hrang vai a ni lelea, A king nikhua anai tîr tîra, mâkana ni no ni. Sôt viat khomsian nghâk ro; A zuang tung ngêt hrang sikin inhnung ual no ni.



⁴ En ta, mi lâiripâk khan a sual sikin tuang a ta, Mi dik rêk chu a iamom sikin zôk a ti.

Mi dik loihai tuang hrang

⁵A ni, kha ni loi khom kha, uain indu chu mi huang hmang, Mi lâiripâk, a ina om ngailoi mi a nia; Ama khan a'rzukna kha hremhmun angin an liantira, Ama kha thina ang a nia, inthâi thei zât ni mah. Mi murdihai a kuanga khan a bukkhôm, Nam murdihai kha a kuang a lâkkhôm ngai a ni.

⁶Hihai murdi hin ama chung a êrôna thu, intêkna thuvâr tôi “A ta ni ual loa inpuntir chu i dôr ten mo ainei hrang? Mâni le mâni bânda insiattu chung chu a va rik e! an iti loi hrang ma ni?

⁷Anni khan voikhat rengin nang hong insiattu hrang kha kaithoi an ta, Mân tiang hnung tiang nang nortu hrang kha hong kai harin, An ta hranga râlâk thil ni ini chian loi hrang ma ni?

⁸Nam tamtak ni longhai tâk sikin, Nam danghai khomin nang long an ti. mihriam thisen le ram le khopui le a sînga lêng hai chung a, Mihriam thisen le irmanêpna thil lei tho tâk murdi sika khan, nang khom chia la omsunhai khan nang insiat sa an ti.

⁹Mi sual kuta irthoka a zôk theina hrangin, a bu irsâng taka an sêp theina hrangin, a insûng ta hranga inlâpna dikloi lâktu chu a chung a rik e!

¹⁰Mi tamtak chu sât thâkin, Ni in sîng ta hrangin inzakna nin tung tâka; Ni hringna chung ngeia khom thil ni itho'nsual tâk a ni.

¹¹Banga irthokin lung kha hong khêksuak a ta, Thing laia pakhalâi khan a ihong don sa hrang a ni.

¹²Thisen insuaka khopui siam le, pualoinaa khopui indingtirtu chung chu a rik e!

¹³En u ta, namhai kha tep loa mâni an irlungkhama, chi tinhai khan mei ta hranga sin an isôl hi, Sipaihai Rengpa ata a ini loi ma ni?

¹⁴Tuikhanglian kha tuihaiin a isip angin, Rengpa roiinpuina inhriatna khan irnêng hi a isip hrang a ni.



¹⁵A tualbômhai kuanga in hrang pêka, khataka khan a tûr kha pola a silkai boi kha a hmu theina hranga inruitirtu chung chu a rik e!

¹⁶Roiinpuina hranga inzaknaa sip ni ni tâka, Nang khomin inin lân, silkai boiin om sa chian ro; Rengpa kut chang tiang khilât kha ni kuang zuang irllet a ta, Ni roiinpuina chung a porinche inzakna intirom kha om a ti.

¹⁷Lebanon chung a irmanêpna le, Ramsahai chung a insiatna, anni inchitirna khan, Ram le khopui le a sûnga omhai chung a leh, Mihriamhai thisen le thil lei tho tâk murdi sika khan, Nang chu nang a ikhum hrang a ni.

¹⁸Millim siam chop a siamtu'n a isin khan, imo inlâpna a inei hrang? Millim siam chop, milak irchutirtu ma mai a siamtu'n ama kut suak a iiam nôk hi, Millim chongtheilo hong siam hi imo a'rfêna?

¹⁹Thing kuanga khan, "Har roh," tia lung chong theilo kuang, "Thoi ro," titu kha, A chung a rik e! Hi hin nangni a irchutir hrang ma ni? En ta, rângachak le tangkaruaa inluan a nia, A sûnga phûk zel om viat ma.

²⁰Rengpa chu a in irthianga khan a oma; Irnênga mi murdihai kha a makunga khan dâihrek ri sehai.

Habakuka 3

Habakuka chongchaina

¹Sigion chung a deipu Habakuka chongchaina.

²O Rengpa, ni chong kin hriata ki chi tâka, O Rengpa, hi kum sûng hin ni sin tho inthar nôkin lân, Hi kum sûnghai hin inlârtir nôkin lân, Ninginmurnaa khan za'rngaina kha inhre mai roh.

³Temana ram ata Pathian a hongga, Mi Irthiang kha Paran tâng ata, A roiinpuina'n irvânhai khi a tuama, An pâknain irnêng hi a isip a ni.

⁴A'rtêkzia kha vâ ang dên a nia; A kut ata vâ irtêk a hong suaka, Ama khan a sinthotheina irthupin a om.

⁵A matona khan hripui kha a fea; A kehaia irthokin mei ir-al irling a fe suaka.



⁶A ngîra, irnêng kha an hnînga, Namhai kha a ena, an hnot indara; Kumkhua tânghai khom kha indartirin an oma, Kumtuang mualhai kha an kûn saa; A lampuihai kha kumtuanga hrang a ni.

⁷Kusan puan inhai dengthei tuang lai ki hmua; Midian ram puanzârhai kha an thinga.

⁸Rengpa chu ivadunghai chung a milung a inchukloi ma ni? Vadunghai chung a khan ni ninginmurna kha a omin, Tuikhanglian chung a khan ni ninginmurna kha a iom ma ni? Ni sakorhai chung a khan chuangin, Ni saninhringna sakor tâlihaia khan ni ichuang hi?

⁹Ni thalngul kha inrongpai zit a nia; Thalhai kha a hruia nin khopa. Khomâksâmna kha namhai hrangin a deta, Nang chu irnêng kha ivadung nin changtir tâka.

¹⁰Tânghai khan nang an hmua, an chia; Tui irsokhai khom kha an fe irhmang tâka; Li inthûk khan hnukirhai an suaa, A kuthai kha chung tiang a phara.

¹¹Misa le tha chu an omnaa khan an ngîr maia, Ni thalhai kâp suaka om ivâr le, Ni ufei irtêk zor zor vâra khan.

¹²Ninginmurin ram kha nir fang suaka, Ninginmurin namhai ni chîlchita.

¹³Ni mihai saninhring hrangin ni fe suaka, Ni sahriak pol saninhringna hrang khan. Mi sia sîngkuuaa irthok khan lu kha nin phopa, ring dênin a lungphûm kha nin langtir tâk a ni.

¹⁴Inrûka inriang fâk irhmanga nuama lômtuhai, kêllaiher anga hong pûtin, nin darhtir hrangin an hong a, Irdoi theihai lu kha ni khianghrolin ni sun tâka.

¹⁵Ni sakorhai leh khan tuipui nin hroa, Tui irsok irkhêl tak kha.

¹⁶Kin hriatin ki sîngrîl kha an thinga, Ki hmûrhai kha hnukirhai khan an thing nor nora; ki ruhaia khan hmonna a hong lûta, Kha ki omna hmuna khan ki inthing a ni; Buaina nia khan irngam ki ta, Mipui, sipai pâl anga ni rûntu chung a hong tung tika chu.



¹⁷Theipui kung kha pâr ta no khom sian, Grephruia khan a ra om ta no ngân khomsian; Oliv sika sin sôlna kha mâkana hong niin, Loihai khan bu hong vâng ta no khom sian; Belra pâl kha a ina irthoka sâtthâka omin, Sehrât ina khan sehrât pâl khom om ta nohai khomsian,

¹⁸RENGPAA khan raiinfân ki ta, ki saninhringna Pathiana khan lôm ki ti.

¹⁹Rengpa, Jehova kha ki hrâtna a nia, ki kehai chu sazukupui kehai angin a siama, Ama khan ki hmun irsânga nin fetir a ti.



Zefania

Zefania 1

Rengpa ninginmurna nikhua chu

¹ Judahai rêng Amon nâipa Josia inlal laia, Rengpa thu Zefania, Kusa nâipa, Gedalia nâipa, Amaria nâipa, Hezekia nâipa kuanga zuang tung kha.

² Irnêng chung ata thil murdi inboipai zit ki ti, ti hi Rengpa thu suak a ni.

³ Mihriam le sahai inboipai ki ta; chunglêng vahai le tuipuia ngahai inboipai ki ta; Mi sualhai kha intûktir ki ta; Irnêng chung ata mihriam inboipai zit ki ti, ti hi Rengpa thu suak a ni.

⁴ Judahai le Jerusalem luatuhai murdi chung a ki kut irlek ki ta; hi hmun ata hi Baal la omsunhai, Kemarim irhming kha ochaihai le ileh,

⁵ In chung sîpa irvân tiang thilhai kuanga kûn ngaihai, Rengpa kuang khomâksâma Malkama sâla insam saa kûn ngaihai,

⁶ Rengpa irheisantuhai leh Rengpa zong loia ama irdon loituhai kha inboipaihai pat ki ti.

⁷ RENGPA PATHIAN makunga khan dâihrek roh: Rengpa nikhua kha anai tâk sikin: Rengpa khan irbôlna a sinsiam tâka, A mi fialhai khom a'rthiangtirhai tâk a ni.

⁸ Khan Rengpa irbôlna zoro sîng chu, mi lianhai le rêng nâipasalhai le ram dang irvônahaia irvôtuhai murdi chu hrem ki ti.

⁹ Khan kha nikhuaa khan chu pathian dikloi chubai mûktuhai murdi le an hruaituhai, irhnuaisia irhlômtuhai le huangnaa siptuhai kha hrem ki ti.

¹⁰ Khan kha nikhua khan Jerusalem nga mikot bâia irthok khan khêk irhâi irkhêl tak om a ta, Misne ata khêk rak rakhai, tâng ata irse mur murhai, om an ta, ti hi Rengpa thu suak a ni.

¹¹ Maktes mihaio, Kanaan mi chu an irhmang sikin khêk rak rak roi! Tangkarua pêl murdihai an thi zoi zit tâk a ni.



¹²Khan, kha tika chu hiang hin ni a ta, meiser belin Jerusalem zong suak ki ti; uain zôl irnok anga om ma maia, an lungrîla, Rengpa khan a sia a sah ti a nei ngai mo, tituhai chu hrem ki ti.

¹³Khan, an sumhai kha râllâk hong chang zoi a ta, An inhai kha ram a ta; a ni, inhai sin an ta, Khannisian lua no nihai; Grep irhuanhai siam an ta, khannisian a uain kha in no nihai.

¹⁴Rengpa nikhua roiinpui tak kha anai tâk e, a nâiin a itheng lat hrang a ni, Rengpa nikho irhâi kha irkhêl tak a ni; kha khan mi hrât kha khêk rak rak a ti.

¹⁵Kha nikhua kha ningmurna nikhua a nia, chardong le intakna nikhua, siatna le ramna nikhua, Inthimna le khor-ui nikhua, sôm le izîng irsa khak nikhua a nia,

¹⁶Kulpuia irkul khopuihai chung a le kua kul irsânghai chung a khan bekul le râl doi irhâi inringna nikhua a nia.

¹⁷Khan, mihriamhai chung a intakna zuang intung ki ta, Mitcho ang dênin fe an ta, Rengpa chung a an sual sikin; an thisen kha vâiphin angin bunpai ki ta, An taksahai khom êkvûng ang dênin.

¹⁸Rengpa ninginmurna nia chu an rângachak mani, An tangkarua'n mani khomin anni kha sansuak thei no ni; Ram pumpui hi a khôkmâkna meia khan kâng irhmang zit a ti. Rama omhai murdi inboi a ta, A ni, inboina irkhêl tak a siam hrang sikin.

Zefania 2

Irlet hranga ngênna

¹⁻²O nam inzakna lam inhre loihaio, Thu'nkung a zuang suak mân le nikhua kha favâi anga a hek mân, ki Rengpa ninginmurnaa ichiom tak kha nin chung a a zuang tung mân le, Rengpa ninginmurna nikhua kha nin chung a a zuang tung mân hin, Intân khôm roi, a ni, intân khôm mur mur roi.



³Nangni irnênga mi thuhnuairôl murdi, a thu zômtuhaio, Rengpa kha zong roi; Felna zong unglân, thuhnuairôl tum roi: Rengpa ninginmurna nikhuaa khan ithupin nin om thei itinin.

Israel ram vêla nam dang siat hrang thu

⁴Gaza khua kha rotsanin om a ta, Askelon khua kha inrampaiin a iom hrang a ni: Sûn laia Asdod khua inhnotsuak an ta, Ekron khua kha khom suakin om a ti:

⁵Tuipui kama om Keret namhai kha an chung a rik e! O Kanaan, Filistia mihai ram, Rengpa thu kha ni chung a zuang itung a ni; Luatu omloi rakin nang inboipai ki ti.

⁶Khan, Tuipui kamhai kha sûl hring hmun ni a ta, Belrapuhai irbukna siamna le belrahai zahual ni a ti.

⁷Khanchu, tuipui kam kha Juda sînghaia la omsunhai ta hrang ni a ta; kha khan an belra rualhai kha tâk an ta, khohloi tiang chu Askelon khua inhaia riak an ti; Rengpa an Pathian khan hong hro a ta, An sal intângna kha irletpai a ti.

⁸Moab mihai hrilsiatna le Amon nâihai khêk khumna, ki mihai an hrilsiatna le an ramria an roiinpuina kha kin hriat tâka.

⁹Khanchu, a nuna kin nun sîng chu, Moab kha Sodom ang ni a ta, Amon nâihai kha Gomora ang ni ngêt ngêt an ta, an ram kha hloisûla sip, michi khur le kumkhua lualoi ang ni a ti: Ki mi la'rkholhai khan anni kha râllâk an ta, ki nam la omsunhai khan lua an ta, tih hi Sipaihai Rengpa, Israelhai Pathian thu suak a ni.

¹⁰Sipaihai Rengpa mihai chung a khan anni kha lian irtiin, anni kha an lei hrilsiat tâk sikin, hi thil hi an lâripâkpuina hrangin an ihmu a ni.

¹¹An chung a khan Rengpa kha ichiom tak ni a ta; irnêng chung a pathianhai murdi kha a inboipai hrang a nia; kha khan mihriamhai khan ama kha biak ta an ta, mi tinin mâni hmun seng ata chubai mûk an ti.

¹²Nangni Ethiopia mihai khom ki khandaia thatin om nin ti.



¹³ Khan, hmâr tiang ram chung a kut irlek a ta, Assuria ram inboipai a ta, Ninevi khua chînsan a ta, ramchâr angin inchârtir a ti.

¹⁴ Khan, a sûnga khan sa chi tinrêng, ramsahai murdi riak an ti: Simbu le sarkuhai khom a khopui laia khan riak an ta, an hnukirhâi kha tukver ata inhriat ni a ta: Sidar thinga siamhai khom an rongtirpai tâka.

¹⁵ Hi hi khopui raifân thei tak, mâni ir-iam zoi thei tak, a lungrîla keima hi ki ni, ki chung a tûte om mahai, irti lungrîl kha a ni: Sahai riakna hmun hrangin, a ramin a'rkhêl bâk tâka na! A hong khêl murdi'n an dang inchek khum an ta, an kut irlek khum an ti.

Zefania 3

Jerusalem سوالنا le saninzôkna

¹ Tehelzong ngai le porinche, opbe hmang khopui chung kha a rik e!

² Hnukirhâi kha zôm maka; halirchûna pom maka; Rengpa kha iam maka; a Pathian tiang nâi nuam ma.

³ A sûnga a hruaituhai kha kâmkeibaknei inrûm lai an nia; a roirêltuhai kha khohloi tianga ine an nia; a tûk dêna insoi hrang ite hôi mahai.

⁴ A deipuhai khom kha mi huang hmang le mi hmangnaboï an nia, a ochaihai rêk khan hmun irthiang kha an porinchetir tâka, Pathian dân kha an nuam lam lamin an inkôktir ngai.

⁵ A sûnga khan Rengpa kha mi dik a nia; siatna tho no ni; zîng tinin a roirêlna kha an langtira, lôipai ngai maka; aniachu mi felloi khan inzakna lam reng inhre mah.

⁶ Namhai kha kin boipaia, an kulhai ten khom kha a ram chit tâka; an kholai dunghai kha kin siatpai zita, tukhomin hro ta mahai; an khopuihai kha insiatin a oma, khanchu mi om ta mahaia, a luatu khom om ta mahai.

⁷ Nangin ni chi photin lân, halirchûna hi lei pomin lân; khanchu ama chungchânga ki inkung murdihai ang khan a omna kha inboipai pat ni no nia, ki tia. Khannisian zînga an thoia, an thiltho murdi an tho'nchâi zit tâka.



⁸Khasikin râlâk la hranga ki thoi ni dênin ni nghâk roi, ti hi Rengpa thu suak a ni. Ki thil tum kha an chung a ki ninginmurna ichiom tak kha insum hranga inlalna ramhai irbuktira namhai koi buk hi a nia; irnêng murdi hi ki khôkmâkna meia a la ikâng fâi zit hrang a ni.

⁹Kha tika chu mipuihai kha hmûr irthiang irputtir nôk ki ta, Rengpa irhming kha an inzaa anni tiang inthuruala a sin an tho suam theina hrangin,

¹⁰Ethiopia dung pên tiang ata ki kuanga ngêntuhai, ki mi indarhai nâinu khan ki thilinhlan hong la an ti.

¹¹Kha nikhuaa khan ki chung a ni tho'nchâina thiltho sikhaia khan inzak ta no chi ni, kha tika chu ni sùng ata ni mi, lâripâkna raiinfânputuhai kha la pai ki ta, ki tâng irthianga hin lâripâk hrangin om ta no chi ni.

¹²Ni sùng ata mi inrianghai le denginthei tuanghai kha hôi ki ta, Rengpa irhming kha iam an ti.

¹³Israel mi la omsunhai khan pualoina tho no nihaia, milak tho sa no nihaia, An bâia khom huangna chong om ual hliak no nia: an fâkin zâl an ta, tûte'n inchitir ta no nihai.

Lômna hla

¹⁴O Zion nâinu, zâi ro; O Israel, khêk rak rak ro; O Jerusalem nâinu, ni milung murdi'n lômin lân, raiinfân roh.

¹⁵Rengpa'n ni chungchâng rêlnahai kha a lâkpai tâka, Ni râl a pai suak ta: Israel inlaltak, Rengpa khom kha ni chung a om e: Thil saloi chi ngai ta no chi ni.

¹⁶Kha nikhuaa khan Jerusalem kuang, chi no roh, O Zion, Ni kut khom irzal no ri se, ti an ti.

¹⁷RENGPA ni Pathian kha ni chung a om e, Saninhringtu hrang mi hrât tak kha: Lômin ni chung a raiinfân a ta, a lungthungna inthartir a ta, hla sakini ni chung a lôm a ti.

¹⁸Nangmaa mi, inkhômputia kop phâk loa beiindonghai kha, hruai khôm ki ti, nangma sika hrilinsiatna puakrik pêtuhai kha.



¹⁹Irngai ro, kha tika chu nang ngaisaktu murdi kha ngaitua ki ti. Khan, ke'nbâi kha saninhring ki ta, Inhnotpaia om kha hruai khôm ki ti, Khan, irnêng chung murdia lei mualinphoina kha, Inpâkna le irhming inthangnaa inchangtir ki ti.

²⁰Kha tika chu nangni hruai lût ki ta, kha tika nangni hruai khôm nôk ki ta: Nin ihmu ngeia nin sal intângnaa ki'rheikîr tika chu, Irnêng chung murdihai laia Irhming inthangna le inpâkna nangni siam pe ki ti, RENGPA'N a ti.



Hagaia

Hagaia 1

Tempil inding thar nôk hranga Rengpa thupêk

¹ Rêng Daria inlal kum hnina, a tha rukna, kha tha nikho masa taka khan, deipu Hagaia kuanga Rengpa thu kha, Sealtiola nâipa Judai ramoptu Zerubabela kuang le Jehozadaka nâipa ochai intaltak Josua kuang a zuang tunga, hiang hin a ti.

² Sipaihai Rengpa khan hiang hin a ti, “Hi mihai hin, Rengpa in sin hrang zoro chu la hong tung ma, an ti e,” tiin.

³ Khan, deipu Hagaia kuang Rengpa thu a zuang tunga;

⁴ “Hi in hi a ram chian laia nangni in chung irchuan neia lêng hi a zoro ma ni? tiin.

⁵ Atûn chu sipaihai Rengpa khan hiang hin a ti: Nin lampuihai ngûk takin sût infel roi.

⁶ Tamtak nin songa, tômte nin inlût ngaia; nin fâka, khop ual mak chêi; nin ina, khop mak chêi; nin sila, lum ual hliak mak chêi; irhlo fâk khan zêp cheta tha hrang piala a ihlo a ni.

⁷ Sipaihai Rengpa khan hiang hin a ti: Nin lampuihai kha ngûk takin sût roi.

⁸ Tânga hong kâi unglân, thing hong la unglân, in kha sin roi; kha khan lôm ki ti, chôiindômin om ki ti, Rengpa’n a ti.

⁹ Hmu nghek nin sabeia, irngai u ta, tômte a lei ni; ina nin hong tunga, ki lei sêm irhmangpaia. Itho sika mo? ti hi Sipaihai Rengpa thu suak a ni. Nangni mâni in tiang pan senga nin intân lat ngaia, ki in kha chu a ram chian sika a ni.

¹⁰ Khasikin irvânin irdorfîm tâk hrang nangni a khappai pea, irnêngin a ra nangni a khappai pe sa a ni.



¹¹Irnêng chunghaia, tâng chunghaia, bu chunghaia, uain chunghaia, hriak chunghaia, irnêng chung thil hong suak chunghaia, mihriam chung haia, sa chung haia, kuta tho suak murdihai chunghaia kin kangtir a ni,” a tia.

Mipuihaiin Rengpa thupêk an zôm

¹²Khanchu Sealtielâ nâipa Zerubabela le Jehozadaka nâipa ochai inlal tak Josua le mi la omsun murdihai khan Rengpa an Pathian irhâi le Rengpa an Pathianin a itîr anga hong, deipu Hagaia thu kha an irngai tâka; mihai khan Rengpa kha an chi tâka.

¹³Khanchu, mihai kuang Rengpa chongbe hmang khan Rengpa tîrtôn Hagaia khan an sîra, Nin kuang ki iom a nih, ti hi Rengpa thu suak a ni, tiin.

¹⁴Khan,Rengpa khan Sealtielâ nâipa, Judai ram optu Zerubabela lungrîl le Jehozadaka nâipa, Ochai inlaltak Josua lungrîl le mi la omsun murdihai lungrîl kha a kai har tâka; khanchu an hong, Sipaihai Rengpa an Pathian ina khan sin an tho tâka;

¹⁵rêng Daria inlal kum hnina, a tha rukna, kha tha sîn sômhni le sîn minlinaa khan.

Hagaia 2

Tempil thar roiinpuina

¹Tha sarina, kha tha sîn sômhni le sîn khatnaa deipu Hagaia kuang Rengpa thu a zuang tunga:

²Sealtielâ nâipa, Judai ram optu Zerubabela kuang le Jehozadaka nâipa, ochai inlaltak Josua kuang le mi la omsunhai kuanga khan hiang hin insîr ro ba, a tia.

³ “Hi in hi matona a roiinpui laia hmu, nin laia tu mo la om? Atûn lai hin i angin mo nin hmu? Nin mithmua ite lua a ini loi mo ni ma?

⁴O Zerubabela, atûn chu hâitakin om roh, ti hi Rengpa thu suak a ni; o ochai inlaltak Josua, Jehozadaka nâipa, nang khom hrât takin om roh, khan, nangni hi rama mi murdihaio, hrât takin om sa roi ti hi Rengpa thu suak a ni. sin tho roi, nin kuang ki oma, ti hi Sipaihai Rengpa thu suak a ni:



⁵ Aigupta ram ata nin hong suak laia thu nangni ki inkungpui ang khan nin laia ki'rtha a la iom mai a ni, chi no roi.

⁶ Sipaihai Rengpakhan hiang hin a ti: voikhat chu sôtnote irvânhai le irnênghai le tuikhanglianhai le mual le tâng hai kha inhnîngtir ki ti.

⁷ Nam tinrênghai kha inhnîngtir ki ta, nam tinrêng thil inuamhai kha hong tung a ta, hi in hi roiinpuina'n insiptir ki ta, sipaihai Rengpa khan a ti.

⁸ Tangkarua hi ki ta a nia, rângachak hi ki ta a nih, ti hi Sipaihai Rengpa thu suak a ni.

⁹ Hi in roiinpuina hnungkhôn ual hi a masa nêkin irkhêl ual a ti, sipaihai Rengpa khan a ti: khan hi hmuna hin irngeina intung ki tah," ti hi Sipaihai Rengpa thu suak a ni.

Deipu'n ochaihai a irdonhaina

¹⁰ Daria inlal kum hnina, a tha kuakna, sîn sômhni le sîn minlina khan deipu Hagaia kuang Rengpa thu, hiang hin a zuang tung.

¹¹ Sipaihai Rengpa khan hiang hin a ti: "Ochaihai kha dân thu, hiang hin irdonhai ro:

¹² Tu'n mani a songkol irfual hmora sa irthiang infûn sianlân, a songkol irfual hmora khan bai mani, thil but inhmin mani, uain mani, hriak mani, fâk hrang rêng rêng mani lei khoi ta sianlân, irthiang ni mo?" tiin. Ochaihai khan, "Irthiang no ni," tiin sâm an ti.

¹³ Khan, Hagaia khan, "Mithi ruak tôn ta sianlân, a porinche ma ni?" ti a ta. Ochaihai khan, "Porinche a ti," tiin sâm an ti.

¹⁴ Khan, Hagaia khan hiang hin a sâm tâka: "Hi mi hi khang tak kha an nia, hi nam hi khang tak khan ki makunga an om, ti hi Rengpa thu suak a ni; an kut suak tinrêng khom khang tak kha a nia, khataka an thil inhlân khom kha a irthiang loi a ni" a tia.

Rengpa'n satvur an kung

¹⁵ Atûn ata nakan ten khomin Rengpa biak ina lung nin ichung irchuan mân, matona thil kha ngaitua ngai roi.



¹⁶Kha zoro lai murdi khan bu khamphulu sômhni irting thei ômtak buk khômnaa mi a hongin sôm vai a kâia; uain sômna hmun bûr sôm ringa thâl suak tuma a hongin, sômhni vai a lei irting ngai.

¹⁷Nin itho suakna murdi chârna hai, irngêhai le irialin nangni ki hrema; khannisianlân, ki tiang hong irhei ual mak chêi, ti hi Rengpa thu suak a ni.

¹⁸Hi tha kuakna, sôn sômhni le sôn minlina a vuan sôn ata hi nakan dênin, matonahai kha ngaitua roi, Rengpa biak in lungphûm nî ata kha ngaitua roi.

¹⁹A chi kha fasiara a la iom ma ni? Grep hruihai, theipui kunghai, dalim le oliv thinghai kha la ra mah; a vuan ata hi sat nangni vur ki ti.

Zerubabela kuanga Rengpa chonginkungna

²⁰Khan, Rengpa thu kha, kha tha, sôn sômhni le sôn minlinaa khan Hagaia kuang a zuang tung nôka;

²¹hiang hin Judai ram optu Zerubabela kuang khan insîr ro: keima'n chu irnêng le irvân kin hnîngtir ngai: ram rêngtoihmunhai kha paitha ki ta, ramhai ram hrâtna kha insiat ki ta;

²²tâlihai le a chung a chuanghai kha irtettir ki ta, sakorhai le a chung chuanghai kha mi tin mâni urêng hai khandaiin tûk an ti.

²³Kha nikhuaa khan, o Zerubabela ki siahlo, Sealtielâ nâipa, nang chel ki ti, Sipaihai Rengpa thu suak khan a ti; khan, irhming namna kutsabi anga nang siam sa ki ti, Rengpa thu suak khan a ti; nang ki len thang tâk a ni, Sipaihai Rengpa thu suak khan a ti, tiin.



Zakaria

Zakaria 1

Rengpa'n a mihai ama tiang irhei hranga fialna

¹ Daria inlal kum hnina, tha riatnaa deipu Zakaria kuanga khan Rengpa thu a zuang tunga:

² Rengpa kha nin pahai chung a khan a sân a milunghoi maka.

³ Khasikin hiang hin an kuang van sîr ro: Sipaihai Rengpa khan hiang hin a ti, keima tiang hong irhei unglân, kei khom nangni tiang zuang irhei ki ti, ti hi sipaihai Rengpa thu suak a ni.

⁴ Deipu masahaiin, sipaihai Rengpa khan, nin om hrang dân suala atûn hong irhei unglân, nin thilsual kha chu hong irheisan roi, a ti e, tia nin pahai an hril khoma irngaitua loia, mikuar sung loi ang khan om no roi, ti hi Rengpa thu suak a ni.

⁵ Nin pahai kha khôn mo an om? Deipuhai khom kha an hring kumkhua tâk ma ni?

⁶ Ki thu le ki thu'nkunghai, ki siahlo deipuhai kuang, ki pêkhaia khan, nin pahai kha a innang tak khom a ini mo ni ma? khanchu, an hong irheia, sipaihai Rengpa khan kin chungchânga ti a tum ngai angin kin om dân ang zêl le kin thiltho ang zêlin keinia a ti tâk a ni, an ti kha, tiin.

Inlârna sakor hmu

⁷ Daria kum hnina, tha sôm le tha khatna, kha kha Sebat tha a nia, sôn sômhni minlinaa khan Idoa nâi Barakia nâipa, deipu Zakaria kuanga khan Rengpa thu a zuang tunga;

⁸ zâna khan sakor sen chung a mi inkhat chuang ki hmua, irhôr irhmûithing kôla hin a ngîra; khan, a hnunga khan sakor, a senhai, a pôlhai a ngoihai an oma.

⁹ Kha khan keiin, “O ki Rengpa, hihai hi i ma ni?” ki tia. Vântirtôn ni chongpuitu khan ki kuang, “Hihai hi imo an ini keima'n nang inentir ki ti,” a tia.



¹⁰Khan, mi irhmûithing laia ngîr khan a sâma, “Hihai hi Rengpa’n irnêng murdi irfang suak hranga a itîrhai kha an ni hi,” a tia.

¹¹Khan, anni khan, Rengpavântirtôn irhmûithing laia ngîr kha a sâma, irnêng murdi kha ei irfang suak tâka, irngai ro, irnêng kha a om chian chiana, a om mai mai a ni, an tia.

¹²Khataka Rengpa vântirtôn khan a sâma, “O sipaihai Rengpa, Jerusalem le Juda khopui chungu, hi kum sômsari ni ninginmurnahai hi i dôr ten mo lung ni inkham loi hrang?” a tia.

¹³Khan, Rengpa khan, vântirtôn, thu satak thu irtharngam om taka ni chongpuitu kha a sâm tâka.

¹⁴Khanchu vântirtôn ni chongpuitu khan, ki kuang, “Hiang hin va insam ro,” a tia: sipaihai Rengpa khan hiang hin a iti a ni: Jerusalem le Zion hi irvei ta takin ki’rveia,

¹⁵khan, nam chai nuam mai maihai ata khan a sân ki milunghoi tak tak maka; ki milung hoi loi vai a ni nâkin, anni hranga thil saloi kha an tho’nsual tâk a ni.

¹⁶Khasikin Rengpa khan hiang hin a iti a ni: za’rngaina le Jerusalem tiang ki’rhei lai a nia, kha khan ki in kha sin a nia, ti hi Sipaihai Rengpa thu suak a ni: khan, Jerusalem chungu khan irkhîna khianghrol kaiinding ni a ti.

¹⁷Hiang hin sipaihai Rengpa khan a ti e, ki khopuihai kha irhniangna sikin chuai nôk an ta, Rengpa khan Zion kha irtharngam nôk a ta, Jerusalem kha inthang nôk a ta, tiin van sam nôk ro, a tia.

Inlârna sehrât irki hmu

¹⁸Khan, ki mit ki hong inlêngtira, ki hong ena, irki minli ki hmua.

¹⁹Vântirtôn ni biaktu kuanga khan, “Hihai hi imo a ini?” ki tia. Khan, ama khan, “Hihai hi Judahai, Israelhai, Jerusalem-hai indartirtu hi an ni hi,” tiin a ni sâma.

²⁰Khan, Rengpa khan thîrsu minli a nin entira.



²¹Khanchu keiin, “Hihai hi imo hong tho hrang an ini?” ki tia. Ama khan, “Sohai so tûte hong tang suak ngam rêng om ta loi dôra, Judahai indartirtu kha an nia; khannisian hihai hi, anni indôptir hrang le Juda ram indarh hranga an nia an irki hong hmangtu namhai irki kha paithâk hranga hong an ni hi,” tiin an sîra.

Zakaria 2

Irkhîna hrui chôi

¹Khan, ki mit ki hong inlêngtira, ki hong ena, mi inkhat a kuta irkhîna chôi hi ki hmua,

²khanchu, keima'n chu, “Khôn mo ni ife hrang?” ki tia. Ama khan ki kuang, “Jerusalem hi a khang i dôr mo a ni, a dung i dôr ten mo a ini inhre hranga irkhî hrangin,” a tia.

³Khan, irngai ta, vântirtôn ni biaktu kha a fe suak ta; khan, vântirtôn dang ama tong hrangin a hong suak saa,

⁴a kuang, “Intânin lân, hi ruatharte kuang hin, “Jerusalem hi a mi tam sik le sapâl tam sikin khua inhrukna nei loi anga luan a iom hrang a ni.

⁵kei hi a vêla mei kul ni ki ta, a laia roiinpui kha ki ini sa hrang a nia,” ti hi Rengpa thu suak a ni.

Sal intânghai kîr nôk hranga ti

⁶Hong roi, hong roi, hmâr ram ata intân suak roi, ti hi Rengpa thu suak a ni. Irvân phâivua ang dênin kin darhtir tâka, ti hi Rengpa thu suak a ni.

⁷Hong ta roi, Zion, Babulon nâinu kuanga la om, relpat roh.

⁸Sipaihai Rengpa khan hiang hin a tia: roiinpuina hrang angzia zêlin nangni an siattu nam kuanga khan a ni tîr a ni: Nangni tôntu'n chu a mit lailên a itôn a ni.

⁹Irngai roi, ki kut ki inthik khum hrang a nia, anni sinhotuhai râllâk ni mai an ti: khanchu, sipaihai Rengpa khan a ni tîr a nih ti nin la inhriat hrang a ni.



¹⁰Zion nâinu, raiinfânin zâi ro, irngai ro, ki zuang e, ni kuang ki ilêng hrang a nia, ti hi Rengpa thu suak a ni.

¹¹Kha nikhuaa khan nam tamtakin Rengpa kha hong zom an ta, ki mihai ni an ti: khan, ni kuanga khan lêng ki ta, khanchu, sipaihai Rengpa khan ni kuang a ni itîr a nih ti nin hriat tâk nin ti.

¹²Khan, Rengpa khan ram irthianga a dongtum hrangin Juda kha lua a ta, Jerusalem kha lan thang a ti.

¹³Mi murdihaio, Rengpa makunga khan dâichit roi: Ama kha a hmun irthiang ata a hong thoi tâka, tiin va hril ro, a tia.

Zakaria 3

Inlârna ochai Inlaltak hmun

¹ Khan, ochai inlaltak Josua, Rengpa vântirtôn makunga ngîr le a doitu hrang setana ama chang tianga ngîr kha a nin entira.

² Khan, Rengpa khan Setana kuang, O Setan, Rengpa khan nang hal ri se. A ni, Rengpa Jerusalem inthangtu khan nang hal ri se. Hi mi hi thingthu mei ata paisuak kha a ini loi ma ni? a tia.

³Khanchu Josua kha silkai porinche taka irbelin vântirtôn makunga khan a hong ngîra.

⁴Khan, a makunga ngîrhai kha a hong chongpuia, “A sil le kai porinche kha hlîk pe roi,” tiin. Khan, ama kuang khan, “Irngai ta, ni tho’nsualnahai kha kin boipai tâka; khanchu silkai hlutakin nang irbeltir ki ti,” a tia.

⁵Khan, kei chu, lukhum enhoi tak inkhumtir ri se, ki hong tia. Khanchu, lukhum enhoitak kha an khumtir tâka, silkaiin an irbela, khan, Rengpa vântirtôn kha a kôla a ngîra.

⁶Khan, Rengpa vântirtôn khan Josua kuang,

⁷“Sipaihai Rengpa khan hiang hin a iti a ni: ki lampuihai ni hro maia, ki thu inkunghai ni tho’n chu, ki in sùng roirêl ni ta, ki roirêl hmunhai kha vong sa ni ta, hi ngîrhai laia hin kop sa theina hrang nang pe ki ti.



⁸ Atûn irngai ta, O Josua ochai inlaltak: Nang le ni rualhai ni makunga toihai leh irngai roi, thil sa hong tung lei entîrna an nia: irngai roi, ki siahlo incher irnôî kha ki hong insua hrang a ni.

⁹ Irngai u ta, Josua makunga ki lung kha; lung inkhata khan mit sari a om a ni: Irngai roi, a chung a khan thil irziakhai irziak ki ta, kha ram saloinahai kha sîn khat zelin lapai zit ki ta, ti hi sipaihai Rengpa thu suak a ni.

¹⁰ Kha nikhuaa khan mi tinin grep kung hnuaihai le theipui hnuaihaia, mâni kôlahai fialhai seng ta nin tih, ti hi sipaihai Rengpa thu suak a ni,” tiin an kung tâk a ni.

Zakaria 4

Meiser siana a hmu

¹ Khan, vântirtôn ni chongpuitu kha a hong nôka, mi inmusu kaithoi angin a ni hong kaiinhara.

² Ki kuang, “Imo ni ihmu?” a tia. Khan, keima’n, “Rângachak meiser siana, a sîpa berbuhai le khataka meiser sarikai le a sîpa meiser hmûr sari seng omhai le,

³ Oliv thing inhni berbu chang tiang inkhat, vei tiang inkhat om ki hmu,” ki tia.

⁴ Khan, vântirtôn ni chongpuitu kuanga khan, “Hi hi imo a ini, ka pu?” tiin ki hong ti nôka.

⁵ Khan, vântirtôn ni chongpuitu khan a ni sâma, ki kuang, “Hihai hi imo an ini ni inhriat loi mo?” a tia. Keima’n, “Inhre ma ung, ka pu,” ki tia.

Zerubabela kuanga Pathian chonginkung

⁶ Khataka khan ki kuang, “Hihai hi Jerubabela kuanga Rengpa thu kha a nia; hrâtna ni loiin, thiltho theina ni ual hliak loiin, ki’rtha’n kêng, tiin sipaihai Rengpakhan a ti e.

⁷ Tu mo ni ini? o tâng lianpui, Jerubabela makunga khan phâizôl chang mai ni ta; kha khan a lung poimo tak kha a ta hrangin satvurna le, raifâna khêk irhâi leh zuang tung a ta,” tiin a ni sâm tâka.



⁸Kha no khom kha Rengpa thu ki kuang a zuang tung nôka:

⁹Jerubabela kut khan hi nin lung phûmhai hi a phûm tâka, Ama kut dênin puihling a ta, khanchu, sipaihai Rengpa khan nin kuang a ni tîr a nih ti inhre ta nin ta.

¹⁰Thil chîn terek zorohai hi tu'n mo a hmusit? Râifân takin om an ta, Jerubabela kuta dâr irhlûm inkhâi kha an ihmu hrang a nia; Hi sarilai ngei hi Rengpa mit kha an ni saa, irnêng pumpui chung a hin an irvâk vêl ngai, tiin.

¹¹Khan, keima'n chu ki sâma, a kuang, "Hi Oliv thing inhni, meiser siana chang tiang le vei tianga om hi imo a ini?" ki tia.

¹²Khan, ki hong sâm nôka, a kuang, "Rângachak tum inhni kôla, hi oliv zâr inhni rângachak hriak hong suaknahai hi imo a ini?" ki tia.

¹³Khan, ama khan a ni sâma, "Hihai hi imo a ini hrang ti ni inhriat loi mo?" a ni tia. Khan, keima'n, "Inhre ma ung, ka pu," ki tia.

¹⁴Khan, ama khan, "Hi nâipa inhni, hriak nei tâkhai hi, irnêng pumpui Rengpa kôla ngîrhai kha an ni hi," a tia.

Zakaria 5

Inlârnaa lekha irzuat vuang hmu thu

¹Khanchu ki hei thîr nôka, boiruaka lekha irzuat vuang lai hi ki hmua.

²Khan vântirtônin imo ni hmu tiin a nir dona, keiin, "Boiruaka lekha irzuat vuang lai ki hmua, a dung tiang chu mûk sôminhni a nia, a khang tiang chu mûk sôm a ni," ki tia.

³Khanchu ama kha ki kuang, "Hi hi khosâlna, ram pumpui chung a fe suak ngai chu a ni, tukhom inru kai chu, phêk kiangkhat tianga irziak angin ram sâng ata hi pai ni an ta, khanchu tukhom khomâkirsâma minlak thotu kai chu lâkpai ni an ti.



⁴Khanchu sipaihai Rengpa'n, 'Hi khosâlna hi tîrsuak ki ta, inruhai ina le khomâkirsâma minlak thotuhai ina lût a ta, khanchu an inhaia khan om maiin, inramhai chit a ti,' a ti" a tia.

Inlârna bôm sînga nupang hmua om thu

⁵Khanchu vântirtôn chu a zuang inlang nôka, "En ro, thil i ma ni a zuang," a tia

⁶"Imo a ini?" tiin ki'rdona. Khan, ama khan, "Bôm a nia, hi ram sîng murdia an sualna chu a ni," tiin a ni sâma.

⁷Khanchu bôm khan a sîng a neia, kha kha a kôra siam a nia. Khan ki en mai laiin, a sîng kha chung tianga irdomin a oma, khanchu a sînga khan nupang hi a toia!

⁸Khanchu vântirtônin, "Hi nupang hin pualoina chu an entîr a ni," a tia. Khanchu nupang kha bôm sînga khan a nam inlût nôka, a sîng leh khan a sîng nôk tâka.

⁹Khanchu irvân tiang ki hei ena, nupang inhni hi keima tianga zuang uang hin ki hmuaia, phâivosimphûr hrât anga mithahai hi an neia. Khanchu bôm kha hrût likin an uangpui tâka.

¹⁰Khanchu keiin vântirtôn kuang khan, "Khahai khan bôm kha kho tiang mo an ifepui hrang?" tiin ki'rdona.

¹¹Khan ama khan, "Babulon ram tianga ama ta hrangin biakbuk sin pe an ta, khan biakbuk kha an sin zoi tena chu, bôm kha biak hrangin khataka khan sia an ti," tiin a ni sâma.

Zakaria 6

Inlârnaa sakor tâli minli hmu thu

¹Khanchu inlârna ki hmu nôka, sumsen tâng inhni kêr ata hi sakor tâli minli hong suak hi ki hmua.

² Tâli inkhatna chu sakor senhaiin an kaia, inhna chu sakor dukhaiin an kaia,



³ inthumna chu sakor ngoihaiin an kai, khan a minlina chu sakor rânghaiin an kaia.

⁴Khanchu vântirtôn kuang khan, “Ka pu, hi sakor tâlihai hin imo a inentir?” tiin ki’rdona.

⁵ Khan ama khan, “Hihai hi irvâna irtha minlihai chu an ni, irnêng pumpuiRengpa makung ata zuang suak an ni,” tiin a ni sâma.

⁶Khan, tâli sakor dukhaiin an ikai kha Babulon ram hmâr tiang an fea, khan sakor ngoihai kha nitâk tiang an fea, sakor rânghai kha chu sim tiang an pana.

⁷Khan sakor rânghai kha an hong suak tena chu, irnêng chu eninfel hrangin nghâkhmo takin an oma. Khan vântirtônin, “Fe unglân, irnêng chu eninfel roi,” tiin a hrilhaia; khanchu an fea, a iti lam ang takin an tho tâka.

⁸Khan vântirtôn chu khêkin ki kuang, “Babulon hmâr tianga sakor fetuhai khan Rengpa ningmurna chu an indâipai ta,” a tia.

Josua rênglukhum inkhumtir thu

⁹Khan Rengpa’n hi thu hi a ni pêka.

¹⁰Ki kuang, “Sal intâng mi Heldaia hai, Tobija hai le Jedaia haiin thilpêk an ipêkhai kha lan lân, Zefania nâipa Josia ina inrang takin fe roh. Hi mi murdihai hi Babulon sal intângna rengata hong kîr nôkhai chu an ni.

¹¹Khan sumtak le rângachak an thilpêkhai ata kha rênglukhum kha siamin lân, ochai uliantak Jehozadaka nâipa Josua inkhumtir roh.

¹² Khan Sipaihai Rengpa’n hiang hin a hril tiin ama chu hril ro, ‘Khan ar hming ôn an iti kha, ama chu tuanintung takin la om a ta, Rengpa biakbuk chu lan ding thar nôk a ti.

¹³Ama ngei chu kha biakbuk sintu kha la ni a ta, rêngin a idong ngai mânlianna chu la dong a ta, a mihai chungaroi la rêl a ti. A rêngtoihmun kôla ochai chu ngîr a ta, ama leh irngei tak le irrual takin sin thosuan an ti’ tiin.



¹⁴Renglukhum chuRengpa tempila, Helema hai, Tobija hai, Jedaia hai, Zefania nâipa Josia hai inhriat maina hrang ni a ti.

¹⁵Khan Rengpa tempil chu hmun hlataka mihai chu hongin sinpuihai an ti. Khan indingtharin a om nôk tena chu, Sipaihai Rengpa'n nin kuanga a ni zuang itîr a nih ti inhre ta nin ti. Hi thil hi Rengpa nin Pathian thupêkhai chu nin zôm vinga ni'n chu, la tung a ti.

Zakaria 7

Bunghei dân dik loi Rengpa'n a dem

¹Khan Daria an lal kum minlina, a tha kuakna (Kisleu tha) a sîn minlinaa khanRengpa'n ki kuang thu a zuang hrila.

²Kha zoro lai khan Bethel mihaiin Sarezera hai, Regenmeleka hai, an mihai lehRengpa satvurna zong hrangin le,

³Sipaihai Rengpa, ochai kuanga le deipuhai kuang khan, “Kha dôr ten kum sûnga kin lei itho ngai ang khan, tempil siatna sika tha ringanaa bu kin inghei ngai hi kin la itho mai hrang ma ni?” tiin an irdonhaia.

⁴Khan hi hi Rengpa rengata ki kuanga thu zuang tung chu a ni.

⁵“Hi rama mipuihai le ochaihai kuang hin hiang hin hril ro, kum sômsari sûng tha ringana le tha sarina bu an inghei hi keima ta hranga an inghei ni mah.

⁶An fâkin an nêk khomin, kha kha chu an ta hranga an ifâk le an inêk kêng a ini” ti hi.

⁷Khan, hi hi matona Jerusalem chu tuanintung taka a oma, mipui tamtak a sip laia le, a khopuihai ti bana, sim tiang le nitâk tiang tâng kôlhaia an om laia deipuhai kuangaRengpa'n a lei ihril kha a ni.

Thuzômlaina sika sal intângna

⁸Khan Rengpa'n hi thu hi Zakaria kuang a hrila:

⁹“Matona ki mihai chu hiang hin thu ki pêkhaia: roirêlna dik chu inlangtir unglân, khonzâna le inrenna khom inlangtir sa roi.



¹⁰Nin ram sũaga ram dang mihai, meithâihai, farahai le inrianginvâihai chu nuam le ningin lohài no unglân, khabana mâni urênghai chungà tukhomin sinsiat ngaitua no ri sehai,” tiin.

¹¹Khannisian mihaiin chu an tukullian insua’n, irngai nuam loiin an oma; an milunghai khâr khapin,

¹²lung angin an inngartira. Matona deipuhai hmanga ki thuhrihai kha an irngai no sikin, a sãn an chungà ki ning an mur tâka.

¹³Thu ki hril lai khan an irngai no sikin, kei khoma an thuhri chu irngai pehai ma ung.

¹⁴Kêllaiher angin, ram danga om hrangin ki phît infâihai zit tâka. Hi ram satak hi masanin khoram inchangtirin, mi inkhat lua a sũaga om loiin an siam tâk a ni.

Zakaria 8

Rengpa’n Jerusalem indingthar nôk hrangin chong an kung

¹Khan Sipaihai Rengpa’n Zakaria kuang hi thu hi an hriattir nôka:

²“A mipuihai ki lunginkhamna, an râlhai chungà ki ningmurna ten insum thei lungkhamna sika khan Jerusalem chu san ki nuama.

³Ki khopui irthiang Jerusalem khan kîr nôk ki ta, khataka khan om ki ti. Khopui iamom tih ni a ta, Sipaihai Rengpa tâng chu tâng irthiang iti ni a ti.

⁴Khanchu Jerusalem kotsuuhai khan pitar le putarhai, khianghrol leh kalchôihai chu la lêng nôk an ti.

⁵Khan a khopui kotsuahaia khan pasaltehai le nupangtehai chu la’rdâi nôk an ti.

⁶“Hi thil hi atûna nam omsunhai ta hranga hin chu thil tho theiloï angin inlang a ta, khannisian keima ta hrangin chu tho thei loi ni no ni.

⁷Ki mihai chu an ihruaihaina ram ata kha saninzôkhai ki ta,



⁸Jerusalema om hrangin nisua tiang le nitâk tiang ata la hong hruaihai ki ti. Anni chu ki mihai ni an ta, kei chu an Pathian iamom tak le diktaka an chungaroirêltu ni ki ti.

⁹“Ngam takin om roi! Ki tempil indingthar nôk hranga lungphûm phûma a om laia deipuhaiin thu an lei ihrilhai kha atûn khom kha thuhai dên kha nin inhriat nôka.

¹⁰Kha nikhuahai khan chu mihriam ta hrangin irhlofâkna hrang hi om maka, sâ ta hrang khomin irhlofâkna hrang rêng rêng hi om mah; mi tin chu mâni tualbôm seng doiin kin omtirhaia.

¹¹Khannisian atûn chu, hi irchi la omsunhai hi chu kha nikhuuaa ki ilohai ang khan chu lôhai ta no ning.

¹²Lungthi takin an loimânhai tho an ta, an grep kunghaiin ra tamtak insua a ta, irnêngin bu le bâl insua a ta, rotui khom tamtak om sa a ti. Hi satvurna murdihai hi ki nama mi la omsunhai chungarintungtir ki ti.

¹³O Juda le Israel mihai, tiana khan chu ram dang mihaiin, ‘Israel le Juda chungarasiatna a itung ang hi ni chungar khom tung ri se’ tiin khomâk an irsâm ngaia. Khannisian nang saninzôk ki ta, ram dang mihaiin, ‘Israel le Juda chungar satvurna a itung ang hi ni chungar khom tung ri se,’ tiin la hril an ti. Khasikin ngam takin omin lân, chi no ro,” a tia.

¹⁴Khan Sipaihai Rengpa’n hiang hin a hrila, “Nin irchibulhaiin ki ning an inmurtir lai khan, an siatna hrang ki ngaituaa, ki milung chu thûl loiin, ki thiltumhai chu kin tungtir tâka.

¹⁵Khannisian atûn chu Jerusalem le Juda mihai chu satvur hrangin ki ngaitua tâka, khasikin chi viat no roi.

¹⁶Hi thilhai hi nin itho tum hrang chu a ni: Thudik irhril unglân, roirêlna hmuna khom irngeina intungtir thei ngai, thudik chu târinlang roi.

¹⁷Mi siatna hrang ngaitua no unglân, khomâkirsâmin minlak tho no roi. Minlak le roirêlna dikloi le thisen insuana hi ki theimâk a ni,” tiin.



¹⁸Khan Sipaihai Rengpa'n hi thu hi Zakaria kuang a hrila:

¹⁹“Juda mihai ta hrangin tha minlinaa le, tha ringanaa le, tha sarinaa le tha sômnaa bungheina hi lômna le râifânaa kût ni a ta, khasikin dikna le irngeina hi irngaiinnat roi,” tiin.

²⁰Khan Sipaihai Rengpa'n, “Khopui tamtakhai rengata Jerusalema mihai zuangna hrang zoro chu anai ta.

²¹Khopui inkhatin khopui danga mihai kuang, ‘SipaihaiRengpa chu biak hrangin le a satvurna chu zong hrangin kin ife a ni hi, nangni khom kin kuang hong sa roi’ la ti an ti, a tia.

²²Mi tamtakhai le nam sinthothei takhai chu Sipaihai Rengpa biak hrangin le a satvurna zong hrangin Jerusalema la zuang an ti.

²³Kha nikhuahaia khan chu ram dang mi sômkhath chu Juda mi inkhat kuang zuangin, ‘Pathian chu nin kuang a om ti kin inhriat sikin, keini khomin nangni zui kin ti’ tiin la hril an ti, a tia.

Zakaria 9

A kôlvêla namhai chungu roirêlna

¹ Hi hi Rengpa thuhiril chu a ni: Hadrak ram chungu le Damaska khopui chungu hremna chu an kunga. Israel namhai vai hi ni loiin, Suria mihai khopui khom hiRengpa ta a ni.

²Khanchu Hadrak ramria Hamath khom chu a ta a nia, khang dênin Tura le Sidon khopuihai le an thiamna murdihai khom chu a ta an ni.

³Tura khan a ta hrangin kul det takhai a sina, tangka le rângachak chu kholaidunga vâiphin ang dôrin a buk zuata.

⁴ Khannisian, Rengpa'n a thil nei murdihai chu lapai ving a ta, khopui chu hâlin la irvômtilir rip a ti.

⁵ Askelon khopuiin kha kha a hmuin la chi a ta, Gaza khopuiin la hmu a ta, a sâna innatirin la om a ti. Khang dênin Ekron khom chu la ni a ta, a sabeina



chu a korong la ni a ti. Gaza'n a rêng chu la'rh mang a ta, Askelon chu mâksanin la om a ti.

⁶Ram dang mihaiin Asdod chu lua an ti. Khan Rengpa'n hiang hin a hrila, "Filistian mihai omlianna chu sâtthâk ki ta.

⁷Hmê chu a thisen om pumin fa ta ngai no nihaia, thilser fâk hrang danghai khom fa ta no nihai. A hringa la omsunhai chu ki mihai chang an ta, Juda namhai laia panam angin la om an ti. Ekron khom chu Jebus mihai angin ki mihai la hong chang an ti.

⁸Ki ram chu hrung ki ta, tukhomin an hro thei lina hrangin sipaihai sia ki ti. Roirêltu ngarhai khan ki mihai hi nuam le ningin inlotirhai ta no ninga, ki mit ngeiin ki mihai tuangzia ki hmu tâk sikin," a tia.

Reng hong tung hrang

⁹ O Zion nâinu, a sân nin raiinfân roi; O Jerusalem nâinu, raifânin khêk roi. En ta ni rêng chu ni kuang a zuang e! Ama chu mi dik a nia, saninzôkna neiin irngaiintôm takin sakuartung chungga, Sakuartungte chung ngeia zuang chuangin.

¹⁰ Khan Rengpa'n hiang hin a hrila, "Irdoina sakor tâlihai chu Israel rengata sonpai ki ta, Jerusalem ata sakorhai chu lapai ki ta, Irdoina sâihli hmanga omhai chu lan siatpai ki ti. Nam tinhai laia ni rêngin irngeina la siam a ta; Tuikhanglian ata tuikhanglian dênin roi la rêl a ta, Eufrates dung ata irnêng mongna tena," a tia.

Pathian mihai indingthara an om nôkna

¹¹ Khan Rengpa'n hiang hin a hrila, "Nangma le ki thuthung, irbôlna thisena namindeta om, khasika vai khan ni mihai chu lan suahai ki ti, Khur sâng tui om lina, sal intângna rengata kha lan suahai ki ti.

¹²O nangni atûna sabeina nei, sal intânghai, Lungthi taka nin omna hrang hmun tiang kêr nôk roi. Nangni ki hril, nin dengtheinaihai kha a lêt hniin satvurna'n nangni thuan ki ti.



¹³Juda chu sipaihai kuta sâihli angin hmang ki ta, Israel chu thal angin hmang ki ti. Zion mihai chu Grik mihai doi hrangin khandai angin hmanghai ki ti,” a tia.

¹⁴Rengpa chu a mihai chung a inlang a ta, a thalhai chu kôlirtêk angin la kâp suak a ti. Rengpa Pathianin bekul lan ringtir a ta, Sim tiang ata kêllaiher kâra hong a ti.

¹⁵Sipaihai Rengpa’n a mihai chu hrung a ta, Anni’n an râlhai chu lan boipaihai an ti. Irdoinaa zu inrui angin la khêk an ta, an râlhai thisen chu lan suaktir an ta; Irbôlna thisen berbu ata maichâma buaka a iom angin la luang a ti.

¹⁶Kha nikhua kha a hong tung tena chu, Belrapuin a belrahai ichiomna ata a isaninzôkhai angin, Rengpa’n a mihai chu saninzôkhai a ti. Renglukhuma lungluluihain angin anni chu a rama khan la chok an ti.

¹⁷Ram kha i dôr takin mo enhoiin sa ta ni! An bu chu ruathartehaiin raiinfân an ta, An uain tharin dôngmatehai chu an raiinfântir pehai a ti.

Zakaria 10

Rengpa’n a mihai a irtansuak thu

¹Khua a kangin Rengpa kuang rotui zong roi. Sûmphâihai le rotuihai chu Rengpazuang itûr a nia, loihai chu mi tin ta hrangin hring zon zonin a siama.

²Mihaiin millimhai le tasân theihai an irdonhai ngaia, khannisian a sâмна an ihmuhai chu minlak le chanlamboi korong a ni ngai. Senkhatin irmanghai an sui ngaia, khannisian fena hrang vai kêng nangni an fe insualtir ngaia, an lungngam saknahai khom chu hmanghmunboi ving a ni. Khasikin mipuihai chu belra irhmanghai angin an irvâk indarh ngaia, hruaitu an nei no sikin, an buai ngai.

³Khan Rengpa’n hiang hin a hrila, “Ki mihai chung a roirêltu, ram dang mihai chung a hin ki ning an mura, khasikin hremhai hrang ki ni. Juda mihai chu ki



ta an nia, kei Rengpa Pathian hin anni chu donsuihai ki ti. Anni chu irdoinaa ki sakor hrâthai ni an ti.

⁴Anni lai ata roirêltuhai, hruaituhai le ki mihai chung a roirêl hrangtuhai chu la suak an ti.

⁵Sipaihaiin an râlhai lampuia dialdôka an ichîlhai angin, Juda mihai chu zoina changin la om an ti. Rengpa chu anni tiang a om sikin la doihai an ta, râlhai sakor chung chuang mihai ten khom lan hnêhai an ti.

⁶Juda mihai chu inhrâtirhai ki ta, Israel mihai chu saninzôkhai ki ti. An chung a lungkhamna nei ki ta, an rama hong hruai kîrhai nôk ving ki ti. Anni chu ki lei ihnôl tâkhai angin om no nihaia, Kei Rengpa an Pathian hin an chongchainahai chu zuang sâm ki ti.

⁷Israel mihai chu sipaihai angin hrât an ta, Uain intu angin raifân takin la om an ti. An irchi suanpârhaiin hi inhnêna hi inhre mai an ta, Rengpa sinthohai sikin an rai la fân a ti.

⁸Ki mihai chu koihai ki ta, an rêngin bûmhai ki ti. Anni chu saninzôkhai ki ta, pung hranga hrila an iom angin, tamtakin lan punghai ki ti.

⁹Nam tinhai laia ki'rthekindartirhai khoma, ram hla takahai khomin nin hre mai an ti. Anni leh an nâi le tehai ngei chu la hring an ta, an rêngin an ram tiang la hong kîr an ti.

¹⁰Aigupta le Assuria ramhai rengata khom hruai khômhai ki ta, an rama inomtirhai ki ti. Gilead le Lebanon-ah khom inomtirhai sa ki ta; ram murdi chu mihriamin la sip an ti.

¹¹An buaina tuipui an pal laiin, kei Rengpa ngei hin tuiirsokhai chu vîk indâi ki ta, Nail li inthûkhai khom chu la kang an ti. Assuria omlianna chu sâtthâk ki ta, Aigupta roiinpuina chu a sinthotheina leh la irhmang a ti.

¹²Ki mihai chu hrât takin siamhai ki ta, ni biak an ta, Kei chu ni zôm an ti," tiin Rengpa'n a hrila.

Zakaria 11

Mi nunsia tûkna



¹O Lebanon, ni mikothai inhong ro, ni sidar thinghai chu meiin a kângpai theina hrangin!

²O meisâr thingkunghai, sidar kunghai chu an tûk tâk sikin chap le inrûmin om ro; kha thing roiinpui takhai kha insiatpaiin an om tâk sikin.

³Roirêltuhai chu lungzîngin an khêk ta, an roiinpuina chu ar hmang tâk sikin. Kâmkeibaknei inrûm irhâihai chu irngai roi. Jordan dung irhôra an omna rampui chu insiat a ni tâk sikin.

Belrapu inhnihai

⁴Rengpa ki Pathianin ki kuang hiang hin a hrila, “That hranga om belra pâlhai hi donsuihai roh.

⁵A’rchôktuhaiin an thathaia chu, hremin om mahai, a zuartuhai lakin, ‘Rengpa chu inpâkin om ri se, ei irchong tâk sikin’ an tia. An belrapuhai ten lua’n an chung a inrenna nei mahai,” a tia.

⁶(Khan Rengpa’n hiang hin a hrila, “Irnêng chung a mihai khu inkhat lua inrenhai ta no ning. Mi tin chu an roirêltuhai kuta pehai ki ta, kha roirêltuhai khan irnêng khu lan ram an ta; khanchu keiin anni chu an kut ata saninzôkhai no ning,” a tia).

⁷Belra zuartuhai le a’rchôktuhai khan kei chu irhlo hrangin an ni hmanga, belra that hranga omhai belrapu chu ki hong chang tâka. Khanchu khianghrol inhni ki lâka, inkhat kha “Ditsakna” ki tia, inkhat dang kha “Irpumkhatna” tiin ki phuaa, khang khan belra pâlhai chu ki donsui tâka.

⁸Khanchu belrapu inthum, a ni hmumâkpu’n chu irngaitheihai ma unga, khasikin tha khat sîngin anni chu ki paithâkhai tâka.

⁹Khanchu keiin belra pâlhai kuang khan, “Nin belrapu’n om ta no ninga, a thi hranghai chu thi ta unglân, inboipaia om hranghai chu inboipaiin om ta roi. A hring sunhai khom chu anni le anni hmê chu la’rfa an ti,” tiin ki hrila.

¹⁰Khanchu khianghrol “Ditsakna” ti chu ki lâka, kin khiakpaia, Rengpa’n nam tinhai le thuthung a isiam kha sîta a om theina hrangin.



¹¹Khasikin thuthung chu kha nê khan sûtin a om tâka, belra irchôktuhai le zuartuhai khan kei chu an ni en maia, khan Rengpa chu ki sinthohai ata kha a zuang chong a nih ti an inhriat tâka.

¹² Khan keiin an kuang, “Nin nuama ni’n chu, ki hlo chu ni pe roi. Khannisian nin nuam noa ni’n chu ni pe no roi,” ki tia. Khanchu tangka sômthum chu ki hlo’n an ni pêk tâka.

¹³ Khan Rengpa’n ki kuang hiang hin a hrila, “Tempila tangka siana hmuna khan se roh,” a tia. Khanchu tangka sômthum, ki man hranga ruk bak ni le irhoia an ingaitua kha tempil tangka siana hmuna khan ki sia tâka.

¹⁴ Khanchu khianghrol dang, “Irpumkhatna” iti kha kin khiakpai nôka, Juda le Israel irpumkhatna chu insiatpaiin a om tâka.

¹⁵ Khan Rengpa’n ki kuang hiang hin a hrila, “Atûn chu belrapu pualoi tak angin om roh.

¹⁶ Ki belrahai donsui hrangin belrapu ki siaa, khannisian belra siat hranga omhai chu changpuihai maka; ar hmanghai khom zong maka, a pop a liamhai khom indamhai maka, a hring sunhai khom infâhai mah. Belrahai laia a marhai hme kha kêng a fâka, an ke mitinhai chu a kaithêr pehai ngai.

¹⁷ Kha belrapu hmanghmunboi chung kha a rik e! A belra pâlhai chu a mâksanhaia. Irdoina’n a sinthotheina chu inboipai ving a ta, a bân chu zeng a ta, a chang tiang mit chu chô a ti,” a tia.

Zakaria 12

Jerusalem saninzôka a la om hrang thu

¹ Hi hi Israel chungthua Rengpa rengata thu suak chu a ni, Rengpa irvânhai kaiinzara, irnêng inding suaka, mihriamhai kuanga hringna petu’n hiang hin a tia:

² “Jerusalem chu a vêla nam murdihai ta hrangin inruina khilâtin siam ki ti. Khan Jerusalem chu an doi tena, Juda khopui murdihai khom chu doiin om an ti.



³Khannisian kha zoro kha a hong tung tena chu, Jerusalem chu lungpui riktak angin siam ki ti, tu nam khomin indompai a tuma ni'n chu, ama chu innatirin om a ti. Rammuala nam tin sipaihai chu ama doi hrangin irzomkhôm an ti.

⁴Kha tena chu keiin an sakor murdihai chu irthatâk inlatirhai ki ta, an sakor chung chuang mihai chu invêttirhai ki ti. Juda mihai chu hrung hai ki ta, khannisian an râlhai sakorhai chu an mit inchotir pehai ki ti.

⁵Khanchu Juda namhai khan an bingin, 'Rengpa Pathianin Jerusalema a mihai chu hrâtna a pêk a ni hi,' la ti an ti.

⁶Kha tena chu Juda namhai chu ram kêra mei angin le, loia bu hmun laia mei angin siamhai ki ta, an kôlvêla namhai chu lan boipaihai ving an ti. Jerusalema mihai chu khopui sînga khan lungthi takin om an ti.

⁷Juda sipaihai chu kei Rengpa ngei hin inhnêna pehai masa ki ta, khanchu Davida irchi suanpârhai leh Jerusalema mihaiin roiinpuina an idong hrang kha Judahaiin an idong hrang nêk khan roiinpui bîk no ni.

⁸Kha tena chu Rengpa'nJerusalema omhai chu hrung hai a ta, an laia hrât loi tak khom Davida angin la hrât a ti. Khanchu Rengpa vântirtôn, Pathian ang dên khan, Davida irchi suanpâra mihaiin anni chu la hruaihai an ti.

⁹ Kha tena chu Jerusalem doi tumtu nam tin hai chu lan boipaihai ki ti.

¹⁰Davida irchi suanpâra mihai le Jerusalema mihai chung a khan khonzâna le chongchai nuamna irtha chu buak ki ti. Khanchu an lei isun that tâk kha en an ta, mi'n a nâi khât a ichâ angin ama chu la châ an ti. Nâilutîr sîntuhai angin a sân la sîn an ti.

¹¹Khanchu kha nia Jerusalema chap irhâi chu Megido phâia an pathian Hadad-Rimona an ichap ngai ang dôrin inring a ti.

¹²A ram sînga sîngkua tin hai chu mâni sîngkua seng la châ an ti: Davida sîngkuaa mihai, Nathana sîngkuaa mihai,

¹³Levi sîngkuaa mihai, Simeia sîngkuaa mihai le sîngkua dang murdihaiin.



¹⁴ Sûngkua tin chu mâni seng la'rsûn an ta, sêngkua tina pasalhai chu nupanghai leh ni loiin an bing sengin sên an ti.

Zakaria 13

Jerusalem le a kôlvêla namhai

¹Khan Sipaihai Rengpa'n, "Kha zoro kha a hong tung tena chu, Davida irchi suanpâra mihai le Jerusalema mihai, an sualnahai le an millim biaknahai thâr irthiangna hrangin tuikuang inhong pe ni an ti.

²Kha tena chu keiin hi ram sêng ata hi millimhai irhming chu inboipai ta ki ta, tukhomin anni chu inhre mai ta no nihai. Deipua irtipu kai chu sâtthâkhai ki ta, millim biak nuamnahai chu lapai pehai ta ki ti.

³Khannisian mi'n thu a la hril nôk maia niin chu, ama nu le pa ngeiin ama chu that nih a ti, tiin hril ri se; minlak thoa, Rengpa thu hrila a'rti sikin. Khan thu a hril nôk laiin ama chu a nu le a pa ngeiin sun that ri sehai.

⁴Kha zoro kha a hong tung tena chu, deipu tukhomin inlârna a ihmuhai sika khan lâirpâk ta no nia, deipu ang khomin om ta no nia, mipuihai huangna hrangin deipu silkaihai irbel ta no nihai.

⁵'Kei chu deipu ni ma ung, loi sinthopu kêng ki ini; ki hring sêng hin loi kêng ki itho ngai,' la ti an ti.

⁶Khanchu mi'n ama chu, 'Ni rôpa sâbehai kha imo a ini?' tiin irdon an ta; khan ama'n, 'Hihai hi ki rualhai ina an ni inphop a ni,' tiin sâm a ta," a tia.

Pathian belrapu that hrang thupêk

⁷ Khan Sipaihai Rengpa'n hiang hin a hrila, "O khandai, harin lân, keima ta hrang sinthotu belrapu kha that roh. Ama chu thatin lân, belrahai chu irthekindarh an ti.

⁸Ki mihai chu doihai ki ta, khanchu ram sêng murdia mipuihai chu hmun thuma sena hmun hni chu thi an ti.

⁹Khanchu a hmun thuma chu meia infetir ki ta, sumtak chu irthiangtira a iom angin irthiangtir ki ta, rângachak chu fia a ini angin fia ki ti, khanchu ki kuang chongchai an ta, keiin anni chu sâmhai ki ti. Anni chu ki mihai an nih



ti hrilhai ki ta, khan anni khomin, ‘Rengpa chu kin Pathian a ni,’ ni ti ta an ti,” a tia.

Zakaria 14

Jerusalem le namhai

¹Roirêl hranga Rengpa toina hrang nikhua chu anai ta! khanchu Jerusalem chu longindarh ni a ta, râllâk sumhai chu ni mithmu ngeia irsem an ti.

²Rengpa’n nam tinrêng hai chu Jerusalem doi hrangin hong hruaihai a ti. Khopui kha lâk ni a ta, inhai chu longindarh ni a ta, nupanghai chu châipui an ti. Mipui a chimrip chu sala fe an ta, khannisian a danghai kai chu khopui ata kha hruaipaiin om no nihai.

³Khanchu Rengpa chu fe suak ta a ta, matona a idoihai ngai ang khan nam tin hai chu doi hai ta a ti.

⁴Kha tena chu ama chu oliv tânga ngîr a ti, Jerusalem nisua tiang khan. Khanchu oliv tâng chu a laitaka nisua tiang ata nitâk tiang irhôr lian tak changin irsenphat a ta, a chimrip kha hmâr tiang irson a ta, a chimrip dang kha sim tiang irson a ti.

⁵Khan nangni chu hi mual inhnihai kêra irhôr ata hi zôk nin ta, nin irchibulhaiin Judai ram rêng, Uzia inlal laia hnîngnupui ata an izôk ang khan nangni khom zôk nin ti. Rengpa ki Pathian chu vântirtôn hai murdi leh zuang a ti.

⁶Kha zoro kha a hong tung tena chu, a dâi le izil om ta no nia,

⁷inthim khom om sa ta no ni. Zâna khom vâi mai ta a ti. Rengpa vaiin hi zoro tung hrang hi a inhriat a ni.

⁸ Kha nikhua kha a hong tung tena chu, Jerusalem ata tuihring hai hong suak a ta, a chimrip chu Tuipui Thia luang lût a ta, a chimrip dang chu Mediteranean tuipuia lût a ti. Kumtuangin luang a ta, fûra khom, sâla khom.

⁹Khan Rengpa chu irnêng chung murdia rêngin om a ta; mi tinin Pathian angin ama chu biak an ta, ar hming khom inkhat vai ni a ti.



¹⁰Khan ram murdi, hmâr tianga Geba ata sim tiang Rimon dênin inchantir nih a ti. Jerusalem chu a kôlvêla ramhai chung a têt a ta, khopui chu Benamina mikot ata a kila mikot ten, inmâna mikot omna hmun le, Hananela in irsâng ata kha rêng uain sômna khur ten kha phâk a ti.

¹¹Mipuihai chu khataka khan lungthi takin om an ta, siatna rêng rêng inchitirin om ta no nihai.

¹²Rengpa'n hripui ichiom tak, Jerusalem doitu nam tinhai chung a intungtir a ti. An hring sângin an taksa chu hmonthâk a ta; an mithai le an mileihai khom hmon a ti.

¹³Kha tena chu Rengpa'n a sân inbuaihai a ta, chitna'n sip an ta, mi tinin an kôla mi chu chel seng an ta, doi an ti.

¹⁴Juda mihaiin Jerusalem chu hrungin doi an ta, râlâk sumin nam tinhai irchon, rângachak hai, sumtak hai le silkai hai chu tamtakin la an ti.

¹⁵Hripui ichiom tak râlhai riakbuka sâ murdihai chung a, sakorhai, sakuartunghai, saringseihai le sakuartung puihai chung a khom chum sa a ti.

¹⁶Khanchu Jerusalem hong doitu nam tinhai laia a la om sunhai chu a kum tinin RengpaPathian chu biak hrangin le, kairêng kût hmang hrangin fe mai ngai an ti.

¹⁷Tu nam khom Rengpa Pathian chu biak hranga Jerusalema a hong fe noa niin chu, an rama rua rêng rêng tho no ni.

¹⁸Aigupta mihaiin kairêng kût chu an hmang nuam noa ni'n chu, nam tin ama biak nuam loituhai chung a Rengpa'n hripui a intungtir hrang kha an chung a intungtir pehai a ti.

¹⁹Kairêng kût kha an hmang nuam noa ni'n chu, hi hremna hi Aigupta le nam dang murdihai chung a la chum a ti.

²⁰Kha tena chu sakor silnianghai chung tena khom hi thu hi irziak ni a ti. "Rengpa ta hranga inhlan," ti hi. Tempila bu anh suangna bêlhai chu maichâm kôla tâborhai ang dêna irthiang ni ta a ti.



²¹Jerusalem le Judai ram murdia bêl le bûrhai chu Rengpa Pathian biakna hranga ison ni ta a ti. Thilinhlan inhlantuhaiin thilinhlan hmêhai suangna hrangin hmang an ti. Kha zoro kha a hong tung tena chu Rengpa Pathian tempila khan Kanaan mihai rêng rêng om ta no nihai.



Malakia

Malakia 1

Rengpa'n Israelhai lung a thung

¹ Israelhai kuanga Rengpa thu suak Malakia kut ziaak chu.

² Rengpa khan, lung nangni ki thung a ni a tia. Nangni rêkin chu, khoa khan mo lung ni ni ithung? nin tia. Esaua kha Jakoba urêng a ini loi ma ni? ti hi Rengpa thu suak a ni: Jakoba kha lung ki thunga;

³ Esaua rêk chu ki khôkmâka, A tânghai chu hmun ramin ki siama, ar chon dongtum chu ram sialhai ki pêk a ni.

⁴ Edom-hai khan, "Inhnê'n ei om nâkin, kîr nôk ei ta, hmun siat takhai kha siam insa ei ta", tihai sian khom; Sipaihai Rengpa khan hiang hin a ti, "Sin an ta chu kai inrîl ki ti: khan, mihai khan anni kha, 'Siatzoina ram le kumkhuaa an chung a Rengpa ninginmurna chian chian nam,' ti an tih.

⁵ Nin mit ngeiin hmu nin ta, 'Israel ram khêl tena khom Rengpa kha chôindômin om ri se, nangni ngêtin la ti nin ti.

Rengpa'n ochaihai a hal

⁶ Sipaihai Rengpa'n nin kuang, "O Ochai, ki'rhming hmusittuhai, nâipa'n a pa an zaa, siahloin a hruaitu: khaanga pa ki niin chu, kho mani nin ni inzâna? hruaitu ki niin chu, kho mani nin ni ichina? Nangni'n chu, 'kho mani nir hming kha kin ihmusit?' nin tia.

⁷ Ki maichâma khan bai porinche nin inhlan kha te. Nangni'n, khoa khan mo kin iporinchetirna? nin tia. Rengpa maichâm hi hmusitom a ni, nin iti hennaa hin a ni.

⁸ Irbôlna'n a mitcho nin inhlanin sualna a iom loi ma ni? A ke'nbâi le sirirdul nin inhlanin sualna a iom loi ma ni? Nin ram optu khom pe ngân u ta; nangni lôm ni mo? Aninole, nangni lei irngaisâng ni mo? Sipaihai Rengpa'n a ti.

⁹ Atûn hin lung a nin kham theina hrangin Pathian lung inchuktirna zong roi. Hiang hin nangni kut suak ngei a ni, Nangni a lei ingaisâng hrang ma ni? Sipaihai Rengpa khan a ti.



¹⁰Mâkana'n ki maichâma khan mei nin inchok lolina hrangin, Nin laia mi, mikot khâr hrang om sianlân chu o! Nin chung a lômna rêng rêng nei ma ung, nin kut ata thil irhlan kha pom sa no ning; Sipaihai Rengpa khan a ti.

¹¹Misa suakna ata a tâkna dên khomin, Jentailhai laia ki'rhming kha a roiinpuia, hmun tina ki'rhming hrangin mirimhoi inhlân a ni, thilinhlan irthiang le Jentailhai laia ki'rhming a roiinpuia, Sipaihai Rengpa'n a ti.

¹²Nangni rêk chu, Rengpa maichâm kha a porinche a ni, A thei ra a bu ngei kha hmusitom, nin itia khan a ni. A porinchetirtu nin ni.

¹³Khan, irngai u ta, ningirhal a om bâka! nin ti saa, nin hnâr nin không khuma, Sipaihai Rengpa'n a ti; irbôlna hrangin mi thil nin ilâk hai, a ke'nbâi hai, sirirdulhai nin hong laka; khaangin thilinhlan kha nin hong lâka: khahai kha nin kut ata ki ipom hrang ma ni? Rengpa'n a ti.

¹⁴A belra pâl laia a chal om chianin, chong khom inkungin Rengpa kuang a hmêlvei inhlana huangtu kha khosâl tong a ni: Kei chu rêng roiinpui tak ki nia, kha rêng roiinpui tak ki nia, ki'rhming khom Jentailhai laia ichiom a ni, Sipaihai Rengpa'n a ti.

Malakia 2

¹Atûn hin o nangni ochaihai, hi chonginkung hi nin ta hranga a ni.

²Ki'rhming roiinputirna hrang nin irngaitua noa, milunga nin vong no'n chu, nin chung a khuasâlna zuang intungtir ki ti, Sipaihai Rengpa'n a ti, nin satvurna donghai kha khuasâlna ki ti: A ni, nin laia milunga vong nin om no sikin khua nangni ki isâl chian tâk a ni.

³Irngai u ta, nangni sikin nin chihai kha halirchu ki ta, nin hmâihai khan êk nâl ki ta, hruaithe nin ihmangna ngêt leh khan; kha leh khan lapai ni nin ti.

⁴Levia kuang ki thuthung hi an ding thiai theina hrangin, hi thupêk hi nin kuang ki hong insua a ni, ti inhria nin ti, sipaihai Rengpa'n a ti.

⁵Ki milung kha a kuang a oma; hringna le irtharngamna ki pêka, chi khom a ni ichi a ni, ki'rhming chia a ngîr theina hrangin a kuanga khan ki ipêk a ni.



⁶Thutak dân kha a bâia a oma, thu insual a hmûra om ma: Irtharngamna tak le irdîn takin ki makunga a lêng ngaia, mi tamtak an pualoina ata an kîrtir a ni.

⁷Ochaihai hmûra chu inhriatna a ivong hrang a nia, a bâi ata dân kha an izong ngai hrang a ni; ama kha Sipaihai Rengpa tîrtôn a nia.

⁸Nangni rêk chu lampui ata nin lei pêt taka; Dâna khan mi tamtak nin intûktira; Levia thuthung kha nin insiat a ni, Sipaihai Rengpa khan a ti.

⁹Khasikin kei khomin, ki lampui chu tukhomin a hro om mak chêia, Dân thua mi theibîk nin inei ang zêlin, mi murdi makunga hmusitom le irhniamin nangni siam ki ti.

Pathian ata mihai iamom loi

¹⁰Ei rêngin pa inkhata irchi ei ini loi ma ni? Pathian inkhat siam khom ei ini loi ma ni? Itho sika mo ei pahai thuthung porinchetira, urêng le urêng ei irhuang hen?

¹¹Juda khan mi a huanga, Israel ram le Jerusalem khuua, thil intirom tho a nia; Rengpa'n lung a ithung ngai hmun irthiang kha Juda khan a porinchetir tâka, Ram dang pathian nâinu a nei tâk a ni.

¹²Hianga tho chu a tukhom ni sian, Jakoba puan in ata Rengpa'n irkiangtir zit a ti. Sipaihai Rengpa kuang thil inhlantu dênin.

¹³Khan, hi khom hi nin tho nôk saa; Rengpa maichâm kha mitrithi le chapna, sabeidongna'n nin irkhuma, khasika khan nin thilinhlan kha uksak ta maka, nin kut ata a sân a ipom viat viat ta loi a ni.

¹⁴Nangni'n chu, "Itho sikin mo?" nin la ti sa rêk, ni thuthung nupang leh ni irkoppui ni khomsian, a chung a dik loi taka ni itho tâk hi, ni thoibop laia dôngma le nangma kêra khan Rengpa kha thu'nhretu a ni.

¹⁵Khan hringna chi kha a nei sikin, ama khan inkhata a isiam loi ma ni? Itho sika inkhata siam mo a ini? Pathian chi kha a izong a ni. Khasika khan nin irtha khan irdîn unglân mi tukhom a thoibop dôngma kha porinche takin lo no ri sehai.



¹⁶“Irmâk hi a sân ki ikhômâk a ni,” Rengpa, Israelhai Pathian khan a ti, mâni silkai irmanêpnaa irkhum le, sipaihai Rengpa’n a ti. Khasikin, nin irthaa khan irdîn unglân, porinche taka nin tho nona hrangin.

Roirêlna nikhua a zuang nâi

¹⁷Nangni rêkin chu, ia khan mo kin insôltir? nin tia. Thilsual thotu murdi Rengpa mithmua mi sa an nia, an chungâ khom a sân a lôm ngai nin ti ngaia, roirêl felna Pathian kha khôn mo a iom? nin itihaia hin a ni.

Malakia 3

¹“Irngai u ta, ki tirtôn kha ki târa, ama khan ki matona lampui kha sinsiam a ti: khan Rengpa nin izong kha, a biak ina khan zuang zôi zel a ti; khan, thuthung tirtôn nin inuam tak kha, irngai u ta a hong e,” sipaihai Rengpa’n a ti.

² “Khannisianlân, a zuangna nikhuaa khan tu mo om thei hranga? Ama a zuang inlang tika chu tu mo ngîr ni? ama fiana mei ang le puan sôptu sabon ang a nia;

³ama kha tangkarua irthiangtu le infâitu angin toi a ta, Levia nâipasalhai kha irthiangtir a ta, anni kha rângachak le tangkarua angin insunfâi a ti. Khan, anni khan Rengpa kuanga felna’n thil inhlanhai kha inhlan an ti.

⁴Khan, Jerusalem le Juda thil inhlan kha tianlai kumhai le mânlai nikhua hai ang khan Rengpa kuanga lômom ni ta a ti.

⁵Khan, roirêl hrangin nangni ki zuang inâi hrang a nia; Dôitheihai, uirehai, milaka khomâksâm tukai chungâ le meithâi le fara le irhlofâkhai hlo insiatpaia ngainêptukai le nam dang lei paithâktukai le ni chi loitukai chungâ khan thu’nhretu sakhi satak ni ki ti, Sipaihai Rengpa’n a ti.

Sôma inkhat pêk thu

⁶Kei Rengpa hi danglam ngai ma unga, khasikin nangni, O Jakoba irchihaio, ar hmang ni mak chêi.



⁷Nin puhai zoro ata kha ki thu'nkunghai nin pêtsana, zôm khom zôm ngai mak chêi. Ki kuang hong kîr unglân, khanchu nin kuang zuang kîr ki ti, Sipaihai Rengpa'n a ti. Nangni'n chu, ia hin mo kin ikîr hrang? nin tia.

⁸Mihriamin Pathian ta kha a inrûk pe hrang ma ni? Khannisian nangni'n chu nin ni inrûk pe ngai? Nangni rêkin chu, Ia hin mo kin inrûk pe? nin tia, Sôma inkhat le thilinhlanhaia hin.

⁹Khosâl tong nin ni ta; nangni hi nam pumpui hin, nin ni inrûk pe ngai a ni.

¹⁰Ki ina fâk hrang a om theina hrangin sôma inkhat murdi kha tholôm bôma hong chôi roi, irvân tukverhai kha nangni kin hong pe'n satvurna dong sêng loi dôrin nangni ki vur mo, vur ma ung, ni hong fia ngân u ta, Sipaihai Rengpa'n a ti.

¹¹Nangni fâk irhmangpai petu nangni khap pe ki ta, khanchu, nin irnêng rahai kha nangni insiat pe ta no nia, irhuana nin grep ra kha nangni tâk irhmangpai pe ta no nia, Sipaihai Rengpa'n a ti.

¹²Khan, nam murdi'n vânei nangni ti ta an ta, Ram inditom tak nin la ni hrang sikin, Sipaihai Rengpa'n a ti.

Lungkham Pathianin an kung

¹³Ki chungu nin thuhai kha a sân a ngar, Rengpa khan a ti. Nangni rêkin chu, ia khan mo kin insîr? nin tia.

¹⁴Pathian sintho hi mâkana a ni: a chonginkung ei izôm le sipaihai Rengpa makunga ning nin inthik tâka. ei ilêng hen hi imo a'rfêna om?

¹⁵Khan, mi lâirpâkhai kha a hoi pehai ei tia; thil tho'nsualtuhai kha an hong thoi insaa, Pathian an fiaa, saninzôk an ni sa ngai nin iti a ni:

¹⁶Khanchu, Rengpa chituhai kha an chongirhlôma: Rengpa'n a lei irngaituaa, a lei inhriata, Rengpa chituhai le ar hming uksaktuhai hrangin inhriat maina lekhabu kha a makunga irziak a ni tâka.



¹⁷Sipaihai Rengpa khan, “Anni kha ki tahai ni an ta, irchon irkhêl bîk tak ki siamna nia chu; khan mi’n a nâipa ama sinthotu kha a isiam angin anni kha siam ki ti,

¹⁸Khanchu hong irhei kîr nin ta, mi fel le mi sia, Pathian sinthotu le tholoitu kha theithâk thei ta nin ti,” a tia.

Malakia 4

Rengpa nikhua zuang tung hrang chu

¹Irngai u ta, nikhua a zuang tung e, hâl inzôina mei angin a kâng a ni; mi lâiripâk murdihai le sual thotu murdihai kha fapôl ni an ta: kha nikhua zuang tung khan anni kha kâng a ti; a’rzung le a ôn dênin hôi no ni, Sipaihai Rengpa’n a ti.

²Khannisian, nangni ki’rhming chituhai chung a rêk chu felna misa hong suak a ta, a thal chu damna ni a ta, sehrâtte insua angin râifân takin irchôm nin ti.

³Khan mi pualoi kha sirbe ta nin ta; nikhua ki isiam ngêt hrang nia chu nin kezapha hnuaia khan vâiphin ang dênin an ini ta hrang a ni, sipaihai Rengpa khan a ti.

⁴“Israelhai murdi ta hranga Horeb tânga ki ipêk, roirêlna le thu’nkunghai, ki siahlo Mosia dân kha inhre mai roi.

⁵ Irngai u ta, Rengpa zuangna nikhua ichiom tak le irkhêl tak makunga khan deipu Elija kha nangni zuang tîr pe ki ti.

⁶Ama khan pahai lungrîl kha nâihai lungrîl tiang irnghattir a ta, nâihai lungrîl kha an pahai tiang; khano’nchu ki zuang hin ram kha khuasâlin zuang hremna lik ki ti”, tiin.



Hrangkhol - All Bible

Mathaia

Mathaia 1

Jisua Krista Irchibulhai

(Lk 3.23-38)

- ¹Jisua Krista chu Davida irchi a nia, Abrahamama ata an irkai lam chu hiang hin a ni.
- ²Abrahamama'n Isaka a neia, Isaka'n Jakoba, Jakoba'n Juda le a urênghai a neia,
- ³Juda'n Pereza le Zera (an nu chu Tamari a ni) a neia, Pereza'n Hezrona a neia; Hezrona'n Arama a neia.
- ⁴Arama'n Aminadaba, Aminadaba'n Nasona, Nasona'n Salmona,
- ⁵Salmona'n Rahabi ata Boaza a neia, Boaza'n Ruthi ata Obeda, Obeda'n Jesaia a neia.
- ⁶Jesaia'n rêng Davida a nei. Davida'n Uria dôngma ata Solomona a neia.
- ⁷Solomona'n Rehoboama, Rehoboama'n Abija, Abija'n Asa.
- ⁸Asa'n Jehosafata, Jehosafata'n Jehorama, Jehorama'n Uzia,
- ⁹Uzia'n Jothama, Jothama'n Ahaza, Ahaza'n Hezekia.
- ¹⁰Hezekia'n Manasea, Manasea'n Amosa, Amosa'n Josia.
- ¹¹Babulon-a sala intâng lai vêl khan Josia'n Jehoiakina le a urênghai a neia.
- ¹²Babulon-a sala intâng hruai hnungin Jehoiakina'n Sealtiel a neia, Sealtiel'n Zerubabela a neia.
- ¹³Zerubabela'n Abiuda, Abiuda'n Eliakima, Eliakima'n Azora.
- ¹⁴Azora'n Zadoka, Zadoka'n Akima, Akima'n Eliuda.
- ¹⁵Eliuda'n Eliazara, Eliazara'n Mathana, Mathana'n Jakoba.



¹⁶Jakoba'n Josefa, Mari pasal kha a neia; Mari ata Jisua Krista an iti kha, a zuang suak tâka.

¹⁷Khanchu, Abrahamama le Davida kêra irlo sôm irlo minli an oma, Davida le Babulon-a sala intâng hruai kêra khom irlo sôm irlo minli an om a ni. Kha rengata irthokin Messia suak dênin irlo sômhleiminli a ni.

Jisua suak thu

(Lk 2.1-7)

¹⁸Jisua Krista zuang suak lam chu hiang hin a ni, a nu Mari kha Josefa dôngma hual a nia, an omsuam mân Irtha Irthiangin nâi an vongtir ti inhriat a ni tâka.

¹⁹A pasal hrang Josefa chu mi fel tak a nia, mualinphoitir nuam maka, inrûkin mâk a tuma.

²⁰Khannisianlân, kha thu kha ar ngaitua laiin, irngai ta, ar manga Rengpa itîr vântirtôn a hmua, "Josefa, Davida nâipa, ni dôngma hual Mari kha a nei chitirîm no ro, a nâi vong chu Irtha Irthiang ata kêng, a tia.

²¹Nâipasal nei a ta, ar hming Jisua phua ni ti, Ama khan a mihai kha an sualhai ata a isaninhriang hrang a ni," a tia.

²²Rengpa'n Deipu bâia,

²³'Irngai ta, dôngmate irthiang khan nâi vong a ta, nâipasal nei a ta, A'rhming Imanuela,' phua an ti. (kha kha "Ei kuanga Pathian a om," tihna a ni.) tia a insîr kha a hong tung theina hrangin hihai murdi hi a hong iom a ni.

²⁴Josefa in kha a hong hara, Rengpa Vântirtôn thupêk angin a oma, Mari kha dôngma'n a nei tâka;

²⁵Khannisianlân nâipasal a nei mâka chu zâlpui suam ma, khan Josefa'n ar hminga JISUA tiin nâi irhminga khan a phua tâka.

Mathaia 2

Nisua tianga mi vârhai

¹Heroda inlal laia, Judai rama Bethlehem khuaa Jisua a zuang suakin, irngai ta, nisua tianga mi vârhai Jerusalema an zuanga



²“Khôn mo Judahai rêng hranga nâi zuang suak kha? Nisua tianga a ârsi kin hmua, ama, chubai mûk hrangin kin ihong a ni,” an tia.

³Kha thu kha rêng Heroda’n an hriatin chu a sân a char a dong tâka, Jerusalema mi murdihai khom an char a donga.

⁴Khanchu, Ochai inlalthai le Dân irchutirtuhai murdi chu a koi bûmhaia, an kuang, “Kho hmuna mo Mesia a isuak hrang?” tiin ar donhaia.

⁵Anni khan, “Judai ram Bethlehem khuua suak hrang a ni,” an tia. Hiang hin Deipu’n a lei irziak kha:

⁶“Nang, Bethlehem, Judai rama om, Judai ram khopui laia hin chîn ual hliak mak che, Ni sêng ata optu a zuang isuak hrang a ni, ki mi Israelhai hruaitu hrang chu iti hi,” tiin an sâma.

⁷Khanchu, Heroda’n mi vârhai kha inrûkin a koihaia, ârsi inlang lai zoro kha fel takin ar donhaia.

⁸Bethlehem-a khan an fetirhaia, “Fe ta unglân, nâite thu kha fel takin irdon infel unglân; kei khomin ama kha chubai ki hong mûk sa theina hrangin, nin hmu tikin ni hong inhril nôk roi,” a tia.

⁹Reng thu kha an inhriata, an fe tâka, nisua tianga a ârsi an ihmu ngêt kha nâite omna chung irdîna a tunga, a’rngam mâka chu an maton tiang a hruaihai maia.

¹⁰Ârsi kha an hmu’n an râi a fân tak taka.

¹¹In sêng an va lûtin chu a nu Mari kôla nâite kha an hmua, khûksadelin chubai an mûka; an irchon kokhai an inhonga, thilpêk rângachak, bero, mura hai an pêka.

¹²Heroda kuang kîr nôk loi hrangin an irmanga hril an ni sikin, an ram panin lam dang tiang an kîr nôk tâka.

Aigupta rama an rot thu

¹³An kîr hnungin, irngai ta, Rengpa vântirtôn inkhat Josefa kuang irmangin an lâra, “Thoiin lân, nâite le a nu hruaiin lân, Aigupta rama rot ta ro; nang ki



hril nôk mâka chu kha khan om mai ro, Heroda'n nâite hi thatpai tumin a izong hrang a ni," a tia.

¹⁴Khanchu, a thoia, nâite le a nu chu a hruaia, a zân zânin Aigupta rama an fe ta.

¹⁵Heroda thi mân chu kha khan an om tâka. Rengpa deipu hmanga, "Ki Nâipa kha Aigupta ram ata ki koi suak," tia a insîr kha a hong tung ta a ni.

Nâitehai ithata an om thu

¹⁶Khan, mi vârhaiin an ihuang a nih ti Heroda'n an hriatin chu, a sân a ning an mur tâka, a zoro thu an irdona an ihril ang khan Bethlehem le a kôlvêl murdia nâipang kum hni hnuai tianga chu an thattirhai zita.

¹⁷Deipu Jeremia'n:

¹⁸"Rama khuaa khêk irhâi an inhriat, lusûn le chap ngûi ngûi irhâi chu; Rakili'n a nâihai a châa, an om ta no sikin ar tha irngam thei ta maka," tia insîr kha a hong tung ta a ni.

Aigupta ram ata an hong kîr thu

¹⁹Heroda a thi zoiin, Aigupta rama khan Josefa'n a'rmangin Rengpa Vântirtôn a hmua,

²⁰"Thoiin lân, nâite le a nu hruaiin lân Israel rama kîr ta ro; nâite that tumtuhai kha an thi zoi ta," a tia.

²¹Khanchu, a thoia nâite le a nu kha a hruaia Israel ram chu a pan tâka.

²²Khannisianlân, Arkelausa chu a pa Heroda irthûlin Judai rama an lal ti an hriatin chu khataka fe kha a chia, a'rmanga inhriattir a ini angin Galili ram tiang a fe tâka.

²³Khua inkhat, Nazaret an itia khan a va oma, "Ama kha, 'Nazaret mi' ti an tih," tia deipuhai lei insîr kha a hong itung ta a ni.

Mathaia 3

Baptistu Johana thuhiril
(Mk 1.1-8; Lk 3.1-18; Joh 1.19-28)

¹Kha lai khan baptistu Johana kha Judai ram ramchâra thuhirilin a hong.



²“Irllet roi, Irvân Ram anai tâk e!” a tia.

³Ama hi kêng deipu Isaia’n, “Ramchâra mi khêk irhâi khan, 'Rengpa lamlian siam unglân, A fena hrangin lam intûn siam roi,’ a ti,” tia a insîr kha.

⁴Johana khan saringsei mul songkolin an nghâka, savun kongkhit a khita, a bu chu khâihmimse le ram khuaihlutui a ni.

⁵Kha zoro lai khan Jerusalem le Jordan tuidung vêl ram murdia omhai khan ama kha an pan sup supa.

⁶An sualhai an inpuanga, Jordan dunga khan a lei baptis-haia.

⁷Khan, Farisaihai le Sadukai tamtak hong a hmu’n an kuang, “Mirûl irchihaio, ningmur hong tung hrang rengata zôk hrangin tu mo baptisma chang hranga nangni inthor?”

⁸Nin sualhai ata nin irlet ngêt a nih ti inlang hrangin sin tho roi.

⁹‘Abrahama irchi kêng ei ni,’ tia ningmurna rengata zôk hrangin irtûng no roi. Nangni ki hril, Pathianin hi lunghai khom hi Abrahama irchi’n a siam thei!

¹⁰Atûn ata thing bul tina hreipui sia chian a ni ta. I ang thing khom ra saloi chu phûra meia tuapai chian an ti.

¹¹Keima’n chu irlet entîrna hrangin tuiin nangni ki baptis ngaia; ki hnunga zuang hrangtu chu keima nêkin a roiinpui uala, a kekok chôi inruk khom ni ma ung.

¹²Ama’n chu Irtha Irthiang leh meiin nangni baptis a ti; a hruizôla bu kha zâp infâia, panga thun hrangin a mira kha a chôi tâka, a’rsîhai kha chu that theiloi meia hâl irhmang a ti,” a tia.

Jisua Baptisma chang thu

(Mk 1.9-11; Lk 3.21-22)

¹³Kha zoro lai khan Galili ram ata Johana kuang, Jordan dunga baptisma chang hrangin Jisua kha a hong fea.

¹⁴Johana khan, “Nangin kêng ni baptis hrang ni nia, ki kuang teh ni hong?” ti’n a sêla.



¹⁵Khannisianlân, Jisua'n, "Atûn hin a sa ti chian ro, hianga Pathianin a inuam murdi ei tho zit hrang a ni," a tia. Khanchu, Johana'n a sa a ti tâka.

¹⁶Jisua kha baptisma a chang zoiin chu tui ata kha a suak zôi zela; a ta hrangin irvân ar hongga, Pathian Irtha kha vasu anga suakin a chungga chuang a hmua.

¹⁷Irrngai ta, irvân ata hnuk irhâiin, "Hi hi ki nâipa, lungthung tak chu a ni, a chungga ki lôm tak tak," a tia.

Mathaia 4

Jisua thêмна a tong

(Mk 1.12-13; Lk 4.1-13)

¹Kha zoiin chu Jisua kha Diabola inthêm hrangin ramchâra Irtha'n a hruai zôi zel tâka.

²Sûn sômminli le zân sômminli bu a nghei zoiin chu a phîng a hong châm tâka.

³Khanchu, Setana kha a hongga, a kuang, "Pathian Nâipa ni ni lele'n chu hi lung hi bai chang hrangin thu pe ro," a tia.

⁴Jisua'n a sâma, "Bai ringotin mihriam hi an ihring thei hrang ni mah. Pathian bâi ata thu tinrêng suakin kêng an ihring hrang a ni," tia irziak ang khan, tiin a sâma.

⁵Kha hnung chu Diabola khan Jisua kha, Jerusalem khopui irthianga a hruai lûta, tempil sîpa an ngîrtira,

⁶a kuang, "Pathian Nâipa ni ni lele'n chu irchômtha ro, 'Ni chungchânga teh Pathianin vântirtônhai thu pe a ta, An kutin nang indom an ti, khano'nchu ni ke leh lung irfûina ni ti,' ti irziak a ni," a tia.

⁷Jisua'n a kuang, "Rengpa ni Pathian fia no ro, ti irziak a ni sa kêng," a tia.

⁸Diabola khan tâng irsâng taka a hruai nôka, rammual ram murdihai le a roiinpuina an entira.

⁹A kuang, "Khûksadelin chubai ni mûkin lân, hihai murdi hi nang pe ki ti," a tia.



¹⁰Jisua'n a kuang, "Setan, rot pat ro, 'Rengpa ni Pathian chu chubai mûkin lân ama sin vai tho ro,' ti irziak a ni," a tia.

¹¹Khanchu, Diabola khan a rotsana, vântîrtônhai an zuanga a sin an tho pe ta.

Jisua'n Galili rama sintho a phut

(Mk 1.14-15; Lk 4.14-15)

¹²Johana an chel ti an hriatin Jisua kha Galili rama a fe pat tâka.

¹³Nazaret suaksanin Kapernaum khuua a zu om ta, kha kha Zebulun le Naftali ram huala Galili dîl panga om a ni.

¹⁴Deipu Isaia insîr kha a hong itung a ni ta:

¹⁵"Zebulun le Naftali ram, Tuipui panna lam, Jordan râl, Jentailhai omna Galili.

¹⁶Inthim hnuaia toihai khan vâi roinputak an hmua, Thina ram inthim hnuaia toihai chung a zuang vâi ta," tia a lei insîr kha a hong tung indikna hrangin, kha kha a hong iom a ni.

¹⁷Kha tena khan Jisua'n, "Irlet roi, irvân Ram chu anai tâk e," tiin a hril irphut tâka.

Jisua'n nga chel ngai mi minli a koina

(Mk 1.16-20; Lk 5.1-11)

¹⁸Jisua chu Galili dîl muanga a chai laiin ulenâi inhni, Simon Petera an iti le Andria chu dîla lên vîrin a hmuaia; nga chel ngai an ni.

¹⁹An kuang, "Ni zui roi, khanchu mihriam cheltu'n nangni siam ki ti," a tia.

²⁰An lênhai kha mâksanin, ama kha an zui zôi zel tâka.

²¹Khatak ata a fe thiaia, ulenâi inhni, Zebedaia nâi Jakoba le Johana kha a hmuaia, an pa Zebedaia leh irkuanga an lên an insui insaa, anni kha a koihaia.

²²Khanchu, irkuang le an pa kha an mâksana; Jisua kha an zui zôi ta.

Jisua'n ar chutir, thu an sîr, a indam thu

(Lk 6.17-19)



²³Jisua'n Galili ram murdi ar fanga, an Sinagokhaia irchutirin, Ram Thurchi Sa chu a hrila, Israelhai laia natna tinrêng le hrât nona tinrêng irveihai chu an damhai thiaia.

²⁴Khanchu, Suria ram murdia a thurchi an thang tâka; damloi murdihai, damloina le natna tinrêng tuanghai, ramilhli ichelhai, hrisangol le zengintheihai, a kuang an hong hruaia, a lei indamhaia.

²⁵Galili ram ata, Dekapoli khua ata, Jerusalem ata, Judai ram ata le Jordan râlhai ata mipui tamtakin ama an zui ta.

Mathaia 5

Tâng chungã thu'nsîr

¹Jisua'n mipuihai kha a hmu'n chu tânga a kâia, a toia, a irchutirhai an hong irbukkhôma;

²khanchu, thu an sîra, a'rchutirhaia.

Vânsatna diktak

(Lk 6.20-23)

³"Irthaa inrianghai chu an vân a sa e, irvân Ram an ta a ni sikin.

⁴"Irtha'nvâihai chu an vân a sa e, irtharngam la ni an ti.

⁵"Thuhnuairôlhai chu an vân a sa e, Pathian chonginkung kha an la hmu hrang sikin.

⁶"Felna sika phîngchâma tuiinhrâlhai chu an vân a sa e, an la ikhop hrang a ni.

⁷"Lungkhamna nei mihai chu an vân a sa e, lungkham an la ihlo hrang a ni.

⁸"Milunga irthianghai chu an vân a sa e, Pathian an la ihmu hrang a ni.

⁹"Irngeina siamtuhai chu an vân a sa e, Pathian nâihai ti an la ni hrang sikin.

¹⁰"Felna sika dengtheina tuanghai chu an vân a sa e, irvân Ram an ta a ni sikin.

¹¹"Keima sika mi'n nangni an hala, deng nangni an intheia, dikloi taka soal tinrêng thoa nangni an bê'n chu nin vân la sa ti.



¹²Lôm unglân, raifân takin om roi, irvâna nin lômman a om intama; khaang dênin tiana deipuhai khom kha deng an intheihai kêng.

Michi le vâ

(Mk 9.50; Lk 14.34-35)

¹³“Irnêng michi nin ni, khannisianlân michi hi dong ta ngân sianlân, itina inaltir nôk hrang ma ni? Pai suaka, sirpha chian ti no chu ia khom hman inruk ni ta no ni.

¹⁴“Rammual vâ nin ni, tâng sîpa kho om chu thup thei ni mah.

¹⁵Mi’n meiser hâlin khamphulu hnuai sia ngai mahai, a sianaa kêng an sia ngai; khanchu, in sînga mi murdi a êl invâ ngai.

¹⁶Khaang dênin nin vâ kha mi mit hmu’n vâ ri se; khanchu, nin thil tho sahai kha hmu an ta, nin Pa irvâna mi chôindôm thei an ti.

Dan chungchânga irchutirna

¹⁷“Dân thua mani, Deipuhai thua mani, insiat hranga zuang ni iam no roi, insiat hrang ni loiin irkiptir hranga zuang kêng ki ini.

¹⁸Thudik nangni ki hril, irnêng le irvân hi a om sîng chu Dân thua om inchuk dap mani, kaipit mani a rêngin a tung irkip zit mâka chu inkhat lua hi boi no ni.

¹⁹Khanchu, hi thupêk laia poimo loitak inkhat khom hi ngainêpa, khaanga mihai irchutir ka chu irvân Rama mi chîn tak ti an ti; aniachu, tukhom, zôma irchutir ka chu irvân Rama mi lian ti an ti.

²⁰Nin felna’n Dân irchutirtuhai le Farisai felna a khêl no’n chu irvân Rama lût viat no chin ni, ti nangni ki hril a ni.

Ningmur chungchânga irchutirna

²¹“Tianlai mihai kuang, “Mi ni ithat hrang ni ma, mi that rêng rêng chu an chungthu rêl ni a ti,” ti thu nin inhriat.

²²Keima’n chu nangni ki hril, mâni urêng chung a ningmur chu a chungthu rêl ni a ti; a urêng “hmangnaboipa” ti chu Sanhedrin-ah rêl ni a ti; a urêng “invêtpa” ti lenvâng chu hremhmun meia fe inruk a nih ti nangni ki hril a ni.



²³Khanchu, ni thilpêk maichâma nin hlan hranga khan ni urêngin ni chungalunghoi nona a nei ti nin hriat suakin chu,

²⁴maichâma ni thilpêk kha masanin lân, fe'n lân ni urêng kha irngeipui bakin lân, kha zoiin ni thilpêk kha inhlan roh.

²⁵“Ni irdoipui kha lampuia nin fe suam laiin irngeipui lat roh; khano'nchu, roirêltu nang incheltir a ta, roirêltu'n chu sipai kuang nang inhlan a ta, intângna ina nang khumna lik an ti.

²⁶Thudik nang hril ki ti, poisa inkhat khom ni pêk irkip mâka chu, kha hmun ata kha suak viat no chi ni.

Uirena chungchânga irchutirna

²⁷“ ‘Ni uire hrang ni mah,’ ti nin inhriat.

²⁸Keima'n chu hiang hin nangni ki hril, tukhom, nupang indit ena en ka chu, a lungrîla a iuire chian tâk a ni.

²⁹Ni mit chang tiangin nang an tûktirin chu kêlsuakin lân, pai rak roh; ni taksa pumpui hremhmuna pai nêkin chu taksa mit kiangkhat boi chu ni ta hrangin a sa ual.

³⁰Khan, ni kut chang tiangin nang an tûktirin chu, tanpaiin lân, pai rak roh; ni taksa pumpui hremhmuna pai nêkin chu, ni taksa kut kiangkhat boi chu ni ta hrangin a sa ual.

Irmâkna chungchânga irchutirna

(Mt 19.9; Mk 10.11-12; Lk 16.18)

³¹“ ‘Tukhom dôngma mâk chu irmâkna lekha pe ri se,’ ti a ni sa.

³²Keima'n chu hiang hin nangni ki hril, uire sika ni loia dôngma mâk ka kai chu, a dôngma kha an iuietir a ni, kha zoia nei nôk khom an iuire a ni.

Khomâksâm chungchânga irchutirna

³³“Tianlai mihai kuang, ‘Milakin khomâk irsâm no unglân, Rengpa kuang ni khomâksâm kha ni isua hrang a ni,’ ti nin inhriata.

³⁴Keima'n chu hiang hin nangni ki hril, khomâk rêng rêng irsâm no roi; irvân sâlin sâm no roi, kha kha Pathian rêngtoihmun a ni;



³⁵irnêng sâlin irsâm sa no roi, kha kha a ke irngatna a ni; Jerusalem sâl khomin irsâm no roi, kha kha rêng roiinpui tak khopui a ni.

³⁶Ni lu sâlin ni isâm hrang ni ual ma, sam malkhat khom ni inngoiiin, ni invom thei ni mah.

³⁷Ni thu'nsâr kha "A ni" nin iti chu a nih ni ri se, "Ni mah" nin iti chu, ni mah ni ri se, khaban kha chu sual ata suak a ni.

Phuba lâk chungchânga irchutirna

(Lk 6.29-30)

³⁸" 'Mit irthûla mit; ha irthûla ha,' ti nin inhriat;

³⁹Keima'n chu hiang hin nangni ki hril; mi sual irdoipui no roi; ni biang chang tiang inbêntu kuang chu vei tiang khom do roh;

⁴⁰Tukhomin ni chungâ thupoi siamin ni songkol lâk an tumin chu ni puan khom inlatir sa roh.

⁴¹Khan, mêl khat nakhrâta nang hruaitu chu mêl hni zui roh.

⁴²Nang an nghi'n chu pe'n lân, ni kuanga pûk nuampu chu irheisan no roh.

Râlhai lungthung hrang thu

(Lk 6.27-28,32-36)

⁴³"Ni bômhai lung ni ithung hrang a ni, ni râl chu ni ikhômâm hrang a ni,' ti nin inhriat.

⁴⁴Keiin chu nangni ki hril; ni râlhai kha lungthungin lân, deng nangni intheitirtu chu chongchai pe ro,

⁴⁵nin Pa irvâna mi nâihai nin ni theina hrangin; Ama'n chu mi sualhai le mi sahai chungâ misa an suaktira, sin sa sinhai le sin saloi sinhai chungâ khom rua an thotir ngai.

⁴⁶Lung nangni thungtuhai vai lung nin thungin, lômman imo nin ihmu hrang? Khâzana irfuangtuhai khomin khang khan an tho ngai!

⁴⁷Khan, nin urênghai vai chubai nin imûk hin imo ni itho inhliak ual? Jentailhai khomin khang khan an tho ngai!



⁴⁸Khanchu, nin Pa irvâna mi a sa irkip angin nangni khom nin isa irkip ngêt hrang a ni.

Mathaia 6

Thilpêk chungchânga irchutirna

¹“Nin thil sa thohai kha mihriam makunga, an hmu hranga tho loi hrangin irdîn roi; khano'nchu nin Pa irvâna mi kuang lômman hmu no chin ni.

²Khanchu, lungkham thilpêk nin pêkin, mi vâirlethaiin mi inpâk an hlo theina hrangin Sinagokhai le kholaidunghaia an itho ngai angin ni matona bekul tum no roh. Thudik nangni ki hril, an lômman chu an hmu zoi ta.

³Nangma'n chu lungkham thilpêk ni pêkin ni kut chang tianga itho kha ni vei kutin inhre no ri se;

⁴ni thilpêk chu inrûka a om theina hrangin; khanchu, ni Pa, inrûka nang hmu ngaitu khan nang pe a ti.

Chongchai chungchânga irchutirna

(Lk 11.2-4)

⁵“Nin chongchai khomin mi vâirlethai angin tho no roi; mi'n an hmu theina hrangin Sinagok haia, kholaidung haia, ngîr puma chongchai an ngaipoimo ngai. Thudik nangni ki hril, an lômman chu an hmu zoi ta.

⁶Nangni'n chu nin chongchai zoro'n, nin chontan sîngrîla lût unglân, in khâr unglân, nin Pa mita hmu theiloï kuanga khan chongchai roi. Khanchu, inrûka nangni hmu ngaitu khan nangni thuan a ti.

⁷“Nin chongchaiin Jentailhai angin nôk mai mai no roi; an chongchai tam sikin inhriat hrangin an ibe a ni.

⁸Anni angin om no roi, nin zong mân khom nin Pa khan nin innanghai chu an hriat zit kêng.

⁹Khanchu, nangni chu hiang hin chongchai roi: 'Kin Pa, irvâna mi, Ni'rhming mahripin om ri se, Ni Ram zuang tung ri se.

¹⁰Ni nuamlam irvâna mi'n an isin angin, irnênga mi'n sin ri se.

¹¹A vuan hin kin rukin bu ni pe roh.



¹²Kin chungá tho insualtuhai kin ngaidam angin, nang khomin kin tho insualnahai ni ngaidam roh.

¹³Thêmnaa ni hruai inlût no'n lân, mi sualhai ata ni saninhring roh,' tiin.

¹⁴“An tho'nsualnaa mihai nin ngaidamin chu, nin Pa irvâna mi khomin nangni ngaidam a ti.

¹⁵Nin ngaidam no'n chu nin Pa'n nin tho'nsualnahai nangni ngaidam bîk no ni.

Bu nghei chungchânga irchutirna

¹⁶“Bu nin nghei zoro khomin mi vârirlethai angin ngûi hmêl irput no roi; anni'n chu mi mit hmu'n bu nghei an inlangtir theina hrangin ngûi hmêl an irput ngai. Thudik nangni ki hril, an lômman chu an hmu zoi ta.

¹⁷Nangni'n chu bu nin ngheiin, sahriak irthû unglân, nin hmâi phi roi.

¹⁸Nin Pa, inrûka om kuang vai no chu mi mit hmua bu nghei inlang no chin ni; khanchu, nin Pa, inrûka nangni hmu ngaitu khan nangni thuan a ti.

Irnênga irchon buk

(Lk 12.33-34)

¹⁹“Irnênga, irthî le ngarêkin a fâk siatnaa, inruhain an inrûk theinaa hin nin ta hrangin irchon bukkhôm no roi.

²⁰Irvâna, irthî le ngar-êkin a fâk insiat loinaa, inruhain an inrûk thei loinaa khan nin ta hrangin irchon bukkhôm ual roi.

²¹Nin irchon omna kipa nin lungrîl khom a om ngai.

Takpum ta hranga vâ

(Lk 11.34-36)

²²“Mit hi takpum ta hrangin meiser ang a ni, khan nin mit a vârin chu nin takpumpui invâr a ti;

²³nin mit a vâ no'n chu nin pumpuiin chokhap a ti. Khanchu, nangnia vâ om kha an thimin chu, kha inthim kha iti hraia irkhêl hrang mani tâk!

Pathian le sum

(Lk 16.13; 12.22-31)



²⁴“Tûte’n hruaitu inhni sin irkop thei no nihai, inkhat hnôlin, inkhat indit an ta; aninole inkhat irngaiinnat an ta, inkhat hmusit an ti. Pathian sin le sum sin irkop thei no chin ni.

²⁵“Khasikin nangni ki hril, nin hringna hrangin imo fâkin kin iin hrang tihai, takpum ta hrangin imo kin isil hrang tihai hi lunginkâng no roi. Fâk hrang nêkin hringna hi a poimo ual, silkai nêkin takpum khom a ipoimo ual loi ma ni?

²⁶Chunglêng vahai khi en u ta, bu tû mahaia, ât mahai, fasiara inlût ual mahai, khannisian, nin Pa irvâna mi’n an fâhaia; anni nêkin chu nin ihlu ual loi ma ni?

²⁷Nangnihai laia lunginkâng sikin tu mo mâni hringna insei viat thei?

²⁸Silkai thua ithoa mo lung nin inkâng? Rama tûktin pâr irsôn lamhai hi ngaitua u ta, sin tho mahaia, pat kai mahai,

²⁹Khannisianlân, nangni ki hril, rêng Solomona lua mina a roiinpui thei ang dôrin ar bela khan, hi tûktin pâr inkhat dôr lua hin irvo ni mah.

³⁰“Khanchu, ram sûl, a vuana hring, nangtûk zînga meia tua nôk zel hrang lua Pathianin khang dôrin a’rvotirin te, O nangni iamna tômhaio, khahai nêkin chu nangni irvôtir no ni mo?

³¹Khasikin imo fâkin, in kin ta, imo silin kin irbel hrang tiin lunginkâng no roi.

³²Jentailhaiin kha kha an ibuaipui ual tak a ni: nin Pa’n khahai murdi kha nangni khomin nin innang ngêt a nih ti an hriat.

³³A ram le a felna chu zong masa roi, khanchu, hihai murdi hi nangni pêk bêlsa a ti.

³⁴Khasikin, zînga hrang lunginkâng no roi, nangtûka hrang khom Pathianin nangni ngaitua a ti. Sûn khat dengthei hi sûn khat hrangin a iruk a ni.

Mathaia 7

Mi dang sêl chungchâng

(Lk 6.37-38,41-42)



¹“Mi sêl no roi, isêla nin om nona hrangin.

²Nin isêl lam ang takin Pathianin nangni sêl a ta, mi chung a dân nin ihmang tak kha nin chung a khom hmang an ti.

³Ithoa mo mâni mita thingtum om chu inhre loiin ni urêng mita minim hlekte om kha ni ihmu?

⁴Itin mo ni mita thingtum om chianin ni urêng kuang, ‘Ni mita minim hlekte kha nang lei la pe rong,’ ni iti ngam dân?

⁵Nang vârirlet! ni mita thingtum kha pai bakin lân, khanchu, ni urêng mita minim hlekte om kha fel takin hmu thei ni ti.

⁶“Ui kuang chu thil irthiang pe no unglân, vok makunga khom nin lunghlu pai no roi; sirpol an ta, chîl insiat chit an ti.

Nghi, zong, intôk thu

(Lk 11.9-13)

⁷“Nghi roi, pêk ni nin ti; zong unglân, hmu nin ti; intôk unglân, inhong pe ni nin ti.

⁸A nghi murdi’n an hmu ngai, a zong murdi’n an hmu ngai; tukhom an tôk chu inhong pe ni a ti.

⁹A ni le, nangnihai laia tu mani, a nâipa’n bai nghi sianlân, tu mo lung pe hrang?

¹⁰Nga nghi sianlân, tu mo mirûl pe hrang?

¹¹Khanchu, nangni mi sualhai luan nin nâihai thil sa pêkna châng nin inhriatin te, nin Pa irvâna mi khan a nghituhai kha thil sa a ipêk intam ual hrang mo ni ma!

¹²“Khanchu, thil i khom mi’n nin chung a an itho nin inuam hrang ang khan mi chung a khom tho ngai roi; kha kha Dân le Deipuhai thu a lei ini chian a ni.

Mikot irchêp

(Lk 13.24)



¹³“Mikot irchêpa khan lût roi, irhmangna mikot chu a’rzata, a lam khom a hoia, kha lampuia fehài chu tamtak an ni.

¹⁴Hringna mikot chu a chîna, a lampui khom ar chêpa, a hmutuhai khom tômte an ni.

Thing sa chu a ra a sa

(Lk 6.43-44)

¹⁵“Deipu dolhai ata irdîn roi, khahai kha belra vun silin nin kuang an hong ngai; an sîng tiang chu inê ang an ni.

¹⁶Anni chu an sinthoa inhria nin ti. Ilhling kunga grep an irhmal ngai ma ni? Ilhling kunga khom theipui an ilâk ngai ma ni?

¹⁷Thing sa chu a ra a sa ngai, thing sia chu a ra sa thei ngai mah.

¹⁸Thing sa chu a ra siat ngai maka, thing saloi chu ra sa insua thei ngai mah.

¹⁹Thing tin ra saa raloi ka chu an phûra, meia an tua ngai.

²⁰Khanchu, deipu dolhai chu an sinthoa inhriat nin ti.

Nangni inhre ngai ma ung

(Lk 13.25-27)

²¹“Rengpa, Rengpa,’ ni ti narânhai chu irvân Rama lût no nihaia, ka Pa irvâna mi nuamlam thotuhai kêng an ilût hrang.

²²Kha nikhuaa khan mi tamtakin, ‘Rengpa, Rengpa! Ni’rhmingin thu kin insîra, ni’rhmingin ramilhlihai kin inhnot suak ngai, ni’rhmingin sinirkhêlhai kin itho ngai loi ma ni?’ la ti an ti.

²³Kha zoiin chu, ‘Nangni thil sual thotuhaio, nangni inhre ngai ma ung, ki kuang ata rot pat roi,’ tiin la hrilhai ki ti.

In sintu inhni

(Lk 6.47-49)

²⁴“Khanchu, hi ki thu hi inhriata, zôm murdi chu mi vâ, lungpui chung a in sintu leh irkhek rua a ni.

²⁵Rua a hong thoa, tuihai a hong liana, phâivua a hong thoa, kha in kha a hong nam rak raka, khannisianlân, chim ma, lungpui chung a sin indet khak a ni sikin.



²⁶“Hi ki thu hi inhriata zôm loihai chu mi’nvêt, bâli chungã in sintu leh irkhek rua a ni.

²⁷Rua a hong thoa, tuihai a hong liana, phâivua hai a hong thoa, kha in kha a hong nam rak raka, a chim tâka, a inrîl rup zôi a ni,” a tia.

Jisua irchamneina

²⁸Jisua’n kha thu kha an sir zoiin chu mipuihaiin a thu irchutir kha a sân ar khêl an ti.

²⁹Dân irchutirtuhai ang ni loia ircham nei taka ar chutirhai sikin.

Mathaia 8

Phâr indam thu

(Mk 1.40-45; Lk 5.12-16)

¹Tâng ata a zuang chum hnungin mipui tamtakin Jisua an zuia.

²A kuang phâr a hongã, kûnin chubai a hong mûka, “Rengpa, ni nuamin chu ni ni’rthiangtir thei,” a tia.

³Jisua’n a hong inbana, a tônia, “Ki nuam e, hong irthiang ta ni ti,” a tia, a phâr kha a hong irthiang zôi zel ta.

⁴Jisua’n a kuang, “Tûte kuang insîr no roh, aniachu Ochai kuang va fe’n lân, ni dam ngêt tih mihaiin an inhriat theina hrangin Mosia’n irbôlna thilinhlan hrang a inkung kha inhlan roh,” a tia.

Sipai irza hruaitu siahlo indam thu

(Lk 7.1-10)

⁵Khan, Kapernaum khua a hong lûtin a kuang sipai irza hruaitu a hongã,

⁶“Rengpa, ki siahlo zenginthei, ina a zâl chiana, a sân a na,” a tia.

⁷Jisua’n, “Hong ki ta indamtir ki ti,” a tia.

⁸Sipai irza hruaitu khan a sâma, “Rengpa, ki in sûnga ni lûtina hrangin irhoi mah, chongbâi ngotin ti’nlân, ki siahlo chu dam a ti.

⁹Kei khom mi thuhnuaia om ki nia, ki hnuiaia sipaihai an om nôka, ‘fe roh’ ki ti le a fea, ‘hong roh’ ki ti le a hongã; ki siahlo khomin ‘hi hih tho roh’ ki ti le a tho ngai,” a tia.



¹⁰Jisua'n kha kha an hriatin a sân ar khêl a tia, a zuituhai kuang khan, "Thudik nangni ki hril, Israelhai laia hiang dôra iamna nei hi tûte la hmu ma ung.

¹¹Nangni ki hril, sak le thang ata mi tamtak hong an ta, irvân Rama khan Abrahamama, Isaka, Jakoba hai leh hruaithe la otsap an ta;

¹²Ram nâihai chu pên tiang inthima inhnot suak ni an ti; kha khan chap le irkamirtôk om a ti," a tia.

¹³Jisua'n, sipai irza hruaitu kuang khan, "Fe tan lân, ni iam angin ni chungatung ri se," a tia. khan, kha zoro ngeia khan nâipang kha a dam tâka.

Mi tamtak indam thu

(Mk 1.29-34; Lk 4.38-41)

¹⁴Petera ina Jisua a lûtin a tarpinu inkhura zâl kha a hmua,

¹⁵a kut a tôn pea, an khur kha a boi pe ta; a thoia, bu anh a tho pe tâka.

¹⁶Khohloi a hong ni'n chu a kuang ramilhli ichel tamtak an hong hruaia, Jisua chongbâiin, ramilhlihai kha an hnot suaka, damloi hong murdihai khom kha an damtir sa a ni.

¹⁷Deipu Isaia'n, "Ama'n chu ei hrât loinahai a lâka, ei natna a pêt ta," tia insîr kha a hong tung indik theina hrangin kha kha a itho a ni.

Jisua zui tumhai

(Lk 9.57-62)

¹⁸Mipui tamtak a kôla om Jisua'n a hmu'n chu Jordan râl tiang fe hrangin a irchutirhai kha thu a pêka.

¹⁹Dân irchutirtu inkhat a honga, a kuang, "Irchutirtu ni fena kipa nang zui ki ti," a tia.

²⁰Jisua'n a kuang "Sihalhaiin khur an neia, chunglêng vahai khomin riak hmun an nei; Mihriam Nâipa hi chu a lu irnghatna hrang lua nei ma," a tia.

²¹A irchutirhai laia mi dangin a kuang, "Rengpa, ka pa vai ni va irvûitir ro ba," a tia.



²²Jisua'n chu a kuang, "Ni zui roh, mithi chu anni mithiin irvûi ri sehai," a tia.

Jisua'n tui irsok a hal indâi

(Mk 4.35-41; Lk 8.22-25)

²³Khan, Jisua irkuanga a chuanga, a irchutirhai khan an zuia.

²⁴Iringloi rengin dîla khan phâivuapui a hong thoa, khanchu tuiirsokin irkuang kha ngîmpai hrang a hong tho tâka, khannisian, Jisua chu a in zêta.

²⁵A'rchutirhai kha Jisua kuang an fea, an va kaithoia, "Rengpa, nin zôk ro, kin ithi hrang kêng," an tia.

²⁶Jisua'n an kuang, "Itho mo ang dôra nin ichi? Iti hraia iamna tôm mo nin ini!" a tia. Khanchu, a thoia, phâivua le tui irsok kha irngam hrangin thu a pêka, kha hnung chu a dâi dup zôi zel tâka.

²⁷Mihai khan a sân a'rkhêl an tia, "Hi mi hi i ang mi mo a ini? Phâivua le tui irsok ten khomin a thu an izôm hi te!" an tia.

Ramilhli ichel inhni indam

(Mk 5.1-20; Lk 8.26-39)

²⁸Dîl râl tiang Gadarin rama Jisua a hong tungin, ramilhli ichel mi inhni, thân ata hong suakhaiin an irtongpuia. Khahai kha ichi an om sikin, kha lampuia khan tûte irlôi ngam mahai.

²⁹Voi khat rengin khahai kha an khêka, "Pathian Nâipa, imo ni lo hrang ni iti? Zoro inkung tung mâna deng nin thei hranga ni izuang ma ni?" an tia.

³⁰Khatak ata nâi tenga om vok rual fâk zong an oma.

³¹Khanchu, ramilhli khan, "Ni nin hnot hrangin chu vok rualhai sînga son nin fetir roh," tiin Jisua kha an ngêna.

³²Jisua'n, "Fe roi," a ti pehaia, khanchu, an suaka, vokhai sînga an va lût ta. Khan vok rual kha rôla an irtol thâka, dîla a ngîmhai zit tâka.

³³A enkoltuhai kha an intâna, kho sînga an fea, thil omzia murdi, ramilhli ichelhai chung a thil tunghai kha an van sîra.



³⁴An kho pumin Jisua irhmupui hrangin an hong suaka, ama an hmu'n chu an ram suaksan hrangin an ngên tâka.

Mathaia 9

Zenginthe indam thu

(Mk 2.1-12; Lk 5.17-26)

¹Jisua irkuanga a chuanga, varâl tiang a kâia, a omna khua Kapernaum chu a va tunga.

²Irngai ta, zenginthe inkhat a zâlna le ileh a kuang an hong irzôna. Jisua'n an iamzia a hmu'n zenginthe kuang khan, "Ki nâi, irtharngam takin om roh, ni sualhai ngaidam a ni tâk e," a tia.

³Dan irchutirtu senkhathaiin, an lungrîlin, "Hi mi hin Pathian a ihril insiat kêng," an tia.

⁴Jisua'n an lungrîla an ingaituawai kha a lei inhriata, an kuang, "Ithoa mo khaanga thil saloi nin lungrîla nin ingaitua?"

⁵Ni sualhai ngaidam a ni ta' ti le "Thoiin lân fe ta roh' ti hi, a kho hi moh ti a ol ual?"

⁶Mihriam Nâipa hin irnêng chungga hin sualhai ngaidam theina ircham a nei ti nin inhriat theina hrangin," a tia. Khanchu, zenginthe kuang khan, "Thoiin lân, ni zâlhmun lan lân, ni ina fe ta ro," a ti pea.

⁷Kha hnung chu kha pa kha a thoia, a ina a fe tâka.

⁸Mipuihai khan kha kha an hmu'n chu, an chia, mihriamhai kuang irchamneina pêktu Pathian kha an inpâk ta.

Jisua'n Mathaia a koina thu

(Mk 2.13-17; Lk 5.27-32)

⁹Jisua'n kha hmun kha a mâka, a fe malamin khâzana irfuangna hmuna toi mi inkhat, a'rhming Mathaia kha Jisua'n a hmua, a kuang, "Ni hong zui roh," a ti pea. Khanchu a thoia, a zui tâka.

¹⁰Khan, Jisua kha Mathaia ina bu a nêk laiin, khâzana irfuangtu tamtak le mi sualhai an hongga, Jisua le a irchutirhai khan bu an nêkpui sa.



¹¹Farisai senkhathaiin ama kha an hmu'n chu a irchutirhai kuang "Itho mo nin irchutirtu hin khâzana irfuangtuhai le mi sualhai laia bu a inêk sa?" an tia.

¹²Jisua'n an chong kha a lei inhriata, an kuang, "Mi hrisêlhaiin daktor innang mahaia, mi irveisiahaiin kêng an innang ngai.

¹³Pathian Thubu'n, 'Irbôlna zong ma ung, lungkhamna kêng ki inuam' a iti hi fe unglân, a omzia va irchu roi, mi felhai irlam hranga zuang ni ma unga, mi sualhai irlam hranga zuang kêng ki ini," tiin a sâma.

Bu nghei chungchânga chong irdonna

(Mk 2.18-22; Lk 5.33-39)

¹⁴Khan, Baptistu Johana irchutirhai, Jisua kuang an hongga, "Itho mo keini le Farisaihai hin bu kin nghei mai ngaia, ni irchutirhaiin chu an inghei viat ngai loi?" an tia.

¹⁵Jisua'n an kuang, "Irneinaa khual mihai kha moineitu an kuanga a om sângin chardong hrangin nin itûng ma ni? Ni thei no ni! khannisianlân, an kuang ata moineitu an tuangpai pe zoro la tung a ta, kha tika chu bu la nghei an ti.

¹⁶Tûte'n puan milui, puan thar hlekin pho ngai mahai, puan thar kha irtum a ta, puan kha inset ual a ti.

¹⁷Tûte'n uain thar kha savun kok miluia thun ngai mahai, thun ngân sian, uain thar khan savun kokhai kha mût set a ta, a uain le a savun kokhai leh hmanghmunboi chang a ti. Khasikin uain thar kha savun kok thara an thuna, khanchu satakin a om ngai," a tia.

Zaira nâinu le nupangnu Jisua puan tôn thu

(Mk 5.21-43; Lk 8.40-56)

¹⁸Jisua'n kha thu kha an sîr laiin, Juda hruaitu inkhat a hongga, a makunga khûksadelin a kuang, "Ki nâinu atûn lele khan a thia; Khannisianlân, hongin lân, a chungga ni kut irnghatin lân hong hring nôk a ti," a tia.

¹⁹Khanchu, Jisua a thoia, a zuia, a irchutirhai khomin an zui sa a ni.



²⁰Khan, nupang inkhat, kum sômhleihni thi suak, damloi chu Jisua kuanga a hong, a puan hmor a tônia.

²¹A lungrîlin, “A puan hmor lua tôniain lân dam zel ki ti,” atia.

²²Jisua chu a hong irheia, khanu kha a hmua, a kuang, “Ki nâinu, irtharngam takin om roh; ni iamna hi ni idampui a ni,” a tia. Khanchu, kha zoro taka khan a hong dam tâka.

²³Khanchu, Jisua kha hruaitu ina a lûta, theihle tumhai le mipui irse mur mur a va hmu’n chu, an kuang,

²⁴“Suak roi, nin rêngin! Nâipang hi thi mah, a in kêng,” a tia. Khanchu, anni khan an innuisana.

²⁵Khannisian, mipuihai an hnot suakhai zoiin chu nâipang omna khan a lûta, a kuta a chela, nâipang kha a hong thoi tâka.

²⁶Kha thurchi kha, kha ram pumpuia khan an thang ta.

Jisua’n mitcho inhni an dam thu

²⁷Khan, Jisua’n kha hmun kha a mâka, a lei fe’n chu mitcho inhni’n an zuia, “Davida Nâipa, lung nin kham ro!” tiin an khêka.

²⁸Jisua in sînga a lûtin chu, mitchohai kha a kuang an hong, Jisua’n an kuang, “Nangni indam thei ki ti, ti nin iam mo?” tiin ar donhaia, “O kin iam, Rengpa!” tiin an sâma.

²⁹Khanchu, Jisua’n an mit a tônia, an kuang, “Nin iam lam ang takin nin chung a tung ri se,” a tia.

³⁰Kha hnung chu an mit a hong vâp pehai ta, Jisua’n ngar takin an kuang, “Hi thu hi tûte hril no roi,” tiin chong a bêhaia.

³¹Khannisian, anni kha an fea, kha ram pumpuia khan Jisua thurchi kha thang an inthei tâka.

Jisua’n chong theiloi an dam thu

³²Khan, kha mihai kha an suak laiin, mi senkhatin ramilhli ichela chong theiloi inkhat Jisua kuang an hong hruaia.



³³Khannisian, ramilhli kha an hnotpai le chu, kha mihriam kha a hong chong thei tâka; mi tinin an irngai ar khêl tâka, “Israelhai laia hiang rêng rêng hi la hmu ngai mak me,” an tia.

³⁴Khannisian, Farisaihaiin chu, “Ramilhli rêngpa’n, ramilhlihai inhnot suak theina irtha a ipêk a ni hi,” an tia.

Jisua’n mipuihai lung an kham thu

³⁵Jisua’n kho lian le kho chînhai ar fanga. Sinagokhaia, a irchuhaia, Pathian Ram Thurchi Sa an sîra, damloi chi tinrêng le natna chi tinrêng hai an damhaia.

³⁶Mipuihai kha a hmu’n chu enkoltu neilo belrahai angin dengthei le inthekindara an om sikin, lung an khamhai tak taka.

³⁷Khasikin a irchutirhai kuang, “Bu ât hrang a itam tia le te, sinthotu an tôm, a tia.

³⁸Khasikin a bu ât hranga sintho hrang hai tîr hrangin, bu Neitupa kuang khan nghi roi,” a tia.

Mathaia 10

Irchutir sômhleihnihai

(Mk 3.13-19; Lk 6.12-16)

¹Jisua’n a irchutir sômhleihnihai kha a koihaia, ramilhlihai inhnot suak theina le damloi chi tinrêng le natna chi tinrêng indam theina sinthotheina a pêkhaia.

²Tirtôn sômhleihnihai irhming chu hihai hi an ni; a masa taka Simon (Petera an iti) le a sangpa Andria; Zebedaia nâipa Jakoba le a sangpa Johana;

³Filipa le Bartholomaia; Thoma le khâzana irfuangtu Mathaia; Alfaia nâipa Jakoba le Thadaia;

⁴Kanaan mi Simona le an cheltirtu Juda Iskariota hai an ni.

Sômhleihnihai tho hrang

(Mk 6.7-13; Lk 9.1-6)



⁵Kha sômhleihnihai kha Jisua'n a tîr suakhaia, an kuang hiang hin chong a bê. “Jentailhai rama le Samari mihai khuaa chu fe no roi.

⁶Israel nam belra irhmanghai kuang nin ife hrang a ni.

⁷‘Fe unglân, Irvân Ram chu anâi ta,’ ti thu van sîr roi!

⁸Damloihai indam unglân, mithihai kaithoi unglân, phârhai irthiangtirhai unglân, ramilhlihai inhnot suak roi. Manboiin nin mana, manboi ngêtin pe roi.

⁹Nin zêpa rângachak poisa mani, sum mani, sumsên mani, chôi no roi;

¹⁰inzinna hrangin hmarsa mani, songkol irthuam mani, kekok irthuam mani, khianghrol irthuam mani chôi no roi. Sinhotu chu a innanghai kha pêk ni a ti.

¹¹“Kho liana mani, kho chîna mani nin lûtin nangni intung nuam hrang mi zong unglân, kha hmun kha nin mâk nôk mâka chu kha ina khan om mai roi.

¹²In sîng nin lûtin chu ‘Irtharngamna nin chung a om ri se,’ ti roi.

¹³Kha ina mihai khan nangni an lei lômin chu nin irtharngamna chubai kha an chung a tung ri se; khannisian, nangni an lei lôm no'n chu nin chubai chong kha la kîr nôk roi.

¹⁴Khan, kho khua khom nangni an pom noa, nin chong an irngai no'n chu marak unglân, nin ke bop kha nûlpai roi.

¹⁵Thudik nangni ki hril, Roirêl nikhuuaa chu kha khuahai tuang hrang nêkin chu Sodom le Gomora khuahai tuang hrang chu a zâi om ual a ti.

Dengintheina hong tung hrang thu

(Mk 13.9-13; Lk 21.12-17)

¹⁶“Irngai u ta! Inê kêra belra lût angin nangni ki itîr a ni. Mirûl anga vârin, vasu anga nunirnêmin om roi.

¹⁷Aniachu irdîn roi, nangni chela, Sanhedrin-ah nangni intunga, an sinagokhaia nangni zêm an ti.



¹⁸Keima sikin hruaituhai le rêng hai makunga la ngêr nin ti, anni leh Jentailhai chu Thurchi Sa nin insêr pehai theina hrangin.

¹⁹Nin chungthu ngaitua hranga nangni an hruai tikin nin ti hrang lei insâpin nin milung inbuai no roi; a zoro a hong tungin inhriattir nih nin ti.

²⁰Nin iti hrang hai kha nangni iti ni no nia, nin Pa Irtha khan nangni ti pe ti.

²¹“Urêng khomin that hrangin a urêngpa lan cheltir a ta, pa khomin a nâihai lan cheltir sa ta, nâihai khomin an nu le pahai doi an ta, that an ti.

²²Keima sikin mi tinin nangni la hnôl an ti. Khannisian tukhom a mong dêna tuang diar ka chu saninhringin om a ti.

²³Khua inkhat ata an nuam nuamin nangni an lo'n chu, kho danga rot pat roi. Thudik nangni ki hril, Mihriam Nâipa a zuang mân Israel ram kho murdia nin sintho zoi no chin ni.

²⁴“Irchulai chu ar chutirtu nêkin lian ual ma, suak khom a pu nêkin lian ual mah.

²⁵Khasikin irchulai kha ar chutirtu angin a hong iom le, suak khom a pu anga a hong iom kha a ruk. In chongpu lua Belzebula an ti'n te, a in sùng mi hai len vâng chu ti nok ual an ti!

Tu mo chi rua

(Lk 12.2-7)

²⁶“Khasikin mihriam hai kha chi no roi. Tinrêng inlang loi hranga ithup om maka, inhriatloi hranga thup ite om sa no ni.

²⁷Inthima nangni ki ihril hi sùn khovâra insêr unglân, inrûka nin inhriat hi in chung a chu angin tânginsampui roi.

²⁸Taksa thata irtha that theiloi hai chu chi no unglân, hremhmuna nin taksa le irtha that theitu Pathian kha chi ual roi.

²⁹Chongzong inhni poisa khatin nin irchôk thei, khannisian, an laia inkhat lua nin Pa thu ni no'n chu irnênga ta no ni.

³⁰Nangni chu nin samzâi ten lua tep zit a ini kêng.



31Khasikin chi no roi, chongzong tamtak nêkin chu nin hlu ual kêng! a tia.

Krista thop le hnôl

(Lk 12.8-9)

32“Tukhom mihai makunga ni thop ka chu kei khomin ka Pa irvâna om makunga thop ki ti.

33Khannisianlân, tukhom vântâng inhriata ni hnôl chu ka Pa irvâna mi makunga hnôl ki ti.

Irngeina ni loiin, khandai inlêng hrang thu

(Lk 12.51-53; 14.26-27)

34“Rammuala hin irngeina inlêng hranga zuang ni sôn no roi. Irngeina inlêng hranga zuang ni ma unga, khandai inlêng hranga zuang kêng ki ini.

35Nâipa'n a pa doi a ta, nâinu'n a nu, moiin a tarpi indoitir hranga zuang kêng ki ini.

36Mi a râl hrang chu a in sêngkua mihai ngêt ni an ti.

37Tukhom keima nêka a nu mani, a pa mani lungthung ual chu, ki irchutir rua ni mah.

38Tukhom a kros irputa ni zui no chu ki irchutir rua ni mah.

39Tukhom mâni hringna sênghual an tumin chu inchân an ta, keima sika an hringna inchân chu hmu an ti.

Lômmanhai

(Mk 9.41)

40“Tukhom nangni lôm chu, a ni lôm an ni; tukhom a ni lôm chu a ni tirtu lôm an ni.

41Tukhom Pathian tirtôn kha Pathian tirtôn a nina sika lei lôm chu Pathian tirtôn lômman hmu a ti. Tukhom mi fel chu mi fel a nina sika lôm chu mi fel lômman hmu a ti.

42Tukhom ki irchutirhai laia a chîn tak khom ki irchutir a nina sika tui dâi khilât khat khom lei pêk chu nangni ki hril, lômman hmu ngêt a ti,” a tia.

Mathaia 11

Baptistu Johana ata irchutirhai



(Lk 7.18-38)

- ¹Jisua'n irchutir sômhleihnihai kha irchutirna thuhai a pêkhai zoiin, khatak ata Galili ram khuahaia irchutir le thu hril hrangin a fe tâka.
- ²Baptistu Johana'n Jisua sintho hai kha intângna in ata a lei inhriatin, a irchutir senkhat Jisua kuang a tîrhaia.
- ³Jisua kuang, "Ni hril roh, Johana'n a zuang hrangtu a iti kha ni ini ma ni? A ninole, mi dang kin la itûng hrang ma ni!" an tia.
- ⁴Jisua'n an kuang, "Fe nôk ta unglân, thil nin ihmu le nin inhriat hi Johana va hril roi!
- ⁵Mitchohai an hmu thei ta, ke'nbâi hai an fe thei ta, phârhai an irthiang ta, kuarsêthai khom an inhriat thei ta, mithihai kaithoiin an om ta, inrianghai laia Thurchi Sa insîr a ni ta.
- ⁶Tukhom ki chungalunghlâna nei loihai chu an vân a sa," a ti pea.
- ⁷Johana irchutirhai kha an fe zoiin chu, Jisua'n mipuihai kuang khan, Johana thurchi an sîra: "Johana kuang ramchâra nin fe laia khan imo hmu hranga nin itûng kha? Phâivua'n lâiluang a isêm inhnîng kha ma ni?
- ⁸A ninole, i en hrang taka nin ife ma ni? Mi, puan irnêm sil ma ni? Khaanga puan sil ngai mi chu rêng ina kêng an om ngai!
- ⁹Ni hril roi, i en hranga nin ife ma ni? Deipu en hranga ma ni? O a ni, khannisian, deipu nêka lian ual tak nin ihmu kha.
- ¹⁰Kha Johana kha kêng Pathian Thubu'n, 'Irngai ta, ki tirtôn ni matona ki lei tîr, ama khan ni lampui lei siam a ti,' a lei iti kha.
- ¹¹Thudik nangni ki hril, Baptistu Johana nêka lian ual tûte la'rsiang ngai mahai, khannisian irvân Rama mi chîn tak khom Johana nêkin chu a roiinpui ual.
- ¹²Baptistu Johana'n thurchi an sîr lai ata a vuan sîn ten khom irvân Ramin tuangna irkhêl a tuang ngaia, mi kôkhelhaiin kha ram kha lâk an tum ngai.



13Deipuhai murdi le Mosia Dân thu khan Johana zuang om dênin Ram thurchi an insîra;

14nin iam nuamin chu, a zuang hrang thu inpuanga lei om Johana hi Elija a ni.

15Irngai roi, mikuar nei murdi'n chu!

16“Atûnlaia thoiintharhai hi i leh mo ki irkhek ta hrang? Nâipang bazar hmuna toihai ang kha an ni. Pâl khatin pâl khat danghai an lei khêk pehaia.

17‘Irneina theihle nangni kin tum pea, khannisian, lâm mak chêi! Lusûn hla kin sak khomin chap mak chêi!’ ti ang kha an ni.

18“Johana chu a zuanga, bu a ngheia uain in maka, mi tinin, ‘Ramilhli ichel kêng,’ an tia.

19Mihriam Nâipa chu a zuanga, a fâka, a ina, mi tinin, ‘Hi mi hi en u ta! Bu’n dupa, uain indupa, khâzana irfuangtuhai le mi suhai rualpa so!’ an tia. Khannisian, Pathian vârna chu a dik ti a raa khan inlangin a iom a ni,” a tia.

A iamloi khuahai

(Lk 10.13-15)

20Jisua’n sinirkhêl a thôna khuaa mihai khan an suai ata irlet mahaia, khasikin kha khuahai kha a ngoa.

21“Korazin! ni chung a rik e! Bethsaida, ni chung a rik e! Nangnia sinirkhêl sinhai kha Tura le Sidon khuaa sin, ni ta sian chu bora puan silin irvut irpolin an suai ata irlet ta an ti.

22Thudik nangni ki hril, Roirêl Nikhua chu nangni ituang nêkin chu Tura le Sidon mihai ituang chu a zâi om ual a ti.

23Nangma Kapernaum khom irvân dênin inpâk ni ini hrang ma ni! mithi khuaa dênin ni zu fe hrang sôn mak che! Nangmaa sinirkhêl isinhai kha Sodom khuaa sin ni sianlân chu, a vuan ten hin la om mai a ti.

24Nang ki hril, Roirêl Nikhuaa chu ni ituang nêkin chu Sodom khuaa ituang chu a zâi om ual a ti,” a ti.

Ki kuang hong unglân sôl irngam roi



(Lk 10.21-22)

²⁵Kha laia khan Jisua'n "Ka Pa, irvân le irnêng Rengpa! Mi vâ, mi thiamhai laia ni iip kha mi inmôlhai laia nin puang sikin, lômthu kin sîr a ni.

²⁶A ni, ka Pa, khaanga tho kha ni nuamlam tak a ni," a tia.

²⁷Thil tinrêng ka Pa'n a ni pêk ta. Pa ti no'n chu tûte'n Nâipa inhre mahai. Nâipa bana chu tûte'n Pa khom inhre mahai, Nâipa'n a inpuangnahaia ti no'n chu.

²⁸"Nangni sinsôl le puakrik pêl murdihaio, ki kuang hong unglân, keima'n nangni irngamtir ki ti.

²⁹Ki ringkol irbun unglân, ki kuang irchu roi, thuhnairôl tak le irngaiintôm tak ki ni sikin, Khanchu nin irtha ta hrangin irngamna hmu nin ti.

³⁰Ki ringkol chu a hoia, ki puak khom a izâng a ni," a tia.

Mathaia 12

Sabat chungchânga chong irdonna

(Mk 2.23-28; Lk 6.1-5)

¹Kha zoro lai khan, Jisua chu Sabat nî'n bu bil hmunhaia a hroa; irchutirhai kha an phîng a châma, bu vûihai kha an khiaka an fâk tâka.

²Farisaihaiin an hmu'n chu, Jisua kuang, "En ta, Sabat nî'n ni irchutirhaiin an itho hi ei Dân ikhap a ni," an tia.

³Jisua'n an kuang, "Davida le a mihaiin an phîngchâm laia an itho kha nin la itep ngai loi ma ni?

⁴Davida kha Pathian ina a lûta ama le a mihaiin bai, an ifâk irthiangloi Pathian kuanga inhlân tâk, Ochaihai vaiin an ifâk ngai kha an ifâk a ni khate.

⁵A ni le Sabat dân an inchâi ngaia, khan khoma thiamno chang ngai mahai ti Mosia Dân lekhabua nin la itep loi ma ni?

⁶Nangni ki hril, hin tempil nêka roiinpui ual a om.



⁷Pathian Thubu'n, 'Irbôlna nuam ma ung, lungkhamna kêng ki inuam,' a iti hi a omzia nin inhriat infel ni sianlân chu, mi sahai kha thiamno inchang no chin ni;

⁸Mihriam Nâipa hi Sabat Rengpa a ni sikin," a tia.

Jisua'n kut zenginhi an damna thu

(Mk 3.1-6; Lk 6.6-11)

⁹Jisua'n kha hmun kha mâkin, Sinagoka a lûta.

¹⁰Khataka khan mi inkhat kut zenginhi a lei oma. Khabana, mi senkhat Jisua'n a tho'nsual tia hnôl nuamhai an lei om saa, Jisua kuang, "Sabat nia mi indamtir hi ei Dânin a ikhap ma ni?" tiin an irdona.

¹¹Jisua'n an kuang, "Nin laia tu khôkin mani belra inkhat nei sian, Sabat nî'n khurpadopa tâk sianlân, tu mo la suak loi hrang?"

¹²Belra nêkin chu mihriam chu a hlu ual kêng! Khasikin Sabat nia thil sa tho hi a irthiang a ni," a tia.

¹³Khanchu, kut zenginhi kuanga khan, "Ni kut phar ro," a tia. A hong inphara, a kut kiang khat tianga angin a dam ving ta.

¹⁴Khanchu, Farisaihai kha an suaka, Jisua kha an that thei hrang lam ngaitua'n an chong tâka.

Pathian siahlo inthangna thu

¹⁵A that hrang lam an zong ti Jisua'n an hriatin chu kha hmun ata kha a rota, mipuihaiin a hnung an zuia. Damloihai murdi an dama,

¹⁶a thurchi tûte kuang insîr loi hrangin thu a pêka.

¹⁷Pathianin deipu Isaia kuanga a insîr kha a hong tung theina hrangin.

¹⁸"En ta, ki siahlo ki inthang, Ki indit tak, Ki lungrîlin a ilôm tak tak hi; A sînga ki'rtha sia ki ta, Khanchu, nam tin laia roirêlna thu inpuang a ti.

¹⁹Sêl no nia, khêk ual no nia, kholaiia khom tûte'n ar hâi inhre ual no nihai.

²⁰Hrât loihai chung a zâidamna nei a ta, Beiindonghai chung a khonzana nei a ta, Dikna khan inhnêna a pêk mâka chu mong no ni.



21Ama irhminga Jentailhaiin sabeina irnghat an ti,” ti hi.

Jisua le Belzebula
(Mk 3.20-30; Lk 11.14-23)

22Khan, mi senkhat Jisua kuang mitcho le ramilhli’n a chel sika chong theiloi an hong hruaia. Jisua’n khapa kha an dama, khanchu, a hong chong theia, a hong hmu thei ta.

23Jisua sintho kha mipuihai murdi’n a’rkhêl an ti oka. “Hi mi hi Davida Nâipa kha mo ni ma?” an tia.

24Ama kha Farisaihaiin an inhriatin chu, “Hi mi hin ramilhlihai an hnot suak theina chu an rêngpa Belzebula’n irnak a pêk sika a ni,” an tia.

25Jisua’n an ingaituawai kha an hriata, an kuang, “Kho rama khom mâni le mâni irdoi chu an chiam ngai; kho khuaa khom, sêngkua khom, mâni le mâni irdoi ka chu inding suak no nihai.

26Setana khom Setana an hnot suakin chu mâni irdoi ni a ta, a ram chu itin mo a ingâr suak thei hrang?

27Khan, Kei Belzebula sika ramilhlihai inhnot suak ngai ki lei ni chu, nin nâihaiin tu sikin mo an inhnot suak ngai kha? khasikin, anni chu nangni ngaituatu hranghai ni an ti.

28Aniachu, Pathian Irtha sika ramilhli inhnot suak ngai ki ni’n chu, nin kuang Pathian Ram kha nin kuang a zuang tung ta tihna a ni.

29A ninole, mi’n mi hrât kha a khit masa bak no’n chu itin mo a ina lûtin a sum a ilâkpai pe thei hrang? A khit zoia vai kêng a in kha inram pe thei hrang.

30Tukhom keima tianga kop loi chu a ni doi a ni, tukhom ni bûmpui no ka chu a ichênpai chit a ni.

31“Khasikin nangni ki hril, mihai سوالنا murdi le Pathian an hril insiatna tinrêng chu ngaidam nih a ti. Irtha Irthiang hrilsiat chu ngaidam ni no ni.



³²Tukhom, Mihriam Nâipa hrilsiattu chu ngaidam ni a ta, Irtha Irthiang hrilsiat chu, atûn hring sûnga khom, zoro hong theng hranga khom ngaidam ni no ni.

Thing le a ra

(Lk 6.43-45)

³³“Ra sa nei thei hrangin chu thingkung sa nin nei a nang; thingkung saloi nin neiin chu ra saloi nei nin ni. Thingkung chu a ra rengata inhriat thei a ni.

³⁴Mirûl irchihaio, nangni'n sual nei chianin itin mo thu sa nin insîr thei hrang? milunga lêt raka sip hi kêng bâiin a insîr suak ngai.

³⁵Mi sa'n chu ar chon kok sa ata thil sahai a sapsua ngai. Mi saloiin chu ar chon kok ata thil saloi a sapsua ngai.

³⁶“Nangni ki hril, mihaiin chong chanlamboi an insîr murdihai kha, Roirêlna Nikhuuaa chu la hril zit an ti.

³⁷Ni thu khan thiam nang inchang a ta, ni thu ngêtin thiamno nang inchangtir a ti,” a tia.

Irsinsiana thilirkhêl an izong thu

(Mk 8.11-12; Lk 11.29-32)

³⁸Kha lai khan Dân irchutirtuhai le Farisaihai laia mi senkhathaiin a kuang, “Irchutirtu, ni kuang ata irsinsiana thilirkhêl hmu kin nuam e,” an tia.

³⁹Jisua'n an kuang, “Atûnlai thoiinthar sual tâk le uire hmang ngaihai, irsinsiana thilirkhêl nin izong na! Khannisianlân, deipu Jona irsinsiana vai ti no chu irsinsiana thilirkhêl dang rêng nin kuang pêk ni no ni.

⁴⁰Jona chu sîn thum le zân thum ngapui sûnga a iom ang khan Mihriam Nâipa hi sîn thum le zân thum irnêng sûnga a iom hrang a ni.

⁴¹Roirêlna Nikhuuaa chu Ninevi khuuaa mihai kha ngîr an ta, thiamno nangni inchang an ti; anni chu Jona thu insîr an inhriata, an sualhai ata an irlet tâk sikin; nangni ki hril, Jona nêka lian ual hin a om.

⁴²Roirêl Nia chu Seba rêngnu kha ngîr a ta, atûnlai mihai leh hin thoi a ta, thiamno inchangtir a ti; rêng Solomona vârna irngaitua hrang luan kôlkung ata a hongga; irngai u ta, Solomona nêka roiinpui ual hin a iom kêng!



Ramilhli hong kîr thu

(Lk 11.24-26)

⁴³“Ramilhli chu kha mi sîng ata a suakin chu irngam hmun zongin tui boina hmunhaia a chaia, khannisian hmu ta maka.

⁴⁴Khanchu, ‘Ki isuaksan tâknaa khan kîr nôk chian ki ti,’ a tia; a va tungin chu rongrala phît infâi diamin a va hmua.

⁴⁵Khanchu, a fea, ama nêka soal ual ramilhli sari dang a hong hruaia; an lûta, kha khan omhmun an khuar tâka. Kha mihriam om lam kha, matona nêkin a siat ok tâka. Khaang dênin, atûnlai thoiinthar soal tâkhai chung a hin la om a ti,” a tia.

Jisua nu le a urêng hai

(Mk 3.31-35; Lk 8.19-21)

⁴⁶Mipuihai kuang thu an sîr lai khan a nu le a urêng hai kha ama chongpui tumin pên tiang an ngîra,

⁴⁷Mi inkhatin a kuang, “Ni nu le ni urêng haiin nang chongpui tumin pên tiang son nang an nghâk kêng,” a tia.

⁴⁸Jisua’n a kuang, “Tu mo ka nu? Tu mo ki urêng hai?” a tia.

⁴⁹Khanchu, a irchutirhai tiang a kut a phara, “En u ta, ka nu le ki urêng hai hi:

⁵⁰Tukhom ka Pa irvâna mi nuamlam thotuhai hi ki urêng hai, ki farnuhai, ka nuhai an ni,” a tia.

Mathaia 13

Fachî inthektu chongirkhek thu

(Mk 4.1-9; Lk 8.4-8)

¹Kha nî sîn ngêta Jisua kha in ata a suaka, dîl kôla a fea, khan a toia, ar chuhaia.

²Mipui tamtak an hong irchunghôma; khanchu, irkuanga a chuanga, a toia, mipui murdi kha chiaiphoia an ngîra.

³Thu tamtak an kuang chongirkhekin an sîra; “Irngai u ta, fachî inthektu fa chi intheh hrangin a fea.

⁴A hong in thekin chu senkhat lampuia a tâka, vahaiin an hong fâk zôi zela.



⁵Senkhat lungpherpha chung, irnêng irphânaa a tâka, irnêng ar sâ no sikin, a hong mông lata.

⁶Khannisianlân, misa a hong irsâng uala, a thêma, irzung a lâk thei no sikin a châra.

⁷Senkhat chu hloi ihlingnei kêra a tâka, hloi kha a hong mông irsânga, a hong dîp irhmang ta.

⁸Senkhat chu irnêng saa a tâka, senkhat chu irzain, senkhat chu sômrukin, senkhat chu sômthumin a hong ra tâka.

⁹Irngaituana mikuar nei murdi'n chu irngai ri sehai," a tia.

Chongirkhek thiltum

(Mk 4.10-12; Lk 8.9-10)

¹⁰Khan, irchutihai kha Jisua kuang an hongga, "Mipuihai laia thu nin sîrin ithoa mo chongirkhekin ni insîr?" an tia.

¹¹Jisua'n an kuang, "Irvân Ram thurîl inhriat theina nin kuang pêk a ni a, mi danghai kuang chu pêk ni ma,

¹²Tukhom a nei ka chu pe sa ni a ta, nei ok a ti; tukhom a nei loi chu a inei sun khom lapai pe ni a ti.

¹³An kuang thu kin sîra chongirkhek ki ihmang nasan chu an ena an hmu nona hrang le an irngaia an inhriat thei lolina hranga a ni.

¹⁴Khasikin, deipu Isaia lei ihril kha an chungga a hong itung a ni hi: 'Hi mihai hin irngai an ta chu a omzia inhre thei no nihai; En en an ta chu hmu'nfel no nihai.

¹⁵An milung a lei inmôl tâka, An mikuar a lei sêt tâk, An mit khom a lei zîng tâk sikin. khano'nchu an mitin hmu an ta, An mikuarin inhriat an ta, An milungin inhre thei an ta, Keima tiang hong irhei kêr an ta, Ki lei indamhai itin, Pathianin a ti,' iti kha.

¹⁶"Nangni chu, nin vân a sa bâka na! Nin mitin a hmua, nin mikuarin a inhriat a ni.



¹⁷Nangni ki hril, nin ihmu hi deipu tamtak le Pathian mi tamtakin a hmu an nuam tak taka, khannisianlân, hmu thei mahai, nin inhriat khom hi inhriat an nuam tak taka, khannisian, inhre thei mahai.

Jisua'n fachî inthektu chongirkhek a hrilfia

(Mk 4.13-20; Lk 8.11-15)

¹⁸“Khasikin irngai unglân, fachî inthektu chongirkhek omzia hi irchu roi.

¹⁹Tukhomin Pathian Ram thu chu irngaia an inhriat thiam no'n chu mi sual chu a hong, a milunga intheke sai chu ar chupui ngai.

²⁰Khan, fachî lungpherpha irnêng irphânaa tâk chu, thu an hriat zoi le lôm taka pom zôi zelhai hi an ni.

²¹Khannisian irzung inthûk a thâk no sikin om sôt ngai mah. Thu sika intakna mani, dengintheina mani a hong om le chu an tûk zôi zel ngai a ni.

²²Fachî ilhling kêra tâk kha thu inhre tâkhai an ni, Khannisian, hi rammual kanna le irchongnahai khan thu kha a dîpa, ra nei ngai mah.

²³Khan, fachî irnêng saa tâk chu thu kha an inhriata, ar ngai lam khom inhriathai hi an ni. An ra ngaia, senkhat irza'n, senkhat sômrukin, senkhat sômthumin an hong pung ngai,” a tia.

Farhli chongirkhek thu

²⁴Jisua'n chongirkhek dang an sîr nôka: “Irvân ram chu mi inkhat a loia chi sa inthektu leh irkhek a ni.

²⁵Zân khat chu mi an in zit hnungin, râl a hong, bu bil laia khan bu dol an theka, a rot nôka.

²⁶Khan, bu kha a hong mônga, a hong vûiin chu farhli khom a hong inlang sa tâka.

²⁷Loi neitu suakhai kha an hong, a kuang, ‘Ka pu, ni loia chi sa ni intheke kha, farhli so kho taka hong om ma ni?’ an tia.

²⁸Ama khan an kuang, ‘Kha kha chu râlhai lei intheke sa a ni so te,’ a tia. Suakhai khan a kuang, ‘Khano'nte, va rôl zoiin lân a sa mo ni ti?’ an tia.



²⁹Ama khan a sâma, ‘Ti ma ung,’ farhli nin rôlin chu bu tak kha inpot pal sa nin ti.

³⁰Bu ât dênin mông sap ri sehai; bu ât tika a âttuhai kuang, ‘Farhli chu rôl bak unglân, hâl hrangin intêl roi; bu tak chu fasiara inlût roi,’ ” a tia.

Ancham chi chongirkhek

(Mk 4.30-32; Lk 13.18-19)

³¹Jisua’n chongirkhek dang, an sîr nôka: “Irvân Ram chu mi’n ancham chi a chôia, a loia a inthek ang hi a ni.

³²Kha kha chîmu murdi laia chîn tak ni khomsian, a hong irsôn tikin chu chîmu danghai nêka lian tak a hong ni ngai. Thingkung a hong nia, khanchu, chunglêng vahai an hong, a ôna irbu an kai ngai,” a tia.

Chol chongirkhek thu

(Lk 13.20-21)

³³Jisua’n chongirkhek dang an sîr nôka: “Irvân Ram chu nupang inkhatin chol a lâka; baiphit litar sômminli leh ar zêla, a thoi mâka chu khamphulua a irpoltir ang kha a ni,” a tia.

Jisua’n chongirkhek a ihmangna san

(Lk 4.33-34)

³⁴Khahai murdi kha Jisua’n mipuihai kuang chongirkhekin an sîra, chongirkhek ni no’n chu an kuang ite insîr ma.

³⁵Kha a ihmangna san chu deipu’n, “An kuang thu kin sîrin chongirkhek hmang ki ta, Kho’rsiang kho’rzir ata thil irthup kha insîr pe ki ti,” tia a lei insîr kha a hong tung theina hranga a ni.

Farhli chongirkhek hrilfiana thu

³⁶Jisua’n mipuihai kha a mâksanhaia, in sînga a lûtin chu a irchutirhai an hong, a kuang, “Loia bu chongirkhek kha imo a omzia nin hril ro,” an tia.

³⁷Jisua’n an kuang, “Fa chi sa inthektu kha Mihriam Nâipa a ni,

³⁸loi chu rammual hi a ni, chi sa chu Ram nâihai an nia, farhli chu sual nâihai an ni;



³⁹râl, farhli inthektu kha chu Diabola a ni. Bu ât zoro chu rammual hekna hrang a nia, bu âttuhai chu vântîrtônhai an ni.

⁴⁰Farhlihai chu irtika, meia an ihâl angin rammual hek tika chu a iom hrang a ni;

⁴¹Mihriam Nâipa'n vântîrtônhai kha tîr a ta, a Ram ata mi, sual inthotir ngaihai le sualtho ngaihai kha bûm an ta,

⁴²mei thi thei ngai loia khan pai an ta, kha khan chap an ta, an irkamnôi an ti.

⁴³Khanchu, Pathian nâihai chu an Pa Rama misa angin vâr ta an ti. Irngai roi, mikuar nei murdi'n chu!

Irchon phûm inrûk chongirkhek

⁴⁴"Irvân Ram chu mi inkhatin loia irchon phûm inrûk a hmu suaka, a phûm nôka raifân takin a fea, a inei murdi a va zuara, kha loi kha a irchôk tâk ang kha a ni.

Lunghlu chongirkhek

⁴⁵"Irvân Ram chu mi inkhatin lunghlu satak a zonga,

⁴⁶Lunghlu satak kha a hmu'n chu, a fea, a inei murdi a va zuara, kha lunghlu kha a irchôk tâk ang kha a ni nôk.

Lên chongirkhek

⁴⁷"Irvân Ram chu nga chel ngai senkhatin an lên dîla an vôra, nga chi tinrêng an iman ang kha a ni nôk.

⁴⁸Lên chu a sip tenin chu muanga an kaisuaa, kha khan an toia; a sa murdi koka an thuna, a saloi ka chu an pai ngai.

⁴⁹Rammual mong tika chu khaang khan la om a ti, vântîrtônhai chu zuang suak an ta, mi felhai laia irthokin mi sualhai kha bûm an ta,

⁵⁰mei thi thei ngai loia khan pai an ta, kha khan chap an ta, an irkamnôi an ti," a tia.

Thil milui le thar



⁵¹Khan, Jisua'n, "Khahai murdi kha nin inhriat thei mo?" a tia. Anni khan, "Kin inhriat thei," an tia.

⁵²Khan, Jisua'n an kuang, "Khasikin, Dân irchutirtu, vân Ram thu irchu tâk ka chu, in neipu'n, ar chon kok ata thil milui le thil thar kêlsuatu ang hi a ni," a tia.

Nazaret-a Jisua hnôlin a om

(Mk 6.1-6; Lk 4.16-30)

⁵³Jisua'n kha chongirkhek kha an sîr zoiin chu khatak ata a fe tâka,

⁵⁴a omna khua tiang a kîr nôka, Sinagoka khan a'rchutirhaia; a thu'nsîr inhriat dôrin chu an irngai a'rkhêl tâka, "Hi mi hi vârna le sinirkhêl sin theinahi hi khô taka a ihmu ma ni?"

⁵⁵Hi mi hi bakot sin ngaitu nâipa kha mo ni ma? Mari kha a nu mo ni ma? A urênghai khom Jakoba, Josefa, Simona le Juda hai kha ni mahai mo?

⁵⁶A farhai khom hitaka om mo ni mahai? Hihai murdi hi khôtaka irthoka a ihmu ma ni?" an tia.

⁵⁷Khanchu, ama kha an hnôl tâka; Jisua'n an kuang, "Deipu chu a khua le a in mihai laia ti no chu hmun tina an chôiirsâng ngai," a ti pehaia.

⁵⁸An iam no sikin khataka khan chu sinirkhêl tho intam ok ma.

Mathaia 14

Baptistu Johana thi thu

(Mk 6.14-29; Lk 9.7-9)

¹Kha zoroa khan Galili rama rêng Heroda'n Jisua thurchi a lei inhriata.

²A siahlohai kuang, "Hi mi hi Baptistu Johana ngêt kha a ni, mithi lai ata a thoi nôk tâk kêng. Khasikin kêng hi sinirkhêl sin theina ircham hi a inei," a tia.

³Matona khan Heroda'n Johana a lei chela, a khitphiara, intângna ina a lei ikhum tâk a ni. Khaanga a ithô nasan chu a urênghpa Filipa dôngma Herodi sika a ni.



⁴Baptistu Johana khan Heroda kuang, “Herodi leh nin irnei hi dik ma,” a lei ti pe sikin.

⁵Heroda’n Johana kha that a tuma, khannisian, Juda mipuihai a chia, Johana kha deipu’n an bê sikin.

⁶Khannisianlân, Heroda suak nê champha nikhuaa khan chu Herodi nâinu kha mipuihai laia a lâma. Heroda kha a lôm tak taka,

⁷a kuang chong an kunga, “I khom ni ni inghi ka chu nang pe ki ti,” a tia.

⁸Khanchu a nu iti pe lam ang takin, “Hi hmuna hin atûn Baptistu Johana lu chu khênga ni pe zôi zel ro!” tiin a nghĩa.

⁹Reng kha a sân a char an dongtir tâka, khannisian a chonginkung sikin le a khual mihai sika khan pêk hrang thu an kung tâka.

¹⁰khanchu, intângna ina khan Johana lu kha an tan ta.

¹¹A lu kha khêngin an hong chôia, nupangtenu kuang an pêka, ama khan a nu kuang a chôi ta.

¹²Johana irchutirhai an hongga, ruak kha an chôia, an phûma; khanchu, an fea, Jisua an insîr pe ta.

Jisua’n mi sâng ringa a vâina thu

(Mk 6.30-44; Lk 9.10-17; Joh 6.1-14)

¹³Khan, Jisua’n Johana thurchi a len hriatin, khataka irthokin a suaka, irkuangin a bing dokin hmun fianriala a fea. Mipuihaiin an inhriattin chu an khuahai ata kea fein an zui tâka.

¹⁴Jisua irkuang ata vakama a suakin chu mipuihai kha a hmu’n chu a sân lung an khamhaia, damloihai an damhaia.

¹⁵Kha ni khohloia khan a irchutirhai an hongga a kuang, “A sân an hnung ok tâka; hi hi hmun fianrial a ni; mipuihai hi infetirhai tan lân, kho sênghaia fehian sian, an fâk hrang ircho ri sehai” an tia.

¹⁶Jisua’n an kuang, “An ife nang mah; nangni’n fa hrang pehai roi,” a tia.



¹⁷Anni khan a kuang, “Hitaka kin inei chu a rêngin bai ringa le nga inhni vai keng,” tiin an sâma.

¹⁸Jisua’n, “Hin hong chôî roi,” a tia.

¹⁹Mipuihai kha sùl chungga toi hrangin thu a pêkhaia; Khanchu, bai ringa le nga inhni kha a lâka, irvân tiang enin Pathian kuang lônthu an sîra. Bai kha a khoia, irchutirhai kuang a pêka, irchutirhai khan mipuihai kuang an sem pehai tâka.

²⁰Mi tinin an fâka an khop senga, an fâk ban chu khamphulu sômhleihni an la hrût insip a ni.

²¹A fâkhai chu nupang le nâipang tep loiin pasal ulian ka khom mi sângringa vêl an ni.

Jisua tui chungga ar lôî

(Mk 6.45-52; Joh 6.15-21)

²²Khan, Jisua’n mipuihai kha an chîntir zoro laiin a irchutirhai irkuanga an chuangtirhaia, dîl râl tiang a lei infehaia.

²³Mipuihai an chîn zoiin chu a bingîn tânga chongchai hrangin a fea: khohloi a hong ni’n chu, kha khan a bing vaiin a om tâka.

²⁴Kha zoroa khan irkuang kha dîla hla taka a om tâka. Phâivua’n a no tiang a sêmpai sikin, tui irsokin hi tiang so tiang a hnôka.

²⁵Khanchu, zînga kôlirsal hrang tônin, Jisua chu tui chungga irlôiin a irchutirhai kuang a hongga.

²⁶Tui chungga a ihong an hmu’n chu an chia, “Mithi irtha kêng!” an tia; an chia, an khêk mur mura.

²⁷Jisua’n a lei chongpuihai zôi zela, “Lungirngam takin om roi, keima kêng ki ini, chi no roi,” a ti pehaia.

²⁸Khanchu, Petera’n, “Rengpa, nangma ni ni’n chu tui chungga ni kuanga hong ni phal roh,” a tia.

²⁹Jisua’n, “Hong roh!” tiin a sâma. Khanchu, Petera kha irkuang ata a suaka, Jisua tiang panin tui chungga ke’n a fe tâka.



³⁰Khannisianlân, phâivua tho kha a hmu'n chu a chia, tuia ngîm hrangin a om tâka, "Rengpa, ni saninzôk ro!" tiin a khêka.

³¹Jisua'n a hei inbana, an tûk zôi tâka, a kuang, "Ni iamna a tôm bâka! Itho sika mo lung ni irhlatir?" a ti pea.

³²An ruaiin irkuang sînga an lûta, phâivua khom a dâidup tâka.

³³Khanchu, irkuanga irchutir omhai khan, "Pathian Nâipa ni ni lele kêng," tiin Jisua chubai an mûka.

Jisua'n Genesaret rama damloihai an damna thu

(Mk 6.53-56)

³⁴Dîl râl an kâiin chu Genesaret ram an hong tung tâka,

³⁵kha khan Jisua kha an lei inhriat zôi zela. Khasikin an kôlvêl ram murdia khan mi an tîra, damloihai murdi kha Jisua kuang an hong tuanga.

³⁶Damloihai khan a puan hmor vai lua tôn hrangin an ngêna; a tôn murdi chu an dam thiaia.

Mathaia 15

Pi pu thumâk

(Mk 7.1-13)

¹Khanchu, Jerusalem ata Farisaihai le Dân irchutirtuhai kha Jisua kuang an hong.

²"Ithoa mo ni irchutirhaiin pi pu thumâk hi an izôm ngailoi? Fâk an zong khomin tho dân angin kut irsûk ngai mahaia!" an tia.

³Jisua'n an kuang, "Ithoa mo Pathian thupêk zôm loiin nin binga thumâk nin izui hi?

⁴Pathianin, 'Ni nu le ni Pa chôiindôm roh, mâni nu mani, pa mani insîrinsiat chu a ithi ngêt hrang a ni,' a tia.

⁵Khannisian, nangni'n chu, 'Tukhom a nu mani, a pa mani, sanna hrang thil a neia, nikhomsian, 'Hi thil hi Pathian ta tak kêng,' a ti'n chu,



⁶a nu le a pa mahrip a itho hrang ni mah,' nin ti ngaia. Khasikin, nin pi le pu thumâkhai nin zôm theina hrangin Pathian thupêk chu ite'n nin ibe ngai loi a ni.

⁷Nangni vâirlethaio, Isaia'n nin chungchâng a lei insîr kha a dik kêng!

⁸Hi mihai hin an bâiin an nin pâka, Khannisian, an lungrîlin chu an ni hla.

⁹An irchutirna chu mihriam thupêk an irchutir sikin, an ni biakna hi a korong a ni, Pathianin a ti,' tia a lei irziak kha," tiin a sâma.

Mihriam porinchetirtu

(Mk 7.14-23)

¹⁰Khan, Jisua'n mipuihai kha a kuang a koihaia, an kuang, "Irngai unglân, inhre thiam roi!

¹¹Bâia lûtin mi porinchetir ngai maka, bâi ata suakin kêng mi a iporinchetir ngai," a tia.

¹²Khanchu, a irchutirhai an hongga, a kuang, "Ni chong khan Farisaihai milung a sân hoi mah, ti nin hriat mo?" an tia.

¹³Jisua'n, "Thing murdi ka Pa irvâna mi iphun ni no chu phâipaiin om an ti.

¹⁴An chungchângga nin milung inbuai no roi! Anni kha mitchohai hruaitu mitcho an nia; mitcho khan mitcho dên a hruaiin chu an ruaiin khurpadopa tâk an ti," tiin a sâma.

¹⁵Petera'n a kuang, "Kha chong omzia kha ni hrilfiah pe ro," a tia.

¹⁶Jisua'n an kuang, "Nangni khom atûn ten ang dôra lan môl mo nin la ini?

¹⁷Bâia lût ka chu phîng sînga a lûta, kha hnung chu a isuakpai ngai ti nin inhriat loi ma ni?

¹⁸Bâia suakhai ka chu milung ata hong suak a nia, kha khan mihriam a porinchetir ngai a ni.

¹⁹Milung ata nin ngaituana sual hai, mi thatna hai, uirena hai, irditna hai, inrûkna hai, milaka irsêlna hai, Pathian hril siatna hai a ihong suak ngai a ni.



²⁰Kha kha mihriam porinchetirtu chu a ni; kut irsûk loia bu nêk hi chu mi porinchetir ngai ma,” a tia.

Suro Foiniki nupangnu iamna

(Mk 7.24-30)

²¹Jisua'n kha hmun kha mâkin Tura le Sidon kho hual vêla a fea.

²²Kha rama om Kanaan nupangnu inkhat a kuang a hongga, “Davida Nâipa! lung nin kham ro! ki nâinu ramilhli'n a chela, dengthei takin a iom kêng,” tiin a khêka.

²³Khannisianlân, Jisua'n chu bâi khat luan sâm mah. A irchutirhai a kuang an hongga, “Hi mi hi infetir ta roh! khêk diaiin ei hnung a ni zui,” tiin an ngêna.

²⁴Khanchu, Jisua'n, “Israel belra irhmanghai laia vai kêng târ ki ini,” tiin a sâma.

²⁵Khannisianlân, nupangnu kha a hongga, “Rengpa, ni changpui roh,” tia kûnin chubai a mûka.

²⁶Jisua'n, “Nâihai bai lapaia, uihai laia pêk chu dik mah,” tiin a sâma.

²⁷Nupangnu khan a kuang; “Rengpa, a ni chu a ni, khannisian, uihai khomin an pu maichâm ata bai irnôi tâk chu an fâk ngai khate,” tiin a sâma.

²⁸Khasikin Jisua'n a kuang, “Nupangnu a sân ni iam, ni inuamlam ang takin ni chungga tung ri se” a ti pea. Khanchu, a nâinu kha, kha zoro lai taka khan a hong dam tâka.

Jisua'n mi tamtak an damtirna thu

²⁹Khan, Jisua chu khatak ata a fea, Galili dîl kôla a fea, tânga a kâia, a toi tâka.

³⁰Mipui tamtak a kuang an hongga, ke'nbâi hai, mitcho hai, suakinsual hai, chong theiloi hai le mi dang tamtak Jisua kuang an hong hruaihaia; a lei indamhai thiaia.

³¹Mipuihai khan chong theiloihai kha hong chongin, kholrabaichahai kha hong damin, kea fe'n, mitcho hai mit hong vâr tâk kha an hmu'n a sân a'rkhêl an tia; khanchu, Israel Pathian kha an inpâk ta.



Jisua'n mi sâng minli a vâina thu

(Mk 8.1-10)

³²Khan, Jisua'n a irchutirhai a koia, an kuang, "Mipuihai hi sîn thum ki kuang an om tâka, atûn hin ite fa hrang an nei no sikin, a sîn lung kin khamhai tak taka, bu ngheiin inkîrtirhai nuam ma ung, khano'nchu lam laia châmsôl irveina an ti," a tia.

³³Irchutirhai khan a kuang, "Hiang dôra mipui infâ inkhop hrangin, hi ramchâra hin khôn mo bai ei ihmu hrang?" an tia.

³⁴Jisua'n, "Idôr mo bai nin inei?" tiin a'rdonhaia. Anni khan, "Bai sari le nga tômte," an tia.

³⁵Khanchu, Jisua'n mipuihai kha irnênga toi hrangin thu a pêkhaia.

³⁶Khan, bai sari le nga kha a lâka, Pathian kuang lômthu an sîra, a khoia, irchutirhai kuang a pêka; irchutirhai khan mipuihai kuang an pêk tâka.

³⁷An rêngin an fâka, an khop seng tâka. Khanchu, irchutirhai khan an ifak mihliaa a'rnôi kha khamphulu sari an la hrût insipa.

³⁸A fâkhai chu nupang le nâipang tep loiin pasal ulian inzen mi sâng minli an ni.

³⁹Kha hnung chu Jisua'n mipuihai kha an chîntirhai zoiin chu irkuanga a chuanga, Magadan rama a fe ta.

Mathaia 16

Sinirkhêl tho hrangin Jisua an inphût

(Mk 8.11-13; Lk 12.54-56)

¹Khan, Farisaihai le Sadukaihai senkhat Jisua kuang an hongga, ama fiana hrangin irvân ata irsinsiana sinirkhêl inentir hrangin an ngêna.

²Khannisian, Jisua'n an kuang, "Khohloi a hong ni'n chu 'Khua a ihoi hrang kêng nin tia, kôl a sen,' nin ti ngai.

³Zînga chu 'Rua a itho hrang ni a ti, kôl a sen, khua ar ui' nin ti ngai; Irvân enin rammual hoi hrang le hoi no hrang nin inhriat theia, khannisian, zoro irsinsianahai hi chu a omzia inhre thei mak chêi.



⁴Atûnlaia thoiintha mi sual tak le uire hmanghai! irsinsiana sinirkhêl nin ni izong na? Jona sinirkhêl ti no chu nin kuang irsinsiana sinirkhêl dang pêk ni no ni,” tiin a sâma, khanchu, a mâksanhai tâka.

Farisaihai le Sadukaihai chol

(Mk 8.14-21)

⁵Irchutirhai kha dîl râl tiang an kâiin chu bai an hong chôi irnghila.

⁶Jisua'n an kuang, “Farisaihai le Sadukaihai chol ata ir-enkol unglân, irdîn roi,” a tia.

⁷Khan, anni khan, “Bai hong chôi mak me,” tiin an bingîn an insîr irhlôma.

⁸Jisua'n an insîrhai chu an hriata, an kuang, “Nin bai chôi no thua itho mo nin binga nin irngaitua? Nin iamna a tôm bâka!

⁹Nin la inhriat thei loi ma ni? Mi sâng ringahai ta hrang bai ringa ki ikhoi kha nin irnghil ma ni ta? An fâk ban khamphulu iza mo an ihrût insip kha?

¹⁰Mi sâng minli ta hrang bai sari rêk khate? An fâk ban khamphulu iza mo an ihrût insip kha?

¹¹Nin kuang bai thurchi insîr ma ung, ti itho mo nin inhriat loi? Farisaihai le Sadukaihai chol ata irdîn roi!” a tia.

¹²Kha hnung chu irchutirhai khan bai chol ata irdîn hrang ni loiin, Farisaihai le Sadukaihai irchutirna ata irdîn hranga a ihril a nih ti an inhriat ta.

Petera'n Jisua nina an puang

(Mk 8.27-30; Lk 9.18-21)

¹³Khan, Jisua kha Kaisari Filipi kho hualsûng a hong tungin, a irchutirhai kuang, “Mihaiin Mihriam Nâipa hi tu mo a ni an ti?” tiin a'rdonhaia.

¹⁴Anni khan, “Senkhatin chu Baptistu Johana a ni, mi dangin Elija a ni, senkhat nôkin chu Jeremia a ni no le deipu tu khôk mani a ni, nang an ti,” tiin an sâma.

¹⁵Ama khan an kuang, “Nangni'n te, tu mo a ni nin ni ti?” ti'n a'rdonhaia.

¹⁶Simon Petera'n a kuang, “Mesia Pathian hring Nâipa kha ni ni,” tiin a sâma.



¹⁷Jisua'n a kuang, "Simon Barjona, taksa le thisenin nang a inhriattir ni maka, ka Pa irvâna mi'n nang a inhriatir a ni.

¹⁸Khasikin nang Petera; lungpui ni ni tih nang ki hril, hi lungpui chung a hin ki koiindang inding ki ta, thina khomin inhnê no ni.

¹⁹Irvân Ram châbihai nang pe ki ta; irnênga ni ikhit chu irvâna khom khit nih a ti, irnênga ni isût chu irvâna khom isût ni a ti," a ti pea.

²⁰Khanchu, Mesia a nih ti tûte hril loi hrangin irchutirhai kha thu a pêkhai ta.

Jisua'n a tuang hrang le a thi hrang thu an sîra

(Mk 8.31-9.1; Lk 9.22-27)

²¹Kha zoi ata chu Jisua'n a irchutirhai kuang fel takin thu an sîra, "Jerusalema a fe hrang thu hai, upa hai, Ochai inlalahai le Dân irchutirhai kuta a tuang hrang thu hai, thatpaia a om hrang thu hai le sîn thum nia kaithoia a om hrang thu hai kha," a irchutirhai a hril irphut tâka.

²²Petera'n ama kha a bingin a hruaia, a kuang, "Pathianin a khap, Rengpa! kha thil kha ni chung a tung viat no ni," tiin a ngoa.

²³Khan, Jisua kha a'rheia, Petera kuang "Setan, rot roh; a ni khâltu ni ni; Pathian nuamlam ngaitua loiin mihriam nuamlamin ni ingaitua a ni hi," a tia.

²⁴Khanchu Jisua'n a irchutirhai kuang, "Tukhomin ni zui a nuamin chu mâni intak ngaitua loiin a kros irputin ni zui ri se.

²⁵Tukhomin mâni hringna sînghual tumtu'n chu inchân an ta, tukhom keima sika a hringna inchân murdi'n chu hmu an ti.

²⁶Mi'n rammual hi a pumin nei sianlân, a hringna inchân sianlân, a ta hrangin imo a'rfêna? A ninole, mi'n a hringna irthûlin imo a ipêk hrang?

²⁷Mihriam Nâipa hi vântirtônhai le a Pa roinpuina le, a izuang hrang a nia; kha tika chu mi tin an sintho ang zêlin thuan seng a ti.

²⁸Thudik nangni hril ki ti, hitaka ngîr senkhathai hi, Mihriam Nâipa, inlal taka a zuang an hmu mâka chu thina irtem loi hrang an om," a tia.

Mathaia 17

Hmêl danglamna



(Mk 9.2-13; Lk 9.28-36)

¹Khan, sùn ruk hnunga chu Jisua'n Petera, Jakoba le Johana hai an bingin a hruaihaia, tâng irsâng taka a fe puihaia.

²An mit hmua Jisua hmêl a hong danglama, a hmâi misa angin a hong vâra, a puan silhai khom irtêk rakin a vâra.

³Khanchu, irchutir inthumhai khan Mosia le Elija'n Jisua an chongpui lai an hmua.

⁴Khan, Petera'n Jisua kuang, "Rengpa, hitaka om hi ei ta hrangin a sa! Ni nuamin chu, kairêng inthum sin ki ta; ni ta hrangin inkhat, Mosia hrangin inkhat, Elija hrangin inkhat," a tia.

⁵A la chonglai takin, sùm vâr takin anni chu a'rhîkhuhaia, sùm ata hnuk irhaiin, "Hi hi ki Nâipa, lungthungtak, ki ilôm tak tak chu a ni; ama thu irngai roi," a tia.

⁶Irchutirhai khan kha kha an inhriatin an inboka, an chi tak taka,

⁷Jisua a hongga, a hong tônhai tâka, "Thoi roi chi no roi!" a ti pehaia.

⁸Khanchu an hong tanga, Jisua ti no chu mi dang hmu ta mahai.

⁹Khanchu tâng ata an zuang chumin chu Jisua'n an kuang, "Mihriam Nâipa thina ata a thoinôk mâka chu nin thil hmu hi tûte hril viat no roi," tiin thu a pêkhaia.

¹⁰Khan, irchutirhaiin Jisua kuang, "Itho mo Dân irchutirtuhaiin Elija a izuang bak hrang a ni, an iti?" tiin an irdona.

¹¹Jisua'n, "Elija chu zuang bak hrang pial a ni, itinrêng ama'n lei siam infel zit a ti.

¹²Khannisian, nangni ki hril, Elija chu a izuang pial tâk kêng; mihaiin lei inhre mahaia, an nuam nuam an lei lo kha. Khaang dênin Mihriam nâipa khom hin an kut a ituang hrang a ni," a tia.

¹³Khanchu, irchutirhaiin, Baptistu Johana thurchi an kuang a insîr a nih ti an hong inhriat tâka.



Jisua'n nâipang hrisangol irvei indamna thu

(Mk 9.14-29; Lk 9.37-43)

¹⁴Mipuihai kuang an hong kîr nôkin chu mi inkhat Jisua kuang a hong; a makunga khûksadelin,

¹⁵“Rengpa, ki nâipa hi lunginkham ro! Hrisangol irvei a nia, a tuang hrai tâka, voi iza tuia le meia an rîl tâka.

¹⁶Ni irchutirhai kuang ki hong hruaia, indam thei mahai,” a tia.

¹⁷Khan, Jisua'n, “Iti hraia iamna boi mo nin ini tâk! Idôr ten mo nin kuang omin nangni ki ingaitua thei hrang? Nâipangtepa kha ki kuang hong hruai roi!” a tia.

¹⁸Jisua'n ramilhli kha thu a pêka, nâipangtepa sêng ata kha a suaka, kha zoro taka khan a hong dam ta.

¹⁹Khanchu, irchutirhai kha Jisua kuang an hong, “Itho mo keini'n kin inhnot suak thei loi?” tiin mi inhriat loiin an irdon zâia.

²⁰Jisua'n an kuang, “Nin iamna tôm sika a ni. Thudik nangni ki hril, iamna ancham ru dôr nin neiin chu hi tâng hi, ‘Hitak ata, so son irson roh ti nin ta,’ irson a ti. Tho thei loi zel nei no chin ni,” a tia.

²¹Khannisianlân, hianga hi chu chongchaina le bu ngheina ti no chu itin te'n inhnotsuak thei ni mah,” tiin a sâma.

Jisua'n a thi hrang thu an sîr nôkna

(Mk 9.30-32; Lk 9.43-45)

²²Irchutirhai kha an rêngin Galili rama an hong hnungin, Jisua'n an kuang, “Mihriam Nâipa hi mihriamhai kuta ichelin om a ta,

²³that an ta, khannisian, sîn thum niin chu kaithoiin om a ti,” a tia. Irchutirhai chu a sân an bêi a dong tâka.

Biak ina khâzana chôi thu

²⁴Jisua le a irchutirhai Kapernaumah an hong tungin, Tempil khâzana irfuangtuhai, Petera kuang an hong, “Nangni irchutirtu hin Tempil khâzana a chôi ngai mo?” tiin an irdona.



²⁵Petera'n, "A chôi ngai" tiin a sâma. Petera kha ina a va lûtin, Jisua'n a lei chongpui baka, "Simon, imo ni'rngai lam? Hi rammuala rêng hai kuang hin tuhai mo khâzana chôi ngai? A ram mihai mo, ram dang mihai mo?" a tia.

²⁶Petera'n, "Ram dang mihai," tiin a sâma. Jisua'n, "Khano'nchu a ram mihai chu an ichôi nang mah.

²⁷Khannisianlân, hi mihai lunghoi loaia an iom hi nuam ma ung, khasikin dîla fe'n lân, irkuai chôiin lân, nga ni iman masa tak bâia khan ei ruaia Tempil khâzana ei ichôi ruk bak sum hmu ni ti. Kha kha hong chôiin lân, ei chôi tum kha an kuang va pe roh," a tia.

Mathaia 18

Tu mo roiinpui tak

(Mk 9.33-37; Lk 9.46-48)

¹Kha lai khan irchutihai Jisua kuang an hong, "Irvân Rama tu mo roiinpui tak hrang?" an tia.

²Khanchu Jisua'n nâipangte hi a koia, an makunga an ngîrtira,

³"Thudik nangni ki hril, nin irleta, nâipangtehai angin nin om no'n chu, irvân Rama lût viat no chin ni.

⁴Irvân Rama roiinpui tak hrang chu irngaiintôma, hi nâipangte anga omtu hi ni a ti.

⁵Tukhom ki'rhming sika hianga nâipangte lôm ka chu keima ni lôm an ni.

Tûkna inomtirtu thêma

(Mk 9.42-48; Lk 17.1-2)

⁶"Tukhom, hi a ni iamhai laia nâipangte inkhat khom hi an tûktirin chu, a hroka bu nôina lung lianpa irhilitirin tuikhanglian inthûk taka inthâkhai sianlân a ta hrangin sa ual a ti.

⁷Tûknahai sikin rammual chung an tak vang na! Tûknahai chu om mai a ti, khan tûknahai inomtirtu chung chu an tak vang na!



⁸“Ni kutin mani, ni ke’n mani, nang an tûktirin chu tanpâin lân, pai chian roh! kut kiang hni mani, ke kiang hni mani neia kumtuang hremhmuna nang pai nêkin chu kut boi, ke boia hringnaa lût ni ta hrangin a sa ual.

⁹Ni mit khomin nang an tûktirin chu kêlsuakin lân, pai rak roh! Mit kiang hni neia hremhmun meidîla nang pai nêkin chu, mit kiang khat vai neia hringnaa lût ni ta hrangin a sa ual.

Belra irhmang chongirkhek thu

(Lk 15.3-7)

¹⁰“Hi mi chîntehai laia inkhat lua hi hmusit loi hrangin irdîn roi, irvâna vântîrtônhaiin ka Pa irvâna mi, hmêl an hmu mai ngai ti nangni ki hril a ni.

¹¹Mihriam Nâipa hi a’rhmanghai zonga saninhiring hrang piala zuang a ni.

¹²“Mi inkhatin belra irzakhat a neia an laia inkhat irhmang sian, itin mo tho le nin irhoitir? Sômkuak kuakhai kha mâkin, fe a ta, ar hmangtu kha a va izong loi hrang ma ni?

¹³Nangni ki hril, a va hmu’n chu sômkuak kuak ar hmang loihai nêkin inkhat chung a khan lôm ual a ti.

¹⁴Khaang dênin, hi mi chîntehai laia inkhat irhmang khom hi nin Pa irvâna mi nuam mah.

Urêng thil tho’nsual thu

¹⁵“Ni urêngin ni chung a thil sual tho sianlân, fe’n lân, nin inhni vai inhriata irchu roh. Ni chong ar ngaiin chu ni innghip ni a ti.

¹⁶Khannisianlân, ni chong ar ngai no’n chu mi dang inkhat mani, inhni mani hruai sa’n lân, khanchu nin thu murdi chu inhretu inhni mani, inthum mani bâia indet ni thei a ti.

¹⁷Khan, khahai chong khom ar ngai no’n chu thil tinrêng koiindanghai kuang intung roh. A hnungkhôn taka chu koiindang chong khom ar ngai nuam no’n chu, kha mi kha chu Jentail angin mani, khâzana irfuangtu angin mani bê roh.

Khap le phal



¹⁸“Thudik nangni ki hril, irnêng chung a i khom nin ikhap ka chu irvâna ikhap ni a ta, irnêng chung a i khom ni iphal ka chu irvâna phal ni a ti.

¹⁹Thudik nangni ki hril; irnêng chung a hin nin laia mi inhni inruala i thua khom an chongchaiin chu ka Pa irvâna mi'n tho pe a ti.

²⁰Mi inhni mani inthum mani ki'rhminga an irchunghôm rikipin an kuang om ngai ki ti,” a tia.

Siahlo ngaidam nuam loi chongirkhek

²¹Khanchu, Jisua kuang Petera a hong a, “Rengpa, ki urêngin voi iza mo ki chung a thil tho'nsual sianlân ki ingaidam hrang? Voisari ten mo a ini hrang?,” a tia.

²²Jisua'n a kuang, “Voi sari ten, ti ma unga, voi sari hmun sômsari ten,” ki iti a ni.

²³Khasika khan irvân Ram chu, Inlaltak tu mo khat a siahlohai kuang sum chungchâng infel tumtu leh irkhek a ni.

²⁴A hong infelin chu, mi inkhat, talent sîngkhat intâng, a kuang an hong hruaia;

²⁵Thuanna a nei no sikin a pu khan ama leh a dôngma, a nâihai le a inei murdi zuara thuan hrang thu a pêka.

²⁶Khanchu, siahlo khan khûksadelin chubai a mûka, ‘Ki chung a irngai nin hoiin lân, a rêngin nang thuan zit ki ti,’ a tia.

²⁷Khanchu, kha siahlo kha a pu khan a sân lung an kham tak taka, an sua, a intâng kha a ngaidam tâka.

²⁸Khannisianlân, kha siahlo kha a fe suaka, a siahlo chanpui inkhat a sum, a duli irza intângtu kha a va hmua, a chela, a bohroka a chela, ‘Ni intâng kha ni pe roh,’ a tia.

²⁹Kha a siahlo chanpui khan inbokin, ‘Ki chung a irngai nin hoiin lân, nang thuan ki ti!’ tiin a ngêna.



³⁰Khannisianlân, nuam maka, a lâkai a thuan mâka chu intângna ina a khum tâka,

³¹Khan, siahlo danghaiin a sintho lam kha an hmu'n a sân poi an tia, Inlaltak kuang khan an fea, thil tinrêng an van sîr pe ta.

³²Khanchu, Inlaltak khan siahlo kha a koia, a kuang, 'Siahlo pualoi! ni ni ngên sikin ni lâkai murdi nang ki ngaidam a ni.

³³Lung nang kin kham angin, nang khomin ni siahlo chanpui lung ni inkham hrang mo ni ma? a ti pea.

³⁴Inlaltak kha a sân a ning an mur sika kha siahlo kha a lâkai a thuan zoi mâka intângna ina a khum tâka,' a tia.

³⁵Khan, Jisua'n, "Mi tinin nin urêng hai nin lungrîl takin nin ngaidam no'n chu ka Pa irvâna mi'n khang dên khan nin chung a tho sa a ti," a tia.

Mathaia 19

Irmâkna chungchânga irchutirna

(Mk 10.1-12)

¹Jisua'n kha thu kha an sîr zoiin chu Galili ram ata a suaka, Jordan râla Judai rama a fe tâka.

²Mipui tamtakin an zuia, kha hmuna khan mi tamtak a lei indamhaia.

³Farisai senkhathai a kuang an hong a, ama fiana hrangin, "I ang khomin mi'n a dôngma a imâk hi a'rthiang mo?" an tia.

⁴Khan ama'n, "A phut ata hi thu hi tep ngai mak chêi mo? a phut ata siamtu khan nupang le pasal a siama,

⁵Khasika khan pasalin a nu le a pa masan a ta, a dôngma thop a ti, khanchu an inhni khan taksa pumkhat hong ni ta an ti,' a iti a ni.

⁶Khasikin mi inhni ni ta mahaia, pumkhat an hong ni ta. Pathianin a izom tâk chu mihriamin a isen viat hrang ni mah," tiin a sâma.

⁷Farisaihai khan a kuang, "Khante, ithoa mo Mosia'n irmâkna lekha pêkin mâk thei thu a ipêk?" an tia.



⁸Jisua'n an kuang, "Mosa'n nin dôngmahai mâk nangni a iphalna chu nin milung ngar sika a ni, Khannisian, a phuta chu khang khan ni mah.

⁹Keima'n chu nangni ki hril, tukhom uire sika ni loa a dôngma mâka, mi dang neitu chu a uire a ni," a tia.

¹⁰Irchutihai khan a kuang, "Khang khan ompui sangram chungchânga pasal ngîrhmun a niin chu, irnei hi sa mah," an tia.

¹¹Jisua'n an kuang, "Hi irchutirna hi mi tin hrang ni maka, Pathianin a ipêkhai chung a vai hmang ni a ti.

¹²Pasalin dôngma ainei loi nasan chu tamtak a om; senkhat chu nei loi hrang piala suak an ni; senkhat chu khang hranga mihriamin an isiam khom an om; senkhat chu irvân Ram sikin aninei loi a ni. Tukhom hi irchutirna a pom thei murdi'n chu zôm ri se," tiin a sâma.

Jisua'n nâipangtehai sat a vur thu

(Mk 10.13-16; Lk 18.15-17)

¹³Khan, Jisua'n an chung a kut a'rngat thei hrang le a chongchai pe theina hrangin mi senkhatin nâipangtehai a kuang an hong hruaia, khannisian, irchutihaiin an lei ngoa.

¹⁴Jisua'n an kuang, "Nâipangtehai ki kuang inhongtirhai unglân, khap no roi, irvân Ram chu hiang mihai ta a ni sikin," a tia.

¹⁵Khan, an chung a kut a'rngata, khatak ata a fe tâka.

Ruatharte irchongpa thu

(Mk 10.17-31; Lk 18.18-30)

¹⁶Khan, mi inkhat Jisua kuang a hong a, "Irchutirtu, kumtuang hringna ki nei theina hrangin i sin sa mo ki itho hrang?" tiin a'rdona.

¹⁷Jisua'n, "Itho mo sin sa ni ni irdon? A sa chu inkhat vai kêng a iom. I khom nisian, hringnaa lût ni nuamin chu thupêkhai zôm roh," tiin a sâma.

¹⁸Ama khan, "I thupêkhai mo?" tiin a'rdona: Jisua'n, "Mi that no roh; uire no roh, milakin mi hnôl no roh;



¹⁹ni nu le ni pa chôindôm roh; khabana, nangma lung ni irthung angin ni bômhai lungthung roh, tihai hi,” tiin a sâma.

²⁰Ruathartepa khan, “Kha thupêkhai kha chu ki zôm zit ta, imo ki la irsam?” a tia.

²¹Jisua’n a kuang, “Satirkipa om ni nuamin chu fe’n lân, ni inei murdi zuarin lân, kha sum kha inrianghai kuang pe roh, khanchu, irvâna irchon nei ni ti; kha hnung chu, hongin lân, ni hong zui roh,” a tia.

²²Ruathartepa khan kha chong kha an hriatin chu chardong takin a rot ta, mi irchongtak a ni sikin.

²³Khan, Jisua’n, a irchutihai kuang, “Thudik nangni ki hril; mi irchonghai hrangin chu irvân Rama lût a intak ok hrang a ni.

²⁴Nangni ki hril nok: Irchong Pathian Rama lût nêkin chu saringsei simphuai mikuara lût ol ual a ti,” a tia.

²⁵Kha chong kha irchutihaiin an inhriatin chu a sân an irngai a’rkhêl oka, “Khano’nte, tu mo saninhring ni thei hrang?” tiin an irdona.

²⁶Jisua’n anni kha en ngitin an kuang, “Ama kha mihriam hrangin chu thei ni maka, Pathian hrangin chu thei a ni,” tiin a sâma.

²⁷Khanchu, Petera’n a kuang, “En ta, keini’n itinrêng mâkin nang kin zuia, imo kin ihmu hrang?” a tia.

²⁸Jisua’n an kuang, “Thudik nangni ki hril: Zoro thara chu, Mihriam Nâipa a rêngtoihmun roiinpui taka a toi tika, nangni a ni zuituhai khom hi Israel nam sômhleihni chung a roirêlin rêngtoihmun sômhleihnia la toi nin ti.

²⁹Tukhom ki’rhming sika in mani, urêng mani; farnuhai mani, pa mani, nu mani, nâihai mani, ramhai mani mâksan chu a bâk irzain hmu an ti; kumtuang hringna la dong sa an ti.

³⁰“Khannisian, atûna a masa taka omhai chu a hnungkhôn tak la ni an ta, a hnungkhôn taka omhai khom a masa tak la ni an ti,” a tia.

Mathaia 20



Grep irhuana sinthotuhai

- ¹Irvân Ram chu mi inkhat a Grep irhuana sin hrang mi zonga zînga suak ang kha a ni.
- ²Ama khan sinthotuhai kha a sîna a duli pe hrangin a'rfelpuihaia, khanchu, a grep irhuana sin hrangin a tîrhai tâka.
- ³Khan, zîng dâr kuak vêlin bazar hmuna a fe nôka, mi dang lei ngîr mai maihai a hmua;
- ⁴an kuang, 'Nangni khom grep irhuana va fe roi ba; a'rhoi ang dôr nangni pe ki ti,' a tia.
- ⁵Khanchu an fe tâka, khan, sîn dâr sômhleihni le khohloi dâr thum tena khom a suaka, khang dênin a tho nôka.
- ⁶Khohloi dâr ringa'n a suak nôka, mi dang ite sin loia ngîrhai a va hmuaia, an kuang, 'Itho sika mo sîn sôta hi hin nin ingîr pa pai?' a tia.
- ⁷Anni khan a kuang, 'Tûte'n irhlo hrangin an ni koi no sikin,' ti'n an sâma. Khan ama'n an kuang, 'Nangni khom fe unglân, grep irhuana va sin roi,' a ti pehaia.
- ⁸Khohloi a hong nî'n chu, grep irhuan neitu khan a sum vongtu kuang, 'Sinthohai kha koi unglân, inhnung tak ata phutin a maton takhai dênin an hlo pe roi,' a tia.
- ⁹Khohloi dâr ringa vêla sin kophai kha an hongin chu a duli chit an dong senga.
- ¹⁰Khanchu, a maton taka sin kophai kha an hongin chu hmu ual hrangin an irtûnga; khannisian, anni khom a duli dên pêk an nia.
- ¹¹An hlo an hong dongin chu in neitupa chung a an chiar tâka.
- ¹²'Hi a hnungkhôn takhai hin dârkhâr khat vai an sina, keini chu misa luma sîn misa tâk dênin kin sina, khan khomin, keini idong dôr ngêt anni khom ni pêkhaia!' an tia.



13A chongpu khan an laia inkhat kuang, ‘Irngai ta, mala, nang huang ma ung. I khom nisian, a sîna a duli hlo hranga ei irti mo ni ma?’

14Atûn ni hlo lan lân, ni ina fe roh. Nangma nang ki ipêk dôr kêng hi a hnungkhôn taka sin koppu khom hi ki ipêk nuam a ni.

15Ki sum khate, ki nuamlam ang taka hmang hrangin ircham ki inei mo ni ma? A ninole, ki tikhoi sikin ni ihnarsa ma ni?’ a ti pea.

16Khanchu, Jisua’n, “A hnungkhônhai chu a masa tak la ni an ta, a masa takhai chu a hnungkhôn tak la ni an ti,” a tia.

Jisua’n a thi hrang thu an sîr voi thumna

(Mk 10.32-34; Lk 18.31-34)

17Khan, Jisua Jerusalem-a a hong fe laiin irchutir sômhleihnihai kha an bingin a hruaihaia, lampuia khan inrûkin an kuang,

18“Irngai u ta, Jerusalema ei ife hrang a nia, kha khan Mihriam Nâipa hi Ochai inlalthai le Dân irchutirtuhai kuta ichelin om a ti. Thi hrangin rêlinchuk an ti.

19Jentailhai kuta pe an ta, anni khan nuiza siamna’n hmang an ta, zêm an ta, krosa hembe’n ti; khannisianlân, sîn thum tena chu kaithoiin om a ti,” a tia.

Nu inkhat ngêna

(Mk 10.35-45)

20Khanchu, Zebedaia dôngma kha a nâipasal inhni hong hruaiin Jisua kuang a hong, khûksadelin chubai a mûka, thil imo khat a zonga.

21Jisua’n a kuang, “Imo ni izong?” a tia. Ama khan, “Hi ki nâipasalhai ruai hi ni Rama, ni chang tiang inkhat, ni vei tiang inkhat, an toi theina hrangin thu pehai ro ba,” a tia.

22Jisua’n a sâma, “Nin thil zong hi nin inhriat loi kêng, ki khilât in hrang nin iin thei hrang ma ni?” a tia. Anni khan, “Thei kin ti,” an tia.

23Jisua’n an kuang, “Ki khilât chu in ngei nin ti; khannisianlân, tu mo ki chang tiang le ki vei tianga toi hrang chu keima ircham ni mah, ka Pa’n a inkung pehai ta hrang a ni,” a tia.



²⁴Irchutir sômhai khan kha kha an inhriatin chu ulenâi inhnihai chung a khan a sân an ning an mur tâka.

²⁵Khasikin Jisua'n an rêngin a koi bukhaia, an kuang, "Jentailhai chung a roirêltuhai kha an inlal tak tak ngaia, an mi lianhai khomin an chung a ircham an nei tak tak ngai ti nin inhriat.

²⁶Khannisianlân, nangni laia chu khang khan a ini hrang ni mah. Nin laia tukhomin mi lian a ni nuamin chu nin sinthotua a iom hrang a ni.

²⁷Nin laia inlal tak ni nuam khom, nin siahloa a iom hrang a ni.

²⁸Mihriam Nâipa khom hi sintho pe hrangin zuang maka, sintho hrang le mi tamtak irtan hranga a hringna pe hranga a izuang a ni," a tia.

Mitcho inhni indam

(Mk 10.46-52; Lk 18.35-43)

²⁹Jisua le a irchutirhai Jeriko khua ata an suak laiin, mipui tamtakin an zuia.

³⁰Mitcho inhni lampui kôla toihaiin Jisua a fe ti an inhriatin chu, "Davida Nâipa! lung nin kham roh!" tiin an khêka.

³¹Mipuihai khan dâihrek hrangin an ngohaia. Khannisianlân, anni khan "Davida Nâipa! lung nin kham roh!" tiin an khêk ual uala.

³²Jisua a ngîra, kha mitchohai kha a koihaia, "Imo nangni tho pe hranga nin inuam?" tiin ar donhaia.

³³Anni khan a kuang, "Rengpa mit vârna kin nuam," an tia.

³⁴Jisua khan lung an khamhai tak taka, an mit a tôna, khanchu, an hmu thei zôia, ama kha an zui tâka.

Mathaia 21

Jisua roiinpui taka Jerusalem a lûtna thu

(Mk 11.1-11; Lk 19.28-40; Joh 12.12-19)

¹Khan, Jisua le a irchutirhai Jerusalem an tung tôn, Oliv tâng Bethfage khuaa an hong tunga. Kha khan Jisua'n a irchutirhai laia mi inhni a tîrhaia,

²an kuang, "Nin matona khuaa son fe unglân, sakuartung, a kôla a tê leh irthung hmu zôi nin ti. Sût unglân ki kuang hong kai roi.



³Tukhomin nin kuang i khom lei tihai sian, ‘Rengpa’n a innang kêng,’ ti unglân; khanchu, nangni inhongtir zôi a ti,” a tia.

⁴Deipu hmanga a insîr kha a hong tung theina hrangin khahai kha a hong iom a ni.

⁵“Zion nâinu kha hril roh, En ta, ni rêng chu ni kuang a hong e, Sakuartung te chung ngeia,” ti thu hi.

⁶Khanchu, irchutihai kha an va fea, Jisua’n thu a ipêkhai ang takin an thoa.

⁷Sakuartung le a tê kha an hong kaia, an chung a punhai an dâpa, Jisua kha a chuang ta.

⁸Mipui laia a tam ualin chu lampuia an punhai an dâpa, senkhatin sôlhna an sâta, lampuia khan an dâp thiai saa.

⁹Mipui Jisua maton tianga fehài le a hnung tianga zuihai khan, “Davida Nâipa kuang, Hosana! Rengpa irhminga hong chu inpâkin om ri se. An chung taka khin Hosana!” tiin an khêka.

¹⁰Jisua kha Jerusalema a lûtin chu, a kho pumpuiin, “Hi mi hi tu ma ni?” tiin an châng soia.

¹¹Mipuihai khan, “Hi mi hi deipu Jisua, Galili rama Nazaret khuaa mi a ni,” an tia.

Tempil irthiangtir

(Mk 11.15-19; Lk 19.45-48; Joh 2.13-22)

¹²Jisua kha Tempila a va lûta, kha khan thil zuartuhai le irchôkpuhai kha an hnot suakhai zita. Sum thûltuhai maichâm le phervali zuartuhai toihmunhai khom a nam inrîl pehaia,

¹³an kuang, “Pathian Thubua, Pathianin, ‘Ki in chu chongchaina in ti an ti,’ ti irziak a ni. Khannisian, nangni’n chu nakhrâtsonghai khura kêng nin isiam a ni hi,” a tia.

¹⁴Tempila khan mitchohai le ke’nâihai a kuang an hong a lei indamhaia.



¹⁵Ochai inlalahi le Dân irchutirtuhaiin sinirkhêl a isinhai le Tempila, ‘Davida Nâipa kuang Hosana,’ tia nâipang khêkhai kha an hmu’n chu a sân an ning an mura, “Hihai thu’nsîr hi nin hriat mo?” an tia.

¹⁶Jisua’n an kuang, “Kin hriat e, ‘Nâïtesenhai le irhnu nêk lai hai bâia khan, inpâkna a famirkip’ ti hi nin itep ngai loi mo?” a tia.

¹⁷Anni kha a rotsanhaia, khopui ata a suaka, Bethani-a a fea, kha khan a riak tâka.

Jisua’n theipui kung kua a sâlna

(Mk 11.12-14,20-24)

¹⁸Khan, zînga khopui tiang a pan nôk laiin Jisua phîng a hong châm tâka.

¹⁹Lam sîra theipui kung a hmua, a va pana, khannisianlân, a hnâ ti no chu ite hmu maka. Khasikin Jisua’n theipui kung kha, “Kumkua’n ra ngai ta no ro!” a ti pea, voikhat rengin theipui kung kha a hong thê m ta.

²⁰Irchutirhaiin ama kha an hmua, an irngai ar khêl ok tâka, “Itina mo theipui kung hi a ithêm zôi tâk?” tiin an irdona.

²¹Jisua’n an kuang, “Thudik nangni ki hril, lunghlâna nei viat loiin iamna nin neiin chu hi theipui kung chung a ki itho ang hin tho thei nin ti. Kha vai kha ni loiin hi tâng kuang khom, ‘Irthonin lân, tuikhangliana zu irpai roh’ ti unglân zu irpai a ti.

²²Nin iamin chu chongchaia nin inghi murdi chu hmu nin ti”, tiin a sâma.

Jisua irchamneina an irdonna thu

(Mk 11.27-33; Lk 20.1-8)

²³Tempila a lûta, ar chuhai laiin Ochai inlalahi le vântâng upahai kha a kuang an hong kâia, “I irchamneina’n mo hi sinhai hi ni itho? Tu’n mo ircham nang a ipêk?” an tia.

²⁴Jisua’n a sâma, “Kei khomin nangni irdon ki ti, kha kha nin ni don theiin chu, kei khomin tu irchamin mo ki itho nangni hril ki ti.

²⁵Johana baptisma kha kho rengata irchamneina mani, Pathian ata mo, mihriam a ta?” a tia. An bingin an irsêla, “Imo ei iti hrang tâk? ‘Pathian ata ei ti le, itho mo Johana kha nin iiam loi?’ ni ti a ta.



²⁶Mihriam ata ei ti lakin mipuihai hi ichi an oma, Johana kha Deipu'n an bê sikin," an tia.

²⁷Khasikin Jisua kuang, "Inhre ma ung," tiin an sâma. Jisua'n an kuang, "Kei khomin tu irchamin mo hihai hi ki isin, nangni hril bîk no ning," a tia.

Nâipa inhni chongirkhek

²⁸Atûn hin nangni'n itin mo nin irngai? "Tiana khan mi inkhatin nâi inhni a neia. A nâi ulian kuang a va fea, a kuang 'Ki nâi a vuan chu grep irhuana fe'n lân, va sin ro,' a tia.

²⁹Ama khan, 'Nuam ma ung!' a tia, Khannisianlân, inhnunga chu a ngaituana a thûla, a fe nôk ta.

³⁰Khanchu inkhatpu kuang khom a fea, khang dênin a va ti nôka. Ama khan, 'O ka pa, fe ki ti,' a tia, khannisianlân, fe maka.

³¹Kha nâi inhnihai khan a tu khan mo an pa nuamlam an sin uala?" a tia. Anni khan a kuang, "A ulian ualpu khan," tiin an sâma. Jisua'n an kuang, "Nangni ki hril: khâzana irfuangtuhai le notizuarhaiin Pathian Ram lût nangni an ikhêl tâk kêng.

³²Baptistu Johana khan lampui dik nin izui hrang nangni irhmu a zuanga, lei iam mak chêia; khâzana irfuangtuhai le notizuarhaiin chu an lei iam a ni. Nangni chu nin hmu hnung khomin nin ngaituana thûlin ama iam mak chêi," a tia.

Grep irhuan chongirkhek

(Mk 12.1-12; Lk 20.9-19)

³³Jisua'n an kuang, "Chongirkhek dang irngai nôk roi: voi khat chu mi tu mani ram chongpu a oma, kha mi khan grep irhuan a thoa, dâiin ar kula, grep sôrna hrang khur a choia, a nghâkna hrangin in irsâng a sina. Khanchu, grep kha a nghâk hranghai kuta bângin, ram danga an zin ta.

³⁴Grep ra irhmal zoro a hong tungin chu, a nghâktuhai kuang khan dongtum va la hrangin a suakhai a tîra.



³⁵Irhuan nghâkhai khan an suakhai kha an lei chela, inkhat an zêma, inkhat an thata, inkhat lungin an dênga.

³⁶Khan, suak danghai matona nêka tam ualin a tîr nôka; matonahai ang dênin an lei tho nôka.

³⁷A hnungkhôn taka chu, ‘Ki nâipa hi chu lei ngîk ngêt an ti,’ tiin a nâipa a tîr tâka.

³⁸Khannisianlân, irhuan nghâkhai khan a nâipa kha an lei hmu’n chu ‘Hi mi hi a chongpu nâipa a ni; Tho that ei ta, ar chon hi lei lua pe rei!’ an tia.

³⁹Khanchu, an chela, grep irhuan pên tiang an kêlsuaa, an that ta.

⁴⁰Khan, grep irhuan chongpupa a hong tikin, kha irhuan nghâkhai kha imo lohài ni?” tiin Jisua’n a’rdonhaia.

⁴¹Anni khan a kuang, “Kha mi suakhai kha that a ta, grep irhuan kha a nghâkpu dang, a ra irhmal zoroa, a zoro taka a dongtum a pe ngai hrangtu kuang pe a ti,” an tia.

⁴²Jisua’n an kuang, Pathian lekha thu’n, ‘In sintuhaiin lung an ipai, hmanhmunboia an ibe kha, A kila lung poimo tak a hong chang ta. Ama kha Rengpa itho a ni; Ei mit hmua hin a irkhêl a ni!’ a iti hi nin itep ngai loi ma ni?

⁴³Khasikin nangni ki hril, “Pathian Ram hi nin kuang ata lapai ni a ta, ra insua hrang namhai kuang ipêk ni a ti.

⁴⁴Tukhom kha lung chung a tûk ka chu irnôi an ta, a idel len vâng chu irnôi indi chit an ti,” a tia.

⁴⁵Ochai inalhai le Farisaihaiin Jisua chongirkhek insîrhai kha an inhriatin, anni chungthu a insîr a nih ti an inhriat tâka.

⁴⁶Khasikin ama chel an tuma, khannisianlân, mipuihai kha an chia, mipuihaiin Jisua kha deipu an bê sikin.

Mathaia 22

Irneina hruaithe chongirkhek
(Lk 14.15-24)



- ¹Mipuihai kuang chongirkhekin Jisua'n thu an sîr nôka,
- ²"Irvân Ram chu rêng inkhat a nâipa ta hranga irneina hruaithe leh khan irkhek thei a ni.
- ³Hruaithe hranga a ifialhai kha koi buk hrangin a siahlohai a tîra, khannisian hong nuam mahaia.
- ⁴Khan, siahlo danghai a tîr nôka, 'Ki ifialhai kuang khan, irngai u ta, hruai chu ki'rsiam diam tâka, ki sehrât chalthai le sa ki ivâihai ki thata, itinrêng irsiam diam a ni tâka, hruaithe fâk hrangin hong ta roi ti roi,' a tia.
- ⁵Khannisianlân, lei ngaisak mahaia, an sintum chit an sina, inkhat chu loia a fea, inkhat chu dukana a fea,
- ⁶mi danghaiin siahlohai kha an chela, an zêma, an thata.
- ⁷Reng kha a sân a ning an mura, khasikin a sipaihai a tîra, kha mi thathai kha an thata, an khua khom an hâl pehai tâka.
- ⁸Khanchu a siahlohai a koia, an kuang 'Irneina hruai kha siam zoi a ni ta, khannisianlân, ki mi fialhai kha fâkrua ni mahai.
- ⁹Atûn chu lamliana fe unglân, mi nin ihmu murdi hruaithe fa hrangin hong koihai roi,' a tia.
- ¹⁰Khanchu siahlohai kha lamliana an fea, mi an ihmu murdi, mi sa le mi sia, an hong koi bûmhaia, irneina in kha mipuiin an sip ta.
- ¹¹"Khan, rêng kha khual mihai en hrangin a va lûta, irneina puan sil loi mi inkhat a va hmua.
- ¹²Reng khan a kuang, 'Mala, irneina puan sil loiin itina mo hin ni ihong lût lam?' tiin ar dona. Khannisianlân, kha mi kha a dâihreka.
- ¹³Khanchu, rêng khan, a siahlo kuang, 'A kut le a ke khit unglân, pên tiang inthima pai suak roi. Kha khan chap le irkamnôi om a ti,' " a tia.
- ¹⁴Khan, Jisua'n, "Fialhai chu tamtak an nia, khannisianlân, inthanghai chu tômte an ni," a tia.

Kaisara kuanga khâzana chôi



(Mk 12.13-17; Lk 20.20-26)

¹⁵Khan, Farisaihai kha an suaka, Jisua kha a thu'nsîr rengata an chel theina hrangin an van sîr irhlôma,

¹⁶Khan, an irchutir senkhathai le Heroda pâla mi senkhathai a kuang an tîra, kha mihai khan, "Irchutirtu, thutak nin sîr ngai ti kin inhriat tukhom uksak ual ngai mak chea, tukhom theibîk loiin mihriam ta hranga Pathian lungdo thutak kha nir chutir ngai.

¹⁷Khante, itin mo nir ngai, ni hril ta? Kaisara kuanga khâzana chôi mo a'rthiang, irthiang ma mo?" an tia.

¹⁸Khannisianlân, Jisua'n an lunginchong kha an hriat chiana, an kuang "Vâirirlethai! Itho mo ki chong nin ôktir nin itum?

¹⁹Khâzana chôi hranga sum kha nin entir u ta," a tia. Khanchu, sum kha a kuang an hong chôi,

²⁰anni kha ar donhaia, "Tu illim le tu irhming mo a chuang?" a tia.

²¹Anni khan, "Kaisara," tiin an sâma. Khanchu, Jisua'n an kuang, "Kaisara ta chu Kaisara pe unglân, Pathian ta chu Pathian pe roi," a ti pehaia.

²²Kha thu kha an inhriatin chu ar khêl an ti tak taka, an mâka, an rot pat ta.

Thoinôkna thu an irdonna

(Mk 12.18-27; Lk 20.27-40)

²³Kha nî sîn ngeia khan, thoinôkna om mah ti pâl Sadukai senkhathai Jisua kuang an hong.

²⁴A kuang, "Irchutirtu, Mosia'n, 'Mi nâi nei loiin a dôngma thisan sianlân, a sangpa khan meithâi kha lua nôkin a upa ta hrangin irchi ainei pe hrang a ni,' a tia.

²⁵Khan, kin laia urêng sari an lei oma; a ulian takin dôngma a neia, irchi nei loiin a thia, khasikin a dôngma kha a sangpa kuang a mâk tâka.

²⁶A sangpa a inhnina chung a khom, khang dênin a oma, inthumna chung a khom, a sarina dênin, an lua senga.

²⁷A hnungkhôn taka chu nupangnu khom a thi sa tâka.



²⁸Khan, thoinôk tika teh tu dôngma tak mo a ini hrang tâk? An rêng lakin an lua senga,” an tia.

²⁹Jisua’n an kuang, “Nin irngai insual bâka! Asan chu Pathian thu le Pathian irtha nin inhriat no sika a ni.

³⁰Mithihai an thoinôk tika chu irvâna vântîrtônhai angin om ta an ti, dôngma pasal irnei ta no nihai.

³¹Khan, mithihai thoinôk thuhai Pathianin nangni a insîr pe kha nin la itep ngai loi ma ni?

³²‘Keima Abrahamama Pathian, Isaka Pathian Jakoba Pathian,’ ki ni a tia, Pathian chu ihringhai Pathian kêng a ini; mithihai Pathian ni ma,” tiin a sâma.

³³Mipuihaiin an inhriatin a irchutirna kha ar khêl an ti tak taka.

Thupêk roiinpui tak

(Mk 12.28-34; Lk 10.25-28)

³⁴Jisua’n Sadukaihai kha a sêl indonghai ti Farisaihaiin an inhriatin chu, an irhmukhôma,

³⁵an laia mi inkhat, Dân irchutirtu khan ama fiana hrangin,

³⁶“Irchutirtu, dâna hin i thupêk tak hi mo a roiinpui tak?” tiin a’rdona.

³⁷Jisua’n a kuang, “ ‘Rengpa ni Pathian chu ni lungrîl murdi’n, nir tha murdi’n, ni lunginchongna murdi’n lungthung roh!’ ti hi,

³⁸Hi hi thupêk roiinpui le poimo tak a ni.

³⁹Thupêk poimo inhnina a irangpui chu ‘Nangma lung ni irthung angin ni bômhai lungthung ro, ti hi,’ tiin a sâma.

⁴⁰Mosia Dân pumpui le deipuhai irchutirna murdi khom hi thupêk inhni hin a ihuap zit a ni,” a tia.

Mesia chungchânga irdon infelna

(Mk 12.35-37; Lk 20.41-44)

⁴¹Farisai senkhathai an irchun laiin Jisua’n an kuang,



⁴²“Mesia hi itin mo nin irngai? Tu nâipa ma ni?” tiin ar donhaia. Anni khan, “Davida nâipa a ni,” tiin an sâma.

⁴³Jisua’n an kuang, “Khan, itho mo Davida kha Irtha’n Rengpa tia a ikoi?”

⁴⁴Rengpa khan ki Rengpa kuang, ‘Ki chang tiang toi roh, ni râlhai ki ke hnuaia ki sia zoi mâka chu,’ a iti a ni.

⁴⁵“Davida’n, ‘Rengpa,’ tiin a koiin teh, itin mo Mesia kha Davida nâipa a ini thei hrang?” a tia.

⁴⁶Khanchu, tûte’n Jisua kha sâm thei mahaia, kha nia irthokin chu tûte’n ite irdon ngam ta mahai.

Mathaia 23

Jisua’n Dân irchutirtuhai le Farisaihai kuang ata irdîn hranga a hrilna

(Mk 12.38-39; Lk 11.43-46; 20.45-46)

¹Khan, Jisua’n mipui le a irchutirhai kuang thu an sîra,

²“Dan irchutirtuhai le Farisaihai hi Mosia Dânhai hrilfia hranga phal an ni.

³Khasikin tho hranga nangni an ibe murdi chu nin zômin, nin izui hrang a ni; Khannisian, an om dân chu zui no roi, an insîrhai hi an hmang ngai no sikin.

⁴Puakrik pêl intak takhai an siama, mihai chung a an bâng ngaia, khan kha mihai sanna hrangin an kutpârhai lua hmang nuam ngai mahai.

⁵An sintho murdi kha mihai hmu hrangin kêng an itho ngai; an bân khit le michal khitnaa Pathian chong irziakhai hi en u ta, an inhrol vang na! An songkol irfual irvonahai khom hi en u ta, an sei vang na!

⁶Hruaithena hmuna toina satakhai, Sinagoka toina langsârhai, dukana chubai irmûk hai,

⁷mihaiin ‘Rabbi’ an itihai an irngaisâng ngai.

⁸“Nangni chu ‘Rabbi’ tia koi ni viat no chin ni; urêng khat inzen nin nia, irchutirtu inkhat vai nin nei sikin.

⁹Irnêng chung a hin tûte ‘Ka pa,’ ti no roi, pa inkhat vai irvâna nin nei sikin.

¹⁰‘Hruaitu,’ ti khomin irkoi no roi. Mesia vai hin nin hruaitu a ni sikin.



¹¹Nin laia a roiinpui tak chu nin sinthopu a ini hrang a ni.

¹²Tukhom irngaiinhlu ka chu irhniam an ta, irngaiintôm ka chu chôiindôm ni an ti.

An vâirletna Jisua'n a dem
(Mk 12.40; Lk 11.39-42,44,52; 20.47)

¹³“Nangni Dân irchutirtu le Farisai vâirlethaio, nin chung a rik! vân Ram lampui kha mihai nin khâr pehai ngaia; nangni lak lût mak chêia, a lût hranghai khom an ilût lak phal mak chêi.

¹⁴Nangni Dân irchutirtu le Farisai vâirlethai, nin chung a rik! Meithâi sum nin fâka, mi huangna'n sôt tak tak nin chongchai ngai, khasika khan nin dūk tong lûminna ual a ti.

¹⁵Nangni Dân irchutirtuhai le Farisaihaio, nin chung a rik e! mi inkhat irlet hrangin tuikhanglian le ram phêk pumpui nin irfang ngaia, khan, a hong irletin chu kha mi kha nangni nêka a bâk inhni'n hrem hmuna fe hrangin nin siam ngai,

¹⁶“Nangni hruaitu mitcho, tukhom Tempil sâlin mi'n khomâksâm sianlân, ite ni mah, Tempil rângachak sâla khomâksâm chu a isua hrang a ni,' tituhaio, nin chung a rik e!

¹⁷Nangni, mi invêt mitchohaio, i hi mo a roiinpui ual, rângachak mo rângachak irthiang infâitu Tempil kha mo?

¹⁸Mi'n maichâm sâlin khomâksâm sianlân, ite ni mah, khataka thilpêk sâla khomâksâm chu a isua hrang a ni nin ti saa.

¹⁹Nangni mitchohaio, i hi mo a roiinpui ual, thilpêk mo thilpêk infâitu maichâm kha mo?

²⁰Khasikin, maichâm sâla khomâksâm chu maichâm le a chung a om murdi sâla khomâksâm a ni.

²¹Tempil sâla khomâksâm chu Tempil le a luatu sâla khomâksâm a ni.

²²Irvân sâla khomâksâm chu Pathian toihmun le a chung a toi sâla khomâksâm a ni.



²³“Nangni Dân irchutirtuhai le Farisai vâirlethaio, nin chung a rik! A zoro taka vâng ngai, podina hai, lêngmiser hai, kumhoi hai sôma inkhat nin pêk ngaia, Dân thua poimo ual, dikna hai, lungkhamna hai; iamomna hai nin ngainêp ngai, khannisian, khahai kha kêng nin itho rua tak chu a ni, a danghai khi ma ual loiin.

²⁴Hruaitu mitchohaio! Nin tui ina thoivâi irthât infâia, saringsei chu nin invol ngai.

²⁵“Nangni Dân irchutirtuhai le Farisai vâirlethai! nin chung a rik: Nin khilât le khêng pên tiang nin infâia; a sêng tiang chu hlêprûkna le insumloina’n a sip a ni.

²⁶Farisai mitchohai! khilât sêng tiang chu infâi bak unglân, a pên tiang khom fâi sa a ti.

²⁷“Nangni Dân irchutirtuhai le Farisai vâirlethai! Thân lung nâl invâra, pên tianga sataka inlang, khannisian a sêng tiang chu mithi ruhai le ruak porinchena tinrênga sip ang kha nin ni.

²⁸Khaangin mi tin mithmua pên tiang chu a sa angin nin inlanga, khannisian, nin sêng tiang chu vâirletna le sualnaa sip nin ni.

Jisua’n hrem an ini hrang thu an sîr

(Lk 11.47-51)

²⁹“Nangni Dân irchutirtuhai le Farisai vâirlethai! nin chung a rik e! Deipuhai thân nin sina, mi felhai inhriatmaina lunghai nin irvo ngaia;

³⁰ei irchibulhai om laia khan lei om tâk khom inlân, Deipuhai thisen an insuakna khan chu kop no ih, nin ti ngai.

³¹Khasikin deipuhai lei thattuhai irchia mi nin nih ti nin inlang chak a ni,

³²Fe unglân, nin irchibulhaiin an lei iphut kha irzoitir roi.

³³Nangni mirûlhai le mirûl irchihaio! Hremhmun fe hranga rêlinchukna irthokin itin mo zôk thei hrangin nin irtûng?



³⁴Khasikin nangni ki hril, nin kuang deipuhai, mi vârhai, Dân irchutirhai hong tîr ki ti; senkhat that nin ta, hembe nin ti; senkhat Sinagoka zêm nin ti, kho tina inhnot irzûl thiai nin ti.

³⁵Khanchu, Abela, mi fel tak thisen nin insua ata, hmun irthiang le maichâm kêra Barakia nâipa Zakaria thisen nin insua dên khan, irnêng chung a mi fel thisen suak murdi moh chu nangnihai chung a chum a ti.

³⁶Thudik nangni ki hril, khahai murdi kha atûnlai mihai chung a itung hrang a ni.

Jisua'n Jerusalem lung a thungzia

(Lk 13.34-35)

³⁷“O Jerusalem, Jerusalem! Deipuhai thattu, Pathianin ni kuanga itîra omhai lei dêng thattu! Ârpuinu'n a têhai a mitha hnuaia a iop khôm angin ni nâihai voi iza mo op khôm ki tuma, nuam mak che?

³⁸Irngai u ta, nin Tempil kha marakin, a korongin om ta a ti.

³⁹Nangni ki hril, Rengpa irhminga hong chu Pathianin satvur ri se, nin ti mâka chu atûna irthokin ni hmu ta no chin ni,” a tia.

Mathaia 24

Jisua'n tempil siat hrang thu an sîrna

(Mk 13.1-2; Lk 21.5-6)

¹Khan, Jisua a suaka, Tempil ata a fe laiin, Tempil inen hrangin ar chutirhai a kuang an hong a.

²Ama khan an kuang en roi, “Thudik nangni ki hril, hitaka lung inkhat khom hi a hmuna om no ni; an rêngin paiin om zit an ti,” a tia.

Buaina le dengitheitirna

(Mk 13.3-13; Lk 21.7-19)

³Khan, Jisua'n oliv tânga a toi laiin, a irchutirhaiin a bing in an hong irhmupua, “Nin hril ta, hihai hi itika mo a itung hrang? Ni zuang nôkna hrang le rammual mongna hrang irsinsiana sinirkhêl kha i imo a iom hrang?” tiin an irdona.

⁴Jisua'n an kuanga, “Tukhomin nangni an huang nona hrangin, irdîn roi.



⁵Mi tamtakin, ‘Mesia kha ki nih,’ tiin keima irhming songin hong an ta, mi tamtak huang an ti.

⁶Nin kôla irdoina thuthang lan hriat nin ta, khannisianlân, nin milung inbuai no roi. Kha thilhai kha chu a hong itung ngêt hrang a ni, khannisianlân, a mongna chu la ni no ni.

⁷Nam le nam irdoi an ta, ram le ram irdoi an ti. Hmun tina châm tâk a ta, hnîngnu inhnîng a ti.

⁸Khahai kha nâiha sê ar phut ta tihna a ni.

⁹“Khanchu, deng nangni inthei hrang le nangni that hrangin nangni lan cheltir an ti. Keima sikin nam tinin nangni khôkmâk an ti.

¹⁰Kha tika chu mi tamtakin an iamna masan an ta, irchel irhlômtir an ta, irkhôkmâk irhlômtir an ti.

¹¹Khanchu, deipu dol tamtak la hong suak an ta, mi tamtak la huang an ti.

¹²Khan, sual a la pung hrang sikin mi tamtak lungthungna la dâi a ti.

¹³Khannisianlân, tukhom a mong dêna tuang diar ka chu saninhringin om a ti.

¹⁴Khan, hi Ram Thurchi Sa hi nam tin inhriatna hrangin rammual pumpuia ihrilin la om a ta, khanchu, a mongna hong tung a ti.

Intakna ichiom tak
(Mk 13.14-23; Lk 21.20-24)

¹⁵“Khanchu, intakna ichiom porinche tak, deipu Davida lei insîr kha hmu nin ta, hmun irthianga khan ngîr hmu nin ti,” (khan a tep murdi’n chu a omzia inhre ri se).

¹⁶Khanchu, “Judai rama omhai kha tânga rot ri sehai.

¹⁷Mi, a in chung a om khom in sînga a neinun la suak hrangin chum no ri se.

¹⁸Mi, loia om khom a puan la hrangin kîr no ri se.

¹⁹Kha nî khan chu inrâihai le nâite pom lai hai chung chu a rik vang na!



²⁰Nin rot hrang zoro kha phalbia mani, Sabat nia mani, a hong tung nona hrangin Pathian kuang chongchai roi.

²¹Kha zoro dengthei inthang om hrang kha chu rammual irsiang ata atûn ten hin la om ngai mah, om khom om nôk ta no ni.

²²Khannisianlân, Pathianin kha sînhai kha an bong ta ni no len vâng sian chu tûte hringin suak no nihai. A mi inthanghai sikin Pathianin kha sînhai kha inbong a ti.

²³“Khanchu, tukhomin nin kuang, en u ta, Krista chu, ‘Hi hi mani, so so mani,’ an ti khomin taksôn no roi,

²⁴Krista dolhai le deipu dolhai an la isuak hrang a ni, khahai khan thei len vânghai sian chu inthanghai lua an huang theina hrangin irsinsiana le thilirkhêl inthang tho an ti.

²⁵Irngai roi! A zoro a hong tung mân nangni ki lei ihril a ni,

²⁶Tukhomin nin kuang, ‘En ta, ramchâra a om,’ an ti khomin fe suak no roi, ‘A chontan sînga a om’ an ti khomin taksôn no roi.

²⁷Mihriam Nâipa zuang nôk hrang chu kôlirtêka, sak tiang ata thang tiang ten irtêk ang kha a ni hrang sikin.

²⁸“Khoa khom saruak omna rikipa raikosohai omkhôm an ti,” a tia.

Mihriam Nâipa zuang hrang thu

(Mk 13.24-27; Lk 21.25-28)

²⁹“Khan, kha dengthei zorohai kha ar zoi le chu misa inthim a ta, tha vâr ta no ni, irvân ata ârsihai tâk a ta, irvân sinthotheinahai kha inhnîng a ti.

³⁰Kha zoro tika chu irnênga nam tinrêngin chapin an rôp irchûm an ta, Mihriam Nâipa hi sinthotheina le roinpuina irkhêl tak le irvân sîm laia a zuang hmu an ti.

³¹Bekul inring tak tum ni a ta, khanchu, a vân vântîrtônhai kha rammual kil minlia tîr suakhai a ta, kôlkung rengata kiang tianga kôlkung dênin a mi inthanghai chu bukkhômhai an ti.

Theipui kung ata irchu hrang



(Mk 13.28-31; Lk 21.29-33)

³²“Khanchu, theipui kung om lam ata hi irchu hrang nin nei; a ôn a hong irnoia, a hna a hong incherin chu kholum a hong nâi tah ti nin inhriat ngai.

³³Khaang dênin, nangni khomin khahai murdi nin hmu tika chu ama kha a zuang nâi tâka, mikot bula a om tah ti inhre roi.

³⁴Thudik nangni ki hril, khahai murdi kha a tung mâka chu atûn laia mihai hi boi no nihai.

³⁵Irnêng le irvân boi a ta, ki thu chu boi no ni.

Tukhomin a nikhua le a zoro an inhriat loi thu

(Mk 13.32-37; Lk 17.26-30,34-36)

³⁶“Khannisianlân, kha nikhua le a zoro kha chu Pa ti no chu tûte’n inhre mahai, irvâna vântîrtônhai khomin, Nâipa khomin inhre mahai.

³⁷Mihriam Nâipa zuang nôkna chu Nova dam laia ang khan ni a ti.

³⁸Tuilian mân, Nova irkuanga a lût ni dênin an fâkin an nêka, dôngma pasal an irnei ngai,

³⁹tui a hong liana, an rêngin an irhmang zit mâka chu imo a hong itung ite inhre mahai; Mihriam Nâipa zuang nôkna chu, khaang tak khan nih a ti;

⁴⁰Kha tika chu mi inhni loia sin an ta, inkhat ihruaiin om a ta, inkhat imâkin om a ti.

⁴¹Nupang inhni’n bu suk an ta, inkhat chu ihruai ni a ta, inkhat chu masan ni a ti.

⁴²“Khanchu, irtûng chianin om roi, itik nia mo nin Rengpa a izuang hrang inhre mak chêi.

⁴³Khannisianlân, hi hi nin inhriat, inru hong hrang in neitu’n inhre sianlân, lei irtûng a ta, a in inmok no ni.

⁴⁴Khasikin, nangni khom irtûng chianin om roi, nin sabe no lai takin Mihriam Nâipa a zuang hrang sikin.

Siahlo iamom le iamomloi

(Lk 12.41-48)



⁴⁵“Siahlo iamom vâr tak, a pu’n a in sîng charêla, siahlo danghai zoro tina an fâk sem pe hranga hruaitua a isiam kha tu mo ni ni?”

⁴⁶An pu a hong, khaanga sin thoa siahlo a hong ihmu kha a vîn a sa.

⁴⁷Thudik nangni ki hril, a neinun murdi chung a pu khan a zêk hrangin phun a ti.

⁴⁸Khannisianlân, siahlo saloi a niin chu, a milungin ka pu chu hong lat no nih ti a ta,

⁴⁹a siahlo chanpuihai kha lei zêm a ta, zu’nruihai laia fâkin in a ti.

⁵⁰Khanchu, kha siahlo pu kha a tîng no lai tak le an hriat no zoro lai takin hong pe a ti.

⁵¹A pu khan inhnot suakpai a ta, vârirlethai idong anga kha indong a ti. Kha khan chap le irkamnôina om a ti.

Mathaia 25

Dôngmate sôm chongirkhek thu

¹“Kha zoi hnung chu irvân Ram chu dôngmate sômhai, an meiserhai chôia, moineitu don hranga fehài leh irkhek ni ta a ti.

²An laia ringa an intoa, ringa an vâra.

³An tohai khan an meiserhai an chôia, a tui chôï sa mahai,

⁴A vârhài khan chu an meiserhai an chôia, a bûra khan a tui an chôï saa.

⁵Moineitu kha a zuang inhnung sikin an lei inmusua, an lei in tâka.

⁶“Zânlai taka chu ‘Moineitu a zuang ta! A don hrangin hong suak ta roi!’ tiin khêk irhai a zuang om tâka;

⁷Khanchu, dôngmate sômhai kha an thoia, an meiserhai an irfûktir tâka.

⁸Khan, an tohai khan a vârhài kuang khan, ‘Nin meisertui kha ni sem roi, kin meiserhai an ithi zoi hrang tâk kêng,’ an tia.

⁹A vârhài khan ‘Nangni pe thei no ni ung, keini le nangni hrangin chu ruk no ni. A zuarpuhai kuang fe unglân, var cho roi,’ tiin an sâma.



¹⁰Khanchu, dôngmate intohai kha meisertui ircho hrangin an fea. Khante, an fe kârin moineitu kha a zuang ta. Dôngmate ringa ar siamhai chu ama leh irbiakna hruaithe fa hrangin an lûta, in an khâr ta.

¹¹“Inhnunga chu dôngmate danghai khom an hong tung tâka, ‘Ka pu, ka pu, mikot nin hong roh,’ an tia.

¹²Ama’n Thudik nangni ki hril, nangni inhre ma ung,” tiin a sâma.

¹³Khasikin, irsiam diamin om roi, a nikhua le a zoro kha nin inhriat no sikin.

Siahlo inthumhai kuanga talent pêk chongirkhek

(Lk 19.11-27)

¹⁴“Kha tika chu irvân Ram chu mi inkhat an zin hrang tôna, siahlohai a koia, sum inkoltir leh irkhek ni ta a ti.

¹⁵Siahlo inkhat chu talent ringa a pêka, inkhat kuang inhni, inkhat dang kuang talent inkhat, an iruk ang dôr chit, pêk an nia, khanchu, a fe tâka.

¹⁶Talent ringa dongtu kha a va inpung zôi zela, talent ringa dang a hlo suaka,

¹⁷khaang dênin talent inhni dongtu khom khan talent inhni dang an pung nôka.

¹⁸Talent inkhat dongtu chu irnêng a va choia, a pu sum kha a phûm tâka.

¹⁹“Zoro sôt ian hnunga chu kha siahlohai pu kha a hong, an sum enkol chungchâng an felpuihaia.

²⁰Talent ringa dongpu kha a hong, talent ringa dang a hong chôia, ‘Ka pu, nangin talent ringa ni nin dontira, en ta, talent ringa dang ki hlo suak,’ a tia.

²¹A pu khan a kuang, ‘Siahlo sa le iamom, ni tho’n sa! tônte chung a iam ni oma tamtak chung a nang inomtir ki ti; ni pu lômna dong sa roh!’ a tia.

²²“Talent inhni dongpu kha a hong, ‘Ka pu, nangin talent inhni ni nin koltira, en ta, talent inhni dang ki hlo suak,’ a tia.

²³A pu khan a kuang ‘Siahlo sa le iamom, ni tho’n sa, tônte chung a iam ni oma, tamtak chung a nang inomtir ki ti, ni pu lômna dong sa roh!’ a tia.



²⁴“Talent inkhat dongtu khom kha a hong, ‘Ka pu, ni ni ti kher kher ti kin hriata, ni itû lolina khom ni bûm ngaia, chi ni inthek lolina khom a ra ni ât ngai a ni.

²⁵Khasikin, nang ki chia, ni talent kha irnênga ki phûma, en ta, ni ta dên kha ni ihmu nôk a ni,’ a tia.

²⁶A pu khan a sâma, a kuang, ‘Nangma siahlo soal le thaboipa, ki itû lolina khom ki âta, ki inthek loinaa khom a ra ki bûm ngai ti nin hriat mo?

²⁷Khante, itho mo ki sum kha sum inpungtuhai lei pe ro ba, ki hong kîrin a pung le ile ki ihmu hrang pial te!

²⁸Khanchu a talent hi a kuanga irthokin la unglân, talent sôm neitu kha pe roi.

²⁹A neitu ka chu pe belsa an ta, nei intam ok a ti; a nei loi chu a inei sun khom lâkpaï pe rip ni a ti.

³⁰Khanchu, siahlo hmang hmunboi hi pên tiang inthima pai suak roi; kha khan chap le irkamnôi om a ti,’ a tia.

Roirêlna hnungkhôn

³¹“Khan, Mihriam Nâipa chu vântîrtôn murdi leh roiinpui taka a zuang tikin chu, a rêngtoihmun roiinpui taka toi a ta,

³²a makunga khan nam tin inkhôm an ta, khanchu, belra nghâktu’n kêl le belra a isen angin pâlhnîin sen a ti.

³³Mi felhai chu a chang tiang sia a ta, a danghai kha a vei tiang sia a ti.

³⁴“Kha tika chu inlaltak rêng khan a chang tianga mihai kuang, ‘Hong roi, ka pa satvurhaio, hong unglân, rammual siam irphut ata nin ta hranga ram sinsiam kha chang roi.

³⁵Ki phîng a châmin nangni’n fâk hrang nin ni pêka, ki tui an hrâlin nangni’n in hrang nin ni pêka; mikhual ki niin, nin ina nin ni intungtira; silkai ki’rsamin puan nin ni insiltira;

³⁶Ki dam no’n nin ni donsuaia, intângna ina ki omin, nin ni pan ngai,’ la ti a ti.



³⁷“Khanchu, mi felhai khan, ‘Rengpa, itika khan mo phîngchâmin nang kin hmua bu nang kin ipêk! tuiinhrâlin ni oma, tui nang kin ipêk?”

³⁸Itika khan mo mikhualin nang kin hmua, nang kin intungtir? silkai irsamin ni oma puan nang kin insiltir?

³⁹Itika khan mo dam loiin mani, intângna ina mani nang kin hmua nang kin ipan?’ tiin la sâm an ti.

⁴⁰Inlaltak khan, ‘Thudik nangni ki hril, hi ki urêng chîntehai laia inkhat chungang nin itho hi, ki chungang nin itho a ni,’ tiin la sâm a ti.

⁴¹“Kha zoia chu, a vei tianga mihai kuang khom khan, ‘Khosâl tonghaio, kumkhuaa mei, diabola le a siahlohai ta hranga lei siama khan ni rotsan roi.

⁴²Ki phîng a châmin nangni’n fâk hrang ni pe mak chêia, ki tui an hrâlin in hrang ni pe mak chêia;

⁴³Mikhual ki niin nin tungtir mak chêia; silkai ki’rsamin puan nin siltir mak chêia, ki damloi lai le intângna ina ki om laiin ni donsui mak chêia,’ la ti a ti.

⁴⁴Anni khom khan, ‘Rengpa, itika khan mo phîngchâmin mani, tuiinhrâlin mani, mikhualin mani, silkai irsamin mani, damloiin mani, intângna ina mani nang kin hmua nang kin idonsui loi?’ tiin la sâm an ti.

⁴⁵Ama khan, ‘Thudik nangni ki hril, hi mi chîntehai laia inkhat chungang nin itho loi chu ki chungang tho loi nin ni,’ tiin la sâm a ti.

⁴⁶“Kha mihai kha, kumtuang hremnaa fe an ta, mi felhai chu kumtuang hringnaa fe an ti,” a tia.

Mathaia 26

Jisua that hrang lam an ngaitua

(Mk 14.1-2; Lk 22.1-2; Joh 11.45-53)

¹Jisua’n kha thu murdi kha an sîr zoiin chu a irchutirhai kuang,

²“Sûn hni hnunga Ferkân kût a hong iom hrang a nih ti nin inhriat, Mihriam Nâipa hi hembe hrangin ipêk ni a ti,” a tia.

³Khanchu, Ochai inlaltak Kaiafa ina irhmukhômna an neia,



⁴inrûkin chela, that hrang lam an ngaituaa.

⁵Khannisianlân, “Kût sângin chu ni no ri se, khano’nchu vântâng laia buaina suak likna ti,” an tia.

Bethani-a Jisua sahriak polin a om

(Mk 14.3-9; Joh 12.1-8)

⁶Khan, Jisua chu Bethani-a phâr Simona ina a oma.

⁷Jisua bu a nêk laiin, nupang inkhat alabastar bûrin sahriak mirimhoi man tamtak hong chôiin, a luah a buak pea.

⁸Irchutirhaiin an hmu’n chu an ning an mura, “I hranga a inchêk mo?”

⁹Hi mirimhoi hi man tamtaka zuarin, inrianghai kuang pe thei kêng a ini,” an tia.

¹⁰Jisua’n an itihai kha an hriata; an kuang, “Itho mo hi nupangnu hi nin inbuai? Keima hrangin sin sa le enhoi tak a itho a ni.

¹¹Inrianghai chu nin laia om mai an nia, khannisianlân, kei chu nin kuang om mai no ning.

¹²Hi sahriak, mirimhoi hi ki takpuma a ibuak hi, ni phûm hranga a ni sinsiam diam kêng a ini.

¹³Thudik nangni ki hril, rammual pumpuia Thurchi Sa hi an hrilna kipa hi nu sintho khom hi, ama inhriatmaina hrangin insîr sa ngai an ti,” a tia.

Juda’n Jisua incheltir a tum

(Mk 14.10-11; Lk 22.3-6)

¹⁴Kha zoi hnungin chu sômhleihnihai laia inkhat, Juda Iskariota an iti kha, Ochai inlalahai kuang a fea,

¹⁵“Ama kha nangni incheltir ki ti, imo nin ni ipêk hrang?” a tia. Sum sômthum an tepa, an pêk tâka.

¹⁶Khataka irthokin chu Juda khan Jisua chu an kuta a bâng theina hrang lam kha a zong mai tâka.

Jisua le a irchutirhai Ferkân kût an fâk

(Mk 14.12-21; Lk 22.7–14.21-23; Joh 3.21-30)



¹⁷Bai chol koploi kût sîn masa taka khan irchutirhai kha Jisua kuang an hongga, “Kho hmuna mo Ferkân kût khalâi ni otna hrang sinsiam inlân ni inuam?” an tia.

¹⁸Ama khan, “Khopuia tu mo khat kuang va fe unglân, a kuang, ‘Irchutirtu khan ki zoro anâi tâka, ki irchutirhai leh Ferkân kût ni ina hmang kin ti duah, a ti’ va ti roi,” a tia.

¹⁹Khanchu, Jisua’n thu a ipêk ang dên khan irchutirhai khan an thoa; Ferkân kût khalai kha an sinsiam tâka.

²⁰Khohloia chu irchutir sômhleihnihai le khalai kha an ot suama.

²¹Khalai an irhîl lai takin Jisua’n an kuang, “Nangni ki hril, nin laia mi inkhat hin nin cheltir a ti,” a ti pehaia.

²²Khanchu, irchutirhai kha a sân an kamanga, a kuang, “Rengpa kei mo ki ini?” an ti senga.

²³Jisua’n an kuang, “Khalai ni otpuipu ngêt hin nin cheltir a ti.

²⁴Mihriam Nâipa hi a thurchi an irziak ang takin a ife hrang a ni; khannisianlân, Mihriam Nâipa incheltir hrangtu chung chu a rik; kha mihriam kha chu irsiang no sian, a ta hrangin sa ual a ti,” a tia.

²⁵An cheltirpu hrang Juda khan a sâma, “Rabbi, kei mo ki ini?” a tia. Ama khan, “Ni ti khate,” a tia.

Rengpa zâmbu

(Mk 14.22-26; Lk 22.14-20; 1 Kor 11.23-25)

²⁶Khan, an fâk laiin Jisua’n bai a lâka, lômthu an sîr zoiin a khoia, a irchutirhai kuang a pêka, an kuang, “La unglân, fa roi, hi hi ki taksa a ni,” a tia.

²⁷Kha hnung chu, khilât a lâka, Pathian kuang lômthu an sîr zoiin chu an kuang a pêka, an kuang, “In roi, nin rêngin;

²⁸hi hi ki thisen mi tamtak soal ngaidamna hranga suak hrang, Pathian thuthung indetpu kha a ni.



²⁹Nangni ki hril, ka pa Rama nangni leh uain thar ki in nê a tung mâka chu hi uain hi in nôk ta no ning,” a tia.

³⁰Kha zoiin chu hla inkhat an saka, an sak zoiin chu Oliv tâng tiang an fe ta.

Jisua'n, Petera'n a iphil hrang thu a lei insîr

(Mk 14.27-31; Lk 22.31-34; Joh 13.36-38)

³¹Khanchu, Jisua'n an kuang, “A vuan zân ngêt hin nin rêngin laizâm tho nin ta, ni masan zit nin ti, ‘Belrapu chu zêm ki ta, belrahai chu indarh zit an ti,’ ti irziak a ni kha.

³²Khannisianlân, kaithoia ki om hnungin Galili rama hong masa ki ta,” a tia.

³³Petera khan, “An rêngin nang an irheisan zit khomin keima'n chu nang irheisan viat no ning,” tiin a sâma.

³⁴Jisua'n a kuang, “Thudik nang ki hril, âr a khuang mân a vuan zân hin voi thum ni phil ni ti,” a tia.

³⁵Petera'n a kuang, “Ni kuang thi a chuk khomin nang phil viat no ning,” a tia. Khaang dênin irchutir murdi khan an ti chita.

Gethsemani irhuana Jisua chongchaina

(Mk 14.32-42; Lk 22.39-46)

³⁶Kha zoia chu, Jisua chu annihai leh hmun inkhat Gethsemani an itia khan an fea, a irchutihai kuang khan, “So son ki va chongchai sûngin hi hin lei toi roi,” a tia.

³⁷Petera le Zebedaia nâihai inhni kha a hruaia, irtha'nvâiin a kamang tak taka.

³⁸An kuang, “Ki'rtha an vâi tak tak, thipui hrang ang dôr a ni. Hi hin om unglân, ni lei hrungpui sa roi,” a tia.

³⁹Maton tiang a va fe viata, irnênga inbokin a chongchaia, “O ka Pa, thei a niin chu, hi khilât hin ni lôi hrâm sian, khannisianlân, keima ircham ni loiin nangma ircham cham ni ri se,” a tia.



⁴⁰Kha hnung chu a hong kîr nôka, irchutir inthumhai kha a inin a hong hmuhaia, Petera kuang, “Itin mo nangni inthum hi te dêrkâr khat lua nin ni ihrungpui viat thei loi?”

⁴¹Inthêmnaa nin lût nona hrangin irtûng chianin chongchai roi, Irtha’n chu a nuama, taksa’n a iphari loi a ni,” a tia.

⁴²A va fe nôka, a chongchaia, “Ka Pa, hi tuangna khilât hi ki in noa, khâipai thei a ni no’n chu, nangma ircham ni ri se,” a tia.

⁴³A hong nôkin chu a irchutirhai kha a in ngêtin a hong hmuhaia; a sân an inmu a suak sikin.

⁴⁴A mâkhai nôka, a voi thumna’n a iti ngai dên kha ti nôkin a chongchai nôka.

⁴⁵Kha zoia chu a irchutirhai kuang a hongga, an kuang, “Atûn ten inmusu’n nin la irngam chian mo? Irngai u ta, a zoro chu a hong tung ta. Mihriam Nâipa hi mi sualhai kuta an incheltir hrang a ni ta.

⁴⁶Thoi unglân fe ta ei ti, en u ta, a nin chel hrangtu hi a hong nâi ta,” a tia.

Jisua an chel

(Mk 14.43-50; Lk 22.47-53; Joh 18.3-12)

⁴⁷A la chong lai takin irchutir sômhleihnihai laia Juda kha a hong tunga, ama pâla khan Ochai inlalthai le Dân irchutirtuhai le vântâng ulian itîr tamtakhai, khandai le hêmvuak chôiin an hong tung tâka.

⁴⁸An cheltir hrangtu khan irsinsiana hrang a lei hril diam tâka; “A biang ki itum tak kha ama ni a ti; chel zôi roi!” tiin.

⁴⁹Juda kha Jisua kuang a theng thaia, a kuang, “Irchutirtu, ni chungga irtharngamna om ri se,” tiin a biang a tuma.

⁵⁰Jisua’n a kuang, “Mala, ni itho hrang chu tho lat roh,” a tia. Khanchu, an hongga, Jisua chu an chel tâka.

⁵¹Jisua kuanga omhai laia inkhatin a khandai a phôia, Ochai inlaltak siahlo mikuar kha a sât thâkpai pea.



⁵²Jisua'n a kuang, "Ni khandai kha a siana hmuna se nôk ta roh. Khandai inlekhai chu khandai ngêta thi an ti.

⁵³Vântîrtôn sângruk le hmun sômhleihni nêka tam ni zuang tîr pe zôi hrangin ka Pa ki ingên thei loi mo nin ni isôn ma ni?

⁵⁴Khannisian, ngên ta inlân Pathian lekha thu kha itin mo a hong itung thei hrang?" a tia.

⁵⁵Khanchu, Jisua'n mipuihai kuang khan, "Khandai le hêmvuak chôiin inru chel hrang anga ni chel hrangin nin ihong mo? Tempila a nitin mi ki'rchutir ngaia, ni chel mak chêia.

⁵⁶Khannisianlân, deipu lekha thuhai kha a hong tung theina hrangin hihai murdi hi a hong iom a ni," a tia. Khannisianlân, a irchutirhaiin ama kha an mâksana, an rot zit tâka.

Jisua roirêltuhai makunga a ngîrna thu

(Mk 14.53-65; Lk 22.54-55,63-71; Joh 18.13-14,19-24)

⁵⁷A cheltuhai khan Jisua kha Ochai inlaltak Kaiafa ina Dân irchutirtuhai le upahai lei irbuk khômnaa khan an hruaia.

⁵⁸Petera khan hla vit ata Ochai inlaltak in tual dênin a zuia. In tual sînga a lûta, an roirêl mongna ten hmu tumin siahlohai laia a toi saa.

⁵⁹Ochai inlalahai le Dân irchutirtuhai le Sanhedrin mi murdihai khan Jisua an that theina hrangin milakin hnôlna an zong, an zonga.

⁶⁰Khannisianlân, hmu mahai, mi tamtak hongin a chungthua milak hril khomhai sian a hnungkhôn taka mi inhni an hong,

⁶¹"Hi mi hi Tempil insiata, 'Sûn thum sîngin sin zoi nôk thei ki ti,' a ti," an tia.

⁶²Khanchu, Ochai inlaltak kha a ngîr suaka, a kuang, "Hihai nang isêlna hi ni isâm thei loi mo? Nang an isêlna hi itin mo?" a tia.

⁶³Jisua kha a dâihreka, Ochai inlaltak khan, "Pathian hring irhmingin nang ki ti; Krista, Pathian Nâipa chu ni ni lele mo ni hril roh," a tia.



⁶⁴Jisua'n a kuang, "Ni ni ti mai tâk khate. Khannisianlân nangni ki hril: nakana chu, atûn ata Mihriam Nâipa hi Itinrêngthothei chang tianga toia, irvân sôm chung a zuang la hmu nin ti," a tia.

⁶⁵Khanchu, Ochai inlaltak khan a puansilhai an pot thêra, "Pathian a hril insiat tah ti inhriatpuitu dang nang ta mah, Pathian a hril insiatzia chu nin inhriat ta!

⁶⁶Itin mo nin insâp?" a tia. Anni khan, "Thi hrangin a ruk," an tia.

⁶⁷Khanchu, a hmâia an inchila, an zêma; senkhatin,

⁶⁸"Nin hril roh. Krista! tu mo nang a zêm!" tiin an inbêna.

Petera'n Jisua a phil thu

(Mk 14.66-72; Lk 22.56-62; Joh 18.15-18,25-27)

⁶⁹Khan, Petera kha irhuan sâng, kholai a toia, khan dôngmate inkhat a kuang a hong, "Nang khom Jisua Galili rama mi kuang ni om ngai," a ti pea.

⁷⁰Khannisianlân, an rênga makunga a phila. "I thurchi mo ni insâr inhre ma ung," tiin a sâma,

⁷¹irhuan dâi mikot pên tiang a va suaka, dôngmate dangin a lei hmu nôka, khataka omhai kuanga khan, "Hi mi hi Nazaret Jisua kuanga om ngai kha a ni duah," a tia.

⁷²"Kha mihriam kha inhre ma ung," tiin Petera khan khomâk irsâmin a phil nôka.

⁷³Chomkhat hnunga chu khataka ngîrhai khan Petera kha, "Nang khom hi an laia mi ngêt ni nih ti ni chong lama hin kin inhriat thei," an hong tia.

⁷⁴Ama khan, khosâl irhuamin khomâk ar sâma, "Kha mihriam kha inhre ma ung," a tia.

⁷⁵Âr a khuang zôi tâka, "Âr a khuang mân nangin voi thum ni phil ni ti," tia Jisua'n a iti kha Petera khan an hriat suaka, khanchu a suaka a chap ngûi ngûi tâka.

Mathaia 27

Pilata kuang Jisua an hruai



(Mk 15.1; Lk 23.1-2; Joh 18.28-32)

¹Zîng tiang inmân taka Ochai inlalahi le vântâng upa murdihai khan Jisua that hrang dân an rêla.

²An khita, an tuanga, Pilata, Rom Ramoptu kuang an pêk tâka.

Juda thi thu

(Tir 1.18-19)

³An cheltirtu Juda khan Jisua kha thiamno an changtir ti an hriat le ar sîra, sum sôm thum kha Ochai inlalahi le upahai a pêk khîrhai nôka.

⁴“Mi fel thi hrangin kin cheltir kha ki lei tho insual a ni,” a tia. Anni khan, “Kha kha kin ta hrangin imo a poina om? Nangin ni nuam nuamin lo roh,” an lei ti pea.

⁵Khanchu, sum kha Tempila a pai inlûta, a fea, a va irkhâi that tâka.

⁶Ochai inlalahi khan sum kha an lâka, “Hi hi Tempil suma sia chu irthiang mah, thisen man kêng a ni,” an tia.

⁷Khanchu an chonga, mikhual phûmna hrangin bêl suktu hmun an lâk tâk.

⁸Khasika khan, kha hmun kha, atûn ten “Thisen Hmun,” an ti mai tâka.

⁹Khanchu deipu Jeremia’n, “Israel nâi tuhaiin mo, sum sômthum an tepa, a man kha an lâka,

¹⁰Rengpa’n thu a ipêk ang khan, Bêl suktu hmun man hrangin sum kha an hmang ta,” a iti kha a hong idik tâk a ni.

Pilata’n Jisua chongirdon a pêk thu

(Mk 15.2-5; Lk 23.3-5; Joh 18.33-38)

¹¹Jisua kha Rom ramoptu makunga a ngîra, ramoptu khan, “Judahai rêng mo ni ni?” tiin ar dona. Jisua’n, “Ki ni,” tiin a sâma.

¹²Khannisianlân, Ochai inlalahi le upahaiin an isêlna thua chu ite khomin sâm mah.

¹³Khasikin Pilata’n a kuang, “Nang an isêlna thua hin ni inhriat loi ma ni?” a tia.



¹⁴Khannisianlân, Jisua'n bâikhat khomin sâm maka, Ramoptu chu a sân ar ngai a'rkhêl tâka.

Jisua that hranga thupêk

(Mk 15.6-15; Lk 23.13-25; Joh 18.39–19.16)

¹⁵Khan, Rom Ramoptu khan Ferkân kût zoro rikipin mi intâng inkhat mipuihaiin an iti tak an sua pehai ngaia.

¹⁶Kha laia khan mi intâng irhming Barabba an iti kha a oma.

¹⁷Khasikin mipui an hong irbûmin Pilata'n an kuang, “A tu hi mo nangni insua pe inlân nin inuam? Barabba hi mo, Jisua, Mesia an iti pu hi mo?” tiin ar donhaia.

¹⁸Juda irchamneipuhai khan Jisua kha an hnarsa sika a kuta an hong ipêk a nih ti fel takin an hriata.

¹⁹Khan Pilata kha roirêl hmuna a toi laiin, a dôngma'n, “Kha mi fel chungka khan ite tho no roh, zânin ki'rmangin ama sikin ki ituang ok kêng,” tiin he a bêa.

²⁰Ochai inlalahai le upahaiin Barabba kha insuaa, Jisua that hranga Pilata ngên hrangin mipuihai an inthêmhaia.

²¹Khannisianlân, Pilata'n mipuihai kuang, “Hi mi inhnihai laia hin tu hi mo nangni insua pe inlân nin inuam?” tiin ar donhaia. Anni khan, “Barabba,” tiin an sâma.

²²Pilata'n an kuang, “Khan Jisua, Mesia an iti hi imo ki ilo hrang tâk?” tiin ar donhaia. Anni khan, “Krosa hembe roh,” an tia.

²³Khannisianlân, Pilata'n an kuang, “Imo a itho insual,” tiin ar donhaia. Khanchu, anni khan, “Krosa hembe roh,” tiin an hrât do dôrin an khêka.

²⁴Pilata'n i ang khomin ite ar fêna om no nia, buaina vai kêng a isuakna hrang ti an hriatin chu tui a lâka, mipuihai makunga a kut a'rsûka, an kuang, “Hi mihriam, thina hin ite mophurna nei ma ung! Ama hi nin nuam nuamin lo ta roi,” a tia.



²⁵Mipui murdi'n, "Hi mi thisen mophurna chu keini le kin nâihai chung a tung ri se," tiin an sâma.

²⁶Khanchu, Pilata'n Barabba kha an sua pehai tâka, Jisua kha sipaihai an zêmtir zoiin, Krosa hembe hrangin an kuta a pêkhai tâka.

Sipaihaiin Jisua an soisak

(Mk 15.16-20; Joh 19.2-3)

²⁷Khanchu, Pilata sipaihai khan Jisua chu Ramoptu omna praitoriana an hruaia, an pâla mi murdi a kôlvêla an irbuka.

²⁸A puanhai an hlîk pea, puan senduk an insiltira.

²⁹Khanchu, ilhling lukhum an phana, an inkhumtira, a kut chang tiang khianghrol an inchôitira; a makunga khûksadelin, "Judahai Reng, hring sôt roh!" tiin an innuisana.

³⁰An inchila, a khianghrol kha an suta, a lu-a an zêma.

³¹Khan, nuiza siamna'n an hmang zoiin chu puan senduk kha an lâk nôka, ama puan ngêt kha an insiltir nôk ta. Khanchu, Krosa hembe hrangin, an hruai ta.

Jisua hembea a om thu

(Mk 15.21-32; Lk 23.26-43; Joh 19.17-27)

³²Khan, an fe laiin Kurini kho mi inkhat ar hming Simona an hmua; Sipaihaiin Jisua Kros irput hrangin an dândea.

³³Golgotha, "Luru hmun," an iti kha an va tunga.

³⁴Khan Jisua chu uain, thil khâ leh irpol an pêka, khan, a'rtem zoiin chu in nuam ta maka.

³⁵Khan, Krosa an hembea, khanchu, tasânin a puansilhai an irsema.

³⁶Kha hnung chu, an toia, an nghâk tâka.

³⁷A lu chung a an sêlna irziak, "Hi mi hi Jisua, Judahai Reng a ni," tiin an inkhopa.

³⁸Khan, ama pâlin inru inhni an hembe saa, a chang tiang inkhat, a vei tiang inkhat.



³⁹Khan, ar lôi murdi'n an lu inthikin Jisua an êroa.

⁴⁰“Tempil insiat ni ta, sîn thum niin inding nôk ni ti na! Pathian Nâipa ni ni'n chu, ni bingin zôk roh! kros rêla irthokin zuang chum ta roh!” an tia.

⁴¹Khaang dênin Ochai inalhai le Dân irchutirhai le upahai khomin ama an êroa:

⁴²“Mi danghai lak an zôk ngaia, ama chu zôk thei maka! Israelhai rêng mo ni ma? Atûn hin kros rêla irthokin zuang chum sian chu iam ei ti!

⁴³Pathian a iama, Pathian Nâipa'n a'rbêa; Tho lei en rei, Pathianin an zôk nuam mo?” an tia.

⁴⁴Hrâtlâksong ama pâla an ihembehai khom khan khaang dênin an êroa.

Jisua thina thu

(Mk 15.33-41; Lk 23.44-49; Joh 19.28-30)

⁴⁵Khan, sîn dêr sômhleihni ata khohloi dêr thum ten chu rammual a zîng khak tâka.

⁴⁶Chohnung dêr thumin chu Jisua kha hnuk irhai inring takin a khêka, “Eli, Eli, lema sabakthani?” a tia. Kha kha “Ki Pathian, Ki pathian itho mo ni ni imâksan?” tihna a ni.

⁴⁷Kha hmuna ngîr senkathaiin ama kha an inhriatin, “Elija a ikoi kêng,” an tia.

⁴⁸Khanchu, an laia mi inkhat an tân zôia, sponj a lâka, uain thûra an chiea, khianghrolin a târa, Jisua kha in intir a tuma.

⁴⁹Khan, mi danghaiin, “Dâihrek roi, a san hrangin Elija mo a zuang lei en rei,” an tia.

⁵⁰Jisua kha hnuk irhai inring takin a khêk nôka, a hrang a chat tâka.

⁵¹Khanchu, tempil sînga puanzâr kha a chung ata a mong dênin a têr thai ta. Kha hnung chu irnêng an hnînga, lungpuihai an koia,

⁵²thânhai an hong irhonga, Pathian mi tamtak a thi tâkhai, taksa kha kaithoiin an oma,



⁵³Thânhai kha an mâka, Jisua, thina irthoka thoinôk hnungin khopui irthianga an lûta, kha khan mi tamtak kuang an inlâr ta.

⁵⁴Sipai sâp le a kuanga sipai om Jisua thîrhai khan hnîngnupui inhnîng le thil omzia kha an hmu'n chu, "Hi mi hi Pathian Nâipa a ni lele hi te!" an tia.

⁵⁵Kha hmuna khan nupang tamtak, Galili rama irthoka Jisua hnung zuia, a ichangpui ngaihai khan hla vit ata an thîra,

⁵⁶Khahai kha Mari Magdala hai, Mari, Jakoba le Josia nu Mari hai an kop saa, Zebedaia dôngma khom a kop sa a ni.

Jisua an phûm thu

(Mk 15.42-47; Lk 23.50-56; Joh 19.38-42)

⁵⁷Khan, khohloi a hong ni'n chu, irchongpa Arimathaia kho mi, ar hming Josefa a hong tunga; ama khom kha Jisua irchutir a ni saa.

⁵⁸Kha mi kha Pilata kuang a va fea, Jisua ruak chu a va nghia.

⁵⁹Pilata khan a phala. Khanchu, Jisua ruak kha Josefa khan, puan irnêm fâi takin a tuama,

⁶⁰ama thân, lunga inver zoi phinga khan an zâl ta. Khanchu, thân bái kha lung lian takin a sîng zoiin chu a fe tâka.

⁶¹Mari Magdala le Mari dang kha thân tiang nghain an toia.

Thân nghâkhai

⁶²A tûk zîng, Sabat ni sîna Ochai inlallhai le Farisaihai kha Pilata kuang an hong,

⁶³a kuang, "Ka pu, kha milakpa khan a hring laiin sîn thum hnungin chu thoinôk ki ti," a iti kin inhriat.

⁶⁴Khasikin thân kha sîn thum sîng chu sataka nghâk hrangin thu pe ro, khano'nchu a irchutirhai kha hong an ta mipui laia, "Thina irthokin a thoinôk tâk,' tina an ti. khano'nchu hi thêmna hnungkhôn hi matona nêkin a isiat ual hrang kêng," an tia.

⁶⁵Pilata'n an kuang, "Sipai nin inei mo ni ma, fe unglân nin thei la lamin inhrungtirhai roi ba," a ti pehaia.



⁶⁶Khanchu, an fe a, thân lung kha irsinsiana siain, a nghâk hranghai kha an innghâktirhai tâka.

Mathaia 28

Jisua thoinôkna thu

(Mk 16.1-10; Lk 24.1-12; Joh 20.1-10)

¹Sabat nê a hong heka, Pathian ni zînga khua a vâv hrang tônin, Magdala mi Mari le Mari danghai khan thân en hrangin an fea.

²Voikhat rengin hnîngnu a hong inhnînga, irvân ata Rengpa Vântîrtôn a zuanga, a khârna lung kha an hlumpaia, a chung a toia.

³A hmêl kha kôlirtêk angin a oma, a silkai khom ivur ang a ni.

⁴Sipai a nghâkhai khan an chi hrai tâk sikin an inthinga, mithi angin an om ta.

⁵Vântîrtôn khan nupanghai kuang, “Nangni chu chi no roi, Jisua an ihêmbetu kha nin izong a nih ti kin hriat.

⁶Hin om ta mah, a iti ang khan a thoinôk ta. Hin hong unglân, a zâlna hi hong en roi.

⁷Atûn inrang takin fe unglân, a irchutirhai kuang, “Thina irthokin a thoinôk ta, Galili rama nin matona a lei fe, kha khan hmu nin ti!’ tiin hrilhai roi. Nangni ki ihril hi inhre mai roi,” a tia.

⁸Khanchu, ichi le raifâna sipin, thâna irthokin an fe lata, irchutirhai va hril hrangin an intân ta.

⁹Voikhat rengin Jisua’n anni kha a’rtongpuihaia, an kuang, “Nin chung a irtharngamna om ri se,” a tia. Khan, a kuang an hong a, kezapha an intûka, chubai an mûka;

¹⁰Jisua’n an kuang, “Chi no roi; fe unglân Galili rama fe hrangin ki urêngai van hril roi, kha khan ni hmu an ti,” a tia.

Thân nghâkhai thu’nsîr

¹¹Nupanghai kha an fe laiin thân nghâk sipai senkhathai kha khopuia an kîr nôka, thil om lam murdi kha Ochai inlalthai an va hrila.



- ¹²Ochai inlalahai kha upahai leh an irhmukhôma, sum tamtak an pêkhaia,
¹³an kuang, “Zâna kin in kârin a irchutirhai an hong, a ruak kha an hong inrûk kêng, tiin insîr roi.
¹⁴Ramoptu khan kha thurchi kha a lei inhriat le khom thiam nin chang tih insîrpui kin ta, ite nin milung nin inbuaina hrang om ma,” an tia.
¹⁵Sipaihai khan sum kha an lâka, hê an ibehai lam ang takin an tho ta. Khasikin atûn ten kha thurchi kha Judahai laia an la ihril inlum mai ngai a ni.

Jisua, a irchutirhai kuang a inlârna thu

(Mk 16.14-18; Lk 24.36-49; Joh 20.19-23; Tir 1.6-8)

- ¹⁶Khan, irchutir sômhleikhathai kha Galili rama tâng inkhata Jisua'n fe roi a iti pehaina khan an fea.
¹⁷Ama an hmu'n chu chubai an mûka, senkhatin iamzoi nohai khomsian,
¹⁸Jisua'n a hong panhaia, anni kha a chongpuihaia, “Irnêng le irvâna irchamneina murdi ki kuang pêk a ni ta.
¹⁹Khanchu, hmun tina mihai kuang fe unglân, ki irchutirhaiin siam unglân, Pa le Nâipa le Irtha Irthiang irhmingin baptis-hai unglân,
²⁰Thu nangni ki ipêk murdi hi zôm hrangin irchutirhai roi. Khanchu, keima kumkhua'n, rammual mong dênin, nin kuang om mai ki ti,” a t



Marka

Marka 1

Baptistu Johana thu'nsîr

(Mt 3.1-12; Lk 3.1-18; Joh 1.19-28)

- ¹Pathian Nâipa; Jisua Krista Thurchi Sa irphutna chu;
- ²Deipu Isaia Lekhabua; “Irngai ta ki tirtôn ni matona ki tîr ta. Ama khan ni lampui siam a ti.
- ³Ramchâra mi khêk irhai khan, 'Rengpa lamlian siam unglân, A fêna hrangin lam intûn siam roi,' a ti,” tia irziak ang khan.
- ⁴Khasikin, Baptistu Johana khan sual ngaidamna hrangin irletna baptisma chang hrang thu ramchâra a hong hrila.
- ⁵Judai ram kil tina mi le Jerusalem khuaa mi murdi khan ama an pana, an sualhai an irphuanga, Jordan dunga khan a lei baptis-hai tâka.
- ⁶Johana kha saringsei mul puanin ar bela, savun kha kongkhitin a khita, khaihmimse le ram khuaihlutui bu'n a ngama.
- ⁷Khan, mipuihai laia, “Ki hnunga zuang hrangpu chu keima nêka roiinpui ual ok a nia, kei chu kûna a kekok hrui sût inruk lua khom ni ma ung.
- ⁸Keima'n tuiin nangni ki baptisa, ama'n chu Irtha Irthiangin nangni baptis a ti,” tiin a hrila.

Jisua baptisma a changna le thêмна a tongna

(Mt 3.13–4.11; Lk 3.21-22; 4.1-13)

- ⁹Kha zoro lai khan Jisua kha Galili rama Nazaret khua ata a hong, Jordan dunga khan Johana'n a lei baptis tâka.
- ¹⁰Tui ata a hong suak le chu irvân ar hong, Irtha, vasu anga ama chungu zuang chum a hmua,
- ¹¹Irvân ata kha hnuk irhai kha a zuang suaka. “Nang, ki Nâipa, ki lungthung tak ni ni; ni chungu ki lôm tak tak,” a zuang tia.
- ¹²Irtha khan ama kha ramchâra a tîr zel tâka.



¹³Kha khan sùn sômminli Setana inthêmin a oma; ram sahai laia a om sa tâka, Pathian vântîrtônhaiin an zuang changpui ngai.

Jisua'n nga cheltuhai minli a koina

(Mt 4.12-22; Lk 4.14-15; 5.1-11)

¹⁴Khan, Johana kha an chel zoiin chu Pathian Thurchi Sa hrilin Jisua kha Galili rama a hongga;

¹⁵“Zoro a hong tung ta; Pathian Ram khom anai ta; irlet unglân, Thurchi Sa hi iam ta roi,” a ti thiaia.

¹⁶Galili dîl pang a hro lai khan Simona le a sangpa Andria kha dîla lên vôrin a va hmuhai, nga chel ngai an nia.

¹⁷Khan Jisua'n an kuang “Ni zui roi, khanchu mihriam cheltu'n nangni siam ki ti,” a tia.

¹⁸An lênhai an mâksana, ama an zui ta.

¹⁹A va fe nôk viata, Zebedaia nâi Johana hai ulenâi kha a hmua, irkuanga lên an phoa,

²⁰Jisua'n, anni khom kha a koihai zôia, an pa Zebedaia le an sinhotuhai irkuanga an mâkhaia, Jisua kha an zui tâka.

Ramilhli ichel indam

(Lk 4.31-37)

²¹Khan, Kapernaum khua an lûta, Sabat nikhua khan Sinagoka ar chuhai zôia.

²²Mi a irchutir dân inhriat murdihai khan ar khêl an ti oka. Dân irchupuhai ang ni loia, thuneina nei taka anni kha ar chuhai sikin.

²³An Sinagoka khan ramilhli ichel mi inkhat a lei oma, a hong khêk suaka.

²⁴“Nazaret Jisua kin chungchânga irrol ni itum ma ni? Nin buai zoi hrangin ni ihong ma ni? Tu mo ni ini nang kin hriat, Pathian mi Irthiang kha ni ni,” a tia.

²⁵Jisua'n a hala, “Dâihrekin lân, a sùng ata hong suak roh,” a tia.

²⁶Khan ramilhli khan deng an theitir bita, inring taka khêkin a sùng ata kha a hong suak tâka.



²⁷An rêngin a'rkhêl an ti tak taka, "Hi hi imo a ini ngai tâk? irchuna thar a ni hi te; ramilhlihai khom irchamnei takin thu a pêka, an izôm hi," an irti irhlôma.

²⁸Galili le ram dang kil tina a thurchi kha an thang zôi zel tâka.

Mi tamtak indamna

(Mt 8.14-17; Lk 4.38-41)

²⁹Khan, Jisua kha Sinagok ata irthokin Jakoba le Johana hai leh an suaka, Simona le Andria hai ina an lûta.

³⁰Simona tarpi kha inkhurin a lei zâl raka, a thurchi an va hril lata.

³¹Ama kha a va pana, a kut a chela, a kaithoi tâka, an khur kha a boi zôia, fâk le nêk a siam pehai ta.

³²Kha khohloi, misa tâk hnung chu, damloi murdi le ramilhli ichelhai a kuang an hong hruaia.

³³An kho pumin inkhâr kôla khan an hong om sup tâka.

³⁴Jisua'n natna tinrênga dam no tamtak an dama, ram khohri ichel tamtak an hnot suaka. Ram khohrihai khan ama an inhriat sikin an chong phal mah.

Jisua'n Galili rama thu an sîr

(Lk 4.42-44)

³⁵Khan zînga khua a la vâi mân a thoia a suaka, hmun fianriala, a va chongchaia.

³⁶Simona le a rualhai khan an zonga;

³⁷an va hmu'n chu, "Mi'n nang an zong sup sup," tiin an hrila.

³⁸Khan, ama'n "Hmun danga, kho irnai bômhaia fe ei ti, khahaia khom thu ki la insîr thiai hrang a ni; khatak kha ki izuangna bi a ni!" a tia.

³⁹Khanchu, Galili ram murdia an Sinagoka lûtin thu an sîr thiaia, ramilhlihai khom an hnot suaka.

Phâr indam

(Mt 8.1-4; Lk 5.12-16)



⁴⁰A kuang phâr a hong, a makunga khûksadela, chubai mûkin indam a ngêna, “Ni nuamin chu ni ni’rthiangtir thei,” a tia.

⁴¹Jisua’n a saterengin lung an khama, a hong inbana a tôna, “Ki nuam e, hong irthiang ta ni ti,” a tia.

⁴²A phâr kha a hong dam zôi zela, a hong irthiang tâka.

⁴³Ngar takin thu a pêka, an fetir zôi ta.

⁴⁴A kuang, “Hi thu hi tûte kuang insîr viat no ro. Khannisian, ochai kuang thengthaiin lân, var en roh, kha hnung chu mi tinin ni’rthiang nôk tâk ti an inhriat infelna hrangin. Mosia’n irbôlna inhlan hranga a iti kha inhlan roh,” a ti pea.

⁴⁵Khannisian a fe suaka, kha thu kha an sîr tâka, a puang indarh ual uala, khanchu, an insîr inlum hrai sikin, Jisua chu thangphuangin khua khom lût ta maka, hmun fianriala a om ta, hmun tin ata mi’n an hong pan ngaia.

Marka 2

Zenginthî indam

(Mt 9.1-8; Lk 5.17-26)

¹Khan, sîn iza tena mani chu Kapernaum a hong lût nôka, ina a om tih thu an thang tâka.

²Khanchu, pên tiang khom mikot kôl sip khakin mi tamtak an lei pungkhôma, an kuang thu a hrila.

³Zenginthi inkhat, mi minliin an hong irzôna, a kuang an hong panpuia.

⁴Mipui sika khan nâi thei mahaia, a omna irdîna a zâlna pumin an zun thâka,

⁵Jisua’n an iamzia a hmu’n chu zenginthî kuang khan “Ki nâipa, ni sualhai ngaidam a ni ta,” a tia.

⁶Dân irchutirtu senkhat toi sahai khan an lungrîlin an ngaituaa,

⁷“Hi mi hin itho sika mo hianga a iti; Pathian a ihril insiat a ni hi te; Pathian ni no’n chu, tu mo sualhai ngaidam thei?” tiin.



⁸Khaang khan an ngaitua tih Jisua'n an hriat zôia, an kuang, "Itho sikin mo lungrîla khaang kha nin ingaitua?"

⁹Zenginthei kuang khan, 'Ni sualhai ngaidam a ni tah ti le thoiin lân, ni zâlna kha lan lân, ke'n fe roh,' ti hi, a kho hi mo a ol ual?"

¹⁰Rammuala hin Mihriam Nâipa hin sual ngaidam theina a nei ti nin inhriat theina hrangin nangni ki hong inhriattir a ni," a tia; zenginthei kuang khan,

¹¹"Thoiin lân ni zâlna kha lan lân, ni in tiang kîr roh, nang ki hril," a tia.

¹²Khanchu, a thoia, a zâlna kha a lâka, an rênga mit hmua a suak zôi tâka; an rêngin ar khêl an ti tak taka, "Hiang hi ei la ihmu ngai viat loi kêng," tiin Pathian an inpâk tâka.

Jisua'n Levia koi thu

(Mt 9.9-13; Lk 5.27-32)

¹³Khan, dîl tiang khan a fe nôka, mipuiin an hong pan sup sup, ama'n a lei irchuhaia.

¹⁴Khan, a fe malamin, Alfaia nâipa Levia kha khâzana irfuangna hmuna toi a hmua, "Ni zui roh," a tia. Ama khan a thoia a zui tâka.

¹⁵Khan Jisua chu Levia ina khalâi a ota, irchutirhai kha khâzana irfuangtuhai le mi sual tamtakin Jisua le irchutirhai an hong otpuia. Khan ama zuipuhai chu tamtak an nia.

¹⁶Farisaihai laia Dân irchutirtuhai khan khâzana irfuangpuhai le mi sualhai khalâi otpui an hmu'n chu a irchutirhai kuang, "Itho sika mo khâzana irfuangpuhai le mi sualhai laia a iot sa?" an tia.

¹⁷Jisua'n kha kha an hriatin an kuang, "Mi hrisêlhaiin daktor innang ngai mahaia, mi irveisiahai kêngin an innang ngai a ni. Mi felhai donsui hranga zuang ni ma unga, mi sualhai donsui hranga zuang kêng ki ini," a tia.

Bu nghei chungchâng thua irdonna

(Mt 9.14-17; Lk 5.33-39)

¹⁸Johana irchutirhai le Farisaihai bu nghei ni khan mi tuhai manni an hong, a kuang, "Itho sika mo Johana irchutirhai le Farisai irchutirhaiin bu an ngheia, ni irchutirhaiin chu an inghei loi?" an hong tia.



¹⁹Jisua'n an kuang, "Irneinaa mikhualhai kha bu nghei an ti, nin itung ma ni? Ni thei no ni! Moineipu an kuang a om sung karka chu bu nghei no nihai.

²⁰Khannisian, Moineipu kha an kuang ata hruai zoro la om a ta, kha tika chu la nghei an ti.

²¹"Tukhomin puan milui phoa, puan thar irhlek leh pho ngai mahai, pho ta sianlan, a thar khan puan milui kha kai set a ta, chet nok ual ual a ti.

²²Tute'n Uain thar khom savun kok miluia thun ngai mahai, thun ta sianlan, uain thar khan savun kok kha mut set a ta, uain le savun kokhai kha hmangmunboi chang zit a ti. Khasikin, uain thar chu savun kok thara thun an ti," tiin a sama.

Sabat chungchanga irdonna

(Mt 12.1-8; Lk 6.1-5)

²³Jisua chu Sabat niin bubil hmunhai a hroa, a irchutirhai khan fe malamin bu vuhai kha an kai duka.

²⁴Farisaihai khan a kuang, "En ta, itho sika mo Sabat dan iphal loi an itho?" an tia.

²⁵Jisua'n a kuang, "Davida'n, a rualhai le phingchama fak hrang an nei loi laia a thil tho kha nin itep loi mo?"

²⁶Abiathara Ochai inlaltak a ni laia Pathian ina a luta, Ochaihai vai fak thei bai kha a faka, a rualhai khom a ipak sa thu kha?" a tia.

²⁷Jisua ngetin, "Sabat hi mihriam ta hranga siam a nia, mihriam hi Sabat ta hranga siam ni mah.

²⁸Khasikin, Mihriam Naiipa hi Sabat chung tena khom hin Reng a ni," a tia.

Marka 3

Kut zenginhi indam

(Mt 12.9-14; Lk 6.6-11)

¹Khan, Sinagoka a luta, kha khan mi inkhat kut zenginhi a lei oma.

²Ama an hnol theina hrangin sabat nia an damtir le indamtir loi an enirchika.

³Khan, Jisua'n kut zenginhi kuang khan, "A laia hin hong suak roh," a tia.



⁴Khan, Jisua'n mipuihai kuang, "Ei dânin Sabat niin imo tho hrangin a ni iphal? Sabat nia insatir mo a'rthiang, insiat mo? mi hringna san mo a'rthiang, that mo?" tiin a'rdonhaia; khannisianlân an dâihreka.

⁵An milung ngarzia an hriatin poi a ti tak taka, ningmur takin a enhai hnungin kha pa kuang khan, "Ni kut inphar roh," a tia. A hong phar suaka, a kut kha a hong dam pe tâka.

⁶Khanchu, Farisaihai kha an suaka, Jisua an that theina hrang dân ngaitua'n Heroda pâla mihai leh khan an chong zôi tâka.

Jisua'n dîl panga mipui an dam thu

⁷Jisua kha a irchutirhai leh dîl pang tiang an fe thal tâka, Galili ram ata mipui tamtakin an zuia. Khan a sintho roiinpuizia an inhriatin Judai ram le

⁸Jerusalem hai ata, Idumai ram le, Jordan râl hai ata, Tura le Sidon hual hai ata kha mipui tamtakin ama an hong pan saa.

⁹Mipuiin an hong hneng hrai lolina hrangin irkuang lei ngaitua hrangin a irchutirhai kha chong a bêhaia.

¹⁰Mi tamtak an damtir tâk sikin natna nei murdi'n ama tôn tumin an ûm mur mur tâka.

¹¹Ramilhli ichelhai khomin ama kha an hmu rikipin a makunga an hong inboka, "Nang Pathian Nâipa ni ni," tiin an khêk ngaia.

¹²Khanchu a thurchi kha tûte inhrilhai loi hrangin a khaphai ngita.

Jisua'n sômhleihnihai an thang thu

(Mt 10.1-4; Lk 6.12-16)

¹³Khan, Jisua kha tânga a fea, a mi hranga a indit ualhai kha a koihaia, khan anni kha a kuang an hong.

¹⁴A kuanga om theina hrangin le thuhiril hranga a tîr suak theina hrangin.

¹⁵Ramilhlihai chung a ircham an nei theina hrangin sômhleihni an thangkaia.

¹⁶Khahai kha Simona, (Jisua'n Petera tia a iphua tâk kha).



¹⁷Zebedeia nâi Jakoba le a sangpa Johana (kha mihai kha “Boanergea” a tihai, kha omzia chu “Khonri Nâihai,” tihna a ni).

¹⁸Andria, Filipa, Bartholomaia, Mathaia, Thoma, Alfaia nâi Jakoba, Thadaia Kanaan mi Simona,

¹⁹a cheltu Juda Iskariota hai an ni.

Jisua le Belzebula

(Mt 12.22-32; Lk 11.14-23; 12.10)

²⁰Khan, Jisua kha in tiang a va kîra, mipui an lei hong irbukkhôm nôka, Jisua le a irchutirhai khan bu anh fâk irman mahaia.

²¹A in sâng mihaiin an inhriatin chu ama hruai hrangin an irthoka, mipuihaiin, “An vêt tâk kêng!” an ti pehai sikin.

²²Dân irchutirtuhai Jerusalem rengata zuanghai khan, “Belzebula ikop a ni hi te. Ramilhli rêng sikin kêng ramilhlihai a inhnot suak ngai,” an tia.

²³Jisua’n a koihaia, chongirkhekin an kuang, “Setana’n Setana ngêt itin mo a inhnot suak thei hrang?”

²⁴Ram khom, mâni le mâni an irdoiin te, kha ram kha ngîr thei no ni.

²⁵In sângkua khom anni le anni an irdoiin te kha in sâng kha ngîr suak thei no nihai.

²⁶Khaang khan, Setan khom ama le ama irdoi ta sianlân chu, ngîr suak thei no ni, irhmang a ti.

²⁷Mi hrât chu an khitphiar bak no’n chu, a in lûtin ar chon lapai pe thei ngai mahai, an khitphiar zoiin kêng a in kha an inram thei hrang.

²⁸A dik takin nangni ki hril, mi an سوالنا murdi le an hril insiatna murdia khom ngaidam ni a ti.

²⁹Khannisianlân, Irtha Irthiang hrilsiat chu itiklai khom ngaidam ni ta no nihai, kumtuanga سوالنا an itho a ni,” a tia.

³⁰Kha kha Jisua’n, “Ramilhli ikop a ni,” an ti sika khan kha kha a insîr a ni.

Jisua nu le a urêng hai

(Mt 12.46-50; Lk 8.19-21)



³¹Jisua nu le a urêng hai kha an hong tunga, pên tiang an ngîra, mi an hong inkoitira.

³²A kôlvêla mipui toihai khan a kuang, “En ta, pên tiang son, ni nu le ni urêng hai in nang an zong,” an tia.

³³Ama khan a sâma, “Ka nu le ki urêng hai kha tuhai mo an ini?” a tia.

³⁴A kôla toihai kha a hong en vêla, “Hei en u ta, Ka nu le ki urêng hai hi.

³⁵Tukhom Pathian nuamlam thotuhai kha kêng, ki urêng hai, ki farnuhai, ka nuhai an ni,” a tia.

Marka 4

Fachî inthektu chongirkhek

(Mt 13.1-9; Lk 8.4-8)

¹Khan, dîl kôla khan a'rchutirhai nôk tâka; mipui tamtak an hong irbuk nôk tâka, irkuanga khan a chuanga, a toia; mipuihai kha dîl kôl muanga khan an oma.

²Chongirkhekin thu tamtak ar chutirhaia, ar chuhai lai khan an kuang,

³“Irngai u ta, voikhat chu mi inkhat hi fachî intheke hrangin a fea;

⁴a hong inthekekin chu senkhat lampuia a tâka, vahaiin an hong fâkpai ta.

⁵Senkhat lungpherpha chung irnêng irphâna hmuna a tâka, irnêng irsa maka, a hong mông lata.

⁶Khan misa a hong irsâng ualin chu, a em inchâra irzung a thâk thei no sikin, a ram nôk chit ta.

⁷Senkhat ilhling laia a tâka, ilhling kha a hong irsôna, a dîp irhmanga, ra thei ta mah.

⁸Senkhat chu irnêng sana hmuna a tâka, a hong môngin a hong irsôna, a ra tâka; a bâk sômthum, a bâk sômruk, a bâk irzakhatin a hong inpungtir ta,” a tia.

⁹Jisua'n, “Tukhom inhriatna hranga mikuar nei murdi'n chu inhre ri sehai,” a tia.



Chongirkhek a ihmang nasan

(Mt 13.10-17; Lk 8.9-10)

¹⁰A binga a om hnungin chu sômhleihnihai le a danghai khan chongirkhek thu kha an irdon infela.

¹¹Jisua'n chu an kuang, "Pathian Ram thurîl kha nin kuang pêk a nia; mi danghai ta hrangin chu chongirkhek vaiin insîr a ni.

¹²'En enin hmu infel no nihaia, Irgai irngaiin ar fêna lam chang inhre no nihai, khano'nchu, hong irhei an ta, ngaidam nina an ti; ti ang kha a ni theina hrangin,'" a tia.

Chongirkhek hrilfiana

(Mt 13.18-23; Lk 8.11-15)

¹³Khan, Jisua ngêtin an kuang, "Hi chongirkhek hi nin inhriat infel thei loi ma ni? Khaang khan a ni'n te, itin mo chongirkhek danghai ngân khom kha nin inhriat thei hrang?"

¹⁴Fachî inthektu khan Pathian Thu a intheke a ni.

¹⁵Lam kôla tâkhai kha hiang hi an ni; thu kha an inhriatin Setana a hong lata; an fachî intheke kha a lâkpai pehai zôi ngaia.

¹⁶Khaang dênin, lungpherpha hmuna inthe Khai kha hiang hi an ni, thu kha an inhriat zoi le raifân takin an pom zôi zela;

¹⁷Khannisianlân, annia khan irzung tha maka, zoro sôtnote vai a diara, kha hnungin chu thu sika intakna mani, dengtheina mani, a hong om le chu an rîl zôi zel ngai a ni.

¹⁸Hloiilhlingnei kêra inthe Khai chu hihai hi an ni: Thu chu an inhriata,

¹⁹khannisian, rammual intakna hai, irchon irzukna hai, irzukna dang danghai, a hong lûta, thu kha a hong dîp irhmanga, a ira ta ngai loi a ni.

²⁰Irnêng saa inthe Khai chu, thu kha inhriata, an poma, a bâk sômthum, a bâk sômruk le a bâk irzakhata rahai hi an ni,'" a tia.

Meiser irkhu

(Lk 8.16-18)



²¹Jisua ngêtin an kuang, “Meiser chu a sianaa sia loia khamphulu hnuaia mani, zâlmun hnuaia mani sia hrangin an hong inchok ngai ma ni?”

²²Inpuang loi hranga thup ite om maka, inlang loi hranga thuppai khom ite om sa mah.

²³Irgaina mikuar nei murdi’n chu irngai ri se!” a tia.

²⁴Khan an kuang, “Nin thu irngai kha irdîn dêkin irngai roi, mi nin irkhîna ngêt khan, nangni irkhîna’n hmang an ti, nangni bôk ual viat an ti.

²⁵Tukhom a nei ka chu bôk sa an ta, a nei loi chu a ineisun khom lapai pe an ti,” a tia.

Chimu chongirkhek thu

²⁶Jisua’n an kuang, “Pathian Ram chu hiang hin a ni, mi’n loia chîmu an theka.

²⁷Zâna a zâla, sîna a thoia, chimu kha itika hong mônga, hong irsôn mani tih a inhriat loi ang hi a ni.

²⁸Irnêngin a kung kha a’rsôntira, ra an neitir ngai, a maton taka a kung a hong suaka, kha hnung a vûia, a hnungkhôn taka a’rmalpum kha a hong suaka.

²⁹Bu kha a hong hmin tâkin chu kôite lâkin bu ât a hong iphut ang hi a ni,” a tia.

Ancham ru chongirkhek

(Mt 13.31-32,34; Lk 13.18-19)

³⁰Jisua’n an kuang, “Pathian Ram chu i leh mo ei irkhî hrang tâk, i chongirkhek hmangin mo ei insîr infel hrang?”

³¹Hiang hi a ni, mi’n ancham ru rammuala, chimu tinrênghai laia a chîn tak a lâka, irnênga a tua.

³²Khannisian sôtnote hnunga a hong mônga, chimu tinrênghai laia a lian tak a hong ni ta; ôn lian tak tak a hong neia, chunglêng vahai khomin an irbûk irbei thei ngai ang hi a ni,” a tia.



³³Khaang chongirkhek tamtak hmang khan an inhriat thiam hrang dôrin thu kha an kuang an sîr ngai.

³⁴Chongirkhek no'n chu an kuang thu insîr ngai ma, a irchutirhai kuang chu itinrêng a hrilfiah ngai a ni.

Jisua'n phâivopui a hal indâi

(Mt 8.23-27; Lk 8.22-25)

³⁵Kha nî dêna khan khohloi a hong ni'n chu, Jisua'n irchutirhai kuang "Dîl râl tiang son lei kêi rei," a tia.

³⁶Kha hnung chu mipuihai kha an mâka, Jisua lei toina irkuanga khan irchutirhai kha an lûta, ama khom an hruaia. Irkuang dang khom an om sa.

³⁷Iringloiin, phâivopui hrât tak a hong thoa, tui irsok kha irkuanga a lûta, a sip vâng vâng tâka.

³⁸Jisua chu lukham khamin irkuang irmei tiang khan a lei ina. An kai thoia, "Irchutirtu kin irhmang hrang hi poi ni iti loi ma ni?" an tia.

³⁹Khanchu a hong thoia, phâivua kha a hala, dîl kuanga khan, "Dâihrekin lân, om chian chian roh," a tia. Phâivua kha a hong monga, a dâidup ta.

⁴⁰Ama khan an kuang, "Ithoa mo ang dôra nin ichi? iamna zel nin la inei loi ma ni?" a tia.

⁴¹Khanchu an chi tak taka, "Hi mi hi tu mo a ini hi, phâivua le dîl khomin a thu an izôm hi?" an irtia.

Marka 5

Gerasin rama ramilhli ichel a indam

(Mt 8.28-34; Lk 8.26-39)

¹Jisua le a irchutirhai chu Galili dîl râl, Gerasin ram an hong tunga.

²Khan, Jisua kha irkuang ata a suak le chu ramilhli ichel, thâna irthoka hong suak mi inkhatin a tonga.

³Kha mi kha thânyaia a om ngaia, tukhomin thîrhruai khomin khit thei ngai mahai.



⁴Thîrhruia khitin thîrkolhai inbuntir ngai khomsian, thîrhruihai kha an pot sata, thîrkolhai kha a khiak chit ngai; a hrât hrai sikin tûte'n sep inhne thei mahai.

⁵A sîn a zânin thâna le tânga a khêka, lunghai leh khom ar ât ngai.

⁶Hlatak ata Jisua kha a hmu'n chu a maton tiang panin an tâna, kûnin chubai a mûka.

⁷Inring takin a khêka, "Jisua, Inchungtaka Pathian Nâipa, imo ni lo hrang ni iti? Deng nin thei loi hrangin Pathian irhmingin nang ki ngên," a tia.

⁸(Hi a itih nasan chu Jisua'n a kuang, "Nang ramilhli, hi pa sîng ata hi hong suak roh," a lei ti tâk sika a ni).

⁹"Imo ni'rhming?" tiin a'rdona. Ama khan, "Ki'rhming chu Nuaia a ni, kin tamtak tak a ni," a tia.

¹⁰Khabana, kha ram ata kha inhnot suakhai loi hrangin Jisua a ngên ngita.

¹¹Khan, kha hmun kôla tâng panga fâk zong, vok tamtak an oma.

¹²Ramilhlihai khan Jisua kuang, "Vok sînga nin lûtîr roh," tiin an ngêna.

¹³Jisua'n a phal pehai ta. Khanchu, ramilhli kha an suaka, vokhai sînga an lûta, vok rualhai kha sângni vêl an nia, khoisabaka an intâna, dîla khan an tâk that ta.

¹⁴Vok vâituhai kha chi pumin an intâna, kho sîng le a kôlvêla mihai kha an va hrila. Khanchu, thil omzia eninfel hrangin mipui an fe ta.

¹⁵Jisua kuang an hong tungin chu ramilhli ichel, Nuaia icheltu kha, puan sila lungrîl pangai irputa lei toi an va hmua; an chi tak taka.

¹⁶Kha a hmutuhai khan ramilhli ichelpa chung a thil tunghai le vok thurchihai kha an lei hril saa.

¹⁷Kha mihai khan Jisua kha an ram ata suak hrangin an ngêna.

¹⁸Jisua irkuanga a chuang tôn chu ramilhli ichelpa khan Jisua kuang, "Ni kuang hong ki ti," tiin a ngêna.



¹⁹Khannisian, Jisua'n phal mah, phal nêkin a kuang, "Ni in mihai kuang fe'n lân, Rengpa'n ni chung a sin nang a itho pezia le lung nang a inkhamzia kha va hril roh," a ti pea.

²⁰Khapa kha a fea, Dekapoli khuahaia khan thil a itho pezia kha tâng an sampui tâka, mi murdi'n ar khêl an ti tak tak.

Jaira nâinu kaithoi le nupang thi suak indam

(Mt 9.18-26; Lk 8.40-56)

²¹Khan, Jisua kha irkuangin varâl a kâi nôkin chu, dîl panga mipui tamtak a kuang an hong irbûma.

²²Sinagok hruaitu laia inkhat, ar hming Jaira kha a hong a, Jisua a hmu'n chu a ke bula khûksadelin chubai a mûka,

²³"Ki nâi nâipangte a sân a naa, a hong hara, a hong dam theina hrangin a chung a ni kut ni'rngat pe roh," tiin a ngên ngita.

²⁴Khanchu, a fepui tâka, mipui tamtakin ama kha an zui saa, ihneng rengin an hnenga.

²⁵Nupang inkhat, kum sômhleihni thi suaka damloi a oma.

²⁶Daktor tamtakin an en chit tâka, a sum nei murdi leh ar enkol tâka, khannisian, irzâng ual nêkin inrikin an rik pe ual uala.

²⁷Jisua thurchi a hong inhriatin chu a hnung tianga mipui kâra khan a hong a,

²⁸a lungrîlin, "A puan vai khom tôn inlân dam zôi ki ti," a tia.

²⁹Khanchu, a puan a tôna a thi suak kha voikhat rengin a hong chat pit ta, a natna kha indam a ni tah ti ar hriat zôi ta.

³⁰Jisua khom khan ama ata sinthotheina a suak tih ar hriat zôia, mipui tiang ar hei vêla, "Tu mo ki puan tôn kha?" a tia.

³¹A irchutirhaiin, a kuang, "Mipuiin ihneng renga nang an ihneng hi ni hmua, itina mo, tu mo ni tôn? ni iti hi?" an tia.

³²Khan, Jisua'n chu a tôntu hmu nuamin a hei thîr vêla.



³³Khanchu, a chung a thil zuang tung tâk kha ar hriatin, nupangnu kha ichi le inthing pumin a hong, khûksadelin chubai a mûka, itinrêng dik takin a hril tâka.

³⁴Jisua'n a kuang, "Ki nâinu, ni iamna hi ni idampui a ni, irtharngam takin fe tan lân, ni natna ata kha hong dam suak ta ni ti," a tia.

³⁵Jisua kha a la chong lai takin, Jaira in ata mi honghai khan, "Ni nâinu a thi ta. Itho sikin mo irchutirpu hi lan sôltir hranga?" an hong tia.

³⁶Jisua'n an thu'nsîr kha a len hriat saa, Sinagok hruaitupa, Jaira kuang khan, "Chi no roh, iam mai roh," a tia.

³⁷Petera, Jakoba le a sangpa Johana hai tih no chu mi dang tukhomin an izui phal ta mah.

³⁸Khan, Jaira in an va tungin chu, lei irse mer mur le lei chap ngei ngûia lei hong khêk lel lul a va hmua.

³⁹A lût malamin an kuang "Ithoa mo nin ibuai nin ichap mer mur? Nâipang kha thi mah, a iin kêng," a tia.

⁴⁰Anni khan an innuisana, khanchu, an rêngin an hnot suakhaia, nâipangtenu nu le pa le ama zuituhai kha a hruaia, nâipangtenu zâlna hmuna khan an lûta.

⁴¹Khan, nâipang kut kha a chela, a kuang, "Talitha, Kum," a tia, (kha kha tôinu, thoi ro!) tihna a ni.

⁴²Nâipangtenu kha a hong thoia ar lôi thei zôia, ama kha kum sômhleihni mi a ni. A sân ar khêl an ti tak taka.

⁴³Jisua'n an kuang, tûte kuanga insîr loi hrangin hê a bêhaia a khapa, "Fâk rua pe roi," a ti saa.

Marka 6

Nazaret khuua Jisua an hnôl

(Mt 13.53-58; Lk 4.16-30)

¹Jisua'n kha hmun kha a suaksana, a omna ngai khuua tiang a fe nôka, a irchutirhai khomin an zui maia.



²Sabat ni a hong nia, Sinagoka khan mi a hong irchutir phut tâka; mi tamtak an oma, a thu an inhriatin chu ar khêl an ti tak taka, “Hi hi kho tak ata a inhriat ma ni? A kuang vârna khom ipêka a iom hi? Itin mo sinirkhêl a itho thei hi te?”

³Mari nâipa mistiri, a urênghai khom Jakoba, Josefa, Juda le Simona hai hi ni mahai mo? A farhai khom ei kuanga om mo ni mahai?” an tia. Kha hnung chu ama kha an hnôl ta.

⁴Jisua khan an kuang, “Deipu chu a khua le a urênghai laia ti no chu hmun tina chôiindômin a om ngai,” a tia.

⁵Khan, damloi tômtê chungá kut a’rnhata a indam ti no chu khataka khan sinirkhêl reng tho thei mah.

⁶An iam no sika khan ar khêl a ti ok a ni.

Jisua’n irchutir sômhleihnihai a tîr suakna

(Mt 10.5-15; Lk 9.1-6)

⁷Khan, mi irchu thiaiin khuahai a’rfang vêla. Sômhleihnihai kha a koia, inhni hnia irkopin a tîr suakhaia, ramilhlihai chungá irchamneina a pêkhaia,

⁸an kuang, “Nin inzinnaa khianghrol ti no chu bai mani, hmarsa mani, nin zêpa sum mani chôi no roi.

⁹Kekok chu bun unglân, khannisian, songkol inhni irthuam chu chôi no roi,” tiin chong a bêhaia.

¹⁰Hiang hin a ti sa, “Nangni an inhamin chu nin suaksan mâka chu nin va itungna in ngeia khan om mai roi.

¹¹Kho khua khomin nangni lôm loia, nin thu an irngai no’n chu, marak unglân, nin kea vâiphin kha hui tha roi. Kha kha an ta hrangin irningna ni a ti,” a tia.

¹²Khanchu, an fe suaka, mipuihai irletna hrangin thu an insîra.

¹³Ramilhli tamtak an inhnot suaka, damno tamtak sahriak an pola an dam ta.

Baptistu Johana thi thu

(Mt 14.1-12; Lk 9.7-9)



14Jisua irhming kha a sân an thang tâk sikin, rêng Heroda khan a len hriat sa tâka. “Baptistu Johana kha mithi lai ata a hong thoi nôk tâka, hi sinthotheina irtha hi a inei,” an tia.

15A danghaiin chu, “Elija a ni,” an tia. Mi danghai nôkin chu, “Tiana deipuhai anga deipu inkhat a ni,” an tia.

16Heroda’n chu a len hriatin, “Johana, a lu ki itanpai kha, a hong thoi nôk ta a ni khate,” a tia.

17Heroda ngeiin Johana kha an cheltira, khitphiarin intângna ina a lei ikhum a ni. Heroda’n hianga a ithôna chu a sangpa Filipa dôngma ni khom sian, ama’n dôngma’n a inei nôk, Herodi sika a ni.

18Johana’n Heroda kuang, “Ni sangpa dôngma ni inei hi dik mah,” tiin a lei hril mai ngaia.

19Khasikin Herodi’n Johana kha a hmumâk tâka, that a tuma, nikhomsian, Heroda sikin that thei mah.

20Heroda’n Johana kha mi dik le mi’rthiang a nih ti an hriat sikin a chia, a inzôk ngai a ni. Johana thu’nsîr an hriat rikipin a sân a buai ngai khomin, a thu’nsîr irngai a nuam ngai a ni.

21Heroda khan a mi roiinpui hai, sipai hruaitu lian hai, Galili rama mi lianhai a koia, a suak champha hruai an thea, kha nî khan chu Herodi’n zoro’nchum a hmu ta.

22Herodi nâinu kha a hong lûta, a lâma, Heroda le khual mihai an lômtir oka, khasikin rêng khan nâipangtenu kuang, “Imo ni inuam? Ni inuam tak ni zong roh, nang pe ki ti,” a tia.

23Chonginkung tamtak neiin a kuang, “I khom ni ni inghi ka chu ki ram chimrip khom nang pe ki ti,” tiin chong ar khâm saa.

24Khanchu, nâipangtenu kha a suaka, a nu kuang, “Imo ki izong hrang?” tiin a nu kha a var dona. A nu khan, “Baptistu Johana lu,” tiin a lei sâma.



²⁵Inrang takin rêng kuang a kîr lata, “Khênga Baptistu Johana lu ni pe zôi roh,” a tia.

²⁶Reng khan poi a ti tak taka, khannisian, a khual mihai makunga a chonginkungna sika khan irkhâl thei maka.

²⁷Reng khan a nghâktu sipai inkhat a tîr zôia; intângna ina khan Johana lu kha a tana,

²⁸Kha hnung chu khêngin a hong chôia, nâipangtenu kuang a pêka, khan a nu a va pêk ta.

²⁹Kha kha a irchutirhaiin an inhriatin chu an va fea, a ruak kha an tuama, thâna an phûm ta.

Mi sângringa vâi thu

(Mt 14.13-21; Lk 9.10-17; Joh 6.1-14)

³⁰Tirtônhai kha Jisua kuang an hong kîr nôka, an sintho murdi le an irchuhai murdi Jisua an hrila.

³¹Mipui a fe hong an tam hrai sikin Jisua le a irchutirhai kha bu anh khom fâk irman mahai. Khasikin ama khan an kuang, “Tho ei bingin ei om theina hrangin fe ei ta, lei irngam ta rei,” a tia.

³²Khanchu, fianrial panin irkuanga an fe ta.

³³Nikhomsian, an isuak chu mi tamtakin an hmua, tuhai mo an nih ti khom an lei inhriathai zôi zela, kho tina irthokin an intâna, Jisua le a irchutirhai kha an lei khâla.

³⁴Jisua kha irkuang ata a chumin chu mipui tamtak a hmua, enkolpu nei loi belra ang an ni sikin lung an khamhai tak taka, sathnem irngai takin ar chutirhai tâka.

³⁵Khante khohloi a hong ni tâka, a irchutirhai kha Jisua kuang an hong, a kuang, “Hi hi hmun fianrial a nia, a sân an hnung ok tâka,

³⁶ei kôlvêl loia mani, khuaa mani infetirhaiin lân, an fâk hrang imo khat ircho ri sehai,” an tia.



³⁷Jisua'n an kuang, "Nangni'n fâk rua imo khat pehai roi," tiin a sâma. Khan, anni'n a kuang, "Bai a duli irzahni man va'rchôkin fâk rua kin ipêk hrang ma ni?" tiin an irdona.

³⁸Khasikin Jisua'n an kuang, "Bai iza mo nininei? fe unglân, va en u ta," a tia. Khanchu, an inei zât an inhriat le chu, "Bai ringa le nga inhni," tiin an hrila.

³⁹Kha hnung chu, Jisua'n mipuihai kha, a pâl pâl in irsena, hloisûl chung a intoihai hrangin irchutirhai chong a bêhaia.

⁴⁰Khaang khan mipuihai kha a thâr thâr in irzakhatin, sômringa'n an intoitirhai tâka.

⁴¹Kha zoiin chu Jisua'n bai ringa le nga inhni kha a lâka, Pathian kuang lômthu a hrila. Kha hnung chu bai kha a khoia, mipuihai sem pehai hrangin a irchutirhai kuta a pêk ta. Nga khom kha an rênga laia a sem pehai sa tâka.

⁴²Mi tinin an fâka an khop senga.

⁴³Bai le nga an fâk mihlia kha khamphulu sômhleihni an la hrût insipa.

⁴⁴A ivâihai kha pasal ulian ringot khom sângringa an ni.

Jisua tui chung a fena thu

(Mt 14.22-23; Joh 6.15-21)

⁴⁵Khan, mipuihai an chîntir lai in varâl tianga Bethsaida khuua a matona lei fe hrangin ama ngêtin a irchutirhai irkuanga an chuangtirhaia.

⁴⁶Mipuihai kha an thahai zoiin chu chongchai hrangin tânga a fe tâka.

⁴⁷Khohloi a hong ni'n chu, irkuang kha dîl laia a om tâka, ama kha a bingin muanga a oma.

⁴⁸Phâivua'n a ni nona tiang a nam tâk sika khan lunginzîng taka irkuang an ivailâi chu a hmua; kôlirsal tônin dîl chung a khan anni tiang a hong a, pialhai a tuma.

⁴⁹Khan, anni khan dîl chung a ife an hmu'n chu mithi irtha an sôna, an khêk mur mura.



⁵⁰Ama an hmua an rêngin irtha tâk rakin an oma. Voikhat rengin Jisua'n an kuang, "Lungirngam takin om roi! Keima kêng ki ni, chi no roi," a ti pehaia.

⁵¹Khanchu, an kuang irkuanga khan a chuang saa, phâivua kha a'rngam ta. Irchutirhai chu an irngai ar khêl tak taka,

⁵²an milung ngar sika sângringa a ivâina thu omzia diktak kha an inhriat thei no sikin.

Jisua'n Genesaret rama damloihai an dam

(Mt 14.34-36)

⁵³Khan, varâl an kâiin chu Genesaret ram an tunga, khatak khan an irkuang an khita.

⁵⁴Irkuang ata an chum le chu Jisua a nih ti mihaiin an inhriat zôi ta.

⁵⁵Kha ram pumpuia mihai an hong intân sup sup, a omna an inhriatna rikipa, a kuang damloihai an puantha pumin an hong irzôna.

⁵⁶Kho hmuna khom khuaa mani, khopuia mani, loia mani, Jisua fena rikipa chu bazara khom damloihai an hong tuanga, a puan hmor lua tôn thei hranga phalna an zonga; khang khan a tôn murdi chu an dam thiai a ni.

Marka 7

Pi pu thumâk

(Mt 15.1-9)

¹Khan, Jerusalem rengata hong Farisaihai le Dan irchutirtuhai Jisua kuang an hong irbuka.

²Khahai khan Jisua irchutirhai senkhatin kut sôp loia fâk an izong an lei hmu tâka.

³(Farisaihai le Judahaiin chu an pi le pu thumâk zômin an kut fâi takin an sôp no'n chu fâk zong ngai mahai.

⁴Khan bazar ata an kîr nôk khomin tui an irsil bak no zelin chu fâk zong ngai mahai. Pi le pu thumâk dang tamtak intûk ngit khom an om sa. Khahai kha khilât, bêlhai, sumpen bêlhai le zâlmunhai sôpfâi hrang tituhai an ni.)



⁵Khasikin, Farisaihai le Dân irchutirtuhai khan, “I sika mo ni irchutirhaiin pi le pu thumâk zôm loiin kut sôp loia fâk an izong ngai hi?” tiin an irdona.

⁶Jisua’n an kuang, “Isaia’n nin chungthu a lei ihril kha a dik: vârirlet nin ni, ‘Hi mihai hin an bâiin an ni chôiindôma, Khannisianlân, an lungrîlin chu an ni hla vit.

⁷An irchutirnaa mihriam thupêkhai an irchutir sikin. An ni biakna hi a korong a ni,’ ti irziak ang khan.

⁸“Pathian thupêkhai chu nin hnôla, mihriam thumâkhai nin ipom a ni hi,” a tia.

⁹Khan, ama ngêtin an kuang, “Nin thumâk nin zôm theina hrangin Pathian thupêkhai nin ihnôl hi chu lungvâr chu nin nei hi te.

¹⁰Mosia’n, ‘Ni nu le pa mahrip tho roh, tukhomin a nu mani, a pa mani, hrilinsiattu chu thi ngêt ri se,’ tiin thu a lei pêka.

¹¹Nangni rêkin chu hiang hin nin ti ngai, ‘Mi’n a nu mani, a pa mani, kuang, ni ni hmangna hrang hi ‘Korban’ a ni ta,’ a ti’n chu, (Hi hi Hebrai chongin Pathian kuanga pêk tihna a ni)

¹²a nu mani, a pa mani ta hrangin ite sin phal ta mak chêi;

¹³hianga thumâk nin irchu thiai sikin Pathian Thu nin irhmangtir ngai a ni. Hianga sin nin itho ngai, a dang khom tamtak a la om sa,” a tia.

Mihriam porinchetirtu

(Mt 15.10-20)

¹⁴Khan mipuihai kha a koi bukhai nôka, an kuang, “Nin rêngin ki thu hi irngai unglân, hi hi inhrenfel roi;

¹⁵Pên tiang rengata mihriam sênga lût ama porinchetir thei ite om mah, mihriam sêng rengata suak ngaituana hin kêng mihriam a porinchetir ngai.

¹⁶Tukhom inhriatna hranga mikuar nei murdi’n chu irngai ri sehai,” a tia.

¹⁷Khan mipuihai chu in sênga a lûtsanhai hnungin, a irchutirhaiin chongirkhek thu kha an irdon infela.



¹⁸Khan, Jisua'n an kuang, "Nangni khom hi dôr hi nin la inhriat thei loi mo? Hi hi inhre mak chêi mo? I khom pên tiang rengata mihriam sênga lût hin ama porinchetir thei mah;

¹⁹a milung sênga lût loiin a phînga a lûta, a suakpai sikin, ti hi nin inhriat no ma ni?" a tia. (Kha kha Jisua'n fâk hrang tinrêng a'rthiang a tihna a ni.)

²⁰Khan, ama ngêtin, "Mihriam sêng rengata hong suak khan kêng mihriam a porinchetir ngai.

²¹Mihriam lungrîl sêng rengata kêng ngaituana sual a hong suak, kha ngaituana sual khan kêng irditna, inruna, irthatna,

²²uirena, irzukna, sual tinrêng tho nuamna, irhuangna, hurna, hnarsana, nuisona, lâripâkna le invêtna hai hi an tungtir ngai.

²³Kha sualhai murdi kha sêng tiang rengata a hong suaka, mihriam chu a porinchetir ngai a ni," a tia.

Suro Foiniki nupangnu iamna

(Mt 15.21-28)

²⁴Khanchu, a thoia, Jisua'n Galili ram a mâksana, Tura le Sidon hualsênga a fe tâka. In inkhata a lûta, tûte inhriat nuam maka, khannisianlân, irthup thei mah.

²⁵Khanchu, nupang inkhat, a nâinu ramilhli ichel pe a oma, kha nu khan a thurchi an hriata, a ke bula a van boka,

²⁶Kha nupangnu kha Grik mi a nia, irzirna tiang chu Suro Foiniki a ni. Khanu khan, a nâinu sênga ramilhli inhnot suak hrangin Jisua a ngêna.

²⁷Khannisianlân, Jisua'n a kuang, "Nâihai khop bak ri sehai, nâihai bai lâkpai pea, uihai kuanga pêk chu dik mah," a tia.

²⁸Nupangnu khan a kuang, "Rengpa ni chu a ni, khannisianlân, maichâm hnuaia uihai khomin nâipanghai bai irnôi chu an fâk ngai khate," tiin a dona.

²⁹Khan, Jisua'n a kuang, "Kha ni chongbâi sika khan fe nôk tan lân, ni nâinu kha ramilhli khan a suaksan ta," a ti pea.



³⁰Khan a ina a fe tâka, a nâinu kha ramilhli'n a suaksan zoia zâlmuna zâlin a va hmua.

Kuarsêt chong theiloi indam

³¹Khan, Tura ram rengata a suak nôka Sidon khuuaa lûtin Dekapoli ram hro'n Galili dîl kha a tung tâka.

³²Khan, mi inkhat kuarsêt, chong khom theiloi hi a kuang an hong hruaia, kha pa chung a kut irngat hrangin Jisua kha an ngêna.

³³Khaang khan, kha pa kha, Jisua'n mipui lai ata a bingin a hruaia, a kutpârhaiin a mikuar sêng an khîk pea, an chila a milei khom an them pe sa.

³⁴Kha hnung chu Jisua'n irvân tiang tangin a phûk an sum huta, a kuang "Efatha," a tia. (Kha kha Grikin, "Lei irhong roh," tihna a ni).

³⁵Khanchu, a mikuarhai a hong irhonga, a milei irkhitna khom a hong irsûta, fel takin a chong thei ta.

³⁶Khan, Jisua'n mipuihai kuang, tûte hril viat loi hrangin thu a pêka, khannisianlân, a khap lia an inpuang li lia tâka.

³⁷An hriat murdi'n ar khêl an ti tak taka, "A isin tinrêng hi ar khêl a ni! kuarsêthai khom an vâp pehaia, chong theiloihai khom a inchongtir thei hi!" an tia.

Marka 8

Jisua'n mipui sângminli a vâina

(Mt 15.32-39)

¹Kha zoro lai khan mipui tamtak an hong irbûm nôka, ite fa hrang an nei no sikin, Jisua'n a irchutirhai kha a koihaia, an kuang,

²"Mipuihai hi ki kuang sîn thum bang an om tâka, ite fa hrang an nei ta no sikin lungkham an om bâka.

³Phîngchâma in tiang kin fetirhai lakin lam laia châmsôl irveina an ta, senkhat len vâng chu an hongna a sân a hla pehai sikin," a tia.

⁴A irchutirhaiin "Tu mo hi ramchâra hin hiang dôra mipuihai infâna hrang bai hmu thei hrang?" tiin an sâma.



⁵Jisua'n, "Bai idôr mo nin inei?" tiin ar donhaia. "Sari," tiin an sâma.

⁶Khanchu, mipuihai kha irnênga toi hrangin thu a pêka, kha hnung chu bai sari chu a lâka lômthu a hril zoiin, a khoia; mipuihai laia sem hrangin a irchutirhai kuang a pêka, an sem tâka.

⁷Nga tômte an nei saa kha khom kha satvurna a hril zoiin an semtirhaia.

⁸Mi tinin an khop dôr dôrin an fâka, an fâk mihlia a'rnôi chu khamphulu sari an hrût insipa.

⁹An rêngin sângminli vêl an ni; kha hnung chu Jisua'n mipui kha an chîntirhai tâka.

¹⁰Jisua chu a irchutirhai leh irkuanga an chuang zôi zela, Dalmanutha ram tiang an fe ta.

Farisaihaiin irsinsiana an zong

(Mt 16.1-4)

¹¹Khan Farisaihai kha Jisua kuang an hongama an chel theina hrangin an irsêlpuia. Pathianin ama a inham le inhamloi ti inhriat theina hrangin irvân ata irsinsiana irhmuhai hrangin an ngêna.

¹²Khan, Jisua kha a milungin ar hniaka, "Itho sikin mo atûnlaia mihaiin irsinsiana an izong? A dik takin nangni ki hril, atûnlaia mihai kuang irsinsiana rêng rêng pêk ni no ni," a tia.

¹³Khan, anni kha mâksanin, irkuang chung a chuang nôkin varâl tiang panin a fe tâka.

Farisaihai chol le Heroda chol

(Mt 16.5-12)

¹⁴A irchutirhaiin bai chôi hrang an irnghila, irkuanga khan bai tang khat vai ti no chu bai dang rêng rêng nei mahai.

¹⁵Khan, Jisua'n an kuang, "Farisaihai chol le Heroda chol ata irhrung unglân, irdîn roi," a ti ngita.

¹⁶Anni'n chu, "Bai ei nei viat no sikin hi hi a iti kêng," tiin an irti irhlôma.



¹⁷Jisua'n an chong kha a len hriatin chu an kuang, "Itho sikin mo bai nin inei loi thu ngot nin ibuaipui? Atûn ten nin la inhriat thei loi ma ni? A'rngailam khom nin la inhriat loi ma ni? Nin milung a ingar hrai ma ni?"

¹⁸Mit nei chakin ithoa mo mit boi anga nin iom? Mikuar nei chakin ithoa mo mikuar boi anga nin iom? Nin inhriat ta loi ma ni?"

¹⁹Mipui sângringa, bai ringa ki khoi lai khan an ifâk mihlia a'rnôi kha khamphulu iza mo nin ihrût insip kha?" tiin a'rdonhaia. Anni'n "Sômhleihni," tiin an sâma.

²⁰Khan, "Sângminli, bai sari ki khoi laia khan a'rnôi kha khamphulu i za mo nin ihrût insip kha?" a tia. Khan anni'n, "Khamphulu sari," tiin an sâma.

²¹Khanchu Jisua'n an kuang, "Atûn ten khom a'rngaina lam nin la inhriat loi mo?" a tia.

Jisua'n Betsaida khuua mitcho an dam

²²Khan, Betsaida khuua an hong tungin chu, mipui senkhatin Jisua kuang mitcho inkhat an hruaia, khapa kha tôn hrangin an ngêna.

²³Khan Jisua'n mitcho kut kha chelin kho pên tiang a fepuia; a mit an chil pe zoiin chu a chungu kut a'rngata, a kuang, "Ni hmu thei ta mo?" tiin ar dona.

²⁴Khan a'rhei vêla, "O mihriam ki hmua, thingkung fe dêtdût angin ki hmu," a tia.

²⁵Khan Jisua'n khapa mita khan a kut a'rngat nôka. Kha zoroa khan kha mitchopa khan a en ngita, a mit a hong vâv nôka, itinrêng fel takin a hmu thei ta.

²⁶Khan Jisua'n, "Kho sênga lût ta no roh," tiin a in tiang an fetir ta.

Petera'n Jisua kha Krista a ni ti a phuangna

(Mt 16.13-20; Lk 9.18-21)

²⁷Khan, Jisua le a irchutirhai kha an fe suaka, Filipa Kaisari ram khuahai kha an irfanga; khan an fe pumin a irchutirhai kuang, "Mihaiin keima hi tu mo ki ni, an ni ti ngai?" tiin ar donhaia.



²⁸Khan anni'n chu, "Baptistu Johana," nang an tia; senkhatin chu, "Deipu Elija, senkhatin tiana deipuhai laia inkhat khôk nih a ti, nang an ti ngai" tiin an sâma.

²⁹Khan Jisua'n an kuang, "Khante, nangni'n te tu mo nin ni ti?" tiin ar donhaia, Petera'n a kuang, "Krista" tiin a sâma.

³⁰Kha hnung chu a thurchi kha tûte hril viat loi hrangin a khaphai khaka.

Jisua'n a ituang hrang thu le a ithi hrang thu a lei insîr

(Mt 16.21-28; Lk 9.22-27)

³¹Khan, a irchutirhai kuang, "Mihriam Nâipa'n intakna tamtak a ituang ngêt hrang thu hai, upahai, Ochai inlalahai le Dân irchutirtuhaiin an ihnôl hrang thu hai, an ithat ngêt hrang thu hai, sîn thum hnunga a ithoinôk ngêt hrang thu hai," ar chutir irphut tâka.

³²Kha thu kha fel takin an sîr pehaia. Khanchu, Petera'n ama kha a bingin a hruaia a hala.

³³Khannisian, Jisua kha a'rheia, a irchutirhai tiang a ena, "Setan, ki hnunga fe roh. Ni ingaituana hi Pathian ata ni loiin, mihriam ata kêng a ini!" tiin Petera kha a hala.

³⁴Khan, Jisua'n mipuihai le a irchutirhai kha a koihaia; an kuang, "Tukhom a ni zui nuam ka chu mâni irnghilin, a Kros irputin ni zui ri se.

³⁵Tukhom mâni hringna inzôk nuam ka chu inchân a ta, khan tukhom keima leh Thurchi Sa sika a hringna inchân ka chu inzôk a ti.

³⁶Mi'n rammual hi a pumin nei sianlân, a hringna inchân ta sian, a ta hrangin imo a'rfêna?

³⁷Mi'n a hringna hmu nôk hranga a pêk hrang ite a nei no sikin.

³⁸Tukhom atûnlaia mihai, uire hmang le sual takhai laia keima le ki thu inzakupui chu, Mihriam Nâipa hi vântîrtôn irthianghai le a Pa roiinpuina leh a zuang tika chu lan zakupui a ti," a tia.

Marka 9



¹Khan, ama ngêtin a irchutirhai kuang, “A dik takin nangni ki hril, nangni hitaka ngîr senkhathai hi chu Pathian Ram kha a sinthotheina leh a zuang tung an hmu mâka chu thi no nihai,” a tia.

Hmêl danglamna
(Mt 17.1-13; Lk 9.28-36)

²Khan, sîn ruk zoia chu Jisua’n, Petera, Jakoba le Johana hai, tâng irsâng taka a fe puihai tâka, an makunga a hmêl omzia kha a hong danglam tâka.

³Khanchu, a silkaihai khom rammuala puan irsûkpuhaiin an isôp incek thei bana chekin a hong irtêk tâka.

⁴Khan Elija le Mosia kha an zuang inlâra, Jisua’n a chongpuihaiin an hmua.

⁵Khanchu, Petera’n Jisua kuang, “Irchutirtu, hitaka om hi ei ta hrangin a sa! Kairêng sin ki ta, nangma hrang inkhat, Mosia hrang inkhat, Elija hrang inkhat,” a tia.

⁶An chi hrai tâk sikin, ti hrang khom a inhriat ta loi a ni.

⁷Khan, sôm zuang zîngin, a’rhlîhaia; sôm ata kha hnuk irhai a zuang suaka, “Ama hi ki Nâipa lungthung tak a ni, a chong irngai roi,” a tia.

⁸Khanchu, inrang takin an en vêla, Jisua ti no chu tukhom hmu ta mahai.

⁹Tâng rengata an zuang chum laiin Jisua’n an kuang, “Mihriam Nâipa mithi lai ata a thoinôk mâka chu nin thil hmuhai kha tûte kuang hril no roi,” tiin a hrilhaia.

¹⁰Khanchu, kha a thupêk kha an zôma, nikhomsian, “Mithi lai ata thoinôkna thu a hril kha i tihna ma ni ta?” tiin an irdon irhlôma.

¹¹Khan anni’n chu Jisua kuang, “Itho sika mo Dân irchutirtuhaiin Elija kha zuang bak a ti an iti ngai?” tiin an irdona.

¹²Khan Jisua’n an kuang, “Thil tinrêng siam infel hrangin Elija kha a izuang masa ngêt hrang a ni, khannisianlân, itho sika mo Pathian Thubu’n Mihriam Nâipa dengtheina tamtak tuangin mi ihnôlin la om a ti, a iti?”

¹³Khan, nangni ki hril: Elija chu a zuang tâka, a thurchi an lei irziak ang tâk khan ama chu an nuam ang takin an lei lo tâk,” a tia.



Jisua'n ramilhli ichel an damna

(Mt 17.14-21; Lk 9.37-43)

- 14**Khan a irchutir danghai kuang an zu tungin chu, an kôla mipui tamtakhai le Dân irchutirtuhaiin an lei irsêlpuihai lai tak an zu hmua.
- 15**Khan mipui murdi'n Jisua kha an hmu'n chu, ar khêl an ti oka, ama tiang an van tâna chubai an va mûka.
- 16**Jisua'n a irchutirhai kuang, "Annihai leh khan itho mo nin irsêl?" tiin ar donhaia.
- 17**Mipui laia mi inkhatin a kuang, "Irchutirtu, ki nâipa ramilhli ichel chong theiloi nin dam pe hrangin ki hong ihruai a ni.
- 18**A puang pe zoro'n chu an rîltir rak ngai, a chilhuan an suaka, a ha a riala, an ngar khak ngai. Inhnotpai pe hrangin ni irchutirhai ki ngêna, khannisianlân thei mahai," tiin a hrila.
- 19**Jisua'n an kuang, "Idôra iamna boi mihriam mo nin ini tâk? Idôr ten mo nin kuanga omin nangni ki irngaitua thei hrang? Nâipang kha ki kuang hong hruai roi," a tia.
- 20**Khanchu, a kuang an hong hruaia, ramilhli khan Jisua a hmu'n chu nâipangtepa kha a sân deng an theitira; hnuaia a chinginrîla, a chilhuan suakin a hong inhlum a va inhluma.
- 21**Khan Jisua'n a pa kha ar dona, "Hianga a om phutna hi itiklai ata ma ni?" a tia. "Nâipangte a ni lai ata kêng," tiin a sâma.
- 22**Ramilhli'n voi iza meia le tuia namthâkin that hrang a tuma, khasikin, nangin ni thei paiin chu lung nin khamin lân, ni san roh, tiin a ngêna.
- 23**Jisua'n a kuang, "Ni theiin chu, mo ni iti! A iamhai ta hrangin chu itinrêng hi tho thei a ni, ti hi ni inhriat loi ma ni?" a tia.
- 24**Khanchu nâipangte pa kha khêkin, "Ki iam, ki iam thei ualna hrangin ni san roh," a tia.



²⁵Khan, Jisua'n mipui hong intân irbukkhôm kha a hmu'n, ramilhli kha a hala, a kuang, "Nang ramilhli chongtheiloï le kuarsêt, thu nang ki pêk nâipangtepa sâng rengata kha hong suakin lân, lût nôk ta no roh," a tia.

²⁶Khan a khêk suaka, deng an theitir bit hnungin a hong suak tâka, nâipangtepa kha thi ang dôrin a oma, mi tamtakin chu, "A thi tâk kêng," an tia.

²⁷Khannisianlân, Jisua'n a kuta a chela, a kaithoia, khanchu a hong thoi tâka.

²⁸Khan Jisua ina a va lûtin, chu a irchutirhaiin a kuang, "I sika mo keini'n te kin inhnot suak thei loi?" tiin inrûkin an irdona.

²⁹Jisua'n, "Hiang hi chu chongchaina le bu ngheina ti no'n chu, insuak thei ni mah," a tia.

Jisua'n a thi hrang le a thoinôk hrang thu a hrilna

(Mt 17.22-23; Lk 9.43-45)

³⁰Jisua le a irchutirhai kha Galili hro'n an fe suaka, a omna kha tûte inhriat nuam maka.

³¹A irchutirhai kha a hriila, an kuang, "Mihriam Nâipa hi mihriamhai kuta incheltirin om a ta, that an ti; khan an that hnung sîn thum tena thoi nôk a ti," a tia.

³²Khannisianlân a thu insîrhai kha a omzia inhre thei mahai, ar don lak ngam mahai.

Tu mo roiinpui tak hrang

(Mt 18.1-5; Lk 9.46-48)

³³Khan, Kapernaum an hong tunga, in sînga an lût tena chu, Jisua'n a irchutirhai kuang, "Lampuia khan i thu mo nin insîr irhlôm kha?" tiin a'rdonhaia.

³⁴Lampuia khan tu mo ei laia hin a lian tak hrang, ti thu an insîr irhlôm sikin an dâihreka.

³⁵Khanchu Jisua kha a toia, a irchutir sômhleihnihai kha a koia, an kuang, "Tukhom a maton tak ni nuam chu, a hnungkhôn taka an iom hrang a ni, mi tin sinhotua om bak a ti," a tia.



³⁶Khan, Jisua'n nâipangte a kaia, an laia an ngîrtira, inkua pumin an kuang,
³⁷“Tukhom ki'rhming sika hianga nâipangte inkhat khom lôm ka chu keima ni lôm ni an ti; tukhom keima ni lôm chu, a ni tîrpu lôm khom an ni sa,” a tia.

A ni doiloipu chu eini tianga kop a ni

(Lk 9.49-50)

³⁸Johana'n a kuang, “Irchutirtu, mi inkhat nir hminga ramilhli inhnót suak kin hmua, kin chanpui a ni no sikin kin hong khap,” a tia.

³⁹Jisua'n, “Khap ta no roi, tukhom ki'rhminga sinirkhêl thoa, a ni hril insiat thei om mahai.

⁴⁰Tukhom a ni doi loitu chu ei tianga kop a ni.

⁴¹Tukhom Krista mi nin ni sika, tui khilât khat in hranga nangni pêkpuhai ka chu, a diktakin nangni ki hril, kha mi khan a lômman hmu ngêt a ti.

Sual hranga inthêmna

(Mt 18.6-9; Lk 17.1-2)

⁴²“Tukhom, hi a ni iampu chîntehai laia inkhat khom intûktir ka chu, an ringa bu nôina lung liantak inhlitirin tuikhangliana inthahai sian, a ta hrangin sa ual a ti.

⁴³Khan, ni kutin nang an tûktirin chu, tan zôi ro! kut kianghni neia hremhmuna fe nêkin chu kut bûia hringnaa fe ni ta hrangin a sa ual.

⁴⁴Kha hmuna khan chu irnge thi ta ngai maka, mei khom ram ngai ma.

⁴⁵Khan ni ke'n nang an tûktirin chu tanpai zôi roh, ke kianghni neia hremhmuna pai nêkin chu, ke bûia hringnaa lût ni ta hrangin a sa ual.

⁴⁶Kha hmuna khan chu irnge thi thei ngai maka, mei khom thi ta ngai mah.

⁴⁷Khan, ni mit inkhatin nang an tûktirin chu kêlsuak roh! Mit kiangkhat neia Pathian Rama lût, ni ta hrangin a sa ual: mit kianghni neia hremhmuna pai nêkin chu,

⁴⁸Kha hmuna khan chu an irnge thi ta ngai maka, mei khom ram ngai ma.



⁴⁹“Irbôlna michi al leh an irthâr ngai angin mi tinrêng meiin irthâr la nih an ti.

⁵⁰Michi hi a sa; khannisianlân, a dong hnungin te i leh mo nin in-al nôk hrang? Nangni ngeia michi nei unglân, irngei irhlôm roi,” a tia.

Marka 10

Jisua'n dôngma mâk thua a irchutirna

(Mt 19.1-12; Lk 16.18)

¹Khan, Jisua'n kha hmun kha a mâka, Judai ram panin Jordan râla a kâia, mipuihai kha a kuang an hong irbuka, a irchutirhai ngai ang dênin ar chuhaia.

²Khan Farisai senkhat a kuang an hong, ama fiana hrangin, “Mi'n a dôngma a imâk hi, dânin a phal mo?” tiin an irdona.

³Jisua'n an kuang, “Mosia'n itin mo dân nangni a pêk?” tiin ar donhaia.

⁴Anni'n chu, “Mosia'n chu irmâkna lekha irziakin a iphal ngai a ni,” tiin an sâma.

⁵Jisua'n an kuang, “Nin milung a ngar sikin kêng, kha dân kha nangni a irziak pe mo sôn mak chêi.

⁶Khannisianlân, rammual irsiang ata Pathian thubu'n a iti angin, ‘Pathianin pasal le nupang a siam a ni’.

⁷Khasikin pasalin a nu le a pa masan a ta, a dôngma thop a ti.

⁸Khanchu, an ruaiin taksa pumkhat hong ni ta an ta, inhni ni ta no nihaia; taksa pumkhat hong ni ta an ti.

⁹Pathianin a irzom tâk chu mihriamin sen ta no ri se,” a tia.

¹⁰Khan in sâng an lût tena chu a irchutirhaiin kha thu kha an irdon nôka.

¹¹Ama khan an kuang, “Tukhom a dôngma mâka mi dang nei chu, a dôngma a iuiresan a ni;

¹²Khang dênin nupang khomin a pasal a mâka, mi dang nei chu a pasal a iuiresan a ni,” a tia.



Jisua'n nâipangtehai sat a vur thu

(Mt 19.13-15; Lk 18.15-17)

¹³Mi senkhatin a kuang nâipangtehai an hong hruaia, an chung a kut irngat hrangin, irchutirhai khan an lei halhaia.

¹⁴Khannisianlân, Jisua'n kha kha a hmu'n chu a ning an mura, a irchutirhai kuang, "Nâipangtehai kha ki kuang inhongtirhai unglân, khaphai no roi, Pathian Ram chu hiang mihai ta kêng a ini.

¹⁵A dik takin nangni ki hril, tukhom nâipangte'n Pathian Ram a ilôm anga lôm loi chu a sênga lût thei viat no ni," a tia.

¹⁶Khanchu, nâipangtehai kha an kuahaia, an chung a kut irngatin sat a vurhai ta.

Ruatharte irchong kumtuang hringna zong thu

(Mt 19.16-30; Lk 18.18-30)

¹⁷Khan, Jisua kha fe nôk hrangin a hei irphêt le chu, mi inkhat a kuang a hong intâna, khûksadelin, "Irchutirtu sa, kumtuanga hringna ki nei theina hrangin imo ki itho hrang?" tiin ar dona.

¹⁸Jisua'n a kuang, "Itho sika mo sa ni ni iti? Pathian ti no chu tûte sa om mahai.

¹⁹Thupêkhai kha chu nin hriat khate: 'Mi that no roh; uire no roh; inru no roh; milakin bâto tho no roh; mi huang no roh; ni nu le pa mahrip tho roh,' tihai hi," a tia.

²⁰Khan khapa khan a kuang, "Irchutirtu, kha thupêk murdihai kha chu nâipangte ki ni lai ata ki izôm ngai kêng," a tia.

²¹Jisua'n khapa kha en ngitin, lungthungna tak neiin a kuang, "Lamkhat ni la'rsam, fe'n lân ni inei murdi zuarin lân, kha sum kha inrianghai pe'n lân, khanchu, irvâna irchon nei ni ti; kha hnung chu hongin lân, ni hong zui roh," a ti pea.

²²Khapa khan kha chongbâi kha an hriatin chu, a hmâi a môk rupa, milung inzîng takin a rota, sum tamtak nei mi a ni sikin.



²³Khan, Jisua kha a hong irhei vêla, a irchutirhai kuang, “Irchonghai hrangin chu Pathian Rama lût hi, idôra intak mo a ini tâk!” a tia.

²⁴Khan, a irchutirhaiin a thuhiril kha ar khêl an ti oka, khannisianlân, Jisua’n a sâmbhai nôka, an kuang, “Nâihaio, Pathian Rama lût hi chu an tak kêng:

²⁵Mi’rchong Pathian Rama lût nêkin chu, saringsei simphuai mikuara lût hi ol ual a ti,” a tia.

²⁶Khan, anni’n chu ar khêl an ti tak taka, “Khante, tu mo inzôkin om thei hrang?” tiin an sâma.

²⁷Jisua’n anni kha a ena, “Kha kha mihriam hrangin tho thei zât ni maka, Pathian hrangin chu tho thei loi om ma, Pathian hrangin chu itinrêng tho thei a ni,” a tia.

²⁸Petera’n a kuang “Irngai ta, thil tinrêng mâksanin nang kin zui tâk a ni,” tiin a hrila.

²⁹Jisua’n, “A dik takin nangni ki hril, tukhom keima sik le Thurchi Sa sika in mani, urêng hai mani, farnuhai mani, nu mani, pa mani, nâihai mani, ramhai mani, mâksan ka chu,

³⁰hi dam sêng renga hin in mani, urêng hai mani, farhai mani, nu mani, pa mani, nâihai mani, ramhai mani, a bâk irza’n hmu an ta, dengintheina le, zoro la hong hranga kumtuang hringna hmu sa a ti.

³¹Khannisianlân, mi tamtak a masa taka omhai kha inhnung taka la om an ta, inhnung taka omhai chu maton taka la om an ti,” a tia.

Jisua’n a thi hrang thu an sîr voithumna

(Mt 20.17-19; Lk 18.31-34)

³²Khan, Jisua le a irchutirhai kha Jerusalem hong fe hrangin lampuia an oma, Jisua chu maton an saa. A irchutirhaiin ar khêl an ti oka, a zuipu murdi’n chu an chia. Khan a irchutirhai kha an bingin a hruaihai nôka, a chung a thil la hong tung hranghai an sîr pehai nôka, an kuang,



³³“Irngai u ta, Jerusalema ei hong ife nôk hrang a ni hi; Mihriam Nâipa hi Ochai inlalthai le Dân irchutirtuhai kuta incheltirin om a ti. Thi hrangin rêlinchuk an ta, kha hnung chu Jentailhai kuta pêk an ti.

³⁴Anni khan nuiza siamna’n hmang an ta, inchil sa an ta, zêm an ta, that an ti, khannisianlân, sîn thum zoia thoi nôk a ti,” a tia.

Jakoba le Johana thil ngên

(Mt 20.20-28)

³⁵Khan, Zebedeia nâihai Jakoba le Johana’n Jisua an hong nâia, a kuang, “Irchutirtu, ni kuanga kin nghihai hi, ni ni itho pe kin nuam,” an tia.

³⁶Khan, Jisua’n an kuang, “Nin ta hrangin imo nangni tho pe inlân nin inuam?” a tia.

³⁷Anni khan a kuang, “Ni roiinpuina Rama ni rêngtoihmun chang tiang inkhat vei tiang inkhat nin toitir hrangin kin nuam,” tiin an sâma.

³⁸Jisua’n an kuang, “Nin izong hi nin inhriatloi kêng. Dengtheina khilât ki iin hrang hi nin iin thei hrang ma ni?” a tia.

³⁹Khan, anni’n chu, “Kin thei,” tiin an sâma. Jisua’n an kuang, “Ki khilât in hrang chu in thei nin ta, ki baptisma chang hrang khom chang thei nin ti.

⁴⁰Khannisianlân, ki chang tiang mani ki vei tiang mani a toi hrangin chu keima inthang hrang ni maka, kha hmunhai kha chu Pathianin a inkung pehai ta hrangin kêng a ini,” a ti pehaia.

⁴¹Kha thu kha a irchutir sômkhathaiin an lei inhriatin, Jakoba le Johana chung a khan an ning an mura.

⁴²Khasikin, Jisua’n an rêngin a koihaia, an kuang, “Jentailhai chung a roirêltua an iphunhai chu an chung a an inlal tak tak ngaia, an hruaituhai khom an chung a ircham an nei tak tak ngai tih khom nin inhriat a ni.

⁴³Khannisianlân, nangni laia chu khang kha ni no ni, tukhom nin laia mi lian chang a nuamin chu, nin sinthotua a iom bak ngêt hrang a ni.

⁴⁴Khabana, nin laia tukhomin maton tak ni a nuamin chu mi murdi suaka a iom bak ngêt hrang a ni.



⁴⁵Mihriam Nâipa lua hi mi'n a sin an itho pe hranga zuang ni maka, mi sintho pe hrang le mi tamtak irtanna hranga a hringna pe hrangin kêng a izuang a ni," a tia.

Mitcho Bartimaia indam thu

(Mt 20.29-34; Lk 18.35-43)

⁴⁶Khan, Jeriko an hong tunga, Jeriko rengata Jisua le a irchutirhai le mipui tamtak le a suak laiin kutdo mitcho, Timaia nâipa Bartimaia kha lampui kôla a lei toia.

⁴⁷Nazaret Jisua a nih ti an hriatin chu a khêka, "Jisua Davida nâipa! Lung nin kham roh," a tia.

⁴⁸Mi tamtakin dâihrek hrangin an hala, khannisianlân, ama khan, "Davida nâipa, lung nin kham roh!" tiin a khêk nôk ual uala.

⁴⁹Jisua a ngîra, "Hong koi u ta", a tia. Khan mitchopa kha an hong koia, a kuang, "Lungirngam takin omin lân, thoi roh, nang a koi," an ti pea.

⁵⁰Khan, a puan a pai raka, ar chôma, Jisua kuang a fe ta.

⁵¹Jisua'n a kuang, "Ni chung a imo nang tho pe inlân ni inuam?" ti'n a'rdona. Khan mitchopa khan a kuang, "Irchutirtu, hmu thei ki nuam," tiin a sâma.

⁵²Jisua'n a kuang, "Fe ta roh, ni iamna hi ni idampui a ni," a ti pea. Khanchu, a hmu thei zôi tâka, lampuia khan Jisua a zui tâka.

Marka 11

Jisua'n roiinpui taka Jerusalem a lûtna thu

(Mt 21.1-11; Lk 19.28-40; Joh 12.12-19)

¹Khan Jerusalem khua an tung tônin, Bethfage le Bethani kho kôl Oliv tâng an hong tungin, a irchutirhai laia mi inhni a tîra,

²an kuang, "Nin maton khuaa son fe unglân, nin tungin chu sakuartungte irkhit, tûte la chuang ngai lina va hmu nin ti. Kha kha sût unglân, hin hong kai roi.

³Khan, tukhomin, 'Kha kha ithoa mo nin ikai?' tiin nangni an irdonin chu, 'Rengpa'n a izong kêng, hong inthaktir nôk zôi a ti,' ti roi," a tia.



⁴Khanchu an fe tâka, sakuartung te, mikot kôla irthung, pên tiang mikot kôla ngîr kha, an va hmua, an sût tâka.

⁵Khataka ngîrhain, “Ithoa mo sakuartung te kha nin isût?” an ti pehaia.

⁶Jisua’n a ihril pehai lam ang takin an sâma, khanchu an ife an phal tâka.

⁷Sakuartungte kha Jisua kuang an hong kaia, a chung a punhai an dâp zoiin chu, Jisua kha a chuang tâka.

⁸Mi tamtakin lampuia an punhai an dâpa, mi dangin loa sôlhna sâtin an dâp saa.

⁹Khanchu a mân tianga fehaila a hnunga zuipuhai khan, “Hosana! Rengpa irhminga zuang chu inpâkin om ri se;

¹⁰Ram zuang tung hrang ei pa Davida ram chu inpâkin om ri se; Anchungtaka khin Hosana,” tiin an khêka.

¹¹Khan, Jerusalem a tungin chu Tempila a lûta, thil tinrêng a en vêla. Khannisianlân khohloi a lei ni tâk sikin a irchutir sômhleihnihai leh Bethani-a an fe tâka.

Jisua’n theipui kung khua a sâlna

(Mt 21.18-19)

¹²Zîng nôka chu Bethani rengata an hong kîr nôkin, Jisua kha a phîng a châm pea.

¹³Khan, theipui kung hna nei hla vit ata a hei hmua, “A ra mo ki hmu ro rôl,” tiin a va pana; khannisianlân, a va tungin chu a hna ti no chu ite va hmu maka; a ra zoro a ni no sikin.

¹⁴Jisua’n theipui kung kuanga khan, “Atûn ata chu tûte’n ni ra fa ta no ri sehai,” a ti pea. A irchutirhai khomin kha chong kha an inhriat.

Jisua’n Tempil a’rthiangtir thu

(Mt 21.12-17; Lk 19.45-48; Joh 2.13-22)

¹⁵Khan, Jerusalem an tungin chu Jisua Tempila a va lûta, Tempila neinun zuartuhai le irchôkpuhai kha a’rzûlpaihaia. Sum thûltuhai maichâm le phervali zuartuhai toihmun khom a nam inrîlpai pehaia.



¹⁶Khan, tukhomin Pathian Tempila neinun an ichôi khom phal ta mah.

¹⁷Khanchu, an kuang, “ ‘Ki in chu nam tin ta hranga chongchaina in ti an tih,’ ti irziak a ini loi ma ni? Nangni rêkin chu inruhai chêng inbualna’n nin isiam hi,” tiin a’rchuhaia.

¹⁸Khan Ochai inlalahai le Dân irchutirtuhaiin kha kha an inhriatin, an that theina hrang lampui an zonga. Ama kha a sân an chia, asan chu mipuihai khan ar chutirna kha ar khêl an ti zap sikin.

¹⁹Khan, khohloi rikipin Jisua le a irchutirhai kha khopui ata an fe suak ngai.

Theipui kung ata irchu hrang

(Mt 21.20-22)

²⁰A tûk zînga chu lampui kha an hong hro’n theipui kung kha a’rzung dêna thêmin an hmu tâka.

²¹Khanchu, Petera’n a hong inhriat suak nôka, a kuang, “Irchutirtu, en ta, theipui kung khua ni isâl kha a thêmin vîng ta,” a tia.

²²Jisua’n a kuang, “Pathian iam roi.

²³A diktakin nangni ki hril, tukhom hi Oliv tâng hi irsonin lân, so tuikhangliana zu irpai roh, ti sianlân, lungrîla lunghla viat loiin a ihril kha tung ngêt a ti, iamtuhai ka chu an ihril ang takin hmu an ti.

²⁴Khasikin nangni ki ti, itinrêng chongchaia nin inghi ka chu hmu sai angin irbe unglân, khanchu, hmu nin ti.

²⁵Khan, chongchai hranga nin ngîr rikipa, tu chungâ khom nuarna nin nei khomin ngaidam roi, nin pa irvâna mi khomin nin inchâinahai nangni a ngaidam theina hrangin.

²⁶Khannisianlân, nin ngaidam no’n chu nin pa irvâna mi khomin nangni ngaidam ual no ni,” tiin a hril pehaia.

Jisua Irchamneina an irdonna thu

(Mt 21.23-27; Lk 20.1-8)

²⁷Khan, Jerusalem an tung nôka, Tempila a lêng laiin Ochai inlalahai, Dân irchutirtuhai le upahai kha Jisua kuang an hongâ,



²⁸“Tu irchamin mo hihai hi ni itho? Hi thilhai hi tho hrangin tu’n mo ircham nang a ipêk?” tiin an irdona.

²⁹Jisua’n, “Kei khomin chongbâi khat nangni irdon ki ta, ni don unglân, khanchu, tu irchamin mo hi thilhai hi ki itho nangni hril ki ti.

³⁰Johana’n baptisma a itho theina ircham kha, Pathian ata mo, mihriam ata mo? ni sâm roi,” a tia.

³¹Khanchu, an bingin an irsêla, “Imo ei iti hrang tâk? ‘Pathian rengata’ ei ti lakin te, itho sika mo a chong nin iiam loi? ni ti a ta.

³²‘Mihriam rengata’ mo ti ih?” an tia. Khannisianlân, mipuihai kha an chia, asan chu, mi murdi’n Johana kha deipu’n an lei pom sikin.

³³Khasikin, “Inhre ma ung,” tiin Jisua kha an sâma. Khan Jisua’n, “Kei khomin tu irchamin mo hi thilhai hi ki itho, nangni hril ual no ning,” tiin a sâmhaia.

Marka 12

Grep Irhuan le a enkolhai chongirkhek

(Mt 21.33-46; Lk 20.9-19)

¹Khan, Jisua’n chongirkhekin an kuang thu an sîra, “Voikhat chu mi inkhatin Grep irhuan a siama, dâiin ar kula, grep sômna hrang khur a choia, in irsâng a sina. Khanchu, loi enkol ngaihai kuang a chuan irhlo hrangin a pêka, ram danga an zin tâka.

²Khan, grep irhmal zoro a hong ni’n chu, a dongtum la hrangin a enkolhai kuang a suak inkhat a tîra.

³A enkolhaiin a suak kha an lei chela, an vîka, kut rongin an infetir tâka.

⁴Khan, ama khan suak dang a tîr nôka; kha khom kha a lu an lei vîk phopa mualphoi an lei sak bita.

⁵Ama khan suak dang a tîr nôka; kha pa kha chu an lei that ta. Suak tamtak khom senkhat an lei vîkhaia senkhat an lei thathai.

⁶Inkhat a nâi lungthungtak a la neia; ‘Ki nâipa hi chu mahrip lei tho ngêt an ti,’ tiin a nâipa kha a hnungkhôn taka a tîr tâka.



⁷Khannisianlân, irhuan enkoltuhai khan, ‘Hi pa hi irchon lua hrangtu chu a ni, tho that ei ti, ar chon lua hrang hi ei lua theina hrangin,’ an irtia.

⁸Khaang khan a nâipa kha an chela, an thata, a ruak khom grep irhuan pên tiang an pai tâka.

⁹“Khan, irhuan chongpu khan imo a ilo hrang tâk?” tiin Jisua’n ar dona. Hong a ta, kha mihai kha thathai a ta, grep irhuan kha enkoltu dang pe paihai a ti.

¹⁰Hi Pathian thu hi nin itep loi ma ni? ‘In sinhaiin lung an ipai, hmanghmunboia an ibe kha. A kila lung kâmom tak a hong ni ta.

¹¹Kha kha Rengpa itho a nia, ei mit hmua ar khêl tak chu a ni!’ ti hi,” a tia.

¹²Kha chongirkhek kha Juda hruaituhai demin a insîr tih inhriatin Jisua kha chel an tuma, khannisianlân, mipui an chia, ama kha an mâka, an rot ta.

Khâzana chôi chungchânga

(Mt 22.15-22; Lk 20.20-26)

¹³Khan, a thu’nsîra irthokin chel hrangin Farisai senkhathai le Heroda pâla mi senkhat a kuang an tîra.

¹⁴A kuang an hong tungin chu, “Irchutirtu, mi dik tak ni nia, tukhom ngaisak bîk nei mak che ti kin inhriata, tukhom hnôl ual loiin thei dôrin Pathian thu mi nir chuhai ngaia, khan, Kaisara kuanga khâzana chôi hi mo a’rthiang, irthiang ma mo? kin ipêk hrang mo, kin ipêk loi hrang mo?” an tia.

¹⁵Khannisian, Jisua’n an vârirletzia kha an hriat chiana, an kuang, “Itho mo nin ni ifia? Aduli pum inkhat hong chôi u ta, lei en rong,” a tia.

¹⁶Khanchu, an hong chôi pea, ama khan an kuang, “Tu irlim le tu irhming mo a chuang?” tiin ar donhaia. Anni khan, “Kaisara,” tiin an sâma.

¹⁷Khanchu, Jisua’n an kuang, “Kaisara ta chu Kaisara pe unglân, Pathian ta chu Pathian pe roi ba,” a ti pehaia. Kha hnung chu Jisua chung a sân an irngai ar khêl tak taka.

Thoinôkna thu irdonna

(Mt 22.23-33; Lk 20.27-40)



- ¹⁸Khan, thoinôkna om ma ti ngai Sadukaihai Jisua kuang an hongga.
- ¹⁹“Irchutirtu, Mosia’n hi dân hi kin ta hrangin a’rziaka; tukhomin nâi nei loiin a dôngma thisan sianlân, a sangpa khan kha meithâi kha a inei ngêt hrang a ni, nâi an neia a thitu upa nâihaia ibe an nina hrangin.
- ²⁰Voikhat chu urêng sari an oma; a ulian takin dôngma a neia, irchi nei loiin a thia.
- ²¹Kha hnung an hnina khomin a nei nôka, irchi nei loi ngêtin a thia. An thumna khomin khang dênin a neia.
- ²²A hnuai nôkhai khomin khang dên khan an hong nia; urêng sarikai khan kha nupang kha an lua senga, tukhomin nâi neipui loiin an thi zita. A hnungkhôn taka nupangnu khom kha a thi sa ta.
- ²³Thoinôk tikin teh tu dôngma tak mo a ini hrang tâk? Kha sarikai khan an rêngin an lua senga,” an tia.
- ²⁴Jisua’n an kuang, “Nin irngai insual bâka na! Imo asan nin inhriat mo? Asan chu, Pathian thu le irtha nin inhriat no sika a ni.
- ²⁵Mithikai an thoi nôk tika chu irvâna vântîrtônhai angin om ta an ta, dôngma pasal irnei ta no nihai.
- ²⁶Khan, mithikai kaithoia an om hrang thurchi chu, Mosia lekhabua chînribuk thurchia khan Pathianin, ‘Keima Abrahamâ Pathian, Isaka Pathian, Jakoba Pathian ki ni,’ tia a ichongpui lam kha nin la itep ngai loi ma ni?
- ²⁷Ama chu a hringhai Pathian kêng a ini, mithikai Pathian ni mah. Nin irngai insual ok!” tiin a sâma.

Thupêk roiinpui tak

(Mt 22.34-40; Lk 10.25-28)

- ²⁸Dân irchutirtu inkhatin an chong an hriata, Jisua’n Sadukaihai kha sâмна satak a pêk ti an hriatin chu a hongga, Jisua kuang, “Thupêkhai laia i hi mo a kâmnang tak?” tiin ar dona.
- ²⁹Jisua’n a kuang, “A kâmnang tak chu hi hi a ni, ‘Israelhai, irngai roi! Rengpa ei Pathian vai hi Pathian a ni.



³⁰Rengpa ni Pathian chu ni lungrîl murdi'n, nir tha murdi'n, ni ngaituana murdi'n, ni hrâtna murdi'n lung ni ithung hrang a ni' ti hi.

³¹A voi hnina kâmnang chu hi hi a ni, 'Nangma lung ni irthung ang dênin ni bômhai lungthung roh' ti hi. Hi inhnihai nêka thupêk nang ual reng om mah," tiin a sâma.

³²Dân irchutirtu khan Jisua kuang, "A ni khate, irchutirpu! Ni iti angin Rengpa vai hi Pathian a nia, ama bana chu Pathian dang zel om mahai.

³³Khasikin Pathian chu mihriamin a lungrîl murdi'n, a lunginchongna murdi'n, a hrâtna murdi'n lung a ithung ngêt hrang a ni, Khabana ama lung a irthung ang khan a bômhai khom lung a ithung hrang a ni. Pathian kuang pumhâl irbôl le irbôlna danghai nêkin khom, kha thupêk inhnihai zôm kha a nang ual," a tia.

³⁴Khan, vâr takin a sâm ti Jisua'n an hriatin a kuang, "Pathian Ram chu hla mak che," a ti pea. Kha zoiin chu tûte'n chong rêng rêng irdon ngam ta mahai.

Mesia thu an irdonna

(Mt 22.41-46; Lk 20.41-44)

³⁵Khan, Jisua'n Tempila ar chuhai laiin an kuang, "Itin mo Dân irchutirtuhaiin Mesia kha Davida irchia mi a ni an iti thei?

³⁶Davida ngeiin Irtha Irthiangin, 'Rengpa khan ki Rengpa kuang, ki chang tiang toi mai roh, Ni râlhai ni kezapha hnuaia ki sia mâka chu,' a ti a ni.

³⁷Davida ngei khan ama kha 'Rengpa.' a iti kêng, khasikin itin mo Mesia hi Davida irchia mi a ini thei hrang?" a tia. Mipui tamtakin Jisua thu'nsîr kha lôm takin an irngaia.

Jisua'n Dân irchutirtuhai ata irdîn hranga hrilna

(Mt 23.1-36; Lk 20.45-47)

³⁸A'rchutirhai pumin an kuang, "Dân irchutirtuhai ata irdîn roi, anni chu songkol irfual inngâka chai an nuam ngaia, bazar haia, chubai irmûk an irngaiirsânga.



³⁹Sinagok haia, toihmun satak hai, hruaithena hmuna hmun satak takhai an irngên ngai.

⁴⁰Meithâihai sum an fâka, mi huangna hrangin sôt tak tak an chongchai ngai. Khasika khan an dûk tuang na ual ok a ti,” a ti pehaia.

Meithâi nu tholôm

(Lk 21.1-4)

⁴¹Khan, Jisua Tempila tholôm bôm kôla a toia, tholôm bôma mipuihaiin tholôm an thâklai kha a lei thîr chiana. Irchong tamtakin sum tamtak an thâk rui ruia.

⁴²Khan, meithâi inriangte a hong, damali inhni a thâka, kha kha poisa khat dôr a ni.

⁴³Kha hnung chu Jisua'n a irchutirhai a koi bûma an kuang, “Nangni ki hril, tholôm bôma tholôm thâk murdihai nêkin hi meithâi inriangtenu hin a thâk intam ual tak.

⁴⁴Mi danghaiin chu an inei mihlia, an ihmang zoi loi an thâka, ama'n chu a ineisun, a irdonsuina hranga kha a ithâk zit a ni,” a tia.

Marka 13

Tempil insiat hrang thu Jisua'n an sîr

(Mt 24.1-2; Lk 21.5-6)

¹Khan, Jisua Tempila irthokin a suak laiin a irchutirhai laia inkhatin a kuang, “Irchutirtu en ta! A lunghai hi a lianin, a in sinhai hi a sa bâka!” a tia.

²Jisua'n a kuang, “Hi in lianhai hi ni hmu mo? Hi lunghai hi inchim ni a ta inkhat lua khom a omna hmuna hin mâksan ni no ni,” a tia.

Buaina le dengintheina

(Mt 24.3-14; Lk 21.7-19)

³Tempil irdîn, Oliv tânga Jisua a toi laiin Petera, Jakoba, Johana le Andria hai khan inrûkin thu an irdona;

⁴“Kha kha itika mo a hong iom hrang, khahai murdi hong tung hranga khan irsinsiana thilirkhêl i imo, a hong om hrang? Nin hril ta,” an tia.

⁵Jisua'n an kuang, “Tûte'n nangni an huang nona hrangin irdîn roi.



⁶Mi tamtakin, ‘Krista ki ni,’ tiin ki’rhming sâmin hong an ta, mi tamtakhai huang an ti.

⁷Khan nâi tenga irdoi irhu mani, hla viata irdoi thurchi mani, nin inhriat tika khom buai no roi, khahai kha chu a hong iom ngêt hrang a ni, khannisian zoro hnungkhôn chu la ni no ni.

⁸Nam le nam la’rdoi an ta; ram le ram la’rdoi an ti. Hmun tina hnîngnu lan hnîng a ta, châm la tâk a ti. Kha kha nâihase irphut ang kha ni a ti.

⁹“Nangni chu irdîn roi; ichel la ni nin ta, roirêltuhai kuang hruaiin la om nin ti. Sinagoka zêm phiar ni nin ta, anni Thurchi Sa nin insîr pe theina hrangin ki’rhming sikin roirêltuhai le rênghai makunga la ngîr nin ti.

¹⁰Zoro hnungkhôn a hong tung mân Thurchi Sa hi mi murdi kuang insîrin a iom bak ngêt hrang a ni.

¹¹“Ichelin nin oma, roirêl hmuna hruaiin nin om tikin, nin iti hrang lei insâpin nin milung lei inbuai no roi; a zoro taka nin inhriat tak kha ti roi; nin iti kha nangni chong ni no nia, Irtha Irthiang chong ni a ti.

¹²Urêng khomin that hrangin a sangpa lan cheltir an ta, pa khomin a nâihai lan cheltir sa a ta, nâihai khomin an nu le pahai doi an ta, that an ti.

¹³Keima sikin mi tinin nangni la hnôl an ti. Khannisianlân, tukhom a mong dêna tuang diarhai ka chu saninhringin om an ti.

Intakna ichiom tak
(Mt 24.15-28; Lk 21.20-24)

¹⁴“Intakna ichiom tak kha a ngîr nona hranga a ngîr la hmu nin ti, (a teppu dôrin a omzia inhre ri se) kha tika chu Judai rama omhai kha tânga laizâm tho ri sehai.

¹⁵In chung a om khomin chumin a in sînga neinun zu la no ri sehai.

¹⁶Loia om khomin a puan la hrangin in sînga kîr no ri se.

¹⁷Nupang nâi vonghai le nâite pom lai hai hrangin chu, kha nikhua hai kha nikho ichiom tak ni a ti.

¹⁸Khahai kha phalbia a tung nona hrangin chongchai roi.



¹⁹Kha nikhuahaia intakna kha chu Pathianin rammual a siam phut ata a vuan tena rammualin a lei inhriat ngai murdi nêka irkhêl ual tak chu a ni hrang sikin. Khaanga kha chu itiklai khom om nôk viat ta no ni.

²⁰Rengpa'n kha nikhuahai kha inbong no sian mihriam tûte dam suak no nihai; a mi inthanghai sikin a inbong a ni.

²¹“Kha zoro tika chu, tukhomin nin kuang, ‘En u ta, Krista chu hi hi te,’ mani, ‘En u ta, so so mani,’ an ti khomin taksôn no roi.

²²Krista dol le deipu dol an la suak hrang sikin, Pathian mi irthianghai ten khom an theiin chu an huang theina hrangin sin irkhêlhai le thilirkhêlhai khom tho an ti.

²³Nangni chu irdîn roi! A zoro a tung mân itinrêng nangni ki lei hril diam ta a ni.

Mihriam Nâipa zuang hrang thu

(Mt 24.29-31; Lk 21.25-28)

²⁴“Kha intakna zoro a theng zoi hnunga nikhuahaia khan chu misa hong inthim a ta, tha khom vâp ta no ni.

²⁵Irvân ata ârsihai tâk a ta, irvân sinthotheinai khom inhnîngtir ni a ti.

²⁶Kha zoi tikin chu Mihriam Nâipa hi a sinthotheina irkhêl tak le roiinpui takin sôm laia zuang ta a ti.

²⁷Kha tikin chu kôlkung ata kiang tianga kôlkung dêna rammual kil minli sùng ata Pathian mi inthanghai bûm hrangin vântîrtônhai tîr suak a ti.

Theipui kunga irchu hrang

(Mt 24.32-35; Lk 21.29-33)

²⁸“Khanchu, theipui kung om lam ata irchu roi, a ôn a hong irnoia, a hna a hong incherin chu kholum anâi tah ti nin inhriat ngai.

²⁹Khaang dênin nangni khomin ama kha a hong tung nin hmu tikin chu ama kha a hong nâi tâka, mikot renga a om tah ti inhre roi.

³⁰Khan, khahai murdi kha a tung mâka chu atûnlai mihai hi la boi irman no nihai, ti inhre mai roi.



³¹Irnêng le irvân boi a ta, ki chong chu boi no ni.

A zoro le nikhua tûte'n inhre mahai

(Mt 24.36-44)

³²“Khannisianlân, kha nikhua le a zoro chu Pa ti no chu tûte'n inhre mahai, irvâna vântirtônhai khomin, Nâipa khomin.

³³Irdîn unglân, irtûng chianin om roi, kha zoro kha nin inhriat no sikin.

³⁴Mi, ram danga an zin hrangin a suakhai kuang an sintum chit mophurtira, mikot nghâktu khom irtûng chiana om hrangin hril baka fe pat tâk ang hi a ni.

³⁵Khasikin irtûng chianin om roi, in chongpu hong hrang zoro kha khohloia mani, zâna mani, âr khuanga mani, zînga mani, a ini hrang nin inhriat no sikin.

³⁶Kha ni'n chu voikhat rengin hong tung lik a ta, a inin nangni a hmu itinin.

³⁷Nin laia ki iti hi mi tin tin kuang ki iti a ni, irtûng chianin om roi!” a tia.

Marka 14

Jisua chel an tum

(Mt 26.1-5; Lk 22.1-2; Joh 11.45-53)

¹Khan, sîn hni zoia Ferkân kût le bai chol kop loi kût om hrang a nia; Ochai inalhai le Dân irchutirtuhai khan Jisua dâihreka chela, that hrangin lampui an zong maia.

²“Kût sîng chu ni no ri se, mipui laia buaina suakna ti,” an tia.

Bethani-a Jisua sahriak ipolin a om

(Mt 26.6-13; Joh 12.1-8)

³Bethani-a phâr Simona ina Jisua a oma, bu a nêk laiin nupang inkhatin nard Sahriak mirimhoi man hlutak alabastar bûrin a hong chôia, a bûr kha an khoia Jisua lua a buaka.

⁴Khataka mi senkhathai chu an ning an mura, “I hrang mo hi sahriak mirimhoi hi a inchêk?”

⁵A duli irzathum nêka tama zuarin a sum kha inrianghai pe thei kêng a ni hi te!” an tia, kha hnung chu a chung a an chiar chuka.



⁶Khannisian, Jisua'n an kuang, "Ite ti no roi, ithoa mo nin inbuai? Ki chung a itho hi thil sa le enhoi tak a itho a ni.

⁷Inrianghai chu nin kuanga om mai an nia, nin nuam te tena nin san thei. Kei chu nin kuang om mai hrang ni ma ung.

⁸A thei lam dôra a itho a ni; ki takpum hi phûm hranga mirimhoi a lei ibuak irh a ni.

⁹Thudik nangni hril ki ti, rammual pumpuia Thurchi Sa hi an hrilna rikipa, hi nu sintho khom hi ama inhriat maina hrangin insîr an ti," a tia.

Juda'n Jisua incheltir a tum

(Mt 26.14-16; Lk 22.3-6)

¹⁰Khan, irchutir sômhleihnihai laia Juda Iskariota khan Jisua an cheltir tumin Ochai inlalahai kuang a va fea.

¹¹Kha kha an lei inhriatin a sân an lôma, poisa pêk an inkung tâka. Khanchu, incheltir hrang lam zoro'nchum a zong tâka.

Jisua'n a irchutihai Ferkân kût hruaithe a fâkpuihai

(Mt 26.17-25; Lk 22.7-14,21-23; Joh 13.21-30)

¹²Bai chol pol loi kût sîn maton tak Ferkân kûta hrang belrate an that ngai nia khan irchutihaiin a kuang, "Ferkân khalâi hi khôn mo nang irfûk pe inlân ni inuam?" tiin Jisua an irdona.

¹³Khanchu, irchutihai laia mi inhni a tîra, "Khopuia va fe ta unglân, pa inkhat bêla tui chôiin nangni irtongpui a ti. Ama kha zui unglân,

¹⁴a lûtna taka in chongpu kuang khan, 'Irchutirtu'n kho hin mo ki irchutihai leh Ferkân Kût khalâi kin ifâkna hrang chontan kha?' a ti, va ti roi.

¹⁵Khanchu, ama ngeiin chontan chuanchung irzat tak, neinun om sai, rêlinfel diam nangni irhmu a ta, khataka khan ei ta hrangin va'rfûk roi," a tia.

¹⁶Khan irchutihai kha an suaka, khopuia khan an fea, Jisua'n a ihril lam ang takin an va hmua, Ferkân Kût khalâi kha an irfûktir ta.

¹⁷Khohloi tiang a hong ni'n chu Jisua kha irchutir sômhleihnihai leh an fe ta.



¹⁸Khan, khalâi an irhîl lai takin, Jisua'n "A dik takin nangni ki hril; nin laia mi inkhat, ki kuanga khalâi otpu lele hin nin cheltir a ti" a ti pehaia.

¹⁹Khanchu, irchutirhai milung dûk a tonga, an bi bingin "Keima ma ni?" tiin an irdon irhlôma.

²⁰Jisua'n an kuang, "Sômhleihnihai laia inkhat, khênga ni otpuipu tak hi a ni.

²¹Pathian Thubu'n Mihriam Nâipa hi thi a ti, a lei iti ang takin a ithi hrang a ni; Khannisian, Mihriam Nâipa incheltir hrangtu chung chu a rik e! kha mihriam kha a irzir loi chian ni sian a ta hrangin sa ual a ti!," a tia.

Rengpa Zânbu

(Mt 26.26-30; Lk 22.14-20; 1 Kor 11.23-25)

²²An fâk lai takin Jisua'n bai a lâka, lômthu an sîr zoiin chu a khoia an kuang a pêka, "Fa roi, hi hi ki takpum a ni," a tia.

²³Kha hnung chu khilât a lâka, Pathian kuang lômthu an sîr zoiin chu an kuang a pêka; an rêngin an in chit ta.

²⁴Khanchu, Jisua'n an kuang, "Hi hi ki thisen mi tamtak ta hranga suak, Pathian Thuthung Thar namindetna a ni.

²⁵Nangni ki hril; Pathian Rama uain thar ki in nî a tung mâka chu hi uain hi in nôk ta no ning," a tia.

²⁶Kha zoiin chu hla inkhat an saka, an sak zoiin chu Oliv tânga an fe ta.

Jisua'n, Petera iphil hrang thu a lei insîr

(Mt 26.31-35; Lk 22.31-34; Joh 13.36-38)

²⁷Khan, Jisua'n a kuang, "Nin rêngin laizâm tho nin ta, ni la ma zit nin ti, Pathian Thubu'n, 'Pathianin belrapu kha that a ta, belrahai kha irthekindarh chit an ti,' a ti sikin.

²⁸Khannisianlân, ki thoinôk hnungin Galili rama nin matona lei fe ki ti," a tia.

²⁹Petera'n a kuang, "A danghaiin nang mâk zithai khomsian, keima, chu nangma viat no ning," tiin a sâma.

³⁰Jisua'n Petera kuang, "Nang ki hril; a vuan zân voihi âr a khuang mân nangin voithum ni phil ni ti," a ti pea.



³¹Petera'n chong na ualin a sâma a kuang, "Ni thina thi sa hrang khom ni inlân nang phil viat no ning," a tia, irchutir danghai khomin khang dênin an ti seng sa.

Gethsemani irhuana Jisua a chongchai

(Mt 26.36-46; Lk 22.39-46)

³²Khan, Gethsemani an iti hmun kha an hong tunga, Jisua'n a irchutihai kuang, "Ki chongchai sângin chu hin lei toi roi," a ti pehaia.

³³Petera, Jakoba le Johana hai kha a hruaia; a saterengin irthanvâiin a milung dûk a tong tâka.

³⁴Khanchu, an kuang, "A sân ki milung dûk a tong hraia thi hrang ang dôrin kêng ki iom. Hin toi unglân, le'rtûng chian roi," a tia.

³⁵Maton tiang a va fe viata, irnênga khûksadelin, thei a ni'n chu, kha tuangna zoro kha irlêk hrangin a chongchaia.

³⁶"Abba! Ka pa! Nangma ta hrangin itinrêng thothei a ni, hi tuangna khilât hi ki kuanga irthokin ni khâipai pe roh, Khannisianlân, Keima ircham ni loiin nangma ircham ni ri se," a tia.

³⁷Kha hnung chu a hong kêr nôka, irchutir inthumhai kha a inin a hmuaia, khanchu, Petera kuang, "Simon, ni iin kêng na? Dârkâr khat lua irtûng chianin ni iom thei loi na?"

³⁸Inthêmnaa nin lût nona hrangin irtûng chianin chongchai roi, Irtha'n chu a nuama, taksa'n a iphâri loi a ni," a tia.

³⁹Khan, voikhat a va fe nôka, a iti ang dênin a va chongchai nôka.

⁴⁰Kha hnung chu a irchutihai tiang a hong kêr nôka, an in ngîrin a hmuhai nôka; an in a mu hrai sikin a sâm hrang lam khom inhre mahai.

⁴¹Khan, a hong kêr voi thumna'n chu an kuang, "Atûn chu, irngam unglân in ta roi. A ruk ta! A zoro a hong tung ta! en u ta, Mihriam Nâipa hi mi sualhai kuta an ichel hrang tâk a ni.

⁴²Thoi unglân, fe ta ei ti, en u ta, nin chel hrangtu hi a hong nâi ta," a tia.

Jisua an ichel thu



(Mt 26.47-56; Lk 22.47-53; Joh 18.3-12)

⁴³Khaanga a la chonglai takin irchutir sômhleihnihai laia Juda kha a hong tung zôia. Ama le Ochai inlalahai le Dân irchutirtuhai le upahai itîr mipui, khandai le hêmvuak chôiin an hong tung saa.

⁴⁴An chel hrangtu khan, “A biang ki itum tak kha nin izongtu ni a ti. Chel unglân, sataka enkolin hruai roi,” tiin a lei hrilhai diam tâk a ni.

⁴⁵Khan, Juda kha a hong tung le chu Jisua kha a va pan pata, “Irchutirtu,” tiin a biang a tuma.

⁴⁶Kha hnung chu Jisua an chela, an intûk khak tâka.

⁴⁷Khan, khataka ngîrhai laia mi inkhatin a khandai a kai doka, Ochai inlaltak suak, mikuar a sât thâk paia.

⁴⁸Kha hnung chu Jisua’n anni kha a chongpuihaia an kuang, “Khandai le hêmvuak chôiin hrâtlaksong chel hrang ang dêna ni chel nin ihong na?

⁴⁹Tempil haia a nitin irchutirin nin kuang ki om ngaia, ni chel ual mak chêia, khannisian, Pathian thu a hong tung indikna hranga a ni hi,” a tia.

⁵⁰Kha kha ar zoiin chu irchutirhai khan ama kha an mâk raka, an intân pat ta.

⁵¹Khan, ruatharte inkhat, puan irphân sila irvo’n Jisua a zuia. Ama kha chel an tuma.

⁵²Khannisianlân a puan marakin, a rongin an tân pat ta.

Jisua roirêltuhai makunga a ngîr

(Mt 26.57-68; Lk 22.54-55,63-71; Joh 18.13-14,19-24)

⁵³Jisua kha Ochai inlaltak ina an tuanga, Ochai inlalahai, upahai le Dân irchutirtuhai an hong irbuk sa zôia.

⁵⁴Petera’n hla vit ata a zuia, Ochai inlaltak kholâi dênin a fea. Khataka khan mi chel ngaihai leh mei uatin a toia.

⁵⁵Ochai inlalahai le Sanhedrin murdi khan Jisua an that theina hrang bi an zonga, khannisian hmu mahai.



- ⁵⁶Mi tamtakin milak an intuma, khannisianlân, an intumna bi irhmu mah.
- ⁵⁷Mi senkhat an ngîra milak an intuma.
- ⁵⁸“Hi pa hin, ‘Hi tempil kuta sin hi insiat ki ta, sùn thumin a dang kuta sinloi inding nôk ki ti,’ a ti kin inhriat,” an tia.
- ⁵⁹Kha khoma khan an intumna bi irhmun thei ual mah.
- ⁶⁰Khanchu, Ochai inlaltak kha an matona a va ngîra, Jisua kuang, “Nang an intumna thua hin ite ni isâm loi hrang mo?” tiin ar dona.
- ⁶¹Jisua kha a dâihreka, i ang khomin sâm mah, Ochai inlaltak khan a kuang, “Inpâk inruk Pathian Nâipa Mesia chu ni ni mo?” tiin ar don nôka.
- ⁶²Jisua’n a kuang, “Ki ni, Mihriam Nâipa hi sinthotheitu chang tianga toiin, irvâna sôm kêra zuang la hmu nin ti,” tiin a sâma.
- ⁶³Kha hnung chu Ochai inlaltak khan a puansilhai ar ekthêra, “Inhriatpuitu dang ite nang ta ma?”
- ⁶⁴Pathian a ihrilinsiatzia hi nin inhriat tâka, itin mo nin irngaidân?” a tia. An rêngin ama kha that inruk a ni an ti chita.
- ⁶⁵An laia senkhatin an inchila, a hmâi an tuam pea, an zêma. A kuang, “Ti ro! tu mo nang zêm!” an tia, khabana a chelpuhai khomin hrui pumin an inbên thiaia.

Petera’n Jisua a phil thu

(Mt 26.69-75; Lk 22.56-62; Joh 18.15-18,25-27)

- ⁶⁶Khan, Petera kha hnuai tiang a in irhual sînga a la om laiin Ochai inlaltak siahlo laia dôngmate inkhat a hongga.
- ⁶⁷Petera mei lei uat kha a hmu le chu a en infela, a kuang, “Nang khom hi, hi Nazaret Jisua kuanga om ngai kha ni ni khate,” a ti pea.
- ⁶⁸Petera’n, “Ni thu’nsîr omzia inhre viat ma ung, a’rngaina lam chang khom inhre ma ung,” tiin a phila, kha zoiin chu dâi pên tiang a va suaka, âr khom a khuang zôi ta.



⁶⁹Khan, dôngmatenu khan a en maia, a kôla ngîrhai kuang khan, “Hi pa khom hi an laia mi inkhat a ni sa,” a ti nôka.

⁷⁰Khannisian, Petera’n a phil nôka, chomkhat a hong ni nôk tena chu, a kôla ngîrhai khan Petera kuang, “Galili rama mi ni ni sa sikin, nang khom an laia mi ni ni ngêt,” an tia.

⁷¹Khannisianlân Petera’n an kuang, “Thudik hrilin khomâk ki irsâm a ni! A dik no’n chu Pathianin deng nin theitir ri se! kha mihriam nin iti kha inhre viat ngai ma ung!” a tia.

⁷²Kha zoiin chu âr voihi a khuang nôk tâka, khanchu Jisua’n Petera kuang, “Âr voihi a khuang mân nangin voithum ni phil ni ti,” a iti pe chong kha a hong irhriat suak nôka, kha chong kha a ngaitua’n a chap tâka.

Marka 15

Jisua Pilata makunga an hruai (Mt 27.1-2,11-14; Lk 23.1-5; Joh 18.28-38)

¹Khan, zîng a hong ni’n chu, Ochai inlalui chu, upahai, Dân irchutirtuhai le roirêltuhai murdi leh an irhmua, an chonga. Jisua kha an khita, an hruaia, Pilata kuta an bâng ta.

²Pilata’n a kuang, “Judahai rêng mo ni ni?” tiin ar dona. “Ni nih, ni ni ti khate,” tiin a sâma.

³Ochai inlalui khan lam iza’n Jisua kha an hnôla,

⁴Khasikin, Pilata’n Jisua ar don nôka, “Ni ni sâm loi hrang mo? irngai ta, pualoi nang an intumna san hi,” a tia.

⁵Jisua’n a i ang khomin a sâm no sikin, Pilata irngai ar khêl ok.

Jisua thi hranga roi an rêlna (Mt 27.15-26; Lk 23.13-25; Joh 18.39–19.16)

⁶Khan, Pilata’n Ferkân Kût zoro rikipin intângna ina om inkhat mipuihaiin an inuam tak an sua pehai ngai.

⁷Kha zoroa khan mi inkhat ar hming Barabba kha, mi pualoihai leh mi an that sika intângna ina om a ni.



⁸Khan, mipuihai an hong fea, an ta hranga a itho pehai ngai anga tho hrangin an ngêna.

⁹Khanchu, Pilata'n, an kuang, "Judahai rêng hi nangni insua pe inlân nin nuam mo?" a tia.

¹⁰Ochai inlalahai khan an hnarsa sika Jisua kha a kuang an hong hruai a nih ti an hriat infela.

¹¹Ochai inlalahai khan mipuihai chu Barabba insua pehai hrangin an inphûthaia.

¹²Khanchu, Pilata'n an kuang, "Khante, Judahai rêng nin ititu hi, imo ki ilo hrang tâk?" tiin ar donhai nôka.

¹³Anni khan, "Krosa hembe ro!" tiin an khêk nôka.

¹⁴Pilata'n an kuang, "Ithoa mo? Imo a itho insual?" tiin ar donhaia. Khannisianlân, anni khan, "Krosa hembe roh!" tiin an khêk inring uala.

¹⁵Khanchu, mipuihai milung inhoi a nuam sikin, Barabba kha an sua pehaia. Khan, Jisua kha sipaihai an zêmtirhai zoiin chu Krosa hembe hrangin a pêk tâka.

Sipaihaiin Jisua an soisak

(Mt 27.27-31; Joh 19.2-3)

¹⁶Khan, sipaihaiin Jisua kha Ramoptu in Praitioriana an hruai inlûta, an chanpuihai murdi an koi buka.

¹⁷Khanchu, songkol irfual senduk an innghâktira, ilhling lukhum an phana, an inkhumtir ta a ni.

¹⁸Kha hnung chu chubai an mûka, "Juda hai Rêng, hring sôt roh," an tia.

¹⁹A lua khianghrolin an vîka, an inchila, khûksadelin chubai an mûka.

²⁰Khan, an phengsan zoiin chu songkol irfual senduk kha an hlîk pea, ama songkol dên kha an innghâktir nôka. Kha zoiin chu Krosa hembe hrangin an hruai suak ta.

Jisua Hembea a om thu

(Mt 27.32-44; Lk 23.26-43; Joh 19.17-27)



²¹Khan, lampuia mi inkhat ar hming Simona an irtongpuia, kha mi kha ram rengata khopui hong pan a nia, sipaihaiin Jisua Kros irput hrangin an dândeia (Simona kha Kurini mi, Alexander le Rufa pa a ni).

²²Khanchu, Jisua kha Golgotha an iti hmuna an hruai ta, kha kha “Luru hmun,” tihna a ni.

²³Kha hmuna khan Jisua kha Uain, Mura leh irpol an pêka, Khannisian, in nuam mah.

²⁴Kha zoiin chu Krosa an hembea, a puansilhai kha an irsema, an dong hrang chit inhriatna hrangin tâ an sâna.

²⁵Jisua an hembe zoro kha zîng dâr kuak vêl a ni.

²⁶Khan, an hnôlna kha lekha'n an irziaka, “Juda hai Rêng,” tiin a lu chungu an târa.

²⁷Khan, Jisua le hrâtlaksong, mi inhni an hembe sa, a chang tiang inkhat, a vei tiang inkhat.

²⁸Khaang khan, Pathian thubu'n “Ama khom mi sualhai laia tep sain a om ta,” a iti kha a hong tung ta.

²⁹Khan, mi ar lôi murdi'n an lu inthikin Jisua kha an êroa, “O hoi! Tempil set ni ta, sîn thum ni'n ni inding nôk hrang na!

³⁰Kros ata zuang chumin lân, irzôk ta ro ba,” an tia.

³¹Khaang dênin Ochai inlallhai le Dân irchutirtuhai khomin Jisua kha an êroa, “Mi danghai lak an zôktira, ama chu zôk thei maka!

³²Tho atûn Mesia, Israelhai rêng hi, Kros ata a zuang chum lei en hi rei; Khanchu ama ei iamna hrangin,” an tia. Ama le an hembe mi inhnihai khomin Jisua an êro sa.

Jisua thina thu

(Mt 27.55-56; Lk 23.44-49; Joh 19.28-30)

³³Khan, sîn dâr sômhleihnua irthokin khohloi dâr thum ten chu rammual an thim khaka.



³⁴Dâr thumin chu Jisua kha inring takin a khêka, “Eli, Eli, lema sabakthani?” a tia. (Kha kha “Ki Pathian, ki Pathian, itho mo ni ni imâksan?” tihna a ni.)

³⁵Kha hmuna ngîr mi senkhatin ama kha an inhriatin, “Iringai u ta, Elija a ikoi kêng,” an tia.

³⁶Khanchu, an laia mi inkhat an tâna, sponj, uain thûr inchia’n, khianghrolin a târa, a hong in ina, “La nghâk roi, Jisua kha insum hrangin Elija a zuang pe mo lei en rei,” an tia.

³⁷Jisua kha inring takin a khêka, a hrang a chat ta.

³⁸Khanchu, Tempila puanzâr kha a chung tiang ata a hnuai dênin a têr thai tâka.

³⁹Sipai hruaitu kros matona ngîrtu khan Jisua hrang chat kha a hmu’n chu, “Hi pa hi Pathian Nâipa ngêt a ni hi te,” a tia.

⁴⁰Nupanghai khomin hlatak ata an thîr sa maia, kha laia khan Magdala mi Mari, Jakoba nâipang ualnu, Mari, Josefa nu, Salomi hai an kop sa a ni.

⁴¹Hi mihai hi Galili rama a om laia ama zuia a sintho ngaihai an ni; ama pâla Jerusalem fe sa nupang dang khom tamtak an om.

Jisua an phûm thu

(Mt 27.57-61; Lk 24.1-12; Joh 19.38-42)

⁴²Juda hai irtûng nî a nia, (Kha kha Sabat hranga an irsinsiam nî a ni.)

⁴³Josefa, Arimathai khuaa om, roirêlpu laia kop sa, mi mahripom tak, Pathian Ram sabe mi a ni sa, khohloi tiang a hong ni’n chu, a hong a ngam takin Pilata a va lût khuma, Jisua ruak a nghia.

⁴⁴Pilata’n Jisua thi tâk thu kha an hriatin chu a sân ar ngai ar khêl oka. Sipai irza hruaitu kha a koia, Jisua thina kha a isôt mani ta, a tia.

⁴⁵Sipai irza hruaitu ata an hriat zoiin chu a ruak kha Josefa a pêk tâka.

⁴⁶Khanchu, Josefa’n puan irnêm a lâka, a ruak kha an suma, puan irnêm leh a tuama, thân, lung invera an zâltira, thân bân kha lungin a sîng tâka.



⁴⁷Khan, Mari Magdala mi le Josefa nu Mari hai khom khan an inzâlna kha an en chiana.

Marka 16

Jisua thoinôkna thu

(Mt 28.1-8; Lk 24.1-12; Joh 20.1-10)

¹Sabat nî a hong hekin Magdala mi Mari, Jakoba nu Mari, Salomi hai khan, Jisua ruak pol hrangin sahriak mirimhoi an irchôka.

²Pathianni zînga misa suak hnungin tâna an va fea.

³Lampuia an fe laiin, “Thân bâia lung kha tu mo nir hlumpai pe hrang tâk?” an irti lai takin.

⁴Lung lian tak a nia, an hong tanga lung kha irhlum saiin an hmu tâka.

⁵Thân sînga an lûta, ruatharte inkhat puan chek sil chang tianga toi an hmua, an chi tâka.

⁶Khanchu, ama khan an kuang, “Lunginzîng no roi, Nazaret Jisua, an ihembe kha, nin izong ni a ta, hin om ta mah, a thoi nôk ta; en u ta, an inzâlna hi.

⁷Atûn chu fe unglân, a irchutihai le Petera kuang khan, nangni a ihril tâk ang khan Galili-a fe masa a ta, kha khan hmu nin ti, tiin va hril roi,” a tia.

⁸Khanchu, thân ata kha an suaka, beidong le chi pumin an intân pat ta. An chi hrai sikin tûte kuang insîr mahai.

Magdala mi Mari kuang Jisua an lâr

(Mt 28.9-10; Joh 20.11-18)

[

⁹Khan, Pathianni zînga a thoinôka khan, Magdala mi Mari a phîng sînga irthokin ramilhli sari a inhnot suakpai penu kuang a masa takin an lâra.

¹⁰Mari khan Jisua chanpuihai a va hrila. Irngaiinsia le chapin an lei oma;

¹¹Mari'n, “Jisua a hring nôka, hmu khom ki hmu lele,” a ti pehaia; an inhriat khomin taksôn mahai.

Irchutihai inhni kuang Jisua an lâr

(Lk 24.13-35)



¹²Kha hnungin, Jisua kha hmêl danglam irputin mi inhni an ram tiang an fe laiin an kuang an lâr nôka.

¹³Khan, an hong kêra irchutir danghai an hong inhrila, khannisian tak lei sôn mahai.

Irchutir sômhleikhathai kuang an lâr

(Mt 28.16-20; Lk 24.36-49; Joh 20.19-23; Tir 1.6-8)

¹⁴A hnungkhôn taka chu irchutir sômhleikhathai bu an nêk lai takin an kuang an lâr nôka. A thoinôk hnunga a hmuhai chong taksôn loiin an milung an inngar sik le iamna reng an nei no sikin, a halirchuhaia.

¹⁵Jisua'n an kuang, "Rammual pumpuia fe unglân, thil siam murdihai kuang Thurchi Sa hi insîr roi.

¹⁶Tukhom a iama, baptisma chang chu saninhringin om an ta. A iam loihai chu thiamno changin om an ti.

¹⁷A iamhai chu sinirkhêl sintheina irtha ipêk ni an ta; ki'rhmingin ramilhli inhnot suak an ta, chong tharin chong an ti.

¹⁸Mirûlhai an kutin chel an ta, thina tûr i ang khom in an ta, ite ti no ni; damloihai chung a kut irngat an ta, dam thiai an ti," a tia.

Jisua irvâna a kêi thu

(Lk 24.50-53; Tir 1.9-11)

¹⁹An kuang thu an sîr zoiin chu, Rengpa Jisua kha irvâna ihruaiin a om tâka, Pathian chang tiang a hong toi tâka.

²⁰Irchutihai khom kha an fe suaka, hmun tina thu an insîr tâka, Rengpa khomin a thophaia, an thu'nsîr kha a dik tiin le an sinirkhêl tho khom an det pehai thiaia. Amen.]



Luka

Luka 1

Theofila kuang

¹Ei laia thil zuang tung, a phut ata a hmuhai le a sinthohaiin,

²an ni ihril ang khan, mi tamtakin irziak an tum tâka.

³Khasikin Theofil mahripom tak, a bul ata tinrêng infel zita suiin, a dônte'n ni ta hrangin irziak inlân ki iti a ni.

⁴Tiana thurchi nang an lei irchuhai kha a dik tak a ni tih nin hriat theina hrangin.

Baptistu Johana suak hrang thu lei hrilna

⁵Judai ram rêng Heroda ni laiin, Abija pâla mi ochai Zakaria a oma, a dôngma chu Arona irchia mi Elizabeti a ni.

⁶An ruaiin Pathian mit hmua fel takin an oma, sêlna boiin Rengpa dân le a thu zômin an om ngaia.

⁷Khannisianlân, Elizabeti a ching sikin nâi nei maka, an ruaiin an tar ok tâka.

⁸Khan, sôn khat chu Zakaria kha Tempila Ochai sin a thoa.

⁹Dân angin Tempila lûtin Rengpa maichâma mirimhoi a hâla.

¹⁰Mirimhoi a hâl laiin mipuihai an rêngin pên tiang an lei chongchaia.

¹¹Mirimhoi hâlna chang tianga ngîrin Rengpa itîr vântîrtôn inkhat a kuang a zuang inlâra.

¹²Zakaria'n a hmu'n chu an lâi raka a sân a chia,

¹³Khannisianlân, vântîrtônin chu, "Zakaria, chi no roh, ni chongchaina kha inhriat a ni, ni dôngma Elizabeti'n nâipasal nang nei pe a ti, ar hming Johana phua ni ti.

¹⁴A suakin chu nangma le mi tamtak lungrîl lômin raifân a ti.

¹⁵Rengpa mithmuin mi lian ni a ta, uain le zu rêng rêng khom in no ni. A nu phîng sùng ata Irtha Irthiangin sip a ti;



¹⁶Israel irchihai laia mi tamtak Rengpa an Pathian tiang hong hruai nôkhai a ti.

¹⁷Pahai chu an nâihai irngaisaktir hrangin, mi pualoihai chu mi felhai lungrîl irput ang irput hrangin, Rengpa ta hranga a mihai hranga lei sinsiam hrangin Elija irtha dong le a sinthotheina neiin, Rengpa makunga khan a izuang masa hrang a ni,” a tia.

¹⁸Vântîrtôn kuang Zakaria khan, “Kha kha itin mo ki inhriat thei hrang? Keima lak tar ki nia, ki dôngma lak a sân ar chang ok tâka,” a tia.

¹⁹Vântîrtôn khan, “Kei hi Pathian makunga ngîr ngai Gabriela ki ni, nang chongpui hrang le kha thu raifânôm tak kha hril hranga itîr ki ni.

²⁰Irngai roh, a zoro taka hong tung ngêt hrang thil ki insîrhai hi tak ni sôn no sikin, a zuang tung tak tak mâka chu dâihrek ni ta, chong thei no chi ni,” a tia.

²¹Mipuihaiin pên tiang an lei nghâka, Tempil sînga a om sôt sikin a sân ar khêl an tia.

²²A hong suak tikin chu a chong thei ta no sikin Tempila inlârna a ihmu a nih ti an inhriata, an kuang kut veivâkin a hrilhaia, chong thei viat ta maka.

²³A sintho zoro a hong chuk tika chu in sîng tiang a kîr tâka.

²⁴Kha zoiin chu a dôngma Elizabeti khan nâi a vong tâka, tha ringa tual suak ta maka,

²⁵“Mi laia ki’rhming siat tâk insa nôkna hrangin Rengpa’n lung a nin khama, hiang hin a ni itho pe ta,” a ni.

Jisua suak hrang thu

²⁶Elizabeti nâi vong, a tha rukna’n chu Pathianin vântîrtôn Grabiela chu Galili ram Nazaret khuaa a tîra.

²⁷Reng Davida irchia mi Josefa dôngma hual dôngmate Mari kuang thu zuang chôiin,



²⁸Mari kuang a lûta, chubai, inditbîknu! “Rengpa ni kuang a om, sat nang a vur ok,” a tia.

²⁹Kha thu kha an hriatin chu imo a omzia tâk, tiin a sân a char a dong tâka.

³⁰Vântîrtôn khan, “Mari, chi no roh, Pathian ngaisakna ni dong kêng.

³¹Inrâi ni ta, nâipasal nei ni ta, ar hming Jisua phua ni ti.

³²Mi lian ni a ta, an chung taka Pathian nâi tih an ti. Rengpa Pathianin a irchibul Davida angin Rengin siam a ti.

³³Jakoba irchihai chung a Rengin om a ta, an laia a ramon mong nê nei no ni,” a tia.

³⁴Khan, Mari’n vântîrtôn kuang, “Pasal lua la nei loiin te, itin mo a ini thei hrang?” a tia.

³⁵Vântîrtôn khan a sâma, “Irtha Irthiang kha ni chung a zuang om a ta, Anchung taka sinthotheina khan nang irhli khu a ti; khasikin nâi zuang suak hrang chu mi irthiang, Pathian Nâipa tih an ti.

³⁶Khan, irngai ta, ni zuarpuinu, a ching an iti ngai, Elizabeti khomin a tar hnungin nâipasal a vong ta, hi tha hi a tha rukna a ni ta.

³⁷Pathian hrangin chu tho theiloite zel om ma,” a tia.

³⁸Mari khan, “Irngai ta, Rengpa suaknu ki ni, nir cham angin ki chung a tung ri se,” a tia, vântîrtôn khan a rotsan tâka.

Mari’n Elizabeti a hrôna thu

³⁹Kha lai khan Mari kha a thoia, thingtâng, Judahai khua inkhata a fe tâka.

⁴⁰Zakaria ina khan a hong tunga, Elizabeti kha chubai a mûka.

⁴¹Elizabeti’n Mari chubai mûk an hriat le chu, a phînga nâite a châng, Elizabeti kha Irtha Irthiangin a sip tâka,

⁴²Khanchu, inring takin a khêka, “Nang chu nupang laia mi vânei tak ni ni, ni nâi vong khom mi vânei a ni.

⁴³Itin lama mo ki Rengpa nu, ni ni hong ihro tâk?



⁴⁴Irngai ta, ni chubai mûkna irhâi kin hriat le chu ki sûnga nâite khom a raifân sikin a ichâng a ni.

⁴⁵Ni kuanga Rengpa'n thu a insîr kha a tung ngêt hrang tih ni iam sikin ni vânei e," a tia.

Mari inpâkna hla

⁴⁶Khanchu Mari'n, "Ki lungrîlin Rengpa a chôindôma,

⁴⁷Ki'rtha khom a ni saninhrintu Pathian chung a raiinfân tak tak,

⁴⁸A suaknu irngaiintômzia a zuang ngaisaka, Irngai ro, atûn ata chu thangthar thiaihai khomin vânei ni tih an ti.

⁴⁹Sinthothei Pathian khom ki chung a sin lian tak a thoa, ar hming khom a irthiang a ni.

⁵⁰A chipuihai chu thoiinthar dênin lung an kham thiai ngai.

⁵¹A bânin a hrâtzia an langtira, Mi lâiripâkhai chu an ngaituana an thekindarh tâka.

⁵²An toi hmuna rêng toihai kha a hnûk thâka, Nam irngaiintômhai kha a chôirsâng tâka.

⁵³Phîngchâmhai chu thil tui tinrêngin a vâia, Irchonghai chu kut rongin an fetira.

⁵⁴Ei irchibulhai kuanga a inkung ang khan. A siahlo Israelhai san hrangin a zuang tâka.

⁵⁵Abrahama le a irchihai kumkhua'n lung an khamzia inhriat maina hrangin," a tia.

⁵⁶Mari chu Elizabeti kuang tha thum a oma, khanchu, a in tiang a fe nôk tâka.

Baptistu Johana suak thu

⁵⁷Elizabeti nâi nei zoro a hong chukin chu, nâipasal a neia,

⁵⁸A bômhai le a urênghaiin, Rengpa'n a sân lung an kham ti an inhriatin chu, a sân an lômpui tâka.



⁵⁹Khan, a sùn riat nia chu, nâitesen sertan hrangin an hong, a pa irhming dên Zakaria phua an tuma.

⁶⁰Khannisianlân, a nu khan, “Ni mak e, a’rhming chu Johana kêng phua hrang,” a tia.

⁶¹Annihai khan, “Hianga irhming hi nin urênghai laia khom la om ngai mah,” an tia.

⁶²A pa kha imo a’rhming phua a nuam ti kut veivâkin an irdona.

⁶³Zakaria’n, irziakna hrang lekha phêk a zonga, a’rhming chu Johana a nih tiin a’rziaka, a sân an irngai ar khêl tâka.

⁶⁴Voi khat rengin Zakaria kha a hong chong thei tâka, Pathian an pâk zôi ta.

⁶⁵An kôlvêla om murdi’n an chia, kha thurchi kha Judai ram thingtâng hmun tina an thang tâka.

⁶⁶An hriatpu dôrin, “Hi nâite hi itin takin mo a la hong iom hrang na! Rengpa Irtha laka a chung a oma,” an tia.

Zakaria hla

⁶⁷Johana pa Zakaria kha Irtha Irthiangin a sipa, hiang hin a tia;

⁶⁸“Rengpa, Israelhai Pathian chu inpâkin om ri se, A mihai san hrangin a zuanga, an zôkhai tâka.

⁶⁹A siahlo Davida irchi ata ei ta hrangin saninhrintu roiinpui tak an ding ta.

⁷⁰Tianlai deipu irthianghai bâia a insîr tâk angin.

⁷¹Ei râlhai le a ni khôkmâktuhai ata, nin zôktu hrang chu,

⁷²Ei irchibulhai lung an khamzia an langtira, A thuthung irthiang an hriat mai a ni.

⁷³Ei pu Abraham a kuang thu an kung khaka,

⁷⁴Ei râlhai ata a ni sana, chi loia a sin ei tho theina hrang thu kha.

⁷⁵Ei hring sângin a mit hmua, Irthiang le fel taka ei om theina hrangin.



⁷⁶“A ni, ki nâi, nang hi Anchungtak Pathian deipu nang la ti an ti. A lampuihai sinsiam hrangin Rengpa maton tiang lei fe ni ti.

⁷⁷An sualhai ngaidamin, a mihai kuanga saninhring thu inhriattir hrangin.

⁷⁸Ei Pathian chu inrenna le lungkhamnaa sip a nia, Khasikin, chung tiang ata saninhringna misa vâi chu ei chung a insuaktir a ta,

⁷⁹irvân ata vârin, inthim le thina dâihlim hnuaia omhai êl invâr a ta, Irtharngamna lama kal nin chôtir a ti,” a tia.

⁸⁰Khan, nâite kha taksa le irtha tianga ar sôn tîr tîra, Israel mipuihai laia an lâi mîka chu, ramchâra a om maia.

Luka 2

Jisua suak thu

(Mt 1.18-25)

¹Kha laia khan, rêng Kaisara Augasta'n Rom sorkâr ram op murdia irhming irziak hrangin thu a pêka.

²Hi irteppui masa tak hi Suria rama Kurinia, Ramoptu a ni laia a ni.

³Mi tinin mâni khua chita irhming irziak hrangin an fea.

⁴⁻⁵Josefa khom Davida in sîngkua le a'rchia mi a ni sîkin, a dôngma hual Mari inrâi chum te tem leh khan Galili ram Nazaret ata Judai rama, Davida suakna Bethlehem khuaa irhming irziak hrangin an fea.

⁶Khan Bethlehem-a an om laiin nâi nei zoro'n a hong de tâka.

⁷Nâi lutîr pasal a neia, puanin a tuama, khualbûka an inleng ta no sîkin sa bu pêkna khênga an inzâl ta.

Beralpuhai le vântîrtônhai

⁸Kha rama belrapuhaiin belra an ena, zâna an riak nghaa.

⁹Rengpa itîr vântîrtôn an makunga a zuang inlâra, Rengpa roiinpuina khan an kôl kha a êl invâr phuta, an chi tak taka.

¹⁰Vântîrtôn khan an kuang, “Chi no unglân, irngai roi, mi tin ta hranga Thurchi Sa râifânôm tak tak nangni ki zuang intung pe kêng.



11A vuan hin nin ta hrangin Davida khuua saninhringtu a suak ta, Reng Krista chu,

12Khan, hi hi nin ta hranga irsinsiana hrang chu a ni; nâtesen, puana tuam, sa bu pêkna khênga zâl hmu nin ti,” a tia.

13Voikhat rengin vântîrtôn kôla khan irvân mipuihai an zuang om mur tâka, Pathian an inpâka.

14“Anchungtaka khin Pathian roiinpui takin om sianlân, Irnênga a lômhai kuang irngeina lêng ri se,” an tia.

15Khan, vân vântîrtônhaiin an rotsan le chu belrapuhai khan, “Thoi, Bethlehem-a fe ei ti, Rengpa’n thu a ni ihril, zuang tung kha lei va en rei,” an tia.

16Khanchu inrang takin an fea, Mari le Josefa, sa bu pêkna khênga nâtesen zâl kha an va hmua.

17An hmu’n chu nâtesen thurchi vântîrtôn insîr kha an hrila.

18An hriatpu dôrin belrapuhai thu’nsîr kha ar khêl an ti tak taka;

19Mari khan kha thuhai kha a lungrîla ngaitua’n a vong chiana.

20Vântîrtôn ihrilhai ang dênin itinrêng an hmu le an inhriat sika khan, belrapuhai khan Pathian chôindôm le inpâk pumin an kîr nôk tâka.

Jisua irhming an phua

21Khan, a sertan hrang nikhua sîn riat a hong chukin chu, sula a om mân daia angin a lei iphua tâk irhming Jisua ti kha an phua tâka.

Nâtesen Jisua Tempila an hruai

22Mosia dân anga an irthiang nî a hong chukin chu Josefa le Mari’n an nâite Pathian kuang inhlan hrangin Jerusalema an fepuia.

23Rengpa dân thua, “Nâi lutîr pasal ka chu Rengpa dongtum hrang a ni,” ti a nia.

24Khan, Rengpa Dân angin vasu inhni mani, phervali mani, irbôlna’n an inhlan hrang a ni.



²⁵Jerusalema khan mi inkhat, ar hming Simeona a oma. Ama kha mi fel le sakhua mi tak a nia, Israelhai irtharngamtir hrangtu kha a thîr maia; a chung a Irtha Irthiang a om.

²⁶Rengpa chonginkung Mesia a hmu mâka chu thi no ni tih a inkung a ni.

²⁷Irtha hruaiin Simeona Tempila a fea, Dân anga a chung a tho hrangin a nu le pa'n nâite Jisua kha, Tempila an hongpuia.

²⁸Simeona'n nâite a poma, Pathian kuang lômthu an sîra.

²⁹“Rengpa, atûn ni thu ang ngêtin, ni suak hi irtharngam takin ni infetir hrang a ni tâka.

³⁰Ni saninhringna chu ki mit ngeiin ki hmu tâka.

³¹Mi tin hmu hranga ni isiam kha.

³²Jentailhai kuang ni vâ inlangtir hrang le ni mi Israelhai roiinpuina hrang chu,” a tia.

³³A nu le pa khan nâitesen chungchâng a insîr kha ar khêl an ti oka.

³⁴Simeona khan anni kha sat a vura, a nu Mari kuang, “Irngai roh, Israel laia mi tamtak siata tûk hrang le inngîr suakna hrangin, hi nâite hi inkung a ni, Pathian irsinsiana, mi tamtakin an isêl sup sup hrang ni a ti.

³⁵Nang khom khandai isun angin ni milung la na a ti, mi tamtak lungrîl sêng inlang la nih a ti,” a tia.

³⁶Deipu inkhat, ar hming Anna, Fanuela nâinu, Asera nam, a sân a tar tâk a oma. A pasal leh kum sari an irsen hnungin,

³⁷Kum sômriatminli a meithâi tâka. Ama khan Tempil rotsan loiin bu a nghei hena, sîn zân chongchaiin Pathian a biak ngai.

³⁸Kha lai khan ama kha a fea, Pathian kuang lômthu an sîra, Jerusalem sansuakna sabeituhai kuang nâitesen thurchi kha an sîr tâka.

Nazaret khuua an kîr

³⁹Rengpa dân angin thil an tho zoi zit hnunga khan Galili rama, an kua Nazaret-a khan an kîr nôk tâka.



⁴⁰Nâitesen khom kha a'rsôn maia, a vâ tîr tîra, Pathian lungkhamna a chung a om maia.

Nâipang Jisua Tempila

⁴¹A nu le pahai kha kum tin Jerusalema Ferkân kût hmang hrangin an fe ngaia,

⁴²Ama kha kum sômhleihni a niin, dân angin kût hmang hrangin an hong fepuia.

⁴³Kût ar zoiin chu, an kîr tâka, nâipang Jisua chu a nu le pa inhre loiin Jerusalema a la riaka.

⁴⁴A rualhai laia fe ni a ti; tiin sîn khat an fe hnungin, an urênghai le an rualhai kuang an zonga.

⁴⁵Khan khom hmu mahaia, zong pumin Jerusalem tiang an hong kîr nôk tâka.

⁴⁶A sîn thum ni'n chu Tempila, irchutirtuhai kuang lei toiin an hong hmu tâka; an thu a lei irngai le lei irdonhaiin an va hmu tâka.

⁴⁷A vâ le a sâm theizia an inhriatin a sîn ar khêl an tia.

⁴⁸A nu le pa khomin an hong hmu'n chu a sîn ar khêl an tia, a nu khan, "Bonga, itho mo hianga ni ni ilo? Ni pa leh irthatâk vîkin nang kin izong mai tâk kêng," a tia.

⁴⁹"Itho mo nin ni izong? Ka pa ina ki om ti nin inhriat loi ma ni?" a tia.

⁵⁰Khannisianlân, a sâm dân kha a'rngaina lam chang inhre mahai.

⁵¹Khanchu, an kuang Nazaret-a fea, an thu zômin a oma, thil omzia hai murdi a nu'n a lungrîla a vong chiana.

⁵²Khan, Jisua kha taksa tiang le vârna tiang a hong irsôn tîr tîra, Pathian le mihriam inrenna le kanna a dong tîr tîr tâka.

Luka 3

Baptistu Johana thu'nsîr
(Mt 3.1-12; Mk 1.1-8; Joh 1.19-28)



- ¹Kaisara Tiberi-a an lal kum sômhleiringa kuma chu, Pontia Pilata chu Judai rama Ramoptu a nia, Heroda chu Galili rama rêng a nia, a sangpa Filipa kha Iturea le Trakonitis rama rêng a ni. Lusania chu Abilene rama rêng a ni.
- ²Anna le Kaiafa hai kha Ochai inlaltak an nia; kha zoro lai khan ramchâra Zakaria nâipa Johana kuang Pathian thu a zuang tunga.
- ³Khanchu, Johana'n Jordan vadung pang ram tin ar fanga, “Nin sualhai ata irlet unglân, baptisma chang roi; khanchu, Pathianin nangni ngaidam a ti,” tiin thu an sîra.
- ⁴Deipu lekhabua irziak angin; “Ramchâra mi hnuk irhai khan, 'Rengpa lampui siam unglân, a fena hrangin lamintûn siam roi!
- ⁵Irhôr tin insip ni a ta, mual le tâng tin irhniamtir ni a ti. Lampui kôihai intûntir ni a ta, Lampui inrualloihai kha inrualtir ni a ti.
- ⁶Khanchu Pathian saninhringna kha mi tinin hmu an ti,' ” ti irziak ang khan.
- ⁷Khan, Johana kuang baptisma chang hrangin mipui an hongga, an kuang, “Mirûl irchihaio, Pathian ningmur zuang tung hrang ata zôk hrangin tu mo nangni hril?
- ⁸Nin sual nin irlet tak tak tih nin nunchana inlangtir roi. Abrahamama kha ei irchibul a ni khate, lei ti chin ni; nangni ki hril, Pathianin hi lunghai khom Abrahamama irchi a inchang thei kêng.
- ⁹Thing tin a'rzung dêna phûr hrangin hreipui an sia ta. Thing tin ra saloia ra chu, irkita meia pai ni an ti,” a tia.
- ¹⁰Khan, mipuihaiin an irdona, “Imo kin itho hrang tâk?” an tia.
- ¹¹An kuang, “Songkol irthuam neihai chu a nei loihai sem unglân, fâkrua neihai khomin a neiloihai sem roi,” a tia.
- ¹²Khâzana irfuangtuhai khom baptisma chang hrangin an hongga, a kuang, “Irchutirtu imo kin itho hrang?” an tia.
- ¹³“Dân bituk bana chu irfuang no roi,” a tia.



¹⁴Sipaihai khom an hongga, a kuang, “Keini te imo kin itho hrang?” an tia. Ama khan, “Nakhrâtin mo minlakin mo tûte thil la pe no unglân, nin hloa nin milung inchuk roi,” a ti pehaia.

¹⁵Mipuihaiin chu a sân sabei takin, Johana kha Krista kêng ni a ti, tia an ngaitua laiin,

¹⁶Johana’n, “keima’n chu tuiin nangni ki baptisa, keima nêka roiinpui ual zuang hrang a nia, keima chu a kekok hrui sût inruk khom ni ma ung; Ama’n chu Irtha Irthiang le meiin nangni baptis a ti.

¹⁷An sêpna hrangin mira a chôia, insêp a ta, butak chu a panga thun a ta, a’rsî kha mei thi ngailoia hâlvôm a ti,” a tia.

¹⁸An om dân irlet hrangin, Johana’n mipuihai kuang lam tamtakin Thurchi Sa a hril ngaia.

¹⁹Reng Heroda khom kha, a urêngpa dôngma Herodi a nei sikin le thilsual dang a itho murdi thua a halirchua.

²⁰Khanchu, Heroda’n Johana kha intângna ina a khum tâka.

Jisua baptisma a chang thu

(Mt 3.13-17; Mk 1.9-11)

²¹Khan, mi murdi baptisma an chang zoiin, Jisua khom baptisma a changa, a chongchai laiin irvân ar hongga.

²²Irtha Irthiang chu taksa irputin a chungga vasu angin a zuang chuma, irvân ata hnuk irhai a zuang suaka, “Ki Nâi lungthung tak ni ni; ni chungga ki lôm tak tak,” a zuang tia.

Jisua irchibulhai

(Mt 1.1-17)

²³Jisua sintho a phuta khan ama kha kum sôminthum a nia. Mi irngai lamin chu Josefa nâipa a ni. Kha pa kha chu Helia nâipa a nia;

²⁴ama chu Matthata nâipa a ni; ama chu Levia nâipa a ni; ama chu Melkia nâipa a ni; ama chu Jannaia nâipa a ni; ama chu Josefa nâipa a ni;



- ²⁵ama chu Mattathia nâipa a nia, ama chu Amosa nâipa a nia, ama chu Nahuma nâipa a nia, ama chu Eslia nâipa a nia, ama chu Naggai a nia;
- ²⁶ama chu Maatha nâipa a nia, ama chu Mattathia nâipa a nia; ama chu Simeia nâipa a ni; ama chu Joseka nâipa a ni; ama chu Joda nâipa a ni;
- ²⁷ama chu Joana nâipa a ni; ama chu Resa nâipa a ni; ama chu Zerubabela nâipa a nia, ama chu Sealtiel a nia; ama chu Neria nâipa a ni;
- ²⁸ama chu Melkia nâipa a ni; ama chu Addia nâipa a ni; ama chu Kosama nâipa a ni; ama chu Elmadama nâipa a ni; ama chu Era nâipa a ni;
- ²⁹ama chu Josua nâipa a ni; ama chu Eliazara nâipa a ni; ama chu Jorima nâipa a ni; ama chu Matthata nâipa a ni; ama chu Levia nâipa a ni;
- ³⁰ama chu Simeona nâipa a ni; ama chu Juda nâipa a ni; ama chu Josefa nâipa a ni; ama chu Jonama nâipa a ni; ama chu Eliakima nâipa a ni;
- ³¹ama chu Melea nâipa a ni; ama chu Menna nâipa a ni; ama chu Mattatha nâipa a ni; ama chu Nathana nâipa a ni; ama chu Davida nâipa a ni;
- ³²ama chu Jesaia nâipa a ni; ama chu Obed a nia; ama chu Boaza nâipa a ni; ama chu Salmona nâipa a ni; ama chu Nasona nâipa a ni;
- ³³ama chu Aminadaba nâipa a ni; ama chu Admina nâipa a ni; ama chu Arnia nâipa a ni; ama chu Hezrona nâipa a ni; ama chu Perez a nia; ama chu Juda nâipa a ni;
- ³⁴ama chu Jakoba nâipa a ni; ama chu Isaka nâipa a ni; ama chu Abraham a nia; ama chu Tera nâipa a ni, ama chu Nahora nâipa a ni;
- ³⁵ama chu Seruga nâipa a ni; ama chu Hragai a nia; ama chu Falega nâipa a ni, ama chu Eber a nia; ama chu Sela nâipa a ni,
- ³⁶ama chu Kainana nâipa a ni, ama chu Arpaksada nâipa a ni, ama chu Sema nâipa a ni, ama chu Nova nâipa a ni, ama chu Lameka nâipa a ni,
- ³⁷ama chu Methusela nâipa a ni, ama chu Enoka nâipa a ni, ama chu Jereda nâipa a ni, ama chu Mahalalela nâipa a ni, ama chu Kenana nâipa a ni,



³⁸ama chu Enosa nâipa a ni, ama chu Setha nâipa a ni, ama chu Adama nâipa a ni, ama chu Pathian Nâipa a ni.

Luka 4

Jisua'n thêмна a tong

(Mt 4.1-11; Mk 1.12-13)

¹Jisua kha Irtha Irthiangin a sipa, Jordan dung ata a kîr nôka, Diabola inthêmin ramchâra a fe tâka.

²Khan Diabola'n sîn sômminli an thêma. Kha sînga khan ite a fâk no sikin inhnunga chu a phîng a châm tâka.

³Diabola'n a kuang, "Pathian Nâi ni ni'n chu, hi lung hi bai inchangtir ro," a tia.

⁴Jisua'n chu, "Bai ringotin chu mihriam hi an ihring hrang ni ma tih irziak a ni," a tia.

⁵Khanchu, Diabola'n a hong hruaia, mitkhap kâr vakin rammual pumpui an entira.

⁶A kuang, "Hi chung a irchamneinahi le roiinpuinahi hi nang pe ki ti; ki kuang ipêk an ni ta, ki inuampu tak kuang ki pêk thei.

⁷Chubai ni mûkin lân, a rêngin nang pe ki ti," a tia.

⁸Jisua'n, "Rengpa ni Pathian chu chubai mûkin lân, Ama sin vai tho ro, tih irziak a ni," tiin a sâma.

⁹Khanchu, Diabola'n Jerusalema a hruaia, Tempil sîp irzuma a siaa, "Pathian Nâipa ni ni'n chu irchôm tha roh.

¹⁰'Pathianin a vân vântîrtônhai nang indom hrangin zuang tîr a ti,' ti irziak a ni.

¹¹An kutin nang indom an ta, ni ke khomin lung irfûi no chi ni," a ti pea.

¹²Jisua'n chu "Rengpa ni Pathian fia no roh," ti irziak a ni, tiin a sâm nôka.

¹³An thêмна hrang dôra an thêм zoiin chu, Diabola'n zoro'nchum danga hrangin a rotsan tâka.



Jisua'n Galili rama sintho a phut

(Mt 4.12-17; Mk 1.14-15)

¹⁴Khan, Jisua kha Irtha Irthiang sinthotheina neiin Galili rama a kîr nôka, kha ram sînga khan a thurchi an thang tâka.

¹⁵An Sinagokhaia, mi ar chutir ngaia, mihai inpâkin a oma.

Nazaret Jisua ihnôlin a om

(Mt 13.53-58; Mk 6.1-6)

¹⁶A seilianna Nazaret khuaa a fea, Sabat ni'n chu a tho ngai lam angin Sinagoka a fea, Pathian Thubu tep hrangin a ngîra.

¹⁷Deipu Isaia lekhabu an pêka, lekha irzuat kha a phara, hi irziak omna hi a tepa.

¹⁸"Inrianghai kuang Thurchi Sa insîr hrangin a nin thang sikin, Rengpa Irtha ki chung a oma, mi intâng hai kuang zôkna thu inpuang hrangin a ni itîr a ni. Mitchohai, mit vîr nôkna hrang le mi ihnuaisiahai zôkna hrangin.

¹⁹Rengpa'n a mihai an zôkna hrang zoro a hong intung tâk tih inpuang sa hrangin," ti hi.

²⁰Khanchu, Jisua'n lekha kha an zuata, a dôntu a pêka, a toia, Sinagoka mi murdi'n an en chuta.

²¹Khan, an kuang, "Hi Pathian lekha thu hi a vuan hin nin mikuar inhriata a zuang tung ta," tiin a hong insîr tâka.

²²A chongbâi suak, lungkham thu insîrin, an lungrîl a tôna, ar khêl an tia, "Hi mi hi Josefa nâipa ni ma mo?" an tia.

²³Khan, an kuang, "Nangni'n hi chongirkhek thu hi, Doktor, ni bingin indam irhlôm roh. 'Kapernaum-ah ni sinthohai, kin lei inhriathai khom hi ni khua tiang khom hin sin ro,' ni la ti ngêt nin ti," a tia.

²⁴Jisua'n, "Deipu chu mâni khuaa tûte'n lôm ngai mahai," a ti pea.

²⁵"Irngai u ta, hi hi a dik a ni, Elija zoro laiin Israel rama meithâi tamtak an oma, kum thum le tha ruk rua tho loiin a oma, a ram pumpui sînga châmpui a tâka.



²⁶Israel rama meithâi inkhat Sidon rama Zarefat kho mi kuang bana chu Elija kha tûte kuang itîr ni ma.

²⁷Deipu Elisa zoro lai khomin Israel rama phâr tamtak an oma, khannisianlân, tûte dam loiin, Suria rama mi Naamana vai indamin a om,” a tia.

²⁸Sinagoka mipuihai khan, a chong kha an inhriatin chu a sân an ning an mur.

²⁹An thoia, an khua ata an kaisuaka, khan an khua omna tânga rôla namthâk hrangin an hruaia.

³⁰Khannisianlân, mipui lai ata rel patin a rot tâka.

Ramilhli ichel indam

(Mk 1.21-28)

³¹Khanchu, Jisua Galili rama Kapernaum khuaa a fea. Sabat ni'n mihai ar chuhaia.

³²Irchamnei takin ar chuhai sikin a sân an irngai ar khêl tâka.

³³Sinagoka khan ramilhli irtha ichel a oma, inring takin a khêka.

³⁴“O, Nazaret Jisua, imo ni lo hrang ni ni iti? Ni'rhmantir hranga ni ihong ma ni? Nang kin hriat Pathian mi irthiang ni ni,” a tia.

³⁵Jisua'n, “Dâihrekin lân a sâng ata hong suak roh,” a tia. Ramilhli khan irnênga an rîltir raka, innatir loiin a sâng ata a suak tâka.

³⁶Khanchu, an rêngin ar khêl an tia. “Itina irchamnei ma ni? Irchamnei le sinthotheina neia ramilhli suak roi a tia, an isuak hi,” an irtia.

³⁷Khanchu, kha rama khan hmun tina Jisua irhming an thang tâka.

Jisua'n mipui tamtak an damna thu

(Mt 8.14-17; Mk 1.29-34)

³⁸Khan, Jisua Sinagok ata a suaka, Simona ina a fea, Simona tarpi a sân inkhur inrikin a oma, a ta hrangin Jisua a ngên pea.

³⁹A kôla a va ngîra, an khur kha a hala, khanchu, a hong boi zôia, a thoia an sin a tho pehai tâka.



⁴⁰Khanchu, misa a tâk hnungin, natna chi tinrênga damloihai a kuang an hong hruaia, an chung chita a kut pharin an damhai zita.

⁴¹Khan, “Pathian Nâipa ni ni,” tia khêkin ramilhlihai khom mihai sâng ata an suak tâka. Krista a ni tih an inhriat sikin. Jisua’n ramilhlihai kha chong hrang phalhai ma.

Sinagoka Jisua thu’nsîr

(Mk 1.35-39)

⁴²Khan, khua a vâ le chu khua ata fianriala a fea, mipuihaiin an zonga, an hmu’n chu, masanhai loa an kuang la om hrangin an ngêna.

⁴³Khannisianlân, Jisua’n an kuang, “Pathian Ram Thurchi Sa kho tina insîr hrang piala tîr kêng ki ni,” a ti pehaia.

⁴⁴Khanchu, Galili rama Sinagokhaia thu an sîr tâka.

Luka 5

Jisua’n irchutir masatakhai a koina

(Mt 4.18-22; Mk 1.16-20)

¹Sûn khat chu, Jisua Genesaret dîl kôla a ngîra, mipuihaiin Pathian thu irngai hrangin an hong pan mur mura;

²dîl kôla irkuang inhni om kha a hmua, nga cheltuhaiin an lên sôphai an imâk kha a hmua.

³Simona irkuanga khan a chuanga, muang ata irthîn viat hrangin a ngêna, khanchu, irkuanga a toia, mipui ar chuhaia.

⁴Thu an sîr zoiin chu Simona kuang, “Tui inthûkna tiang irkuang infetirin lân, nga man hrangin nin lênhai vôr roi,” a tia.

⁵Khan, Simon khan, “Rengpa, zân sôt kin vôra, ite man ma ung, khannisianlân, nangma irchamin lênhai vôr nôk kin ti,” a tia.

⁶An zu vôrin chu nga tamtak an mana, an lênhai khom a chet vâng vâng.

⁷Khanchu, irkuang danga an chanpui omhai kha hong sanhai hrangin an zâphaia. An hongai irkuang inhni ngîm vâng vângin an thun insip zita.



⁸Khan, Simon Petera'n thil omzia a hmu'n chu, Jisua kuang khûksadelin, "Rengpa, ni masan roh, mi sual kêng ki ni," a tia.

⁹Ama le a rualhaiin an nga chel a tam hrai sikin a sân ar khêl an tia.

¹⁰Simona pâla Zebedaia nâihai Jakoba le Johana khomin ar khêl an ti ok sa a ni. Khan, Jisua'n Simona kuang, "Chi no ro, atûn ata chu mihriam chel ta ni ti," a ti pea.

¹¹An irkuanghai muanga an hong kaisuaa, thil tinrêng mâk zitin Jisua an zui tâka.

Jisua'n phâr an damna

(Mt 8.1-4; Mk 1.40-45)

¹²Nikho khat chu, Jisua kha khua inkhata a om laiin, a taksa pumpuia inphâr khan Jisua kha a hmua, khûksadelin damna a zonga, "Rengpa ni nuamin chu ni ni'rthiangtir thei," a tia.

¹³Jisua'n a hong inbana, "Ki nuam e, hong irthiang ta roh," a tia. Voikhat rengin a phâr kha a hong boi zit ta.

¹⁴Khan, Jisua'n a kuang, "Tûte inhril no roh, aniachu, Ochai kuang van entirin lân, mi tinin ni dam tâk ti an inhriat theina hrangin, Mosia dân angin irbôlna inhlan roh," a ti pea.

¹⁵Khannisianlân, Jisua thurchi kha an thang ual uala, a thu'sîr irngai hrang le an natnahai indam hrangin mipuihai a kuang an hong irbûma.

¹⁶Khan fianriala a fea a chongchaia.

Jisua'n zenginthei an damna thu

(Mt 9.1-8; Mk 2.1-12)

¹⁷Sûn khat chu Jisua'n mi ar chutira, a kôla Farisaihai le Dân irchutirtuhai an toia, Galili le Judai ram kho tin ata le Jerusalem ata hong an nia. Mi indam theina hrangin Rengpa Irtha Jisua chung a oma.

¹⁸Zenginthei a zâlna pumin an hong irzôna, in sênga Jisua makunga se hrang an tuma.



¹⁹Khannisianlân, mipui tam sikin lût thei mahaia, in chung tiang an luipuia, in chung ata an lâi taka, Jisua makunga a zâlna pumin an zu inthâka.

²⁰Khan, Jisua'n an iamzia a hmu'n chu, a kuang, "Mala, ni sualhai ngaidam a ni ta kêng," a tia.

²¹Khan, Dân irchutirtuhai le Farisaihai khan, "Hiang taka Pathian hrilsiat hi tu mo a ini! Pathian vai kêng soal ngaidam thei," tiin an insîr irhlôma.

²²Jisua'n an ngaituana an hriata, "Itho mo khaanga thil nin ingaitua?"

²³'Ni sualhai ngaidam a ni ta' ti le thoiin lân ke'n fe ta roh, ti hi kho hi mo a ol ual?"

²⁴Mihriam Nâipa hin rammuala sualhai ngaidam theina a nei tih nangni inlangtir pe ki ti," a ti pehaia.

²⁵Voikhat rengin an mit hmua a thoi zoka, a zâlna puantha a lâka, Pathian inpâk pumin a ina a fe ta.

²⁶An rêngin irngai irkhêlin an chia, "A vuan chu hiang taka thil irkhêl ei ihmu hi," tiin Pathian an inpâk tâka.

Jisua'n Levia a koina

(Mt 9.9-13; Mk 2.13-17)

²⁷Kha hnung chu, Jisua a fe suaka, khâzana irfuangna hmuna toi, khâzana irfuangtu inkhat, a'rhming Levia kha Jisua'n a hmua, Jisua'n a kuang, "Ni zui roh," a ti pea.

²⁸Khanchu, thil tinrêng mâkin a zui tâka.

²⁹Khan, Levia khan Jisua hrangin a ina hruai an thea, khâzana irfuangtu tamtak le mipuihai a fiala.

³⁰Khan, Farisai senkhathai le Dân irchutirtu senkhathaiin Jisua irchutirhai kha an sêla, "Itho mo khâzana irfuangtuhai, mi sualhai leh nin fâkin nin iin suam," an tia.

³¹Jisua'n an kuang, "Mi hrisêlhaiin doktor innang ngai mahaia, mi irveisiahai kêngin an innang ngai.



³²Mi felhai irlam hranga zuang ni ma unga, mi sualhai an irlet theina hranga zuang kêng ki ini,” a tia.

Bu nghei chungchânga irdonna

(Mt 9.14-17; Mk 2.18-22)

³³Mi senkhatin Jisua kuang, “Johana irchutirhaiin bu ngheiin an chongchai ngaia, Farisai irchutirhai khomin khang dênin an tho ngaia, khannisianlân, ni irchutirhaiin chu nghei ngai mahaia?” an tia.

³⁴Jisua’n an kuang, “Irneinaa an rualhai kha moineipu an kuang a om kêr ka chu bu nin inngheitir theihai hrang ma ni? Ni thei no ni!

³⁵Khannisianlân, an kuang ata moineitu an hruaipai nikhua la tung a ta, kha tika chu la nghei an ti,” a tia.

³⁶Jisua’n an kuang chongirkhek dang an sîra, “Tûte’n puan thar inpot thêrin puan milui phô ngai mahai, phô ta ngân sian, a thar khan kaiset a ta, a thar hlek lâkin a milui kha irfûk no ni.

³⁷Tûte’n uain thar savun kok miluia thun ngai mahai, thun ngân ta sianlân, uain khan savun kokhai kha mût khoi a ta, irpai a ta, savun kokhai khom insiat a ti.

³⁸Khasikin, uain thar chu, savun kok thara thun an ti.

³⁹Tûte’n uain milui in hnungin uain thar in nuam ngai mah, uain milui a sa ual sikin,” a tia.

Luka 6

Sabat chungchânga irdonna

(Mt 12.1-8; Mk 2.23-28)

¹Sabat ni voikhat chu bubil hmunhai a hroa; a irchutirhaiin bu vûi an khiaka, an kuta inmuai infâiin an bâra.

²Farisai senkhathaiin, “Itho mo ei Dânin Sabat nia tholoi hrang a iti te nin itho?” tiin an irdona.

³Jisua’n an kuang, “Davida le a mihaiin an phîngchâm laia an itho kha nin itep ngailoi ma ni?



⁴Pathian ina a lûta, Ochaihai bana chu tûte fâk hrang dân ni loi bai irthiang kha a lâka, a fâka. a rualhai khom a ipêk thu kha?” a tia.

⁵An kuang, “Mihriam Nâipa hi Sabat nikhua Rengpa a ni,” a ti pehaia.

Kut zenginthe indam thu

(Mt 12.9-14; Mk 3.1-6)

⁶Khan, Sabat nikhua danga chu Jisua Sinagoka a lûta, ar chuhaia. Khataka khan mi inkhat kut chang tianga zenginthe a oma.

⁷Dân irchutirtuhai le Farisaihai khan demna an hmu theina hrangin Sabat nia indam hrang le indam loi hrang an enirchika.

⁸Jisua'n an milung inchong an hriatin, damloi kuang, “Thoiin lân, a laia hin ngîr suak ta,” a tia. Khanchu a thoia, a ngîr suak tâka.

⁹Jisua'n an kuang, “Sabat nia insa mo a'rthiang, insiat mo, mi saninhring mo, a'rthiang thatpai mo? nangni ki'rdon,” a ti pehaia.

¹⁰Khanchu an rêng khan a enhaia, zenginthe kuang khan, “Ni kut phar ro,” a tia. A hong phara, a kut kha a hong dam tâka.

¹¹Khanchu, a sân an ning an mur tâka, Jisua kha itina lo hrang mani tiin an irdon irhlôm tâka.

Irchutir sômhleihnihai a inthangna thu

(Mt 10.1-4; Mk 3.3-19)

¹²Kha zoroa khan Jisua chongchai hrangin tânga a fea, zân khovârin Pathian kuang a chongchaia.

¹³Khua a hong vârin chu a irchutirhai kha a koihaia, an lai ata sômhleihni an thanga, an irhminga Tirtôn a phuahaia.

¹⁴Simona Petera le a sang Andria, Jakoba le Johana, Filipa le Bartholomaia,

¹⁵Mathaia le Thoma, Alfaia nâipa Jakoba le Simon Zelota,

¹⁶Jakoba nâipa Juda le an cheltirtu Juda Iskariota hai an ni.

Jisua'n ar chutirna le an damna thu

(Mt 14.23-25)



¹⁷Khan, Jisua le a irchutihai tâng ata an zuang chum hnungin, a irchutih tamtakhai leh hmun inchama an ngîra, kha hmuna khan mipui tamtak Judahai ram tina irthoka, Jerusalema irthoka, tuikhanglian vapanga khua Tura le Sidon mihai an oma.

¹⁸A thu'nsîr irngai hrang le natnahai indam hranga hong an ni. Ramilhli ichelhai khom an hong dam tâka.

¹⁹A kuang ata sinthotheina a suak sikin mipui murdi'n ama tôn hrang an tuma, an rêngin an dam pak tâka.

Raifâna le chardongna

(Mt 5.12)

²⁰Jisua'n a thîr vêla, a irchutihai kha a ena, thu an sîra, “Nangni inrianghaio, nin vân a sa e, Pathian Ram nin ta a ni sikin!

²¹Nangni atûna phîngchâmhaio, nin vân a sa, Nin la khop hrang sikin! Nangni atûna chaphaio, nin vân a sa, nin lan nui hrang sikin.

²²“Mihriam Nâipa sika, mihaiin nangni an khôkmâka, nangni an hnôla, nangni an êroa, irhming siat raka nangni an hnôlin chu, nin vân la sa ti.

²³Kha zoi tika chu raiinfân unglân, lômin irchôm roi, irngai u ta, irvâna nin lômman a om hrang sikin! Nin chung a an itho angin an irchibulhai khomin Deipuhai chung a an itho ngai a ni.

²⁴“Nangni irchonghaio, nin chung a rik e, inhoina murdi nin hman zoi tâk sikin!

²⁵Nangni atûna khophaio, nin chung a rik e, nin phîng a la châm hrang sikin! Nangni atûna innuihaio, nin chung a rik e, beidongin nin la ichap hrang sikin!

²⁶“Mi tinin nangni an inpâk tika chu lungkham nin la iom hrang kêng; khang dênin an irchibulhaiin deipu dolhai an inpâk ngai.

Râlhai lungthung hrang

(Mt 5.38-48; 7.12)

²⁷“Ki thu irngaipuhaio, hiang hin nangni ki hril, nin râlhai kha lungthung unglân, nangni khôkmâktuhai chung a khan an satna hrang tho pehai roi.



²⁸Khua nangni sâltuhai chu satvurhai roi, deng nangni intheitirtuhai chu chongchai pehai roi.

²⁹“Mi’n ni hmâi kiangkhat inbêntu kuang kiangkhat tiang khom do pe roh. Khan ni puan lâktu kuang chu ni songkol lâk khom inlatir roh.

³⁰Nang a zongtu murdi chu pe’n lân, ni sum nang lâk petu chu zong nôk ta no roh.

³¹Nin chungâ mihaiin, nin nuamlam an itho ang dênin mi chungâ khom tho roi.

³²Nangni lungthungtuhai vai lung nin thungin itin mo satvur nin idong hrang? Imo mi sualhai nêka nin danglam bîkna? Mi sualhai khomin anni lungthungtuhai chu lung an thung ngai kêng.

³³Nin chungâ sin sa thohai chungâ vai sin sa nin itho hin, imo mi sualhai leh nin danglam bîkna? itin mo satvur nin idong hrang? Mi sualhai khomin khang khan an tho ngai kêng.

³⁴Hmu nôk hranga, nin isabei hai kuang vai, nin inpûktirin te, imo satvur nin idong hrang? Mi sualhai khomin a bi hmu nôk hrangin chu mi sualhai an inpûktir ngai.

³⁵Ni ma! Ni râlhâi lungthungin lân, an satna hrang sin ro. Ite sabei loiin inpûktir roh. Khanchu, lômman tamtak hmu nin ta, Anchungtaka Pathian nâihai nin ini hrang a ni; Ama’n chu lômna châng inhre loihai le mi sualhai khom lung an kham zit ngai.

³⁶Nin pa khomin mi lung a inkham angin nangni khomin mi lung inkham ngai roi.

Mi dang sêl chungchâng

(Mt 7.1-5)

³⁷“Mi sêl no roi, Pathian khomin nangni sêl no ni, mi dem no unglân, Pathianin nangni dem no ni, mi ngaidam unglân, Pathianin nangni ngaidam a ti.



³⁸Pe unglân, khanchu, Pathianin nangni pe a ti. Tikhoi pêkin namirdên ngitin, nok inhnîngin, lêt rakin nin dong thei dôr nin kuta nangni pe a ti. Mi nin irte pêna ngai dêna khan Pathianin nangni irte pe a ti,” a tia.

³⁹Jisua’n hi chongirkhek hi an sîra, “Mitcho’n mitcho dên hruai thei mah, a hruaiin chu an ruaiin khurpadopa tâk an ti.

⁴⁰A’rchutirtu nêkin a’rchupu lian ual ma, khan, a’rchutu khom a zoi tika chu a’rchutirtu pha ta ti.

⁴¹Itin lama mo, mâni mita thingtum om chu inhre loiin ni urêng mita minim om chu ni ihmu?

⁴²Mâni mita thingtum om chu ngaipoimo loiin, ‘Ni urêng kuang ni mita minim nang lei kêl pe rong ni iti thei hrang?’ Mi vârirlet! Ni mita thingtum kêl bakin lân, khanchu, ni urêng mita minimte kha hmu’nfel thei ni ti.

Thing sa le thing saloi ra

(Mt 7.16-20; 12.33-35)

⁴³“Thing sa chu a ra siat ngai mah, thing sia lak a ra sa ngai mah.

⁴⁴Thing tin an ra chita ei inhriat thei a ni; ilhling rângâ theipui irhmal ngai mahai, hloiilhlingnei kunga khom grep irhmal ngai mak chêi.

⁴⁵Mi sain chu a milung irchon kok sa ata thil sahai a phor suak ngai, mi sual chu a milung irchon kok saloi ata thil saloihai a phor suak ngai, milunga lêt raka sip hi kêng bâiin nin insîr suak ngai.

Mi inhni in sin thu

(Mt 7.24-27)

⁴⁶“Itho mo ki thu zôm loia Rengpa, Rengpa, nin ni iti?

⁴⁷Tukhom ki kuang hongâ ki thu zôm chu i ang mi mani nangni hril ki ti.

⁴⁸Kha mi kha chu a in sin kha lungpui chungâ inthûk vita lungphûm ang kha a ni. Tui lianin a suka, inhnîng maka, det ngita sin a ni sikin.

⁴⁹Khan, tukhom ki hnuk irhai inhriata, ki thu zôm no chu, lungphûm loia pil chungâ in sin, tui lianin a suk a suka, a chim zôi zela, a isiat irnôi chit ang kha a ni,” a tia.



Luka 7

Sipai irza hruaitu suak indamna thu

(Mt 8.5-13)

- ¹Khan, Jisua'n mihai kuang thu an sîr zoiin chu Kapernaum khuua a fea.
- ²Rom sipai irza hruaitu suak lung a ithung tak dam maka, a thi vâng vâng.
- ³Khan, Jisua thurchi an hriatin chu a suakna kha indam pe ngêt hranga ngên hrangin Juda upahai a tîra.
- ⁴Jisua kuang an hong, "Hi mi hi changpui inruk a ni.
- ⁵Ei mihai hi lung a thunga, Sinagok khom a ni sin pe a ni," an tia.
- ⁶Khanchu, Jisua kha an pâla a fe sa tâka. In a va tung hrang tôn chu, sipai irza hruaitu chu a rualhai a tîra, "Rengpa intak pu pumin hong no ro, ki in sêng ni lûtna zât ni mak e,
- ⁷Khabana keima khom ni kuanga hong hrang khom inruk ni ma ung.
- ⁸Kei khom keima nêka lianhai thu hnuaia om ki nia, ki thu hnuaia sipaihai an oma, inkhat kuang, 'Fe roh,' ki tiin a fea, 'Hong roh,' ki tiin a hong, ki suak kuang, 'Hi hi sin roh,' ki tiin a sin ngai," a tia.
- ⁹Khan, Jisua'n kha kha an hriatin kha pa kha a sân a'rkhêl a tia, a'rhei têi tuaia, a zuituhai kuang, "Nangni ki hril, hiang dôra iamna irkhêl hi Israelhai laia tukhom la hmu ma ung," a tia.
- ¹⁰A mi tîrhai kha ina an va kîr nôkin chu, suak kha a damin an va hmu ta.

Jisua'n meithâi nâipa a kaithoi

- ¹¹Chomkhat hnunga chu Jisua kha Nain khuua a fea, a irchutirhai le mipuihaiin an zuia.
- ¹²Khan, khua dâi mikot an tungin chu, mithi an hong irzôna, meithâinu nâi neisun a ni. An khuua mi tamtak an hong saa.
- ¹³Khan, Rengpa'n a hmu'n chu, kha nu kha lung an kham tak taka, "Chap ta no roh," a tia.



¹⁴A va nâia, irlâng kha a chela, a'rzôntuhai khom kha an ngîr tâka, "Ruatharte, thoi roh, nang ki ti," a tia.

¹⁵Mithi kha a thoi zôi zela, a chonga, a nu kuang a pêk tâka.

¹⁶Mi murdi'n an chia, Pathian an inpâka, "Ei laia Deipu roiinpui tak a zuang iom tâk a ni," an tia; Pathianin a mihai a zuang ihro tâk a ni, an ti saa.

¹⁷Kha thu kha Judai ram murdia le a kôlvêla Judai ram tina an thang suak tâka.

Baptistu Johana mi tîrhai

(Mt 11.12-19)

¹⁸Johana irchutirhaiin Jisua thurchi Johana an hrila.

¹⁹Khanchu, mi inhni Rengpa kuang a tîra, "A zuang hrang Mesia kha mo ni ini, mi dang kin la itûng hrang mo?" tia irdon hrangin.

²⁰Khan, Jisua kuang an hongga, "Baptistu Johana'n a zuang hranga kha ni ini mo, mi dang mo kin la itûng hrang? a ti," tiin an irdona.

²¹Kha lai taka khan, Jisua'n mi tamtak damloihai, an natna hai, ramilhli ichelhai an damhaia, mitchohai mit an vâp pehaia.

²²Khan, Johana irchutirhai kuang, "Fe nôk ta unglân, Johana kuang nin ihmu le nin inhriathai va hril roi, mitchohai an hmu thei ta, kholrahai ke'n an fe thei ta, phârhai an irthianga, kuarsêt hai khom an mikuar a vâra, mithihai kaithei an ni tâka, inrianghai kuang Thurchi Sa hril a ni ta.

²³Khan, tukhom ki chungga milung irlakna nei loi chu an vân a sa," a tia.

²⁴Johana mi tîrhai an kîr hnungin, Jisua'n mipui kuang Johana chungchâng thu an sîra. "I enhoi en hrangin mo ramchâra nin izuang? lailuang phâivua'n a isêm inhnîng mo?"

²⁵I en hrangin mo nin ife suak? puan irnêm sila irvo mo? puan irnêm sil le mi neihai chu rêng ina kêng an iom.

²⁶I tak en hrangin mo nin ife? Deipu en hrangin mo? A ni khate; nangni ki hril, ama chu deipu nêka roiinpui ual a ni. Hi mi hi a ni hi te.



²⁷Johana'n hi Pathian Thubua, 'Irngai ta, ki tirtôn ni matona ki tîr, Ama khan ni matona ni lam siam a ti,' tia a thurchi an irziak kha.

²⁸Nangni ki hril, nupanginei laia Johana nêka roiinpui ual om mahai; aniachu, Pathian Rama mi chîn tak khom ama nêkin chu a roiinpui ual," a tia.

²⁹Vântâng hai le khâzana irfuangtuhai khan Johana thu an inhriatin Pathian sintho dik tak kha pomin a kuang baptisma an chang oka;

³⁰Farisai le Dân irchutirtuhai chu baptisma kha chang nuam mahai, anni ta hranga Pathian irfûktir kha nuam mahai.

³¹Jisua'n, "Atûnlai mihai hi i leh mo ki irkhi hrang tâk? I ang mo an ini.

³²Nâipang hai bazar hmuna toia, senkhatin irneina theihle nangni kin tum pea, lâm mak chêia, lusûn hla kin sak khomin chap mak chêia, tia irsamirhlôm ang kha an ni.

³³Baptistu Johana a zuanga, bu ne maka, uain khom in maka, ramilhli nâi kêng nin tia.

³⁴Mihriam Nâipa a zuanga, a fâkin a ina, rôlruakpa, khâzana irfuangtuhai le mi sualhai rualpa nin tia.

³⁵Khannisianlân, a pomtuhai ta hrangin chu, Pathian vârna hi a dik a ni tih inlangna a ni," a tia.

Farisai Simona ina Jisua thu

³⁶Farisai inkhatin Jisua bu nêk a koia, Jisua a fea, bu ne hrangin a toia.

³⁷Kha khua khan nupang sual a oma, Jisua Farisai ina bu a nêk tih an hriatin chu alabastar bûrin sahriak mirimhoi a hong chôia.

³⁸Jisua hnung tiang a ke bula a ngîra, a chapa, a mit irthîn a kehai a zunga, a samin a huia, a ke kha a tuma, a sahriak mirimhoi kha a pol tâka.

³⁹Farisai khan a hmu'n chu a milungin, "Hi mi hi deipu dik a ni'n te, a tontunu, nupang sualzia hi inhria a ti," a tia.



⁴⁰Jisua'n a kuang, "Simon, nang hril hrang ki nei," a tia. Simona'n "Ti ro ba, irchutirtu," a tia.

⁴¹Jisua'n, "Mi inhni'n lâkai pe ngaitu kuang sum an tângtira, inkhatin irza ringa, inkhatin sômringa,

⁴²An tuam thei no sikin, a ngaidamhaia, a tu khan mo lungthung ual ni?" a tia.

⁴³Simona'n a sâma, "Ki iam lamin chu a ingaidam tam ualtu khan," a tia. Jisua'n, "Ni indik," a ti pea.

⁴⁴Khanchu, nupangnu tiang irheiin, Simona kuang, "Hi nupangnu hi ni hmu mo? Ni ina ki hongga, ki ke sôpna hrang tui ni pe mak chea, ama hin chu a mit irthi'n ki ke an duia, a samin a huia.

⁴⁵Nangin ni tum mak chea, ama hin chu a hong lût phut ata ki ke tum hi mong mah.

⁴⁶Nangin ki lua sahriak ni pol mak chea, ama hin chu ki ke sahriak mirimhoi a ipol a ni.

⁴⁷Khasikin, nangni ki hril, hi nupangnu hin lungthungna lian tak an langtirnaa hin, a سوالنا murdi ngaidam a ni tâk tih an lang infel a ni. Khasikin, tukhom ngaidamna tôm ual dongpu'n chu lung a ithungna ar nêp ual ngai," a tia.

⁴⁸Nupang kuang khan, "Ni سوالنا ngaidam a ni ta," a tia.

⁴⁹A khalai otpuituhaiin chu, "Tu mo a ini tâk kha, سوالhai khom ngaidam thei tâk," an irtia.

⁵⁰Khan, nupang kuang khan, "Ni iamna hin nang a isaninhring a ni, irtharngam takin fe ta ro," a tia.

Luka 8

Jisua zui nupanghai

¹Chomkhat hnunga chu Jisua'n Galili ram kho lian le kho chîna Pathian Ram Thurchi Sa insîrin a fea. Irchutir sômhleihnihai khom an zui ngai.



²Nupang senkhat, ramilhli ichel indam le an natnahai ata damhai khom an kop sa; Magdala kho mi Mari a sũaga ramilhli sari a irzũlpai pehai,

³Heroda sum enkoltu Chuza dũagma Joani hai, Susani hai, mi dang nupang tamtakhaiin an zui saa. Hi mihai hin an sumin Jisua le a irchutirhai an changpui ngaia.

Fachĩ inthektu chongirkhek

(Mt 13.1-9; Mk 4.1-9)

⁴Kho tina irthokin mipuihai Jisua kuang an hong irbũma, Jisua'n hi chongirkhek thu hi an sũa.

⁵“Mi inkhatin bu inrĩt hrangin a loaia a fea, khaanga fachĩ a hong inthe kkan senkhat lampuia a tũaka, an lei sirphaa, vahaiin an hong fũk zũa tũaka.

⁶Senkhat lungpherpha pil chung a tũaka, a hong mũng lata, khannisian, pil kha a'rzil no sikin a hong chũr zũaia.

⁷Senkhat hloihlingnei kũaa a tũaka, hloi kkan ar sũa dela, a dũa irhmang ta.

⁸Senkhat irnũa saa a tũaka, a hong irsũa liana, a bũk irza'n a vũa tũaka,” a tia. Kha thu kha an sũa, “Irngaina mikuar nei murdi'n chu irngai ri sehai,” tiin a tia.

Chongirkhek thil tum

(Mt 13.10-17; Mk 4.10-12)

⁹A irchutirhai kkan kha chongirkhek thu kha i tihna mo, tiin an irdona.

¹⁰Ama kkan, “Pathian Ram thurũl chu nangni inhriat hranga tho a nia, mi danghai ta hrang chu thu intak a ni; hmu chian khomhai sian hmu'n fel mahaia, inhre mai khomhai sian an inhriat thei nona hrangin.

Fachĩ inthektu chongirkhek omzia

(Mt 13.18-23; Mk 4.13-20)

¹¹“Chongirkhek omzia chu hi hi a ni: Fachĩ chu Pathian thu hi a ni.

¹²Lampuia tũk kha chu an iam noa saninhring an ni nona hrangin Diabola a hong a, an milunga thu kha a lũkpai pehai ngai.



¹³Lungpherpha chung a tâk kha, an inhriat zôi le thu kha lôm taka pom tâkhai hi an ni; khannisianlân, irzung la maka; zoro sôtnote chu an iam tâka, inthêmna an tong viat le chu an tûk nôk zôi ngai a ni.

¹⁴Hloiilhlingnei laia tâkhai chu thu kha an inhriata, a hong irsôna, khannisian dam sêng hringnun inhoinahai le irchongnahai khan a hong dîpa, ra puihling a insuak ngai loi a ni.

¹⁵Irnêng saa tâk kha hihai hi an ni; thu kha inhriata lungrîl dik le saa, sataka vonga, bei zâma ra suak tâkhai hi an ni.

Meiser hâla irkhu

(Mk 4.21-25)

¹⁶“Tukhomin an meiser hâl kha belin irkhu ngai mahai, zâlmun hnuai khom sia ngai mahai, a lût murdi'n a vâ an hmu theina hrangin a sianaa an sia ngai.

¹⁷Ite phuang nôk loi hranga thup om mah, inhriat loi hrang le inlang loi hrangin ite ithup om ual mah,

¹⁸Khanchu, nin thu dong dâna irdîn roi, a nei ka chu pe bel sa an ta, a nei loi chu a neia a inhriat sun khom lapai pe an ti.” a tia.

Jisua nu le a urêng hai

(Mt 12.46-50; Mk 3.31-35)

¹⁹A nu le a urêng hai khom a kuang an hong a, khannisianlân, mipui sikin nâi thei mahai.

²⁰“Ni nu le ni urêng hai in nang hmu tum in pên tiang son nang an nghâk,” tiin an hrila.

²¹Ama'n a sâmhaia, “Pathian thu inhriata zômhai hi ka nu le ki urêng hai an ni,” a tia.

Phâivopui a hal inmong

(Mt 8.23-27; Mk 4.35-41)

²²Sûn khat chu a irchutirhai leh irkuanga an chuanga, an kuang, “Dîl râl tiang son kâi ei ti,” a tia, an suak tâka.



²³Khaanga an fe lai khan, Jisua kha a lei ina. Voikhat rengin dîla khan phâivopui a hong thoa, an irkuang tuiin a sip vâng vâng tâka, a sân phûkinthingin an om tâka.

²⁴Irchutirhai kha Jisua kuang fein, an va kaithoia, “Irchutirtu, Irchutirtu; kin ithi zoi hrang tâk kêng,” an tia. Khanchu, Jisua kha a thoia, phâivopui le tui irsok kha a hala: a hong monga, a boi rup tâka.

²⁵Irchutirtu khan an kuang, “Kho mo nin iamna?” a tia. An chia, ar khêl an ti tak taka, “Hi mi hi tu mo a ini? phâivua le tui ten khom thu a pêka, an i-zôm hi.” an irti irhlôma.

Jisua'n ramilhli ichel an damna thu

(Mt 8.28-34; Mk 5.1-20)

²⁶Khan, Jisua le a irchutirhai kha Galili dîl râl, Gerasin mihai rama khan an va kâia.

²⁷Jisua varâl a kâi le chu mi inkhat, ramilhli ichel a tonga, kha mi kha zoro sôt taka silkai boiin, in sênga khom om loiin thâna a om ngai.

²⁸Jisua a hmu'n chu a khêka, a makunga khûksadelin, inring takin, Jisua Pathian Anchungtaka Nâipa, Imo ni lo hrang ni iti? Deng nin theitir no roh, tiin a ngêna.

²⁹Jisua'n irtha porinche kha a sêng ata suak hrangin, thu a pêk sika hianga a iti a ni. Voi iza an chela, lung ina an khum ngaia, a kut a ke thîrhruin an khita an pôisata, ramilhli khan ramchâr tiang a hruai ngai a ni.

³⁰Jisua'n, “Imo nir hming?” a tia. Ama khan, “Ki'rhming chu Nuaia,” a tia. A sênga ramilhli lût kha a sân an tam sika, a ni.

³¹Khurmongboia pai thâk loi hrangin Jisua kha an ngêna.

³²Khan, kha tânga khan vok rual fâk zongin an oma, ramilhlihaiin vokhai sênga lût hrangin Jisua an ngêna, a phal pehaia.

³³Kha pa sêng ata an suaka, vokhai sênga an lût tâka. Rôl fora khan an intâna, dîla an intân lûta, tui inhakin an thi ta.



³⁴A enkoltuhai khan thil hong tung kha an hmu'n chu an intâna, kho sâng mihai le a kôlvêla mihai kha an inhrilhaia.

³⁵Khanchu, i thil mo a hong itung ta tih en hrangin mihai kha an suaka, Jisua kuang an hong tungin chu, ramilhli isuaksan tâk pa kha puan sila, lungrîl pangai irputin Jisua ke bula toi an hong hmu'n chu, a sâan an chi tâka.

³⁶Khan, a hmupu dôrin a dam lam dân kha mihai kuang an va hrila.

³⁷Gerasin rama mihai khan an chi sikin Jisua kha an kuang ata rot hrangin an ngêna, khanchu, Jisua irkuanga a chuanga a mâk tâka.

³⁸Ramilhli sâng ata suak, hong damtu khan, Jisua kuang, “Nang zui ki ti,” a tia.

³⁹Khannisianlân, Jisua'n, “Ni ina fe'n lân, ni chung a Pathian sinthozia hi van sîr roh,” a ti pea. Khanchu, a fea, khopui sâng pumpuia a chung a Jisua sinthozia kha an sîr tâka.

Jaira nâinu le nupang thi suak indam

(Mt 9.18-26; Mk 5.21-43)

⁴⁰Khan, Jisua hong kîr kha mipuihai khan lei lômin an lei nghâka.

⁴¹Irngai ta, mi inkhat, ar hming Jaira, Sinagok hruaitu kha a hong a, Jisua ke bula an bok hrupa, a ina fe hrangin a ngêna.

⁴²A nâinu neisun, kum sômhleihni mi, a thi vâng vâng sikin. Khan, Jisua a fe'n chu mipuihaiin an uap tur tura.

⁴³Nupang inkhat, kum sômhleihni thi suak tâk, a sum nei murdi khom daktora a sêng zoi tâka, tûte'n an indam theiloi kha a hnunga a hong a, a puan hmor kha a hong tôna,

⁴⁴Iringloiin a thi suak kha a boi zôi zela.

⁴⁵Jisua'n, “Tu mo a ni tôn kha?” a tia. “Kei chu ni ma ung,” an ti chita, khan Petera'n, “Hruaitupa mipuiin hiang dôra ihneng renga nang an ihneng hi te,” a ti pea.

⁴⁶Khannisianlân Jisua'n, “Tukhôkin mani a ni tôn, keima ata sinthotheina a suak ti kin hriat,” a tia.



⁴⁷Khan, nupangnu khan irthup thei zât ni ta mah ti an hriatin, inthing pumin a hongga, a makunga an boka, a itônna san le irningloia a idam tâk thu mi murdi makunga a hril tâka.

⁴⁸Khanchu Jisua'n a kuang, "Ki nâinu, ni iamna hi ni idampui a ni, irtharngam takin fe ta roh," a tia.

⁴⁹A la chong lai takin Jaira in ata mi inkhat a hongga, "Ni nâinu a thi ta, Irchutirtu hi dengintheitir ta no roh," a hong tia.

⁵⁰Jisua'n an hriatin, Jaira kuang, "Chi no roh, iam maiin lân, dam nôk a ti," a tia.

⁵¹In kha a va tungin chu, Petera, Johana, Jakoba hai le nupangtenu pa vai ti no chu tûte lût hrang phal maka.

⁵²Khataka om murdi'n nâite lei sînin an chapa. Jisua'n, "Chap no roi, a thi ni mah, a in kêng," a tia.

⁵³A thi ngêt a nih ti an inhriat sikin an innuisana.

⁵⁴Jisua'n a kut a chela, "Ki nâinu thoi roh," a tia.

⁵⁵A'rtha kha a zuang kîr nôka, a thoi zôia; "Fâk rua pe roi," a tia.

⁵⁶A nu le pa khan ar khêl an ti tak taka, khannisianlân, thil om lam kha mi dang hril a khap khaka.

Luka 9

Jisua'n irchutir sômhleihni a tîr suakna thu

(Mt 10.5-15; Mk 6.7-13)

¹Jisua'n irchutir sômhleihnihai kha a koi bûmhaia, an kuang, ramilhli inhnot suak theina le natnahai indam theina sinthotheina le irchamneina a pêka.

²Khanchu, Pathian Ram thu'nsîr hrang le damloi indam hrangin a tîr suakhai tâka.

³An kuang khan, "Inzinna hrangin khianghrol, hmarsa, bai, sum, songkol a'rthuamin chôi no roi, a ti pehaia.



⁴Nangni an lei lômna in taka khan om chian roi, kha khua kha nin mâk nôk mâka chu.

⁵Nangni an lei ingaisak laina khua chu, nin suaksan hrang tika an dikloizia inhriatirna hrangin nin kezaphaa vâiphin kha nûlpai roi,” a ti pehaia.

⁶Khanchu, an suak tâka, kho tin an irfanga, hmun tina Thurchi Sa hrilin mihai an indam thiaia.

Heroda char a dong

(Mt 14.1-12; Mk 6.14-29)

⁷Khan, Galili-a rêng Heroda'n, thil omzia an hriatin a buai tâka. Senkhatin, “Johana kha mithi lai ata a ithoi nôk tâk kêng,” an tia.

⁸Senkhatin, “Elija a zuang inlâr nôk ta kêng,” an tia; senkhatin, “Tianlaia deipu tu mo khat a zuang ithoi nôk ta kêng,” an ti sika khan, a'rngaina lam chang inhre maka.

⁹Heroda khan, “Johana kha a lu ki itanpai tâk kha! A thurchi hiang dôra irkhêl ki inhriat hi tu mo a ini tâk?” a tia. Jisua kha hmu a tum tâka.

Mi sângringa a vâina thu

(Mt 14.13-21; Mk 6.30-44; Joh 6.1-14)

¹⁰Khan, tirtônhai an hong kîr nôkin chu an sinthohai Jisua kuang an hrila. Khan, a kuang a hruaihaia, Bethsaida khuaa an bingin a fe puihaia.

¹¹Mipuiin an inhriatin chu an zuia, a lei lômhaia, Pathian Ram thu a hrila, indam innang ka chu an damhaia.

¹²Khan, khohloi a hong ni'n chu, irchutir sômhleihnihai an hong, a kuang, “Mipuihai hi infetirhai ta roh, kho sînga le a kôl vêlhaia hin bu le riak hmun an hmu theina hrangin, ei omna lak hi hmun ramchâra om kêng ei ini,” an tia.

¹³Khan Jisua'n an kuang, “Nangni'n fâkrua pehai roi,” a ti pehaia. Anni'n “Bai ringa le nga inhni vai kêng kin inei.

¹⁴Hiang dôra mipui sângringa fâk hrang, kin va irchôk hrang ma ni?” tiin an sâma. Khan a irchutirhai kuang, “Mipuihai hi a buk bukin sômringa chitin intoitirhai roi,” a tia.



¹⁵Khanchu, irchutirhaiin a chong bê angin an intoihai tâka.

¹⁶Khan, Jisua'n bai ringa le nga inhni kha a lâka, irvân enin Pathian kuang lômthu an sîra, a khoia, khanchu mipuihai kuang sem hrangin a irchutirhai a pêk tâka.

¹⁷Khanchu, an rêngin an khop do dôrin an fâk hnungin, an fâk ban, khamphulu sômhleihni irchutirhaiin an la hrût insip a ni.

Petera'n Jisua nina a phuang

(Mt 16.13-19; Mk 8.27-29)

¹⁸Voikhat chu Jisua'n a bingin a chongchaia, a irchutirhai an hongha, an kuang, "Mipuihaiin tu mo a ni, an ni ti ngai?" tiin ar donhaia.

¹⁹Senkhatin, "Baptistu Johana, senkhatin Elija, senkhatin tiana deipu tu khôk mani, a izuang nôk nang an ti ngai," tiin an sâma.

²⁰Khante, "Nangni'n teh tu mo nin ni ti?" tiin ar donhaia, Petera'n, "Pathian Mesia ni ni," tiin a sâma.

Jisua'n a tuang hrang le a thi hrang thu an sîr

(Mt 16.20-28; Mk 8.30-9.1)

²¹Khan, Jisua'n hi thu hi tûte kuang insîr loi hrangin thu a pêka.

²²An kuang, "Mihriam Nâipa hi upahai, Ochai inlalahai, Dân irchutirtuhaiin, hnôl an ta, dengingtheitir an ta, that an ti, khan, sîn thum hnunga chu hringin thoi nôk a ti," a tia.

²³Khan, an rênga kuang, "Tukhomin ni zui a nuamin chu, mâni intakna uksak loiin, a nitin a kros irputin ni zui ri se.

²⁴Tukhom mâni hringna inzôk nuam chu inchân a ta, Tukhom keima sika a hringna inchân murdi'n zôk an ti.

²⁵Mi'n rammual hi a pumin nei sianlân, ama khan siatpuiin irhmangpui sian, a ta hrangin imo ar fêna?

²⁶Ki thu le keima nin zakpui ka chu Mihriam Nâipa khomin a roiinpuina le, Pa le vântîrtôn irthianghai roiinpuina le, a zuang tika anni kha lan zakpui a ti.



²⁷Dik takin nangni ki hril, hitaka ngêr senkhathai hi Pathian Ram an hmu mâka chu thiloi hrang an om,” a tia.

Jisua hmêl danglamna

(Mt 17.1-8; Mk 9.2-8)

²⁸Kha thu an sîr zoi ata sîn riat vêl anga chu, Petera, Johana, Jakoba hai hruaiin chongchai hrangin tânga an fea.

²⁹Khaanga a chongchai laiin a hmêl inlang dân kha a hong danglam tâka, a puanhai kha a vâ irtêk tâka.

³⁰Iringloiin mi inhni an zuanga, an chongpuia. Mosia le Elija an ni.

³¹Irvân roiinpuina'n an zuang inlâra, Pathian tumna sua hranga, Jerusalema a thi hrang chungchâng thu Jisua leh an insîr a ni.

³²Petera le a rualhai chu an lei ina, an hong harin chu Jisua roiinpuina le a kuanga mi inhni ngêr an hmua.

³³Mihai khan Jisua an mâksan tôn chu, Petera'n a kuang, “Irchutirtu, hitaka om hi ei ta hrangin a sa, kairêng inthum sin ki ta, nangma ta hrang inkhat, Mosia ta hrang inkhat, Elija ta hrang inkhat,” a tia, (kha thu kha imo a iti khom a inhriat infel loi a ni.)

³⁴A la chong lai takin sûmin a zuang irhlihaia, sûmin a zuang irhlihaiin chu irchutirhai kha an chia.

³⁵Sûm ata kha hnuk irhai a zuang suaka, “Ama hi ki Nâipa, ki inthang chu a ni; Ama thu hi irngai roi,” tiin.

³⁶Hnuk irhai a zuang suak zoiin chu Jisua vai an hmua. Irchutirhai khan an thil hmuhai tûte hril loiin an ip chiana.

Jisua'n ramilhli ichel nâipang a indamna

(Mt 17.14-18; Mk 9.14-27)

³⁷Zîng nôka tâng ata Jisua le a irchutir inthumhai an zuangin chu mipui tamtakin Jisua kha an lei nghâka.

³⁸Mipui laia pa inkhat chu a khêk suaka, “Irchutirtu, ki nâipa inkhat neisun kha hong en hrangin nang ki ngên a ni;



³⁹ramilhli'n a chela, a khêk raka, an rîla, a bâia a khasuai zung chupin a soisaka, thi hrang ang dôrin a rotsan ngai.

⁴⁰Ni irchutirhai hi inhnot suak hranga ki ngên lakin tho thei mahai," a tia.

⁴¹Jisua'n "Iamna nei loi, mi pualoihaio, idôr ten mo nin kuang ki omin nangni ki ingaitua hrang? Ni nâipa kha hin hong hruai roh," a tia.

⁴²Khan, nâipang kha a hongin chu, ramilhli khan irnênga an zuan raka, an rîl ta. Jisua'n ramilhli kha thu a pêka, nâipang kha an damtira, a pa kuang a pêk ta.

⁴³Pathian sintho roiinpuizia chu ar khêl an ti tak taka.

Jisua'n a thina hrang thu a lei insîr nôkna

(Mt 17.22-23; Mk 9.30-32)

Jisua'n sintho mihaiin ar khêl an la ti laiin, a irchutirhai kuang,

⁴⁴"Nangni ki ihril hrang hi irnghil no roi, Mihriam Nâipa hi mihriamhai kuta ipêk nih a ti," a tia.

⁴⁵Khan, irchutirhai lakin a omzia inhre thei mahaia. An inhriat thei nona hranga thu irthup a nia, ama lak an chi sikin irdon ngam mahai.

Tu mo roiinpui tak?

(Mt 18.1-5; Mk 9.33-37)

⁴⁶Khan, irchutirhai khan tu mo ei laia a roiinpui tak hrang, tiin an irsêla.

⁴⁷Jisua'n an milung inchong an hriata, nâipangte a kaia, an kôla an ngîrtira.

⁴⁸An kuang, "Tukhom hi nâipangte hi ki'rhming sika lôm chu, keima ni lôm a ni; keima ni lôm chu, a ni tîrtu lôm an ni. Nin laia a chîn tak hi a roiinpui tak a ni," a tia.

Nangni doi loi ka chu nin tianga kop an ni

(Mk 9.38-40)

⁴⁹Khan, Johana khan ama kha a chongpuia, "Irchutirtu, mi inkhatin ni'rhmingin ramilhli an hnotsuak kin hmua, keini angin nang a zui no sikin khap kin lei itum kêng," a tia.

⁵⁰Jisua'n a kuang, "Khap no roi, nangni doi loi ka chu nin tianga kop a ni," a tia.



Samari khua mihaiin Jisua an hnôl

⁵¹Jisua, irvân a kâi hrang nî a hong nâiin chu, Jerusalema fe ngêt hrangin milung an chonga.

⁵²A maton tiang thanginthei hrangin mi a tîra, a ta hranga tinrêng lei irfûktir hrangin Samari khua inkhata an lûta.

⁵³Khan Jerusalema fe a nih ti an inhriat sikin lei lôm mahaia.

⁵⁴Khan, irchutir Jakoba le Johana'n an inhriatin chu a kuang, “Rengpa, hihai kâng zit hranga hin Elija angin irvân ata mei koi thâk hrangin ni nuam mo?” an tia.

⁵⁵Khan, Jisua'n anni tiang irheiin a halhaia.

⁵⁶Khanchu, kho danga an fe tâka.

Jisua zui tumhai

(Mt 8.19-22)

⁵⁷Khan, lampuia an fe laiin, mi inkhatin Jisua kuang, “Ni fena tina nang zui ki ti,” a tia.

⁵⁸Jisua'n a kuang, “Sihalhaiin khur an neia, vahaiin irbu an neia; khannisianlân, Mihriam Nâipa chu a lu irnghatna hrang lua nei mah,” a ti pea.

⁵⁹Khanchu, mi dang kuang, “Ni zui roh,” a ti pea. Khan, kha mi khan “Rengpa, fe ki ta, ka pa va irvûi bak ki ti,” a tia.

⁶⁰Jisua'n a kuang, “Mithi'n anni mithi kha irvûi ri sehai; nang chu Pathian Ram thu hi va hril indarh ual roh,” a tia.

⁶¹Mi dangin a kuang, “Rengpa, nang zui ki ti, khan, ki in mihai chonghoiin ni van thâtir bak roh,” a tia.

⁶²Jisua'n a kuang, “Tukhom âl kaina kut irnghata, hnung tianga en chu Pathian Rama mi ni inruk ni mah,” a ti pea.

Luka 10

Jisua'n sômsari inhnihai a tîrna thu



- ¹Kha zoiin chu, Rengpa'n mi dang sômsari inhni an thanga, a bo bopin an fena hrang kho tina le hmun tina a tîr suakhaia.
- ²An kuang, “Bu ât hrang a tama sintho mi lak an tôm. Khasikin, a bu ât hranga mi tîr hrangin bu Neitupa kuang ngên roi,” a tia.
- ³Irgai u ta, ine laia belrate lût angin nangni ki itîr a ni.
- ⁴Sum kok, hmarsa, kekok hai chôï no roi; lampuia khom tûte chubai no roi.
- ⁵In nin lûtna kipa, “Hi ina hin irtharngamna om ri se,” ti bak roi.
- ⁶Irtharngamna irngaiinna mi an omin chu, nin irtharngamna thu kha a chung a om mai a ta, khan an om no'n chu nin irtharngamna thu kha nin chung a hong kîr nôk a ti.
- ⁷Nin tungna ina vai om unglân, in tin rôl têt tuat no roi, nangni an ipêk ka fâkin in roi, sinthotu chu a hlo hmu rua a ni.
- ⁸Khua nin lûta, nangni an lômin chu, nangni an ipêk ka chu fa roi.
- ⁹Kha khuahai khan damloi indam unglân, an kuang, “Pathian Ram nin kuang a zuang tung ta,” ti roi.
- ¹⁰Nin lûtna khuaa nangni an lôm no'n chu tuala fe unglân,
- ¹¹Nin khuaa vâiphin kin kea kop ten lua khom nin chung a kin hui nôk zit, khan khomin, Pathian Ram chu nin kuang a zuang tung ta, nin iti hrang a ni.
- ¹²Nangni ki hril, Pathian Roirêl nia chu, kha kua tuang hrang nêkin chu Sodom kua tuang hrang chu a zâi om ual a ti.

Irlet nuamloi khuahai

(Mt 11.20-24)

- ¹³Korazin! Ni chung a rik e! Bethsaida khom ni chung a rik e! Nangnia sinirkhêl thohai kha Tura le Sidon khuaa tho ni sianlân chu, bora silin irvut irnôtin an sual ata irlet ta an ti.
- ¹⁴Roirêl nîa chu nin ituang hrang nêkin chu Tura le Sidon tuang hrang chu a zâi om ual a ti.



¹⁵Nangma Kapernaum khom, irvân dênin inpâk ni ini hrang ma ni? Hremhmuna kêng paithâk ni ini hrang.

¹⁶Jisua'n a irchutirhai kuang, "Tukhom nin thu irngai chu, ki thu irngai a ni. Tukhom nangni hnôl chu a ni hnôl a ni, tukhom ni hnôl chu a ni tîrtu hnôl a ni," a tia.

Sômsari inhnihai hong kêr nôk thu

¹⁷Khan, sômsari inhnihai kha raifân takin an hong kêra, "Rengpa, nir hmingin ramilhlihai tenin kin thu an zôm," an tia.

¹⁸Jisua'n a sâma, "Setana irvân ata michêk anga zuang tâk ki hmu," a tia.

¹⁹An kuang, "Irngai u ta, mirûl, âinuvêt hai, râlpâ hrâtna murdi hai sirbe theina ircham nangni ki pêk a ni, ite'n nangni inna viat no ni.

²⁰Aniachu, irthahai nin irchamin an om sika hin lôm no roi, irvâna nin irhming irziak a ni sikin lôm ual roi," a tia.

Jisua lômna

(Mt 11.25-27; 13.16-17)

²¹Kha laia khan Jisua kha Irtha Irthiangin raifânin a sipa, "Ka pa, irnêng irvân Rengpa, mi thiamhai laia ni thup khaka, mi'nmôlhai kuang nin puang ngai sikin lômthu kin sir; A ni, ka pa, khang kha ni lungdo le ni nuamlam tak a ni.

²²Ka Pa'n itinrêng a nin koltir ta, Nâipa hi tu mo a ini, Pa ti bana chu tukhomin inhre mahai; Pa khom tu mo a ini, Nâipa le Nâipa'n a inpuang nuamhai laia ti no chu, tukhomin inhre mahai," a tia.

²³Khan, Jisua'n irchutirhai tiang a'rheia, inrûkin, "Hihai nin ihmu hi nin râlvân a sa.

²⁴Deipuhai, rêng hai tamtakin nin ihmuhai ang hi hmu an nuama chu hmu mahai, nin inhriathai hi inhriat an nuama chu inhre mahai," a ti pehaia.

Samari mi sa chongirkhek thu

²⁵Dân irchutirtu inkhat Jisua kuang a hong, a kuang, "Irchutirtu, kumtuang hringna ki nei theina hrangin imo ki itho hrang?" a tia.



- ²⁶Jisua'n a sâma, "Dân bua mo a chuang? A itak mo nin itep ngai?" a tia.
- ²⁷Ama khan, " 'Rengpa ni Pathian chu ni milung murdi'n, ni hringna murdi'n, ni hrâtna murdi'n, ni lungrîl murdi'n lung ni ithung hrang a ni; nangma lung ni irthung angin ni bômhai khom lung ni ithung hrang a ni ti hi,' " a tia.
- ²⁸Jisua khan, "Ni sâm indik e, khang khan tho'n lân, hring ni ti," a tia.
- ²⁹Khannisianlân, Dân irchutirtu khan thiam chang nuamin, Jisua kuang, "Tu mo ki bômhai?" a tia.
- ³⁰Jisua'n kha thu kha a sâma, "Mi inkhat, Jerusalem ata Jeriko khuaa fe hrang kha, lam chimripa hrâtlâksonghaiin an lei zêma, a puan a diar an khekpai pea, an zêm bita, thi vâng vângin an rotsana.
- ³¹Kha lama khan Ochai inkhat a zu fea, a hong hmu'n chu a lôi pata.
- ³²Khang dênin Levia irchi mi inkhat khomin kha hmun kha a hong tunga, ama kha a hong hmu'n chu a lôi sa tâka.
- ³³Samari mi inkhat inzin fe khan, kha hmun kha a hong tunga, ama kha a hong hmu'n chu lung an kham tak taka,
- ³⁴a va pana, a pophai kha sahriak le uain polin a tuam pe tâka; ama sakuartung chung a ngei khan an chuangtira, khualbûka a fepuia, a enkol tâka.
- ³⁵Zîng nôka chu a duli inhni a kêlsuaa, khualbûk enkoltu kha a pêka, lei enkolin lân, hi nêka hin ni thâmin chu ki zuang kîr nôk tika nang thuan ki ti," a tia.
- ³⁶"Khan, kha mi inthumhai laia a tu tak kha mo hrâtlaksonghai tongtu bômhai ni iam?" a tia.
- ³⁷Ama khan a kuang, "Lunginkhamtu kha," a tia. Jisua'n, "Nang khom khang tak khan va tho ro," a tia.

Jisua'n Marthi le Mari a panna

- ³⁸Khan, Jisua le a irchutirhai an inzin malamin, khua inkhata an lûta, nupang a'rhming Marthi'n a ina an tungtirhaia.



³⁹Zuarpui inkhat a neia, a'rhming chu Mari a ni, ama kha Rengpa ke bula toiin a thu'nsâr a'rngaia.

⁴⁰Marthi chu sin zongin a buai zapa, a hong, "Rengpa, ki zuarpuinu'n ki bing doka sin hranga a ni imâk hi, ni ingaisak loi ma ni? Ni hong san sian sa no ni mo?" a tia.

⁴¹Rengpa khan a sâma, "Marthi, Marthi, thil tamtak ni ngaituaa ni ibuai kêng.

⁴²Inkhat vai kêng a inang, Mari'n thil dik an thanga, ni isutpai hrang ni mah," a tia.

Luka 11

Jisua'n chongchai dân ar chutirna

(Mt 6.9-13; 7.7-11)

¹Voikhat chu hmun inkhata a chongchaia. A hong mongin chu a irchutirhai laia inkhatin a kuang, "Rengpa, Johana'n a irchutirhai chongchai dân a irchutir angin keini khom nir chutir roh," an tia.

²An kuang, "Nin chongchaiin hiang hin ti roi: 'Kin pa, Ni'rhming mahrip om ri se, Ni Ram zuang tung ri se.

³A ni tin kin rugin bu ni pe roh.

⁴Keini khomin kin chung a tho'nsual murdi kin ngaidam ngai angin, Nang khomin kin suhai ni ngaidam roh, Thêmnâa ni hruai lût no roh,' ti hi," a tia.

⁵Jisua'n a irchutirhai kuang, "Nin laia mi inkhatin rual nei sianlân, zânlaia a kuang va fe'n, 'Mala, bai tiam nin pûktir ta':

⁶Ki rual inzinin a ni hro lika, ite infatir hrang lak nei ma unga," va ti sianlân;

⁷in sînga a rualpa'n, 'Ni hong inbuai ta no roh, mikot kin kal zit ta, ki nâihai leh kin izâl tâk kêng, thoiin nang inhong pe thei no ning,' ti sianlân;

⁸Nangni ki hril, a rual a ni sikin thoiin va pe no khom sian, a zong ngot ngot sikin thoiin a nuam dôr pe a ti.



⁹“Khanchu, nangni ki hril, nghi unglân, pêk ni nin ti; zong unglân hmu nin ti, into unglân inhong pe ni nin ti.

¹⁰A nghi murdi chu pêk ni an ta, a zong murdi’n hmu an ta, an tôk murdi chu mikot inhong pe ni an ti.

¹¹Nangni laia pahai hin, nin nâipahaiin nga nangni nghi sianlân, nga irthûla tu mo mirûl pe hrang?

¹²Ârtui irthûlin khom tu’n mo âinuvêt pe hrang?

¹³Khasikin, nangni mi sualhai luan nin nâihai thil sa pêkna châng nin inhriatin te nin pa irvâna mi khan a nghituhai kha Irtha Irthiang a ipêk hrang mo ni mah!” a tia.

Jisua le Belzebula

(Mt 12.22-30; Mk 3.20-27)

¹⁴Khan, Jisua’n ramilhli chong theiloi inkhat an hnot suaka, a suak le chu chong theiloi kha a hong chong tâka. Mipui khan ar khêl an tia.

¹⁵Khan, mi senkhatin chu, “Ramilhli rêng Belzebula a ni sikin, ramilhlihai a inhnot suak thei a ni,” an tia.

¹⁶Senkhatin ama fiana hrangin irvân ata irsinsiana sinirkhêl inentir an inphûta.

¹⁷Jisua’n an milung inchong an hriata, an kuang, “Kho ram khom irsena, mâni le mâni irdoi ka chu ram chit an ti, in sêngkua khom mâni le mâni irdoi ka chu irhmang an ti.

¹⁸Setana khom mâni le mâni an irdoiin te, itin mo a ram kha a inding thei hrang? Belzebula sikin ramilhlihai inhnot suak nin ni ibe, a ti pehaia.

¹⁹Keiin Belzebula sikin inhnot suak ni inlân, nin mihai khan tu sikin mo ramilhli an lei inhnot suak ngai? Khanchu, anni kêng thiamno nangni inchangtir ual hrang.

²⁰Khan, Pathian irchama ramilhlihai ki inhnot suak ngai a niin chu, Pathian Ram nin kuang a zuang itung tak tak a ni.



²¹Mi hrâtin hriamhrei irkipin a hrung kêr ka chu, neinin murdi kha zômin a om ngai.

²²Aniachu, ama nêka hrât ualin a hong beia, a hong inhne'n chu, a isong râltuam kha sutpai a ta, a neinin khom lapai pe a ta, a nu nuamin sempai a ti.

²³Tukhom, ki tianga kop loi ka chu a ni doi a ni, tukhom ni bûmpui no ka chu a inthek indarh a ni.

Ramilhli kêr nôk thu

(Mt 12.43-45)

²⁴“Ramilhli kha, mi sâng ata a suakin chu, irngam hmun zongin tui om loina hmunhaia a'rvâk a'rvâka; khannisian a hmu no sikin, ‘Ki in, ki isuaksan tâknaa khan, kêr nôk chian ki ti,’ a tia.

²⁵A hong kêr nôkin chu, phît fâia infel diamin a hmua.

²⁶Khanchu, a fea, ama nêka soal ramilhli dang sari a hong hruai lûta, kha khan omhmun an khuar tâka; kha mihriam om dân kha chu matona nêkin a hong siat ual ta a ni,” a tia.

Vânsatna tak tak

²⁷Jisua'n kha thu kha an sîr laiin mipui laia nupangnu a khêka, a kuang, “Nupang nang vongtunu le nang donsuinu chu a vân a sa e,” a tia.

²⁸Jisua'n a sâma, “Pathian thu inhriata zômhai chu an vân a sa ual,” a ti pea.

Irsinsiana an inphût

(Mt 12.38-42)

²⁹Khan, mipui an hong pungkôm mura, Jisua'n, “Atûnlaia mihai hi a sân an soal; irsinsiana sinirkhêl an zonga, Jona irsinsiana ti no chu irsinsiana sinirkhêl zel inentir ni no nihai.

³⁰Ninevi kho mihai hranga deipu Jona irsinsiana a ini ang khan, atûnlaia mihai hrangin chu Mihriam Nâipa hi irsinsiana ni a ti.

³¹Roirêl Nia chu sim tianga rêngnu Seba la ngîr a ta, atûnlaia mihai thiamno inchang a ti. Reng Solomona vâr irngai hrang pialin ram hla tak ata a hong sikin. Nangni ki hril Solomona nêka lian ual hin a om.



32“Roirêl Nia chu Ninevi mihai khom hong ngîr an ta, thiamno nangni inchang an ti. Jona thuhiril sikin an سوالنا ata an irleta; irngai roi, nangni ki hril, Jona nêka roiinpui ual hin a om,” a tia.

Takpum meiser

(Mt 5.15; 6.22-23)

33Tûte'n meiser inchokin, hmun irthupa se ngai mahaia, khamphulu khom irkhu ngai mahai, a siana hmuna kêng an sia ngai, mi a lût murdi'n a vâ an hmu theina hrangin.

34Ni mit hi ni takpum ta hrangin meiser ang a ni; ni mit a dikin chu ni takpumpui kha invâr zit a ti; a dik no'n chu ni pumpui inthim khak a ti.

35Irdîn roh, nangmaa vâ om kha inthim ni lik ni.

36Khanchu, meiser, nangni a i-êl invâr hlang ngai ang khan, nin takpum ôn inthimna boi zitin, nin pumpuiin vâ hlang a ti.

Jisua'n Farisaihai le Dân irchutirtuhai a dem

(Mt 23.1-36; Mk 12.38-40)

37Khan, Jisua'n an sîr lai khan Farisai inkhatin bu nêk a koia; a fea, bu nêk hrangin a toia.

38Farisai khan, kut irsu loia, Jisua'n khalai a i-ot kha a hmu'n chu ar ngai ar khêl oka.

39Khan, Rengpa'n a kuang, “Nangni Farisaihai, khilât le khêng a pên tiang nin infâia, khan, nin sêng tiang chu huatirhamna le سوالنا'n a sip a ni.

40Nin invêt bâka! pên tiang siamtu, Pathianin a sêng tiang khom a isiam mo ni ma?

41Ni khilât le khêng sênga thil om kha mi'nrianghai pe unglân chu nin ta hrangin itinrêng a irthiang mai hrang a ni.

42“Nangni, Farisaihai nangni lan tak pe a ti na! lêngmiser, podina le chîmu tinrênghai sôma inkhat Pathian nin pêk ngai, khannisianlân, dikna le Pathian lungthungna chu nin irngaiinnêp ngai; khahai kha kêng nin itho ngêt ngêt hrang chu, a danghai khom khi mâk ual loiin.



⁴³Nangni Farisaihaio, nangni lan tak pe ti, Sinagoka toina satakhai le dukanhaia chubai mûk nin irngaiinhlu ngaia.

⁴⁴Nangni lan tak pe ti, mi'n thân ti inhre loia a chung a mi an ifena ngai ang hi nin ni e," a tia.

⁴⁵Dân irchutirtuhai laia inkhat khan, "Irchutirtu, hi thu ni insîr hin keini khom ni ni dem sa a ni," tiin a sâma.

⁴⁶Jisua'n, "Dân irchutirtuhaio, nangni khom nangni an tak pe; mi chung a pêl intak, puakrik nin bân ga, a pêlpui hrangin chu nin kuthmor luan tôn nuam mak chêi.

⁴⁷Nangni an tak pe vang na! Nin irchibulhai ithat deipuhai thân nin siam insata.

⁴⁸Nin irchibulhaiin deipuhai an lei that kha, nin inhampui inlangna'n, nangni'n an thânhai nin siaminsata.

⁴⁹Khasikin, Pathian vârna'n, 'Deipuhai le tirtônhai tîr ki ta, senkhathai that an ta, senkhathai dengintheitir an ti,' a tia.

⁵⁰Khasikin, rammual irsiang ata deipuhai an lei that sikin, atûnlaia mihai hi denginthei ni an ti.

⁵¹Abela an that ata Zakaria dênin, ama len vâng chu maichâm le hmun irthiang kêra that a ni. Nangni ki ti, khahai sik piala khan atûnlaia mihai chung a phuba lâk ni an ti.

⁵²Dân irchutirtuhai khom nangni an tak pe vang na! vârna châbi nin chôipaia, nangni lak lût no chin ni, a lût nuamhai tena nin khâl ngai", a tia.

⁵³Khan Jisua'n kha hmun kha a mâkin chu, Dân irchutirtuhai le Farisaihaiin an sêla, thil tamtak an irdona.

⁵⁴A sâm insual a nei le an chel theina hrangin an enirchika.

Luka 12

Mi vâirlethai ata irdîn hrang

(Mt 10.26-27)



¹Mipui sâng tamtak irsirpol bet but ang dôr an pungkôma, Jisua'n a maton taka, a irchutirhai kuang, "Farisaihai chol vârirletna ata irdîn roi.

²Ite thupsua thei ni mah, an lang nôk zel ngai, ite inhriat loi hranga ip om mah, inhriat suak a ni nôk ngai.

³Zân inthima nin itihai kha sîn khovâra lan puang an ta, chontan sînga inrûka nin iti kha in chungu chuanguin tâng lan sampui an ti, a ti pehaia.

Tu mo chi rua

(Mt 10.28-31)

⁴"Ki rualhaio, nangni ki hril, takpum thata, kha zoia ite tho thei ta loi chu chi no roi.

⁵Tu mo chi rua, nangni hril ki ti; takpum thata, thi zoi hnunga hremhmuna pai theina thuneitu, Pathian vai kha chi roi; a ni, nangni hril nôk ki ti, Ama vai kha chi roi.

⁶Chongzong ringa poisa hni'n an izuar ngai mo ni ma? Pathianin chu an laia inkhat te lua irhmâi ngai ma. Nin samzâihai ten khom a itep zit kêng.

⁷Chi no roi, chongzong tamtak nêkin nin hlu ual.

Mihai makunga Krista thop

(Mt 10.32-33; 12.32; 10.19-20)

⁸"Nangni ki hril, mihai makunga ni thop ka chu Pathian vântîrtônhai makunga Mihriam Nâipa hin thop a ti.

⁹Khannisianlân, mihai makunga ni hnôl ka chu Mihriam Nâipa khomin Pathian vântîrtônhai makunga hnôl a ti.

¹⁰Tukhom Mihriam Nâipa sêl chu ngaidam nih a ta; khannisianlân, Irtha Irthiang sêl ka chu ngaidam ni no ni.

¹¹"Khan, nin roirêl hrangin, Sinagoka mani, Ramoptu makunga mani, roirêltuhai makunga mani, nangni an hruai tikin, itin mo ki isâm hrang, imo ki iti hrang, tiin milung inkâng no roi.

¹²Nin iti hrang chu a zoro taka Irtha Irthiangin nangni hril a ti," a tia.

Irchong invêt chongirkhek



¹³Mipui laia mi inkhatin Jisua kuang, “Irchutirtu, ka upa kuang kin pa irchon mâk ni sem sa hrangin ti pe roh,” a tia.

¹⁴Jisua’n a sâma, “Mihriam, nangni ta hrangin tu mo roirêltua le irchon sempua ni siam?” a tia.

¹⁵Khan an kuang, “Irdîn unglân, irzukna tinrêng ata irdîn roi, mihriam hringna bi hi irchon lâmkhîl sika ni mah,” a ti pehaia.

¹⁶Khan, hi chongirkhek hi an sîra, “Mi irchong tak inkhat hi a loia a sân an lâpa.

¹⁷Khanchu, ar ngaituaa, ‘Itin mo ki itho hrang tâk? ki bu le bâl siana hrang nei zoi ta ma unga,’ a tia.

¹⁸‘Hiang hin tho ki ti; ki fasiar set ki ta, a nêka lian ual sin ki ta, kha khan ki bu le bâl, ki neinun murdi sia ki ti,’ a tia.

¹⁹Khanchu, ki’rtha kuang, “Irtha, kum tamtak hrangin sum tamtak ni buk ta; irngamin lân, fa’n lân, inin lân lungthi takin om ro, irti ki ti,” a tia.

²⁰Khan, Pathianin a kuang, ‘Mi’nvêt, a vuan zân zel hin ni hringna a iboi hrang tâk kêng, hi thil ni isuahai hi tu ta hrang mo a ini tâk?’ a ti pea.

²¹Khan, Jisua’n, “Pathian tiang irchon buk loia, mâni ta hrang vaia irchon buk chu khang khan nih an ti,” a tia.

Pathian iam roh

(Mt 6.25-34)

²²Jisua’n a irchutirhai kuang, “Khasikin, nangni ki hril nin takpum fâk nêk hrang, nin sil le kai hrang lunginkâng no roi.

²³Fâk nêk hrang nêkin hringna a hlu ual, silkai hrang nêkin takpum a hlu ual.

²⁴Vaâkhai hi en u ta, bu khom tû mahai; khannisianlân, Pathianin an fahai ngai; nangni chu vahai nêkin chu nin ihlu ual kêng.

²⁵Nangni laia lunginkâng sikin tu mo mâni hringna inseitir ual thei?

²⁶Hi dôr lua nin itho thei loi khate, imo a da dang len vâng khate nin lunginkânga?



²⁷Tûktin pârhai hi en u ta, sin khom zong mahai, puan khom không mahai, khan, nangni ki hril, kha dôra irchong Solomona khom khan hi pârhai hi pha mah.

²⁸Khanchu, ram hloisûl, a vuana hring, nangtûka meia tuah nôk hrang lua Pathianin khang dôra a'rvôtirin te, o nangni iamna tômhaio, khahai nêkin nangni irvôtir no ni mo!

²⁹Khasikin, nin fâk nin nêk hrang thua lunginkâng no roi.

³⁰Hi hi rammual mi murdi'n an ibuaipui tak ngai a ni; nangni khomin nin innang ngai ti, nin Pa'n an hriat;

³¹Ama Ram kha zong bak unglân, khanchu, hihai khom hi nangni a ipek belsa hrang a ni.

³²Pôl tômtehaio, chi no roi, Ram nangni pêk hi nin pa nuamlam tak a ni.

Irvâna irchon

(Mt 6.19-21)

³³“Nin inei murdi zuar unglân, inrianghai pe roi, irvâna inru fe loinaa, irthî ifâk thei loinaa khan, sum kok phâi thei loihai, sum hek theiloihai irsiam roi.

³⁴Nin irchon omna kipa nin lungrîl khom a om ngai.

Siahlo irtûng chian

³⁵“Irthok sai diamin, meiser bel sai leh irsiam mai roi.

³⁶Siahlo, an pu irnei hruaithe ata zuang hrang lei nghâk chianhai angin. A zuanga mikot a hong intôk le, inhong zôi hrangin.

³⁷Siahlo, an pu zuanga irtûng chiana om a ihmuhai chu, mi vânei an ni. Nangni ki hril, ama kha irsiam a ta, khalâi dohai a ta, an bu nêk donhai a ti.

³⁸“Zân chimripa, âr khuanchunga mo, a zuanga irtûng chiana om a ihmuhai chu mi vânei an ni.

³⁹Hi hi nin inhriat, inru hong hrang inneitu'n inhre sianlân chu hrung a ta, a in inset no ni.



⁴⁰Khasikin, nangni khom irtûng chianin om roi, nin tûng no lai takin Mihriam Nâipa zuang a ti,” a tia.

Siahlo iamom le iamomloi

(Mt 24.45-51)

⁴¹Petera'n, “Rengpa, hi chongirkhek hi keini vai mo ni ni ihril mi murdi mo?” a tia.

⁴²Rengpa'n, “An pu'n a siahlohai hruaitua le an bu sem tika sem ngaitu hrangin sum enkoltu iamom tak le vâr tak a inkung hrang kha tu mo a ini hrang?”

⁴³A pu a hong, khaanga lei tho siahlo a ihmu chu mi vânei a ni.

⁴⁴A dik takin nang ki hril, a inei chung a hruaitua hong siam a ti.

⁴⁵Khannisian siahlo khan, ‘Ka pu hong kîr lat no ni,’ tiin nupang pasal zêm sianlân, lei fâk lei nêkin len rui sianlân,

⁴⁶Kha siahlo pu kha ar tûng no kârin, a iam no nikhuua a pu zuang a ta, tukkhai a ta, mi iamloihai dongtum indong a ti.

⁴⁷Siahlo, an pu nuamlam inhre chiana tho loi le irtûng loi chu a sate'n zêm ni an ti.

⁴⁸Aniachu, inhre loi sika hremna dôr thil tho chu nêp uala zêm nih an ti. Tukhom tamtak indongtira omhai chu tamtak ingên ni an ti.

Jisua sika irsenna

(Mt 10.34-36)

⁴⁹“Irnêng hâl hranga zuang ki ni, atûn khom kâng zôi ta sian ki ti!”

⁵⁰Baptisma ki ichang hrang a om, kha kha ki tho mâka chu ki ning ar hal vang na!

⁵¹Irnênga irngei inlêng hranga zuang ni ma ung, irsenna inlêng hranga zuang kêng ki ini.

⁵²Atûna irthokin in sûng khata mi ringa irsen an ta, inthumin, inhni doi an ta, inhniin inthumhai doi an ti.



⁵³Pa'n a nâipa doi a ta, nâipa'n a pa; nu'n a nâinu doi a ta, nâinu'n a nu; a tarpiin a moinu doi a ti, moinu'n a tarpi doi a ti," a tia.

A zoro inhriat thiam

(Mt 16.2-3)

⁵⁴Jisua'n mipuihai kuang khan, "Misa tâk tiang sôm a hong zîngin chu rua a itho hrang kêng nin tia, a tho khom a tho ngai.

⁵⁵Khan sim tiang phâivua a hong tho nin inhriatin chu, a ilum hrang kêng nin tia, lum khom a lum ngai.

⁵⁶Vâirirlethaio! Irnêng irvân nin ena, kho om hrang lam nin inhriata, khannisianlân, atûnlai zoro om lam hi itho mo nin inhriat theiloi?" a tia.

Ni irdoipui leh irngei ro

(Mt 5.25-26)

⁵⁷"A dik le dikloi kha ithoa mo nangni khomin nin itheithâk mai loi?

⁵⁸Thuneitu makunga ni irdoipui leh nin inlang hrangin, fe pumin ama leh irngeina lam zong roh; khano'nchu, roirêltu makunga nang hruai inlût a ta, Roirêltu'n pulis kuang nang inhlan a ta, pulis khan intângna ina nang khum a ti.

⁵⁹Nang ki hril, poisa khatte khom ni thâk irkip mâka chu, khatak ata kha suak viat no chi ni," a tia.

Luka 13

Nin sual nin irlet no'n chu thi nin ti

¹Kha laitaka khan tuhai mani an oma, Galili rama mi, Pathian kuang thil an inhlan laia Pilata'n a ithathai thurchi Jisua kuang an hril.

²Jisua'n a sâma, "Khaanga thata an iom kha Galili rama mi danghai nêkin an sual ual nin isôn ma ni?

³Sual bîk mahai, nangni ki hril, nangni khom nin irlet no'n chu khang dênin irhmang nin ti.

⁴Khano'nte, Siloam in irsâng chimin sômhleiriat a idel thathai kha. Jerusalema mi danghai nêkin an isual bîk nin isôn ma ni?



⁵Sual bîk mahai, nangni ki hril, nangni khom nin irlet no'n chu khaang dênin irhmang nin ti," a tia.

Theipui raloi chongirkhek

⁶Jisua'n hi chongirkhek thu hi an sîr saa; "Mi senkhatin grep irhuana theipui kung a phuna. A ra a zonga hmu maka.

⁷Khanchu irhuan enkoltu kuang, 'En roh, kum thum hi theipui kunga hin a ra ki zonga, inkhat lua hmu ma ung. Hmun vai kêng a iluana, phûrpai roh,' a tia.

⁸Khan, irhuan enkoltu'n, 'Ka pu, kumin chu la om hi ri se, a'rhîlin tuk ki ta, nimnok vur ki ta,

⁹nakum a ra'n te sa a ta, a ra no le phûrpai ni ti,' " a tia.

Sabat nia nupang damloi indam

¹⁰Voikhat chu Sabat ni'n Sinagok inkhata Jisua'n ar chutirhaia.

¹¹Nupang inkhat, kum sômhleiriat ramilhli ichel a oma, a kûn chiana, ngîr khom ngîr intûn thei maka.

¹²Jisua'n a hmu'n chu a koia, "Nupangnu, ni natna ata ni zôk ta," a ti pea.

¹³A chung a kut a'rngkata, a ngîr intûn thei zôi zela, Pathian an pâk tâka.

¹⁴Jisua'n Sabat ni'n mi an damtir sikin Sinagok hruaitu kha a sân a ning an mura, sinthôna hrang sîn ruk a oma, kha sêng khan hong unglân indam irhlôm roi ba, Sabat nî lele'n te! tiin mipuihai a hrila.

¹⁵Rengpa khan a kuang, "Nangni vârirlethaio, Sabat ni khoma mâni sehrât chal mani, sakuartung mani sûtâ, a thungna hmun ata tui in hranga hruai suak loa om mo nin om?

¹⁶Hi nu khom hi Abrahamâ nâinu a nia. Setana'n kum sômhleiriat dên a khit phiar tâka, kha a khitna kha Sabat ni khom ni sian sût pe hrang mo ni ma?" a tia.

¹⁷Kha thu kha a hong insîrin chu, a râlhai kha a sân an inzaka, mipui chu a sintho roiinpui takhai sikin an lôma.



Ancham chi chongirkhek

(Mt 13.31-32; Mk 4.30-32)

¹⁸Khanchu Jisua khan, “Pathian Ram chu i ang mo a ini? I leh mo ki irkhek hrang?”

¹⁹Ancham chi mal khat, mi’n a lâka, ar huana a inthek ang hi a ni; a hong mônga, thing a hong changa, chunglêng vahaiin a ôna an riak ngai,” a tia.

Chol chongirkhek

(Mt 13.33)

²⁰Jisua’n ar don nôka, “Pathian Ram chu i leh mo ki hong irkhek nôk hrang?”

²¹Nupangnu’n chol a lâka, baiphit litar sômminli leh a’rzêl zita, a thoi mâka khamphulua a irpol ang kha a ni,” a tia.

Mikot irchêp

(Mt 7.13-14,21-23)

²²Jisua’n irchutir malamin Jerusalem a pana, kho lian le kho chînhai ar fang thiaia.

²³Tu’n mani, a kuang, “Saninhringhai chu tômtê vai mo an ini hrang?” a tia.

²⁴Jisua’n a kuang, “Mikot irchêpa khan lût tum hrâm roi; nangni ki hril, mi tamtakin lût tum an ta thei no nihai.

²⁵In neitupa a thoia mikot a kal tâkin chu, nangni’n pên tiang ngîrin, ‘Ka pu, mikot nin hong roh,’ tiin van tôk khom unglân ama khan, ‘Kho tianga mi mo nin ini nangni inhre ma ung,’ tiin nangni lei sâm a ti.

²⁶Khanchu nangni’n, ‘Hmunkhatin fâkin ei in suam ngai khate, ki kholaihaia nir chutir ngai khate,’ la ti nin ti.

²⁷Khannisian, ama khan, ‘Nangni ki hril, kho tianga mi mo nin ini, nangni inhre ngai ma ung; ki kuang ata rot roi, mi pualoihai!’ nangni ti nôk a ti.

²⁸Hnôlin nin om tikin chu chapin, irkamnôi nin ta; Abrahama hai, Isaka hai, Jakoba hai le deipu murdihai kha, Pathian Rama omin hmu nin ti.

²⁹Khan, sak le thang, sim le hmâr ata mi hong an ta, Pathian Ram hruaithe hong ot an ti.



³⁰Irngai u ta, a hnungkhôn takhai khom a maton tak la ni an ta, a maton takhai khom a hnungkhôn tak la ni an ti,” a tia.

Jisua'n Jerusalem lung a thungzia

(Mt 23.37-39)

³¹Kha laitaka khan Farisai senkhat an hongga, a kuang, “Suakin lân, hitak ata rot roh, Heroda'n nang that a itum kêng,” an hong tia.

³²Jisua'n an kuang, “Kha sihal kha hiang hin hril roi, Irngai roh, a vuan le nangtûk hin ramilhlihai inhnot suak ki ta, damloihai khom indam ki ta, sîn thumin ki sin zoi ki ti.

³³I khom nisian, a vuan, nangtûk le a zîng nôk dênin tho mai ki ti; Jerusalem pên tiang deipu thi ngai mah,” a tia.

³⁴“O Jerusalem, Jerusalem, deipuhai thattu, ni kuanga tîrhai lungga lei dêng thattu! Ârpuinu'n a tehai a mitha hnuai a iop khôm angin ni nâihai voi iza op khôm ki tuma, nin inuam loi kha?

³⁵Khasikin, ‘Rengpa irhminga hong chu Pathianin satvur ri se,’ nin ti mâka chu nin Sinagok hi ram a ta, ni hmu nôk ta no chin ni,” a tia.

Luka 14

Jisua'n mi invûng an dam

¹Sabat ni voikhat chu Farisaihai laia hruaitu lian inkhat ina bu nêk hrangin a fea, an lei enirchik chiana.

²Mi inkhat a ke, a kut invûng Jisua kuang a hongga.

³Jisua'n Dân irchutirtuhai le Farisaihai a chongpuihaia, an kuang, “Ei Dânin Sabat ni hin indam a phal mo, phal ma mo?” a tia.

⁴Khanchu, anni kha an dâihreka. Jisua'n damloi kha a chela, an damtira, an fetir ta.

⁵Khan Jisua'n an kuang, “Tu mo khatin a nâipa mani, a sehrât chal mani, Sabat ni'n tuikhura tâk sianlân, Sabat nî ni khomsian, nin ikêlsua zel loi hrang mo?” a tia.

⁶Khannisianlân, kha thu kha tûte'n sâm thei mahai.



Irngaiintômna le irphalna

7Bu nêk hranga a mi fialhai khan toina sa an irchu ngai ti Jisua'n a hmu'n chu an kuang chongirkhek thu an sîr tâka.

8"Tu'n mo khat moi lôm hruaithe fa hranga nangni an fialin chu toihmun sataka toi no roi; nangni nêka mi lian a hong fial itinin,

9Nin kuang, 'Hi pa toihmun hrang hi inkian roi,' nangni a hong tiin chu, inzak takin toihmun saloi taka nin itoi chian hrang a ni.

10Nang an fialin chu toihmun saloi taka toiin lân, khanchu nang a fialpu kha hong a ta, ni kuang, 'Mala, toihmun saa hin hong toi ro,' tih a ta, khalâi ottuhai mit hmua chôirsângin om ni ti.

11Irngaiinhlu ka kai irhniam an ta, irngaiintôm ka kai chôirsâng ni an ti," a tia.

12A fialtu kuang khom khan, "Sûna mo zâna mo hruai nin thein, ni rualhai, ni urênghai, ni parualhai le ni bôma irchonghai kha fial no roh; khano'nchu, nang fial nôkna an ta, nang thuan lele'n ti.

13Hruai nin thê tikin chu inrianghai, suakinsualhai, ke'nbâihai, mitchohai fial ual roh;

14Khanchu, satvurna dong ni ti, nang thuanna hrang nei no nihaia; mi fialhai thoinôkna tika Pathianin nang thuan a ti," a tia.

Hruaithe roiinpui chongirkhek thu

(Mt 22.1-10)

15A khalâi otpui inkhat khan kha kha an hriatin a kuang, "Pathian Rama hruaithe hrang chu an vânei bâka!" a tia.

16Jisua'n a kuang, "Mi tu'n mani hruaithe roiinpui tak a siama, mi tamtak a fiala.

17A fâk zoro tika chu a fialhai kuang, 'Hong ta roi, atûn hin itinrêng ar zoi ta,' ti hrangin a siahlo a tîra;

18An rêngin irphialna an nei chita.



¹⁹A maton takpu khan, ‘Loi ki lâka, va en a nang; ngaihoi takin ni lei hong irphat pe roh,’ a tia.

²⁰Mi dangin, ‘Sehrât bop ringa ki lâka, eninfel hrangin fe ki tuma; ngaihoi takin ni hong irphat pe roh,’ a tia. Mi dangin, ‘Innei zoi phing lele ki nia, hong thei no ning,’ a tia.

²¹Siahlo kha a hong, kha thu kha a pu a hrila. A chongpupa kha a ning an mur tâka, siahlo kuang khan, ‘Fe latin lân, kholaidung haia, inkongkâr haia, fe’n lân, invâihai, kholra baicha hai, mitcho hai, ke’nbâi hai, hi hin hong hruai lût roh,’ a tia.

²²Siahlo khan, ‘Ka pu, ni thupêk ang khan tho a ni tâka, khan khomin hmun kha a la ôl mai,’ a tia.

²³Khan a siahlo kuang, ‘Fe’n lân, lamlian haia, lam kêmhâia, mihai ki in sipna hrangin mi hong hruai inlûthai roh.

²⁴Nang ki hril, mi ki ifialhai khan inkhat luan ki hruaithe fa no nihai,’ ” a tia.

Jisua zui intak lam

(Mt 10.37-38)

²⁵Khan, a rualin mipui tamtak Jisua leh an fe saa, a hong irheia, an kuang,

²⁶“Tukhom a pa mani, a nu mani a dôngma mani, a nâihai mani, a urêng hai mani, a farnuhai mani, ama hringna nêk khoma lung ni thung loi chu ki irchutir ni thei no ni.

²⁷Tukhom mâni kros irputa ni zui no chu ki irchutir ni thei no ni,” a tia.

²⁸Nin laia tu mo in irsâng sin tumin, a toia, a sin zoina hrang sum a inei hrang le nei loi hrang insâp bak loi hrang?

²⁹Lungphûm sia chian tâka, a sin zoi thei no’n chu a en murdi’n, innuisan an ti.

³⁰‘Hi pa hi in sin a phuta, sin zoi thei mah,’ ti an tih.

³¹Khan, tu rêngin mo a mi sîngkhat leh rêng danga mi sîngni leh a doi hranga zuang, a ngam hrang le ngam no hrang toiin a ngaitua masa no hrang?



³²A doi ngam no'n chu hla vita an la om laiin irngeina thu hril hrangin palai tîr a ti.

³³Khaang dênin nangni laia mi khom a inei murdi a mâk zit no'n chu ki irchutir ni thei no ni.

Michi dong hmangna boi

(Mt 5.13; Mk 9.50)

³⁴“Michi hi a sa, khannisianlân, michialna kha boi ta sianlân, i leh mo an inal nôk hrang?”

³⁵Irnêng insana hrang khomin sa ta maka, nimnoka pol inruk khom ni ta maka, pai chian hrang vaiin kêng a iruk tâk. Tukhom irngaina mikuar nei murdi'n chu irngai ri sehai,” a tia.

Luka 15

Belra irhmang

(Mt 18.12-14)

¹Voikhat chu khâzana irfuangtuhai le mi sual tamtakin a thu irngai hrangin an hong pana.

²Farisaihai le Dân irchutirtuhai khan, “Hi pa hin mi sualhai a'rpâlpuia, bu khom a nêkpuihai ngai,” tiin an chiara.

³Jisua'n an kuang, hi chongirkhek thu hi an sîra,

⁴“Nangni laia tu'n mo khatin belra irzakhat nei sianlân an laia inkhat irhmang ta sianlân, rama sômkuak kuakhai kha mâkin, ar hmang kha a hmu nôk mâka chu tu mo zong loi hrang?”

⁵A hmu nôkin chu raifân takin a dâra irput a ta,

⁶in sîng a va tungin chu a rualhai le a kôlahai koi buk a ta, ‘Ki belra irhmang kha ki hmu nôk ta, tho ni lômpui roi,’ ti a ti.

⁷Nangni kin hril, khaang dênin mi fel sômkuak kuak irlet nuam loihai nêkin chu, mi sual inkhat irlet chungahin irvâna mi an lôm ual ngai.

Duli irhmang chongirkhek thu



⁸“Khan, nupang tukhom, duli sôm neiin inkhat irhmang ta sian, meiser hâla in phîtin, a hmu nôk mâka chu tu mo sataka zong loi hrang?”

⁹A hmu nôkin chu a rualhai le a kôlahai koi buk a ta, ‘Ki duli irhmang kha ki hmu nôk tâk e, tho ni lômpui roi,’ ti a ti.

¹⁰Nangni ki hril, khang dênin Pathian vântirtônhai laia khan mi sual inkhat irlet chung a lômna a lûminna ual ngai,” a tia.

Nâipa irhmang

¹¹Jisua’n an sîr zom zêla, “Mi inkhatin nâipasal inhni a neia;

¹²a nâipang ual khan a pa kuang, ‘Ka pa, ki’rchon dongtum hrang chu ni pe roh,’ a tia. Khanchu, a sum kha an kuang a semhai tâka.

¹³Khan, nikhua sôtnotea chu, a nâi nâipang ual khan a dongtum murdi kha a lâkkhôm zita, ram dang hlataka a fe tâka; kha sum kha nuamningin a hmang inhek zoi tâka.

¹⁴A sum nei a hmang inhek zit hnungin chu kha rama khan châmpui a tâka, fâk hrang ar sam tâka.

¹⁵Khanchu, kha rama om mi inkhat ar hnêl tâka, ama khan a loi tianga vokhai enkol hrangin a tîra.

¹⁶Khan, vokhai bu fâk ngai itinrênga hôk fa hrangin a’rzuka, khannisian tûte’n fa rua pe mahai.

¹⁷“Khan, a hong inhriat suak tena chu, ka pa ina irhlo mihai bu nêk zoiloi a itam tia le te, keima lak hi hin phîngchâmin ki ithi chian hrang ma ni!

¹⁸Thoi lik ki ta, ka pa kuang fe ta ki ta, a kuang, ‘Ka pa, Pathian chung a le ni chung a ki itho’nsual ta a ni.

¹⁹Ni nâipaa irti inruk ni ta ma ung, irhlo ngai inkhat angin ni hmang roh, ti ki ta,’ a tia.

²⁰“Khanchu a thoia, a pa kuang a fe tâka. Hla taka a la om laiin a pa khan a lei hmua, lung an kham tak taka, a van tâna, a poma, a tum pôt pôta.



²¹A nâipa khan, ‘Ka pa, irvâna Pathian chung a le ni chung a thil ki tho’nsual a ni, ni nâipaa irti inruk ni ta ma ung,’ a tia.

²²A pa khan a siahlohai kuang, ‘Songkol satak kha hong la lat unglân, inngâktir roi, kutsabi inbuntir unglân, kekok khom inbuntir roi.

²³Sehrâtchal tuai mar tak kha hong kai unglân, that roi, raifân takin hruai inthe ei ti.

²⁴Hi ki nâipa hi a thia, a hong ihring nôk ta a ni; a’rh manga, ei ihmu nôk ta a ni hi,’ a tia. Khanchu raifân takin hruaithe an phut tâka.

²⁵“A nâipa ulian ual kha loa fe a hong kîrin chu, in a tung tôn chu thil tum irhai le lâm irhai kha an hriat tâka.

²⁶Siahlo inkhat a koia, ‘Khu khu, imo a ini tâk?’ tiin ar dona.

²⁷Ama khan, ‘Ni sangpa a hong kîra, dam taka a hmu nôk sikin ni pa’n sehrâtchal mar a ithat kêng,’ a tia.

²⁸Khanchu, a ning an mura, in sâng lût nuam ta maka. A pa kha a va suaka, a hong inthêma.

²⁹A pa kha a sâma, ‘Irrgai roh, kumkhua’n ni ta hrangin suak sinin ki sina, ni thupêk lak pom loiin om ma unga, khan khomin ki rualhai leh lômna hrang kêlte lua ni pe ngai mak chea.

³⁰Khannisianlân, hi ni nâipa notizuarhai kuanga ni sum hmang inchêktu hi a hong kîra, sehrâtchal mar tak ni lei that pe sa nôka,’ a tia.

³¹“Khan, a pa khan a sâma, ‘Ki nâipa, ki kuanga om mai ni nia, ki inei murdi hi ni ta zit kêng.

³²Hi ni sangpa thi tâk hi, a ihong hring nôk ta a ni, ar hmang tâk kha ei ihmu nôk ta a ni hi te,’ raifân taka om hrang kêng ei ini,” a tia.

Luka 16

Sum enkoltu iamomloi

¹Khan, a irchutirhai kuang khan, “Mi irchong inkhatin sum enkoltu a neia, kha mi khan a sum a hmang inchêk mai mai a ni ti’n a kuang an va dema.



²Khanchu ama kha a koia, ‘Ni chungchâng thu ki inhriat hi itin lama mo? Ni sum enkol irziakna bu kha hong chôî roh sum enkoltua kop thei no chi ni,’ a ti pea.

³Kha sum enkoltu khan a lungrîlin, ‘Ka pu’n sum enkoltu ki nina a ni inmâktir hrang ni a ti, itin mo tho ta ning? Irnêng tuk lak hrât ma unga, kut do lak kin zaka, a tia.

⁴Sum enkoltu a nin mâktir tika mihaiin an ina an ni inomtir theina hrang lam kin hriat ta,’ a tia.

⁵Khanchu, a pu lâkai intângtuhai kha inkhat khatin a koihaia, a maton tak kuang khan, ‘Ka pu kuang i dôr mo ni intâng?’ a tia. Ama khan ‘Sahriak tân irzakhat,’ a tia.

⁶Ama khan, ‘Ni’rziakna lekha hi lan lân, toiin lân, sômringa ti irziak roh,’ a tia.

⁷Mi dang kuang, ‘Nang te i dôr mo ni intâng kha?’ a tia. Ama khan, ‘Bu tân sângkhat,’ a tia. Ama khan, ‘Ni irziakna lekha hi lan lân, tân sômriat ti irziak roh,’ a tia.

⁸A pu khan sum enkoltu soal vâr thiamzia kha an pâk tâka, vâr nâihai nêkin atûnlai mihai hi rammual thila chu an vâr ual a ni,” a tia.

⁹Jisua’n, “Nangni ki hril, rammual irchonin rual siam unglân; irchon a hek tika kumtuang rama lôm lût ni thei nin ti.

¹⁰Tômte chung a iamom chu tamtak chung a khom iam a om ngai.

¹¹Rammual irchon chung a lua nin iamom no’n te tu mo irchon tak tak kha nangni inkoltir ngam hrang?

¹²Mi dang ta chung a lua iamom loiin teh nin ta hrang ngei khom tu mo nangni pêk hrang?

¹³Siahlo tukhomin hruaitu inhni sin tho irkop thei ni no ni, inkhat hnôl ni a ta, inkhat pom ni a ta, a ninole inkhat kha irngaiinnat a ta, inkhat hmusit a ti. Pathian Sin le sum sin tho irkop thei no chin ni,” a tia.



Jisua thu'nsîr senkhat dang
(Mt 11.12-13; 5.31-32; Mk 10.11-12)

¹⁴Farisai, sum irngai inhluttuhaiin kha thu kha an inhriatin, Jisua kha an innuisana.

¹⁵Jisua'n an kuang, "Mi mit hmu'n mi fel anga inlang mai mai nin ni; khannisian, Pathianin nin lung sêng an hriata. Mihriamhai irngaisâng hi Pathian mit hmu'n intirom a ni.

¹⁶Baptistu Johana a hong mâka chu, Mosia Dân le deipuhai lekhabu thuhai kha hmang hrang a nia; kha rengata chu Pathian Ram Thurchi Sa hril a nia, mi tinin lût tumin an inbo sup sup a ni.

¹⁷Khannisianlân, Dân thu inkhat chînte boi nêkin chu irnêng le irvân boi hi ol ual a ti.

¹⁸"Dôngma mâka, mi dang nei ka chu an iuire a ni, mi dôngma mâk tâk nei khom an iuire a ni.

Irchongpa le Lazara

¹⁹"Mi irchongpa inkhat a oma, puan man tamhai silin a nitin a hoihôka lêngin a om ngai.

²⁰A mikot kôla khan mi inriang tak inkhat, ar hming Lazara, pân ituam zuak, an zâltir ngaia;

²¹Irchongpa maichâm ata a ifâk irnôi tâkhai kha fâk hrang arzuka, uihai lakin a pân an hong inliak ngaia.

²²Mi inriang kha a thia, Abrahamama kôla toi hrangin vântîrtônhaiin an fepui tâka. Mi irchongpa khom a thia, an phûma.

²³Mithi khuaa intak tak a tuanga; a hong tanga; hla taka om Lazara, Abrahamama kôla toi a hong hmua.

²⁴Khan, a hong sâma, 'Ka pa Abrahamama, lung nin khamin lân, Lazara kha a kut pâr hmor tuia inchie sianlân, ki milei indâi hrangin zuang tîr ro ba, hi mei choka hin a sân ki na tak tak kêng,' a tia.



²⁵“Abrahama’n chu, ‘Ki nâipa, nangin ni dam laiin thil sa inzen ni donga, khaang dênin Lazara’n thil saloi inzen a idong kha inhre mai ro ba; atûn chu ama chu irtharngam takin hi hin a om ta, nang chu natna tuangin ni iom tâk a ni.

²⁶Khabana, hitak ata nangni kuanga fe tumhai mo, kha tiang ata keini tianga hong tumhai mo, an kâi thei nona hrangin irnêng chat inthûk tak ei kâra a iom kêng,’ a tia.

²⁷“Irchongpa khan, ‘A ninole, ka pa Lazara kha ka pa ina infetir hrangin nang ki ngên.

²⁸Irzirpui pasal ringa ki neia, hi na tuangna hmuna hin hongna an ti, sathnem irngai takin hrilhai ri se,’ a tia.

²⁹Abrahama khan, ‘Ni urênghai hril hrang te, Mosia le deipuhai an nei khate, khahai thu kha irngai ri sehai,’ a tia.

³⁰Ama khan, ‘Ka pa Abrahama, ni make, mithi laia mi ngêt an kuang fe sianlân irlet an ti,’ a tia.

³¹Ama khan, ‘Mosia le deipuhai thu an zôm no’n chu mithi laia mi thoinôk thu khom zôm ual no nihai,’ ” a ti pea.

Luka 17

Sual

(Mt 18.6-7,21-22; Mk 9.42)

¹Khan, Jisua’n a irchutirhai kuang, “Tûknahai hi om no thei ni mah, khannisianlân, an omtirtu chung chu a rik e,

²Hi mi chîntehai laia inkhat khom hi an tûktir nêkin chu bu nôina lung lianpa a ringa inhlitira, tuikhangliana inthâk ni sian a ta hrangin sa ual a ti.

³“Irdîn roi, ni urêngin ni chung a thil a tho’sualin chu hril roh, a’rletin chu ngaidam roh.

⁴Sûn khata ni chung a voisari thil a tho’sualin voisari ‘Ki’rlet e,’ tia nangma tiang a hong irheiin chu ni ingaidam hrang a ni,” a tia.

lamna



⁵Tirtônhaiin Rengpa kuang khan, “Kin iamna nin det pe roh,” an tia,

⁶Rengpa khan, “Ancham ru malkhat dôr iamna nei unglân chu, hi thingtheimu kung kuanga hin ‘Irphôiin lân, tuikhangliana irson roh,’ ti nin ta, nin thu zôm a ti,” tiin a sâma.

Siahlo sintum

⁷Nangni laia tukhomin mâni siahlo nei sian, irnêng tuka fe mo, kêlbelra ena fe mo a hong kêr le, “Hongin lân, bu hong ot zôi roh,” tu mo lei ti hrang?

⁸Khasikin, ki bu nêk hrang siam ro, irsiamin lân, ki nêk zoi mâka chu ni don ro; kha zoi tika nêk ni ti, a iti loi hrang mo ni ma?

⁹Nin thu anga a tho sikin nin siahlo chu lômthu nin hril ngai mo?

¹⁰Khaang dênin nangni khom thupêk murdi nin tho zoi zit hnung khomin, “Siahlo takirtâi loi ei ni, ei itho tum kêng ei itho a ni, ti roi,” a tia.

Phâr sômkhât a indam thu

¹¹Khan, Jisua Jerusalem a pan pumin Samari le Galili ramria a fea.

¹²Khua inkhata a lûtin chu, phâr sômkhât an hong; hla vita an ngîra;

¹³an khêka, “Jisua, Hruaitupa, lung nin kham ro,” an tia.

¹⁴Anni kha a hong hmuhaiin chu, “Fe ta unglân ochaihai van entir roi,” a tia. Khaanga an fe lai khan an hong irthiang tâka.

¹⁵An laia inkhât khan a dam tâk ti ar hriat zoi le chu, irhai inring taka Pathian inpâk pumin a hong kêr nôk tâka.

¹⁶Jisua ke bula khan a van boka, lômthu an sîr tâka. Kha mi kha Samari mi a ni.

¹⁷Jisua khan a lei chongpuia, “Mi sômkhât kha nin irthiang infâi zit mo ni ma? Kuakhai kha khôn mo an om tâk?”

¹⁸Ithoa mo, hi ram dang mi vai hin, Pathian inpâk hrangin a hong ikîr nôk?” a tia.

¹⁹Khanchu, a kuang, “Thoiin lân, fe roh, ni iamna hi ni dampuina a ni,” a tia.

Pathian Ram zuang tung



(Mt 24.23-28,37-41)

- ²⁰Farisaihaiin Pathian Ram zuang tung hrang zoro an irdonin chu, Jisua'n an kuang, "Pathian Ram zuang tung chu mita hmu zât ni mah.
- ²¹Tûte'n, 'En ro, hi hin kêng a om,' 'So son kêng a om,' ti no nihai. Irngai u ta, Pathian Ram chu nin laia hin a iom chian a ni," a tia.
- ²²A irchutirhai kuang khan, "Mihriam Nâipa hring lai sînhai hi sîn khatte lua nin ihmu nuam nî la hong om a ti, khannisianlân, hmu no chin ni.
- ²³Nin kuang, 'En u ta, so so mani, hi hi mani,' la ti an ti; en hrangin fe suak no unglân, zuihai sa no roi.
- ²⁴Irvâna kôlirtêkin kôlkung ata kôlkung dênin a ivâr ngai ang kha a ni, Mihriam Nâipa zuang Ni chu la nih a ti.
- ²⁵Khannisian, atûnlai mihai hin la hnôl an ta, thil tamtak a ituang masa hrang a ni.
- ²⁶"Nova zoro laia thil om dân ang khan Mihriam Nâipa zuang hrang nia khom a la iom hrang a ni.
- ²⁷Nova irkuanga a lût ni dên khan mihai khan an fâkin an ina, dôngma pasal an irneia; tui a hong liana, an rênga a hong ithat irhmanghai tâk kha.
- ²⁸Khaang dênin Lota dam laiin thil a iom kha; an fâkin an ina, an irchôka, an zuara, thil an phuna, in an sina;
- ²⁹Khannisianlân, Sodom khua ata Lota a suak ni khan irvân ata mei le kât a thoa, an rêngin a thathai zita.
- ³⁰Mihriam Nâipa a zuang tika chu khaang dên khan a ini hrang a ni.
- ³¹Kha tika chu in chung a mi an omin chu in sûnga a neinun la hrangin chum no ri se.
- ³²Loia om chu kîr ta no ri se. Lota dôngma inhre mai roi.
- ³³Tukhom mâni hringna inzôk nuam ka kaiin chu inchân a ta, tukhom mâni hringna inchân ka kaiin chu inzôk a ti.



³⁴“Nangni ki hril, kha ni zâna khan mi inhni zâlmun khata zâl an ta, inkhat chu ihruai ni a ta, inkhat chu mâksan ni a ti.

³⁵Nupang inhni’n bu suk an ta, inkhat chu ihruai ni a ta, inkhat chu mâksan ni a ti.

³⁶Mi inhni loia fe khom inkhat ihruai ni a ta, inkhat mâksan ni a ti,” a tia.

³⁷Irchutirhai khan, “Rengpa, khôn mo?” an tia. Jisua’n, “Sa ruak omna kipa raikosohai khom omkhôm an ti,” a tia.

Luka 18

Meithâi le roirêltu chongirkhek thu

¹Khan, beidong loia chongchai mai mai hrang a nizia chongirkhekin Jisua’n a hrila.

²Khua inkhata hin roirêltu a oma; Pathian khom chi maka, mihriam khom uksak mah.

³Kha khuaa khan meithâi inkhat a oma, kha meithâinu khan, “Ki irdoipui leh kin thubuai ni set infel pe roh,” tiin roirêlpu kuang a hong fe mai ngaia.

⁴Ama khan i dôr ten mani chu lei nuam maka, nakan tena chu a lungrîlin, “Pathian chi loiin mihriam uksak no khom inlân,

⁵hi meithâi hin a sân a nin buaia, infel pe ki ti; khano’nchu, la hong mai a ta, ni lan buai irzêltir ngêt a ti,” a tia.

⁶Rengpa khan an sîr maia, “Roirêltu felloi thu’nsîr chu inhre roi.

⁷Pathianin a mi inthang, sîn zâna ama insamtuhai thu kha Pathianin a iset infel pe lat loi hrang ma ni? A ir-ial hrang ma ni?

⁸Nangni ki hril, zuang set infel pe lat a ti. Khannisian, Mihriam Nâipa hin a zuang tika rammuala iamna nei zuang hmu ni mo?” a tia.

Farisai le khâzana irfuantuhai chongchai

⁹Mânia ki fel irtia, mi danghai hmusit ngaihai kuang Jisua’n chongirkhek thu an sîra.



¹⁰“Mi inhni Tempila chongchai hrangin an fea; inkhat chu Farisai a nia, inkhat chu khâzana irfuangtu a ni.

¹¹Farisai kha a ngîra, hiang hin a chongchaia, ‘O Pathian, kei chu mi dang anga mi huang ngai, iamomloi le uire mi khom ki ni no sikin le hi khâzana irfuangtu ang khom hi ki ni no sikin, lômthu nang ki hril.

¹²Hapta tin bu ki nghei ngaia, ki inei murdi sôma inkhat ki pêk ngai,’ a tia.

¹³“Khâzana irfuangtu chu inhnung tiang a ngîra, irvân tiang khom tang ngam maka, ‘O Pathian, keima mi soal hi lung nin kham roh,’ tiin a rôp ar chûm tâka.

¹⁴“Jisua’n nangni ki hril, a masapu nêkin hi pa hi thiam changin a in tiang a kîr tâka. Tukhom irngaiinhlu murdi’n irhniam an ta, irngaiintôm murdi’n chôindôm ni an ti,” a tia.

Jisua’n nâipang sat a vurna

(Mt 19.13-15; Mk 10.13-16)

¹⁵Mi senkhat an nâitehai Jisua kuanga, an chung a kut irngat hrangin an hruaihaia, irchutirhai khan an lei hnôlhaia.

¹⁶Khannisianlân, Jisua’n anni kha a koihaia, “Nâipangtehai kha ki kuang inhongtirhai unglân, hnôlhai no roi; Pathian Ram chu hianga nâipangtehai ta kêng a ni.

¹⁷Thudik nangni ki hril, Pathian Ram chu nâipangte anga lôm loi ka chu tûte a sûnga lût viat no nihai,” a tia.

Hruaitu irchong

(Mt 19.16-30; Mk 10.17-31)

¹⁸Khan, hruaitu inkhatin a kuang, “Irchutirtu sa, kumtuang hringna ki dong theina hrangin imo ki itho hrang?” tiin ar dona.

¹⁹Jisua’n, “Itho sika mo sa ni ni iti? Tûte sa om mahai, Pathian vai no chu.

²⁰Thupêkhai kha nin hriat khate uire no roh, mi that no roh, inru no roh, milakin mi hnôl no roh, ni nu le ni pa chôindôm roh,” a tia.

²¹Ama khan, “Khahai murdi chu ki thoibop ata ki zôm ngai,” a tia.



²²Kha kha an hriatin Jisua'n a kuang, "Lam inkhat ni la'rsam; niinei murdi zuarin lân, inrianghai sem roh, khanchu, irvâna irchon nei ni ti; khan, hongin lân, ni zui roh," a tia.

²³Kha thu kha a hong inhriatin chu a sân a char a dong tâka irchongpa a ni sikin.

²⁴Jisua'n ama kha a hmu'n, "Irchonghai ta hrangin Pathian Rama lût an tak vang na!

²⁵Pathian Rama mi'rchong lût nêkin chu simphuai mikuara saringsei lût a ol ual," a tia.

²⁶A lei irngaituhai khan, "Khano'nte, tu mo saninhring ni thei hranga?" an tia.

²⁷Ama khan, "Mihriam itho theiloi hi Pathianin chu a tho thei zit kêng," a tia.

²⁸Petera khan, "Irngai ta, kin in le loi mâksanin nang kin zui tâka," a hong tia.

²⁹Jisua'n, "Thudik nangni ki hril, tukhom Pathian Ram sikin a in mani, dôngma mani, urênghai mani, nu le pa mani, nâihai mani mâksan tâk ka kai chu,

³⁰a nêka tam ual, atûna hring sêng le zoro la hong tung hranga kumtuang hringna le ileh hmu ngêt a ti," a tia.

A thi hrang thu Jisua'n a insîr voithumna

(Mt 20.17-19; Mk 10.32-34)

³¹Sômhleihnihai kha an bingin a hruaihaia, an kuang, "Irngai u ta, Jerusalema ei ife hrang a ni; Mihriam Nâipa chungchâng thu deipuhai hmanga irziak murdi kha tung irkip a ti.

³²Jentailhai kuta pe an ta; anni khan len nuisan an ta, inzakom takin soisak an ta; inchil an ta.

³³Zêm an ta, that an ta; sîn thum ni'n thoinôk a ti," a tia.



³⁴Khannisianlân, a irchutihai khan kha thu kha a'rngaina lam chang inhre mahai, anni ta hrangin kha thu kha irthup a ni sikin, imo a ihril khom inhre mahai.

Jeriko kho kôla mitcho a indamna

(Mt 20.29-34; Mk 10.46-52)

³⁵Khan, Jisua chu Jeriko khua a tung tôniain mitcho inkhat hi lampui sîra kut do'n a lei toia.

³⁶“Mipui fe irhai kha imo a ini tâk,” tiin a'rdonhaia.

³⁷“Nazaret Jisua a hong a ni,” an ti pea.

³⁸Khanchu, “Jisua, Davida Nâipa, lung nin kham roh,” tiin a khêk tâka.

³⁹Fe masahai khan an ngoa, dâihrek hrangin an ti khomin a matona nêka inringin, “Davida Nâipa, lung nin kham ro,” tiin a khêk nôk ual uala.

⁴⁰Jisua kha a ngîra, a kuang hong hruai hrangin a tia.

⁴¹A kôl a hong tungin chu, “Imo nang tho pe inlân ni inuam?” a tia. Ama khan, “Rengpa, hmu thei ki nuam,” a tia.

⁴²Khanchu Jisua'n, “Hong hmu thei ta roh, ni iamna hi ni idampui a ni,” a tia.

⁴³Iringloiin a hong hmu thei tâka. Mi murdi'n kha kha an hmu'n chu Pathian an inpâka.

Luka 19

Jisua le Zakaia

¹Khan Jisua'n sîn palin Jeriko lût hrang a nia.

²Kha khan mi inkhat, a'rhming Zakaia a oma; khâzana irfuangtuhai hruaitu a nia, mi irchong tak a ni.

³Jisua kha tu mo a inih ti hmu a tuma, mipui sika khan hmu thei maka, mi dung bong a ni sikin.

⁴Khanchu a fena hrang lampuia an tâna, theipui kunga en hrangin a luia.



⁵Jisua'n kha hmun kha a tungin chu a tanga, "Zakai, zuang chum lat roh, a vuan hin ni ina ki itung hrang kêng," a tia.

⁶A zuang chum lat lata, raifân takin an tungtir tâka.

⁷Kha kha an hmu'n chu an rêngin, "Mi sual kuang tung hrangin a lût tâk so," tiin an chiara.

⁸Zakai kha a ngîra, Rengpa kuang khan, "Irngai ta, Rengpa, ki sum chimrip mi'nrianghai pe ki ta; tu chung a khom dikloi taka ki lei ilâkpai pe a omin chu a bâk minli'n tuam nôk ki ti," a tia.

⁹Jisua'n a kuang, "A vuan hin hi ina hin saninhringna a zuang tung ta, ama khom Abraham a nâipa a ni.

¹⁰Mi irhmanghai zonga saninhring hrangin Mihriam Nâipa hi a izuang a ni," a tia.

Rângachak sum chongirkhek thu

(Mt 25.14-30)

¹¹Kha thu kha an irngai lai khan Jerusalem khom a hong nâi tâk sikin le Pathian Ram kha zuang tung zel hrangin an iam sikin, hi chongirkhek thu hi Jisua'n an sîr tâka.

¹²Hiang hin an sîra, "Mi lian inkhat, an lal theina hrang thu lâka hong kîr nôk hrangin kho lam hlataka fe a tuma.

¹³A suak sôm khat a koihaia, rângachak sum inkhat a pêkhai senga, an kuang, ki om no kârin len pung roi," a tia.

¹⁴Khan, kha khuaa mihai khan an hnôla, "Hi pa hi rêng hrangin nuam ma ung" ti hrangin palai an tîr zui sa zôia.

¹⁵"Inlalna thu kha a lâka, a hong kîr nôkin chu, sum a ipêkhai kha, an inpung zât inhriatna hrangin an koitira.

¹⁶A hong masa tak khan, 'Ka pu, ni rângachak sum kha sômin a pung,' a tia.

¹⁷Ama khan, 'Suak sa, ni tho'n sa e, tômte chung a ni iam oma, kho sôm chung a hruaitu'n om roh,' a tia.



¹⁸Inhnina hongpu khom khan, ‘Ka pu, ni rângachak sum kha ringa’n a pung,’ a tia.

¹⁹Ama’n chu, ‘Nang khom, kho ringa chung a hruaitu’n om roh,’ a tia.

²⁰“A dang khom a hong, ‘Ka pu, en ta, ni rângachak sum kha, irthân huina puanin ki lei infûn chiana.

²¹Mi ngar tak ni ni sikin nang ki chia; ni isia loi khom ni lâk ngaia, ni itû loi khom ni ât ngaia,’ a tia.

²²“Ama khan, ‘Suak sual, ni chongbâi suak rengata thiam nang inchang ma ung. Mi ngar tak ki nia, ki isia loi khom ki lâk ngaia, ki itû loi khom ki ât ngai nin hriat mo?

²³Khano’nte, ki sum kha ithoa mo sum bepârhai kuang ni isia loi? ki hong kîrin a pung le ileh ki la isîng hrang kêng a ini,’ a tia.

²⁴Khan, a kôla ngîrhai kuang, ‘A rângachak sum kha lapai pe unglân, sôm neitu kha pe roi,’ a tia.

²⁵Anni khan, ‘Ka pu, ama’n chu sôm a nei khate!’ an tia.

²⁶Ama’n an kuang, ‘Nangni ki hril, tukhom a neipu ka kai chu, pêk belsa ni a ta, a nei loi chu a inei sunte khom lâkpai pe rip ni a ti,’ a tia.

²⁷Khan, hi ki râlhai inlal hranga ni inuam loituhai hi, hong hruai unglân, ki makunga that roi,” a tia.

Jisua’n roiinpui takin Jerusalem a lût

(Mt 21.1-11; Mk 11.1-11; Joh 12.12-19)

²⁸Kha thu kha an sîr zoiin chu Jerusalem panin maton an sa tâka.

²⁹Oliv tâng an itia om Bethfage le Bethani khua a tung tînin irchutirhai laia inhni a tîrhaia.

³⁰“Ei maton khuaa son va fe unglân, nin va lûtin sakuartungte irthung, tûte la chuang ngai lina va hmu nin ta; sût unglân, hong kai roi.

³¹Tu mo khatin, ‘Ithoa mo nin isût?’ nangni an ti khomin, Rengpa’n a innang kêng, tiin sam roi,” a tia.



- ³²Khanchu a itîrhai kha an fe tâka, an kuang a ihrilhai ang dênin an va hmua.
- ³³Sakuartung kha an sût lai takin a neipuhai khan, “Sakuartung kha ithoa mo nin isût?” an tia.
- ³⁴Anni khan, “Rengpa’n a innang kêng,” an tia.
- ³⁵Jisua kuang an hong kaia, sakuartung chungu khan an puanhai an dâpa, a chungu Jisua kha an inchuangtir tâka.
- ³⁶A fe tâka, lampuia khan an puanhai an dâp thiaia.
- ³⁷Jerusalem tung tôn, Oliv tâng khêl tôna khan irchutir murdihai khan sinirkhêl an ihmu murdihai sikin an lôma, hnuk irhai inring takin an khêka, Pathian an inpâk tâka.
- ³⁸“Rengpa irhminga hong chu, inpâkin om ri se, Irvâna irngei lêng sianlân, Anchungtaka khin roinpuina om ri se,” an tia.
- ³⁹Mipui laia Farisai senkhathaiin chu a kuang, “Irchutirtu, ni irchutirhai hi khaphai roh,” an tia.
- ⁴⁰Ama khan a sâmhaia, “Nangni ki hril, hihai hi an dâihrekin chu hi lunghai lua hin an ikhêk suak hrang a ni,” a tia.

Jisua’n Jerusalem a châ

- ⁴¹Khan, a hong nâi uala khopui a hong hmu’n chu a chap tâka.
- ⁴²“O nang lua’n a vuan ten hin irtharngamna lampui hi inhre tan lân chu! khannisianlân, atûn chu ni hmu loi hrangin ar thup ta.
- ⁴³Ni râlhaiin nir hîlin kul siam an ta, nang irhualin kil tin ata nang an bei zoro la hong tung a ti:
- ⁴⁴ni sînga om ni nâihai ten luan nang pai rak an ti; ni sînga lung irchon rêng rêng hôi no nihai, Pathianin nang a zuang kan lai kha nin hriat no sikin, kha kha ni chungu hong tung a ti,” tiin.

Jisua Tempila a lût

(Mt 21.12-17; Mk 11.15-19; Joh 2.13-22)



⁴⁵Khan, Jisua chu Tempila khan a va lûta, neinun zuartuhai kha an hnot suakhaia,

⁴⁶an kuang, “Ki in chu chongchaina in ni a ti, ti irziak a ni, nangni’n chu nakhrâtsonghai khura kêng nin siam ual tâk,” a tia.

⁴⁷A nitin Tempila khan ar chutir ngaia, Ochai inlalahai le Dân irchutirpuhai khan, vântâng hruaituhai le, ama kha that irhmang an tuma.

⁴⁸Khannisianlân, mipuihaiin a thu irngai an hnông thei no sikin, a tho lam dân an inhriat theiloi a ni.

Luka 20

Jisua irchamneina chungchâng

(Mt 21.23-27; Mk 11.27-33)

¹Sûn khat chu Jisua’n Tempila mihai Thurchi Sa hrilin ar chutir laiin, Ochai inlalahai, Dân irchutirtuhai le upahai a kuang an hong.

²“I irchamneina’n mo hi thil hi ni itho? Tu’n mo thu nang a ipêk nin hril roh,” an hong tia.

³Jisua’n a sâma, “Kei khomin chongbâi khat nangni irdon ki ti;

⁴Johana baptisma kha irvâna om ircham mo a ini, mihriam ircham mo? ni hril roi,” a tia.

⁵An irsêl irhlôma, “Pathian ircham ei ti le, ‘Ithoa mo a thu nin izôm loi’ ni ti a ta;

⁶Mihriam ircham ei ti lakin mipui hin an rêngin lungin ni dêng an ta, Johana kha deipu ni ngêtin an pom sikin,” an tia.

⁷Khanchu, “Kho tianga irchamin mo, hi thil hi a itho inhre ual ma ung,” an tia.

⁸Jisua khom khan, “Kei khomin tu irchamin mo hi thil hi ki itho nangni hril ual no ning,” a tia.

Grep irhuan chongirkhek

(Mt 21.33-46; Mk 12.1-12)



⁹Vântâng mipui kuang Jisua'n hi chongirkhek thu hi a hril tâka, "Mi inkhatin grep irhuan a siama, irhuan enkoltuhai kuang a chuan a'rhlotirhaia, ram danga zoro sôtak a zu irhmanga.

¹⁰A'rhmal zoro'n chu a dongtum la hrangin suak inkhat irhuan enkoltuhai kuang a tîra, Khannisianlân, irhuan enkoltuhai khan an lei zêma, kut rongin an inkîrtira.

¹¹Suak dang a tîr nôka, kha khom kha an lei zêma, inzakom takin an soisaka, kut rong dênin an inkîrtîr nôk tâka.

¹²A voithumnaa a itîr len vâng chu thisen an lei insuaa, irhuan ata an pai suaka.

¹³"Grep irhuan neitupa khan, 'Itin mo ki itho hrang tâk? ki nâipa inditom tak hi tîr ta ki ta; ama hi chu lei inza an ti duah,' a tia.

¹⁴Irhuan enkoltuhai khan an lei hmu'n chu, 'Hi mi hi irhuan luatu hrang chu a ni, tho that ei ta, eini'n ar chon kha ei dongna hrangin,' an irtia.

¹⁵Grep irhuan ata kha an pai suaka, an that tâka. Khanchu, Jisua'n, "Grep irhuan neitupa khan itin mo lohài ta ni?" a tia.

¹⁶"Hong a ta, irhuan enkoltuhai kha that irhmanghai a ta, irhuan kha mi danghai pe a ti," a tia. Kha thu kha an inhriatin chu, 'Kha tenpa bâk kha chu tho tet no ni,' an tia.

¹⁷Khannisianlân, an nihai kha Jisua'n a ena, "Imo a omzia? 'In sinpuhaiin lung an inuam loi kha, kha ngêt kha a kila lung poimo tak a hong ni ta,' ti irziak hi i tihna ma ni?

¹⁸"Tukhom kha lung chung a tûk murdi chu koi irnôi an ta, a idel len vâng chu irnôi indi chit a ti" a tia.

Khâzana chôi thua irdonna

(Mt 22.15-22; Mk 12.13-17)

¹⁹Kha lai khan Dân irchutirtuhai le Ochai inlalthai khan, kha chongirkhek thu kha anni demin a insîr ti an inhriat sikin, chel zôi zel an nuama, aniachu vântâng an chihaia.



²⁰Khanchu, zoro'nchum an irdîp chaka. Ramoptu roirêlna le ar chamneinaa an tung theina hrangin a chong insuala chel hrangin enirchiktu senkhat mi dik anga inlang, an tîra.

²¹Kha mihai khan, "Irchutirtu ni thu'nsîr le ni thu irchutir hi a dik ti kin inhriat; tukhom inza bîk nei ual loiin Pathian thu dik tak nir chutir ngai.

²²Kaisara kuang khâzana kin ichôi hrang mo, chôi loi hrang mo? nin hril roh," tiin an irdona.

²³Khannisianlân, butdi an itho a nih ti an hriata, an kuang,

²⁴"A duli ni hong inentir u ta, tu dûr le tu irhming mo a chuang?" a tia. Anni khan, "Kaisara," an tia.

²⁵Ama khan, "Khano'nte, Kaisara ta chu Kaisara pe unglân, Pathian ta chu Pathian pe roi ba," a tia.

²⁶Khanchu vântâng makunga a thu'nsîra chel an itum kha hlo an sam tâka; a isâmna kha a sân ar khêl an tia, an dâihrek ta.

Thoinôkna thua irdonna

(Mt 22.23-33; Mk 12.18-27)

²⁷Sadukaihaiin thoinôkna om mak an tia; an laia senkhat Jisua kuang an hong.

²⁸"Irchutirtu Mosia'n, Tukhom dôngma neia nâi nei loiin thi sianlân, a urêngpa ta hrangin irchi a inei hrang a nih ti a'rziaka.

²⁹Khan, urêng pasal sari an oma, a ulian tak khan dôngma a neia, nâi nei loiin a thia;

³⁰a inhnina khan a lua nôka,

³¹Inthumna khomin; a lua nôka, khaangin sarikai khan an lua senga, nâi nei loiin an thi zita.

³²Kha hnung chu nupang khom kha a thi sa tâka,

³³Khanchu thoinôkna khan kha nu kha tu dôngma tak mo a ini hrang tâk? Urêng sarikai khan dôngma'n an nei senga," tiin an irdona.



³⁴Rengpa'n an kuang, "Hi rammual mihai hi dôngma pasal an irnei ngaia,
³⁵rammual la hong om hranga thoinôknaa chang hranga inkunghai rêk chu dôngma pasal irnei ta no nihai.

³⁶Thi khom thi nôk thei ta no nihai, vântîrtônhai angin om an ti. Thina ata an thoi nôk tâk sikin Pathian nâihai ni ta an ti.

³⁷Mithi kaithoi thu kha Mosia khomin an langtir kate; chînribuk mei chok thua khan Rengpa kha, 'Abrahama Pathian, Isaka Pathian, Jakoba Pathian' tia a insîr kha.

³⁸Ama chu mithihai Pathian ni maka, mi hringhai Pathian a ni ual. Ama ta hrangin chu an ihring zit a ni," a tia.

³⁹Dân irchutirpu senkhatin, "Irchutirtu, a sân nin sîr indik," an lei ti saa.

⁴⁰Kha hnung chu, thu dang irdon ngam ta mahai.

Mesia chungchâng irdon infelna

(Mt 22.41-46; Mk 12.35-37)

⁴¹Jisua'n an kuang, "Krista kha Davida nâipa, itin lama ti mo an ini?"

⁴²Inpâkna hla bua Davida ngeiin.

⁴³'Rengpa khan ki Rengpa kuang ki chang tiang hong toi roh, Ni râlhai ni ke irnghatnaa ki sia mâka chu,' a tia.

⁴⁴Davida'n ama kha, 'Rengpa' a tiin teh, itin mo Mesia kha Davida nâipa a ini thei hrang?" a tia.

Dan irchutirtuhai ata irdîn hrang

(Mt 23.1-36; Mk 12.38-40)

⁴⁵Vântâng mipui inhriatin Jisua'n a irchutirhai kuang khan,

⁴⁶"Dân irchutirtuhai ata irdîn roi. Anni khan songkol irfual inngâka chai vêl an uara, bazar hmuna chubai irmûk an irngaisânga, Sinagoka toina langsâr tak le hruaithena hmuna toina satakhai an irngên ngai.

⁴⁷Hi mihai hin meithâi sum fa pe zoia, mi hmu hrangin vai, sôt tak tak chongchai ngaihai hin hremna tuang ual an ti," a tia.

Luka 21



Meithâi thilpêk

(Mt 12.41-44)

- ¹Tholôm bôma mi irchonghai tholôm thâk kha Jisua'n a thîr maia,
²meithâi inriang tak inkhatin poisa hni a hong ithâk a hmua.
³Khanchu, “Thudik nangni ki hril, hi meithâi inriang tak hin mi danghai nêkin a thâk intam ual a ni.
⁴Mi danghaiin chu an inei lêta om kha kêng an ithâk ngai, ama hin chu a ineisun a ir-enkolna hranga kha kêng a hong ithâk a ni hi,” a tia.

Tempil siat hrang thu

(Mt 24.1-2; Mk 13.1-2)

- ⁵Khan, irchutir senkhathaiin Tempil, lung satakhai leh an irvôtir le Pathian kuanga an thilpêkhai an insîr laiin, Jisua'n,
⁶“Hi nin thil hmuhai, lung irchuan rêng rêng hi inchim loia hitaka hin om no ni; khaang zoro kha la tung a ti,” a tia.

Buaina le dengtheina

(Mt 24.3-14; Mk 13.3-13)

- ⁷Anni'n, “Irchutirtu, kha kha itika mo a hong iom hrang?” tiin an irdona.
⁸Ama'n, “Hruai pai nin ni nona hrangin irdîn roi; ki'rhming songin, 'keima hi ki ni, a zoro tung hrang a ni ta,' tiin mi tamtak hong suak an ti, an hnung zui no roi.
⁹Irdoi irhai le tehel sika buaina irhai nin inhriatin chi ual no roi, khahai kha tung masa hrang rêng a ni, zoro mongna chu la ni no ni,” a tia.
¹⁰Khan, an kuang, “Nam dang le nam dang irdoi an ta, ram dang le ram dang irdoi sa an ti.
¹¹Hnîngnupui tho a ta, hmun dang danga châm tâk a ta, hrihai pung a ta, irvân ata ichiomhai le siatna irkhêl tak tak hong om a ti.
¹²Khannisianlân, kha thilhai kha a hong tung mân nangni chel an ta, Sinagokhaia hruaiin, intângna ina nangni khum an ti, deng nangni an inthei hrang a ni. Ki'rhming sikin rêng hai le roirêltuhai makunga nangni hruai an ti.
¹³Kha kha nin ta hrangin Thurchi Sa hril inchumna zoro la nih a ti.



¹⁴Lei inhre diam roi, itin mo irphilin kin lei isâm hrang, tiin lunginkâng no roi.

¹⁵Nin irdoipuihai murdi'n nangni an sêl thei nona hrangin vârna le mi sâm theina nangni pêk ki ti.

¹⁶Nin nu le nin pahai, nin urêng hai, nin sângsuak hai le nin rual hai dên khomin nangni incheltir an ta, senkhat vâng chu nangni thatpai an ti.

¹⁷Ki'rhming sikin mi tinin nangni hnôl an ti.

¹⁸Khannisianlân, nin samzâi malkhat khom irhmang no ni.

¹⁹Diar ngitin ngîr unglân, khanchu zôk nin ti.

Jisua'n Jerusalem siat hrang thu a lei hrilna

(Mt 24.15-21; Mk 13.14-19)

²⁰“Khan, sipaihaiin Jerusalem an irhual nin hmu tika chu a siat hrang anai tah ti inhre roi.

²¹Kha zoro tika chu Judai rama omhai chu tâng ramhaia intân hai sian; khopui sînga omhai khan suaksan ri sehai, rama omhai chu a sînga lût no ri sehai.

²²Pathian thubua irziak a hong tung indik theina hrangin, kha nikhuaa chu ‘Phuba lâk nihai,’ ni a ti.

²³Kha ni'n chu, inrâi hai le nâite pom lai hai kha a sân intak a ti. Hi rammuala hin a sâna intak tung a ta, hi irchihai chung a hin ningmur a hong tung hrang sikin.

²⁴Khandaiin thi an ta, nam tin kuang suaka hruai indarin om an ta, khan, Jentail hai zoro a mong mâka chu Jerusalem hi Jentail hai isirbe ni a ti.

Mihriam Nâipa zuang hrang thu

(Mt 24.29-31; Mk 13.24-27)

²⁵“Khan, misa haia, tha haia, ârsi haia khin irsinsiana irkhêl tak tak hong om a ta; irnênga khom tuikhanglian irsôn le irhai an inhriatin nam tin thôna lam inhre loiin kamang an ta;



²⁶Irvân sinthotheinahi kha inhnîngtir ni a ta, rammuala thil ichiom hong tung hrang an ngaitua'n ichia irthatâkin chingirîl an ti.

²⁷Kha zoro tika chu Mihriam Nâipa hi sinthotheina le roinpuina irkhêl tak leh sôm laia zuang hmu an ti.

²⁸Kha thil kha a zuang tung tikin chu chung tiang enin tang unglân, nin zôkna hrang kha a zuang nâi sikin," a tia.

Theipui kung ata irchu hrang

(Mt 24.32-35; Mk 13.28-31)

²⁹Jisua'n an kuang chongirkhek thu an sîr saa, "Theipui kung le thing danghai khom hi en u ta,

³⁰A hong incher irnoi nin hmu'n, kholum a hong irphut ta, ti nin inhriat ngai.

³¹Khaang takin nangni khomin, khahai murdi zuang tung nin hmu tikin chu, Pathian Ram chu a zuang nâi tah ti inhre mai ngai roi.

³²Thudik nangni ki hril, khahai thil murdi kha a zuang tung mâka chu atûnlaia mihai hi boi irman no nihai.

³³Irnêng le irvân boi a ta, ki thu chu boi viat no ni.

Irtûng chian hranga inthorna

³⁴"Khanchu, nuam le ninga omhai, zu'nruai hai, a nitin om dân ngaituana hai, nin lungrîla a sip nona hrangin irdîn roi.

³⁵Chânga in-ôk angin nangni tongna ti. Irnêng pumpui chung a zuang itung hrang a ni.

³⁶Kha thil zuang tung hranghai tuang suaka, Mihriam Nâipa makunga nin ngîr theina hrangin itiklai khomin irngaitua'n chongchai roi," a tia.

³⁷Jisua'n sîna chu Tempila ar chutirhaia, khohloi tiang chu a suaka, Oliv tâng an itia khan a riak ngai.

³⁸Mi murdi khom a thu irngai hrangin zînga Tempila an hong ngai.

Luka 22

Jisua that hrang lam an ngaitua

(Mt 26.1-5; Mk 14.1-2; Joh 11.45-53)



¹Khan, bai chol koploi Kût, Ferkân Kût an iti kha a hong nâi tâka.

²Ochai inlalahai le Dân irchutirtuhai khan vântâng mipui an chihai sikin inrûka that hrang lam an ngaituaa.

Juda'n Jisua incheltir a tum

(Mt 26.14-16; Mk 14.10-11)

³Sômhleihnihai laia kop sa, Juda, Iskariota an itihtu sũaga Setan a lûta.

⁴Khanchu, a va fea, Ochai inlalahai le ulian hruaituhaiin an ichel hrang lam a van sîrpuihaia.

⁵Anni khan a sân an lei lôma, sum pêk hrang an inkung ta.

⁶Ama khom khan sa a tia, mipui om loi laia incheltirna zoro'nchum a zong tâka.

Ferkân kût bu sinsiam

(Mt 26.17-25; Mk 14.12-21; Joh 13.21-30)

⁷Bai chol kop loi Kût ni, Ferkân Kûta belrate an that nê chu a hong tunga.

⁸Khanchu, Petera le Johana kha a tîra, "Ferkân Kût khalâi bu ei inêk hrang va sinsiam roi," a tia.

⁹Anni khan "Khôn mo va sinsiam inlân ni inuam?" an tia.

¹⁰Ama khan, "Irngai u ta, khopuia nin va lûtin pa inkhat bêla tui chôiin nangni irtongpui a ti; a lûtina ina zui lût roi.

¹¹Khan, in neipupa kuang, 'Irchutirtu'n ki irchutirhai leh Ferkân Kût khalâi kin nêkna hrang chontan kha kho hin mo a ti,' ti roi.

¹²Ama khan chontan chuanchung irzat tak; itinrêng omsai, nangni inkhîk irhmu a ti. Kha khan sinsiam roi," a tia.

¹³Khanchu an fea, an kuang a insîr lam ang tak khan an va hmua, Ferkân Kût khalâi bu kha an sinsiam tâka.

Rengpa zâmbu

(Mt 26.26-30; Mk 14.22-26; 1 Kor 11.23-25)

¹⁴Khan, a fâk zoro'n chu ama le a irchutirhai khan khalâi kha an ot tâka.



¹⁵An kuang, “Ki tuang mân hi Ferkân Kût khalâi bu hi nangni otpui ki nuam tak tak a ni.

¹⁶Nangni ki hril, Pathian Rama a tak tak a tung mâka chu hi khalâi bunêk hi fa ta no ning,” a tia.

¹⁷Khanchu, khilât a lâka, Pathian kuang lômthu an sîr zoiin, an kuang, “Hi hi la unglân, irsem roi.

¹⁸Nangni ki hril, atûn ata Pathian Ram a zuang tung mâka chu, hi uain tui hi in nôk ta no ning,” a tia.

¹⁹Khan, bai a lâka, Pathian kuang lômthu an sîr zoiin a khoia, an kuang a pêkhaia, “Hi hi ki taksa a ni, nin ta hranga pêk a ni; nin ni inhriat maina hrangin hi ang hin tho ngai roi,” a tia.

²⁰Zân bu nêk zoia chu khang dênin khilât a lâka, “Hi khilât hi ki thisena thuthung thar, nin ta hranga suak chu a ni.

²¹Khannisianlân, irngai u ta, a nin cheltir hrangtu chu hi maichâma hin a ot chian a ni.

²²Mihriam Nâipa hi Pathian inkung angin a ife hrang a ni, aniachu, an cheltirtu hrang mihriam chung chu a rik e,” a tia.

²³Anni khan an laia khang tho hrang kha tu tak mo a ini hrang tâk, tiin an indon irhlôma.

Tu mo roiinpui tak hrang

²⁴Khan irchutihai laia tu mo roiinpui tak ni ni, ti thu irsêlna a hong suaka.

²⁵Ama khan an kuang, “Jentailhai rêng hai chu inlal an irti tak taka, an chung a irchamneituhai lakin, ‘Hruaitu sa,’ ti irhming an irphuaa.

²⁶Khannisianlân, nangni laia chu khang khan ni mah. Nin laia roiinpui tak chu a chîn tak angin om sianlân, hruaitu tak kha sinthopu angin om ual ri se.

²⁷Tu mo roiinpui ual, khalâi ottu mo a sinthotu mo? khalâi ottu kha mo ni no ni? Khannisianlân, keima’n chu sinthotu angin ki iom kêng.

²⁸“Intakna ki tong sûngin nangni’n nin ni ompuia.



²⁹Ka pa'n ram a ni inkung pe ang dênin kei khomin ram nangni kin kung pe;
³⁰khanchu, ki rama chu ki maichâma fâkin, in nin ta, rêngtoihmuna toiin
 Israel nam sômhleihnihai chung a roirêl pe nin ti.

Petera'n phil hrang thu Jisua'n a lei insîr

(Mt 26.31-35; Mk 14.27-31; Joh 13.36-38)

³¹“Simon, Simon, irngai ta! Setana'n butak le bu irsi sensâi hrang, bu'n sêp
 anga nangni fiaa, a sa le a sia nangni theithâk hrangin, Setana'n phalna a
 hmu tâk.

³²Khannisianlân, ni iamna a boi nona hrangin nang ki chongchai pe. Khan, ni
 hong irhei nôk tika chu ni urênghai indet ro,” a tia.

³³Ama khan, “Rengpa, ni kuang chu intângna ina lût hrang le thi hrang
 khomin fe sa mai ki'rphal,” a tia.

³⁴Ama khan, “Peter, nang ki hril, ‘Ama kha inhre ma ung’ tia voithum ni ni
 phil mâka chu a vuan zân âr khuang no ni,” a tia.

Sum choli, hmarsahai, le khandaihai chôi thu

³⁵Jisua'n an kuang, “Sum choli, hmarsatehai, kekokhai chôi loa nangni ki
 tîra khan, thil irsam nin nei moh?” a tia. Anni khan, “Nei viat ma ung,” an
 tia.

³⁶Ama khan, “Atûn chu sum choli neipu'n chu chôi sianlân, hmarsate khom
 chôi ri se; khandai nei loi chu a puan zuar sianlân, irchôk ri se.

³⁷Nangni ki hril, ‘Ama chu mi sual laia an tep sa ta,’ ti Pathian Lekha thu chu
 ki chung a tung ngêt hrang a ni. Ki chungthu an irziak kha tung irkip hrang a
 ni ta” a tia.

³⁸Anni khan, “Rengpa, en ta, hin khandai inhni a om e,” an tia. Ama khan, “A
 ruk ta,” a tia.

Oliv tânga chongchai

(Mt 26.36-46; Mk 14.32-42)

³⁹Khan, ama kha a suaka, a tik danga angin Oliv tânga khan a fea, a
 irchutirhai khom khan an zui saa.



⁴⁰A hmun a va tungin chu an kuang, “Thêmnaa nin lût nona hrangin chongchai roi,” a tia.

⁴¹Lung dêng phâk ten vêla, a bingin a va fea, khûksadelin a chongchaia.

⁴²“Ka pa, sa ni ti’n chu, hi khilât hi ni lapai pe roh, khannisianlân, keima ircham ni loiin nangma ircham ni ual ri se,” a tia.

⁴³Irvân ata vântîrtôn inkhat inhartir hrangin a kuang a zuang inlâra.

⁴⁴A zâm a’rzal tak taka, a’rthân kha thisen zung lian tak angin a zunga.

⁴⁵A chongchai zoiin chu irchutirhai kuang a hongga, an beidong inmusu kha a hong hmua, an kuang, “Ithoa mo nin inmusu?”

⁴⁶Thoi unglân, thêmnaa nin lût nona hrangin chongchai roi,” a tia.

Jisua chel thu

(Mt 26.47-56; Mk 14.43-50; Joh 18.3-11)

⁴⁷Khan, a la chong lai takin mipui an hong tunga, sômhleihnihai laia kop Juda an iti khan mah a hong hruaia, tum hrangin Jisua a hong pana.

⁴⁸Khannisianlân, Jisua’n a kuang, “Juda, Mihriam Nâipa hi i tumin mo, ni incheltir hrang?” a tia.

⁴⁹A kôla mihai khan thil hong tung hrang kha an hmu’n, “Rengpa, khandai irlek kin ti duah?” an tia.

⁵⁰An laia inkhatin chu Ochai inlal tak siahlo mikuar chang tianga a sât thâkpai pea.

⁵¹Jisua’n a sâma, “A ruk ta,” a tia. A mikuar kha a tôn pea, an damtir ta.

⁵²Ochai inlalahai, Tempil hruaituhai le upa honghai kuang khan, Jisua’n, “Khandai le hêmvuak chôiin hrâtlâksong chel hrang ang dênin nin hong ipût mo?”

⁵³A nitin, Tempila nin laia ki om ngai lai khan ni chel mak chêia; khannisianlân, inthim irchamneina’n roi a rêl lai hin nin sintho zoro a ni,” a tia.

Petera’n Jisua a phil

(Mt 26.57-58,69-75; Mk 14.53-54,66-72; Joh 8.12-18,25-27)



54 Jisua an chel tâka, Ochai inlaltak ina an hruai lût ta; Petera khan hla vit ata a zuia.

55 Khan kholaiia mei an thoa, an toi irbuka, Petera khom kha an laia khan a toi saa.

56 Mei vâra a toi laiin siahlo dôngmate inkhatin a hong hmua, a en vong vonga, “Hi pa khom hi a kuanga om sa a ni hi te,” a tia.

57 Ama’n, “Nupang, ama chu inhre ma ung,” a tia, a phila.

58 Kha hnungin mi dangin a hong hmu nôka, “Nang khom hi, an laia mi ni ni hi te,” a tia. Petera’n, “Mihriam, kei chu ni viat ma ung,” a tia.

59 Dârkâr khat vêl hnunga chu mi dangin, “Hi pa khom hi a kuanga kop sa kha a ni ngêt hi te, Galili mi a ni hi,” a ti ngita.

60 Petera khan, “Mihriam, ni thu’nsîr kha inhre viat ma ung,” a tia. A chong mai lai takin âr a khuang zôia.

61 Rengpa chu a hong irheia, Petera kha a ena. Petera khan, ‘A vuan zân âr a khuang mân nangin voi thum ni phil ni ti,’ Rengpa’n a kuanga a lei iti kha an hriat suaka.

62 Pên tiang a suaka, a chap irhniak bop bop tâka.

Jisua nuiza siamna’n an hmang, an inbên

(Mt 26.67-68; Mk 14.65)

63 Jisua cheltuhai khan nuiza siamna’n an hmanga, an inbêna,

64 A mit an tuama, “Tu mo nang an bên, ti ro?” an tia.

65 Chong saloi tak takin an ngoa.

Sanhedrin makunga Jisua a ngîr

(Mt 26.59-66; Mk 14.55-64; Joh 18.19-24)

66 Khan, khua a vârin chu vântâng upahai, Ochai inlalthai le Dân irchutirpuhai kha an irbuka; an Sanhedrin-ah khan Jisua kha an hong hruaia.

67 A kuang, “Krista ni ni lele’n chu nin hril roh,” an tia. Ama khan, “Nangni hril khom inlân, iam ual no chin nia,

68 Chong nangni irdon khom inlân ni sâm ual no chin ni.



⁶⁹Khannisianlân, atûn ata chu Mihriam Nâipa hi Pathian sinthotheina chang tiang toi ta a ti,” a tia.

⁷⁰Khan an rêngin, “Nang hi Pathian Nâipa ni ini mo?” an tia. Ama’n, “Ni nih, nin ni ti khate,” a tia.

⁷¹Anni’n, “Inhriatpuitu dang tu mo ei la innang hrang? Eini ngeiin a chongbâi suak ata ei inhriat tâk hi te,” an tia.

Luka 23

Pilata makunga Jisua an hruai (Mt 27.1-2,11-14; Mk 15.1-5; Joh 18.28-38)

¹An rêngin an thoia, Pilata kuang Jisua chu an hruai tâka.

²“Hi mi hin ei mipuihai tehel zong hrangin an thorhaia, Kaisara kuang khâzana chôî a khapa, ama hi Rêng, Krista chu, ar ti, ti khom kin inhriat suak a ni,” tiin an hnôla.

³Pilata’n a kuang, “Judahai rêng mo ni ni?” a tia. Khan, Jisua’n, “Ni ni, ni ni ti khate,” tiin a sâma.

⁴Pilata’n Ochai inlalthai le mipuihai kuang khan, “Hi mi hi thiamno inchang hranga hin ite a bi hmu ma ung,” a tia.

⁵Khannisianlân, anni khan, “Tehel zong mi inthorin, Judai ram kho tina mi ar chutir ngai ti kin inhriat, Galili rama a phuta, hin khom a hong itung tâk a ni,” tiin an bei nôk uala.

Heroda makunga Jisua a ngîr

⁶Pilata’n, kha kha a hong inhriatin chu, Galili mi a ni le ni loi ar dona.

⁷Heroda biala mi a nih ti an hriatin chu, Heroda kuang a tîr tâka; ama khom Jerusalema a lei om lai tak a ni.

⁸Heroda’n Jisua thurchi a lei inhriata, Jisua hmu hrang a nuamna, a sîn a lei sôt tâk sikin, Jisua a hmu’n chu a lôm oka; a sinirkhêl imo khat hmu khom a sabeî sa.

⁹Thu tamtak ar dona, khannisianlân, i ang khomin sâm mah.



¹⁰Ochai inlhai le Dân irchutirtuhai khom an ngîr saa, an sêla.

¹¹Khan, Heroda khom khan, a sipaihai leh Jisua kha an hmusit tak taka, nuiza siamna'n an hmanga, puan roiinpui tak an siltira, Pilata kuang a tîr nôk tâka.

¹²Pilata le Heroda kha lei irngei ngai mahaia; kha nikhua taka khan chu an irngei ta.

Jisua thi hranga a roi an rêlna
(Mt 27.15-26; Mk 15.6-15; Joh 18.39; 19.16)

¹³Pilata khan Ochai inlhai le Dân irchutirtuhai le vântâng mipuihai kha a koi buka, an kuang,

¹⁴“Hi mi hi mihai tehel zong hrangin an thorhai, nin hong tia, nin makung ngeia ki'rtipua, nin ihnôlna thua thilpoi ite a itho hmu ma ung.

¹⁵Heroda khomin hmu ual mah, ki kuang a hong itîr nôk ta a ni. Irngai roi thina hrang ang dôr ite tho'nsual nei ual mah.

¹⁶Khanchu, vîk ki ta, insua nôk ki ti,” a tia.

¹⁷Ferkân kût hruaithe rikipin Pilata'n mi intâng inkhat an ta hrangin an sua pehai ngai a ni.

¹⁸Khannisianlân, an rêngin khêk irrualin, “Hi mi hi chu thatin lân, Barabba kha nin sua pe roh,” an tia.

¹⁹Kha mi kha khopua tehelna sik le mi that sika intângna ina intâng a ni.

²⁰Pilata khan Jisua kha insua a nuama, an kuang thu an sîr nôka;

²¹Khannisian, “Krosa hembe roh, krosa hembe roh,” tiin an khêk mur mur tâka.

²²Khan, Pilata'n a voi thumnaa, an kuang, “Itho mo? Imo a tho'nsual? Thina hrang rak ten ite a itho'nsual hmu ma ung; vîk ki ta insua ki ti,” a tia.

²³Anni khan inring takin an khêka, Krosa hembe hrangin an ngên ngota, an irhai khan an hnêpai tâka.

²⁴Pilata'n an ingên angin an kung tâka.



²⁵Tehelna le mi that sika intângna ina mi intâng an ingên kha an sua, Jisua kha an nuam nuama lo hrangin a pêkhai tâka.

Jisua hembêna

(Mt 27.32-44; Mk 15.21-32; Joh 19.17-27)

²⁶Khanchu, sipaihaiin Jisua an hruaia, an fe laiin, Simona Kurini kho mi, thingtâng rengata khopui hong pan an tonga, an chela; Kros an irputtira, Jisua hnunga an infetira.

²⁷Khan, vântâng mipui tamtak le milung naa chap bop bop nupanghaiin an zui sup supa.

²⁸Jisua kha anni tiang a'rheia, "Jerusalem nuhaio, ni châ no roi, nangni le nin nâihai ta hrangin chap ual roi.

²⁹Nupang ching hai, nâivong ngai loihai, nâi don ngai loihai chu an vân a sa e! an ti zoro la hong tung a ti.

³⁰Kha zoro tika chu mihaiin tâng kuang, 'Ni del roh,' ti an ta, mual kuang, 'Ni'rkhu roh,' la ti an ti.

³¹Thing hring lua hiang hin an lo'n te, thing châr len vâng te itin takin mo an ilo hrang?" a tia.

³²Khan, that sa hrangin mi dang, mi sual inhni, a pâlin an hruai saa.

³³Luru an ti hmun chu an va tunga; khatak khan krosa an hembe tâka; mi sualhai khom kha a chang tiang inkhat, a vei tiang inkhat, an hembe saa.

³⁴Jisua'n, "Ka Pa, annihai hi ngaidam roh, an sintho hi inhre mahai" a tia. A silkaihai kha tasânin an irsema.

³⁵Vântâng mipuihai khan ngîrin an thîra. Hruaituhai khom khan, "Mi dang lua an damhai ngaia, Pathian mi'nkung, Krista chu, a ni lele'n teh a bing khomin irdam ri se ba," tiin an êroa.

³⁶Sipai hruaituhai khom khan an innuisana, a kuang an fea, zu thûr an pêka,

³⁷"Judahai rêng ni ni tak takin chu, ni bingin irdam ro ba," an tia.

³⁸A chungka khan, "Hi mi hi Judahai rêng a ni," ti irziak an târa.



³⁹An hembe sa mi sual inkhatpu khan a chiar khuma, “Krista kha ni ini loi ma ni? Irdamin lân, keini khom nin dam sa ro ba,” a tia.

⁴⁰Khannisianlân, inkhatpu khan a lei khapa, a halirchua, “Pathian ten lua ni ichi loi mani, irang maia nang an ihrem hi?

⁴¹Eini ruai hi chu hrem inruk rêng ei ni, ei sinthôna man ei ihmu a ni hi; Ama hin chu ite tho’nsual nei mah,” a tia.

⁴²Khanchu, “Jisua, ni Ram ni tung tika nin hre mai roh,” a tia.

⁴³Jisua’n a kuang, “Thudik tak nang ki hril, ki kuang a vuan hin Paradisa om sa ni ti,” a tia.

Jisua thi thu

(Mt 27.45-56; Mk 15.33-41; Joh 19.28-30)

⁴⁴Khan, sôn dâr sômhleihni vêl ata khohloi dâr thum dênin rammual an thim khaka;

⁴⁵misa a hong inthim tâka, tempil sênga puanzâr kha a laia a têr thai tâka.

⁴⁶Jisua kha inring takin a khêka, “Ka Pa, ki’rtha ni kuta nang kin koltir,” a tia. Kha kha a ti zoiin chu a hrang a chat tâka.

⁴⁷Sipai irza hruaitu khan thil zuang tung kha a hmu’n chu, Pathian an pâka, “Hi mi hi mi dik ngêt a ni,” a tia.

⁴⁸Kha thîr hranga mipui hong irbukhai khan thil omzia kha an hmu’n, beidongin an rôp irchu chûmin an kîr nôk tâka.

⁴⁹A hmêl inhriathai chu hla vita an ngîr chiana, Galili ram ata ama zuipu nupanghai leh khan, kha thil kha an thîr suama.

Jisua an phûm

(Mt 27.57-61; Mk 15.42-47; Joh 19.38-42)

⁵⁰⁻⁵¹Khan, Judai rama Arimathai khuaa mi, ar hming Josefa a oma. Ama chu mi fel tak, mi mahripom tak, le Pathian Ram zuang tung hrang lei nghâk mi a nia. Roirêlpulai laia mi ni sa khomsian, an roirêlna le an sintho kha sa tipuihai maka.

⁵²Kha mi kha Pilata kuang a fea, Jisua ruak a va nghia.



⁵³Khan, Jisua ruak kha a kai thâka, puan irnêmin a tuama, tûte an la inzâl ngai lina lung inver thâna an zâltir tâka.

⁵⁴Kha nikhua kha Judahai irtûng nî a nia, khannisian Judahai Sabat ni ar phut vâng vâng ta.

⁵⁵Galili ram ata hong zuitu nupanghai khom khan an zui sa thiai thiaia, thân le a ruak an inzâl lam kha an hmua.

⁵⁶Khan, an kîra, mirimhoihai le sahriak mirimhoihai an irfûka. Khan, Dân thupêk angin Sabat nî chu an irngama.

Luka 24

Jisua thoinôkna thu

(Mt 28.1-10; Mk 16.1-8; Joh 20.1-10)

¹Khan, Pathianni thingchangvârroa mirimhoi an irfûkhai kha chôiin thâna khan an va fea.

²Thân mikot ata lung kha irhlumpaiin, an va hmua,

³an hong lûtin chu Rengpa Jisua ruak kha hmu ta mahai.

⁴Khaanga chamai raka an om lai khan, mi inhni puan chek silin an kôla an zuang ngîra.

⁵An chia, irnênga inbokin an kûn khaka; kha mihai khan an kuang, “Itho sika mo mithi laia mi hring nin izong?”

⁶Hi hin om ta ma? Kaithoi a ni ta Galili rama a om laia nin kuanga a ihril kha inhre mai roi,

⁷‘Mihriam Nâipa hi mi sualhai kuta incheltir ni a ta, Krosa hembe an ta, sûn thum ni’n a ithoi nôk hrang a ni,’ a ti ngai khate,” an tia.

⁸Khan, nupanghai khan a thu’nsîr kha an inhriat suak nôk tâka.

⁹Thân ata kha an kîra, thil omzia chu sômhleikhathai le mi danghai kuang, kha thu kha an hril ta.

¹⁰Kha thu, tirtônhai hong hrilpuhai chu, Magdala mi Mari, Joani, Jakoba nu Mari hai le an laia fe sa nupang senkhathai an ni.



11Khannisianlân, kha thu kha thu dikin le'rngai mahaia, lei iam mahai.

12Petera chu a thoia, thâna khan a van tâna, a kûna a zu vêngin chu, puan irnêm sil omhai vai kha a hmuhaia, khanchu, thil om dân kha ar khêl ti pumin in tiang a kêr nôk tâka.

Emmau kho pan rual lefahai

(Mk 16.12-13)

13Irngai ta, kha ni taka khan an laia mi inhni kha khua inkhat Emmau an itia khan fe hrangin an suaka, kha khua kha Jerusalem ata kilometer sômhleikhat vêla hla a ni.

14Thil hong tung murdi kha an insîr suama.

15Khaanga an insîr suam lai khan Jisua ngei khan a hong nâihaia, an fe suam tâka;

16khannisianlân, a hmêl an inhriat thei nona hrangin an mit an vâitir pehaia.

17An kuang, “Fe puma nin insîr kha i thu mo?” a tia. Khanchu, ngûi takin an ngîr tâka.

18A'rhming Kleopa khan a sâma, “Nangma vai hi ni ni ti, Jerusalem hroa atûnlai thurchi inhre loi chu!” a tia.

19Ama khan, “I thurchi mo?” a tia. Anni khan, “Nazaret Jisua thurchi; Pathian le mi murdi mit hmua a thua le a sinthoa deipu sinthothei tak thurchi kha,

20Ama kha Ochai inlalui le ei roirêltuhaiin that hrangin an pêka, Krosa an hembé thu kha.

21Keini lakin Israelhai irtantu hrang a ni tih kin lei tûnga. Kha vai kha ni ma, a vuan hin a sîn thumna a ni tâk.

22Kin pâla nupang senkhathai khan a vuan zîng khan thâna an va fea, chardong an nin lâktira.

23A ruak hmu loiin an hong kêr nôka, vân vântîrtôn inlâr kin hmua, khahai khan, ‘A hring nôk ta,’ an ti tiin an hong tia.



²⁴Kin iompui laia senkhat khom tâna an va fea, nupanghai insîr ang tak khan an va hmua, khannisian ama chu va hmu ta mahai, an tia.

²⁵Jisua khan an kuang, “Mi’ntohaio, deipuhai thu’nsîr tinrêng iamna tianga beng sêthaio!

²⁶Krista’n kha thil kha tuangin a roiinpuinaa a lût hrang mo ni ma?” a tia.

²⁷Khanchu, Mosia ata irphutin deipu murdi thu suiin Pathian Lekha thua, a thurchi irziakna hmun tina a hrilfiah pehaia.

²⁸An ifena hrang khua an tung tônin, ama chu fe mai hrang angin an langa.

²⁹Chong bâiin an chela, “Kin kuang riak sa ta roh, an hnung ok tâk, misa khom tâk hrang a ni ta, a inthim hrang tâk kêng,” an tia. Khanchu an kuang riak hrangin a lût tâka.

³⁰Zân bu an hong ot suama, bai a lâka, sat a vura, a khoia an kuang a pêka.

³¹An mit kha a hong vâra, a hmêl an inhriat tâka; ama khom an mit hmua ar hmang pat ta.

³²Anni’n, “Lampuia a ni chongpui laia Pathian Lekha thuhai a ni hril lai khan, ei milung a hong vâ ual mo ni ma?” an irtia.

³³Khanchu, an thoia, Jerusalema an kîr nôka, sômhleikhathai le an rualhai omkhôm kha an hong hmua.

³⁴“Rengpa chu a hong thoi nôk ngêt a ni, Simona kuang khom a inlâr kêng,” an lei tia.

³⁵Anni khom khan lampuia thil hong tung le bai a khoia ama an inhriat tâk dânhai kha an insîra.

Irchutirhai kuanga Jisua inlârna thu

(Mt 28.16-20; Mk 16.14-18; Joh 20.19-23; Tir 1.6-8)

³⁶Kha thu kha an insîr laiin Jisua ngei kha an laia a hong ngîra, an kuang, “Nin chung a irtharngamna om ri se,” a tia.

³⁷A’rkhêl an tia an chi tak taka, irtha an ihmu an sôna.



³⁸Ama khan, “Ithoa mo khang dôra nin ichi? Itina mo nin irngaitua inbuai tâk?

³⁹Ki kuthai, ki kezaphahai hi en u ta, keima ngei kha ki ni hi te. Ni tôn unglân, en roi; nin ni ihmu ang hin irtha’n taksa le ru nei mak e,” a tia.

⁴⁰An sîr zoiin a kuthai a kezaphahai an entirhaia.

⁴¹An lôm hraia chu, la iam ual mahaia, ar khêl an ti lai takin an kuang, “Hin imo fâkrua nin inei?” a tia.

⁴²Nga, rô inhmin bong khat an pêka,

⁴³A lâka, an makunga khan a fâk tâka.

⁴⁴Jisua’n an kuang, “Nin laia ki om lai khan hi thuhai lele hi nangni ki hril ngai khate. Mosia Dân bua, Deipu lekhabua, inpâkna hlabuhaia ki Thurchi an lei irziak, hong tung indik ngêt hranga nangni ki lei inhrilhai kha a ni,” a tia.

⁴⁵Khanchu, Pathian lekha thu inhre thiam thei hrangin an lungrîl an vâp pehaia.

⁴⁶An kuang, “Krista khan tuang ngêt a ta, sîn thum ni’n mithi lai ata thoi nôk a ti,

⁴⁷Ama irhmingin irletna le sual ngaidamna thu Jerusalem ata nam tin laia insîr la ni a ti.

⁴⁸Hi thilhai hi an hriattuhai nin ni.

⁴⁹Irngai u ta, Pa chonginkung chu nin chung a zuang tîr ki ti. Chung tiang ata sinthotheina nin chung a chum mâka chu, khopuia hin lei om mai roi,” a tia.

Irvâna Jisua lâk a ni

(Mk 16.19-20; Tir 1.9-11)

⁵⁰Khan, Bethani dâi dênin a hruai suakhaia, a bân an phara, anni kha sat a vurhaia.

⁵¹Khaanga sat a vur lai khan a’rsenpuihaia, ama chu irvâna hruai kâiin a om tâka.

⁵²Khan, ama chu chubai an mûka, raifân takin Jerusalema an kîr nôk tâka,



53khan Tempila khan Pathian kuang lômthu insîrin an zoro murdi an hmang ngai.



Johana

Johana 1

Hringna thu

- ¹A phut taka Thu a om, Thu kha Pathian kuang a oma, Thu kha Pathian a ni.
- ²Ama kha a phut rengata Pathian kuang a om.
- ³Ama hmanga itinrêng siam a nia; thil siam rêng rêng ama isiam loi ite om mah.
- ⁴Amaa hringna a oma, kha hringna kha mihriamhai vârna a ni.
- ⁵Vâr kha inthima a zuang vâra, inthimin kha kha inhre mah.
- ⁶Pathianin mi inkhat a zuang tîra, ar hming chu Johana a ni.
- ⁷Ama kha vâr thu inhriattir hranga zuang a ni, mi murdi'n a thu inhriattir kha an iamna hrangin.
- ⁸Ama kha chu vâr ni ma, vâr thu kha inhriattir hranga zuang a ni ual.
- ⁹Kha vâr kha vâr dik tak, rammuala zuanga mi tin zuang invârtu chu a ni.
- ¹⁰Rammuala a oma, ama hmanga rammual kha siam a nia, rammualin ama kha len hre ma.
- ¹¹Ama ram ngeia a zuanga, aniachu ama mihaiin lei lôm mahai.
- ¹²Mi senkhatin chu an lei lôma, ama iamtu murdihai chu an kuang Pathian nâihai ni theina hrang a pêka.
- ¹³Kha mihai kha thisena irzir ni mahai, pasal nuamlama irzir khom ni mahai, Pathian ata irzir an ni.
- ¹⁴Khan, Thu chu mihriam a zuang changa, ei laia a zuang om tâka. A roiinpuizia ei hmu, Pa nâi khât neisun roiinpuina chu, lungkham le thu takin a sip.
- ¹⁵Johana'n a thurchi a hrila, "Ki hnunga zuang hrang chu 'keima nêkin a roiinpui ual' ki iti kha, hi mi hi a ni, ki om mâna om tâk a nia," tiin a khêka.



¹⁶A lungkhamna irkip ei dong seng, lungkham chung a hril thei ban lungkham nôkna.

¹⁷Dân kha Mosia hmanga pêk a nia, lungkhamna le thutak chu Jisua Krista zâra zuang tung a ni.

¹⁸Tukhomin Pathian hmu ngai mahai; Pa Nâipa nei sun, a rôpsuama om khan, a thurchi an hriattir ta a ni.

Baptistu Johana thu inhriattir

(Mt 3.1-12; Mk 1.1-8; Lk 3.1-18)

¹⁹Jerusalem khuaa Judahaiin, “Tu mo ni ini?” tia irdon hrangin Ochaihai le Levia irchihai an tîrhai lai khan, Johana’n hi thu hi a hong inhriattir a ni.

²⁰Khan Johana’n ip loiin, “Kei chu Krista chu ni ma ung,” tiin fel takin an puang ta.

²¹Khante, “Tu mo ni ini? Elija mo ni ini?” tiin an irdona. Ama’n a sâm nôka, “Ni ma ung,” a tia; “Deipu kha mo ni ini?” an tia. “Ni ma ung,” tiin a sâm nôka.

²²Anni’n, “A ni tîrtuhai kin sâm theina hrangin tu mo ni ini, nin hril ta, ni thurchi imo insîr hrang ni inei?” an tia.

²³Johana’n, deipu Isaia chong hmangin a sâm: “Keima hi ramchâra ‘Rengpa lampui siam roi tia khêktu kha ki ni,’ ” a tia.

²⁴Kha palai, Farisaihai hong itîrhai khan Johana an irdon nôka.

²⁵Anni’n, “Krista mani, Elija mani, deipu mani lua ni ni no’n teh, ithoa mo mi ni ibaptis ngai?” tiin an irdon nôka.

²⁶Johana’n, a sâma, “Keiin chu tuiin ki baptisa, khannisian nin laia mi inkhat, nin inhriat loi a ingîr a ni.

²⁷Ama kha ki hnunga a hong a, a kekok hrui sût inruk lua ni ma ung,” a tia.

²⁸Khahai kha Bethani khua, Jordan vadung râl, Johana a baptisna ngai hmun an iti a ni.

Pathian Belrate chu



²⁹A tûka chu Johana'n Jisua khan ama a hong ipan kha a hmua; "En u ta, Pathian Belrate, rammual sual pêl hrangtu so," a tia.

³⁰So mi so a ni, "Ki hnunga hong hrangtu chu, keima nêka roiinpui ual, ki om mâna om tâk, ki ititu chu.

³¹Ama kha inhre ma unga; khannisianlân, Israelhaiin ama an inhriat theina hrangin kei hi tuia baptis-in ki ihong a ni," a tia.

³²Hi hi Johana'n thu an hriattir dân chu a ni, "Irtha kha vasu angin irvân ata a zuang suaka, a chungu chuang ki hmua.

³³Khan khomin, keima'n chu lan hre ma ung, nikhomsian, tuia mi baptis hranga ni tîrtu, Pathian khan Irtha kha irvân rengata zuang chumin vasu anga zuangin, tukhok chungu chum mani hmu ni ti, kha kha Irtha Irthianga mi ni ibaptis hrangpu kha a ni, ti a ni lei inhril tâka," a tia.

³⁴Johana'n, "Kha kha ki hmu tâka, hi mi hi Pathian Nâipa a nih ti nangni kin hriattir a ni," tiin.

Irchutir masa takhai

³⁵A tûk nôka chu Johana kha a irchutirhai inhni leh an ngîra.

³⁶Jisua chai vêl kha an thîra, "En u ta, Pathian Belrate so," a tia.

³⁷A irchutir inhnihaiin a insîr kha an inhriatin chu Jisua kha an zui tâka.

³⁸Jisua kha a hong irheia, ama an hong izui kha a hmua, an kuang, "Imo nin izong?" a tia. Anni'n, "Rabbi, (Kha kha irchutirtu tihna a ni) khôn mo ni iom?" an tia.

³⁹"Hong unglân hmu nin ti" a tia. Khanchu a kuang an fe tâka, a omna kha an va hmua, kha nia khan a kuang an om tâka. Khohloi dâr minli vêl a ni.

⁴⁰Johana thu'nsîr inhriata Jisua zuitu inhnihai laia inkhat kha Andria, Simon Petera urêng a nia.

⁴¹Ama khan a masa taka a urêng Simona a va hmua, "Mesia, (Kha kha Krista tihna a ni) kin hmu ta," a va tia.



⁴²Khan, Jisua kuang a hong hruaia. Jisua'n ama a lei ena, "Johana nâipa, Simona ni ni, Kifa nang ti ta an ti". (Kifa chu Petera ti le hmunkhat, a omzia chu lungpui tihna a ni.)

Jisua'n Filipa le Nathanaela a koi thu

⁴³A tûka chu Jisua'n Galili rama fe a tuma, Filipa a hmua, a kuang, "Ni zui roh," a tia.

⁴⁴(Filipa kha Andria le Petera omna khua, Bethsaida khuaa mi a ni.)

⁴⁵Filipa'n Nathanaela chu a hmua, a kuang "A thurchi Dân lekhabua Mosia'n a'rziak, deipuhai khomin an irziak kha ama kin hmu ta, Nazaret Jisua, Josefa nâipa kha," a tia.

⁴⁶Nathanaela'n, "Nazaret khuaa thil sa a isuak thei ma ni?" a tia. Filipa'n, "Hongin lân en roh," a tia.

⁴⁷Jisua'n Nathanaela hong a hmu'n chu a thurchi a lei insîra, "En u ta, Israel mi dik tak, mi huang tumna rêng rêng nei loi so," a tia.

⁴⁸Nathanaela'n, "Itin mo ni ni inhriat," a tia. Jisua'n, "Filipa'n nang a koi mâna theipui kung bula ni om lai khan nang ki ihmu tâk kêng," a tia.

⁴⁹Nathanaela'n, "Rabbi, Pathian Nâipa ni ni. Israelhai rêng inlaltak ni ni kêng," tiin a sâma.

⁵⁰Jisua'n, "Theipui kung bula nang ki hmu kêng ni kuang ki ti sikin ni ni iam mo? Hi nêka thil roiinpui ual hi la hmu ni ti," a tia.

⁵¹Khan, a kuang, "Thudik tak nang kin hril, irvân irhonga vântirtônhai Mihriam Nâipa chung a chum le a kâi la hmu nin ti," a tia.

Johana 2

Kana khuaa irneina

¹Sûn thum nî'n chu Galili ram Kana khuaa irneina a oma, kha khan Jisua nu a om saa.

²Jisua le irchutirhai khom irneinaa khan an fiala.

³Uain ruk ta mahaia, Jisua nu khan a kuang, "Uain an irsam tâk kêng," a tia.



⁴Jisua'n a sâma, "Nupang ithoa mo ni hong irrol? ki zoro a la itung loi kêng," a tia.

⁵A nu khan sinthotuhai kuang, "Nin kuang nangni a ihril lam ang takin tho zôi zel roi," a tia.

⁶Judahai irsûkinfâi dân angin, lung tuibêl kiruk oma, litar irzakhat keng theina chit a ni, kha lung tuibêlhai kha an doa.

⁷Jisua'n an kuang, "Tui bêlhai hin tui sung roi," a tia. A rêngin an sung insiphaia.

⁸Khanchu an kuang, "Thâl unglân, hruaithea hruaitu kuang fepui roi," a tia. Khanchu an fepui tâka.

⁹Khaang khan tui kha an hong chôia, uain a hong chang tâka, hruaithea hruaitu khan tui uain chang kha a'rtema, uain kha kho taka mani inhre maka; (khannisianlân tui thâltuhai khan chu an inhriata,) moineitu kha a koia,

¹⁰a kuang, "Mi tinin uain sa an sem masaa, tamtak an in zoiin a saloi ual an sem ngaia, nang chu atûn ten uain sa ni la inei hi te," a tia.

¹¹Jisua'n hi sinirkhêl a itho phutna hi Galili rama Kana khuua a thoa, a roiinpuizia an langtira, a irchutirhai khan ama an iam tâka.

¹²Kha zoi hnunga chu, Jisua kha a nu le a urêng hai le a irchutirhai le Kapernaum khuua an zu fea, kha khan nikhua tômtê vai an châm.

Tempil irthiangtir

(Mt 21.12-13; Mk 11.15-17; Lk 19.45-46)

¹³Judahai Ferkân Kût zoro a hong tung vâng vâng tâka, Jisua kha Jerusalema a hong fea.

¹⁴Tempila khan sehrât, belra, phervalihai an izuar kha a hmuhaia, sum thûltuhai an maichâm kôla toi a hmu saa.

¹⁵Zêmna hruihrual ang hi a siama, an bêlrahai, sehrâthai, sa dang murdi leh khan an hnot suakhai zita; sum thûltuhai maichâmhai kha a naminrîla, an poisahai kha an thekpai pehaia.



¹⁶Khanchu phervali zuartuhai kuang khan, “Hi hi la suak roi, Ka Pa in hi bazar hmunin siam no roi,” a tia.

¹⁷A irchutirhai khan, “Ni in hranga ki sathnem irngaina khan mi fa zoi a ti,” tih Pathian lekha thu kha an inhriat suak nôk tâka.

¹⁸Judahai khan an hong irkôka, “Hi thilthotheina ni nei ti entîrna hrangin i irsinsiana sinirkhêl mo ni ni inentir hrang?” an tia.

¹⁹Jisua’n, “Hi Tempil hi set unglân, sùn thum sângin indingtir nôk ki ti,” a tia.

²⁰Judahai khan, “Sùn thum sângin ni indingtir nôk hrang mo? Hi Tempil sinna hranga hin kum sômminli kiruk a inang kêng,” an tia.

²¹Khannisianlân, Jisua’n tempil a iti hi ama takpum a ni.

²²Khasikin thina irthokin a thoinôkin chu, a irchutirhaiin hi thu hi a lei insîr zoi tâk ti an inhriat suaka, Pathian Lekha Thu le Jisua thu insîr tâkhai kha an iam tâka.

Jisua’n mihriam nitnazia an hriat

²³Ferkân Kût Jerusalema a om laia Jisua’n irsinsiana sinirkhêl a ithohai kha an hmua, mi tamtakin ama kha an iam tâka.

²⁴Khannisianlân, Jisua’n anni kha iamhai maka, mi murdi an hriat infelhai tak tak sikin.

²⁵Mi thurchi tûte’n inhril ngai mahai, an milung sûnga om murdi kha a inhriat zit a ni.

Johana 3

Jisua le Nikodema

¹Mi inkhat ar hming Nikodema a oma, Judahai hruaitu, Farisai pâla mi a ni.

²Zân khat chu Jisua kuang a hongga, a kuang, “Rabbi, Pathian itîr irchutirtu ni nih ti kin hriat, Pathian an chungga a om no’n chu tukhomin ni irsinsiana sinirkhêl tho ang hi tho thei no nihai,” a tia.



- ³Jisua'n a sâma, "Thudik tak nang ki hril, mi tukhom a suakinthar no'n chu Pathian Ram hmu thei no ni," a tia.
- ⁴Nikodema khan, "Mi a tar hnungin itin mo a isuakinthar nôk thei hrang? A nu sũaga lûtin lak suak nôk thei ta no nia?" a tia.
- ⁵Jisua'n, "Thudik nang hril ki ti, mi tukhom tuia le irthaa an suak no'n chu Pathian Rama lût thei no ni.
- ⁶Taksaa irzir ka chu taksa mi a nia, irthaa irzir ka chu irthaa mi a ni.
- ⁷Ni isuak nôk hrang kêng ki iti hi ar khêl ti no roh.
- ⁸Phâivua khoa khom a nuam nuamna a tho ngai; ar hâi nin hriat, khannisianlân, kho tianga hong mani tih le kho tiang mo a ife nôk hrang ti chu inhre mak che. Tukhom Irthaa suak ka chu khaang kha a ni," a tia.
- ⁹Nikodema'n, "Kha kha itin mo a ini thei hrang?" a tia.
- ¹⁰Jisua'n a kuang, "Israelhai irchutirtu ni nia, kha kha ni inhriat loi mo?"
- ¹¹Thudik nang hril ki ti, kin inhriat kha kin insîra, kin ihmu kha kin inhriattir ngai, tûte'n kin thu inhriattir pom nuam mak chêi.
- ¹²Rammual thil ki insîr lua iam mak chêia, irvân thil len vâng te nangni hril inlân itin mo nin iiam thei hrang?
- ¹³Tukhom irvâna kâi ngai maka, Mihriam Nâipa, irvân ata zuang chumtu vai ti no chu," a tia.
- ¹⁴Mosia'n ramchâra mirûl a inkhâi ang khan Mihriam Nâipa hi inkhâiin a iom hrang a ni.
- ¹⁵Tukhom a iam murdi chu ama sika kumtuang hringna an nei theina hrangin.
- ¹⁶Pathianin rammual lung a thung tak taka, khanchu, a Nâipa khât neisun a pêka, ama iam tâk ka chu irhmang loa kumtuang hringna an neina hrangin.
- ¹⁷Pathian khan rammual thiamloi inchang hrangin a Nâipa rammuala târ maka, ama sika rammual saninhringa an om theina hrangin a itâr kêng a ni.



¹⁸Tukhom Pathian Nâipa iam ka chu atûn ata thiamloiin om mahaia, tukhom Nâipa iamloi chu atûn ata thiamloiin an iom tâk a ni. Pathian Nâipa khât kha an iam no sikin.

¹⁹Thiamno an chang dân kha hiang hin a ni; vâk kha rammuala a zuanga, khannisianlân, mihaiin vâk nêkin chu inthim kha an nuam ual, thil sual an tho sikin.

²⁰Thil sual tho murdi'n vâk an khôkmâk ngaia, vâra hong mahai, an sinthohai an lang nona hrangin.

²¹Sin dik thohai murdi'n vâra an hong ngai, an sinthohai kha Pathian thu zôma tho an nih ti an langna hrangin.

Jisua le Baptistu Johana

²²Kha zoi hnunga chu Jisua le a irchutirhai kha Judai rama an fea. Kha khan Jisua an kuang a om maia, a baptis-hai ngaia.

²³Johana khomin Salem kôla Aion hmuna a baptis thiaia. Kha hmuna khan tui a tam sikin, mipuihai a kuang an fea, a lei baptis-hai ngaia.

²⁴Kha zoro lai khan Johana kha intângna ina la khum mahai.

²⁵Johana irchutir senkhathai le Juda inkhat irsûkinfâi thua an lei irsêl tâka.

²⁶Khanchu, Johana kuang an fea, "Irchutirtu, Jordan râk nisua tianga ni kuanga om, thurchi ni insîr ngai kha ni lan hriat mo? Khapa khan mi a baptisa, mipuiin an pan sup sup ngai," an tia.

²⁷Johana'n a sâma, "Pathianin a pêk no'n chu tukhomin ite dong thei mahai.

²⁸'Kei chu Krista ni ma unga, a mân tianga fe hranga tîr ki ni' ki iti kha nangni ngei ki thu inhretuhai nin ni.

²⁹Moi pasal chu moineitu kha a ni, moi neitu rual, a thu hong uksak maitu khan moineitu irhai an hriatin a lôm ngai, khang khan kei khom ki lôm ar kip tâk a ni.

³⁰Ama chu roiinpui tîr tîr hrang a nia. Kei chu chîn tîr tîr hrang ki ni," a tia.

Irvân ata zuang chum



³¹Chung tiang ata zuang chumtu kha chu mi tin tin nêka an chung tak a ni; irnênga suak chu irnênga mi a nia, irnêng thil an sîr ngai; irvân ata zuang chu mi murdi nêka inchung tak a ni.

³²Thil a ihmu le a inhriathai kha an sîra, khannisianlân, tukhomin a thu inhriattir kha pom mahai.

³³Tukhom a thu inhriattir pom chu mi dik a nih ti pom indet a ni.

³⁴Pathian itîr khan Pathian thu an sîr ngai, Pathianin ama Irtha irkip a pêk sikin.

³⁵Pa'n Nâipa lung a thunga, a kuta itinrêng a sia ta.

³⁶Tukhom Nâipa iam chu kumtuang hringna an nei ta; Nâipa thu zôm loi chu hringna nei no nihaia, an chung Pathian ningmur kha a om mai a tia.

Johana 4

Jisua le Samari nupang

¹Johana nêkin Jisua'n irchutir tam ual a siam le a baptis-hai nôk tih Farisaihaiin an inhriat tih Jisua'n an hriatin chu,

²(A dik takin, Jisua'n chu tûte baptis maka, a irchutirhaiin mi an ibaptis ngai a ni.)

³Khanchu Judai ram a suaksana, Galili rama a kîr nôk tâka.

⁴Samari ram kha hro hrang a nanga.

⁵Samari khua inkhat, Sukar an iti kha a va tunga, kha kha Jakoba'n a nâipa Josefa ram a ipêk kôla om a ni.

⁶Jakoba tuikuang khom khatak khan a oma. Sûn lai tak a hong ni'n Jisua kha a sân a sôl sikin tuikuang kôla khan a toi chota.

⁷Samari nupang inkhat tui chôl hrangin a hong. Jisua khan, "In hrang ni pe roh," a lei ti pea.

⁸A irchutirhai kha fâk rua ircho hrangin khuaa an fe tâk a ni.



⁹Nupang khan, “Nang Juda mi ni nia, keima Samari nupang ki nia, ithoa mo in hrang ni ni inghi?” a tia. (Judahaiin Samari mihai kha itea irhmang irhlômpui ngai mahai).

¹⁰Jisua’n a sâma, “Pathian thilpêk le ni kuang, ‘In hrang ni pe roh,’ tihtu hi inhre’n lân chu, a kuang ni inghi lem hrang a ni, ama’n chu tui hring nang a ipêk hrang a ni,” a tia.

¹¹Nupangnu khan, “Ka pu, kaisuana hrang ite lak nei mak chea, tuikuang a inthûk tia le te, kho taka mo tui hring ni inei?”

¹²Kin pu Jakoba nêkin ni iroiinpui ual ma ni? Ama khan hi tuikuang hi a ni pêka, ama le a nâihai le a sâ vâihai khomin hitaka hin an in ngai,” a tia.

¹³Jisua’n, “Tukhom hi tui in murdi chu an tui lan hrâl nôk a ta;

¹⁴Tukhom an kuanga ki ipêk hrang tui in ka chu an tui inhrâl nôk ta no ni. An kuang ki ipêk hrang chu an phîng sûnga tuihnâr hong chang a ta, kumtuang dênin kang ta no ni,” a tia.

¹⁵Nupang khan, “Ka pu kha tui kha ni pe ro, ki tui an hrâl ta nona hrangin le hi ten tena tui chôi ki zuang ta nona hrangin,” a tia.

¹⁶Jisua’n, “Ni pasal va koiin lân, hong kîr nôk ro,” a tia.

¹⁷Nupangnu’n, “Pasal mo ki neia,” tiin a sâma. Jisua’n, pasal nei ma ung ni iti hi, ni ti indik;

¹⁸pasal ringa ni nei tâka, atûna ni inei khom hi ni pasal tak ni ual maka, “Ni iti kha a dik,” a tia.

¹⁹Nupang khan, “Ka pu, deipu ni nih ti kin hriat ta.

²⁰Kin irchibulhaiin chu hi tânga hin Pathian an biak ngaia, nangni’n chu, ‘Mihaiin Jerusalema ngêt Pathian an ibiak hrang a ni’ nin ti ngaia,” a tia.

²¹Jisua’n, “Nupangnu, ni iam roh, hi tânga kher no khom, Jerusalema kher no khom Pa chubai nin mûkna hrang zoro tung a ti.



²²Nangni Samarihaiin chu nin inhriat loi chubai nin mûka, keini Judahaiin chu kin inhriat kêng chubai kin imûk ngai; saninhringna chu Judahai kuang ata hong suak a nia.

²³Khannisianlân, a zoro la tung a ti, atûn khom a tung thiai ta, Pathian chubai mûktu tak takhaiin irtha le thutakin Pa chubai mûk an ti, khang mi kha Pa'n ama chubai mûktu hrangin a izong a ni.

²⁴Pathian chu Irtha a nia, ama chubai mûktuhaiin Irtha le thu takin chubai an imûk hrang a ni," a tia.

²⁵Nupangnu'n, "Mesia, Krista an iti kha, zuang hrang a nih ti kin hriat. A zuang tika chu itinrêng ni la hril a ti," a tia.

²⁶Jisua'n a sâma, "Keima, nang a chongpuitu hi Ama kha ki ni," a tia.

²⁷Kha lai taka khan irchutirhai kha an hong tung nôka, nupangnu a ichongpui kha an hong hmu'n chu, a sân ar khêl an tia. Khannisianlân, tukhomin, "Imo ni izong? Ithoa mo nupangnu kha ni ichongpui?" khom ti mahai.

²⁸Nupangnu'n a tuibêl a mâksana, kho sêng tiang a kîr nôka, kho sênga mihai kuang khan,

²⁹"Mi inkhat ki itho tinrêng ni hril zit theitu a oma, hong unglân en u ta, Krista mo ni thei ni?" a tia.

³⁰Khanchu, kho sêng ata kha an suaka, Jisua kuang an fea.

³¹Kha kêra khan irchutirhaiin "Irchutirtu, fa roh," tiin an ngêna.

³²Ama khan, "Nin inhriatloi bu nêk hrang ki nei," a tia.

³³Irchutirhaiin, "Tu mo khatin bu an hong ipêk ma ni?" tiin an irti irhlôma.

³⁴Jisua'n an kuang, "A ni tirtu nuamlam sin le a sintho zoi hi ki bu a ni.

³⁵Nangni'n bu âtna hrangin 'Tha minli a la om,' nin iti ngai mo ni ma? Thîr unglân, loihai hi en u ta, buhai chu ât thei zôi zel hrangin a hmin ta tih nangni ki hril.



³⁶Bu âttu chu a hlo a hmu ngaia, kumtuang hringna dêna om hrangin a ra a bûm ngai, a phuntu le a âttu an lôm irrual theina hrangin.

³⁷‘Mi inkhatin a tûa, mi dangin a ât ngai,’ ti hi a dik a ni.

³⁸Nin sin sôl loina ra ât hrangin nangni ki itîr hi, mi dangin an sina, an isinna ra kha nin i-ât a ni,” a tia.

³⁹Nupangin, “Ki sintho tinrêng a ni hril thei zit,” a ti sika khan, kha khuua Samari mi tamtakin Jisua an iam tâka.

⁴⁰Samari mihai kha Jisua kuang an hong tungin chu, an kuang la châm hrangin an ngêna, kha khuua khan sîn hni a châm tâka.

⁴¹A thu an inhriatin chu mi dang tamtak khomin an iam tâka.

⁴²Khan, nupang kuang khan, “Atûn chu ni thu’nsîr sika iam ni ta ma unga, kei ni ngêtin a thu’nsîr kin inhriata, hi mi hi rammual saninhringtu a ni ngêt ti kin inhriat ta,” an tia.

Jisua’n milian nâipa an damtir

(Mt 8.5-13; Lk 7.1-10)

⁴³Sîn hni hnunga chu khatak ata Galili rama a fe tâka.

⁴⁴Jisua ngêtin, “Deipu kha ama ram tiang chôirsângin om ngai mah,” a lei ti ngaia.

⁴⁵Galili ram a va tungin chu, Galili mihai khan a sîn an lei lôma; Jerusalema Ferkân Kûta an fe laia a sintho tinrêng an hmu sikin.

⁴⁶Jisua Galili rama Kana khuua tui uain an changtirna kha a va tung nôka. Khan, Kapernaum-ah sorkâr mi liantak inkhat nâipa damloi a oma.

⁴⁷Khapa khan Jisua, Judai ram ata Galili rama a hong tih an hriatin chu a kuang a hong fea, a nâipa thi vâng vâng indam hrangin Kapernaum-ah fe hrangin a fiala.

⁴⁸Jisua’n a kuang, “Thilirkhêl le sinirkhêl tho nin hmu no’n chu iam viat no chin ni,” a tia.

⁴⁹Khapa khan, “Ka pu, ki nâipa kha a thi mân hong hrâm roh,” a tia.



⁵⁰Jisua'n, "Fe ta roh; ni nâipa kha a dam ta," a tia. Ama khan Jisua thu'nsîr kha a iama, a fe tâka.

⁵¹A kîr nôk laiin, a siahlohain an lei dona, "Ni nâipa kha a dam tâk," an lei tia.

⁵²A nâipa lei dam zoro kha ar donhaia. Anni khan, "Mizân sîn dârkhata khan an khur a boi pe ta," an tia.

⁵³Khanchu, a pa khan Jisua'n a kuanga, "Ni nâipa a dam tâk," a ti lai tak kha a nih ti an hriat tâka. Kha hnung chu, ama le a in mihai, an rêngin an iam zit tâka.

⁵⁴Kha kha Jisua Judai ram ata Galili rama a fe hnunga sinirkhêl a itho voihnina a ni.

Johana 5

Dîla damloi indam

¹Kha zoi hnung chu Judahai kût inkhat a oma, Jisua khom Jerusalema a hong fe saa.

²Jerusalema khan Belra mikot kôla dîl inkhat, Hebrai chonga Bethzatha an iti kha a oma; khataka khan bokrop ringa a oma,

³Kha khan damloi tamtak, mitchohai, ke'nbâihai, zenginthihai an oma.

⁴Rengpa itîr vântîrtônin tui a zun châng. Tui a châng zoi le dîla irchôm masa tak kha i ang natna khom ni sian, an dam ngai sikin tui châng nghâkin an iom a ni.

⁵Mi inkhat, kum sômthum kiriat damloi khom a oma.

⁶Jisua'n khataka a zâl kha a hmua, zoro sôt tak damloiin a om tah ti an hriata, a kuang, "Dam mo ni nuam?" a tia.

⁷Damno khan, "Ka pu, tui a châng zoi leh dîla ni siatu hrang tukhom nei ma unga, lût ki tum sângin mi dangin an ni khêl ngai a ni," a tia.

⁸Jisua'n, "Thoiin lân, ni puantha lan lân ke'n fe ta roh," a tia.



⁹Kha pa kha irningloiin a hong dam zôi zela; a puantha kha a lâka, ke'n a fe tâka. kha nikhua kha Sabat nî a ni.

¹⁰Judahaiin a damtu kuanga khan, “Sabat nî a ini kêng; ei Dânin ni puantha ni ichôi irthiang mah,” an ti pea.

¹¹Ama khan a sâma, “A nin damtirpu khan, ‘Ni puantha lan lân, ke'n fe ta roh,’ a ni ti khate,” a tia.

¹²Anni'n, “Ni puantha lan lân, ke'n fe roh, titu kha tu ma ni?” an tia.

¹³A hong damtu khan tu mo a ini lak inhre maka, kha khan mipui tamtak an oma, Jisua laka chu a fe pat tâka.

¹⁴Kha zoi hnunga chu Jisua'n Tempila a hmua, a kuang, “Hi, ni hong idam tâk hi; sual nôk ta no roh, khano'nchu, ni chung a thil saloi ual hong tungna ti,” a tia.

¹⁵Kha pa khan ama indamtirtu kha Jisua a nih ti Judahai kha a va hril tâka.

¹⁶Khasika khan Judahaiin Jisua kha deng an intheitir irphut tâka, Sabat ni'n mi an damtir ti sikin.

¹⁷Jisua'n an kuang, “Atûn ten Ka Pa'n sin a tho maia, kei khomin ama angin ki isin a ni,” a tia.

¹⁸Khasika khan Judahaiin ama kha that an tum nôk uala, Sabat nî a insiat vai ni loiin, Pathian kha “Ka Pa a ni,” a tia Pathian angin ar bê sikin.

Jisua irchamneina

¹⁹Jisua'n a sâmhaia, “Thudik tak nangni ki ihril hi, Nâipa'n ama thu'n ite tho thei mah; Pa sintho a ihmu ti no chu; Pa sintho ang kha Nâipa khomin a itho ngai a ni.

²⁰Pa'n Nâipa lung a thunga, a sintho tinrêng an entira. Hi nêka thil roiinpui ual hi lan entir a ti, ar khêl nin tihna hrangin.

²¹Pa'n mithihai a kaithoia, a inhring ang dênin Nâipa khomin a inuam murdi chu an hringtir ngai.



²²Pa'n tu chungthu khom rêl pe ngai mah, Nâipa kuang roirêlna kha a inhlan zit a ni,

²³mi murdi'n Pa an imahrip angin Nâipa khom mahrip an ti. Tukhom Nâipa mahrip loi chu ama tîrtu Pa khom an imahrip loi a ni.

²⁴“Thudik nangni ki hril, tukhom ki thu inhriata, a ni tîrtu iam chu kumtuang hringna a nei ta, thiamno changin om ta no nia, thina ata hringnaa a ilût tâk a ni.

²⁵Thudik nangni ki hril, a zoro tung a ti, atûn khom a tung thiai ta; kha tika chu mithihaiin Pathian Nâipa hnukirhai inhriat an ta, an hriathai kha hring an ti.

²⁶Pa chu hringna hnâr a ini angin Nâipa khom kha hringna hnâr nina a ipêk a ni.

²⁷Mihriam Nâipa a ni sikin roirêl theina a ipêk sa a ni.

²⁸“Kha kha ar khêl ti no roi, thâna mithi murdi'n a hnukirhai an inhriat zoro la tung a ti,

²⁹Khan, thân ata hong suak an ta, sin sa thotuhai chu hringna neiin hong thoi nôk an ta, sual thotuhai chu thiamloi chang hrangin thoi nôk an ti.

Jisua inhriatpuituhai

³⁰“Ki bingin ite tho thei ma ung; Pathianin a ni ihril ang takin roi ki rêla, ki roirêl khom a dik, keima nuamlam tho tum loiin a ni tîrtu nuamlam vai tho ki tum ual sikin.

³¹Mâni thurchi inhriattir ni inlân, ki thu inhriattir kha dikloi a ni.

³²Khannisianlân, mi dang ki thu inhriattirtu a om, ki thu a inhriattir kha a dik ti khom kin hriat.

³³Johana kuang mi nin tîra, ama'n thutak a lei inhriattir a ni.

³⁴Thu ki inhriattir hi mihriama irthoka ni maka; khannisianlân, saninhringa nin om theina hrangin hi thu hi ki ihril a ni.



³⁵Johana chu meiser chok tak le vâr tak ang a nia, a vâra raifân taka hong om chot khom nin nuama.

³⁶Khannisianlân, Johana thu inhriatpuina nêka inhriatpuitu poimo ual ki nei, Pa'n sintho hranga a ni ipêkhai, atûna ki ithohai hin Pa'n keima a ni tîr ngei a nih ti an hriattir.

³⁷Pa ni tîrtu ngei khom khan ki thu an hriat ta a ni. Nangni'n itiklai khom a hnukirhai inhre ngai mak chêi, a hmêl khom hmu ngai mak chêi.

³⁸A thu khom nin milunga vong chian mak chêia, a itîrtu hi nin iam no sikin.

³⁹Pathian Lekha Thu ngûk takin nin irchu ngai, a sînga kumtuang hringna a om ti nin iam sikin. Kha Pathian Thubuhai khan ki thu inhriattirtu chu an ni.

⁴⁰Khannisianlân, hringna nei hrangin ki kuang hong nuam mak chêia.

⁴¹“Mihriam inpâk zong ma ung.

⁴²Nangni kin hriat, nin milunga Pathian lungthungna zel nei mak chêi.

⁴³Ka Pa irchamin ki zuanga, khannisianlân ni lei lôm mak chêi; mâni irchamin tu mo khat zuang sianlân lei lôm nin ti.

⁴⁴Pathian rengata inpâkna dong tum loiin irpâkirhlôm nin nuama, itin mo nin iiam thei hrang?

⁴⁵Ka Pa kuang nangni hnôl ki ti sôn no roi. Nangni a hnôltu hrang chu Mosia a ni, nin iiam kha.

⁴⁶Mosia kha nin lei iam ni sian chu kei khom ni iam nin ta, ki thurchi kêng a irziak.

⁴⁷A thu irziak kha nin iam zel no'n chu ki thu'nsîr hi itin mo nin iiam thei hrang?” a tia.

Johana 6

Mi sângringa a vâina thu

(Mt 14.13-21; Mk 6.30-44; Lk 9.10-17)

¹Kha zoi hnung chu Jisua kha Galili dîl, (Tiberi dîl an iti) râla a kâi tâka.

²Damloihai chungâ sinirkhêl a ithohai an hmu sikin mipui tamtakin an zuia.



³Jisua chu tânga a kâia, a irchutirhai leh an toia.

⁴Judahai Ferkân Kût kha anai tâka.

⁵Jisua kha a hong irheia, mipui tamtakin ama an hong pan kha a hmua, Filipa kuang, “Hihai fâk khop hrang bai khôn mo ei irchôk hrang?” a tia.

⁶(Kha kha Filipa fiana hranga a ihril a ni; a itho hrang kha chu a binga a lei inhriat chian a ni.)

⁷Filipa’n a sâma, “Mi tinin tômte tea an dong chit hrang khom a duli irzahni man baiin khom ruk no nihai,” a tia.

⁸A irchutirhai laia inkhat, Andria, Simon Petera urêngpa khan,

⁹“Hitaka hin pasalte inkhat barli bai ringa le nga inhni nei a om; khannisianlân, hiang dôra mipui hrangin chu ite ni no ni?” a tia.

¹⁰Jisua’n, “Mipuihai hi intoitir roi,” a tia. Kha hmuna khan hloisûl tamtak a oma. Mipuihai kha an toia, sângringa an ni.

¹¹Jisua’n bai kha a lâka, Pathian kuang lômthu an sîra, khataka toihai kha a semhaia; khang dênin nga khom an ruk dôrin a semhaia.

¹²An khopin chu a irchutirhai kuang, “Ite inchêk loi hrangin, a zôk kha se sabak roi,” a tia.

¹³Khanchu an lâk khôma, barli bai tang ringa fâktuhai kuanga sem ban kha khamphulu sômhleihni an hrût insipa.

¹⁴Mipuihaiin sinirkhêl a itho kha an hmu’n chu, “Hi mi hi deipu, rammuala zuang hrangtu kha a ni ngêt kêng!” an tia.

¹⁵Khan Jisua’n nakhrâta chelin rênga siam an tum tih an hriatin; tânga a bingin a fe nôk tâka.

Tui chung a fe

(Mt 14.22-33; Mk 6.45-52)

¹⁶Khohloi a hong ni’n chu a irchutirhai kha dîla an zu fea,

¹⁷Irkuanga an chuanga, Kapernaum tiang panin dîl kha irkân hrang an nia. Zân a hong inthim tâka, Jisua lak an kuang la hong tung maka.



¹⁸Phâivua a sân a tho sikin tui a hong irsôna.

¹⁹Kilometar ringa mani, kiruk mani vêl irkuang an vai zoia chu, Jisua'n tui chung a fea irkuang a hong nâi kha an hmu'n chu; an chia.

²⁰Khannisianlân, ama khan an kuang, "Keima kêng ki ini, chi no roi," a tia.

²¹Kha hnung chu irkuanga khan an inchuangtira, irkuang khan an ipanna muang kha a tung zôi zel tâka.

Mipuihaiin Jisua an zong

²²A tûka, dîl râla mipui la omhai khan irkuang inkhat vai no chu irkuang dang om mah ti an hmua, Jisua kha a irchutirhai kuang irkuanga chuang sa maka, a irchutirhai kha an bing vaiin an fe tih an hriata.

²³Rengpa'n lômthu an sîr zoia bai an fâkna kôla Tiberi khua ata irkuang dang honghai kha an hong tung tâka.

²⁴Mipuihaiin Jisua le a irchutirhai chu, kha hmuna khan om ta mahai tih an hmu'n chu, irkuanghaia khan an chuanga Jisua zongin Kapernaum-ah an fe tâka.

Jisua, hringna bai

²⁵Mipuihaiin Jisua kha dîl râl dang tiang an va hmu'n chu, "Irchutirtu, itik kêra hi hin ni hong itung mo?" an tia.

²⁶Jisua'n a sâmhâia, "Thudik tak nangni ki hril, sinirkhêl nin hmu sika ni zong ni mak chêia, bai nin fâk khop sika ni zong nin ni hi te.

²⁷Bai a hek nôk thei irzûlin irvâk irvâk no unglân, kumtuang dêna om mai hrang hringna bu, Mihriam Nâipa'n nangni a ipêk hrang kha zong ual roi, Pathian, Pa khan ama a'rsinsia tâk sikin," a tia.

²⁸Khanchu anni'n, "Pathian sin kin tho theina hrangin imo kin itho hrang?" an tia.

²⁹Jisua'n, "Pathian sin nin itho hrang chu hi hi a ni, a mi tîr hi iam roi," a tia.

³⁰Anni khan, "Kin hmua kin iam theina hrangin i sinirkhêl mo ni itho hrang? Imo ni itho hrang?"



- 31Kin irchibulhaiin ramchâra mana kha an fâka, Pathian lekha thu'n irvân ata anni kha fâk rua a pêk a iti ang khan," an tia.
- 32Jisua'n, "Thudik tak nangni ki hril, irvân ata bai Mosia'n nangni pe maka; Ka Pa'n kêng irvân ata bai diktak kha, nangni a ipêk a ni.
- 33Pathian bai pêk kha irvân ata zuang chuma rammual kuanga hringna pêkpu hi a ni," a ti a.
- 34Anni'n, "Rengpa, kha bai kha ni pe mai roh," an tia.
- 35Jisua'n, "Kei hi hringna bai chu ki ni; ki kuanga hong ka chu an phîngchâm no ni, tukhom a ni iam chu an tuiinhrâl ta no ni.
- 36Nangni'n nin ni hmu hnung khomin ni la iam mak chêi tih nangni ki hril.
- 37Pa'n ki kuanga a ni ipêk murdi chu ki kuang hong an ta, ki kuanga hong tâk ka chu inhnót suak no ning. Tukhom Pa hmu ngai mahai, Pa kuang ata zuang suak ni loi chu.
- 38Mâni nuamlam tho hrang ni loiin a ni tîrtu nuamlam tho hrangin irvân ata zuang chum ki ni.
- 39A ni tîrtu chu hi hi a ni; ama'n a ni ipêk murdi tukhom irhmangtir loaia zoro hnungkhôna chu la kaithoihai nôk ki ti, iti hi.
- 40Ka Pa nuamlam chu hi hi a ni; Nâipa hmua ama iam murdi'n kumtuang hringna an neia, anni kha zoro hnungkhôna chu kaithoihai ki ti," a tia.
- 41"Irvân ata bai zuang chum kha ki ni" a ti sikin, Judahai kha a chung a an chiar tâka.
- 42"Hi pa hi Josefa nâipa, Jisua, a ini loi ma ni? A nu le pa khom ei inhriat khate. Itin mo 'Irvân ata zuang chum ki ni,' a iti tâk hi?" an tia.
- 43Jisua'n a sâmhaia, "Chiar ta no roi.
- 44Pa, a ni tîrtu'n a hong hruai no'n chu tukhom ki kuang hong thei no nihai; keima'n zoro hnungkhôna chu kaithoi ki ti.



⁴⁵Deipuhaiin, ‘Mi murdi Pathianin irchutir a ti,’ tiin an irziak. Mi tin, Pa thu inhriata, a kuang ata irchu chu ki kuang an hong ngai.

⁴⁶Tûte’n Pa an hmu tâk ki iti ni mah; Pa kuang ata zuangpu vaiin kêng Pa chu a ihmu.

⁴⁷Thudik tak nangni ki hril, tukhom a iamtu chu kumtuang hringna a nei ta.

⁴⁸Keima hi hringna bai ki ni.

⁴⁹Nin irchibulhaiin ramchâra mana an fâka, khannisian an thia.

⁵⁰Irvân ata bai zuang chum hi chu a fâk murdi’n thi no nihai.

⁵¹Keima hi irvân ata bai hring zuang chum kha ki ni. Hi bai hi tukhomin an fâkin chu kumkhua’n hring mai an ti. Bai ki ipêk hrang chu ki taksa hi a ni, rammual hringna hranga ki ipêk kha a ni,” a tia.

⁵²Khanchu, Judahai kha a sate’n an irsêl tâka. “Itin mo hi pa hin a taksa fa hrangin a ni ipêk thei hrang?” an tia.

⁵³Jisua’n, “Thudik tak nangni ki hril; Mihriam Nâipa taksa nin fâk noa, a thisen nin in no’n chu nin bingin hringna nei mak chêi.

⁵⁴Tukhom ki taksa fâka, ki thisen intu chu kumtuang hringna a nei ta, keiin zoro hnungkhôna ama kha kaithoi ki ti.

⁵⁵Ki taksa hi bu tak a nia, ki thisen hi in rua tak a ni.

⁵⁶Tukhom ki taksa fâka, ki thisen in chu keimaa a om maia, kei khom amaa ki iom a ni.

⁵⁷Pa, hring khan a ni tîra, Pa sika khan kei khom ki hringa, khang dênin tukhom a ni fâk chu keima sikin hring an ti.

⁵⁸Hi hi irvân ata bai zuang chum chu a ni, nin irchibulhaiin bai an fâka, an ithi nôk ang kha ni mah. Hi bai fâktu hi chu kumtuangin hring mai a ti,” a tia.

⁵⁹Hi thu hi Jisua’n Kapernaum Sinagoka ar chutir laiin a insîr a ni.

Kumtuang hringna thu



⁶⁰A irchutirhai laia tamtakin an inhriatin chu “Hi hi thu ngar tak a ni, tu’n mo an inhriat thei hrang?” an tia.

⁶¹Kha thua khan a irchutirhai an chiar tih Jisua’n a lungrîlin an hriata, an kuang, “Hi thu hin nin milung a ini loi mo?”

⁶²Mihriam Nâipa hi tiana a omna ngai tiang a kîr nin hmu tikin, itin mo nin itho hrang?

⁶³Hringna pêktu chu Irtha a ni; taksa kha kâmnang ma. Nin kuanga thu ki insîrhai hi Irtha le hringna a ni.

⁶⁴Kha tena khom khan senkhatin la iam nuam mak chêi,” a tia. Jisua’n a phut ata tuhai mo iam nuamloi hrang le tu mo ama incheltirtu hrang an hriat chian tâka.

⁶⁵Khasikin kêng nin kuang, “Pa’n fe theina nangni a pêk no’n chu tûte ki kuang hong thei mahai, ki iti kha,” a tia.

⁶⁶Kha tika chu a zuituhai laia tamtakin an mâksana, a kuang fe ta mahai.

⁶⁷Jisua’n sômhleihnihai kuang khan, “Nangni khom fe sa nin inuam ma ni?” a tia.

⁶⁸Simon Petera’n a sâma, “Rengpa, tu kuang mo kin ife hrang? kumtuang hringna thu ni nei khate,

⁶⁹Pathian mi irthiang kha ni nih ti kin iama, inhriat khom kin inhriat,” a tia.

⁷⁰Jisua’n a sâmhaia, “Nangni sômhleihnihai hi keima inthang mo ni mak chêi? Khan khoma nin laia inkhat chu Diabola a ni!” a tia.

⁷¹Simon Iskariota nâipa Juda thu kha a insîr a ni, sômhleihnihai laia mi a ni nâkin ama incheltirtu hrang a ni.

Johana 7

Jisua le a urênghai

¹Kha zoi chu Jisua’n Galili ram ar fanga, Judahaiin that an tum sikin Judai ram irfang nuam maka.



²Judahai kairêng kût kha anai tâka.

³Jisua urênghaiin chu a kuang, “Hi hmun hi suaksanin lân, Judai rama fe ro, ni irchutirhaiin ni sintho hi an hmu theina hrangin.

⁴Tukhomin irhming inthang nuam sikin inrûkin sintho ngai mahai. Hi sin hi ni tho lele’n chu rammual hmua hin inlang ro,” an tia.

⁵A urênghai khom khan iam mahaia.

⁶Jisua’n an kuang, “Ki zoro la tung ma, nangni zoro chu itiklai khomin a tung mai.

⁷Rammualin nangni khôkmâk thei maka, kei chu a ni khôkmâk, an sin thohai sa mah ti kin hriattir ngai sikin.

⁸Kûta hong fe roi. Kei chu atûn chu la hong fe no ning; ki zoro a la tung no sikin,” a tia.

⁹Khaang khan an sîra, Galili rama a la om maia.

Jisua kairêng kûta

¹⁰A urênghaiin kût hmang hranga an kâi zoi hnung chu ama khom inrûkin a hong fe saa.

¹¹Judahaiin kût hmuna khan ama kha an zonga, “Khôn mo a iom?” an tia.

¹²Mipui khan a chungchâng an insîr sup sup. Senkhatin, “Mihriam sa a ni,” an tia, senkhatin, “Ni mah, mipui a hruai insual kêng,” an tia.

¹³Judahai an chi sikin, thangphuangin chu tukhomin a chungchâng insîr mahai.

¹⁴Kût an hmang lai takin Jisua kha tempila a kâia, ar chutirhaia.

¹⁵Judahai khan, “Hi mi hi irchu loiin itin mo lekha a ithei?” an tia, a sân ar khêl an tia.

¹⁶Jisua’n anni kha a sâmhaia, “Ki thu irchutir hi keima irchutirna ni maka, a ni tîrtu irchutirna a ni.



¹⁷Tukhom Pathian nuamlam tho nuam chu, ki thu irchutir hi Pathian kuang ata mo, keima iphuachôp moh ti inhria an ti.

¹⁸Tukhom mâni iphuachôpa thu insîrtu chu mâni roiinpuina a izong a ni. Khannisian a tîrtu roiinpuina zongtu chu iam a oma, amaa dik lolina rêng rêng om mah.

¹⁹Mosia'n Dân kha nangni a ipêk loi ma ni? khannisianlân, nin laia tukhomin Dân chu zôm mak chêi. Ithoa mo ni that nin itum?" a tia.

²⁰Mipui khan an sâma, "Ramilhli ichel ni ni hi te; tu mo nang that nang tum?" an tia.

²¹Jisua'n anni kha a sâma, "Thil inkhat ki thoa, nin rêngin ar khêl nin ti.

²²Mosia'n sertan thu nangni a pêk sikin (Mosia insuaktir ni mah, nin irchibulhai insuaktir kêng). Khasikin, Sabat nê khomin ser nin tan ngai.

²³Mosia Dân porinchetir lolina hrangin Sabat nê khoma ser nin tan ngaiin te, ithoa mo Sabat ni'n mi kin damtir sikin, ki chungu nin ning nin inmurtir bîk?

²⁴Pên tianga inlang dân ngot enin ngaitua no unglân, a ni dân dik takin ngaitua ual roi," a tia.

Hi mi hi Krista ma ni?

²⁵Jerusalema mi senkhathaiin chu, "Hi mi hi that an itum kha ni ma mo?

²⁶En u ta, thangphuanguin thu an sîra, tukhomin sêl mahai. Kûthai hin ama hi Krista chu ni ngeiin an inhriat ta tihna mo a ini hrang?

²⁷Hi pa hi kho tianga mi mo a ini lak ei inhriata; Krista chu a zuang tika chu kho taka mi mo a ini tukhomin inhre no nihai," an tia.

²⁸Jisua'n khaanga Tempila ar chutir lai khan hnukirhai inring takin, "Keima nin nin hriata, kho taka mi mo ki ini khom nin inhriat. Khannisianlân, mâni thua zuang ni ma ung. A ni tîrtu chu mi diktak a ni, ama chu inhre mak chêi.

²⁹keima'n chu kin hriat, a ni tîra, a kuang ata zuang ki ni sikin," a tia.

³⁰Khanchu chel an tuma, khannisianlân, a zoro a la hong tung no sikin tûte'n tôn thei mahai.



31Mipui laia tamtakin an iama, “Krista a zuang tika hi pa itho nêka tam ual sinirkhêl a zuang itho hrang ma ni?” an tia.

Jisua chel hrangin enkoltuhai tîr an ni

32Farisaihaiin chu a chungchâng mipuiin inrûka an insîr sup sup kha an inhriata, Ochai inlalthai le Farisaihai khan Jisua chel hrangin enkoltuhai an tîr tâka.

33Khanchu, Jisua’n, “Zoro sôtnote nin kuanga la om ki ta, kha zoiin a ni tîrtu kuang fe ki ti.

34Nangni’n ni zong nin ta, ni hmu no chin ni, ki omna hranga fe thei no chin ni,” a tia.

35Juda thuneituhai khan, “Khôn mo a fea, ei ihmu ta loi hrang? Ei mihai Grik khopuia fea, Griksai irchutir a itum ma ni?”

36Nangni’n ni zong nin ta ni hmu no chin ni, ki fena hranga khom hong thei no chin ni, a itihai hi i tihna ma ni?” tiin an irti irhlôma.

Tui hring dunghai

37Kût hnungkhôn taka, nikhua roiinpui taka khan Jisua a ngîra, hnukirhai inring takin a khêka, “Tukhom tuiinhrâl ka chu ki kuang hong sianlân, in ri se.

38Pathian lekha thu’n a insîr angin, tukhom keima ni iam chu a milung ata tui hring dunghai zuang suak a ti” a tia.

39Kha kha Irtha, ama iamtuhaiin an la idong hrang kha a insîrna a ni; Jisua kha roiinpuia a la om no sikin Irtha kha pêk a la ini loi a ni.

Mipui laia irsenna

40Mipui laia senkhatin kha thuhai kha an inhriatin chu, “Hi pa hi deipu chu a ni ngêt,” an tia.

41Mi dangin, “Krista chu a ni,” an tia. Senkhatin chu, “Krista chu Galili ram ata a izuang hrang mo?”

42“Krista chu Davida irchi, Davida omna Bethlehem khuuaa zuang suak hrang a ni’ Pathian lekha thu’n a iti mo ni ma?” an tia.



⁴³Khanchu, ama sikin mipui laia irsenna a hong om ta.

⁴⁴An laia senkhatin ama chel an tuma, khannisianlân, tûte'n tôn mahai.

Juda hruaituhai iam loina

⁴⁵Enkoltu sipai chu Ochai inlalahai le Farisaihai kuang khan an kîr nôka, anni khan, "Ithoa mo nin hong ihruai loi?" an tia.

⁴⁶Enkolpu sipaihai khan an sâma, "Hi pa thu'nsîr ang hin tûte'n thu lan sîr ngai mahai," an tia.

⁴⁷Farisaihai khan an sâma, "Nangni khom nangni a lei ihuang ma ni?"

⁴⁸Hruaituhai le Farisaihai laia inkhat luan ama iam mahai ti nin inhriat loi mo?

⁴⁹Hi mipui, Mosia Dân inhre loihai hi Pathianin khua a isâlhai kêng," an tia.

⁵⁰Farisaihai laia, mi inkhat Nikodema, matona Jisua leh irhmu hranga fepu kha a om saa. Ama khan an kuang,

⁵¹"Ei dânin chu mi tukhom a chongbâi suak ei inhriat mân le a sintho ei hmu suak mân chu thiamno inchantir thei mak me," a tia.

⁵²Anni'n an sâma, "Nang khom Galili mi ni ini loi mo? Pathian lekha thu ngûk takin tepin lân, Galili ram ata deipu suak ngai mahai tih inhria ni ti," an tia.

⁵³Khan, mi tin mâni in senga an fe tâka.

Johana 8

Nupang uire lai an chel

¹Khanchu, mi tin mâni in chita an fe tâka, khannisian Jisua chu Oliv tânga a fe tâka.

²A tûk zînga chu Tempila a lût nôka. Mipui murdi a kuang an hong; a toia, annihai kha ar chutirhai tâka.

³Dân irchutirtuhai le Farisaihai khan, nupangu a uire lai taka chel an hong hruaia, a laia an inngîrtira.



- ⁴Jisua kuang, “Irchutirtu, hi nupangnu hi a uire lai taka kin ichel a nia,
- ⁵Ei Dân, Mosia ni ipêka chu hiang nupangnu hi lunga dêng that hrang tih a nia. Nangin teh itin mo ni ti?” an tia.
- ⁶Kha kha ama fiana hrangin an iti a ni, demna an hmu theina hrangin. Jisua kha a kûna, a kut chalin irnênga a’rziaka.
- ⁷Khaanga ngîr pumin an irdon kher kher sikin, a thoia, an kuang, “Nin laia sual neiloï takin lungin dêng masa ri se,” a tia.
- ⁸Khanchu a kûn nôka, a kutin irnênga a’rziak nôk tâka.
- ⁹Kha kha an inhriatin chu inkhat khatin ulian taka irphutin an suak zit tâka, nupangnu a omna ngaia om leh vai khan an om tâka.
- ¹⁰Jisua kha a hong tanga, a kuang, “Nupangnu, khôn mo an om zoi tâk? Thiamno nang inchangtir tûte om mahai mo?” a tia.
- ¹¹Ama khan, “Rengpa, om mahai,” a tia. Jisua’n a kuang, “Keima khomin thiamno nang inchangtir no ning; fe’n lân, atûn ata chu sual nôk ta no roh,” a tia.

Jisua rammual vâ

- ¹²Jisua’n Farisaihai kuang thu an sîr nôka, “Keima hi rammual êl invârpu ki ni. Tukhom a ni zuitu chu inthima lêng viat no nihaia, hringna vâ nei ual an ti,” a tia.
- ¹³Farisaihaiin a kuang, “Mâni thurchi kêng ni insîr, ni thu insîr hi dik mah,” an tia.
- ¹⁴Jisua’n, “Mâni thu inhriattir ki ni khomin ki thu inhriattir chu a dik a ni, ki zuang suakna le ki fena hrang kin hriata, nangni’n chu ki zuang suakna le ki fena hrang inhre mak chêi.
- ¹⁵Nangni’n chu taksa dânin nin ni hrilsiat ngaia, keima’n chu tûte hrilsiat ngai ma ung.
- ¹⁶Ki lei hrilsiat khom lei ni sianlân, ki hrilsiatna chu dik a ti; ki bing vaia om ni ma unga, Pa ni tîrtu ki kuang a om sikin.



¹⁷Nin Dân lekhabua khom, ‘Hriatpuitu mi inhni chong chu a dik,’ ti irziak a ni.

¹⁸Kei hi mâni thu inhriattirtu ki nia, Pa ni târpu chu ki thu nin hriatpui sa a ni,” a tia.

¹⁹Anni’n chu, “Kho hi mo ni Pa,” an tia. Jisua’n, “Nangni’n nin hre mak chêi, Ka Pa khom inhre mak chêi. Keima nin hre unglân chu Ka Pa khom inhria nin ti,” a tia.

²⁰Kha thu kha Tempil tholôm bôm siana hmuna ar chutir laia a insâr a ni. Tukhomin chel mahai, a zoro a la tung no sikin.

Ki fena hranga fe thei mak chêi

²¹Jisua’n an kuang, “Hin om ta no ning, nangni’n ni zong nin ti, khannisianlân nin sualnaa khan thi nin ti. Ki fena hranga hong thei no chin ni,” a ti nôka.

²²Judahaiin, “A irthat hrang ma ni? Ki fena hranga khan hong thei no chin ni a iti hi?” an tia.

²³Jisua’n an kuang, “Nangni chu hnuai tiang ata hong suak nin ni; kei chu chung tianga zuang suak ki ni; hi rammual ata hong suak nin nia; Kei chu hi rammual ata hong suak ni ma ung.

²⁴Khasika khan kêng, ‘Nin sualnaa khan thi ni nin ti’ nangni ki iti,” a tia.

²⁵Anni’n, “Tu mo ni ini?” an tia. Jisua’n, “A phut ata nin kuang ki insâr tâk mo ni ma?

²⁶Nin chungchânga insâr hrang le rêl hrang tamtak ki nei; i khom nisian, a ni târtu chu mi diktak a ni, a kuang ata ki inhriat vai rammual kuang kin sâr ngai,” a tia.

²⁷An kuang Pa thu a insâr a nih ti inhre mahai.

²⁸Jisua’n an kuang, “Mihriam Nâipa hi nin inkhâi tika keima ki ni tih le, keima irchamin i khom tho ma ung Pa’n a ni ihril ang vai kin sâr ngai tih lan hria nin ti.



²⁹A ni tîrpu chu ki kuang a oma, ki bing vaia om hrangin ni rotsan ngai ma, a nuamlam vai ki tho ngai sikin,” a tia.

³⁰Kha thu kha an sîr laiin mi tamtakin ama kha an iam tâka.

Thutakin nangni'n zalêntir a ti

³¹Jisua'n ama iamtu Judahai kuang khan, “Ki thutaka nin om maiin chu ki irchutir tak takhai ni nin ti;

³²Thutak inhria nin ta, thutak khan nangni inzalêntir a ti,” a tia.

³³Anni'n an sâma, “Abrahama irchihai ei nia, tu suaka khom om ngai ma ung, nangni inzalêntir a ti, itina ni iti ma ni?” an tia.

³⁴Jisua'n a sâmhaia, “Thudik tak nangni ki hril, thilsual tho murdi chu suak an ni.

³⁵Suak chu kumkhua'n in sîngkua mi ni mai mah, nâipa chu kumkhua'n a om mai.

³⁶Khasikin, Nâipa'n nangni an zalêntirin chu zalên tak tak ta nin ti.

³⁷Abrahama irchihai nin nih ti kin hriat, khannisianlân, ni that nin tuma, ki thu hin nangnia hmun a nei no sikin.

³⁸Keima'n Pa kuanga ki ihmu kin sîra, nangni khom nin Pa kuang ata nin inhriat kha nin insîr ngai,” a tia.

Nin pa Diabola

³⁹Anni'n, “Kin pa chu Abrahama a ni,” tiin an sâma. Jisua'n, “Abrahama nâihai nin ni'n chu, Abrahama itho ang kha tho nin ti.

⁴⁰Atûna ni that nin itum hi, thutak Pa kuang ata ki inhriat, nangni hriltu hi Abrahama'n khang khan tho ngai ma.

⁴¹Nin pa itho ang nin itho hi,” a tia. Anni'n chu, “Zâi nâi ni ma unga, Pa inkhat kin nei, Pathian chu,” an tia.

⁴²Jisua'n an kuang, “Pathian kha nin Pa a ni lele'n chu, lung ni thung nin ti, Pathian kuang ata zuang ki ni. Keima irchama zuang ni ma unga, a ni tîrtu irchama zuang kêng ki ini.



⁴³Ki thu'nsîr hi itina mo nin inhriat thei loi? Ki thu nin dong indik no sika a ni.

⁴⁴Nin pa Diabola ata suak nin nia, nin pa lungdo sin nin inuam a ni. Ama kha a phut ata mi that ngai a ni, thu dik tiang khom chang ngai ma, dikna zel a nei no sikin. Milak a tho'n ama insua a ni ngai. Milak pa a ni sikin; milakhai tinrêng pa khom a ni sa.

⁴⁵Keima'n thutak kin sîr sikin nin ni iiamloi a ni.

⁴⁶Nin laia tu mo sualna insîr thei? Thutak kin sîra, ithoa mo nin ni iiam loi?

⁴⁷Pathian ata suak khan Pathian thu a'rngaitua ngaia; nangni'n chu ki thu irngaitua mak chêi, Pathian ata suak nin ni no sikin," a tia.

Jisua le Abrahama

⁴⁸Judahai khan an sâma, "Samari mi ni nia, ramilhli ichel a ni kin iti kha, kin iti indik mo ni ma?" an tia.

⁴⁹Jisua'n, "Ramilhli ichel ni ma unga, Ka pa ki ichôiindôm kêng, nangni lakin ki thang nin insiaa.

⁵⁰Keima roiinpuina hrang zong ni ma ung, a zongtu le a ngaituatu chu inkhat a om.

⁵¹Thudik nangni ki hril, tukhom ki thu zômpu chu thi viat no ni," a tia.

⁵²Judahaiin a kuang, "Atûn chu ramilhli ichel ni nih ti kin inhriat infel ta; Abrahama a thi tâka, deipuhai khom an thi tâka, nang lakin, "Tukhom ki thu zôm chu kumkhua'n thina irtem no ni,' ni tia.

⁵³Kin irchibul Abrahama nêkin ni iroiinpui ual ma ni? Ama khom a thi tâka, deipuhai khom an thi tâka, a tukhokin mo ni irbe?" an tia.

⁵⁴Jisua'n, "Mâni irchôiindôm inlân, ki satna kha ite ni no ni. Kin Pathian nin iti Ka Pa chu, a ni chôiindômtu chu a ni.

⁵⁵Ama chu inhre mak chêi, keima'n chu kin hriat; Ama kha inhre ma ung ki ti'n chu, nangni ang dêna milak ni ki ti; khannisianlân, ama kin hriata a thu khom ki zôm ngai.



⁵⁶Nin Pa Abrahamana'n ki izuang a hmu hranga khan a rai a fan oka, khang khan a hmu ngeia, a lom tak tak," a tia.

⁵⁷Judahai khan a kuang, "Kum somringa lua la ni mak che dua, Abrahamana ni hmu moa?" an tia.

⁵⁸Jisua'n an kuang, "Thudik keng nangni ki ihril. Abrahamana suak man khom ki om," tiin a sama.

⁵⁹Khan ama dengna hrang lung an laka, khannisian Jisua kha ar bika, Tempil ata a suak taka.

Johana 9

A suak ata mitcho mit invarna

¹Khan, Jisua chu a fe malamin mi inkhat mitcho saia suak a hmua.

²A irchutirhai khan, "Rabbi, mitcho saia a isuak hi tu'n mo thil a tho'n sual, hi mi hin mo a nu le a pa'n mo?" an tia.

³Jisua'n a sama, "Hi pa hin tho'nsual mah, a nu le pa khomin tho'nsual ual mahai, amaa Pathian sintho an lang theina hranga a ni.

⁴Sun a ni lai hin a ni tirtu sin hi ei itho hrang a ni. Zan ni hrang a ni ta tute'n sin thei ta no nihai.

⁵Rammuala ki om sung hin rammual var ki ni," a tia.

⁶Kha kha an sir zoin irneng an chila, kha khan pilpok a siama, a mita a pola,

⁷"Siloam dila va'rsu roh," a tia. Siloam chu "Tir" tihna a ni. Khanchu a va fea, a va'rsuka, mit varin a hong kir nok taka.

⁸A tualbomhai le matona a kutdo lei hmu ngaihai khan, "Hi pa hi kutdoa toi ngai kha mo ni ma?" an tia.

⁹Senkhatin, "A ni khate," an tia. Mi dangin, "Ni mah, ar angpui keng," an tia. Kha pa khan, "Kha mi kha ki ni," a tia.

¹⁰Anni'n, "Itin mo ni mit a ivar tak lam?" an tia.



¹¹Ama khan, “Mi inkhat, Jisua an iti khan pilpok a siama, ki mita a pola, ‘Siloam dîla fe’n lân, va’rsûk roh,’ a ni tia. Khanchu, ki va’rsûka, ki hong ihmu thei zel tâk a ni,” a tia.

¹²Anni khan, “Khôn mo a iom?” an tia. “Inhre ma ung,” tiin a sâmbhaia.

Farisaihaiin mitcho a hong idam dân an irdonna

¹³Khanchu, mitcho lei ni ngai kha Farisaihai kuang an hruaia,

¹⁴Jisua’n pilpok a siama, a mit a invârtir pe nî kha Sabat nikhua a nia.

¹⁵Farisaihai khan a hong ihmu thei tâk lam kha an irdon nôka. Ama khan, “Ki mita pilpok a pola, ki’rsûka ki ihmu thei tâk a ni,” a tia.

¹⁶Farisaihai laia mi senkhatin, “Hi pa hi Pathian ata zuang suak ni ma, Sabat a ser no sikin,” an tia. Senkhatin chu, “Mi sualin itin mo hiang sinirkhêl a itho thei hrang?” an tia. An laia irsenna a hong om tâka.

¹⁷Mitcho kuang khan, “Ama kha i ang mi’n mo ni ibe, ni mit nang an vârtir pea?” an tia. Ama khan, “Deipu a ni,” a tia.

¹⁸Khannisian, Juda ulianhai khan kha mi kha mitcho saia suak a nia, atûn chu mit vârna a hmu a nih ti iam thei mahai sikin, a nu le pahai an koia, an kuang,

¹⁹“Hi pa hi nin nâipa, mitcho saia suak nin iti kha ma ni? Itina a hong ihmu thei tâk mo?” tiin an irdonhaia.

²⁰A nu le pa khan an sâma, “Hi pa hi kin nâipa a nia, mitcho saia suak a ni.

²¹Itina a ihong hmu thei tâk mani chu inhre ma ung, a mit invârtir petu khom inhre ma ung; irdon roi, puihling a ni tâka, a chungchâng thu insîr ri se,” an tia.

²²A nu le pahai khan Judahai an chi sika khaanga an iti a ni; Judahaiin chu, “Ama kha Krista a nih,” ti a pom murdi chu Sinagok ata inhnót suak hrangin an le’rsiam diam tâka.

²³Khasikin kêng a nu le pa’n, “Puihling a ni khate, ama irdon roi,” an itihna a ni.



²⁴Khan, mitcho lei ni ngaitu kha a voi hnina an koi nôka, a kuang, “Pathian makunga thudik hril hrangin inkungna nei ro! Nang indampu kha mi soal a nih ti kin inhriat,” an tia.

²⁵Ama khan a sâmhaia, “Mi soal a ni le ni loi inhre ma ung, thil inkhat kin hriat, mitcho ki lei ni ngaia, atûn chu ki hmu thei ta,” a tia.

²⁶Anni khan, “Itin mo nang a ti? Ni mit itin mo a invârtir?” an tia.

²⁷Ama khan, “Nangni ki hril tâka, irngai nuam mak chêi; ithoa mo nin inhriat nuam nôk tâk? Nangni khom a irchutirhai nin ini nuam mo?” a tia.

²⁸Anni khan an ngo tâka, “Nang hi, kha pa irchutir kha ni nia, keini chu Mosia irchutirhai kin ini kêng.

²⁹Pathianin Mosia a chongpui tih kin inhriat, hi mi hi chu kho taka mi mani inhre viat ma ung,” an tia.

³⁰Kha pa khan a sâma, “Khatak kha ar khêlna chu, kho taka mi mani inhre mak chêia, ki mit a invârtir hi!

³¹Pathianin mi soal chong irngai nuam mah ti ei inhriat; khannisianlân, Pathian ngaisaka, a nuamlam thotuhai chong chu ar ngaitua ngai.

³²Rammual irsiang ata mitcho saia suak mit invârtir ngai tukhomin inhre mahai.

³³Hi pa hi Pathian ata zuang suak a ni no’nte ite tho thei no ni,” a tia.

³⁴Anni khan an sâm nôka, “Soal pumpuia suak mo ni mak che, ni’rchutir ni itum?” an tia. Khanchu an inhnot suak tâka.

Irtha tianga mitcho

³⁵An inhnot suak tih Jisua’n a lei inhriatin, a va zong suaka, a kuang, “Mihriam Nâipa hi ni iam mo?” tiin ar dona.

³⁶Kha pa khan a sâma, “Ka pu, tu mo a ini ni hril roh, ki iam theina hrangin,” a tia.

³⁷Jisua’n, “Ni hmu chian tâka, nang a chongpui maipu hi a ni hi te,” a tia.

³⁸“Rengpa, ki iam” tiin khûksadelin chubai a mûk tâka.



³⁹Jisua'n, "Roirêl hrangin hi rammuala zuang ki ni, mitchohaiin an hong hmu theia, mit vârhaiin mitcho an hong ni theina hrangin," a tia.

⁴⁰A kôla Farisai omhai khan kha kha an inhriatin a kuang, "Keini khom mitcho mo kin ini?" an tia.

⁴¹Jisua'n an kuang, "Mitcho nin ni'n chu, sual nei no chin ni; khannisian, 'Kin hmu thei hi te' nin ti sikin, nin sual kha a iom chian a ni," a tia.

Johana 10

Belrapu chongirkhek

¹Jisua'n, "Thudik tak nangni ki hril, tukhom belra mikota lût loa, hmun dang tianga lua lût chu inru ngai le hrâtlâksong a ni.

²Mikota lût chu belrapu a ni.

³Inkhâr enkoltu'n ama kha mikot an hong pe ngaia, belrahai khomin ar hâi an inhriat, a belrahai kha an irhming sengin a koia a hruai suak ngai.

⁴A ta murdi an suaktir zoiin chu an maton a hruaia, belrahai khan ama an zui ngai, a hnukirhai an inhriat sikin.

⁵Mi dang chu zui no nihaia, intânsan an ti, mi danghai hnukirhai chu an inhriat no sikin," a tia.

⁶Kha chongirkhek thu kha Jisua'n an kuang an sîra, khannisianlân, a thu'nsîr omzia kha inhre mahai.

Jisua belra enkoltu sa

⁷Khanchu, Jisua'n an kuang thu an sîr nôka, "Thudik tak nangni ki hril, keima hi belrahai ta hrangin mikot ki ni.

⁸Ki matona hong murdi chu inru ngai le nakhrâtsonghai an ni; khannisian belrahai khomin an thu irngaitua mahai.

⁹Keima hi mikot chu ki ni. Tukhom keimaa lût chu inzôkin om a ta, lûtin suak a ta, fâk hrang hmu sa ti.

¹⁰Inru chu inru hrang le mi that hrang le insiat hrang vaiin kêng a ihong ngai, kei chu hringna nin neina hranga, tamtak nin neina hranga zuang ki ni.



11Kei hi belra enkoltu sa ki ni; belra enkoltu sa'n a belrahai hrangin a hringna a pêk ngai.

12Irhlo mi, belrapu tak ni loia, belra neipu ni no chu inê hong a hmu'n chu belrahai an tânsan ngai, inê khan belrahai kha a sea, an thekindarh chit ngai.

13Irhlo mi a nia, belrahai a uksak no sikin a intânsan pat ngai a ni.

14Kei chu belra enkoltu sa ki ni, ki ta chu kin hriat, ki ta khomin an nin hriat.

15Pa'n a nin hriata kei khomin Pa ki inhriat ang hin; belrahai ta hrangin ki hringna ki pêk.

16Hi belra kula mi ni loi hi belra dang ki nei; anni khom ki la hong ihruaihai hrang a ni, ki hnukirhai khom inhria an ti, khanchu pâl khatin om an ta, a enkoltu inkhat leh.

17“Hi sika hin Pa'n lung a ni ithung a ni, la nôk hranga ki hringna ki pêk hrang sikin.

18Tukhomin ki hringna hi ni lâk pe thei no ni. Keima irchamin ki ipêk hrang a ni. A pêk thei ki ni; la nôk thei khom ki ni. Hi thupêk tho hrang hin Ka Pa'n a ni ibe a ni,” a tia.

19Kha thu sika khan Judahai laia irsêlna a hong om nôka.

20An laia mi tamtakin, “Ramilhli ichel an vêt kêng! ithoa mo a chong nin irngai?” an tia.

21Senkhatin, “Ramilhli ichelin chu hiang hin chong thei no ni! Itin mo ramilhli'n mitcho mit a invârtir pe thei hrang?” an tia.

Judahaiin Jisua an hnôl

22Khan, phalbi zoro a nia, Jerusalema irpumpêkna kût an hman lai a ni.

23Jisua chu Tempila Solomona bokropa a hong irlôi a va'rlôia.

24Judahai a kôla an hong pungkhôma, a kuang, “I dôr ten mo milung ôkincha'n ni ni isia hrang? Krista ni ni'n chu, fel takin nin hril roh,” an tia.

25Jisua'n a sâma, “Nangni ki hril tâk khate, iam mak chêia, Ka Pa irhminga sin ki ithohai hin ki thurchi nangni a inhriattir a ni.



- ²⁶Khannisianlân, iam mak chêi, ki belra laia mi nin ni no sikin.
- ²⁷Ki belrahaiin ki hnukirhai an inhriata, kei khomin anni kha kin hriat ngaia, an ni zui ngai;
- ²⁸an kuang kumtuang hringna ki pêka, kumkhua'n thi no nihai, tukhomin ki kut ata ni lapai pe no nihai.
- ²⁹Anni ni pêktu Ka Pa chu itinrêng nêka roiinpui ual a ni; Ka Pa kuta om chu tûte'n sutpai thei mahai.
- ³⁰Keima le Pa chu pumkhat kin ni," a tia.
- ³¹Judahaiin chu ama dêngna hrang lung an hrût nôka.
- ³²Jisua'n an kuang, "Pa'n sin hranga a ni ipêk, sin sa tamtak nin mit hmua ki sina, ki sinthohai laia a i tak sika mo lunga ni dêng nin itum?" a tia.
- ³³Judahaiin an sâma, "Sin sa ni sin sika lungin nang dêng hrang ni ma unga, Pathian ni hrilinsiat le nang mihriam mai mai Pathiana nir bê sikin a ni," an tia.
- ³⁴Jisua'n a sâma, "Nin Dân lekhabua, 'Pathianhai nin nih,' ti irziak mo ni ma?.
- ³⁵Ei inhriat angin ei Pathian Thubu'n a iti ka chu kumkhua'n a idik ngai a ni, Pathianin a chong a intungnahai khom kha pathianhai a iti a ni.
- ³⁶Keima len vâng chu Pa'n a nin thanga, rammuala a ni izuang tîr a ni. Itin mo Pathian Nâipa ki ni, ki ti sika hin Pathian ni hril insiat, nin ni iti?
- ³⁷Ka Pa'n sin hranga a ni inuam ki sin no'n chu ni iam no roi;
- ³⁸Khannisianlân, ki isin a ni'n chu, keima nin ni iam no khomin, ki sinthohai lua hi iam roi ba; Pa chu keimaa a om ti le kei khom Paa ki om tih nin inhriat infel theina hrangin," a tia.
- ³⁹Kha hnung chu Jisua kha chel an tum nôka, khannisian an kut ata a suak tâka.



⁴⁰Jordan râla, Johana'n matona mi a baptisna ngai hmun tiang khan a fea, kha hmuna khan a om mai tâka.

⁴¹Mi tamtak a kuang an hongga, "Johana'n sinirkhêl ite tho mah, khannisianlân, Johana'n hi pa chungchâng thu a insîr murdi chu a hong idik kêng," an tia.

⁴²Khanchu mi tamtakin ama an iam tâka.

Johana 11

Lazara thi thu

¹Mi inkhat ar hming Lazara, Bethani khuaa om kha dam maka. Bethani khua kha Mari le a zuarpuinu Marthi omna khua a ni.

²(Hi Mari hi Rengpa sahriak mirimhoi poltu, a ke sahriak innôta, a sam leh a ke hui penu kha a ni, a dam no Lazara hi a nuchapa a ni.)

³Khanchu, a farnuhaiin, "Rengpa, ni lungthung kha dam ma," tiin mi an van hriltira.

⁴Jisua'n a len hriatin chu, "Hi natna hi thina hrang ni maka, Pathian roiinpuina hranga a ni. Hi sika hin Pathian Nâipa hi roiinpuin a iom hrang a ni," a tia.

⁵Jisua'n Marthi le a zuarpuinu le Lazara kha lung a thunga,

⁶Khannisianlân, dam mah ti an hriat hnungin a omna khuaa khan sîn hni a la oma.

⁷Kha zoi hnung chu a irchutirhai kuang, "Judai rama fe nôk ta ei ti," a tia.

⁸A irchutirhaiin "Irchutirtu, Judahaiin lunga nang dêng an tum chak kha; khan khomin fe nôk ni itum mo?" an tia.

⁹Jisua'n a sâma, "Sûna dârkar sômhleihni a iom loi ma ni? Khasikin mi tukhom sîn khovâra a lêngin chu a ke sir châi ngai ma, hi rammual vâh hi a hmu sikin.

¹⁰Zâna a lêngin chu a ke sir a châi ngai, amaa khan vâh a om no sikin," a tia.



¹¹Kha thu kha an sîr zoiin an kuang, “Ei rualpa Lazara kha a ina, khannisian ama kaithoi hrangin ki ife hrang a ni,” a tia.

¹²A irchutirhai khan a kuang, “Rengpa, a in a ni’n te, hong dam nôk ta ti,” an tia.

¹³Jisua’n a thi thu a insîrna a ni, khannisianlân anni’n chu a’rngam sînga a in thu a insîr an sôna.

¹⁴Khasikin, Jisua’n fel takin an sîra, “Lazara a thi tâk,

¹⁵khannisian nangni sikin khataka ki iom no chu ki lôm, nin iam theina hrangin; i khom nisian, a kuang va fe ei ti,” a tia.

¹⁶Thoma, (Phîra) an iti chu a irchutir chanpuihai kuang, “Tho Irchutirtu kuanga ei rêngin fe ei ta, a thinaa va thi sa hrangin fe ei ti,” a tia.

Jisua thoinôkna le hringna

¹⁷Jisua a hong tungin chu Lazara kha sîn minli tâna a lei om ta tih an hriata.

¹⁸Bethani kha Jerusalem kôla om a ni, kilometer thum dôra hla a ni.

¹⁹Judahai laia tamtak, an nuchapa thi chungchâng thua Marthi le Mari lungngam saka toipui hrangin an hongga.

²⁰Marthi chu Jisua tung hrang a nih ti an hriatin chu a va dona, Mari’n chu in a lei nghâka.

²¹Marthi’n Jisua kuang, “Rengpa, hitaka ni iom ni sian chu, ki nuchapa thi no ni!

²²Atûn khom Pathian kuang ni izong murdi Pathianin nang pe a ti, ti kin hriat,” a tia.

²³Jisua’n, “Ni nuchapa thoi nôk a ti,” a tia.

²⁴Marthi’n, “Zoro hnungkhôna chu thoinôkna nia chu thoinôk a ti, ti chu kin hriat,” a tia.

²⁵Jisua’n, “Kei hi thoinôkna le hringna ki ni, tukhom a ni iam ka chu thi khom sianlân, hring mai a ti;



²⁶tukhom hring maia ni iam chu, kumkhua'n thi no ni; kha kha ni iam mo?" a tia.

²⁷Ama khan a kuang, "Ki iam, Rengpa, Krista, Pathian Nâipa rammuala zuang hrangpu kha ni nih ti ki iam," a tia.

Jisua a chap

²⁸Kha kha an sîr zoiin a fea, a zuarpuinu Mari chu inrûkin a va koia, "Irchutirtu hi hin a om, nang a koi," a tia.

²⁹Khan, kha thu kha an hriat zoi le chu a thoi lika, a kuang a fe tâka.

³⁰Jisua kha kho sûnga la lût loiin, Marthi'n a va donna hmuna khan a la om maia.

³¹Judahai, in sûnga lungngam saka toihai khan, Mari thoi lika, a suak kha an hmu'n, tâna chap hranga a ife mani an tia, an zuia.

³²Mari'n Jisua omna a va tunga, a va hmu'n chu a ke bula an boka, "Rengpa hi hin omin lân chu, ki nuchapa thi no ni," a tia.

³³Jisua'n Mari chap le a hong zuitu Judahai chap kha a hmu'n, a sân a'rpei a tema, a'rhniaka,

³⁴"Khôn mo nin inzâl," a tia. Anni khan, "Rengpa, hongin lân, en roh," an tia.

³⁵Jisua a chap ta.

³⁶Judahai khan "En u ta, Lazara hi lung a thung bâka!" an tia.

³⁷An laia senkhatin chu, "Mitchopa kha mit vârna a ipêk mo ni ma? Lazara khom hi thi loiin a isia thei loi ma ni?" an lei tia.

Lazara kaithoia a om thu

³⁸Jisua kha irhniak pumin thân kha a tung tâka. Thân kha pûk a nia, lung leh khâr a ni.

³⁹Jisua'n, "Lung hi khâipai roi," a tia. A thitu farnu Marthi'n a kuang, "Rengpa, atûn hin chu a mirim se ta ti, a thina sîn minli a ni ta," a tia.

⁴⁰Jisua'n a kuang, "Ni iamin chu Pathian roiinpuizia hmu ni ti, nang ti ma ung mo?" a tia.



⁴¹Khanchu lung kha an khâipai tâka, Jisua kha a tanga, “Ka Pa, ki thu nir ngaitua sikin lômthu kin sîr.

⁴²Ki thu nir ngaitua ngai ti khom kin hriat; khannisianlân, hitaka mi pungkhômhai sika hin hi thu hi ki insîr a ni, nangin keima ni ni tîr ti an iam theina hrangin,” a tia.

⁴³Kha kha an sîr zoiin chu hnukirhai inring takin a khêka, “Lazar, hong suak roh,” a tia.

⁴⁴Mithi kha a kut a ke thân puana tuam pumin a hong suaka, a hmâi khom irhuina puana tuam a nia. Jisua’n an kuang, “Sût unglân, infetir roi,” a tia.

Jisua that hrang lam an ngaitua

(Mt 26.1-5; Mk 14.1-2; Lk 22.1-2)

⁴⁵Mari ina hong Judahai laia tamtakin Jisua sintho kha an hmua, an iam tâka.

⁴⁶Senkhat chu Farisaihai kuang an fea, Jisua sinthohai kha an va hrila.

⁴⁷Khanchu, Ochai inlalahai le Farisaihai khan Sanhedrin-ah an koia, “Hi pa hin sinirkhêl tamtak a thoa, itin mo ei itho ta hrang?”

⁴⁸Hiang hin ei insua rak maiin chu mi murdi’n iamna an ta, Rom mihai hong an ta, ei hmun irthiang le ei nam ni hong insiat pai pêna an ti,” an tia.

⁴⁹An laia inkhat, ar hming Kaiafa, kha kuma Ochai inlaltak khan, an kuang, “Inhre mak chêi;

⁵⁰Mipui irthûla mi inkhat a thia, nam pumpui irhmang chit loi chu nin ta hrangin a sa ual ti nin inhriat loi a ni,” a tia.

⁵¹Kha kha ama lungrîl puak suaka a insîr ni mah; kha kuma khan Ochai inlaltak a nia, an nam irthûla Jisua thi hrang a lei insîr a ni.

⁵²An nam irthûl vai khom ni loiin Pathian nâi rammuala indarhai pâl khata a hruaikhôm nôkna hrang khom a insîr a ni.

⁵³Khatak ata chu ama that lam an ngaitua tâka.



⁵⁴Khasikin Jisua kha inlangin Judahai laia lêng ta maka, kha rengata chu ramchâr kôla khua inkhat ar hming Efraima an itia khan a fea, kha khan a irchutirhai leh an om tâka.

⁵⁵Judahai Ferkân Kût a hong nâi tâka, thingtâng ata mi tamtak chu Ferkân Kût mân irthâr hrangin Jerusalema an fea.

⁵⁶Jisua kha an zonga, Tempila an irbûm laiin an chonga, “Itin mo nin ngaitua? Kûtnaa hong no ni mo?” an irti irhlôma.

⁵⁷Ochai inalhai le Farisaihaiin ama an chel theina hrangin tukhomin a omna an inhriatin chu irchamneituhai an inhriattir hrang a nih ti thu an pêka.

Johana 12

Jisua Bethani-a sahriak mirimhoi pol thu

(Mt 26.6-13; Mk 14.3-9)

¹Ferkân Kût hrang sùn ruk a la omin, Jisua'n mithi lai ata a ikaithoi Lazara omna Bethani khua kha a hong tunga.

²Khatak khan a ta hrangin zânbu an sinsiama, Marthi'n khalâi othai kha a donhaia, Lazara khom khalâi othai laia chang sa a ni.

³Khan, Mari'n, litar chimrip vêl, Spiknard hriak mirimhoi tak le man hlutak a hong chôia, Jisua ke an nôta, a samin a ke a hui pea; khanchu, kha hriak mirim khan in pumpui kha a sip zit tâka.

⁴A irchutirhai laia inkhat Juda Iskariota ama incheltir hrangtu khan,

⁵“Ithoa mo hi sahriak mirimhoi hi a duli irzathuma zuarin inrianghai pêk a ini loi?” a tia.

⁶Inrianghai a ngaisak sika kha chong kha a iti ni mah, inru a nia, sum kok a dôna, a sûnga om kha a lâk ngai sika a ni.

⁷Jisua'n, “Ite ti no roi, phûmin ki om nia hrangin hrê ri se.

⁸Inrianghai chu nin kuang om mai hrang an ni, kei chu nin kuang om mai no ning,” a tia.

Lazara that an tum thu



⁹Juda mi tamtakin Bethani khuaa Jisua a om ti an inhriat tâka, Jisua vai hmu nuama hong ni mahaia, mithi lai ata a ikaithoi Lazara khom hmu an inuam sa a ni.

¹⁰Ochai inlalahai khan Lazara khom kha that an tum tâka,

¹¹ama sika Juda tamtakhaiin an rotsanhaia, Jisua an iam tâk sikin.

Jisua roiinpui taka Jerusalem a lûtna thu

(Mt 21.1-11; Mk 11.1-11; Lk 19.28-40)

¹²A tûk zînga chu Ferkân Kûta hong mi tamtakin chu Jisua kha Jerusalema hong lût hrang a nih ti an inhriatin,

¹³tûm ônhai an chôia, a nghâk hrangin an suaka. “Hosana! Rengpa irhminga hong chu inpâkin om ri se! Israel rêng chu inpâkin om ri se!” tiin an khêk mur mura.

¹⁴Jisua’n sakuartung a hmua, a chung a chuanga,

¹⁵“Chi no ro, Zion nâinu, En ta, ni Rêng chu a hong e, sakuartung te chung a chuangin,” ti irziak ang khan.

¹⁶Kha kha a irchutirhaiin a phuta khan chu inhre thei mahaia, khannisianlân, Jisua chôindôma a om zoi tena chu, a chungchâng, khaanga irziak a ni, a chung a kha thil kha lei itho a ni an inhriat thei ta.

¹⁷Lazara, thân ata a koi suaka, mithi lai ata a kaithoi laia a kuanga mipui omhai khan kha thu kha an inhriatirhai thiai tâka.

¹⁸Sinirkhêl a tho tih an inhriat sikin, mipuihaiin ama an va inghâk a ni.

¹⁹Farisaihai khan, “Ite nin ilo thei loi a ni hi te, en u ta, rammualin ama an izui tâk hi,” an irtia.

Grik mi senkhatin Jisua an zong

²⁰Kût hmang laia Pathian biak hranga hong fehai laia Grik tuhai manni an oma.

²¹Khahai kha Galili rama Bethsaida kho mi Filipa kuang an fea, “Ka pu, Jisua hmu kin nuam,” tiin an ngêna.



²²Filipa khan Andria a hong hrila, Andria le Filipa khan Jisua an va hrila.

²³Jisua'n a sâma, "Mihriam Nâipa chôiindôma a om zoro a hong tung ta.

²⁴Thudik nangni ki hril; bu'rmal irnênga a tâka a thi no'n chu, ar mal dênin a om chiana, a thiin chu ra tamtak an sua ngai.

²⁵Tukhom mâni hringna inpâm murdi'n chu inchân a ta; tukhom hi rammuala hin a hringna an pâm no'n chu kumtuang hringna nei mai a ti.

²⁶Tukhom ki sintho nuam murdi'n chu ni zui ngêt ri se, ki sin thotu chu ki omnaa a om sa theina hrangin. Tukhomin ki sin tho chu ka Pa'n chôiindôm a ti," a tia.

Mihriam Nâipa inkhâiin a om hrang thu

²⁷"Atûn hin ki lungrîl a na tak taka, imo ki iti hrang tâk? 'Ka Pa, hi zoro ata hi ni saninhring roh' ki iti hrang ma ni? Ti no ning, hi dûk tuang hrang piala zuang kêng ki ini," a tia.

²⁸"Ka Pa, nir hming chôiindôm roh," a tia. Khanchu, irvân ata hnukirhai a zuang suaka, "Ki chôiindôm ta, la chôiindôm nôk mai ki ti," a tia.

²⁹Khataka mipui ngîr sahai khan hnukirhai kha an inhriatin, "Khonri kêng," an tia; senkhatin "Vântîrtônin a ichongpui," an tia.

³⁰Jisua'n a sâma, "Kha hnukirhai kha ki ta hranga zuang suak ni mah, nin ta hranga a ni ual.

³¹Atûn hin rammual chungchâng ngaitua lai a ni, atûn hin rammual roirêltu hi pai suak ni a ti.

³²Keima irnêng ata inkhâia ki omin chu, mi murdi keima tiang kaihruaihai zit ki ti," a tia.

³³Kha thu kha i ang taka a ithi hrang mani tih inhriatirna hrangin a insîr a ni.

³⁴Mipuiin chu an sâma, "Krista chu kumkhua'n om mai a ti, ti Dân lekhabu ata kin inhriat, nangin 'Mihriam Nâipa inkhâiin om a ti,' itina ni iti ma ni? Mihriam Nâipa kha tu mo a ini?" an tia.



³⁵Jisua'n an kuang, "Vâr hi sôtnote nin laia la om a ti. Vâr nin nei sùng hin chai roi, inthimin nangni a de nona hrangin, tukhom inthima lêng chu a fena inhre ngai ma.

³⁶Vâr nin nei sùng hin vâr hi iam roi, vâr nâihai nin ni theina hrangin," a tia. Kha thu kha Jisua'n an sîr zoiin, a fe pat tâka, an hmu nona hrangin ar bîka.

Judahai iamnozia

³⁷Khaanga sinirkhêl tamtak kha an mit hmua tho khom sianlân iam mahai.

³⁸Deipu Isaia'n: "Rengpa, kin thu'nsîr tu'n mo iam? Rengpa sinthotheina kha tu kuang mo an lang?" a iti kha a hong tung theina hrangin.

³⁹Hi sika hin an iiam thei loi a ni, Isaia khan:

⁴⁰"Pathianin an mit an chotir pehaia, An milung an ngartir sa, An mitin an hmu nona hrang le an milungin an inhriat thei nona hrangin. Khanchu, hong kêr nôk an ta, Anni kha ki lei indamhai itinin," a iti ang khan.

⁴¹Isaia'n kha thu kha a roiinpuizia a hmu sikin a thurchi a insîr a ni.

⁴²Khan khomin hruaituhai laia mi tamtakin Jisua kha an iam tâka; khannisian, Farisaihai sikin insîr inlang ngam mahai, khano'nchu, Sinagok ata inhnot suak an ini hrang a ni.

⁴³Pathian roiinpuina nêkin mihriam kuanga roiinpuina an inuam ual a ni.

Jisua thu, roirêlna

⁴⁴Jisua a khêk suaka, "Tukhom ni iam chu keima ni iam ni mahaia, a ni târtu iam an ni.

⁴⁵Tukhom a ni hmu chu a ni târtu hmu a ni.

⁴⁶Rammuala hin vâr angin ki izuang a ni, tukhom a ni iam murdi'n chu inthima an om nona hrangin.

⁴⁷Tukhomin ki thu inhriatin zôm no sianlân, ama kha keiin thiamno inchangtir ma ung; rammual thiamno inchangtir hranga zuang ni ma ung, rammual saninhriang hranga zuang ki ni.



⁴⁸Tukhom ni hnôla ki thu pom nuam loi chu a chungthu rêl pe hrang inkhat a nei. Ki thu'nsîr ngei kha, zoro hnungkhôna chu a chungthu rêl petu la ni a ti.

⁴⁹Keima phuachôpin insîr ma unga, Pa, a ni tîrpu ngei khan, ki insîr hrang le ki iti hrang kha ircham a ni ipêk a ni.

⁵⁰A thupêk chu kumtuang hringna a nih ti kin hriat. Khasikin, Pa'n hril hranga a ni iti ang takin ki ihril a ni," a tia.

Johana 13

Irchutirhai ke a'rsûk

¹Ferkân Kût hrang a hong ni tâka, Jisua'n hi rammual suaksana Pa kuang a fe zoro a tung ta ti an hriata; Ama mi, rammuala om a lungthunghai chu a mong dênin lung a thunga.

²Khan, zâmbu an nêk laiin, Diabola khan Simon nâipa Juda Iskariota kha Jisua incheltir hrangin ngaituana a lei inneitir tâka.

³Jisua'n, Pa'n itinrêng a kuta a sia tih le Pathian ata zuang suak a nih ti le, Pathian kuang fe nôk hrang a ni an hriata.

⁴Khasikin, zâmbu khalâi ot lai kha a thoia, a songkol irfual a kheka, irhuina puan a lâka, a boma.

⁵Khan tâbora tui a sunga, irchutirhai ke a'rsûk tâka, irhuina puan khan a hui thiaia.

⁶Simon Petera kha a hong phâkin chu, Petera'n, "Rengpa nangma'n ki ke ni irsûk hrang mo?" a tia.

⁷Jisua'n a sâma, "Ki sintho hi atûn hin inhre mak che, khannisianlân, nakana lan hria ni ti," a tia.

⁸Petera'n a kuang, "Ki ke irsu viat no chi ni," a tia. Jisua'n a sâma, "Ni ke ki'rsûk no'n chu ki irchutir ni thei no chi ni," a tia.

⁹Simon Petera khan a kuang, "Rengpa, khano'nchu, ki ke vai irsu loiin, ki kut le ki lu khom," a tia.



10Jisua'n a kuang, "Tui irsil tâk chu a ke vai no chu irsûk nang mah, a pumin a fâi kêng. Nangni chu nin fâi, nin rêngin chu ni mah," a tia.

11Ama incheltirtu hrang kha an hriata, khasikin, "Nin rêngin chu fâi mak chêi," a iti a ni.

12An ke a'rsûk zoiin chu, a songkol sia kha an nghâka, a toi nôk tâka, an kuang, "Nin chung a ki sintho hi a omzia nin inhriat mo?"

13Nangni'n, Irchutirtu le Rengpa nin ni ti ngai, nin ti indik, ki ni ngeia.

14Kei Rengpa le irchutirtu luan nin ke ki'rsûkin te, nangni khomin nin ke nin irsûk irhlôm hrang a ni.

15Nin chung a ki itho anga nangni khomin nin thôna hrangin, nangni ki irhmutir a ni.

16Thudik tak nangni kin hril, suak chu a pu nêkin roiinpui ma, tirtôn khom a tirtu nêkin roiinpui ual mah.

17Kha kha nin inhriata, nin zômin chu lôm nin ti.

18Nin rênga thu insîr ma ung; ki inthanghai chu keima'n kin hriat, khannisian: 'Ki bai fâktu'n a kuttum a nir hmua,' ti Pathian lekha thu kha a zuang tung theina hrangin.

19"Kha kha a zuang tung mân atûn hin nangni ki lei inhril a ni; a zuang tung tika, Ama kha ki ni ngei nin iam theina hrangin.

20Thudik nangni ki hril, ki mi tîr lei lôm chu keima ni lôm a ni, keima ni lômtu chu a ni tirtu lôm a ni," a tia.

Incheltira a om hrang thu Jisua'n a lei insîr

(Mt 26.20-25; Mk 14.17-21; Lk 22.21-23)

21Jisua'n kha thu kha an sîr zoiin a sân a milung dûk a tonga. "Thudik tak nang ki hril, nin laia mi inkhatin nin cheltir a ti," a tia.

22Tu tak mo a iti inhre loiin irchutirhai kha an ir-enchuk tâka.

23A irchutirhai laia inkhat, Jisua'n lung a ithung kha, Jisua kôla a toia.



²⁴A tu tak mo a iti irdon hrangin kut veivâkin Simon Petera'n ama kha a chongpuia.

²⁵Khan kha mi khan Jisua a va nâiin, "Rengpa a tu tak hi mo?" a tia.

²⁶Jisua'n a sâma, "Bai hlek kin chia ki ipêktu tak chu a ni," a tia. Khan bai hlek kha an chia, a lâk suaka, Iskariota Simona nâipa Juda kha a pêka.

²⁷Juda'n bai hlek kha a lâk zoiin chu, a sûnga Setana a lût tâka. Jisua'n a kuang "Ni itho hrang kha tho lat ta roh," a tia.

²⁸Khataka toihai laia tukhomin kha kha i sika a kuanga a insîr mo inhre mahai.

²⁹Irchutir senkhathaiin chu Juda sum hmarsa a dôn sikin, Jisua'n, kût hranga thil ei innanghai var cho roh; a iti mani, a ninole, inrianghai i i pehai roh, a iti pe mani an sôna.

³⁰Juda khan bai hlek kha a lâka, a suak zôi zel tâka; kha zoro kha, zân a ni.

Thupêk thar

³¹Khan, Juda kha a suak zoiin chu Jisua'n, "Atûn chu Mihriam Nâipa chôiindômin a om ta, Amaa Pathian khom chôiindômin a om ta.

³²Amaa Pathian chôiindôma a om khan, Pathianin ama khom a makunga chôiindôm a ta, chôiindôm zôi zel a ti.

³³Nâihaio, sôtnote nin kuang ki la oma, nangni'n ni zong nin ta, ki fena hranga hong thei no chin ni, Judahai kuang ni ihril ang khan atûn nangni kuang khom ki hril a ni.

³⁴"Thupêk thar nangni ki pêk; lungirthung irhlôm roi; keiin lung nangni ki ithung ang hin nangni khom lungirthung roi.

³⁵Lung nin irthung irhlômin chu mi murdihaiin ki irchutirhai nin ni ti, khataka khan inhria an ti," a tia.

Jisua'n, Petera iphil hrang thu a lei insîr

(Mt 26.31-35; Mk 14.27-31; Lk 22.31-34)



³⁶Simon Petera'n a kuang, "Rengpa, khôn mo ni ife hrang?" a tia. Jisua'n a sâma, "Atûn chu ki fena hranga ni zui thei no chin ni, nakana ni la zui nin ti," a tia.

³⁷Petera'n, "Rengpa, itho sikin mo atûn hin nang ki izui thei loi hrang? Nangma hrangin chu thi khom ki'rhuam kêng," a tia.

³⁸Jisua'n a sâma, "Ki hrangin thi nir huam mo? Thudik tak nang ki hril, nangin voithum ni ni phil mâka chu âr khuang no ni," a tia.

Johana 14

Jisua, Pa kuanga fena lampui

¹Jisua'n, "Nin milung dûk intong no ri se, Pathian nin iam kei khom ni iam sa roi.

²Ka Pa ina omna tamtak a oma, om no sianlân chu, nin ta hranga hmun siama ki fe hrang thu nangni ki ihril hrang ma ni?

³Nin ta hranga hmun siamin ki fe'n chu zuang kîr nôk ki ta, ki kuang nangni hruai ki ti, ki omnaa nin om sa theina hrangin.

⁴Ki fena hrang lam khom nin inhriat," a tia.

⁵Thoma'n a kuang, "Rengpa, ni fena hrang inhre ma ung, itin mo a lam kin inhriat thei hrang?" a tia.

⁶Jisua'n a sâma, "Keima hi lampui le thutak le hringna ki ni, keimaa fe no chu tukhom Pa kuang tung ngai mahai.

⁷Keima hi nin hre unglân chu ka Pa khom inhria nin ta, atûn chu ama nin inhriat tâk, ama nin hmu sa tâk," a tia.

⁸Filipa'n a kuang, "Rengpa, Pa kha nir hmutirin lân, kin ta hrangin sa ti," a tia.

⁹Jisua'n, "Filipa, hi dôr hi nin kuang ki om tâka chu, nin ni la inhriat loi ma ni? Keima ni hmu chu Pa hmu a ni. Itina mo 'Pa chu nir hmutir roh' ni iti?



¹⁰Keima Paa ki om le Pa keimaa a om ti nin iiam loi ma ni? Nin kuanga thu ki insîrhai hi keima phuachôpin ki insîr ni mah. Pa keimaa a om maiin chu, a sin a itho a ni ual.

¹¹Keima Paa ki oma, Pa keimaa a om ki iti hi iam roi; a ninole, ki sintho sika lua hin ni iam roi.

¹²Thudik tak nangni ki hril, tukhom ni iam chu thil ki itho ang hi tho sa ti; hi nêka roiinpui ual khom hi la tho a ti, Pa kuang ki fe hrang sikin.

¹³Ki'rhmingin i khom nin izong ka chu tho thiai ki ti; Pa kha Nâipa sika chôindôm a ni theina hrangin.

¹⁴Nangni'n ki'rhmingin i khom nin izong ka chu tho thiai ki ti.

Irtha Irthiang inkung kha

¹⁵“Nangni'n lung nin ni thungin chu, ki thupêkhai zôm nin ti.

¹⁶Khan, keima'n Pa zong ki ta, Irtharngamtu dang nangni pe a ti, kumkhuaa nin kuanga om hrangin.

¹⁷Irtha dik tak chu, rammualin nei thei maka, ama an hmu thei no sik le ama an inhriat no sikin. Nangni'n chu ama nin inhriat, nin kuang a om maia, nangnia a om mai sikin.

¹⁸Fara'n nangni masan no ning, nin kuang zuang nôk ki ti.

¹⁹Zoro sôtnote hnunga rammualin ni hmu ta no nihai, nangni'n chu ni hmu nin ti, keima ki hring sikin nangni khom la hring nin ti.

²⁰Kha tika chu keima Paa ki oma, nangni keimaa nin om le, keima nangnia ki om ti lan hria nin ti.

²¹Tukhom ki thupêkhai poma zômpu chu lung ni thungpu a ni, lung ni thungpu chu ka Pa'n lungthung a ta, kei khomin lungthung ki ti, a kuang inlâr sa ki ti,” a tia.

²²Juda, (Iskariota ni loi) khan a kuang, “Rengpa, kin kuang inlâr ni ta, rammual kuang nin lâr loi hrang mo?” a tia.



²³Jisua'n a sâma, "Mi'n lung an ni thungin chu ki thu khom zôm a ta, ka Pa'n ama kha lungthung a ta, a kuang zuang kin ta, a kuang om mai kin ti.

²⁴Lung ni thung loitu chu ki thu zôm maka, thu nin inhriat hi keima thu ni maka, Pa a ni tîrtu thu a ni ual.

²⁵Nin kuang ki la om sêng hin nangni ki ihril a ni;

²⁶Irtharngamtu, Irtha Irthiang, ki'rhminga Pa'n a zuang itîr hrang khan itinrêng nangni irchutir a ti, nin kuang ki insîr murdi nangni inhriat suaktir nôk a ti.

²⁷Irtharngamna nangni ki mâk pe, keima irtharngamna kêng nangni ki ipêk; rammualin a ipêk ang ni loiin nangni ki ipêk a ni. Nin milung dûk tong no ri se, chi khom chi no ri se.

²⁸"Nangni masan hrang ki nia, nin kuang zuang kîr nôk ki ti," ki iti kha nin inhriat ta. Lung nin ni thungin chu Pa kuanga ki ife hrang hi lôm nin ti; Pa kha keima nêkin a roiinpui ual sikin.

²⁹Kha kha a zuang tung tika nin iam theina hrangin, atûn a zuang tung mân nangni ki ihril a ni.

³⁰Zoro sôt ualin chu nin kuang thu insîr intam ta no ning, hi rammual roirêlpu hi a hong hrang sikin, ama'n ki chung a irchamnei mah,

³¹khannisian, keiin Pa lung ki thung le, Pa'n thu a ni ipêk angin ki tho ngai tih rammualin an hriatna hrang a ni. Thoi unglân, hitak ata hi suak ta ei ti.

Johana 15

Jisua, Grep râng diktak

¹"Kei hi Grep râng diktak ki ni, ka Pa ar huan enkoltu a ni.

²Ki irzompui ôn raloi murdi chu a pai ngaia, a ra murdi chu a'rthial infâi ngaia, a ra tam ualna hrangin.

³Nin kuanga ki thu'nsîr murdi sika khan nin irthiang ving ta.



⁴Keimaa om mai unglân, kei khom nangnia om mai ki ti. Ôn kha grep râng a om mai no'n chu a ira thei loi ang dênin, nangni khom keimaa nin om mai no'n chu ra thei no chin ni.

⁵“Kei hi grep râng ki ni, nangni a ônhai nin ni. Tukhom keimaa a om maia, kei khom amaa ki om maina chu tamtakin a ra ngai; keima boiin ite tho thei mak chêi.

⁶Tukhom keimaa om loi chu ôn anga pai suakin an om ngai, ôn ipai kha a châra, an irkhôma, meia an paia, a kâng irhmang ngai.

⁷Keimaa nin om maia, ki thu nangnia a om maiin chu nin inuam murdi zong unglân, hmu thiai nin ti.

⁸Tamtak nin ra hin, ka Pa chu chôindômin a om ngaia, khanchu ki irchutirhai ni nin ti.

⁹Pa'n lung a ni thung sikin kei khomin lung nangni ki ithung a ni; ki lungthungin om roi.

¹⁰Ki thupêkhai nin zômin chu, ki lungthungin om mai nin ti, keiin ka Pa thupêkhai ki zôma, a lungthunga ki iom ang hin.

¹¹“Ki lômna hi nangnia a om mai theina hrang le nin lômna ar kip theina hrangin hi thu hi nin kuang ki insîr a ni.

¹²Hi hi ki thupêk chu a ni; lung nangni ki ithung ang takin nangni khom lung irthung irhlôm roi.

¹³Mi'n a rual hranga a hringna a ipêk bana lungthungna inthûk ual tûte'n nei mahai.

¹⁴Thu nangni ki ipêk hi nin zômin chu ki rualhai nih nin ti.

¹⁵Suak nangni ti ta no ninga; suakin chu a pu sintho inhre maka; rualhai nangni ti ta ki ti; ka Pa kuang ata thil ki inhriat murdi nangni kin hriatir tâk sikin.



¹⁶Nangni'n nin thang mak chêi, keima'n nangni kin thang, va ra hrang le nin raa om mai hrangin nangni kin kung a ni; ki'rhminga Pa kuanga nin izong murdi nangni a pêk theina hrangin.

¹⁷Khasikin hi thu hi nangni ki ipêk a ni, lung irthung irhlôm roi.

Rammualin a hmumâkna

¹⁸“Rammualin nangni a hmumâkin chu, keima a ni lei hmumâk ta ti inhre mai roi.

¹⁹Rammuala mi ni unglân chu, rammualin ama ta angin lung nangni a ithung hrang a ni. Khannisianlân, rammual ata nangni ki inthang suak nin nia, rammual mi nin ni ta no sikin rammualin nangni a ihnôl a ni.

²⁰Suak a pu nêkin roiinpui mah ti thu nin kuang ki insîr kha inhre mai roi. Anni'n deng an ni inthei ang khan nangni khom deng nangni lan theitir an ti; ki thu an zômin chu nin thu khom zôm an ti.

²¹Khannisianlân, hi thil murdi hi ki'rhming sika nin chung a tho an ti, a ni tîrtu an inhriat no sikin.

²²Keima zuangin an kuang thu insîr no inlân chu sual nei no nihaia, atûn chu an sual hnônna hrang nei ta mahai.

²³Tukhom ni hnôl chu ka Pa khom an ihnôl a ni.

²⁴Mi dang tûte la tho ngai loi thilhai an laia tho no inlân chu sual nei no nihai; atûn chu ki sinthohai an hmua, kei le Pa chu an ni ihnôl tâk a ni.

²⁵I khom nisianlân, an Dân lekhabua, ‘Anni'n a bi om loiin an ni hnôl’ ti irziak kha a hong tungna hranga an itho a ni.

²⁶“Irtharngamtu, Pa kuang ata nin kuang ki zuang itîr hrang kha, Pa rengata suak Irtha diktak kha a zuang tung tika ama'n ki thurchi nangni inhriattir a ti.

²⁷Nangni khom ki thu inhrepuhai nin ni, a phut ata ki kuang nin om sikin.

Johana 16

¹“Nin iamna nin mâk nona hrangin hi hi nangni ki insîr pe a ni.



²Sinagok haia nangni kêlsua an ta; nangni that tumtuhaiin Pathian sin an itho anga an bê zoro la hong tung a ti.

³Khaang thil kha mipuiin nin chung a la tho an ti, Pa le kei an nin hriat no sikin.

⁴A zoro a zuang tung tika nangni ki lei hril tâk tih nin inhriat maina hrangin, hi thu hi nin kuang ki insîr a ni.

Irtha Irthiang sintho

“Hi thu hi a phut ata nangni ki la ihril loi a ni, nin kuang ki la om sikin.

⁵Atûn chu a ni tîrtu kuang fe hrang ki nia, khan khomin nin laia tukhomin ki fena hrang nirdon mak chêi.

⁶Hi thu hi nin kuang kin sîr sikin nin milung kha chardongna'n a sip tâka.

⁷“Khannisianlân, thudik tak nangni ki hril, ki ife hi nin ta hrangin a sa ual, ki fe no'n chu Irtharngamtu kha nin kuang zuang no nia, ki fe'n chu nin kuang zuang tîr ki ti.

⁸Ama kha a zuang tungin chu, سوالنا تیغ منی، دیکنا ثوا منی، روریلنا ثوا منی، ان لای یرنگای انسوال تیغ رانموا لای یرناتیر ا تی.

⁹Sualna lama thiamno chang an ti, keima an ni iam no sikin;

¹⁰Thudika khom thiamno an ichang a ni, Pa kuang ki fe hrang sik le nin ni hmu ta no hrang sikin;

¹¹rorیلنا لاما کوم تیامنو ان اچانگ ا نی، هی رانموا لای یرناتیر کوم تیامنو چانگین ا ام تاک سیکین.

¹²“Nin kuang thu insîr hrang tamtak ki la nei, khannisian, atûn chu nangni hrangin inhriat lantak hrai a ti.

¹³Irtha dik tak a zuang tung tika chu thutak murdia nangni hruai inlût a ti. Ama phuachôpin thu insîr no ni; thu a idong kha insîr a ta, thil la hong tung hrang khom nangni hril a ti.

¹⁴Ama'n kei ni chôindôm a ta, ki chong tihai kha lâkin nangni a hril hrang sikin.



¹⁵Pa'n thil a inei murdi ki ta a ni; khasika khan kêng, 'Irtha'n ki taa om lâkin, nangni hril a ti,' ki iti a ni.

Chardongna le lômna

¹⁶“Sôtnotea nangni'n ni hmu ta no chin nia, sôtnotea ni hmu nôk nin ti,” a tia.

¹⁷A irchutirhai senkhatin, “Ei kuanga thu'nsîr kha imo a itihna? Sôtnotea ni hmu ta no chin nia, sôtnotea dên ni hmu nôk nin ti, a iti hi, ‘Pa kuang ki fe hrang sikin’ a iti hi? an irtia.

¹⁸Khanchu, ‘Sôtnote’ a iti hi imo a itihna? Imo a insîr tum inhre mak me,” an tia.

¹⁹Jisua'n thu an irdon nuam tih an hriata, an kuang, “Sôtnotea ni hmu ta no chin ni, sôtnotea dên ni hmu nôk nin ti, ki iti kha nin irdon irhlôm mo?

²⁰Thudik tak nangni ki hril, nangni'n nin mit irthi tâkin chap nin ta, khannisianlân, nin chardong kha lômna la chang a ti.

²¹Nupangin nâihâ a tuang laiin chu a sân a char a dong ngaia, a zoro a tung tâk sikin; khannisianlân, nâi a neiin chu a chardong kha inhre ta mah, rammuala mihriam zuang suak kha a lôm sikin.

²²Khaang khan nangni khom atûn hin nin char a donga, khannisianlân, nangni hmu nôk ki ti, nin lungrîl lôm a ti, nin lômna kha tûte'n nangni lâkpai pe no nihai.

²³Kha nikhuaa khan nangni'n ite nir don ta no chin ni. Thudik tak nangni ki hril, Pa kuang i khom nin zongin chu ki'rhmingin nangni pe a ti.

²⁴Atûn ten ki'rhmingin ite la zong mak chêi; zong roi, khanchu hmu nin ti, nin lôm ar kip theina hrangin” a tia.

Rammual inhnêtu

²⁵“Kha kha chongirkhekin nin kuang kin sîr ngai a nia; nin kuang chongirkhekin insîr ta loiin fel taka Pa thu nangni ki hril zoro la hong tung a ti.



²⁶Kha nikhua khan chu nangni'n ki'rhmingin zong nin ta; keima'n nin ta hrangin Pa kuang zong ki ti, ki itihna ni mah.

²⁷Pa ngei khan lung nangni a thunga, nangni'n kei lung nin ni thunga, Pa rengata zuang ki nih ti nin iam sikin.

²⁸Pa kuang ata ki zuang suaka, rammuala zuang ki ni, rammual suaksan nôk ki ti, Pa kuang ki ife nôk hrang a ni," a tia.

²⁹A irchutihai khan, "Atûn chu fel takin thu nin sîr tâka, chongirkhekin insîr ta mak che.

³⁰Nangma'n itinrêng nin hriat, tûte'n nang an irdon khom nang ta mah, atûn chu kin inhriat ta. Hi sika hin Pathian kuang ata zuang ni nih ti kin iam tâk," an tia.

³¹Jisua'n a sâma, "Atûn chu nin iam ta mo?

³²Irgai roi, mâni in chita irthekindarin ki bingin nin ni mâk zoro la tung a ti, a tung thiai ta; khannisian, ki bingin om ma ung, Pa kha ki kuang a om.

³³Keimaa irtharngamna nin hmûna hrangin nin kuang hi thu hi ki insîr a ni; rammuala hin intak nin tuang ngai; khannisian hâi takin om roi! Keiin rammual kin hnê ta," a tia.

Johana 17

Jisua chongchaina

¹Kha thu kha Jisua'n an sîra, irvân tiang a tanga, "Ka Pa, a zoro a tung ta; ni Nâipa chôiiindôm roh, Nâipa khomin nang a chôiiindômna hrangin;

²Mi murdi chung a irchamneina a kuang ni pêk tâk sikin, Ama khomin ni ipêk murdihai kuang kumtuang hringna a pêk theina hrangin.

³Hi hi kumtuang hringna chu a ni, nang Pathian tak vai le ni itîr Jisua Krista inhriat hi.

⁴Thil tho hrang ni ni ipêk kha ki tho zoia irnênga hin nang ki chôiiindôm ta.

⁵Ka Pa! rammual om mâna ni kuanga roiinpuina ki inei kha, atûn nangma makunga ngei ni chôiiindôm roh.



- 6“Rammual ata mi ni ipêkhai kuang nir hming kin langtir ta; ni ta an nia; anni kha ni ni pêka; ni thu khom an zôm ta.
- 7Atûn chu thil ni ni ipêk murdi nangmaa suak a nih ti an inhriat ta.
- 8Nangin thu ni ni ipêkhai kha an kuang ki pêka, an hong poma; ni kuang ata zuang ki ni ngêt ti an inhriat tâka; nangin keima ni ni tîr ti khom an iam ta.
- 9“Keiin an ta hranga ki ingên pe hi, rammual ta hranga ngên pe ni ma ung, nangin ni ni ipêkhai ta hrang a ni, ni ta an ni sikin.
- 10Ki ta murdi chu ni ta a ni, ni ta khom ki ta a ni, annia chôindômin ki om ta.
- 11Kei rammuala om ta no ning, anni hi chu rammuala la om an ta; kei chu ni kuang hong kîr hrang ki ni ta. Ka Pa Irthiang! nangin ni ni ipêkhai hi nir hmingin hrunghai roh, Keima le nangma pumkhat ei ini angin, anni khom pumkhat an ni theina hrangin.
- 12“An kuang ki om sîng chu nangin keima ni ni ipêkhai hi nir hmingin ki hrung ngai; anni kha ki donsua, an laia inkhat lua irhmang loa, irhmang nâipa ti no chu, Lekha thu a hong tung irkipna hrangin.
- 13Atûn ni kuang hong kîr hrang ki ni ta, hi thil hi rammuala ki insîr a ni; ki lômna annia an nei irkipna hrangin.
- 14Ni thu an kuang ki pêk tâka, rammualin anni kha an hmu mâkhaia, keima rammuala mi ki ini loi ang dênin rammuala mi an ni no sikin.
- 15“Anni chu rammual ata la suak hrangin nang ngên ma ung, mi sual ata hrung hrangin nang ki ngên a ni.
- 16Rammuala mi ni mahai, keima rammuala mi ki ini loi ang hin.
- 17Anni chu thutakin irthiangtir roh, ni thu chu thutak a ni.
- 18Rammuala ni ni itîr ang hin anni khom rammuala ki itîr a ni.
- 19Anni sikin ki irthiang infâi a ni, anni khom thutaka an irthiang theina hrangin.



²⁰“Hihai ta hrang vai ngên pe ni ma ung, an thu insîr sika keima ni la iam hranghai ta hrang khoma ngên sa ki ni.

²¹An rêngin inpumkhat an ni theina hrangin nang ki ngên a ni. Ka Pa nang keimaa ni oma, kei nangmaa ki iom ang hin, anni khom einia an omna hrangin, nangin kei ni ni tîr ti rammualin an iam theina hrangin.

²²Nangin roiinpuina ni ni ipêk kha kei khomin ki pêkhai ta, pumkhat an ni theina hrangin pumkhat ei ni ang dênin.

²³Keima annia, nang keimaa omin, an inpumkhat tak takna hrangin; khanchu ni ni itîr a nih ti rammualin inhriat an ta, lung ni ni thung angin anni khom lung ni thung tih rammualin inhriat an ti.

²⁴Ka Pa, nangin mi, ni ni ipêkhai hi ki kuanga om hrangin ki nuam, nangin lung ni ni thung sika rammual irsiang mâna ni ipêk ki roiinpuina kha an hmûna hrangin;

²⁵Ka Pa Fel tak! Rammualin nang inhre mahaia, keiin chu nang kin hriat; hihai khom hin nangin kei ni ni tîr ti an inhriat.

²⁶An kuang ni’rhming kin hriattira, inhriattir mai ki ti; nangin kei lung ni ni thungna ngei kha annia a oma, keima annia ki om theina hrangin,” a tia.

Johana 18

Jisua an ichel thu

(Mt 26.47-56; Mk 14.43-50; Lk 22.47-53)

¹Jisua’n kha thu kha an sîr zoiin, a irchutirhai leh an suaka, Kidron dung an irkâna, khataka khan irhuan a oma, a sînga khan a irchutirhai leh an lûta.

²An cheltirtu Juda khom, kha hmun kha an hriata, kha khan Jisua leh a irchutirhai an irhmukhôm ngai sikin.

³Khan, Juda khan sipai pâlkhat le Ochai inlalthai le Farisaihai itîr Tempil enkoltuhai, kha khan a hong hruaihaia; meiser hai, chokser hai, hriamhrei hai an hong chôia.

⁴Jisua’n a chung a thil hong tung hrang murdi kha an hriat zita, a va suaka an kuang, “Tu mo nin izong?” a tia.



⁵“Nazaret Jisua,” tiin an lei sâma, Jisua’n, “Kei hi ki ni,” a tia. An cheltirtu Juda khom kha an laia a ngîra.

⁶Khanchu, “Keima hi ki ni,” an kuang a ti zoi le, hnung tiang an irtôla, irnênga an inrîla.

⁷“Tu mo nin izong?” tiin anni kha ar donhai nôka, “Nazaret Jisua,” an tia.

⁸Jisua’n, “Keima hi ki nih ti nangni ki hril ta khate, keima nin ni izong a ni’n chu, a danghai hi infetirhai roi,” a tia.

⁹A thu’nsîr, “O Pa, Nangin kei ni ni ipêkhai kha, inkhat lua irhmangtir ma ung,” a iti kha a hong tung theina hrangin.

¹⁰Simon Petera chu a khandai vong a phôia, Ochai inlaltak suak mikuar chang tianga a sât thâk pea. Kha suak irhming kha Malka a ni.

¹¹Jisua’n Petera kuang khan, “Khandai kha a koka thun roh, Pa’n a ni ipêk tuangna khilât hi ki i-in loi hrang ma ni?” a tia.

Jisua Anna makunga a ngîr

(Mt 26.57-58; Mk 14.53-54; Lk 22.54)

¹²Khan, sipai pâl le an hruaitu le Judahai Tempil enkoltu, irchun khômhai khan Jisua kha an chela, an khita,

¹³Anna kuang an hruai masaa, Kaiafa tarpupa a ni sikin. Kaiafa chu, kha kuma khan Ochai inlaltak a ni.

¹⁴Kaiafa khan, “Mipui thi irthûla mi inkhat thi a sa ual,” tia Judahai tipuitu chu a ni.

Petera’n Jisua a phil

(Mt 26.69-70; Mk 14.66-68; Lk 22.55-57)

¹⁵Simon Petera le irchutir dang inkhatin Jisua kha an zuia, kha irchutir kha Ochai inlaltak hmêlhriat a ni, Ochai inlaltak tual laia khan Jisua a lûtpui saa.

¹⁶Petera chu mikot pên tiang a ngîra; irchutir dang Ochai inlaltak hmêlhriat kha a va suaka, mikot enkoltu dôngmate kha a chongpuia, Petera kha a hruai inlûta.



¹⁷Mikot enkoltu dôngmate khan Petera kuang, “Nang khom, hi pa irchutirhai laia mi ni ini loi ma ni?” a tia. Ama khan, “Ni ma ung,” a tia.

¹⁸Siahlohai le enkoltu sipaihai khan an ngîra, a dâi hrai sikin meiholin mei an thoa, an uata; Petera khom ngîr pumin an laia mei lum kha a va uat saa.

Ochai inlaltakin Jisua chong ar don

(Mt 26.59-66; Mk 14.55-64; Lk 22.66-71)

¹⁹Ochai inlaltak khan Jisua kha a irchutirhai thurchi le a thu irchutir chungchâng ar dona.

²⁰Jisua'n a sâma, “Thangphuangin mi tin kuang thu kin sîr ngai; Juda murdi fe irchunna Sinagok haia, Tempil haia, ki'rchutir mai ngaia, inrûkin ite insîr ngai ma ung.

²¹Ithoa mo ni ni irdon? Ki thu'nsîr irngaituhai kuang imo ki insîr ngai irdonhai ro ba, imo ki insîr an inhriat,” a tia.

²²Kha kha an sîr zoiin chu enkoltu sipai ngîrhai laia inkhat khan Jisua hmâia an bêna, “Ithoa mo Ochai inlaltak kha, khaanga ni isâm?” a tia.

²³Jisua'n a sâma, “Ki ti insualna a om duaiin chu, imo ki ti insual, hi mihai hi inhril roh. Khannisian, ki tho indikna a omin chu, nin hril ro, khannisian ki tho'n dik a omin te ithoa mo ni ni inbên?” a tia.

²⁴Khanchu, Anna khan khit pumin Ochai inlaltak Kaiafa kuang a tîr tâka.

Petera'n Jisua a phil nôkna

(Mt 26.71-75; Mk 14.69-72; Lk 22.58-62)

²⁵Simon Petera khan ngîrin mei lum a la uata, “Nang khom hi irchutirhai laia mi ni mak che mo?” an tia. Khan Petera'n a phila, “Ni ma ung,” a tia.

²⁶Ochai inlaltak siahlohai laia inkhat, Petera'n a mikuar a isât thâk pe urêng khan, “Irhuaa khan a kuang nang ki ihmu mo ni ma?” a tia.

²⁷Petera khan a phil nôka; khanchu âr a khuang zôi zel tâka.

Jisua Pilata makunga

(Mt 27.1-2,11-14; Mk 15.1-5; Lk 23.1-5)



²⁸Zîng taka Jisua chu Kaiafa in ata Ramoptu in Praitioriana an hong hruaia. Juda irchamneituhai chu, dân ang taka irthianga Ferkân Kût fâk an nuam sikin Ramoptu in Praitioriana lût mahai.

²⁹Khanchu, Pilata chu an kuang a va suaka, “Hi mi hi imo a tho’nsuala nin ibe,” a tia.

³⁰Anni khan, “Hi mi hin thilsual tho no sian chu ni kuang hong hruai no ni ung,” an tia.

³¹Pilata’n, “Nangni’n hruai unglân, nin dân angin a chungthu rêl pe roi,” a tia. Khan, Judahaiin a kuang, “Keini’n chu mi that theina dân nei ma ung,” an tia.

³²A thi hrang thu Jisua’n a lei insîr a hong tung theina hrangin khahai kha a hong iom a ni.

³³Khanchu, Pilata chu Praitioriana a lût nôka, Jisua kha a koia, a kuang, “Judahai rêng mo ni nih?” a tia.

³⁴Jisua’n a sâma, “Kha kha nangma milung suaka ni iti mo, mi dangin ki chungchâng nang an ihril mo?” a tia.

³⁵Pilata’n a sâma, “Kei hi Juda mi mo ki ini? Ni chipuihai le Ochai inlalthaiin ki kuang nang an hong ihruai a ni hi; imo ni iti?” a tia.

³⁶Jisua’n a sâma, “Ki rêng Ram hi chu rammuala om ni ma, ki Ram chu hi rammuala om ni sianlân, Judahai kuta incheltira ki om nona hrangin ki hnung zuihaiin doihai an ta, ki rêng Ram chu hitaka hin ni mah,” a tia.

³⁷Pilata’n, “Khante, rêng mo ni ini?” a tia. Jisua’n a sâma, “Nangma’n rêng ni ni ti khate; kei chu thutak inhriattir hi ki isuakna san le rammuala ki izuangna san chu a ni; tukhom thutaka omhai chu ki’rhâi an irngai ngai,” a tia.

³⁸Pilata’n a kuang “Thutak chu imo a ini?” a tia.

Jisua thi hrangin an inkung
(Mt 27.15-31; Mk 15.6-20; Lk 23.13-25)



Kha kha an sîr zoiin chu Judahai kuang a va suak nôka, an kuang, “A chung a thiamno inchang hrangin ite a bi hmu ma unga.

³⁹Khannisian, nin dân angin Ferkân Kût zoro’n intângna ina om mi inkhat kin sua ngaia. Judahai rêng hi nangni insua pe inlân nin nuam mo?” a tia.

⁴⁰Khannisianlân, inring takin an khêka, “Hi pa hi chu ni no ri se, Barabba kha ni ri se,” an tia. (Barabba kha hrâtlâksong ngai mi a ni.)

Johana 19

¹Khan, Pilata’n Jisua a hruaia, a vîka.

²Sipaihaiin ilhling lukhum an siama, an inkhumtira, khanchu, songkol irfual senduk an inngâktir sa,

³“Chubai, Judahai rêng!” an tia; an inbêna.

⁴Pilata chu pên tiang a va suak nôka, an kuang, “En u ta, a chung a ite a sua na hmu ma ung tih nin inhriatna hrangin nin kuang ki hong ihruai suak hi,” a tia.

⁵Khanchu, ilhling lukhum khumpumin songkol irfual senduk inngâkin Jisua kha a hong suaka. Pilata’n an kuang, “En u ta, hi mihriam hi,” a tia.

⁶Ochai inlalahai le a ngâkhaiin an hmu’n chu, “Krosa hembê roh, Krosa hembê roh,” tiin an khêka. Pilata’n an kuang, “Nangni’n hruai unglân, Krosa hembê roi, keiin chu ite a chung a sua na hmu ma ung,” a tia.

⁷Judahaiin an sâma, “Dân kin neia, kha dân ang khan a ithi hrang a ni, Pathian Nâipa ar ti sikin,” an tia.

⁸Pilata’n kha thu kha an hriatin chu a chi nôk uala.

⁹Praitioriana a lût nôka, Jisua kuang, “Kho tianga mi mo ni ini?” a tia. Khannisianlân, Jisua’n sâma.

¹⁰Pilata’n a kuang, “Ni ni isâm loi hrang mo? Nang insua thei ki ni, Krosa nang hembê thei ki ni, ti hi ni inhriat loi ma ni?” a tia.



¹¹Jisua'n a sâma, "Chung tiang ata pêk ni ni no'n chu, ki chung a irchamneina rêng nei no chi ni, khasikin, ni kuanga ni pêktu khan soal a pêl intam ual a ni," a tia.

¹²Khasikin Pilata'n ama insua hrang lam a zong tâka, khannisianlân, Judahai an khêka, "Hi pa hi nin sua'n chu Kaisara rual ni no chi ni," an tia.

¹³Pilata'n kha thu kha an hriatin chu Jisua kha a hruai suaka, "Lungirchuan" Hebrai chonga chu Gabbatha an iti roirêlna toihmuna khan a toia.

¹⁴Ferkân Kût irtûng ni a nia, sîn lai tak a ni. Judahai kuang khan, "En u ta, nin rêng hi," a tia.

¹⁵Khahai kha an khêka, "Inboipai roh, inboipai roh, Krosa hembe roh," an tia. Pilata'n, "Nin rêng hi Krosa ki ihembe hrang mo?" a tia. Ochai inlalthaiin an sâma, "Kaisara ni no chu rêng dang nei ma ung," an tia.

¹⁶Khanchu Pilata'n Jisua kha Krosa hembe hrangin a pêkhai tâka.

Jisua hembe thu

(Mt 27.32-44; Mk 15.21-32; Lk 23.26-43)

Khanchu, Jisua kha an hruai tâka,

¹⁷Khan a kros kha irputin "Luru hmun" Hebrai chonga Golgotha an iti hmun dênin a fe tâka.

¹⁸Khatak khan krosa an hembra, mi dang inhni, a sîr le a sîra an hembe saa, a laia Jisua.

¹⁹Pilata'n inhriatirna a'rziaka, "Nazaret Jisua, Judahai rêng," tiin kros rêla a târa.

²⁰Inhriatirna kha Juda tamtakin an tepa, Jisua an hembêna hmun kha khopui kôl a ni sikin Hebrai, Rom, Grik chongin irziak a ni.

²¹Juda Ochai inlalthai khan Pilata kuang, "Judahai rêng tiin irziak no roh, Judahai rêng ki ni a ti, tiin irziak roh," an tia.

²²Pilata'n a sâma, "Ki irziak chu ki'rziak zoi ta," a tia.



²³Sipaihaiin Jisua krosa an hembe zoiin chu a silkaihai an lâk pea, sipai minliin an irsema, an sika phêk kha khatin an dong. A songkol irfual an lâk saa, kha kha insui loi songkol a nia, a ring ata a pumpuia phan a ni.

²⁴Anni khan, “Hi hi chu ir-ekthêr no roi, tu ta hrang tak mani inhriatna hrangin tasân ei ti,” an tia. “Ki silkaihai an irsema, Ki songkol hrangin tâ an sâna,” ti irziak kha a hong tung indik hranga a ni. Sipaihai khan kha kha an tho tâk a ni.

²⁵Jisua Kros kôla khan, a nu le a nu zuarpuinu Mari, Klopa dôngma le Magdala mi Mari hai an ngîra.

²⁶Jisua’n a nu le a kôla ngîr irchutir lung a ithungtu kha a hmu’n chu a nu kuang, “Ka nu, en ta, ni nâipa kha,” a tia.

²⁷Irchutir kuanga khom khan “En ta, ni nu kha,” a tia. Kha zoro ata chu a irchutir kha ama ina om hrangin kha nu kha a hruai tâka.

Jisua thi thu

(Mt 27.45-56; Mk 15.33-41; Lk 23.44-49)

²⁸Kha zoi hnung chu Jisua’n itinrêng a tung irkip ta ti an hriata; Pathian lekha thu a tung theina hrangin, “Ki tui an hrâl e,” a tia.

²⁹Khataka khan bêl, uain thûra sip, a oma; khanchu sponj, uain thûra an inchie kha, husop khianghrolin an târa, a hmûra an hong intungtira.

³⁰Jisua’n uain thûr kha a lei in zoiin chu, “A’rzoï ta,” a tia; khanchu a lu a kûna, a hrang a chat ta.

Jisua kânga an sun

³¹Judahai irtûng ni a nia, ruakhai kha Sabat nia Krosa a om mai nona hrangin, kha Sabat kha nikho roiinpui a nia, Judahai khan mi hembhai ke inkhiakhaia, an ruakhai insum hrangin Pilata kuang an ngêna.

³²Khanchu, sipaihai an hongga, Jisua pâla hembhai, a matonpu le a dang kehai an khiak pehaia.

³³Jisua kha an va pana, a thi tah ti an inhriata, khannisian a ke chu khiak pe mahai.



³⁴Sipai laia inkhat khan a kânga ufeiin a suna, thisen le tui a zuang luang suak tâka.

³⁵Mit ngeia hmutu insîr a ni, nangni khomin nin iamna hrangin. A thu inhriatir hi a dika, thu dik an sîr ti inhretu inkhat a om.

³⁶Pathian lekha thu'n "A ru inkhat lua inkhiak ni no ni," ti a hong indikna hrangin ama kha a hong iom a ni.

³⁷Pathian lekha thu dangin, "An isunna kha la en an ti," a ti saa.

Jisua phûma a om thu

(Mt 27.57-61; Mk 15.42-47; Lk 23.50-56)

³⁸Kha zoi hnung chu Arimathai khuaa om Josefa, Jisua irchutir, Judahai a chi sika irthuptu khan, Pilata kuang Jisua ruak la hrangin a ngêna. Pilata'n a lei phal pea. Khanchu, a ruak kha a va lâka.

³⁹Nikodema, zâna a kuanga hongtu kha mura le aloe irpolsai, her sômthum dôr chôiin a hong.

⁴⁰An inhni khan Jisua ruak kha an lâka, Judahai irphûm dân angin thil mirimhoihai leh khan puan irnêm silin an tuama.

⁴¹Ama an hembêna hmuna khan irhuan a oma; irhuana khan thân thar, tûte lan zâlna ngai loi a oma.

⁴²Judahai irtûng ni a ni sikin le thân kha an kôl renga om a nia, Jisua kha an phûm ta.

Johana 20

Jisua thoinôk thu

(Mt 28.1-8; Mk 16.1-8; Lk 24.1-12)

¹Pathian ni zîng taka, thingchangvârroa chu Magdala mi Mari kha thâna khan a va fea, lung kha thân ata lâkpaiin a hmua.

²Khanchu Simon Petera le irchutir dang Jisua'n lung a ithungtu kuang khan a van tâna, an kuang, "Thân ata Rengpa kha an lâk suaka, khôn mo an isia inhre ma ung," a tia.

³Khanchu, Petera le irchutir dang kha thân tiang panin an suak tâka.



- ⁴An ruaiin an intân suama; irchutir dang kha Petera nêkin an tân hrât uala, thân kha a tung masa a ni.
- ⁵Kûnin a vênga, puan irnêm sil omhai kha a hmua, a sênga chu lût mah.
- ⁶Simon Petera khom a hnunga a hong tung tâka, thân sênga khan a lûta, puan irnêm sil omhai kha a hmua,
- ⁷a lu khitna puan khom kha, puan irnêm sil kôla om loiin irzuata a binga omin a hmua.
- ⁸Irchutir dang, thân tung masa khom kha a lût sa tâka, a hmua, a iam ta.
- ⁹Mithi lai ata thoi nôk hrang a nih ti Pathian lekha thu kha lan hre thiam mahaia.
- ¹⁰Khanchu, irchutirhai kha an in tiang an kîr nôk tâka.

Magdala mi Mari kuanga Jisua inlârna thu

(Mt 28.9-10; Mk 16.9-11)

- ¹¹Khan, Mari kha thân pên tiang chap puma ngîrin a kûna, thân sêng kha a vênga.
- ¹²Vântîrtôn inhni, puan cheka irvo'n, Jisua an inzâlna lu thun tiang inkhat, ke thuan tiang inkhat toiin a hmuhaia.
- ¹³Anni khan a kuang, “Nupang, ithoa mo ni ichap?” an tia. Ama khan an kuang, “Ki Rengpa an lâkpaia, an isiana inhre ma ung,” a tia.
- ¹⁴Kha kha an sîr zoiin chu a hong irheia, Jisua ngîr kha a hmua, Jisua a nih ti inhre mah.
- ¹⁵Jisua'n a kuang, “Nupang, ithoa mo ni ichap? Tu mo ni izong?” a tia. Ama khan irhuan enkoltu mani a sôna, a kuang, “Ka Pu, ama kha ni ilâkpai a ni'n chu, ni isiana nin hril ro ba; khanchu la ki ti,” a tia.
- ¹⁶Jisua'n a kuang, “Mari,” a tia. Ama khan ama tiang a hong irheia, Hebrai chongin, “Rabboni,” a tia, (Kha kha “Irchutirtu” tihna a ni.)



¹⁷Jisua'n a kuang, "Ni tôn no roh, Pa kuang khom la hong fe ma ung; khannisianlân, ki urênghai kuang va fe'n lân, an kuang, 'Ka Pa, nin Pa, Ki Pathian, nin Pathian kuang kâi hrang ki ni' a ti, ti roh," a tia.

¹⁸Mari, Magdala mi kha a fe tâka, irchutirhai kuang, "Rengpa kha ki hmu ta," a va tia, a kuanga thu a insîr pe kha a hrilhaia.

Irchutirhai kuang Jisua an lârna thu

(Mt 28.16-20; Mk 16.14-18; Lk 24.36-49)

¹⁹Pathianni khohloi a nia, Judahai an chi sikin irchutirhai omna mikothai kha an khâr tâka, Jisua a hong, an laia a hong ngîra, an kuang, "Nin chung a irtharngamna om ri se," a tia.

²⁰Kha kha an sîr zoiin chu a kut le a kâng an entirhaia, Rengpa kha an hmu'n chu irchutirhai kha a sân an lôm tâka.

²¹An kuang, "Nin chung a irtharngamna om ri se," a ti nôka. "Pa'n keima a ni itîr ang dênin kei khomin nangni ki tîr a ni," a tia.

²²Kha kha an sîr zoiin chu, "Irtha Irthiang nei roi, tiin an chung a phûk a mût khumhaia.

²³Tu soal khom nin ingaidamhai ka chu ngaidam ni an ta, nin ingaidam loi chu ngaidam ni no nihai," a tia.

Thoma kuanga Jisua inlârna

²⁴Sômhleihnihai laia inkhat, Thoma, (Phîra) an iti kha, Jisua hong laiin an laia om maka.

²⁵Irchutir danghai khan a kuang, "Rengpa kha kin hmu ta kêng," an tia. Ama khan, "A kuta thîr hembêna sabê ki hmua, thîr hembêna sabêhaia ki kut leh ki tôna, a kâng kin them mâka chu iam no ning," a tia.

²⁶Sûn riat hnunga a irchutirhai kha in sînga an om irchun nôka, Thoma khom an laia a om saa, Mikothai kha an kala, khannisianlân Jisua a hong, an laia a hong ngîra, "Nin chung a irtharngamna om ri se," a tia.



²⁷Khan, Thoma kuang khan, “Ni kut pârin hong inthemin lân, ki kuthai en ro; ni kutin hong inbanin lân, ki kâng hi tôn roh; iam loiin om no’n lân iam zôi zel roh,” a tia.

²⁸Thoma’n a sâma, “Ki Rengpa le ki Pathian,” a tia.

²⁹Jisua’n a kuang, “Ni ni hmu sika iam mo ni inih? Hmu loia iamhai chu an râlvân a sa,” a tia.

Hi lekhabu irziakna san

³⁰Jisua’n irchutirhai makunga khan sinirkhêl dang tamtak a thoa, kha kha hi lekhabua irziak ni mah.

³¹Jisua kha Krista Pathian Nâipa a nih ti nin iam theina hrang le nin iam sika khan ama irhminga hringna nin nei theina hranga hihai hi irziak a ni.

Johana 21

Irchutir sarihai kuanga Jisua inlârna

¹Kha zoi hnung chu Jisua kha Tiberi dîla a irchutirhai kuang an lâr nôka, hiang hin an lâr a ni.

²Simon Petera, Thoma (Phîra an iti,) Galili rama Kana khuaa om. Nathanaela, Zebedaia nâipahai inhni, a irchutir inhni danghai an om irchuna.

³Simon Petera khan an kuang, “Nga chel fe hrang ki ni,” a tia. Anni khan, “Keini khom ni kuang zuang sa kin ti,” an tia. An fe suaka, irkuanga an chuang tâka; khannisian kha zâna khan chu ite man mahai.

⁴Khua a hong vârin chu Jisua kha ivadung kôla chiaiphoia a ngîra; khannisianlân, irchutirhai khan Jisua a nih ti inhre mahai.

⁵Jisua’n an kuang, “Nâihaio, ite nin iman loi mo?” a tia. Anni khan, “Man viat ma ung,” tiin an sâma.

⁶Jisua’n an kuang, “Irkuang sîr chang tianga khan lên vôr unglân, man nin ti,” a tia. Khanchu an vôra, nga kha a tam ta hrai sikin kaisua thei ta mahai.



⁷Irchutir, Jisua'n lung a ithung khan Petera kuang, "Rengpa a ni so te," a tia. Simon Petera'n Rengpa a nih ti an hriatin chu puan a sila, (puan boia om a ni sikin) dila khan ar chom thak taka.

⁸Irchutir danghai khan irkuang chin le, lena nga sip kaisua pumin an hong pana. Muang ata hla maka, metar irzakhat vela om an ni.

⁹Muanga an va suakin chu, meihola mei tho, a chung a nga le bai om kha an hmua.

¹⁰Khan, Jisua'n, "Atun hin nin nga man kha hong choi u ta," a tia.

¹¹Khanchu, Simon Petera kha irkuanga a va chuanga, len kha nga lian tak tak sipin muanga a kai suaka, a ringin irzakhat somringa inthum a ni. Khaang dor kha om khom sianlan, len kha chet mah.

¹²Jisua'n an kuanga, "Hong unglan fa ta roi," a tia. Irchutihai laia tukhomin, "Tu mo ni ini?" ti'n irdon ngam mahai. Rengpa a nih ti an inhriat infel sikin.

¹³Jisua kha a fea, bai a laka, an kuang a pekhaia, nga khom khang denin a pekhaia.

¹⁴Kha kha Jisua mithi lai ata a thoinok hnunga an lar voithumna a ni.

Ki belrahai infa ro

¹⁵Khan, an fak zoiin chu Jisua'n Simon Petera kuang, "Simon, Johana napa, hihai nekin nanging lung mo ni ni thung ual?" a tia. Ama khan, "O Rengpa, lung nang ki thung ti nin hriat," a tia. Jisua'n a kuang, "Ki belra tehai infa roh," a tia.

¹⁶A voihninaa khom Jisua'n a kuang, "Simon, Johana napa, nanging lung mo ni ni thung?" a ti noka. Ama khan, "O Rengpa, lung nang ki thung ti nin hriat," a ti noka. Jisua'n, "Ki belrahai enkol roh," a tia.

¹⁷A voithumna khan a kuang, "Simon, Johana napa, nanging lung ni ni thung mo?" a tia. Jisua'n a voithumna'n, "Nanging lung ni ni thung mo?" a ti pe nok sikin, Petera irngai a siat taka. "Rengpa itinring nin hriat, lung nang ki thung ti nin hriat," a tia. Jisua'n a kuang, "Ki belrahai infa roh.



¹⁸“Thudik tak nang ki hril, ni nâiinpang laiin nir siama, ni kong ni khita, ni nuamna tiang tiang ni chai ngaia, ni ulian tika chu ni kut phar ni ta, mi dangin ni kong nang khit pe an ta, ni nuam loina ti tiang nang hruai an ti,” a tia.

¹⁹(Kha thu kha Jisua’n an sîr pena chu, Petera thi lam hrang le Pathian a la ichôiindôm hrang a nih ti irhmutir hrangin kha thu kha a insîr a ni.) Kha kha an sîr zoiin chu Jisua’n a kuang, “Ni zui roh,” a tia.

Jisua le irchutir dang

²⁰Khan, Petera kha a hong irheia, irchutir, Jisua’n lung a ithung, zânbu fâk laia Jisua tiang va kûna, “Rengpa, tu mo nang a chel hrang?” tia irdontu kha a hnunga a hmua.

²¹Ama kha Petera’n a hmu’n chu Jisua kuang, “Rengpa, hi pa hin imo a itho hrang?” a tia.

²²Jisua’n a kuang, “Ki zuang nôk mâka hring mai hrangin nuam khom inlân, imo ni ilo hrang? Ni zui zôi zel roh,” a tia.

²³Khan, kha irchutir kha thi loi hrang angin urênghai laia thu an thang tâka. Khannisianlân, Jisua’n thi no nih ti a kuang a insîr ni mah. “Ki zuang nôk mâka hring mai hrangin nuam khomin lân, imo ni ilo hrang?” a itihna kêng a ni.

²⁴Kha irchutir kha hi thu inhretu le irziaktu hi a nia, a thu inhriatir hi a dik a nih ti ei inhriat.

²⁵Thil dang tamtak Jisua’n a itho a la oma, khahai kha irziak suak zit hrang ang ni sian, lekhabu irziak hrang chu rammuala khom hin inlengin iam ma ung.



Tîrtônhai Sintho

Tîrtônhai Sintho 1

Irtha Irthiang pêk inkung

¹Theofil, ki lekha masaa khan Jisua sintho irphut thu ata irvâna ilâka a om dêna a sintho le a thu irchutir murdi ki'rziak tâka;

²a tîrtôn inthanghai kha Irtha Irthiang hmangin chong a bêhaia, irvân tiang ihruaiin a om nî tena thu kha;

³a thi zoiin a hring nôk tih inhriatna hrangin irhmâi loiin voi tamtak an kuang an lâra, sîn sômminli sîng kha Pathian Ram thu insîrin an lâr ngai.

⁴An laia a om laiin "Jerusalem kha suaksan no roi Pa inkung nangni ki ihril kha lei nghâk roi, a tia.

⁵Johana khan tuiin nangni a baptis ngaia, khannisianlân nangni chu sîn sôtnotea Irtha Irthianga baptis ni nin ti" tiin a hrila.

Jisua irvân a kâina thu

⁶Khan, tîrtônhai kha Jisua leh an irbukkhômin chu, "Rengpa, atûn hin mo Israelhai ram ni inding nôk hrang?" tiin an irdona.

⁷Jisua'n an kuang, "Pa'n a zoro le nikhua, ama ircham chama om hranga a isia chu nangni lei inhriat zât ni mah.

⁸Khannisianlân, Irtha Irthiang nin chung a zuang tung tika sinthotheina la nei nin ti; khanchu, Jerusalema, Judai le Samari ram pumpuihaia kôlkung dênin ki thu inhretuhai nin ini hrang a ni," a tia.

⁹Khan, kha thu kha an sîr zoiin chu an en chian laiin irvâna hruai a nia, sûmin an ihmu phâk loia a lâk irhmang tâka.

¹⁰Khaanga irvâna a kâi an thîr mai laiin mi inhni puan chek sil an kuang an zuang ngîra.

¹¹Kha mihai khan, "Galili mihaio, ithoa mo irvân tiang enin nin ingîr mai? Hi Jisua nin kuang ata irvâna lâkpai hi irvâna a ikâi nin hmu ang takin zuang nôk a ti" an tia.



Juda thûltu inthang thu

¹²Khanchu, tîrtônhai kha oliv tânga irthokin Jerusalema an kîr nôk tâka, kha tâng kha Jerusalem ata kilometer khat vêl a ni.

¹³Khua an lûtin chu an tungna chontan chunginta an kâia; khahai kha Petera, Johana, Jakoba, Andria, Filipa, Thoma, Bartholomaia, Mathaia, Alfaia nâipa Jakoba, Zelota pâla om Simona le Jakoba nâipa Juda hai an ni.

¹⁴An rêng khan nupanghai le Jisua nu Mari le Jisua urêng hai le lungrual takin an chongchai ngai.

¹⁵Sûn tômte hnunga chu, iamtuhai irbukkhômna an neia, an rêngin irzakhat sômhni vêl an ni, khahai laia khan Petera chu a ngîra, an kuang,

¹⁶“Urêng hai, Irtha Irthiangin Jisua cheltuhai hruaitu Juda thu Davida bâia a lei insîr, Pathian Lekha thu kha, a hong itung hrang pial a ni.

¹⁷Ama kha ei laia a kop sa ngaia, ei sinthônaa hin khom dongtum nei hranga inthang sa a ni,” a tia.

¹⁸Ama khan a thilsual thôna manin hmun inkhat a lâka, a tâk thata, a phîng chetin a rîl murdi a suak zita.

¹⁹Kha thu kha Jerusalema om murdi'n an inhriata, kha hmun kha anni chongin “Akeldama” an tia, kha kha “Thisen hmun” tihna a ni.

²⁰Inpâkna hla bua hiang hin irziak a ni. 'A in le loi kha ram sianlân, A sînga tûte om no ri se,' ti le 'A hruaitu nina kha mi dangin chang ri se,' ti hi.

²¹Khanchu, ei Rengpa Jisua leh ei om laia ei laia kop sa ngai,

²²“Baptistu Johana zoro ata irvâna a ni kâisan ni dêna kop ngai, mi inkhat, a thoinôkna nin hriatpuitu hrangin ei inthang suak hrang a ni” a tia.

²³Khanchu, mi inhni, Josefa, Barsaba an iti, (Justa khom an iti sa ngai) le Mathia an inkunga.

²⁴Kha hnung chu an chongchaia, “Rengpa, nang mihriam murdi lungrîl inhretu, hihai hi a tu khôk hi mo ni inthang nin hriattir roh.



²⁵Juda'n ama hmuna a fe theina hranga hi tîrtôn sin a imâk rak hmun thûl hrangin," an tia.

²⁶An inhnia chung a khan tâ an sâna, an tasân chu Mathia chung a chuma, Mathia kha tîrtôn sômhleihnihai laia khan tep sa a ni ta.

Tîrtônhai Sintho 2

Irtha Irthiang zuang tung

¹Pentikos nî a hong tungin chu an rêngin hmun khata an omkhôm zita.

²Khanchu, voikhat rengin irvân ata phâivopui anga irhâi a zuang tung thuta, an toina in kha irhâi khan a zuang sip zita.

³Milei anga om meidôn irsem indarin an hmua, an chung a chuang chita.

⁴An rêngin Irtha Irthiangin an sip zita, Irtha'n a inchongtirhai angin chong dangin an chong tâka.

⁵Irvân hnuai a nam chi tinrêng laia om, Pathian ngaisak Judahai kha Jerusalema an châma.

⁶Kha irhâi kha an inhriattin chu mi tamtak an hong irchuna, an thu'nsâr kha mi tinin mâni chong ang chitin an inhriat sikin an milung sûnga an lei buaia.

⁷Irkhêl an ti tak taka, "En u ta, hi thu'nsâr murdihai hi Galili mi mo ni mahai?"

⁸Itina mo ei rêngin mâni chong ang chitin ei inhriat seng thei ma ni?

⁹Senkhat Parthai mi, Medai mi, Elimatai mihai ei nia; senkhat Mesopotamia rama om, Judai rama om, Kapadokia ram, Ponto le Asia ram,

¹⁰Frugia le Pamfulia ram, Aigupta le Libia rama Kurini khua kôlvêla omhai ei nia; senkhat Rom khua ata hong,

¹¹Judahai le Juda saphun hai ei nia; senkhat Kret chômbung mi le Arab rama mi ei nia; khannisianlân, Pathian sintho roiinpuihai an insâr hi, mâni chong ang chita ei inhriat hi" an tia.

¹²An rêngin a'rngaina lam chang inhre loiin ar khêl an tia, "Hi hi imo a ini ta ngai!" an tia.



¹³Senkhatin chu, an innuisanhaia, “Uain thar an inrui kêng!” an tia.

Pentikos nia Petera thu'nsîr

¹⁴Sômhleikhathai laia Petera kha a ngîra, mipui laia khan inring takin thu an sîra, “Nangni Judai rama mihai le Jerusalema om murdihaio, ki thu'nsîr hi irngai roi.

¹⁵Hihai hi nin iiam angin inrui mahai, zîng dâr kuak vai kêng a la ini.

¹⁶Hi thil hi deipu Joela'n a lei insîr kha a ni:

¹⁷Pathianin, ‘Sûn hnungkhôna chu hi hi la tho ki ti: Mi murdi chung a Irtha la buak ki ta, Nin nâipahai le nin nâinuhaiin ki thu lan sîr an ta, Nin ruathartehaiin inlârna la hmu an ta, Nin tarhaiin irmangin phan an ti.

¹⁸Kha nikhuahaia khan chu ki sinthotuhai, Nupang pasal chung a Irtha buak ki ta, ki thu insîr an ti.

¹⁹Chung tiang irvâna sin irkhêlhai, Hnuai tiang irnênga thilirkhêlhai inhmudir ki ti. Thisen, mei, meikhuhai om a ti;

²⁰Misa inthim a ta, tha thisen chang a ti; Rengpa nikhua roiinpui le poimo tak zuang tung mân.

²¹Khanchu Rengpa irhming irlam murdi'n chu Saninhringin om an ti,” a ti,’ iti kha.

²²Nangni Israel mihaio, irngaitua u ta; nin inhriat chit angin Pathianin Nazaret Jisua hmangin thil roiinpui tak takhai, thilirkhêl hai sinirkhêl hai nin laia ngêt tiin. A mi inkung a nizia a sân an lang infeltir a ni kha te.

²³Ama kha Pathian lei itum lei irêl angin nin kuang pêk a nia. Nangni'n nam dang mihai hmangin krosa nin hembra, nin ithat kha.

²⁴Khannisianlân, Ama kha chu thina ichel sua thei a ni no sikin Pathianin thina ata inzôkin, a kaithoi ta,

²⁵David a khomin a chungchâng hianga a lei insîr kha: 'Ki makunga Rengpa ki hmu mai ngaia, ki kuang a oma, Ite'n nin hnîng thei mah.



- ²⁶Khasikin ki lungrîl a lôma, ki chong khom lômna'n a sipa, ki taksa khomin a sabei ngit a ni.
- ²⁷Ki'rtha mithi khuua mâksan no chi nia, Ni mi irthiang ruak hmon phal no chi ni,
- ²⁸Hringna lam ni nir hmua, Ni hmêl hmu'n lômin sip ta ki ti,' a tia.
- ²⁹Urênghaio, irchibul Davida thu kha hâi takin nangni ki hril, ama kha a thi tâka, an phûma, a thân khom atûn ten ei kôla a la om mai.
- ³⁰Ama kha deipu a nia, ar chihai laia tu mo khat a rêngtoihmun lua hrangin Pathianin a kuang chong an kung ngit ti an hriata.
- ³¹Khan Davida khan Pathianin sônmatona imo a itho hrang ti kha a hmua, khasikin Mesia thoinôk hrang thu kha a insîr a nia, 'Mithi khuua mâksan ni maka; a ruak khom hmon no nia,' ti thu a insir a ni.
- ³²A ni, kha Jisua kha Pathianin a kaithoi nôk tâka, kha thu kha ei rêngin an hriatuhai ei ni.
- ³³Pathian chang tiang chôindôm a ni tâka, Pa kuang ata Irtha Irthiang inkung kha a donga, nin ihmu le nin inhriat hi a thilpêk a zuang ibuak chu a ni hi.
- ³⁴Davida irvâna fe mak e, ama ngeiin 'Rengpa khan ki Rengpa kuang ki chang tiang lei toi mai roh.
- ³⁵Ni râlhai ni ke irnghatnaa, hong sia ki ti,' a itihna kêng.
- ³⁶“Khanchu, Jisua nin ihêmbe kha, Pathianin Rengpaa le Kristaa a siam ngei ti Israel mi tinin inhre ngêt ri sehai” a tia.
- ³⁷Khanchu, kha thu kha an inhriatin chu an lungrîl a sân a tônia, Petera le tîrtôn danghai kuang khan, “Urênghaio, imo kin itho hrang tâk?” an tia.
- ³⁸Petera'n, “Irlat unglân nin sualhai ngaidam a nina hrangin Jisua Krista irhmingin baptisma chang chit roi; khanchu, hi thilpêk, Irtha Irthiang hi, dong nin ti.



³⁹A inkung hi nangni le nin nâihai le ram hla taka mi murdihai hrang le Rengpa ei Pathianin a kuanga a ikoihai hrangin a ni,” a tia.

⁴⁰Thu dang tamtakin a hrilfaa, “Atûn lai mi sualhai ata hi irdîn roi” tiin a ngênhaia.

⁴¹A thu zômhai murdi’n baptisma an changa; kha nî khan mi sângthum vêlin an thop sahai tâka.

⁴²tîrtônhai thu irchutirin irpôlkhôm le bai khoa chongchaiin sathnem irngai takin an oma.

Iamtuhai om dân

⁴³tîrtônhai khan sinirkhêl le thilirkhêl tamtak an tho sikin mi tinin an chihai tâka.

⁴⁴A iamhai murdi chu irpôlkhôm maiin an neinun tinrêng irkopin,

⁴⁵an irchonhai an neinunhai murdi an zuara, an intak lam ang chitin an rênga kuang an sem ngaia.

⁴⁶A nitin milung hmunkhatin tempila an inkhôm ngaia, an in tiang khom raifân tak le milung chuk takin khalâi an ot suam ngai.

⁴⁷Pathian an inpâka, mi murdi lôm lamin an oma. Khan, Rengpa’n a saninhringhai ka chu a nitin an kuang an thoptirhai maia.

Tîrtônhai Sintho 3

Tempil mikot kôla ke’nbâi kutdo indam

¹Chohnung dâr thum chongchai zoro anga khan Petera le Johana kha tempila an hong fea.

²Pa inkhat, a suak lai ata ke’nbâi hi an hong irzôna, Tempila fehai kuang kut lei do hrangin mikot “Enhoi” an iti kôla a nitin an sia ngaia.

³Kha pa khan Petera le Johana tempila lût hrang kha a hmuhaia, kut a lei doa.

⁴Khan Petera le Johana khan an en chiana, Petera khan a kuang, “Ni hong en ta,” a tia.



⁵Khanchu ama khan imo khat dong hrang anga sabeiin a ena,

⁶Khannisianlân Petera'n, "Sum le rângachak ite nei ma ung, nikhomsian, ki ineisun nang pe ki ti. Nazaret Jisua Krista irhmingin ke'n fe ta roh," a tia.

⁷A kut chang tiang a chela, a kaithoia, voikhat rengin a ke le a ke ârtui ruhái kha a hong hrât zôi zel tâka.

⁸Khanchu kha pa kha irchôm zokin a ngîra, ke'n a fe tâka, kea fe'n, irchôma Pathian inpâk pumin Tempila khan a lût sa tâka.

⁹Mipui murdi'n kea a ife le Pathian a inpâk kha an hmu'n chu,

¹⁰Tempil mikot Enhoi kôla kutdo toi ngai kha a nih ti an inhriata, a chungá thil tung kha ar khêl an ti tak taka, a'rngaina lam chang inhre mahai.

Tempila Petera thu'nsîr

¹¹Khan, kutdo khan Petera le Johana kha a la chel mai laiin mipuihai kha Solomona bokrop an itia khan an lei intân irbuka ar khêl an ti tak taka.

¹²Khan, Petera'n mipuihai kuang, "Nangni Israel mihaio, ithoa mo hi hi ar khêl nin iti? Pathian kin ngaisak bîk sika kin sinthotheinaa hi pa hi infetir angin ithoa mo nin ni en mai?"

¹³Abrahama, Isaka le Jakoba Pathian, ei irchibulhai Pathian khan a tîrtôn Jisua kha a ichôiindôm tâk a ni. Ama kha nin incheltira, Pilata'n insua a tum khomin nin sêl ngot kha a ni.

¹⁴Mi Irthiang le Fel tak kha nin hnôla, mi thatpa kha insua pe hrangin nin ngêna.

¹⁵Hringna pêktu kha nin thata, khannisianlân, Pathianin ama kha mithi lai ata a kaithoi tâka, kha thu'nhretuhai kha kin ni.

¹⁶Jisua irhminga sinthotheina le ar hming iamna khan nin ihmu le nin inhriat ngai pa hi an damtir tâka; ama iamna sikin a ni, hi pa hi, nin rênga nin ihmu angin a idam tâk a ni.

¹⁷Khannisianlân, atûn hin urênghaio, nangni le nin hruaituhai khomin Jisua chungá nin sintho kha nin inhriat tak tak loi a nih ti ki inhriat a ni.



¹⁸Pathianin a deipu murdihai hmanga Krista khan a ituang hrang a nih ti a lei insîr kha a zuang itung a ni ta.

¹⁹Khasikin nin sualhai irlat unglân, Pathian tiang hong kîr nôk roi.

²⁰Khanchu Rengpa kuang ata hartharna zoro hong tung a ta, nin ta hranga Mesia a inkung Jisua kha, zuang tîr a ti.

²¹Aniachu, itinrêng siamthar zoro a tung mâka chu irvânin ama kha lan sua no ni; kha siamtharna thu kha Pathianin a deipu irthianghai bâia tianlai ata a insîr tâk kha.

²²Mosia khom khan, “Rengpa nin Pathianin keima anga nin urêng hai laia mi, deipu inkhat nangni inding pe a ti, i khom nin kuanga a insîr murdi chu nin la izôm hrang a ni.

²³Kha deipu thu irngai loi murdi chu ‘Pathian mihai lai ata inhnotsuakin that irhmang hrang a ni’ a iti kha.

²⁴Samuela le a hnunga deipu murdihaiin atûnlai thurchi hi an lei insîr sa ngai a ni.

²⁵“Deipuhai le nin irchibulhai kuanga thuthung a ipêk khom kha nin idong sa tâk a ni. Pathianin Abra-hama kuang, “Ni’rchihai sikin rammuala mi murdi satvur ki ti,” a lei iti ang khan.

²⁶Pathianin a nâi kha an thanga, nin sualhai irheisantir zit hrang le sat nangni vur hrangin nin kuang a zuang itîr masa a ni hi,” a tia.

Tîrtônhai Sintho 4

Petera le Johana Sanhedrin makunga an ngîr

¹Khaanga Petera le Johana’n mipuihai kuang thu an insîr lai khan, Ochaihai kha tempil pulis hruaitupa le Sadukaihai an kuang an hong.

²Jisua thoinôkna thu hrilin mipuihai kha mithi thoinôkna thu an irchutirhai sikin a sân an ning an mur tak taka.

³Khanchu an chelhaia, khohloi tiang a ni sikin a tûk dênin intângna ina an khumhai tâka.



⁴Khannisianlân, an thu irngaituhai laia tamtakin an iam sa tâka, an tam lam chu pasal ulian ringot khom sângringa vêl an ni.

⁵A tûka chu Juda hruaituhai, Upahai, Dân irchutirtuhai Jerusalema an inkhôma.

⁶Kha kha Ochai inlaltak Anna, Kaiafa, Johana, Alexander hai Ochai inlal irchihai leh an inkhôm a ni.

⁷Petera le Johana kha an laia an inngîrtirhaia, “Itina an indam thei ma ni, tu irhmingin mo hi thil hi nin itho,” tiin an irdonhaia.

⁸Khanchu Petera kha Irtha Irthiangin a sipa, an kuang, “Mipui hruaituhai le upahaio,

⁹a vuan hin ke’nbâi indam thua itina indam mo a ini nin ni irdona,

¹⁰nangnihai le Israel mi murdi’n inhre ri sehai; Nazaret Jisua Krista, nin ihembe, Pathianin mithi lai ata a ikaithoi tâk irhming khan indam a nia; atûn hin nin makunga dam vangin a ingîr tâk a ni.

¹¹Jisua hi a ni, Pathian Thu bu’n, ‘Ama hi kêng nangni in sintuhaiin nin inuamloi lung nin ipai kha, a kila lung poimo tak a hong ni ta,’ a tia.

¹²“Tu dang kuang khom saninhringna om mah, irvân hnuiaia mihriam irhming iphua laia ni saninhring thei irhming dang rêng rêng om mahai,” a tia.

¹³Petera le Johana hai an ihâi lam kha an hmua, lekha thiam no le mi’nmôl mai mai an nih ti an inhriattin, a sân a’rkhêl an tia; Jisua kuanga om ngai an nih ti an inhriat ta.

¹⁴Khan, an mi indam, an kuanga ngîr kha an enin ite dem hrang lak om maka.

¹⁵Khanchu Sanhedrin ata kha an insuaktirhai zoiin chu an chonga.

¹⁶“Hi mihai hi itin mo ei ithohai ta hrang? An sinirkhêl tho hi Jerusalema om murdi’n an inhriat tâk hi; eini khomin ei isêl thei loi hi.



¹⁷Aniachu, mi'n an inhriat irzat ual nona hrangin tu kuang khom Jisua irhminga thu'nsîr nôk ta loi hrangin lei insîhai rei," an tia.

¹⁸Khanchu anni kha an koihai nôka, Jisua irhminga thu insîr loi hrangin le irchutirhai ta loi hrangin thu an pêkhaia.

¹⁹Khannisianlân, Petera le Johana'n an kuang, "Pathian mithmua, Pathian thu zôm nêkin nangni thu zôm mo a idik ual, ngaitua roi.

²⁰Keini chu thil kin ihmu le kin inhriat hi insîr loiin om thei ma ung," an tia.

²¹Khan, anni khan a sate'n an insîhaia, an insuahai tâka. An thiltho sika mi murdi'n Pathian an chôindôm sikin hremna zoro'nchum an ihmu loi a ni.

²²Irkhêl taka an indam kha kum sômminli nêka ulian a ni.

lamtuhaiin hâina hrangin an chongchai

²³Petera hai kha an suaka, an rualhai kuang an va fea, Ochai inlalthai le upahaiin an kuang an insîr kha an hrilhai zita.

²⁴An thu irngaituhai khan irrualin inring takin Pathian an insama, "O inlaltak, Nangma, irvân, irnêng, tuikhanglianhai le a sûnga thil om murdi siamtu ni ni;

²⁵Nangma'n Irtha Irthiangin kin irchibulhai ni siahlo Davida bâiin hi thu hi nin sîra, 'Jentailhai ithoa mo an ninginmur? Mipuiin ithoa mo thil chanlamboi an ingaitua?

²⁶Irnêng rênghaiin an irsiam irfôk tâka, Hruaituhai khom a chungchânga an insîr irhlôma, Rengpa le a Krista doi hrang,' tiin.

²⁷"Khaang tak khan hi khuaa hin ni siahlo irthiang, Jisua sahriak ni ipoltu chungka khan, Heroda le Pontia Pilata hai kha Jentailhai, Judahai leh an inthurual tâka.

²⁸Nangin ni lei inkung anga intungtir ni itum kha, hlo inchuktur hrangin an ipungkhôm a ni.

²⁹Rengpa, atûna an ni ikhap lam hi irngai ta, ni thu hril ngam hrangin ni suakhai hi huaisenna ni pe ro.



³⁰Mihai indam hrangin ni sinthotheina inlangin lân, ni siahlo irthiang Jisua irhmingin irsinsianahai le thilirkhêlhai inthotir sa roh,” an tia.

³¹Khaanga an chongchai zoiin chu an omkhômna hmun kha a hong inhnînga, an rêngin Irtha Irthiangin an sipa, hâi takin Pathian thu an hril tâka.

Iamtuhaiin thil an irkopirhlôm

³²Iamtuhai kha milung hmunkhat le lungrîl hmunkhat irputin an oma, an laia tukhomin an thil neihai kha ‘Ki ta bîk a ni,’ ti mahai; itinrêng an irkopirhlôm ta.

³³tîrtônhai khan a sinthotheina lian tak neiin Rengpa Jisua thoinôkna thu an hril ngaia, an rêngin Pathian satvurna an dong senga.

³⁴An laia tukhom irsam om mahai, in mani, ram mani, an ineihai kha an zuara, a man kha an hong chôia.

³⁵tîrtônhai kuang an inhlana, an intak lam ang takin kha sum kha an sem ngai.

³⁶Khan, Josefa, tîrtônhaiin Barnaba an iti (Kha kha “Irtharngamna nâi” tihna a ni) Levia irchi, Kupra chômbuga omtu khom khan,

³⁷ram a neia, a zuara, a man kha hong chôiin tîrtônhai kuang an hlan ta.

Tîrtônhai Sintho 5

Anania le Sappiri

¹Mi inkhat, a’rhming Anania a oma, a dôngma chu Sappiri a ni. Anania’n ram a zuara,

²a man kha a dôngma inhriatpuiin anni ta hrangin an khâia, a chimrip vai hong chôiin tîrtônhai kuang an hong inhlana.

³Khannisianlân Petera’n, “Anani, Irtha Irthiang huangin ram man a chimrip thup hrangin ithoa mo Setana’n ni milunga ircham ni inneitir?”

⁴Ni zuar mâna khom khan ni ta a nia, ni zuar hnunga khom a man chu nir cham tak mo ni ma? Ithoa mo, hianga thil tho hrangin milung nin inchong? Mihriam huang ni itum ni maka, Pathian kêng huang ni itum,” a tia.



⁵Anania'n kha thu kha an hriatin chu an rîl zôi zel tâka, a thi ta. An hriat murdi'n a sân an chi tâka.

⁶Ruathartehai kha hongin, an tuama, irzôn suakin, an phûm ta.

⁷Dârkâr thum zoia chu a dôngma khom thil omzia inhre loiin a hong lûta.

⁸Petera'n a kuang, "Nin hril roh, ram kha hiang dôr vaiin mo nin izuar?" a tia. Sappiri khan, "O! kha dôr khan" a tia.

⁹Petera'n, "Ithoa mo Rengpa Irtha fia tumin nin inthurual? Irngai ta, ni pasal phûmtuhai khom mikot kôl an hong tung nôk tâk so, nang khom nang irzôn suak an ti," a tia.

¹⁰Khanchu irningloiin a ke kôla khan an rîla, a thi zôi zel tâka, ruathartehai kha an hong lûta, ama kha a thiin an hong hmua, an irzôn suaka, a pasal kôla an phûm sa tâka.

¹¹Koiindang mi murdihai le kha thu inhriat murdi'n chu a sân an chi tâka.

Tîrtônhaiin thilirkhêl le sinirkhêl tamtak an tho

¹²Tîrtônhai chu mipui laia thilirkhêl le sinirkhêl tamtak an tho thiaia. An rêngin lungrual takin bokropa an inkhôm ngaia.

¹³An kuanga khan tûte mi dang kop ngam mahaia chu, a sân an irngaisânghai tak tak a ni.

¹⁴Rengpa iamtuhai chu, nupang, pasal, an kuanga kopin an pung thiai mai.

¹⁵Khanchu dam loihai khom kholâihaia an irzôn suaka, zâlhmun haia, puanthâ haia an inzâltirhaia. Petera hong inlôi va inlôi khan ar hlîmin senkhat lua ar hli theina hrangin an iti a ni.

¹⁶Jerusalem kôlvêl ata khomin mi an hongga, dam loihai, ramilhli ichelhai an hruaia, khahai murdi khom kha an hong dam thiai tâka.

Tîrtônhai deng an intheitirhai

¹⁷Khan, Ochai inlaltak le a changpui murdihaiin; Sadukai pâla mihai kha, an hong irthoka; tîrtônhai kha an hnarsa hai tak taka, dengintheitirhai an nuam tâka.



¹⁸Khaang khan, tîrtônhai kha an chelhaia, vântâng intângna ina an khumhai tâka.

¹⁹Khannisianlân, zâna Rengpa itîr vântîrtôn inkhatin intângna in mikot kha a hong inhonga, a hruai suakhaia, an kuang,

²⁰“Fe ta unglân, Tempila va ngîr unglân, mipuihai kuang hi hringna thu le a omzia murdi hi van sîr ta roi,” a tia.

²¹Kha thu kha an inhriatin chu an fe tâka, zînga chu Tempila an lûta, mi an irchutirhai ta. Ochai inlaltak le a chanpuihai khan Israel upahai Sanhedrin-ah mi murdi an koi bukhaia, tîrtônhai kha va hruai hrangin intângna ina mi an tîra.

²²An mi tîrhai kha an va fea, khannisian, intângna ina khan va hmu mahai, an hong kîr nôka,

²³“Intângna in kha sataka irkhârin kin hmua, khannisianlân kin hong inhonga, a sûnga tûte hmu ma ung,” tiin an hong insîra.

²⁴Tempil hruaitu le Ochai inalhaiin an inhriatin chu, “Itina mani ta ngai?” tiin a sân an buai tâka.

²⁵Kha zoro lai khan mi inkhat a hong, an kuang, “Irngai u ta, intângna ina mi nin ikhumhai khan tempila mi an irchutirhai,” a hong tia.

²⁶Khanchu, tempil hruaitu kha a chanpuihai leh an hong tîrtônhai kha nakhrât song loiin an hong hruaihaia, nakhrât an songin chu mipuiin lungin dêng hai an tih ti an chi sikin.

²⁷An hong hruai intunghaiin chu Sanhedrin-ah khan an inngîrtirhaia, Ochai inlaltak khan an kuang,

²⁸“Hi Jisua irhminga thu insîr viat ta loi hrangin thu nangni kin pêka; irngai u ta, nin thu irchutir Jerusalem pumpui nin insip zit tâk hi te; hi mi thina hi keini chung a nin ni intum a ni hi te,” tiin a sâmbhaia.

²⁹Petera le tîrtônhai khan “Mihriam thu nêkin Pathian thu kin izôm hrang a ni.



³⁰Ei irchibulhai Pathian khan, krosa hembea nin ithat tâk Jisua kha, a kaithoi nôk tâka.

³¹Israelhai soal irlettira ngaidam an ni theina hrangin. Ama ngei kha Pathianin rêng le saninhrintu ni hrangin a chang tiang a chôindôm ta.

³²A thu zômtohai kuang Pathian ipêk Irtha Irthiang le keini hi kha thu'nhretuhai kha kin ni," tiin an sâma.

³³Kha an thu kha an inhriatin chu a sân an ning an mur tâka, tîrtônhai kha thatpai an tum tâka.

³⁴Khannisianlân, Farisai inkhat; ar hming Gamaliela, Dân irchutirtu, mi murdi irngaisâng tak kha Sanhedrin-ah khan a ngîra, tîrtônhai kha insuahai viat hrangin enkoltuhai kha a hrila.

³⁵Roirêltuhai kuang khan, "Israel mihaio, hi mihai chungu nin sintho tuma khan irdîn roi.

³⁶Kha mân khan Theuda kha, mi roiinpui tak nia irbe'n a hongu, mi irza minli vêlin an zuia. Ama kha an thata, ama zuituhai murdi kha an indarh zita, ite ni ta mahai.

³⁷Kha zoi hnung chu, irteppui lai khan Galili rama om Juda kha a hong nôka, ama khomin mipui a sân an hnêhaia. Khannisianlân, ama khom an thata, ama zuitu murdi khom an indarh nôk zit sa ta.

³⁸Khasikin, atûn hin nangni ki ti, hi mihai hi tônhai no roi, inomtirhai chian roi. Hi an sintho tum le an sinthohai hi mihriam tho suakna vai a ni'n chu mong nôk zôi a ti.

³⁹Khannisian Pathiana irthoka suak a ni'n chu that theihai no chin ni; Pathian doi hong nina nin ti," a tia.

⁴⁰Khanchu, a thu kha an zôma, tîrtônhai kha an koia, an khaphaia, Jisua irhminga thu'nsîr viat ta loi hrangin thu an pêkhaia, an insuahai tâka.

⁴¹Khanchu Jisua irhming sika mualphoi tuang hranga inruk an ni sikin, lôm takin Sanhedrin ata an suak ta.



⁴²A nitin, Tempila le in tiang “Jisua kha Mesia a ni,” iti insîr le irchutir mong ual mahai.

Tîrtônhai Sintho 6

Upa sarihai inthang thu

¹Kha zoroa khan irchutirhai an pung mai lai khan, a nitin an thil sema khan an meithâihai an uksak ngai no sikin Grik chong hmang ngai Judahai kha Hebrai chong hmang Judahai chung a chiara.

²Sômhleihnihai khan irchutir danghai murdi kha an koi buk zita, “Pathian thuhiril mâksana a nitin sumpuan zêka ei changin chu dik no ni.

³Khanchu, urênghaio, nin laia mi irhming sa, Irtha Irthianga sip, mi pasal sari inthang unglân, an kuang hi sin hi inhlan kin ti.

⁴Keini chu chongchai le thu’nsîrin om kin ti,” an tia.

⁵Kha thu khan mipui murdi an lômtirhaia; khanchu, Stefana, iamtu det tak le Irtha Irthianga sip le Filipa, Prokora, Nikanora, Timona, Parmena, Nikola, Juda saphun, Antiokei khuaa mihai an inthanghaia.

⁶Kha mihai kha tîrtônhai makunga an inngîrtirhaia, tîrtônhai khan an lu chung a kut irnghatin an chongchaia.

⁷Khanchu, Pathian thu chu an darh zêl tâka, Jerusalema irchutir a sân an hong punga, Ochaihai laia mi tamtak khomin Iamna kha an pom sa tâka.

Stefana chel thu

⁸Stefana chu Pathian lungkhamna le sinthotheina’n a sipa, mi laia sinirkhêl le thilirkhêl roiinpui tak a tho ngaia.

⁹Khannisianlân, Kurini khua le Alexandria khua ata Juda senkhat, “Mi’ntâng suak pâl,” Sinagok an itia kop sa ngaihai le Kilikia ram le Asia rama Judahai an hong irpâla, Stefana kha an hong irsêlpuia.

¹⁰A vârna le an sîrtirtu Irtha kha, sêl inhnê thei mahai.

¹¹Khanchu, “Mosia leh Pathian a hril insiat kin inhriat” ti hrangin mi an inphûta.



¹²Mipuihai, upahai le Dân irchutirtuhai kha an inthorhaia, Stefana kha an beia, an chela, Sanhedrin roirêltuhai kuang an hruai zôi tâka.

¹³Inhriatpuitu milak an siama, khahai khan, “Hi pa hin ei Tempil irthiang le ei Dân hi a hrilinsiat ngai.

¹⁴Nazaret Jisua’n ei tempil hi insiat a ta, Mosia Dân ni pêkhai hi indanglamtir zit a ti, a iti kin inhriat a ni,” an tia.

¹⁵Roirêl buala om murdi’n Stefana kha an en chuta, a hmêl kha vântîrtôn hmêl angin an hmua.

Tîrtônhai Sintho 7

Stefana thu’nsîr

¹Ochai inlaltak khan, “Hi thu hi a dik mo?” a tia.

²Khan, Stefana’n, “Ki urêng hai le ka pahaio, irngaitua roi. Ei irchibul Abraham a kha Haran khuaa a om mân, Mesopotamia rama a om lai khan, Roiinpuina Pathian kha a kuang an lâra,

³‘Ni ram le ni sêngsuak hai hi masanhaiin lân, ram nang ki la inhmutirna hrang tiang fe roh,’ a zuang tia.

⁴Khanchu, Kaldai ram ata a suaka, Harana om hmun a siama. A pa thi zoiin chu khataka irthokin atûn nin omna rama hin Pathianin nangni a irthontir a ni.

⁵Pathianin ram lua hrang ite ke sirna hmun khom pe maka; khannisian, Abraham a kha nâi nei loi a ni khomin, ama le ar chihai kuang hi ram hi pêk an kung tâka.

⁶Pathianin hiang hin a ti, ‘Ni’rchihai chu mi rama mikhual la ni an ti, kum irza minli mi suaka omin denginthei ni an ti.

⁷Khannisian suaka siamtu hrang nam chu keima ngeiin la ngaitua ki ta, kha zoi hnunga suak an ta, hi hmuna hin ki sin la tho an ti,’ a tia.



⁸Khanchu, Pathianin Abrahamama kuang sertan thu a thung tâka, khanchu Abrahamama'n Isaka a neia, sîn riat nia a ser a tan pea. Isaka'n Jakoba a neia, Jakoba'n nâipasal, sômhleihnihai kha a neia.

⁹"Khan, irchibulhaiin Josefa kha an hnarsaa, Aigupta ram tiang an zuara; khannisianlân Pathianin a kuang a om,

¹⁰intak a ituang murdi ata kha a sansuak zêl a ni. Aigupta rama rêng Faroa mit hmua mi vâr tak le inditom tak an nitira; Faroa khan Aigupta ram le a sîngkuahai chung a hruaitua a siam tâka.

¹¹Khan, Aigupta le Kanaan ram pumpuia châm a hong tâka, a sîn intak an tuanga; ei irchibulhai khan fâk hrang nei ta mahai.

¹²Jakoba'n Aigupta rama bu a om tih an hriatin chu, ei irchibulhai kha a tîr suakhaia, kha kha an fe phutna masa tak a ni.

¹³An voihni fenaa khan Josefa'n a urêng hai kuang hmêl inhriatna a siama, Faroa khomin Josefa in sîng mihai kha an hriathai tâka.

¹⁴Khanchu, Josefa khan a pa Jakoba le a urêng hai murdi an koitirhaia, an rêngin sôm sari ringa an ni.

¹⁵Jakoba hai kha Aigupta rama an fea, kha rama khan ama le ei irchibulhai kha an thi tâka.

¹⁶An ruak kha Sekem kho dênin an hong irzôna, Abrahamama'n Sekem khuua Harmora nâihai kuanga suma a ilâk thâna khan an phûm tâka.

¹⁷Abrahamama kuang Pathian chonginkung kha a tung hrang zoro anai tika chu ei mihai kha Aigupta-a khan a sîn an punga, an tam tâka.

¹⁸Aigupta rama khan rêng dang, Josefa inhre loi, a hong inlal tâka.

¹⁹Kha pa khan ei irchibulhai kha fing irfia takin a beihaia, ei irchibulhai deng an theitira, an nâitesenhai thi hrangin an paitirhai ngaia.

²⁰Kha zoro lai khan Mosia a zuang suaka, nâitesen inditom tak a nia, an ina tha thum an ompuia.



- 21**An in ata an pai suak zoiin chu Faroa nâinu'n a lâka, a nâi hrangin a don tâka.
- 22**Mosia kha Aigupta rama vârna murdi ar chutira, khanchu, thu insîr thei tak le sinthothei tak a hong ni tâka.
- 23**Mosia kha kum sômminli a ni kum khan, a urêng Israel nâihai kha hro a nangin an hriat tâka.
- 24**A va hro'n chu an laia inkhat kha Aigupta mi'n deng a hong intheitir lai kha a hmua, a sana, dengtheina tuangtu phuba kha a lâka, Aigupta mi kha a that tâka.
- 25**Mosia khan ama kutin Pathianin anni saninzôk a ti, ti a urênghaiin an inhriat mani a tia; khannisianlân, inhre ta mahai.
- 26**A tûka chu mi inhni irsual lai a hong hmua, selhai tumin, 'Irngai u ta, urêngkhat kêng nin ini, ithoa mo nin irsual?' tiin irngei a tuma.
- 27**A pualoi masa pu khan Mosia kha a nampaia, 'Kin chung a hruaitu le roirêltua tu'n mo nang siam?
- 28**Mizâna Aigupta mi ni ithatpai ang khan ni thatpai ni itum ma ni?' a tia.
- 29**Kha thu sika khan Mosia kha a rota, Midian rama a va om tâka, kha khan nâipasal inhni a nei tâka.
- 30**"Khan, kum sômminli a hong ni zoiin Sinai tânga ramchâra chînribuka meichok kêra vâvântîrtôn a kuang an lâra.
- 31**Mosia'n a thil hmu kha ar khêl a ti tak taka; fia tumin a va nâia, Rengpa hnuk irhâiin,
- 32**'Kei hi ni puhai Pathian, Abraham, Isaka, Jakoba hai Pathian kha ki ni' a lei tia. Khanchu Mosia kha a chia, fia ngam ta maka.
- 33**Rengpa khan a kuang, 'Ni kekok kha khek roh, ni ngîrna kha hmun irthiang a ni.



³⁴Aigupta rama ki mihai deng an intheizia ki hmu maia, an khêk irhâi khom kin hriata, anni hruai suak hrangin ki zuang ichum ta a ni. Hong ta, Aigupta rama nang tîr ki ti,' a tia.

³⁵“Kha Mosia ‘hruaitu le roirêltua tu mo nang siam’ tia an isêl kha chînribuka vântîrtôn an laia inlârtu khan a changpuia, Pathianin ama ngei kha hruaitu le sansuaktu ni hrangin a itîr a ni.

³⁶Ama khan anni kha a hruai suaka, Aigupta rama, Tuipui Sena, ramchâra kum sômminli sêng dênin sinirkhêl le thilirkhêlhai tho'n Aigupta ram ata mipuihai a hruai suak tâka.

³⁷Kha Mosia kha Israel nâihai kuang, ‘Pathianin keima angin nin urênghai laia om deipu nangni la siam pe a ti’ titu kha a ni.

³⁸Ama kha a ni ramchâra pungkhôm laia, Sinai tânga ama chongpuitu vântîrtôn laia khom oma, eini ni pe hranga Pathian thu hring latu kha a ni.

³⁹Khannisianlân, ei irchibulhai khan a thu zôm nuam mahaia, an sêla, Aigupta ram tianga kîr nôk an nuama.

⁴⁰Arona kuang, ‘Kin mahruaitu hrangin pathianhai ni siam pe roh, Mosia, Aigupta ram ata ni hruai suaktu lak a thurchi reng inhre ta ma ung’ an tia.

⁴¹Kha hnung chu, khahai khan sehrât irlim an sina, a'rlim kha satakin an biaka, an kut suaka khan an lôm tâka.

⁴²“Khanchu, Pathianin anni kha ar heisanhaia, irvâna ârsihai an biak theina hrangin a rotsanhaia, deipu lekhabua: 'Israel in sêng mihaio, kum sômminli sêngin ramchâra khan irbôlna sa thatin nin inhlân ma ni?

⁴³Moleka puan in le nin pathian Refana ârsi millimhai kha chubai nin mûka, khasikin Babulon khêl tiang nangni intângtir ki ti,' ti irziak ang khan.

⁴⁴Ei puhaiin chu ramchâra khan Pathian omna puan in an neia, Mosia kuang Pathianin siam hrang lam a hril laia, a dûr an entir ang taka siam a ni.



⁴⁵Kha ngêt kha ei irchibul irchihai khomin an nei maia, Pathianin ei puhai makunga Jentailhai an hnot suaka, Josua hai Kanaan ram an lûta khan an lûtpuia, Davida zoro dên khan a om tâka.

⁴⁶Davida khan Pathian changpuina a donga, Jakoba Pathian ta hrangin in sin phalna a ngên tâka.

⁴⁷Khannisianlân, Solomona'n in kha a sin pe tâka.

⁴⁸Aniachu, Anchungtaka kuta sin inhaia om ngai mah, deipu'n:

⁴⁹Rengpa'n, 'Irvân ki toihmun a nia, Irnêng hi ki ke irnghatna a ni. In i ang mo nin ni isin pe hranga, ki'rngamna hmun te khôn mo?

⁵⁰Hi thil murdi hi ki kuta ki isiam a ini loi ma ni?' a ti: tia a insîr ang khan.

⁵¹"Mi pualoihai, sertanloi mi ang, milung le beng ngarhaio; Irtha Irthiang nin doi maia, nin puhai ang dênin nangni khomin nin tho ngaia.

⁵²Nin puhaiin deipuhai laia tu mo deng an inthei loi? Mi fel Tak, hong hranga thu lei hriltuhai kha an thathaia, atûn nangnihai hi, kha Mi fel tak incheltirtu le thatpuhai kha nin ni.

⁵³Nangni hi Pathian Dân, Vântîrtônhai zuang inchoi hmu chaka, zôm loihai nin ni," a tia.

Stefana lunga dêng

⁵⁴Kha thu kha an inhriattin a sân an ninginmurin Stefana chung a an irkam an nôia.

⁵⁵Khannisianlân, Stefana chu Irtha Irthiangin a sipa, irvân tiang a thîr chiana, Pathian roiinpuina le Pathian chang tianga Jisua ngîr a hmua.

⁵⁶"Irngai u ta, irvân irhong ki hmua, Pathian chang tiang Mihriam Nâipa ngîr khom ki hmu," a tia.

⁵⁷Khanchu, inring takin an khêka, an mikuar an hîpa, Stefana kha an hong bei tâka,

⁵⁸khua ata kha an nam suaka, lungin an dêng tâka. Thu'nhretuhai khan an puanhai kha ruatharte inkhat ar hming Saula an iti ke bula khan an sîaa.



⁵⁹Stefana'n "Rengpa Jisua, ki'rtha la roh," tia Rengpa a koi laia lungin an dêng sup supa.

⁶⁰Khûksadelin, inring takin "Rengpa, hi an sintho insual hi inhre pehai mai no roh," a tia. Kha thu kha an sîr zoiin chu a hrang a chat tâka. Saula khomin an ithat kha a pompuihaia.

Tîrtônhai Sintho 8

Paula'n Koiindanghai deng an theitirhai

¹Saula khom khan Stefana thi kha a sa a ti saa. Kha nikhua ata khan Jerusalem-a Koiindang kha deng an theitirhai tâka. Khanchu, tîrtônhai vai no chu Juda le Samari ram kho tina an indarh zit tâka.

²Pathian ngaisak senkhathaiin Stefana kha an phûma, a sân an châ tâka.

³Saula chu Koiindang inboipai tumin in tina a lûta, nupang pasal a kaisuakhaia, intângna ina a khumhai ta.

Samari rama Thurchi Sa hril thu

⁴Khan, iamtu kho tina irthe Khai kha hmun tina an fea, Thurchi Sa an hril thiaia.

⁵Filipa chu Samari khopuia a chuma, an kuang Krista Thu a hrila.

⁶Mipuihaiin Filipa thu'nsîr an inhriata, a sintho irkhêl thohai an hmu'n chu a thu'nsîrhai kha a sân an irngaia.

⁷Ramilhli kha inring taka khêkin mi tamtak sùng ata an hong suaka, zenginthe le ke'nbâi tamtak khom an damtirhaia.

⁸Kha khuaa mihai kha a sân an lôm tak taka.

⁹Kha khuaa khan mi inkhat, Simona an iti, dôi thei a oma. Mi roiinpui tak niin ar bêa, Samari mihai khan a dôi kha ar khêl an ti tak taka.

¹⁰Mi murdi'n, a lian a chînin a thu kha a sân an irngai. "Hi pa hi Pathian sinthotheina 'Roiinpui' an iti kha a ni," an tia.

¹¹A mitphil thu kha zoro sôt tak a'rkhêl an lei ti tâk sikin a thu kha an irngai ngaia.



¹²Khannisian Pathian Ram Thurchi Sa le Jisua Krista irhminga Filipa'n a ihril kha an iam tâkin chu nupang pasalin baptisma an hong chang tâka.

¹³Simona khomin a iam tâka, baptisma a changa, Filipa kha a kop khak ta, thilirkhêl le sinirkhêl roiinpui tak a ithohai kha a hmua, ar khêl a ti tak taka.

¹⁴Jerusalem-a tîrtôn omhai khan Samari kho mihaiin Pathian thu an pom tah ti an inhriatin chu an kuang Petera le Johana an tîra.

¹⁵Anni chu an zu fea, Irtha Irthiang an dong theina hrangin an chongchai pehaia.

¹⁶An laia tukhomin Irtha Irthiang kha la dong mahaia; Rengpa Jisua irhmingin baptisma an ichang vai a la ni.

¹⁷Khanchu, Petera le Johana'n an lu chung a kut an irnghata, Irtha Irthiang an dong tâka.

¹⁸tîrtônhaiin an chung a kut an irnghatin Irtha Irthiang pêk anni ti Simona khan a hmu'n chu,

¹⁹“Hianga sinthotheina hi ni pe roi, tu chung a khom kut ki'rnghatin Irtha Irthiang an dong sa theina hrangin,” tiin an kuang poisa pêk a tuma.

²⁰Khannisianlân, Petera'n a kuang, “Pathian thil manboi pêk hi suma irchôk ni tum sikin, ni sum leh ni pumpuiin irhmang ni ti.

²¹Ni lungrîl irput lam Pathian mit hmua dik maka, hi thila hin kopna le dongtum nei mak che.

²²Aniachu, ni sual hi irletin lân, Rengpa kuang chongchaiin lân, ni ngaituana sual hi nang ngaidam no ni mo.

²³Irzukna lungrîl siat tak ni'rputa, sualin nang a khit khak ti nang kin hriat,” a tia.

²⁴Simona'n, “Ni thil insîrhai chu ite ki chung a zuang tung nona hrangin nangin Rengpa kuang ni ngên pe roi,” a tia.



²⁵Khanchu, Rengpa thu kha an inhriattira an insîr hnung chu Petera le Johana kha Jerusalem tiang an kîr nôk tâka. An kîr pum khan Samari rama kho tamtaka Thurchi Sa an hrila.

Filipa le thainuzel

²⁶Rengpa itîr vântîrtônin Filipa kha a chongpuia, “Thoiin lân, Jerusalem ata Gaza khua zu sun sim tiang ramchâr thengthai tiang khun fe roh,” a tia.

²⁷Khanchu, a thoia, a fe tâka. Khan, Ethiopia rama mi inkhat, an rêngnu Kandaki hnuiaia thainuzel inlaltak tak, a sum murdi enkoltu, Jerusalema Pathian biak hrangin a hong fea;

²⁸a kîr nôk tiang chu tâlia toi pumin deipu Isaia lekhabu a tepa.

²⁹Irtha’n Filipa kuang, “Tâli so va panin lân, va nâi roh,” a tia.

³⁰Khanchu, Filipa kha a van tâna, deipu Isaia lekhabu, thainuzel itep kha, ar ngaia, “Ni itep kha a omzia mo nin hriat?” a tia.

³¹Ama khan, “Tûte’n ni hrilfiah pe loiin itin mo ki inhriat thei hrang?” a tia. Filipa kha a kôla a toia chuang sa hrangin a fiala.

³²Pathian lekha thu irchâng a itep lai kha hi hi a ni: “Belra that hrang angin ama kha an hruaia, Belrate a mul eppu makunga a idâihrek angin ama kha a bâi âng mah,

³³Mualinphoitir a nia, dik loi taka rêl pe a ni, A’rchihai thurchi tu’n mo lan sîr hrang? Rammual ata a hringna an lâk pe tâka,” ti hi.

³⁴Khan, thainuzel khan Filipa kuang “Deipu hin tu thu mo a insîr, ama thu mo, mi dang thu mo? Ni hril ta,” a tia.

³⁵Filipa khan Lekha thu ata insîr phut chu Jisua thurchi a hril tâka.

³⁶Khaanga lampuia an fe lai khan tui omna an tunga, thainuzel khan, “En ta, hi hin tui a om, baptisma ki ichang hrang hi, imo ni khâl?” a tia.

³⁷Filipa khan, “Ni milung murdi’n ni iamin chu baptisma chang thei ni ti,” a tia. Ama khan, ‘Ki iam,’ Jisua Krista chu Pathian Nâipa a ni ki iam,” a tia.



³⁸Khanchu, tâli kha an ngîrtira, Filipa le thainuzel kha an inhni'n tuia khan an chuma; Filipa khan a baptis tâka.

³⁹Tui ata an hong suakin chu, Rengpa irtha'n Filipa chu a lâkpai tâka. Thainuzel khan hmu ta maka; khannisianlân, raifân takin a fe tâka.

⁴⁰Filipa kha Azota khuaa an hmua, Kaisari khua a tung mâka chu kho tina a fe tâka, Thurchi Sa a hril thiaia.

Tîrtônhai Sintho 9

Paula suakintharna

(Tir 22.6-16; 26.12-18)

¹Saula chu Rengpa irchutirhai kha that hrangin a lan sîhai thiaia. Ochai inlal tak kuang a fea,

²Rengpa Lampuia zui mihai, nupang pasal, a ihmu murdi chela Jerusalama, a hong hruai theina hrangin Damaska khuaa Sinagok hruaituhai pêk hrang lekha Ochai inlal tak a va ngêna.

³Damaska pana a fe laiin, a tung vâng tâka, voikhat rengin irvân ata ar hîlin a zuang vâp pe phuta,

⁴irnênga a sakor ata a tâk tâka; "Saula, Saula, ithoa mo deng ni ni inthei?" ti hnuk irhâiin a zuang tia.

⁵Ama khan, "Rengpa, tu mo ni ini?" a tia. Hnukirhâi khan, "Jisua, deng ni intheitirtu kha ki ni;

⁶thoiin lân, kho sînga lûtin lân, ni tho hrang nang lei hril an ti," a tia.

⁷A ifepuihai kha chamai rakin an ngîra, hnukirhâi kha an inhriata chu tûte hmu mahai.

⁸Saula chu a hong thoia, a hong menga, ite hmu thei ta maka; khanchu, a kuta an kaia Damaska-a khan an hruai lûta.

⁹Sûn thum rammual hmu loiin a oma, ite fâkin in mah.

¹⁰Damaska-a khan irchutir inkhat, Anania a oma. Rengpa chu a kuang an lâra, "Anani" a tia. Ama khan, "Rengpa, hi hin ki om," a tia.



¹¹Rengpa khan, “Thoiin lân, lamlian ‘intûn’ an itia khan fe’n lân, Juda ina Tarsa khuaa om Saula zong suak roh. Ama kha a chongchai lai tak a ni,

¹²inlârna’n mi inkhat, Anania a hong lûta, a mit invâr pe nôk hrangin a chung a kut irnghatin a hmua,” a tia.

¹³Anania’n, “Rengpa, kha pa khan Jerusalema ni mi irthianghai a sate’n deng an theitir ti mi tamtakin an hrila.

¹⁴Hi hin khom nir hming irlam murdi chel theina hrangin Ochai inlalthai kuang ata irchamneina a hmua hong kêng a ini,” a tia.

¹⁵Rengpa khan, “Fe chian roh, hi pa hi Jentailhai, rênghai le Israelhai kuang ki’rhming pe lûttu hranga ki mi inkung kêng a ini.

¹⁶Ki’rhming sikin intak i anga irkhêl mo a la ituang hrang, ama lan hretir ki ti,” a tia.

¹⁷Khanchu, Anania chu a chuma, ina khan a va lûta, a chung a kut irnghatin, “Urêng Saula, ni mit a vâc nôk theina hrang le Irtha Irthianga ni sip theina hrangin, ni hongna lampuia ni kuanga inlâr Rengpa Jisua khan ni kuang a ni hong itûr a ni,” a tia.

¹⁸Khanchu, irningloi rengin a mit ata hlip anga om a tâk zôia, a mit a hong vâc nôk tâka. Khanchu, a thoia, baptisma a chang ta.

¹⁹Bu anh a fâka, a hong har nôk tâka. Damaska-a khan irchutirhai kuang idôr sîn ten mani a châma.

Saula’n Damaska-a thu a hril

²⁰Sinagokhaia khan Jisua Pathian Nâipa a nih ti a hril irphut zôi tâka.

²¹A thu’nsîr inhriat murdi’n a sân ar khêl an tia. “Hi mi hi Jerusalema Jisua Irhming irlamtuhai dengintheitirtu kha ni ma mo? Ochai inlalthai kuang hruai hrangin hi Irhming irlamtuhai chel tumin hi hin khom a izuang mo ni ma?” an tia.



²²Saula thu insîra khan mi an hne tîr tîra, Jisua chu Mesia a nih ti fel takin a hrilfiah ngai sikin Damaska-a Judahai kha a sêl indonghaia, an buaitirhai chit ta.

Saula Judahai kuang ata a rel pat

²³Zoro sôt tak hnunga chu Saula that tumin Judahai an chong irhlôma.

²⁴Khannisianlân, ama'n an thiltum kha a lei inhriata. Khan that hrangin kul mikot tina khan a sîn a zânin ama an inruanga.

²⁵Khannisianlân, a irchutirhaiin ama kha an hruaia, zâna kulbang ir-ônga kokin an inthâka.

Saula Jerusalema a fe

²⁶Khan, Saula'n Jerusalem a hong tungin chu irchutirhai laia kop a tuma anni khan irchutir a ni sa tih iam thei mahaia, an rêngin a sîn an chia.

²⁷Khannisianlân, Barnaba khan tîrtônhai kuang a fepuia; lampuia Rengpa a hmua, Rengpa'n ama a ichongpui lam thuhai, Damaska-a Jisua irhminga hâi takin thu a ihril thurchihai a hrilhaia.

²⁸Khanchu, Saula chu Jerusalema khan an laia a om sa tâka. Rengpa irhmingin hâi takin thu a hril ngai.

²⁹Grik chong hmang Judahai kuang thu an sîra, a sêlhaia, anni khan that an lei tum tâka.

³⁰Urênghaiin kha kha an inhriatin Kaisari khuaa an hruaia, Tarsa khuaa an infetir pat tâka.

³¹Judai rama, Galili rama, Samari ram haia, a ram pumpuia koiindang mihai kha lungngam takin an oma, an det tîr tîra, Rengpa chi pumin an om saa, Irtha Irthianga irtharngamin an hong pung tîr tîra.

Ainia indam

³²Petera'n hmun tin ar fang laiin voikhat chu Luda khuaa mi irthianghai a zu hroa.

³³Kha khan mi inkhat, Ainia, zenginthî sika kum riat dên zâlmuna zâl tâk a hmua.



³⁴Petera khan a kuang, “Aini, Jisua Krista’n nang an dam ta, thoiin lân, ni zâlna kha siam infel roh,” a tia. Khanchu, a thoi zôia.

³⁵Luda le Saron phâia om murdihaiin Aini kha an hmua, Rengpa tiang an hong irlet intam ta.

Dorki kaithoi

³⁶Khan, Jopa khuaa irchutir inkhat Tabiti a oma, a Grik irhming chu Dorki a ni, kha kha ‘Sazukilla’ tihna a ni. Thil sa tho le inrianghai changpuina’n a zoro a lei hmang ngai a ni.

³⁷Kha lai khan dam maka, a thi tâka. Tui an irsiltira, chontan chungintaa an inzâltira.

³⁸Luda chu Jopa kho kôla om a nia. Luda khuaa Petera a om ti irchutirhaiin an inhriatin chu, “Lungkham takin hong lat ri se,” tia ngên hrangin a kuang mi inhni an tîra.

³⁹Khanchu, Petera kha a thoia, an pâla khan a fe sa tâka. A va tungin chu chontan chungintaa an hruai kâia, meithâi murdi kha a kôla an ngîra, an chapa. Dorki’n a dam laia songkol le puan diar dang a isiamhai kha inentirin an chapa.

⁴⁰Petera khan an rêngin an suaktirhai zita, khûksadelin a chongchaia ruak tiang a’rheia, “Tabiti, thoi roh,” a tia. Khanchu, Tabiti kha a hong menga, Petera kha a hmua, a hong toi suak tâka.

⁴¹Petera khan an bana, a kaithoia, mi irthianghai le meithâihai kha a koihaia, damin an kuang a hruai tâka.

⁴²Kha kha Jopa kho pumpuiin an inhriata, mi tam takin Rengpa an iam tâka.

⁴³Petera kha Jopa khuaa khan zoro sôt tak, savun siamtu Simona ina a châma.

Tîrtônhai Sintho 10

Petera le Kornelia



- ¹Khan, Kaisari khuaa mi inkhat, Kornelia, Itali sipai pâl an itia sipai irza hruaitu a oma.
- ²Ama kha Pathian ngaisak mi a nia, a in sâng mihai an rêngin Pathian chi mi an ni. Pathian kuang a chongchai mai ngaia.
- ³Sûn khat chu chohnung dâr thuma, fel takin inlârna a hmua, Pathian itîr vântîrtôn inkhat a kuang a hong lûta, “Korneli” a hong tia.
- ⁴Kornelia khan ama kha a en chiana, a chia, “Rengpa, i mani?” a tia. Vântîrtôn khan, “Ni chongchaina le ni thil pêkhai kha Pathianin an hriat chian a ni.
- ⁵Atûn hin Jopa khuaa mi tîrin lân, mi inkhat, Simona, Petera an iti kha inkoitir roh.
- ⁶Ama chu, tuipei kôla, savun siamtu Simona ina a tung,” a tia.
- ⁷A chongpuitu vântîrtôn kha a fe zoi le, Kornelia khan a siahlohai laia mi inhni le sipai inkhat, Pathian irngaisak tak, a tîrtôn ngai bîk laia mi kha a koia.
- ⁸Thil omzia murdi kha a hrila, Jopa khuaa khan a tîr tâka.
- ⁹Khan, a tûk sîn laia, kha mihai khua an tung tôn chu Petera kha chongchai hrangin in chung zôla a luia.
- ¹⁰A sân a phîng a châma, bu nêk a nuama, khannisian nêk hrang an siam lai takin inlârna a hmua.
- ¹¹Irvân irhongin i mani puan lianpa ang kha, a kil minlia thunga irvâna irthokin zuang tâkin a hmua.
- ¹²Kha sûnga khan sa ke minli chi tinrênghai a lôn ngai chi tinrênghai le va chi tinrênghai an hmutira.
- ¹³A kuang hnuk irhâiin, “Peter, thoi roh, thatin lân fa roh,” a tia.
- ¹⁴Petera’n, “Ni mah, Rengpa, irthiang loi le porinche ite fa ngai ma ung,” a tia.



¹⁵Hnuk irhâi voihnina'n, "Pathianin a'rthiang a iti chu nangma'n irthiang mah ti no roh," a ti nôka.

¹⁶Khaang khan, voithum a zuang tia. Kok kha irvân tiang lâkpai a ni nôk tâka.

¹⁷Petera'n a thil hmu kha a'rngaina lam inhre loiin a om lai khan, Kornelia mi târhai kha Simona in kha irdon suakin a mikot kôla an lei ngâra;

¹⁸"Hi hin Petera a tung mo?" tiin an irdona.

¹⁹Petera'n a inlârna hmu kha a ngaitua laiin, Irtha khan a kuang, "Mi inthumin nang an zong.

²⁰Thoiin lân, chum roh, ite lunghla loiin zuihai roh; khahai kha ki hong itârhai an ni," a tia.

²¹Khanchu, Petera kha a suaka, mihai kuang khan, "Nin izong kha ki ni, imo nin ihong nasan?" a tia.

²²Anni khan, "Pathian chi mi, Juda nam murdi'n an inpâk, sipai irza hruaitu fel tak Kornelia chu vântirtôn irthiangin a chongpuia, ni thu'nsîr a'rngai theina hrangin, a ina nangma kha fial hrangin a hrila, keini hi a ni hong itâr a ni," an tia.

²³Kha mihai kha a koi lûthaia, an riaktirhai tâka. A tûka chu Petera chu a thoia, kha mihai kha a zuia, Jopa khuaa iamtu, tuhai mani khom an fe saa.

²⁴A tûk nôka chu Kaisari khuaa an tung tâka, Kornelia khan a urênghai le rual lungthunghai a koi bûmhaia, Petera hai chu an lei ngâk chiana.

²⁵Khan, Petera a lût hrang tôn takin Kornelia'n a lei dona, a ke bula khûksadelin chubai a mûka.

²⁶Petera khan ama kha a kaithoia, "Thoi roh, kei khom mihriam dên kêng ki ini," a tia.

²⁷A kuang thu'nsîr pumin a lûta, mi tamtak irbûmhai kha a va hmua.



²⁸An kuang, “Judahai ta hrangin nam dang, pan hrang le irpôlpui hrangin Juda sakhua’n phal mah ti nangni rengin nin inhriat. Khannisianlân, tûte a’rthiangloi le fâiloi hranga ki bê nona hrangin Pathianin a ni irhmutir a ni.

²⁹Khasikin, a ni hong koi le chu sêl loiin ki ihong a ni. Imo ni ni hong ifialna san?” a tia.

³⁰Kornelia khan, a vuan hin a sîn minlina a ni ta, atûn ang zoro hi chohnung dâr thuma ki chongchai laiin; irngai ta, mi inkhat puan chek sil ki kuang a hong ngîra,

³¹“Korneli! ni chongchaina le ni thilpêkhai Pathianin an hriat mai kêng.

³²Khanchu, Jopa khuaa mi tîrin lân, Simon Petera hong koi roh, ama kha tuikhanglian panga savun siam ngaitu Simona ina a tung,” a tia.

³³Khasikin, ni kuanga mi ki hong itîr zôi zel a ni; ni ihong hi a sa ok. Rengpa’n thu insîr hranga nang a ipêk inhre hrangin atûn hin Pathian mithmu’n kin rêngin kin iom a ni hi,” a tia.

Kornelia ina Petera thu’nsîr

³⁴Petera’n thu an sîra: “Pathianin mi tinrêng ir-ang natin a ni en tih kin hriat infel ta.

³⁵Nam tin laia tukhom ama inhriata, sin fel tak tho murdi chu a pom inruk mi a ni ngai.

³⁶Ama khan irtharngamna Thurchi Sa Jisua Krista, mi tinhai Rengpa bâia insîrin Israelhai an pêltir ti nin inhriat, Jisua chu mi murdi Reng a ni.

³⁷Johana’n baptisma thu a hril zoia Galili rama irphuta Judai ram pumpuia thil hong tung thu kha nin lei inhriat ta.

³⁸Nazaret Jisua chu Pathianin Irtha Irthiang le sinthotheina’n a vurzia kha nin inhriat. Pathian khan a ompui maia, sin sa thoa inzin vêlin Diabola soisak murdihai an damtir thiaia.

³⁹Judai ram le Jerusalema a sintho murdi inhretuhai kin ni, ama kha Krosa hembé’n an ithat a ni.



⁴⁰Khannisian, Pathianin sîn thum nia kaithoia hmu theiin an lârtira.

⁴¹Mi tin hmua chu inlâr mah, Pathianin inhretu hranga a lei inkung keinihai vai hin kin hmu; a thoi nôk hnung khan kin fâkin kin in suam ngai a ni.

⁴²Kha kha tânginsampui hrang le Ama kha mi hring le mithi chung a Roirêltua Pathian inkung kha a nih ti mihai inhriattir hrangin thu a ni ipêk a ni.

⁴³Tukhom, Ama iam tâk chu ar hming sikin a sualhai ngaidamin om a ti, tiin deipu murdihai khomin a Thurchi an insîr ngai,” a tia.

Jentailhaiin Irtha Irthiang an dong

⁴⁴Petera'n kha thu kha an sîr laiin ar ngaitu murdihai chung a khan Irtha Irthiang a hong tung tâka.

⁴⁵Sertanhai laia iamtu Petera hong zuituhaiin chu, Irtha Irthiang thilpêk, Jentailhai kuang a ini kha ar khêl an ti tak taka.

⁴⁶Chong inhriat loiin a thu an insîr le Pathian an inpâk kha an inhriata.

⁴⁷Petera'n, “Hi mihai hi kin idong ang khan Irtha Irthiang an donga, tui hmangin baptisma an ichang kha tu'n mo khap hrang?” a tia.

⁴⁸Khanchu, Jisua Krista irhminga baptisma chang hrang thu a pêka. Kha zoia chu la châm ual hrangin an ngêna.

Tîrtônhai Sintho 11

Petera'n a thurchi Jerusalem Koiindang a hril

¹Judai ram tina tîrtônhai le urêng omhai khan Jentailhai khomin Pathian thu an iam sa ti an inhriat tâka.

²Petera'n Jerusalem a tungin chu, sertanhaiin an lei sêla, a kuang,

³“Sertan loihai a hroa, an kuang bu a nêk ngai,” an tia.

⁴Khannisianlân, Petera'n chu a bula irthokin a rêngin thil hong tunghai kha an sîr pe tâka.

⁵Jopa khuaa ki chongchai laiin, inlârna ki hmua. puan lian tak angin, a kil minlia khitin irvân ata zuang irtûlin ki hmua, ki kôl a ni hong nâia.



⁶Kha khan ki en chiana, sa ke minli chi tinrêng hai, a lôn ngai chi tinhai le va chi tinrêng hai ki hmua.

⁷Hnuk irhâiin ki kuang, “Peter, thatin lân fa roh,” a ni tia.

⁸Khannisianlân, keima’n Rengpa, “Ni mak e!, a’rthiangloi le a fâiloi ite ki bâia lût ngai mah,” ki tia.

⁹Irvân ata hnuk irhâi khan, ‘Pathianin a’rthiangtir tâk chu nangin porinche ti no roh,’ a ni zuang ti nôka.

¹⁰Khaang dên khan voithum a zuang oma, a rêngin irvâna khâipai a ni nôk tâka.

¹¹Kha zoro lai khan mi inthum Kaisari ata ki kuang mi an hong itîrhai kha ki tungna in mikota an lei ngîr chian tâka.

¹²Irtha khan lungirhlâna nei viat loiin anni kha zui hrangin a nin hrila. Hi urêng kiruk khom hin an ni zui saa, Kornelia ina khan kin va lûta.

¹³Khanchu, ama khan ki kuang, a ina vântîrtôn a hmu thu chu a kuang, ‘Jopa khuaa mi tîrin lân, Simon Petera inkoitir roh,

¹⁴ama khan thu nang hril a ta, a thu’nsîr sika khan nang le ni in sîng mi murdi saninhringin om nin ti’ a ti thuhai a ni lei hrila.

¹⁵Thu chu ki hong insîr phuta, Irtha Irthiang chu, a phuta kin chung a zuang itung ang dênin, an chung a zuang tung ta.

¹⁶Rengpa’n, ‘Johana’n tuiin a baptis ngaia, nangni chu Irtha Irthianga baptis ni nin ti’ a itihai kha kin hriat suak nôk ta.

¹⁷Khaang khan, Rengpa Jisua Krista ei iam phut laia thilpêk a ni ipêk a ni ti, a ifel a ni. Khasikin, ‘Keima hi tu mo ki ni, Pathian ikhap tum hi!’ a tia.

¹⁸Hi chong hi an inhriat le chu sêl ta mahaia, “Khaang khan a ni’n chu, Pathianin Jentailhai khom irleta, hring hranga zoro’nchum a ipêk a ni kha te,” tiin Pathian an inpâk ta.

Antiokei khua Koiindang



¹⁹Khan, Stefana an that zoia dengintheina sika inthek indarhai, kha Foiniki rama, Kupra chômbung, Antiokei kho dênin an fe indara Judahai kuang vai no chu tu kuang khom thu hril mahai.

²⁰An laia senkhat chu Kupra chômbunga om le Kurini kho mihai an ni. Kha mihai khan Antiokei an tungin chu Grik mihai kuang khom thu an insîr. Rengpa Jisua Thurchi Sa an hril sa tâk.

²¹Rengpa'n anni kha a changpuihaia, mi tam takin an iama, Rengpa tiang an irhei ta.

²²An thurchi kha Jerusalem khuaa Koiindanghaiin an lei inhriata. Anni khan Barnaba chu Antiokei-a an tîr ta.

²³A zu tungin chu Pathian lungkhamna sintho chu a hmua, a sân a lôma; lamom taka Rengpa chel khak ta hrangin an rêngin an thorhaia.

²⁴Barnaba chu mi satak, Irtha Irthiang le iamnaa sip a ni. Khanchu mi tamtak Rengpa kuang hruai an ni tâka.

²⁵Khan, Barnaba chu Saula zong hrangin Tarsa tiang a fe nôk ta.

²⁶A hong hmu'n chu Antiokei-a a hong hruaia, kum khat ang dôr Koiindang mihai laia an kop saa, mi tamtak an irchutir ngai. Antiokei khuaa hin a ni irchutirhai chu 'Kristian' an itihna masa tak a ni.

²⁷Khâlâi khan Jerusalem ata deipu senkhat Antiokei-a an fea.

²⁸An laia inkhat Agaba chu a ngîra, rammual pumpuia châm irkhêl tak tung a ti, ti Irtha inhriattirin an puanga, kha châm kha Klaudia inlal laiin a tung ta.

²⁹Khanchu, irchutirhai khan an thei lam chitin, Judai rama iamtuhai laia changpuina thon an tuma.

³⁰Kha kha an tho ngeia, upahai laia pe hrangin Barnaba le Saula kuta an thon ta.

Tîrtônhai Sintho 12

Jakoba that thu le Petera intângna ina lût thu



¹Khan, kha zoro lai khan rêng Heroda'n koiindang mihai laia mi senkhat deng an theitir irphuta.

²Jakoba, Johana urêngpa chu, khandaiin a tuk thata.

³Ama kha Judahai an lôm ok ti an hriatin, Petera khom chel a tum nôk thiaia, (Kha kha Bai chol koploi kût zoro a ni.)

⁴Petera chu a chela, intângna ina a khuma, sipai pâl minli, minli lia irsanin an entirhaia. Ferkân kût zoia mipui matona hruai suak a itum a ni.

⁵Petera chu intângna ina a om sînga khan koiindang mihai sathnem irngai takin Pathian kuang an chongchai pea.

Intângna in ata Petera a suak

⁶Heroda'n hruai suak tum hrang zân khan Petera kha sipai inhni kêra, a bâna thîr hruai inhni bunin a ina, a vêngtuhai khom mikot bula an oma, intângna in chu an nghâk chiana.

⁷Irngai ta, Rengpa itîr vântîrtôn inkhat a hong ngîra, intângna in sînga khan vâ a zuang inlang. Vântîrtôn khan Petera dâra an bên inhartira, “Thoi lat roh,” a tia. Thîrhruai khom kha a bân ata a tâk pe tâka.

⁸Vântîrtôn khan, “Irsiamin lân, ni kekok bun roh,” a tia. Khaang khan a tia. Vântîrtôn khan, “Ni songkol inngâkin lân, ni zui roh,” a ti nôka.

⁹Petera khan a zui suak ta. Vântîrtôn sintho chu a tak a nih ti inhre ma, a'rmanga a ihmu ma ni a sôna.

¹⁰Khan, a enkoltu masa tak le inhnina an khêlin chu khopui a lûtna thîr mikot an va tunga, kha mikot kha a bingin ar hong tâka, an fe suaka. Khan, lamlian inkhat an khêlin chu irningloiin vântîrtôn khan Petera kha a mâksan tâka.

¹¹“Khan, Petera kha a hong har le chu, “Rengpa'n vântîrtôn a zuang tîra. Heroda kut ata le Judahai sabeina murdia irthokin a nin zôk ti a dik kin hriat ta,” a tia.

¹²A milung an chong zoiin chu Johana Marka nu Mari ina khan a va fea, kha khan mi tamtak an om irchuna, an lei chongchaia.



¹³Petera khan mikot kha an tôka, dôngmate inkhat, Rodi kha, mikot inhong hrangin a va fea.

¹⁴Petera hnuk irhâi a nih ti an hriatin chu a lôm ta hraia, mikot kha inhong loiin an tân nôka, mikot kôla Petera a ngîr ti thu a va hrilhaia.

¹⁵Anni khan, “Ni invêt ma ni ta,” an lei tia. Ama’n chu, “A dik ta tak kêng? a ti ngita. Anni khan, “Vântîrtôn ni a ti,” an tia.

¹⁶Khannisianlân, Petera khan mikot kha an tôk nôk hena. Mikot an hong inhongin chu ama kha an hmu tâka, a sân ar khêl an ti.

¹⁷Khanchu, dâihrek hrangin kutin a zâphaia; Pathianin intângna in ata a hruai suak lamhai kha a hrilhaia tâka. Khan, “Hi thu hi Jakoba le iamtu danghai van hrilhaia roi,” a tia. Kha hnung chu, a suaka ram danga a fe tâka.

¹⁸Khua a hong vârin chu enkoltu sipaihai kha “Petera kha khôn mo a iom tâk?” tiin a saterengin an buai ta.

¹⁹Heroda khan a zonga, hmu maka, a enkoltuhai kha a ngohaia, thathai hrangin thu a pêkhai ta. Khan, Heroda kha Judai rama irthokin Kaisari khuua a zu fea, kha khan a om ta.

Heroda thi thu

²⁰Heroda chu Tura le Sidon mihai chung a sân a ning an mura. Anni khan Blasta, rêng zâlmun nghâkpu kha rualin an siam baka, inrualin rêng kuang an hong, an ramin rêng rama irthoka fâk nêk an ihmu ngai a ni sikin irngei hrangin an ngêna.

²¹Chongpui hrang nia khan Heroda chu rêng songkol inngâkin rêng toihmuna a toia, an kuang thu an sîra.

²²Mi murdi’n, “Mihriam hnuk irhâi ni mah, Pathian hnuk irhâi kêng,” an tia, an khêka.

²³Ama khan Pathian kuang roinpuina a pêk no sikin Rengpa vântîrtônin voikhat rengin a chela, rûlrukûtin a fâka, a thi ta.

²⁴Pathian thu chu an darh maia, iamtuhai an pung maia.



²⁵Barnaba le Saula'n an sintho an zoiin chu Johana, Marka an itipu kha hruaiin Jerusalem ata an kîr nôk ta.

Tîrtônhai Sintho 13

Barnaba le Saula an inthangna le tîr suak

¹Khan, Antiokei Koiindang mihai laia khan deipuhai le tîrtônhai an oma. Khahai kha Barnaba, Simeona (Nigera, an ti) Kurini mi Lukia, rêng Heroda'n urênga a inei Manaina, Saula hai an nia.

²Bu an ngheia Rengpa an biak suam laiin Irtha Irthiangin, “Barnaba le Saula hi anni ki inkungna san tho hrangin ni'rsentir roi,” a tia.

³Khanchu, bu an ngheia, an chongchaia, an chungu kut an irnghata, an tîr suak ta.

Tîrtônhaiin Kupra chômbunga thu an hril

⁴Khanchu, Irtha Irthiang itîr suakin Selukai khuaa an chuma, khatak ata khan Kupra chômbunga irkuangin an fea.

⁵Salamis khua an tungin chu Judahai Sinagokhaia Pathian thu an hrila. Johan Marka khom anni changpuitu hrangin an hruai sa.

⁶Chômbung kha Pafos khua dênin an irfang suaka. Dôithei, deipu dol, Juda mi inkhat, Bar-Jisua an hmua.

⁷Kha mi kha Ramoptu vâr tak Sergia Paula kuanga om a ni. Kha Ramoptu khan Barnaba le Saula kha chai hrangin a fiala, Pathian thu inhriat a nuama.

⁸Eluma, dôithei (Kha kha Grik chonga a'rhming a ni.) khan Ramoptu kha iamna thu kha in-iam notir a tuma, anni kha a sêlhaia.

⁹Saula, Paula an iti kha, Irtha Irthiangin a sipa, ama kha a en chiana,

¹⁰“Diabola nâipa, satna tinrêng râlpa. Milak tinrêngin ni sipa, zoro tina Pathian thutak hi thu no inchang ni itum ngai a ni.

¹¹Irngai roh, atûn Rengpa kut hi ni ituang hrang a ni; ni mit cho a ta, sun khovâr hmu ta no chi ni,” a tia. Khanchu, sôm le inthimin ama kha a zui zôi zel tâka, a hruai hrang mi zongin a'rvâk a'rvâk thiai tâka.



¹²Khan, Ramoptu khan thil hong om kha a hmua, Rengpa irchutirna thu kha a'rkhêl a ti oka, a iam tâka.

Pisidia rama Antiokei-a Barnaba le Paula thu'nsîr

¹³Paula le a rualhai chu Pafos ata irkuangin an suaka, Pamfulia rama Perga khua an tunga, Johan Marka khan anni kha a'rheisanhaia, Jerusalema a kîr nôk tâka.

¹⁴Perga ata kha Pisidia rama Antiokei khuaa an fe zêla. Sabat niin Sinagoka inkhômin an toi sa.

¹⁵Dân bu le deipu Lekhabu tep zoi chu Sinagok hruaituhai khan mi an tîra, "Urênghaio, nin ni inthorna hrang thu imo nin neiin chu insîr roi," an va tia.

¹⁶Khanchu, Paula chu a ngîra, kutin a zâpa, an sîr tâka. "Nangni Israel mihaio, irngai roi.

¹⁷Hi Israel mihai Pathian hin ei irchibulhai kha a lei inthanga, an mikhualna Aigupta rama an om sâng khan nam roiinpui taka a siama; khatak ata kha a sinthotheina roiinpui tak hmangin a hruai suakhaia.

¹⁸Kum sômminli ramchâra khan an sinthohai kha an en thei maia.

¹⁹Kum irza minli sômringa sûnga khan Kanaan rama nam sari ar hmangtira, an ram khom a mihai a pêk ta.

²⁰"Kha hnunga khan roirêltuhai a pêk zela, deipu Samuela dênin,

²¹Khan, kha hnunga khan rêng an nghia, khang khan, Pathianin Saula, Kisa nâipa, Benamina irchia mi kha kum sômminli sûnga an rêng hrangin a pêkhai ta.

²²Ama kha a hnôl hnunga khan an rêng hrangin Davida a siam ta. Kha chungchâng kha Pathianin hiang hin an sîr. "Davida, Jesaia nâipa, ki lungchuk mi ki hmu ta, ama khan sin hranga ki inuam murdi sin a ti," a tia.

²³Pathianin a lei inkung tâk ang khan, kha irchihai laia irthoka khan Israel mihai Saninhringtu Jisua a zuang intung a ni.



²⁴Jisua'n a sin a phut mân khan, Israel mihai an sual an irleta baptisma an changna hrangin Johana'n thu an sîr pe ngai.

²⁵Khan, Johana'n a sintum a zoi hrang tôn khan mipuihai laia, 'Tu mo a nih ti nin ni iam? Nin inghâktu kha keima hi ni ma ung. Khannisianlân, irngai u ta! Ki hnunga zuang a ti, kei chu a kekok khek hrang luan inruk ma ung,' a tia.

²⁶Urênghai, Abrahama irchihai le nangni Pathian chi mi dang murdihaio, kha saninhringna thu kha ei rênga kuang a zuang itung ta a ni.

²⁷Jerusalema omhai le an roirêltuhaiin ama kha inhre mahaia, Sabat ni rikipin an itep ngai deipuhai thu an inhriat thiam no sikin ama kha thiam no an inchangtira, deipuhai thu kha an tung irkiptir ta a ni.

²⁸Thina hrang dôr a chung a ite a bi an hmu no khomin, that hrangin Pilata kuang an ngêna.

²⁹A thurchi Pathian Thu bu'n a irziak murdi kha a tung zoiin Kros ata an kai suma, tâna an phûm ta.

³⁰Khannisianlân, Pathianin ama kha mithi lai ata a kaithoi nôk tâka.

³¹Galili ram ata Jerusalema ama pâla hmunkhata lei lêng suam ngaihai kuang sîn tamtak sêng an lâr ngaia; kha mihai kha atûn hin Israel mihai kuang a thu inhretuhai an ni.

³²Keini hi chu Thurchi Sa kha hril hrangin kin izuang a ni. Pathianin irchibulhai kuang thu an kunga,

³³eini an irchihai kuanga Jisua kaithoia a hong intung tâk thu hi. Sam inhninaa, 'Nang chu ki nâipa ni ni, A vuan hin ki nâia ki nei ta a ni,' tia irziak ang khan.

³⁴Ramna hmun tâna kîr nôk ta loi hrangin Pathianin ama kha thina irthokin a kaithoi hrangzia thu, hiang hin an sîr: 'Satvurna irthiang le fel Davida kuanga ki inkung kha nang pe ki ti,' tiin.

³⁵Khasikin, hla danga, 'Ni mi irthiang chu tâna ram hrangin phal no chi ni,' a ti sa.



³⁶ Davida'n ama zoro ka chu Pathian nuamlam a sina, kha hnung chu a thia, ar chibulhai leh an phûma, a takpum kha thâna a ram tâk.

³⁷ Pathianin thina irthoka a ikaithoitu kha chu ram mah.

³⁸ Khanchu urênghaio; khasika soal ngaidamna thu nangni kin hong ihril a ni. Mosia Dâna thiam nin chang thei nona murdia khan,

³⁹ Jisua iamtu murdi thiam inchangtir an ni ta. Kha kha Mosia Dânin mi thiam a inchangtir thei loi kha a ni.

⁴⁰ Khasikin, irdîn roi, deipuhai lei iti kha nin chung a tung likna ti:

⁴¹ 'Hmusittuhai, en u ta! ar khêl ti unglân irhmang roi; nin dam sînga sin ki itho hi, mi'n nangni hrilfiah pe khom sian iam viat no chin ni, iti kha,' a tia.

⁴² Khan, Paula le Barnaba kha inkhôm in ata an suakin chu Sabat ni nôka kha thu kha hong insîr nôk hrangin mipuihai khan an fiala.

⁴³ Inkhôm an chîn zoiin chu, Juda mi tamtak le Juda saphun Pathian ngaisak tam takin Paula le Barnaba kha an zuia, an inkhômnaa khan Pathian lungkhamnaa om mai hrangin an inthorhaia.

⁴⁴ Sabat ni nôka chu Rengpa thu irngai hrangin a kho pumpui an hong inkhôma.

⁴⁵ Khannisianlân, Judahaiin mipui an hmu'n chu a sân an hnarsahaia; Paula thu'nsîr kha an sêl irkaltira, an insîr insiata.

⁴⁶ Paula le Barnaba khan hâi takin, "Pathian thu hi nangni kuang hril masa hrang rêng a ni; khannisianlân, nin hnôla, kumtuang hringna nei zel loia nin irngai hnung chu inhre roi, Jentailhai tiang irhei kin ti.

⁴⁷ Khaanga tho hrangin Rengpa'n thu a ni ipêk a ni. 'Jentailhai invâr hrangin nang kin kung, kôlkil dêna mihai Saninhringna hrangin,' ti irziak ang khan," an tia.

⁴⁸ Khanchu, Jentailhai khan kha thu kha an inhriatin chu an lôma, Pathian thu an chôiindôm tâka, kumtuang hringna dong hranga inthang murdihai khan chu an iam tâka.



⁴⁹Rengpa thu kha ram pumpuia khan an darh ta.

⁵⁰Khannisianlân, Judahaiin kho sũaga ulianhai le Pathian ngaisak Jentail nupang mahripomhai an inthorhaia, Paula le Barnaba kha an beihaia, an ram ata an inhnot suakhai tâka.

⁵¹An idemhai inlangna hrangin tirtônhai khan an ke zapha ata vâiphin an hui thâka, Ikoniom khuaa an fe tâka.

⁵²Irchutirhai kha Irtha Irthiangin an sipa, a sân an lôm tâka.

Tirtônhai Sintho 14

Paula le Barnaba Ikoniom khua

¹Khaang dên khan Ikoniom-a khom Judahai Sinagoka tirtônhai kha an inkhôma, an thu'nsîr sikin Juda le Grik tam takin an iama,

²Iam nuamloi Judahai khan Jentailhai an inthorhaia, urêng hai kha an khôkmâktirhaia.

³Khannisian, tirtônhai kha sôt zan an châma, Rengpa thu kha hâi takin an hril ngaia. A lungkhamna thu an hril ngai kha namindetna hrangin Rengpa'n anni hmangin thilirkhêl le sinirkhêl tamtak a thoa.

⁴Kho sũaga mipuihai kha an irsena, senkhatin Judahai an thopa, senkhatin tirtônhai an thopa.

⁵Jentailhai le Judahai chu an roirêltuhai le, dengintheitirhai bita lunga dêng an tum ti,

⁶tirtônhaiin an inhriatin, Lukaoni rama Lustra khua, Derbe khuaa le a vêl ramhaia an rot tâka.

⁷Khahai khoma khan Thurchi Sa an hril thiaia.

Lustra le Derbe

⁸Khan, Lustra-ah khan mi inkhat, ke'nbâi, toi chiana om, a'rzir ata a ke'nbâi, ke'n kal la chôi ngai viat ngai loi mi a oma.

⁹Kha pa khan Paula thu'nsîr kha a'rngai, Paula'n a en chiana, damna hrangin iamna a nei ti an hriatin,



¹⁰inring takin, “Ni ke’n ngîr suak roh,” a tia. Kha pa kha ar chôma, ke’n a fe thei ta.

¹¹Mipuihaiin Paula sintho kha an hmu’n, Lukaoni chongin inring takin, “pathianhai kha mihriam angin ei laia an hong isuak ta a ni hi,” an tia.

¹²Barnaba kha ‘Zeusa’ an tia, Paula thu’nsîrtu tak a ni sikin, ‘Hermaa’ an tia.

¹³An pathian Zeusa tempil kha mikot suaa a oma, kha khan Ochaiin sehrâtchal le pâr inthil hruihai dâi mikota khan an hong chôia; mipuihai leh khan tîrtônhai kuang irbôlna inhlan an tum tâka.

¹⁴tîrtôn Barnaba le Paula’n kha kha an inhriatin chu, an puan an inpot thêra, mipui laia khan an irchôm lûta, an khêka,

¹⁵“Hi hi i hrang mo nin itho? keini khom nangni ang mihriam mai mai kin ni. Hi chanlamboi thilhai hi mâkin, Pathian hring, irvân, irnêng, tuikhanglian le a sînga om murdi siamtu tianga nin hong kop theina hranga Thurchi Sa nangni hong hril kêng kin ini.

¹⁶Pathianin tiana chu mi tin mâni lampui chit hro a phal ngai a ni.

¹⁷Khannisianlân, ama inhriattirna omin thil sa nangni tho pe’n an lang ngêt ngai. Irvân ata rua le chîmuhai a zoro taka nangni a pêk ngaia; fa hrang le nin lungrîla lômna nangni a pêk ngai,” an tia.

¹⁸Kha thu kha insîrin mipuihai chu an kuang irbôlna inhlan loi hrangin an khap thei zâma.

¹⁹Khannisianlân, Antiokei le Ikoniom ata Juda senkhat an hongga, mipuihai kha an hong inhminhaia, Paula chu lungin an dênga, a thi tâk sônin kho sîng ata an kai suaka.

²⁰Khannisian, irchutirhai kha an hong ngîrin a thoia, kho sînga a lût nôk tâka, khan, a tûka chu Barnaba le Derbe-a an fe tâka.

Suria ram Antiokei-a an kîr nôk thu

²¹Kha khuaa khan Thurchi Sa an hrila, irchutir mi tamtak an siam hnungin Lustra-ah an kîra. Ikonioma, Antiokei-haia an fe maia.



²²“Intakna tamtak tuangin Pathian Rama ei ilût hrang a ni,” tiin iamtuhai lungrîl an indettira, iamna kha chel khak hrangin an inthorhaia.

²³Koiindang tina upahai an thangpui thiaia bu ngheiin an chongchaia, an iiam Rengpa kuang an inkoltir maia.

²⁴Pisidia ram chu an irfang suaka, Pamfulia an hong tung nôka.

²⁵Perga khuaa thu an hrila, Atalia khuaa an fea,

²⁶khataka irthokin chu irkuangin Antiokei an tung nôk tâka. Kha hmun kha hi zoroa an sintho an phut hrang laia Pathian lungkhamna kuta ibânga an omna hmun kha a ni.

²⁷An tungin chu koiindang mihai chu an koi bukhaia, Pathianin anni hmanga thil a itho murdi le Jentailhai ta hrang khom Jisua iamna lam ar hong thuhai an hrila.

²⁸Iamtuhai kuang khan zoro sôt tak an châm tâka.

Tîrtônhai Sintho 15

Jerusalem inkhômpui

¹Judai ram ata mi senkhat an hong chuma, “Mosia Dân anga ser nin tan kher no’n chu saninhring ni thei no chin ni,” tiin urênghai kha an hong irchutira.

²Khanchu Paula le Barnaba hai le an irsêl mur mura, an irsunkhak sikin, Paula le Barnaba leh an laia mi senkhat, Jerusalema tîrtônhai le upahai kuang fea kha thu kha insîr hrangin an tia.

³Khanchu, koiindang mihai chu an inthaa, Foiniki ram Samari ram an irfang suaka, khataka urêng omhai kuang, Jentailhaiin Pathian thu an iam tâk thu an insîr thiaia; kha an insîra irthoka khan iamtuhai an lômtir oka.

⁴Jerusalema an hong tungin chu koiindang mihai, tîrtônhai le upahai chu an lei lôma; Pathianin anni hmanga thil a itho murdi an kuang an hrila.

⁵Farisai pâla mi, iamtu senkhat an ngîr suaka, “Jentailhai chu an sertan hrang a nia, Mosia Dân khom zôm hrangin inphût ngit hrang a ni,” an tia.

⁶Kha thu ngaitua hrang khan tîrtônhai le upahai kha an inkhôma.



- ⁷Zoro sôt tak an ngaitua hnungin Petera a ngîra, an kuang, “Urênghaio, Jentailhaiin keima bâi ata Thurchi Sa an inhriata an iamna hrangin Pathianin tiana nin lai ata nin thang kha nin inhriat.
- ⁸Lungrîl inhretu Pathian chu keini a ni ipêk ang dêna an kuanga Irtha Irthiang pêkin Jentailhai a inuam a ni an langtir kha.
- ⁹Eini le anni thiarthâk loiin an iam sikin an sualhai a ngaidam tâka.
- ¹⁰Khasikin, ei irchibulhai le eini ipêl zoi loi puak kha atûna hin iamtuhai chungang inkhop pe tumin i hrangin mo Pathian nin idoi?
- ¹¹Khaang khan ni ma! anni ang dênin eini khom Rengpa Jisua lungkhamna sika saninhring hrang ni’n ei irtûng,” a tia.
- ¹²Khanchu, mipui murdi chu an dâihrek tâka, Barnaba le Paula chu anni hmanga Jentailhai laia thilirkhêl le sinirkhêl Pathianin a ithohai an insîr chu an irngaia.
- ¹³An dâihrek zoi khan Jakoba’n an sîra, “Urênghaio, ki thu hi irngai roi.
- ¹⁴Pathianin ama irhming irput hranga anni laia mi la suak hrangin Jentailhai a zuang hro irphut thu Simona’n an sîr tâka.
- ¹⁵Kha thu le deipuhai thu hi a irtok thap a ni, Pathian thu’n,
- ¹⁶Kha irzoia khan kîr nôk ki ta, Davida omna in chim kha inding nôk ki ti. A siatna ualhai khom siam insa nôk ki ti.
- ¹⁷Mi dang, Jentailhai murdi ki’rhming irputhai khan Rengpa an zongna hrangin, kha kairênghai kha inding ki ti, tiin.
- ¹⁸Rammual irsiang ata hi thu inhre ngaitu Rengpa khan a ti,’ a iti ang khan.
- ¹⁹“Khasikin, ama hi ki ngaitua lam a ni, Jentail, Pathian tianga hong irlethai hi chu inbuai no inlân,
- ²⁰kha nêkin, lekha thonin millim biakna thil irthiang loi fâk mani, irdit mani, sa ise that le thisen fâk mani, mong hrangin ti pehai inlân ki iti a ni.
- ²¹Mosia Dân chu tian ata Sabat ni rikipin Sinagoka an insîr ngai ta,” a tia.

Jentail Kristianhai laia lekha thon



²²Khanchu tîrtônhai, upahai le koiindang pumpuiin, an laia mi inthanga, Paula le Barnaba pâla Antiokei-a infetir an inchuka. An ulian ual inhni Juda, Barsaba an iti le Sila an inthanga.

²³Hiang hin an irziakin an inchôi: “tîrtônhai le upahai le nin urênghai hin, Antiokei-a mihai, Suria rama mihai, le Kilikia rama Jentail urêng omhai kha chubai nangni kin mûk e.

²⁴Kin laia mi senkhat, thu zuang insîrin nangni kha an inbuaia, lungzîng nangni an siam ti kin inhriata; khannisian, an kuang ite thu pe ma ung.

²⁵Khasikin, kin irbûma, milung inrual takin mi inthanga nin laia hong tîr hrangin kin inchuk a ni. Kin rual indit tak Barnaba le Paula pâla kin hong itîr a ni.

²⁶Jisua Krista sin thônaa an hringna phalhai leh hin nin zuang tîr sa kin tia.

²⁷Khaang khan, Juda le Sila kin zu itîr a ni. Hihai hin kin irziak hai hmêl irhmu ngeiin nangni insîr pe an ti.

²⁸Irtha Irthiang le irrualin hi thu kâmom ok loi hi chu puakrik dang siam loi hrangin kin inrual.

²⁹Millim biakna hmê fa no roi, thisen le sa ise that hme fa no unglân, irdit masan sa unglân kin ti, hi thilhai ata nin irkiangin chu nin ta hrangin sa ti, Dam takin,” tiin an irziaka.

³⁰Khanchu an infetir tâka, Antiokei an tunga, mipui an koi buka, lekha thon kha an pêka.

³¹An tep zoiin chu, fûina thu sika khan a sân an lôm tâka.

³²Juda le Sila chu deipu an ni saa, urênghai chu thu tam takin an inthora, an indeta.

³³Sôt tak an châm hnungin, anni tîrtuhai kuang irtharngam taka kîr nôk hrangin iamtuhai khan an inkîrtir tâka.

³⁴Khannisianlân, Sila chu om mai hrang a tuma.



³⁵Paula le Barnaba chu Antiokei-a khan an om chian tâka, mi dang tam takhai leh Rengpa thu an insîra, an irchutirhai ngaia.

Paula le Barnaba an irsen

³⁶Zoro sôt ian hnunga chu Paula'n Barnaba kuang, “Tho! fe nôk ei ta, kho tina Rengpa thu ei insîrna murdia ei urênghai pan ei ta, iamnaa an ngîr hmunhai lei irhmutir rei,” a tia.

³⁷Barnaba'n Johan Marka an laia tuang a nuama,

³⁸Khannisian, Paula'n chu nuam maka, asan chu, Pamfulia ram tena a kîra, an sin a zoipui no sika a ni.

³⁹A sân an irkhala, an irsen tâka; Barnaba'n Johan Marka a hruaia, irkuangin Kupra chômbung tiang an fe tâka,

⁴⁰Paula'n chu Sila an thanga, urênghaiin Rengpa Lungkhamnaa an koltir hnungin an zin suak sa tâka.

⁴¹Suria ram le Kilikia ram chu an irfang suaka, Koiindang mihai kha an indettirhai thiaia.

Tîrtônhai Sintho 16

Timothea'n Paula le Sila a zui

¹Paula'n Derbe le Lustra khom a hro saa, kha khan Kristian inkhat a'rhming Timothea a oma. A nu chu Kristian Juda a nia, a pa chu Grik a ni.

²Lustra le Ikonioma urênghai khan Timothea kha a sân an inpâk.

³Paula'n ama kha hruai hrangin a nuama, kha kôlvêla Judahai khan Timothea pa kha Grik a nih ti an inhriat zita, a ser a tan pea.

⁴Kho tin an irfang malamin, Jerusalema tîrtônhai le upahai thurêl kha an pêk thiai maia, zôm hrangin a hrilhai thiaia.

⁵Khasikin, koiindanghai kha iamna an hrât uala a nitin an pung tîr tîr tâka.

Troas-ah Paula inlârna hmu

⁶Irtha Irthiangin Asia rama thu'nsîr a khap sikin Frugia le Galatia ram an irfanga.



⁷Musia ramri an tungin chu Bithunia rama fe an tuma, khannisian, Jisua Irtha khan phal maka.

⁸Khasikin, Musia ram khêlin Troas-ah an fe tâka.

⁹Khan, kha ni zâna khan Paula'n inlârna'n Makedonia rama mi inkhatin, "Makedonia rama hong kêiin lân, ni hong san roh!" tia ngênin a hmua.

¹⁰Paula'n inlârna hi a hmu zoi le chu, Makedonia rama fe hrangin kin irsiam zel tâka, kha rama mihai laia Thurchi Sa insîr hrangin Pathianin a ni koi sikin.

Filipi khuua Ludi irletna

¹¹Khanchu, Troas-ah irthokin irkuangin kin suaka, Samotraki khuua kin theng thaia, a tûka Neapolis khuua kin fea.

¹²Khataka irthokin Filipi khuua kin fea, kha kha kha Makedonia rama kha inkhat a nia, kha biala khan chu kho kâmom tak a ni. Rom mihai riakbuk a ni. Kha khuua khan sîn tamtak kin châma.

¹³Sabat niin khopui pên tianga ivadung panga, Judahai chongchaina ngai hmun ni hranga kin iiama khan kin fea; kha khan kin toia, nupang irbûmhai laia thu kin insîr.

¹⁴Khahai laia mi ar hming Ludi Thuatira kho mi puan senduk zuar ngai, Pathian chi mi nupang inkhatin kin chong an hriata, khanchu, Paula thu'nsîr kha zôm hrangin Rengpa'n a lungrîl an vâp pea.

¹⁵Ama le a in mihaiin baptisma an chang zoiin chu, "Rengpa iam tak takin nin ni bêin chu ki ina hong tung roi," tiin a ni fial ngita, a nin tûk tâka.

Filipia khuua Paula le Sila Intângna ina an khum

¹⁶Khan, nikho khat chu chongchaina hmuna kin fe laiin suak dôngmate inkhat ramilhli ichel tasân thei hin a ni chongpuia, khanu khan tasân a theina sika khan a puhai sum tamtak a lei pêk ngaia.

¹⁷Khanu khan Paula le keini a ni zuia, "Hi mi, saninhringna lampui nangni hrilhai hi, Anchungtak Pathian suakhai an ni hi," tiin a khêk ngaia.



- ¹⁸Khaang khan, sîn tamtak a tho tena chu Paula milung hoi ta maka, a'rheia, ramilhli kuang khan, "Jisua Krista irhmingin a sînga irthoka suak hrangin thu nang ki pêk," a tia. Mitkhap kârin a suak zôi tâka.
- ¹⁹Khan, a puhai khan an sum hmûna ngai om ta mah ti an inhriat le chu Paula le Sila kha an chela, roirêltuhai kuang bazâr hmuna an kai inlûthaia.
- ²⁰Roirêltuhai kuang an intungin chu, "Hi mihai hi Juda an nia, kin kho sînga buaina an siam ngai.
- ²¹Keini Rom mihai izôm le irthiang loi dân dang an ihril a ni," an tia.
- ²²Mipuihai kha Paula le Sila zêm hrangin an irsiam tâka. Kha hnung chu, roirêltuhai khan Paula le Sila puan an thêr pehaia, khianghrol leh zêm hrangin thu an pêka.
- ²³An zêm bithai hnungin intângna ina an khuma, a nghâktu kuang khan sataka khum khak hrangin thu an pêka.
- ²⁴Khaang khan, intângna in sîngrîl taka a khuma, an kea thing kol an inbuntira.
- ²⁵Zân laitaka chu Paula le Sila chu Pathian kuang an chongchaia, hla an saka, intângna ina mi danghaiin an irngaia.
- ²⁶Khanchu, irningloiin hnîngnupui a hong inhnînga, intângna in lungphûmhai ten khom ar nok zit tâka.
- ²⁷Khanchu, intângna in nghâktu kha a hara, mi'ntânghai kha an irot suak zit mani ta a tia, a khandai a phôia, irthatpai a tuma.
- ²⁸Khannisianlân, Paula khan inring takin a khêka, "Ite irlo no roh, kin rêngin hin kin la om zit hi te," a tia.
- ²⁹Kha zoi le chu meiser a zonga, a'rchôm lûta, ichi le inthing pumin Paula le Sila makunga khan a van boka.
- ³⁰Ama kha pên tiang a hruai suaka, "Puhai, saninhring ki ni theina hrangin imo ki itho hrang?" a tia.



³¹Anni khan, “Rengpa Jisua iamin lân, khanchu saninhring nih ni ti, nangma le ni in sâng mihai le,” an tia.

³²Ama le a ina om murdihai kuang khan Rengpa thu an hril tâka.

³³Kha zân, kha dârkâr lelea khan Paula hai kha a hruaia, an izêmna pophai kha a’rsûk pehaia, an in sâng mi rêngin baptisma an chang zôia.

³⁴Paula le Sila kha a ina a hruaihaia, fa hrang a pêkhaia. Pathian an iam tâk sikin an in sâng pumin a sân an rai a fân tâka.

³⁵A tûk zîng chu roirêltuhaiin, “Kha mihai kha insua ta roh,” ti thupêk inchôitirin enkoltu hril hrangin pulis an tîra.

³⁶Intângna in enkoltu khan an thu kha Paula a hrila, “Roirêltuhai khan nangni insua hrangin mi a hong tîra, atûn hong suak unglân, irtharngam takin fe roi,” a tia.

³⁷Khannisianlân, Paula khan an kuang, “Rom mi kin nia, thiam no chang ni ma unga, vântâng hmuna an ni zêma, intângna ina an ni khuma. Atûn hin inrûkin nin sua an itum mo? Ni viat no ni, anni ngêt honghai sianlân, ni va hruai suak ri sehai,” a tia.

³⁸Pulishai khan kha thu kha roirêltuhai an va hrila. Rom mi an nih ti an inhriatin chu an chi tâka.

³⁹An va fea, thupha an chôia, an hruai suaka, an khua ata suak hrangin an ngên tâka.

⁴⁰Paula le Sila kha intângna in ata an suaka, Ludi ina an fea. Kha khan iamtuhai kha an hmua, irtharngamna an sakhai zoiin chu an mâkhai tâka.

Tîrtônhai Sintho 17

Thesalonika khuaa buaina

¹Khan, Amfipoli le Apolonia an khêla. Thesalonika an tung tâka, khatak khan Judahai Sinagok a oma.

²Paula chu a itho ngai lam angin an khôm saa; Sabat voithum Pathian Lekha thu ata sataka sûtpuin,



³Krista kha thina tuang hrang a nizia le mithi lai ata thoi nôk hrang ngê a nizia hrilfiain an khîk irhmu ngaia. “Hi Jisua, a thurchi nangni kin ihril hi, Krista kha a ni,” a tia.

⁴Khanchu an laia mi senkhatin an iama, Paula le Sila kha an zôm tâka; Pathian ngaisak Grik mi tamtak le mi lian nuhaiin an zui saa.

⁵Judahaiin an hnarsa tak taka, kholâia mi sual om ma maihai kha an bûmhaia, a khopumin an inbuaia, tîrtônhai kha vântâng makunga hruai suak tumin Jasona in an hong rûna.

⁶Khannisian, an hmu no tika chu, Jasona le iamtu senkhathai kha kho sêng hruaituhai kuang an hruaihaia, an khêka, “Hi mihai hin hmun tina buaina an siam ngai! Atûn hin ei khuaa an ihong a ni,

⁷Jasona hin a ina a lei intung ngaia. Hihai hin, a’rhming Jisua, rêng dang a om tiin Kaisara dân an doi ngai,” an tia.

⁸Kha chong kha an inhriatin chu mipuihai le kho sêng hruaituhai an buai tâka.

⁹Kho sêng hruaituhaiin Jasona le a chanpuihai kha an irchôka, an insuahai tâka.

Paula le Sila Beroia kua

¹⁰Khanchu iamtuhaiin kha ni zân ngeiin Paula le Sila kha Beroia khuaa an infetirhai zôia, khan an tungin chu Judai Sinagoka an lûta.

¹¹Khataka mihai kha chu Thesalonika mihai nêkin chu an lungrîl ar hong uala. Thu kha tui takin an irngaia, Paula thu’nsîr kha a dik le dikloi inhriatna hrangin a nitin Pathian Lekhabu an tep ngai.

¹²Khahai laia mi tam takin an iam taa, Grik nupang mahripom tak le pa tamtak khom an iam tâka.

¹³Khannisian, Thesalonika taka Judahai khan, Paula’n Beroia khuaa khom Pathian thu an sîr tih an inhriatin chu kha khan khom an va fea, mipuihai an inthora; an buai nôk tâka.



¹⁴Khanchu, iamtuhaiin tuipui dêna irkuanga fe hrangin Paula kha an tîra, Sila le Timothea chu an la oma.

¹⁵Paula zu thakhai khan Atheni dênin an zu thaka, Sila le Timothea kha irhnot taka a kuang fe hrangin Paula chong bê chôiin an kîr nôk tâka.

Atheni khuua Paula thu'nsîr

¹⁶Khan, Paula'n, Atheni-ah anni kha a lei nghâk laiin kha khuua kha millim sip a nih ti a hmu'n a lungrîl a na pe oka.

¹⁷Khanchu, Sinagoka Judahai le Jentailhai, Pathian biakhai kha a sêl ngai; bazâr hmuna khom khataka omhai ngân chu a nitin a sêl ngaia.

¹⁸Khan, Epikuria mi senkhat le Stoik mi vâi senkhathai leh khom an irdoia. Senkhatin, “Hi hmûr thiampa hin imo insîr a itum?” an tia. Senkhat nôkin chu, “Ram dang Pathian thu a insîr hrang a ni hi te,” an tia. Hianga an itih nasan chu Paula'n Jisua thu le thoi nôk thu an sîr sika a ni.

¹⁹Khanchu, Paula kha an koia, roirêlna Areopagia khan an hruaia; a kuang “Hi irchutirna thar ni insîr ngai hi an hriat kin nuam.

²⁰Ni insîr kin inhriathai hi lan hre ngai ma ung. Khasikin, itina mo a ini an hriat kin nuam,” an tia.

²¹(Atheni kho sîng mi murdi le kho dang mi a zuang iomhai khomin an zoro nei murdi thil thar insîrna le irngainaa hmang an nuama.)

²²Khan, Paula kha roirêlna Areopagia maton taka a ngîra, “Nangni Atheni mihai, lam tinrênga sakho mi tak nin nih ti kin hriat.

²³Nin kho sînga ki lêng malamin chubai nin mûk ngaihai ki ena, maichâm inkhat, “Inhriat loi Pathian ta hrang,” tia irziak ki hmua. Nin inhriat no chubai nin mûk mai ngai kha atûna nangni ki insîr pe hi a ni.

²⁴Pathian, rammual le a sînga thil tinrêng siamtu chu, irnêng le irvân Rengpa a ni sikin kuta sin inhaia om ngai mah.

²⁵Mihriamin ei sem hrang thil ite khom irsam mah. Ama ngei kha tinrêng laia hringna hai, phûksâna hai le thil tinrêng pêktu a ni.



²⁶Rammual pumpuia om hrangin, mi inkhat ata zât tin a siama. An ta hrangin hun bihai a khit pehaia, an omna hranghai a khang pehaia.

²⁷Hi a ithô nasan chu ama an ena, an zonga an hmu lik theina hranga a ni. Khannisian, Pathian khan tûte ni hla ual mah.

²⁸Mi senkhatin an iti angin, 'Ama sikin ei hring, ei ichâng, ei iom a ni.' Nin hla phuahai khomin an iti sa angin, 'Eini khom a nâihai ei ni.' ti hi.

²⁹Khanchu, Pathian irchihai ei ni'n chu, Pathian chu rângachak mani, sumin mani, lung mani, mihriam thiamthei le inkunga songhai ang mani hi niin ei ibe hrang ni mah.

³⁰Pathianin ama ei inhriat no laia khan chu inhre loi om a tho ngaia; khannisianlân, atûn chu ram tina mi murdi irlet hrangin chong a ipêk tâk a ni.

³¹Nikhua a khita, kha nia khan a mi phuntu kha rammuala mi murdihai roi dik takin inrêltir a ti. Kha thu kha chu Pathianin ama kha thina irthoka kaithoiin mi murdi kuang an hriattir ta," a tia.

³²Khan, thina irthoka thoi nôk thu an inhriat le chu senkhatin an innuisana; senkhat nôkin chu, "Hi thu hi ni kuang ata a la'rngai nôk kin nuam," an tia.

³³Khanchu, Paula chu an lai ata a suak tâka.

³⁴Senkhat chu a kuang an thop ngita an iam tâka. Khahai laia senkhat chu, Areopagia roirêltu pâla mi Dionusia le nupang inkhat ar hming Damari le mi danghai leh an ni.

Tîrtônhai Sintho 18

Paula Korinth khuaa

¹Kha zoi chu Paula'n Atheni a suaksana, Korinth khuaa a fe tâka.

²Juda mi inkhat Akuila a hmua, ama kha Ponto rama suak a ni. Rom rêng Klaudia khan Juda murdi Rom khua ata an hnotesuak sikin a dôngma Priskili leh Itali ram ata hong tung phing an ni. An kuang a chaia,



³a sintho ang sin an ni sikin a tungna haia, a sinpui sa ngaia; puan in sin ngai an ni.

⁴Sabat ni rikipin Sinagoka thu an sîra; Judahai le Grikhai kha in-iamtirhai tumin a beihai ngaia.

⁵Sila le Timothea Makedonia ram ata an hong tunga khan Paula chu thuhiril sina ar pêk tâka; Jisua kha Krista a nih ti Judahai kuang a hrilfiah ngai.

⁶Khannisianlân, Judahaiin an doia, an insîrinsiatin chu Paula'n a puan an thika, "Nin thi khomin nangni mophurna a ni ta, kei chu ki'rthiang ta. Atûn chu Jentailhai tiang irhei ta ki ti," a tia.

⁷Khatak ata a fe suaka, mi inkhat Tita Justa ina a lûta, ama kha Pathian ngaisak mi tak a nia; a in khom Sinagok kôla om a ni.

⁸Sinagok hruaitu Krispa le a in sîng mihai murdi'n Rengpa an iama, Korinth khuaa mi tamtakhai khomin an inhriata, an iama, baptisma an chang tâka.

⁹Zân khat chu Paula'n inlârna a hmua, Rengpa khan a kuang, "Chi no roh, dâihrek loiin thu insîr mai roh.

¹⁰Keima ni kuang ki om sikin nang innatir hrangin tûte ni chung a kut tha no nihai, hi khuaa hin mi tamtak ki nei," a tia.

¹¹Paula chu an kuang Pathian thu irchutirin kum khat le tha ruk a om tâka.

¹²Khan, Gallioa, Akaia rama Ramoptu a chang laiin Judahai an inruala, Paula an chela, roirêlna hmuna an hruaia.

¹³"Hi mi hin dân ni loia Pathian biak hrangin mi inthêm inhnê a tum ngai," an tia.

¹⁴Paula chong hrang a ti le, Gallioa khan Judahai laia, "Judahai, hi hi thil dik loi mani a ninole tho'nsual mani lua ni sian chu, irlêk loiin nangni ngaitua pe ki ti.

¹⁵Khannisianlân, thuhai irhminghai le nin dân chungchânga nin buaina thu chian a niin chu, nangni'n ngaitua roi. Kei chu khang thu kha chu irngaitua nuam ma ung," a lei tia.



¹⁶Roirêlna in ata kha an suaktir tâka.

¹⁷Khannisian mi dang murdi chu Sinagok in hruaitu Sosthena chu an chel tâka, roirêlnaa khan an zêma. Kha khom kha Gallioa khan, kha an thil tho kha itea irngai mah,

Paula Antiokei-a a kîr nôkna

¹⁸Paula chu nikho sôt tak a la châma, kha zoi hnunga chu urênghai kha satakin an thâhaia, Suria ram tiang panin irkuangin a fe suak tâka, a kuang Priskili le Akuila khom an fe sa. Paula'n chonginkung a lei nei sikin, Kenkriai khuua a sam a lei ep baka.

¹⁹Khanchu, Efesi an tunga kha khan Priskili le Akuila kha a mâkhaia; ama kha Sinagoka a lûta, Judahai kha thu a la'rtukpuihaia.

²⁰Khanchu, anni khan sôt taka om hrangin an ngêna, khannisian, nuam pehai maka.

²¹Khan, an kuang, fe khomin lân, "Pathian lungdo a ni'n chu nin kuang la hong nôk ki ti," tiin chonghoiin an thâhaia, Efesi-a irthokin irkuangin a fe tâka.

²²Kaisari a tungin chu Jerusalema a fea, Koiindang chubai a mûka; kha hnung chu Antiokei-a a fe tâka.

²³Kha khan sîn tamtak a om hnungin a fe nôka, iamtuhai indet thiaiin Galatia ram le Frugia ram a'rfang suak zit tâka.

Efesi le Korinth-ah Apolova thu'nsîr

²⁴Kha laia khan Juda inkhat a'rhming Apolova, Alexandria suak, Efesi-a a zuanga. Ama chu thu'nsîr thei tak a nia, Pathian Thuhai khom an hriat oka.

²⁵Ama kha Rengpa Lampui thu irchu tâk a nia, lungrîla sathnem irngai tak irveiin Jisua thu an sîr ngaia, dik takin a'rchutir ngaia. Khannisianlân, Johana baptisma thu vai kêng a la inhriat.

²⁶Sinagoka hâi takin thu'nsîr a phuta khan chu, Priskili le Akuila khan a thu'nsîr an inhriatin chu an ina an hruaia, a kuang Pathian Lampui thu dik ualin a hrilfiah pehaia.



²⁷Khan, ama kha Akaia rama fe a tum sikin Efesi-a iamtuhaiin an inthora, ama an lei lômna hrangin Akaia rama iamtuhai laia lekha an irziak pea. A tungin chu Pathian lungkhamna sika iamtu hong changhai ta hrangin changpuitu satak a chang ta.

²⁸Vântâng inhriata Judahai kha a sêl indonga, Pathian Lekha thu hmangin Jisua chu Mesia a nih ti an lang ngaia.

Tîrtônhai Sintho 19

Paula Efesi khuua

¹Apolova kha Korinth khuua a la om laiin, Paula'n chu sak tiang ram hual vêl ar fanga, Efesi a tunga. Kha khan iamtuhai senkhat a hmua,

²ama khan, “Nin iam phuta khan Irtha Irthiang nin dong mo?” a tia. Anni khan, “Irtha Irthiang a om tih lua inhre ma ung,” tiin an sâma.

³Ama khan, khante, i baptisma mo nin ichang?” a tia. Anni khan, “Johana baptisma,” an tia.

⁴Khanchu, Paula'n an kuang, Johana khan mihai kuang, ki hnunga zuang hrangtu Jisua nin la iiam hrang a ni tiin an sualna ata irlet tâkhai kha a ibaptis ngai a ni kha,” a tia.

⁵Kha kha an inhriat le chu Rengpa Jisua irhmingin baptisma an chang tâka.

⁶Khanchu, Paula'n an chung a kut a'rngkata, Irtha Irthiang an dong zôi zel tâka, chong inhriat loihaiin an chonga, Pathian thu an insîr tâka.

⁷An rêngin pasal sômhleihni vêl an ni.

⁸Paula chu Sinagoka lût maiin tha thum chu Pathian Ram thurchi irtukpuiin, inthêm inhnê tumin hâi takin thu an sîr maia.

⁹Khannisianlân, senkhat chu a sân an lei ngara, iam nuam mahaia, mipui makunga Rengpa Lampui thu kha an insîrinsiata. Khasikin, Paula'n anni kha mâkin, iamtuhai kha a hruaia, a nitin zîng dâr sômhleikhata irthokin khohloi dâr minli tena Turana irchûna ina khan thu an sîr irhlômpuihai ngaia.



¹⁰Khaang khan kum hni a thoa, khasikin, Asia rama om murdi, Judahai le Grikhai khomin Rengpa thu an inhriat tâka.

Skeva nâihai thurchi

¹¹Khan, Pathianin Paula kuta thilirkhêl danglam tak an thoa.

¹²Paula'n a lei ihmang ngai hmâihuina le a puan silhai kha dam loihai kuang an chôia, an natnahai a boi pehai ngaia, an sênga ramilhli ten khom an suak ngai.

¹³Khanchu, Judahai, ramilhli inhnot suak tuma irvâk ngaihai khomin Rengpa Jisua irhming an hmanga. Ramilhlihai kuang, "Paula'n a insîr ngai Jisua irhmingin a sêng ata suak hrangin thu nang ki pêk," an tia.

¹⁴Juda Ochai Inlaltak Skeva khan nâipasal sari khaanga tho ngai a neia.

¹⁵Khannisianlân, ramilhli khan an kuang, "Jisua kin hriat, Paula khom kin hriat; nangni rêk hi chu tuhai mo nin ini?" a tia.

¹⁶Khanchu, a sênga ramilhli neitu khan a hong inboa, an hnê zit tâka, kha in ata kha pop iliam le an puan chet chitin an intân zit tâka.

¹⁷Efesi-a om Judahai le Grikhai murdi'n kha thu kha an inhriatin an chi tak taka. Khanchu, Rengpa Jisua irhming an thang ual tâka.

¹⁸Iamtu tamtak an hong, vântâng inhriata an tho'nsualhai an inpuanga.

¹⁹Dôi hmang ngai tamtak khomin an lekhabuhai an hong irchuna, mi tin mit hmua an hal tâka, khan a man an insâpa, sêngringa (50,000) a niin an inhriat.

²⁰Khaang taka khan Rengpa thu an dara, an hnê thiai tâka.

²¹Kha zoiin chu, Paula'n Makedonia ram le Akaia ram irfang zoi baka, Jerusalema fe a tuma. "Kha khan ki fe zoiin chu Rom khua khom hro sa ngêt ki ti," a tia.

²²Khasikin, a changpui ngai mi inhni, Timothea le Erasta kha Makedonia rama a lei tîrhai baka, ama kha Asia rama a la oma.

²³Kha lai vêla khan Rengpa Lampui thu sikin buaina lian tak Efesi-a a oma.



²⁴Mi inkhat ar hming Demetria, sumin Artemis tempil in irlim siam ngai a oma, kha a sin khan a siam thiamhai laia inlâpna lian tak a pêk ngaia.

²⁵Khasikin, ama khan anni kha a koibûmhaia, an sintho anga thohai le; khanchu, an kuang, urênghai, hi sin hi ei irchongna a nih ti nin inhriat.

²⁶Khannisianlân, hi Paula sintho hi nangni khomin nin hmu, nin inhriat, Efesi khuaa vai khom ni loiin Asia ram pumpuia ti hrang dôrin hi mi hin, ‘kuta siam pathianhai hi pathian ni viat mahai,’ tiin mi tamtak an thê inhnê zoi tâka.

²⁷Khasikin, ei sintho hi mi’n ngainêp an ti, ti vai ni loiin, Asia rama mi murdi le rammuala mi’n an ibiak ngai pathiannu Artemis roiinpui khom boi a ti, ti hi ichi a iom a ni,” a tia.

²⁸Kha chong kha mipuihaiin an inhriat le chu an ning an mur tâka, “Efesi khuaa Artemis hi a roiinpui ok,” tiin an khêka.

²⁹Khanchu, a kho pumpui an buai tâka; Gaia le Aristarka, Makedonia rama om, Paula hnungzuihai kha an chela, a pâlin enhoi siamna ina an intânpuihaia.

³⁰Paula’n mipui makunga va ngîr a tuma, khannisianlân, iamtuhaiin phal mahai.

³¹Khan, Asia ram ulian senkhat Paula rualhai an oma, khahai khom khan Paula kha enhoi siamna ina van lang loi hrangin chong an inhriattira.

³²Khan, ar bûmhai an rêngin an buai tâka; mi tam takin an irbûmna bi khom inhre mahai. Khasikin, senkhat thu inkhat an khêkpuia, senkhat thu dang an khêkpuia.

³³Judahaiin chu Alexandara chu mân tiang an nampai sikin, mipui laia senkhat chu ama sika an tia. Alexandara chu dâihrek hrangin kutin an hong zâpa, mipui kuang chu a thiam thu insîr a tuma.

³⁴Khannisianlân, ama kha Juda a nih ti an hriat le chu, dârkâr hni ang dôr, “Efesi-a khuaa Artemis hi roiinpui tak a ni,” ti inzenin an khêk mur mura.



³⁵Khopui lekha irziaktu khan mipuihai an dâihrektir zoiin chu, “Efesi mihaio, Artemis roiinpui tak biak in le a’rlim irthiang irvân ata zuang tâk kha, enkoltu chu Efesi kho mihai hi nin nih ti tu mo om?

³⁶Hi thil hi sêl zoi loi a ni hnungin, nin idâihrek hrang a ni, ngaituah irzom loiin ite nin itho hrang ni mah.

³⁷Hi nin hong hruaihai hi tempil inmok ngai ni mahaia, ei pathian insîrinsiattu lak ni mahai.

³⁸Demetria le a sinthohai khomin tu chung a khom thu’ntak an neiin chu roirêltuhai ei neia, roirêlna in khom a’rhong mai, so son van tung ri se.

³⁹Khan, thu’ntak dang pial nin neiin chu inkhôm ngai dêna ngaitua ni a ti.

⁴⁰A vuana inkhôm sika hin buaina insuahai tiin ni sia an ti, ti hi ichiom a ni. Hi buaina hi a bi boi a ni sikin, tûte lakin a bi insîr thei no nia,” a tia.

⁴¹Kha kha a ti zoiin chu mipuihai kha an chîntir tâka.

Tîrtônhai Sintho 20

Makedonia le Grik rama Paula inzinna

¹Buaina kha a boi hnungin Paula’n irchutirhai a koi buka, an thorhaia, chonghoiin an irsena, Makedonia rama fe hrangin a suak tâka.

²Kha ram kha ar fang suaka, irchutirhai kha a sate’n an thorhai zoiin Grik ram a tung tâka.

³Khatak khan tha thum a om hnungin Suria ram tiang fe hrangin, ar siama; khannisian, Judahaiin that an tum sikin Makedonia ram tiang kîr nôk a tum chian tâka.

⁴Pura nâipa Sopatera, Beroia kho mihai, Thesalonika kho mi Aristarka le Sekunda hai, Derbe kho mi Gaia hai, Timothe hai, Asia rama Tukika hai leh Trofima haiin an zuia.

⁵Khahai kha maton an lei insaa, Troas khuaa anni lei nghâka.

⁶Keini khom bai chol koploi kût zoia Filipi khua ata irkuangin kin suaka, sîn ringa hnunga Troas kin tunga, kha khan sîn sari kin châma.



Paula Troas kua a hrôna hnungkhôn

⁷Khan, Pathianni khohloi bai khoi hranga kin irbûmin, Paula'n a tûka fe a tum sikin zânlai dênin thu an sîr ngita.

⁸In irchuan chunginta chontana kin inkhômnaa khan meiser tamtak a oma.

⁹Khan, ar hming Eutuka, ruatharte inkhat tukvera a toia, a lei inmusua, Paula thu'nsîr kha a sôt ta hrai sika khan in irchuan inthumna ata a zuang tâka, an zu hrûtin chu a thi chian ta.

¹⁰Khannisianlân, Paula a chuma, a zun boa, a zu poma, "Nin charindong no roi, a hrang la chat mah," a tia.

¹¹Khanchu, Paula kha a kêi nôka, bai a khoia, an fâktir tâka, khovâr dênin a chongpui zoiin chu a fe tâka.

¹²Ruatharte pa kha a hong dama in tiang an hruai tâka, an irtha a'rngam tak tak ta.

Troas ata Mileto-a an zinna

¹³Khan, keini chu irkuangin Asso kua panin matona kin lei fe masaa, Paula chu kea hong a tum sikin Asso khuaa irkuanga lei inchuangtir kin tuma, kha kha ama lei inkung lam dân a ni.

¹⁴Asso-a a ni hong phâka, kin inchuangtira; Mitulene kua kin tung tâka.

¹⁵Khataka irthokin irkuang ngêtin kin fe nôka, a tûka Kia kin tung ta. A tûk nôka chu Samo chômbung kin lûta, a tûk nôka chu Mileto kin tung tâka.

¹⁶Khan, Paula'n Asia rama om insôt a nuam no sikin Efesi chu sîn pal a itum pial a ni. Thei a ni photin chu Jerusalema Pentikos nî hmang a tuma, a irhnot a ni.

Efesi upahai laia Paula thu'nsîr

¹⁷Mileto-a irthokin Paula'n Efesi khuaa mi a tîra, koiindang upahai an koitira.

¹⁸A kuang an tungin chu an kuang, Asia ram ki lût ni masa taka nin kuanga ki om kêr ka ki om lam kha nin inhriat.



- ¹⁹Judahaiin an nin ruang sika mit irthi tâk pum le zoro ngar ki chung a hong tunghai tuangin, irngaiintôm takin Rengpa sin ki tho ngai.
- ²⁰Nin ta hranga inlâp hrang ite thup loiin vântâng laia in sînghaia nangni ki hril ngaia, nangni ki'rchutir ngai kha te.
- ²¹Judahai le Griksai kuang khom Pathian tiang an sualna irlet hrang le ei Rengpa Jisua iam hrangin ngûk takin thu ki hril ngai.
- ²²Khan, atûn Irtha Irthiang thu zômin Jerusalema ki ife hrang a ni, kha khan ki chung a imo a itung hrang inhre ma ung.
- ²³Khannisianlân, kho tina, "Intâng ina buaina'n a ni nghâk ti vai hi Irtha Irthiangin a nin hriattir, ki inhriat a ni.
- ²⁴Pathian lungkhamna Thurchi Sa insîr hrang sintum Rengpa Jisua Krista'n a ni ipêk zoina hrangin chu ki hringna khom hi ite'n bê ma ung.
- ²⁵"Khasikin, inhre roi, nin rêngin, Pathian Ram thurchi insîra ki'rvâkna ngaihaia hin atûna irthokin chu ni hmu ta no chin nih ti kin hriat.
- ²⁶Khabana, ar hmang nin om le khom kei chu ki ihul a nih ti a vuan hin nangni kin hriattir.
- ²⁷Pathian thil tum murdi a rêngin nin laia insîr indîn ma ung.
- ²⁸Khasikin, Pathian Koiindang, a Nâipa thina sika ama ta hranga a isiam chung a belrapu chang unglân, nangni le belra pâl Irtha Irthiangin nangni a ikoihai satna hrang zong roi.
- ²⁹Ki hnunga chu inê ichiomhai nin laia hong lût an ta, belra pâlhai kha hôi no nihai tih kin hriat.
- ³⁰Nin laia senkhat mi khomin iamtuhai anni tiang an hruai theina hrangin milak an hril zoro la tung a ti.
- ³¹Khasikin, sîn zân mitrithi tâk puma kum thum dênin mi tin nangni ki irchutir kha inhre maiin irngai zit roi.



³²“Atûn hin Pathian enkolna le a lungkhamna thua nangni ki’rngat; ama khan nangni a siam inlian theia, Pathianin a mihai ta hranga a inkung satvurna kha nangni a pêk thei.

³³Tu tu sum mani, rângachak mani, silkai mani khom irzuk ngai ma ung.

³⁴Ki kut hin keima le ki chanpuihai intakna murdi a tho suak ngai ti nangni rengin nin inhriat.

³⁵Lam tinrênga sintho irnaksongin le Rengpa Jisua’n, ‘Lâk nêkin pêk an lâp ual’ a iti kha inhre mai roi,” a tia.

³⁶Kha thu kha an sîr zoiin chu an rêngin khûksadel pumin, an chongchaia.

³⁷An rêngin an chap tâka, Paula kha an inkuaa, an tum tâka.

³⁸A hmêl an hmu nôk ta no hrang thu Paula’n a insîr pehai kha an milung irngaisiatna bi tak chu a ni. Kha irzoiin chu irkuang dênin an zu thak tâka.

Tîrtônhai Sintho 21

Paula Jerusalema a fe thu

¹Anni kha chong kin bê zoiin chu irkuangin kin suak tâka. Intûn thalin kin fea, Kos kin tunga, a tûka Rodi kin tung nôka, khataka irthokin Patara khuaa kin fe.

²Kha khan irkuang inkhat Foiniki pan hrang kin hmua, kin chuanga kin fe nôk ta.

³Kupra an langna hmun kin phâka, Kupra kha vei tiang mâkin Suria tiang kin pan. Tura chu neinun an insum sikin muanga kin chum.

⁴Kha khan iamtuhai senkhat kin hmua, an kuang sîn sari kin châm. Anni khan Irtha Irthiang inhrilin Paula kha Jerusalema fe loi hrangin an khapa.

⁵Kha zoia chu kin suaka, kin fe’n chu irchutirhai khan an rêngin, an dôngma, an nâihai le kotsua dênin an nin thaa, tuipei kôla khan khûksadelin kin chongchaia.

⁶Chubai kin irmûka, irkuanga kin chuanga, in sîng tiang an kîr nôk tâka.



⁷Tura ata kha irkuangin Tolemai khua kin tunga, urênghai chubai kin mûka, an kuang sîn khat kin châma.

⁸A tûka kin suak nôka, Kaisari khua kin tunga, Thurchi Sa hriltu Filipa ina kin lûta; ama kha upa sarikai laia om kha a ni. A ina kin tung tâka.

⁹Nâi dôngmate irthiang minli a neia, Pathian thu an hril ngai.

¹⁰Nikhua sôt ian kin châma, kin châm sûngin Judai ram ata deipu inkhat Agaba a zuang chuma.

¹¹Kin kuang a zuanga, Paula kongkhit kha a lâka, a ke le a kut ar khita, “Jerusalem Judahaiin hiang hi kongkhit neitu hi khit an ti, Jentailhai kuta pe an ti, Irtha Irthiangin a ti,” a tia.

¹²Kha thu kha kin inhriatin keini le kha khuaa mihai khan Paula kha Jerusalema fe loi hrangin kin ngên khaka.

¹³Paula khan, “Imo nin itina, nin chap nin chapa, bei nin ni indongtira nin dôptir nin itum mo? Rengpa Jisua irhming sika khan Jerusalema khan khit vai mo ki’rhuama, thi khom ki irhuam kêng,” a tia.

¹⁴Inthêm thei a ni no tena chu, ‘Rengpa ircham cham ni ri se,’ kin tia, kin chîn tâka.

¹⁵Kha hnung chu kin irsiama, Jerusalema kin hong fe ta.

¹⁶Kaisaria khuaa irchutir senkhathaiin an ni zuia, kin tungna hrang Nasona ina an ni hruaia; ama kha Kupra chômbunga irchutir masahai laia om a ni.

Paula’n Jakoba a hro

¹⁷Jerusalem kin tungin chu urênghai raifân takin an ni lei lôm a ni.

¹⁸A tûka chu Paula pâlin Jakoba kuang kin chaia, koiindang upa murdi khom an lei oma.

¹⁹Paula’n khahai kha chubai a mûk zoiin a sin thôna hmanga Pathianin Jentailhai laia thil a itho kai chu chipchiar takin a hrila.



²⁰Urênghai khan kha thu kha an inhriatin Pathian an inpâka, Paula kuang khan, “Urêngpa, Judahai laia iamtu an tam tâkzia ni hmua, ei dân irngaiinnat zit an nia.

²¹Nangin Jentailhai laia Juda om murdi kha Mosia dân masana, an nâihai sertan loi hrang le Judahai dân zômloi hrangin nir chutir ngai ti mi insîr an inhriat.

²²Itin mo a ini hrang tâk? Ni zuang tung ti an inhriat ngêt hrang a nia.

²³Khanchu, ni kuang kin thu insîr ang hin tho ro ba chonginkung nei lai pasal minli ei laia an om.

²⁴Kha mihai kha hruaiin lân, irthâr sa’n lân, an sam ep man tum pehai roh. Khanchu, mi murdi’n ni thurchi an inhriat hi milak a ni, nangma ngei khom dân ang takin ni la iom mai kêng a nih ti inhria an ti.

²⁵Jentailhai laia iamtuhai chungchâng thu chu, millim biakna thil fa loi hrang hai mani, sa thisen fa loi hrang hai mani, sa ise that hme fa loi hrang hai mani le irdit mâksan hranga ei thu rêlhai ei thon tâk kha te,” an tia.

²⁶Khanchu, a tûka Paula’n khan mihai kha a hruaia, anni leh khan ar thâr sa tâka. Khan, tempila a lûta, an irthâr zoi hrang ni le an irhmang irkipa irbôlna an hlan pehai zoro hrang ni ochai an hriattira.

Tempila Paula an chel

²⁷Sûn sari a hong phâk vângin Asia rama Judahaiin Paula chu tempila an hmua. Mipui an inphûthaia, Paula kha an chel tâka.

²⁸“Israel mihaio, ni changpui roi. Hi mi hi ei irchibulhai, ei dân hai le irkal lama ram tina mi murdi irchu ngaitu kha a ni, atûn khom khan tempila hin Grik mihai a lûtpuihaia, hi hmun irthiang hi a iporinchetir a ni,” an tia.

²⁹Efesi kho mi Trofima kha khopui ama leh an hmu masa tâk sikin, Paula’n ama kha tempila a hruai lût mani an iti a ni.

³⁰An kho pumin an buai zoi ta, mipui an hong intân sup sup. Paula kha an chela, tempil ata an hnûk suaka, mikothai an khâr zôia.



³¹Ama kha that an tum laiin Jerusalem kho pumpui a buai ti sipai hruaitu inlal takin a len hriata.

³²Kha pa kha sipaihai le sipai irza hruaituhai hruaiin an laia an tâna. Mipui khan sipai hruaitu inlaltak le sipaihai kha an hmu le chu Paula an izêm kha an mong tâka.

³³Sipai hruaitu inlaltak khan a hong nâia, Paula kha a chela, thîrhruî inhni'n an khittira, tu mo a ini, imo a itho ar dona.

³⁴Mipui laia senkhat thu irrualin an khêka, senkhat thu dangin an khêka, buaina sikin a kho mo dik inhre thei maka; Kulpui sînga an hruaitirhai tâka.

³⁵Anni khan kalbi dênin an hruaia, mipuihai an pût hrai sikin sipaihaiin Paula kha an irdona.

³⁶Mipuihai khan, “That roi” tia khêkin an zui sup supa.

Paula'n a thiamna thu an sîr

³⁷Khan, Paula'n Kulpuia an hruai lût hrang lai khan Paula'n sipai hruaitu inlaltak kuang, “Ni kuang thu bâi khat insîr thei ning mo?” a tia. Ama khan, “Grik chong ni ithei ma ni?”

³⁸Khanchu, Aigupta mi inkhat kha mâna buaina insuaka mi that uar, sâng minlihai ramchâra hruai suaktu kha ni ini loi mo?” a tia.

³⁹Paula'n, “Juda, Kilikia rama Tarsa khuaa suak ki ni, kho poimo mi kêng ki ini. Ngaihoi takin mipui laia nin chongtir roh,” a tia.

⁴⁰Phal a hong ni le Paula kha kalbia khan a ngîra, mipui kha dâihrek hrangin kutin a zâphaia, an dâihrek tâka, Hebrai chongin thu an sîr tâka.

Tîrtônhai Sintho 22

¹“Urênghai le pahaio, ki thiamna thu nin kuang ki insîr hi irngai roi,” a tia.

²Hebrai chongin thu an sîr tih an inhriattin chu an dâi nôk uala.

³Khan, Paula'n, “Juda mi, Kilikia rama Tarsa khuaa suak ki ni; khannisianlân, hi khuaa Gamaliela irchutirna hnuaia seilian ki ni. Ei irchibulhai dân kha



ngar taka irchu ki nia, a vuan sũa nangni ang taka hin Pathian tianga irpe mi ki ni.

⁴Hi Lampuia mihai hi thathai hrang dôrin deng kin theitir ngaia, nupang pasal ki chela, intângna ina kin khumtir ngai.

⁵Ochai inlaltak le upa toihai khomin an nin hriatpui. An kuang ata Damaska urêng hai pêk hrang lekha ki lâka, khataka omhai kha hrem hrangin khit puma Jerusalema hruai hrangin ki fe tâka.

Paula'n a suakinthar thu an sîr

(Tir 9.1–19.12-18)

⁶“Khan, ki fea, Damaska ki tung hrangin sũa lai taka, irningloiin irvũana irthokin vũa a saterengin a ni zuang êl phuta.

⁷Khanchu, hnuai kin rũa raka, ‘Saula, Saula! ithoa mo deng ni ni intheitir?’ iti chong kin hriata.

⁸Keiin, ‘Rengpa, tu mo ni ini?’ ki tia. Ama khan ‘Jisua, deng ni intheitirtu,’ a tia.

⁹Khan vũa kha chu an hmua, ki ichongpuitu chong kha chu inhre mahai.

¹⁰Khan keima'n, ‘Rengpa, imo ki isin hrang?’ ki tia. Rengpa'n ki kuang, ‘Thoiin lân, Damaska-a lût roh, kha khan Pathianin thil tinrêng ni isin hranga a lei inkung murdi ihrilin om ni ti,’ a tia.

¹¹Khan, a vũa hrai sika khan ki mit khom a zîng khaka, ki chanpuihai khan kêng Damaska-a khom an ni ihruai lût.

¹²“Mi inkhat, Anania, dân ang taka Pathian bê mi, kha khuua Juda murdihaiin an inpâk kha,

¹³ki kuang a hong, ki kôla a ngũa, ki kuang, ‘Urêng Saula, ni mit hong vũa ri se,’ a ni tia. Khanchu ki hong hmu nôk thei tâka, ama ki hong ena.

¹⁴Ama khan, ‘Ei irchibulhai Pathianin a nuamlam inhriata Mi feltak kha hmua, a hnuk irhũa ngêt inhre hrangin nang an thang ta.

¹⁵Ni thil hmu le inhriat thua khan mi murdi kuang thu'nhretu ni ini hrang a ni.



¹⁶Ir-ial loiin thoiin lân, ar hming sâmin baptisma changin lân, ni sualhai irsunfâi ta roh,' a ni tia.

Paula Jentailhai kuang tîr a ni.

¹⁷“Khan Jerusalema ki kîr nôka tempila ki chongchai laiin inlârna'n,

¹⁸Rengpa ki hmua, ki kuang, 'Irhnotin lân, Jerusalem mapai chian ro; ki thu ni insîr hrang hi an pom no hrang sikin,' a ni tia.

¹⁹“Keiin, 'Rengpa, Sinagok tena lûtin nang a iamtuhai ki zêma, intângna ina kin khumtir ngai kha, anni ngeiin an inhriat.

²⁰Ni thu'nhretu Stefana thisen an insua lai khan, keima khom an laia ki ngîr saa, a sa ki itipuihai kêng, a thattuhai puan diar ki lei enkol,' ki tia.

²¹Ama khan 'Fe roh, hla taka Jentailhai kuang nang ki itîr hrang a ni,' a ni ti tâka,” a tia.

Paula sipai hruaitu inlaltak makunga

²²Kha ten kha an sîra, an irngai tena chu hnuk irhâi inring takin an khêka, “Inboipai roi! thatpai roi! hring inruk ni ma!” an tia.

²³An khêka, an puanhai an hlîka, vâiphin irvân tiang an vôra.

²⁴Sipai hruaitu inlaltak khan Paula chu kulpuia a hruai inlûtira, a chungka khang dôra an ikhêksan kha a hmu suak theina hrangin hruai hruala zêmin indôp hrangin thu a pêka.

²⁵Zêm hranga savun hruai leh an khit zoiin, Paula'n a kôla ngîr sipai irza hruaitu kuang, “Rom mi, thiam no inchangtir khom la ni loia zêm mo a'rthiang,” a tia.

²⁶Sipai irza hruaitu khan inlaltak kuang a fea, “Itin mo ni itho hrang? Hi pa hi Rom mi a lei ini chian kêng,” a tia.

²⁷Sipai hruaitu inlaltak kha a hongka, a kuang, “Rom mi mo ni ini? Ni hril ro” a tia. Paula'n “O, ki ni,” tiin a sâma.

²⁸Ama khan, “Keiin chu Rom mi nina nei hrangin sum tamtak ki ithâm kêng,” a tia, Paula'n chu, “Kei chu Rom mia suak pial ki ni,” a tia.



²⁹Khanchu soisak puma indôp hranghai khan Paula kha an chînsan zoi tâka, sipai hruaitu inlaltak khom khan Rom mi a lei ikhit chian tih a hong inhriatin a sân a chitinrîm tâka.

Paula Sanhedrin-ah a ngîr

³⁰A tûka chu Judahaiin Paula chungu thu imo an nei inhriat infel tumin sipai hruaitu inlaltak khan Paula kha a sûtâ, khanchu Paula kha a hruaia. Ochai inlalhai le Sanhedrin mihai irbuk hrangin thu a pêkhaia. Paula kha an makunga an ngîrtira.

Tîrtônhai Sintho 23

¹Paula'n roirêltuhai kha a hong enin felhaia, "Urênghaio, a vuan sân ten hin Pathian makunga ki om lama ki sia le sa inhriatnaa mani, thei nona ite nei ma ung," a tia.

²Ochai inlaltak Anania khan Paula kôla ngîrhai kuang, "A bái kha inbên pe roi," a tia.

³Paula khan, "Nang, bang innôt invârpa, Pathianin nang inbênna ti, Dân anga mi ngaitua hrangin ni toia, dân no anga mi inbên hrang ni iti mo?" a tia.

⁴A kôla ngîrhai khan, "Ochai inlaltak ni ingo mo?" an tia.

⁵Paula'n, "Ochai inlaltak a nih ti ki inhriat loi a ni, 'Nin nam roirêltu chungu thu saloi insîr no roh,' ti irziak a ni," a tia.

⁶Paula'n senkhat Sadukaihai, senkhat Farisaihai an nih ti an hriata, Sanhedrin-ah khan a khêka, "Urênghaio, kei khom Farisai ki ni, Farisai nâipa khom ki ni. Mithi thoi nôkna a om tûngna thua a roirêlna makunga ki ingîr a ni," a tia.

⁷Kha kha an sîr zoiin chu Farisaihai le Sadukaihai kha an irsêla, Sanhedrin kha an irsen tâka.

⁸Sadukaihai khan, "Thoinôkna zel om mah, vântîrtôn hai, irtha hai khom om mah," an tia. Farisaihai chu kha kha an iama.



⁹Khanchu buaina lian tak a suak tâka, Farisai tianga Dân irchutirtuhai senkhat an ngîra, an san khaka, “Hi pa chung a hin ite thil dik loi hmu ma ung, Irtha’n mani vântîrtônin mani an ichongpui ni a ti,” an tia.

¹⁰An irsêl ta hrai sikin, sipai hruaitu inlaltak khan Paula kha an inpot chit itinin tiin, zu fea, an lai ata Paula la suaka, Kulpuia hruai hrangin sipaihai thu a pêkhaia.

¹¹Kha zân khan Rengpa kha Paula kôla a ngîra, “Hâi takin om roh; Jerusalema ki thu ni ihril ang takin Rom khuuaa khom ni ihril hrang a ni,” a tia.

Judahaiin Paula an inruang

¹²A tûk zînga chu Judahai chu Paula inruangin an irbuka, an that mâka chu ite fâka in loi hrangin khomâk an irsâma.

¹³Khaanga inruangtuhai kha sômminli nêka tam an ni.

¹⁴Ochai inlalahai le upahai kuang an fea, “Paula kin that mâka chu ite fa loi hrangin khomâk kin irsâm zit a ni.

¹⁵Khasikin, atûn nangni le roirêltuhaiin a thu fel nôk uala ngaitua tum angin Paula kha nin kuang hruai insum hrangin sipai hruaitu inlaltak kuang hong hril roi; a zuang chum zoi mâna that hrangin kin irsiam diam tâk a ni,” an tia.

¹⁶Khannisianlân, Paula farnu nâipa’n that tuma an lei inruang hrang thu kha a lei inhriata, a hong fea, kulpui sînga a lûta, Paula a hril tâka.

¹⁷Paula khan sipai irza hruaitu laia inkhat a koia, “Hi ruatharte hin sipai hruaitu inlaltak kuang hruai roh; a kuang, thu imo khat insîr hrang a nei,” a tia.

¹⁸Khanchu, sipai hruaitu inlaltak kuanga khan a va hruaia, “Mi intâng, Paula khan a ni koia, hi ruatharte hi ni kuanga hong hruai hrangin a ni ngêna, ni kuang imo khat insîr hrang a inei ni a ti,” a tia.

¹⁹Sipai hruaitu inlaltak khan a kuta a chela, a hruaia, inrûkin, “Imo ni hril hrang ni inei?” a tia.



²⁰Ama khan, “Paula thu fel nôk uala ngaitua hrang angin nangtûk Sanhedrin makunga hruai insum hrangin Judahaiin nang ngên hrangin an inruai.

²¹Khannisianlân, an thu le’rngai no roh. An laia mi sômmimli nêka tamin an inruang chian, khahai khan an that mâka chu, ite fâk nêk zong loi hrangin khomâk an irsâm. Atûn hin ni thu nghâkin irsiamsaiin an iom chian a ni,” a tia.

²²Sipai hruaitu inlaltak khan ruatharte pa kha an fetir tâka, “Hi thu hi ni nin hril ti, tûte kuang insîr no roh,” tiin a khapa. Khanchu ruathartepa kha an suaktir tâka.

Ramoptu Felika kuang Paula an fetir

²³Sipai hruaitu inlaltakin, sipai irza hruaitu inhni a koihaia, “Kaisaria a vuan zân dâr kuaka fe hrangin sipai irzahni le sakor chung a chuang mi sômsari le ufei chôi mi irzahni irfûk roi.

²⁴Khan, Paula chuangna hrang sakorte irfûk sa unglân, sataka Ramoptu Felika kuang nin intungtir hrang a ni,” a tia.

²⁵Hiang hin lekha a’rziaka,

²⁶“Klaudia Lusian Ramoptu inzaom tak Felika chubai a mûk e.

²⁷Hi pa hi Judahaiin an chela, an that hrang laiin sipaihai hruaiin ki zu fea, Rom mi a nih ti kin hriatin ki sansuaka.

²⁸Khan, thatpai an inuam nasan inhriat ki nuama, an Sanhedrin makunga ki zu fepuia.

²⁹An Dân i ia mani hnôl a nih ti ki hmua. Khannisianlân, an hnôlna thua khan thina hrang dôr mani intângna hrang dôr mani ite a itho inhre thei ma ung.

³⁰Judahaiin that tumin an inruang ti mi’n an ni hril le ni kuang ki hong itîr zôi zel a ni, a hnôltuhai khom a chung a thupoi an inei murdi ni kuang hril hrangin kin hriattir,” tiin.

³¹Khanchu sipaihaiin thupêk angin a zân zânin Paula kha an hruaia, Antipatri khua an tunga.



³²A tûka chu sakor chung a mihai kha Paula hruai mai hrangin an fea, sipai danghai khan an kîrsana, kulpui tiang an kîr nôk tâka.

³³Anni khan Kaisari kha an tunga, Ramoptu kuang lekha an pêka, Paula khom an makunga an inngîrtira.

³⁴Ramoptu khan lekha kha a tep zoiin kho tianga mi mo a ini tiin ar dona, Kilikia rama mi a ni an hriat tâka.

³⁵“Nangma hnôltuhai an zuang tung tika ni chungchâng ngaitua ki ti,” a tia. Khan, Heroda Praitoriana siaa, enkol hrangin thu a pêka.

Tîrtônhai Sintho 24

Judahaiin Paula an sêlna thu

¹Sûn ringa zoia chu ochai inlaltak Anania le upa senkhathai kha ukhîl inkhat, Tertula hruaiin an hong tunga, Paula an sêlna thu kha Ramoptu makunga an sêl tâka.

²Paula an koi suak zoi chu Tertula khan an sêlna thu a hong insîr tâka; “Felika mahripom tak, nangma zâra kin laia irngeina le irtharngamna sôt tak a lei om tâka, ni vârna sikin hi rama mihai ta hrangin thil saloi tak tak,

³lam tinrênga hmun tina siaminsat a hong ini tâk hi, a sa kin tia, kin lôm tak tak a ni.

⁴Ni zoro nang kin châi nona hrangin bongte’n hong ti ki ti, lungkham taka ni irngaitua pe hrangin nang ki ngên.

⁵Hi pa hi mizêl tak, ram tina Juda murdi laia buaina insuaktu, Nazaret pâl hruaitu tak a nih ti kin inhriat.

⁶Tempil khom porinchetir a tuma, kin ichel ta a ni.

⁷Khannisian, sipai hruaitu inlaltak Lusua a hong, a ni’rchupuia a hnôltuhai chu ni makunga fe hrangin a ni ipêk a ni.

⁸Nangma ngeiin irdonin lân, kin ihnôlna murdi hi inhre thei ni ti,” a tia.

⁹Judahai khomin a hnôlna kha an lei thopa, khang kha a ni an lei tia.

Felika makunga Paula’n a thiamna thu an sîr



¹⁰Ramoptu khan thu insîr hranga a hong en le Paula khan, “Kum tamtak, hi chihai roirêltu ni lei ni tâk tih kin hriat sikin raifân taka ni makunga ki thiamna thu ki insîr hrang a ni,” a tia.

¹¹Jerusalema Pathian bê hranga ki hong ife kha sùn sômhleihni ban la ni no ni ti, nangma rengin inhre suak thei ni ti.

¹²Tempila mani, Sinagoka mani, khopui kho hmuna khom mi ki sêla, buaina siam hranga mi ki inthor tûte’n inhre mahai.

¹³Atûna an ni sêlna khom hi a bul a bâl ni kuang insîr hrang nei ual no nihai.

¹⁴Thil inkhat nang hril ki ti, ‘Pâl dang’ an iti lam dân zuiin ei irchibulhai Pathian ki biak ngaia, Dân le deipuhai lekhabua irziak murdi ki iam sa.

¹⁵Pathian ki iama, mi fel le felloihai thoi nôkna a om tih ki iam sa; kha kha anni ngeiin an iam sa.

¹⁶Khasikin, itiklai khoma Pathian le mihriam makunga insîrinsiat hlo ma ung, sia le sa inhriatna irthiang nei ki tum ngit ngai a ni.

¹⁷“Kum tamtak hnunga hin ki chipuihai kuanga thupêk chôiin, irbôlna inhlan hrangin Jerusalem-a ki hong fea.

¹⁸Khaanga ki tho lai khan tempila an ni hmua, khannisian mipui pungkhômna om maka, buaina om ual mah.

¹⁹Khannisian, Asia rama om Juda senkhat an oma, khahai khan ki chungu thupoi an neiin chu hi hin hongin, ni makunga an ni hnôla an intung hrang a ni.

²⁰A ninole, hitaka honghai hin Sanhedrin makunga ki ngîr lai khan imo ki itho’nsual an iti hrang a ni.

²¹Hi thu bâi khat sika hin a ni no tâkin chu, an laia ngîrin, ‘Mithi thoi nôkna thua a vuan sùn hin nin makunga inpông khumin ki iom a ni hi te,” tiin a sâma.

²²Felika khan Lam thu kha an hriat infel ok sikin, An kuang, “Sipai hruaitu inlaltak Lusua a zuang tung tika nin thu la rêl rong,” tiin a lei sia chiana.



²³Paula kha zalên viata inomtirin, a rualhaiin a sin an itho pe khom khap loia enkol hrangin sipai irza hruaitu kha thu a pêka.

Felika le a dôngma Drusili makunga Paula a ngîr

²⁴Khan, sôn idôr ten mani hnunga Felika chu a hong nôka, a dôngma Drusili, Juda mi, hruaiin a hong, Paula kha an koitirhaia, Krista Jisua iamna thu a insîr kha a'rngai.

²⁵Thiam inchangna thu hai, insumtheina thu hai, roirêlna la om hrang thu hai Paula'n an sîr lai khan Felika'n a sôn ichi a om a tia, "Fe nôk tan lân, zoro'nchum ki nei nôk tika nang la hong inkoitir nôk rong," a tia.

²⁶Sum a ipêk kha a sakei saa, khasikin Paula kha koia, a ichongpui mai ngai a ni.

²⁷Kum hni ar vêl hnungin chu Felika chu Porkia Festa'n a thûla. Felika khan Judahai inlômîr a nuama, Paula kha lung ina a mâksan tâka.

Tîrtônhai Sintho 25

Paula'n Kaisara kuanga a thu intung a ngên

¹Festa'n, ram kha a op hnung sôn thum zoia, Kaisaria irthokin Jerusalema a hong fea.

²Ochai inlalahai le Juda hruaituhaihai khan Festa kuang Paula chungchâng thu buai kha an lei hrila.

³"Lungkham takin Jerusalema hong inhruaitir roh," tiin an lei ngêna, lam laia lei irdîpa that an itum a ni.

⁴Khannisian, Festa'n, "Paula kha Kaisari intângna ina a oma, kei khom fe lat hrang ki ni,

⁵Sualna a neiin chu nin hruaituhaiin ni zui sianlân, sêl roi," a tia.

⁶An laia khan sôn riat mani sôn sôm vêl mani a châma, Kaisaria a kîr nôk tâka. A tûka chu roirêlna toihmuna a toia, Paula kha an hruaitirhaia.



⁷A zuang tungin chu Jerusalem ata Juda zuang chumhai kha a kôla an ngîra, thu ngar tak takin an hnôla; khannisian, an hnôlnahai kha a bul diktak suisuak thei mahai.

⁸Paula'n a thiamna thu an sîra, "Judahai dân porinchetir ma ung, tempil khom porinchetir ma ung, Kaisara khom hril insiat ma ung," a tia.

⁹Festa'n Judahai laia irhming sa a nuama, Paula kuang, "Jerusalema hong fea, hi nang an ngôna thuhai hi khitaka ki makunga rêl ni nuam mo?" a tia.

¹⁰Paula'n chu, "Roirêlna toihmun Kaisara makunga, roirêl pea ki omna hrang ngeia ngîr ki ti. Judahai chung a ite tho'nsual ma ung, nang khomin ni inhriat angin.

¹¹Thil ki tho'nsuala, thina hrang dôr thil ki tho'n chu, thi hi sêl ma ung. Khannisianlân, hihai ni hnôlna hi a bul ite a om no'n chu, anni raifâna hrangin tûte'n an ni ipêk hrang ni mah. Ki chungchâng hi Kaisara kuanga intung ki ngên," a tia.

¹²Festa'n a roirêltuhai a chongpui zoiin chu, "Kaisara kuanga intung ni inuamna angin, Kaisara kuang fe ni ti," a tia.

Reng Agripa le Berniki makunga Paula an hruai

¹³Sûn idôr ten mani a hek hnungin chu, rêng Agripa le Berniki chu Kaisari khuaa Festa lôm hrangin an hong a.

¹⁴Sûn tamtak an châma, Festa'n Paula chungchâng thu chu rêng a hrila, "Felika khan mi intâng inkhat a mâksana,

¹⁵Jerusalema ki hong fe'n Juda ochai inlalahai le an upahaiin a thu kha an ni hrila, thiam no inchangtir hrangin an ni ngêna.

¹⁶keima'n chu an kuang, "Mi tûte, ama hnôltuhai le hmâi irsonga an irti mâka chu thiam no inchangtir zôi zel chu Rom sorkâr dân ni mah," ki tia.

¹⁷Hi hin an zuanga, ir-ial loiin a tûka roirêlna toihmuna ki toia, kha pa kha kin koitirhaia.

¹⁸A hnôltuhai kha a kôla an ngîra, ki itung lam angin ite thupoi insîr mahai.



¹⁹Anni sakho thu le mi inkhat thi tâk Paula'n a hring nôk thu an sîr, Jisua chung a lei ibuai chian a ni.

²⁰Keima'n kha thu kha ki'rngaitua thei ual khomin inhre ma unga, Jerusalema hong fea, an thu kha hong rêl a nuam le nuam no ki'rđona.

²¹Khannisianlân, Paula'n kha kha sataka enkola an thu kha inlaltak kuanga intung a ngên uala. Khasikin Kaisara kuang ki tîr thei mâka chu enkol insa hrangin thu ki ipêk a ni," a tia.

²²Agripa khan Festa kuang, "Kei khom kha pa thu'nsîr kha irngai ki inuam kêng," a tia. Festa'n, "Nangtûk la'rngai roh," a tia.

²³A tûka chu Agripa le Berniki kha roiinpui takin an fea, thu'nsîrna in sûnga an lûta, sipai hruaitu lianhai le khuaa mi poimo ual ualhai khom an kop saa. Festa thupêkin Paula kha an hong hruai inlûta.

²⁴Festa'n, "Reng Agripa le hitaka kin laia om murdihaio, Juda mipui murdihaiin 'Hring inruk ni mah,' tiin an khêka, Jerusalema le a chungchâng thu ki kuang an insîr kha hi nin ihmu pa hi a ni.

²⁵Khannisianlân, keima'n chu thina hrang ang dôr ite a itho hmu ma ung, ama'n Inlaltak kuang intung a nuam sikin tîr ki itum ta a ni.

²⁶Aniachu ite irziak hrang inhre ma ung. Khasikin nin makunga ki hong ihruai suak a ni; rêng Agripa, ni kuanga hong hruai bîk ki ni, irâi a ni zoiin i imo irziak hrang kin hriat theina hrangin.

²⁷Ama an ihnôl fel taka irziak loia mi intâng Inlaltak kuanga tîr chu a dikin inhre ma ung," a tia.

Tîrtônhai Sintho 26

Paula'n rêng Agripa makunga a thiamna thu an sîr

¹Agripa'n Paula kuang, "Ni thiamna thu nin sîr thei," a tia. Kha zoi le Paula'n a kut a phara, a thiamna thu an sîr tâka.

²"Reng Agrip, a vuan hin ni makunga Judahai ni hnôlna murdia ki thiamna thu kin sîr hrang sikin, a sân vânei ki'rti ok.



³Judahai om lam le an irsêlna ngai lamhai a sân nin hriat sikin vânei ki'rti nôk ual a ni. Khasikin, sataka nir ngai pe hrangin nang ki ngên a ni.

⁴Ki thoibop ata ki chipuihai laia le Jerusalema ki om lam chu a phut ata Judahai murdi'n an inhriat.

⁵An insîr nuamin chu ei sakho pôl ingar tak Farisai laia om, tian ata ki inihai khom an inhriat.

⁶Ei irchibulhai kuang Pathian thu'nkung kha a tung ki sabeina thua atûn hin roirêlna makunga ki ingâr a ni.

⁷Kha thu'nkung kha hmu hrang sabeiin ei nam sômhleihnihaiin a sân a zânin sathnem irngai takin sin an itho ngai a ni. O rêng Agrip, khaang sabeina sika khan Judahai hin an ni ihnôl a ni.

⁸“Nangni'n itho sika mo Pathianin mithihai a ikaithoi nin iiam loi?

⁹Keima ngei khomin Nazaret Jisua irhming doi lamin thil tamtak tho inlân ki lei ti ngaia.

¹⁰Khaang khan Jerusalema ki ti ngaia, ochai inlalahai kuang ata ircham lâkin mi irthianghai laia mi tamtak intângna inhaia ki bukhaia, thathai an tum khomin a sa ki tipuihai ngai.

¹¹Sinagok tina Jisua hril insiatir tumin ki hremhai chian chiana, an chung a ki ning an mur hrai sikin, ram dang dênin deng kin theitirhai ngai.

Paula'n a suakinthar thu an sîr

(Tir 9.1; 22.6-16)

¹²Khaang tho hranga khan ochai inlalahai kuang ata thu dong le an thupêk chôiin Damaska ki pana.

¹³Khanchu, rêng Agrip, lampuia kin fe laiin sân laia irvân ata vâr, misa nêka vâr, ki hmua, kha khan keima le ki ifepuihai kha a ni zuang êla.

¹⁴Irnênga ki'rtet raka, Hebrai chonga irhâiin, ‘Saula, Saula, ithoa mo deng ni ni intheitir? Sunna khianghrol irpal hi nangma vai kêng nang a inphop' tiin chong kin hriata.



¹⁵“Keima’n, ‘Rengpa, tu mo ni ini?’ ki tia. Rengpa’n, ‘Jisua, deng ni intheitirtu hi ki ni,’ a tia.

¹⁶Thoiin lân, ni ke’n ngîr roh, ki sinthopua nang inkung hrangin ni kuanga ki zuang inlâr a ni. Ni ni ihmu thu le thil nang ki la inentir hrang hi mihai ni ihril hrang a ni.

¹⁷Judahai le Jentailhai kuang nang tîr ki ta, anni ata nang ki isansuak hrang a ni.

¹⁸Keima ni iam sika an sualhai ngaidam an nina hrangin mi irthianghai laia irchon dongtum an nei sa theina hrangin. An mit invâr hrangin, inthim ata vâ hong inkîrtir hrangin Setana thuhnuai ata Pathian tiang hong inkîrtirtu hrang ni ni,” a ni tia.

Paula’n a thurchi Judahai le Jentailhai a hril

¹⁹“Khasikin, rêng Agrip, irvân ata inlârna ki ihmu kha chu sêl ma ung.

²⁰Khanchu, Damaska mihai kuanga insîr irphutin Jerusalema mihai kuang, Judai rama mi murdihai le Jentailhai kuang khom an sualna ata irleta Pathian tiang an irheia, an irlet tak tak a nih ti an langna hranga, sin an thônâ hrangin thu ki ihril ngai a ni.

²¹Khasika khan tempila ki om laiin Judahaiin an ni chela, ni that an itum a ni.

²²Khanisianlân, Pathianin a ni changpui sikin a vuan ten mi lian le mi chîn tetehai kuang thuhiril hrangin ki la ingîr thei a ni. Deipuhai le Mosia’n thil hong tung hrang an insîr ban ite insîr ma ung.

²³Krista khan dûk tuang a ta, mithi lai ata thoi nôkna mahruaitu nih a ta, Judahai le Jentailhai kuang vâ irhmutir masa tak ni a ti, an ti thu kha,” a tia.

Paula’n reng Agripa iam hrangin a ngên

²⁴Khaanga a thiam thu an sîr laiin Festa kha inring takin a khêka, “Paula, ni invêt tâk kêng, ni tep intam ta hraia nang a invêttir a ni ta,” a tia.



²⁵Khannisianlân, Paula khan “Festa mahripom tak, invêt ma unga; thu dik tak le thu vâk tak ki insîr ual a ni.

²⁶Hi thil hi rêng khomin an hriat, a kuang khom hâi takin ki insîr a ni. Hi thil hi inrûka tho khom ni mah, a kuang ite ip om mah ti kin hriat infel sikin.

²⁷Reng Agrip, deipuhai thu ni iam mo? Ni iam tih kin hriat” a tia.

²⁸Agripa khan Paula kuang, “Sôtnote sînga Kristiana ni siam ni itum mo?” a tia.

²⁹Paula’n, “Sôt sian, sôt no sian, nang vai ni loiin a vuana ki thu irngaituhai murdi khom hi keima anga om hrangin Pathian kuang ki ngên a ni, thîrkol hi chu bun sa loiin,” a tia.

³⁰Khanchu, rêng hai, Ramoptu hai Berniki hai le an itoipuihai murdi kha an thoi zita.

³¹An bingin an fea, an chonga, “Hi pa hi thina hrang dôr mani, lung ina intângna hrang ang dôr mani ite tho ual ma hi te,” an tia.

³²Agripa khan Festa kuang, “Hi pa hin Kaisara kuanga tung ngên no sianlân chu suak zôi thei a ni,” a tia.

Tîrtônhai Sintho 27

Paula Rom khua panin a fe

¹Khan, irkuangin Itali rama fe hrangin an ni ti zoi le, Paula le mi intâng dang senkhathai chu Augasta sipai pâl an iti pa sipai irza hruaitu Julia kuta an inhlan ta.

²Adramuteno khuaa irkuang, tuikhanglian kôla Asia ram khuahai hro hrang khan kin chuanga, kin fe tâka. Makedonia rama Thesalonika kho mi Aristarka khom a om sa.

³A tâka chu Sidon kin tunga, kha khan Julia khan Paula chung a sa oka, irkaiinhar theina hrangin a rualhai kuang an lêngtira.

⁴Khatak ata irkuangin kin fe nôka, phâivua’n a no tiang a ni nam sikin Kupra chômbung khorthi phâivua ir-upna tiang kin fea.



⁵Kilikia ram le Pamfulia ram dep tuipui kin khêl zoiin Lukia rama Mura khua kin tunga.

⁶Kha khan sipai irza hruaitu khan Alexandria khuaa irkuang, Itali rama fe hrang a hmua, kha irkuanga khan an nin chuangtira.

⁷Nikho sôtzan kin fe zâm zâma, intak takin Knidos khua irdîn kin tung hrâma, a no tiang a ni nam sikin Kret chômbung irbîkna tiang kin fe irkuala. Kret chômbung hmor irzum Salmoni an iti kha kin hroa.

⁸Intak takin ivapang zuiin hmun inkhat irkuang Irngamna ‘Hoi’ an iti kha kin tunga, kha kha Lasai kho pêna om a ni.

⁹Nikho sôt ian kin châm hnungin Bu nghei zoro a khêl tâka, irkuanga fe mai a sân ichi a om tâk sikin anni kha Paula’n thu ar donhaia,

¹⁰an kuang, “Puhaiio, atûn hin ei fe mai hrangin chu siatna a sate’n ei itong hrang ti kin hriat; irkuang le a timmatua pêl vai ni loiin eini irkuanga chuanghai khom hong tung a tih ti kin hriat,” a tia.

¹¹Khannisianlân, sipai irza hruaitu chu Paula ircham nêkin irkuang chalaitu le irkuang neitu ircham kha a zôm uala.

¹²Phalbia omna hrangin chu irkuang irngamna kha an chum rak no sikin, mi tam ual fe suaka, Foiniki khua a tung hrâma, khataka khan phalbi tuang kha an nuama. Foiniki khua hi Kret chômbunga irkuang irngamna inkhat a ni, sim nitâk tiang le hmâr nitâk tianga irheia om a ni.

Tuipuia phâivua

¹³Sim khorthi a hong tho viat viata, an inuam ang tak an ihmu mani an irtia, thîrkuaikim kha an kaisuaka, Kret chômbung ivapang kha thei dôra nâiin kin zuia.

¹⁴Khannisianlân, sôtnotea, muang ata a sân phâivua a zuang tho thuta kha phâivua kha Eurakuilo an ti.

¹⁵Irkuang kha a hong sêm rak raka, phâivua tianga chalai inhne chi ni ta maka, a nuam nuama, ni tân hrangin kin om tâka, a ni tân, a ni tân tâka.



- ¹⁶Chômbung chînte Klaudi an iti kôla phâivua ir-upna tiang irtôla, intak tak pumin irpûm irkuangin kin zôk thei hrâma.
- ¹⁷Irkuang an kaisuaka, irkuang kha hruiin an khit khak tâka. Libia ivakama, tuichira ni tân phâk a ti, ti an chi sikin irkuang puanzâr kha an irhniamtira; khanchu, a ni tân a ni tân nôk tâka.
- ¹⁸Phâivua le tuiirsôn khan a ni ngîm mai sikin a tûka chu irkuang timmatua pêl kha an pai irphut tâka.
- ¹⁹Sûn thum ni'n chu anni kut ngêtin irkuang timmatua khom an pai suak nôk tâka.
- ²⁰Nikho sôt tak misa khom, ârsi khom inlang maka, phâivua lakin a saterengin a nin muai maia, hring hrang rêng rêngin irsabei ta ma ung.
- ²¹Bu nêk loia nikho tamtak an om hnungin Paula kha an laia a ngîra, "Puhai, ki thu kha zômin Kret chômbung ata khan suak no inlân chu hiang intakna le irhmangnahai hi ei itong loi hrang a ni.
- ²²Khannisianlân, atûn hin irtharngam taka om hrangin nangni ki ngên a ni. Nin laia tûte thi no chin ni, irkuang chu a isiat hrang a ni.
- ²³A ta ki nia, a sin ki tho ngai, Pathianin vântîrtôn inkhat zânin khan a zuang tîra, ki kuang a zuang ngîra,
- ²⁴'Paula, chi no roh, Kaisara makunga ni ingîr hrang a ni. Irngai ta, irkuanga ni inzinpui murdi kha nangma sikin Pathianin a inzôk hrang a ni,' a ni zuang tia.
- ²⁵Khasikin, puhaio, irtharngam takin om roi. Pathian ki iama, a ni ihril ang kha tung ngêl a ti.
- ²⁶Chômbung khôn mo khata a ni itân suak hrang a ni," a tia.
- ²⁷A zân sômhleiminli zâna chu phâivua'n Mediteranean tui puia khan a ni tân zêla, zânlai tak vêla chu irkuang mihaiin i mual mani tung hrang angin an inhriata.



²⁸Khanchu, tui inthûk lam an irkhia, hlam sômhnia inthûk a lei nia; zoro sôtnote hnunga an irkhi nôka, hlam sômhleiringaa inthûk a ni ta.

²⁹Lung khorok kêra a ni chôi itinin ti an chi sikin irkuang irmei tiang thîrkuaikim minli an inthâka, khovâr a sân an nghâkhmoa.

³⁰Irkuang chalaituhai khan irkuang lu tiang thîrkuaikim thâk hrang angin irpûm kha tuikhangliana an inthâka, irkuang kha rotsan an itum a ni.

³¹Kha zoi le, Paula'n sipai irza hruaitu le sipaihai kuang khan, "Hihai hi irkuanga an om mai no'n chu zôk thei no chin ni," a tia.

³²Khanchu, sipaihai khan irpûm hruihai kha an ât sata, an intân-paitir tâka.

³³Khovâr tînin Paula'n irkuanga om murdihai kha bu nêk hrangin a ngênhaia, "A vuan hin ite fa loia nin omna sîn sômhleiminli a hong ni ta.

³⁴Khasikin bu nêk hrangin nangni ki ngên a ni, nin hringna hrang a ni; nin laia tûte samzâi inkhat te khom irhmang no ni," a tia.

³⁵Kha thu kha an sîr zoiin bai a lâka, an rênga makunga khan Pathian kuang lômthu an sîr zoiin a khoia, a fâk irphut tâka.

³⁶Khanchu, an rêngin irtharngam takin an fâk tâka.

³⁷Irkuanga om kha kin rêngin irzahni sôm-sari kiruk kin nia.

³⁸An fâk zoi zit hnungin chu irkuang inzângtir hrangin an bu pêlhai kha tuipuaia an pai suak nôk tâka.

Irkuang siat thu

³⁹Khua a hong vârin chu, kho tianga ivakam mo an itung inhre mahai, khannisianlân, kho tianga li inkilkôia mani chiaiphoi an hmua, kha chungakhan a theiin chu irkuang kha muang inkâitir an tuma.

⁴⁰Thîrkuaikim hruihai kha an ât sata, tuipuaia an mâksan tâka; kha chungakhan an kai inhêlna khitnahai kha an sûta, maton tianga puanzâr kha phâivua insêmtir lam hrangin an irsângtira, chiaiphoi kha an pan tâka.



⁴¹Khannisianlân, tui hrât inhni irtongna hmuna kin lût lika, irkuang kha hnuai an insuktir tâka. Khanchu irkuang lu tiang an ôk khaka, inchâng thei loiin a om chiana, a pên tiang chu tuiirsôn sikin a koi irphut tâka.

⁴²Sipaihai chu intâng hai kha that zit an tuma, tui irhliaia kâi, om an ta, intân zoi an ti, ti an chia.

⁴³Khannisianlân, sipai irza hrulaitu khan Paula saninzôk a nuama, an thil tum kha a khapa; tui irhliai thei murdi'n tuipuia irchômthâka muanga lei kâi masa hrang le,

⁴⁴mi dang chu thingphêk chung a mani, kâi hrangin thu a pêk tâka. Khaang khan kin rêngin muanga satakin kin kâi zit tâka

Tîrtônhai Sintho 28

Malta chômbung

¹Kin kâi zoiin chu chômbung kha Malta a nih ti kin hriat tâka.

²Kha chômbung mihai khan a sân lung an ni lei inkham tak taka. Rua a tho sik le a sân a dâi sikin mei an thoa, kin rêngin an ni lei lôma.

³Paula'n thing têlkhat a'rfuanga, meia a tuaa, a lum sikin mirûl a suaka, a kut an chuka, a kut a kher pe khaka.

⁴Khataka mihai khan a kuta mirûl kop chian kha an hmu'n chu, "Hi pa hi mi that ngêt a ni, tuikhanglian ata intân suak khom sianlân, dik taka Roirêltu'n a ihring hi a inuam ta loi a ni," an tia.

⁵Khannisianlân, ama khan mirûl kha meia a nok thâka, ite ti mah.

⁶Anni khan a hong invûngin irningloia chingirîlin a ithi zôi zel hrang mani an iama. Sôt ian an nghâka, ite ti mah ti an hmu'n chu an ngaidân ar thûla, "Pathian a ni hi te," an ti nôk tâka.

⁷Kha kôla khan kha chômbung rêng Poplia irhuan a oma. Ama khan a ni lei lôma, sîn thum dên lôm takin an nin tungtira.

⁸Poplia pa kha inkhur le thisena in-êk irveiin a lei zâl chiana. Paula khan a ena, a lua kut irngatin a chongchaia, a dam tâka.



⁹Kha zoi hnung chu, kha chômbunga khan mi dang a na murdi an hongga, an dam tâka.

¹⁰Annihai khan a saterengin an ni chôindôma, kin fe nôk hrang khomin kin innang murdi irkuanga an siaa.

Paula'n Rom khua a tung

¹¹Tha thum hnunga chu phalbi laia lei châm tâk irkuangin kin fe nôk tâka. Kha irkuang kha Dioskuri an tia, (Pathian inphâr khom an ti ngai) Alexandria khuaa irkuang a ni.

¹²Surakus khua kin tunga, sîn thum kin châma.

¹³Khatak ata kha irkuangin kin kîr nôka, Regium khua kin tunga. Sîn khat zoia sim khorthi a hong thoa.

¹⁴Kha khan iamtuhai kin hmua, an kuang hapta khat châm hrangin an ni ngêna, khaang khan Rom khua kin tung ta a ni.

¹⁵Rom khuaa iamtuhai khan kin thurchi an lei inhriat le chu, 'Appia dukan' le 'khualbûk inthum' dênin ni nghâk hrangin an hongga. Paula'n kha mihai kha a hmu Pathian kuang lônthu an sîra, a sîn ar tha a'ngam sa tâka.

¹⁶Rom kin tungin chu a nghâktu sipai kuang a binga om an phal ta.

Paula'n Rom-ah thuhiril

¹⁷Sîn thum hnunga chu Paula'n khataka Juda hruaituhai kha a koi bukhaia, an hongin chu an kuang, "Urênghaio, ei mihai chungga mo ei irchibulhai Dân ata mo ite tho'nsual no khomin, Jerusalema an ni chela, Rom sorkâr kuta an nin hlana.

¹⁸Rom mihaiin chong an nir don zoiin chu ki chungga ite tho'nsuala, thi theina hrang an hmu no sikin nin sua an nuam tâka.

¹⁹Khannisianlân, ama kha Judahaiin an sêl sikin Kaisara kuang intung ngêt ki inang tâk a ni; ki mihai demna hrang nei chu ni ma ung.

²⁰Khasikin nangni hmu le nangni chongpui nuamin nangni ki ikoi buk a ni; Israelhaiin an isabei ngai, kha pa sika khan hi thîrhruhi hi ki ibun a ni," a tia.



²¹Anni khan, “Judai ram ata ni thurchi insîrna lekha ite hmu ma ung, urênghai laia tûte’n ni thurchi a siat tiang mo, a sa tiang mo insîr hrangin hong ual mahai.

²²Hi pôl hi hmun tina insîrinsiat a ni tiin kin lei inhriat, nir ngai dân khom inhriat kin nuam,” an tia.

²³Khanchu, nikhua an khita, kha ni khan a omna ina mi tam takin an hong pana, zîng ata zân dênin Pathian ram thu an sîra, a hrilfiaa. Mosia Dan bu le deipuhai lekhabu ata Jisua chungchânga annihai kha in-iamtir tumin a hrilhaia.

²⁴Senkhatin a thu’nsîr kha an iama, senkhatin iam mahai.

²⁵An chong irhmun thei ta maka, Paula’n hi thu hi an sîr zoiin chu an fe suak tâka. A thu’nsîr kha hi hi a ni. “Irtha Irthiangin deipu Isaia bâia nin irchibulhai kuang a insîr kha a sân a dik.

²⁶“Hi chihai laia hin fe’n lân, van sîr roh, Irngai, irngai nin ta, a’rngaina lam chang inhre no chin ni. Hmu chian chian nin ta, hmu’nfel no chin ni.

²⁷Hi mihai milung hi a cho tâka, An mikuar kha an sêttira, An mit an insîng saa, khan ni no sian an mitin hmu an ta, An mikuarin inhria an ta, An milung inhre sa ta, hong irhei nôk an ta, lei indamhai likna ki ti,’ a ti kha.

²⁸Pathian saninhringna kha Jentailhai kuang pêk a nih ti inhre roi; anni’n chu irngai irngai an ta,” a tia.

²⁹Hi thu hi an sîr zoiin chu an irsêl mur mura an rot zoi tâka.

³⁰Kum hni kêi rakin ama omna hranga man a ipêk ina khan a oma, a kuang a hong murdi a lei lômhai ngai.

³¹Pathian Ram thu a hrila, Rengpa Jisua Krista thu, hâi takin mi ar chutirhaia, tûte’n khap mahai.



Rom

Rom 1

Chubai mûkna

¹Paula, Jisua Krista suak, tirtôn hranga koi, Pathian Thurchi Sa hril hranga indangtu khan;

²Kha Thurchi Sa kha, Pathianin a deipuhai hmangin a Lekha irthianga a lei inkung tâka;

³A Nâipa, ei Rengpa Jisua Krista thu chu taksa tiang ei suiin chu Davida irchia suak a nia,

⁴a irthiangna irtha tianga chu sinthotheina'n Pathian Nâipa a nizia an langtira;

⁵kha sika khan Pathianin nam tin laia mihai iama tak insôntir hrangin tirtôn nina sintum an inhlan a ni:

⁶Nangni khom khaanga Krista mihai ni hranga koi nin nia:

⁷Pathianin a lungthung le ama mi irthiang ni hranga a ikoi Rom khuaa mihai chubai nangni ki mûk a ni. Pathian ei Pa le Rengpa Jisua Krista kuang ata lungkhamna le irngeina nin kuang om ri se.

Paula'n Rom hro a'rzukna thu

⁸Nin iamna thu ram tina an thang sup sup sikin Jisua Krista zâra nangni sikin Pathian kuang lônthu ki insîr phot bak a ni.

⁹Ki chongchainahai khan nangni kin hriat mai ngai a ni, a dik taka a Nâipa Thurchi Sa insîrin ki lungrîl murdi'n a sin ki tho ngai, Pathian kha nin hriatpuitu a ni.

¹⁰A sa a iti rua a ni'n chu atûn hin lua nangni ki hong hro theina hrangin Pathian ki ngên mai a ni.

¹¹Nin det nôk ualna hrangin irtha tiang thilpêk nangni indongtir hrangin nangni hmu ki'rzuk tak tak a ni.



¹²Ki iamna le nin iamna irfa irhlôm hi ki irzuk a ni, ei irchangpui irhlôm theina hrangin.

¹³Urênghaio, nangni hong hro ki tum maia, khannisian, inchum loina a lei om nôk ngai ti nin inhriat ki inuam a ni. Jentail danghai laia ra ki hmu ngai angin nin laia khom ra hrang hmu ki isabei a ni.

¹⁴Grik mi le Oze mihai, mi vâ le mi'nmôlhai kuang lâkai ki nei:

¹⁵Khasikin kêng nangni Rom khuaa omhai kuang khom Thurchi Sa hril hi ki irzuk tak tak a ni.

Thurchi Sa sinthotheina

¹⁶Thurchi Sa hi inzakpui ma ung, tukhom, a iam murdi saninhringna hranga Pathian sinthotheina a nia; Judahai hrangin a ni phota, Jentailhai hrang khom a ni nôka.

¹⁷Hi hin iamna sika vai Pathianin mi thiam a inchangtir lam a hong inlang ta a ni, Pathian Thu bu'n, "Iamnaa mi fel chu hring a ti" ti irziak ang khan.

Mihriamhai سوالنا

¹⁸Irvân ata Pathian ningmurna kha mihriamhai Pathian uksak loina, سوالنا le felloina murdi chung a zuang inlang a ni; an سوالنا sikin thutak kha a khâl khaka,

¹⁹Pathianin an hriattir tâk sikin, Pathian thurchi inhriat hrang mihai chu an lungrîla inhriattirin a lei om tâka.

²⁰A nina, mita hmu thei loi, a kumtuang sinthotheina le a Pathianzia kha rammual siam irphut ata a thil siamhai chu fel taka hmu theiin an langa. Irphilna hrang zel nei mahai.

²¹Pathian chu inhriat chakin, Pathian angin chu chôindôm mahaia, lômthu khom hril mahai; thil chanlamboi an ngaitua tâka; an lungrîl invêt chu an thim zoi ta.

²²Vâr an irti nâkin, a sân an invêt tâk a ni.



²³Thi theiloi Pathian roinpuina chu thi thei mihriam hai, va hai, sa ke minli neihai le thilhring irlim ang dênin an inchangtira, chubai an mûka.

²⁴Khasikin, an milung irzuk lam thil porinchehai tho hrangin Pathianin ar heisanhaia, inzakupui hrang angin an iom tâk a ni.

²⁵Pathian thutak nêkin milak an inthanga, a siamtu biak nêkin a isiam kha biakin a sin an tho tâka. A siamtu chu kumtuanga inpâkin om ri se. Amen.

²⁶Khasika khan kêng Pathianin inzak taka an ihur kha phalin a irheisanhai tâk a ni; an nupanghai khomin an omlam dân kha paiin dân no angin an oma;

²⁷an pasalhai khom nupang hmang lam dân pangai mâksanin, hurin an irhnarsa irhlôma, pasal le pasal saloi takin an lênga. An taksa ngeia an sual ra kha an ihmu a ni.

²⁸Khanchu Pathian inhriatna dik kha an inthâ tâk sikin an ngaituana felloi tak anga om hrangin Pathianin a'rheisanhaia, an tho loi hrang hrang khom an tho tâk a ni.

²⁹Fel loina chi tinrêngin an hong sip tâka, sualna hai, huatirhamna hai, mi that hai, irngôna hai, irhuangna hai le irkhôkmâkna haiin an sip ta.

³⁰An irnuisoa, an irhrilsiata, Pathian an khôkmâka, an irlôi irhlôma, an irpâka, an irsonga, thil saloi thar an uar suak nôk maia; an nu le pa mahrip tho mahai,

³¹tûte uksak mahaia, milung nei loi, chonginkung insiat, izirpui lungkhamna nei loi, inrenna nei loi an ni.

³²Khaang thil thotuhai chu Pathianin a inkung ang dêna thi inruk an nih ti an inhriat nâkin, nakhrâtin an tho maia, mi dang a thohai khom an la pompui sa ngai a ni.

Rom 2

Pathian roirêlna dik



¹Khasikin, o mihriam, mi hrilsiatpu tukhom ni inlân, irphilna rêng nei viat no chi ni; mi dang ni irêlna ngeia khan nangma theiloi ni ichang kêng; nangma a rêlpu rêng khomin khaanga sin kha ni tho sa ngai sikin.

²Khaanga tho mihai kha chu Pathianin thiam no an changtirin chu, a itho indik a nih ti ei inhriat;

³nangma'n ni itho anga thohai thiamno nin changtirin chu, Pathianin nangni a idemna kha lôl hrangin ni irtûng ma ni?

⁴A ninole, nangni irlettir a nuam sikin Pathian chu khonzâna neiin nangni a nghâk ngai tih inhre loiin satna a nei intamzia le a tuangdiarzia le a entheizia chu a ingainêp ma ni?

⁵Ni tukullian le ni milung ngar sikin Pathian ningmurna nikhua, dik taka Pathianin roi a rêlna nikhua tika mani hremna bukkhôm chian ni ni.

⁶Pathianin chu mi tin an sintho ang takin a irêl hrang a ni.

⁷Roiinpuina hai, chôindômna hai le irhmang thei loinahai zonga thil sa tho mai maihai kumtuang hringna pe a ti;

⁸Khannisianlân, mâni hrang vai sapirsia ngita, thutak hnôla, thil dikloi zôm ualhai chungu chu Pathian ningmurna le ninginthikna om a ti.

⁹Thil sual tho murdihai hrangin intakna hai, chardongnahai om a ti Judahai hrangin om bak a ta, Jentailhai hrang khomin om a ti;

¹⁰Khannisianlân, thil sa tho murdihai chu Pathian kuang ata roiinpuina hai, chôindômna hai le irtharngamnahai dong an ti. Judahai dong phot an ta, Jentailhai khomin dong an ti.

¹¹Pathianin mi theibîk nei mah.

¹²Dân pên tianga om, sualna tho murdi, dân pên tiang irhmang an ti; Dân sênga om, thil sual tho murdi Dân hmanga an chungchâng rêl ni a ti.

¹³Dân inhriat sika ni loiin a zôma zôm sika khan Pathian makunga thiam chang thei a ni.



¹⁴Dân nei loi Jentailhai chu Dân thu tum chu an irsiangpui zia irfûk lam a ni sikin an thoa, dân chu an kuang ipêk ni no khomsian, dân nei ang an ni.

¹⁵Dân thupêk chu an milunga a irziak a nih ti an omlam ata an lang, an sia le sa inhriatnaa khom an langa an lungrîlhai ar sêla, a kêra thiam an changa, a kêra thiamno an chang ngai.

¹⁶Pathianin mi tinrêng ngaituana irthup Jisua Krista hmanga a rêl niin chu Thurchi Sa ki insîr anga hin rêl a ti.

Judahai le Dan

¹⁷Khannisianlân, nang kha, Juda mi nir tia, Dana khan ni'rnhata, Pathian chu a sân ni songa:

¹⁸Pathian nuamlam khom nin hriat. Dân nin hriat sikin a sia le sa khom nin hriat;

¹⁹mitchohai hruaitu, inthima omhai in êltu,

²⁰Mi invêthai hruai invârtu, nâipang irchutirtu tak nia ni irbe ngai; inhriat hrang le thutak zong chu Dân thua hin a om zita nin hriat sikin.

²¹Mi dang ki'rchutir nir tia, ithoa mo mâni a irchutir loi? Inru loi hrangin mi nir chutira, nangin ni inrûk mo?

²²Uire ni khapa, nangin ni iuire mo? irlim khôkmâktu, nangin millim biakna ina thilhai kha ni inrûk ngai mo?

²³Dân chu a sân songin dân chu inchâiin Pathian thang ni insetir mo?

²⁴“Nangnihai sikin Pathian irhming chu Jentailhai laia hrilinsiat a ni,” ti irziak ang khan.

²⁵Dân zômin lân chu ni sertan khom kha a sân inlâp a ti; Dân nin châiin chu sertanloi ang chian ni ni.

²⁶Sertanloiin Dân a zômin chu sertan anga bê a ini loi hrang ma ni?

²⁷Nangni'n ser nin tana, Dân thu irziak nin neia, khannisian Dân thu chu inchâi nôka, Jentail, taksa sertan loihai chu Dân thu chu an zôm ngit nôka, thiamno nangni an inchangtir hrang a ni.



²⁸A chungphua ringota Juda mi ki nih ti chu Juda mi tak tak ni mah, taksa ringota sertan chu sertan tak tak ni nôk sa mah;

²⁹aniachu, sêngrîla Juda mi ni chu, Juda tak tak chu a nia, sertan tak tak khom kha milung tianga a nia, Lekha thu ringota ni loiin irtha tiang a ni ual. Khaang mi chu mihriamin chôindôm nohai khomsian Pathianin chôindôm a ti.

Rom 3

¹Khante, Juda mi nih a'rfê bîkna mo a om? Sertan khom imo a'rfêna?

²Lam tinrênga a sân an lâp; An lâpna tak chu Pathian thuhai inkoltir an inina hi a ni.

³Mi senkhathai iamom ta no sianlân, itin mo ni ta ni? Anni iamom loina khan Pathian iamomna chu a inboi hrang ma ni?

⁴Nâi sai mak e! mi murdi milak thei ni zit khomsian, Pathian chu a idik ngêt hrang a ni: "Nangin thu nin sîr zoro'n thiam ni changa, Roirêl pea ni om tika nin hnê theina hrangin," tia irziak ang khan.

⁵Ei dikloina khan Pathian felzia an langtir infel ualin te, itin mo ei irngai? Pathianin mi a hrem hin, mi felloi a ini ma ni? (Mihriam dân angin ki insîr a ni)

⁶Nâi sâi mak! Pathianin itin mo rammual roi a irêl thei hrang?

⁷A ninole, milak ki inina hin a roiinpuina hranga Pathian dikzia an langtir ual nôkin chu ithoa mo mi suala nin ni itep hrang?

⁸Mi senkhatin "Thil sa a hong suak theina hrangin thil sual lei tho rei, a ti", tia an ni hrilinsiat ang khan ei itho chian hrang ma ni? Kha mihai kha thiamno changrua pial an ni.

Tûte mi fel om mahai

⁹Khante eini Judahai hi ei isa bîk ma ni? Nâi sâi mak e! Judahai le Grikhai chu sual suaka om zit ei nih ti kin insîr infel tâk kha te:

¹⁰"Tûte mi fel rêng om mahai; Inkhat lua om mahai;



- 11**Tûte inhre thiam rêng om mahai, Tûte Pathian zong rêng om viat mahai.
- 12**A ni lolina tiang an pêt zoi zit tâka; Ite khom hmang inruk ta loiin an om zit tâka; Tukhom thil sa tho reng om mahai; Inkhatte lua om ta mahai.
- 13**An hrok chu thân inhong a nia, An mileiin huangna thu an insîra, An hmûr ata mirûl tûr a suaka,
- 14**An bâu chu khuasâlna le thu khâin a sipa.
- 15**An ke chu thisen insuana hrangin a pêt hrâta;
- 16**An lampuia chu irhmangna le dengtheina a oma.
- 17**Irtharngamna lam khom inhre mahai.
- 18**An mit hmua Pathian chitna zel om mah,” ti irziak ang khan.
- 19**Dân thuhai chu Dân hnuaiia omhai chung a hmang hrang a nih ti ei inhriat; tûte’n ite an insîr thei lolina hrang le rammual hi Pathian roirêla a omna hrangin.
- 20**Dân zôm insa sikin tûte Pathian makunga thiam changpui om mahai; Dân sikin mi’n thil sual an tho ti an inhriat fia ngai a ni.

lam sika thiamchangna

- 21**Atûn chu Dân hmang ngai loa mi thiam an changtir lam Pathian khan a zuang inlangtir ta: Dân le deipuhai thu khomin kha kha a insîr a ni.
- 22**Jisua Krista an iam sikin Pathianin mi thiam a inchangtir a ni, tukhom a iam murdihai chu, danglamna zel om mah.
- 23**Mi murdi’n thilsual an tho zita, Pathian roiinpuina kha an ichang thei ta loi a ni.
- 24**Khannisianlân, Jisua Krista irtanna zâra Pathian chu a lungkhamna sika vai mi manboiin thiam an changtir ta.
- 25**Pathianin ama kha a thisen tûng sika sual thupha chôiina ni hrangin an kunga, mi thiam a inchangtir lam inlangtir hranga tho a ni.



²⁶Atûn laia a felzia entirna hrangin kêng, ama ngei kha mi fel a ni theina hrang le, Jisua iam murdi chu thiam inchangtirtu a ni theina hrangin.

²⁷Khante, song hrang mo ei neia? Nei mak meh! I sikin mo? Sintho sikin mo? Ni mak e, iamna sika kêng a ini.

²⁸Dân zôm sika ni loiin iamna sikin mi'n thiam an chang ei iti a ni.

²⁹Pathian chu Judahai ta bîk ma ni? Jentailhai ta khom a ni loi ma ni? Ni e, Jentailhai ta khom a ini kêng.

³⁰Pathian chu inkhat a nia, sertanhai chu an iamna sikin thiam inchangtir a ta, sertan loihai khom an iamna sika ngêt khan thiam inchangtir a ti.

³¹Khano'nte, iamna ei insîr poimo sikin Dân chu ite ni loa ei isia ta tihna ma ni? Ni mak e. Dân chu ei ithop ual a ni.

Rom 4

Enton hranga Abrahamama

¹Khano'nte, taksa tianga ei irchibul Abrahamama thu kha itin mo ei insîr hrang tâk?

²Abrahama khan sintho sika thiam a changin chu song hrang a inei a ni; aniachu, Pathian makunga song hrang nei viat mah.

³Pathian lekha thu'n imo a insîr kha? "Abrahama khan Pathian a iama, kha a iamna khan thiam inchangtir a ni," a tia.

⁴Sinthotu hlo chu lungkham thilpêk ni mah, lâkai anga bê a ni ual.

⁵Aniachu sintho loa, Pathian ngaisak loi, thiam inchangtirtu iam uala iamna kha, ama felnaa inkung a ni.

⁶Sintho sika ni loa Pathianin thiam a inchangtirhai vâneizia Davida khom hiang hin an sîr:

⁷"An itho'nchâinahai ngaidama oma, An sualhai irkhupaia omhai chu. Vân an nei bâk na!

⁸Rengpa'n sual neia a ibe loi chu vân an nei e," tiin.



⁹Kha satvurna kha sertanhai hrang vai mo sertan loihai hrang khom? “Abrahama’n a iamna sikin thiam a chang,” ei tia.

¹⁰A sertan mâna thu mo a tan zoia thu? Itina irngai hrang ma ni? A sertan hnunga ni maka, a sertan mâna a ni ual.

¹¹A sertan mâna a iamna ngeiin Pathianin thiam an changtir tih entîr hrangin ser a itan kêng a ini. Khanchu sertan no khomsian iamna sika Pathianin thiam a inchangtirhai hrangin chu Abrahama chu an irtha tianga pa a ni.

¹²Sertanhai pa khom a ni, sertan an ini vai sika ni loiin ei pa Abrahama’n ser a tan mâna a iam ang dêna iamna an nei sika a ni.

Iamna sika chonginkung hlenna thu

¹³Dan zôm sika ni loiin iamnaa thiam inchangtir a ni sik uala, Pathian khan Abrahama kuang ama le ar chihai khan rammual hi an la ilua hrang a nih ti thu a inkung a ni.

¹⁴Dan zôm hi irchon luatu nina ni sian, iamna hi a korong chian ni a ta, chonginkung khom ite ni ma tihna ni a ti.

¹⁵Dânin chu ningmurna an suaktira, Dân om no sian inchâina khom a iom hrang ni mah.

¹⁶Abrahama irchi murdihai hrangin, dân zômтуhai vai ni loiin, ama iam anga iamтуhai hrangin Pathian thilmanboi pêk a nizia inlang hrangin iamna sikin kêng Abrahama kuang thu a inkung a ni.

¹⁷“Chi tamtak paa nang siam ki ti,” ti irziak ang khan, a iiam Pathian, mithihai inhring nôktu, thil om loihai inomtirtu a iiam Pathian mithmua khan; Abrahama chu ei renga pa a ni.

¹⁸Sabei hrang a om no khomin a sakeiin a iam ngita, khanchu chi tamtak pa a hong ni ta, “Ni’rchihai chu khi irvâna ârsi tam ang dôr khi la ni an ti,” ti irziak ang khan.

¹⁹Kum irzakhat ang dôra mi a ni tâka, a takpum ngaitua’n chu mithi ang dêna ni tâka, Sari khom kha nâi nei zât ni ta mah ti an hriat chian pumin a iamna kha chuai ual hliak mah,



²⁰iamna irsamin Pathian thu'nkung kha lunghla loia, a iamna kha a hrât tîr tîra, khanchu Pathianin a chôindôm ual ta a ni.

²¹Thu'nkung khan a inkung tak chu hlen thei ngêt a ti a iam ngita.

²²Khasikin a lôma, "A iamna sika thiam inchangtir a ni," an iti a ni.

²³Khanchu, hi chongbâi, "Ama chu mi fela pom a ni," iti hi, ama chungchâng insîr hrang ringota irziak ni mah.

²⁴Keinihai, ei Rengpa Jisua mithi lai ata kaithoitu iamtuhai, iamna sika thiamchang tâkhai hrang khoma irziak a ni.

²⁵Jisua chu thil sual ei ithohai sika ithatpai a nia, Pathian kuang thiam ei changna hranga kaithoi a ni sa.

Rom 5

Thiamchangna ra

¹Khasikin iamna sika thiam ei chang tâk sikin, ei Reng Jisua Krista zâra Pathian le irngeiin ei om ta.

²Ama sika ngêt khan atûn hin ei iomna lungkhamna hnuai hin, iamna'n ei lût tâka, Pathian roiinpuina sabeina sikin ei ilôm sa a ni.

³Khabana ei intaknaa khom ei ilôm mai a ni; intakna'n dorôina a siama,

⁴dorôina khom khan detna a siama, detna khan sabeina an suaktir ti ei inhriata.

⁵Kha sabeina khan bei nin dongtir maka, Irtha Irthiang a ni ipêk hmangin ei lungrîla hin Pathianin a lungthungna kha a zuang ibuak tâk a ni.

⁶Ite tho theiloï ei ni lai khan, a zoro taka Krista chu mi sualhai hrangin a zuang thi tâka.

⁷Mi fel ta hranga thi chu tu hrang khomin a sân intak a ti, mi sa ta hrangin chu thi ngam khom an om rôï mo.

⁸Aniachu Pathianin lung a ni ithungna an langna chu, mi sual ei ni lai ata Krista kha ei ta hrangin a zuang thi tâka!



⁹A thisen sika khan Pathianin thiam a ni zuang inchangtir tâka; Pathian ninginmurna ata khom ama zâra ni sansuak ngei a ti.

¹⁰Râl ei ni lai lua khan a Nâipa thina zâra Pathian leh ei irngei tâkin chu Pathian leh irngeina ei om hnunga vâng chu Krista hringna sikin saninhring ni ngêt ei ti!

¹¹Kha vai khom kha ni mah, atûna irngeina ni pêktu ei Rengpa Jisua Krista zâra Pathiana ei ilôm a ni.

Adama le Krista

¹²Rammuala hin mi inkhat sikin soal a hong lûta, soal sika khan thina a hong om ta. Khanchu rammuala mihriam murdi hi thina khan ar fang suak ta a ni, mi murdi'n thil soal an tho sikin.

¹³Dân a om mân khomin rammuala soal a om ta, khannisian Dân a om no sikin soal kha suala ibe ni mah.

¹⁴Khannisianlân, Abraham a zoro ata Mosia zoro dênin mi murdi chung a Adama'n Pathian thupêk zôm loia thil soal a itho tâk anga soal loihai chung a khom thina khan ircham a neia. Adama chu la zuang hrangpu leh irkhek a ni.

¹⁵Khannisianlân, Pathian thilmanboi pêk kha Adama soal leh khan irang no tak a ni. Mi inkhat soal sika khan mi tamtak an thia; Pathian lungkhamna le mi inkhat Jisua Krista sika khan a thilmanboi pêk chu mi tam takin an idong a ni.

¹⁶Pathian thilpêk le mi inkhat soal chu irang no tak a ni, mi inkhat soal sikin thiamno changna a hong oma, aniachu, soal tamtak sikin lungkhama thiam changna a hong om ta.

¹⁷Mi inkhat, mimal soalna sika rammuala hin thina'n roi a rêl a ni tâkin chu, mi inkhat ngêt Jisua Krista sikin, Pathian lungkhamna irkhêl tak le thilmanboi pêk thiam changna dongtuhai chu, hringna changin roiinpui takin roirêl ngêt an ti.

¹⁸Khanchu, mi inkhat soal sikin mi murdi thiamno inchangtir an nia, khang dênin mi inkhat fel sikin mi murdi thiam changin an ihring thei tâk a ni.



¹⁹Mi inkhat thu zômloi sika khan mi tamtak mi سوال an ni tâka, khang dênin mi inkhat thu zômna sika mi tamtak mi fel ni an ti.

²⁰Sual a pung nôk ual theina hrangin Dân a zuang oma; khannisianlân, سوال a pung nôk ualin lungkhamna a pung nôk ual a ni.

²¹Khanchu, سوال chu thina'n roi a rêla; ei Reng Jisua Krista zâra kumtuang hringna ei nei theina hrangin Pathian lungkhamna khan thiam inchangtirna'n roi a irêl tâk a ni.

Rom 6

Sual thisana Kristaa hring

¹Imo ei insîr hrang tâk? Lungkhamna chu a pung theina hrangin ei isual nôk li lia hrang ma ni?

²Nâi sâi mak e, Eini سوال thisan tâkhai chu suala itin mo ei la iom mai thei hrang?

³Krista Jisuaa baptisma chang murdihai chu a thinaa baptis-in ei om thiai tih nin inhriat mo ni ma?

⁴Baptisma ei changin a kuang phûmin ei om saa, a thina kha ei irkoppui a ni; khang dênin, Pa'n mithi lai ata roiinpui taka Krista chu a kaithoi ang khan, eini khom hringna tharin lêng ta ei ti.

⁵A ithi anga ama leh irzoma ei thiin chu ama kha a ithoi nôk ang dênin ama leh irzomin eini khom kaithoiin om sa ei ti.

⁶Sual suaka ei om ta lina hrangin سوال irput takpum hi thatpai hrangin ei mihriam milui kha a kuang hemben a om tah ti ei inhriat a ni.

⁷Tukhom thi tâk chu سوال ata a irkiang tâk a ni.

⁸Khan, Krista kuang ei thi sa tâkin chu a kuang hring sa ta ei tih ti ei iiam a ni.

⁹Krista chu mithi lai ata kaithoiin a oma, thi nôk ta no ni tih ei inhriat, thina khan a chung a ircham nei ta mah.



¹⁰A thina kha سوالنا تیڠ چو ٲی ٲهنگ ٲائنا ا نیا، ا هریڠنا چو ٲاٲیان کوانگ هریڠ ٲهنگ ٲائنا ا نی.

¹¹كهاڠ دینن نانڠنی کھوم سوالنا تیڠ چو ٲی ٲاکیڠ یربه ۛنڠلان، کریستا جیسواا کھان ٲاٲیان تیڠ چو ا هریڠین یربه روی.

¹²كھانچو، نین ٲاکسا یرزوکنا نانڠنی ینزومتیر هریڠین نین ٲاکٲوم ٲی ٲهیا کھان سوال هی ینلال نو ری سه.

¹³نین ٲاکٲوم ۛنھای کھوم ٲیل سالوی ٲھونا هریڠین ینھمانڠتیر ٲا نو روی؛ میٲھی لای اٲا هریڠ نۛک انڠین ٲاٲیان کوانگ ینھلان ۛنڠلان، نین ٲاکٲوم ۛنھای کھوم کھا اما کوانگ فھنا هریامھری هریڠین ٲه ۛال روی.

¹⁴سوال کھان نین چونڠا یرچام نھی ٲا نو نیا؛ دآن هنۛاایا ۛم ماکا، لۛنڠکھامنا ٲھنۛاایا نین ۛم ۛال ٲاک سیکین.

Felna suak

¹⁵یتین مو ا یني هریڠ ٲاک؟ دآن ٲھنۛاایا ۛم لویا لۛنڠکھامنا ٲھنۛاایا هی ۛم ٲاک سیکین، سوال هی یتھو نۛک مای هریڠ ما نی؟ نی ماک ه.

¹⁶ٲو کوانگ کھوم ا ٲھو زۛم هریڠا ا سوکا نین لۛٲین چو، ٲھنا هریڠ ٲهنا سوال سوک ماڠی، فھنا هریڠ ٲهنا ٲھو زۛمنا سوک ماڠی کھوم نی سیانلان، ا ٲھو نین ینزۛمٲو سوک چو نین نیھ ٲی نین ینھریاٲ لوی ما نی؟

¹⁷سوال سوک نی نی ٲاكا، کھاننسیان، نانڠنی ان ینھلان نۛک ٲھورچی سا یرچۛٲیرنا ٲھو نین یدونڠ کھا میلونڠ ٲاكا نین زۛم سیکین،

¹⁸سوال سوک اٲا چو ینسوک نین نی، فھنا سوک نین هونڠ نی ٲا. کھاسیکین ٲاٲیان کوانگ لۛمٲھو ۛم ری سه.

¹⁹(نین ینھریاٲ ٲهینا هریڠین میھریام دآنین ٲھو کی ینسیر ا نی.) نین ٲاکٲوم هرہٲ لویزا ینھریاٲین، میھریام ٲاکیڠ ٲھو کی ینسیر ا نی، نین ٲاکٲوم ۛنھای چو ماٲونا ٲورینچه له ینچائنا سوکا ینسیاٲ هریڠین نین ینٲک نڠای انڠ کھان، اٲۛن چو فھنا سوکا یرٲھیانڠا هریڠ هریڠین ٲه ۛال ٲا روی.

²⁰سوال سوک نین نی لای کھان فھنا اٲا نین یرکیانڠا.

²¹اٲۛنا نین ینزاکٲوی ٲاک، ٲیل نین لهی یتھو نڠای کھا، نین ینلٲٲوی مو؟ کھا کھان ا مونڠ ٲاكا چو ٲھنا ان ٲونڠا.



²²Atûn chu soal ata irkiang nin ni tâka, Pathian suaka nin lût tâk sikin kumtuang hringna chang hranga irthiangtir nin ni ta.

²³Soal man chu thina a nia; Pathian thilmanboi pêk chu ei Rengpa Krista Jisuaa khan kumtuang hringna a ni.

Rom 7

Irnei chongirkhek

¹Urênghaio, dân nin inhriat intama, ki insîr hi irhmâi no chin ni; dânin chu mi a hring sêng vai an chung a ircham a inei mo ni ma?

²Dôngma chu a pasal a hring sêng ten a pasala dân khan a khita; khannisian a pasal a thiin chu a pasal ata dânin a ikhitna kha isûtin a om ngai.

³A pasal hring laiin mi dang a neiin chu a iuire a nia; a pasal thi hnunga chu dân khitna ata ar kianga, mi dang nei khomsian uire ni ta mah.

⁴Khaang tak kha a ni, ki urênghaio: Krista takpum ônhai nin ni tâk sikin dân chu nin thisan tâka. Pathian ta hrangin ra ei insua theina hrangin atûn chu mi dang ta, mithi lai ata kaithoitu ta kha ei ni.

⁵Taksaa ei om lai khan dân sika ei inuamlam soal hong suakhai chu ei takpum ônhai thina hrang dôra ra hrangin sin a hong tho ngai.

⁶Atûn hin chu, a ni khit ngaitu kha ei thisan tâka, dân ata ei irkiang ta: Dân thu irziak milui anga ni loiin Irtha dân tharin sin ei itho ual a ni.

Dân le سوالنا

⁷Imo ei insîr hrang tâk? Dân chu soal ma ni? Ni mak e. Aniachu dânin nin hriattir no sian soal hi inhre no ning, dân khan, “Irzuk no roh,” ti no sian, irzuk hi ki inhriat loi hrang pial a ni.

⁸Hi thupêk hi zoro'nchuma hmangin soal khan keimaa hin irzukna chi tinrêng an suaktira. Dân om no sianlân chu soal hi thil thi chian a ni.

⁹Tiana khan chu dân kop loiin ki om ngaia, khannisian thupêk chu a hong oma, soal kha a hong hara,



¹⁰kei chu ki thi tâka. Hringna hranga thupêk chu ki hrangin thina a hong ni ta.

¹¹Sualin chu thupêk kha zoro'nychuma hmangin mi a huanga; a ni ithatpai tâk a ni.

¹²Dân kha chu a'rthiang kêng, thupêk khom a'rthianga, a fela, a isa a ni.

¹³A ninole, thil sa khan ei ta hrangin thina a hong intung kêng na? Intung mak e. Sual kêngin a ni: Sual a nizia inlang hrangin thil sa hmangin ki ta hrangin thina a hong intunga, thupêk sikin sual irkhêlzia chu a hong inlang fel tâk a ni.

Mihriama irmîl thei loi

¹⁴Dân chu irtha tianga thil a nih ti ei inhriat; kei chu mihriam mai mai, sual suaka zuar tâk ki ni.

¹⁵Ki châng lam dân hi inhre thei ma ung, ki itho nuam chu tho loiin ki inuam loi kêng ki itho hen a ni.

¹⁶Ki itho nuam loi kha ki tho'n dân kha a sa ki itipui sa tihna a ni.

¹⁷Khanchu keima hi chu a thotu tak kha ni ma ung, keimaa sual om hi a ni ual.

¹⁸Keimaa mihriam hi chu thil sa ite om mah ti kin hriat; thil sa tho nuamna nei ngai khom inlân, tho thei ma ung.

¹⁹Ki itho nuam thil sa kha tho loiin ki itho nuam loi thil sual chu ki tho ngaia.

²⁰Ki itho nuam loi lam kha ki tho'n chu a thotu tak kha keima hi ni ta ma ung tihna a ni; keimaa sual om hi a ni ual.

²¹Hiang hi thil om lam a nih ti kin hriat suak ta: Thil sa ki tho nuam nâkin, thil sual ki tho nôk ngai.

²²Ki mihriam sîngrîlin chu Pathian Dân kha a lôma;

²³Khannisianlân, ki takpuma hin a thotu, dân danglam tak a om tih kin hriat, kha khan ki sîngrîlin sa a iti lam dân kha a doia, sualna dân ki takpuma hong tho ngai suaka khan a ni siam chian a ni.



²⁴Lunginkham om mi te ki nia na! Hi thina takpum ata tu'n mo ni sansuak ni?

²⁵Pathian vaiin kêng! ei Rengpa Jisua Krista zâra ei Pathian kuanga lômthu ki insîr a ni. Khanchu, ki milung sîngrîl taka chu Pathian Dân a zôma, ki takpum hin chu سوالنا sin a itho a ni.

Rom 8

Irthaa hringna chu

¹Khasika khan atûn chu Krista Jisua omhai ta hrangin chu thiamno inchangtirna zel om ta mah.

²Krista Jisuaa hringna Irtha dân khan سوال le thina dân ata chu a nin suaktir tâka.

³Taksa hrât loina sika dânin a itho thei viat loi kha Pathianin a zuang tho tâka; mihriam taksa سوال ang irputin a Nâipa ngêt kha, سوال irbôlna'n Pathianin a zuang tîra; taksa سوال om chu thiamno an changtir tâka;

⁴taksa dâna om ta loi, irtha dâna om tâkhai, keinia hin dânin a inphût kha hlen suaka a om theina hrangin.

⁵Taksa dâna omhaiin chu taksa tianga thilhai an nuama, irtha dâna omhaiin chu Irtha tianga thilhai an nuam ngai a ni.

⁶Taksa tianga thil nuamhai chu thina a nia, Irtha tianga thil nuam chu hringna le irtharngamna a ni.

⁷Taksa nuamlam chu Pathian a doia; Pathian Dân zôm maka, zôm khom zôm thei ual mah;

⁸Khasikin taksa nuamlam anga omhai chu Pathian inlômthir thei mahai.

⁹Pathian Irtha kha nin kuang a omin chu taksa mi ni ta mak chêia, Irtha mi nin ni ual ta a ni. Tukhom Krista Irtha nei loi chu ama mi ni mah.

¹⁰Khan, Krista kha nangnia a omin chu nin takpum kha سوال sika thi ni khomsian, thiam inchangtir nin ni tâk sikin nin irtha chu a ikring a ni.



¹¹Mithi lai ata Jisua kaithoi nôkpu irtha kha nangnia a omin chu, thina irthoka Krista Jisua kaithoi nôkpu khan nin takpum thi thei kha nangnia ama Irtha inomtirin nin takpum thi thei kha inhring a ti.

¹²Khasika khan, urênghaio, lâkai ei nei, taksa dâna taksa taka hring hrang chu ni mah.

¹³Taksa dâna nin omin chu nin ithi ngêt hrang a ni: aniachu, nin taksa irzuk lam thil sual thohai Irthaa nin thatpaiin chu hring nin ti.

¹⁴Pathian Irtha hruaia om murdihai chu Pathian nâihai an ni.

¹⁵Nin Irtha dong kha suak anga ichia nangni inomtir nôk hrang ni loiin nâia nangni siam hranga Irtha a ni ual; khasika khan, “Abba! ka Pa” tiin ei ikhêk suak ngai a ni.

¹⁶Kha Irtha ngei khan einia irtha leh irkopin Pathian nâihai ei ni a nin hriattira.

¹⁷Pathian nâihai ei niin chu ar chon luatuhai ei ni, Krista tuangna ei irkoppui ngêt hrang a ni.

Roiinpuina hong om hrang

¹⁸Atûna tuangnahai hi nakana ei ta hranga roiinpuina inlang hrang leh khan irkhek inrukin bê ma ung.

¹⁹Thil siam murdi'n chu Pathianin a nâihai a hong inlangtir zoro an nghâkhmo tak tak a ni.

²⁰Thil siamhai chu an mâni nuamlam sik ni loiin, Pathian nuamlam sikin chanlamboi ni hranga hnôl an ni tâk, aniachu, sabei hrang a la om;

²¹thil siamhai chu siatna suak ata insuaka omin, Pathian nâihai zalênna roiinpui kha an irkoppui hrang a nih ti sabeina a ni.

²²Thil siam murdi chu atûn ten nâiha irvei inrûm angin an inrûm tih ei inhriat a ni.

²³Kha vai kha ni mah, eini Irtha ra masa dongtuhai ngei khom hi, a nâia a ni siam tika chu, nghâkhmo'n ei inrûm a ni.



²⁴Kha sabeina sika khan saninhring ei nia; aniachu hmu tâk sabeina kha sabeina ni mah. A ihmu chian tâk kha chu tu mo la sabe mai hrang?

²⁵Ei ihmu loi kha ei sabein chu ei inghâk zâm zâm ngai a ni.

²⁶Khasikin Irtha khom khan ei hrât loinaa a ni changpui ngai. I anga chongchai hrang moh ti inhre mak meh. Irtha'n chu inrûm insîr theiloiin a ni chongchai pe ual a ni.

²⁷Mi milung enfiatu Pathianin chu, Irtha insîr tum chu imo a nih ti an hriat; Irtha'n chu Pathian nuamlam ang takin a ni chongchai pea.

²⁸Pathian lungthungtu, ama inkung anga a ikoihai hrangin chu, an satna hrangin itinrêngin a tho pe ngai tih ei inhriat;

²⁹a lei inhriathai kha ama Nâipa ang taka om hrangin a lei inkunga; khanchu, a Nâipa chu urêng tamtak laia nâi lutîr tak a hong ini hrang a ni.

³⁰Khan a lei inkunghai kha a koia, a ikoihai kha chu thiam an changtira, thiam a inchangtirhai chu a roiinpuina an changtir sa a ni.

Krista Jisuaa Pathian lungthungna

³¹Kha thua khan imo ei insîr hrang tâk? Pathian chu eini tiang a changin chu tu'n mo ni doi thei hrang?

³²Ama Nâipa ngei khom hôi loa ei rênga hranga pêktu khan itinrêng manboiin a ni ipêk sa loi hrang ma ni?

³³Pathian mi inthanghai chu tu'n mo hnôl ngam hrang? Pathian chu thiam inchangtirtu a nia.

³⁴Tu'n mo thiamno inchangtir hrang? Krista Jisua mo? Ama chu ei ta hrangin a ithi vai ni loiin a thoi nôka, Pa Pathian chang tiang omin ni chong petu kha chu ama dên kêng a ini.

³⁵Krista lungthungna ata chu tu'n mo ni sen thei hrang? Intakna'n mani, lungdûkna'n mani, dengintheina'n mani, châmin mani, korongboiin mani, khandaiin mani a ni isen thei hrang ma ni?



³⁶Pathian Thu bu'n, "Nangma sikin sîn sôtin that zôi zel hmabâkin ki oma, Belra that hrang anga sia ki ni," ti irziak ang khan.

³⁷Thei no ni! Khahai murdi ata khan a ni lungthungtu sikin roiinpui taka ngamtu ei ni.

³⁸Thina'n mani, hringna'n mani, vântîrtônin mani, inlalna'n mani, thil omsaiin mani, thil la om hrangin mani, sinthotheina'n mani,

³⁹irsângna'n mani, inthûkna'n mani, thil siam dang rêng rênghai khomin ei Rengpa Krista Jisuaa om Pathian lungthungna ata chu ni sen thei no ni, ti kin hriat infel a ni.

Rom 9

Pathian nam inthang Israel

¹Kristaa khan thu dik tak ki insîr a ni; milak ma ung: Irtha Irthiang zâra ki sia le sa inhriatna khomin an hriat infel a ni.

²Ki lungrîl intak lam irkhêlzia le ki chardongna a iboi thei loizia hi!

³Ki urênghai, taksa tianga ki chipuihai irthûla hin khosâl tongin Krista kuang ata indang ni inlân, ki ti rak ngai a ni.

⁴Israel mi an nia, nâi nina hai, roiinpuina hai, thuthung hai, dân hai, sin thôna sin hai, Pathian thu'nkung hai an changa;

⁵irchibulhai kha an puhai an nia, taksa tianga suiin chu Krista ngei khom kha an irchi a ni; itinrêng chung a om Pathian chu kumtuanga inpâkin om ri se! Amen.

⁶Pathian thu chu mâkana a ni ta tihna chu ni viat mah; Israel irchi murdi Israel mi ni zit mahai.

⁷Abrahama irchi murdi khom a nâihai ni zit ual mahai. "Isaka hin nir chihai sui ni a ti," Pathianin a iti ual kha.

⁸Khanchu taksa tianga a nâihai chu Pathian nâihai ni ual hliak mahai, Pathian thu'nkung sika a nâihai chu Abrahama irchi dik taka bê an ni.



⁹“Atûn zoro anga hin zuang a ta, Sari’n chu nâipasal nei a ti,” tia inkung a ni kha.

¹⁰Kha vai kha ni maka, Rebeki khan nâipasal inkhat, ei irchibul Isaka ata inphîr a vonga,

¹¹nâite suak mân a sia mo a sa mo an ti thei mân khan Pathianin a nuamlam angin inkhat kha a inthang a nih ti an lang:

¹²sintho sika ni loiin, a koitu nuamlamin Rebeki kuang, “A ulian ualin a nâipang ual sintho a ti,” Pathianin a ti kha.

¹³Pathian Thu bu’n, “Jakoba lung ki thunga, Esaua chu ki khôkmâk,” ti irziak a ni sa.

¹⁴Khaang kha a niin chu imo ei insîr hrang tâk? Pathiana felloina a iom ma ni? Om mak e!

¹⁵Ama khan, “Lung ki inkham murdi chu lung ki inkham ni a ta, za ki irngaiina murdi chung a za irngai ki ti,” tia Mosia kuanga a insîr kha.

¹⁶Khasikin, mihriam nuam lama mâni sinthoa ni loiin, Pathian lungkhamnaa a irngat ual a ni.

¹⁷Pathian Lekha Thu’n Faraa kuang, “Hi mi sika ringot hin nang kin dingtir nôk a ni, nangmaa ki sinthotheina nang kin entir theina hrang le rammual pumpuia ki’rhming an thang theina hrangin,” a tia.

¹⁸Khanchu Pathian khan a inuam murdi lung an kham ngaia, a inuam murdi khom an tukulliantir ngai a ni.

Pathian ningmurna le lungkhamna

¹⁹Khaang khan a ni’n teh ithoa mo Pathianin mi a la idem hrang? A inuamlam kha tu mo khâl theia? nin iti a ni thei.

²⁰Khannisian, o mihriam, Pathian sêltu kha tu mo ni ini? Thil siam khan a siamtu kuang? “I hrang mo hiang hin ni ni isiam?” a iti hrang ma ni?

²¹Bêlpil tang khat ata bêl inkhat hlu ual takin le bêl inkhat hlu loi taka hrangin bêl saktu’n chu pilbêl chung a khan ircham a inei mo ni ma?



²²Khaang khan Pathianin a tho ngai, a ninginmurna le a sinthotheina inlang nuam khomsian, a ninginmurna dongtu bêl irhmang zôi zâthai chu a tuang zâm zâma,

²³Khan, a lunginkhamna bêl, a roiinpuina dong hranga a isinsiam, einihai kuanga hin, a roiinpuina irkhêl tak a zuang inlangtir tâk a ni.

²⁴Judahai lai ata vai ni loiin Jentailhai lai ata a ikoi suakhai hi, khaang bêlhai kha ei ni.

²⁵Hosea lekhabua hiang hin a insîr kha, “Ki mi ni ngai loihai kha ‘Ki mihai’ ti ki ta, Lung ki ithung loinu kha ‘Lungthungnu’ ti ki ti.

²⁶‘Ki mihai ni mak chêi,’ an itihna hmuna ngei khan Pathian ihring nâihai ibe’n om an ti,” tia irziak ang khan.

²⁷Isaia khom khan Israel mihai thu khêkpuiin, “Israel mihai chu tuikhanglian chiai dôrin tam khomhai sianlân, a ihrem ban tômte vai saninhing ni an ti.

²⁸Rengpa khan irrêng chung a roirêlna hrang kha a hlen lat hrang a ni,” a ti kha.

²⁹Isaia dênin, “Rengpa Itinrêngthothei khan irchi ni lei hôi pe no sian chu, Sodom angin ni ta a ta, Gomora ang dênin ni ta ei ti,” tia a lei insîr ang khan.

Israelhai le Thurchi Sa

³⁰Imo ei insîr hrang tâk? Jentail thiam chang tum ual loihai chu thiam inchangtir an hong ni ta, iamna sika thiam changna kha.

³¹Dân zôma thiamchang tum Israelhai khan kêng dân angin chu thiam chang zoi ta mahai.

³²Itho sikin mo? Iamna’n zong loiin sinthoa hmu an tum sika a ni. Tûkna lunga khan an itûk tâk a ni.

³³Pathian Thu Bu khan, “Irngai ta, Zion-a khan tûkna lung le khâlna lungpui ki siaa, Tukhom ama iam murdi’n chu mualinphoi no ni,” ti irziak ang khan.

Rom 10



¹Urênghaio, ki chipuihai kha saninhringin omhai sian tih hi ki inuamlam le Pathian kuanga ki ingên tak ngai a ni.

²Pathian ta hranga sathnem ki'rngai irkhêlzia kin hriat, inhriat infel loiin sathnem an irngai a ni.

³Pathianin mi thiam an changtir lam inhre thiam mahaia, an lampui an hro ngita, Pathianin thiam an changtir dân hnuai irpelût nuam mahai.

⁴Krista chu dân famirkiptirtu a ni, a iam murdihai thiam inchangtira an om theina hrangin.

Mi murdihai hranga saninhringna

⁵Mosia'n chu dân zôm sika thiamchang chungchâng thu, hiang hin a'rziak: "Dân zômtu chu hring a ti," tiin.

⁶Iamna sika thiam changna thu rêk chu, "Tu mo irvâna lui hranga?" (ama kha chung tiang ata tu mo Krista zuang hruai hrang tihna a ni.)

⁷"Tu mo irnêng rîla zu fe hranga? (ama kha thina ata tu mo Krista a hong ihruai hrang tihna a ni) mo nin lungrîlin ti no roi," a tia.

⁸Khante, imo a iti? "Thu khan nang a nâi, ni bâi le ni lungrîla a om," a ti. Thu ti hi iamna thu ei insîr hi a ni.

⁹"Ni bâiin Jisua kha Rengpa a ni tiin ni thopa, thina ata Pathianin a kaithoi ti ni lungrîla ni iamin chu saninhringin om ni ti," tiin.

¹⁰Lungrîla iam chu thiam inchangtir an nia, bâia thop chu saninhringin an om sa ngai.

¹¹Pathian Lekha thu'n, "Tukhomin a iam chu mualinphoi no nihai," a iti a ni.

¹²Juda mani, Grik mani ite danglamna om ual mah; Rengpa inkhat chu an rênga Rengpa a ni; ama irlamtu murdi hrangin itinrêng a nei intam a ni.

¹³"Tukhom Rengpa irlamtu murdi chu saninhring ni an ti," ti a ni.

¹⁴An iiam loi chu itin mo an irlam hrang? An inhriat loi chu itin mo an iiam thei hrang? A hriltu om loiin teh itin mo an inhriat hrang?



¹⁵Tîr an ni no'n chu tu'n mo hril hrang? “Thil sa thurchi hong hriltu ke chu a va sa vang na!” ti irziak ang khan.

¹⁶Khannisianlân, Thurchi Sa chu an rêngin iam zit mahai. Isaia ngei khomin, “Rengpa, kin thu'nsîr hi tu'n mo a iam?” a tia.

¹⁷Khanchu, thu chu inhriat sikin iam a nia, thu kha chu Jisua Krista thu kha a ni.

¹⁸Khante, an mikuarin an inhriat ngailoi tak tak ma ni? Inhriat e: “An irhâi chu ram tina an thanga, An thu chu kôlkung dênin an thang suak ta,” ti a ni.

¹⁹Israel mihaiin an inhriat ngailoi ma ni? “Irchia tep kâiloihai chu nang inhnarsatir ki ta, Irchia vâr loihai sikin ning nang ni inmurtir ki ti,” tiin Mosia khan an sîr masaa.

²⁰Isaia'n chu hâi nôk ualin: “Ni zong loihaiin an ni hmua, Ni'rlamloihai kuang ki inhriattira,” a tia.

²¹Israelhai chungchâng thua chu, “He lâkloi le tehelzong mihai ta hrangin sîn misa tâkin ki bân ki phar ngai,” a tia.

Rom 11

Israelhai chung Pathian lungkhamna

¹Khante, Pathianin a mihai kha a ipai thâk mo ei iti hrang? Pai thâk mak e. Keima ngei khom Israel mi, Abrahamama irchi, Benjamina nam ki ni.

²Pathianin a phuta a inthang, a mihai kha pai thâk viat mah. Elija thurchi Pathian Lekha thua chuang kha nin inhriat loi ma ni? Ama khan Israelhai chungchâng Pathian kuang an tungtira:

³“Rengpa, ni deipuhai an thata, Ni maichâmhai an inchimtira, Keima vai ki la oma, Kei khom ni thatpai an itum a ni,” tiin.

⁴Khannisianlân, Pathianin itin mo a sâm kha? “Baala makunga khûksadel ngai loi mi sângsari keima hrangin ki la hôi mai a ni,” tiin a isâm a ni khate.

⁵Atûn khom khang dên khan Pathianin a lungkhamna sika a inthang suakhai tômte an la om.



⁶A lungkhamna sika inthang suak an niin chu, a sintho sika ni thei mahai; khang khan ni sian, lungkhamna kha lungkhamna ni thei no ni.

⁷Itin mo a ini hrang tâk? Israelhai khan an izong kha hmu mahaia, Pathian inthang tôte vaiin an hmua, mi danghai rêng rêng chu an sêt zoi zit tâk a ni.

⁸“Pathianin a vuan tena hin lungrîl inmusu irtha a pêka, mit hmu thei loi le beng inhre thei loi le ile,” ti irziak ang khan.

⁹Khan, Davida khan, “An hruiathe kha an ta hrangin châng le bil ni sianlân, Tûkna le thuanna ni ri se;

¹⁰An hmu thei lina hrangin an mit kha zîng sianlân, puak rikin irkul mai ri se,” a tia.

¹¹An tûk sikin an itûk theng thaina hrang mani, ti nôk inlân? Tûk theng thai mak! An tûk sikin Jentailhai kuang saninhringna a zuang tunga, Israelhai irzukna hranga a ni.

¹²Khang khan, an tûk luan rammual irchongna a nia, an hlosamna man Jentailhai irchonga a niin te, an hong kop irkip tena len vâng chu itin tak mo a ini hrang tâk!

Jentailhai Saninhringna

¹³Nangni Jentailhai kuang thu ki insîr a ni. Keima hi Jentailhai hranga tirtôn ki ni sikin ki sinthôna sin hi ki inhlu a ni;

¹⁴Ki chipuihai nangni kin hnarsatira, senkhat lua ki saninhring theina hrangin.

¹⁵Anni pai thâkna lua rammual hi Pathian ruala siam nôkna a ni’n chu, anni lômlût nôkna chu thina ata hring nôkna ni no ni mo?

¹⁶Bai tiam masa tak kha Pathian kuang inhlân irthiang a ni’n teh, a pumpuiin irthiangtir a ni. Khan, thing khom a’rzung a’rthiangin chu a ônhai khom a irthiang a ni.



¹⁷Oliv thing ôn senkhat kha sât thâkin, nangni oliv dolhai kha oliv kunga khan zom nin nia; irzung sa kha nin thop sa tâka.

¹⁸Ôn danghai ata kha irsor khom unglân a'rzung infâtu ni mak chêi, a'rzungin nangni a infa a ni.

¹⁹Khan, nangma'n, "Ki izom hrang ônhai kha sât thâk kêng a ini," ti ni ti.

²⁰Ni ti indik; an iam no sikin ikhiakpaiin an oma, nang chu ni iam sikin izom ni ni, lâirpâkpui no roh, chi ual roh.

²¹Pathianin a ôn takhai kha a hôi no'n chu nang khom nang hôi ual no ni.

²²Pathian satzia le ichiomzia hi ngaitua ta; a tûkhai hrangin ichi a oma, a satnaa ni om maiin chu, nangma ta hrangin chu a isa a ni, ni om mai no'n chu nang khom sât thâk ni ni ti.

²³Khan, anni khom iamloia an om mai no'n chu izomin om nôk an ti, Pathianin anni kha a zom nôk thei a ni.

²⁴Nang oliv dol ata sât thâk lua, suak dân pangai ang loia oliv thing saa zom ni ni'n chu oliv dik tak ôn kha thing dika khan zom ol ual ok a ti!

Israelhai indingtir nôkna

²⁵Urênghaio, hi thu'rthup hi nin inhriat loi nuam ma ung; khano'nchu ki vâdên lei irtina nin ti; Jentailhai an kop irkip mâka chu Israel mi senkhathai chung a hnangrakna la zuang tung bak a ti, ti hi.

²⁶Kha tika khan kêng Israel mi murdi saninhringna an iom hrang a ni. "Zion ata Saninhringna kha a zuang isuak hrang a ni, Jakoba kuang ata Pathian ngaisak loina inboi a ti,

²⁷Ama kha an kuanga ki thuthung hrang chu a ni. An sualhai ki lâkpai tika chu," ti irziak ang khan.

²⁸Thurchi Sa an hnôl sikin Judahai chu Pathian râl an nia; nangni dongtum a saa; Khannisian, Pathianin an thang sikin irchibulhai zâra a rual lungthunghai an ni.

²⁹Pathianin mi, sat a ivur tâk le a inthang tâk chu sut nôk thei ni ta mah.



³⁰Tiana khan chu Pathian thu zôm no sikin a lungkhamna nin dong ta a ni.

³¹Khaang dênin, atûn hin nangni'n lungkhamna nin dong sikin anni khomin lungkhamna an dong sa theina hrangin atûn hin an la iiam loi a ni.

³²An rênga chung a lungkhamna an langtir nuam sikin Pathianin mi murdi iamloinaa a ikhum zit ta a ni.

Pathian inpâk roi

³³Pathian irchongzia, a vârna le an hriatna kha an thûk bâka! A roirêl lam khom inhriat phâk loi zât, a lampuihai kha sui suak thei zât a ni no bâka!

³⁴Pathian Thu bu khan, “Rengpa lungrîl chu tu mo an hriata, Tu mo a roizêknaa chang tâk?

³⁵A thuan nôk hranga thilpêk, Tu mo om ngai?” ti hi.

³⁶Thil murdi hi ama ata zuang om, ama sika le ama hranga om a ni. A kuang kumtuang roiinpuina kha om ri se. Amen.

Rom 12

Kristaa hringna thar

¹Khasikin urênghaio, Pathian lungkhamna sika hin irbôlna hring le irthiang le Pathian lôm inruk ni hrangin nin takpum kha inhlan hrangin nangni ki ngên a ni; khaang kha nin sintho hrang lam tak a ni.

²Hi rammual om lam ang hin om no unglân, Pathian nuamlam, a sa le lôm inruk le satirkip kha nin inhriat infel theina hrangin, nin lungrîl a thara omin hong danglam ta roi.

³Pathian ni ipêk lungkhamna sika hin nin laia tukhom irngaiinhlu hrai loi hrangin nangni ki ingên a ni. Pathianin mi tin kuang iamna a ipêk ang takin, mâni irphu tôk lungrîl irput roi.

⁴Takpum inkhata ôn tamtak ei neia, ôn murdi'n tho tum an nei seng;

⁵khaang dênin eini khom tamtak ni inlân khom Kristaa khan takpum ôn anga irzom irhlôm seng ei ni.



⁶Lungkhamna a ni ipêk ang dênin thilmanboi pêk dang dang ei nei seng, thuhirilna tiang a ni'n chu, ei iam lam ang takin insîrin lân,

⁷sinthôna tiang a ni'n chu, sathnem irngai takin sinin lân, irchutirna tiang a ni'n chu irchutirin lân;

⁸mi irtharngamtir hrang a ni'n chu thei tôp insua'n lân; pêktu'n chu phal takin pe sianlân, roirêltu'n chu takirtâi takin rêl sianlân, changpui innanghai changpuitu'n chu raifân takin changpui ri se.

Kristian diktak irsinsianahai

⁹Lungthungna chu vârillekna kop loiin ni ri se. Sual chu khôkmâk unglân, a sa kha pom khak roi.

¹⁰Urêng angin ir-en irhlôm unglân, irchôiindôm irhlôm uar roi.

¹¹Irtha inboi viat loiin lungrîl irthor takin Rengpa sin kha tho roi.

¹²Sabeina khan nangni inlômirtir sianlân, dengitheina nin tuang khomin dorôi takin tuang unglân, itiklai khomin chongchai roi,

¹³urêng irsamhai kha irchangpui irhlôm unglân, mikhual lôm uar roi.

¹⁴Deng nangni intheituhai chu satvurhai unglân, kha sâlhai no roi.

¹⁵Lômhai chu lômpuihai unglân, chaphai chu chappui roi.

¹⁶Ngaitua hmunkhatin om seng unglân, irngaitua irsâng hrai no unglân, mi chînhai irrualpui roi, Vâr irti no roi.

¹⁷Sual chu suala ngêt thuan no unglân, mi murdi irngaia a sa ngaitua roi.

¹⁸Nangni chu mi murdi leh irngei tum roi.

¹⁹Inditom takhaio, "Phuba la no unglân, Pathian ningmurna inkian ual roi; phuba rêng rêng keima lâk hrang a ni, keima'n thuan ki ti Rengpa'n a ti," ti irziak a nia.

²⁰Khasikin ni râl a phîng a châmin chu fa hrang pe ro; a tui an hrâlin chu in hrang pe roh, khang khan ni tho'n chu a sân a inzak hrang a ni.

²¹Sual nang inhnêin om no'n lân, satna'n sual chu inhnê ual roh.



Rom 13

Roirêltuhai thu zôm hrang

¹Mi tinin an chung a roirêltuhai thu an izôm hrang a ni. Pathian inkung ni loiin roirêltu om thei mahai; atûna roirêltuhai khom hi Pathian inkung kêng an ini.

²Khanchu, roirêltu doi chu Pathian inkung a idoi a ni; a doitu chu ama chung a hremna intungtir a ti.

³Roirêltu chu thil sa thopu hrangin chu ichiom ma, thil sual thotu hrangin chu ichi a iom a ni. Roirêltu chi loia om mo ni nuam? Thil sa tho'n lân, inpâk hlo ni ti.

⁴Ni satna hranga Pathian sinthopu a ni. Thil sual ni tho'n chu chi ro, khandai kha an ichôi pai pai ni ma. Pathian sinthotuhai an nia, thil sual thotuhai chung a Pathian hremna irlektuhai an ni.

⁵Khasikin, hremna chi ringot vai ni loiin ni sia le sa inhriatna sika khom an thu ni izôm hrang a ni.

⁶Khaang khan a ni sikin khâzana khom nin chôi ngai; irchamneituhaiin an sin sataka an tho'n chu Pathian sin an itho a ni.

⁷Pe hranga an inkunghai murdi kuang pe unglân, irnêng man a niin chu pe unglân, khâzana chôi hrang a ni le chôi unglân, chi hrang chu chi unglân, mahrip hrang chu mahrip roi.

Urêng irlungthungna

⁸Lungirthung irhlômna ringot no chu tûte kuang intâng no roi; mâni mihriam chanpui lungthungtu chu dân zôm irkip tak a ni.

⁹Dân thupêkhai, "Uire no ro, mi that no ro, inru no ro, irzuk no ro," tihai le thupêk danghai rêng rêng hi "Nangma lung ni irthung ang hin ni bômhai lungthung ro," tih hin a kaikhôm zit a ni.

¹⁰Lungthungna'n mâni bômhai insiat ngai maka; khasikin lungthungna hi dân zôm irkipna a ni.

Krista zuang nôkna anai thu



¹¹Atûnlai thil omzia nin inhriat sikin le a inhai thoi zoro a ni tak tak tâk tih nin inhriat sikin, kha kha ki insîr a ni; atûn chu ei iam phut laia nêkin chu ei saninhringna chu anâi ual tâk a ni.

¹²Zân hi a boi vâng vâng tâka, khua a ivâr hrang a ni ta; khasikin izînga sintho chu pai inlân, vâ irbelin irbel ta ei ti.

¹³Sûna om angin satakin om ta ei ti, zu inbuai le zun ruia om loiin, hur le irdit songa om loiin.

¹⁴Rengpa Jisua Kristaa khan irbel lem unglân, nin taksa irzukna puiinhling hrangin ite irsiam no roi.

Rom 14

Ni urêng sêl no roh

¹Iamnaa mi hrât loi chu, a lunghlânahai kha sêl loiin lôm roh.

²Mi inkhatin thil itinrêng fa thei hrangin a iama, mi hrât no'n chu chîmu (an sùlhloihna) vai a fâk ngai.

³Itinrêng fa thei mi khan a fâk loi mi kha hmusit no ri se; a fâk loitu khom khan a fâktu kha sêl no ri se; Pathianin ama kha chu a ilôm tâk kêng.

⁴Mi dang siahlo sêltu chu tu mo ni ini? A ngîr indet mo, a tûk mo, a ngaituah hrang chu a pu ircham cham a ni. Ngîr indet ngêt a ti, Rengpa khan a ngîr indet suaktir thei a ni.

⁵Khan, mi dangin sùn khat hi sùn dang nêkin a'rngaiinhlu bîka, mi dangin chu nikhua murdi hi irang chitin a bêa. Mi tinin mâni lungrîla inhriat infel ri se.

⁶Sùn khat ser bîktu chu Rengpa chôindômna hrangin a iser a ni; itinrêng fâktu chu, Pathian kuang lômthu insîr baka a ifâk a ni sikin, Rengpa a ichôindôm a ni. A fâk loitu khom khan Pathian kuang lômthu an sîr sa dên sikin Rengpa chôindômna hrangin a inghei a ni.

⁷Tûte mâni hranga hring ni mak me, tûte mâni hranga thi ni ual mak me;



⁸ei hring khomin Rengpa ta hrangin ei ikring a nia, ei thi khomin Rengpa ta hrang ei ithi a ni; khasikin ei hring khomin ei thi khomin Rengpa ta ei ni.

⁹Khanchu mi hring le mithi Rengpa a ni theina hrangin Krista chu a thia a ikring nôk tâk a ni.

¹⁰Itho sika mo nangin ni urêngpa ni isêl mai? Itho sika mo nang khomin ni urêngpa ni ihmusit mai? Pathian roirêlna toihmun makunga khan ei la ingêr seng hrang kêng a ni.

¹¹“A hringpu kha ki ni kêng, Mi tinrêng ki makunga khûksadelin om an ti. Irnêng murdi'n Pathian ki ini inpuang an ti, Rengpa'n a ti,” ti irziak a ni.

¹²Khanchu, ei rêngin Pathian makunga mâni thurchi insêr seng hrang ei ni.

Ni urêng intûktir no roh

¹³Khanchu, irsêl irhlôm uar no roi, tukhomin mâni urêng tûkna hrang mani, lunghoiloina hrang mani, siam tum no roi.

¹⁴Ama khât ringotin chu a'rthiang loi ite om mah ti Rengpa Jisuaa khan kin hriat infel a ni. Nikhomsianlân, thil senkhat a'rthiang loa irngaipu ta hrangin chu a irthiang loi a ni.

¹⁵Ni thil fâk sikin ni urêng lungrîl a nain chu lungthungna lampui ni ihro ta loi a ni. A thi irthûl Krista'n a thi pe kha, ni thil fâkin inboi no roh.

¹⁶Khasikin nin ta hranga satna kha insêr insiatin om no ri se.

¹⁷Pathian Ram thu chu fâk le nêk lampang ni mah; Irtha Irthiang zâra thiam changna hai, irngeina hai lômna hai a ni ual.

¹⁸Khaanga Krista sinthotu murdi chu Pathian nuamlam mi a nia, mihriam inpâk khom a hlo ngai.

¹⁹Khanchu irngeina hrang le inlâptir irhlômna hrang thilhai kha ei irzûl ngêr hrang a ni.

²⁰Ni thil fâk sikin Pathian sintho insiat no roh. Thil itinrêng fâk hi a'rthiang, khannisian, mi dang tûkna thil chu fâk sa mah.

²¹Ni urêng tûkna hrang a niin chu hme hai, uain hai le thil tinrêng nghei a sa.



²²Ni iam lam kha iam chian roh, Pathian leh nin kêr thu a ni. Mâni iam dân lama thiam loina nei loi chu a vânei e.

²³Khannisian, tukhomin thiam irti loi puma fâk chu Pathianin thiamno a an chang chian tâk a ni; a iam lam ang ni mah ti a ni sikin. I khom, dika inhre loi puma tho chu sual a ni.

Rom 15

Mâni lôm lam ni loiin mi dang lôm lam zong hrang

¹Eini iamnaa a hrâthai hin mâni lômna zong loiin hrât no ualhai an hrâtloinaa ei ichangpui hrang a ni.

²Iamnaa ei phun indet theina hrangin mâni bômhai inlômin an ta hranga thil sa tho tum seng ei ti.

³Krista khomin mâni lômna zong ual mah, “Nang êrôthai êrôna kha ki chung a chum ta,” ti irziak ang khan a ituang tâk a ni.

⁴Pathian Lekha thua lei irziak tâk rêng rêng chu nir chutir hranga irziak a ni, thu irziak ata dorôina le irtharngamna ei dong zâra sabeina ei nei theina hrangin.

⁵Dorôina le irtharngamna Pathian kha Krista Jisua nuamlam angin lungrîl inkhat nang innei sianlân,

⁶Khanchu, lungrîl inkhat inrualin ei Rengpa Jisua Krista Pa le Pathian kha zâi inrualin inpâk thei nin ti.

Judahai le Jentailhai hranga Thurchi Sa.

⁷Pathian roiinpuina hrangin Krista khan nangni a ipom angin pom irhlôm seng roi.

⁸Nangni ki hril, Pathian iam omzia infelna hrangin irchibulhai kuang a thu'nkung kha hlenin, Krista chu sertanhai sinthotua a lei oma.

⁹Jentailhai khomin a lungkhamna sika Pathian chôiindôm theina hrangin. Pathian Thu bu'n, “Khanchu Jentailhai laia nang inpâk ki ta, Ni'rhming inpâkin zâi ki ti,” ti irziak ang khan.



¹⁰Hiang hin a ti sa a ni: “Jentailhaio, mihai leh lôm roi,”

¹¹Hiang khom hi a ti: “Jentail murdihaio, Rengpa chu inpâk roi, Ama mihai murdi khomin inpâk ri sehai,”

¹²Isaia khomin hiang hin a ti: “Jesaia irzung hong irzâm ata, Jentailhai rêng hrangin hong suak a ti. Ama chung a Jentailhai khan an sabeina kha irngat an ti,” ti a ni.

¹³Irtha Irthiang sinthotheina zâra sabeinaa nin sip theina hrangin sabeina hnâr Pathiana khan nin iam sikin lômna le irtharngamna tinrêngin nangni vur ri se.

Paula tirtôn a nina san

¹⁴Ki urênghaio, nangnihai hi satnaa sip, vârna tinrêng neiin tam, irchutir irhlôm thei hrangin nangni ki iam ngita;

¹⁵aniachu, thil senkhat nangni inhriattir nôk hrangin ki la hong irziaka. Jentailhai hranga sin hrangin Pathian khan Krista sinthôna sin a ni zuang inhlan phuta khan, hâi taka ki irziak a ni.

¹⁶Jentailhai chu Irtha Irthianga Pathian kuang, lôm inruka irbôlna hranga, inhlan hrangin Thurchi Sa hril hi ki ochai sin a ni.

¹⁷Krista Jisuaa khan Pathian sin ki tho hi a sân ki isong a ni.

¹⁸Jentailhai in-iamtir hrangin Krista'n sintho le thuhrlin keima ni hmanga a sinthohai vai no chu i khom hril ngam no ninga;

¹⁹Irsinsiana le sinirkhêlhai, Irtha Irthiang sinthotheinaa khan a ni hmang a ni, khasika khan Jerusalem kua le a kôlvêl rama irthokin Illurikon dênin, Krista Thurchi Sa chu hmun tina ki hril irkip tâka.

²⁰Mi dang lungphûm chung a sin inding ki ni lina hrangin Krista lan hriatloina hmun kipa Thurchi Sa inpuang hi ki nuamlam a ni.

²¹“A thurchi an la ihril ngai lina mihai khan chu hmu an ta, La'nhre ngailoihai khan inhria an ti,” ti irziak ang khan hril ki itum ngai a ni.

Paula'n Rom hro a tum lam



- ²²Khasika khan kêng, nin kuanga hong ki irlêk chian ngai a ni.
- ²³Atûn hin chu hi ramhaia hin fena hrang nei ta ma unga, kum tam tak sêng nangni hong hro ki itum mai ngai ang khan.
- ²⁴Spain ram fe malamin hong hrangin ki'rsabeia, nangni irpôlkhômpui bakin, ki ife tumna tiang nin sua hrangin nangni ki sabei sa a ni.
- ²⁵Atûnlai taka hin chu mi irthianghai sintho hrangin Jerusalem khuaa la fe bak ki ti.
- ²⁶Makedonia le Akaia rama mihai khan irphal takin Jerusalem khuaa mi irthianghai laia inrianghai ta hrangin tholôm an thoa.
- ²⁷Irphal taka tho an ni, aniachu an ni ata lâkai an nei mai ngai a ni. Jentailhaiin an irtha tiang thila Judahai an irkoppuiin chu, rammual tianga thila khom Jentailhaiin Judahai sin an itho a inang a ni.
- ²⁸Khasikin, kha kha ki thoa, tholôm kha an kuang kin hlan infel tika nangni hong hro malamin Spain rama fe ki ti.
- ²⁹Khan, nin kuang ki hong tika chu Krista satvurna famirkip pumin hong ki ti, ti kin hriat.
- ³⁰Urênghaio, ei Rengpa Jisua Krista le Irtha Irthiang zâra lungirthungna'n Pathian kuang ni chongchaipui ngut ngut hrangin nangni ki ngên a ni.
- ³¹Judai rama iam loihai ata ki zôk theina hrang le Jerusalem ta hranga changpuina thil ki ichôi hi, mi irthianghai lômlam tak a hong ni theina hrangin.
- ³²Pathian irfûktir lam anga, lungrîl raifân taka nin kuang ki hong, ei irkaiinhar irhlôm theina hrangin ni chongchai pe roi.
- ³³Irrngeina Pathian chu nin rênga kuang om ri se. Amen.

Rom 16

Mimal chubai mûkna

- ¹Ei farnu Foibi, Kenriai Koiindanga sinthotu hi, a hmêl nangni inhriattirna nei ki nuam a ni.



- ²Rengpa irhminga mi irthianghai ti irhoi anga lei lôm hrang le changpui nangna kipa lei changpui hrangin nangni ki nuam a ni. Ama khom hi mi tamtak lei changpui ngai a nia, keima ngei khom a ni changpui a ni.
- ³Priskili le Akuila, Krista Jisuaa ki sinthopuihai kha chubai ni mûk pe roi;
- ⁴khahai khan ki hringna inzôkna hrangin thi khom an irhuam a ni. Keima vai ni loiin Jentail koiindang murdi khom an chung a ni.
- ⁵An ina Koiindang inkhômhai ngai kha chubai ki mûk a ni. Ki rual lungthung Epaineta, Asia rama Krista iam masatak kha chubai ni mûk pe roi.
- ⁶Mari, nin ta hranga dengthei taka sinnu kha chubai ki mûk.
- ⁷Andronika le Junia, ki chipui le ki intângpuihai kha, chubai ki mûk; anni chu tirtônhai laia irhming inthang tak an nia, ki'rthûla Krista iam masa an ni.
- ⁸Ampliata, Rengpaa ki rual lungthung tak kha, chubai ki mûk.
- ⁹Kristaa ki sinthopui Urbana le ki indit tak, Stakua kha chubai ki mûk.
- ¹⁰Kristaa mi tak, Apelia kha chubai ki mûk. Aristobula in sâng mihai chubai ki mûk.
- ¹¹Ki chipui, Herodiona kha chubai ki mûk. Narkisa hai in sâng mi Rengpaa omhai kha chubai ki mûk.
- ¹²Trufaini le Trufosi, Rengpaa a satêna sinthohai kha, chubai ki mûk. Ki rual satak Persi, Rengpa hranga a satêna sintho ngai kha, chubai ki mûk.
- ¹³Rengpa sinthoa mi langsâr tak Rufa le a nu, ka nu ni sa khom kha, chubai ki mûk.
- ¹⁴Asunkrita hai, Flegona hai, Hermia hai, Patroba hai, Herma hai, an kuanga urêng omhai leh khan, chubai ki mûk.
- ¹⁵Filologoa le Juli, Nirea le a farnu le Olumpa, an kuanga mi irthiang om murdi chubai ki mûkhai.
- ¹⁶Tum irthiangin irchubai irhlôm unglân, Krista Koiindang hin chubai nangni kin mûk a ni.

Inthorna hnungkhôn



¹⁷Urênghaio, irchutirna thu nin idongna lama nin laia irsenna le tûkna insuaktuhai ata irdîn unglân, anni kha irheisan hrangin nangni ki nuam a ni.

¹⁸Khaang mihai khan ei Rengpa Krista sintho mahai, mâni phîngpui sintho chian an ni. An chong hmang thiam le chong hoiin mi'nmôlhai kha an huanghai ngai a ni.

¹⁹Thurchi Saa nin detzia mi tin inhriat a nia, khasikin kei khom nin chung a ki ilôm a ni. Nikhomsianlân, thil sa tianga vâra, sualna tiang irkiang ki inuam a ni.

²⁰Irngeina Pathian khan Setana kha nin ke hnuai a nangni insirphatir a ti. Ei Rengpa Jisua Krista lungkhamna kha nin kuang om ri se.

²¹Ki sinthopui Timothea le ki chipui Lukia hai, Jasona hai, Sosipatera hai hin chubai nangni an mûk.

²²Keima, Tertia, hi lekha thon irziaktu hin, Rengpa irhmingin chubai nangni ki mûk a ni.

²³Ki tungna in pa, koiindang inkhôm dongtu Gaia hin, chubai nangni a mûk. Kho sum enkoltu Erasta le a urêngpa Kuarta khomin chubai nangni an mûk.

²⁴Ei Rengpa Jisua Krista lungkhamna kha nin rênga kuang om ri se. Amen.

A mongna chongchai

²⁵Pathian chu chôindôm ei ti; Ama'n chu Jisua Krista thu, Thurchi Sa ei ihril le tiana thurîl irthup lei inpuang tâk ang khan nin iamnaa det takin nangni an dettir thei a ni.

²⁶Atûn hin chu thu irthup ngai kha deipuhai Lekhaa a hong inlanga, tukhomin an iama an zôm theina hrangin kumtuang Pathian thupêk anga nam tin laia inhriattir a ni ta.

²⁷Pathian omsun, vâ tak, Jisua Krista sikin kumtuangin roiinpuina om ri se. Amen.



1 Korinth

1 Korinth 1

¹Paula, Krista Jisua tirtôn ni hranga Pathian nuamlam anga koi le ei urêngpa Sosthena khan,

²Korinth khuaa Pathian Koiindang om, mi irthiang ni hranga koi, Krista Jisuaa irthiangtir le hmun tina ei Rengpa Jisua Krista, (anni le eini Rengpa) irhming irlam murdihai chubai kin mûkhai.

³Pathian ei Pa le Rengpa Jisua Krista kuang ata lungkhamna le irngeina nin kuang om ri se.

Krista Satvurnahai

⁴Pathianin Krista Jisuaa lungkhamna nangni a ipêk ang hin nin chungchânga ki Pathian kuang itiklai khomin lônthu kin sîr ngai a ni.

⁵Amaa khan lam tinrêngin irchongtir ni nia, thua le inhriatna tinrênga nin irsôn maia,

⁶Krista thu kha nangnia indet ngitin a oma;

⁷ei Rengpa Jisua Krista inlârna nin inghâk angin satvurna tinrêng hmu loiin om mak chêi.

⁸Ei Rengpa Jisua Krista Nikhuaa khan khom sêlna boia nin omna hrangin ama khan a mong dênin nangni indet a ti.

⁹Pathian, a Nâipa Jisua Krista, ei Rengpa leh irpôlna nei hranga nangni koitu kha iiam a iom a ni:

Koiindanga irsenna

¹⁰Urênghaio, ei Rengpa Jisua Krista irhmingin nangni ki ngên, nin laia irsenna om loiin thukhatin om unglân, lungrîl hmunkhat le ngaidân hmunkhat le tumna hmunkhata, fel taka irzom ngotin om roi.

¹¹Ki urênghaio, nin laia irngeiloina a om tih Kloii in sîng mihaiin an ni hril.

¹²Hi hi a ni ki iti chu: Mi tinin, “Kei Paula pôl ki ni, kei Apolova pôl ki ni, kei Kifa pôl ki ni, kei Krista pôl ki ni,” nin irti chita.



¹³Krista chu senin a iom ma ni? Nin ta hrangin Krosa hembe kha Paula ma ni? A ninole Paula irhmingin baptisma nin ichang ma ni?

¹⁴Krispa le Gaia no chu tûte nin laia ki baptis no sikin Pathian kuang lômthu ki ihril a ni.

¹⁵Khaang khan, tûte'n Paula irhmingin baptisma ki chang ti thei no chin ni.

¹⁶(Stefana le a in sâng mihai kha chu ki baptis sa; mi dang ki baptis sa mo chu inhre ma ung).

¹⁷Krista'n baptis hrangin ni tîr maka, Thurchi Sa insîra, kha Thurchi Sa kha mihriam vârna hmang loia insîr hrangin a ni tîr ual a ni; Krosa Krista thina kha chanlamboi a chang lina hrangin.

Krista, Pathian sinthotheina le vârna

¹⁸Kros thu chu a'rh mang thiaihai ta hrangin chu invêtna a nia, eini saninhring thiaihai ta hrangin chu Pathian sinthotheina a ni.

¹⁹Pathian Thu Bu'n, "Mi vâ vârna chu inboi ki ta, Mi thiam thiamna hnôl sa ki ti," ti irziak a ni.

²⁰Mi vâ kha khôn mo a iom? Mi thiam kha khôn mo a iom? Hi rammuala irsêl thiam kha khôn mo a iom? Pathianin rammual vârna hi invêtna a nih ti an lang ta.

²¹Pathian vâ dân chu hi hi a ni, Rammualin vârna hmanga Pathian an inhriat theiloi hnungin, kin thuhri invêtmanga iamtuhai saninhring hi: Kha kha Pathian nuamlam tak a ni.

²²Judahaiin chu irsinsiana thilirkhêl an inphûta, Grikhai lakin kha vârna ringot kha an zonga;

²³Keini'n chu Krista hembe thu kin ihril a ni, kha kha Judahai ta hrangin chu khâltu a nia, Jentailhai ta hrangin chu thil invêtom a ni.

²⁴Juda khom ni sian, Grik khom ni sian, koihai ta hrangin chu Krista kha Pathian vârna le sinthotheina a ni.



²⁵Pathian invêtna chu mihriam vârna nêkin a vâ uala. A hrât loina khom mihriam hrâtna nêkin a hrât ual a ni.

²⁶Urênghaio, nangni a ikoi lam hi irngaitua u ta, taksa tianga mi vâ tam takhai, mi hrât tam takhai, mi sa tam takhai ikoi an ni loizia hi.

²⁷Pathianin chu rammual mihai irngaia thil invêthai kha mi vârhai mualinphoina hrangin an thanga, rammuala thil hrât loihai kha thil hrâthai mualinphoina hrangin an thang saa.

²⁸Rammual thil môl le hmusitomhai, thil om loihai ten khom, Pathianin an thanga; thil om saihai pai thâkna hrangin Pathianin ite ni loia an irngai kha an thang tâk a ni.

²⁹Khasikin Pathian makunga khan tûte irsor thei om mahai.

³⁰Nangni chu, Krista Jisuaa khan nin om tâka; ama chu Pathian kuang ata, eini ta hrangin chu vârna hai, thiam inchangtirna hai, irthiangna hai le irtanna hai a lei ni tâka.

³¹Khanchu an irziak angin, “Song hrang nuamhaiin Rengpa kha song ri sehai”.

1 Korinth 2

Krista hembea om thu

¹Urênghaio, Pathian thutak irthup insîra nin laia ki hong laia khan thu roiinpui le vârna roiinpui leh hong ma ung.

²Nin laia ki om khoma khan thil dang murdi irnghil zitin Jisua Krista hembea om thu vai kha inhriat ki tum ngai a ni.

³Khaang khan nin laia ki hong laia khan inhriat loi le ichia inthing pumin ki oma.

⁴Ki bâia irthoka irchûna thu suak le ki thu insîrhai khom kha mihriam vârnaa inthêmna thu ni maka, Pathian Irtha sinthotheinaa inhriatna thu a ni ual.

⁵Khasikin nin iamna kha mihriam vârnaa irngat maka, Pathian sinthotheinaa a irngat a ni ual.



Pathian vârna

⁶Khan khom, irthaa ulianhai kuang chu vârna thu kin sîr ngaia. Khannisian, hi rammual vârna thu chu ni maka, hi rammual roirêltu, an inlalna irhmang thiaihai vârna thu khom ni mah.

⁷Pathian vârna thu irthup kha ki insîr ual ngai a ni, vârna thu irthup, ei roiiipuina hranga Pathianin rammual om mâna a lei inkung sai tâk kha.

⁸Kha vârna kha hi rammual roirêltuhai rêng rêngin inhre mahai. Inhrehai sianlân chu, roiiipuina Rengpa kha hembe no nihai.

⁹Pathian Thu'n, "Pathianin ama lungthunghai ta hranga an irfûk angin chu, Mita hmu ngailoi le mikuara inhre ngai loi. Mihriam lungrîla lût ngai loi a ni," a iti angin.

¹⁰Eini chu Pathianin a thutak irthup kha Irtha'n a nin hriat tâka. Irtha khan tinrêng a suisuak ngai Pathian thil tum inthûk tak khom.

¹¹Mihriam thil tum kha a sûnga om, ama irtha vai kêng an hriat ngai. Khaang dênin Pathian Irtha vaiin kêng Pathian thil tumhai an hriat thei.

¹²Ei idong hi rammual irtha ni maka, Pathianin thil a ni ipêkhai tinrêng ei inhriat theina hrangin Pathian zu itîr Irtha kha ei idong ual a ni.

¹³Khasikin mihriam vârna irchutirin insîr ngai ma unga, Irtha irchutirin kin insîr uala, irthaa thutak kha Irtha mihai kuang kin hrilfia ngai.

¹⁴Tukhom Irtha nei loiin chu Pathian Irtha ata thil pêkhai kha dong thei ma. Kha mi khan chu kha thilhai kha inhre thei mah; ama ta hrangin chu invêtna kai a ni, a hlutzia kha irtha vaia inhre thei a ni sikin.

¹⁵Tukhom Irtha nei ka kaiin chu thil tinrêng hlutzia an inhriat ngai, khannisian, ama chu tûte'n inhre thei ngai mahai.

¹⁶Pathian thu'n, "Tu'n mo Rengpa lungrîl inhriat? Tu mo irchûna chong pe thei hrang?" a iti ang khan. Khannisian, eini'n chu Krista lungrîl ei irput.

1 Korinth 3

Pathian suakhai



- ¹Urênghaio, irtha mihai kuanga ki insîr angin nin kuang thu insîr thei ma unga; taksa mi, Krista iamnaa nâitesenhai kuanga insîr angin ki insîr ngai a ni.
- ²Nin la fâk thei no sikin bu hrum ni loiin irhnutuiin nangni kin fâa; atûn ten khom la fa thei mak chêi.
- ³Taksa mi nin la ni sikin. Nin laia irhnarsâna le ir-êngna a om kêr ka chu taksa mi, mihriam taka la om nin ni tihna mo ni ma?
- ⁴Nin laia, “Kei Paula pôl ki ni, kei Apolova pôl ki ni,” tihai nin la om sêng chu a sân nin la taksa mi tihna mo ni ma?
- ⁵Khano’nte Apolova chu i mani? Paula khom imo a ini? Nin iam theina hranga sinhotu an ini kêng; kha khom kha Rengpa’n a ipêk ang dênin an isin a ni.
- ⁶Keima’n ki phuna, Apolova’n tuiin an fâa, khannisianlân Pathianin a irsôntir a ni.
- ⁷A’rsôntirtu Pathian vai no chu a phuntu le tuia infâtu kha ite ni mahai.
- ⁸A phuntu le tuia infâtu chu sin hmunkhata sin an ni. An sin intam dâna zirin lômman hmu an ti.
- ⁹Pathian ta hranga sin suam kin ni, nangni hi Pathian loimân nin ni. Pathian in sin nin ni sa.
- ¹⁰Pathianin thilpêk a ni ipêk hmangin in sintu thiam tak angin keima’n lungphûm ki phûma, mi dangin in an isin a ni. Khannisianlân, mi tinin an sin hrang lam chita irdîn ri sehai.
- ¹¹Pathianin lungphûm a lei iphûm tâk Jisua Krista bana chu tûte’n lungphûm dang phûm thei no ni.
- ¹²Kha lungphûm chungâ khan senkhatin rângachak mani, sum mani, lung mantam mani hmangin in sin an ta; senkhatin thing mani, hloisûl mani, fapôl mani hmangin sin an ti.



¹³Krista Nikhuuaa khan meiin an lâh hrang sikin, mei ngei khan mi tin sintho kha fia ta a ta, a ini tak inlang a ti.

¹⁴Lungphûm chung a sin kha a kâng no'n chu a sintu'n lômman hmu a ti.

¹⁵Tu sintho khom a kângin chu inchân a ti. Khannisian, ama tak chu mei irkân ang dôrin saninhringin om a ti.

¹⁶Pathian in nin nih ti le Pathian irtha nangnia a om tih nin inhriat loi ma ni?

¹⁷Tukhomin Pathian in kha an siatin chu, Pathianin ama kha insiat a ti. Pathian in chu a'rthiang kêng, kha in kha nangnihai nin ni.

¹⁸Tûte a bingin irhuang no ri se. Nin laia tukhomin hi rammual dâna vârin a'rbe'n chu, a vâh ta tak theina hrangin into chang phot bak ri se.

¹⁹Hi rammualin vârna a iti hi Pathian mit hmua chu invêt a ni sikin, Pathian Thu'n, "Pathianin mi vârhai chu an vârillekna khan an inôk ngai," a iti angin.

²⁰Pathian Thubu dangin, "Rengpa'n chu mi vârhai ngaituana kha a korong a nih ti an hriat," a iti sa angin.

²¹Khasikin tûte'n mihriamhai song no ri se. Thil tinrêng nin ta a ni.

²²Paula khom, Apolova khom, Petera khom, hi rammual khom, hringna khom, thina khom, thil om saihai le a la hong iom hranghai khom, a rêngin nin ta zit a ni.

²³Nangni khom, Krista ta nin nia, Krista khom Pathian ta a ni.

1 Korinth 4

Krista tirtônhai

¹Keini hi Krista tirtôn le Pathian thutak irthup enkoltuhaiin ni bê roi.

²Enkoltu hranga inkunghai chu an iiamom phot hrang a ni.

³Nangni'n mo mi dangin mo nin ni fiana hi itea bê ma ung, keima lakin irfia ngai ma ung.

⁴Itea irdemna hrang inhre ma ung, sêlna boi ki ni tihna lak ni mah, ni fiatu chu Rengpa a ni.



⁵Khanchu Rengpa zuang nôk mâka chu a zoro loia tûte insîr insiat no roi. Rengpa zuang mâka chu, ama'n inthima thup irhmanghai chu ivâra hong inlang an ta, lungrîla tumna irthuphai khom inlang sa a ti. Khanchu, mi tinin mâni irphu tôka Pathian inpâk hlo seng an ti.

⁶Urênghaio, hi thu, "Thu irziak chu khêl no roi," iti chong omzia nin irchu theina hrangin keima le Apolova hi nin enton hrangin ki hong itârlang a ni; tûte'n inkhat songin mi dang enkhûm no roi.

⁷Tu mo mi chung a ulian nangni siam? Nin idonghai kha Pathian nangni ipêk ni ma mo? Nin dongin teh ithoa mo dong no anga nin irsong?

⁸Nin irsam tinrêng nin inei tâk ma ni? Kin om no khoma rêng nin ichang thei tâk ma ni? Reng chang thei tak tak unglân ki nuam vang na, keini khom nin rêng kin changna hrangin.

⁹Pathianin keini tirtônhai hi thi hranga inkung ang dênin, irnêng le irvân vântîrtôn le mi murdi enhoi hrangin a hnungkhôn taka a ni isia mani ki ti ngai.

¹⁰Keini chu Krista sikin mi'nvêt kin ni, nangni chu Krista zâra mi vâv nin ni. Keini chu hrât ma unga, nangni chu nin hrâta, keini chu mihaiin an ni hmusita, nangni chu nangni an ngaisâng a ni.

¹¹Atûn ten phîngchâm le tuiinhrâlin kin oma, silkai kin irsama, mi tôkholmol kin tuanga, kin invâi a ni.

¹²A sân kuta sintho'n fâk kin zonga, mi'n khomâk an ni sâm le sat kin vurhaia, deng an nin theitir le diar takin kin tuanga,

¹³mi'n an ni êro le dâiriamin kin sâm ngai. Hi rammuala sahrok leh danglam ual ma ung, atûn ten khom hin irnênga nokkok ang kin ni.

¹⁴Hi thu ki irziak hi nangni inzakna hrang ki tia ni loiin, ki nâi lungthunghai angin nangni irchu ki nuam sika a ni.



¹⁵Krista khan enkoltu sîngkhat (10,000) khom nei unglân, Pa chu inkhat vai nin inei a ni. Nin laia Thurchi Sa hong intungna Krista Jisua leh irzoma nin hringna khan nin Pa ki hong ini a ni.

¹⁶Khasikin keimaa irthoka irchu hrangin nangni ki ngên.

¹⁷Hi chungchânga hin, Timothea, Rengpaa ki nâi lungthung le iamom kha nin kuang ki hong tîr. Ama khan Krista leh irzoma hringna thara ki om dân ram tina koiindang tinhai ki'rchutir ngai lam ang khan nangni inhriatir nôk a ti.

¹⁸Nin laia hong ta loi hrang ni sônin mi senkhat chu nin irsong a ni.

¹⁹Khannisianlân, Rengpa'n sa a ti'n chu, nin laia hong lat ki ti, khanchu hi mi irsonghai thu chu ni loiin, an sinthotheina kha inhre thei ta ki ti.

²⁰Pathian Ram chu thu vaia irngat mah, sinthotheinaa a irngat ual a ni.

²¹Imo nin inuam? Tôkholm leh mo nin kuang ki ihong hrang, aninole lungthungna le thuhnuaîrôl lungrîl irputin?

1 Korinth 5

Koiindang laia irditna saloi

¹Nin laia irditna saloi a om tih mi'n an hong insîr bak ngaia, khang dôra irditna saloi kha chu Jentailhai laia lua om ngai mah. Mi inkhatin a puinghâksia a zâlpui ngai ti khom ki lei inhriat.

²Khan khomin nin la irsong thei mai? Irsong nêkin, kha mi kha nin lai ata nin inhnot theina hrangin chardongin nin isip ual hrang a ni.

³Nin laia taksa'n chang no khom inlân, irtha'n chu ki ichang a ni; nin laia om ang khan ei Rengpa Jisua irhmingin khang taka thil ichiom thotu chungna khan roi ki rêl ta.

⁴Nangni le keima irtha Rengpa Jisua sinthotheinaa irbûmin,

⁵Kha mi kha ar tha Rengpa Nikhuuaa khan saninhring a ni theina hrangin, a takpum chu irhmang hrangin Setana kuta nin ipêk hrang a ni.

⁶Nin irpâk hi dik mah, chol tômtê'n bai tang kha a pumpuiin a thoizit ngai ti nin inhriat mo ni ma?



⁷Chol koploi bai nin ini ang dênin, bai tang thar zek nin ni theina hrangin chol milui kha zen infâi roi. Ei Ferkân kûtna hrang Krista ngêt kha inhlanin a om tâk sikin.

⁸Khasikin, Ferkân kût ei ti, chol miluia kût tho loiin, nunsiat le sualna chola kût tho loiin, takna le dikna bai, chol kop loiin kût nei ei ti.

⁹Ki lekha thona khan irdit hmanghai pôlloi hrangin nangni ki tia.

¹⁰Rammual mi, irdit hmanghai, huatirham hai, inru hai le millim biakhai pôl viat no roi ki iti ni mah, khaang khan ni sianlân rammual nin imâk rak a inang hrang a ni.

¹¹Ki iti tak chu tukhom urêng irhming irputa irdit song mani, huatirham mani, millim biak mani, irngo song mani, zû'nruai mani, inru mani pôl no roi ti hi a ni. Khaanga mi leh khan chu fâk nêk khom hmunkhatin zong no roi.

¹²Pên tianga mihai chu keima'n ki ngaitua hrang mo a oma?

¹³Nangni'n sêng tianga mi nin ngaitua'n, pên tianga mihai chu Pathianin a ingaitua loi ma ni? Kha mi soal kha nangni laia irthokin inhnot suak roi.

1 Korinth 6

iamtu urêng hai leh thubu ai

¹Nin laia mi'n iamtu dang ata thubu ai a neiin iamtu hai kuang tung loiin, itho sika mo iamloihai kuang a itung ngam?

²Iamtu hai in rammual roi la rêl an ti, ti nin inhriat mo ni ma? rammual roirêl petu hrang hai nin ni'n chu, thil chînte lua ngaitua rukloi nin ini ma ni?

³Atûn dam sêng thil chu ti loiin, vântîrtôn hai chungchâng thu khom kin la irêl hrang tih nin inhriat loi ma ni?

⁴Dam sêng thil rêl hrang ni neiin koiindanga ite irngeiloihai nin inrêltir hrang ma ni?

⁵Inzak a om bâka! Urêng kêra thu irfûk thei mi vâ inkhat lua nin laia nin iom loi ma ni?

⁶Urêngin a urêng leh an thubu ai roirêlnaa intungin, sononghai a inrêl ngai hi!



⁷Thubuai nin nei ngai sika hin chukloina tak nin neih ti chu a inlang a ni. Nin ta hrangin tho'nsuala om kha a isa mo ni ma? Nin ta hrangin tuang ual nih khom itho sika mo nin inuam loi?

⁸Nangni rengin nin tho'nsual irhlôma. nin inrûk irhlôm ngai, nin urênghai ta tak leh khom?

⁹Mi felloihaiin Pathian Ram lua no nihai ti nin inhriat loi ma ni? Ihuangin om no roi; irdit songhai, millim biakhai, uirehai, hurhai, mongkohurhai,

¹⁰inrûhai, huatirhamhai, zu'nruihai, irkhal songhai, hleprûkhai hin Pathian Ram lua viat no nihai.

¹¹Nangni khom senkhat chu khaanga mi nin lei ni ngai. Khannisianlân, sualna ata infâiin Pathian kuanga inhlan nin ni tâka, ei Rengpa Jisua Krista le ei Pathian Irtha sikin Pathian kuang thiam nin chang ta.

Pathian roiinpuina hranga takpum hmang hrang thu

¹²Thil tinrêng tho hi ki ta hrangin a'rthianga, khannisian, inlâp zit ual ma, ki ta hrangin irthiang khomnian, i suaka khom irphal ma ung.

¹³Fâknêk chu phîng ta hrang a nia, phîng chu fâknêk ta hrang a ni; khannisian, Pathianin inboi seng seng a ti. Takpum hi irditna sanoa hmang hrang ni maka, Rengpa ta hrang a ni ual; Rengpa khom takpum ta hrang a ni.

¹⁴Pathianin Rengpa chu thina irthokin a kaithoia, eini khom a sinthotheina'n ni kaithoi sa a ti.

¹⁵Nin takpumhai kha Krista takpum ônhai a nih ti nin inhriat loi ma ni? Krista takpum ônhai kha la pêkin notizuar takpum ônhaiin ki isiam hrang ma ni? Nâisâi mak e!

¹⁶Notizuar irzompui mi kha a notizuar leh takpum inkhat a nih ti nin inhriat no ma ni? Pathian Thubu'n fel takin, "An ruaiin takpum inkhat ni ta an ti," a iti a ni.

¹⁷Khannisianlân, Rengpa irzompui mi kha chu irtha pumkhat an ni.



¹⁸Irdit hi mong ta roi. Mihriamin sualna dang a isin tinrêng chu a takpum pên tiang a ni; irdit song mi rêk kha chu ama takpum chung a isual a ni.

¹⁹Nin takpum kha nin sûnga om Pathian nangni ipêk Irtha Irthiang in a nih ti nin inhriat loi ma ni? Mâni ta ni ta mak chêia,

²⁰mana irchôk kêng nin ini tâk, khasikin nin takpum kha Pathian roiinpuina hrangin hmang roi.

1 Korinth 7

Irneina chungchânga chong irdonna

¹Atûn, nin thu irziak chungchânghai kha ngaitua'n: Pasal ta hrangin dôngma nei loi a sa.

²Khannisian, irditna tak a om ngai sikin pasalin dôngma bîk nei chit sianlân, nupang khomin pasal bîk nei chit ri sehai.

³Pasalin a dôngma kuang a dongtum dôr chu pe sianlân, khaang dênin nupang khomin a pasal kuang a dongtum dôr chu pe ri se.

⁴Nupangin ama takpum chung a khan ircham nei maka, a pasalin a nei ual, khaang dênin pasal khomin ama takpum chung a ircham nei maka, a dôngma'n a nei ual a ni.

⁵Chongchai hranga nin irpêk theina hrang le nin irhmun nôk theina hrangin bongtea hrangin a sa nin ti seng seng no'n chu, nin irchamneina irchu irhlôm no roi; khano'nchu, nin irdîn zoi nona sikin Setana'n nangni an thêin itinin.

⁶Hi thu hi thupêk angin insîr ma unga, phalna thu ringot angin ki insîr ual a ni.

⁷A dik takin chu, nin rêngin keima ang hin om unglân ki inuam a ni. Khannisianlân, mi tinin an dongtum chit thilpêk Pathian kuang ata an idong chit a ni; inkhatin lam dang tiang, a dangin lam dang tiang.

⁸Khan in nei loihai le meithâihai kuang chu hiang hin ki ti a ni: keima angin irthi phiain om tum mai unglân nin ta hrangin sa a ti.

⁹Khannisian, irdîn theina nin nei no'n chu irnei roi, hur nêkin chu irnei a sa.



10In nei tâkhai kuang khan thu ki pêk, keima thupêk chu ni loiin Rengpa thupêk: Nupangin a pasal sen no ri se;

11an irsen tâk le khom pasal dang nei ta no ri se, khano'nchu, a pasal leh ngêt om nôk ri se; pasal khomin a dôngma ma no ri se.

12Mi danghai kuang chu Rengpa'n ni loiin keima'n ki ti: Kristian pasalin sonong dôngma a neiin a dôngma khan a kuang om mai hrangin a milung a chuk rêng rêngin chu ma no ri se.

13Khan, Kristian nupang khomin sonong pasal a neiin chu, a pasal khan a kuanga om mai hrangin a milung a chuk rêng rêngin chu ma no ri se.

14Iamloi pasal chu a dôngma zâra irthiangtir a nia, iamloi nupang khom a pasal zâra irthiangtir a ni sa. Khaang khan ni sian, nin nâihai kha irthiang no nihai; khannisianlân, an irthiang a ni.

15Aniachu, iamloi khan irsen a nuamin chu irsen chian ri sehai; khaang thil kha a tokin chu iamtu, nupang pasal, khit ni mahai; Pathian chu irngei hrangin nangni a ikoi a ni.

16Kristian dôngma, ni pasal ni saninhring hrang le hrang loi, itin mo ni inhriat? Kristian pasal, ni dôngma ni saninhring hrang le hrang loi itin mo ni inhriat?

Pathian koi lam anga om hrang

17Tukhom Rengpa'n a kuang thilpêk a ipêk lam tak le Pathianin a ikoi lam takin om ri se. Hi dân hi koiindang tina ki isiam a ni.

18Sertan mi khan Pathian koina a pom tâkin chu, a sertan irsinsia kha pai a tum hrang ni mah; Sertanloi mi khomin Pathian koina a pom tâkin chu, ser a itan hrang ni mah.

19Pathian thupêkhai zôm ti no zel chu sertan le tanloi ite ni mah.

20Tukhom Pathianin a koi laia a iom lam ang tak khan om mai ri se.

21Pathianin nang a ikoia khan suaka om mo ni ini? Ngaitua no roh; khannisian, zalênna zoro ni manin chu hmang ual ro?



²²Suak, Rengpa'n a ikoi chu Rengpa insua suak a nia, khang dēna khan suak ni loi Krista'n a ikoi khom kha Krista suak a ni.

²³Pathianin mana nangni a irchôk tâk kêng; khasikin mihriamhai suak chang no roi.

²⁴Urênghai, tukhom Pathianin a koi laia a om lam ang khan Pathian leh irpôlin om mai ri se.

Lênglaihai le meithâihai chungchânga chong irdon

²⁵Atûn, lênglaihai chungchânga nin thu irziak kha irngaitua'n: Rengpa ata thupêk chu nei ma ung, khannisianlân, Rengpa lungkhamna sika iiam rua mi ki ni sikin ki'rngaidân insîr ki ti.

²⁶Atûnlai intakna ngaitua'n, mi a om lam ang taka a iom mai hi sa le ki'rhoitir.

²⁷Dôngma mo ni nei tâk? Zôkna zong no roh. Lênglai mo ni la ini? Dôngma zong no roh.

²⁸Khannisianlân dôngma ni nei leh khom tho'nsual mak che; dôngmate khomin pasal a neiin tho'nsual mah. Khannisianlân, in nin neiin chu rammuala dengthei nin ti; kha kha nangni inzôk ki inuam a ni.

²⁹Urênghai, ki iti nuam tak chu hi hi a ni: zoro hi a bong ta; atûna irthokin chu dôngma neihai kha nei no angin omhai sianlân,

³⁰chaphai kha chap loi angin omhai sianlân, lômhai chu lômloi angin omhai sianlân, ar chôkhai khan nei loi angin omhai sianlân;

³¹hi rammual hmangtuhai chu hmang ta hrai loia an om theina hrangin zoro hi inbongin a iom a ni; hi rammual om dân hi a irhmang thiai a ni hi.

³²Lungdûk nei loi hrangin nangni ki nuam a ni. Ruatharte'n chu Rengpa inlôm a tum sikin Rengpa sin kha a ngaitua ngai.

³³Khannisianlân, dôngma nei sikin rammual thilhai a ngaituah ngaia;



³⁴Khasikin kailangka'n a iom ngai a ni. Đôngmate'n chu a takpum le ar tha inhlan rip a nuam sikin Rengpa sin kha a ngaitua ngai; khannisian, pasal a nei tâkin chu a pasal inlôm a nuam sikin rammual thilhai a ngaitua ngai.

³⁵Kha kha nangni changpui ki nuam sika ki iti a ni. Nin chung a dân ngar khang tum ma ung. Thil dik le malam panna thil sin hrang le Rengpa sinthônaa ite hôi viat loia irpêkhlet hrangin nangni ki inuam a ni.

³⁶Đôngmate le ruatharte irnei thu infel tâk, irnei nôk ta loi hrang tihai chungchâng thua chu: ruatharte kha a đôngmate tianga khan mahripa omin ar dân thei noa an irnei a nang ti an hriattin chu irnei ri sehai, a inuam angin, tho'nsual mah.

³⁷Khannisianlân, a nang ti loia, kha đôngmate kha nei loi hrang a lungrîl det taka sinsiama, a nuamlam septheitu khan chu om hrang dân a lungrîla a ngaitua zoi ta, đôngmate kha a nei no sikin a tho'n sa.

³⁸Khasikin ruatharte, đôngma neitu khan a tho'n sa, khannisian a nei loitu khan a tho insa ual.

³⁹Nupang kha a pasal hring sâng chu a pasal ikhit a nia; khannisian, a pasal a thiin chu a inu nuam a nei thei, Kristian a ni ngânin chu.

⁴⁰Khannisianlân, a om ngaiin om sianlân, a raifân ual a ti. kha kha ki'rngaidân a ni, kei khom Pathian Irtha chu ki neiin ki irbe a ni.

1 Korinth 8

Millim biakna thil chungchânga chong irdon

¹Atûn, millim biakna thil chungchânga nin thu irziak ngaitua'n: Ei rêngin inhriatna ei nei an iti angin a idik a ni. Khannisian, khaanga inhriatna khan chu mi an irpâk ngaia, lungthungna rêkin chu mi a siam insa ngai.

²Tukhomin idôr ten mani inhriatna nei tâkin ar tûngin chu, an hriat hrang lam angin a la inhriat loi a ni.

³Khannisian, tukhomin Pathian lung a thungin chu kha mi kha Pathianin a inhriat a ni.



⁴Khaang khan, millim biakna thil fâk chungchânga chu: rammuala millim rêng rêng hi ite an ini loizia le Pathian inkhat vai a om tih chu ei inhriat.

⁵Irvâna mo, irnênga mo, Pathian irhming irput pathian le rêngpa, tamtak om khomsian,

⁶Eini ta hrangin chu Pathian inkhat vai, Pa, thil itinrêng siamtu kha a oma, ama ta hrangin ei hringa, Rengpa khom inkhat vai, Jisua Krista a oma, ama sikin thil tinrêng siam a ni, eini khom ama sikin ei ihring a ni.

⁷Khannisian, kha thutak kha mi tinin inhre mahai. Mi senkhat chu millim biak ngaiinzong an ni sikin, atûn tena hin millim ta ang taka bên an fâk rikipa an sia le sa inhriatna a'rzala, kha fâk khan a innim tâkin an irbe ngai a ni.

⁸Khannisian, fâk hin Pathian leh ei irzomna chu ni siam insa pe thei loi a ni; fa no khom inlân ite inchân no ih, fa khom inlân ite hmu ual no ih.

⁹Khannisianlân, nin zalênna sintho khan iamnaa hrât loihai kha suala an tûk lolina hrangin irdîn roi.

¹⁰Nangma inhriatna nei mi, sia le sa inhriatna hrât loi nei mi khan millim biakna ina ni fâk lai nang hmu sianlân, a sia le sa inhriatna khan millim biakna thil fâk an ngam hrang ni ma moh?

¹¹Khasikin kha mihriam hrât loi, ni urêng, Krista'n a'rthûlin a ithitu kha nin hriatna sikin a irhmang hrang a ni.

¹²Khaang khan nin Kristian urêng hai chung a tho'nsuala, an sia le sa inhriatna inphop pêkin Krista chung a nin tho'nsual ni a ti.

¹³Khasikin fâkin ki urêng suala an tûktirin chu, sa fa viat ta no ning, ki urêngpa suala a tûk lolina hrangin.

1 Korinth 9

Tirtôn irchamneina le sintum

¹Zalên mo ni ma ung? Tirtôn mo ni ma ung? Ei Rengpa Jisua mo hmu ma ung? Nangni kha Rengpa ta hranga ki sintho ra ni mak chêi mo?



²Mi danghaiin tirtônin ni bê no khomhai sian, nangni'n chu nin ni bê ngêt! Rengpa leh nin hringna a'rzom tâk sikin, ki tirtôn indangna chu nangni kha nin ni.

³Mi'n an ni sêlin chu hiang hin ki sâm ngai:

⁴Sin ki tho theina hranga fâknêk pêk hrangin ircham ki inei loi ma ni?

⁵Tirtôn danghai le Rengpa urênghai le Petera hai anga khan kin zinnaa Kristian dôngma hruai hrangin ircham ki inei loi ma ni?

⁶Khante, Barnaba le keima vai mo mânia irfâ hrang?

⁷Tu sipai mo mânia irfaa râl doi ngai? Tu mo grep irhuan siana, a ra fa ngai loi? Tu mo kêl pâl vâia a dût in ngai loi?

⁸Dân khomin kha dên kha a ti sikin, a nitina irkhîna hi ki iten loi a ni.

⁹Mosia dân lekhabua khan, "Sechalpa kha bu a chîla ni hmang laiin a hmûr khit pe no roh," ti ei tep. Pathianin sechal mo a ingaitua tak?

¹⁰Eini hranga a insîr mo ni ma? A ni, eini hrang piala a irziak a ni. Âl kaitu le bu âttu khan dongtum tûngin sin an itho hrang a ni.

¹¹Nin laia irtha chi kin intheke, nin kuang ata taksa thilhai ât inlân irkhêl ni mo?

¹²Mi danghai lua mina hi taksa thilhai hi, nin kuang ata tûng hrangin irchamneina an neiin teh, keini len vâng te irchamneina lian ual kin inei mo ni ma? Khannisianlân, kha irchamneina kha hmang ma ung. Krista Thurchi Sa chakal kin sak lona hrangin itinrêng kin ituang zâm zâm a ni.

¹³Pathian biak ina sintho mihai khan biak ina irthokin an fâk hrang an hmu ngai tih le maichâma irbôlna inhlan ngaihai khomin maichâm le dongtum an nei ngai ti nin inhriat loi ma ni?

¹⁴Khang taka khan Rengpa'n Thurchi Sa kha Thurchi Sa insîrhai irfâna hrangin a inkung a ni.

¹⁵Khannisianlân, keima'n chu khahai kha inkhat khom ki ihmang loi a ni; atûn khom hin ki chung a khang khan nin thôna hranga ki irziak ni viat mah.



Tukhomin ki isong hi chanlamboia an isiam nêkin chu thi zel inlân ki ta hrangin a sa ual.

¹⁶Thurchi Sa kin sîr ringot sika irsong theina nei ma ung. Thurchi Sa hi insîr ngêt hranga dânde kêng ki ini. Thurchi Sa hi insîr no inlân chu, ki ta hrangin ichiom tak a ini hrang a ni.

¹⁷Hi sin hi keima nuam inthangna sika ki isin ni sianlân chu thahlo tûng thei ki ti; khannisian, Pathianin hi sin a nin koltir sikin ki sintum piala bêin ki isin a ni.

¹⁸Khante, thahlo imo ki ihmu hrang tâk? Thurchi Sa hrang sika ki sinthônaa ki'rchamneinai hai hmang loaia, thahlo boia ki sin hi Thurchi Sa ta hranga zoro sa a ni.

¹⁹Tûte suak chu ni ma ung, khannisianlân, thei dôra mi ki lâklût theina hrangin mi murdi suak ki ichang a ni.

²⁰Judahai ki lâklût theina hrangin Judahai laia chu Juda angin ki om ngai. Dân hnuaiia om no khom inlân, dân hnuaiia omhai kuang chu anni ki lâklût theina hrangin dân hnuaiia om angin ki om ngai.

²¹Khaang dênin, Jentailhai ki lâklût theina hrangin Jentailhai laia chu Jentailhai angin, Juda dân pên tiang ki om ngai. Kha kha Pathian Dân zôm ma ung ki itihna ni mah; Krista Dân hnuaiia ki iom a ni.

²²Hrât loi ki lâklût theina hrangin hrât loi hai laia chu hrât loi angin ki om ngai. Itin tak mani, senkhathai lua ki saninhring theina hrangin mi murdi kuang thil tinrêng ki ni tâk.

²³Satvurna ki dong theina hrangin, khahai tinrêng kha Thurchi Sa sinin ki isin a ni.

²⁴Intânirsiathai chu an rêngin an intâna, khannisianlân, inkhat vaiin lômman a hmu ngai ti nin inhriat loi ma ni? Lômman chu nin hmu theina hrangin khaang takin intân roi.



²⁵Irsiatnaa changhaiin chu lam tinrênga an irdîn ngai. Anni chu rênglukhum siatthei hmu hrangin an irsiata, eini'n chu rênglukhum siat theiloi hmu hranga a ni.

²⁶Khasikin thiltum neiin ki intân ngai a ni. Phâivua irchûmtu ang khan chu irchûm ma ung.

²⁷Ki takpum denginthei nghekin ki sep ngaia, mi danghai irsiatnaa ki koibuk hnungin keima chukloia ki om loina hrangin.

1 Korinth 10

Millim ata irdîn hrang

¹Urênghaio, ei irchibulhai Mosia zuihai chung a thil tung kha nin inhriat mai hrangin ki nuam. An rêngin sôm thupna hnuai a an om chita, hoi riamin Tuipui sen râl an kâi.

²Sûma le tuipuaia khan Mosia zuihai ni theina hrangin an rêngin baptis-in an iom a ni.

³An rêngin hmunkhatin irtha bu an fâka,

⁴hmunkhatin irtha tui an ina, anni zuitu irtha lungpuia irthokin irtha tui an i-in a ni; kha lungpui kha Krista a ni.

⁵Khan khomin an laia mi tam ual chung a chu Pathian milung hoi maka, ramchâra khan an ruak a irthek chit a ni.

⁶Khahai kha eini ta hranga enirkhîna a ni, thil sa loi an irzuk angin ei irzuk loina hrang le,

⁷an laia mi senkhat millim an ibiak angin ei biak loina hrangin. Pathian Thubu'n, "Mipuihai hruaithe fa hrangin an toia, khannisian, zu in le irdita hoihokna an irlet nôk," a iti angin.

⁸An laia mi senkhat irdit saloi an uara sîn khat sînga mi sîngni le sâng thum an ithi anga khan, eini chu irditna sa loi uar no ih.

⁹An laia mi senkhat Rengpa an ifia ang khan fia no roi, mirûlin an chuk thathai ok kha. Rengpa chu fia no roi.



- 10**An laia senkhat Pathian ata an ichiar ang khan chiar no roi, inboipaitu'n an boipaihai kha.
- 11**Kha an thil tonghai kha mi dang halirchu a nia; eini zoro hnungkhôna omhai nir chutirtu hrangin irziak a ni sa.
- 12**Khanchu, tukhom ngîr indeta irhriat chu, a tûk lolina hrangin irdîn ri se.
- 13**Fiana nin itong hen hi mi tong ban om ual mah. Pathian chu iam a oma, ni tuang thei bana irkhêl fiana nin chung a intungtir no ni, nin doi zoi theina hrangin fiana hong tung laiin lôitheina lampui nangni siam pe a ti.
- 14**Khasikin inditom takhaio, millim biak hi irheisan roi.
- 15**Mi vârhai kuanga insîr ang khan ki insîr a ni; ki thu'nsîr hi ngaitua u ta.
- 16**Satvur khilât chung a lônthu ei insîr hi Krista thisen irzompuina a ini loi ma ni? Bai ei ikhoi ngai khom hi Krista takpum irzompuina a ini loi ma ni?
- 17**Eini mi tamtakhai hi, bai tiam inkhata irthokin ei dong seng sikin.
- 18**Israel mihai kha en u ta, irbôlna sa fâkhai khan maichâma Pathian sin kha an irzompui ni ma mo?
- 19**Millim le a kuanga fâk inhlan kha thil kâmom a ni ki itihna ma ni?
- 20**Ni mak e! ki iti chu sonong maichâma irbôlna kha Pathian kuanga ni loiin ramilhlihai kuang an inhlan a ni ual. Ramilhlihai leh irzom hrangin chu nangni ki inuam viat loi a ni.
- 21**Rengpa khilât le ramilhli khilât irkop thei no chin ni; Rengpa maichâm le ramilhli maichâm fâk irkop thei no chin ni.
- 22**Rengpa chu ning ei inmurtir hrang ma ni? Ama nêkin ei ihrât ma ni?
- 23**Thil tinrêng tho a'rthianga, khannisian, thil tinrêng chu sa zit mah. Thil tinrêng tho a'rthianga, khannisian, thil tinrêng tho'n mi siam insa ual mah.
- 24**Tukhomin mâni satna hrang vai zong loiin mi dang satna hrang zong ual ri se.



²⁵Hmê dukana an izuar ka chu ite irdon viat loiin ni sia le sa inhriatna sikin fa zel roi.

²⁶Pathian Thubu'n, "Irnêng le a sũaga thil tinrêng hai hi Rengpa ta a ni," a ti sikin.

²⁷Sonong inkhatin nangni fialin fe ta unglân, nangni an ido ka chu irdon viat loiin nin sia le sa inhriatna sikin fa zel roi.

²⁸Khannisian, t'un mani, "Hi fâk hi millim kuanga inhlan a ni," tiin nangni a hrilin chu, nangni hriltu sik le ama sia le sa inhriatna sikin fa no roi;

²⁹nangni sia le sa inhriatna ki iti ni mah, mi dang sia le sa inhriatna ki ti ual a ni. I hranga mi dang sia le sa inhriatna khan ki zalênna a isêl ma ni?

³⁰Ki fâk chung a Pathian kuang lômthu ki insîr tâk pial teh i hrang mo mi'n an ni la isêl ngai hi?

³¹Khaang khan, nin isin murdi, nin ifâk le nin i-in murdi Pathian roiinpuina hrangin tho roi.

³²Judahai, Griksai le Pathian Koiindang hai ta hranga buaina nin ni no hrang lam takin om roi.

³³Ki itho ang taka hin tho roi. Kei chu mâni ta hranga satna zong loiin saninhriang an ni theina hranga mi murdi satna hrang zong ualin ki sinthôna tina mi murdi inlôm tîr ki itum ngai a ni.

1 Korinth 11

¹Ki om dân irchutuhai ni roi, Krista om dân irchutu ki ini ang hin.

Inkhômnaa lukhum khum thu

²Nin inhriat mai sikin le thumâk nangni ki insîr pe ang taka nin vong ngit sikin nangni kin pâk.

³Khannisian, pasal lu chu Krista a ni, nupang lu chu pasal a ni; Krista lu chu Pathian a nih ti hi nin inhriat hrangin ki nuam.

⁴Pasal, lukhum puma chongchai mani, thuhiril mani chu an lu an imualinphoitir a ni.



⁵Aniachu, nupang lukhum khum loia chongchai mani, thuhiril mani, khom an lu an imualinphoitir a ni, khaang kha chu ep inkol le hmunkhat a ni.

⁶Nupangin lukhum khum nuam loi chu ep chian ri se. Aniachu, nupang ta hrangin sam ep le voi hi inzak a omin chu lu khum ri se.

⁷Pasal chu Pathian irangpui le roiinpuina inlangtirpu a ni sikin lukhum an ikhum hrang ni mah; nupang chu pasal roiinpuina inlangtirtu a ni.

⁸Pasal hi nupang ata siam ni maka, nupang chu pasal ata siam a ni.

⁹Pasal hi nupang ta hranga siam ni maka, nupang chu pasal ta hranga siam a ni.

¹⁰Khasikin vân vântîrtônhai sika khan nupangin pasal irchamneina hnuaiia om a nih ti irdangna hrangin lu an ikhum hrang a ni.

¹¹Khannisianlân, Rengpaa khan nupang hi pasal boiin chu om thei mahaia, pasal khom nupang boiin chu om thei mahai.

¹²Nupang hi pasal ata siam a ni ang dênin pasal hi nupang ata suak a nia; khannisianlân, itinrêng hi Pathian ata suak zit a ni.

¹³Irgaitua u ta, nupang lukhum khum loia Pathian kuang chongchai chu ar hoi mo?

¹⁴Pasal sam insei chu ata hranga thil inzakom a nih ti nin lungrîl irzirpui khomin a inhriat mo ni ma?

¹⁵Nupangin sam insei chu ama roiinpuina a nia, a sam kha ama irkhûna hranga pêk a ni.

¹⁶I khom ni sianlân, hi hi nin hnôl a ni khomin, keini'n mani, Pathian Koiindanghaiin mani, khaang tiang khan dân nei mak meh.

Rengpa zânbu

(Mt 26.26-29; Mk 14.22-25; Lk 22.14-20)

¹⁷Hi nangni ki hrilnahaia hin nangni inpâk ma ung, nin satna hrang ni loia nin siat ualna hrangin nin inkhôm ngai sikin.



18A masa takin nin laia irsenna a om tih mi'n an ni hrila; dik le khom ki iam a ni.

19(Mi dikhai kha an inlang theina hrangin nin laia irsenna a om hrang pial a ni.)

20Nin irbûm zoroa nin ifâk ngai kha Rengpa zânbu ni mah.

21Nin fâkin nin bu chit nin fâka, senkhat nin inrui laiin senkhat nin phîng a châm ngai sikin.

22Fâk zongna hrang in nininei loi ma ni? A ninole, Pathian koiindang enkûmin intak mihai kha mualphoi nin isak ma ni? Hi chungchânga hin imo ti ri se, ti nin ni itûng? Nangni ki inpâk hrang ma ni? Nangni inpâk zât ni ma ung.

23Thu nangni ki ihril non nôk hi Rengpa kuang ata kêng: Khaanga ichela a om ni zâna khan Rengpa Jisua'n bai a lâka, lômthu an sîr zoiin a khoia,

24“Hi hi ki takpum a ni, nin ta hranga a ni, nin ni inhriatmaina hrangin tho hen roi,” a iti kha.

25Khaang dênin, an fâk zoia, khilât khom a lâka, “Hi khilât hi ki thisena Thuthung Thar chu a ni, nin in rikipin nin ni inhriatmaina hrangin tho hen roi,” a iti kha.

26Kha bai kha nin fâka, khilât khom nin in rikipin, a zuang nôk mâka chu, Rengpa thina kha nin inpuang ngai a ni.

27Khasikin, tukhom chukloi puma Rengpa bai hi fâka, a khilât hi in ka kaiin Rengpa takpum le thisena thiamno chang an ti.

28Khanchu, mi tin mâni irfia seng sianlân, khaangin bai kha fâkin khilât kha in ri se.

29Bai fâktu le khilâta uain intu khan Rengpa takpum a nih ti an hriat no'n chu mâni chungaroirêlna tung hrangin a ifâkin a i-in a ni.

30Hi pa sika hin nin laia tamtakin hrât loiin nin irzala mi tamtak chu nin inmusu a ni.



- ³¹Mâni ir-en masa ngai inlân chu roirêl pe'n ei iom loi hrang a ni.
- ³²Roirêl pea ei om khomin rammual mihai leh thiamloi ei chang loina hrangin Rengpa'n a ni sep ngai a ni.
- ³³Khanchu urênghaio, Rengpa zâmbu ot hranga nin inkhômin irnghâk ngai roi.
- ³⁴Nin inkhômin Pathian roirêlna hnuaiia nin om loina hrangin tukhom a phîng a châmin chu a ina ne ri se. Thil dang chu ki hong tika hong infel ki ti.

1 Korinth 12

Irtha thilpêk

- ¹Urênghaio, Irtha tianga thilpêk thu kha nin inhriat loi nuam ma ung.
- ²Jentail mi nin ni lai khan millim chongtheilo tiang nangni an hruai irhmang ngai ti nin inhriat.
- ³Khasikin hi hi nangni kin hriattir: Pathian Irtha'n chu tukhomin, “Jisua kha vânnisalin om ri se,” ti thei mahaia, Irtha Irthianga no'n chu, Jisua kha Rengpa; ti thei sa mahai.
- ⁴Khan, thilpêk chi dang dang a oma, Irtha inkhata om a ni.
- ⁵Sinthôna chi dang dang a oma, Rengpa inkhat a ni;
- ⁶sinthotheina khom chi dang dang a oma, Pathian inkhat kuanga om a ni, mi tin kuang sinthotheina pe ngaitu kha.
- ⁷Inlâp seng hrangin mi tin kuang Irtha inhriattirna kha a zuang tung senga.
- ⁸Irtha zâra mi senkhat kuang thuvâr insîr theina pêk a nia, mi dang kuang chu Irtha ngêta khan thu inhriat theina pêk a nia;
- ⁹mi dang kuang chu Irthaa dên khan iamna pêk a nia, kha Irtha ngêt khan mi dang kuang indam theina pêk a nia,
- ¹⁰mi dang kuang thuhiril theina pêk a nia, mi dang kuang Irtha dik le dikloi inhriat theina pêk a nia, mi dang kuang chong inhriat loi chi dang dang pêk a ni, mi dang kuang chong inhriatloi hrilfiah theina pêk a ni.



¹¹Hihai murdi hi Irtha inkhata sintho zit a nia, a inuam ang takin mi tin kuang chi dang dang a ipêk a ni.

Takpum inkhat ôn dang dang

¹²Takpum hi inkhat a nia, ôn tamtak a neia; takpum ônhai murdi kha tam ok khom sian takpum inkhat a ini angin; Krista khom khaang kha a ni.

¹³Ei rêngin Juda mo ei ni, Grik mo ei ni, suak mo ei ni ni loi mo, taksa pumkhata om hrangin Irtha inkhata baptis ei nia, Irtha inkhat vai a ni inneitir chit a ni.

¹⁴Takpum hi ôn khat vai ni loiin, ôn tamtak ei ni.

¹⁵Ke hin “Kut ki ni no sikin takpuma kop ni ma ung,” ti ta sianlân, khasika khan takpuma kop loi ni ual mah.

¹⁶Mikuar hin “Mit ki ni no sikin takpuma kop ma ung,” ti ta sianlân, khasika khan takpuma kop loi ni ual mah.

¹⁷Takpumpui hi mit ni zit ta sian itin mo irhâi ei inhriat hrang? Mikuar ni zit ta sianlân, itin mo mirim ei inhriat hrang?

¹⁸Pathianin ôn dang dang hi takpuma hin a nang a itihna hmun tina a isia a ni.

¹⁹An rêngin ôn khat vai ni ta sianlân, takpuma a iom thei hrang ma ni?

²⁰Ôn dang dang tam ok khom sian, takpum chu inkhat a ni.

²¹Khanchu mit hin kut kuang, “Nang innang ma ung,” ti thei mah; lu khomin ke kuang, “Nang innang ma ung,” ti thei ual mah.

²²Takpum ôn hrât loi ual anga inlanghai hi a poimo ual.

²³Ei takpum ôn hmusitom anga ei ibehai hi, kha ngêt kha ei ngaipoimoa, a sate’n ei irvôtir ngaia, a inlang saloihai kha ei irvô insatir ngai a ni.

²⁴Ei takpum ôn sa ualhai chu irvôtir mo a nanga. Pathianin taksa hi a siam irfûka, insitomhai kha a chôindôm-tira.

²⁵Khasikin, takpuma hin irsenna om maka, a ôn dang danghai an irngaitua irhlôm theina hrangin a isia irfûktirhai a ni.



²⁶Ôn inkhatin a tuangin chu ôn dang dangin an tuang zit a ni, ôn inkhat chôindôm a ni'n chu ôn dang murdi'n an lôm sa zit ngai a ni.

²⁷Nangnihai hi Krista takpum chu nin ni, a ônhai nin ni seng sa a ni.

²⁸Pathianin a Koiindanga hi mihai hi a siaa: inkhatnaa tirtônhai, an hninaa deipuhai, an thumnaa Irchûtirtuhai, thilirkhêl thohai, indam theina thilpêk hai, mi changpui nuamhai, roirêl thiamhai, chong inhriat loia thu'nsîr theina thilpêk donghai kha an ni.

²⁹An rêngin tirtôn an ni zit mo? An rêngin deipu mo an ni zita? An rêngin irchutirtu mo an nia? An rêngin thilirkhêl thothei mo an nia?

³⁰Indam theina thilpêk dong zit mahaia, chong inhriat loiin chong zit mahai, a hrilfia theina dong zit ual mahai.

³¹Irtha thilpêk poimo ual dong a sân irzuk roi. Lam satak nangni inentir ki ti.

1 Korinth 13

Lungthungna

¹Mihriam chonghai le vân vântîrtôn chonghaiin thu insîr thei khom inlân, lungthungna ki nei no'n chu, dêr inring mai mai mani, têngrep inbên irhâi mai mai mani ni ki ti. ti.

²Khabana, thu'nsîr theina neiin, thu'rthup murdi inhriattheina le inhriatna murdi nei khom inlân, lungthungna ki nei no'n chu ite ni no ning.

³Inrianghai infâna hrangin ki nei murdi pe vingin, ki takpum tena khom kâng hrangin irpe khom inlân, lungthungna ki nei no'n chu ki ta hrangin ite ar fêna om no ni.

⁴Lungthungna chu a tuang theia, khonzâna a neia; hnarsa ngai maka, lâirpâk maka, irsong ngai maka,

⁵Lungthungna chu om insual ngai maka, mâni hranga sa zong ngai mah, a ninginmur nuam ngai maka; sual insâp ngai mah;

⁶lungthungna'n chu felloina lôm ngai maka, thutak a lôm ngai.



⁷Lungthungna'n chu a tuang zâm zâma, a iamna hai, a tuangnahai le a tuangtheina hai hlosam viat ngai mah.

⁸Lungthungna chu itiklai khom boi no ni. Thu'nsârna hi om khom sian inmongtir la ni a ti, chong inhriat loihai hi om khomsian la mong an ti; inhriatna hi om khomsian la boi a ti.

⁹Irkup loiin, ei inhriata irkup loiin thu ei insâr ngai a ni;

¹⁰ar kipa zuang tung tika chu ar kip loi hi boi ta a ti.

¹¹Ki nâiin pang lai khan nâipang chongin ki chonga, nâipang lungrîl ki'rputa, nâipang ngaitua lam angin thil ki ngaitua ngai; ki hong puihlingin chu nâipang tho lam kha ki mâk ta.

¹²Atûn chu hlîmena inlang rêi ruai ang dênin ki'rhmu, nakana chu hmâi irtongin hmu ta ei ti. Atûn chu a chimrip vai ei inhriata, nakana chu Pathianin nin inhriat infel ang hin lan hriat infel ei ti.

¹³Khanchu hi thil inthum iamna hai, sabeina hai le lungthungna hai hi om mai a ti, an laia a poimo tak chu lungthungna hi a ni.

1 Korinth 14

Irtha thilpêk, chong inhriatloi le thuhri theina thilpêk

¹Khan, nin irzûl hrang tak chu lungthungna hi a ni. Irtha thilpêkhai irzuk roi, a bîkin, Pathian thu insâr theina thilpêk kha irzuk roi.

²Chong inhriatloi thu'nsârthu khan mihriam laia a insâr ni maka, Pathian kuanga a insâr a ni, tûte'n an inhriat loi sikin. Ama khan Irtha sinthotheina'n thutak irthup a insâr a ni.

³Khannisian, Pathian thu'nsârthu'n chu mihriam laia a insâr a nia, siaminsatna thuhai, inthorna thuhai le irtharngamna thuhai a pêk ngai.

⁴Chong inhriatloi thu'nsârthu khan chu ama vai a'rsiaminsata, khan, Pathian thunsârthu khan chu koiindang pumpui a siaminsat ngai.

⁵Nin rêngin chong inhriatloia thu'nsâr hrangin nangni ki nuam; khannisian, Pathian thu'nsâr theina thilpêk nei hrangin nangni ki nuam ual a ni. Chong



inhriatloi chu Koiindang pumpuiin siaminsatna an hmûna hranga hrilfiatu a om nôk no ngânin chu, Pathian thu'nsîrtu kha chong inhriatloia thu'nsîrtu nêkin chu a ihlu ok a ni.

⁶Khasikin urênghai, nin kuang hong ta inlân, chong inhriatloiin thu insîr inlân, nin ta hrangin imo a'rfêna ki iom hrang? Pathiana irthoka thuphuang thu mani, inhriatna thu mani, thu sa insîr hrang mani, irchûna thu mani ki hong chôi no zelin chu nin ta hrangin ar fêna ki iom loi hrang a ni.

⁷Hringna neiloi, irhâihoi hmangruahai, theihle mani, perkhuang mani khom hi omze nei loia an tumin chu i hla mo an isak tu mo inhre thei hrang?

⁸Bekul khom mumal neia an tum no'n teh tu mo râl doi hranga irsiam hrang?

⁹Khaang dênin chong inhriatloia nin insîr kha inhre mai thei a ni no'n teh tu mo inhre thiam hrang? Chong pa pai nin ini hrang kêng.

¹⁰Rammuala hin chong chi dang dang a sân a itam khom a ni thei, omze neiloi inkhat lua om mah.

¹¹A thu'nsîr omzia kin hriat no'n chu ama kha ki ta hrangin kha chong hmangpu kha ram dang mi ang ni a ta, kei khom a ta hrangin ram dang mi ni sa ki ti.

¹²Khanchu irtha thilpêk dong irzuk mai unglân, Koiindang indingna hranga siam insatna hrang kha nin nei theina hrangin zong roi.

¹³Khasikin chong inhriatloi neihai chu a hrilfiah theina hrangin chongchai ri se.

¹⁴Chong inhriatloia ki chongchaiin chu ki'rtha kha a chongchai ngeia, ki ngaituana chu hmang ma ung.

¹⁵Itin mo a ini hrang tâk? Irtha'n chongchai ki ta, ngaituana hmangin chongchai ki ta. Inpâkna hla khom irtha'n sak ki ta, ngaituana hmangin sak sa ki ti.



¹⁶Pathian kuanga irtha vaiin lômthu nin sîrin te, inkhôma hong chang mi narânhai khan nin chong kha inhriat no nihaia, nin lômthu insîra khan itin mo “Amen” an iti thei hrang?

¹⁷Ni lômthu insîr chongchaina kha a sân a sa khom a ni thei, khannisian mi dang inlâptir mah.

¹⁸Nangni nêkin chong inhriatloi ki hmang intam ual sikin Pathian chung a sân ki ilôm a ni.

¹⁹Khannisian koiindang inkhômnaa khan mi dang irchutirna hrangin chong inhriatloia thu 10,000 (sîngkhat) insîr nêkin ngaituana hmanga thu bâi ringa lik insîr ki nuam ual.

²⁰Urênghaio, nâipang angin thil ngaitua no roi; sualna lama chu nâitesen ang ni unglân, ngaituanaa chu puihling takin om roi.

²¹“Chong inhriatloi hmang mihai hmûrin hi mihai kuang hin thu insîr ki ta, Khan khomin mihaiin nir ngaitua pe no nihai,” Rengpa’n a ti, tiin Dân bua a irziak a ni.

²²Khanchu, chong inhriatloi hi iamloi mihai ta hrangin irsinsiana a nia, iamtuhai ta hrangin ni mah; khaang dênin Pathian thuhiril hi iamtuhai ta hrangin irsinsiana a nia, iamloihai ta hrangin chu ni mah.

²³Koiindang pumpui inkhômnaa nin rêngin chong inhriatloiin thu insîr ta unglân, lan hre loihai mani iamloihai mani hong lût tahai sianlân, nin invêt mani nangni ti no nihai mo?

²⁴Nin rêngin thu lei insîr ta unglân, iamloi mani, inhreloi mani hong lûthai kha nin thu khan sun a ta, an sualzia inhriattir a ti.

²⁵An lungrîla thu’rthuphai kha inlangtir ni a ta, Pathian chubai mûkin inbok an ta, “Nin laia Pathian a om ngai a ni,” tiin irpuang ual an ti.

Koiindanga tho dân mumal

²⁶Urênghaio, inkhômnaa hla nei mani, thu inpuang hrang nei mani, chong inhriatloia chong nang mani, hrilfiana neihai nin omin chu, itina tho hrang mani? Koiindang siaminsat lam tianga tho hrang a ni.



²⁷Mi tukhomin chong inhriatloia thu nin insîrin, mi inhni inthum bana thu insîr no ri sehai, a dônte'n insîr sianlân, inkhatin hrilfia roi,

²⁸hrilfiatu an om no'n chu Koiindang inkhômnaa khan dâihrek sianlân, a bîkin mâni le Pathian kuang insîr ri se.

²⁹Thuhriltuhai khom mi inhni mani inthum mani vaiin hrilhai sianlân, mi dangin a sate'n lei irngai ri sehai.

³⁰A'rngaituhai laia thu inpuang hrang a omin chu an sîr masatu kha dâihrek ri se.

³¹A dônte'n thuhiril ngai unglân, khanchu mi tinin irchu hrang nei thei nin ti, mi tin irtharngamin om thei nin ti.

³²Thuhriltuhai thuhiril theina irtha thilpêk khan, an thu hnuai a iom hrang a ni;

³³Pathian chu buaina Pathian ni maka, irngeina Pathian kêng a ini. Koiindang tina mi irthianghai tholam angin.

³⁴Koiindang inkhômnaa nupanghai chu dâihrek ri sehai, thu an insîr phal ni mah. Dân bu'n a insîr angin thu an izôm ual hrang a ni.

³⁵Thil inhriat nuam an neiin chu in sîng tiang an pasalhai irdon ri sehai. Nupang ta hrangin chu Pathian Koiindang inkhômnaa thu'nsîr hi inzak a om.

³⁶Pathian thu hi nangni ata suak ma ni? khano'nte, nin kuang vai mo a zuang itung?

³⁷Tukhomin deipu mani, irtha mi mani, niin a'rbê'n chu, nin kuanga ki lekha hi Rengpa thupêk a nih ti lei inhre ri se.

³⁸Khannisian, tukhomin a ngaisak no'n chu ama khom ngaisak no roi.

³⁹Khanchu, ki urênghaio, thuhiril hi a sân irzuk unglân, chong inhriatloia thu'nsîr khom khap no roi.

⁴⁰Aniachu, itinrêng fel tak le mumal nei taka tho hrang a ni.

1 Korinth 15



Krista thoinôkna

¹Urênghaio, nin kuanga Thurchi Sa nangni ki lei inhril kha atûna hin nangni inhriattir nôk ki nuam; kha Thurchi Sa kha nin lei poma, kha chung a khan nin iamna a inding indet hrang a ni.

²Thurchi Sa nangni ki ihril kha nin pom maiin chu saninhing ni nin ta, nin pom mai no'n chu nin iamna kha a korong ni a ti.

³Hi hi ki thu dong poimo tak nangni ki ihril nôk chu a ni; Krista chu Pathian Lekha thu ang zêlin ei sualhai sikin a thia,

⁴phûmin a oma, Pathian Lekha thu angin sîn thum nia kaithoi a ni;

⁵Petera kuang an lâra, sômhleihnihai kuang khom an lâra.

⁶Kha hnunga, voikhat urêng irzaringa nêka tamhai kuang an lâr nôka, kha laia a tam ual chu an la dama, senkhat chu an thi ta;

⁷Jakoba kuang an lâr nôka, kha zoi hnunga chu tirtôn murdihai kuang an lâr nôka.

⁸A mong taka chu, kei, a zoro loia suak kuang khom an lâr nôk.

⁹Kei chu, tirtôn laia a chîn tak ki ni, Pathian Koiindang deng kin theitir sikin tirtôna ibe zât khom ni ta ma ung.

¹⁰Khannisianlân, Pathian lungkhamna sikin ki ini nih ki ni ta. A lungkhamna ni pêk hi a korong ni mak e, tirtôn danghai nêkin ki sin intam kêng, khannisianlân, keima isin ni mah, ki kuanga om Pathian lungkhamna isin a ni ual.

¹¹Khanchu, kei khomin, anni khomin khang khan kin hril ngaia, nangni khomin kha ngei kha nin iam tâk.

Mithi thoinôkna

¹²Krista chu mithi lai ata kaithoi a ni thu kin hrila, nin iam hnungin te, nin laia senkhatin ithoa mo mithi thoinôkna om mah nin iti thei?

¹³Mithi thoinôkna a om no'n chu Krista khom kha kaithoi ni no ni.



¹⁴Krista kha kaithoi a ni no'n chu kin thuhiril hi milak ni a ti, milak iam nina nin ti.

¹⁵Pathianin Krista chu mithi lai ata a thoi ti kin hrila, mithi thoinôkna a om no'n chu Krista khom kaithoi ni no ni, Pathian chungchâng thua milak kin insâr ni a ti.

¹⁶Mithihai kaithoi an ni no'n chu Krista khom kha kaithoi ni bîk no ni.

¹⁷Krista chu kaithoi a ni no'n chu nin iamna hi ite ni maka, nin sualnaa nin la iom mai ni a ti.

¹⁸Khaang khan a ni'n chu, iamtu Kristaa intakhai khom kha an irhmang ta ni a ti.

¹⁹Kristaa sabei kin nei hi atûn hring laia hrang vai ni no sian, mi murdi nêka lungkhamom tak ni ei ti.

²⁰Khannisian, Krista chu mithi lai ata kaithoi a ni ngêta, mithihai thoinôkna mahruaitu a ni.

²¹Mihriam sikin thina a lei oma, mihriam sika ngêt thoinôkna khom a lei iom a ni.

²²Mi murdi Adama leh an irzomna sika an ithi ang khan mi murdi Krista leh an irzomna sikin kaithoiin om an ti.

²³Aniachu, mâni zoro senga kaithoi ni an ti; a masa taka Krista a nia, Krista tahai chu a zuang nôk tika kaithoiin om an ti.

²⁴Kha hnung chu zoro mong hong tung ta a ti; Krista'n roirêlnahai le irchamneinahai le sinthotheinahai kha inboi zit a ta, Ram kha Pa Pathian kuta bâng ta a ti.

²⁵Pathianin a râlhai an hnê zita, a ke bula a sia mâka chu Krista a inlal mai hrang a ni.

²⁶Râl hnungkhôn tak inhne hrang chu thina hi a ni.



²⁷Pathian Thubu'n, "Pathianin itinrêng a ke hnuaia a sia zit," a tia. Khasikin "Itinrêng" ti chong hin Pathian, itinrêng Krista ke hnuaia setu chu huap mah ti a inlang a ni.

²⁸Khan, itinrêng Krista'n lalna hnuaia a sia tika chu Nâipa ngei khom Pathian itinrêng a hnuaia setu hnuaia om a ta, Pathian chu itinrênga tinrêng ni ta a ti.

²⁹Khaang khan a ni no'n te, mithi irthûla baptisma changhai kha itin mo an itho hrang? Mithihai chu kaithoiin an om no hrangin te, i hranga anni irthûla baptisma an ichang ngai mo?

³⁰Eini khom itho sikin mo dârkâr tina ichia ei iom ngai ma ni?

³¹Urêng hai, ei Rengpa Jisua Kristaa nangni ki songna kha sâmin, "A nitin thina ki tong ngai," ki ti a ni.

³²Mihriam tho lam ringota Efesi-a sahrânghai irsualpui ki ni'n teh, ki ta hrangin, imo ar fêna om hranga? Mithi kaithoiin an om no hrangin chu senkhathai iti ngai ang khan "Tho fa ei ta, lei in rei, nangtûka ei thi zôi hrang sikin," an ti ngai.

³³Hruai irhmangin om no roi, "Rual سوالin nunchan sa an siat ngai," ti a ni.

³⁴Fel takin har unglân, soal ta no roi. Nin laia mi senkhat chu Pathian inhriatna zel nin nei no sikin nin inzakna hranga hi hi ki iti a ni.

Thoinôk takpum

³⁵Itin mo mithihai kha kaithoi an ini hrang? I ang takpum mo an irput hrang? tiin nin irdon a ni thei.

³⁶Nangma mi'nto! Irnênga chi ni tû khomin a thi bak no'n chu mông ngai mah kha teh.

³⁷Khan, ni chi tu khom kha a takpum la om hrang chu tu mak chea, a'rmal vai ni tû ngaia, bu'rmal chi dang i khôk irmal mani a ni thei.

³⁸Khannisian, Pathianin a nuamlam takin takpum a pêk ngai, chitin an takpum seng kha.



³⁹Taksa murdi hi taksa chi inkhat ni mah; mihriam taksa a danga, sa taksa a danga, va taksa a danga, nga taksa a dang a ni.

⁴⁰Khabana, irvân takpum a oma, irnêng takpum khom a om; irvân takpum roiinpuina a dang a nia, irnêng takpum roiinpuina khom a dang a ni.

⁴¹Misa roiinpuina a danga, tha roiinpuina a danga, ârsihai roiinpuina khom a dang a ni, ârsi le ârsi khom roiinpuinaa chu irang mah.

⁴²Mithi thoinôkna khom hi, khang khan a ni. Hmon theia phûmin a oma, hmonthei loa kaithoiin om a ti;

⁴³Hmêl setak le hrât loi taka phûmin a oma, enhoi tak le hrât taka kaithoiin om a ti.

⁴⁴Mihriam takpuma phûmin a oma, irtha takpuma kaithoiin om a ti. Mihriam takpum a om sikin irtha takpum khom a iom hrang a ni.

⁴⁵Pathian Thubu'n, "Mihriam masa tak, Adama kha mihriama siam a ni," a tia. Adama hnungkhôna kha chu hringna pêkpu Irtha a ni.

⁴⁶Irtha kha a zuang iom bak ni maka, taksa kha a zuang om baka, kha hnung irtha a zuang iom a ni.

⁴⁷Adama masa kha chu pila siam, irnênga irthoka hong a nia; Adama inhnina chu irvâna irthoka zuang a ni.

⁴⁸Irnênga siamhai chu irnênga Siamtu ang kha an nia, irvâna mihai chu irvâna Mi ang kha la nih ei ti.

⁴⁹Khan, irnênga siamtu ang kha ei ini angin, irvâna irthoka zuangpu angna khom la nei ei ti.

⁵⁰Urênghaio, "Taksa le thisenin Pathian Ram lua thei no nia, a hmon thei hin hmon theilo kha lua thei ual no ni," ti hi a ni.

⁵¹⁻⁵²Hi thutak irthup hi irngai roi. Ei rêngin chu thi zit no ih, khannisian, bekul hnungkhôn an ring tena chu voikhat rengin, mitkhapkâr vakin indanglamin om seng ei ti. Bekul an ring tikin chu mithihai khom thi nôk zit loi hrangin kaithoiin om an ta, eini khom indanglamin om seng ta ei ti.



⁵³A hmonthei hi hmon theiloia chang a ta; a thi thei khom hi thi theiloia a ichang hrang a ni.

⁵⁴Khasikin hi hmonthei hi hmon theiloia changin a oma, hi thi thei khom hi thi theiloia changin a om tikin chu “Inhnêna’n thina an lem zoi ta!

⁵⁵O thina nin hnêna kha khôn mo a iom tâk? O thina, ni tûr kha khôn mo a iom tâk?” ti thu irziak kha hong tung ta a ti.

⁵⁶Thina tûr chu soal a nia, soal sinthotheina chu Dân thu a ni.

⁵⁷Khannisian, ei Rengpa Jisua Krista zâra inhnêna ni pêktu Pathian kuang lômthu om ri se!

⁵⁸Khasikin urêng lungthunghai, det takin châng viat loiin om roi. Rengpa Sin nin itho rêng rêng chu a korong chang viat mah ti nin inhriat sikin, Rengpa Sin chu sathnem irngai takin sin mai roi.

1 Korinth 16

lamtuhai ta hranga thilpêk

¹Khan, Judai rama Pathian mihai ta hranga tholôm tho thu kha, Galatia rama Koiindanghai kuang thu ki pêk ang khan nangni khomin lei tho sa roi.

²Pathianni rikipin nin sika nin sum hlo lam ang sengin lei bûm roi, ki hong tika tholôm irfuang a nang loina hrangin.

³Khan, nin thilpêk chôiã, Jerusalema fe hranga tukhom a sa nin iti tak lekhai chôiin ki hong tika tûr ki ti.

⁴Ki ife sâna hrang irhoi a ni len vângin chu keima ni zui an ti.

Paula’n inzin a tum thu

⁵Makedonia ram ki’rfang a nang sikin, Makedonia ram irfang zoi bak ki ta nin kuang hong ki ti.

⁶Nin kuang chu sôtzan chu om ki ti, phalbi sûng chu a ni thei, khoa khom ki fena taka nin ni intha theina hrangin.

⁷Atûna fe malama nangni hmu chu nuam ma unga, Rengpa’n sa a ti’n chu nin kuang sôtzan cham ki’rtûng a ni.



⁸Efesi khua hin pentikos nî tena chu om ki ti.

⁹Hi khua hin a ni doi tamtak om khomhai sian, sin roiinputak le sin kâmnang tak ki sin theina hranga zoro'nchum tak a iom a ni

¹⁰Timothea a hongin chu mâni in ang taka nin kuang a om theina hrangin lei lôm unglân, lunghnâng lei tho roi, keima anga Rengpa sin tho a ni sikin.

¹¹Tûte'n hnuaisia no ri sehai, irtharngam takin ki kuang a hong tung theina hrangin intha ual roi; urênghai leh hmunkhata hong hrangin ki lei itûng kêng.

¹²Ei urêngpa Apolova thu kha chu, urêng danghai leh hmunkhatin nangni hong hro hrangin kin thor maia, khannisian, hi zoroa hong hrangin chu nuam viat mah, zoro'nchum a hmu leh chu hong a ti.

Thu khârna le chubai mûkna

¹³Irtûng chianin om unglân, iamnaa ngîrindet unglân, hâi unglân, hrât takin om roi.

¹⁴Nin sin murdi lungthungna'n sin roi.

¹⁵Stefana le a in mihai thurchi kha nin inhriat, anni kha Akaia rama Kristian chang masa tak an nia, khabana, Pathian mihai sintho hranga irpêk an ni.

¹⁶Khaanga mihai le an isinpuihai le an sin lei tho pe ngaihai irchamneina kha pomin, an thu zôm hrangin nangni ki ngên a ni.

¹⁷Khan, Stefana hai, Fortunata hai, Akaika hai hong a hin a sân an nin lôm a ni; anni hin nin omloi khom irdang loiin an ni siama,

¹⁸nin lungrîl nangnia inhartir ang khan kei khom an nin hartira, hiang mihai hi irngaiinhlu roi.

¹⁹Asia ram Koiindanghai hin chubai nangni an mûk. Akuila le Priskili le an ina Koiindang inkhômhai hin Rengpa irhmingin chubai nangni an mûk mur mur a ni.

²⁰Urêng murdihai khom hin chubai nangni an mûk; irtum irthiangin chubai irmûk irhlôm roi.



²¹Hi hi, kei Paula'n, keima kut ngeia irziakin chubai nangni ki imûkna a ni.

²²Tukhom, Rengpa lungthung loi chu vânnisalin om ri se! Maranatha: Ei Rengpa a zuang e!

²³Rengpa Jisua lungkhamna kha nin kuang om ri se.

²⁴Krista Jisuaa lung nangni ki thungna hi nin rênga kuanga om ri se. Amen.



2 Korinth

2 Korinth 1

¹Paula, Pathian lungdoa Krista Jisua tirtôn le ei urênga Timothea khan, Korinth khuaa Pathian Koiindanghai le Akaia ram pumpuia Pathian mihai kuang khan:

²Pathian ei Pa le ei Rengpa Jisua Krista'n lungkhamna le irngeina nangni pe ri se.

Paula'n Pathian kuanga lômthu an sîrna

³Ei Rengpa Jisua Krista Pathian le Pa, khonzana sip, Pa, changpuina murdi luangsuakna Pathian kuanga lômthu insîr ei ti.

⁴A kuanga irthok ata ei idong changpuina ngei kha hmangin buaina chi tinrêng nei mihai ei changpui theina hrangin ei buaina tinrênga Pathianin a ni changpui ngai.

⁵Krista tuangna tam takhaia dongtum ei inei ang khan Krista zârin Pathian changpuina lian khoma dongtum ei inei a ni.

⁶Kin tuangin chu, changpuina le saninhringna nin hmûna hrang a ni; changpuina kin omin chu, nangni khom changpuiin nin oma, tuangna kin ituang kha tuangtheina neia ituang hrangin hrâtna ipêkin nin iom a ni.

⁷Khasikin nangnia kin tûngna kha inhnîng viat ngai mah; kin tuangnahaia dongtum nin inei ang khan kin changpuina donghai khoma hin dongtum nin nei sa ti kin hriat.

⁸Urênghai, Asia rama buaina kin itong thurchi kha inhriat tharna nangni pêk kin nuam. Kin chungpa puak isiahai kha a lian hrai sik le a rik hrai sika khan la hring hrang tûngna rêng nei ma ung.

⁹Kin chungpa thina roi an irêl tâkin kin hriat. Khannisianlân, kha kha chu nangnia irngat loa Pathian, mithi kaithoi ngaitu kuang kin irngat thei ualna hranga a lei ni.



¹⁰Ama khan kha thina ichiom tak ata kha a ni saninhring tâka, ni la saninhring a ti; ni la saninhring nôk mai a ti, tiin kin tûngna amaa kin irnghata,

¹¹nangni khomin kin ta hranga chongchaia nin ni changpui ang khan. Khanchu, kin ta hranga chongchaina tam takhai kha sâmin Pathianin sat a ni vur ta, kin irthûlin mi tam takin a kuanga lônthu insîr an ti.

Paula tumna irthûlna

¹²Hi rammuala kin hringnuna le a bîkin nangni leh kin irzomna khan lungkhamna sinthotheina sikin Pathian ipêk irthiangna le dikna an ni vong ti kin sia le sa inhriatna'n a ni hril sikin kin irsong a ni.

¹³⁻¹⁴Nin itep thei le nin inhriat thei kai kêng nin kuang kin irziak. Atûn ni lan hre thei ving no khom unglân, ni lan hriat thei tak tak nin tih ti ki tûng, ei Rengpa Jisua Nikhuuaa khan nangni kin song lam ang taka nin ni song theina hrangin.

¹⁵Khahai murdi kha kin hriat infel, voi hni satvura nin om theina hrangin nangni hong hro bak ki tum.

¹⁶Makedonia rama ki fe malamin nangni hong hroa, ki hong kîr nôk tiang khom nangni hong hro nôk ki tum a ni, Judai rama kin zinna hranga khan nin ni changpui theina hrangin.

¹⁷Hi ki tumna sika hin tumna detloi mi ang khan ki inlang ma ni? Hi ki tumnahai hi mâni hranga sa tûng sika “A ni, a ni” le “Ni mak, ni mak”, inrual taka ti hranga tum mo ki ini ma ni?

¹⁸Pathian thutak hril a ifel ang khan nin kuanga ki chonginkung khom kha “A ni” le “Ni mak” ni mah.

¹⁹Pathian Nâipa, Jisua Krista, a thu Sila, Timothea le keima'n kin insîr kha, “A ni,” le “Ni mak,” a ni no sikin, Ama kha Pathian “A ni” ti a ni.

²⁰Pathian chonginkunghai murdi “A ni” a ni sikin. Khasika khan kêng Jisua Krista zârin Pathian roiinpuina hrangin “Amen” ei ti ngai.



²¹Krista leh irzoma nangni le hringna nin hmutirtu kha Pathian a nia, a sintho hranga nin dangtu khom ama dê n a ni,

²²ama khan ama ta ei nina irsinsia ei chung a siaa, ei ta hranga thil a ibûmhai khapna'n ei lungrîla Irtha Irthiang a ni ipêk a ni.

²³Ki inhriatpuitu hrangin Pathian ki ikoi a ni, ama khan ki lungrîl an hriat. Nangni hoi hrang sika Korinth khua ki hong kêi ta loi a ni.

²⁴Nin iam ngêt hrang thu nangni insîr pe tum ma ung, iamnaa khan nin ngîr indet ti kin hriat sikin. Kha nêkin, nin raifâna hrangin nangni leh sin kin tho ual a ni.

2 Korinth 2

¹Khasikin, irngaiinsiat nangni sak hrangin chu nin kuanga hong nôk ta no inlân ti ki lunginchong tâk a ni.

²Irngaiinsiat nangni sak inlân, tu'n mo raifân ni sak hranga? Ngaisiat ki sakhai ti no chu tûte om mah.

³Ki hong tika nin lômtir hranghaiin ki milung inna lina hrangin kha lekha kha nangni ki hong ithon a ni. Ki râi a fânin chu nangni khom nin râi a fân sa ngai tih kin hriat sikin.

⁴Lungrîl inbuai le beiindong taka mit irthi tam tak tâkpuma ki irziak a ni; ki thil tum chu nin milung innatir loa, nin rênga lung nangni ki ithungzia hi nin inhriat theina hrangin a ni.

Thil tho'nsualtu ta hranga ngaidamna

⁵Atûn hin tukhomin mi lungrîl an natirin chu, keima lungrîl innatir ni maka, nin rêngin nangni lungrîl nangni a inna vi viat pak a ni. (Hi ki iti nasan chu a chung a inngar hrai ki nuam no sika a ni).

⁶Kha mi kha chu nin laia mi a tam ualin kha anga dûk nin itho kha a iruk a ni.

⁷Khan khoma ngaidam unglân, lungrîl na'n a sip hrai nona hrangin inthor sa roi.



⁸Khaanga, ama kha lung nin thung ta tak tih inhre hrangin nangni ki ngên.

⁹Nin kuanga ki'rziak nasan chu fianahaia nin lei hong inngîr insa dân le nangni ki hrihna chong zoro tina zôm mai hrangin mo nin irsiam tih inhriat ki nuam sika a ni.

¹⁰Mi tukhom nin ingaidam ka chu kei khomin ki ngaidam. Keima khomin ki ingaidam tâk chu, a dik takin i khom ngaidam hrang ki inei chu nangni sikin Krista makunga ki ingaidam ngai a ni.

¹¹Setana'n ei chung a zoro'nchum a hmu lina hrangin; a tumnahai ei inhriat chian sikin.

Troas khuua Paula lungdûkna

¹²Krista Thurchi Sa insîr hrangin Troas ki tungin chu, khataka sintho hrangin Rengpa'n lam a nin hong pe ki hmu.

¹³Khannisianlân, ei urêngpa Tita ki hmu no sikin ki milung dûk a tong ok. Khasikin khataka mihai kha chongbâi hoiin kin thaa, Makedonia rama ki fe ta.

Krista zâra inhnêna

¹⁴Khannisianlân, Pathian kuang lônthu om ri se! Krista inhnêna sika lampui hrôna khan mi intâng ang khan Pathianin Krista leh irzomin a ni hruai mai ngai sikin. Krista inhriatna thu kha hmun tina mirimhoi ang khan irthekindarh hrangin Pathianin a ni ihmang ngai a ni.

¹⁵Keini chu Krista'n mirimhoi hâl Pathian kuang a inhlân, saninhriang thiaihai le ar hmang thiaihai laia inthekindarh ang kha kin ni.

¹⁶A'rhman thiaihai ta hrangin chu thina hrang mirimsia a nia; saninhriang thiaihai ta hrangin chu hringna hrang mirimhoi a ni. Khante, tu mo kha sin hranga a chuk hrang tâk?

¹⁷Mi tamtak chu Pathian thu hi irvaina hmang an iom ang khan, keini chu hmang ma ung. Pathianin a ni tîrna sikin Krista zuituhai ang khan Pathian mit hmua dik takin kin ichong a ni.

2 Korinth 3



Thuthung Thar sinhotuhai

- ¹Mâni irhril insa ei iphut nôk mani ta rêk? A ninole, mi danghai ang dênin irhril insana lekha ei ichôi mo, nin kuang ata kin ilâk mo a inang ta ma ni?
- ²Nangni hi kin lekha, kin milung sũaga irziak, mi tin inhriat le tep kha nin ini kêng.
- ³Nangni hi Krista lekha, keini a ni irziaktir, lekhatuia irziak ni loi, Pathian hring Irthaa irziak a ni, lungphêka irziak khom ni maka, taksa milung phêka irziak nin nih ti an lang infel a ni.
- ⁴Krista zârin Pathian kuang iamna kin nei sikin kha kha kin iti a ni.
- ⁵Keini ringotin chu chuk ma unga, keini itho anga insâr hrang ite om mah, kin ichukna chu Pathian ni ipêk a ni.
- ⁶Ama khan Thuthung Thar sintho inrukin a ni siama, kha kha, Dân, horopa irziak ang kha ni maka; Thuthung Thar, Irthaa irziak kha a ni. Dân, horopa irziak khan, thina an tungtira, Irthaa chu hringna an tungtir a ni.
- ⁷Mosia hmêl boi nôk zôi hrang lua Israel nâihaiin an ien mai thei loi dôrin a roiinpuia; lung horopa irziak, thina intungtu sin thônâ lua, khang taka roiinpui a ni'n chu,
- ⁸Irtha sinthônâ kha a iroiinpui ual hrang mo ni mah?
- ⁹Thiamloina intung ngai dân lua mina a roiinpuiin te, saninhringna intung ngai sinthônâ kha idôra roiinpui ual mo a ini hrang!
- ¹⁰Roiinpuina vâ ual ok sika khan zoro thenga roiinpuina vâ kha chu om mah kin ti thei.
- ¹¹Kha zoro sôtloitea lua khan roiinpuina a omin te, kumtuanga hrang vângâ kha teh idôra roiinpuina lian ual mo a iom hrang tâk!
- ¹²Kha tũagna kha kin nei sikin kin ihâi a ni.
- ¹³Keini chu Mosia ang khan ni ma ung, ama khan vâra chuai tır tır boidipna kha Israel mipuihaiin an hmu loina hrangin a hmâi kha irkhuna'n a'rkhûa.



¹⁴A dik takin, an milung sâng kha ar khâr a ni, a vuan sîn ten khoma hin Thuthung Lui an tepin chu kha irkhûna ngêt khan an milung sâng ar khu ngai.

¹⁵A vuan sîn ten khoma hin Mosia Dân an tep rikipin irkhûna khan an lung sâng a la'rkhu mai ngai.

¹⁶Khannisianlân, Rengpa tiang an irngat tika chu, kha irkhûna kha pai ni ta a ti.

¹⁷Hi hmuna "Rengpa" ti hi chu Irtha a nia, khante, Rengpa Irtha omna tina chu zalêna a om ngai.

¹⁸Keini chu kin rêngin hmâi irkhu loiin Rengpa roiinpuina chu kin inlangtira, roiinpui ata roiinpui ual ual hrangin, ama irangpuia om hrangin, irthiangtir mai ei ni, kha kha Rengpa ti a ni, ama kha Irtha a ni.

2 Korinth 4

Pil bêla irtha irchon om

¹Pathianin a lungkhamna'n hi sin hi tho hrangin a ni pêka, khasikin kin zâmirezaltir ma ung.

²Thil irthup le inzakupiom sinhai kha kin mâka, milakin sin ma unga, Pathian thu huangna khomin hmang sa ma ung. Thutak vârna irkipin Pathian mithmua khan inlêngin mi tin sia le sa inhriatna mit tung kin tum ual ngai.

³Kin Thurchi Sa insâr hi thupin a omin chu, ar hmang chianhaia irthokin ithupin a iom a ni.

⁴Hi rammuala pathian saloi khan an milung inchong inthima a sia pehai sikin an iiam loi a ni. Krista, Pathian angna neitu roiinpuizia Thurchi sa vâ an chungu zuang inlang kha an hmu lina hrangin an mit a incho pehai a ni.

⁵Keini thu insâr ma unga, Jisua Krista chu Rengpa a nih ti kin insâra, keini khom Jisua sikin nangni suakhai kin ni iti kin insâr ual ngai.



⁶“Inthima irthokin vâ hong vâ suak a ti,” tihtu Pathian ngêt khan a ni, Krista hmêla Pathian roiinpuina vâ suak kin inhriatna hrangin kin lungrîl a ivâr tâk a ni.

⁷Khannisianlân, keini, irtha tianga irchon neihai hi pil bêl ang kha kin ni, irtha lian kha kin ta ni loiin Pathian ta a nih ti an lang theina hrangin.

⁸Inbuai maiin kin oma, khannisian, duai ma ung; a kêra chu lunginzîngin kin oma, khannisian, kin beidong viat ngai mah.

⁹Râl tamtak an oma, khannisian, rual nei loiin om ngai ma ung; pop chitin om ngai khom inlân, irhmang ripin chu om ma ung.

¹⁰Itiklai khomin kin takpum thi theia hin Krista thina kin irput mai ngai, a hringna khom kin takpuma hin an lang theina hrangin.

¹¹Kin hring kêr ka chu Krista sika thi hrangin kin irtûng mai ngai, a hringna khom kin takpum thi theia hin an lang theina hrangin.

¹²Kha omzia chu keinia thina'n sin a thoa, nangnia hringna'n sin a itho a ni.

¹³Pathian Thubu'n, “Kin iam sikin thu ki insîr a ni,” a iti ang khan, kha iamna irtha ngêta khan keini khomin thu kin insîr a ni, kin iam sikin.

¹⁴Rengpa Jisua kaithoitu Pathian khan keini khom Jisua pâlin ni kaithoi a ta, nangni leh a makunga ni hruai a tih ti kin inhriat.

¹⁵Hihai tinrêng hi nangni hrang sika a ni; Pathian lungkhamna'n mi tam ual a izo tîr tîr ang khan, khahai khan Pathian roiinpuina hrangin lômthu insîrna chongchai Pathian kuang inhlan ual ual an ti.

lamnaa hring

¹⁶Khasika khan kin zâmirzal viat ma ung. Kin taksa mihriam hi hong hmon tîr tîr khomsian, kin irtha mihriam chu a nitin siamintharin a iom mai a ni.

¹⁷Sôtnote sînga kin intakna tuang nêp taka hin kumtuang roiinpuina, tetûk inruk loi dôra irkhêl, a ni siam pe a ni.



¹⁸Thil hmu theihai chu thîr mak mea, thil hmu theiloihai chu ei ithîr ual a ni. Thil hmutheihai chu boi nôk zôi a ta, thil hmu theiloihai chu kumtuangin om a ti.

2 Korinth 5

¹Ei omna irnênga in hi siat khom sian, irvâna in, kuta sinloi, kumtuanga om mai hrang, Pathian kuanga in det chu ei neih ti ei inhriat.

²Irvâna ei omna hrang ina khan, a nir khu hrang irzuk tak takin hi ina hin ei inrung tak tak ngai a ni;

³Kha kha ei silin chu takpum boiin om no ih.

⁴Hi irnêng ina ei om laia hin puak rikin ei inrung tak taka, silkai boia om ei nuam sika ni maka, silkai thua om ei nuam sika a ni, thi thei hi hringna inlem zoiin a om theina hrangin.

⁵Khaang hranga khan a ni siam irfûktirtu chu Pathian a ni, irkhâmna Irtha ni pêktu kha.

⁶Khasika khan takpum ei om sêng hin Rengpa kuang om mak meh ti inhriatin kumkhua'n ir-ial takin ei om ngai.

⁷Ei hringna hi hmu theia fe loiin, iamna'n ei ife ual a ni.

⁸Ir-ial takin ei om, ki iti, taksaa om loia Rengpa kuanga om ei nuam ual a ni.

⁹Khasikin om inlân, om no inlân, ama nuamlam mi ni ei itum ngit ngai hrang a ni.

¹⁰Mi tinin taksaa sinthohai, a sia mo, a sa mo, ei itho ang taka ei hmu theina hrangin Krista roirêlna toihmun makunga khan inlangin ei iom zit hrang a ni.

Krista zâra Pathian leh rual irchangna

¹¹Rengpa chi lam kin hriata, mi kin inthêm ngai a ni. Pathianin a nin hriat infel zit, nangni khomin nin lungrîlin nin hriat infel sa nin ti ki tûng.

¹²Nin kuang kin sa lam kin insîr ni mah, om dân tiang ni loia kha a chungphua ringota irsong ngaihai kha nin sâm theina hrangin keini nin ni songna hrang bi nangni kin insîr pe ual a ni.



¹³Kin into ta tak ma ni? Pathian hrang sika a ni. A ninole kin ivâr ma ni? Nangni hrang sika a ni.

¹⁴Krista lungthungna'n a ni irêl a ni, mi tin ta hrangin mi inkhat a thia, kha omzia chu an rêngin a thina kha an irkoppui a nih ti atûn chu kin infel ta.

¹⁵Khan, a hringhai khan anni ta hrangin hring ta loia, an ta hrang sika thia thoinôktu ta hrang vaia an iam theina hrang takin a ni, mi murdi ta hrangin a ithi kha.

¹⁶Khasikin mihriam irkhî lamin tûte hril insiat ta no ni ung. Mihriam irkhî dânin Krista lei inhre ta khom unglân, tho ta ma ung.

¹⁷Tukhom, Kristaa a omin chu, thilsiamthar a hong nia, thil miluihai chu a boia, irngai u ta, a hong thar ta.

¹⁸Khahai tinrêng kha ei râl irchangna irthoka Krista zâra a rualhai ni siama, mi dang khom a rualhai a siam theina sin ni pêktu Pathian khan a isin a ni.

¹⁹Kin thu'nsîr chu hi hi a ni, Pathianin Krista zârin mi tinrêng a rualhaiin a siam tâk. An sualhai kha insâp pe ta loiin, a rualhaia a siamzia thu kha keini hi a ni ipêk tâk a ni.

²⁰Khasikin Krista hranga palai kin ni. Pathianin nangni a ngênna kha keinia a ibâng a ni. Krista irthûlin nangni kin ngên: Pathianin râl nin nina irthokin a rualhaiin nangni siam ri se.

²¹Krista khan soal nei mah, Khannisian, ama leh irzoma Pathian felna kha ei dong sa theina hrangin Pathianin ei soal a indong a ni.

2 Korinth 6

¹Pathian lungkhamna nin idong kha chanlamboia nin hmang inhek loina hrangin keini a sinthopuihaiin nangni kin ngên.

²Pathianin, "Nangni ki ngaitua zoro a hong tungin, Nangni ki ngaituaa; Nangni ki saninhring zoro a hong tungin, Nangni ki changpui ngai," a ti. Irngai roi! Atûn hin zoro lômom tak a nia, atûn hin saninhringna ni chu a ni.



³Kin sinthôna hin tûte'n an ni demna hmu nohai sian ki nuam a ni, khasikin tûte lampuia khom lam chaninvâtir tum ma ung.

⁴Kha nêkin, kin sinthôna tinrênga buainahai, dengtheinahai le intaknahai diar taka tuangin, Pathian sinthotuhai kin nih ti kin inlang ual ngai.

⁵Zêm bitin, intângna ina khumin le mipui zêmin kin oma; sinsôlin, inmu inhnâiin le bu ngheiin kin om ngai.

⁶Kin irthiangna hai, inhriatna hai, tuangna hai le khonzana hai sikin Pathian sinthohai kin nih ti kin inlang ngai. Irtha Irthiang sikin, kin lungthungna dik sikin,

⁷thutak kin insârna sikin le Pathian irtha sikin. Mi doina hrang le keini ir-enkolna hrangin felna kha tukfamin kin nei ngai.

⁸Chôiirsângin le mualphoi sakin kin om ngaia; irkôkinsia le inpâkin kin om ngai. Milakhaia bê kin nia, khan khomin thutak kin insâr ngai;

⁹mi inhriatloi angin kin oma, khan khoma mi tinin an nin hriat; ithi ang dôra omin, khannisian, nin ni ihmu ang khan kin ihring a ni. Hremin kin tuang khomin, that chu ni ma ung;

¹⁰Lungdûk irsak ni khom unglân, ki lôm mai; inriang kin ang, khannisian, mi tamtak kin irchong; ite neilo kin ang, khan khoma thil tinrêng kin nei zit.

¹¹O Korinth rual lungthunghai! Nin kuang fel takin kin iti tâk a ni; kin lungrîl kin inhong irzattir tâk.

¹²Keini chu kin lungrîl nangni tiang khâr ma unga, nangni chu nin lungrîl keini tiang nin ikhâr a ni.

¹³Ki nâihai anga nangni bê'n atûna hin kin iti a ni; Nin ta hranga ngaituana kin nei lam takin nangni khom nei roi. Nin lungrîl inhong irzat roi.

Pathian hring Tempil kha nin ni

¹⁴Iamno mihai inthurualpui no roi. Felna le سوالنا'n imo irhlopna an nei? Vâr le inthim khom ar kop thei moa?



¹⁵Krista le Beliarâ khomin irnaina imo an nei? Iamtu le iamloi imo kopirkâina an nei?

¹⁶Pathian tempil le millimhai khomin imo irzomna an inei? Eini chu Pathian hring tempil kêng ei ni. Pathianin, “Ki mihai kuang in sin ki ta, an kuang om ki ti; Keima an Pathian ni ki ti,” a iti ang khan.

¹⁷Khasikin, “Anni laia irthokin hong suak unglân, A bingîn om roi, Thil porinche rêng rêng tôn no roi, Rengpa’n a ti. Khanchu, nangni pom ki ti.

¹⁸Keima nin Pathian ni ki ta, nangni ki nâipahai le ki nâinuhai ni nin ti, Rengpa Itinrêngthothei khan a ti,” a iti a ni.

2 Korinth 7

¹Ki rual lungthunghai, kha chonginkunghai murdi kha eini hrang a ni. Khasika khan, takpum le irtha porinche thei thil ata irkiang ei ta, Pathian mahrip tho pumin irthiangna irkiptir ei ti.

Koiindang mihai irletnaa Paula lômthu

²Nin lungrîl hmun nin ken roi. Tûte chungâ tho’nsual ma unga, tûte insiat ma unga, tûte chungâ khom inlâpna zong ma ung.

³Ama kha thiamno inchangna hranga ki iti ni mah; matona ki iti tâk ang khan, lung nin ni thung ok sikin hmunkhatin ei iom mai a ni, ei hring le khom ei thi le khom.

⁴Nangni kin hriat infel oka, nangni ki song tak tak a ni. Kin buaina tinrêng khoma khan lungrîl hrâtna’n ki sip maia; râifâna’n ki isip lêt a ni.

⁵Makedonia ki tung hnung khoma khan, irngamna zel nei ma ung. Hmun tina buaina a oma, mi leh irsualin kin oma, kin lungrîla chitna kin nei.

⁶Khannisian, Pathian, lungrîl ngûi inthorinhar ngaitu khan Tita hongna sikin a nin thorinhartir.

⁷A hongna ringot kha nin ilôm ni maka, ama nin lei inthor inharzia a ni hrilna khom kha a nia. Ama khan, ni hmu nin nuamzia hai, nin milung nin ni



inlêngpuizia hai le ni thop hranga nin irsiamzia hai a ni hril sikin, atûna hin chu ki lôm ual ok tâk.

⁸Ki lekha thon khan lungdûk nangni tho khom sian, irsîr ta ma ung, zoro sôt ok loi chu lungdûk nangni a tho ti kin hriata, ki irsîr a ni.

⁹Khannisianlân, atûn chu ki râi a fân ok, lungdûk nangni ki tho sika ni loiin, nin lungdûkna khan nin lampui nangni an tung sikin a ni. Kha lungdûkna kha Pathianin a ihmang a ni, khasikin nin chung a tho'nsual ma ung.

¹⁰Lungdûkna, Pathianin a ihmang khan lungrîl irthûlna nangni pêkin saninhringna nangni an tungtir sikin. Khannisianlân, mihriam ringot lungdûkna chu thina a tung ngai.

¹¹En u ta, nin lungdûknaa Pathian sintho hi, sathnem irngaina nangni an neizia hai, nin irthiangzia fia nin nuam dân hai, ninginthikna hai, irningna hai, ngaituana hai, irpêkna hai, tho'nsualna hai dengitheina hai hranga nin irsiam dân hai kha! kha thu rêng rênga khan nangni chu sêlna om mak chêi ti nin inlang a ni.

¹²Khasikin nin kuang irziak inlân khom a soal thotu sika khan ki irziak ni maka, a soal tuangtu sika khan khom ki irziak ni maka, kin chung a nin sathnem irngaizia Pathian mit hmua nin kuanga inhriattira a om theina hrangin ki irziak ual a ni.

¹³Khasika khan kêng inthorinharin kin iom. Inthorinhara kin iom vai ni loiin, Tita nin lei changpuina zâra a lômna sikin keini khom a ni inlôm tak tak a ni.

¹⁴A kuanga nangni song ngai khom inlân, mualinphoi ma ung. Nin kuang thutak kin hril mai ngai, khang khan, Tita kuanga nangni ki songna khan a dik iti a ifia a ni.

¹⁵An irchûna thuhai zôm hranga nin rêngin nin irsiam zia hai, ichi le inthing puma ama nin lei lômzia hai kha an hriat mai sikin, nin ta hranga a lungthungna ar sôn ual ok ta.

¹⁶Nangni ki'rngat zit thei sikin ki lôm tak tak a ni.



2 Korinth 8

Iamtuhai hranga thilpêk

- ¹Urênghaio, Makedonia rama Koiindanghai laia Pathian lungkhamna sintho kha nin inhriat hrangin kin inuam a ni.
- ²Buaina an tonga khan fia tak takin an oma, khannisianlân, an raifâna a lian tak tak sikin inriang tak ni khomhai sian, tikhoina tak neiin pêkna an inei a ni.
- ³An thei dôr chu, an thei dôr nêka tam khom, an ipêk a nih ti nangni kin hriatpui a ni.
- ⁴An binga lungdo'n Judai rama Pathian mihai changpuina lama sintum nei sa hrangin an ni ingên a ni.
- ⁵Kha kha kin itûng ban a ni! A masa takin Rengpa kuang an irpêk baka, kha hnung chu Rengpa lungdo'n ki kuang an irpêk nôk a ni.
- ⁶Khasikin hi sin phutpu Tita kha, kin ngên, hi lungthungna sin sa bîk hi sunzom maia nangni zoipui hrangin.
- ⁷Nin inei murdi iamna hai, thu'nsîr theina hai le inhriatna hai, ni changpui hranga nin irzukna hai le lung nin ni thungna haia khan nin irchong ok sikin hi lungthungna sin khoma hin tikhoi sa hrangin nangni kin nuam a ni.
- ⁸Ite dân nangni khang pe ma ung. Khannisianlân, mi danghaiin ni changpui an irzukzia hai nangni hmu'n lung nin ni thungna hi a dik ta tak mani iti inhriattir ki tum a ni.
- ⁹Ei Rengpa Jisua Krista lungkhamna nei intamzia chu nin inhriat; inriangna sikin nin hong irchong theina hrangin irchong ok khomsian, nangni sikin a lei inriang tâk a ni.
- ¹⁰Mini kuma nin iphut kha atûn hin zoi unglân nin ta hrangin sa a ti, ti hi keima irngaidân a ni. Sin hranga a phut masa vai ni mak chêia, sin hranga an milung masa khom nin ni sa.



11Khaang khan, kha chung a irngat maiin nin sin kha zoi ta roi! Nin lei itum tâk ang khan zoi hrangin irzuk unglân, atûna nin nei lam ang tak khan tho roi.

12Pe hrangin nin irzukin chu, nininei loi chung a ni loiin, nininei chung a nin thilpêk kha Pathianin inham a ti.

13-14Nangni puak nangni inpêlin mi danghai inzôk tum ma ung; khannisianlân, hi zoroa hin nin nei intam sikin ar samhai nin ichangpui chu a sa ok a ni. Khanchu, nangni nin irsama anni an nei intam khomin nangni changpui an ti. Khaang khan irangna om a ti.

15Pathian Thubu'n, "A hrût intam khan nei intam ual maka, a hrût intom khan nei intôm ual mah," a iti ang khan.

Tita le a chanpuihai

16Nangni changpui hranga kin irzuk lam ang taka Tita khom irzukna inneitu Pathian chung a kin lôm tak tak.

17Kin ngênna a inham vai ni loiin, ama lung suaka nangni changpui irzukna nin kuang a hong ichuk a ni.

18Ama le a urêng, Thurchi Sa insîrna sin a ithôna sika Koiindang murdi'n an imahriptu kha kin zu tîr sa.

19Khabana, ama hi, hi lungthungna sin Pathian roiinpuina hrang le nangni changpui kin nuamna inlangna hrang kin sinnaa ni zui hranga Koiindanghaiin an inthanga an iphun a ni.

20Hi thilpêk tam kin sem dâna hin tûte'n an ni sêl lona hrangin kin irdîn a ni.

21Kin thil tum chu Rengpa mithmu vaia ni loiin mihriam mit hmu khoma dikna sin hi a ni.

22Khasikin anni leh khan kin urêng inkhat kin zu itîr a ni; voi iza kin fiaa, nangni changpui a'rzuk tak tak iti kin inhriat. Atûn vâng chu tak nangni a sôn tak taka, nangni changpui a'rzuk ual ual tâk.



²³Tita hi chu ki rualpa, nangni ki changpuina lama sin ni thopui ngaitu a nia; urêng dang a changpuihai hi chu Koiindanghai irthûla Krista kuanga roiinpuina intungtu an ni.

²⁴Khahai kuanga khan nin lungthungna inlang roi, nangni kin songna chungchâng thua hin kin idik ti Koiindanghai murdi'n an inhriat infel theina hrangin.

2 Korinth 9

Kristian chanpuihai ta hranga changpuina

¹Judai rama Pathian mihai changpuina inpêl chungchâng thu kha chu nangni kuanga irziak nang ual mah.

²Changpui nin peiziahai kin hriata. Makedonia rama mihai kuang khan “Akaia rama urênghaiin chu mini kum ata changpui hranga an irsiam tâk kêng,” tiin nangni ki song a ni. Nin irzukna khan an laia mi tamtak an thora.

³Khannisian, kha thua khan nangni ki songna kha a korong a ni lolina hrangin, urênghai hi ki hong itîr a ni, ki ihril lam ang taka nin lei irsiam theina hrangin.

⁴Makedonia rama mihai ngânin kin pâla ni zuang zuiin, nin irsiam loi zuang hmu ta duaihai sian, nangni kin iiam lia le te, nangni vai ni loiin, keini hi mualinphoiin kin iom hrang kêng.

⁵Khasikin, inrenna thilpêk nin lei intak kha nin lei irsiam diam theina hrangin, hi urênghai hi ki matona nangni lei zuang sir bak hrangin ngên an nang niin kin hriata. Khanchu, ki zuang tung tena chu lei irfûk diam ta nin ta, nin nei sika ni loiin, nin nuam sika nin ipêk a nih ti inlang a ti.

⁶Inhre roi, hiang lama hin chîmu a tû intômin chu inlût intôm a ta, a tû intamin chu ât intam a ti.

⁷Mi tinin inpâm pum le pêk loi theiloi anga irngaia pêk ni loiin, an lungsuak lam ang taka pêk ni ri se; lôm taka pêkpu kha kêng Pathianin a lôm ngai.



⁸Pathian chu nin innang thil sa tinrêng nangni a pêk theia. Khabana nin innang nêka tam khom thil sa nin tho theina hrangin nangni a pêk belsa thei a ni.

⁹Pathian Thu bu'n, "A sem indara irsamhai a pêka, A khonzâna chu kumkhua'n a pangai a ni," ti irziak ang khan.

¹⁰Khan, an thektu kuang chîmu petu leh fa hrang bai pêktu Pathian khan chîmu nin innang murdi nangni pêkin nangni irsôtir a ti, nin tikhoi irthoka khan ra tamtak nangni insua pe a ti.

¹¹Nin tik nin inhoi mai theina hrangin Pathianin nangni irchongtir mai a ta, mi tam takin nin thilpêk keima irthoka an hmu sika khan Pathian kuang lônthu insîr an ti.

¹²Hi nin sintho hin Pathian mihai irsamna vai irfûk pe maka, Pathian kuang lônthu insîrna lian tak nghi sain a lêt mai a ni.

¹³Hi nin sintho'n fiana a intung sika khan mi tam takin Pathian kuang roiinpuina pe an ti. Krista Thurchi Sa nin inpuang ngaia iam nin om sik le anni ta hrang le mi tin ta hranga nin tikhoi sika khan.

¹⁴Khasikin lungthungna inthûk tak neiin nangni chongchai pe an ti, Pathianin lungkhamna bîk nangni ar hmutir sika khan.

¹⁵A thilmanboi pêk sika khan Pathian kuang lônthu insîr ei ti.

2 Korinth 10

Paula'n a sinthôna a huaisan

¹Keima, Paula, nin laia ki oma nin chungga irngaiintôm le dâiriamama oma, nin kuanga ki om no le nin chungga lum raka om ngaitu an iti hin Krista tuhnuairôlna le nunhoina songin nangni ki ngên a ni.

²Ni kuanga ki hong zoro hin rammual mihai lunginchong anga sin thoa ni'rngaituhai chungga ngar ngit hrang ki ni, nangni chungga chu ngar ngit hranga nin phût loi hrangin nangni ki ngên.



³Rammuala om chu ei ni, khannisian rammual mihai lungrîl irput anga bei ni mak meh.

⁴Kin râlhai doinaa kin ihmang râlthuamhai chu rammual râlthuam ni maka, Pathian râlthuam irnak nei a ni ual; ama kha kulpui det takhai siana'n kin hmang ngai. Irsêlna dik loihai kin inboia;

⁵Pathian inhriatna dân hranga lâirpâkna lamchâina tinrêng hai kha kin seta, ngaituana tinrêng suaka hruaiin Krista thu kin zôm ngai.

⁶Iam nin om tak tak tih nin fia zoiin chu iamom loihai denginthei hrangin irsiam zel kin ti.

⁷Thilhai hi a chungphuaa an inlang dân nin ien a ni. Kha khan tu mo khat Krista mia irbe a iom ma ni? A sa, a omin chu, a bingin a chungchâng ngaitua nôk ri se, ama a ini ang takin keini khom Krista ta kin ni sikin.

⁸Nangni setna hrang ni loa nangni indingna hranga Rengpa'n irchamneina a ni ipêk hi song ual viat khom inlân, inzak ma ung.

⁹Ki lekha thona nangni insi tum anga inlang chu ki inuam loi a ni.

¹⁰Mi senkhatin, "Paula lekha thonhai hi a ngarin a naa, khannisian, ei kuang a omin chu a taksa a'rzala, a thuhai khom ite ni mah," ti an ti.

¹¹Khaanga mihai khan, hmun danga kin oma kin lekha thonhai le nin kuanga kin oma kin sintho hrang kha a danglamna om mah, iti an inhriat ngêt hrang a ni.

¹²A dik takin, mânîa irpâka irsâng oka irbêhai laia khan chu irtepin anni leh irkhî ngam ma ung. An invêt bâka! Mânî le mânî an irkhîna hrang le an irrêlna hrangin anni na nâkin dân an siama.

¹³Khannisianlân, keini chu, kin irsongna kha a ten om kêng; Pathianin sin a ni iten pe sînga khan a ni ngêt ngai, khan, hi hin nin laia kin sin kha a huap sa.

¹⁴Kha ten sînga om nin ni sikin Krista Thurchi Sa chôia nin kuang kin zuang khoma kha ten ban chu fe ma ung.



¹⁵Khasikin Pathianin a ni iten pe bial bana mi danghaiin an isin kha song ma ung. Kha nêkin, nin iamna hong irsôn a ta, Pathianin a ni iten pe sũaga zoro tin nin laia sinna lian ual ok tho thei kin ti, ti kin itũag ual a ni.

¹⁶Khanchu, Thurchi Sa hi nin kuang bana ram danga khom insîr thei kin ta, hmun danga mi sin lei tho tâk kha song no ni ung.

¹⁷Khannisianlân, Pathian Thu'n a iti angin, "Tukhomin a song nuam murdi'n chu Rengpa sintho kha song ri se," ti a ni.

¹⁸Mânia sa irtia irpâktu chu inpâk hlo no nia, Rengpa'n an pâkin kêng inpâkna a ihlo ngai.

2 Korinth 11

Paula le tirtôn dolhai

¹Into viat anga ki om zoro lai khomin nin ni ituangpui hrangin ki nuam. Ngaihoi takin ni tuangpui roi!

²Pathian hnarsâna angin kêng nang ki hnarsa; dôngmate irthiang ang nin nia, pasal ruathar inkhat, Krista ngei kha, nangni innei hranga ki lei inkung pehai nin ni.

³Nin lung sũag kha hong siatin Kristaa nin irpêkna rikip le irthiang kha marak nin ti, ti ki ichi a ni, khang khan Evi kha mirûl butdi milak khan inthêmin a iom a ni.

⁴Tu mani nin kuang zuangin Jisua dang, a thu kin insîr ni loi a zuang insîra, lôm taka nin lei irngai thei sik le keinia nin ihmu Irtha le Thurchi Sa ni viat loi irtha dang le thurchi sa dang nin lei pom sikin.

⁵Nin "tirtôn" lianhai nêka chîn ual hrangin chu irtũag ma ung!

⁶Thu'nsîr chu ki thei rak no khom a ni thei, khannisian, inhriatnaa chu khang khan ni viat mah; ama kha chu itiklai khomin tinrênga nangni kin infel pe tâk a ni.



⁷Nin kuang Pathian Thurchi Sa ki zuang insîr laia khan ite thil nangni ngên ma ung; nangni chôindômna hrangin keima ki irhniam a ni kha. Kha khan ki itho'nsual ma ni?

⁸Nin laia sin ki tho zoro'n Koiindang danghaiin hlo an ni ipêk ngai a ni. Nangni changpuina hrangin, Koiindanghai sum kêng ki inhek pehai ngai.

⁹Nin kuang ki om sêngin poisa ki'rsam laia khan tûte nangni inbuai ma ung; Makedonia rama irthoka urêng zuanghai khan ki irsam tinrêng an ni zuang ichôi pe a ni. Sûn hnung tianga ang khan sûnmatona khom nangni angin phurrik ni viat no ning!

¹⁰Krista thutak keimaa om sika khan hi ki'rsongna hi Akaia ram pumpuia dâihrek no ni.

¹¹Lung nangni ki thung no sika hi hi ki iti ma ni? Lung nangni ki thung iti Pathianin an hriat!

¹²Atûn hin sin tho mai ki ti, tirtôn danghai kha an irsong thei lolina hrang le keini sintho lam ang takin sin an tho, an ti thei lolina hrangin.

¹³Kha mihai kha tirtôn dik ni mahai: tirtôn dolhai, an sinthoa milak thoa, Krista tirtôn dikhai anga inlang hranga irsiam an ni.

¹⁴Kha kha a sa, irkhêl ual mah! Setana khom vâv vântirtôn anga inlang hrangin ar siam kha te!

¹⁵Khasikin a tirtônhai khomin felna tirtônhai anga inlang hranga an irsiam hi thilirkhêl ni mah. A hnungkhôna chu an sintho ang takin la hmu an ti.

Tirtôn ninaa Paula tuangna

¹⁶Ki ti nôk: tûte'n into'n ni bê no ri sehai. Khannisianlân, nin ni bê'n chu, a chînte lua ki'rsong theina hrangin into angin ni pom roi.

¹⁷A dik takin, atûna ki iti hi chu Rengpa thu angin ti ma ung; hi irsongna thua hin chu into ang takin ki iti a ni.

¹⁸Khannisianlân, mi tamtak mihriam nitna song an om sikin, kei khom song ki ti.



- ¹⁹Nangni chu vâr tak tak, khasikin intohai lôm takin nin ituangpui a ni!
- ²⁰Nangni chu mi'n suakin nangni siamin, nangni fa khôt zoiin, nangni huangin, chângâ nangni in-ôktirin, nangni enkhûm khom sian, nin hmâia nangni inbên khom sian, nin tuang zoi zit ngai.
- ²¹Khahai tho hrangin chu kin chi hrai sikin a pom khom kin zak. Khannisianlân, tukhomin i ang lama khom an irsong ngamin chu, into angin ki ichong a ni, kei khom ki'rsong ngam.
- ²²Hebrai mi mo an ini? Kei khom ki ni. Israel mi mo an ini? Kei khom ki ni; Abrahamâ irchi mo an ini? Kei khom ki ni.
- ²³Krista sinthotuhai mo an ini? Into ang riaiin hong hrilin lân, anni hrangin chu tirtôn sa ual ki ni! Sintho intam uala irnak song ual ki ni, intângna ina kin tâng intam uala, zêm laka ki tuang intam ual taka, thi zôi zel theina khom ki tong intam tâk a ni.
- ²⁴Judahaiin voi sôminthum voi kuaka vîka tarâng ringa an ni zêm.
- ²⁵Voi thum Rom-haiin an ni zêma, voi khat lungin an ni dênga. Voi thum irkuang siatna ki tonga, voi khat chu zân khat le sîn khat tui chungâ ki om.
- ²⁶Kin zinna voi tamtak ichiomna ki tong ngai, tuia ata, hrâtlâksonghai ata, ki Juda chanpuihai ata, Jentailhai ata, khopui sîng ata ramchâr ata, tuipui ata chitna ki tong chi chian ngai.
- ²⁷Sin intamin ki buaia, fâkrua ki'rsam mai ngaia, silkai boiin phalbi dâi ki tuang ngai.
- ²⁸Hihai bana khom hin Koiindang murdihai ki ngaituana, a nitin ni del chianin a om sa ngai.
- ²⁹Mi hrât loihai ki ituangpui ngailoi ma ni? Mi an tûkin ki irvei ngai loi ma ni?
- ³⁰Ki song ngêt hrangin chu ki hrât loizia inlang thilhai hi song ki ti.
- ³¹Rengpa Jisua Pa le Pathianin milak ki itho loizia an hriat. Ama kha kumtuangin inpâkin om ri se.



³²Damaska khuaa khan rêng Areta hnuaia roirêltu khan ni chel tumin Damaska khua kha mi an nghâktira.

³³Khannisian, kokin kulpui bang ir-ônga an nin thâka, kha roirêltu ata ki izôk a ni.

2 Korinth 12

Paula thil hmu le inhriattirna

¹Ki irsong hrang rêng rêng a ni, ite ar fêna a om no hrang khomin. Khannisianlân, atûn Pathianin inlârna a ni irhmu le thu phuang hrang a ni ipêkhai kha insîr ki ti.

²Kum sômhleiminli matona khan Kristian mi inkhat, irvân irsâng taka khin zuang ilâkin a om ti kin hriat (ama kha a tak mani, inlârna a ihmu mani, inhre ma ung Pathian vaiin an hriat).

³⁻⁴Ki ti nôk, kha mi kha Paradisa zuang lâkin a om ti kin hriat, (Ama khom kha a tak mani, inlârna a i hmu mani, inhre ma ung. Pathian vaiin an hriat). Khan, ama khan chonga insîr theiloi le mihriam insîr hranga phal ni loi thil a hong inhriata.

⁵Khasikin kha mi kha song ki ti, khannisian, ki'rzalzia inlang thilhai ti no chu keima chu irsong no ning.

⁶Irsong nuam khom inlân, into ni no ning, thu dik tak kin sîr hrang sikin. Khannisian, irsong no ning, tukhomin an ni hmu lam le keima ata thu an inhriat lam nêkin an ni'rngaiirsâng lina hrangin.

⁷Thilirkhêl tamtak ki ihmuhai sika khan irpâkna'n ki sip lina hrangin, taksa a satêna dam lina tak pêkin ki iom a ni, kha kha ki'rpâk lina hranga Setana tirtôn anga sinthoa ni zêm ngai a ni.

⁸Hi natna hi nir kiangtir pe hrangin Rengpa kuang voi thum ki nghi.

⁹Khannisianlân, ama khan, "Ki lungkhamna hi kêng ni irhelpui tak, ni hrât loi zoro'n kêng ki sinthotheina a irkip ngai," tiin a ni sâm. Khasikin ki chung a Krista sinthotheina ki chung a om theina hrangin lôm takin ki hrât loinhai hi song ual ta ki ti.



¹⁰Krista sikin chu hrât loinahai, hmusitnahai, hnuaisianahai, dengintheitirnahai le intaknahai khom ki milung a chuk. Ki hrât loi zoro rikipa ki hrât ngai sikin.

Paula'n Korinth mihai a ngaituana

¹¹Into angin ki iom a ni, nangni'n into hrangin nin ni inphût sikin. Nangni'n kêng nin ni inhamna inlang hrang nin ini. Ite ni no khom inlân, nin "tirtôn" lianhai nêkin chu i lama khom chîn ual no ning.

¹²Tirtôn ki nih ti fiana sinirkhêl le thilirkhêl tamtak nin laia diarna ta tak neiin sin a ni ta.

¹³Koiindang danghai nêka saloi uala enin itin mo nin iom? Poisa tianga nangni kin buai lolina kha a ni no'nte. Ngaihoi takin kha fel zoi lolina kha chu ni ngaidam roi!

¹⁴Atûna hi nin kuang zuang hranga ki irsiam a voi thumna a ni tâka, khan, ite nangni sîng no ning. Ki izong chu nangni kha nin ni, nin poisa ni mah. Khannisianlân, nâihaiin an nu le pahai sem hrang an nei hrang ni maka, nu le pahaiin an nâihai sem hrang an inei ual hrang a ni.

¹⁵Nangni changpuina hrangin ki inei murdi lôm takin hmang zoi ki ta, keima khom irhmang zoiin om ki ti. Lung nangni ki thung okna sika khan lung nin ni ithung bak loi hrang ma ni?

¹⁶Puakrik nangni ki ichang pe loi kha chu inham nin ti. Khannisianlân, tu'n mani ama kha milaka sip, milakin nangni a in-ôk tâk kêng la ti a ti.

¹⁷Itin mo? Nin laia ki zuang itîrhai hmangin nin chung a inlâpna mo ki zonga?

¹⁸Tita kha zuang hrangin ki ngên, ama le Kristian urêng dang kha ki zuang itîr a ni. Tita'n kin chung a inlâpna a zong nin iti thei hrang ma ni? Ama le keima hi lunginchong irhmunin châng dân hmunkhatin châng ngai ma ung mo?

¹⁹Nin kuang ki thiamna thu insîr mai nin ni sôn thei. Ni make! Krista einia chong ang khan Pathian makunga kin iti a ni, thil tinrêng kin isinhai hi rual lungthunghai, nangni changpuina hrang zit a ni.



²⁰Ki zuang tikin ki nuam lamin nangni ki hmu no itinin ti le nangni khomin nin nuam lamin nin ni hmu no itinin ti hi, ki ichi a ni. Khabana irngôna hai, irhnarsâna hai, ningmurna hai, ir-êngna hai, insirinsiatna hai, irnuisôna hai le lâirpâkna hai buaina hai nin laia ki hmu itinin ti ki ichi sa a ni.

²¹Ki zuang nôk tika nin mithmua ki Pathianin ni mualinphoitir a ta, matona thil sual thohai, an thil porinche tho, irditna hai, hurna hai irlet ual loiin mi tamtak sikin chapna ki ti, tih hi ki ichi sa a ni.

2 Korinth 13

Lei hrilna hnungkhôn le chubai mûkna

¹Atûna nin kuanga ki izuang hrang hi a voi thumna hrang a ni. Pathian Thubu'n a iti ang khan, "Hnôlna kha inhriatpuitu inhni mani, inthum mani an om vaiin indet ni a ti," ti a ni.

²Zoro theng tâka sual sinhai le mi dang murdihai khom nangni hril ki inuam a ni. Nin laia ki zuang a voi hninaa khan ki ti tâka, atûn hin nin kuang ki om no sikin ti nôk ki ti: Ki zuang nôkin chu tûte dengintheitirna irthokin zôk no chin ni.

³Krista, keimaa chong ngai fiana nin izong ngai kha a rêngin hmu nin ti. Ama kha nangni a ngaitua zoro'n irzal ngai maka; kha nêkin, nin laia a sinthotheina a inlang ual ngai a ni.

⁴Ama kha hrât lolina'n Krosa hembe'n om khom sianlân, Pathian sinthotheina'n a ihring mai a ni. Keini khom ama le irzomin kin ihrât loi a ni; Khannisian, nangni leh kin irmanna sikin a hringna khan Pathian sinthotheina dong sa kin ti.

⁵Iamna khan nin om le om loi nin irhriat theina hrangin nin bingin irfia ngai unglân, nangni ngeiin irfia ngai roi. A ninole, nangnia Jisua Krista kha a om ti nangni ngeiin nin irhriat infel loi ma ni? Irhriatna nin la nei no'n chu a dol chian nin la ni.

⁶Irfiana khan keini chu hlosam ma ung ti lan hria nin tih ki tûng.



⁷Ite thil nin tho'nsual loina hrangin Pathian kuang kin nghi ngai, hlo kin chuk tih inlangna hranga ni loiin, hlosam khom inlân, nangni'n thil dik nin tho theina hranga a ni ual.

⁸Thutak hrang sika ni no'n chu, a doi hrangin chu sin tho thei ma ung.

⁹Kin irzal zoro khomin nin lei hrât ngai sikin kin ilôm a ni. Khasikin nin sa irkipna hrang khomin kin nghi sa ngai.

¹⁰Khasika khan kêng hi hi nin kuang ki om loi zoro'n ki irziak; nangni setna hrang ni loia nangni indingna hranga Rengpa'n irchamneina a ni ipêk kha hmanga ki zuang tung tikin nangni ki'rkôk rak loina hrangin.

¹¹Atûn chu, ki urênghai, lôm takin om roi. Sat irkipna hrangin irnak song unglân; ki ngênna irngai unglân; lung inrualin om unglân, irtha irngam takin om roi. Khanchu, lungthungna le irngeina Pathian kha nin kuang om a ti.

¹²Urêng irtumna'n chubai irmûk irhlôm roi.

¹³Pathian mihai murdi'n chubai nangni an mûk.

¹⁴Rengpa Jisua Krista lungkhamna, Pathian lungkhamna le Irtha Irthiang pôlna kha nin rênga chung a om ri se.



Galatia

Galatia 1

Chubai mûkna

¹Kei Paula, tirtôn, mihriam itîr ni loi, mihriam inkung khom ni loi Jisua Krista le mithi lai ata ama kaithoitu Pa Pathian inkungtu hin,

²Ki kuanga urêng om murdihai leh hin, Galatia rama koiindanghai chubai nangni kin mûk.

³Pathian, ei Pa le Rengpa Jisua Krista kuang ata lungkhamna le irngeina nin kuang om ri se.

⁴Pathian, ei Pa nuamlam zômin atûn zoro saloi ata ni sansuak hrang le ei sualhai ni'rsunfâi pe hrangin Krista kha a'rpêk tâka.

⁵Pathian kuang khan roinpuina kumtuangin om ri se. Amen.

Thurchi Sa dang om mak

⁶Krista lungkhamnaa koitu kha rotsanin Thurchi Sa chi dang nin pom nôk thut hi, irkhêl ki ti.

⁷Thurchi Sa chi dang om mah, nangni inbuaipuihai khan Krista Thurchi Sa indanglam an itum kêng.

⁸Eini khom ni inlân, irvân ata zuang chum vântirtônhai khom ni sianlân, ei ihril tak ni loi "Thurchi Sa" nangni an hrilin chu, khosâl tongin om ri sehai!

⁹Nangni ki hril tâka, atûn khom nangni ki hril nôk. Nin ipom tak ni loi "Thurchi Sa" dang, nangni hong hril murdi chu khosâl tongin om ri se.

¹⁰Khante! mihriam inlôm-tir mo ki itum Pathian inlôm-tir mo? Mihriam lôm lam insîr tumin ki ihong ma ni? Mihriam inlôm-tir tum ni inlân Krista suak ni no ning.

Paula tirtôn a ni dân

¹¹Urênghaio, nangni ki hril, Thurchi Sa nangni ki ihril hi mihriam ata suak ni mah.



¹²Tu kuanga dong khom ni ma ung, tukhomin nir chu ual mahai, Jisua Krista ngei khan ki kuang a inpuang a ni.

¹³Juda sakhuaa ki'rpêk laia ki om lam kha nin inhriat; Pathian koiindanghai laia hong lûta deng kin theitirhaia, inram chithai ki itum ngai kha.

¹⁴Ei sakhua biakna tianga irchibulhai thumâk vong chungchânga khom, ki rual tamtak Judahai ki khêl ngai.

¹⁵Khannisianlân Pathian lungkhamna'n ka nu pum sâng ata a ni lei inkunga, a ni ikoi tâk a ni.

¹⁶Jentailhai laia Thurchi Sa ki hril theina hrangin a Nâipa kha ki kuang an lâ lai khan, tûte ni san hrangin irdon ma ung.

¹⁷Ki ni mân daiha tirtôn lei ni tâk Jerusalem mihai kuang fe ual ma ung. Arabia rama ki fe pat tâka; khan, Damaska kho tiang ki hong ikîr nôk lik tâk a ni.

¹⁸Kum thum hnunga chu Jerusalema Kifa hmêl inhriat hrangin ki hong fea, a kuang sîn sômhleihni ki châma.

¹⁹Khannisianlân, Rengpa urêng Jakoba ti no chu tirtôn danghai tûte hmu ma ung.

²⁰Nin kuanga ki thu irziak hi a dik a ni. Milak tho ma ung, Pathianin an hriat.

²¹Kha zoiin chu Suria le Kilikia ramhaia ki fe nôk tâka.

²²Judai rama Kristian koiindanghai len vâng chu ki hmêl lan hre irman mahai,

²³“Tiana deng nin theitu khan inrampai a itum iamna thu a hril lik ta,” ti irhâi vai an inhriata;

²⁴Khang khan, keima sikin Pathian an inpâk ta.

Galatia 2

Tîrtôn danghaiin Paula an pom



¹Kum sômhlei minli zoiin Barnaba leh Jerusalema kin hong fe nôka, Tita khom kin hruai sa.

²Pathianin a ni tîr sika fe ki ni. Hruaitu lian ualhai vai an bingin ki'rhmuipuihaia, Jentailhai kuang Thurchi Sa tâng ki insampui hi anni inhriata kin sîr pehai nôka; zoro lei thenga ki sinthôna mo, atûn laia mo, mâkana sôl ki ni loina hrangin.

³Khannisianlân, ki mi hruai Tita khom kha Grik mi a ni nâkin, nakhrâtin ser intantir ual mahai.

⁴Iamtu dol, Jisua Krista Zalênna ei nei enirchik hranga an laia lût inrukhaiiin chu suaka nin lûtîr an tuma.

⁵Aniachu, Thurchi Sa thudik kha nin ta hrangin an indang lamtir loina hrangin voikhat lua irtôl viat nuam ma ung.

⁶Hruaitu poimo nia inlanghai, an ni tak tak le ni loi, ki ta hrangin danglam ual mah, Pathianin pên tiang inlang dân vai ngaisâng ma, hihai luan insîr hrang ite nei mahai.

⁷Nei nêkin Petera kha sertanhai laia Thurchi Sa hrilna sin inkoltir a ini ang dênin sertanloihai kuang Thurchi Sa hrilna sin hi ki kuang inkoltir a nih ti an hmu.

⁸Sertanhai hranga tirtôn ni hranga Petera ta hranga tho pêktu khan, Jentailhai ta hranga tirtôn ni hrangin kei khom a ni itho pe a ni.

⁹Khanchu, Koiindang dingpuia an ibe tâkhai, Jakoba hai, Kifa hai le Johana hai khom khan, hi dongtum ki idong hi an hmum tho suam kin ni entîrna'n Barnaba leh irpôlna kut chang tiang a ni pêk tâka; keiin Jentailhai laia sin tho kin ta, anni'n sertanhai laia.

¹⁰An laia inrianghai chu inhre mai hrangin a ni tia, khatak kha ki la itum chian a ni.

Antiokei khuua Paula'n Petera ar kôk

¹¹Khan, Kifa kha Antiokei khuua a hong lai khan dem omin an lang sikin, hmâi ir-enin ki'rkôka.



¹²Jentailhai laia bu a nêk ngaia, khannisian Jakoba kuang ata mi senkhat Jentail ser intantir tumtuhai kha a chia, an hong tung tena chu a chia, a bingin a om tâka.

¹³Juda danghai khom khan a tho dân an zuia, Barnaba khom an tho dân angin a om sa tâka.

¹⁴An sintho dân kha Thurchi Sa thu leh irhme mah ti ki hmu'n, an rênga makunga Kifa kuang khan, "Nang Juda ni nia, Juda anga om loiin Jentailhai angin ni hong lênga, kha chung a khom khan ithoa mo Jentailhai kha Juda mi anga inomtir ni itum?" ki tia.

Judahai khom Jentailhai anga iam sika saninhring an ni

¹⁵Eini chu Juda mi hrang piala suak ei nia, "Jentail mi sual" an iti ngai ang ni mak meh.

¹⁶Aniachu, Jisua Krista iamna sika vai, Dân zôm sika ni loiin, mi'n Pathian makunga thiam a chang thei a nih ti kin inhriat; Dân zôm sika ni loa Krista iam sika Pathian makunga thiam ei chang theina hrangin keini ngei khom hin Kristaa khan iamna kin irngat a ni. Tukhomin Dân zôm sika Pathian makunga thiamchang zoi no nihai.

¹⁷Krista iam sika Pathian makunga thiamchang tum, keinihai ngei khom hi, "Jentail mi sualhai" anga siatna irngai kin niin chu, Krista khan sual sin a lei tho tihna ma ni? Nâi sai mak.

¹⁸Ki lei insiat tâk Dân ngêt kha inding thar nôk ki tumin chu, an siattu ki nih ti a ifel a ni.

¹⁹Keima'n chu, Dân sika, Dân ki thisan tâk a ni, Pathian tiang chu ki hring theina hrangin Krista kuang krosa hembé ki ni ta.

²⁰Keima hringna pangaia hring ni ta ma unga, keimaa hin Krista kha a hring tâk a ni. Atûna taksaa ki ikring hi, a ni lungthungtu ki ta hranga hringna pêktu, Pathian Nâipa iama hring ki ni.

²¹Pathian lungkhamna hi hnôl no ning. Dân zôm sika Pathian makunga thiamchang thei a niin chu, Krista thina hi a korong chian ni a ti.



Galatia 3

Dân le iamna

- ¹O Galatia rama mi'nvêthaio, tu'n mo nangni an dôi? Nin mit hmu ngeia Jisua Krista kha Krosa hembé a nih ti fel taka inlangtir a ni kha te!
- ²Ni hril u ta, Irtha nin idong kha Dân nin zôm sika ma ni, Thurchi Sa nin inhriata nin iam tâk sika ma ni?
- ³Khaang dôra invêt mo nin ini! Irtha song tâk hnunga taksa thila nin imong hrang ma ni?
- ⁴Nin chungá thil tunghai kha ite a ini loi ma ni? Ni loia irhoi tak!
- ⁵Phal taka Irtha nangni pêka, nin laia thilirkhêl tho ngaitu Pathian khan, Dân nin zôm sika mani, Thurchi Sa nin inhriat nin pom tâk sika tho ma ni?
- ⁶Pathian Thubu'n a ti angin, "Abrahama'n chu Pathian a iama, thiamchanga pom kêng a ni ta," ti a irziak ang khan.
- ⁷Abrahama nâi dik takhai kha chu iamtuhai hi an nih ti inhre roi ba.
- ⁸Khan, Lekha Thu khan Jentailhai khom iamna sikin Pathian khan thiam inchangtir hrang a nih ti a lei hmua; khanchu Abrahama kuang, "Nangmaa khan nam tin satvurin om an ti," tiin Thurchi Sa kha a lei hril diam tâk a ni.
- ⁹Khanchu, Abrahama'n a iiam anga iam murdi'n satvurna kha an idong tâk a ni.
- ¹⁰Dân zôm irnghatnaa hmanghai chu khosâl tong chian an ni; "Dân lekha Thu a chuang murdi zôm loia tho zit loi chu khosâl tong an ni," ti irziak a ni.
- ¹¹Dân zôm sikin Pathian makunga tûte thiamchang zoi om mahai ti a fel a ni. "Iamna sika thiamchang kha hring a ta," ti a ni.
- ¹²Dânin chu, "Thupêk zôm zittu chu hring a ta a ti maia, iamna insîr sa mah.
- ¹³Thingá inkhâi chu khosâl tong a ni," ti irziak ang khan. Krista khan ei ta hrangin khua isâlna kha pêlin Dân khosâlna ata a ni sansuak tâk.



¹⁴Khanchu, Pathianin Abrahamama sat a vurna kha Jentailhai kuang Kristaa khan a zuang tung tâka, eini hin Irtha pêk inkung kha iamna sikin ei lei dong tâk a ni.

Dân le chonginkung

¹⁵Urênghaio, entîrna hrangin mihriam tho dân hong insîr ta inlân, mihaiin Thu an hong intung infel tâkin chu, mihriam thuthung chian a ni sikin, tûte'n khoi nôk ngai mah, bôk khom bôk ngai mahai.

¹⁶Abrahama le ar chihai kôla vai a ni, Pathianin Thu a inkung kha: mi tamtak chungchâng insîr mah, "Irchihai" ti loiin mi inkhat hrilna angin, "Chi" a iti a ni; kha mi kha Krista hi a ni.

¹⁷Ki insîr tum chu hi hi a ni. Kum irzaminli le kum sômthum zoia Dân lei om tâk khan Pathian Thuthung kha insiat ual mah, a thu'nkung khom kha indanglamtir ual mah.

¹⁸Dân zôm sika irchon luatu ni thei sian, Pathian thu'nkung sika ni no nia; irchon luatu hrang a ipêk tâk a ni.

¹⁹Khaang kha ni sian, Dân hi itho sikin mo pêk a ini? Tho'nsualna hi i ang tak mani ti, inlang hranga vântîrtônhai palai hmangin pêk a ni; Abrahamama kuang Nâi a inkung kha a hong inlang mâna hrang vai a ni.

²⁰Mi inkhat hrangin palai om nang maka, Pathian chu inkhat vai a ni.

Suakhai le Nâihai

²¹Khaang kha ni sian, Pathian Thu'nkung hi Dân hin a irkal ma ni? Ircal mak e! A nin hring thei Dân pêk ni sianlân, kha Dân zôm sika khan Pathian makunga tukhom thiamchang thei ni a ti.

²²Khannisianlân, Pathian Lekha thu khan, "Itinrêng hi soal thuhnuaia a om ta," a tia; khanchu Jisua Krista iam sika dong hrang thil inkung kha a iam murdi kuang pêk a ni.

²³Iamna thu a hong tung mâka chu Dânin mi a khitphiara;

²⁴Iamna sika thiam ei chang theina hrangin, Dân chu Krista tianga ni kaihruaitu a nia.



²⁵Khannisian atún chu iamna thu kha a hong tung tâk sikin, Dân kaihruaitu hnuaiia om ta mak me.

²⁶Khanchu Krista Jisua nin iamna sikin nin rêngin Pathian nâihai nin ni ta;

²⁷Kristaa baptisma chang murdi'n chu Kristaa khan nin irvô tâk a ni.

²⁸Juda le Jentail, suak le suakloi, pasal le nupang om ual ta mah, Jisua Krista leh irzomin nin rêngin pumkhat nin ni.

²⁹Khanchu, Krista mi nin ni tâkin chu Abrahamama irchihai nin nia; Pathianin thilpêk a inkung kha nin ihmu hrang a ni.

Galatia 4

¹Ki insîr tum tak kha hong insîr thiai inlân; Nâipa kha irchon murdi luatu hrang ni sian khom nâipang a la ni sêngin chu a neitu tak a ni khomin suak ang dêna ibe a ni.

²A pa zoro'nkung a tung mâka chu enkoltuhai hnuaiia a om ngai.

³Eini khom khaang khan ei om, nâipang ei la ni lai khan rammual irchutirna dikloi hnuaiia suak ei ni.

⁴A zoro tak a hong tungin chu Pathianin a Nâipa kha a zuang tîra.

⁵Ama kha, Dân hnuaiia omhai nir tan hrang le nâipa ngîrhmunana nin ngîrtir hrangin nupang ata suakin Dân hnuaiia a hong inseilientir a ni.

⁶Nâi nin nih ti a felna hrangin, Pathian khan a Nâipa Irtha kha ei milung sênga a hong tîra, "Abba, Ka pa" tiin a khêk suak ngai.

⁷Khanchu, suak ni ta mak chêia, nâi nin ni ual ta, nâi nin niin chu, Pathian zâra irchon luatuhai hrang nin ni.

Galatia mihai Paula'n ar vei

⁸Tianlai khan Pathian lan hre ngai mak chêia, khasikin an irzir dân reng khoma Pathian ni ngai loihai suaka nin om ngai kha.



⁹Atûn chu Pathian nin hong inhriat tâka, Pathianin nangni a hong inhriat tah ti hrang a ni. Itho sikin mo rammual irchutirna dikloi mai maia, ite ni theiloihai tiang nin irheia an suak ni nôk nin inuam tâk?

¹⁰Misa hai, tha hai, zoro hai, kum hai ser bîk nin inei nôk tâk?

¹¹Nangni hrangin ki zoro chanlamboiin pai ki tih ti ichi a om a ni.

¹²Urênghaio, keima anga om hrangin nangni ki ngên, nangni ang dênin kei khom ki oma, tukhomin ki siatna hrang tho ngai mak chêi.

¹³Nin kuang Thurchi Sa ki hong hril masa khan ki damno sika a nih ti nin inhriat.

¹⁴Ki taksa kha nin ta hrangin buaipui om tak ni khom sian, ni hmusit mak chêia, ni hnôl ual mak chêi; Pathian vân vântîrtôn ang dên le Jisua Krista ang dênin nin ni lôma.

¹⁵Thei ni len vâng sian nin mithai kêlsuaka ni pêk nin irhuam tih kin hriat; vânei nin irti lia le te itho mani ta?

¹⁶Thudik tak kin sîr sikin nin râl mo ki ini mani ta?

¹⁷Ni irdoipuihai hin a sa lama nangni hong ngaisak ni mahaia, nangni hruaipaia, nin irngaiinhluthai an nuam sika kêng.

¹⁸Nin laia ki om lai khomin a sa tianga hong ngaisak an om photin chu raifân a om mai.

¹⁹Nâihaio, Krista angna nin nei mâka chu nâi irveiin nangni ki irvei a ni.

²⁰Atûna hin nin kuanga ki iom ni sian ki'rzuk tak tak, nin tianga ki ngaituana khom indanglamtir ki ta; nangni ki ngaituana ki milung a buai ok tâk kêng a ni!

Hagari le Sari ennirkhîna

²¹Dân hnuaia om nuamhaio, ni hril roi, Dân thu kha nin inhriat loi ma ni?

²²“Abrahama chu nâipa inhni a neia, inkhat kha suaknu nâi, inkhat kha a suak ni loinu nâi,” ti irziak a ni.



²³Suaknu nâi kha mihriam dân pangai anga nei a nia, a suak ni loinu nâi chu Pathian thu'nkung sika nâi a ni.

²⁴Hi hi chongirkhek a ni: kha nupang inhnihai kha thuthung inhni entîrna an ni, inkhat chu Sinai tâng ata hong suak kha a nia, kha kha Hagari a nia, a nâi neihai chu suak an ni.

²⁵Hagari kha Arabia rama Sinai tâng entîrna a ni, Jerusalem chu atûnlaia khua leh hmunkhat a ni, a sûnga omhai leh suak an ni.

²⁶Chung tiang Jerusalem chu suak ni mahai, kha kha eini nu hi a ni.

²⁷Pathian Thubu'n, "Nang a ching tâk, nâi nei ngai loi, lôm roh! Nang nâiha irvei ngai loi, raifân takin khêk suak roh! Nupang pasal neinu nêkin chu nupang chardong om, mi imâknu khan nâi a nei intam ual a ti," ti irziak ang khan.

²⁸Khanchu urênghaio, Isaka ang dêna Pathian thu'nkung nâihai nin ni.

²⁹Mihriam dân pangai anga nei khan Irtha sinthotheinaa nei chu deng a inthei ang dênin, atûn khom a ni mai.

³⁰Lekha thua itin mo a irziak kha? "Suaknu chu a nâipa leh khan inhnot suak roh; suaknu nâipa khan suak ni loinu nâipa irchon a iluapui hrang ni mah," ti a ni kha.

³¹Khanchu, urênghaio, suaknu nâihai ni mak mea, suak ni loinu nâihai ei ni.

Galatia 5

Nin Zalênna vong insa roi

¹Krista khan a nin zalêntir tâka, nin zalênnaa khan ngîr indet khak unglân, suak ringkola intâng nôk ta no roi.

²Irngai u ta, keima Paula ngei hin nangni ki hril, ser nin tanin chu Krista kha inlâppui viat no chin ni.

³Sertan murdi kuang hi hi ki insîr nuam chu a ni. Dânin a inphût murdi chu an itho lele hrang a ni.



⁴Dân zôm sika thiamchang tumhaio, Krista leh nin irsen tâka; lungkhamna kha nin suaksan ta a ni.

⁵Keini chu Irtha zâra iamna sika thiamchangna kha sabeiin kin inghâkhmo a ni.

⁶Jisua Kristaa ei om photin chu sertan mo, tanloi mo danglam ual mah; lungthungnaa irbel iamna hi a poimo a ni.

⁷Mâ nin isôn tia le te, a tu takin mo Thutak kha taksôn loi hrangin nangni hruai irhmang!

⁸Hi hruai kôina hi a koitu Pathian ata suak ni mah.

⁹Chol tômte khomin bai lian tak khom ar fang suak thei ti a ni.

¹⁰Rengpa inkhata om suam ei ni sikin lungrîl dang la'rput mak chêi, keima'n chu ki iam ngit a ni; nangni inbuitir chu, tukhom ni sian, hrem la tong a ti.

¹¹Urênghaio, keima'n sertan a nang tiin lei hril ngai inlân, itho mo deng an ni intheitir hrang? khaang khan nisian, kros thu kin ihril hin buaina siam no ni.

¹²Nangni inbuai ka chu ser an itan vai ni loiin, kha khan tho li lia ri se; tan sabak ri se ki inuam a ni.

¹³Urênghaio, nangni chu Zalênna nei hranga koi nin ni, nin Zalênna hi taksa ta hranga zoro inchuma hmang viat no roi; lung irthung irhlômin sin irtho irhlôm roi.

¹⁴“Nangma lung ni irthung angin ni bômhai khom lungthung roh,” ti chongbâi khat hi nin zômin chu Dân murdi nin izôm zit ni a ti.

¹⁵Ramsa ang dêna nin irsea, nin irfâk duaiin chu, nin irfâk zit loina hrangin irdîn roi.

¹⁶Ki insîr tum tak chu hi hi a ni: Irthaa om unglân, taksa irzukna chu zôm viat no chin ni.

¹⁷Taksa nuamlam chu irtha lam tianga thil ar kal khaka, Irtha lakin taksa tiang thil chu ar kal khak saa, an irkal irhlôm khak sikin, nin itho nuam tak ite nin itho thei ngai loi a ni.



¹⁸Irtha hruaia nin omin chu Dân hnuiaia om mak chêi.

¹⁹Taksa mihai sintho chu an lang infel a ni: irditna hai, porinchena hai, hurna hai,

²⁰millim biakna hai, dôi hai, irkhôkmâkna hai, irngôna hai, hnarsâna hai, milung saloi hai, dohasa hai, irthekindarna hai, irsenna hai,

²¹irhnarsâna hai, zun rui uar hai, zu hmun buala inhoina hai le khaanga a dang dang thôna hai kha. Khaanga tho mihai khan Pathian Ram lua viat no nihai ti nangni ki hril tâk angin nangni hril nôk ki ti.

²²Irtha ra chu: lungthungna hai, raiinfâna hai, irngeina hai, tuangdiarna hai, khonzâna hai, satna hai, iamomna hai,

²³thuhnuairôlna hai insumtheina hai a ni. Khaang tianga Dân irkal om mah.

²⁴Jisua Kristaa omhai khan an taksa irzukna hai le nuamna hai khan an hembe ta a ni.

²⁵Irthaa hringna ei ni tâkin chu Irtha ni ihruai ang dênin om ei ti.

²⁶Lârirpâka, irsual irhlôm le irhnarsa'n ei iom hrang ni viat mah.

Galatia 6

Puakrik irsan irhlôm

¹Urênghaio, mi tu mo khatin soal a tho lai takin tong ta unglân, nangni irtha mihaiin nin indik hrang a ni; khannisianlân, irngaiintôm takin ni tho hrang a ni. Nangni khom thêmnâa nin lût sa lina hrangin irdîn dêkin om roi.

²Puakrik irsan irhlôm ngai unglân, khanchu Krista dân kha nin izôm ni a ti.

³Mi ite ni loia mi lian tak nia irbe chu mâni a irhuang chian a ni.

⁴Mi tinin mâni sintho enfiah seng bak ri se, kha hnung chu mi dang chung a ni loiin mâni chung ngeia song hrang nei a ti.

⁵Mi tinin mâni hrang puak ei nei seng.

⁶Kristian thu irchutirna dongpu khan thil sa murdi chu ama irchutirtu kuang a ipêk sa hrang a ni.



⁷Ihuangin om no roi, Pathian chu hmusit zât ni mah. Mi'n a itû chu, a i-ât nôk ngêt hrang a ni.

⁸Mâni taksa tianga tûtu chu takxaa siatna ât a ti. Irtha tianga tûtu chu Irthaa hringna ât a ti.

⁹Thil sa tho hnông no idua, ei irtha ei inboi no'n chu a zoro taka ei la i-ât ngêt hrang a ni.

¹⁰Khanchu zoro inchum ei inei ang lam takin mi tin kuang sin sa tho inlân, iamnaa ei in sînghai chung a lenvâng chu tho uar ual ei ti.

Inthorna le chubai mûkna

¹¹En u ta, horop inhrol tak taka ki irziak hi keima irziak ngei a ni.

¹²Taksa tianga, ser tan hranga nangni inphût ngaihai kha a chungphua tiang ringot inlanga, irpâk nuamhai kha an ni. Kha kha an tho ngai, nikhomsianlân, Krista Kros sika dengtheina an zôkna hranga paia an itho ngai a ni.

¹³Sertanhai khom hin Dân kha zôm irkip bîk ngai mahai. Nin takxaa irsinsiana om kha an irsongpui theina hrangin, ser nangni intantir an itum a ni.

¹⁴Kei chu ei Rengpa Jisua Krista Kros vaino chu song hrang dang rêng nei ma ung, kha krosa khan rammual hi ki ta hrangin hembe a nia, kei khom rammual ta hrangin hembe ki ni.

¹⁵Mi'n ser an itan le tanloi ite poimo mah, Siamtharna hi a poimo tak chu a ni.

¹⁶Hi thu zômту murdi chung a irngeina le za'rngaina om ri se, Pathian Israelhai chung a khom.

¹⁷Ki chong khârna'n: Atûn ata chu tukhomin nin buai ta no ri se, ki takpuma sâbe omhai hin Jisua Krista suak ki ni tih irsinsiana a inlang a ni.

¹⁸Urênghaio, ei Rengpa Jisua Krista lungkhamna kha nin kuang om ri se. Amen.



Efesi

Efesi 1

Chubai mûkna

¹Pathian nuam lama Krista Jisua Tirtôn Paula khan, mi irthiang Efesi khuua om, Krista Jisua mi iamomhai chubai ki mûk.

²Pathian ei Pa le Rengpa Jisua Krista kuang ata lungkhamna le inrenna nin kuang om ri se.

Kristaa irtha tianga satvurna

³Ei Rengpa Jisua Krista Pa Pathian chu inpâk ei ti. Ama khan Krista zâra irvân hmunhaia khin irtha tiang satvurna tinrêngin sat a ni vura.

⁴Irthiang le sêlnaboia a kuang ei om theina hrangin irnêng irsiang mân khan lung a ni thunga, Kristaa khan a nin thang ta.

⁵Ama nuamlam le a tum lam ang taka Jisua Krista zâra a nâi ni hrangin a ni lei inkung sa ta.

⁶A lungkhamna roiinpui tak sika a Nâipa lungthunga thilmanboi pêk sikin Pathian inpâk ei ti.

⁷Krista thisenin irtan ei ni tâka, ei sualnahai ngaidam a ni tâk. Pathian lungkhamna chu an thûk tak taka.

⁸Kha lungkhamna kha vârna le inhriattheina chuminbak takin a ni ivur tel a ni.

⁹Pathianin a lungdo irthup Krista zâra zoi a itum kha zoiin a nin hriattir ta.

¹⁰Kha a lungdo kha a zoro a chuk tika Pathianin thilsiam murdihai, irvân le irnênga omhai murdi intêl zita, Krista kha a lu taka siam hrang a ni.

¹¹Thil tinrêng hi Pathian lungdo le ti lam taka tho a ni; Khante, Pathianin a phuta a ti lam angin Kristaa a mihai ni hrangin a ni inthang tâk a ni.

¹²Tho! eini Krista lei tûng masahai hin Pathian roiinpuina kha ei inlangtir hrang a ni.



¹³Nin saninhringna Thurchi Sa, thutak kha nin inhriatna khan Pathian mihai nin hong ni ta. Krista nin iam sikin Pathianin Irtha Irthiang inkung kha nangni pêkin, Ama ta nin nih ti irsinsiana nin chung a isia a ni.

¹⁴Kha kha Pathian roiinpuizia inpâkna hranga ama ta ngei irtan suakna hranga ei irchon luana hranga khapna a ni.

Paula chongchaina

¹⁵Khasikin kei khom, Rengpa Jisuaa nin iamna le Pathian mihai murdi lung nin thungzia kha kin hriat rengata chu,

¹⁶ki chongchainahaia khom nangni inhre maiin nangni sikin Pathian kuang lômthu insîr mong ma ung.

¹⁷Ei Rengpa Jisua Krista Pathianin roiinpuina Pa khan inhriatna lama vârna le inhriat infelna nin nei theina hrangin, Irtha kha nangni a pêkna hranga ngên maiin.

¹⁸Ama vârn nin hmu theina hrangin nin lungrîlhai ar hong, nangni a koinaa tûngna om hai, a mihai hranga a inkung satvurna irkhêl tamzia hai leh.

¹⁹Keini a iamhai laia sintho mai sinthotheina lianzia hai kha nin inhriat theina hrangin ki ingên a ni. Hi sinthotheina, einia sintho mai hi irtha lian,

²⁰Pathianin thina irthoka Krista a kaithoia, irvân Rama a chang tiang an toi laia a ihmang dên kha a ni.

²¹Krista chu irvân roirêltuhai, irchamneituhai, sinthotheituhai le rêng hai chung vita roirêlin hi rammual le rammual la hong om hranga irhming tinrêng laia irhming inchungtak ainei a ni.

²²Khan, Pathianin thil tinrêng Krista ke hnuai a sia ta, ama chu thil tinrêng Rengpa hrangin Koiindang hai kuang a pêk ta.

²³Koiindang chu Krista takpum a ni, hmun tina thil tinrêng irkiptirtu irkipna kha.

Efesi 2

Thina irthoka hringna



¹Zoro lei theng tâka khan chu, nin thu zôm lolina le nin sualnahai sikin irtha tiang nin ithi a ni.

²Kha laia khan chu rammuala lampui sa loihai zuiin, boiruaka irtha sinthotheidahai roirêltu thu nin izôm a ni, atûna Pathian thu zôm loihai laia sintho mai irtha hi.

³A dik takin eini khom ei rêngin anni angin ei iom a ni, ei taksa irzuknahai dungzuiin ei oma, ei takpum le ei lungrîlhai lungdo ei isin a ni. Eini khom mi danghai angin Pathian ningmurna nâi ei ni kha.

⁴Khannisianlân, Pathian khonzana kha a itamin a milung ni thungna kha a ilian a ni,

⁵ei thu zôm lolina sika irtha tiang thi ei ni lai tak khomin, Krista leh a ni inhring tâk a ni. Pathian lungkhamnaa saninhring nin ni tâk.

⁶Krista Jisua leh ei irzomna sika khan irvân Rama ama leh roirêl hrangin ama pâlin a ni kaithoi tâka.

⁷Khahai murdi a thôna san chu zoro la hong hranghaia Krista Jisuaa lungthungna a inlanga a lungkhamna lian bîkzia kha an hmutir theina hranga a ni.

⁸Lungkhamna sika iamnaa saninhring nin ni; nangni itho suak ni maka, Pathian thilpêk a ni.

⁹Sintho sika ni mah, khano'nchu, mi'n songna an ti.

¹⁰Thil sa tho hrangin Krista Jisuaa khan isيامa omin ama kut suak ei hong nia; kha thil sa tho kha ei omna hrangin Pathianin a lei isiam irfûk a ni.

Kristaa pumkhata siam

¹¹Nangni, irzirnaa Jentail, taksa kuta sertanhaiin, "Sertanloi" nangni an iti ngai kha.

¹²Kha lai khan Krista la nei mak chêia, Israel in sîngkua ata mi dang nin nia, Pathian thu'nkunga thuthung pên tianga mi nin ni saa, rammuala hin sabeina rêng neilo le Pathian tak inhre loa nin iom kha inhre mai roi.



¹³Khannisianlân, atûn chu Krista Jisuaa, nangni tiana hla taka omhai kha, Krista thisen sikin irnâitirin nin om ta.

¹⁴Krista chu ei irngeina a ni. Ama khan Jentailhai le eini Judahai hi pumkhata a ni siama, ei irdanna ngai bang, irdoina kha, a taksa khan an inboitir a ni.

¹⁵Dân thupêkhai le tho hrang omhai kha an mongtira, keini le nangni, amaa khan, mihriam thar, pumkhata a ni siama, irngeina a zuang intung tâka.

¹⁶Krosa khan irdoina kha an boitira, Jentailhai le Judahai kha pumkhata hong omin Pathian leh ei irngei tâka.

¹⁷Krista a zuanga khan hla uala om, nangni kuang irngeina Thurchi Sa a hrila, nâi uala om, keini kuang khom irngeina Thurchi Sa dên kha a hrila.

¹⁸Krista zârin ei rêngin Judahai le Jentailhai, Irtha hmunkhatin Pa kuang ei itung suam thei tâk a ni.

¹⁹Khanchu, atûn hin mikhual le mi châm mai ni ta mak chêia, mi irthianghai leh khan tualkhat le Pathian in sêngkua nin ni sa tâk.

²⁰Tirtônhai le deipuhai lungphûm chung a sia nin ni, kha lungphûm a kila lung poimo tak kha Krista Jisua hi a ni.

²¹Kha in pumpui kha amaa khan siam sa a nia, Rengpa hrangin Tempil irthiang a hong ni ta a ni.

²²Nangni khom amaa khan Irthaa Pathian omna in hrangin mi danghai leh sia insa nin ni.

Efesi 3

Jentailhai hranga Paula sin thôna

¹Hi sika hin nangni Jentailhai hranga Krista Jisua mi intâng, kei, Paula hin, nangni ki chongchai pe ngai a ni.

²A lungkhamna sikin Pathianin nin ta hrangin hi sin hi tho hrangin a nin kung ti inhre ta nin ti.

³Ki insâr viat tâk ang khan, Krista thu'rthup kha inlârnaa inhriattir ki ni.



⁴Ki thu irziak nin tep intamin chu Krista thurîl kha kin hriat infelzia khom inhre thei nin ti.

⁵A tirtôn le deipuhai kuang Irtha'n atûna a inhriattir ang hin, tianlai khan chu hi thurîl hi mihriamhai lan hretir ngai mah:

⁶Thurchi Sa sikin Krista Jisuaa khan Jentailhai khom, Israelhai leh irchon lua suam hrang le pumkhata om hrang le sêngkhat, thu'nkung dong suam hrang an ni thu hi.

⁷Pathian lungkhamna thilpêk a nin dongtir sika hin a sinthotheina hmangin kha Thurchi Sa sinthotua siam ki ni.

⁸Keima hi mi irthiang murdihai laia chîn tak nêk khoma chîn ual ki ni, khan khomin Pathianin Jentailhai kuang Krista irchongna suisuak zoiloi Thurchi Sa insîr hrangin a lungkhamna'n a nin kunga.

⁹Pathian itinrêng siamtu kuanga kumtuanga thu irthupa om, a lei irfûktir kha, mi murdihai kuang inlangtir hrangin a ni iphun a ni.

¹⁰Pathian vârna nei intamzia hi, Koiindang sika hin, irvân rama vântirtôn roirêltuhai le irchamneituhai kuang atûn inhriattir a ni ta.

¹¹Kumtuang ata lei irfûktir tâk ang ngei kha ei Rengpa Jisua Kristaa hlo a zuang inchuktir ta.

¹²Kristaa khan, ama ei iam sikin, irnâi tak le ngam takin Pathian ei inâi thei ta a ni.

¹³Khanchu, nin ta hranga ki ituangnahai sika, indôp loi hrangin nangni ki ngên, nin roiinpuina hrang a ni.

Krista lungthungna

¹⁴Hi sika hin Pa makunga khûksadelin ki kûn ngai.

¹⁵Pa, irvân le irnênga sêngkua tinrêngin an irhming diktak an hmûna kha.

¹⁶A'rtha zâra nin sêng tianga hringnun inhriatna hrangin a roiinpuina irkhêl tak ata sinthotheina nangni pe sianlân,



¹⁷Iamna sikin Krista chu nin milunga châm sianlân, lungthungnaa irzung kaiin phûm indet nin ini hrang a ni.

¹⁸Khanchu mi irthiang murdihai le a lungthungna irzatzia hai, seizia hai, irsângzia hai, inthûkzia hai, fel takin inhriat inrual thei nin ti.

¹⁹Krista lungthungna, inhriat seng loi kha, inhria nin ta, Pathian famirkipna tinrênga insiptir hong ni nin ti.

²⁰Khanchu, einia sin ngai sinthotheina hmanga ei izong le ei ingaitua phâk bana irkhêl ngei khan,

²¹itiklai khomin, Koiindanga le Krista kuang roiinpuina kumtuangin om ri se! Amen.

Efesi 4

Takpum inkhat nina

¹Khanchu, nangni a ikoina irphua om hrangin kei, Rengpa sika intâng hin, nangni ki ngên.

²Lam tinrênga irngaiintôm le thuhnuairôl takin lungthungna le tuangdiarnahai nei mai ngai roi.

³Irngei taka om suamin Irthaa pumkhatna hi vong khak roi.

⁴Nangni a ikoina san sabeina hmunkhat nei hranga koi nin ini angin, Takpum inkhat le Irtha inkhat vai a om.

⁵Rengpa inkhat, iamna hmunkhat, baptisma hmunkhat,

⁶mi murdi Pa, Pathian inkhat vai a om. Ama chu itinrêng chung a oma, itinrêng ar fang suaka, itinrênga a om sa a ni.

⁷Khanchu, Krista lungkhamna thilmanboi pêk chu a ruk a iti ang takin a ni ipêk seng a ni.

⁸Pathian Lekha thua khom: “Chung tiang a kâia khan râl tamtak a imanhai kha suaka a hruaia, Mihriamhai kuang khom thilpêk a sem,” ti a ni kha.



⁹Chung tianga kâi ti hi i tihna ma ni? Irnêng hmun irhnuai taka zuang chum masa tihna a ni.

¹⁰Itinrêng a famirkip theina hrangin, zuang chumpu ngei kha irvân chung daiha a hong kâi nôk tâka kha a ni.

¹¹Khanchu, “Mihriamhai kuanga thilpêkpu” kha ama hi a ni: mi senkhat chu tirtôn hrangin, senkhat chu deipu hrangin, senkhat Thurchi Sa hriltu hrangin, senkhat pastor le irchutirtu hrangin a zuang inkunga.

¹²Khaang khan, Krista takpum sin inngîrna hrangin Pathian mihai murdi Kristian sinthônaa sin an tho theina hrangin, kha kha a itho a ni.

¹³Kha kha ei rênga iamna hmunkhat ei vonga, Pathian Nâipa inhriatna ei neia, mi puihling, Krista a ifamirkip dôra mi famirkip ei hong ni theina hrang a ni.

¹⁴Khanchu, mihriam vâirlethaiin, an minlakna hmanga ihuanga omin, irchûna dikloi sika tuilian isok le phâivua'n hi tiang so tianga a isok le a isêm nâipang siat ang hi ni no roi.

¹⁵Khanchu, lungthungnaa thudik insîrin itinrênga Krista tianga hong irsônlian thei ei ti, ama chu Lu a nia, Krista chu.

¹⁶Takpumpui chu amaa a'rngata, irthahruai le irnakin a khit hlûma, takpum om tin chu an itho ang tho chitin an irsôn inruala, lungthungna'n an irfa inlian ngai.

Om dân milui le om dân thar

¹⁷Khanchu, hi hi kin sîr nuama, Rengpa irhmingin nangni ki hril; lungrîl mumal neilo Jentailhai om lam angin om ta no roi.

¹⁸An lungrîl a zîng zoia, inhriatna nei mahaia, an milung an incho tâk sikin Pathian hringna tak ata senin an om ta.

¹⁹Inzakna lam khom inhre ta mahaia, suai porinchenaa an irpumpêka, huatirham takin thil porinche tinrêng an thoa.

²⁰Nangni chu Krista irchutu nin nia, khaanga om sa hrang ni mak chêi.



²¹A thu nin zôma, thutak, Kristaa om kha, irchutir nin ni tâka.

²²Khasikin, nin taksa irzukna'n a insiat tâk, nin om dân masa, mihriam milui kha, mâksan roi.

²³Nin lungrîl le lunginchong kha inthar ni sianlân:

²⁴thutaka suak, felna le irthiangnaa Pathian anga siam, mihriam thar khan, irbel roi.

Om dân thara om hrang dân

²⁵Khanchu milak tho mâk unglân, Krista takpum ôn ei ni seng sikin mâni tualbômhai kuang thudik vai hril roi.

²⁶Ninginmur khom unglân, thil sual tho no roi, misa tâk de dênin ninginmur no roi.

²⁷Diabola kha zoro'nchum pe no roi.

²⁸Inrûk ngai khan inru ta no ri se, mi irsam kuang pêk hrang a nei theina hrangin mâni kut ngeia sin tho'n tam ual ri se.

²⁹Chong saloi rêng rêng hman no roi, mi siaminsat thei vai, nin bâia suak ri se, khanchu a'rngaituhai hrangin lômom a ti.

³⁰Pathian Irtha Irthiang kha beiindongtir no roi, irtanna ni hrangin ama ta ngei nin nizia Pathianin nangni a isinsia a ni.

³¹Irkhômâmâkna hai, ninginmurna hai, nuarna hai hrângna hai, insirinsiatna murdi hai nangni ata pai irhmang roi, sualna murdi hnung songsan roi.

³²Lungirkham irhlômin, ir-en irhlôm unglân, Pathianin Kristaa nangni a ingaidam angin irngaidam irhlôm roi.

Efesi 5

Vâra om

¹Khanchu, Pathian nâi inditom takhai nin ni sikin, a om dân latuhai ni roi.

²Krista'n lung a ni thunga, Pathian lôm lam thilpêk le thilinhlan mirimhoi ni hrangin ei ta hrangin a irpêk ang khan lungthungna nei seng roi.



³Pathian mihai nin ni tâk sikin, nin laia: irditna hai, Porinchena hai, huatirhamna hai rêng rêng nin laia sâm khom sâm ni no ri se.

⁴Bâi nghalhai, chonghoi loi le tufiam porinche insîr hai, nin ta hrangin sa mah, lônthu insîr uar ual roi.

⁵Irdit uar hai, mi porinche hai, mi huatirham (Kha kha millim biak tihna a ni); kha mihai khan Krista le Pathian Rama khan dongtum nei viat mahai ti inhre fel roi.

⁶A nêp ang tianga kha thil insîrtuhai khan nangni huang no ri sehai, kha thil sika khan Pathian ningmurna kha taksônloi mihai chung a itung hrang a ni!

⁷Khasikin, anni chu irkômpuihai viat no roi.

⁸Tiana khan chu inthim nin nia, atûn chu Rengpaa vâr nin hong ni ta, ivâra omhai angin nin iom ngêt hrang a ni.

⁹Vâr chu satna hai, felna hai, le thutak tinrêngin a ra suak ngai.

¹⁰Rengpa lômlam chu i mani ti inhre fel tum ual roi.

¹¹Khan, inthim hnuai omhai sintho inlâp loa khan kop viat no roi, a dikloizia inlangtir ual ngai roi.

¹²Inrûka om thil tho ngaihai kha insîr khom inzak a om a ni.

¹³Aniachu, thil tinrêng a thiamnozua inhriattira om hi vâr inlangtir a ni ngai, inlangtira om ka chu vâr a ni.

¹⁴Khasikin Pathian thua khom: “Nang inmusu, harin lân, Mithi lai ata thoi roh, Krista khan nang êl invâr a ti,” ti a ni kha.

¹⁵Khanchu nin om dâna a sân irdîn roi, mi’nvêthai anga om loiin mi vârhai angin om ual roi.

¹⁶Zoro sano taka om ei ni sikin nin zoro kha hmang insa roi.

¹⁷Khasikin, invêt takin om no unglân, Rengpa nuamlam i mani tih inhriat tum ual roi.

¹⁸Uain inrui uar ta no roi, siatna bul a ni, Irtha sip ual roi.



¹⁹Inpâkna hla hai, Pathian hla hai le irtha tianga hla hai leh khan irdon irhlôm ngai unglân, nin milung takin Rengpa inpâkna hla sakín inpâk roi.

²⁰Ei Rengpa Jisua Krista irhmingin itiklai khomin itinrênga Pa, Pathian kuang lômthu hril roi.

Ompui sangram om hrang dân

²¹Krista chituhai nin ni sikin irpelût irhlôm roi.

²²Nuhai khomin Rengpa thu an izôm angin, mâni pasalhai thu an izôm hrang a ni.

²³Krista chu ama takpum Koiindang saninhrintu a nia, Koiindang lu a ini angin pasal chu dôngma lu a ni.

²⁴Krista kuang Koiindang a irpelût angin, dôngmahaiin an pasalhai thu, lam tinrênga zôm ri sehai.

²⁵Pahaio, Krista'n Koiindang lung a ithung ang hin nin dôngmahai lungthung roi.

²⁶Koiindang chu thu le tuia irsûkinfâia irthianginfai hrangin Krista chu ama a irpêka,

²⁷Koiindang roiinpui tak, chuai loi, innimna koploi le khaang thil porinche koploi, irthiang le chukloina dang rêng rêng om loi, ama ta hranga inding hrangin a irpêk a ni.

²⁸Pasalhai khan mâni takpum lung an ithung angin mâni dôngmahai lung an ithung hrang a ni. Mâni dôngma lungthungtu chu ama lung a irthung a ni.

²⁹Tukhomin mâni takpum khôkmâk ngai mahai, Krista'n Koiindang an fâa, a indot angin an indot ngai a ni;

³⁰eini khom a takpum ônhai ei ni.

³¹Pathian Lekha thua, “Khasika khan pasalin a nu le a pa rotsan a ta, a dôngma chel a ta, khanchu an inhniin taksa pumkhat hong ni ta an ti,” ti a ni.



³²Hi hi thurîl inthûk tak a ni, keima'n chu Krista le Koiindang thu a insîrna niin kin hriat.

³³I khom nisian, nin laia tukhomin mâni lung a irthung angin mâni dôngma lungthung seng ri se, dôngma khomin a pasal chi lam dân inhre ri se.

Efesi 6

Nâipanghai le nu le pa

¹Nâipanghaio, Rengpaa khan nin nu le nin pahai thu zôm roi, kha kha thil dik tak a ni.

²"Ni nu le ni pa chôiindôm roh," ti hi thupêk laia tep masa tak a ni.

³"Ni ta hrangin sa a ta, irnênga hin dam insôt ni ti," ti a ni kha.

⁴Khan, nangni pahaio, nin nâihai ninginmurtir no unglân, Rengpa irchutirnaa le isepnaa khan enkol ual roi.

Suakhai le an puhai

⁵Suakhaio, Krista thu nin izôm angin lungrîla a sate'n chi pum le inthing pumin taksaa nin puhai thu zôm roi.

⁶Mihriam inlôm-tir tumtuhai ang dêna an hmu lai ringota sin loiin Krista suak ni irhoiin lungrîl takin Pathian nuamlam tho unglân,

⁷mihriam sintho vai ni loia Rengpa sintho nin ini ual angin raifân takin sin ngai roi.

⁸Suak khom suakloi khom, mi tinin an thil sa tho lômman Rengpa kuang ata an hmu seng hrang a nih ti nin inhriat a ni.

⁹Khan, nangni hruaituhaio, khang dênin an chung a tho roi. Nin suakhai le nin Hruaitu, theibîk neilo kha, irvâna a om ti inhre maiin irngô irhal ma roi.

Sual doina hrangin Pathian râltukfam

¹⁰A mong taka chu Rengpa le a hrâtna ata kha sinthotheina la mai ngai roi.

¹¹Diabola nangni inthêmna hrang nin lei khâl theina hrangin Pathian râltukfam irkipin irbel roi.



¹²Mihriam râl doi mak meh, inlalna hai le irchamneina hai, hi rammual inthim chungaroirêltuhai le irvân hmuna irtha sual omhai ei idoi ual a ni hi.

¹³Khasikin, Pathian râltukfam irkip khan irbel unglân, nikho saloi a tung tika râl kha khâl khak thei nin ti, nin khâl zoia khom ngîr mai thei nin ti.

¹⁴Khanchu, det takin ngîr unglân, thutaka nin kong khitin, dikna kha rôpphoa innghâk roi.

¹⁵Irngeina Thurchi Sa inpuang hranga irsiam diamna kha kekokin bun unglân,

¹⁶mi sualpa thal chok theihai kha nin that mai theina hrangin iamna hi phô'n hmang roi.

¹⁷Saninhringna kha lukhuma hmang unglân; Irtha khandai, Pathian thu kha, vong roi.

¹⁸Chongchai mai unglân, Pathian chu nin innang rikipin zong unglân, Irtha hruai ang takin, itiklai khom chongchai roi. Nin chongchainaa khan mi irthiang murdi hrangin mongloiin zong roi.

¹⁹Thurchi Sa irthup kha kin hriat theia, hâitaka inpuangsuak hranga ki ngîr tika, Pathianin thu a ni pêk theina hrangin keima ta hrang khomin ni chongchai pe sa ngai roi.

²⁰Atûn hin intângna ina om khom inlân, Thurchi Sa palai ki ni. Khasikin, Thurchi Sa insîrna lama khan ki hâi hrang dân taka ki hâi theina hrangin ni chongchai pe ngai roi.

Inthâna chubai

²¹Rengpaa urêng inditom tak le sinthotu iamom tak Tukika hin ki thurchi nin inhriat theina hrangin itinrêng nangni hril a ti.

²²Ki thurchi nangni hril hrang le irtharngam nangni sak hrangin ama hi ki hong itîr a ni.

²³Pa, Pathian le Rengpa Jisua Krista kuang ata irngeina hai, lungthungna hai le iamna hai kha urêng hai kuang om ri se.



²⁴Pathian lungkhamna kha lungthungna chuai theiloia ei Rengpa Jisua Krista lungthungtuhai kuang om ri se.



Filipi

Filipi 1

Chubai mûkna

¹Paula le Timothea, Krista Jisua suakhaiin chu, Krista Jisua mi irthiang Filipi khuaa om murdi le Koiindang hruaituhai le sinthotuhai chubai kin mûk.

²Pathian ei Pa le Rengpa Jisua Krista kuang ata lungkhamna le irngeina nin kuang om ri se.

Filipihai ta hranga Paula chongchaina

³Nin thurchi ki'rngaitua rikipin ki Pathian kuang lômthu kin sîr ngaia,

⁴i ang zoroa khom nin rênga ta hrangin ki chongchai rikipin raifân takin ki chongchai ngai a ni.

⁵Nin inhriat phut ni ata atûn tena Thurchi Sa hriina sin nin ni thopui ngai sikin.

⁶Nangnia hi thil sa insuaktu khan Krista Nikhuaa puihling dênin a tho mai ki iam ngit a ni.

⁷Nangni ki'rngai tak tak hena, Pathianin hi dongtum a ni ipêk Thurchi Sa ta hranga ki beina le indettirna sin ki thônahai le atûn intângna ina ki om laia ni changpuituhai nin ni sikin ki milunga nin om maia, nin rênga chungga khaang lungrîl irput irhoi khom ki ni.

⁸Nin rêngin Krista Jisua lungrîl irputin nangni ki'rngai a nih ti Pathianin an hriat.

⁹Nin lungthungna chu inhriatnahaia, thil hmu'n fel theina tinrênghaia irsôna a pung ual ual theina hrangin ki chongchai a ni.

¹⁰Khanchu, thil sa ualhai kha inthang thei nin ta, Krista Nikhuaa khan irthiang le sêlnaboi lei ni nin ta,

¹¹Pathian roiinpuina'n le inpâkna'n Krista zâra felna ra khan nin lei isip hrang a ni.

Ki ta hrangin chu hring hi Krista a ni



- ¹²Urênghaio, ki thil tuanghai hi Thurchi Sa indarna hrang a lei ni chian tih nin inhriat ki nuam a ni.
- ¹³Ki thîrkol bunhai hi Krista sika a ni ti, Reng in enkoltuhai le mi dang murdihaiin an inhriat ta.
- ¹⁴Urêng tam ualhai khomin ki thîrkol bun sikin Rengpa an iam uala, chi loiin Pathian thu khom an hril ngam ta.
- ¹⁵Mi senkhat chu hnarsana le sêlna sikin Krista thu an hril sa ngaia, senkhat chu lungrîl satakin an hril ngai.
- ¹⁶Thurchi Sa song hranga inkung ki ni, inhriatin lungthung sika hril an ni.
- ¹⁷Mi senkhatin chu ki thîrkol bun chung a hin irngaisiatna ni bôk pe tumin, tho tak tak loiin, mâni satna hrang vai ngaitua'n Krista thu an ihril ngai a ni.
- ¹⁸Poi make! A dolin mo, a takin mo i ang lama khom Krista thu ihril a ini hi raifân a om, raiinfân mai ki ti.
- ¹⁹Nin ni chongchai pe sik le Jisua Krista Irtha changpuina sikin sansuak ki ni hrang tih kin hriat ta.
- ²⁰Ki inuam tak le ki isabei ngit kha ite mualinphoi loa, hâitaka i zoroa khom, hi zoro ngêta khom hin, damin mo ithiin mo, ki taksa Krista chôindôm hi a ni.
- ²¹Ki ta hrangin chu hring hi Krista a nia, thi khom inlâpna a ni.
- ²²Nikhomsian, ki la hringin chu sin kâmom la sin thei ok ki ti, a i tak mo inthang hrang inhre ma ung.
- ²³A lai lakloa omin, a'rngaina lamchang khom inhre loiin ki iom a ni. Hi hringnun hi mâkin, Krista kuanga om ta inlân ki'rzuk tak tak, kha kha a sa ual ok a ni.
- ²⁴Khannisian, nangni sika hin ki la ihring mai hi kâm a la iom ual a ni.
- ²⁵Nin rênga iamna irsôntir le nin raifânna inpung hranga ki dam mai hi a sa ual ti kin hriat ta.



²⁶Ki hong nôk tika chu keima sikin Krista lan pâk ual nin ti.

²⁷Mi danghai leh nin om dânhai kha Krista Thurchi Sa leh irhme bak ri se, ki hong mo hong no mo irtha hmunkhata ngîrindetin, lungrîl hmunkhat irputin Thurchi Sa iamna kha nin thop irrual ti inhriat thei ki ti.

²⁸Khanchu, doituhai chu i ang khomin chi loiin, hâitakin om unglân; khanchu, nangni inhnê no nihaia, inhnêhai nin ti, kha kha anni ta hrangin irhmangna a nih ti irsinsiana feltak ni a ti; asan chu inhnêna nangni petu kha Pathian a ni.

²⁹Krista sika ama nin iiam vai ni loiin, ama sika nin ituang sa hrang khomin phal nin ni.

³⁰Irdoina keimaa nin ihmu ngai, atûn khom a om tih nin inhriat kha nangni khomin nin itong sa tâk a ni hi.

Filipi 2

Krista irngaiintômna le roiinpuina

¹Krista zâra irtharngamna nin nei tâka, a lungthungna khan nangni an lôma, Irtha pôlna nin chungna, irngaiinnatna le irlungkhamna nin nei ta.

²Khasikin, lunginrual takin lungirthung irhlôma, inthuruala lungrîl hmunkhat irputin ki raifâna irkiptir roi.

³Mâni hrang irzûl le irngaiinhlu taka ite tho loiin tukhomin irngaiintôm takin mi danghai sa ualin bê roi.

⁴Mâni satna hrang vai zong loiin, mi danghai satna hrang khom zong roi.

⁵Krista Jisua lungrîl ang hi nangni khomin irput mai roi.

⁶Ama kha Pathian irangpui ni khomsianlân, Pathian irangpuia om kha tum ngit hrangin irbe maka,

⁷Mihriamhai anga zuang irzirin, suak angin a'rsiama, ama le ama a'rngaiintôm ual tâka.

⁸Khanchu, mihriam anga zuang omin, a'rngaiintôma, thipui rakin thu a zôma, krosa a thina ngei chu.



⁹Khasikin Pathianin ama kha irsâng takin a sia tâka, irhming murdihai laia irhming inchungtak a pêk tâka.

¹⁰Khanchu, Jisua irnênga mihai, irnêng hnuaia mihai a makunga khûksadel an ta.

¹¹Pa Pathian roiinpuina hrangin mi tinrêngin, Jisua Krista kha Rengpa a ni tiin lan puang an ti.

Vâr anga rammual invâr hrang thu

¹²Khanchu, ki indit takhaio, ki om laia ki thu nin izôm ang khan atûn ki om no khomin nin zôm nôk ual a inang a ni. Pathian chi le inthing pumin nin saninhingna irkiptir hrangin sin mai roi.

¹³Ama nuamlam tho tum hrang le tho thei hranga nangnia sintu kha Pathian a ni.

¹⁴Chiar loi le irsêl loiin itinrêng tho roi.

¹⁵Atûnlai mi irkôkpoploi le pualoi laia hin Pathian nâi, sual neilo, irthianglai, sêlnaboi nin ni theina hrang le rammual invârtuhai nin ni theina hrangin.

¹⁶Khanchu, môk intân ni loa, môk sinsôl ni ual loiin, Krista Nikhuaa chu song hrang nei thei ki ti.

¹⁷Nin iamna sin thôna le irbôlnaa khan inhlana om hrang ni khom inlân lôm ki ti, nangni khom nangni lômpui sa ki ti.

¹⁸Khang dênin, nangni khom lôm unglân, ni lômpui sa roi.

Timothea le Epafrodita

¹⁹Nin thurchi inhriata milung dam taka ki om theina hrangin Rengpa Jisua'n a sa a ti'n chu, nin kuang Timothea hong tîr lat thei ki ti, ti ki sabei a ni.

²⁰A dik taka keima anga nangni ngaitua chu ama vai hi a ni.

²¹Mi danghaiin chu Jisua Krista ta hrang ngaitua loiin mâni ta hrangin an zong ngai.



²²Khannisianlân, ama hi chu a nangzia nin inhriat tâka, pa le nâi an sin suam angin Thurchi Sa sin kin tho suam ngai.

²³Khanchu, ki thurchi hrang kin hriat le ama hi hong tîr zôi thei ki ti, ti hi ki isabei a ni.

²⁴Rengpa'n sa a ti'n chu keima khom hong lat thei ki ti, ki iam.

²⁵Khan, ki urêngpa, ki sipai chanpui le ki tirtôn, ki innang inchuk hranga nin mi hong tîr Epafrodita hi, nin kuang hong tîr a nangin ki inhriat a ni.

²⁶Nin rêngin a sân nangni ar ngai tak taka, dam mah ti nin len hriat sikin a sân poi ki ti ok a ni.

²⁷Dam loiin a oma, thi vânga na chu a nia, khannisian Pathianin lung an khama, ama vai khom ni loiin kei khom lung a ni inkham ni a ti, beiindong ualna tong loiin a ni siam ta.

²⁸Khanchu, ama nin lei hmua nin lômna hrangin ama hi ki hong itîr lat a ni.

²⁹Ama hi Rengpa irhmingin raifân takin lei lôm unglân, hiang mi hi irngaiinhlu roi.

³⁰Nangnihaiin changpuina nin ni ipêk thei ban kha, ama'n ni pêk a tuma, a sân irnak song tak takin Krista sinthôna sika, a lei thipui vâng vâng a ni.

Filipi 3

lamna sika thiamchangna

¹A mongna taka chu ki urênghaio, Rengpaa khan lôm roi. Thu pangai dên irziak nôk hi ki ta hrangin ihnông om ni mah, nin ta hrangin inlâp a ti.

²Uihai ata, thil saloi thotuhai ata, sertan uarhai ata irdîn roi.

³Eini Pathian Irtha zâra Pathian biak le Krista Jisua songa pên tiang thila irnghat loihai hi sertan dik tak ei ni ual a ni.

⁴Nuam inlân chu kei khomin pên tianga thil chu ki isong thei kêng. Mi'n pên tiang thil song theia an inhriatin chu kei khom kin hre nôk ual a ni.



⁵Sûn riat nia sertan, Israel irchia mi, Benjamina irchia mi, Hebrai nu le pa kâra suak ki ni, Dân zômna lama chu Farisai ki nia.

⁶Sathnem irngaina tiang lak Koiindanghai dengitheitirtu ki ni. Dânin a inphût anga hlen suakna lama khom sêlnaboi ki ni.

⁷Khannisianlân, kha thil kha, ki ta hranga inlâpna hrang ka chu, Krista sikin inchâna ki bê tâk a ni.

⁸Kha vai kha ni mah, ki Rengpa Jisua Krista inhriat hi a sân a hlua, itinrêng hi inchâna ki bê tâka, Krista kha ki nei theina hrang le ama leh pumkhat kin ni theina hrangin, ama sikin itinrêng kin chên tâka.

⁹Dân zôm sika ni loiin Krista iam sika thiamchang ki ni, iamna sika Pathian makunga thiamchangna chu.

¹⁰Thil ki inuam tak chu hi hi a ni. Krista inhriathai, a thoinôkna sinthotheina dong hai, a ituang anga tuang hai, a thina irtemtuhai hi a ni.

¹¹Khanchu mithi thoinôknaa khan kaithoi ni ngêt ki ti.

Inkungna ten pana intân

¹²Ki hmu tâk irti ni ma unga, ki'rkup tâk irti khom ni ual ma ung, "Krista ni man nasan hi ki man rôl mo," tiin irzûlin ki irzûl mai a ni.

¹³Urênghaio, hlochuk tâkin irbe ma unga, thil inkhat ki tho ngai, thil fe tâkhai kha irnghilin mân tiang thilhai kha ki thir ual a ni.

¹⁴Krista Jisua Pathian chung tianga koina lômman, hringna kha, hmu ngêt hrangin inkungna tiang ki pan ngut ngut a ni.

¹⁵Khanchu, eini puihling tâkhai hin chu khang lungrîl kha irput ei ti. Khan, senkhatin ngaidân dang nin nei duai khomin Pathianin nangni lan fâi pe a ti.

¹⁶I khom nisianlân, ei iphâk ten chit hi indikin, khataka irthokin mân tiang fe mai ei ti.

¹⁷Urênghai, ki omdân irchupuhai ni roi, enton hrang nin ni neia, kin om dân anga omhai chu en ual takhai roi.



¹⁸An om dâna Krista kros râl tamtak an om ti nangni ki hril mai ngai kha, atûn khom chap pumin nangni ki ihril nôk a ni.

¹⁹Khahai mongna hrang chu siatna a ni, fâk hrang hi Pathiana an bêa, an inzakupui hrang thilhai kha an song uala, rammual thil ringot an ingaitua a ni.

²⁰Eini chu irvân khua le tuihai ei nia, irvân ata a ni saninhringtu Rengpa Jisua Krista zuang hrang kha nghâkhmo takin ei ithîr a ni.

²¹Itinrêng ar cham hnuaiia sia theitu khan, ei taksa intem tak hi ama taksa roiinpui anga om hrangin a sinthotheina khan a ni indanglamtir hrang a ni.

Filipi 4

Lungrîl hmunkhat om hranga hrilna

¹Khasikin ki urêng inditom takhai le ki irngai tak takhai, ki raifâna le ni roiinpuitirtu hranghai ki indit takhaio, khang khan Rengpaa ngîr indet roi.

²Rengpaa khan milung hmunkhat irput hrangin Euodii le Suntuki kha ki ngênhai.

³Nang khom, ki ringkol irbunpui iamom tak, kha nupanghai kha changpui hrangin nang ki ngên a ni; anni khan Klemena le Hringna Bua irhming chuang danghai le, Thurchi Sa hrilna sina ni sinpui intam ngai an ni.

⁴Rengpaa khan lôm mai roi, ti nôk ki ti, lôm roi!

⁵Nin tuangtheizia mi murdi inhriat ni ri se. Rengpa kha anai e.

⁶Itea khom lunginzîng no roi, i thila khom chongchaiin nin innanghai Pathian kuang intung unglân, lômthu hril pumin ngên roi.

⁷Khanchu, mihriam inhriat phâk loi, Pathian irtharngamna khan nin milung le nin lungrîlhai kha Krista Jisuaa khan nangni enkol pe a ti.

⁸A mongna taka chu urênghaio, a dik le mahripom murdi, a fel le irthiang murdi, inditom le a thanginsat murdi, satna a oma inpâk ruk a om photin chu, khahai kha ngaitua roi.

⁹Ki kuang nin thil irchu le donghai, nin thil inhriat le hmuhai kha tho ngai roi. Khanchu irtharngamna Pathian khan nangni ompui a ti.



Filipi mihai thilpêk sika Paula lômthu

¹⁰Nin ni ngaituazia, hi kêra hin nin hong inlangtir nôk thei tâk sikin, Rengpaa khan ki lôm tak tak a ni. Khaang tho kha nin tum ngeia, zoro'nchum nin la ihmu loi ringot a ni.

¹¹Ki irsamna thu ki insîr ual chu ni ma ung; i ang khomin om inlân milungchuk taka om dân kin hriat tâk sikin.

¹²Inriang taka om dân ki theia, irchong taka om dân ki thei tâka; itinrênga khop le phîngchâma om dân, irchong le inriang om dân thu'rthup ki'rchu ta.

¹³A nin hrâttu sikin i khom tong hrangin hrâtna ki nei tâk a ni.

¹⁴I khom ni sianlân, ki lunginzîng hai nin ni inhriatpui ngai hi nin tho'n satak tak.

¹⁵Khan, Thurchi Sa ki hril phut laia Makedonia ki suaksan hnung khan nangni Filipihai vai ni loi chu Koiindang dang inkhat luan sum hmang hrang ni ngaituapui om mahai ti nin inhriat.

¹⁶Thesalonika khuaa ki om lai khomin ki'rsamna ni changpui hrangin voikhat vai ni loiin voihni reng thilpêk nin ni ithon kha.

¹⁷Thilpêk zong ni ma ung, nin ta hranga irtha tianga ra hrang kha ki zong ual a ni.

¹⁸Nin thilpêk murdi ki lei donga, ki nei intam ta. Epafrodita kuta nin thil hong thonhai kha ki lei hmua, ki'rhniang tâk e. Kha kha mirimhoi thilinhlân, pomiruk, Pathian nuamlam a ni.

¹⁹Ki Pathian khan Krista Jisuaa ar chongna roiinpui tak ata nin innang tinrêng nangni pe a ti.

²⁰Ei Pathian le ei Pa kha kumtuangin roiinpui ri se! Amen.

Chubai mûkna

²¹Mi irthiang murdi Krista Jisua irhmingin chubai nangni ki mûk. Ki kuanga urêng omhai hin chubai nangni an mûk.



²²Mi irthiang murdi'n chubai nang an mûk, Kaisara ina omhai hin nangni an mûk ual tak a ni.

²³Rengpa Jisua Krista lungkhamna kha nin kuang om ri se.



Kolosa

Kolosa 1

Chubai mûkna

¹Pathian nuamlam anga Krista Jisua Tirtôn Paula le ei urêngpa Timothea khan,

²Kolosa khuaa mi irthiang om Kristaa urêng iamomhai kuanga khan, Pathian ei Pa kuang ata lungkhamna le irngeina nin kuang om ri se.

Kolosa Kristianhai sika Paula lômthu

³Nin ta hrangin kin chongchai rikipin ei Rengpa Jisua Krista Pa, Pathian chu, lômthu kin insîr ngai.

⁴Krista Jisua nin iiam tâk thu hai, mi irthiang murdi nin lungkham tâk thuhai kin lei inhriata.

⁵Thurchi Sa thutak nin inhriat ata sabeina nin lei nei tâk sika a ni, kha sabeina kha nin ta hrangin irvâna sia insa a ni.

⁶Nin kuang Thurchi Sa a hong tunga Pathian lungkhamna kha nin inhriat infel nî ata thil om dân ang khan rammual ram tina Thurchi Sa khan ra a suakin a indarh ta a ni.

⁷Kin ta hranga Krista sinhotu iamom Epafra; kin suak chanpui inditom tak, Thurchi Sa hriltu khan,

⁸Irtha zâra lungthungna nin nei thu hi a ni hril a ni.

⁹Khasika khan irtha tiang vârna le inhriat thiamna tinrêng nuamlam nin inhriat irkip theina hrangin, nin thurchi kin inhriat ni ata chongchai le ngên pe mong ma ung.

¹⁰Rengpa mi nin rugin, lam tinrênga inhriatnaa nin irsôn inlian theina hrangin kin ngên ngai a ni.

¹¹A sinthotheina roiinpui tak ata suak irzukna khan lam tinrênga sôina le tuangdiarna nei hrangin nangni inhrât a ti.



¹²Khanchu mi irthianghai le a ram vâra irchon nei inruka siamtu Pathian kha raifân takin lônthu hril thei nin ti.

¹³Ama khan inthim irchamneina ata a ni san suakin, a Nâipa lungthung taktu rama khan a ni hruai inlût ta a ni.

¹⁴Nâipaa khan irtan suak ei nia, ei sualhai ngaidam a ni ta.

Krista mizia le a sintho

¹⁵Krista kha hmu theiloi Pathian angpui, thil siam murdi mahruaitu a ni.

¹⁶Amaa khan itinrêng, irvâna om hai, irnênga om hai, hmu thei hai, hmu theiloi hai siam a nia; rêngtoihmun hai roirêlna hai, inlalna hai, irchamneina hai, itinrêng hi ama sika siam a nia, ama ta hranga a ni sa.

¹⁷Ama chu itinrêng om mâna, amaa khan itinrêng a irnghat sa a ni.

¹⁸Ama kha Koiindang hi a takpum a ni sa; ama kha itinrêng bul a nia, itinrênga inchungtak a nina hrangin mithi laia thoinôkna mahruaitu a ni.

¹⁹Amaa Pathian nina irkip a om hi Pa nuamlam a ni.

²⁰Krista sikin Ama leh a'rngeitir nôka, Krosa a Nâipa thisen khan irngeina a siama, Krista sika khan irnênga omhai, irvâna omhai kha Ama leh irngeina a siam ta.

²¹Nangni khom tiana khan chu Pathian ata mikhual nin nia, thil sual nin irngaituaa nin tho ngai sikin râl nin ni.

²²Nikhomsianlân, atûn chu A Nâipa taksa thina sikin a rual hrangin nangni a siam tâka, a makunga irthiang le demnaboi le sêlnaboia nin om theina hrangin, Pathianin Ama leh nangni a irngeitir ta a ni.

²³Khanchu iamna khan om mai unglân, det taka ngîrin Thurchi Sa nin inhriat sika sabeina nin nei tâk kha irtôl irhmang no roi. Thurchi Sa kha irvân hnuai a thil siam murdi hril a ni ta, kei Paula hi kha sinthotua siam ki ni.

Koiindang ta hranga Paula sinthôna

²⁴Nangni sika ki tuangna hin atûn hin ki râl a ifân a ni. A takpum, Koiindang ta hranga Krista tuang bakhai kha ki takpumin ki isunzom mai a ni.



²⁵Pathian thu le a lei inkung kha nin kuang irkip taka inpuang hrangin Pathianin sin a ni pêka, Koiindang sinthotu'n kei hi a ni isiam a ni.

²⁶Mi murdi ata kumkhuaa a lei ithup ngai, thu'rthup kha, atûn a mi irthianghai kuang an langtir ta.

²⁷Kha mihai kuang khan Nam tin ta hranga thu'rthup roiinpui le hlu tak kha Pathianin inhriattir a nuam ngei a ni; kha thu'rthup kha, Krista nangnia om, roiinpuina sabeina san kha a ni.

²⁸Krista thu kha mi murdi laia kin hrila, Kristaa ei puihling chit theina hrangin vârna tinrêngin mi tin kin irchuin kin kaihruai ngai a ni.

²⁹Kha sintho hranga khan Krista hrâtna, keinia sin ngai kha hmangin kin beia, a sân irnak songin kin isin a ni.

Kolosa 2

¹Nangni le Laodikei khua mi le taksaa ki hmêl hmu loihai khomin idôr tena irnak songin mo nin ta hrangin ki isin ngai nin inhriat ki inuam a ni.

²An milung irtha a'rngam theina hrangin lungthungnaa an irsuikhôma, lam tinrênga milunga inhriat felna a sipa, Pathian thu'rthup, Krista kha, an inhriat thei ki inuam a ni.

³Kristaa khan vârna le inhriat thiamna irchon hlu murdi kha a'rphûma.

⁴Tukhomin, thudik ni le irhoi taka inlang dik ual loia nangni an huang chian lona hrangin ki lei insîr a ni.

⁵Taksa'n nin kuang om no khom inlân irtha'n nin laia ki oma, nin irvong infelzia le Krista iamnaa nin detzia ki hmu'n ki rai a ifân a ni.

Kristaa hringna irkip

⁶Khanchu, Krista Jisua kha Rengpaa nin pom tâk sikin ama leh irzomin om mai roi.

⁷Amaa khan irzung kaiin irzom unglân, irchuin nin om ang khan iamnaa khan ngîr indet unglân, lômthu insîr uar roi.



⁸Irdîn roi, Kristaa suak ni loi, rammual irchutirna dikloi ramkhohri ata suak, rammual vârna an iti mihriam irchu nôk mai mai khan tu mo khatin nangni an huang itinin.

⁹Krista takpuma khan Pathian famirkipna tinrêng kha a om.

¹⁰Ama chu inlalna le irchamneina murdi lu a nia, amaa khan nangni khom famirkiptir nin ni.

¹¹Kristaa khan sertan nin ni tâk, mihriam kuta tan ni loiin, sual sinthotheina ata kêlsuana hrangin Kristaa sertan nin ni ta.

¹²Baptismaa khan a kuang phûm sa nin nia, mithi lai ata ama kaithoitu Pathian sinthotheina iam sikin amaa khan kaithoi sa nin ni.

¹³Nin porinchenahai le taksaa sertan loi nin ni sikin thi nin nia, khannisianlân, Krista leh nangni an hringtir tâka, ei porinchenahai murdi ngaidam a ni ta.

¹⁴Thupêk kuta irziak, ni khâl ngaitu, zôm hrang hmabâk chu, a kâtpaia, Krosa khan hembê'n an boitir ta.

¹⁵Kha Krosa khan Krista'n irtha roirêltuhai le irchamneinahai, sinthotheinahai ata suak paiin, khahai an hnêna kha mi tin hmu hrangin a siam ta.

¹⁶Khanchu, fâk le nêk thua mani, in thua mani, nikho irthiang hmang thua mani, tha thar kût hmangna thua mani, Sabat ni thua mani, tukhomin ircham nangni nei pe no ri sehai.

¹⁷Kha kha thil la om hrang irhlîm a ni, a tak chu Krista hi a ni.

¹⁸Takpum irngainêp hrang, vântîrtônhai khom biak hrang tia inlârna danglam bîk hmua irbe, taksa lungrîl tak irputa, ite ni loa irpâkhai hi nin chungu ircham inneitirhai no roi.

¹⁹A lu tak Krista chu chel ta mahaia, Amaa khan takpumpui hi irnak le irzung khitphiara infa a nia, Pathian nuamlam angin takpumpui kha a irsôn ngai a ni.

Kristaa hringna thar



²⁰Rammual irchutirna dikloihai kha Kristaa nin thisan tâkin te, itho sika mo rammual mihai angin hi thupêkhai

²¹“Intôk no roh,” “irtem no roh,” “Tôn no roh,” itihai hi nin izôm mai?

²²Khaang thilhai kha mihriamhai isiam dân le irchutirnahai a nia, voikhat hmang zoi hnungin chu a irhmang nôk zit ngai kêng a ni.

²³Hi vântîrtôn biak tihai mani, takpum irngaiinêp tihai hi mani, sa zap le chu ar hoia, khannisian taksa irzuknahai inhnê hrangin chu ite ar fêna om mah.

Kolosa 3

¹Krista leh kaithoi nin ni tâka, khasikin Pathian chang tiang Krista toinaa om, chung tiang thilhai kha, zong ual roi.

²Chung tiang thila nin lungrîl irngat khak unglân, irnêng thila chu irngat no roi.

³Nin thi tâka, nin hringna kha Krista kuang Pathianin a vong insa a ni.

⁴Nin hringna bul, Krista kha, a zuang inlang tena chu nangni khom a kuang roiinpui takin inlang sa nin ti.

Hringna milui le thar

⁵Nin rammual om dân sual: irditna hai, porinchena hai, hurna hai, irzukna sual hai huatirhamna hai (kha kha millim biakna a ni,) hihai hi thatpai roi.

⁶Kha thil sika khan iam loihai chung Pathian ningmur a izuang chum hrang a ni.

⁷Tiana khan nangni khom, khaang khan nin oma, nin nuamlam tak a ni.

⁸Atûn chu ningmurna hai, milung inphuna hai, irhmumâkna hai, mâksan unglân, irhrilsiatna hai le chong porinche hai nin bâi ata suak no ri se.

⁹Milak irhril irhlôm uar no roi, mihriam milui kha a sinthohai leh nin hlîk tâka.

¹⁰Mihriam thar khan nin irbel tâk sikin; Pathian inhriat infel hrangin kha mihriam thar kha a siamtu anga om hranga siam thar mai a ni.



¹¹Kha hringna thar khan Grik le Juda, sertan le tanloi, Oze le Skuthia mi, suak le suakloi om thei mah, Krista vai hi itinrêng a nia, itinrênga a om.

¹²Khanchu Pathian mi inthang, mi irthiang le inditom takhai ni le irhoiin lungrîl taka irrenna hai, khonzana hai, irngaiintômna hai, thuhnuaîrôlna hai, tuangdiarna hai khan irvô roi.

¹³Tukhomin tu chung a khom thu'ntak nin neiin a tuang theiin, irngaidam irhlôm roi, Rengpa'n nangni a ingaidam ang khan tho roi.

¹⁴Khahai murdi chung a khan lungthungna irbel unglân, kha kha itinrêng inruai taka khithkop theitu a ni.

¹⁵Krista irngeina khan nin milunga roirêl ri se, takpum inkhata om hranga koi nin ni. Lômna châng inhre roi.

¹⁶Krista thu kha, a'rchongna murdi leh nangnia om ri se. Inpâkna hla hai, Pathian hla hai, Irtha tiang hla hai le vârna tinrêngin irchutir unglân, irthor irhlôm roi. Nin milung taka Pathian chôindômin raifân takin inpâk roi.

¹⁷Krista zâra Pathian kuanga lômthu hril pumin, nin itho murdi, thu'nsîra mani sinthoa mani Rengpa Jisua irhmingin tho zit roi.

Hringna thara Kristian in sêngkua om dân

¹⁸Nuhaio, nin pasalhai thu zôm roi, kha kha Rengpa mihai tho rua a ni.

¹⁹Pahaio, nin dôngmahai lungthung unglân, an chung a suai no roi.

²⁰Nâipanghaio, lam tinrênga nin nu le nin pahai thu zôm roi, kha kha Rengpa nuam lam a ni.

²¹Pahai khom nin nâihai ninginmurtir no unglân, an beidongna ti.

²²Suakhaio, lam tinrênga nin puhai thu zôm unglân, mihriam inlôm-tir tumtuhai ang a hmu laia vai sin loiin, milung taka Rengpa chi pumin an hmu loa khom sin roi.

²³Nin itho murdi mihriam sintho ang ni loiin Rengpa sintho ang takin tho roi.

²⁴Irchon nin ilua hrang hi Rengpa ata lômman a nih ti inhre mai roi. Rengpa Krista sin nin itho a ni.



²⁵Thil dikloi thotuhai khan thil dikloi an itho man hmu an ti, Pathian chu tûte theibîk nei mah.

Kolosa 4

¹Hruaituhaio, nangni khomin irvâna Hruaitu nin nei tih inhriatin, nin suakhai chungâ dik tak le satakin itinrêng tho roi.

Inthorna

²Chongchai ngut ngut unglân, nin chongchainaa lômthu insîr pumin irngaitua roi.

³Keini hrang khomin ni chongchai pe roi. A thu hrilna lampui Pathianin a nin hong pena hrangin, lung in ki intângna san Krista thurîl inpuang ki sunzom theina hrangin.

⁴Ki insîr hrang lam ang taka kin sîr theina hrangin ni chongchai pe sa roi.

⁵Iamloihai ata vâr takin om unglân, nin zoro kha hmang insa roi.

⁶Itiklai khomin satak le chonghoi taka chong uar unglân, khanchu mi tin, i anga sâm hrang mo nin inhriat hrang a ni.

Inthâna chubai

⁷Rengpaa ki chanpui sinthotu iamom tak, kin urêng inditom tak Tukika hin ki thurchi murdi nangni hril a ti.

⁸Kin thurchi nin inhriata lungrîl raifân taka nin om theina hrangin ki hong itîr a ni.

⁹Ama pâla hin nangni mi, urêng inditom tak Onesima, iamtu det tak hi ki hong tîr sa a ni. Hi thurchi hi nangni hril zit a ti.

¹⁰Aristarka, intângna ina ki iompui hin chubai nangni a mûk. Marka, Barnaba tupa khom hin chubai nangni a mûk. (Ama hi nin kuang a hong zoro'n chu lei lôm hrangin nangni ki hril tâk kha.)

¹¹Josua, Justa an iti hin chubai nangni a mûk, Juda Kristianhai laia khan anni inthum vai hi Pathian Ram ta hranga a sinthotu an ni, ki'rtha a sân an irngamtir a ni.



¹²Epaфра, nangni mi, Krista Jisua suak hin chubai nangni a mûk. A chongchai rikipin det takin nin ngîra, nin hong puihlinga, Pathian nuamlam anga iamtu tak ni theina hrangin sathnem irngai takin nangni a ngên pe ngai a ni.

¹³Nangnihai ta hrangin, Laodikei khuua mihai le Hieropolis khuua mihai ta hranga ama hi a sin intam tak tak ti khom kin hriat a ni.

¹⁴Luka, doktor inditom tak le Dema hin chubai nangni an mûk.

¹⁵Laodikei, khuua urêng omhai le Numfii le a ina Koiindang inkhôm ngaihai kha chubai ni hong mûk pe sa roh.

¹⁶Ki lekha hi nin laia nin tep zoia, Laodikei Koiindang inteptir sa roi, khang dênin Laodikei Koiindang lekha hi lei tep sa roi.

¹⁷Khan, Arkipa kuang khan, “Sinthôna, Rengpa kuang ata ni idong kha ni izoi ngêt hrang kêng, ti roi,” a tia.

¹⁸Kei Paula'n hi hi keima kut ngeia irziakin chubai nangni ki imûkna a ni, ki thîrkol bunhai hi inhre mai roi. Pathian lungkhamna kha nin kuang om ri se.



1 Thesalonika

1 Thesalonika 1

Chubai mûkna

¹Paula, Silvana le Timothea khan, Pa Pathian le Rengpa Jisua Kristaa Thesalonika koiindanghai laia: Lungkhamna le irngeina nin chung a om ri se.

Thesalonika mihai iamna le om lam

²Nangnihai sikin Pathian kuang lônthu kin sîr ngai; kin chongchainahaia khom mong loiin nin irhming kin irlam ngai.

³Iamna sika irnak nin isonghai, lungthungna sika nin sin intamzia haia, ei Rengpa Jisuaa sabeina nin sip indetziahai, ei Pa le Pathian makunga kin inhriat mai ngai a ni.

⁴Urênghaio, Pathianin lung nangni a thunga, ama ta hranga inthang suak nin nih ti kin inhriat.

⁵Nin kuang Thurchi Sa kin hong intung lai khan thu mai mai ni loiin sinthotheina le, Irtha Irthiang iam pumin kin hong insîr a ni; nin laia i angin mo nin ta hrangin kin iom khom nin inhriat.

⁶Kin om lam le Rengpa om lam lâktuhai nin hong ni tâka, intakna tamtak tuang pumin Irtha Irthiang thu kha lâkin nin pom ta.

⁷Khanchu, Makedonia le Akaia rama iamtu murdihai ta hrangin enton nin nia,

⁸Rengpa thu atûn nangni ata Makedonia le Akaia rama vai indarh tâk hi ni loiin hmun tina Pathian nin iiam thu an thang tâka; khasikin keini'n ite kin insîr nang ta mah.

⁹Nangni kin hro laia nin ni lôm lamhai, millim mâksana Pathian hring le dik taka sintho hranga Pathian tiang nin hong irhei tâk thu hai le

¹⁰A Nâipa Jisua, mithi lai ata kaithoi, ningmurna zuang tung hrang ata ni sansuakpu kha, irvân ata zuang nghâka nin omhai an insîr sup sup a ni.

1 Thesalonika 2



Thesalonika khuaa Paula sinthôna

- ¹Urênghaio, nin kuang kin ihong kha a korong ni mah ti nangni khomin nin inhriat.
- ²Nin inhriat angin Filipi khuaa khan inzakom taka soisak tuang khom inlân, irdoina tamtak kêra nin kuang Thurchi Sa hril hrangin ei Pathianin hâina a ni pêk a ni.
- ³Kin thuhiril hi thu dikloi mani, thu porinche mani, irhuangna thu mani ni maka.
- ⁴Thurchi Sa inkoltir inruka Pathianin a ni inkung ang dênin, mihriam inlôm hrang ni loiin ei lungrîl fiatu Pathian inlôm hrangin thu kin ihril ngai a ni.
- ⁵Itiklai khom mi inpâk pa pai ngai ma unga, huatirham irkhûna hrang thu insîr sa ngai ma ung tih nin inhriat, Pathian khomin an hriat.
- ⁶Mi ni inpâk zong ngai ma unga, nangni'n mo mi dangin mo, mi ni inpâk khom irzûl ual ma ung.
- ⁷Krista tirtôn kin ni sikin mihai ta hranga intak ni tuangpui ngai khomin lân, nu'n a nâihai a indot angin nangni kin indot a ni.
- ⁸Khaang dôra nangni kin irngaiinnat hi, lung nangni kin thung sikin. Pathian Thurchi Sa vai ni loiin kin hringna ten khom nangni kin ipêk ngam a ni.
- ⁹Urênghaio, kin sin sôlzia le intakzia kha nin inhriata, nin laia tukhom kin intaktir lona hrangin a sîn a zânin sin tho'n Thurchi Sa kin insîr ngai a ni, kha te!
- ¹⁰Irthiang le fel le demom loi takin iamtuhai ata kin om ngai ti Pathian le nangni khom, nin hriatpuituhai nin ni.
- ¹¹Pa'n a nâihai chung a itho angin nin rênga chung a kin tho ngai ti nin inhriat.
- ¹²A ram le a roiinpuina chang sa hranga nangni koitu Pathian mi irphuaa om hranga ngênin, inthorin, nangni kin inhriatir ngai a ni.



¹³Hi sika hin mong loiin Pathian kuang lômthu kin insîr ngai, kin thu hong insîr nin pom lai khan, mihriam thu anga pom loiin Pathian thu ngêt chu a nia, nangni iamtuhai chung a sintho ngai kha a ni.

¹⁴Urênghaio, nangni khom Judai rama Pathian koiindanghai Krista Jisuaa omhai irchutirtu nin lei nia, anni'n Judahai ata an ituang angin nangni khomin nin mihai ata nin itûng kha.

¹⁵Kha Judahai khan Rengpa Jisua le deipuhai an thata, keini khom an nin buaia Pathian inlôm-tir mahaia, mi dang khom irdoipui loi nei mahai.

¹⁶Saninhringna an ni theina hranga thuhiril khom an ni khapa, sual chungirchuan thoa, a hnungkhôn taka chu Pathian ningmurna an chung a itung tâk a ni.

Paula'n Thesalonika hro nôk a'rzuk

¹⁷Urênghaio, lungrîl tiang ni loiin taksa tiang zoro i ten sùng mani ei irsena, khasikin nin hmêl hmu nôk kin irzuka, hmu tumin a sân kinibei a ni.

¹⁸Nangni hong pan kin tum ngaia, keima Paula ngêt hin voi-hni voithum ki tum tâka, khannisian setana'n a ni khâl ngai a ni.

¹⁹Kin sabeina mani, ki raifâna mani, ei inhnêna chôindômna rênglukhum isong hrang hi i ma ni? Ei Rengpa Jisua a zuang tika, a makunga chu nangni ngei hi nin ini loi hrang ma ni?

²⁰Nangni hi kin roiinpuina hrang le kin raifâna hrang chu nin ini kêng.

1 Thesalonika 3

¹Nin thurchi inhre loa om kin thei ta no sikin keini vai hi Atheni khuaa la om inlân sa kin tia.

²Khanchu, kin urênghaio Timothea, Krista Thurchi Sa hrila Pathian sin kin ithopui hi nin iamna indet hrang le,

³hi dengintheinahai sika nin laia mi tukhom nin inhnîng lina hrangin nangni inthor hrangin kin hong itûr a ni. Nangni khomin hi hi nei ngêt hrang a nih ti nin inhriat kha.



⁴Nin kuang kin om lai khan dengintheina ei ituang hrang tih nangni kin lei hril a ni. Khaang ngêt khan a hong tung ta ti nin inhriat.

⁵Iamnaa nin det mai le det mai loi inhre loa om kin thei ta no sikin, Timothea kha kin hong itîr a ni, inthêmtu'n inthêmpai hrangin kin sin sôlna chanlamboi a chang thei itinin tia kin hong itîr a ni.

⁶Timothea chu nin kuang ata a hong kîr nôk tâka, thurchi raifânôm tak, nin iiam indetziahai, lungthungna nin inei intamzia hai, keini'n nangni hmu kin irzuk tak tak angin nangni khomin nin irzuk thu hai, itiklai khomin nin ni inhriat mai a ni tihai nin ni hrila.

⁷Khasika khan, urênghaio, nin iamna a det sikin kin lunginzîngna le kin intakna murdia irtharngam takin kin om thei ta a ni.

⁸Rengpaa nin det mai sika hin atûn chu kin ta hrangin kin hringna hi ar fêna a om ta.

⁹Nangni zâra Pathian makunga kin raifânna murdi sika hin a kuang lônthu hril thei inlân o!

¹⁰Nin hmêl kin hmu theina hrang le iamna nin irsam kin thuan theina hrangin Pathian kuang, sûn le zân ngûk takin kin zong ngai a ni.

¹¹Ei Pa Pathian ngei le ei Rengpa Jisua khan nin kuang kin hongna hrang lam ni siam pe ri se.

¹²Lung nangni kin ithung nêka irkhêlin lung nin irthung theina hrang le mi murdi lung nin thung theina hrangin, nin lungthungna kha Rengpa'n inpungtirin nangni inpuang pe ri se.

¹³Khanchu ei Rengpa Jisua khan a mi'rthianghai murdi leh a zuang tika, Pathian ei Pa makunga khan irthiang le sêlna boia a om theina hrangin nin milung indet ri se.

1 Thesalonika 4

Pathian lôm lama hring



¹A mong taka chu urênghaio, Pathian inlôm lama om dân kin kuang ata nin idong ang khan nin oma, khaanga om mai hrangin Rengpa Jisua irhmingin nangni kin ngên.

²Rengpa Jisua irchamneina hmangin i thu mo nangni kin pêk nin inhriat.

³Pathianin irthiangliai hrang le irdit mapai hrangin nangni a inuam a ni.

⁴Mi tinin irthiang tak le mahripom takin mâni bêl vong thiam chit roi.

⁵Pathian inhre loi Jentailhai angin taksa irzukna lût no roi.

⁶Hi thila hin tukhomin a urêng a huangin a chung a thil saloi tho no ri se; khaanga thotuhai chung a khan Rengpa'n phuba la a tih ti nangni kin inhriattir tâk kha.

⁷Pathianin chu porinche taka om hrang ni loiin irthiang taka om hrangin a ni ikoi a ni.

⁸Khasikin, hi thu uksak loi chu mihriam a ipoisak loi ni maka, Irtha Irthiang nangni pêktu Pathian kha a ipoisak loi a ni ual.

⁹Nin kuang chu urênghai irlungthungna thu irziak nang maka, Pathianin nangni ngei lung irthung irhlôm hrangin nangni a irchu a ni.

¹⁰Khaang khan, Makedonia rama nin lei itho ngai tâk a ni. Khasikin, urênghaio, kha lungthungna kha nei nôk ual hrangin nangni ki ngên a ni.

¹¹Nangni ki lei inhril tâk ang khan, dâiriama omin, mâni sintum chit lunghnânga, mâni hnuk chu hlosuak tum seng ngai roi.

¹²Khanchu, iamnotuhaiin mahrip nangni tho an ta, tûte chung a nin irngat khom nang no nia, ite irsam no chin ni.

Rengpa zuang nôkna

¹³Urênghaio, sabeina rêng neilo mi danghai anga nin beidong loina hrangin, a thi tâkhai thurchi nin inhriat kin inuam a ni.

¹⁴Jisua a thia, a thoi nôk ti ei iama, khaang dênin Jisua sika a thi tâkhai khom Pathianin ama leh hruai sa a ti.



¹⁵Rengpa thu'n hi hi nangni kin ihril a ni: Rengpa zuang nôk tena a hring a dama la om maihai hin, a thi tâkhai kha khêlhai thei viat no ih, iti hi.

¹⁶Rengpa ngei kha thupêk khêk irhai le, vântîrtôn roiinpui tak irhai le, Pathian bekul irhai le irvân ata zuang chum a ti, Kristaa thi tâkhai kha thoi masa an ti.

¹⁷Kha zoi hnungin chu eini hring dama la om maihai hi boiruaka Rengpa nghâk hrangin anni leh irrualin sôm laia khin lâkin om ei ta, Rengpa kuang kumkhua'n om ta ei ti.

¹⁸Khasikin, hi thuhai leh hin irtharngam lei irsak irhlôm roi.

1 Thesalonika 5

Rengpa zuangna hranga irsiamna thu

¹Aniachu, urênghaio, a zoro le a nikhua thuhai irziak pe nang mak chêi.

²Rengpa Nikhua chu zâna inru angin a itung hrang ti nangni ngeiin fel takin nin inhriat.

³“Ningbeina le zôkna,” zoroa an ti lai takin nupang nâiha ise angin voikhat rengin an chung a irhmangna zuang tung a ta, lôi thei no nihai.

⁴Urênghaio, nangni chu inthima om mak chêia, kha nikhua chu inru angin nangni de no ni.

⁵Nin rêngin ivâra mi le sûna mi nin ni. Zâna mi le inthima mi ni mak me.

⁶Khasikin mi danghai angin in no idua; har ei ta, irngaitua zui ei ti.

⁷Mi'n zâna kêng an i-in ngai, zu khom zâna kêng an inrui ngai.

⁸Eini chu sûna mi ei ni sika hin iamna le lungthungna rôppho kha inngâkin, saninhring sabeina kha lukhuma hmangin irtûng chianin om ei ti.

⁹Pathian ningmurna tuang hrang ni loiin ei Rengpa Jisua Krista zâra saninhring ni hrangin a ni inkung ual a ni.

¹⁰Ei dam khoma, ei thi khoma ama leh hmun khata ei om theina hrangin ei irthûlin a ithi a ni.



11Khasikin, irtharngam irsak irhlôm roi, nin lei itho ngai angin.

Irchutirna hnungkhôn le chubai mûkna

12Urênghaio, nin ta hrangin intak taka sintuhai le hriltuhai kha inhre mai hrangin nangni kin ngên.

13Anni chu an sintho sika ngaisâng tak takin lungthung unglân, irngei siam siam roi.

14Khan, urênghaio, nangni ki ngên, mi thaboihai kha ngo unglân, mi beidonghai kha irtharngam sakhai unglân, mi hrât loihai changpui unglân, mi tin chung a nin lungrîl insôt roi.

15Tukhomin tu soal khom suala thuan loi hrangin irdîn unglân, itiklai khomin thil sa tho'rhlômin mi murdi chung a thil sa tho mai roi.

16Lôm mai unglân,

17mongloiin chongchai unglân,

18itinrênga lômthu hril mai roi. Hi hi Krista Jisuaa khan Pathianin nin tho hranga a inuam chu a ni.

19Irtha kha that no roi.

20Thuhrilhai khom hmusit no roi.

21Itinrêng fia ual unglân, a sa kha pom khak unglân,

22a saloi kha masan roi.

23Irngeina Pathian ngêt khan nin pumin irthiangtir sianlân, ei Rengpa Jisua Krista zuang nôk tika chu nin irtha le lungrîl le nin taksa a puma sêlna boiin inomtir ri se.

24Nangni a koitu chu iam a oma, tho khom tho ngêt a ti.

25Urênghaio, ni chongchai pe ngai roi.

26Urêng murdi kha kut chelin chubai ni mûk pe seng roi.

27Hi lekha hi urêng murdi inhriata tep hrangin Rengpa irhmingin nangni ki ngên.



²⁸Ei Rengpa Jisua Krista lungkhamna kha nin kuang om ri se.



2 Thesalonika

2 Thesalonika 1

Chubai mûkna

¹Paula, Silvana le Timothea khan Thesalonika khuua Pathian ei Pa le ei Rengpa Jisua Krista koiindanghai chubai ki mûk.

²Pa Pathian le Rengpa Jisua Krista kuang ata lungkhamna le irngeina nin kuang om ri se.

Krista zuang tika roiinpuina

³Urênghaio, nangni sikin Pathian kuang lômthu hril mai hrang kin nia, kha kha kin itho hrang pial a ni. Iamnaa chung nin tuar tak taka, nin rênga lung nin irthung irhlômna khom an thûk tîr tîr a ni.

⁴Dengintheina le intak tinrêng dorôi takin nin tuanga, iamnaa nin detzia le nin dorôizia hai hi koiindanghai laia nangni kin song ngai a ni.

⁵Pathian Ram sika tuang nin nia, khataka lût inruk nin ni theina hrangin. Pathian roirêl dikzia inlangna nin ni.

⁶Pathian chu dik takin thil a tho ngaia, deng nangni intheitirtuhai chu intakna'n thuan a ti.

⁷Rengpa Jisua kha irvân ata ama vântûrtôn sinthothei takhai le meichok laia a zuang inlang tika, nangni intak tuanghai hi hong irngamtir a ti, keini khom ni'rngamtir a ti.

⁸Pathian inhre loihai le ei Rengpa Jisua Krista Thurchi Sa iam nuam loihai chunga phuba a lâk tika chu kha mihai khan hremna tuang an ti.

⁹Kha mihai kha Rengpa makunga le a sinthotheina roiinpui taka irthokin kumkhua siatnaa khan pai ni an ti.

¹⁰A mi'rthiang, ama iamtuhai kuang ata roiinpuina le chôindômna dong hranga a zuang tika chu, kin thuhril nin lei iam sikin nangni chu kha iamtuhai laia khan kop sa nin ti.



¹¹Hi sika hin Pathianin nangni a ikoina irphua nin om theina hrang le sat nin nuamna murdi le iamna sika nin sinthohai kha, a hrâtnaa nangni ar kiptir theina hrangin, mong loiin nangni kin chongchai pe ngai.

¹²Khanchu ei Pathian le Rengpa Jisua Krista lungkhamna zâra, ei Rengpa Jisua irhming kha nin laia chôindôm ni a ta, nangni khom ama zâra chôindôm ni nin ti.

2 Thesalonika 2

Dân insiatpa

¹Urênghaio, ei Rengpa Jisua Krista zuang nôkna le a kuang ei inkhômna hrang thua khan.

²Irthaa insîr mani, thuhiril mani, kin lekha sikin mani sirsana, “Rengpa nikhua kha a tung mai ta,” ti thu’nthang sika nin lungrîl inthinga inbuai loi hrangin nangni ki ngên.

³Tukhomin i lampuia khom nangni hruai irhmang no ri se. Pathian ata tehelna chu a hong tunga, Dân insiatpa, Irhmang hrangpa kha, a hong inlang mâka chu kha Nikhua kha hong tung no ni.

⁴Ama’n chu mihaiin Pathiana an inei, an ibiak murdihai kha doi a ta, anni nêka roiinpuiin irbe a ta, Pathian Tempil ngeia toiin Pathianin irbe a ti.

⁵Nin kuang ki om lai khan, kha khan kha thu kha kin ihril ngai kha inhre mak chêi mo?

⁶A zoro taka a hong tung theina hrangin atûn hin i’n mo nangni a ikhâlin nin inhriat?

⁷Dân insiatna khan atûn khom inrûkin a la tho mai kêng; khannisianlân, a khâltu kha lâkpai a ni mâka chu hong inlang lik no ni.

⁸Kha zoro tika chu Dân insiatpa kha hong inlang a ta, khannisian ama kha Rengpa Jisua’n hong that a ta, a zuang nôkna roiinpui taka khan zuang irhmangtir a ti.



⁹Dân insiatpa kha setana hrâtnaa hong, sinthotheina tinrêngin sinirkhêl le thilirkhêl korong ni a ti.

¹⁰Kha irhmang hranghai kha dikloi takin lam tinrênga huang ni a ta, anni saninhiring thei hrang Thurchi Sa thutak kha an lôm no sikin.

¹¹Khasikin, milak an iam theina hrangin Pathianin an laia huangna hri an lêngtira.

¹²Thutak iam loa fel loina lôm ualhai murdi'n thiamno an ichang zit hrang a ni.

Saninhiring hranga inthang nin ni

¹³Urêng, Rengpa indit takhaio, nangni sikin Pathian kuang lômthu hril mai hrang rêng ei ni; Irthaa irthiangtirin, thutak iam hrang le ra masa hrangin saninhiring hrangin Pathianin nangni a inthang a ni.

¹⁴Kha hranga khan ei Rengpa Jisua Krista roiinpuina changna hrangin ei Thurchi Sa hril hmangin nangni a ikoi a ni.

¹⁵Khasikin urênghai, ngîr indet unglân thuhiril le lekha thona thutak nangni kin irchutirhai kha intûk indet ngit roi.

¹⁶Khanchu, ei Rengpa Jisua Krista, Pathian ei Pa, lung ni thungpu, a lungkhamna sika kumkhua'n irtharngamna le sabeina sa ni pêktu khan,

¹⁷nin lungrîl irtharngamtir sianlân, thil sa tinrêng nin itho le nin insîra khan nangni inhrât mai ri se.

2 Thesalonika 3

Ni chongchai pe roi

¹A mong taka chu, urênghaio, ni chongchai pe roi. Rengpa thu kha nin laia roiinpui tak le hrât taka a indarh ang khan an darh mai theina hrang le,

²mi dikloi le mi sualhai ata ei zôk theina hrangin. Mi murdi'n la iam mahaia.

³Rengpa chu iam a oma, ama khan nangni an hrâtin mi sualhaia irthokin nangni inzôk a ti.



⁴Thu nangni kin ipêk angin nin zôma, nin izôm mai khom Rengpaa khan kin iam ngit a ni.

⁵Rengpa khan nin milunghai kha Pathian lungthungna inhre nôk ual hrang le Krista anga tuangdiarna nei hrangin kaihruai ri se.

Thaboi loi hranga inthorna

⁶Urênghaio, kin irchutirna thu zui nuamloia irthaboi taka om urênghai ata irkiang hrangin ei Rengpa Jisua Krista irhmingin thu nangni kin pêk a ni.

⁷Kin isin lam takin nin isin hrang a nih ti nangni rengin nin inhriat infel. Nin laia kin om laia khan kin irtha inboi ngai ma ung.

⁸Tu bu khom manboiin ne ngai ma ung, nin laia mi tûte deng kin intheitir loina hrangin sîn le zân sinin kin isôl a ni.

⁹Kin thei no sika ni maka, nin entonna hranga tho kin ni ual ngai a ni.

¹⁰Nin kuang kin om laia khan, “Sin tho nuamloi murdi’n chu fâk khom fa no ri se,” tiin nangni kin hril ngai kha te!

¹¹Nin laia senkhat an irthaboiin, chiar ti no chu ite tho loiin an om tih kin inhriat sikin kha kha kin iti a ni.

¹²Khaang mihai kha sin tak taka mâni itho suaka irnghat hrangin Rengpa Jisua Krista irhminga thu pêkin kin inthorhai a ni.

¹³Urênghaio, nangni’n chu sin sa sin hnông no roi.

¹⁴Khan, tukhomin hi lekha thona kin thu nangni inpêl hi a zôm no’n chu an zak theina hrangin irsinsiahai unglân, irpôlpuihai viat no roi.

¹⁵Aniachu, râl angin chu bêhai no unglân, urêng angin irchutirhai ual roi.

Chong hnungkhôn

¹⁶Irngeina Rengpa ngei khan kumkhua’n lam tinrênga irngeina nangni pe sianlân, Rengpa kha nin rênga kuang om ri se.

¹⁷Kei Paula’n keima kut ngeia chubai nangni ki imûkna a ni. Hianga ki irziak hi ki lekha thon murdi irsinsiana a ni.

¹⁸Ei Rengpa Jisua Krista lungkhamna kha nin rênga kuang om ri se.



1 Timothea

1 Timothea 1

Chubai mûkna

¹Keima Paula, a ni saninhrintu Pathian le ei isabei irnghatna Krista Jisua thupêk anga Krista Jisua tirtôn hin,

²iamnaa ki nâi tak tak Timothe, chubai nang ki mûk. Pa Pathian le Krista Jisua ei Rengpa kuang ata lungkhamna, za'rngaina, irngeina hai ni kuang om ri se.

Irchutirna dikloi ata irdîn hrang

³Makedonia rama ki fe hrang laia nang ki ingên ang khan Efesi khuaa om mai hrangin nang ki ngên nôk. Mi senkhat thurin dikloi irchutir ngaihai kha khaphai ngêt roh.

⁴Khaanga thonthu le irchibulhai sui suina kha inmatir roh, irsêlna an intamtirna mai maia, iamna sika irhriat ngai, Pathian thil tum chu, mi inhriat infeltir ual mahai.

⁵Milung irthiang, sia le sa inhriatna irthiang le iamna dik tak ata suak lungthungna kha a hong hring ual theina hrangin hi thu hi nang ki ipêk a ni.

⁶Senkhatin chu kha kha an pêtsana, irsêlna inlâp loi tiang an lût ta.

⁷Dân irchutirtu ang takin an irbea, an thu'nsîr omzia le ngam taka an thil insîr ngaihai kha inhre tak tak mahai.

⁸Dân hi a hmangna hrang taka hmang a ni'n chu a sa ti ei inhriat.

⁹Mi dikhai chung a irlek hrang ni mah ti inhre hrang a ni. Dân ngaisak loihai le tukullian hai, Pathian ngaisak loi le porinche hai nu le pa thattu hai le mi that hai,

¹⁰irdit uarhai le mongkohur hai, mihriam inrûk uarhai le milak hai, milak thoa mâni thurchi dikloi taka insîrhai, thurin det insîr loi lama sintho murdihai hranga siam a ni ual.



¹¹Inpâk inruk Pathianin inpuang hranga a ni inkoltir Thurchi Sa roiinpui irkalna tianga irchutir uar hai chung a irlek hrang a ni.

Lungkhamna sika lômthu

¹²A nin hrâtirtu, iam inruka ni bêa hi sin hranga nin kungtu Krista Jisua, ei Rengpa kuang lômthu ki insîr a ni;

¹³matona khan an insîrinsiattu, dengitheitirtu le êrotu lei ni khom inlân, iamtu la ni ma unga; inhriat loia tho ngai ki ni sikin ki chung a za ar ngai tak taka.

¹⁴Khan ei Rengpa lungkhamna tamtak khan Krista Jisuaa iamna le lungthungna'n a ni vur insip ual ta.

¹⁵Krista Jisua kha mi sualhai saninhring hrangin rammuala a zuang tih hi a dikin pomrua tak a nia, anni laia kei hi a sual tak ki ni.

¹⁶Hi pa sika hin lung a ni inkham a ni, Krista Jisua khan ki chung a tuangdiarzia an langtir masaa, atûn ata khom ama iamtu murdi'n, kumtuang hringna nei thei an ti entîrna hrang a lei ni.

¹⁷Inlaltak kumtuanga om, thi theiloi, mita hmu theiloi, Pathian tak vai kuanga khan chôirsângna le roiinpuina kumtuangin om ri se. Amen.

¹⁸Ki nâipa, Timothe, hi thupêk hi nang kin koltir; deipuhaiin ni chungchâng an lei insîr kha inhre maiin lân, kha thu kha hmangin irdoina sa kha beiin lân,

¹⁹iamna le sia le sa inhriatna irthiang vong khak roh. Mi senkhathaiin an sia le sa inhriatna an hnôla, an iamna kha a koi siat zoi ta.

²⁰Khahai laia khan Humenaia le Alexandara khom an kopa, Pathian insîrinsiatna an mongna hrang le an irletna hrangin sep an nanga, Setana kuta ki pêk ta a ni.

1 Timothea 2

Pathian biaka mipui inkhôm hrang dân



- ¹Nang ki ibe nuam masa tak chu thil zongna hai, chongchaina hai, ngên pena hai, lônthu hrilna hai, mi murdi hrangin nei unglân,
- ²Pathian ngaisak le mahripa omin irtharngam taka ei om suam theina hrangin inlaltak le irchamneitu murdihai hrangin zong pe sa roi.
- ³Kha kha a ni saninhringtu Pathian hmuin a saa, a inuamlam a ni.
- ⁴Ama khan mi murdi saninhringa om le thutak inhriat hrangin a inuam a ni.
- ⁵Pathian inkhat vai a oma, Pathian le mihriam kêra palai inkhat vai a om sa, Ama kha mihriam Krista Jisua chu.
- ⁶Mi murdi irtanna hrangin ama kha ar pêka, saninhringna thu chu a zoro a iti taka a zuang inpuang ta.
- ⁷Keima hi, Jentailhai kuang chu iamna thu kha inpuang hrang le thutak irchutirtu le tirtôn hranga inkung ki ni; thutak ki insîr a ni, milak insîr ma ung.
- ⁸Khanchu, nin inkhômna kipa pasalhain chu tho ta takin, ningmur le lunghla puma tho loiin kut irthiang pharin chongchai ri sehai.
- ⁹Nupang khom a satak le ar hoi tôkin irvôhai sianlân, rêlirlek taka sam irvo mani, rângachaka irvo mani, lunghlu irthei irhli mani, puan man tam irbel mani uar no ri sehai.
- ¹⁰Pathian ngaisak nupanghai tho irhoi, thil sa tho'n irbel ual ri sehai.
- ¹¹Nupanghaiin chu dâihrekin, thu ôi takin thil an irchu hrang a ni.
- ¹²Nupangin mi an irchutir mani, pasal chung a ircham an inei mani phal ma ung, an idâihrek ngêt hrang a ni.
- ¹³Adama kha siam masa a nia, kha hnunga kêng Evi kha siam a la ni sikin.
- ¹⁴Khabana, ihuanga om kha Adama ni maka, nupang kha kêng ihuang le porinchetirtu chu a ni.



¹⁵Nupanghai nâi nei zoro'n, Pathianin natna le dengintheina nangni an tongtira; khan khomnisan, iamna le lungthungna le, irthiangna neiin, lungrîl feltak leh an om photin chu saninhringin om an ti.

1 Timothea 3

Koiindang hruaitu

¹Tukhom Koiindang hruaitu sintho a nuamin chu sin sa a itho nuam a ni, ti hi a dik a ni.

²Khanchu Koiindang hruaitu ni hrangin chu sêlna boi, dôngma inkhat nei, insumthei, lungrîl diktak, mi fel, mi lôm dân thei le irchutir thiam mi a ini hrang a ni.

³Zu in ngailoi, mi vîk ngai loi, mi nunirnêm, irngei nuam mi le sum irngaiinnat loi mi a ini hrang a ni,

⁴mahripom taka mâni in sêngkua om dân rêla, nâi le te enkol thiam mi a ini hrang a ni.

⁵Mâni in sêngkua rêl fel thiam loiin itin mo Pathian Koiindang a ienkol thei hrang?

⁶Iamthar mi ni no ri se, khano'nchu lâirpâk a ta, Diabola angin thiamno changna ti.

⁷Pên tianga mihai ngaisâng a ini sa hrang a ni, khanchu irhming siatna hloin Diabola châng a in-ôk loi hrang a ni.

Koiindang sinthotuhai

⁸Khang dênin Koiindang sinthotuhai khom omdân sa, lungrîl det, zû'n duloi, porinche taka sum hlêp nuam mi ni loi,

⁹sia le sa inhriatna irthianga iamna thu chel indet khak mi an ini hrang a ni.

¹⁰Enfia masa phot hrang an ni, an ruk dênin kêng sin an itho hrang a ni.

¹¹An nupanghai khom, khang dênin mi mahripom, mi nuiso ngai loi, insumthei, lam tinrênga mi iamom an ini hrang a ni.



¹²Sinthotuhai chu dôngma inkhat nei, nâi le te in sângkua enkol thiam mi a ini hrang a ni.

¹³Sintho insahai chu an dongtum hong sa tîr tîr a ta, Krista Jisua iamna lama khom hong hâi tîr tîr an ti.

Ei sakhua thu'rthup roiinpui

¹⁴Hi lekha ki'rziak lai hin hong a nang hmu lat ki'rsabei maia,

¹⁵Khannisian, kin hnung taka Pathian sângkua, Pathian hring Koiindang, thutak vongtuhai chu, i anga om hrang mani, nin hriat theina hrangin ki hong irziak a ni.

¹⁶Tûte'n ei sakhua thu irthup roiinpuizia hi dik mah ti thei no ni: Ama kha taksa irputin a zuang inlanga. Irtha'n a dikzia an langtira, Vântîrtônhai khomin an hmua. Ama chu nam tin laia inpuang indarh a nia, Rammual pumpuia mihaiin an iama, Roiinpui taka lâkpai a ni ta.

1 Timothea 4

Irchutirtu dolhai

¹Zoro hnungkhôna chu mihaiin iamna thu hi la'rheisan an ti, irtha dikloi la iam an ta, ramilhlihai irchutirna la zui an tih ti irtha fel takin an sîr.

²Kha thu irchutirna inthek indartuhai kha sia le sa inhriatna cho, thîr irlinga eminchâr nei ang, milakthei an ni.

³Mi senkhatin innei le thil senkhat fâk hi dik mah tiin mi an khapa. Khannisianlân, Thutak inhre tâk, iamtuhai chu lômthu insîr puma fâk hrangin Pathian isiam a nih ti an inhriat.

⁴Pathian thilsiam murdihai hi a saa, ite pai hrang om ma; lômthu insîr puma fâk hrang a ni.

⁵Pathian thu le chongchaina'n ar hlan irthiang zit ta.

Krista sinhotu sa

⁶Hi kaihruainahai hi urênghai hrilin lân, Krista Jisua sinhotu sa ni ini hrang a ni; iamna thu le irchutirna sa ni zôm ngai ang khan irtha tianga nang irsôntir sa ri se.



⁷Khannisianlân, Pathian mahrip loia, pitarhai thonthu dukdakloi mai mai irheisanin lân, Pathian ngaisakna tiang thila irsep roh.

⁸Taksaa irsep hi an lâpa, irtha tianga irsepna len vâng chu lam tinrênga an lâpa, atûn hring sùng le nakan hringnun hrangin an lâp tak tak a ni.

⁹Hi thu hi a dika, pom zôi zât a ni.

¹⁰Pathian hring kha ei isabei irngatna a ni tak tak a ni. Ama kha mi murdi ta hrangin saninhringtu a nia, iamtuhai ta hrangin a ni lele sa.

¹¹Hi thuhai le irchutirnahai hi urêng hai pêkin lân, irchutir zui mai roh.

¹²Ni nâiin pang sikin tûte'n nang manêp no ri sehai, thu'nsîrna lama, omlam dâna, lungthungna lama, irthiangna lama, iamtuhai entonrua ni roh.

¹³Ki zuang mân chu vântâng laia Pathian thu tep hai, thuhail hai, irchutirna hai lei uar roh.

¹⁴Upahaiin ni chung a kut irngat laia deipuhai insîr anga irtha tiang thilpêk ni idonghai kha inthâ no roh.

¹⁵Hmang zui maiin lân, tuina taka neiin lân, khanchu mi tinin ni masôn mai lam an ihmu hrang a ni.

¹⁶Ni sintho le irchutirnaa a sân irdînin lân, hi hi tho maiin lân, nangma le ni thu irngaituhai ni isaninhring hrang a ni.

1 Timothea 5

Mi dang chung a tho hrang

¹Upa ualhai chu ngo no'n lân, mâni pa anga enin a ngênin ngên roh; ruathartehai chu sangpa angin,

²Pitarhai chu nu angin, dôngmatehai chu irthiang takin farnu angin enhai roh.

³Mâni ringota om meithâihai chu inza'n lân;



⁴khannisianlân, tu le nâi nei meithâihai khan in sângkua tianga an sintum, Pathianin sângkua mophurna a ipêk chu hlen suak irchu sianlân, anni infa inliantu kha infa nôk ri se, kha kha Pathian nuamlam a ni.

⁵Infâtu neiloi, mâni ringota om meithâi chu, Pathian vai irhnêl hrang a neia, changpuina zongin a sùn a zân a chongchai ngai.

⁶Meithâi rêlillek tak chu, a hring lai khomin mithi a ini chian a ni.

⁷Hi irkaihruaina hi hrilin lân, sêlna boiin om ri se.

⁸Khannisianlân, tukhomin mâni in tiang le khuahai, a bîkin mâni in sâng mihai a donsui no'n chu a iamna kha a hnôla, iamloi mi nêkin an sual ual a ni.

⁹⁻¹⁰Kum sômruk la kâiloi chu meithâi laia irziak sa no roh; pasal inkhat vai nei, thil sa thôna lama inpâk ruk, nâi le te hong enkol inchuk tâk, mikhualhai lei intung ngai, mi irthianghai ke lei irsûk ngai, mi dengintheihai changpui nuam, thil sa thôna lama irpe mi a ini hrang a ni.

¹¹Meithâi la nâiin pang ualhai chu irziak no roh, an irzukna sikin Krista irheisana pasal nei an nuam nôk ngai,

¹²an thu lei inkung tâk kha an porinchena sikin hrilsiat an hlo ngai.

¹³Kha ni loi khom, mi ina an chainaa thaboi an irchua, thaboi vai khom ni loiin mi nuiso an uara, bâto an hrâta, an insîr loi hrang hrang an insîr ngai a ni.

¹⁴Khasikin meithâi la nâiin pang ualhai chu pasal nei nôkhai sianlân, nâi neiin in sângkua enkolhai sianlân, râlhaiin ni hrilsiatna hrang zel aninei loi hrang a ni.

¹⁵Senkhat chu Setana zuiin an ipêt inchâi tâk a ni.

¹⁶Iamtu nupangin, an in sângkua meithâi ompui nei sianlân, a infa hrang a ni; Koiindang kha puakrik inpêl no ri se, meithâi an bing doka omhai khan an enkol theina hrangin.



¹⁷Koiindang Upa, mi hruai thiam, thuhiril le irchutirna tianga takirtâi bîkhai chu a bâk inhnia chôiindôm inruk an ni.

¹⁸Lekha Thu'n, "Sehrâtpa'n bu a chîl laiin a hmûr khit no ri se; sinthotu chu a hlo hmu rua a ni," a tia.

¹⁹Koiindang upa an ihnôlna chu thun hretu inhni mani, inthum mani lua an om no'n chu, pom no roh.

²⁰Thil tho'nsualhai chu vântâng makunga halirchu roh, mi dang khomin an chi theina hrangin.

²¹Hi thu hi ite theibîkna nei loiin, ni sin thôna tina tûte thop bîk nei loia, Pathian le Krista Jisua le vântîrtôn inthanghai mithmu'n zôm hrangin sathnem irngai takin nang kin hriattir.

²²Sinthotu hrang namindet irhnót no'n lân, mâni irvong irthiang roh.

²³Tui ringot in ta no'n lân, natna ni nei sikin, ni phîng hoina hrangin uain tômte te in viat sa ngai roh.

²⁴Mi senkhat سوالنا chu an lang pama, thiamno inchang thei zôi zel a ni; senkhat سوالنا chu sôt ian hnunga no'n chu inlang ngai mah.

²⁵Khaang dênin thil tho'n sa chu an lang pama, inlang no khom sian, thup mai thei chu ni mah.

1 Timothea 6

¹Pathian irhming le ei irchutirna thu insîrinsiata, a om nona hrangin siahlohain an puhai kha itinrêng chungâ chôiindôm inrukin bê ri sehai.

²Suak, Kristian pu neihain chu iamnaa urêng an ini songin an puhai kha an ingainêp hrang ni mah, sa nôk ualin sin an itho pehai hrang a ni; an sinthotuhai le iamna le lungthungnaa in sîngkhat an ini kêng. Hi hi ni irchutirin ni inthorna hrang chu a ni.

³Tukhom ei Rengpa Jisua Krista thu dik le sakhua irchutirna thu irkala irchutirna dang irchutir chu,



⁴mi'nvêt, lâripâk tak, ite inhre loi an ni; insîr hrang zong thei tak, irsêlna nuam, irhnarsa hai, irsualna hai, Pathian hrilsiatna hai, irsêl mongnaboi insuaktu an ni.

⁵Lungrîl siat tâk, thudik man phâk ta loi, sakhua hi irchongna hranga hmang tumhai an ni.

⁶A ni, Pathian ngaisakna hin mihriam ar chongtir ngai, a thil neia khan a milung a chukin chu.

⁷Rammuala hin ite lûtpui mak mea, ite suakpui thei ual no ih.

⁸Khasikin, fâk hrang le silkai hrang ei neiin chu ei milung inchuk ei ti.

⁹Irchongna nuam mihai chu inthêmnaa an lûta, huatirhamna invêt, châng ichiom taka an in-ôka, an siatpuia, an irhmang ngai a ni.

¹⁰Sum irngaiinnat hi sual tinrêng bul a ni, Sum nei intam an itumna tiang senkhat chu iamna hi an pêtsana, chardongna tamtakin an lungrîl an bingin an suninkhoi ngai a ni.

Mimal ta hranga inthorna

¹¹Nang, Pathian mi, kha thilhai kha nangma'n chu rotsan roh. Felna hai, Pathian ngaisakna hai, iamna hai, lungthungna hai thuhnuairôlna hai, tuangdiarna hai, nunhoina hai, nei tum khak roh.

¹²Iamna hlu hi songin thei dôr insua roh; kumtuang hringna chu chel khakin lân, kha kha chang hranga koi ni ni, inhretu tamtak makunga iamna ni ipom thu ni inpuang kha.

¹³Itinrêng hringna hnâr, Pathian le Krista Jisua, Pontia Pilata makunga chi viat loia, thudik thop ngittu makunga khan,

¹⁴ei Rengpa Jisua Krista a zuang inlâr nôkna, Nikhua dêna thupêk kha iamom taka zôm hrangin tum roh.

¹⁵An lârna kha chu a zoro taka Pathian inpâkrua le Roirêltu om sun, rênghai rêngtak le rênghai Reng khan intung a ni.



¹⁶Ama vai hi thi theiloi, nâisâiloi zât, vâra om, tûte la ihmu loi le hmu thei ni sa loi kha a ni, a kuanga chôindômna le sinthotheina kumtuangin om ri se. Amen.

¹⁷Rammual mi irchonghai kha irsor loi hrangin hrilin lân, sum songloi ruaa irnghat tum loia itinrêng ei ihmang hranga ni pêktu Pathiana irnghat ual hrangin inthor roh.

¹⁸Thil sa tho hrangin, thil sa thoa irchong hranghai phal taka mi danghai sem sa ngai hrangin inthor roh.

¹⁹Khanchu, nakan tena irchon hlu tak an irsiam pe ni a ta, hringna tak tak an ichang hrang a ni.

²⁰O Timothe, ni chung a enkoltirna irnghat hi a sân vong irdîn roh. “Inhriatna dik,” tia an isong, dik ual loi, thu irkal, rammual mi tamtakin an irhnikpui ngai ata kha irkêm roh.

²¹Kha kha senkhatin an izôm sa, iamna lam ata an iboi tâk a ni, Pathian lungkhamna kha nin rênga kuanga om ri se.



2 Timothea

2 Timothea 1

Chubai mûkna

¹Paula, Krista Jisuaa hringna om inkungna thu insîrna tianga Pathian lungdoa Krista Jisua tirtôn khan

²Ki nâi lungthung tak, Timothea kuanga: Pathian ei Pa le Krista Jisua ei Rengpa khan lungkhamna hai, irngeina hai ni kuang om ri se.

Thurchi Sa iamom

³Sûn zâna ki chongchaina haia zoro tin nang kin hriat mai ngai sikin irchibulhai ata le sa inhriatna irthiang tak neia a sin ki tho ngai Pathian kuang lômthu kin sîr ngai.

⁴Ni mitrithîhai khom kin hriat maia, raifân taka irhmu nôk a sân ki'rzuk.

⁵Ni iamna detzia khom kin hriat mai ngai, ni pi Loisi inei le ni nu Euniki khomin a inei kha nang khomin ni nei a nih ti kin hriat.

⁶Kha sika khom khan ni chungna kut ki'rngat laia Pathian thilpêk ni idong kha sêm ir-al mai hrangin nang hril nôk ki inuam a ni.

⁷Pathian Irtha ei idong hin nin dôptir maka, hrâtna hai, lungthungna hai, mâni irseptheina hai a ni ipêk a ni.

⁸Ei Rengpa thu hi inpuang inzak no roh, ama sika lung in intâng khom hi nin zakpui ual no roh; Pathian hrâtna tûngin Thurchi Sa sika intak irhuam ual roh.

⁹Ei sintho sika ni loiin ama tum dân a ni ual sikin lungkhamna'n a ni saninhringa, irthiang taka hring hrangin a ni ikoi a ni. Krista Jisuaa khan irnêng irsiang mân daiha a lungkhamna kha a ni pêk tâka.

¹⁰Khannisian atûn hin, a ni saninhringtu Krista Jisua a zuanga khan, kha kha a hong inlang lik tâk a ni. Ama khan thina an hnê tâka, Thurchi Saa hin hringna le thi theiloina a hong inlang tâk a ni.



¹¹Kei hi kha Thurchi Sa inpuang hrangin Pathianin tirtôn le irchutirtu hranga inkung ki ni.

¹²Khasika khan kêng atûn khom hianga ki ituang a ni; khannisian inzak ma ung; ki iiam chu kin hriat, ki inkoltir kha, kha Nikhua khan, a vong insa indik tih kin hriat.

¹³Ki kuanga ta ni inhriat ngai irchutirna hrisêl kha a sân zômin lân, Krista Jisua iamnaa le lungthungnaa khan om ngit roh.

¹⁴Ni chung a irngat, thilpêk roiinpui tak kha, einia a om ngai, Irtha Irthiang hmangin a sân vong insa roh.

¹⁵Asia rama om mi murdihaiin an ni mâk ti nin hriat, Fugela le Hermogena hai dênin, an nir heisan ta ti nin hriat.

¹⁶Rengpa'n Onesifora in mihai kuanga lungkhamna pe ri se; anni khan voi iza an nin lômtira, lung ina ki intâng hi nin zakpui loiin.

¹⁷Rom khuaa a zuang tung le a ni hong zong suak kher a ni. Efesi khuaa khom a sân a ni changpui intamzia nin hriat infela,

¹⁸Rengpa khan kha Nikhuaa khan a lungkhamna kha indongtir ri se! Efesi khuaa ki ta hranga sin a ithozia khom nin hriat infel a ni.

2 Timothea 2

Krista Jisua sipai iamom

¹Ki nâipa, nang chu Krista Jisua lungkhamna hin nang inhrât ri se.

²Khan, hriatpuitu tamtakhai laia keima rengata irchutirna chong ni inhriathai kha, mi dang irchutir nôk thiai hrangin, mi iamomhai kuang inkoltir roh.

³Krista Jisua sipai iamomtak angin intak ni tuangpui sa roh.

⁴Sipai chu a hruaitu inlômtir hrangin hi rammual thil danga tomirzêl ngai mah.

⁵Mi intân irsiat khom dân ang taka an tân no'n chu lômman hmu thei no ni.

⁶Loimâna sin takirtâipu ngêt khan a ra a idong masa hrang a ni.



⁷Ki insîr hi ngaitua sabakin lân, Rengpa'n lam tinrênga inhriat thiamna nang pe a ti.

⁸Thurchi Sa ki hril ngai, Jisua Krista, Davida irchia mi, mithi lai ata thoi nôk tâk thu kha inhre mai roh.

⁹Kha Thurchi Sa sika khan intak ki tuanga, mi sual ang dêna thîrhruï ikhit ki ni, Pathian thu chu khit zât ni ma.

¹⁰Krista Jisuaa om, saninhringna kha, kumtuang roiinpuina le an dong theina hrangin irtanhai sikin, hihai murdi hi ki ituang a ni.

¹¹Hi thu hi a dik a ni: "A thina ei kop sa'n chu, A hringna kop sa ei ti.

¹²Ei tuangin chu, Ama leh roirêl sa ei ti. Ei hnôlin chu, ni hnôl a ti.

¹³Iamom no khom inlân, Ama chu iam a om maia, A bingin a'rphil thei no sikin," ti hi.

Sinthotu pomrua

¹⁴Hi thu hi mihai inhriattirhai roh, Pathian irhmingin hrilin lân, thu irchua irsêlna ngai hi masan ri sehai, inlâpna om maka, a'rngaituhai an siatna mai mai a ni.

¹⁵Nangin chu Pathian nuamlam mi, sinthotu, mâni sin inzakpui loi, thutak chu dik taka hmang theitu ni tum khak roh.

¹⁶Rammual mihai thu dukdakloi kha irheisan roh, kha khan Pathian ngaisak loina tiang mi a hruai ngai.

¹⁷Pân saloi angin an thu irchutir kha a zap ngai; an laia Humenaia le Fileta kha a bulpui an ni.

¹⁸Thutak chu an pêtsana, "Thoinôkna chu a om chian ta" an tia, mi senkhat iamna khom an irhmangtir ngai.

¹⁹Khannisian, Pathian lungphûm det tak kha chu inhnîng thei ma, ama khan hi chong hi irziak a om: "Rengpa'n ama tahai chu an hriat," iti le "Tukhom Rengpa ta ki nih ti murdi'n chu sual hnung a isongsan ngêt hrang a ni," ti hi.



²⁰In roiinpui taka bêlbûrhai khom rângachak le suma siam ni zit mahaia, pilsoia siamkhôm a ni, senkhat a hlu ual, senkhat hlu loi ual.

²¹Hi thil saloi ki insîrhai ata irkêm mi hi chu hmangrua hlu, in Neitupa hrangin hmang zât, irsûkinfâi diam, sin sa tinrêng sinna hranga hmang zôi thei hranga irsiam chak ang hi lei ni a ti.

²²Thoibop irzukna hai chu irheisanin lân, milung irthiang taka Rengpa irlamtuhai le felna hai, iamna hai, lungthungna hai, irngeina hai irzûl roh.

²³Hi isêlna inlâploi le invêtom hi irheisan roh, irdoina an suaktirna mai mai a ni.

²⁴Rengpa siahlo chu irhal a iuar hrang ni ma, tukhom inrenthei, irchuthei, mi tuangdiarthei a ini hrang a ni.

²⁵Ama doituhai khom tuangdiarthei takin a suiôi hrang a ni, thutak inhre hrangin Pathianin an lungrîl a irlettir zôi thei.

²⁶Diabola châng a in-ôk, a nuamlam a inthotir ngaihai kha hong suakin la hong har suak an ti.

2 Timothea 3

Sûn hnungkhôna mihai

¹Sûn hnungkhôna chu zoro intak tak la tung a ti, ti inhre roh.

²Mâni hrang satna zonghai, sum irngaiinnat hai, irsong hai, irpâkna hai, Pathian insîrinsiat hai, nu le pa thu zôm loihai, lômna neilo hai, irthiang loi hai,

³Irzirpui lungthungna nei loi hai, mi nunsia hai, mi hnôl ngai hai, irdîntheiloi hai, mi nunrông hai, mi that nuam hai, a sa nuam viat loi hai,

⁴Vârirlet hai, milung hrât hai, irngaiinhlu hai Pathian lungthung nêkin mâni lômna vai lungthung ualhai la suak an ti.

⁵A chungphua tiang chu sakho mi ang ni an ta, khannisianlân, a sêng tiang chu takna nei ual loihai la om an ti. Khaang mihai kha chu hnung songsanhai roh.



⁶Khahai laia mihai kha kêng in sũaga lũata, sual puakrik nupang into ualhai suaka a man ngai.

⁷Kha nupanghai kha irzukna tinrênga hruai irhmang, inhriat tum maia thutak inhre thei viat loihai an ni.

⁸Jannia le Jambria'n Mosia an idoi anga khan, kha mihai khom khan thutak hi an doi ngai, lungril siat zoi tâka, iamna lama khom Pathian nuamloina lam mi an ni.

⁹Khannisianlân, kha vai kha tho no ni, mi tinin an intozia an hmu hrang sikin. Kha tak kha, Jannia le Jambria chung a khom a itung a ni.

Timothea fũana

¹⁰Nangma'n chu irchutirna hai, ki om dân hai, ki thil tum hai, ki iamna hai, ki tuangdiarna hai nin hriat.

¹¹Antiokei-a hai, Ikoniona hai le Lustra khua haia dengitheina le intakna tak tak ki chung a zuang tunghai dengitheina hai ki ituang irkhêlzia le khatak ata Rengpa'n a ni isansuak thu hai kha nin hriat.

¹²Tukhomin Krista Jisua nunhoi tak anga om an tum photin chu dengitheini ngêt an ti.

¹³Mi sualhai le tho pa paihai chu an dongtum hong siat tũa tũa an ti, mi dang huang ngai khomsian anni ngei khom huang an ti.

¹⁴Nang chu, nir chu tâk, ni pom indet tâk kha te, chel khak roh, tu mo nang irchu nin hriat.

¹⁵Ni nũaipangte ata Lekha irthiang kha nin hriat sa tâka, Jisua Krista iam sika saninhriang ni hranga vũana nang a pêk thei ti nin hriat.

¹⁶Lekha thu murdi hi Pathian phũkkhum a nia; ir-en indikna hranghaiin, irsiaminsatna hranghaiin, nun dân dik irchutirna hranghaiin an lũap tak tak a ni.

¹⁷Khaanga hmangin kêng Pathian mi chu hmang inruk a hong nia, thil sa tinrêng thothei hranga irbel a hong ni ngai a ni.



2 Timothea 4

¹Pathian le Krista Jisua, mithi le mi hring roirêltu hrang makunga a zuang nôkna le a ram inhriatin thu nang ki pêk.

²Thu chu hril roh, zoro saa khom, zoro saloia khom, bei mai roh; tuangdiar taka irchutir pumin an dikloina irhmutirin lân, halirchu'n lân, inthor roh.

³Irchutirna hrisêl irngai nuam sabak loiin an nuamlam vai irngaiin an mikuar lût lam anga irchutirtuhai vai an koibuk zoro la tung a ti.

⁴Thudika an mikuar sungloia, thonthu mai mai irhnikpui an ti.

⁵Nang chu itinrênga irsepin lân, tuang zâm zâm roh; Thurchi Sa hrilna sin hi sin maiin lân, ni sinthôna sin kha sua roh.

⁶Kei chu inhlan hranga ti ki ni ta, rammual ata ki fe suak zoro a tung ta.

⁷Intân irsiatna sa kha chu ki zoi tâka, ki'rhlan na hranga kin tân suaka, iamna kha ki ivong chian a ni;

⁸atûn chu, thiamchangna, chôindômna lukhum kha, dong hrang vai ki hmabâk a ni ta; kha kha roirêl dik, Rengpa khan, kha Nikhuaa khan ni pe a ta, keima vai ni loiin ama lungthunga, a zuang inlang nôk lei nghâkhai murdi kuang khom pe sa a ti.

Mimal thu

⁹Ki kuang hong lat hrang hi lei tum zêl ta roh.

¹⁰Dema khan atûnlai rammual a'rngaiinnat sikin Thesalonika khua tiang a ni rotsan ta, Kreskea khom Galatia rama a fe ta, Tita kha Dalmatia rama a fe sa.

¹¹Luka vaiin a ni ompui. Marka kha, sintho lama ni thopty satak a ni, hong hruai roh.

¹²Tukika chu Efesi khuaa ki târ ta.

¹³Ni hong tika chu Troas khuaa Karpa kuang ki songkol irfual hong mâk kha hong lan lân, ki lekhabu le, savun lekha hai len vâng kha chu hong chôî ngêt roh.



¹⁴Alexander, dâr thîrsu kha ki chung a sual tak tak ngai; a sintho ang takin Rengpa'n thuan a ti.

¹⁵A kuang nang khom irdîn takin om ngai roh, ei thu'nsîr a idoi tak tak ngai kêng.

¹⁶Ki thiamna thu kin sîr phut laia khan tûte'n ni changpui maka, anni imâk zit a ni; Pathianin mô chu inphurtir no ri se.

¹⁷Khannisian, Thurchi Sa kha Jentailhai ta hranga kin sîr irkip theina hrangin Rengpa'n a ni ompuia, hrâtna a ni pêka, thi hrang tâk a ni ikêlsua nôk a ni.

¹⁸Rengpa'n sualna tinrênga irthokin ni kêlsua a ta, a vân rama khin hoi takin ni hruai a ti. Roiinpuina kha a kuang kumtuangin om mai ri se! Amen.

Inthâna thu

¹⁹Priskili le Akuila le Onesifora in sîng mihai kha chubai ni hong mûk pe roh.

²⁰Erasta kha Korinth-ah a la oma, Trofima chu a damno sikin Mileto-a ki mâk.

²¹Phalbi mân hong tum ngêt roh. Eubula hai, Pudea hai Lina hai, Klaudi hai le urêng murdi'n chubai nang an mûk.

²²Rengpa kha nir tha kuang om ri se. Pathian lungkhamna kha nin rênga kuang om ri se.



Tita

Tita 1

Chubai mûkna

¹Kei Paula hi, Pathian siahlo le Jisua Krista tirtôn, Pathian mi izenhai iamnaa kaihruai hrang le

²sakho lam thudik, kumtuang hringna sabeina chu, inhriattir hranga inkung ki ni.

³Milak tho ngailoi Pathian khan, kha kha irnêng irsiang mân daiha a lei inkung tâka, ama thu ang dênin sa a ti zoro taka a zuang inlangtir ta, a ni Saninhringtu Pathian thupêk anga, kha Thurchi Sa inpuangna sin kha inkoltir ki ni.

⁴Tita, ki irkoppui iamnaa ki nâi tak tak kuanga ki irziak a ni: Pa Pathian le ni Saninhringtu Krista Jisua lungkhamna le irngeina nang pe ri se.

Kret chômbunga Tita sintho

⁵Thil infel ban infel hrangin Kret chômbunga nang ki imâk a ni, thu nang ki ipêk ang khan kho tina upahai phun pehai roh.

⁶Upahai chu demnaboi, dôngma inkhat nei an ini hrang a ni; an nâihai khom iamtu a hoihôngna tianga sêlnaboi le tukullian ni no ri sehai.

⁷Koiindang hruaitu chu Pathian sêngkua enkoltu a nia, demnaboi ni ri se; mâni thu ringot nuam, milunginrem, zu'n rui mi, mi zêm song, porinche taka hlep nuam mi ni no ri se.

⁸Mi lôm dân thiam, insumthei, mi'nthîk, mi irthiang, mâni irsep thei mi ni ri se.

⁹Irchutirna dik takin mi an thor theina hrang le kha irchutirna sêltuhai kha thiamno an changtirhai theina hrangin irchutirna ang tak thurin iamom kha pom khak mi a ini sa hrang a ni.

¹⁰Dân ni loi anga om, thuhiril mai maihai le huangtuhai tamtak an oma, sertanhai laia mi an ni ual tak.



¹¹Khahai bái kha híp pehai hrang a ni; a sêngkua kuain mihai an inbuaihaia, sum hmu hrang sabein irchutir loi hrang hrang mi an irchutir ngaia.

¹²Kret mi ngei, anni deipu inkhat khomin, “Kret chômbunga mihai hi milak thei, sahrâng pualoi, thaboi rôluakhai an ni,” a iti hi thudik tak a iti a ni.

¹³Khasikin, iamna hrisêl an nei theina hrangin, na ianin irkôkhai roh.

¹⁴Judahai thonthu mai mai le thutak irheisan tâkhai thu zôm ta no ri sehai.

¹⁵Mi irthianghai ta hrangin chu itinrêng hi a'rthianga, mi porinchehai le iamna nei loihai ta hrangin chu ite hi irthiang om mah, an milung le an sia le sa inhriatna dênin a iporinche a ni.

¹⁶Pathian inhriatin an irtia, porinchehai, thu zôm loihai, thil tinrêng thôna lama Pathian nuamloi lamhai an ni, (an sintho khan a philhai ngai.)

Tita 2

Irchutirna hrisêl

¹Nangma'n chu irchutirna hrisêl ni irchutir mai hrang a ni.

²Putarhai chu insumthei, mahripom, irsepthei, iam dân dik, lungthungna nei mi le mi khonza thei ni hrangin inthorhai ro.

³Khaang dênin pitarhai khan an om lama Pathian chi mi ni hrangin inthorin lân, mi nuiso uar, uain indu mi ni no ri se; thil sa irchutir uar sianlân,

⁴nuvenghai chu an pasalhai le an nâihai lungthung mani,

⁵insumthei mani, irthiang mani, in sêng omlam sa mani, khonzâna mani, pasal thu zôm hranga an irsep theina hrangin inthor ro. Khanchu, Pathian thu chu hrilsiat a om lina hrangin.

⁶Khaang dênin pavenghai khom mâni irsep hrangin inthor roh.

⁷Nangma len vâng chu thil sa tinrêng thôna lama entonrua takin omin lân, mahripom tak le a sate'n mi irchutirin lân,

⁸chongbâi hoi, demna hrang om loi hmang ngai roh, a le tiang an inzakna hrangin.



⁹Suakhai chu lam tinrênga an puhai kuang irpelût hrangin inthorhai roh; an nuamlamin omhai sianlân, an ithuanhai tur hrang ni mah.

¹⁰An puhai neinun an inrûk hrang ni mah. Inrûk nêkin, Pathian ni Saninhringtu hi mihaiin an iam nuam theina hrangin itiklai khomin mi sa le iamom an nih ti an inlang ual hrang a ni.

¹¹Mi murdi saninhringa an om theina hrangin Pathian lungkhamna kha inlangtir a hong ni ta.

¹²Atûnlai zoro hin Pathian uksak loina le rammual tiang thil masanin mâni irvong infela, dik taka omhai le Pathian uksakna nunhai a ni'rchutira.

¹³Ei Pathian roiinpui taka a zuang inlangna nikho lômom ei isabei hi hlo'nchuk zoro ei inghâk a ni.

¹⁴Ama ngei chu ei ta hrangin a'rpêka, tho'nsualna tinrêng ata a nir tan suaka, ama mi hrangin a ni'rthiangtira, thil sa tho nuamna a ni ipêk a ni.

¹⁵Hi thuhai hi ni ihril hrang a ni, inthorin lân, irchamnei takin ngohai ro. Tûte'n nang ngainêp no ri sehai.

Tita 3

Thil sa tho mai hrang

¹Roirêltuhai le irchamneihai kuang irpelûta an thu zôm hrangin le lam tinrênga sin sa tho hranga irzoi diama om hrangin inhretir nôk roh.

²Tûte hrilsiat loia, irngeisîpa rual irchanga, mi tin chung a zâidam hrangin ti pe roh.

³Tiana khan chu eini khom inmôltak, tukullian tak, hruai irhmanga om, irzukna le inhoina chi tinrêng suaka om ei nia, mi hnarsaa êsêlin ei oma; nunse tak, irkhôkmâk irhlôm uar mi ei ni ngai.

⁴Aniachu, a ni saninhringtu Pathian khonzazia le a ni lungthungzia a hong inlanga khan, a ni saninhring ta.

⁵Eini'n thil ei tho'n sa sika ni loiin, a lungkhamna sikin, a ni saninhring tâka, siamtharnaa irsûkinfâi le Irtha Irthianga siamthar ei ni tâk a ni.



⁶A ni saninhringtu Jisua Krista zâra ei chungâ hin ar tha kha a bun intam ok tâka,

⁷khanchu lungkhamna sika thiam nin changtirin kumtuang hringna sabeina irchon luatuhai ei ni thei tâk a ni.

⁸Hi thu hi a dik a ni. Pathian iam tâkhai chu thil sa tho nuamna lungrîl an irput zêl theina hrangin hi thu hi uar hrangin nang ki nuam a ni; kha kha a saa, tu hrang khomin a inlâp a ni.

⁹Irsêlna kâmboi hai, irchibulhai sui sui hai, Dân thua irsêl irsêl hai masan roh; inlâpna nei maka, ar fêna om ual mah.

¹⁰Irsen indarna insuaktu chu voikhat voihni ngo'n lân irngaitua zui no roh.

¹¹Khaang mi kha chu lungrîl kôi siat tâk an nih ti khom an inhriat chian a ni.

Inthâna chongbe

¹²Artema mani, Tukika mani ni kuang ki hong tîr le chu Nikopoli khuaa ni hong pan lat roh, kha khan phalbi sêng chu om ki itum a ni.

¹³Zena, dân inhre mi le Apolova chu, an inzinna lampuia ite an irsam loina hrangin ni thei ang tôkin changpuihai roh.

¹⁴Ei mihai kha ra loia an om loina hrang le thil kâmom poimohai kha irsam loi hrangin sin tho nuam mai hrangin irchutirhai roh.

¹⁵Ki kuanga om murdihaiin chubai nang an mûk a ni. Iamnaa ei rualhai kha chubai ki mûk. Nin rênga kuang Pathian lungkhamna om ri se.



Filemona

Filemona 1

Chubai mûkna

¹Paula, Krista Jisua sika intângna ina intâng le ei urêngpa Timothea khan, kin sinthopui inditom tak Filemona hai,

²kin farnu Afii hai, kin sipaipui Arkipa hai ni ina inkhôm ngai Koiindang mihai chubai kin mûk.

³Ei Pa Pathian le Rengpa Jisua Krista kuang ata lungkhamna hai, irngeina hai nin kuang om ri se.

Filemona lungthungna le iamna

⁴Ki urêngpa Filemona, ki chongchai rikipa nang kin hriat mai ngai, ki Pathian kuang khom lônthu ki hril ngai.

⁵Ni iamna thu le Rengpa Jisua le mi irthianghai lung ni thungzia kin hriatin Pathian kuang lônthu kin sîr a ni.

⁶Iamna sika irpôlkhômnâ ei inei takna hin Kristaa khan satvurna tinrêng ei idonghai inhriat thiamna an thûk ual ki sabei.

⁷Urêngpa, ni lungthungna thu kin hriatin ki râi a fân tak taka, mi irthianghai lungrîl khom ni kaiinhar tâk sikin ki'rtha a'rngam ruam ta a ni.

Paula'n Onesima a ngên pena

⁸Hi sik taka hin Kristaa urêng ei inina ni itho irhoi tho hrangin thu nang pe ngam khom inlân,

⁹ni lungthungna inhriatin, keima Paula, atûn Krista Jisua sika intângna ina intâng hin, a ngênin nang ki ingên a ni.

¹⁰Khaang khan, intângna ina intânga ki om laia Kristaa ki nâi Onesima ta hrangin keima irtha tianga pa hin ni kuang ki ingên a ni.

¹¹Matona khan ni ta hrangin hmanghmunboi ni khomsian, atûn chu ki ta hrangin a sân a nang tâka, ni ta hrang khomin nang ta ti.



¹²Ki inuampuina lungrîl tak takin leh hi pa hi ni kuang ki hong tîr nôk a ni duah.

¹³Thurchi Sa sika kin tâng sîng hin nangma irthûla ni changpui hrangin ompui mai ki nuam tak taka.

¹⁴Khannisianlân a sa ni ti no'n chu ite tho tum ma ung; lungthungna chu nangma ata suak ngei ni sian tih ki nuam sikin, ama hi nang khappai pe ki inuam loi a ni.

¹⁵Idôr ten sîng mani nang a irotsan hi kumkhuaa ni kuanga ngam patna irthûl ni a ti.

¹⁶Atûn chu, suak ang ni ta loiin, suak nêka hlu tak, urêng inditom tak a ni ta, ki ta hrangin a satak taka, ni ta hrang khomin taksa tiang le Rengpaa sa nôk ual ngêt a ti.

¹⁷Khasika khan, ni sinthopuiin ni ni bê tak takin chu keima ang dênin ama hi lei lôm roh.

¹⁸Ni kuang ata sininchâi mani, a intâng mani a omin chu keima'n nang thuan hrangin lei insâp roh.

¹⁹Kei, Paula hin keima kut ngêta irziakin nang thuan ki ti, ki iti hi. Nangma ngei ki kuanga ni intâng ti ual chu ni ma ung.

²⁰Khanchu, urêngpa, Rengpa sikin hi thil hi ni tho pe'n lân, Kristaa khan ki lungrîl nin lômtir roh.

²¹Nang ki ingên hi hlo a chuk ngêt sakei ngitin ki irziak a ni, ki sakei nêka irkhêlin ni itho lele ki iam sa a ni.

²²Nin chongchaina hai kha sâmin nin kuang ki hong isuak ki sakei a ni, ki tungna hrang in ni lei ngaitua pe ro.

Inthâna chubai

²³Epaфра, Krista Jisuaa, intângna ina ki intângpui hin chubai nang a mûk.

²⁴Ki sinthopui Marka hai, Aristarka hai Dema hai le Luka hai hin chubai nang an mûk.



²⁵Ei Rengpa Jisua Krista lungkhamna kha nin rênga kuang om ri se.



Hebrai

Hebrai 1

Pathianin a Nâipa thu an sîrna

¹Tianlai khan Pathianin ei irchibulhai kuang a deipuhaia zoro tamtakin lam tinrênga thu a lei insîr ngaia.

²Khannisianlân, sîn hnungkhônhai hin chu ei kuanga a Nâipa thu an sîr ta. Amaa khan Pathianin irnêng le irvân a siama, khabana ama kha sîn hnungkhônhaia chu thil tinrêng dong zit hrangin a iphun a ni.

³Ama chu a Pathian roiinpuina vâ le, a tak angpui ngei le, ama sinthotheina thua itinrêng indingtu neiin, sualhai a'rthiangtir hnungin chung tianga Roiinpuetak chang tianga khin a hong toi ta.

Pathian Nâipa chu vântîrtônhai nêkin a roiinpui ual

⁴Vântîrtônhai irhming nêka irhming roiinpui a nei tâka, khanchu anni nêkin a roiinpui ual a ni.

⁵Pathianin hi chong hi vântîrtônhai kuang ti viat ngai mah, “Nang chu ki Nâipa ni ni; A vuan sîn hin ni Pa ki hong ni ta,” ti hi. Khabana, Pathianin tu vântîrtôn thu khom insîrin, “Keima a Pa ni ki ta, Ama kha, ki Nâipa ni a ti,” ti chong hi ti ngai mah.

⁶Kha nêkin, Pathianin a Nâi lutîr kha rammuala a zuang tîr hrang laiin, “Pathian vântîrtôn murdihaiin Ama chubai an imûk ngêt hrang a ni,” a iti ual a ni.

⁷Vântîrtônhai chungchâng chu Pathian Thu'n hiang hin a ti, “Pathianin vântîrtônhai chu phâivua'n a siam ngaia, A sinthotuhai meichokin a siam ngai,” a tia.

⁸Nâipa chungchâng rêk chu Pathianin ama hi a iti a ni, “O Pathian, nin lalna ram chu kumtuangin om mai a ti! Ni mihai chung felna'n roi ni rêl ngai.

⁹Thudik nir ngai inhlua, thudikloi ni hnôl ngai. Khasikin Pathian, ni Pathian khan nang inthangin ni hmêlhai nêkin chôiirsâng raifâna nang a ipêk ual ok tâk a ni hi,” ti le.



¹⁰“Nang Rengpa’n a phuta irnêng ni siama, irvân khom ni kut ngeia ni isiam a ni.

¹¹Khahai kha la boi an ta, nang chu om mai ni ti; Khahai kha silkai angin la milui an ti.

¹²Puan angin inzuat ni ta, Silkai angin thûl ni ti. Nang chu a ngai dên nih ni ta, Ni kumhai khom boi no ni,” tiin.

¹³Pathianin vântîrtônhai laia tûte kuang hi chong hi ti ngai mah: “Ni râlhai ni kezapha sianaa ki siam mâka chu, Ki chang tiang hin toi roh,” ti hi.

¹⁴Khante, vântîrtônhai hi imo an ni? Vântîrtônhai chu irtha Pathian sinthohai an nia, saninhringna hmu hranghai changpui hranga tîr suakhai an ni.

Hebrai 2

Saninhringna Roiinpui

¹Khasikin hruai irhmanga ei om nona hrangin thutak ei inhriathai kha ei intûk indet ngit hrang a ni.

²Vântîrtônhaiin ei irchibulhai kuang thu an lei intung lua kha a dika, tukhom a zui loi le a zôm loi ka chu hremna an ihmu rua an hmu zel ngai a ni.

³Hiang dôra saninhringna roiinpui vâng hi te uksak loiin tho inlân, itin mo ei irbîk thei hrang? Hi saninhringna hi a phuta Rengpa’n an puanga, kha hnung ama inhriathaiin a dik tih an ni ifia pe nôk a ni.

⁴Pathian khomin sinirkhêl chi tinrêng le thilirkhêlhai sin le ama lungdoa Irtha Irthiang thilpêkhai semin khahai kha an hriatpui sa.

Saninhringna lama ei hruaitu

⁵Pathianin vântîrtônhai kha rammual thar la hong om hrang ei insîr chungaroirêltu hrangin se mah.

⁶Kha nêkin chu, kho hmuna mani, Pathian Thubua lei iti angin: “Mihriam hi imo a nia, O Pathian, ni inhriat mai ngai; Mihriam nâipa khom hi imo a nia, ni ikan ngai?”



⁷Ama chu vântîrtônhai nêka irhnuai ualin ni siama, Roiinpuina le chôindômna nin khumtira,

⁸thil itinrêng chung a roirêlpu'n ni siam ta," ti'n irziak a lei ni. Pathianin mihriam hi, "Thil tinrêng chung a roirêlpu'n a siama," a ti sikin lam tinrêng a huap zit ti a fela. Aniachu, atûn hin chu itinrêng thu hnuaia omin la hmu ual mak meh.

⁹Khannisianlân, Jisua sôtnote hranga vântîrtônhai nêka irhnuai uala siam kha ei ihmu a ni, Pathian lungkhamna sika mi tin ta hranga thi hrangin. Thina a tuangna sika khan roiinpuina le chôindômna inkhumin atûn hin ei ihmu tâk a ni.

¹⁰Pathian, thil tinrêng siampu le indotpu ta hrangin chu, ama roiinpuina dong sa hranga nâi tamtak a hong hruaihai theina hrangin. Jisua khah dengitheina tuang sika famirkiptira siam hi a idik a ni. Jisua chu saninhringna tianga mihai hruaipu a ni sikin.

¹¹Irthiangtirtu le irthiangtirhai chu Pa hmun khata suak an ni. Khasikin, Jisua'n annihai kha urêng hai ti inzak mah:

¹²Pathian kuang, "Ki urêng hai kuang ni sinthohai insîr ki ta, An inkhômnaa nang inpâk ki ti," a ti.

¹³"Pathiana ki iamna irngat ki ti," a ti nôk, Pathianin, "Nâipang a ni ipêkhai leh hin kin om," a ti nôk sa.

¹⁴Jisua'n nâipang a ikoihai kha taksa le thisen nei an ni sikin, ama ngei khom anni anga zuang omin an mihriam nitna a zuang inthangpui sa a ni. Kha a zuang thô nasan tak chu thina chung a irchamneitu Diabola kha ar hmangtir theina hrang le,

¹⁵thi chia dam sûnga suaka om murdihai kha a sansua theina hranga a ni.

¹⁶A ichangpui ngai kha vântîrtônhai ni mah ti a fel. Pathian Thu'n, "Abrahama irchihai a changpui ngai," a ti sikin.



¹⁷Khasika khan Pathian sin a thôna khan mihriamhai Ochai Inlaltak, iamom le lungkhamnaa sip a hong nia, an sualhai ngaidam a ni theina hrangin lam tinrênga a urêng hai angin a inang pial a ni.

¹⁸Ama ngeiin thêмна tongin a lei tuang tâk sikin, atûn chu thêмна tonghai a changpui thei ta.

Hebrai 3

Jisua chu Mosia nêkin a roiinpui ual

¹Ki Kristian urêng, Pathianin a ikoihai! Ei iamna lama ochai Inlaltak ni hranga Pathianin a itîr Jisua kha ngaitua roi.

²Pathian in sîng mihai laia Mosia iam a iom ang khan, ama khom hi sin tho hranga an thangtu Pathian kuang iam a iom a ni.

³In sintu khan a in nêkin chôiindômna a idong ual ngai ang khan, Jisua hi Mosia nêkin roiinpuina dong ual ok inruk a ni.

⁴In tin hi tu mo khat isin mani chu a ni ngêta, thil tinrêng chu Pathian isiam a ni.

⁵Pathian in sîng mihai laia tirtôn chu Mosia kha iamom tak a nia, Pathianin sîn matona a la iti hranghai kha a lei insîr a ni.

⁶Krista rêk chu Pathian in sîng mihai chung a Nâipa'n iam a iom a ni. A in sîng mihai chu einihai hi ei ni, ei ihâina intûk indetin ei itûng hi ei irngat ngit ngânin chu.

Pathian mihai ta hranga irngamna

⁷Khasikin, Irtha Irthiangin, "A vuan sîn Pathian hnukirhai nin inhriatin chu,

⁸Nin irchibulhaiin ramchâra inthêмна nia, Pathian an innuartir lai ang khan, Nin lungrîl inngartir no roi;

⁹Pathianin kha hmun khan nin irchibulhaiin, An ni fia'n, an ni inthêma, Kum sômminli sînga ki sinthohai an hmu khomin.

¹⁰Khasikin, kha irchihai chung a khan ki ning an mura, 'An lungrîlin a hruai pêta, Ki lampuihai khom inhre ta mahai,' ki tia.



¹¹Ki ninginmurna sikin chonginkung ngar tak ki neia, 'Ki'rngamna hrang rama khan lût viat no ni,' ki tia," a iti ang khan.

¹²Urênghai, Pathian hring kha hnungsong hrangin nin laia tûte'n iam loina lungrîl sual nin nei loina hrangin irdîn roi.

¹³Khaang khan, nin laia tûte sual huangna sika milung ngar nin om loina hrangin Pathian Thubu'n, "A vuan sîn" ti a ni hmang pe sîng ka chu a ni tin irthor irhlôm mai roi.

¹⁴Ei irngat phutna kha a mong dênin ei intûk indet ngânin chu Krista leh Pathian satvur dong hranghai ei ni ta.

¹⁵Ama hi Pathian Thubu'n a ti; "A vuan sîn Pathian hê nin inhriatin chu, Nin irchibulhaiin ama doia an irhel ang khan, Nin milung inngar no roi," ti hi.

¹⁶Tuhai mo Pathian hê inhriat hnunga tehel zong kha? Aigupta rama irthoka Mosia'n a ihruai suakhai kha an ni.

¹⁷Tuhai chung a mo kum sômminli sînga Pathian ning a inmur kha? Sual sina ramchâra thi tâkhai chung a khan a ni.

¹⁸Tuhai mo Pathianin chonginkung ngar tak neiin, "Ki'rngamtirna hrang rama khan lût viat no nihai," a iti kha? Tehel zonghai murdi kha an ni.

¹⁹Khaang khan, an iamno sikin kha rama khan lût thei mahai tih ei ihmu a ni.

Hebrai 4

¹Atûn hin Pathianin kha irngamnaa nin lût hrangin chonginkung a ni ipêk a ni. Khasikin, nin laia tûte kha irngamnaa lût theiloï nin om loina hrangin irdîn ei ti.

²An inhriat ang takin Thurchi Sa chu eini khomin ei inhriat. Thu chu an inhriat, khannisianlân, an thuin hriathai khan ite ar fêna hmu mahai; asan chu, thu an inhriat kha iamna'n an pom no sikin a ni.

³Eini a iamhai chu, Pathianin a inkung irngamnaa khan ei ilût mai a ni. "Ki ninginmurna sikin chonginkung ngar tak ki neia, Ki'rngamna hrang rama



khan lût viat no ni,” a iti ang khan. A sinthohai kha irnêng le irvân irsiang phuta a izoi tâk ni khomsian, kha chong kha a la iti a ni.

⁴Pathian Thubua, “Kho hmuna mani sîn sari ni’n chu Pathianin a sintho murdi ata a’rngam ta,” tiin.

⁵Kha thu zôm dênin: “Ki’rngamtirna hrang rama khan lût viat no ni,” a ti nôk.

⁶Thurchi Sa lei inhriat masahai khan an iam lolina sikin, irngamna Rama lût ta no nihai, mi dang la lût hrangin phalna a la iom a ni.

⁷Khaang khan, Pathianin “A vuan sîn” tiin nikhua dang an kung nôka, kum tamtak hnunga Davida hmangin matona a lei iti tâk, “A vuan sîn Pathian hnukirhai nin inhriatin chu, Nin milung inngar no roi,” ti kha a ti nôka.

⁸Josua’n mipuihai kha irngamna a lei ipêk thei ni sianlân chu, Pathianin inhnunga khan nikho dang thu insîr ta no ni.

⁹Khasikin Pathian mihai ta hrangin chu sîn sari nia Pathianin a irngam ang khan irngamna kha a la iom mai a ni.

¹⁰Tukhom kha irngamnaa lût chu Pathianin a sintho ata a irngam ang khan ama khom a sintho ata irngam a ti.

¹¹Tho, khasikin anni anga iam lolina sika chuk loa om loiin irngamna khan ei lût theina hrangin a sîn irnak song ei ti.

¹²Pathian thu chu a hringa, sin a tho theia, i ang dôra khandai hriam ngaih tak nêk khomin a ngaih uala, hringna le irtha irbunnahai, ru’rbun le irtin hai dênin a sunkhoi chit theia, lungrîla ngaituana le tumnahai hi an hriat thei zôi zel ngai a ni.

¹³Pathian hrangin chu ite thil irthup om mah, thilsiam tinrêng hai khom a mithmu’n chu inlang pharin ar hong zit ngai a ni. Ama kuang ngei ei sik senga thurchi ei la insîr hrang a ni.

Jisua Ochai Reng roiinpui tak

¹⁴Pathian omna irvâna fe tâk, Ochai Reng roiinpui tak Jisua, Pathian Nâipa kha ei nei sikin ei thurin hi intûk indet ngit ei ti.



¹⁵Ochai Inlaltak ei hrât nonahai le inhre phâkpui theiloi mi nei mak mea, eini anga lam tinrênga thêмна tong tâk, khannisian, sual chu sual loi kêng ei ini.

¹⁶Tho, khasikin za'rngaina le changpuina ei intak tika ei hmu theina hrangin Pathian lungkhamna rêngtoihmun kha hâi takin pan ei ti.

Hebrai 5

¹Ochai Inlaltak murdi'n chu, sualhai sika irbôlna le thilpêkhai inhlana mihriamhai irthûla Pathian sintho hranga mihriamhai laia irthoka phun an ni.

²Khahai khom kha lam tamtak ata an hrât nona sikin, ite inhre loihai le an sualhai chung a khan an indîn thei ngai.

³Khasikin mi danghai ta hrangin sual irbôlna an inhlân ang khan an mâni ta hrang khomin an inhlân ngêt hrang a ni.

⁴Chôiindômna dong nuamin tûte Ochai inlaltak chang thei ngai mah. Arona anga Pathian ikoihai vai kêng ochai inlaltak a ichang thei ngai.

⁵Khaang khan, Krista khomin ochai inlaltak ni sika chôiindômna kha ama ta hrangin la mah. Khannisianlân, Pathianin a kuang, “Nangma ki Nâipa ni ni, a vuan sîn hin ni Pa ki hong ni tâk,”

⁶Hmun danga, “Melkisedeka angin nangma Kumtuangin ochai ni ni ti,” a ti sa.

⁷A taksa irput lai sînhaia khan Jisua'n thina irthoka ama saninhring theitu Pathian kuang a sâna inringa khêkin le ngênna hai a neia, irngaiintôma ar pêkna sikin irngai pe'n a om.

⁸Pathian Nâipa tak ni khom sianlân, a tuangnahaia khan thu zôm a irchu a ni.

⁹Irkiptir a hong ni tena chu a thu zômhai ta hranga saninhringna hnâr a hong ni ta.

¹⁰Khaang khan, Pathianin Melkisedeka anga kumtuanga ochai inlaltak ni hrangin an kung ta.

Tûkna ata irdîn hrang



¹¹Hi thua hin insîr hrang tamtak ei nei, khannisianlân, an sîr infel an tak, nin inhriat thei no sikin.

¹²A zoro ngaitua'n chu irchutirtu ni thei ta zit le nin irhoia, khannisianlân, Pathian thu bul rêt A, B, CH ata irchutir nin nang nôk tâk a ni. Bu'nhrum ni loiin irhnutui lan nang kêng nin ini.

¹³Tukhom irhnutui lan nang chu, sia le sa lan hriat loi, nâite a ni.

¹⁴Bu'nhrum chu ulianhai, an tho inzong sika a sa le a sia sen thei tâkhai hrang a ni.

Hebrai 6

¹Tho, khasikin Krista thu bul insîr ta loiin, maton tiang fe'n puihling lam pan ta ei ti. Sin chanlamboi thina intung ngai ata irleta Pathian iam hrang lam hai,

²baptisma le kut irnghatna chungchânga irchutirna thu hai, thoinôkna thuhai le kumtuang roirêlna thuhai lungphûm chu phûm nôk ta no ih.

³Maton tiang fe ta ei ti! Pathianin sa a tiin chu kha kha ei itho ngêt hrang a ni.

⁴Khan, voikhat chu Pathian vâra om tâka, irvân thilpêk irtem tâka, Irtha Irthiang khom dong tâka,

⁵Pathian thu satzia le zoro la hong hranga sinthotheina om hrang hai khom inhriat tâka,

⁶an iamna mâk nôkhai chu irlet nôk hranga hong kêr nôk thei zât ni ta mah. Anni khan Pathian Nâipa kha hembe nôkin mualphoi an sak sikin.

⁷Irnêng, a chung a rotui tâk ngai lei donga, a neitu ta hranga chîmu fâk rua insuak tâk chu Pathianin sat a vur ngai.

⁸Khannisianlân, kha irnêng khan ilhling le hloi an suaktirin chu chanlamboi a nia; Pathian khomâksâm ichiomin a oma, inhnunga chu hâl irhmang a ni ngai.



⁹Khannisianlân, rual lungthunghai, khang khan ti khom inlân, nangni chu satvurna sa kin inhriat infel.

¹⁰Pathian chu felloi ni mah. Ama ta hranga sin nin ithohai, lungthungna nin inlanghai, nin Kristian chanpuihai nin lei ichangpui le atûn ten khom nin la ichangpui maihai kha irnghil viat no ni.

¹¹Nin itûng a hong tung indik theina hrangin nin sika nin takirtâina chit insua mai hrangin kin inuam tak tak a ni.

¹²Nin irtha inboi loiin iamna le tuangdiarna sika Pathian inkung hmuhai om dân kha irchu hrangin nangni kin inuam sa a ni.

Pathian chonginkung iamom

¹³Pathianin Abrahamama kuang chong an kung laia khan ama nêka roiinpui ual tûte an om no sikin, ama irhming sâmin khomâk ar sâma.

¹⁴Pathianin Abrahamama kuang, “Sat nang vur ki ta, irchi tamtak nang pe ki ti,” a tia.

¹⁵Abrahama’n a tuangdiar sikin Pathian inkung kha a ihmu a ni.

¹⁶Mihriamhaiin khomâk an irsâmin, anni nêka roiinpui ualhai irhming sâmin an irsâma, an irkhalna tinrêng khom an mong ngai.

¹⁷Pathianin a inkung hmu hranghai kuang khan a thil tum indanglam viat no ni, ti infel pe ual nuamin a chonginkung kha khomâk irsâmin a indet a ni.

¹⁸Khasikin Pathianin thil inhni a chonginkung danglam loi hrang le khomâksâm irkhêl loi hrang hmangin eini a kuanga zôkna hmuhai hin ei matona tûngna om hi intûk indet ngit hrangin a nin thor tak tak a ni.

¹⁹Kha tûngna kha ei hringnun hrangin thîrkuaikim ang kha a ni. Det tak le iamom tak a nia, irvân biak in puanzâr sûnga hmun irthiang khoma khan a lûta.

²⁰Ama khan Jisua’n ei irthûlin ei matona a lei lût tâka, Melkisedeka angin kumtuang ochai inlaltak a lei ni ta.

Hebrai 7



Ochai Melkisedeka

¹Hi Melkisedeka hi Salem rêng le Pathian Inchungtak ochai a ni. Abrahamama rêng minliai inhnê zoia râl buala irthoka a hong tiang Melkisedeka hin a'rtongpuia, sat a ivur a ni.

²Khanchu, Abrahamama'n thil tinrêng sôma inkhat a pêk ta. (Melkisedeka irhming omzia masa chu "Felna Reng" a nia, khabana Salem rêng a ni sikin "Irngeina Reng" a ni sa.)

³Melkisedeka pa mani, nu mani, ar chibulhai mani, irziak zel om maka; a suak ni le a thi ni khom irziak om sa ma. Pathian Nâipa angin ochaiin a iom mai a ni.

⁴Irngai u ta, idôra roiinpui mo a ini; Ei irchibul Abrahamama luan a râlhai thil tinrêng sôma inkhat a ipêk kha.

⁵Levia irchihai laia ochai changhai kha, Israelhai kuanga irthoka sôma inkhat la hrangin Dânin thu a ipêk a ni; ama kha an ram mihai kuanga irthoka a ni, an ram mihai kha Abrahamama irchi ngêt nihai khomsian an itho a ni.

⁶Melkisedeka kha Levia irchi ni mah, khannisianlân, Abrahamama kuanga irthokin sôma inkhat a lâka, Pathian chonginkung hmutu kha sat a ivur a ni.

⁷Lunghlâna om viat loiin, satvurna dongtu nêkin a vurtu a roiinpui ual.

⁸Ochaihahi chungchânga chu a thi thei mihriamhaiin sôma inkhat an lâka, khannisian, Melkisedeka chungchânga chu, Pathian Thubu'n a hring mai a ititu'n sôma inkhat a ilâk a ni.

⁹Khan, Abrahamama'n sôma inkhat a pêka khan, Levia sôma inkhat la ngaitu khomin a pêk sa ti thei a ni.

¹⁰Melkisedeka'n Abrahamama a'rtongpui laia khan Levia kha la suak maka, ar chibul Abrahamama takpum irzoma a la om mai sikin.

¹¹Israelhai kuanga khan Levihai ochai nina hnuaia Dân ipêk an ni. Khahai sintho kha a sa irkip a ni'n te, Arona anga ni loiin Melkisedeka anga ochai dang hong om ite a nangna om mah.



¹²Ochai ninaa khan danglamna a hong omin chu dâna khom danglamna a hong om ngêt a inang a ni.

¹³A thuhai insîra om ei Rengpa chu nam dang a nia, a nam laia mi tûte ochai chang ngai mah.

¹⁴Ei Rengpa chu Juda nama irthoka zuang irzir a nih ti inhriat infel a ni, Mosia'n ochai chungchâng thu an sîr laia khan hi nam hi sâm mah.

Melkisedeka anga ochai dang

¹⁵Ei thu'nsîr kha a hong fel ual ta; Melkisedeka anga ochai dang a hong om ta.

¹⁶Ama kha mihriam dân balama siam ni loiin, mong ngailoi hringna sinthotheinaa ochaia siam a ni.

¹⁷Pathian Thubu'n, "Nang chu, Melkisedeka omdân anga kumtuangin Ochai ni ni ti," a iti ang khan.

¹⁸Balam milui kha a hrât no sik le a hmangna boi sikin pai a ni ta.

¹⁹Mosia Dân khan ite satirkipin a siam thei no sikin. Atûn chu tûngna sa ual pêkin ei om tâka, Pathian ei nâi thei ta.

²⁰Khabana, Pathian khomâk irsâmna khom a om sa ta. Mi danghai ochai chang laia khan chu, khaanga khomâk irsâmna kha om ngai mah.

²¹Khannisianlân, Jisua chu Pathianin a kuang, "Rengpa kha khomâk ar sâmna, A milung inchong thûl ta no ni: Nangma kumtuangin Ochai ni ni ti," tia khomâk irsâmin ochaiin a isiam a ni.

²²Khasikin kha danglamna khan Jisua chu thuthung sa ual inkungtu'n a isiam tâk a ni.

²³Danglamna dang a la om sa: mi danghai kha chu thina sikin an om mai thei ngai no sikin, ochaia siam kha tamtak an ni.

²⁴Khannisianlân, Jisua chu Kumkhontuangin a hring mai sikin a ochai sin kha tûte'n thûl mahai.



²⁵Khasikin amaa Pathian kuanga honghai chu atûn le itiklai khomin a saninhring thei, anni ta hranga Pathian kuang ngên pe hrangin kumtuangin an hring mai sikin.

²⁶Khaang khan, Jisua Ochai Inlaltak mi'rthiang, demnaboi, سوالنا neiloj, mi سوالهاي laia irthoka a binga om, irvânhai nêka inchung uala siam tâk chu ei ta hrangin a iruk bak a ni.

²⁷Ama kha ochai inlal danghai angin ni maka; ochai inlal danghai chu a nitin an سوالنا sikin irbôlna an inhlan baka, kha hnung kêng mihai hrang an la inhlan pe ngai. Khannisianlân, Jisua chu ama ta hrangin nang mah sikin, voikhatin ama ar hlan laia khan irbôlna inkhatin a irzoitir zit a ni.

²⁸Mosia Dân khan mihriam, irsamna neihai kha ochai inlaltakin a phun ngaia, khannisianlân, Pathian khomâk sâmnâ chonginkung, Dân hnunga zuang om khan chu Nâipa, kumtuanga irkip tak kha a iphun a ni.

Hebrai 8

Jisua, ei Ochai Inlaltak

¹Ei insîr laia a poimo tak chu ama hi a ni: Khaanga Ochai Inlaltak, irvâna Reng Roiinputak rêngtoihmun chang tianga hong toi ei inei a ni.

²Mihriam isin ni loj, Rengpa isin biakbuk tak tak Hmun Irthiang taka Ochai Inlaltakin sin a itho a ni.

³Ochai inlalthai ka chu thilpêk le irbôlna Pathian kuang inhlan hranga phun an nia, khasikin ei ochai Inlaltak khom hin inhlanrua mani chu a nei ngêt a inang a ni.

⁴Irnênga om sianlân chu, ochai zel ni viat no ni; Juda Dân ti lama thilpêk inhlan ngai ochai an om sikin.

⁵Anni sintho ngai kha chu irvân thilhai millim le irlim ka kêng a ini. Mosia'n biakbuk a sin hrang laia Pathianin a kuang, "Ni sin hrangzia chu tânga enirkhîna a'rlim ni ni ihmu ang zeka sin hrangin ngaitua roh," tia hril angin.



⁶Khannisianlân, atûn chu, anni nêka an chung ual ochai sin kha Jisua ipêk a ni ta, thuthung, Pathian le mihriam kêra a irfûk kha a isa ual ang khan, kha thuthung kha thil sa ual inkungnaa inding a ni tâk sikin.

⁷Thuthung masa kha ite demna boi a ni'n chu, an hnina hong iom kha ite nangna om mah.

⁸Khannisianlân, Pathianin a mihai fel lolina a hmu sikin, hiang hin a ti. "Nikhuahai kha a hong itung hrang tâk, Israelhai le Judahai thuthung thar ki siam pe hrang nikhuahai kha.

⁹An irchibulhai Aigupta ata hruai suak hranga an kuta kin tûk nia ki thuthung siam ang khan ni ta no ni. ki thuthung siama khan iamom maka, Khasikin anni kha ki uksak ta loi a ni, Rengpa'n a ti.

¹⁰Nikhua hong tung hranga Israelhai kuang thu ki ithung hrang chu hi hi a ni. An milung sûnga ki dânhai sia ki ta, An lungrîla irziak sa ki ti. Keima an Pathian ni ki ta, Annihai kha ki mihai ni an ti.

¹¹Khanchu, tûte'n, Rengpa kha inhre ro, tia mâni bômhai mani, mâni ram mihai mani an irchutir nang ta no ni. A chîn taka irthokin a lian tak dênin an nin hriat hrang tâk sikin.

¹²An sualhai ngaidam ki ta, an inchâinahai inhre mai ta no ning, Rengpa'n a ti," tiin.

¹³"Thuthung Thar," a ti sikin a masa kha chu a inmiluitir tâk a ni; khang khan, thil milui hmang sa taloi chu boi zit ta a ti.

Hebrai 9

Irnêng le irvân chubai mûkna

¹Khan, thuthung masa khom khan chubai mûkna dânhai le mihriam siam chubai mûkna hmun a neia.

²Biakbuk an siama, chontan masa kha meiser an siana hai, maichâma baihai Pathian kuanga inhlân tâkhai a oma, kha kha Hmun Irthiang an tia.

³Puanzâr inhnina sûnga khan biakbuk Hmun Irthiang tak an iti chu a ni.



⁴A sũaga khan mirimhoi hũana hmun rũagachak maichâm le rũagachak inluan Thuthung Bôm a oma; kha Thuthung Bôm sũaga khan mana omna rũagachak kola hai, Arona khianghrol hong incher hai le thupêk irziakna lungphêk inhnihai kha an oma.

⁵Kha Bôm sũaga khan Pathian roiinpuina inlangin Cheruphai kha soal ngaidamna hmuna an mitha pharin an om sa. Khannisianlân, atún chu kha thurchi kha a kip a kôiin insîr thei ni no ih.

⁶Kha thilhai kha hiang hin an lei irfûktir a ni. Ochaihai kha a nitin Biakbuk chontan masaa khan an sintum sin hrangin an fe ngaia.

⁷Khannisianlân, Biakbuk sũagrila khan chu Ochai Inlaltak vai a kuma voikhat thisen chôi ngêtin a lût ngai. Kha a thisen chôi kha ama hrang sik le mipuihaiin an inhriat loi kũara soal an isinhai hrang sika khan Pathian kuang an hong inhlan ngai.

⁸Hi irfûktirna murdia irthoka hin Irtha Irthiangin ar chutira; “Biakbuk chontan masa kha a la om sũag ka chu, Hmun Irthiang Tak lampui kha la’rhong mah,” ti hi.

⁹Kha kha atúnlaia entîrna a ni. A omzia chu thilpêkhai le irbôlhai Pathian kuang inhlan khan, a bêtu lungrîl famirkip thei mah,

¹⁰fâk hrang, i-in hrang le irthârna balam tamtakhai thu vai a ni sikin. Khahai murdi kha pên tiang dân ringot an nia, Pathianin thupêk thar a pêk mũaka hmang hrang a ni.

¹¹Khannisianlân, Krista chu thil sa, hitaka lei om pial tâkhai ochai Inlal takin a izuang a ni. Biakbuk, sin a thũana ngai kha a roiinpui uala, a famirkip ual; mihriam isin biakbuk ni mah, ama kha hi rammuala thilsiam laia mi ni mah tihna a ni.

¹²Krista’n biakbuk chontan masa khũala Hmun Irthiang tak voikhatin a lût pat lai khan, irbũana hrangin kũalhai le sehrâthai thisen chôi maka, ama thisen ngei chôiin ei ta hrangin kumtuang saninhringna a ni irhmu tâk a ni.



¹³Kêlhai le sehrâtchahai thisen le se'rla irvâm porinche chung a inthek luan an taksa innimna infâi pêkin an irthiang theiin te,

¹⁴Krista thisen len vângin te a ithei ual ok hrang kêng! kumtuang Irtha hruaina'n Pathian kuang ama irbôlna famirkip ar hlan tâk sikin, Pathian hring sin ei tho theina hrangin a thisenin thina ten intung sintho ngaihaia irthokin ei sia le sa inhriatna irthiang a ti.

¹⁵Hi sika hin Krista hi thuthung thar irfûktirtu a ni, Pathianin a ikoihai khan kumtuang satvurna a inkung kha an hmu theina hrangin. Kha a ni theina chu thuthung masa a la om sênga mihriamhai inchâina irthoka kêlsuaka, thina a lei om tâk sikin a ni.

¹⁶Pi le pu thumâk chungchânga chu a mâktu kha a thi le thiloï ir-enfia a nang,

¹⁷a mâktu a la dam sêng chu ite a hmangna la om loiin a thi hnungin kêng a hmangna a la om chak ngai a ni.

¹⁸Khasikin thuthung masa khom kha thisen an hmang tena kêng hmang a la ichang.

¹⁹A masa'n Mosia Dâna thupêk murdihai kha mipuihai kuang an puang baka. Kha hnung chu sehrâtchahai le kêlhai thisen kha tui leh irpoltirin, husop ôn le samul sen hmangin Dân lekhabu le mipuihai murdi kha an theka,

²⁰an kuang, "Hitak hin Pathianin nin izôm hranga nangni a ipêk thuthung namindettu thisen kha a ni," a tia.

²¹Khabana, Biakbuk le biakna hmangruahai murdi khom kha thisen an thek sa.

²²A dik takin, Dân dungzuiin thil tinrêng hi thisenin an irthiang thei zit dên, sualhai ngaidamna vai kêng thisen suak loa a chang thei loi.

Sual chu Krista irbôlna'n an boi

²³Kha thilhai, irvâna a tak taka om millimhai kha, khang khan irthiangtir an ini hrang a ni. Khannisianlân, irvâna thilhai kha chu irbôlna sa ual ok an innang a ni.



²⁴Krista chu mihriam isiam Hmun Irthiang, a tak millima khan lût mah, atûna Pathian makunga ei irthûla a ngîrna irvâna khin a ilût zôi a ni.

²⁵Juda Ochai Inlaltak khan sa thisen chôiin Hmun Irthiang Taka khan kum tin a fe ngaia. Khannisianlân, Krista chu nangnia inhlan hrangin voi tamtak lût mah.

²⁶Khaang khan ni no sianlân, irnêng irsiang phut ata voi tamtak a ituang hrang tâk a ni. Khannisianlân, atûn zoro mong hrang tona hin ar bôlna sika sual an boi theina hrangin voikhatin a zuang inlang a ni.

²⁷Mi tin voikhat chu thi ngêt an ta, kha hnunga khan Pathian irêlin om an ti.

²⁸Khaang dênin Krista khom kha mi tamtakhai sual inboi hrangin voikhat irbôlna'n inhlan a ni tâka. Sualhai lapai hrang ni ta loiin ama lei nghâktuhai saninhringnaa hruai lût hrangin a izuang nôk hrang a ni.

Hebrai 10

¹Juda Dân chu thil tak ang zeka dâr irkip le entonna iamom ni maka, thil sa zuang irlang hrang irhlâm, a tak ni loi, a'rlim vai a ni. Kum tin irbôlna ngaingîr kha kumkhua'n an inhlan ngai a ni. Itin mo kha Dân khan khaanga irbôlnahai sika khan Pathian kuanga hong mihai kha famirkipin a isiam thei hrang?

²Pathian biaka honghai kha an sualhai ata irthokin an irthiang tak tak ni sianlân chu, suala inhriatna kha nei ta no nihaia, irbôlna kha irngam ta an ti.

³Kha nêkin hi irbôlna hin an sual tho, kum tin an hriat nontir ngai a ni.

⁴Sechalhai le kêlhai thisenin sualhai kha inboi zât ni mah.

⁵Khasikin, Krista'n rammuala a zuang hrang laiin Pathian kuang, "Irbôlnahai le thilpêkhai nuam mak chea, Keima ta hrangin takpum ni ni irfûk pe ual tâk.

⁶Sa pum hâlirvôm irbôlnahai sual inboina hranga irbôlnahai kha lôm viat mak che.

⁷Khanchu keima'n, 'O Pathian, Dân lekhabua ki thurchi irziak ang khan, Ni lungdo sin hrangin keima hin ki om' ki tia," a tia.



⁸A masa'n, "Irbôlnahai, thilpêkhai, pum hâlirvôma irbôlnahai le soal irbôlnahai kha Dân ang taka inhlan ni khom sianlân nuam mak chea, lôm khom lei lôm mak che," ki tia.

⁹Khanchu, "O Pathian, ni lungdo sin hrangin keima hin ki om," a ti nôka. Khasikin Pathianin irbôlna miluihai kha an boi zita, khahai irthûla khan Krista irbôlna hi a isia tâk a ni.

¹⁰Jisua Krista'n Pathian lungdo a sina, a takpum ngei voikhat ar hlan rip sika khan, ei rêngin soal ata ei irthiang tâk a ni.

¹¹Juda Ochai tinin a nitin an sintum sinin irbôlna ngai dên kha voi tamtak an inhlan ngaia, khannisianlân, kha irbôlnahai khan سوالنا inboi thei viat mah.

¹²Krista'n chu kumtuanga hrangin سوالhai ta hrangin irbôlna voikhat vai an hlana, kha hnung chu Pathian chang tiang a hong toi ta.

¹³A râlhai Pathianin a ke zapha siana'n a siam pe mâka chu ama khan a inghâk mai a ni.

¹⁴Irbôlna voikhat vaiin an soal ata irthiang tâkhai kha kumtuanga hrangin famirkipin a siam ta.

¹⁵Irtha Irthiang khomin hiang hin a nin hriattir:

¹⁶"Nikhua hong tung hranga an kuang, Thu ki intung hrang chu hi hi a ni; An milung sûnga ki dânhai sia ki ta, An lungrîla irziak sa ki ti," a tia.

¹⁷Kha hnung, "An سوالhai le an inchâinahai inhre mai ta no ning," a ti nôka.

¹⁸Khasikin khaanga ngaidamna omna taka khan chu soal inboina hranga thilpêk nang ta mah.

Pathian nâi ei ti.

¹⁹Khasikin urênghaio, Jisua thina sikin zalên takin Hmun Irthiang taka khan ei lût thei ta.

²⁰Ama khan puanzâr chu khêlin (kha kha a takpum tihna a ni) lam thar le lam hring a nin hong pe ta.

²¹Pathian in sûng mihai chungga Ochai roiinpui tak ei inei a ni.



²²Khasikin lungrîl dik le iamna irkip neiin, sia le sa inhriatna dikloi ata ei lungrîlhai irthiangtirin le ei takpumhai tui irthianga infâiin Pathian nâi ei ti.

²³Ei thurin hi chel indet ngit ei ti, Pathian chu a chonginkunga iamom a ti, ti ei irngat thei sikin.

²⁴Lungirthung le sin sa sina inthor irhlôm hrangin ngaitua seng ei ti.

²⁵Senkhatin inkhôm mâksan an iuar angin uar no inlân, irthor nôk ual ei ti; Rengpa Nikhua chu a hong nâi tah ti nin inhriat sikin irthor irhlôm nôk ual ual ei ti.

²⁶Thutak ei inhriat hnung khomin ei la sual maiin chu sualhai inboi hrangin irbôlna om ta no ni.

²⁷A om hrang chu ichi puma Roirêlna le mei inthang Pathian doihai kângirhmang hrang nghâkna vai tâk kêng.

²⁸Tukhom Mosia Dân zôm loi chu, ama doiin mi inhni mani inthum mani inhriatpuitu an omin chu, lungkhamna boi zitin that a ni ngai.

²⁹Pathian Nâipa hnuaisiaa, Pathian thuthung thisen ama irthiangna kha itea bê loa, lungkhamna Irtha êro mi kha idôra dûk rik ual mo tuang sian nin irhoitir?

³⁰“Phuba rêng rêng keima lâk hrang a ni, Keiin thuan ki ti,” ti le “Rengpa’n a mihai ngaitua a ti,” titu hi ei inhriata,

³¹Pathian hring kuta tûk chu thil ichiom tak a ni.

³²Zoro thenga nin chungu thil omhai kha inhre mai roi. Pathian vârin nangni a êl hnungin kha laia khan dûk tamtak nin tuanga, khannisian, buaina khan nangni inhre mah.

³³Zoro khat chu mipui vântâng laia nangni êro’n deng nangni an intheia, zoro danga chu khaanga deng an lei intheihai leh hmunkhatin nin tuanga.

³⁴Mi’ntânghai tuangna kha nin tuangpuia, nin neinun murdi nangni an lâk pe lai khomin, kumtuanga sôl hrang thil sa ual nin la neih ti inhriatin, kha nin inchâna khom kha lôm takin nin ituang a ni.



³⁵Khanchu nin hâina kha irhmangtir no roi, lômman roiinpui tak a inei hrang a ni.

³⁶Pathian nuam lam nin sina, a inkung kha nin hmu theina hrangin diarna nin inang a ni.

³⁷Pathian Thubu'n, "Sôtnote hnunga chu a zuang hrangtu kha zuang ta a ti; Ir-ial ta no ni.

³⁸Khannisianlân, ki mi fel chu iamna'n hring a ti; Hnung tiang a'rtôlin chu a chung a lôm viat no ning," a iti angin.

³⁹Eini chu hnung tiang irtôla a'rh mang hranghai ni mak mea, iamna neia saninhring ni hrang mi kêng ei ini.

Hebrai 11

Iamna

¹Iamna nei ti chu thil ei isabei kha a dik ngêt infel le thil ei ihmu loihai kha a om ngêt inhriat infel hi a ni.

²An iamna'n kêng zoro miluia mihai khan Pathian ipomna an lei idong ngai.

³Iamna'n rammual hi Pathian thua siam a nih ti ei inhriat, khang khan, thil hmu theihai hi thil hmu thei loihaia siam a ni.

⁴Iamna'n Abela khan Kaina nêka irbôlna sa ual Pathian kuang an hlana. A iamna sikin a thilpêk kha ipomin a oma, mi fel a ni tiin Pathian pomna a idong a ni. Kha a iamna sika khan a thi hnung khomin thu a la insîr mai a ni.

⁵Iamna'n Enoka kha thina irtem loi hrangin Pathianin chung tiang a hruaia, tûte'n hmu ta mahai. Pathian Thubu'n, "Enoka kha chung tiang hruaiin a om mâka khan Pathian an lômtir ngai," a tia.

⁶Iamna boiin chu tûte'n Pathian inlôm thei ngai mah. Iamna nei taka Pathian kuanga hong murdi'n chu ama chu a oma, ama zonghai kuang lômman a pêk ngai iti a iam ngêt hrang a ni.

⁷Iamna'n Nova khan, sîn matona thil a la ihmu theilo Pathianin a hril laia khan, Pathian thu zômin irkuang a sina, kha irkuanga khan ama le a in sâng



mihai saninhringin an om. Khasika khan, rammual kha thiamno an changa, iamna sika felna Pathian kuanga om kha a idong a ni.

⁸Iamna'n Abrahama khan, Pathianin ram pe hranga a inkung pea fe hrangin a koi laia khan Pathian thu zômin a fena hrang khom inhre loiin a suaka,

⁹Iamna'n Pathianin ram a inkung pea khan khual mi angin a oma, Pathian chonginkung dong sa, Isaka le Jakoba angin puan inhaia a oma.

¹⁰Abrahama'n khopui, lungphûm det nei, Pathian isiam le sin kha a nghâk mai a ni.

¹¹Iamna'n Abrahama kha a tar ok hnungin le Sari ngei khom a iching ni sian khom, Pathian chu a chonginkunga iam a om tiin a'rngat ngit sikin pa a la ichang a ni.

¹²Abrahama kha a thi ang dôra om tâk ni khomsian, kha mi inkhata irthokin irchi, irvâna ârsi za le tuipui kôla chiaï tep zoiloi dôr an irzir a ni.

¹³Iamna neiin kha mihai kha an ithi a ni. Pathianin a inkung pe kha dong phâk no khomsian, hla taka irthoka hmu'n an lei lôm tâka, irnênga hin khualmi le mi'nvâi an nih ti an lei inhriattir ta.

¹⁴Khaanga tihai khan chu an ram an ithîr a nih ti an lang.

¹⁵An ram hong mâk kha chu kan ta maka, kan sianlân chu kîr nôkna zoro'nchum nei ta an ti.

¹⁶Kha nêkin, ram sa ual irvâna om kha kêng an irngai. Khasikin Pathianin an Pathian irti kha inzak maka, an ta hrangin khopui ten khom a lei siam pe tâk sikin.

¹⁷Iamna'n Abrahama khan, fiaa a om lai khan a nâipa neisun Isaka kha, irbôlna'n a inhlan a ni. Pathian kuang ata chonginkung hmutu ni khom sianlân, a nâi irbôlna'n a la inhlan nuam a ni.

¹⁸Pathianin a kuang, "Isaka irthoka hin ni chihai ki inkung kha nei ni ti," a ti pea.



- ¹⁹Pathianin Isaka kha thina irthok khomin a kaithoi thei tih Abrahama'n an hriata, Isaka kha thina irthokin a hmu nôk ti hrangin a om.
- ²⁰Iamna'n Isaka khan, sîn matona hrangin Jakoba le Esaua hai chung a satvurna chonga an kunga.
- ²¹Iamna'n Jakoba khan, a thi hrang tînin Josefa nâihai kha sat a vur seng senga, kha hnung chu a khianghrol hmor tûngin Pathian chubai a mûk tâka.
- ²²Iamna'n Josefa khan, a thi hrangin Israel irchihai Aigupta ata an suak hrang thu an sîra, a ruhai an ihrê hrang dân khom chong a māk pehai.
- ²³Iamna'n Mosia kha a suak laiin, nâite hmêl satak a ni sikin a nu le a pa'n rêng thupêk chi loiin tha thum an thupa.
- ²⁴Iamna'n Mosia khan, a hong lian tena chu Faroa nâinu nâipaa irbe mai kha nuam ta maka.
- ²⁵Sôtnote sînga sual inhoina hmang nêkin chu Pathian mihai leh dengtheina tuang an thang ual ta.
- ²⁶Krista sika hmusitna tuang kha Aigupta rama irchon murdihai nêka irchon hlu ualin a bêa, sîn matona a lômman hmu hrang kha a thîr mai sikin.
- ²⁷Iamna'n rêng ningmur kha chi loiin Aigupta ram a mâka; hmu theiloi Pathian kha a hmu sikin a ikîr nuam ta loi a ni.
- ²⁸Iamna'n Ferkân kût an siama, thisen kha mikothaia inthek hrangin thu a pêka, vântîrtôn khan Israelhai nâi lutîr chu a that lina hrangin.
- ²⁹Iamna'n Israelhai khan muanga fe ang dôrin Tuipui Sen kha an irkâna; Aigupta mihaiin chu irkân an tuma, tuiin an lemhai zita.
- ³⁰Iamna'n Jeriko kulpui kha Israelhaiin sîn sari an vêl zoiin chu a chim ta.
- ³¹Iamna'n Rahabi notizuar kha Pathian thu zôm loihai leh irhmang sa maka, Israel eninfeltuhai kha lunghoi tak le lôm takin a lei intunghai sikin.
- ³²Ki la insîr mai hrang mo? Gideona, Baraka, Samsona, Jeptha, Davida, Samuela hai le deipuhai thurchi insîr hrang lakin zoro nei ma ung.



³³Iamna'n ram pumpui an doia, an inhnêa, thil dik an sina, Pathian chonginkung an donga, kâmkeibaknei bâihai an hîp pea,

³⁴mei inthanghai an thata, khandaia that an zôk a ni. Hrât no an lei nia, khannisianlân, iamna'n an hrâta, Israel buala khan mi hrât an nia, nam dang râl pâlhai kha an inhnê ngai.

³⁵Iamna sikin nupanghaiin an urêng mithihai thoinôkna an hmua. Mi dang thoinôkna sa ual an dong theina hrangin kêlsua nuam mah.

³⁶Senkhat chu nuiza siamna'n an hmanga, an zêma, senkhat nôk chu kolbun le intângna ina an khum.

³⁷Lunga dêngin an oma, bong hnia âtin an oma, khandaia thatin an oma, Belra vun le kêl vun silin an invâia; inriangin, intak takin le dengtheiin an oma.

³⁸Kha mihai ta hrangin chu rammual hi om hmun hoi loi tak a ni. Mi'nvâi angin ramchârhaia le tânghaia an irvâk an irvâka, pûkhaia le khurhaia an om ngaia.

³⁹Khahai khan an iamna sikin Pathian pomna an donga, khannisianlân, Pathian chonginkung chu dong mahai,

⁴⁰Pathianin ei ta hranga thil sa ual an kung sikin. Khahai kha eini leh ngêt kêng famirkipa siamin an iom hrang tih hi Pathian thil tum a ni.

Hebrai 12

Pathian ei Pa

¹Eini chu, a ni thîrhai mipui tamtak ihual vêlin ei om sika hin, ni khaphai le sual einia kop ngit hi pai ei ta, ei maton intân irsiatna oma hin irnak songin intân ei ti.

²Jisua, ei iamna irphutna le mongna tiang kha en ngit ei ti. Ama khan a matona raifâna sika khan mualinphoina kha ngainêpin Krosa khan a tuanga, atûn chu Pathian rêngtoihmun chang tiang a hong toi ta.



³Nin sôla nin irzal loina hrangin mi sualhai hnôlna irkhêltak tuangtu kha ngaitua roi.

⁴Sual nin doinaa hin thi ngamin la pût mak chêi.

⁵Pathianin nâihai anga nangni an thorna chong kha nin irnghil tâk ma ni? “Ki nâi, Rengpa nang sepna kha ngaisakin lân, Nang a ngo khomin irzal no roh.

⁶Rengpa khan lung a ithunghai chu a sep ngaia, Nâia a ipom ka chu a zêm ngai,” ti hi.

⁷Pa isep anga nin ituang hi tuang zâm zâm roi; Pathianin nâihai chung a tho dân angin sep loi nâi tu mo a om?

⁸Nâi murdi'n an itong ngai sepna kha nin tong no'n chu, nâi tak ni loiin, zâi nâi kêng nin ini hrang a ni.

⁹Ei taksa tianga pahai thua khom an ni sep, mahrip ei tho ngai. Ei irtha tianga Pa len vâng chu ei hringna hrangin ar cham chamin ei iom a nang a ni.

¹⁰Ei taksa tianga pahaiin chu sôtnotea sa an ti lam ang takin an ni sep ngai, Pathianin chu a'rthiangna ei dong theina hranga ei satna hrangin kêng a ni isep ngai.

¹¹Sepna rêng rêng hi tuang laiin chu raifânomin inlang ngai maka, intak takin an lang ngai a ni. Khannisianlân, tuang zoi tika chu, khataka tuang suaka om tâkhaiin chu ra irtharngam om tak an suaktira, mi a siaminsa ngai.

Irchutirna le hrilna

¹²Nin kut khamhai kha lêng unglân, nin irkhûk inthinghai kha inngîr roi.

¹³Khan, ke'nbâi kha irlo'rphêt loa, indama a om ualna hrangin lam intûna fe roi.

¹⁴Mi tin leh irngeia lêng tum unglân, irthiangna nei tum sa roi; kha irthiangna boiin tûte'n Rengpa hmu thei no ni.

¹⁵Tûte Pathian lungkhamna ata kîr nôk loa, thingkung khâ hong inchera, a tûr sika buaina tamtak insua anga mi om loi hrangin en zit roi.



¹⁶Khabana, tûte irdit song mi mani, Esaua anga rammual mi mani, om loi hrangin en zit roi; ama kha a nâi lutîr nina a ni.

¹⁷Inhnunga khan a pa satvurna la dong khomsian, a sin lei tho kha a thûl thei ta no sikin, hnôlin a om tah ti nin inhriat.

¹⁸Nin ngîrna inhre mai roi. Israelhai ang khan rammual Sinai Tânga ngîr mak chêi. Kha zoroa khan meichok hai, inthim hai, sûmbual hai, phâivopui hai,

¹⁹bekul irhai hai, hnukirhai ichiomhai a oma. Mipuihaiin kha hnukirhai kha an inhriata, inhre nôk viat ta loi hrangin an ngêna.

²⁰“Sâ ten khomin tâng kha a tônin chu lunga dêng that hrang a ni,” ti thupêk kha an tuang thei no sika a ni.

²¹An thil hmu kha ichi a om ok, Mosia lua khomin “Chiin kin thing tak tak,” a iti rak a ni.

²²Nangni chu Zion Tâng, Pathian hring khopui, vân Jerusalem le Vântîrtôn sâng tamtakhai omna nin ingîr a ni.

²³Nangni chu Pathian nâi lutîr irvâna an irhming chuang tâkhai râifâna an irbûmnaa nin ingîr a ni. Pathian, mi murdihai roirêltu kuang le mi felhai irtha famirkipa siam tâkhai kuang nin ingîr a ni.

²⁴Nangni chu Jisua, thuthung thar irfûktirtu kuang le thisen inthek, Abela thisen nêka thil sa ual inkungtu kuang nin ingîr a ni.

²⁵Thu’nsîrtu kha lei nuam loiin nin om lina hrangin irdîn roi. Irnênga thu lei insîrtu lua kha nuam maka, hremna zôk mah. Eini irvâna irthoka thu’nsîrtu hnung songhai len vâng chu hremna kha zôk thei viat no ih.

²⁶Kha laia khan a hnukirhai khan irnêng hi an hnînga, khan, atûn chu, “Voikhat chu irnêng vai ni loiin irvân khom lan hnîng ki ti,” tiin chong a inkung tâk a ni.

²⁷Khan, “Voikhat nôk” ti hin thil inhnîng thei loihai an om mai theina hrangin thil siamhai kha inhnîngin thon paiin om an ti, ti a inlang a ni.



²⁸Khasikin lôm ei ti, raifânin, a lôm hrang lamin mahrip le ichi pumin Pathian chubai mûk ei ti,

²⁹ei Pathian hi mi kâng irhmang ngai mei a ni sikin.

Hebrai 13

Pathian inlômtir hrang lam

¹Kristian urênghai ang takin lung irthung irhlôm roi.

²Nin ina mikhual intung inhre mai roi. Mi senkhatin khaanga tho an inhriat no kârin vântirtôn an intung tâk kêng.

³Lung ina omhai kha, nangni khom a intâng sa ang takin inhre mai roi.

⁴Inneina hi mi murdi'n an inhlut hrang a ni, ompui sangram khomin an iamom irhlôm hrang a ni. Irdithai le uirehai chu Pathianin rêl a ti.

⁵Sum irngaiinnat mi ni no unglân, nin thil nei lam anga khan milung inchuk roi. Pathianin, “Nang intha viat no ninga, mâk khom nang ma viat no ning,” a ti sikin.

⁶Khasikin hâi takin, “Rengpa ni changpuipu a ni, chi no ning. Mihriamin imo a ni ilo thei hrang?” ti ei ti.

⁷Pathian thu nangni lei insîr pe nin hruaitu masahai kha inhre mai roi. An lei hong om dân le an thi ziahai kha ngaitua unglân, an iam dân irchu roi.

⁸Jisua Krista chu mizân, a vuan le kumkhua'n a pangai dên a ni.

⁹Irchutirna chi dang dang le irkhêl tak tak hruai irhmangin om no unglân, Pathian lungkhamna irthoka lungrîl hrâtna hmu hi a sa, fâk thua dân zômin chu ni no ri se; kha dân zômhai khan ite irfêna hmu mahai.

¹⁰Biakbuka ochai angin sin ei thoa, maichâma khan chu fa thei mak meh.

¹¹Nin inhriat angin, saruak, a thisen Juda ochai Inlalin Hmun Irthiang Taka irbôlna hranga a ilûtpui ngai kha riakbuk pên tiang an ihâl ngai a ni.

¹²Jisua khomin ama thisen ngeia mihai an fâi theina hrangin khopui pên tiang a lei ituang a ni.



- 13**Tho, khasikin khopui pên tiang fe ei ta a mualinphoina lei irkoppui rei.
- 14**Irnênga hin chu khopui det nei mak mea, khopui la hong om hrang kha ei isabei a ni.
- 15**Khaang khan, Jisua zâra ei irbôlna'n Pathian kuang inpâkna inhlan mai ei ti; ama kha hmûrin irbôlna an inhlan, "Rengpa a ni," tia an ithopna a ni.
- 16**Thil sa sin le irsan irhlôm hi irnghil no roi, khahai kha irbôlna, Pathian inlôm ngai an ni.
- 17**Nin hruaituhai thu zôm unglân, an thupêk murdi zui roi. Pathian kuang an sintho an lan sîr hrang sikin irngam loiin nangni an enkol ngai a ni. An thu nin zômin chu, raifân takin sin an ti, khano'nchu, intak pumin sin an ta, nin ta hrangin sa no ni.
- 18**Kin ta hrangin ni chongchai pe mai roi. Itiklai khomin thil fel sin ki nuam mai sikin sia le sa inhriatna irthiang tak kin nei ti kin inhriat infel.
- 19**Nin kuang Pathianin a ni tîr nôk zôi theina hranga chongchai hrangin nangni ki ngên tak tak a ni.
- 20-21**Khan, ei Rengpa Jisua, a thina sika kumtuang thuthung deta om, Belrapu Roiinpuetak, thina irthoka a kaithoitu irngeina Pathian khan a lungdo nin sin theina hrangin thil sa nin innang murdi nangni pe sianlân, Jisua Krista zâra einia hin, ama a lungdo sin ri se. Krista kuang roiinpuina kumtuangin om mai ri se! Amen.

Thukhârna le chongchaina

- 22**Urênghai, nin kuanga ki lekha thon hi a sei ok no sikin hi inthorna chong bêhai hi ngûk taka irngai hrangin nangni ki ngên.
- 23**Ei urêngpa Timothea intângna in ata insua a ni tâk ti nin inhriat ki nuam. A hong tung inrangin chu, nangni hmu hrangin ki hong tena hong hruai ki ti.
- 24**Nin hruaituhai murdi le Pathian mihai murdi kha chubai ni mûk pe roi. Itali rama urênghaiin chubai nangni an mûk.
- 25**Nin rênga kuang Pathian lungkhamna om ri se.



Jakoba

Jakoba 1

Chubai mûkna

¹Pathian le Rengpa Jisua Krista suak Jakoba khan nam sômhleihni rammuala inthek indarhai kha chubai ki mûk.

Iamna le vârna

²Ki urênghaio, fiana chi tinrêng nin tong tena thil raifân omin bê zit roi,

³nin iamna fiaa a om hin tuangdiarna a siam ti nin inhriat.

⁴Khaang khan, ite irsam loia nin famirkipa, puihlinga nangni a siam theina hrangin nin tuangdiarna khan hlosam viat loiin nangnia sintho ngêt ri se.

⁵Nin laia tukhomin vârna ar samin chu mi murdi kuanga inhnar loia phal taka pe ngaitu Pathian kuang ngên ri se, pêk ni a ti.

⁶Aniachu, iamna neiin, lungirhla viat loiin a ingên hrang a ni; lungirhlatu chu phâivua'n tuikhanglian a sêma a irsoktir ang hi a ni.

⁷⁻⁸Khaang mi lungrîl bulbâl neilo, a sintho murdia ite detloi mi khan Rengpa kuang ata ite hmu hrangin irtûng no ri se.

Inriangna le irchongna

⁹Iamtu inriang mi kha Pathianin a chôirsâng sikin lôm ri se.

¹⁰Iamtu irchong khom irhniamtira a omin lôm sa ri se, hloisûl pâr angin ar chongna a la chuai hrang sikin.

¹¹Misa, a hong suakin a sân a hong luma, hloisûl kha a em inthêma, a pâr a tâka a enhoina a boi ngai. Khaang khan, irchong khom a sinthôna irhmangin om a ti.

Fiana le thêrna

¹²Fiana tonga, ngîr indet khak mi chu a vâna sa, fiaa a om hnungin Rengpa'n ama lungthungtu hai pêk a inkung, chôindômna lukhum, hringna kha, a ichang hrang a ni.



¹³Tukhomin thêмна an tongin, “Hi thêмна hi Pathian ata kêng,” ti no ri se. Pathian chu soal hranga inthêm chi ni ma, ama khomin tûte inthêm ngai mah.

¹⁴Mi tin hi mâni irzukna suala inthêm an ni zit uala, kha khan mi an hôpin a hruai irhmang ngai a ni.

¹⁵Kha irzukna khan tê a hong vonga, soal a nei, kha soal kha a hong puihlingin chu thina an tungtir ngai a ni.

¹⁶Ki urêng inditom takhaio, ihuagin om no roi.

¹⁷Thilpêk sa le thilpêk irkip chu irvâna irthoka danglamna le irthûlna nei viat ngailoi Pathian, irvâna vâr Siamtu kuanga irthoka zuang chum ngai a ni.

¹⁸A thil siamhai laia ra masa hrangin ama nuamlam ang takin thutaka a ni inei a ni.

Thu irngaina le zômna

¹⁹Ki urêng inditom takhaio, hi hi inhre roi. Mi tinin ar ngai tiang uar sianlân, inîrna lam tiang irchu loiin, an milung inchuk ri sehai.

²⁰Mihriam ningmurna hin Pathian thiltum diktak kha hlo inchuk thei ngai mah.

²¹Khasikin, intirom chi tinrêng le soal chi tinrêng pai irhmang unglân, nin milunga Pathian thu tû, nangni saninhring thei chu thuhnuairôl takin pom roi.

²²Sinthôna om loia thu irngai vai a ruk tiin mâni irhuang no roi.

²³Tukhom thu irngaitu nia, zôm ual loi chu, hlîmena mâni hmêl entu ang a ni.

²⁴Ngûk takin ar ena, a rot hnungin chu i ang hmêl irput mi mani a’rngil nôk zel ngai.

²⁵Aniachu, tukhom dân famirkip, nin zalêntirtu kha ngaitua uala, khaanga om maia, irngaia irngil nôk lattu ni loia, a zôma zômту ngei chu, a sintho murdia hlochuk a ti.



²⁶Tukhom sakho mi tak nia irbea, a milei vêng inhnê ual loi chu mâni a irhuang a nia, a sakhua chu chanlamboi a ni.

²⁷Pathian mit hmua sakho biak dân irthiang le سوال kop loi chu hi hi a ni: fara le meithâihai an intak laia donsui le rammual porinche kop loa irvong insa hi a ni.

Jakoba 2

Theibîk nei loi hranga hrilna

¹Ki urênghaio, ei Rengpa roiinpui tak Jisua Krista iamtuhai khan theibîk nei no roi.

²Nin Sinagoka, mi rângachak kut sabi buna songkol satak inngâk hong lût sianlân, mi inriang songkol siat inngâk hong lût sa sianlân;

³songkol sa inngâk kha chu nin lei uksaka, “Nang chu toina sa hin toi ro,” nin tia, mi inriang kuang chu, “Nang chu so son ngîr ro,” mani, “Ki ke hnuaiia hin toi ro,” mani nin ti’n chu,

⁴theibîk nin neia, nin thîr dân lungrîl a sân a isual mo ni ma?

⁵Ki urêng inditom takhaio, irngai u ta, rammual irngaia mi inrianghai hi iamnaa irchong hrang le ama lungthungtuhai kuang a ram inkung chang hrangin Pathianin a inthang loi ma ni?

⁶Nangni’n chu mi inrianghai kha inza mak chêia. Mi irchonghai hi nangni hnuaisiatuhai le roirêlna ina nangni hnûklût ngaitu ni mahai mo?

⁷Irhming satak nin irput kha insîrinsiattuhai ni mahai mo?

⁸“Nangma lung ni irthung angin ni bômhai lung ni ithung hrang a ni,” ti Lekha Thua chuang Dân roiinpui tak hi, nin zômin chu nin tho’n sa;

⁹theibîk nin neiin chu سوال nin itho a ni, Dân insiattuhai, nin ni.

¹⁰Tukhomin Dân zôm zit khomsian inkhat khom an siatin chu a rênga insiat a ni.

¹¹“Uire no roh,” titu’n chu, “Mi that no roh,” a ti nôka, Uire no khom sianlân, mi ni thatin chu Dân insiat ngêt ni ni.



¹²Khanchu Dân, nin zalêntirtu hmanga rêl pe hrang ei nih ti inhriatin thu insîr unglân, thil tho'n sa roi.

¹³Mi chungu za'rngaina nei loia thilthotu chu za'rngaina boiin a chungu roirêl pe ni a ti; khannisian, za'rngaina hin chu roirêlna an hnê ngai.

Iamna le sintho

¹⁴Ki urênghaio, mi'n "Iamna ki nei," ti sianlân, a sinthoa inlang no sianlân, imo an lâpna? Khaanga iamna khan nang saninhriang thei ni mo?

¹⁵Urêngpa mani farnu mani silkaiboi le phîngchâmin om sianlân,

¹⁶nin laia tu'n mani, "Irtharngam takin fe tan lân, lum tak le khop takin om roh," ti sianlân, a taksa ta hranga innang kha a pêk ual no'n chu imo an lâpna?

¹⁷Khaang dênin sintho boia iamna vai hi chu omzia a inei loi a ni.

¹⁸Mi tu khôkin mani, "Mi inkhatin iamna a neia, mi dangin sintho a nei," ti a ti. Khannisian, keima sâmna chu, "Itin mo, mi'n sintho boiin iamna a inei thei lam nir hmu roi; keima'n chu sintho'n ki iamna nang irhmu ki ti," ti hi a ni.

¹⁹Pathian inkhat vai a om ti ni iam mo? Ni tho'n sa! ramkhohrihai khomin an iama, an inthing ngai kêng.

²⁰Mi'nvêtpa, iamna hi sintho kop loiin chu ite ni mah ti nin hriat nuam mo?

²¹Ei irchibul Abrahama kha a nâipa Isaka, maichâma an hlan lai khan, a sintho sika thiam inchangtir mo ni ma?

²²A iamna le a sintho kha ar hlopa, a sintho khan a iamna kha ar kiptir ta ti nin hriat.

²³Pathian Lekha thua, "Abrahama'n Pathian a iama, a iam sika khan thiamchanga pom a ni ta," ti kha a tunga, Pathian ruala ibe a ni ta.

²⁴Mi'n sintho sikin thiam an changa, iamna vaiin ni mah ti nin inhriat ta.

²⁵Khaanga khan Rahabi notizuar khom khan, mi tîrhai kha a lei lôma, lam danga an kîrtirhaia, a sintho sika khan thiam a ichang mo ni ma?



²⁶Khasikin, takpum hi irtha kop loiin chu a ithi angin sintho kop loiin chu iamna khom hi a ithi a ni.

Jakoba 3

Milei hi

¹Ki urênghaio, nin laia irchutirtu ni hi tum sup sup no roi, irchutirtuhai hi mi danghai nêka ngar uala roirêl pe ei la ini hrang ti nin inhriat.

²Ei rêngin thil tamtak ei tho'nsual ngai. Tukhom a thu'nsîra tho'nsual ngailoi mi chu mi puihling a ni, khang mi chu an takpumpui khom an sep thei ngai.

³Ei thu inzôm-tir hrangin sakor bâia thîr takam ei inhmuamin chu, an takpumpui khom ei nuamna ang ei inher kô-i thei ngai.

⁴Irkuanghai khom lian okhai sian khom, phâivua'n a sêm inhnîng lai khomin a chalaitu'n a nuamna tiang ang a chalaina chînte khan an fetir thei a ni.

⁵Khang dênin milei khom hi takpum ôn chînte a ni nâkin, irsorthei tak a ni. Mei irsî chînte te'n ram inrôp tak tak khom a ikâng thei ngai dên hi ngaitua u ta.

⁶Milei khom hi mei ang a nia, rammual siatnaa sip, ei takpuma kop, ei takpum om dân porinchetirtu a ni; ei hringnun pumpui hremhmun meia dengintheitirtu a ni.

⁷Mihriamin, ramsa le vâ tinrêng hai, thilhring le tuia nga tinrênghai hi vâi inngam thei an nia, an vâi inngam ta ngai.

⁸Khannisian, milei chu tûte'n vâi inngam thei viat ngai mah. Sual om chian thei loi, thina tûra sip a ni.

⁹Kha leh khan ei Pa, Rengpa chu ei inpâka; ei mihriam chanpui, Pathian irangpuia siamhai khua ei sâl sa ngai a ni.

¹⁰Bâi inkhat ata satvurna le khosâlna a suak ngai. Ki urênghaio, khang khan chu a ini hrang ni mah.

¹¹Tuihnâr inkhat ata tui thum ual le tui khâ suak ngai mah.



¹²Ki urênghaio, theipui kunga Oliv a ra ngai ma ni? Grep hruia khom theipui a ira thei ma ni? michikhur ata khozoi tui irthiang zuang suak thei ual mah.

Chung tiang ata vâ

¹³Nin laia vâna le inhriat thiamna nei mo an om? Om dân sa le thil sa tho'n thiam tak le thuhnuairôl takin inlangtir ri se.

¹⁴Nin milunga hnarsâna inthûk tak le mâni dohasana nin neiin chu thudik irkalnaa nin vâna irsorpuiin milak tho no roi.

¹⁵Khaang vâna kha chung tianga zuang chum ni maka, rammual ata taksa irzukna le ramkhohri ata a ni ual.

¹⁶Hnarsâna le mâni dohasana omnaa khan buaina le sualna chi tinrêng a om ngai.

¹⁷Chung tiang ata vâna zuang suak chu a maton taka a'rthianga, kha zoiin irngei a nuama, a milung ar uaia, changpui a hoia, lungkhamna le ra saiin a sipa, theibîkna le vârirletna nei ngai mah.

¹⁸Irngeina siamtuhaiin irngeina zonga chi an itû kha thil sain a ra ngai.

Jakoba 4

Rammual leh rual irchangna

¹Nin laia irdoina le irsualnahai hi khôtak ata hong suak ma ni? Hoina nin nuama, nin milung sûnga irdoina intung ngaitu ata ni ma mo?

²Nin irzuka, nei mak chêi, mi nin thatpuia; nin hnarsaa, nei thei mak chêi, nin irkhalin nin irdoia; Pathian nin ngên no sikin nin nuamlam nin ihmu ngai loi a ni.

³Nin zong khomin nin zong dik no sikin hmu mak chêi, inhoina'n hmang nin tuma.

⁴Iamna boihaio! Rammual rual irchangpui hi Pathian râl nina a nih ti nin inhriat no ma ni? Rammual rual ni hi a nuam murdi'n chu Pathian râla a irsiam a ni.



⁵Lekha thu'n, "Einia Pathianin irtha a isia hin irzukna lian tak a nei," a iti hi dik loi hrangin nin iiam ma ni?

⁶Khasikin, Pathianin lungkhamna a ni ipêk hi a lian ual. Pathian Thubu'n, "Pathianin lâiripâkhai a doia, Irngaiintômhai chu lung an kham ngai," ti a ni.

⁷Khasikin Pathian kuang irpelût unglân, Diabola chu doi roi, khanchu nangni rotsan a ti.

⁸Pathian nâi roi, ama khomin nangni nâi a ti. Mi sualhaio, nin kuthai irsûkinfâi unglân, mi vârillekhaio, nin milung irthiangtir roi.

⁹Lunginzîng unglân, beiindong unglân, chap roi; nin innuina kha beidonga chang sianlân, nin raifâna kha ngûina chang ri se.

¹⁰Rengpa makunga irngaiintôm unglân, khanchu nangni chôirsâng a ti.

Urêng hrilsiatloi hrang

¹¹Urênghaio, irhrilinsiat irhlôm no roi. Tukhom a urêng hrilsiat mani, dem mani chu Dân a hrilsiata, Dân a idem a ni; Dân ni demin chu, Dân zômtu ni mak chea, roirêltu ni ni.

¹²Dân pêktu le roirêltu, Pathian inkhat vai a om. Ama vai kêng mi saninhring theia irhmangtir theitu chu a ni. Nang, tualbômhai dem ngaitu kha tu mo ni ini?

Irsor loi hranga hrilna

¹³Irngai u ta, nangni, "A vuan mani, nangtûk mani, kho khuaa mo khat fe ei ta, kha hmuna khan kum khat sum bepâr va tho ei ta, sum tamtak van pung ei ti," tituhaio.

¹⁴Nangtûk hin itin mo nin hringna kha a iom hrang khom inhre mak chêi. Sûm, sôtnote a hong inlanga, a iboi nôk ang hi nin ni.

¹⁵Khasikin, "Rengpa'n sa a ti chu dam ei ta, khahai kha tho ei ta," nin iti hrang a ni.

¹⁶Atûn hin chu lâiripâk takin nin irsora. Khaanga lâiripâk taka om kha sual a ni.



¹⁷Khanchu, thil sa tho hrang inhriat chaka tholoi chu a ta hrangin sual a ni.

Jakoba 5

Mi irchonghai hriina

¹Nangni mi irchonghaio, irngai u ta, nin chung a intak zuang tung hrang sikin chap unglân, khêkhroi ta roi.

²Nin irchongnahai a siat zoi tâka, nin puanhai khom irnge'n an fâk zoi ta.

³Nin rângachak le sumhai khom a êkin a lei man zoi ta, a êk iman kha nin theiloizia inlangtirtu ni a ta, meiin thil a ikâng irhmang angin nin taksa kha fa zoi a ti. Sûn hnungkhôna chu irchon nin ibukkhôm a ni hi.

⁴Irngai u ta, nin loia sinhotuhai hlo nin khit pehai kha an khêka, bu âttuhai khêk irhai kha Itinrêng Rengpa mikuar inhriata a tung ta.

⁵Irnênga hin hoi tak le nuamningin nin oma, that hrang nikhuuaa hrangin nin lei irvâi inmar chian nin ni.

⁶Mi dik tak chu thiamno nin inchangtira, nin thata, ama'n chu nangni doi mah.

Diarna le chongchaina

⁷Khanchu, urêngaio, Rengpa zuang mâka chu diar takin om roi. Loi neitu'n a loi ata ra inlût hrang a inghâk dân hi en roi; rua masa le rua hnungkhôn a nghâk mai mai ngai a ni.

⁸Nangni khom diar takin om unglân, lungrîl det tak irput roi; Rengpa zuang nôkna hrang anai ta.

⁹Urêngaio, thiamno changa nin om lolina hrangin irdem irhlôm no roi. Irngai u ta, Roirêltu chu mikot kôla a om chian tâk a ni.

¹⁰Urêngaio, Rengpa irhminga thu insîrtu, deipuhai dengintheina diar taka an tuang dân kha enton hrangin hmang roi.

¹¹Diar taka tuangtu kha vânsa ei irti a ni. Joba tuangdiarzia nin inhriata, Rengpa'n a hnungkhôna a pêk dânhai nin inhriat. Rengpa kha za'rngaina le lungkhamna'n a sipa.



¹²Ki urênghaio, i khom nisian khomâk irsâm ngai no roi, irvân mani irnêng mani, thil dang sâmin mo khomâk sâm no roi, “A ni,” nin iti chu “A ni” ti chian unglân, “Ni ma,” nin iti chu “Ni ma” ni chian ri se; khanchu thiam loiin nin iom loi hrang a ni.

¹³Nin laia vânduaina tong an om mo? Chongchai ri se. Râifân mo an om? Inpâkna hla sak ri se.

¹⁴Nin laia damloi mo an om? Koiindang upa inkoitirin, anni’n Rengpa irhminga sahriak polin a ta hrangin chongchai ri se;

¹⁵iam ngita chongchaina khan damloi kha indam a ta, Rengpa’n kaithoi a ti; thil a lei tho’nsual tâk khom ngaidam ni a ti.

¹⁶Khanchu, nin sualhai thupha chôi irhlôm unglân chongchai irhlôm roi; khanchu indamin om nin ti. Sathnem irngai taka mi dik chongchaina khan thil roiinputak a tho thei a ni.

¹⁷Elija kha eini anga mihriam ma mai kêng a ini, rua tho loi hrangin sathnem irngai takin a chongchaia, kum thum le tha ruk sêng irnêng chung a rua tho ta mah.

¹⁸A chongchai nôka, irvân ata rua a zuang thoa, irnêng ata chîmuhai a hong inmông thartir nôk ta.

¹⁹Ki urênghaio, nin laia tu mani thutak ata pêt irhmang sianlân, tu khôkin mani a hong koikhîr nôkin chu,

²⁰ama hi inhre roi: mi sual, a lampui irhmangna ata hruai kîr nôktu khan kha mi sual irtha kha thina ata irthokin a saninhringa, sual tamtak ata ngaidamna an tung pe tâk a ni.



1 Petera

1 Petera 1

Chubai mûkna

¹Petera, Jisua Krista tirtôn khan, Pathian mi irthiang irthekindarhai Ponto ram hai, Galatia ram hai, Kapadokia ram hai, Asia ram hai le Bithunia rama om tâkhai chubai ki mûk.

²Pa Pathian lei inhriat anga inthang, Jisua Krista thu iam hrang le a thina irsu'nfâi hranga Irtha irthiangtir nin nia, nin chungga lungkhamna le irngeina inpungin om ri se.

Sabeina hring

³Ei Rengpa Jisua Krista Pathian le Pa chu inpâkin om ri se. Jisua Krista kha mithi lai ata kaithoiin sabeina hring nei hrangin a za'rngaina roiinpui tak khan a nin hring nôk tâka.

⁴Khasikin, Pathianin a mihai hranga irchon tamtak a isia kha dong hrangin ei itûng a ni. Kha irchon siat thei loa, hmon thei loi le chuai thei ngai loi kha Pathianin nin ta hrangin irvâna a isia tâk a ni.

⁵Ama nin iam sikin saninhringna sinsiam sai, zoro hnungkhôna inlang a ni dênin, Pathian sinthotheina khan nangni vong a ti.

⁶Fiana tinrêng nin tonga, nin lunginzîng khomin raifân takin om roi.

⁷Nin iamna fiana hrang a ni, rângachak siat thei lua meia fia a nia, kha nêka hlu ual, nin iamna chu, fia hrang pial kêng; khanchu Jisua Krista a zuang inlâr tika inpâkna hai, roiinpuina hai, chôindômna hai, hlo nin ti.

⁸Ama hmuloi khomin lung nin thunga, atûn ama nin hmu ual no khomin nin iama, raifâna irkhêl insîr thei loi le roiinpuina'n nin isip a ni;

⁹nin iamna ra, nin irtha saninhringna kha, nin hmu thiai sikin.

¹⁰Hi saninhringna chungchâng hi deipuhaiin ngûk taka zongin an sua, nin chungga Pathian thilpêk, lungkhamna zuang tung hrang chu, an lei insîr a ni.



¹¹Annia Krista irtha om chu, Krista tuangna le a hnunga chôindôma a om hrang thu, a lei inhriattira, i zoroa mo zuang tunga, itina zuang tung hrang moh ti inhriat an tum ngai a ni.

¹²Anni ta hrang ni loi, nangni ta hrangin sin an tho a nih ti inhriattir an ni. Irvân ata tîr, Irtha Irthiang changpuia nin kuanga thurchi Sa hriltuhai khan, kha kha nangni an hril tâk kha. Kha thil kha vântîrtônhaiin khom inhriat an irzuk a ni.

Om dân irthiang a om hranga koina

¹³Khasikin lungrîl irsiam diamin irtûng chian unglân, Jisua Krista a zuang inlang tika lungkhamna nangni a zuang chô pe hrang kha tûng ngit roi.

¹⁴Nâi thu zômhai angin om unglân, tianlai, nin inhriat loi laia nin irzuknahai ang khan om no roi.

¹⁵Nangni a koitu a irthiang angin nangni khom nin om lam murdia lei irthiang roi.

¹⁶Pathian Lekha Thu'n, "Keima ki'rthiang sikin, nangni khom nin irthiang hrang a ni," a iti ang khan.

¹⁷Theibîk nei loia mi tin an sintho ang taka ngaitua petu kha "Pa" tia nin koiin chu, hi rammuala nin om sûng hin ama chi pumin om roi.

¹⁸Nin irchibulhai ata nin idong nôk, om dân hman hmunboi tak ata kha thil siatthei sum le rângachaka irtan ni mak chêia,

¹⁹belrate demna boi le porinche loi, Krista thisen hlua irtan nin nih ti nin inhriata.

²⁰Ama chu khorsiang kho'rzir mân daiha Pathian lei inkung a nia, atûn zoro hnungkhôna hin nin ta hrangin a len lang ta a ni.

²¹Ama zâra mithi lai ata kaithoitu le roiinpuina pêktu Pathian kha, nin iam tâka, khanchu Pathian kha nin iamna le sabeina nin irngatna tak a hong ni ta.



²²Atûn chu thutak nin zôm sikin nin lungrîl nin irthiangtira, urênghai lungirthung ta takin lung nin irthung tâka, nin lungrîl takin lung irthungirhlôm roi.

²³Chi siat thei ata ni loiin chi siat thei loi Pathian kumtuang thu hring ata suakinthar nin ni.

²⁴Pathian Thubu'n, "Mi murdi hloisûl ang an ni, An roipuinahai khom hloisûl pâr ang a ni, Hloisûl chu a chuaia, A pârhai chu a tâka.

²⁵Rengpa thu chu kumtuangin a om mai," ti a ni. Kha ngêt kha a ni Thurchi sa nangni an ihril kha.

1 Petera 2

Lung hring le nam irthiang

¹Khanchu soal chi tinrêng masan unglân, huangna hai, vârirletna hai, hnarsâna hai, insîrinsiatna hai murdi masan roi;

²nâitesen suakthar angin irtha tianga irhnutui irthiang ite polloi kha irzuk roi, kha irhnutui kha nin inin chu irsôn nin ta, hringna hmu nin ti.

³Pathian Thubu'n, "Rengpa satna kha irtem ngân u ta," ti irziak ang khan.

⁴Rengpa kha pan roi, ama chu Lung hring, mihriamhai ihnôl, Pathian inthang, hlu tak kha a ni.

⁵Khanchu nangni khom lung hring ang hong niin irtha tianga in hrang angin bukkhôm roi. Kha khan Jisua Krista zâra Pathian pom inruk, irtha tiang irbôlna inhlan hrang, ochai irthiang hong ni nin ti.

⁶Pathian Lekha Thu'n, "En ta, lung hlu tak ki inthang a kila lungphûm chu Zion-a ki sia ta, Tukhom ama iam ka chu mualinphoi no nihai," a tia.

⁷Nangni iamtuhai hrangin chu lung hlu tak a ni, iamloihaiin chu, "In sintuhaiin lung an ipai kha, Kha ngei kha a kila lung poimo tak a hong ni ta," ti hi.



⁸Pathian Thubu ngêtin, “Lung, mi tûkna hrang le Lungpui mi khâlna hrang khom a ni,” a iti ang khan. Thu kha an iamno sikin an itûk a ni, ama kha Pathian lei irêl dân khom a ni chian ta.

⁹Nangni chu nam inthang, Rengpa ochai, nam irthiang, Pathian ta bîk, ama vâ irkhêl taka lût hranga inthim ata nangni koi suaktu Pathian sintho roiinpui inpuang hrang nin ni.

¹⁰Matona khan Pathian mi la ni ngai mak chêia, atûn chu Pathian mihai nin hong ni tâk; matona khan Pathian za’rngaina lan hre ngai mak chêia, atûn chu a za’rngaina nin hong dong tâk kêng.

Pathian suakhai

¹¹Inditom takhaio, khual inzin, mi rama om nin ni sikin irtha doi ngai, taksa irzukna hai ata irkêm hrangin nangni ki ngên a ni.

¹²Jentailhai lai ata satakin lêng unglân, thil soal thoa nangni an bê khomin nin sintho sahai anni ngêtin hmu an ta, Pathianin nangni a zuang hro tika ama chôiindôm thei an ti.

¹³Rengpa sikin mihriam dâna irchamneituhai kuang irpelût roi; irchamneitu irsâng tak, inlaltak thu hai,

¹⁴thil soal thotuhai hrema, thil sa thotuhai chôiindôm hranga a inkung ram optuhai thu zôm roi.

¹⁵Ite inhre loihai thu’nsîr inmôl kha thil sa thoa nangni in-ôktir hrangin Pathianin a inuam a ni.

¹⁶Zalênin om roi. Khannisianlân, nin zalênna kha soal thupna’n hmang loia, Pathian suakhai anga om hrangin nangni a inuam a ni.

¹⁷Mi murdihai inza unglân, urênghai lungthung unglân, Pathian chi unglân, rêng inlaltak kha chôiindôm roi.

Krista tuangna enton hrang

¹⁸Nangni siahlohaio, nin puhai thu zôm unglân, mi sa le mi nunhoihai vai ni loiin mi saloihai khom mahrip thohai roi.



¹⁹Mi'n Pathian nuamlam nia a inhriat ngit sika a tuang kher loi hrang intak a tuangin chu Pathian nuamlam a ni.

²⁰Nin sual sika nin tuangin diar takin tuang khom unglân, nin ta hrangin irhming satna imo om? Khannisian, thil sa nin tho khomin kuttum nin tuangin chu Pathian nuamlam a ni.

²¹Hianga om hrangin Pathian ikoi nin ni, Krista khom khan nin ta hrangin a tuanga, enton hranga a ke hnung nin zui theina hrangin nangni a imâk pe a ni.

²²Ama khan thil sual tho maka, a bâia huangna thu suak ual mah.

²³Mi ingo'n a om laiin ngo nôk ngai maka, dik taka roirêl ngaitu Pathian kuanga khan tûngna a inkoltir tâk a ni.

²⁴Sual thisana felna neia ei hring theina hrangin, Krista ngêtin a taksa'n Krosa khan ei sualhai a pêla, ama zêmna irdulhai khan indam nin ni ta.

²⁵Belra angin lamchan nin invâi tâka, atûn chu nin irtha Enkoltu le Hruaitu kuanga khan nin hong ikîr nôk tâk a ni.

1 Petera 3

Ompui sangram chungchâng

¹Khaang dênin nangni nuhai khom, nin pasalhai thu zôm roi, khanchu an laia Pathian thu zômloi an om khomin thu'nsîr kher nang loiin nin nunchana khan inhnê a ti,

²anni ngeiin chi puma nin om lam irthiang kha hmu an ti.

³Pên tianga irvôna rêlirlek taka sam irvôtir hai, rângachak irthei irhli hai silkai sa irbela irvô insa tum loiin,

⁴lungrîl ata mizia dik, lungrîla thuhnuairôl le nunhoi, irbelna siat theiloiin, irbel roi, kha kha Pathian mit hmu'n a ihlu tak tak a ni.

⁵Khaanga khan tianlai nupang irthiang, Pathiana sabeina irnghathai kha, an pasalhai thu zômna hrangin an irvo a ni.



⁶Sari khan Abrahamama thu a zôma, “Ki Rengpa” tiin a ikoi ngai a ni. Atûn khom thil sa nin thoa, chitna rêng nin nei no’n chu Sari nâihai nin ni.

⁷Nangni pahaio, khang dênin ompui sangram nin ninaa nin dôngmahai indot roi, hrât loi ual an ni sikin Pathian lungkhamna thilpêk, hringna kha, nangni changpuitu an ni inhriatin inza thiamhai roi. Khanchu, nin chongchaina ite’n khâl no ni.

Felna sika tuang

⁸A mong taka chu, nin rêngin lungrîl hmunkhat irput unglân, irkan irhlômin urêng angin lung irthung irhlôm unglân, lung irkham irhlômin thuhnuairôl takin om roi;

⁹Sual kha سوالin thuan no unglân, khusâlna khom khusâlna’n thuan loiin satvurhai roi; satvurna dong hrang kêngin Pathianin nangni a ikoi.

¹⁰Pathian Lekha thu’n, “Hringna lungthung nuam le, Zoro sahai hmu nuamin chu, Sual ata a milei vêng insa sianlân, A hmûr khom huangna thu insîr loi hrangin vêng insa ri se.

¹¹Sual irheisanin thil sa tho ri se, Irngeina zongin lungrîl pêk takin irzûl mai ri se.

¹²Rengpa mit chu mi felhai chung a chuma, An chongchaina khom ar ngaitua ngai. Khannisian thil saloi thotuhai chu a doihai ngai,” a iti angin.

¹³Thil sa thônâ tiang irnak nin songin chu tu mo nin chung a thil saloi tho hrang?

¹⁴Thil dik nin tho sika tuang nin niin chu vân sain irbe roi. Tukhom chi no unglân, lungindûk viat no roi.

¹⁵Krista kha inza unglân, nin lungrîla rênga nei roi. Nangnia om nin isabei nasan chu nangni irdon murdi chu sâm hrangin irsiam diam roi.

¹⁶Khannisianlân, thuhnuairôl le bengvâr takin, sia le sa inhriatna irthiang tak neiin tho roi, khanchu Kristaa nin om lam sa insîrinsiathai kha mualinphoiin om an ti.



¹⁷Pathianin sa a tia tuang nin ni lele'n chu, thil sual tho sika tuang nêkin chu thil sa tho sika tuang kha a sa ual.

¹⁸Krista khom ei sualhai sikin voikhat a thia, Pathian kuang nangni a hruai theina hrangin, mi fel chu mi felloihai ta hrangin a ithi a ni. Taksaa thatpai a nia, irtha tiang chu inhringin a om.

¹⁹Ama khan intângna ina om, irthahai kuang thu a zu hrila.

²⁰Khahai kha Nova irkuang tuk sûnga Pathianin tuangdiar taka a nghâk laia, zôm nuamloihai irtha kha an ni. Irkuanga khan, mi tômte, kiriat vai, tuia saninhring an ni.

²¹Kha irangpui, baptisma hin, Jisua Krista thoinôkna sikin atûn hin nangni a isaninhring ta a ni; baptisma chu taksaa porinche irsûkinfâina vai ni maka, sia le sa inhriatna irthiang taka Pathian kuanga thu inkungna hi a ni ual.

²²Jisua Krista chu irvâna fe'n Pathian chang tiang a oma, vântîrtônhai, irchamneinahai, sinthotheinahai a thuhnuaia an om ta.

1 Petera 4

Nunchan danglam tâkhai

¹Krista'n taksaa a tuang sikin nangni khom khang lungrîl kha irput roi; tukhom taksaa tuang tâkin chu sual a mâksan ta.

²Atûn rengata chu taksaa nin hring sûng chu mihriam irzuknahai irzûl ta loia Pathian nuamlama om theina hrangin.

³Sûnhnung tiang khom Jentailhaiin an lei itho nuam ngai: hurna haia, taksa irzukna haia, zû induna haia, zu hmun raiinfâanna haia, zu in irhlômna haia, millim biakna intirom tak haia nin thoa zoro nin lei hmang inhek ok tâk.

⁴Atûn hin a hoihokna angin nin om ta no sikin ar khêl an tia, nangni an hril insiat tâk a ni.

⁵Khannisianlân, khahai khan, Pathian, mihring le mithihai ngaitua hranga irsiam sai kuang khan an thurchi chit anni'n lan sîr an ti.



⁶Hi sika hin mithihai kuang khom Thurchi Sa hril a ni, mi danghai ang dêna an chungchâng rêl a nia, Pathian makunga irthaa an om theina hrangin.

Pathian thilpêk enkoltu sahai

⁷Thil tinrêng mongna zoro chu anai tâka, nin chongchai theina hrangin lungrîl irfîm tak irputin irvong infel roi.

⁸Thil dang nêkin milung takin lung irthung irhlôm hi uar roi, lungthungna'n sual tamtak ar khu ngai sikin.

⁹Chiar loiin nin ina intung irhlôm ngai roi.

¹⁰Pathian lungkhamna thilpêk tamtak enkoltu sahai angin Irtha tiang thilpêk nin idong murdi kha sin nin tho irhlômna hrangin hman roi.

¹¹Tukhomin thu an sîrin chu Pathian thu ngêt insîr ri se, sinthotu khomin Pathianin irzukna a ipêk angin sin ri se; khanchu Jisua Krista sikin Pathian chu itinrênga inpâka a om theina hrangin, roiinpuina le sinthotheina chu kumtuangin ama ta a ni. Amen.

Kristian nina sika tuangna

¹²Inditom takhaio, fiana irkhêl tak nin laia zuang tung hi thilirkhêl tak zuang tung tâk angin bê no roi.

¹³Krista tuangna koppuituhai nin ni sikin lôm unglân, roiinpui taka a zuang inlang tena chu raifân le lômin nin la isip hrang a ni.

¹⁴Krista irhminga hal nin ni'n chu nin vân a sa kêng, Irtha roiinpui tak, Pathian Irtha kha, nangnia a om tihna a ni.

¹⁵Nin laia tukhomin, mi that sika mani, inru sika mani, thil sual tho sika mani, mi'nbwaitu a ni sikin mani, tuang no ri se.

¹⁶Kristian nin ni sika tuang nin ni'n chu nin inzak hrang ni mah, Krista irhming nin irput sikin Pathian chôindôm ual roi.

¹⁷Roirêlna kha phut zoro a ni tâka, Pathian in sùng mihai ata phut ni a ti. Einia phut a ni'n chu Pathian Thurchi Sa thu iam loihai kha itin takin mo an iom hrang tâk!



¹⁸Pathian lekha thu'n, "Mi dikhai lua saninhring hrâm an ni'n te, Pathian ngaisakloi mi sualhai kha, itin takin mo an iom hrang tâk?" a iti ang khan.

¹⁹Khanchu Pathian lungdo anga tuanghai khan thil sa tho maiin an irtha kha Siamtu iamom tak kuang inkoltir ri sehai.

1 Petera 5

Pathian belrahai

¹Nin laia koiindang upahai kha, keima an upa chanpui, Krista tuangnahai inhriatpuitu le roiinpuina zuang inlang hrang chang sa hranga sabeitu hin nangni ki inthor a ni.

²Nin laia Pathian belrahai kha enkol insa roi, nakhrâtin ni loiin Pathian nuamlam anga irzuk taka tho'n, fâk sa hrang sabei sika ni loiin, sintho nuamna lungrîl irputin enkol roi.

³Nin ihruaihai chung a inlal no unglân, belra pâlhai enton rua ni ual roi.

⁴Khanchu, Belra Enkoltu Inlaltak a zuang inlang tena chôindômna lukhum roiinpui chuai theiloi kha dong nin ti.

⁵Khaang dênin nangni vânglaihai, ulian kuanga irpêklût roi. Sin nin irsanirhlôm theina hrangin thuhnuairôlna irbelin sin tho roi. Pathian Thubu'n, "Pathianin lâripâkhai a doia, irngaiintômhai chu a lunginkham ngai," ti a nia.

⁶Khasikin, a zoro taka chôindôma nin om theina hrangin Pathian kut hrât tak hnuai irsia hnuai unglân,

⁷nin lungdûkna murdi ama chung a irnghat zit roi; nangni a ngaitua tak tak a ni.

⁸Irngaitua unglân, irdîn roi! Nin râl Diabola kha, kâmkeibaknei inrûm ngai angin fâk hrang zongin a chai ngai.

⁹Iamna hin ngîr indet khak unglân, ama kha doi roi. Rammual hmun danga nin urênghai khomin khang dênin an tuang ti nin inhriata.



¹⁰Sôtnote nin tuang zoiin, Kristaa a kumtuang roiinpuina chang hranga nangni koitu, lunginkhamna sip Pathian khan nangni zuang inngîrtir a ta, siaminsa irkipin, inhrâtin nangni indet a ti.

¹¹Ama kuang khan sinthotheina kumkhua'n om ri se. Amen.

Inthâna chubai

¹²Urêngpa, mi iamom a nih ti nang kin hriat, Silvana kuta hin hi lekha bongte hi nangni ki hong thon a ni, hi hi Pathian lungkhamna kha a nih ti inhriattir hrang le, kha khan ngîr indet khak hranga nangni kin thorna a ni.

¹³Babulon koiindang nangni ang dêna inthang hin chubai nangni an mûk; ki nâipa Marka khomin nangni a mûk sa.

¹⁴Krista lungthungnaa kut irchelin chubai irmûk roi. Nangni Kristaa om murdihai kuang irngeina om ri se.



2 Petera

2 Petera 1

Chubai mûkna

¹Jisua Krista suak le tirtôn Simon Petera khan, a ni saninhringtu Jisua Krista zâra le ei Pathian felna zâra iamna kin idong ang donghai chubai ki mûk.

²Pathian le ei Rengpa Jisua nin inhriatnaa lungkhamna le irngeina nin chungga inpungin om ri se.

Pathian koina le inthangna

³A roiinpuina le a satna dong hranga ni koipu ei inhriatna sika, sakhua diktak hringnuna ei om theina hrangin, thil ei innang murdi Pathian sinthotheina lianin a ni pêk ta.

⁴Khanchu; thilpêk roiinpui tak le hlu tak a inkung chu, a ni pêk tâka, khasika khan rammual irzukna, a nin siatthei ata nin suaka, Pathian zia nin irkoppui thei tâk a ni.

⁵Hi sika hin thei dôr insua nin iamnaa khan satna inkoptir unglân, nin satnaa khan inhriatna,

⁶nin inhriatnaa khan mâni irsepna, mâni irsepnaa khan diarna,

⁷nin diarna khan Pathian uksakna, Pathian uksaknaa khan urênghai inrenna, nin urênghai inrennaa khan lungthungna chu bôk sa roi.

⁸Hi nitna hi nin innang a ni, kha kha chu nin neia, a pung maiin chu ei Rengpa Jisua Krista nin inhriatnaa takirtâi tak le poimo takin nangni siam a ti.

⁹Kha thil nei loihai chu mitcho, hmu irzat loi, an tianlai sual irsûkinfâi pe an nih ti irnghil tâkhai an ni.

¹⁰Khanchu, urênghaio, nangni a ikoina le nangni a inthang hi inlangtir hrangin theidôra takirtâina insua'n, det takin ngîr roi; khaanga ngîrhai chu itiklai khomin tûk siat no nihai.



11Khanchu ei Rengpa le saninhringtu Jisua Krista kumtuang rama lôm takin nangni inlûttir a ti.

12Khasikin thutak nin inhriata khan det takin om ta khom unglân, hi thu hi nangni inhriat nontir mai ki inuam a ni.

13Khan, hi takpum ki'rput sêng hin chu hi thuhai nin inhriatna kha inhar thiai mai hrangin nangni ki nuam a ni.

14Ei Rengpa Jisua Krista'n a ni ihril angin hi ki takpum hi ki isuaksan lat ta hrangin ki irhriat a ni.

15Ki suaksan hnung khomin, itiklai khoma hi hi nin inhriat mai theina lam nangni siam pe hrangin thei dôrin irnak ki isong a ni.

Krista roiipuina mit ngeia hmutuhai

(Mt 17.5; Mk 9.7; Lk 9.35)

16Ei Rengpa Jisua Krista, sinthotheina le, a izuang nôkna thu nangni kin ihril lai khan thonthu phuachôp mai mai nangni hril ni ma ung, a roiipuina chu mit ngeia hmutuhai kin ni.

17Pa Pathian kuang ata chôindômna le roiipuina a dong lai khan, Roiipuina Irsângtak kuang ata irhâi a zuang suaka, "Hi hi ki Nâipa lungthungtak a chung a ki lôm tak tak a ni," a zuang tia.

18Kha hnuk irhai, irvân ata zuang chum kha, keini khom tâng irthianga a kuang kin om lai khan kin inhriat a ni.

19Deipuhai thu lei inpuang kha a dik ngêt tih keini khomin kin pom indet uala, nangni khomin, Vârpâr Ârsi a zuang inlang mân vâ angin, kha thu kha nin milunga invârtu hmang unglân sa a ti.

20Pathian Lekha thua lei hrilna thuhai hi mâni ngaidân ringota hrilfia hrang ni mah ti inhre masa phot unglân.

21Lei hrilna rêng rêng hi mihriam thua suak ni maka, Irtha Irthiang hruaiin Pathian kuang ata an insîr ngai a ni.

2 Petera 2

Deipu dol le irchutirtu dikloi



- ¹Mipuihai laia deipu dol an iom ngai ang khan nangni laia khom irchutirna dikloi la hong om a ti; mi insiat thei irchutirna dikloi inrûkin la hong lûtpui an ta; Inlaltak anni irtantu kha, hnôlin mâni siatna inrang takin intungtir an ti.
- ²An omlam intirom tak chu mihaiin hong zui an ta, anni sika khan thutak lampui hi hrilinsiatna ni a ti.
- ³Sum an hmu theina hrangin huatirham takin an thu phuachôp khan bepârna hrangin nangni an hmanga; khannisianlân, tiana an chungaroirêl sai tâk chu om chian chian no ni, anni irhmangtirtu hrang kha a ihar chian tâk a ni.
- ⁴Vântîrtônhaiin thilsual an tho lai khan Pathianin hôihai ma, hremhmuna a paia, Roirêl Ni nghâk hrangin khura inthima khan an iom tâk a ni.
- ⁵Tianlai rammual khom hôi ma, rammual sual tak chungar tui an lêttira khom khan, Nova, felna thu'npuangtu le mi dang sari vai an izôk a ni.
- ⁶Sodom le Gomora khua khom a'rvuttir chita, Pathian uksak loihai a ihrem lam hrang entîrna hrangin a insiat chittir a ni khate.
- ⁷Lota, mi fel, mi sualhai omlam a sâna poi ti ngaitu kha a sansuaka,
- ⁸Kha mi satak kha an laia om sa ngai a nia, an thil tho'nsual a hmu le a inhriathai chu a sâna milung an natir ngaia.
- ⁹Rengpa khan ama chituhai chu tuangna ata sansuak lam le roirêl Ni a zuang tung mâna khom mi sual hrem lam an hriat;
- ¹⁰an takpum irzukna porinche anga omhai le Pathian irchamneina hmusittuhai len vâng chu hremna lam an hriat nôk ual. Hi irchutirtu dik loihai hi an invêtin an hâia, an lâripâka, irvân mi roiinpuihai khom khi mahrip tho loiin an hrilinsiat ngai a ni.
- ¹¹Anni nêka hrât le sinthothei ual vântîrtônhai khomin, Rengpa makunga hi mi roiinpuihai chungchâng an insîrin chong siat hmang ngai mahai.



¹²Khannisian, hihai hi ngaituana nei loi, ramsa, chela that zôi hranga zuang suakhai ang hi an ni, an inhriat thiamloi murdi an hrilsiata, ramsahai anga that ni an ti,

¹³an sual man kha tuang an ti. Sûn sosôta a hoihôkna uar ngai an ni, nin laia mi intirom le mi porinche irphûm an nia, nin hruaithêna an hong kopa hin nangni an ihuang a ni.

¹⁴An mitin uire hrang an en vêl maia, sual tho hnông thei mahai. An lungrîla huatirhamna lam a sân an inhriata, Pathian khosâl tong an ni.

¹⁵Lampui dik an pêtsana, an irhmang ta. Beora nâipa Balaama lampui an zui ta. Ama khan chu thilsual tho an lâp takin ar hriata.

¹⁶Khannisian, a tho'nsualnaa khan halirchu'n a om tâka, sakuartung chong theiloi chu mihriam angin a hong chonga, deipu invêtna chu inmongtir a ni ta.

¹⁷Kha kha tuikuang tui om loi le sôm phâivua'n a isêmpei ang an ni; khahai ta hrangin chu Pathianin hmun inthim inthûk tak kha a sia pehai ta.

¹⁸Thu chanlamboi uar tak taka hrilin, suala omhai laia irthoka intân suak lai takhai chu taksa irzuknaa intiromna an inthêm inhnêhai ngaia.

¹⁹Anni sual suaka om chianin mi zalênna pe hrangin an inkung ngai, tu mihriam khom ama inhnêtu suaka chu a iom a ni.

²⁰Rengpa le Saninhringtu Jisua Krista an inhriat sikin rammual porinchenahai an intân suaksan hnungin kha dêna khan intân nôk an ta, inhnê nôkin an omin chu, a phuta nêkin inhnunga an dinghmun kha chu siat ual tak ni a ti.

²¹Lampui fel inhriat hnunga thupêk irthiang an kuang inkoltir kha chu irheisan nêkin chu lampui fel inhre no sianlân a ta hrangin a isa ual hrang a ni.

²²An om lam ata hi, hi thuvâr dikzia hi an lang infel ok: "Ui chu a miluak a fâk nôka," ti le "Vokpui dialdôka a irbual nôk ngai," tihai hi.

2 Petera 3



Rengpa zuang nôkna chonginkung

- ¹Inditom takhaio, voi hni lekha nangni ki hong ithon a ni ta. Nin inhriat sai tâk nangni ki hong inhriat nontir nôk; nangnia lungrîl irthiang kaiinhar hrangin voi hni nangni ki hong ithon a ni.
- ²Deipu irthianghai thu le Rengpa le Saninhrintu thupêk, nin tirtônhaiin tiana nangni an ihril kha, inhre mai roi.
- ³Sûn hnungkhôna chu hmusitpuhai, mâni irzukna ang taka omhai hong suak an ti, ti inhre masa roi. Hmusit tak takin,
- ⁴“Zuang nôk chonginkung kha itin mo a ni tâk? Ei irchibulhai an thi zoi tâka, thilsiam irphut ata itinrêng a ngai dênin a la iom mo ni ma?” la ti an ti.
- ⁵Tianlaia khan Pathian thu’n, irvânhai khi siam a ini le irnêng chu tui ata siam suak a inihai, tui le tui kêra a isia hai,
- ⁶tuilêt lai khan rammual milui chu, kha tui khan a ngîma, a insiathai kha a’rngil om an thoa.
- ⁷Pathian ngaisak loihai chungchâng rêl zoro le irhmangtir tika meia kâng irhmang hrangin atûn irnêng le irvân khom hi Pathian thu’n a ihôi a ni.
- ⁸Inditom takhaio, hi hi irngil no roi, Rengpa ta hrangin chu sûn khat hi kum sângkhat ang a nia, kum sângkhat khom hi sûn khat ang a ni.
- ⁹Senkhat iam lam angin Rengpa hi a thu’nkung hlenna lama ir-ial ma; nin ta hrangin a ituang thei kêng; tûte irhmang nuam maka, mi murdi’n an sual an irleta, a kuang an ikîr a nuam ual a ni.
- ¹⁰Rengpa Nikhua chu inru angin a zuang itung ngêt hrang a ni. Kha tika chu irhai inring tak le irvân khi kâng irhmang zit a ta; irnêng le a sûnga thil om murdi khom irhmang zit a ti.
- ¹¹Hihai hi khaanga siat zit hrang a ni’n chu nangnihai kha i ang mi mo nin ini hrang?



¹²Pathian sên tep nghâkhmo taka nin thîr mai lai hin mi irthiang, Pathian ta hranga irpêk mi nin ini hrang a ni. Kha tika chu irvân khi kâng irhmang a ta, a lum sikin ârsihai khom zôi zit an ti.

¹³Khannisianlân, Pathian inkung, irnêng thar le irvân thar, a sênga felna omna kha, ei inghâk a ni.

¹⁴Khanchu inditom takhaio, hi thil nin nghâkhai hin Pathian makunga irthiang le sêlna boia om hrangin theidôr insua unglân, ama leh irngei roi.

¹⁵Rengpa tuangdiarna hi saninhring nin ni theina zoro inchuma bê unglân, Pathianin vârna nangni a ipêk angin ei urêngpa inditom tak Paula khomin hi thu hi a irziak ngai a ni.

¹⁶A thu irziak senkhathai chu a sên inhriat thiam an tak, ite irchu loi le mi det loihaiin Pathian Lekha thu dang an irngai kôi ang dênin an irngai kôia, mâni siatna an intung ngai.

¹⁷Inditom takhaio, nangni'n chu nin inhriat tâka, irdîn roi; khano'nchu uksak nei loihaiin nangni hruai irhmang an ti; nin det insat laiin tûk likna chin ni.

¹⁸Ei Rengpa le saninhringtu Jisua Krista inhriatna hai, lungkhamna hai irsônlian mai roi. A kuanga khan roiinpuina atûn ata kumtuang dênin om ri se. Amen.



1 Johana

1 Johana 1

Hringna Thu

¹A phut ata om, kin mikuara kin inhriat tâk, kin mita kin ihmu, ngûk taka kin ien, kuta kin itôn, hringna Thu kha kin irziak a ni.

²Kha hringna kha a hong inlanga, kin ihmu tâk, kin inpuanga, Pa kuanga om kumtuang hringna kin kuang a zuang inlang kha, nangni kin inhril a ni.

³Nangni'n nin ni pôl sa theina hrangin kin ihmu le kin inhriat kha nangni kin inhril a ni, kin irpôlna kha Pa le Nâipa Jisua Krista leh kin irpôlna a nia.

⁴Kin lôm a'rkip theina hrangin hi thu hi kin irziak a ni.

Pathian chu Vâr a ni

⁵A Nâipa ata thu kin inhriat nin kuanga kin inpuang chu hi hi a ni: Pathian chu vâr a nia, amaa inthim zel om mah.

⁶Khasikin, inthima lêng maiin, ama leh ei irpôl ei tia, inthima ei omin chu milak ei thoa, thutak ei izôm loi a ni.

⁷Ama vâra a om angin vâra ei iomna san chu ei irpôlkhôm hi a ni, A Nâipa Jisua thisenin ei sual murdi a ni'rsûkinfai tâk a ni.

⁸Sual nei ma ung ei ti'n chu, mâni ei irhuanga, thutak kha einia a iom loi a ni.

⁹Ei sualhai Pathian kuang ei irphuanguin chu, ama kha iam a omin a dika, ei sualhai a ni ngaidamin, ei dikloina murdi a ni irsûkinfâi hrang a ni.

¹⁰Thilsual tho ma ung ei ti'n chu, Ama kha milak ei inchangtira, a thu khom ei nia a iom loi a ni.

1 Johana 2

Krista ni Thoptu

¹Nâihaio, thil sual nin tho loina hrangin hi thu hi nin kuang ki irziak a ni. Aniachu, tukhom hong sual ta sianlân, Pa kuanga nin sîrputu mi fel, Jisua Krista kha, ei nei.



²Krista kha ei sual ngaidamna a ni, eini sual vai ni loiin rammuala mi murdi sual ngaidamna khom a ni.

³Pathian thupêkhai ei zômin chu ama ei inhriat a nih ti a ifel a ni.

⁴Ama kha kin inhriat tia a thupêkhai zôm ual loi chu milak a nia, amaa thutak a iom loi a ni.

⁵Tukhomin a thu a zômin chu Pathian kha a sân lung a ithung a ni. Amaa ei om ngêt tih inhriat infelna hrang chu hi hi a ni:

⁶Tukhom, Pathian leh irzomin ki om mai titu kha Jisua Kristaa om angin a iom sa hrang a ni, ti hi.

Thupêk thar

⁷Inditom takhaio, nin kuang thupêk thar ki hong irziak ni mak e, thupêk milui, a phut ata nin inei kha ki irziak a ni. Thupêk milui kha, nin inhriat sai tâk kha a ni.

⁸Khannisian atûna nin kuanga thupêk ki irziak hi a thar a ni, kha thutak kha Kristaa leh nangnia an lang; inthim kha a hong irkiang thiaia, vâr tak tak a hong vâr tâk sikin.

⁹Vâra om irtia, a urêng khôkmâk chu atûn ten khom inthima a la iom mai a ni.

¹⁰Tukhom mâni urêng lungthungtu chu vâra a om maia, amaa khan tûkna rêng om mah.

¹¹Tukhom mâni urêng khôkmâktu chu inthima a oma, inthima a'rvâk ngaia, inthimin a mit an zîng pe ngai sikin a fena khom a inhriat ngai loi a ni.

¹²Nâihaio, Krista zâra nin sualhai ngaidam a ni tâk sikin nin kuang ki irziak a ni.

¹³Pahaio, ama chu a phut ata om mai kha nin inhriat tâk sikin nin kuang ki irziak a ni. Vânglaihai, Setan kha nin inhnê tâk sikin nin kuang ki irziak a ni.

¹⁴Nâihaio, Pa kha nin inhriat tâk sikin nin kuang ki irziak tâk a ni. Pahaio, ama chu a phut ata om mai kha nin inhriat tâk sikin nin kuang ki irziak tâk a



ni. Ruathartehaio, nin hrâta, Pathian thu nangnia a om tâk sika Setan nin inhnê tâk sikin nin kuang ki irziak tâk a ni.

¹⁵Rammual hi lungthung no unglân, rammuala thil omhai khom lungthung sa no roi, Tukhomin rammual hi lung a thungin chu, Pa lungthungna a inei loi a ni.

¹⁶Rammuala thil om murdihai taksa irzukna hai, mit irzukna hai, mâni sum irsorpuinahai le dam sêng roiinpuinahai hi Pa kuang ata suak ni mak e, rammual ata suak kêng a ini ual.

¹⁷Rammual hi a'rzuknahai pumin a hong iboi thiai a ni, khannisian, Pathian nuamlam thotu chu kumkhua'n om mai a ti.

Krista doitu

¹⁸Nâihaio, zoro hnungkhôn a hong ni tâka, Krista râl la hong om a ti, ti nin inhriat ang khan, atûn hin Krista râlhai tamtak an hong suak ta; khasika khan zoro hnungkhôn kha a ni tah ti ei inhriat a ni.

¹⁹Anni kha ei lai ata an suaka, ei mi le satak tak ni mahaia, nihai sian ei kuang an iom mai hrang a ni. Khannisian, an rêngin ei mi le sa ni zit mahai tih an inlang fiana hrangin an isuak tâk a ni.

²⁰Nangni chu, Mi Irthianga khan sahriak nangni a'rthutira, itinrêng nin inhriat a ni.

²¹Thutak kha nin inhriat loi sika ki irziak ni maka, thutak nin inhriat sikin le thutak ata minlak rêng rêng suak ngai mah ti khom nin inhriat sika ki irziak a ni.

²²Jisua kha Krista a nih ti pomloitu nêka milak tu mo om? Kha pomloitu kha Krista râl a ni. Pa le Nâipa a inhnôl a ni.

²³Tukhom Nâipa pomloi chu Pa khom a ipom loi a ni; tukhom Nâipa pomtu chu Pa khom a ipom a ni.

²⁴Nangni'n chu a phut ata nin inhriat kha nangnia inomtir mai roi. A phut ata nin inhriat kha nangnia a om maiin chu nangni khom Pa le Nâipa khan nin iom mai hrang a ni.



²⁵Hi hi a ni a thu'nkung, Krista ngêtin ei kuang a inkung kumtuang hringna hi.

²⁶Nangni hruai irhmang tumtuhai chungchâng thu hi nin kuang ki irziak a ni.

²⁷Nangni chu, a sahriak nangni pol kha nangnia a om maia, tukhom irchu nang mak chêi. A sahriak nangni irpoltirna khan thil tinrêng nangni ar chutira, kha kha a dika, milak ni mah. Khanchu, nangni a irchutir ang khan Kristaa khan om mai roi.

Pathian Nâihai

²⁸Atûn hin, Nâihaio, a zuang inlâr tika hâi taka ei oma, a zuang Nikhuuaa inzak loa ei om theina hrangin Kristaa khan om mai roi.

²⁹Ama kha mi diktak a ni ti nin inhriatin chu, dik taka thoitu ka chu a nâihai an nih ti inhre roi.

1 Johana 3

Pathian nâihai

¹Irgai u ta, Pa lung ni thungna hi a lûminna bâka! Pathian nâihaia a ni ibe tâk hi; khaang kha ei hong ini kêng. Hi sika hin rammualin nin hre ma, ama kha an inhriat no sikin.

²Inditom takhaio, atûn hin Pathian nâihai ei ni tâka, itin mo ei la iom hrang tih chu lan lang mah. Ama a zuang inlâr tika chu ama angin om ei tih iti ei inhriat, a nilam ang takin ama kha ei la hmu hrang sikin.

³Tukhom, Kristaa sabeina nei murdi'n chu ama a irthiang angin a'rthianginfâi ngai.

⁴Tukhom, thil soal tho chu dân a insiat a ni, soal chu dân insiatna a nia.

⁵Ama kha sualhai lapai hrangin a hong inlanga, amaa khan soal om mah ti nin inhriat.

⁶Tukhom Kristaa om mai chu thilsual tho mah; tukhom thil soal tho chu Krista hmu maka inhriat khom inhre mah.



⁷Nâihaio, tukhomin nangni huang no ri sehai; Krista kha mi dik tak a ini angin thil dik thotu kha mi dik a ni.

⁸Thil soal thotu chu Diabola ata suak a ni; a phut rengata Diabola khan thil soal a thoa. Pathian Nâipa a zuang inlangna san chu, Diabola sinthohai inboi hranga a ni.

⁹Tukhom Pathian nâi chu soal ngai maka, Pathian nitna tak amaa a om maia; Pathian kha a pa a ni sikin a isual thei ta loi a ni.

¹⁰Pathian nâihai le Diabola nâihai inlang infelna chu hi hi a ni: tukhom thil dik tholoi le a urêng lungthung loi chu Pathiana suak ni mah.

Lungirthung irhlômna

¹¹A phut ata thu nin inhriat kha: lung ei irthung irhlôm seng hrang a nih ti hi a ni.

¹²Mi soal ata suak Kaina, a urêngpa Abela that anga khan chu om no iduah. Ithoa mo a ithat kha? Ama sinthohai a suala, a urêngpa sinthohai a fel sikin.

¹³Urênghaio, rammualin nangni a khôkmâk khomin ar khêl ti no roi.

¹⁴Eini chu urênghai lung ei thung sikin thina ata ei suaka, hringnaa ei lût ta tih ei inhriat: lungthungna nei loi chu thinaa a la iom mai a ni.

¹⁵Tukhom, a urêng khôkmâk chu mi that a ni, tukhom mi that chu kumtuang hringna nei no nih ti nin inhriat.

¹⁶Ama'n ei ta hrangin a hringna a ipêka hin, lungthungna kha ei inhriat ta. Eini khomin urênghai hrangin ei hringna hi ei ipêk hrang a ni.

¹⁷Tu'n mani rammual irchon neiin a urêng irsam hmu sianlân, ama kha inren no sianlân, Pathian lungthungna kha itin mo a kuang a iom thei hrang?

¹⁸Nâihaio, chongbâi le hmûr vaiin lungthung no ih, lungthungna diktak le sinthoa inlangin ni ual ri se.

Pathian makunga hâina

¹⁹Khanchu, thutaka ei om tih inhria ei ta, a makunga khom ngam takin om thei ei ti.



²⁰Ei milung luan thiamno a nin changtirin te, Pathian kha ei milung nêkin a roiinpui uala, itinrêng an hriat zit a nih ti ei inhriata.

²¹Inditom takhaio, ei lungrîlin thiamno a nin changtir no'n chu Pathian ei hnôl ngam ngai.

²²A thupêkhai ei zôma, a nuamlam ei tho sikin a kuang ei ngên murdi ei hmu thiai ngai a ni.

²³A thupêk chu hi hi a ni: A Nâipa Jisua Krista irhming ei iama, thu a ni ipêk anga lung ei irthungirhlôm hi.

²⁴Pathian thupêk zômtu chu Pathiana a om maia, Pathian khom a kuang a iom mai a ni. Khan, hi hi Pathian einia a om mai tih ei inhriatna a ni: Irtha a ni ipêk hi a ni.

1 Johana 4

Irtha dik le dikloi

¹Inditom takhaio, irtha narân hi iam no roi, irtha chu Pathian ata zuang suak a ni le ni loi fia bak ngai roi; deipu dol tamtak rammuala an hong suak tâk sikin.

²Hi hi Pathian Irtha nin inhriat theina hrang chu a ni: Tukhom Jisua Krista chu taksa'n a zuang tih thoitu murdi chu Irtha a idong kha Pathiana suak a ni.

³Jisua thoploihai irtha dong kha Pathian ata suak ni ma: kha kha Krista doitu hong hrang ti nin inhriat kha a ni, atûn khom rammuala a iom mai ta a ni.

⁴Nâihaio, nangni chu Pathian ata suak nin nia, nangnia om Irtha kha rammuala om nêkin chu a roiinpui ual sikin deipu dolhai kha nin ngam tâk kêng.

⁵Anni kha rammuala mi an nia; khasikin rammuala mi angin thu an insîra, rammualin an thu an irngaitua ngai a ni.



⁶Eini chu Pathian ata suak ei ni; Pathian inhretuhai khan ei thu khom an irngai ngai; Pathian ata suak loi chu ei thu khom irngaitua mahai; khataka khan irtha diktak le dikloi ei inhriat thei a ni.

Pathian chu lungthungna a ni

(Joh 3.16)

⁷Inditom takhaio, lung irthung irhlôm ei ti, lungthungna chu Pathian ata zuang suak a ni; tukhom lungthungna nei ka chu Pathian nâi a nia, Pathian an hriat sa ngai a ni.

⁸Tukhom lungthungna nei loiin chu Pathian inhre mahai, Pathian chu lungthungna a nia.

⁹Pathian lungthungna chu hi ang hin ei kuang a zuang inlang, ama zâra hringna ei nei theina hrangin Pathianin a Nâipa neisun rammuala a zuang tîra hin a ni.

¹⁰Hi ngêt hi a ni lungthungna chu: Eini'n Pathian lung ei ithung ni loiin, Ama'n lung a ni thunga, ei sual thuphachôina hrangin a Nâipa a zuang tîr tâk a ni.

¹¹Inditom takhaio, Pathianin khaang dôrin lung a ni thungin te, eini khom lung ei irthungirhlôm seng hrang a ni.

¹²Tukhomin Pathian hmu ngai mahaia chu, lung ei irthung irhlômin chu Pathian einia a om maia, a lungthungna khom einia irkiptirin a iom a ni.

¹³A'rtha ni pêk hi Amaa ei oma, Ama khom einia a om tih ei inhriatna chu a ni.

¹⁴Pa'n Nâipa kha rammual Saninhringtu hrangin a zuang tîr ti ei hmu tâka, mi dang khom ei inhriattir a ni.

¹⁵Tukhom Jisua kha Pathian Nâipa a nih ti thoitu chu amaa khan Pathian a om maia, ama khom kha Pathiana a om mai a ni.

¹⁶Pathianin lung a ni thungna chu eini ngêtin ei inhriata, ei iam ta a ni, Pathian chu lungthungna a nia, kha lungthungnaa om mai kha Pathiana a om maia, Pathian khom amaa a om mai a ni.



¹⁷Roirêl nikhua kha chi viat loia ei om theina hrangin einia lungthungna chu irkiptir a ni ta; rammuala khom hin ama ang takin ei iom ta a ni.

¹⁸Lungthungnaa hin chitna rêng om maka, lungthungna irkip khan chitna murdi an hnot irhmang ngai. Chitna hi hremna a ni sa, ichia om chu lungthungnaa a la irkip loi a ni.

¹⁹Ama'n lung a ni thung masa sikin eini khomin lung ei ithung a ni.

²⁰Mi'n, "Pathian lung ki thung," tiin a urêng khôkmâk sian, milak a ni; a urêng a ihmu mai lua lung a thung no'n te, Pathian a ihmu ngailoi kha itin mo lung a ithung thei hrang?

²¹Krista'n thupêk a ni ipêk chu hi hi a ni: Tukhom Pathian lungthungtu khan a urêng khom lung a ithung sa hrang a ni, ti hi.

1 Johana 5

Iamna hi rammual inhnêna

¹Tukhom Jisua hi Krista kha a nih ti iam murdi chu Pathian nâi an ni. Tukhom Pa lungthungtu khan nâi khom lung a ithung sa ngai a ni.

²Pathian nâihai lung ei thung a ni ti ei inhriatna chu, Pathian lung ei thunga, a thupêkhai ei izôm hi a ni.

³Pathian lung ei thungna chu hi hi a ni: a thupêkhai zôm hi; a thupêkhai chu eini ta hrangin ngar mah.

⁴Pathian nei murdi'n chu rammual hi an hnê ngai: hi hi a ni rammual inhnêna ngamna chu, ei iamna hi.

⁵Jisua hi Pathian Nâipa a nih ti iamtu vai no chu tu mo rammual hi inhnê thei hrang?

Nâipa chungchânga thu inhretu

⁶Jisua Krista hi a ni, tui le thisena zuang kha, tuia vai ni loiin, tuia le irthaa a ni ual; Irtha kha an hriatpuitu a ni. Irtha kha thutak a ni.

⁷Inhriatpuitu inthum an om:

⁸Irtha, tui, le thisen kha, kha inthumhai kha an lunginrual a ni.



⁹Mihriam inhriatpuina lua ei pomin te Pathian inhriatpuina kha a roiinpui ual a ni; Pathian inhriatpuina kha, A Nâipa thurchi an hriattir takna hi a ni.

¹⁰Tukhom Pathian Nâipa iamtu'n chu amaa hin inhriatna hi a nei a ni: Pathian iamloitu chu Pathian kha milaka a inchangtir a ni, Pathianin a Nâipa thurchi an hriattir kha a iamno sikin.

¹¹Hi hi a thu inhriattir chu a ni, Pathian khan kumtuang hringna a ni pêka, kha hringna kha a Nâipaa hin a iom a ni.

¹²Tukhom Nâipa nei murdi'n chu hringna kha an nei ta, Nâipa nei loiin chu hringna kha nei mahai.

Kumtuang hringna

¹³Kumtuang hringna nin nei ti nin inhriat theina hrangin nangni Pathian Nâipa irhming iamtuhai kuang hi thu hi ki irziak a ni.

¹⁴A nuamlam anga i khom ei ngênin chu a nir ngaitua ngai, kha kha a kuanga ei ngamna chu a ni.

¹⁵Ei ngên zoro rikipin a nir ngaitua ngai ti ei inhriat sikin ei ingên ang kha a ni pêk ngai ti khom ei inhriat.

¹⁶Tukhomin, a urêng, thina dôr ni loi soal tho'n hmu sianlân, ngên pe a ta, Pathianin hringna pe a ti. Hi hi thina dôra soal tho loihai hranga a ni. Khannisian, thina hrang dôr soal a oma, khaanghai ta hrangin ngên pe hrang ti ma ung.

¹⁷Thil dikloi tho rêng rêng hi soal a ni zita, aniachu soal murdi hi thina hrang dôr soal ni mah.

¹⁸Tukhom Pathian inei chu thil tho'nsual mah ti ei inhriata; Pathian Neitu khan a vong inhringa, mi soal khan a itôn theiloi a ni.

¹⁹Rammual pumpui hi Mi soalpa thuhuaia om sian khom Pathian ata suak ei nih ti ei inhriat.

²⁰Pathian Nâipa kha a zuanga, Pathian tak kha inhre thei hrangin inhriat theina a ni pêk ti ei inhriat sa; khanchu Pathian tak khan ei iom a nia, Nâipa



Jisua Kristaa khan. Hi hi a ni Pathian dik tak kha, hi hi a ni kumtuang hringna chu.

²¹Nâihaio, millim ata irkiang roi.



2 Johana

2 Johana 1

Chubai mûkna

¹Upa'n chu Nupang sa, Pathian inthang le a nâihai, thutaka ki lungthunghai chubai ki mûk. Keima vai khom ni loiin thutak inhretu dang murdi khomin lung nang an thung;

²thutak, ei nia om mai, kumkhua'n ei kuang a om hrang sikin.

³Thutak le lungthungnaa khan Pa Pathian le Pa Nâipa Jisua Krista kuang ata lungkhamna hai, za'rngaina hai, irngeina hai kha ei kuang om a ti.

Thutak le lungthungna

⁴Pa'n thu a ni ipêk anga ni nâi tuhai mani thutaka an om ki hmu sikin ki lôm tak tak a ni.

⁵Nupang sa, thupêk thar ni loiin a phut ata ei idong kha nang hril hrangin ki irziak a ni: "Lungthung irhlôm seng ei ti," ti nang ki ngên a ni.

⁶A thupêk ang dêna ei iom hi lungthungna chu a ni; hi hi a thupêk, a phut ata nin inhriat tâk kha a ni, "Lungthungnaa nin om mai hrang a ni," ti hi.

⁷Mi huang ngaihai, Jisua Krista chu taksa irputin a zuang ti pomloihai, rammuala an hong suak tâka, khaang mihai kha huangtu le Krista doituhai an ni.

⁸Khasikin nin itho suak tâkhai inchân loa lômman ar kipa nin hmu theina hrangin, mâni ir-enkol insa roi.

⁹Tukhom Krista irchutirna thua om loa a khêlin chu Pathian nei mah. A irchutirna thua om mai chu Pa le Nâipa ainei irkop tâk a ni.

¹⁰Kha irchutirna kha kop loa nin kuanga hong chu tukhom nin ina intungtir no unglân, chongbâi sa khomin lei chongpui no roi.

¹¹Chongbâi saa lei chongpuitu chu thil tho'nsuala khan a ikop sa a ni.

Inthâna chubai



¹²Nin kuang thu tamtak insîr hrang nei khom inlân, lekha le lekhatuia irziak tum ma ung; ei lôm ar kip theina hrangin ni kuang hongga, hmêl irhmua nang chongpui ki inuam ual a ni.

¹³Ni zuarpuinu inthangnu nâihai khan chubai nang an mûk sa a ni.



3 Johana

3 Johana 1

Chubai mûkna

¹Upa khan, a sâma ki lungthung Gaia, chubai nang ki mûk.

²Rual inditom tak, itinrênga hlo ni chuk, irtha le taksa tiang ni dama, ni hrisêl theina hrangin nang ki chongchai pe ngai a ni.

³Urêng hai an hong a, thutaka ni iamomzia le thutaka ni om indet khakzia an ni hong hrila, ki râi a fân tak tak a ni.

⁴Ki nâi hai thutaka an om tih kin hriata ki ilôm bana chu lômna dang rêng nei ma ung.

Gaia inpâkin a om

⁵Rual inditom tak, hi urêng hai hi mikhual ni khom hai sian an chung a ni lei satak taka,

⁶Koiindanga khom ni satzia an insîr ngai. An inzinna lama anni hi Pathian nuamlam tiang ni lei changpui zêl theiin chu a sân sa ti.

⁷Krista sinthoa an fenaa khan Jentail hai lai ata ite sanna la nuam mahai.

⁸Khanchu, thutak hranga sin suam ei ni, ei inhriat theina hrangin keini hin hi mihai hi ei ichangpui hrang a ni.

⁹Koiindang hai kuang khan lekha ki'rziak tâka, khannisianlân, Diotrefa, an laia hruaitu chang nuam ngaitu khan, ki thu uksak mah.

¹⁰Khasikin ki hong zoro tena chu a om dân, thil irkhêl tak tak thoa mi a ibê thuhai nangni hril zit ki ti. Kha kha a ruk ti loiin ama ngêtin urêng hai lôm nuam maka, a lôm nuam hai khom a khapa, Koiindang ata an hnot suak hai ngai a ni.

¹¹Urêng inditom tak, a saloi chu irchu no'n lân, a sa chu irchu ual roh. Thil sa thotu chu Pathiana suak a nia, sin saloi thotu chu Pathian la hmu ngai mah.

¹²Demetria hi mi tinin an inpâka, thutak inpâk khom a ihlo a ni; keini khomin kin inpâka, kin inpâkna chu a dik a nih ti nin hriat.



Inthâna chubai

¹³Ni kuang thu tamtak insîr hrang ki neia, khannisian, pe'n le lekha tuia irziakin nuam ma ung.

¹⁴Sôtnote hnunga nang hmu lat ki sabeia, kha tena hmêl irhmu'n la chong ta rei.

¹⁵Irtharngamna ni kuang om ri se. Ei rualhai hin chubai nang an mûk. Ei rualhai kha an irhming irlam sengin chubai ni mûk pe roh.



Juda

Juda 1

Chubai mûkna

¹Jisua Krista suak le Jakoba urêng Juda khan, Pa Pathian lungkhamna le Jisua Krista ienkolnaa om, ikoihai chu chubai ki mûk.

²Za'rngaina hai, irngeina hai, lungthungna hai nin chungna inpungin om ri se.

Irchutirna dikloi chungchâng

(2 Pet 2.1-17)

³Inditom takhaio, saninhringna ei idong chungchâng hi nin kuang irziak ki nuam tak tak ngaia; Pathianin a mi irthianghai laia iamna thu voikhat nang an kol indettir tâk hi thop ngit hranga nangni inthor hrangin nin kuang lekha irziak a nang ti kin hriata.

⁴Mi senkhat Pathian nei loihai, inrûkin ei laia hong lût an oma, kha mihai khan ei Pathian lungkhamna kha hurna an inchangtira, ei Hruaitu le ei Rengpa neisun Jisua Krista khom pom mahai. Kha mihai khan thiamno an chang hrang dân chu tianlai ata Pathian Thubu'n a lei inpuang sai diam tâk a ni.

⁵Nin inhriat sai zit a ni khomin, nangni hong inhriattir nôk ki inuam a ni. Rengpa'n Aigupta ram ata Israel mihai a sansuaka, khannisian an laia iamloituhai kha a inboipaihai nôk a ni.

⁶Vântîrtônhai khom an irchamneinaihai pom nuam loa, an omna hmun mâksanhai kha, Roirêlna Nikhua roiinpui tika an chungthu rêl hrangin kumtuang thîrhruia khitin inthim hnuai a isiahai tâk a ni.

⁷Khaang dêna khan Sodom le Gomora khua hai kha, an kôlvêla khua hai leh hurna porinchea an irpumpêk zoi tâk sikin, mi tin le inhriattirna'n anni chu kumtuang meia hrem an ni tâk a ni.

⁸Khaang dên khan, kha mihai khan inlârna an hmua, kha inlârna hmu sika khan an takpum an porinchetira, Pathian irchamneina an hnuaisiaa, chung tianga roiinpuihai khom an hrilinsiat ngai a ni.



⁹Mikaila, vântîrtôn inchungtak khomin, Diabola le Mosia ruak chungchânga an irsêl lai khan, chong saloiin hal nuam mah, “Rengpa’n hal ri se,” a ti chian a ni.

¹⁰Hi mihai hin an inhriat thiamloi murdi an insîrinsiat ngaia; ngaituana neilo ram sahain an isuakpui inhriatna an izui ang dênin anni khom hin an izuinaa khan a insiattirhai a ni.

¹¹Lungkham an om bâk ngaia! Kaina lampui kha an zuia, sum irzûlin Balaama sualna tiang an intâna, Kora angin tehel an zong sikin, an irhmang sa ta!

¹²Khahai kha lungthungna hruai nin inthê insiattu an ni, inzak loiin an ot sa. Mâni ringot an irngaituaa, sôm rotui pailoi, favâng thing ra loi, voihi thi tâk; a’rzung le ileh inkar zit tâk; a’rhmanng zit tâk ang kha an ni.

¹³Tuikhanglian ivôrpai, mâni mualirphoi irsak, ârsi chaninvâi, Pathianin kumtuang inthim irsa khak lei sia pehai ang kha an ni.

¹⁴Adama irchi fe thiai a sarina, Enoka khan hihai chungchâng hi an lei hrila, “En u ta, Rengpa chu a mi irthiang sâng tamtak leh zuang a ti.

¹⁵Pathian uksakloi mi murdihaiin Pathian chi loa an thil tho murdihai le ama doia thu ngar ta tak an insîr murdi chungchânga Pathian uksakloi mi sualhai thiamno inchangtir hrang le mi murdi chung roirêl hrangin zuang a ti,” tiin.

¹⁶Kha mihai khan chiar le mi hrilsiat vai an hrâta, anni irzukna sual vai an irzûla, bâi nghal songin irpâkin an irsora, inlâpna irzûlin mi huang an hrât tak tak a ni.

Irdîn hranga irchutirna

¹⁷Inditom takhaio, nangni’n chu ei Rengpa Jisua Krista tîrtônhaiin thu an lei insîr kha inhre mai roi.

¹⁸“Zoro hnungkhôna chu, nangni innuisantuhai, Pathian uksak loa mâni irzukna ang taka omhai la om an ti,” tia nangni a ihril kha.

¹⁹Khahai kha irsenna insuaktuhai, taksa mi, Irtha mi ni loihai an ni.



²⁰Inditom takhaio, nangni'n chu iamna irthiang taka khan mâni irrual khak unglân; Irtha Irthianga chongchaiin,

²¹Pathian lungthungna khan irvong insa unglân kumtuang hringna hrangin ei Rengpa Jisua Krista lungkhamna kha nghâk roi.

²²Lungirhlâna neihai kha lunginkham unglân,

²³mei ata senkhat sansuak innanghai kha kaisuahai lat roi; senkhat chu chi pumin lunginkham unglân, an taksaa porinche kop silkaihai kha intir roi.

Satvurna

²⁴Tûkloi hranga nang enkol thei chu, a roiinpuina makunga sêlna boi le raiinfân tak taka nangni inngîrtir theipu,

²⁵Pathian omsun, a ni saninhringtu kuang khan, ei Rengpa Jisua Krista zâra, roiinpuina hai, inlalna hai, sinthotheina hai, irchamneina hai zoro theng tâk murdihai ata atûn le kumtuang dênin om mai ri se. Amen.



Thuphuang

Thuphuang 1

Chubai mûkna

¹Hi lekhabu hi Jisua Krista thuphuang, Pathianin a suakhai inhriat hranga a ipêk, thil hong tung zôi hrang thu kha a ni; kha thu kha vântîrtôn zuang tîrin a suak Johana kuang a zuang inhriattira,

²khanchu, Johana'n a ihmu murdihai kha an sîra. Ama hi Pathian thu le Jisua Krista'n thutak a inpuang an sîrna a ni.

³Hi lei hrilna bu teptu le ar ngaihai le a sînga thu om zômhai chu an vîn a sa! Hihai murdi tungna hrang zoro hi anai tâk sikin.

Koiindang sarikai chubai mûkna

⁴Johana khan Asia rama Koiindang sarikai kuang: Pathian, A om mai le, om tâka le, la om hranga kuanga irthok ata, A rêngtoihmun makunga irtha sari omhai kuanga irthok ata,

⁵Jisua Krista, inhriatpuitu iamom tak, thina irthoka thoinôk masa tak le rammual rênghai chungu roirêltu kuanga irthok ata, lungkhamna le irngeina kha nin ta ni ri se. Lung a ni thunga, a thina sikin ei sualhai ata a ni'rtansuaka,

⁶khua le tui le a Pathian le a Pa sintho hranga ochaihaia ni siamtu kuang, a ni, ama kuang ngei roinpuina le irchamneina kumtuangin om mai ri se! Amen.

⁷En roi, ama kha sîm laia khin a izuang hrang a ni! Mi tinin hmu an ti, ama suntuhai ngei khomin hmu an ti. Irnêng chungu mi murdi'n ama kha châ an ti. Khaang tak khan la ni a ti! Amen.

⁸“Keima hi a maton tak le a hnungkhôn tak ki ni,” Rengpa Pathian om mai tâk le om tâka le la om mai hrang, Itinrêngthothei khan a ti.

Johana'n Krista inlârna a hmûna

⁹Kei Johana, nin urêngpa le Jisua hnung zuinaa a Ram mihai chungu dengtheina hong tung diar taka tuangna lama nin chanpuipa ki ni, Pathian



thu le Jisua'n thutak a inpuang thu kin puangna sikin Patmos chômbunga intângin ki oma.

¹⁰Rengpa nia khan Irtha Irthiangin a ni pôla; khanchu ki hnunga irhai bekul anga inringin,

¹¹“Ni thil hmuhai hi irziakin lân, Koiindang sarihai: Efesi, Smurna, Pergamos, Thuatira, Sardis, Filadelfia le Laodikei hai kuang thon roh,” a iti kin hriat.

¹²Tu mo ni chongpui tih inhriat nuamin ki hong irhêlin chu, rângachak meiser siana sari ki hmua;

¹³Kha meiser siana laia khan mihriam ang, a kechum dên thaia songkolirfual inngâk, rângachak kongkhita khit ki hmua.

¹⁴A sam chu belra mul le ivur angin a vâra, a mit chu meichok angin a oma;

¹⁵a kezaphahai chu dâr irtêk, meipuaia hâl irthiang tâk angin a oma, a hnuk irhai chu tuitâk irhai angin a ni.

¹⁶A kut chang tiang ârsi sari a chôia; a bâia irthokin khandai bê hni nei ngaih tak a hong suaka, a hmêl chu misa hrât lai tak ang a ni.

¹⁷Ama kha ki hmu le chu, a ke bula ithi ang dôrin kin rîla. Ama khan a kut chang tiang ki chung a irngatin ki kuang, “Chi no roh! kei hi a maton tak le a hnungkhôn tak.

¹⁸A hring kha ki ni! Thina chung a le mithi khua chung a khom ircham ki nei.

¹⁹Khasikin ni thil hmuhai, atûna omhai le hi inhnunga la hong om hranghai hi irziak roh.

²⁰Ama hi ki kut chang tianga ârsi sari ni ihmuhai le rângachak meiser siana sarihai omzia irthup chu a ni: Ârsi sari chu Koiindang sarihai vântîrtôn an nia, meiser siana sari chu Koiindang sarihai an ni.

Thuphuang 2

Efesi Koiindang kuanga lekhaton



¹Efesi koiindanga vântîrtôn kuang hi ang hin irziak roh: “Hi thu hi a kut chang tianga ârsi sari chôia, rângachak meiser siana sarilai laia ar lôi maitu khan hi thu hi a insîr a ni.

²Ni sintho murdia ni sin irnak songzia hai le ni diarzia hai, mi sualhai nirngai theizia hai, ni tirtôn ni loia tirtôn dang irtihai kha ni fiaa, milak an nih ti nin hriat tâkzia hai kha kin hriat.

³Ni diar tak taka, ki’rhming sikin ni tuanga ni sabei dong mah.

⁴Khannisianlân, nang demna ki nei: atûn chu matona ang khan lung ni ni thung ta no sikin.

⁵Idôr ten mo ni inrîl tâk ngaitua roh! Ni sualna ata irletin lân ni sintho masa kha tho nôk ta roh. Ni sualna ata nir let no’n chu zuang ki ta, ni meiser siana kha a hmun ata ki ithînpai hrang kêng.

⁶Khannisianlân, hi hi ni satna chu a ni: Nikola pâlhai sintho kha ki hnôl lam ang takin ni hnôl sikin.

⁷“Irtha’n koiindanghai kuanga thu a insîr hi mikuar nei murdi’n chu irngai roi! An hnêtu ka chu Pathian Irhuana hringna thing ra infatir ki ti,” tiin.

Smurna Koiindang kuanga lekhathon

⁸“Smurna koiindanga vântîrtôn kuang hiang hin irziak roh: Hi thu hi a maton tak le a hnungkhôn tak, a thia hong hring nôk taktu khan a insîr a ni.

⁹Ni dengtheizia le nin riangzia kin hriat, khannisianlân, nir chong, Juda tak ni loia, Setana pâla mi Juda irtihai nang insîrinsiatzia kha kin hriat!

¹⁰Ni tuang hranghai hi ite chi no roh. Irngai ta! nin laia mi senkhat intângna ina khumin Setana’n nangni a ifia hrang a ni. Khante, sîn sôm dengthei nin ti. Thina dênin keimaa iamomin om roh, khanchu inhnêna lômmanin hringna rêng lukhum nang pe ki ti.

¹¹“Irtha’n koiindanghai kuang thu a insîr hi mikuar nei murdi’n chu irngai roi! An hnêtu ka chu thina inhnina khan ite nangni lo no ni, a ti,” tiin.

Pergamos koiindang kuanga lekhathon



¹²Pergamos koiindang vântîrtôn kuang hiang hin irziak roh: “Hi thu hi khandai bê hni nei ngaihtak neitu khan a insîr a ni.

¹³Ni omna hmun Setana toihmun omna kha kin hriat. Ki’rhming nin tûk ngita, ki inhriatpuitu iamom tak Antipas, Setana omnaa nin laia an that lai khoma khan ni iamna hi ma mak che.

¹⁴Khannisianlân, nang demna ki nei viat: nin laia mi senkhatin Balaama thu irchutirna an pom sikin. Kha pa khan millim biakna thil an ifâkna hrangin le irditna porinche an songna hrangin Balaka kha Israel mihai suala hruai irhmang dân a irchutir a ni.

¹⁵Khaang dênin Nikola mihai irchutirna thu pom senkhat ni ompui sa.

¹⁶Khasikin ni sualna ata irlet roh! Ni’rlet no’n chu ni kuang zuang ki ta, ki bâia khandai khan anni kha ki zuang idoi hrang kêng.

¹⁷“Irtha’n koiindanghai kuang thu a insîr hi mikuar nei murdi’n irngai roi! An hnêtu ka chu mana irthup kha pe ki ta, lung ngoi a chung a irhming thar irziak, a dongtu ti no’n chu tûte’n an inhriat ngai loi kha pe sa ki ti, a ti,” tiin.

Thuatira koiindang kuanga lekhaton

¹⁸Thuatira Koiindanga vântîrtôn kuang hiang hin irziak roh: “Hi thu hi Pathian Nâipa, a mit meichok anga om, a kezaphahai dâr irtêk anga om khan a insîr a ni.

¹⁹Ni sinthohai murdi kin hriat, lungthungna ni neizia hai, ni sinthozia hai le ni dorôizia hai kha. Atûna ni sinthohai hi chu matona nêkin a lûminna ual ti khom kin hriat.

²⁰Khannisianlân, nang demna ki nei a ni, nupang Jezebeli deipu irtinu kha nir ngai thei sikin. Ama khan ki suakhai kha irdit le millim biakna thil fâk irchutirin a hruai irhmang ngai.

²¹A sualna ata a’rletna hrangin zoro ki pêka, khannisian, irlet nuam mah.

²²Khasikin natna zâlmuna ki pai ta, a uire ngaihai khom kha an irlet no’n chu denginthei irkhêl taka pai sa ki ti.



²³A zui ngaihai khom kha that pe ki ta, khanchu keima hi lungrîl le ngaituana inhre ngaitu ki nih ti koiindanghai murdi'n inhria an ti. Nin rêngin nin sintho ang sengin nangni pe ki ti.

²⁴“Khannisianlân, nangni Thuatira kho mi, hi irchutirna saloi pom loia, ‘Setana thu irthup inthûk’ an iti irchu kakai chungu chu puakrik dang ite nangni bôk pe no ning ki iti a ni.

²⁵Nin inei sai kha chu ki zuang mâka chu intûk ngit roi.

²⁶⁻²⁸An hnêtu kakai le a mong dêna ki nuamlam sintuhai chu, ka Pa kuanga irthoka ki hmu ang taka irchamneina kha pe ki ti; nam tin chungu thîr khianghrol leh roirêl a ta, pilbêl anga intôk khoi chit hrangin irchamneina pe sa ki ti. Sikhovâr khom pe sa ki ti.

²⁹“Irtha'n koiindanghai kuang thu a insîr hi mikuar nei murdi'n chu irngai roi, a ti,” tiin.

Thuphuang 3

Sardis Koiindang kuanga lekhaton

¹“Sardis koiindanga vântîrtôn kuang hiang hin irziak roh: Hi thu hi Pathian irtha sari le ârsi neitu khan a insîr a ni. Ni sinthohai murdi kin hriat; thi chianin, hring irhming ni irput a ni!

²Harin lân, ni la inei a thi vâng vâng kha a thi hlet mân inhrât roh. Ni sintho rêng rêng hi ki Pathian mit tung mah ti kin hriat.

³Khasikin irchutira ni om le ni inhriathai kha inhre maiin lân, zômin lân ni sualna ata irlet roh. Ni har no'n chu inru angin zuang ki ta, itika mo ni kuang ki izuang hrang inhre no chi ni.

⁴Khannisianlân, Sardis-ah khan an puanhai innimloi, mi tômte nin om. Anni kha puan chek silin ki kuang om ngai an ti, khaanga tho inruk an ni ngai sikin.

⁵An hnêtu ka chu khang khan puan chekhai insiltir ni an ta, hringna lekhabua irthokin an irhming kha pai viat no ning. Ka Pa le vântîrtônhai makunga ki ta an ni tiin inpuang inlang ki ti.



6“Irtha’n koiindanghai kuang thu a insîr hi mikuar nin neiin chu irngai roi, a ti,” tiin.

Filadelfia koiindang kuanga lekhathon

7“Filadelfia koiindang vântîrtôn kuang hiang hin irziak roh: Hi thu hi mi irthiang tak le a dik tak, Davida châbi neitu, tûte ikhâr theiloi hrang inhong, tûte inhong theiloi hrang khârtu khan a insîr a ni.

8Ni sintho murdi kin hriat: sinthotheina chînte ni nei, khan khomin ki thu ni poma, ki’rhming hnôl mak che ti kin hriat. Khasikin tûte khâr theiloi mikot kha ni makunga ki inhong a ni.

9Irngai ta! Setana pâla mi senkhathai, Juda ni loia, milak tho Juda irtihai kha hong tîr ki ta, ni ke bula chubai nang hong inmûktir ki ti; khanchu khahai khan lung nang ki thung tih inhriat an ti.

10Diarna thu nang ki pêk hi ni zôm sikin, irnêng chungu mihai fia hranga rammual pumpui chungu fiana zoro zuang tung hranga irthok khomin nang inzôk sa ki ti.

11Ki izuang lat hrang tâk kêng, ni thil nei kha dôn chianin lân, khanchu inhnêna lômman ni idong tum kha nang irchupui no nihai.

12An hnêtu kha chu ki Pathian biak ina chopuiin siam ki ta, kha hmuna khan om ta a ti. Khan, amaa khan ki Pathian irhming le, ki Pathian khopui Jerusalem thar, ki Pathian kuang ata irvâna irthoka zuang chum hrang irhming le ki’rhming thar irziak ki ti.

13“Irtha’n koiindanghai kuang thu a insîr hi mikuar nei murdi’n chu irngai roi, a ti,” tiin.

Laodikei koiindang kuanga lekhathon

14Laodikei koiindanga vântîrtôn kuang hiang hin irziak roh: “Hi thu hi Amen, inhriatpuitu diktak le iamom tak Pathian thilsiam bul khan a insîr a ni.

15Ni sintho murdi kin hriat; a dâi khom ni mak che, a lum khom ni ual mak che. Ni idâi mani ni ilum mani ki nuam a ni!

16Lum ual loi, dâi ual loiin, ni lum chêlchûl sikin ki bâi ata nang insâ pai ki ti.



¹⁷Ki'rchong, sum ki nei, ite irsam ma ung ni tia, nang mi'rngaiinsia, inrenom, inriang, mitcho le korongboi ni nih ti ni inhriat loi a ni.

¹⁸Khasikin nir chong theina hrangin rângachak meia irthiang tâk hai, ni korongboi ser an lang lolina hranga ni sil hrang puan chek hai, ni hmu theina hranga mitna hloi hai ki kuang ircho hrangin nang ki ti.

¹⁹Lung ki ithung ka chu ki hrila, ki zêm ngai, khasikin sathnem irngaiin lân, ni sualna ata irlet roh.

²⁰Irngai ta! mikota ngîrin ki intôk hi, tukhomin ki'rhâi an hriata; mikot an hongin chu, a ina lûtin a kuang bu nêk ki ta, ama khomin ki kuang nêk a ti.

²¹An hnêtu ka chu rêngtoihmun kôla intoitir ki ti; kei khomin kin hnêa ka Pa rêngtoihmun kôla ki itoi ang hin.

²²Irtha'n koiindanghai kuang thu a insîr hi mikuar nei murdi'n chu irngai roi, a ti" tiin.

Thuphuang 4

Irvâna rêngtoihmun le a toitu chubai mûkna

¹Kha irzoiin chu inlârna dang ki hmua, ki hong ena, irvâna mikot irhong ki hmu. Khanchu, bekul irhai ang hnukirhai kin hriat masaa ni chongpuitu khan, "Hi hin hongin lân, inhnunga thil hong om hranghai nang inhmutir ki ti," a tia.

²Khanchu, voikhat rengin Irtha'n ki om zôi zela, irvân toihmun a hong irsiama, kha toihmuna khan mi inkhat a hong toi saa.

³Khan, a toitu kha Jasper le Karnelian lung hlu dôrin an langa, rêngtoihmun vêla khan sumrisâng emerald lung rông angin ar zâm sa.

⁴Rêngtoihmun kôl vêla khan rêngtoihmun dang sômhni minli a om saa, kha rêngtoihmunhaia khan upa sômhniminli puan chek sila rângachak rêng lukhum khumin an toi.



⁵Rengtoihmuna irthokin kôlirtêk, hnukirhai, khonri hai an hong suak dur dura. Rengtoihmun matona khan meiser sari a choka, khahai kha Pathian Irtha sarilai kha an ni.

⁶Rengtoihmun matona ngîr khan Krustal lung anga vâv hlîmen tuikhanglian anga a om sa khan, rêngtoihmun irhîlin thilhring minli mân tiang le hnung tiang mita sip an oma.

⁷Thilhring inkhatna chu kâmkeibaknei a anga, inhnina chu sehrâtchal a anga, an thumna chu mihriam hmêl a anga, a minlina chu irmupui vuang lai a anga.

⁸Kha thilhring minlihai khan mitha kiruk an nei seng, kha an mithahai kha sûng tiang le pên tiang mita sip an ni. A sûn a zânin, “Rengpa Pathian Itinrêngthohei, A om tâka le A om maia le A la om hrangtu chu A’rthiang e, a’rthiang e, a’rthiang e, tia sakini mong ngai mahai,” tiin.

⁹Khan, thilhring minlihai khan rêngtoihmuna toi kumtuanga hring mai kuanga khan roiinpuina le chôindômna hla an saka, lônthu an insîr rikipa,

¹⁰Upa sômhni minlihai kha rêngtoihmuna toitu makunga khan inbokin kumtuanga hring maitu kha chubai an mûka. An rênglukhumhai kha rêngtoihmun matona siain,

¹¹“Kin Rengpa le Kin Pathian! Roiinpuina le chôindômna, sinthoheina hai hmurua ni ni, Nangma’n thil tinrêng ni siama, Ni’rchama om le a hring an ni,” an tia.

Thuphuang 5

Lekhabu irzuat le Belrate

¹Khan, rêngtoihmuna toitu kut chang tianga khan lekhabu irzuat sûng tiang pên tianga irziak, irsinsiana sari neia irsinsia khak ki hmua.

²Vântîrtôn hrâtak, hnukirhai inring takin, “Tu’n mo hi irsinsiana hi inhonga, lekhabu irzuat hi a phar thei hrang tâk?” tia tânginsam ki hmu sa.

³Khannisianlân, irvâna, irnênga, irnêng hnuai khom lekhabu irzuat kha an hong thei le a en theirua tûte om mahai.



⁴Lekhabu irzuat kha an hong, a en theirua tûte an om no sikin ki chap ngûi ngûia.

⁵Khanchu, upahai laia inkhatin ki kuang, “Chap no roh. Irngai ta! Juda nama mi Kâmkeibaknei, Davida bulpui khan, a’rsinsiana sari kha inhonga, lekhabu irzuat kha phar hrangin an hnê ta,” a tia.

⁶Kha hnung chu, rêngtoihmun inlaina tak, thilhring minlihai le upahai irhîlin Belrate ngîr that tâk anga inlang, irki sari le mit sari nei ki hmua; kha mit sarihai kha chu Pathian irtha sari, irnêng chung pumpuia tîr suakhai kha an ni.

⁷Belrate kha a fea, rêngtoihmuna toitu kut chang tianga lekhabu irzuat kha a va lâk tâka.

⁸Lekhabu irzuat kha a lâk le chu, thilhring minli le upa sômhniminlihai kha, serânda le rângachak berbu mirimhoia sip chôi sengin, Belrate makunga khan an inboka; kha mirimhoi kha Pathian mihai chongchaina a ni.

⁹“Nangma lekhabu irzuat kha lâka, A’rsinsiana inhongrua ni ni; Thatin ni oma, ni thina sika khan chi tina mihai, chong tina mihai, ram tina mihai, Pathian ta hrangin ni thisenin nir chôi tâk.

¹⁰Kin Pathian sintho hrangin kha le tua le ochaihaiin ni siam tâka; Khanchu, irnênga roirêl an ti,” tiin hla thar an saka.

¹¹Ki hong en nôka, rêngtoihmun le thilhring minlihai le upahai kôla khan vântîrtôn tamtak hnukirhai kin hriata; an tam lam chu a sâng a sâng hmun sâng tamtak le a sâng a sângin sâng tamtak an ni.

¹²Khahai khan hnukirhai inring takin, “Belrate that tâk hi, Sinthotheina hai, irchongna hai, vârna hai, hrâtna hai, chôiindômna hai, roiinpuina hai le inpâknahai hmuua a ni,” an tia.

¹³Khabana, irvân le irnêng chung le irnêng hnuai le tuikhangliana thilhring tinrêng hai le rammual sûnga thilhring om murdihaiin, “Rêngtoihmuna toitu le Belrate kuanga khan, Inpâkna hai, chôiindômna hai, roiinpuina hai le sinthotheina hai, kumtuangin om ri se,” ti hla an isak kin hriat sa.



¹⁴Thilhring minlihai khan “Amen!” an tia, upahai khan inbokin chubai an mûka.

Thuphuang 6

Irsinsianahai

¹Belrate khan irsinsiana sari laia inkhatna kha an hong lai ki hmua, thilhring minlihai laia inkhat khan hnukirhai khonri ang dôra inringin, “Hong roh!” a iti kin hriata.

²Khanchu, ki hong ena, sakor ngoi ki hmua. A chungu chuangtu khan thal a chôia, a kuang rênglukhum an pêka; inhne pumin le inhne thiai mai hrangin a suak tâka.

³Khan, Belrate khan irsinsiana an hnina an hong le chu, thilhring an hnina khan “Hong roh! a iti kin hriata.

⁴Sakor dang a sen a hong suaka. A chungu chuangtu kuang khan mihriamhai an irthat irhlômna hrangin irnênga irsualna intung theina thu an pêka, a kuang khandai lian tak an pêk sa.

⁵Khan, Belrate khan irsinsiana an thumna an hong le chu, thilhring an thumna khan, “Hong roh!” a iti kin hriata. Ki hong ena, sakor vom ki hmua. A chungu chuangtu khan thil varna bop khat a kutin a chôia.

⁶Thilhring minlihai lai ata suak ni le irhoi hnukirhai kin hriata, “Fapui khamphulu khat sîn khat hlo, barli khamphulu thum sîn khat hlo, khannisian, oliv thing le grep irhuan chu insiat no roh,” a iti kin hriata.

⁷Khanchu, Belrate khan irsinsiana a minli an hong le chu, thilhring a minlina khan, “Hong roh!” a iti kin hriata.

⁸Ki hong ena, sakor dâng ki hmua. A chungu chuangtu irhming kha Thina a nia, mithi khua’na zui sa. Khandai hai, châm hai, hri hai, ram sahrâng hai hmanga that hrangin irnêng hi hmun minlia sena hmunkhat chungu irchamneina an pêka.



⁹Khanchu, Belrate khan irsinsiana a ringana an hong le chu, Pathian thu an insîr sik le Pathian inhriatpuitu an nina tiang iam a om sika thata omhai irtha kha maichâm hnuaiia ki hmua.

¹⁰Anni khan hnukirhai inring takin, “Itinrêngthothei Rengpa, A’rthiang le A diktu! Idôr ten mo irnênga mihai chungâ roirêl loiin kin thisen phuba la loiin ni iom hrang?” tiin an khêka.

¹¹Khan, an rêngin puan chek an pêk senga, an suak chanpuihai le an urênghai, anni thata an lei iom ang dêna om hranghai kha an irkip mâka chu la nghâk ual hrangin an hrila.

¹²Belrate’n irsinsiana ki rukna an hong lai kha ki ena, Hnîngnupui a hong inhnînga, misa kha samul puan vom angin a hong duka, tha khom thisen ang dôrin a hong sen tâka.

¹³Phâivopui theipui ra selhai a inthingpai zit ngai angin ârsihai kha irnênga an chil chûm chûm tâka.

¹⁴Irvân chu lekhabu an inzuatpai angin, a boi tâka; tâng le chômbung tinrêng kha an omna hmun rengata ithînpaiin an om tâka.

¹⁵Khanchu, irnênga rênghai, roirêltuhai, sipai uliantakhai, irchonghai, mi lianhai, mi tinhai, suakhai le suak ni loihai murdi kha pûkhaia le tânga lungpuihaia an irbîka.

¹⁶Tânghai le lungpui kuang khan, “Ni delin lân, rêngtoihmuna toitu hmêla irthok le Belrate ningmurna ata ni thup roi!

¹⁷An ningmurna nikhua ichiom tak kha a itung tâk kêng, tu mo ngîra doi thei hrang?” an tia.

Thuphuang 7

Israel mi (2,44,000) nuaihni sîngminli sângminli

¹Kha irzoiin chu, muanga le tuikhangliana le thingkunghai rêng rênga phâivua a tho ta lina hrangin phâivua chela irnêng kil minlia ngîr vântîrtôn minli ki hmua.



²Vântîrtôn dang, Pathian hring irsinsiana chôi, nisua tianga hong suak ki hmu. Ama khan vântîrtôn minli Pathianin irnêng le tuikhanglian siat theina thu a ipêkhai kha hnukirhai inring takin an sâma.

³Vântîrtôn khan an kuang, “Ei Pathian suakhai an michala irsinsiana ei sia mâka chu irnêng le tuikhanglian le thingkunghai kha lan siat no roi,” a tia.

⁴An michala Pathian irsinsiana zonhai hrilin ki oma, nuaihni sîngminli le sângminli an ni. Khahai kha Israel nam sômhleihnihai an ni.

⁵Juda nama sîngkhat sângghni, Reubena nama sîngkhat sângghni, Gada nama sîngkhat sângghni,

⁶Asera nama sîngkhat sângghni, Naftalia nama sîngkhat sângghni, Manasea nama sîngkhat sângghni,

⁷Simeona nama sîngkhat sângghni, Levia nama sîngkhat sângghni, Isakara nama sîngkhat sângghni,

⁸Zebuluna nama sîngkhat sângghni, Josefa nama sîngkhat sângghni, Benjamina nama sîngkhat sângghni irsinsia tak tak an ni.

Mipui tam irkhêl

⁹Kha irzoiin chu ki hong ena, mipui tam irkhêl tep zoiloi, zât tin, chi tin, nam tin le chong tina mihai puan chek sila tûm ônhai chôiin, rêngtoihmun le Belrate makunga ngîr ki hmua.

¹⁰Khahai khan hnukirhai inring takin, “Saninhringna hi ei Pathian, rêngtoihmuna toitu le Belrate kuanga irthoka a ni,” tiin an khêka.

¹¹Vântîrtônhai murdi kha rêngtoihmun le upahai le thilhring minlihai kôla khan an ngîra, rêngtoihmun makunga khan inbokin,

¹²“Amen! Inpâkna hai, roiinpuina hai, vârna hai, lômthu insîrna hai, chôiindômna hai, Sinthotheina hai, Kumkhontuangin ei Pathian ta a ni mai! Amen!” tiin Pathian chubai a mûka.

¹³Khan, upahai laia inkhatin ki kuang, “Hi puan chek silhai hi tuhai man ni, kho rengata hong mo an ini?” tiin a nir dona.



¹⁴“Ka pu, inhre ma ung. Nangma’n nin hriat,” tiin ki sâma. Ama khan ki kuang, “Hihai hi dengitheina ichiom tak ata hong zôkhai kha an nia, an puanhai Belrate thisena irsunfaiin an inchek tâkhai a ni.

¹⁵Khasikin, Pathian toihmun makunga ngîrin, sùn le zânin a biak ina sin an tho ngai, khan, rêngtoihmuna toitu khan a puan in an chung a zâr a ti.

¹⁶An phîngchâm ta no nia, an tui khom inhrâl ta no ni. Misa’n emhai ta no nia, a sâna lum rêng rêng tuang ta no nihai.

¹⁷Belrate, rêngtoihmun inlanaa om kha a enkoltu ni a ta, hringna tuikhanglianhaia tuang a ti. Khanchu, Pathianin an mit ata mitrithi tinrêng huipai ta a ti,” a tia.

Thuphuang 8

Irsinsia sarina

¹Belrate khan irsinsia a sarina kha an hong le chu, dârkar chimrip vêl irvân an thim chita.

²Khan, vântîrtôn sari Pathian makunga ngîr ngaihai kha ki hmua, an kuang bekul sari an pêka.

³Vântîrtôn dang a hong, rângachak mirimhoi hâlna kok chôiin maichâm kôla a ngîra, Pathian mihai chongchaina le rêngtoihmun makunga rângachak maichâm chung a inhlan hrangin a kuang mirimhoi tamtak an pêka.

⁴Mirimhoi khu kha Pathian mihai chongchaina le vântîrtôn kuta irthokin Pathian makunga a fe ta.

⁵Khan, vântîrtôn khan mirimhoi hâlna kok kha a lâka, maichâma meiin an sipa, irnênga a paithâka, khanchu, hnukirhai, khonri hai, kôlirtêk hai, hnîngnu hai a hong om zôi ta.

Bekulhai

⁶Khan, vântîrtôn sari bekul sari chôihai kha tum hrangin an irsiam ta.

⁷Vântîrtôn inkhatna khan a bekul a hong tuma, irial le mei thisen leh irpol a hong oma; ama kha irnênga bunpaiin a om ta. Khanchu, irnêng hmun thuma



sena hmunkhat chu a kânga, thingkunghai khom hmun thuma sena hmunkhat a kânga, hloisûl hringhai murdi khom a kâng sa ta.

⁸Vântîrtôn an hnina khan a bekul a hong tuma, tâng lianpa meiin a ikâng lai ang tuikhangliana an paithâka. Khanchu, tuikhanglian hmun thuma sena hmunkhat chu thisen a chang tâka,

⁹a sûnga thilhringhai khom hmun thuma sena hmunkhat chu an thia, irkuanghai khom hmun thuma sena hmun khat chu an siat sa tâka.

¹⁰Vântîrtôn an thumna khan a bekul a hong tuma, ârsi lianpa, meiser anga chok, irvân ata zuang tâkin vadung hmun thuma sena hmunkhat le tuikhanglian kha a dela.

¹¹(Kha ârsi irhming kha “A khâ” a ni). Tui hmun thuma sena hmunkhat chu a hong khâ tâka, kha tui kha an ina, mi tamtak an thi ta, a kha tâk sikin.

¹²Vântîrtôn a minlina khan a bekul a hong tuma, khanchu, misa hmun thuma sena hmunkhat, tha hmun thuma sena hmunkhat le ârsihai hmun thuma sena hmunkhat chu intôk siat a nia, khahai kha hmun thuma sena hmunkhat an thim theina hrangin. Khanchu, sîn hmun thuma sena hmunkhat chu vâ om ta maka, zân khom hmun thuma sena hmunkhat chu an thim khak tâka.

¹³Khan, ki hong ena, irmupui vânlazôla vuangin hnukirhai inring takin, “Vântîrtôn inthumhai bekul la tum hranga irhai hong om hrang sika khan irnênga omhai chung a rik e! a rik e! a rik e! a ti kin hriata.

Thuphuang 9

¹Vântîrtôn ringana khan a bekul a hong tuma, khanchu, ârsi, irvân ata irnênga tâk ki hmua, a kuang khurmongboi châbi an pêka.

²Ârsi khan khurmongboi kha a inhonga, khur ata kha meikhu, meipui thi theiloï khu khak angin a hong suaka, kha meikhu sika khan misa le irvân hai a hong inthim ta.

³Meikhu ata khâihai irnênga an zuang tâka, âinuvêthaiin sinthotheina an inei ang takin an kuang sinthotheina an pêka.



⁴Irnênga hloisûl hai, thilhring hai le thingkung hring hai rêng rêng chu sê viat loia, mihriam an michala Pathian irsinsiana nei loihai vai kha sê hrangin an hrila.

⁵Khan, khâihai kha mihriamhai kha that hrangin chu pe maka, tha ringa sâng denginthei hrangin an pêk. Deng an theizia chu âinuvêtin mi a sêa, deng a intheitir ang hi a ni.

⁶Kha sûnga khan chu thina zong an ta, hmu viat no nihai; thi irzuk an ta, khannisian, thina'n marakhai a ti.

⁷Khahai kha sakor irdoina fe hranga irsiam chak an anga; an lua khan rângachak rênglukhum ang zek khuma, an hmâihai kha mihriam hmâi a anga.

⁸An sam kha nupang sam angin a oma, an ha kha kâmkeibaknei ha angin a om.

⁹Thîr rôppho ang hin rôppho an neia, an mithâ zâp irhai chu sakor tamtakin irdoina hmun pana sakor tâlihai an intânpui sup sup irhai ang kha a ni.

¹⁰Âinuvêtin angin irmei le sêna hrang an neia, tha ringa sâng mihriamhai innatir theina khom an irmeia khan a iom a ni.

¹¹Khur mongboia vântîrtôn kha rêng angin an chung a inlal takin an neia; Hebrai chonga a'rhming chu Abadona a nia, Grik chonga a'rhming chu Apoluona, a ni. (A omzia chu "An siattu," tihna a ni).

¹²Thilirkhêl masa chu a theng tâka, thilirkhêl dang inhni, hi zoia hin la om a ti.

¹³Khan, vântîrtôn kirukna khan a bekul a hong tuma, khanchu, Pathian makunga rângachak maichâm irkia irthokin hnukirhai kin hriata.

¹⁴Hnukirhai khan vântîrtôn kirukna kuang, "Eufrates tuidunga vântîrtôn minli ikhithai kha insua ro!" a tia.

¹⁵Kha dârkâr le sîn le tha kum hranga irsiam tâk vântîrtôn minlihai kha, mihriamhai hmun thuma sena hmunkhat that hrangin an insuhai tâka.



¹⁶Sipai sakor chung a chuanghai kha an tamzia chu krór hni an nih ti hrilin ki oma.

¹⁷Inlârnaa khan sakorhai le a chung a chuanghai kha hiang hin ki hmu: rôppho mei anga sen huakin, lunghlu anga dum le kât anga eng an ni. Sakor luhai kha kâmkeibaknei lu ang hin a oma, an bâia irthokin mei hai, meikhu hai le kât hai a suaka.

¹⁸Kha hremna inthumhai: mei, meikhu, le kât an bâia irthoka suak khan mihriam hmun thuma sena hmunkhat chu a that ta.

¹⁹Sakorhai sinthotheina kha an bâia le an irmeia khan a oma; an irmeihai kha mirûl angin a oma, lu an nei saa, ama khan mi an innatir ngai a ni.

²⁰Mihriam, kha hremnaa that banhai khan an kut sinthohai ata irlet ual mahaia; ramilhli hai, rângachak millim hai, sum millim hai, dâr millim hai, lung millim hai, thing millim hai, ite hmu theiloi, inhretheiloi le fe theiloi hai biak kha ma mahai.

²¹An mi that hai, dôihmang hai, an irdit porinche hai, an inrûkhai ata khom irlet ual mahai.

Thuphuang 10

Vântîrtôn le lekhabu irzuat tê

¹Khan, vântîrtôn hrât tak dang irvân ata zuang chum ki hmua. Sûmin ar tuama, a lua sumrisâng ar zâma, a hmâi kha misa angin a oma, a kehai kha mei chopui angin a om.

²A kuta khan lekhabu irzuat tê phar sai a chôia, a ke chang tiang tuikhanglian a sira, vei tiang muang a sira,

³kâmkeibaknei inhrâm ang dôrin hnukirhai inring takin a khêka. A khêk zoiin chu khonri sarilai khan inring takin an dona.

⁴Kha khonri sarilai khan an rôl an insua zoi le chu irziak ki tuma. Khannisianlân, “Khonri sarilai chong kha ip chian roh, irziak no roh,” tiin irvâna irthokin hnukirhai kin hriata.



⁵Khan, vântîrtôn tuikhanglian le tânga ngîr ki ihmu khan a kut chang tiang irvân tiang a phara,

⁶irvân hai, irnêng hai, tuikhanglian hai le a sûnga om tinrênghai siamtu Pathian, kumtuanga hring mai irhminga khomâk irsâmin, “Zoro om ta no ni,

⁷khannisianlân, vântîrtôn a sarina khan a bekul a tum tena chu Pathianin a thu'rthup kha irkiptir ta a ti, a suak, deipuhai kuang a inpuang ang khan,” a tia.

⁸Khanchu, irvân irthoka hnukirhai kin hriatin a ni chongpui tâka, “Tuikhanglian le tânga ngîr vântîrtôn kuang va fe'n lân, a kuta lekhabu irzuat phar sai so va la roh,” a tia.

⁹Vântîrtôn kuang ki va fea, lekhabu irzuat tê kha ki nghia. Ama khan ki kuang, “La'nlân, fa roh: ni sûnga khâ a ta, ni bâia chu khuaihlutui ang dôrin thum a ti,” a tia.

¹⁰Khanchu, vântîrtôn kuta irthokin lekhabu irzuat tê kha ki lâka, ki fâka; ki bâia chu khuaihlutui ang dôrin a thuma. Khannisianlân, kin vol zoiin chu ki sûnga chu a khâ zap ta.

¹¹Khan, ki kuang “Mi tamtakhai, nam tamtakhai; chong tamtakhai le rêng tamtakhai chungchâng thu ni la insîr nôk hrang kêng,” an tia.

Thuphuang 11

Inhriatpuitu inhnihai

¹Khanchu, khianghrol irkhîna khianghrol anga ipêkin ki oma, “Fe'n lân, Pathian biak in le maichâm kha irkhi'n lân, a sûnga Pathian biakhai kha tep sa roh.

²Khannisianlân, Biak in pên tiang chu irkhî no roh, Jentailhai kuang pêk a ni tâk sikin. Anni khan khopui Irthiang kha tha sômminli le tha hni sirpha an ti.

³Ki inhriatpuihai inhni bora puan silin tîr ki ta, sùn sângkhat irzahni sômruk sûnga khan Pathian thu insîr an ti,” a tia.



⁴Kha inhriatpuitu inhnihai kha Oliv thing inhni le meiser siana inhni, irnêng Rengpa makunga ngîrhai kha an ni.

⁵Anni kha tukhomin innatir an tumin chu an bâi ata mei a hong suaka, an râlhai kha a kâng irhmang ngai, khaang dênin tukhomin innatir an tumin chu ithatin om ngêt an ti.

⁶Khahai khan Pathian thu an insîr sùng chu rua tholoi hranga irvân khâr theina irtha an neia, tui, thisen, inchang theina irtha an nei sa, khabana rammual hi an nuam dôr dengintheina tinrênga dengintheitir theina irtha an nei sa a ni.

⁷Khan, an inhriatna thu an insîr zoiin chu khurmongboi ata sahrâng hong suak hrang khan doihai a ta, inhnêhai a ta, thathai a ti.

⁸An ruak kha an Rengpa hembea a omna Jerusalem lamliana khan om a ti. Kha kho roiinpui kha irtha tiang thua chu Sodom le Aigupta ti a ni.

⁹Nam tina mihai, chi tina mihai, chong tina mihai le zât tina mihai khan an ruak kha sùn thum le chomân en an ta, phûm phal no ni.

¹⁰Kha inhnihai thi sika khan irnênga omhai lôm an ta, raifânin thilpêkhai irthon irhlôm an ti. Kha deipu inhnihai khan irnênga omhai deng an intheitir ok ngai sikin.

¹¹Khan, sùn thum le chomân hnunga chu Pathian kuang ata hringna phûk an sûnga a zuang lûta, an ke'n an ngîra; khanchu a hmuhai khan an chi ok ta.

¹²Khan, deipu inhnihai khan irvâna irthokin hnukirhai inring takin, “Hin hong roi!” ti chong an inhriata. An râlhaiin an en chian kârin sùm laia irvâna an fe tâka.

¹³Kha zoro taka khan hnîngnupui an hnînga; khua kha hmun sôma sena hmunkhat chu a chima, mi sâng sari an thi. A la hringhai khan an chi tâka, irvân Pathian an inpâk tâka.

¹⁴Thilirkhêl inhniina chu a theng tâka, khannisianlân, thilirkhêl inthumna hong tung zôi a ti!

Bekul sarina



¹⁵Khan, vântîrtôn sarina khan a bekul a hong tuma, “Rammual roirêlna chu ei Rengpa le Krista ta a hong ni tâk, ama’n kumtuangin roirêl a ti,” tiin irvâna hnukirhai inringtak takhai a hong oma.

¹⁶Khanchu, upa sômhni minlihaiin an rêngtoihmuna Pathian makunga toihai khan inbokin,

¹⁷“Rengpa Pathian Itinrêngthothei, A om mai le A om tâka! Ni sinthotheina roiinpuitak kha lâkin roi ni rêl tâk sikin ni kuang lômthu kin sir!

¹⁸Jentailhai khan ningmurna an sip ta, Ni ningmurna zoro khom a hong tung tâk sikin, Mithihai roirêl pe zoro hai, Ni suakhai, deipuhai, ni mi irthianghai, Mi lian mi chîn nir hming chituhai, Lômman ni pêk zoro le irnêng insiattuhai kha insiat sa hrang zoro a tung ta!” tiin Pathian chubai an mûka.

¹⁹Khanchu, irvâna Pathian biak in kha ar hong, Thuthung Bôm a zuang inlanga. Kha hnung chu kôlirlek hai, hnukirhai, khonri hai, hnîngnu hai, irial inrik takhai a hong om ta.

Thuphuang 12

Nupangnu le Dragon

¹Khanchu, thilirkhêl roiinpuitak irvâna an langa. Nupangnu misaa irvo, a ke hnuaia tha om, ârsi sômhleihnua siam rênglukhum khum hi a oma.

²Kha nu khan nâi a vonga, nâiha sein a khêka.

³Thilirkhêl dang irvâna an lang nôka. Dragon sen lianpa, lu sari le irki sôm nei, rênglukhum sari khum chit hi a oma.

⁴A’rmeiin irvâna ârsi hmun thuma sena hmunkhat chu a zêma, irnênga a paithâk ta. Nupangnu nâi kha a zuang suak le chu a lei fâk theina hrangin nupangnu matona khan a ngîr ngita.

⁵Khan, nâipasal, nam tin chung a thîr khianghrola roirêl hrang a neia, a nâi kha Pathian le a rêngtoihmun tiang tuang zôiin a oma.

⁶Nupangnu kha chu ramchâra Pathianin hmun ar fûk pea, sùn sângkhat irzahni sômruk sûnga enkola a omna hrang tianga khan a rot ta.



⁷Khanchu, irvâna irdoina a om ta. Mikaila le vântîrtônhaiin dragon kha an doia, dragon le a tirtônhai khomin an doi dêna;

⁸khannisianlân, dragon kha inhnêpaiin a om tâka, ama le a tirtônhai kha irvâna om hrangin phal ni ta mahaia.

⁹Khanchu, dragon lianpa, rûlpui tar, Diabola le Setana an iti, rammual pumpui inlemtu kha an paithâk ta. Irnênga an paithâka, ama vântîrtônhai khom an paithâk sa.

¹⁰Kha hnung chu, irvâna hnukirhai inring takin, “Atûn chu ei Pathian saninhringna le a Reng ninaa a sinthotheina le a Krista irchamneina hai kha a zuang tung ta! Ei Pathian makunga ngîrin, a sûn a zâna ei urêng hai hnôl ngaitu kha irvân ata an paithâk tâk sikin.

¹¹Belrate thisen le thutak an inpuang sika khan inhnêna an changa, an hringna khom thi ngam rakin an phal sa.

¹²Khasikin, irvân hai le a sûnga omhai, lo ta roi! Khannisianlân, irnêng le tuikhanglian, nin chung a rik! Diabola khan zoro bongte vai a nei tâk ti an hriat, ningmur takin nin kuang a zuang tak tak sikin,” a iti kin hriat.

¹³Dragon khan hnuai paithâk a ni ar hriat le chu nâipasal nei nupangnu kha a’rzûl tâka.

¹⁴Khanchu, nupangnu kha dragon tôn phâk bana, kum thum le a chimrip sûng enkola a omna hrang ramchâr tiang a vuang theina hrangin irmupui lianpa mitha kianghniin an pêka.

¹⁵Nupangnu kha tuiin a tân theina hrangin a hnunga dragon khan tui, a bâia irthokin tuilian angin an phîsuaka.

¹⁶Khannisianlân, irnêngin nupangnu kha a changpuia, a bâi a ânga, dragon tui inphît kha an lem tâka.

¹⁷Dragon kha nupangnu chung a ning an mur tak taka, nupangnu irchi la om Pathian thupêk zômhai le Jisua thutak inpuang pomhai kha doi hrangin a fe tâk.



¹⁸Dragon kha tuikhanglian chiaiphoia khan a ngêr tâka.

Thuphuang 13

Sahrâng inhnihai

¹Khan, sahrâng irki sôm le lu sari nei, tuikhanglian ata hong suak ki hmu. A'rkihaia khan rênglukhum a om senga, a luhaiia khan Pathian hrilsiatna irhminghai a om sa.

²Sahrâng ki ihmu kha keiârsi a anga, a kehai chu savom ke a anga, a bâi chu kâmkeibaknei bâi a ang. Dragonin sahrâng kuang khan a sintho theina le a rêngtoihmun le ar chamneina liantak kha a pêk.

³Sahrâng lu inkhat kha thi theina dôra popin ki hmu, khannisianlân, kha sâbe kha a hong dam ta. Irnênga mi murdi'n ar khêl an tia, sahrâng kha an zui ta.

⁴Sahrâng kuang ar chamneina a pêk sikin dragon kha mi tinin chubai an mûk. Sahrâng khom kha an mûk saa, "Sahrâng anga hi tu mo a om? Tu mo a doi thei hrang?" an tia.

⁵Khan, sahrâng kha irpâk thei hrang le Pathian hrilsiat thei hrangin phal a ni, tha sômminli tha hni sùng ircham nei hrangin phal a ni sa.

⁶Khanchu, Pathian le ar hming le a omna le irvâna omhai murdi hrilsiat an phut ta.

⁷Pathian mihai doia inhne hrangin phal a ni, chi tin, nam tin, chong tin, le zât tin chung a irchamneina a kuang pêk a ni sa.

⁸Irnêng le irvân siam mâna that tâk Belrate hringna bua irhming chuanghai ti no'n chu irnêng chung a om mi murdi'n chubai mûk an ti.

⁹"Mikuar nin neiin chu irngai roi!

¹⁰Tukhom sala om hranga a niin chu sala hruaiin om a ta, khandaiia thi hrang a niin chu, khandaiia thatin om a ti. Hitaka hin Pathian mihai chu ngêrindetna le iamom taka an om a nangzia an lang," a tia.

¹¹Khan sahrâng dang irnêng ata hong suak ki hmua. Belrate irki angin irki inhni a neia, dragon angin a chonga.



¹²Sahrâng masa irchamneina murdi kha sahrâng masa mit hmua a hmanga. Irnêng le a chung a mihriam om murdihai kha sahrâng masa thi theina dôra pop tâk, a dam nôk kha, chubai mûk hrangin an phût ta.

¹³Sahrâng inhnina khan, mi tin mit hmua irvân ata irnênga mei zuang chôiin sinirkhêl liantak a sina.

¹⁴Sahrâng masa mit hmua sinirkhêl sin hranga phalna a hmu sika khan irnênga mi murdihai a huanga; an kuang, sahrâng khandaia pop tâk la dam nôk chôirsângna hrangin ama irlim siam hrangin thu a pêka.

¹⁵Sahrâng masa irlim kha phûk hong neia, a chong theina hrang le chubai mûk loihai murdi a that theina hrangin sahrâng inhnina kuang khan phûk pêk theina irtha pêk a ni sa.

¹⁶Khanchu, sahrâng khan mi murdi, a lian a chîn, ar chong an riang, suak le suakloi khom, an kut chang tiang mani, an michala mani, irsinsiana nei seng hrangin an phûta.

¹⁷Sahrâng irhming mani, a'rhming nambar mani, indangna nei loihai ka chu, tûte'n ite irchôkin an zuar thei lina hrangin.

¹⁸Ama hin vârna a nang. Inhriat theina neiin chu sahrâng nambar kha sût ri se, mihriam nambar a ni sikin. A nambar chu irzaruk sômruk kiruk a ni.

Thuphuang 14

Belrate le a mihai

¹Khan ki hong ena, Belrate kha Zion Tânga, mi 144,000 (Nuaikhat sîngminli sîngminli) an michala ar hming le a Pa irhming irziakhai leh ngîrin ki hmua.

²Irvâna irthokin hnukirhai, tuitâk irhai le a sâna khonri inring angin kin hriat; Serânda âthaiin an Serânda an i-ât irhai angin kin hriat.

³Rengtoihmun le thilhring minlihai le upahai makunga khan mi nuaikhat sîngminli le sîngminli kha an ngîra, hla thar, anni vai irchu thei kha, an saka. Rammuala mi murdi laia kha mihai vai kha inhlan an ni.



⁴Kha mihai kha nupang leh porincheloi, a'rthiangliai an ni. Belrate fena tina an zui ngai. Pathian le Belrate kuang inhlan masa tak ni hranga rammuala mi murdihai laia irthoka irtan an ni.

⁵Milak hril viat ngai mahai; sêlnaboi an ni.

Vântîrtôn inthumhai

⁶Khan, irnênga mi murdi zât tina mihai, chi tina mihai, chong tina mihai le nam tina mihai kuang tânginsam hrang Thurchi Sa nei vântîrtôn dang irvânlaizôla vuang ki hmua.

⁷Ama khan hnukirhai inring takin, “Mihriamhai roirêl zoro a hong tung tâk sikin Pathian chu chi unglân, chôindôm roi! Irvân, irnêng tuikhanglian le tuihnâr hai siamtu kha chubai mûk roi!” a tia.

⁸Vântîrtôn inhnina khan vântîrtôn inkhatna kha a hong zuia, “Babulon kho roiinpui, a hurna uain hrât nam tin in-intir ngainu kha an rîl ta! an rîl ta!” a tia.

⁹Khan, vântîrtôn inthumna khan vântîrtôn inkhatna le inhnina a hong zuia, hnukirhai inring takin, “Tukhom sahrâng le a'rlim chubai mûk le a michala mani, an kuta mani a'rsinsiana chuang murdi chu;

¹⁰kha mi tak khan Pathian ningmurna uain, a ningmurna khilâta a isung insip kha in a ti. Vântîrtôn irthianghai leh Belrate makunga mei le kâta dengitheiin om a ti.

¹¹Kha mihai dengitheina meikhu kha Kumtuangin khu mai a ta, sahrâng le a'rlim chubai mûkhai le ar hming indangna neihai ta hrangin chu, a sîn a zânin zôkna om pe no ni,” a tia.

¹²Hi hin Pathian mihai, a thupêk zôma Jisua ta hranga iamomhai chu tuangdiarna an inei a ni.

¹³Khanchu, irvâna irthokin hnukirhaiin, “Hi hi irziak roh: Atûna irthokin Rengpaa thihai chu an vân a sa,” a iti kin hriat. Irtha khan, “A ni tak tak! An sinsôlna irthokin irngam ta an ti; an sinthôna ra khan a zui sikin,” tiin a sâma.



Irnêng bu ât zoro

¹⁴Khan, ki hong ena, sôm chek hlang ki hmua. Kha sôm chung a khan mihriam ang taka om hi, rângachak rênglukhum khuma, kôite ngaihtak chôiin a toia.

¹⁵Khan, vântîrtôn dang Pathian biak ina irthokin a hong suaka, sôm chung a toitu kuanga khan hnukirhai inring takin, “Ni kôite kha hmangin lân, bu kha ât roh; a ât zoro tâk kêng; irnêng buhai kha an hmin tâk sikin!” a tia.

¹⁶Khanchu, sôm chung a toitu khan a kôite kha irnênga a vaia, irnêng buhai kha ât a ni ta.

¹⁷Khan, vântîrtôn dang irvâna Pathian biak in ata a hong suak nôka, ama khom khan kôite ngaihtak a chôï sa.

¹⁸Vântîrtôn dang, mei chung a ircham neitu, maichâma irthokin a hong suaka. Kôite ngaihtak chôïtu kuang khan hnukirhai inring takin, “Ni kôite kha hmangin lân, irnênga grep ra khu zu ât roh, an hmin tâk sikin!” a tia.

¹⁹Khang khan, vântîrtôn khan a kôite kha irnênga a vaia, irnênga grep ra kha a âta, Pathian ningmurna grep sômna khurpuia khan a thun tâka.

²⁰Khanchu, khopui pên tianga grep sômna khura grep kha a sôma, kha khur ata kha thisen a hong suaka, kilometer irzathum seiin a luang suaka, metar inhni vêl an thûka.

Thuphuang 15

Vântîrtônhai leh hremna hnungkhônhai

¹Khanchu, irvâna thilirkhêl dang roiinpui tak le irkhêltak ki hmua. Vântîrtôn sariin hripui sari an chôïa, kha kha dengintheina hnungkhôn takhai an ni; kha tena khan Pathian ningmurna a hek tâk sikin.

²Khan, hlîmen mei leh irpol tuikhanglian nia irhoi taka inlang ki hmua. Sahrâng le a’rlim le a’rhming nambar inhnêtu hai kha ki hmu sa. Pathian perkhuang chôiin, hlîmen tuikhanglian muanga khan an ngîra.



³Pathian suak Mosia hla le Belrate hla an saka, “Rengpa Pathian Itinrêngthohei, Ni sinthohai chu a roiinpuiin ar khêl tak tak! Nangma chu nam tinhai laia Inlaltak, Ni lampuihai chu a felin a dik tak tak!

⁴Rengpa, tu mo nang chi loia, a chôindôm loi hrang? Nangma vai ni'rthianga, Ni sintho felhai kha mi tinin an hmu tâk sikin. Nam tinrêngin chubai nang hong mûk an ti,” tiin.

⁵Kha zoiin chu ki hong ena, irvâna tempil irhong, a sûnga Pathian omna Biakbuk kha ki hong hmua.

⁶Khanchu, kha tempil ata irthokin hremna sari chôî vântîrtôn sarikai kha tempil ata an zuang chuma; puan irnêm chek, vâ irtêk tak silin, rângachak hruin an rôp an khita.

⁷Kumtuanga hring mai Pathian ningmurnaa sip rângachak berbu sari kha thilhring minlihai laia inkhat khan vântîrtôn sarikai kha a pêka.

⁸Tempil kha Pathian roiinpuina le sinthotheina khu khan a sip zita, vântîrtôn sarikai ichôî hremna sari kha a hek mâka chu tûte tempila khan lût thei mahai.

Thuphuang 16

Pathian ningmurna berbuhai

¹Tempil ata zuang suak irhai inringtak khan vântîrtôn sarikai kuang, “Fe unglân Pathian ningmurna berbu sarikai kha irnênga bunpai roi!” a iti kin hriata.

²Vântîrtôn masa taktu kha a fea, a berbu kha irnênga a bunpaia; khanchu, sahrâng le a'rsinsiananeihai le a'rlim chubai mûktuhai chung a khan pân hri saloi natak a suak tâka.

³Vântîrtôn inhnina khan a berbu kha tuikhangliana a bunpaia; khanchu thisen, mithi thisen angin a om zita, tuia thilhring murdi an thi zit ta.

⁴Vântîrtôn inthumna khan a berbu kha tuidunghai le tuihnârhaia a bunpaia; thisen an chang zit tâk.



⁵Vântîrtôn tuia irchamneitu khan, “Om mai le a om tâka, Nang mi Irthiang, roi ni rêl indik!

⁶Mi irthianghai le deipuhai thisen insuatuhai kha thisen ni in intir lik tâk hi; an dongtum an ihmu kêng,” a iti kin hriat.

⁷Maichâm ata kha, “A ni, Rengpa, Pathian itinrêngthothei, ni roirêlna kha a dikin a fel a ni,” irhai kin hriat sa.

⁸Vântîrtôn minlina khan a berbu kha misaa a bunpaia; misa lum khan mihriamhai em inlông hrangin phal a ni.

⁹Mihriamhai kha misa lum taka em inlôngin an om tâka, kha dengitheina chung a irchamneitu Pathian irhming kha khomâk an sâma, an sual ata irletin ama inpâk ual mahai.

¹⁰Vântîrtôn ringana khan a berbu kha sahrâng rêngtoihmuna a bunpaia. A ram kha inthimin a bôm zit tâka, mihriamhai kha an natir hrai sikin an milei an sêa;

¹¹an na sik le an pân sika khan irvân Pathian khomâk an sâma, an sintho saloihai ata kha irlet ual mahai.

¹²Vântîrtôn kirukna khan a berbu kha Eufrates tuipuia khan a bunpaia, a tui kha a kang chat tâka; nisua tiang ata rêng zuang hranghai ta hrangin lam a irhong tâk a ni.

¹³Khan, Dragon bâi ata, sahrâng bâi ata, deipu dol bâi ata hong suak irtha porinche inthum, uichok anga om ki hmu sa.

¹⁴Kha kha ramilhli irtha an ni, sinirkhêl khom an tho ngai. Pathian Itinrêngthothei nikho roiinpui irdoinaa hruai irchunghôm hrangin irtha inthumhai kha rammual pumpuia rênghai murdi kuang an fea.

¹⁵“Irngai u ta! Inru angin ki izuang kêng! Irsiama irvô zoi diama omhai chu an vâna sa, silkai boiin a mualinphoi no hrang sikin.

¹⁶Khanchu, irthahai khan rênghai kha hmun inkhata, Hebrai chonga Armagedon an itia khan an koibûmhai tâka.



¹⁷Vântîrtôn sarina khan chu a berbu kha boiruaka a bunpaia, tempila rêngtoihmun ata irhai inring tak a zuang suaka, “ar zoi tâk!” tiin.

¹⁸Khan, kôl a’rtêka, irhai a zuang suaka, khonri, hnîngnu a hong inhînga. Mihriam siam phut ata khaang dôra hnîngnu tho kha la om ngai mah. Khaanga hnîngnupui kha a natak a ni.

¹⁹Kho roiinpui kha hmun thumin a hong koia, ram tina khopuihai a chim tâka. Babulon kho roiinpui kha Pathianin an hriat chiana, a ningmurna khilât kha an intir tâka.

²⁰Chômbung murdi a boia, tânghai khom ar hmang zit ta.

²¹Irvân ata irial lian tak tak, her sômringa ang dôra rik, mihriam chung a tâka. Irial hremna sika khan Pathian kha an hrilsiata, kha hremna kha a na ta hrai sikin.

Thuphuang 17

Notizuar chung a roirêlna

¹Berbu sari chôl vântîrtôn sarikai laia inkhat kha a hong a, ni hong chongpuia. “Hong ta, tui tamtak chung a toi, notizuar irhming inthang tak chung a hremna om hrang kha nang irhmutir ki ti.

²Irnênga rênghaiin an indit ngaia, irnênga omhai khom a hurna zu khan a vâi inruitir ngai,” a tia.

³Vântîrtôn khan Irtha ramchâra a ni fepuia, Pathian hrilsiatnaa sip, lu sari nei le irki sômchat nei, sahrâng seninlâr chung a chuang nupangnu ki hmua.

⁴Nupangnu kha puan senduk le seninlârin a’rvoa, rângachak irthei hai, lung mantam hai, sailungvârhaiin a’rvoa. A kutin intirom le a hurna porinchena sip rângachak khilât a chôia.

⁵A michala khan irhming, a omzia irthup, “Babulon kho roiinpui, irnênga notizuarhai le thil intiromhai nu,” iti irziak a oma.

⁶Khan, kha nupang kha Pathian mihai thisen le Jisua mârtârhai thisen inruiin ki hmu. Ki hmu le chu a sân ki’rngai a’rkhêl tak taka



⁷Vântîrtôn khan, “Ithoa mo ar khêl ni iti?” a tia. “Nupangnu le a chuangna sahrâng lu sari le irki sôm nei omzia irthup kha nang hril ki ti.

⁸Sahrâng kha voikhat a lei om tâka, om nôk ta mah. Khannisianlân, khurmongboia irthokin hong suak a ta, irhmangnaa fe a ti. Irnênga mihriam omhai, irnêng le irvân siam mâna hringna lekhabua an irhming irziak loihai khan, sahrâng kha an hmu tena chu, a om tâk, om nôk ta loi, khannisianlân, a hong om nôk hrang tâk sikin, an irngai la’rkhêl tak tak a ti.

⁹Hi hin vârna le inhriat theina a nang. Lu sarikai kha nupangnu toina tâng sarikai kha an ni. Reng sari khom an ni sa:

¹⁰ringa chu an inrîl tâka, inkhat chu a lan lala, inkhat chu la hong inlal mah, hong inlal khomsian sôtnote kêng a inlal hrang.

¹¹Sahrâng lei om tâk kha, om nôk ta no khom kha rêng sarikai pâla kariatna a nia, irhmangnaa fe thiai tâk a ni.

¹²“Irki sôm ni ihmuhai kha rêng sôm a lan lal loihai an ni. Khannisianlân, sahrâng le rênggai angin dêrkâr khat chu irchamneina ipêk la ni an ti.

¹³Khante an thiltum inkhat a ni sikin an sinthotheina le an irchamneina sahrâng kuang pe an ti.

¹⁴Khanchu, Belrate kha doi an ta, khannisianlân, Belrate kha rênggai Reng, inlalahai Inlaltak a ni sikin anni kha inhnê a ta, a inhnêna kha a ikoihai, a inthanghai le iamoma ama zuituhai khomin dong sa an ti,” a tia.

¹⁵Kha vântîrtôn ngîr khan ki kuang, Notizuarnu toina tui tamtak ni ihmu kha mihai, mipuihai, Jentail hai, le chong dang dang hai an ni.

¹⁶Irki sôm le sahrâng ni ihmu khan notizuarnu kha hnôl an ti. Thil ainei murdi lapai pe zit an ta, bomboiin marak an ti. A hme khom fa an ta, meiin hâlirvôm an ti.

¹⁷Pathian thu le a thil tumhai a hong tung indik theina hrangin, rêng sômkhathai khan an irchamneina sahrâng kuang pe hrangin Pathianin lung irrualna an neia.



¹⁸Khan, “Nupangnu ni ihmu kha kho roiinpui, irnênga rêng hai chung a roirêltu kha a ni,” a tia.

Thuphuang 18

Babulon inrîlna

¹Kha zoiin chu vântîrtôn dang irvân ata zuang chum ki hmua. Ama khan irchamneina lian tak a neia, a roiinpuina'n irnêng pumpui a êl invâra.

²Ama khan hnukirhai inring takin, “Babulon kho roiinpui an rîl ta! an rîl ta! Ramilhlihai omna le irtha porinche hai, va porinche tinrêng chêng inbualna a hong ni ta.

³A hurna uain hrât kha nam murdi'n irnênga rêng haiin ama kha an uirepui ngaia, a hoihokna thil irchok hraina sikin rammuala bepârhaiin an irchong sa ngai,” tiin a khêka.

⁴Khanchu, irvâna irthokin hnukirhai dangin, “Hong suak roi, ki mihai! Kha nu kuang ata kha hong suak roi! A sualnahaia nin ikop viat hrang ni mah! A hremnahai hi nin tuang sa loina hrangin.

⁵A sualna khan irvân a phâka, Pathianin a thilsual tho kha a inhriat chian a ni.

⁶Nin chung a itho angin a chung a tho unglân, A sinthohai murdi a bâk inhniin thuan unglân, Zu nangni a irfûk pe hranga bâk hnia hrâtin a khilât insip pe roi.

⁷Roiinpui a irti le a hoihokhai ang takin hremna le beidongna'n thuan roi. A lungrîlin, ‘Rengnu'n ki toia! Meithai ni ma ung. Beidongna tong viat no ning!’ a iti kêng.

⁸Khasika khan, sîn khat sîngin hremnahai, natnathai, beidongna hai, le châm hai hong tung zit a ti. Meiin hâlih mang ni a ti, a roirêltu Rengpa Pathian kha a hrât sikin,” a tia.

⁹Irnênga rêng hai a uirepui ngaihai le a nuamninga a iompui ngaihai khan, a kângna khu kha an hmu tikin chu beidongna'n la chap an ti.



10A hremna kha tuang sa an chi sikin hla tak ata thîr an ta, “Babulon kho roiinpui le kho det, ni chung a rik! Ni chung a rik! Dâr-kâr khat sîngin te ni chung a roirêlna a itung tâk hi,” an tia.

11Rammuala bepâr thohai khom khan beidongin an châa, tûte’n an neinun an irchôk ta no sikin.

12A nei sunhai chu rângachak hai, sum hai, lunghlu mantam hai, sailungvâr hai, puan irnêm hai, puan senlâr le senduk hai, sotor hai, puan seninlâr hai, thing mirimhoi zât tinrêng hai, sâihaa siam thil tinrêng hai thing hlutak le dâr, thîr, sailungvâra siam thil tinrêng hai;

13thingzungthum hai, mosola hai, bero hai, mura hai, mirimhoi hâl zât hai, uain le oliv hriak hai, baidi le bu hai, sehrât le belra, sakor le tâli, suak hai le mihriam hringna hai an ni.

14Bepâr thohai khan a kuang, “Thil sa a nei ni irzukhai murdi kha an irhmang zit tâka, nir chongna le ni roiinpuina murdi khom an boi zoi tâk, hmu nôk ta no chi ni,” an tia.

15Bepâr thohai, ama sika hong irchonghai khan a hremna kha an tuang sain teh ti chi sikin hlataka ngîr an ti, beidongin châ an ti,

16“Kho roiinpui, puan irnêm le a senduk le a seninlâr sila, rângachak le lunghlu mantam le sailungvâra irvô ngai a chung a rik! A chung a rik e!

17Dâr-kâr khat sîngin te kha a irchongna murdi kha a irhmang zit tâk hi,” ti an ti. Irkuang hruaituhai le a chuanghai le a chalaithuai le tuia irhlo ngai murdihai khom khan hlataka ngîrin,

18a ikângna meikhu kha an hmu’n chu, “Hi kho roiinpui anga hi chu la om viat ngai mah!” tiin an khêka.

19An lua bâli an phula, beidongin an châa, “Kho roiinpui ar chongna sika tuikhanglian irkuang neihai khom lei irchong sa thei! A chung a rik! A chung a rik! Dâr-kâr khat sîngin te ar hmang zit lam tâk hi,” tiin an khêka.



²⁰O irvân le Pathian mihai, tirtônhai le deipuhai, a ramna sika hin lôm ta roi! Nin chung a tho lam angin Pathianin a irêl tâk a ni hi!

²¹Khanchu, vântîrtôn hrât tak hin bu nôina lung lianpa ang dôr lung a lâka, tuikhangliana an zuana, “Babulon kho roiinpui chu kha dôra na khan inzuan ni a ta, tûte’n hmu nôk ta no nihai.

²²Serânda irhai, mihriam hla sak irhai, theihle irhai le bekul irhai, ni sûnga inhre nôk ni viat ta no ni! Sin zongna lam rêng rênga sin thiam mi ni sûnga om nôk viat ta no nia, bunôina irhai khom ni sûnga inhre nôk ni ta no ni!

²³Meiser vâk khom ni sûnga hmu nôk ni ta no ni, pasal le moi irhai ni sûnga inhre nôk ni viat ta no ni. Ni bepârhai kha rammual pumpuia mi lianhai an nia, ni dôl milakin rammual pumpuia mihai huangin an iom a ni ta!” a tia.

²⁴A sûnga deipuhai le Pathian mihai le irnênga ithat murdihai thisen suakna a ni sikin Babulon kha ihrem a ni.

Thuphuang 19

¹Kha zoiin chu irvâna mipui tamtakhai khêk irhai inring tak angin, “Haleluia! Saninhringna, roiinpuina, sinthotheina hai ei Pathian ta a ni!

²A roirêlnahai khom a dikin a ifel a ni! Ama khan notizuar inthang, a uirena sika irnêng insiat ngainu le a suakhai thisen insua ngai kha thiamno inchangin Pathianin deng an theitir tâk sikin,” an iti kin hriat.

³Khan, an khêk nôka, “Haleluia! Kho kângna meikhu kha kumtuangin chung tiang intor mai a ti,” an tia.

⁴Khanchu, upa sômhni minlihai le thilhring minlihai khan inbokin, “Amen! Haleluia,” tiin Pathian, rêngtoihmuna toitu kha chubai an mûka.

Belrate irneina hruaithe

⁵Khan, rêngtoihmuna irthokin hnukirhai a hong suaka, “Nangni suakhai murdi le ama mahrip thohai ngai, mi lian le mi chînhai, ei Pathian inpâk roi!” a tia.



⁶Khanchu, mipui tamtak hnukirhai angin le tuitâk irhai angin le khonripui irhai angin, “Haleluia, Rengpa ei Pathian Itinrêngthothei khan roi a rêl ta!

⁷Râifân le lôm takin a roiinpuina chôindôm ei ti! Belrate dôngma nei zoro a ni ta, a moi khom ar siam zoi ta.

⁸Puan irnêm, fâitak le irtêk tak a sil hrangin pêk a ni,” a iti kin hriat. (Puan irnêm kha Pathian mihai sintho sa a ni.)

⁹Vântîrtôn khan ki kuang, “Belrate irneina hruaithea fialhai chu an vân a sa,” ti irziak roh, a tia. Ama dênin ki kuang, “Hihai hi Pathian thu dikhai a ni,” a ti saa.

¹⁰Khanchu, chubai mûk hrangin a ke bula kin boka, khannisianlân, ama khan ki kuang, “Hiang hin chu tho no roh, kei khom nangma le ni urênghai le Jisua thutak inpuang pomhai suak chanpui kêng ki ni. Pathian chubai mûk roh!” a tia. Thutak Jisua inpuang kha thu’nsîr theina irtha a ni.

Sakor ngoi chungu chuangu

¹¹Khan, irvân irhong ki hmua, sakor ngoi le a chungu chuangu iamom le dik taka an iti ki hmu sa. Ama khan fel takin roi a rêla, a râl a doi ngai.

¹²A mithai kha meichok angin a oma, rênglukhum tamtak a khuma. A chungu irziak irhming ama bana chu tûte’n a omzia an inhriat loi, a nei sa.

¹³Songkol irfual, thisen kop chit an nghâka, a’rhming chu “Pathian Thu,” a ni.

¹⁴Irvâna sipaihai khan puan irnêm chekhlung le fâi tak sila, sakor ngoihai chungu chuangu an zuia.

¹⁵A bâia irthokin khandai ngaihtak a hong suaka, ama khan nam tin inhnê a ti. Thîr khianghrolin an chungu roirêl a ta, Pathian Itinrêngthothei ningmur inrikna grep sômna khura khan sirpha a ti.

¹⁶A puan le a malpuia khan, “Renghai Reng le Hruaituhai Hruaitu,” tia irhming irziak a om.



¹⁷Khan, misaa khin vântîrtôn ngîr ki hmua, vântîrtôn khan irvânlaizôla va vuang murdihai kuang hnukirhai inring takin a khêka, “Pathian hruaithe roiinpuitak irhîl hrangin hong irbûm roi!

¹⁸Hong unglân, rêng hai, sipai ulianhai, sipaihai, sakor le a chung a chuanghai hme, mi murdi suak le suak ni loi, a lian le a chîn hai hme nin fâk theina hrangin!” a tia.

¹⁹Khanchu, sahrâng le irnênga rêng hai le an sipaihai kha sakor chung a chuang le a sipaihai doi hrangin an irbûm ki hmua.

²⁰Sahrâng kha an chela, deipu dol, a mit hmua sinirkhêlhai sin ngaipu kha an chel saa. (Kha sinirkhêlhai sika khan sahrâng irsinsiana neihai le a’rlim chubai mûkhai kha a ihuang ngai a ni). Sahrâng le deipu dol kha an ruaiin an hring pumin kâta kâng mei laia khan an paithâk tâka.

²¹An sipaihai kha chu sakor chung a chuangu bâia khandai suaka khan an sâta, va murdi’n an hmehai kha an fâka, an khop tâka.

Thuphuang 20

Kum sâng roirêlna

¹Khan, vântîrtôn irvân ata zuang chuma khurmongboia châbi le thîrhruil lianpa a ichôi ki hmua.

²Dragon, rûlpui tar Diabola le Setana kha a chela, kum sângkhat hrangin a khit ta.

³Khurmongboia khan a pai thâka, a khura kum sângkhat a hek mâka chu nam tin a huang lina hrangin a kal khak tâka. Kha hnung chu zoro sôtnote hrangin insua nôk ni a ti.

⁴Khan, rêngtoihmunhai ki hmua, a chung a mi an toia, kha a toihai kuang khan roirêl thei hrangin irchamneina pêkin an om. Khabana, Jisua inhriatpuitu an nina sik le Pathian thu an inpuangna sika an lu an itan pehai irtha kha ki hmu sa. Anni khan sahrâng le a’rlim chubai mûk mahai, sahrâng irsinsiana kha an michala mo an kuta mo se mahai. Khahai kha an hong hringa, kum sângkhat sînga hrangin Krista leh roirêlin an om ta.



⁵(Mithi danghai kha chu kum sângkhat a hek mâka chu la hring mahaia.)
Ama kha thoinôkna masa tak a ni.

⁶Kha thoinôkna masa taka changhai kha chu an vên a sa'n an irthiang a ni.
Khahai chungha khan chu thi hnina khan ircham rêng nei ta mah; Pathian le
Krista Ochaihai ni an ta, ama leh kum sângkhat roirêl an ti.

Setana inhnêa a omna

⁷Kum sângkhat a hek tikin chu, Setana kha an tângna ata insua ni a ta,

⁸khanchu rammual pumpuia nam tin irthekindarhai, Gog le Magog huanga,
irdoinaa hong hruai bôm hrangin fe suak a ti. An tam lam chu tuikhangliana
chiaiphoi dôr an ni.

⁹Irnêng pumpuia an dâp zitin an hong kêia, mi irthianghai kul le an khopui
indet tak kha an irhuala, khannisian irvân ata mei a zuang chuma, anni kha a
kâng irhmanghai tâka.

¹⁰Khanchu, annihai huangtu Diabola kha, sahrâng le deipu dol omnaa, kêta
kâng meidîla khan an paihaia, kha khan a sùn a zânin hremna tuangin
kumkhua'n om ta an ti.

Roirêlna hnungkhôn tak

¹¹Khan, rêngtoihmun vâr lianpa le a chungha toitu kha ki hmua. A makung ata
irnêng le irvân an rota an irhmang pat ta.

¹²Khanchu, mithihai, a lian a chînin, rêngtoihmun makunga ngîr ki hmua.
Lekhabuhai an phara, lekhabu dang hringna lekhabu khom kha ar phar saa.
Khanchu, mithihai kha an sintho seng lekhabua chuang ang takin roirêl pêkin
an om ta.

¹³Khanchu, tuikhanglian khan a sênga mithi omhai kha an suaktira, thina le
mithi khua khan an sênga mithi omhai an insua saa, an rêngin an sintho ang
sengin roirêl pêkin an om tâka.

¹⁴Kha hnung chu thina le mithi khua kha meidîla an pai thâk ta. (Meidîl kha
thi inhnina a ni).



¹⁵Tukhom hringna lekhabua ar hming chuang loi ka chu meidîla khan an pai thâk sa ta.

Thuphuang 21

Irvân thar le Irvên thar

¹Khan, irvân thar le irvên thar ki hmua; irvân masa le irvên masa kha a boi tâka, tuikhanglian khom om ta mah.

²Khabana, Khopui Irthiang, Jerusalem thar kha, moiin a pasal don hranga a irvô ngai ang khan irzoi diamin Pathian kuang irvân ata zuang chumin ki hmua.

³Rengtoihmuna irthokin hnukirhai inringtakin, “Atûn chu Pathian in kha mihriamhai laia a zuang om ta! Ama chu an kuang om a ta, anni chu a mihai ni an ti. Pathian ngei kha an kuang om a ta, an Pathian ni a ti.

⁴“An mit ata mitrithi murdi huipai pehai a ti. Thina om ta no nia, beidongna hai, chapna hai le natna hai khom om ta no ni; thil miluihai kha a boi zoi ta,” a iti kin hriat.

⁵Khanchu, rêngtoihmuna toitu khan, “Atûn chu thil tinrêng ki siam inthar ta!” a tia. Khabana, “Irziak roh, hi thuhai hi iam a omin an idik kêng,” a ti saa.

⁶Khan, ki kuang, “A’rzoî tâk! keima a maton tak le a hnungkhôn tak, a bul le a mong ki ni. Tuiinhrâlhain chu hringna tuikuang ata manboiin pe ki ti.

⁷An hnêtu haiin chu hihai hi ki kuang ata dong an ti: Keima an Pathian ni ki ta, annihai kha ki nâihai ni an ti.

⁸Khannisianlân, mi thâidôphai, iamloihai, irdit saloi thohai, mi thathai, felloihai, dôi hmanghai, millim biakhai, milakhai murdi omna hrang hmun chu mei le kâta kâng dîl kha a ni; kha kha thi inhnina chu a ni,” a tia.

Jerusalem thar

⁹Khan, berbu sari hremna hnungkhôn tak sari chôitu, vântîrtôn sarikai laia inkhat kha ki kuang a hongga, “Hongin lân, Moi, Belrate dôngma hrang nang irhmutir ki ti,” a ni tia.



- 10**Khanchu, ama khan Irtha'n tâng irsâng lianpa sîpa a ni fepuia, Jerusalem, Khopui Irthiang, Pathian kuang irvân ata zuang chum kha a nin entira.
- 11**Khopui khan Pathian roiinpuina a neia, lungmantam, Jasper lung angin, Krustal lung angin a vâra.
- 12**Kulpui irsângtak a neia, kha kulpui khan mikot sômhleihni a neia, mikothai nghâkin vântîrtôn sômhleihni an oma. Mikothaia khan Israel nam sômhleihnihai irhming a chuanga.
- 13**Kha mikothai kha nisua tiang inthum a oma, hmâr tiang inthum a oma, sim tiang inthum a oma, nitâk tiang inthum an iom a ni.
- 14**Kulpui khan lungphûm sômhleihni a neia, kha lungphûmhaia khan Belrate tirtôn sômhleihnihai irhming a chuanga.
- 15**Khan, vântîrtôn ni chongpuitu khan khopui le a mikothai le kulpui irkhîna hrangin rângachak irkhîna khianghrol a chôia.
- 16**Khopui kha a dung le a khang ar ang chaka. Vântîrtônin a irkhîna khianghrol khan a'rkhia: a dung kilometar sângni irza minli a ni, a khang le a'rsânglam khom a dung dôr a ni.
- 17**Vântîrtôn khan irkhîna khianghrol a ichôi dên leh khan kulpui kha a'rkhi nôka, a'rsânglam kha mûk irzakhat sômminli minli a ni.
- 18**A kulpui kha Jasper lunga siam a nia, a khopui kha rângachak irthiang, hlîmen ang dôra irthianga siam a ni.
- 19**Kulpui lungphûmhai kha lungflu mantam chi tinrênga irvô a ni. Lungphûm masatak chu Jasper a nia, inhnina chu safir a nia, inthumna chu agate lung a nia, a minlina chu emerald lung a nia,
- 20**a ringana chu sardonuk lung a nia, a kirukna chu karnelian lung a nia, a sarina chu kruso lung a nia, kariatna chu berul lung a nia, kuakna chu topaz lung a nia, sômna chu krusopras lung a nia, sômhleikhatna chu tarkois lung a nia, sômhleihnina chu amethus lung a ni.



²¹Mikot sômhleihnihai kha sailungvâr sômhleihni an nia, mikot tin kha sailungvâr inkhat senga siam a ni. Kha khopui tual kha chu rângachak irthiang hlîmen eninhlenthalthei anga hi a ni.

²²Khopui sûnga khan tempil hmu ma ung, Rengpa Pathian Itinrêngthothei le Belrate chu a tempil a ni sikin.

²³Khopui êl hrangin misa le tha nang ta mah, Rengpa roiinpuina khan a êla, Belrate kha a meiser a ni.

²⁴Khan a vâra khan nam tin om an ta; irnênga rênghaiin an roiinpuina chôiin lût an ti.

²⁵Khopuia mikothai kha sôn sôtin irhongin om mai a ta, itiklai khom khâr ni no ni, zân reng om ual ta no ni.

²⁶Khopui sûnga khan nam tin roiinpuina le chôiorsângna chôiin lût ni a ti.

²⁷Khannisianlân, thil porinche ite hong lût thei no nia, thil intirom thohai le milak insâr uarhai lût thei no nihai; Belrate hringna bua irhming chuanghai vai kha Khopuia khan lût thei an ti.

Thuphuang 22

Hringna vadung

¹Khan, vântîrtôn khan hringna tui vadung krustal lung anga irtêk, Pathian le Belrate rêngtoihmun ata zuang luang kha a nin entira,

²Khopui kholai inlaina taka a luanga. Khan, muang kiang tiang, kiang tianga hringna thing, thatin voikhat, a kuma voi sômhleihni ra a oma; kha thing hnahai kha nam tin damna a ni.

³Khopuia khan Pathian khomâksâm rêng rêng om ta no ni. Pathian le Belrate rêngtoihmun kha om ta a ta, a suakhai khan chubai mûk an ti.

⁴A hmêl hmu an ta, ar hming an michala chuang sa a ti.

⁵Zân om ta no nia, meiser le misa khom nang ta no ni; Rengpa Pathian khan êl invâr ta a ta, kumtuang kumtuangin rênghai angin roirêl ta an ti.

Jisua zuang nôkna thu



⁶Khan, vântîrtôn khan ki kuang, “Hi thuhai hi iam a omin a idik a ni. Deipuhai kuang ama Irtha pêktu Rengpa Pathian khan thil hong tung zôi hranghai kha a suakhai kuang en hrangin vântîrtôn a itîr a ni,” a tia.

⁷Jisua’n, “Irngai roh! Ki izuang zôi zel hrang tâk kêng! Hi lekhabu lei hrilna pomhai ka chu an vân a sa,” a tia.

⁸Kei Johana hi, hi thil murdihai hmupu le inhrepu ki ni. Kin hriata ki hmu zoi le chu kha thilhai nin entirtu vântîrtôn ke bula chubai mûk hrangin kin boka.

⁹Khannisianlân, ama khan ki kuang, “Khaang khan chu tho no roh. Kei khom nangma le ni urêng deipuhai le hi lekhabu thu pom murdihai suak chanpui kêng ki ini, Pathian chubai mûk roh!” a tia.

¹⁰Khanchu, ama khan ki kuang, “Hi lekhabu lei hrilna thuhai hi ip no roh, hihai murdi hong tungna hrang hi anai tâk sikin.

¹¹Tukhom mi felloi chu thil felloi sin mai a ta, tukhom mi porinche chu porinche om mai a ti; tukhom mi sa chu thil sa tho mai a ta, tukhom mi irthiang chu irthiangin om mai a ti,” a tia.

¹²Jisua’n, “Irngai roh! Ki izuang zôi zel hrang tâk kêng! mi tin an sintho ang senga pêk hrangin ki lômman ki kuang a om.

¹³Kei Alfa le Omega, a maton tak le a hnungkhôn tak, a Bul le a Mong ki ni,” a tia.

¹⁴Hringna tuikuanga thei ra kha an fâk theina hrang le khopui kha an lût theina hranga an puan irsûk infâihai chu an vân a sa.

¹⁵Khopui pên tiang chu uihai, dôi theihai, irdit saloihai, mi thathai, millim biakhai, chong le sinthoa milakhai kha om an ti.

¹⁶“Kei, Jisua’n, hi thuhai hi Koiindanghai nin kuanga inpuang hrangin ki vântîrtôn ki zuang tîr a ni. Davida bulpui le a chi, sikhovâr vârtak ki ni,” a tia.



¹⁷Khan, Irtha le moi khan, “Hong roh!” an tia. An hriat murdi’n, “Hong roh!” ti sa ngêt ri se. Tukhom a tuiinhrâl murdi chu hong roi; a nuam murdi’n hringna tui hi manboiin in ri se.

Thukhârna

¹⁸Kei, Johana’n, tukhom hi lekhabu lei hrilna thu inhriat murdi’n chu ngar takin kin hriattir: Tukhomin hi thuhai hi a bôkin chu, hi lekhabua a ihril hremnahai hi a chungâ Pathianin bôk pe a ti.

¹⁹Khan, tukhomin hi hrilna lekhabua thu a paiin chu hi lekhabua a ihril a dongtum hringna thing kunga thei ra le Khopui Irthianghai kha Pathianin indoktir a ti.

²⁰Hi thu inhretuhai hin, “A ni tak tak! Ki izuang hrang tâk kêng!” a ti. Amen, zuang ta roh, Rengpa Jisua!

²¹Rengpa Jisua lungkhamna kha mi tin kuang om ri se, Amen.



Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2022, Vitória/ES - Brasil